

New Testament

Apinayé (Brasil) Language

Apinayé (Brasil) - Bible - New Testament

Matêwre	3	
Makre	164	
Rukre	256	
Juãw	426	
Atre	548	
Rõmãn	692	
Wam Korĩt	772	
Sikũn Korĩt	845	
Karatas	890	
Epes	917	
Piripos	943	
Korosẽ	959	
Wam Tesarõn	976	
Sikũn Tesarõn	990	
Wam Ximotre	998	
Sikũn Ximotre	1.018	
Xitre	1.032	
Piremõ	1.040	
Eprêw	1.043	
Xiakre	1.098	
Wam Pêtre	1.117	
Sikũn Pêtre	1.137	
Wam Juãw	1.148	
Sikũn Juãw	1.164	
Hapuhã Juãw	1.166	
Jutre	1.169	
Apokarip	1.176	

Apinayé (Brasil) - Bible - New Testament

Matêwre

Matêwre 1

Apraãw kanrêhã hkra nê htàmnhwýjê nhĩxi

Rukre 3.23-38

¹Amnepễm Jejus Kris kormã pika hwýr wrýk kêt ri hkukamã higễtjê nhĩxi na jajaja. Wýj ri higễtjê hõ nhĩxi na pre kêp Tawi. Nê Tawi xwýj ri higễt nhĩxi pê na pre Apraãw.

²Nê Apraãw kra na pre kêp Ijak. Nê Ijak kra na pre kêp Jako. Nê Jako hkra na pre kêp Juta mē htõjaja.

³Nê Juta hkra na pre wa kêp Pere nê Jera. Nê Pere mē Jera wa katorxà na pre kêp Tama. Nê Pere hkra na pre kêp Erõ. Nê Erõ hkra na pre kêp Ari.

⁴Nê Ari hkra na pre kêp Amĩnatap. Nê Amĩnatap kra na pre kêp Nasõ. Nê Nasõ hkra na pre kêp Samõ.

⁵Nê Samõ hkra na pre kêp Poas. Nê Poas katorxà na pre kêp Raap. Nê Poas kra na pre kêp Opex. Nê Opex katorxà na pre kêp Rutre. Nê Opex kra na pre kêp Jese.

⁶Nê Jese hkra na pre kêp Pahihti Tawija. Nê Tawi hkra na pre kêp Sarumãw. Sarumãw katorxàja Uristi hprõ na pre. Tã nhũm pre Uristi ty nhũm Tawija hãmri mýrpê Uristi hprõ ho hprõ nê kamã hkra. Nhũm wa hkraja kêp Sarumãw.

⁷Nê Sarumãw kra na pre kêp Ropã. Nê Ropã hkra na pre kêp Apiasti. Nê Apiasti kra na pre kêp Asti.

⁸Nê Asti hkra na pre kêp Josapa. Nê Josapa hkra na pre kêp Jorã. Nê Jorã hkra na pre kêp Ojis.

⁹Nê Ojis kra na pre kêp Jotã. Nê Jotã hkra na pre kêp Akaj. Nê Akaj kra na pre kêp Ejekis.

¹⁰Ně Ejekis kra na pre kêp Manase. Ně Manase hkra na pre kêp Amõ. Ně Amõ hkra na pre kêp Josis.

¹¹⁻¹²Ně Josis kra na pre kêp Jekonīs mẽ htõjaja. Kormã mẽ htĩr ri na pre Papirõn nhõ xwỳnhjaja kot mẽ hkurê kaxàr kaxyw mẽ hwỳr hprõt nẽ mẽ unê. Ijaew piitã unênh pa nẽ ma akupỹm mẽ õ pyka hwỳr mẽ ho hapêx nhũm mẽ hpãnhã Papirõn kamã pa ho pa. Jakamã nhũm Josis mẽ hkra Jekonīs mẽ htõjaja mẽ hipêêxà pyrà nẽ Papirõn kamã pa ho pa. Ně Jekonīs kra na pre kêp Saraxi. Ně Saraxi hkra na pre kêp Joropape.

¹³Ně Joropape hkra na pre kêp Apiux. Ně Apiux kra na pre kêp Eriakĩ. Ně Eriakĩ hkra na pre kêp Ajo.

¹⁴Ně Ajo hkra na pre kêp Satok. Ně Satok kra na pre kêp Akĩ. Ně Akĩ hkra na pre kêp Eriux.

¹⁵Ně Eriux kra na pre kêp Eresa. Ně Eresa hkra na pre kêp Matã. Ně Matã hkra na pre kêp Jako.

¹⁶Ně Jako hkra na pre kêp Juje. Ně Juje hprõ na pre kêp Marir. Ně Marir Kra na pre kêp Jejus. Mẽ kot kãm: “Tĩrtũm kot mẽ pakaxyw ãm xwỳnh” anhỹr xwỳnhhta na pre.

¹⁷Nhũm Apraãw kanrêhã axte axpẽn kanrêhã mẽ àptàr nywjaja Tawija wỳr kêp 14. Ně Tawi nhĩrõ pẽ Papirõn hwỳr mẽ hapêx kêt ri axpẽn kanrêhã mẽ àptàr nywjaja mããnẽn kêp 14. Ně ra Papirõn kamã mẽ pa nhĩrõ pẽ axpẽn kanrêhã Jejus pẽ Tĩrtũm kot mẽ pakaxyw ãm xwỳnhhta wỳr mããnẽn kêp 14. ã na pre Jejus Kris xwỳj ri higêtjê nhĩxi anẽ.

Jejus Kris kator

Rukre 1.26-38; 2.1-7

¹⁸Tã ã mẽ hixi jarênh kot anhỹr kanrêhã na pre ã Jejus Kris kator anẽ. Nhũm pre kormã Jujeja Marir o hprõ kaxyw. Nom kormã ho hprõ hkêt ri nhũm htujarõ. Kormã hkukrit tã nhũm Tĩrtũm Karõ tanhmã ho nhũm htujarõ.

¹⁹Hãmri nhũm Jujeja harênh ma nẽ tee ri hamaxpěr nẽ htỳx nhãm mẽhõ kot kêp htu hã hkamnhĩx. Juje kot tãm amnhĩ nhĩpêx nẽ tãm hamaxpěr jakamã tee ri kot ho hprõ hkukamã hamaxpěr. Ně hamaxpěr o: —Nà pa mãn ixte

hture hã. Nhãm mēhõ ra kot ã hipêx anhÿr kēnã. Nà kot paj ho ixprõ hkêt nē. Nom kot paj ixkwÿjê mã ã kot amnhĩ nhĩpêx anhÿr o amnhĩrĩt kêt nē. Kot paj anē nhũm mē kuma nē ho kapēr punuj nhũm amnhĩ kamã hpijaàm tÿx nē. Ja pymaj kot paj ixkatàt kôt hkaga kurê kumrēx. Nom ixkwÿjê hkàx ã hkaga. Anē.

²⁰Nē ã hamaxpēr anhÿrja o ra gõr nē nõ. Nhũm Tĩrtũm kapēr o mē wrÿk xwÿnhjê hõ hwÿr wrÿ nē hwÿr axàn kuri xa. Hãmri nē kãm: —Pa Juje? E ot pa awÿr tē. Kwa tee ri Marir o aprõ hkukamã ajamaxpēr punuj kêt nē. Mãmri ho aprõ. Mēhõ kot apê tanhmã ho hkêt. Tĩrtũm Karõ na pre ã hipêx anē. Jakamã kwa tee ri ajamaxpēr kêt nē mãmri ho aprõ nē war apa.

²¹Koja hkrare kato nē myre nē hprêk. Hãmri nē mē kot hkôt amnhĩ xunhwÿr xwÿnhjaja mē kot amnhĩ tomnuj piitã pē mē utàr pa. Jakamã koja kato ka wa hã hixi mē nhũm kēp Jejus. Anē. Nhũm pre ã Tĩrtũm kapēr o mē wrÿk xwÿnhja kãm kapēr anē. Ijaew kapēr kãm Jejus jarēnhja te kēp “Tĩrtũm kēp mē papytār xwÿnh” anhÿr pyràk. Jakamã nhũm Tĩrtũm kapēr o mē wrÿk xwÿnhja Juje òt kãm ã kãm Marir jarēnh anē.

²²⁻²³Nom kormã ã kãm kapēr anhÿr xwÿj ri na pre ra Tĩrtũm nhÿ hã kapēr xwÿnhjê hõja kukamã tanhmã harēnh to nē hã kagà. Nē hã kagà ho: E mē inhma nē inhmar tÿx nē ho apa. Koja nhÿrmã pyka já kamã mēhõ kormã hkukrit tã htujarõ. Nē hkra kato nē myre. Nhũm mē omu nē hã hixi mē nhũm kēp Emanuew. Anē. Ijaew kapēr kãm “Emanuew” jarēnhja te kēp “Ota ra Tĩrtũm mē pahkôt pa ho pa” anhÿr jarēnhja pyràk. Jakamã nhũm pre Tĩrtũm nhÿ hã kapēr xwÿnhja Jejus kukamã ã harēnh anē nē hã kagà.

²⁴Jakamã nhũm Tĩrtũm kapēr o mē wrÿk xwÿnhja Juje mã kapēr par mē nhũm hkrākato. Hãmri nē kot kãm ujarēnh xá hkôt Marir o hprõ.

²⁵Nom kormã tanhmã ho hkêt nē ri o pa rãhã nhũm hkrareja kato. Hãmri nhũm wa hã hixi mē nhũm kēp Jejus nē mãänēn kēp Emanuew.

Matêwre 2

Kanhêti ho studa xwÿnhjê jarēnh

¹Nhũm pre Jejus Perěj kamã kato. Pika pê Jutej kamã. Pahi Erox kormã kot Jutej nhõ xwỳnhjê ho amnhĩptàr o pa ri nhũm õ pika kamã kato. Hãmri nhũm Tĩrtũmja kaxkwa kamã Kra kator jarēnh xà hã kanhêti raxta õ nhõ nhũm pika hõ kamã kanhêti ho studa xwỳnhjaja omu. Kanhêtija pumu nê hkĩnh nê axpēn mã: —Kwa ga mẽ kanhêti raxti mũj pumu. Mãn ra Ijaew nhõ pahi nywta kato nhũm kanhêti mũj kêp ho amnhĩrĩt xà hã ajêt. Kwa pu mẽ ma hapêr o mõi nê nhỹri tokyx omu nà. Anê hãmri nê amnhĩ to pikuprõnh pa nê ma hapêr o pa. Ma myt gjêx xà hwỳr hapêr o pa hã apkati xohtô nê. Hãmri nê ra Ijaew nhõ pika hwỳr pøj nê krĩ pê Jerujarē hwỳr hapêr o mõi. Pahi Erox nhõ krĩja wỳr nhũm mẽ hapêr o mõi hãmri nê kamã pøj nê mẽ hkrare nywta ã krĩ nhõ xwỳnhjê kukjêr o mõi

²nê mẽ kãm: —Pa? Ot pa mẽ apê Ijaew nhõ pahi nywreta pumunh kaxyw mõi. Ham kator xwỳnhta. Mẽ inhõ pika kamã na pa prem kaxkwa hkrax rũm kot ho amnhĩrĩt xà hã kanhêti raxta pumu. Hãmri nê nhỹri pahi nywre pumunh nê kutã mẽ ixkõn krã ho ixtēm nê ixkrĩ nê kãm mex o mex ã harēnh kaxyw nêtānh mẽ inhõ krĩ rũm hapêr o mõi. Kwa mẽ inhmã harē. Nhỹri na? Na pa mẽ inhmã omunh prãm tỳx kumrēx. Anhỹr o hã mẽ hkukjêr o mõi jakamã nhũm mẽ piitã pahi nywja jarēnh ma nê axpēn mã harēnh o hprõt.

³Nhũm pahi Eroxja harēnh ma nê tee ri amnhĩ kukamã hamaxpêr. Pahi nyw kot mẽ ho amnhĩptàr ã hkamnhĩx nhũm já kêp omnuj tỳx nê. Nhũm krĩ nhõ xwỳnhjaja ã hamaxpêr anhỹr ã omu nê tee ri amnhĩ kukamã hamaxpêr o ra kãm ma nê.

⁴Hãmri nhũm pahi Eroxja amnhĩ wỳr hkwỳjê hã karõ. Mẽ õ patre krãhtũmjaja nê Tĩrtũm kapêr tũm o mẽ ahkre ho mẽ pa xwỳnhjaja nhũm amnhĩ wỳr mẽ hã karõ nê Tĩrtũm kot nhỹrmã mẽ hwỳr mēnh mã xwỳnhta ã mẽ hkukjêr kaxyw. Nê mẽ kãm: —E Tĩrtũm kot nhỹrmã mẽ pahwỳr mēnh mã xwỳnhta ã na pa mẽ akukjêr kaxyw mẽ ato akuprõ. Kwa mẽ atõ inhmã harē. Koja nhỹrmã kator kaxyw nê nhỹri koja we kato? Xà jar mẽ panhõ krĩ kamã nà? Xà nhỹri krĩ hõ kamã? Anê.

⁵Hāmri nhūm mẽ kuma nẽ kām: —Nà mẽ panhõ pika pê Jutej kamã koja xep kato. Krĩ pê Perěj kamãã. Na pre Tĩrtũm nhỹ hã kapēr o mẽ pa xwỳnhja ra hkukamã mẽ panhĩgêjtjê mã tanhmã harēnh to nẽ hã kagà. Nẽ hã kagà ho:

⁶Pa Perěj nhõ xwỳnhjaja? E mẽ anhõ krĩ grire htã kamã koja nhỹrmã mẽ panhõ Pahi Maatija kato. Koja mẽ pahpê Ijaewjê piitã mẽ pahto amnhĩptàr mex o pa. Jakamã mẽ anhõ krĩ grire htã koja Ijaew piitã axpẽn mã mex ã harēnh o pa. ã na pre Tĩrtũm kot mẽ pahwỳr mēnh mã xwỳnhhta kukamã mẽ kām harē nẽ hã kagà anẽ. Anẽ.

⁷Hāmri nhūm pahi Erox tee ri ã harēnh anhỹrja ma hāmri nẽ amnhĩ wỳr mẽ kot hã àhkukjêr o mōr xwỳnhjê hã karõ. Nom nhỹri Ijaew kàx ã. Hāmri nhūm mẽ ma hwỳr mra nẽ agjê nhūm mẽ omu nẽ pahi nywta ã mẽ hkukja nẽ mẽ kām: —E mẽ aprĩ hã inhmã pahi kator nywta jarẽ. Tanhmã na pre ra mẽ ate kanhêti pumunh ã mytwrỳ kute? Xà ham na ka prem omu nà amnepê mã? E mẽ aprĩ hã tanhmã inhmã harēnh to. Anẽ. Hāmri nhūm mẽ ihõja kām: —Nà na ra hã amgrà axkrut kaxyw. Na pa prem omu hāmri nẽ inhnojarêt nẽ man ixpa ho ixpa ry rax nẽ mẽ awỳr pøj. Anẽ.

⁸Nhūm mẽ kuma nẽ mẽ kām: —Tỳ. Nom jar amrakati. Perěj kamã na xep kato. E mẽ māmri ma hwỳr mō nẽ kamã hapêr. Hāmri nẽ nhỹri omu nẽ akupỹn ixwỳr mō nẽ inhmã harẽ. Pa ijaxwỳja ma hwỳr mō nẽ omu nẽ mẽ apyrà nẽ kām mex o mex ã harẽ. Ijaxwỳja inhmã omunh prãm tỳx kumrẽx. Anẽ. Nom hêx rom ã ri mẽ kām kapēr anẽ. Kot nhỹri harēnh mar nẽ hã àmnēnh nhūm mẽ kot hpĩr kaxyw nhūm hêx rom ã kām omunh prãm tỳx ã amnhĩ jarēnh anẽ.

⁹⁻¹⁰Jakamã nhūm mẽ kuma hāmri nẽ kato nẽ ma Perěj wỳr mōr kurê kumrẽx. Hāmri nẽ kormã mẽ õ pika kamã mẽ pa ri kanhêti ho studa xwỳnhhta nhūm mẽ axte amnhĩ kukamã omu nẽ hkĩnh nẽ. Nhūm ma Perěj wỳr mẽ hkukamã mō nhūm mẽ omunh pê ma hkôt pa rãhã hwỳr pøj. Nhūm kanhêtija pahi nywre nhõrkwỹ mỳri ajêt.

11Jakamã nhũm mẽ ma hkôt mra nẽ ixkreja wỳr pøj nẽ kapem xa. Hãmri nẽ mẽ kãm kapēr nẽ mẽ hwỳr agjê nẽ Jejus mẽ katorxàja wa omu. Hãmri nẽ Jejus kutã hkôn krã ho hkrĩ hpa nẽ kãm kapēr nẽ kãm: —Pa Xugitre. Hêxta waa nẽ. Nà amex o amex. Kot kaj nhỹrmã axaptàr hãmri nẽ apê mẽ inhõ Pahi Maati. Nà ãm hãmri na pa mẽ apumu nẽ ixkĩnh nẽ. Anẽ. Hãmri nẽ ahpỹnhã kãm hkĩnh xà gõ. Kãm ôr kwỳ gõ nẽ kãm mēhkuxwa xà hkwȳ gõ nẽ kãm te kot ràmre kuxware pyræk pê mĩraja nhũm mẽ kãm hkwȳ gõ. Mẽ hkĩnh xà hã kàxpore xohtô nhũm prem kãm òr pa.

12Hãmri nẽ ra akupỹm Jerujarẽ kamã pahi Erox wỳr nojarêt. Nhũm kamàt nhũm mẽ gõr nẽ hikwỹ hãmri nẽ ra amỹti. Nhũm Tĩrtũm mẽ hpimtir kãm mẽ kãm kapēr nẽ mẽ kãm: —Pa? E mẽ inhma. Kêr ka mẽ akupỹm pahi Erox wỳr amrar nẽ kãm mẽ hkrata jarēnh kêt nẽ. ãm kwarĩ ho kwarĩ. Nẽ kêr ka mẽ pry hõ hã mãn ma mẽ anhõ pika hwỳr akupỹm apa ho apa. Anhỹr o mẽ kãm kapēr jakamã nhũm apkati nhũm mẽ kànhmã hkrĩ hãmri nẽ Tĩrtũm kot mẽ kãm hã karõ xà hkôt ma akupỹm mẽ õ pika hwỳr pa kurê kumrēx nẽ akupỹm pahi Erox wỳr mrar kêt nẽ.

Juje mẽ hprõ wa kot Erox pymaj ma Jejus o mõi

Apokarip 12.1-6; 12.13-18

13Tã nhũm kanhêti ho studa xwỳnhjaja ma akupỹm hapêx hãmri nhũm Tĩrtũm axte Marir mjên Juje hwỳr kapēr o mẽ wrỳk xwỳnhjê hõ mẽ. Nhũm kê axte hpimtir kãm hwỳr wrỳ nẽ kãm kapēr nẽ kãm: —Pa Juje. E kwa kànhmã nhỹ. Na ra pahi Eroxja aprõ pê hkrata ã amỹnê. Kojã tokyx pōristi hkwȳjaja mẽ anhõ krĩ hwỳr pøj nẽ war apê hpĩr kaxyw ri hapêr. Jakamã kwa wa tokyx akato nẽ ma pika pê Ejit wỳr amõi kurê kumrēx. Nẽ Ejit kamã apa rãhã pa nhỹrmã akupỹn amnẽ war amẽ. E kwa tokyx. Anẽ.

14Hãmri nhũm kuma nẽ kànhmã nhỹ nẽ Marir mra nẽ war amnhĩ to akuprõ nẽ ra nojarêt. Hãmri nẽ krĩa pê Jejus o kato nẽ ma o mõi kurê kumrēx. Wa mõi ryy nẽ hãmri nẽ Ejit wỳr pøj nẽ kamã pa ho pa.

15-20Rôm nhũm pahi Erox tee ri amnhĩ wỳr kanhêti ho studa xwỳnhjê kamã hamak o pa nom nhũm mẽ akupỹm hwỳr mrar kêt nẽ. Jakamã nhũm mẽ kamã gryk nẽ hamaxpēr o: —Tk. Kwa nà. Na mẽ ãm inhmã hêx nẽ akupỹn

ixwÿr mrar nē nhÿri inhmã pahi nywta jarēnh kêt nē. Nà kwār mẽ māmri ã inhÿpêx anē. Mẽ kot ixpê ho hpimxuure kaxyw ã. Nà kot paj mẽ kêp kupi nhÿm mẽ rĩ amnhĩ pumu. Na xep prem kanhêti kot harēnh xàja pumunh ã ra hã amgrà pyxi nē hkôt mytwrÿ kêp 6. Jakamã mãn mẽ hkrata ra hã amgrà axkrut kaxyw. Nà na pa ra ijamaxpêr. Kot paj Perěj kamã mẽ hkra myjaja ra mẽ hã amgrà axkrut xwÿnhjaja nē kormã mẽ hã amgrà axkrut kêt xwÿnh piitã mẽ himex pa. Jao ra mẽ kamã pahi nywta pĩ. Nà ixte hpÿr mã kênã. Koja hprêk nē ixpãnhã Ijaew o amnhÿptàr kêt nē. Anhÿr o hamaxpêr hãmri nē amnhĩ wÿr ò pôristi hkwyjê hã karõ nē mẽ kãm mẽ hkrajê hã amÿnê nē mẽ kãm: —E kêt ka mẽ ma Perěj wÿr mra nē kamã mẽ kêp mẽ hkra myrejaja ra mẽ hã amgrà axkrut xwÿnhjê nhÿmex pa. Nē kormã mẽ hã amgrà axkrut kêt xwÿnhjaja mãänēn mẽ himex par kumrêx. Nē Perěj pu hã ri krĩ hkryre hkôt mãänēn ri ajapôj nē ã mẽ himex par anē. Anē. Hãmri nhÿm mẽ kuma nē ma mẽ hwÿr mrar kurê kumrêx. Hãmri nē Perěj wÿr pôj nē mẽ kêp mẽ hkra myre piitã mẽ himex pa. Jakamã nhÿm mẽ katorxà nē mẽ hipêxàjaja tee ri mẽ hkra htyk xwÿnhjê pumu nē hkaprĩ htÿx nē mÿr rÿnh nē. Nom na pre Tÿrtÿm nhÿ hã kapêr jarēnh o mẽ pa xwÿnh finat Jeremÿstija ra amnepêm ã mẽ kot amnhĩ nhÿpêx anhÿrja kukamã mẽ panhÿgêjtê mã mẽ harē nē hã kagà. Na pre mẽ kãm Ijaew kurê xwÿnhjê pynēnh nē ma mẽ ò pika hwÿr mẽ ho hapêx par kaxyw. Hãmri nhÿm mẽ panã Rrakewja te ra kot tee ri ja hã mẽ omunh nē tanhmã amnhĩ nhÿpêx to pyræk nhÿm Jeremÿstija tanhmã Ijaewjê jarēnh to nē hã kagà. Nē hã kagà ho: Amnepêm Perěj kamã na pre mẽ panã Rrakewja hpijagri ho nôrja ã ra htyk kaxyw nē tee ri hkra kator mã xwÿnhhta kukamã hamaxpêr nē mÿr o nõ. Nhÿm hkwyjaja tee ri akupÿm tam hamaxpêr kaxyw kãm kapêr. Tã jarãhã Rrakew kanrêhã hkra nē htàmnhwÿ nijaja ra uræk nē tee ri mẽ hkrare ho hamak xàj mÿr o pa. Mẽ kot mẽ kêp utàr nē mẽ himex par jakamã nhÿm mẽ tee ri mẽ ho hamak xàj mÿr o pa. Anē. Nhÿm pre finat Jeremÿsja mẽ hkukamã ã mẽ harē nē mẽ hã kagà anē. Tã ra jarãhã mēni piitã Rrakew pyrà nē hkrajê o hamak xàj mÿr o pa.

Wa kot akupÿm wa ò pika hwÿr Jejus o mör

Juãw 7.41-42

Tã nhũm mytwrÿ grêre nê hapêx nhũm pahi Erox ty. Jakamã nhũm kamàt nhũm Jujeja gôr nê nõ. Nê kê ôt kãm axte amÿti. Nhũm Tĩrtũm kapêr o mẽ wrÿk xwÿnhja axte hwÿr wrÿ nê kãm: —Pa Juje? E na ra Marir pê hkra pĩr mã xwÿnhhta ty. Jakamã kwa wa mãmrĩ ma akupÿm mõ. Ma akupÿm mẽ apê Ijaewjê nhõ pika hwÿr axàmnhĩx aprõ mẽ hkrata wa o mõ. Anhÿr o kãm kapêr. Na pre ra amnepê m Tĩrtũm nhÿ hã kapêr o mẽ pa xwÿnhjê hõja ja kukamã mẽ panhĩgêjtjê mã ja jarê nê hã kagà. Nê hã kagà kot: “Ixpê Tĩrtũm kot paj nhÿrmã Ejit rũm ma akupÿm õ pika hwÿr ixkrata wa mẽ kumẽ.” Anhÿr o kot hkukamã harênh nê hã kagà.

²¹Jakamã nhũm Tĩrtũm kapêr o mẽ wrÿk xwÿnhja ã Juje mã karõ anê hãmri nhũm kuma nê ma akupÿm wa o mõ. Ma akupÿm mẽ õ pika hwÿr wa o mõ.

²²Tã ra akupÿm hpôx kaxyw htêp o mõ. Hãmri nê pahi Erox kra Akêrawja ra hipêêxà mÿr pê kot Jutej kamã mẽ ho amnhĩptàr hã harênh ma. Hãmri nê tee ri mẽ amnhĩ kukamã hamaxpêr nê kãm mẽ hwÿr wa o mõi pyrna nê. Tã nhũm kamàt nhũm Juje ra gôr nê nõ nê kê axte amÿti. Nhũm kê axte Tĩrtũm kapêr o mẽ wrÿk xwÿnhja hwÿr wrÿ nê akupÿm õ pika hkwÿ pê Jutej wÿr mõi nê wa mẽ hkurê nê kãm: —Pa Juje? E kêr ka Jutej wÿr wa mẽ amõi kêt nê. Pãnhã nhãm mẽ anhõ pika hõ hwÿr mãn mõ nê kamã ri apa. Anê nhũm kuma nê hpãnhã wa mẽ ma mẽ õ pika hkwÿ pê Garirej wÿr wa mẽ juk nê ma mõ.

²³Nê kamã põi nê krĩ pê Najare hwÿr mõ nê kamã amnhĩm õrkwÿ nhĩpêx nê kamã wa mẽ pa ho pa. Nhũm pre ra amnepê m Tĩrtũm nhÿ hã kapêr o mẽ pa xwÿnhjê hõja ra ã mẽ kot amnhĩ nhĩpêx anhÿrja kukamã mẽ panhĩgêjtjê mã mẽ harê nê hã kagà. Nê hã kagà kot: Tĩrtũm kot mẽ pahwÿr mẽnh mã xwÿnhhta koja kêp Najare nhõ xwÿnh. Anê.

Matêwre 3

Juãw Paxis kot Tĩrtũm kapêr jarênh o pa

Makre 1.1-6; Rukre 3.1-14; Juãw 1.19-23

¹Nhũm pre Juãw Paxisja ã amnhĩ nhĩpêx anê. Nê pika pê Jutej kamã mẽ kãm Tĩrtũm kapêr jarênh o pa. No ãm krĩm pa hkêt nê. ãm mẽ hpu hã krĩ pê amỳm ri kapôt ã ri mẽ kãm Tĩrtũm kapêr jarênh o pa.

²⁻³Tĩrtũm nhỹ hã kapêr o pa xwỳnh finat Ijais ra kot Juãw kukamã mẽ panhĩgêjtê mã tanhmã harênh to nê hã kagà xá hkôt. Na pre hkukamã hã kagà ho: Kojã nhỹrmã mẽhõ mõn pøj. Kapôt ã mõn pøj nê mẽ kãm tanhmã mẽmoj tã karõ hto ho ri pa. Nê mẽ kãm: “Kojã Tĩrtũm tokyx mẽ pahwỳr mẽ panhõ Pahihtija mẽ nhũm wrỳ nhũm mẽ piitã omu. Jakamã kwa mẽ tokyx kutêp tãm amnhĩ nhĩpêx o ri apa. Te mẽ kot mẽhõ kutêp pry ho mexta pyrà nê amnhĩ nhĩ ho tãm amnhĩ nhĩpêx nê tãm ajamaxpêr mex o ri apa. Kêr ka mẽ Pahihti kutêp ã amnhĩ nhĩpêx anhỳr o ri apa.” Anhỳr o kojã mẽ kãm ujarênh o pa. Anê. Na pre finat Ijaisja Juãw Paxis kukamã ã mẽ kãm harênh anê nê hã kagà. Tã nhũm hã kagà xàja kôt nhũm Juãw Paxisja mõn pøj. Hãmri nê Ijais kot hkukamã harênh xà hkôt kapôt ã ri mẽ kãm ujarênh o pa nhũm mẽ kãm mar prãm xwỳnhjaja ma hwỳr mra. Nhũm mẽ kãm kapêr nê mẽ kãm: —E kojã Tĩrtũm tokyx kot mẽ pakaxyw ãm xwỳnhja o amnhĩrit. Jakamã kwa mẽ tokyx kutêp amã amnhĩ tomnuj kaga hprãm xàj tãm amnhĩ nhĩpêx o apa. Anhỳr o Jejus kutêp mẽ kãm kapêr o pa.

⁴Juãw Paxisja hikàxpore hkêt jakamã na pre ê mex kêt nê pa. ãm mẽmo mry pê kamer kĩ ho amnhĩm ê nhĩpêx nê hagjê nê hã pa. Nê mẽmo mry hkà ho amnhĩ pre nê ri pa. Nê mẽõ mex kur kêt nê ãm krit ku nê menh ôr o ri pa.

⁵Jakamã nhũm kapôt ã ri mẽ kãm Tĩrtũm kapêr jarênh o pa nhũm mẽ kot mar kaxyw ma hwỳr mra. Pika pê Jutej kamã ri mẽ pa xwỳnhjaja. Nê Jutej kamã krĩ pê Jerujarê nhõ xwỳnhjaja. Nê pyhti pê Jotãw mỳri mẽ pa xwỳnhjaja. Nhũm prem piitã harênh ma nê kot mar kaxyw ma hwỳr mra.

⁶Hãmri nê kapêr ma nê Tĩrtũm noo mã mẽ kot amnhĩ tomnuj xwỳnh ã kãm amnhĩ jarê. Mẽ kot amnhĩ tomnuj kaga nê tam amnhĩ nhĩpêx o pa hprãm xàj ã kãm amnhĩ jarênh anê. Nhũm Tĩrtũm kaxkwa kamã hkrĩ htã mẽ kuma nê amnhĩ katut kôt mẽ kot amnhĩ tomnuj rênh pa nê axte kãm hamaxpêr

kêt nê. Jakamã nhũm pre Juãw Paxisja Tĩrtũm mã gôx kãm mẽ hkrã kumrãr pa. Pyhti pê Jotãw kamã mẽ hkrã kumrã.

⁷Tã nhũm Parijew mẽ Satusew nhõ xwỳnhjaja mããnẽn mẽ hkôt ma Juãw Paxis wỳr mra. Mẽ uràk nê mẽ kêp Ijaew jakamã haxwỳja Juãw Paxis kot mẽ hkrã kumrãr kaxyw ma hwỳr mra. No ãm hkwỳjê hkĩnhã mẽ kot amnhĩ tomnuj kaga hprãm xàj kãm amnhĩ jarẽn h kêt nê. ãm amnhĩ krã hkôt hkwỳjê hkôt hwỳr mra nê amnhĩ to kuma. Nom nhũm Juãw Paxisja ra hprĩ hã ã mẽ hamaxpêr anhỹrja kôt mẽ omunh mex nê. Jakamã mẽ kãm: —Tk kwa nà. Kormã mẽ ate amnhĩ tomnuj pix o ri apa kênã. Xà kot paj mẽ ate amnhĩ tomnuj o apa rãhã mẽ akrã kumrã nhũm Tĩrtũm ja hã mẽ apumu nhũm ja kãm mex nê? Nà koja já kãm mex kêt nê. Koja ja mỳrapê nhỹrmã tanhmã mẽ atomnuj tỳx to ka mẽ tee ri umaj apimxur prãm kaprỳ.

⁸Na htem amnhĩ tomnuj kaga nê tãm amnhĩ nhĩpêx nê tam axpẽn nhĩpêx. Jakamã e kwa mẽ ã amnhĩ nhĩpêx o apa anê pa rĩ kormã mẽ akrã kumrã.

⁹Na ka htem atỳx ri ajamaxpêr o: “Mẽ ixpê finat Apraãw kanrêhã htàmnhwỳ hkwỳ na pa mẽ. Jakamã koja Tĩrtũm ja hã mẽ ixpumu hãmri nê mẽ ixte amnhĩ tomnuj o ixpa tã nhũm ja hã tanhmã mẽ ixto hkêt nê. Koja mẽ ixto mex nê.” Anhỹr o atỳx ri amnhĩ kukamã ajamaxpêr. Nom ja kot anhỹr kêt. Mẽ apê Apraãw kanrêhã htàmnhwỳ htã mẽ ate uràk nê tãm amnhĩ nhĩpêxre hã. Kot kaj mẽ apê htàmnhwỳ htã amnhĩ tomnuj o ri apa hãmri nê Tĩrtũm noo mã te mẽ apê pikap kênre nhĩkwỹ pix pyràk.

¹⁰Na ra Tĩrtũm mẽ ate amnhĩ tomnuj mỳrapê tanhmã mẽ ato kaxyw. Te ho mễhõ nhõ mẽmo hpàr ô hkêt nhũm kot tee ri omunh nê krãhyr nê kuwy kamã mẽnh nê ho kaxàr par pyràk o koja mẽ anhĩpêx. Jao amnhĩ nê kuwy hwỳr mẽ arê ka mẽ kamã amnhĩ xà htỳx kamã ajamak rãhã ho ri apa. Anê. Nhũm pre ã Juãw Paxisja Parijew mẽ Satusew nhõ xwỳnhjê mã kapêr anê.

¹¹Hãmri nê hpãnhã axte mẽ kot mar kaxyw hwỳr mẽ mrar xwỳnhjê mã kapêr nê mẽ kãm: —E ra mẽ ate amnhĩ tomnuj kaga xwỳnhjaja. Na pa Tĩrtũm mã mẽ akrã kumrãr kaxyw gô pix o mẽ akrã kumrã. Nom koja tokyx ixpãnhã Tĩrtũm kot mẽ pakaxyw ãm mã xwỳnhta tãm mẽ pahwỳr pôj.

àhpumunh tỳx o kot ijakrenh par jakamã na pa hte ãm kukwak ri ixpa nẽ amnhĩ tã hã ixpijaàm o ri ixpa. Koja mẽ awỳr Tĩrtũm Karõ rẽ nhũm mẽ akarõ mã agjê. Ka mẽ ỹ hã tam amnhĩ nhĩpêx o ri apa. Nom kormã mẽ kot tãm amnhĩ nhĩpêx kêt xwỳnhjaja koja Tĩrtũm kot mẽ pahwỳr mẽnũh xwỳnhja ja hã mẽ omu nẽ mẽ hipêx o te kuwy kot mẽmoj to kaxàr par pyræk o mẽ hipêx.

¹²—Na htem pur kãm harôj nhĩkẽ nẽ ho grà nẽ hpãnhã kahtwỳ. Nẽ kahuk pa hãmri nẽ hkapĩ nhũm kôk apê nẽ prỳhkà ho htor pa. Nhũm mẽ hpãnhã hy ho pa nẽ ixkre kamã gôj kãm unhwỳ. Ja pyrà nẽ koja tokyx Tĩrtũmja mẽ piitã mẽ kot tanhmã amnhĩ nhĩpêx to ho pa hã mẽ omunh xà hkôt mẽ ho axkjê. Jakamã mẽ kot tãm amnhĩ nhĩpêx o mẽ pa xwỳnhjaja koja ma amnhĩ wỳr mẽ ho api nhũm mẽ kuri mex rãhã nẽ pa ho pa. No mẽ kot amnhĩ tomnuj rãhã ho mẽ pa xwỳnhjaja koja jajê hkĩnhã tanhmã mẽ homnuj to. Nhũm mẽ ma kuwy raxja wỳr pa nẽ kamã amnhĩ xà htỳx kamã hamak rãhã nẽ pa ho pa. Anhỹr o mẽ kãm kapêr.

Juãw Paxis kot Jejus krã kumrãr

Makre 1.9-11; Rukre 3.21-22; Juãw 1.32-34

¹³Tã nhũm Jejus pika pê Garirej rũm kato nẽ ma Juãw Paxis wỳr mỗ. Juãw kot pyhti pê Jotãw kamã hkrã kumrãr kaxyw ma hwỳr mỗ. Hãmri nẽ omu nẽ kãm: —Pa. E ot pa awỳr amnhĩ to tẽ. Ate mẽ kuxwar ixkrã kumrãr kaxyw. Anẽ.

¹⁴Hãmri nhũm tee ri kuma nẽ kãm: —Kwa nà. Aa ate amnhĩ tomnure hã kot pa kêt ri akrã kumrã. Nà ka kot kaj ixkrã kumrã. Anẽ.

¹⁵Hãmri nhũm kãm: —Kwa nà. Mãmri ixkrã kumrã Juãw Paxis. Tĩrtũm kãm ja prãm kênã kot ka kêt ri axtem nẽ ixkaga. Kot puj mẽ Tĩrtũm kãm hprãm xà hkôt tanhmã amnhĩ nhĩpêx to ho ri papa. Anẽ. Hãmri nhũm kuma nẽ kãm: —Tôe. Nà kot paj akrã kumrã. Anẽ.

¹⁶Hãmri nẽ pyhti hwỳr o wrỳ nẽ kamã hkrã kumrã. Hãmri nẽ wa akupỹm api nẽ gô mỳ ri ãm rãhã nhũm kaxkwa axkjê. Hãmri nhũm kurũm Tĩrtũm

Karōja Jejus wỳr te tuuti pyrà nẽ ahpar mã hwỳr wrỳk o tẽ nẽ ìkre hã xa. Nhũm Jejus arĩ amnhĩ wỳr wrỳk o htẽm kãm omunh o xa.

¹⁷Hãmri nhũm Tĩrtũm kaxkwa rũm kãm kapẽr nẽ kãm: Pa? E apê ixkra mex na ka. ãm hãmri na ka hte ixkanrẽhã ã amnhĩ nhĩpêx mex anẽ. Inhmã ajapê kamã na ka ri apa ho apa. Anẽ.

Matêwre 4

Satanasti tee kot amnhĩ tã Jejus kamã hamak

Makre 1.12-13; Rukre 4.1-13; mããnẽn Eprêw 2.18; 4.15

¹Tã nhũm Jejus Tĩrtũm Karō nhỹ hã ma kapôt ã ri pa. Satanasti kot amnhĩ tã kamã hamak kaxyw nhũm ma kapôt ã ri pa.

²Ri pa hã apkati xohtô nẽ. Ra hã arĩgro pê 40. Nẽ kormã apkur kêt jakamã ra kãm prãm tỳx kumrẽx nẽ ri pa.

³Hãmri nhũm Satanastija nhỹhỹnh hwỳr tẽ nẽ hêx rom kãm kapẽr nẽ kãm: —Pa. E kwa mãn ka ra amã prãm tỳx nẽ nà? Nom xep apê Tĩrtũm Kra jakamã apê mẽmoj hihtỳx kêt. Tĩrtũm pyrà nẽ axàhpumunh o axàhpumunh kẽnã. Jakamã kwa kẽn nhĩkwỹ mũj mã anẽ kê amã pãwti hã amnhĩ jahkre ka aku nẽ tokyx ho amnhĩ xihtỳx. E kwa tokyx kãm akapẽr. Anẽ.

⁴Hãmri nhũm kuma nẽ kãm: —Tk. Nà kot paj amar xà hkôt ã ri amnhĩ nhĩpêx anhỹr kêt nẽ. Kojã Tĩrtũm kãm inhmã mẽmoj nhõr prãm nẽ inhmã mẽmoj gõ pa rĩ kormã kukrẽ. Kapẽr ã kagà htũm kot ja jarẽnh kot: Na htem mẽ apkur xà pix kukwak ri htĩr nẽ pa hkêt nẽ. Na htem mããnẽn Tĩrtũm kapẽr ma nẽ hkôt amnhĩ nhĩpêx nẽ htĩr nẽ pa. Anẽ. —Ã kapẽr ã kagà kamã kot harẽnh kot anhỹr jakamã kot paj akapẽr kôt ri ã amnhĩ nhĩpêx anhỹr kêt nẽ. ãm kwarĩ ho kwarĩ. Anẽ.

⁵Hãmri nhũm Satanastija tee ri kuma hãmri nẽ hpãnhã ma Jerujarẽ hwỳr o mõi. Nẽ Tĩrtũm mã amnhĩ jarẽnh xà hã ixkre hprêk nhĩmõi wỳr ho api nẽ kỳxpê hatur xà hã ãm nhũm xa. Hãmri nẽ amnhĩ parpê kẽn rũnh nhĩkwỹ xwỳnhja pumunh o xa nhũm Satanasti kãm:

⁶—E apê Tirtüm Kra jakamã kwa ja rüm ahpar mã ajarĩ nê ma tẽ nê pikap tẽm. Koja Anhĩpêêxàja apumunh mex nê ka tanhmã amnhĩ to hkêt nê. Kapêr ã kagà htùm kot harênh kot: Tirtüm koja kapêr o wryk xwýnh kwýjê mã ajarê ka ajarĩ nê ahpar mã tẽ nhùm mẽ kýt pê amý nhùm mẽmoj akà hyr kêt nê. Anê. —Ã kapêr ã kagà htùm kot ajarênh anhýr jakamã e tokyx ajarĩ. Anê.

⁷Hãmri nhùm Jejus kuma nê kãm: —Tk kot paj ri ate inhmã karõ xàja kôt ã amnhĩ nhĩpêx anhýr kêt nê. Koja Tirtüm tãm inhmã ijarĩ hã karõ pa rĩ mar xà hkôt ijarĩ. No kot pa ri amar xà hkôt ijarĩ hkêt nê. Tirtüm kapêr ã kagà htùm kot ja jarênh kot: Kêr ka mẽ amnhĩ krã hkôt amnhĩ tã ixkamã ajamak kaxyw inhĩxi jarênh kôt tanhmã amnhĩ nhĩpêx to hkêt nê. Anê. —Ã kot ja nê kapêr kot anhýr jakamã kwarĩ ho kwarĩ. Kot paj ri amar xà hkôt ijarĩ hkêt kumrêx. Tirtüm tãm kot inhmã ã ixte amnhĩ nhĩpêx anhýr ã karõre hã. Anê.

⁸Hãmri nhùm Satanasti tee ri kuma nê hpãnhã ma nhýri kên prêeti hwýr o tẽ nê himõk ã axte o xa. Hãmri nê kãm pika piitã ahkre hpa. Nê mẽ hikukrêx piitã nhùm kãm ahkre ho xa. Kàxpore nê mẽmoj mex piitã nhùm kãm ahkre nhùm Jejus piitã omunh o xa.

⁹Hãmri nhùm kê Satanasti axte kãm: —E mãn ka kam ri mẽmoj mex mũj piitã omunh pa. Piitã inhõ na. Nom kot kaj ixkutã tẽm nê inhmã inhmex o inhmex ã ijarê pa ama nê amã piitã õr pa. Ka kam mẽmoj piitã ho anhõ nê ho amnhĩptàr o apa. Jakamã e kwa tokyx. Anê.

¹⁰Hãmri nhùm kuma nê axte kãm kapêr nê kãm: —Tk kwa ma nhýhým tẽ Satanasti. Kot paj ri amã amex o amex ã ajarênh kêt kumrêx. Tirtüm kapêr ã kagà htùm kot ja nê kapêr kãm hihtýx kênã. Kapêr kot: Kêr ka mẽ ixkapêr pix ma nê ixkutã pix mã akõnkrã ho akrĩ nê inhmã inhmex o inhmex ã ijarê. Kêr ka mẽ ã amnhĩ nhĩpêx anhýr o ri apa. —Anhýr o kot hã karõ jakamã kot paj amã amex o amex ã ajarênh kêt kumrêx. Anê.

¹¹Hãmri nhùm tee ri amnhĩ tã kuma hãmri nê ma tẽ. Tee ri kãm kapêr kapryja ã amnhĩ pumu hãmri nê hkaga nê ma tẽ. Hãmri nhùm Tirtüm kapêr

o mẽ wrỳk xwỳnhjaja Jejus wỳr wrỳ nẽ tanhmã ho mex to nẽ kãm õ nhũm kukrẽ nẽ akupỳm hihtỳx.

Jejus kot Garirej kamã kapër o pa

Makre 1.14-15; Rukre 4.14-15

¹²Tã nhũm Juãw Paxisja mẽmoj tã pahi Erox mã akir nhũm amnhĩ tã kuma nẽ gryk xàj haxà nhũm hkrĩ ho hkrĩ. Hãmri nhũm Jejusja harẽnh ma nẽ ma akupỳm Garirej kamã krĩ pê Najare hwỳr ma akupỳm tẽ.

¹³Hãmri nẽ ra pøj nom kamã ri pa hkêt nẽ. Nẽ hpãnhã kurũm kato nẽ ma krĩ pê Kapanaũ hwỳr tẽ. Gô rax pê Garirej mỳri na pre. Pika hkwỳ pê Jepurõ mẽ Natari wa mẽ kamã na pre nhũm Jejus ma hwỳr tẽ. Hãmri nẽ kamã pa.

¹⁴Nhũm ra amnepêm Tĩrtũm nhỹ hã kapër jarẽnh o mẽ pa xwỳnh finat Ijaisja Jejus kukamã ra mẽ panhĩgêjtjê mã ã kot amnhĩ nhĩpêx anhỹr ã harẽ nẽ hã kagà. Jejus kot ã mẽ hwỳr mõi anhỹrja kukamã nhũm pre harẽ nẽ hã kagà.

¹⁵Pika hkwỳ kamã mẽ pa xwỳnhjaja nhũm pre mẽ hkukamã mẽ harẽnh mex nẽ. Nẽ pika pê Garirej kamã mẽ pa xwỳnhjaja nhũm pre mããnẽn mẽ hkukamã mẽ harẽ. Nẽ pyhti pê Jotãw mẽ gô xujanãr wa hkaêx kãm pika piitã kamã mẽ pa xwỳnhjaja. Nẽ krĩ pê Garirej kamã mẽ kệp Ijaew kêt xwỳnhjaja nhũm pre mããnẽn mẽ harẽ. ã na pre finat Ijaisja mẽ hkukamã Tĩrtũm nhỹ hã mẽ piitã mẽ harẽ nẽ hã kagà anẽ. Jejus kot ma mẽ hwỳr mõi rja kukamã nhũm ra hprĩ hã harẽ nẽ hã kagà. Nẽ hã kagàja o:

¹⁶E. Kot paj mẽ amã mẽmoj mex jarẽ ka mẽ inhma. Mẽ ate Tĩrtũm pumunh kêt jakamã te mẽ ate kamàt kô kamã ri apa pyræk. Tã koja Tĩrtũm mẽ amã amnhĩ to amnhĩrĩt ka mẽ hpãnhã te mẽ ate hirã kamã ri apa pyræk o amnhĩ nhĩpêx nẽ ra hkôt amnhĩ xunhwỳ. Anhỹr o mẽ hkukamã mẽ harẽ nẽ hã kagà.

¹⁷Tã nhũm ra kot hkukamã mẽ kãm ujarẽnh xà hkôt nhũm Jejusja mẽ hwỳr mõi nẽ mẽ kãm Tĩrtũm kapër jarẽnh o ri mẽ hkôt pa. Nẽ mẽ kãm tanhmã amnhĩ jarẽnh to ho pa. Nom kormã hprĩ hã mẽ kãm amnhĩ jarẽnh kêt nẽ. Te ho nhãm mẽhõ jarẽnh pyræk o mẽ kãm amnhĩ jarẽ nẽ mẽ kãm: —E na ra Tĩrtũmja kot mẽ akaxyw ãm xwỳnhhta mẽ nhũm mẽ awỳr wrỳ. Jakamã kwa mẽ tokyx tee ri ate amnhĩ tomnuj ã amnhĩ pumu nẽ ã ate amnhĩ nhĩpêx

anhÿr kaga nê hpãnhã Tĩrtũm kôt mãn amnhĩ nhĩpêx o ri apa. Anhÿr o mẽ kãm kapêr o pa pê mẽ ahkre ho ri mẽ hkôt pa.

Jejus kot amnhĩ wÿr tep pynênh xwÿnhjê hwÿr

Makre 1.16-20; Rukre 5.1-11

18Tã nhũm Jejus ma gô rax pê Garirej mÿ ri pa nê gôx kãm ja wa omu. Simãw Pêtre mẽ htõ Andreja nhũm wa gôx kãm kryhti rênh o wa xa. Hãmri nhũm Jejus wa hwÿr tẽ nê wa omu nê amnhĩ kôt wa kuwÿ nê wa kãm:

19—Pa. E kwa ma ixkôt mãn war apa. Kot paj tanhmã war ajahkre hto ka wa ma mẽ kãm ijarênh o ri apa. Mẽ kot war amar nê ra ixkôt amnhĩ xunhwÿr kaxyw. Anê.

20Hãmri nhũm wa kuma nê kryhti re nê wa ma hkôt htêm kurê kumrêx.

21Hãmri nhũm mẽ ma nhãm axte mō nê ra jajê hwÿr kato. Jepetew mẽ hkra Xiakre mẽ Juãwja nhũm wa mẽ hwÿr kato. Nhũm mẽ õ pàr kãm kryhti ho mex o wa mẽ nhÿ. Hãmri nhũm mẽ hwÿr mra nhũm Jejus amnhĩ kôt ja wa kuwÿ nê wa kãm: —Pa Xiakre mẽ Juãw. E wa ma ixkôt mãn wa apa. Anê.

22Hãmri nhũm wa kuma nê hipêxà mã amnhĩ jarê nê ma hkôt pa ho pa kurê kumrêx.

Jejus kot tanhmã amnhĩ nhĩpêx to

Rukre 6.17-19

23Tã nhũm Jejus Garirej kamã Ijaew mã Tĩrtũm kapêr jarênh o pa. Na pre hte Tĩrtũm kapêr o mẽ ahkre xà hã ixkre hwÿr agjê nê kamã mẽ kãm Tĩrtũm kapêr jarênh o hkrĩ nê mẽ kãm: —E mẽ tee ri ate amnhĩ tomnuj ã amnhĩ pumu nê hpãnhã Tĩrtũm kôt mãn amnhĩ nhĩpêx o ri apa. Kot kaj mẽ ã amnhĩ nhĩpêx anê nhũm ja hã mẽ apumu nê mẽ ato hkra kurê kumrêx. Anê. Hãmri nê akupÿm mẽ kãm mẽ à xwÿnhjê ho mex. Ahpÿnhã tanhmã mẽ à kute xwÿnhjaja nhũm akupÿm mẽ ho mex o pa.

24Jakamã nhũm mẽ piitã pikaja kamã ri axpên mã harênh o hprôt. Nê pika pê Sir kôt mãânên ma ri axpên mã harênh o hprôt. Nhũm mẽ piitã harênh ma nê ma hwÿr mẽ à xwÿnhjê ho mra. Ahpÿnhã ri tanhmã mẽ à kute xwÿnhjaja. Mẽ à htÿx xwÿnhjaja. Nê mẽ ĩ kamã mẽ htyk xwÿnhjaja. Nê mẽ

hkrã pipãnh xwÿnhjaja. Nẽ mẽkarõmnuti kot Satanasti nhÿ hã tanhmã ri mẽ ho xwÿnhjaja. Nhũm prem mẽ hamÿ nẽ ma Jejus wÿr mẽ o mra nhũm mẽ omu nẽ akupÿm mẽ ho mex pa.

²⁵Jakamã nhũm mẽ ohtô nẽ ma hkôt pa. Krĩ pê Garirej rũm nẽ Tekap rũm nẽ Jerujarẽ rũm nẽ pika pê Jutej rũm. Nẽ pyhti pê Jotãw nhĩkjê rũm mẽ pa xwÿnhjaja. Nhũm mẽ ã ohtô nẽ ma Jejus kôt omunh o pa anẽ.

Matêwre 5

Jejus kot tanhmã mẽ ahkre hto

Rukre 6.20-23

¹Nhũm Jejus amnhĩ kôt ri mẽ kot omunh o mẽ pa xwÿnhjê pumu hãmri nẽ mẽ ahkre kaxyw ma tẽ nẽ hixêt ã api nẽ himõk ã nhÿ. Hãmri nhũm mẽ ma hkôt mra nẽ pu hã hkrĩ pa.

²Hãmri nhũm mẽ ahkre nẽ mẽ kãm:

³E mẽ inhma. Kot kaj mẽ atõ amnhĩ kaxyw tanhmã Tĩrtũm mẽ wa inhmã ajamaxpër to nẽ ajamaxpër o: “Koja Tĩrtũm inhĩhkô hã pa hkêt pa ixtÿx ri tanhmã amnhĩ tomnuj to ho ri ixpa rãhã ho ri ixpa.” Anhÿr o ajamaxpër. Hãmri nhũm Tĩrtũm ã ajamaxpër anhÿr ã apumu nhũm ja kãm mex nẽ. Hãmri nhũm apê hkra hã ato mex nẽ atãnopxar o akôt pa ho pa ka ajamakêtkati nẽ axãmnhĩx akĩnh nẽ ri apa.

⁴Nẽ kot ka mẽ atõ tanhmã amnhĩ tomnuj to. Hãmri nẽ tee ri ja hã amnhĩ pumu nẽ apijaàm nẽ akaprĩ nẽ. Nẽ akaprĩ xàj amÿr o nhÿ. Amÿr rax nẽ. Hãmri nhũm Tĩrtũm ja hã apumu nhũm ja kãm mex nẽ. Jakamã nhũm anê akaprĩ hta nẽ ato mex nẽ ka ajamakêtkati nẽ axãmnhĩx akĩnh nẽ ri apa.

⁵Nẽ kot ka mẽ atõ agryk tokyx anhÿr kêt nẽ. Nẽ kritpêm amnhĩ tã amã mẽ hkaprĩ ho ri apa. Hãmri nhũm Tĩrtũm ja hã apumu nhũm ja kãm mex nẽ. Hãmri nhũm ato mex nẽ ka ajamakêtkati nẽ axãmnhĩx akĩnh nẽ ri apa.

⁶Nẽ kot ka mẽ atõ amã Tĩrtũm kãm hprãm xà hkôt amnhĩ nhĩpêx o ri apa hprãm nẽ. Nhũm amnhĩ tã apumu nhũm ja kãm mex nẽ. Hãmri nhũm ato

mex nê tanhmã akrã hto ka hkôt pix mã amnhĩ nhĩpêx o ri apa. Jao ajamakêtkati nê axàmnhĩx akĩnh nê ri apa.

⁷Nê mẽ kamã mẽ axukapĩ ho ri apa xwỳnhjaja na hte Tĩrtũm ja hã mẽ apumu nhũm ja kãm mex nê. Jakamã na hte mẽ hã mẽ apyrà nê mẽ akamã ukapĩ ho pa. Jao mẽ ato mex nê ka mẽ ajamakêtkati nê axàmnhĩx akĩnh nê ri apa.

⁸Nê kot ka mẽ atõ ã ajamexpêr anê nê ajamexpêr o: “Nà kot paj ãm Tĩrtũm kapêr kôt pix mã ri amnhĩ nhĩpêx o ri ixpa. ãm ja pix na inhmã hprãm.” Anhỹr o ajamexpêr. Hãmri nhũm Tĩrtũm amnhĩ tã mẽ apumu nê mẽ ato mex nê. Ka mẽ ajamakêtkati nê axàmnhĩx akĩnh nê ri apa. Nê nhỹrmã Tĩrtũm wỳr api nê kuri amex rãhã apa ho apa.

⁹Nê kot ka mẽ atõ mēhō wa kot axpēn kutã amnhĩ xãm xwỳnhhta axpēn tã wa omu nê wa kot tanhmã axpēn nhĩpêx tota nê tanhmã wa kãm akapêr to nê akupỹm tãm wa ãm. Hãmri nhũm Tĩrtũm ja hã apumu nhũm ja kãm mex nê. Nê apê hkra hã ajarē ka ajamakêtkati nê axàmnhĩx akĩnh nê ri apa.

¹⁰Nê koja mēhō mẽ ate Tĩrtũm kapêr mar xà hkôt amnhĩ nhĩpêx o apa hã mẽ apumu nê hã tanhmã mẽ anhĩpêx kati hto. Tã nom koja Tĩrtũm arĩ mẽ ato mex nê. Mẽ apê hkra jakamã mẽ kot tanhmã mẽ anhĩpêx hto htã ka mẽ ajamakêtkati nê axàmnhĩx akĩnh nê ri apa.

¹¹⁻¹²—Kwãr mẽ mãmri ixtã mẽ ato kapêr rỳ mẽ ato hêx rỳ tanhmã ri mẽ atomnuj to. Kwãr mẽ mãmri ã mẽ anhĩpêx anê. Nom kêr ka mẽ arĩ amnhĩ kaxyw inhmã ajamexpêr tỳx rãhã pê ajamakêtkati nê axàmnhĩx akĩnh nê ri apa. Kwãr mẽ mãmri ixtã ã mẽ anhĩpêx anê nê mẽ amex kêt ã mẽ ajarē. Amnepê m na prem ã Tĩrtũm nhỹ hã kapêr jarēnh xwỳnhjê nhĩpêx anê. Jakamã koja mẽ uràk nê ã mẽ anhĩpêx anê. Hãmri nhũm Tĩrtũm ja hã mẽ apumu nê amnhĩm mẽ amex ã mẽ ajarē. Hãmri nê nhỹrmã kaxkwa kamã wa inhō krĩ kamã mẽ ato mex nê. Jakamã kêr ka mẽ ã amnhĩ kukamã ajamexpêr anhỹr pê mãmri akĩnh nê ajamakêtkati nê axàmnhĩx ri apa. Kwãr mẽ mãmri ã wa ixtã mẽ anhĩpêx anê. Anê.

Jejus krajaja te kot kaxwa mẽ kanê hpôk wa uràk

Makre 9.49-50; Rukre 13.34-35

13Nhũm Jejus arĩ mẽ kãm kapěr nẽ mẽ kãm: —Nẽ mẽ ate ixkõt amnhĩ xunhwỳr xwỳnhjaja te mẽ ate kaxwa pyræk. Kaxwaja mẽ apkur xà ho ành mã mex. No koja mēhõ tẽn kamã pika hkwỳ mẽ nẽ ho ahkà. Hãmri tanhmã kot wem ho nẽ akupỹm ho mex? Nà koja akupỹm mex kêt nẽ. ãm mẽ kot hkapĩr pix kaxyw koja mex. Ja pyrà nẽ kot ka mẽ atõ ate inhmã tanhmã amnhĩ nhĩpêx to ho apa hã amnhĩ jarēnh tã gaa nẽ rĩ amã ixkõt amnhĩ nhĩpêx prãm kêt nẽ. Hãmri nẽ ra te apê kaxwa mẽ pika pihkarta pyræk. Kwa mẽ ixujarēnh ma nẽ kãm ajamaxpěr tỳx rãhã ho ri apa.

14-16—Nẽ te mẽ ate kanê hpòk pyræk. Nẽ te mẽ ate hixêt prêk nhĩmõk ã krĩ xãm pyræk. Koja krĩja hixêt prêeti nhĩmõk ã xa nhũm mẽ piitã omu. Nẽ kanêja. Xà na htem kanê hpòk nẽ poti ho hpro? Nà na htem hpòk nẽ kỳx pẽ mẽmoj nhĩmõk ã unhwỳ nhũm mẽ piitã mẽ kãm hirã nhũm mẽ hirã kamã mẽmoj pumunh mex nẽ. Ja pyrà nẽ kot kaj mẽ tãm amnhĩ nhĩpêx o ri apa nhũm mẽ piitã ja hã mẽ apumunh kõt ra kaxkwa kamã Tĩrtũm mex ã harēnh o pa. Anẽ.

Jejus kot tanhmã Mojes kapěr jarēnh to

Rukre 16.16-17

17Nhũm Jejus arĩ mẽ kãm kapěr nẽ mẽ kãm: —Nẽ amnepêm Mojes kot Tĩrtũm nhỹ hã Ijaewjê mã tanhmã mẽ kot amnhĩ nhĩpêx to hã mẽ kãm karõja. Nẽ amnepêm Tĩrtũm nhỹ hã kapěr jarēnh o mẽ pa xwỳnhjê kapěrja. Ixte mẽ kapěr o ijarêx kaxyw na pa pre mẽ awỳr ixwryk kêt nẽ. Jakamã kwa mẽ ri ã axpẽn mã ijarēnh anhỹr kêt nẽ. Kêt ixprĩ hã ixte mẽ amã mẽ kapěr jarēnh nhũm mẽ ate mar mex kaxyw na pa pre kaxkwa rũm mẽ awỳr wrỳ.

18—Tĩrtũm kapěr ã kagà htũm kot mẽmoj jarēnhja. Koja ujarēnh xà hkõt mẽmoj tanhmã amnhĩ to hpar mẽ nhũm rĩ kormã kaxkwa mẽ pika wa hapêx pa nhũm kapěr ã kagàja mããnēn hapêx. Nom nhũm Tĩrtũm kapěr koja mẽmojja pyrà nẽ aa hapêx kêt nẽ. Koja rãhã ho rãhã nẽ aa ihkjê ho tanhmã mēnh to hkêt nẽ. ãm hãmri na pa ã mẽ amã harēnh anẽ.

¹⁹—Ně kot ka mẽ atõ Tĩrtũm kapěr o pixire nẽ hirõp xa. Hãmri nẽ ra amnhĩ pyrà nẽ anhĩõ mã ja hã amỹnẽ. Apyrà nẽ kot hirõp ãm kaxyw ka kãm hã amỹnẽ. Kot kaj ã amnhĩ nhĩpẽx anẽ hãmri nẽ apê Tĩrtũm kra hkêt ã amnhĩ to amnhĩrit. Nom kot ka kêt mẽ tãm amnhĩ nhĩpẽx o ri apa. Nẽ amnhĩ pyrà nẽ tãm mẽ kot amnhĩ nhĩpẽx kaxyw mẽ kãm akapěr o ri apa hãmri nhũm Tĩrtũm ja hã apumu nẽ ato hkra nẽ ato mex nẽ.

²⁰—No Parijew nhõ xwỳnhjaja nẽ Tĩrtũm kapěr tũm o mẽ ahkre ho mẽ pa xwỳnhjaja. Mẽ kot Tĩrtũm kapěr kõt amnhĩ nhĩpẽx mex ã amnhĩ jarẽnh tã no ãm hkõt ã amnhĩ nhĩpẽx anhỹr kêt nẽ. Jakamã kot kaj mẽ hkõt amnhĩ nhĩpẽx o ri apa hãmri nẽ mẽ uràk nẽ nhỹrmã Tĩrtũm mẽ wa inhõ krĩ kamã apa hkêt nẽ. Anẽ.

Mẽ gryk o mẽ pa xwỳnhjê jarẽnh

Rukre 12.58-59; mãänën Rõmãn 12.19; Epes 4.26; Wam Ximotre 2.8; Xiakre 1.19-20

²¹Nhũm Jejus arĩ mẽ kãm kapěr nẽ mẽ kãm: —Nẽ amnepêm na prem mẽ panhĩgêtjê mã Tĩrtũm kapěr kwỳ jarẽnh o pa nẽ mẽ kãm: Kêr ka mẽ axpẽn par kêt nẽ. Kot kaj mẽ mẽhõx pĩ nhũm mẽ ja mỳrapê atomnuj nẽ. Nẽ ma mẽ anhõ pahшти hwỳr ato tẽ nhũm mỳrapê tanhmã ato rỳ hkõt apĩ. Anẽ. ãm hãmri na prem mẽ kãm ja jarẽ.

²²Tã kot paj ixprĩ hã mẽ amã tanhmã harẽnh to ka mẽ inhma. Kot kaj mẽ mẽmoj tã anhĩõ kamã agryk. Hãmri nhũm Tĩrtũm tee ri ja hã apumu nhũm ja kãm mex kêt nẽ. Jakamã koja mẽ anhõ pahшти tanhmã ja hã mẽ ato japêr hã koja ja mex nẽ. Rỳ kot kaj mẽ tanhmã mẽhõ japrỳ hto. Ho hagrô rỳ ho rop. Mỳrapê kop apu akwỳ kot apynênh nẽ anhõ pahшти hwỳr ato htẽm nẽ ãhkram ajaxàr ronhỹx ja inhmã mex nẽ. Rỳ kot kaj mẽ tanhmã anhĩõ mã akapêr punuj to nẽ kãm: “Tk. Ate ho warêhti hã. Te apê hagrô pyràk kênã.” Anhỹr o kãm akapêr. Tã kop apu Tĩrtũm ra ã akapêr anhỹrja mỳrapê mẽ kot amnhĩ xà htỳx kamã hamak tũm xàta wỳr amẽnh ronhỹx ja inhmã mex nẽ. Ja pumaj kwa kêr ka mẽ ã axpẽn mã akapêr anhỹr kêt nẽ. Kêt mẽ axpẽn mã tãm akapêr pix o ri axpẽn kõt apa.

23—Ně kêr ka mẽ tanhmã ate anhĩõ nhĩpêx hto kamã Tĩrtũm mã mex o mex ã harênh kêt ně. Kêr ka mẽ kãm amnhĩ jarênh o akrĩ hãmri ně ra mẽhõ kot mẽmoj tă akamã gryk xwỳnh mã ajamaxpêr japêr.

24Hãmri ně akato ně ma hwỳr atêm kurê kumrêx ně wa tãm axpên mã akapêr ně tãm akupỹm axpên xãm. Hãmri ně rĩ kormã ma akupỹm tẽ ně Tĩrtũm mã amnhĩ jarênh jatur xàm amẽ ně kãm mex o mex ã harẽ. Kêr ka mẽ ã amnhĩ nhĩpêx anhỹr o ri apa.

25-26—Na htem tanhmã axpên nhĩpêx to hãmri ně kot tanhmã war axpên to xwỳnhjê hõja ma õ pahi hwỳr tẽ ně kãm tanhmã kot ho xwỳnhhta jarênh kaxyw nojarêr. Hãmri nhũm ra kamã gryk xwỳnhhta kot pahi mã harênh kaxyw nojarêr ã harênh ma ně tee ri amnhĩ kukamã hamaxpêr ně ma hwỳr tẽ ně wa akupỹm tãm axpên xãm. Na htem ã amnhĩ nhĩpêx anẽ. Pahi kot wa harênh mar ně tanhmã axpên tă wa ho pymaj na htem ã amnhĩ nhĩpêx anẽ ně tokyx tãm akupỹm axpên xunhwỳ. No koja mẽ anhỹr kêt nhũm pahija wa harênh ma ně wa kot tanhmã axpên to xwỳnhhta õ jaxà nhũm tee ri kãm kator prãm. Hãmri ně tanhmã amnhĩ to ně ra amnhĩ pãnhã kãm amnhĩrer pa nhũm pahihtija rĩ kormã pôristi mã anẽ nhũm kãm ure nhũm kato. Ja pyrà ně kêr ka mẽ Tĩrtũm tanhmã kot mẽ anhĩpêx to pymaj tokyx mẽ ate amnhĩ tomnuj kaga ně hkôt amnhĩ nhĩpêx rãhã ho ri apa. Anẽ.

Tanhmã mẽ pahte mẽ pahprõjê nhĩpêx to

Matêwre 19.3-9; Makre 9.43-47; 10.2-9; mãânên Rukre 16.18

27Nhũm Jejus arĩ mẽ kãm kapêr ně mẽ kãm: —Ně na pre finat Mojesja mẽ panhĩgêjtjê mã Tĩrtũm kapêr tũm kwỳ jarẽ ně mẽ kãm: “Kêr ka mẽ amnhĩ prõ pix tãnopxar o ri apa. No mẽ kuhpa hã nhãm mẽhõ ho amnhĩkati ho ri apa hkêr ně.” Anẽ. ãm hãmri na pre mẽ kãm ja hã karõ.

28Tã kot paj ixprĩ hã mẽ amã tanhmã harênh to ka mẽ inhma. Kot kaj mẽ nhãm mẽhõ pumu ně amã ho amnhĩkati hprãm mã ajamaxpêr. Jao te ra ate ho amnhĩkati pyræk o amnhĩ nhĩpêx. Kormã ate ho amnhĩkati hkêr tă ra hkukamã ajamaxpêr jakamã te ra ate ho amnhĩkati pyræk o amnhĩ nhĩpêx.

²⁹ã mẽ hamaxpěr punuj anhÿr xwÿnhjaja koja mẽ nhÿrmã ma mẽ kot amnhĩ xà htÿx kamã hamak tÿm xàta wÿr ma mra nẽ kamã pa rãhã ho pa. Jakamã kêr ka mẽ nhãm mẽhõ pumu nẽ amã hkĩnh japêr hãmri nẽ te ate ano kaxàr nẽ mẽnh nẽ axte ate omunh kêt pyràk o amnhĩ nhĩpêx. Jao hkàx ã rĩt nẽ ma nhÿhÿm atẽm kurê kumrẽx.

³⁰—Nẽ kot kaj mẽ anhĩhkra ho tanhmã amnhĩ tomnuj to kaxyw. Hãmri nẽ tee ri ja hã amnhĩ pumu nẽ te ate amnhĩ nhĩhkra krãhyr nẽ mẽnh pyràk o amnhĩ nhĩpêx nẽ tanhmã amnhĩ tomnuj to hkêt nẽ. Mẽ ìhkra ho mẽ kot tanhmã amnhĩ tomnuj to ho mẽ pa xwÿnhjaja koja mẽ nhÿrmã ma mẽ kot amnhĩ xà htÿx kamã hamak tÿm xàta wÿr ma mra nẽ kamã pa rãhã ho pa. Anẽ.

Mẽ pahte axpẽn kaga hkêt

³¹Nhũm Jejus arĩ mẽ kãm kapěr nẽ mẽ kãm: —Nẽ na pre finat Mojes mẽ panhĩgêtjê mã Tĩrtũm kapěr tũm kwÿ jarẽ nẽ mẽ kãm: “Kot kaj mẽ atõ aprõ kaga kaxyw hãmri nẽ ate hkaga hã amnhĩ jarẽnh ã kagà nhĩpêx nẽ kãm agõ nẽ rĩ kormã hkaga.” Anẽ. ãm hãmri na pre ã mẽ kãm Tĩrtũm kapěr tũm jarẽnh anẽ.

³²Tã kot paj ixprĩ hã mẽ amã tanhmã harẽnh to ka mẽ inhma. Kêr ka mẽ atÿx ri amã hprãm xà hkõt aprõ kaga hkêt nẽ. Nom koja aprõ akuhpa hã nhãm mẽhõ ho amnhĩkati ka harẽnh ma hãmri nẽ amã ja hã hkaga hprãm nẽ mãmrĩ kam nẽ hkaga. Ja tanhmã kute hkêt. Nom koja ã amnhĩ nhĩpêx anhÿr kêt tã ka amnhĩ krã hkõt hkaga. Hãmri nhũm mẽhõ apãnhã ho hprõ nẽ o pa. Hãmri nẽ ra kot apê aprõ ho amnhĩkati ho pa pyràk o hipêx. Nẽ nija haxwÿja. Te arĩ kêp aprõ htã akuhpa hã nhãm myja o amnhĩkati o pa pyràk o amnhĩ nhĩpêx. Anẽ.

Tãm mẽ pakapěr ã Jejus kot mẽ pamã karõ

Xiakre 5.12

³³Nhũm Jejus arĩ mẽ kãm kapěr nẽ mẽ kãm: —Nẽ na pre finat Mojes mẽ panhĩgêt nẽ pahpãmjê mã Tĩrtũm kapěr tũm jarẽnh o: “Kêr ka mẽ Tĩrtũm mã mẽmoj to anhÿr ã amnhĩ jarẽ hãmri nẽ amnhĩ jarẽnh xà hkõt kãm tanhmã amnhĩ nhĩpêx to. Nom kêr ka mẽ atÿx ri kãm tanhmã amnhĩ jarẽnh

to ho amnhĩ to axêx kêt nê. ãm akatàt kôt mẽ ate amnhĩ jarênh to xà hkôt kãm tanhmã mẽmoj to.” Anê. ãm hãmri na pre mẽ kãm ja jarê.

³⁴Tã kot paj ixprĩ hã mẽ amã tanhmã harênh to ka mẽ inhma. Kêr ka mẽhõ mã tanhmã amnhĩ jarênh to. Tĩrtũm mã pix mã amnhĩ jarênh kêt nhãm mẽhõ mã mããnên tanhmã amnhĩ jarênh to. Nê akatàt kôt kãm amnhĩ jarê. Na ka htem mẽ kot mẽ axêx kêt kôt mẽ apumunh kaxyw mẽmoj nhĩxi jarênh kôt amnhĩ jarê. Nom kêr ka mẽ axte ã mẽmo nhĩxi hã amnhĩ jarênh anhỹr kêt nê. Mẽmoj tã amnhĩ jarê nê akatàt kôt amnhĩ jarênh kurê kumrêx. No mẽ kot axêx kêt kôt apumunh kaxyw mẽmoj nhĩxi hkôt amnhĩ jarênh kêt nê. Tanhmãn kaxkwa nhĩxi jarênh kôt mẽmoj tã amnhĩ jarênh kêt nê. Kaxkwa kêp Tĩrtũm krĩ xà maati kênã kot ka kêt mẽ axtem nê atỳx ri amnhĩ kaxyw hixi jarê.

³⁵Rỳ mẽ kot axêx kêt kôt apumunh kaxyw pika nhĩxi jarênh kêt nê. Pika kêp Tĩrtũm par xãm xà kênã kot ka kêt mẽ atỳx ri amnhĩ kaxyw tanhmã hixi jarênh to. Nê krĩ pê Jerujarêja mããnên kêr ka mẽ ri amnhĩ kaxyw tanhmã hixi jarênh to hkêt nê. Koja nhỹrmã Tĩrtũm mẽ awỳr Jerujarê hwỳr ixpê pahi maati hã inhmẽ pa kamã mẽ ato amnhĩptàr o ixkrĩ. Jakamã kêr ka mẽ ri atỳx amnhĩ kaxyw tanhmã hixi jarênh to ho ri apa hkêt nê.

³⁶—Nê kêr ka mẽ kot axêx kêt kôt apumunh kaxyw mẽ ri tanhmã amnhĩ krã hkĩ jarênh to hkêt nê. Kot kaj mẽ anê nê ãm tanhmã hã harênh to kaprỳ. Xà kot kaj mẽ ajamaxpêr pix o tanhmã amnhĩ krã hkĩ hto? Nà kot kaj mẽ ho anhỹr kêt nê. Jakamã mẽ ri atỳx tanhmã harênh to hkêt nê. Nê mẽ atỳx ri mẽmo nhĩxi jarênh kôt mẽmoj tã amnhĩ jarênh o apa hkêt nê.

³⁷ãm akatàt kôt tãm amnhĩ jarênh kurê kumrêx. Jao mẽ kãm: “Tỳ. Nà kot paj ho anê.” Anhỹr o mẽmoj tanhmã ho. Rỳ mẽ kãm: “Nà kot paj ho anhỹr kêt nê.” Anhỹr o mẽmoj tanhmã ho hkêt nê. ãm akatàt kôt tanhmã mẽmoj tã amnhĩ jarênh to xà hkôt ho anhỹr kurê kumrêx. Mẽ kot Satanasti hkôt amnhĩ nhĩpêx o mẽ pa xwỳnh pixjaja na htem hêx rom mẽmoj nhĩxi jarênh kôt tanhmã amnhĩ jarênh to ho pa. Anê.

Mẽ pahte tanhmã axpên nhĩpêx to hã Jejus kot mẽ pamã karõ

Rukre 6.27-30; 23.34; mããnên Atre 7.60; Rõmãn 12.14

³⁸Nhũm Jejusja arĩ mẽ kãm kapër nẽ mẽ kãm: —Na prem amnepêm mẽ panhĩgêjtjê mã Tĩrtũm kapër tũm jarẽnh o: “Koja mẽhõ apê ano katõk nẽ hkapa hã koja mẽ anhõ pahija atã mã ho anẽ nẽ kêp no kapa. Rỳ koja mẽhõ apê axwa hõ hkwỹr hã koja atã mã ho anẽ nẽ atã kêp wa hõ hkwỹr.” Anhỹr o mẽ kãm hã karõ. ãm hãmri na prem ã ja jarẽnh anẽ.

³⁹Tã kot paj ixprĩ hã mẽ amã tanhmã ja jarẽnh to ka mẽ inhma. Koja mẽhõ tanhmã mẽ anhĩpêx to ka mẽ ãm amnhĩ tã omu nẽ tanhmã amnhĩ tã ho hkêt nẽ. Koja anhĩnep akura ka ãm omu nẽ tanhmã amnhĩ tã ho hkêt nẽ. Te ate kãm ihkjê hpër nhũm kot ihkjê kamã hkuranh pyræk o amnhĩ nhĩpêx nhũm ja amã mex nẽ. No amnhĩ tã tanhmã ho hkêt nẽ.

⁴⁰—Nẽ koja mẽhõ anhĩnõhkà hã awỳ nhũm mẽ anhõ pahija amã anẽ ka mãmrĩ kãm agõ nẽ tanhmã hã kãm nẽ hkêt nẽ. Te ate hkõt kry pê kãm anhĩnõhkà hpakà ry jagjênh xwỳnhhta nhõr pyræk o amnhĩ nhĩpêx. Nom kêr ka mẽ kamã agryk kamã kãm õr kêt nẽ.

⁴¹—Nẽ koja mẽhõ ate kãm jênh tur nẽ hkõt ho amõr ryy kaxyw amã kapër ka mãmrĩ kãm ho anẽ. Nẽ kot amã nhỹri hã karõ xàja wỳr o pøj nom kamã kãm õr kêt nẽ. Kãm ho hakrenh ryy nẽ rĩ kormã akupỹm kãm agõ.

⁴²—Nẽ koja mẽhõ õ mẽmoj kêt nẽ awỳr tẽ nẽ mẽmoj tã awỳr ka mãmrĩ kãm agõ. Rỳ nhũm awỳr tẽ nẽ apê mẽmoj to ãpresta kaxyw ka mãmrĩ kãm ho ãpresta. Kêr ka mẽ ã axpên nhĩpêx anhỹr o ri apa. Anẽ.

Mẽ pamã axpên kĩnh ã Jejus kot mẽ pamã karõ

Rukre 6.32-36; mãnhen Rõmãn 12.14

⁴³Nhũm Jejus arĩ mẽ kãm kapër nẽ mẽ kãm: —Nẽ na prem amnhĩ krã hkõt axtem nẽ tanhmã mẽ panhĩgêjtjê mã mẽmoj jarẽnh to nẽ mẽ kãm: “Kêr ka mẽ amã mẽ akrãmnhwỳjê pix kĩnh nẽ tanhmã mẽ ho mex to. No kêt mẽ kot tanhmã mẽ ato xwỳnhjaja kêr ka mẽ mãmrĩ mẽ kamã axàhkurê ho ri apa.” Anhỹr o mẽ kãm karõ.

⁴⁴Nom pa kot paj mẽ amã Tĩrtũm kot tanhmã ja hã karõ hto hã harẽ ka mẽ inhma. Kêr ka mẽ kot tanhmã ri mẽ atomnuj to xwỳnhjaja amnhĩ tã tanhmã

mě ho hkêt nê. Ām tanhmã mẽ ho mex to pix hkukamã mãn ajamaxpěr. Nê mẽ ho Tĩrtũm wỳr pix kukamã mãn ajamaxpěr.

⁴⁵Na hte ã kaxkwa kamã Měpahpãm Tĩrtũmja amnhĩ nhĩpêx anhỳr o pa. Mě kot amnhĩ tomnuj xwỳnhjaja nê mẽ kot amnhĩ to mex xwỳnhjaja nhũm hte mẽ ho hpimràatã mẽ ho mex o axpẽn pyràk. Jao hamẽ wa hwỳr na rẽ nê hamẽ wa hwỳr myyti rẽ nhũm hamẽ wa kãm hirã ho pa. Jakamã kêr ka mẽ uràk nê mẽ piitã tãm mẽ hipêx o axpẽn pyràk. Mě kot amnhĩ tomnuj xwỳnhjê mẽ mẽ kot amnhĩ to mex xwỳnhjê mẽ ho apimràatã mẽ ho mex o axpẽn pyràk.

⁴⁶—Nê xàt kaj mẽ amã mẽ piitã mẽ ho mex prãm kêt nê ãm mẽ kot mẽ ato mex xwỳnh pixjaja ka mẽ amã mẽ ho mex prãm nhũm Tĩrtũm ja hã mẽ apumu nhũm ja kãm mex nê nà? Nà koja kãm mex kêt nê. Koja mễhõ ato mex kêt tã kêr ka ãm amnhĩ rom ho mex nê. Nhũm Tĩrtũm ja hã apumu nê amnhĩm amex ã ajarẽ. Mě kot amnhĩ tomnuj xwỳnhjaja na htem ãm mẽ kot mẽ ho mex xwỳnh pixjaja nhũm mẽ amnhĩ xwar mẽ ho mex. No tãm mẽ kot amnhĩ nhĩpêx xwỳnhjaja na htem mẽ piitã mẽ ho mex o axpẽn pyràk. Mě kot tãm amnhĩ nhĩpêx xwỳnhjaja nê mẽ kot amnhĩ tomnuj xwỳnhjaja nhũm mẽ ho hpimràatã mẽ ho mex o axpẽn pyràk.

⁴⁷—Nê na hte mẽ hkwỳjaja ãm amnhĩ kwỳjê pix mã kapěr mex o pa. Nom mẽ piitã tãm mẽ hipêx kêt nê. Nom kêr ka mẽ ã amnhĩ nhĩpêx anhỳr kêt nê. Kêr ka mẽ kurom mẽ piitã tãm mẽ hipêx o axpẽn pyràk. Mě akwỳjê mẽ mẽ akwỳ hkêt xwỳnhjaja ka mẽ hipêx o axpẽn pyràk. Nê tãm mẽ kãm akapěr o axpẽn pyràk.

⁴⁸Kaxkwa kamã Měpahpãm Tĩrtũm pyrà nê mẽ kot amnhĩ tomnuj xwỳnhjê mẽ mẽ kot amnhĩ to mex xwỳnhjaja mẽ ho apimràatã mẽ ho mex o axpẽn pyràk. Na hte ã Tĩrtũmja mẽ panhĩpêx anẽ. Anẽ.

Matêwre 6

Mě pahte mẽ kêp amrakati xwỳnhjê ho mex rãhã hã mẽ pamã karõ

¹⁻²Nhũm Jejus arĩ mẽ kãm kapër nẽ mẽ kãm: —Nẽ na htem mẽ piitã hkwỳjê noo mã tanhmã mẽ kêp amrakati xwỳnhjê ho mex to. Nom kãm mẽ hkaprĩ kamã tanhmã mẽ ho mex to hkêt nẽ. ãm hkwỳjaja kot ja hã mẽ omunh nẽ mẽ mex ã mẽ harẽnh pix kaxyw na htem krĩ hkôt ri mẽ kêp amrakati xwỳnh piitã mẽ ho mex o pa. Nẽ mẽ pikuprõnh xà hã ixkre kamã kuhê nẽ tanhmã mẽ ho mex to. Mẽ hkwỳjaja kot ja hã mẽ omunh nẽ amnhĩm mẽ mex ã mẽ ho jarkrar kaxyw. Jakamã koja nhỹrmã Tĩrtũmja axte ja hã mẽ kãm mẽmoj mex nhõr kêt nẽ. Ra jar mẽ hkwỳjaja kot ja hã mẽ omunh nẽ amnhĩm mẽ mex ã mẽ harẽnh kênã. Jakamã kwa kêr ka mẽ ho mẽ uràk kêt nẽ. Nẽ tanhmã mẽhõ ho mex to kaxyw nẽ akwỳjê no kuhpa hã mẽ hkàx ã tanhmã mẽ ho mex to. No kot kaj mẽ noo mã tanhmã mẽ ho mex to. Mẽ kot hã apumunh nẽ ato jarkrar kaxyw tanhmã mẽ ho mex to nhũm kaxkwa kamã Mẽpahpãmja ja hã apumu nẽ mẽ hã tanhmã ato mex to hkêt nẽ. Koja ãm hã apumu.

³—Ja pymaj kêr ka mẽ mẽ kêp amrakati xwỳnhjê mã mẽmoj nhõr kaxyw hãmri nẽ mẽ piitã mẽ no hkàx ã tanhmã mẽ ho mex to. Hãmri nẽ nhãm ri ja hã mẽ kãm amnhĩ to jarkrar kêt nẽ. Aprõ mã rỳ akrajê mã rỳ akràmnhwỳ mã hã amnhĩ jarẽnh kêt nẽ.

⁴Kot kaj mẽ no hkàx ã tanhmã ho mex to no nhũm Tĩrtũm tapxipix apumunh o nhỹ. Hãmri nẽ ja hã ato mex rax nẽ ka amex nẽ apa. Anẽ.

Tanhmã mẽ pahte Tĩrtũm mã amnhĩ jarẽnh to hã mẽ pamã karõ

Rukre 11.1-13; 18.9-14

⁵Nhũm Jejus arĩ mẽ kãm kapër nẽ mẽ kãm: —Nẽ mããnẽn ja. Na htem hakwa pix o amnhĩ mex ã amnhĩ jarẽnh xwỳnhjaja Tĩrtũm mã amnhĩ jarẽnh kaxyw nẽ mẽ kot Tĩrtũm kapër o mẽ ahkre xà hã ixkreja wỳr agjê. Nẽ mẽ piitã mẽ noo mã kãm tanhmã amnhĩ jarẽnh to. Rỳ gáp kuhê nẽ mẽ piitã mẽ noo mã kãm amnhĩ jarẽ. Tã mẽmo kaxyw na htem mẽ noo mã Tĩrtũm mã amnhĩ jarẽ? Nà ãm mẽ kot ja hã mẽ omunh nẽ mẽ mex ã mẽ ho jarkrar pix kaxyw. Nẽ mẽ harẽnh o: “E mũjti pumu. Na hte apkati mẽ ã Tĩrtũm mã amnhĩ jarẽnh anẽ. Kot amnhĩ to mex xwỳnh mãn.” Anhỹr ã harẽnh kaxyw. Tã ra mẽ piitã mẽ kot ja hã omunh nẽ amnhĩm mẽ mex ã ho jarkrar jakamã koja Tĩrtũm axte

ja hã tanhmã ho mex to hkêt nê. Ra pika ja kamã mẽ kot mẽ omunh nê mẽ mex ã mẽ harênh kênã.

⁶No mẽ kajaja. Kêr ka mẽ uràk nê ã amnhĩ nhĩpêx anhÿr kêt nê. ãm Tĩrtũm mã amnhĩ jarênh kaxyw nê akwÿjê no hkàx ã hitom wÿr agjê nê hitom kãm ahte kãm amnhĩ jarê. Hãmri nhũm Tĩrtũm tapxipix ja hã mẽ apumu. Mẽ amã amnhĩ to amnhĩrĩt kêt tã mẽ apumu. Hãmri nê mẽ ato mex nê.

⁷—Nê mẽ kêp Tĩrtũm kra hkêt xwÿnhjaja na htem sãnti mã amnhĩ jarênh kaxyw nê xatã kãm amnhĩ jarê. Nê xatã kàx pêê kãm amnhĩ jarê. Nê hamaxpêr o: “Kot paj xatã sãnti mã amnhĩ jarê nhũm inhmar japêr.” Anhÿr o hamaxpêr jakamã xatã kãm amnhĩ jarê. No ãm htÿx ã hamaxpêr anhÿr kaprÿ.

⁸Jakamã kwa kêr ka mẽ ho mẽ uràk kêt nê. Tĩrtũm ra kot mẽ ate mẽmoj tã hwÿr xàta ra ja kukamã kot omunh mex kênã kot ka kêt mẽ xatã hã hwÿr o akuhê.

⁹—Nê kêr ka mẽ kãm amnhĩ jarênh kaxyw nê amnhĩ krã hkôt tanhmã kãm amnhĩ jarênh to rÿ kãm amnhĩ jarênh o: Pa Měinhĩpêêxà maati pê kaxkwa kamã ri apa xwÿnh? Amex o amex Tĩrtũm.

¹⁰Apê mẽ ijamãr mex xwÿnh maati na ka. Na hte kaxkwa kamã mẽ kot ri amã tanhmã amnhĩ nhĩpêx to ho mẽ pa xwÿnhjaja akôt pix mã amnhĩ nhĩpêx o ri pa. Tã ijaxwÿja inhmã mẽ uràk nê akôt pix mã amnhĩ nhĩpêx o ri ixpa hprãm.

¹¹Nê kwa jarãhã mẽ inhmã mẽmoj gõ pa mẽ akukwak ri ho apku.

¹²Na pa hte tõiã amnhĩ tomnuj nê Tĩrtũm. Nom mẽ kot tanhmã ixtomnuj to xwÿnhjaja na pa hte ãm mẽ omu nê amnhĩ tã tanhmã mẽ ho hkêt nê. Nê ja ho ijamakêtkati nê axte kãm ijamaxpêr kêt nê. ã ixte amnhĩ nhĩpêx anhÿr jakamã kwa ja hã ixpumu nê ixpyrà nê ixte tanhmã amnhĩ tomnuj to hã ixpumu nê hã tanhmã ixto hkêt nê. ãm ho ajamakêtkati kurê kumrêx nê axte kãm ajamaxpêr kêt nê.

¹³Ně kot paj nhỹrmã tanhmã amnhĩ tomnuj to kaxyw ka ja hã ixpumu ně ixte ã amnhĩ nhĩpêx anhỹrja nê ixto htỳx ně pa tanhmã amnhĩ tomnuj to hkêt nê. ãm mẽmoj punuj pê ixpytâr rãhã ho apa Tĩrtũm. Tã ãm ja pix na hapêx. Anê. —E kêr ka mẽ ã Tĩrtũm mã amnhĩ jarênh anê. Anê.

¹⁴—Ně koja mẽhõ tanhmã anhĩpêx to htã ka ho ajamakêtkati ně axte kãm ajamaxpêr pix o ri apa hkêt nê. Hã koja kaxkwa kamã Měpahpãm maatija ja hã apumu ně apyrà ně tanhmã ate amnhĩ tomnuj to ho hamakêtkati ně axte kãm hamaxpêr kêt nê.

¹⁵Nom kot kaj mẽ ã amnhĩ nhĩpêx anhỹr kêt nê. Ně tanhmã mẽ kot mẽ atota ã anohtỳx rãhã ho apa hãmri nhũm Měpahpãm maatija mẽ apyrà ně mẽ ate tanhmã amnhĩ tomnuj to ho hamakêtkati hkêt nê. ãm hã nohtỳx rãhã ho pa ho pa. Anê.

Tanhmã mẽ pahte Tĩrtũm mã mex o mex ã harênh to

Rukre 18.11-12

¹⁶Nhũm Jejus arĩ mẽ kãm kapêr ně mẽ kãm: —Ně mẽ kot amnhĩ to jarkrar xwỳnhjaja na htem Tĩrtũm mã amnhĩ jarênh kaxyw hãmri ně tõhã ho apkur kêt rãhã kãm amnhĩ jarênh jakamã hkuk kaprĩ ně hkwyjê hkôt pa. Tã mo kaxyw na htem ã mẽ noo mã amnhĩ nhĩpêx anê? ãm mẽ apkur kêt rãhã Tĩrtũm mã amnhĩ jarênh ã mẽ omunh pix kaxyw. Tã ra jar pika ja kamã mẽ kot ja hã mẽ omunh jakamã koja Tĩrtũm nhỹrmã ja hã tanhmã mẽ ho mex to hkêt nê. Jakamã kwa kêr ka mẽ ho mẽ uràk kêt nê.

¹⁷Kêr ka mẽ tõhã Tĩrtũm mã amnhĩ jarênh ryy kaxyw axàpkur kaga hãmri ně amnhĩ krã kahõ ně amnhĩ jaxwỳr mux ně akuk kĩnh ně ri akwyjê hkôt apa.

¹⁸Hãmri ně nhỹri mẽ hkàx ã ahte kãm amnhĩ jarê ně kãm mex o mex ã harê. Kot kaj mẽ ã mẽ hkàx ã amnhĩ nhĩpêx anê nhũm mẽ akwyjaja mẽ axàpkur kaga hã mẽ apumunh kêt nê. Nhũm Tĩrtũm pix ja hã mẽ apumu. Hãmri ně nhỹrmã ja hã mẽ ato mex nê. Anê.

Kaxkwa kamã mẽmoj mex

Rukre 12.33-34; mãânên Sikũn Ximotre 4.8; Wam Pêtre 1.4; Eprêw 10.34

¹⁹Nhũm Jejus arĩ mẽ kãm kapër nẽ mẽ kãm: —Nẽ mãănẽn ja. Kêr ka mẽ jar pika ja kamã akukrêx rũnh o apa hkêt nẽ. Kêt jar mẽ hikukrêx koja kritpêm mex kêt nẽ. Kot kaj mẽ ho akuprõ nhũm amnhôre apê homnu rỳ paratre apê homnu. Nẽ kàx o mẽ akukrêx nhũm haxwỳja apê omnu rỳ nhũm mễhõ apê hkwỳ ho ahkĩ.

²⁰Jakamã kêr ka mẽ akukrêx rũnh o apa hkêt nẽ. Kaxkwa kamã Tĩrtũm kot mẽ akutêp mẽ akukrêx o pikuprõnhja na kêt mex kumrêx o jar mẽ hikukrêx jakrenh par. Jakamã kêr ka mẽ amã nhỹrmã kaxkwa kamã akukrêx mex prãm xàj tãm mẽ piitã tãm mẽ hipêx nẽ mẽ ho mex o ri apa. Nẽ mẽ kamã axukaprĩ nẽ. Nẽ Tĩrtũm kôt ri amnhĩ nhĩpêx mex nẽ. Hãmri nhũm ã mẽ ate amnhĩ nhĩpêx anhỹr ã mẽ apumu nẽ mẽ akutêp mẽ amã mẽmoj mex kwỳ jaxwỳ. Kaxkwa kamã mo amnhôre nẽ mo paratre? Nẽ kamã mo mẽ ahkĩnh xwỳnh? ãm kamã amrakati kumrêx.

²¹Kot kaj mẽ jar akukrêx rũnh hãmri nẽ ãm tanhmã apê homnu hto pix kukamã ajamaxpêr. Nom kot kaj mẽ apê Tĩrtũm kra hã kaxkwa kamã akukrêx mã ajamaxpêr rãhã ho ra akĩnh nẽ ri apa.

²²—Nẽ kot kaj mẽ ixkapêr ma nẽ ixkôt amnhĩ nhĩpêx hãmri nẽ tãm amnhĩ nhĩpêx. Nẽ tãm axpẽn hipêx. Jao te hirã kamã arĩt mex pyræk o amnhĩ nhĩpêx.

²³No koja mễhõ ixkapêr ma nẽ ãm kuma nẽ ixkwỳm ri amnhĩ nhĩpêx o pa. Hãmri nẽ te kamàt kô kamã mễhõ rĩt mex kêt kot amnhĩ nhĩpêx pyræk o amnhĩ nhĩpêx. E kêr ka mẽ ã amnhĩ nhĩpêx anhỹr pymaj ixkapêr ma nẽ kãm ajamaxpêr tỳx rãhã ho ri apa.

²⁴—Nẽ kot kaj apyxi nẽ anhõ patrãw hamẽxkrut hãmri nẽ arĩgro pyxi hã hamẽ wa kãm axàpênh o amỹkry hkêt nẽ. Kot kaj anẽ nẽ hõ gryk ã ihõ kaga. Ja pyrã nẽ kot kaj mẽ jar akàxpore nẽ akukrêx pix mã ajamaxpêr nẽ amã hapê ho akwỳjê pê ho anhõxỳ ho ri apa. Nẽ gryk ã Tĩrtũm kãm hprãm xà hkôt tanhmã ho mẽ ho mex to hkêt nẽ. Jakamã kwa kêr ka mẽ Tĩrtũm pix

mã mǎn ajamaxpěr rǎhǎ nĕ. Jao akàxpore nĕ akukrêx pix kukamǎ ajamaxpěr o ri apa hkĕt nĕ. Anĕ.

Mĕ pahte tee ri amnhĩ kukamǎ pajamaxpěr kĕt ǎ mĕ pamǎ karō

Rukre 12.22-31; mǎǎnĕn Piripos 4.6; Wam Pĕtre 5.7

²⁵Nhũm Jejus arĩ mĕ kǎm kapěr nĕ mĕ kǎm: —E. Kwa kĕr ka mĕ tee ri mĕmoj tǎ amnhĩ kukamǎ ajamaxpěr kĕt nĕ. Tanhmǎn axàpkur xà rỳ axê ka mĕ tee ri hkukamǎ ajamaxpěr kĕt nĕ. Mĕmoj piitǎ hkukamǎ tee ri ajamaxpěr o ri apa hkĕt nĕ. Tĩrtũmja àhpumunh tỳx o àhpumunh tỳx xwỳnh na. Na pre àhpumunh tỳx o mĕ anhĩpêx ka mĕ kukwak ri atĩr nĕ apa. Jakamǎ xà kot mĕ amǎ mĕ anhō ho pa kaxyw àhpumunh kĕt? Nà ja kaxyw àhpumunh tỳx kĕnǎ. Kĕp mĕ anhĩpêx xwỳnh jakamǎ mǎǎnĕn kĕp mĕ amǎ mĕ anhō xwỳnh. Nĕ kĕp mĕ amǎ mĕ axê nhōr xwỳnh.

²⁶—Mǎn ka htem kuwênhre pumu. Na hte tee ri amnhĩ xàpkur xà hkukamǎ hamaxpěr o hkaprĩ nĕ ri pa hkĕt nĕ. Mĕ anhĩpêxà maati tǎm na hte kǎm ò ho pa. Tǎ kǎm mĕ ajapê htỳx o kot kuwênhre jakrenh jakamǎ koja uràk nĕ mĕ amǎ mĕ anhō rǎhǎ ho pa.

²⁷—Nĕ xà kot kaj mĕ kritpĕm atĩr prǎm xàj ja pix kukamǎ ajamaxpěr rǎhǎ nĕ ra ajamaxpěr kĕt kritpĕm atĩr nĕ apa? Nà kot kaj mĕ anhỹr kĕt nĕ.

²⁸—Mǎn ka htem akunĩ kamǎ pixôrǎ pumu. Na hte tee ri tanhmǎ kute hkukamǎ hamaxpěr o ra hkaprĩ nĕ harir kĕt nĕ.

²⁹Tǎ nom muxre nĕ harir ka mĕ omu. Te ho amnepĕm pahihti Sarumǎw xê mex pyràk nom mex o hakre.

³⁰Pixôrǎreja koja mĕmo arĩgro hǎ htĩr nĕ mux nĕ harir tǎ mĕmo arĩgro hǎ ra grà pa nĕ hapêx. Kĕp pixôrǎ pix nĕ hapêx tokyx anhỹr tǎ nhũm Tĩrtũm ho mex nĕ nhũm mux nĕ harir. No mĕ kajaja na hte mĕ ato mex o pixôrǎ ho mexta jakre. Jakamǎ kwa mĕmo kaxyw kot ka kĕt mĕ tee ri amnhĩ xê hkukamǎ ajamaxpěr o ri akaprĩ nĕ apa? Kot kaj mĕ ǎ ajamaxpěr anhỹr jao kormǎ amnhĩ kaxyw Tĩrtũm mǎ ajamaxpěr tỳx kĕt nĕ.

³¹—Kwa mĕ tee ri axàpkur xà hkukamǎ ajamaxpěr o ri akaprĩ hkĕt nĕ. Nĕ tee ri amnhĩ kukamǎ tanhmǎ ajamaxpěr to ho ri akaprĩ hkĕt nĕ.

³²Mě kot Tĩrtũm kôt amnhĩ xunhwỳr kêt xwỳnhjaja na htem ã ri hamaxpěr anhỳr o pa. Tã nom kêr ka mẽ ho mẽ uràk kêt nẽ. Tĩrtũm ra kot mẽ panhõ mẽmoj kêt kôt mẽ pahpumunh mex kênã.

³³Jakamã kêr ka mẽ hkôt ri tanhmã amnhĩ nhĩpêx to rãhã ho ri apa. Nẽ amã ja pix tãnopxar prãm. Hãmri nhũm Tĩrtũm amnhĩ tã mẽ apumu nẽ apkati mẽ mẽ amã mẽmoj nhõr o pa.

³⁴—Jakamã kwa kêr ka mẽ tee ri amnhĩ kukamã ajamaxpěr o akaprĩ nẽ apa hkêt nẽ. Tĩrtũm kot apkati mẽ mẽ pajamãr mex jakamã kêr ka mẽ jarãhã amnhĩ kukamã apkati mẽ ajamaxpěr kêt nẽ. Kê apkati mãn. ãm jarãhã pix mã mãn mẽ ate tanhmã amnhĩ nhĩpêx tota kukamã ajamaxpěr. Tĩrtũm kot mẽ pahpumunh mex o pa rãhã kênã. Anẽ.

Matêwre 7

Mě pahte axpẽn to pakapěr punuj kêt ã kot mẽ pamã karõ

Rukre 6.37-38; 6.41-42; mããnẽn Rõmãn 2.1-3; Wam Korĩt 4.5; Xiakre 4.11-12

¹Nhũm Jejus arĩ mẽ kãm kapěr nẽ mẽ kãm: —Nẽ kêr ka mẽ atỳx ri amnhĩ krã hkôt tanhmã akwỳjê hõ kot amnhĩ tomnuj to hã harẽn h kêt nẽ. Kot kaj mẽ ã harẽn anẽ nhũm Tĩrtũm ja hã mẽ apumu nẽ mẽ kajaja ã mẽ ajarẽn anẽ.

²Na hte tanhmã mẽ pahte axpẽn nhĩpêx to hã mẽ pahpumunh kôt tanhmã mẽ panhĩpêx to.

³⁻⁵Jakamã kwa kêr ka mẽ mẽhõ kot tanhmã amnhĩ tomnuj to hã omu hãmri nẽ hã kãm kapěr tokyx anhỳr kêt nẽ. Akumrêx ate tanhmã amnhĩ tomnuj to hã amnhĩ pumu nẽ hkaga hãmri nẽ rĩ kormã ate mẽmoj tã omunh xwỳnhhta wỳr tẽ nẽ hã tanhmã kãm akapěr to. Kêr ka mẽ ã amnhĩ nhĩpêx anhỳr o ri apa. —Nẽ xà koja mẽ akwỳjê hõ tanhmã amnhĩ tomnuj to grire. Ka ate amnhĩ tomnuj tỳx o hakrenh tã ã kot amnhĩ nhĩpêx anhỳr ã omu nẽ hã kãm akir nhũm amã ja mex nẽ nà? Nà koja amã ja mex kêt nẽ. Kot ka akumrêx ate tanhmã amnhĩ tomnuj tota kaga hãmri nẽ rĩ kormã anhĩõ tanhmã kot amnhĩ tomnuj to gireta nê kãm akapěr nhũm ja amã mex nẽ.

6—Ně xà na htem mẽ apkur xà mex jamỳ ně rop mã kurě? Nà na htem anhỹr kêt ně. Ja pyrà ně kêr ka mẽ kot Tĩrtũm kaga xwỳnhjê mã kapěr jarěnh o ri apa hkêt ně. Aně.

Mẽ pahte mẽmoj to presija hã amnhĩ to Tĩrtũm wỳr

Makre 11.24; Rukre 11.5-13; Juãw 14.13-14; mããněn Wam Tesarõn 5.17; Xiakre 1.5-8; 4.1-3

7-11Nhũm Jejus arĩ mẽ kãm kapěr ně mẽ kãm: —Ně xà kot we akraja kãm prãm ně tep ã awỳ ka axtem ně kagã hõ py ně kãm agõ? Rỳ nhũm krãhyre gre hã awỳ ka axtem ně makre hõ py ně kãm agõ? Nà na ka htem ã mẽ hipêx anhỹr kêt. Na ka htem kot mẽmoj tã mẽ awỳr xà hkôt kãm mẽmoj gõ. Mẽ ate amnhĩ tomnuj tã na ka htem akrajê ho mex o ri apa. Tã kaxkwa kamã Tĩrtũmja na hte mẽ ato mex o mẽ ate mẽ akrajê ho mex jakrenh. Kãm mẽ ajapê htỳx kôt na hte mẽ amã mẽmoj mex nhõr o pa. Jakamã kot ka mẽ mẽmoj tã awỳ nhũm mẽ ama ně mẽ ate mẽmoj tã hwỳr xàta kôt amã kugõ. ãm xatã mẽ ate hã axàhwỳr o ri apaja nhũm mẽ amã hprãm xwỳnhhta gõ. ãm mẽmoj tã hwỳr rãhã ho ri apa nhũm mẽ ama ně mẽ amã mẽmoj tanhmã hipêx to. Te ho mẽhõ kãm tep xành ně teprẻnhxà hpỳr ně xatã gõx kãm rẻnh o ãm pyrà ně xatã mẽmoj tã awỳ. Hãmri nhũm mẽ ama ně mẽ amã hprãm xwỳnhhta gõ. Te tep kanhêr xwỳnhhta jatã kot tep kanhêr pyràk. Jao mẽ amã mẽmoj prãm xwỳnhhta gõ.

12—Ně mẽ piitã mẽ kot tãm mẽ anhĩpêxja na mẽ amã hprãm. Tã kêr ka mẽ amnhĩ pyrà ně tãm mẽ piitã mẽ hipêx o ri apa. Mẽ kot tãm mẽ anhĩpêx kêt tã kêr ka mẽ axàmnhĩx mẽ kêp anhõxỳ hkêt ně tãm mẽ hipêx. Kot kaj mẽ ã axpẻn nhĩpêx aně ně finat Mojes mẽ Tĩrtũm nhỹ hã mẽ kapěr o mẽ pa xwỳnhjê xujarẻnh xà hkôt axpẻn nhĩpêx mex o ri apa. Aně.

Pry pijakrut jarẻnh

Rukre 13.24; mããněn Piripos 3.19-21

13-14Nhũm Jejus arĩ mẽ kãm kapěr ně mẽ kãm: —Tĩrtũm kapẻrja mẽ kêp hihtỳx jakamã na htem ohtô ně hkôt amnhĩ xunhwỳr kêt ně. Na htem ãm hpỳnhre ně hkôt amnhĩ xunhwỳr ně hkôt amnhĩ nhĩpêx. Jakamã te Tĩrtũm nhõ krĩ hwỳr pry grireta ã hpỳnhre ně pa pyràk. No nhũm Satanasti hkôt mẽ kot amnhĩ xunhwỳr xwỳnhjaja na htem Satanasti kôt pix mã tanhmã amnhĩ tomnuj to hprãm. Mẽ kãm mex jakamã nhũm mẽ amnhĩ nhĩpêx o te

pry krepak rax ã axpën kôt mẽ ohtô nẽ pa pyræk o amnhĩ nhĩpêx. Axtem kuwy hwỳr pry krepakja nõr tã nhũm mẽ htỳx kuwyja wỳr amnhĩ to pa. Jakamã Tĩrtũm kapêrja mẽ apê hihtỳx tã kêr ka mẽ mãmri hkôt amnhĩ xunhwỳ. Jao Tĩrtũm nhõ krĩ hwỳr pry grireta ã mãn apa. Anẽ.

Mẽ kot amnhĩ to hêx xwỳnhjê jarênh

Rukre 6.43-44; määnên Xiakre 3.9-12; Wam Juãw 3.10; 4.4-6

¹⁵Nhũm Jejus arĩ mẽ kãm kapêr nẽ mẽ kãm: —E kwa mẽ o kora. Mẽ akwỳjaja kot kêp Tĩrtũm nhỹ hã kapêr jarênh xwỳnh ã amnhĩ jarênh tã na htem ja hã amnhĩ to hêx. Nhũm htem kãm mẽ kapêr mar prãm nẽ. Te mẽ kapêr mex pyræk tã no nhũm htem ãm mẽ kãm amnhĩ to hêx pix o ri mẽ hkôt pa. Mẽ kot mar nẽ axtem nẽ Tĩrtũm kapêr kwỳm tanhmã amnhĩ nhĩpêx to kaxyw nhũm htem hêx rom tanhmã mẽ kãm kapêr to. Jakamã kwa mẽ o kora. Mẽ axkãm ajamak rom nẽ amnhĩ nê mẽ omunh mex nẽ.

¹⁶Kêr ka aprĩ hã mẽ piitã mẽ kot tanhmã amnhĩ nhĩpêx to hã mẽ omu nẽ rĩ kormã tanhmã mẽ harênh to. Mẽ hamaxpêr punuj xwỳnhjaja kêp Tĩrtũm nhỹ hã kapêr jarênh xwỳnh kêt. No koja mẽ tãm hamaxpêr nẽ tãm amnhĩ nhĩpêx ka ja hã mẽ omu nẽ mẽ kêp Tĩrtũm nhỹ hã kapêr jarênh xwỳnh ã mẽ omunh kurê kumrêx. Na htem hprĩ hã mẽ kot tanhmã amnhĩ nhĩpêx to ho pa hã mẽ omu nẽ rĩ kormã tanhmã mẽ harênh to.

¹⁷Na htem hamaxpêr punuj hãmri nẽ hkôt tanhmã amnhĩ tomnuj to. Nom koja mẽhõ hamaxpêr mex nẽ hãmri nẽ hkôt tãm amnhĩ nhĩpêx mex o pa.

¹⁸Na htem tanhmã hamaxpêr to xà hkôt tanhmã amnhĩ nhĩpêx to ho pa.

¹⁹—Nẽ koja mẽhõ õ pĩ hpàr ô hkêt japêr nhũm tee ri omu hãmri nẽ krãhta nẽ kuwym kumẽ. Ja pyrà nẽ koja mẽhõ tanhmã amnhĩ tomnuj to ho pa nhũm Tĩrtũm tee ri ja hã omu hãmri nẽ ã kot amnhĩ nhĩpêx anhỳr o paja mỳrapê kuwy hwỳr kumẽ.

²⁰Jakamã kot kaj mẽ tanhmã mẽ kot amnhĩ nhĩpêx to ho pa hã akwỳjê pumu nẽ ra aprĩ hã tanhmã mẽ kute hã mẽ omunh kurê kumrêx. Mẽ kêp Tĩrtũm nhỹ hã kapêr xwỳnh ã mẽ omu rỳ mẽ kêp hkwỳm ri kapêr xwỳnh ã mẽ omu. Anẽ.

Mê kot Tirtûm nhô krî hwÿr gjêx mã xwÿnhjê jarênh

Rukre 13.25-27; mãânên Sikûn Korîť 13.5; Wam Juãw 2.3-6

21-23Nhũm Jejus arĩ mẽ kãm kapêr nê mẽ kãm: —Nê Inhĩpêxà Tirtûm mẽ wa inhô krĩja wÿr koja mẽ piitã gjêx kêt nê. ãm mẽ kot kapêr kôt amnhĩ nhĩpêx o mẽ pa xwÿnh pixjaja koja mẽ nhÿrmã ma hwÿr agjê. Na hte mẽ hkwÿjaja ixto “Pahihti” anhÿr ã ijarênh tã no ãm ixkôt ri amnhĩ nhĩpêx kêt nê. Jakamã koja mẽ nhÿrmã wa inhô krĩ hwÿr àpir kêt nê. Kot paj nhÿrmã mẽ piitã mẽ htĩr ri tanhmã mẽ kot amnhĩ nhĩpêx to ho pa hã mẽ omunh xà hkôt tanhmã mẽ harênh to. Mẽ mex ã mẽ hkwÿjê jarê nê mẽ kot amnhĩ tomnuj ã mẽ hkwÿjê jarê. Hãmri nhũm mẽ hkwÿ kot ixkôt amnhĩ nhĩpêx o pa hkôt xwÿnhjaja kuwyta wÿr ma pa pymaj tee ri amnhĩ kukamã hamaxpêr hãmri nê tanhmã inhmã amnhĩ jarênh to nê inhmã: “Kwa Jejus. Xà ate ixpumunh kêt? Na pa pre amnepêm ixtĩr ri pikap ixpare ri anhÿ hã aa mẽ kot mẽmoj pumunh kêt kwÿ ho anhÿr rax nê. Nê ixkwÿjê nê mẽkarõmnuti jano nê mẽ kãm akapêr jarênh o ri ixpa. Kwa xà ate ja hã ixpumunh kêt?” Anhÿr o inhmã amnhĩ jarê. —Nom mẽ htĩr ri ã mẽ kot amnhĩ nhĩpêx anhÿr o pa htã ixkapêr kôt amnhĩ nhĩpêx kêt jakamã kot paj mẽ kuma nê ãm mẽ kuma nê amnhĩ nê mẽ hano nê mẽ kãm: “Tk kwa mẽ ma mra. Mẽ apê ixkwÿ hkêt. Mẽ ate ixkôt amnhĩ nhĩpêx o apare hã. ãm mẽ ate amnhĩ tomnuj xwÿnh na ka mẽ. E mẽ ma kuwy hwÿr amrar kurê kumrêx.” Anhÿr o kot paj amnhĩ nê mẽ hano. Hãmri nhũm mẽ kot ixkôt amnhĩ nhĩpêx o mẽ pa xwÿnh pixjaja ma Tirtûm mẽ wa inhô krĩ hwÿr gjêx pa. Anê.

Ixkre pijakrut jarênh

Rukre 6.46-49; mãânên Xiakre 1.22-25; Wam Juãw 2.3-6

24Nhũm Jejus arĩ mẽ kãm kapêr nê mẽ kãm: —E kot paj mẽ amã awjarê ka mẽ ixujarênh ma. Nà mẽ kot ixkapêr mar nê hkôt amnhĩ nhĩpêx o mẽ pa xwÿnhjaja te mẽ kot ixujarênh ja pyræk. Mẽ kot amnhĩ nhĩpêx o te mẽhõ kot amnhĩ kukamã hamaxpêr mex nê aptÿx kãm amnhĩm òrkwÿ nhĩpêxja pyræk.

25Koja mẽhõ aptÿx kãm amnhĩm hipêx nhũm mẽmo arĩgro hã na wrÿk rax nê gô htàm rax nê hanhi no nhũm arĩ ãm tÿx nê xa. Tã kot kaj mẽ ixkôt amnhĩ nhĩpêx o ri apa hã kot kaj mẽ te ixkre ja pyræk. Jao amex nê

ajamakêtkati nê ri apa. Te ho gô htàm kot ixkre janhir nhũm arĩ ãm tỳxta pyræk.

26-27—No mẽ kot ixkapêr mar nê ãm mar xwỳnhjaja. Te mẽ kot mễhõ kot amnhĩ kukamã hamaxpêr mex kêt nê htỳx mõi nê gô mỳri gyw rerek kãm amnhĩm òrkwỹ nhĩpêx pyræk. Koja mẽmo arĩgro hã òrkwỹ hã kòk xàpêr tỳx nê na wrỳk rax nê. Nê gô htàm nê hanhi nê kêp grành pa. Jakamã koja mẽhõ ixkòt amnhĩ nhĩpêx kêt nê te kot ã kot amnhĩ nhĩpêx anhỹr xwỳnhhta pyræk. Jakamã kwa mẽ ixkapêr mar tỳx nê hkòt amnhĩ nhĩpêx rãhã ho ri apa. Te mẽhõ aptỳx kãm òrkwỹ xãm xwỳnhhta pyræk. Anẽ.

28Nhũm pre Jejusja ã mẽ kãm ujarênh ry anẽ nhũm mẽ amnhĩ jaêr pê kot tanhmã mẽ ahkre htoja mar o hkrĩ.

29Hãmri nê axpên mã harênh o: —Hêxta waa nê. ãm hãmri na ã mẽ pamã kapêr anẽ. àhpumunh tỳx kòt na hte ãm hãmri tanhmã mẽ pamã ujarênh to. Pêr ãm Tĩrtũm kapêr tũm o mẽ ahkre xwỳnhjê kurom àhpumunh tỳx kumrêx. Anẽ.

Matêwre 8

Kà nhy hkro xàpêr o pa xwỳnh jarênh

Makre 1.40-45; Rukre 5.12-16

1Tã nhũm Jejus mẽ kãm kapêr pa hãmri nê hixêt prêeta rũm akupỹn wrỳ nê ma tẽ nhũm mẽ ohtô nê ma hkòt mra.

2Hãmri nhũm mẽhõ my hkà nhy hkro xàpêr o pa xwỳnhja omu nê hwỳr tẽ. Hãmri nê kutã hkõnkrã ho tẽm nê hipô nê nhỹ nê amnhĩ to kuwỳ nê kãm: —Pa Pahihti. E ot pa awỳr amnhĩ to tẽ. Akupỹm ate mẽ ixto mex kaxyw axàhpumunh tỳx jakamã kot ka amã akupỹm ixto mex prãm nê mãmri ixto mex. Anẽ.

3Hãmri nhũm Jejus kuma nê hkà punuti hã ìhkra xi. Amnhĩ kamã kahak kêt nê hã ìhkra xi nê kãm: —Nà kot paj ato mex. E akupỹm akà mex. Anẽ. Hãmri nhũm hkà akupỹm mex kurê kumrêx.

⁴Hāmri nhūm Jejus kām: —E kêr ka amnhĩ tã mẽ kãm tanhmã ijarēnh to hkêt rãhã ma patre hwỳr tẽ kê akupỹm akà mex ã apumu. Hāmri ka hpãnhã amnepēm finat Mojes kot mẽ ate akupỹm amex ã Tĩrtũm mã tanhmã amnhĩ nhĩpêx to hã karõta ka kãm ho anẽ. Kê mẽ piitã akupỹm akà mex ã apumu. Anẽ.

Pôristi krãhtũm mã àpênh xwỳnh jarēnh

Rukre 7.1-10

⁵Tã nhūm Jejus ma krĩ pẽ Kapanaũ hwỳr mõi. Hāmri nẽ hwỳr pøj nhūm Rõm nhõ xwỳnh pẽ pôristi krãhtũmja omu nẽ hwỳr tẽ. Kêp Ijaew kêr tã hwỳr tẽ. Na pre kãm àpênh xwỳnh kêp à htỳx nẽ nõ nhūm omu nẽ tee ri hkukamã hamaxpêr. Hāmri nẽ Jejus ra õ krĩ hwỳr hpõx ã omu nẽ hwỳr tẽ nẽ kãm harẽ nẽ kãm:

⁶—Pa Jejus? E ot pa awỳr tẽ. Inhmã àpênh xwỳnhja na ixpê à htỳx nẽ. Ra ã kamã htyk pa nẽ nõ. O mũj inhõrkwỹ kamã nõ. Anẽ.

⁷Nhūm Jejus kuma nẽ kãm: —Tỳ? Tôe. Nà pa ma akõt tẽ nẽ akupỹm amã ho mex. Anẽ.

⁸⁻⁹Hāmri nhūm tee ri kuma nẽ kãm: —Kwa akĩnhã ixpê Ijaew kêr jakamã ixte amnhĩ kuk ã ixpijaàm. ãm ja rũm mãn akapêr pix o akupỹm inhmã ho mex nà? Ixpê mẽ hkrãhtũm na pa hte inhõ pôristi mã mẽmoj tã karõ nhūm mẽ inhmar xà hkõt inhmã mẽmoj tanhmã ho. Na pa hte mẽ kãm: “E mẽ ma mra nẽ ã amnhĩ nhĩpêx anẽ.” Anẽ nhūm htem inhma nẽ ma mrar kurê kumrêx. Rỳ pa mẽ kãm: “E mẽ amnẽ ixwỳr mra nẽ ã amnhĩ nhĩpêx anẽ.” Anẽ nhūm mẽ inhma nẽ ixwỳr mra. No kêr ixrom axàhpumunh tỳx kõt na ka hte mẽ àja mã akapêr nhūm ama nẽ mẽ kêp hapõx nẽ ma mrar kurê kumrêx. Jakamã kwa ãm ja rũm akapêr pix o akupỹm inhmã ho mex nà? Anẽ.

¹⁰Hāmri nhūm Jejus amnhĩ jaêr pẽ kot kãm ã kapêr anhỳrta ma nẽ hkĩnh nẽ. Hāmri nẽ hã hkõt ri mẽ mõi xwỳnhjê mã kãm: —Kwa xà na ka mẽmyja kapêr ma? Mẽ pahkĩnh ã kêp Ijaew kêr tã mẽ arom amnhĩ kaxyw inhmã hamaxpêr tỳx nẽ. Aa mẽ atõ uràk nẽ ã amnhĩ kaxyw inhmã ajamaxpêr tỳx

anhÿr kêt tã nhũm mẽ arom kãm àpênh xwÿnh kaxyw ã inhmã hamaxpêr tÿx anê.

11Nà koja nhÿrmã mẽ hkwÿjaja kêp Ijaew kêt tã ohtô nê pika piitã kurũm ma Tĩrtũm mẽ wa inhõ krĩ hwÿr api nê hwÿr agjê. Nê wa ixkuri wa inhõ krĩ kamã Ijaew pàr krax pê Apraãw nê Ijak nê Jako mẽ pimràatã pa ho pa. Mẽ kêp Ijaew kêt tã mẽ ìhkô hã apkur mex o hkrĩ nhũm Tĩrtũm mẽ ho mex rax o pa.

12No pêr mẽ apê Ijaew kwÿjaja kot kaj mẽ hkôt hwÿr agjêx kêt nê. Tĩrtũm kãm hwÿr mẽ agjêx prãm tã ka mẽ axtem nê hkaga. Jakamã kot kaj mẽ ma kamàt kô xihtÿx rax wÿr ajapêx nê mẽ kêp awry rax nê mẽ kot amnhĩ xà htÿx kamã hamak tũm xàta kamã apa ho apa. Hãmri nê tee ri mẽ ixwÿr agjêx prãm kaprÿ nê akaprĩ xàj mur nê amnhĩ kamã agryk tÿx nê. No ãm tee ri amnhĩ kamã agryk kaprÿ. Mẽ ate Tĩrtũm kapêr kaga nê hkôt amnhĩ xunhwÿr kêt jakamã kot kaj mẽ nhÿrmã ã amnhĩ nhĩpêx anê. Anê.

13Nhũm pre ã Jejusja mẽ kãm kapêr anê. Hãmri nê pôristi krãhtũmta mã kãm: —E mãmrĩ ma akupÿm tẽ nê amã àpênh xwÿnhhta pumu. Ra ate kaxyw inhmã ajamaxpêr tÿx jakamã na pa ra akupÿm amã ho mex. E akupÿm tẽ nê omu. Anhÿr o kãm kapêr rôm nhũm ra akupÿm kãm mex kurê kumrêx.

Jejus kot ahpÿnhã mẽ à xwÿnhjê ho mex

Makre 1.29-31; Rukre 4.38-41

14Tã nhũm Jejus ma Simãw Pêtre nhõrkwÿ hwÿr tẽ nê hwÿr axà. Nhũm Simãw Pêtre xupãnhgêx ra à nê hkà kagro htÿx nê nõ.

15Hãmri nhũm Jejus hwÿr axà nê omu nê ìhkra hã kupy nhũm hkà hakry nê akupÿm hihtÿx kurê kumrêx. Jakamã kànhmã nhÿ nê mẽ kãm mẽõ hã àpênh o ri mra.

16Tã nhũm ra awjakry. Ra kamàtre ho mõi nhũm mẽ piitã Jejus wÿr mẽ à xwÿnhjê ho mra. Nê mẽkarõmnuti kot mẽ hwÿr gjêx xwÿnhjaja nhũm mẽ hwÿr mẽ o mra. Hãmri nhũm mẽ omu nê akupÿm mẽ piitã mẽ ho mex. Mẽ à xwÿnhjê ho mex nê mẽ hkwÿjê nê mẽkarõmnuti jano. ãm kapêr pix o mẽ nê mẽ hano nhũm mẽ kêp hapôj nê ma hapêx.

¹⁷Na pre ra Tirtüm nhỹ hã kapër xwỳnh finat Ijaisja ã amnhĩ nhĩpêx anhỹrja kukamã amnepêm mẽ kãm harênh o: Tirtüm kot mẽ pahwỳr mênh mã xwỳnhja koja nhỹrmã wrỳ nẽ mẽ panê mẽ paxà piitã rênh pa nẽ akupỹm mẽ pahto mex pa. Anẽ. Na pre ã finat Ijaisja Jejus kukamã harênh anẽ. Tã nhũm wrỳ nẽ kot harênh xà hkôt ã amnhĩ nhĩpêx anhỹr o pa.

Wa kãm Jejus kôt amnhĩ xãm prãm xwỳnh wa harênh

Rukre 9.57-62

¹⁸Tã nhũm Jejus amnhĩ pu hã rít nẽ tee ri hwỳr mẽ mrar xwỳnhjê pumu hãmri nẽ hkôt mẽ pa ho mẽ pa xwỳnhjê mã kãm: —E ma pu mẽ pàr mã agjê nẽ ma xarmã mỗ. Anẽ.

¹⁹Hãmri nhũm mẽ nojarêr rôm nhũm Tirtüm kapër tũm o mẽ ahkre xwỳnhjê hõ Jejus wỳr tẽ nẽ kãm: —Pa mẽ ijahkre xwỳnh? E pa ma akôt ri ixpa ho ixpa nà. Anẽ.

²⁰Hãmri nhũm kuma nẽ kãm: —Ko ka mã. Kam nẽ rĩ ma ixkôt ri apa. Nom kêr ka inhmar kumrêx. Xore na hte pika hkre kamã hikwỹ. Nẽ kuwênhre pĩ nhĩmõk ã hikwỹ. No pa ixpê Tirtüm kot mẽ awỳr inhmênh xwỳnh tã mry hkĩnhã inhõrkwỹ hkêt. Na pa hte amarĩ nhãm krĩ hwỳr ixpa nẽ nhãm hõ hwỳr ixpa. Tã xà kot ka ixpyrà nẽ ã amnhĩ nhĩpêx anhỹr o ri apa nà? Anẽ.

²¹Hãmri nhũm pãnhã hõja hwỳr tẽ. Ra mẽ kot hkôt amnhĩ xunhwỳr xwỳnhjê hõja hwỳr tẽ nẽ kãm: —Pa Pahihti. E pa amã amnhĩ jarê ka inhma. Kot paj ma akôt ixpa ho ixpa no ãm kormã. Koja nhỹrmã inhĩpêxà tanhmã amnhĩ to nẽ ty măn. Pa haxà hãmri nẽ rĩ kormã ma akôt ixpa ho ixpa. Anẽ.

²²Hãmri nhũm kuma nẽ kãm: —Kwa nà ri ã ajamxpêr anhỹr kêt nẽ. Ma ixkôt apa ho apa kurê kumrêx. Kê mẽmoj inhnê ano kupyrrỳ apê àmnàr kêt nẽ. Kwār mẽ htĩr tũm nẽ mẽ pa hkêt mã xwỳnhjaja măn axwakre kamã amã anhĩpêxà jamār o pa nẽ haxà. Anẽ.

Jejus kot kôk o pinhkrênh jarênh

Makre 4.35-41; Rukre 8.22-25

²³Tã nhũm mẽ ra xarmã nojarêr nhũm Jejus mẽ hkôt mẽ pa ho mẽ pa xwỳnhjaja pàr wỳr agjê hãmri nẽ himô raxja ã ma xarmã mỗ.

²⁴Hāmri nhũm Jejus ra õtxwa nẽ ra gõr nẽ nõ. Puh nhũm naja hkoko ho mõ nẽ kôk xàpêr tỳx kumrẽx. Nhũm gô kànhmã harĩ nẽ axpẽn tak tỳx nẽ. Xatã axpẽn tak nẽ pàr kre kamã axkapĩ nhũm ra àr o mõ. Hāmri nhũm mẽ tee ri omu nẽ kãm ma htỳx kumrẽx. Nẽ tee ri amnhĩ nhĩpêx. No nhũm Jejusja htỳx gõr nẽ nõ.

²⁵Hāmri nhũm mẽ hwỳr hprõt nẽ kumra nẽ kãm: —Kwa Pahihti. Kot puj mẽ jarãhã pahtyk pa. Kwa tokyx kànhmã nhỹ nẽ ri tanhmã amnhĩ nhĩpêx to wehe. Anẽ.

²⁶Hāmri nhũm hkrãkato nẽ kànhmã nhỹ nẽ kôk mã kapêr nẽ kãm: —E kwa hāmri anhĩkrê. Anẽ. Puh nhũm hpinhkrênh pa nhũm gôja tãm nõi kurê kumrẽx. Hāmri nhũm Jejusja hkõt mẽ pa ho mẽ pa xwỳnhjê hwỳr apkjê nẽ mẽ kãm: —Hêxta waa nẽ. Kwa pêr ãm kormã te mẽ ate amnhĩ kaxyw Tĩrtũm mẽ wa inhmã ajamaxpêr tỳx kêt pyræk. Hã na ka mẽ amã ma xàj tee ri amnhĩ kukamã ajamaxpêr. Anẽ.

²⁷Hāmri nhũm mẽ amnhĩ jaêr pê ã kot amnhĩ nhĩpêx anhỹrja ã omu nẽ tee ri hamaxpêr nẽ axpẽn pumunh pê omunh o kuhê. Hāmri nẽ axpẽn mã: —Kokỹỹ. Pêr Jejus kêp mẽ panhĩõ hkêt. Mẽ pahtõ kot pu we te kot amnhĩ nhĩpêx pyrã nẽ kôk mã pakapêr nhũm hpinhkrênh kurê kumrẽx? Nã Jejusja mẽ pakurom àhpumunh tỳx o àhpumunh tỳx. Anẽ.

Jejus kot wa nê mẽkarõmnuti janor

Makre 5.1-20; Rukre 8.26-39

²⁸Tã nhũm mẽ ra himô rax pê Garirejja ã rê nẽ pika pê Geras wỳr pøj nẽ kamã mõ. Hāmri nhũm ra mẽhõ myja wa hamẽxkrut nẽ mẽ kutã tẽ. Ra mẽkarõmnuti kot hamẽ wa hwỳr gjêx xwỳnhja wa. Mẽkarõmnuti xohtô kot tanhmã wa ho jakamã nhũm wa oprê htỳx nẽ hihtỳx rax nẽ wa pa. Jakamã nhũm mẽ piitã kãm wa uma nẽ amnhĩ nê mẽ htykjê jagjênh xà hã kẽn kre kaêx kãm wa kumẽ nhũm wa kamã pa ho pa. Jakamã nhũm wa Jejus kutã tẽ nẽ amnhĩ wỳr omu hāmri nẽ amnhĩ nê tanhmã kãm kapêr to. Nom mẽkarõmnuti nhỹ hã àmra kamã kãm kapêr nẽ kãm:

²⁹—Pa Tirtũm Kra Jejus? Mo kaxyw na ka mẽ ixwỳr tẽ? Kwa tanhmã mẽ ixto hkêt nẽ. Ate tanhmã mẽ ixtomnu hto hã arĩgrota kormã katoore hã. Anẽ.

³⁰Nhũm ra krĩ nhõ xwỳnhjê hkrit hagrô ohtô nẽ ri mẽ hpum pa.

³¹Nhũm mẽkarõmnuti mẽ omu hãmri nẽ amnhĩ to Jejus wỳ nẽ kãm: —Kwa kot ka jahti wa nê mẽ ijapôx japêr nẽ mẽ kot amnhĩ xà htỳx kamã hamak tũm xàta wỳr mẽ ixrẽnh kêt nẽ. Hagrô hkwỳ mỳj wỳr mãn mẽ ixrẽ pa mẽ hpãnhã hwỳr mãn hagjê nà? Anẽ.

³²Hãmri nhũm mẽ kuma nẽ mẽ kãm: —Tôe mẽ tãm mẽ hwỳr mãn mra. Anẽ. Hãmri nhũm mẽ kuma nẽ myta wa kêp hapôj nẽ hagrô hwỳr mrar kurê kumrẽx nẽ hpãnhã kãm gjêx pa. Hãmri nhũm hagrôta mẽkarõmnuti pymaj amỹra nẽ ma hprôt nẽ himô hã hixêt prêk ã axpum rôrôk nẽ gôx kãm mrõ nẽ pikaprãr pa.

³³Hãmri nhũm hagrô jamãr o ri mẽ pa xwỳnhjaja tee ri omu hãmri nẽ ma akupỹm krĩm hprôt nẽ mẽ kãm awjarẽ. Nẽ myta wa akupỹm tãm hkrã hã harẽnh o hprôt.

³⁴Hãmri nhũm krĩ nhõ xwỳnhjaja tee ri mẽ hkrit jarẽnh ma nẽ ma piitã Jejus wỳr mra nẽ hkaxpa. Hãmri nẽ amnhĩ nê kãm: —E kwa mẽ ma amrar kurê kumrẽx. Anẽ. Hãmri nhũm mẽ kuma nẽ awjanã nẽ ma akupỹm pan rê.

Matêwre 9

ĩ kamã htyk xwỳnh jarẽnh

Makre 2.1-12; Rukre 5.17-26; Juãw 10.37-38

¹Nhũm Jejus mẽ hkôt mẽ pa ho mẽ pa xwỳnhjaja awjanã nẽ ma akupỹm pàr wỳr mra nẽ gjêx pa nẽ akupỹm xarmã rê nẽ akupỹm Jejus nhõ krĩ hwỳr mõ.

²Hãmri nẽ hwỳr pôj nhũm krĩ nhõ xwỳnh kwỳjaja mẽ omu nẽ ã kamã htyk xwỳnhja mỳ nẽ Jejus wỳr o tẽ. Nõr xà kamã nõr rãhã nhũm mẽ hã hije nẽ kumỳ nẽ hwỳr o tẽ. Hãmri nhũm amnhĩ tã mẽ omu. Ra mẽ kot hkràmnhwỳta kaxyw kãm hamaxpêr tỳx ã mẽ omu nẽ ã kamã htyk xwỳnhhta mã kapêr nẽ kãm: —Pa? Kwa tee ri amnhĩ kukamã ajamaxpêr kêt nẽ. Na pa ra apê

tanhmã ate amnhĩ tomnuj to ho ijapêx pa. Kot paj axte kãm ijamaxpêr kêt nê. Anê.

³Hãmri nhũm Tĩrtũm kapêr tũm o mẽ ahkre xwỳnhjaja tee ri ã kot kãm kapêr anhỹrja ã kuma nê axpên mã: —Tk. Kwa mẽhõ myti mũj kêp Tĩrtũm kêt tã te ri kot amnhĩ nhĩpêx pyræk ã amnhĩ nhĩpêx. Tĩrtũm pix na kot mẽ nê mẽ kot amnhĩ tomnuj o hapêx xwỳnh. Anê.

⁴Hãmri nhũm Jejus amnhĩ tã mẽ kuma nê mẽ kãm: —Kwa mẽ ã ajamaxpêr anhỹr kêt nê.

⁵Ixte mẽ nê mẽ kot amnhĩ tomnuj o ijapêx par ã amnhĩ jarênh tã mẽ ate ja kôt ixpumunh kêt jakamã na ka mẽ ja kaxyw ixkôt ajamaxpêr kêt nê. Nom kot paj mẽ anoo mã akupỹm ĩ kamã htyk xwỳnhhta o mex ka mẽ apiitã hã ixpumu hãmri nê ixkôt ajamaxpêr kurê kumrêx. Ixpê Tĩrtũm kot mẽ awỳr inhmênh xwỳnhhta na pa. Ixte mẽ anê mẽ ate amnhĩ tomnuj rênh kaxyw na pre mẽ awỳr inhmê pa mẽ awỳr wrỳ.

⁶Tã mẽ ate ja hã ixpumunh kaxyw kot paj mẽ anoo mã ja ho mex. Anhỹr o mẽ kãm amnhĩ jarê hãmri nê ĩ kamã htyk xwỳnhhta mã kãm: —E kànhmã xa nê anõr xàta py nê ma akupỹm anhõrkwỹ hwỳr tẽ. Anê.

⁷Puh nhũm kànhmã ãm kurê kumrêx nê nõr xà py nê mẽ noo mã kato nê ma akupỹm õrkwỹ hwỳr tẽ.

⁸Hãmri nhũm mẽ piitã no hapôx rũnh nê omunh o kuhê nê kamã no pyma htỳx nê. Nê tee ri omu nê axpên mã: —Kokỹỹ. Kwa aa mẽ pahte ã mẽhõ kot amnhĩ nhĩpêx anhỹr ã omunh kêt tã jarãhã ja pumu. Anhỹr o Jejus jarê hãmri nê y hã Tĩrtũm mã mex o mex ã harê.

Jejus kot amnhĩ kôt Matêwre hwỳr

Makre 2.13-17; Rukre 5.27-32

⁹Tã nhũm Jejus mẽ kêp kato nê hkôt mẽ pa xwỳnhjê mẽ nhũm mẽ ma mõ. Hãmri nê pa ixpê Matêwre ixpumu. Ixte Rõm kãm mẽ ho amnhĩptàr xwỳnh mã krĩ nhõ xwỳnhjê pê kàxpore hkwỳ jamỳnh xwỳnh na pa pre. Nom mẽ kot ho tewên kryre htã ixte amnhĩm hkwỳ ho ixàrik prãm xàj na pa pre hte mẽ kãm ho rũnh nê harê. Jakamã nhũm mẽ piitã kãm ixkĩnh kêt nê. Tã pa

pre mẽ kêp kàxpore jamỳnh xà hã ixkre kamã mẽ kêp hamỳnh o nhỹ nhũm Jejus mẽ hkwyjaja ijãnh mra nẽ ixpumu nẽ amnhĩ kôt ixwỳ nẽ inhmã: — Pa? E axàpênhta kaga nẽ hpãnhã amnẽ mẽ ixkôt măn tẽ nẽ ixkôt măn ri apa ho apa. Anẽ. Hãmri pa kuma nẽ ixàpênh kaga nẽ ma hkôt tẽ. Nẽ hpãnhã hkôt ixpa ho ixpa.

10Hãmri nẽ mẽmo arĩgro hã amnhĩ nhõrkwy hwỳr Jejus nẽ hkôt mẽ pa ho pa xwỳnhjaja mẽ ixkràmnhwỳ hkwyjê hwỳ. Nhũm mẽ piitã mra nẽ inhõrkwy hwỳr agjê nẽ ixkutã apkur o hkrĩ. Nẽ ixpyrà nẽ Rõm nhõ pahi mã mẽ kêp kàxpore hkwy jamỳnh xwỳnh kwỳ haxwỳja ixwỳr mra nẽ mẽ ixkutã apkur o hkrĩ.

11Hãmri nhũm Parijew nhõ xwỳnhjaja mra nẽ inhõrkwy kapem mẽ ixàpkur ã mẽ ixpumu. Nẽ tee ri mẽ ixkaêx ã Jejus pumu hãmri nẽ hkôt mẽ pa ho mẽ pa xwỳnhjê hwỳr agjê nẽ mẽ ixtã mẽ kãm akir nẽ mẽ kãm: —Kwa mẽ kot jajê kutã apkur kêt tã mẽ akrãhtũmja axtem nẽ mẽ kutã apkur o nhỹ. Kwa nà mẽ kot amnhĩ tomnuj xwỳnh kênã. Jejus kot amnhĩ to mex ronhỹx mẽ kutã apkur kêt nẽ. Anẽ.

12Hãmri nhũm Jejus amnhĩ tã ã mẽ kapêr anhỹrja ma nẽ mẽ kãm: —Tk. Nà ixte tãm mẽ unhwỳr kaxyw na pa mẽ kutã ixàpkur o nhỹ. Xà na hte tõtõja mẽ mex xwỳnhjê hwỳr mra nẽ mẽ hkane? Nà ãm mẽ à xwỳnhjê pix wỳr na hte mra nẽ tanhmã mẽ hkane hto. Ra mẽ ate ja pumunh mex. Tã ja pyrà nẽ na pa pre mẽ kot amnhĩ to mex xwỳnhjê hwỳr ixwrỳk kêt nẽ. Mẽ kot amnhĩ tomnuj xwỳnhjê pix wỳr na pa pre wrỳ. Ixte tãm mẽ unhwỳr kaxyw mẽ hwỳr wrỳ nẽ ã jajê kutã ixàpkur o inhỹr anẽ.

13Ga mẽ ma mra nẽ Tĩrtũm kapêr ã kagà htũm kot ja jarẽnhja kamã harẽ nẽ ama. Harẽnh kot: Na ka htem inhmã tanhmã amnhĩ jarẽnh to kaxyw hãmri nẽ inhmã mẽmoj gõ nẽ tanhmã ixto mex to. Nom kêr ka mẽ ãm ja pix ho anhỹr kêt nẽ. Mẽ mããnẽn mẽ piitã tanhmã mẽ ho mex to ho ri apa. Anẽ. — ã Tĩrtũm kapêr ã kagà htũm kot ja jarẽnh kot anhỹr. Tã ja pyrà nẽ na pa pre mẽ kot amnhĩ tomnuj xwỳnhjê hwỳr wrỳ nẽ mẽ kamã ixukapri ho ixpa. Mẽ kot amnhĩ tomnuj kaga nẽ hpãnhã tãm amnhĩ nhĩpêx kaxyw na pa pre

ã mẽ hwỳr ixwryk aně. Tã ka mẽ ri atỳx amnhĩ krã hkôt ã ixto akapěr aně. Aně.

Mě kot mẽmoj tă Jejus kukjêr

Makre 2.18-20; Rukre 5.33-35

14Tã nhũm Juãw Paxis kôt mẽ pa xwỳnhjaja Jejus wỳr mra ně mẽmoj tă hkukja ně kãm: —Pa? E ot pa mẽ awỳr mra. Kwa mẽ inhmã mẽmoj jarě. Na pa htem tōhã Parijew nhõ xwỳnhjê pyrà ně ixàpkur kêt kãm Tĩrtũm mã amnhĩ jarě. Tã nom akôt mẽ pa ho mẽ pa xwỳnhjaja na htem àmnhĩx apkur o pa kamã kãm amnhĩ jarěnh o pa. Kwa mo na htem mẽ ixpyrà ně tōhã apkur kêt kamã kãm amnhĩ jarěnh kêt ně? Aně.

15Hãmri nhũm mẽ kuma ně mẽ kãm: —Nà mo kaxyw kot kêt mẽ apkur kêt rãhã kãm amnhĩ jarě? Mě hkaprĩre hã. Mě kot ixkôt pa ho pa hã amnhĩ pumunh jakamã na htem hkĩnh ně ixkôt pa. Kormã ixte mẽ kamã ixpa kênã kot kêt mẽ apkur kêt rãhã Tĩrtũm mã tanhmã amnhĩ jarěnh to. Xà na htem hkràmnhwỳ hã hkĩnh kaxyw hã akuprõ ně hkaprĩ ně apkur kêt o kamàt ně mỳr o hkrĩ? Nà na htem anhỳr kêt ně. Na htem hã akuprõ ně hkĩnh ně hã apkur rũnh ně. Ja pyrà ně na hte ixkôt mẽ pa ho mẽ pa xwỳnhjaja ixkôt kormã àmnhĩx hkĩnh ně apkati mẽ apkur o pa. Nom koja mẽ kãm ixkurê xwỳnhjaja nhỹrmã tanhmã ixto hãmri nhũm mẽ hkaprĩ htỳx ně rĩ kormã tōhã apkur kêt rãhã Tĩrtũm mã amnhĩ jarě. Aně.

Mě pahte Jejus kôt amnhĩ nhĩpêx

Makre 2.21-22; Rukre 5.36-39

16Nhũm Jejus mẽ piitã mẽ kãm kapěr ně mẽ kãm: —Mě kot amnhĩ tomnuj xwỳnhjaja ra mẽ kot amnhĩ nhĩpêx tũm o amnhĩ pyræk jakamã na htem tanhmã mẽ kot amnhĩ nhĩpêx nyw tota kaga.

17Tã ixte amnhĩ nhĩpêx nywja te kot mẽ ate amnhĩ nhĩpêx tũm pyræk kêt jakamã na ka htem ixkapěr ma ně ãm ama. Kwa mẽ inhma ně mẽ ate amnhĩ nhĩpêx tũmja gryk ã ixkaga hkêt ně. Aně.

Mě hkra htyk ně mēhõ ni kamrô wa harěnh

Makre 5.21-43; Rukre 8.40-56

18Nhũm pre ã Jejus mẽ kãm kapěr anhỳr o xa. Rôm nhũm mẽõ pahihtija tẽ nẽ mar o xa. Hãmri nẽ hamaxpěr o: —Kokỹỹ. Jejusja ãm hãmri kệp pahi

maati kumrêx. Hã na ri ã kapêr mex anê. E pa hwÿr tẽ nẽ ixkrare ho kuwÿ. Anê. Hãmri nẽ hwÿr tẽ nẽ kutã hkõnkrã ho nhÿ nẽ kãm: —Pa akupÿm mẽ ixto mex xwÿnh? E ot pa awÿr tẽ. Kwa ma ixkõt tẽ nẽ inhmã ixkra nire pumu nẽ tanhmã inhmã ho kê akupÿm inhmã htír. Na ham ixpê ty pa kaxyw amã ijamaxpêr nẽ man awÿr tẽ. Anê.

19Hãmri nhũm kuma nẽ kãm: —Tôe. Nà kot paj ma akõt tẽ. Anê. Hãmri nẽ ma hkõt tẽ. Mẽ ixpê hkõt ixpa ho ixpa xwÿnhjê mẽ pa mẽ ma hkõt mō.

20-21Nhũm mēhō ni kamrô rãhã ho pa xwÿnhja ma mẽ ixkõt tẽ. Na pre hte hkamrô hkryre rãhã ho pa hã amgrà pê 12 nẽ tee ri kãm amnhĩ mex prãm o pa. Jakamã Jejus jarēnh ma nẽ amnhĩ kaxyw kãm hamaxpêr kurê kumrêx nẽ hamaxpêr o: —Ma pa kop ma hwÿr tẽ nẽ kêp ê nhĩrê pix kupēnh tã akupÿm inhmex japêr. Anê. Hãmri nẽ ma mẽ ohtôjê kaêx kõt hwÿr tẽ. Nẽ katut kõt tẽ nẽ kêp ê nhĩrê kupê.

22Hãmri nhũm Jejus ho hakêx nẽ amnhĩ tã omu nẽ kãm: —Pa? Kwa tee ri amnhĩ kukamã ajamaxpêr kêt nẽ. Ate amnhĩ kaxyw inhmã ajamaxpêr tÿx jakamã na ka ra akupÿm amex. E mãmri ajamakêtkati nẽ ri apa. Anê. Hãmri nhũm akupÿm mex nẽ hkĩnh tÿx nẽ ma akupÿm tẽ.

23Hãmri pa mẽ ma htyk xwÿnh nhĩpêêxà hkõt mra nẽ òrkwÿ hwÿr agjê nẽ mẽ pikuprõnh xwÿnhjê pumu. Nhũm mẽ ra mẽ hã htu rax nẽ. Nẽ omũj ri kaprĩ xàj pifti kakôr o hkrĩ nẽ omũj ri mur. Kàx pê mur nẽ amnhĩ tak o hkrĩ.

24Hãmri nhũm Jejus mẽ hwÿr axà nẽ mẽ omu. Nẽ ra kot my hkrata htyk ã omunh tã kuri mẽ mÿr o mẽ hkrĩ xwÿnhjê mã kapêr nẽ mẽ kãm ãm òt nẽ nōr ã harê nẽ mẽ kãm: —Pa? Kwa mon ka mẽ ri akaprĩ nẽ amÿr o akrĩ? E mẽ ma mra. Na wa hkrata wa kêp htyk kêt nẽ. Na ãm gōr nẽ nō. Anê. Hãmri nhũm mẽ kot ra htyk ã omunh mex jakamã kuma nẽ ãm kuma. Nhũm mẽ hkwyja axtem nẽ ri axpēn mã hã hpêr o pikēnh o hkrĩ.

25Hãmri nhũm kapôt mã mẽ hano nhũm mẽ hapôj nẽ kapôt ã kuhê. Hãmri nhũm Jejusja htyk xwÿnhhta wÿr axà nẽ hpa hã kupy nẽ kãnhmã ãm nhũm akupÿm htír nẽ kãnhmã ãm kurê kumrêx.

²⁶Hāmri nhũm mẽ piitã akupỹm htĩr kãm omu nẽ ma ri krĩ piitã hkõt ri mẽ kãm harẽnh o hprõt.

Wa nohkre xwỳnh wa harẽnh

Matêwre 20.29-34

²⁷Tã nhũm Jejus kato nẽ ma tẽ. Pa mẽ hkõt ixpa ho ixpa xwỳnhjaja ma hkõt mỗ. Hāmri nhũm wa myja wa hamẽkrut. Hamẽ wa nohkre xwỳnh wa Jejus jarẽnh ma nẽ hã ajêt nẽ hkõt rôrôk o mỗ. Nẽ xatã amnhĩ to hwỳr o hkõt rôrôk o mỗ nẽ kãm: —Pa Jejus? E Tĩrtũm kot mẽ ixkaxyw axãm jakamã kwa wa ixpumu nẽ wa ixkamã axukaprĩ kêt wehe. Anẽ.

²⁸Hāmri nhũm wa kuma nẽ wa hkukamã nhỹri ixkrem axà nhũm wa hkõt axà nẽ xa nhũm wa omu nẽ wa kãm: —Pa? E xàn ka wa ra amnhĩ kaxyw inhmã ajamaxpěr tỳx nẽ nà? Anẽ. Hāmri nhũm wa kãm: —Tỳ. Wa ixte amnhĩ kaxyw amã ijamaxpěr tỳx kênã. Anẽ.

²⁹Hāmri nhũm wa kuma nẽ hamẽ wa no hã ìhkra xi nẽ wa kãm: —Tôe. Nà war ate tanhmã amnhĩ kaxyw inhmã ajamaxpěr to xà hkõt kot paj war anhĩpêx. Anẽ.

³⁰Hāmri nhũm wa akupỹm rĩt mex kurê kumrẽx. Hāmri nẽ akupỹm kato nẽ ma htẽm kaxyw nhũm wa kãm: —E kêr ka wa nhãm mẽ kãm ixte war ato mex ã ijarẽnh kêt nẽ. ãm kwarĩ ho kwarĩ.

³¹Anhỹr tã no nhũm wa kuma nẽ ãm kuma nẽ wa ma tẽ nẽ krĩ pu hã mẽ piitã mẽ kãm ri war amnhĩ tã harẽnh o mra.

Kapěr kêt xwỳnh jarẽnh

³²Tã nhũm Jejus ma axte nhỹhỹm mẽ ixto mỗ. Hāmri nhũm mẽhõ my mẽkarõmnuti kot hwỳr àr nẽ tanhmã ho nhũm kapěr kêt nẽ pa xwỳnhja nhũm mẽ Jejus wỳr o tẽ.

³³Hāmri nhũm omu nẽ nê mẽkarõmnuti jano nẽ kãm: —E kêp akato nẽ ma tẽ. Anẽ. Hāmri nhũm kuma nẽ kurũm kato nhũm akupỹm kapěr mex kurê kumrẽx. Hāmri nhũm mẽ kot hã omunh xwỳnhjaja tee ri kot mẽkarõmnuti janor ã omu nẽ kamã no pyma nẽ. Nẽ axpẽn mã: —Kokỹỹ. Aa mẽ pahte ã mẽhõ kot anhỹr pumunh kêt kumrẽx tã na pu mẽ jarãhã ja pumu. Anẽ.

34Nom nhũm mẽ hkwỳ pê Parijew nhõ xwỳnhjaja axtem nẽ hã mẽ kãm kapër o: —Tk. Kot amnhĩ krã hkôt mẽ hanor kêt kênã. Mẽkarõmnuti nhõ pahi nhỹ hã kot mẽ nê mẽ hanor kênã. Anẽ.

Jejus kệp mẽ pakamã ukapřĩ xwỳnh

Makre 6.34; Rukre 10.2-3; Juãw 4.35

35Tã nhũm Jejusja krĩ ho ohtô nẽ hkôt ri mẽ kãm Tĩrtũm kapër jarẽnh o pa. Pa mẽ hkôt ixpa. Na pre hte nhỹri krĩ hwỳr pøj nẽ mẽ kot Tĩrtũm kapër o mẽ ahkre xà hã ixkre hwỳr mra nẽ hwỳr agjê nẽ mẽ pikuprõnh xwỳnhjê jahkre. Nẽ mẽ kãm: —E mẽ inhma. Tĩrtũm kãm mẽ apiitã mẽ ato hkra hprãm. Jakamã kwa mẽ ate amnhĩ tomnuj kaga hprãm xàj hkôt amnhĩ xunhwỳ nẽ kapër kôt amnhĩ nhĩpêx. Jao amnhĩ nhĩpêx nyw o amnhĩ nhĩpêx o ri apa. Anhỹr o mẽ kãm kapër. Hãmri nẽ ahpỹnhã ri tanhmã mẽ à kute xwỳnhjê ho mex. Nhũm mẽ ohtô nẽ hkôt mar o pa.

36Hãmri nhũm mẽ omu nẽ kãm mẽ hkapřĩ nẽ. Na prem tee ri amnhĩ kukamã hamaxpër o pa jao ra hkapřĩ nẽ. Nhũm Jejus ja hã mẽ omu nẽ hamaxpër o: —Hêxta waa nẽ. Na mẽ mex kêt nẽ pa. Te mẽ kệp ôwêhti jamãr xwỳnh kêt kot amnhĩ nhĩpêx pyræk o htỳx ri pa. Mẽhõ koja kãm mẽ hkapřĩ nẽ tanhmã mẽ ho mex to ho pa? Anẽ. Hãmri nẽ mẽ kamã ukapřĩ nẽ.

37Hãmri nẽ mẽ hã mẽ ixpê hkôt ixpa ho ixpa xwỳnhjê mã kapër nẽ mẽ inhmã: —Nà na mẽ kormã ohtô rax nẽ Tĩrtũm kapër mar kêt nẽ. No ãm kormã mẽ ate mẽ kãm kapër jarẽnh o apa kaxyw mẽ agrêre. Te pur rax kãm ra harôj kamrêk par nẽ ãm tã no ãm kaxyw hikẽnh xwỳnhjaja grêre pyræk.

38Jakamã kwa mẽ ho Tĩrtũm wỳ kê axte mẽ kaxyw mẽ akwỳjê rê kê mẽ apyrà nẽ ma mẽ hkôt ri mẽ kãm kapër jarẽnh o pa. Anẽ.

Matêwre 10

Jejus kot mẽ ho 12 nẽ mẽ rênh

Makre 3.13-19; Rukre 6.12-16

1-4Tã nhũm Jejusja hkôt mẽ ixpa ho mẽ ixpa xwỳnhjê ho 12 nẽ mẽ ixrê. Mẽ ixte ma krĩ piitã hwỳr inhmarr nẽ ÿ hã mẽ ahkre nẽ tanhmã mẽ à kute xwỳnhjê ho mex o ixpa kaxyw. Nẽ ÿ hã mẽ nê mẽkarõmnuti janor o ixpa

kaxyw nhũm mẽ ixrê. Na pre mẽ ixto 12 nẽ mẽ ixrê. ã mẽ inhĩxi kot anhỹr. Pêtre kumrêx na pre kuta. Hixi hõ pê Simãw. Nẽ hkôt htõ Andreja ta. Nẽ hkôt Jepetew kra Xiakreja ta. Nẽ hkôt Xiakre htõ Juãwja ta. Nẽ hkôt Firiptija ta. Nẽ hkôt Patoromewja ta. Nẽ hkôt Tomasja ta. Nẽ hkôt pa ixpê Matêwre nhũm pre mẽ hkôt ixta. Ixpê pahĩ nhỹ hã kãm mẽ kêp ixujamýnh xwýnh tã nhũm pre jajê hkôt ixta. Nẽ ixkôt Apew kra Xiakre hõja ta. Nẽ hkôt Tatewja ta. Nẽ hkôt Simãw Jerroxja ta. Nẽ hkôt Jut Kariotja ta. Kormã kot mẽ kãm Jejus kurê xwýnhjê nhĩhkram òr mã nhũm Jejus kot amnhĩ kukamã omunh mex tã mẽ hkôt amnhĩ kaxyw kuta. ã mẽ ixte ý hã mẽ ahkre o ixpa kaxyw mẽ ixrênh xwýnhjê nhĩxi kot anhỹr.

Jejus kot mẽ kêp 12jê mã mẽ àpênh ã karõ

Makre 6.7-13; Rukre 9.1-6; 10.1-12; 10.14; mãänên Atre 13.50-51; 18.6

⁵Hãmri nhũm Jejus mẽ ixrênh pa nẽ ma mẽ hwýr mẽ ixrênh kaxyw tanhmã mẽ inhmã kapêr to nẽ mẽ inhmã: —E. Kêr ka mẽ ma mẽ piitã mẽ kãm ri ijarênh o apa. No ãm kormã mẽ kêp Ijaew kêt xwýnhjê nhõ pika hwýr apa hkêt nẽ. Rý mẽ kêp Samar nhõ krĩ hwýr ka mẽ apa hkêt nẽ.

⁶Ãm mẽ pahpê Ijaew nhõ krĩ kôt pix mã mãn ri apa. Mẽ kot tee ri amnhĩ kukamã hamaxpêr o pa jakamã te mẽ kêp ôwêhti pikunor nẽ htýx ri mex kêt nẽ pa pyræk.

⁷Jakamã kêr ka mẽ ma mẽ hwýr apa nẽ ã mẽ hkôt ri mẽ kãm akapêr o apa anẽ nẽ mẽ kãm: “E kot kaj mẽ ate amnhĩ tomnuj kaga nẽ Tĩrtũm kôt amnhĩ xunhwý hãmri nhũm amnhĩ tã mẽ apumu nẽ mẽ ato hkra. Jakamã e kwa mẽ tokyx hkôt amnhĩ xunhwý.” Anẽ. Kêr ka mẽ ã mẽ kãm akapêr anhỹr o ri mẽ hkôt apa.

⁸Hãmri nẽ akupým mẽ à xwýnhjê ho mex o ri apa. Nẽ mẽ htyk xwýnhjaja ka mẽ akupým mẽ ho htĩr o ri apa. Nẽ mẽ hkànhy rũnh xwýnhjaja ka mẽ akupým mẽ ho mex o ri apa. Nẽ mẽ kamã mẽkarõmnuti xwýnhjaja ka mẽ nê mẽ hano. E kêr ka mẽ ã inhỹ hã mẽ ho mex o ri apa anẽ. Na pa amarĩ tanhmã mẽ ato ka mẽ inhmã amnhĩrer kêt tã ra mẽ ate tanhmã mẽ ho mex

to mã tãm. Tã kêr ka mẽ amnhĩ xwar amarĩ ri mẽ ho mex o ri mẽ hkôt apa. No ri mẽ ho mex pãnhã kàxpore hã axàhwỳr kêt nẽ.

9-10—Nẽ kêr ka mẽ ma mẽ hwỳr apa kaxyw anojarêt hãmri nẽ amnhĩ kôt akukrêx rũnh o apa hkêt nẽ. ãm anhỹ kamã mẽ hwỳr apa. Nẽ akàxpore ho rax nẽ ho apa hkêt nẽ. Rỳ akawà kamã axê hkwỳ rỳ aparkà hõ xàr nẽ ho amõr kêt nẽ. Rỳ kô hõ py nẽ ri ho apa hkêt nẽ. ãm anhõ mrykà pix jamỳ nẽ ma ho apa. Kêr kê mẽ ate Tĩrtũm kapêr o mẽ ahkre nẽ mẽ ho mex xwỳnhjaja mãn amnhĩ pãnhã mẽ amã mẽ axàpkur xà gõ ka mẽ kutã axàpkur o ri mẽ hkôt apa.

11—Nẽ kêr ka mẽ nhỹri krĩ hwỳr ajapôj nẽ kamã mẽhõ kot amnhĩ to mex xwỳnh japêr. Nẽ ra omu hãmri nẽ kuri mãn pôj nẽ hkôt apikamênh tãmtã kurũm akupỹm ajapôj nẽ ma nhãm krĩ hõ hwỳr mra.

12—Nẽ kêr ka mẽ mẽhõ nhõrkwỹ hwỳr pôj nẽ mẽ kãm: “E ot pa mẽ awỳr mõ. Nà koja Tĩrtũmja mẽ ato mex nẽ.” Anhỹr o mẽ kãm akapêr.

13Koja mẽ ama nẽ amnhĩ wỳr awỳ ka mẽ amnhĩ tã mẽ omu nẽ mẽ kãm: “E koja Tĩrtũm mẽ ato mex nẽ ka mẽ ajamakêtkati nẽ ri axàmnhĩx apa.” Anhỹr o mẽ kãm akapêr. No koja mẽ amnhĩ nhõrkwỹ nẽ mẽ akurê nhũm Tĩrtũm ja hã mẽ omu nẽ mẽ ho mex kêt nẽ.

14—Nẽ koja nhỹri krĩ hõ kamã mẽ akaga nẽ akapêr mar kêt japêr. Ka mẽ tee ri amnhĩ tã mẽ kamã ama hãmri nẽ tokyx mẽ kurũm ajapôj nẽ ma akupỹm apa. Nẽ akupỹm anojarêt nẽ mẽ noo mã akuhê nẽ amnhĩ par ã awjagrô kapĩ nẽ ma apa. Mẽ kot Tĩrtũm kaga hã amnhĩ pumunh kaxyw ka mẽ ã mẽ noo mã amnhĩ nhĩpêx anẽ. Hãmri nẽ ma nhỹhỹm hpãnhã apa.

15Koja nhỹrmã Tĩrtũm mẽ kot amnhĩ tomnuj mỳrapê tanhmã mẽ ho. Na pre ã Sotõ mẽ Komo nhõ xwỳnhjê nhĩpêx anẽ. Na prem amnhĩ tomnuj tỳx nẽ nhũm Tĩrtũm tee ri ja hã mẽ omu nẽ tanhmã hã mẽ homnuj tỳx to. Tã jar mẽ kãm ixkapêr mar prãm kêt nẽ mẽ kot ixkaga xwỳnhjaja koja ja hã mẽ omu nẽ kot Sotõ mẽ Komo nhõ xwỳnhjê nhĩpêx o mẽ hipêx. No ãm tanhmã

mě ho htỳx o mẽ hakre. Aně. Nhũm pre Jejus ã mẽ inhmã mẽ ixàpênh ã karõ aně.

Jejus kot mẽ kêp 12jê hkukamã mẽ harěnh

Makre 13.9-13; Rukre 12.11-12; mãănênh Rukre 21.12-17; Wam Pêtre 3.13-17; 4.12-19; Rukre 6.40; Juãw 15.20; Rukre 12.2-9

16Nhũm Jejus arĩ kot mẽ ixrênh xwỳnhjê mã kapêr nẽ mẽ inhmã: —E kot paj ma mẽ hwỳr mẽ arẽ. Ma mẽ ate Tĩrtũm kapêr o mẽ ahkre ho ri mẽ hkôt apa kaxyw. Jakamã kot kaj mẽ te ôwêhti kot mry xoprê hwỳr amnhĩ to mrar nhũm kot hkwỳ hpar pyràk o amnhĩ nhĩpêx. Kojã mẽ hkwỳjaja mẽ ate mẽ ahkre ma nhũm ja mẽ kêp omnuj nẽ nhũm mẽ hã tanhmã mẽ anhĩpêx to. Tã nom kêr ka mẽ tee ri amnhĩ kukamã ajamaxpêr nẽ amã mẽ uma hkêt nẽ.

17—E kwa mẽ o kora. Kêr ka mẽ ma mẽ hwỳr mra nẽ amnhĩ nê mẽ htãnopxar o ri apa. Kojã mẽ hkwỳjaja mẽ akapêr ma nẽ kêp mẽ aprãm nõkati. Nẽ mẽ apynê nẽ ma mẽ utàr xwỳnhjê hwỳr mẽ ato mra nẽ mẽ kãm tanhmã mẽ ato hêx to. Hãmri nhũm mẽ mar xà hkôt mẽ atak. Tĩrtũm kapêr o mẽ ahkre xà hã ixkre kamã kojã mẽ ã mẽ anhĩpêx aně.

18—Nẽ kojã mẽ ixtã tanhmã mẽ ato kaxyw mẽ apynê nẽ ma mẽ õ pahi hwỳr mẽ ato mra nẽ tanhmã kãm mẽ ato hêx to. Nom kwãr mẽ mamrĩ ã mẽ anhĩpêx aně. Kojã mẽ ato aně ka mẽ kutã akrĩ nẽ mẽ kãm Tĩrtũm kapêr jarẽ. Ijaewjê mã nẽ mẽ kêp Ijaew kêt xwỳnhjê mã.

19—Nẽ kojã mẽ ma mẽ õ pahi hwỳr mẽ ato mra nẽ ã mẽ anhĩpêx aně nom kêr ka mẽ tee ri tanhmã mẽ kãm amnhĩ jarěnh to hkukamã ajamaxpêr kêt nẽ. Kojã Tĩrtũm Karõ tãm tanhmã mẽ akrã hto ka mẽ ô ri mẽ kãm akapêr mex nẽ.

20Nẽ kot kaj mẽ amnhĩ krã hkôt ri mẽ kãm akapêr kêt nẽ. Tĩrtũm Karõ nhỹ hã kot kaj mẽ ô ri mẽ kãm tanhmã axujarěnh to.

21-22—Nẽ kojã mẽ hkwỳjaja ixtã mẽ akamã gryk nẽ. Nẽ mẽ atã àmnênh pix o pa. Nẽ mẽ kot mẽ apar kaxyw mẽ akwỳjê hã amỳnê. Kojã mẽ anhĩpêxã hkwỳjaja mẽ apê mẽ hkra hã amỳnê. Nhũm mẽ akra hkwỳjaja mẽ apê mẽ hipêxã hã amỳnê. Nhũm mẽ atõ hkwỳjaja mẽ apê mẽ htõ hã amỳnê. Nhũm mẽ akatorxàjaja mẽ atã amỳnê. Hãmri nhũm mẽ apa. No ãm kwãr mẽ mãmri

ã mẽ anhĩpêx anê. ã mẽ kot mẽ anhĩpêx anhÿr tã kêr ka mẽ tee ri amnhĩ kukamã ajamxpêr pê ixkaga hkêt nê. Mẽ ãm amnhĩ to htÿx rãhã ty. Hãmri nê akaxwÿnhja ma Tĩrtũm mẽ wa inhõ krĩ hwÿr axàpir kurê kumrêx nê wa ixkuri akupÿm amex nê atĩr tũm nê apa ho apa.

23—Nê koja mẽ nhÿri krĩ hkwȳ kamã ixtã tanhmã mẽ anhĩpêx hto ka mẽ mãmri mẽ kurũm ajapôj nê ma nhÿhÿm krĩ hõ hwÿr apa. Nê hpãnhã kamã mẽ kãm ri ijarênh o mẽ hkôt apa. Kot kaj mẽ kormã Ijaewjê nhõ krĩ piitã hwÿr apa hkêt ri pa akupÿn mẽ awÿr wrÿ. Kwa kêr ka mẽ ixkapêr mã ajamxpêr tÿx rãhã ri apa.

24-25—Mẽ ate ixkôt apa ho apa xwÿnh na ka mẽ. No pa na ixpê mẽ ajahkre xwÿnh. Jakamã koja mẽ kot tanhmã inhĩpêx to ho mããnên mẽ anhĩpêx. Koja mẽ nhÿrmã tanhmã inhĩpêx to nê mã ixkôt mẽ ato anê nê. Mẽ pahte amnhĩ nhĩpêxja kot axpên pyræk. Jakamã koja mẽ ixpê Satanasti hã ijarê nê mããnên tanhmã mẽ ajarênh punuj to ho pa. Mẽ pahte amnhĩ nhĩpêxja kot axpên pyræk jakamã koja mẽ panhĩpêx o axpên pyræk.

26—Tã nom kêr ka mẽ tee ri amnhĩ kukamã ajamxpêr pê amã mẽ uma ho apa hkêt nê. Na htem piitã axpên pê tanhmã hamaxpêr punuj to ho hpimxur o pa nom tee ri ho pimxur prãm kaprÿ. Koja nhÿrmã mẽ hamaxpêr piitã amnhĩrĩt pa. Nê mẽmoj piitã ra hpimxur mex tã koja nhÿrmã amnhĩrĩt par kumrêx.

27—Nê koja nhÿrmã mẽ piitã ixte amnhĩ nhĩpêx kôt ixpumu. Na pa ra mẽ hkàx ã mẽ amã ixujarênh rax nê. Tã kêr ka mẽ ma mẽ piitã mẽ kãm harênh o ri apa. Nê ra ixte mẽ hkàx ã ahte ixte mẽ amã mẽmoj jarênhhta ka mẽ hpãnhã ma mẽ kãm harênh o ri apa kê mẽ apyrà nê harênh ma.

28—E kêr ka mẽ amã mẽ kot tanhmã mẽ ato mã xwÿnhjê puma ho apa hkêt nê. Mẽ kot mẽ apar mã tã koja mẽ ãm mẽ akrãhkà pix pa nom tanhmã mẽ akaxwÿnh to hkêt nê. Tĩrtũmja tapxipix na hte mẽ hkrãhkà nê mẽ hkaxwÿnh mẽ ho pimràatã kot amnhĩ xà htÿx kamã hamak tũm xàta wÿr mẽ rênh pumunh. Tã kot hwÿr mẽ arênh pymaj kêr ka mẽ amã kapêr kwÿm ri tanhmã amnhĩ nhĩpêx to puma ho ri apa.

29-31—Ně Tĩrtũm kot mẽ pahto hapêx par pumunh tã mãăněn kot mẽ pajamãr mex. Mãn ka htem kuwênhre pumu. Na hte Tĩrtũm kuwênhre jamãr mex o pa. Mẽ piitã mẽ kot ãm omunh tã nom nhũm Tĩrtũm mẽ kurom hamãr mex pẽ mẽ htãnopxar rãhã ho pa. Tã kãm mẽ pajapê htỳx o kot kuwênhre jakrenh jakamã kwa mẽ tee ri amnhĩ kukamã ajamxpêr o ri akaprĩ nẽ apa hkêt nẽ. Koja Tĩrtũm mẽ pahtãnopxar rãhã ho pa. Kot mẽ panhĩ piitã omunh par. Nẽ ahpỹnhã tanhmã mẽ pahkrã hkĩ kute hkôt mẽ pahpumunh par. Tã kot mẽ pahtãnopxar rãhã jakamã mo kaxyw kot kaj kêt mẽ ri amã mẽ uma ho apa? Anẽ.

Mẽ pahte Jejus kôt amnhĩ xunhwỳr rỳ mẽ pahte hkaga jarẽnh

32Nhũm Jejus arĩ kot mẽ hwỳr mẽ ixrênh xwỳnhjê mã kapêr nẽ mẽ inhmã: —E kwa mẽ mãmrĩ akwỳjê mã mẽ apê ixkwỳ hã amnhĩ jarẽnh o ri apa nẽ amã mẽ uma xàj tee ri amnhĩ nhĩpêx kêt nẽ. Kot kaj mẽ kãm ra ate ixkôt amnhĩ xunhwỳr ã amnhĩ jarẽ. Pa ja hã mẽ apumu hãmri nẽ mẽ apyrà nẽ kaxkwa kamã Inhĩpêêxà mã ra ate ixkôt amnhĩ xunhwỳr ã mẽ ajarẽ.

33Nom kot kaj mẽ kot ixtã tanhmã mẽ ato pymaj apê ixkwỳ hã amnhĩ jarẽnh kêt nẽ. Pa ja hã mẽ apumu hãmri nẽ nhỹrmã amnhĩ xwar Inhĩpêêxà mã mẽ apê ixkwỳ hkêt ã mẽ ajarẽ. Jakamã kwa mẽ mãmrĩ mẽ kãm apê ixkwỳ hã amnhĩ jarẽnh o ri mẽ hkôt apa kê mẽ ama nẽ amnhĩ kaxyw inhmã hamaxpêr japêr. Anẽ.

Mẽ kãm Jejus ã hkwỳjê kurê xwỳnhjaja

Makre 8.34-35; Rukre 9.24; mãăněn Rukre 12.51-53; 14.26-27; Apokarip 12.11

34Nhũm Jejus arĩ kot mẽ hwỳr mẽ ixrênh xwỳnhjê mã kapêr nẽ mẽ inhmã: —Ra mẽ awỳr ixwrỳk tã koja mẽ piitã ixkukwak ri hamakêtkati nẽ àmnhĩx ri pa hkêt nẽ. Kormã. Koja mẽ akwỳjaja ixkapêr ma nẽ mẽ apyrà nẽ amnhĩ kaxyw ixkôt hamaxpêr. Nhũm mẽ akwỳjaja axtem nẽ kuma nẽ ãm kuma. Hãmri nẽ ixtã tanhmã mẽ atomnuj to ho pa ka mẽ amnhĩ xà htỳx kamã ajamak o ri apa.

35—Koja mẽ akrajaja ixtã mẽ apê mẽ hipêêxà nẽ mẽ katorxà kutã amnhĩ xunhwỳ. Nhũm mẽ wỳjjaja ixtã mẽ umregêxjê kutã amnhĩ xunhwỳ.

³⁶—Koja mẽ ã mẽ akwỳjaja ixtã mẽ akutã amnhĩ xunhwỳr anẽ. Mẽ anhõrkwỳ kamã mẽ akukwak ri pa htã ixtã mẽ akutã amnhĩ xunhwỳ.

³⁷—Nẽ mẽ amã mẽ anhĩpêêxà nẽ mẽ akatorxà japêê. Nẽ mẽ amã mẽ akrajê japêê. Tã nom kot kaj mẽ gryk ã ixkõt amnhĩ nhĩpêx mex o ri apa hkêt hãmri nẽ apê ixkwỳ mã tãm kêt.

³⁸Rỳ nhũm mẽ nhỹrmã ixtã mẽ apar kaxyw ka mẽ tee ri amnhĩ kukamã ajamaxpêr nẽ mẽ kot mẽ apar pymaj ixkaga hã kot kaj apê ixkwỳ mã tãm kêt nẽ.

³⁹Koja mẽ nhỹrmã ixpĩ pa mẽ anê ty. Tã mẽ ate ixkõt amnhĩ nhĩpêx o apa xwỳnhjaja. Koja mẽ ixpyrà nẽ ixtã mẽ apar mã tã kwa kêr ka mẽ amã atyk pymaj ixkaga hkêt nẽ. Kwãr mẽ mãmri tanhmã ixtã mẽ ato. Kot kaj mẽ nhỹrmã Tĩrtũm mẽ wa ixri axte amnhĩ xà kamã ajamak kêt nẽ atĩr tũm nẽ amex rãhã apa ho apa. Nom kot kaj mẽ jar amã amex nẽ apa hprãm xàj ixkaga hãmri nẽ nhỹrmã wa ixri atĩr tũm nẽ apa ho apa hkêt nẽ. Anẽ.

Mẽ kot Jejus krajê ho mex xwỳnhjê jarênh

Matêwre 25.34-40; Makre 9.41; Juãw 13.20

⁴⁰Nhũm Jejus arĩ kot mẽ hwỳr mẽ ixrênh xwỳnhjê mã kapêr nẽ mẽ inhmã: —E koja mẽhõ nhỹri mẽ apumu nẽ mẽ apê ixkra hã tanhmã mẽ ato mex to nẽ te pa kot ixto mex pyràk. Nẽ kot kaj mẽ tanhmã pa ixto mex to nẽ te Tĩrtũm o mex pyràk.

⁴¹—Nẽ kot ka mẽ nhỹri Tĩrtũm nhỹ hã mẽ kãm kapêr jarênh xwỳnhjê hõ tanhmã ho mex to nhũm Tĩrtũm hã apumu nẽ nhỹrmã hã ato mex nẽ. Rỳ ka mẽ mẽhõ kot Tĩrtũm kõt amnhĩ nhĩpêx xwỳnhjê hõ pumu nẽ tanhmã ho mex to. Nhũm Tĩrtũm hã apumu nẽ mããnên hã ato mex nẽ. Te ate mẽhõ ho mexta pyrà nẽ mããnên ato mex nẽ.

⁴²Nhũm mẽhõ nhỹri mẽ kot ixkõt kormã amnhĩ xãm nyw nẽ kormã àhpumunh tohtuj anhỹr xwỳnhjê hõ pumu. Nẽ kãm kôr ã omu nẽ hamaxpêr o: “Kwa Jejus kõt ri pa xwỳnh mũj kãm kôr. Kormã kot Jejus kõt amnhĩ xãm tỳx kêt tã kêp hkwyỳ. E kot paj kãm gô hkwyỳ kê ho ixkõ.” Anẽ hãmri nẽ kãm hkwyỳ nhũm ho ixkõ. Hãmri nhũm Tĩrtũm hã omu nhũm kot kãm gô

pix nhõr nhũm kot ho hkõm tã nhũm ja hã ho mex rax nẽ. Anẽ. Nhũm pre ã Jejus kot mẽ hwỳr mẽ ixrẽnh xwỳnhjê mã kapẽr ry rax anẽ. Mẽ ixpê 12jê mã ã kapẽr anẽ.

Matêwre 11

Juãw Paxis kot Jejus jarẽnh mar

Rukre 7.18-23; 7.5; mãänën Rukre 4.16-21

¹Tã nhũm Jejus ra kot mẽ hwỳr mẽ ixrẽnh xwỳnhjê mã kapẽr pa hãmri nẽ kato nẽ ma krĩ pu hã krĩ hkwỳjê hkõt ri pa. Nẽ mẽ kãm Tĩrtũm kapẽr jarẽnh o ri mẽ hkõt pa.

²Nhũm Juãw Paxisja arĩ kêp prês nẽ mẽ hagiẽnh xà kamã hkrĩ. Nhũm pre hte hkõt mẽ pa ho mẽ pa xwỳnhjaja hwỳr mra nẽ kãm Jejus kot tanhmã amnhĩ nhĩpêx to ho pa hã harẽ. Hãmri nhũm harẽnh ma nẽ tee ri hkukamã hamaxpẽr. Hãmri nẽ hkõt mẽ pa xwỳnh wa ho axkrut nẽ wa kuta

³nẽ hwỳr wa kumẽ nẽ wa kãm: —Kwa wa ma Jejus wỳr tẽ nẽ hkukja nẽ kãm: “Xà ka na pre Tĩrtũm mẽ ixwỳr amẽ nà? Xà kormã axtem mẽhõ na pa mẽ ri hamãr o ri ixpa?” Anhỳr o hkukja hãmri nẽ tanhmã kot amnhĩ jarẽnh to hã ama nẽ man akupỹn ixwỳr tẽ nẽ inhmã harẽ. Anẽ.

⁴Hãmri nhũm wa kuma nẽ ma hwỳr tẽ. Nhũm Jejus kormã tanhmã mẽ à kute xwỳnhjê ho mex o xa. Mẽ nohkre xwỳnhjaja nhũm akupỹm mẽ ho mex. Nẽ mẽkarõmnuti kot mẽ hwỳr gjêx xwỳnhjaja nhũm mẽ nê mẽ hanor o ãm rãhã nhũm Juãw kõt wa pa xwỳnhhta wa hwỳr tẽn pøj. Nẽ kormã mẽ hã omunh o wa xa. Hãmri nẽ kãm Juãw Paxis kapẽr jarẽ nhũm wa kuma nẽ wa kãm: —Tỳ. Nà ãm hãmri na ja hã ijarẽ. Ixpê mẽ ate ixkamã ajamak o apa xwỳnhhta na pa. Na ka wa kam ã ixte amnhĩ nhĩpêx anhỳr ã ixpumu. Jakamã wa ma akupỹm tẽ nẽ aprĩ hã kãm ijarẽ.

⁵Na pa hte akupỹm mẽ nohkre xwỳnhjê ho mex. Nẽ mẽ hkànhy xwỳnhjaja pa akupỹm mẽ hkà ho mex. Nẽ mẽ hyk o mẽ pa xwỳnhjaja pa akupỹm mẽ hte ho mex. Nẽ mẽ htyk xwỳnhjaja pa akupỹm mẽ ho mẽ htĩr. Nẽ mẽ kêp amrakati nẽ ri mẽ pa xwỳnhjaja pa mẽ kãm mẽmoj mex jarẽnh o ri mẽ hkõt

ixpa. ã na pa hte mẽ hipêx anhÿr o ri ixpa. Jakamã e wa ma akupÿm Juãw wÿr tẽ nẽ ã kãm ijarẽnh anẽ.

⁶Kê ijarẽnh ma nẽ ixkôt hamaxpêr tÿx nẽ tee ri ixkukamã hamaxpêr kêt nẽ. Koja ã amnhĩ nhĩpêx anẽ nẽ hamakêtkati nẽ ri pa. E wa tokyx ma akupÿm tẽ nẽ kãm ã ijarẽnh anẽ. Anẽ.

Jejus kot tanhmã Juãw Paxis jarẽnh to

Rukre 7.24-35

⁷⁻⁹Nhũm pre ã Jejus Juãw Paxis kôt wa pa ho wa pa xwÿnhja wa kãm amnhĩ jarẽnh anẽ nẽ akupÿm hwÿr wa kumẽ nhũm wa ma akupÿm hwÿr tẽ. Hãmri nhũm Jejus mẽ kot mar o kuhê xwÿnhjê mã tanhmã Juãw Paxisja jarẽnh to nẽ mẽ kãm: —Na ka pre htem kapôt ã Juãw Paxis mar kaxyw ma hwÿr mra. Nom ê mex ã omunh kaxyw rÿ hpijaàm kãm tanhmã kapêr to hã mar kaxyw na ka prem hwÿr amrar kêt nẽ. Tĩrtũm nhÿ hã kapêr o pa jakamã na ka prem ate mar kaxyw ma hwÿr mra. Tĩrtũm nhÿ hã ixkukamã ijarẽnh o pa xwÿnh na. Ixpê Tĩrtũm kot mẽ akaxyw ixãm xwÿnh ã na hte ijarẽnh o pa. Nẽ hprĩ hã tanhmã mẽ amã ijarẽnh to. Jakamã kapêrja mex o kot wam Tĩrtũm nhÿ hã kapêr jarẽnh xwÿnhjê kapêr piitã hakrenh par.

¹⁰Tĩrtũm kapêr ã kagà htũm kot Juãw kukamã tanhmã harẽnh to nẽ harẽnh kot: Kot paj Ixkra hkukamã ma mẽ hwÿr harẽnh xwÿnhja mẽ nhũm ma ri kutêp mẽ kãm harẽnh o pa. Mẽ kot mar nẽ kutêp tãm amnhĩ nhĩpêx o pa kaxyw. —Anhÿr o Tĩrtũm Juãw Paxis kukamã harẽ nhũm prem hã kagà. Tã nhũm ixkukamã mẽ awÿr kumẽ.

¹¹Juãw Paxisja na mex kumrêx. Na pre hprĩ hã ixkukamã tanhmã ijarẽnh to ho pa. Tã nom ixkôt mẽ pa ho mẽ pa xwÿnhjê hkĩnhã na pre ixkôt pa ho pa hkêt nẽ. Jakamã ixkôt mẽ pa ho mẽ pa xwÿnhjaja kot ixkôt hprĩ hã ixkapêr mar o pa jakamã na mẽ mex o mẽ kot Juãw Paxisja jakrenh. Anẽ.

¹²⁻¹³—Na pre finat Mojes kumrêx mẽ kãm Tĩrtũm kapêr kwÿ hã kagà. Tã nhũm hpãnhã Tĩrtũm nhÿ hã kapêr jarẽnh xwÿnhjaja Mojes mÿr pê hkwÿ hã kagà. Nhũm prem kamã harẽ nẽ kuma nẽ hkôt amnhĩ nhĩpêx o pa. Hãmri nhũm Juãw Paxisja mẽ mÿrpê kato nẽ tãm Tĩrtũm kapêr o mẽ ahkre ho ri

pa. Tã pa hpãnhã ho mẽ ajahkre ho ri mẽ akôt ixpa nhũm mẽ ohtô nẽ inhma nẽ ixkôt amnhĩ xunhwỳ nẽ kãm ixkapěr kôt pix mã amnhĩ nhĩpêx o ri pa hprãm nẽ.

14—Amnepêm na pre Tĩrtũm nhỹ hã kapěr jarẽnh xwỳnhjaja mẽhõja kukamã tanhmã harẽnh to ho pa. Nẽ mẽ kãm harẽnh o: “Koja nhỹrmã mẽhõ te Eris kot amnhĩ nhĩpêx pyræk o amnhĩ nhĩpêx nẽ mẽ awỳr mỗ. Nẽ mẽ amã Tĩrtũm kot mẽ awỳr mẽnũ mã xwỳnhja jarẽnh o pa ka mẽ ama.” Anhỹr o mẽ kãm mẽhõ jarẽ. Tã kot paj mẽ amã kot hkukamã harẽnh xwỳnhhta nhĩxi jarẽ ka mẽ inhma. Nà Juãw Paxisja kukamã na prem ã harẽnh anhỹr o pa.

15—E kot pa mẽ amã mẽ piitã htỳx ri tanhmã mẽ hamaxpěr to ho mẽ pa hã mẽ amã mẽ harẽ ka mẽ harẽnh ma.

16Te mẽhprĩre kot amnhĩ nhĩpêx pyræk o na htem amnhĩ nhĩpêx. Mẽhprĩrejaja na htem mẽ õrkwỹ kapem mẽmoj to amnhĩkati nẽ tee ri hkwyjê kot amnhĩ nhĩpêx pumu nẽ mẽ kãm:

17Kwa na pa mẽ amã gre htã ka mẽ ixkutã anhõkrepõx kêt nẽ. Pa mẽ ja hã mẽ apumu nẽ hpãnhã mẽ amã mẽ htyk jarẽ htã ka mẽ akaprĩ nẽ amỳr kêt nẽ. Kwa mẽ ri ã amnhĩ nhĩpêx anhỹr kêt nẽ. Anẽ. —Mẽhprĩjaja na htem ã axpẽn mã kapěr anẽ. Tã te mẽ ate mẽ uræk. Tĩrtũm kot mẽ awỳr ỹ hã kapěr jarẽnh xwỳnhjê rẽnũ tã ka mẽ te mẽhprĩre kot amnhĩ nhĩpêx pyrã nẽ mẽ ama nẽ ãm mẽ ama nẽ mẽ hkôt amnhĩ nhĩpêx kêt nẽ.

18—Juãw Paxis na pre mẽ awỳr mỗ nẽ ixkĩnhã apkur mex o ri pa hkêt nẽ. Nẽ ixkĩnh ã wĩhti ho hkõm kêt nẽ. Ka mẽ ja hã omu nẽ hkaga nẽ atỳx ri Satanasti nhỹ hã tanhmã kot amnhĩ nhĩpêx to hã hkamnhĩx. Hãmri nẽ mẽhprĩre kot amnhĩ nhĩpêxta pyrã nẽ hkôt amnhĩ nhĩpêx kêt nẽ.

19Tã hãmri pa hpãnhã mẽ awỳr mỗ nẽ Juãw Paxis rom apkati mẽ ixàpkur mex o ri mẽ akôt ixpa. Nẽ kurom mẽ akutã wĩhti hkwy ho ixkõm o ri ixpa. Tã ka mẽ ja hã ixpumu nẽ atỳx ri ixàpkur rũnh nẽ ixpipãnh o ri ixpa hã ixkamnhĩx nẽ ã axpẽn mã ixto akapěr anẽ. Nẽ mẽ kot amnhĩ tomnuj xwỳnhjê hkôt ri ixpa xwỳnh ã axpẽn mã ijarẽ. ã na ka htem axpẽn mã ijarẽnh anẽ. Jao te mẽ ate Juãw Paxis nhĩpêx pyrã nẽ ixkaga nẽ ixkôt amnhĩ nhĩpêx kêt

ně. Na hte ã htỳx ri tanhmã mẽ hamaxpěr to ho mẽ pa xwỳnhjaja amnhĩ nhĩpêx aně. No tãm ri mẽ hamaxpěr xwỳnhjaja na htem ahpỳnhã wa ixte amnhĩ nhĩpêx ã wa ixpumu nẽ axpẽn mã wa ijarěnh o: “Nà ahpỳnhã wa kot amnhĩ nhĩpêx tã no ãm hamẽ Tĩrtũm nhỹ hã kapěr mex o pa. E pu mẽ wa uràk nẽ Tĩrtũm kôt amnhĩ xunhwỳ.” Anhỹr o axpẽn mã wa ijarě. Aně.

Mẽ kot Tĩrtũm kôt mẽ hamaxpěr kêt xwỳnhjê jarěnh

Rukre 10.13-15

20Na pre hte Jejus krĩ piitã hkôt pa nẽ krĩ nhõ xwỳnhjê mã kapěr nẽ mẽ kot amnhĩ tomnuj ã mẽ kãm kapěr. Korajĩ mẽ Pese nhõ xwỳnhjê kumrěx mã kapěr nẽ mẽ kãm:

21-22—E mẽ inhma. Amnepêm krĩ pê Sitõ mẽ Xir wa kamã mẽ pa xwỳnhjaja na prem tanhmã amnhĩ tomnuj tỳx to ho pa nhũm Tĩrtũm tee ri ja hã mẽ omu nẽ mẽ kot amnhĩ tomnujta ã tanhmã mẽ ho. Tã kwa mẽ o kora Korajĩ mẽ Pesêj nhõ xwỳnhjaja. Ra ixte mẽ amã aa mẽ ate mẽmoj pumunh kêt kwỳ ho anhỹr rax tã ka mẽ omu nẽ ãm omu nẽ amnhĩ tomnuj kaga hkêt nẽ. Arĩ tanhmã amnhĩ tomnuj to ho ri apa. Mỳrapê kot kaj mẽ amex kêt nẽ. Kop apu Sitõ rỳ Xir kamã mãn ixte mẽ kãm aa mẽ kot mẽmoj pumunh kêt kwỳ ho anhỹr o ri ixpa ronhỹx mẽ omu nẽ mẽ arom amnhĩ kaxyw ixkôt hamaxpěr tỳx kurê kumrěx. Nẽ tee ri kot tanhmã kot amnhĩ tomnuj to hã amnhĩ pumu nẽ hkaprĩ nẽ hkaga hpa. No mẽ kajaja na pa hte tee ri mẽ amã aa mẽ ate mẽmoj punuj kêt kwỳ ho anhỹr o ixpa kaprỳ. Ka mẽ ja hã ixpumu nẽ ãm ixpumu nẽ amnhĩ tomnuj kaga hkêt nẽ. Jakamã koja nhỹrmã Tĩrtũm tanhmã mẽ atomnuj tỳx to. Nẽ tanhmã Sitõ mẽ Xir wa kamã mẽ pa xwỳnhjê jarěnh to nhũm mẽ kot amnhĩ tomnuj mỳrapê amnhĩ xà htỳx kamã hamak rãhã ho pa. No mẽ kajaja mẽ ate amnhĩ tomnuj tỳx o mẽ hakrenh jakamã koja Tĩrtũm mẽ hkĩnhã mẽ atomnuj tỳx kumrěx. Ka mẽ amnhĩ xà htỳx kamã ajamak rãhã ho ri apa kãm ga. Aně.

23-24Nhũm pre ã Jejus mẽ kãm kapěr aně. Nẽ hpãnhã Kapanaũ nhõ xwỳnhjê mã kapěr nẽ mẽ kãm: —No mẽ apê Kapanaũ nhõ xwỳnhjaja. Kot kaj mẽ ajaxwỳja mẽ uràk nẽ amex kêt nẽ. Ra ixte mẽ amã aa mẽ ate mẽmoj pumunh kêt kwỳ ho anhỹr rax nhũm mẽ ate hã ixpumunh tã amnhĩ tomnuj kaga hkêt

tã Tĩrtũm mẽ wa inhõ krĩ hwỳr akrà. No ãm hwỳr akrà kaprỳ. Kot kaj mẽ atõ hwỳr axàpir kêt nẽ. Kop apu Sotõ nhõ xwỳnhjaja mãn kot ã ixte amnhĩ nhĩpêx anhỳr ã ixpumunh ronhỹx mẽ ra kot amnhĩ tomnuj kaga nẽ ixkõt amnhĩ xunhwỳr kurê kumrẽx. No mẽ kajaja na ka mẽ ã amnhĩ nhĩpêx anhỳr kêt nẽ. Jakamã kot kaj mẽ nhỹrmã ma kuwy maatita wỳr ajapêx pa kãm ga. Anẽ.

Jejus kot õ Papaj mã amnhĩ jarẽnh

Rukre 10.21-22

25-26Tã nhũm Jejus Tĩrtũm mã amnhĩ jarẽ nẽ kãm: —Pa Papaj? Nà apê mẽ inhõ Pahi Maati na ka. Pikap ri mẽ pa xwỳnhjaja nẽ kaxkwa kamã mẽ pa xwỳnhjaja apê mẽ ixpiitã mẽ inhõ Pahi Maati na ka. ãm hãmri na ka hte amnhĩ nhĩpêx mex o ri apa. Na ka hte mẽ àhpumunh tỳx ã mẽ kot amnhĩ to jarkrar xwỳnhjê mã axàhpumunh tỳx o amnhĩrĩt kêt nẽ. ãm mẽ àhpumunh kêt ã mẽ kot amnhĩ jarẽnh xwỳnhjê pix mã na ka hte axàhpumunh tỳx o amnhĩrĩt nhũm mẽ tapxipixjaja ja hã apumu. Nà ãm hãmri. ãm hãmri na ka hte amã hprãm xà hkõt ã mẽ piitã mẽ hipêx anhỳr o ri apa Papaj. Jakamã mẽ kot amnhĩ to hkryre xwỳnh pixjaja na htem hprĩ hã ate amnhĩ nhĩpêx kõt apumunh o pa. Anẽ. Nhũm pre ã Jejus Tĩrtũm mã amnhĩ jarẽnh anẽ.

27Hãmri nẽ hpãnhã mẽ kot mar o kuhê xwỳnhjê mã kapêr nẽ mẽ kãm: —Nà na pre ra Inhĩpêxàja inhĩhkra kamã mẽmoj piitã hagiênh pa. Ixte kãm ho amnhĩptàr o ixpa kaxyw. Jakamã tapxipix na kot ixpê Kra hã ixpumunh par. No jar pika ja kamã mẽ pa xwỳnhjaja na mẽ kot ja hã ixpumunh kêt. Nẽ papxipix na ixte Inhĩpêxà kot tanhmã amnhĩ nhĩpêx to hã omunh par. Jakamã na pa hte ã amnhĩ nhĩpêx o ri ixpa anẽ nẽ inhmã hprãm xà hkõt mẽ hkwyjê mã ho amnhĩrĩt o ri ixpa. Jakamã nhũm mẽ ixpyrà nẽ Inhĩpêxà kot tanhmã amnhĩ nhĩpêx to ho pa hkõt omu.

28-30—Nẽ tee ri amnhĩ kukamã mẽ ajamaxpêr o ri apa xwỳnhjaja te mẽ ate mẽmoj pytĩ rax tur nẽ ahte ho apa pyràk. Kwa mẽ ixkõt amnhĩ xunhwỳ nẽ ixte amnhĩ nhĩpêx ã ixpumu. Ixte mẽ akamã ixukaprĩ xwỳnh na pa. Na pa hte mẽ akutã inhnojarêt rãhã ho ixpa. Jakamã kot kaj mẽ ixkõt amnhĩ xunhwỳ pa te ixte mẽ anê mẽmoj pytĩ ho ixwryk pyràk o mẽ anhĩpêx nẽ tãm

mě axunhwỳ ka mẽ tãm ajamaxpěr nẽ tãm amnhĩ nhĩpêx o ri apa. Mo kaxyw koja ixkôt mẽ kot amnhĩ nhĩpêx o pa xwỳnhjaja tee ri amnhĩ kukamã hamaxpěr o pa? Nà na htem ixkamnàr rom hamakêtkati nẽ àmnhĩx ri pa ho pa. Anẽ.

Matêwre 12

Jejus kêp arĩgromnu hpãm

Makre 2.23-28; Rukre 6.1-5

¹Tã nhũm Ijaew nhõ arĩgromnu pê sapja kato. Hãmri nhũm Jejus mẽ hkôt ri mẽ ixpa ho mẽ ixpa xwỳnhjê mẽ pa mẽ ma mẽ hpur kôt ri nhỹhỹm ri ixpa. Hãmri nẽ ra mẽ inhmã prãm nẽ mẽmo hy te kot harôj pyræk xwỳnhja kwỳ rê nẽ kugrà nẽ ma Jejus kôt hkanhar o mỗ. Mẽ ixpê Ijaew na pa htem axpẽn pur kãm ã amnhĩ nhĩpêx anhỹr o ixpa.

²Hãmri nhũm mẽ ixkwỳ pê Parijew nhõ xwỳnhjaja kãm mẽmoj tã Jejus o kapêr prãm jakamã ã mẽ ixte amnhĩ nhĩpêx anhỹr ã mẽ ixpumu nẽ mẽ ixtã Jejus kukjêr kurê kumrêx nẽ kãm: —Kwa Tĩrtũm kapêr tũm kot mẽ panhõ arĩgromnu hã mẽ pahte mẽ hpur kãm mẽmoj nhĩkênh nê mẽ pahkurê htã nhũm ri akôt mẽ pa ho mẽ pa xwỳnhjaja axtem nẽ ã amnhĩ nhĩpêx anhỹr o ri akôt pa. Mẽmo hyta rê nẽ akôt hkanhar o pa. Kwa mẽ kãm anẽ kê mẽ ã amnhĩ nhĩpêx anhỹr kêt nẽ. Na htem arĩgromnu hã mẽmoj tã àpênh kêt kênã. Anẽ.

³⁻⁴Hãmri nhũm mẽ kuma nẽ hprĩ hã mẽ kãm Tĩrtũm kapêr jarê nẽ mẽ kãm: —Tk. Xàn ka htem Tĩrtũm kapêr ã kagà htũm kot pahi Tawi kot tanhmã amnhĩ nhĩpêx tota kamã harênh nẽ mar kêt nẽ? Na pre hkôt ri mẽ pa xwỳnhjê mẽ nhũm mẽ prãm xàj Tĩrtũm mã amnhĩ jarênh xà hã ixkre hwỳr agjê. Hãmri nhũm mẽ õ patre maatija mẽ kãm prãm tỳx ã mẽ omu nẽ kãm mẽ hkaprĩ nẽ mẽ kãm mẽmoj gõ. Mẽ kot Tĩrtũm noo mã pãwti jaxwỳr xwỳnhhta gõ nhũm mẽ kuku. Tĩrtũm kapêr ã kagà htũm kot ja nê mẽ hkurê htã nhũm mẽ kãm prãm tỳx ã mẽ omu nẽ mẽ kamã ukaprĩ xàj mẽ kãm kugõ. ãm mẽ õ patre pix kot ja hkur kaxyw tã nhũm mẽ kãm kugõ nhũm mẽ kuku.

Tã nom nhũm Tĩrtũm ja hã mẽ omu nhũm ja kêp omnuj kêt nẽ. Kot mẽ kamã ukapĩ nẽ mẽ kãm õr ã omu nhũm ja kãm mex nẽ.

⁵—Mẽ panhõ arĩgromnu htã na hte patrejaja arĩ hã Tĩrtũm mã amnhĩ jarẽnh xà hã ixkre kamã àpênh o pa. Tĩrtũm kapêr ã kagà htũm kôt na htem arĩgromnu htã nhũm mẽ arĩ hã apê nhũm Tĩrtũm pê jamnuj kêt nẽ. Kumã mẽ àpênh xwỳnh kênã.

⁶ãm hãmri na pa mẽ amã ja jarẽ. Tĩrtũm mã amnhĩ jarẽnh xà hã ixkreta mex tã nom ixpê Tĩrtũm Kra jakamã inhmex o ixte ixkreta jakrenh.

⁷Tĩrtũm kapêr ã kagà htũm kot ja harẽnh kot: Kêr ka mẽ inhmã amnhĩ jarẽnh kaxyw nẽ ãm inhmã mẽmoj nhõr pix pê inhmã amnhĩ jarẽnh kêt nẽ. Mẽ mããnẽn mẽ kamã axukapĩ o ri apa pê inhmã amnhĩ jarẽ. Ja na kêt inhmã hprãm. —Ã harẽnh kot anhỹr. Tã mẽ ate aprĩ hã ja mar ronhỹx ka mẽ ixkôt mẽ pa xwỳnhjê kot mẽmo hy rênh nẽ hkanhar o mõi ã mẽ omu nẽ ri tanhmã mẽ ho akapêr to hkêr nẽ. ãm mẽ kãm prãm ã mẽ omu nẽ mẽ kamã axukapĩ nẽ.

⁸—Kêr pa na pre Tĩrtũm mẽ akaxyw ixãm nẽ mẽ awỳr inhmẽ. Jakamã papxipix na pa hte arĩgromnu hã tanhmã mẽ kot amnhĩ nhĩpêx to hã mẽ kãm karõ. Kwa mẽ jajê pumu nẽ mẽ kamã axukapĩ kêt wehe. Kwãr mẽ mãmrĩ mẽmo hyta rê nẽ hkanhar o ixkôt mõi. Anẽ.

ĩhkra grà xwỳnh jarẽnh

Makre 3.1-6; Rukre 6.6-11

⁹Nhũm pre ã Jejus Parijew nhõ xwỳnhjê mã kapêr anẽ hãmri nẽ Tĩrtũm kapêr o mẽ ahkre xà hã ixkre hwỳr tẽ nẽ axà.

¹⁰Nhũm Parijew nhõ xwỳnhjaja tanhmã ho kapêr to kaxyw htãnopxar o kuhê. Jakamã nhũm ixkre kamã mẽhõ my ĩhkra grà xwỳnhja mẽ pikuprõnh xwỳnhjê nhĩhkô hã nhỹ nhũm Parijew nhõ xwỳnhjaja omu nẽ axpẽn mã: —Kwa pu mẽ jar pakuhê nẽ Jejus kot tanhmã amnhĩ nhĩpêx to hã omu. Xà koja arĩgromnu hã mũjti ho mex nà? Koja ho anẽ nẽ Tĩrtũm kapêr tũm kuhpa hã amnhĩ nhĩpêx. E pu mẽ kop xa nẽ hã omu. Anẽ. Hãmri nẽ hã Jejus

kukja nê kãm: —E mẽ inhmã mẽmoj jarê. Xà na htem arĩgromnu hã akupỹm mẽ ho mex nhũm Tĩrtũm kãm ja mex nê nà? Anê.

¹¹Hãmri nhũm mẽ hamaxpêr kôt mẽ omunh mex nê mẽ kãm: —Kwa tanhmã na htem arĩgromnu hã amnhĩ nhĩpêx to ho pa wehe? Xà koja we mẽ akrit ôwêhti ahkrehti kamã tẽm ka omu nê ãm omu nê arĩgro mex jamãr pê ho axàpir kêt nê? Nà kot kaj mẽ tee ri omu nê ho axàpir kurê kumrêx.

¹²Arĩgromnu hã mẽ ho mexja ja mex kênã. Tĩrtũm mã mẽ pahpê panhĩja na mẽ pamex o mẽ hkrit jakrenh jakamã kêr pu mẽ tee arĩgromnu htã pu mẽ hã tanhmã axpẽn to mex to ho papa. Ja na Tĩrtũm kãm hprãm. Anhỹr o mẽ kãm kapêr.

¹³Hãmri nê hpãnhã myta mã: —E anhĩhkra katàt. Anê. Hãmri nhũm ìhkra katàt nê mex kurê kumrêx.

¹⁴Hãmri nhũm Parijew nhõ xwỳnhjaja tee ri ja hã omu nê Jejus kamã gryk nê. Arĩgromnu pê sap ã kot ho mex jakamã nhũm mẽ kamã gryk tỳx nê. Hãmri nê ma mra nê hapôj nê hã axpẽn kukjêr o kuhê nê axpẽn mã: —Kwa ã kot amnhĩ nhĩpêx anhỹrja mỳrapê tanhmã kot puj wem ho? ã kapêr anhỹrja o te mẽ papamjaja mẽ pahte hkĩnhã mẽ kamã paxukapĩrĩ kêt pyræk ã mẽ pajarê. Koja mẽ pahkwỳjaja kuma hãmri nê mẽ pahte amnhĩ nhĩpêx kaga nê amnhĩ kaxyw hkôt pix mã hamaxpêr. Kwa tanhmã kot puj wem ja nê ho? Anhỹr o axpẽn kukjêr o kuhê.

Jejus kêp Tĩrtũm kot mẽ pahwỳr mẽnh xwỳnh ã harênh

Makre 3.7-12

¹⁵Hãmri nhũm Jejus amnhĩ tã Parijew nhõ xwỳnhjê jamaxpêr kôt mẽ omu hãmri nê mẽ kêp kato nê hpãnhã ma nhỹhỹm krĩ hõ hwỳr ma tẽ. Nhũm mẽ ohtô nê omu nê ma hkôt mra nhũm mẽ omu nê akupỹm mẽ kãm mẽ à xwỳnh piitã ho mex.

¹⁶Hãmri nê mẽ kãm: —E na pa akupỹm mẽ ato mex. Nom kêr ka mẽ amnhĩ tã ixto axàmra ho ri apa hkêt nê. Ixpê Tĩrtũm Kra hã mẽ kãm ijarênh kêt nê. ãm kwarĩ kumrêx. Anhỹr o mẽ kãm kapêr.

¹⁷Na pre ra amnepê m Tirtûm nhÿ hã kapêr xwÿnh finat Ijaisja Jejus kukamã mē kãm tanhmã harēnh to nē hã kagà. Te Tirtûm tãm kapêr pyræk o harē nē hã kagà. Nē hã kagà ho:

¹⁸Ota ixkôt amnhĩ nhĩpêx o pa xwÿnh ta xa. Pa na pa amnhĩ kaxyw ãm. Inhmã hapêê. Na pa hte tanhmã kot amnhĩ nhĩpêx to ho pa hã omu nē ixkĩnh tÿx nē. Kot paj hwÿr amnhĩ karõ mē nhũm hwÿr axà nhũm ma ÿ hã pika piitã hkôt mē piitã mē kãm ijarēnh o ri mē hkôt pa. Mē kot hprĩ hã ixte tanhmã amnhĩ nhĩpêx to nē tanhmã ijamaxpêr to hã ixpumunh kaxyw.

¹⁹Nom koja ri amnhĩ to àmra o pa hkêt nē. Rÿ kãm amnhĩ to rax prãm o mē kãm tanhmã amnhĩ nhĩpêx to ho pa hkêt nē.

²⁰ãm kapêr xukaprĩ pix o koja mē hirerek xwÿnhjê mã kapêr o pa. Nē mē kot tee ri amnhĩ nhĩpêx ã amnhĩ pumunh xwÿnhjê kamã ukaprĩ o pa. Nē mē kot htÿx ri amnhĩ nhĩpêx o mē pa xwÿnhjê kutã nojarêt rãhã ho pa jakamã nhũm mē hpãnhã tãm amnhĩ nhĩpêx o pa. Koja ã amnhĩ nhĩpêx anhÿr o ri mē hkôt pa rãhã ra akupÿm mēmoj piitã tãm haxwÿr pa.

²¹ã kot amnhĩ nhĩpêx anhÿr o pa jakamã koja pika piitã hkôt mē pa xwÿnh kwÿjjaja kukwak ri amnhĩ kaxyw Tirtûm kôt hamaxpêr nē hkôt amnhĩ xunhwÿ. Anē. Na pre ã finat Ijaisja Tirtûm nhÿ hã kormã Jejus wrÿk nē kator kêt ri tanhmã kot amnhĩ nhĩpêx to ho pa hkukamã harēnh nē hã kagà anē. Tã nhũm mē hwÿr wrÿ nē ã mē hkôt amnhĩ nhĩpêx anhÿr o pa.

Jejus mē mēkarõmnuti wa harēnh
Makre 3.20-30; Rukre 11.14-23; 11.31-32; 12.10

²²Tã nhũm prem Jejus wÿr mēhõ myja o mō. Mēkarõmnuti kot hwÿr àr nē ho nohkre nē ho kapêr kêt xwÿnh ta nhũm mē hwÿr o mō. Hãmri nhũm omu nē nē mēkarõmnuti jano nē akupÿm ho mex kurê kumrêx nhũm akupÿm rīt mex nē akupÿm kapêr mex nē.

²³Hãmri nhũm mē amnhĩ jaêr pê omu nē kamã no puma nē hã axpên kukjêr o: —Kokÿÿ. Jejus na hte ãm mē ho mex o mē ho mex o pa. Mãn kêp Tirtûm kot mē pahwÿr mēnh mã xwÿnh ta na nà? ã na hte ã amnhĩ nhĩpêx anhÿr o pa. Mãn kêp pahi finat Tawi kanrêhã tãmnhwÿta na nà? Anē.

²⁴Nom nhũm Parijew nhõ xwỳnhjaja ã Jejus kot amnhĩ nhĩpêx anhỹr ã omu nẽ kêp mẽkarõmnuti hkwỳ hã hkamnhĩx. Jakamã mẽ kot hã axpêr kukjêr ã mẽ kuma nẽ mẽ kãm: —Tk pêr hinhu nhĩkôôti nhỹ hã na hte mẽ nê amnhĩ kwỳjê japôx o pa. Anẽ. Hinhu nhĩkôôti nhĩxi hõ pê Satanasti nhũm prem ã Satanasti nhỹ hã Jejus kot amnhĩ nhĩpêx ã hkamnhĩx anẽ.

²⁵Nhũm ra mẽ hamaxpêr kôt mẽ omunh mex jakamã mẽ kãm: —Kwa mẽ inhma mẽ ate ixpê Satanasti hkwỳ hã ixkamnhĩx xwỳnhjaja. Koja pika nhõ xwỳnhjaja axpên kutã amnhĩ xunhwỳ nẽ axpu hãmri nẽ anhgrà nẽ ma ahpỹnhã ri pa. Hãmri nẽ amnhĩ krã hkôt ri tanhmã amnhĩ nhĩpêx to ho pa. Jakamã nhũm mẽ õ pahija mẽ hamãr kêt nẽ. Nẽ koja krĩ nhõ xwỳnhjaja. Rỳ mẽ kot axpên to hkwỳ xwỳnhjaja mẽmoj tã axpên kãm gryk nẽ axpên kutã amnhĩ xunhwỳ. Hãmri nẽ ahpỹnhã awry hã pa nhũm mẽ õ pahija tee ri kãm mẽ hamãr prãm kaprỳ. Mo mẽ hkwỳjaja kot ri mẽ hamãr o pa? No koja pahija tãm amnhĩ nê amnhĩ kwỳjê janor kêt nẽ.

²⁶Tã ja pyrà nẽ ixte Satanasti nhỹ hã tanhmã amnhĩ nhĩpêx to ho ri ixpa ronhỹx pa ri mẽ nê amnhĩ kwỳjê janor kêt nẽ.

²⁷—No mẽ akwỳjaja? Xà Satanasti nhỹ hã na htem mẽ nê mẽkarõmnuti japôx o pa? Kêp apu pa ixte ÿ hã mẽ nê amnhĩ kwỳjê japôx ronhỹx mẽ akwỳjaja ixpyrà nẽ ÿ hã mẽ nê amnhĩ kwỳjê japôx o pa. Nà Tĩrtũm nhỹ hã mẽ ixte mẽ nê mẽ hapôx o ixpa kênã. Jakamã mẽ ate ã ijarênh anhỹrja mex kêt.

²⁸Tĩrtũm Karõ nhỹ hã ixte mẽ nê mẽ hapôx jakamã kwa mẽ ja hã ixpumu nẽ ixte mẽ ato amnhĩptàr kaxyw Tĩrtũm kot mẽ awỳr inhmênh kôt ixpumu kêt wehe. Pa na ka htem ijamãr o apa.

²⁹—Satanastija àhpumunh tỳx jakamã na htem tee ri kêp hkôt mẽ kot amnhĩ xunhwỳr xwỳnhjê pytàr kaxyw nhũm mẽ nê mẽ omunh mex nẽ. Tã nom ixàhpumunh tỳx o ixte Satanasti jakrenh par jakamã na pa hte kêp mẽ utà nhũm mẽ hpãnhã ixkôt ri amnhĩ nhĩpêx.

³⁰—Ra mẽ amã ixkapêr mar prãm tã nom kormã ixkôt amnhĩ xunhwỳr kêt nẽ. Kwa wem ma amnhĩ to amõr gri nẽ tokyx ixkôt amnhĩ xunhwỳr kêt wehe.

Kot kaj mẽ anhỹr kêt hãmri nẽ mẽ apê ixkutã amnhĩ xunhwỳr xwỳnh pyràk o amnhĩ nhĩpêx.

31-32—Nẽ koja mẽhõ ixkapêr ma nẽ kãm ixprãm kêt nhũm Tĩrtũm ixtã omu nom tokyx tanhmã ixtã ho hkêt nẽ. Koja kormã amnhĩ tã hamã. Karõ kot axte kãm ijarẽnh o amnhĩrĩt nhũm jatã kot mar nẽ kãm ixprãm nẽ ixkõt amnhĩ xãm prãm xàj nhũm kormã amnhĩ tã hamã. Nom koja Karõ xatã mẽ kãm tanhmã ixto amnhĩrĩt to htã nhũm mẽ kuma nẽ ãm kuma nẽ te mẽ kêp amnhĩ jamak pro pyràk. Jao ra Karõ hã hpijaàm kêt o amnhĩ nhĩpêx. Mỳrapê koja Tĩrtũm nhỹrmã amnhĩ xwar te kêp amnhĩ jamak pro pyràk o mẽ hipêx nhũm mẽ tee kãm amnhĩ kaprĩ kaprỳ. Hãmri nẽ amnhĩ xà htỳx kamã hamak o pa xàta wỳr ma pa nẽ kamã pa rãhã nẽ pa ho pa. Anẽ.

Mẽ pajamaxpêr xà hkõt tanhmã ri mẽ pakapêr to

Rukre 6.43-45

33Nhũm Jejus arĩ Parijew nhõ xwỳnhjê mã kapêr nẽ mẽ kãm: —Nẽ kot kaj mẽ atõ anhõ mẽmo pàr nhũm amã ô mex nẽ. Ô rax nẽ. Ka omu nẽ akĩnh nẽ amnhĩm mex ã harẽ. No koja apê ô hkêt ka tee ri omu nẽ mex kêt ã harẽ. Na htem ã amnhĩm mẽmo xõ hpàr pumunh kõt tanhmã kute hã harẽnh anẽ. Ja pyrà nẽ na htem tanhmã mẽ kot amnhĩ nhĩpêx to hã mẽ omunh kõt tanhmã mẽ harẽnh to. Mẽ kot amnhĩ tomnuj xwỳnh ã mẽ harẽ rỳ mẽ kot amnhĩ to mex xwỳnh ã mẽ harẽ.

34-35—Nẽ koja mẽhõ hamaxpêr mex nẽ hãmri nẽ kapêr mex o pa. Nom koja hamaxpêr punuj nẽ kapêr punuj pix o pa. Nẽ htỳx ri tanhmã amnhĩ tomnuj to ho pa. Na htem ahpỹnhã amnhĩ jamaxpêr xà hkõt tanhmã kapêr to ho pa. No mẽ kajaja na ka htem kagã xoprê jamaxpêr pyràk o ajamaxpêr punuj pix o ri apa. Jao akapêr punuj nẽ. No tãm ajamaxpêr o tãm akapêr o ri apa hkêt nẽ. Na htem tanhmã hamaxpêr to xà hkõt tanhmã ri kapêr to ho pa.

36-37Koja nhỹrmã Tĩrtũm mẽ piitã tanhmã mẽ kapêr to hã mẽ mar xà hkõt tanhmã mẽ harẽnh to. Jakamã mẽ akapêr mex o mẽ apa xwỳnhjaja koja mẽ amex ã mẽ ajarẽ. Nom mẽ atỳx ri akapêr punuj o mẽ apa xwỳnhjaja koja

mě amex kêt ã mě ajarẽ. Hãmri nẽ mě akapěr punuj o apaja mỳrapê mẽ atomnuj tỳx nẽ. Anẽ.

Jejus kot Jõhti jarẽnh

Makre 8.11-12; Rukre 11.29-32

38Hãmri nhũm Tĩrtũm kapěr tũm o mẽ ahkre xwỳnh mẽ Parijew nhõ xwỳnh kwỳjaja mẽmoj tã Jejus wỳ nẽ kãm: —Kwa Pahihti. Mẽ inhmã aa mẽ ixte mẽmoj pumunh kêt õ ho anẽ. Kot paj mẽ omu hãmri nẽ Tĩrtũm kot mẽ ixwỳr amẽnh ã apumunh kurê kumrẽx. Jakamã e mẽ inhmã mẽmoj to anẽ nà. Anẽ.

39Hãmri nhũm mẽ kuma nẽ mẽ kãm: —Tk. Pěr ãm mẽ ajamaxpěr punuj pix o na ka htem apa. Ixpê Tĩrtũm kot mẽ awỳr inhmẽnh xwỳnh tã mẽ ate ja hã ixpumunh kêt. Nẽ mẽ ate ja hã axpẽn mã ijarẽnh kêt tã ixte mẽ amã aa mẽmoj pumunh kêt õ ho anhỳr kaxyw hã ixwỳ. Nà pa mẽ amã ho anhỳr kêt nẽ. Kormã. ãm amnepêm Jõhti kot tanhmã amnhĩ nhĩpêx toja pix kot paj mẽ amã harẽ.

40—Tĩrtũm nhỹ hã kapěr xwỳnh Jõhtija amnepêm na pre tep rax kumrẽxja htĩr rãhã kukrẽ. Nhũm õxàhkre kamã htĩr nẽ hkrĩ hã apkati axkrunẽpxi hãmri nẽ htĩr rãhã õxàhkre rũm kato. Tã ixpê Tĩrtũm kot mẽ awỳr inhmẽnh xwỳnh kot paj nhỹrmã kẽn kre kamã ixtyk nẽ inhnõr ã apkati axkrunẽpxi. Jõhti hkĩnhã ixtyk kumrẽx nẽ inhnõr ã apkati axkrunẽpxi hãmri nhũm Tĩrtũm akupỹm ixto ixtĩr.

41—Nẽ koja nhỹrmã Tĩrtũm akupỹm mẽ htyk nẽ mẽ hikwỹ xwỳnh piitã akupỹm mẽ ho htĩr hãmri nhũm mẽ piitã Inhĩpêxà mẽ wa ixkutã hkrĩ pa wa tanhmã mẽ harẽnh to. Tĩrtũm mẽ wa ixkuri mẽ htĩr tũm nẽ mẽ pa ho mẽ pa mã xwỳnhjê hã mẽ hkwỳjê jarẽ nẽ wa ixkuri mẽ pa ho mẽ pa hkêt xwỳnhjê jarẽ. Mẽ piitã ã ahpỹnhã mẽ harẽnh anẽ. Amarĩ mẽ pa xwỳnhjaja nẽ mẽ õ pahijaja. Jakamã nhũm Nĩnĩwe nhõ xwỳnhjaja tanhmã wa inhmã mẽ ajarẽnh to. Jõhti kot mẽ hwỳr mõi nẽ mẽ kãm Tĩrtũm kapěr jarẽnh o pa xwỳnhjaja nhũm mẽ tanhmã wa inhmã mẽ ajarẽnh to nẽ wa inhmã: “Na pre Jõhtija man mẽ inhõ krĩ hwỳr mõi nẽ mẽ inhmã akapěr jarẽnh o ri mẽ ixkõt pa. Pa prem kuma nẽ mẽ ixte amnhĩ tomnuj kaga nẽ akõt amnhĩ xunhwỳr kurê kumrẽx Tĩrtũm. No or war akutã mẽ hkrĩ xwỳnh kwỳ ata mẽ na pre

Akra Jejus tã mē hwỳr mō nē mē kãm kapēr o ri mē hkôt pa nhũm prem mar tã mē ixkĩnhã mē kot amnhĩ tomnuj kaga nē hkôt amnhĩ xunhwỳr kêt nē. Mē ixkurom mē kot Akra mar tã amnhĩ kaxyw kãm hamaxpēr kêt nē.” Anhỳr o koja mē wa inhmã mē ajarē ka mē tee ri mē ama nē ra mē amã ma nē. Nom ãm mē amã ma kaprỳ.

⁴²—Nē sur kãm mē ò pahi nitita koja mē hpãnhã tanhmã wa inhmã mē ajarēnh to nē wa inhmã: “Na pa pre inhmã pahi Sarumãw kot war anhỹ hã àhpumunh tỳx ã harēnh ma hãmri nē inhmã mar prãm xàj ma awry hã ò pika hwỳr mō nē omu nē kapēr ma. Hãmri nē ma akupỹm inhõ pika hwỳr mō nē ixkwỳjê mã àhpumunh tỳx ã harēnh o ri ixpa. Tã Akra Jejus na kot àhpumunh tỳx o pahi Sarumãw jakrenh tã or war akutã mē hkrĩ xwỳnh kwỳ ata mē. Mē kot kapēr mar tã ixkĩnhã kãm mar prãm kêt. Na prem kuma nē ãm kuma.” Anhỳr o koja wa inhmã mē ajarē. Hãmri nē ja hã mē amã akir ka mē tee ri mar o akrĩ nē amnhĩ kamã agryk o akrĩ. Nom ãm amnhĩ kamã agryk kaprỳ. Anē.

Mëkarõmnuti kot tanhmã mēhõ hto hã harēnh

Rukre 11.24-26

⁴³Nhũm Jejus arĩ Parijew nhõ xwỳnhjê mē Tĩrtũm kapēr tũm o mē ahkre xwỳnhjê mã kapēr nē mē kãm: —Te mē ate ixte mēhõ nē mëkarõmnuti japõx xwỳnhhta pyræk. Nhũm te kệp kator nē ma htēm pyræk. Nē nhỹri amgrà kamã ri pa pyræk. Koja ja kệp omnuj nhũm tee ri kamã nhỹri hkôt xà japēr o pa. Nom tee ri hapēr o pa kaprỳ.

⁴⁴Hãmri nē tanhmã amnhĩ kukamã hamaxpēr to nē hamaxpēr o: “E kot paj ma akupỹm mē kot nē ixkator xwỳnhhta wỳr tē nē axà nē kamã mãn ri ixpa.”

⁴⁵Anhỳr o hamaxpēr hãmri nē ma akupỹm hwỳr tē. Nom kormã akupỹm hwỳr àr kêt ri nhũm kamã amrakati nē ri pa. Jakamã nhũm akupỹm hwỳr axà. Nom ahte hwỳr àr kêt nē. Amnhĩ kôt hkwyjê ho 7 nē hwỳr mē ho gjêx pa. Mē kệp 7jaja nē wamta mē nhũm mē piitã hwỳr gjêx pa. No mē kệp 7jaja na omnuj tỳx o kot wamta jakrenh jakamã nhũm mē kot hwỳr gjêx xwỳnhhta mē y hã ra amnhĩ tomnuj tỳx nē oprê htỳx o pa. Wam pyxire kot hwỳr àrta nhỹ hã nhũm amnhĩ tomnuj o ri pa nom kawax pê oprê. Tã nhũm ra axte

hwỳr mẽ ohtô nẽ gjêxta nhỹ hã hãmri oprê htỳx kumrêx. Ja pyrà nẽ kot kaj mẽ tokyx ixkôt amnhĩ xunhwỳr kêt nẽ hãmri nẽ amnhĩ tomnuj tỳx pix o ri apa. Anẽ.

Jejus kot tanhmã hkwỳjê jarênh to hã harênh

⁴⁶Nhũm Jejus arĩ mẽ ahkre ho nhỹ. Rôm nhũm katorxà nẽ htôjaja nhỹhỹnh hwỳr môn pôj. Nom kormã hwỳr gjêx kêt nẽ. Mẽ kot hã htu rax jakamã nhũm mẽ tee ri hwỳr gjêx kaxyw kormã kapôt ã hã mẽ omunh o kuhê.

⁴⁷Hãmri nhũm mēhōja kapôt ã mẽ omu nẽ Jejus mã mẽ harẽ nẽ kãm: —Kwa Pahihti. Ota akatorxà mẽ atôjaja awỳr môn pôj nẽ tee àr kaxyw. O mũj mẽ kapôt ã kuhê. Anẽ.

⁴⁸⁻⁵⁰Hãmri nhũm kuma nẽ kãm: —Tôe. Nà kot pa ixkato nẽ mẽ omu. Inhmã mẽ hapêê. Nom kot kaj mẽ atô Tĩrtũm kapêr ma nẽ hkôt amnhĩ xãm nẽ hkôt amnhĩ nhĩpêx. Hã kot kaj te apê ixtô rỳ ixkatorxà pyræk o pu mẽ axpẽn nhĩpêx o ri papa. Pa inhmã ixkatorxà nẽ ixtôjê japê pyrà nẽ mãänên inhmã mẽ ajapê nẽ. Anẽ.

Matêwre 13

Mêmo hy hkre xwỳnh jarênh

Matêwre 13.18-23; Makre 4.1-9; Rukre 8.4-8

¹Hãmri nhũm Jejus mẽ kãm kapêr pa nẽ ixkre rũm kato nẽ ma himô rax wỳr tẽ nẽ gô mỳri mẽ kãm ujarênh kaxyw nhỹ. Pa mẽ ixpê hkôt mẽ ixpa ho ixpa xwỳnhjaja ma hkôt mra.

²⁻³Hãmri nẽ gôta wỳr pôj nẽ mỳri ixkrĩ. Nhũm mẽ Jejus ã htu rax nẽ nhũm tee ri mẽ omunh o nhỹ. Hãmri nẽ hamaxpêr nẽ kànhmã xa nẽ tẽ nẽ pàr krem axà nẽ pàr kre kamã mũtũm awry rũm mẽ ahkre ho nhỹ nhũm mẽ piitã omunh nẽ mar mex o hkrĩ. Nhũm mẽ kãm ujarênh o mẽ ahkre ho nhỹ. Nom mẽ kãm tãm ujarênh kêt nẽ. Mẽ kot Tĩrtũm kapêr mar nẽ tanhmã hkôt amnhĩ nhĩpêx to ho paja nhũm hã kuxi nẽ mẽ kãm harênh o nhỹ nhũm mẽ amgrà kamã kỳx pê mar o hkrĩ. Nhũm mẽ kãm:

⁴—E mẽ inhma. Kojã mēhō ma pur mã mō nẽ pur kãm mẽmo hy ho ukapêr o ri pa. Nom nhũm hy piitã amex kãm rôrôk kêt nẽ. Kojã hkwỳja ahpỹnhã

nhÿri rôrôk. Kwÿ aptÿx kãm rôrôk nhÿm kuwênhre omu nê hwÿr mra nê hkrêr pa.

⁵—Nê koja kên kãm hkwÿ rôrôk nê ra higrôt kutã nojarêr nê higrôt pa. Nom nhÿm kamã aptÿx nê kêp pika hkryre.

⁶Jakamã nhÿm higrôt nhÿm hã myt apha nê arÿgro htÿx mê nhÿm grã pa. Harê hkryre jakamã grã pa.

⁷—Nê koja mrônhi kamã hkwÿ rôrôk nê higrôt tã no nhÿm utÿja kêp amÿtã nhÿm ô hkêr nê.

⁸—No kêr hirã kamã pika mex kãm rôrôk xwÿnhja hirã kamã rôrôk jakamã higrôt mex nê piitã ô rÿnh nê. Kamã ô hkwÿ kêp 30 nê kamã hkwÿ kêp 60 nê kamã hkwÿ kêp 100. ã mê ujarênh kot anhÿr.

⁹Kwa kêr ka mê ixujarênhja ma nê kãm ajamxpêr tÿx rãhã ho apa. Anê.

Mêmo kaxyw Jejus kot mê ujarênh o mê ahkre

Makre 4.10-25; Rukre 8.9-15

¹⁰Hãmri pa mê ixpê Jejus kôt mê ixpa ho ixpa xwÿnhjaja Jejus kot mê kãm ã ujarênh anhÿrja ã kuma nê tee ri hkukamã ijamxpêr. Hãmri nê hã hkukja nê kãm: —Kwa axujarênhja na pa mê ixprÿ hã hkôt mêmoj pumunh kêr nê. Mon ka hte ãm mê ujarênh pix o mê ahkre? Anê.

¹¹Hãmri nhÿm mê inhmã: —Tôe. Nã kot paj mê amã harê. Tÿrtÿm kãm mê ate aprÿ hã mar prãm jakamã kot paj ixprÿ hã mê amã harê. Mê kot amnhÿ tomnuj kaga nhÿm Tÿrtÿm kot ja hã mê omunh nê mê ho hkra. Ja na pa harê. No mÿjjaja mê akÿnhã kãm ja mar prãm kêr jakamã na htem ixujarênhja ma nê ãm kuma nê htÿx ri pa.

¹²—No kêr mê kajaja na ka mê ixkôt ri apa ho apa. Nê xatã ixkapêr mar o apa jakamã na ka mê aprÿ hã ixkapêr ma. Tã mê ate ixkôt amnhÿ nhÿpêx o apa jakamã na pa tanhmã mê akrã hto ka mê aprÿ hã mar mex o mÿ. No mê kot ixkapêr mar nê ãm mar xwÿnhjaja na mê akÿnhã inhmar tÿx kêr nê. Jakamã nhÿm Tÿrtÿm tanhmã mê hkrã hto nhÿm mê hã no hkêr tokyx anê htÿx ri pa.

13“Ixte mẽ kãm aa mẽ kot mẽmoj pumunh kêt kwỳ ho anhỳr rax tã nhũm mẽ omu nẽ ãm omu. Nẽ ixte amnhĩ nhĩpêxja nhũm mẽ kãm hkĩnh kêt nẽ. Nẽ mẽ kot ixkapêr mar tã ãm inhma nẽ kãm hprĩ hã inhmar prãm kêt nẽ.”
—Jakamã na pa hte ã mẽ kãm mẽmoj te ho tãm pyrà nẽ harẽ no ãm hã haxwỳ nẽ mẽ kãm ixujarẽnh anẽ.

14-15—Na pre ra Tĩrtũm nhỹ hã kapêr o pa xwỳnh Ijaisja amnepê m mẽ hkukamã tanhmã mẽ harẽnh to nẽ hã kagà. Mẽ kot inhmar nẽ ãm inhmar xwỳnhjê jarẽ nẽ tanhmã mẽ hkukamã mẽ harẽnh to nẽ mẽ harẽnh o: Kojã mẽ ujarẽnh mex mar pymaj amnhĩ jamak pro nẽ amnhĩ no hpro nẽ hkôt hamaxpêr kêt nẽ. Jakamã kojã mẽ kãm mẽ kot amnhĩ nhĩpêx mex prãm kêt nẽ harẽnhja ma nẽ ãm kuma. Nẽ omu nẽ ãm omu. Mẽ kãm hprãm kêt jakamã kojã mẽ ã amnhĩ nhĩpêx anẽ. ã mẽ kot amnhĩ nhĩpêx anhỳr kêt ronhỹx mẽ ra Tĩrtũm kapêr ma nẽ hkôt amnhĩ xunhwỳ. Hãmri nhũm amnhĩ tã mẽ omu nẽ mẽ nê mẽ kot amnhĩ tomnuj rên pa. Hãmri nhũm mẽ hkôt amnhĩ nhĩpêx mex nẽ kapêr mar mex o pa. Tã no nhũm mẽ ã amnhĩ nhĩpêx anhỳr kêt nẽ. Anẽ. —ã Ijaisja mẽ hkukamã mẽ harẽ nẽ mẽ hã kagà anẽ.

16—No kêt mẽ kajaja na ka htem ano ho ixte tanhmã amnhĩ nhĩpêx to ho ixpa hã ixpumunh o ixkôt apa. Nẽ mẽ ajamak o ixkapêr mar o ri ixkôt apa.

17Amnepê m mẽ akukamã pahijaja nẽ Tĩrtũm nhỹ hã mẽ kãm kapêr o ri mẽ pa xwỳnhjaja na prem kãm ixpumunh prãm tỳx o pa. Nẽ mẽ kãm ixkapêr mar prãm tỳx o pa. No ãm mẽ akĩnhã ixpumunh nẽ ixkapêr mar kêt rãhã htyk pa. Kormã ixwrỳk nẽ jar ixkator kêt jakamã na prem arĩ htĩr nẽ pa ri ixpumunh kêt rãhã ra htyk pa. ãm mẽ kapxipixjaja na ka mẽ mỳr pẽ ixte amnhĩ nhĩpêx ã ixpumunh nẽ ixkapêr mar o ixkôt apa. Tã mẽ kurom mẽ ate ano ho ixpumunh nẽ ajamak o ixkapêr mar o ixkôt apa jakamã kwa mẽ ja hã amnhĩ pumu nẽ tãm amnhĩ nhĩpêx o ri apa pẽ akĩnh nẽ ri apa. Anẽ. Nhũm pre ã Jesus mẽ ixpê hkôt ixpa ho ixpa xwỳnhjê mã kapêr anẽ.

Jesus kot hprĩ hã mẽmo hy jarẽnh

Makre 4.13-20; Rukre 8.11-15

18Hãmri nhũm Jesus mẽ ixpê hkôt ixpa ho ixpa xwỳnhjê mã hprĩ hã mẽ ujarẽnhhta jarẽ nẽ mẽ inhmã: —E kot paj ixprĩ hã mẽ amã mẽmo hy ho

ukapêr xwÿnh ã ixujarēnhta jarē ka mẽ inhma. Nà mẽmo hyta te kēp Tĩrtũm kapêr pyràk. Nē ahpÿnhã mẽmo hy rôrôk ã pikata te kēp mẽ apê panhĩ ahpÿnhã mẽ ate Tĩrtũm kapêr mar nē ahpÿnhã hkôt tanhmã amnhĩ nhĩpêx tota pyràk.

¹⁹Jakamã mẽ kot mar xwÿnh kwÿjaja te mẽ kot aptÿx kãm hy rôrôk nhũm kuwēnh kot hwÿr mrrar nē hkrēr par xwÿnhta pyràk. Jao Tĩrtũm kapêr ma no nhũm Satanasti te kuwēnh kot hy krēr parta pyrà nē mẽ kot mar nē amnhĩ kaxyw hkôt hamaxpêr nē hkôt amnhĩ xunhwÿr pymaj hãmri ra tanhmã kapêrja nē mẽ hkrã hto. Jakamã nhũm mẽ kuma nom ho hamakêtkati tokyx anē nē axte kãm hamaxpêr kêt nē pa.

²⁰—Nē mẽ kot mar xwÿnh kwÿjaja te mẽ kot kēnre kamã hy hkwÿ rôrôk nē higrôt nē grà par tokyx anhÿr xwÿnhta pyràk. Jao Tĩrtũm kapêr ma nē hkĩnh nē. Nē kãm mar prãm nē.

²¹Tã nhũm mēhõ Tĩrtũm nē tanhmã mẽ kãm kapêr to nhũm mẽ kuma nē Tĩrtũm kaga. Te mẽmo hy higrôt nom ra grà par tokyx anhÿrta pyràk.

²²—Nē mẽ kot mar xwÿnh kwÿjaja te mrônhi kamã hy hkwÿ rôrôk nē higrôt nhũm mrônhi kot kēp àmnar xwÿnhta pyràk. Jao mẽ kãm Tĩrtũm kapêr mar prãm tã mãänēn kãm mẽ hikukrêx rũnh nē mẽ hikàxpore rũnh prãm. Hãmri nē ãm ja pix kukamã hamaxpêr o pa. Nē ja gryk ã axte Tĩrtũm kapêr mã hamaxpêr nē hkôt amnhĩ nhĩpêx kêt nē.

²³—Nē mẽ kot mar xwÿnh kwÿjaja te hirã kamã pika mex kãm hy hkwÿ rôrôk nē higrôt nē ô rũnhta pyràk. Jao ixkapêr ma nē amnhĩ krã him hagjēnh tÿx nē. Nē ixkôt ri amnhĩ nhĩpêx mex rãhã ho pa. Jakamã te mẽmo hy ô rũnh nē ô mex pyràk o amnhĩ nhĩpêx. E ã ixujarēnhja kot anhÿr. Anē.

Harôj kaàkre jarēnh

Matêwre 13.36-43; Makre 4.26-29

²⁴Nhũm Jejus axte mẽ kot mar o hkrĩ xwÿnhjê mã awjarē nom hprĩ hã mẽ kãm ujarēnh kêt nē. Axte mẽ kãm mẽmoj tã kuxi nē awjarē nē mẽ kãm: — Nà nhÿrmã Tĩrtũm mẽ kot kormã htĩr ri tanhmã amnhĩ nhĩpêx to ho pa hã mẽ omunh xà hkôt ahpÿnhã tanhmã mẽ harēnh toja te mẽ ujarēnh ja pyràk.

Koja mēhō harôj y mex o ukapêr kaxyw ma hpur mã mō. Hāmri nē hkre hpa nē ma akupỹm mō.

²⁵Tã nhũm kamàt nhũm ra gōr nē nō. Hāmri nhũm kãm hkurê xwỳnhja ma kêp ihpur wỳr tē nē harôj mexta nhĩpy axtem nē kêp harôj kaàkre hkre. Harôj kaàkreja te kot harôj mex pyræk nom mē kot hkur kêt. Tã nhũm kêp harôj y mex nhĩpy hkre hpa hāmri nē ma akupỹm tē.

²⁶—Tã nhũm hamē higrōt nē anhĩpê ô.

²⁷Nhũm kãm mē àpênh xwỳnhjaja tee ri harôj mex kaêx ã harôj kaàkreta pumu nē hpur nhō dōn wỳr tē nē kãm harē nē kãm: “Kwa ate harôj mex pix kre htã pēr hkaêx ã harôj kaàkre mãânēn kato. Kwa tanhmã na pre amnhĩ to nē hkaêx ã kato?” Anē.

²⁸Hāmri nhũm tee ri mē kuma nē mē kãm: “Nà mēhō kãm ixkurê xwỳnh na pre ã inhĩpêx anē.” Anē hāmri nhũm kãm mē àpênh xwỳnhhta kãm: “Kwa xà kot paj mē tokyx ma hwỳr mra nē nê harênh pa nē kurē nà?” Anē.

²⁹Nhũm mē kãm: “Nà kot kaj mē anē nē harôj mexta mē ho apimràatã ixpê harênh pa.

³⁰Kwār mãmrĩ harôj mex mē hpimràatã ô hpa mãn. Ka mē rĩ ma hwỳr mra nē harôj kaàkre kumrêx jarênh pa nē axpên tã harê ho ê nē ma o mra nē hpôk. Hāmri nē rĩ kormã hpãnhã harôj mex jakà nē ho akuprō nē ô ho mra nē ixkre kamã haxwỳ.” Anē. ã mē ujarênh kot anhỹr. Anhỹr o mē kãm kapêr.

Jejus te kot mēmo hy hkryre pyræk ã harênh

Makre 4.30-32; Rukre 13.18-19

³¹⁻³²Hāmri nhũm Jejus arĩ mē kãm amnhĩ tã kuxi nē ujarênh o nhỹ. Nē tanhmã mē kãm amnhĩ tã ujarênh to nē mē kãm: —Nà Tĩrtũm kot mē awỳr ixte mē ato amnhĩptàr kaxyw inhmēnh ã ijarênhja. Te ixte mēmo hy pixire nhũm mē kot hkre nhũm higrōt pyræk. Koja gaa nē hprêk. Hāmri nē hpa anhgrà nhũm kuwênhre hwỳr mra nē hôptĩ kamã amnhĩm haê nhĩpêx nē kamã hikwỹ. Tã kot paj nhỹrmã mēmo hy jarênhhta pyrà nē ixpyxi htã pika piitã hkôt mē ho amnhĩptà nē mē omunh mex rãhã ho ixpa. Anē.

Jejus te kot pãwti kaxkrit xà pyràk ã harënh

Rukre 13.20-21

³³Nhũm Jejus arĩ mẽ kãm amnhĩ tã kuxi nẽ ujarënh o nhỹ nẽ mẽ kãm: —E kot pa hpãnhã mẽ amã tanhmã pãwti kaxkrit xà jarënh to ka mẽ inhma. Na hte mënijaja pãwti nhĩpêx kaxyw hãmri nẽ kaxkrit xà hkwỳ ho grille nẽ kupy nẽ trik xôm mẽ ho ahkà. Hãmri nẽ ho pãwti nhĩpêx. Kaxkrit xàja grille htã pãwti piitã ho kaxkrit mex nẽ. Tã ja pyrà nẽ ixpyxi htã koja mẽ nhỹrmã pika piitã hkôt ixkôt amnhĩ nhĩpêx mex o pa. Anhỹr o mẽ kãm amnhĩ jarë.

Jejus kot mẽ ujarënh pix kãm mẽ ahkre hã harënh

Makre 4.33-34

³⁴Na pre ã Jejusja mẽ ujarënh o mẽ ahkre ho pa anẽ. ãm mẽ ujarënh pix o mẽ ahkre ho pa. Te tãm ujarënh pyràk no ãm mẽmoj tã haxwỳ rỳ amnhĩ tã haxwỳ nẽ mẽ kãm tanhmã amnhĩ jarënh to.

³⁵ã kot mẽ ahkre ho pa anhỹr kukamã na pre ra amnepêm Tĩrtũm nhỹ hã kapër o mẽ pa xwỳnhjê hõja harë nẽ hã kagà. Te Jejus tãm tanhmã amnhĩ jarënh to pyràk o hkukamã harë nẽ hã kagà nẽ hã hkagà ho: Kot paj mẽ kãm ixujarënh pix kãm mẽ ahkre ho ri ixpa. Mẽmoj te ho tãm pyrà nẽ harë nom mẽmoj tã haxwỳ nẽ tanhmã mẽ kãm ixujarënh to. Nẽ aa mẽ kot mẽmoj mar kêt xwỳnh kwỳ kot paj mẽ kãm harë kê mẽ kuma. Anẽ.

Jejus kot hprĩ hã harôj kaàkre jarënh

Matêwre 13.24-30; 13.47-50

³⁶Tã nhũm Jejus mẽ kãm ujarënh pa nẽ mẽ kure nẽ ma tẽn ixkrem axà. Hãmri pa mẽ ixpê hkôt ixpa ho ixpa xwỳnhjaja ma hkôt mra nẽ ixkrem agjê. Hãmri nẽ harôj kaàkre hã ujarënhhta ã hkukja nẽ kãm: —Kwa aprĩ hã mẽ inhmã harôj kaàkre jarënhhta jarë nà. Na pa mẽ kormã ixprĩ hã mar mex kêt nẽ. Anẽ.

³⁷Hãmri nhũm mẽ inhmã: —Tõe pa ixprĩ hã mẽ amã harë. ãm paa. Ixpê Tĩrtũm kot mẽ awỳr inhmënh xwỳnh te ixte mẽmo hy mex o ukapër xwỳnhhta pyràk.

³⁸Ně purta te kêp pika piitã pyrãk. Ně harôj mexta te ra mẽ ate ixkôt amnhĩ xunhwÿr nẽ ixkôt amnhĩ nhĩpêx o apa xwÿnhjê pyrãk. Ně harôj kaàkreta te mẽ kot Satanasti hkôt amnhĩ nhĩpêx o mẽ pa xwÿnhjê pyrãk.

³⁹Ně kot harôj kaàkre hkre xwÿnhhta te Satanasti pyrãk. Ně harôj jakàr xà hã arĩgrota te Tĩrtũm kot ahpÿnhã tanhmã mẽ harênh to xà hã arĩgrota pyrãk. Ně mẽ kot harôj jakàr xwÿnhjaja te Tĩrtũm kapêr o wrÿk xwÿnhjê pyrãk.

⁴⁰Mẽ ujarênhja kamã na prem harôj kaàkre kumrêx jarê nẽ hã hpôk jarê. Ja pyrã nẽ koja nhÿrmã Tĩrtũm kot ahpÿnhã tanhmã mẽ harênh to xà hã arĩgrota ã hãmri ã mẽ kot amnhĩ tomnuj o mẽ pa xwÿnhjê nhĩpêx anẽ.

⁴¹—Kot paj nhÿrmã kãm mẽ piitã mẽ ho amnhĩptàr kaxyw hãmri nẽ kapêr o mẽ wrÿk xwÿnhjê mã anẽ nhũm mẽ ma mran wrÿ nẽ mẽ kot amnhĩ tomnuj xwÿnhjê pix o akuprõ. Ně mẽ kot nhãm mẽ hkwyjê kot mẽ urãk nẽ tanhmã amnhĩ tomnuj to ho pa kaxyw mẽ kãm anhÿr xwÿnhjaja nhũm mẽ mãânẽn mẽ ho akuprõ.

⁴²Hãmri nẽ mẽ ho pikuprõnh pa nẽ te mẽ kot harôj kaàkreta nhĩpêx pyrã nẽ kuwy kamã mẽ rênh pa. Hãmri nhũm mẽ kamã amnhĩ xà htÿx kamã hamak rãhã nẽ pa ho pa. Ně amnhĩ xà htÿx ã maj tee ri mÿr rãhã ho pa. Ně tee ri amnhĩ xà hã maj amnhĩ nham o axpên kamnhar tÿx kaprÿ.

⁴³—No ixkôt mẽ kot amnhĩ nhĩpêx xwÿnhjaja koja mẽ mẽ kurom mex kumrêx nẽ pa. Kot paj mẽ ho mex rax nẽ nhũm mẽ mex rãhã nẽ pa ho pa. Tĩrtũm kot kormã pika nyw nhĩpêx mã xwÿnhhta kamã nhũm mẽ mex kumrêx nẽ pa ho pa. E kêr ka mẽ ixujarênhja ma nẽ kãm ajamexpêr tÿx rãhã ho apa. Anẽ.

Mě hikukrêx mex o hpimxur jarênh

Piripos 3.7

⁴⁴Nhũm Jejus arĩ mẽ ixpiitã mẽ inhmã tanhmã ujarênh to. Nom hprĩ hã ujarênh kêt nẽ. Kê axte mẽmoj tã kuxi nẽ mẽ inhmã tanhmã ujarênh to nẽ mẽ inhmã: —Mě ate ixkôt amnhĩ xunhwÿr xwÿnhjaja te mẽ apê mẽ hikukrêx mex ã pika japrôr xwÿnhhta pyrãk. Koja mẽhõ mẽ hikukrêx mex jamÿ nẽ o tẽ nẽ nhÿri amnhĩm ho amũxu. Kaxyw kakwÿ nẽ kamã hagjê nẽ hity hpa nẽ

ma akupÿm tẽ. Hãmri nhũm jãã nhũm mẽhõ tẽn kãm kato. Hã pikata kakwÿ nẽ kãm kato nẽ omu nẽ hkĩnh nẽ. Nẽ hamaxpẽr o: “E pa ma tẽ nẽ inhõrkwÿ kamã ixkukrêx piitã ho wẽnê hpa nẽ hpãnhã kàxpore jamÿ nẽ ho amnhĩm mẽ hikukrêx mex ã pika japrô nẽ amnhĩm mẽmoj mexta o ixàrik pa.” Anhÿr o hamaxpẽr nẽ akupÿm hity hpa nẽ ma akupÿm tẽ. Hãmri nẽ mẽmoj mexta gryk ã õ mẽmoj piitã ho wẽnê hpa. Hikukrêx nẽ õrkwÿ nhũm piitã ho wẽnê hpa. Hãmri nẽ hpãnhã kàxpore jamÿ nẽ ma o tẽ nẽ amnhĩm pikata japrô. Hãmri nẽ ma akupÿm hwÿr tẽ nẽ kamã mẽ hikukrêx mexta kwÿrnh pa nẽ ho õ kumrêx. —Tã te mẽ ate mẽhõ kot ã amnhĩ nhĩpêx anhÿr xwÿnhta pyræk. Na ka mẽ uræk nẽ inhgryk ã amnhĩ tomnuj kaga hpa nẽ hpãnhã ixkõt amnhĩ nhĩpêx. Te mẽhõ kot mẽmo mẽ hikukrêx mex gryk ã hikukrêx tũm piitã kaga hpar nẽ mẽ hikukrêx mex o hpimxur xà hã pikata japrô pyræk. Anẽ.

Mẽhõ kot kẽn jaxênh japrô jarênh

⁴⁵Nhũm Jejus arĩ mẽ inhmã awjarẽ nẽ mẽ inhmã: —Nẽ ja. Na htem kãm hkĩnh nẽ hamakêtkati nẽ ri hpa hprãm xàj Tĩrtũm kõt amnhĩ xunhwÿ nẽ hkõt ri amnhĩ nhĩpêx rãhã ho pa. Te mẽhõ my kãm kẽn jaxênh mex prãm nẽ ma ri hapêr o pa xwÿnhta pyræk.

⁴⁶Nẽ ra nhÿri omu nẽ ma tẽ nẽ prês ã mẽ hkukja. Nhũm mẽ kãm hã ho ohtô nẽ harẽ nhũm ma akupÿm tẽ nẽ kãm ho õ hprãm xàj hikukrêx piitã ho wẽnê hpa. Hãmri nẽ kàxpore jamÿ nẽ o tẽ nẽ amnhĩm ho haprô. Kẽn jaxênh mexta pix gryk ã hikukrêx piitã ho wẽnê hpa nẽ hpãnhã ho amnhĩm haprô. —Tã ja pyrã nẽ na ka htem amex nẽ ajamakêtkati nẽ axàmnhĩx ri apa hprãm xàj ixkõt amnhĩ xunhwÿ nẽ ixkõt pix mã amnhĩ nhĩpêx o apa. Anẽ.

Kryhti jarênh

Matêwre 13.24-30; 13.36-43

⁴⁷⁻⁴⁸Nhũm Jejus arĩ mẽ inhmã awjarẽ nẽ mẽ inhmã: —E Tĩrtũm kot nhÿrmã tanhmã mẽ harênh to xà hã arĩgro kot paj ixprĩ hã tanhmã mẽ amã harênh to. Te ho mẽmyjaja kot himô kamã kryhti rênh pyræk. Kojã mẽ gôx kãm kumẽ nẽ akupÿm ho api nhũm kamã tep ohtô nẽ. Nhũm omu nẽ kÿx pê

amgrà kamã hkapĩ nẽ ahpÿnhã ri tanhmã kamã kute kawrà. Nẽ kamã mex kawrà nẽ kawà kamã kugjê nẽ mẽ kot hkur kêtja nhũm nhãm kurẽ.

⁴⁹Ja pyrà nẽ Tĩrtũm kot ahpÿnhã ri tanhmã mẽ kot amnhĩ nhĩpêx to hã mẽ omunh xà hkôt tanhmã mẽ hipêx to kaxyw arĩgrota ã ã mẽ hipêx anẽ. Koja kapêr o mẽ wrÿk xwÿnhjaja mẽ kot hkôt amnhĩ xunhwÿr xwÿnhjê nẽ mẽ kot amnhĩ tomnuj o mẽ pa xwÿnhjê kawrà hpa.

⁵⁰Nẽ te mẽ kot tep mex nẽ tep punu kawrà nẽ nhãm rênhta pyræk o mẽ hipêx nẽ ma kuwy hwÿr mẽ o mra nẽ kamã mẽ kurẽ. Nhũm mẽ tee ri amnhĩ xà htÿx ã maj amÿra nẽ tee ri amnhĩ nhĩpêx kaprÿ. Anẽ. Nhũm pre ã Jejusja axte mẽ ixpê hkôt mẽ ixpa ho mẽ ixpa xwÿnhjê mã ujarênh anẽ.

⁵¹Hãmri nẽ mẽ inhmã: —E xàn ka mẽ atã aprĩ hã ixujarênhta ma nà? Anẽ pa mẽ kãm: —Tÿ. Nà na pa mẽ atã ixprĩ hã mar mex nẽ. Anẽ.

⁵²Hãmri nhũm mẽ inhmã: —Tôe. Nà ãm hãmri. Na ka xep mẽ ra ixte mẽ ahkre nywta mar mex nẽ. Nẽ mẽ akwÿjaja mããnên Tĩrtũm kapêr tũm mar mex nẽ. Te mẽ apê mēhõ apkur xà rax pyrà nẽ ma ho mẽ piitã mẽ hipêx o ri mẽ hkôt paja pyræk. Ja pyrà nẽ kêr ka mẽ ma mẽ piitã mẽ hkôt Tĩrtũm mẽ wa ixkapêr o mẽ ahkre ho ri mẽ hkôt apa. Anẽ.

Najare nhõ xwÿnhjaja kot Jejus kaga hã mẽ harênh

Makre 6.1-6; Rukre 4.16-30; Juãw 1.11

⁵³ã Jejus mẽ inhmã ujarênh par anẽ.

⁵⁴Hãmri nẽ ma akupÿm Najare hwÿr mō nẽ Tĩrtũm kapêr o mẽ ahkre xà hã ixkre hwÿr tẽ nẽ axà nẽ mẽ ahkre ho nhÿ. Nhũm mẽ amnhĩ jaêr pê tanhmã kot mẽ ahkre hto hã kuma nẽ tee ri hkukamã hamaxpêr nẽ axpên mã: —Tk. Kwa kêp mẽ panhĩõ htã tanhmã kot we amnhĩ to nẽ ã àhpumunh tÿx kôt mẽ pamã kapêr anẽ nẽ ri mẽ kãm aa mẽ kot mẽmoj pumunh kêt kwÿ ho anhÿr o pa?

⁵⁵⁻⁵⁶Na pre mẽ panoo mã hprêk nhũm mẽ pahte pahprĩ hã hkwÿjê pumunh. Kêp pĩ kuprãr xwÿnh Juje mẽ hprõ Marir wa hkraa. Nẽ kêp Xiakre nẽ Juje nẽ Simãw nẽ Jut mẽ htõõ. Nẽ htõxjaja jar mẽ pakamã pa nhũm mẽ pahte

mě piitã mẽ omunh mex kênã kot kêt we mẽ kurom ã àhpumunh tỳx aně. Aně.

⁵⁷Hãmri ně kamã gryk ně hkaga. Hãmri nhũm tee ri amnhĩ tã mẽ omu ně mẽ kãm: —Nà Tĩrtũm nhỹ hã kapěr jarěnh o mẽ pa xwỳnhjaja na htem krĩ hkwy kamã kãm mẽ mar prãm ně. Nom õ krĩ kamã mẽ kot karàre rũm hprêk kãm omunh xwỳnhjaja na htem kuma ně ãm kuma. Aně.

⁵⁸Tã mẽ kot amnhĩ kaxyw hkôt hamaxpěr kêt jakamã nhũm tee ri mẽ kãm aa mẽ kot mẽmoj pumunh kêt kwỳ ho anhỹr rax prãm. No ãm mẽ kãm mẽmoj to grêre ně ho aně.

Matêwre 14

Mě kot Juãw Paxis pĩr ã mẽ harěnh

Makre 6.14-29; Rukre 9.7-9

¹Tã nhũm pika pê Garirej kamã mẽõ pahihti Erox Jejus jarěnh ma

²ně tee ri hkukamã hamaxpěr ně hã õ pôristi mã kapěr ně mẽ kãm: —Kwa pěr Juãw Paxis na nà? Ra ixte hã ixàmnênh nhũm mẽ kot hpĩr tã mãn tanhmã amnhĩ to ně akupỹm htĩr. Nà pěr tãm kênã. Jakamã na hte aa mẽ kot mẽmoj pumunh kêt kwỳ ho anhỹr o pa. Aně.

³⁻⁵Na pre ra Erox htõ pê hprõptàn ho hprõ. Tõ arĩ htĩr tã nhũm axtem ně kệp utà ně ho hprõ. Hãmri nhũm Juãw Paxisja harěnh ma ně hã kãm akir ně kãm: —Kwa Eroxis kệp atõ hprõ kênã na ka kêt axtem ně kệp utà ně ho aprõ. Kwa ja omnuj tỳx o omnuj tỳx. Aně. Hãmri nhũm amnhĩ tã kuma ně kamã gryk ně kot hpĩr kaxyw. Tã nom nhũm Ijaew kot axpẽn mã kệp Tĩrtũm nhỹ hã kapěr jarěnh xwỳnh ã harěnh jakamã nhũm mẽ umaj hpĩr kêt ně. ãm ho prês ně haxà nhũm hkrĩ ho hkrĩ.

⁶Tã nhũm jãã nhũm Erox kator ã arĩgro kato nhũm mẽ hã akuprõ ně hã hkĩnh. Hãmri nhũm hprõ nyw kra niti mẽ hwỳr axà ně ahte mẽ hipôk ri mẽ kãm gre. Mě kot omunh ně kamã hkurẽ kaxyw nhũm mẽ noo mã hpijaàm kêt ně mẽ kãm grer o xa. Hãmri nhũm pahi Erox omu nhũm ja kãm mex ně nhũm hkĩnh ně kamã nopyma ně.

⁷Hāmri nē kām: —Nà ãm hāmri na ka ã mẽ inhmã amnhĩ nhĩpêx anē. Jakamã kwa māmri mẽmoj tã ixwỳ. Amã mẽmoj prãm xà hkôt hã ixwỳ kot paj amã kugõ. ãm hāmri na pa amã anē. E mẽmoj na amã hprãm? Anē.

⁸Hāmri nhũm kuma nē kām: —Ma Juãw Paxis krã na pa inhmã hprãm. Inhmã hkrã krãhta nē pasiiti kamã axà nē ixwỳr o tẽ nē inhmã agõ. Anē. Ra katorxà kot kaxyw kãm karõ jakamã nhũm ã hã hwỳr anē.

⁹Hāmri nhũm Eroxja tee ri kuma nhũm ja kêp omnuj nē. Nom ra mẽ pikuprõnh rax xwỳnhjê nhĩpôk ri mẽ noo mã kot kãm: “E māmri amã mẽmoj prãm xà hkôt hã ixwỳ pa amã kugõ.” Anhỳr jakamã kãm kot kêp nê hprãm kêt nē. Hāmri nē Juãw Paxis wỳr õ pôristi hkwỳ rē

¹⁰nhũm mẽ ma mẽ hagjênh xàta wỳr mra nē unê nē mut krãhta.

¹¹Hāmri nē hkrã mỳ nē pasiiti kamã kuxà nē ma akupỹm nita wỳr o tẽ nē kãm kugõ nhũm kumỳ nē ma katorxà hwỳr o tẽ nē kãm kugõ.

¹²Hāmri nhũm Juãw Paxis kôt mẽ pa xwỳnhjaja tee ri mẽ kot hpĩr ã harênh ma nē ma hwỳr mra nē kumỳ nē ma o mõi haxà. Hāmri nē ma Jejus wỳr mra nē kãm harē.

Jejus kot mẽ ho ohtô nē mẽ kãm mẽ õ hã harênh

Makre 6.30-44; Rukre 9.10-17; Juãw 6.1-14

¹³Hāmri nhũm Jejus Juãw Paxis jarênh ma nē hkaprĩ nē. Nē ma himô nhĩkjê hwỳr kapôt ã mõi kaxyw pàr krem axà nē ma mõi. Pa mẽ hkôt ixpa ho ixpa xwỳnhjaja ma hkôt mra. Hāmri nhũm krĩ hkwỳ kamã mẽ pa xwỳnhjaja harênh ma nē ohtô nē ma mẽ inhĩhkrep pikap mra. Nē ra amnhĩ to wa nē mẽ inhmõi xàja wỳr pøj nē mẽ ixkutêp hkrĩ.

¹⁴Jakamã pa mẽ mõi nē mẽ hwỳr pøj nē mẽ omu. Hāmri nhũm Jejus mẽ omu nē kãm mẽ hkaprĩ nē mẽ kãm mẽ à xwỳnhjê ho mex pa.

¹⁵Tã nhũm ra myt àr kaxyw pa mẽ hkôt ixpa ho ixpa xwỳnhjaja tee ri mẽ omu nē Jejus wỳr mra nē kãm: —Kwa na ra amỹkry htỳx nē. Amnhĩ nê mẽ hano kê mẽ ma nhỹri krĩ hkwỳ hwỳr mra nē tokyx amnhĩm mẽmoj japrô nē kuku. Mo jar mẽ apkur xà hã mẽõ? Jar akunĩ pix kênã. Anē.

¹⁶Hāmri nhūm mẽ inhma nẽ mẽ inhmã: —Nà kot paj mẽ hanor kêt nẽ. Mẽ kajaja kot kaj mẽ kãm õ nhūm mẽ apku. Anẽ.

¹⁷⁻²¹No nhūm mẽ ohtô rax kumrêx. Měmyjaja kêp 5.000. Nẽ kaxyw mẽ hprõ nẽ mẽ hkrajaja. Jakamã nhūm Jejus ã mẽ inhmã kapêr anẽ pa mẽ tee ri mẽ hkukamã ijamaxpêr nẽ kãm: —Kwa nà mẽ panhõja raxti hã. Mẽ panhõ pãwti kêp sîk pix. Nẽ kaxyw tep gràja pijakrutre kênã kot kêt mẽ piitã mẽ hipêx. Nà xà kot paj mẽ ma mra nẽ nhỹri mẽ kãm mẽ mẽmoj japrô nhūm mẽ kuku? Anẽ. Hāmri nhūm mẽ inhmã: —Nà pu mẽ kãm mẽmoj japrôr kêt nẽ. Kot puj mẽ kãm mẽ panhõta o anhrà. E mẽ kãm anẽ kê mẽ ahpỹnhã ri hije nẽ hkrĩ hpa. Anẽ. Hāmri pa mẽ kuma nẽ mẽ kãm anẽ nhūm mẽ piitã hkrĩ hpa. Hāmri nhūm Jejus pãwti mẽ tepja jamỳ nẽ kaxkwa hwỳr rît nẽ ho Tĩrtũm wỳ nẽ kãm: —Pa Papaj? Nà apê mẽ inhmã mẽ inhõ ho apa xwỳnh jakamã amex o amex. Anẽ. Hāmri nẽ mẽ kãm ho hkry hpa nẽ hkôt mẽ ixpa ho mẽ ixpa xwỳnhjê mã kugõ pa mẽ ô ri ho mẽ hipêx pa. Nhūm mẽ piitã apkur o hkrĩ. Mẽõja grire htã nhūm Jejus tanhmã mẽ kãm ho rax to nhūm mẽ ohtô rax kumrêx tã piitã kuku nẽ ho õhy htu hpa nhūm arĩ mẽõ jakrêx prã. Hāmri pa mẽ akupỹm hakrêx o akuprõ nẽ ho kawà ho 12 nẽ ho nỳt pa.

Jejus kot gô krãhkà hã ãm nẽ htẽm ã harẽnh

Makre 6.45-52; Juãw 6.15-21

²²⁻²³Tã nhūm Jejus mẽ ixpê hkôt ixpa ho ixpa xwỳnhjê mã anẽ pa mẽ akupỹm pàr mã agjê nẽ ma xarmã hkukamã mõ. Hāmri nhūm mẽ kot mar o kuhê xwỳnhjê jano nhūm mẽ ma akupỹm hapêx. Hāmri nhūm Jejus kot Tĩrtũm mã amnhĩ jarẽnh kaxyw ahte tẽ nẽ hixêt ã api nẽ himõk ã kãm amnhĩ jarẽnh o nhỹ. Gaa nhūm ra kamàt nhūm arĩ ahte hixêt nhĩmõk ã nhỹ.

²⁴Rôm pa mẽ pàr kãm mẽ inhmõr xwỳnhjaja kormã himô nhĩpõk ri mõ. Pu nhūm kòk xàpêr tỳx mẽ ixkaxpa. Nẽ gô axpẽn tak tỳx nẽ pa mẽ tee ri rrẽmti ho gô rẽnh nhĩpêx nẽ tee ri axpẽn pumu.

²⁵Tã nhūm krãhyre kà nhūm Jejus man mẽ ixkôt gô krãhkà hã xan tẽ

²⁶pa mẽ amnhĩ wỳr omu. No nhũm kormã hirã mex kêt jakamã pa mẽ ixprĩ hã omunh mex kêt nẽ. Hãmri nẽ tee ri omu nẽ mẽkarõ hã hkamnhĩx nẽ umaj ixàmra rax nẽ.

²⁷Hãmri nhũm mẽ inhmã kapër nẽ mẽ inhmã: —Tk. Kwa mẽ amã ma hkêt nẽ. Pa na pa mẽ akôt tẽ. Anẽ.

²⁸Hãmri nhũm Simãw Pêtre kuma nẽ kãm: —Kwa xà ka na ka tẽ? Tôe apê mẽ inhõ Pahihti jakamã kwa amnhĩ wỳr ixwỳ pa apyrà nẽ gô krãhkà hã xa nẽ awỳr tẽ nà? Anẽ.

²⁹Hãmri nhũm kãm: —Tôe mamrĩ amnẽ ixwỳr tẽ. Anẽ. Hãmri nhũm kuma nẽ pàr rùm kato nẽ hwỳr tẽ. Uràk nẽ gô krãhkà hã hwỳr tẽ.

³⁰Hãmri nẽ kormã htêp o htêm mẽ kôk xàpêrta kamã ama nẽ tee ri amnhĩ kukamã hamaxpër pê ra àr o mỗ. Hãmri nẽ àmra kamã Jejus mã amnhĩ to akir nẽ kãm: —Kwa tokyx ixto api Pahihti. Anẽ.

³¹Hãmri nhũm hpa hã kupy nẽ ho àpir kurê kumrẽx nẽ kãm: —Kwa pẽr ãm kormã ate amnhĩ kaxyw inhmã ajamaxpër tỳx kêt. Mon ka we ixkamnàr rom mãmri man ixwỳr atêmre hkêt nẽ? Anẽ.

³²Hãmri nhũm wa akupỹn mẽ ixwỳr tẽ nẽ wa axà. Hãmri nhũm kôk katàt kôt pinhkrênh pa nhũm gô tãm nõi kurê kumrẽx.

³³Hãmri pa mẽ Jejus kot ã amnhĩ nhĩpêx anhỹrja ã omu hãmri nẽ kãm mex o mex ã harẽ nẽ kãm: —Kwa ãm hãmri na hte amnhĩ pê Tĩrtũm Kra hã amnhĩ jarẽ. Nà apê Kra kênã. Anẽ.

Jenějare kamã Jejus kot akupỹm mẽ ho mex ã harênh

Makre 6.53-56

³⁴Tã pa mẽ ra himô hã rê nẽ Jenějare hwỳr pøj.

³⁵Hãmri nẽ ma kapê hã ri ixpa. Hãmri nhũm pika nhõ xwỳnh kwỳjaja Jejus pumu nẽ mẽ piitã mẽ kãm harênh o hprôt nẽ ahpỹnhã hwỳr nhỹhỹnh mẽ à xwỳnhjê hã karõ. Nhũm mẽ man mẽ ixwỳr mẽ o mra

³⁶nẽ mẽ ho Jejus wỳ nẽ kãm: —Pa? Kwa kê mẽ à xwỳnhjaja akupỹm mex kaxyw apê axê kupê nà? Anẽ. Hãmri nhũm mẽ kãm: —Tôe. Kwãr mẽ mãmri

mran hkupê. Anê. Hāmri nhūm mẽ kuma nê axpën pānhā hwỳr mra nê kêp ê pix kupênh tã ra akupỹm mex nê ma akupỹm mra.

Matêwre 15

Parijew nhõ xwỳnh mẽ Tĩrtũm kapêr tũm o mẽ ahkre xwỳnhjê jarênh

Makre 7.1-13

¹Tã nhūm Parijew nhõ xwỳnh mẽ Tĩrtũm kapêr tũm o mẽ ahkre ho mẽ pa xwỳnhjaja Jerujarê rũm ma Jejus wỳr mra. Na htem mẽ ixkukamã mẽ inhĩgêjtê pyrà nê apkur kaxyw nê amnhĩ nhĩhkra kuhõnh ryy nê. Amnhĩ nhĩhkra htyk pix kuhõnh nê hkrĩ hkêt nê ãm amnhĩ nhĩhkra kuhõnh japjêê nê. Nê õ prat kuhõnh japjêê nê kormã apkur kaxyw hkrĩ. Tĩrtũm kot ja hã mẽ omunh nê mẽ mex ã mẽ harênh ã amnhĩ kamnhĩx jakamã na pre ã amnhĩ nhĩpêx anhỹr o pa. Jakamã nhūm mẽ ma Jejus wỳr mra.

²Hāmri nê omu nê kãm: —Pa Jejus? E kwa mẽ inhmã mẽmoj jarê. Amnepêm mẽ panhĩgêjtaja na prem apkur kaxyw nê amnhĩ nhĩhkra kuhõnh japjê nê rĩ kormã apku. Tã pa htem arĩ ijaxwỳja ã amnhĩ nhĩpêx anê. No akôt mẽ pa ho mẽ pa xwỳnhjaja na htem mẽ ixpyrà nê ã amnhĩ nhĩpêx anhỹr kêt nê. Kwa mo na htem amnhĩ nhĩhkra tyk kuhõnh tokyx anê nê hkrĩ nê apku? Anê.

³Hāmri nhūm mẽ kuma nê mẽ kãm: —Tk. Na ka htem ãm mẽ panhĩgêjtê hkôt pix mã amnhĩ nhĩpêx o apa no Tĩrtũm kapêr kôt amnhĩ nhĩpêx kêt nê.

⁴Tĩrtũm na pre mẽmoj tã mẽ pamã karõ ho: Kêr ka mẽ anhĩpêêxà nê mẽ akatorxà wa hã apijaàm nê mẽ ho ajuta rãhã ho ri apa. Kot kaj mẽ ã amnhĩ nhĩpêx anhỹr kêt nê tanhmã mẽ kãm akapêr punuj to ho ri apa. Hã koja mẽ akwỳjaja ja mỳrapê mẽ apa. Anê. —Na pre ã Tĩrtũmja mẽ pamã karõ anê.

⁵No mẽ kajaja na ka htem ã akwỳjê mã karõ anhỹr kêt nê. ãm kapêrja kwỳm na ka htem mẽ kãm karõ nê mẽ kãm: Kot kaj mẽ mẽmo arĩgro hã akàxpore japêr nom kêr ka mẽ ho tanhmã akatorxà rỳ anhĩpêêxà ho ajuta hto kaxyw wa kãm hkwy nhõr kêt nê. ãm ho ate wa ho ajuta hkêt ã wa kãm amnhĩ jarê hāmri nê Tĩrtũm mã amnhĩ jarênh xà hã ixkre hwỳr o tẽ nê mẽ ixte tanhmã ixkreta ho mex to kaxyw mẽ inhmã agõ. Kot kaj mẽ ã amnhĩ nhĩpêx

aně nhũm Tĩrtũm ja hã mẽ apumu nhũm ja kãm mex nẽ. Kêr ka mẽ ã amnhĩ nhĩpêx anhỹr o ri apa. —Anhỹr o na ka htem mẽ kãm karõ ho ri apa.

⁶Nom Tĩrtũm kapêr tũm kot ã ja jarênh anhỹr kêt. ãm amnhĩ krã hkôt na ka htem ã mẽ kãm karõ punuj o ri apa anẽ. Te mẽ akapêrja mex o kot Tĩrtũm kapêr jakrenh pyræk.

⁷Mẽ ate Tĩrtũm kôt amnhĩ nhĩpêx ã amnhĩ jarênh tã ãm amnhĩ to axêx nẽ hkôt amnhĩ nhĩpêx kêt nẽ. Na pre Tĩrtũm amnepêem mẽ akukamã tanhmã mẽ ajarênh to. Nhũm ÿ hã mẽ kãm kapêr jarênh xwỳnh Ijaisja ô ri mẽ kãm mẽ ajarẽ nẽ hã kagà. Te Tĩrtũm tãm kot mẽ ajarênh pyræk.

⁸Na pre mẽ akukamã mẽ ajarênh o: Mẽ kãm ixkĩnh ã mẽ kot amnhĩ jarênh tã mẽ kãm ixkĩnh kêt. Na htem kãm ixprãm ã amnhĩ jarênh kaprỳ.

⁹Mẽ kot ixkuhpa hã amnhĩ krã hkôt mẽmoj tã hkwỳjê mã karõ ho pa jakamã na htem kot ixkôt amnhĩ nhĩpêx o pa hã amnhĩ jarênh kaprỳ. Anẽ. —Na pre ã Ijaisja Tĩrtũm nhỹ hã mẽ akukamã mẽ ajarẽ nẽ mẽ atã kagà anẽ. Anẽ. Nhũm pre ã Jejus Parijew nhõ xwỳnhjê mẽ Tĩrtũm kapêr tũm o mẽ ahkre xwỳnhjê mã kapêr anẽ.

Mẽmoj kot mẽ pahtomnu hã harênh

Makre 7.14-23

¹⁰Tã nhũm Jejus amnhĩ wỳr mẽ kot mar o kuhê xwỳnhjê hwỳ nẽ axte mẽ kãm kapêr nẽ mẽ kãm: —E mẽ inhma nẽ inhmar tỳx nẽ.

¹¹Na hte Tĩrtũm kapêr tũm o mẽ ahkre xwỳnhjaja amnhĩ krã hkôt mẽ ate amnhĩ nhĩhkra kuhõnh japjê hã mẽ amã karõ ho pa. Nẽ amnhĩ krã hkôt mẽ axàpkur xà hã tanhmã mẽ amã karõ hto ho pa. Tĩrtũm kot ja hã mẽ apumunh kôt mẽ amex ã mẽ ajarênh kaxyw ã mẽmoj tã mẽ amã karõ anẽ. Nom na hte Tĩrtũm tanhmã mẽ kot amnhĩ nhĩhkra kuhõnh to hã mẽ omunh xà hkôt tanhmã mẽ harênh to hkêt nẽ. Rỳ mẽ axàpkur xà pumunh kôt mẽ mex ã mẽ ajarênh kêt nẽ. Ja tanhmã kãm kute hkêt. Na hte ã mẽ kot amnhĩ nhĩpêx anhỹr ã mẽ omunh xà hkôt mẽ mex ã mẽ harênh rỳ mẽ mex kêt ã mẽ harênh kêt nẽ. Na hte mẽmoj kur ã mẽ omu nẽ ãm mẽ omu nẽ hã tanhmã

mě harěnh to hkêt nê. Ām mẽ kapěr punuj rỳ mẽ kapěr mex ã mẽ mar kôt pix mã na hte tanhmã mẽ harěnh to. Anê.

12Nhũm pre ã Jejus mẽ kãm kapěr anê pa mẽ hkôt mẽ ixpa ho mẽ ixpa xwỳnhjaja kuma hãmri nê hwỳr mra nê kãm: —Kwa na ka ã mẽ kãm akapěr anê nhũm Parijew nhõ xwỳnhjaja tee ri ama nhũm ja mẽ kêp omnuj nê. Anê.

13-14Hãmri nhũm mẽ inhma nê tanhmã mẽ inhmã Parijew nhõ xwỳnhjê jarěnh to nê hprĩ hã mẽ hkukamã mẽ harěnh o: —Tk. Kwār mãmri mẽ kêp omnuj. Mẽ kot Tĩrtũm kapěr tũm o mẽ ahkre ho pa htã na htem hkôt amnhĩ nhĩpêx kêt. Jakamã te mẽ nohkre xwỳnh kot amnhĩ nhĩpêx pyræk. Koja mēhõ nohkre htã amnhĩ kôt nhỹhỹm nohkre hõ ho mō hãmri nê wa hamē pry pumunh kêt nê htỳx mō hãmri nê nhỹri ahkrehti kamã tēm. Tã Parijew nhõ xwỳnhjaja te kot wam htēm xwỳnhhta pyræk nhũm mẽ kot mẽ mar xwỳnhjaja te kot wam htēm xwỳnh kôt hõ htēmta pyræk. Jakamã Parijew nhõ xwỳnhjaja mẽ kot mẽ mar o pa xwỳnhjê mẽ koja mẽ hpimràatã nhỹrmã te ahkrehti kamã rōrōk par pyræk o amnhĩ nhĩpêx nê mex kêt nê pa ho pa. Koja kaxkwa kamã inhõ Papaj nhỹrmã amnhĩ nê mẽ hanor pa. —Inhõ Papaj te kêp mẽmo hy hkre ho pa xwỳnhhta pyræk. Na htem mẽmo hy hkre nhũm higrōt hapōj nê higrōt mex nê. Hãmri nhũm mẽ hwỳr mra nê omu nê nê mẽmoj nhĩgrōt punuj jarê nê kurē. Ja pyrã nê koja nhỹrmã inhõ Papaj amnhĩ nê Parijew nhõ xwỳnhjê janor pa nhũm mẽ mex kêt nê pa ho pa. Jakamã kwa kêr ka mẽ hkôt ri amnhĩ nhĩpêx kêt nê. Anê. Nhũm pre ã Jejus mẽ ixte hkôt ixpa ho ixpa xwỳnhjê mã hprĩ hã Parijew nhõ xwỳnhjê hkukamã ã mẽ harěnh anê pa mẽ mar o ixkrĩ.

15Hãmri nhũm Simãw Pêtre tee ri Tĩrtũm kot mẽ apkur xà hã mẽ omunh xà hkôt tanhmã mẽ harěnh to hkêt ã harěnh ma. Nê ãm tanhmã mẽ kapěr to pix ã mẽ mar kôt tanhmã mẽ harěnh toja ma hãmri nê hã Jejus kukja nê kãm: —Kwa mon ka ri ã ja jarěnh anê Pahihti? Anê.

16Hãmri nhũm kuma nê hprĩ hã mẽ inhmã awjarē nê mẽ inhmã: —Kwa xàn ka mẽ kormã aprĩ hã ja mar kêt nê?

¹⁷E pa ixprĩ hã mẽ amã harẽ ka mẽ inhma. Nà na htem mẽmoj ku nhũm hte mẽ hkrã hi hwỳr gjêx kêt nẽ. Na hte mẽ õhy pix wỳr agjê nẽ gaa nẽ nhãm hapôj nẽ hapêx. Na htem mẽ apkur xàja ku nẽ ỹ hã tanhmã amnhĩ tomnu hto hkêt nẽ. Jakamã na hte Tĩrtũm ja hã mẽ omunh xà hkôt tanhmã mẽ harẽnh to hkêt nẽ.

¹⁸ãm mẽ hkrã kamã mẽ hamaxpěr punuj pix nhỹ hã mẽ kot tanhmã amnhĩ tomnuj to jakamã na hte Tĩrtũm mẽ hamaxpěr ã mẽ omunh xà hkôt tanhmã mẽ harẽnh to.

¹⁹Koja mẽhõ tanhmã hamaxpěr punuj to nẽ ra hkôt amnhĩ tomnuj pix o pa. Na htem nhãm mẽ hpar o pa nẽ mẽ kêp ahkĩ nẽ amnhĩ to hêx nẽ mẽ hakwa kamã nhãm axpẽn mã mẽ hixi jarẽnh o pa. Nẽ nhãm mẽ kêp mẽ hprõ ho amnhĩkati nẽ mẽ hkuprỳ hwỳr mra nẽ mẽ ho amnhĩkati. Nẽ tanhmã ri axpẽn tomnuj to ho pa.

²⁰Mẽ hamaxpěr punuj nhỹ hã na htem ã amnhĩ nhĩpêx anhỹr o pa. No na hte Tĩrtũm mẽ kot amnhĩ nhĩhkra kuhõnh japjê hkêt ã mẽ omunh xà hkôt mẽ kot amnhĩ to mex xwỳnh ã mẽ harẽnh kêt nẽ. Ja tanhmã kãm kute hkêt. Anẽ.

Jejus kot Ijaew kêt xwỳnh ni kamã ukaprĩ hã harẽnh

Makre 7.24-30

²¹Tã nhũm Jejus mẽ inhmã kapěr pa hãmri nẽ mẽ inhmã anẽ pa mẽ ma hkôt mõ. Ma Xir mẽ Sitõja wa pu hã ri ixpa.

²²Nhũm mẽhõ nija omu nẽ hwỳr tẽ. Mẽ ixkĩnhã kêp Ijaew kêt tã hwỳr tẽ. Kanaã nhõ xwỳnh na pre. Tã Jejus wỳr tẽ nẽ kãm: —Ka Pahihti Jejus? Apê Tĩrtũm kot mẽ ixwỳr amênh xwỳnh jakamã xê ixujarẽnh ma nẽ ixkamã axukaprĩ hkêt wehe. Na mẽkarõmnutija tanhmã ixpê ixkra ho nhũm ixpê omnuj tỳx kumrêx. Anẽ.

²³Hãmri nhũm Jejus kuma nẽ ãm kuma nẽ kãm tanhmã nẽ hkêt nẽ. Jakamã pa mẽ ixpê hkôt ixpa ho ixpa xwỳnhjaja kãm: —Kwa hano kê ma akupỹm tẽ ri. Na ãm ri mẽ pahkôt xatã hkrata jarẽnh pix o ri pa. Anẽ.

²⁴Nom nhũm kot amnhĩ tã kamã hamak kaxyw tanhmã mẽ inhmã hã kapër to nẽ mẽ inhmã: —Nà ãm Ijaewjê pix wỳr na pre Tĩrtũm inhmẽ. Te mẽ kệp ôwêhti pikunor pyræk o na htem htỳx ri amnhĩ nhĩpêx o pa. Jakamã ãm mẽ hwỳr pix mã na pre inhmẽ. Na kormã inhmã tanhmã nhãm mẽ hkwỳjê jarênh to hkêt nẽ. Anẽ.

²⁵Hãmri nhũm nitita tee ri amnhĩ tã kuma nẽ hwỳr tẽ nẽ kutã hkõnkrã ho htẽm nẽ nhỹ nẽ kãm: —Xê ma we ixkamã axukaprĩ hkêt wehe. Anẽ.

²⁶Hãmri nhũm kãm: —Nà kormã. Na pre Tĩrtũm mẽ kệp Ijaewjê pix wỳr inhmẽ. Jakamã na pa kormã nhãm tanhmã mẽ akwỳjê ho mex to hkêt nẽ. Anẽ.

²⁷Hãmri nhũm kãm: —Ma ãm hãmri na ka akapër. Nom ixpê Ijaew kêt tã mẽ kuxwar ãm ixto mex grire kêt wehe. Anẽ.

²⁸Hãmri nhũm kuma nẽ kãm: —Nà ãm hãmri na ka ã akra kaxyw inhmã ajamaxpër tỳx anẽ. Jakamã kot paj nê mẽkarõmnutita jano. Kojaxte tanhmã apê ho hkêt kumrêx. Anhỹr o kãm kapërja rôm nhũm hkraja akupỹm mex kurê kumrêx.

Jejus kot mẽ à xwỳnhjê ho ohtô nẽ mẽ ho mex ã harênh

Makre 7.31-37

²⁹Tã nhũm Jejus mẽ inhmã anẽ pa mẽ ixrohã krĩa pê ixkato nẽ ma himô rax pê Garirej wỳr mỗ. Nẽ nhỹri gô mỳri hixêt wỳr mỗ nẽ hã api nẽ ixkrĩ.

³⁰Hãmri nhũm mẽ ohtô nẽ ma mẽ ixkôt mra. Nẽ mẽ à xwỳnhjaja nhũm mẽ hamỳ nẽ Jejus wỳr mẽ o mra. Na prem ohtô rax kumrêx. Ra ri mẽ pa hkêt xwỳnhjaja nẽ mẽ nohkre xwỳnhjaja nẽ mẽ hyk o mẽ pa xwỳnhjaja. Nẽ mẽ kapër kêt xwỳnhjaja nẽ ahpỹnhã ri tanhmã mẽ à kute xwỳnhjaja nhũm mẽ hamỳ nẽ ma Jejus wỳr mẽ o mra nẽ kutã mẽ haxwỳ. Hãmri nhũm mẽ omu nẽ ahpỹnhã akupỹm mẽ ho mex pa.

³¹Jakamã na pre mẽ kapër kêt xwỳnhjaja akupỹm kapër mex nẽ. Nẽ ri mẽ pa hkêt xwỳnhjaja akupỹm mrar mex nẽ. Nẽ mẽ hyk o mẽ pa xwỳnhjaja akupỹm tãm ri mra. Nẽ mẽ nohkre xwỳnhjaja akupỹm rĩt mex nẽ. ã ahpỹnhã akupỹm mex par anẽ. Hãmri nhũm mẽ kot hwỳr mẽ hamỳnh nẽ Jejus wỳr

mẽ o mrar xwỳnhjaja amnhĩ jaêr pê akupỹm mẽ mex ã mẽ omu nẽ mẽ kamã no puma nẽ hkĩnh nẽ. Hãmri nẽ Tĩrtũm mã mex o mex ã harẽ nẽ axpẽn mã harẽnh o: —Nà ãm hãmri mẽ panhõ Tĩrtũmja ãm mex o mex. Anẽ.

Jejus kot mẽ ho 4.000 nẽ mẽ kãm mẽ õ hã harẽnh

Makre 8.1-10

32Tã nhũm Jejus mẽ ixte hkôt ixpa ho ixpa xwỳnhjaja amnhĩ wỳr mẽ ixwỳ nẽ mẽ ixkôt mẽ mrar xwỳnhjê jahkre nẽ mẽ inhmã: —E. Ka mẽ rĩ kam jajê pumu. Na pa ra inhmã mẽ hkaprĩ nẽ. Na mẽ pahkôt ri pa hã apkati axkrunẽpxi nhũm ra mẽ kêp mẽõja hapêx pa. Kojã mẽ apkur kêt rãhã ma akupỹm mẽ õ krĩ hwỳr pa hãmri nẽ pry hã hirot nẽ rôrôk o pa. Mẽ õ krĩ hwỳr awryy. Anẽ.

33Nhũm pre ã mẽ inhmã mẽ harẽnh anẽ pa mẽ tee ri kuma hãmri nẽ kãm: —Kwa nom nhỹri kot pu mẽ kãm mẽmoj japrô nhũm mẽ tokyx kuku? Ja kapôt pix kênã. Nẽ mẽ ohtô griiã. Anẽ.

34Hãmri nhũm mẽ inhmã: —No mẽ panhõ pãwtita? Tanhmã na arĩ kute nẽ hikwỹ? Anẽ. Hãmri pa mẽ kãm: —Nà ãm kêp 7 pix. Nẽ kaxyw tep kwỳ no ãm grêre. Kot mẽ ho dare kaxyw ã. Anẽ.

35Hãmri nhũm mẽ inhma nẽ mẽ ixkôt mẽ mrar xwỳnhjê mã anẽ nhũm mẽ hkrĩ pa.

36Hãmri nhũm pãwti mẽ tep grêreta jamỳ nẽ ho Tĩrtũm wỳ nẽ kãm: —Pa Papaj. Nà apê mẽ inhmã mẽ inhõ ho apa xwỳnh jakamã amex o amex. ãm amex kumrẽx. Anẽ. Hãmri nẽ mẽ kãm mẽmojta o hkry hpa nẽ mẽ inhmã kugõ pa mẽ ô ri ho xa nẽ ho mẽ hipêx pa.

37-38Hãmri nhũm mẽ piitã apku nẽ õhy htu hpa. Nhũm prem mẽmyjaja kêp 4.000 nẽ kaxyw mẽnijaja nẽ mẽhprĩjaja. Mẽ ohtô rax kumrẽx tã nhũm Jejus mẽõ ho mẽ hipêx pa. Hãmri pa mẽ hakrêx o akuprõ nẽ ho kawà ho 7 nẽ ho nỳt.

39Hãmri nhũm Jejus ma akupỹm mẽ õ krĩ hwỳr mẽ hano pa mẽ pàr krem agjê hãmri nẽ ma ijaxwỳja mỗ. Ma pika pê Makatã hwỳr mỗ.

Matêwre 16

Parijew nhõ xwýnh kwý kot aa mẽ kot mẽmoj pumunh kêt õ ho anhýr ã Jejus wýr ã mẽ harênh

¹Tã pa mẽ ra hwýr pøj nhũm Parijew mẽ Satusew nhõ xwýnhjaja Jejus pumu nẽ hwýr mra. Nẽ hêx rom kot kamã hamak kaxyw hwýr mra nẽ kãm: —Pa Jejus? E kwa mẽ inhmã aa mẽ ixte mẽmoj pumunh kêt õ ho anẽ nà? Pa mẽ ate ho anhýr ã apumu nẽ Tĩrtũm kot mẽ ixwýr amênh ã akôt ijamaxpêr kurê kumrêx. E kwa tokyx. Anẽ.

²⁻³Hãmri nhũm mẽ kuma nẽ mẽ kãm: —Tk. Nà kot paj mẽ amã ho anhýr kêt nẽ. Mẽ ate hã ixpumunh nẽ ixkôt ajamaxpêere kaxyw ã. Na ka htem kaxkwa kamã kakrã pumu nẽ axpên mã na wrýk ã harê. Nẽ kaxkwa mex pumu nẽ axpên mã amgrà hã harê. Tã ixte tanhmã mẽ amã mẽmoj nhĩpêx to hã ixpumu nom Tĩrtũm kot mẽ awýr inhmênh xwýnh ã ixkôt ajamaxpêr kêt nẽ.

⁴ãm mẽ ajamaxpêr punuj pix o na ka htem ri ajamaxpêr o apa. Ixpê Tĩrtũm kot mẽ awýr inhmênh xwýnh tã ka mẽ ja hã ixkôt ajamaxpêr kêt nẽ. Tã mẽ ate aa mẽmoj pumunh kêt kwý ixte mẽ amã ho anhýr kaxyw ka mẽ inhmã hã karõ. Nà kot paj mẽ amã ho anhýr kêt nẽ. Kormã. Kot paj ãm nhỹrmã te amnepêm Jõhti kot amnhĩ nhĩpêx pyræk o amnhĩ nhĩpêx. E ja pix kot paj mẽ amã harê. Nom kot paj mẽ amã aa mẽ ate mẽmoj pumunh kêt õ ho anhýr kêt nẽ. Anẽ. Nhũm pre ã Jejus mẽ kãm kapêr anẽ hãmri pa mẽ ixrohã mẽ kêp ixkato nẽ ma ixpa.

Jejus kot hkôt mẽ pa xwýnhjê jahkre hã harênh

Makre 8.14-21

⁵Tã pa mẽ Jejus mẽ ixrohã ma mõi nẽ pàr mã agjê nẽ ma xarmã akupým rê nẽ hikjê hã mõi. Hãmri nẽ tee ri mẽ ixàpkur xà japêr nẽ axpên mã: —Kwa na pu mẽ panhõ pãwti ho pajamakêtkati nẽ kure. Anẽ.

⁶Hãmri nhũm Jejus mẽ inhma nẽ tanhmã mẽ inhmã Parijew mẽ Satusew nhõ xwýnhjê jarênh to. Nom pãwti hã kuxi nẽ mẽ inhmã mẽ harê nẽ mẽ inhmã: —Kwa mẽ o kora. Kêr ka mẽ Parijew mẽ Satusew nhõ xwýnhjê mẽ kêp pãw kaxkrit xà hkwy hpyr kêt nẽ. Anẽ.

⁷Hāmri pa mẽ tee ri kuma nẽ ixprĩ hã mar mex kêt nẽ. Nẽ arĩ kapërta ã axpẽn kukjêr o hkôt mõi nẽ axpẽn mã: —Kwa mẽ pahte mẽ panhõ pãwti rer jakamã mãn mẽ pahte mẽ õ pãw kaxkrit xà kwỳ hpyr nẽ mẽ pahkurê nà? Anẽ.

⁸Hāmri nhũm mẽ inhma nẽ mẽ inhmã: —Hêxta waa nẽ. Mon ka mẽ ãm axpẽn mã mẽ panhõ pãwti hkêt pix jarênh o mõi? Pêr kormã mẽ ate amnhĩ kaxyw inhmã ajamaxpêr tỳx kêt.

⁹Jãã ixte mẽ anoo mã pãwti kêp 5 pix tã nhũm ixte ho mẽ kêp 5.00otajê nhĩpêx par. Nhũm mẽ kot hkur nẽ ho õhy htu hpar nhũm mẽ ate mẽõ jakrêx o apikuprõnh par nẽ ho kawà ho 12 nẽ ho hipu.

¹⁰Nẽ ham pãwti kêp 7 o mẽ kêp 4.000 nhĩpêx par nhũm mẽ kot hkur nẽ ho õhy htu hpar nhũm mẽ ate mẽõ jakrêx o apikuprõnh raxja.

¹¹Ra ixte mẽ anoo mã ja ho anhỹr o axkrut tã ka mẽ ra hã ano hkêt nẽ arĩ axpẽn mã mẽ paxàpkur xà pix jarênh o ixkôt mõi. Nà mẽ paxàpkur xàja na pa harênh kêt nẽ. Parijew mẽ Satusew nhõ xwỳnhjê nhõ pãwti kaxkrit xà pix na pa hã kuxi nẽ mẽ amã tanhmã harênh to. Anẽ.

¹²Nhũm pre ã mẽ inhmã kapêr anẽ hãmri pa mẽ atã kuma nẽ kãm: —Nà na pa xep mẽ hãmri tã ama. Xep mẽ ixte Parijew mẽ Satusew nhõ xwỳnhjê kapêr kôt amnhĩ nhĩpêx nẽ na ka mẽ ixkurê nẽ ã mẽ harênh anẽ. Anẽ.

Jejus kot amnhĩ tã hkôt mẽ pa xwỳnhjê kukjêr ã harênh

Makre 8.27-30; Rukre 9.18-21

¹³Tã pa mẽ axte Jejus kôt mõi nẽ pika pê Sejarej Piripos kamã kormã mõi nhũm Jejus amnhĩ tã mẽ ixkukja nẽ mẽ inhmã: —E mẽ inhmã mẽmoj jarê. Tanhmã na hte mẽ akwỳjaja axpẽn mã ijarênh to wehe? Anẽ.

¹⁴Hāmri pa mẽ kãm: —Nà na htem ahpỹnhã tanhmã ajarênh to. Na hte kamã mẽ hkwỳjaja ajarênh o finat Juãw Paxis ã ajarê. Nhũm kamã mẽ hkwỳjaja ato finat Eris ã ajarê nhũm mẽ hkwỳjaja tõiã apê Tĩrtũm nhỹ hã akapêr o apa xwỳnhjê hõ akupỹm atĩr ã ajarê. Nẽ tõiã finat Jeremĩstija rỳ axtem hõ hã ajarê. ã na htem ahpỹnhã axpẽn mã ajarênh anẽ. Anẽ.

15Hāmri nhūm mẽ inhma nẽ mẽ inhmã: —No mẽ kajaja? Ixpê mēhõ hã na ka htem axpẽn mã ijarẽ? Anẽ.

16Hāmri nhūm Simãw Pêtre kãm: —Nà apê Tirtũm kot mẽ ixkaxyw axãm nẽ mẽ ixwỳr amēnh xwỳnh na ka. Nẽ apê mẽ ixpiitã mẽ inhõ Pahi Maati na ka. ã na pa htem axpẽn mã ajarēnh anẽ. Anẽ.

17Hāmri nhūm kuma nẽ kãm: —Nà ãm hāmri na ka ã ijarēnh anẽ Simãw Pêtre. Nom amnhĩ krã hkôt na ka ã ijarēnh anhỹr kêt nẽ. Tirtũm tãm kot amã ixto amnhĩrĩt xà hkôt na ka ã ijarēnh anẽ.

18Nà akumrẽx na ka ã ijarēnh anẽ. Tã koja mẽ apyrà nẽ nhỹrmã mẽ kot ixkôt amnhĩ xunhwỳr xwỳnhjaja ma hkwỳjê mã ja hã ijarēnh o ri krĩ piitã hkôt pa. Hāmri nhūm mẽ hkwỳjaja mẽ kuma nẽ mẽ apyrà nẽ ixkôt amnhĩ xunhwỳ. Hāmri nhūm mẽ kêp ixprãm nõkati xwỳnhjaja tee ri tanhmã mẽ kot ijarēnh toja ma nẽ ã ijarēnh anhỹrja nê mẽ kãm kapēr tã nom ho hkapyr. ã koja ixkôt mẽ kot amnhĩ xunhwỳr xwỳnhjaja mẽ kãm ijarēnh o pa anẽ. Jao te mẽ apê kēn nhūm ixte mẽ ato amnhĩm inhõrkwỹ nhĩpêx pyràk. Tã akumrẽx ate ã ijarēnh kot anhỹr jakamã kot paj te ixte akumrẽx amỳnh nẽ ato ixtēm nẽ inhõrkwỹ nhĩpêx kaxyw amnhĩm akumrẽx axãm pyràk o anhĩpêx Simãw Pêtre.

19—E kêt ka ma inhỹ hã tanhmã mẽ piitã mẽ kãm ijarēnh to ho ri apa. Mẽ kot hprĩ hã amar kaxyw. Kojaja mẽ hkwỳjaja ama nẽ amnhĩ kaxyw ixkôt hamaxpēr nẽ ixkôt amnhĩ xunhwỳ. Ka ja hã mẽ omu nẽ mẽ kãm: “E ra mẽ ate Jesus kôt amnhĩ xunhwỳr jakamã kot ka mẽ nhỹrmã ty nẽ ma kaxkwa hwỳr api nẽ Tirtũm mẽ wa kuri amex kumrẽx nẽ atĩr tũm nẽ apa ho apa.” Anhỹr o mẽ kãm ijarēnh o apa. No mẽ kot akapēr mar nẽ ãm mar nẽ ixkôt amnhĩ xunhwỳr kêt xwỳnhjaja ka mẽ kãm: “No mẽ kajaja mẽ ate Jesus kôt amnhĩ xunhwỳr kêt jakamã kot kaj mẽ nhỹrmã Tirtũm mẽ Krata wa kuri atĩr tũm nẽ apa ho apa hkêt nẽ.” Anhỹr o ã inhỹ hã mẽ kãm akapēr anhỹr o ri mẽ hkôt apa. Jao te ate kaxkwa hwỳr saf pyr nẽ Tirtũm krajê mã kahê xà rēnh nẽ Tirtũm kra hkêt xwỳnhjê pē kahê pyràk o amnhĩ nhĩpêx o apa. Anẽ. Nhūm pre ã Jesus Simãw Pêtre mã kapēr anẽ.

²⁰Hāmri nē hpānhā mẽ ixpiitā mẽ inhmā kapēr nē mẽ inhmā: —E. Kwa kēr ka mẽ kormā mẽ piitā mẽ kām Tirtūm kot mẽ awyr inhmēnh ã mẽ kām ijarēnh o ri apa hkēt nē. Kormā. Anē.

Jejus kot amnhī kukamā amnhī jarēnh ã harēnh

Makre 8.31-33; Rukre 9.22

²¹Hāmri nhūm Jejus hprī hā amnhī kukamā tanhmā mẽ inhmā amnhī jarēnh to nē mẽ inhmā: —Nà mẽ kajaja mẽ ate aprī hā ixpumunh mex. No mẽ pahkwỳjaja kām hprī hā ijarēnh mar nē ixpumunh prām kēt. Ijaew krāhtūmjaja nē Tirtūm kapēr tūm o mẽ ahkre xwỳnhjaja nē patre krāhtūmjaja. Mẽ kām hprī hā ixpumunh nē kām ixkapēr mar prām kēt jakamā kot paj tokyx ma Jerujarē hwyr mō nhūm mẽ kamā ixpynē nē ixtak rax nē ixpī. Nom kot paj ixtyk ã apkati axkrunēpxi nhūm Tirtūm akupym ixtō ixtīr. Anē.

²²Hāmri nhūm Simāw Pētre tee ri kot ã mẽ kām amnhī jarēnh anhỹrja ã kuma nē hwyr tē nē hpa hā kupy nē mẽ ixpē ho kato nē mẽ ixkàx ã o xa. Nē ã kot amnhī jarēnh anhỹrja nē kām kapēr nē kām: —Kwa nà Pahihti. Ri ã amnhī jarēnh anhỹr kēt nē. Mo kot kēt mẽ ri axtem nē ã anhīpēx anē? Anē.

²³Hāmri nhūm kuma nē hwyr apkjē nē omu nē kām: —Tk. Te apē Satanasti kapēr pyrāk o na ka ã inhmā akapēr anē. Kot kaj ã akapēr anē hāmri nē ixkōt apa hkēt nē. Tirtūm kām hprām xà hkōt na ã mẽ kot inhīpēx anhỹr kaxyw kēnā. Tā ka Tirtūm jamaxpēr o ajamaxpēr kēt nē amnhī jamaxpēr o ã inhmā akapēr anē. Te apē ixpē axāmnār xwỳnh pyrāk o amnhī nhīpēx. Anē.

Jejus krajaja kot tanhmā amnhī nhīpēx to hā mẽ harēnh

Makre 8.34–9.1; Rukre 9.23-27; Juāw 12.24-26; määnēn Rōmān 15.1; Wam Korīt 10.23-24; Karatas 5.24; Piripos 2.4; Wam Pētre 4.1; Apokarip 2.10; 12.11

²⁴Nhūm pre ã Jejus Simāw Pētre mā kapēr anē hāmri nē hpānhā mẽ ixpē hkōt ixpa ho ixpa xwỳnh piitā mẽ inhmā kapēr nē mẽ inhmā: —E kot kaj mẽ ixkōt amnhī xunhwyr ã amnhī jarē hāmri nē määnēn amnhī jarēnh o: “Jejus kēp inhō Pahihti jakamā kot paj kapēr kōt pix mā amnhī nhīpēx rāhā ho ri ixpa. Kwār ixkwỳjaja tanhmā hā inhīpēx hto.” Anhỹr o amnhī jarē.

²⁵—Koja mẽ ixtã mẽ atõx pĩ rỳ tanhmã mẽ atõ hto ka ty. Tã nom koja akaxwỳnh ma ixwỳr àpir kurê kumrêx. Hãmri ka ixkuri atĩr tũm nẽ amex rãhã nẽ apa ho apa. Nom kot kaj mẽ jar atĩr prãm xàj ixkaga hãmri nẽ inhõ krĩ hwỳr axàpir kêt nẽ.

²⁶—Nẽ koja mẽhõ hikukrêx rax gryk ã Tĩrtũm kaga. Tã nhỹrmã ty hãmri nẽ amnhĩ kôt hikukrêx õ hpyr nẽ o mõi kêt nẽ. Koja tee ri kuwy hwỳr mõi pymaj amnhĩ nẽ hikukrêx rax o amnhĩ pãnhã amnhĩrer prãm kaprỳ. Tanhmã koja amnhĩ to nẽ Tĩrtũm mã amnhĩre nẽ ma õ krĩ hwỳr api? Koja ã amnhĩ nhĩpêx anhỹr kêt nẽ.

²⁷—Nẽ ixpê Tĩrtũm kot mẽ awỳr inhmẽnh xwỳnh kot paj nhỹrmã kaxkwa rũm akupỳn mẽ awỳr wrỳ nhũm Tĩrtũm kapêr o mẽ wrỳk xwỳnhjaja man ixkôt wrỳ. Hãmri pa inhõ Papaj nhỹ hã ixte mẽ piitã tanhmã mẽ kot amnhĩ nhĩpêx to hã mẽ omunh xà hkôt ahpỳnhã tanhmã mẽ harẽnh to.

²⁸ãm hãmri na pa ã mẽ amã amnhĩ jarẽnh anẽ. Kot paj nhỹrmã akupỳn ixte mẽ ato amnhĩptàr kaxyw man mẽ awỳr wrỳ. Tã kot kaj mẽ akwỳjaja akupỳn ixwrỳyta kukamã tokyx ixte tanhmã ixte amnhĩ nhĩpêx to hã ixpumu. Anẽ.

Matêwre 17

Jejus kot hixêt prêk nhĩmõk ã hirã kamã ãm ã harẽnh

Makre 9.2-13; Rukre 9.28-36; mãanẽn Sikũn Pêtre 1.16-18

¹Tã nhũm semãnja hapêx nhũm Jejus ma nhỹri hixêt prêk wỳr mõi. Nẽ kaxyw Simãw Pêtre nẽ Xiakre nẽ Xiakre htõ Juãwja nhũm ma amnhĩ kôt wa mẽ o mõi. Nhũm wa mẽ mõi nẽ hixêt prêk ã api nẽ himõk ã kuhê.

²Hãmri nhũm Jejus xep ra axtem nẽ xa. Axtem hkuk nhĩrã htỳx nẽ xa. Te myyti nhĩrã htỳx pyræk. Nẽ ê haka htỳx kumrêx.

³Hãmri nhũm xep ja wa kaxkwa rũm hwỳr wrỳ nẽ kuri kãm kapêr o xa. Mojes mẽ Erisja wa nhũm hwỳr wrỳ nẽ kuri xa. Tĩrtũm amnepêm amnhĩ wỳr wa ho àpir tã wa akupỳn wrỳ nẽ Jejus mã kapêr o xa.

⁴Hãmri nhũm Jejus kôt mẽ mõi xwỳnhjaja wa mẽ omu nhũm Simãw Pêtre tanhmã hamaxpêr to nẽ Jejus wỳr tẽ nẽ kãm: —Kwa Pahihti. Nà ãm hãmri

na pu mẽ amně mō. Kwa pu mẽ kritpêm jar axkamẽ nẽ tokyx panojarêť kêt nẽ. Pa mẽ amã pô nhĩrõnh o axkruněpxi nẽ hipêx. Amã hõ nhĩpêx nẽ Mojes mã hõ nhĩpêx nẽ Eris mã hõ nhĩpêx ka mẽ kamã akrĩ. E kwa pa mẽ amã ho anẽ nà? Anhỹr o kãm kapêr. Nom amnhĩ krã hkõt ã kapêr anẽ.

⁵Hãmri nẽ kormã ã kãm kapêr anhỹr rôm nhũm ra kakrã jaka htỳxja wrỳ nẽ wa mẽ hkunor pa nhũm wa mẽ kamã kuhê. Nhũm kakrã kamã Tĩrtũm mẽ kãm kapêr nẽ mẽ kãm: —E ota Ixkra xa. Inhmã hapê ho inhmã hapê. E kêr ka mẽ kapêr mar tỳx rãhã ho ri apa. Anẽ.

⁶Hãmri nhũm mẽ tee ri kuma nẽ kãm ma htỳx nẽ umaj pikap rôrôk nẽ htu mỳrpê hikwỹ.

⁷Hãmri nhũm Jejus mẽ hwỳr tẽ nẽ mẽ hã ãhkra jaxwỳ nẽ mẽ kãm: —E mẽ kãnhmã akuhê nẽ amã ma hkêt nẽ. Anẽ.

⁸Hãmri nhũm mẽ kuma nẽ kãnhmã rĩť nẽ Jejus pix pumu nhũm ahte xa nhũm kuri wa ãm xwỳnhťa wa ra ma akupỹm api.

⁹Hãmri nhũm mẽ kormã akupỹm hixêť nhĩmõk rũm mẽ ixwỳr wrỳk o mō nhũm Jejus mẽ kãm: —E kêr ka mẽ ham ate mẽmoj pumunh xwỳnhťa kormã nhãm mẽ kãm harênh kêt nẽ. Kot paj nhỹrmã ty nẽ akupỹm ixtĩr ka mẽ rĩ kormã mẽ kãm ja hã ijarênh o ri apa. Anẽ.

¹⁰Hãmri nhũm mẽ kormã akupỹn mẽ ixwỳr wrỳk o mō nhũm mẽ Jejus mã: —Kwa mẽ inhmã mẽmoj jarê. Na htem Tĩrtũm kapêr tũm o mẽ ijahkre xwỳnhjaja mẽ inhmã: “Eris kumrêx koja Tĩrtũm mẽ pahwỳr kumẽ nhũm Krisja kormã hapu hã wrỳ.” Anẽ. Na htem ã mẽ inhmã war ajarênh anẽ. Tã ka ra wrỳ nom kormã akukamã Erisja wrỳk kêt. Anẽ.

¹¹Hãmri nhũm mẽ kãm: —Nà ãm hãmri na prem ã wa ijarênh anẽ. Na pre ra ixkukamã te Eris kot amnhĩ nhĩpêx pyrãk xwỳnhťa tẽ nẽ ixkutêp mẽ kãm ijarênh o pa.

¹²Tã nom nhũm mẽ ja hã omunh kêt nẽ. Na prem axtem nẽ kãm hprãm xà hkõt tanhmã hipêx to nẽ kupĩ. Tã koja mẽ nhỹrmã ã hipêx anhỹr pyrãk o inhĩpêx. Anẽ.

¹³Hāmri nhūm mẽ ra hprĩ hã kuma nẽ axpẽn mã: —Kwa Juãw Paxis pimràata na ã mẽ pamã harēnh anẽ. Tapxipix na pre te Eris kot amnhĩ nhĩpêx pyræk o amnhĩ nhĩpêx o pa. Tã tãm na mẽ pamã harẽ. Anẽ.

Jejus kot mēhō hkra nê mēkarōmnuti kator ã harēnh

Makre 9.14-29; Rukre 9.37-43

¹⁴Tã nhūm mẽ ra akupỹm ahpar mã man mẽ ixwỳr hpôx o mō nhūm mẽ ohtô rax nẽ Jejus kutêp kuhê. Hāmri nhūm mēhō myja mẽ omu nẽ mẽ kutã tẽ nẽ mẽ hkaxpa nẽ Jejus kutã hkôn krã ho tēm nẽ nhỹ nẽ hkra ho kuwỳ nẽ kãm:

¹⁵—Pa Jejus. Kwa inhmã ixkra kamã axukaprĩ nẽ. Na hte mēkarōmnutija xatã tanhmã ixpê ho nhūm hte ỹ hã mra nẽ rôrôk nẽ tōhã kuwy kamã rôrôk nẽ tōhã gôx kãm mran mrõ nẽ ixpê homnuj tỳx nẽ.

¹⁶Tã pa akôt mẽ pa ho mẽ pa xwỳnhjê hwỳr o tẽ nom nhūm mẽ kot inhmã ho mex kaxyw tee ri tanhmã ho hkapyrỳ. Kwa xà kot kaj akupỹm inhmã ho mex nà? Anẽ.

¹⁷Hāmri nhūm kuma nẽ mẽ ixte hkôt ixpa ho ixpa xwỳnhjê mã kapēr nẽ mẽ inhmã: —Hêxta waa nẽ. Ra mẽ ate ixte Tĩrtũm nhỹ hã mẽ ho mex ã ixpumunh o ixkôt apa ryy htã kormã ixpyrà nẽ ã mẽ hipêx anhỹr kêt nẽ. Nà kormã mẽ kaxyw Tĩrtũm kôt mẽ ajamaxpēr tỳx kêt jakamã na ka mẽ tee mẽ ho mex kaxyw. Anẽ. Hāmri nẽ myta mã kãm: —E amnẽ ixwỳr akrata o tẽ pa omu. Anẽ.

¹⁸Hāmri nhūm kuma nẽ hwỳr o tẽ nhūm omu nẽ nê mēkarōmnutija kator nhūm akupỹm mex kurê kumrêx.

¹⁹Hāmri pa mẽ ixte Jejus kôt ixpa ho ixpa xwỳnhjaja ja hã omu mẽ hkàx ã amnhĩ tã hkukja nẽ kãm: —Kwa na pa mẽ axwakre kamã tee ri nê hanor prãm kaprỳ. Kwa mon pa mẽ apyrà nẽ nê hanor nhūm kator nẽ ma htēm kêt nẽ? Anẽ.

²⁰⁻²¹Hāmri nhūm mẽ inhmã: —Nà kormã mẽ ate mẽ kaxyw Tĩrtũm kôt ajamaxpēr tỳx kêt. Nom kot ka mẽ kaxyw hkôt ajamaxpēr tỳx hāmri nẽ hkôt amnhĩ nhĩpêx kukwak ri mẽmoj tã awỳ nhūm mẽ ama nẽ mẽ ate mẽmoj tã

axàhwỳr xà hkôt mẽ amã tanhmã mẽmoj nhĩpêx to. Te mẽ ate pĩ hpàr mũj mã akapêr nẽ kãm: “Kwa amnhĩ jarê nẽ ma tẽ nẽ gô xujanãr kãm mãn mrõ.” Anhỹr nhũm kot amar nẽ amar xà hkôt ã amnhĩ nhĩpêx anhỹr kurê kumrêx pyræk. Ja pyrà nẽ kot kaj mẽ amnhĩ kaxyw Tĩrtũm kôt ajamaxpêr tỳx kukwak ri mẽmoj tã awỳ nhũm mẽ ama nẽ mẽ amã mẽmoj tanhmã ho rỳ mẽ amã mẽmoj gõ. Anẽ.

Jejus kot htyk kukamã amnhĩ jarênh ã harênh

Makre 9.30-32; Rukre 9.43-45

22-23Tã hãmri pa mẽ Jejus kôt ma mõi nẽ nhỹri pika pê Garirej kamã kormã ixpa. Hãmri nhũm Jejus axte amnhĩ kukamã mẽ inhmã tanhmã htyk ã amnhĩ jarênh to nẽ mẽ inhmã: —Nà koja mẽ tokyx mẽ kãm ixtã amỹnê nhũm mẽ ixpĩ. Mẽ kot ixpĩr tã kot paj ixtyk ã apkati axkrunêpxi nhũm Tĩrtũm akupỹm ixto ixtĩr. Anẽ. Hãmri pa mẽ tee ri ã kot amnhĩ jarênh anhỹrja ã kuma nẽ ixkaprĩ htỳx kumrêx.

Jejus kot Tĩrtũm nhõrkwỹ hwỳr àr

Rõmãn 13.5-7; Wam Korĩt 10.32–11.1

24Tã pa mẽ Jejus kôt ma mõi nẽ ra Kapanaũ hwỳr pøj. Hãmri nhũm mẽ kot Tĩrtũm mã amnhĩ jarênh xà hã ixkre ho mex kaxyw mẽ kêp kàxpore hkwỳ jamỳnh xwỳnhjaja mẽ ixpumu nẽ mẽ ixwỳr mra nẽ Simãw Pêtre mã kãm: —Pa. Kwa xà na hte mẽ ajahkre xwỳnhja mẽ pahpê hkwỳjê pyrà nẽ Tĩrtũm mã amnhĩ jarênh xà hã ixkre ho mex kaxyw kàxpore hkwỳ nhõr kêt nẽ nà? Anẽ.

25Hãmri nhũm mẽ kuma nẽ mẽ kãm: —Tỳ kot mẽ kãm òr o pa kênã. Anẽ. Hãmri nẽ ma mẽ ixkôt tẽ nẽ mẽ ixkôt mēhõ nhõrkwỹ hwỳr axà. Hãmri nẽ kot Jejus mã mẽ harênh mã tã nhũm ra hamaxpêr ã omu nẽ kumrêx kãm kapêr nẽ kãm: —Kwa inhmã mẽmoj jarê Simãw Pêtre. Xà na hte pahi hkrajaja ò papaj mã kàxpore hkwỳ nhõr o pa nà? Xà na hte ãm hkra hkêt xwỳnh pixjaja kãm hkwỳ nhõr o pa? Anẽ.

26Hãmri nhũm kuma nẽ kãm: —Nà mẽ kêp hkra hkêt xwỳnh pixjaja na hte kãm òr o pa. Anẽ. Hãmri nhũm Jejus kãm: —Tỳ. Nà ãm hãmri na ka ja jarê. Na hte pahi hkrajaja ò papaj mã kàxpore nhõr kêt nẽ. Mẽ kêp hkra kênã. Tã

ixpê Tirtūm Kra jakamã mo kaxyw kot pa kêt ōrkwỹ hwỳr inhgjêx kaxyw kãm kàxpore hkwỳ gō?

²⁷Tã nom kot paj ōr kêt nhũm kàxpore hkwỳ jamỳnh xwỳnhjaja tee ri ja hã ixpumu nẽ axpẽn mã ixte amnhĩ tomnuj xwỳnh ã ijarẽ. Jakamã e ma gônhmã tẽ nẽ tep õ kanhê. Hãmri nẽ ho api nẽ apy nẽ hakwa jakjê nẽ kamã kàxpore htỳxre pumu. Nẽ apy nẽ man o tẽ nẽ pahpãnhã kàxpore jamỳnh xwỳnhhta mã agō. Anẽ. Nhũm pre ã Jejus Simãw Pêtre mã karō anẽ nhũm kuma nẽ ma hwỳr tẽ nẽ kot kãm karō xà hkôt ã amnhĩ nhĩpêx anẽ.

Matêwre 18

Mẽ kot amnhĩ to rũnh xwỳnhjê jarênh

Makre 9.33-37; Rukre 9.46-48; mããnhẽn Piripos 2.3-7; Wam Pêtre 3.4; 5.5-6

¹Tã mẽ ixte Jejus kôt ixpa ho ixpa xwỳnhjaja amnhĩ kukamã ijamaxpêr nẽ amnhĩ tã Jejus kukja nẽ kãm: —Kwa mẽ inhmã mẽmoj jarẽ Pahihti. Nhỹrmã mẽ ixpê pahi nẽ anhĩhkô hã mẽ ho amnhĩptàr o ri ixpata ã mẽ ixtō kot paj we mẽ ho amnhĩptàr rax o ixkwỳjê jakre? Anẽ.

²Hãmri nhũm mẽ inhma nẽ amnhĩ wỳr mẽhprĩre hō mã hpa ho apê nhũm hwỳr tẽ nẽ mẽ ixkuri xa.

³Hãmri nhũm Jejus omu nẽ hã mẽ inhmã: —E mẽ inhma. Kêr ka mẽ apê pahi pyràk o tanhmã amnhĩ jarênh to ho ri apa hkêt nẽ. ãm te amarĩ ri mẽ apa pyràk o amnhĩ nhĩpêx. Te mẽhprĩre kot amnhĩ nhĩpêx pyràk. Kot kaj mẽ ã amnhĩ nhĩpêx anhỹr o apa hkêt hãmri nẽ nhỹrmã inhĩhkô hã mẽ ho amnhĩptàr kêt nẽ.

⁴Jakamã kot kaj mẽ amã nhỹrmã inhĩhkô hã mẽ ho amnhĩptàr o apa hprãm. Hã kot kaj mẽ te mẽhprĩre kot amnhĩ nhĩpêx pyrã nẽ amã amnhĩ to rũnh prãm kêt nẽ apa.

⁵—Nẽ kêr ka mẽ apê pahi kot amnhĩ nhĩpêx pyràk o tanhmã amnhĩ jarênh to ho apa hkêt nẽ. ãm te amarĩ ri mẽ apa pyràk o amnhĩ nhĩpêx. Jao nhỹri mẽhprĩjê hō pumu nẽ kamã axukapri nẽ kãm mẽmoj tanhmã ho rỳ kãm mẽmoj gō. Hãmri nẽ te pa ate tanhmã ixto mex to pyràk o amnhĩ nhĩpêx. Kot kaj mẽ ã amnhĩ nhĩpêx anhỹr o apa hãmri nhũm Tirtūm ja hã mẽ apumu

ně mẽ ate amnhĩ to rũnh kêt tă mẽ ate amnhĩ to rũnh xwỳnh ã mẽ ajarẽ. E kot kaj mẽ amã amnhĩ to rũnh prãm hã kot kaj mẽ ã amnhĩ nhĩpêx anhỹr o ri apa. Anẽ.

Mẽ kot amnhĩ tomnuj xwỳnhjê hkukamã mẽ harẽnh

⁶Nhũm Jejus arĩ mẽ inhmã mẽhprĩ jarẽ nẽ mẽ inhmã: —Nẽ mẽhprĩre na htem amnhĩ kaxyw ixkôt hamaxpêr o pa. Tã koja mẽhõ inhnê tanhmã mẽ kãm kapêr to. Mẽ kot tanhmã amnhĩ tomnuj to hprãm xàj tanhmã mẽ kãm kapêr to ho pa. Hãmri nhũm mẽ kuma nẽ mẽ kapêr xà hkôt tanhmã amnhĩ tomnuj to. Hã koja Tĩrtũm ja hã omu hãmri nẽ kot inhnê tanhmã kãm kapêr to xwỳnhhta pumu nẽ homnuj tỳx nẽ. Te mẽ kot mẽhõ pynênh nẽ mut ã kên pytĩ hõ nhôr nẽ ma o htêm nẽ gô xupỳm kãm mẽnh pyræk o hipêx. Te ho ja pyræk no ãm homnuj tỳx o hakre.

⁷—Nẽ koja mẽhõ inhnê tanhmã mẽ kot ixkôt amnhĩ xunhwỳr xwỳnhjê hõ mã kapêr to. Kot tanhmã amnhĩ tomnuj to hprãm xàj tanhmã kãm kapêr to. Rỳ kot ixkaga hprãm xàj tanhmã kãm kapêr to. Hãmri nhũm kuma nẽ mar xà hkôt ixkapêr kwỳm tanhmã amnhĩ tomnuj to. Tã koja Tĩrtũmja ja hã omu nẽ mããnên kot inhnê kêp àmnàr xwỳnhhta pumu nẽ ã inhnê kãm kapêr anhỹrja mỳrapê homnuj tỳx kumrêx.

⁸⁻⁹—E kwa mẽ okora. Kot kaj mẽ anhĩhkra ho tanhmã amnhĩ tomnuj to rỳ apar o tanhmã amnhĩ tomnuj to. Hã kêt ka mẽ axte ã amnhĩ nhĩpêx anhỹr pymaj te mẽ ate amnhĩ pê krãhyr nẽ mẽnh pyræk o amnhĩ nhĩpêx nẽ axte ã amnhĩ tomnuj anhỹr kêt nẽ. Rỳ ka mẽ ano ho mẽmoj punuj pumu. Hã kêt ka kãm ajamaxpêr pix o apa pymaj te mẽ ate amnhĩ pê ano katøk nẽ kaxàr nẽ mẽnh pyræk o amnhĩ nhĩpêx nẽ nhãm arĩt kurê kumrêx. Kêt ka mẽ ã amnhĩ nhĩpêx anhỹr o ri apa. Hãmri nẽ nhỹrmã ty nẽ ma Tĩrtũm nhõ krĩ hwỳr api. No kot ka mẽ arĩ akutã ano nẽ arĩ akutã apar nẽ arĩ akutã anhĩhkra rãhã ri apa htã ho amnhĩ tomnuj o apa. Hãmri nẽ nhỹrmã ty nẽ ate amnhĩ tomnuj mỳrapê ma mẽ kot amnhĩ xà htỳx kamã hamak tũm xà hwỳr ma mỗ.

¹⁰⁻¹¹—Nẽ kêt ka mẽ mẽhprĩrejê kamã axukapĩ rãhã ho apa. Na hte kaxkwa kamã Tĩrtũm kapêr o mẽ wrỳk xwỳnh kwỳjaja Tĩrtũm mã mẽ hamãr mex o

pa. Tã koja mēhō tanhmã kēp hō hto nhũm mē hã omu nē ma tē nē Tĩrtũm mã harēnh kurê kumrēx. Anē.

ôwēhti pikunor jarēnh

Rukre 15.3-7

¹²Nhũm Jejus arĩ mē inhmã kapēr nē mē inhmã: —E pa mē amã awjarē ka mē ixujarēnh ma. Nà koja mēhō my hkrit ôwēhti xohtô nē. Nē apkati mē ma hamār o pa. Hãmri nhũm pyxire nē tanhmã amnhĩ to nē kēp akunok. Kwỳ kaga nē ma nhỹhỹm ahte tē nē kēp akunok. Hãmri nhũm mytita ma akupỹm o mōr kaxyw hkwỳ ho pikuprōnh pa hãmri nē tee ri hkwỳ kaēx ã pikunor xwỳnhhta japêr nom nhỹri omunh kêt nē. Hãmri nē tee ri hkukamã hamaxpēr nē ma hkwỳ ho mō nē nhỹri kure. Kutêp apkur kaxyw nhỹri kure hãmri nē ma akupỹm pikunor xwỳnhhta japêr o tē.

¹³Hãmri nē hapêr ryy nē nhỹri hwỳr kato nē omu nē hkĩnh nē. Hãmri nē kutu nē ma akupỹm o tē. Na hte pikunor kêt xwỳnhjê nhỹ hã hkĩnh tã pikunor xwỳnhhta mã kato nē hkĩnh tỳx nē. Krit xohtô htã nom ãm kãm ho pixi nē ho hpikunor prãm kêt. ã mē ujarēnh kot anhỹr.

¹⁴Ja pyrã nē Tĩrtũm kãm mēhō pyxi nē nhỹrmã ma kuwy wỳr mōr prãm kêt kumrēx. Mē piitã mē kot hkôt amnhĩ xunhwỳrja na kãm hprãm. Anē.

Jejus kôt mē pahtōjê hō kot mē pahtomnuj jarēnh

¹⁵Nhũm Jejus arĩ mē inhmã kapēr nē mē inhmã: —Nē ja. Koja ixkôt mē atō rỳ mē atōx tanhmã atomnuj to. Hã kêr ka ma hwỳr tē nē kot tanhmã anhĩpêx to hã amnhĩ tã kãm akapēr. Nom kêr ka mē nhãm mēhō mã harēnh kêt nē. ãm tanhmã kot ato xwỳnhhta pix wỳr tē nē kumē war axpēn mã akapēr nē war axpēn ma. Nhũm ama nē akupỹm tãm anhĩpêx hã kêr ka akupỹm te ixkôt kēp atō rỳ atōx pyrãk o ka wa axpēn nhĩpêx nē axte jam ajamaxpēr kêt nē.

¹⁶Nom koja ama nē ãm ama rỳ tanhmã ato hkêt ã amnhĩ jarēnh japêr. Hã kêr ka ma akupỹm tē nē akupỹm amnhĩ kôt Kris kôt atō rỳ atōx o axkrut rỳ mē ho axkrunēpxi nē amnhĩ kôt hwỳr mē o mra kê mē axpēn tã war ama. Amnepēm Tĩrtũm kapēr ã kagã htũm kot ja jarēnh o: Kêr ka mē atō tanhmã axpēn nhĩpêx to. Hãmri nē hã axpēn mã akapēr kaxyw nē amnhĩ kôt akwỳjê

ho axkrut rỳ ho axkrunēpxi nē akupỹm hwỳr mẽ o mra kê mẽ axpẽn tã war ama. Anē. —Ă Tĩrtũm kapēr ã kagà htũm kot ja jarēnh kot anhỹr.

17Jakamã kêr ka mẽ amnhĩ kôt akupỹm kot tanhmã ato xwỳnhhta wỳr mẽ o mra kê mẽ atã kuma. Hãmri nhũm arĩ mẽ kãm kot tanhmã ato hkêt ã amnhĩ jarē ka tee ri amnhĩ tã omu nē ikrēsti hwỳr tẽ nē Kris kwỳ hã mẽ pikuprõnh xwỳnhjê mã harē. Kê mẽ ama hãmri nē ja hã axte kot tanhmã ato xwỳnhhta mã kapēr. Nhũm mẽ mar kêt nē arĩ kot tanhmã ato hkêt ã amnhĩ jarē ka mẽ amnhĩ nê hanor kurê kumrēx. Hãmri nē te kệp Kris kôt mẽ atõ rỳ mẽ atõx kêt pyràk o hipêx.

18—Nē koja mēhõ ixkôt amnhĩ xãm nē Inhĩpêêxà Tĩrtũm kôt ri amnhĩ nhĩpêx o pa. Ka mẽ ja hã omu nē inhỹ hã tanhmã kãm akapēr to nē kãm: “E ra ate Jejus kôt amnhĩ xãm jakamã kot kaj nhỹrmã Tĩrtũm mẽ wa kuri amex kumrēx nē atĩr tũm nē apa ho apa.” Anhỹr o kãm akapēr. Nom mẽ kot ixkôt amnhĩ xunhwỳr kêt xwỳnhjaja ka mẽ ã mẽ kãm akapēr anhỹr kêt nē. Ăm inhỹ hã mẽ kãm: “No mẽ kajaja mẽ ate Jejus kôt amnhĩ xunhwỳr kêt jakamã kot kaj mẽ Tĩrtũm mẽ Krata wa kuri atĩr tũm nē amex nē apa hkêt nē.” Anē. Kêr ka mẽ inhỹ hã ã ahpỹnhã tanhmã mẽ kãm akapēr to ho apa anē.

19-20—Nē kot kaj mẽ Tĩrtũm mã amnhĩ jarēnh kaxyw te axkrutre rỳ axkrunēpxire htã axpẽn wỳr akuprõ nom mẽ kapxipixjaja apikuprõnh kêt nē. Kot paj mẽ akaêx ã mẽ anhĩhkô hã mẽ amar o xa. Mẽ ate ano ho ixpumunh kêt tã pa wa mẽ anhĩhkô hã mẽ amar o xa. Jakamã kot kaj mẽ axpẽn wỳr akuprõ nē mẽmoj tã Tĩrtũm wỳ nhũm kaxkwa kamã ja hã mẽ ama. Nē mẽ ate hã axàhwỳr xwỳnhhta nhũm mẽ amã tanhmã ho. Kêr ka mẽ ã ixkamnàr rom axàmnhĩx amnhĩ to Inhĩpêêxà hwỳr anē. Anē. Nhũm pre ã Jejus mẽ inhmã kapēr anē.

Mẽ pahte tanhmã axpẽn nhĩpêx to hã mẽ pamã karõ

Matêwre 6.14-15; Rukre 17.3-4; mãänēn Epes 4.32; Korosê 3.13

21Tã nhũm Simãw Pêtre Jejus wỳr tẽ nē mẽmoj tã hkukja nē kãm: —Kwa inhmã mẽmoj jarē Pahihti. Xà koja akôt ixtõ rỳ ixtõx tanhmã inhĩpêx to pa amnhĩ tã omu nē ãm omu nē amnhĩ tã tanhmã ho hkêt nē. Nhũm axte tanhmã ixto nē axte tanhmã ixto ho 6 tã pa ãm amnhĩ tã omu nē amnhĩ tã

tanhmã ho hkêt nê. ãm ho ijamakêtkati nê axte kãm ijamaxpêr kêt nê. ã amnhĩ tã hipêx anhÿr o 7 nhũm ja amã mex nê nà? Anê.

²²Hãmri nhũm kãm: —Nà kot kaj ã amnhĩ tã hipêx anhÿr o 7 pix kêt nê. Koja mêhõ xatã tanhmã ato rãhã nê ka amnhĩ tã omu nê ajaxwÿja amnhĩ tã xatã tanhmã ho hkêt nê. ãm amnhĩ tã omu nê ãm omu nê tãm hipêx rãhã ho ri apa. Mãmri ho anhÿr o apa rãhã nê aa jam anhÿrer kêt nê.

²³—E kot paj ixprĩ hã mē amã tanhmã ja jarēnh to ka mē inhma. Tĩrtũm na hte xatã mē ate tanhmã amnhĩ tomnuj to hã mē apumu nē mē anê rēnh o pa. Te kot pahi kot ã hkwÿjê nhĩpêx anhÿr pyræk. Koja mē õ pahija kãm mē àpēnh xwÿnhjaja kot kēp kàxpore ho ãpresta hã mē omunh kaxyw nhÿ.

²⁴Hãmri nhũm mē hwÿr ja ho tē nē kutã ãm. Ra kot kēp hikàxpore ho ãpresta rax xwÿnhja.

²⁵Tã no ãm aa akupÿm kãm õr kêt nē ra kēp ho hapêx pa. Hãmri nhũm pahija tee ri amnhĩ tã omu nē hkwÿjê mã hã amÿnê nē mē kãm: “E. Mē ma o tē nē hprõ nē hkrajaja nē õrkwÿ nē hikukrêx mērohã ho wēnê hpa nē hpãnhã kàxpore py nē man inhmã o tē. Kot ixpê ixkàxpore ho ãpresta nē akupÿm inhmã õr kêt mÿrapê.” Anê.

²⁶—Hãmri nhũm kot ho ãpresta xwÿnhhta tee ri amnhĩ tã kuma nē kutã hkõnkrã ho nhÿ nē amnhĩ to hwÿr kãm hihtÿx nē kãm: “Kwa nà ri ixto anhÿr kêt nē pahihti. Ixkamã axukaprĩ nē hkêt wehe. Nà kot paj akupÿm amã kugõ kãm ga.” Anê.

²⁷—Hãmri nhũm amnhĩ tã kuma nē kãm hkaprĩ nē. Hãmri nē kãm: “Tõe. Nà kot paj ã anhĩpêx anhÿr kêt nê. Kot paj anhõ kõt kaxõnh pa nē kumē ka mãmri ma ajamakêtkati nē axãmnhix apa.” Anê.

²⁸Nhũm ã kãm kapêr anê nhũm kuma nē hkĩnh nē. Hãmri nē ma tē nē kato nē ixkre kapem pōristi hõ pumu. Na pre ra kēp kàxpore hkwÿ ho grire nē ho ãpresta nhũm kato nē omu. Hãmri nē hwÿr tē nē amnhĩ kĩnhã õkre hã kumÿ nē kãm: “Kwa tokyx akupÿm ate ixpê kàxpore ho ãpresta pãnhã inhmã agõ.” Anê.

²⁹Hāmri nhūm tee ri amnhĩ tã omu nẽ ra ham kot pahi kutã amnhĩ nhĩpêxta pyrã nẽ kutã hkõnkrã ho nhỹ nẽ kãm: “Kwa nã. Kwa ri ixto anhỹr kêt nẽ. Nã kot paj hpãnhã amã kugõ. Kwa ixkamã axukaprĩ nẽ hkêt wehe.”

³⁰Anhỹr tã nom nhūm kuma nẽ ãm kuma nẽ hã amỹnê. Hã hkwỳjê mã amỹnê nẽ mẽ kãm: “E mẽ ma jahti ho tẽ nẽ haxà. Koja kot ixpê kàxpore ho ãpresta pãnhã inhmã kugõ nẽ rĩ kormã kato nẽ rĩ amnhĩ pumu.” Anẽ. Hāmri nhūm mẽ kuma nẽ ma o tẽ nẽ haxà.

³¹—Hāmri nhūm hkwỳjaja tee ri mar o kuhê nhūm mẽ kêp ja omnuj nẽ nhūm mẽ pahi hwỳr agjê nẽ kãm harẽ.

³²Hāmri nhūm tee ri harẽnh ma nẽ kamã gryk tỳx nẽ akupỹm amnhĩ wỳr hã karõ nhūm akupỹm hwỳr axà nhūm kãm: “Tk. Kwa na ka pre amnhĩ tomnuj tỳx nẽ. Ate amnhĩ to ixwỳr nhūm inhmã akaprĩ nẽ ixte anhõ kõt kaxõnh nẽ mẽnũh tã

³³ka amnhĩ kĩnhã anhĩõta kamã axukaprĩ hkêt nẽ ri ã hipêx anẽ.” Anẽ.

³⁴Hāmri nẽ kamã gryk nẽ hã õ pôristi mã amỹnê nhūm mẽ ma o tẽ nẽ haxà. Mẽ kot mẽ hagjênh xà hã ixkre kamã apkati mẽ tanhmã mẽ kot hipêx to kaxyw nhūm mẽ kãm hã amỹnê. Tanhmã mẽ kot hipêx to rãhã nhūm kot akupỹm kàxpore raxta nhõr par nẽ rĩ kormã kator kaxyw nhūm mẽ ma o tẽn haxà. ã mẽ ujarẽnh kot anhỹr. Anẽ.

³⁵Nhūm pre ã Jejus mẽ ixte hkõt ixpa ho ixpa xwỳnhjê mã kapêr anẽ. Hāmri nẽ mẽ inhmã: —Ja pyrã nẽ koja ixkõt mẽ atõ rỳ mẽ atõx tanhmã mẽ atomnuj to ka mẽ amnhĩ tã omu nẽ ãm omu nẽ ho ajamakêtkati kurê kumrêx nẽ axte kãm ajamaxpêr kêt nẽ. Te pahi kot mẽnũh nhõ kõt kaxõnh par nẽ axte kãm hamaxpêr kêeta pyræk. No kot kaj mẽ ã amnhĩ nhĩpêx anhỹr kêt nhūm kaxkwa kamã inhõ Papaj ja hã mẽ apumu nẽ te ho pahi tee ri kot amnhĩ tomnuj xwỳnhãta kot amnhĩ nhĩpêx ã omunh nẽ hã àmnênũh nhūm mẽ kot apkati mẽ tanhmã omnuj tota pyræk o mẽ anhĩpêx. Anẽ.

Matêwre 19

Jejus kot mẽ pahte xepên kaga nê mẽ pahkurê

Matêwre 5.31-32; Makre 10.1-12; Rukre 16.18; mãänên Wam Korĩt 7.10-16

¹Tã nhũm Jejus mẽ inhmã kapër pa nẽ mẽ inhmã anẽ pa mẽ ixrohã Garirej rũm ixkato nẽ pyhti pê Jotãw hã rê nẽ hpãnhã ihkjê hã ri ixpa. Pika pê Jutej kamã.

²Hãmri nhũm mẽ ohtô nẽ Jejus pumu nẽ man mẽ ixwỳr mra nhũm mẽ omu nẽ mẽ kãm akupỹm mẽ à xwỳnhjê ho mex.

³Hãmri nhũm Parijew nhõ xwỳnh kwỳjaja hwỳr mra. Hêx rom kot kamã hamak nẽ tanhmã ho kapër punuj to kaxyw hwỳr mra nẽ kãm: —Pa? Kwa mẽ inhmã mẽmoj jarẽ. Tanhmã na pre amnepêm finat Mojesja mẽ pahte mẽ pahprõ kaga hã mẽ panhĩgêjtjê mã karõ hto? Xà kot mẽ pahprõ pahkwỳm ri tanhmã amnhĩ nhĩpêx to pu mẽ hkaga nhũm ja Tĩrtũm mã mex nẽ nà? Anẽ.

⁴Hãmri nhũm mẽ kãm: —Nà na ka mẽ aprĩ hã Mojes kot tanhmã ja jarẽnh to mar mex kêt nẽ. Ja kot anhỳr kêt. Amnepêm mẽmoj piitã hkrax kãm na pre Tĩrtũm my nẽ nija wa hipêx. Axpẽn kaxyw wa hipêx.

⁵Hãmri nẽ wa hkukamã tanhmã wa kot amnhĩ nhĩpêx to hã wa harẽ nẽ wa harẽnh o: Kojã mẽmyjaja hprõ kaxyw hãmri nẽ gryk ã katorxà mẽ hipêêxà wa hkaga nẽ ãm hprõ kôt pix mã pa ho pa. Te wa tipxi nẽ ri wa pa pyrãk o amnhĩ nhĩpêx. Anẽ. —Na pre ã Mojes Tĩrtũm nhỹ hã mẽ kãm ja jarẽnh anẽ.

⁶Jakamã kojã te wa tipxi nẽ ri wa pa pyrãk o axpẽn nhĩpêx o pa. Tĩrtũm tãm kot axpẽn mã wa òr kênã kot kêt wa axtem nẽ ri htỳx ri hamaxpër nẽ axpẽn kaga. Anẽ.

⁷Hãmri nhũm mẽ kuma nẽ kãm: —Tỳ. Nom finat Mojes na pre mẽ pakukamã mẽ panhĩgêjtjê mã ã ja hã karõ anẽ nẽ mẽ kãm: Kot kaj mẽ aprõ kaga kaxyw hãmri nẽ ra kêp aprõ hkêt ã hã kagà nhĩpêx nẽ kãm agõ nẽ amnhĩ nê hano kê ma tẽ. —Anhỳr o na pre mẽ kãm hã karõ. Tã ka na ka mẽ ixte axpẽn kaga hkêt ã mẽ inhmã karõ. Anẽ.

⁸Hãmri nhũm mẽ kuma nẽ mẽ kãm: —Tỳ no ãm mẽ kãm Tĩrtũm kapër kôt amnhĩ nhĩpêx prãm kêt jakamã na pre ã mẽ kãm ja jarẽnh anẽ. No amnepêm mẽmoj piitã hkrax kãm na prem ã amnhĩ nhĩpêx anhỳr o pa hkêt nẽ.

⁹Jakamã kêr ka mẽ aprõ kaga hkêt nẽ apa. Kot kaj mẽ hkaga nẽ hpãnhã nhãm mẽhõ ho aprõ nhũm Tĩrtũm noo mã te ate wam aprõ kamã nhãm aprõ nyw o amnhĩkati pyræk. Tĩrtũm pê ja omnuj tỳx nẽ. Rỳ koja mẽhõ hprõ kaga ka hpãnhã ho aprõ nhũm Tĩrtũm noo mã te ate wam mjên pê ho amnhĩkati pyræk. Ja mãănẽn Tĩrtũm pê omnuj tỳx nẽ. Anẽ. Nhũm pre ã Parijew nhõ xwỳnhjê mã kapẽr anẽ.

¹⁰Hãmri pa mẽ ixte hkõt ixpa ho ixpa xwỳnhjaja ã kapẽr anhỹrja ã kuma nẽ kãm: —Xà na hte mẽ mjên ra kãm mẽ hprõ hkĩnh kêt tã hkaga hkêt nẽ arĩ hkõt pa ho pa nhũm hte Tĩrtũm mã ja mex nẽ nà? Jakamã kwa xà kot paj mẽ nhỹrmã ixprõ kaga pymaj ixprõ hkêt kumrẽx nẽ ixpa ho ixpa nhũm ja mẽ inhmã mex nẽ nà? Anẽ.

¹¹Hãmri nhũm mẽ inhmã: —Nà ãm hãmri na ka mẽ ja jarẽ. No mẽ ate harẽnhja na mẽ piitã mẽ kãm mex kêt. Koja Tĩrtũm tãm amã aprõ hkêt ã ajarẽ ka rĩ aprõ hkêt nẽ ahte ajamakêtkati nẽ ri apa.

¹²Na htem piitã hprõ nẽ pa hkêt nẽ. Na hte kamã tanhmã mẽ kute xwỳnhjaja kormã hprĩre ri tanhmã kute mỳrapê kãm hprõ hprãm kêt nẽ pa. Nẽ kamã tanhmã mẽ ho mỳrapê nhũm mẽ hkurẽ hkêt nẽ hprõ hkêt nẽ pa. Nẽ kamã mẽ kãm Tĩrtũm mã tanhmã amnhĩ to ho pa pix prãm xàj kãm hprõ hprãm kêt nẽ pa. Tã kot kaj mẽ jajê pyrà nẽ ã amnhĩ nhĩpêx anhỹr prãm nẽ rĩ kam nẽ aprõ hkêt nẽ apa. Anẽ.

Jejus kot amnhĩ nẽ mẽhprĩjê janor kêt ã harẽnh

Makre 10.13-16; Rukre 18.15-17

¹³Tã nhũm Ijaew kwỳjaja Jejus pumu nẽ hwỳr mẽ hkrarejê jamỳ nẽ mẽ o mra. Kot mẽ hã ìhkra jaxwỳr nẽ mẽ ho Tĩrtũm wỳr kaxyw hwỳr mẽ o mra. Hãmri pa mẽ ixte hkõt ixpa ho ixpa xwỳnhjaja tee ri mẽ omu nẽ tanhmã nẽ mẽ kãm ixkapẽr to nẽ mẽ kãm: —Tk. Mo kaxyw na ka mẽ Jejus wỳr mẽ o mra? Kormã mẽ raxre kẽnã. Kwa mẽ ma akupỹm mẽ o mra nà? Anẽ.

¹⁴Hãmri nhũm Jejus mẽ inhma nẽ mẽ inhmã: —Kwa nà mẽ ri inhnẽ mẽhprĩjê kurê hkêt nẽ. Kwãr mẽ mãmrĩ ixwỳr mẽ o mra. Anẽ. Hãmri nẽ amnhĩ wỳr mẽ mẽ kãm hpa ho apê nhũm mẽ hwỳr mẽ o mra nhũm mẽ kuri

kuhê nhũm mẽ omu nẽ mẽ hã mẽ inhmã: —E mẽ jarejê pumu. Na htem hamakêtkati nẽ hkĩnh nẽ ri pa. Nẽ mẽ kãm amnhĩ to rũnh prãm kêt nẽ. Tã Tĩrtũm kôt mẽ kot amnhĩ nhĩpêx o mẽ pa xwỳnhjaja te mẽ kot jajê pyràa nẽ kãm amnhĩ to rũnh prãm kêt nẽ pa. Anẽ.

¹⁵Hãmri nẽ mẽ hã ìhkra jaxwỳ nẽ mẽ ho Tĩrtũm wỳ hãmri nẽ mẽ inhmã anẽ pa mẽ ma axte mẽ kurũm mỗ.

Kàxpore rũnh xwỳnh jarēnh

Makre 10.17-22; Rukre 18.18-23; mǎānēn Rōmān 3.19-20; Wam Ximotre 6.6; Xiakre 2.10

¹⁶Tã nhũm Ijaew òja Jejus wỳr tẽ nẽ kãm: —Pa mẽ ijahkre xwỳnh? Kwa inhmã mẽmoj jarē. Tanhmã kot pa nhỹrmã Tĩrtũm ri ixtĩr tũm nẽ ixpa ho ixpa kaxyw amnhĩ nhĩpêx to wehe? Anẽ.

¹⁷Hãmri nhũm kãm: —Tk. Ra Tĩrtũm kot nhỹrmã mẽ atĩr tũm nẽ apa kaxyw mẽmoj tã mẽ amã karō nhũm ate mar mex kēnã kot ka kêt ri axte ja hã ixkukja. Nà Tĩrtũmja mex o mex jakamã kot kaj amã kuri atĩr tũm nẽ apa hprãm hã kot kaj kapēr kôt amnhĩ nhĩpêx no ri apa. Anẽ.

¹⁸Hãmri nhũm kãm: —No nhỹ kapēr kôt kot paj amnhĩ nhĩpêx o ri ixpa wehe? Anẽ. Hãmri nhũm kãm: —Na pre mẽ amã mẽmoj tã karō ho: Kêr ka mẽ axpēn par kêt nẽ. Nẽ nhãm mẽ hprō ho amnhĩkati hkêt nẽ. Nẽ mẽ kēp axàhkĩnh kêt nẽ. Nẽ tanhmã mẽ ho axêx to hkêt nẽ.

¹⁹Nẽ anhĩpêxà mẽ akatorxà wa hã apijaàm nẽ wa ho mex pē wa kutã anojarêt o ri apa. Nẽ amã akwỳjê hã ma ho te ka amã amnhĩ tã ma pyrāk o mẽ hipêx. Jao tãm mẽ hipêx o ri apa. E kot kaj amã nhỹrmã Tĩrtũm kuri atĩr tũm nẽ apa hprãm hã kêr ka ã amnhĩ nhĩpêx anhỹr o ri apa. Anẽ.

²⁰Hãmri nhũm kuma nẽ kãm: —Ku nhũm. Ra ã ixte amnhĩ nhĩpêx anhỹr o ri ixpa kēnã. Nom te kormã ixtĩr tũm nẽ ixpa kaxyw ixte tãm kêt pyrāk. Kwa axte inhmã mẽmoj jarē nà? Anẽ.

²¹Hãmri nhũm kãm: —Nà kormã mẽmoj pyxi nẽ arĩk. Na ka amã akukrêx rax prãm tỳx o amã Tĩrtũm prãm jakre. Jakamã ma akupỹm tẽ nẽ akukrêx rax o wēnê hpa nẽ hpānhã kàxpore jamỳ nẽ ma mẽ kēp amrakati xwỳnhjê mã òr pa. Hãmri nẽ rĩ akupỹn ixwỳr tẽ nẽ rĩ ixkôt apa ho apa. Anẽ.

²²Hāmri nhūm kuma nē tee ri amnhī kukamā hamaxpēr. Kām hikukrêx rax japê nē kām kamā ĩhkra karo hprām kêt nē. Hāmri nē tee ri Jejus kot ã kām hã karō anhÿrja ma nhūm ja kêp omnuj nē nhūm ma akupÿm htēm kurê kumrêx.

²³Hāmri nhūm Jejus tee ri omu nē mẽ inhmã: —Hêxta waa nē. Koja mẽ hikukrêx rŭnh xwÿnhjaja ohtô nē kām mẽ hikukrêx japê xàj Tĩrtŭm mẽ wa ixri htĩr tŭm nē pa ho pa hkêt nē. Wa ixte amnhī nhĩpêxja mẽ kêp hihtÿx.

²⁴Mẽ kām hikukrêx rŭnh mã ĩhkra karo hprām kêt rãhã tee ri kām Tĩrtŭm kôt amnhī nhĩpêx prãm kaprÿ. Te ho mẽhõ kot menh kagô hã hkre nē kām kagô katõk prãm kêt rãhã kãm guhkrax kãm àr prãm kaprÿta pyræk. Anē. Nhūm pre ã Jejus mẽ inhmã kapēr anē.

²⁵Hāmri pa mẽ kuma nē tee ri amnhī kukamā ijamaxpēr nē kām: —Kwa mẽ ixpiitã mẽ inhmã mẽ ixkukrêx japê kênã. Jakamã xà kot paj mẽ ixpiitã nhÿrmã war ari ixtĩr tŭm nē ixpa ho ixpa hkêt nē nà? Anē.

²⁶Hāmri nhūm mẽ inhmã: —Nà kot kaj mẽ amnhī krã hkôt mẽ amã mẽ akukrêx japêja mã anhÿrer kêt nē. ãm Tĩrtŭm pix na hte ja kaxyw tanhmã mẽ akrã hto ka mẽ amã akukrêx japê hkêt nē. Jao ra mẽ apê Tĩrtŭm mẽ wa ixri atĩr tŭm nē mẽ apa ho mẽ apa mã xwÿnh. Anē.

²⁷Hāmri nhūm Simãw Pêtre kãm: —Kwa no we mẽ pajaja Pahihti? Na pa prem agryk ã mẽmoj piitã hkaga hpa nē akôt ixpa ho ixpa. Jakamã kot paj mẽ nhÿrmã war ari ixtĩr tŭm nē ixpa ho ixpa nà? Anē.

²⁸Hāmri nhūm kuma nē mẽ ixpiitã mẽ inhmã: —Tÿ. Kot paj nhÿrmã mẽmoj piitã ho nyw pa hāmri nē ixte mẽ ho amnhĩptàr o ixkrĩ xà maati kamã nhÿ nē mẽ piitã mẽ kot tanhmã amnhī nhĩpêx to hã mẽ omunh xà hkôt tanhmã mẽ harênh to. Tã mẽ kajaja mẽ ate ixkôt apa ho apa xwÿnhjaja kot kaj mẽ inhmã Ijaew kot amnhī nhĩpêx ã mẽ omunh xà hkôt ahpÿnhã tanhmã inhmã mẽ harênh to. Mẽ mex ã mẽ harê rÿ mẽ mex kêt ã mẽ harê. Kot kaj mẽ ã inhmã mẽ harênh anē. ãm hāmri na pa mẽ amã ixkapēr anē.

²⁹—Ně ka mẽ atõ inhmã tanhmã amnhĩ nhĩpêx to ho apa kaxyw akwỳjê re mẽ ma inhmã mẽmoj to anhỹr o ri apa. Tanhmãn anhõrkwỹ rỳ atõ rỳ atõx re. Rỳ aprõ mẽ akrajê re. Rỳ akatorxà mẽ anhĩpêxà war are. Rỳ akukrêx piitã rer pa hãmri mẽ ma mẽ piitã mẽ kãm ixkapêr o mẽ ahkre ho ri mẽ hkôt apa. Hã kot paj mẽ apumu mẽ mẽ ato mex rax mẽ. Hãmri ka mẽ ma mẽ hkôt apa mẽ mẽ kãm ixkapêr jarênh o apa nhũm mẽ kot mẽ amar xwỳnh kwỳjaja mẽ ama mẽ mẽ kãm mẽ akĩnh mẽ. Nễ ra mẽ ate akwỳjê rer par tã mẽ tãmjaja te mẽ apê mẽ hkra rỳ mẽ htõ rỳ mẽ htõx pyræk o mẽ anhĩpêx mẽ mẽ ato mex o pa. Hãmri ka mẽ nhỹrmã ty mẽ ma Tĩrtũm mẽ wa inhõ krĩ hwỳr api mẽ wa ixkuri amex kumrêx mẽ atĩr tũm mẽ apa ho apa.

³⁰Nom kwa kêr ka mẽ amnhĩ tã ja ma mẽ amnhĩ to rũnh xwỳnh ã amnhĩ kamnhĩx kêt mẽ. Jar mẽ kot amnhĩ to rũnh ã amnhĩ to jarkrar xwỳnhjaja koja mẽ nhỹrmã amnhĩ to hkryre hã amnhĩ pumu. No jar mẽ kot amnhĩ to hkryre xwỳnh ã amnhĩ jarênh xwỳnhjaja koja mẽ nhỹrmã amnhĩ to rũnh ã amnhĩ pumu. Anễ.

Matêwre 20

Jejus kot nhỹrmã hkrajê ho mex ã harênh

Rômãn 9.14-16

¹Nhũm Jejus arĩ mẽ ixte hkôt ixpa ho ixpa xwỳnhjê mã awjarẽ mẽ mẽ inhmã: —Nễ kot paj nhỹrmã tanhmã mẽ ato mex to. Te ixpê hpur nhõ dõn kot amnhĩ nhĩpêx pyræk o mẽ anhĩpêx. Koja pur nhõ dõnja ihpur kãm mẽmo xõ ra hkà hpa nhũm omu hãmri mẽ kaxyw mẽ àpênh xwỳnhjê japêr kaxyw ma gàm tẽ. Nễ gáp xa mẽ mẽ kãm akir nhũm mẽ hã akuprõ.

²Hãmri nhũm mẽ kãm: “E. Kot kaj mẽ jarãhã inhmã ixpur kãm apê. Kot kaj mẽ inhmã axàpênh o amỹkry pa hpãnhã mẽ kot apkati pixi hã mẽ àpênh pãnhã mẽ kãm amnhĩrer xàja kôt mẽ amã amnhĩre.” Anễ hãmri nhũm mẽ kuma mẽ mẽ kãm: “Tõe. Nà kot paj mẽ amã apê.” Anễ nhũm pur wỳr mẽ kurẽ nhũm mẽ ma kãm àpênh mã mra.

³—Tã nhũm arĩ kỳx mã myt tẽ nhũm pur nhõ dõn akupỹm gàm tẽ nhũm mẽ hkwỳja arĩ kuhê.

⁴Nhũm tee ri mẽ omu nẽ mẽ kãm: “Kwa mon ka mẽ axàpênh kêt nẽ arĩ akuhê? E. Mẽ ma wantajê hkôt mra nẽ inhmã apê pa hpãnhã mẽ amã amnhĩrer mex nẽ.” Anẽ.

⁵Hãmri nhũm mẽ kuma nẽ ma mẽ hkôt mra. Tã nhũm ra myt kaxkwa nhĩpôk ri ajêt nhũm hpur nhõ dõnja mã hkwỳjê ho anẽ nẽ. Kê axte mẽ hkôt jajê jano nhũm mẽ ma mẽ hkôt mra. Tã nhũm ra myt ahpanh grire nhũm ma akupỹm kêwe gàm tẽ nẽ mã mẽ ho anẽ nẽ axte mẽ hkôt jajê rẽ.

⁶—Tã nhũm ra myt grire nhũm ma akupỹm kêwe gàm tẽ nẽ jajê pumu nhũm kê wem arĩ gáp kuhê. Hãmri nhũm tee ri mẽ omu nẽ mẽ kãm: “Kwa mon ka mẽ axàpênh kêt nẽ atỳx gáp akuhê ho akuhê?” Anẽ.

⁷Hãmri nhũm mẽ kãm: “Nà mẽhõ kot mẽ inhmã mẽ ixàpênh ã karõre hã.” Anẽ. Hãmri nhũm mẽ kãm: “Tôe. Mẽ ma mẽ hkôt ixpur wỳr mra nẽ inhmã mãn apê.” Anẽ hãmri nhũm mẽ kuma nẽ ma hkwỳjê hkôt mra.

⁸—Tã nhũm ra kamàt. Hãmri nhũm hpur nhõ dõnja kãm àpênh xwỳnhjê krãhtũm wỳr tẽ nẽ kãm: “E. Ma mẽ hwỳr tẽ nẽ mẽ kãm anẽ kê mẽ àpênh kaga nẽ man akôt mra ka inhmã mẽ kãm amnhĩre. Nom kêr ka hapu hã mẽ mõi xwỳnhjê kumrẽx mã amnhĩre nẽ wam mẽ mõi xwỳnhjê ho hapu nẽ mẽ kãm amnhĩre.” Anẽ. Hãmri nhũm kãm: “Tôe. Nà kot paj mẽ ho anẽ.” Anẽ.

⁹Hãmri nẽ ã mẽ kãm amnhĩrer anẽ. Hapu hã mẽ mrrar xwỳnhjê kumrẽx mã amnhĩre. Te mẽ kot kwỳhtã àpênh o amỹkry pyræk o nhũm hpãnhã mẽ kãm amnhĩre.

¹⁰Hãmri nhũm wam mẽ mrrar xwỳnhjaja ja hã mẽ omu nẽ hkĩnh nẽ. Hãmri nẽ htỳx hamaxpěr o: “Nà kot paj xep kàxpore jamỳnh rax o mẽ hakre. Ixàpênh rax o ixte mẽ hakrenh kênã.” Anhỳr tã no nhũm mẽ piitã mẽ kãm amnhĩrer o axpẽn pyræk. Ra pur nhõ dõn kot kãm hã karõ xà hkôt.

¹¹Hãmri nhũm mẽ hamỳ nẽ tee ri hkre kamã omu nẽ we ra hpur nhõ dõnja kamã gryk nẽ.

¹²Hãmri nẽ hwỳr mra nẽ kãm: “Kwa jajaja na mẽ amã àpênh o ore pyxi nẽ. No kêt mẽ pajaja na pa mẽ kwỳhtã ixàpênh rax o kamàt. Arĩgro htỳx kãm

ixàpênh o ixãm o ixtã kamàt tã ka pěr ãm mẽ inhmã amnhĩrer o axpẽn pyræk. Kwa na ka mẽ ixtomnuj nẽ.” Anẽ.

¹³Hãmri nhũm mẽ kuma nẽ mẽ kãm: “Tk. Nà na pa mẽ atomnuj kêt nẽ. Na pa kwỳhtã tanhmã mẽ amã amnhĩrer to xà jarẽ ka mẽ inhma nhũm ja mẽ amã mex nẽ ka mẽ ma hwỳr axàpênh mã mra.

¹⁴Kwa mẽ akàxpore jamỳ nẽ ma mra. ãm pa inhmã hprãm xà hkôt na pa ã mẽ amã amnhĩrer anẽ.

¹⁵Ixkàxpore jakamã kot paj nhãm inhmã mẽhõ mã òr prãm xà hkôt kãm kugõ. Tã ka mẽ ã mẽ hã ixkamã agryk anẽ. E mẽ akàxporeja mỳ nẽ ma mra.” Anẽ. Nhũm ã hpur nhõ dõn mẽ kãm kapěr anẽ. ã mẽ ujarênh kot anhỳr. Anẽ.

¹⁶Nhũm pre ã Jejus mẽ inhmã ujarênh anẽ nẽ mẽ inhmã: —Ja pyrà nẽ wam mẽ ate ixkôt amnhĩ xunhwỳr xwỳnhjaja nẽ hapu hã mẽ kot kormã ixkôt amnhĩ xunhwỳr mã xwỳnhjaja kot paj nhỹrmã mẽ apiitã mẽ ato mex kumrêx o axpẽn pyræk. Anẽ.

Jejus kot htyk kukamã amnhĩ jarênh

Makre 10.32-34; Rukre 18.31-34

¹⁷Tã nhũm Jejus mẽ inhmã anẽ pa mẽ ixrohã ma Jerujarẽ hwỳr mõ. Mẽ ohtôjê hkôt mõ. Hãmri nhũm Jejus mẽ ixpê 12jê mã anẽ nẽ mẽ ixkwỳjê hkàx ã mẽ inhmã kapěr kaxyw ahte hapu hã mẽ ixto mõ.

¹⁸Hãmri nẽ mẽ inhmã amnhĩ kukamã tanhmã amnhĩ jarênh to nẽ mẽ inhmã: —E na pu mẽ ra Jerujarẽ hwỳr mõ. Kamã koja mẽ pahkwỳjaja inhĩpêx kati nẽ. Koja mẽ patre krãhtũmjê mẽ Mojes kapěr o mẽ ahkre xwỳnhjê nhĩhkram ijaxà nhũm mẽ kot ixpĩr kaxyw ixtã amỹnê.

¹⁹Koja mẽ kãm ixkurê xwỳnhjaja ixpynê nẽ Rõm nhõ xwỳnhjê nhõ pòristijê hwỳr ixto tẽ nẽ mẽ kãm tanhmã ixto hêx to. Hãmri nhũm mẽ kuma nẽ mẽ mar xà hkôt tanhmã inhĩpêx to. Nhũm mẽ hkwỳjaja ixtã hpěr o axkê nẽ ixtã akunha nhũm mẽ hkwỳjaja ixto kapěr punuj nẽ tanhmã ijapry hto nẽ ixtak. Hãmri nẽ ma ixto tẽ nẽ pĩ kahpa hã inhô nẽ ixpĩ. ã koja mẽ inhĩpêx anẽ.

Nom kot paj ixtyk ã ixtã apkati axkrunëpxi nhũm Tirtũm akupỹm ixto ixtĩr. Anẽ.

Xiakre mẽ Juãw wa katorxà kot wa ho Jejus wỳr ã harënh

Makre 10.35-45; mãänën Rõmãn 12.3; 12.10; 12.16; Epes 4.2; Piripos 2.3-8; Xiakre 4.6; Wam Pêtre 5.3

20Tã nhũm Jepetew prõja amnhĩ kôt Jejus wỳr hkra Xiakre mẽ Juãwja wa o tẽ. Kot wa ho Jejus wỳr kaxyw hwỳr wa o tẽ. Mẽ ixpyrà nẽ wa kot Jejus kôt pa ho pa xwỳnhjê hõ na pre wa nhũm wa katorxàja Jejus wỳr wa o tẽ. Hãmri nẽ kutã hkõnkrã ho tẽm nẽ nhỹ

21nhũm kãm: —Pa mo na? Anẽ. Hãmri nhũm kãm: —Ma ixkrata na pa ixte wa ho awỳr kaxyw awỳr wa o tẽ. Xê kot kaj nhỹrmã ate mẽ piitã mẽ ho amnhĩptàr kaxyw nhỹ nhũm ixkrata wa akutã anhĩjê nẽ wa kêp anhõ kôwenatô nẽ akutã anhĩjê nẽ wa ato nhỹ. Ja prãm xàj na pa ã wa ho awỳr anẽ. Anẽ.

22Hãmri nhũm kuma nẽ Xiakre mẽ Juãw wa omu nẽ wa kãm: —Nà na war akatorxàja htỳx ã war ato ixwỳr anẽ. Koja mẽ tokyx ixpĩ kot paj amnhĩ xà htỳx kãm ijamak kãm ty. Tã xà koja mẽ ixpyrà nẽ ã war anhĩpêx anẽ ka wa ixpyrà nẽ amnhĩ xà htỳx kamã ajamak rax kãm ty nà? Anẽ. Hãmri nhũm wa kãm: —Tỳ. Nà kot pa wa ijaxwỳja anẽ nẽ apyrà nẽ amnhĩ xà htỳx kãm ijamak kãm ty. Anẽ.

23Hãmri nhũm wa kãm: —Nà ãm hãmri na ka wa amnhĩ jarẽ. War ate ixpyrà nẽ ixkôt amnhĩ xà htỳx kãm ajamak kãm atyk mã kênã. Tã nom war akatorxà kot war ato ixwỳrta ã kot paj tanhmã war amã nẽ hkêt nẽ. Kêt inhõ Papaj tãm koja ixkaxyw mẽhõ japêr nhũm inhĩhkô hã nhỹ. No pa kot paj amnhĩ kaxyw mẽhõ jarënh kêt nẽ. Anhỹr o wa kãm kapêr.

24Hãmri pa mẽ ixte wa uràk nẽ Jejus kôt ixpa ho ixpa xwỳnhjaja wa katorxà kot ã wa ho Jejus wỳr anhỹrja ã kuma nẽ wa kamã inhgryk nẽ. Hãmri nẽ axpën mã ixkapêr o: —Tk. Nà koja Juãw mẽ Xiakre wa nhỹrmã kêp õ kôwenatô nẽ mẽ pahto amnhĩptàr kêt kumrëx. Anẽ.

25Nhũm Jejus mẽ inhma nẽ amnhĩ wỳr mẽ ixpiitã mẽ inhmã hpa ho apê nẽ mẽ inhmã: —E mẽ amnẽ ixwỳr axkamẽ pa mẽ amã awjarẽ mãn. Anẽ. Hãmri

pa mẽ hwỳr axkamẽ nhũm mẽ inhmã: —E mẽ inhma. Na hte Ijaew kêt xwỳnhjê nhõ pahijaja ã amnhĩ nhĩpêx anhỹr o ri pa nẽ amarĩ hkrĩ xà kamã hkrĩ ho hkrĩ. àhpumunh tỳx jakamã amarĩ ixkre hkre jakry kamã hkrĩ ho hkrĩ nẽ kãm mẽ àpênh xwỳnhjê pix mã mẽmo mẽ àpênh ã karõ. Na htem ã amnhĩ nhĩpêx anhỹr o hkrĩ. Nẽ mẽ kot mex ã harênh kaxyw tanhmã mẽ ho mex to ho pa.

26-27Tã no mẽ kajaja. Kêr ka mẽ ho mẽ urak kêt nẽ. ãm te amarĩ ri mẽ apa pyrak o axpên nhĩpêx o ri apa. Nẽ te mẽ apê mẽ kãm axàpênh xwỳnh pyrak o amnhĩ nhĩpêx o ri mẽ hkôt apa. No kêr ka mẽ ho amnhĩptar mã ajamaxpêr o ri apa hkêt nẽ.

28Mẽ ate mẽmoj tã pa ixkutã anojarêt ho apa kaxyw na pa pre mẽ awỳr ixwryk kêt nẽ. Ixte amarĩ mẽmoj to mẽ kamjaja mẽ akutã inhnojarêt o ixpa kaxyw na pa pre mẽ awỳr wrỳ. Nẽ mẽ ate ixkôt amnhĩ xunhwỳr xwỳnhjê nẽ ixtyk kaxyw na pa pre wrỳ. Anẽ.

Jejus kot no hkre xwỳnh wa ho mex ã harênh

Matêwre 9.27-31; Makre 10.46-52; Rukre 18.35-43

29Tã pa mẽ Jejus kôt kormã Jerujarẽ hwỳr ra Jeriko htêp o mõi. Hãmri nẽ kurũm ixkaton mõi nhũm mẽ ohtô nẽ mẽ ixkôt mra.

30Nhũm pry nhĩhkjê hã no hkre xwỳnh wa àhwỳr o hkrĩ xwỳnhja wa amnhĩ wỳr mẽ inhmrar mar o nhỹ. Mẽ ohtô nẽ Jejus kôt mẽ mrar xwỳnhjê mrar ma nẽ mẽ kãm: —Kwa mo na? Mẽmoj wỳr na ka mẽ axohtô nẽ mra? Anẽ. Hãmri nhũm mẽ wa kãm: —Nà Jejus pê Najare nhõ xwỳnhhta kôt na pa mẽ mra. Anẽ. Hãmri nhũm wa mẽ kuma hãmri nẽ kax pê Jejus mã kapêr nẽ kãm: —Pa Pahihti? E apê mẽ inhõ Pahihti mex na ka. Te apê amnepêm anhĩgêt pahihti Tawita pyrak. Jakamã kwa wa ixkamã axukapri nẽ akupym wa ixto mex. Anẽ.

31Hãmri nhũm Jejus kôt mẽ mõi xwỳnhjaja wa kuma nẽ wa kãm: —Tk. Kwa war akapêr kêt nẽ nhỹ nà. Anẽ. Tã no nhũm wa ãm mẽ kuma nẽ xatã amnhĩ to kuwỳ. Kax pê amnhĩ to kuwỳ.

³²Hāmri nhūm Jejus wa kuma nē xa nē wa omu nē wa kām: —Pa mo na? Tanhmā kot pa wa ato? Anē.

³³Hāmri nhūm wa kām: —Nà akupŷm wa inhmā wa ixrīt mex prām. Anē.

³⁴Hāmri nhūm kām wa hkaprī nē wa no htok nhūm wa akupŷm rīt mex kurē kumrēx. Hāmri nē rīt mex ā amnhī pumu nē hkīnh tŷx nē ma Jejus kōt hkwŷjê hkōt mō.

Matêwre 21

Jejus kot Jerujarē hwŷr àr ā harēnh

Makre 11.1-11; Rukre 19.28-40; Juāw 12.12-19

¹Tā nhūm Jejus kormā Jerujarē hwŷr kormā mō. Pa mē hkōt mō nē ra Petake hwŷr ixàhtêp o mō. Hixêt pê Oriwêhti kahti ri na pre krīja xa. Jakamā pa mē wa hwŷr ixàhtêp o mō nhūm Jejus mē ixte hkōt ixpa ho ixpa xwŷnhjê wa ho axkrut nē amnhī kukamā wa kumē.

²Nē wa kām: —E wa ma krī mŷj wŷr mē ixkukamā wa tē. Nē wa hwŷr axà nē nhŷri jumēnre mē hkra wa kām ê nē wa ām xwŷnh wa omu hāmri nē kām ê xà hpōt nē man akupŷn amnē hamē wa o tē.

³Koja mēhō ja hā war apumu nē hā tanhmā war amā kapēr to ka wa kām ā ijarēnh anē nē kām: “Nà mē panhō Pahihti na hā karō pa wa hwŷr tē.” Anhŷr o wa kām ijarē. Hāmri nhūm war ama nē war amā ōr kurē kumrēx. E wa ma hwŷr tē. Anē.

⁴Tirtūm kapēr ā kagà htūm ra kot ja kukamā harēnh. Na pre ra Tirtūm nhŷ hā kapēr xwŷnhjê hō ja jarē nē hā kagà ho:

⁵Pa Jerujarē nhō xwŷnhjaja. Kwa mē tee ri amnhī kukamā ajamaxpēr ho amā ma hkêt nē. Ota mē anhō pahi nywta ra jumēnre hā nhŷ nē mē awŷr hpōx o tē. Te kot amnhī to grire xwŷnh pyrāk o amnhī nhīpêx nē tē.

⁶Anhŷr o kot hkukamā harēnh jakamā nhūm Jejus amnhī kukamā ja wa kumē hāmri nhūm wa ma hwŷr htēm kurē kumrēx.

⁷Nē krīta wŷr pōj nhūm Jejus kot wa kām harēnh xà hkōt nhūm wa jumēnreta pumu. Hāmri nē hamē wa kām ê xà hpōt nē ma Jejus wŷr wa o

tê. Hāmri nê kaxyw amnhĩ xê hkwỳ hkwỳr nê kām ho jumēnre nywta kô kahty. Nê kām ho htỳx nê o xa nhũm Jejus hã nhỹ nê hã mō.

⁸Kormã Jerujarē hwỳr hixêt ã àpir o mō. Nhũm mẽ kot omunh o kuhê xwỳnhjaja hkĩnh nê ma hkukamã pry ho mex kaxyw amnhĩ xê hkwỳptyr ho mō. Nê pô hkwỳ jakà nê utyr o mō.

⁹Nhũm mẽ hkwỳjaja Jejus kukamã mra nhũm mẽ hkwỳjaja hapu hã hkôt mra. Nê piitã kàx pê Tĩrtũm mex o mex ã harēnh o hkôt mō nê harēnh o: Ota Tĩrtũm kot mẽ pahwỳr mēnh xwỳnhhta ra pōj. ãm hāmri na mẽ pahwỳr wrỳ. Ja na mex kumrēx. Kêp mẽ panhō Pahihti mex na. ãm hāmri na pre Tĩrtũm mẽ pahwỳr kumē. Tĩrtũm mex kumrēx. ãm mex o mex. Anhỹr o Jejus kôt Jerujarē hwỳr harēnh o mō. Kot mẽ ho amnhĩptàr kurê kumrēx ã hkamnhĩx jakamã hkĩnh nê hkôt ã harēnh anhỹr o mō.

¹⁰Hāmri nhũm krĩ nhõ xwỳnhjaja tee ri mẽ kuma nê axpēn mã: —Kwa mēhõ na we hpôx o mō nhũm mẽ ã hkôt harēnh anhỹr o mō? Anē.

¹¹Hāmri nhũm Jejus kôt mẽ mrar xwỳnhjaja mẽ kuma nê mẽ kām: —Nà Tĩrtũm nhỹ hã kapēr jarēnh xwỳnh pê Jejus na. Kêp Garirej kamã krĩ pê Najare nhõ xwỳnhhta na. Anē.

Jejus kot Tĩrtũm nhõrkwỹ hwỳr àr ã harēnh

Makre 11.15-19; Rukre 19.45-48; Juãw 2.13-22

¹²⁻¹³Tã hāmri nhũm Jejus Jerujarē wỳr axà nê jumēnre rũm wrỳ nê ma Tĩrtũm mã amnhĩ jarēnh xà hã ixkre hwỳr tê nê axà. Hāmri nê tee ri mẽ kot tanhmã ixkre kamã amnhĩ nhĩpêx to hã mẽ omunh o xa. Nhũm mẽ axtem nê môx nê ôwēhti nê tuuti ho wēnê ho kuhê. Mẽ kot haprôr nê Tĩrtũm mã amnhĩ jarēnh kaxyw kām hpar nê òr kaxyw mẽ kām ho wēnê ho kuhê. Nom axtem nê mẽ kām hã ohtô rax kām mẽ kām ho wēnê. Hāmri nhũm Jejus mẽ hwỳr axà nê tee ri mẽ omu nhũm ja kêp omnuj tỳx kumrēx. Hāmri nhũm mẽ hwỳr tê nê mẽ kot kàxpore ho pinhpanh xwỳnhjê pê mẽ õ mēsti rēnh pa. Nê mẽ kot tuuti ho wēnê xwỳnhjê pê hkrĩ xà hkujate nê rēnh pa. Hāmri nê mẽ kām: —Tk. Kwa Tĩrtũm kapēr ã kagà htũm kot ixkreja jarēnh kot: Inhõrkwỹja ãm mẽ ate inhmã amnhĩ jarēnh xà hã ixkre pix kaxyw na. Anhỹr

o kot harēnh tã ka mẽ axtem nē kamã ã amnhĩ nhĩpêx anē. E kwa mẽ ajapôx tokyx anē. Anē. Hãmri nē mẽ kator pa nhũm mẽ ma hapêx.

14Hãmri nhũm mẽ no hkre xwỳnhjaja nē mẽ hyk o mẽ pa xwỳnhjaja mra nē agjê nē Jejus kutã kuhê nhũm mẽ omu nē akupỹm mẽ ho mex.

15-16Hãmri nhũm mẽhprĩ hkwỳjaja hwỳr mra nē kuri kãm mex o mex ã gre nē kãm grer o: Amex kumrêx Pahihti. Tĩrtũm na pre mẽ ixwỳr amē. Kot kaj te anhĩgêt Tawi pyrã nē mẽ ixto amnhĩptàr o apa. Anhỳr o kãm grer o kuhê. Hãmri nhũm patre krãhtũm mẽ Tĩrtũm kapêr tũm o mẽ ahkre ho mẽ pa xwỳnhjaja tee ri ã mẽ grer anhỳr ã mẽ kuma. Nē tee ri Jejus kot mẽ no hkre xwỳnhjê mẽ mẽ hyk o mẽ pa xwỳnhjê ho mex ã omunh o kuhê nē gryk nē Jejus wỳr tē nē kãm: —Kwa na mẽhprĩjaja mẽ grer kãm ã ajarēnh anē ka mẽ mar kêt nē? Mẽ grerja mexti hã. Anē. Hãmri nhũm mẽ kãm: —Tỳ ixte mẽ mar kênã. Tĩrtũm kãm hprãm xà hkôt na mẽ ã inhmã inhmex o inhmex ã ixtã grer anē. Tĩrtũm kapêr ã kagà htũm kot ã mẽ hkukamã harēnh kot anhỳr. Mẽ harēnh kot: Koja mẽhprĩjaja Pahihti mã mex o mex ã grer o kuhê. Anhỳr o kot mẽ hkukamã harēnh kênã. Tã mãn ka mẽ kormã kamã harēnh kêt jakamã na ka mẽ ja jarēnh mar kêt nē. Kwãr mẽ mãmri ã inhmex ã grer anē.

17Anhỳr o mẽ kãm kapêr hãmri nē mẽ inhmã anē pa mẽ ixkreta rũm ijapôj nē ma akupỹm Petãn wỳr mra nē kamã amnhĩm hikra.

Jejus kot mẽmo hpàr mã kapêr ã harēnh

Makre 11.12-14; mãänēn Xiakre 1.6

18Tã nhũm kwỳhtã nhũm Jejus kànhmã nhỹ nē mẽ inhmã anē pa mẽ ixrohã ma akupỹm Jerujarē hwỳr mra. Hãmri nē kormã mō nhũm Jejus pry kahti ri ra kãm prãm nē.

19Hãmri nē mẽmo pĩ pê fikêhti jarēnhja pumu nē kot ô hkwỳ rēnh nē hkrêr kaxyw hwỳr màt. Hãmri nē tee ri ô japêr nhũm ô hkêt nē ãm hô hpix harir. Hãmri nhũm tee ri omu nē kãm: —E kot kaj axte axô hkêt kumrêx. Anhỳrja o nhũm grã par kurê kumrêx.

²⁰Hāmri pa mẽ ixte hkôt ixpa ho ixpa xwỳnhjaja omu nẽ Jejus mã: —Kokỹỹ. Kwa tanhmã na we amnhĩ nhĩpêx to nẽ grà kurê kumrêx? Anẽ.

²¹Nhũm mẽ inhmã: —Nà kot kaj mẽ ixpyrà nẽ fikêhti kot tanhmã amnhĩ nhĩpêx to kaxyw Tĩrtũm mã ajamxpêr tỳx nẽ nhũm amã hprãm xà hkôt amã tanhmã hipêx to. Nom kêr ka mẽ ajamxpêr kati ho tee ri hkukamã ajamxpêr kêt nẽ. ãm kaxyw Tĩrtũm kôt ajamxpêr tỳx nẽ nhũm mẽ amã tanhmã mẽmoj nhĩpêx to. ãm hāmri na pa mẽ amã ja jarẽ. No ãm ja pix kêt. Kot kaj mẽ mãñnẽn hixêt mũj mã akapêr nẽ kãm: “E anhỹr xàta rũm akato nẽ ma tẽ nẽ gô rax kãm mrõ.” Anẽ nhũm amar xà hkôt ã amnhĩ nhĩpêx anẽ.

²²—Nẽ kot kaj mẽ mẽmoj tã Tĩrtũm wỳ nẽ kaxyw kãm ajamxpêr tỳx kãm hã awỳ nhũm amã mẽmoj prãm xwỳnhhta gõ. Anẽ.

Mẽhõ nhỹ hã Jejus kot mẽ ahkre hã harẽnh

Makre 11.27-33; Rukre 20.1-8

²³Nhũm arĩgro hõ hã nhũm Jejus kêwe axte Tĩrtũm mã amnhĩ jarẽnh xà hã ixkreja wỳr axà nẽ kamã mẽ ahkre ho nhỹ. Mẽ kãm tanhmã mẽ kot amnhĩ nhĩpêx to nẽ nhỹrmã Tĩrtũm mẽ wa kuri htĩr tũm nẽ pa kaxyw tanhmã mẽ kãm kapêr to ho nhỹ. Hāmri nhũm Ijaew krãhtũmjê mẽ mẽ õ patre krãhtũmjaja hāmri hwỳr mra nẽ hêx rom mẽmoj tã hkukja nẽ kãm: —Kwa mẽ inhmã amnhĩ jarẽ. Mẽhõ nhỹ hã na ka hte ã amnhĩ nhĩpêx anhỹr o apa? Na ka hte akupỹm mẽ ho mex o apa nẽ tanhmã mẽ ahkre hto ho apa. Xà amnhĩ krã hkôt na ka hte ã amnhĩ nhĩpêx anẽ nà? Anẽ.

²⁴Hāmri nhũm mẽ kãm: —Nà kot pa ixkumrêx mẽmoj tã mẽ akukja. Ka mẽ inhma nẽ tanhmã inhmã harẽnh to pa rĩ kormã mẽ amã amnhĩ jarẽ.

²⁵⁻²⁶Finat Juãw Paxis ã kot paj mẽ akukja. Mẽhõ nhỹ hã na pre hte mẽ hkrã kumrãr o pa? Xà amnhĩ krã hkôt nà? Xà Tĩrtũm nhỹ hã? E mẽ atõ inhmã ja jarẽ. Anẽ. Hāmri nhũm mẽ kuma nẽ tee ri kot tanhmã kutã kãm harẽnh to hkukamã hamxpêr pê axpẽn pumunh o kuhê nẽ axpẽn mã: —Kwa tanhmã kot puj wem kãm ja jarẽnh to? Or mẽ kot mar o kuhê xwỳnhjaja na htem kêp Tĩrtũm nhỹ hã kapêr jarẽnh xwỳnh ã harẽ. Tã kot puj mẽ kãm kot amnhĩ krã hkôt kot mẽ hkrã kumrãr ã harẽ nhũm mẽ tee ri mẽ pama nẽ mẽ pakamã

gryk tỳx nê. Nê mẽ paxêx rom ã mẽ pahte kãm pakapêr anhỹr ã mẽ pahpumu nê kên o mẽ pahtak o mẽ panhĩmex. No kot puj mẽ kãm Tĩrtũm nhỹ hã kot mẽ hkrã kumrãr ã harẽ hãmri nhũm mẽ pamã: “Kwa ã kot anhỹr kênã na ka prem kapêr ma nê hkôt ajamaxpêr kêt nê?” Anê. Jakamã kot puj mẽ ja pymaj tanhmã kãm harênh to hkêt nê. Kot puj mẽ ãm kãm aa te mẽ pahte ja jarênh mar kêt pyrãk o harẽ. Anê. Mẽ kot tanhmã Jejus mã nê nhũm kot ta pãnhã tanhmã mẽ kãm nê pymaj nhũm mẽ tee ri kãm tanhmã nê hprãm kaprỳ o kuhê.

²⁷Hãmri nê kãm: —Konên. Mẽ ixte mễhõ nhỹ hã kapêr o pa hã omunhre hã. Anê. Hãmri nhũm mẽ kuma nê mẽ kãm: —Tk. Tõe kot pa xep ijaxwỳja mẽ amã tanhmã amnhĩ jarênh to hkêt nê. Ijaxwỳja ixte mễhõ nhỹ hã ã ixte amnhĩ nhĩpêx anhỹr o ri ixpa hã amnhĩ pumunhre hã. Anê.

Mễhõ my mẽ hkra wa pijakrut ã wa harênh

Matêwre 7.21-23; Rukre 7.29-30

²⁸Hãmri nhũm Jejus axte Ijaew krãhtũmjê mẽ mẽ õ patre krãhtũmjê mã kapêr nê mẽmoj tã kuxi nê tanhmã mẽ kãm ujarênh to nê mẽ kãm: —E pa mẽ amã awjarẽ ka mẽ inhma. Koja mễhõ hkra my hamẽxkrut. Hãmri nê hkra kot waja mã tanhmã kapêr to nê kãm: “E kêr ka jarãhã ma tẽ nê inhmã pur kãm apê.” Anê.

²⁹Hãmri nhũm kuma nê pur mã htêm kaga nê hitõt nê. Tãã no ãm hã ahtũmre nê tanhmã hamaxpêr to hãmri nê ma hwỳr tẽ nê kamã àpênh o xa.

³⁰Hãmri nhũm wa hipêêxàja hpãnhã hkra kot hapu hwỳr tẽ nê mã kãm kapêr anê nê kãm: “E kêr ka ajaxwỳja atõ hkôt tẽ nê wa inhmã apê.” Anê nhũm kuma nê kãm: “Tõe. Nà kot paj ma tẽ.” Anhỹr tã no ãm hõta kĩnhã htêm kêt nê.

³¹—Jakamã e. Nhỹ hkra na pre hipêêxà kapêr ma nê hkôt amnhĩ nhĩpêx nê kapêr nhĩrõp ãm kêt nê? Xà kot waja nà? Xà kot haputa? E mẽ atõ tanhmã inhmã wa harênh to. Anê. Hãmri nhũm mẽ kuma nê kãm: —Nà kot wata. Kot wata na hitõt tã tanhmã hamaxpêr to nê ma tẽ nê kãm apê. Anê. Hãmri nhũm mẽ kãm: —Tỳ ãm hãmri na ka harẽ. No mẽ kajaja te mẽ ate hkra kot

haputa kot amnhĩ nhĩpêx pyræk. Mě ate Tĩrtũm kapěr kôt amnhĩ nhĩpêx o apa hã amnhĩ jarênh tã hkwỳm ri amnhĩ nhĩpêx o apa. Te mẽ ate kot hapu kot hipêêxà mã àpênh ã amnhĩ jarênh tã kãm àpênh kêêta pyræk. No kêt mẽ kot amnhĩ tomnuj o mẽ pa xwỳnh kwỳjaja na mẽ arom Tĩrtũm kapěr ma nẽ hkôt amnhĩ nhĩpêx. Jao ra tãm amnhĩ nhĩpêx o pa. Jakamã mẽ arom ma kaxkwa hwỳr pa kaxyw ra tãm nẽ. ãm hãmri na pa mẽ amã ixkapěr.

³²Na ka mẽ finat Juãw Paxis ã ixkukja. Juãw Paxisja na pre hte mẽ ate tãm amnhĩ nhĩpêx ã mẽ amã karõ ho pa. Tã no ka mẽ ãm ama nẽ ãm ama nẽ aa kapěr kôt amnhĩ nhĩpêx kêt nẽ. Nom mẽ kot amnhĩ tomnuj o mẽ pa xwỳnh kwỳjaja mẽ arom kuma nẽ Tĩrtũm kôt amnhĩ nhĩpêx. Ka mẽ ja hã mẽ omu nẽ ãm mẽ omu nẽ mẽ uræk nẽ ã amnhĩ nhĩpêx anhỹr kêt nẽ. Anẽ.

Mě àpênh punu xwỳnhjê jarênh

Makre 12.1-12; Rukre 20.9-18

³³Nhũm Jejus arĩ Ijaew krãhtũmjê mẽ mẽ õ patre krãhtũmjê mã kapěr. Nẽ mẽ kot tanhmã hipêx to hkukamã mẽ kãm tanhmã amnhĩ jarênh to. No ãm amnhĩ tã kuxi nẽ mẽ kãm awjarẽ nẽ mẽ kãm: —Koja mēhõ mẽ kot kãm pur kãm àpênh kaxyw hkwỳjê mã karõ nhũm mẽ ma hwỳr mra nẽ kamã mẽmo hy hkre nẽ hkre pa. Hãmri nhũm hpur nhõ dõn nhỹhỹm nojarêt nẽ kãm mẽ àpênh xwỳnhjê mã tanhmã hpur jarênh to nẽ mẽ kãm: “E or ixpur nõ. Kê kamã mẽmoj kà hpa ka mẽ mãmri kamã axujamỳnh pa nẽ ho axkjê. Nẽ ixkutêp inhmã inhõ jaxwỳ nẽ mãmri anhõ tanhmã ho hprãm xà hkôt tanhmã ho.” —Anhỹr o mẽ kãm kapěr hãmri nẽ ma nhỹhỹm mõ.

³⁴Tã nhũm ra pur kãm mẽmoj hkà pa nom nhũm hpur nhõ dõn arĩ krĩ hõ kamã hã ujahkre ho ri pa htã kuri kãm àpênh xwỳnhjê ho axkrunêpxi nẽ akupỹm mẽ hwỳr mẽ kurẽ. Mě kot mẽ kãm hkwỳ nhõr nhũm mẽ ma kot kãm o mõi kaxyw nhũm ma mẽ hwỳr mẽ kurẽ.

³⁵Nhũm mẽ ma hwỳr mõi. Mõi nẽ ra hwỳr pøj nhũm mẽ amnhĩ wỳr mẽ omu nẽ axtem nẽ mẽ homnuj nẽ. Nẽ mẽ unê nẽ ja tak nẽ ja pĩ nẽ hõja nhũm mẽ kên o htak hãmri nẽ amnhĩ nê wa hano nhũm wa ma akupỹm ÿ kamã mõi.

³⁶Hāmri nhūm mẽ õ patrāwja tee ri wa omu nẽ hamaxpēr o: “Kwa nà na mẽ ixpê inhmã mẽ àpênh xwỳnhjê homnuj tỳx nẽ. Nà kot paj axte mẽ hwỳr mẽ hkwyjê rẽ. Nom hpānhã mẽ ho ohtô nẽ mẽ kurẽ. Kê mẽ ohtô nẽ mẽ hwỳr mỗ nẽ tã inhmã inhõ hkwy jamỳ nẽ man ixwỳr o mỗ.” —Anhỳr o hamaxpēr hāmri nẽ mẽ hwỳr jajê rẽ nhūm mẽ ma akupỹm mẽ hwỳr mỗ. Nhūm mẽ amnhĩ wỳr mẽ ohtô hã nẽ mã mẽ ho anẽ nẽ mẽ hipêx kati nẽ nhūm mẽ ỹ kamã ma õ patrāwja wỳr akupỹm mỗ.

³⁷Hāmri nhūm tee ri mẽ omu nẽ hamaxpēr o: “Hêxta waa nẽ. Tanhmã kot paj amnhĩ nhĩpêx to? Nà kot paj pēr mẽ hwỳr ixkraja măn mẽ. Inhmã hapê htỳx tã kot paj mẽ hwỳr kumẽ kê ma mẽ hwỳr mỗ. Hāmri nhūm mẽ kêp ixkra hã omu nẽ tanhmã ixpê ho hkêt nẽ. Nẽ tã inhmã kãm inhõja kwỳ gõ.” Anẽ. —Hāmri nẽ mẽ hwỳr kumẽ nhūm ma mỗ.

³⁸Tã hāmri ra mẽ hwỳr hpôx o mỗ nhūm mẽ amỳm amnhĩ wỳr omu nẽ kêp hkra hã omu nẽ axtem nẽ hã axpên mã amỳnê nẽ axpên mã: “E oněj hpur nhõ dõn krata tẽ. Kojã nhỹrmã õ papaj mỳr pê amnhĩm hpur ã pykata pytã nẽ ho õ. Jakamã kwa pu mẽ hpĩr kurê kumrêx nẽ kêp hpur ho arík nẽ ho panhõ. E tokyj pu mẽ kupĩ ri.” Anẽ.

³⁹—Hāmri nhūm ra tẽ nẽ mẽ hwỳr pøj nhūm mẽ unê nẽ hpur nê ho kato nẽ mã ho anẽ nẽ kupĩ. ã mẽ ujarênh kot anhỳr. Anẽ.

⁴⁰Nhūm pre ã Jejus mẽ kãm ujarênh anẽ. Hāmri nẽ hã mẽ hkukja nẽ mẽ kãm: —E kojã pur nhõ dõnja hkra jarênh ma hāmri nẽ tãm mẽ hwỳr mỗ hāmri nẽ tanhmã mẽ hipêx to wehe? Anẽ.

⁴¹Hāmri nhūm mẽ kãm: —Nà kojã ma akupỹm mẽ hwỳr mỗ hāmri nẽ mẽ homnuj tỳx nẽ mẽ himex pa. Hāmri nẽ hpānhã nhãm hpur ã mẽmojjê rẽ nhūm mẽ tã katat kôt kãm àpênh o pa. Anẽ.

⁴²Hāmri nhūm Jejus mẽ kãm: —Tỳ ãm hāmri na ka ã mẽ harênh anẽ. Kot mẽ ho anhỳr mã tãm kênã. Măn ka prem ra Tĩrtũm kapēr ã kagà htũm kot tanhmã ja jarênh toja ma? Harênh kot: Mẽ kot kên o amnhĩm õrkwỹ nhĩpêx kaxyw nẽ kên maati pumu nẽ htỳx omnuj ã hkamnhĩx nẽ hkagata. Mẽ kot hkaga htã nhūm Tĩrtũm mẽ kurom mex o kot kên piitã hakrenh par ã omunh

kurê kumrêx. Tirtûm kot kên maati mex ã harênh xwÿnhhta mẽ pamã mex o mex. Æ Tirtûm kapêr ã kagà htûm kot ja jarênh kot anhÿr.

⁴³Ja pyrà nê na pre ra Tirtûm amnhĩ kaxyw mẽ apê Ijaew xunhwÿ. Mẽ apê hkra nê hkôt mẽ ate amnhĩ nhĩpêx kaxyw amnhĩ kaxyw mẽ axunhwÿ. Tã ka mẽ axtem nê hkaga. Te mẽ kot kên maati pumunh nê mex kêt ã hkamnhĩx nê hkagata pyræk. Jakamã koja mẽ apãnhã Ijaew kêt xwÿnh kwÿjê xunhwÿ nhũm mẽ arom hkôt amnhĩ nhĩpêx mex o pa. Jao ra mẽ kêp hkra nê. Anê.

⁴⁴Nhũm pre ã Jejus mẽ kãm te kêp kên maati pyræk o mẽ kãm amnhĩ jarênh anê. Hãmri nê axte amnhĩ tã kuxi nê mẽ kãm axte kên jarênh pyræk ã amnhĩ jarê nê mẽ kãm: —Nà kot kaj mẽ atõ ixkaga hãmri nê te mēhō htÿx htēm nê kên pumunh kêt nê hã htêk nê tēm pyræk o amnhĩ nhĩpêx. Jao ixkutã amnhĩ xãm. Rÿ ka tanhmã ajamaxpêr to nê ixkaga nhũm te kên maati kot anhĩpy tēm nê axôm par pyræk o anhĩpêx ka mẽ amex kêt kumrêx. Anê.

⁴⁵Nhũm pre ã mẽ kãm ujarênh kãm mẽ harênh anê. Hãmri nhũm patre krãhtûmjê mẽ Parijew nhõ xwÿnhjaja tee ri amnhĩ tã kuma

⁴⁶nhũm ja mẽ kêp omnuj tÿx jakamã nhũm mẽ kãm unênh nê haxàr prãm nê. No mẽ ãm amnhĩ tã kãm mẽ kot mar o kuhê xwÿnhjê puma nê. Mẽ kurom Jejus kêp Tirtûm nhÿ hã kapêr xwÿnh ã hkamnhĩx jakamã nhũm mẽ kãm mẽ uma nê. Hãmri nê kormã tanhmã ho hkêt nê.

Matêwre 22

Pahi kot hkra hprõ kaxyw hkwÿjê hwÿr ã harênh

Rukre 14.15-24; määnên Wam Korĩt 6.9-11; Epes 5.5-6; Apokarip 19.7-8

¹⁻²Tã nhũm Jejus axte mẽ kãm awjarê. Ijaew kot Tirtûm kaga hã mẽ kãm hã kuxi nê awjarê nê mẽ kãm: —E pa mẽ amã ahpÿnhã mẽ kot Tirtûm kapêr mar nê tanhmã amnhĩ nhĩpêx to xwÿnhjê jarê ka mẽ inhma. Te mẽ kot pahihtti kot hkra hprõ kaxyw nhũm kot amnhĩ wÿr hkwÿjê hwÿr nhũm mẽ kot harênh mar nê ahpÿnhã tanhmã amnhĩ nhĩpêx to xwÿnhjaja kot amnhĩ nhĩpêx pyræk. Koja pahihttija hkra hã hkĩnh nê hã apkur mex kaxyw amnhĩ wÿr hkwÿjê hã karõ.

³Hāmri nhūm kām mẽ àpênh xwỳnhjaja ra kot amnhĩ wỳr mẽ hã karõ xwỳnhjê hwỳr mra nẽ mẽ kām nojarêh nhūm mẽ kuma nẽ ãm mẽ kuma nẽ axtem nẽ mẽ kêp hitõt nẽ. Hāmri nhūm mẽ tee ri mẽ kuma nẽ akupỹm tẽ nẽ pahшти mã mẽ harẽ.

⁴—Hāmri nhūm tee ri amnhĩ tã mẽ harênh ma nẽ hpãnhã mẽ hwỳr axtem kām àpênh xwỳnh kwỳjê rẽ nhūm mẽ ma mẽ hwỳr mra nẽ mẽ kām: “Pa. E kwa mẽ tokyx. Na ra pahшти mẽ akutêp mẽõ nhĩpêx pa. Na mẽ môx kwỳ hpa nẽ ho àr mex nẽ. Nẽ mẽ akutêp mẽmoj nhĩpêx par jakamã e kwa mẽ tokyx nà.” Anẽ.

⁵ã mẽ kām kapêr anhỳr tã nhūm mẽ kuma nẽ ãm mẽ kuma nẽ ma ahpỹnhã nhỹhỹm mra. Nhūm ja ma àpênh mã mra nhūm ja ma ihpur kām àpênh mã ma tẽ nhūm ja ma nhỹhỹm mẽmo to wênê ho tẽ.

⁶Nhūm mẽ hkwỳjaja mẽ kām ujarênh xwỳnhjê pynê nẽ mẽ htak o mẽ kupa.

⁷—Hāmri nhūm pahштиja mẽ harênh ma nẽ àhkurê nẽ. Hāmri nẽ mẽ hwỳr pôristi hkwỳ rẽ nhūm mẽ ma mẽ hwỳr mra nẽ mẽ unê nẽ mẽ kupa nẽ mẽ õ krĩ hã hpôk pa.

⁸Hāmri nhūm pahшти kām mẽ àpênh xwỳnh kwỳjê mã kām: “Kwa ra ixte mẽ kutêp mẽõ mex kwỳ xunhwỳr tã nhūm mẽ ixwỳr mrar kêt nẽ. Ixtỳx ho mẽ mex ã mẽ hkamnhĩx nẽ amnhĩ wỳr mẽ hã karõ no mẽ mex kêt. Mẽ kot mẽ ixkutã apkur mã tãm kêt.

⁹E kwa mẽ ma krĩ hkôt axtem mẽ hkwỳjê japêr o mra. Nẽ nhỹri mẽhõ pumu nẽ kām awjarê kê man ixwỳr tẽ nẽ ixkra hã hkĩnh nẽ mẽ ixkutã apku. Mẽ ã mẽ kām axujarênh o amrar anẽ.” Anẽ.

¹⁰—Hāmri nhūm mẽ kuma nẽ ma mẽ hapêr o mra nẽ mẽ piitã mẽ kām anhỳr o mra. Nhūm mẽ kuma nẽ wam tajê rom ma mẽ hkôt mrar kurê kumrêx. Mẽ kot amnhĩ to mex xwỳnhjaja nẽ mẽ kot amnhĩ tomnuj xwỳnhjaja hāmri piitã ma mẽ hkôt mra. Hāmri nẽ ixkreja wỳr mra nẽ hwỳr gjêx kaxyw nhūm mẽ kām mẽ ê mex gõ nhūm mẽ haghê hāmri nẽ kormã mẽ apkur xà hã ixkre hwỳr agjê nẽ ho nỳt pa.

11Hāmri nhūm pahihtija mẽ hwỳr axà nẽ mẽ piitã mẽ omu. Nhūm ja pixi nẽ axtem nẽ hkwyjê hkĩnhã mẽ kot kãm ê mex nhõrja jaxàr kêt rãhã axà nẽ apkur o nhỹ.

12Hāmri nhūm tee ri ja hã omu nẽ hwỳr tẽ nẽ kãm: “Pa. Tk. Kwa na htem ixkrem gjêx kaxyw nẽ mẽ kot mẽ kãm mẽ ê mex nhõr jagjê nẽ rĩ kormã hwỳr agjê nẽ apku. Tã mon ka akwyjê hkĩnhã haxàr kaga? Kwa na htem ã amnhĩ nhĩpêx anhỹr kêt nẽ.” Anhỹr o kãm kapêr nom nhūm kuma nẽ ãm kuma nẽ tanhmã kutã kãm nẽ hkêt nẽ. ãm htỳx apkur o nhỹ.

13Jakamã nhūm tee ri omu hāmri nẽ hã mẽ kot kãm àpênh xwỳnhjê mã amỹnê nẽ mẽ kãm: “E mẽ hwỳr tẽ nẽ unê nẽ hpa nẽ hte hpre nẽ ma o tẽ nẽ kamàt kô kamã amẽ. Kê tee ri mur nẽ amnhĩ xà htỳx kamã hamak o amnhĩ nham o axpên kamnhar tỳx kaprỳ ho nõ nẽ rĩ amnhĩ pumu.” Anẽ. Hāmri nhūm mẽ kuma nẽ kãm ho anẽ. ã mẽ ujarênh kot anhỹr. Anẽ.

14Nhūm pre Jejus ã mẽ kãm ujarênh anẽ hāmri nẽ mẽ kãm: —Nà Tĩrtũm kot pahihtita pyrà nẽ amnhĩ wỳr mẽ ho ohtô nẽ mẽ hwỳr tã na hte mẽ piitã hkôt amnhĩ xunhwỳr kêt nẽ. Jakamã na hte ãm mẽ ho grêre nẽ amnhĩ wỳr mẽ ho api. Anẽ.

Parijew nhõ xwỳnh kot Jejus kamã hamak ã mẽ harênh

Makre 12.13-17; Rukre 20.20-26; mãänên Römän 12.1; 13.7

15-16Tã nhūm Parijew nhõ xwỳnhjaja ã Jejus kot mẽ kãm ujarênh anhỹrja ma hāmri nẽ kurũm kato nẽ tanhmã hkukamã axpên mã hã àmnênh to. Hāmri nẽ hwỳr mẽ hkwyjê mẽ Erox kôt mẽ pa xwỳnh kwỳjê rẽ. Hêx rom mẽ kot mẽmoj tã hkukjêr kaxyw hwỳr mẽ kurẽ nhūm mẽ ma hwỳr mra nẽ omu nẽ kãm: —Kwa Jejus. Nà ãm hāmri na ka hte Tĩrtũm kapêr o mẽ ahkre mex o ri apa nẽ mẽ kamã akahak o apa hkêt nẽ. Mẽ kot tanhmã ato kapêr punuj to htã ka aprĩ hã mẽ ahkre mex o ri apa.

17E kwa mẽ inhmã mẽmoj jarẽ. Rõm nhõ pahihtu kot mẽ pahpê Ijaew mẽ pahte kãm kàxpore hkwy nhõr ã mẽ pamã karõta. Kwa xà ja amã mex nà? Xà kot pu mẽ kãm hkwy gõ? Nà xà kot pu mẽ kãm õr kêt nẽ? E kwa mẽ inhmã tanhmã ja jarênh to. Anẽ.

¹⁸Nhũm prem ã hêx rom àhkukjêr anhÿr tã no nhũm ra mẽ hamaxpêr ã mẽ omu nê mẽ kãm: —Tk. Kwa mon ka mẽ ã axêx rom ja hã ixkukjêr anê?

¹⁹⁻²⁰E mẽ atõ inhmã kàxpore htÿxre hõ gõ pa omu. Anê. Hãmri nhũm mẽ kãm ja gõ nhũm kupy nê kànhmã mẽ kãm kupê nê mẽ kãm: —E mẽhõ nhĩxi nê mẽhõ karõ na ja hã? Anê.

²¹Hãmri nhũm mẽ kãm: —Pahi Sesti karõ nê hixi na hã. Anê. Hãmri nhũm mẽ kuma nê mẽ kãm: —Tÿ. Tô kêr ka mẽ mãmri kãm hkwÿ nhõr o apa. Hã hkarõ nê hã hixi. Tãm kot hipêx xwÿnh jakamã õ na. No mẽ kajaja na pre Tĩrtũm mẽ anhĩpêx nhũm mẽ apê õ jakamã kwa kêr ka mẽ kapêr kôt pix mã ri amnhĩ nhĩpêx o ri apa. Anê.

²²Hãmri nhũm mẽ amnhĩ jaêr pê ã kot kàxpore jarênh anhÿrja ma nê axte kãm tanhmã nê hkêr nê. Hãmri nê akryk omu hãmri nê ma akupÿm mra.

Akupÿm mẽ htĩr ã mẽ harênh

Makre 12.18-27; Rukre 20.27-40; Juãw 5.21; 6.39-40; mãänên Wam Korĩt 6.14; 15.12-28; Wam Tesarõn 4.13-18

²³Tã nhũm Satusew nhõ xwÿnh kwÿjaja mẽ kot akupÿm mẽ htĩr kêt ã mẽ hkamnhĩx kêt xwÿnhjaja na pre mẽ. Na pre htem mẽ htyk nê mẽ hapêx kumrêx ã mẽ hkamnhĩx jakamã axpên mã tanhmã Jejus jarênh to nê axpên mã: —E kwa pu mẽ hwÿr mra nê mẽmoj xihtÿx ã hkukja. Kê mẽ pama nê tee ri tanhmã mẽ pamã kapêr to hkukamã hamaxpêr kaprÿ. Kê mẽ piitã ja hã omu nê àhpumunh kêt ã omunh kurê kumrêx. E tokyx pu mẽ hwÿr. Anhÿr jakamã Parijew nhõ xwÿnhjê pyrã nê hêx rom ma hwÿr mra nê hkukja nê kãm:

²⁴—Pa Jejus? Kwa mẽ inhmã mẽmoj jarê. Na pre finat Mojesja Tĩrtũm nhÿ hã ã mẽ panhĩgêjtjê mã karõ anê. Mẽ hkra hkêr rãhã mẽ pa nê mẽ htyk xwÿnhjaja nhũm mẽ harênh o: Koja mẽhõ hprõ nê kamã hkra hkêr rãhã pan ty. Hã koja hkôt htõja hpãnhã hprõ ho hprõ nê kamã hkra. Hãmri nhũm kato nê te kêp htõ htyk xwÿnhhta hkra pyrãk. Anê. ã na pre Mojesja Tĩrtũm nhÿ hã mẽ kãm karõ anê.

²⁵Jakamã kwa ga mẽ ixujarēnh ma. Koja mẽ kot axpēn to htõ xwỳnhjaja kēp 7. Nhũm kot waja hãmri hprõ nē wa pa nhũm kamã hkra hkêt rãhã ty. Nhũm hkõt htõja hpãnhã ho hprõ

²⁶nē wa axpēn to pa. Nhũm mãânēn kamã hkra hkêt rãhã ty. Nhũm htõ hõta haxwỳja hpãnhã tãm o hprõ nē we wa axpēn to pa grire nhũm haxwỳja kamã hkra hkêt rãhã ty. Hãmri nhũm htõ hkwyjaja ni pyxi nē axpēn pãnhã ho hprõ hpa no mēhõ kamã hkra hkêt rãhã htyk pa.

²⁷Hãmri nhũm mẽ hprõta mẽ hkõt amnhĩ to hitep nē ty.

²⁸Tã Tĩrtũm kot akupỹm nhỹrmã mẽ ho htĩr ronhỹx nhỹ nhỹx kēp nija mjēn kumrēx? Ra piitã kot ho hprõ kēnã. E mẽ inhmã ja jarē. Anē.

²⁹⁻³⁰Hãmri nhũm Jejus mẽ kuma nē mẽ kãm: —Nà kaxkwa kamã mẽ kot amnhĩ nhĩpēxja axtem na. Mẽ htĩr ri mẽ kot Tĩrtũm kõt amnhĩ xunhwỳr xwỳnhjaja na htem ty hãmri nē Tĩrtũm nhõ krĩ kamã axte kãm hprõ hprãm kêt nē pa. Jakamã hprõ hkêt nē pa. Rỳ ni japēr nē mjēn kêt nē pa. Nom ri kãm mjēn rỳ hprõ hprãm kêt nē pa. Hãmri nē Tĩrtũm kapēr o mẽ wrỳk xwỳnhjē pyrã nē axte htyk kêt nē. Ām htĩr tũm rãhã nē pa ho pa. Pēr mẽ ate Tĩrtũm kapēr ã kagà htũm mar mex kêt jakamã na ka mẽ ã ja hã ixkukjēr anē. Tĩrtũm àhpumunh tỳx o àhpumunh tỳx jakamã kumã mẽ ate mēmoj tã ixkukjēr xwỳnhta na tanhmã kēp kute hkêt. Ra ja kukamã àhpumunh tỳx kēnã.

³¹⁻³²—Nom mẽ ate akupỹm mẽ htĩr kêt ã mẽ hkamnhĩxja kot paj ixprĩ hã mẽ amã harē. Amnepēm na pre Tĩrtũm pĩ hpõkja kamã tanhmã Mojes mã kapēr to. Mãn ra mẽ ate mar. Na pre kãm: Ixpē Apraãw nhõ Tĩrtũm na pa. Nē mãânēn ixpē Apraãw kra Ijak mẽ htãmnhwỳ Jako wa õ Tĩrtũm na pa. Anhỹr o Mojes mã amnhĩ jarē nhũm kuma nē hã kagà. Kēp apu arĩ mẽ htyk rãhã nhỹx pre ã mẽ harēnh anhỹr kêt nē. Nhỹx pre mẽ harēnh o: “Amnepēm Apraãw nē hkra nē htãmnhwỳ mẽ htĩr ri ixpē mẽ õ Tĩrtũm na pa pre.” Anhỹr o nhỹx pre mẽ harē. Nom na pre ã amnhĩ jarēnh anhỹr kêt nē. Mẽ pamã te Apraãwja mẽ htyk nē mẽ hapēx pyræk. Nom nhũm prem ra Tĩrtũm ri ra

akupÿm htír nê mex nê pa ho pa. Tã ka htem Tirtũm kapêr kwÿm ri akupÿm mê htír kêt ã mê harênh o apa. Anhÿr o Satusew nhõ xwÿnhjê mã kapêr.

33Hãmri nhũm mê kot mar o kuhê xwÿnhjaja amnhĩ jaêr pê kot mê ahkreja ma.

Tirtũm kapêr maati jarênh

Matêwre 10.37; Makre 12.28-34; Rukre 10.25-28; mãânên Wam Juãw 5.3

34Tã nhũm Parijew nhõ xwÿnhjaja Satusew nhõ xwÿnhjê jarênh ma. Mê kot tee ri kãm hamaxpêr o Jejus jakrenh prãm kaprÿ hã mê harênhja ma hãmri nê axpên wÿr akuprõ nê Jejus wÿr mra. Kot mê uràk nê hêx rom àhkukjêr nê hamaxpêr o hakrenh kaxyw hwÿr mra.

35Hõja kêp Tirtũm kapêr tũm o mê ahkre o mê pa xwÿnh jakamã hêx rom kamã hamak kaxyw kãm kapêr nê kãm:

36—Kwa Jejus. Ot pa mê awÿr mra. Kwa mê inhmã mẽmoj jarê. Na pre Tirtũm ahpÿnhã mẽmoj to 10 nê hã mê pamã karõ. Mê pahte hkôt amnhĩ nhĩpêx kaxyw hã mê pamã karõ. Tã nhÿ kapêr na mex o kot hkwÿ jakrenh wehe? Anê.

37Hãmri nhũm kuma nê mê kãm: —Nà kot mê pamã hã karõ kot: Kêr ka mê anhĩ piitã ho amã Tirtũm kĩnh tÿx o apa. Mê amã hkĩnh tÿx o mẽmoj piitã hakrenh par o apa.

38E Tirtũm kot mê pamã hã karõ ja na mex o piitã hakrenh par.

39Nê hkôt ja: Kêr ka mê amã akwÿjê hã ma ho te ka amã amnhĩ tã ma pyràk. Jao ra tãm mê hipêx.

40ã Tirtũm kapêr ã kagà htũm kot mê pamã hã karõ kot anhÿr. ã mê pahte amnhĩ nhĩpêx anhÿr o papaja na Tirtũm kãm hprãm tÿx kumrêx. Kot kaj mê ja wa hkôt amnhĩ nhĩpêx rãhã ho ri apa nê mãânên ra Tirtũm kot mê pamã mẽmoj tã karõ xwÿnh piitã hkôt amnhĩ nhĩpêx. Ja na pre Mojes mê Tirtũm nhÿ hã kapêr xwÿnhjaja amnepêm Tirtũm nhÿ hã mê panhĩgêjtê mã hã karõ ho pa. Anê.

Jejus kot amnhĩ tã mê hkukjêr ã harênh

Makre 12.35-37; Rukre 20.41-44; mãânên Rõmãn 1.3-4

⁴¹Nhũm Parijew nhõ xwỳnhjaja arĩ Jejus mar o kuhê nhũm amnhĩ tã tanhmã mẽ hkukjêr to. Nom te nhãm mēhõ hã mẽ hkukjêr pyræk o mẽ hkukja nẽ mẽ kãm:

⁴²—E mẽ inhmã mẽmoj jarẽ. Tanhmã na ka htem axpẽn mã Tĩrtũm kot mẽ akaxyw ãm mã xwỳnhhta jarẽnh to? Kêp mẽhõ kanrêhã htàmnhwỳ koja wehe? Anẽ. Hãmri nhũm mẽ kãm: —Nà koja kato nẽ kêp pahi finat Tawi kanrêhã htàmnhwỳ koja.

⁴³Anẽ nhũm Jejus mẽ kuma nẽ mẽ kãm: —Tỳ. ãm hãmri na ka mẽ harẽ. No mo na htem axpẽn mã kêp pahi Tawi hkanrêhã htàmnhwỳ pix ã harẽ nẽ mããnẽn kêp õ pahihti hã harẽnh kêt nẽ? Tawi na pre Tĩrtũm Karõ nhỹ hã tanhmã harẽnh to nẽ harẽnh o:

⁴⁴Na pre Tĩrtũm inhõ Pahihti mã ã kapêr anẽ nẽ kãm: “E amnẽ ixwỳr tẽ nẽ inhĩhkô hã nhỹ nẽ inhmã mẽ ho amnhĩptàr o akrĩ. Kot paj mẽ kot kãm akurê xwỳnh piitã mẽ unênh pa nẽ awỳr mẽ o mra nẽ anhĩhkram mẽ haxàr pa.” Anhỹr o pre kãm kapêr.

⁴⁵ã Tawija Tĩrtũm kot Kris mã kapêr jarẽnh nẽ kêp õ pahi hã kagà anẽ. Mẽ kajaja na ka htem ãm kêp Tawi tàmnhwỳ pix ã axpẽn mã harẽnh o ri apa. No kêt Tawija na pre kêp õ Pahihti hã harẽnh o pa. Anẽ.

⁴⁶Hãmri nhũm mẽ kuma nẽ tee ri kot tanhmã kutã kãm kapêr to hkukamã hamaxpêr nẽ axte mẽmoj tã hkukjêr kêt nẽ. Tanhmã kot mẽ amnhĩ to nẽ hamaxpêr o hakre? Na prem tee ri kãm hamaxpêr o hakrenh prãm kaprỳ. Jejus mẽmoj piitã hkukamã àhpumunh tỳx o àhpumunh tỳx.

Matêwre 23

Jejus kot tanhmã Parijew nhõ xwỳnhjê jarẽnh to

Makre 12.38-40; Rukre 11.43-46; 20.45-47

¹Tã nhũm Jejus mẽ ixte hkôt ixpa ho ixpa xwỳnhjê mẽ mẽ kot mar o kuhê xwỳnhjê mã kapêr nẽ mẽ inhmã tanhmã Parijew nhõ xwỳnh mẽ Mojes kapêr o mẽ ahkre xwỳnhjê jarẽnh to nẽ mẽ inhmã:

²—Nà Parijew nhõ xwỳnh mẽ Tĩrtũm kapẽr tũm o mẽ ahkre xwỳnhjaja na htem hprĩ hã Tĩrtũm kapẽr ã kagà htũm mar mex nẽ.

³Jakamã kêr ka mẽ mar tỳx nẽ mẽ kot ho mẽ ajahkre kôt amnhĩ nhĩpêx. No mẽ kot amnhĩ nhĩpêxja kêr ka mẽ hkôt amnhĩ nhĩpêx kêt nẽ. Mẽ kot Tĩrtũm kapẽr tũm o mẽ ajahkre htã hkôt amnhĩ nhĩpêx kêt nẽ.

⁴Te mẽ kot mẽhõ kot mẽ katut ã mẽ kãm mẽ jênh pytĩ janhôr tã no ãm mẽ kuxwar hkwỳ htur kêt kot amnhĩ nhĩpêx pyràk o na htem amnhĩ nhĩpêx o pa. Jao mẽ amã mẽmoj tã karõ nẽ mẽ amã: “E kêr ka mẽ ã amnhĩ nhĩpêx anẽ nẽ ã amnhĩ nhĩpêx anẽ.” Anhỹr pix o mẽ amã kapẽr o pa. Nom mẽ tãmjaja amnhĩ kapẽr kôt amnhĩ nhĩpêx kêt nẽ.

⁵—Na htem hkwỳjê kot mẽ omunh nẽ mẽ kot amnhĩ to mex ã mẽ harênh kaxyw mẽ noo mã tanhmã amnhĩ nhĩpêx to. Nẽ mẽ mẽ noo mã mẽ ê mex pix kãm pa. Nẽ amnhĩm Tĩrtũm kapẽr ã kagà htũm kwỳ hã kagà nẽ amnhĩ nhõkrã hã hanhõ nẽ amnhĩ pa hã hanhõ nẽ hã pa. Mẽ kot hã nohtỳx rãhã hã mẽ hkamnhĩx kaxyw nhũm htem ã amnhĩ nhĩpêx anhỹr o pa. Nẽ mẽ kãm mẽ piitã mẽ kot amnhĩm mẽ rũnh ã mẽ harênh o paja nhũm htem kãm hprãm.

⁶—Nẽ mẽ pahpê Ijaewjê nhõ Tĩrtũm kapẽr o mẽ ahkre xà hã ixkre kamã mẽ kot amnhĩ to rũnh xwỳnhjê hkrĩ xà mex pix kamã kãm hkrĩ hprãm. Nẽ mẽmoj tã mẽ apkur xà mex ã arĩgro hã nhũm htem ma mẽ apkur xà hã ixkre hwỳr akuprõ nhũm mẽ kot amnhĩ to rũnh xwỳnhjê hkrĩ xà mex pix kamã kãm hkrĩ hprãm.

⁷Nẽ nhỹri pry hã mra nhũm mẽ kot mẽ omunh nẽ mẽ kêp mẽ ahkre xwỳnh maati hã mẽ hã hpijaàm kãm tanhmã mẽ kãm kapẽr mex toja nhũm htem kãm hprãm. ã na hte Parijew nhõ xwỳnh mẽ Tĩrtũm kapẽr tũm o mẽ ajahkre xwỳnhjaja hêx rom mẽ anoo mã amnhĩ nhĩpêx anhỹr o pa.

⁸⁻¹⁰—No mẽ kajaja. Kêr ka mẽ ho mẽ uràk kêt nẽ. Kê mẽ axpẽn mã mẽ ajarênh o: “Pahi Maati” anhỹr o mẽ ajarênh kêt nẽ. Rỳ mẽ ajarênh o: “mẽ ijahkre xwỳnh maati” anhỹr o axpẽn mã mẽ ajarênh hkêt nẽ. Kêt paxipix na pre Tĩrtũm mẽ akaxyw ixãm jakamã paxipix na ixpê mẽ anhõ Pahi Maati.

Ně paxipix na ixpê mẽ ajahkre xwỳnh maati. No mẽ kajaja ixkôt mẽ apê axpẽn to atõx nẽ atõ na ka mẽ. —Ně kêr ka mẽ ri axpẽn jarẽnh o: “Měpahpãm” anhỳr kêt nẽ. Kêk kaxkwa kamã na Měpahpãmja.

11-12—Ně kot ka mẽ amnhĩ to rax prãm xàj tanhmã amnhĩ to jarkrar to ho apa htã no nhũm akwỳjaja ama nẽ ãm ama nẽ akôt hamaxpěr kêt nẽ. No kot kaj mẽ piitã mẽ kutã tanhmã anojarêt to ho apa nhũm mẽ amnhĩ tã mẽ apumu nẽ axpẽn mã mẽ amex ã mẽ ajarẽ. Jakamã kot kaj mẽ amã mẽ piitã mẽ kot mẽ amex ã mẽ ajarẽnh prãm hãmri nẽ ri mẽ piitã mẽ kãm tanhmã amnhĩ nhĩpêx to pê mẽ kutã anojarêt rãhã ho ri apa. Anẽ.

Jejus kot mẽ hkwỳjê mã kapěr tỳx ã harẽnh

Makre 12.40; Rukre 11.39-52; 20.45-47

13-14Tã nhũm Jejus hpãnhã Parijew nhõ xwỳnh mẽ Tĩrtũm kapěr tũm o mẽ ahkre ho mẽ pa xwỳnhjê mã kapěr. Nẽ mẽ kãm kapěr kãm hihtỳx nẽ mẽ kãm: —E mẽ apê Parijew nhõ xwỳnh mẽ Tĩrtũm kapěr tũm o mẽ ahkre xwỳnhjaja. E mẽ inhma. Kot kaj mẽ amex kêt nẽ. Mẽ apê mẽ no kupyx xwỳnh na ka mẽ. Nẽ mẽ amã Tĩrtũm kôt amnhĩ nhĩpêx prãm kêk. Nẽ nhỹrmã atyk nẽ mẽ amã õ krĩ hwỳr axàpir prãm kêk. Nẽ akwỳjaja kot hwỳr àpir pymaj na ka htem akwỳjê nẽ tanhmã mẽ kãm axêx to ho apa. Mẽ kot mẽ apyrà nẽ Tĩrtũm kapěr kwỳm amnhĩ nhĩpêx prãm xàj na ka htem amnhĩ mẽ tanhmã mẽ kãm axêx to ho ri apa. Jao te mẽ ate mẽ kêp Tĩrtũm nhõ krĩ hwỳr kahêxà kahê htỳx pyræk o apa.

15—Ně mẽ akwỳjaja kot mẽ akôt amnhĩ xunhwỳr nẽ mẽ akôt amnhĩ nhĩpêx prãm xàj na ka htem ma awry hã nhỹhỹm tanhmã mẽ kãm ri axujarẽnh to ho ri apa. Jakamã nhũm mễhõ mẽ ama nẽ mẽ akôt amnhĩ xãm hãmri nẽ ra amnhĩ tomnuj tỳx o mẽ ajakre. Jakamã koja mẽ nhỹrmã mẽ apyrà nẽ ma mẽ kot amnhĩ xà htỳx kamã hamak tũm xàta wỳr pa. Jakamã kwa mẽ o kora. Kot kaj mẽ amex kêt nẽ.

16—Hêxta waa nẽ. Mẽ apê Parijew nhõ xwỳnhjê mẽ mẽ apê Tĩrtũm kapěr tũm o mẽ ahkre xwỳnhjaja kot kaj mẽ amex kêk kumrêx. Na ka htem mẽ kêp mẽ hikàxpore jamỳnh prãm xàj atỳx ri tanhmã mẽ ahkre hto ho apa nẽ mẽ kãm: “Kot kaj mẽ ãm hãmri mẽmoj tã amnhĩ jarẽnh kaxyw hãmri nẽ

Tĩrtũm mã amnhĩ jarẽnh xà hã ixkre nhĩxi jarẽnh kôt mẽhõ mã amnhĩ jarẽ nhũm ama nẽ hamaxpẽr o: ‘Ko. Apu ãm hãmri na inhmã amnhĩ jarẽ rỳ ko na apu ãm amnhĩ to hêx.’ Anhỹr o hamaxpẽr. Nom kot kaj mẽ ixkreta ho mex kaxyw mẽ kãm kàxpore hkwỳ gõ hãmri nẽ ate mẽ kãm õr xàta jarẽnh kôt ãm hãmri mẽmoj tã mẽhõ mã amnhĩ jarẽ. Hãmri nhũm ama nẽ hamaxpẽr o: ‘Nà ãm hãmri na ã inhmã amnhĩ jarẽnh anẽ. Kot ixkre ho mex kaxyw kàxpore hkwỳ nhõr kôt ã amnhĩ jarẽnh anẽ. Jakamã na amnhĩ to hêx kêt nẽ.’” Anhỹr o hamaxpẽr. Na ka htem ã mẽ ahkre ho apa anẽ.

¹⁷Nom mẽ ate mẽ ahkreta mex kêt. Pẽr mẽ ajamaxpẽr mexti hã. Tĩrtũm mã amnhĩ jarẽnh xà hã ixkreta mex o ixkre ho mex kaxyw kàxpore nhõrta jakrenh. Tã ka htem axtem nẽ mẽ kot kãm kàxpore nhõrta mex o ixkre jakrenh ã harẽ. No mẽ pahte ãm hãmri mẽmoj tã amnhĩ jarẽnh nẽ aa paxêx kêt rãhã ho papaja na Tĩrtũm kãm hprãm.

¹⁸—Nẽ na ka htem mẽ kêp mẽ hikukrêx jamýnh prãm xàj ã atỳx ri mẽ ahkre anẽ nẽ mẽ kãm: “Kot kaj mẽ ãm hãmri mẽmoj tã amnhĩ jarẽnh kaxyw nẽ Tĩrtũm mã mẽmoj nhõr xà hã mêtija jarẽnh kôt mẽhõ mã tanhmã amnhĩ jarẽnh to. Hãmri nhũm mẽ ama nẽ hamaxpẽr o: ‘Nà ãm hãmri na inhmã amnhĩ jarẽ rỳ ko na apu ãm inhmã amnhĩ to hêx.’ Anhỹr o hamaxpẽr. Nom kot kaj mẽ Tĩrtũm mã mẽmoj nhõr xà hã mêtija ã kãm mẽmoj xi. Hãmri nẽ ra mẽ ate kãm õr xàta jarẽnh kôt ãm hãmri mẽmoj tã mẽhõ mã amnhĩ jarẽ. Hãmri nhũm ama nẽ hamaxpẽr o: ‘Nà ãm hãmri na ã inhmã amnhĩ jarẽnh anẽ. Kot Tĩrtũm mã mẽmoj nhõr ã amnhĩ jarẽnh kôt kot amnhĩ jarẽnh anhỹr jakamã na amnhĩ to hêx kêt nẽ.’ Anhỹr o hamaxpẽr.” Anẽ. Na ka htem ã mẽ ahkre anẽ.

¹⁹Mẽ ajamaxpẽr kêt xwýnh na ka mẽ. Tĩrtũm mã mẽmoj nhõr xà hã mêtija na mex o mẽ kot hã kãm mẽmoj nhõrta jakrenh. Tã na ka htem axtem nẽ mẽ kot hã kãm mẽmoj nhõrta mex o mêtija jakrenh ã harẽ.

²⁰Nom Tĩrtũm mã mêtija mẽ mẽ kot hã kãm mẽmoj nhõrta te kot axpẽn pyrãk jakamã kot kaj mẽ mêtija jarẽnh kôt mẽmoj tã amnhĩ jarẽ nẽ mããnẽn mẽ ate hã Tĩrtũm mã mẽmoj xirja jarẽnh kôt amnhĩ jarẽ. Hamẽ wa kot axpẽn

pyràk jakamã hamẽ wa harẽnh pê amnhĩ to axêx kêt nẽ. Jakamã kêr ka mẽ mẽmoj tã amnhĩ jarẽnh kaxyw nẽ hamẽ wa harẽnh kôt ãm hãmri mẽmoj tã amnhĩ jarẽ nẽ ho axêx kêt nẽ.

²¹Tã kot kaj mẽ ãm hãmri amnhĩ jarẽnh ã mẽmoj tã amnhĩ jarẽnh kaxyw nẽ Tĩrtũm mã amnhĩ jarẽnh xà hã ixkre hkôt hã amnhĩ jarẽ nẽ mããnẽn Tĩrtũm kêp ixkre hpãm kôt hã amnhĩ jarẽ. Jakamã kêr ka mẽ hamẽ wa harẽnh pê amnhĩ to axêx kêt nẽ.

²²—Nẽ kot kaj mẽ ãm hãmri amnhĩ jarẽnh ã mẽmoj tã amnhĩ jarẽnh kaxyw nẽ kaxkwa jarẽnh kôt amnhĩ jarẽnhja o mããnẽn kaxyw kaxkwa kamã Tĩrtũm krĩ xà maati hkôt amnhĩ jarẽ. Nẽ mããnẽn Tĩrtũm kôt amnhĩ jarẽ. Jakamã kwa hamẽ wa harẽnh pê amnhĩ to axêx kêt nẽ.

²³—Hêxta waa nẽ. Mẽ apê Parijew nhõ xwỳnh mẽ mẽ apê Tĩrtũm kapêr tũm o mẽ ahkre xwỳnhjaja kot kaj mẽ amex kêt nẽ. Mẽ ate mẽ no kupyw xwỳnh na ka mẽ. Na ka htem Tĩrtũm kapêr piitã hkôt amnhĩ nhĩpêx kêt nẽ ãm hkwy kôt pix mã amnhĩ nhĩpêx o ri apa. Na ka htem ãm kapêr o hpỳnhre nẽ hkôt amnhĩ nhĩpêx ã amnhĩ pumu nẽ ate amnhĩ to mex xwỳnh ã amnhĩ jarẽnh o apa. No Tĩrtũm kãm hprãm xà piitã hkôt amnhĩ nhĩpêx kêt nẽ. Mẽ ate tãm mẽ hipêx nẽ mẽ ho mex nẽ mẽ kamã axukapĩ hã kot mẽ amã karõja. Nẽ mẽ amã Tĩrtũm kĩnh ã kapêr kôt amnhĩ nhĩpêx hã karõja ra mẽ ate mar tã hkôt amnhĩ nhĩpêx kêt nẽ. Mẽ ate kapêr piitã hkôt amnhĩ nhĩpêx ronhỹx ja mẽ amã mex o mex.

²⁴Mẽ ate ãm kapêr o hpỳnh nẽ hkôt amnhĩ nhĩpêx jakamã te mẽ ate atỳx ri tanhmã axàpkur to ho mẽ akrĩ pyràk. Jao te mẽ axàpkur xà hã mẽõ kamã pure pumunh nẽ nê hanhir nẽ rẽnh tã mããnẽn kamã kẽn rax pumunh tã nê hanhir nẽ rẽnh kêt rãhã hkur pyràk. Jao Tĩrtũm kapêr o hpỳnhre nẽ hkôt amnhĩ nhĩpêx no piitã hkôt amnhĩ nhĩpêx kêt nẽ. Pêr mẽ ajamaxpêr kêt tã na ka htem atỳx mẽ ahkre ho ri apa.

²⁵—Hêxta waa nẽ. Mẽ apê Parijew nhõ xwỳnh mẽ mẽ apê Tĩrtũm kapêr tũm o mẽ ahkre xwỳnhjaja kot kaj mẽ amex kêt nẽ. Mẽ ate mẽ no kupyw xwỳnh na ka mẽ. Nà mẽ apê Parijew nhõ xwỳnhjaja te mẽ ate mẽ kot apkur kaxyw

prat kre kuhõnh punuj tã mex ã harẽnh nẽ kamã apkur pyræk o na ka mẽ. Jao ãm mẽ akrãhkà rùm pix mã mẽ amex. Nẽ mẽ noo mã te mẽ amex pyræk no mẽ anhõxàhkre kaxwỳnh kãm mẽ ajamaxpěrja mex kêt. Mẽ akapěr prãm nẽ mẽ axàhkurê nẽ mẽ anhõxỳy.

26Mẽ ajamaxpěr mex kêt kênã. Kwa kêt ka mẽ tãm ajamaxpěr o tãm akwỳjê nhĩpêx o ri apa. Nẽ axàmnhĩx ri mẽ kêp amrakati xwỳnhjê mã mẽmoj nhõr o ri apa. Kot kaj mẽ ã amnhĩ nhĩpêx anẽ nhũm Tĩrtũm ja hã mẽ apumu nẽ amnhĩm mẽ amex ã mẽ ajarẽ. No na ka htem amã mẽ amnhĩ to mex prãm xàj ãm tee ri amnhĩ kuhõnh japjê kaprỳ.

27—Hêxta waa nẽ. Mẽ apê Parijew nhõ xwỳnhjê mẽ mẽ apê Tĩrtũm kapěr tũm o mẽ ahkre ho mẽ apa xwỳnhjaja kot kaj mẽ amex kêt nẽ. Te mẽ ate mẽ htykjê jagjênh xà pyræk. Na htem mẽ hagjênh xà ho mex o pa nom kamã mẽ hi nẽ ahpunuj pix.

28Ja pyrà nẽ ã mẽ ate amnhĩ nhĩpêx anhỹr. Kapôt rùm mẽ anhĩja na mex. Te mẽ ate mẽ ho mex o apa pyræk o na ka htem amnhĩ nhĩpêx nhũm mẽ ãm akrãhkà pix pumu nom ãm mẽ akrã hi kaxwỳnh kãm mẽ ajamaxpěr punuj rãhã hã mẽ apumunh kêt nẽ. Mẽ ate tanhmã mẽ no kupyrr to pix kukamã ajamaxpěr jakamã te mẽ ate mẽ htykjê jagjênh xà pyræk.

29-30—Hêxta waa nẽ. Mẽ apê Parijew nhõ xwỳnh mẽ mẽ apê Tĩrtũm kapěr tũm o mẽ ahkre xwỳnhjaja kot kaj mẽ amex kêt nẽ. Mẽ ate mẽ no kupyrr xwỳnh na ka mẽ. Na ka htem ma mẽ hã pika hwỳr apa nẽ Tĩrtũm nhỹ hã kapěr o mẽ pa xwỳnhjê hã pika ho mex. Nẽ mẽ kot amnhĩ to mex xwỳnhjê hã pika ho mex. Nẽ axpẽn mã mẽ harẽnh o: “Hêxta waa nẽ. Na pre amnepêm mẽ pakukamã mẽ panhĩgêjtaja Tĩrtũm nhỹ hã mẽ kãm kapěr xwỳnhjê homnuj nẽ mẽ kupa. No kêt mẽ papajaja mẽ kamã ri papa ronhỹx pu prem mẽ uræk nẽ ã mẽ hipêx anhỹr kêt nẽ.” Anhỹr o axpẽn mã mẽ hkaprĩ ho ri apa.

31-32Nom ãm amnhĩ to axêx. Mẽ ate ã amnhĩ nhĩpêx anhỹr o apa kênã. ã mẽ ate amnhĩ nhĩpêx anhỹr jao ra apê mẽ hkanrêhã mẽ hkra kumrêx ã amnhĩ to amnhĩrĩt mex o apa.

33Te mẽ ate kagã xoprê kot mẽ hkamnar nẽ mẽ homnuj tỳx pyrãk jakamã koja Tĩrtũm nhỹrmã ma mẽ kot amnhĩ xà htỳx kamã hamak tũm xàta wỳr mẽ ajano ka mẽ ma hwỳr ajapêx. Hãmri nẽ tee ri amã ajapôx prãm kaprỳ nẽ rĩ amnhĩ pumu.

34—Kot paj nhỹrmã ma mẽ awỳr inhỹ hã ixkapêr jarênh o mẽ pa xwỳnh kwỳ rẽ. Nẽ inhỹ hã mẽ àhpumunh xwỳnh kwỳ rẽ. Nẽ ixkapêr o mẽ ahkre xwỳnh kwỳ rẽ. Nom kot kaj mẽ ãm mẽ kapêr ma nẽ apê mẽ hprãm nõkati nẽ tanhmã mẽ homnuj tỳx to ho apa. Nẽ ixpê mẽ hkwỳjê hpar o apa. Jao pĩ kahpa hã mẽ hanhôr o mẽ hkwỳjê hpa. Nhũm mẽ hkwỳjaja Tĩrtũm kapêr o mẽ ahkre xà hã ixkre kamã mẽ ahkre ho hkrĩ ka mẽ omu nẽ mẽ unê nẽ ixkreja kamã mẽ htak. Hãmri nhũm mẽ apymaj nhãm ahpỹnhã krĩ hkwỳ hwỳr hprôt nẽ mra. ã kot kaj mẽ inhỹ hã ixkapêr jarênh xwỳnhjê nhĩpêx anhỹr o apa.

35-36Na prem ra mẽ himex rax nẽ. Annepêr panhĩ kator krax rũm Atãw kra Apewta na pre Tĩrtũm nhỹ hã kapêr o pa nhũm htõja kãm mar prãm kêt nẽ kupĩ. Tã nhũm Tĩrtũm axte mẽ hwỳr ỹ hã kapêr o mẽ pa xwỳnh kwỳjê rẽ nhũm prem mã mẽ ho anê nẽ mẽ hkwỳjê nhĩmex. Nhũm pre xatã mẽ hwỳr mẽ hkwỳjê rẽ nhũm mẽ xatã mẽ kupa. Apew rũm Parakis kra Jakaris wỳr na prem mẽ himex rũnh nẽ. Hãmri nhũm prem Tĩrtũm mã amnhĩ jarênh xà hã ixkre kamã Jakarisja pĩ. Tã mẽ kajaja mẽ ate mẽ urãk nẽ mẽ amã Tĩrtũm kapêr mar prãm kêt nẽ mẽ urãk nẽ amã Tĩrtũm nhỹ hã kapêr xwỳnhjê nhĩmex prãm nẽ. ã mẽ ate mẽ anhĩgêjtjê pyrã nẽ mẽ hipêx anhỹr mỳrapê koja Tĩrtũm mẽ apê mẽ hkanrêhã mẽ hkra nẽ mẽ htãmnhwỳjaja mẽ ato hpimràatã tanhmã mẽ ato htỳx to ka mẽ amnhĩ xà htỳx kamã ajamak rãhã ho ri apa. Anẽ.

Jejus kãm Jerujarẽ nhõ xwỳnhjê japê htỳx ã harênh

Rukre 13.34-35; mããnên Rõmãn 11.25-27

37Hãmri nhũm Jejus te ra kot Jerujarẽ nhõ xwỳnhjê pumunh nẽ mẽ kãm kapêr pyrãk o tanhmã kapêr to ho xa. Nẽ mẽ kãm: —Hêxta waa nẽ Jerujarẽ nhõ xwỳnhjaja. Tĩrtũm kot xatã mẽ awỳr ỹ hã kapêr jarênh xwỳnhjê rênh nhũm mẽ kot mẽ akôt mẽ amã kapêr jarênh o pa htã ka mẽ kapêr mar kêt kumrêx. Nẽ axtem nẽ kên o mẽ htak o mẽ himex o apa. ã na ka htem amnhĩ

tomnuj o apa aně. Tã nom arĩ inhmã mẽ ajamãr o ri ixpa hprãm. Te ho krãhyre kot nore hpro nẽ ho hikwỹ pyrãk o na pa inhmã mẽ anhĩpêx prãm nẽ. Nom mẽ amã ixprãm nõkati nẽ mẽ ate ixkaga kumrẽx.

³⁸Mýrapê koja Tĩrtũm mẽ anhõ krĩ jamãr kêt nẽ.

³⁹Kot paj tokyx ty nẽ mẽ apiitã mẽ are nẽ ma akupỹm api ka mẽ axte ixpumunh kêt nẽ. ãm akupỹn ixwryk xà hã arĩgrota pix ã koja mẽ akwỹjaja mẽ amỹrpê krĩ ja kamã ixpõx ã ixpumu. Hãmri nẽ mẽ akurom ixpumu nẽ hkĩnh tỳx nẽ. Nẽ tã ixkõt amnhĩ xunhwyr kurê kumrẽx. Hãmri nẽ axpẽn mã ijarẽnh o: Ota Tĩrtũm kot mẽ pahwyr mẽn xwỹnhhta wrỳ. Nà ãm hãmri na mẽ pahwyr wrỳ. Ja mex o mex. Koja mẽ ã axpẽn mã ijarẽnh aně. Aně.

Matêwre 24

Jejus kot mẽ pakukamã mẽmoj jarẽnh

Makre 13.1-13; Rukre 21.5-19; mããnẽn Wam Ximotre 4.1-3; Sikũn Ximotre 3.1-9; Apokarip 6.1-17

¹Tã nhũm Jejus Tĩrtũm mã amnhĩ jarẽnh xà hã ixkre rũm kato nẽ ma tẽ. Pa mẽ ixte hkõt ixpa ho ixpa xwỹnhjaja kormã ixkreja pumunh o ixkuhê nẽ kãm harẽ nẽ kãm: —Kwa Pahihti. Hêxta waa nẽ. Ixkreja ãm mex kumrẽx. Aně. Hãmri nhũm mẽ inhmã:

²—Tỳ mex nom koja nhỹrmã mẽ kãm Tĩrtũm kurê xwỹnhjaja grãnh pa. Koja arĩ kẽn õ axkrutre nẽ axpẽn mỳnh nẽ nõr kêt nẽ. Koja piitã anhrã nẽ ahpỹnhã ri hikwỹ. Aně.

³Hãmri pa mẽ kuma nẽ tee ri hkukamã ijamaxpěr. Hãmri nhũm Jejus ma tẽ nẽ hixêt pê Oriwêhti hã api nẽ hã nhỹ pa mẽ ma hkõt mra nẽ mẽ kot ã ixkre nhĩpêx anhỹrta ã hkukja nẽ kãm: —Kwa xà ãm hãmri koja mẽ ã ixkreta nhĩpêx aně? Kwa mẽ inhmã aprĩ hã harẽ. Xà koja mẽ nhỹrmã ho aně nà? Xà koja mẽ tokyx ho aně? Nẽ akupỹn mẽ ixwyr awryk nhũm mẽmoj piitã hapêxja. Kwa mẽmo koja we wỳj ri tanhmã amnhĩ nhĩpêx to wehe? Aně.

⁴Hãmri nhũm mẽ inhmã hprĩ hã tanhmã mẽmoj kot amnhĩ nhĩpêx to hkukamã ujarẽnh o nhỹ nẽ mẽ inhmã: —Nà nhỹrmã mẽmoj piitã hapêx kaxyw tanhmã amnhĩ nhĩpêx toja kumrẽx kot paj mẽ amã harẽ ka mẽ inhma.

Nà koja mẽ ohtô nẽ mẽ awỳr mra nẽ hêx rom te pa ixte amnhĩ nhĩpêx pyràk o amnhĩ nhĩpêx o mẽ akôt pa.

⁵Nẽ mẽ amã amnhĩ jarênh o: “E Tĩrtũm na pre mẽ awỳr inhmẽ. Ixpê kaxkwa rĩm ixwrỳk xwỳnhhta na pa.” Anhỳr o mẽ akôt mẽ amã amnhĩ to hêx o pa. Jao ohtô nẽ mẽ nokupyr o pa.

⁶—Nẽ koja mẽ nhỹri awry hã axpên par o pa nẽ mẽ atã axpên par o pa. Nom kêr ka mẽ harênh ma nẽ ri tokyx mẽmoj piitã hapêx ã hkamnhĩx kêt nẽ. Kormã mẽmoj piitã hapêx xà hã arĩgroja kormã.

⁷Koja mẽmoj piitã hapêx kaxyw nhũm ahpỹnhã ri pika piitã hkôt mẽ pa xwỳnhjaja pika hõ nhõ xwỳnhjê kutã kuhê nẽ pijapu ho kuhê. Jao ra axpên par o pa. Hãmri nhũm nhỹri pika hkwỳ htertet tỳx kumrêx. Nẽ mẽ hpur kãm mẽõja hapêx nhũm mẽ kãm prãm tỳx nẽ pa. Jakamã nhũm mẽ ohtô nẽ prãm xàj axkaprã.

⁸Nom ja kormã mẽmoj hapêx kaxyw krax pix na. Te ho mênijê hõ hpijagri kaxyw nẽ kormã kawax pê õhy xà pyràk.

⁹—Nẽ koja mẽ piitã ixkôt mẽ akamã gryk nẽ kãm mẽ akurê htỳx o pa. Nẽ mẽ awỳr mra nẽ ixtã mẽ apynê nẽ mẽ atomnuj tỳx nẽ mẽ apa.

¹⁰Jakamã koja mẽ kot ixkôt amnhĩ xunhwỳr xwỳnh kwỳjaja mẽ umaj tee ri amnhĩ kukamã hamaxpêr hãmri nẽ ixkaga. Nẽ ixkôt mẽ kãm axpên tã amỹnê nẽ axpên kãm gryk o pa.

¹¹Nhũm nhỹri mẽ hkwỳjaja Tĩrtũm nhỹ hã kapêr jarênh xwỳnh ã amnhĩ to hêx o pa. Jao mẽ ohtô nẽ mẽ nokupyr o pa.

¹²Koja mẽ ã amnhĩ nhĩpêx anhỳrja o ra piitã kãm axpên kamã ukaprĩ hkêt o pa.

¹³Koja mẽ ã ixtã mẽ atomnuj o pa anẽ. Tã nom kêr ka mẽ amnhĩ to htỳx nẽ ixkaga hkêt nẽ. Mẽ kot mẽ apar tã ka mẽ kaxkwa kamã akupỹm atĩr kurê kumrêx.

14—Ně kot kaj mẽ apê ixkwỳjaja ma krĩ piitã hkôt Tĩrtũm kapêr o mẽ ahkre ho apa. Mẽ kot amnhĩ tomnuj kaga mẽ ixkôt amnhĩ xunhwỳr nhũm Tĩrtũm kot ja hã mẽ omunh mẽ mẽ ho hkra hã mẽ kãm harênh o ri mẽ piitã mẽ hkôt apa. Kot kaj mẽ piitã mẽ kãm ijarênh pa pa rĩ kormã akupỹn mẽ awỳr wrỳ. Anẽ.

Mẽ pahomnuj tỳx xwỳnh maati hã harênh

Makre 13.14-23; Rukre 21.20-24; mãânên Sikũn Tesarõn 2.3-4

15Nhũm Jejus arĩ mẽmoj kukamã mẽ inhmã kapêr mẽ mẽ inhmã: — Amnepêem Tĩrtũm nhỹ hã kapêr xwỳnh finat Tãnĩewja na pre tanhmã mẽ atomnuj tỳx xwỳnh maati ja jarênh to. Tã koja nhỹrmã ra kot harênh xà hkôt axtem mẽ Tĩrtũm mã amnhĩ jarênh xà hã ixkre hwỳr axà mẽ Tĩrtũm xãm xà kamã xa. Ka mẽ ja hã omu hãmri mẽ mẽ kot krĩ grành par ã hkamnhĩx kurê kumrêx.

16Koja ã amnhĩ nhĩpêx anẽ ka mẽ amỳm amnhĩ wỳr mẽ omu hãmri mẽ ajapôj mẽ ma aprôt mẽ amrar kurê kumrêx. Mẽ apê jar pika pê Jutej kamã mẽ apa xwỳnhjaja kaj mẽ omu hãmri mẽ mẽ kot mẽ apar pymaj aprôt mẽ ma amrar kurê kumrêx.

17Rỳ ka mẽ anhõrkwỹ hkrãmnênh o akrĩ japêr mẽ amỳm amnhĩ wỳr mẽ omu mẽ akukrêx wỳr axàr mẽ hõ hpyr mã ajamaxpêr kêt mẽ. ãm wrỳ mẽ aprôt mẽ ma atêm kurê kumrêx.

18Rỳ ka mẽ apur kãm axàpênh o apa japêr mẽ amỳm mẽ omu hãmri mẽ akupỹm anhõrkwỹ hwỳr axê jamỳnh kaxyw atêm kêt mẽ. ãm mẽ umaj aprôt mẽ ma atêm kurê kumrêx.

19—No mẽ htujarô mẽ mẽ hkra karàre xwỳnhjaja koja mẽ kêp mẽmoj omnuj tỳx mẽ. Tanhmã kot mẽ amnhĩ to mẽ mẽ umaj hprôt tỳx? Nà pika ja kamã koja mẽ mex kêt o mex kêt. Mẽ kot amnhĩ tomnuj mỳrapê koja Tĩrtũm tanhmã mẽ homnuj tỳx to.

20—Ně kwa kêr ka mẽ amnhĩ to Tĩrtũm wỳr kê ã mẽ kot amnhĩ nhĩpêx anhỹr xà hã arĩgroja na wrỳk pê ã amnhĩ nhĩpêx anhỹr kêt mẽ. Rỳ mẽ hkôt xà hã arĩgro pê sap ã ã amnhĩ nhĩpêx anhỹr kêt mẽ.

21—Ně ã mẽ kot amnhĩ nhĩpêx anhỹr ã arĩgroja ã koja mẽ piitã amnhĩ xà htỳx kãm hamak tỳx kumrêx. Amnepê m Tĩrtũm kot pika ho kator krax rũm amnẽ mẽ pa xwỳnhjaja kormã aa kot ã amnhĩ xà htỳx kamã hamak anhỹr kêt tã arĩgroja ã koja mẽ amnhĩ xà htỳx kumrêx kamã ama. Hãmri nẽ axte pika ja kamã ã amnhĩ xà htỳx kumrêx kamã hamak anhỹr kêt nẽ.

22Kop apu Tĩrtũm kot mẽ kot amnhĩ xà htỳx kamã hamak xà hã arĩgro hkwỳ ho gri hkêt ronhỹx ka mẽ apiitã apikaprãr pa. Ja pymaj koja mẽ amã ho gri. Kot ra amnhĩ kaxyw mẽ arênh xwỳnhjê japê xàj mẽ amã ho gri.

23-24—Tã ã mẽmoj kot amnhĩ nhĩpêx anhỹr jakamã koja mẽmojaja tanhmã mẽ amã ixto hêx to nẽ mẽ amã: “Ota ra Kris akupỹn wrỳ. Kwa mẽ hwỳr mra nẽ omu.” Anẽ. Rỳ mẽ amã: “Krisja krĩ mũj kamã na raa. Kwa mẽ ma hwỳr mra nẽ omu.” Anhỹr o mẽ amã ixto hêx o pa. Rỳ mẽ awỳr mra nẽ mẽ amã amnhĩ to hêx nẽ mẽ amã: “E. Ot pa ixpê Kris ã mẽ awỳr wrỳ. Tĩrtũm na mẽ awỳr inhmẽ pa wrỳ.” Anẽ. Rỳ mẽ amã: “E ixpê Tĩrtũm nhỹ hã ixkapêr xwỳnh na pa mẽ awỳr mơn pøj.” Anhỹr o mẽ amã amnhĩ to hêx. Hãmri nẽ mẽ anokupyr kaxyw mẽ amã aa mẽ kot mẽmoj pumunh kêt kwỳ ho anhỹr o pa. Tĩrtũm kot amnhĩ kôt mẽ arênh xwỳnhjaja kãm mẽ ate ja hã mẽ omunh nẽ mẽ gryk ã ixkaga hprãm xàj koja mẽ ã mẽ anoo mã amnhĩ nhĩpêx anhỹr o pa. Nom ãm ã amnhĩ nhĩpêx anhỹr kaprỳ ka mẽ ixkaga hkêt nẽ.

25—E kwa mẽ inhmar tỳx nẽ. Na pa ra ixprĩ hã ã mẽ kot amnhĩ nhĩpêx anhỹrja kukamã ã mẽ amã mẽmoj jarênh anẽ. Tã kêt ka mẽ amnhĩ nê ã mẽ kot amnhĩ to hêx anhỹr o mẽ pa xwỳnhjê pumunh mex o apa nẽ axkãm ajamak rom.

26Rỳ koja mẽ tanhmã mẽ amã ixto hêx to nẽ mẽ amã: “Ota Tĩrtũm kot mẽ pahwỳr mênh xwỳnhhta kapôt ã mơn pøj. E mẽ tokyx ma hwỳr mra nẽ omu.” Anhỹr o mẽ amã ijarẽ ka mẽ ama nẽ ãm mẽ ama nẽ hwỳr amrar kêt nẽ. Rỳ nhũm mẽ amã: “Ota hitom kãm xa. E mẽ mamrĩ hwỳr agjê nẽ omu.” Anẽ no ka mẽ ãm mẽ ama nẽ ãm mẽ ama nẽ hwỳr agjêx kêt nẽ.

27Kot paj nhỹrmã akupỹn mẽ awỳr ixwrỳk kaxyw hãmri nẽ ixpimxur kãm ixwrỳk kêt nẽ. Koja pika piitã hkôt mẽ pa xwỳnhjaja anhĩpê ixwrỳk kãm

ixpumu. Te mẽ piitã anhĩpê mẽ kot na haxênh pumunh pyræk o kot kaj mẽ anhĩpê apiitã ixpumu.

²⁸Te nhỹri mẽmoj kro nẽ nõr nhũm nhõnhti kot omunh nẽ hã htor nẽ hpinphanh nhũm mẽ piitã hã omunh pyræk o kot paj amnhĩ nhĩpêx. Anẽ.

Jejus akupỹn wrỳk xwỳj ri mẽmoj kukamã harênh
Makre 13.24-31; Rukre 21.25-33; mãânên Wam Tesarõn 4.16-17

²⁹Nhũm Jejus arĩ mẽ ixte hkõt ixpa ho ixpa xwỳnhjê mã kapêr nẽ mẽ inhmã: —Nẽ kot paj akupỹn mẽ awỳr inhnojarêh nhũm rĩ Tĩrtũm kaxkwa kamã tanhmã mẽmoj nhĩpêx to. Kapêr ã kagà htũm kot tanhmã ja kukamã harênh to nẽ harênh kot: Koja Tĩrtũm kaxkwa ho àk nhũm kanhêti piitã rôrøk pa nhũm myyti ahtyk nhũm mytwrỳre uræk nẽ axte hpøk kêt nẽ. Anẽ.

³⁰Koja ã mẽmoj amnhĩ nhĩpêx anhỹr pa hãmri pa kaxkwa hã mẽ amã mẽmoj nhõ. Hãmri nhũm pika piitã hkõt ri mẽ pa xwỳnhjaja piitã omu nẽ tee ri amnhĩ kukamã hamaxpêr o hkaprĩ nẽ mỳr rax kumrêx. No mẽ kajaja kot kaj mẽ omu hãmri nẽ akupỹn mẽ awỳr ixwrỳk nẽ mẽ ato amnhĩptar mã ajamaxpêr kurê kumrêx. Kot paj kakrã kamã hirã htỳx kãm akupỹn ixihtỳx kãm mẽ awỳr wrỳ.

³¹Hãmri nẽ Tĩrtũm kapêr o mẽ wrỳk xwỳnh maati mã anẽ nhũm pifti kakõ hãmri nhũm hkwỳjaja kuma nẽ ma mẽ awỳr pika piitã hkõt anhgrà nẽ ma mra nẽ inhmã mẽ ato akuprõ. Ixte amnhĩ kaxyw mẽ axunhwỳr xwỳnhjê o akuprõ nẽ man akupỹn ixwỳr mẽ ato hapêx. Anẽ.

Jejus kot mẽmo pàr o ejêp jarênh
Makre 13.28-31; Rukre 21.29-33

³²Nhũm Jejus arĩ mẽ inhmã kapêr nẽ mẽ inhmã: —E ka mẽ pĩ hpàr mũj pumu. Na hte mẽmo mytwrỳ hã rã nhũm mẽ omu nẽ ô hkukamã hamaxpêr kurê kumrêx.

³³Ja pyrà nẽ koja ã ixte mẽmoj jarênh anhỹr xwỳnhja amnhĩ nhĩpêx par mẽ ka mẽ omu nẽ akupỹn mẽ awỳr ixwrỳk mã ajamaxpêr kurê kumrêx. Kot paj te ra mẽ anhõrkwỹ kapem ixãm pyræk o amnhĩ nhĩpêx.

³⁴Nom akupÿn ixwrÿk kêt ri koja ã mẽ kot mẽmoj kot amnhĩ nhĩpêx anhÿr pumunh xwÿnhjaja kormã piitã htyk kêt ri pa akupÿn wrÿ.

³⁵—Nẽ koja nhÿrmã pika nẽ kaxkwa wa hapêx pa. Tã no ãm ixkapêrja koja wa uràk nẽ aa hapêx kêt nẽ. Koja ãm rãhã ho rãhã. Kot paj aa ihkjê ho tanhmã mẽnh to hkêt nẽ. Anẽ.

Mẽ pahte akupÿn Jejus wrÿk xà hã arĩgro pumunh kêt ã mẽ pajarênh

Makre 13.32-37; Rukre 12.37; 17.26-30; 17.34-36; mãänën Wam Tesarôn 5.2

³⁶Nhũm Jejus arĩ mẽ inhmã kapêr nẽ mẽ inhmã: —Nẽ ixte akupÿn mẽ awÿr ixwrÿk xà hã arĩgroja mẽ ate omunh kêt. Nẽ kaxkwa kamã Tĩrtũm kapêr o mẽ wrÿk xwÿnhjaja haxwÿja kot ja pumunh kêt. Nẽ ijaxwÿja ixpê Tĩrtũm Kra htã ixte ja hã amnhĩ pumunh kêt. ãm inhõ Papaj pix na kot ja pumunh.

³⁷—Nẽ kot paj nhÿrmã man akupÿn mẽ awÿr wrÿ. Akupÿn mẽ awÿr ixwrÿk xà hã arĩgrota ã koja mẽ htÿx ri amnhĩ tomnuj o pa. Te annepêm Noehti kormã htĩr ri mẽ pa xwÿnhjaja kot htÿx ri amnhĩ tomnuj o pata pyràk.

³⁸Na pre htem amnhĩ kaxyw Tĩrtũm mã hamaxpêr kêt nẽ. ãm jar mẽ kot amnhĩ nhĩpêx pix kukamã hamaxpêr kôt pix mã amnhĩ nhĩpêx o pa. Rôm nhũm Noehtija gô htàm pymaj pàr rax nhĩpêxta mã axà.

³⁹Nhũm mẽ ja hã omu nẽ ãm omu nẽ tanhmã ri amnhĩ kukamã hamaxpêr to hkêt nẽ. Hãmri nhũm naja mẽ haêr pê wrÿ nẽ wrÿk rax o mẽ hanhir pa. Tã akupÿn ixwrÿk xà hã arĩgroja ã koja mẽ htÿx ri ã amnhĩ nhĩpêx anhÿr o paja o pa mẽ haêr pê naja pyrà nẽ akupÿn wrÿ.

⁴⁰—E kot paj mẽ amã nhÿrmã akupÿn ixwrÿk nẽ tanhmã mẽ anhĩpêx to hã amnhĩ jarê. Te kot ja pyràk. Koja mẽmyjê hõ wa hamêxkrut nẽ hpur kãm àpênh o xa. Nhũm hõja ra ixkôt amnhĩ xãm nhũm hõja ixkôt amnhĩ xãm kêt japêr. Hãmri pa amnhĩ wÿr ra kot ixkôt amnhĩ xãm xwÿnhhta o api nhũm kot ixkôt amnhĩ xãm kêt xwÿnhhta hpur kãm ahte arĩ xa. Hãmri nẽ tee ri hkràmnhwÿ japêr rĩt o xa.

⁴¹Rÿ nhũm mẽnijê wa hamêxkrut nẽ harôj kahuk o xa. Nhũm hõja ra ixkôt amnhĩ xãm nhũm hõja ixkôt amnhĩ xãm kêt japêr. Hãmri pa amnhĩ wÿr kot ixkôt amnhĩ xãm xwÿnhhta ho api nhũm kot ixkôt amnhĩ xãm kêt xwÿnhja

tee ri hkràmnhwỳ japêr rīt o xa hāmri nē hamaxpêr rax kumrêx. Kot paj nhỹrmã akupỹn wrỳ nē ã mẽ anhĩpêx anê.

⁴²Tã mẽ ate akupỹn ixpôx xà hã arĩgro pumunh kêt jakamã kwa kêr ka mẽ ijamãr rãhã ho ri apa.

⁴³Na htem htỳx ri nhỹri tanhmã amnhĩ nhĩpêx to ho pa nhũm mẽ kêp àhkĩnh xwỳnh mẽ òrkwỹ hwỳr agjê nē mẽ kêp ahkĩ.

⁴⁴Tã mẽ ate akupỹn ixwrỳk xà hã arĩgro pumunh kêt jakamã kwa kêr ka mẽ ixwakre kamã te mẽ apê mẽ òrkwỹ nhõ dôn kot amnhĩ nhĩpêx pyrà nē atỳx ri tanhmã amnhĩ tomnuj to ho apa hkêt nē. Ixkutêp axkãm ajamak rom nē ri apa. Jao tãm ixkutêp amnhĩ nhĩpêx rãhã ho ri apa. Anê.

Mẽ kãm mẽ àpênh mex xwỳnhjê jarênh

Rukre 12.41-48

⁴⁵Nhũm Jejus arĩ mẽ inhmã kapêr nē mẽ inhmã: —E koja mẽ kãm àpênh xwỳnhjê hõ àpênh mex o pa hāmri nhũm ò patrãw àpênh ã omu hāmri nē ma nhỹhỹm mõi kaxyw nē ìhkram mẽmoj piitã haxàr pa nē kãm: “E kêr ka ixwakre kamã inhmã inhõrkwỹ tãnopxar mex nē. Nē inhmã mẽ àpênh xwỳnhjê mã mẽ apkur xà nhõr o apa.” Anhỹr o kãm mẽmoj tã karõ hāmri nē kato nē ma nhỹhỹm mõi.

⁴⁶Hāmri nhũm kot kãm àpênh mex xwỳnhja wakre kamã kãm àpênh mex o pa. Jakamã nhũm ò patrãw akupỹn hpôx o mõi nhũm amnhĩ wỳr harênh ma nē hkĩnh nē. Nē tee ri amnhĩ kukamã hamaxpêr o kãm uma hkêt nē. Kot wakre kamã kutêp kãm àpênh mex jakamã tee ri tanhmã amnhĩ kukamã hamaxpêr to hkêt nē.

⁴⁷Jakamã nhũm ò patrãwja akupỹn pøj nē kot kãm àpênh mex ã omu nē hkĩnh nē. Hāmri nē kot kãm ò mẽmoj piitã hamãr o pa kaxyw ìhkram haxàr pa.

⁴⁸No koja axtem nē wakre kamã kãm àpênh mex kêt japêr. Nē hamaxpêr o: “Tk. Nà koja tokyx akupỹn mõi kêt nē.” Anhỹr o hkamnhĩx.

⁴⁹Hāmri nē wakre kamā kām mẽ àpênh xwỳnhjê htak nē pipānh pix o pa. Nē kām kagôxyhti xành xwỳnhjê kôt pix mã pa.

⁵⁰Hāmri nhũm ò patrāwja haêr pê akupỹn pôj nē tee ri ja hã omu.

⁵¹Hāmri nē kamā gryk tỳx nē tanhmã homnuj htỳx to nē kām mẽ àpênh punuj xwỳnhjê mẽ mẽ ho hpimràatã amnhĩ nê mẽ kator pa. Hāmri nē mẽ kot kapêr kwỳm amnhĩ nhĩpêx xwỳnhjê mẽ mẽ ho hpimràatã tanhmã mẽ homnuj to nē amnhĩ nê mẽ kator. Hāmri nhũm mẽ tee ri amnhĩ kukamã hamaxpêr nē mur nē tee ri amnhĩ nhĩpêx. Tã kêr ka mẽ ixwakre kamã ho mẽ uràk kêt nē. Mẽ kurom ixwakre kamã ixkapêr kôt amnhĩ nhĩpêx mex rãhã ho ri apa. Anẽ.

Matêwre 25

Kormã mẽ mjên kêt xwỳnhjê ho 10 nē mẽ harênh

Wam Tesarôn 5.1-3

¹Nhũm Jejus arĩ mẽ inhmã kapêr nē mẽ inhmã: —Nē mẽ ate Tĩrtũm kôt amnhĩ nhĩpêx o mẽ apa xwỳnhjaja kêr ka mẽ akupỹn amnhĩ wỳr ixkãm ajamak rom nē ri apa. Nom mẽ kêp Tĩrtũm prãm nõkati xwỳnhjaja koja mẽ akĩnhã ãm htỳx tanhmã amnhĩ to pix kukamã hamaxpêr o pa. Te kormã mẽ mjên kêt xwỳnhjaja kot amnhĩ nhĩpêxta pyràk. E pa mẽ amã tanhmã mẽ harênh to ka mẽ inhma. Koja kormã mẽ mjên kêt xwỳnhjê kêp 10jaja ma hkràmnhwỳ mjên mã xwỳnhjê kutã pry hã mra. Amnhĩ kôt kanê jamỳ nē o mra nē kutêp pry nhĩkrep hkrĩ.

²⁻⁴Nhũm mẽ kêp 5jaja hkwỳjê rom amnhĩ kukamã hamaxpêr mex nē kanê kaxyw amnhĩ kôt orti hkwỳ ho mỗ. No nhũm mẽ kêp 5 nē mẽ hkĩnhã ãm htỳx kanê pix jamỳ nē o mra.

⁵Hāmri nē mẽ mjên mã xwỳnhjê kutêp axpên mã kapêr o hkrĩ. Nhũm tokyx htêm kêt nhũm mẽ kutêp hkrĩ nē gaa nē ra òtxwa nē gaa nē hikwỳ nē ra òt pa.

⁶—Tã nhũm kôt ã kamàt hāmri nhũm mjên mã xwỳnhjê hpôx o tẽ. Hāmri nhũm kot hkukamã harênh xwỳnhjê mẽ òt o mẽ hikwỳ xwỳnhjê mã amỹra

ně mẽ kãm: “Kwa mẽ hãmri. Ota mjên mã xwỳnhta tẽ. Mẽ tokyx kànhmã akrĩ pu mẽ kutã mra.” Anẽ.

⁷Hãmri nhũm mẽ hkrã hapôj nẽ kanê hpôk.

⁸Nom nhũm mẽ hkwỳjê hkĩnhã õ kanê kaxyw orti ho pa hkêt xwỳnhjaja ra mẽ kêp mẽ kanêja hkaprỳ hpa nhũm mẽ tee ri kot hpôk kaxyw. Hãmri nẽ orti hkwỳ hã hkwỳjê hwỳ nẽ mẽ kãm: “Xê mẽ inhmã orti ho inhõ kanê go.” Anẽ.

⁹Nom nhũm mẽ kêp nê nẽ mẽ kãm: “Ma mẽ inhõ kanê kamã orti grire kênã kot pa kêt mẽ amã ho go. Xê mẽ tokyx ma mra nẽ nhỹri amnhĩm hkwỳ japrô mê.” Anẽ.

¹⁰Hãmri nhũm mẽ tee ri mẽ kuma nẽ ma amnhĩm hkwỳ japrôr mã ma mra. —Rôm nhũm mjên mã xwỳnhta mẽ hãnh tẽ nhũm kanê kamã arĩ mẽ orti xwỳnhjaja omu nẽ hã jêt kurê kumrêx. Hãmri nẽ ma hkôt môn mẽ pikuprõnh xà hã ixkreja wỳr wa hã hkĩnh nẽ apkur kaxyw gjêx pa nhũm mẽ hã kahê. Mẽ gjêx xà hã oreja ra hwỳr hpôx jakamã nhũm mẽ hã kahê.

¹¹—Tã nhũm ma mẽ kot orti japrôr mã mrar xwỳnhjaja hãmri amnhĩ to hapu nẽ mra nẽ tee ri mẽ hã hakwakre kupê nẽ htatak nẽ tee ri mẽ kãm akir nẽ mẽ kãm: “Xê mẽ inhmã kahê xà mẽ pa mẽ awỳr agjê.” Anẽ.

¹²Hãmri nhũm hprõ mã xwỳnhta mẽ kuma nẽ mẽ kãm: “Tk. Nà ixte mẽ apumunhre hã kot pa kêt mẽ amã kahê xà mẽ. Kwa mẽ ma akupỹm mra.” Anẽ. Ầ mẽ ujarẽnh kot anhỹr. Anẽ.

¹³Nhũm pre ã Jejus mẽ inhmã ujarẽnh anẽ. Hãmri nẽ mẽ inhmã: —E kêr ka mẽ te kot amnhĩ kôt orti hkwỳ ho mõi xwỳnhjaja kot amnhĩ nhĩpêx pyræk. Mẽ ate akupỹn ixwrỳk xà hã arĩgro pumunh kêt jakamã kêr ka mẽ apkati mẽ ixkamã ajamak rãhã ho apa. Anẽ.

Mẽ kãm mẽ àpênh xwỳnhjê jarênh

Rukre 19.11-27

¹⁴Nhũm Jejus arĩ mẽ inhmã kapêr nẽ mẽ inhmã: —E kêr ka mẽ ixwakre kamã inhmã tanhmã amnhĩ nhĩpêx mex to ho ri apa pa hpãnhã mẽ amã amnhĩrer mex nẽ. Mẽ ate tanhmã inhmã amnhĩ nhĩpêx to ho apa xà hkôt

kot paj mẽ amã amnhĩre. Te mēhõ my kot kãm mẽ àpēnh xwỳnhjê nhĩpêx pyràk. Kojã nhỹhỹm nojarêt nē kãm mẽ àpēnh xwỳnhjê mã hikukrêx piitã hkaga hpa. Õrkwỹ nē hpur nē hkrit. ãm mẽmoj piitã mẽ kot wakre kamã kãm hamãr o pa kaxyw mẽ kãm hkaga hpa.

¹⁵Hãmri nē ahpỹnhã mẽ kãm kàxpore hkwy gõ. Mẽ kot kutêp kãm tanhmã ho rũnh to kaxyw ahpỹnhã mẽ kãm õr pa. Kot kàxpore pumunh mex xwỳnhja mã nhũm ho 5.000 nē kugõ. Nē kot hkõt kax pē omunh xwỳnhja mã nhũm ho 2.000 nē kugõ. Nē kormã kot omunh tỳx kêt xwỳnhja mã nhũm ãm ho 1.000 pix nē kugõ. Hãmri nē mẽ kãm amnhĩ jarẽ nē ma nhỹhỹm mõ.

¹⁶Hãmri nhũm kot ho 5.000 nē hamỳnh xwỳnhja kàxporeta py nē ma o mõi kurê kumrêx nē tanhmã ho àpēnh to ho mõi kãm ra hipy axte ho 5.000 nē kumẽ.

¹⁷Nhũm kot ho 2.000 nē hamỳnh xwỳnhja mããnēn tanhmã ho àpēnh to ho mõi kamã ra hipy axte ho 2.000 nē kumẽ.

¹⁸Nom nhũm kot ho 1.000 pix nē hpyr xwỳnhja wa hkĩnh ã axtem nē ma o tẽ nē kãm kakwỳ nē kamã haxà nē hity hpa nē ma akupỹm tẽ.

¹⁹—Tã nhũm mẽ õ patrãwja akupỹn mõi põi nē mẽ kãm: “E mẽ amnẽ ixwỳr mra nē ixte mẽ amã kàxpore ho ixpigrành xwỳnhhta jarẽ. Tanhmã na ka prem ixkutêp inhmã hipêx to?” Anẽ.

²⁰Hãmri nhũm kot ho 5.000 nē hpyr xwỳnhhta kumrêx hwỳr tẽ nē kãm: “E ota akàxporeta. Ate inhmã ho 5.000 pix nē õr tã pa amã ho rax nē amã hipy axte ho 5.000 nē kumẽ nhũm ho axkamur nē ra ho 10.000. Tã ota.” Anhỹr o kãm kapêr hãmri nē kãm kugõ

²¹nhũm amnhĩm hamỳ nē omu nē hkĩnh nē. Hãmri nē kãm: “Nà ãm hãmri na ka inhmã ho anẽ. Ixte amã ho 5.000 pix nē õr tã ka ra inhmã ho rax jakamã kot kaj apê inhmã mẽ àpēnh xwỳnhjê hkrãhtũm. E amnẽ ixwỳr axà pu mẽ apku nē pahkĩnh.” Anẽ.

²²—Hāmri nhūm hpānhā kot ho 2.000 nē hpyr xwỳnhhta hwỳr tē nē ò patrāwta mā kām: “E ota akàxporeta. Ate inhmā ho 2.000 pix nē òr tã pa amā ho rax nē amā hipy axte ho 2.000 nē kumē. Tã ota.” Anē.

²³Hāmri nhūm kuma nē amnhīm hamỳ nē omu nē hkĩnh nē. Hāmri nē kām: “Nà ãm hāmri na ka ã inhmā ho rax anē. Ixte amā ho 2.000 pix nē òr tã ka inhmā ho rax jakamā kot kaj apê inhmā mẽ àpênh xwỳnhjê hkrāhtũm. E amnē ajaxwỳja ixwỳr axà pu mẽ apku nē pahkĩnh.” Anē.

²⁴—Tã nhūm kot ho 1.000 pix nē hpyr xwỳnhhta hapu hã wa hkôt tē. Hāmri nē ò patrāw mā tanhmā kapēr to nē kām: “Nà ra ixte apumunh tũm. Pēr axàhkurê pix kām na ka hte apa. Nē amā akàxpore ho rax nē anhõ ho rax pix kukamā ajamaxpēr o ri apa. Nom mẽ pajaja mẽ ixàpênh rax pix kukwak ri na ka hte akàxpore rax nē apa.

²⁵Jakamā na pa inhmā apyma nē. Nē akàxporeta py nē ma o tē nē kaxyw kre nē kamā haxà. Tã ka akupỳn mõi pøj pa ajarēnh ma hāmri nē hkapa nē man akupỳn amā o tē. Tã ota anhõ 1.000ta.” Anē.

²⁶⁻²⁷Hāmri nhūm tee ri kuma nē kām: “Tk. Kwa amā ixpyma nē ate ixpumunh mex anhỳr tã na ka ixte amā kàxpore nhõrta pyr nē ma ho atēm. Nē mẽ kot mẽ kêp kàxpore jamỳnh o kuhê xà kamā mẽ kām òr nhūm mẽ ixkutêp tanhmā inhmā ho rax to hkêt nē? Pēr ãm amā kaga nē ate amnhĩ tomnu pix o ri apa xwỳnh.” Anē.

²⁸⁻³⁰Hāmri nē kêp kàxporeta py nē nhām jam kugõ nē kām: “E amỳ nē o tē nē kot inhmā ho 10.000 nē òr xwỳnhhta mā agõ. Hāmri nē jahti pynê nē ma o tē nē kamàt kô kamā amē. Apênh mexti hã. Koja tee amỳra nē amnhĩ xà htỳx kamā hamak xàj tee ri amnhĩ nham o axpên kamnhar tỳx kaprỳ nē rĩ amnhĩ pumu.” Anhỳr o kām kapēr nhūm kuma nē hpa hã kupy nē ma o tē. Hāmri nhūm mẽ ò patrāwja mẽ àpênh xwỳnhjê mã kām: “E mẽ ate ixwakre kamā mẽ axàpênh mex xwỳnhjaja kot paj ã mẽ ato mex rax anē ka mẽ akĩnh nē. Nom mẽ kot inhmā mẽ àpênh mex kêt xwỳnhjaja kot paj mẽ kêp mẽõ mẽmojta jamỳ nē nhām mẽhõm kugõ nhūm hkaprĩ nē.” Anē. ã mẽ ujarēnh kot anhỳr. Anē.

Jejus kot nhÿrmã mẽ piitã tanhmã mẽ harēnh to hã harēnh

Matêwre 13.35-43; 13.47-50; mãänēn Apokarip 20.11-15

31Nhũm Jejus arĩ mẽ inhmã kapēr nē mẽ inhmã: —Nē kot paj nhÿrmã akupÿn mẽ awÿr wrÿ nhũm Tĩrtũm kapēr o mẽ wrÿk xwÿnh piitã man ixkõt wrÿ. Kot paj wrÿ nē ixpê pahi maati hã ixkrĩ xà maati kamã inhmex nē nhÿ.

32-33Hãmri nē Tĩrtũm kapēr o mẽ wrÿk xwÿnhjê mã anē nhũm mẽ ma krĩ piitã hkõt mẽ apiitã mẽ ato pikuprõnh pa nē akupÿn ixwÿr mẽ ato hapêx. Pa mẽ apumu nē tanhmã mẽ axunhwÿr to. Te ôwêhti jamãr o pa xwÿnh kot ôwêhti kaêx ã motre pumunh nē nhãm nê motre xunhwÿr parta pyrãk.

34Hãmri nē ixupôk rũm mẽ ate ixkõt amnhĩ xunhwÿr xwÿnhjê mã ixkapēr nē mẽ amã: “E mẽ kajaja kot kaj mẽ amex kumrêx nē ri apa ho apa. Amnepê mormã mẽmoj piitã hkêt ri na pa pre Inhĩpêxà mẽ wa mẽ akukamã tanhmã ijamaxpēr to nē mẽ amã mẽmoj mex xunhwÿr rũnh nē.

35Tã ka prem ajapôj hãmri nē ixkõt amnhĩ xunhwÿ nē tanhmã ixto mex to ho ri apa. Na pa pre inhmã prãm nē ixpa ka prem ixpumu nē ixkamã axukaprĩ nē inhmã mẽmoj gõ pa kuku. Nē na pa pre inhmã kôr nē ixpa ka prem ja hã ixpumu nē inhmã gô pa ho ixkõ nē akupÿm ixihÿtÿx. Nē aa mẽ ate ixpumunh kêt tã ka prem nhÿri ixpumu nē amnhĩ nhõrkwÿ hwÿr ixwÿ.

36Nē na pa pre ixê pynajti nē ri ixpa ka prem ja hã ixpumu nē inhmã axê gõ pa haxà nē ri hã ixpa. Nē na pa pre ixà nē inhĩkwÿ ka prem ixwÿr mra nē ixkane nē tanhmã ixto mex to pa akupÿm inhmex. Nhũm prem ijaxà pa mẽ hagjēnh xà kamã ixkrĩ ka prem ixwÿr mra nē tanhmã ixto mex to. ã mẽ ate ixto mex anhÿr o ri apa jakamã nhũm inhõ Papajja ixtã mẽ apumu. Tã koja ixtã mẽ ato mex rax nē.” Anē.

37—Kot paj ã mẽ ate tãm amnhĩ nhĩpêx xwÿnhjê mã ixkapēr anē. Hãmri ka mẽ tee ri inhma nē amnhĩ tã ixkukja nē inhmã: “Kwa xà mẽ pajaja na pa prem ã ato mex anē? Nà mẽ ixte ã anhĩpêx anhÿr kãm amnhĩ pumunh kêt tã na ka ã mẽ ijarēnh anē. Kwa nhÿri na ka pre amã prãm nē apa pa prem apumu nē amã mẽmoj gõ ka aku? Nē nhÿri na ka pre amã kôr nē apa pa prem amã gô hkwÿ ka ho ixkõ?

³⁸Ně nhỹri na pa prem apumu ně amnhĩ nhõrkwỹ hwỳr awỳ? Rỳ ka pre axê pynajti ně apa pa prem amã inhĩnhkà gõ ka haghê?

³⁹Ně nhỹri na ka pre axà ně anhĩkwỹ pa prem apumu ně akane? Ně nhỹri na prem ajaxà pa mẽ haghênh xàja wỳr mra ně kamã tanhmã ato mex to? Nà mẽ pa hkêt.” Anhỹr o amnhĩ tã ixkukja.

⁴⁰Hãmri pa mẽ amã: “Nà mẽ kêp amrakati xwỳnhjaja na pre htem pa pyræk. Tã ka prem mẽ kamã axukaprĩ hã tanhmã mẽ kutã anojarêt to ho ri apa jao te pa tanhmã ixto mex to ho apa pyræk. ãm hãmri na ka prem ã mẽ ho mex anhỹr o ri apa.” Anẽ. Kot paj ã mẽ ate amnhĩ to mex xwỳnhjê mã ixkapêr anẽ.

⁴¹—Hãmri ně hpãnhã apke rům mẽ kot ixkôt amnhĩ xunhwỳr kêt xwỳnhjê mã tanhmã ixkapêr to ně mẽ kãm: “No mẽ kajaja kot paj ixupôk rům mẽ unhwỳr xwỳnhjê hkĩnhã mẽ ato mex kêt ně. Amnepêm na pre Tĩrtũmja Satanasti mẽ mẽ kot tanhmã kãm amnhĩ nhĩpêx to ho mẽ pa xwỳnhjê mẽ mẽ ho hpimràatã mẽ kaxyw kuwy rax kumrêxja nhĩpêx. Mẽ kot amnhĩ tomnuj tỳx mỳrapê nhỹrmã kamã amnhĩ xà htỳx kamã hamak rãhã ně pa ho pa kaxyw. Tã kot kaj mẽ ajaxwỳja ma mẽ hkôt hwỳr ajapêx. Mẽ apê Satanasti hkôt mẽ ate amnhĩ nhĩpêx o apa xwỳnh jakamã kot kaj mẽ uràn ma hwỳr ajapêx pa.

⁴²Aa mẽ ate tanhmã ixto mex to hkêt. Na ka pre htem inhmã prãm ně ixpa hã ixpumu nom inhmã mẽmoj nhõr kêt ně. Ně inhmã kôr ně ixpa hã ixpumu nom inhmã gô hkwỳ hkêt ně.

⁴³Ně nhỹri ahte ixpa hã ixpumu nom amnhĩ nhõrkwỹ hwỳr ixwỳr kêt ně. Ně ixê pynajre ně ixpa hã ixpumu nom inhmã axê nhõr kêt ně. Ně ixà ně inhĩkwỹ hã ixpumu nom ixkane hkêt ně. Ně mẽ kot ijaxàr nhũm arĩ ixkrĩ hã ixpumu nom ixwỳr amrar ně tanhmã ixto mex to hkêt ně. ã mẽ ate inhĩpêx anhỹr o apa jakamã e mẽ ma kuwy hwỳr apa kurê kumrêx.” Anẽ. Kot paj ã mẽ kãm ixkapêr anẽ.

⁴⁴Hãmri nhũm mẽ tee ri inhma ně amnhĩ tã ixkukja ně inhmã: “Kwa nà ã mẽ ijarênh anhỹr kêt ně. Aa mẽ ixte ã anhĩpêx anhỹỹre hã. Nhỹri na pa prem

tanhmã akute hã apumu? Nà aa mẽ ixte nhỹri ã ate amnhĩ nhĩpêx anhỹr ã apumunhre hã.” Anẽ.

⁴⁵—Koja mẽ ã inhmã amnhĩ tã aprãr anhỹr kaprỳ. Kot paj mẽ kãm: “Nà na ka pre htem mẽ kêp amrakati xwỳnhjê pumu nẽ ãm mẽ omunh o ri apa nẽ mẽ kamã axukaprĩ hkêt nẽ. ã mẽ hipêx anhỹr jao te pa ã inhĩpêx anhỹr pyræk. Jakamã kwa mẽ tokyx ma kuwy hwỳr ajapêx kurê kumrêx.” Anẽ. Kot paj ã kuwy hwỳr mẽ hanor anẽ.

⁴⁶Hãmri nẽ hwỳr mẽ rênh pa nhũm mẽ ma hwỳr hapêx nẽ kamã amnhĩ xà htỳx kãm hamak rãhã nẽ pa ho pa nẽ aa kator kêt kumrêx. No kêt mẽ ate tãm amnhĩ nhĩpêx o mẽ apa xwỳnhjaja kot kaj mẽ kurom ma Tĩrtũm mẽ wa inhõ krĩ hwỳr api nẽ kamã amex nẽ atĩr tũm nẽ apa ho pa. Kot paj ã ahpỹnhã mẽ apiitã mẽ anhĩpêx anẽ. Anẽ. Nhũm pre ã Jejus akupỹn wrỳk ã amnhĩ kukamã mẽ inhmã ujarênh anẽ. Hãmri nẽ mẽ inhmã ujarênh pa.

Matêwre 26

Mẽ kot Jejus ã àmnênh ã amnhĩ jarênh

Makre 14.1-2; Rukre 22.1-2; Juãw 11.45-53

¹Tã nhũm Jejus mẽ ixte hkôt ixpa ho ixpa xwỳnhjê mã ujarênh pa nẽ mẽ inhmã:

²—E kot puj mẽ axte pahtã apkati axkrut hãmri nhũm arĩgro pê Pas kato. Jakamã koja mẽ piitã amnepêm Tĩrtũm kot Ejit nhõ xwỳnhjê pê mẽ pakukamã mẽ panhĩgêjtjê kator mã hamaxpêr nẽ hã hkĩnh kaxyw Jerujarê hwỳr akuprõ. Kamã koja mẽ ixpynê nẽ pĩ kahpa hã inhô nẽ ixpĩ. Koja mẽ tokyx ã inhĩpêx anẽ. Anẽ. Nhũm pre ã amnhĩ kukamã mẽ inhmã amnhĩ jarênh anẽ.

³Rôm nhũm Jerujarê kamã patre krãhtũmjê mẽ Ijaew pigêjtjaja patre maati Kajpasja nhõrkwỹ kamã axpên wỳr akuprõ.

⁴⁻⁵Ra mẽ kãm Jejus pĩr prãm tã mẽ kãm mẽ kot hkôt kapêr mar o pa xwỳnhjê pyma nẽ. Hãmri nẽ tee ri hamaxpêr nẽ axpên mã: —Hêxta waa nẽ. Tanhmã kot puj wem ho nẽ kupĩ? Kot puj mẽ pahkĩnh kãm tanhmã ho nhũm mẽ

hkĩnh xwỳnhjaja hã mẽ pakamã gryk tỳx nẽ. Pu mẽ hã axpu nẽ hã tanhmã axpẽn to. Jakamã kwa pu mẽ kormã tanhmã ho hkêt nẽ. Anhỹr o axpẽn ma.

Mẽhõ ni kot Jejus krã gregrer ã harẽnh

Makre 14.3-9; Rukre 7.36-50; Juãw 12.1-8

⁶Tã nhũm Jejus kormã krĩ pê Petãn kamã Simãw nhõrkwỹ kamã apkur o nhỹ. Simãwja na pre hkà kro xàpêr tỳx o pa nhũm Jejus ra arĩgro hõ hã akupỹm hkà ho mex. Hãmri nẽ akupỹm õ krĩ hwỳr pøj nẽ õrkwỹ hwỳr tẽ nẽ kuri apkur o nhỹ.

⁷Hãmri nhũm mẽhõ nija hpôx ã omu nẽ hamaxpêr o: —Ma koja pêr Jejusja pa hã apkati grêre hãmri nẽ ty. An pa ma hwỳr tẽ nẽ mẽhkuxwa xà ho hkuxwa. Anẽ hãmri nẽ kẽn jaka ho kàx kãm mẽhkuxwa xàja nhũm kumỳ nẽ ma hwỳr o tẽ. Hãmri nẽ ho hkrã gregrer nẽ hã hkapĩr pa nẽ ho hkuxwa hpa. Mẽhkuxwa xà hã kàxpore xohtô rax tã nhũm ã hã hkapĩr par anẽ.

⁸Hãmri pa mẽ ixte Jejus kôt ixpa ho ixpa xwỳnhjaja tee ri ã kot hipêx anhỹr ã omu nẽ axpẽn mã: —Tk. Kwa na hã mẽhkuxwa xàta kapĩr pa.

⁹Kop apu ma kot o htẽm nẽ ho wẽnê nẽ hpãnhã kàxpore ho rax kumrêx nẽ hamỳnh nẽ ho mẽ kêp amrakati xwỳnhjê nhĩpêx par o nhỹx ja kãm mex nẽ. Kwa mo na we ã amnhĩ nhĩpêx anhỹr kêt nẽ? Anẽ.

¹⁰Hãmri nhũm Jejus amnhĩ tã mẽ inhma nẽ mẽ inhmã: —Kwa kot ixto mex kaxyw kẽnã na ka mẽ axtem nẽ ixtã kãm akir.

¹¹Mẽ kêp amrakati xwỳnhjaja koja mẽ arĩ mẽ akôt pa rãhã nẽ. Ka mẽ amã mẽmo arĩgro hã tanhmã mẽ ho ajuta hto hprãm nẽ tanhmã mẽ ho ajuta hto nẽ mẽ kãm mẽmoj gõ. No pa kot paj ri mẽ akôt ixpa ka mẽ ixto mex ry ho apa hkêt nẽ. Kot paj tokyx mẽ apiitã mẽ are.

¹²Ixtyk nhũm mẽ kot ijaxàr kukamã na ã ixkuxwa anẽ. ãm hãmri na ã inhĩpêx anẽ.

¹³ãm hãmri na pa mẽ amã kot ã inhĩpêx anhỹrja jarẽ. Koja mẽ krĩ piitã hkôt axpẽn mã ijarẽnh ã kagà kamã ijarẽnh o pa nẽ kamã nija kot ã inhĩpêx anhỹr kamã harẽ nẽ kuma. Anẽ.

Jut Kariot kot mẽ kãm Jejus ã àmnênh

Makre 14.10-11; Rukre 22.3-6

14Tã nhũm Jut Kariotja. Kêp mẽ ixpê Jejus kôt ixpa ho ixpa xwỳnh pê 12 hõ htã ra tanhmã hamaxpêr to nẽ axtem nẽ Satanasti nhỹ hã ma patre krãhtũmjê hwỳr tẽ nẽ tanhmã Jejus o mẽ mar to nẽ mẽ kãm:

15—E ot pa mẽ amã Jejus jarênh o tẽ. Xà kot paj mẽ amã hã amỳnê ka mẽ hpãnhã inhmã amnhĩre nà? Anẽ. Hãmri nhũm mẽ kuma nẽ hkĩnh nẽ. Hãmri nẽ kãm: —Nà kot paj mẽ amã amnhĩre. Anẽ hãmri nẽ kãm kàxpore ho 30 nẽ òr kurê kumrêx nhũm hamỳ nẽ hkĩnh nẽ kato nẽ ma tẽ.

16Hãmri nẽ mẽ kãm Jejus pynênh kaxyw tãnopxar o ri hkôt ri pa. Mẽ kot mar o ri pa xwỳnhjê hkàx ã unênh nẽ ma mẽ hwỳr o htêm kaxyw.

Jejus kot hkôt mẽ pa xwỳnhjê kutã apkur

Makre 14.12-21; Rukre 22.7-13; Juãw 13.21-30

17Tã nhũm mẽ hkĩnh pê Pasja kato. Amnepêm kormã Ejit kãm mẽ pa ri na pre mẽ inhĩgêjtjaja ôwêhti hkrare hkwỳ hpa nẽ ho anẽ nẽ kuku. Tĩrtũm kot ja hã mẽ omunh nẽ Ejit nhõ xwỳnhjê nẽ mẽ kator kaxyw nhũm prem ã amnhĩ nhĩpêx anẽ. Tã mẽ ixpê mẽ hkanrêhã mẽ htãmnhwỳjaja na pa htem arĩ amgrà mẽ arĩgro pê Pasja ã axpên wỳr akuprõ nẽ jam ijamaxpêr pê mẽ uràk nẽ ôwêhti hkrare hkwỳ pa nẽ pãwti kaxkrit kêt kãm kuku. Jakamã pa mẽ ixte Jejus kôt ixpa ho ixpa xwỳnhja wa axkrut nẽ Jejus wỳr tẽ nẽ amnhĩ tã hkukja nẽ kãm: —Kwa nhỹri kot paj we wa tẽ nẽ mẽ akutêp Pas ã mẽ panhõ hã apê? Anẽ.

18Hãmri nhũm wa kãm: —Nà wa mãmri ma Jerujarêja wỳr wa tẽ. Nẽ krĩm axà nẽ mẽhõ myti pumunh kurê kumrêx nẽ kãm: “E Jejus na wa inhmẽ pa wa awỳr tẽ. Na awỳr hpêr mênh o: ‘E na pa ra inhnojarê. Jakamã nhỹri kot paj we ixkôt ri mẽ pa ho mẽ pa xwỳnhjê mẽ Pas ã axpên kutã apku?’ Anhỹr o awỳr hpêr mẽ.” Anẽ. E wa ã kãm akapêr anẽ kê war ama nẽ war amã òrkwỹ nhĩmõk ã ixkre rax ò jahkre. Kamã ra kaxyw mẽ paxàpkur xà hã mẽmoj piitãã. Ka wa omu hãmri nẽ mãmri mẽ ixkutêp kamã mẽmoj tã apê. Anẽ.

¹⁹Hāmri nhūm wa kuma nē ma Jerujarē hwȳr tē. Nē hwȳr axà hāmri nē ra kot wa kām mẽmoj jarēnh xà hkôt mẽmoj piitã omu hāmri nē mẽ ixkutêp mẽõ hã àpēnh o wa xa.

²⁰Tã nhūm kamàt pa mẽ Jejusja kôt ixkreta wȳr ixpôx pa nē hwȳr agjê nē ixàpkur kaxyw ixkrĩ. Mẽ ixte Jejus kôt ixpa ho ixpa xwȳnhjê pê 12jaja pa mẽ ixpiitã Jejus kutã ixàpkur o ixkrĩ.

²¹Hāmri nhūm Jejus tanhmã mẽ inhĩõ jarēnh to nē mẽ inhmã: —E pa mẽ amã mẽmoj jarē ka mẽ inhma. Kot kaj mẽ atõ mẽ kām ixkurê xwȳnhjê nhĩhkram ijaxà. Anē.

²²Hāmri pa mẽ tee ri kuma nē ixkaprĩ htȳx nē. Hāmri nē axpēn pãnhã amnhĩ tã hkukja nē kām: —Kwa xà pa? Nà pa hkêt. Kot paj ã anhĩpêx anhȳr kêt kumrêx Pahihti. Anhȳr o axpēn pãnhã kām amnhĩ tã aprã.

²³Hāmri nhūm mẽ inhmã: —Nà ãm hāmri na pa mẽ amã ixkapêr. Mẽ ate ixkutã guhkrax kām anhõ pãwti ho mry kagô nhek o akrĩ xwȳnhjê hõ kot kaj mẽ kām ixtã amȳnê.

²⁴Tĩrtũm kapêr ã kagà htũm ra kot ixkukamã harēnh xà hkôt koja mẽ tanhmã ixto rax nē ixpĩ. Nom kot mẽ kām ixtã àmnēnh mã xwȳnhhta hêxta waa nē. ã kot amnhĩ nhĩpêx anhȳrja mȳrapê koja amnhĩ xà htȳx kām hamak rax kumrêx. Kop apu aa õ mãmãj nhõxà hkre rũm kator kêt ronhȳx ja kām mex nē. Anē.

²⁵Hāmri nhūm Jut Kariot kot mẽ kām hã àmnēnh mã xwȳnhhta hāmri amnhĩ tã kuma nē kām: —Kwa xà we pa Jejus? Xà pa kot paj ã anhĩpêx anē? Kwa nà pa hkêt. Anē. Hāmri nhūm kām: —Tȳ. Ka ã ate inhĩpêx anhȳr mã kēnã. Anē.

Jejus kot amnhĩ kamrô pikapĩr kukamã harēnh

Makre 14.22-26; Rukre 22.14-23; mãänēn Wam Korĩt 11.23-26

²⁶Tã nhūm Jejus pãwti hõ py nē Tĩrtũm mã harē nē mẽ inhmã ho hkry nē ho mẽ inhĩpêx pa nē mẽ inhmã: —E na pa ã mẽ amã pãwti ho hkry nē mẽ amã õr anē. Ja pyrã nē koja mẽ ã inhĩpêx anē nē te ixto hkry hpar pyrãk o inhĩpêx pa amnhĩ xà htȳx kamã ijamak kām ty. Nom mẽ anê kot paj ty. E

mě māmřĩ aku. Anhỹr o mẽ inhmã amnhĩ jarẽ pa mẽ kuma nẽ kot mẽ inhmã ho hkry xwỳnhja ku.

27-28Hāmri nhũm hpãnhã kop py nẽ mã ho anẽ nẽ Tĩrtũm mã harẽ nẽ mẽ inhmã kugõ nẽ mẽ inhmã: —Mẽ kot ixpĩr xà hã arĩgroja ã koja ixkamrô axkapĩ. Nom koja mẽ amarĩ ixpĩr nhũm amarĩ ixkamrô hpikapĩr kêt nẽ. ãm paa. Pa kot paj mẽ anẽ mẽ ĩhkram amnhĩ jaxà nhũm mẽ ã inhĩpêx anẽ nẽ ixpĩ. Koja ixkamrô axkapĩ nhũm Tĩrtũm omu nẽ ixkukwak ri mẽ ate ixkôt amnhĩ xunhwỳr xwỳnhjê nẽ mẽ ate amnhĩ tomnuj piitã te amnhĩ katut kôt rēnh par pyræk o hipêx nẽ mẽ ato hkra. Ra amnepēm kot ã amnhĩ jarēnh anhỹr xà hkôt. Jakamã e mẽ ixkamrô pikapĩr mã ajamaxpēr pē wĩhti ho akõm o axpēn nhĩpêx.

29ãm hāmri na pa ã mẽ amã amnhĩ jarēnh anẽ. Kot paj axte wĩhti ho ixkõm kêt rãhã nhũm nhỹrmã inhõ Papaj akupỹn mẽ awỳr inhmẽ. Hāmri pu mẽ akupỹn ixwrỳk xà hã arĩgrota ã pahkĩnh rax kumrēx. No ãm axtem tanhmã hã pahkĩnh to. Anẽ. Nhũm pre ã Jejus mẽ inhmã amnhĩ jarēnh anẽ. Pa mẽ axpēn pãnhã kopta py nẽ wĩta kwỳ ho ixkõ.

30Hāmri nẽ mẽ ixpiitã ho ixkõm pa nẽ Tĩrtũm mã mex ã gre. Hāmri nẽ ijapõj nẽ hixêt præk pē Oriwēhti hwỳr ma mra.

Jejus kot Simãw Pētre mã kapēr ã harēnh

Makre 14.27-31; Rukre 22.31-34; Juãw 13.36-38

31Tã nhũm Jejus tanhmã mẽ ixte hkôt ixpa ho ixpa xwỳnhjê jarēnh to nẽ mẽ inhmã: —E Tĩrtũm kapēr ã kagà htũmta kot tanhmã mẽ akukamã mẽ ajarēnh to nẽ mẽ ajarēnh kot: Kot paj ôwēhti jamār o pa xwỳnhja pĩ hāmri nhũm ôwēhti hpigrành pa nẽ ma anhrà nẽ ri mra. Anhỹr o kot mẽ ajarēnh. Te ho mẽ apê ôwēhti pyrà nẽ ã mẽ ajarēnh anẽ. Tã kamàt ja kamã koja mẽ tanhmã inhĩpêx to ka mẽ ixtã mẽ omu nẽ mẽ umaj ôwēhti pyrà nẽ apiitã ixkaga hpa nẽ ma aprõt nẽ mra.

32Nẽ mẽ kot ixpĩr tã kot paj akupỹm ixtĩr. Hāmri nẽ ma akupỹm mẽ akukamã pika pē Garirej wỳr mō. Kamã kot puj mẽ axte axpēn pumu. Anẽ.

³³Hāmri nhũm Simāw Pêtre tee ri tanhmã mẽ kot amnhĩ nhĩpêx to hkukamã amnhĩ jarēnhja ma nẽ hkaprĩ nẽ kãm: —Tk. Nà kot paj ã amnhĩ nhĩpêx anhỹr kêt nẽ Pahihti. Koja pahkwỳja akaga japêr no pa kot paj aa akaga hkêt nẽ. Kot paj akôt ixpa rãhã nẽ. Anẽ.

³⁴Hāmri nhũm Jejus kãm: —Nà ra ixte akukamã ixàhpumunh mex. Koja apkati hkôt krãhyre hkàr kêt ri ka ra mẽ umaj ate ixkôt apa hkêt ã mẽ kãm amnhĩ tã axaprãr o axkrunēpxi kãm ga. Kwa jam ajamxpêr tỳx nẽ. Anẽ.

³⁵Hāmri nhũm tee ri kuma nẽ axte kãm: —Kwa nà. Mẽ kot ajaxàr nẽ apĩr tã kot paj arĩ akôt ri ixpa nhũm mẽ pahto amỹrà nẽ tanhmã panhĩpêx to. Nà kot paj aa akaga hkêt nẽ. Anhỹr o kãm amnhĩ jarẽ. Pa mẽ ijaxwỳja ã kãm amnhĩ jarēnh anẽ.

Jejus kot Tirtũm mã amnhĩ jarēnh

Makre 14.32-42; Rukre 22.39-46

³⁶Tã nhũm Jejus mẽ inhmã anẽ pa mẽ ma nhỹri mẽ kot kãm “Gesēm” anhỹr xwỳnhja wỳr mra. Hāmri nhũm mẽ inhmã: —E mẽ jar ixkutêp akrĩ. Pa ma mũtũm tẽ nẽ Tirtũm mã amnhĩ jarẽ mãn. Anẽ.

³⁷Hāmri nẽ mẽ ixkwỳjê ho axkrunēpxi nẽ amnhĩ kôt mẽ kuwỳ. Simāw Pêtre nẽ Jepetew kra pijakrut pê Xiakre nẽ Juāwja wa nhũm amnhĩ kôt mẽ kuwỳ nhũm mẽ ma hkôt mra. Hāmri nhũm Jejus tee ri mẽ kot tanhmã hipêx tota kukamã hamaxpêr o hkaprĩ nẽ amnhĩ kamã kahak tỳx nẽ.

³⁸Hāmri nẽ mẽ kãm: —Hêxta waa nẽ. Na pa tee ri amnhĩ xà htỳx kamã ijamakja kukamã ijamaxpêr nẽ amnhĩ kamã ixkahak tỳx o ra ixkaprĩ nẽ. Te ixkaprĩ kot ixpĩr o mōr pyræk. Jakamã e mẽ jar anohtỳx nẽ ixto Tirtũm wỳr o akrĩ kê tanhmã ixto pa mẽ kot tanhmã ixtoja kutã ixihtỳx nẽ. Anẽ.

³⁹Hāmri nẽ mẽ kurũm htēm grire nẽ Tirtũm mã amnhĩ jarēnh kaxyw htu mỳr pê tēm nẽ pikap nō nẽ kãm: —Kwa Papaj. Hêxta waa nẽ. Inhmã amnhĩ xà htỳx kãm ijamak prãm kêt kumrêx. Na pa tee ri amnhĩ kukamã ijamaxpêr nẽ amnhĩ kamã ixkahak tỳx nẽ. Jakamã kot kaj amã inhnê ja ho ajapêx prãm nẽ mãmri inhnê ho ajapêx nhũm mẽ kãm ixkurê xwỳnhjaja tanhmã ixto hkêt

ně. Rỳ ko. Kot kaj amã mẽ kot tanhmã ixto hprãm kê mẽ mãmri tanhmã inhĩpêx to. Nom pam inhmã hprãm xà hkôt kêt. Aně.

⁴⁰Hãmri nẽ kànhmã xa nẽ akupỹm Simãw Pêtreja mẽ hwỳr tẽ nẽ tee ri mẽ omu nhũm mẽ ra òt pa nẽ hikwỹ. Nhũm mẽ omu nẽ Simãw Pêtre mã kãm: —Kwa Simãw Pêtre. E mẽ hãmri akrã hapôj. Kwa wem anohtỳx grire

⁴¹nẽ ixkutêp amnhĩ to Inhõ Papaj wỳr o akrĩ kê mẽ ixkôt tanhmã mẽ ato htã ka mẽ amã mẽ uma xàj ixkaga hkêt nẽ arĩ mẽ kutã amnhĩ to htỳx nẽ akuhê. ã mẽ amã mẽ ate amnhĩ nhĩpêx anhỳr prãm nom kormã mẽ amã maa.

⁴²Anhỳr o mẽ kãm kapêr hãmri nẽ akupỹm tẽ nẽ axte Tĩrtũm mã amnhĩ jarẽ nẽ kãm: —Kwa Papaj. Nà inhmã amnhĩ xà htỳx kãm ijamak prãm kêt. Na pa amnhĩ kukamã ijamaxpêr nẽ amnhĩ kamã ixkahak tỳx kumrêx. Jakamã kot kaj amã inhnê ja ho ajapêx prãm nẽ mãmri inhnê ho ajapêx kê mẽ kãm ixkurê xwỳnhjaja tanhmã ixto hkêt nẽ. Nom ko. Kot kaj amã mẽ kot tanhmã ixto hprãm kê mẽ mãmri tanhmã inhĩpêx to. Nom pam inhmã ja prãm xà hkôt kêt. Aně.

⁴³Hãmri nẽ kànhmã xa nẽ Simãw Pêtreja mẽ hwỳr akupỹm tẽ. Nẽ mẽ omu nhũm kê mẽ axte gõr nẽ hikwỹ. Ra mẽ òtxwa htỳx nẽ axte gõr nẽ hikwỹ. Nhũm Jejus tẽ nẽ tee ri mẽ omunh o xa

⁴⁴nom axte tanhmã mẽ kãm nẽ hkêt nẽ. ãm awjanã nẽ akupỹm tẽ nẽ kê wam kot Tĩrtũm mã amnhĩ jarênh xà hkôt axte kãm amnhĩ jarẽ.

⁴⁵⁻⁴⁶Hãmri nẽ akupỹm mẽ hwỳr tẽ nẽ mẽ kãm: —Kwa xàn ka mẽ arĩ gõr nẽ anhĩkwỹ? E mẽ tokyx akrã hapôj. Na mẽ ra mẽ kot ixwỳr mrar nẽ ixpynênh mã. Kojã mẽ tokyx ixkutã mẽ kot amnhĩ xunhwỳr xwỳnhjaja mẽ kãm ixtã amỳnê. Ota ra kot ixtã mẽ kãm àmnênh xwỳnhhta tẽ. E mẽ tokyx kànhmã akrĩ pu mẽ kutã mra. Aně.

Mẽ kot Jejus pynênh ã harênh

Makre 14.43-50; Rukre 22.47-53; Juãw 18.2-11

⁴⁷Nhũm Jejus mẽ kãm kapêr o ãm rãhã nhũm Jut Kariot pê mẽ inhĩõja hwỳr tẽ. Nẽ amnhĩ kôt mẽ ohtô nẽ hwỳr mẽ o tẽ nhũm mẽ wapohti nẽ kô jamỳ

ně hkôt o mra. Patre krähtüm mẽ Ijaew krähtümjaja kot Jejus wỳr mẽ rēnh xwỳnhjaja nhũm mẽ man hkôt Jejus wỳr mra.

⁴⁸Na pre ra Jut Kariot amnhĩ kukamã mẽ kãm amnhĩ jarēnh o: —Kot paj ixkumrēx hwỳr tē ka mẽ ixkôt hapu hã mra. Kot paj hwỳr tē mẽ kãm ixkapēr mẽ kahti hkôt kumỳ. Ka mẽ hã ixpumu mẽ hwỳr mra mẽ unēnh kurē kumrēx. Ixte kahti hkôt mỳnh xwỳnhhta kot kaj mẽ unē. Anē.

⁴⁹Hãmri mẽ Jejus wỳr tē mẽ kãm: —Pa Jejus? Xàn ka kormã anhôt kêt mẽ xa? Anē mẽ kahti hkôt kumỳ.

⁵⁰Hãmri nhũm amnhĩ tã omu mẽ kãm: —Kwa Jut. Ate tanhmã ixto kaxyw mã xwỳnh jakamã e kam mẽ mãmri tanhmã ixto. Anē. Hãmri nhũm Jut kôt mẽ mrrar xwỳnhjaja Jut kot kahti hkôt mỳnh ã omu mẽ hwỳr mra mẽ unēnh kurē kumrēx.

⁵¹Hãmri nhũm mẽ inhĩõja tee ri ja hã mẽ omu mẽ õ wapo kapa mẽ patre maati mã àpēnh xwỳnh kot mẽ hkôt htēm xwỳnhhta mã ho apē. Nē kot ho hkrã nhĩpōnh mã tã kuhpaw mẽ upōk rũm hamak nhĩkjê pix krähta.

⁵²Hãmri nhũm Jejus omu mẽ nē kãm kapēr mẽ kãm: —Kwa akupỳm awapota hkàm haxà mẽ amarĩ xa. Na htem wapo ho mẽ oprē ho pa nhũm mẽ amnhĩ xwar wapo ho mẽ kupa.

⁵³Xà kot paj amnhĩ to Tĩrtüm wỳ nhũm ãm inhma mẽ tanhmã jajê pē ixpytār to hkêt mẽ? Nà kot paj amnhĩ to kuwỳ nhũm ixwỳr kapēr o mẽ wryk xwỳnhjê rēnh kurē kumrēx nhũm mẽ ohtô rax kumrēx mẽ wry mẽ mẽ kēp ixpytã.

⁵⁴Nom kot paj ã amnhĩ to hwỳr anhỹr kêt mẽ. Tĩrtüm kapēr ã kagà htüm kot amnepēm ixkukamã ã mẽ kot inhĩpēx anhỹr ã mẽ harēnh jakamã kwār mẽ mãmri Tĩrtüm kãm hprãm xà hkôt ã inhĩpēx anē. Anē.

⁵⁵Hãmri mẽ hpãnhã mẽ kot unēnh xwỳnhjê mã kapēr mẽ mẽ kãm: —Kwa na pa pre apkati mẽ Tĩrtüm mã amnhĩ jarēnh xà hã ixkre kamã mẽ kãm ixujarēnh o ixpa. Ka prem tokyx ixpynēnh kêt tã jarãhã te ixte amnhĩ tomnuj xwỳnh pyræk o inhĩpēx mẽ ixwỳr wapohti mẽ kô hã akapēn mẽ ixwỳr tē.

⁵⁶Tã nom ra Tĩrtũm kapẽr ã kagà htũm kamã Tĩrtũm nhỹ hã mẽ kapẽr xwỳnh kot mẽ akukamã mẽ ajarẽnh nẽ mẽ atã kagà xà hkõt na ka mẽ ri ã inhĩpêx anẽ. Anẽ. Nhũm pre ã Jejusja amnhĩ tã mẽ kãm kapẽr anẽ. Hãmri pa mẽ ixte hkõt ixpa ho ixpa xwỳnhjaja mẽ omu nẽ tee ri amnhĩ kukamã ijamaxpẽr nẽ mẽ umaj ixprõt nẽ anhrà nẽ ma inhmrrar kurê kumrẽx.

Mẽ kot patre maati hwỳr Jejus o mõi ã harẽnh

Makre 14.53-65; Rukre 22.54-55; 22.63-71; Juãw 18.12-14; 18.19-24

⁵⁷Nhũm pre Ijaew krãhtũmjê mẽ Tĩrtũm kapẽr tũm o mẽ ahkre xwỳnhjaja ra patre maati Kajpas nhõrkwỹ hwỳr akuprõ nẽ Jejus kutêp hkrĩ. Hãmri nhũm mẽ kot unênh xwỳnhjaja ma mẽ hwỳr o tẽ.

⁵⁸Hãmri nẽ mẽ hwỳr ho axà nẽ hkõt gjêx pa. Nhũm Simãw Pêtre mẽ hkõt hapu hã mẽ htãnopxar o tẽ nẽ kĩtare hwỳr axà nẽ põiisti nhĩhkõ hã nhỹ. Hãmri nẽ tee ri Jejus kukamã hamaxpẽr o nhỹ nẽ hamaxpẽr o: —Kwa tanhmã koja mẽ ixpê mẽ inhõ Pahihti nhĩpêx to? E pa jar amỳm tanhmã mẽ kot hipêx to hã mẽ omunh o nhỹ. Anẽ.

⁵⁹Hãmri nhũm patre krãhtũmjê mẽ juistijaja kãm Jejus pĩr prãm tỳx nẽ. Jakamã na prem Ijaew wa ho hamẽxkrut nẽ axpẽn kõt tanhmã mẽ kãm ho hêx to nhũm mẽ kot hã wa mar nẽ ra hpĩr kaxyw mẽ pikuprõnh xwỳnhjê kapi.

⁶⁰Jakamã nhũm prem axpẽn pãnhã mẽ hwỳr mra nẽ tanhmã ho hêx to. Nom axpẽn kõt harẽnh kêt nẽ. ãm ahpỹnhã tanhmã ri harẽnh to nom wahõ wa axkrut nẽ axpẽn kõt harẽnh kêt nẽ. Jakamã nhũm mẽ tee ri hã mẽ kuma. Tã nhũm ja wa mẽ hwỳr tẽ nẽ axpẽn kõt harẽ nẽ mẽ kãm:

⁶¹—Nà na pre tanhmã Tĩrtũm mã amnhĩ jarẽnh xà hã ixkre jarẽnh to nẽ harẽnh o: “Kot paj nhỹrmã inhmã ixkreja grãnh par prãm nẽ kugrà hãmri nẽ ãm ixtã apkati axkrunẽpxi pix nẽ akupỹm hipêx pa. Ja kaxyw ixãhpumunh tỳx.” Anhỹr o na amnhĩ jarẽ pa wa kuma.

⁶²Anhỹr o mẽ kãm ho hêx. Hãmri nhũm patre maatija wa kuma nẽ kãnhmã xa nẽ Jejus mã kapẽr nẽ kãm: —Kwa xà ãm hãmri na wa ã ajarẽnh anẽ nà? Xàn ka pre ã amnhĩ jarẽnh anẽ? E mẽ inhmã tanhmã amnhĩ jarẽnh to. Anẽ.

⁶³Nom nhũm amarĩ mẽ kãm xa nẽ mẽ kãm tanhmã nẽ hkêt nẽ. Hãmri nhũm patre maatija tee ri omu nẽ axte kãm kapêr nẽ kãm: —Kwa aprĩ hã mẽ inhmã tanhmã amnhĩ jarênh to. Tĩrtũm noo mã amã ixkapêr jakamã kêr ka akatàt kôt mẽ inhmã amnhĩ jarẽ nẽ amnhĩ to axêx kêt nẽ. Xà apê Tĩrtũm Kra? Xà ka na pre Tĩrtũm mẽ ixkaxyw axãm? Kwa akatàt kôt mẽ inhmã amnhĩ jarẽ. Anẽ.

⁶⁴Hãmri nhũm tã hprĩ hã mẽ kãm amnhĩ jarẽ nẽ mẽ kãm: —Tỳ. Nà ãm hãmri na ka ã ijarênh anẽ. Ixpê Tĩrtũm kot mẽ akaxyw ixãm xwỳnh ta na pa. Na pre mẽ awỳr inhmẽ pa mẽ awỳr wrỳ. Tã kot paj nhỹrmã axte kaxkwa rũm amnẽ akupỳn kakrã kamã mẽ awỳr wrỳ. Hãmri nẽ Tĩrtũm xàhpumunh o àhpumunh xwỳnh ta nhĩhkô hã nhỹ hãmri nẽ pam tanhmã mẽ ajarênh to ka mẽ amnhĩ tã ixpumu nẽ inhma. Anẽ.

⁶⁵Hãmri nhũm patre maatija tee ri ã kot amnhĩ jarênh anhỹr ã kuma nẽ kamã gryk tỳx nẽ. Hãmri nẽ gryk xàj kêp patre maati hã ê kapa nẽ hkaxônh pa nẽ kumẽ nẽ hkwỳjê mã kãm: —Tk. Kwa mo kaxyw kot puj mẽ axte ri tanhmã kot amnhĩ tomnuj to hã harênh xwỳnh ò japêr? Tãm kot amnhĩ pê Tĩrtũm Kra hã amnhĩ jarênh ã amnhĩ to hêx nhũm mẽ pahte mar kênã.

⁶⁶Jakamã e kwa tanhmã kot puj mẽ hipêx to? Anẽ. Hãmri nhũm mẽ kãm: —Nà ã kot amnhĩ jarênh anhỹr mỳrapê koja ty. Ra htyk mã tãm kênã. Anẽ.

⁶⁷Hãmri nẽ tanhmã hipêx kati hto. Mẽ hkwỳjaja hkuk kuhtô nẽ ìhkra ho htak nhũm mẽ hkwỳjaja ìhkra hpo ho htak nẽ hã hpêr o axkẽ nẽ kãm:

⁶⁸—E apê Tĩrtũm Kra hã ate amnhĩ jarênh jakamã mãn uràk nẽ axàhpumunh tỳx. Jakamã e mẽ kot atak xwỳnh ta nhĩxi jarẽ pa mẽ ama. Anẽ.

Simãw Pêtre kot Jejus kôt pa hkêt ã amnhĩ jarênh

Makre 14.66-72; Rukre 22.56-62; Juãw 18.15-18; 18.25-27

⁶⁹Rôm nhũm Simãw Pêtre arĩ kĩtare kamã nhỹ. Hãmri nhũm mẽ kãm àpênh xwỳnh nitita omu nẽ hprĩ hã omunh kurê kumrêx. Hãmri nẽ kãm: —Xê pêr apê Jejus kôt mẽ pa xwỳnhjê hõ na ka. Anẽ.

⁷⁰Hãmri nhũm tee ri amnhĩ tã kuma nẽ kãm mẽ uma xàj mẽ kãm amnhĩ tã aprã nẽ kãm: —Tk. Kokỹ. Ixte mēhõ my ata pumunhre hã. Anẽ.

⁷¹Hāmri nē mẽ umaj kànhmã xa nē tē nē kītare hwỳr hakwakrem ahte mẽ hkàx ã xa. Tã nhũm hpãnhã hõja omu nē hã mẽ kãm: —Xê ma pěr ãm hãmri na mẽ harẽ. Kêp Jejus kôt ri mẽ pa xwỳnhjê hõ na pěr. Anẽ.

⁷²Hāmri nhũm amnhĩ tã kuma nē kãm: —Tk. Nà mẽ ri ã amnhĩ krã hkôt ri ixto axêx anhỹr kêt nē. Ixte aa mēhõta pumunh kêt kumrẽx. Anẽ.

⁷³Tã nhũm mẽ hkwỳjaja hwỳr mra nē kãm kapěr nhũm tanhmã mẽ kãm kapěr to nhũm mẽ kuma nē kãm: —Kwa pěr ãm hãmri na mẽ ajarẽ. Apê Jejus kwỳ na ka. War akapěr kot axpẽn pyràk kênã. Anẽ.

⁷⁴Hāmri nhũm tee ri mẽ kuma mẽ kãm amnhĩ tã aprãr kãm hihtỳx nē mẽ kãm: —Kwa nà. Na pa Tĩrtũm noo mã mẽ amã amnhĩ jarẽ. Kot paj amnhĩ to ixêx japêr nhũm inhma nē hã tanhmã ixto. Nà uràk ixpê Garirej nhõ xwỳnhre hã. Ixte mēhõ mũj pumunh kêt kumrẽx tã ka mẽ xatã axpẽn kôt ixte hkôt ixpa ho ixpa xwỳnh ã ixkamnhĩx o xa. Anhỹrja o ra mẽ kãm amnhĩ tã aprãr o axkrunẽpxi nhũm krãhyre hkàr kurê kumrẽx.

⁷⁵Hāmri nhũm Simãw Pêtre kuma nē ra Jejus kot hkukamã krãhyre hkàr kêt ri kot hã amnhĩ aprãr o axkrunẽpxi hã harẽnhta mã hamaxpěr kurê kumrẽx. Hãmri nē kànhmã hakry hpar o tē nē hkaprĩ htỳx kumrẽx nē kītare pê kato nē tē nē awry hã xa nē mỳr rax nē.

Matêwre 27

Mẽ kot pahiti Pirat wỳr Jejus o htēm ã mẽ harẽnh

Makre 15.1; Rukre 23.1-2; Juãw 18.28-32

¹Tã nhũm ra myt kator o mõi mẽ nhũm mẽ hkrãhtũmjê mẽ patre krãhtũmjaja axpẽn wỳr pikuprõnh pa. Hãmri nē Jejus ã axpẽn mar o hkrĩ nē axpẽn mã: —Nà kot puj mẽ hã amỹnê kê mẽ kupĩ. Kêp Tĩrtũm Kra hã kot amnhĩ jarẽnh o amnhĩ to hêx kênã. Anẽ.

²Hãmri nē mẽõ pōristijê mã anẽ nhũm mẽ hpa hpre hpa nē ma pahiti Pirat wỳr o tē. Pirat kêp Rôm nhõ pahiti nhỹ hã mẽ ixpê Ijaewjê ho amnhĩptàr jakamã nhũm mẽ ma hwỳr o tē nē ìhkram haxà.

Jut Kariot kot amnhĩ pĩr ã harẽnh

Atre 1.15-19

³Rôm nhũm Jut Kariot tee ri mẽ kot Jejus pĩr kaxyw mẽ harēnh ma nẽ hkaprĩ nẽ. Ra kot mẽ kãm hã àmnēnh tã mẽ kot hpĩr kaxyw ã mẽ harēnh ma nẽ tee ri amnhĩ kukamã hamaxpēr o hkaprĩ htỳx nẽ. Hãmri nẽ hamaxpēr o: — Hêxta waa nẽ. Mo na pa pre ri axtem nẽ ã amnhĩ nhĩpêx anẽ? Nà na pa pre amnhĩ tomnuj tỳx kumrêx. Anẽ. Hãmri nẽ ra mẽ kot kãm kàxpore ho 30 nẽ òrta jamỳ nẽ ma akupỹm patre krãhtũmjê mẽ Ijaew pigêtjê hwỳr o tẽ. Hãmri nẽ mẽ kot Tĩrtũm mã amnhĩ jarēnh xà hã ixkreja wỳr mẽ hwỳr axà

⁴nẽ nhỹri mẽ omu nẽ mẽ hwỳr tẽ nẽ mẽ kãm: —E ota mẽ akàxporeta. Na pa ã mẽ amã Jejus ã ixàmnhēnh anhỹrja o amnhĩ tomnuj tỳx nẽ. Kot tãm amnhĩ nhĩpêx o pa htã pa axtem nẽ ã mẽ amã hã ixàmnhēnh anẽ. Jakamã e mĩ. Mẽ akupỹm akàxporeta jamỳ. Kot paj amnhĩm hamỳnh kêt nẽ. Anẽ. Hãmri nhũm mẽ tee ri kuma nẽ kãm: —Kokỹ. Nom ka na ka pre mẽ ixwỳr tẽ nẽ ho mẽ inhmar kēnã. Anẽ.

⁵⁻⁷Hãmri nhũm tee ri mẽ kuma hãmri nẽ pikap kàxpore rēnh pa nẽ ma tẽ nẽ kato. Hãmri nẽ hkaprĩ htỳx kumrêx nẽ hamaxpēr o: —Kwa tanhmã kot pa we amnhĩ to? Nà kot paj amnhĩ pĩ. Anẽ. Hãmri nẽ krĩ pê kato nẽ ma mẽ kot pika kakwỳnh nẽ ho amnhĩm poti nhĩpêx xà hã pika hwỳr tẽ hãmri nẽ amnhĩ mut mã ê nẽ ho amnhĩ pĩ. Hãmri nhũm patre krãhtũmjaja harēnh ma nẽ tee ri kot kàxpore rēnhhta kawrà nẽ hã axpēn kukja nẽ axpēn mã: —Kwa tanhmã kot puj wem ja ho? Jut kot mẽ pamã Jejus ã àmnēnh nhũm mẽ pahte hpĩr xà hã kàxpore na. Jakamã kot puj mẽ ho Tĩrtũm mã amnhĩ jarēnh xà hã ixkre ho mex kêt nẽ. Finat Mojes kot ja nê mẽ panhĩgêtjê kurê jakamã na htem mẽ hpar xà hã kàxpore ho ixkreta ho mex kêt nẽ. Jakamã kwa tanhmã kot puj mẽ ho? Anẽ. Hãmri nhũm ja mẽ kãm: —E na pa ra ijamaxpēr. Pu mẽ ho Jut kot amnhĩ pĩr xà hã pikata japrô hãmri nẽ kamã jar mẽ kêp mẽ pahkwỳ hkêt htyk xwỳnhjê jagjēnh o papa. Anẽ. Hãmri nhũm mẽ kuma nhũm ja mẽ kãm mex nẽ. Jakamã nhũm arĩgro hõ hã nhũm mẽ ma hwỳr mra nẽ haprô.

⁸Hāmri nē hā hixi mē nhūm kēp “mē hkamrô pikapīr xà kamā pika”. Mē kot Jejus pīr xà hā kàxpore ho haprôr jakamā nhūm prem ã hā hixi mēnh anē. Nhūm htem arī axpēn mā ã hixi jarēnh anhÿr o pa.

⁹⁻¹⁰Nhūm pre ra amnepēm Tīrtūm nhÿ hā kapēr o pa xwÿnh finat Jeremīsti mē hkukamā hprī hā ja jarē nē hā kagà. Nē hā kagà o: Koja Ijaew nhō patrejaja mēhō kot mē kām mēhō my hā àmnēnh pānhā kām kàxpore ho 30 nē òr xwÿnhja jamÿ. Hāmri nē ma o tē nē nhÿri mē kot amnhīm pika kakwÿnh nē ho poti nhīpêx o pa xà hā pika hkwȳ japrô. Ra Tīrtūm kot inhmā mē harēnh xà hkôt koja mē ã amnhī nhīpêx anē. Anē. ã finat Jeremīsti kot Tīrtūm nhÿ hā mē hkukamā mē harēnh nē hā kagà anhÿr xàja kôt nhūm prem ã amnhī nhīpêx anē.

Pahihti Pirat kot Jejus kukjêr ã harēnh

Makre 15.2-5; Rukre 23.3-5; Juāw 18.33-38

¹¹Rôm nhūm mē pahihti Pirat wÿr Jejus o tē nē hwÿr ho axà nē kutā ãm nhūm xa nhūm Piratja omu nē kām: —E. Kwa inhmā amnhī jarē. Xà apē Ijaew nhō pahi na ka nà? Xà ka na htem amnhī wÿr ajamār o pa? Anē. Hāmri nhūm kām: —Tÿ. Nà ãm hāmri na ka ijarē. Anē.

¹²Hāmri nhūm mē hkrāhtūmjê mē patre krāhtūmjaja pahihti Pirat mā tanhmā ho kapēr punuj to. Nhūm amnhī tā mē kuma nom tanhmā kām amnhī tā àprār to hkêt nē.

¹³Jakamā nhūm pahihti Pirat tee ri ja hā omu nē kām: —Kwa xà na ka ã mē kot ato kapēr anhÿrja mar kêt nē nà?

¹⁴Anhÿr tā nom nhūm Jejus akryk xa nē axte tanhmā kām nē hkêt nē. Hāmri nhūm Pirat tee ri kot ã amnhī nhīpêx anhÿr ã omu nē hamaxpēr o: —Kokÿÿ. Mē kot ho kapēr punuj tā nhūm ãm mē kuma nē te kām mē uma hkêt pyrà nē tanhmā inhmā amnhī tā àprār to hkêt nē. Anē.

Pirat kot Jejus pīr kaxyw hā àmnēnh ã harēnh

Makre 15.6-15; Rukre 23.13-26; Juāw 18.39–19.16

¹⁵⁻²¹Tā nhūm Pirat kormā mē kot axpēn mar xà hā ixkre kamā ÿr rāhā nhūm hprōja hwÿr hpēr mē nē kām: —Xê tanhmā mē kām Jejusja ã axàmnēnh to hkêt nē. Na pa kamàt ja kamā hkôt amÿti nē tee ri hkukamā ijamaxpēr. Kot

amnhĩ to mex xwỳnh na. Aa tanhmã kot amnhĩ tomnuj to hkêt jakamã xê tanhmã mẽ kãm hã axàmnênh to hkêt nê. Kwarĩ. Anê. Hãmri nhũm Piratja kuma nê hamaxpêr o: —Nà ixte Ijaew krãhtũmjê pumunh tũm. Ijaew kwỳjaja kãm Jejus kĩnh nhũm mẽ hkrãhtũmjaja kot mẽ hã Jejus kamã gryk nê. Jakamã ixte tanhmã mẽ kãm hã ixàmnênh to kaxyw na mẽ ã ixwỳr o htêm anê. Anê. Na htem Pas nhõ arĩgrota hapôx mẽ nhũm pre htem Ijaew o amnhĩptàr xwỳnhja mẽ kãm mẽ hagjênh xà kamã hkrĩ xwỳnhjê ho hpỳnh nê mẽ hapôj. Mẽ kãm hprãm xà hkôt nhũm mẽ kãm mẽ hapôj nhũm mẽ akupỹm kapôt ã hamakêtkati nê amnhĩx pa. Jakamã nhũm ra mẽ hagjênh xà kamã mễhõ my pê Parapasja hkrĩ. Na pre tanhmã amnhĩ tomnuj to nhũm mẽ mỳrapê unê nê haxà. Jakamã nhũm Ijaewjaja mẽ ho amnhĩptàr xwỳnh Pirat wỳr akuprõ nê kuhê nhũm mẽ kãm: —E kot paj jarãhã mẽ amã mẽ hagjênh xà kamã mẽ hkrĩ xwỳnhjê hõ mã inhũre kê àmnhĩx kato nê ri pa. Nhỹ kot paj mẽ amã kãm inhũre? Xà Parapas nà? Xà mẽ akwỳ kot amnhĩm ho mẽ anhõ pahшти Jejus pê Tĩrtũm kot mẽ akaxyw ãm xwỳnhhta kot paj mẽ amã kãm inhũre? Nhỹ wehe? E mẽ inhmã nhỹ jarê. Anê. Pirat na pre mẽ inhõ patre krãhtũmjê pumunh mex nê. Ijaew kãm Jejus kapêr mar prãm tỳx ã nhũm mẽ hã kamã gryk tỳx nê hwỳr o mrarja kôt nhũm mẽ omunh mex nê. Jakamã ã hã mẽ hkukjêr anê. Hãmri nhũm mễhpigêr mẽ patre krãhtũmjaja kuma hãmri nê mẽ pikuprõnh nê mẽ kuhê xwỳnhjê mã kãm: —Kwa mẽ kãm anê kê mẽ pamã Parapas mã mãn ure nê mãmri Jejus Kris pĩ. E kwa mẽ tokyx kãm anê kê Parapas mã ure. Anê. Hãmri nhũm mẽ mẽ kuma nê pahшти Pirat mã kãm: —Nà mẽ inhmã Parapas mã mãn anhũre. Anê.

²²Hãmri nhũm tee ri mẽ kuma nê mẽ kãm: —Kwa no mẽ ate Jejus pê Tĩrtũm kot mẽ akaxyw ãm xwỳnh ã harênh xwỳnhhta? Tanhmã kot paj hipêx to? Anê. Hãmri nhũm mẽ kãm: —Apĩ ri. Tokyx pĩ kahpa hã anhô kê ty. Anê.

²³Hãmri nhũm tee ri mẽ kuma nê mẽ kãm: —Tk. Kwa nà. Tanhmã kot amnhĩ tomnuj tore hã kot pa kêt ri pĩ kahpa kunhõ nhũm ty. Anê. Hãmri nhũm mẽ

xatã àmra kamã kãm: —Kwa pĩ kahpa hã mãn anhô kê ty. Kwa tokyx ã mẽ inhmã hipêx anẽ. Anẽ.

²⁴Hãmri nhũm tee ri ja nê tanhmã mẽ kãm kapër to no nhũm mẽ mar kêt nẽ. Nhũm tee ri mẽ àmra mar o xa. Hãmri nẽ kãm Jejus pĩr prãm kêt jakamã amnhĩm gô hkwỳ janhi nẽ mẽ piitã mẽ noo mã amnhĩ nhĩhkra kuhõnh o xa. Mẽ kot hã omunh xà hkôt kãm hpĩr prãm kêt ã omunh kaxyw. Hãmri nẽ mẽ kãm: —E na pa mẽ anoo mã ã amnhĩ nhĩhkra kuhõnh anẽ ka mẽ ja hã ixpumu. Nà inhmã hpĩr prãm kêt. Tanhmã kot amnhĩ tomnuj tore hã. Mẽ kaxipixjaja mẽ amã hpĩr hprãm jakamã mẽ kam nẽ tanhmã ho. No pa kot paj tanhmã ho hkêt nẽ. ãm kwarĩ ho kwarĩ. Anẽ.

²⁵Hãmri nhũm mẽ kuma nẽ kãm: —Tôe. Nà ãm hãmri. Kot paj mẽ pamjaja amnhĩ tã htykja nhô. Nẽ mẽ ixkra nẽ mẽ ixtàmnhwỳjê mẽ amnhĩ to ixpimràatã amnhĩ tã kunhò. Kê Tĩrtũm kãm tanhmã hã mẽ ixtõ hto hprãm nẽ mamrĩ tanhmã hã mẽ ixtõ hto. Anẽ.

²⁶Hãmri nhũm mẽ kuma nẽ mẽ kãm hprãm xà hkôt mẽ kãm Jejus ã amỹnê nẽ mẽ kãm Parapas mã ure. Ra Parapas kot pahi Pirat pê õ pôristi kutã amnhĩ xãm nẽ kêp hõxpĩrja mỳrapê nhũm mẽ kot unênh nẽ haxàr tã Ijaew kãm hprãm xà hkôt akupỹm kãm ure. Hãmri nẽ õ pôristijê mã anẽ nhũm mẽ Jejus tak. Nẽ htak rax nẽ hãmri nhũm Pirat mẽ kãm hã amỹnê nhũm mẽ kot pĩ kahpa hã nhôr o hpĩr kaxyw ma o tẽ.

Pôristi kot Jejus ã hpër o pikênh ã harênh

Makre 15.16-20; Juãw 19.2-3

²⁷Tã nhũm pôristijaja mẽ kot pĩ kahpa hã Jejus nhôr kaxyw ma o tẽ nẽ pahihiti Pirat nhõrkwỹ kamã ixkre hõ hwỳr ho axà. Nhũm pôristi ohtô nẽ hwỳr akuprõ nẽ hã pěr o pikênh kaxyw axpẽn mã: —E kwa tokyj pu mẽ kãm pahi xê jaxà ri. Kêp pahi hã kot amnhĩ jarênh kênã. Anẽ.

²⁸Hãmri nẽ kêp ê kapa nẽ hpãnhã kêp pahi hã mẽ ê kamrêk mexja py nẽ kãm haxà.

²⁹Nẽ kãm pahi hã mẽ ahkà nhĩpêx nẽ hkrãm haxà. Nom axtem akunĩ kamã mẽmo mrô nhĩ te kot ronh kanêre pyræk xwỳnhja nhũm mẽ hikãx nẽ hkrãm

haxà. Nê kãm pahi hã kô gõ nhũm kupy nê o xa. Hãmri nhũm mẽ ho anhỹr pa nê kutã hkõn krã ho rôrôk nê hkrĩ hpa nê hã pěr o pikẽnh kamã kãm: — E ãm hãmri. Apê ljaew nhõ pahi punuti na ka. Anê.

³⁰Hãmri nê kànhmã kuhê nê hkuk kuhtô nê kêp kô pytã nê xatã ho hkrãx pê htak. Nhũm prem ã pěr o pikẽnh kãm hipêx anê.

³¹Hãmri nê kêp pahi hã ê kapa nê akupỹm kãm ê jaxà nê mẽ kot pĩ kahpa hã nhôr kaxyw ho kato nê ma o tẽ.

Pôristi kot pĩ kahpa hã Jejus nhôr ã harẽnh

Makre 15.22-32; Rukre 23.27-43; Juãw 19.17-25

³²Nhũm pôristijaja Jejus o kato nê ma kapôt mã o tẽ. Nê kãm pĩ kahpa pytĩja gõ nhũm kumỳ nê mẽ hkôt o hkwỳ. Nom ra hirot tỳx nê nhũm mẽ tee ri ja hã omu nê mẽhõ kot ho ajuta kaxyw mẽ kot omunh xwỳnhjê kapi ho xa. Hãmri nê Sirẽn nhõ xwỳnh Simãw kà htyk pumu nê unê nê kãm kot Jejus o ajuta kaxyw hã karõ nhũm hwỳr tẽ nê kêp pĩ kahpata mỳ nê hkôt kãm kumỳ nê o tẽ.

³³Hãmri nhũm mẽ kẽn nhĩxêt te kot mẽ hkrã hi pyrãk xwỳnhhta wỳr mẽ o pøj. Mẽ kapěr kãm na prem hixêtja jarẽnh o: “Korkot.” No mẽ pakapěr kãm Korkot jarẽnhja kêp “mẽ hkrã hi xà” nhũm mẽ ma hwỳr Jejus o pøj.

³⁴Hãmri nê mẽ kot pĩ kahpa hã nhôr kaxyw nhũm à htỳx kumrẽx kamã hamak pymaj kãm mẽmo mẽ hkanexàja gõ. Wĩhti mẽ mẽmo mry ma xà ho pihkàr nhũm mẽ kãm hkwỳ gõ. Nom nhũm hkaki nê mẽ kot amnhĩ xà htỳx kamã hamak kêt xà hã omunh kurê kumrẽx nê hkaga. Nhũm mẽ tee ri ja hã omu hãmri nê kêp ê kapa nê kumẽ nê pĩ kahpa hã kuxi nê prek o ãhkra nê hpar o htỳx pa. Hãmri nê kànhmã pĩ jarĩ nê ahkre kamã ãm nê ho htỳx nhũm kỳxpê ajêt.

³⁵Hãmri nhũm pôristi hkwỳjaja axpẽn mã ê hkwỳ ho pigrãnh kaxyw hã kẽnre ho jôka.

³⁶Hãmri nê ho anhỹr pa nê pikap Jejus jamãr o hkrĩ.

³⁷Na htem mẽ hpar kaxyw nê tanhmã mẽ kot amnhĩ tomnuj to hã kagà nê mẽ mỳri pĩ kahpa hã hanhõ. Jakamã na prem tapti hõ py nê tanhmã Jejus

ã kagà hto nẽ hã kagà ho: IJAEW NHÕ PAHI NA JÁ HIXI PÊ JEJUS Hãmri nẽ hwỳr ho api nẽ mỳri kunhõ. ã Jesus kot amnhĩ jarẽnh anhỳrja mỳrapê na prem kupĩ.

³⁸Hãmri nhũm mẽ hpãnhã wa àhkĩnh xwỳnh wa ho axkrut nẽ mãänën pĩ kahpa hã wa kunhõ. Nẽ akutã ho Jesus nhĩjê nhũm war ajêt.

³⁹Tã nhũm pry hã mẽ mrar xwỳnhjaja Jesus pumu nẽ hã hpër o pikënh o mra nẽ kãm:

⁴⁰—Kwa ka na ka pre ate Tĩrtũm mã amnhĩ jarẽnh xà hã ixkre grành par nẽ atã apkati axkrunêpxi nẽ akupỹm hipêx par ã amnhĩ jarẽ. Nẽ apê Tĩrtũm Kra hã amnhĩ jarẽ. Nẽ axàhpumunh o axàhpumunh jakamã e kwa amnhĩ kapa nẽ wrỳ pa mẽ ja hã apumu. Kwa tokyx. Anẽ.

⁴¹Nẽ patre krãhtũmjê mẽ Tĩrtũm kapër tũm o mẽ ahkre o mẽ pa xwỳnh mẽ mẽ hkrãhtũmjaja piitã hwỳr mra nẽ hã hpër o axkẽ.

⁴²Nẽ axpën mã harënh o: —E jahti na xep pre mẽ kamã ukapřĩ ho pa nẽ tanhmã mẽ ho ajuta hto ho pa. Tã nom tãm tanhmã amnhĩ to nẽ wrỳk kêt nẽ. Kwa pu mẽ arĩ pakuhê nẽ kot amnhĩ kaxàr nẽ wrỳk kãm omu. Koja wrỳ pu mẽ omu nẽ kêp mẽ panhõ pahĩhti hã hkôt pajamaxpër kurê kumrëx. E tokyx wrỳ Jesus. Pa mẽ awrỳk kãm apumu. Nà kot kaj awrỳk rax nẽ.

⁴³Na hte amnhĩ kaxyw Tĩrtũm mã hamaxpër o pa. Nẽ kêp Kra hã amnhĩ jarẽnh o pa. Jakamã e. Kê Tĩrtũm tãm hwỳr tẽ nẽ kêp Kra hã akupỹm mẽ pahpê utà. Anẽ.

⁴⁴Hãmri nhũm wa kot akutã hijê nẽ jêt xwỳnhhta wa haxwỳja mẽ mar xà hkôt mã ho kapër anẽ.

Jejus tyk ã harënh

Makre 15.33-41; Rukre 23.44-49; Juãw 19.28-30; mãänën Eprêw 10.19-20

⁴⁵Tã nhũm kaxkwa nhĩpòk ri myt ỳr mẽ nhũm te kamàt pyràk nhũm kamàt kô rax kumrëx. Jao hã awry mẽ nhũm ra akupỹm myt katêr o mỗ.

⁴⁶Hāmri nhūm Jejus kapēr kām hihtỳx nē àmra htỳx kām Tĩrtũm mǎ kapēr nē kām: —Inhõ Tĩrtũm inhõ Tĩrtũm. Kwa mon ka ixkaga? Anē. Nom kapēr kamǎ kām kapēr o: —Eri Eri. Rāmǎ sapatani. Anē.

⁴⁷Hāmri nhūm mē kot mar xwỳnhjaja kot Eri jarēnh ã kuma nē htỳx ho finat Eris mǎ kapēr ã hkamnhĩx.

⁴⁸Nhūm Jejus par pē guhkrax kām wĩhti punure xa. Jakamǎ nhūm mē ã kapēr anhỳr ã kuma nhūm mēhõ kām hkaprĩ nē. Hāmri nē mēmo rerek py nē o tē nē kaxyw pĩ rytija py nē ho hkanhwỳ. Nē akupỳn o tē nē ho wĩhti nhek nē Jejus kot hkaôr kaxyw kām kupē.

⁴⁹Hāmri nhūm hkwỳjaja tee ri ja hǎ omu nē nē kām kapēr nē kām: —Tk. Kwa nhām xa. Pu mē kop Eris jamǎ mǎn. Kojã hwỳr tē nē ho wrỳk japēr. Anē.

⁵⁰Hāmri nhūm kamàt kô mē nhūm Jejus ra htyk kaxyw nē axte àmra htỳx nē hāmri nē ty.

⁵¹Tykja kôt nhūm Tĩrtũm mǎ amnhĩ jarēnh xà hǎ ixkre kamǎ hakwakre hǎ kupēxēja kỳj rũm ahpar mǎ axkjê nē amnhĩ kahê xà mēnh kurê kumrēx. Utĩ rax tǎ axkjê nē amnhĩ kahê xà mē. Te Jejus htyk o te kot mē pahte hkôt amnhĩ xunhwỳr xwỳnhjê mǎ Tĩrtũm wỳr pry jakwa kre kahê xà mēnh pyræk o ã amnhĩ nhĩpêx anē. Nhūm pika htertet tỳx kumrēx o kēn rũnh kwỳ ohtô nē hkrakrak pa.

⁵²Hāmri nhūm mē htyk ã pika kamǎ mē htykjê nhõrkwỳ ho ohtô nē mē hǎ axkjê nhūm mē hikwỳ xwỳnhjaja akupỳm htĩr nē hapôj nē kuhê. Na prem kormǎ htyk kêt ri amnhĩ kaxyw Tĩrtũm kôt hamaxpēr. Tǎ nhūm Jejus ty nhūm mē ohtô nē akupỳm htĩr nē hapôj nē kuhê.

⁵³Nom kormǎ nhỹhỹm mrar kêt nē. Arĩ mē hǎ pika nhĩpy Jejus akupỳm htĩr ã hamǎr o kuhê. Tǎ nhūm Jejus apkati hõ hǎ akupỳm htĩr ã arĩgrota ã nhūm mē rĩ kormǎ ma Jerujarē hwỳr mra nē hwỳr agjê nhūm mē ohtô nē akupỳm mē htĩr ã mē omu.

⁵⁴Nhũm kormã Jejus htyk o mōrta ã nhũm pōristi krāhtũm mẽ pōristi hkwyjaja hãmri hparpê hamār o kuhê nẽ htyk kãm omu. Nẽ pika htertet kamã ama nẽ mẽmoj kot tanhmã amnhĩ nhĩpêx toja pumu nẽ tee ri hamaxpêr nẽ kãm ma htỳx kumrêx. Hãmri nẽ axpên mã: —Hêxta waa nẽ. Pêr ãm hãmri na pre htyk xwỳnhta amnhĩ jarê. Kêp Tĩrtũm Kra kênã. Tã pu mẽ amarĩ pahtỳx kupĩ. Anẽ.

⁵⁵⁻⁵⁶Nhũm pre mẽnijaja ohtô nẽ amỳm Jejus tyk kãm omunh o kuhê. Marir Matarêñ nẽ Xiakre mẽ Juje wa katorxà Marir nẽ Xiakre hõ mẽ Juãw wa katorxàja nhũm mẽ kormã htyk kãm omunh o kuhê. Na prem Garirej rũm hkôt tanhmã ho ajuta hto ho hkôt Jerujarê wỳr mō.

Mẽ kot Jejus jaxàr ã harênh

Makre 15.42-47; Rukre 23.50-56; Juãw 19.38-42

⁵⁷Tã nhũm ra myt grire nhũm krĩ pê Arimatej rũm hikàxpore rax xwỳnh pê Jujeja tẽ. Nom axtem Juje hõ na pre. Ra kot Jejus kôt amnhĩ xãm jakamã kãm ho wrỳk nẽ haxàr prãm nẽ.

⁵⁸Hãmri nẽ ma pahi Pirat wỳr tẽ nẽ ã hã kuwỳ nẽ kãm: —E ot pa awỳr tẽ. Kwa inhmã htyk xwỳnhta gō pa ma o tẽ nẽ haxà nà? Anẽ. Hãmri nhũm kuma nẽ kãm harê nhũm ma o tẽ nẽ haxà.

⁵⁹Kaxyw kupêxê mex ò py nẽ ho hkupu pa

⁶⁰nẽ ma o tẽ nẽ ò kên kre kamã haxà. Na pre htyk kukamã kên kre kakwỳ nhũm mẽ kot kormã kamã mẽhõ jaxàr kêt tã kamã na pre Jejus jaxà. Hãmri nẽ hã kên rax ò xãm nẽ ho hitom nẽ ma akupỳm tẽ.

⁶¹Nhũm Marir Matarêñ mẽ Marir òja wa kên kreta kapem omunh o wa nhỹ.

Pōristi kot kên kre jamār o kuhê ã harênh

⁶²Tã nhũm apkati nhũm mẽ inhõ arĩgromnu pê sap kato. Hãmri nhũm Parijew nhõ xwỳnhjê mẽ patre krāhtũmjaja ma pahi Pirat wỳr mra nẽ kãm:

⁶³—Kwa pahihiti. Nà amnhĩ to hêx o pa xwỳnhta na pre kormã htĩr nẽ pa ri tanhmã amnhĩ jarênh to ho pa. Nẽ nhỹrmã ty nẽ htyk ã apkati axkrunêpxi pix nẽ akupỳm htĩr ã amnhĩ jarê.

⁶⁴Jakamã kwa hwỳr anhõ pôristi hkwỳ rē kê mẽ ma hwỳr mra nē hamãr mex o apkati axkrunēpxi. Kot ka anhỳr kêt nhũm hkôt mẽ pa ho mẽ pa xwỳnhjaja ma hwỳr mra nē ho ahkĩ nē ma o mra nē nhỹri haxà nē mẽ piitã mẽ kãm ra akupỹm htĩr ã harēnh o hēx o pa. Te tãm kot amnhĩ kukamã amnhĩ jarēnh pyræk. Nom mẽ kot axte ã harēnh anhỳrja koja omnuj tỳx o tãm kot ã amnhĩ jarēnh anhỳrja jakre. Anē.

⁶⁵Hãmri nhũm mẽ kuma nē mẽ kãm: —Tôe. Nà koja mẽ ho anē. E mẽ ma hwỳr amnhĩ kôt pôristi hkwỳ ho mra kê mẽ hakwakre kahê xà jamãr mex o kuhê. Anē.

⁶⁶Hãmri nhũm mẽ kuma nē ma hwỳr mra nē hakwakre hã kēn raxta o htỳx pa. Nē mẽhõ kot omunh nē kahê mẽnh pymaj menh ê ho hkukõ. Hãmri nē ho anhỳr pa nē pôristi mã kãm: —E Kêr ka mẽ jar kuri hamãr mex o akuhê. Kê mẽhõ tē nē tanhmã ho hkêt nē. Anē.

Matêwre 28

Jejus akupỹm htĩr ã harēnh

Makre 16.1-8; Rukre 24.1-12; Juãw 20.1-10

¹Tã nhũm apkati nhũm tòmĩk. Hãmri nhũm Marir Matarēn mẽ Marir õja kwỳhtã kànhmã nhỹ nē ma akupỹm kēn kreta wỳr wa tē.

²Puh nhũm pika htertēt tỳx nē nhũm Tĩrtũm kapēr o mẽ wrỳk xwỳnhja kēn kre wỳr wrỳ nē nhãm hakwakre nē kēn raxta mẽ nē hã nhỹ.

³Hirã htỳx kãm nhỹ. Te na jaxēnh pyræk. Nē ê haka htỳx kumrēx.

⁴Nhũm pôristijaja tee ri omu nē kãm ma htỳx nē htertēt nē umaj pikap rôrôk pa nē te htyk pyrà nē hikwỹ.

⁵Hãmri nhũm wa nita kēn kre hwỳr pøj nē tee ri Tĩrtũm kapēr o mẽ wrỳk xwỳnhhta pumu. Nhũm wa kãm: —Kwa wa amã ma hkêt nē. War ate Jejus pumunh kaxyw na ka wa tē. Mẽ kot pĩ kahpa hã nhôr xwỳnhhta.

⁶Nom jar amrakati. Na ra akupỹm htĩr nē kato nē ma tē. E wa kam nē amnē axà nē nôr xà kaprỳ pumu. Anē. Hãmri nhũm wa kuma nē tee ri kēn kre kamã Jejus japêr nhũm kamã amrakati.

⁷Hāmri nhūm Tirtūm kapēr o wryk xwýnh wa kām: —E wa tokyx ma akupým tē nē hkôt mē pa ho mē pa xwýnhjê mã harē. Kojā ma Jejus mē akukamā akupým Garirej wýr mō. Garirej kamā kot kaj mē axte axpēn pumu. Ra kot mē amā amnhī jarēnh xà hkôt. E kwa wa tokyx ma akupým mē hwýr tē. Anē.

⁸Hāmri nhūm wa kuma nē ma akupým hprôt nē htēm kurê kumrēx. Kām ma htā hkīnh nē. Nē ma Jejus kôt mē pa ho mē pa xwýnhjê mã ujarēnh kaxyw ma mē hwýr hprôt nē wa tē.

⁹Pu nhūm ra Jejus tām wa kutā tē nē wa hkaxpa. Hāmri nē wa haēr pē wa kām kapēr nē wa kām: —Pa? Nhýhým na ka wa tē? Anē. Hāmri nhūm wa omu nē hkīnh tỳx kumrēx nē hwýr hprôt nē hpar pē hkōn krā ho tēm nē akutā hpar ã kumý nē kām mex o mex ã harē nē kām: —Hêxta gàà nē. Ma amex kumrēx. Amex o amex. Anē.

¹⁰Hāmri nhūm wa kām: —E war amā ma hkêt nē. Mamrī ma tē nē ixkôt mē pa ho mē pa xwýnhjê mã ijarē kê mē ma Garirej wýr mra. Kamā kot paj mē axte axpēn pumu. Anē.

Pôristi kot kàxpore hprām xàj Jejus o hêx ã harēnh

¹¹Rôm nhūm pôristi hkwýjaja akupým tām hkrā hāmri nē ma kēn kreta rŭm akupým krīm mra. Hāmri nē patre krāhtŭmjê hwýr mra nē mē kām ujarēnh pa.

¹²Hāmri nhūm mē tee ri mē kuma nē mēhpigêtjê ho akuprō nē mē hā axpēn mar o hkrī. Hāmri nē axpēn mar pa nē pôristi mã amnhīrer rax nē mē kām:

¹³—E mē amnhīm kàxpore jamý nē ma ri ã mē kām amnhī jarēnh anhýr o apa. Nom kêr ka mē kām amnhī to axêx nē mē kām: “Na pa prem kēn kre kapem ixtỳx gōr nē inhīkwý nhūm Jejus kôt mē pa ho mē pa xwýnhjaja mra nē mē ixpê ĩ ho ahkī nē ma o mra.” Anhýr o mē kām amnhī to axêx o apa. Mē ixte kàxpore ho mē amā amnhīrerta pānhā.

¹⁴Kojā pahihiti Piratja mē anhôt ã mē ajarēnh ma nē hā tanhmā mē ato kaxyw hā kot paj mē axy pē tanhmā kām ixkapēr to nhūm tanhmā mē ato

hkêt nê. Jakamã e. Mẽ tee ri amnhĩ kukamã ajamaxpêr kêt nê. Mẽ mãmri ma mra nê ã mẽ kãm axujarênh anhÿr o ri apa. Anê.

15Hãmri nhũm mẽ kuma nê mẽ kot amnhĩ to hêxta pãnhã kàxpore jamÿ nê ma mẽ mar xà hkôt mẽ piitã mẽ kãm Jejus kôt mẽ pa xwÿnhjê ho hêx o pa. Tã na htem arĩ jarãhã Ijaewjaja ã axpên mã mẽ harênh anhÿr rãhã ho pa.

Jejus kot hkôt mẽ pa ho mẽ pa xwÿnhjê mã mẽ àpênh ã karõ

Makre 16.14-18; Rukre 24.36-49; Juãw 20.19-23; Atre 1.6-8

16Tã pa mẽ ixte Jejus kôt ixpa ho ixpa xwÿnh pê 11jaja hãmri akupÿm Jejus htĩr ã harênh ma hãmri nê ma Garirej wÿr mra. Nhÿri Jejus kot mẽ inhmã mẽmo hixêt prêk jarênhja wÿr.

17Nê ra hwÿr ixpôx o mrar mẽ Jejus pumu. Tã nom nhũm mẽ ixkwÿjaja tee ri omu nê htÿx ho nhãm mēhõ hã hkamnhĩx. No kêt mẽ pajaja na pa prem ixprĩ hã omunh kurê kumrêx nê ixkĩnh tÿx nê. Nê ixkĩnh nê hwÿr ixprôt nê kãm: —Pa Jejus? Hêxta waa nê. Amex o amex. Anê.

18Hãmri nhũm mẽ inhmã: —E na pre Tĩrtũm ã inhmã kapêr anê nê inhmã: “E kêr ka amnhĩ nhÿ hã mẽmoj piitã tanhmã ho ho apa. Kaxkwa kamã nê pika kamã. Mamrĩ nhÿhÿm amnhĩ krã hkôt amã tanhmã amnhĩ to hprãm xà hkôt tanhmã amnhĩ nhĩpêx to ho ri apa.” Anê. Na pre mẽ akaxyw ã inhmã kapêr anê.

19—Jakamã e. Kêr ka mẽ ma pika piitã hkôt ri mẽ kãm ijarênh o ri apa. Kê mẽ ixte mẽ nê tanhmã amnhĩ nhĩpêx to hã ijarênh ma hãmri nê ixkôt amnhĩ xunhwÿ nê ixkôt ri amnhĩ nhĩpêx o pa. Nê kêr ka mẽ ja hã mẽ omu nê Tĩrtũm mẽ wa inhmã mẽ hkrã kumrã. Wa ixkarõ nhÿ hã mẽ hkrã kumrã. Mẽ kot wa inhÿ hã pix mã tanhmã amnhĩ nhĩpêx to ho pa kaxyw.

20—Nê mẽ kãm anê kê mẽ ixkapêr piitã hkôt amnhĩ nhĩpêx rãhã ho pa. E kêr ka mẽ ma mẽ kãm ã ijarênh anhÿr o ri mẽ hkôt apa. Kot paj mẽ anhĩhkô hã ri ixpa rãhã nhũm nhÿrmã pikaja hapêx o hapêx. Anê. Na pre ã Jejus mẽ inhmã mẽ ixàpênh ã karõ anê. Matêwre kot Jejus jarênh nê hã kagàja ja kôt na hapêx.

Makre

Makre 1

Matêwre 3.1-10; Rukre 3.1-9; Juãw 1.6-8; 1.19-23

¹Pa Kris kôt ixkràmnhwỳjaja. E kot paj mẽ amã tanhmã Jejus kot amnhĩ nhĩpêx to ho pa hã kagà ka mẽ kamã harẽ nẽ ama. Kêp Tĩrtũm Kra na. Tãm na pre mẽ pakaxyw ãm nẽ mẽ pahwỳr kumẽ. Tã tãm kot mẽ pahwỳr wrỳk nẽ tanhmã amnhĩ nhĩpêx to ho paja kot paj mẽ amã ixprĩ hã harẽ nẽ hã kagà ka mẽ kamã harẽ nẽ ama.

Juãw Paxis kot Jejus kukamã harẽnh

²Kormã Jejus mẽ pahwỳr wrỳk xwỳj ri na pre Tĩrtũm nhỹ hã kapêr o pa xwỳnhjê hõ pê Ijaisja kukamã tanhmã harẽnh to nẽ hã kagà. Nẽ Jejus kukamã harẽnh o mõi xwỳnh Juãw Paxisja nhũm pre mãănẽn hkukamã tanhmã harẽnh to nẽ hã kagà. Te Tĩrtũm tãm hamaxpêr pyræk o harẽ nẽ harẽnh o: E kot paj Ixkra hkukamã ma mẽ hwỳr kot harẽnh xwỳnhjê hõmẽ kê ma kutêp mẽ kãm harẽnh o ri pa. Kê mẽ kuma nẽ kutêp tãm amnhĩ nhĩpêx mex o pa.

³Koja kukamã harẽnh xwỳnhja ma kapôt ã ri hwỳr mẽ mrar xwỳnhjê mã harẽnh o ri pa. Nẽ kỳx pê mẽ kãm kapêr nẽ mẽ kãm: “E mẽ inhma. Koja Tĩrtũm tokyx mẽ pahwỳr mẽ panhõ Pahihti mẽ nhũm wrỳ pu mẽ pahpiitã omu. Jakamã kwa mẽ tokyx kutêp tãm amnhĩ nhĩpêx. Te ho mẽ kot mẽhõ kutêp pry ho mex pyræk o amnhĩ nhĩpêx. Nom pry kumrêx o mex kêt nẽ. ãm amnhĩ nhĩ ho tãm amnhĩ nhĩpêx nẽ tãm axpẽn nhĩpêx. Pahihtita kutêp. Mẽ pahte amnhĩ nhĩpêx tũmja te kot pry nhĩnur nẽ krã hakỳx nẽ pry juk nhũm mẽ tee ri kot kãm hã mrar mex prãm kaprỳ pyræk. Jakamã kot kaj mẽ Pahihti nyw kutêp ate amnhĩ tomnuj kaga nẽ tãm amnhĩ nhĩpêx nẽ tãm axpẽn nhĩpêx. Hãmri nẽ te mẽ kot pry nhĩnur o mex nẽ ho katàt nhũm ra katàt mux nẽ nõi pyræk o amnhĩ nhĩpêx. E kwa kêr ka mẽ ã kutêp amnhĩ nhĩpêx anẽ.” Anhỹr o koja mẽ kãm harẽnh o pa. Anẽ. Na pre ã Tĩrtũm Juãw Paxis kukamã harẽnh anẽ nhũm ã hã kapêr xwỳnh pê Ijaisja mẽ pamã hã kagà.

⁴Tã ra kot harënh xà hkôt nhũm Juãw Paxisja tẽ. Hãmri nẽ kapôt ã ri mẽ kãm Tĩrtũm kapër jarënh o pa nẽ mẽ kãm: —Kwa mẽ tokyx amnhĩ tomnuj kaga nẽ tãm ri amnhĩ nhĩpêx. Kê Tĩrtũm ja hã mẽ apumu nẽ mẽ anê mẽ ate amnhĩ tomnuj rënh pa nẽ mẽ ato hkra. Pa mẽ piitã mẽ kot ra mẽ apê hkra hã mẽ apumunh kaxyw mẽ akrã kumrã. Anẽ.

⁵Hãmri nhũm mẽ ohtô nẽ kot kapër mar kaxyw ma nhỹhỹnh hwỳr kapôt mã mra. Pyka pê Jutej rũm nẽ Jutej kamã krĩ pê Jerujarẽ rũm nhũm mẽ ohtô nẽ hwỳr mra. Hãmri nẽ nhỹri omu nẽ kãm: —E ixte amnhĩ tomnuj kaga hprãm xàj na pa awỳr amnhĩ to tẽ. Na pa hte amnhĩ tomnuj pix o ri ixpa. Tã tee ri ja hã amnhĩ pumu nẽ ixkaprĩ nẽ. Hãmri nẽ ra inhmã amnhĩ tomnuj kaga nẽ tãm amnhĩ nhĩpêx prãm nẽ. Anhỹr ã amnhĩ jarẽ. Hãmri nhũm Tĩrtũmja kaxkwa kamã hkrĩ htã mẽ kuma nẽ amnhĩ katut kôt mẽ kot amnhĩ tomnuj piitã rënh pa nẽ axte kãm hamaxpër kêt nẽ. Jakamã nhũm Juãw Paxis gôx kãm mẽ hkrã kumrã. Pyhti pê Jotãw kamã.

⁶Juãw Paxisja hikàxpore hkêt jakamã na pre ê mex kêt nẽ pa. ãm mẽmo mry pê kamer kĩ ho amnhĩm ê nhĩpêx nẽ hagjê nẽ hã pa. Nẽ mẽmo mry hkà ho amnhĩ pre nẽ ri pa. Nẽ mẽõ mex kur kêt nẽ ãm krit ku nẽ menh ôr o ri pa.

⁷Hãmri nẽ mẽ kãm tanhmã Jejus jarënh to ho pa nẽ mẽ kãm: —E mẽ inhma. Kojã tokyx Tĩrtũm kot mẽ pakaxyw ãm xwỳnhta mẽ pahwỳr wrỳ. Ahpumunh tỳx o kot ijakrenh jakamã na pa hte ãm kukwak ri ixpa nẽ amnhĩ tã hã xpijaàm rãhã ho ri ixpa. Te ixkrãm ã xpijaàm o amnhĩ nhĩpêx pyræk.

⁸Na pa hte gô pix o Tĩrtũm mã mẽ akrã kumrãr o ri ixpa. Nom mẽ pahwỳr wrỳk mã xwỳnhja kojã mẽ awỳr Tĩrtũm Karõ rẽ nhũm mẽ akaxwỳnh mã agjê. Ka mẽ ỹ hã tãm ri amnhĩ nhĩpêx rãhã ho ri apa. Anẽ.

Juãw Paxis kot Jejus krã kumrãr ã harënh

Matêwre 3.13-17; Rukre 3.21-22; Juãw 1.32-34

⁹Tã nhũm Jejusja tãm Juãw Paxis wỳr tẽ. Garirej kamã krĩ pê Najare rũm ma hwỳr tẽn pôj. Hãmri nhũm Juãwja hkrã hkumrã. Pyhti pê Jotãw kamã hkrã kumrã.

¹⁰Hāmri nē wa gōj rūm api nē mỳr ri kaxkwa pumunh o xa. Nhūm kaxkwa axkjê nhūm kurūm Tīrtūm Karō te tuuti pyrà nē Jejus wỳr wrỳk o tē nē ĩkre hã xa nhūm amnhĩ tã omunh o xa.

¹¹Hāmri nhūm Tīrtūm kaxkwa rūm kãm kapēr nē kãm: E apê Ixkra mex na ka. Ām hāmri na ka hte ixkanrēhã amnhĩ nhĩpêx mex o apa. Inhmã ajapê kamã na ka ri apa ho apa. Anē.

Jejus kot Satanasti kaga hã harēnh

Matêwre 4.1-11; Rukre 4.1-13; määnēn Eprêw 2.18; 4.15

¹²Tã nhūm Tīrtūm Karōja ma kapôt mã Jejus o mō

¹³nhūm kapôt ã mry xoprê kaêx ã ri mrar o hã arĩgro pē 40. Hāmri nhūm Satanasti omu nē ma hwỳr tē nē ri hkôt pa. Kapôt ã ri hkôt hêx rom tanhmã kãm kapēr to nhūm kot mar nē hkôt amnhĩ xãm prãm xàj ma hkôt pa. Nom nhūm Jejus hkaga kumrēx nhūm tee ri ho anhỳr kaprỳ nē ma akupỹm tē. Hāmri nhūm Tīrtūm kapēr o mẽ wrỳk xwỳnhjaja Jejus wỳr wrỳ nē tanhmã ho mex to.

Jejus kot Tīrtūm mã àpēnh krax ã harēnh

Matêwre 4.12-17; Rukre 4.14-15

¹⁴Nhūm pre ra mẽ ixpê Ijaew o amnhĩptàr xwỳnh pē Eroxa Juãw Paxis kot mẽmoj tã kãm àkjêr mỳrapê nhūm pre ra unê nē haxà. Tã kot haxàr jakành pē nhūm Jejus ma akupỹm pyka pē Garirej wỳr mō nē kamã mẽ kãm Tīrtūm kapēr jarēnh o pa. Nē Tīrtūm kot mẽ hwỳr mēnh ã amnhĩ jarēnh o pa. Nom te nhām mẽhõ jarēnh pyràk o amnhĩ jarē

¹⁵nē mẽ kãm: —E na Tīrtūm kãm mẽ ato hkra hprãm nē. Jakamã na ra kot mẽ awỳr ãm xwỳnhnta mẽ nhūm mẽ awỳr wrỳ. Kwa mẽ tokyx kapērja ma nē amnhĩ kaxyw hkôt ajamaxpēr. Hāmri nē ate amnhĩ tomnuj kaga nē Tīrtūm kôt măn amnhĩ nhĩpêx o ri apa. Kot kaj mẽ ã amnhĩ nhĩpêx anē nhūm Tīrtūm amnhĩ tã mẽ apumu nē mẽ ato hkra. Anē.

Jejus kot amnhĩ kôt tep pynēnh xwỳnh wa hwỳr ã harēnh

Matêwre 4.18-22; Rukre 5.1-11

¹⁶Tã nhūm Jejus ma Garirej kamã gō rax pē Garirej mỳri mō. Hāmri nē Simãw mẽ htõ Andreja wa hwỳr kato nē wa omu. Wa kot tep pynēnh xwỳnh

jakamã na pre wa gôx kãm kryhti rēnh o xa nhũm Jejus wa hãnh tē nē wa omu.

¹⁷Hãmri nē amnhĩ kôt wa kuwỳ nē wa kãm: —E war amnē ixkôt tē nē ixkôt mãn apa. War apê tep kanhêr rax o ri apa xwỳnh tã kêr ka war axàpênhta kaga nē hpãnhã ixkôt apa ho apa. Kot paj tanhmã war akrã hto ka wa tep pynēnh pãnhã ma ri mē hkôt mē kãm ixkapêr jarēnh o ri apa. Mē ohtô nē mē kot war amar nē Tĩrtũm kôt amnhĩ xunhwỳr kaxyw. Jao kot kaj te war ate tep kanhêr rax nē Tĩrtũm mã òr pyràk o amnhĩ nhĩpêx. Anhỳr o wa kãm kapêr.

¹⁸Hãmri nhũm wa kuma nē kryhti kaga nē ma hkôt pa ho pa kurê kumrêx.

¹⁹Hãmri nē mē gô mỳri mō nē Jepetew kra Xiakre mē htō Juãw wa hwỳr kato nē wa omu. Nhũm wa kormã hipêêxà nhĩhkô hã pàr kãm kryhti ho mex o wa nhỹ nhũm Jejus wa mē hwỳr kato nē wa omu nē amnhĩ kôt wa kuwỳ.

²⁰Hãmri nhũm wa kuma nē ma hkôt pa ho pa. Pàr kre kamã mē kãm àpēnh xwỳnhjê ri hipêêxà re nē ma Jejus kôt pa ho pa.

Jejus kot mēhō nē mēkarōmnuti janor ã harēnh

Rukre 4.31-37

²¹Hãmri nhũm Jejus mē hkôt mē pa ho mē pa xwỳnhjaja ma krĩ pē Kapanaũ hwỳr mō hãmri nē hwỳr pøj. Hãmri nhũm mē ixpê Ijaewjê nhō arĩgromnu pē sap kato nhũm Jejus ma Tĩrtũm kapêr o mē ahkre xà hã ixkre hwỳr tē nē hwỳr axà. Hãmri nē kamã mē kot Tĩrtũm kapêr mar kaxyw axpēn wỳr mē pikuprōnh xwỳnhjê jahkre ho nhỹ.

²²Nē mē ahkre mex nhũm mē kuma nē tee ri hamaxpêr nē axpēn mã: —Hêxta waa nē. Pêr ãm hãmri na ã mē pamã mēmoj jarēnh anē. Tĩrtũm kapêr tũm o mē ahkre xwỳnhjê rom àhpumunh tỳx kôt na hprĩ hã mē pajahkre mex nē. Anē.

²³Hãmri nhũm mēhō myja mē hwỳr axà. Na pre ra mēkarōmnuti hwỳr axà nhũm ÿ hã amnhĩ tomnuj o pa. Hãmri nē mē hwỳr axà nē Jejus pumu nē kãm kapêr. Nom tãm kapêr kêt nē. Mēkarōmnuti nhỹ hã kãm kapêr. Kàx pē kãm kapêr nē kãm:

²⁴—Pa Jejus? Kwa tanhmã mẽ ixto hkêt nê. Ixte apumunh mex. Apê Najare nhõ xwỳnh tã mãănên apê Tĩrtũm kot mẽ ixwỳr amẽn h xwỳnh maati na ka. Tĩrtũm rũm na ka pre mẽ ixwỳr wrỳ. Kwa xà kot kaj mẽ ixto ajapêx nà? Anê.

²⁵Hãmri nhũm kãm: —Tk. Kwa anhĩkrê nê myta kurũm akator kurê kumrêx. Anê.

²⁶Hãmri nhũm kuma nê àmra htỳx kãm myja o àk tỳx nê kêp kato nê ma tẽ nhũm akupỹm mex.

²⁷Hãmri nhũm mẽ piitã omu nê kamã no pyrna nê. Hãmri nê xatã axpẽn mã harẽn h o pa nê axpẽn mã: —Kokỹỹ. Jejus na pre àhpumunh tỳx kôt mẽkarõmnuti jano nhũm kuma nê mẽ kurũm hapôx kurê kumrêx. Anê.

²⁸Hãmri nhũm Garirej kamã mẽ piitã ri axpẽn mã harẽn h o pa.

Jejus kot akupỹm Simãw xupãnhgêx o mex ã harẽn h

Matêwre 8.14-15; Rukre 4.38-39

²⁹Tã nhũm Jejus Xiakre mẽ Juãw merohã Tĩrtũm kapêr o mẽ ahkre xà hã ixkre rũm kato nê ma Simãw mẽ Andre wa õrkwỹ hwỳr mõ.

³⁰Hãmri nê mẽ hwỳr agjê. Nhũm Simãw xupãnhgêxja ra à nê hkà kagro htỳx nê nõ nhũm Jejus mẽ hwỳr axà nhũm mẽ kãm harê.

³¹Hãmri nhũm mẽ kuma nê hwỳr axà nê omu nê hpa hã kupy nê kàn hmã ỳr nhũm hkà hakry nê akupỹm mex kurê kumrêx. Hãmri nê kàn hmã xa nê tẽ nê mẽ kãm mẽmoj nhĩpêx nhũm mẽ hkur o hkrĩ.

Jejus kot akupỹm mẽ hkwỳjê ho mex ã harẽn h

Matêwre 8.16-17; Rukre 4.40-41

³²⁻³³Tã nhũm myt axà nhũm mẽ ohtô nê Simãw mẽ Andre wa õrkwỹ hwỳr mra nê hakwakrem Jejus ã akuprõ. Nê amnhĩ kôt mẽ à xwỳnhjê ho mra. Nê mẽkarõmnuti kot mẽ hwỳr gjêx xwỳnhjaja nhũm mẽ hwỳr mẽ o mra.

³⁴Hãmri nhũm Jejus mẽ omu nê akupỹm ahpỹnhã mẽ piitã mẽ ho mex pa. Nê mẽkarõmnutija nhũm mẽ kurũm mẽ hapôj. Mẽkarõmnuti kot kêp Tĩrtũm Kra hã omunh tã no nhũm kapêr nê mẽ hkurê nê mẽ hano nhũm mẽ kapêr kêt rãhã mẽ kurũm hapôj nê ma mra.

Jejus kot Tirtüm mã amnhĩ jarēnh ã harēnh

Rukre 4.42-44

35Tã nhũm apkati nhũm kormã myt kator kêt ri nhũm Jejus kànhmã nhỹ nẽ tẽ nẽ kato. Hãmri nẽ ma kapôt ã ahte nhỹhỹm tẽ nẽ nhỹri Tirtüm mã amnhĩ jarēnh o nhỹ.

36Hãmri nhũm Simãw Pêtre mẽ hkwỳjaja hkrã hapôj nẽ tee ri ixkre kamã hapêr. Hãmri nẽ hapôj nẽ ma hpri jakop o mō.

37Hãmri nẽ hwỳr kato nẽ omu nẽ kãm: —Pa. Kwa na mẽ piitã tee ri ajapêr. Anẽ.

38Hãmri nhũm mẽ kãm: —Tô ma pu mẽ mō. Nom kot puj mẽ akupỹm mẽ hwỳr pamōr kêt nẽ. Kot puj mẽ hpãnhã nhãm krĩ hkwỳ hkôt măn ri pajapôj. Pa kamã mẽ kãm Tirtüm kapêr jarē măn. Ja kaxyw na pre mẽ awỳr inhmẽ. Krĩ piitã hkôt mẽ pa xwỳnhjaja kot kapêr mar kaxyw. Anẽ.

39Hãmri nẽ mẽ ma axte Garirej kamã krĩ hkwỳ hkôt pa. Nẽ krĩ piitã hkôt Tirtüm kapêr o mẽ ahkre xà hã ixkre kamã mẽ kãm Tirtüm kapêr jarēnh o pa. Nẽ mẽ kurũm mẽkarõmnuti japôx o pa.

Jejus kot akupỹm mẽhõ hkàmnu ho mex ã harēnh

Matêwre 8.1-4; Rukre 5.12-16

40Tã nhũm mẽhõ hkà hkro xàpêr tỳx xwỳnhja Jejus wỳr tẽ. Hãmri nẽ hã hpijaàm kaxyw kutã hkõnkrã ho tẽm nẽ nhỹ nẽ kãm: —Pa Pahihti. E ot pa awỳr amnhĩ to tẽ. Akupỹm ate mẽ ixto mex kaxyw axàhpumunh tỳx jakamã kot ka akupỹm amã ixto mex prãm nẽ mãmri akupỹm ixto mex. Anẽ.

41Hãmri nhũm kuma nẽ kamã ukapri nẽ hã ãhkra xi nẽ kãm: —Nà kot paj ato mex. E akupỹm akà mex.

42Anhỹrja kôt nhũm akupỹm hkà mex kurê kumrêx.

43-44Hãmri nhũm Jejus kãm kapêr kãm hihtỳx nẽ hano nẽ kãm: —E kêr ka amnhĩ tã akwỳjê mã tanhmã ijarēnh to hkêt rãhã ma patre hwỳr tẽ kê akupỹm akà mex ã apumu. Hãmri ka amnepêr Mojes kot mẽ ate akupỹm mẽ amex ã Tirtüm mã tanhmã amnhĩ nhĩpêx to hã karõ xwỳnhhta ka kãm ho anẽ. Kê mẽ piitã akupỹm akà mex ã apumu. Anẽ.

⁴⁵Hāmri nhūm kuma nē ma tē. Nom axtem nē ma mē piitā mē kām amnhī jarēnh o ri mra. Jejus kot kām karō xà kuhpa hā ma mē kām amnhī jarēnh o ri mra. Jakamā nhūm mē kuma nē piitā nhỹhỹnh Jejus wỳr mra. Mē ohtō rax kumrēx nē hwỳr mra nhūm tee ri mē noo mā nhỹri krīm pa mā. Hāmri nē ãm krĩ pu hā ri pa htā nom nhūm mē arĩ ohtō nē hwỳr mra.

Makre 2

Jejus kot akupỹm ĩ kamā htyk xwỳnh o mex ã harēnh

Matêwre 9.1-8; Rukre 5.17-26; Juāw 10.37-38

¹Tā nhūm Jejus hā apkati grēre nē hkôt mē pa ho mē pa xwỳnhjê mērohā ma akupỹm Kapanau wỳr mō. Hāmri nē hwỳr pōj nhūm mē piitā nhỹri mēhō nhōrkwỹ kamā hpōx kôt harēnh ma nē hā akuprō.

²Ra hā pikuprōnh rax nē ixkre nhĩtom pa. Nhūm mē hkwỳjaja kapôt ã kuhē nhūm Jejus Tĩrtũm kapēr o mē ahkre ho nhỹ.

³Hāmri nhūm mēmyjaja kēp kwat nē ĩ kamā htyk xwỳnhja mỳ nē Jejus kot ho mex kaxyw hwỳr o tē.

⁴Hāmri nē tee ri hā mē pikuprōnh rax xwỳnhjê pumu nē nhỹhỹnh kot hwỳr o àr kaxyw tee ri amnhī kukamā ho ukapi ho pa. Hāmri nē hamaxpēr nē ixkre nhĩmōk po hwỳr ho api nē himōk kwỳ grà nē hkôt ĩ kamā htyk xwỳnhhta nōr xà mērohā hkôt Jejus wỳr haxà.

⁵Hāmri nhūm mē kot kaxyw kām hamaxpēr tỳx ã mē omu nē ĩ kamā htyk xwỳnhhta mā kapēr nē kām: —Pa? Kwa tee ri amnhī kukamā ajamaxpēr kêt nē. Na pa ra anê ate amnhī tomnuj piitā ho ijapêx. Kot paj axte kām ijamaxpēr kêt nē. Anē.

⁶Hāmri nhūm Tĩrtũm kapēr tũm o mē ahkre xwỳnhjaja tee ri ã kapēr anhỹrja ã kuma nē hamaxpēr o:

⁷—Tk. Kwa pēr mēhō myti mũj kēp Tĩrtũm kêt tã te kapēr pyrāk o amnhī nhĩpêx nē mē nê mē kot amnhī tomnuj o hapêx ã amnhī jarē. Tĩrtũm pix kot mē nê mē kot amnhī tomnuj o hapêx kênã. Anē.

⁸Nom nhũm Jejus mẽ hamaxpěr kôt mẽ omunh mex nẽ. Mẽ kot Tĩrtũm pix kot mẽ nẽ mẽ kot amnhĩ tomnuj rẽnũh nẽ akupỹm mẽ à xwỳnhjê ho mex kôt mẽ hamaxpěrja nhũm mẽ omunh mex nẽ mẽ kãm: —Kwa mẽ ã ajamaxpěr anhỹr kêt nẽ.

⁹Ixte mẽ nẽ mẽ kot amnhĩ tomnuj o ijapêx par ã amnhĩ jarẽnũh tã mẽ ate mẽ ano ho ja kôt ixpumunh kêt jakamã na ka htem ja hã ixkôt ajamaxpěr kêt nẽ. Nom kot paj mẽ anoo mã akupỹm myja o mex. Ka mẽ ja hã ixpumu hãmri nẽ ixkôt ajamaxpěr kurê kumrẽx.

¹⁰Ixpê Tĩrtũm kot mẽ awỳr inhmẽnũh xwỳnh na pa. Ixte mẽ anê mẽ ate amnhĩ tomnuj rẽnũh kaxyw na pre mẽ awỳr inhmẽnũh pa wrỳ. Tã mẽ ate ja kôt ixpumunh kaxyw kot paj mẽ anoo mã mytija ho mex.

¹¹Anhỹr o mẽ kãm kapěr hãmri nẽ ã kamã htyk xwỳnhũta mã kapěr nẽ kãm: —E kànhmã xa nẽ anõr xà mỳ nẽ ma akupỹm anhõrkwỹ hwỳr tẽ. Anẽ.

¹²Hãmri nhũm kuma nẽ kànhmã ãm kurê kumrẽx. Hãmri nẽ akupỹm mex ã amnhĩ pumu nẽ hkĩnh tỳx nẽ nõr xà mỳ nẽ mẽ noo mã kato nẽ ma akupỹm õrkwỹ hwỳr tẽ. Hãmri nhũm mẽ kot omunh xwỳnhjaja amnhĩ jaêr pê omu nẽ no hapõx kaxyw nẽ hkôt omunh o kuhê nẽ kamã no pyma htỳx nẽ. Nẽ tee ri omu nẽ axpẽn mã: —Hêxta waa nẽ. Aa mẽ pahte ã mẽhõ kot amnhĩ nhĩpêx anhỹr ã omunh kêt kumrẽx tã jarãhã ja pumu. Nà Tĩrtũmja ãm mex o mex. Anẽ.

Jejus kot amnhĩ wỳr Rewi hwỳr ã harẽnũh

Matêwre 9.9-13; Rukre 5.27-32

¹³Hãmri nhũm Jejus mẽ ma mra nẽ akupỹm gô rax pê Garirej wỳr mra nẽ gô mỳ ri pa. Hãmri nhũm mẽ piitã omu nẽ hwỳr mra nẽ hã akuprõ nhũm Tĩrtũm kapěr o mẽ ahkre ho nhỹ.

¹⁴Hãmri nẽ mẽ kure nẽ axte hkôt mẽ pa ho mẽ pa xwỳnhjê mẽrohã ma axte mra nẽ nhỹri Apew kra Rewija pumu. Rõm kãm mẽ õ pahĩti mã amnhĩ kwỳjê pê kàxpore hkwỳ jamỳnh xwỳnh na pre. Jakamã nhũm ãpẽnũh o nhỹ nhũm Jejus hãnũh tẽ nẽ omu nẽ amnhĩ kôt kuwỳ nẽ kãm: —Pa? E kwa

axàpênhta kaga nê hpãnhã amnê mē ixkôt mãn ri apa ho apa. Anê. Hãmri nhũm kuma nê àpênh kaga nê ma hkôt mō nê hkôt pa ho pa.

¹⁵Hãmri nhũm mēmo arĩgro hã nhũm Rewi nhõ mē apkur xà hã mēō rax nê. Jakamã nhũm amnhĩ nhõrkwy hwỳr hkràmnhwỳjaja nê Jejus mē hkôt mē pa ho mē pa xwỳnhjê hwỳ. Hãmri nhũm mē ma hkôt mra nê õrkwy hwỳr agjê nê kuri apkur o hkrĩ. Nê mãñnēn mē kēp Rõm nhõ pahi mã mē kēp kàxpore hkwy jamỳnh xwỳnh kwỳ nê mē ohtō nê mē kutã apkur o hkrĩ.

¹⁶Hãmri nhũm Tĩrtũm kapēr tũm o mē ahkre xwỳnh kwỳ pē Parijew nhõ xwỳnhjaja mra nê mē apkur ã mē omu. Nê tee ri mē hkaêx ã Jejus pumu nê hkôt mē pa ho mē pa xwỳnhjê hwỳr agjê nê hã mē kãm akir nê mē kãm: — Kwa na htem mē kot amnhĩ tomnuj xwỳnhjê kutã apkur kêt tã ka mē Jejus mē apimràatã axtem nê mē kutã axàpkur o akrĩ. Mē ate amnhĩ to mex ronhỹx ka mē kutã axàpkur kêt nê. Anê.

¹⁷Hãmri nhũm Jejus amnhĩ tã mē kapēr ma nê mē kãm: —Tk. Ixte tãm mē unhwỳr kaxyw ixte mē kutã ixàpkur o inhỹr kēnã. Xà na hte tōtō mē mex xwỳnhjê hwỳr mra nê mē hkane? Nà na hte ãm mē à xwỳnhjê pix kane ho pa. Ra mē ate ja pumunh mex. Ja pyrã nê na pa pre mē kot amnhĩ to mex xwỳnhjê hwỳr ixwrỳk kêt nê. ãm mē kot amnhĩ tomnuj xwỳnhjê pix wỳr na pa pre wrỳ. Ixte tãm mē unhwỳr kaxyw mē hwỳr wrỳ nê jajê kutã ixàpkur o nhỹ. Mē ate amnhĩ tomnuj mã anhũrer nê hpãnhã tãm amnhĩ nhĩpêx o apa kaxyw na pa pre mē awỳr wrỳ nê mē akamã ixukaprĩ ho ri mē akôt ixpa. Tã ka mē atỳx ã ixte mē kutã ixàpkur anhỹrja ã ixto akapēr anê. Anê.

Mē kot Tĩrtũm mã amnhĩ jarēnh kaxyw mēō kaga hã mē harēnh

Matêwre 9.14-17; Rukre 5.33-39

¹⁸Juãw Paxis kôt mē pa xwỳnhjê mē Parijew nhõ xwỳnhjaja na prem tōhã Tĩrtũm mã amnhĩ jarēnh kaxyw nê apkur kêt rãhã kamã kãm amnhĩ jarē. Nom nhũm Jejus kôt mē pa ho mē pa xwỳnhjaja na prem kãm amnhĩ jarēnh prãm nê apkur kãm amnhĩx kãm amnhĩ jarēnh o pa. Jakamã nhũm Ijaew kwỳjaja tee ri ja hã mē omu nê Jejus wỳr mra nê mē hã hkukja nê kãm: — Pa? Kwa aprĩ hã mē inhmã mēmoj jarē. Na hte Parijew nhõ xwỳnhjê mē Juãw Paxis kôt mē pa xwỳnhjaja tōhã Tĩrtũm mã amnhĩ jarēnh kaxyw nê

apkur kêt rãhã kãm amnhĩ jarẽ. No akôt mẽ pa ho mẽ pa xwỳnhjaja na htem àmnhĩx apkur o pa kamã kãm amnhĩ jarẽnh o pa. Kwa mo na htem mẽ uràk nẽ tõiã apkur kêt rãhã kãm amnhĩ jarẽnh kêt nẽ? Anẽ.

¹⁹Hãmri nhũm Jejus mẽ kãm: —Tk. Mo kaxyw kot mẽ ã amnhĩ nhĩpêx anẽ? Mẽ hkaprĩ hkêt kênã. Mẽ kot ixkôt pa ho pa hã amnhĩ pumunh jakamã na htem hkĩnh nẽ pa. Kormã ixte mẽ hkôt ixpa kênã kot kêt mẽ Tĩrtũm mã kapêr kaxyw nẽ ho apkur kêt kamã kãm amnhĩ jarẽ. Xà na htem hkràmnhwỳ hã hkĩnh kaxyw hã akuprõ nẽ hkaprĩ nẽ apkur kêt nẽ mỳr o hkrĩ? Nà na htem hã akuprõ nẽ hkĩnh nẽ apkur rũnh nẽ. Ja pyrã nẽ na hte ixkôt mẽ pa ho mẽ pa xwỳnhjaja ixkôt kormã àmnhĩx hkĩnh nẽ apkati mẽ apkur kãm kãm amnhĩ jarẽnh o pa.

²⁰Nom koja mẽ kãm ixkurê xwỳnhjaja nhỹrmã tanhmã ixto hãmri nhũm mẽ rĩ kormã hkaprĩ htỳx kãm ho apkur kêt rãhã Tĩrtũm mã amnhĩ jarẽ. Anẽ. Nhũm pre ã Jejus mẽ kãm hkôt ri mẽ pa ho mẽ pa xwỳnhjê jarẽnh anẽ hãmri nẽ axte mẽ kãm kapêr nẽ mẽ kãm:

²¹⁻²²—Mẽ kot amnhĩ tomnuj xwỳnhjaja mẽ kot amnhĩ nhĩpêx tũm o amnhĩ pyrãk jakamã na htem mẽ kot amnhĩ nhĩpêx nyw kaga. Tã ixte amnhĩ nhĩpêx nywja te kot mẽ ate amnhĩ nhĩpêx tũm pyrãk kêt jakamã na ka htem inhma nẽ ãm inhma. Kwa mẽ inhma nẽ mẽ ate amnhĩ nhĩpêx tũm gryk ã ixkaga hkêt nẽ. Anẽ.

Jejus kêp arĩgromnu hpãm ã kot amnhĩ jarẽnh

Matêwre 12.1-8; Rukre 6.1-5

²³Tã nhũm mẽ ixpê Ijaew nhõ arĩgromnu pê sap kato nhũm Jejus mẽ hkôt mẽ pa ho mẽ pa xwỳnhjaja ma nhỹhỹm mõi. Ma mẽ hpur kahti hkôt nhỹhỹm mõi nhũm hkôt mẽ pa ho mẽ pa xwỳnhjaja ra kãm prãm nẽ. Hãmri nẽ prãm xàj purta kamã amnhĩm mẽmo hy te kot harôj pyrãk xwỳnhhta kwỳ rê nẽ ma Jejus kôt hkanhar o mõi. Mẽ ixpê Ijaewjaja na pa htem axpên pur kãm ixpa nẽ ã amnhĩ nhĩpêx anẽ.

²⁴Hãmri nhũm Parijew nhõ xwỳnhjaja mẽ hkôt mra nẽ tee ri ja hã mẽ omu nẽ Jejus wỳr mra nẽ mẽ hã kãm akir nẽ kãm: —Kwa jarãhã sap tã akôt mẽ

pa ho mẽ pa xwỳnhjaja mẽmo hy hkwỳ rê nẽ akôt hkanhar o pa. Tĩrtũm kapẽr ã kagà htũm kot mẽ panhõ arĩgromnu hã mẽ pahte mẽmoj nhĩkẽnh nẽ mẽ pahkurê kẽnã. Kwa mẽ kãm anẽ kê mẽ ã amnhĩ nhĩpêx anhỹr kêt nẽ. Anẽ.

25-26Hãmri nhũm Jejus mẽ kuma nẽ hprĩ hã mẽ kãm Tĩrtũm kapẽr tũm jarẽ nẽ mẽ kãm: —Kwa xàn ka mẽ kormã Tĩrtũm kapẽr ã kagà htũm kamã pahi Tawi kot tanhmã amnhĩ nhĩpêx to kamã harẽnh nẽ mar kêt nẽ? Kormã Apiatar kêp patre maati ri na pre Tawi hkôt ri mẽ pa xwỳnhjê mẽ prãm xàj Tĩrtũm mã amnhĩ jarẽnh xà hã ixkre hwỳr agjê. Hãmri nhũm Apiatar mẽ kãm prãm tỳx ã mẽ omu nẽ mẽ kamã ukaprĩ nẽ mẽ kãm mẽmoj gõ. Mẽ kot Tĩrtũm noo mã pãwti jaxwỳr xwỳnhhta nhũm mẽ kãm kugõ nhũm mẽ kuku. Tĩrtũm kapẽr ã kagà htũm kot ja nẽ mẽ kurê htã nhũm mẽ kãm prãm tỳx ã mẽ omu nẽ mẽ kamã ukaprĩ xàj mẽ kãm kugõ. Patre pix kot ja hkur kaxyw tã nhũm mẽ kãm kugõ nhũm mẽ kuku. Tã nom nhũm Tĩrtũm ja hã mẽ omu nhũm ja kêp omnuj kêt nẽ. Patre kot mẽ kamã ukaprĩ nẽ mẽ kãm òr nhũm ja hã omu nhũm ja kãm mex nẽ. Anẽ. Hãmri nẽ mẽ kãm:

27—Na pre Tĩrtũm panhĩ kumrẽx o kato nẽ kormã mẽ hkôkôt nẽ Tĩrtũm mã hamaxpẽr o hkrĩ kaxyw arĩgromnu ho kato. No na pre arĩgromnu kumrẽx o kato nẽ hpãnhã kaxyw panhĩ ho kator kêt nẽ.

28Tã pa na pre Tĩrtũm mẽ akaxyw ixãm nẽ mẽ awỳr inhmẽ. Jakamã papxipix na pa hte arĩgromnu hã tanhmã mẽ kot amnhĩ nhĩpêx to hã mẽ kãm karõ ho ri ixpa. Jakamã kwãr mẽ mãmri mẽmojta rê nẽ ixkôt hkanhar o mõ. Anẽ.

Makre 3

Jejus kot akupỹm ãhkra grà xwỳnh o mex ã harẽnh

Matêwre 12.9-14; Rukre 6.6-11

1Tã nhũm mẽ ixpê Ijaewjê nhõ arĩgromnu pê sapja axte kato. Hãmri nhũm Jejus Tĩrtũm kapẽr o mẽ ahkre xà hã ixkreja wỳr tẽ nẽ axà nẽ kamã Tĩrtũm kapẽr o mẽ ahkre ho nhỹ. Nhũm mẽhõ my ãhkra grà xwỳnhja mẽ ãhkô hã mar o nhỹ.

²Nhũm Parijew nhõ xwỳnhjaja kãm mẽ hkrãhtũmjê mã Jejus o kapër prãm jakamã htãnopxar o kuhê nẽ axpẽn mã: —E kwa pu mẽ jar pakuhê nẽ kot tanhmã amnhĩ nhĩpêx to hã omu. Xà koja jarãhã ìhkra grà xwỳnh mũj o mex nà? Jarãhã arĩgromnu kênã kot kêt kãm ìhkra ho mex. Koja ho anẽ nẽ ra Tĩrtũm kapër tũm nhĩrôp xa. E pu mẽ xa nẽ hã omu. Anẽ.

³Hãmri nhũm Jejus ìhkra grà xwỳnhhta pumu nẽ kãm: —Pa? E kànhmã xa nẽ amnẽ ixwỳr tẽ. Anẽ. Hãmri nhũm kànhmã xa nẽ hwỳr tẽ nẽ mẽ piitã mẽ noo mã xa.

⁴Hãmri nhũm Jejus mẽ kot omunh o hkrĩ xwỳnhjê hwỳr rĩt nẽ arĩgromnu hã tanhmã mẽ kot amnhĩ nhĩpêx to hã mẽ hkukja nẽ mẽ kãm: —E mẽ inhma. Tanhmã na htem arĩgromnu hã axpẽn nhĩpêx to wehe? Xà kot ka mẽ arĩgromnu hã axà htỳx nẽ amex prãm xàj ma mẽhõ hwỳr amnhĩ to tẽ nhũm apumu nẽ apkatim arĩgro mex jamãr pẽ akane hkêt ka ty nhũm ja amã mex nẽ? Rỳ nhũm apumu nẽ tanhmã atomnuj to nẽ akupỹm amnhĩ nẽ ajano nhũm ja amã mex nẽ? Nà koja ã anhĩpêx anẽ nhũm ja amã mex kêt nẽ. E mẽ inhmã mẽmoj jarẽ. Tanhmã na pre finat Mojesja Tĩrtũm nhỹ hã arĩgromnu hã mẽ pahte axpẽn nhĩpêx ã mẽ pamã karõ hto? Xà kot puj mẽ hã axpẽn kãm paxukaprĩ rỳ hã mẽ pamã axpẽn kurê ho papa? Xà kot puj mẽ hã mẽmoj punuj pẽ mẽ utà rỳ kot puj mẽ ãm arĩgro mex pix ã mẽ utàr kaxyw arĩgro mex jamã? E mẽ atõ inhmã ja jarẽ. Anẽ. Ra kot hprĩ hã mẽ hamaxpẽr ã mẽ omunh mex nẽ ã hêx rom mẽ hkukjêr anẽ. Nom nhũm mẽhõ tanhmã kutã kãm nẽ hkêt nẽ. Mẽ ãm piitã akryk mar pẽ omunh o hkrĩ. Mẽ kot tanhmã kãm nẽ nhũm ta pãnhã tanhmã mẽ kãm nẽ pymaj nhũm mẽ tee ri kãm tanhmã nẽ hprãm nom akryk mar o hkrĩ.

⁵Hãmri nhũm Jejus tee ri mẽ ukaprĩ hkêt ã mẽ omu nẽ hkaprĩ nẽ mẽ kamã gryk nẽ. Hãmri nẽ ìhkra grà xwỳnhja mã kãm: —Tk. Mẽ kot tanhmã inhmã ujarẽnh tore hã. E anhĩhkra katàt. Anẽ. Hãmri nhũm ìhkra katàt nẽ akupỹm mex kurê kumrẽx.

⁶Hãmri nhũm Parijew nhõ xwỳnhjaja tee ri ã Jejus kapër anhỹrja ã kuma nẽ kot sap ã akupỹm myta o mex ã omu nẽ kamã gryk tỳx nẽ. Nẽ hapôj nẽ ma

pahi Erox kôt mẽ pa xwỳnhjê hwỳr mra nẽ mẽ kãm harẽ nẽ tanhmã hã axpẽn kukjêr to nẽ axpẽn mã: —Kwa tanhmã kot puj mẽ ho? Na ã kapêr anhỳrja o mẽ pahto kapêr punuj nẽ. Te hkĩnhã mẽ papamjaja mẽ kamã paxukapĩ hkêt pyræk ã mẽ pajarẽ. Koja mẽ pahkwỳjaja kuma hãmri nẽ mẽ pahte amnhĩ nhĩpêx kaga nẽ amnhĩ kaxyw hkôt pix mã hamaxpêr o pa. Ja pymaj kwa tanhmã kot puj mẽ ho? Anẽ.

Mẽ ohtô nẽ kot Jejus kapêr mar kaxyw hwỳr mra ã mẽ harênh

Matêwre 4.23-25; Rukre 6.17-19

7-8Tã nhũm Jejus mẽ hkôt mẽ pa ho mẽ pa xwỳnhjê mẽrohã ma akupỹm gô rax wỳr mỗ nhũm mẽ ohtô nẽ omu nẽ ma hkôt mra. Pyka pê Garirej mẽ Jutej wa kurũm nẽ krĩ pê Jerujarẽ rũm nẽ pyka pê Itumêj rũm nẽ pyhti pê Jotãw nhĩkjê hã krĩ hkwy rũm nẽ krĩ hkwy pê Xir mẽ Sitô wa pu hã krĩ hkwy rũm ohtô nẽ ma hwỳr mra. Na prem ra harênh ma nẽ nhỹhỹm mör ã omu nẽ axpẽn mã harênh o: —E kwa tokyj pu mẽ ma hwỳr mẽ à xwỳnhjê o mỗ kê akupỹm mẽ ho mex. Anẽ. Hãmri nẽ hwỳr mẽ o mra nẽ hã pikuprõnh rax nẽ.

9-10Hãmri nhũm Jejus akupỹm mẽ à xwỳnhjê ho mex. Gô mỳri xa nẽ tanhmã mẽ ho mex to. Jakamã nhũm mẽ axte ohtô nẽ hwỳr mra nẽ piitã kot htok nẽ akupỹm mex kaxyw hwỳr axpẽn nhĩgã. Hãmri nhũm tee ri amnhĩ wỳr mẽ omu nẽ hkôt mẽ pa ho mẽ pa xwỳnhjê mã: —Kwa mẽ ma mra nẽ amnẽ kanôre jêt mũj kjênh o tẽ nẽ jar inhmã anhô. Kê mẽ ixtã axpẽn nhĩgãnh o ijanênh japêr pa hwỳr axà nẽ amỹm mẽ ho hpỹnh nẽ akupỹm mẽ ho mex. Anẽ. Hãmri nhũm mẽ kuma nẽ ma mra nẽ kãm ja o tẽ nẽ kunhô.

11Na pre mẽkarõmnuti hkwyja mẽ hkwyjê hwỳr agjê. Jakamã nhũm mẽ Jejus pumu nẽ mẽkarõmnuti nhỹ hã kêp Tĩrtũm Kra hã omunh kurê kumrêx. Hãmri nẽ hã hpijaàm kaxyw kutã hkõnkrã ho hkrĩ nẽ mẽkarõmnuti nhỹ hã kãm kapêr nẽ kãm: —Kwa apê Tĩrtũm Kra na ka. Anẽ.

12Hãmri nhũm tee ri amnhĩ tã mẽ kuma. Kãm mẽkarõmnuti ã kot harênh anhỳr prãm kêt nẽ. ãm mẽ piitã mẽ kot kapêr mar nẽ kot amnhĩ nhĩpêx ã omunh pê kêp Tĩrtũm Kra hã omunhja na kãm hprãm. Jakamã nhũm

mēkarōmnuti ã harēnh anē nhūm ja nē mē kām kapēr nē mē kām: —Tk kwa nà kêr ka mē tanhmã ijarēnh to hkêt nē. Anē.

Jejus kot amnhĩ kaxyw mē kēp 12 rēnh ã harēnh

Matēwre 10.1-4; Rukre 6.12-16

13Tã nhūm Jejus hkôt mē pa ho mē pa xwỳnh kwỳjê mã kām: —E pu mē ma mō nē krāhakỳx mūj ã api. Anē. Hāmri nē mē ma hwỳr mō nē hã api

14nhūm Jejus amnhĩ kaxyw mē ho 12 nē mē kurê. Mē kot ma ÿ hã Tĩrtũm kapēr o mē ahkre

15nē ÿ hã mē nē mēkarōmnuti janor o pa kaxyw.

16ã mē hixi kot anhỹr. Na pre ja kēp Simãw no nhūm Jejus hpãnhã hã hixi hō mē nhūm hpãnhã mãnēn kēp Pētre.

17Nē hkôt Jepetew kra Xiakre mē htō Juãwja wa kuta. Hāmri nē kot Simãw nhĩpêx pyrã nē wa hã hixi hō mē nhūm wa hpãnhã mãnēn kēp Poanes. Wa kot amnhĩ prēprêk jakamã nhūm ã wa hã hixi mēnh anē.

18Nē hō pē Andreja ta. Nē hkôt Andre htō Firiptija ta. Nē hkôt Patoromewja ta. Nē hkôt Matēwreja ta. Nē hkôt Tomasja ta. Nē hkôt Arpêw kra Xiakreja ta. Nē hkôt Tatewja ta. Nē hkôt Simãw òja ta. Simãwja na pre kām mē ixpê Ijaewjê nhō pika pē Ijaew kĩnh tỳx nē. Jakamã na pre kām nhām pika hō nhō pahi kot mē ho amnhĩptàr prãm kêt nē pa.

19Nē hkôt Jut Kariotja ta. Kormã kot mē kām Jejus kurê xwỳnhjê nhĩhkram òr mã nhūm Jejus kot amnhĩ kukamã omunh mex tã mē hkôt amnhĩ kaxyw kuta. ã mē kot ÿ hã mē ahkre o pa kaxyw mē rēnh xwỳnhjê nhĩxi kot anhỹr.

Jejus mē mēkarōmnuti wa harēnh

Matēwre 12.22-32; Rukre 11.14-23; 12.10; Juãw 10.19-21

20Hāmri nhūm Jejus hkôt mē pa ho mē pa xwỳnh kwỳjê rēnh pa nē ma amnhĩ kôt mēhō nhōrkwỹ hwỳr mē o mō. Na prem apkur kêt ry rax nē ra kām prãm tỳx nē nhūm ma mē apkur kaxyw amnhĩ kôt mē o mō. Hāmri nhūm axte mē à xwỳnhjaja mē omu nē Jejus wỳr pikuprōnh rax nhūm mē tokyx apkur kêt nē.

²¹Hāmri nhūm Jejus katorxà nē htōjaja tee ri mē apkur kêt ã mē harēnh ma nē axpēn mā: —Kwa mǎn ãm ra tanhmā hkrā amnhī to nà? Hã na mē kot omunh kaxyw hã hpikuprōnh rax jakamā nhūm kormā apkur kêt nē. E tokyx pu mē ma hwÿr mra nē omu nē mē kēp utà nē akupÿn amnhī kôt o mō. Anē.

²²Rôm nhūm Tirtūm kapēr tūm o mē ahkre xwÿnhjaja Jerujarē rūm Jejus wÿr mōn pōj. Hāmri nē tanhmā ho kapēr punuj to. Kēp mēkarōmnuti hkwÿ hã hkamnhīx jakamā harēnh o: —Tk pēr hinhu nhīkôôti nhÿ hã na hte mē nē amnhī kwÿjê japôx o pa. Anē. Hinhu nhīkôôti nhīxi hō pē Satanasti nhūm prem ÿ hã Jejus kot amnhī nhīpêx o pa hã hkamnhīx.

²³Hāmri nhūm amnhī tã mē omu nē amnhī wÿr mē kām hpa ho apê nē mē kām amnhī jarē. Nom amnhī tã kuxi nē mē kām mēmoj jarē nē mē kām: —Kwa mē inhma mē ate ixpê Satanasti hkwÿ hã ixkamnhīx xwÿnhjaja. Xà na hte Satanasti mē nē amnhī kwÿjê janor o pa? Nà na hte ã amnhī nhīpêx anhÿr kêt nē.

²⁴Na hte pika nhō xwÿnhjaja axpēn kutā amnhī xunhwÿ nē axpu hāmri nē anhrà nē ma ahpÿnhã ri pa nē amnhī krā hkôt ri tanhmā amnhī to ho ri pa. Jakamā nhūm mē ò pahija mē hamār o pa hkêt nē.

²⁵Nē krī nhō xwÿnhjaja haxwÿja. Mē kot axpēn to hkwÿ xwÿnhjaja koja mēmoj tã axpēn kām gryk nē axpēn kutā amnhī xunhwÿ hāmri nē anhrà nē ahpÿnhã pa hāmri nhūm mē ò pahi tee ri kām mē hamār o pa hprām. Mo hkwÿjaja kot kêt ri mē hamār o pa? Nom tām kot amnhī nē mē hanoore hã. Mē tāmjaja na prem axpēn kām gryk nē anhrà nē ahpÿnhã pa.

²⁶Tã ja pyrà nē ixte Satanasti nhÿ hã tanhmā amnhī nhīpêx to ho ixpa ronhÿx pa ri mē kurūm amnhī kwÿjê japôx o ri ixpa hkêt nē. Mēkarōmnutijaja kēp Satanasti hkwÿ kēnã. Kojaja Satanasti ixte mē kurūm mē hapôx kaxyw tanhmā inhmã nē hkêt nē.

²⁷àhpumunh tÿx jakamā na hte mē kot hkôt amnhī xunhwÿr xwÿnhjê pumunh tÿx o pa nhūm mēhō tee ri kēp mē utàr kaxyw. Tã ixàhpumunh tÿx o ixte hakrenh jakamā ixte kēp mē utàrja inhmã tanhmã kute hkêt. Na pa

hte kêp mẽ utà nhũm mẽ hpãnhã ixkôt amnhĩ nhĩpêx o pa nhũm Satanasti tee ri mẽ hã ixpumunh o pa kaprỳ.

28—Ăm hãmri na pa mẽ amã ixkapêr. Kot kaj mẽ tanhmã amnhĩ tomnuj to ho apa. Nê amnhĩ tomnuj tỳx kumrêx rãhã ho apa. Rỳ tanhmã akapêr punuj to ho apa. Rỳ tanhmã Tĩrtũm o akapêr punuj to ho apa. Tã tee ri ja hã amnhĩ pumu nê akaprĩ nê ã ate amnhĩ nhĩpêx anhỹrja kaga nê Tĩrtũm kôt amnhĩ xunhwỳ. Hãmri nhũm amnhĩ tã mẽ apumu nê amnhĩ katut kôt mẽ ate amnhĩ tomnuj nê mẽ akapêr punuj rênh pa nê axte kãm hamaxpêr kêt nê. Koja ho hapêx par kumrêx.

29Nom koja Tĩrtũm Karõ xatã mẽ amã ixto amnhĩrĩt tã ka mẽ ama nê ãm ama nê te kêp amnhĩ jamak pro pyræk o amnhĩ nhĩpêx. Jao Tĩrtũm Karõ hã apijaàm kêt ã amnhĩ to amnhĩrĩt. Ja mỳrapê koja Tĩrtũm nhỹrmã amnhĩ xwar te mẽ apê amnhĩ jamak pro pyræk o mẽ anhĩpêx ka mẽ tee ri kãm amnhĩ kaprĩ kaprỳ. Hãmri nê mẽ kot amnhĩ xà htỳx kamã hamak o pa htũm xà wỳr ma apa nê kamã apa rãhã apa ho apa. Anê.

30Mẽ kot Satanasti nhỹ hã mẽ nê mẽkarõmnuti janor o pa hã hkamnhĩx jakamã nhũm pre Jejus ã mẽ kãm kapêr anê.

Jejus katorxà mẽ htõjê jarênh

Matêwre 12.46-50; Rukre 8.19-21; määnên Eprêw 2.11-12

31Rôm nhũm Jejus katorxà mẽ htõjaja hwỳr mra no ãm kormã hwỳr gjêx kêt nê. Mẽ kot hã htu rax jakamã nhũm mẽ tee ri hwỳr gjêx kaxyw kormã kapôt ã kuhê. Hãmri nê mẽ kot mar o kuhê xwỳnhjê hõ mã kapêr nê kãm: —Kwa ma tẽn Jejus mã mẽ ijarê kê mẽ ixwỳr kato. Anê.

32Rôm nhũm ixkre kamã mẽ hkrĩ xwỳnhjaja mẽ omu nê Jejus mã mẽ harê nê kãm: —Kwa Pahihti. Ota akatorxà mẽ atõjaja awỳr mra nê pøj nê tee ri awỳr gjêx mã nê kormã kapôt ã kuhê nê atã karõ. Anê.

33-35Hãmri nhũm mẽ kuma nê mẽ kãm: —Tõe pa ixkato nê mẽ omu. Inhmã mẽ hapêê. Nom kot kaj mẽ atõ Tĩrtũm kapêr ma nê hkôt amnhĩ xãm nê hkôt amnhĩ nhĩpêx. Hã kot kaj te apê ixtõ rỳ ixkatorxà kot amnhĩ nhĩpêx pyræk

o pu mẽ axpẽn nhĩpêx. Pa te inhmã mẽ hapê pyrà nẽ inhmã mẽ ajapê nẽ. Anẽ.

Makre 4

Mẽmo hy hkre xwỳnh jarẽnh

Matêwre 13.1-9; Rukre 8.4-8

¹Tã nhũm Jejus axte gô jakàx ã mẽ ahkre ho nhỹ. Hãmri nhũm mẽ axte hã htu rax jakamã nhũm tee ri mẽ omu hãmri nẽ pàr krem axà nẽ gôx kãm amỳm mẽ ahkre ho nhỹ. Nhũm mẽ piitã kỳxpê omunh nẽ mar mex o kuhê.

²Hãmri nhũm mẽ ahkre ho nhỹ. Nom mẽ ujarẽnh pix kãm mẽ ahkre. Mẽ kot Tĩrtũm kapêr mar nẽ tanhmã hkôt amnhĩ nhĩpêx to ho paja nhũm hã kuxi nẽ mẽ kãm hã ujarẽnh o nhỹ nẽ mẽ kãm:

³—E mẽ inhma. Kojã mễhõ ma pur mã mỗ nẽ pur kãm mẽmo hy ho ukapêr o pa nom nhũm hy piitã amex kãm rôrôk kêt nẽ. Kojã ahpỹnhã rôrôk.

⁴Kojã hkwỳ aptỳx kãm rôrôk nhũm kuwênhre omu nẽ hwỳr mra nẽ hkrẽr pa.

⁵⁻⁶Nẽ kojã kẽn kãm hkwỳ rôrôk hãmri nẽ higrôt kutã nojarêr nẽ higrôt pa. Nom nhũm kamã aptỳx nẽ kamã kệp pika hkryre jakamã nhũm higrôt nhũm hã myt ahpa nẽ arĩgro htỳx mẽ nhũm grà pa. Harê hkryre jakamã grà pa.

⁷Nẽ kojã hkwỳ mrônhĩ kamã rôrôk nẽ higrôt tã no nhũm utĩa kệp amỳtã nhũm ô hkêt nẽ.

⁸—No kojã hirã kamã pika mex kãm hkwỳ rôrôk. Hãmri nẽ hirã kamã rôrôk jakamã higrôt mex nẽ piitã ô rax nẽ. Kamã ô hkwỳ kệp 30 nẽ kamã hkwỳ kệp 60 nẽ kamã hkwỳ kệp 100. ã mẽ ujarẽnh kot anhỹr.

⁹Kwa mẽ ama nẽ kãm ajamaxpêr tỳx rãhã ho ri apa. Anẽ.

Jejus kot hprĩ hã mẽmo hy jarẽnh

Matêwre 13.10-23; Rukre 8.9-15

¹⁰Hãmri nhũm mẽ Jejus xujarẽnh mar pa nẽ anhrà nẽ ma akupỹm mra nhũm hkôt mẽ pa ho pa xwỳnh pê 12 mẽ hkwỳjaja pix Jejus ri arĩk. Hãmri

ně ujarēnh̄ta ã hkukja ně kām: —Kwa mon ka hte ã mẽ kām axujarēnh̄ anē Pahih̄ti? Na pa mẽ ixpr̄i h̄ã amar mex kêt ně. Anē.

11-12Hāmri nh̄um mẽ kām: —Nà kot paj ixpr̄i h̄ã mẽ amã harē. Tĩrtũm kām mẽ ate apr̄i h̄ã mar prãm jakamã kot paj ixpr̄i h̄ã tanhmã mẽ amã harēnh̄ to. Nà mẽ kot amnh̄i tomnu kaga nh̄um Tĩrtũm kot ja h̄ã mẽ omunh̄ xà hkôt mẽ ho hkra h̄ã harēnh̄ja na pa hte mẽ kām harē. No mũjjaja mẽ akĩnh̄ã mẽ kām mar prãm kêt jakamã na pa hte mẽ kām mẽmoj tã haxwỳ ně awjarē nh̄um mẽ ãm ixujarēnh̄ pix ma. Na htem kuma ně ãm kuma ně htỳx ri h̄ã pa. No kệp apu mẽ kām hpr̄i h̄ã mar prãm ronh̄ȳx mẽ ra hpr̄i h̄ã kuma ně Tĩrtũm kôt amnh̄i xunhwỳ nh̄um amnh̄i tã mẽ omu ně mẽ kot amnh̄i tomnuj o hapêx. Nom mẽ kām mar prãm kêt. Anē.

13Tã mẽ ate apr̄i h̄ã ixujarēnh̄ja mar mex kêt jakamã tanhmã kot kaj mẽ amnh̄i to ně ixujarēnh̄ piitã ama? E kot paj ixpr̄i h̄ã mẽ amã mẽmo hyta jarē ka mẽ inh̄ma.

14—Nà mẽmo hyta te kệp Tĩrtũm kapēr pyræk. Nē ahp̄ȳnh̄ã rôrôk xà h̄ã pikata te kệp ahp̄ȳnh̄ã mẽ kot Tĩrtũm kapēr mar xwỳnh̄jê kot mar ně ahp̄ȳnh̄ã tanhmã amnh̄i nh̄ipêx to pyræk.

15Jakamã mẽ kot mar xwỳnh̄ kwỳjaja hte kot aptỳx kām hkwȳ rôrôk nh̄um kuwēnh̄ kot hwỳr mrar ně hkrēr par xwỳnh̄ta pyræk. Jakamã na htem Tĩrtũm kapēr ma nom nh̄um Satanasti te kuwēnh̄ kot hy hkrēr parta pyræk o mẽ hipêx. Nē mẽ kot amnh̄i kaxyw hkôt hamaxpēr ně hkôt amnh̄i xunhwỳr pymaj tanhmã nê mẽ hkrã hto. Jakamã nh̄um mẽ Tĩrtũm kapēr ma nom ho hamakêtkati tokyx anē ně axte kām hamaxpēr kêt ně.

16—Nē mẽ kot mar xwỳnh̄ kwỳjaja te kot kēnre kamã hkwȳ rôrôk ně higrôt nh̄um te h̄ã myt ahpa nh̄um grà par tokyx anh̄ȳr xwỳnh̄ta pyræk. Na htem Tĩrtũm kapēr ma ně hkĩnh̄ ně. Nē kām mar prãm ně. Te hy higrôt tokyx anh̄ȳrta pyræk.

17Tã nh̄um mẽh̄o tē ně Tĩrtũm nê tanhmã mẽ kām kapēr to nh̄um mẽ kuma ně hkaga. Rỳ nh̄um mẽ Tĩrtũm ã tanhmã mẽ homnuj to nh̄um mẽ tee ri

amnhĩ tã mẽ omu nẽ hkaga. Te mẽmo hy higrõt nẽ grà par tokyx anhÿrta pyràk.

18—Nẽ mẽ kot mar xwÿnh kwÿjaja te kot mrõnhĩ kamã hkwÿ rôrõk nẽ higrõt nhũm mrõnhĩ kot kęp àmnàr xwÿnhhta pyràk. Nẽ mẽ kãm Tĩrtũm kapěr mar prãm nẽ.

19Nom mãănẽn kãm hikukrêx rax nẽ hikàxpore rax prãm jakamã ãm ja pix kukamã hamaxpěr o ri pa. Jao ra gryk ã axte Tĩrtũm kapěr mã hamaxpěr nẽ hkõt amnhĩ nhĩpêx kêt nẽ. Te mrõnhĩ kot higrõt pê àmnàr nhũm ô hkêeta pyràk.

20—No mẽ kot mar xwÿnh kwÿjaja te hirã kamã pika mex kãm hy hkwÿ rôrõk nẽ higrõt nẽ ô raxta pyràk. Na htem ixkapěr ma nẽ amnhĩ krã him hagjênh tÿx nẽ. Nẽ ixkõt ri amnhĩ nhĩpêx mex rãhã ho ri pa. Te mẽmo hy hkre kamã ô hkwÿja kęp 30 nẽ kamã kęp 60 nẽ kamã kęp 100ta pyrà nẽ Tĩrtũm kapěr kõt amnhĩ nhĩpêx mex rãhã ho pa. E ã ixujarênhja kot anhÿr. Anẽ.

Kanê hpimxur ã harênh

Rukre 8.16-18; 8.24-25; Matêwre 13.10-15; 25.14-30

21Nhũm Jejus arĩ hkõt mẽ pa ho pa xwÿnhjê jahkre nẽ mẽ kãm: —Xà na htem kanê hpõk nẽ poti ho hpro rÿ hitom kãm par krak ri unhwÿ? Nà na htem hpõk hãmri nẽ kÿx pê mẽmoj nhĩmõk ã unhwÿ.

22Ja pyrà nẽ mẽ piitã kot hkwÿjê pê tanhmã hamaxpěr punuj to ho hpimxur prãm tã tee ri kot ho hpimxur prãm kaprÿ. Kojã nhÿrmã mẽ hamaxpěr piitã amnhĩ to amnhĩrĩt pa. Nẽ mẽmoj piitã ra hpimxur mex tã kojã nhÿrmã amnhĩ to amnhĩrĩt pa. Te mẽ kot kanê hpõk nẽ kÿx pê unhwÿr nhũm amnhĩrĩt mex pyràk. Ja pyrà nẽ na pa hte Tĩrtũm kapěr o ri ixpimxur o ixpa hkêt nẽ. Na pa hte ixprĩ hã mẽ amã harênh mex o ixpa.

23Kwa mẽ ixujarênhja ma nẽ kãm ajamaxpěr tÿx rãhã ho ri apa. Anẽ. Nhũm pre ã Jejus mẽ kãm kapěr anẽ.

²⁴Hāmri nē mẽ kām: —Nē kêr ka mẽ axpën kām axukaprĩ ho ri tanhmã axpën to mex to ho ri apa. Kêr kê Tĩrtũm ja hã mẽ apumu nē mẽ apyrà nē mẽ akamã ukaprĩ pê mẽ ato mex o pa.

²⁵Koja mēhõ inhmã tanhmã amnhĩ nhĩpêx mex to pa ja hã omu nē kot inhmã àpênh mexta pãnhã ho mex nē. No koja inhmã àpênh mex kêt pa ja hã omu nē hã ho mex kêt nē. —Nē koja mēhõ kãm ixkapêr mar prãm nom kormã hprĩ hã mar mex kêt tã arĩ mar o pa nē gaa nē mar tỳx o mō. No koja kuma nē ãm kuma hāmri nē gaa nē hã no hkêt. Anē.

Pur kãm mẽmo hy hkre xwỳnh jarēnh

Matêwre 13.24-30

²⁶Nhũm Jejus arĩ hkôt mẽ pa ho mẽ pa xwỳnhjê jahkre ho nhỹ nē mẽ kãm: —E pa mẽ amã tanhmã mẽ kot ixkapêr mar tỳx xwỳnhjê jarēnh to ka mẽ inhma. Koja mēhõ ixkapêr mar tỳx nē ra hkôt ri amnhĩ nhĩpêx o pa. Hāmri nē hamaxpêr nyw o hamaxpêr o pa nē amnhĩ nhĩpêx nyw o amnhĩ nhĩpêx o pa. Te mẽ hpur kãm mēhõ kot mẽmo hy hkre xwỳnh kot amnhĩ nhĩpêx pyræk. Na hte hyja kre ho pa.

²⁷Hāmri nē hkre hpa nē kamàt mẽ òt o hikwỹ nē arĩgro mẽ mẽmoj tã àpênh o pa. Rãhã nhũm mẽmo hyja arĩ hikwỹ ho hikwỹ hkêt nē. Koja amnhĩ nhĩpêx ò ho amnhĩ nhĩpêx nē higrôt kato nē hprêk. Kre xwỳnh kot tanhmã kot amnhĩ nhĩpêx to hã omunh kêt tã nhũm kãm hprêk.

²⁸—Na hte hpôm hapôx o pa nē higrôt o pyka kahte. Hāmri nē hprêk nē hô axpôt nē gaa nē hpãnhã ô. Hāmri nē hkamrêk pa nē xa.

²⁹Hāmri nē mẽ kot hikênh mã mex nē nhũm kot hkre xwỳnhhta omu nē amnhĩm hamỳnh pa. Tã mẽ kot ixkapêr mar mex xwỳnhhaja te mẽmo hy ra higrôt kator nē hprêk nē hô pipôt nē ô xwỳnhhta pyræk. Nē uræk nē amnhĩ nhĩpêx ò ho amnhĩ nhĩpêx o pa. Anē.

Jejus te kot mẽmo hy pyræk ã kot amnhĩ jarēnh

Matêwre 13.31-32; Rukre 13.18-19

³⁰⁻³²Nhũm Jejus arĩ mẽ ahkre ho nhỹ nē mẽ kãm: —Tĩrtũm kot mẽ awỳr ixte mẽ ato amnhĩptàr kaxyw inhmēnh ã ijarēnhja. Te ixte mẽmo hy pixire pyræk. Koja mēhõ mẽmo hy hõ pixire nē hkre nhũm ra higrôt. Nē gaa nē

hprêk. Hāmri nē hpa anhrà nhūm kuwēnhre hwỳr mra nē hôptĩ kamā amnhīm haē nhīpêx. Mēmo hyta grire htā nhūm hkre nhūm higrōt nē ã amnhĩ nhīpêx anē. Tā kot paj nhỹrmā urà nē ixpyxi htā kot paj pika piitā hkôt mē ho amnhīptà nē mē omunh mex rāhā ho ri ixpa. Anē. ã na pre Jejusja hkôt mē pa ho mē pa xwỳnhjê mã amnhĩ tã kuxi nē ujarēnh anē.

33Mē kām ujarēnh kām mē ahkre ho pa. Te nhām mēmoj jarēnh pyrà nē amnhĩ tã haxwỳ nē harē. Mē kot tanhmā mar to hā mē omunh xà hkôt tanhmā mē kām ujarēnh to.

34Na pre ãm ujarēnh pix kām mē kām kapēr mar prām kêt xwỳnhjê mã amnhĩ jarēnh rāhā ho pa. No mē kot hkôt pa ho pa xwỳnhjê mã nhūm hprĩ hā ujarēnh jarē nhūm mēhprĩ hā mar mex nē.

Jejus kot kôk o pinhkrēnh ã harēnh

Matêwre 8.23-27; Rukre 8.22-25

35Tā nhūm amỹkry nhūm Jejus arĩ pàr kre kamā nhỹ. Hāmri nē hkôt mē pa ho mē pa xwỳnhjê mã kām: “E pu mē ma xarmā mō.”

36Anē hāmri nē mē kot mar o hkrĩ xwỳnhjê re nē pàr mã agjê nē ma xarmā mō. Garirej rūm kato nē ma xarmā pika hō hwỳr mō. Nhūm pàr kwỳja ma mē hkôt mō.

37-38Nhūm Jejus ra õtxwa nē tē nē pàr kre kamā hkrā japar xà hā hkrā xi nē ra õt tỳx nē nõ. Nhūm kôk àpêr tỳx nē nhūm gô kànhmā harĩ nē axpēn tak. Ra ri xatā axpēn tak nē pàr kre kamā axkapĩ nhūm ra mē kêp àr o mō. Hāmri nhūm mē tee ri amnhĩ nhīpêx nē tee ri amnhĩ kukamā hamaxpēr nē Jejus wỳr hprōt nē kumra nē kām: —Kwa kànhmā nhỹ Pahihti. Kot puj mē jarāhā pahtyk pa. Anē.

39Hāmri nhūm hkrākato nē kànhmā nhỹ nē kôk mē gôta pumu nē wa kām kapēr o: —E kwa wa anhīkrê. Anē. Hāmri nhūm gô mē kôk hpinhkrēnh kurê kumrêx.

40Hāmri nhūm Jejus hkôt mē pa ho mē pa xwỳnhjê mã kām: —Hêxta waa nē. Kormā mē ate amnhĩ kaxyw Tĩrtūm mē wa inhmā ajamaxpēr tỳx kêt. Hā na ka mē ri amā ma nē tee ri amnhĩ kukamā ajamaxpēr. Anē.

⁴¹Hāmri nhũm mẽ amnhĩ jaêr pê ã kot amnhĩ nhĩpêx anhÿr ã omu nẽ tee ri axpẽn pumunh pê omunh o kuhê. Hāmri nẽ axpẽn mã: —Kokÿÿ. Jejus kêp mẽ panhĩõ hkêt. Mẽ pahtõ kot pu te kot amnhĩ nhĩpêx pyrà nẽ kôk mã pakapêr nhũm anhĩkrê? Nà mẽ pakurom àhpumunh tÿx o àhpumunh tÿx. Anẽ.

Makre 5

Jejus kot mēhō nē mēkarōmnuti janor ã jarēnh

Matêwre 8.28-33; Rukre 8.26-34

¹Tã nhũm Jejus mẽ hkôt mẽ pa ho mẽ pa xwÿnhjê mērohã mō nẽ xarmã Geras wÿr pôj.

²⁻⁴Hāmri nẽ pàr rũm hapôj nhũm mēhō myja Jejus pumu nẽ hwÿr tẽ. Mēkarōmnuti kot hwÿr àr nhũm ÿ hã oprê htÿx kumrêx. Hāmri nẽ hkwyjê hkàx ã kapôt ã mẽ hã pika kamã ri hkênh nẽ pa ho pa. Nhũm mẽ xatã kàx o hte hpre nẽ hpa hpre htã no nhũm kurê.

⁵Nẽ kamàt kãm nẽ arĩgro hã àmra htÿx o mrar pê kên o amnhĩ tak o mra. Mẽ hã pyka kamã nẽ kapôt ã hixêt ã amnhĩ tak tÿx rãhã ho mra.

⁶Tã amÿm Jejus pumu nẽ hwÿr hprôt nẽ hã hpijaàm kaxyw kutã hkôn krã ho tēm nẽ hparpê nhÿ.

⁷⁻⁸Hāmri nhũm omu nẽ nē mēkarōmnuti mã kapêr nẽ kãm: —Kwa kurũm akato nẽ ma tẽ. Anẽ. Hāmri nhũm kuma nẽ tanhmã myta o nhũm tãm mēkarōmnuti nhÿ hã Jejus mã kapêr nẽ àmra kamã kãm: —Pa Tĩrtũm Kra Jejus? Mo kaxyw na ka ixwÿr tẽ? Kwa tanhmã ixto hkêt nẽ nà?

⁹⁻¹⁰Anẽ nhũm kãm: —Tanhmã na anhĩxi te? Anẽ. Nhũm kãm: —Nà ixpê Mēohtôhti. Mēkarōmnuti ohtô nẽ kot ixwÿr gjêx jakamã na htem ã inhĩxi jarēnh anẽ. Kwa nē mẽ ijanor kêt nẽ nà? Anẽ.

¹¹⁻¹²Hāmri nhũm mēkarōmnuti tãm amnhĩ to kuwÿ nẽ kãm: —Kwa kêr ka jahti nē mẽ ijapôx japêr nẽ mẽ kot amnhĩ xà htÿx kamã hamak o mẽ pa htũm xàta wÿr mẽ ixrēnh kêt nẽ. Hagrô hkwy mÿj wÿr mãn mẽ ixrē pa mẽ hpãnhã hwÿr mãn hagjê? Anẽ.

¹³Hāmri nhūm mẽ kām: —Tôe. Mẽ tām hwỳr mra. Anẽ. Hāmri nhūm mẽmyta pê hapôx pa nẽ ma hagrô hwỳr mrar kurê kumrẽx nẽ mẽ kām gjêx pa nhūm myja akupỹm tām hkrã. No nhūm hagrôja mẽkarõmnuti pymaj amỹra nẽ axkahkũm nẽ hprõt nẽ himô hã krã hixêt ã axpum rôrôk nẽ gôx kãm mrõ nẽ hpikaprãr pa. Ohtô rax kumrẽx. Kêp 2.000 tã hpikaprãr pa.

¹⁴Hāmri nhūm hagrô jamãr o ri mẽ pa xwỳnhjaja tee ri ja hã omu nẽ ma mẽ õ patrãw wỳr akupỹm mẽ piitã mẽ kãm harẽnh o hprõt nẽ mra. Hāmri nẽ mẽ kãm ujarẽnh pa.

¹⁵⁻¹⁶Nhūm mẽ tee ri mẽ kuma nẽ ma Jejus wỳr mra nẽ hkaxpa nẽ kuri myta pumu. Nhūm ra akupỹm tām hkrã nẽ ê kamã tām amnhĩ nhĩpêx nẽ nhỹ. Nhūm mẽ kot hã omunh xwỳnhjaja mẽ kãm ujarẽnh pa nhūm mẽ kuma nẽ myta pumu hãmri nẽ tee ri amnhĩ kukamã hamaxpêr o kãm Jejus puma nẽ.

¹⁷Hāmri nẽ amnhĩ nẽ kãm kapêr nẽ kãm: —Kwa mẽmo kaxyw na ka mẽ ixwỳr rê? Mẽ ma akupỹm amrar tokyx anẽ. Anẽ.

¹⁸Hāmri nhūm mẽ kuma nẽ akupỹm pàr wỳr agjê nhūm akupỹm mex xwỳnhhta tee ri ja hã mẽ omu nẽ mẽ hkôt hkrã.

¹⁹No nhūm Jejus kãm: —Nà kot kaj mẽ ixkôt amõr kêt nẽ. Ma akupỹm anhõ krĩ hwỳr mãn tẽ nẽ mẽ kãm Tĩrtũm kot akupỹm ato mex ã amnhĩ jarẽnh o ri mẽ hkôt apa. Anẽ.

²⁰Hāmri nhūm kuma nẽ ma akupỹm tẽ. Hāmri nẽ õ pyka pê Tekap kãm mẽ kãm Jejus kot tanhmã ho mex to hã harẽnh ri mẽ hkôt pa nhūm mẽ amnhĩ jaêr pê kuma nẽ tee ri hkukamã hamaxpêr.

Jejus kot akupỹm mẽhõ ho mex nẽ akupỹm mẽhõ ho htĩr ã harẽnh

Matêwre 9.18-26; Rukre 8.40-56

²¹Tã nhūm Jejus mẽ hkôt mẽ pa ho pa xwỳnhjê mẽrohã akupỹm xarmã mõ nẽ rê. Hāmri nẽ pàr nhõ nẽ api nẽ gô mỳri kuhê nhūm pika nhõ xwỳnhjaja Jejus pumu nẽ hã pikuprõnh rax nẽ.

²²⁻²³Hāmri nhūm mẽhõ my pê Jajtija hwỳr tẽ nẽ kutã hkõnkrã ho htẽm nẽ nhỹ. Kêp Tĩrtũm kapêr o mẽ ahkre xà hã ixkre jamãr xwỳnh maati na pre. Nhūm hkra nija kêp à htỳx nẽ htyk kaxyw nẽ nõ. Kormã nyw. Kormã hã

amgrà pè 12 pix tã ra kèp htyk kaxyw. Hãmri nhũm Jajtija tee ri hkukamã hamaxpër nẽ ma Jejus wỳr tẽ nẽ hpar pè hkõn krã ho tẽm nẽ ho hwỳr kãm hihtỳx nẽ kãm: —Pa akupỹm mẽ ixto mex xwỳnh maati. E awỳr na pa tẽ. Na ra ixkra ixpê htyk kaxyw. Pa tee ri omu nẽ kaxyw amã ijamaxpër nẽ awỳr tẽ. Jakamã kwa ma ixkõt inhõrkwỹ hwỳr tẽ nẽ inhmã omu nẽ hã anhĩkra xi nẽ akupỹm inhmã ho mex. Anẽ.

²⁴Hãmri nhũm kuma nẽ ma hkõt tẽ. Nhũm mẽ ohtô nẽ axpẽn nhĩgãnh nẽ axpẽn kujahêk o wa hkõt mra.

²⁵Nhũm mẽhõ nija haxwỳja wa hkõt tẽ. Na pre hte hkamrô hkryre rãhã ho pa hã ra hã amgrà kèp 12.

²⁶Nẽ tõtô mã amnhĩrer rax nẽ nhũm mẽ tee ri kot ho mex kaxyw nom xatã hkane kaprỳ. Hãmri nhũm ra hikàxpore kèp hapêx nhũm arĩ ãm rãhã nẽ pa.

²⁷⁻²⁸Hãmri nẽ tee ri amnhĩ kukamã hamaxpër nẽ Jejus jarẽnh ma nẽ hamaxpër o: —Ma kot paj ma hwỳr tẽ nẽ kèp ê pix kupênh tã akupỹm inhmex japêr. Ma kot paj ho anẽ. Anhỹr o hamaxpër hãmri nẽ ma mẽ hkõt hwỳr htẽm kurê kumrẽx. Nhũm mẽ ohtô raxja kaêx ã mẽ hkõt hwỳr tẽ. Hãmri nẽ katut kõt kèp ê nhĩrê kupê.

²⁹ãm ê pix kupênh tã akupỹm mex ã amnhĩ pumunh kurê kumrẽx.

³⁰Hãmri nhũm Jejus kot kèp ê kupênh ã amnhĩ tã omu nẽ hêx rom xa nẽ mẽ ho hakêx nẽ amnhĩ tã mẽ kãm kapêr nẽ mẽ kãm: —Kwa mẽ atõ na ka ri amnhĩ kaxyw inhmã ajamaxpër tỳx pè ixpê ixê kupê? Anẽ. Hãmri nhũm mẽ piitã kuma nẽ tee ri axpẽn pumu nẽ kãm amnhĩ tã aprã.

³¹Hãmri nhũm hkõt mẽ pa ho pa xwỳnhjaja kãm: —Mẽ kot apê amnàr griã kot ka kêt ri mẽhõ kot apê hkupênh xwỳnh ã ri mẽ hkukja. Kwa mãn ãm mẽhõ amarĩ apê hkupê. Anẽ.

³²Hãmri nhũm mẽ kãm: —Nà na amarĩ ixpê hkupênh kêt nẽ. Na amnhĩ kaxyw inhmã hamaxpër tỳx pè ixpê hkupê. Tã na ixàhpumunh tỳx xà ho akupỹm mex. Nom ra ixte mẽhõ kot ixpê hkupênh xwỳnhhta pumunh jakamã

na pa ixêx rom ã amnhĩ tã ri mẽ hkukjêr anê. E kwa mẽ atõ inhmã amnhĩ jarê. Anê.

³³Hãmri nhũm nija kuma nê tee ri kêp kot amnhĩ to hpimxur prãm. Hãmri nê hpijaàm nê hwỳr htertet o tẽ nê kutã hkõn krã ho tẽm nê nhỹ nê kãm amnhĩ jarê nê kãm: —Ma pa na pa inhmã inhmex prãm xàj apê axê kupê. Tã na pa akupỹm inhmex. Anê.

³⁴Hãmri nhũm kuma nê kãm: —Tỳ. Nà ate amnhĩ kaxyw inhmã ajamaxpêr tỳx kôt ã ate amnhĩ nhĩpêx anhỹr jakamã na ka akupỹm amex. Kot kaj axte akamrô rãhã ho ri apa hkêt nê. E mãmri ajamakêtkati nê ma akupỹm anhõrkwỹ hwỳr tẽ. Anê. Hãmri nhũm kuma nê hkĩnh nê ma akupỹm tẽ.

³⁵Rôm nhũm Jajti mã mẽ àpênh xwỳnhjaja õrkwỹ rũm ma õ patrãw kutã mra nê wa hkaxpa nê Jajti mã kãm: —Kwa na ra akra apê ty. Mo kaxyw kot ka kêt amnhĩ kôt Jejus o mõi? Kwãr mãmri ma akupỹm awjanã nê tẽ. Anê.

³⁶Hãmri nhũm Jejus mẽ kuma nê Jajti mã kãm: —Kwa tee ri akra hkukamã ajamaxpêr kêt nê. ãm kaxyw inhmã mãn ajamaxpêr tỳx rãhã nê. Anê.

³⁷⁻⁴⁰Hãmri nhũm mẽ axte mõi nê mẽ õrkwỹ hwỳr pøj nê mẽ omu. Nhũm mẽ ra hã htu rax nê mỳr o hkrĩ. Hãmri nhũm Jejus mẽ hwỳr axà nê mẽ omu nê kot mẽ hkra htyk kumrêx ã omunh tã mẽ kãm: —Kwa mẽ hãmri amỳr kêt nê. Na nireta htyk kêt nê. Na ãm gõi nê nõi. Anê. Hãmri nhũm mẽ kot ra htyk ã omunh mex jakamã kuma nê ãm kuma nê axtem nê ri axpên mã hã hpêr o axkê. Hãmri nhũm Jejus mẽ hanor pa nê hitom kãm htyk xwỳnh wỳr àr kaxyw nê amnhĩ kôt Juãw nê Xiakre nê Simãw Pêtre nê kaxyw htyk xwỳnh katorxà nê hipêêxà pix amnhĩ kôt mẽ ho axà.

⁴¹Hãmri nê htyk xwỳnhhta wỳr tẽ nê hpa hã kupy nê kãm kapêr nê kãm: —Pa? E kwa kànhmã nhỹ. Anê. Nom amnhĩ kapêr kãm harê nê kãm: —Tarit kũm. Anê.

⁴²Hãmri nhũm kànhmã ỹr kurê kumrêx nê kànhmã xa nê ri mra. Na pre ra hprêk nê ty. Na ra hã amgrà kêp 12 tã ty nhũm Jejus akupỹm ho htĩr nê kànhmã ỹr nhũm kànhmã xa nê ri mra.

⁴³Hāmri nhũm kuri omunh xwỳnhjaja amnhĩ jaêr pê omu nê kamã no puma nê hkĩnh tỳx kumrêx. Hāmri nhũm Jejus katorxà mẽ hipêêxàja wa kãm: — E măn ra kãm prãm nê. Wa tokyx kãm mẽmoj japêr kê kukrê. Nom kêr ka wa inhmar kumrêx. Kêr ka wa akupỳm ixte ho htĩr ã ri mẽ kãm ijarênh o ri apa hkêt nê. ãm kwarĩ ho kwarĩ. Anê.

Makre 6

Najare nhõ xwỳnhjaja kot Jejus kaga hã mẽ harênh

Matêwre 13.53-58; Rukre 4.16-30; Juãw 1.11

¹Tã nhũm Jejus ma õ krĩ pê Najare hwỳr ma akupỳm mō nhũm hkôt mẽ pa ho mẽ pa xwỳnhjaja ma hkôt mō.

²Hāmri nê hwỳr pōj. Nhũm mẽ õ arĩgromnu pê sap kator jakamã nhũm Jejus ma Tĩrtũm kapêr o mẽ ahkre xà hã ixkre hwỳr tẽ. Hāmri nê kamã mẽ ahkre ho nhỹ nhũm mẽ amnhĩ jaêr pê kapêr mex ã kuma nê tee ri axpên pumunh pê hamaxpêr o hkrĩ. Jejus kêp mẽ hkwỳ hã hkamnhĩx nom nhũm mẽ kurom àhpumunh tỳx nê kapêr mex jakamã nhũm mẽ kuma nê tee ri hamaxpêr o hkrĩ. Hāmri nê axpên mã:

³—Kwa kêp mẽ panhĩõ htã tanhmã kot we amnhĩ to nê ã àhpumunh tỳx kôt mẽ pamã kapêr anê nê ri mẽ kãm aa mẽ kot mẽmoj pumunh kêt kwỳ ho anhỹr o pa? Mẽ panoo mã na pre hprêk. Kêp pĩ kuprãr xwỳnh Juje mẽ hprõ Marir wa hkra na. Nê htõ Xiakre nê Juje nê Simãw nê Jutja ra mẽ pahte mẽ kêp htõ hã omunh mex. Nê htõxjaja jar mẽ pakamã pa nhũm mẽ pahte mẽ omunh mex kênã kot kêt we mẽ kurom ã àhpumunh tỳx anê. Anê. Anhỹr o axpên mã harẽ. Hāmri nê kamã gryk nê hkaga

⁴⁻⁶nhũm tee ri amnhĩ tã mẽ omu nê hamaxpêr o: —Hêxta waa nê. Mẽ kãm amnhĩ kaxyw ixkôt hamaxpêr prãm kêt kumrêx. Anê. Hāmri nê mẽ kãm: — Nà Tĩrtũm nhỹ hã kapêr jarênh o mẽ pa xwỳnhjaja na htem krĩ hkwỳ kamã kãm mẽ mar prãm nê. Nom õ krĩ kamã mẽ kot karàre rũm hprêk o mōr kãm omunh xwỳnhjaja na htem kuma nê ãm kuma. Anê. Hāmri nhũm mẽ kot amnhĩ kaxyw hkôt hamaxpêr kêt jakamã nhũm tee ri mẽ kãm aa mẽ kot mẽmoj pumunh kêt kwỳ ho anhỹr rax prãm kaprỳ. Nê ãm mẽ à xwỳnhjê ho

grêre nê mẽ hã ìhkra jaxwỳ nê akupỹm mẽ ho mex. Hãmri nê mẽ kurũm kato nê ma krĩ hkwyỳ hkôt ri Tĩrtũm kapẽr o mẽ ahkre ho pa.

Jejus kot mẽmoj tă mẽ kệp 12jê mã karõ hã harẽnh
Matêwre 10.5-15; Rukre 9.1-6; 10.1-12; mãânẽn Atre 13.50-51; 18.6

⁷Tã nhũm Jejus amnhĩ wỳr mẽ kot ỹ hã mẽ ahkre ho pa xwỳnh pê 12jê hwỳ. Ra kot amnhĩ kaxyw mẽ rênh xwỳnhtaja nhũm amnhĩ wỳr mẽ kuwỳ. Hãmri nê axpẽn kaxyw mẽ ho axkrut nê mẽ kurê nê mẽ kãm mẽ àpênh ã karõ nê ma mẽ hkwyỳjê hwỳr mẽ kurẽ. Nê mẽ kãm: —E kêr ka mẽ ma mẽ pahkwỳjê hwỳr mra nê inhỹ hã Tĩrtũm kapẽr jarẽnh o ri mẽ hkôt apa. Nê mẽ kurũm mẽkarõmnuti japôx o ri mẽ hkôt apa.

⁸⁻⁹Nom kêr ka mẽ amnhĩ kôt akukrêx rax nê ri apa hkêt nê. Nê kawà htu nê ho ri apa hkêt nê. Nê amnhĩ kôt axàpkur xà ho ri apa hkêt nê. Rỳ akàxpore rax nê ri ho apa hkêt nê. ãm mẽ anhõ Kamis nê mẽ apar kà ho pixire nê agjê nê ri hã apa. Nê mẽ amnhĩ kaxpar xà hã mẽ anhõ kô pix o apa. Mẽ ã anhỹ kamã mẽ hkôt ri apa anẽ.

¹⁰—Nê kêr ka mẽ nhỹri krĩ hõ hwỳr pôj. Nê apôx xà kamã mẽhõ nhõrkwỹ kamã hkôt ri apikamẽnh tãmtã kurũm akupỹm ajapôj nê ma hpãnhã nhãm krĩ hõ hwỳr apa. Nom atỳx ri nhãm mẽ hwỳr amrar nê nhãm mẽ hwỳr amrar kêt nê.

¹¹—Nê koja mẽ nhỹri mẽ akapẽr kaga ka mẽ tee ri amnhĩ tă mẽ kamã ama hãmri nê tokyx mẽ kurũm ajapôj nê ma apa. Nê anojarêt nê mẽ noo mã akuhê nê amnhĩ par ã awjagrô kapĩ. Mẽ kot Tĩrtũm kaga hã amnhĩ pumunh nhũm kot amnhĩ pyrà nê mẽ hkaga hã omunh kaxyw ka mẽ ã mẽ noo mã amnhĩ nhĩpêx anẽ. Hãmri nê hpãnhã ma nhỹhỹm apa.

¹²Anhỹr o mẽ kãm mẽ àpênh ã karõ. Nhũm mẽ kuma nê hapôj nê ma mẽ hkwyỳjê hkôt pa. Ma krĩ piitã hkôt Tĩrtũm kapẽr o mẽ ahkre ho ri mẽ hkôt pa nê mẽ kãm: —E kwa mẽ tokyx amã ate amnhĩ tomnuj kaga hprãm xàj Tĩrtũm kôt mãn amnhĩ xunhwỳ. Anẽ.

¹³Hãmri nê mẽ nê mẽkarõmnuti jano. Nê akupỹm mẽ à xwỳnhjê ho mex kaxyw mẽmo htwỳm o mẽ hkrã gregrer nê Jejus nhỹ hã akupỹm mẽ ho mex.

Mě kot Juāw Paxis pīr ā mẽ harēnh

Matêwre 14.1-12; Rukre 9.7-9

14Tā nhũm mẽ piitā Jejus jarēnh ma nē axpēn mã tanhmã harēnh to ho pa. Nom ahpỹnhã tanhmã harēnh to. Na prem kamã harēnh o: —Nà Juāw Paxis pimràata na. Pěr akupỹm htīr jakamã na hte ã mẽ kot aa mẽmoj pumunh kêt kwỳ ho anhỹr o pa. Aně.

15Ně kamã axtem harēnh o: —Nà tãm kêt. Pěr finat Eris na. Aně. Ně kamã axtem harēnh o: —Nà tãm kêt. Pěr Tīrtũm nhỹ hã kapěr jarēnh xwỳnhjê hõ na. Te kot amnepê mã mẽ kot Tīrtũm nhỹ hã tanhmã amnhĩ nhĩpêx to xwỳnhjê kot amnhĩ nhĩpêx pyræk o kot amnhĩ nhĩpêx kênã. Anhỹr o ahpỹnhã harě.

16Hãmri nhũm Ijaew o amnhĩptàr xwỳnh pê Erox āxipasja mẽ kot ã harēnh anhỹr ã mẽ kuma nē Juāw Paxis mã hamaxpěr kurê kumrêx. Hãmri nē mẽ kãm: —Nà pěr Juāw Paxista na. Ixte mẽ kãm hã ixàmnênh nhũm mẽ kot inhmã mut krãhyr xwỳnhhta mãn ra tanhmã amnhĩ to nē akupỹm htīr. Aně.

17-20Na pre ra pahi Erox āxipasja htõ Pirip pê hprõ Eroxis pytà nē ho hprõ nhũm hkra niti mẽ wa hwỳr apha. Hãmri nhũm Juāw Paxisja tee ri ja hã pahihti Erox āxipasja pumu nē hã kãm akir nē kãm: —Tk. Kwa Tīrtũm kêp ja omnuj. Ra kot ja nê mẽ pahkurê htã ka axtem nē ã amnhĩ nhĩpêx aně. Anhỹr jakamã nhũm hprõ Eroxisja amnhĩ tã kuma nē kamã gryk tỳx nē. Ně kãm hpīr prãm nē. No nhũm pahi Erox āxipas kãm hpīr prãm kêt nē. Juāw Paxis kot Tīrtũm kôt amnhĩ nhĩpêx nhũm kot hã omunh mex jakamã kãm hpīr prãm kêt nē. Juāw na pre hte xatã kãm Tīrtũm kapěr jarēnh o pa. Nhũm pahihti Erox āxipasja kormã hprĩ hã mar mex kêt tã hã hpijaàm nē kãm mar prãm nē. Nom nhũm hprõ kãm hpīr prãm jakamã nhũm kêp mẽ kãm hã amỹnê nhũm mẽ ma o tẽ nē haxà nhũm mex nē mẽ hagjênh xà kamã hkrĩ ho krĩ.

21-24Tā nhũm jãã nhũm pahi Erox āxipas kator ã arĩgro kato nhũm mẽ piitã hwỳr mra nē hã akuprõ nē hã hkĩnh nē hã apkur o hkrĩ. Ô kôwenatôjaja nē hkràmnhwỳjaja nē krĩ hkwy kamã mẽõ pahijaja nhũm mẽ ohtô nē hã akuprõ nē hã hkĩnh. Hãmri nhũm hprõ Eroxis kra nitija mẽ hwỳr axà nē mẽ kãm

gre. Mě kot omunh nē kamā hkurē pix kaxyw mẽ noo mā hpijaàm kêt nē ā mẽ kām grer anē. Hāmri nhūm pahi Erox omu nhūm ja kām mex nē nhūm mẽ piitā hkīnh nē kamā nopyma nē. Nē grer kām hpijaàm kêt nē tanhmā mẽ kām grer to nhūm mẽ omu nē kamā no pyma nē. Hāmri nhūm pahi Erox āxipasja kām: —Nà ām hāmri. Na ka mẽ inhmā agrer mex nē. Jakamā kwa māmri mẽmoj tā ixwỳ. Amā mẽmoj prām xà hkôt inhmā mẽmoj jarē pa amā kugō. Ām hāmri na pa amā amnhī jarē. Na pa Tirtūm noo mā ā amā amnhī jarēnh anē. Ka mamri ixkukrêx mex kwỳ hā ixwỳ pu axpēn mā ho axkjê. E mẽmo na amā hprām? Anē. Hāmri nhūm kuma nē ma katorxà hwỳr tē nē kām harē nē kām: —Xê mẽmoj tā kot paj we kuwỳ? Anē. Hāmri nhūm kuma nē hamaxpēr o: —Ma ām hāmri koja mẽ tā jarāhā inhmā Juāw Paxis pī. Anē. Hāmri nē hkrata mā kām: —Ma Juāw Paxis krā hā kot kaj awỳ kê mẽ amā kugō ka man ixwỳr o tē. Anē.

²⁵Hāmri nhūm kuma nē akupỹm pahi hwỳr axà nē kām: —Ma Juāw Paxis krā kot kaj inhmā agō. Pasiiti kamā axà nē inhmā agō pa ma amnhīm o ixtēm kurê kumrêx. Ām ja pix na inhmā hprām. Anē.

²⁶Hāmri nhūm tee ri kuma nē hkaprī nē. Nē hamaxpēr o: —Hêxta waa nē. Inhmā hpīr prām kêt. Nom ra ixte ixkutā mẽ hkrī xwỳnhjê noo mā inhmā kām mẽmoj prām xwỳnh nhōr ā amnhī jarēnh nhūm ixte kām ōr ā amnhī jarēnh nhūm mẽ piitā mẽ kot inhmar jakamā tanhmā kot pa we amnhī to nē kēp nē? Nà pa nē hkêt nē. Anē.

²⁷Hāmri nē ō pôristijê mā kām: —E mẽ ma Juāw Paxis wỳr mra nē mut krāhta nē pasiiti kamā hkrā xà nē akupỹn o tē nē kām agō. Anē. Hāmri nhūm mẽ kuma nē ma mẽ hagiēnh xà hwỳr mra nē Juāw wỳr axà hāmri nē mut krāhta.

²⁸Hāmri nē pasiiti kamā hkrā xà nē akupỹm o tē nē kot hā hwỳr xwỳnh mā kugō nhūm kumỳ nē ma katorxà hwỳr o tē nē kām kugō.

²⁹Hāmri nhūm Juāw Paxis kôt mẽ pa ho mẽ pa xwỳnhjaja tee ri harēnh ma nē hkaprī htỳx nē. Hāmri nē pahi Erox āxipas wỳr mra nē ĩ hā kuwỳ nhūm mẽ kām kugō nhūm mẽ kumỳ nē ma o mra nē kēn kre kamā haxà.

Jejus kot mẽ ho 5.000 nẽ mẽ kãm õ hã harẽnh

Matêwre 14.13-21; Rukre 9.10-17; Juãw 6.1-14

30Tã hãmri nhũm mẽ kot Jejus nhỹ hã mẽ ahkre ho mẽ pa xwỳnhjaja akupỳn Jejus wỳr mơn pøj nẽ kãm amnhĩ jarẽ. Tanhmã mẽ kot mẽ ahkre hto ho pa nẽ tanhmã mẽ ho mex to ho pa hã kãm amnhĩ jarẽnh pa.

31Tã nhũm mẽ piitã axpẽn pãnhã kot Jejus mar kaxyw mẽ hwỳr mra nhũm mẽ kormã apkur kêt nẽ. Jakamã nhũm Jejus hkôt mẽ pa ho mẽ pa xwỳnhjê mã: —E ma pu mẽ awrã kaprỳ hwỳr mō nẽ nhỹri pahkrĩ nẽ pakôkôt nẽ apku.

32Anẽ hãmri nhũm mẽ gôx kãm kanôre wỳr agjê nẽ ma ahte xarmã awrã kaprỳ hwỳr mō.

33Nhũm krĩ hkwỳ nhõ xwỳnhjaja mẽ omu hãmri nẽ nhỹhỹm mẽ mōr xà hã mẽ omunh kurê kumrêx. Hãmri nẽ krĩ hkwỳ rũm ma mẽ ìhkrep mra nẽ mẽ kãm amnhĩ to wa nẽ pøj nẽ mẽ kutêp hkrĩ.

34Hãmri nhũm mẽ mō nẽ mẽ hwỳr pøj nẽ kre kura nẽ kanôre nhô. Hãmri nhũm Jejus mẽ hwỳr api nẽ mẽ omu nẽ hamaxpěr o: —Hêxta waa nẽ. Na mẽ omnu nẽ pa. Te mẽ kêp ôwêhti jamãr xwỳnh kêt nẽ htỳx ri pa xwỳnh kot amnhĩ nhĩpêx pyrãk. Mẽhõ kot mẽ kamã ukaprĩ nẽ tanhmã mẽ ho mex to ho pa? Anẽ. Hãmri nẽ mẽ kamã ukaprĩ nẽ xa nẽ Tĩrtũm kapěr o mẽ ahkre rax nẽ.

35-36Tã nhũm myt àr kaxyw nhũm hkôt mẽ kot pa ho pa xwỳnhjaja hwỳr mra nẽ kãm: —Kwa hãmri na ra amỹkry htỳx nẽ. Mẽ hano kê mẽ ma nhỹri krĩ hkwỳ hwỳr mra nẽ tokyx amnhĩm mẽmoj japrô nẽ kuku nẽ hikwỹ nẽ gõr. Mo jar kapôt ã mẽ apkur xà? Anẽ.

37Hãmri nhũm mẽ kuma nẽ mẽ kãm: —Kwa nà mẽ kamjaja mẽ kãm mẽmoj gõ kê mẽ kuku. Anẽ. Hãmri nhũm mẽ kuma nẽ tee ri hamaxpěr nẽ kãm: —Kwa mo mẽ kaxyw mẽ pakàxpore rax? Kot pu mẽ pakàxpore ho 200 nẽ ho mẽ kãm mẽmoj japrôr tã nom nhũm mẽ ãm ho hkryre nẽ kuku nẽ ho õhy htu hkêt nẽ. Mẽ ohtô rax kumrêx kênã. Anẽ.

38Hãmri nhũm mẽ kãm: —Nà kot puj mẽ kãm mẽmoj japrôr kêt nẽ. No mẽ panhõ pãwtita? Tanhmã na arĩ kute? E mẽ atõ tẽ nẽ omu nẽ akupỳn tẽ nẽ

inhmã harẽ. Anẽ. Hãmri nhũm ja ma tẽ nẽ omu nẽ akupÿn tẽ nẽ kãm: —Nà pãwti ãm kêp 5 pix. Nẽ kaxyw tep ãm pijakrutre. Anẽ.

³⁹Hãmri nhũm Jejus kuma nẽ mẽ kãm: —Tôe. Mẽ kãm anẽ kê mẽ ahpÿnhã ri hije nẽ hkrĩ. Anẽ.

⁴⁰Hãmri nhũm mẽ piitã ahpÿnhã kêp 50 nẽ hije nẽ hkrĩ hpa.

⁴¹Nhũm Jejus pãwti mẽ tepta jamÿ nẽ kànhmã kaxkwa hwÿr rĩt nẽ Tĩrtũm mã kupẽ nẽ kãm harẽ nẽ kãm: —Pa Papaj? Nà ka na apê mẽ inhmã mẽ inhõ ho apa xwÿnh jakamã amex o amex. Anẽ. Hãmri nẽ mẽ kãm ho hkry hpa nẽ hkõt mẽ pa ho mẽ pa xwÿnhjê mã kugõ nhũm mẽ ô ri ho mra nẽ ho mẽ hipêx pa. Pãwti mẽ tepta nhũm mẽ ho mẽ hipêx pa.

⁴²⁻⁴⁴Nhũm mẽ piitã apkur mex nẽ. Mẽõja mẽ kêp grire htã nhũm Jejus tanhmã mẽ kãm ho rax to nhũm mẽ ohtô rax tã piitã kuku nẽ ho õhy htu hpa. Mẽmyjaja kêp 5.000 nẽ kaxyw mẽ hprõ nẽ mẽ hkrajaja nhũm mẽõja ho mẽ hipêx pa nhũm arĩ hakrêx prã. Jakamã nhũm Jejus kõt mẽ pa ho mẽ pa xwÿnhjaja akupÿm hakrêx o pikuprõnh pa nẽ ho kawà o 12 nẽ ho nÿt.

Jejus kot gô krãhkà hã htẽm ã harẽnh

Matêwre 14.22-33; Juãw 6.15-21

⁴⁵⁻⁴⁶Tã nhũm Jejus hkõt mẽ pa ho mẽ pa xwÿnhjê mã kãm: —E mẽ kanõre mã axà nẽ ma akupÿm ixkukamã krĩ pê Petsêj wÿr rê. Pa jajê jano hãmri nẽ ma tẽ nẽ nhÿri Tĩrtũm mã amnhĩ jarẽ nẽ rĩ ma mẽ akõt tẽ. Anẽ. Hãmri nhũm mẽ kuma nẽ kanõre mã gjêx pa nẽ ma mõi nhũm Jejus mẽ kot mar xwÿnhjê janor pa nẽ ma hixêt prêk ã api nẽ Tĩrtũm mã amnhĩ jarẽnh o nhÿ.

⁴⁷Tã nhũm kamàt nhũm arĩ ahte kÿxpê nhÿ. Nhũm hkõt mẽ pa ho mẽ pa xwÿnhjaja kormã kanõre kamã mõi.

⁴⁸Hãmri nhũm Jejus amÿm mẽ omu nhũm kôk ra mẽ kutã àpêr tÿx kumrêx nhũm mẽ tee ri amnhĩ nhĩpêx nẽ tee ri rrẽmti ho gô rênh nhĩpêx o hkrĩ. Tã nhũm ra krãhyre kà nhũm Jejus Tĩrtũm mã amnhĩ jarẽnh pa nẽ kànhmã xa nẽ ma mẽ hkõt tẽ. Nom kanõre kamã htẽm kêt nẽ gô krãhkà hã xa nẽ mẽ hwÿr hpar o tẽ.

49-50Hāmri nē mẽ hwỳr kato nē mẽ kamã hamak kaxyw hêx rom kot mẽ hakrenh mã. Nhũm mẽ amnhĩ wỳr omu nē mẽkarõ hã hkamnhĩx nē tee ri amnhĩ kukamã hamaxpêr nē umaj htertet nē àmra rax nē. Hāmri nhũm mẽ kãm: —Tk. Kwa mẽ amã ma hkêt nē. Pa na pa mẽ akôt tē. Anē.

51Hāmri nē mẽ hwỳr kanôre hkrem axà nhũm kôk xàpêr tỳxta hapêx. Hāmri nhũm mẽ Jejus kamã no pyma nē tee ri hamaxpêr nē axpên mã: —Kokỹỹ. Tanhmã na we amnhĩ to nē gô krãhkà hã hpar o man mẽ pahkôt tē mẽ pahwỳr àr mẽ nhũm kôk hapêx par kurê kumrêx. Anē. Hāmri nē tee ri kot ã amnhĩ nhĩpêx anhỹrja kukamã hamaxpêr o hkrĩ.

52Kormã mẽ kot hprĩ hã Jejus tanhmã kute hã omunh kêt jakamã. Tĩrtũm pyrà nē àhpumunh o àhpumunh ã omunh mex kêt jakamã tee ri pãwti grêre ho mẽ hipêx par nē gô krãhkà hã htēm nē kôk o pinhkrênh ã omu nē tee ri ã kot amnhĩ nhĩpêx anhỹrja kukamã hamaxpêr.

Kenějare kamã Jejus kot akupỹm mẽ ho mex ã harênh

Matêwre 14.34-36

53Tã nhũm mẽ xarmã rê nē krĩ pê Jenějare hwỳr pôj. Hāmri nē kanôre nhô

54nē api nē kuhê nhũm krĩ nhõ xwỳnhjaja Jejus pumunh kurê kumrêx nē axpên mã: —Kwa pêr Jejusta na mō. Nà tãm kênã. Anē.

55Hāmri nē hkĩnh nē ma kape hã mẽ à xwỳnhjê hkôt mrar kurê kumrêx nē mẽ harir xà rãhã mẽ hamỳ nē akupỹm Jejus wỳr mẽ o mra. Nhỹri hpôx xà kamã omu nē hwỳr mẽ o mra.

56Na pre htem ã Jejus nhĩpêx anē. Jakamã nhũm hte ma nhỹhỹm mra. Krĩ rũnh kôt mra nē krĩ hkryre hkôt mra nhũm mẽ omu nē hwỳr mẽ à xwỳnhjê ho mra nē mẽ ho kuwỳ nē kãm: —Pa? Kwa kê jajaja akupỹm mex kaxyw apê axê pix kupê nà? Anē. Hāmri nhũm mẽ kãm: —Tôe. Nà kwār mẽ mãmri hkupê. Anē. Hāmri nē mẽ kot kêp ê kupênh xwỳnh piitã akupỹm mex pa.

Makre 7

Mẽ higêt hkôt mẽ kot amnhĩ nhĩpêx xwỳnhjê jarênh

Matêwre 5.21-48; 15.1-20

1-4Tã nhũm Mojes kapër o mẽ ahkre o mẽ pa xwỳnh kwỳjaja Jerujarẽ rũm Jejus wỳr mỗ. Hãmri nẽ hã akuprỗ nẽ hkôt mẽ pa ho mẽ pa xwỳnhjê kot amnhĩ nhĩpêx ã mẽ omunh o kuhê. Ijaew na prem mẽ hkukamã mẽ higêtjê kapër kôt ri tanhmã amnhĩ nhĩpêx to ho pa. Jakamã mẽ uràk nẽ apkur kaxyw nẽ xatã amnhĩ nhĩhkra kuhõnh japjê nẽ rĩ kormã apku. No mẽ amnhĩ nhĩhkra grã pix kuhõnh nẽ hkrĩ nẽ apkur kêt nẽ. Kuhõnh japjê nẽ kormã hkrĩ nẽ apku. Tĩrtũm kot ja hã mẽ omunh nẽ amnhĩm mẽ mex ã mẽ harẽnh ã amnhĩ kamnhĩx jakamã na prem ã amnhĩ nhĩpêx anhỹr o pa. Nẽ nhỹri amnhĩm mẽõ hkwỳ japrỗ nẽ akupỹm ỏrkwỹ hwỳr o mra nẽ haxwỳ nẽ mẽ higêt pyrã nẽ wỳr japjê rũnh kumrẽx nẽ rĩ kormã apku. Nẽ mẽ uràk nẽ poti nẽ gỏj nẽ papêre hkre kahõnh japjê rũnh nẽ rĩ kormã kamã ỏ nhĩpêx. Mẽ higêt pyrã nẽ ã amnhĩ nhĩpêx anhỹr o pa. Tĩrtũm kot ja hã mẽ omunh nẽ amnhĩm mẽ mex ã mẽ harẽnh prãm xàj. Nom nhũm Jejus kôt mẽ pa xwỳnhjaja na prem ã amnhĩ nhĩpêx anhỹr kêt nẽ. Na prem apkur kaxyw nẽ katat kôt amnhĩ nhĩhkra kuhõ nẽ àmnhĩx apkur o hkrĩ. Jakamã nhũm Parijew nhõ xwỳnh mẽ Tĩrtũm kapër tũm o mẽ ahkre xwỳnhjaja tee ri ã mẽ kot amnhĩ nhĩpêx anhỹr ã mẽ omu nẽ mẽ hã Jejus kukja nẽ kãm:

5—Pa Jejus? Kwa mẽ inhmã mẽmoj jarẽ. Amnepêtm mẽ panhĩgêtjaja na pre htem apkur kaxyw nẽ amnhĩ nhĩhkra kuhõnh japjê rũnh kumrẽx nẽ arĩ kormã hkrĩn apku. Jakamã na pa htem mẽ uràk nẽ ã amnhĩ nhĩpêx anẽ. No akôt mẽ pa ho mẽ pa xwỳnhjaja na htem ho mẽ ixpyrã kêt nẽ. Kwa mo na htem ã amnhĩ nhĩpêx anhỹr kêt nẽ? Anẽ.

6Hãmri nhũm mẽ kuma nẽ mẽ kãm amnepêtm Tĩrtũm nhỹ hã kapër xwỳnh pê Ijais kapër jarẽ nẽ mẽ kãm: —Nà ãm hãmri na pre finat Ijaisja amnepêtm tanhmã mẽ ajarẽnh to. Te Tĩrtũm tãm kapër pyrãk o mẽ ajarẽ nẽ mẽ ajarẽnh o: Mẽ kãm ixkĩnh ã amnhĩ jarẽnh tã mẽ kãm ixkĩnh kêt. Na htem ãm kãm ixprãm ã amnhĩ jarẽnh kaprỳ.

7Mẽ kot ixkapër kuhpa hã amnhĩ krã hkôt mẽmoj tã hkwỳjê mã karõ ho pa jakamã na htem ãm kot ixkôt amnhĩ nhĩpêx ã amnhĩ jarẽnh kaprỳ. Anẽ. ã na pre mẽ ajarẽnh anẽ.

8-9ãm hãmri na pre mẽ ajarẽ. Na ka htem mẽ panhĩgêt kapër kôt pix mã amnhĩ nhĩpêx o apaja gryk ã ra Tĩrtũm kapër kaga hpa. Te mẽ akapër mex o kot Tĩrtũm kapër jakrenh pyræk.

10Na pre finat Mojes Tĩrtũm nhỹ hã mẽmoj tã mẽ pamã karõ ho: Ker ka mẽ anhĩpêêxà nẽ mẽ akatorxà wa hã apijaàm o ri apa. Jao wa kutã anojarêt rãhã nẽ. Nom kot kaj mẽ ho mex hkêt nẽ tanhmã mẽ kãm akapër punuj to hãmri nhũm mẽ akwỳjaja ja mỳrapê mẽ apa. Anẽ. Na pre ã finat Mojesja Tĩrtũm nhỹ hã mẽ pamã karõ anẽ.

11No mẽ kajaja na ka mẽ axtem nẽ tanhmã akwỳjê mã ja hã karõ hto nẽ mẽ kãm: “Kot kaj mẽ mẽmo arĩgro hã akàxpore hkwỳ nom anhĩpêêxà ho ajuta kaxyw kãm hkwỳ nhõr kêt nẽ. ãm wa kãm ate ho ajuta kêt ã amnhĩ jarẽ hãmri nẽ Tĩrtũm mã amnhĩ jarẽnh xà hã ixkre hwỳr mãn o tẽ nẽ mẽ ixte ixkre ho mex kaxyw mẽ inhmã agõ. Kot kaj mẽ ã amnhĩ nhĩpêx anẽ nhũm Tĩrtũm ja hã mẽ apumu nhũm ja kãm mex nẽ. E kêt ka mẽ ã amnhĩ nhĩpêx anhỹr o ri apa.” Anhỹr o na ka htem akwỳjê mã karõ.

12Jao mẽ kot mẽ hipêêxà nẽ mẽ katorxà ho ajuta nẽ mẽ hkurê.

13Te mẽ amã mẽ panhĩgêt kapër mex o kot Tĩrtũm kapër jakrenh pyræk o na ka htem amnhĩ nhĩpêx. Jao te Tĩrtũm kapër mex kêt pyræk o hipêx nẽ mar kêt nẽ apa. ã na ka htem Tĩrtũm kapër kuhpa hã amnhĩ nhĩpêx anhỹr o ri apa. Anẽ.

Mẽ pajamaxpër punuj kôt mẽ pahtomnu hã harẽnh

Matêwre 15.10-20

14Tã nhũm Jejus Parijew nhõ xwỳnhjê mẽ hkwỳjê mã kapër pa hãmri nẽ amnhĩ wỳr ra mẽ kot mar o kuhê xwỳnhjê mã hpa ho apê nẽ mẽ kãm: —E pa mẽ amã mẽmoj jarẽ ka mẽ inhma nẽ inhmar mex nẽ.

15-16Na hte Tĩrtũm kapër tũm o mẽ ahkre xwỳnhjaja amnhĩ krã hkôt mẽ ate amnhĩ nhĩhkra kuhõnh japjê hã mẽ amã karõ ho pa. Nẽ amnhĩ krã hkôt mẽ axàpkur xà hã tanhmã mẽ amã karõ hto ho pa. Mẽ ate ã amnhĩ nhĩpêx anhỹr nhũm Tĩrtũm kot ja hã mẽ apumunh kôt amnhĩm mẽ amex ã mẽ ajarẽnh kaxyw nhũm htem ã mẽmoj tã mẽ amã karõ anẽ. Nom na hte Tĩrtũm tanhmã

mě panhĩkra kuhõnh to hã mẽ pahpumu nẽ ãm hã mẽ pa hpumu. Nẽ mẽmo mẽ paxàpkur xà hã mẽ pahpumu nẽ ãm hã mẽ pahpumu. Ja kãm tanhmã kute hkêt. Na hte ja hã mẽ omunh xà hkôt amnhĩm mẽ mex ã mẽ harẽnh rỳ mẽ mex kêt ã mẽ harẽnh kêt nẽ. Rỳ mẽ hakwa ho mẽmoj kur ã mẽ omunh xà hkôt tanhmã mẽ harẽnh to hkêt nẽ. ãm mẽ hakwa ho tanhmã kapër to pix ã mẽ mar kôt na hte tanhmã mẽ harẽnh to. Anhỹr o mẽ kãm kapër.

17Hãmri nẽ mẽ kot mar o kuhê xwỳnhjê re nẽ hkôt mẽ pa ho mẽ pa xwỳnhjê mẽ mẽ amnhĩm hikranh xà hã ixkre hwỳr agjê. Hãmri nhũm hkôt mẽ pa ho mẽ pa xwỳnhjaja tee ri Jejus kot tanhmã mẽ hakwa jarẽnh to hã kuma nẽ hã hkukja nẽ kãm: —Kwa mon ka ri mẽ inhmã ã ja jarẽnh anẽ? Anẽ.

18Hãmri nhũm mẽ kãm: —Kwa xàn ka mẽ kormã aprĩ hã ja mar mex kêt nẽ? E pa ixprĩ hã mẽ amã harẽ ka mẽ inhma. Nà mẽ apkur xà na hte mẽ hkrã hi kamã mẽ hamaxpër wỳr gjêx kêt nẽ.

19Na hte ãm mẽ õhy pix wỳr agjê nẽ gaa nẽ nhãm hapôj nẽ hapêx. Na htem mẽ apkur xà nhỹ hã tanhmã amnhĩ tomnu to hkêt nẽ. Jakamã na hte Tĩrtũm mẽ apkur xà hã mẽ omunh xà hkôt tanhmã mẽ harẽnh to hkêt nẽ. Anẽ. Nhũm pre ã mẽ kãm kapër anhỹr o mẽ paxàpkur xà piitã mex ã harẽ. Jakamã na hte Tĩrtũm krajaja àmnhĩx mẽmoj piitã hkur o pa nẽ kãm mẽmoj kur pyma hkêt nẽ. Jakamã nhũm Jejus ã mẽ kãm kapër anẽ nẽ mẽ kãm:

20—Mẽ hkrã hi kamã mẽ hamaxpër punuj pix nhỹ hã na htem tanhmã amnhĩ tomnuj to. Jakamã na hte Tĩrtũm tanhmã mẽ hamaxpër to ho pa hã mẽ omunh xà hkôt tanhmã mẽ harẽnh to. Nom mẽ kot mẽmoj kur ã mẽ omunh xà hkôt rỳ mẽ ãhkra kuhõnh japjê hã mẽ omunh xà hkôt tanhmã mẽ harẽnh to hkêt nẽ. Ja tanhmã kệp kute hkêt.

21-22Nom koja mẽhõ hamaxpër punuj nẽ ra hkôt tanhmã amnhĩ tomnuj to. Jao axpẽn kamã hpijaàm kêt nẽ. Rỳ mẽhõx pĩ rỳ mẽ kệp ahkĩ. Rỳ mẽ kệp mẽ hprõ rỳ mẽhkuprỳ ho amnhĩkati. Rỳ ri axpẽn pê õxỳ. Rỳ tanhmã hkwyjê homnuj to. Rỳ tanhmã mẽ ho kapër punuj to. Rỳ hêx rom mẽ no kupy r o ri pa. Rỳ mẽmoj tã amnhĩ to jarkrar o pa. Rỳ axpẽn kukrêx pumu nẽ kãm ho

õ hprãm xàj hã õ xwỳnhhta kamã gryk. Rỳ htỳx ri tanhmã amnhĩ nhĩpêx to. Mẽ hamaxpêr punuj jakamã na htem ã ri amnhĩ nhĩpêx anhỹr o pa.

23Tã ã mẽ kot amnhĩ nhĩpêx anhỹr ã mẽ omunh xà hkôt na hte Tĩrtũm mẽ kot amnhĩ tomnuj xwỳnh hã mẽ harẽ. Anẽ.

Mẽhõ kot hkra kaxyw Jejus mã hamaxpêr ã harẽnh

Matêwre 5.21-28

24Tã nhũm Jejus mẽ hkôt mẽ pa ho mẽ pa xwỳnhjaja nhỹhỹm nojarêr hãmri nẽ krĩ rũm hapôj nẽ ma krĩ pê Xir pu hã ri pa. Hãmri nhũm Jejus hkwỳjê mã: —E kwa pu mẽ tokyx ixkre mũj wỳr mỗ mẽ kuri pôj nẽ kamã amnhĩm hikra. Pu mẽ pahpôx tokyx anẽ kê krĩ nhõ xwỳnhjaja mẽ pahpôx ã mẽ pahpumunh kêt nẽ. Anhỹr tã nom nhũm mẽ piitã mẽ harẽnh ma nẽ mẽ hã akuprõ.

25-26Nhũm mẽhõ ni haxwỳja Jejus hpôx ã harẽnh ma nẽ ma hwỳr tẽ. Nom kêp Ijaew kêt axtem Gres nhõ xwỳnh na pre. Pika pê Sir kamã krĩ mẽ kot kãm “Wẽnĩs” anhỹr xwỳnh kamã na pre kato. Nhũm pre mẽkarõmnuti kêp hkra ni mã axà. Hãmri nhũm õ mãmãj tee ri omu nẽ ra Jejus hpôx ã harẽnh ma nẽ ma hwỳr tẽ. Hãmri nẽ hwỳr axà nẽ hparpê hkõnkrã ho htẽm nẽ nhỹ nẽ kãm: —Xê Pahihti. Inhmã ixkra nê mẽkarõmnuti jano kê ma tẽ kê akupỹm inhmã mex. Anẽ.

27Hãmri nhũm kãm: —Nà kormã. Na pre Tĩrtũm taxy kormã Ijaewjê pix wỳr inhmẽ. Jakamã na pa kormã nhãm mẽ akwỳjê hõ tanhmã mẽ ato mex to hkêt nẽ. Anẽ.

28Hãmri nhũm tee ri amnhĩ tã kuma nẽ kãm: —Ma ãm hãmri na ka ja jarẽ. Ixpê Ijaew kêt tã nom mẽ kuxwar we ixto mex grire kêt wehe. Anẽ.

29Hãmri nhũm kãm: —Nà ãm hãmri na ka ã akra kaxyw inhmã ajamaxpêr tỳx anẽ. Jakamã kot paj nê mẽkarõmnutita jano. Kojaxte tanhmã apê ho hkêt nẽ. E ma akupỹm hwỳr tẽ nẽ omu. Anẽ.

30Hãmri nhũm kuma nẽ ma akupỹm õrkwỹ hwỳr tẽ nẽ omu. Nhũm ra mẽkarõmnutija kêp kato nẽ ma tẽ nhũm akupỹm tãm hkrã nẽ hkĩnh nẽ par kãm hkõkôt o nõ.

Hamak kro nê kapêr krok xwÿnh jarênh

Matêwre 15.29-31

31Tã nhũm Jejus mē hkôt mē pa ho mē pa xwÿnhjaja krī pē Xir rūm hapôj nē akupÿm gô rax pē Garirej wÿr ma mra. Pyka pē Sitō jakre nē mō nē pyka pē Tekap jakre.

32Hāmri nē kormã hpôx o mōr rôm nhũm mē amnhī wÿr Jejus pumu nē hwÿr mēhō myja o tē. Kapêr krok nē umar kêt xwÿnhhta nhũm mē wÿr o tē nē kām: —Pa? Ot pa mē awÿr ixkràmnhwÿta o tē. Kwa hã anhīhkra xi kê akupÿm mē inhmã mex. Anē.

33Hāmri nhũm omu nē hpa hã kupy nē mē kēp o kato nē nhÿri mē hkàx ã o xa. Nē akutã hamak kre kupê nē argôx mē nē ho ôhto htok.

34Hāmri nē kaxkwa hwÿr rīt nē htyk xà mēnh tÿx nē kām kapêr. Mē pakapêr kām kām: “E ajamak katêr nē anhōhto kaxkrit.” Anē. Nom kapêr kām kām: “Epata.” Anē.

35Hāmri nhũm hamak katêr nē ôhto kaxkrit kurê kumrêx nē tãm kapêr nē tãm ama.

36-37Hāmri nhũm mē kot omunh xwÿnhjaja amnhī jaêr pē Jejus kot ho mex ã omu nē kamã no puma nē. Hāmri nhũm mē kām: —Kwa kêr ka mē akwÿjê mã ja hã ijarênh kêt nē. Anhÿr tã no nhũm mē kuma nē ãm kuma nē ma mē piitã mē kām harênh o ri hprôt nē mē kām: —Kwa Jejus na mex o mex. Na hte mē ho mex o pa nhũm mē umar kêt xwÿnhjaja akupÿm tãm ama nhũm mē kapêr kêt xwÿnhjaja akupÿm tãm kapêr. ãm hāmri na hte ã mē hipêx anhÿr o pa. Nà ãm mex o mex. Anē.

Makre 8

Jejus kot mē ho 4.000 nē mē kām mē ô hã harênh

Matêwre 15.32-39

1-2Tã nhũm arīgro hō hã nhũm mē ohtô nē nhÿri kapôt ã Jejus ã htu rax nē kot mē ahkre mar o kuhê hã apkati axkrunêpxi. Nhũm mē apkur xà hã mēōja ra mē kēp hapêx. Hāmri nhũm Jejus ja hã mē omu hāmri nē hkôt mē pa ho mē pa xwÿnhjê mã akir nē mē kām hpa ho apê nē mē kām: —E mē amnē

ixwỳr mra nẽ ixkapěr ma. Anẽ. Nhũm mẽ hwỳr mra nẽ kuhê nhũm mẽ kãm: —Kwa na pa inhmã mẽ kot inhmar o kuhê xwỳnhjê kaprĩ nẽ. Na mẽ ra mẽ pahkôt ri pa hã apkati axkruněpxi nhũm mẽ apkur xà hã mẽõja mẽ kệp hapêx.

³Mẽ õ krĩ hwỳr awry jakamã koja mẽ mẽmoj kur kêt rãhã ma akupỹm pa hãmri nẽ pry hã hirot nẽ rôrôk o pa. Hãmri pa inhmã mẽ hkaprĩ nẽ. Anẽ

⁴Hãmri nhũm mẽ kuma nẽ axte tee ri hamaxpěr nẽ kãm: —Kwa nà nhỹhỹnh kot puj kêt mẽ kãm mẽmoj to mra? Jar ãm kapôt pix kênã. Anẽ. Hãmri nhũm mẽ kãm:

⁵—Nà tanhmã na mẽ anhõ pãwtija kute? Anẽ. Nhũm mẽ kãm: —Ãm kệp 7 pix. Nẽ kaxyw tep kwỳ no ãm grêre. Anẽ.

⁶Hãmri nhũm mẽ kuma nẽ mẽ kot mar o kuhê xwỳnhjê mã anẽ nhũm mẽ kuma nẽ hkrĩ pa. Hãmri nhũm pãwti jamỳ nẽ ho Tĩrtũm wỳ nẽ kãm: —Pa Papaj. Nà ka na apê mẽ inhmã mẽ inhõ ho apa xwỳnh. Jakamã amex o amex. ãm amex kumrêx. Anẽ. Hãmri nẽ mẽ kãm ho hkry pa nẽ hkôt mẽ pa ho mẽ pa xwỳnhjê mã kugõ nhũm mẽ ho mẽ hipêx pa.

⁷Nhũm hpãnhã tepta py nẽ mã ho anẽ nẽ ho Tĩrtũm wỳ. Hãmri nẽ hkôt mẽ pa ho mẽ pa xwỳnhjê mã kugõ nhũm mẽ mã ho anẽ nẽ hamỳ nẽ ho mẽ hipêx pa.

⁸⁻⁹Hãmri nhũm mẽ ohtô rax kumrêx tã piitã apku nẽ õhy htu pa. Měmyjaja kệp 4.000 nẽ kaxyw mẽ hprõjaja nẽ mẽ hkrajaja. Tã nhũm Jejus mẽ apkur xàja o mẽ hipêx pa. Nhũm hkôt mẽ pa ho mẽ pa xwỳnhjaja hakrêx o akuprõ nẽ ho kawà ho 7 nẽ ho nýt. Hãmri nhũm Jejus ma akupỹm mẽ õ krĩ hwỳr mẽ kot mar xwỳnhjê jano nhũm mẽ ma akupỹm hapêx.

¹⁰Hãmri nhũm Jejus hkôt mẽ pa ho mẽ pa xwỳnhjê mẽ ro hã kanôre hkrem agjê nẽ mẽ hkwỳm ma Tamanut wỳr mõ.

Parijew nhõ xwỳnh kwỳ kot mẽmoj tã Jejus kamã hamak ã mẽ harênh

Matêwre 12.38-42; 16.1-4; Rukre 12.54-59

¹¹Tã nhũm mẽ Tamanut wỳr pøj nhũm Parijew nhõ xwỳnh kwỳjaja Jejus pumu nẽ ma hwỳr mra nẽ mẽmoj tã kuwỳ nẽ kãm: —Pa. Ot pa mẽ awỳr

mra. Kwa mẽ inhmã aa mẽ ixte mẽmoj pumunh kêt õ ho anẽ. Pa mẽ ja hã apumu nẽ Tĩrtũm kot mẽ ixwỳr amẽnh ã akõt ijamaxpěr kurê kumrẽx. E tokyx. Anẽ. Kot tee ri mẽ kãm mẽmoj to anhỹr kaxyw nẽ ho anhỹr kêt nhũm mẽ kot hã omunh nẽ ma hkwỳjê mã ho kapěr punuj kaxyw nhũm mẽ ã hêx rom kãm kapěr anẽ.

12Nhũm ra kãm mẽ kot amnhĩ kaxyw hkõt hamaxpěr kêt kãm ã kapěr anhỹr mar kaga nẽ. Hãmri nẽ tee ri amnhĩ tã mẽ hamaxpěr ã mẽ omu nẽ htyk xà mẽnh tỳx nẽ mẽ kãm: —Hêxta waa nẽ. Mẽ ajamaxpěr punuj pix o na ka htem ri ajamaxpěr o apa. Ixpê Tĩrtũm kot mẽ awỳr inhmẽnh xwỳnh tã ka mẽ ja hã ixkõt ajamaxpěr kêt nẽ. Nà mo kaxyw kot pa kêt mẽ amã mẽmoj to anẽ? Kot paj ho anẽ ka mẽ omu nẽ ãm omu nẽ ixkõt ajamaxpěr kêt nẽ. Nà kot paj mẽ amã mẽmoj to anhỹr kêt nẽ. Anẽ.

13Hãmri nẽ mẽ kure nẽ hkõt mẽ pa ho mẽ pa xwỳnhjê mẽrohã ma mra nẽ akupỹm kanõre hkrem agjê nẽ ma xarmã mõ.

Jejus kõt mẽ pa xwỳnhjaja kot hprĩ hã omunh kêt ã mẽ harẽnh

Matêwre 16.5-12; mãänën Makre 6.52

14Tã nhũm mẽ kormã kanõre kamã xarmã mõi rôm nhũm Jejus kõt mẽ pa ho mẽ pa xwỳnhjaja tee ri mẽ apkur xà japêr nẽ axpẽn mã: —Kwa hêxta waa nẽ. Na pu mẽ panhõ pãwti re nẽ amnhĩ kõt o pamõi kêt nẽ. Nẽ ãm pixire nẽ o mõi. Anẽ.

15Hãmri nhũm Jejus tee ri mẽ kuma nẽ tanhmã hã mẽ kãm kapěr to. Nom mẽmoj tã kuxi nẽ mẽ kãm awjarẽ nẽ mẽ kãm: —Kwa oko kêr ka mẽ amnhĩ nê Parijew nhõ xwỳnh mẽ Pahi Erox nhõ pãw kaxkrit xà pumunh mex nẽ. Anẽ.

16Hãmri nhũm mẽ kuma nẽ tee ri kapěrja kukamã hamaxpěr pê hã axpẽn kukjêr o hkrĩ nẽ axpẽn mã: —Kwa mo na ri ã mẽ pamã pãw kaxkrit xà jarẽnh anẽ? Mãn mẽ panhõ pãwti hkêt ã mẽ pahpumu hã na ri ã harẽnh anẽ nà? Anẽ.

17Hãmri nhũm Jejus mẽ kapěr ã mẽ kuma nẽ mẽ kãm: —Kwa mon ka wem ãm xatã axpẽn mã mẽ panhõ pãwti hkêt jarẽnh pix o mõi? Xàn pa hte mẽ

apyrà nê tee ri mẽ paxàpkur xà hkêt kukamã ijamxpêr o ixpa? Nà inhmã ja tanhmã kute hkêt.

¹⁸Ra mẽ ano ho mẽ ate ixpumunh mex tã kormã aprĩ hã tanhmã ixkute hã ixpumunh mex kêt. Nê mẽ ajamak o ixkapêr mar mex tã aprĩ hã mar tỳx kêt. Kwa wem ixte amnhĩ nhĩpêx mã ajamxpêr tỳx nê. E mẽ inhmã mẽmoj jarẽ.

¹⁹Jãã ixte mẽ kêp 5.000 mã pãwti kêp 5 nhĩrênhta. Tanhmã na ka prem hakrêx o akuprõ nê ho kawà ho nỳt to? E mẽ atõ inhmã harẽ. Anê Hãmri nhũm ja kãm: “Na pa prem ho kawà ho 12 nê ho nỳt.” Anê.

²⁰Nhũm kuma nê mẽ kãm: —Tỳ na pre hakrêx ã kawà kêp 12. Tã ham ixte mẽ kêp 4.000 mã pãwti kêp 7 nhĩrênhta. Tanhmã na ka prem hakrêx ho akuprõ nê ho kawà ho nỳt to? Anê. Nhũm ja kãm: “Na pa prem ho 7.” Anê.

²¹Hãmri nhũm kuma nê mẽ kãm: —Tỳ ra ixte mẽ anoo mã ã ja ho anhỹr o axkrut tã ka mẽ ra hã ano hkêt nê arĩ axpên mã mẽ panhõ pãwti hkêt pix jarênh o ixkôt mỗ. Kormã mẽ ate ixàhpumunh tỳx ã ixpumunh kêt. Anê.

Jejus kot akupỹm nohkre xwỳnh o mex ã harênh

Juãw 9.1-7

²²Tã nhũm mẽ ma krĩ pê Pesêj wỳr mỗ nê ra hwỳr pỏj. Hãmri nhũm krĩ nhõ xwỳnh kwỳjaja mẽ omu nê Jejus wỳr mẽhõ myja o tẽ. Ra nohkre nê rĩt kêt nê pa xwỳnhja nhũm mẽ hpa hã kupyn hwỳr o tẽ. Hãmri nê ho kuwỳ nê kãm: —Pa Pahihti? Ot pa mẽ awỳr ja ho tẽ. Kwa hã anhĩhkra xi nê akupỹm mẽ inhmã no ho mex. Anê.

²³Hãmri nhũm mẽ kuma nê nohkre xwỳnhhta pumu nê hpa hã kupy nê o tẽ nê krĩ pê ho kato nê nhỹri mẽ hkàx ã o xa. Hãmri nê no hã argỏx mẽ nê hã ãhkra xi nê kãm: —E mãn ka mẽmoj pumu nà? Anê.

²⁴Hãmri nhũm kuma nê hkrãkato nê ri rĩt hãmri nê kãm: —Tỳ na pa mẽmoj pumu. Nom ixprĩ hã omunh mex kêt nê. Te mẽmo pĩ hpàr kwỳ ri mrar pyràk. Anê.

²⁵Hāmri nhūm axte no hā ĭhkra xi nhūm tā rīt mex nē. Ri hprī hā mẽmoj piitā omunh mex nē.

²⁶Hāmri nhūm Jejus akupỹm ōrkwỹ hwỳr kumē nē kām: —E kêr ka kape hā ri amrar kêr nē. Ām ma ma akupỹm anhōrkwỹ hwỳr atēm kurê kumrēx. Anē.

Jejus kot amnhĩ tā hkôt mẽ pa xwỳnhjê kukjêr ã harēnh

Matêwre 16.13-20; Rukre 9.18-21

²⁷Tā hāmri nhūm Jejus ma hkôt mẽ pa ho mẽ pa xwỳnhjê mẽ mẽ ma mō. Ma krī pê Sejarej Piripos pu hā krī hkwỳ hkôt mō. Nē kormā pry hā mō nhūm Jejus amnhĩ tā hkôt mẽ pa ho mẽ pa xwỳnhjê kukja nē mẽ kām: —Kwa mẽ inhmā mẽmoj jarē. Tanhmā na htem ahpỹnhā ri axpēn mã ijarēnh to wehe? Anē.

²⁸Hāmri nhūm mẽ kām: —Nà na htem ahpỹnhā tanhmā ajarēnh to. Na hte kamā mẽ hkwỳjaja axpēn mã ato finat Juāw Paxis ã ajarē. Nē kamā mẽ hkwỳjaja ato finat Eris ã ajarē nē mẽ hkwỳjaja apê Tĩrtũm nhỹ hā kapēr o pa xwỳnh ra htyk xwỳnhjê hō hā ajarē. Ā na htem ahpỹnhā axpēn mã ajarēnh anhỹr o pa. Anē.

²⁹Hāmri nhūm mẽ kuma nē mẽ kām: —No we mẽ kajaja? Ixpê mēhō hā na ka htem axpēn mã ijarē? Anē. Hāmri nhūm Simāw Pêtre kām: —Nà mẽ pajaja na pa htem apê Tĩrtũm kot mẽ ixkaxyw axām nē mẽ ixwỳr amēnh xwỳnh ã ajarē. Nē apê mẽ ixpiitā mẽ inhō Pahi Maati hā ajarē. Ā na pa htem axpēn mã ajarēnh anē. Anē.

³⁰Hāmri nhūm kuma nē mẽ kām: —Nà ãm hāmri na ka htem ã ijarēnh anē. Ā ixte anhỹr. Kwa nom kwa kêr ka mẽ inhma. Kêr ka mẽ kormā ã akwỳjê mã ijarēnh anhỹr kêr nē. Anē.

Jejus kot amnhĩ kukamā amnhĩ jarēnh ã harēnh

Matêwre 16.21-23; Rukre 9.22

³¹Tā nhūm Jejus amnhĩ kukamā hkôt mẽ pa ho mẽ pa xwỳnhjê mã tanhmā amnhĩ jarēnh to nē mẽ kām: —Nà ra mẽ ate Tĩrtũm kot mẽ akaxyw ixām ã ixpumunh mex. No mẽ pahkwỳjaja kām ja hā ijarēnh mar nē ixpumunh prām kêr. Ijaew krāhtũmjê mẽ Tĩrtũm kapēr tũm o mẽ ahkre o mẽ pa

xwỳnhjê mẽ patre krähtümjaja na mẽ kãm ja hã ixpumunh prãm kêt. Jakamã koja mẽ nhỹrmã ixpynê nẽ ixtak rax nẽ ixpĩ. Nom kot paj ixtyk ã ixtã apkati axkrunëpxi hãmri nhũm Tĩrtũm akupỹm ixto ixtĩr. Anẽ.

32Hãmri nhũm mẽ kot hpĩr ã amnhĩ jarënh ma nẽ tee ri hkukamã hamaxpër. Hãmri nhũm Simãw Pêtreja hwỳr tẽ nẽ hkwyjê pê ho kato nẽ mẽ hkàx ã o xa nẽ kãm: —Kwa nà Pahihti. Koja Tĩrtũm anê mẽ omunh mex nẽ nhũm mẽ ã anhĩpêx anhỹr kêt nẽ. Kwa ri ã kapër anhỹr kêt nẽ. Anẽ.

33Hãmri nhũm kuma nẽ hwỳr apkjê nẽ pu hã hkôt mẽ pa ho mẽ pa xwỳnh piitã omu. Hãmri nẽ mẽ hamak mã Simãw Pêtre mã kapër nẽ kãm: —Tk. Kwa na ka ã inhmã akapër anhỹrja o te Satanasti nhỹ hã akapër pyræk. Tĩrtũm nhỹ hã na ka ã inhmã akapër anhỹr kêt nẽ. ãm jar mẽ kãm Tĩrtũm kapër mar prãm kêt xwỳnhjê jamaxpër o na ka ajamaxpër nẽ ã inhmã akapër anẽ. No Tĩrtũm jamaxpër o ajamaxpër kêt nẽ. Anẽ.

Jejus krajaja tanhmã kot amnhĩ nhĩpêx hto hã mẽ harënh

Matêwre 6.24-28; Rukre 9.23-27; Juãw 12.24-26; mãänën Apokarip 2.10; 12.11

34Tã nhũm Jejus amnhĩ wỳr mẽ kot mar o kuhê xwỳnhjê mẽ hkôt mẽ pa ho mẽ pa xwỳnhjê mã anẽ nhũm mẽ hwỳr axkamẽ nẽ kuhê. Hãmri nhũm tanhmã mẽ ahkre hto nẽ mẽ kãm: —E mẽ inhma. Kot kaj mẽ ixkôt amnhĩ xunhwỳr ã amnhĩ jarë hã kot kaj mẽ mãänën amnhĩ jarënh o: “Jejus kệp inhõ Pahihti jakamã kot paj ãm kapër kôt pix mã amnhĩ nhĩpêx rãhã ho ri ixpa. Kwãr ixkwỳjaja tanhmã hã inhĩpêx to pa arĩ hkôt amnhĩ nhĩpêx rãhã ho ixpa.” Anhỹr o amnhĩ jarë.

35—Koja mẽ ixtã mẽ atõx pĩ rỳ ixtã tanhmã mẽ ato ka ty. Ate tanhmã ijarënh to ho apa hã nhũm mẽ apĩ. Tã nom koja akaxwỳnh ma inhõ krĩ hwỳr àpir kurê kumrëx nẽ kamã atĩr tũm nẽ amex rãhã nẽ apa ho apa. Nom kot kaj mẽ jar atĩr prãm xàj ixkaga hãmri nẽ hwỳr axàpir kêt nẽ.

36-37—Nẽ koja mẽhõ hikukrêx gryk ã Tĩrtũm kaga. Hãmri nẽ nhỹrmã ty nẽ ã kamã kuwy hwỳr ma mõi nẽ amnhĩ kôt kukrêx õ hpyr nẽ o mõi kêt nẽ. Koja tee ri kuwy hwỳr mõi pymaj amnhĩ nẽ hikukrêx rax o amnhĩ pãnhã

amnhirer prām kaprỳ. Tanhmã koja amnhĩ to nẽ Tirtũm mã amnhĩre nẽ ma õ krĩ hwỳr api? Koja ã amnhĩ nhĩpêx anhỳr kêt nẽ.

³⁸—Nẽ koja mẽhõ ixte mẽ ahkre hã inhma nhũm ja kęp omnuj japêr. Nhũm kot mẽ kãm ixprām nõkati xwỳnhjê hkôt pa gryk ã ixkaga. Hã kot paj nhỹrmã mẽ ato amnhĩptàr kaxyw akupỹn wrỳ nẽ amnhĩ xwar kot ixkaga xwỳnhta kaga. ãm hãmri na pa mẽ amã ja hã amnhĩ jarẽ. Kot paj nhỹrmã inhõ Papaj nhỹ hã ixte mẽ ho amnhĩptàr kaxyw akupỹn wrỳ nhũm kapêr o mẽ wrỳk xwỳnhjaja man ixkôt wrỳ. Pa mẽ wrỳ hãmri nẽ ra mẽ kot ixkaga xwỳnhjaja pa amnhĩ pyrà nẽ amnhĩ xwar mẽ hkaga hpa. Anẽ.

Makre 9

¹Nhũm Jejus arĩ mẽ kãm kapêr nẽ mẽ kãm: —ãm hãmri na pa mẽ amã amnhĩ jarẽ. Kot paj nhỹrmã akupỹn ixte mẽ ato amnhĩptàr kaxyw mẽ awỳr wrỳ kãm ga. Tã kot kaj mẽ akwỳjaja kormã atĩr ri ja kukamã tanhmã ixte amnhĩ nhĩpêx to hã ixpumu. Anẽ.

Jejus hirã htỳx kãm ãm ã harẽnh

Matêwre 17.1-9; Rukre 9.28-36; määnẽn Sikũn Pêtre 1.16-18

²Tã nhũm arĩgro kęp 6 nẽ hapêx nhũm Jejus ma nhỹri hixêt prêk wỳr tẽ. Nẽ Simãw Pêtre nẽ Xiakre nẽ Juãwja nhũm ma amnhĩ kôt wa mẽ o mõ. Nhũm wa mẽ ahte mõ nẽ hixêt prêk ã api nẽ himõk ã kuhê. Hãmri nhũm Jejus axtem nẽ xa.

³Ra ê haka htỳx kumrêx nẽ xa.

⁴Hãmri nhũm ja wa kaxkwa rũm hwỳr wrỳ nẽ kuri kãm kapêr. Finat Mojes mẽ finat Erisja wa wrỳ nẽ kuri kãm kapêr o xa. Tirtũm amnepêem amnhĩ wỳr wa ho àpir tã nhũm wa akupỹn wrỳ nẽ kãm kapêr.

⁵⁻⁶Nhũm wa mẽ mex kumrêx nẽ hirã htỳx kãm kuhê nhũm Jejus kôt mẽ mõi xwỳnhjaja wa mẽ omu nẽ mẽ kamã no pyma nẽ. Nẽ tee ri mẽ kãm tanhmã kapêr to hkukamã hamaxpêr. Hãmri nhũm Simãw Pêtre hamaxpêr nẽ Jejus mã kãm: —Kwa Pahiti. Nà ãm hãmri na pu mẽ amnẽ mõ. Kwa pu mẽ kritpêem jar axkamẽ nẽ tokyx panojarêt kêt nẽ. Pa mẽ amã pô nhĩrõnh o

axkrunēpxi nē hipêx. Amã nē Mojes mã nē Eris mã hõ nhîpêx ka mẽ kamã akrî. Kwa xàt pa mẽ amã ho anē nà? Anē.

⁷Hāmri nhũm kakrã jaka htỳx wrỳ nē wa mẽ hkunor pa nhũm wa mẽ kamã kuhê. Hāmri nhũm kakrã kamã Tirtũm mẽ kãm kapêr nē mẽ kãm: —Ota Ixkra xa. Inhmã hapê ho inhmã hapê. Kêr ka mẽ kapêr mar tỳx rãhã ho ri apa. Anē.

⁸Hāmri nhũm mẽ kuma nē amnhĩ pu hã rît nhũm ãm Jejus pix mẽ kuri xa nhũm Mojes mẽ Erisja wa ra ma akupỹm api nhũm mẽ ãm Jejus pix pumu.

⁹Hāmri nhũm mẽ ma akupỹm hkwyjê hwỳr wrỳk o mõi nhũm Jejus mẽ kãm: —Kwa kêr ka mẽ ham mẽ ate mẽmoj pumunh xwỳnhhta kormã nhãm mẽ kãm harēnh kêt nē. Koja mẽ mẽmo arĩgro hã ixpĩ hāmri nhũm Tirtũm akupỹm ixto ixtĩr ka mẽ rĩ kormã mẽ kãm ja hã ijarēnh o ri apa.

¹⁰Anē hāmri nhũm mẽ kuma nē mẽ kãm harēnh kêt nē. ãm axpēn mã pix mã harē nē kot akupỹm htĩr ã amnhĩ jarēnhja ã axpēn kukjêr o pa nē axpēn mã: —Kwa mo na ri ã akupỹm htĩr ã amnhĩ jarēnh anē? Tanhmã kot we amnhĩ to nē htyk tã akupỹm htĩr? Anē. Hāmri nē tee ri hkukamã hamaxpêr o hkõt pa.

Juãw Paxis te kot Eris pyrãk ã harēnh

Matêwre 11.13-15; 17.10-13

¹¹Hāmri nhũm mẽ kormã ahpar mã wrỳk o mõi mẽ nhũm Jejus kõt mẽ mõi xwỳnhjaja mẽmoj tã hkukja nē kãm: —Kwa mẽ inhmã mẽmoj jarē. Na hte Tirtũm kapêr tũm o mẽ ahkre xwỳnhjaja mẽ inhmã: “Eris kumrêx koja Tirtũm mẽ pahwỳr kumẽ nhũm Krisja hapu hã wrỳ.” Anē. Na htem ã mẽ inhmã war ajarēnh anē. Tã ka na ka ra wrỳ nom nhũm kormã Erisja akukamã wrỳk kêt nē. Anē.

¹²⁻¹³Hāmri nhũm mẽ kãm: —Nà ãm hāmri na htem mẽ amã ã ja jarēnh anē. Na pre ra ixkukamã te kot Eris kot amnhĩ nhîpêx pyrãk xwỳnhhta tē nē ixkutêp mẽ kãm ijarēnh o pa. Nom mẽ kot ixkukamã ijarēnh xwỳnh ã omunh kêt jakamã na prem axtem nē kãm tanhmã hipêx to hprãm xà hkõt tanhmã hipêx kati hton kupĩ. Tã koja mẽ ã hipêx anhỳr pyrã nē mã ixto anē nē

inhîpêx kati nê tokyx mẽ kãm ixprãm kêt xwỳnhjaja ixpynê nê ixpĩ pa amnhĩ xà htỳx kamã ijamak kãm ty. Tĩrtũm kapêr ã kagà htũm kot wa ijamẽ wa ixkukamã wa ijarênh xà hkôt. Anẽ.

Jejus kot mẽhõ hkra nê mẽkarõmnuti janor ã harênh

Matêwre 17.14-21; Rukre 9.37-43

14Hãmri nhũm Jejus nê Simãw Pêtre nê Xiakre nê Juãwja mẽ akupỹm hkwyjê hwỳr hpôx o mra nê amnhĩ kukamã hkwyjê pumu nhũm mẽ ohtô nê mẽ hã akuprõ nê mẽ kãm kapêr. Nhũm Tĩrtũm kapêr tũm o mẽ ahkre ho mẽ pa xwỳnhjaja mẽmoj tã mẽ hkukjêr o kuhê.

15Jakamã nhũm Jejus mẽ hwỳr hpôx o tẽ nhũm mẽ pikuprõnh xwỳnhjaja amnhĩ wỳr omu nê hkĩnh nê. Hãmri nê kutã hprõt nê kãm: —Pa. Nà ãm hãmri na ka akupỹn mẽ ixwỳr tẽ. Anẽ.

16Hãmri nhũm mẽ kãm: —Kwa mẽmoj tã na ka mẽ axpẽn mã axàkjêr o akuhê? Anẽ.

17-18Hãmri nhũm mẽhõ myja kãm: —Nà ixkra hã na pa mẽ axpẽn mã ixkapêr. Na pre mẽkarõmnuti ixpê hwỳr axà nê tanhmã ixpê ho nhũm kapêr kêt nê pa. Nhũm hte xatã tanhmã ixpê ho nhũm pykap amnhĩ rê nê hakwa jamrô ho hikwỹ. Hãmri nê à htỳx kamã ama nê amnhĩ nham o axpẽn kamnhar tỳx kumrêx pê htỳx pa nê hikwỹ nê ixpê omnuj tỳx nê. Na hte ã mẽkarõmnuti nhỹ hã amnhĩ nhîpêx anhỹr o pa. Jakamã na pa ate inhmã ho mex kaxyw man o tẽ nê tee ri ajapêr. Hãmri nê ho akôt mẽ pa ho mẽ pa xwỳnhjê hwỳ nhũm mẽ kot inhmã ho mex kaxyw tee ri tanhmã ho hkaprỳ. Anẽ.

19Hãmri nhũm Jejus kuma nê hkôt mẽ pa ho mẽ pa xwỳnhjê mã kãm: —Hêxta waa nê. Ra mẽ ate Tĩrtũm nhỹ hã ixte mẽ ho mex ã ixpumunh ryy htã ixpyrà nê ã amnhĩ nhîpêx anhỹr kêt nê. Mãn ka mẽ kormã kaxyw Tĩrtũm kôt ajamaxpêr tỳx kêt nê. E amnẽ ixwỳr akra ho tẽ pa omu. Anẽ.

20Hãmri nhũm mẽ hwỳr o tẽ nhũm mẽkarõmnuti Jejus pumu nê tanhmã hkrata o htỳx to nhũm pykap tẽm nê hakwa jamrô nê amnhĩ rênh o nõ.

²¹Nhũm Jejus omu nẽ hipêêxà mã: —Kwa tanhmã na ra kot amnhĩ nhĩpêx ã mytwrỳ kute? Anẽ. Nhũm kãm: —Nà hprĩre rũm na hte ã amnhĩ nhĩpêx anhỹr o pa.

²²Na hte mẽkarõmnuti xatã ixpê hpĩr kaxyw kuwy kamã kurẽ nẽ gôx kãm kurẽ. Kwa kot ka ate ho mex kukamã axàhpumunh japêr nẽ wa ixkamã axukapřĩ nẽ akupỹm inhmã ho mex. Anẽ.

²³Hãmri nhũm Jejus kãm: —Xàn ka tee ri ixte ho mex kaxyw ixkukamã ajamaxpêr? Nà ixte mẽmoj piitã ho anhỹr kaxyw ixàhpumunh tỳx kênã. Kot ka mẽ atõ mẽmoj tã amnhĩ kaxyw ixkôt ajamaxpêr tỳx hã kot paj amã ho anẽ. Anẽ.

²⁴Hãmri nhũm kuma nẽ kãm hkra mex prãm tỳx xàj kapêr tỳx nẽ kãm: —Nà na pa amnhĩ kaxyw akôt ijamaxpêr. Nom kot kaj tanhmã ixkrã hto pa akôt ijamaxpêr tỳx rãhã ho ri ixpa Pahihti. Anẽ.

²⁵Rôm nhũm mẽ ohtô rax nẽ hwỳr kormã mra nhũm Jejus amnhĩ wỳr mẽ omu hãmri nẽ mẽkarõmnutija mã kapêr kurê kumrêx. Nẽ kãm kapêr kãm hihtỳx nẽ kãm: —Pa mẽkarõmnuti. E apê mẽ ho mẽ kapêr kêt nẽ mẽ umar kêt o apa xwỳnh ã pa amã ixkapêr ka inhma. Kêr ka mẽ hkrata pê akato nẽ ma amõr o mõi nẽ axte tanhmã ho hkêt nẽ. Anẽ.

²⁶Hãmri nhũm tee ri kot kãm karõja ma nẽ gryk xàj xatã amỹra nẽ mẽ hkrata o htỳx kumrêx nhũm htertet tỳx o nõ. Hãmri nhũm kêp kato nẽ ma tẽ nhũm te htyk pyrã nẽ nõ nhũm mẽ tee ri omu nẽ ra htyk ã hkamnhĩx.

²⁷Hãmri nhũm Jejus hpa hã kupy nẽ kànhmã ãm nhũm akupỹm mex nẽ kànhmã xa nẽ ri mra. Nẽ tãm kapêr o mra nẽ umar mex nẽ.

²⁸Tã nhũm Jejus hkôt mẽ pa ho mẽ pa xwỳnhjê mẽrohã ma akupỹm amnhĩm hikranh xà hã ixkreja wỳr mra nẽ hwỳr agjê nẽ hkrĩ. Hãmri nhũm Jejus kôt mẽ pa ho mẽ pa xwỳnhjaja amnhĩ tã hkukja nẽ kãm: —Kwa mẽ inhmã mẽmoj jarẽ Pahihti. Na pa mẽ tee ri axwakre kamã mẽ hkrata nẽ mẽkarõmnuti janor kaprỳ. Kwa mon pa mẽ apyrã nẽ ja ho anhỹr mex kêt nẽ? Anẽ.

²⁹Hāmri nhūm mẽ kām: —Nà axtem na mẽkarōmnuti ja. Na htem mẽ nê hanor tokyx anhỹr kêt nê. Na htem ho Tĩrtũm wỳr tỳx nê rĩ kormã hano. Anẽ.

Jejus kot htyk kukamã amnhĩ jarẽnh

Matêwre 17.22-23; Rukre 9.44-45

³⁰⁻³¹Tã nhūm Jejus mẽ hkôt ri mẽ pa ho pa xwỳnhjê mẽ krĩja rũm hapôj nê ma nhãm mō. Nê ma pyka pê Garirej kahti hkôt mō. Nom mẽ piitã mẽ hkàx ã mō. Jejus kormã kot amnhĩ tã tanhmã hkôt mẽ pa ho mẽ pa xwỳnhjê jahkre hto ho pa jakamã kãm mẽ hkàx ã mẽ o pa hprãm nê. Hāmri nê amnhĩ kukamã mẽ kãm tanhmã amnhĩ jarẽnh to nê mẽ kãm: —E kot paj mẽ amã tanhmã amnhĩ jarẽnh to ka mẽ inhma nê inhmar tỳx nê. Kojã mẽ kãm ixprãm kêt xwỳnhjaja tokyx mẽ kãm ixtã amỹnê nhūm mẽ ixpĩ. Kot paj ixtyk ã ixtã apkati axkrunẽpxi hāmri nhūm Tĩrtũm akupỹm ixto ixtĩr. Kwa kêt ka mẽ ja ma nê hã anohtỳx nê ho apa. Anẽ.

³²Hāmri nhūm mẽ tee ri ã kot amnhĩ jarẽnh anhỹrja ma nê axpẽn mã: —Kwa mo na ri ã mẽ pamã amnhĩ jarẽnh anẽ? Nà kêp mẽ panhō Pahi Maati hã kot amnhĩ jarẽnh kênã kot kêt mẽhō kupĩ. Anhỹr o axpẽn mã harẽnh o hkôt mō. Hāmri nê ã kot amnhĩ jarẽnh anhỹr mar prãm kêt jakamã hprĩ hã tanhmã hkukjêr to hkêt nê. ãm akryk hkôt mar o mō.

Mẽ kot amnhĩ to rũnh xwỳnh jarẽnh

Matêwre 18.1-5; Rukre 9.46-48

³³⁻³⁴Tã nhūm Jejus mẽ hkôt mẽ pa ho pa xwỳnhjaja kormã ma krĩ pê Kapanau h wỳr mō nhūm hkôt mẽ pa ho mẽ pa xwỳnh pê 12jaja tanhmã amnhĩ kukamã hamaxpêr to hāmri nê axpẽn mã: —Kwa mẽ pahtō kot puj we nhỹrmã pahpê pahi nê mẽ ho amnhĩptar rax o ri pahkwỳjê jakre? Anhỹr o axpẽn kukjêr o Jejus kôt mō. Nê axpẽn mã: “Nà pa.” Nhūm mẽ hk wỳjaja: “Nà kêt pa.” Anhỹr o hkôt mō. Hāmri nhūm Jejus mẽ mar o mō. Hāmri nhūm mẽ mō nê nhỹri amnhĩm hikranh xà hã ixkre hwỳr pōj nê hwỳr agjê nhūm mẽ kãm: —Kwa mẽmoj tã na ka mẽ pry hã amnhĩ jarẽnh o mō? Anẽ. Hāmri nhūm mẽ tee ri kuma nê hpijaam nê. Nê kãm tanhmã amnhĩ jarẽnh to hkêt nê.

³⁵Jakamã nhũm Jejus nhỹ nẽ mẽ kãm anẽ nhũm mẽ kuri hkrĩ pa nhũm mẽ kot mẽ kãm mẽ ho amnhĩptàr rax prãmta ã mẽ kãm kapër nẽ mẽ kãm: —E mẽ inhma. Ka mẽ atõ amã mẽ ho amnhĩptàr rax prãm. Hã kêr ka te apê mẽ piitã mẽ kãm amarĩ axàpênh xwỳnh pyræk o amnhĩ nhĩpêx o mẽ hkôt apa. Jao mẽmoj to mẽ kutã anojarêt rãhã nẽ. Anẽ.

³⁶Hãmri nẽ amnhĩ wỳr mẽhprĩre hõ mã hpa ho apê nhũm hwỳr tẽ nhũm kumỳ nẽ o nhỹ nẽ hã mẽ kãm kapër nẽ mẽ kãm:

³⁷—E mẽ inhma. Kêr ka mẽ apê pahi pyræk o tanhmã amnhĩ jarẽnh to ho ri apa hkêt nẽ. ãm te amarĩ ri mẽ apa pyræk o amnhĩ nhĩpêx o ri apa. Jao nhỹri mẽhprĩre hõ pumu nẽ kamã axukapri nẽ kãm mẽmoj tanhmã ho rỳ kãm mẽmoj gõ. Hãmri nẽ ã amnhĩ nhĩpêx anhỹr o te pa ate tanhmã ixto mex to pyræk o amnhĩ nhĩpêx. Nẽ kot ka mẽ atõ pa tanhmã ixto mex to nẽ te ate Tĩrtũm o mex pyræk o amnhĩ nhĩpêx. E kêr ka mẽ amã amnhĩ to rũnh prãm nẽ ã amnhĩ nhĩpêx anhỹr o ri apa. Anẽ.

³⁸Hãmri nhũm Juãw nhỹhỹnh tẽn mẽ hwỳr axà nẽ Jejus mã: —Kwa Pahihti. O mũj mẽhõ kêp mẽ pahkwỳ hkêt tã anhỹ hã mẽ nê mẽkarõmnuti janor o pa. Pa mẽ tee ri ja hã omu nẽ kêp mẽ pahkwỳ hkêt jakamã pa mẽ ã kot amnhĩ nhĩpêx anhỹrja nê kãm ixkapër. Anẽ.

³⁹⁻⁴⁰Hãmri nhũm kuma nẽ kãm: —Kwa nà nê tanhmã kãm nẽ hkêt nẽ. Kojã mẽhõ inhỹ hã aa mẽ kot mẽmoj pumunh kêt kwỳ ho anẽ hãmri nẽ kêp mẽ panhĩõ nẽ ri mẽ pahkwỳm tanhmã mẽ ahkre hto ho pa hkêt nẽ. Ra mẽ pahkôt kot amnhĩ nhĩpêx mã kênã. Jakamã kwa mẽ ja nê tanhmã kãm nẽ hkêt nẽ. Kwãr mãmrĩ ã amnhĩ nhĩpêx anẽ. Ja mex kênã.

⁴¹—Kojã mẽhõ nhỹri mẽ atõ amã kôr ã apumu nẽ hamaxpër o: “Kwa Jejus kôt ri pa xwỳnh mũj kãm kôr. E pa kãm gô hkwỳ kê ho ixkõ.” Anhỹr o hamaxpër nẽ apê ixkwỳ hã amã gô hkwỳ ka ho ixkõ. Nhũm ãm kot amã gô pix nhõr nhũm ate ho akõm tã nhũm Tĩrtũm atã omu nẽ ho mex rax nẽ. Anẽ.

Mẽ pahte amnhĩ tomnuj pymaj tanhmã amnhĩ nhĩpêx to hã mẽ pajarẽnh

Matêwre 18.6-9; Rukre 17.1-2

⁴²Nhũm Jejus arĩ hkõt mẽ pa ho mẽ pa xwỳnhjê mã kapër nẽ mẽ kãm: —Nẽ mẽ kot ixkõt amnhĩ xunhwỳr tohtuj anhỳr xwỳnhjaja. Koja mễhõ ma mẽ hwỳr tẽ nẽ inhnê mẽ kãm kapër. Mẽ kot mẽ mar nẽ tanhmã amnhĩ tomnuj to hprãm xàj hêx rom mẽ kãm kapër nhũm mẽ mar xà hkõt tanhmã amnhĩ tomnuj to. Hã koja Tĩrtũm ja hã omu nẽ kot inhnê tanhmã kãm nẽ xwỳnhhta pumu nẽ homnuj tỳx nẽ. Te mẽ kot mễhõ pynênh nẽ mut ã kên pytĩ hõ nhôr nẽ ma o htẽm nẽ gô xupỳm rax kãm mễnh pyræk o hipêx. Te ho ja pyræk no ãm homnuj tỳx o hakre.

⁴³⁻⁴⁷—E kwa mẽ o kora. Kot kaj mẽ anhĩkra rỳ apar o tanhmã amnhĩ tomnuj to. Hã kêr ka mẽ axte ã amnhĩ nhĩpêx anhỳr pymaj te ate amnhĩ pê anhĩkra rỳ apar krãhyr nẽ mễnh pyræk o amnhĩ nhĩpêx nẽ axte ã amnhĩ tomnuj anhỳr kêt nẽ. Rỳ ka mẽ ano ho mẽmoj punuj pumu. Hãmri nẽ kãm ajamaxpêr pix o apa pymaj te ate amnhĩ pê ano katõk nẽ mễnh pyræk o amnhĩ nhĩpêx nẽ nhãm arĩt kurê kumrêx. Kêr ka mẽ ã amnhĩ nhĩpêx o apa rãhã nẽ. Hãmri nẽ nhỹrmã ty nẽ ma Tĩrtũm mẽ wa inhõ krĩ hwỳr api. No kot ka mẽ arĩ akutã ano nẽ arĩ akutã apar nẽ arĩ akutã anhĩkra rãhã ri mrar tã tõhã tanhmã ho amnhĩ tomnuj to. Hãmri nẽ nhỹrmã ty nẽ ma mẽ kot amnhĩ xà htỳx kamã hamak tũm xà pê kuwy maatita wỳr ma apa.

⁴⁸Kuwyja kamã na htem mẽ kot amnhĩ tomnuj mỳrapê amnhĩ xà htỳx kamã hamak rãhã ho pa ho pa hãmri nẽ aa hapôx kêt nẽ.

⁴⁹ã koja mẽ kot amnhĩ tomnuj o mẽ pa xwỳnh piitã amnhĩ nhĩpêx anhỳr rãhã nẽ pa ho pa.

⁵⁰Jakamã kwa kêr ka mẽ axpẽn to mex rãhã ho ri apa. Nom axpẽn kãm agryk nẽ tanhmã axpẽn nhĩpêx to ho ri apa hkêt nẽ. Anẽ. Nhũm pre ã Jejus hkõt ri mẽ pa ho mẽ pa xwỳnhjê jahkre anẽ.

Makre 10

Mẽ pahte axpẽn kaga nê Jejus kot mẽ pahkurê

Matêwre 5.31-32; 19.1-12; Rukre 16.18; mãânên Wam Korĩt 7.10-16

¹Tã nhũm Jejus mẽ hkôt mẽ pa ho pa xwỳnh mẽrohã ma pyka pê Jutej wỳr mỗ. Hãmri nẽ pyhti pê Jotãw ã rê nẽ hpãnhã ma xarmã mỗ. Nhũm mẽ axte mẽ hã akuprõ nhũm kê Jejus axte mẽ ahkre ho xa.

²Hãmri nhũm Parijew nhõ xwỳnh kwỳjaja hwỳr mra. Mẽ kot hêx rom kamã hamak nẽ mar nẽ tanhmã ho kapêr punuj to kaxyw hwỳr mra nẽ kãm: — Pa. Ot pa mẽ mẽmoj tã akukjêr kaxyw awỳr mra. Kwa tanhmã na pre amnepêm finat Mojesja mẽ pahte mẽ pahprõ kaga hã mẽ panhĩgêjtjê mã karõ hto? Xà koja mẽ pahprõ mẽ pakapêr hkwym tanhmã amnhĩ nhĩpêx to pu mẽ mỳrapê hkaga nhũm Tĩrtũm ja hã mẽ pahpumu nhũm ja kãm mex nẽ nã? Anẽ.

³Hãmri nhũm mẽ kãm: —Tanhmã na pre Mojes Tĩrtũm nhỹ hã ja hã mẽ amã karõ hto? Anẽ.

⁴Nhũm mẽ kãm: —Nà na pre harênh o: Kêr ka mẽ aprõ kaga kaxyw hãmri nẽ ate hkaga hã amnhĩ jarênh ã kagà nẽ kãm agõ nẽ rĩ kormã hkaga. Anẽ. Na pre ã mẽ inhmã ja hã karõ anẽ. Anẽ.

⁵Hãmri nhũm mẽ kãm: —Tỳ nom mẽ kãm Tĩrtũm kapêr kôt amnhĩ nhĩpêx prãm kêt jakamã na pre ã mẽ kãm ja jarênh anẽ.

⁶Amnepêm mẽmoj piitã hkrax kãm na prem axpên kaga hkêt nẽ. Na pre Tĩrtũm wam myja nhĩpêx nẽ hpãnhã kãm hprõ nhĩpêx. Axpên kaxyw wa hipêx.

⁷Jakamã na hte mẽmyjaja hprõ kaxyw nẽ gryk ã katorxà nẽ hipêêxà wa hkaga nẽ ãm hprõ kôt pix mã pa ho pa.

⁸Te wa tipxi nẽ ri wa pa pyræk o axpên nhĩpêx o pa.

⁹Tĩrtũm tãm kot axpên mã wa òr kênã kot kêt mẽhõ wa kot axpên kaga kaxyw tanhmã wa hipêx to rỳ tanhmã wa kãm kapêr to. Anẽ. Nhũm pre ã Jejus mẽ kãm kapêr anẽ.

10Hāmri nē hkôt mē pa ho mē pa xwỳnhjê mē akupỹm ixkrem agjê nhũm mē kām: —Kwa aprĩ hã mē inhmã mē kot axpẽn kaga hã mē harēnh̄ta jarē pa mē ixprĩ hã kuma nà. Anē. Hāmri nhũm mē kām:

11—Nà kot kaj mē aprõ kaga nē hpānhã nhām mēhõ ho aprõ nhũm Tĩrtũm noo mã te ate wam aprõ kamã nhām aprõ nyw o amnhĩkati pyræk. Tĩrtũm pê ja omnuj tỳx nē. Rỳ koja mēhõ hprõ kaga ka hpānhã ho aprõ nhũm Tĩrtũm noo mã te ate wam mjên pê ho amnhĩkati pyræk. Ja mãänēn Tĩrtũm pê omnuj tỳx nē.

12—Nē mēnijaja. Koja mēhõ ni ra mjên kaga nē hpānhã nhām mēhõ ho mjên. Ja mex kêt. Mjên krax kêp mjên kumrēx kēnã kot kêt hkaga nē hpānhã nhām hõ ho mjên. Koja anē nhũm Tĩrtũm noo mã te kot wam mjên kamã nhām hõ ho amnhĩkati pyræk nhũm Tĩrtũm pê ja omnuj tỳx nē. Anē.

Jejus kot amnhĩ nē mēhprĩjê janor kêt ã harēnh

Matêwre 19.13-15; Rukre 18.15-17

13Tã nhũm Ijaew kwỳjaja Jejus wỳr mē hkrarejê jamỳ nē mē o mra. Kot mē hã ìhkra jaxwỳr nē mē ho Tĩrtũm wỳr kaxyw hwỳr mē o mra. Hāmri nhũm hkôt mē pa ho pa xwỳnhjaja tee ri ja hã mē omu nē mē kām: —Kwa mo kaxyw na ka mē Jejus wỳr mē o mra? Kormã mē ràxre kēnã. Mē ma akupỹm mē o mra nà? Anē.

14Hāmri nhũm Jejus ja hã mē kuma nē mē kām: —Kwa nà kwār mē mãmrĩ ixwỳr mē o mra. Mē ri inhnê mēhprĩjê kurê hkêt nē. Anē. Hāmri nē mē kām hpa ho apê nhũm mē hwỳr mē o mra nhũm mē kuri kuhê. Hāmri nhũm mē hã hkôt mē pa ho mē pa xwỳnhjê mã kām: —E mē jarejê pumu. Na htem hamakêtkati nē hkĩnh nē ri pare. Mē kām amnhĩ to rũnh prãm kêt nē ri pare. Tã Tĩrtũm kôt mē kot amnhĩ nhĩpêx o ri mē pa xwỳnhjaja na htem mē uræk nē kām amnhĩ to rũnh prãm kêt nē ri pa.

15—Na hte jarejaja hipêêxà nē katorxà wa kapēr ma nē wa hkôt ri amnhĩ nhĩpêx o ri pare. Tã ixpê Tĩrtũm kot mē awỳr inhmēnh xwỳnh na pa. Kot ka mē amã ixkôt amnhĩ xunhwỳr prãm hã kot kaj mē jarejê kot amnhĩ nhĩpêx

pyràk o amnhĩ nhĩpêx. Jao ixkapêr ma nê ixkôt ri amnhĩ nhĩpêx mex o ri apa. Anê.

16Hãmri nê mēhprĩrejê jamỳ nê mē hã ìhkra jaxwỳ nê mē ho Tĩrtũm wỳ nê kãm: —Pa Papaj. E kêr ka jarejê ho mex rãhã nê kê mē mex nê pa. Anê.

Hikàxpore rax xwỳnh jarēnh

Matêwre 19.16-22; Rukre 18.18-23; määnēn Wam Ximotre 6.6-10; Xiakre 5.1-6

17Tã nhũm Jejus mē hkôt mē pa ho pa xwỳnhjaja nhỹri pry hã mō nhũm Ijaew krãhtũmja omu nê hwỳr tē nê mēmoj tã hkukja nê kãm: —Pa mē ijahkre xwỳnh maati? E kwa inhmã mēmoj jarē. Nhỹrmã Tĩrtũm ri ixtĩr tũm nê ixpa hprãm xàj mēmo kot pa we ho anhỹr o ri ixpa? Ate amnhĩ to mex pix o ri apa xwỳnh jakamã kwa inhmã tanhmã ja jarēnh to. Anê.

18Hãmri nhũm kãm: —Xà ate ixpê Tĩrtũm kwỳ hã ixpumunh kôt na ka ixte uràk nê amnhĩ to mex xwỳnh ã ijarē? Tĩrtũm pix na kot amnhĩ to mex rãhã xwỳnh jakamã kot kaj ã ijarēnh anê nê ixpê Tĩrtũm Kra hã ijarē. Jao uràk nê ixte amnhĩ to mex xwỳnh ã ijarē. Nà xàn ka ãm atỳx ri amnhĩ krã hkôt ã ijarēnh anê?

19—Tĩrtũm mex o mex jakamã kot kaj amã nhỹrmã kuri atĩr tũm nê apa hprãm hãmri nê ra kot mēmoj tã mē amã karō xà hkôt amnhĩ nhĩpêx o ri apa. Ra ate mar mex kēnã. Na pre mē amã: Kêr ka mē axàhkĩnh o ri apa hkêt nê. Nê mē hpar kêt nê. Nê tanhmã axêx kêt nê. Nê axêx rom tanhmã mē nokupyr to hkêt nê. Nê mē kêp mē hprō ho amnhĩkati hkêt nê. Nê anhĩpêxà mē akatorxà wa hã apijaàm nê wa ho mex pê wa kutã anojarêt rãhã ho ri apa. E kot kaj amã nhỹrmã Tĩrtũm kuri atĩr tũm nê apa hprãm hã kot kaj ã amnhĩ nhĩpêx anhỹr o ri apa. Anê.

20Hãmri nhũm kuma nê kãm: —Kwa ixprĩre ri ra ã ixte amnhĩ nhĩpêx anhỹr o ri ixpa kēnã. Nom te ixtĩr tũm nê ixpa kaxyw ixte kormã tãm kêt pyràk. Anê.

21Hãmri nhũm kuma nê hprĩ hã omu nê kãm hapê nê. Hãmri nê kãm: —Nà kormã mēmoj pyxire nê arĩk. Na ka amã akukrêx rax kĩnh tỳx o Tĩrtũm jakre. Jakamã kêr ka ma akupỳm anhōrkwỹ hwỳr tē nê akukrêx rax o wēnê

hpa. Nē kàxpore jamỳ hāmri nē ma mẽ kêp amrakati xwỳnhjê mã òr o ri apa. Hāmri nē akupỳn tē nē arĩ ri ixkôt apa ho apa. Anē.

²²Hāmri nhũm kuma nē tee ri hikukrêx rax kukamã hamaxpêr. Kãm hapê jakamã kãm kãm ìhkra karo hprãm kêt nē. Hāmri nē tee ri Jejus kot ã kãm hã karõ anhỳrja ma nhũm ja kãm mex kêt nhũm awjanã nē hkaprĩ nē ma akupỳm tē.

²³Hāmri nhũm Jejus tee ri omu nē hkôt mẽ pa ho mẽ pa xwỳnhjê mã kãm: —Hêxta waa nē. Kojã mẽ hikukrêx rũnh xwỳnhjaja ohtô nē kãm mẽ hikukrêx japê xàj Tĩrtũm mẽ wa ixri htĩr tũm nē pa ho pa hkêt nē. Wa ixte amnhĩ nhĩpêxja mẽ kêp hihtỳx. Anē.

²⁴Hāmri nhũm mẽ tee ri kapêrja ma nhũm Jejus mẽ hamaxpêr kôt mẽ omunh mex jakamã axte tanhmã mẽ kãm harênh to nē mẽ kãm: —Nà Tĩrtũm mẽ wa ixte amnhĩ nhĩpêxja na mẽ hikàxpore rũnh xwỳnhjaja pê ja hihtỳx.

²⁵Mẽ kãm hikukrêx rax mã ìhkra karo hprãm kêt rãhã tee kãm Tĩrtũm kôt amnhĩ nhĩpêx prãm kaprỳ. Te ho mẽhõ kot menh kagô hã hkre nē kãm kagô katõk prãm kêt rãhã kãm guhkrax kãm àr prãm kaprỳta pyræk. Anē.

²⁶Hāmri nhũm mẽ kuma nē tee ri amnhĩ kukamã hamaxpêr nē kãm: —Kwa no mẽ ixpiitã mẽ inhmã mẽ ixkukrêx japê kênã. Jakamã xà kot paj mẽ ixpiitã nhỹrmã war ari ixtĩr tũm nē ixpa ho ixpa hkêt nē? Anē.

²⁷Hāmri nhũm mẽ kãm: —Nà kot kaj mẽ amnhĩ krã hkôt mẽ amã mẽ akukrêx japê mã anhũrer kêt nē. ãm Tĩrtũm pix na hte ja kaxyw tanhmã mẽ akrã hto ka mẽ amã akukrêx japê hkêt nē. Jao ra mẽ apê Tĩrtũm mẽ wa ixri atĩr tũm nē mẽ apa ho mẽ apa mã xwỳnh. Anē.

²⁸Hāmri nhũm Simãw Pêtre kãm: —Kwa Pahihti na pa prem agryk ã mẽmoj piitã hkaga hpa nē akôt ixpa ho ixpa. Jakamã xà kot paj mẽ nhỹrmã war ari ixtĩr tũm nē ixpa ho ixpa kêt nē nà? Anē.

²⁹Hāmri nhũm kuma nē hkôt mẽ pa ho pa xwỳnh piitã mẽ kãm: —Nà ka mẽ atõ inhmã tanhmã amnhĩ to ho apa kaxyw akwỳjê re nē ma inhmã tanhmã amnhĩ nhĩpêx to ho ri apa. Anhõrkwỹ re rỳ atõ rỳ atõx rỳ aprõ nē akrajê re.

Rỳ akatorxà nẽ anhĩpêxà wa are. Rỳ akukrêx piitã rer pa hãmri nẽ ma ixkapër o mẽ piitã mẽ ahkre ho ri mẽ hkôt apa.

³⁰Hã kot paj amnhĩ tã mẽ apumu nẽ mẽ ato mex rax nẽ. Hãmri ka mẽ ma mẽ kãm ixkapër jarẽnh o mẽ hkôt apa nhũm mẽ kot mẽ amar xwỳnh kwỳjaja mẽ ama nẽ kãm mẽ akĩnh nẽ. Nẽ ra mẽ ate akwỳjê rer par tã mẽ tãmjaja te mẽ apê mẽ hkra rỳ mẽ htõ rỳ mẽ htõx pyræk o mẽ anhĩpêx. Jao tanhmã mẽ ato mex to ho pa. —Nẽ koja mẽ kãm ixprãm kêt xwỳnhjaja ixtã tanhmã mẽ atomnuj to hã ka mẽ nhỹrmã ma Tĩrtũm mẽ wa inhõ krĩ hwỳr api nẽ wa ixkuri amex nẽ atĩr tũm nẽ apa ho apa.

³¹Nom kêr ka mẽ ja hã amnhĩ pumunh kôt amnhĩ to rax xwỳnh ã amnhĩ to jarkrar kêt nẽ. Mẽ kot amnhĩ to rũnh xwỳnh ã amnhĩ jarẽnh xwỳnhjaja koja mẽ nhỹrmã amnhĩ to rũnh kêt ã amnhĩ pumu. Nẽ mẽ kot amnhĩ to hkryre xwỳnhjaja koja mẽ nhỹrmã amnhĩ to rũnh ã amnhĩ pumu. Anẽ.

Jejus kot amnhĩ kukamã axte amnhĩ jarẽnh

Matêwre 20.17-19; Rukre 18.31-34

³²Tã nhũm Jejus hkôt ri mẽ pa ho mẽ pa xwỳnhjê mã kapër pa hãmri nẽ ma Jerujarẽ hwỳr mẽ o mõ. Ra kamã kãm hkurê xwỳnhjaja kot hpĩr ã amnhĩ jarẽnh tã ma hwỳr mẽ o mõ. Jakamã nhũm mẽ tee ri hkukamã hamaxpër o hkôt mõ. Nhũm mẽ amarĩ mẽ hkôt mrar xwỳnhjaja haxwỳja kãm ma nẽ. Hãmri nhũm Jejus mẽ kêp 12ta o mõ nẽ hkwỳjê hkàx ã amnhĩ kukamã tanhmã mẽ kãm amnhĩ jarẽnh to ho mõ nẽ mẽ kãm:

³³—E na pu mẽ ra Jerujarẽ hwỳr mõ. Kot puj mẽ hwỳr pøj nhũm mẽ kãm ixkurê xwỳnhjaja patre krãhtũmjê mẽ Tĩrtũm kapër tũm o mẽ ahkre xwỳnhjê nhĩhkram ijaxà. Hãmri nhũm mẽ kãm Tĩrtũm kapër kôt amnhĩ nhĩpêx prãm kêt xwỳnhjaja ixpĩr kaxyw mẽ kãm ixtã amỳnê

³⁴nhũm mẽ mar xà hkôt tanhmã inhĩpêx kati hto. Nẽ mẽ hkwỳjaja ixtã hpër o axkẽ nẽ ixtã akunha. Nẽ mẽ hkwỳjaja tanhmã ijapry hto nẽ ixtã argõx rẽ nẽ ixtak hãmri nẽ ixpĩ. Koja mẽ ã inhĩpêx anẽ. Nom kot paj ixtyk ã ixtã apkati axkrunẽpxi nhũm Tĩrtũm akupỹm ixto ixtĩr. Anẽ.

Xiakre mẽ Juãw wa kot amnhĩ to Jejus wỳr ã wa harẽnh

Matêwre 20.20-28; Rukre 22.24-30; mãänën Piripos 2.3-8; Wam Pêtre 5.3

35Tã nhũm Jepetew kra Xiakre mẽ Juãw wa tanhmã hamaxpër to nẽ Jejus mã kãm: —Kwa mẽ ijahkre xwýnh. Pa wa amã mẽmoj jarẽ ka wa inhmã “y” anẽ nà? Anẽ. Hãmri nhũm wa kãm:

36—Ko wa mamrĩ inhmã mẽmoj jarẽ pa wa ama mãn. Anẽ.

37Hãmri nhũm wa kãm: —Nà kot kaj nhỹrmã ate mẽ piitã mẽ ho amnhĩptàr kaxyw nhỹ pa wa akutã anhĩjê. Nẽ wa papxipix ixpê anhõ kôwenatô nẽ akutã anhĩjê nẽ ato nhỹ. Ja na pa wa inhmã hprãm. Anẽ.

38Hãmri nhũm wa kãm: —Nà na ka wa ãm atỳx ri ã amnhĩ to ixwỳr anẽ. Koja mẽ tokyx ixpĩ pa amnhĩ xà htỳx kamã ijamak rax nẽ ty. Tã xà koja mẽ ixpyrà nẽ ã war anhĩpêx anẽ ka wa ixpyrà nẽ amnhĩ xà htỳx kamã ajamak rax kãm ty nà? Anẽ.

39Hãmri nhũm wa kãm: —Tỳ. Nà kot pa wa ijaxwỳja anẽ nẽ apyrà nẽ amnhĩ xà htỳx kamã ijamak kãm ty. Anẽ. Hãmri nhũm wa kãm: —Nà ãm hãmri na ka wa ja hã amnhĩ jarẽ. War ate ixpyrà nẽ ixkôt amnhĩ xà htỳx kãm ajamak kãm atyk mã kênã.

40Tã nom war ate amnhĩ to ixwỳrta ã kot paj tanhmã war amã nẽ hkêt nẽ. Inhõ Papaj tãm koja ja kaxyw mẽhõ japêr nhũm inhĩhkô hã nhỹ. No pa kot paj ri ja kaxyw mẽ atõ rênh kêt nẽ. Anẽ.

41Hãmri nhũm wa uràk nẽ Jejus kôt mẽ pa ho mẽ pa xwýnh kwỳjaja ã wa kot amnhĩ to hwỳr anhỹr ã wa kuma nẽ wa kamã gryk nẽ.

42Jakamã nhũm Jejus mẽ piitã mẽ ho akuprõ nẽ mẽ kãm: —E mẽ inhma. Na hte Ijaew kêt xwýnhjê nhõ pahihtijaja ã amnhĩ nhĩpêx anhỹr o ri pa nẽ amarĩ hkrĩ xà kamã hkrĩ ho hkrĩ. àhpumunh jakamã amarĩ ixkre kre jakry kamã hkrĩ ho hkrĩ nẽ kãm mẽ àpênh xwýnhjê pix mã mẽmo mẽ àpênh ã karõ ho hkrĩ. Na htem ã amnhĩ nhĩpêx anẽ. Nẽ mẽ kot amnhĩm mex ã harênh prãm xàj tanhmã mẽ ho mex to ho pa.

43-45Tã no mẽ kajaja kêr ka mẽ atõ amã amnhĩ to rax prãm hãmri nẽ ho mẽ kot amnhĩ nhĩpêx pyràk kêt nẽ. Mẽ piitã mẽ kutã anojarêt rãhã ho ri apa. Kêt paa. Mẽ ate inhmã axàpênh o apa kaxyw na pa pre mẽ awỳr ixwrỳk kêt

ně. Ām pa ixte tanhmã mẽ amã amnhĩ nhĩpêx to ho ixpa kaxyw na pa pre mẽ awỳr wrỳ. Mẽ ate nhỹrmã kuwy wỳr apa pymaj mẽ anê ixtyk kaxyw na pa pre mẽ awỳr wrỳ. Jakamã kot kaj mẽ atõ amã amnhĩ to rax prãm hã kêr ka ixpyrà nẽ akwỳjê kutã anojarêt rãhã ho ri apa. Hãmri nẽ inhmã te ate amnhĩ to rax o amnhĩ nhĩpêx pyræk o amnhĩ nhĩpêx. Anẽ.

Jejus kot akupỹm Paximew o mex ã harẽnh

Matêwre 20.29-34; Rukre 18.35

⁴⁶Tã nhũm Jejus mẽ hkõt mẽ pa ho mẽ pa xwỳnhjaja kormã Jerujarẽ hwỳr mõi ri ra krĩ pê Jeriko hkõt mõi. Hãmri nhũm mẽ ohtõ nẽ mẽ hã ajêt nẽ mẽ hkõt mõi. Nhũm mẽhõ myja pry nhĩhkrep nhỹ. Ximew kra Paximew nohkre xwỳnhja pry kamã ahwỳr o hkrĩ.

⁴⁷Hãmri nhũm Jejus mẽ hkwỳjaja hwỳr htêp o mõi nhũm amnhĩ wỳr mẽ kuma nẽ mẽ kot Jejus nhĩxi jarẽnh o mõi ã kuma hãmri nẽ kàx pê kãm kapêr nẽ amnhĩ to kuwỳ nẽ kãm: —Pa Jejus? Nà apê mẽ inhõ Pahihti mex kumrêx na ka. Te apê amnepêm anhĩgêt pahihti Tawi kot amnhĩ nhĩpêx pyræk. Jakamã kwa we ixkamã axukapřĩ nẽ akupỹm ixto mex kêt wehe. Ixte amnhĩ kaxyw akõt ijamaxpêr xwỳnh na pa. Anẽ.

⁴⁸Hãmri nhũm Jejus kukamã mẽ mrar xwỳnhjaja kuma nẽ kãm: —Tk. Kwa akapêr kêt nẽ nhỹ nà. Anẽ. Tã nom nhũm ãm mẽ kuma nẽ xatã amnhĩ to kuwỳ. Kỳx pê amnhĩ to kuwỳ nẽ axte kãm: —Kwa ixkamã axukapřĩ nẽ akupỹm ixto mex Pahihti. Anẽ.

⁴⁹Hãmri nhũm Jejus kuma nẽ xa nẽ hkõt mẽ pa ho mẽ pa xwỳnhjê mã kãm: —E mẽ atõ hwỳr tẽ nẽ hpa hã apy nẽ amnẽ ixwỳr o tẽ. Anẽ. Hãmri nhũm mẽ kuma nẽ nohkre xwỳnhhta mã kapêr nẽ kãm: —E tee ri amnhĩ kukamã ajamaxpêr kêt nẽ. Na atã karõ. E tokyx kànhmã xa. Anẽ.

⁵⁰Hãmri nhũm mẽ kuma nẽ hkĩnh tỳx nẽ. Nẽ kànhmã harĩ nẽ amnhĩ nê õ kajaati mẽ nẽ hwỳr htêm kurê kumrêx.

⁵¹Hãmri nhũm Jejus kãm: —Pa mo na? Tanhmã kot pa ato? Anẽ. Hãmri nhũm kãm: —Nà akupỹm inhmã ixrĩt mex prãm Pahihti.

⁵²Aně nhům kām: —Tôe. Nà ra ate amnhĩ kaxyw inhmã ajamaxpěr tỳx jakamã kot kaj akupỹm arĩt mex kurê kumrêx. E māmri ma akupỹm tẽ. Aně. Nhům akupỹm rĩt mex ã amnhĩ pumu nẽ hkĩnh o hkĩnh. Hāmri nẽ Jejus ã ajêt nẽ ma hkôt hkĩnh nẽ tẽ.

Makre 11

Jejus kot Jerujarẽ hwỳr àr ã harẽnh

Matêwre 21.1-11; Rukre 10.28-40; Juãw 12.12-19

¹Tã nhům Jejus mẽ hkôt mẽ pa ho mẽ pa xwỳnhjê mẽ kormã Jerujarẽ hwỳr mỗ. Hāmri nẽ krĩ pê Petake mẽ hõ pê Petãn wỳr ahtêp o mỗ. Hixêt pê Oriwêhti kahti ri na pre krĩa wa xa. Jakamã nhům Jejus hkôt mẽ pa ho mẽ pa xwỳnh wa ho axkrut nẽ mẽ amnhĩ kukamã wa kumẽ

²nẽ wa kām: —E wa ma krĩ mũj wỳr mẽ ixkukamã wa tẽ. Hāmri nẽ hwỳr pôj nẽ nhỹri jumẽnre nyw mã ê nẽ ãm xwỳnhhta pumu. Kormã mẽ kot hã hkrĩ hkêt kumrêx xwỳnhhta.

³Ka wa omu nẽ kām ê xà hpôt nẽ man akupỹn ixwỳr o tẽ. Koja mễhõ war apumu nẽ hã tanhmã war amã kapêr to ka wa ã kām ijarẽnh aně nẽ kām: “Nà mẽ panhõ Pahihti na hã karõ pa wa hwỳr tẽ.” Anhỹr o kām ijarẽ. E wa ma hwỳr tẽ. Aně.

⁴Hāmri nhům wa kuma nẽ ma hwỳr htẽm kurê kumrêx nẽ hwỳr pôj. Nhům Jejus kot wa kām hã karõ xà hkôt jumẽnre nywreta pumu.

⁵Hāmri nẽ kām ê xà hpôt o xa nhům kuri mẽ kuhê xwỳnhjaja tee ri hã wa omu nẽ wa kām: —Kwa mo kaxyw na ka wa kām ê xà hpôt o xa? Kwa kot ka wa mẽ ixpê ho ahkĩ nà? Aně.

⁶Hāmri nhům wa mẽ kām: —Nà mẽ panhõ Pahihti na wa inhmã hã karõ pa wa hwỳr tẽ. Wa ixte ma hwỳr o ixtẽm kaxyw. Aně. Hāmri nhům mẽ wa kām: —Tỳ? Tôe wa māmri ma kām o tẽ. Aně.

⁷Hāmri nhům wa ma akupỹm Jejus wỳr o tẽ. Hāmri nẽ kaxyw amnhĩ xê hkwỳ hkwry nẽ kām ho hkô kahty hpa nẽ kām ho htỳx nẽ o xa nhům Jejus hã nhỹ nẽ mỗ.

⁸Ně kormã Jerujarẽ hwÿr hixêt ã àpir o mō. Nhũm mẽ kot omunh o kuhê xwÿnhjaja hkĩnh nẽ ma hkukamã pry ho mex kaxyw amnhĩ xê hkwÿ hkwÿrÿ nẽ ho kãm uty. Nhũm mẽ hkwÿjaja nhÿri pô hkwÿ jakà nẽ o mra nẽ hkukamã kãm uty.

⁹⁻¹⁰Nhũm mẽ hixêt ã api nẽ ahpar mã wrÿk o mō nhũm mẽ piitã kàx pê Tĩrtũm mex o mex ã harẽnh o hkôt mō. Nhũm mẽ hkwÿjaja kukamã mra nhũm mẽ hkwÿjaja hapu hã mra nhũm prem piitã hkôt Tĩrtũm mex o mex ã harẽnh o mō. Nẽ harẽnh o: E ota Tĩrtũm kot mẽ pahwÿr mẽn̄h xwÿnh̄ta ra pōj. Nà ãm hãmri na mẽ pahwÿr wrÿ. Ja mex kumrẽx. Kêp mẽ panhō Pahihti mex na. Kojã mẽ panhĩgêt pahi Tawi pyrã nẽ mẽ pahto amnhĩptã nẽ mẽ pahto mex o pa. ãm hãmri na Tĩrtũm mẽ pahwÿr kumẽ. Tĩrtũm mex kumrẽx. ãm mex o mex. Kukwak ri pix mã na pu htem pajamakêtkati nẽ paxãmnhĩx papa rãhã ho papa. Anhÿr o Jejus kôt harẽnh o mō. Kot mẽ ho amnhĩptãr kurê kumrẽx ã hkamnhĩx nẽ hkĩnh nẽ ã hkôt kapẽr anhÿr o mō.

¹¹Jao ra Jerujarẽ hwÿr pōj nhũm Jejus Tĩrtũm mã amnhĩ jarẽnh xà hã ixkre hwÿr tẽn̄ axã. Nom nhũm ra amÿkry htÿx jakamã nhũm hwÿr axã nẽ ãm hkre pumunh o xa hãmri nẽ akupÿm kato nẽ hkôt mẽ pa ho mẽ pa xwÿnh̄ pê 12jê mẽ nhũm mẽ ma akupÿm Petãn wÿr mra.

Jejus kot pĩ hpàr pê fikêhti mã kapẽr ã harẽnh

Matêwre 21.18-22

¹²Tã nhũm apkati nhũm Jejus mẽ hkôt mẽ pa ho pa xwÿnh̄jê mẽrohã Petãn rũm hapōj nẽ ma akupÿm Jerujarẽ hwÿr mra. Nhũm Jejus ra kãm prãm nẽ mō.

¹³Hãmri nẽ amÿm mẽmo pĩ hpàr hōptĩ rax pê fikêhti pumu nẽ hamaxpẽr o: —E pa hwÿr tẽn̄ nẽ ô hkwÿ rê nẽ kuwô mãn. Anẽ. Hãmri nẽ hwÿr tẽn̄. Nhũm kormã ô kaxyw ã mytwÿrÿ kator kêt jakamã nhũm ô hkêt nẽ ãm hô pix nẽ xa.

¹⁴Hãmri nhũm hwÿr tẽn̄ nẽ tee ri ô japêr nẽ ãm hô pix pumu. Hãmri nẽ tee ri omu nẽ kãm: —E kot kaj axte axô hkêt kumrẽx. Anhÿr o kãm kapẽr nhũm hkôt mẽ pa ho mẽ pa xwÿnh̄jaja hã kuma.

Jejus kot Tĩrtũm nhōrkwÿ hwÿr àr ã harẽnh

Matêwre 21.12-17; Rukre 19.45-46; Juãw 3.13-22

15-17Tã nhũm Jejus mẽ hkôt mẽ pa ho mẽ pa xwỳnhjaja Jerujarẽ hwỳr agjê nẽ Tĩrtũm mã amnhĩ jarẽnh xà hã ixkre hwỳr agjê. Nhũm Jejus tee ri kamã mẽ kuhê xwỳnhjê pumu. Nhũm mẽ ra ixkre kamã axtem nẽ môx nẽ ôwêhti nẽ tuuti ho wẽnê ho kuhê. Ixkre hwỳr mrar xwỳnhjaja kot haprôr nẽ Tĩrtũm mã amnhĩ jarẽnh kaxyw kãm hpar nẽ òr kaxyw mẽ kãm ho wẽnê. Nom axtem nẽ hã ohtô rax kãm mẽ kãm ho wẽnê nhũm mẽ hkwỳjaja mẽ kãm mẽ hikàxpore ho anhĩpa. Hãmri nhũm Jejus mẽ hwỳr axà nẽ tee ri mẽ kot ã amnhĩ nhĩpêx anhỹr ã mẽ omu nẽ mẽ kãm akir nẽ mẽ kãm: —Tk. Kwa Tĩrtũm kapêr ã kagà htũm kot òrkwỹ jarẽnh kot: Inhõrkwỹja ãm pika piitã hkôt mẽ piitã kot inhmã amnhĩ jarẽnh xà hã ixkre pix kaxyw na. Anhỹr o kot harẽnh tã ka mẽ axtem nẽ kamã ã amnhĩ nhĩpêx anhỹr o akuhê. E kwa mẽ ma mra nẽ ajapôx tokyx anẽ. Anẽ. Nhũm pre ã mẽ kãm kapêr anhỹr pẽ mẽ ahkre hãmri nẽ ixkreja nẽ mẽ kator pa.

18Hãmri nhũm patre krãhtũmjê mẽ Tĩrtũm kapêr tũm o mẽ ahkre xwỳnhjaja tee ri ã mẽ hipêx anhỹr ã omu nẽ kapêr ma nẽ kamã gryk tỳx nẽ. Hãmri nẽ mẽ kot hã àmnênh kaxyw tanhmã axpên mar to nẽ axpên mã: —Tk. Kwa na mẽ ohtô nẽ kãm mar prãm nẽ. Koja mẽ anẽ nẽ gryk ã mẽ pahkaga nẽ axte mẽ pakapêr mar kêt nẽ. Kwa pu mẽ kupĩ ri. E tanhmã kot puj mẽ ho nẽ kupĩ? Anẽ.

19Tã nhũm myt axà nhũm Jejus mẽ hkôt mẽ pa ho pa xwỳnhjaja Jerujarẽ rũm hapôj nẽ ma nhỹri amnhĩm hikranh kaxyw mra.

Mẽ pahte tanhmã mẽmoj tã Tĩrtũm wỳr to hã mẽ pamã karõ

Matêwre 6.14-15; 17.20; Makre 11.13; Juãw 14.13; mãânên Xiakre 1.6; Wam Juãw 3.22

20Tã nhũm apkati nhũm Jejus mẽ hkôt mẽ pa ho mẽ pa xwỳnhjaja Jerujarẽ hwỳr akupỹm mra. Hãmri nẽ axte pĩ hpàr pẽ fikêhtita pumu. Jejus ra kot kãm kapêr xwỳnhta pumu nhũm ra grà pa nẽ xa.

21Hãmri nhũm Simãw Pêtre Jejus kot tanhmã pĩ mã kapêr toja mã hamaxpêr nẽ hã kãm: —Kwa mẽ ijahkre xwỳnh. Ga mẽmoj mũj pumu. Jãã ate fikêhti mã akapêr xwỳnhta na grà par kumrêx nẽ xa. Anẽ.

22-23Hāmri nhūm kuma nē mẽ piitã mẽ kãm: —Tỳ nà ãm hāmri na pa mẽ amã ixkapēr. Kot kaj mẽ mẽmo kaxyw Tĩrtũm mã ajamxpēr tỳx pē mẽmoj tã awỳ nhūm ama nē amã hprãm xà hkôt tanhmã amã hipêx to. Ka mẽ amnhĩ kaxyw Tĩrtũm mã ajamxpēr tỳx pē hixêt mũj mã akapēr nē kãm: “E xa nē ma tē nē gô xujanār kãm mrõ.” Anhỹr o kãm akapēr nhūm amar xà hkôt ã amnhĩ nhĩpêx anē nē tēn kamã mrõ.

24Kot kaj mẽ mẽmoj tã Tĩrtũm wỳ nē kaxyw ãm pix mã ajamxpēr tỳx nē nhūm amã ho anē.

25-26—Nē kot kaj mẽ Tĩrtũm mã amnhĩ jarēnh kaxyw nē ra mẽhõ kot tanhmã ato mã ajamxpēr. Hāmri nē ja ho ajamakêtkati kurê kumrēx nē axte kãm ajamxpēr kêt nē. ãm mẽmoj nyw pix mã ajamxpēr o tãm amnhĩ nhĩpêx o apa. Hāmri nhūm Tĩrtũm kaxkwa rũm ja hã apumu nē apyrà nē ate tanhmã amnhĩ tomnuj to ho hamakêtkati nē axte kãm hamaxpēr kêt nē. Anē.

Mēhõ kapēr kôt Jejus kot mẽ ahkre hã mẽ kot hkukjêr

Matêwre 21.23-27; Rukre 20.1-8

27Nhūm mẽ akupỹm Jerujarē hwỳr agjê nhūm Jejus kê axte Tĩrtũm mã amnhĩ jarēnh xà hã ixkre hwỳr axà. Nhūm hkôt mẽ pa ho mẽ pa xwỳnhjaja hkôt hwỳr mra nē hkôt agjê nē kormã kamã kuhê. Hāmri nhūm Ijaew krãhtũmjê mẽ mẽ kot Tĩrtũm kapēr tũm o mẽ ahkre xwỳnh mẽ mẽ õ patre krãhtũmjaja Jejus pumu nē hwỳr mra nē hêx rom tanhmã kãm kapēr to. Na pre ra Jejus ixkreja nē mẽmoj to wēnê xwỳnh mẽ kàxpore o mẽ hpinhpanh xwỳnhjê jano nhūm mẽ tee ri ja hã omu nē kamã gryk tỳx nē. Jakamã nhūm akupỹn mẽ hwỳr axà nhūm mẽ axte omu nē hwỳr mra kurê kumrēx

28nē kãm: —Kwa mẽ inhmã amnhĩ jarē. Mēhõ nhỹ hã na ka hte ã amnhĩ nhĩpêx anhỹr o ri apa? Mēhõ na pre mẽ ixwỳr amē ka pre mō? Nà xà amnhĩ krã hkôt na ka hte ã amnhĩ nhĩpêx anhỹr o ri apahti? E kwa mẽ inhmã amnhĩ jarē. Anē.

29Nhūm Jejus kot tanhmã mẽ hamaxpēr to hkôt mẽ omunh mex jakamã mẽ kãm: —Nà kot pa ixkumrēx mẽmoj tã mẽ akukja. Ka mẽ inhmã harē pa rĩ kormã mẽ amã tanhmã amnhĩ jarēnh to.

³⁰Finat Juāw Paxisja ã kot paj mẽ akukja. Měhõ nhỹ hã na pre hte mẽ hkrã kumrãr o pa? Xà amnhĩ krã hkôt nà xà Tĩrtũm nhỹ hã? E mẽ atõ inhmã harẽ. Anẽ.

³¹⁻³²Hãmri nhũm mẽ kuma nẽ tee ri kot tanhmã kutã kãm harẽnh to hkukamã hamaxpěr nẽ axpẽn mã: —Kwa tanhmã kot puj mẽ kãm ja jarẽnh to? Mẽ kot mar o kuhê xwỳnhjaja na htem Juāw Paxis kệp Tĩrtũm nhỹ hã kapěr jarẽnh xwỳnh ã axpẽn mã harẽnh o pa. Jakamã kot puj mẽ kãm kot amnhĩ krã hkôt mẽ hkrã kumrãr o pa hã harẽ nhũm mẽ tee ri mẽ pama nẽ mẽ pakamã gryk nẽ. Nẽ mẽ paxêx rom ã kãm mẽ pakapěr anhỹr ã mẽ pahpumu nẽ kẽn o mẽ pahtak o mẽ panhĩmex. No kot puj mẽ kãm Tĩrtũm nhỹ hã mẽ hkrã kumrãr ã harẽ nhũm mẽ pama nẽ mẽ pamã: “Kwa ã kot anhỹr kẽnã na ka prem kapěr mar tã ixkôt amnhĩ xunhwỳr kêt nẽ?” Anẽ. Nà kot puj pěr mẽ kãm tanhmã harẽnh to hkêt nẽ. Kot puj mẽ ãm kãm aa te mẽ pahte ja jarẽnh mar kêt pyrãk o harẽ. Anẽ. Mẽ kot tanhmã kãm nẽ nhũm kot ta pãnhã tanhmã mẽ kãm nẽ pymaj nhũm mẽ tee ri tanhmã kãm nẽ hprãm kaprỳ ho kuhê.

³³Hãmri nẽ Jejus mã kãm: —Konẽn. Mẽ ixte mẽhõ nhỹ hã kapěr o pa hã omunhre hã. Anẽ. Hãmri nhũm mẽ kuma nẽ mẽ kãm: —Tk. Tôe kot pa xep ijaxwỳja mẽ amã tanhmã amnhĩ jarẽnh to hkêt nẽ. Ijaxwỳja ixte mẽhõ nhỹ hã ã ixte amnhĩ nhĩpêx anhỹr o ri ixpa hã amnhĩ pumunhre hã. Anẽ.

Makre 12

Mẽ àpênh punuj xwỳnhjê jarẽnh

Matêwre 21.33-46; Rukre 20.9-18

¹Nhũm Jejus arĩ Ijaew krãhtũm mẽ mẽõ patre krãhtũm mẽ Tĩrtũm kapěr tũm o mẽ ahkre xwỳnhjê mã kapěr o xa. Nẽ mẽ kãm mẽ kot tanhmã hipêx to hkukamã mẽ kãm tanhmã amnhĩ jarẽnh to. No ãm hã kuxi nẽ mẽ kãm awjarẽ nẽ mẽ kãm: —Koja mẽhõ hpur ã hkwỳjê mã karõ. Mẽ kot kamã kãm àpênh kaxyw mẽ kãm karõ. Hãmri nhũm mẽ ma hwỳr mra nẽ kamã mẽmo hy hkre nẽ hkre pa. Hãmri nẽ pu hã kahê hpa nẽ pur kaêx kãm ixkre hprêk nhĩpêx. Mẽ kot himõk ã mẽ kot kệp àhkĩnh pymaj mẽ hapêr o hkrĩ kaxyw.

Hāmri nē hipêx pa nhūm mẽõ patrāwja awry hã krī hõ hwỳr nojarêr nē mẽ kãm tanhmã hpur jarēnh to nē mẽ kãm: “E or ixpurta nõ. Kê kamã mẽmoj kà hpa ka mẽ māmri kamã awjamỳ nē ho axkjê. Hāmri nē ixkutêp inhõ jaxwỳ nē māmri anhõ tanhmã ho hprãm xà hkôt tanhmã ho.” —Anhỳr o mẽ kãm kapêr hāmri nē ma mõi.

²Tã nhūm ra pur kãm mẽmoj hkà pa. Nhūm hpur nhõ dõn arĩ krī hõ kamã hã ujahkre ho pa htã kuri kãm àpênh xwỳnhjê hõja nhūm akupỹm mẽ hwỳr kumẽ. Mẽ kot kãm õ hkwỳ nhõr nhūm ma kot kãm o mõi kaxyw ma mẽ hwỳr kumẽ nhūm ma akupỹm mẽ hwỳr mõi. Mõi nē ra mẽ hwỳr pøj.

³Hāmri nhūm mẽ omu nē axtem nē homnuj nē. Nē unê nē htak nē akupỹm hano nhūm ÿ kamã ma akupỹm mõi.

⁴Hāmri nhūm õ patrāwja tee ri omu nē hpãnhã ja mẽ nhūm ma mẽ hwỳr mõi. Mõi nē mẽ hwỳr pøj. Hāmri nhūm kê wem omu nē mã ho anê nē. Unê nē htak nē hkrãx pê htak nē akupỹm hano nhūm wanta pyrã nē ma akupỹm ÿ kamã mõi.

⁵Hāmri nhūm axpên pãnhã kãm mẽ àpênh xwỳnh kwỳjê rē nhūm mẽ axpên pãnhã ma mẽ hwỳr pa. Ma mẽ hwỳr pa nē pøj nhūm mẽ te ho wantajê mẽ hipêx pyrã nē mẽ hkwỳjê pynê nē htak rax nē mẽ hano nē mẽ hkwỳjê pa.

⁶Nhūm mẽ õ patrāw mẽ harēnh ma nē tee ri amnhĩ kukamã hamaxpêr nē hamaxpêr o: “Hêxta waa nē. Tanhmã kot paj we amnhĩ nhĩpêx to nē inhõta kwỳ jamỳ? Nà kot paj mẽ hwỳr ixkraja mẽ. Inhmã hapê htã kot paj mẽ hwỳr kumẽ kê ma mẽ hwỳr mõi. Hāmri nhūm mẽ kêp ixkra hã omu nē tanhmã ixpê ho hkêr nē. Nē jatã inhmã kãm inhõja kwỳ gõ nhūm man ixwỳr o tẽ. Nà kot paj anê.” —Anhỳr o hamaxpêr hāmri nē ma mẽ hwỳr hkraja mẽ nhūm ma mẽ hwỳr mõi.

⁷—Tã mẽ hwỳr hpôx o mõi nhūm mẽ amỳm amnhĩ wỳr omu nē kêp hkra hã omunh kurê kumrêx nē hã axpên mã amỳnê nē axpên mã: “E. Nà oněj hpur nhõ dõn krata tẽ. Koja nhỹrmã õ papaj mỳrpê amnhĩm pur ã pyka pytã nē

ho õ. Jakamã e pu mẽ kupĩ nẽ kêp hpur ho arĩk nẽ ho panhõ. E kwa tokyj pu mẽ kupĩ ri.” Anẽ.

⁸—Rôm nhũm ra mẽ hwỳr hpôx o tẽ nẽ ra pøj nhũm mẽ unê nẽ pur nê ho kato nẽ ahkà kamã kupĩ. ã mẽ ujarẽnh kot anhỳr. Anẽ.

⁹Nhũm pre ã Jejus Ijaew krãhtũmjê mã ujarẽnh anẽ. Hãmri nẽ hã tanhmã mẽ hkukjêr to nẽ mẽ kãm: —E mẽ inhmã mẽmoj jarẽ. Koja pur nhõ dõnja tee ri mẽ kot hkra hpĩr ã harẽnh ma hãmri nẽ tãm mẽ hwỳr mõi hãmri nẽ tanhmã mẽ hipêx to wehe? Nà koja ma mẽ hwỳr mõi nẽ mẽ himex pa hãmri nẽ hpãnhã nhãm hpurta ã mẽmojjê rẽ.

¹⁰Mãn ka prem ra Tĩrtũm kapêr ã kagà htũm kot ja jarẽnh ma nà? Harẽnh kot: Na prem kẽn o amnhĩm òrkwỹ nhĩpêx kaxyw hãmri nẽ kẽn maati pumu nẽ htỳx omnuj ã hkamnhĩx nẽ hkaga. Mẽ kot hkaga htã nom nhũm Tĩrtũm mẽ kurom mex o kot kẽn piitã hakrenh par ã omunh kurê kumrêx.

¹¹ãm hãmri na pre ã mex ã omunh anẽ. Anẽ. ã Tĩrtũm kapêr ã kagà htũm kot harẽnh kot anhỳr. Anẽ.

¹²Nhũm pre ã Jejus mẽ kãm ujarẽnh kãm mẽ harẽnh anẽ nhũm mẽ amnhĩ tã kuma. Tĩrtũm kapêr tũm o mẽ ahkre xwỳnh mẽ mẽ õ patre krãhtũm mẽ Ijaew krãhtũmjaja nhũm mẽ kot mẽ kãm kẽn maati kaga xwỳnhjê jarẽnh o te mẽ tãm harẽnh pyrækja ma nhũm ja mẽ kêp omnuj nẽ. Jakamã nhũm mẽ kãm unênh nẽ haxàr prãm nẽ. Nom amnhĩ tã kãm mẽ kot mar o kuhê xwỳnhjê puma nẽ.

¹³Jakamã na prem ma mra nẽ hapøj hãmri nẽ Jejus wỳr Parijew nhõ xwỳnh mẽ pahi Erox kôt mẽ pa xwỳnh kwỳjê rẽ. Mẽ kot hêx rom mẽmoj tã hkukjêr nhũm kot mẽ mar nẽ tanhmã Rôm nhõ xwỳnhjê nhõ pahi Sesti kapêr kuhpa hã ri tanhmã mẽ kãm nẽ nhũm mẽ kot mar kaxyw.

¹⁴Jakamã nhũm mẽ ma hwỳr mra nẽ hêx rom kãm kapêr nẽ kãm: —Kwa Jejus? Nà ãm hãmri na ka hte Tĩrtũm kapêr o mẽ ahkre mex nẽ. Na ka hte mẽ kamã akahak o apa hkêt nẽ. Nẽ mẽ kot tee ri mẽ kot tanhmã ato kapêr punuj to htã ka hte arĩ aprĩ hã mẽ ahkre mex o ri apa. E kwa mẽ inhmã

měmoj jarě. Rõm nhõ pahihti kot mẽ pahpê Ijaew mẽ pahte kãm kàxpore hkwỳ nhõr ã mẽ pamã karõta. Kwa xà ja amã mex nà? Xà kot pu mẽ kãm kugõ? Xà kot pu mẽ kãm õr kêt nẽ? E kwa mẽ inhmã harẽ. Anẽ.

¹⁵Nhũm prem ã hêx rom ja hã hkukjêr anhỹr tã no nhũm Jejus mẽ hamaxpêr ã mẽ omunh mex mẽ mẽ kãm: —Tk. Kwa mon ka mẽ axêx rom ja hã ixkukja? E mẽ atõ inhmã kàxpore htỳxre hõ gõ pa omu. Anẽ.

¹⁶Hãmri nhũm ja kãm ja gõ nhũm kupy nẽ kànhmã kupẽ nẽ mẽ kãm: —E mēhõ nhĩxi nẽ mēhõ karõ na hã? Anẽ. Anẽ nhũm mẽ kãm: —Pahi Sesti karõ nẽ hixi na hã.

¹⁷Anẽ nhũm mẽ kãm: —Tỳ. Tô kêt ka mẽ mãmri kãm hkwỳ nhõr o apa. Hã hkarõ nẽ hã hixi. Tãm kot hipêx xwỳnh jakamã õ na. No mẽ kajaja na pre Tĩrtũm mẽ anhĩpêx nhũm mẽ apê õ jakamã kwa kêt ka mẽ kapêr kôt pix mã ri amnhĩ nhĩpêx o ri apa. Anẽ. Nhũm pre ã mẽ kãm kapêr anẽ nhũm mẽ piitã mar o kuhê. Nhũm mẽ kot hêx rom hkukjêr xwỳnhjaja amnhĩ jaêr pẽ ã kàxpore jarẽnh anhỹrja ã kuma nẽ axpẽn mã: —Kwa mẽ paxêx rom mẽ pahte hã hkukjêr tã nhũm ãm hãmri mẽ pakutã mẽ pamã harẽ. Kwa tanhmã kot puj wem hkukjêr to nhũm pahi Sesti kapêr kwỳm ri mẽ pamã mẽmoj jarẽ? Anẽ. Hãmri nẽ tee ri tanhmã hkukjêr to hkukamã hamaxpêr o kuhê.

Akupỹm mẽ htĩr xwỳnhjê jarẽnh

Matêwre 22.23-33; Rukre 20.27-40; Juãw 6.21; 6.38-40; mããnẽn Wam Korĩt 6.14; 15.12-28; Wam Tesarõn 4.13-18

¹⁸Tã nhũm Satusew nhõ xwỳnh kwỳjaja. Mẽ kot akupỹm mẽ htĩr mã hamaxpêr kêt xwỳnhjaja na pre mẽ. Tã mẽ kot mẽ htyk nẽ mẽ hapêx ã mẽ hkamnhĩx jakamã na prem axpẽn mã Jejus jarẽnh o: —E kwa pu mẽ ma hwỳr mra nẽ mẽmoj xihtỳx ã hkukja kê mẽ pama nẽ tee ri tanhmã mẽ pamã kapêr to hkukamã hamaxpêr. Hãmri nhũm mẽ piitã ja hã omu nẽ àhpumunh kêt ã omunh kurê kumrêx. E tokyx ma pu mẽ hwỳr. Anẽ. Hãmri nẽ ma hwỳr mra nẽ Parijew nhõ xwỳnhjê pyrã nẽ hêx rom kãm:

¹⁹—Pa Jejus? Kwa mẽ inhmã mẽmoj jarẽ. Na pre finat Mojesja Tĩrtũm nhỹ hã ã mẽ panhĩgêjtjê mã karõ anẽ. Mẽ hkra hkêt rãhã mẽ pa nẽ mẽ htyk xwỳnhjaja nhũm mẽ harẽnh o: Koja mēhõ hprõ hãmri nẽ kamã hkra hkêt

rãhã pa nẽ ty. Hã koja hkôt htõja hpãnhã hprõ o hprõ nẽ kamã hkra. Hãmri nhũm kato nẽ te kêp htõ htyk xwỳnhhta hkra pyræk. Anẽ. Na pre ã Mojes Tĩrtũm nhỹ hã ja hã mẽ kãm karõ anẽ.

²⁰Jakamã kwa ga mẽ ixujarẽnh ma. Koja mẽmojjaja mẽ kot axpẽn to htõ xwỳnhjaja kêp 7. Nhũm kot waja hprõ. Nẽ wa pa nhũm myja kormã hprõ kamã hkra hkêt rãhã ty.

²¹Nhũm hkôt htõ hõta hpãnhã hprõ ho hprõ nẽ wa axpẽn to pa. Nhũm haxwỳja kamã hkra hkêt rãhã ty. Nhũm hkôt htõ hõta haxwỳja ho hprõ nẽ wa axpẽn to pa grire nhũm wamta wa uræk nẽ kamã hkra hkêt rãhã ty.

²²Hãmri nhũm htõ hkwyjaja piitã nija pyxi nẽ axpẽn pãnhã ho hprõ nom mẽhõ kamã hkra hkêt rãhã htyk pa. Hãmri nhũm mẽ hprõta mẽ hkôt amnhĩ to hitep nẽ ty.

²³Tã Tĩrtũm kot akupỹm nhỹrmã mẽ ho htĩr ronhỹx nhỹ nhỹx kêp nija mjên kumrẽx? Ra piitã kot ho hprõ kẽnã. E kwa mẽ inhmã ja jarẽ. Anẽ.

²⁴Hãmri nhũm Jejus ã mẽ ujarẽnh anhỹrja ma nẽ mẽ kãm: —Tk. Nà mẽ ate Tĩrtũm kapër ã kagà htũm mar mex kêt. Nẽ mẽ aprĩ hã tanhmã Tĩrtũm kute hã omunh kêt jakamã na ka mẽ ã atỳx ja hã ixkukjêr anẽ.

²⁵Kormã mẽ htĩr ri mẽ kot Tĩrtũm kôt amnhĩ xunhwỳr xwỳnhjaja na htem ty hãmri nẽ Tĩrtũm nhõ krĩ kamã axte kãm hprõ hprãm kêt pa. Rỳ ni japêr nẽ kãm mjên prãm kêt nẽ pa. Hãmri nẽ Tĩrtũm kapër o mẽ wrỳk xwỳnhjê pyrà nẽ axte htyk kêt nẽ. ãm htĩr tũm rãhã nẽ pa ho pa.

²⁶—Nom mẽ ate akupỹm mẽ htĩr kêt ã mẽ hkamnhĩxja kot paj ixprĩ hã mẽ amã harẽ. Amnepêm na pre Tĩrtũm pĩ hpòk kamã tanhmã Mojes mã kapêr to. Mãn ra mẽ ate mar. Na pre kãm: Ixpê Apraãw nhõ Tĩrtũm na pa. Nẽ mããnên ixpê Apraãw kra Ijak mẽ htàmnhwỳ Jako wa õ Tĩrtũm na pa. Anhỹr o Mojes mã amnhĩ jarẽ nhũm kuma nẽ hã kagà.

²⁷Kêp apu arĩ mẽ htyk rãhã nhỹx pre ã mẽ harẽnh anhỹr kêt nẽ. Nhỹx pre mẽ harẽnh o: “Amnepêm Apraãw nẽ hkra nẽ htàmnhwỳ mẽ htĩr ri ixpê mẽ õ Tĩrtũm na pa pre.” Anhỹr o nhỹx pre mẽ harẽ. Nom na pre ã amnhĩ jarẽnh

anhÿr kêt nê. Mẽ pamã te Apraãwja mẽ htyk nê mẽ hapêx pyræk. Nom nhũm prem ra Tĩrtũm ri akupỹm htĩr nê mex nê pa ho pa. Tã ka htem Tĩrtũm kapêr kwỹm ri akupỹm mẽ htĩr kêt ã mẽ harênh o apa. Anê.

Tĩrtũm kapêr maati jarênh

Matêwre 10.37; 22.34-40; Rukre 10.25-27; mãânên Wam Juãw 2.15; 5.3; Apokarip 2.4

28Tã nhũm Tĩrtũm kapêr tũm o mẽ ahkre xwỹnhjê hõ mẽ hwÿr tẽ nê mẽ kot xepên mã kapêr ã mẽ omunh o xa. Hãmri nê Jejus kot tanhmã Satusew nhõ xwỹnhjê mã kapêr mex toja ma nê kãm: —Nà ãm hãmri na ka ã mẽ kãm ja jarênh anê Pahihti. Kwa inhmã mẽmoj jarê. Na pre Tĩrtũm ahpỹnhã mẽmoj to 10 nê mẽ pamã hã karõ. Mẽ pahte hkõt amnhĩ nhĩpêx o ri papa kaxyw hã mẽ pamã karõ. Tã nhỹ kapêr na mex o kot hkwyjê jahkrenh wehe? Anê.

29Hãmri nhũm kãm: —Nà Tĩrtũm kapêr xohtôô. Kapêr piitã hkõt mẽ pahte amnhĩ nhĩpêx o papaja na kãm hprãm. No pixi na mẽ pahte hkõt amnhĩ nhĩpêx o papaja nhũm kãm hprãm tỳx o kot hkwy jakrenh. Kapêr mex maati na ja. Na pre kapêr o: E mẽ apê Ijaew nhõ xwỹnhjaja. Ixpê mẽ anhõ Tĩrtũm ã ixpaxi mex na pa.

30Jakamã kêr ka mẽ amã ixkĩnh tỳx o mẽmoj piitã hakrenh pa. Jao mẽ anhĩ piitã ho amã ixkĩnh tỳx kumrêx o ri apa.

31Anhÿr o na pre mẽ pamã karõ. Nê hkõt ja: Kêr ka mẽ nhãm mẽ hipêx o te ka amã amnhĩ tã ma pyræk o mẽ hipêx o ri apa. Jao tãm mẽ hipêx rãhã ho ri apa. Anê. E ja wa kumrêx na Tĩrtũm kãm mẽ pahte hkõt amnhĩ nhĩpêx o ri papa hprãm tỳx nê. Anê.

32Hãmri nhũm kuma nê kãm: —Nà ãm hãmri na ka ja jarê Mějiahkre xwỹnh. Tĩrtũm pyxi mex kênã.

33Amnepêm na pre htem kãm amnhĩ jarênh kaxyw nê kãm mẽmoj gõ nê rĩ kormã tanhmã kãm amnhĩ jarênh to. Tã nom kot puj mẽ ã ate harênhhta kõt amnhĩ nhĩpêx anhÿr o papa jao mẽ panhĩ piitã pamã Tĩrtũm kĩnh. Nê mẽ pamã hkĩnh o mẽmoj piitã hakrenh pa. Nê nhãm mẽ hipêx o te mẽ papamjaja pamã amnhĩ tã ma pyræk o mẽ hipêx. Jao tãm mẽ hipêx rãhã ho

ri papa. Kot puj mẽ ã amnhĩ nhĩpêx anẽ nhũm Tĩrtũm kãm ja mex o mẽ pahte kãm mẽmoj nhõrta jakre. Anhỹr o kãm kapêr.

³⁴Hamaxpêr mex pê ã Jejus mã kapêr anẽ nhũm kuma nẽ kãm: —Nà ãm hãmri na ka ja jarẽ. Na ka ra mẽ kot Tĩrtũm kõt amnhĩ nhĩpêx o amnhĩ nhĩpêx nyw pumunh mex o mẽ. Nà te ate tokyx hkõt amnhĩ xãm kaxyw pyræk. Anẽ. Hãmri nhũm mẽ kãm hkurê xwỳnhjaja tee ri wa kot axpẽn mã kapêr mar o kuhê nẽ axte kãm mẽmoj tã hkukjêr pyma nẽ. Ra tee ri mẽ kot hêx rom mẽmoj tã hkukjêr kaprỳ jakamã axte tanhmã hkukjêr to hkêt nẽ.

Jejus kêp pahi finat Tawi nhõ Pahihti hã harênh

Matêwre 22.41-46; Rukre 20.41-44; määnên Rõmãn 1.3-4

³⁵Hãmri nhũm Jejus arĩ Tĩrtũm mã amnhĩ jarênh xà hã ixkre kamã amnhĩ tã mẽ ahkre. Nom te nhãm mẽhõ hã mẽ hkukjêr pyræk amnhĩ tã mẽ hkukja nẽ mẽ kãm: —E mẽ inhmã mẽmoj jarẽ. Tĩrtũm kapêr tũm o mẽ ajakre xwỳnhjaja na htem tanhmã mẽ amã Tĩrtũm kot mẽ akaxyw ãm mã xwỳnh jarênh to nẽ mẽ amã harênh o: “Koja kêp pahi finat Tawi kanrêhã htàmnhwỳ koja.” Anhỹr o kot mẽ amã harẽ. ãm kêp kanrêhã htàmnhwỳ pix ã mẽ amã harênh o pa. No na pre pahi Tawija kêp kanrêhã htàmnhwỳ hã harẽ nẽ määnên kêp õ pahihti hã harẽ. Tã nom nhũm Tĩrtũm kapêr tũm o mẽ ajakre xwỳnhjaja na htem urà nẽ kêp pahihti hã mẽ amã harênh kêt nẽ. ãm kêp kanrêhã htàmnhwỳ pix ã harẽ. Kwa mo na htem Tawi pyrà nẽ kêp õ pahi hã harênh kêt nẽ?

³⁶Na pre Tawi tãm Tĩrtũm kapêr tũm kwỳ hã kagà nẽ tanhmã Tĩrtũm kot mẽ akaxyw ãm mã xwỳnhhta jarênh to. Tĩrtũm Karõ nhỹ hã tanhmã harênh to. Tĩrtũm mex ã mẽ grer xàja kwỳ hã kagà nẽ hã kagà ho: Tĩrtũm na pre inhõ Pahihti mã ã kapêr anẽ nẽ kãm: “E amnẽ ixwỳr tẽ nẽ inhĩhkõ hã nhỹ nẽ inhmã mẽ ho amnhĩptàr o akrĩ. Kot paj mẽ kot kãm akurê xwỳnh piitã mẽ unênh pa nẽ awỳr mẽ o mra nẽ anhĩhkram mẽ haxàr pa.” Anhỹr o pre kãm kapêr. Anẽ.

³⁷—Na pre ã Tawi Tĩrtũm kot Kris mã kapêr jarênh nẽ kêp õ pahi hã kagà anẽ. Tã nom Tĩrtũm kapêr tũm o mẽ ajakre xwỳnhjaja na htem kêp Tawi htàmnhwỳ pix ã ri axpẽn mã harênh o ri pa. No kêt Tawija na pre kêp õ

Pahihti hã harënh o pa. Anë. Nhũm pre ã Jejus mẽ kãm amnhĩ jarënh anë nhũm mẽ mar o kuhê xwỳnhjaja kuma nẽ hkĩnh nẽ. Nẽ kãm axte mar prãm nẽ.

³⁸Hãmri nhũm arĩ mẽ ahkre ho nhỹ nẽ mẽ kãm: —Kwa mẽ o kora. Kêr ka mẽ Tĩrtũm kapêr tũm o mẽ ahkre ho mẽ pa xwỳnhjê kot amnhĩ nhĩpêx o amnhĩ nhĩpêx kêt nẽ. Mẽ omu nẽ ãm mẽ omu nẽ mẽ kot amnhĩ nhĩpêx kôt amnhĩ nhĩpêx kêt nẽ. Na htem piitã mẽ hã hpijaàm kaxyw ê mex pix kãm ri pa. Nẽ mẽ kot amnhĩm mẽ rũnh ã mẽ harënh nhũm mẽ kot amnhĩ jarënh marja na htem kãm hprãm.

³⁹Nẽ Tĩrtũm kapêr o mẽ ahkre xà hã ixkre kamã mẽ kãm amnhĩ to rũnh xwỳnhjê hkrĩ xà mex pix kamã na mẽ kãm hkrĩ hprãm. Nẽ mẽmoj tã mẽ apkur xà hã arĩgro hã ma hkwỳjê hkôt mẽ apkur xà hã ixkre hwỳr akuprõ nẽ kãm mẽ kot amnhĩ to rũnh xwỳnhjê hkrĩ xà mex pix kamã hkrĩ hprãm.

⁴⁰—Nẽ mẽ kot mẽ mjên htyk xwỳnhjê ho mex o pa hã amnhĩ jarënh tã amnhĩ to hêx. Nẽ na htem axtem nẽ mẽ nokupyr kaxyw mẽ hwỳr mra nẽ mẽ kãm: “E ot pa awỳr ato ajuta kaxyw tẽ. Ra amjên apê htyk jakamã kot paj pam amã akukrêx jamãr o ixpa.” Anë hãmri nẽ mẽ kêp mẽ òrkwỹ pytã nẽ amnhĩm mẽ kêp mẽ hikukrêx piitã ho hapêx. Te tãm kot mẽ hipêx o pa pyræk nom tãm mẽ hipêx kêt nẽ. Nẽ te tãm amnhĩ nhĩpêx pyrã nẽ Tĩrtũm mã amnhĩ jarënh japjêê ho kuhê. Te mẽ kot Tĩrtũm mã ãm hãmri amnhĩ jarënh pyræk tã hkwỳjaja kot ja hã mẽ omunh pix kaxyw nhũm mẽ ã kãm amnhĩ jarënh anë. Mỳrapê koja mẽ mex kêt nẽ. Koja Tĩrtũm tanhmã mẽ hipêx kati hto. Jakamã kwa kêr ka mẽ ã mẽ kot amnhĩ nhĩpêx anhỹr o mẽ pa xwỳnhjê kôt amnhĩ nhĩpêx o ri apa hkêt nẽ. ãm kwarĩ ho kwarĩ. Anë.

Kêp mjên htyk xwỳnh jarënh

Rukre 21.1-4

⁴¹Nhũm Jejus arĩ Tĩrtũm mã amnhĩ jarënh xà hã ixkre kamã mẽ omunh o xa. Na pre hte Ijaew ixkreja o mex kaxyw ixkre jamãr xwỳnhjê mã hikàxpore hkwỳ nhõr o pa. Nhũm mẽ hikàxpore rũnh xwỳnhjaja hwỳr agjê nẽ kàxpore gjênh xà kamã hkwỳ ho rax nẽ hagjê nẽ ma akupỹm mra.

⁴²Tã nhũm mēhō ni pê mjên htyk xwỳnhja haxwỳja hwỳr axà. Kêp amrakati kumrēx. Nē hikàxpore tỳxre ãm pijakrutre htã kàxpore rũnh xwỳnhjê hpãnhã ixkreta wỳr tē. Nē kãm Tĩrtũm kĩnh xàj kàxpore gjênh xà kamã hamē kumē hãmri nē kato nē ma akupỹm tē.

⁴³Hãmri nhũm Jejus amỳm ã kot amnhĩ nhĩpêx anhỳr ã omunh o xa nhũm ja kãm mex nē. Hãmri nē hkôt mē pa ho mē pa xwỳnhjê mã harē nē mē kãm: —E mãn ka mēnire htēm mũj pumu. Na pre mjên kêp ty nhũm kêp amrakati nē hikàxpore grire htã amnhĩ pê òr pa. Kwỳjê rom kãm Tĩrtũm kĩnh xàj amnhĩ pê òr pa. Apkur xà hã hikàxpore na.

⁴⁴Kêt mē hkwỳjaja na hte hikàxpore hkwỳ pix o mra nē gjênh xà kamã hagjê nom arĩ mē hikàxpore rũnh. No nija na mē uràk nē kãm hikàxpore japê hkêt nē. Nē ho õxỳ hkêt nē àmnhĩx piitã o tē nē òr pa. Anē.

Makre 13

Jejus kot nhỹrmã mēmoj piitã ho hapêx ã harēnh

Matêwre 24.1-14; Rukre 21.5-9; 21.17-19; mãânēn Wam Ximotre 4.1; Sikũn Ximotre 3.1

¹Tã hãmri nhũm Jejus kôt mē pa ho mē pa xwỳnhjaja arĩ Tĩrtũm mã amnhĩ jarēnh xà hã ixkre kaxwỳnh pumunh o kuhê nē hã Jejus mã: —Hêxta waa nē. Ixkreja mex kumrēx Pahihti. Kēn rũnh o mē kot hipêx jakamã mex o mex. Nē mē kot ri Tĩrtũm mã hkĩnh xà nhõr nēj haxwỳja piitã mex kumrēx. Anē.

²Hãmri nhũm mē kãm: —Nà mex tã koja nhỹrmã mē kãm Tĩrtũm kurê xwỳnhjaja grành pa. Koja arĩ kēn axkrutre axpēn mỳnh nē nõr kêt kumrēx. Koja piitã anhgrà nē ahpỹnhã ri hikwỹ. Anhỳr o mē kãm kapēr.

³Hãmri nē ixkreja rũm kato nē ma tē nē hixêt pê Oriwêhti hã api nē hã nhỹ. Tĩrtũm nhõrkwỹ kutã hixêtja nhũm hã api nē hã nhỹ. Hãmri nhũm Simãw Pêtre mē Xiakre mē Juãw mē Andreja ma hkôt mra. Ahte hkôt mra nē mē kot Tĩrtũm mã amnhĩ jarēnh xà hã ixkre grành par ã hkukja nē kãm:

4—Kwa xà ãm hãmri koja mẽ ã ixkreja nhĩpêx anê? E aprĩ hã mẽ inhmã harê. Xà koja mẽ nhỹrmã kugrà nà xà koja mẽ tokyx ho anê? Kwa mẽmo koja we wỳj ri tanhmã amnhĩ nhĩpêx to? Anê.

5-6 Hãmri nhũm mẽ kãm: —Nà kot paj mẽ amã harê. Nom nhỹrmã mẽmoj piitã hapêx kaxyw tanhmã amnhĩ nhĩpêx to kumrêx kot paj mẽ amã harê ka mẽ inhma. Koja mẽ ohtô nê mẽ apê ixkwỳjê hwỳr mra nê hêx rom te pa ixte amnhĩ nhĩpêx pyràk o amnhĩ nhĩpêx o pa. Nê tanhmã mẽ amã amnhĩ jarênh to nê mẽ amã: “E pa na pre Tĩrtũm mẽ awỳr inhmẽ. Ixpê kaxkwa rũm ixwrỳk xwỳnhhta na pa.” Anhỹr o mẽ akôt mẽ amã amnhĩ to hêx o pa. Nê mẽ amã: “E na pa mẽ ato amnhĩptàr kaxyw mẽ awỳr wrỳ.” Anhỹr o mẽ amã amnhĩ jarê. Nom kêr ka mẽ ama nê ãm mẽ ama. Mẽ kot amnhĩ to hêx xwỳnh na mẽ. Kormã akupỳn ixpôx xà hã arĩgroja kormã.

7—Nê koja mẽ nhỹri awry hã axpên par o pa. Nê mẽ atãã axpên par o pa. Nom kêr ka mẽ harênh ma nê ri tee ri tokyx mẽmoj piitã hapêx ã hkamnhĩx kêt nê. Mẽmoj piitã hapêx xà hã arĩgroja kormã.

8—Nê koja mẽmoj piitã hapêx kaxyw nhũm ahpỳnhã ri pika piitã hkôt mẽ pa xwỳnh piitã pika hõ nhõ xwỳnhjê kutã amnhĩ xunhwỳ nê axpu nê axpên pa. —Nê koja pika piitã hkôt tanhmã mẽ à kuteja mẽ hamỳ nhũm mẽ amnhĩ xà htỳx kãm hamak o pa. Nhũm nhỹri pika htertet tỳx nê. Nê nhỹhỹnh pika hkwy kamã mẽ pa xwỳnhjaja prãm xàj pikaprãr pa. Tã nom kormã mẽ kot amnhĩ xà htỳx kãm hamak xà hkrax pix na ja. Te mẽnijaja pijagri kaxyw nê kormã õhy xà hpỳnh pyràk. Koja mẽmoj piitã hapêx kaxyw nê ã amnhĩ nhĩpêx anê.

9—E pa hpãnhã mẽ kot Tĩrtũm mã amnhĩ jarênh xà hã ixkre grành par xwỳj ri mẽmoj tanhmã kot hkukamã amnhĩ nhĩpêx to hã hã harê. Mẽ ate hã ixkukjêr xwỳnhhta kot paj mẽ amã harê. Nà koja mẽ kãm ixkurê xwỳnhjaja mẽ awỳr mra nê ixtã mẽ apynê nê mẽ atomnuj nê. Nê ma mẽ pikuprõnh xà hã ixkre hwỳr mẽ ato mra nê kamã mẽ kãm mẽ ato kapêr punuj nê nhũm mẽ kuma nê ma mẽ ato mra nê mẽ ajagjê. Mẽ ate ixkôt apa ho apa xwỳnh

ã ã mẽ anhĩpêx anẽ. Nẽ mẽ õ pahihti hwỳr mẽ ato mra nẽ mẽ kãm tanhmã mẽ ato kapêr punuj to.

10Tã nom kwa kêr ka mẽ kutã akuhê nẽ mãmri tãm mẽ kãm ijarênh o akuhê.

11Nom kêr ka mẽ kãm amnhĩ jarênh kukamã tee ri ajamxpêr o ri amã mẽ uma hkêt nẽ akuhê. Rỳ mẽ ajamxpêr o: “Hêxta waa nẽ. Mẽ kot ixkukjêr ã arĩgrota ã tanhmã kot pa we ri mẽ kãm amnhĩ jarênh to?” Anhỳr o tee ri amnhĩ kukamã ajamxpêr kêt nẽ. Koja Tĩrtũm Karõ tanhmã mẽ akrã hto ka mẽ ã hã akatàt kôt tanhmã mẽ kãm amnhĩ jarênh to.

12—Nẽ mẽ atõ nẽ mẽ anhĩpêxà nẽ mẽ akrajaja koja mẽ ixtã mẽ atã amỳnê nẽ ma pahi hwỳr mẽ ato mra nẽ kãm mẽ ajarê nhũm mẽ kuma nẽ mẽ ajagjê nẽ mẽ akwỳjê pa.

13Koja mẽ piitã ixkôt mẽ akamã gryk nẽ ã kãm mẽ akurê ho pa anẽ. Nom mẽ kot ã mẽ anhĩpêx anhỳr mã tã kêr ka mẽ amnhĩ to htỳx nẽ ixkaga hkêt nẽ. Mẽ kot mẽ apar tã ka mẽ kaxkwa kamã akupỳm atĩr kurê kumrêx. Hãmri nẽ mẽ kurom Tĩrtũm mẽ wa ixri atĩr tũm nẽ amex rãhã nẽ apa ho apa. Mẽ kot tanhmã mẽ ato htã mẽ apê akupỳm kaxkwa kamã atĩr tũm nẽ apa mã xwỳnh jakamã kwa tee ri amnhĩ kukamã ajamxpêr o ri apa hkêt nẽ. Anẽ.

Mẽ pahomnuj tỳx xwỳnh maati hã harênh

Matêwre 24.15-28; Rukre 21.20-24; määnên Sikũn Tesarõn 2.3-4; Apokarip 13.11-17

14-16Nhũm Jejus arĩ mẽ kãm kapêr nẽ mẽ kãm: —Nẽ koja nhỹrmã kot mẽ atomnuj tỳx kumrêx xwỳnh maatija axtem nẽ Tĩrtũm mã amnhĩ jarênh xà hã ixkreja kamã amnhĩ xãm. Hãmri ka mẽ ja hã omu nẽ mẽ kot krĩ grành par mã ajamxpêr kurê kumrêx. Koja ã amnhĩ nhĩpêx anẽ ka mẽ amỳm amnhĩ wỳr mẽ omu hãmri nẽ ajapôj nẽ ma aprôt nẽ amrar kurê kumrêx. Mẽ apê jar pika pê Jutej kamã mẽ apa xwỳnhjaja mẽ omu hãmri nẽ mẽ kot mẽ apar pymaj ma aprôt nẽ amrar kurê kumrêx. Hixêt prêk wỳr ajapôj nẽ aprôt nẽ ma mra. Nẽ jar Jerujarê nhõ xwỳnhjaja kê mẽ umaj haxwỳja hapôj nẽ ma hprôt nẽ ma mrar o mra. Nẽ kapôt ã ri mẽ pa xwỳnhjaja kê mẽ ê jamỳnh kaxyw akupỳm krĩ hwỳr gjêx kêt nẽ. ãm ma mẽ umaj hprôt nẽ mrar o mrar kurê kumrêx.

17—Ně mẽ htujarô xwỳnhjaja ně mẽ hkra karàre xwỳnhjaja. Jajê pê koja mẽmoj omnuj tỳx ně. Tanhmã kot wem amnhĩ to ně hprôt tỳx? Nà pika ja kamã koja mẽ mex kêt ně. Mẽ kot amnhĩ tomnuj mỳrapê koja Tĩrtũm tanhmã mẽ homnuj tỳx to.

18-19—Koja ã mẽmoj amnhĩ nhĩpêx anẽ hãmri nhũm mẽ piitã amnhĩ xà htỳx kãm hamak rũnh o pa. Tĩrtũm kot mẽ piitã mẽ ho kator krax rũm amnẽ mẽ pa xwỳnhjaja na mẽ kormã à htỳx kamã hamak rũnh kêt ně. Kormã amnhĩ xà kamã hamak kryre. No nhỹrmã mẽ hprôt xà hã arĩgrota ã koja mẽ amnhĩ xà htỳx kamã hamak rax kumrêx. —Tã akupỹn ixte mẽ awỳr ixwryk xà hã arĩgrota ã kot pa mẽmoj punuj o ijapêx pa ka mẽ axte ã mẽmoj kot anhỹr pumunh kêt ně. Nom kormã akupỹn ixwryk xwỳj ri kot kaj mẽ amnhĩ xà htỳx kamã ajamak o apa. Jakamã kêr ka mẽ ã amnhĩ nhĩpêx anhỹrja kukamã amnhĩ to Tĩrtũm wỳ ně kãm: “Pa Tĩrtũm. Kwa kê mẽmoj ã amnhĩ nhĩpêx anhỹr kaxyw hãmri kê amgrà pê ã amnhĩ nhĩpêx anẽ. Koja na pê ã amnhĩ nhĩpêx anẽ nhũm omnuj tỳx ně.” Anhỹr o amnhĩ to awỳ.

20—Mẽ hprôt xà hã arĩgrota ã koja Tĩrtũm kãm mẽ apê hkrajaja mẽ atyk par pymaj mẽ anê mẽmo punuta ã arĩgro hkwỳ grà ně mẽ akukamã mẽ amã ho grêre. Koja mẽ akamã ukapřĩ xàj ã mẽ anê hipêx anẽ.

21—Ně koja ã mẽmoj amnhĩ nhĩpêx anhỹr kaxyw hãmri nhũm mẽ hêx o mẽ pa xwỳnhjaja ma mẽ awỳr mra ně hêx rom tanhmã mẽ amã kapêr to ně mẽ amã: “E ota ra Tĩrtũm kot mẽ pakaxyw ãm xwỳnhhta pôj. Kwa mẽ tokyx hwỳr mra ně omu ně hkôt ri apa.” Anhỹr o mẽ amã hêx. Hãmri nhũm mẽ hkwỳjaja tee ri mẽ kuma ně mẽ amã: “Nà tãm kêt. Jar mẽ ixkamã na. E mẽ tokyx amnẽ hwỳr mãn mra ně omu.” Anhỹr o mẽ amã hêx o pa. Nom kêr ka mẽ ama ně ãm mẽ ama ně mẽ hkôt amrar kêt ně.

22-23—E kwa mẽ inhma. Na pa ra ixprĩ hã mẽmoj kot ã amnhĩ nhĩpêx anhỹrja kukamã mẽ amã tanhmã harênh to. Tã kêr ka mẽ axkãm ajamak rom ně ri apa. Koja mẽ kot amnhĩ to hêx xwỳnhjaja axpên pãnhã mẽ awỳr mra ně mẽ amã kêp Tĩrtũm kot mẽ akaxyw ãm xwỳnh ã amnhĩ to hêx. Ně mẽ hkwỳjaja kêp Tĩrtũm nhỹ hã kapêr jarênh xwỳnh ã amnhĩ to hêx. Hãmri ně aa mẽ kot

měmoj pumunh kêt kwỳ ho anhỹr o pa. Te Tĩrtũm nhỹ hã kot ho anhỹr pyràk nom hêx rom mẽ apê Tĩrtũm kot amnhĩm mẽ arênh xwỳnhjê nokupyr kaxyw ã amnhĩ nhĩpêx anhỹr o pa. Anẽ.

Akupỹn Jejus wrỳk xà hã arĩgro jarênh

Matêwre 24.29-31; Rukre 21.25-28; mǎānēn Sikũn Pêtre 3.10; Apokarip 1.7; 19.11-16

24-25Nhũm Jejus arĩ mẽ kãm kapêr nẽ mẽ kãm: —Tã koja mẽ kot amnhĩ xà htỳx kamã hamak xà hã arĩgrota hapêx nhũm Tĩrtũm ã mẽmoj nhĩpêx anẽ. Koja kaxkwa ho àk tỳx nẽ nhũm myyti ahtyk. Nhũm mytwrỳre axte hirã hkêt nẽ. Nhũm kanhêti piitã axrê nẽ rôrôk pa.

26Hãmri pa man akupỹn pika hwỳr wrỳ nhũm mẽ piitã ixwrỳk kãm ixpumu. Kakrã kamã kot paj ixihtỳx o inhĩrã rax kãm akupỹn mẽ awỳr wrỳ.

27Hãmri nẽ ma krĩ piitã hwỳr Tĩrtũm kapêr o mẽ wrỳk xwỳnhjê rẽ nhũm mẽ ma mra nẽ amnepêm ixte amnhĩ kaxyw mẽ axunhwỳr xwỳnh piitã ho akuprô nẽ akupỹn ixwỳr mẽ ho mra. Anẽ.

Jejus kot mẽmo pĩ hpàr ã ejêp jarênh

28Nhũm Jejus arĩ mẽ kãm kapêr nẽ mẽ kãm: —E ka mẽ pĩ hpàr mũj pumu. Na hte mẽmo mytwrỳ hã rã nhũm mẽ omu nẽ ô hkukamã hamaxpêr kurê kumrêx.

29Ja pyrà nẽ koja mẽmoj ã amnhĩ nhĩpêx anhỹr mẽ ka mẽ akupỹn mẽ awỳr ixwrỳk mã ajamaxpêr kurê kumrêx.

30Koja akupỹn ixpôx kêt ri ã mẽ kot mẽmoj kot amnhĩ nhĩpêx anhỹr pumunh xwỳnhjaja kormã piitã htyk par kêt ri pa akupỹn mẽ awỳr wrỳ.

31—Nẽ koja nhỹrmã pika nẽ kaxkwa wa hapêx pa. Tã no ãm ixkapêr koja wa uràk nẽ aa hapêx kêt nẽ. Koja ãm rãhã ho rãhã. Kot paj aa ihkjê ho tanhmã mẽnh to hkêt nẽ. Anẽ.

Mẽ pahte akupỹn Jejus wrỳk xà hã arĩgro pumunh kêt ã mẽ pajarênh

Matêwre 24.36-44; Rukre 12.37-40; mǎānēn Atre 1.9-11; Wam Tesarôn 5.2; Sikũn Pêtre 3

32Nhũm Jejus arĩ mẽ kãm kapêr nẽ mẽ kãm: —Nom akupỹn ixwrỳk xà hã arĩgroja mẽ ate omunh kêt. Nẽ kaxkwa kamã Tĩrtũm kapêr o mẽ wrỳk

xwÿnhjaja kot ja pumunh kêt. Nê pa ixpê Tirtûm Kra htã ijaxwÿja ixte ja hã amnhĩ pumunh kêt. ãm Mẽpahpãm maatija tapxipix kot ja pumunh.

33—Tã mẽ ate akupÿn ixwrÿk xà hã arĩgro pumunh kêt jakamã kwa kêr ka mẽ axkãm ajamak rom nê ri apa. Nê apkati mẽ amnhĩ wÿr ijapêr arĩt rãhã ho ri apa.

34-35—E pa tanhmã mẽ amã akupÿn ixwrÿk xà hã arĩgro jarênh to ka mẽ inhma. Kojã mẽhõ nhÿhÿm nojarêh hãmri nê kãm mẽ àpênh xwÿnhjê mã mẽ àpênh ã karõ nê òrkwÿ jamãr xwÿnh mã tanhmã kãm karõ hto. Hãmri nê òrkwÿ kahê xà jamãr xwÿnh mã kãm: “E kêr ka ixwakre kamã ijapêr arĩt rãhã ho ri apa.” Anê hãmri nê ma nhÿhÿm mō. Tã mẽ kot ijapêr rĩt rãhã ho mẽ pa xwÿnhjaja te kot ixkre kahê xà jamãr xwÿnh kot amnhĩ nhĩpêx pyrãk. Õ patrãwja akupÿn hpôx xà hã arĩgro hã omunh kêt jakamã na hte kahê xà jamãr rãhã ho pa. Kojã apu axpêr kamàt nhũm akupÿn hpôx japêr. Rÿ kôt ã kamàt rÿ krãhyre kà nhũm akupÿn hpôx japêr. Rÿ kwÿhtyk nhũm akupÿn hpôx japêr. Tã urãk nê mẽ ate akupÿn ixwrÿk xà hã arĩgro pumunh kêt jakamã kêr ka mẽ ijamãr rãhã ho ri apa. Jao ixkutêp inhmã tanhmã amnhĩ nhĩpêx to rãhã nê. Ra ixte mẽ amã hã karõ xà hkôt.

36Kop ixkre kahê xà jamãr xwÿnhja tee ri ò patrãw kamã ama hãmri nê ra òtxwa nê htÿx òt o ÿr rôm nhũm haêr pê hwÿr hpôx ronhÿx ja kêp mex kêt nê. Ja pyrã nê kêr ka mẽ ixkutêp ixkôt amnhĩ nhĩpêx rãhã ho ri apa. Nom tee ri amnhĩ wÿr ixkãm ama hãmri nê axte inhmã ajamaxpêr kêt pê atÿx ri tanhmã amnhĩ tomnuj to ho apa hkêt nê.

37—E ixte mẽ amã mẽmoj jarênhja na pa hte ixkwÿjê piitã mẽ kãm harê. Jakamã kwa kêr ka mẽ akupÿn ixwrÿk ã ijapêr arĩt rãhã ho ri apa. Anê. Nhũm pre ã Jejus amnhĩ kukamã mẽ kãm ujarênh anê.

Makre 14

Mẽ kot Jejus pĩr kukamã hamaxpêr ã mẽ harênh

Matêwre 26.1-5; Rukre 22.1-2; Juãw 11.45-53

1Tã nhũm Ijaew hkĩnhã ã arĩgro pê Pas wÿr apkati axkrut. Pas ã na hte mẽ ixpê Ijaewjaja amnepêm Tirtûm kot pika pê Ejit pê mẽ inhĩgêt nê mẽ

ixpãmjê kator mã ijamaxpêr kaxyw axpên wÿr akuprô nê hã ixkĩnh. Na pa htem arĩgroja mã: “Pas” anê. Nê harênh o: “Mê pahte pãw kaxkrit kêt kur ã arĩgro” anê.

²Jakamã nhũm mẽ inhõ patre krãhtũmjê mẽ Tĩrtũm kapêr tũm o mẽ ahkre xwÿnhjaja kãm Jejus pĩr prãm nê. Nom mẽ kãm hkôt kapêr mar o mẽ pa xwÿnhjê pyrna nê. Nê tee ri hã amnhĩ jahkre nê axpên mã: —Hêxta waa nê. Tanhmã kot puj wem ho nê kupĩĩ? Kot puj mẽ pahkĩnh kãm tanhmã ho nhũm mẽ hkĩnh xwÿnhjaja hã mẽ pahpumu nê mẽ pakamã gryk tÿx nê. Pu mẽ hã axpu nê hã tanhmã axpên to. Jakamã kwa pu mẽ kormã tanhmã ho hkêt nê. Anê.

Mêhõ ni kot Jejus krã gregrer ã harênh

Matêwre 26.6-13; Rukre 7.36-50; Juãw 12.1-8

³Rôm nhũm Jejus Simãw nhõrkwyĩ kamã kormã apkur o nhÿ. Krĩ pê Petãn kamã. Simãwja na pre hkà kro xàpêr tÿx o pa nhũm Jejus akupÿn ho mex. Jakamã akupÿm õ krĩ hwÿr pøj nê kutã apkur o nhÿ. Hãmri nhũm mẽhõ nija harênh ma nê mẽ hkuxwa xà hã kàx õ py nê ma hwÿr o tẽ. Nê mẽ hwÿr axà nê nhÿhÿnh kàx kahte nê mẽ hkuxwa xà ho hkrã gregrer pa.

⁴Hãmri nhũm mẽ apkur o hkrĩ xwÿnhjaja tee ri ã kot amnhĩ nhĩpêx anhÿr ã omu nê kamã gryk nê. Nê axpên mã: —Tk. Kwa nà na hã mẽ hkuxwa xàta kapĩr par kumrêx.

⁵Kop apu ma o htêm nê ho wênê nê hpãnhã kàxpore ho rax kumrêx nê hamÿnh nê ho mẽ kêp amrakati xwÿnhjê nhĩpêx par nhÿx ja kãm mex nê. Mo na ri ã amnhĩ nhĩpêx anhÿr kêt nê? Anê nê hã kãm akir.

⁶Hãmri nhũm Jejus mẽ kuma nê mẽ kãm: —Tk. Kwa mẽ kãm axàkjêr kêt nê. ãm hãmri na ã inhĩpêx anê.

⁷Mê kêp amrakati xwÿnhjaja koja mẽ arĩ mẽ akôt pa rãhã nê. Ka mẽ amã mẽmo arĩgro hã mẽ ho ajuta hprãm nê tanhmã mẽ ho ajuta hto nê mẽ kãm mẽmoj gõ. No pa kot paj ri mẽ akôt ixpa ka mẽ ixto mex ry ho apa hkêt nê. Kot paj tokyx mẽ are.

⁸Ixyk nhũm mẽ kot ijaxàr kukamã na ã ixkrã gregrer anẽ. ãm hãmri na ã inhĩpêx anẽ.

⁹ãm hãmri na pa mẽ amã ja jarẽ. Kojã mẽ krĩ piitã hkôt axpẽn mã ixte tanhmã mẽ anê amnhĩ nhĩpêx to hã ijarẽnh o pa nẽ mãănẽn kot ã inhĩpêx anhỹrja mãănẽn harẽnh o pa. Nhũm mẽ piitã kot tanhmã ixto mex to hã harẽnh ma. Anẽ.

Jut Kariot kot mẽ kãm Jejus ã àmnênh kaxyw ã harẽnh

Matêwre 26.14-16; Rukre 22.3-6; Juãw 13.21-30

¹⁰Tã nhũm Jut Kariotja. Jejus kôt mẽ pa ho mẽ pa xwỳnh pê 12 hõ na pre. Tã axtem nẽ Satanasti nhỹ hã ma patre krãhtũmjê hwỳr tẽ nẽ axtem nẽ tanhmã Jejus o mẽ mar to nẽ mẽ kãm: —E ot pa mẽ amã Jejus jarẽnh o tẽ. Xà kot paj mẽ amã hã amỹnê ka mẽ hpãnhã inhmã amnhĩre nà? Anẽ.

¹¹Hãmri nhũm mẽ kuma nẽ hkĩnh nẽ. Hãmri nẽ kãm: —Nà kot paj mẽ amã amnhĩre. Anẽ. Hãmri nhũm mẽ kuma nẽ kato nẽ ma tẽ nẽ Jejus pynênh kaxyw htãnopxar o hkôt ri pa.

Jejus kot ý hã kapêr o mẽ pa xwỳnhjê kutã apkur ã harẽnh

Matêwre 26.17-19; Rukre 22.7-13

¹²Tã nhũm arĩgro pê Pas kato. Amnepêm mẽ inhĩgêjtjaja na prem ôwêhti hkrare hkwỳ pa. Tĩrtũm kot ja hã mẽ omunh nẽ Ejit kãm mẽ kãm mẽ hkurê xwỳnhjê nhĩhkra nê mẽ kator kaxyw na prem ã amnhĩ nhĩpêx anẽ. Jakamã na pa htem arĩ mẽ ixpê mẽ hkanrêhã mẽ htãmnhwỳjaja Pas ã axpẽn wỳr akuprõ nẽ jam ijamaxpêr pê mẽ uràk nẽ ôwêhti hkrare hkwỳ hpa nẽ pãwti kaxkrit kêt kãm kuku. Jakamã nhũm Jejus kôt mẽ pa ho pa xwỳnh pê 12jaja Pas ã mẽ apkur xà hã Jejus kukja nẽ kãm: —Kwa nhỹri kot paj mẽ akutêp Pas ã mẽ panhõ hã apê? Anẽ.

¹³Hãmri nhũm mẽ kuma nẽ ja wa ho axkrut nẽ mẽ amnhĩ kukamã wa kumẽ nẽ wa kãm: —E wa ma Jerujarê hwỳr wa tẽ. Nẽ hwỳr axà nẽ mẽhõ myja pumunh kurê kumrêx. Nhũm amnhĩm gô ru nẽ amnhĩ kre hã poti xãm nẽ o tẽ ka wa omu nẽ hã ajêt nẽ ma òrkwỹ hwỳr hkôt tẽ.

¹⁴Hāmri nē ixkre nhō dōn pumu nē kām: “E Jejus na wa inhmē pa wa awỳr tē. Na awỳr pēr mēnh o: ‘Nhỹri kot paj we ixkōt ri mē pa ho pa xwỳnhjē mē Pas ā axpēn kutā apku?’ Anhỹr o na awỳr pēr mē.”

¹⁵—Wa ā kām akapēr anē kē war ama nē war amā ōrkwỹ nhīmōk ā ixkre rax ō jahkre. Ra kamā kaxyw mē paxàpkur xà hā mēmoj piitāā. Ka wa omu nē māmri kamā mē ixkutēp mē panhō hā apē. Anē.

¹⁶Hāmri nhūm wa kuma nē ma hwỳr tē. Nē krīm axà nē ra kot wa kām mēmoj jarēnh xà hkōt mēmoj piitā omu nē mē kutēp mē kām mēō hā àpēnh o wa xa.

Jejus kot mēhō kot mē kām hā àmnēnh ā harēnh

Matēwre 26.20-25; Rukre 22.21-23; Juāw 13.21-30

¹⁷Tā nhūm kamàtre nhūm Jejus mē hkōt mē pa ho pa xwỳnhjaja wa hkōt mō.

¹⁸Hāmri nē kỳxpē ixkreja wỳr api nē hwỳr agjē nē apkur kaxyw hkrĩ hpa nē kormā apkur o hkrĩ nhūm Jejus mē kām: —E pa mē amā mēmoj jarē ka mē inhma nē amnhĩ krām haxàr tỳx nē. Kot kaj mē ixkutā axàpkur o akrĩ xwỳnhjē hō mē kām ixkurē xwỳnhjē mē ixtā amỹnē. Anē.

¹⁹Hāmri nhūm mē tee ri kuma nē hkaprĩ htỳx nē. Nē axpēn pānhā amnhĩ tā hkukja nē kām: —Kwa xà pa kot paj ā anhĩpēx anē? Nà pa hkēt. Anē.

²⁰Hāmri nhūm mē kām: —Nà mē apē 12jē hō kot kaj ā inhĩpēx anē. Mē ate ixkutā guhkrax kām anhō pāwti ho mry kagō nhek o akrĩ xwỳnhjē hō kot kaj ixtā amỹnē.

²¹Tĩrtũm kapēr ā kagà htũm kot ixkukamā harēnh xà hkōt koja mē tanhmā ixto rax nē ixpĩ. Nom kot mē kām ixtā àmnēnh mē xwỳnhhta hēxta waa nē. Ā kot amnhĩ nhĩpēx anhỹrja mỳrapē koja amnhĩ xà htỳx kām hamak rax kumrēx. Kop apu aa ō māmāj nhōxà hkre rũm kator kēt ronhỹx ja kām mex nē.

²²Anē nē kormā mē apkur o hkrĩ rōm nhūm pāwti hō py nē ho Tĩrtũm wỳ. Hāmri nē mē kām ho hkry nē mē piitā mē kām ōr pa nē mē kām: —E na pa mē amā pāwti ho hkry nē mē amā kugō. Ja pyrà nē koja mē ā inhĩpēx anē

ně te ixto hkry hpar pyrək o inhĩpêx pa amnhĩ xà htỳx kamã ijamak kãm ty. Nom mẽ anê kot paj ty. E mẽ mãmri aku. Anẽ.

23-24Nẽ hpãnhã wĩhti hã kop py nẽ mã ho anẽ nẽ Tĩrtũm mã harẽ. Hãmri nẽ mẽ kãm kugõ nẽ mẽ kãm: —E mẽ kot ixpĩr xà hã arĩgrota ã koja ixkamrô axkapĩ. Nom koja mẽ amarĩ ixpĩr nhũm amarĩ hpikapĩr kêt nẽ. ãm paa. Pa kot paj mẽ anê mẽ ìhkram amnhĩ jaxà nhũm mẽ ã inhĩpêx anẽ. Koja ixkamrô axkapĩ nhũm Tĩrtũm omu nẽ ixkukwak ri mẽ anê mẽ ate amnhĩ tomnuj piitã amnhĩ katut kôt rẽn h pa nẽ mẽ ato hkra. Ra amnepêm kot ja hã amnhĩ jarẽn h xà hkôt. Jakamã e. Mẽ axpẽn pãnhã ixkamrô pikapĩr mã ajamaxpêr pê ixte mẽ amã kop kãm wĩhti nhõrta o akõm o axpẽn nhĩpêx. Anẽ. Nhũm pre ã mẽ kãm amnhĩ jarẽn h anẽ nhũm mẽ piitã ho hkõm o axpẽn nhĩpêx.

25Hãmri nhũm mẽ kãm: —ãm hãmri na pa mẽ amã amnhĩ jarẽ. Kot paj axte wĩhti ho ixkõm kêt rãhã nhỹrmã Inhõ Papaj akupỹn mẽ awỳr inhmẽ. Hãmri pu mẽ rĩ kormã akupỹn ixpõx xà hã arĩgrota ã pahkĩnh nẽ. Nom axtem tanhmã hã pahkĩnh to. Anẽ.

26Nhũm pre ã mẽ kãm kapêr anẽ hãmri nhũm mẽ Tĩrtũm mã mex o mex ã gre hãmri nẽ hapõx pa nẽ ma hixêt pê Oriwêhti hwỳr mra.

Jejus kot Simãw Pêtre hkukamã tanhmã harẽn h to

Matêwre 26.31-35; Rukre 22.31-34; Juãw 13.36-38

27Tã nhũm Jejus hkôt mẽ pa ho pa xwỳnhjê hkukamã tanhmã mẽ kãm ujarẽn h to nẽ mẽ kãm: —E mẽ inhmã. Tĩrtũm kapêr ã kagà htũm kot ã mẽ pajarẽn h kot anhỹr. Kot paj ôwêhti jamãr o pa xwỳnhja pĩ hãmri nhũm ôwêhti hpigràn h pa nẽ ma anhrà nẽ ri mra. Anhỹr o te ixpê ôwêhti jamãr xwỳnh nhũm mẽ apê ôwêhti pyrək ã mẽ pajarẽn h. Tã kot puj mẽ ã amnhĩ nhĩpêx anẽ.

28Mẽ kot ixpĩr tã koja Tĩrtũm akupỹm ixto ixtĩr. Pa akupỹm ixtĩr nẽ ma mẽ akukamã pika pê Garirej wỳr mō. Kamã kot puj mẽ axte axpẽn pumu. Anẽ.

29Hãmri nhũm Simãw Pêtre tee ri mẽ amnhĩ tã kuma nẽ kãm: —Kwa nà. Ri ã mẽ ijarẽn h anhỹr kêt nẽ Pahihti. Kot paj akaga hkêt nẽ. Jajaja koja anhrà nẽ hprõt nẽ ma mrar japêr no pa kot paj anhỹr kêt nẽ. Anẽ.

³⁰Hāmri nhūm kām: —Nà kot kaj anē Simāw Pêtre. Koja apkati hkôt krāhyre hkâr kêt ri ka ra mẽ umaj ate ixkôt apa hkêt ã mẽ kām amnhĩ tã axàprār o axkrunēpxi kām ga. Kwa jam ajamxpēr tỳx nē. Anē.

³¹Hāmri nhūm tee ri amnhĩ tã kuma kām amnhĩ tã àprār kām hihtỳx nē kām: —Tk. Kwa nà. Kot paj ã amnhĩ nhĩpêx anhỳr kêt nē. Koja mẽ tee akôt ixpĩr mã tã no pa ãm aa akaga hkêt kumrêx. Kot paj akôt ixpa ho ixpa rãhã nē. Anē. Hāmri nhūm hkôt mẽ pa ho mẽ pa xwỳnh kwỳjê piitã ã kām amnhĩ jarēnh anē.

Jejus kot Tĩrtũm mã amnhĩ jarēnh

Matêwre 26.36-46; Rukre 22.39-46

³²Tã nhūm Jejus ma nhỹri mẽ kot kām “Gesēm” anhỳr xwỳnhja wỳr hkôt mẽ pa ho pa xwỳnhjê ho mō. Hāmri nē mẽ kām: —E mẽ jar ixkutêp akrĩ. Pa ma mĩtũm tẽ nē Tĩrtũm mã amnhĩ jarē mãn. Anē.

³³Hāmri nē amnhĩ kôt mẽ ho axkrunēpxi nē mẽ o mō. Simāw Pêtre mẽ Jepetew kra pijakrut pê Xiakre nē Juāwja nhūm amnhĩ kôt mẽ o mō.

³⁴Hāmri nē amnhĩ kukamã mẽ kām hkurê xwỳnhjaja kot tanhmã hipêx tota kukamã hamxpēr o ra amnhĩ kamã kahak tỳx o ra hkaprĩ nē. Hāmri nē hkôt mẽ mrar xwỳnhjê mã kām: —Hêxta waa nē. Na pa tee ri amnhĩ xà htỳx kamã ijamakja kukamã ijamxpēr nē amnhĩ kamã ixkahak tỳx o ixkaprĩ nē. Te ra ixkaprĩja kot ixpĩr o mōr pyræk. Jakamã e mẽ jar anohtỳx nē ixto Tĩrtũm wỳr o akrĩ kê tanhmã ixto pa mẽ kot tanhmã ixtoja kutã ixihtỳx nē. Anē.

³⁵Hāmri nē mẽ kurũm htēm grire nē amnhĩ kamã kahak o Tĩrtũm mã amnhĩ jarēnh kaxyw htu mỳr pê htēm nē pikap nõ nē kām:

³⁶—Kwa Papaj. Hêxta waa nē. Inhmã amnhĩ xà htỳx kām ijamak prãm kêt kumrêx. Na pa tee ri amnhĩ kukamã ijamxpēr nē amnhĩ kamã ixkahak tỳx nē. Jakamã kot kaj amã inhnê ja ho ajapêx prãm nē mãmri ho ajapêx nhūm mẽ kām ixkurê xwỳnhjaja tanhmã ixto hkêt nē. Rỳ ko. Kot kaj amã mẽ kot tanhmã ixto hprãm kê mẽ mãmri tanhmã inhĩpêx to. Nom pam inhmã hprãm xà hkôt kêt.

³⁷Anhÿr o Tirtũm mã amnhĩ jarẽ hãmri nẽ kànhmã xa nẽ akupÿm Simãw Pêtreja mẽ hwÿr tẽ nẽ mẽ omu nhũm mẽ ra htÿx gõr nẽ hikwÿ. Hãmri nhũm tee ri mẽ omu nẽ Simãw Pêtre mã kãm: —Kwa Simãw Pêtre. E mẽ hãmri akrã hapôj. Kwa wem anohtÿx grire nẽ ixkutêp amnhĩ to Inhõ Papaj wÿr o akrĩ

³⁸kê mẽ ixkõt tanhmã mẽ ato htã ka mẽ amã mẽ uma xàj ixkaga hkêt nẽ arĩ mẽ kutã amnhĩ to htÿx nẽ akuhê. ã mẽ amã mẽ ate amnhĩ nhĩpêx anhÿr prãm nom kormã mẽ amã maa. Anẽ.

³⁹Hãmri nẽ akupÿm tẽ nẽ axte Tirtũm mã tanhmã amnhĩ jarẽnh to.

⁴⁰Nẽ akupÿm mẽ hwÿr tẽ nẽ mẽ omu nhũm mẽ axte ôt pa nẽ hikwÿ. Nhũm tẽ nẽ tee ri mẽ omu hãmri nẽ tanhmã mẽ kãm nẽ hkêt nẽ. ãm awjanã nẽ ma akupÿm tẽ nẽ axte Tirtũm mã amnhĩ jarẽ.

⁴¹⁻⁴²Hãmri nẽ akupÿm mẽ hwÿr tẽ nẽ mẽ kãm: —Kwa xàn ka mẽ arĩ gõr nẽ anhĩkwÿ? E mẽ tokyx akrã hapôj. Na mẽ ra ixwÿr mrar nẽ kot ixpynênh mã. Koja mẽ tokyx ixkutã mẽ kot amnhĩ xunhwÿr xwÿnhjaja mẽ kãm ixtã amÿnê. Ota ra kot ixtã mẽ kãm àmnênh xwÿnhhta tẽ. E mẽ tokyx kànhmã akrĩ pu mẽ kutã mra. Anẽ.

Mẽ kot Jejus pynênh ã mẽ harênh

Matêwre 26.47-56; Rukre 22.47-53; Juãw 18.1-11

⁴³Nhũm Jejus kormã mẽ kãm kapêr o ãm rãhã nhũm Jut Kariotja tẽ. Mẽ hkõt mẽ pa ho mẽ pa xwÿnhjê hõ htã nhũm ra amnhĩ kõt mẽ ohtô nẽ Jejus wÿr mẽ o tẽ nhũm mẽ wapohti nẽ kô jamÿ nẽ hkõt o mra. Patre krãhtũm mẽ Ijaew krãhtũmjê mẽ Tirtũm kapêr tũm o mẽ ahkre xwÿnhjaja ra Jut kõt mẽ kurẽ nhũm mẽ man hkõt Jejusja wÿr mra.

⁴⁴Na pre ra Jut Kariotja mẽ kãm tanhmã amnhĩ jarẽnh to nẽ mẽ kãm: —E kot paj nhÿri mẽ pahte unênh mã xwÿnhhta pumu nẽ hwÿr tẽ nẽ kahti hkõt kumÿ nẽ tanhmã kãm ixkapêr to. Ka mẽ ixpumu nẽ hwÿr tẽ nẽ unê nẽ ma akupÿm o tẽ. Anẽ hãmri nẽ ma hwÿr mẽ o tẽ.

⁴⁵Nẽ Jejusja pumu nẽ hwÿr tẽ nẽ kãm: “Pa mẽ ijahkre xwÿnh.” Anẽ hãmri nẽ kahti hkõt kumÿ.

⁴⁶Hāmri nhūm hkôt mẽ mrar xwỳnhjaja omu nẽ Jejus wỳr mra nẽ unênh kurê kumrêx.

⁴⁷Hāmri nhūm Jejus kôt mẽ pa ho mẽ pa xwỳnhjaja tee ri ja hã mẽ omu nhūm hõja õ wapo kapa nẽ patre maati mã àpênh xwỳnh kot mẽ hkôt htẽm xwỳnhhta mã wapo ho apê. Nẽ kot ho hkrã nhĩpônẽ mã tã kuhpaw nẽ upôk rūm hamak nhĩkjê krãhta.

⁴⁸⁻⁴⁹Hāmri nhūm Jejus amnhĩ tã mẽ kot unênh xwỳnhjê mã kãm: —Kwa na pa pre apkati mẽ Tĩrtũm mã amnhĩ jarênh xà hã ixkre kamã mẽ kãm ixujarênh o ixpa ka prem tokyx ixpynênh kêt nẽ. Tã jarãhã te ixte amnhĩ tomnuj xwỳnh pyrà nẽ ixwỳr wapohti nẽ kô hã akapẽn nẽ ixwỳr atẽm rax nẽ. Nom ra mẽ ate tanhmã ixto kaxyw arĩgro kator jakamã mẽ mãmri tanhmã amã ixto hprãm xà hkôt tanhmã ixto. Tĩrtũm kapêr ã kagà htũm kot mẽ akukamã ã mẽ ate inhĩpêx anhỹr ã mẽ ajarênh xà hkôt. Anẽ.

⁵⁰Hāmri nhūm hkôt mẽ pa ho mẽ pa xwỳnhjaja tee ri mẽ kot unênh ã mẽ omu hãmri nẽ mẽ umaj Jejus kaga nẽ ma hprôt pa nhūm ahte mẽ kuri xa.

⁵¹⁻⁵²Hāmri nhūm mẽ ma o tẽ. Nhūm kormã mẽhõ nyw xwỳnhja tee ri ja hã mẽ omu nẽ ma Jejus kôt tẽ. Nhūm mẽ amnhĩ kôt omu nẽ kot unênh kaxyw kahty xà hã kupy nhūm mẽ umaj mẽ ãhkra kamã kahty xàja re nẽ ma hkênh nẽ hprôt nẽ tẽn akunok.

Ijaew nhõ patre maati kot Jejus kukjêr ã harênh

Matêwre 26.57-68; Rukre 22.63-71; Juãw 18.12-14; 18.19-24

⁵³Tã nhūm mẽ ma mẽ õ patre maati nhõrkwỹ hwỳr Jejus o tẽ. Hãmri nhūm patre krãhtũmjê mẽ Ijaew krãhtũmjê mẽ Tĩrtũm kapêr tũm o mẽ ahkre xwỳnhjaja õrkwỹ hwỳr Jejus ã akuprõ.

⁵⁴Hāmri nhūm Simãw Pêtre mẽ hkôt tẽ nẽ mẽ hkôt patre maati nhõ kĩtare hwỳr axà nẽ amỹm hã mẽ omunh o xa. Nhūm ra pôristijaja kĩtare kamã amnhĩm kuto nẽ hã ànhunh o hkrĩ nhūm mẽ hwỳr tẽ nẽ mẽ ãhkô hã ànhunh o nhỹ.

⁵⁵⁻⁵⁶Rôm nhūm ixkre kamã mẽ pikuprõnh xwỳnhjaja tee ri Jejus ã krĩ nhõ xwỳnhjê kukja nẽ mẽ kãm: —E mẽ atõ na ka pre Jejus kot tanhmã amnhĩ

tomnuj to hã omu? Mẽ atõ mẽ inhmã harẽ pa mẽ ama nẽ Rõm nhõ xwỳnhjê nhĩhkram haxà kê mẽ pamã kupĩ. Anẽ. Hãmri nhũm mẽ axpẽn pãnhã tanhmã harẽnh to. Tanhmã kot amnhĩ tomnuj to hã harẽnh to htã nom ri ho hêx jakamã axpẽn kwỳm ri tanhmã ri harẽnh to nhũm mẽ tee ri mẽ kuma nẽ mẽ kãm: —Tk. Kwa mẽ axpẽn kwỳm ri tanhmã harẽnh to hkêtnẽ. Axpẽn kôt mãn ri tanhmã mẽ inhmã harẽnh to. Anẽ.

⁵⁷Hãmri nhũm mẽ hkwỳjaja kànhmã kuhê nẽ axpẽn kôt tanhmã ho hêx to nẽ mẽ kãm:

⁵⁸—Nà kot paj mẽ amã tanhmã kot amnhĩ nhĩpêx to hã harẽ. Na pa prem ã kapêr anhỹr ã kuma. Na pre tanhmã Tĩrtũm mã amnhĩ jarẽnh xà hã ixkreta jarẽnh to nẽ harẽnh o: “Kot paj ixkreja grành pa hãmri nẽ ixtã apkati axkrunêpxi nẽ akupỹm hipêx. Nom kot paj amnhĩ nhĩhkra ho hipêx kêt nẽ.” Anhỹr ã ã amnhĩ jarẽnh anẽ pa mẽ kuma.

⁵⁹Anhỹr o harẽnh tã nom axpẽn kôt harẽnh kêt nẽ. Arĩ axpẽn kwỳm ri harẽ.

⁶⁰Hãmri nhũm mẽõ patre maati tee ri mẽ kot tanhmã ho kapêr toja ma nẽ mẽ aptàr tũmjê noo mã kànhmã xa nẽ Jejus mã kãm: —E na ka ra mẽ kot ã ajarẽnh anhỹrja ma. Xà kot kaj tanhmã mẽ inhmã amnhĩ tã axàprãr to hkêtnẽ? Xà ãm hãmri na mẽ ajarẽ? E kwa mẽ inhmã tanhmã amnhĩ jarẽnh to. Anẽ.

⁶¹No nhũm akryk xa nẽ tanhmã kãm nẽ hkêtnẽ. Hãmri nhũm tee ri ã kot amnhĩ nhĩpêx anhỹr ã omu nẽ axte kãm: —Kwa mẽ inhmã amnhĩ jarẽ. Xà apê Tĩrtũm Kra na ka? Xà ka na apê Tĩrtũm kot mẽ ixwỳr amẽnh xwỳnh na ka? Anẽ.

⁶²Hãmri nhũm tã kãm amnhĩ jarẽ nẽ kãm: —Tỳ. Ixpê tãmta na pa. Ra mẽ ate jarãhã tanhmã ijarẽnh to kaxyw apikuprõnh tã nom kot paj nhỹrmã mẽ kamjaja tanhmã mẽ ajarẽnh to ka mẽ amnhĩ tã ixpumu. Kot kaj mẽ Tĩrtũm kot mẽ ato amnhĩptàr xà kutã akrĩ hãmri pa hwỳr tẽ nẽ ãhkô hã nhỹ. Kakra kamã kot paj hwỳr tẽ nẽ ãhkô hã nhỹ hãmri nẽ ã hã tanhmã mẽ ajarẽnh to ka mẽ amnhĩ tã ixpumu. Anẽ.

63-64Hāmri nhũm tee ri ã kot amnhĩ jarēnh anhỹrja ã kuma nẽ gryk xàj amnhĩ xê kaxô nẽ mẽ àptàr tũmjê mã kãm: —Kwa mo kaxyw kot puj mẽ axte ri ho tanhmã kot amnhĩ tomnuj to hã harēnh xwỳnhjê hõ japêr? Ra tãm kot amnhĩ pê Tĩrtũm Kra hã amnhĩ to hêx nhũm mẽ pahte pajamak o mar kênã. E tanhmã kot puj mẽ ho? Anẽ. Hāmri nhũm mẽ kãm: —Nà kot puj mẽ kupĩ. Ra htyk mã tãm kênã. E kwa tokyx pu mẽ ma Rôm nhõ pahшти hwỳr o tẽ kê mẽ pamã hã amỹnê kê mẽ kupĩ. Anẽ.

65Hāmri nhũm mẽ hipêx kati rax nẽ. Nẽ hkuk kuhtô nẽ hpãnhã no hpro nẽ htak nẽ kãm: —E mẽ kot atak xwỳnhjê nhĩxi jarẽ. Apê Tĩrtũm Kra hã ate amnhĩ jarēnh jakamã mãn urak nẽ axàhpumunh tỳx. Jakamã e mẽ hixi jarẽ. Anẽ. Nhũm prem ã hipêx anẽ hāmri nẽ pōristijê nhĩhkram haxà nhũm mẽ htak rax o kuhê.

Simãw Pêtre kot Jejus kôt pa hkêt ã kot amnhĩ jarēnh

Matêwre 26.60-75; Rukre 22.54-62; Juãw 18.15-18; 18.25-27

66-67Rôm nhũm Simãw Pêtre arĩ kĩtare kamã mẽ ãhkô hã ànhunh o nhỹ. Hāmri nhũm mẽõ patre maati mã àpênh xwỳnh nitita mẽ hwỳr kato nẽ xa. Hāmri nẽ hirã kamã hprĩ hã Simãw Pêtre pumu nẽ omunh mex kurê kumrêx nẽ kãm: —Xê pêr apê Najare nhõ xwỳnh Jejus kôt mẽ pa ho mẽ pa xwỳnhjê hõ na ka. Anẽ.

68Hāmri nhũm tee ri kuma nẽ ra kãm ma nẽ. Nẽ kãm amnhĩ tã aprã nẽ kãm: —Tk. Kokỹ. Ixte mēhõ my ata pumunhre hã. Anẽ. Hāmri nẽ kànhmã xa nẽ ma tẽ nẽ kĩtare hwỳr kahê hkôt ã mẽ hkàx ã ahte xa nhũm krãhyre kà.

69Nẽ gaa nhũm hpãnhã mẽ kãm àpênh xwỳnhjê hõja omu nẽ hã mẽ kãm: —Xê ma ãm hāmri na harẽ. Kôt ri mẽ pa xwỳnhjê hõ na pêr. Anẽ.

70Hāmri nhũm amnhĩ tã kuma nẽ kãm: —Tk. Kwa nà. Mẽ ri ã amnhĩ krã hkôt ri ixto axêx anhỹr kêt nẽ. Aa ixte mēhõ ata pumunh kêt kumrêx. Anẽ. Hāmri nhũm mẽ hkwỳja gaa nẽ kê axte hprĩ hã omu nẽ kãm: —Kwa ãm hāmri na mẽ ajarẽ. Apê Jejus hkwỳ na ka. Ajaxwỳja apê Garirej nhõ xwỳnh kênã. Anẽ.

⁷¹Hāmri nhūm tee ri mẽ kuma nẽ kām ma htỳx nẽ. Hāmri nẽ mẽ kām: — Kwa nà. Na pa Tĩrtũm noo mã mẽ amã amnhĩ jarẽ. Kot paj amnhĩ to ixêx japêr nhūm inhma nẽ hã tanhmã ixto. Nà uràn ixpê Garirej nhõ xwỳnhre hã. Ixte mẽhõ mũj pumunh kêt kumrêx tã ka mẽ xatã axpẽn kôt ixte hkôt ixpa ho ixpa xwỳnh ã ixkamnhĩx o xa. Anhỹr o ra mẽ kām amnhĩ tã aprãr o axkrunêpxi.

⁷²Hāmri nhūm axte krãhyre kà. Jao ra hkàr o axkrut. Hāmri nhūm Simãw Pêtre kuma nẽ Jejus kot ra hkukamã ã amnhĩ nhĩpêx anhỹr ã harênhja mã hamaxpêr kurê kumrêx. Krãhyre kormã hkàr o axkrut kêt ri kot mẽ kām amnhĩ tã aprãr o axkrunêpxi hã harênhja mã hamaxpêr. Hāmri nẽ ra kànhmã hakry hpar o tẽ nẽ hkaprĩ htỳx kumrêx. Hāmri nẽ tee ri amnhĩ kukamã hamaxpêr nẽ amnhĩ mã: —Hêxta waa nẽ. ãm hāmri na pre Jejus ijarẽ. Tã pa kot ijarênh xà hkôt ã amnhĩ nhĩpêx anẽ. Kwa mo na pa axtem nẽ ã mẽ kām amnhĩ to ixêx anẽ? Anẽ hāmri nẽ hkaprĩ xàj mỳr rax nẽ.

Makre 15

Pirat kot Jejus kukjêr ã harênh

Matêwre 27.1-2; 27.11-14; Rukre 23.1-5; Juãw 18.28-38

¹Tã nhūm myt kato nhūm mẽ axte Jejus ã axpẽn wỳr akuprõ. Patre krãhtũmjê mẽ Ijaew krãhtũmjê mẽ Tĩrtũm kapêr tũm o mẽ ahkre xwỳnhjê mẽ Ijaew nhõ juistijaja nhūm mẽ piitã hã akuprõ. Hāmri nẽ pôristi mã anẽ nhūm mẽ Jejus pa hpre nhūm mẽ ma Rõm nhõ xwỳnhjê nhõ pahi Pirat wỳr o tẽ. Piratja na pre hte Rõm nhõ xwỳnhjê nhõ pahi Sesti nhỹ hã Ijaew o amnhĩptàr o pa nhūm prem ma hwỳr o tẽ.

²Hāmri nẽ kutã ãm nẽ tanhmã kām harênh to nẽ kām: —E ot pa mẽ awỳr jahti ho tẽ. Na hte mẽ inhmã hêx rũnh o pa. Mẽ ixte Pahihti Sesti kapêr kwỳm ri amnhĩ nhĩpêx prãm xàj tanhmã mẽ inhmã hêx to. Nẽ axtem nẽ mẽ ixte Sesti mã kàxpore hkwỳ nhõr kêt ã mẽ inhmã karõ. Nẽ Tĩrtũm kot mẽ ixkaxyw kêp mẽ inhõ pahi hã ãm ã amnhĩ jarênh o pa. Na hte ã mẽ inhmã amnhĩ to hêx anhỹr o pa. Anẽ. Hāmri nhūm Pirat mẽ kuma nẽ Jejus pumu nẽ tanhmã hkukjêr to nẽ kām: —E inhmã amnhĩ jarẽ. Xà ãm hāmri na mẽ ã

ajarēnh anē nà? Xà apê Ijaew nhõ pahi na ka? Xà ka na htem amnhĩ wỳr akãm hamak o pa? Anē. Hãmri nhũm kãm: —Tỳ. Nà ãm hãmri na ka ã ijarēnh anē. Anē.

³Hãmri nhũm patre krãhtũmjaja tanhmã kãm ho kapēr to.

⁴Nhũm mẽ kuma nẽ axte hkukja nẽ kãm: —Kwa na mẽ ã ajarēnh anē ka mẽ ama nẽ ãm mẽ ama nẽ inhmã tanhmã amnhĩ tã axàprār to hkêt nẽ. Anē.

⁵Nom nhũm Jejus ãm akryk xa nẽ tanhmã axte kãm nẽ hkêt nẽ. Jakamã nhũm Pirat tee ri omunh pê hamaxpēr o nhỹ.

Pirat kot Jejus pĩr ã àmnēnh ã harēnh

Matêwre 27.15-26; Rukre 23.13-25; Juãw 18.39–19.16

⁶Na pre hte pahi Pirat arĩgro pê Pasja ã Ijaewjaja kãm hprãm xà hkôt mẽ hagjēnh xwỳnhjê ho hpỳnh nẽ mẽ kãm ure.

⁷⁻¹⁰Jakamã nhũm Ijaew kwỳjaja hwỳr mra nẽ kãm: —Pa. Kwa xà kot kaj jarãhã mẽ inhmã mẽ hagjēnh xwỳnhjê hõ mã anhũre nà? Anē. Hãmri nhũm mẽ kuma nẽ hamaxpēr o: —E paj Jejus ã mẽ kuma nẽ kãm inhũre. Mẽ piitã mẽ kãm kapēr mar prãm nhũm mẽõ patre krãhtũmjaja pix kot mẽ hkôt kamã gryk nẽ ã ixwỳr o mrar anhỹr kênã. Anē. Hãmri nẽ mẽ kãm: —Tỳ. Nà kot paj mẽ amã hõm inhũre. Kwa xà kot pa mẽ amã mẽ anhõ “pahihti” jarēnhja mã inhũre nà? Anē.

¹¹Hãmri nhũm patre krãhtũmjaja tee ri kuma nẽ mẽ kãm: —Kwa mẽ kãm anē kê Parapas mã mãn ure. Anē. Hãmri nhũm mẽ kuma nẽ Pirat mã kãm: —Nà Jejus mã anhũrer kêt nẽ. Parapas mã mãn anhũre. Anē.

¹²Hãmri nhũm mẽ kãm: —No mẽ ate mẽ anhõ pahi hã harēnh xwỳnhhta? Tanhmã kot paj ho? Anē.

¹³Hãmri nhũm mẽ àmra kamã kãm hã amỳnê nẽ kãm: —Kwa pĩ kahpa hã anhõ kê ty. Anē.

¹⁴Hãmri nhũm tee ri mẽ kuma nẽ mẽ kãm: —Tk. Kwa nà. Tanhmã kot amnhĩ tomnuj tore hã kot pa ã hipêx anē. Anhỹr tã nhũm mẽ xatã anhĩpê kãm

kapër kãm hihtỳx nẽ kãm: —Kwa pĩ kahpa hã mãn anhô kê ty. Tokyx ã mẽ inhmã hipêx anẽ. Anhỳr o kuhê. Kàx pê kãm anhỳr o kuhê.

¹⁵Nhũm tee ri mẽ kuma hãmri nẽ mẽ kãm hprãm xà hkôt mẽ kãm Parapas mã ure. Nẽ pôristi hkwỳjê mã Jesus ã amỳnê nẽ mẽ kãm: —Tôe. Mẽ mamrĩ hwỳr tẽ nẽ htak hãmri nẽ kapôt ã mẽ hpar xà hã pika hwỳr o tẽ nẽ pĩ kahpa hã anhô. Anẽ.

Mẽ kot Jesus tak ã mẽ harênh

Matêwre 27.27-32; Juãw 19.2-3

¹⁶Tã nhũm pôristijaja akupỹm ixkreja wỳr Jesus o axà nẽ amnhĩ wỳr hkwỳjê hã karõ nhũm mẽ hwỳr agjê nẽ Jesus ã akuprõ.

¹⁷Hãmri nẽ kêp pahi hã hpêr o pikênh kaxyw kãm pahi hã mẽ ahkà nhĩpêx nẽ hkrãm haxà. Nom axtem nẽ akunĩ kamã mẽmo mrô nhĩ te kot ronh kanêre pyræk xwỳnhja nhũm mẽ kãm hikãx nẽ hkrãm haxà. Hãmri nẽ kêp ê kapa nẽ pahi hã mẽ ê kamrêk õ py nẽ kãm haxà.

¹⁸Hãmri nẽ kãm: —E apê Ijaewjê nhõ pahi na ka. Anẽ.

¹⁹Hãmri nẽ xatã axpên pãnhã hwỳr mra nẽ pĩ ho hkrãx pê htak nẽ hkuk kuhtô nẽ hã hpêr o pikênh pê hã hpijaàm pyrà nẽ kutã hkõn krã ho hkrĩ.

²⁰Hãmri nẽ kêp pahi xê kapa nẽ akupỹm kãm ê jaxà nẽ pĩ kahpa hã nhôr kaxyw ma o kato nẽ o tẽ.

²¹Nom nhũm ra hirot tỳx nẽ nhũm mẽ tee ri omu hãmri nẽ mẽhõ kot ho ajuta kaxyw mẽ kot hkôt omunh o mõi xwỳnhjê kapi ho xa. Hãmri nẽ Sirên nhõ xwỳnh Simãw hkà htykreja pumu. Aresãn mẽ Rupti wa hipêxà na pre. Nhũm htỳx hamakêtkati nẽ mẽ kutã krĩm tẽ. Hãmri nhũm mẽ haê nẽ unê nẽ kãm Jesus o ajuta kaxyw hã karõ nhũm kãm pĩ kahpaja mỳ nẽ mẽ hkôt o tẽ.

Mẽ kot pĩ kahpa hã Jesus nhôr ã mẽ harênh

Matêwre 27.33-44; Rukre 23.33-43; Juãw 19.17-27

²²Nhũm mẽ ra kên nhĩxêt te kot mẽ hkrã hi pyræk xwỳnhja wỳr Jesus o pøj. Mẽ kot kãm “Korkot” anhỳr xwỳnhja wỳr. Mẽ pakapêr kãm na htem Korkotja jarênh o: “Mẽ hkrã hi xà” anẽ. Jakamã nhũm mẽ ra hwỳr o pøj.

²³Hāmri nē kot pī kahpa hā nhôr kaxyw wīhti hkwỳ ho mẽ mẽmo mẽhkanexà pē mīra ho ahkà. Kot ho kôm nē amnhĩ xà htỳx kām hamak kêt kaxyw hipêx nē kām kugō nom nhũm hkaga nē ho hkôm kêt nē.

²⁴⁻²⁶Hāmri nhũm myt kaxkwa nhĩpôk wỳr tē nhũm mẽ pī kahpata ã Jejus xi nē prek o ãhkra ho htỳx nē hpar o htỳx. Nē hpãnhã kaxyw kakwỳ nē kànhmã pī kahpa jarĩ nē kre kamã ãm nē hity hpa. Nhũm Jejus kỳx pē amnhĩ xà htỳx kumrêx kamã hamak o ajêt. Nhũm pôristi hōja tē nē tapti hō py nē hã kagà ho: IJAEWJÊ NHÕ PAHI NA JA Hāmri nē Jejus wỳr ho api nē mỳ ri kunhō. Hāmri nhũm hparpê pôristi hkwỳja axpên mã ê hkwỳ ho hpigrành kaxyw hã kênre ho jôka ho hkrĩ.

²⁷⁻²⁸Tã nhũm mẽ wa kot amnhĩ tomnuj xwỳnh wa ho axkrut nē mã wa ho anē nē. Nē pī kahpa hã prek o wa ãhkra ho htỳx nē wa hpar o htỳx hāmri nē akutã ho Jejus nhĩjê nhũm wa ajêt.

²⁹Hāmri nhũm mẽ kot omunh mã mrar xwỳnhjaja Jejus pumu nē hã hpêr o pikênh punuj nē hkrã ho apê nē kãm: —Kwa na ka pre ate Tĩrtũm mã amnhĩ jarênh xà hã ixkre grành par nē atã apkati axkrunêpxi nē akupỳm hipêx par ã amnhĩ jarênh o apa. Nē axàhpumunh o axàhpumunh ã amnhĩ jarênh o apa.

³⁰Jakamã e kwa amnhĩ kapa nē wrỳ pa mẽ ja hã apumu. E kwa tokyx. Anē.

³¹Nē patre krãhtũmjê mẽ Tĩrtũm kapêr tũm o mẽ ahkre xwỳnhjaja piitã hwỳr mra nē hã hpêr o pikênh o kuhê. Nē axpên mã kapêr o: —E jahti na xep pre mẽ kamã ukaprĩ ho pa nē tanhmã mẽ ho ajuta hto ho pa. Tã tãm tanhmã amnhĩ to nē wrỳk kêt nē.

³²Kwa pu mẽ arĩ pakuhê nē kot amnhĩ kaxàr nē wrỳk kãm omu. Kojã wrỳ pu mẽ omu nē kêp mẽ panhō pahĩti hã hkôt pajamaxpêr kurê kumrêx. E tokyx wrỳ Jejus pa mẽ awrỳk kãm apumu. Nà kot kaj awrỳk rax nē. Anē. Hāmri nhũm akutã wa kot hijê nē jêt xwỳnh wa haxwỳja kãm kapêr punuj o ajêt.

Jejus htyk ã harênh

Matêwre 27.45-46; Rukre 23.44-49; Juãw 19.28-30

³³Tã nhũm ra kaxkwa nhĩpôk ri myt nhỹr mẽ nhũm te kamàt pyràk. Nhũm kamàt kô rax kumrẽx o ra hã awry mẽ nhũm akupỹm myt katêr o mỗ.

³⁴Hãmri nhũm Jejus àmra kamã Tĩrtũm mã kapêr nẽ kãm: —Inhõ Tĩrtũm inhõ Tĩrtũm. Kwa mon ka ixkaga? Anẽ. Nom kapêr kãm kapêr o: —Eri Eri rãmã sapatani. Anẽ.

³⁵Hãmri nhũm mẽ kot mar o kuhê xwỳnhjaja kot Eri hã harênh ma nẽ htỳx ho finat Eris mã kapêr ã hkamnhĩx.

³⁶Hãmri nhũm ja hprôt nẽ mẽmo rereeti py nẽ pĩ ho hkanhwỳ nẽ o tẽ nẽ ho wĩhti nhek nẽ Jejus wỳr o tẽ nẽ kot hkaôr kaxyw kãm kupê. Hãmri nẽ hkwyjê mã kãm: —E hãmri pu mẽ jar hkàx ã pakuhê nẽ Eris jamã măn. Koja kuma nẽ hwỳr tẽ nẽ o wrỳ nà? Anẽ.

³⁷Nom nhũm Jejus ra htyk kaxyw nẽ àmra htỳx nẽ ty.

³⁸Hãmri nhũm Tĩrtũm mã amnhĩ jarênh xà hã ixkre kamã hakwakre hã kupêxêja axkjê nẽ amnhĩ kahê xà mẽnh kurê kumrẽx. Utĩ rax tã kỳj rũm ahpar mã axkjê nẽ amnhĩ kahê xà mẽ. Te Jejus htyk o mẽ pahte hkôt amnhĩ xunhwỳr xwỳnhjê mã Tĩrtũm wỳr pry jakwa kre kahê xà mẽnh pyràk o ã amnhĩ kaxônh anẽ.

³⁹Nhũm pôristi krãhtũmjê hõja Jejus parpê kutã htyk kãm omunh o xa. Hãmri nẽ tee ri omu nẽ hamaxpêr o: —Hêxta waa nẽ. ãm hãmri na pre hte kêp Tĩrtũm Kra hã amnhĩ jarênh o pa. Tã pa mẽ amarĩ kupĩ. Anẽ.

⁴⁰⁻⁴¹Rôm nhũm mẽni kwỳjaja amỳm htyk kãm omunh o kuhê. Na pre htem Garirej kamã Jejus mẽ hkôt mẽ pa ho mẽ pa xwỳnhjê mã mẽ apkur xà hã àpênh o mẽ hkôt pa nẽ mẽ hkôt Jerujarê hwỳr mỗ. Marir Matarênh nẽ Xiakre mẽ Jojes wa katorxà Marirja. Nẽ Sarome. Nẽ mãănênh mẽni hkwyjaja nhũm mẽ amỳm Jejus htyk kãm omunh o kuhê.

Mẽ kot Jejus jaxàr ã harênh

Matêwre 27.57-61; Rukre 23.50-56; Juãw 19.38-42

⁴²Nhũm prem arĩgro pē sēsta hã Jejus pĩ nhũm ra amỹkry htỳx nē. Sap kukamã na pre htem Ijaewjaja amnhĩm apkur xà hã mẽõ nhĩpêx pa nhũm sap kato nhũm mẽmoj to anhỹr kêt nē.

⁴³Jakamã nhũm Juje hõ pē Arimatej nhõ xwỳnhja. Kêp Ijaewjê nhõ juisti hõ na pre. Nhũm mẽ piitã kãm hkĩnh nē axpẽn mã mex o mex ã harēnh o pa. Na pre Tĩrtũm kot mẽ pahwỳr Jejus mēnh kôt hamaxpēr o pa. Tã Jejus htyk ã omu hãmri nē hamaxpēr o: —E pa ma pahi Pirat wỳr tē nē Jejus nhĩ hã kuwỳ. Inhmã uma htã kot paj ma hwỳr tē nē hã kuwỳ kê inhmã kugõ pa ma o tē nē tokyx haxà. Kot paj ho anhỹr tokyx anhỹr kêt nhũm mẽ panhõ arĩgromnu pē sapja wỳr ra myt axà hãmri pa haxàr kêt nē. Anhỹr o hamaxpēr nē ma Pirat wỳr tē nē hã kuwỳ.

⁴⁴Hãmri nhũm amnhĩ jaêr pē ra htyk ã harēnh ma nē amnhĩ wỳr pōristi krãhtũmjê hõ hã karõ nē hã hkukja nē kãm: —Kwa xà na ra Jejus ty? Anē. Hãmri nhũm kãm: —Tỳ na ra ty. Anē.

⁴⁵Hãmri nhũm kuma nē Juje mã kãm: —Tôe. Mamrĩ ma o tē nē haxà. Anē.

⁴⁶Hãmri nhũm kuma nē akupỹm Jejus wỳr tē nē pōristi mã anē nhũm mẽ kãm ho wrỳ. Nhũm kumỳ nē kupêxê ho hkupu hpa nē o tē nē kēn kre kakwỳnh kãm haxà. Hãmri nē kēn rax o hitom mex nē ma akupỹm krĩm tē.

⁴⁷Nhũm Marir Matarēn mẽ Juje katorxà Marir òja wa ma hkôt tē nē kot haxàr kãm omunh o xa. Kot mẽ hkuxwa xà ho gregrer kêt rãhã haxàr kãm omu.

Makre 16

Jejus akupỹm htĩr ã harēnh

Matêwre 28.1-10; Rukre 24.1-12; Juãw 20.1-10

¹⁻²Tã nhũm apkati. Nom nhũm ra mẽ inhõ arĩgromnu pē sap kator jakamã nhũm mẽ kormã akupỹm kēnkreta wỳr mrrar kêt nē. Hãmri arĩgro mex jamãr pē kôkôt o hkrĩ. Hãmri nhũm axte apkati nhũm tômĩk nhũm ra mẽ inhõ arĩgromnu hapêx nhũm Marir Matarēn mẽ Sarome mẽ Xiakre katorxà Marirja mẽ ma akupỹm kēnkreta wỳr mra. Kormã kwỳhtãã. Kormã myt

kator o mōr mẽ nhũm mẽ kànhmã hkrĩ hãmri nẽ mẽ kot Jejus gregrer kaxyw mẽ hkuxwa xà hkwy jamy nẽ ma hwyr o mra.

³Hãmri nẽ kormã mōr ri tee ri amnhĩ kukamã hamaxpēr nẽ axpēn mã: —Xê gàa nẽ. Mēhō koja mẽ pamã nhãm kēnkre nê hitom raxta xãm pu mẽ Jejus wyr agjê nẽ gregrer? Utĩ rax kumrēx kēnã. Anẽ.

⁴Hãmri nẽ hwyr pōj nẽ omu nhũm ra hitom xàja kàx ã nō nhũm mẽ tee ri omu. Utĩ rax tã ra kàx ã nō.

⁵Hãmri nhũm mẽ kēnkre hwyr agjê nẽ upōk rŭm mēhō nyw pumu. Nhũm ê jakajre kamã nhỹ nhũm mẽ amnhĩ jaēr pê omu nẽ tee ri hamaxpēr.

⁶Hãmri nhũm mẽ kãm: —Kwa mẽ amã ma hkēt nẽ. Mẽ ate Najare nhō xwýnh pê Jejus pumunh kaxyw na ka mẽ mra. Mẽ kot pĩ kahpa hã nhôr xwýnhhta. Nom jar amrakati. Na ra Tirtŭm akupỹm ho htĩr. E mẽ kam nẽ amnẽ agjê nẽ ano ho nōr xà kaprý pumu

⁷nẽ tokyx ma akupỹm mra nẽ hkôt mẽ pa ho pa xwýnhjê mã harẽ. Kojã ma Jejus mẽ akukamã akupỹm Garirej wyr mō. Garirej kamã kot kaj mẽ axte axpēn pumu. Ra kot mẽ amã amnhĩ jarēnh xà hkôt. Kwa mẽ tokyx ma akupỹm mẽ hwyr mra. Nẽ kwa kê Simãw Pētreja harēnh mar mex nẽ. Anẽ.

⁸Hãmri nhũm mẽ kuma nẽ awjanã nẽ ma akupỹm hprōt. Nẽ tee ri hamaxpēr nẽ kãm ma xàj htertēt tỳx jakamã kormã nhãm mēhō mã harēnh kēt nẽ.

Jejus kot Marir Matarēn wyr kator ã harēnh

Juãw 20.11-18

⁹Nhũm semãn nyw mã àr xà hã arĩgro pê tōmĩkja ã nhũm Jejus akupỹm htĩr. Hãmri nẽ Marir Matarēn kumrēx wyr kato. Kot nê mẽkarōmnuti ho 7 nẽ nê hanor xwýnhhta kumrēx wyr kato.

¹⁰Hãmri nhũm akupỹm htĩr kãm omu nẽ hkĩnh tỳx kumrēx. Nẽ ma akupỹm tẽ nẽ Jejus kràmnhwýjê mã harẽ. Nhũm mẽ hkaprĩ nẽ mỳr o hkrĩ nhũm mẽ hwyr axà nẽ mẽ omu nẽ mẽ kãm:

¹¹—Xê mẽ amỳr kēt nẽ. Na ra Jejus akupỹm htĩr nẽ ham ixwyr kato pa inhno ho omu. Xê mẽ hãmri axte amỳr kēt nẽ. Anhỹr tã nom nhũm mẽ htỳx ho

amnhĩ krã hkôt kot ri ã harēnh anhỹr ã hkamnhĩx jakamã kuma nẽ ãm kuma.

Jejus kot hkwỳjê hwỳr kator ã harēnh

Rukre 24.13-35

12Tã nhũm Jejus axte ja wa hwỳr kato. Kôt mẽ pa ho pa xwỳnh wa ho axkrut nẽ wa hwỳr kato. Na pre wa Jerujarē rũm kato nẽ akupỹm wa õ krĩ hwỳr mōr mẽ nhũm wa hwỳr kato. Nom axtem tanhmã amnhĩ nhĩpêx to nẽ wa hwỳr kator jakamã nhũm wa tokyx hprĩ hã kêp Jejus ã omunh kêt nẽ.

13Tã kêp Jejus ã omu hãmri nẽ akupỹm Jerujarē hwỳr mō nẽ hkwỳjê mã harēnh kurê kumrêx. Nom nhũm mẽ wa kuma nẽ ãm wa kuma nẽ akupỹm htĩr kôt hamaxpêr kêt nẽ.

Jejus kot hkwỳjê mã mẽmoj tã karõ hã harēnh

Matêwre 28.18-20; Rukre 24.44-49; Juãw 20.19-23; mãânēn Atre 1.6-8

14Tã nhũm Jejus tã hkôt mẽ pa ho mẽ pa xwỳnh pê 11 wỳr kato nhũm mẽ kamã no pyma nẽ hkĩnh tỳx nẽ omunh o kuhê. Hãmri nhũm mẽ kãm: — Kwa hêxta waa nẽ. Marir Matarēn mẽ akwỳta mẽ kot akupỹm ixtĩr kãm ixpumunh nẽ mẽ amã ijarēnh tã ka mẽ ama nẽ ãm mẽ ama. Pêr ãm mẽ akrã hihtỳx jakamã na ka mẽ ama nẽ mẽ hkôt ajamaxpêr kêt nẽ. Anẽ.

15Hãmri nẽ mẽ kot tanhmã kãm amnhĩ nhĩpêx to ho pa hã mẽ kãm karõ nẽ mẽ kãm: —E kêr ka mẽ ma krĩ piitã hkôt mẽ kãm ijarēnh o ri mẽ hkôt apa. Ixte tanhmã mẽ nê amnhĩ nhĩpêx toja ka mẽ aprĩ hã mẽ kãm ijarēnh o ri mẽ hkôt apa.

16Nẽ mẽ kot mẽ akapêr mar nẽ amnhĩ kaxyw ixkôt hamaxpêr xwỳnhjaja kêr ka mẽ hkrã kumrã nhũm mẽ nhỹrmã Tĩrtũm mẽ wa ixri htĩr tũm nẽ mex rãhã nẽ pa ho pa. No mẽ kot amnhĩ kaxyw ixkôt hamaxpêr kêt xwỳnhjaja koja Tĩrtũm nhỹrmã amnhĩ nê mẽ hano nhũm mẽ ma kuwy hwỳr pa.

17—Nẽ amnhĩ kaxyw ixkôt mẽ ajamaxpêr xwỳnhjaja kot kaj mẽ inhỹ hã tanhmã amnhĩ nhĩpêx to ho ri apa. Aa mẽ kot mẽmoj pumunh kêt kwỳ ho anẽ nẽ inhỹ hã inhĩxi jarēnh kôt mẽ nê mẽkarõmnuti janor o ri mẽ hkôt apa. Nẽ mẽ ate nhãm mẽ kapêr mar kêt tã inhỹ hã ho akapêr mex o apa. Mẽ ate

mar kêt tã ra ho akapër nhũm mẽ kot mẽ kapërta mar xwỳnhjaja hprĩ hã mẽ amar mex nẽ.

18Nẽ kot kaj mẽ nhỹri atỳx kagã xoprê hõ hpyr tã no nhũm tanhmã mẽ ato hkêt nẽ. Rỳ atỳx mẽmoj to mẽ hpar xà hkwỳ ho akõm tã no nhũm tanhmã mẽ ato hkêt nẽ. Nẽ inhỹ hã mẽ à xwỳnhjê hã mẽ anhĩkra jaxwỳ nhũm mẽ akupỹm mex. Kot kaj mẽ amnhĩ kaxyw ixkõt mẽ ajamaxpër xwỳnhjaja ã inhỹ hã amnhĩ nhĩpêx anhỹr o ri apa. Anẽ.

Jejus kot akupỹm kaxkwa hwỳr àpir ã harẽnh

Rukre 24.50-53; mãänën Atre 1.6-11

19Tã nhũm mẽ panhõ Pahihti Jejusja hkõt mẽ pa ho mẽ pa xwỳnhjê mã kapër pa hãmri nhũm Tĩrtũm ma akupỹm amnhĩ wỳr kaxkwa hwỳr ho api. Hãmri nhũm kaxkwa kamã Tĩrtũm nhĩhkô hã upòk rũm nhỹ. Kot ìhkô hã mẽmoj piitã ho amnhĩptàr kaxyw hkrĩ ho hkrĩ.

20Hãmri nhũm hkõt mẽ pa ho pa xwỳnhjaja ma akupỹm àpir kãm omu hãmri nẽ angrà nẽ ma krĩ piitã hkõt mẽ kãm Tĩrtũm kapër jarẽnh o pa nhũm Pahihti Jejus mẽ ìhkô hã pa ho pa. Nhũm mẽ ma ỹ hã hkwỳjê mã aa mẽ kot mẽmoj pumunh kêt kwỳ ho anhỹr o ri mẽ hkõt pa nhũm mẽ ja hã mẽ omu nẽ axpën mã mẽ harẽnh o: —Nà ãm hãmri na mẽ pamã Tĩrtũm kapër jarẽnh o pa nẽ ho hêx kêt nẽ. ỹ hã mẽ kot aa mẽ pahte mẽmoj pumunh kêt kwỳ ho anhỹr o pa kênã. Nà ãm hãmri na ã mẽ pamã kapër jarẽnh anhỹr o pa. Anẽ. Ja kõt na Makre kot Jejus jarẽnhja hapêx.

Rukre

Rukre 1

Rukre kot Teopre mā amnhī jarēnh

Atre 1.1-2

¹Pa pahi Teopre. Xà amex? E ot pa awÿr kagà nhīpêx nē awÿr kumē. Ixte amā Jejus jarēnh kaxyw. Na prem ra ohtô nē jar mē pahkôt Jejus kot amnhī nhīpêx o pa hā kagà rax nē.

²Jejus nhÿ hā Tīrtūm kapēr jahkre ho mē pa xwÿnhjaja na prem Jejus kot tanhmā amnhī nhīpêx to hkra xām kot amnhī nhīpêx o pa hā omunh o hkôt pa. Hāmri nē hprī hā mē inhmā harē nē hā kagà nhūm mē ohtô nē mē mar xà hkôt mē urà nē kot tanhmā amnhī nhīpêx to ho pa hā kagà.

³Tā pa mē harēnh ma nē ijamaxpēr o: —E kot paj ijaxwÿja Jejus kot amnhī nhīpêx kwÿ hā kagà. Nà kot paj ho anē. Anhÿr o ijamaxpēr jakamā ot pa ra ixte amā hā kagà kaxyw.

⁴Tā kêr ka kamā harē nē ixpyrà nē ama nē aprī hā harēnh mar tÿx nē mē kot amā harēnh xwÿnhjê hkôt ajamaxpēr tÿx o apa. Ām hāmri na prem mē amā harē. E kot paj amā hkwÿ hā kagà. Ixpê akràmnhwÿ Rukre kot paj ixprī hā amā harē nē hā kagà.

Tīrtūm kapēr o wryk xwÿnh kot Juāw Paxis jarēnh

⁵Juāw Paxis nhīpêxà finat Jakarisja kumrēx kot paj amā harē. Kêp finat Apiasti kanrēhā htàmnhwÿ jakamā uràk nē kêp mē apê Ijaew nhō patre na pre. Pahihti Eroxa kormā kot mē anhō pika kamā mē ho amnhīptàr ri nhūm Jakaris kêp patre nē pa. Nē hprō Ijapew mē wa kêp Parāw kanrēhā htàmnhwÿ.

⁶Nē wa hamē na pre Tīrtūm kôt tām amnhī nhīpêx o wa pa. Ām Tīrtūm kapēr kôt pix mā ri amnhī nhīpêx rāhā ho wa pa.

⁷Nom Ijapewja tanhmā hkra xà kute jakamā nhūm wa hkra hkêt nē wa pa rāhā wa ra hpigêx tÿx nē.

⁸Jakamã nhũm Jakaris ma mẽ kot Tĩrtũm mã amnhĩ jarẽnh xà hã ixkre hwỳr tẽ. Kwỳjê pyrà nẽ kot Tĩrtũm mã tanhmã amnhĩ nhĩpêx to kaxyw ma mẽ hpãnhã hwỳr tẽ nẽ axà.

⁹⁻¹⁰Hãmri nẽ kamã Tĩrtũm mã amnhĩ jarẽnh pẽ kãm mẽ hkuxwaxà ho xêt o xa. Nhũm Ijaew kwỳjaja ixkreta wỳr akuprõ nẽ kapem kutêp Tĩrtũm mã amnhĩ jarẽnh o kuhê.

¹¹Pu nhũm kaxkwa rũm Tĩrtũm kapêr o mẽ wrỳk xwỳnhja wrỳ nẽ Jakaris kutã xa. Mẽ hkuxwa xà ho xêt xà hã mês kunĩhti xupôk rũm xa.

¹²Hãmri nhũm amnhĩ jaêr pẽ amnhĩ kutã omu nẽ akryk omunh o xa.

¹³Hãmri nhũm kãm: —Pa Jakaris? Kwa tee ri ajamaxpêr o amã ma hkêt nẽ. Na pre Tĩrtũm ate akra hã hwỳr o apa hã ama nẽ hã apumu. Jakamã koja tanhmã aprõ hkra xà ho ka kamã akra. Nhũm nõ nẽ rax nẽ kato nẽ myre. Ka wa hã hixi mẽ nhũm kêp Juãw.

¹⁴Koja kato ka wa omu nẽ akĩnh tỳx kumrêx. Nhũm akwỳjaja haxwỳja ohtô nẽ war akra jarẽnh ma nẽ war anhy hã hkĩnh nẽ.

¹⁵Koja kormã akra kator kêt ri nhũm Tĩrtũm Karõja hkarõ hwỳr axà. Hãmri nhũm kato nẽ gaa nẽ hprêk nẽ Tĩrtũm mã tanhmã amnhĩ nhĩpêx to ho pa. Tĩrtũm kãm hprãm xà hkôt pix mã tanhmã amnhĩ nhĩpêx to ho pa. Nom kêr ka inhmar kumrêx. Kê mẽmoj to wĩhti ho hkôm kêt nẽ pa. Nẽ kagôxyhti ho hkôm kêt nẽ pa. ãm kwarĩ ho kwarĩ.

¹⁶Koja hprêk hãmri nẽ mẽ apê Ijaew mã Tĩrtũm kapêr jarẽnh o mẽ hkôt pa. Nhũm mẽ ohtô nẽ kuma nẽ kot amnhĩ tomnuj kaga nẽ Tĩrtũm kôt amnhĩ xunhwỳ nẽ hkôt amnhĩ nhĩpêx mex o pa.

¹⁷—Tĩrtũm kot mẽ awỳr mẽ apytâr xwỳnh maati mẽnh mã xwỳnh kukamã koja mẽ kãm harẽnh o pa. Te Tĩrtũm nhỹ hã kapêr jarẽnh xwỳnh finat Eris kot amnhĩ nhĩpêx pyræk o koja amnhĩ nhĩpêx. Nẽ uræk nẽ Tĩrtũm Karõ nhỹ hã mẽ amã Tĩrtũm kapêr jarẽnh o mẽ akôt pa. Jakamã nhũm mẽ akwỳjaja kuma hãmri nẽ amnhĩ tomnuj kaga hpa nẽ Tĩrtũm kôt pix mã amnhĩ nhĩpêx o pa. Nẽ tãm mẽ hkrajê nhĩpêx o pa. Koja mẽ ã akra Juãwja kôt amnhĩ

nhîpêx anê. Jao Tirtûm kot mẽ awÿr mênh mã xwÿnhhta kutêp tãm amnhî nhîpêx o pa. Anê.

¹⁸Nhũm pre ã Tirtûm kapêr o wrÿk xwÿnh Jakaris mã hkrata jarênh anê. Hãmri nhũm tee ri kuma nê kãm: —Kwa xà we ãm hãmri na ka ã inhmã ixkra jarênh anê nà? Ra ixprô mẽ wa ijamê wa ixpigêx tÿx kênã kot pa kêt wa ixkra. Anê.

¹⁹Hãmri nhũm kãm: —Nà ãm hãmri na pa ã amã harênh anê. Ixpê Gapriew na pa ã awÿr ixwrÿk nê Tirtûm nhÿ hã amã harênh anê. Ixte Tirtûm nhîhkô hã ixkuhê xwÿnhjê hõ na pa. Tãm na awÿr inhmê pa awÿr wrÿ nê ã amã akra jarênh anê.

²⁰Tã ate ixkôt ajamxpêr kêt jakamã kot kaj axte axumar kêt nê akapêr kêt rãhã nhũm akra kato. Kojã kato ka rĩ kormã akupÿm akapêr nê akupÿm ama. Ate ixkôt ajamxpêr kêt jakamã kot kaj ã amnhî nhîpêx anê nê rĩ amnhî pumu. ãm hãmri na pa ã amã ixkapêr anê. Anê. Nhũm pre ã Tirtûm kapêr o wrÿk xwÿnhja Jakaris mã kapêr anê. Jakamã nhũm tokyx ixkre rũm kator kêt nê.

²¹Hãmri nhũm ixkre kapem mẽ kuhê xwÿnhjaja tee ri kamã ama nê axpên mã: —Tk. Kwa mo na we ri hitom kãm ho anhÿr kãm unê nê tokyx kator kêt? Anê.

²²Tã nhũm akupÿn mẽ hwÿr kato. Nê tee ri kot mẽ kãm kapêr kaxyw no ãm ìhkra pix o ri mẽ kãm tanhmã ujahkre hto. Hãmri nhũm mẽ amnhî jaêr pê kot ã amnhî nhîpêx anhÿr ã omu nê tee ri hkukamã hamaxpêr nê axpên mã: —Kwa tanhmã na we amnhî to? Mãn hitom kãm mẽmoj tanhmã kute hã omu hã na ri ã amnhî nhîpêx anê nà? Anê.

²³Hãmri nhũm Jakaris ixkre kamã mẽmoj tã àpênh pa hãmri nê ma akupÿm òrkwÿ hwÿr tẽ.

²⁴⁻²⁵Tã nhũm hprô Ijapewja htujarô. Hãmri nê amnhî tujarô hã amnhî pumu nê hkĩnh tÿx nê. Nê hamaxpêr o: —Hêxta gàu nê. Ma ãm hãmri na pa pre ixkra hkêt nê amnhî kamã ixpijaàm o ri ixpa. Tã ra ixtujarô. Kot paj wa axte

ri amnhĩ kamã ixpijaàm kêt nẽ. Ma ãm hãmri na Tĩrtũm ã wa inhĩpêx anẽ. Na pa wa ixkĩnh tỳx kumrêx. Anẽ. Nhũm pre ã hamaxpêr anẽ hãmri nẽ arĩ òrkwỹ kamã hkrĩ ho hkrĩ. Aa nhỹhỹm kator nẽ mõi kêt rãhã hã mytwrỹ kêp 5.

Tĩrtũm kapêr o wrỹk xwỹnh kot Marir mã hkra jarênh

Matêwre 1.18-21

26Tã nhũm Ijapew ra htujarô hã mytwrỹ kêp 6 nhũm Tĩrtũm axte kapêr o wrỹk xwỹnh pê Gapriewja mẽ. Nhỹri Garirej kamã krĩ pê Najare hwỳr kumẽ nhũm ma hwỳr wrỹ.

27Mêhõ pê Marir wỳr wrỹ. Nhũm ra Juje ho mjên kaxyw. No ãm kormã hkukrit rãhã ho mjên kaxyw. Jujeja Marir pyrà nẽ kêp pahi finat Tawi kanrêhã htàmnhwỳ na pre.

28Jakamã nhũm Gapriew Marir wỳr wrỹ nẽ kãm: —Pa Marir? E ot pa amã Tĩrtũm kapêr jarênh kaxyw awỳr wrỹ. Kot akôt pa ho pa jakamã koja ato mex rax kumrêx. Anẽ.

29Hãmri nhũm amnhĩ tã kuma nẽ tee ri hamaxpêr nẽ hamaxpêr o: —Xê mẽmo na we ri ã inhmã kapêr anẽ? Tanhmã koja we Tĩrtũmja ixto mex rax to? Anẽ.

30Hãmri nhũm Gapriew kãm: —Kwa tee ri amnhĩ kukamã ajamaxpêr kêt nẽ. Tĩrtũm kãm ajapêê.

31Kot kaj atujarô nhũm akra kato nẽ myre. Ka hã hixi mẽ nhũm kêp Jejus.

32-33Koja Tĩrtũm amã ho mex rax nẽ. Nẽ koja mẽ piitã mẽ kãm kêp amnhĩ Kra hã ho amnhĩrĩt. Nẽ mẽ apê Ijaew o amnhĩptàr kaxyw koja mẽ akaxyw ãm nhũm higêt pahi Tawi pyrà nẽ mẽ ato amnhĩptàr o pa. Mẽ ate amnhĩ wỳr kamã ajamak o apa xwỹnhta koja. Tĩrtũm kãm hprãm xà hkôt koja mẽ ato amnhĩptàr rãhã ho pa. Anẽ.

34Nhũm pre ã kãm kapêr anẽ nhũm amnhĩ tã kuma nẽ tee ri amnhĩ kukamã hamaxpêr hãmri nẽ kãm: —Xê gàu nẽ. Tanhmã kot pa kêt we amnhĩ to nẽ

ixtuarô? Kormã ixkukrit nê mo kormã inhmjên? Mê. Xà Juje kot ixkamã hkra hkukamã na ka ã ri inhmã axujarênh anê? Anê.

³⁵Hãmri nhũm kãm: —Nà koja Tĩrtũm Karõ tãm tanhmã ato ka ÿ hã tanhmã amnhĩ to hkêt tã atujarô. Jakamã koja akra kêp Tĩrtũm Kraa.

³⁶⁻³⁷Na ra haxwỳja anã Ijapewja htujarô. Ra hpigêx tỳx nê aa hkra hkêt nhũm hkwỳjaja kot axpên mã ôhy kamã hkra hkêt kumrêx ã harênh o pa htã ra htujarô. Tĩrtũm kot tanhmã mẽ ho nhũm mẽ htujarô tanhmã kêp kute hkêt. Jakamã nhũm tanhmã ho nhũm mjên tãm htu nhũm ra htujarô hã mytwrỳ kêp 6. Tĩrtũm tãm kot mẽmoj piitã tanhmã ho kaxyw àhpumunh xihtỳx. Jakamã koja uràk nê mã ato anê nê ka kormã akukrit tã atujarô. Anê.

³⁸Nhũm pre ã Gapriew Marir mã kapêr anê nhũm amnhĩ tã kuma nê kãm: —Ko. Kê mãmri kãm tanhmã ixto hprãm xà hkôt mãmri tanhmã inhĩpêx to. Inhmã Tĩrtũm kapêr kôt amnhĩ nhĩpêx prãm. Kê mãmri kãm tanhmã ixto hprãm xà hkôt tanhmã inhĩpêx to. Anê nhũm kuma nê ma akupỳm api.

Marir kot Ijapew wỳr mõi ã harênh

Rukre 11.27

³⁹⁻⁴⁰Tã nhũm Marir amnhĩ tujarô hã amnhĩ pumu nê nã Ijapew wỳr hkrà kurê kumrêx. Hãmri nê nojarêt nê õ krĩ rũm kato nê ma hwỳr mõi. Ma Ijapew papxà hwỳr mõi. Ijapew nhõ krĩa pika pê Jutej kamã nhỹri hixêt kamã na pre. Nhũm ma hwỳr mõi hãmri nê hwỳr pøj nê Ijapew wỳr axà nê omu nê kãm: —Ka? Xà wa amex? Anê.

⁴¹Hãmri nhũm kuma nê kãm: —Ỡ ma wa inhmex na pa wa ixpa. Anhỹrja kôt nhũm ôhy kamã hkraja haxwỳja te kot Marir kapêr mar nê amnhĩ nhĩpêx pyràk o htu kamã àxôn timer tỳx o nõ. Hãmri nhũm Ijapew Tĩrtũm Karõ nhỹ hã tanhmã Marir mã kapêr to.

⁴²Kàx pê kãm kapêr nê kãm: —Xê gài nê. Ra Tĩrtũm kot ato mex jakamã na ka akĩnh rax o mẽ inhni hkwỳjê jakrenh pa. Anhõhy kamã akraja koja Tĩrtũm amã ho mex rax nê.

⁴³Xê mon ka ã ixto mex nê ixwÿr amõr anê? Apê inhõ Pahihti katorxà htã ixto mex nê ã ixwÿr amõr anê. Hêxta gàu nê. ãm hãmri na ka ixwÿr mõ Marir.

⁴⁴Na ka ixwÿr mõn pøj nê inhmã akapër hãmri nhũm ixtu kamã ixkrare akapër ma nê hkĩnh xàj ixtu kamã ixkamnãr tÿx o nõ.

⁴⁵Na ka pre Tĩrtũm kapër o wrÿk xwÿnh kot amã kapërja ma nê hkõt ajamaxpër tÿx nê. Jakamã kot kaj Tĩrtũm nhÿ hã akĩnh nê ajamakêtkati nê amex nê ri apa. Anê.

Marir kot Tĩrtũm mã mex o mex ã gre ã harênh

Rukre 6.20-26

⁴⁶Hãmri nhũm Marir Ijapew kot ã kãm kapër anhÿrja ma nê kãm Tĩrtũm mex o mex ã gre nê gre o: Tĩrtũm na mex o mex.

⁴⁷Kêp ixkaprĩ xwÿnh na. Kêp ixkaprĩ xwÿnh jakamã na pa inhmex nê ixkĩnh nê ri ixpa.

⁴⁸⁻⁴⁹Ixte amnhĩ to grire nhũm ja hã ixpumu nê ixkamã ukaprĩ nê ixto mex rax kumrêx. Jakamã koja mẽ piitã axpên kanrêhã axpên mã ijarênh rãhã ho pa. Tĩrtũm kot tanhmã ixto mex to hã ijarênh rãhã ho pa. Tĩrtũm na mex o mex nê hihtÿx o hihtÿx. Tã na ã inhĩpêx anê.

⁵⁰Ma na hte ã amnhĩ nhĩpêx anê nê axpên kanrêhã mẽ kot hã hpijaàm xwÿnhjê pumu nê mẽ kutã nojarêt rãhã ho pa. Nê mẽ kamã ukaprĩ rãhã ho pa. ã na hte mẽ hipêx mex anhÿr o pa.

⁵¹Nê hihtÿx o hihtÿx jakamã na hte mẽ kot amnhĩ to jarkrar o ri mẽ pa xwÿnhjaja tanhmã mẽ ho nhũm mẽ axkaprã.

⁵²Nê pahihti hkwÿ kot kapër mar nê ãm mar xwÿnhjaja. Na hte amnhĩ tã mẽ omu nê mẽ àpênh nê mẽ hapøj nê mẽ hpãnhã mẽ kot amnhĩ to hkryre xwÿnh kwÿ jagjê.

⁵³Na hte mẽ kãm kapër kõt amnhĩ nhĩpêx prãm xwÿnhjê ho mex o pa nhũm mẽ mex nê pa. No mẽ kãm hprãm kêt xwÿnhjaja nhũm tanhmã mẽ ho mex to hkêt nê.

54-55ãm hãmri na pre amnepê mã mẽ panhîgêť mã amnhĩ jarênh xà hkôt mẽ pahpê Apraãw rûm axpên kanrêhã hkrajaja mẽ pahto mex o pa. Mẽ pahpê Ijaew mẽ pahte kãm tanhmã amnhĩ nhĩpêx to ho papa nhũm kãm mẽ pajapê xàj mẽ pahto mex rãhã ho pa. Nẽ mẽ pakamã ukaprĩ rãhã ho pa. Anẽ. Nhũm pre ã Marir Ijapew mã Tĩrtũm mex o mex ã greer anẽ.

56Hãmri nẽ ri hkôt pa hã mytwrÿ axkrunêpxi nẽ ma akupÿm õ krĩ hwÿr mỗ.

Juãw Paxis kator ã harênh

57Tã nhũm Ijapew hpijagri kaxyw õhy xà nhũm hkrare kato nẽ myre.

58Hãmri nhũm omu nẽ hkĩnh tÿx nẽ. Hãmri nhũm hkwÿjaja Tĩrtũm kot wa kamã ukaprĩ hã wa kãm wa hkra myre nhõr ã harênh ma nẽ wa ÿ hã hkĩnh nẽ.

59Tã nhũm wa hkraja ra hã arĩgro pê 8 nhũm mẽ hkwÿjaja kot my kwrÿt kà krãhyr kaxyw hwÿr akuprõ. Tĩrtũm kot mẽ kãm hã karõ xà hkôt nhũm mẽ kot kãm õr ã amnhĩ to amnhĩrĩt kaxyw ã hipêx anhÿr kaxyw. Na htem ã mẽ kêp Ijaew krajê piitã mẽ hipêx anẽ. Jakamã nhũm prem ã hipêx anẽ hãmri nẽ hpãnhã tanhmã kot hã hixi mẽnh to kaxyw ri hã axpên kukja. Hãmri nẽ hipêêxà hkôt kot hã Jakaris mẽnh kaxyw.

60Hãmri nhũm katorxà tee ri axpên tã mẽ kuma nẽ mẽ kãm: —Ma koja kêp Jakaris kêt nẽ. Koja kêp Juãw. Anẽ.

61Hãmri nhũm mẽ tee ri kuma nẽ kãm: —Kokÿ. Mo jar mẽ pahtõ pê Juãw kot kêt ri kêp Juãw? Jar amrakati kênã kot ka kêt wa ri ã hã hixi rênh anẽ. Anẽ.

62Hãmri nẽ hixi hã hipêêxà kukja. Nom nhũm arĩ umar kêt nẽ kapêr kêt jakamã nhũm mẽ tanhmã ri kãm mẽ ãhkra nhĩpêx to.

63Hãmri nhũm ãhkra ho kagà hã ahwÿ nhũm mẽ kãm ja gõ nhũm kupy nẽ hã mẽ kãm hixi nhĩpêx. Nhũm mẽ kupy nẽ omu hãmri nẽ hixi pê Juãw kôt omu. Hãmri nẽ tee ri hixija kukamã hamaxpêr.

64Rôm nhũm Jakaris akupÿm ama nẽ kapêr mex kurê kumrêx nẽ Tĩrtũm mã mex o mex ã harênh o xa.

65-66Hāmri nhūm mẽ omu nẽ ma mẽ piitã mẽ kãm wa hkra jarẽnh o ri axpẽn kôt hprõt. Pika pê Jutej kamã hixêt kape hã krĩ hkôt nhūm mẽ ri mẽ piitã mẽ kãm harẽnh o hprõt. Tĩrtũm kot wa hkra kôt tãnopxar o pa nẽ ho mex ã harẽnh o hprõt. Hāmri nhūm mẽ kuma nẽ tee ri hkukamã hamaxpěr nẽ axpẽn mã: —Hêxta waa nẽ. Tĩrtũm tãm na xep hte jare hkôt ri pa ho pa. Jakamã koja nhỹrmã hprêk hāmri nẽ tanhmã koja we amnhĩ nhĩpêx to ho pa wehee? Anẽ.

Jakaris kot Tĩrtũm nhỹ hã kapěr ã harẽnh

67Hāmri nhūm Jakaris Tĩrtũm Karõ nhỹ hã Tĩrtũm mex o mex ã harẽnh o xa. Tĩrtũm kot mẽ kêp Ijaew o mex ã harẽ nẽ mẽ kãm:

68Hêxta waa nẽ. Nà Tĩrtũmja mex o mex. Na pre hte mẽ pahpãmjaja ãm hkôt pix mã amnhĩ nhĩpêx o pa. Jakamã nhūm hte Tĩrtũm mẽ pahpê hkrajê kamã ukaprĩ nẽ mẽ pahto mex o pa. E kwa pu mẽ kãm mex o mex ã harẽnh rãhã nẽ.

69Ra kot mẽ pahwỳr mẽ pahkaprĩ xwỳnh pê mẽ panhõ pahihtĩ mẽnh mã. Ja kaxyw àhpumunh xihtỳx o hihtỳx jakamã na pre ra mẽ pahwỳr mẽnh ã amnhĩ jarẽ. Koja kêp amnepêm Tĩrtũm mã tanhmã amnhĩ nhĩpêx to ho pa xwỳnh Tawija hkanrêhã htàmnhwỳ.

70Amnepêm Tĩrtũm nhỹ hã kapěr xwỳnhjaja na prem mẽ kãm Tĩrtũm kapěr jarẽnh o pa nẽ mẽ kãm:

71“Koja Tĩrtũm mẽ panê mẽ kãm mẽ pahkurê xwỳnhjê pumunh mex o pa.” Anẽ.

72Tĩrtũm ra kot mẽ pahpãmjê mã amnhĩ jarẽnh xà hkôt kãm mẽ pakamã ukaprĩ rãhã ho pa hprãm. Koja aa ja ho anhỹr o hamakêtkati hkêt nẽ.

73-75Na pre ra mẽ pahpãm Apraãw mã mẽ pakukamã ã mẽ pahtã amnhĩ jarẽnh anẽ nẽ kãm: “Kot paj mẽ anê mẽ kãm mẽ akurê xwỳnhjê pumunh mex nẽ mẽ ãhkra nê mẽ ato ixkato. Jakamã kot kaj mẽ amnhĩ kamã amã mẽ uma hkêt nẽ axàmnhĩx ri ajamakêtkati nẽ mẽ kamã apa. Nẽ kot kaj mẽ mãmri axàmnhĩx ri inhmã tanhmã amnhĩ nhĩpêx to ho ri apa rãhã nẽ. Nẽ

ixkôt amnhĩ nhĩpêx o ri apa rãhã ty.” Anhÿr o na pre Tĩrtũm mẽ pakukamã mẽ pahãtã amnhĩ jarẽ. Anẽ. Nhũm pre ã Jakaris mẽ kãm Tĩrtũm kapêr jarẽnh anẽ. Hãmri nẽ hkrareja mÿ nẽ o xa nẽ kãm:

76—No ka Xugitre. Kot kaj aprêk hãmri nẽ apê Tĩrtũm maati nhÿ hã kapêr jarẽnh o apa xwÿnh. Jakamã kot kaj Pahihti hkukamã mẽ piitã mẽ kãm harẽnh o ri mẽ hkôt apa. Mẽ kot amar nẽ kutêp tãm amnhĩ nhĩpêx kaxyw.

77—Tĩrtũm kot mẽ nê mẽ kot amnhĩ tomnuj rênh nẽ mẽ ho hkra hã harẽnhja kot kaj mẽ hkôt mẽ kãm harẽnh o ri apa.

78—Na hte Tĩrtũm mẽ pakamã ukaprĩ ho pa nẽ mẽ pakamã gryk tokyx anhÿr kêt nẽ. Jakamã koja mẽ pahwÿr mẽ pahkaprĩ xwÿnhja mẽ. Kormã mẽ pahwÿr wrÿk kêt jakamã te mẽ pahte kamàt kô kamã tee ri mẽ paxàhkupênh o ri papa xwÿnh pyræk. —Nom koja mẽ pahwÿr wrÿkja o te ra myt kator nẽ mẽ pamã hirã nẽ mẽmoj to amnhĩrĩt mex pyræk o mẽ panhĩpêx. Ja kaxyw koja Tĩrtũm mẽ pahwÿr mẽ pahkaprĩ xwÿnhja mẽ nhũm man mẽ pahwÿr wrÿ nẽ mẽ pamã mẽ pahtyk puma xwÿnhjê mã Tĩrtũm kapêr o amnhĩrĩt o pa. Mẽ pahte mar nẽ ra pajamakêtkati nẽ paxàmnhĩx ri papa nẽ pahtyk kaxyw.

79—Mẽ kãm mẽ htyk puma xwÿnhjaja te kamàt kô kamã ri pa pyræk. Tã koja mẽ pahkaprĩ xwÿnhja wrÿ hãmri nẽ tanhmã mẽ hkrã hto nhũm mẽ te arĩgro hã ri mẽ pa xwÿnh kot amnhĩ nhĩpêx pyræk o amnhĩ nhĩpêx. Jao hamakêtkati nẽ axte kãm htyk puma hkêt nẽ ri pa. Anẽ. Nhũm pre ã Jakaris Tĩrtũm Karõ nhÿ hã hkrare mã kapêr anẽ.

80Tã nhũm Juãwja gaa nẽ aptàr. Nẽ Tĩrtũm kôt amnhĩ nhĩpêx o pa. Nom kormã kot Ijaew jahkre ho pa hkêt ri kapôt ã ri mẽ puhã pa. ã na pre Juãw kator nẽ amnhĩ nhĩpêx anhÿr o pa anẽ. Na pre kato nẽ hã mytwrÿ grêre hãmri nhũm Jejusja hkôt kato.

Rukre 2

Jejus kator ã harẽnh

Matêwre 1.18-25

¹⁻²Na pre ã Jejus kator aně. Nhũm pre Rõm nhõ xwỳnhjê nhõ pahi Sesti Akusja õ pika piitã hkõt mẽ ho kõta kaxyw. Aa kot mẽ ho kõta hkêt tã ra kot mẽ ho kõta kaxyw. Kormã pahi Sirën haxwỳja kot pika pê Sir kamã mẽ ho amnhĩptàr ri nhũm pahi Sesti Akus kot mẽ ho kõta kaxyw. Jakamã kãm àpênh xwỳnhjê mã kapěr nẽ mẽ kãm: —E kêr ka mẽ ho kõta kaxyw nẽ mẽ piitã mẽ hixi hã kagà hpa. Aně.

³Hãmri nhũm mẽ piitã ã kot mẽ hipêx anhỹr ã amnhĩ tã harēnh ma hãmri nẽ mẽ kot mẽ hixi hã kagà kaxyw piitã akupỹm papxà hwỳr ma hapêx.

⁴Nhũm pre Marir mjên Juje haxwỳja ma krĩ pê Perěj wỳr mõi. Garirej kamã õ krĩ pê Najare rũm kato nẽ ma hwỳr mõi. Pika pê Jutej kamã na Perějja. Kamã na pre Juje nhĩgêt Tawija kato.

⁵Nhũm Juje kêp kanrēhã htàmnhwỳ jakamã na pre ma akupỹm hwỳr mẽ hkwyjê hkõt mõi. Nẽ ma amnhĩ kõt kot ho hprõ mã xwỳnh Marir o mõi. Arĩ htujarô rax rãhã nhũm ma amnhĩ kõt o mõi.

⁶Nhũm wa mõi hãmri nẽ hwỳr pøj. Nhũm Marir hpijagri xà hã mytwrỳ mã àr jakamã nhũm kamàt nhũm õhy xà.

⁷Nom nhũm Perěj wỳr mẽ hpõx nyw xwỳnhjaja ra ixkre piitã ho nỳt pa nhũm wa tee ri hpijagri kaxyw amnhĩ to ukapi ho pa. Hãmri nẽ nhỹri môx nhõrkwỹ punajre hwỳr axà nhũm Marir kamã hpijagri. Nhũm hkra kato nẽ myre. Kra kot wa na pre. Hãmri nhũm kumỳ nẽ kupêxê ho hkupu hpa nẽ môx xàpkur xà hã kõi kapyr kamã kuxi nhũm hamakêtkati nẽ gõr nẽ nõ.

ôwêhti jamãr xwỳnhjê jarēnh

⁸Rõm nhũm ôwêhti jamãr o mẽ pa xwỳnhjaja kapõt ã ri hkrit ôwêhti jamãr o pa. Nhũm ra kamàt nhũm mẽ hamãr o hkrĩ.

⁹Pu nhũm kaxkwa rũm Tĩrtũm kapěr o wrỳk xwỳnhja wrỳ nẽ mẽ mỳri ajêt. Hãmri nẽ tanhmã amnhĩ to nẽ mẽ hpuhã ho hirã rax kumrēx. Nom nhũm Tĩrtũm tãm ã mẽ hipêx aně. Hãmri nhũm mẽ tee ri jawỳ Tĩrtũm kapěr o wrỳk xwỳnhja pumu nẽ kãm ma htỳx nẽ akryk omunh o hkrĩ.

¹⁰Hāmri nhūm mẽ kām: —Pa? Kwa mẽ amã ixpyma hkêt nẽ. Ixte mẽ amã mẽmoj mex jarẽnh kaxyw na pa mẽ awỳr wrỳ. Kot kaj mẽ harẽnh ma nẽ akĩnh nẽ. Nom mẽ kapxipixjaja kaj mẽ akĩnh kêt nẽ. Koja mẽ piitã ja jarẽnh ma nẽ mẽ apyrà nẽ hkĩnh nẽ pa.

¹¹Na ra ham mẽ akamã ukapřĩ xwỳnhhta kato. Pahi Tawi nhõ krĩ mẽ mẽ anhõ krĩ pê Perěj kamã. Kêp mẽ apiitã mẽ anhõ pahшти na. Mẽ ate amnhĩ wỳr kamã ajamak o apa xwỳnh pê Kris na. Tãm na ham kato.

¹²E pa ixprĩ hã mẽ amã tanhmã harẽnh to ka mẽ inhma. Na kato nhūm katorxà kupêxê ho kupu hpa nẽ kôsti kamã kuxi nhūm nõ. Kwa mẽ tokyx ma hwỳr mra nẽ kêp mẽ anhõ pahшти hã omu. Anẽ.

¹³Nhūm pre ã mẽ kãm ujarẽnh anẽ. Hāmri nhūm hkwyjaja wamta kôt ohtô nẽ mẽ hwỳr wrỳ nẽ puhã harir. Hāmri nẽ Tĩrtũm mã mex o mex ã grer o harir.

¹⁴Nẽ hã grer o: Tĩrtũm maati na mex o mex. Jakamã mẽ kãm hprãm xà kôt pix mã amnhĩ nhĩpêx o mẽ pa xwỳnhjaja koja amnhĩ tã mẽ omu nẽ tanhmã mẽ ho nhūm mẽ hamakêtkati nẽ àmnhĩx hkĩnh nẽ pa ho pa.

¹⁵Anhỹr o grer o harir hāmri nẽ ma akupỹm kaxkwa hwỳr àpir pa nẽ akunok. Hāmri nhūm ôwêhti jamãr xwỳnhjaja mẽ kapêr ma nẽ ma akupỹm àpir ã mẽ omu nẽ axpẽn mã: —E tokyx pu mẽ krĩm nẽ Tĩrtũm kot mẽ pamã ho amnhĩrĩt xwỳnhhta japêr nẽ tokyx nhỹri omu. Kwa ma pu mẽ tokyx hwỳr nẽ omu. Anẽ.

¹⁶Hāmri nhūm mẽ ma hwỳr mra. Hāmri nẽ krĩm agjê nẽ môt nhõrkwỹ wỳr agjê nẽ mẽ hkrareta pumu. Nhūm kôsti kamã nõ nhūm mẽ omu nẽ kuri Marir mẽ Juje wa omu.

¹⁷Hāmri nẽ akupỹm hapôj nẽ ma mẽ piitã mẽ hkôt ri mẽ kãm harẽnh o pa. Ra Tĩrtũm kapêr o wrỳk xwỳnh kot mẽ kãm harẽnh xàja kôt nhūm mẽ ma mẽ kãm harẽnh o ri mẽ hkôt pa.

¹⁸Nhūm mẽ amnhĩ jaêr pê mẽ kot harẽnh ma nẽ tee ri hkukamã hamaxpêr.

¹⁹Nom nhũm Marir mẽ kot kãm hkrax rũm tanhmã hkra jarēnh to xàta kukamã pix mã hamaxpěr rãhã ho pa.

²⁰Jakamã nhũm ôwēhti jamãr xwỳnhjaja ma akupỹm hkrit wỳr mra. Tĩrtũm kapěr o wrỳk xwỳnh ra kot mẽ kãm ujarēnh xà hkôt nhũm mẽ kot Jejus pumunh jakamã ma akupỹm hkĩnh nẽ Tĩrtũm mã mex o mex ã harēnh pẽ hã grer o akupỹm mra.

Mẽ kot Jejus ã hixi mēnh ã harēnh

Matêwre 1.21; Rukre 1.31

²¹Tã nhũm wa hkrareta ra hã arĩgro pẽ 8 nhũm mẽ hwỳr akuprõ nẽ kãm my kwryt kà krãhta. Na hte Ijaew mẽ hkra myre piitã ã mẽ hipêx anẽ. Mẽ piitã mẽ kot Tĩrtũm mã õr ã mẽ omunh kaxyw. Jakamã nhũm mẽ kãm ho anẽ nẽ hpãnhã hã hixi mẽ. Marir kormã kot ho htujarõ hkêt ri Tĩrtũm kapěr o wrỳk xwỳnh kot hkukamã kãm hixi jarēnh xàja kôt nhũm mẽ hã hixi mẽ nhũm hixi kệp Jejus.

Mẽ kot Tĩrtũm mã Jejus nhõr pyrãk o hipêx

²²⁻²⁴Tã nhũm Marir hpijagri ho hapêx. Jakamã nhũm Juje ma krĩ pẽ Jerujarẽ hwỳr mẽ kot Tĩrtũm mã amnhĩ jarēnh xà hã ixkre hwỳr amnhĩ kôt o mõ. Na pre ra finat Mojes amnepêm Tĩrtũm nhỹ hã mẽ hkukamã mẽ hpãmjê mã ja hã karõ. Nẽ mẽ kãm hã karõ ho: Koja mẽ aprõ hpijagri. Hãmri nẽ hpijagri ho hapêx ka mẽ ma Tĩrtũm mã amnhĩ jarēnh xà hã ixkre hwỳr o mra nẽ hpãnhã Tĩrtũm mã mẽmoj gõ. Kãm tutre ho gõ rỳ kãm tuuti hõ ho axkrut nẽ agõ kê patre hamỳ nẽ kãm kupa. Kot ja hã omunh nẽ hpijagri xwỳnhhta akupỹm mex ã harēnh kaxyw. Anhỹr o kot mẽ kãm ja hã karõ jakamã nhũm wa ma ã amnhĩ nhĩpêx anhỹr kaxyw hwỳr mõ. Nẽ amnhĩ kôt Jejus mỳ nẽ o mõ. Tĩrtũm kot mẽ kãm ja hã karõ nhũm mẽ kot hã kagà xà hkôt. Na pre ra finat Mojes mẽ kãm ja jarẽ nẽ mẽ kãm: Kot kaj mẽ akra my kot wa hãmri nẽ te mẽ ate Tĩrtũm mã õr kaxyw hipêx pyrãk o hipêx. Kê tãm amnhĩ nhĩpêx o pa nẽ ÿ hã tanhmã kãm amnhĩ nhĩpêx to ho pa. Anhỹr jakamã nhũm wa ra Jerujarẽ hwỳr nojarêt nẽ amnhĩ kôt Jejus mỳ nẽ ma amnhĩ kôt o mõ.

Simeãw kot Jejus kukamã harēnh

25-26Rôm nhũm Jerujarẽ kamã Simeãwja. Tĩrtũm Karõ nhỹ hã kot tanhmã amnhĩ to mex to ho pa xwỳnh na pre. Na pre hte Tĩrtũm kapẽr kõt pix mã tãm amnhĩ nhĩpêx o pa. Jakamã nhũm pre ra Tĩrtũm Karõ ã kãm kapẽr anẽ nẽ kãm: —E inhma Simeãw. Kot kaj atĩr rãhã nhỹrmã Tĩrtũm kot mẽ akaxyw ãm mã xwỳnhja ka ano ho omu nẽ rĩ kormã ty. Anhỹr o kãm kapẽr jakamã nhũm kuma nẽ hkĩnh nẽ ãm pix kamã hamak o pa. Mẽ kêp Ijaew wỳr wryk nẽ mẽ ho mex mã xwỳnhhta pix kamã hamak rãhã ho pa.

27Jakamã nhũm Jejus katorxà mẽ hipêêxà purota wa Tĩrtũm mã amnhĩ jarẽnh xà hã ixkreja wỳr Jejus o axà nẽ kormã o xa. Finat Mojes kot mẽ kãm hã karõ xà hkõt. Hãmri nhũm Tĩrtũm Karõ mẽ hwỳr Simeãwja mẽ nhũm ma mẽ hwỳr tẽ nẽ axà.

28Hãmri nẽ wa hkrata pumu nẽ hkĩnh tỳx nẽ. Hãmri nẽ wa kêp kumỳ nẽ o xa nẽ hã Tĩrtũm mã mex o mex ã harẽ nẽ kãm:

29-32Pa Pahi Maati. E ot pa ixte amã tanhmã amnhĩ nhĩpêx to ho ixpa xwỳnh ã amnhĩ jarẽ. Nà ãm hãmri na ka pre ã inhmã jare hkukamã harẽnh anẽ. Tã ate inhmã harẽnh xà hkõt pa ra inhno ho omu. Kêp mẽ ixkamã ukaprĩ xwỳnh ã omu. Nẽ kêp ate mẽ ixwỳr mẽnũh xwỳnh ã omu. Nà koja te arĩgro hã myt hirã nẽ mẽmoj piitã ho amnhĩrĩt mex pyræk o koja mẽ inhĩpêx o pa. Jakamã koja hprêk hãmri nẽ ma Ijaew kêt xwỳnhjê mã apê Tĩrtũm ã akapẽr o amnhĩrĩt o pa nhũm mẽhprĩ hã ajarẽnh ma. Nẽ mẽ ixpê Ijaew kot paj mẽ ijaxwỳja kuma nẽ hã ixpijaàm o ri ixpa. Jakamã kot paj ixàmnhĩx ri tanhmã amnhĩ nhĩpêx to ho ri ixpa nẽ ixàmnhĩx ty. Ra ixte inhno ho ate inhmã harẽnh xwỳnhhta pumunh kênã. Anẽ.

33Nhũm pre ã Simeãw Jejus jarẽnh anẽ. Nhũm katorxà mẽ hipêêxà purota wa amnhĩ jaêr pê kot ã harẽnh anhỹrja mar o xa.

34-35Hãmri nhũm Simeãw wa ho Tĩrtũm wỳ nẽ kãm: —E Tĩrtũm. Kêr ka ja wa ho mex nẽ. Wa ho mex o wa ho mex rãhã ho apa. Anẽ. Hãmri nẽ Marir mã kapẽr nẽ kãm: —Nà ãm hãmri na pre Tĩrtũm mẽ pakaxyw akrata xãm. Mẽ pahpê Ijaew kaxyw ãm. Jakamã koja hprêk nẽ ma Tĩrtũm kapẽr o mẽ piitã mẽ ahkre ho ri mẽ hkõt pa. Nhũm mẽ kuma hãmri nẽ ahpỹnhã tanhmã

hamaxpër to xà hkôt tanhmã hipêx to. Jakamã nhũm mẽ hkwỳjaja kuma nẽ hkôt amnhĩ xunhwỳ nẽ hkôt amnhĩ nhĩpêx o pa. Jao tãm hipêx o pa. No nhũm mẽ hkwỳjaja kuma nẽ axtem nẽ kãm hkĩnh kêt nẽ. Hãmri nẽ tanhmã hipêx to. Jakamã kot kaj tee ri ja hã mẽ omu nẽ akaprĩ htỳx nẽ. Te mẽ kot wapo ho akanhwỳr nẽ akamã ho kaxkep nhũm apê omnuj tỳx pyræk o kot kaj amnhĩ kamã ama nẽ mẽ omu. Anẽ.

ãnti kot Jejus pumunh ã harẽnh

Wam Ximotre 5.5

36-38Rôm nhũm mẽhõ ni pẽ ãntija mẽ hwỳr axà nẽ Jejus pumu. ãntija Panuew kra na pre. Nẽ Ase hkwỳ na pre. Ni htã kệp Tĩrtũm nhỹ hã kapër jarẽnh o pa xwỳnh. Na pre ra mjên no ãm kormã mjên nẽ pa hã amgrà pẽ 7 pix nhũm pre kệp ty. Hãmri nhũm axte mjên kêt nẽ pa rãhã ra hpigêx tỳx nẽ. Ra hã amgrà pẽ 84. Na pre hte Tĩrtũm mã amnhĩ jarẽnh xà hã ixkre hwỳr pa nẽ kãm amnhĩ jarẽnh rãhã ho pa. Nẽ kot kãm amnhĩ jarẽnh kaxyw nẽ apkur kêt rãhã kãm amnhĩ jarẽ. Nẽ arĩgro hã hwỳr pa nẽ kamàt kãm hwỳr pa. ã na pre hte amnhĩ nhĩpêx anhỹr rãhã ho pa anẽ. Jakamã mẽ hwỳr axà nẽ Jejus pumu nẽ hkĩnh nẽ. Hãmri nẽ hã Tĩrtũm mã mex o mex ã harẽ nẽ kãm: —Hêxta gàa nẽ Tĩrtũm. ãm hãmri na ka mẽ ixwỳr Jejus mẽ. Ma amex o amex. Anẽ. Hãmri nẽ Ijaew kot amnhĩ wỳr mẽ kamã ukaprĩ xwỳnh kamã hamak xwỳnhjê mã ra Jejus kator ã harẽnh o ri mẽ hkôt pa.

Marir mẽ Juje wa kot akupỹm Najare hwỳr mõi ã wa harẽnh

Matêwre 2.19-23

39Tã nhũm Marir mẽ Juje wa Tĩrtũm kapër ã kagà htũm kôt Tĩrtũm mã amnhĩ jarẽnh xà hã ixkre kamã tanhmã amnhĩ nhĩpêx to hpa hãmri nẽ kato nẽ ma akupỹm mõi. Ma Garirej kamã õ krĩ pẽ Najare hwỳr wa ma akupỹm mõi.

40Tã nhũm wa hkrata ra wa kãm hprêkre ho mõi. Nẽ mex nẽ àhpumunh tỳx nẽ. Tĩrtũm kot tãnopxar nẽ mẽmoj to kutã nojarêt rãhã ho pa jakamã nhũm mex nẽ hkĩnh nẽ pa.

Marir mẽ Juje wa kot tee ri Jejus japêr ã wa harẽnh

Rukre 4.22

⁴¹Nhũm pre hte Marir mẽ Juje wa amgrà mẽ hkwỳjê hkôt ma Jerujarẽ hwỳr pa. Mẽ kot arĩgro pẽ Pas ã hkĩnh kaxyw. Pas ã na hte mẽ kęp Ijaew amnepẽm Tĩrtũm kot pika pẽ Ejit rũm mẽ hpãmjê katorja mã hamaxpẽr kaxyw axpẽn wỳr akuprõ nẽ hã hkĩnh. Jakamã nhũm wa ma mẽ hkôt hã hkĩnh kaxyw Jerujarẽ hwỳr hkwỳjê hkôt mỗ.

⁴²Nhũm ra Jejus hprêk o mỗ. Ra hã amgrà pẽ 12 jakamã nhũm wa ma amnhĩ kôt o mỗ.

⁴³⁻⁴⁴Tã nhũm mẽ hkĩnh pa hãmri nẽ akupỹm nojarêt nhũm Marir mẽ Juje wa ma hkwỳjê hkôt akupỹm mỗ. Nhũm Jejus Jerujarẽ kamã ahte arĩk nẽ akupỹm wa hkôt mỗr kêt nẽ. Nhũm wa htỳx wam ma hkwỳjê hkôt htẽm ã hkamnhĩx jakamã wa hapêr kêt nẽ. Hãmri nẽ wa hapu hã hamakêtkati nẽ mẽ hkôt mỗr o mỗr ã ra hã kamàt. Hãmri nẽ mẽ kot amnhĩm hikranh xàja wỳr mẽ hkôt pỏj nẽ tee ri mẽ hkaêx ã hkra japêr o ri mra nom omunh kêt nẽ.

⁴⁵Jakamã nhũm apkati nhũm wa awjanã nẽ ma akupỹm Jerujarẽ hwỳr mỗ nẽ kamã hapêr o ri pa.

⁴⁶Nom tokyx kãm kator kêt nẽ. Mẽ hkaêx ã tee ri hapêr o pa hã apkati axkrut. Nẽ nõ nhũm apkati nhũm wa tã Tĩrtũm mã amnhĩ jarẽnh xà hã ixkreja wỳr hapêr o mỗ nẽ hwỳr axà. Hãmri nẽ omunh kurê kumrẽx. Nhũm arĩ mẽ kot Tĩrtũm kapêr tũm o mẽ ahkre xwỳnhjê mar o mẽ kutã nhỹ. Nẽ mẽmoj tã ri mẽ hkukja nẽ tanhmã mẽ kãm ujarẽnh to.

⁴⁷Nhũm mẽ kot mar xwỳnhjaja tee ri kapêr ã kuma nẽ àhpumunh tỳx ã omu hãmri nẽ akryk mar o hkrĩ.

⁴⁸Hãmri nhũm Marir mẽ Juje mẽ hwỳr axà nẽ mẽ kuri wa hkraja pumunh kurê kumrẽx. Hãmri nhũm katorxàja hwỳr tẽ nẽ kãm: —Xê Jejus. Mon ka axtem nẽ ã ri amnhĩ nhĩpêx anẽ nẽ akupỹm wa ixkôt amỗr kêt nẽ? Na pa wa mỗ nẽ mẽ pahkwỳjê hkôt pỏj nẽ tee ri mẽ hkaêx ã ajapêr nẽ tee ri akukamã ijamaxpêr. Anẽ.

⁴⁹Hāmri nhūm amnhĩ tã wa kuma nẽ wa kãm: —Tỳ. Nom Inhĩpêêxà nhõrkwỹ kamã ixarĩk kênã na ka wa tee ri ixkukamã ajamaxpêr nẽ ijapêr o ri apa. Anẽ.

⁵⁰Hāmri nhūm wa kuma nẽ ã kot amnhĩ jarênh anhỹrja kukamã tee ri hamaxpêr.

⁵¹Hāmri nẽ mẽ ma akupỹm mõi nẽ Najare hwỳr pøj nẽ kamã pa. Nhūm pre Jejus wa kapêr kôt ri amnhĩ nhĩpêx rãhã ho pa. Hāmri nhūm katorxàja hkrax rĩm mẽ kot kãm tanhmã hkra kot amnhĩ nhĩpêx to hkukamã harênhja pix kukamã hamaxpêr rãhã ho pa.

⁵²Gaa nhūm Jejus ra àptàr o mõi. Nẽ àhpumunh tỳx nẽ. Nhūm mẽ piitã ã kot amnhĩ nhĩpêx anhỹr ã omu nẽ kãm hkĩnh nẽ. Nhūm Tĩrtũm haxwỳja kãm hapê nẽ.

Rukre 3

Juãw Paxis kot Tĩrtũm kapêr jarênh o pa hã harênh

Matêwre 3.1-10; Makre 1.1-8; Juãw 1.19-28

¹⁻²Tã nhūm kormã pahihti Tipeja mẽ ho amnhĩptàr o pa. Na pre ra mẽ ho amnhĩptàr ã amgrà pê 15. Nhūm Põn Piratja pahihti Xipe mã pika pê Ijaew nhõ xwỳnhjê ho amnhĩptà. Nhūm Eroxa kãm pika pê Garirej nhõ xwỳnhjê ho amnhĩptà. Nhūm Erox tõi Firipja kãm pika pê Iturej nẽ hõ pê Takonĩt wa kamã mẽ pa xwỳnhjê ho amnhĩptà. Nhūm Risãnja kãm pika pê Apirên kamã mẽ ho amnhĩptà. Nhūm Anas mẽ Kajpasja wa kêp Ijaew nhõ patre maati. Rôm nhūm Jejus mẽ Jakaris kra Juãwja wa ra hamẽ anhĩpê àptàr. Jakamã nhūm Tĩrtũm tanhmã Juãw mã kapêr to. Kormã kapôt ã ri pa ri nhūm kãm kapêr nẽ kãm tanhmã kot amnhĩ nhĩpêx to ho pa hã kãm karõ nẽ kãm: — Pa Juãw. E inhma. Kêr ka ma mẽ kãm ixkapêr jarênh rãhã ho ri apa. Anẽ.

³Hāmri nhūm kuma nẽ ma ri mẽ kãm kapêr jarênh o pa. Pyhti pê Jotãw mỳri mẽ piitã mẽ kãm harênh o ri pa nẽ hpãnhã ihkjê hã ri mẽ pa xwỳnhjê mã harênh o ri pa. Nẽ mẽ kãm: —E kwa mẽ tokyx amã amnhĩ tomnuj kaga hprãm xàj tãm ri amnhĩ nhĩpêx. Kê Tĩrtũm ja hã mẽ apumu nẽ mẽ anê mẽ

ate amnhĩ tomnuj o hapêx pa. Pa mẽ piitã mẽ kot mẽ apê Tĩrtũm kra hã mẽ apumunh kaxyw mẽ akrã kumrã. Anhỹr o mẽ kãm kapêr o ri pa.

⁴⁻⁵Na pre ra amnepêem mẽ hkukamã Tĩrtũm nhỹ hã kapêr o pa xwỳnh Ijais ra Juãw kukamã kot tanhmã amnhĩ nhĩpêx to hã harẽ nẽ hã kagà. Nẽ hã kagà ho: Koja nhỹrmã mễhõ mơn pøj. Kapôt ã mơn pøj nẽ mẽ kãm ujarênh o ri pa. Nẽ mẽ kãm ujarênh o: “E mẽ inhma. Koja Tĩrtũm tokyx mẽ pahwỳr mẽ panhõ pahihti mẽ nhũm wrỳ nhũm mẽ piitã omu. Jakamã kwa mẽ tokyx kutêp tãm amnhĩ nhĩpêx o apa. Te ho mẽ kot mễhõ kutêp pry ho mex pyrãk o amnhĩ nhĩpêx. Jao tãm amnhĩ nhĩpêx. Nẽ tãm axpẽn nhĩpêx. Pahihtita kutêp. Mẽ pahte amnhĩ nhĩpêx te kot pry nhĩnur pyrãk nhũm mẽ tee ri kot kãm hã mrar mex prãm kaprỳ pyrãk. Hinur nẽ krã hakỳx nẽ pry juk pyrãk o na mẽ pahte amnhĩ nhĩpêxja. Jakamã kot kaj mẽ ate amnhĩ tomnuj kaga nẽ tãm amnhĩ nhĩpêx. Nẽ tãm axpẽn nhĩpêx. Hãmri nẽ te mẽ kot pry nhĩnur o mex nẽ ho katàt nhũm katàt muux nẽ nờr pyrãk o kot kaj mẽ amnhĩ nhĩpêx. Pahihti nywta kutêp. Kwa kêr ka mẽ ã amnhĩ nhĩpêx anẽ.

⁶Kot kaj mẽ anẽ nhũm mẽ ohtô nẽ ja hã mẽ apumu hãmri nẽ mẽ apyrà Tĩrtũm kot mẽ ho hkra kaxyw amnhĩ to kuwỳ.” Anhỹr o mẽ kãm ujarênh o pa. Anẽ. Nhũm pre ã finat Ijaisja Juãw Paxis kukamã mẽ kãm ujarênh anhỹr o pa.

⁷Jakamã nhũm àptàr nẽ Ijais kot ra hkukamã harênh xà hkôt ma Tĩrtũm kapêr o mẽ ahkre ho pa. Nhũm prem kuma hãmri nẽ kot mẽ hkrã kumrãr kaxyw hwỳr amnhĩ to mra. Nhũm mẽ omu nẽ tanhmã mẽ ahkre hto. Nẽ mẽ kãm kapêr kãm hihtỳx nẽ mẽ kãm: —Tk. Kwa kormã. Mẽ ate amnhĩ tomnuj pix o ri apa xwỳnh kênã. Xà kot paj mẽ ate amnhĩ tomnuj rãhã mẽ akrã kumrã nhũm Tĩrtũm ja hã mẽ apumu nhũm ja kãm mex nà? Nà koja ja kãm mex kêt nẽ. Koja ja mỳrapê nhỹrmã tanhmã mẽ anhĩpêx to ka mẽ tee ri umaj apimxur prãm kaprỳ.

⁸—Na htem amnhĩ tomnuj kaga nẽ hpãnhã tãm amnhĩ nhĩpêx. Nẽ tãm ri axpẽn nhĩpêx. Jakamã e kwa mẽ ã amnhĩ nhĩpêx anhỹr o apa. No na ka htem atỳx ri ajamaxpêr o: “Mẽ ixpê finat Apraãw kanrêhã htàmnhwỳ

jakamã koja Tirtũm ja hã mẽ ixpumu hãmri nẽ mẽ ixte amnhĩ tomnuj mỳrapê tanhmã mẽ ixto hkêt nẽ. Koja ãm mẽ ixto mex rãhã nẽ.” Anhỹr o atỳx ri amnhĩ kukamã ajamaxpěr o apa. Nom ja kot anhỹr kêt. Mẽ apê Apraãw kanrêhã htàmnhwỳ htã uràk nẽ tãm amnhĩ nhĩpêx o apare hã. Kot ka mẽ apê kanrêhã htàmnhwỳ htã amnhĩ tomnuj o ri apa hãmri nẽ Tirtũm noo mã te mẽ apê pikap kênre nhĩkwỹ pix pyràk.

⁹—Na ra Tirtũm kot mẽ ate amnhĩ tomnuj mỳrapê tanhmã mẽ ato kaxyw. Koja mẽ anhĩpêx o te mẽhõ nhõ mẽmoj pàr ô hkêt nhũm kot tee ri omunh hãmri nẽ krãhyr nẽ kuwy kamã mẽnh nẽ ho xêt par pyràk o mẽ anhĩpêx. Jao amnhĩ nê kuwy hwỳr mẽ arênh pa ka mẽ kamã amnhĩ xà htỳx kamã ajamak rãhã ho ri apa. Anẽ. Nhũm pre ã Juãw Paxisja mẽ kãm kapěr anẽ.

¹⁰Hãmri nhũm mẽ kuma nẽ tee ri amnhĩ kukamã hamaxpěr nẽ kãm: —Kwa xô wehe? Xà koja ã mẽ inhĩpêx anẽ? Kwa tanhmã kot paj mẽ kot ã mẽ inhĩpêx anhỹr pymaj amnhĩ nhĩpêx to wehe? Anẽ.

¹¹Hãmri nhũm mẽ kãm: —Nà kêt ka mẽ axpên kãm axukaprĩ ho ri apa. Nẽ mẽ kêp amrakati xwỳnhjê mã amnhĩ kutã mẽmoj nhõr o ri apa. Nẽ mẽ anhĩnôhkà axkrut nẽ mẽhõ hinôkà hkêt xwỳnhjê mã ho pyxi nẽ agõ nẽ pyxi nẽ ho arĩk. Nẽ mẽ axàpkur xà ho anhõxỳ ho apa hkêt nẽ. ãm axàmnhĩx ri mẽ kêp amrakati xwỳnhjê mã amnhĩ kutã mẽ kãm mẽmoj to hkryre nẽ agõ. E kêt ka mẽ ã axpên nhĩpêx anhỹr o ri apa. Anẽ.

¹²Hãmri nhũm Rõm kãm mẽ õ pahĩti mã mẽ piitã mẽ kêp kàxpore hkwỳ jamỳnh xwỳnhjaja mẽ uràk nẽ hwỳr mra. Kot mẽ uràk nẽ mẽ hkrã kumrãr kaxyw hwỳr mra nẽ kãm: —No we mẽ pajaja? Tanhmã kot paj wem amnhĩ nhĩpêx to? Anẽ.

¹³Hãmri nhũm mẽ kãm: —Nà mẽ kajaja kêt ka mẽ Rõm nhõ pahĩ kot mẽ amã mẽ ate mẽ kêp kàxpore hkwỳ jamỳnh jarênh xà hkôt pix mã hamỳnh o ri apa. No mẽ atỳx ri amnhĩ krã hkôt amnhĩm hkwỳ jamỳnh prãm xàj mẽ kãm hkre kamã ho rũnh nẽ mẽ kãm harênh o ri apa hkêt nẽ. Anẽ.

¹⁴Hãmri nhũm hpãnhã pòristi hkwỳjaja hwỳr mra nẽ kãm: —Kwa no we mẽ pajaja? Tanhmã kot paj wem ri amnhĩ nhĩpêx to ho ixpa? Anẽ. Hãmri nhũm

mě kām: —Nà kêr ka mẽ anhõ pahшти kot mẽ axapênh pãnhã mẽ amã kàxpore nhõrta pix jamỳ nẽ ajamakêtkati nẽ axamnhĩx ri ho amnhĩm axujaprõr o ri apa. No mẽ akwỳjaja kām apyma nẽ mẽ amã kàxpore nhõr prãm xàj ri mẽ kām tanhmã amnhĩ pyma hto ho ri apa hkêr nẽ. E kêr ka mẽ ã amnhĩ nhĩpêx anhỹr o ri apa. Anẽ.

Juãw Paxis kot tanhmã Jejus jarênh to hã harênh

Matêwre 3.11-12; Makre 1.7-8; Juãw 1.19-28; määnên Atre 19.4

15Nhũm pre ã Juãw Paxisja mẽ kām kapêr anẽ. Nhũm mẽ kuma nẽ htỳx kêp Tĩrtũm kot mẽ pakaxyw ãm mã xwỳnhta ã hkamnhĩx.

16Hãmri nhũm amnhĩ tã ã mẽ hamaxpêr anhỹr ã mẽ omu hãmri nẽ mẽ kām amnhĩ tã aprã nẽ mẽ kām: —Nà pa hkêr. Na pa hte ãm Tĩrtũm mã gô pix o mẽ hkrã kumrãr o ri ixpa. No koja tokyx ixpãnhã Tĩrtũm kot mẽ pakaxyw ãm xwỳnhta tãm mẽ pahwỳr pôj. àhpumunh tỳx o kot ijakrenh jakamã na pa hte ãm kukwak ri ixpa nẽ hã ixpijaàm o ri ixpa. Tĩrtũm kot mẽ pakaxyw ãm xwỳnhta koja mẽ awỳr Karõ rẽ nhũm mẽ akaxwỳnh mã agjê ka mẽ ỹ hã tãm ri amnhĩ nhĩpêx rãhã ho ri apa. Nom kormã mẽ kot tãm amnhĩ nhĩpêx hkêr xwỳnhjaja koja ja hã mẽ omu hãmri nẽ mẽ hipêx o te kuwy kot mẽmoj to kaxàr par pyrãk o mẽ hipêx.

17—Na htem pur kām harôj nhĩkê nẽ ho grà nẽ hpãnhã kahtwỳ. Nẽ kahuk pa hãmri nẽ hkapĩ nhũm kôk apê nẽ prỳhkà ho htor nẽ ho hapêx pa. Nhũm mẽ hy ho pa nẽ ixkre kamã gôj kām unhwỳ. Ja pyrã nẽ koja tokyx Tĩrtũm mẽ piitã mẽ kot tanhmã amnhĩ nhĩpêx to ho pa hã mẽ omunh xà hkôt mẽ ho axkjê. Mẽ kot tãm amnhĩ nhĩpêx o mẽ pa xwỳnhjaja koja ma amnhĩ wỳr mẽ ho api nhũm mẽ kuri mex nẽ hkĩnh rãhã nẽ pa ho pa. No mẽ kot amnhĩ tomnuj xwỳnhjaja koja mẽ hkĩnhã tanhmã mẽ hipêx to nhũm mẽ ma kuwy raxja wỳr pa nẽ kamã amnhĩ xà htỳx kamã hamak rãhã nẽ pa ho pa. Anẽ.

18Nhũm pre ã Juãw Paxis Tĩrtũm kapêr o mẽ ahkre anhỹr o pa.

Juãw Paxis kot Jejus krã kumrãr ã harênh

Matêwre 3.13-17; Makre 1.9-11

¹⁹Tã nhũm Ijaew nhõ pahi Eroxo ra htõ hprõ pê Eroxis pytà nẽ ho hprõ nhũm Juãw Paxisja harẽnh ma nẽ ma hwỳr tẽ nẽ hã kãm akir. No ãm ja pix ã kãm àkjêr kêt nẽ. Mããnẽn tanhmã kot amnhĩ tomnuj tỳx to ho pa hã kãm akir.

²⁰Nhũm amnhĩ tã kuma nẽ kamã gryk tỳx nẽ amnhĩ tã mẽ kãm hã amýnê nhũm prem unê nẽ haxà. Jao amnhĩ tomnuj tỳx nẽ.

²¹Nom kormã mẽ kot haxàr kêt ri nhũm Juãw Paxis Ijaew kwỳjê krã kumrãr o xa. Rôm nhũm Jejusja hãmri tãm nhỹhỹnh hwỳr tẽ nẽ kot hkrã kumrãr kaxyw kãm anẽ nhũm kuma nẽ hkrã kumrã. Hãmri nhũm Jejus gôj rũm api nẽ kormã gô mỳ ri Tĩrtũm mã amnhĩ jarẽnh o xa.

²²Pu nhũm kaxkwa axkjê nhũm kurũm Tĩrtũm Karõ te tuuti pyrã nẽ hwỳr wrỳk o tẽ nẽ ìkre hã xa. Hãmri nhũm kaxkwa rũm Tĩrtũm kãm kapêr nẽ kãm: Pa? E apê Ixkra mex na ka. ãm hãmri na ka hte ixkanrêhã amnhĩ nhĩpêx o apa. Inhmã ajapê kamã na ka ri apa ho apa. Anẽ.

Jejus kukamã higêt nẽ hpãmjê nhĩxi hã harẽnh

Matêwre 1.1-17

²³Tã nhũm Jejus Tĩrtũm mã kapêr o mẽ ahkre ho pa hkra. Na pre ra hã amgrã pê 30 hãmri nẽ kãm ho hkra. E kot paj hpãnhã amã Jejus kukamã hpãmjê nhĩxi jarẽ Teopre. Ijaewjaja na prem htỳx ho Juje kêp Jejus nhĩpêêxà kumrêx ã hkamnhĩx nom kêp hipêêxà kumrêx kêt ãm kêp hipêêxà puro na pre. Jejus kêp Eri htãmnhwỳ na pre.

²⁴Nẽ Eri kêp Matat kra na pre. Nẽ Matat kêp Rewi hkra na pre. Nẽ Rewi kêp Mewki hkra na pre. Nẽ Mewki kêp Jãnaj kra na pre. Nẽ Jãnaj kêp axtem Juje hõ hkra na pre.

²⁵Nẽ Juje kêp Matatis kra na pre. Nẽ Matatis kêp Amõs kra na pre. Nẽ Amõs kêp Naũ hkra na pre. Nẽ Naũ kêp Eri hkra na pre. Nẽ Eri kêp Nakai hkra na pre.

²⁶Nẽ Nakai kêp Mate hkra na pre. Nẽ Mate kêp axtem Matatis õ hkra na pre. Nẽ Matatis kêp Semeĩ hkra na pre. Nẽ Semeĩ kêp Juje hõ hkra na pre. Nẽ Juje kêp Jotre hkra na pre.

²⁷Ně Jotre kêp Joanãn kra na pre. Ně Joanãn kêp Rej kra na pre. Ně Rej kêp Joropape hkra na pre. Ně Joropape kêp Saraxi kra na pre. Ně Saraxi kêp Neri hkra na pre.

²⁸Ně Neri kêp axtem Mewki hõ hkra na pre. Ně Mewki kêp Axi hkra na pre. Ně Axi kêp Kojã hkra na pre. Ně Kojã kêp Ematã hkra na pre. Ně Ematã kêp Erti hkra na pre.

²⁹Ně Erti kêp Jojue hkra na pre. Ně Jojue kêp Eries kra na pre. Ně Eries kêp Jorĩ hkra na pre. Ně Jorĩ kêp Matat hkra na pre. Ně Matat kêp axtem Rewi hõ hkra na pre.

³⁰Ně Rewi kêp Simeãw kra na pre. Ně Simeãw kêp Juta hkra na pre. Ně Juta kêp axtem Juje hõ hkra na pre. Ně Juje kêp Janã hkra na pre. Ně Janã kêp Eriakĩ hkra na pre.

³¹Ně Eriakĩ kêp Merea hkra na pre. Ně Merea kêp Mena hkra na pre. Ně Mena kêp Matata hkra na pre. Ně Matata kêp Natã hkra na pre. Ně Natã kêp Tawi hkra na pre.

³²Ně Tawi kêp Jese hkra na pre. Ně Jese kêp Opex kra na pre. Ně Opex kêp Poas kra na pre. Ně Poas kêp Sarã hkra na pre. Ně Sarã kêp Nasõ hkra na pre.

³³Ně Nasõ kêp Amĩnatap kra na pre. Ně Amĩnatap kêp Amĩ hkra na pre. Ně Amĩ kêp Ari hkra na pre. Ně Ari kêp Erõ hkra na pre. Ně Erõ kêp Pere hkra na pre. Ně Pere kêp Juta hkra na pre.

³⁴Ně Juta kêp Jako hkra na pre. Ně Jako kêp Ijak kra na pre. Ně Ijak kêp Apraãw kra na pre. Ně Apraãw kêp Tera hkra na pre. Ně Tera kêp Nako hkra na pre.

³⁵Ně Nako kêp Jeruk kra na pre. Ně Jeruk kêp Rakau hkra na pre. Ně Rakau kêp Parek kra na pre. Ně Parek kêp Epti hkra na pre. Ně Epti kêp axtem Sara hõ hkra na pre.

³⁶Ně Sara kêp Kajná hkra na pre. Ně Kajná kêp Apaxat kra na pre. Ně Apaxat kêp Sěre hkra na pre. Ně Sěre kêp Noehti hkra na pre. Ně Noehti kêp Ramek kra na pre.

³⁷Ně Ramek kêp Metujarě hkra na pre. Ně Metujarě kêp Enok kra na pre. Ně Enok kêp Jarate hkra na pre. Ně Jarate kêp Marerer kra na pre. Ně Marerer kêp axtem Kajná hõ hkra na pre. Ně Kajná kêp Enos kra na pre.

³⁸Ně Enos kêp Set kra na pre. Ně Set kêp Atāw kra na pre. Ně Atāw kêp Tirtūm kra na pre. Tirtūm kot wam my pê Atāwja pika ho hipêx jakamã te kêp hkra pyræk. Ā Jejus kukamã hpãmjê nhīxi kot anhÿr.

Rukre 4

Satanasti kot amnhī tā Jejus kamã hamak ā harēnh

Matēwre 4.1-11; 16.23; Makre 1.12-13; 8.33; määnēn Eprēw 2.18; 4.15

¹Tā nhūm Jejus pyhti pê Jotāw rūm akupÿm ma mō. Hāmri nē Tirtūm Karō nhÿ hã mēmoj kutã amnhī to htÿx nē. Jakamã nhūm nhÿhÿm ma kapôt wÿr o mō

²nhūm Satanasti omu nē ma hwÿr tē nē ri hkôt pa. Kapôt ā ri hkôt hēx rom tanhmã kãm nē ho pa. Kot mar nē Tirtūm kapēr nhîrôp ãm prãm xàj ma hkôt tanhmã kãm kapēr to ho pa. Hāmri nē hkôt pa o hã arĩgro pê 40 nhūm Jejus kormã apkur kêt o hã arĩgro pê 40 nē hapêx nhūm ra kãm prãm tÿx nē.

³Hāmri nhūm Satanasti kãm: —Kwa mãn ka ra amã prãm tÿx kumrēx nà? Nom xep apê Tirtūm Kra jakamã mēmoj tanhmã apê kute hkêt. Kwa kēn nhīkwÿ mÿj mã anē kê amã pãwti hã amnhī jahkre ka aku nē tokyx ho amnhī xihtÿx. E kwa tokyx kãm anē. Anē.

⁴Hāmri nhūm kuma nē kãm: —Tk. Nà kot paj akapēr mar xà hkôt tanhmã amnhī nhîpêx to hkêt nē. Kojã Tirtūm kãm inhmã mēmoj nhõr prãm nē inhmã mēmoj gō pa arĩ kormã kukrē. Kapēr ā kagà htūm kot ja jarēnh kot: Na htem mē apkur xà pix kukwak ri htÿr nē pa hkêt nē. Na htem määnēn Tirtūm kapēr mar xà hkôt tanhmã ri amnhī nhîpêx to ho pa ho htÿr nē mex

ně pa. Aně. Ā kapēr ā kagà kot ja jarēnh kot anhyr jakamā kot paj amar xà hkôt ā ri amnhĩ nhĩpêx anhyr kêt nē. Ām kwarĩ ho kwarĩ. Aně.

⁵Nhũm pre ā Jejus Satanasti mǎ kapēr aně nhũm tee ri kuma hāmri nē hpānhā ma nhỹhỹm o mō nē nhỹri kỳx pē mẽmoj prēeti nhĩmōk ā o xa. Hāmri nē kām pika piitā ahkre ho xa. Nē kām mẽ hikukrêx piitā ahkre. Kàxpore nē mẽmoj piitā nhũm kām ahkre hpa nhũm anhyr omunh o xa.

⁶Hāmri nhũm Satanasti kām: —E mǎn ka kam ri mẽmoj mũj piitā omu. Piitā inhō na. Inhmā na pre Tĩrtũm piitā ōr pa. Kot paj inhmā mēhō mǎ ōr prām nē kām kugō.

⁷Tǎ amā kot paj kugō. Jakamā e. Kwa tokyx ixkutā tēm nē inhmā inhmex o inhmex ā ijarē pa ama nē rĩ amā piitā ōr pa. E tokyx. Aně.

⁸Hāmri nhũm kuma nē kām: —Tk. Kot paj amā amex o amex ā ajarēnh kêt kumrêx. Ām kwarĩ ho kwarĩ. Amexti hǎ. Tĩrtũm kapēr ā kagà htũm kot ja nē kapēr kām hihtỳx kēnǎ. Kapēr kot: Kêr ka mẽ ixkapēr pix ma. Nē ixkutā pix mǎ mǎn akōnkrǎ ho akrĩ nē inhmā inhmex o inhmex ā ijarēnh o ri apa. Kêr ka mẽ ā amnhĩ nhĩpêx anhyr o ri apa. Anhyr o kot harēnh jakamā kot paj ri amā amex o amex ā ajarēnh kêt nē Satanasti. Aně.

⁹Nhũm pre ā Jejus amnhĩ nē kām kapēr aně. Hāmri nhũm tee ri kuma nē hpānhā ma krĩ pē Jerujarē hwỳr o mō. Nē mẽ kot Tĩrtũm mǎ amnhĩ jarēnh xà hǎ ixkre hprêk nhĩmōk wỳr ho api nē kỳxpê hatur xà hǎ ām nhũm xa. Nhũm amnhĩ parpê kēn rũnh nhĩkwỹ pumunh o xa. Hāmri nhũm Satanasti kām: —E apê Tĩrtũm Kra jakamā kwa ja rũm ahpar mǎ ajarĩ nē ma tē nē pikap tēm. Kojā Anhyrêxà apumunh mex nē ka tanhmā amnhĩ to hkêt nē.

¹⁰⁻¹¹Kapēr ā kagà htũm kot ja jarēnh kot: Tĩrtũm kojā kapēr o wryk xwỳnh mǎ ajarē ka ajarĩ nē ahpar mǎ tē nhũm mẽ kỳx pē amỳ nhũm mẽmoj akà hyr kêt nē. Ā kapēr ā kagà kamā ajarēnh kot anhyr jakamā e tokyx ajarĩ nē ma tēn pikap ahto. Aně.

¹²Hāmri nhũm kuma nē kê axte amnhĩ tǎ kām kapēr nē kām: —Tk. Kwa nà. Kot pa ri amar xà hkôt ā amnhĩ nhĩpêx anhyr kêt nē. Kojā Tĩrtũm tām inhmā

ijarĩ hã karõ pa rĩ mar xà hkõt ijarĩ no kot pa ri amar xà hkõt ijarĩ hkõt nẽ. Tĩrtũm kapẽr ã kagà htũm kot ja jarẽnh kot: Kêr ka mẽ amnhĩ krã hkõt amnhĩ tã ixkamã ajamak kaxyw inhĩxi jarẽnh kõt tanhmã amnhĩ nhĩpêx to hkõt nẽ. ã ja nẽ kapẽr kot anhỹr jakamã ãm kwarĩ ho kwarĩ. Kot paj ri amar xà hkõt ã amnhĩ nhĩpêx anhỹr kêt nẽ. Tãm kot inhmã ijarĩ hã karõre hã. Anẽ.

¹³Nhũm pre ã Jejus Satanasti mã kapẽr anẽ hãmri nhũm tee ri mẽmoj piitã ho mar kaprỹ hãmri nẽ hkaga nẽ ma nhỹhỹm tẽ. Hãmri nẽ kot nhỹrmã axte hwỹr htẽm nẽ kot mẽmoj punuj o mar kaxyw kormã amnhĩm hamãr o ri pa.

Jejus kot Tĩrtũm kapẽr o mẽ ahkre ho hkrax ã harẽnh

Matêwre 4.12-17; Makre 4.14-15

¹⁴Tã nhũm Jejus ma akupỹm Garirej wỳr mõ. Nẽ Tĩrtũm Karõ nhỹ hã àhpumunh tỳx nẽ hkwỳjê mã kapẽr jarẽnh o ri pa. Nhũm mẽ kuma nẽ piitã pikaja kamã axpẽn mã tanhmã harẽnh to.

¹⁵Na pre hte mẽ kot Tĩrtũm kapẽr o mẽ ahkre xà hã ixkre hwỹr agjê nẽ kamã mẽ ahkre ho hkrĩ. Nhũm mẽ piitã kuma nẽ kãm mar prãm nẽ. Hãmri nẽ axpẽn mã mex ã harẽnh o ri pa.

Najare kamã mẽ kot Jejus kaga hã mẽ harẽnh

Matêwre 13.53-58; Makre 6.1-6; Juãw 1.11

¹⁶Tã nhũm Jejus ma akupỹm krĩ kamã àptàr xàja wỳr ma mõ. Najare hwỹr. Hãmri nẽ kamã pøj. Nhũm Ijaew nhõ arĩgromnu pê sap kato nhũm Jejus ma mẽ hkõt Tĩrtũm kapẽr o mẽ ahkre xà hã ixkre hwỹr tẽ. Hãmri nẽ hwỹr axà nẽ mẽ kuri nhỹ. Hãmri nẽ kamã mẽ kãm Tĩrtũm kapẽr ã kagà htũm kamã harẽnh kaxyw kànhmã xa

¹⁷nhũm mẽ omu nẽ kãm ja gõ. Finat Ijais pê Tĩrtũm nhỹ hã kapẽr xwỳnh kot Tĩrtũm kapẽr kwỳ hã kagàja nhũm mẽ kãm kugõ. Hãmri nhũm kupy nẽ kamã kormã Tĩrtũm kot tanhmã mẽmoj jarẽnh to hõ japêr o xa. Nẽ kãm kato hãmri nẽ mẽ kãm kamã harẽ. Nom amnhĩ tã kamã mẽ kãm harẽnh o xa nẽ mẽ kãm:

¹⁸Na pre ra Tĩrtũm Karõja ixto ixàhpumunh tỳx nẽ mẽ kêp amrakati xwỳnhjê hwỹr inhmẽ pa ra mõ. Ixte mẽ kãm mẽmoj mex jarẽnh o ixpa kaxyw. Nẽ

Satanasti kot amnhĩ kôt mẽ unhwỳr xwỳnhjê hwỳr nhũm pre mãănên inhmẽ. Ixte mẽ nê Satanasti japôx o ixpa kaxyw. Nê mẽ kot hprĩ hã Tĩrtũm kapêr mar kêt xwỳnhjê hwỳr nhũm pre mãănên inhmẽ. Ixprĩ hã ixte mẽ kãm kapêr jarênh o ri mẽ hkôt ixpa kaxyw. Nê mẽ kot amnhĩ tomnuj o mẽ pa xwỳnhjê hwỳr nhũm pre mãănên inhmẽ. Ixte mẽ nê mẽ kot amnhĩ tomnuj rênh pa nhũm mẽ hamakêtkati nê àmnhĩx ri pa kaxyw. Ǻ na pre Tĩrtũm jajê piitã hwỳr inhmên anê pa ra man môn pôj.

¹⁹Nê amgrà ja kêp Tĩrtũm kot mẽ ato mex xà hã amgràja nhũm ixte mẽ amã harênh o ixpa kaxyw na pre inhmẽ pa môn pôj. Anê.

²⁰Nhũm pre Ǻ Jejus Tĩrtũm kapêr Ǻ kagà htũm kamã mẽ kãm amnhĩ jarênh anê. Hãmri nê akupỹm mẽ kãm kagàja gô nê ho mẽ ahkre kaxyw akupỹm nhỹ nhũm mẽ piitã omunh pê mar o hkrĩ.

²¹Hãmri nhũm mẽ kãm tanhmã amnhĩ jarênh to nê mẽ kãm: —E ra Ijais kot Ǻ ixkukamã ijarênh anhỹr xà hkôt na pa mẽ awỳr wrỳ nê mẽ anoo mã Ǻ amnhĩ nhĩpêx anhỹr o hkra. Anê.

²²Hãmri nhũm mẽ amnhĩ jaêr pê Ǻ kot amnhĩ jarênh anhỹr Ǻ kuma. Nê tee ri kuma nê axpên pumunh pê hamaxpêr o hkrĩ. Jejus mẽ kurom àhpumunh tỳx nê kapêr mex tã nhũm mẽ Ǻm kêp amnhĩ kwỳ pix Ǻ hkamnhĩx kãm hihtỳx nê. Hãmri nê axpên mã: —Tk. Kwa kêp Juje hkra pix kênã koja we ri Ǻ amnhĩ jarênh anê. Anê.

²³Hãmri nhũm amnhĩ tã mẽ kuma nê mẽ kãm: —Nà na ka mẽ ixte amnhĩ jarênh ma nom ixkôt ajamaxpêr kêt nê. Jakamã axpên mã ijarênh o: “Tk. Kêp mẽ pahkaprĩ xwỳnh ro nhỹx jar mẽ panhõ krĩ kamã aa mẽ pahte mẽmoj pumunh kêt kwỳ tanhmã mẽ pamã hipêx to pu mẽ hã omu. Te ra kot krĩ pê Kapanau kamã mẽ kãm mẽmoj kwỳ ho anhỹrta pyræk. Pu mẽ omu nê hkôt pajamaxpêr kurê kumrêx.” Anhỹr o ri axpên mã ijarê.

²⁴Koja nhãm krĩ hõ kamã mễhõ kêp Tĩrtũm kapêr jarênh xwỳnh Ǻ amnhĩ jarê ka mẽ harênh ma nê amã ma hwỳr amrar nê mar prãm nê. No kêt jar

mě panhõ krĩ kamã ixpê mẽ anhiõ hã ã amnhĩ jarēnh aně ka mẽ amã inhmar prãm kêt nẽ.

²⁵—Kwa mẽ inhma. Amnepēm kormã finat Eris htĩr ri na pre mẽ hã na wrỳk kêt ry rax nẽ. Jao hã amgrà axkrunēpxi nẽ hkôt mytwrỳ pê 6. Nhũm mẽ õ hkêt nẽ pa. Ra mẽ kệp mẽmoj grà pa nẽ hapêx nhũm mẽ kãm prãm tỳx kumrēx nẽ pa. Nhũm mẽ kệp mẽ mjên tyk xwỳnhjaja kãm prãm xàj hirot o pa.

²⁶Tã nom Tĩrtũm mẽ ho mex kaxyw mẽ hwỳr Eris mẽnh kêt nẽ. Erisja mẽ uràk nẽ kệp Ijaew tã nhũm Tĩrtũm kot mẽ ho ajuta kaxyw mẽ hwỳr mẽnh kêt nẽ. Mẽ kot amnhĩ kaxyw Tĩrtũm kôt hamaxpēr kêt jakamã nhũm mẽ hwỳr mẽnh kêt nẽ. Axtem Ijaew kêt xwỳnhjê hõ hwỳr na pre kumẽ. Nhãm Sitõ kamã krĩ pê Sarep kamã mjên htyk xwỳnhhta wỳr. Tokyx kot tanhmã ho mex to kaxyw. Jakamã nhũm ma hwỳr mõ nẽ tanhmã kãm kapēr to nhũm kuma nẽ amnhĩ kaxyw Tĩrtũm kôt hamaxpēr kurê kumrēx.

²⁷—Nẽ finat Eriasti haxwỳja. Eris pyrà nẽ kệp Tĩrtũm nhỹ hã kapēr o pa xwỳnh tã amnhĩ kwỳ pê Ijaew tanhmã mẽ ho ajuta hto hkêt nẽ. Na prem ohtô nẽ hkà nhy nẽ hkro xàpêr o pa. Jao ra omnuj tỳx nẽ. Tã nhũm Tĩrtũm kot akupỹm mẽ ho mex kaxyw mẽ hwỳr Eriasti mẽnh kêt nẽ. Amnhĩ kaxyw mẽ kot hkôt hamaxpēēre hã. Ām Sir nhõ xwỳnh Namãja pix na pre Tĩrtũm Eriasti mã aně nhũm akupỹm ho mex. Kệp Ijaew kêt tã nhũm akupỹm ho mex. Tã ja pyrà nẽ na pa ãm mẽ kot amnhĩ kaxyw ixkôt hamaxpēr pix xwỳnhjê mã tanhmã amnhĩ nhĩpêx to ho ri ixpa. No mẽ ate amnhĩ kaxyw ixkôt ajamaxpēr kêt xwỳnhjê mã tanhmã ri amnhĩ nhĩpêx to hkêt nẽ. Aně. Nhũm pre ã Jejus mẽ kãm amnhĩ jarēnh aně.

²⁸Hãmri nhũm mẽ kuma nẽ kamã gryk tỳx nẽ axpẽn mã hã amỳnê nẽ axpẽn mã: —Tk. Kwa pu mẽ ixkre nê kator nẽ ma o tẽ nẽ kupĩ ri. Aně.

²⁹Hãmri nẽ kaxyw kànhmã kuhê hpa nẽ hwỳr hprõt nẽ unê. Mẽ kot ma o htēm nẽ hixêt prêk jatur xà hã hkujaêk nhũm ahpar mã tẽn htēm nẽ htyk kaxyw. Mẽ õ krĩja hixêt prêk nhĩmõk ã na pre. Jakamã nhũm prem unê nẽ hatur xàta wỳr o tẽ.

³⁰Tã nom nhũm tanhmã amnhĩ nhĩpêx to nẽ mẽ kêp akunok nẽ hpãnhã nhãm ma tẽ nhũm mẽ tee ri hapêr nom nhỹri omunh kêt nẽ.

Jejus kot mēhō nē mēkarōmnuti kator ã harēnh

Makre 1.21-28

³¹Tã nhũm Jejus ma akupỹm Garirej kamã krĩ pê Kapanaũ hwỳr mō. Nhũm mẽ õ arĩgromnu pê sap kato nhũm ma mẽ kot Tĩrtũm kapêr o mẽ ahkre xà hã ixkre hwỳr tẽ nẽ mẽ ahkre ho nhỹ.

³²Hãmri nhũm mẽ kot mar o hkrĩ xwỳnhjaja kuma nẽ kãm mar prãm nẽ. Nẽ axpẽn mã: —Hêxta waa nẽ. ãm hãmri na ã mẽ pamã kapêr anẽ. Àhpumunh tỳx xà hkôt na hte ãm hãmri mẽ pamã awjarẽ. Anẽ.

³³Nhũm mēhō myja mẽ ãhkô hã haxwỳja mar o nhỹ. Mēkarōmnuti na pre ra hwỳr axà nhũm ã hã tanhmã amnhĩ tomnuj to ho pa. Hãmri nẽ mẽ ãhkô hã Jejus mar o nhỹ nẽ ra àmra kamã tanhmã kãm kapêr to. Nom nhũm tãm kãm kapêr kêt ãm kamã mēkarōmnutija kãm kapêr.

³⁴Nẽ kãm: —Pa? Jejus pê Najare nhō xwỳnh? Nà ate mẽ ixto ajapêx par kaxyw na ka mẽ ixwỳr mō. Ra ixte apumunh mex kênã. Apê Tĩrtũm kot mẽ ixwỳr amēnh xwỳnh maatita na ka. Jakamã kwa tanhmã kot kaj mẽ ixto? Mo kaxyw na ka pre mẽ ixwỳr mō? Anẽ.

³⁵Hãmri nhũm kuma nẽ mēkarōmnuti kot kãm ã kapêr anhyr ã omunh kurê kumrêx. Jakamã kutã kãm kapêr nẽ kãm: —Tk. Kwa anhĩkrê nẽ kêp akato. Anẽ. Hãmri nhũm kuma nẽ myta o pika kura nẽ kêp kato nẽ ma tẽ. ãm ho pika kuranh pix nhũm nō. Hãmri nẽ akupỹm kãnhmã nhỹ nẽ akupỹm mex.

³⁶Hãmri nhũm mẽ piitã omu nẽ kamã no pyma nẽ. Hãmri nẽ axpẽn mã: —Kokỹỹ. Na hte Jejus amnhĩ krã hkôt àhpumunh tỳx xà hkôt mēkarōmnuti mã kapêr nẽ mẽ hano nhũm htem kuma nẽ mẽ kêp hapôx kurê kumrêx. Anẽ.

³⁷Hãmri nhũm mẽ mẽõ pika kamã piitã ri axpẽn mã harēnh o pa.

Jejus kot Simãw Pêtre xupãnhgêx o mex ã harēnh

Matêwre 8.14-15; Makre 1.29-31

³⁸Tã nhũm Jejus Tĩrtũm kapêr o mẽ ahkre xàja rũm kato nẽ ma Simãw Pêtre nhõrkwỹ hwỳr tẽ. Nẽ mẽ hwỳr axà nhũm Simãw Pêtre omu nẽ kãm

upãnhgêx tanhmã kute hã harẽ nẽ kãm: —Kwa Pahihti. Tẽ nẽ inhmã ixupãnhgêx pumu. Na hkà kagro htỳx nẽ amnhĩ to àpêr o nõ. Kwa tẽn inhmã omu. Anẽ. Hãmri nhũm kãm: —Tôe. Nà kot paj amã omu. Anẽ.

³⁹Hãmri nẽ hwỳr tẽn kuri xa nẽ kãm: —Pa? E kwa akà hakry. Anẽ. Hãmri nhũm kuma nẽ hkà hakry nẽ akupỹm hihtỳx kurê kumrêx. Hãmri nẽ kànhmã nhỹ nẽ mẽ kãm mẽõ hã àpênh o ri mra.

Jejus kot mẽ ho ohtô nẽ mẽ ho mex ã harênh

Matêwre 8.16-17; Makre 1.32-34

⁴⁰Tã nhũm ra amỹkry htỳx mẽ nhũm mẽ Jesus wỳr ahpỹnhã ri mẽ à xwỳnhjê ho mra. Nhũm amnhĩ wỳr mẽ omu hãmri nẽ mẽ piitã ri mẽ hã ãhkra jaxwỳ nẽ akupỹm mẽ ho mex pa.

⁴¹Nhũm ra mẽkarõmnuti mẽ hkwyjê hwỳr agjê nhũm mẽ kurũm mẽ hano nhũm mẽ tee ri amnhĩ tã omu nẽ mẽ kêp hapôx kurê kumrêx. Hãmri nẽ mẽ kêp hapôx kaxyw nẽ àmra kamã kãm kapêr nẽ kãm: —Kwa tanhmã kot pa wem amnhĩ nê ato? Hêxta waa nẽ. Apê Tĩrtũm Kra hã axàhpumunh tỳx kênã. Anhỹr o kãm kapêr. ãm hãmri na prem ã harênh anẽ. Kêp Tĩrtũm kot mẽ pakaxyw ãm xwỳnh kênã. No nhũm Ijaew nhõ pahijaja kot mẽ kapêr mar nẽ kêp mẽkarõmnuti hkwy hã hkamnhix pymaj nhũm Jesus amnhĩ nê mẽ kãm kapêr nẽ mẽ kãm: —Kwa mẽ ri ã ijarênh anhỹr kêt nẽ. Anhỹr o mẽ kãm kapêr hãmri nẽ mẽ hano nhũm mẽ hapôj nẽ ma mra.

Mẽmo kaxyw Tĩrtũm kot mẽ pahwỳr Jesus mẽnh ã harênh

Makre 1.35-39

⁴²Tã nhũm apkati nẽ myt kator grire nhũm Jesus kot Tĩrtũm mã amnhĩ jarênh kaxyw kànhmã nhỹ nẽ kato nẽ ma nhỹhỹm kapôt mã tẽ. Hãmri nhũm krĩ nhõ xwỳnhjaja hkrã hapôj nẽ tee ri hapêr nẽ ma hkôt hpri jakop o mẽ. Nẽ nhỹri hwỳr kato nẽ omu hãmri nẽ ma nhỹhỹm mõi nê kurê nẽ kãm: —Kwa Jesus. Kêr ka tokyx ma nhỹhỹm amõi kêt nẽ. Kritpêm mẽ ixkôt axkamẽ mãn. Anẽ.

⁴³Hãmri nhũm mẽ kuma nẽ amnhĩ tã mẽ kãm: —Nà kot paj kritpêm mẽ akôt ixpikamênh kêt nẽ. Kot paj ma krĩ piitã hkôt ri Tĩrtũm kapêr o mẽ ahkre ho ri mẽ hkôt ixpa. Tĩrtũm kot tanhmã mẽ ho hkra hto hã harênhja kot paj mẽ

hkôt ri mẽ kãm harênh o ri ixpa. Ja kaxyw na pre Tĩrtũm mẽ awỳr inhmẽ. Anẽ.

⁴⁴Nhũm pre ã mẽ kãm amnhĩ jarênh anẽ. Hãmri nẽ mẽ kêp kato nẽ ma Ijaew nhõ pika piitã hkôt Tĩrtũm kapêr o mẽ ahkre ho ri pa. Ijaew nhõ Tĩrtũm kapêr o mẽ ahkre xà hã ixkre kamã mẽ piitã ho mẽ ahkre ho ri pa.

Rukre 5

Jejus kot amnhĩ kôt mẽ hkwỳjê hwỳr ã harênh

Matêwre 4.18-22; Makre 1.16-20

¹Tã nhũm Jejus ma gô rax pê Jenêjare hwỳr mỗ. Hãmri nẽ hwỳr pôj nẽ gô mỳri Tĩrtũm kapêr o mẽ ahkre ho xa nhũm mẽ ohtô nẽ pu hã mar o kuhê. Nẽ kot hprĩ hã mar nẽ hkôt omunh kaxyw hã axpên nhĩgãnh o kuhê.

²Hãmri nhũm tee ri amnhĩ tã mẽ omu nẽ amnhĩ pu hã hakêx nẽ rĩt nẽ gôx kãm pàr kaprỳ hamêxkrut nẽ jêtja wa omu. Nhũm ò dôn wa gôx kãm kryhti kuhôn h o xa. Nhũm pàr hamẽ hkaprỳ nẽ ajêt nhũm Jejus omu.

³Hãmri nẽ hwỳr tẽ nẽ hõm axà nẽ ò dôn pê Simãwja mã anẽ nhũm hkôt axà nẽ kii mẽ kêp pàrja amỳm kunhõ nhũm ajêt. Hãmri nhũm pàr kre rũm amỳm mẽ ahkre ho nhỹ nhũm mẽ piitã omu nẽ mar mex o kuhê.

⁴Tã nhũm mẽ ahkre hpa nẽ Simãw mã kãm: —E gô xupỳm wỳr anhõ pàr o axkamẽ nẽ axte anhõ kryhti mẽ nẽ ho amnhĩm tep kwỳmnê. Anẽ.

⁵Hãmri nhũm tee ri kuma nẽ kãm: —Kwa na pa mẽ ra kamàt kãm tee rênh o apkati nẽ ho hõmnênh kêt tã ka ri inhmã anẽ. Nom kot paj amar xà hkôt kop kumẽ. Anẽ.

⁶Hãmri nẽ upỳm wỳr pàr o axkamẽ nẽ htõ Andre mẽ wa axte kryhti mẽ. Nẽ ãm mẽnh tipxi htã ho tep pynênh rax kumrêx. Jakamã nhũm kryhtija ra pikaxôn h kaxyw.

⁷Hãmri nhũm wa tee ri ho anẽ nẽ amnhĩ wỳr pàr ò ho mrar xwỳnh ta wa kãm akir. Jepetew kra Juãw mẽ Xiakreja wa nhũm wa amnhĩ wỳr wa kãm akir nhũm wa hwỳr pàr ò ho tẽ hãmri nẽ mẽ kryhti hã hije nẽ pàr wỳr ho

api. Hāmri nē pàrta hamē tep o ho nýt pa nē hamē ho hipu mex nē. Jao nhỹx gôn̄h mã wa axà.

8-10Hāmri nhũm mẽ amnhĩ jaêr pê tep xohtô raxta pumu nē kamã no pyma nē. Hāmri nhũm Simãwja Jejus kutã hkôn krã ho tēm nē hipô nē nhỹ nē hã hpijaàm kamã kãm kapêr nē kãm: —Kwa Pahihti. Kii tamũ axkamẽ. Akĩnhã ixte amnhĩ tomnuj tỳx xwỳnh na pa. Anẽ. Hāmri nhũm kuma nē ãm kuma nē kãm: —Kwa nà tee ri amnhĩ kukamã ajamaxpêr kêt nē. Kot kaj jarãhã hpãnhã tãm amnhĩ nhĩpêx o apa. Na ka ra tep pynênh rũnh o apa. Tã kot kaj ja kaga nē hpãnhã ma ri mẽ hkôt Tĩrtũm kapêr o mẽ ahkre ho ri apa. Koja mẽ ohtô nē ama nē Tĩrtũm kôt amnhĩ xunhwỳ nē hkôt amnhĩ nhĩpêx o pa. Jakamã kot kaj te ate tep pynênh rũnh nē Tĩrtũm mã òr pyræk o amnhĩ nhĩpêx o apa. Anẽ. Nhũm pre ã Jejus Simãw mã kapêr anẽ.

11Hāmri nhũm mẽ gô jakàx ã pàr janhôr tỳx nē kamã hikukrêx piitã hkaga hpa nē ma Jejus kôt pa ho pa.

Jejus kot hkà nhy kro tỳx xwỳnh o mex ã harênh

Matêwre 8.1-4; Makre 1.40-45

12Tã nhũm Jejus ma krĩ hõ hwỳr mỗ. Hāmri nhũm mẽhõ my hkà nhy hkro htỳx xwỳnhja omu nē hwỳr tẽ nē hã hpijaàm kaxyw kutã hkônkrã ho nhỹ nē kãm: —Pa Pahihti. E ot pa awỳr amnhĩ to tẽ. Kwa akupỹm ate mẽ ixto mex kaxyw axàhpumunh tỳx jakamã kot ka akupỹm amã ixto mex prãm nē mãmri akupỹm ixto mex. Anẽ.

13Hāmri nhũm kuma nē hkà punuti hã ìhkra xi. Amnhĩ kamã kahak kêt nē hã ìhkra xi nē kãm: —Nà kot paj ato mex. E akupỹm akà mex kurê kumrêx. Anhỹrja kôt hāmri nhũm hkàja akupỹm mex pa.

14Hāmri nhũm Jejus kãm: —E kêr ka amnhĩ tã akwỳjê mã tanhmã ijarênh to hkêt rãhã ma patre hwỳr tẽ kê akupỹm akà mex ã apumu. Hāmri ka amnepêm Mojes kot mẽ ate akupỹm amex ã Tĩrtũm mã tanhmã amnhĩ nhĩpêx to hã karôta ka kãm ho anẽ. Kê mẽ mẽ piitã akupỹm akà mex ã apumu. Anẽ. Hāmri nhũm kuma nē kãm: —Tôe. Nà kot paj anẽ. Anẽ. Hāmri nē ma hwỳr htēm kurê kumrêx.

15Hāmri nhům mẽ piitã axpẽn mã Jejus jarěnh o ri hprõt nhům mẽ kot kapěr mar kaxyw ma hwỳr mra. Nẻ mẽ à xwỳnhjaja nhům kot mẽ ho mex kaxyw nhům mẽ hwỳr amnhĩ to mra.

16Jakamã nhům pre hte Jejus tỡhã mẽ kęp hapỏj nẻ ahte ma kapỏt ả Tỉrtũm mã amnhĩ jarěnh kaxyw mra. Nẻ kãm amnhĩ jarěnh pa hãmri nẻ ma akupỹm mẽ hwỳr mra.

Jejus kot ỉ kamã htyk xwỳnh o mex ả harěnh

Matêwre 9.1-8; Makre 2.1-12; Juãw 10.37-38

17Tã nhům Jejus ma Tỉrtũm kapěr o Ijaew jahkre ho pa. Jakamã nhỹri mẻhỏ nhỏrkwỹ kamã ho mẽ ahkre ho xa nhům Parijew nhỏ xwỳnhjẻ mẽ Tỉrtũm kapěr tũm o mẽ ahkre ho mẽ pa xwỳnhjaja kot mar kaxyw ma hwỳr mra. Na pre ra Garirej rũm mẽ hkwỳjaja ma hwỳr mra. Nẻ pika pẻ Jutej rũm mẽ hkwỳ haxwỳja ma hwỳr mra. Nẻ krĩ pẻ Jerujarẻ rũm. ả na prem ohtỏ nẻ krĩ piitã kurũm kot mar kaxyw hwỳr akuprỏ nhům mẽ ahkre anẻ. Nẻ Tỉrtũm kot ho ảhpumunh tỳx jakamã nhům ỹ hã akupỹm mẽ à xwỳnhjẻ ho mex.

18Hãmri nhům hkwỳjaja ỉ kamã htyk xwỳnh mỳ nẻ Jejus wỳr o tẻ. Nẻr xỏ kamã nẻr rỏhỏ nhům mẽ hã hije nẻ hwỳr o tẻ. Hãmri nẻ tee ri kot hwỳr ho ảr kaxyw ri mẽ hkupu ho pa.

19Nom nhům mẽ ra ixkre ho nỳt rax jakamã nhům mẽ tee ri amnhĩ kukamã ho ukapi ho ri pa. Hãmri nẻ ra hamaxpẻr nẻ ixkre nhĩmỏk po hwỳr ho api nẻ ixkre nhĩmỏk kwỳ grỏ nẻ hkỏt ỉ kamã htyk xwỳnhhta jaxỏ. Nẻr xỏ kamã nẻr rỏhỏ Jejus wỳr haxỏ nẻ mẽ hipỏk ri ho wrỳ nẻ kutỏ kuxi nhům nỏ.

20Hãmri nhům Jejus amnhĩ tỏ mẽ kot kaxyw kãm hamaxpẻr tỳx ả mẽ omunh mex nẻ. Hãmri nẻ ỉ kamã htyk xwỳnhhta mã kapẻr nẻ kãm: —Pa? E na pa ra anẻ tanhmỏ ate amnhĩ tomnuj to ho apaja o ijapẻx pa. Kot paj axte kãm ijamaxpẻr kẻt nẻ. Anẻ.

21Hãmri nhům Parijew nhỏ xwỳnhjẻ mẽ Tỉrtũm kapẻr tũm o mẽ ahkre ho mẽ pa xwỳnhjaja tee ri kot ả kãm kapẻr anhỹrja ả kuma nẻ axpẽn mã: —Tk. Kwa kęp Tỉrtũm kẻt tỏ te ri kot amnhĩ nhĩpẻx pyrỏk o ri mẽ nẻ mẽ kot amnhĩ

tomnuj o hapêx ã amnhĩ jarênh o kuhê. Tĩrtũm pix na kot mẽ nê mẽ kot amnhĩ tomnuj o hapêx xwỳnh kênã. Anẽ.

²²Nhũm mẽ ã axpên mã Jejus jarênh anẽ nhũm amnhĩ tã mẽ kuma nẽ mẽ hamaxpêr kôt mẽ omunh mex nẽ. Jakamã mẽ kãm: —Kwa mẽ ã ajamaxpêr anhỹr kêt nẽ.

²³Ixte mẽ nê mẽ kot amnhĩ tomnuj o ijapêx par ã amnhĩ jarênh tã mẽ ate ja kôt ixpumunh kêt jakamã na ka mẽ ixkôt ajamaxpêr kêt nẽ. Nom kot paj mẽ anoo mã akupỹm ĩ kamã htyk xwỳnhhta o mex ka mẽ apiitã ja hã ixpumu hãmri nẽ ixkôt ajamaxpêr kurê kumrêx.

²⁴Ixpê Tĩrtũm kot mẽ awỳr inhmênh xwỳnhhta na pa. Ixte mẽ anê mẽ ate amnhĩ tomnuj rênh kaxyw na pre mẽ awỳr inhmê pa mẽ awỳr wrỳ. Tã mẽ ate ja kôt ixpumunh kaxyw kot paj mẽ anoo mã myja o mex. Anẽ. Hãmri nẽ hpãnhã ĩ kamã htyk xwỳnhja mã kapêr nẽ kãm: —E kànhmã xa nẽ anõr xà py nẽ ma akupỹm anhõrkwỹ hwỳr tẽ. Anẽ.

²⁵Nhũm kànhmã ãm kurê kumrêx. Hãmri nẽ amnhĩ pumu nẽ hkĩnh tỳx nẽ nõr xà py nẽ mẽ noo mã kato nẽ akupỹm õrkwỹ hwỳr ma Tĩrtũm mã mex o mex ã harênh o tẽ.

²⁶Hãmri nhũm mẽ amnhĩ jaêr pê omu. Nẽ no hapôx kaxyw hkôt omunh o kuhê nẽ kamã no puma nẽ. Nẽ tee ri omu hãmri nẽ axpên mã: —Kokỹỹ. Aa mẽ pahte ã mễhõ kot amnhĩ nhĩpêx anhỹr ã omunh kêt tã na pu mẽ jarãhã ja pumu. Anẽ. Hãmri nẽ Tĩrtũm mã mex o mex ã harênh o kuhê.

Jejus kot amnhĩ kôt Rewi hwỳr ã harênh

Matêwre 9.9-13; Makre 2.15-17; Rukre 15.1-2

²⁷Tã nhũm Jejus ma hkôt mẽ pa ho mẽ pa xwỳnhjê mễrohã ma nhỹhỹm mỗ. Hãmri nẽ nhỹri Rewi pumu. Rewi nhĩxi hõ pê na Matêwre. Rõm kãm mẽ õ pahĩhti mã amnhĩ kwỳjê pê kàxpore hkwỳ jamỳnh xwỳnh na pre. Jakamã nhũm ujamỳnh xà hã ixkre kamã mẽ kêp hkwỳ jamỳnh o nhỹ nhũm Jejus mẽ hkôt mẽ pa o mẽ pa xwỳnhjaja hãnh mra. Hãmri nhũm Jejus àpênh ã omu nẽ amnhĩ kôt kuwỳ nẽ kãm: —Pa? E kwa axàpênhta kaga nẽ hpãnhã amnẽ mẽ ixkôt măn tẽ. Nẽ ixkôt măn ri apa ho apa. Anẽ.

²⁸Hāmri nhūm kuma nē àpênh kaga hpa nē ma hkôt mō nē hkôt pa ho pa.

²⁹Hāmri nhūm mēmo arĩgro hā nhūm Rewi nhō mē apkur xà hā mēō rax nē. Jakamā nhūm amnhĩ nhōrkwȳ hwỳr hkràmnhwỳjaja nē Jejus mē hkôt mē pa ho mē pa xwỳnhjê hwỳ. Mē kot kutā apkur kaxyw nhūm amnhĩ kôt mē kuwỳ nhūm mē ma hkôt mra nē òrkwȳ hwỳr agjê nē apkur o hkrĩ. Nē mē kēp Rōm nhō pahi mā mē kēp kàxpore hkwỳ jamỳnh xwỳnh kwỳjaja nē mē ohtō nē hwỳr akuprō nē axpēn kutā apkur o hkrĩ.

³⁰Hāmri nhūm Parijew nhō xwỳnhjê mē Tĩrtũm kapēr tũm o mē ahkre ho mē pa xwỳnh kwỳjaja mra nē mē apkur ã mē omu nē tee ri mē hkaêx ã Jejus pumu hāmri nē Jejus kôt mē pa ho mē pa xwỳnhjê hwỳr agjê nē hā mē kām akir nē mē kām: —Kwa mē kot amnhĩ tomnuj ho mē pa xwỳnhjê kutā mē apkur kêt tã ka mē apytār xwỳnhja mē apimràatã axtem nē mē kutā axàpkur o akrĩ. Kwa mē ate amnhĩ to mex ronhỹx ka mē kutā axàpkur kêt nē. Anē.

³¹Hāmri nhūm Jejus amnhĩ tã mē kapēr ã mē kuma nē mē kām: —Tk. Nà ixte tãm mē unhwỳr kaxyw na pa mē kutā ixàpkur o nhỹ. Xà na hte tōtōja mē mex xwỳnhjê hwỳr mra nē mē hkane? Nà ãm mē à xwỳnhjê pix wỳr na htem mra. Ra mē ate ja pumunh mex kēnã. Ja pyrà nē na pa pre mē kot amnhĩ to mex xwỳnhjê hwỳr ixwrȳk kêt nē. Mē kot amnhĩ tomnuj xwỳnhjê pix wỳr na pa pre wrȳ. Ixte tãm mē unhwỳr kaxyw na pa pre mē hwỳr wrȳ nē ã jajê kutā ixàpkur o inhỹr anē.

³²ãm mē kot amnhĩ tomnuj xwỳnhjê hwỳr na pa pre wrȳ nē mē kamã ixukaprĩ ho ri ixpa. Mē kot amnhĩ tomnuj mā urer nē hpãnhã tãm amnhĩ nhĩpêx o pa kaxyw na pa pre mē hwỳr wrȳ. Tã ka mē atỳx ã ri mē ixto akapēr anē. Anē.

Mē hpāmjaja kot amnhĩ nhĩpêx gryk ã Jejus kaga hā mē harēnh

Matêwre 9.14-17; Makre 2.18-22

³³Tã nhūm Ijaew kwỳjaja Jejus wỳr mra nē kām: —Pa? E ot pa mē awỳr mra. Kwa aprĩ hā mē inhmã mēmoj jarē. Na hte Parijew nhō xwỳnhjê mē Juãw kôt mē pa xwỳnhjaja tōhã Tĩrtũm mā amnhĩ jarēnh kaxyw nē apkur kêt rãhã kām amnhĩ jarē. No akôt mē pa ho mē pa xwỳnhjaja na htem

àmnhix apkur o pa kamã kãm amnhĩ jarẽ. Kwa mo na htem mẽ uràk nẽ tōhã apkur kêt ri kãm amnhĩ jarẽnh hkêt nẽ? Anẽ.

³⁴Hãmri nhũm mẽ kuma nẽ mẽ kãm: —Tk. Nà mo kaxyw koja mẽ apkur kêt rãhã kãm amnhĩ jarẽ? Mẽ hkaprĩ hkêt kênã. Mẽ kot ixkôt pa ho pa hã amnhĩ pumunh jakamã hkĩnh nẽ pa. Kormã ixte mẽ kamã ixpa kênã kot kêt mẽ Tĩrtũm mã amnhĩ jarẽnh kaxyw nẽ apkur kêt rãhã kãm amnhĩ jarẽ. Xà na htem hkràmnhwỳ hã hkĩnh kaxyw hã akuprõ nẽ hkaprĩ nẽ apkur kêt nẽ mỳr o hkrĩ? Na htem hã akuprõ nẽ hkĩnh nẽ hã apkur rũnh nẽ. Ja pyrã nẽ na hte ixkôt mẽ pa ho mẽ pa xwỳnhjaja ixkôt kormã àmnhix ri hkĩnh nẽ apkati mẽ apkur o pa.

³⁵Nom koja mẽ kãm ixkurê xwỳnhjaja nhỹrmã tanhmã ixto hãmri nhũm mẽ rĩ kormã ixtã hkaprĩ htỳx kãm apkur kêt ri tanhmã amnhĩ nhĩpêx to. Anẽ.

³⁶Nhũm pre ã Jejus mẽ kãm hkôt ri mẽ pa ho mẽ pa xwỳnhjê jarẽnh anẽ hãmri nẽ mẽ kãm: —Nà mẽ kot amnhĩ tomnuj xwỳnhjaja mẽ kot amnhĩ nhĩpêx tũm o amnhĩ pyrãk jakamã na htem mẽ kot amnhĩ nhĩpêx nyw kaga.

³⁷⁻³⁹Ixte amnhĩ nhĩpêx nywja te kot mẽ ate amnhĩ nhĩpêx tũm pyrãk kêt jakamã ka htem inhma nẽ ãm inhma. Kwa mẽ ixkapêr ma nẽ mẽ ate amnhĩ nhĩpêx tũm gryk ã ixkaga hkêt nẽ. Anẽ.

Rukre 6

Jejus kêp arĩgromnu hpãm ã harẽnh

Matêwre 12.1-8; Makre 2.23-28

¹Tã nhũm Ijaew nhõ arĩgromnu pê sapja axte kato. Hãmri nhũm Jejus mẽ hkôt ri mẽ pa ho mẽ pa xwỳnhjê mẽ ma mẽ hpur kôt ri nhỹhỹm ri pa. Hãmri nhũm hkôt mẽ pa ho mẽ pa xwỳnhjaja ra kãm prãm nẽ mra hãmri nẽ prãm xàj mẽmo hy te kot harôj pyrãk xwỳnhhta kwỳ rê nẽ kugrà nẽ ma Jejus kôt hkanhar o mỗ. Ijaew kot amnhĩ nhĩpêx xà hkôt.

²Hãmri nhũm Parijew nhõ xwỳnhjaja kãm mẽmoj tã Jejus o kapêr prãm jakamã ã mẽ kot amnhĩ nhĩpêx anhỹr ã mẽ omu nẽ mẽ hã Jejus kukjêr kurê kumrêx nẽ kãm: —Kwa Tĩrtũm kapêr tũm kot mẽ panhõ arĩgromnu hã mẽ pahte mẽ pahpur kãm mẽmoj nhĩkênh nê mẽ pahkurê htã nhũm ri akôt mẽ

pa ho mẽ pa xwỳnhjaja axtem nẽ mẽmo hyta kwỳ rê nẽ akôt hkanhar o mẽ. Kwa mẽ kãm anẽ kê mẽ ã amnhĩ nhĩpêx anhỹr kêt nẽ. Na htem arĩgromnu hã ã amnhĩ nhĩpêx anhỹr kêt nẽ. Anẽ.

³⁻⁴Hãmri nhũm Jejus mẽ kuma nẽ hprĩ hã mẽ kãm Tĩrtũm kapêr tũm jarẽ nẽ mẽ kãm: —Kwa xà na ka mẽ Tĩrtũm kapêr ã kagà htũm kamã pahi Tawi kot tanhmã amnhĩ nhĩpêx tota kamã harênh nẽ mar kêt nẽ? Na pre Tawija hkôt ri mẽ pa xwỳnhjê mẽ nhũm mẽ prãm xàj Tĩrtũm mã amnhĩ jarênh xà hã ixkre wỳr agjê nhũm patre maatija mẽ kãm prãm tỳx ã mẽ omu nẽ mẽ kãm mẽmoj gõ. Mẽ kot Tĩrtũm noo mã pãwti jaxwỳr xwỳnhhta nhũm mẽ kãm kugõ nhũm mẽ kuku. Tĩrtũm kapêr ã kagà htũm kot ja nê mẽ kurê htã nhũm mẽ kãm prãm tỳx ã mẽ omu nẽ mẽ kamã ukaprĩ xàj mẽ kãm kugõ. Patre pix kot ja kur kaxyw tã nhũm mẽ kãm kugõ nhũm mẽ kuku. Tã nhũm Tĩrtũm ja hã mẽ omu nhũm ja kêp omnuj kêt nẽ. Kot mẽ kamã ukaprĩ nẽ mẽ kãm òr nhũm mẽ hã omu nhũm ja kãm mex nẽ.

⁵Tã pa na pre Tĩrtũm mẽ akaxyw ixãm nẽ mẽ awỳr inhmênh jakamã papxipix na pa hte arĩgromnu hã tanhmã mẽ kot amnhĩ nhĩpêx to hã mẽ kãm karõ ho ri ixpa. Ixpê arĩgromnu hpãm na pa. Anẽ.

Jejus kot ìhkra grà xwỳnh o mex ã harênh

Matêwre 12.9-14; Makre 3.1-6

⁶Tã nhũm Ijaew nhõ arĩgromnu pê sapja axte kato. Hãmri nhũm Jejus Tĩrtũm kapêr o mẽ ahkre xà hã ixkre hwỳr tẽ nẽ axà nẽ Tĩrtũm kapêr o mẽ ahkre ho nhỹ. Nhũm mẽhõ myja upòk rũm ìhkra grà xwỳnhja mẽ ìhkô hã mar o nhỹ.

⁷Nhũm Parijew nhõ xwỳnhjê mẽ Tĩrtũm kapêr tũm o mẽ ahkre ho mẽ pa xwỳnhjaja mẽ kãm mẽ hkrãhtũmjê mã Jejus o kapêr prãm xàj htãnopxar o kuhê. Nẽ ìhkra grà xwỳnhhta pumu nẽ hã axpên mã: —Kwa pu mẽ jar pakuhê nẽ Jejus tanhmã kot amnhĩ nhĩpêx to hã omu. Xà koja jarãhã mũjti ho mex nà? Jarãhã arĩgromnu kênã kot kêt kãm ìhkra ho mex. Koja anẽ nẽ Tĩrtũm kapêr kwỳm ri amnhĩ nhĩpêx. E pu mẽ kop pakuhê nẽ hã omu. Anẽ.

⁸Nhũm Jejus ra kot mẽ hamaxpěr kôt mẽ omunh mex jakamã amnhĩ wỳr myta mã hpa ho apê nẽ kãm: —Pa? E kànhmã xa nẽ amnẽ ixwỳr tẽ. Anẽ. Hãmri nhũm kuma nẽ kànhmã xa nẽ hwỳr tẽ.

⁹Hãmri nhũm Jejus amnhĩ pu hã ri mẽ ho hakẽx nẽ mẽ kot mar o hkrĩ xwỳnhjê pumu nẽ mẽ kãm: —E mẽ inhmã mẽmoj jarẽ. Tanhmã na htem arĩgromnu hã axpẽn nhĩpêx to ho pa wehe? Xà kot ka arĩgromnu hã axà htỳx nẽ nũ hãmri nẽ amnhĩ mex prãm xàj ma mẽhõ hwỳr amnhĩ to tẽ. Hãmri nhũm ãm apumu nẽ apkatim arĩgro mex jamãr pê akane hkêt ka ty nhũm ja amã mex nẽ nà? Rỳ nhũm tanhmã atomnuj to nẽ akupỹm amnhĩ nê ajano nhũm ja amã mex nẽ nà? Nà koja ã anhīpêx anẽ nhũm ja amã mex kêt nẽ. Na ka htem ã amnhĩ nhĩpêx anhỹr o apa hkêt nẽ. E mẽ inhmã mẽmoj jarẽ. Tanhmã na pre finat Mojesja Tĩrtũm nhỹ hã mẽ pamã arĩgromnu hã mẽ pahte axpẽn nhĩpêx ã karõ hto? Xà kot puj mẽ axpẽn kãm paxukaprĩ ho papa nà? Kot puj mẽ pamã axpẽn kurê ho papa? Xà kot puj mẽ hã mẽmoj punuj pê axpẽn pytà nà? Xà kot puj mẽ hã axpẽn pytàr pymaj arĩgro mex jamã? E mẽ atõ inhmã ja jarẽ. Anẽ. Nhũm pre ã mẽ hkukjêr anẽ.

¹⁰Mẽ hamaxpěr ã mẽ omunh mex pê ã mẽ hkukjêr anhỹr o xa. Nom nhũm arĩ mẽhõ tanhmã kutã kãm nẽ hkêt nẽ. ãm akryk mar pê omunh o hkrĩ. Mẽ kot tanhmã kãm nẽ nhũm ta pãnhã tanhmã kot mẽ kãm nẽ pymaj nhũm mẽ tee ri kãm tanhmã nẽ hprãm nom akryk mar o hkrĩ. Hãmri nhũm Jejus tee ri mẽ omu hãmri nẽ myta mã kãm: —Tk. Mẽ kot tanhmã inhmã kapěr tore hã. E anhĩhkra katàt. Anẽ. Hãmri nhũm ãhkra katàt nẽ akupỹm mex kurê kumrẽx.

¹¹Hãmri nhũm mẽ kãm Jejus kurê xwỳnhjaja tee ri ja hã omu nẽ kamã gryk tỳx nẽ. Arĩgromnu hã kot ho mex jakamã nhũm mẽ kamã gryk tỳx nẽ. Nẽ hã axpẽn kukjêr o kuhê nẽ axpẽn mã: —Kwa ã kot amnhĩ nhĩpêx anhỹr mỳrapê tanhmã kot puj wem ho? Na ã kapěr anhỹrja o tanhmã mẽ pahto kapěr punuj to. Te mẽ papamjaja mẽ pahte hkĩnhã pahkwỳjê kamã paxukaprĩ hkêt pyràk ã mẽ pajarẽ. Koja mẽ pahkwỳjaja kuma hãmri nẽ mẽ

pahte amnhĩ nhĩpêx kaga nê amnhĩ kaxyw ãm hkôt pix mã hamaxpêr o pa. Jakamã kwa tanhmã kot puj mẽ ja nê ho? Anê.

Jejus kot amnhĩ kaxyw mẽ ho 12 nê mẽ rênh ã harênh

Matêwre 10.1-4; Makre 3.13-19

12Tã nhũm arĩgro hõ hã nhũm Jejus ma kot Tĩrtũm mã amnhĩ jarênh kaxyw ma hixêt prêk wỳr tẽ nê hã api. Hãmri nê kãm amnhĩ jarênh o apkati.

13Tã nhũm kwỳhtã nhũm amnhĩ kôt kot ri mẽ o pa xwỳnhjê hwỳ nê amnhĩ kaxyw mẽ ho 12 nê mẽ kurê. Nê mẽ kãm: —E mẽ kajaja kot paj ma mẽ pahkwỳjê hwỳr mẽ arê ka mẽ ma inhỹ hã Tĩrtũm kapêr o mẽ ahkre ho ri mẽ hkôt apa. Kot kaj mẽ apê inhỹ hã mẽ ahkre ho apa xwỳnh. Anê.

14Kot amnhĩ kaxyw mẽ rênh xwỳnhjê nhĩxi na jajaja: Simãw kumrêx na pre kuta nê axte hã hixi mẽ nhũm kêp Pêtre. Nê Simãw Pêtre hkôt htõ Andreja ta. Nê hkôt Xiakre hta. Nê hkôt Juãw ta. Nê hkôt Firiptija ta. Nê hkôt Patoromew ta.

15Nê hkôt Matêwreja ta. Nê hkôt Tomasja ta. Nê hkôt Apew kra axtem Xiakre hõja ta. Nê hkôt Simãw Jeroxja ta.

16Nê hkôt Xiakre hõ hkra Jutja ta. Nê hkôt Jut Kariot ta. Jut Kariotja na pre kormã kot mẽ kãm Jejus kurê xwỳnhjê nhĩhkram òr mã. Nhũm kot amnhĩ kukamã omunh mex tã mẽ hkôt amnhĩ kaxyw kuta. ã mẽ kot Jejus nhỹ hã mẽ ahkre o pa kaxyw mẽ rênh xwỳnhjê nhĩxi kot anhỹr.

Jejus xapênh ã harênh

Matêwre 4.23-25

17Tã nhũm Jejus akupỹm ÿ hã mẽ ahkre ho pa xwỳnhjê mẽ hãmri hixêt prêêta kurũm wrỳ nê nhỹri hinur kãm kuhê. Hãmri nhũm nhỹhỹnh mẽ kot mar mã xwỳnhjaja hã akuprõ. Kôt mẽ pa ho mẽ pa xwỳnh kwỳjaja nê nhỹhỹnh krĩ hkwỳ rũm mẽ hkwỳjaja. Pika pê Jutej kurũm mẽ hkwỳjaja. Nê krĩ pê Jerujarê kurũm mẽ hkwỳjaja. Nê gô mỳ ri Xir mẽ Sitõja wa kamã mẽ pa xwỳnh kwỳjaja. ãm ahpỹnhã ri nhỹhỹnh krĩ hkwỳ rũm mẽ kot mar mã xwỳnhjaja hã pikuprõnh rax nê.

18-19 Mě kot kapěr mar nhům kot akupỹm mẽ ho mex kaxyw nhům prem ma hwỳr amnhĩ to pa. Mě hkwỳjaja tanhmã ri à kute. Nhům mẽ hkwỳjaja mẽkarõmnuti kot mẽ hwỳr gjêx xwỳnhjaja nhům mẽ piitã ma hwỳr amnhĩ to pa. Na prem ra amnhĩ kaxyw kãm hamaxpěr o: —E pa ma hwỳr tẽ nẽ ãm hkupênh pix tã akupỹm inhmex japêr. Anẽ. Hãmri nẽ ma hwỳr mra nhům mẽ omu nẽ Tĩrtũm xàhpumunh tỳx o akupỹm mẽ ho mex pa.

Jejus kot hkõt mẽ pa ho mẽ pa xwỳnhjê jahkre hã harênh

Matêwre 5.1-12

20 Tã nhům Jejus hkõt mẽ pa ho mẽ pa xwỳnhjê jahkre nẽ mẽ kãm: E kot kaj mẽ atõ amnhĩ kaxyw tanhmã inhmã ajamaxpěr to nẽ ajamaxpěr o: “Nà ixkukrêx rax kêt tã na hte Tĩrtũm ixkõt pa ho pa. Koja ixkõt pa hkêt pa ixtỳx ri tanhmã amnhĩ nhĩpêx to ho ri ixpa rãhã nẽ. Tĩrtũmja mex kumrêx o kot mẽ hikukrêx raxta jakrenh par.” Anhỹr o ajamaxpěr. Hãmri nhům Tĩrtũm ã ajamaxpěr anhỹr ã apumu nhům ja kãm mex nẽ. Hãmri nhům apê hkra hã ato mex nẽ atãnopxar o akõt pa ka ajamakêtkati nẽ akĩnh nẽ axàmnhĩx ri apa.

21 Nẽ kot kaj mẽ atõ amã Tĩrtũm kãm hprãm xà hkõt tanhmã amnhĩ nhĩpêx to ho ri apa hprãm tỳx nẽ. Nhům amnhĩ tã apumu nhům ja kãm mex nẽ nhům ato mex nẽ. Nẽ tanhmã ato ka hkõt pix mã amnhĩ to mex o ri apa nẽ ajamakêtkati nẽ akĩnh nẽ axàmnhĩx ri apa. Nẽ kot kaj mẽ tanhmã amnhĩ tomnuj to. Hãmri nẽ tee ri ja hã amnhĩ pumu nẽ ajamaxpěr. Nẽ apijaàm nẽ akaprĩ xàj amỳr o nhỹ. Amỳr rax nẽ. Hãmri nhům Tĩrtũm ja hã apumu nhům ja kãm mex nẽ. Jakamã nhům anê akaprĩ hta nẽ ato mex nẽ. Ka ajamakêtkati nẽ akĩnh nẽ axàmnhĩx ri apa.

22-23 Nẽ kwãr mẽ mãmri ixtã tanhmã mẽ ato kapěr punuj to nẽ tanhmã mẽ ato hêx to nẽ tanhmã ri mẽ atomnuj to ho pa. Kwãr mẽ mãmri ã mẽ anhĩpêx anhỹr o pa. Ka mẽ ãm inhmã pix mã ajamaxpěr rãhã ho apa pê ajamakêtkati nẽ axàmnhĩx ri apa. Kwãr mẽ mãmri ã mẽ anhĩpêx anẽ nẽ mẽ amex kêt ã mẽ ajarênh o pa. Amnepêh na pre Tĩrtũm nhỹ hã kapěr xwỳnhjaja nhům prem ã mẽ hipêx anẽ. Jakamã koja mẽ urak nẽ ã mẽ anhĩpêx anhỹr o pa. Nhům Tĩrtũm ja hã mẽ apumu nẽ amnhĩm mẽ amex ã mẽ ajarê. Hãmri nẽ

nhỹrmã kaxkwa kamã wa inhõ krĩ kamã mẽ ato mex rax nẽ. Ka mẽ akĩnh nẽ ajamakêtkati nẽ axàmnhĩx ri apa. Jakamã kwãr mẽ mãmrĩ pika jakamã ã ixtã mẽ anhĩpêx anẽ. Anẽ.

Jejus kot arĩ mẽ kot mar xwỳnhjê jahkre hã harẽnh

Xiakre 5.1-5

²⁴Nhũm Jejus nhãm hkõt mẽ pa ho mẽ pa xwỳnhjê nhĩhkõ hã mẽ kot Tĩrtũm kõt amnhĩ nhĩpêx o pa hkêt xwỳnhjê hwỳr apkjê. Nẽ mẽ omu nẽ tanhmã mẽ kãm kapêr to. Mẽ hikukrêx rũnh xwỳnhjê kumrêx mã kapêr nẽ mẽ kãm: E kwa mẽ o kora mẽ akukrêx rũnh xwỳnhjaja. Na ka htem ãm akukrêx rũnh pix mã ajamexpêr o ri apa nẽ gryk ã Tĩrtũm mã ajamexpêr o apa hkêt nẽ. Jao mẽ amã kapêr mar prãm kêt nẽ. Nẽ ãm akukrêx rũnh mã ajamexpêr pẽ akĩnh nẽ ri apikunhar o ri apa. Tã kot ka mẽ nhỹrmã ty hãmri nhũm akĩnh xàja apê hapêx.

²⁵Nẽ mẽ amã Tĩrtũm kõt ri amnhĩ nhĩpêx prãm kêt xwỳnhjaja. Kot kaj mẽ nhỹrmã akaprĩ htỳx kãm tee ri amnhĩ to hwỳr kaprỳ kãm ga. Kojã mẽ amar kêt nẽ. Nẽ mẽ atỳx ri mẽ ate tanhmã amnhĩ tomnuj to hkukamã ajamexpêr nẽ apikunhar pẽ amnhĩ tomnuj o apa xwỳnhjaja. Kot kaj mẽ nhỹrmã ã mẽ ate amnhĩ nhĩpêx anhỹrja mỳrapê mẽ kot amnhĩ xà htỳx kamã hamak o pa htũm xà hwỳr ma apa. Hãmri nẽ kamã akaprĩ xàj amỳr rãhã ho ri apa. Jakamã kwa mẽ o kora mẽ amã Tĩrtũm prãm kêt xwỳnhjaja. Kêr ka mẽ ixkapêr ma nẽ axkãm ajamak rom nẽ ri apa.

²⁶Amnepêr mẽ pakukamã mẽ pa xwỳnhjaja na prem Tĩrtũm kapêr o hkwỳjê jahkre ho pa. Nom axtem nẽ hkwỳm ri tanhmã mẽ kãm ho hêx to nhũm mẽ kuma nhũm ja mẽ kãm mex nẽ nhũm mẽ amnhĩm mẽ mex ã mẽ harẽ. No ãm mẽ mex kêt. Tã mẽ kajaja. Mẽ kot mẽ urak nẽ axpên mã mẽ amex ã mẽ ajarẽnh tã Tĩrtũm mã mẽ amex kêt. Jakamã kot kaj mẽ amex kêt nẽ. Anẽ.

Mẽ kãm mẽ pahkurê xwỳnhjê jarẽnh

Matêwre 5.38-48; Rukre 23.34; mãânên Atre 7.60; Rõmãn 12.14

²⁷Hãmri nhũm Jejus hpãnhã mẽ piitã mẽ ahkre nẽ mẽ kãm: —E mẽ ate inhmar xwỳnhjaja. Kêr ka mẽ kot mẽ atomnuj xwỳnhjaja amnhĩ tã tanhmã mẽ ho hkêt nẽ. ãm mẽ ho mex pix o ri apa hkukamã mãn ajamexpêr.

28—Ně mẽ kot mẽ ato kapěr punuj xwỳnhjaja. Kêr ka mẽ amnhĩ xwar amnhĩ tã tanhmã mẽ ho akapěr punuj to hkêt nẽ. ãm tãm mẽ kãm akapěr pẽ mẽ kãm akapěr mex o ri apa. Nẽ mẽ kot tanhmã ri mẽ ato ho pa xwỳnhjaja ka mẽ ho mex pix o ri apa. Nẽ mẽ ho Tĩrtũm wỳr pix kukamã mãn ajamaxpěr.

29—Nẽ koja mẽhõ anhĩnep akura ka ãm omu nẽ tanhmã amnhĩ tã ho hkêt nẽ. Te ate kãm ihkjê pěr nhũm kot ihkjê kamã akuranh pyræk o amnhĩ nhĩpêx nhũm ja amã mex nẽ. No kêr ka mẽ amnhĩ tã tanhmã mẽ ho hkêt nẽ. —Nẽ koja mẽhõ apê anhĩnôhkà py ka tanhmã hã kãm nẽ hkêt nẽ. Kwãr mãmri apê kupy. Ka mããnẽn te ate kry pẽ anhĩnôhkà hpakà ry jagjênh xwỳnhhta anhĩnôhkà hkôt kãm őr pyræk o hipêx. Nom kamã agryk kãm kãm őr kêt nẽ.

30—Nẽ koja mẽhõ kêp amrakati kumrêx nẽ awỳr tẽ nẽ mẽmoj tã awỳ. Ka anhõ mẽmoj japêr nẽ mãmri kãm mẽmoj gõ. Kêp anhõxỳ hkêt kamã kãm mẽmoj gõ. Rỳ koja mẽhõ apê mẽmoj to ahkĩ ka axàhkurê hkêt nẽ. Nẽ tanhmã hã ho hkêt nẽ.

31Mẽ piitã mẽ kot tãm mẽ anhĩpêxja na mẽ amã hprãm. Tã kêr ka mẽ amnhĩ pyrà nẽ tãm mẽ piitã mẽ hipêx o ri apa. Mẽ kot tãm mẽ anhĩpêx kêt tã kêr ka mẽ axàmnhĩx ri anhõxỳ hkêt nẽ tãm mẽ hipêx o ri apa.

32—Nom kot kaj mẽ amã mẽ piitã mẽ ho mex o apa hprãm kêt japêr. Nẽ ãm mẽ kot mẽ ato mex xwỳnhjê pix ka mẽ amã mẽ ho mex prãm. Xà koja Tĩrtũm ja hã mẽ apumu nhũm ja kãm mex nẽ? Nà koja kãm mex kêt nẽ. Koja mẽhõ mẽ ato mex kêt tã ka mẽ amnhĩ rom ho mex nẽ nhũm Tĩrtũm ja hã mẽ apumu hãmri nẽ mẽ amex ã mẽ ajarẽ. Mẽ kot amnhĩ tomnuj o mẽ pa xwỳnhjaja na htem ãm mẽ kot mẽ ho mex xwỳnhjê pixjaja nhũm htem amnhĩ xwar mẽ ho mex o pa. No tãm mẽ kot amnhĩ nhĩpêx o mẽ pa xwỳnhjaja na htem mẽ piitã mẽ ho mex o pa. Mẽ kot tãm amnhĩ nhĩpêx xwỳnhjaja nẽ mẽ kot amnhĩ tomnuj xwỳnhjaja nhũm mẽ ho hpimràatã mẽ ho mex o xpẽn pyræk o pa.

33-36—Nẽ mẽ kot amnhĩ tomnuj xwỳnhjaja na htem ãm mẽ kot mẽ ho mex xwỳnh pixjaja nhũm htem amnhĩ xwar mẽ ho mex o pa. No mẽ kajaja. Kêr

ka mẽ māmri mẽ piitã mẽ kamã axukapri pix nẽ. Jao axàmnhix ri mẽ piitã mẽ kãm mẽmoj nhõr o ri apa. Nhũm Tirtũm ja hã mẽ apumu nẽ ja hã mẽ ato mex nẽ. —Jakamã kêr ka mẽ amarĩ mẽ kãm akurê xwỳnhjê ho mex nẽ. Nẽ mẽ kamã axukapri nẽ. Nẽ mẽ piitã mẽ kãm mẽmoj nhõr o ri apa. Kê nhỹrmã Tirtũm maati mẽ hã mẽ amã mẽmoj nhõr rax nẽ. Nẽ mẽ ate kot amnhĩ nhĩpêx kôt amnhĩ nhĩpêx xwỳnh ã mẽ ajarẽ. Tirtũm na hte mẽ kot amnhĩ tomnuj xwỳnhjê kamã ukapri ho pa. Jakamã kêr ka mẽ uràk nẽ ã mẽ hipêx anhỹr o ri apa. E kêr ka mẽ ã axpẽn nhĩpêx anhỹr rãhã nẽ. Anẽ.

Mẽ pahte axpẽn to pakapêr punuj kêt ã mẽ pamã karõ

Matêwre 7.1-5; mãänên Rômãn 2.1-3; 14.1; Wam Korĩt 4.5; Xiakre 4.11-12

37Nhũm Jejus arĩ mẽ ahkre nẽ mẽ kãm: —Nẽ kêr ka mẽ atỳx ri amnhĩ krã hkôt tanhmã mẽ kot amnhĩ tomnuj to hã tanhmã axpẽn jarẽnh to ho ri apa hkêt nẽ. Kêr kê Tirtũm mẽ apyrà nẽ ã mẽ ajarẽnh anhỹr kêt nẽ. —Nẽ kêr ka mẽ tanhmã mẽhõ kot ra atomnuj tota mã ajamaxpêr rãhã hkêt nẽ. ãm ho ajamakêtkati tokyx anẽ nẽ axte kãm ajamaxpêr kêt nẽ. Kêr kê Tirtũm ja hã mẽ apumu nẽ mẽ apyrà nẽ axte tanhmã mẽ ate amnhĩ tomnuj to mã hamaxpêr kêt nẽ.

38—Nẽ kêr ka mẽ axpẽn kamã axukapri pê tanhmã axpẽn to mex to ho ri apa. Kêr kê Tirtũm ja hã mẽ apumu nẽ mẽ apyrà nẽ mẽ akamã ukapri pê tanhmã mẽ ato mex to ho pa. Na hte mẽ pahte axpẽn kamã paxukapri hã mẽ pahpumunh xà hkôt tanhmã mẽ pakamã ukapri to.

39—Nom kêr ka mẽ atỳx ri tanhmã axpẽn to akapêr to hkêt nẽ. Mẽ ate aprĩ hã axpẽn jamaxpêr kôt axpẽn pumunhre hã. Jakamã kot kaj mẽ atỳx ri mẽhõ ho akapêr punuj hãmri nẽ te mẽ nohkre xwỳnhjê hõ kot mẽmoj pumunh kêt tãã te kot no ho omunh nẽ tanhmã harẽnh to pyràk o amnhĩ nhĩpêx.

40Tirtũmja tapxipix na kot mẽ pajamaxpêr kôt mẽ pahpumunh par. Mẽ axàhpumunh tỳx o mẽ pahte hakrenh kêt jakamã kwa kêr ka mẽ ãm hkôt pix mã amnhĩ nhĩpêx o ri apa. Kot kaj mẽ ã amnhĩ nhĩpêx anẽ hãmri nẽ gaa nẽ uràk nẽ mẽ piitã mẽ kamã axukapri pix o ri apa.

41-42 Jao mēhō kot tanhmã amnhĩ tomnuj to hã omu hãmri nē tanhmã hã kãm nē tokyx anhỹr kêt nē. Akumrēx ate tanhmã amnhĩ tomnuj to hã amnhĩ pumu nē hkaga hãmri nē rĩ kormã mēhōta hwỳr tē nē kot tanhmã amnhĩ tomnuj to hã kãm akapēr to. Anē.

Mē pajamxpēr xà hkôt mē pakapēr ã mē pajarēnh

Matêwre 7.16-20; 12.33-37

43-45 Nhũm Jejus arĩ mē ahkre nē mē kãm: —Nē koja mēmo pĩ hpàr mex nē ô mex nē. Nom koja pàr punuj hãmri nē ômnuj nē. —Nē na htem mēmo xô pumu nē hkôt tanhmã pàr kute hã omu. No na htem rãrãj pumu nē kēp akunĩ kamã mrônhĩ xô hã hkamnhĩx kêt nē. Na htem mēmo xỳ hpàr pumu nē ô xànhre hã hkamnhĩx kêt nē. Ja pyrà nē koja mēhō hamaxpēr punuj nē määnēn hakwa ho kapēr punuj pix nē. Nē htỳx tanhmã amnhĩ tomnuj to ho ri pa. Nom koja hamaxpēr mex nē hãmri nē määnēn hakwa ho kapēr mex o pa. Na htem ahpỹnhã amnhĩ jamaxpēr xà hkôt tanhmã hakwa ho kapēr to ho ri pa. Anē.

Ixkre pijakrut jarēnh

Matêwre 7.24-27; määnēn Xiakre 1.22-25; Wam Juãw 2.3-6

46 Nhũm Jejus arĩ mē hkôt mē pa ho pa xwỳnhjê jahkre ho nhỹ nē mē kãm: —Nē kot kaj mē ixpê mē anhō pahihiti hã ijarē hã kot kaj mē ixkapēr kôt amnhĩ nhĩpêx rãhã ho ri apa.

47 —E pa mē amã ixprĩ hã mē kot ixkôt amnhĩ nhĩpêx xwỳnhjê kot amnhĩ nhĩpêx jarē ka mē aprĩ hã inhma.

48 Mē kot amnhĩ nhĩpêxja te mēhō hamaxpēr mex pē aptỳx kãm amnhĩm òrkwỹ nhĩpêx pyràk. Koja aptỳx kãm òrkwỹ nhĩpêx nhũm mēmo arĩgro hã na wrỳk rax nē. Nē gô htàm rax nē hanhi nom nhũm arĩ ãm tỳx nē xa. Tã kot kaj mē ixkôt amnhĩ nhĩpêx ã kot kaj mē te ixkre jarēnhja pyràk. Jao amex nē ajamakêtkati nē ri apa. Te gô htàm kot ixkre janhir tã nhũm ãm tỳxta pyràk.

49 Nom koja mēhō hamaxpēr mex kêt nē htỳx mō nē gô mỳri gyw rerek kãm amnhĩm òrkwỹ nhĩpêx. Hãmri nhũm mēmo arĩgro hã na wrỳk rax nē. Nē hã gô htàm rax nē òrkwỹ janhi nē kēp grành pa. Tã koja mēhō ixkôt amnhĩ

nhîpêx kêt nê te ho mēhō kot gō mÿri gyw rerek kām ixkre nhîpêxta pyrāk. Jao mex kêt nê pa. Jakamā kwa mē ixkapēr mar tÿx nê te gō htām kot ixkre janhir nê grānh parta pyrāk o amnhî nhîpêx o apa hkêt nê. Anê.

Rukre 7

Jejus kot mēhō mā àpēnh xwÿnh o mex ā harēnh

Matêwre 8.5-13

¹Tā nhūm Jejus mē kām ujarēnh pa hāmri nê ma akupÿm Kapanaū hwÿr mō.

²Nê mōō nê ra hwÿr pōj. Nhūm krī kamā pōristi krāhtūm mā àpēnh xwÿnhja à htÿx nê nō. Ra htyk kaxyw nê nō nhūm ō patrāw tee ri omu nê kām hapē jakamā tee ri hkukamā hamaxpēr o hkaprī nê.

³Hāmri nê Jejus pōx ā harēnh ma nê hwÿr Ijaew pigēt kwÿjê rē nê mē kām: —Kwa mē ma Jejus wÿr mra nê kām ijarē kê tokyx man ixwÿr tē nê inhmā àpēnh xwÿnhnta o mex. Anê.

⁴⁻⁵Hāmri nhūm mē kuma nê ma hwÿr mra nê omu nê kām: —Pa. Na pōristi krāhtūm na awÿr mē inhmē pa mē mra. Mē pahkīnhā kēp Ijaew kêt tā kām mē pahkīnh nê. Tām na pre mē inhō krī kamā mē inhmā Tirtūm kapēr o mē ahkre xà hā ixkreja nhîpêx. Tā na kām àpēnh xwÿnhnta kēp à htÿx nê nō nhūm apōx hā ajarēnh ma nê man awÿr mē inhmē. Kwa ma hwÿr tē nê kām ho mex nà? Anê.

⁶Hāmri nhūm mē kuma nê mē kām: —Tôe. Ma pu mē hwÿr. Anê. Hāmri nê ma mē hkôt tē. Hāmri nê kormā ōrkwÿ htēp o htēm mē nhūm axte kutā hkrāmnhwÿ hkwÿ rē nhūm mē ma kutā mra. Hāmri nê mra nê mē hkaxpa nê Jejus pumu nê kām: —Pa? Kwa na pōristi krāhtūmta ā awÿr karō anê. Na mē inhmā: “E kêr ka mē mra nê nhÿri Jejus kaxpa nê kām awjarē kê ām ata rūm kapēr pix o inhmā à xwÿnhnta o mex. Kīnh ā ixpē Ijaew kêt jakamā ixte amnhî kuk ā ixpijaàm tÿx. Jakamā kot paj pam hwÿr ixtēm kêt nê. Kwa kām anê kê ata rūm kapēr pix o inhmā akupÿm ho mex.

⁷⁻⁸Ixpē mē hkrāhtūm jakamā na pa hte inhō pōristi mā mēmoj tā karō nhūm mē inhmar xà hkôt inhmā mēmoj tanhmā hipêx to. Na pa hte mē kām: ‘E

mě ma mra nē ã amnhĩ nhĩpêx anē.’ Anē nhũm mẽ inhma nē ma mrar kurê kumrêx. Rỳ pa mẽ kãm: ‘E mẽ amnē ixwỳr mra nē ã amnhĩ nhĩpêx anē.’ Anē nhũm mẽ inhma nē ixwỳr mra. No kêt Jejus na hte ixrom tanhmã mẽ ã kuteja mã kapêr nhũm kuma nē mẽ kêp hapôj nē ma mrar kurê kumrêx. Jakamã koja ata rũm kapêr pix o inhmã ho mex.” Anhỳr o awỳr karõ. Jakamã na pa mẽ akutã mra nē akaxpa nē ã amã kapêr jarênh anē. Anē.

⁹Hãmri nhũm Jejus amnhĩ jaêr pê mẽ kapêr ma nē hkĩnh nē. Hãmri nē hkôt mẽ kot mar o pa xwỳnhjê mã kãm: —Kwa xà na ka mẽ ã kot ixwỳr karõ xwỳnh jamaxpêr anhỳrta ã ama? Mẽ pahkĩnhã kêp Ijaew kêt tã mẽ arom amnhĩ kaxyw inhmã hamaxpêr tỳx nē. Aa mẽ atõ uràk nē ate amnhĩ kaxyw ã inhmã ajamaxpêr tỳx anhỳr kêt tã nhũm mẽ arom kãm àpênh xwỳnh kaxyw inhmã hamaxpêr tỳx nē. Anē.

¹⁰Nhũm pre ã mẽ kãm kapêr anē hãmri nhũm pôristi krãhtũm krãmnhwỳjaja kuma nē awjanã nē ma akupỹm hkrãhtũm nhõrkwỳja wỳr mra. Nhũm ra Jejus kãm àpênh xwỳnhhta akupỹm ho mex nhũm mex nē ri mra. Hãmri nhũm mẽ akupỹm pôj nē akupỹm mex ã omu.

Jejus kot akupỹm mēhō hkra ho hťir ã harēnh

Juãw 11.1-46

¹¹Tã nhũm Jejus ma krĩ pê Naĩ hwỳr hkôt mẽ pa ho mẽ pa xwỳnhjê mẽrohã mō nhũm mẽ ohtô nē mẽ hkôt mra.

¹²Nhũm mẽ ra Naĩ hwỳr hpôx o mō. Nē hwỳr agjê. Axpêr kãm agjê nē mō nhũm kêp mjên htyk xwỳnhja mẽ kutã tē. Nhũm hkra myja ham kêp ty. Kra pyxi htã kêp ty nhũm mẽ kasãw kamã kuxà nē kumỳ nē kot haxàr kaxyw o mō nhũm katorxà mẽ hkôt mỳr o mō. Nhũm krĩ nhõ xwỳnh kwỳjaja ma hkôt mō. Piitã hkaprĩ nē hkôt mỳr o mō.

¹³Tã nhũm Jejus mẽ hkwỳja mẽ mō nē mẽ hkaxpa nē katorxà mỳr ã omu nhũm Jejus kãm hkaprĩ nē. Hãmri nē xa nē kãm: —Pa? Kwa amỳr kêt nē. Anē.

14Hāmri nē kasāwta wỳr tē nē hā ìhkra xi nhũm mẽ kot mỳnh xwỳnhjaja omu nē amarĩ kām o xa. Hāmri nhũm htyk xwỳnhhta mã kapēr nē kām: —E kwa kànhmã nhỹ. Anẽ.

15Pu nhũm kànhmã ÿr kurê kumrêx. Nẽ kapēr o nhỹ. Hāmri nhũm Jejus nita mã kām: —E ota akrata. Na akupỳm amã htĩr. Anẽ. Hāmri nhũm akupỳm htĩr ã omu nē hkĩnh tỳx kumrêx.

16Hāmri nhũm mẽ kot omunh xwỳnhjaja amnhĩ jaêr pê akupỳm hkra htĩr kām omu nē ÿ hā haxwỳja hkĩnh nẽ. Nẽ Tĩrtũm mã mex o mex ã harẽ nẽ axpẽn mã: —Kwa ãm hāmri na Tĩrtũm ã mẽ panhĩpêx anẽ nẽ mẽ pahwỳr ÿ hā kapēr jarênh xwỳnhhta mẽ nhũm mẽ pahwỳr mō. Tĩrtũm mẽ pakamã ukaprĩ jakamã na ã mẽ panhĩpêx anẽ. Nà ãm hāmri na ã mẽ panhĩpêx anẽ. Anẽ.

17Hāmri nē piitã ma pikaja rũm mẽ kām harênh o hprõt nhũm mẽ piitã harênh ma.

Juãw Paxis tee ri Jejus kukamã hamaxpēr ã harênh

Matêwre 11.2-6; 11.22; Rukre 4.16-21

18Rôm nhũm Juãw Paxisja kêp prês nē hkrĩ nhũm hte hkõt mẽ pa xwỳnhjaja hwỳr mra nē kām Jejus kot tanhmã amnhĩ nhĩpêx to ho pa hā harẽ. Hāmri nhũm harênh ma nē tee ri hkukamã hamaxpēr. Hāmri nē hkõt mẽ pa xwỳnh wa ho axkrut nē wa kuta

19nẽ Jejus wỳr wa kumẽ nē wa kām: —Kwa wa ma hwỳr tē nē hkukja. Nẽ kām: “Xà ka na pre Tĩrtũm mẽ ixwỳr amẽ nà? Nà xà kormã axtem hõ na pa mẽ kormã amnhĩ wỳr hamãr o ri ixpa?” Anẽ. E wa ma hwỳr tē nē ã hkukjêr anẽ nẽ tanhmã kot amnhĩ jarênh to hā ama hāmri nē man akupỳn tē nẽ inhmã harẽ. Anẽ.

20-21Hāmri nhũm wa kuma nē ma hwỳr tē. Nhũm Jejus kormã mẽ ho mex o xa. Mẽ nohkre xwỳnhjaja nhũm akupỳm mẽ no ho mex. Nẽ mẽkarõmnuti kot mẽ hwỳr gjêx xwỳnhjaja nhũm mẽ nê mẽ hapôx o ãm rãhã nhũm wa ra hwỳr tē nẽ kormã hā mẽ omunh o xa. Hāmri nē kām Juãw Paxis kapēr jarẽ.

²²Hāmri nhūm wa kuma nē wa kām: —Tỳ. Nà ãm hāmri na ja hã ijarē. Ixpê mẽ ate ixkamã ajamak o apa xwỳnhta na pa. Jakamã e. Wa kam nē tanhmã ixte amnhĩ nhĩpêx to hã ixpumu hāmri nē ma akupỹm hwỳr tē nē aprĩ hã kām ijarē. Mẽ nohkre xwỳnhjaja na pa akupỹm mẽ no ho mex. Nē mẽ hkànhy xwỳnhjaja pa akupỹm mẽ hkà ho mex. Nē mẽ hyk o mẽ pa xwỳnhjaja pa akupỹm mẽ ho mex. Nē mẽ htyk xwỳnhjaja pa akupỹm mẽ ho htĩr. Nē mẽ kêp amrakati nē ri mẽ pa xwỳnhjê mã mẽmoj mex jarēnh o ri ixpa. Na pa hte ã mẽ ho mex o ri mẽ hkôt ixpa anē. Jakamã e kwa wa ma akupỹm hwỳr tē nē ã kām ijarēnh anē.

²³Kê ijarēnh ma nē arĩ amnhĩ kaxyw ixkôt hamaxpêr tỳx rãhã nē. Koja ã amnhĩ nhĩpêx anē nē hamakêtkati nē ri pa. Nē tee ri ijarēnh kukamã hamaxpêr kêt nē. E wa tokyx ma akupỹm hwỳr tē nē ã kām ijarēnh anē. Anē.

Jejus kot Juãw Paxis mex ã harēnh

Matêwre 11.7-19

²⁴⁻²⁵Nhūm pre ã Jejus wa kām amnhĩ jarēnh anē nhūm wa kuma nē ma akupỹm Juãw Paxis wỳr tē. Hāmri nhūm Jejus mẽ kot mar o kuhê xwỳnhjê mã tanhmã Juãw Paxis jarēnh to nē mẽ kām: —Na ka prem kapôt ã mar kaxyw ma hwỳr mra. Nom ê mex ã omunh kaxyw rỳ hpijaàm kām tanhmã kapêr to hã mar kaxyw hwỳr amrar kêt nē.

²⁶Kêp Tĩrtũm nhỹ hã kapêr xwỳnh jakamã na ka prem mar kaxyw ma hwỳr mra. Tĩrtũm nhỹ hã kot ixkukamã ijarēnh o pa xwỳnh na. Ixpê Tĩrtũm kot mẽ akaxyw ixãm xwỳnh ã na pre mẽ amã ijarēnh o pa. Nē hprĩ hã tanhmã mẽ amã ijarēnh to. Jakamã na kapêr mex o kot wam Tĩrtũm nhỹ hã kapêr jarēnh o mẽ pa xwỳnhjê kapêr jakrenh.

²⁷Tĩrtũm kapêr ã kagà htũm kot Juãw kukamã tanhmã harēnh to nē harēnh kot: Kot paj Ixkra hkukamã ma mẽ hwỳr harēnh o pa xwỳnh mẽ kê ma ri hkukamã mẽ kām harēnh o ri pa. Kê mẽ kuma nē kutêp tãm amnhĩ nhĩpêx. Anhỹr o Tĩrtũm Juãw Paxis kukamã harē nhūm mẽ hã kagà. Tã nhūm mẽ awỳr kumẽ.

²⁸Juãwja mex kumrêx. Na pre hprĩ hã ixkukamã tanhmã ijarênh to ho pa. Nom ixkôt mẽ pa ho mẽ pa xwýnhjê hkĩnhã ixkôt pa ho pa hkêt ãm ixkukamã ijarênh o pa. Jakamã ixkôt mẽ pa ho mẽ pa xwýnhjaja na mex o kot Juãw Paxisja jakrenh. Mẽ kot ixkôt hprĩ hã inhmar o pa jakamã mẽ mex o kot hakrenh. Anẽ.

²⁹Nhũm pre ã Jejus mẽ kãm Juãw Paxis jarênh anẽ. Mẽ kot Juãw mar o kuhê xwýnh kwýjaja na pre htem tanhmã amnhĩ tomnuj to ho pa. Tã Juãw kot mẽ kãm Tĩrtũm kapêr jarênh ma nẽ axpẽn mã Tĩrtũm mex ã harẽ. Nẽ axpẽn mã: —Nà ãm hãmri. Tĩrtũm kapêr na mex kumrêx. Anẽ. Hãmri nẽ amnhĩ tomnuj kaga nẽ Tĩrtũm kôt amnhĩ xunhwỳ. Jakamã nhũm Juãw Paxis Tĩrtũm mã mẽ hkrã kumrã.

³⁰No nhũm Parijew nhõ xwýnhjê mẽ Tĩrtũm kapêr tũm o mẽ ahkre ho mẽ pa xwýnhjaja jajê hkĩnhã Juãw Paxis kaga kumrêx. Jakamã nhũm mẽ hkrã kumrãr kêt nẽ. Mẽ kot Tĩrtũm kapêr kaga jakamã na pre htem Jejus kapêr ma nẽ ãm kuma.

³¹Hãmri nhũm Jejus mẽ kãm: —E pa mẽ amã mẽ piitã htỳx ri hamaxpêr ã tanhmã mẽ harênh to ka mẽ kot amnhĩ nhĩpêx ã mẽ harênh ma.

³²Te mẽ kot mẽhprĩre kot amnhĩ nhĩpêx pyràk. Mẽhprĩrejaja na htem òrkwỳ kapem hije nẽ mẽmoj to amnhĩkati ho hkrĩ. Nẽ tee ri hkwỳjê kot amnhĩ nhĩpêx pumu nẽ mẽ kãm: Kwa na pa mẽ amã gre htã ka mẽ ixkutã anhõkrepôx kêt nẽ. Pa mẽ ja hã mẽ apumu nẽ hpãnhã mẽ amã mẽ htyk jarẽ htã ka mẽ akaprĩ nẽ amỳr kêt nẽ. Kwa mẽ ri ã amnhĩ nhĩpêx anhỳr kêt nẽ. Anhỳr o axpẽn mã kapêr. Tã te mẽ ate mẽ uràk. Tĩrtũm kot mẽ awỳr y hã kapêr xwýnhjê rênh tã ka mẽ te mẽhprĩre kot amnhĩ nhĩpêxta pyrà nẽ mẽ ama ãm mẽ ama nẽ mẽ hkôt amnhĩ nhĩpêx kêt nẽ.

³³—Juãw Paxis na pre mẽ awỳr mỗ nẽ ixpyrà nẽ apkur mex o ri pa hkêt nẽ. Nẽ ixpyrà nẽ wĩhti ho hkõm kêt nẽ pa. Tã ka mẽ ja hã omu nẽ hkaga nẽ atỳx ri Satanasti nhỹ hã kot tanhmã amnhĩ nhĩpêx to ho pa hã hkamnhĩx nẽ ri harênh o ri apa. Hãmri nẽ mẽhprĩre kot amnhĩ nhĩpêx pyrà nẽ hkôt amnhĩ nhĩpêx kêt nẽ.

³⁴Tã pa Juãw pãnhã mẽ awỳr mỗ. Nẽ kurom apkati mẽ ixàpkur mex o ri ixpa. Nẽ kurom wĩhti hkwỹ ho ixkõm o ri ixpa. Ka mẽ ja hã ixpumu mẽ atỳx ri ixàpkur rũnh mẽ ixpipãnh o ri ixpa hã ixkamnhĩx mẽ ã axpẽn mã ixto akapẽr anhỳr o ri apa. Nẽ mẽ kot amnhĩ tomnuj xwỳnhjê hkõt ri ixpa hã axpẽn mã ijarẽnh o ri apa. ã na ka htem axpẽn mã ijarẽnh anẽ. Jao te mẽ ate Juãw Paxis nhĩpêx pyrà mẽ ixkaga mẽ ixkõt amnhĩ nhĩpêx kêt mẽ. Na hte ã htỳx ri tanhmã mẽ hamaxpẽr to ho mẽ pa xwỳnhjaja amnhĩ nhĩpêx anhỳr o ri pa.

³⁵—No tãm ri mẽ hamaxpẽr o mẽ pa xwỳnhjaja na htem ahpỹnhã Juãw mẽ wa ixte amnhĩ nhĩpêx ã wa ixpumu mẽ axpẽn mã wa ijarẽnh o: “Nà ahpỹnhã wa kot amnhĩ nhĩpêx tã wa hamẽ ãm hãmri Tĩrtũm nhỹ hã kapẽr jarẽnh mex o pa. E pu mẽ wa uràk mẽ Tĩrtũm kõt amnhĩ xunhwỳ.” Anhỳr o axpẽn mã wa ijarẽnh o pa. Anẽ.

Parijew nhõ xwỳnh pê Simãwre jarẽnh

Matêwre 26.6-13; Makre 14.3-9; Juãw 12.1-8

³⁶Tã nhũm Parijew nhõ xwỳnh pê Simãwreja amnhĩ nhõrkwỹ hwỳr Jejus mẽ hkõt mẽ pa ho pa xwỳnhjê mẽ kuwỳ. Mẽ kot kutã apkur kaxyw amnhĩ wỳr mẽ kuwỳ nhũm mẽ õrkwỹ hwỳr mra mẽ mẽ hwỳr agjê mẽ apkur kaxyw hkrĩ.

³⁷Hãmri nhũm mẽhõ nija mẽ hwỳr axà. Na pre hte amnhĩ tomnuj pix o pa. Hãmri mẽ Jejus õ krĩ hwỳr hpõx mẽ Simãwre nhõrkwỹ kamã apkur ã harẽnh ma mẽ ma hwỳr tẽ. Mẽ hkuxwaxà hã à py mẽ ma hwỳr o tẽ.

³⁸Hãmri mẽ hwỳr axà mẽ Jejus pumu mẽ hwỳr tẽ mẽ pum xa. Nẽ tee ri tanhmã kot amnhĩ tomnuj to ho paja mã hamaxpẽr mẽ hpijaàm mẽ hkaprĩ mẽ mỳr o xa. Hãmri mẽ Jejus kutã hkõn krã ho tẽm mẽ nhỹ mẽ no kagô ho hpar go. Hãmri mẽ amnhĩ krã kĩ ho hpar grà mẽ kupã hãmri mẽ hpãnhã mẽ hkuxwa xà ho kuxwa. Kãm hkĩnh xàj ã hipêx anẽ.

³⁹Hãmri nhũm Simãwre tee ri ja hã omu mẽ hamaxpẽr o: —Tk. Kwa jahti kot amnhĩ tomnuj pix o pa xwỳnh tã mẽ ixwỳr axà mẽ ã Jejus nhĩpêx anẽ

nhũm amnhĩ nê hanor kêt nê. Kêp ãm hãmri Tĩrtũm nhỹ hã kapêr jarênh o pa xwỳnh ronhỹx ja hã omu nê amnhĩ nê hanor kurê kumrêx. Anê.

⁴⁰Hãmri nhũm Jejus amnhĩ tã hamaxpêr ã omu nê hêx rom kãm kapêr nê kãm: —E Simãwre. Pa amã awjarê ka inhma. Anê. Hãmri nhũm kãm: —Tôe. Mex. Mãmri inhmã awjarê pa ama. Anê.

⁴¹Hãmri nhũm kãm: —Nà koja mêhõ my wa hamêxkrut. Nhũm hõja mêhõ pê kàxpore ho rax kumrêx nê ho ãpresta. Nhũm hõja ãm kêp ho grille nê ho ãpresta. Hãmri nê wa hamê kàxpore ho hapêx pa.

⁴²Hãmri nê akupỹm kot kêp ho ãpresta xwỳnhhta mã hpãnhã òr kaxyw tee ri amnhĩ kukamã hamaxpêr. Ra kot ho hapêx par jakamã tee ri amnhĩ kukamã hamaxpêr. Tã nhũm kot wa kãm ho ãpresta xwỳnhhta wa hwỳr tẽ nê wa kãm: “Kwa wa tee ri amnhĩ kukamã ajamaxpêr kêt nê. Na pa ra war ate ixto tewên ã kagàta kaxôn pa nhũm ja hapêx. Kot paj axte kãm ijamaxpêr kêt nê. Jakamã wa mãmri ajamakêtkati nê axàmnhĩx ri apa.” Anhỹr o wa kãm kapêr. ã mẽ ujarênh kot anhỹr. Anê. Nhũm pre ã Jejus Simãwre mã ujarênh anê. Hãmri nê hã hkukja nê kãm: —E nhỹ myja koja we kãm ho tewên xwỳnhhta kĩnh tỳx nê wehe? Anê.

⁴³Hãmri nhũm kãm: —Nà kot kêp ho rax nê ho ãpresta xwỳnhhta koja kãm hkĩnh tỳx o hõta jakre. Anê. Hãmri nhũm kãm: —Tỳ. Nà ãm hãmri na ka ã harênh anê.

⁴⁴Tã mãn ka ni kot ã inhĩpêx anhỹr xwỳnhhta pumu. Na ka amnhĩ nhõrkwỹ hwỳr ixwỳ pa axà nom ka inhmã gô hkwỳ pa ho amnhĩ par kuhõnh kêt nê. Tã nhũm nija arom ã inhĩpêx anê nê no kagô ho ixpar kuhõ nê amnhĩ krã kĩ ho grà ho nhỹ.

⁴⁵—Nê anhõrkwỹ hwỳr ixarta ã ka ixkahti hkôt inhmỳnh nê ixpãr kêt nê. Tã kêt nija arom xatã ixpar pãr o nhỹ.

⁴⁶Nê ate orti ho ixkrã gregrer kêt tã nhũm arom mẽ hkuxwaxà ho ixpar kuxwa ho nhỹ. Mêhkukwaxà hã kàxpore xohtô htã nhũm àmnhĩx ho ixpar kuxwa ho nhỹ.

⁴⁷ãm hãmri na pa amã ja jarẽ. Nija kot amnhĩ tomnuj tỳx tã pa ra nẽ kot amnhĩ tomnuj o ijapêx pa. Ra kot amnhĩ tomnuj tỳx xwỳnh ã amnhĩ pumunh jakamã na amnhĩ kaxyw inhmã hamaxpêr pê kãm ixkĩnh nẽ ã inhĩpêx anẽ. No ka na ka hte uràk nẽ amnhĩ tomnuj tỳx o apa htã uràk nẽ tee ri ja hã amnhĩ pumunh kêt nẽ. Tã nita kĩnhã ate amnhĩ tomnuj kaga hkêt jakamã na ka ãm amã ixkĩnh grire. Anẽ. Nhũm pre ã Jejus Simãwre mã kapêr anẽ.

⁴⁸⁻⁵⁰Hãmri nẽ nija mã kapêr nẽ kãm: —E kànhmã xa. Ra ate amnhĩ kaxyw inhmã ajamaxpêr jakamã na pa ra ate amnhĩ tomnuj piitã amnhĩ katut kôt rēnh pa. Kot paj axte kãm ijamaxpêr kêt nẽ. Jakamã māmri ma ajamakêtkati nẽ axãmnhix anhōrkwy hwỳr tẽ. Anẽ. Hãmri nhũm mẽ kot axpēn kutã apkur xwỳnhjaja tee ri kot kãm kapêr anhỳrja ã kuma nhũm ja mẽ kãm mex kêt nẽ. Jakamã nhũm mẽ ri axpēn mã harēnh o: —Tk. Kwa mēhō na hte ri kot Tĩrtũm kot amnhĩ nhĩpêx pyràk o amnhĩ nhĩpêx nẽ mẽ kot amnhĩ tomnuj o hapêx ã amnhĩ jarēnh o we ri pahti? Anẽ.

Rukre 8

Mēnijê hkwỳ kot Jejus kôt pa hã mẽ harēnh

Makre 15.40-41; 16.9

¹Tã nhũm Jejus ma mẽ piitã mẽ kãm Tĩrtũm kapêr o mẽ ahkre ho ri mẽ hkôt pa. Krĩ rũnh kamã nẽ krĩ hkryre kamã. Mẽ kot amnhĩ tomnuj kaga nẽ Tĩrtũm kôt amnhĩ xunhwỳr nhũm kot amnhĩ tã mẽ omunh nẽ mẽ ho hkra kaxyw nhũm ri mẽ hkôt mẽ kãm harēnh o pa. Nhũm y hã mẽ ahkre ho mẽ pa xwỳnh pê 12jaja ma hkôt ri pa.

²Nẽ mēni hkwỳjaja. Na pre ra Jejus mẽ hkwỳjê nẽ mẽkarōmnuti japôj. Nẽ mẽ hkwỳjaja tanhmã mẽ à kute xwỳnhjaja nhũm akupỹm mẽ ho mex. Xwỳnhjaja nhũm prem haxwỳja ma hkôt ri pa. Hõ pê na pre Marir Matarēn nhũm pre ra Jejus nẽ mẽkarōmnuti ho 7 nẽ hapôj.

³Nẽ Joanã. Joanã mjên Kujahiti na pre kēp pahiti Erox mã mẽ àpēnh xwỳnhjê krãhtũm. Nẽ Sujānre. Nẽ kaxyw mēnijê ohtô nẽ Jejus kôt tanhmã mẽ ho ajuta hto ho mẽ hkôt pa. Jao mẽ hikàxpore ho mẽmoj japrô nẽ ho mẽ kãm mẽ õ nhĩpêx o ri mẽ hkôt pa.

Mëmo hy hkre xwỳnh
Matêwre 13.1-9; Makre 4.1-9

⁴Tã nhũm mẽ ra krĩ piitã rũm Jejus wỳr akuprõ. Jakamã nhũm mẽ ohtõ rax kumrëx nhũm Jejus mẽ kãm ujarënh o nhỹ. No ãm hprĩ hã ujarënh kêt nẽ. Mẽ kot Tĩrtũm kapër mar nẽ tanhmã hkõt amnhĩ nhĩpêx to nhũm hã kuxi nẽ mẽ kãm hã ujarënh o nhỹ.

⁵Nẽ mẽ kãm: —E mẽ inhma. Koja mēhõ ma pur mã mõ nẽ pur kãm mẽmo hy ho ukapêr o ri pa. Nom nhũm piitã amex kãm rôrõk kêt nẽ. Kwỳ ahpỹnhã nhỹri rôrõk. Hãmri nhũm hkwy aptỳx kãm rôrõk nhũm kuwênhre omu nẽ hwỳr mra nẽ hkrër pa.

⁶—Nẽ kën kãm hy hkwy rôrõk nẽ higrõt kutã nojarêt nẽ higrõt pa. No nhũm kamã aptỳx nẽ kamã kêp pika hkryre jakamã nhũm higrõt nhũm hã myt apha nẽ arĩgro htỳx mẽ nhũm grà pa. Kamã kën nhũm amgo mex kêt jakamã nhũm grà pa.

⁷—Nẽ mrõnhĩ kamã rôrõk xwỳnhja haxwỳja higrõt tã no nhũm utĩ kêp amỳtã nhũm ô hkêt nẽ.

⁸—No hirã kamã pika mex kãm rôrõk xwỳnhja. Hãmri hirã kamã rôrõk nẽ higrõt mex nẽ piitã ô rax nẽ. Piitã kamã ô kêp 100. ã mẽ ujarënh kot anhỹr. E kwa mẽ ixujarënh ma nẽ kãm ajamxpêr tỳx rãhã ho ri apa. Anẽ.

⁹Nhũm pre ã Jejus mẽ kãm ujarënh anẽ. Hãmri nhũm hkõt mẽ pa ho mẽ pa xwỳnhjaja kuma nẽ tee ri hkukamã hamaxpêr nẽ kãm: —Kwa na pa mẽ ixprĩ hã axujarënh kõt mẽmoj pumunh kêt nẽ. Aprĩ hã mẽ inhmã tanhmã harënh to pa mẽ ixprĩ hã kuma nà? Anẽ.

¹⁰Hãmri nhũm mẽ kãm: —Tõe. Nà kot paj mẽ amã harẽ. Tĩrtũm kãm mẽ ate aprĩ hã mar prãm jakamã kot paj ixprĩ hã mẽ amã harẽ. Mẽ kot amnhĩ tomnuj kaga nhũm Tĩrtũm kot ja hã mẽ omunh nẽ mẽ ho hkra. Ja na pa harẽ. —No mũjjaja na mẽ akĩnhã kãm mar prãm nõkati. Jakamã na htem ixujarënh ma nẽ ãm kuma nẽ htỳx ri pa. Anẽ.

Jejus kot prĩ hã mẽmo hy jarënh
Matêwre 13.18-23; Makre 4.13-20

11Hāmri nhūm Jejus hkôt mẽ pa ho mẽ pa xwỳnhjê mã: —E kot paj ixprĩ hã mẽ amã mẽmo hy ho ukapêr ã mẽ ujarēnhta jarē ka mẽ inhma. —Nà mẽmo hyta te kêp Tĩrtũm kapêr pyræk. Nê ahpỳnhã hy rôrôk ã pikata te kêp ahpỳnhã mẽ kot Tĩrtũm kapêr mar xwỳnhjê kot amnhĩ nhĩpêx pyræk.

12Mẽ kot mar xwỳnh kwỳjaja te kot aptỳx kãm hy rôrôk nhūm kuwēnh kot hwỳr mrar nê hkrêr par xwỳnhhta pyræk. Jao Tĩrtũm kapêr ma nhūm Satanasti te kuwēnh kot hy hkrêr parta pyrà nê mẽ kot amnhĩ kaxyw Tĩrtũm kapêr kôt hamaxpêr nê hkôt amnhĩ xunhwỳr pymaj tanhmã nê mẽ hkrã hto. Jakamã nhūm mẽ kapêr ma nom ho hamakêtkati tokyx anê nê axte kãm hamaxpêr nê hkôt amnhĩ nhĩpêx kêt nê.

13—Nê mẽ kot mar xwỳnh kwỳjaja te kot kēnre kamã hkwỳ rôrôk nê higrôt nê grà par tokyx anhỳr xwỳnhhta pyræk. Jao Tĩrtũm kapêr ma nê hkĩnh nê. Nê kãm mar prãm nê. Tã nhūm mēhō tē nê Tĩrtũm nê tanhmã kãm kapêr to nhūm mẽ kuma nê Tĩrtũm kaga. Te mẽmo hy higrôt nê grà par tokyx anhỳrta pyræk.

14—Nê mẽ kot mar xwỳnh kwỳjaja te kot mrônhĩ kamã hkwỳ rôrôk nê higrôt nhūm mrônhĩ kot kêp àmnàr xwỳnhhta pyræk. Jao kãm Tĩrtũm kapêr mar prãm nê. No ãm mãănēn kãm hikukrêx rax nê hikàxpore rax prãm xàj ãm ja pix mã hamaxpêr o pa. Nê gaa nê ra gryk ã axte Tĩrtũm kapêr mã hamaxpêr nê hkôt amnhĩ nhĩpêx kêt nê.

15—Nê mẽ kot mar xwỳnh kwỳjaja te hirã kamã pika mex kãm hy hkwỳ rôrôk nê higrôt nê ô raxta pyræk. Nê ixkapêr ma nê amnhĩ krã him hagjēnh tỳx nê ixkôt ri amnhĩ nhĩpêx mex rãhã ho ri pa. Jakamã te ra mẽmo hy hkreta ô rax mex pyræk. E. ã ixujarēnh kot anhỳr. Anê.

Kanê mẽ guhkrax wa harēnh

Makre 4.21-25

16Nhūm Jejus arĩ mẽ kãm ujarēnh o nhỹ nê mẽ kãm: —E mẽ inhma. Xà na htem kanê hpôk hāmri nê guhkrax o hpro rỳ par krak ri unhwỳ? Nà na htem ã hipêx anhỳr kêt nê. Na htem hpôk nê kỳxpê kuhê xà kamã unhwỳ nhūm hirã mex o kuhê. Nhūm htem ixkrem agjê nê hirã kamã mẽmoj pumunh

mex nê. Ja pyrâ nê na pa hte mē ate inhmar tỳx kaxyw ixprĩ hã mē amã awjarê.

¹⁷Kormã mē ate mēmoj pumunh nê aprĩ hã mar kêt tâ kot kaj mē tokyx aprĩ hã omu nê ama. Te mēmoj kot mē apê hpimxur pyrâk tâ koja tokyx mē amã amnhĩ to amnhĩrĩt ka mē aprĩ hã omunh pa. Te mē ate kanê hpôk kãm aprĩ hã mēmoj pumunh mexta pyrâk.

¹⁸Jakamã kêr ka mē ixkapêr mar tỳx nê hkôt ajamaxpêr rãhã ho ri apa. Jao ixkapêr piitã mar tỳx nê. Nom kot ka mē mar tỳx kêt nê hã ano hkêt pa nê axte kãm ajamaxpêr o apa hkêt nê. Anê.

Jejus kot tanhmã katorxà mē htôjê jarênh to hã harênh

Matêwre 12.46-50; Makre 3.31-35; mãänên Eprêw 2.11-12

¹⁹Nhũm Jejus arĩ mē ahkre ho nhỹ. Rôm nhũm katorxà nê htôjaja nhỹhỹnh hwỳr môn pôj. No nhũm mē kot mē hã htu rax jakamã nhũm mē tee ri hwỳr gjêx kaxyw nê kormã kapôt ã kuhê.

²⁰Hãmri nhũm mēhõja mē omu nê Jejus mã mē harê nê kãm: —Kwa Pahihti. Ota ra akatorxà mē atôjaja awỳr pôj nê tee ri awỳr gjêx mã. O mũj mē kormã kapôt ã kuhê. Anê.

²¹Hãmri nhũm mē kuma nê mē kãm: —Tôe pa ixkato nê mē omu. Inhmã mē hapêê. Nom kot kaj mē atô Tĩrtũm kapêr ma nê hkôt amnhĩ xãm nê hkôt amnhĩ nhĩpêx. Hã kot kaj te apê ixtõ rỳ ixkatorxà kot amnhĩ nhĩpêx pyrâk o pu mē axpên nhĩpêx. Pa te inhmã mē hapê pyrâ nê inhmã mē ajapê nê. Anê.

Jejus kot kôk mã kapêr ã harênh

Matêwre 8.23-27; Makre 4.35-41

²²Tã nhũm apkati hõ hã nhũm Jejus himô rax ã rêr kaxyw nojarêt nê hkôt mē pa ho mē pa xwỳnhjê mã kãm: —E kot puj mē jarãhã ma xarmã mõ. Anê. Hãmri nê mē pàr mã gjêx pa nê ma xarmã mõ. Garirej rũm kato nê ma xarmã pika hõ hwỳr kormã mõ.

²³Nhũm ra Jejus õtxwa nê pàr kre kamã gõr nê nõ. Pu nhũm kôk àpêr tỳx nê nhũm gô axpên tak tỳx nê kãnhmã harĩ. Nê pàr kre kamã pikapĩr rax

nhũm pàrta mẽ kãm àr o mỗ nhũm mẽ tee ri amnhĩ nhĩpêx. No nhũm Jejus arĩ htỳx gờr nễ nỡ.

²⁴Hãmri nhũm mẽ tee ri amnhĩ kukamã hamaxpêr nễ kumra nễ kãm: —Kwa Pahihti kànhmã nhỹ. Kot puj mẽ jarãhã pahtyk pa. Anẽ. Hãmri nhũm kànhmã nhỹ nễ kôk mã kapêr nễ kãm: —E. Kwa hãmri anhĩkrê. Anẽ. Hãmri nhũm hpinhkrênh par mẽ nhũm gô tãm nờr kurê kumrêx.

²⁵Hãmri nhũm Jejus hkwỳjê hwỳr apkjê nễ mẽ kãm: —Kwa kormã te mẽ ate amnhĩ kaxyw Tĩrtũm mẽ wa inhmã ajamaxpêr tỳx kêt pyràk. Anẽ. Hãmri nhũm mẽ amnhĩ jaêr pê kot ã amnhĩ nhĩpêx anhỹr ã omu nễ no hawênh rũnh nễ tee ri axpên pumunh pê hamaxpêr o kuhê nễ axpên mã: —Kokỹỹ. Jejus kêp mẽ panhĩõ hkêt. Mễ pahtõ kot pu we te kot amnhĩ nhĩpêx pyrà nễ we kôk mã pakapêr nhũm we pama anhĩkrê? Nà Jejus mẽ parom àhpumunh tỳx o àhpumunh tỳx. Jakamã na ã anẽ. Anẽ.

Jejus kot mễhõ nê mẽkarõmnuti kator ã harênh

Matêwre 8.28-34; Makre 5.1-20

²⁶Tã nhũm mẽ ra himô nhĩhkjê hã krĩ pê Geras wỳr rê. Himô nhĩkjê hã na pre pika pê Garirej. Nễ Garirej nhĩkjê hã na Gerasja. Jakamã nhũm mẽ ra hwỳr rê.

²⁷⁻²⁹Hãmri nễ pàr kre rũm hapôj nễ api nễ mra nhũm mễhõ myja mẽ kutã tễ. Na pre ra hwỳr mẽkarõmnuti hkwỳ agjê nhũm mẽ ỹ hã oprê htỳx nễ hkênh nễ ri mra. Nễ òrkwỹ kamã hkrĩ hkêt nễ. ãm ri kapôt ã pa ho pa. Mễ htykjê hã pika kamã kên kre kaêx kôt ri pa. Na pre ra krĩ nhõ xwỳnhjaja xatã tee ri unê nễ hkaxpre. Tee ri kàx o ri hkaxpre htã no nhũm amnhĩ nê rênh pa. Nhũm mẽkarõmnutija tanhmã hkrã hto nhũm kapôt pix ã ri mra. Jakamã nhũm Jejus mẽ pàr rũm hapôj nễ api nhũm mẽ omu nễ mẽ kutã tễ nễ Jejus kaxpa. Nhũm amnhĩ wỳr omu nễ nê tanhmã mẽkarõmnuti mã kapêr to. Hãmri nhũm my xoprêja hwỳr tễ nễ kutã hkôn krã ho tễm nễ nhỹ. Hãmri nễ kàxpêê amnhĩ tã kãm kapêr. Nom tãm kapêr kêt nễ. Mễkarõmnuti nhỹ hã kãm kapêr nễ kãm: —Pa Tĩrtũm Kra Jejus? Kwa mo kaxyw na ka mẽ ixwỳr tễ? Kwa tanhmã mẽ ixto hkêt nễ. Anẽ.

30Hāmri nhũm mẽ kām: —Kwa tanhmã na mẽ anhĩxi kute? Anẽ. Nhũm mẽ kām: —Nà mẽ ixpê Mẽohtôhti. Anẽ. Mẽkarõmnuti ra kot hwỳr ohtô nẽ gjêx jakamã na prem ã kãm amnhĩ nhĩxi jarênh anẽ.

31-32Hāmri nẽ Jejus mã: —Kwa jahti nê mẽ ijapôj nẽ mẽ kot amnhĩ xà htỳx kamã hamak tũm xà hwỳr mẽ ixrênh kêt nẽ. Hagrô hkwỳ mũj wỳr mãn mẽ ixrê pa mẽ hpãnhã hwỳr mãn hagjê nà? Anẽ. Hagrôja kii mẽ kêp amỳm hixêt ã ri apkur o pa nhũm mẽ ã Jejus mã mẽ hwỳr amnhĩ to hwỳr anẽ. Hāmri nhũm mẽ kām: —Tôe. Tô mẽ tãm hwỳr mãn mra. Anẽ.

33Hāmri nhũm mẽ kuma nẽ myta pê hapôj nẽ ma hagrôja wỳr mrar kurê kumrêx nẽ mẽ kãm gjêx pa. Hāmri nhũm myja akupỳm tãm hkrã. No nhũm hagrôja mẽkarõmnuti pymaj amỳra nẽ axkahkũm nẽ hprôt nẽ himô hã krã hixêt ã axpum rôrôk nẽ gôx kãm mrõ nẽ pikaprãr pa.

34Hāmri nhũm hagrô jamãr xwỳnhjaja tee ri omu hāmri nẽ ma mẽ õ patrãw wỳr akupỳm mẽ piitã mẽ kãm harênh o hprôt nẽ mra.

35-36Nhũm mẽ tee ri mẽ kuma hāmri nẽ ma kot Jejus pumunh mã hwỳr mra nẽ hkaxpa. Nẽ kuri myta pumu nhũm ra akupỳm tãm hkrã nẽ tãm amnhĩ nhĩpêx nẽ ê kamã mex nẽ nhỹ. Nhũm mẽ kot hã omunh xwỳnhjaja mẽ kãm ujarênh pa. Nhũm mẽ kuma nẽ tee ri amnhĩ kukamã hamaxpêr o ra kãm ma nẽ.

37-39Hāmri nẽ amnhĩ nê Jejus mã kapêr nẽ kãm: —E kwa mẽ tokyj ma akupỳm amrar kurê kumrêx. Anẽ. Hāmri nhũm mẽ kuma nẽ awjanã nẽ ma akupỳm pàr wỳr mra nẽ agjê. Nhũm akupỳm mex xwỳnhhta mẽ hkôt hkrà nom nhũm Jejus kãm: —Nà kot kaj mẽ ixkôt amõr kêt nẽ. Ma akupỳm anhõ krĩ hwỳr mãn tẽ nẽ Tĩrtũm kot tanhmã akupỳm ato mex to hã mẽ kãm amnhĩ jarênh o ri mẽ hkôt apa. Anẽ. Hāmri nhũm kuma nẽ ma akupỳm krĩm tẽ nẽ ri mẽ kãm Jejus kot tanhmã ho mex to hã harênh ri mẽ hkôt pa.

Jejus kot wa ho axkrut nẽ wa ho mex ã harênh

Matêwre 9.18-26; Makre 5.21-43

40Tã nhũm Jejus mẽ ma akupỳm xarmã mõi nẽ rê nẽ mẽ kutêp mẽ pikuprõnh xwỳnhjê pumu. Nhũm mẽ ra amnhĩ wỳr mẽ omu nẽ mẽ kutêp gô jakax ã

pikuprõnh rax nẽ. Jakamã nhũm mẽ mẽ hwỳr pøj nhũm mẽ amnhĩ wỳr Jejus pumu nẽ hkĩnh nẽ.

⁴¹⁻⁴²Hãmri nhũm Jajti ma hwỳr tẽ. Ijaew nhõ Tirtũm kapẽr o mẽ ahkre xà hã ixkre jamãr xwỳnh na pre. Nhũm pre hkra ni pyxire. Hã amgrà pẽ 12. Tã ra kęp à htỳx nẽ htyk kaxyw nẽ nõ. Hãmri nhũm hipêêxàja tee ri omu hãmri nẽ Jejus wỳr tẽ nẽ kutã hkõnkrã ho tẽm nẽ nhỹ nẽ ho kuwỳ nẽ kãm: —Pa akupỹm mẽ ixto mex xwỳnh maati. E awỳr na pa tẽ. Na ra ixkra ixpê htyk kaxyw. Pa tee ri omu nẽ kaxyw amã ijamaxpẽr nẽ awỳr tẽ. Kwa ma ixkõt inhõrkwỹ hwỳr tẽ nẽ inhmã omu nẽ tokyx inhmã ho mex nà? Anẽ. Hãmri nhũm kuma nẽ ma hkõt tẽ. Nhũm mẽ ohtô nẽ wa hkõt pry hã mra nẽ axpẽn nhĩgã nẽ axpẽn kujahêk o hkõt mra.

⁴³Hãmri nhũm mẽhõ nija haxwỳja wa hkõt tẽ. Na pre hte hkamrô hkryre rãhã ho pa hã ra amgrà kęp 12. Nhũm tõtô tee ri kot ho mex kaxyw hkane kaprỳ ho pa.

⁴⁴Jakamã nhũm tee ri amnhĩ kukamã hamaxpẽr hãmri nẽ Jejus jarẽnh ma nẽ ma mẽ hkõt hwỳr htẽm kurê kumrẽx. Nom nhũm mẽ ohtô rax nẽ hkõt mõi jakamã nhũm mẽ hkaêx kõt hwỳr tẽ nẽ hkatut kõt kęp ê nhĩrê kupê. Hãmri nẽ ãm kęp ê pix kupênh tã akupỹm mex.

⁴⁵Hãmri nhũm Jejus kot kęp ê kupênh ã amnhĩ tã omunh tã hêx rom mẽ ho hakẽx nẽ mẽ omu nẽ mẽ kãm: —Kwa mẽ atõ na ka ri amnhĩ kaxyw inhmã ajamaxpẽr tỳx pẽ ixpê ixê kupê? Anẽ. Hãmri nhũm mẽ piitã tee ri axpẽn pumu nẽ kãm amnhĩ tã aprã. Hãmri nhũm Simãw Pêtre kãm: —Mẽ kot apê amnàr griã kot ka kêt ri mẽhõ kot apê hkupênh xwỳnh ã ri mẽ hkukja. Kwa mãn ãm mẽhõ amarĩ apê hkupê. Anẽ.

⁴⁶Hãmri nhũm kãm: —Nà mẽhõja amarĩ hkupênh kêt nẽ. Na amnhĩ kaxyw inhmã hamaxpẽr tỳx pẽ ixpê hkupê. Tã ixàhpumunh tỳx xàja kõt na akupỹm mex. Nom ixte mẽhõ kot ixpê hkupênh xwỳnhja pumunh jakamã na pa ixêx rom ã amnhĩ tã ri mẽ hkukjêr anẽ. Kwa mẽ atõ inhmã amnhĩ jarẽ. Anẽ.

⁴⁷Hãmri nhũm mẽhõ nita kuma nẽ tee ri kęp kot amnhĩ to hpimxur prãm kaprỳ. Hãmri nẽ hpijaàm kãm hwỳr htertet o tẽ nẽ kutã hkõn krã ho tẽm nẽ

nhỹ nẽ kãm amnhĩ jarẽ nẽ kãm: —Ma pa na pa inhmã inhmex prãm xàj apê axê kupê. Tã na pa akupỹm inhmex. Anẽ.

⁴⁸Hãmri nhũm Jejus kuma nẽ kãm: —Tôe. Nà ra ate amnhĩ kaxyw inhmã ajamxpêr tỳx kôt ate ã amnhĩ nhĩpêx anhỹr jakamã na ka akupỹm amex. E mãmri ajamakêtkati nẽ ma akupỹm tẽ. Anẽ. Hãmri nhũm kuma nẽ hkĩnh nẽ ma akupỹm tẽ.

⁴⁹Rôm nhũm Jajti mã àpênh xwỳnhjê hõ òrkwỹ rúm ma ò patrãw kutã tẽ nẽ wa hkaxpa nẽ Jajti mã kãm: —Kwa na ra apê akra ty. Jakamã mo kaxyw kot ka kêt amnhĩ kôt hwỳr Jejus o mỗ? Kwãr mãmri ma akupỹm tẽ. Anẽ.

⁵⁰Hãmri nhũm Jejus kuma nẽ Jajti mã kãm: —Kwa tee ri akra hkukamã ajamxpêr kêt nẽ. Kaxyw inhmã mãn ajamxpêr tỳx nẽ. Koja te ra apê htyk tã koja akupỹm amã htĩr. Anẽ.

⁵¹⁻⁵³Hãmri nhũm mẽ mỗ nẽ òrkwỹ hwỳr pôj nẽ hwỳr axà nẽ mẽ omu nhũm mẽ ra htyk xwỳnhhta ã htu rax nẽ. Nẽ omũj ri mur. Hãmri nhũm Jejus mẽ hwỳr axà nẽ mẽ mỳr ã mẽ omu nẽ mẽ kãm: —Kwa mẽ hãmri amỳr kêt nẽ. Na nireta mẽ apê htyk kêt na ãm gõr nẽ nõ. Anẽ. Hãmri nhũm ra mẽ kot htyk ã omunh mex jakamã kuma nẽ ãm kuma nẽ axtem nẽ ri axpên mã hã hpêr o axkê. Hãmri nhũm Jejus htyk xwỳnhhta wỳr hitom wỳr àr kaxyw nẽ amnhĩ kôt Juãw nẽ Xiakre nẽ Pêtre nẽ kaxyw htyk xwỳnh katorxà nẽ hipêêxàja. Jajê pix na pre amnhĩ kôt mẽ ho agjê.

⁵⁴Hãmri nẽ htyk xwỳnhhta wỳr tẽ nẽ hpa hã kupy nẽ kãm: —Pa? Kwa tokyx kànhmã nhỹ. Anẽ.

⁵⁵Hãmri nhũm akupỹm htĩr nẽ kànhmã ỹr kurê kumrêx. Hãmri nhũm Jejus mẽ kãm: —E kwa mẽ tokyx kãm mẽmoj japêr kê kukrê. Mãn ra kãm prãm nẽ. Anẽ.

⁵⁶Hãmri nhũm katorxà mẽ hipêêxà wa amnhĩ jaêr pê akupỹm htĩr kãm omu nẽ kamã no pyma ho hkĩnh tỳx nẽ. Hãmri nhũm Jejus wa kãm: —E wa inhma. Kêr ka wa akupỹm ixte war amã ho htĩr ã ri mẽ kãm ijarênh o ri apa hkêt nẽ. ãm kwarĩ ho kwarĩ. Anẽ.

Rukre 9

Jejus kot mẽ ho 12 nẽ ahpỹnhã mẽ rẽnh ã harẽnh

Matêwre 10.1; 10.5-15; Makre 6.7-13; Rukre 10.1-12; mãânên Atre 13.49-50; 18.6

1-2Tã nhũm Jejus hkôt mẽ pa ho mẽ pa xwỳnh pẽ 12jê mã kapẽr nẽ mẽ kãm: —E mẽ amnẽ ixwỳr mra nẽ ixkapẽr ma. Na pa ra mẽ amã ixàhpumunh tỳx xà hkwỳ gõ. Jakamã kêr ka mẽ inhỹ hã ma ri akwỳjê hkôt tanhmã mẽ ho mex to ho ri mẽ hkôt apa. Mẽ à xwỳnhjê ho mex o ri mẽ hkôt apa. Nẽ mẽ hkwỳjê nẽ mẽkarõmnuti japôj. Nẽ mẽ piitã mẽ kãm anẽ kê mẽ tokyx Tĩrtũm kôt amnhĩ xunhwỳ kê mẽ ho hkra.

3Nom kêr ka mẽ amnhĩ kôt akukrêx ho ohtô nẽ ri ho apa hkêt nẽ. Nẽ amnhĩ kaxpar xà hã kô ho apa hkêt nẽ. Nẽ kawà htur nẽ ho apa hkêt nẽ. Nẽ amnhĩ kôt axàpkur xà hã anhõ ho apa hkêt nẽ. Rỳ akàxpore rax nẽ ho apa hkêt nẽ. ãm mẽ anhõ kamĩs ho pixi nẽ haxà nẽ ri hã apa. Nẽ anhỹ kamã ã ri mẽ hkôt apa anẽ. Kê mẽ kot mẽ akapẽr mar xwỳnhjaja tãm mãn mẽ amã mẽ anhõ ho pa.

4—Nẽ kêr ka mẽ nhỹri krĩ hõ hwỳr pôj nẽ apôx xà kamã mẽhõ nhõrkwyĩ kamã hkôt ri apikamẽnh tãmtã kurũm akupỹm ajapôj nẽ ma hpãnhã nhãm krĩ hõ hwỳr apa. Nom atỳx ri nhãm mẽ hwỳr amrar nẽ nhãm mẽ hwỳr amrar kêt nẽ.

5—Nẽ koja mẽ nhỹri mẽ akapẽr kaga ka mẽ amnhĩ tã mẽ kamã ama nẽ tokyx mẽ kurũm ajapôj nẽ ma nhãm apa. Nẽ anojarêt nẽ mẽ noo mã akuhê nẽ amnhĩ par ã awjagrô kapĩ. Mẽ kot Tĩrtũm kaga hã amnhĩ pumunh nhũm Tĩrtũm kot amnhĩ pyrà nẽ mẽ hkaga hã mẽ kot omunh kaxyw ka mẽ ã mẽ noo mã amnhĩ nhĩpêx anẽ. Hãmri nẽ ma hpãnhã krĩ hõ hwỳr apa. Anẽ.

6Nhũm pre ã Jejus mẽ kãm mẽ àpênh ã karõ anẽ. Nhũm mẽ kuma hãmri nẽ hapôj nẽ ma mẽ hkôt pa. Ma krĩ piitã hkôt akupỹm mẽ à xwỳnhjê ho mex nẽ Tĩrtũm kapẽr o tanhmã mẽ ahkre hto ho ri mẽ hkôt pa.

Pahi Erox tee ri kot Jejus kukamã hamaxpẽr ã harẽnh

Matêwre 14.1-12; Makre 6.14-29

7-8Hāmri nhūm pika pē Garirej kamā mẽ piitā Jejus jarēnh ma nē ahp̄ynhā ri tanhmā axpēn mā harēnh to. Mē hkwỳjaja kēp finat Juāw Paxis akup̄ym ht̄ir ā ri harē. Nhūm mẽ hkwỳjaja amnepēm mẽ hkukamā Tirtūm nhỹ hā kapēr jarēnh xwỳnhjē hō ra akup̄ym ht̄ir ā harē. Nhūm mẽ hkwỳjaja kēp finat Eris ā axpēn mā harē. Jakamā nhūm pahшти Eroxa mẽ kot ahp̄ynhā tanhmā ri harēnh toja ma nē tee ri hkukamā hamaxpēr.

9Nē hamaxpēr o: —Kwa mēhō na hte we ri ā amnhĩ nhĩpēx anhỹr o pa wehe? Nà finat Juāw Paxis kēt. Ra ixte amnepēm hā ixàmnēnh nhūm mẽ kot inhmā mut krāhyr nē hp̄ir kēnā. Kwa mēhō na hte we ri ā amnhĩ nhĩpēx anē? Anhỹr o hamaxpēr hāmri nē kām omunh prām nē.

Jejus kot mẽ ho ohtō nē mẽ kām mẽ õ hā harēnh

Matēwre 14.13-21; Makre 6.30-44; Juāw 6.1-14

10Tā nhūm Jejus nhỹ hā kapēr o mẽ pa xwỳnhjaja akup̄yn hwỳr mran pōj nē mẽ kot ri tanhmā amnhĩ nhĩpēx to ho pa hā kām amnhĩ jarē. Hāmri nhūm mẽ kuma nē ma kr̄i pē Pesēj wỳr kormā mẽ o mō.

11Hāmri nhūm kr̄i hkwỳ nhō xwỳnhjaja ra ma mẽ mōr ā mẽ harēnh ma nē ohtō nē ma mẽ hkôt mra nē nhỹri mẽ hkôt pōj. Nhūm Jejus amnhĩ kôt mẽ omu hāmri nē tanhmā mẽ ho mex to ho xa. Kôt mẽ à nē mẽ pa xwỳnhjaja nhūm akup̄ym mẽ ho mex. Hāmri nē Tirtūm kapēr o mẽ ahkre nē mẽ kām: —E kot kaj mẽ atō amā amnhĩ tomnuj kaga hprām xāj Tirtūm kôt amnhĩ xām nhūm amnhĩ tā apumu nē ato hkra. Hāmri ka ajamakētkati nē amex nē axàmnhix ri apa. Anhỹr o mẽ kām kapēr pē mẽ ahkre ho xa.

12Tā nhūm myt àr kaxyw nhūm Jejus nhỹ hā mẽ ahkre ho mẽ pa xwỳnh pē 12jaja hwỳr mra nē kām: —Kwa na ra kamàt o mō. Mē hano kê mẽ amnhĩ to kr̄i hō japēr nē tokyx amnhĩm mẽmoj japrō nē kuku nē hikwỹ nē gōr. Mo mẽ panhō? ãm jar kapôt pix kēnā. Anē.

13-14Hāmri nhūm mẽ kuma nē mẽ kām: —Kwa ka mẽ kamjaja mẽ kām mẽmoj gō kê mẽ kuku. Anē. Nhūm mẽ ohtō rax nē mẽ hkôt mra. Měmyjaja kēp 5.000 nē kaxyw mẽ hprō nē mẽ hkrajaja. Jakamā nhūm mẽ kēp 12jaja Jejus kot ā mẽ kām kapēr anhỹrja ma nē tee ri mẽ hkukamā hamaxpēr nē

kām: —Kwa nà mo mẽ panhõ rax? Mẽ panhõ pãwti kêp sîk nẽ kaxyw tep grà axkrut্রে kênã kot kêt we mẽ piitã mẽ hipêx pa. Xà kot paj mẽ ma mra nẽ nhÿri mẽ kãm mẽ apkur xà japrô nhũm mẽ kuku? Anẽ. Hãmri nhũm mẽ kãm: —Nà pu mẽ kãm mẽmoj japrôr kêt nẽ. Mẽ panhõta kot puj mẽ kãm ho anhrà. E mẽ kãm anẽ kê mẽ ahpÿnhã ri hije nẽ hkrĩ nẽ apku. Anẽ.

¹⁵Hãmri nhũm mẽ kuma nẽ mẽ kãm anẽ nhũm mẽ piitã hkrĩ pa.

¹⁶Hãmri nhũm Jejus pãwti mẽ tepta jamÿ nẽ kànhmã kaxkwa hwÿr rît nẽ kànhmã kupẽ nẽ Tirtũm mã harẽ nẽ kãm: —Pa Papaj? Apê mẽ inhmã mẽ inhõ xwÿnh jakamã amex o amex. Anẽ. Hãmri nẽ mẽ kãm ho hkry hpa nẽ hkôt mẽ pa ho mẽ pa xwÿnhjê mã kugõ nhũm mẽ ô ri ho xa nẽ ho mẽ hipêx par kumrêx.

¹⁷Nhũm mẽ piitã apkur mex o hkrĩ. Mẽõja mẽ kêp grire htã nhũm Jejus tanhmã mẽ kãm ho rax to nhũm mẽ ohtô rax tã piitã kuku nẽ ho õhy htu hpa. Nhũm arĩ mẽõ jakrêx prã nhũm Jejus kôt mẽ pa ho mẽ pa xwÿnhjaja akupÿm hakrêx o pikuprõnh pa nẽ ho kawà ho 12 nẽ ho nÿt pa.

Jejus kot amnhĩ tã hkôt mẽ pa xwÿnhjê kukjêr ã harênh

Matêwre 16.13-19; Makre 8.27-29

¹⁸Tã nhũm arĩgro hõ hã nhũm Jejus nhÿri ahte Tirtũm mã amnhĩ jarênh o nhÿ nhũm hkôt ri mẽ pa ho mẽ pa xwÿnhjaja ma hwÿr mra. Hãmri nhũm amnhĩ wÿr mẽ omu nẽ amnhĩ tã tanhmã mẽ hkukjêr to nẽ mẽ kãm: —Kwa mẽ inhmã mẽmoj jarẽ. Tanhmã na htem ahpÿnhã axpên mã ijarênh to wehe? Anẽ.

¹⁹Hãmri nhũm mẽ kãm: —Nà na htem ahpÿnhã tanhmã ajarênh to. Na hte kamã mẽ hkwÿjaja ato finat Juãw Paxis ã ajarẽ. Nhũm kamã mẽ hkwÿjaja ato finat Eris ã ajarẽ nhũm mẽ hkwÿjaja tõiã apê Tirtũm nhÿ hã kapêr jarênh xwÿnhjê hõ ra akupÿm htĩr ã ajarẽ. ã na htem ahpÿnhã ajarênh anẽ. Anẽ.

²⁰Hãmri nhũm mẽ kuma nẽ mẽ kãm: —No mẽ kajaja? Ixpê mẽhõ hã na ka htem ixkamnhix? Anẽ. Hãmri nhũm Simãw Pêtre kãm: —Nà mẽ pajaja na pa htem apê Tirtũm kot mẽ ixkaxyw axãm nẽ mẽ ixwÿr amênh xwÿnh ã

ajarẽ. Nẽ apê mẽ ixpiitã mẽ inhõ Pahi Maati hã ajarẽ. ã na pa htem ajarẽnh anẽ. Anẽ.

21Hãmri nhũm kuma nẽ mẽ kãm: —Tỳ. Nà ãm hãmri na ka htem ã ijarẽnh anẽ. ã ixte anhỹr kênã. Nom kêr ka mẽ inhmar kumrẽx. Kêr ka mẽ kormã ã akwỳjê mã ijarẽnh anhỹr o ri apa hkêt nẽ. Anẽ.

Jejus kot amnhĩ kukamã amnhĩ jarẽnh

Matêwre 16.21; Makre 8.31-33

22Nhũm Jejus arĩ hkôt mẽ pa ho pa xwỳnhjê mã kapêr nẽ hprĩ hã tanhmã mẽ kãm amnhĩ jarẽnh to nẽ mẽ kãm: —Nà ãm hãmri na Simãw Pêtre ijarẽ. Mẽ kajaja ra mẽ ate ja hã ixpumunh mex. No mẽ pahkwỳjaja na mẽ akĩnhã mẽ kãm ja hã ijarẽnh mar nẽ ja hã ixpumunh prãm kêr. Ijaew pigêtjaja nẽ Tĩrtũm kapêr tũm o mẽ ahkre o mẽ pa xwỳnhjaja nẽ patre krãhtũmjaja mẽ kãm ja hã ixpumunh prãm kêr. Jakamã koja mẽ nhỹrmã ixpynê nẽ ixtak rax nẽ. Hãmri nẽ ixpĩ. Nom kot paj ixtyk ã apkati axkrunẽpxi nhũm Tĩrtũm akupỹm ixto ixtĩr. Anẽ.

Jejus krajaja tanhmã kot amnhĩ nhĩpêx to hã mẽ harẽnh

Matêwre 10.31; 16.24-28; Makre 8.34–9.1; Rukre 14.25-33; Juãw 12.24-26; mããnẽn Karatas 5.24; Piripos 2.4; Wam Pêtre 4.1-2; Apokarip 2.10-12

23Nhũm pre ã Jejus amnhĩ kukamã hkôt mẽ pa ho mẽ pa xwỳnhjê mã amnhĩ jarẽnh anẽ hãmri nẽ hpãnhã mẽ kot mar o kuhê xwỳnh piitã mẽ kãm kapêr nẽ mẽ kãm: —E kot ka mẽ atõ ate ixkôt amnhĩ xãm ã amnhĩ jarẽ hãmri nẽ mããnẽn ã amnhĩ jarẽnh anẽ nẽ amnhĩ jarẽnh o: “Jejus kêp inhõ Pahihti jakamã kot paj kapêr kôt pix mã amnhĩ nhĩpêx rãhã ho ri ixpa. Kwãr ixkwỳjaja tanhmã hã inhĩpêx to.” Anhỹr o apkati mẽ ã amnhĩ jarẽnh anẽ.

24—Koja mẽ ixtã mẽ atõx pĩ rỳ tanhmã mẽ atõ hto ka ty. Tã koja akaxwỳnh ma inhõ krĩ mex wỳr àpir kurê kumrẽx. Hãmri nẽ kamã atĩr tũm nẽ amex rãhã apa ho apa. Nom kot kaj mẽ jar atĩr prãm xàj ixkaga hãmri nẽ hwỳr axàpir kêr nẽ.

25—Nẽ koja mẽhõ hikukrêx rax gryk ã Tĩrtũm kaga. Hã koja nhỹrmã ty nẽ ỹ kamã kuwy hwỳr ma mõi nẽ amnhĩ kôt hikukrêx õ hp̄yr nẽ o mõi kêr nẽ.

Koja tee ri kuwy hwỳr mōr pymaj amnhĩ nê hikukrêx rax o amnhĩ pãnhã amnhĩrer prãm kaprỳ.

26—Nê koja mēhō ixte mē ahkre hã inhma nhũm ja kēp omnuj nhũm ixkaga japêr. Hã kot paj nhỹrmã akupỹn mē ato amnhĩptàr kaxyw akupỹn wrỳ nê amnhĩ xwar kot ixkaga xwỳnhhta kaga. ãm hãmri na pa ã mē amã amnhĩ jarēnh anē. Kot paj nhỹrmã man akupỹn inhō Papaj nhỹ hã ixte mē ho amnhĩptàr kaxyw akupỹn wrỳ. Nhũm kapêr o mē wrỳk xwỳnhjaja man ixkôt wrỳ. Pa mē wrỳ hãmri nê mē kot ixkaga xwỳnhjaja pa amnhĩ pyrà nê mē hkaga.

27ãm hãmri na pa ã mē amã amnhĩ jarēnh anē. Kot paj nhỹrmã akupỹn ixte mē ato amnhĩptàr kaxyw mē awỳr wrỳ. Tã kot kaj mē akwỳjaja kormã atĩr ri ja kukamã tanhmã ixte amnhĩ nhĩpêx to hã ixpumu. Anē.

Jejus kot kēn prêk nhĩmōk ã hirã kamã ãm ã harēnh

Matêwre 17.1-8; Makre 9.2-8; määnēn Sikũn Pêtre 1.16-18

28Tã nhũm semãnja hapêx nhũm Jejus Simãw Pêtre nê Xiakre nê Juãw wa mē kãm kapêr nê mē kãm: —E pu mē ma hixêt prêk mũj wỳr mō nê hwỳr api nê himōk ã Tĩrtũm mã amnhĩ jarē. Anē. Hãmri nê ma amnhĩ kôt hwỳr mē o mō nê hwỳr mē ho api.

29-32Hãmri nhũm Jejus Tĩrtũm mã amnhĩ jarēnh o xa. Nom nhũm hkôt hixêt wỳr mē mōr xwỳnhjaja õtxwa htỳx nê ra gōr nê hikwỹ. Pu nhũm Jejus axtem hkuk nê xa. Nê ê haka htỳx nê xa. Hãmri nhũm ja wa kaxkwa rũm wrỳ nê kuri kãm kapêr o xa. Finat Mojes mē finat Erisja wa kuri kãm kapêr o xa. Na pre ra amnepêem Tĩrtũm amnhĩ wỳr wa ho api. Tã nhũm wa ra akupỹn wrỳ nê Jejus mã kapêr o xa. Mē hpimràatã hirã htỳx kãm axpēn mã kapêr o kuhê. Jejus kormã krĩ pê Jerujarē kapem mē kot hpĩr kêt ri nhũm wa mē axpēn mã htyk kukamã harēnh o kuhê. Nhũm wa kãm: —Nà Tĩrtũm jamaxpêr xà hkôt kot kaj ã amnhĩ nhĩpêx anē. Anhỹr o Jejus tyk kukamã kãm hamaxpêr o hihtỳx o wa xa. Rôm nhũm mē õt xwỳnhjaja hkrã hapôj nê tee ri Jejus pumu. Nhũm mex kumrêx nê hirã htỳx kãm xa nhũm mē omu nê kuri wa ãm xwỳnhhta wa omu.

³³Hāmri nhũm Mojes mẽ Eris wa ra akupỹm nojarêt nhũm Simãw Pêtre tee ri ja hã wa omu nẽ Jejus mã kãm: —Kwa Pahihti. Nà ãm hāmri na pu mẽ amnẽ mỗ. Kwa pu mẽ kritpêm jar axkamẽ nẽ tokyx panojarêt kêt nẽ. Pa mẽ amã pô nhĩrõnh o axkrunẽpxi nẽ hipêx. Amã hõ nhĩpêx nẽ Mojes mã hõ nhĩpêx nẽ Eris mã hõ nhĩpêx ka mẽ kamã akrĩ. E kwa pa mẽ amã ho anẽ nà? Anẽ. Nhũm amnhĩ krã hkôt ã kãm kapêr anẽ.

³⁴Hāmri nẽ kormã kãm kapêr rôm nhũm kakrã jaka tỳxja wrỳ nẽ mẽ hkunor nhũm wa mẽ kamã kuhê. Hāmri nhũm Simãw Pêtre mẽ Juãw mẽ Xiakreja mẽ tee ri kakrã kot amnhĩ nhĩpêx ã omu nẽ kãm ma nẽ.

³⁵Hāmri nhũm kakrã kamã Tĩrtũm mẽ kãm kapêr nẽ mẽ kãm: —E ota Ixkra xa. Mẽ ate kamã ajamak o apa xwỳnhta na. Inhmã hapêê. Kêr ka mẽ ãm tapxipix kapêr mar tỳx o ri apa. Anẽ.

³⁶Hāmri nhũm mẽ kuma nẽ kànhmã rĩt nẽ ãm Jejus pix pumu nhũm ahte xa. Nhũm kuri wa ãm xwỳnhta wa ra ma akupỹm api nhũm mẽ Jejus pix pumu. Mẽ tapxipixjaja na prem ã Jejus kot amnhĩ nhĩpêx anhỹr ã omu nom taxy kormã nhãm hkwyjê mã harênh kêt nẽ. ãm axpên pix mã harênh pê hkukamã hamaxpêr o ri Jejus kôt pa.

Jejus kot mễhõ nê mẽkarõmnuti janor ã harênh

Matêwre 17.14-21; Makre 9.14-29

³⁷Tã nhũm apkati nhũm mẽ ma akupỹm ahparmã hkwyjê hwỳr wrỳk o mỗ. Nẽ mẽ hwỳr hpôx o mỗ nhũm mẽ ra mẽ kutêp pikuprõnh rax nẽ kuhê.

³⁸Hāmri nhũm mẽhõ myja amnhĩ wỳr mẽ omu nẽ mẽ kutã tẽ nẽ mẽ hkaxpa nẽ Jejus pumu nẽ kãm: —Pa Jejus. Kwa ixkamã axukapĩ nẽ inhmã ixkra ho mex. ãm ixpê pyxire.

³⁹Na hte mẽkarõmnuti xatã ixpê tanhmã ho nhũm ỹ hã amỹra nẽ mra nẽ rôrôk nẽ hakwa jamrô ho hikwỹ nhũm tokyx kãm urer kêt nẽ. Nhũm ra ixpê homnuj tỳx nẽ.

⁴⁰Hāmri pa akôt mẽ pa ho mẽ pa xwỳnhjê hwỳr o tẽ nhũm mẽ kot inhmã ho mex kaxyw tee ri tanhmã ho hkapyrỳ. Anẽ.

⁴¹Hāmri nhūm kuma nē hkôt mē pa ho pa xwỳnhjê mã kām: —Hêxta waa nē. Na ka mē ra ixte Tĩrtũm nhỹ hã mē ho mex ã ixpumunh o ixkôt apa ryy tã kormã ixpyrà nē ã mē hipêx anhỹr kêt nē. Mãn ka mē kormã mē kaxyw Tĩrtũm kôt ajamaxpēr tỳx kêt nē. Anē. Hāmri nē myta mã kām: —E amnē ixwỳr akra ho tē pa inhno ho omu. Anē.

⁴²Hāmri nhūm hwỳr o tē nhūm mēkarõmnuti axte kêp ho pika kura nhūm amỹra nē tēm nē nō. Hāmri nhūm Jejus omu nē nê mēkarõmnuti kator nhūm akupỹm mex nē kànhmã nhỹ. Hāmri nhūm akupỹm hipêêxà mã kugõ.

⁴³Hāmri nhūm mē amnhĩ jaêr pê Jejus kot ã hipêx anhỹrja ã omu nē ri axpên mã harênh o: —Kokỹỹ. Hêxta waa nē. Pēr ãm Tĩrtũmja ãm àhpumunh o àhpumunh. Anē.

Jejus kot htyk kukamã amnhĩ jarênh

Matêwre 17.22-23; Makre 9.30-32

⁴⁴Hāmri nhūm Jejus hkôt mē pa ho mē pa xwỳnhjê mã kām: —E kot paj mē amã tanhmã amnhĩ jarênh to ka mē inhmar tỳx nē. Na pa pre mē ate aa mēmoj pumunh kêt kwỳ ho anhỹr o ixpa pix kaxyw mē awỳr ixwỳr kêt nē. Koja mē tokyx mē kãm ixtã amỹnê nhūm mē ixpĩ. E kwa kêr ka mē ja ma nē hã anohtỳx nē ho apa. Anē.

⁴⁵Hāmri nhūm mē tee ri kot ã amnhĩ jarênh anhỹrja ma nē axpên mã: —Kwa mo na pēr ri ã amnhĩ jarênh anē? Kêp mē panhõ Pahi Maati hã kot amnhĩ jarênh kênã kot kêt mēhõ kupĩ. Anhỹr o axpên mã ri harênh o kuhê. Hāmri nē mē kãm ã kot amnhĩ jarênh anhỹrja mar prãm kêt jakamã hprĩ hã tanhmã hã hkukjêr to hkêt nē. ãm akryk mar o kuhê.

Mē kot amnhĩ to rũnh xwỳnhjê jarênh

Matêwre 18.1-5; Makre 9.33-37; Rukre 22.24-27; mãânên Píripos 2.3-9; Wam Pêtre 5.5

⁴⁶Tã nhūm Jejus kôt mē pa ho mē pa xwỳnhjaja tanhmã amnhĩ kukamã hamaxpēr to hãmri nē axpên mã: —Kwa mē pahtõ kot puj we nhỹrmã pahpê pahi nē mē ho amnhĩptàr rax o pahkwỳ jakre? Anē. Hāmri nē ja hã axpên kukjêr o Jejus kôt mō nē axpên mã: “Nà pa.” Nhūm mē hkwỳja: “Nà kêt pa.” Anhỹr o hkôt mō.

⁴⁷Hāmri nhũm Jejus mẽ kuma nẽ mẽ hamaxpěr kôt mẽ omu. Hāmri nẽ xa nẽ amnhĩ wỳr mẽhprĩjê mã hpa ho apê nhũm hwỳr tẽ nẽ kuri xa.

⁴⁸Hāmri nhũm Jejus hkôt mẽ pa ho pa xwỳnhjê mã tanhmã harēnh to nẽ mẽ kãm: —E mẽ inhma. Kêr ka mẽ apê pahi pyræk o tanhmã amnhĩ jarēnh to ho ri apa hkêt nẽ. Ām te amarĩ ri mẽ apa pyræk o amnhĩ nhĩpêx o ri apa. Jao nhỹri mẽhprĩre hõ pumu nẽ kamã axukapĩ ho kãm mẽmoj tanhmã ho rỳ kãm mẽmoj gõ. Hāmri nẽ te pa ate tanhmã ixto mex to pyræk o amnhĩ nhĩpêx. Nẽ kot ka mẽ atõ pa tanhmã ixto mex to nẽ te ate Tĩrtũm tanhmã ho mex to pyræk o amnhĩ nhĩpêx. Kot kaj mẽ ã amnhĩ nhĩpêx anhỹr o ri apa nhũm Tĩrtũm ja hã mẽ apumu nẽ mẽ ate amnhĩ to rũnh kêt tã nhũm tãm mẽ ate amnhĩ to rũnh xwỳnh ã mẽ ajarẽ. E kot kaj mẽ amã amnhĩ to rũnh prãm nẽ ã amnhĩ nhĩpêx anhỹr o ri apa. Anẽ.

Mẽhõ kot Jejus nhỹ hã tanhmã amnhĩ nhĩpêx to hã harēnh

Makre 9.38-41

⁴⁹Hāmri nhũm Jejus kôt mẽ pa ho pa xwỳnhjê hõ pẽ Juãwja nhỹhỹnh hwỳr hpõx o tẽ nẽ kãm: —Kwa Pahihti. O mũj mẽhõ kêp mẽ pahkwỳ hkêt tã anhĩxi jarēnh kôt mẽ nẽ mẽkarõmnuti janor o pa. Pa mẽ tee ri kot ã amnhĩ nhĩpêx anhỹr ã omu nẽ nẽ kãm ixkapěr. Kêp mẽ pahkwỳ hkêt kênã kot kêt ã mẽ hanor anhỹr o pa. Anẽ.

⁵⁰Hāmri nhũm kuma nẽ kãm: —Kwa nà ja nẽ tanhmã kãm nẽ hkêt nẽ. Kojã mẽhõ mẽ pahkwỳm ri tanhmã mẽ ahkre hto hkêt nẽ hãmri nẽ kêp mẽ panhĩõõ. Ra mẽ pahkôt kot amnhĩ nhĩpêx o pa mã kênã. Jakamã kwa mẽ ja nẽ tanhmã kãm akapěr to hkêt nẽ. Kwãr mãmri ã amnhĩ nhĩpêx anhỹr o ri pa. Ja mex kênã. Anẽ.

Samar nhõ xwỳnhjaja kot Jejus kaga hã mẽ harēnh

Atre 8.14-15

⁵¹Hāmri nhũm Jejus akupỹm kaxkwa hwỳr àpir kaxyw ra hwỳr apkati grêre ho mõi jakamã nhũm hamaxpěr o: —E pa ma akupỹm Jerujarẽ hwỳr mõi. Nà kot paj anẽ. Mẽ kot kamã tanhmã ixto mã tã kot paj ma akupỹm mẽ hwỳr mõi. Anẽ.

⁵²Hāmri nē amnhĩ kukamã mẽ hkwỳjê rē nhũm mẽ ma mẽ hkukamã Samar nhõ krĩ kamã nhỹri mẽ kot amnhĩm hikranh xà japêr o mō.

⁵³Nom nhũm Samar nhõ xwỳnhjaja kêp Jerujarē nhõ xwỳnhjê hprãm nōkati jakamã Jerujarē hwỳr mōr ã mẽ harēnh ma nē amnhĩ nē mẽ hkurê.

⁵⁴Hāmri nhũm mẽ tee ri amnhĩ tã mẽ kuma nē awjanã nē akupỹm Jejus wỳr mra nē kãm mẽ harē. Hāmri nhũm Juãw mẽ Xiakre wa mẽ harēnh ma nē mẽ kamã gryk nē nē Jejus mã: —Kwa Pahihti. Nà na mẽ axtem nē amnhĩ nē mẽ pahkurê. Jakamã e kwa pu mẽ kaxkwa rũm mẽ hipy kuwy hpòk kwỳ rē kê mẽ hkaxàr pa nà? Anē.

⁵⁵Hāmri nhũm wa kuma nē wa kãm: —Tk. Kwa nà wa ajamaxpērja mex kêt. Pu mẽ ã ri mẽ hipêx anhỹr kêt nē. Koja Tĩrtũm kãm ja ho anhỹr prãm nē rĩ tãm tanhmã mẽ ho. No mẽ papajaja pu mẽ ri mẽ kamã pagryk xàj tanhmã mẽ hipêx to hkêt nē. Pu mẽ ã mẽ hipêx anē nē ra amnhĩ tomnuj tỳx nē. Kwa wa ri ã ajamaxpēr anhỹr kêt nē. Anē.

⁵⁶Hāmri nē mẽ ma Samar rũm hapôj nē hpãnhã nhãm krĩ hõ hwỳr pa.

Mẽ hkwỳjaja kãm Jejus kôt pa hprãm ã mẽ harēnh

Matêwre 8.18-22

⁵⁷Tã nhũm Jejus mẽ kormã mōr ri nhũm mēhōja hwỳr tē nē kãm: —Pa Jejus? E kot paj ma akôt ixpa ho ixpa. Anē.

⁵⁸Hāmri nhũm kuma nē kãm: —Ko ka mã. Kam nē rĩ ma ixkôt ri apa ho apa. Nom kêr ka inhmar kumrêx nē rĩ kormã ixkôt apa. Na hte xore pika hkre kamã hikwỹ xà. Nē kuwênhre pĩ nhĩmõk ã hikwỹ xà. No pa na Tĩrtũm kot mẽ awỳr inhmēnh xwỳnh tã jajê hkĩnhã inhõrkwỹ hkêt. Na pa hte ãm nhãm krĩ hõ hwỳr ixpa nē nhãm ixpa. Tã xà kot kaj ixpyrà nē ã amnhĩ nhĩpêx anhỹr o ri apa nà? Anē.

⁵⁹Nhũm pre ã kãm kapêr anē hāmri nē nhãm mēhōja wỳr apkjê nē kãm: —Pa? No ka? Xà kot ka ma ixkôt apa ho apa nà? Anē. Hāmri nhũm kãm: —Tỳ no ãm kormã. Koja nhỹrmã inhĩpêxàja tanhmã amnhĩ to nē ty măn. Pa haxà hāmri nē rĩ kormã ma akôt ixpa ho ixpa. Anē.

⁶⁰Hāmri nhūm Jejus kuma nē kām: —Kwa nà ri ã ajamxpěr anhÿr kêt nē. Ma ixkôt apa ho apa kurê kumrëx. Kê mẽmoj ano kupyr rÿ inhnê apê amnàr kêt nē. Kwār mẽ htír tūm nē mẽ pa hkêt mã xwÿnhjaja mãn axwakre kamã amã anhĩpêxà jamār o pa nhūm nhÿrmã ty kê mẽ amã haxà. Ka mãmrĩ ma Tĩrtūm kapěr o mẽ ahkre ho ri mẽ hkôt apa. Kê mẽ ama nē mẽ hkwÿjaja hkôt amnhĩ xunhwÿ nhūm mẽ ho hkra. Anē.

⁶¹Nhūm pre ã kām kapěr anē hāmri nhūm nhām mẽhō myja haxwÿja hwÿr tē nē kām: —E. Pa kot pa ma akôt ri ixpa ho ixpa. Nom kormã. Pa ma akupÿm tē nē ixkwÿjê mã amnhĩ jarē nē tanhmã amnhĩ to hpa mãn. Hāmri nē mẽmo arĩgro hã rĩ kormã ma akôt ixpa ho ixpa. Anē.

⁶²Hāmri nhūm tee ri kuma nē kām: —Kwa nà. Kot kaj ã ajamxpěr anē hāmri nē ixkôt apa htã te amnhĩ katut kôt arĩt rãhã ho ri apa pyræk o amnhĩ nhĩpêx. Kwa ã ajamxpěr anhÿr kêt nē ma ixkôt apa kurê kumrëx. Anē.

Rukre 10

Jejus kot mẽ hwÿr mẽ kệp 72 rēnh ã harēnh

Matêwre 10.1; 10.5-15; Makre 6.7-13; Rukre 9.1-6; 9.10-11; mãänēn Atre 13.50-51; 18.6

¹Tã nhūm Jejus axte amnhĩ kaxyw mẽ ho 72 nē mẽ kurê. Hāmri nē mẽ ho axkrut kapēn nē ma nhÿhÿm krĩ hkwỳ hkôt amnhĩ kukamã mẽ kurē. Mẽ kot mẽ hkôt ri Tĩrtūm kapěr o mẽ ahkre ho pa kaxyw.

²Hāmri nē mẽ kām: —Na mẽ ohtô rax nē kormã Tĩrtūm kapěr mar kêt nē. No ãm kormã mẽ ate mẽ kām harēnh o apa kaxyw mẽ agrêre. Te pur kām harôj kamrêk pa nē ãm tã no ãm kaxyw hikēnh xwÿnh grêre pyræk. Jakamã kwa mẽ ho Tĩrtūm wÿ kê axte mẽ kaxyw mẽ hkwỳjê rê.

³—E kot paj ma mẽ hwÿr mẽ arē. Ma mẽ hkôt mẽ ate Tĩrtūm kapěr o mẽ ahkre ho ri apa kaxyw. Jakamã kot kaj mẽ te ate ôwēhti kot mry xoprê hwÿr amnhĩ to mrar nhūm kot hkwỳ hpar pyræk o amnhĩ nhĩpêx. Kojã mẽ hkwỳjaja mẽ ate mẽ ahkre ma nhūm ja mẽ kệp omnuj nē nhūm mẽ hã tanhmã mẽ anhĩpêx to. Tã kêr ka mẽ tee ri amnhĩ kukamã ajamxpěr nē amã mẽ uma hkêt nē.

4—Ně kêr ka mẽ hwỳr anojarêt nẽ amnhĩ kôt amrykà rỳ akawà rỳ aparkà hõ ho apa hkêt nẽ. ãm anhỹ kamã ma mẽ hwỳr apa. Nẽ mẽ hwỳr mra nhũm mẽ nhỹri pry hã mẽ atõ kaxpa nẽ amã kapêr o xa ka wa axpẽn mã akapêr ry hkêt nẽ. Anojarêt kãm kãm akapêr krãnre nẽ mẽ hakre nẽ ma krĩm apa.

5—Ně kêr ka mẽ hwỳr pøj nẽ nhỹri mẽ õrkwỹ hwỳr agjê nẽ mẽ kãm: “Xà kot paj mẽ ato Tĩrtũm wỳr kê mẽ ato mex nẽ ka mẽ ajamakêtkati nẽ ri apa?” Anẽ.

6Hãmri nhũm mẽ ama nhũm ja mẽ kãm mex japêr nhũm mẽ hkĩnh nẽ amã: “ỳ kam nẽ mãmrĩ mẽ ixto awỳ.” Anẽ. Hãmri ka mẽ ama nẽ tanhmã mẽ ho Tĩrtũm wỳr to. No koja mẽ apê ja kaga ka mẽ ho hwỳr kêt nẽ.

7—Ně kêr ka mẽ nhỹri mẽ õrkwỹ kamã mẽ hwỳr pøj hãmri nẽ mẽ hkôt ri apikamẽnh tãmtã nẽ akupỹm mẽ kurũm ajapôj nẽ ma hpãnhã krĩ hõ hwỳr apa. Nẽ mẽ axàmnhĩx mẽ kuri axàpkur o ri apa. Mẽmoj to akõm o ri apa. Ra mẽ ate mẽ ho mex pê mẽ kãm Tĩrtũm kapêr o mẽ ahkre ho apa kênã. Jakamã kwãr mẽ mãmrĩ amnhĩ pãnhã mẽ amã mẽ axàpkur xà gõ ka mẽ kuri mẽ apku.

8—Ně kêr ka mẽ nhỹri mẽ hwỳr pøj nhũm mẽ ato mex nẽ. Nẽ mẽ amã mẽmo mẽ apkur xà gõ ka mẽ mãmrĩ axàmnhĩx aku. Aa kormã mẽ ate mẽmojta kur kêt tã mãmrĩ ajamakêtkati nẽ aku. No tee ri amnhĩ kukamã tanhmã ajamaxpêr to hkêt nẽ.

9—Ně kêr ka mẽ ã mẽ kãm akapêr anẽ nẽ mẽ kãm: “Tĩrtũm kãm mẽ ato hkra hprãm. Na hte amnhĩ wỳr mẽ awỳ.” Anẽ hãmri nẽ akupỹm mẽ kãm mẽ à xwỳnhjê ho mex. ã kot kaj mẽ mẽ kãm amnhĩ nhĩpêx anhỹr o ri mẽ hkôt apa.

10—Ně kêr ka mẽ nhỹri mẽ hwỳr pøj nhũm mẽ ãm mẽ apumu nẽ amnhĩ nhõrkwỹ hwỳr mẽ awỳr kêt japêr. Hãmri ka mẽ tee ri amnhĩ tã mẽ omu hãmri nẽ ra ma nhãm apa kaxyw.

11Hãmri nẽ anojarêt nẽ mẽ kãm: “E mẽ inhma. Tĩrtũm kot mẽ pahwỳr mẽnh xwỳnhhta na mẽ awỳr wa inhmẽ pa wa mẽ awỳr mõ. Wa ixte Tĩrtũm kapêr

o mẽ ajahkre kaxyw. Kãm mẽ ato hkra hprãm nhũm wa ixte mẽ amã harẽnh kaxyw na pa pre wa ã mẽ awỳr inhmõr anẽ. Tã ka mẽ harẽnh ma nẽ wa ixkaga. Jakamã kot paj wa jar mẽ anhõ krĩ kamã amnhĩ par kà hã awjagrô kapĩ. Mẽ ate Tĩrtũm kaga hã amnhĩ pumunh nhũm Tĩrtũm kot amnhĩ pyrã nẽ mẽ akaga hã mẽ ate omunh kaxyw kot paj wa mẽ anoo mã ã amnhĩ par kà hã awjagrô kapĩr anẽ. Kot kaj mẽ nhỹrmã tee ri ã amnhĩ nhĩpêx anhỹrja mã ajamaxpěr nẽ akaprĩ htỳx kumrẽx kãm ga. ãm hãmri na pa wa mẽ amã ja jarẽ.” Anhỹr o mẽ kãm akapěr nẽ mẽ kệp ajapôj nẽ ma hpãnhã nhãm krĩ hõ hwỳr apa kurê kumrẽx.

12—Koja nhỹrmã Tĩrtũm mẽ kot amnhĩ tomnuj mỳrapê tanhmã mẽ ho. Na pre ra ã krĩ pê Sotõ nhõ xwỳnhjê nhĩpêx anẽ. Na prem amnhĩ tomnuj tỳx o pa nhũm Tĩrtũm tanhmã mẽ kot amnhĩ tomnuj tỳx ã tanhmã mẽ ho. Tã jar mẽ kot kãm ixkapěr mar prãm kêt nẽ mẽ kot ixkaga xwỳnhjaja. Koja Tĩrtũm ixtã mẽ omu nẽ kot Sotõ nhõ xwỳnhjê nhĩpêx pyrãk o mẽ hipêx nom tanhmã mẽ ho htỳx o mẽ hakre. —E kêt ka mẽ ma krĩ hkwỳ hkôt apa nẽ ã mẽ kãm akapěr anhỹr o ri apa. Anẽ.

Mẽ kot Tĩrtũm kôt hamaxpěr kêt xwỳnhjê jarẽnh

Matêwre 11.20-24

13-14Tã nhũm Jejus krĩ hkwỳ nhõ xwỳnhjê mã kapěr o xa nẽ mẽ kot amnhĩ tomnuj ã mẽ kãm akir. Krĩ pê Korajĩ mẽ Pesêj nhõ xwỳnhjê kumrẽx mã kapěr nẽ mẽ kãm: —E mẽ inhma. Amnepêm krĩ pê Sitõ mẽ Xir wa kamã mẽ pa xwỳnhjaja na prem tanhmã amnhĩ tomnuj tỳx to ho pa nhũm Tĩrtũm mẽ omu nẽ hã mẽ homnuj tỳx nẽ. Tã kwa mẽ o kora Korajĩ mẽ Pesêj wa kamã mẽ apa xwỳnhjaja. Ra ixte mẽ amã mẽ ate mẽmoj pumunh kêt o anhỹr rax o ixpa htã ka mẽ omu nẽ arĩ amnhĩ tomnuj o ri apa nẽ tokyx amnhĩ tomnuj kaga hkêt nẽ. Jakamã kot kaj mẽ amex kêt nẽ. Kop apu Sitõ rỳ Xir kamã mãn ixte mẽ kãm aa mẽ kot mẽmoj pumunh kêt kwỳ ho anhỹr o ri ixpa ronhỹx mẽ omu nẽ mẽ arom amnhĩ kaxyw ixkôt hamaxpěr kurê kumrẽx. Nẽ tee ri tanhmã amnhĩ tomnuj to ho pa hã amnhĩ pumu nẽ hkaprĩ nẽ ã amnhĩ nhĩpêx anhỹr kaga hpa. No mẽ kajaja na pa tee ri mẽ amã tanhmã amnhĩ nhĩpêx to ho ri ixpa kaprỳ. Ka mẽ ja hã ixpumu nẽ ãm ixpumu nẽ amnhĩ

tomnuj kaga hkêt nê. Tã koja nhÿrmã Tÿrtÿm mẽ piitã mẽ kot amnhÿ tomnuj mÿrapê tanhmã mẽ hipêx to. Hãmri nê tanhmã Sitõ mẽ Xir wa kamã mẽ pa xwÿnhjê jarênh to nhÿm mẽ kot amnhÿ tomnuj mÿrapê amnhÿ xà htÿx kamã hamak o ri pa. No mẽ kajaja mẽ ate amnhÿ tomnuj tÿx o mẽ hakrenh jakamã koja Tÿrtÿm mẽ hkÿnhã mẽ atomnuj tÿx o mẽ atomnuj tÿx. Ka mẽ amnhÿ xà htÿx kamã ajamak rãhã ho ri apa ho apa. Anê.

¹⁵Nhÿm pre ã Jejus mẽ kãm kapêr anê. Hãmri nê hpãnhã Kapanaũ nhõ xwÿnhjê mã kapêr nê mẽ kãm: —No mẽ apê Kapanaũ nhõ xwÿnhjaja. Kot kaj mẽ ajaxwÿja mẽ amex kêt nê. Mẽ ate amnhÿ tomnuj kagare pyrã nê Tÿrtÿm nhõ krÿ hwÿr akrà ho apa. Nom kot kaj mẽ atõ hwÿr axàpir kêt nê. Kot kaj mẽ ma kuwy maati hwÿr ajapêx pa kãm ga.

¹⁶Anhÿr o mẽ kãm kapêr hãmri nê hpãnhã hkôt mẽ pa ho mẽ pa xwÿnhjê mã kapêr nê mẽ kãm: —Kot kaj mẽ Tÿrtÿm kapêr o mẽ ahkre ho ri apa nhÿm mēhõ ama nê akapêr kôt amnhÿ nhÿpêx. Hã koja te pa kot ixkôt amnhÿ nhÿpêx pyrãk o amnhÿ nhÿpêx. No koja amar kêt nê akaga hãmri nê te pa kot inhmar kêt nê ixkaga pyrãk o amnhÿ nhÿpêx. Jao mãânên Tÿrtÿm kaga. Anê hãmri nhÿm mẽ kuma hãmri nê anhgrà nê axkrut kapên nê ma ahpÿnhã krÿ hkôt anhgrà.

Mẽ hkÿnh nê ri mẽ pa xwÿnhjê jarênh

Apokarip 3.5

¹⁷Tã nhÿm mẽ kêp 72jaja krÿ hkwÿ rÿm akupÿn Jejus wÿr pøj. Piitã hkÿnh nê hpôx pa. Hãmri nê kãm: —Kwa Pahihti. Na pa prem anhÿ hã mẽ nê mẽkarõmnuti japôx rax nê. Na pa prem mẽ nê mẽ hano nhÿm mẽ ãm mẽ kurÿm hapôx kurê kumrêx. Anê.

¹⁸Hãmri nhÿm mẽ kuma nê mẽ kãm: —Tôe. Ixàhpumunh tÿx o ixte Satanasti jakrenh jakamã na ka htem inhÿ hã mẽ hano nhÿm mẽ tee ri mẽ akutã hihtÿx prãm. Hãmri nê te na haxênh prêprêk pyrãk o amnhÿ nhÿpêx nê mẽ kurÿm hapôx kurê kumrêx pa ja hã mẽ omu.

¹⁹⁻²⁰Mêkarõmnuti te kot kagã xoprê rÿ te kot makre pyrãk. Tã ra ixte mẽ amã ixàhpumunh tÿx xà hkwÿ nhõr jakamã na ka prem mẽ kãm akapêr

nhũm mẽ tee ri akutã tanhmã amnhĩ tỳx to hprãm. Tã koja Satanasti tee ri mẽ ate nhỹrmã Tĩrtũm mẽ wa ixri atĩr tũm nẽ apa pymaj tanhmã mẽ ano kupyri to kaprỹ. Ra Tĩrtũm kot õ kagà kamã mẽ atĩr tũm nẽ mẽ apa kaxyw mẽ anhĩxi hã kagà kẽnã. Jakamã kwa mẽ jam ajamaxpẽr o akĩnh nẽ ajamakêtkati nẽ ri apa. No kêt mẽkarõmnuti kot mẽ akapẽr mar nẽ mẽ kurũm hapõxta ã mẽ omunh xà hkõt pix mã akĩnh nẽ ri apa hkêt nẽ. Anẽ.

Jejus kĩnh kãm kot Hipêêxà mã amnhĩ jarẽnh

Matêwre 11.25-27

21Tã nhũm Tĩrtũm Karõ tanhmã Jesus to nhũm ÿ hã hkĩnh nẽ xa. Hãmri nẽ Tĩrtũm mã kapẽr nẽ kãm: —Pa Papaj? Nà apê mẽ ixpiitã mẽ inhõ Pahi Maati na ka. Pikap ri mẽ pa xwỳnhjaja nẽ kaxkwa kamã mẽ pa xwỳnhjaja apê mẽ ixpiitã mẽ inhõ Pahi Maati na ka. ãm hãmri na ka hte amnhĩ nhĩpêx mex o ri apa. Na ka hte mẽ àhpumunh tỳx ã mẽ kot amnhĩ jarẽnh xwỳnhjê mã axàhpumunh tỳx o amnhĩrĩt kêt nẽ. ãm mẽ àhpumunh kêt ã mẽ kot amnhĩ jarẽnh xwỳnhjê pix mã na ka hte ja ho amnhĩrĩt nhũm mẽ tapxipixjaja ja hã apumu. ãm hãmri na ka hte amã hprãm xà hkõt ã mẽ piitã mẽ hipêx anhỹr o ri apa. Jakamã mẽ kot amnhĩ to hkryre xwỳnh pixjaja na htem ate amnhĩ nhĩpêx ã apumunh o pa.

22—Na ka pre inhĩhkra kamã mẽmoj piitã haxàr pa. Ixte ho amnhĩptàr o ri ixpa kaxyw. Jakamã kapxipix na ka hte ixpê akra hã ixpumunh par. No jar ri mẽ pa xwỳnhjaja na mẽ kot ja hã ixpumunh kêt. Nẽ mããnẽn papxipix na ixte ate tanhmã amnhĩ nhĩpêx to hã apumunh par. Jakamã na pa hte ã amnhĩ nhĩpêx anẽ nẽ inhmã hprãm xà hkõt mẽ hkwỳjê mã ato amnhĩrĩt o ri ixpa nhũm mẽ ixpyrà nẽ ate tanhmã amnhĩ nhĩpêx to ho apa hkõt apumu. Anẽ.

Jejus kõt mẽ pa xwỳnhjaja kot hkõt omunh o pa hã mẽ harẽnh

Matêwre 13.16-17

23-24Nhũm pre Jesus ã Tĩrtũm mã amnhĩ jarẽnh anẽ hãmri nẽ hpãnhã hkõt mẽ pa ho mẽ pa xwỳnhjê mã kapẽr nẽ mẽ kãm: —E na ka htem ixkõt mẽ ano ho ixte tanhmã amnhĩ nhĩpêx to hã ixpumunh o ri apa. Nẽ mẽ ajamak o ixkapẽr mar o ri ixkõt apa. No amnepêm mẽ akukamã pahijaja nẽ Tĩrtũm nhỹ hã kapẽr jarẽnh o ri mẽ pa xwỳnhjaja kãm ixpumunh prãm tỳx o pa htã

mě akínhã ixpumunh kêt rãhã htyk pa. Kormã ixwryk nẽ jar ixkator kêt jakamã na prem ixpumunh kêt rãhã ty. Nẽ mẽ kãm ixkapěr mar prãm tã mẽ akínhã ixkapěr mar kêt nẽ. ãm mẽ kapxipixjaja na ka mẽ mỳr pê ixte amnhĩ nhĩpêx ã ixpumunh nẽ ixkapěr mar o ixkõt apa. Tã mẽ kurom mẽ ate ano ho ixpumunh nẽ ajamak o ixkapěr mar jakamã kwa mẽ ja hã amnhĩ pumu nẽ tãm amnhĩ nhĩpêx o akính nẽ ri apa. Anẽ.

Samar nhõ xwỳnh jarẽnh

Matêwre 22.34-40; Makre 12.28-34; mããnẽn Wam Juãw 3.17-18

25Tã nhũm Tĩrtũm kapěr tũm o mẽ ahkre o mẽ pa xwỳnhja Jejus wỳr tẽ nẽ hêx rom kot kamã hamak kaxyw kãm: —Pa? E kwa inhmã mẽmoj jarẽ. Tanhmã kot paj we nhỹrmã Tĩrtũm ri ixtĩr tũm nẽ ixpa kaxyw amnhĩ nhĩpêx to wehe? Anẽ.

26Hãmri nhũm kãm: —Tanhmã na ka hte Tĩrtũm kapěr ã kagà htũm kot mẽ htĩr tũm nẽ pa hã kagà kamã harẽnh nẽ mar to? Anẽ.

27Hãmri nhũm kãm: —Nà harẽnh kot: Kêr ka mẽ anhĩ piitã ho amã Tĩrtũm kính o ri apa. Mẽ amã hkính tỳx o mẽmoj piitã hakrenh par o ri apa. Nẽ kêr ka mẽ amã mẽ piitã hã ma ho te ka amã amnhĩ tã ma pyræk o mẽ hipêx o ri apa. Jao tãm mẽ hipêx o ri apa. Anẽ. ã Tĩrtũm kapěr ã kagà htũm kamã ja jarẽnh kot anhỹr. Anẽ.

28Hãmri nhũm Jejus kuma nẽ kãm: —Tỳ. Nà ãm hãmri na ka harẽ. Kot kaj ã mẽ hipêx anhỹr o ri apa nẽ nhỹrmã Tĩrtũm mẽ wa ixri atĩr tũm nẽ apa ho apa. Anẽ.

29Hãmri nhũm kuma nom kãm mẽ piitã mẽ ho mex prãm kêt nẽ. ãm amnhĩ kwỳ pixjaja nhũm kãm mẽ ho mex o pa hprãm. Jakamã hêx rom kãm: —Kwa no mẽmojaja kot pa we ri ã mẽ hipêx anhỹr o ri ixpa? Xà mẽ pahkwỳ pê Ijaew pixjaja nà? Anẽ.

30Hãmri nhũm kuma nẽ tanhmã kãm ujarẽnh to. Nom hã kuxi nẽ kãm awjarẽ nẽ kãm: —E pa amã awjarẽ ka inhma. Koja Ijaew nhõ xwỳnhja ma Jerujarẽ rũm Jeriko hwỳr ahpar mã ma mỗ. Mỗ nhũm ra mẽ ahkính xwỳnhjaja kutã mra. Hãmri nẽ pry kahti ri hwỳr kato nẽ unê nẽ htak rax nẽ.

Ně kêp ê hkwrÿnh pa ně ma kurÿm hprôt ně mra ně akunok nhÿm mẽ kot htak o hkà rênh rãhã ra htyk kaxyw ně nõ.

³¹Hãmri nhÿm patreja tẽ ně omu. No ãm omunh o hãnh tẽ ně hkupu ně ma tẽ. Uràk ně kêp Ijaew tã ãm omu ně tanhmã ho ajuta hto hkêt ně hãnh omunh o tẽ ně hkupu ně ma tẽ.

³²Hãmri nhÿm patre ho ajuta xwÿnhja mããnên tẽ. Nẽ patre pyrà ně omu ně ãm omu ně hkupu ně ma tẽ. Uràk ně kêp Ijaew tã omu ně ãm omu ně hkupu ně ma tẽ.

³³—Tã nhÿm Samar nhõ xwÿnhja mããnên mõi. Samar nhõ xwÿnhjê mẽ Ijaew na prem kãm axpên kÿnh kêt tã nhÿm mõi ně omu ně kamã ukapřĩ ně. Kêp Ijaew ã omunh tã tee ri omu ně kamã ukapřĩ ně.

³⁴Hãmri ně hwÿr tẽ ně omu ně kãm mẽ kot htak o hkà rênh xà kane ně kãm hkupu pa. Hãmri ně kànhmã ãm ně hkrit jumênre hã kumẽ ně ma nhÿri mẽ kot amnhÿm hikranh xà hã ixkre hwÿr o mõi ně hwÿr o pøj. Hãmri ně omunh mex o apkati.

³⁵Hãmri ně akupÿm nojarêt ně kàxpore hkwy jamÿ ně o tẽ ně kot mẽ kãm õ xwÿnhja mã kugõ ně kãm: “E kot paj hãmri ma mõi. Ota ixkàxporeta. Kêr ka inhmã à xwÿnhta tãnopxar mex ně. Nẽ inhmã omunh mex kê akupÿm mex. Koja kàxporeja apê grille hã kot paj nhÿrmã akupÿn mõi ně axte hkôt amã hkwy gõ.” Anhÿr o kãm kapêr ně ma akupÿm mõi. ã mẽ ujarênh kot anhÿr. Anẽ.

³⁶Nhÿm pre ã Jejus kãm ujarênh anẽ. Hãmri ně kãm: —E nhÿ na pre kãm mẽ kot htak xwÿnhta kapřĩ ho te tãm kãm amnhĩ tã ma pyràk wehe? Anẽ. Hãmri nhÿm Tÿrtÿm kapêr tÿm o mẽ ahkre xwÿnhta kãm: —Nà kot kamã ukapřĩ xwÿnhta na pre omu ně kamã ukapřĩ ně ho mex o te tãm kãm amnhĩ tã ma pyràk o hipêx. Anẽ.

³⁷Hãmri nhÿm Jejus kãm: —Tÿ. Nà ãm hãmri na ka harẽ. Uràk ně kêp Ijaew kêt tã kamã ukapřĩ ně ho mex ně. Tã kêr ka uràk ně ã mẽ piitã mẽ hipêx

anhÿr o ri apa. Uràk nê mẽ kêp akwÿ hkêt tâ mẽ kamã axukapri ho ri apa. Anê.

Jejus kot Matre mẽ Marir wa hwÿr mör ã harênh

Rukre 12.29-31

38Tã nhũm Jejus kri rũm kato hãmri nê hkôt mẽ pa ho mẽ pa xwÿnhjê mẽ mẽ ma nhãm kri hõ hwÿr mō. Mōō nê hwÿr pōj. Hãmri nhũm Matre mẽ omu nê amnhĩ nhõrkwÿ hwÿr mẽ kuwÿ nhũm mẽ ma hwÿr mō nê õrkwÿ hwÿr pōj.

39Hãmri nhũm Jejus mẽ ahkre ho nhÿ nhũm Matre htõx Marirja arĩ hpar pê mar o nhÿ.

40Hãmri nhũm Matre mẽ hwÿr axà nê omu. Nê tee ri àpênh rax kukamã hamaxpêr nê Jejus wÿr tẽ nê kãm: —Xê ma Pahihti. Kormã ixàpênh rax tâ nhũm Marir ixto ajuta hkêt nê. ãm akapêr pix mar gryk ã ixkôt htẽm nê ixto ajuta hkêt nê. Pa ahte mẽ panhõ hã ixàpênh o xa. Xà amã ja mex? Xê kãm anê kê tokyx ixkôt tẽ pa wa hã axkrut nê mẽ panhõ hã ixàpênh tokyx anê. Anê.

41Hãmri nhũm tee ri kuma nê kãm: —Kwa Matre. Na ka ãm mẽ panhõ pix kukamã ri ajamaxpêr nê gryk ã tee ri amnhĩ nhĩpêx.

42ãm hãmri na Marir kãm ixkapêr mar prãm nê. Jakamã kot paj ri amnhĩ nê akôt hanor kêt nê. Anê.

Rukre 11

Mẽ pahte tanhmã Tirtũm mã amnhĩ jarênh to hã mẽ pamã karõ

Matêwre 6.9-13; 7.7-11

1Tã nhũm apkati hõ hã nhũm Jejus nhÿri Tirtũm mã amnhĩ jarênh o nhÿ. Nê kãm amnhĩ jarênh pa nhũm hkôt mẽ pa ho mẽ pa xwÿnhjaja kot kãm amnhĩ jarênh ã omu nê hwÿr mra nê kãm: —Kwa Pahihti. Amnhĩ pyrã nê mẽ ixte Tirtũm mã amnhĩ jarênh kaxyw tanhmã mẽ ijahkre hto. Kêr pa mẽ apyrã nê tanhmã kãm amnhĩ jarênh to ho ri ixpa. Na pre finat Juãw Paxisja hkôt mẽ pa ho mẽ pa xwÿnhjê mã ja jahkre nhũm mẽ kuma nê tãm kãm amnhĩ jarê. E kwa mẽ inhmã tanhmã ja jahkre hto nà? Anê.

²Hāmri nhūm mẽ kām: —Tôe. Nà kêr ka mẽ kām amnhĩ jarēnh kaxyw nē māmri amnhĩ krā hkôt tanhmã kām amnhĩ jarēnh to. Rỳ kām amnhĩ jarēnh o: Pa Měinhĩpêxà maati? Nà amex o amex Tĩrtũm. Apê mẽ ijamār mex xwỳnh maati na ka.

³Nē kwa kêr ka apkati mẽ mẽ inhmã mẽmo gō pa mẽ akukwak ri ho ixàpkur o ri ixpa.

⁴Nē na pa hte tōhã amnhĩ tomnuj nē Tĩrtũm. Nom mẽ kot tanhmã ixtomnuj to xwỳnhjaja na pa hte ãm mẽ omu nē amnhĩ tã tanhmã mẽ ho hkêt nē. Nē ja ho ijamakêtkati kurê kumrêx. ã na pa hte amnhĩ nhĩpêx anhỹr o ri ixpa. Jakamã kwa kêr ka ja hã ixpumu nē ixpyrà nē ixte tanhmã amnhĩ tomnuj to hã ixpumu nē hã tanhmã ixto hkêt nē. ãm ho ajamakêtkati kurê kumrêx nē axte kām ajamaxpêr kêt nē. Nē kot paj tanhmã amnhĩ tomnuj to kaxyw japêr ka ja hã ixpumu nē ixte ã amnhĩ nhĩpêx anhỹrja nē ixto htỳx nē pa ja ho anhỹr kêt nē. E ãm ja pix na hapêx. Anē. E kêr ka mẽ ã Tĩrtũm mã amnhĩ jarēnh anhỹr o ri apa. Anē.

Mẽ pahte amnhĩ to Tĩrtũm wỳr rãhã hã mẽ pamã karō

Matêwre 7.7; 15.21-28; Makre 11.24; Rukre 18.1-8; Juãw 14.13-14; mãănēn Rōmãn 12.12; Epes 6.18; Wam Tesarōn 5.17-18

⁵⁻⁶Nhūm Jejus arĩ hkôt mẽ pa ho pa xwỳnhjê jahkre ho nhỹ nē mẽ kām: — Nē ja. Kojã mẽ akràmnhwỳjê hō. Nhūm kôt ã kamàt nhūm nhỹhỹnh awỳr mōn pōj. Ka anhō mẽmoj kêt hāmri nē anhĩjuk ri akràmnhwỳ hwỳr tē. Hāmri nhūm ra amnhĩ tã kahê nē nō. Ka tee ri omu hāmri nē hakwa krem xa nē kām akapêr nē kām: “Pa ixkràmnhwỳ. Na ka mẽ ra gōr? Kwa kànhmã nhỹ nē inhmã anhō mẽmoj japêr. Na ra ham ixkràmnhwỳta mōn pōj. Nē kām prãm tỳx nē mō nom kaxyw inhō hkêt. Kwa kànhmã nhỹ nē inhmã anhō mẽmoj japêr nē inhmã hkwỳ pa ma o tē kê kukrê. ãm inhō hkêt kumrêx. ãm hāmri na pa amã amnhĩ jarê. Kwa tokyj kànhmã nhỹ nē inhmã mẽmoj japêr nà?” Anhỹr o kām akapêr.

⁷Hāmri nhūm ama nom kām kànhmã ỹr prãm kêt nē. Nē amã: “Tk. Nà ra mẽ ixte amnhĩ tã kahê hpar nē inhĩkwỳ kênã kot pa kêt kànhmã nhỹ nē amã mẽmoj japêr.” Anē.

⁸Ka tee ri ama nê xatã kãm: “Kwa ã inhîpêx anhÿr kêt nê ixkràmnhwÿ. Kwa tokyx.” Anhÿr o xa. Nê xatã kãm anojarêt o xa. Hãmri nhũm ra kãm amar kaga hãmri nê tã kànhmã nhÿ nê amã ate ho presija xwÿnhhta gô. No ãm kêp akràmnhwÿ hã ate hã axàhwÿr tipxi hã amã òr kêt nê. ãm xatã ate ho presija htÿx xwÿnhja mã hamaxpêr nê tã kànhmã nhÿ nê amã kugô. ã mē ujarēnh kot anhÿr.

⁹⁻¹⁰—Tã kêr ka mē ja pyrà nê amnhî to Tîrtûm wÿr rãhã ho ri apa nhũm ama nê ate mēmoj tã hwÿrta amã kugô. ãm xatã ate hã axàhwÿr o ri apa nhũm amã kugô. ãm mēmoj to hwÿr rãhã ho ri apa nhũm ama hãmri nê amã mēmoj tanhmã hipêx to. Te ho mēhõ kãm tep xành nê gôx kãm xatã tep rēnh xà rēnh o ãm pyrà nê xatã mēmoj tã hwÿr o ri apa. Hãmri nhũm ama nê amã hprãm xwÿnhhta gô. Te ho tep kanhêr xwÿnhhta tã kot tep ò kanhêr pyræk o anhîpêx nê amã mēmoj prãm xwÿnhhta gô. Anē.

Tîrtûm kot hkrajê mã mēmoj mex nhõr ã harēnh

Makre 7.9-11

¹¹Nhũm Jejus arî hkôt mē pa ho mē pa xwÿnhjê jahkre nê mē kãm: —Nê xà koja akra kãm tep xành nê hã awÿ ka ama nê axtem nê kãm kagã xoprê hõ py nê agô?

¹²Rÿ nhũm krãhyre gre hã awÿ ka axtem nê kãm makre hõ py nê agô? Nà na ka htem ã akrajê nhîpêx anhÿr kêt nê. Na ka htem mē kot mēmoj tã àhwÿr xà hkôt kãm mēmoj gô.

¹³Mē kamjaja mē ate amnhî tomnuj o ri apa htã ka htem akrajê ho mex o ri apa. Tã kaxkwa kamã Tîrtûmja na hte mē pahto mex o mē ate mē akrajê ho mexta jakrenh. Kãm mē pajapê htÿx kôt na hte mē pamã mēmoj mex nhõr o pa. Nê mãñnēn amnhî Karõja na hte mē pamã kugô. Jakamã kot kaj mē atõ Karõ hã awÿ nhũm ama nê awÿr kumē nhũm wrÿ nê akarõ mã axà. ã na hte Tîrtûm kãm mē pajapê xàj mē pamã mēmoj mex nhõr o pa anē. Anē.

Jejus mē Satanasti wa harēnh

Matêwre 12.22-32; Makre 3.20-30

¹⁴Tã nhũm Jejus nhÿri axte mēhõ nê mēkarõmnuti kator. Na pre ra mēkarõmnuti tanhmã ho nhũm kapêr kêt nê pa. Hãmri nhũm Jejus omu nê

nê kator nhũm akupỹm kapër mex nê. Nhũm mẽ piitã amnhĩ jaêr pê omu nê no hawênh rũnh nê omunh o kuhê.

¹⁵Nom nhũm mẽ hkwỳjaja Jejus kot ã hipêx anhỹr ã omu nê htỳx ho kêp mẽkarõmnuti hkwỳ hã hkamnhĩx nê axpên mã harênh o: —Tk pěr hinhu nhĩkôôti nhỹ hã na hte mẽ nê amnhĩ kwỳjê japôx o pa. Anê. Hinhu nhĩkôôti nhĩxi hõ pê Satanasti nhũm prem Satanasti nhỹ hã Jejus kot ã amnhĩ nhĩpêx anhỹr o pa hã hkamnhĩx.

¹⁶Jakamã nhũm mẽ hkwỳjaja hwỳr mra nê kãm: —Kwa mẽ inhmã aa mẽ ixte mẽmoj pumunh kêt õ ho anê. Pa mẽ omu nê ate Tĩrtũm nhỹ hã tanhmã amnhĩ nhĩpêx to ho apa hã apumunh kurê kumrêx. Anê. Nom hêx rom mẽ kot kamã hamak kaxyw ã kãm kapër anê.

¹⁷Nhũm ra Jejus mẽ hamaxpěr kôt mẽ omunh mex jakamã mẽ kapër ma nê mẽ kãm: —Kwa mẽ inhma mẽ ate ixpê Satanasti hkwỳ hã ixkamnhĩx xwỳnhjaja. Kojã pika nhõ xwỳnhjaja axpên kutã amnhĩ xunhwỳ nê axpu hãmri nê anhgrà nê ma ahpỹnhã ri pa. Hãmri nê amnhĩ krã hkôt ri tanhmã amnhĩ to ho ri pa. Jakamã nhũm mẽ õ pahi mẽ hamãr o pa hkêt nê. Rỳ kojã krĩ nhõ xwỳnhjaja. Mẽ kot axpên to hkwỳ xwỳnhjaja mẽmoj tã axpên kãm gryk nê axpên kutã amnhĩ xunhwỳ hãmri nê axpên pê anhgrà nê ahpỹnhã pa hãmri nhũm mẽ õ pahi tee ri kãm mẽ hamãr o pa hprãm. Mo õ krĩ kamã mẽ hkwỳ kot ri mẽ hamãr o pa? No na pre mẽ õ pahi tãm amnhĩ nê mẽ hanor kêt nê.

¹⁸—Tã ja pyrà nê ixte Satanasti nhỹ hã tanhmã amnhĩ nhĩpêx to ho ixpa ronhỹx pa mẽ nê amnhĩ kwỳjê janor o ri ixpa hkêt nê. Nhỹx Satanasti ixte mẽ nê mẽ hanor kaxyw tanhmã inhmã nê hkêt nê.

¹⁹—No kêt mẽ akwỳjaja? Xà Satanasti nhỹ hã na htem mẽ nê mẽ hapôx o pa nà? Kêp apu pa ixte ỹ hã mẽ nê mẽ hapôx ronhỹx mẽ akwỳjaja ixpyrà nê ỹ hã mẽ nê mẽ hapôx o pa. Nà Tĩrtũm nhỹ hã mẽ ixte mẽ nê mẽ hapôx o mẽ ixpa kênã. Jakamã ã mẽ ate ijarênh anhỹr o apaja mex kêt.

²⁰Tĩrtũm Karõ nhỹ hã ixte mẽ nê mẽ hapôx o ri ixpa kênã. Jakamã kwa mẽ ja hã ixpumu nẽ Tĩrtũm kot ixte mẽ ato amnhĩptàr kaxyw mẽ awỳr inhmẽnh kôt ixpumunh kurê kumrẽx kêt wehe. Pa na ka htem ixkamã ajamak o apa.

²¹⁻²²—Satanastija àhpumunh tỳx jakamã na htem tee ri kêp mẽ kot hkôt amnhĩ xunhwỳr xwỳnhjê pytàr kaxyw nhũm mẽ nê mẽ omunh mex nẽ. Nom ixàhpumunh tỳx o ixte Satanasti jakrenh jakamã pa na pa hte kêp mẽ utà nhũm mẽ hpãnhã ixkôt ri amnhĩ nhĩpêx.

²³—Mẽ amã ixkapêr mar prãm tã na ka mẽ kormã ixkôt amnhĩ xunhwỳr kêt nẽ. Kwa wem ma amnhĩ to amõr gri nẽ tokyx ixkôt amnhĩ xunhwỳr kêt wehe. Kot kaj mẽ anhỳr kêt nẽ hãmri nẽ te mẽ ate ixkutã amnhĩ xunhwỳr xwỳnh pyràk o amnhĩ nhĩpêx.

²⁴Mẽ ate ixkôt amnhĩ xunhwỳr kêt xwỳnhjaja te mẽ ate mẽhõ nê mẽkarõmnuti japôx xwỳnh pyràk. Nhũm te kêp kator nẽ ma mõ nẽ nhỹri amgrà kamã ri pa. Nhũm ja kêp omnuj nhũm tee ri kamã nhỹri hkôkôt xà japêr o pa. Nom tee ri hapêr o pa nẽ hamaxpêr o: “E kot paj ma akupỹm mẽ kot nê ixkator xwỳnhhta wỳr tẽ nẽ hwỳr axà nẽ hkôt mãn ixpa.” Anẽ.

²⁵Hãmri nẽ ma akupỹm hwỳr tẽ. Nom kormã akupỹm hwỳr àr kêt ri nhũm kamã amrakati nẽ pa.

²⁶Jakamã nhũm ma akupỹm hwỳr tẽn axà. Nom ahte àr kêt nẽ. Ra amnhĩ kôt amnhĩ kwỳjê ho 7 nẽ hwỳr mẽ ho agjê. Nẽ hwỳr gjêx pa. Mẽ kêp 7jaja nẽ wamta mẽ nhũm mẽ piitã hwỳr gjêx pa. No mẽ kêp 7jaja omnuj tỳx o kot wamta jakrenh jakamã nhũm mẽ kot hwỳr gjêx xwỳnhhta mẽ ỹ hã amnhĩ tomnuj tỳx o pa. Oprê htỳx nẽ. Wam pyxire nẽ kot hwỳr àr nhỹ hã amnhĩ tomnuj o ri pa nom ãm kawax pê oprê. Tã axte hwỳr mẽ ohtô nẽ gjêxta nhỹ hã oprê htỳx kumrẽx. Ja pyrà nẽ kot kaj mẽ tokyx ixkôt amnhĩ xunhwỳr kêt nẽ hãmri nẽ ãm amnhĩ tomnuj tỳx pix o ri apa. Anẽ.

Mẽ hkĩnh nẽ mẽ pa xwỳnhjê jarẽnh

Rukre 8.19-21

²⁷Nhũm pre ã Jejus mẽ ahkre anẽ nhũm mẽhõ nija kuma nẽ kãm: —Hêxta gàa nẽ. Mãn akatorxà ã ate amnhĩ nhĩpêx anhỹr o apa hã apumu nẽ hkĩnh nẽ. Anẽ.

²⁸Hãmri nhũm kãm: —Tỳ. Nà kot anhỹr kênã. Nom kot ka mẽ atõ Tĩrtũm kapêr ma nẽ hkõt amnhĩ nhĩpêx hãmri nẽ akĩnh rax o ixkatorxà kot ixpumunh nẽ hkĩnhhta jakre. Anẽ.

Jejus kot tanhmã Jõhti jarẽnh to

Matêwre 12.38-42; Makre 8.12

²⁹Tã nhũm mẽ ohtõ nẽ Jejus ã akuprõ nẽ mẽmoj tã kuwỳ nẽ kãm: —Pa. Kwa mẽ inhmã aa mẽ ixte mẽmoj pumunh kêt õ ho anẽ pa mẽ omu. Anẽ. Hãmri nhũm mẽ kuma nẽ mẽ kãm: —Tk. Kwa mẽ ajamaxpêr punuj pix o na ka htem ri ajamaxpêr o apa. Ixpê Tĩrtũm kot mẽ awỳr inhmẽnh xwỳnh tã ka mẽ ja hã ixkõt ajamaxpêr kêt nẽ. Tã mẽ ate aa mẽmoj pumunh kêt kwỳ ixte mẽ amã ho anhỹr kaxyw hã inhmã karõ. Nà kot paj kormã mẽ amã ho anhỹr kêt nẽ. Kot paj nhỹrmã te amnepêr finat Jõhti kot amnhĩ nhĩpêx pyræk o amnhĩ nhĩpêx ka mẽ hã ijarẽnh ma nẽ kormã ja hã ixpumu.

³⁰Tĩrtũm nhỹ hã kapêr xwỳnh pê Jõhtija amnepêr na pre tep rax kukrẽ. Tã nom nhũm htĩr rãhã õxàhkre rũm kato nhũm mẽ omu nẽ Tĩrtũm kot mẽ hwỳr mẽnh ã omu. Tã kot paj nhỹrmã Jõhti pyrà nẽ tanhmã amnhĩ nhĩpêx to nhũm mẽ ja hã ixpumu nẽ Tĩrtũm kot mẽ awỳr inhmẽnh xwỳnh ã ixpumunh kurê kumrẽx.

³¹—Nẽ koja nhỹrmã Tĩrtũm akupỹm mẽ htyk nẽ mẽ hikwỹ xwỳnh piitã akupỹm mẽ ho htĩr hãmri nhũm mẽ piitã Inhĩpêxà mẽ wa ixkutã hkrĩ. Pa wa mẽ piitã tanhmã mẽ harẽnh to. Tĩrtũm mẽ wa ixkuri mẽ htĩr tũm nẽ mẽ pa ho mẽ pa mã xwỳnh ã mẽ hkwyjê jarẽ. Nẽ wa ixkuri mẽ pa ho mẽ pa hkêt xwỳnhjê jarẽ. Mẽ piitã ã mẽ harẽnh anẽ. Amarĩ mẽ pa xwỳnhjaja nẽ mẽ õ pahijaja. Hãmri nhũm sur kãm mẽ õ pahi niti Tĩrtũm mã tanhmã amnhĩ jarẽnh to hãmri nẽ hpãnhã tanhmã mẽ ajarẽnh to nẽ kãm mẽ ajarẽnh o: “Na pa pre inhmã pahi Sarumãw kot anhỹ hã àhpumunh tỳx ã harẽnh ma hãmri nẽ inhmã mar prãm xàj ma awry hã õ pika hwỳr ixpa nẽ omu nẽ kapêr ma.

Hāmri nē ma akupỹm inhõ pika hwỳr ixpa nē ixkwỳjê mã àhpumunh tỳx ã harēnh o ixpa. Tã Akra Jejus na àhpumunh tỳx o pahi Sarumãw jakrenh tã or war akutã mẽ hkrĩ xwỳnh kwỳ mũj na prem kapēr ma no ãm ixkĩnhã kãm mar prãm kêt nē. Na prem kuma nē ãm kuma.” Anhỳr o wa inhmã mẽ ajarē. Hāmri nē ja hã mẽ amã akir ka mẽ tee ri mar o akrĩ nē amnhĩ kamã agryk o akrĩ.

³²—Hāmri nhũm hpãnhã Nĩnĩwe nhõ xwỳnhjaja wa inhmã tanhmã amnhĩ jarēnh to. Jõhti kot mẽ hwỳr mõi nē mẽ kãm Tĩrtũm kapēr jarēnh o pa xwỳnhjaja nhũm mẽ tanhmã wa inhmã amnhĩ jarēnh to. Hāmri nē pahi nita pyrã nē wa inhmã tanhmã mẽ ajarēnh to nē wa inhmã: “Na pre Jõhti man mẽ inhõ krĩ hwỳr mõi nē mẽ inhmã akapēr jarēnh o ri mẽ ixkõt pa. Pa prem kuma nē mẽ ixte amnhĩ tomnuj kaga nē akõt amnhĩ xunhwỳr kurê kumrēx Tĩrtũm. Nom or war akutã mẽ hkrĩ xwỳnh kwỳ mũj na pre Akra Jejus tãm mẽ hwỳr mõi nē mẽ kãm kapēr o ri mẽ hkõt pa nhũm prem kuma no ãm mẽ ixkĩnhã amnhĩ tomnuj kaga nē hkõt amnhĩ xunhwỳr kêt nē. Mẽ kot Akra mar tã amnhĩ kaxyw kãm hamaxpēr kêt nē.” Anhỳr o koja mẽ wa inhmã mẽ ajarē ka mẽ tee ri mẽ ama nē amnhĩ kamã agryk tỳx nē. Jakamã e kwa ixte mẽ amã ã ixkapēr anhỳrja ma nē kãm ajamaxpēr tỳx rãhã ho ri apa. Anē.

Mẽ pajamaxpēr mex te kot kanê hpõk mex pyrãk ã harēnh

Matêwre 5.15; 6.22-23

³³Nhũm Jejus arĩ mẽ ahkre ho nhỹ nē mẽ kãm: —Xà na htem kanê hpõk nē poti ho hpro? Nà na htem ho anhỳr kêt nē. Na htem hpõk nē kỳx pê mẽmoj nhĩmõk ã unhwỳ nhũm mẽ piitã mẽ kãm hirã mex nhũm htem ixkrem agjê nē hirã kamã mẽmoj pumunh mex o mra.

³⁴Ja pyrã nē kot ka mẽ atõ ixkapēr ma nē ixkõt amnhĩ nhĩpêx nē tãm amnhĩ nhĩpêx o ri apa. Nē tãm mẽ hipêx o ri apa. Jao te hirã kamã mẽ rĩt mex xwỳnhjaja kot amnhĩ nhĩpêx pyrãk. Nom koja mẽhõ inhma nē ãm inhma nē ixkwỳm ri tanhmã amnhĩ nhĩpêx to ho pa. Jao te kamãt kô kamã mẽ rĩt mex kêt xwỳnhjaja kot htỳx amnhĩ nhĩpêx o pa pyrãk o amnhĩ nhĩpêx.

35—E kêr ka mẽ ã amnhĩ nhĩpêx anhỹr pymaj ixkapêr ma mẽ kãm ajamaxpêr tỳx rãhã ho ri apa.

36Kot kaj mẽ ixkapêr ma mẽ ixkôt amnhĩ nhĩpêx. Hãmri mẽ te mẽ ate kanê hpôk mex nhĩrã kamã ri apa pyræk o amnhĩ nhĩpêx. Jao aprĩ hã ixkapêr ma mẽ aprĩ hã ixte tanhmã amnhĩ nhĩpêx to hã ixpumunh mex mẽ. Anẽ.

Jejus kot tanhmã Parijew nhõ xwỳnhjê jarênh to

Matêwre 23.25-26

37Tã nhũm Jejus ra mẽ ahkre pa. Hãmri nhũm Parijew nhõ xwỳnhja hwỳr tẽ mẽ kãm: —Pa. E kwa ma ixkôt tẽ mẽ mẽ ixkutã apku. Anẽ. Hãmri nhũm kuma mẽ kãm: —Tôe. Nà kot paj ma akôt tẽ. Anẽ Hãmri mẽ ma hkôt tẽ mẽ òrkwỹ hwỳr axà mẽ apkur kaxyw mẽ ìhkô hã nhỹ.

38No ãm mẽ hkukamã mẽ hpãmjê pyrà mẽ amnhĩ nhĩhkra kuhõnh ryy hkêt mẽ. ãm amnhĩ nhĩhkra htyk pix kuhõnh tokyx anẽ mẽ nhỹ. Nẽ ò prat kuhõnh ryy hkêt rãhã apkur kaxyw nhỹ. Jakamã nhũm kot amnhĩ kôt hwỳr xwỳnhhta tee ri ja hã omu mẽ hamaxpêr o: —Tk. Kwa na hte mẽ ixte amnhĩ nhĩpêx kôt amnhĩ nhĩpêx mex kêt mẽ.

39Anẽ nhũm Jejus amnhĩ tã hamaxpêr ã omu mẽ kãm: —Nà mẽ apê Parijew nhõ xwỳnhjaja te mẽ ate mẽ kot apkur kaxyw prat kre kuhõnh punuj tã mex ã harênh pyræk o amnhĩ nhĩpêx. Nẽ ãm mẽ akrã hkà rũm pix mã na mẽ amex. Nẽ mẽ noo mã te mẽ amex pyræk no ãm mẽ anhõxàhkre kaxwỳnh kãm mẽ ajamaxpêr mex kêt. ãm mẽ akapêr prãm. Nẽ mẽ axàhkurêê. Nẽ mẽ anhõxỳy.

40Mẽ ate atỳx ri amnhĩ nhĩpêx o ri mẽ apa xwỳnh kênã. Kwa kêr ka mẽ ãm akrãhkà pix rũm amex mẽ ri apa hkêt mẽ. Mẽ mãânên anhõxàhkre kaxwỳnh kãm ajamaxpêr mex o ri apa. Nẽ tãm mẽ piitã mẽ hipêx o ri apa.

41Kêr ka mẽ tãm ajamaxpêr o tãm mẽ hipêx o ri apa. Nẽ axàmnhĩx ri mẽ kêp amrakati xwỳnhjê mã mẽmoj nhõr o ri apa. Kot kaj mẽ ã amnhĩ nhĩpêx anẽ hãmri nhũm Tĩrtũm ja hã mẽ apumu mẽ amnhĩm mẽ amex ã mẽ ajarê. No na ka htem mẽ amã mẽ amnhĩ to mex prãm xàj tee ri amnhĩ kuhõnh japjê kaprỳ. Anẽ.

Jejus kot Parijew nhõ xwỳnhjaja mex kêt kukamã mẽ harēnh

Matêwre 23.4; 23.7; 23.13-24; 23.27-38; Makre 12.38-39

⁴²Nhũm Jejus arĩ Parijew nhõ xwỳnhjê jahkre nẽ mẽ kãm: —Kwa mẽ okora Parijew nhõ xwỳnhjaja. Kot kaj mẽ amex kêt nẽ. Na ka htem Tĩrtũm kapēr piitã hkôt amnhĩ nhĩpêx o apa hkêt nẽ ãm hkwỳ kôt pix mã amnhĩ nhĩpêx o ri apa. Nẽ ãm kapēr o hpỳnhre nẽ hkôt amnhĩ nhĩpêx hãmri nẽ hã amnhĩ pumu nẽ ate amnhĩ to mex xwỳnh ã amnhĩ to jarkrar o ri apa. Nom Tĩrtũm kãm hprãm xà piitã hkôt amnhĩ nhĩpêx hkêt nẽ. Mẽ ate tãm mẽ piitã mẽ hipêx o ri apa hã kot mẽ amã karõja. Nẽ mẽ amã Tĩrtũm kĩnh ã kapēr kôt amnhĩ nhĩpêx o ri apa hã karõja mẽ ate mar mex tã hkôt amnhĩ nhĩpêx kêt nẽ. Mẽ ate kapēr piitã hkôt amnhĩ nhĩpêx ronhỹx ja mẽ amã mex kumrêx.

⁴³—Kwa mẽ o kora. Mẽ piitã mẽ kot amnhĩm mẽ ate amnhĩ to rũnh xwỳnh ã amnhĩm mẽ ajarēnhja na mẽ amã hprãm. Nẽ mẽ piitã mẽ kot amnhĩm mẽ apê mẽ ahkre mex xwỳnh maati hã mẽ ajarēnhja na mẽ amã hprãm.

⁴⁴—Kwa mẽ o kora. Kot ka mẽ amex kêt nẽ. Mẽ kot mẽ akapēr mar nẽ mẽ akôt amnhĩ nhĩpêx xwỳnhjaja te mẽ kot htỳx ri mẽ hã pika nhĩmõk ã ri mẽ pa xwỳnh kot amnhĩ nhĩpêx pyræk. Jao mẽ ate amnhĩ to mex ã amnhĩ kamnhĩx nom mẽ ate amnhĩ to mex kêt. Te mẽ kot pika mex ã hkamnhĩx nẽ htỳx ri mẽ hã pika nhĩmõk ã ri mẽ pata pyræk o na htem amnhĩ nhĩpêx. Anẽ. Nhũm pre ã Jejus Parijew nhõ xwỳnhjê mã mẽ kot amnhĩ nhĩpêx jarēnh anẽ.

Jejus kot Tĩrtũm kapēr tũm o mẽ ahkre xwỳnhjê mã kapēr

Matêwre 23.1-4; 23.13; 23.29-36

⁴⁵Hãmri nhũm Tĩrtũm kapēr tũm o mẽ ahkre ho pa xwỳnhja kuma nẽ kànhmã xa nẽ kãm: —Kwa na ka ã Parijew nhõ xwỳnhjê jarēnh punuj anhỹr jao mãănēn ã mẽ paja jarēnh anẽ nà? Mẽ ixte amnhĩ nhĩpêxja ãm tipxi kēnã. Anẽ.

⁴⁶Hãmri nhũm kãm: —Tỳ. Mãănēn mẽ kajaja. Kwa o kora mẽ apê Tĩrtũm kapēr tũm o mẽ ahkre xwỳnhjaja. Kot kaj mẽ uræk nẽ amex kêt nẽ. Na ka htem mẽ kãm mẽmoj tã karõ ho ri apa nẽ mẽ kãm: “E kêt ka mẽ ã amnhĩ nhĩpêx anẽ nẽ ã amnhĩ nhĩpêx anẽ.” Anhỹr tã no ãm mẽ kajaja amnhĩ kapērja kôt amnhĩ nhĩpêx kêt nẽ. Te mẽ ate mēhõ kot mẽ katut ã mẽ kãm

mě jênh pytĩ janhôr tã mẽ ho ajuta nẽ hkwỳ htur kêeta pyràk o na ka htem amnhĩ nhĩpêx o ri apa.

47-49—Na pre Tĩrtũm amnepê m mẽ pahpãmjê hkukamã tanhmã mẽ harênh to. àhpumunh tỳx xà hkôt tanhmã mẽ hkukamã mẽ harênh to nẽ mẽ harênh o: “Kot paj ma mẽ hwỳr inhỹ hã ixkapêr jarênh xwỳnhjê rẽ. Nom koja mẽ omu nẽ ãm mẽ omu nẽ kêp mẽ hprãm nõkati nẽ tanhmã mẽ hipêx to ho pa. Nẽ ixpê mẽ hkwỳjê hpar o pa. ã koja mẽ inhỹ hã ixkapêr jarênh xwỳnhjê nhĩpêx anẽ.” Anhỹr o mẽ hkukamã mẽ harẽ. Tã ã mẽ harênh anhỹr xà hkôt nhũm prem ã mẽ hipêx anẽ nẽ mẽ hkwỳjê hpa nẽ mẽ hkwỳjê pynê nẽ mẽ hagjê. —Amnepê m mẽ akukamã mẽ kot ã mẽ hipêx anhỹr nhũm mẽ ate mẽ ano ho ja hã mẽ omunh kêt tã ka htem arĩ mẽ hã pika ho mex o ri apa. Te mẽ amã mẽ hapê nẽ mẽ ho ajamak pyrà nẽ mẽ hã pika ho mex o ri apa. Nom mẽ amã mẽ hapê hã ho mex hkêt nẽ. ãm ra mẽ htyk nẽ hapêx nẽ mẽ amã Tĩrtũm kapêr jarênh o pa hkêtja ã na ka htem akĩnh nẽ ã axêx rom mẽ hã pika ho mex anhỹr o ri apa.

50-51—Na prem Tĩrtũm nhỹ hã kapêr jarênh o mẽ pa xwỳnhjê nhĩmex rax nẽ. Amnepê m panhĩ kator krax rũm finat Atãw kra finat Apewja na pre Tĩrtũm nhỹ hã kapêr o pa nhũm htõ kãm mar prãm kêt nẽ kupĩ. Tã nhũm Tĩrtũm axte mẽ hwỳr ỹ hã kapêr jarênh o mẽ pa xwỳnh kwỳjê rẽ nhũm prem mã mẽ ho anẽ nẽ mẽ hkwỳjê nhĩmex. Nhũm pre xatã mẽ hwỳr mẽ hkwỳjê rẽ nhũm mẽ xatã mẽ kupa. ã Apew rũm finat Jakaris wỳr na prem mẽ himex rax anẽ. Nẽ hpãnhã Jakarisja nhũm prem Tĩrtũm mã amnhĩ jarênh xà hã ixkre kamã kupĩ. Tã ka mẽ ajaxwỳja amã Tĩrtũm kapêr mar prãm kêt nẽ mẽ uràk nẽ amã ỹ hã kapêr jarênh o mẽ pa xwỳnhjê nhĩmex prãm. Tã ã mẽ pahpãmjê mẽ ato hpimràatã mẽ ate mẽ hipêx anhỹrja mỳrapê koja Tĩrtũm ja hã mẽ apê mẽ hkanrêhã mẽ htàmnhwỳjaja tanhmã mẽ ato htỳx to ka mẽ amnhĩ xà htỳx kamã ajamak o ri apa rãhã nẽ kãm ga.

52—Jakamã kwa mẽ o kora mẽ apê Tĩrtũm kapêr tũm o mẽ ahkre xwỳnhjaja. Mẽ ajaxwỳja na ka htem Parijew nhõ xwỳnhjê pyrà nẽ Tĩrtũm kapêr o mẽ ahkre ho apa. Nẽ aprĩ hã mar mex tã no ãm amnhĩ kaxyw hkôt ajamaxpêr

ně hkôt amnhĩ nhĩpêx kêt nê. Hāmri nê mẽ kot mẽ amar o pa xwỳnhjê mã atỳx ri tanhmã mẽ ahkre hto nhũm htem mẽ ama nê mẽ apyrà nê amnhĩ kaxyw Tĩrtũm kôt hamaxpêr nê hkôt amnhĩ nhĩpêx kêt nê. Mẽ kãm hprĩ hã kapêr mar mex prãm tã mẽ amar xà hkôt mẽ ate amnhĩ nhĩpêx pyràk o amnhĩ nhĩpêx o pa. Nom mẽ kajaja na ka htem mẽ kãm mẽ hamaxpêr mex nhõr kêtja mỳrapê nhũm htem ã amnhĩ nhĩpêx anhỹr o pa. Jakamã kwa mẽ o kora kot kaj mẽ amex kêt nê. Anê. Nhũm pre ã Jejus mẽ kãm kapêr anê.

53-54 Hāmri nê kato nê ma tẽ. Nhũm Tĩrtũm kapêr tũm o mẽ ahkre ho mẽ pa xwỳnhjê mẽ Parijew nhõ xwỳnhjaja hāmri kot tanhmã mẽ kãm kapêr toja ma nê kamã gryk tỳx nê. Jakamã ma hkôt mra. Hêx rom mẽmoj tã hkukjêr o hkôt mra. Nê hã hkukjêr kãm hihtỳx o hkôt mra. Kot tanhmã mẽ kãm ujarênh to nhũm mẽ kot mar nê ra hã àmnênh kaxyw ma hkôt àhkukjêr o mra.

Rukre 12

Mẽ pahte Tĩrtũm pê mẽ pajamaxpêr punuj o pahpimxur kêt

Matêwre 10.26-33

1-3 Tã nhũm mẽ Jejus ã htu rax kumrêx nê hã axpên nhĩgãnh o kuhê. No nhũm kormã mẽ kãm tanhmã kapêr to hkêt nê. ãm kormã hkôt mẽ pa ho mẽ pa xwỳnhjê kumrêx mã kapêr nê mẽ kãm: —Mẽ piitã kãm amnhĩ kwỳjê pê hamaxpêr punuj o hpimxur hprãm tã koja nhỹrmã mẽ hamaxpêr piitã amnhĩrĩt pa. Nê mẽmoj piitã ra hpimxur mex tã koja nhỹrmã piitã amnhĩrĩt pa. Nê mẽ kot kamàt kô kamã hpimxur pê mẽmoj jarênh tã koja mẽ piitã nhỹrmã kot mẽmoj jarênhhta ma. Nê mẽ kot hitom kãm kawax pê axpên mã mẽmoj punuj jarênh tã koja nhỹrmã mẽ piitã mẽmoj jarênhhta ma. Jakamã kwa kêr ka mẽ tanhmã Parijew nhõ xwỳnhjaja kot amnhĩ nhĩpêx to ho pa hã mẽ omu nê ãm mẽ omu nê mẽ hkôt amnhĩ nhĩpêx kêt nê. Te mẽ kot tãm amnhĩ nhĩpêx pyràk o amnhĩ nhĩpêx tã no ãm tãm amnhĩ nhĩpêx o pa hkêt. Na htem ãm htỳx ri tanhmã amnhĩ to hêx to ho pa. Tã kêr ka mẽ uràk nê ã amnhĩ nhĩpêx anhỹr kêt nê. Anê.

Mẽ pahte pahkwỳjê pumaj Tĩrtũm kaga hkêt ã mẽ pamã karõ

Matêwre 10.28-31

⁴Nhũm Jejus arĩ hkõt mẽ pa ho mẽ pa xwỳnhjê mã kapêr nẽ mẽ kãm: —E ixkràmnhwỳjaja. Kêr ka mẽ amã akwỳjê puma rỳ nhãm mẽ hkwỳjê puma ho ri apa hkêt nẽ. Koja mẽ apar tã ãm mẽ anhĩ pix pa nom tanhmã mẽ akarõ hto hkêt nẽ.

⁵Tĩrtũmja tapxipix na hte mẽ ĩ nẽ mẽ hkarõ ho hpimràatã mẽ kot amnhĩ xà htỳx kamã hamak tũm xà hwỳr mẽ kurẽ. Tã kêr ka mẽ ja pumaj Tĩrtũm kapêr kwỳm tanhmã ri amnhĩ nhĩpêx to ho apa hkêt nẽ.

⁶⁻⁷—Nẽ Tĩrtũm kot mẽ pahto hapêx par pumunh tã mãănẽn kot mẽ pajamãr pumunh mex. Mãn ka htem kuwênhre pumu. Na hte Tĩrtũm hamãr mex o pa. Mẽ piitã mẽ kot ãm kuwênhre pumunh o pa htã nhũm Tĩrtũm mẽ kurom hamãr mex o pa. Nẽ htãnopxar rãhã ho pa. Nom kãm mẽ pajapê htỳx o kuwênhre jakrenh jakamã kwa mẽ tee ri amnhĩ kukamã ajamaxpêr o ri akaprĩ nẽ apa hkêt nẽ. Koja Tĩrtũm mẽ pahtãnopxar rãhã ho pa. Ra kot tanhmã mẽ pakute hã mẽ pahpumunh par. Nẽ ahpỳnhã tanhmã mẽ pahkrã hkĩ kute hkõt mẽ pahpumunh par. Tã kot mẽ pahtãnopxar rãhã jakamã mo kaxyw kot kaj kêt mẽ ri amã mễhõ puma ho ri apa?

⁸—Jakamã kwa mẽ mãmri mẽ kãm mẽ apê ixkra hã amnhĩ jarênh o ri apa nẽ amã mẽ uma xàj tee ri amnhĩ nhĩpêx o ri apa hkêt nẽ. Kot ka mẽ kãm ra mẽ ate ixkõt amnhĩ xunhwỳr ã amnhĩ jarẽ. Pa ja hã mẽ apumu hãmri nẽ mẽ apyrà nẽ kaxkwa kamã Tĩrtũm kapêr o mẽ wrỳk xwỳnhjê mã ra mẽ ate ixkõt amnhĩ xunhwỳr ã mẽ ajarẽ.

⁹Nom kot ka mẽ kot ixtã tanhmã mẽ ato pymaj apê ixkwỳ hã amnhĩ jarênh kêt japêr. Pa ja hã mẽ apumu hãmri nẽ nhỹrmã amnhĩ xwar mẽ kãm mẽ apê ixkwỳ hkêt ã mẽ ajarẽ. Jakamã kwa mẽ mãmri mẽ kãm apê ixkwỳ hã amnhĩ jarênh o ri mẽ hkõt apa kê mẽ ama nẽ tanhmã inhmã hamaxpêr to.

¹⁰Koja mẽ ama nẽ ãm ama nẽ kãm ixprãm kêt japêr. Hãmri nhũm Tĩrtũm ixtã mẽ omu nom tokyx ixtã tanhmã mẽ ho hkêt nẽ. Koja kormã amnhĩ tã mẽ hamãr o pa. Karõ kot axte mẽ kãm ijarênh o amnhĩrit nhũm mẽ hkwỳjaja kot mar nẽ kãm ixprãm nẽ ixkõt amnhĩ xunhwỳr kaxyw nhũm kormã amnhĩ tã mẽ hamãr o pa. Nom koja Karõ xatã mẽ kãm ixto amnhĩrit tã nhũm mẽ

kuma nê ãm kuma nê te mẽ kot kêp amnhĩ jamak pro pyræk o amnhĩ nhĩpêx o pa. Jao Karõ hã hpijaàm kêt mỳrapê koja Tĩrtũm nhỹrmã amnhĩ xwar te kot mẽ kêp amnhĩ jamak pro pyræk o mẽ hipêx nhũm mẽ tee kãm amnhĩ kaprĩ kaprỹ. Hãmri nê amnhĩ xà htỳx kamã hamak tũm xàta wỳr ma pa nê kamã pa ho pa. Jakamã kwa mẽ mãmri mẽ kãm mẽ apê ixkra hã amnhĩ jarẽnh o ri mẽ hkõt apa nê tanhmã mẽ kãm ijarẽnh to ho ri apa.

¹¹Koja mẽ ama nê kãm mẽ amar prãm kêt japêr hãmri nê ixtã mẽ apynê nê tanhmã mẽ anhĩpêx to kaxyw. Nê Ijaew nhõ Tĩrtũm kapêr o mẽ ahkre xà hã ixkre hwỳr mẽ ato mrrar japêr. Rỳ mẽ õ pahi hwỳr mẽ ato mrrar nê tanhmã kãm mẽ ato hêx to. Nom kêr ka mẽ mẽ kãm amnhĩ jarẽnh kaxyw nê tee ri amnhĩ kukamã ajamaxpêr o amã mẽ uma kêt nê.

¹²Koja Tĩrtũm Karõ ja kaxyw mẽ amã mẽ ajamaxpêr mex gõ hãmri ka mẽ ô ri mẽ kãm amnhĩ jarẽ. Jakamã kwa mẽ tee ri mẽ kãm amnhĩ jarẽnh kukamã ajamaxpêr o ri mẽ amã mẽ uma ho apa hkõt nê. Anê.

Mẽ hikukrêx rũnh pix kukamã hamaxpêr xwỳnhjê jarẽnh

Wam Ximotre 6.9-10; Xiakre 4.13-17; 5.1-6

¹³Nhũm Jejus arĩ mẽ ahkre o xa nhũm mẽ mar o kuhê. Rôm nhũm mẽhõ myja hwỳr tẽ nê kãm kapêr nê kãm: —Pa? Kwa ot pa awỳr amã mẽmoj jarẽnh mã tẽ. Na pre inhĩpêxà ty nhũm ixtõ ixrom amnhĩm õ mẽmoj piitã ho àrĩk pa. Õ pika nê hkrit nê hikukrêx nê ãm mẽmoj piitã ho àrĩk par kumrêx. Kwa ma ixkõt tẽ nê kãm anê pa wa amnhĩm ho axkjê nà? Anê.

¹⁴Hãmri nhũm kuma nê kãm: —Tk. Kokỹ. Na pa pre mẽ amã mẽ mẽmoj to ixpikjêr kaxyw mẽ awỳr ixwryk kêt nê. Anê.

¹⁵Hãmri nê mẽ kot mar o kuhê xwỳnh piitã mẽ kãm kapêr nê mẽ kãm: —Kwa kêr ka mẽ amã anhõ mẽmoj rũnh prãm o ri apa hkõt nê. Na htem mẽmoj rũnh kukwak ri Tĩrtũm wỳr apir kêt nê. Mẽmojta kêp pika pix nhõ xwỳnh na.

¹⁶Anhỹr o mẽ kãm kapêr hãmri nê mẽ kãm awjarẽ. Mẽ hkukrêx rax ã kuxi nê mẽ kãm awjarẽ nê mẽ kãm: —Nà koja mẽhõ õ mẽmoj rax nê. Nê hpur kãm õ rax nê. No ãm õ jaxwỳr xà hã ixkre kêp grire.

17Hāmri nhūm tee ri hpur kām ò rax kukamā hamaxpēr nē hamaxpēr o: “Kwa tanhmā kot pa amnhī to nē ja piitā nhỹri haxwỳ wehe? Inhmā amarī mē kēp amrakati xwỳnhjê mǎ hkwỳ nhōr prām kêt. Kot paj ãm amnhīm piitā ir pa nē kritpēm hkur o ixpa. Nom ixpê haxwỳr xà hǎ ixkreja ixpê grire.” Anē.

18—Hāmri nē hamaxpēr o: “Nà na pa ra ijamaxpēr. Kot paj ixkre grireta grà nē hpānhǎ rax ò nhīpêx. Hāmri nē ixpur kām inhōta jamỳ nē kamā ir pa. Nē ixàpênh xà hǎ ixkukrêx piitā kamā haxwỳr pa. Nà kot paj ho anē.” Anē.

19—Hāmri nē ra ixkreja grành pa nē hpānhǎ rax ò nhīpêx. Nē hipêx pa hāmri nē kamā hpur kām òta xir pa. Nē àpênh xà hǎ hikukrêx piitā kamā unhwỳ. Hāmri nē omu nē hkĩnh nē. Nē hamaxpēr o: “Nà hāmri. Kot paj tokyx axte mēmoj tǎ ixàpênh kêt nē. Ra inhō rax kumrêx kênǎ. Kot paj kritpēm ho ixàpkur mex o ixpa. Nà ãm hāmri na pa amnhī kukamā ijamaxpēr mex pē ixkre rax nhīpêx.” Anē.

20Tǎ nhūm Tĩrtũm tee ri ã kot amnhī nhīpêx anhỹr ã omu nhūm ja kām mex kêt nē. Hāmri nhūm hǎ kām kapēr nē kām: “Nà na ka atỳx ri anhō rax mē akukrêx rax o apikuprōnh kaprỳ. Na ka ãm amnhī pix kukamā ajamaxpēr o apa pē ã amnhī nhīpêx anē. Nom kot kaj kamàt ja kamā ty nē anhỹ kamā ma mō nē amnhī kôt anhō mēmoj rax ò ho amōr kêt nē. Koja hpānhǎ mēhō amỳr pē ho amnhīptàr pa ka rĩ amnhī pumu.” Anē. Nhūm ã Tĩrtũm kām kapēr anē. Ǻ mē ujarênh kot anhỹr.

21—Mē kot amnhī nhō nē amnhī kukamā pix mǎ hamaxpēr o mē pa xwỳnhjaja na htem myja pyrà nē Tĩrtũm mǎ hamaxpēr o pa hkêt nē. Jakamā koja mē nhỹrmǎ ty hāmri nē hkukrêx pix kukamā hamaxpēr nē amnhī mǎ pix mǎ hamaxpēr o paja mỳrapê Tĩrtũm mē wa ixri htĩr tũm nē mex nē pa ho pa hkêt nē. Mē kot amnhī nhō pix kukamā hamaxpēr xwỳnhjaja nē amnhī kukamā pix mǎ mē hamaxpēr xwỳnhjaja nē mē kamā ukapĩrĩ hkêt xwỳnhjaja mē ò mēmoj rũnh tǎ koja mē nhỹrmǎ ty hāmri nē amnhī kôt hō ho pixi nē o mōr kêt nē. Koja mē mēmoj piitā rer pa nē ma ỹ kamā ma mō. Jakamā kwa kêr ka mē jajê pyrà nē anhō mēmoj to anhōxỳ ho ri apa hkêt nē. Anē.

Mê pahte tee ri amnhĩ kukamã pajamxpěr kêt ã mẽ pamã karõ

Matêwre 6.25-34; mãânên Wam Pêtre 1.3-9

22Tã nhũm Jejus hpãnhã tanhmã hkôt mẽ pa ho mẽ pa xwỳnhjê jahkre hto nẽ mẽ kãm: —Kwa kêt ka mẽ tee ri amnhĩ kukamã ajamxpěr o ri apa hkêt nẽ. Amnhĩ xàpkur xà rỳ axê ka mẽ tee ri hkukamã ajamxpěr kêt nẽ. Nẽ mẽ ãm mẽmoj piitã hkukamã tee ri ajamxpěr kêt nẽ.

23Tĩrtũm àhpumunh tỳx o àhpumunh tỳx xwỳnh na. Na pre àhpumunh tỳx o mẽ anhĩpêx ka mẽ kukwak ri atĩr nẽ apa. Tã xà kot mẽ amã mẽ anhõ ho pa hkukamã àhpumunh kêt? Nà ja kukamã àhpumunh xihtỳx kênã. Kêp mẽ anhĩpêx xwỳnh jakamã mãânên kêp mẽ amã mẽ anhõ ho pa xwỳnh. Nẽ kêp mẽ amã mẽ axê nhõr o pa xwỳnh.

24—Mãn ka htem kuwênhre pumu. Na hte tee ri amnhĩ xàpkur xà hkukamã hamxpěr o hkaprĩ nẽ ri pa hkêt nẽ. Na hte Tĩrtũm tãm kot kãm õ ho pa. Tã kãm mẽ pajapê htỳx o kuwênhre jakrenh jakamã koja uràk nẽ mẽ pamã mẽ panhõ mex o pa rãhã nẽ.

25-26Jakamã kwa kêt ka mẽ mẽmo arĩgro hã axàpkur xà hkryre pumu nẽ ate amnhĩ pê hkrêr par nẽ amã prãm o akaprĩ nẽ apa hkukamã tee ri ajamxpěr kêt nẽ. ãm Tĩrtũm kamnàr rom axàmnhĩx anhõ hkryreta ku nẽ akĩnh kãm tanhmã amnhĩ nhĩpêx to ho ri apa. Xà kot ka anhõ mry grire pumu nẽ akaprĩre nhũm ra tanhmã amã amnhĩ to rax to? Na htem ãm tee ri mẽmo hkukamã hamxpěr o hkaprĩ nẽ pa kaprỳ. Jakamã kêt ka mẽ ã ri ajamxpěr anhỹr o akaprĩ nẽ apa hkêt nẽ.

27—Mãn ka htem akunĩ kamã pixôrãre pumu. Na hte tee ri tanhmã amnhĩ kute hkukamã hamxpěr o hkaprĩ nẽ harir kêt tã muxre nẽ harir ka mẽ omu. Te ho amnepêm finat pahшти Sarumãw xê mex pyràk nom ãm mex o kot hakrenh.

28—Pixôrãreja arĩgro ja hã htĩr nẽ muxre nẽ harir tã koja mẽmo arĩgro hã grà pa nẽ hapêx. Kêp pixôrã pix nẽ hapêx tokyx anhỹr tã na hte Tĩrtũm ho mex nẽ nhũm mux nẽ harir. Nom mẽ pajaja na hte mẽ pahto mex o pixôrãre ho mexja jakrenh. Jakamã kwa mẽmo kaxyw kot ka mẽ tee ri amnhĩ xê

hkukamã ajamxpër o akaprĩ nẽ apa? Nà kot kaj mẽ anẽ nẽ amnhĩ kaxyw Tĩrtũm mã ajamxpër tỳx kêt nẽ.

²⁹—Kwa mẽ tee ri amnhĩ xàpkur xà hkukamã ajamxpër rãhã o ri akaprĩ nẽ apa hkêt nẽ. Nẽ mẽ tee ri amnhĩ kukamã tanhmã ajamxpër to ho ri akaprĩ nẽ apa hkêt nẽ.

³⁰Mẽ kot Tĩrtũm kôt amnhĩ xunhwỳr kêt xwỳnhjaja na htem ã ri hamxpër anhỳr o hkaprĩ nẽ pa. Tã kêt ka mẽ ho mẽ uràk kêt nẽ. Tĩrtũm kot mẽ panhõ mẽmoj kêt kôt mẽ pahpumunh mex kênã.

³¹Jakamã kêt ka mẽ ãm hkôt ri amnhĩ nhĩpêx rãhã nẽ. Nẽ amã ja pix kukamã ajamxpër o ri apa hprãm. Hãmri nhũm amnhĩ tã mẽ apumu hãmri nẽ apkati mẽ tãm mẽ amã mẽmoj nhõr o pa. Anẽ.

Kaxkwa kamã mẽ pakukrêx rax jarênh

Matêwre 6.19-21; mãânên Sikũn Ximotre 4.8; Eprêw 10.34; Wam Pêtre 1.4

³²Nhũm Jejus arĩ mẽ kãm kapër nẽ mẽ kãm: —E mẽ ate ixkôt amnhĩ xunhwỳr xwỳnhjaja. Ra Tĩrtũm kot mẽ ato hkra jakamã kwa mẽ axàmnhĩx hkamnàr rom ri tanhmã amnhĩ nhĩpêx to ho ri apa. Na hte mẽ apê hkra hã mẽ apumu nẽ hkĩnh nẽ. Kojã nhỹrmã kaxkwa kamã õ krĩ hwỳr mẽ ato api ka mẽ kamã wa ixkuri amex nẽ atĩr tũm nẽ apa ho apa. Ja na mex o kot jar pika ja kôt mẽ õ mẽmoj rũnh nẽ pa xwỳnhhta jakrenh.

³³Jakamã kêt ka mẽ axàmnhĩx ri akukrêx kwỳ ho wẽnê nẽ hpãnhã kàxpore jamỳ nẽ mẽ kêp amrakati xwỳnhjê mã ho apigrành o ri mẽ hkôt apa. Kot kaj mẽ ã amnhĩ nhĩpêx anẽ hãmri nẽ kaxkwa kamã akukrêx rax nẽ. Mo kaxkwa kamã mẽ àhkĩnh xwỳnh koja mẽ apê ho ahkĩ? Nẽ kamã mo amnhõre kot mẽ apê homnu? Kaxkwa kamã ja amrakati kumrêx. Jakamã Tĩrtũm kot mẽ amã mẽ akukrêx nhõr mã xwỳnhhta koja aa apê omnuj nẽ hapêx kêt kumrêx.

³⁴Kot kaj mẽ jar pika ja kamã akukrêx rax hãmri nẽ tanhmã apê omnu hto pix kukamã ajamxpër rãhã ho ri apa. Nom kot kaj mẽ apê Tĩrtũm kra hã kot kaj mẽ jar akukrêx rax kêt tã kaxkwa kamã akukrêx pix kukamã ajamxpër rãhã ho ra akĩnh nẽ ri apa. Anẽ.

Mě pahte Jejus kutêp tanhmã amnhĩ nhĩpêx to hã mẽ pamã karõ

Matêwre 24.42-43; Makre 13.32-37; Rukre 21.34-36; mãânên Wam Tesarõn 5.4-8

35Nhũm pre Jejus arĩ mẽ ahkre nẽ mẽ kãm: —E na pa pre ra mẽ apê ixkõt mẽ apa ho apa xwỳnhjê mã tanhmã amnhĩ kukamã amnhĩ jarênh to. Ixtyk nẽ akupỹm ixtĩr nẽ ma akupỹm ixàpir hãmri nẽ mẽmo arĩgro hã akupỹn mẽ awỳr ixwrykja na pa pre ra mẽ amã ja hã amnhĩ jarê. Tã kwa kêr ka mẽ ixwakre kamã ixte mẽ amã ã amnhĩ jarênh anhỹrja mã ajamaxpêr tỳx pê ixkõt amnhĩ nhĩpêx rãhã ho ri apa.

36-38—Te mẽ õ patrãw mã mẽ àpênh mex xwỳnhjaja kot amnhĩ nhĩpêx pyrãk o amnhĩ nhĩpêx o ri apa. Kojã mẽ õ patrãw ma mẽ kot axpên mã wa rer mã xwỳnh pumunh mã ma nhỹhỹm tẽ. Hãmri nhũm kãm mẽ àpênh xwỳnhjaja arĩ kutêp òrkwỹ kamã hkrĩ. Axkãm hamak rom nẽ kutêp hkrĩ. Akupỹn htêm nhũm mẽ kot amnhĩ wỳr mar nẽ kãm kahê xà mẽnh tokyx anhỹr kaxyw arĩ kutêp òt kêt nẽ hkrĩ. Kõt ã kamàt nhũm akupỹn hpôx o htêm rỳ arĩgro hwỳr hpôx o htêm nhũm mẽ kot amnhĩ wỳr mar nẽ kãm kahê xà mẽnh tokyx anhỹr kaxyw kutêp òt kêt nẽ hkrĩ. Akupỹn hpôx ã omunh hãmri nẽ tokyx apkur kaxyw kãm õ nhĩpêx kaxyw. Kêr kê akupỹn pøj nẽ ã mẽ kot amnhĩ nhĩpêx anhỹr ã mẽ omu nẽ hkĩnh nẽ. Tã kêr ka mẽ àpênh xwỳnhhtajê pyrã nẽ ixwakre kamã inhmã ajamaxpêr rãhã ho ri apa. Jao ixkamã ajamak o apa ho ixkõt amnhĩ nhĩpêx mex rãhã nẽ. No kot paj akupỹn mẽ awỳr wry hãmri ka mẽ àpênh xwỳnhjê pyrã nẽ inhmã mẽmoj nhõr kêt nẽ. Kêt pa kot paj mẽ õ patrãwta kurom mẽ amã mẽmoj mex gõ.

39—Na htem mẽ kêp àhkĩnh pymaj amnhĩ nhõrkwỹ jamãr rãhã ho pa.

40Ja pyrã nẽ mẽ ate akupỹn ixwryk xà hã arĩgro pumunh kêt jakamã kêr ka mẽ òrkwỹ nhõ dõnta pyrã nẽ ixkutêp axkãm ajamak rom rãhã nẽ ri apa. Jao tãm amnhĩ nhĩpêx rãhã nẽ. Anẽ.

Mě õ patrãw mã mẽ àpênh mex xwỳnhjê jarênh

Matêwre 24.45

41Nhũm pre ã Jejus hkõt mẽ pa ho pa xwỳnhjê jahkre anẽ. Hãmri nhũm Simãw Pêtre kuma nẽ kãm: —Kwa Pahihti. Xàn ka mẽ piitã mẽ kãm ã akapêr anẽ nà? Xà ãm mẽ papxipixjê mã? Anẽ.

⁴²Hāmri nhūm kām: —Nà ãm ixwakre kamã mẽ ate ixkôt tanhmã inhmã amnhĩ nhĩpêx to ho mẽ apa xwỳnh piitã mẽ amã na pa ã ixkapêr anê. Koja mẽ àpênh xwỳnhjê hõ õ patrãw mã àpênh mex o pa nhūm amnhĩ tã omu nê ma nhỹhỹm mōr kaxyw nê ìhkram mẽmoj piitã haxàr pa. Hāmri nê kām: “E kêr ka ixwakre kamã inhmã inhōrkwỹ htãnopxa. Nê mẽ àpênh xwỳnhjê mã õ mex kê mẽ apkur mex o pa.” Anê. Koja ã kām mẽmoj tã karõ anê hāmri nê kato nê ma nhỹhỹm mō.

⁴³Hāmri nhūm kām àpênh mex xwỳnhhta wakre kamã kām àpênh mex o pa. Jakamã nhūm õ patrãw akupỹn hpôx o mō nhūm amnhĩ wỳr harênh ma nê hkĩnh nê. Nê mẽmoj tã amnhĩ tã kamã kahak kêt nê. Rỳ tee ri wakre kamã kām àpênh punuj ã amnhĩ pumu nê tee amnhĩ kukamã hamaxpêr kêt nê. Kot wakre kamã kutêp àpênh mex jakamã akupỹn hpôx ã harênh ma nê hkĩnh nê.

⁴⁴—Jakamã nhūm õ patrãwja akupỹn pōj nê kot kām àpênh mex ã omu nê haxwỳja hkĩnh nê. Hāmri nê kot kām hamār o pa kaxyw kām mẽmoj piitã ìhkram haxàr pa.

⁴⁵Nom koja kām àpênh xwỳnhhta axtem nê wakre kamã kām àpênh mex kêt nê. Nê tokyx akupỹn mōr kêt ã hkamnhĩx nê wakre kamã kām mẽ àpênh xwỳnhjê htak nê pipãnh pix nê mẽ kām gô xành xwỳnhjê kôt pix mã pa japêr.

⁴⁶Hāmri nhūm õ patrãw haêr pê akupỹn pōj nê tee ri ã amnhĩ nhĩpêx anhỹr ã omu. Hāmri nê gryk tỳx nê tanhmã homnuj to. Hāmri nê kām mẽ àpênh punuj xwỳnhjê mẽ mẽ ho pimràatã amnhĩ nê mẽ hanor pa. Tã kêr ka mẽ ixwakre kamã ho mẽ uràk kêt nê. Mẽ kurom ixkapêr kôt tãm amnhĩ nhĩpêx mex rãhã ho ri apa.

⁴⁷⁻⁴⁸—Nê koja mẽhõ kormã Tĩrtũm kapêr mar kêt nê htỳx ri tanhmã amnhĩ tomnuj to ho pa. Hã koja Tĩrtũm ja hã omu nê nhỹrmã kot amnhĩ tomnuj o pata mỳrapê tanhmã ho nhūm amnhĩ xà htỳx kamã hamak tũm xà kamã pa. Nom akrànhmã amnhĩ xà kamã hamak o pa. Aa kot Tĩrtũm kapêr mar kêt jakamã koja ãm akrànhmã amnhĩ xà kamã hamak o pa. Nom koja mẽhõ

kapër mar mex tã ãm kuma nẽ hkõt amnhĩ nhĩpêx kêt nẽ. Nẽ xatã hirôp kuhê nẽ tanhmã amnhĩ tomnuj to. Hã koja Tĩrtũm tee ri ja hã omu nẽ nhĩrmã tanhmã homnuj tỳx to. Hãmri nhũm wantajê pyrã nẽ amnhĩ xà htỳx kamã hamak tũm xàta kamã pa ho pa nom mẽ kĩnhã amnhĩ xà htỳx kamã hamak rãhã ho pa. Anẽ.

Jejus kot nhĩrmã mẽ kot amnhĩ tomnuj xà ho hapêx ã harênh

Matêwre 10.34-36

⁴⁹Nhũm Jejus arĩ hkõt mẽ pa ho mẽ pa xwỳnhjê jahkre nẽ mẽ kãm: —Nà ixte mẽ omnu xà piitã ho ijapêx par nẽ mẽ kot tanhmã amnhĩ tomnuj to piitã ho ijapêx par kaxyw na pa pre wrỳ. Tã ra ixte piitã ho ijapêx par o inhmõr ronhỹx ja inhmã mex kumrêx. Nom kormã.

⁵⁰Kot paj amnhĩ xà htỳx kãm ijamak rax o mẽ kot amnhĩ tomnuj o ijapêx o hkrax. Hãmri nẽ nhĩrmã ho ijapêx pa. Na pa ra ixtyk kaxyw ixte amnhĩ kà xà kamã ijamak kukamã ijamaxpêr o ra amnhĩ kamã ixkahak nẽ ri ixpa. Tã kot paj ja ho ijapêx pa nẽ ixkĩnh tỳx kumrêx. Anẽ.

Mẽ kot Jejus ã axpên kutã amnhĩ xunhwỳr ã mẽ harênh

Matêwre 10.21; 10.34-35

⁵¹Nhũm Jejus arĩ mẽ ahkre nẽ mẽ kãm: —Nẽ ra mẽ awỳr ixwrỳk tã koja mẽ piitã ixkukwak ri hamakêtkati nẽ àmnhĩx ri pa hkêt nẽ. Kormã. Koja mẽ akwỳjaja ixkapêr ma nẽ mẽ apyrã nẽ amnhĩ kaxyw ixkõt hamaxpêr. No nhũm mẽ akwỳjaja mẽ akĩnhã kuma nẽ ãm kuma. Hãmri nẽ ixtã tanhmã mẽ anhĩpêx to ka mẽ ixpyrã nẽ amnhĩ xà htỳx kamã ajamak o ri apa.

⁵²—Nẽ koja tanhmãn ixkre pyxi kamã mẽmojaja ohtôn pa. Nhũm war axkrut্রে nẽ ixkõt amnhĩ xunhwỳ nhũm mẽ axkrunêpxi nẽ ixkwỳm ri amnhĩ nhĩpêx nẽ ixkutã amnhĩ xunhwỳ.

⁵³Nhũm mẽ hipêêxà hkra my mẽ wa ixtã axpên kutã amnhĩ xunhwỳ. Nhũm mẽ katorxà hkra ni mẽ wa ixtã axpên kutã amnhĩ xunhwỳ. Nhũm mẽ wỳj umregêx mẽ wa haxwỳja ixtã axpên kutã amnhĩ xunhwỳ. Koja mẽ ã ixtã axpên nhĩpêx anhỹr o pa. Anẽ.

Mẽ pahte amnhĩ tomnuj kaga nẽ Tĩrtũm kôt amnhĩ nhĩpêx ã mẽ pamã karõ

Matêwre 5.25-26; 16.2-4

54Nhũm Jejus hpãnhã mẽ kot hkôt amnhĩ xunhwỳr kêt xwỳnhjê mã kapër nẽ mẽ kãm: —Kwa mẽ inhma mẽ ate ixkôt amnhĩ xunhwỳr kêt xwỳnhjaja. Na htem kaxkwa kamã na htyk rax pumu nẽ na wryk mã hamaxpër kurê kumrẽx. Hãmri nhũm na wry.

55Nẽ amgrà pẽ kôk krihkritja nhũm htem kuma nẽ arĩgro htỳx mã hamaxpër kurê kumrẽx. Hãmri nhũm arĩgro htỳx nẽ.

56-57ã na ka htem aprĩ hã mẽmoj pumunh kôt mẽmoj kukamã ajamaxpër mex o ri apa anẽ. Nom nhũm Tĩrtũmja mẽ ate tanhmã amnhĩ tomnuj to mỳrapê tanhmã mẽ ato kaxyw nhũm mẽ ate ja hã amnhĩ pumunh tã tokyx amnhĩ tomnuj kaga hkêt nẽ.

58-59—Na htem tanhmã axpẽn tomnuj to. Hãmri nhũm kot tanhmã war axpẽn to xwỳnhhta pahi hwỳr htẽm nẽ kãm tanhmã kot ho xwỳnhhta jarẽnh kaxyw. Hãmri nhũm kamã gryk xwỳnhhta kot pahi mã harẽnh kaxyw ã harẽnh ma nẽ hãmri tokyx hwỳr tẽ nẽ wa tãm akupỹm axpẽn xãm. Na htem ã amnhĩ nhĩpêx anẽ. Pahi kot ja mar nẽ tanhmã mẽ ho pymaj na htem ã amnhĩ nhĩpêx anẽ nẽ tokyx akupỹm tãm axpẽn xunhwỳ. No koja mẽ ã amnhĩ nhĩpêx anhỳr kêt nẽ nhũm pahija mẽ harẽnh ma hãmri nẽ tanhmã kot hõ ho xwỳnhhta pynê nẽ haxà nhũm tee kãm kator prãm o hkrĩ kaprỳ. Hãmri nẽ tanhmã amnhĩ to nẽ amnhĩ pãnhã kãm amnhĩ rer pa nhũm pahihtija kormã mẽ kãm anẽ nhũm mẽ kãm ure nhũm kato. Ja pyrà nẽ kêr ka mẽ Tĩrtũm tanhmã kot mẽ anhĩpêx to pymaj tokyx mẽ ate amnhĩ tomnuj kaga nẽ hkôt amnhĩ nhĩpêx rãhã ho ri apa. Anẽ.

Rukre 13

1Tã nhũm axtem mẽ hkwyjaja Jejus wỳr mra nẽ kãm: —Pa? Kwa xàn ka ra Garirej nhõ xwỳnh kwỳjê jarẽnh ma nà? Na xep prem Jerujarẽ hwỳr mra nẽ ham mẽ kot Tĩrtũm mã amnhĩ jarẽnh xà hã ixkre kamã kãm amnhĩ jarẽnh kaxyw kormã kãm mry hpar o kuhê nhũm xep pahшти Piratja mẽ harẽnh ma nẽ mẽ hã amỹnê nhũm mẽ ma mẽ hwỳr mra nẽ mẽ himex pa. Kwa mãn mẽ kot amnhĩ tomnuj tỳx o mẽ pajakrenh ã na prem mẽ himex nà? Anẽ.

²⁻³Hāmri nhūm mẽ kām: —Nà mẽ kot amnhĩ tomnuj tỳx mỳrapê mẽ kot mẽ himex kêt. Mẽ apiitã mẽ ate amnhĩ tomnuj o axpẽn pyræk kênã. Tã kot ka mẽ amnhĩ tomnuj kaga nẽ Tĩrtũm kôt amnhĩ xunhwỳr kêt hã kot ka mẽ nhỹrmã ty hāmri nẽ ò krĩ hwỳr axàpir kêt nẽ.

⁴No Jerujarẽ kamã ixkre prêkja mẽ kot kãm “Siroe” anhỹr xwỳnhhta mẽ ho 18 nẽ mẽ hipy htem nẽ mẽ himex par xwỳnhhaja. Xà mẽ kot amnhĩ tomnuj tỳx mỳrapê na prem ty? Xà mẽ kot amnhĩ tomnuj tỳx o Jerujarẽ kamã arĩ mẽ htĩr xwỳnhjê jakrenh?

⁵Nà kot anhỹr kêt. Mẽ apiitã mẽ ate amnhĩ tomnuj o axpẽn pyræk. Jakamã kot kaj mẽ ã amnhĩ nhĩpêx anhỹr kaga nẽ Tĩrtũm kôt amnhĩ nhĩpêx kêt nẽ hāmri nẽ mẽ uræk nẽ nhỹrmã ty hāmri nẽ Tĩrtũm nhõ krĩ hwỳr axàpir kêt nẽ. Jakamã kwa mẽ ixkapêr ma nẽ kãm ajamaxpêr tỳx rãhã ho ri apa. Anẽ.

Tĩrtũm kot mẽ pakamã gryk tokyx anhỹr kêt ã harênh

Rômãn 2.4; Sikũn Pêtre 3.8-9

⁶Tã nhūm Jejus kê axte tanhmã mẽ ahkre hto. Nẽ Tĩrtũm kot tanhmã mẽ panhĩpêx to hã kuxi nẽ mẽ kãm awjarẽ nẽ mẽ kãm: —Koja hpur nhõ dõn mẽmo pàr kre nhūm ra hprêk mex nẽ ô mã tãm nẽ. Tã aa ô hkêt ã ra hã amgrà axkrunêpxi.

⁷Hāmri nhūm kot hkre xwỳnhja tee ri omu nẽ kãm àpênh xwỳnh wỳr tẽ nẽ kãm: “E kwa ma tẽ nẽ mẽmo pàr mũj krãhta nẽ amẽ. Mexti hã. Ra ô hkêt ã amgrà axkrunêpxi kênã. Koja pêr aa ô hkêt nẽ. Mo kaxyw kot kêt ô hkêt tã ô mex xwỳnh kaêx ã mẽ kêp àmnàr o kuhê? E hwỳr tẽ nẽ krãhta nẽ amẽ.” Anẽ.

⁸⁻⁹Hāmri nhūm tee ri kot kãm hã karõja ma nẽ kãm: “Kwa nà kormã. Pa kop ixàmnhĩx pàr krax ã mẽmo japôk kwỳ kapĩ nẽ kop hamã mãn. Kê axte hã amgrà pyxi nẽ hapêx nẽ ô hkêt pa kormã krãhta nẽ kumẽ. Koja amgrà ja kamã amã ô japêr ka omu nẽ akĩnh nẽ.” Anẽ. ã mẽ ujarênh kot anhỹr. Anẽ. Nhūm Jejus ã mẽ kãm ujarênh anẽ. Mẽ kot amnhĩ tomnuj tỳx o pa htã nhūm Tĩrtũm kot pur nhõ dõn mã àpênh xwỳnhhta pyrà nẽ mẽ kamã gryk tokyx anhỹr kêt ã nhūm ã hã kuxi nẽ mẽ kãm ujarênh anẽ.

Jejus kot arĩgromnu hã mēhõ ho mex ã harênh

Rukre 14.1-6; Juaw 5.16-17

10Tã nhũm mẽ õ arĩgromnu pê sap kato nhũm Jejus Ijaew pikuprõnh xà hã ixkre hwỳr axà nẽ kamã Tĩrtũm kapẽr o mẽ ahkre ho nhỹ.

11Nhũm kamã mẽhõ ni hikõt rãhã nẽ pa xwỳnhja nhỹ. Na pre ra amnepẽm mẽkarõmnuti tanhmã ho nhũm katàt nẽ ri mrar kêt kumrẽx. ãm hikõt rãhã nẽ ri pa hã ra hã amgrà pê 18.

12-13Hãmri nhũm Jejus omu nẽ amnhĩ wỳr kãm hpa ho apê nhũm hwỳr tẽ nhũm hã ãhkra xi nẽ kãm: —E na ka ra akupỹm amex. Anẽ nhũm akupỹm katàt nẽ mex kurê kumrẽx. Hãmri nẽ amnhĩ pumu nẽ hkĩnh tỳx nẽ Tĩrtũm mã mex o mex ã harẽnh o xa.

14Nom nhũm mẽ pikuprõnh xà hã ixkre jamãr xwỳnh maatija tee ri ja hã omu hãmri nẽ Jejus kamã gryk tỳx nẽ. Mẽ õ arĩgromnu hã akupỹm kot ho mex jakamã nhũm kamã gryk tỳx nẽ. Hãmri nẽ mẽ pikuprõnh xwỳnhjê mã kãm: —Tk. Kwa semãn ã mẽ àpẽnh xà hã arĩgro xohtõõ. Kêp 6. Kot kaj mẽ mãmrĩ tãmĩk nẽ sikũn nẽ tês nẽ kwata nẽ kĩa nẽ sêsta ja ã ka mẽ apê rỳ mãmrĩ Jejus wỳr amnhĩ to mra kê akupỹm tanhmã mẽ ato mex to. No sap ã kwarĩ. Sap kêp mẽ pahpê Ijaew nhõ arĩgromnu kênã. Na pu htem hã paxàpẽnh kêt nẽ. Jakamã arĩgro ja hã kot akupỹm mẽ ato mexja mex kêt. Anẽ.

15Hãmri nhũm Jejus kuma nẽ kãm: —Kwa xà mẽ kajaja na ka htem sap ã axàpẽnh kêt nẽ apa? Nà mẽ ate hã axàpẽnh kênã. Xàn ka htem sap ã akrit kawar nẽ akrit môx ma mẽ ho apa nẽ mẽ hkõm kêt nẽ? Nà na ka htem ma mẽ ho apa nhũm htem ixkõ. Mot ka kêt mẽ ri axtem nẽ mẽ kot sap ã tanhmã amnhĩ toja nẽ mẽ kãm akapẽr?

16Ixte ni ho mex xwỳnhhta mẽ pahpyrà nẽ kêp finat Apraãw kagrõt nyw õ na. Nhũm pre Satanasti te kot kãm ê nẽ ri o pa pyræk o hipêx jakamã nhũm ã hã hikõt nẽ ri paja ã ra hã amgrà kêp 18. Tã pa nẽ te ixte Satanasti ho ixkrihkrit nẽ ixte kêp utar pyræk o hipêx nẽ akupỹm ho mex. Mo kot pa kêt ri omu nẽ ãm omu nẽ arĩgromnu hã ho mex kêt nẽ? Nà ixte arĩgro piitã hã akupỹm mẽ ho mex o ixpa xwỳnh kênã. Anẽ.

17Hāmri nhūm mẽ kot kām kapēr mar prām kêt xwỳnhjaja kuma nẽ kamã gryk nẽ. Te ho mẽhprĩjê mã mẽ hamaxpēr nhõr pyràk o mẽ hipêx pyràk jakamã nhūm mẽ amnhĩ tã kuma nẽ kamã gryk nẽ. No nhūm mẽ kot ra ã amnhĩ nhĩpêx anhỹr o pa hã omunh xwỳnhjaja ja hã omu nẽ kãm hkĩnh nẽ.

Jejus te kot mẽmo hy pyràk ã harēnh

Matêwre 13.31-33; Makre 4.30-32

18-19Nhūm Jejus arĩ mẽ ahkre nẽ tanhmã mẽ kãm amnhĩ tã ujarēnh to nẽ mẽ kãm: —Nẽ Tĩrtũm kot mẽ awỳr ixte mẽ ato amnhĩptàr kaxyw inhmēnh ã ijarēnhja. Te ixte mẽmo hy pixire pyràk. Na htem hkre nhūm higrõt. Nẽ gaa nẽ rĩ hprêk. Hāmri nẽ pa anhrà nhūm kuwēnhre hwỳr mra nẽ hô pytĩ kamã amnhĩm haê nhĩpêx. Tã kot paj nhỹrmã mẽmo hy jarēnhhta pyrà nẽ ixpìxi htã kot paj pika piitã hkõt mẽ ho amnhĩptà nẽ mẽ omunh mex rãhã ho ri ixpa. Anẽ.

Jejus te kot pãwti kaxkrit xà pyràk ã harēnh

Matêwre 13.33-35

20-21Nhūm Jejus arĩ mẽ ahkre ho xa. Nom hprĩ hã amnhĩ jarēnh kêt nẽ. ãm amnhĩ tã kuxi nẽ mẽ kãm awjarẽ nẽ mẽ kãm: —E kot pa hpãnhã tanhmã mẽ amã pãwti kaxkrit xà jarēnh to. Kojã mēnijê hõ ãm hkwỳ ho grire nẽ kupy nẽ kaxyw mẽmo xôm kãm kumẽ nẽ ho pihkàr pa nẽ ho pãwti nhĩpêx. Nhūm kaxkrit xàja grire htã pãwti piitã ho kaxkrit mex nẽ. Ja pyrà nẽ kot paj ixpyxi htã kojã mẽ nhỹrmã pika piitã hkõt ixkõt amnhĩ nhĩpêx mex o pa. Anẽ. Nhūm pre ã Jejus mẽ kãm amnhĩ tã pãw kaxkrit xàja xi nẽ harēnh anẽ.

Kaxkwa hwỳr hakwa kre kahê xà jarēnh

Matêwre 7.13-14; 7.21-23; Juãw 10.7-10

22Tã nhūm Jejus arĩ krĩ pẽ Jerujarẽ hwỳr krĩ hkõt ri mẽ ahkre ho mẽ hkõt ri pa.

23Hāmri nhūm mẽhõ myja hwỳr tẽ nẽ mẽmoj tã hkukja nẽ kãm: —Pa. Kwa inhmã mẽmoj jarẽ. Xà kojã mẽ ohtô nẽ nhỹrmã Tĩrtũm ri htĩr tũm nẽ papa ho nà kojã mẽ grêre? Anẽ.

24Hāmri nhūm kuma nẽ mẽ kot mar o kuhê xwỳnh piitã kãm: —Nà mẽ kot Tĩrtũm kõt amnhĩ xunhwỳr xwỳnhjê pix kojã mẽ õ krĩ hwỳr agiê. Wỳr mẽ gjêx xàja ãm pixii nom kojã mẽ ohtô nẽ kãm hkõt wỳr gjêx prãm kêt nẽ. Na

htem te hwÿr mẽ gjêx xà hõ japêr o pa pyræk. Nom pa na te ixpê hwÿr mẽ gjêx xà pixita pyræk. Jakamã kwa kêr ka mẽ tokyx ixkôt amnhĩ xunhwÿr tÿx nẽ ixkôt ri amnhĩ nhĩpêx o ri apa. Na htem ohtô nẽ kãm ixkôt amnhĩ xunhwÿr prãm kêt nẽ. Ixte amnhĩ nhĩpêxja mẽ kêp hihtÿx jakamã nhũm htem ixkaga.

25—Tã koja mẽ nhÿrmã ty nẽ tee ri kãm Tĩrtũm wÿr gjêx prãm kaprÿ. Kot paj te mẽ kêp kahê pyræk o mẽ hipêx nhũm mẽ kapôt ã kuhê nẽ tee ri amnhĩ tã ixpumu nẽ inhmã: “Kwa mẽ inhmã kahê xà mẽ pa mẽ awÿr agjê Pahihtĩ.” Anẽ. Hãmri pa mẽ kãm: “Nà ixte mẽ apumunhre hã kot pa kêt ri mẽ amã kurẽ.” Anẽ.

26—Hãmri nhũm mẽ tee ri inhma nẽ inhmã: “Kwa nà ra ate mẽ ixpumunh mex kênã. Na ka pre mẽ inhõ krĩ kamã mẽ ijahkre ho ri apa nẽ mẽ ixkutã axàpkur o ri apa.” Anẽ.

27Hãmri pa mẽ kãm: “Tk. Ixte mẽ akutã ixàpkur tã mẽ ate ixkôt amnhĩ xunhwÿrre hã. Jakamã e mẽ ma mra. Mẽ ate amnhĩ tomnuj pix o mẽ apa xwÿnh jakamã kot kaj mẽ ixwÿr agjêx kêt nẽ.” Anẽ. Kot paj ã mẽ kãm ixkapêr anẽ.

28—Hãmri nhũm mẽ amÿm ri mẽ inhmex ã mẽ ixpumunh o kuhê. Kaxkwa kamã mẽ ixkĩnh nẽ ri mẽ inhmex nẽ ixpa hã amÿm mẽ ixpumunh o kuhê. Apraãw nẽ Ijak nẽ Jako nẽ Tĩrtũm kapêr jarênh o mẽ pa xwÿnh piitã nhũm mẽ amÿm mẽ ixkĩnh nẽ mẽ ixàpkur mex ã mẽ ixpumunh o kuhê. Hãmri nẽ tee ri mẽ ixwÿr kãm gjêx prãm kaprÿ nẽ hkaprĩ nẽ mur nẽ amnhĩ krã hkĩ jarê nẽ amnhĩ kà nhê nẽ amnhĩ kamã gryk tÿx nẽ. No ãm tee ri amnhĩ kamã gryk kaprÿ. ã koja mẽ amnhĩ nhĩpêx anẽ.

29Nom Tĩrtũm kôt mẽ kot amnhĩ xunhwÿr xwÿnhjaja koja mẽ kurom pika piitã kurũm axpên wÿr akuprõ nẽ Tĩrtũm wÿr agjê nẽ kuri hkĩnh nẽ apkur mex o hkrĩ. Mẽ akwÿjaja nẽ pika piitã kurũm hohtô rax nẽ axpên wÿr akuprõ nẽ hwÿr agjê nẽ kuri apkur mex nẽ hkĩnh nẽ pa ho pa.

30—Mẽ apê Ijaewjaja mẽ amã Ijaew kêt xwÿnhjê hprãm nõkati htã koja mẽ hkwÿjaja mẽ akwÿjê rom Tĩrtũm ri axpên wÿr akuprõ nẽ hkĩnh nẽ axpên

kutã apkur mex o hkrĩ. Jakamã kwa kot kaj mẽ uràk nẽ amã Tĩrtũm mẽ wa ixwỳr agjêx prãm hã kot kaj mẽ ixkõt amnhĩ xunhwỳ nẽ ixkapêr kõt amnhĩ nhĩpêx mex o ri apa. Anẽ.

Jejus kãm Jerujarẽ nhõ xwỳnhjê japê hã harênh

Matêwre 23.37-39

31Hãmri nhũm Parijew nhõ xwỳnh kwỳjaja Jejus wỳr mra nẽ kãm: —Pa. E ot pa mẽ awỳr mra. Kwa kêr ka ma Jerujarẽ hwỳr amõr kêt nẽ. Na ra mẽ hkĩnh wỳr pahi Eroxja pøj nẽ kot tanhmã ato kaxyw atã amnhĩ jarẽ pa mẽ kuma. Jakamã kwa mẽ hwỳr amõr kêt nẽ. Nhãm krĩ hõ hwỳr mãn mõ. Anẽ.

32Hãmri nhũm mẽ kuma nẽ mẽ kãm: —Tk. Nà kot pa umaj nhãm krĩ hõ hwỳr inhmõr kêt nẽ. Kot paj ma mẽ hkwỳjê nê mẽkarõmnuti japõx pẽ mẽ hkwỳjê ho mex o ma hwỳr mõ. Pahi Erox kãm mẽ hpar pix prãm. E mẽ mãmri ma akupỹm hwỳr mra nẽ ã kãm ixkapêr jarênh anẽ. No kot paj umaj nhỹhỹm ixprõt nẽ ixtẽm nẽ kêp ixpimxur kêt nẽ. Ra ixte õ krĩ hwỳr inhnojarêt kênã. Anẽ.

33Hãmri nẽ mẽ kot mar xwỳnhjê mã amnhĩ jarẽ nẽ mẽ kãm: —Kot paj tanhmã amnhĩ nhĩpêx to ho ri ixpa rãhã Jerujarẽ hwỳr mõn pøj nẽ kamã ty. Kamã na htem mẽ kot Tĩrtũm nhỹ hã kapêr jarênh xwỳnhjê nhĩmex. Tã hwỳr kot paj mõ. Anẽ. Nhũm pre ã Jejus mẽ kãm amnhĩ jarênh anẽ.

34Hãmri nẽ te ra kot Jerujarẽ nhõ xwỳnhjê pumunh o ãm nẽ mẽ kãm kapêr pyræk o kapêr nẽ mẽ kãm: —Hêxta waa nẽ mẽ apê Jerujarẽ nhõ xwỳnhjaja. Tĩrtũmja xatã mẽ awỳr ỹ hã kapêr jarênh o mẽ pa xwỳnhjê rênh tã ka mẽ kapêr mar kêt nẽ. Nẽ axtem nẽ kên o mẽ htak o mẽ himex o apa. Na ka htem ã amnhĩ tomnuj o apa anẽ. Tã arĩ inhmã mẽ ajamãr o ri ixpa hprãm. Te ho krãhyre kot nore hpro nẽ ho hikwỹ pyræk o na pa inhmã mẽ anhĩpêx prãm tã ka mẽ apê ixprãm nõkati nẽ ixkaga.

35Mỳrapê koja Tĩrtũm mẽ anhõ krĩ jamãr kêt nẽ. Kot paj tokyx ty nẽ mẽ apiitã mẽ are nẽ ma akupỹm api ka mẽ axte ixpumunh kêt nẽ. ãm akupỹn ixwrỳk xà hã arĩgrota pix ã koja mẽ akwỳjaja mẽ amỳr pẽ krĩ ja hwỳr ixwrỳk kãm ixpumu. Hãmri nẽ mẽ akurom ixpumu nẽ hkĩnh tỳx nẽ. Nẽ tã ixkõt

amnhĩ xunhwỳ nẽ axpẽn mã ijarẽnh o: E ota Tĩrtũm kot mẽ pahwỳr mẽnh xwỳnhhta pỏj. Nà ãm hãmri na mẽ pahwỳr wrỳ. Na mex kumrẽx. Anẽ.

Rukre 14

Jejus kot axte arĩgromnu hã mẽhỏ ho mex ã harẽnh

Rukre 13.10-17

¹Tã nhũm sap nhũm Jejus ma Parijew nhỏ xwỳnhjê krãhtũm kutã apkur kaxyw ỏrkwỳ hwỳr tẽ. Hãmri nhũm mẽ wa hã htu rax nẽ Jejus apkur ã tãnopxar o kuhê. Mẽ kot amnhĩ nhĩpêx kwỳm ri tanhmã amnhĩ nhĩpêx to nhũm mẽ kot hã omunh nẽ ra hã àmnênh kaxyw nhũm mẽ kuri htãnopxar o kuhê.

²Nhũm ixkreja kamã mẽhỏ my hte hikot xwỳnh mẽ kuri xa.

³Hãmri nhũm Jejus omu nẽ hã Parijew nhỏ xwỳnhjê mẽ Tĩrtũm kapêr tũm o mẽ ahkre xwỳnhjê kukja nẽ mẽ kãm: —Kwa mẽ inhmã mẽmoj jarẽ. Jarãhã na mẽ panhỏ arĩgromnu pê sap. Tanhmã na pre finat Mojesja Tĩrtũm nhỹ hã mẽ pahte sap ã tanhmã amnhĩ nhĩpêx to hã mẽ pamã karỏ hto? Xà kot puj mẽ akupỹm mẽ ho mex nà? Kot puj mẽ ãm mẽ omu nẽ akupỹm mẽ ho mex kêt nẽ? E mẽ atỏ inhmã ja jarẽ. Anẽ.

⁴Hãmri nhũm mẽ kuma nẽ tanhmã kutã kãm nẽ hkêt nẽ. ãm akryk mar o kuhê. Mẽ kot tanhmã kãm nẽ nhũm kot ta pãnhã mẽ kãm tanhmã nẽ pymaj nhũm mẽ akryk mar o kuhê nẽ tanhmã kutã kãm nẽ hkêt nẽ. Hãmri nhũm tee ri mẽ omu hãmri nẽ myja ã ãhkra xi nẽ akupỹm ho mex. Hãmri nẽ hano nhũm ma akupỹm mex nẽ hkĩnh nẽ ma tẽ.

⁵Hãmri nhũm Jejus mẽ kãm: —E mẽ inhma. Xà koja mẽ akra sap ã mẽ apê ahkrehti xupỳm kãm tẽm ka mẽ ãm omu nẽ arĩgro mex jamãr pê tokyx ho axàpir kêt nẽ? Nà kot kaj mẽ ho axàpir kurê kumrẽx. Rỳ koja akrit mỏx gyw mã axà xàt ka mẽ omu nẽ ãm omu nẽ arĩgro mex jamãr pê tokyx hkaxàr kêt nẽ? Nà kot kaj mẽ hkaxàr kurê kumrẽx. Na htem sap ã tanhmã mẽ ho mex to ho pa. Mẽ panhỏ arĩgromnu htã pu htem hã tanhmã mẽ ho mex to. Jakamã na pa ã hã myta ho mex kurê kumrẽx anẽ nẽ ri arĩgro mex jamãr kêt nẽ. Anẽ.

⁶Nhũm pre ã Jejus mẽ kãm amnhĩ jarẽnh anẽ nhũm mẽ kuma nom kutã kãm mẽmoj jarẽnh kêt nẽ. Ra kot akupỹm ho mex jakamã nhũm mẽ tanhmã hã kãm nẽ hkêt nẽ kuhê.

Mẽ pahte amnhĩ to hkryre hã mẽ pajarẽnh

Matêwre 23.6-14; Rukre 6.32-36; mãânẽn Xiakre 4.10; Wam Pêtre 5.5-6

⁷Hãmri nhũm mẽ apkur kaxyw mẽ hkrĩ xà hã hkrĩ hpa. Nhũm mẽ hkwỳjaja hkwỳjê pê amnhĩ to wa nẽ mẽ hkrĩ xà mex kãm hkrĩ hpa. Hãmri nhũm Jejus ja hã mẽ omunh o xa nẽ axte mẽ kãm mẽmoj jarẽ. No ãm mẽmoj tã kuxi nẽ mẽ kãm awjarẽ nẽ mẽ kãm:

⁸—Nà koja mẽ axpẽn mã mẽhõ rer kaxyw nẽ amnhĩ wỳr mẽ atã karõ. Mẽ ate kutã axàpkur kaxyw. Hãmri kêr ka mẽ hwỳr mra nẽ axàpkur kaxyw nẽ kupĩp kãm akrĩ kurê kumrêx. No kot kaj mẽ kêp amnhĩ to wa nẽ mẽ hkrĩ xà mex pytã nẽ hã akrĩ nhũm ra kot amnhĩ to rax xwỳnhjê hõja hapu hã mẽ akõt tẽn axà.

⁹Hãmri nhũm ixkre nhõ dõn kot amnhĩ wỳr mẽ awỳr xwỳnhhta mẽ hkrĩ xà mexta ã mẽ awỳ nẽ mẽ amã: “Kwa mẽ atõ kànhmã xa nẽ kãm mẽ hkrĩ xà kaprã.” Anẽ. Hãmri ka nhãm xa nẽ kãm anhỳr xàta gõ. Hãmri nẽ apijaàm kãm hpãnhã kupĩp kãm nhỹ.

¹⁰Ja pymaj kêr ka mẽ kupĩp kãm akrĩ kurê kumrêx. Kê ixkre nhõ dõnja tee ri ja hã mẽ apumu nẽ mẽ amã: “Tk. Kwa ixkràmnhwỳjaja. Mẽ kupĩp kãm akrĩ hkêt nẽ. Kwa mẽ mra nẽ jar mẽ hkrĩ xà mex ã mãn akrĩ.” Anẽ hãmri nhũm ja mẽ amã mex nẽ. Nhũm mẽ piitã kot mẽ ato mex ã mẽ atã omu ka mẽ ajaxwỳja amnhĩ tã omu nẽ akĩnh nẽ ajamakêtkati nẽ akrĩ.

¹¹—Nẽ koja mẽhõ te amnhĩ to rax o hkwỳjê jakrenh pyræk o amnhĩ nhĩpêx o ri pa hãmri nhũm Tĩrtũm ja hã omu nẽ tanhmã hã ho. Hãmri nhũm ra amnhĩ to grire hã amnhĩ pumunh o ri pa nẽ rĩ amnhĩ pumu. Nom koja mẽhõ amnhĩ to rax o hkwỳjê jakrenh pyræk o amnhĩ nhĩpêx o ri pa hkêt nhũm Tĩrtũm ja hã omu hãmri nẽ tãm amnhĩm kot amnhĩ to rax xwỳnh ã harẽ. Anẽ.

Mẽ pahte mẽ kêp amrakati xwỳnhjê ho mex ã mẽ pamã karõ

¹²Nhũm pre ã Jejus mẽ ahkre anẽ hãmri nẽ hpãnhã mẽ apkur xà hã ixkre nhõ dõnja mã kapẽr nẽ kãm: —Nà na ka hte amnhĩ wỳr akwỳjê pix wỳ. Atõjê hwỳ nẽ akràmnhwỳjê hwỳ. Nẽ mẽ hikàxpore rũnh xwỳnhjê hwỳ. Nom nhỹrmã mẽ kot amnhĩ xwar amnhĩ nhõrkwỹ hwỳr awỳr pix kaxyw na ka hte ã amnhĩ wỳr mẽ hwỳr anẽ.

¹³No kêt amnhĩ wỳr mẽ no kre xwỳnhjê mãn wỳ. Nẽ mẽ hyk o mẽ pa xwỳnhjê mãn wỳ. Nẽ mẽ hkrã pipãnh puro xwỳnhjê mãn wỳ. Nẽ mẽ hpigêx tỳx xwỳnhjê mãn wỳ. Nẽ mẽ hirot nẽ àpênh kêt xwỳnhjê mãn wỳ. Kêr ka amnhĩ wỳr jajê mãn wỳ kê mẽ awỳr mra nẽ akutã apku.

¹⁴Mo mẽ kot amnhĩ xwar awỳr kaxyw mẽ õ mẽmoj? Mẽ kêp amrakati. Tã kot kaj mãmrĩ amnhĩ wỳr mẽ awỳ nhũm Tĩrtũm mẽ hã apumu hãmri nẽ nhỹrmã kot akupỹm mẽ ho htĩr xà hã arĩgrota ã mẽ hã amã mẽmoj mex gõ nẽ ato mex nẽ. Hãmri ka akĩnh nẽ. Anẽ.

Tĩrtũm kutã mẽ paxàpkur xà maati jarẽnh

Matêwre 8.11; 25.1-10; 26.29; mãânẽn Apokarip 19.9

¹⁵Hãmri nhũm mẽ apkur kaxyw hkrĩ pa nhũm Jejus nhĩhkô hã mẽ apkur o mẽ krĩ xwỳnhjê hõja tanhmã Jejus mã kapẽr to nẽ kãm: —Hêxta waa nẽ. Kot puj mẽ nhỹrmã Tĩrtũm nhõ krĩ hwỳr api nẽ kutã paxàpkur o pahkrĩ nẽ pahkĩnh tỳx kumrêx. Anẽ.

¹⁶Hãmri nhũm kuma nẽ kê axte mẽ ahkre. Mẽ kot Tĩrtũm kutã apkur kaxyw kot amnhĩ wỳr mẽ hwỳrta ã nhũm mẽ ahkre. No ãm hã kuxi nẽ tanhmã mẽ kãm ujarẽnh to nẽ mẽ kãm: —Koja mẽhõ amnhĩ wỳr mẽ ho ohtô nẽ mẽ kot kutã mẽ apkur mex kaxyw mẽ kuwỳ.

¹⁷Hãmri nẽ mẽ hwỳr kãm àpênh xwỳnh mẽ nẽ kãm: “E ma tẽ nẽ mẽ kãm awjarẽ kê mẽ tokyx mra pa mẽ apku.” Anẽ.

¹⁸Hãmri nhũm kuma nẽ ma mẽ hwỳr mẽ kãm ujarẽnh o tẽ. Hãmri nẽ wamta mã anẽ nhũm kuma hãmri nẽ hitõt nẽ kãm: “Nà kot paj hwỳr ixtêm kêt nẽ. Na pa ham amnhĩm pika hkwỳ japrô. Jakamã kot paj ma hwỳr tẽ nẽ ixprĩ hã omu mãn. Kwa kêr ka kãm ijarẽ kê ixte tanhmã hã nẽ xà hkôt ã ixte amnhĩ nhĩpêx anhỹrja mã hamaxpẽr kêt nẽ.” Anẽ.

¹⁹—Hāmri nhūm kuma nē hpānhā nhām ja wỳr tē nē kām awjarē nhūm kuma nē haxwỳja hitōt nē kām: “Nà kot paj hwỳr ixtēm kêt nē. Na pa ham amnhīm môx o 10 nē haprô. Jakamā kot paj ma hwỳr tē nē ixprĩ hã ri omu măn. Kwa kêr ka kām ijarē kê tee ri tanhmã hamaxpēr to hkêt nē. Ixte tanhmã hã nē xà hkôt ã ixte amnhĩ nhĩpêx anhỹr kêt.” Anē.

²⁰—Hāmri nhūm kuma nē hpānhā ma ihōta wỳr tē nē kām awjarē nhūm kuma nē haxwỳja hitōt nē kām: “Nà kot pa hwỳr ixtēm kêt nē. Na pa kormã ham ixprô. Kormã ixprô nyw nē inhmã rer prãm kêt jakamā kot paj ma hwỳr ixtēm kêt nē.” Anē.

²¹—Hāmri nhūm kām àpênh xwỳnhhta tee ri mẽ kuma nē awjanã nē ma akupỹm tē. Kot ma mẽ hwỳr mẽnh xwỳnhhta wỳr ma akupỹm tē nē kām mẽ harē. Hāmri nhūm tee ri mẽ harênh ma nē mẽ kamã gryk nē. Hāmri nē hpānhā mẽ kêp amrakati xwỳnhjê hwỳr kām àpênh xwỳnhhta mẽ. Mẽ hkrã pipānh puro xwỳnhjê hwỳr kumẽ. Nē mẽ hpigêx tỳx xwỳnhjê hwỳr kumẽ. Nē mẽ hirot nē àpênh hkêt xwỳnhjê hwỳr kumẽ nhūm ma mẽ kām ujarênh o tē. Hāmri nē amnhĩ kôt mẽ kuwỳ nhūm mẽ kuma nē wamtajê rom hkôt mrar kurê kumrêx. Hāmri nē agjê nē apkur kaxyw mẽ hkrĩ xà kamã hkrĩ hpa.

²²Hāmri nhūm kām àpênh xwỳnhja ò patrāw wỳr tē nē kām mẽ harē nē kām: “E ate mẽ hã karō xàta kôt na mẽ ra hkrĩ hpa htã arĩ mẽ hkrĩ xà hkwỳ hkapỳ.” Anē.

²³—Hāmri nhūm kuma nē kām: “Hêxta waa nē. Kêt ãm mẽ hkrĩ xàta hipu mex ronhỹx pa omu nē ixkĩnh nē. No ãm kormã piitã hipu hkêt. Kwa ma krĩ pu hã ri mẽ hapêr o mra. Nē nhỹri mẽ hkwỳjê pumu nē mẽ haprô nē man amnhĩ kôt mẽ o mra kê mẽ hkrĩxà ho hipu hpa.

²⁴No kêt wam ixte amnhĩ wỳr mẽ hwỳr xwỳnhhtaja. Mẽ hitōt xwỳnhhaja kot paj axte amnhĩ wỳr mẽ hwỳr kêt nē.” Anē. ã mẽ ujarênh kot anhỹr. Na hte ã Tĩrtũm amnhĩ wỳr mẽ piitã mẽ hwỳr anē. Anē.

Mẽ pamã Jesus kĩnh tỳx ã mẽ pamã karō
Matêwre 10.37-38; Makre 8.34; Rukre 9.23-25; Juãw 12.26

²⁵Tã nhũm Jejus mẽ òrkwỹ rũm kato nẽ kormã Jerujarẽ hwỳr mỗ nhũm mẽ hohtô rax nẽ hkôt mỗ. Hãmri nhũm Jejus xa nẽ mẽ ho hakẽx nẽ mẽ omu nẽ mẽ kãm:

²⁶—E kot ka mẽ atõ amã ixkôt amnhĩ xãm prãm nẽ ã amnhĩ nhĩpêx anẽ. Nẽ amã atõ nẽ atõx nẽ anhĩpêxà nẽ akatorxà japê htỳx tã kêr ka amã ixkĩnh tỳx o wa mẽ hakrenh pa. Nẽ amã aprõ nẽ akrajê japê htỳx tã kêr ka amã ixkĩnh tỳx o wa mẽ piitã mẽ hakrenh pa. Nẽ amã ixkĩnh tỳx o amã amnhĩ japê jakre. Kêr ka mẽ atõ ixkôt amnhĩ xãm kaxyw nẽ ã amnhĩ nhĩpêx anẽ.

²⁷—Koja mẽ ixpĩ pa mẽ anê ty. Tã mẽ ate ixkôt amnhĩ nhĩpêx o mẽ apa xwỳnhjaja. Koja mẽ ixtã mẽ apar mã tã kêr ka mẽ amã ixkĩnh tỳx o mẽ umaj ixkaga hkêt nẽ. Kwãr mẽ mãmri tanhmã ixtã mẽ ato. Kot kaj mẽ nhỹrmã Tĩrtũm mẽ wa ixri axte amnhĩ xà kamã ajamak kêt nẽ atĩr tũm nẽ amex rãhã apa ho apa. Nom kot kaj mẽ ixkĩnhã jar pika ja kamã amã amex nẽ apa hprãm xàj ixkaga hãmri nẽ nhỹrmã wa ixri atĩr tũm nẽ apa hkêt nẽ. Anẽ.

Mẽ pahte amnhĩ kukamã pajamxpêr mex ã mẽ pamã karõ

²⁸Nhũm Jejus arĩ mẽ kãm kapêr nẽ mẽ kãm: —Kwa kêr ka mẽ ixkôt amnhĩ xunhwỳr kaxyw nẽ amnhĩ kukamã ajamxpêr mex nẽ. Na htem amnhĩm òrkwỹ rũnh nhĩpêx kaxyw hãmri nẽ hkukamã hamxpêr mex nẽ. Nẽ kaxyw krax mã kuhê xà hkukamã hamxpêr. Nẽ kaxyw kỳx pê kãm hikwỹ xàja kukamã hamxpêr. Nẽ òkwaêja kukamã hamxpêr. Nẽ hã pỏja kukamã hamxpêr. ã na htem amnhĩm òrkwỹ rũnh nhĩpêx kaxyw hkukamã hamxpêr mex anẽ.

²⁹Nom kot kaj mẽ hkukamã ajamxpêr mex kêt nẽ ãm kaxyw pĩ ho grêre nẽ hakà. Rỳ ra hã axàpênh rax kurê ra amã ho anhỹr kaga nẽ hkaga hpa nẽ hatur xàm mẽnũh kêt nẽ. Hãmri nhũm mẽ hkwỳjaja hãnh mra nẽ omu nẽ atã hpêr o axkẽ.

³⁰Nẽ axpẽn mã ri ajarênh o: “E ga mẽ ixkre mũj pumu. Na pre hipêx xwỳnhja hkurê kãm kaga nẽ hipêx par kêt nẽ.” Anhỹr o axpẽn mã ajarê. Ja pyrà nẽ kêr ka mẽ ixkôt amnhĩ xunhwỳr kaxyw nẽ amnhĩ kukamã ajamxpêr mex nẽ. Nẽ ajamxpêr o: “Nà mẽ kot Jejus ã tanhmã ixto htỳx tã kot paj hkaga

hkêt nê. Kot paj hkôt amnhĩ nhĩpêx rãhã ho ri ixpa.” Anhÿr o amnhĩ kukamã ajamxpêr. Hãmri nê rĩ kormã ixkôt amnhĩ xãm. No kot ka mẽ umaj ixkaga hkukamã ajamxpêr hãmri nê ixkôt amnhĩ xãm kêt kurê kumrêx.

31—Nê koja krĩ hõ kamã pahihti nhõ pôristi xohtô nê. Nê kutã nhãm krĩ hõ kamã pahihti nhõ pôristija grêre. Tã nhũm wa hpijapu kaxyw nhũm krĩ hõ rũm pahihti nhõ pôristi xohtôja mẽ grêreta wÿr mra. Hãmri nhũm kutã krĩ hõ kamã mẽ õ pôristi grêre nhõ pahi nhÿ nê tee ri mẽ amnhĩ kukamã hamxpêr nê hamxpêr o: “Kwa koja apu krĩ hõ rũm pôristi xohtô raxja nhũm inhõ pôristi grêreja mẽ axpên kutã kuhê nê axpu nhũm mẽ inhnê mẽ himex. Nà inhõ pôristi grêre kênã.” Anhÿr o hamxpêr.

32—Hãmri nê pahi hõta wÿr õ kôwenatô mẽ. Kormã krĩ hõ rũm mẽ hohtôtaja mẽ htêp kêt nhũm mẽ kutã kumẽ nhũm ma mẽ kutã tẽ. Hãmri nê awry hã mẽ hkaxpa nê mẽ õ pahihti mã kãm: “E na mẽ inhõ pahihti akutã inhmẽ pa tẽ. Na inhmã: ‘Ma tẽ nê mẽ kãm awjarẽ. Kot puj pêr mẽ papijapu hkêt nê. Kwarĩ. Kot puj mẽ tãm axpên xunhwÿ.’ Anhÿr o kapêr nê mẽ akutã inhmẽ pa tẽ.” ã mẽ ujarênh kot anhÿr. Ja pyrã nê na htem mẽmoj kukamã hamxpêr mex nê rĩ kormã tanhmã amnhĩ nhĩpêx to.

33—Tã kêr ka mẽ atõ amã ixkôt amnhĩ xãm prãm hãmri nê pahita pyrã nê amnhĩ kukamã ajamxpêr tÿx nê rĩ kormã tanhmã amnhĩ nhĩpêx to. Kêr ka ate inhmã tanhmã amnhĩ nhĩpêx to ho apa kaxyw hãmri nê inhgryk ã te ate amã amnhĩ japê hkêt pyrãk o mẽmoj piitã mã anhĩhkra karo pyrãk o amnhĩ nhĩpêx. Hãmri nê rĩ kormã ixkôt amnhĩ xãm.

34-35No kot kaj mẽ amnhĩ kukamã ajamxpêr kêt nê atÿx ri ixkôt amnhĩ xunhwÿr japêr. Hãmri nê mẽmo arĩgro hã mẽ kot ixtã tanhmã mẽ ato xwÿnhjê pymaj ra ixkaga mã. Hã kot kaj mẽ te mẽ ate kaxwa punu pyrãk o amnhĩ nhĩpêx. Kaxwaja mẽ apkur xà kamã mex. Na htem amnhĩm ho õ xành nê kuku. Nom koja mẽhõ kamã pika hkwy mẽ nê ho ahkà hãmri tanhmã kot mẽ ho nê akupÿm ho mex? ãm mẽ kot hkapĩr pix kaxyw koja mex. Ja pyrã nê kot ka mẽ atõ ate inhmã tanhmã amnhĩ nhĩpêx to ho apa hã amnhĩ jarênh tã gaa nê amã ixkôt amnhĩ nhĩpêx prãm nôkati. Hãmri nê ra te ate kaxwa

punu kapĩr mã tãmta pyræk. E kwa mẽ mẽmoj tã ixujarēnhja ma nẽ mẽ uræk nẽ amnhĩ kukamã ajamxpēr mex nẽ. Anẽ.

Rukre 15

ôwêhti pikunor jarēnh

Matêwre 18.12-14

¹Tã nhũm mẽ kot pahihiti mã hkwỳjê pê kàxpore hkwỳ jamỳnh xwỳnhjê mẽ mẽ kot amnhĩ tomnuj xwỳnhjaja Jejus kapēr mar kaxyw hwỳr mra.

²Hãmri nhũm Parijew nhõ xwỳnhjê mẽ mẽ kot Tĩrtũm kapēr tũm o mẽ ahkre xwỳnhjaja mẽ hã Jejus pumu. Hãmri nẽ kê wem axte axpēn mã tanhmã ho kapēr punuj to nẽ axpēn mã: —Tk. Kwa na hte mũjti axtem nẽ mẽ kot amnhĩ tomnuj xwỳnhjaja amnhĩ wỳr mẽ kuwỳ nẽ tōhã mẽ kutã apku. Kwa mẽ kot amnhĩ tomnuj xwỳnh kēnã kot kêt mẽ kutã apkur o pa. Anẽ.

³Hãmri nhũm Jejus amnhĩ tã mẽ kuma nẽ tanhmã mẽ kãm kapēr to. Nom hprĩ hã mẽ kãm kapēr kêt nẽ. Kê ãm amnhĩ tã kuxi nẽ mẽ kãm ôwêhti pikunor jarē nẽ mẽ kãm:

⁴—Koja mẽhõ õ ôwêhti xohtô nẽ. Nẽ ma nhỹri hamãr o pa. Hãmri nhũm pyxire nẽ hkwỳ kaga nẽ ma nhỹhỹm ahte tẽ nẽ akunok. Hãmri nhũm õ dõnja ma kot akupỹm piitã o mõi kaxyw hkwỳ ho pikuprõnh pa hãmri nẽ tee ri hkwỳ kaêx ã pikunor xwỳnhhta japêr. Hãmri nẽ ma hkwỳ ho mõi nẽ nhỹri kure. Kot nhỹri kutêp apkur o ri pa kaxyw kure hãmri nẽ ma akupỹm pikunor xwỳnhhta japêr o tẽ. Hãmri nẽ hapêr ryy nẽ nhỹri hwỳr kato.

⁵Nẽ omu nẽ hkĩnh tỳx nẽ. Hãmri nẽ amnhĩ kre hã kumẽ nẽ ma akupỹm hkwỳ hwỳr o tẽ.

⁶Hãmri nẽ mẽ ãhkô hã kumẽ nẽ hkĩnh nẽ hkràmnhwỳjê ho akuprõ nẽ õrkwỳ htã mẽ õrkwỳ xwỳnhjê ho akuprõ nẽ mẽ kãm: “Kwa na pre ixpê ixkriita õ akunok. Pa pre hapêr kãm ixihitỳx nẽ kãm ixkato nẽ omu nẽ ixkĩnh nẽ. Jakamã kwa wem mããnēn inhỹ hã akĩnh.” Anẽ. —Ã mẽ ujarēnh kot anhỹr.

⁷Ja pyrã nẽ koja mẽ kot amnhĩ tomnuj tỳx xwỳnhjê hõ tee ri amnhĩ pumu nẽ kot amnhĩ tomnuj kaga nẽ Tĩrtũm kôt amnhĩ xãm. Hãmri nhũm kaxkwa

kamã mẽ piitã ja hã omu nẽ hkĩnh tỳx nẽ. Te ho my kot ôwêhti hpikunor xwỳnh mã kator nẽ hkĩnh tỳxta pyràk. Na hte Tĩrtũm tãm mẽ kot amnhĩ nhĩpêx o mẽ pa xwỳnhjê pumu nẽ hkĩnh nẽ. Tã koja mễhõ kot amnhĩ tomnuj tỳx tã ã amnhĩ nhĩpêx anhỹrja kaga nẽ Tĩrtũm kôt amnhĩ xãm hãmri nhũm amnhĩ tã omu nẽ hkĩnh tỳx nẽ. Jakamã na pa hte mẽ akurom ã mẽ kot amnhĩ tomnuj xwỳnhjê hkôt Tĩrtũm kapêr o mẽ ahkre rãhã ho ri ixpa. Anẽ. Nhũm pre ã Jejus mẽ kot tanhmã ho kapêr punuj to xwỳnhjê mã amnhĩ jarẽnh anẽ.

Kàxpore pikunor jarẽnh

⁸Nhũm Jejus arĩ mẽ kãm awjarẽ nẽ mẽ kãm: —Nẽ ja. Koja mễhõ ni hikàxpore kêp 10. àpênh o arĩgro pê 10 pãnhã kàxpore kêp 10. Tã ho pyxi nẽ ho akunok. Hãmri nẽ tee ri hapêr nẽ hkaprĩ nẽ. Hãmri nẽ kanê hpôk nẽ hitom kapõnh pê hprĩ hã hapêr o ri pa nẽ kãm kato.

⁹Hãmri nẽ kupy nẽ hkĩnh nẽ hkràmnhwỳjê ho akuprõ nẽ òrkwỹ htã mẽ òrkwỹ xwỳnhjê ho akuprõ nẽ mẽ kãm amnhĩ jarẽ nẽ mẽ kãm: “Xê na pre ixpê ixkàxpore hõta akunok pa tee ri hapêr tã akupỹm kãm ixkato nẽ kupy nẽ ixkĩnh nẽ. Jakamã xê wem inhỹ hã mẫãnẽn akĩnh.” ã mẽ ujarẽnh kot anhỹr.

¹⁰—Ja pyrà nẽ koja mẽ kot amnhĩ tomnuj xwỳnhjê hõ pyxire nẽ amnhĩ tomnuj kaga nẽ ixkôt amnhĩ xãm. Hãmri nhũm kaxkwa kamã mẽ piitã ja hã omu nẽ hkĩnh nẽ. Te mễhõ ni kot kàxpore pikunor xwỳnh mã kator nẽ hkĩnhhta pyràk. Anẽ.

Mẽ hkra pikunor jarẽnh

¹¹Nhũm Jejus arĩ mẽ ahkre ho xa. Tĩrtũm kãm mẽ piitã mẽ hapê htỳx ã mẽ ahkre ho xa. No kê ãm hã kuxi nẽ kê we tanhmã mẽ kãm ujarẽnh to nẽ mẽ kãm: —Nẽ koja mễhõ hkra my wa axkrut.

¹²Hãmri nhũm kot hapu ò papaj wỳr tẽ nẽ kãm: “E papaj. Ot pa awỳr tẽ. Kot kaj nhỹrmã ty pa wa amỳr pê akukrêx o ixàrĩk. Jakamã e kwa tokyx atĩr ri amnhĩ kamã wa inhmã ho axkjê pa inhõ ho amnhĩptàr kurê kumrêx nà?” Anẽ. Hãmri nhũm kuma nẽ wa kãm hikukrêx o axkjê. Kot wa mã hkwy gõ nẽ kot hapu mã hkwy gõ.

13Hāmri nhūm kot haputa ãm ri hipêêxà hkôt pa hkrânre hāmri nē kot kām hikukrêx nhôr jamÿnh pa nē ma nhÿhÿm o mō nē ho wênê hpa. Hāmri nē hpānhã kàxpore jamÿ nē ma nhÿhÿm mō. Nhÿhÿm awry hã pika hō hwÿr ma mō. Mōo hāmri nē krī hō kamã htÿx ri tanhmã amnhĩ tomnuj to ho ri pa. Hāmri nē gaa nē ra mē hkuprÿjê hã kàxpore ho hapêx pa. Nē kagôxÿhti hã ho hapêx pa. Nē gaa hāmri nē hikàxpore hkêt nē ri pa.

14—Rôm nhūm pikaja kamã mē hã na wrÿk kêt ry rax nē. Nē gaa nhūm mē hpur kām mē kêp mē apkur xà hã mēōja hapêx pa. Jakamã nhūm mē hkra kot haputa kêp amrakati nē kām prãm tÿx nē ri pa. Hāmri nē tee ri amnhĩ kukamã hamaxpêr.

15Hāmri nē amnhĩ to krī nhō xwÿnhjê mar o ri pa. Kot mē kām tanhmã àpênh to nē hpānhã apkur kaxyw. Hāmri nhūm mēhō kot kām hkrit hagrô jamâr kaxyw hã kumē nhūm ma hwÿr tē nē kām hamâr o pa. Nom kot kām hamâr o pata pānhã ãm kām mēmoj nhôr kryre nhūm arĩ kām prãm tÿx kumrêx.

16Nē tee ri kot hagrô kutã òta kur prãm nē tee ri omunh o pa.

17—Nē gaa hāmri nē tanhmã hamaxpêr to. Nē tee ri kot tanhmã amnhĩ tomnuj toja ã amnhĩ pumu nē hamaxpêr o: “Hêxta waa nē. Mãn mÿtar inhō krī kamã inhō papaj mã mē àpênh xwÿnhjaja ixrom apkur mex o pa. àpkur mex nē nhūm mēō jakrêx prâr rÿnh tã pa jar mē hkĩnhã prãm xàj ra ixtyk o mō.

18Nà kot paj ma akupÿm mō. Hāmri nē inhō papaj pumu nē ã kām amnhĩ jarênh anē nē kām: ‘Kwa Papaj. Na pa pre ixpê akra hã amnhĩ tomnuj tÿx kumrêx nhūm ja apê omnuj nē. Nhūm Tirtÿm pê ja omnuj nē.

19Jakamã na pa ixpê akra hã amã amnhĩ jarênh ã ixpijaàm nē. Ixte tãm kêt kumrêx. Jakamã kwa xà kot pa amã mēmoj tã ixàpênh o ri ixpa ka hpānhã inhmã inhō pa apku nà?’ Anhÿr o kot pa kām amnhĩ jarê. Nà kot paj anē.”

20—Anhÿr o amnhĩ kukamã hamaxpêr hāmri nē ma akupÿm mō. Mōo nē ra hpôx o mō. Nē kormã amÿm mōr ri nhūm ò papaj hwÿr rīt nē omu nē amnhĩ

kra hã omunh kurê kumrëx nê hkĩnh nê ma kutã hprõt nê tẽ. Omu nê kãm hkaprĩ nê. Nê hwÿr hprõt nê hkaxpa nê kahti hkõt kumÿ.

²¹Hãmri nhũm kãm amnhĩ jarẽ nê kãm: “Kwa papaj. Na pa pre amnhĩ tomnuj nê nhũm ja apê omnuj nê. Nê Tĩrtũm pẽ ja omnuj nê. Jakamã ixte ixpê akra hã amã amnhĩ jarẽnh ã ixpijaàm. Ixte tãm kêt kumrëx.” Anẽ.

²²Nom kormã kãm amnhĩ jarẽnh par kêt ri nhũm hipêêxà kãm mẽ àpênh xwÿnhjê mã akir nê mẽ kãm: “E kwa mẽ atõ ma tẽ nê kãm ê mex õ py nê akupÿn ixkrata wÿr ho aprõt nê kãm haxà. Nê hpar kà nê ãhkra kamã kàx nê amnẽ kãm hamÿ nê ho aprõt.

²³Nê akupÿm aprõt nê môx kra htwÿm mexta õ pumu nê unê nê apĩ. Nê mẽ ho anẽ pu mẽ ixkra hã pahkĩnh nê apku. E mẽ amnhĩ prêprêk nê tokyx ã amnhĩ nhĩpêx anẽ.

²⁴Na pre ma ixpê mõi o te ixpê htyk pyræk. Tã akupÿn mõi nê ixwÿr pøj nê te akupÿm inhmã htĩr pyræk. Jakamã e mẽ tokyj.” Anhÿr jakamã nhũm mẽ hã môx kra pĩ nê ho anẽ nê hkĩnh nê hã apkur o hkrĩ.

²⁵—Rôm nhũm hkra kot wata kormã pur kãm htÿx àpênh o xa. àpênh o ãm tã akupÿn hpõx o tẽ. Hãmri nê amnhĩ kukamã mẽ kot ri mẽmoj tatak nê mẽ grer ma.

²⁶Hãmri nê tee ri hamaxpêr o tẽ nê õrkwÿ hwÿr pøj nê kormã kapem xa nê mẽ hã mẽ àpênh xwÿnhjê hõ kukja nê kãm: “Kwa mẽmoj tã na ka wem ã akĩnh rax anẽ?”

²⁷Anẽ nhũm kãm: “Nà mẽhõ hkêt. Atõ na akupÿn pøj nhũm anhĩpêêxà omu nê hkĩnh tÿx nê. Nê mẽ inhmã anẽ pa mẽ hã môx kra htwÿm mexja pĩ nê hã ho anẽ nê hã ixkĩnh nê hkur o ixkrĩ.” Anẽ.

²⁸Hãmri nhũm tee ri htõ jarẽnh ma nê gryk tÿx nê. Hãmri nê gryk xàj kapem hkuk punuj o mẽ omunh o xa nê mẽ hwÿr àr kêt nê. Hãmri nhũm hipêêxàja tee ri omu nê hwÿr kato nê tee ri kot mẽ hwÿr ho àr kaxyw ho anhÿr kaprÿ.

²⁹Hāmri nhūm kām: “Tk. Kwa na pa hte amã ixàpênh rûnh rãhã ho ri ixpa hã ra ixtã amgrà xohtô nê. Nê aa akapêr nhîrôp tanhmã ixãm to hkêt. Tã ka hte ixpumunh nê akînh nê ixtã mêmoj tōx pîr kêt nê.

³⁰Tã nhūm akra kot haputa apê akukrêx kwỳ jamýnh pa nê ma o mō nê axtem nê mē hkuprýjê mã òr par tã akupýn mō nê pōj. Ka omu nê akînh nê hã môx kra twýmta pî. Nà kot paj mē awýr ixàr kêt nê.” Anê. —Hāmri nê gryk tỳx nê xa.

³¹Hāmri nhūm ò papaj tee ri kuma nê kām: “Kwa nà ri ã akapêr anhýr kêt nê. Inhmã ajapê kênã. Na ka hte ixkôt apa ho apa rãhã nê. Nê ixkukrêx piitã kêp anhõõ.

³²No atōja na pre te ixpê htyk pyràk tã arĩ htír. Nê te pikunor pyràk tã te ra akupým kator pyràk jakamã na pa omu nê ixkînh nê. Nê inhmã hapê ho te mãânên inhmã ajapê pyràk.” Anê. —Ã mē ujarênh kot anhýr. Ja pyrà nê koja mēhõ te kot amnhĩ tomnuj tỳx o ri pa htã amnhĩ kaxyw Tirtüm mã hamaxpêr nê amnhĩ to kuwỳ nê hkôt amnhĩ xãm. Hāmri nhūm amnhĩ tã omu nê hkînh nê. Nê kãm hprãm nê. No mē kajaja. Mē apê Parijew nhõ xwýnhjê mē Tirtüm kapêr tùm o mē ahkre xwýnhjaja. Na ka htem mē kot amnhĩ tomnuj xwýnhjaja kot Tirtüm kapêr mar o kuhê hã mē omu nê Tirtüm kînhã akînh kêt nê. Nê te hkra kot wata jamaxpêr pyràk o ajamaxpêr nê tee ri ja hã mē omu nê mē kamã agryk nê. Nê mē amã mē hprãm nõkati. Anê.

Rukre 16

Mê panhõxỳ nê Jejus kot mē pamã karõ

¹Tã nhūm kê Jejus axte hkôt ri mē pa ho mē pa xwýnhjê jahkre. No ãm mêmoj tã kuxi nê mē kãm tanhmã ujarênh to nê mē kãm: —Nà koja mēhõ hikàxpore rax xwýnhja kãm àpênh xwýnh mã mêmoj to wênê ho pa kaxyw ãm. No nhūm kãm ho mex kêt nê. Axtem nê kêp amarĩ mē kãm mêmoj to fiat par o mō. Hāmri nhūm ra mēhõ kot ã amnhĩ nhîpêx anhýr ã omu nê ma ò patrãw wýr tē nê kãm harê.

²Hāmri nhūm tee ri harēnh ma nē amnhī wỳr hā karō. Hāmri nhūm hwỳr tē nē axà nhūm kām: “Pa. Kwa xà ãm hāmri na mẽ inhmā ajarē? Kwa nà mon ka ri axtem nē ã ixpê inhō mẽmoj nhĩpêx anē? E inhmā ate mẽ kām ho fiat par xwỳnhjê nhĩxi hā kagà nē inhmā agō hāmri nē ma tē. Kot ka axte inhmā axàpēnh kêt nē rĩ amnhī pumu.” Anē.

³—Hāmri nhūm kuma nē tee ri amnhī kukamā hamaxpēr nē hamaxpēr o: “Hêxta waa nē. Tanhmā kot paj amnhī to? Ixihtỳxre hā kot pa mẽhō mã pur ã apê. Nom inhmā amarĩ ri ixàhwỳr o ri ixpa hprãm kêt. Ixte amnhī kuk ã ixpijaàm.” Anē.

⁴Hāmri nē tanhmā amnhī kukamā hamaxpēr to nē hamaxpēr o: “Nà kot paj amnhī wỳr ixte mẽ kām ho fiat xwỳnhjê hā karō. Nē mẽ kām mẽ ò kōōta ahpar mã hkamē kê mẽ ãm inhō patrãw mã hkwỳ pix gō. Kêr kê mẽ amnhī tã ixpumu nē kām ixkĩnh nē. Hāmri nē inhō patrãw kot ixkaga hā ixtã harēnh ma nē ixkamã ukaprĩ japêr. Hāmri nē amnhī wỳr ixwỳ pa ahpỳnhã mẽ kutã ixàpkur o ri ixpa nhūm prãm ixpĩr kêt nē. Nà kot paj anē.” Anē.

⁵Hāmri nē amnhī wỳr mẽ hā karō nhūm mẽ hwỳr mra. Nhūm mẽ omu nē ja mã kām: “E tanhmā na ka pre inhō patrãw pē mẽmoj to fiat to? E inhmā harē.” Anē.

⁶Hāmri nhūm kām: “Na pa pre kêp orti hā à ho 100 nē ho fiat. Ota hā kagàta. Tã pa kormã kām amnhĩrer kêt nē.” Anē nhūm kuma nē kām: “Tôe ka inhma. Kot paj amã anhō kôt o gri ka ãm kām ho 50 pix nē agō pa ixte anhō kôt ho ijapêx par pyràk o anhĩpêx.” Anē.

⁷Hāmri nē hpãnhã nhãm ja mã kām: “No ka. Tanhmā na ka pre kêp mẽmoj to fiat to?” Anē nhūm kām: “Na pa pre kêp pãy hā xak o 1.000 nē ho fiat. Tã pa kormã hpãnhã kām amnhĩrer kêt nē.” Anē nhūm kām: “Tôe. Kot paj hāmri amã anhō kôt o gri ka ãm kām ho 800 pix nē agō pa ixte anhō kôt ho ijapêx par pyràk o anhĩpêx.” Anē. Nhūm ã mẽ hipêx anē. Hāmri nē hamaxpēr o: “E. Na pa mẽ kām mẽ ò kôt o hkry pa. Kojã mẽ amnhī tã kām ixkĩnh japêr.” Anē.

8—Hāmri nhūm ò patrāwja ã kot mẽ hipêx anhÿr ã harēnh ma nē kām: “Tk. Kwa ate pa ixkukamã ajamaxpēr nē inhmã mẽmoj to anhÿr mex kêt tã ka amnhĩ kukamã ajamaxpēr mex pê ã mẽ hipêx mex anē.” Anē. Ā mẽ ujarēnh kot anhÿr. Anē. Nhūm pre ã Jejus mẽ kām ujarēnh anē. Hāmri nē mẽ kām: —Tã ja pyrà nē na hte mẽ kot Tĩrtũm kôt amnhĩ xunhwÿr kêt xwÿnhjaja ãm amnhĩ pix kukamã hamaxpēr mex o pa. Jao amnhĩ kaxyw pix mã mẽ piitã tanhmã mẽ ho mex to ho pa. Mẽ kot amnhĩ tã mẽ omunh nē mẽ kām mẽ hkĩnh nē amnhĩ xwar tanhmã mẽ ho mex to kaxyw nhūm htem ã amnhĩ nhĩpêx anhÿr o pa. Tã mẽ ate ixkôt amnhĩ xunhwÿr xwÿnhjaja. Tĩrtũm kot tanhmã mẽ ate amnhĩ kwÿjê ho mex to hã amnhĩm mẽ ajarēnh kaxyw kêr ka mẽ amnhĩ mẽ mẽ piitã mẽ hkukamã ajamaxpēr mex nē. Pê tanhmã mẽ ho mex to ho ri apa. Ā mẽ ate amnhĩ nhĩpêx anhÿrja na mex. Nom kormã mẽ ate ã amnhĩ nhĩpêx anhÿr kêt.

9—Hêxta waa nē. Mon ka htem mẽ uràk nē ã axpēn to mex anhÿr kêt nē? Kwa mẽ àpēnh xwÿnhhta kot amnhĩ nhĩpêx pyrà nē tanhmã axpēn to mex to o ri apa hkêt wehe. Jao akukrêx nē akàxpore ho anhõxÿ hkêt nē. Kêr ka nhÿrmã ty nē Tĩrtũm wÿr api nhūm ja hã mẽ ato mex rax nē. Te ho kot ò patrāw mã àpēnh xwÿnhhta kot tanhmã mẽ ho mex to xwÿnhjê hwÿr mrar nhūm mẽ kot amnhĩ xwar tanhmã ho mex tota pyràk.

10-11—Na hte Tĩrtũm tanhmã mẽ pakute hã mẽ pahpumunh mex nē. Koja mẽ amã mẽmoj gō ka mẽ kām hprãm xà hkôt ho anhõxÿ hkêt nhūm ja hã mẽ apumu nē axte mẽ amã mẽmoj gō. Nom hpānhã mẽ amã òr rax o wamta jakre nē kugō. Nom kot ka mẽ ri mẽmojta o anhõxÿ ho ri apa nhūm tee ri ja hã mẽ apumu nē axte mẽ amã mẽmoj nhõr kêt nē. Koja mẽ amã mẽmoj gō ka mẽ ho anhõxÿ ho ri apa nhūm ja kêp homnuj nē.

12—Nē kot kaj mẽ jar Tĩrtũm kot mẽ amã mẽmoj nhõr xwÿnhja ho anhõxÿ ho ri apa. Hã koja nhÿrmã kaxkwa kamã mẽ amã mẽmoj mex nhõr kêt nē.

13—Nē kot kaj apyxi nē anhõ patrāw hamēxkrut nē arĩgro pyxi hã hamē wa kām axàpēnh o amÿkry hkêt nē. Kot kaj anē nē hõ gryk ã hõ kaga. Ja pyrà nē kot kaj mẽ jar pika ja kamã akàxpore nē akukrêx pix kukamã ajamaxpēr

o ri apa hã kot kaj mẽ amã hapê htỳx nẽ mẽ kêp ho anhõxỳ ho ri apa. Nẽ akukrêx rax gryk ã Tĩrtũm kãm hprãm xà hkôt akukrêx o tanhmã axpẽn to ajuta hto ho ri apa hkêt nẽ. Ja pymaj kwa kêr ka mẽ ãm Tĩrtũm pix mã mãn ajamaxpêr rãhã ho ri apa. Jao te akukrêx nẽ akàxpore mã axàmnhĩx ri anhĩhkra karo ho ri apa pyræk. Anẽ. Nhũm pre ã Jejus mẽ ahkre anẽ.

14Hãmri nhũm Parijew nhõ xwỳnhjaja mar o kuhê. Na prem ra mẽ hikàxpore rax gryk ã Jejus kaga. Jakamã ã kot mẽ kãm kàxpore jarênh anhỹrja ma nhũm ja mẽ kêp omnuj nẽ nhũm mẽ hã hpêr o pikênh o kuhê.

15Hãmri nhũm amnhĩ tã mẽ kuma nẽ mẽ kãm: —Nà na ka htem te mẽ ate tãm mẽ kot amnhĩ nhĩpêx xwỳnh pyræk o amnhĩ nhĩpêx nom ri mẽ kãm amnhĩ to axêx o ri apa. No nhũm Tĩrtũmja kot tanhmã mẽ ate amnhĩ nhĩpêx to nẽ tanhmã mẽ ajamaxpêr to hkôt mẽ apumunh par. Nẽ hprĩ hã mẽ anhõxỳ hã mẽ apumu. Te mẽ ate tãm amnhĩ nhĩpêx pyræk nom mẽ anhõxỳ kamã na ka htem apa. Mẽmoj te mex pyræk nhũm htem omu nẽ mex ã hkamnhĩx. No nhũm Tĩrtũm àhpumunh tỳx xà hkôt hprĩ hã mẽmojta pumu nhũm kêp omnuj nẽ. Mẽ akurom omnuj ã omunh kurê kumrêx. Na hte hprĩ hã mẽ ate amnhĩ nhĩpêx ã mẽ apumu. Anẽ.

Tĩrtũm kapêr aa hapêx kêt ã harênh

Matêwre 5.17-18

16Nhũm Jejus arĩ mẽ ahkre nẽ mẽ kãm: —Nẽ na pre finat Mojesja kumrêx mẽ kãm Tĩrtũm kapêr kwỳ hã kagà. Tã nhũm hpãnhã Tĩrtũm nhỹ hã kapêr jarênh xwỳnh kwỳjaja mããnẽn mẽ kãm hkwy hã kagà. Nhũm prem kuma nẽ mẽ hkôt amnhĩ nhĩpêx o ri pa. Tã nhũm finat Juãw Paxisja mẽ hpãnhã kato nẽ Tĩrtũm kapêr o mẽ ahkre ho ri pa. Tã pa hpãnhã ho mẽ ajahkre ho ri ixpa nhũm mẽ ohtô nẽ ixkôt amnhĩ xunhwỳ nẽ kãm ixkapêr kôt pix mã amnhĩ nhĩpêx o ri pa hprãm nẽ.

17—Tĩrtũm kapêr tũmja mex o mex. Kojã aa hapêx kêt nẽ. Kojã nhỹrmã kaxkwa nẽ pika wa hapêx pa no nhũm Tĩrtũm kapêr tũmja aa hapêx kêt nẽ. Kojã rãhã ho rãhã nẽ aa ihkjê ho mẽnh kêt nẽ. Anẽ.

Mẽ pahte axpẽn kaga hkêt ã mẽ pamã karõ

Matêwre 5.31-32; 19.9-12; Makre 10.2-12

¹⁸Nhũm Jejus arĩ mẽ ahkre nẽ mẽ kãm: —Nẽ kêr ka mẽ aprõ kaga hkêt nẽ apa. Kot kaj mẽ hkaga nẽ hpãnhã nhãm hõ ho aprõ nhũm Tĩrtũm noo mã te ate wam aprõ kamã nhãm ho amnhĩkati pyræk. Nhũm ja kêp omnuj nẽ. Rỳ ka ra mẽhõ kot hprõ kaga xwỳnhhta ka hpãnhã ho aprõ. Nhũm Tĩrtũm noo mã te ate wam mjên pê ho amnhĩkati pyræk. Nhũm Tĩrtũm pê ja omnuj nẽ. Anẽ.

Hikàxpore rax xwỳnh mẽ kêp amrakati xwỳnh wa harēnh

Rukre 6.20-26

¹⁹Nhũm Jejus arĩ mẽ ahkre kamã mẽ kãm awjarẽ nẽ mẽ kãm: —Koja mẽhõ kàxpore rax xwỳnh ê mex pix kãm ri pa. Nẽ apkati mẽ apkur mex o pa.

²⁰Nhũm amrakati xwỳnh pê Rajareja hkà nhyre nẽ arĩ pry kamã àhwỳr o hkrĩ. Nhũm htem hamỳ nẽ ma o pa nẽ hikàxpore rax xwỳnh nhõrkwỹ jakwakrem haxwỳ.

²¹Nhũm õ jakrêx kwỳ hkrēr prãm xàj hakwa krem àhwỳr o hkrĩ. Nhũm rop hwỳr mra nẽ hkà nhy kunhnwỳnh o kuhê.

²²—Tã nhũm Rajare ty nhũm Tĩrtũm kapēr o mẽ wrỳk xwỳnhjaja hwỳr wrỳ nẽ ma akupỹm kaxkwa hwỳr hkarõ ho mõi nẽ ho api. Hãmri nhũm kaxkwa kamã mẽ pahpãm Apraãw nhĩhkõ hã hkĩnh nẽ apkur mex o hkrĩ. —Tã nhũm hikàxpore rax xwỳnhhta mãănēn hkõt ty. Nhũm hkwỳjaja hã akuprõ nẽ hã mur nẽ ma o tẽ nẽ haxà.

²³Hãmri nhũm hkarõ ma mẽ kot amnhĩ xà htỳx kamã hamak tũm xà pê kuwy maatita wỳr ma mõi. Nẽ kamã amnhĩ xà htỳx kãm hamak rãhã ho pa. Hãmri nẽ amnhĩ xà hã maj kànhmã rĩt nẽ kaxkwa kamã Apraãw pumu. Nhũm Rajare ra kuri mex nẽ nhỹ.

²⁴Hãmri nhũm tee ri wa omu nẽ Apraãw mã akapēr nẽ kãm: “Kwa Apraãw. Kwa we ixkamã axukaprĩ nẽ ixwỳr Rajare mẽ kê ixwỳr tẽ nẽ ìhkrakrã ho gõ htok nẽ ho inhõhto jakry. Na pa kuwy kamã amnhĩ xà htỳx kãm ijamak tỳx kumrêx.” Anẽ.

²⁵Hãmri nhũm kuma nẽ kãm: “Tk. Nà kot pa awỳr mẽnh kêt nẽ. Na ka pre atĩr ri amex nẽ akĩnh nẽ ri apa. No nhũm Rajare akĩnhã hkà nhy rax nẽ

amnhĩ xà htỳx kãm hamak rãhã ho ri pa. Tã ra jar inhĩhkô hã hkĩnh nẽ pa. Ka pre kurom amex nẽ apa htã kot kaj hpãnhã amnhĩ xà htỳx kãm ajamak rãhã ho ri apa.

²⁶Nẽ pahkaêx kãm ahkaprỳ griã. Jakamã nhỹhỹnh kot kêt awỳr rê? Ka ajaxwỳja nhỹhỹnh kot ka kêt mẽ ixwỳr rê?” Anẽ.

²⁷—Nhũm ã kãm kapêr anẽ nhũm tee ri kuma nẽ kãm: “Kwa tô ma inhõ krĩ hwỳr mãn amẽ kê ma ixkwỳjê hwỳr wrỳ.

²⁸O mũj arĩ inhõ krĩ kamã ixtõ kêp 5 nẽ arĩ htĩr nẽ pa. Kê wa mẽ kãm awjarẽ kê mẽ amnẽ kuwy hwỳr pa pymaj tokyx amnhĩ tomnuj kaga nẽ Tĩrtũm kôt mãn amnhĩ xunhwỳ nẽ hkôt ri amnhĩ nhĩpêx o pa.” Anẽ.

²⁹—Hãmri nhũm Apraãw kãm: “Nà pa mẽ hwỳr mẽnũh kêt nẽ. Ra mẽ kuri Tĩrtũm kapêr jarẽnh xwỳnhjê mẽ Mojes kot Tĩrtũm kapêr ã kagà kênã. Kê mẽ kamã harẽ nẽ ja ma nẽ rĩ tãm tanhmã amnhĩ nhĩpêx to.” Anẽ.

³⁰Hãmri nhũm tee ri kuma nẽ kãm: “Kwa nà. Koja mẽ kagàja mar kêt nẽ. No kêt Rajare na pre ra htyk tã akupỹm htĩr jakamã koja mẽ hwỳr wrỳ nẽ mẽ kãm awjarẽ nhũm mẽ akupỹm htĩr ã omu nẽ kapêr ma hãmri nẽ amnhĩ tomnuj kaga kurê kumrêx. Kwa nà ã ri anhỹr kêt nẽ mẽ hwỳr amẽ hêxta waa nẽ.” Anẽ.

³¹—No nhũm kãm: “Nà koja mẽ Tĩrtũm kapêr ã kagà mar kêt ã koja mẽ mããnẽn Rajare tyk nẽ akupỹm htĩr nẽ mẽ hwỳr wrỳk nẽ kot mẽ kãm tanhmã ujarẽnh to hã mar kêt nẽ. Jakamã kwarĩ pa mẽ hwỳr mẽnũh kêt nẽ. Kot paj ho anẽ nẽ ãm ixte mẽ hwỳr mẽnũh kaprỳ pyràk o amnhĩ nhĩpêx.” Anẽ. ã mẽ ujarẽnh kot anhỹr. Anẽ.

Rukre 17

Mẽ kot Jejus nẽ mẽ no kupyr ã mẽ harẽnh

Matêwre 18.6; Makre 9.42; mããnẽn Rômãn 1.32; Sikũn Pêtre 2.1; 2.18

¹⁻²Tã nhũm Jejus hkôt mẽ pa ho mẽ pa xwỳnhjê jahkre ho nhỹ nẽ mẽ kãm: —E kot paj mẽ kot ixkôt amnhĩ xunhwỳr tohtuj anhỹr xwỳnhjê jarẽ ka mẽ inhma. Nà koja mẽhõ mẽ hwỳr tẽ nẽ inhnê mẽ kãm kapêr. Mẽ kot mẽ mar

ně amnhĩ tomnuj prãm xàj tanhmã mẽ kãm kapër to. Hãmri nhũm mẽ mar xà hkôt tanhmã amnhĩ tomnuj to. Hã koja Tĩrtũm ja hã omu ně kot inhnê tanhmã kãm ně xwỳnhnta pumu ně ja hã homnuj tỳx ně. Te mẽ kot mễhỗ pynênh ně mut ã kên pytĩ hỡ nhỡr ně ma o htẽm ně gỏ rax kãm mễnh pyràk o koja hipêx. Te ho ja pyràk no ãm homnuj tỳx o ja jakre. Jakamã kwa mẽ ixkapër ma ně kãm ajamaxpër tỳx rãhã ho ri apa. Anẽ.

Mẽ pahte amnhĩ tã tanhmã mễhỗ hto hkêt ã mẽ pamã karỗ

Matêwre 18.21; Makre 11.25-26; mấnênh Epes 4.32; Korosẽ 3.13

³Nhũm Jejus arĩ mẽ ahkre ně mẽ kãm: —Nẽ koja ixkôt atỏjê hỡ tanhmã atomnuj to. Ka amnhĩ tã omu hãmri ně ma hwỳr tẽ ně ja hã kãm akapër ně kãm: “Kwa mon ka axtem ně ri ã inhĩpêx anẽ ixtỏ? Kwa nà ri ã inhĩpêx anhỹr kêt ně.” Anẽ hãmri nhũm amnhĩ tã ama ně amã: “Nà na pa tee ri ixte tanhmã atota ã amnhĩ pumu ně ixkaprĩ ně. Nà kot paj axte ã ri anhĩpêx anhỹr kêt ně. Kwa kêt ka axte tanhmã ja mấ ajamaxpër to hkêt ně. Te ate amnhĩ katut kôt mễnh pyràk o hipêx pu akupỹm tãm axpẽn nhĩpêx o papa.” Anẽ. Koja ã amã kapër anẽ ka amnhĩ tã ama hãmri ně axte tanhmã kot atoja mấ ajamaxpër kêt ně.

⁴—Koja arĩgro pyxi hã xatã tanhmã atomnuj to japêr. Hãmri ně xatã tee ri ja hã amnhĩ pumu ně awỳr mra ně xatã amnhĩ tã amã kapër ně amã: “Pa ot pa awỳr tẽ. Na pa ra ixkaprĩ ně. Kwa ixte ã anhĩpêx anhỹrja pumu ně ãm omu. Kot paj axte hkêt ně.” Anhỹr o xatã amã kapër. Nẽ ra axte tanhmã atomnuj to ně kê axte awỳr tẽ ně ã amnhĩ tã amã kapër anẽ. Nom kêt ka ama ně kamã agryk kêt ně. ãm xatã kãm: “Nà kot puj anẽ ně akupỹm tãm axpẽn nhĩpêx. Kot paj axte tanhmã ate ixtota mấ ijamaxpër kêt ně. Kot puj ja ho pajapêx ně tãm axpẽn nhĩpêx o akupỹm papa.” Anhỹr o kêt ka mẽ xatã axpẽn nhĩpêx anhỹr rãhã ho ri apa ně aa jam anhũrer kêt ně. Anẽ.

Mẽ pahte mẽmoj tã Tĩrtũm wỳr hã mẽ pajarênh

Matêwre 17.20-21; 21.21-22; Makre 11.23

⁵Tã nhũm Jejus nhỹ hã mẽ ahkre ho mẽ pa xwỳnhjaja hãmri kãm: —Kwa Pahihti. Tanhmã mẽ ixto pa mẽ amnhĩ kaxyw Tĩrtũm kôt ijamaxpër tỳx rãhã ho ri ixpa. Anẽ.

⁶Hāmri nhūm mẽ kām: —Nà ra mẽ ate amnhĩ kaxyw hkôt ajamaxpēr jakamã na ra amnhĩ tã mẽ apumu. Jakamã mẽ ate hkôt amnhĩ nhĩpêx kukwak ri na ka htem mẽmoj tã awỳ nhūm mẽ ate mẽmoj tã hwỳr xà hkôt mẽ amã tanhmã mẽmoj nhĩpêx to. Te mẽ ate pĩ hpàr mīj mã akapēr nẽ kām: “E amnhĩ jarẽ nẽ ma tẽ nẽ gô xujanãr kãm mãn mrõ.” Anẽ nhūm kot amar nẽ amar xà hkôt ã kot amnhĩ nhĩpêx anhỹrta pyræk. Ja pyrà nẽ kot kaj mẽ ate Tĩrtũm kôt amnhĩ nhĩpêx o apa kukwak ri mẽmoj tã awỳ nhūm mẽ ama nẽ mẽ amã mẽmoj tanhmã ho. Rỳ mẽ amã mẽmoj gõ. Anẽ.

Te mẽ pahpê Tĩrtũm mã paxàpênh xwỳnh pyræk

⁷Nhūm Jejus arĩ mẽ ahkre nẽ mẽ kām: —Nẽ ja. Kot kaj mẽ amã mẽ àpênh xwỳnh kwỳjaja nhūm hõ amã mẽmoj tã àpênh o pa ã ho anhỹr pa. Hāmri tanhmã kot kaj kãm akapēr to wehe? Xà kot kaj kãm: “E hāmri axàpênhhta kaga nẽ tẽ nẽ nhỹ nẽ apku.” Anhỹr o kãm akapēr?

⁸Nà kot kaj kãm anhỹr kêt nẽ. Kot kaj kãm: “E kwa tokyx tẽ nẽ hpãnhã inhmã inhõ hã apê. Kot pa ixàpkur pa ka ixpãnhã nhỹ nẽ apku.” Anhỹr kãm akapēr. Kêp amã àpênh xwỳnh jakamã ka ã kãm akapēr anẽ.

⁹Ja pyrà nẽ kot puj mẽ Tĩrtũm kot mẽ pamã mẽmoj tã karõ xà hkôt tanhmã kãm amnhĩ nhĩpêx to ho ri papa. Mẽ õ patrãwta pyrà nẽ kot tanhmã mẽ pamã karõ hto xà hkôt pu mẽ amnhĩ nhĩpêx. —Xà na htem mẽ õ patrãw mã mẽmoj tã àpênh pa hāmri nẽ hkwỳjê mã amnhĩ to jarkrar o ri pa nẽ mẽ kãm: “E ka mẽ ixpumu. Na pa hte inhõ patrãw mã ixàpênh mex o mẽ hakre ka mẽ ja hã ixpumu. Hêxta waa nẽ. Mon pa hte ri axtem ã amnhĩ nhĩpêx anẽ?” Anhỹr o xà kot kaj mẽ kãm amnhĩ to jarkrar o ri apa? Nà na ka htem ã amnhĩ nhĩpêx anhỹr kêt nẽ.

¹⁰—Tã pa hte mẽ õ patrãwta pyrà nẽ tanhmã mẽ amã mẽmoj tã karõ hto ho ixpa. Jakamã kêr ka mẽ inhma nẽ ixte mẽ amã mẽmoj tã karõ xà hkôt tanhmã inhmã amnhĩ nhĩpêx to ho ri apa. Hāmri nẽ hã amnhĩ to jarkrar pê amnhĩ jarênh o: “Ăm hāmri na pa ã Jejus mã amnhĩ nhĩpêx anẽ. Hêxta waa nẽ. Ixpê Jejus mã tanhmã ixte amnhĩ nhĩpêx to mex xwỳnh na pa.” Anhỹr o amnhĩ to jarkrar kêt nẽ. Kêt ãm amnhĩ jarênh o: “Nà ixte kãm tanhmã amnhĩ

nhîpêx to ho ixpa xwÿnh pix na pa. Na hte mẽmoj tâ inhmã karõ pa kuma nê ÿ hã tanhmã kãm amnhĩ nhîpêx to.” Anhÿr o amnhĩ jarênh o ri apa. No ri amnhĩ krã hkôt atÿx tanhmã amnhĩ to jarkrar to ho ri apa hkêt nê. Anê.

Jejus kot mẽ ho 10 nê akupÿm mẽ ho mex ã harênh

Matêwre 8.1-4

11Tã nhũm Jejus arĩ Garirej rũm pika pê Samar hkàx ã Jerujarê hwÿr kormã mō.

12Nê nhÿri krĩ hō htêp o mōr mẽ nhũm krĩ pu hã ri mẽ pa xwÿnhjaja kêp 10 nê kutã mra. Mẽ hkànhy hkro htÿx xwÿnhjaja kutã mra nê hkaxpa nê amÿm kuhê nê omu.

13Hãmri nê kãm: —Pa Pahihti. Kwa mẽ ixpumu nê mẽ ixkamã axukapri nê tanhmã mẽ ixto mex to. Anê.

14Hãmri nhũm mẽ kãm: —Tôe. Nà kot paj mẽ ato mex. E mẽ mãmri awjanã nê ma akupÿm mẽ anhō patrejê hwÿr mra kê mẽ akupÿm mẽ akà mex ã mẽ apumu. Anê. Hãmri nhũm mẽ kuma nê kapêr mar xà hkôt awjanã. Kà nhy rãhã awjanã nê ma akupÿm patre hwÿr mra. Nê kormã akupÿm hwÿr pry hã mrar rãhã piitã hkà mex pa.

15Hãmri nhũm ãm pyxi nê hkwÿjê rom awjanã nê akupÿm Jejus wÿr Tirtũm mã mex o mex ã harênh o hwÿr tẽ.

16Hãmri nê Jejus kaxpa nê kutã hkõnkrã ho tẽm nê nhÿ nê amnhĩ tâ kãm kot ho mex ã kãm amnhĩ jarê. Kwÿjê hkĩnhã kêp Ijaew kêt axtem kêp Samar nhō xwÿnh tâ mẽ kurom akupÿn hwÿr tẽ nê kãm mex o mex ã harê.

17-19Hãmri nhũm amnhĩ tâ kuma nê kãm: —No mẽ akwÿjaja? Ixte mẽ ato 10 nê mẽ ato mex tâ ka ãm kapxipix awjanã nê akupÿn ixwÿr tẽ. Akwÿjê hkĩnhã apê Ijaew kêt tâ akupÿm amnhĩ mex ã amnhĩ pumu hãmri nê mẽ kurom awjanã nê Tirtũm mã mex o mex ã harênh o ixwÿr tẽ. Hêxta waa nê. Mo na hte ixkwÿjaja apyrà nê amnhĩ kaxyw ixkôt hamaxpêr kêt nê? E kànhmã xa nê mãmri ma ajamakêtkati nê akĩnh nê ma akupÿm tẽ. Anê.

Jejus akupÿn wrÿk xà hã arĩgro jarênh

Matêwre 24.23-24; 24.37-44; Makre 13.32-37; mãänên Wam Tesarõn 5.2-8; Sikũn Pêtre 3.3-10

20-21 Tã nhũm Parijew nhõ xwỳnh kwỳjaja Jejus wỳr mra nẽ omu nẽ kãm: — Kwa mẽ inhmã mẽmoj jarẽ. Xà koja apu Tĩrtũm tokyx kot mẽ pahwỳr mẽnh mã xwỳnhhta mẽ nhũm mẽ pahwỳr wrỳ nẽ mẽ pahto amnhĩptàr kurê kumrẽx nà kormã? Anẽ. Hãmri nhũm mẽ kuma nẽ mẽ kãm amnhĩ jarẽ. Te ho nhãm mẽhõ jarẽnh pyrã nẽ mẽ kãm: —Nà ra kot mẽ ho amnhĩptàr o pa kẽnã. Nom nhỹri hkrĩ xà kamã mẽ ho amnhĩptàr o hkrĩ hkêt nẽ. Na htem amnhĩ kaxyw hkôt hamaxpẽr nẽ hkôt amnhĩ xunhwỳ hãmri nhũm kệp mẽ õ pahшти hã mẽ ho amnhĩptàr o pa. Nẽ mẽ kãm mẽ hamaxpẽr mex gõ nhũm htem hkôt ri hamaxpẽr mex o pa. Anẽ.

22 Hãmri nẽ hpãnhã hkôt mẽ pa ho mẽ pa xwỳnhjê mã kapẽr. Mẽ kot nhỹrmã tee ri kamã hamak o pa hã mẽ kãm kapẽr nẽ mẽ kãm: —Kot kaj mẽ nhỹrmã tee ri amã tokyx akupỹn ixwrỳk nẽ ixte mẽ ato amnhĩptàr prãm xàj tee ri inhmã anojarêt kaprỳ ho ri apa. Nẽ axpẽn mã ri ijarẽnh o: “Hêxta waa nẽ. Mo na we Pahшти tokyx akupỹn mẽ pahwỳr wrỳk kêt nẽ?” Anhỹr o inhmã anojarêt o ri apa pê ixkamã ajamak rãhã ho apa.

23—Nẽ koja mẽ ra akupỹn ixwrỳk ã tanhmã mẽ amã ixto hêx to ho pa. Nhỹri ixkuhê nhũm mẽ kot ixpumunh ã mẽ amã ixto hêx o pa. Nom kêr ka mẽ ama nẽ ãm mẽ ama.

24 Kot paj nhỹrmã akupỹn mẽ awỳr ixwrỳk kaxyw nhũm mẽ pika piitã hkôt akupỹn ixwrỳk kãm anhĩpê ixpumu. Te mẽ piitã mẽ kot anhĩpê na jaxênh pumunh pyrãk o kot kaj mẽ apiitã ixpumu.

25 Nom kormã jar pika ja kamã ixpa ri koja mẽ ohtô nẽ ixkaga pa amnhĩ xà htỳx kamã ijamak kãm ty. Hãmri nẽ mẽmo arĩgro hã ma akupỹm kaxkwa hwỳr api. Hãmri nẽ nhỹrmã akupỹn mẽ awỳr wrỳ.

26—Nà kot paj nhỹrmã man akupỹn mẽ awỳr wrỳ. Akupỹn ixwrỳk xà hã arĩgrota ã koja jar pika ja kamã mẽ pa xwỳnhjaja htỳx ri tanhmã amnhĩ tomnuj to ho pa. Te amnepêm finat Nohti htĩr ri mẽ kot htỳx ri tanhmã amnhĩ tomnuj to ho pa pyrãk o koja mẽ amnhĩ nhĩpêx o pa.

²⁷Na prem amnhĩ kaxyw Tĩrtũm mã hamaxpěr o pa hkêt nẽ. Nẽ ãm jar pika ja kamã mẽ kot amnhĩ nhĩpêx pix kukamã hamaxpěr o ri paja o ãm kôt pix mã tanhmã ri amnhĩ nhĩpêx to ho pa. Rôm nhũm Noehti gô htàm pymaj pàr raxja nhĩpêx nẽ kãm axà. Nhũm prem hã omu nẽ ãm omunh o pa nẽ tanhmã ri amnhĩ kukamã hamaxpěr to hkêt nẽ. Tã nhũm nata mẽ haêr pê wrỳ. Hãmri nẽ wrỳk rax o ra pika piitã hanhi nhũm mẽ piitã pikaprãr pa.

²⁸—Akupỹn ixwrỳk xà hã arĩgrota ã koja mẽ mããnẽn te amnepêm Sotõ nhõ xwỳnhjaja kot htỳx ri tanhmã amnhĩ tomnuj to pyràk o amnhĩ nhĩpêx. Finat Rohti kormã htĩr ri mẽ kot htỳx ri tanhmã amnhĩ tomnuj to ho pata pyràk o koja mẽ amnhĩ nhĩpêx. Na pre hte Sotõ nhõ xwỳnhjaja ãm pika ja kamã mẽ kot amnhĩ nhĩpêx pix kukamã hamaxpěr o ri pa. Nẽ ãm kôt pix mã ri amnhĩ nhĩpêx o pa. Nẽ htỳx ri amnhĩ xàpkur xà pix kukamã hamaxpěr. Nẽ mẽ hpur kãm ri àpênh pix kukamã hamaxpěr. Nẽ ri amnhĩ xujaprôr pix kukamã hamaxpěr nẽ xpẽn mã mẽmoj to wẽnê pix kukamã hamaxpěr. Nẽ amnhĩm òrkwỹ nhĩpêx pix kukamã hamaxpěr. ã na prem pika ja kamã mẽ kot amnhĩ nhĩpêx pix kukamã hamaxpěr o ri pa anhỹrja o amnhĩ kaxyw Tĩrtũm mã hamaxpěr o pa hkêt nẽ.

²⁹—Tã nhũm Rohti mẽ ò krĩ rũm kator mẽ nhũm Tĩrtũm krĩ nhõ xwỳnhjaja kot amnhĩ tomnuj tỳx o paja mỳrapê mẽ himex pa. Jao kaxkwa rũm mẽ hipy mẽmo hpòk kwỳ rẽ nhũm mẽ hkaxàr pa.

³⁰Tã akupỹn mẽ awỳr ixwrỳkja mẽ koja mẽ te Rohti nhõ krĩ kamã mẽ kot amnhĩ nhĩpêx pyrà nẽ htỳx ri amnhĩ tomnuj pix o pa.

³¹—Nẽ akupỹn ixwrỳta ã ka mẽ anhòrkwỹ nhĩmòk ã hkrãmnênh o akrĩ japêr nẽ akupỹn ixwrỳk kãm ixpumu. Hãmri nẽ akukrêx wỳr axàr nẽ hõ hpyr mã ajamaxpěr kêt nẽ. Rỳ ka mẽ apur kãm axàpênh o akuhê japêr nẽ akupỹn ixwrỳk kãm ixpumu. Hãmri nẽ akupỹm anhòrkwỹ hwỳr atêm mã ajamaxpěr kêt nẽ. Mo kaxyw kot ka kêt hwỳr tẽ? Kêt ãm inhmã mẽ ajapê hã akupỹn mẽ awỳr ixwrỳk mã ajamaxpěr o akĩnh nẽ ixpumunh o akuhê.

³²—Nẽ kêr ka mẽ Rohti prõ kot tanhmã amnhĩ nhĩpêx toja mã ajamaxpěr rãhã ho ri apa. Na pre Tĩrtũm kapêr nhĩrôp xa nẽ amnhĩ katut kôt Sotõta

wỳr rīt hāmri nē ã amnhĩ nhĩpêx anhỹrja mỳrapê htyk kurê kumrêx. Tã kêr ka mẽ ho uràk nē amã akukrêx rax japê xàj ixkôt amõr kaxyw anhĩtõt kêt nē.

³³—Nē kwa kêr ka mẽ jar pika ja kamã tanhmã mẽ ate amnhĩ nhĩpêx to pix kukamã ajamaxpêr o ri apa hkêt nē. Nē mẽ akukrêx rax pix kukamã ajamaxpêr kêt nē. Kojã nhỹrmã ja piitã mẽ apê hapêx pa. Mẽ ate kãm anhĩhkra karo hpar pyràk o piitã hipêx hāmri nhũm Tĩrtũm ja hã mẽ apumu nē hpãnhã nhỹrmã mẽ amã mẽmoj mex nhõr rax nē.

³⁴—Nē kot paj kamàt kãm akupỹn ixwryk japêr nhũm nhỹri mēhõ ra ixkôt amnhĩ xàm xwỳnh mẽ mēhõ kot ixkôt amnhĩ xãm kêt xwỳnh wa par kãm nõr japêr. Hāmri pa amnhĩ wỳr ra ixkôt kot amnhĩ xãm xwỳnhhta o api nhũm kot ixkôt amnhĩ xãm kêt xwỳnhhta arĩ gõr nē nõ.

³⁵Rỳ pa arĩgro hã akupỹn ixwryk japêr nhũm mēnijê hõ wa hamẽxkrut nē harõj kahuk o ãm japêr. Hāmri pa ra kot ixkôt amnhĩ xãm xwỳnhja ho api nhũm kot ixkôt amnhĩ xãm kêt xwỳnhja ahte arĩ harõj kahuk o xa. Hāmri nē hamaxpêr mex kêt kumrêx o xa.

³⁶Rỳ kojã mẽmyjê hõ wa axkrut nē hpur kãm àpênh o ãm japêr. Pu pa amnhĩ wỳr kot ixkôt amnhĩ xãm xwỳnhhta o api nhũm kot ixkôt amnhĩ xãm kêt xwỳnhhta pur kãm ahte arĩ apênh o xa. Hāmri nē tee ri hkràmnhwỳ hkukamã hamaxpêr o xa. Anē. Nhũm pre ã Jejus hkôt mẽ pa ho mẽ pa xwỳnhjê mã amnhĩ jarēnh anē.

³⁷Hāmri nhũm mẽ kuma nē kãm: —Kwa nhỹri kojã mẽmoj ã amnhĩ nhĩpêx anē? Anē. Hāmri nhũm mẽ kãm: —Nà kojã nhỹri mẽmojja ã amnhĩ nhĩpêx anē ka mẽ omunh kurê kumrêx. Te nhỹri mẽmoj kro nē nõr nhũm nhõnhti kot omunh nē hã htor nē hpinhĩpanh nhũm mẽ kot hã omunh kurê kumrêxta pyràk. Anē.

Rukre 18

Mẽ pahte Tĩrtũm mã amnhĩ jarēnh rãhã ho papa hã mẽ pamã karõ

Rukre 11.5-8; mãänēn Wam Tesarõn 5.17

¹Tã nhũm Jejus hkôt mẽ pa ho mẽ pa xwỳnhjê mã mẽmoj tã karõ. Mẽ kot tanhmã Tĩrtũm mã amnhĩ jarẽnh to hã mẽ kãm karõ. Mẽ kot xatã kãm amnhĩ jarẽnh o pa nẽ amnhĩ kaxyw kãm hamaxpěr rãhã ho pa kaxyw. No ãm hã kuxi nẽ tanhmã mẽ kãm hã ujarẽnh to nẽ mẽ kãm:

²—Koja nhỹri krĩ hõ kamã juistija kãm Tĩrtũm prãm nõkati. Nẽ mããnẽn kãm amnhĩ kwỳjê hprãm nõkati htã kệp juisti nẽ tanhmã mẽ kãm kapěr to ho hkrĩ.

³Jakamã nhũm mẽhõ ni pẽ mjên htyk xwỳnh. Nhũm hte mẽhõ xatã tanhmã kệp õ mẽmoj to ho pa. Hãmri nhũm tee ri amnhĩ tã omu nẽ xatã juistita wỳr mra nẽ kãm harẽ nẽ kãm: “Xê gầ nẽ. Na hte pahkwỳjê hõja ixtomnuj rãhã ho pa. Xê ixtã tanhmã kãm akapěr to kê tãm inhĩpêx.” Anẽ. Nẽ xatã hwỳr mra nẽ amnhĩ to kuwỳ nẽ xatã hwỳr mra nẽ amnhĩ to kuwỳ.

⁴⁻⁵No nhũm kuma nẽ ãm kuma. Kãm hkwyjê ho ajuta hprãm kêt jakamã ãm kuma. Tã nhũm xatã hwỳr mra. Gaa nhũm rĩ kãm mar kaga nẽ. Hãmri nẽ hamaxpěr o: “Tk. Hêxta waa nẽ. Jahti na hte xatã ixwỳr mra nẽ tanhmã inhmã amnhĩ jarẽnh to. Nẽ ãm xatã ixwỳr mra. Nà na pa ra inhmã mar kagyk nẽ. E pa tokyx tanhmã nẽ kot tanhmã ho xwỳnhta mã ixkapěr to. Inhmã Tĩrtũm pyma kamã rỳ inhmã ixkwỳjê kaprĩ kamã pa tanhmã nẽ kãm nẽ hkêt tã kot pa anhỹr kêt nhũm amnhĩ tã inhmã harẽnh pix nẽ pa ra mar kurê ixkrã tãtãk nẽ.” Anhỹr o hamaxpěr. ã mẽ ujarẽnh kot anhỹr.

⁶—Juisti tãm hamaxpěr kêt tã nhũm nija xatã hwỳr mra nẽ amnhĩ to hwỳr jakamã nhũm jatã tanhmã ho ajuta hto.

⁷⁻⁸No kêt Tĩrtũmja. Xàn ka htem mẽmoj tã awỳ nhũm juisti punutita pyrà nẽ mẽ ama nẽ ãm mẽ ama? Nà koja ã amnhĩ nhĩpêx anhỹr kêt nẽ. Kot ka mẽmoj tã kãm amnhĩ jarẽ nhũm ama nẽ tanhmã amã mẽmoj to rỳ tanhmã amã amnhĩ nhĩpêx to. Juistita rom mẽ pakamã ukaprĩ xwỳnh na. Tã kot paj nhỹrmã akupỹn wrỳ nẽ mẽ apumu ka mẽ arĩ amnhĩ kaxyw hkôt ajamaxpěr mex pẽ kãm amnhĩ jarẽnh rãhã ho ri apa pa ja hã mẽ apumu nẽ ixkĩnh tỳx nẽ. Ja na inhmã hprãm. Anẽ.

Tanhmã mẽ kot Tĩrtũm mã amnhĩ jarẽnh to hã mẽ harẽnh

Matêwre 6.5-8; määnên Wam Pêtre 5.5-6

⁹Tã nhũm Jejus mẽ kot amnhĩ to mex o hkwỳjê jakrenh ã amnhĩ to jarkrar o ri mẽ pa xwỳnhjê pumu nẽ tanhmã mẽ kãm kapêr to. Nom mẽ kot amnhĩ to jarkrarta ã kuxi nẽ mẽ kãm awjarẽ nẽ mẽ kãm:

¹⁰—Koja mễhõ wa hamẽxkrut nẽ Tĩrtũm mã amnhĩ jarênh kaxyw wa tẽ. Ja kêp Parijew nhõ xwỳnh nhũm hõja kêp mẽ õ pahi mã hkwỳjê pê kàxpore hkwỳ jamỳnh xwỳnh. Nhũm wa Tĩrtũm mã amnhĩ jarênh xà hã ixkre hwỳr wa tẽn axà.

¹¹⁻¹²Hãmri nhũm Parijew nhõ xwỳnhhta kumrêx tẽ nẽ nhỹri mẽ piitã mẽ noo mã Tĩrtũm mã amnhĩ jarẽ. Nẽ amnhĩ to jarkrar pê kãm amnhĩ jarênh o: “Pa Tĩrtũm. E ra ate ixpumunh mex. Na pa hte amnhĩ to mex pix o ri ixpa. Ra ate ja hã ixpumunh mex. Na pa hte kàxpore hkwỳ jamỳnh xwỳnh nẽj rom tãm amnhĩ nhĩpêx. Nẽ semãn piitã hã ixàpkur kêt rãhã amã amnhĩ jarênh rãhã ho ixtã apkati axkrut. Nom ja pix kêt. Na pa hte määnên ixàpênh pãnhã kàxpore jamỳ nẽ mẽ kot amã tanhmã amnhĩ nhĩpêx to ho pa xwỳnhjê mã hkwỳ nhõr o ixpa. Nẽ na pa hte ri ixàhkĩnh o ri ixpa hkêt nẽ. Nẽ nhãm mẽ kêp mẽ hprõ ho amnhĩkati ho ri ixpa hkêt nẽ. Na pa hte mẽ piitã mẽ kurom tãm amnhĩ nhĩpêx ã amnhĩ pumu nẽ ixkĩnh tỳx kumrêx. Hêxta waa nẽ. Mon pa hte ri ã amnhĩ to mex o ixpa anẽ?” Anhỹr o Tĩrtũm mã amnhĩ to jarkrar pê kãm amnhĩ jarênh o xa.

¹³—Hãmri nhũm hpãnhã mẽ kêp kàxpore hkwỳ jamỳnh xwỳnhhta haxwỳja Tĩrtũm mã amnhĩ jarẽ. No ãm Parijew nhõ xwỳnhhta rom ki hkwỳjê pê awry nẽ ahte hipô nẽ kãm amnhĩ jarẽ. Nẽ kãm amnhĩ jarênh pê amnhĩ tak nẽ mur nẽ kãm: “Kwa Tĩrtũm. Na pa hte amnhĩ tomnuj tỳx o ri ixpa. Nẽ ixtỳx ri amã prãm xà kuhpa hã tanhmã amnhĩ nhĩpêx to. Na pa tee ri ja hã amnhĩ pumu nẽ ixkaprĩ htỳx nẽ. ã inhmã amnhĩ nhĩpêx anhỹr o ri ixpa hprãm kêt tã pa hte ã amnhĩ nhĩpêx anhỹr o ri ixpa. Kwa xà kot ka ixkamã axukaprĩ nẽ amnhĩ katut kôt ixte amnhĩ tomnuj rênh pa Tĩrtũm?” Anhỹr o kãm amnhĩ jarẽ.

14—Hāmri nhūm Tīrtūm hamē wa kot kām amnhī jarēnh ma no ām wamta ma nē ām kuma. No kêt hkôt hōja ma hāmri nē kot kām amnhī tā àhwỳr xà hkôt amnhī katut kôt kot amnhī tomnuj rēnh pa nē ho hkra. Jakamā nhūm mex nē hkīnh nē pa. Ra tām hkrā hāmri nē hkīnh nē ma htēm kurê kumrēx. Ā mē ujarēnh kot anhỳr. Ām hāmri na pa mē amā ja jarē. Koja mēhō Parijew nhō xwỳnhhta pyrà nē kot amnhī to mex xwỳnh ã amnhī kamnhīx hāmri nē Tīrtūm kot amnhī katut kôt kot amnhī tomnuj rēnh kaxyw amnhī to hwỳr kêt nē. Koja ām kām amnhī to jarkrar pix nē. Jakamā koja Tīrtūm te kot mar nē ām mar pyrāk o hipêx. No koja mēhō kot kàxpore hkwy jamỳnh xwỳnhhta pyrà nē tee ri tanhmā amnhī tomnuj to hā amnhī pumu nē hkaprī nē. Hāmri nē amnhī to Tīrtūm wỳ nhūm kuma nē tanhmā ho mex to. Anē.

Jejus kot amnhī wỳr mēhprirejê hwỳr ã harēnh

Matêwre 19.13-15; Makre 10.13-16

15Tā nhūm Jejus mē hkôt mē pa ho mē pa xwỳnhjaja arī pry hā Jerujarē hwỳr mō nhūm Ijaew kwỳjaja mē omu nē mē hkrare jamỳ nē Jejus wỳr mē o mra. Kot mē hā ĩhkra jaxwỳr nē mē ho Tīrtūm wỳr kaxyw. Hāmri nhūm hkôt mē pa ho mē pa xwỳnhjaja tee ri ja hā mē omu nē nē mē kām kapēr nē mē kām: —Tk. Kwa mē ma akupỳm mē akrata o mra nà? Mo kaxyw na ka mē Jejus wỳr mē o mra? Kormā mē ràxre kēnā. Anē.

16Hāmri nhūm amnhī tā mē kuma nē mē kām: —Tk. Kwa nà mē ri inhnē mēhprijê kurê hkêt nē. Kwār mē māmri ixwỳr mē o mra. Anē. Hāmri nē amnhī wỳr mē kām hpa ho apê nhūm mē hwỳr mē o mra nhūm mē kuri kuhê. Hāmri nhūm hkôt mē pa ho mē pa xwỳnhjê mā kām: —E mē jareja mē omu. Na htem hamakêtkati nē hkīnh nē ri pare. Nē kām amnhī to rūnh prām kêt nē ri pa. Tā Tīrtūm kôt mē kot amnhī nhīpêx xwỳnhjaja na htem mē urāk nē kām amnhī to rūnh prām kêt nē ri pa.

17—Jarejaja na htem hipêxà nē katorxà wa kapēr ma nē wa hkôt ri amnhī nhīpêx mex o ri pa. Tā ixpê Tīrtūm kot mē awỳr inhmēnh xwỳnh kot ka mē amā ixkôt amnhī xunhwỳr prām. Hā kot kaj mē te ho jarejê kot amnhī nhīpêx pyrāk o amnhī nhīpêx. Jao ixkapēr ma nē ixkôt ri tanhmā amnhī nhīpêx mex to ho ri apa. Anē.

Kàxpore rax xwỳnh jarēnh

Matêwre 19.16-30; Makre 10.17-31; mǎānēn Wam Ximotre 6.6

18Tā nhūm Ijaew nhō pahihiti hōja Jejus wỳr tē nē kām kapēr nē kām: —Pa? Mē ijahkre xwỳnh maati? Kwa inhmā mēmoj jarē. Tanhmā kot pa we nhỹrmā Tĩrtũm ri ixtĩr tũm nē ixpa kaxyw amnhĩ nhĩpêx mex to ho ri ixpa wehe? Anē.

19Hāmri nhūm kām: —Xà ate ixpê Tĩrtũm kwỳ hā ixpumunh kôt na ka ixte uràk nē amnhĩ to mex xwỳnh ã ijarē? Tĩrtũm pix na kot amnhĩ to mex rāhā xwỳnh jakamā kot kaj ã ijarēnh anhỹr jao ixpê Kra hā ijarē. Nē uràk nē ixte amnhĩ to mex xwỳnh ã ijarē. Nà xàn ka ãm atỳx ri amnhĩ krā hkôt ã ijarēnh anē?

20—Tĩrtũmja mex o mex xwỳnh jakamā kot kaj amā nhỹrmā kuri atĩr tũm nē apa hprām hāmri nē ra kot mēmoj tā mē amā karō xà hkôt amnhĩ nhĩpêx o ri apa. Ra ate mar mex kēnā. Na pre mē amā: Kêr ka mē axpēn pē axàhkĩnh hkêt nē. Nē mē axpēn par kêt nē. Nē mē axpēn to axêx o ri apa hkêt nē. Nē mē axpēn pē aprō ho amnhĩkati hkêt nē. Nē mē anhĩpêxà mē akatorxà wa hā apijaàm pē wa kutā anojarêt pix o ri apa. E kot kaj amā nhỹrmā Tĩrtũm kuri atĩr tũm nē apa hprām hā kêr ka ã amnhĩ nhĩpêx anhỹr o ri apa. Anē.

21Nhūm pre ã Jejus kām kapēr anē nhūm kuma nē kām: —Kwa ixprĩre ri ra ã ixte amnhĩ nhĩpêx anhỹr o ri ixpa kēnā. Nom ixte ixtĩr tũm nē ixpa kaxyw kormā ixte tām kêt pyràk. Anē.

22Hāmri nhūm Jejus kām: —Nà kormā mēmoj pyxire nē arĩk. Na ka amā akukrêx rax japê htỳx o Tĩrtũm jakre. Jakamā kêr ka ma akupỹm tē nē akukrêx o wēnê hpa nē hpānhā kàxpore jamỳ hāmri nē ma mē kēp amrakati xwỳnhjê mǎ òr pa. Hāmri nē rĩ akupỹn ixwỳr tē nē ixkôt apa ho apa. Anē.

23Hāmri nhūm kuma nē tee ri amnhĩ kukamā hamaxpēr. Kām kukrêx rax japê nē kām ìhkra karo hprām kêt nē. Jakamā tee ri Jejus kot ã kām hā karō anhỹrja ma nē awjanā nē ma akupỹm tē.

24Hāmri nhūm tee ri ja hā omu nē hā mē kot mar xwỳnhjê mǎ kapēr nē mē kām: —Hêxta waa nē. Kojā mē hikukrêx rũnh xwỳnhjaja ohtô nē kām mē

hikukrêx japê xàj Tirtùm mẽ wa ixri htĩr tũm mẽ pa ho papa hkêt mẽ. Wa ixte amnhĩ nhĩpêxja mẽ kêp hihtỳx.

²⁵Na htem kãm hikukrêx rax mã ìhkra karo hprãm kêt rãhã tee ri kãm Tirtùm kôt amnhĩ nhĩpêx prãm kaprỳ. Te ho mẽhõ kot menh kagô hã hkre mẽ kãm kagô katõk prãm kêt rãhã kãm guhkrax kãm àr prãm kaprỳta pyræk. Anẽ. Nhũm pre ã Jejus mẽ kãm kapêr anẽ.

²⁶Hãmri nhũm mẽ kuma mẽ tee ri amnhĩ kukamã hamaxpêr mẽ kãm: —Kwa nom mẽ ixpiitã mẽ inhmã mẽ ixkukrêx japê kênã. Jakamã xà kot paj mẽ ixpiitã nhỹrmã war ari ixtĩr tũm mẽ ixpa ho ixpa hkêt mẽ nà? Anẽ.

²⁷Hãmri nhũm mẽ kãm: —Nà kot kaj mẽ amnhĩ krã hkôt mẽ amã mẽ akukrêx japêja mã anhũrer kêt mẽ. Tirtùm pix na hte ã mẽ kot amnhĩ nhĩpêx anhỹr kaxyw tanhmã mẽ hkrã hto nhũm mẽ kãm mẽ hikukrêx japê htỳx kêt mẽ. Jao mẽ kêp Tirtùm mẽ wa ixri htĩr tũm mẽ mẽ pa ho pa mã xwỳnh. Anẽ.

²⁸Hãmri nhũm Simãw Pêtre kãm: —Kwa Pahihti no mẽ pajaja? Na pa prem agryk ã mẽmoj piitã hkaga hpa mẽ akôt ixpa ho ixpa. Jakamã kot paj mẽ nhỹrmã war ari ixtĩr tũm mẽ ixpa ho ixpa nà? Anẽ.

²⁹Hãmri nhũm kãm: —Tỳ. Nà ka mẽ atõ inhmã tanhmã amnhĩ nhĩpêx to ho apa kaxyw akwỳjê re mẽ ma inhmã tanhmã amnhĩ nhĩpêx to ho ri apa. Anhõrkwỳ re rỳ atõ rỳ atõx rỳ aprõ mẽ akrajê re. Rỳ akatorxà mẽ anhĩpêxà war are. Rỳ akukrêx piitã rer pa hãmri mẽ ma ixkapêr o mẽ piitã mẽ ahkre ho ri mẽ hkôt apa.

³⁰Hã kot paj ja hã mẽ apumu mẽ mẽ ato mex rax mẽ. Hãmri ka mẽ ma nhỹhỹm apa mẽ nhỹri mẽ kãm ixkapêr jarênh o ri mẽ hkôt apa nhũm mẽ kot mẽ amar xwỳnh kwỳjaja mẽ ama mẽ ra kãm mẽ akĩnh mẽ. Nẽ ra mẽ ate akwỳjê rer par tã nhũm mẽ tãmjaja te mẽ apê mẽ hkra rỳ mẽ htõ rỳ mẽ htõx pyræk o mẽ anhĩpêx mẽ tanhmã mẽ ato mex to ho pa. Hãmri ka mẽ nhỹrmã ty mẽ ma Tirtùm mẽ wa inhõ krĩ hwỳr api hãmri mẽ wa ixkuri amex kumrêx mẽ atĩr tũm mẽ apa ho apa. Anẽ. Nhũm pre ã Jejus Simãw Pêtre mẽ hkwỳjê mã kapêr anẽ.

Jejus kot axte htyk kukamã amnhĩ jarênh

Matêwre 20.17-19; Makre 10.32-34

31Tã nhũm Jejus mẽ kot ÿ hã kapêr jarênh o mẽ pa xwỳnh pê 12jaja mẽ hkwyjê pê mẽ ho kato. Nê nhỹri mẽ hkàx ã mẽ o xa nê tanhmã mẽ kãm amnhĩ jarênh to nê mẽ kãm: —Amnepêr Tĩrtũm nhỹ hã kapêr jarênh xwỳnhjaja na prem ixkukamã tanhmã mẽ kot inhĩpêx to hã ijarê nê ixtã kagà. Tã pu mẽ ra Jerujarê hwỳr mỗ. Kamã koja mẽ tanhmã ixto rax nê. Ra mẽ kot ixkukamã ijarênh nê ixtã kagà xà hkôt koja mẽ ixto anê.

32-33Koja mẽ kãm ixkurê xwỳnhjaja ixpynê nê Rôm nhõ xwỳnhjê nhõ pôristi hwỳr ixto tẽ nê mẽ kãm ixto hêx nhũm mẽ kuma nê mẽ mar xà hkôt tanhmã inhĩpêx to. Nê mẽ hkwyjaja ixtã hpêr o axkê nê akunha. Nê mẽ hkwyjaja ixto kapêr punuj nê ijapry nê ixtã argôx rê nê ixtak. Hãmri nê ixpĩ. ã koja mẽ inhĩpêx anê. Nom kot paj ãm ixtyk ã apkati axkrunêpxi nhũm Tĩrtũmja akupỹm ixto ixtĩr. Anê.

34Hãmri nhũm mẽ kuma nê tee ri htyk nê akupỹm htĩrja kukamã hamaxpêr no ãm hpri hã hkôt hamaxpêr kêt nê.

Jejus kot no hkre xwỳnh o mex ã harênh

Matêwre 20.29-34; Makre 10.46-52

35Tã nhũm Jejus mẽ kormã Jerujarê hwỳr Jerikoja têt o mỗ. Hãmri nhũm pry nhĩhkjê hã no hkre xwỳnhja àhwỳr o nhỹ.

36Hãmri nê amnhĩ wỳr mẽ mrar ma. Mẽ ohtô nê Jejus kôt mẽ mrar xwỳnhjê mrar ma nê mẽ kãm: —Kwa mẽmo ri? Mẽmoj wỳr na ka mẽ axohtô nê mra? Anê.

37Hãmri nhũm mẽ kãm: —Nà Jejus pê Najare nhõ xwỳnh kôt na pa mẽ mỗ. Anê.

38Hãmri nhũm mẽ kuma nê kàx pê Jejus mã kapêr nê kãm: —Pa Jejus? Apê mẽ inhõ Pahihti mex na ka. Te apê amnepêr anhĩgêr pahihti Tawi kot amnhĩ nhĩpêx pyræk. Jakamã kwa ixkamã axukapri nê akupỹm ixto mex kêt wehe. Ixte amnhĩ kaxyw akôt ijamaxpêr xwỳnhjê hõ na pa. Anê.

³⁹Hāmri nhũm Jejus kukamã mẽ mrar xwỳnhjaja tee ri kuma nẽ kãm: —Tk. Kwa akapěr kêt nẽ nhỹ nà. Anẽ. Tã no nhũm ãm mẽ kuma nẽ xatã amnhĩ to hwỳr o nhỹ. Kàx pẽ kãm kapěr o nhỹ.

⁴⁰Hāmri nhũm Jejus kuma nẽ xa nẽ amnhĩ wỳr hã karõ nhũm mẽ hpa hã kupy nẽ hwỳr o tẽ nhũm kãm:

⁴¹—Pa mo na? Tanhmã kot pa ato? Anẽ. Nhũm kãm: —Nà akupỹm inhmã ixrĩt mex prãm. Anẽ.

⁴²Hāmri nhũm kãm: —Tôe. Nà ra ate amnhĩ kaxyw inhmã ajamaxpěr tỳx jakamã kot kaj akupỹm ri rĩt. Anẽ.

⁴³Hāmri nhũm akupỹm rĩt mex kurê kumrêx nẽ ja hã amnhĩ pumu nẽ hkĩnh tỳx nẽ. Hāmri nẽ ma Jejus kôt Tĩrtũm mã mex o mex ã harênh o mẽ hkôt tẽ. Hāmri nhũm mẽ kot hã omunh xwỳnhjaja haxwỳja Tĩrtũm mã mex o mex ã harênh o Jejus kôt mỗ.

Rukre 19

Jakew kãm Jejus pumunh prãm ã harênh

Rukre 3.8; 3.12-13

¹Tã nhũm Jejus arĩ Jerujarẽ hwỳr mỗ nẽ Jeriko hwỳr pỏj. Hāmri nẽ krĩ kahti hkôt pry hã mỗ.

²Nhũm mẽ ra hkôt htu rax nẽ hkôt omunh o mỗ. Jakamã nhũm Jakew pẽ Rõm nhõ pahi mã kwỳjê pẽ kàxpore hkwỳ jamỳnh xwỳnhjê krãhtũm xwỳnhja. Na pre hikàxpore rax nẽ.

³Tã haxwỳja kãm Jejus pumunh prãm nẽ. Nom ãm hakooti nẽ hprĩhti jakamã tee ri kot omunh kaxyw amnhĩ nhĩpêx nhũm mẽ kêp àmnàr rax nẽ.

⁴Hāmri nhũm ra hamaxpěr nẽ ma kukamã hprõt nẽ tẽ nẽ nhỹri pry mỳri pĩ xãm pumu nẽ hã api nẽ kutêp ajêt. Hāmri nhũm Jejus mỗ nẽ hapa.

⁵Nẽ kànhmã rĩt nẽ omu nẽ kãm: —Pa Jakew. E kwa tokyx tẽn wrỳ pa ma akôt anhõrkwỹ hwỳr tẽ nẽ ari amnhĩm hikra. Anẽ.

⁶Hāmri nhūm kuma nē hkīnh nē. Nē wrỳk kurê kumrēx nē ma amnhī kôt nē o tē.

⁷Hāmri nhūm mē kot omunh o kuhê xwỳnhjaja tee ri ja hā omu nhūm ja mē kēp omnuj nē nhūm mē axpēn mā harēnh o: —Tk. Kwa nà. Jakew kot amnhī tomnuj xwỳnh tã nhūm Jejus ma hkôt tē nē kuri pōj. Anē.

⁸Hāmri nhūm wa ōrkwỹ hwỳr axà nē nhỹ nhūm Jakew Jejus mā amnhī jarēnh o: —E. Nà ra ixte pahihiti mā kàxpore jamỳnh xwỳnhhta na pa pre hte ho prēs jakre nē amnhīm hamỳnh rax nē. Tã kot paj akupỹm mē kām ōr pa. Na pa pre hte mē hkwỳjê pê ho 10 nē hamỳ. Tã kot paj hipy ho 40 nē kurē nē akupỹm mē kām ho ixpigrành pa. Ā kot paj mē hipêx anē. Nē ixkàxpore jakrēx kot paj ho axkjê nē mē kēp amrakati xwỳnhjê mā ho ixpigrành pa. Anē.

⁹Hāmri nhūm kuma nhūm ja kām mex nē. Jakamã nhūm kām: —Nà ãm hāmri. Ate pahkukamã panhīgēt Apraãw pyrà nē jarãhã ate amnhī tomnuj kaga jakamã na ra jarãhã anhōrkwỹ hwỳr mē mex xà axà. Kojã Tĩrtũm jarãhã amnhī katut kôt ate amnhī tomnuj rēnh pa nē axte kām hamaxpēr kêt nē.

¹⁰⁻¹¹Mē ate amnhī tomnuj xwỳnhjê hwỳr na pre Tĩrtũm inhmē pa wrỳ. Te nhỹri mē apikunor nhūm ixte mē ajapêr o ixpa kaxyw Tĩrtũm kot mē awỳr inhmēnh nhūm ixwrỳk nē nhỹri ixte mē ajapêr o ixpa nē mē amã ixkator nē ixkīnh nē ma akupỹm hwỳr mē ato inhmōrta pyræk. Anē.

Mē pahte Tĩrtũm mā tanhmã amnhī nhĩpêx to

Matêwre 25.14-30

Hāmri nhūm mē ohtô nē Jejus mar o hkôt Jerujarē hwỳr mra. Na prem htỳx tanhmã kot amnhī nhĩpêx to hã hkamnhĩx o hkôt mō nē axpēn mā: —E ma pu mē hkôt. Kojã Jerujarē hwỳr pōj hāmri nē kēp mē pahpê Ijaew nhõ pahi nē mē pahto amnhĩptàr kurê kumrēx. E kwa ma pu mē hkôt. Anē.

¹²Nhūm Jejus mē hamaxpēr kôt mē omunh mex nē. Jakamã kot mē piitã mē ho amnhĩptàr xà hã arĩgro hã mē kām amnhī jarēnh kaxyw. Kormã Jerujarē hwỳr ahtêp kêt ri mē kām amnhī jarēnh kaxyw. Nom hprĩ hã mē kām hã

amnhĩ jarēnh kêt nē. Ām amnhĩ tã kuxi nē mē kām awjarē nē mē kām: — Koja nhỹri krĩ hõ kamã mēhõ myja. Kot amnhĩ to rax o hkwỳjê jakrenh xwỳnhja. Nē krĩ hõ kamã krĩ piitã hkôt pahi nhõ pahihtija hāmri harēnh ma nē amnhĩ wỳr kuwỳ. Kot ma hwỳr mōr nhũm ò krĩ kamã nē mǎānēn krĩ hkwỳ kamã kēp mē ò pahi kaxyw kot ām kaxyw nhũm hwỳr nojarēt.

13Hāmri nē amnhĩ wỳr kām mē àpēnh xwỳnhjê ho 10 nē tanhmã mē hã karõ hto. Nhũm mē hwỳr mra nhũm mē kām amnhĩ jarē nē mē piitã mē kām kàxpore hkwỳ gō. Ahpỹnhã mē kām hpỹnh nē kugō nē mē kām: “E ota ixkàxpore hkwỳta. Kot kaj mē ixkutêp tanhmã ri inhmã ho rax to. Kêr pa mēmo arĩgro hã akupỹn mō kê ra ixahã inhmã ho ohtô nē pa hamỳ.” Anhỹr o mē kām kapēr hāmri nē ma mō.

14Hāmri nhũm ò krĩ nhõ xwỳnhjaja ra kēp mē ò pahi kaxyw harēnh ma nhũm ja mē kēp omnuj nē. Nē mē kām hkĩnh kêt jakamã ma krĩ hõ kamã kot mē kaxyw ām xwỳnhhta wỳr hkwỳ rē nhũm mē ma hwỳr mra nē hwỳr pōj. Hāmri nē kot mē kaxyw ām mǎ xwỳnhhta pumu nē kām: “Pa. E ot pa mē awỳr mra. Kwa na ka xep ra mē ixkaxyw mē inhĩōja xām kaxyw. Kwa nà mē inhmã jahti hkĩnhti hã. Kwa mē ixkaxyw ām kêt nē nà?” Anhỹr o kām kapēr.

15—Tã no nhũm ām mē kuma nē ām mē kuma nhũm mē awjanã nē mǎ akupỹm mra. Hāmri nhũm pahija mē kaxyw mē kām hkĩnh kêt xwỳnhhta xām nhũm ma akupỹm ò krĩ hwỳr mō. Mōō nē ra pōj hāmri nē amnhĩ wỳr kām mē àpēnh xwỳnhjê hã karõ nē mē kām: “E no ixte mē amã kàxpore nhõr xwỳnhhta? Tanhmã na ka prem ixkutêp inhmã ho rax to? E mē inhmã agō pa omu.” Anē.

16—Hāmri nhũm wamta kām: “Ota akàxpore ate inhmã òr xwỳnhhta. Na ka pre inhmã ho pyxi nē agō pa kupy nē ho mēmo hy hkwỳ japrô nē hkre. Nhũm ô pa mē kām ho wēnê ho ri ixpa nē hpãnhã kàxpore jamỳ nē hipy amã kurē nhũm ra kēp 10. Ota. E amỳ.” Anē.

17—Hāmri nhũm kuma nē hkĩnh nē. Hāmri nē kām: “Nà ām hāmri na ka ã inhmã ho rax anē. Ixte amã ho pyxi nē òr tã ka pre inhmã hamār mex nē

nhũm kànhmã axkamẽ nẽ ra kêp 10. Tã ra ixpê krĩ hkwỳ kamã mẽ õ pahi jakamã kot ka inhmã krĩ ho 10 nẽ inhmã hamãr o ri apa. Jakamã kwa mãmri amnhĩm kàxporeta o arĩk.” Anẽ.

18—Hãmri nhũm hpãnhã hõja hwỳr tẽ nẽ kãm: “E ota akàxporeta. Na pa pre ho mẽmo hy hkwỳ japrô nẽ hkre nhũm ô pa mẽ kãm ho wẽnê nẽ hpãnhã kàxpore jamỳ nẽ hipy amã kurẽ nhũm ra kêp 5. Tã ota. E amỳ.” Anẽ.

19Hãmri nhũm kuma nẽ kãm: “Nà ãm hãmri. Hãmri na ka ã inhmã ho rax anẽ. Jakamã kot kaj hpãnhã inhmã krĩ ho 5 nẽ ho amnhĩptàr o apa. E mãmri amnhĩm kàxporeta o arĩk.” Anẽ.

20-21—Hãmri nhũm hpãnhã hkôt hõta tẽ. Nom hkwỳjê hkĩnhã õ patrãw mã tanhmã kàxpore ho rax to hkêt nẽ. ãm tanhmã hamaxpěr punuj to nẽ htỳx ri kot kêp ho õxy nẽ amnhĩm piitã hamỳnh par nẽ akupỹm kãm hkwỳ nhõr kêt ã hkamnhĩx. Jakamã tanhmã kãm ho rax to hkêt nẽ. ãm hkupu nẽ o tẽ nẽ nhỹri kutêp kuxi. Hãmri nhũm õ patrãw amnhĩ wỳr hã karõ nhũm hwỳr tẽ nẽ amnhĩ nê kãm kapěr punuj nẽ kãm: “Tk. Ota akàxporeta. Ixte amã tanhmã ho rax tore hã. Ixte amã ho rax ronhỹx ka amnhĩm piitã hamỳnh pa nẽ akupỹn inhmã hkwỳ nhõr kêt nẽ. Rỳ ixte tanhmã apê homnuj to ronhỹx ka hã inhmã akir. Jakamã na pa tanhmã amã ho rax to hkêt nẽ. ãm hkupu nẽ o tẽ nẽ ho amũxu nhũm arĩ akutêp hikwỹ. Tã ota.” Anhỹr o amnhĩ nê õ patrãw mã kapěr punuj nẽ.

22-23Hãmri nhũm tee ri amnhĩ tã kuma. Kot amnhĩ to mex xwỳnh nẽ kãm mẽ àpênh xwỳnhjê ho mex o pa xwỳnh tã ã kãm àpênh xwỳnh kot kãm kapěr anhỹrja ma nẽ amnhĩ tã kamã gryk nẽ. Hãmri nẽ kãm: “Tk. Kwa xà ã ixte amnhĩ nhĩpêx anhỹr? Nà ixte ã amnhĩ nhĩpêx anhỹr kêt. ã ixte amnhĩ nhĩpêx anhỹr nhũm amã ixpuma ronhỹx ka pre amã ixpuma xàj ixkàxporeta py nẽ ixwakre kamã amnhĩ krã hkôt tanhmã inhmã ho rax to. Tã nhỹx pa pre ra akupỹn awỳr tẽ nẽ hamỳ. Nà na ka ã ijarênh anhỹr o axêx nẽ amnhĩ krã hkôt tanhmã inhmã ho rax to hkêt nẽ. Mỳrapê kot paj atomnuj tỳx nẽ ka rĩ amnhĩ pumu. Pěr ãm ajamaxpěr punuj.”

²⁴—Nhũm pre ã kãm kapër aně hãmri ně mẽ kot mar o kuhê xwỳnhjê mã kãm: “E mẽ atõ kệp kàxpore py ně wam kot ho 10 ně hamỳnh xwỳnhhta mã agõ.” Aně.

²⁵Hãmri nhũm mẽ tee ri kuma nhũm ja mẽ kệp omnuj nhũm mẽ kãm: “Kwa nà ra hikàxpore rax kênã. Ra ate kãm ho 10 ně òr kênã.” Aně.

²⁶Hãmri nhũm mẽ kãm: “ỹỹ nom tãã. Mãmri kãm agõ. Koja mễhõ inhmã àpênh mex pa amnhĩ tã omu ně kot inhmã àpênh mexta pãnhã ho mex ně. No koja inhmã àpênh mex kêt ně pa tee ri ja hã omu ně ho mex kêt ně. E mãmri kãm agõ.” Aně.

²⁷Hãmri ně hpãnhã mẽ kãm: “E hpãnhã mẽ kãm ixprãm nőkati xwỳnhjaja. Ixte mẽ ho amnhĩptàr mã tã mẽ kãm ixprãm nőkati xwỳnhjaja. Mễ ma mẽ hwỳr mra ně mẽ ho akuprõ ně akupỳn amnẽ ixwỳr mẽ o mra ně inhnoo mã mẽ himex pa.” Aně. ã mẽ ujarênh kot anhỳr. Aně. Nhũm pre Jejus ã mẽ kãm ujarênh aně. Te tãm kệp patrãwta pyrã ně ã amnhĩ jarênh aně. Mễ kot tanhmã amnhĩ nhĩpêx to ho pa hã mẽ omunh xà hkôt tanhmã mẽ hipêx to hã amnhĩ jarẽ.

Jejus kot Jerujarẽ hwỳr àr ã harênh
Matêwre 12.1-11; Makre 11.1-11; Juãw 12.12-19

²⁸Nhũm Jejus kormã Jerujarẽ hwỳr mỗ.

²⁹Hãmri ně ra Petake mẽ Petãn wa htêp o mỗ. Hixêt pê Oriwêhti kahti ri na krĩ wa xa. Jakamã nhũm Jejus hkôt mẽ pa ho mẽ pa xwỳnh wa ho axkrut ně amnhĩ kukamã wa kumẽ.

³⁰Ně wa kãm: —E. Wa ma krĩ mũj wỳr mẽ ixkukamã wa tẽ. Ně wa hwỳr pôi ně nhỹri jumẽnre nyw mã ê ně ãm ata pumu. Kormã mẽ kot hã hkrĩ hkêt xwỳnhhta. Ka wa omu ně kãm ê xà hpôt ně man akupỳn ixwỳr o tẽ.

³¹Nhũm mễhõ ja hã war apumu ně hã tanhmã war amã kapër to ka wa kãm ã ijarênh aně ně kãm: “Mễ panhõ Pahшти na hã karõ pa wa hwỳr tẽ.” Anhỳr o wa kãm ijarẽ. E wa ma hwỳr tẽ. Aně.

³²Hāmri nhūm wa kuma nē ma hwȳr htēm kurē kumrēx. Nē wa krīm pōj nhūm Jejus kot wa kām harēnh xà hkôt jumēnreta pumu.

³³Hāmri nē kām ê xà hpôt o xa nhūm ò dōnjaja mra nē hā wa omu nē wa kām: —Tk. Kwa mo kaxyw na ka wa ri mē ixpê mē ixkrit mā ê xà pôt o wa xa? Kwa xà kot kaj wa mē ixpê ho ahkĩ nà? Anē.

³⁴Hāmri nhūm wa mē kām: —Nà mē panhō Pahihti na wa inhmā anē pa wa tē. Wa ixte ma akupȳm kutā ho inhmōr kaxyw. Anē. Hāmri nhūm mē wa kuma nē wa kām: —Tôe. Nà wa māmri ma kām o tē. Anē.

³⁵Hāmri nhūm wa ma akupȳm Jejus wȳr o tē. Hāmri nē kaxyw amnhĩ xê hkwȳ hopôj nē kām ho hkô kahty nē kām ho htȳx nē o xa nhūm hā nhỹ nē mō.

³⁶Kormā Jerujarē hwȳr hixêt ã àpir o mō. Nhūm mē kot omunh o mrar xwȳnhjaja hkĩnh nē ma hkukamā kot pry ho mex kaxyw amnhĩ xê hkwȳptyr o mō.

³⁷Hāmri nhūm mē hixêt ã api nē kormā ahpar mā wrȳk o mō. Hāmri nhūm Jejus kôt mē pa ho pa xwȳnhjaja kàx pē Tĩrtūm mex o mex ã harēnh o hkôt mō. Ra mē kot hkôt pikamēnh ry nē kot mē kām aa mēmoj pumunh kêt kwȳ ho anhȳr rax ã omunh jakamā hkĩnh nē nē Tĩrtūm mex o mex ã harēnh o hkôt mō.

³⁸Nē harēnh o: E ota Tĩrtūm kot mē pahwȳr mēnh xwȳnhhta na ra pōj. ãm hāmri na mē pahwȳr wrȳ. Na mex kumrēx. Kêp mē panhō Pahihti mex na. ãm hāmri na pre Tĩrtūm mē pahwȳr kumē. Tĩrtūmja mex kumrēx. Mex o mex. Kukwak ri pix mā na pu htem pajamakêtkati nē paxàmnhĩx ri papa rāhā ho papa. Anhȳr o Jejus kôt harēnh o mō. Ra kot mē ho amnhĩptàr kurē kumrēx ã hkamnhĩx jakamā hkĩnh nē hkôt ã kapēr o mōr anē.

³⁹Hāmri nhūm Parijew nhō xwȳnh kwȳjaja mē hkôt mra nē tee ri mē kuma hāmri nē Jejus mā kām: —Kwa Jejus. Mē kām anē kê mē anhĩkrê nà? Anē.

⁴⁰Hāmri nhūm mē kām: —Tk. Nà kot paj mē kām anhȳr kêt nē. ã mē kapēr anhȳrja na inhmā mar hprām. Kwār mē māmri Tĩrtūm mā mex o mex ã

harēnh o ixkôt mō. Kot mẽ anhỹr kêt nhũm ra pikap kēn nhĩkwỹ xwỳnhja tee ri ja hã mẽ omu hãmri nẽ tãm tanhmã amnhĩ nhĩpêx to nẽ mẽ hpãnhã tãm Tĩrtũm mã mex o mex ã harēnh o hikwỹ. Jakamã kwār mẽ mãmri kapēr anẽ. Anẽ.

Jejus tee ri kot Jerujarẽ hkukamã hamaxpēr ã harēnh

Rukre 23.27-31

⁴¹Nhũm mẽ kormã Jerujarẽ hwỳr hpôx o mō. Kormã hixêt rũm ahpar mã hwỳr wryk o mō. Hãmri nhũm Jesus amỳm amnhĩ hkukamã Jerujarẽ nhõ xwỳnhjê pumunh o mō nẽ mẽ hkukamã hamaxpēr o hkaprĩ nẽ. Hãmri nẽ hkaprĩ xàj mỳr o mō.

⁴²Hãmri nẽ te kot mẽ kuri mẽ omunh o ri pa pê mẽ kãm kapēr pyræk o mẽ kãm kapēr nẽ mẽ kãm: —Hêxta waa nẽ Jerujarẽ nhõ xwỳnhjaja. Kot kaj mẽ amex kêt nẽ. Mẽ ate amnhĩ kukamã axàhpumunh mex ronhỹx ka mẽ ra mẽ kãm mẽ akurê xwỳnhjê pumaj ixkôt amnhĩ xunhwỳr kurê kumrêx nhũm mẽ tee ri tanhmã mẽ ato mã. Ka mẽ ra ixkukwak ri amex nẽ ajamakêtkati nẽ akĩnh nẽ ri apa ho apa.

⁴³⁻⁴⁴Tĩrtũm tãm kot mẽ awỳr inhmēnh tã ka mẽ amã ixprãm kêt nẽ. Jakamã koja nhỹrmã mẽ kãm mẽ akurê xwỳnhjaja mẽ awỳr mra nẽ mẽ anhõ krĩm hipôk pa. Hãmri ka mẽ amnhĩ wỳr mẽ omu nẽ tee ri ajapôx kaxyw nhũm mẽ awỳr agjê nẽ mẽ anhĩmex pa nẽ mẽ anhõ krĩja grành pa. Nẽ ahpỹnhã ri mẽ anhõrkwỹ grành pa. ã koja mẽ mẽmoj piitã grành par anẽ. Anẽ.

Jejus kot Tĩrtũm nhõrkwỹ hwỳr àr ã harēnh

Matêwre 21.12-17; Makre 11.15-19; Juãw 2.13-22

⁴⁵⁻⁴⁶Tã nhũm Jesus Jerujarẽ hwỳr axà nẽ jumēnre rũm wry hãmri nẽ ma Tĩrtũm mã amnhĩ jarēnh xà hã ixkreja wỳr tẽ. Hãmri nẽ hwỳr axà nẽ tee ri kamã mẽ pa xwỳnhjê pumunh o xa. Nhũm mẽ ra axtem nẽ môx nẽ ôwēhti nẽ tuuti ho wēnê ho kuhê. Mẽ kot haprôr nẽ Tĩrtũm mã hpar nẽ kãm ôr pê kãm amnhĩ jarēnh kaxyw mẽ kãm ho wēnê ho kuhê. Nẽ axtem nẽ mẽ kãm hã ohtô rax kãm mẽ kãm ho wēnê. Hãmri nhũm Jesus mẽ hwỳr axà nẽ tee ri mẽ omu mẽ kãm akir nẽ mẽ kãm: —Tk. Kwa nà. Tĩrtũm kapēr ã kagà htũm kot ôrkwỹ jarēnh kot: Inhõrkwỹja ãm mẽ ate inhmã amnhĩ jarēnh xà

hã ixkre pix kaxyw na. Anhÿr o kot harënh tã ka mẽ axtem nẽ kamã ã amnhĩ nhĩpêx anhÿr o apa. E mẽ ajapôj nẽ ma ajapêx tokyx anẽ. Anhÿr o mẽ kãm kapêr hãmri nẽ ixkre nê mẽ kator nhũm mẽ ma hapêx pa.

⁴⁷Tã nhũm Jejus apkati mẽ Tĩrtũm mã amnhĩ jarënh xà hã ixkreja wÿr mra nẽ kamã mẽ ahkre ho hkrĩ. Hãmri nhũm mẽ õ patre krãhtũm mẽ Tĩrtũm kapêr tũm o mẽ ahkre xwÿnhjê mẽ mẽ kot amnhĩ to rũnh xwÿnhjaja kot mẽ ahkre ma nhũm ja mẽ kêp omnuj nẽ nhũm mẽ kãm hpĩr prãm nẽ.

⁴⁸Nom nhũm amarĩ mẽ pa xwÿnhjaja mẽ kurom kãm mar prãm nẽ akryk mar o kuhê. Jakamã nhũm mẽ tee ri ja hã mẽ omu nẽ tanhmã mẽ kot hpĩr to hkukamã hã axpën ma.

Rukre 20

Mêhõ nhÿ hã Jejus kot mẽ ahkre hã harënh

Matêwre 21.23-27; Makre 11.27-33

¹Nhũm arĩgro hõ hã nhũm Jejus kê axte Tĩrtũm mã amnhĩ jarënh xà hã ixkreja wÿr axà nẽ mẽ ahkre ho nhÿ. Tanhmã mẽ kot amnhĩ nhĩpêx to nẽ nhÿrmã Tĩrtũm mẽ wa kuri htĩr tũm nẽ pa hã mẽ kãm kapêr o nhÿ. Hãmri nhũm Ijaew nhõ pahijê mẽ mẽ kot Tĩrtũm kapêr tũm o mẽ ahkre xwÿnhjê mẽ mẽ õ patre krãhtũmjaja hêx rom mar o kuhê.

²Hãmri nẽ kãm: —Kwa mẽ inhmã amnhĩ jarë. Mêhõ nhÿ hã na ka hte ã amnhĩ nhĩpêx anhÿr o ri apa? Na ka hte akupÿm mẽ ho mex o apa nẽ tanhmã mẽ ahkre hto ho apa. Xà amnhĩ krã hkôt na ka hte ã amnhĩ nhĩpêx anẽ nà? Anẽ.

³Hãmri nhũm mẽ kãm: —Nà ixkumrêx kot paj mẽmoj tã mẽ akukja. Ka mẽ inhma nẽ inhmã harë pa rĩ kormã tanhmã mẽ amã amnhĩ jarënh to.

⁴Finat Juãw Paxisja ã kot paj mẽ akukja. Mêhõ nhÿ hã na pre mẽ hkrã kumrãr o pa? Xà amnhĩ krã hkôt nà xà Tĩrtũm nhÿ hã? E mẽ atõ inhmã harë. Anẽ.

⁵⁻⁶Hãmri nhũm mẽ kuma nẽ tee ri kot tanhmã kutã kãm harënh to hkukamã hamaxpêr nẽ axpën mã: —Kwa tanhmã kot puj mẽ kãm harënh to? Jar mẽ

kot mar xwỳnhjaja na htem kêp Tĩrtũm nhỹ hã kapêr jarênh o pa xwỳnh ã harênh o pa. Tã kot puj mẽ kãm kot amnhĩ krã hkôt mẽ hkrã kumrãr o pa hã harê nhũm mẽ tee ri mẽ pama nê mẽ pakamã gryk tỳx nê. Nê mẽ paxêx rom mẽ pahte kãm pakapêr ã mẽ pahpumunh kurê kumrêx nê kên o mẽ pahtak o mẽ panhĩmex. Nom kot puj mẽ kãm Tĩrtũm nhỹ hã mẽ hkrã kumrãr ã harê nhũm mẽ pamã kapêr o: “ã kot anhỹr kênã na ka prem kapêr ma nê ra ixkôt amnhĩ xunhwỳr kêt nê?” Anê. Nà kot puj mẽ kãm tanhmã harênh to hkêt nê. Kot puj mẽ ãm kãm aa te mẽ pahte ja jarênh mar kêt pyrãk o harê. Anê. Mẽ kot tanhmã kãm nê nhũm kot ta pãnhã tanhmã mẽ kãm nê pymaj nhũm mẽ ãm tee ri kãm tanhmã nê hprãm kaprỳ o kuhê.

⁷Hãmri nê kãm: —Konên. Mẽ ixte mẽhõ nhỹ hã kapêr o pa hã omunhre hã. Anê.

⁸Hãmri nhũm mẽ kuma nê mẽ kãm: —Tk. Tôe kot pa xep ijaxwỳja mẽ amã tanhmã amnhĩ jarênh to hkêt nê. Ijaxwỳja ixte mẽhõ nhỹ hã ã ixte amnhĩ nhĩpêx anhỹr o ri ixpa hã amnhĩ pumunhre hã. Anê.

Mẽ àpênh punuj xwỳnhjê jarênh

Matêwre 21.33-46; Makre 12.1-12

⁹Nhũm Jejus arĩ Ijaew nhõ pahijê mã kapêr. Nê mẽ kot tanhmã hipêx to hkukamã mẽ kãm tanhmã amnhĩ jarênh to. No ãm amnhĩ tã kuxi nê mẽ kãm awjarê nê mẽ kãm: —Koja mẽhõ hpur ã hkwỳjê kot kamã kãm àpênh kaxyw mẽ kãm karõ. Hãmri nhũm mẽ ma hwỳr mra nê kamã mẽmo hy hkre nê hkre pa. Hãmri nhũm ra hpur nhõ dõnja nhỹhỹm nojarêt nê kãm mẽ àpênh xwỳnhjê mã tanhmã hpur jarênh to nê mẽ kãm: “E or ixpur nõ. Kê kamã mẽmoj hkà hpa ka mẽ mãmri kamã axujamỳnh pa nê ho axkjê. Nê ixkutêp inhõ jaxwỳ nê mãmri mẽ anhõ tanhmã ho hprãm xà hkôt tanhmã ho.” Anê. —Nhũm ã mẽ kãm kapêr anê hãmri nê ma nhỹhỹm mõ.

¹⁰—Tã nhũm ra hkà hpa. Nom nhũm hpur nhõ dõnja kormã krĩ hõ kamã ri hã ujahkre ho ri pa. Tã kuri kãm àpênh xwỳnhjê hõja nhũm akupỹm mẽ hwỳr kumê. Mẽ kot kãm kwỳ nhõr nhũm ma kot kãm o mõi kaxyw ma mẽ

hwỳr kumẽ nhũm ma mẽ hwỳr mỗ. Mỗõ nẽ mẽ hwỳr pỏj nhũm mẽ omu nẽ axtem nẽ unê nẽ htak nẽ akupỹm hano nhũm ma akupỹm ỹ kamã mỗ.

11Hãmri nẽ pỏj nhũm ỏ patrãwja tee ri omu nẽ hpãnhã ja mẽ nhũm ma mẽ hwỳr mỗ. Mỗõ nẽ mẽ hwỳr pỏj nhũm kê wem mã ho anẽ nẽ unê nẽ htak nẽ akupỹm hano nhũm wamta pyrà nẽ ma akupỹm ỹ kamã mỗ.

12—Hãmri nhũm kê axte hkỏt ja mẽ nhũm ma mẽ hwỳr mããnẽn mỗ. Ma mẽ hwỳr mỗ nẽ pỏj nhũm mẽ te ho wamta wa hipêx pyràk o hipêx nẽ unê nẽ htak rax nẽ amnhĩ nê hano nẽ pur nê kapỏt ã kumẽ. Hãmri nhũm ma akupỹm mããnẽn ỹ kamã mỗ.

13Nhũm mẽ ỏ patrãw tee ri mẽ omu nẽ hamaxpêr o: “Hêxta waa nẽ. Tanhmã kot paj amnhĩ nhĩpêx to? Nà kot paj mẽ hwỳr ixkra mãn mẽ. Inhmã hapê htã kot paj mẽ hwỳr kumẽ kê ma mẽ hwỳr mỗ. Hãmri nhũm mẽ kêp ixkra hã omu nẽ tanhmã ixpê ho hkỏt nẽ. Nẽ tã inhmã kãm inhỏja kwỳ gỏ.” Anhỳr o hamaxpêr hãmri nẽ ma mẽ hwỳr kumẽ nhũm ma mẽ hwỳr mỗ.

14—Tã ra mẽ hwỳr hpỏx o mỗ nhũm mẽ amỳm amnhĩ wỳr omu nẽ kêp hkra hã omu nẽ hã axpẽn mã amỳnê nẽ axpẽn mã: “E onêj hpur nhỏ dỏn krata tẽ. Kojã nhỹrmã ỏ papaj mỳr pê amnhĩm pur ã pyka pytà nẽ ho ỏ. Kwa pu mẽ hpĩr kurê kumrêx nẽ kêp hpurja o panhỏ. E tokyj pu mẽ kupĩ ri.” Anẽ.

15—Hãmri nhũm tẽ nẽ mẽ hwỳr pỏj nhũm mẽ unê nẽ pur nê ho kato nẽ ma o tẽ nẽ kupĩ. ã mẽ ujarẻnh kot anhỳr. Anẽ. Nhũm pre ã Jejus mẽ kãm ujarẻnh anẽ nẽ hã tanhmã mẽ hkukjêr to nẽ mẽ kãm: —E kojã hpur nhỏ dỏnja hkra jarẻnh ma hãmri nẽ tãm mẽ hwỳr mỗ nẽ tanhmã mẽ hipêx to wehe?

16Kojã ma mẽ hwỳr mỗ hãmri nẽ mẽ himex pa. Hãmri nẽ hpãnhã hpur ã nhãm mẽmojjê rẻ nhũm mẽ tã kãm hamãr mex o pa. Anẽ. Nhũm pre ã Jejus mẽ kãm ujarẻnh anẽ hãmri nhũm mẽ kot mar xwỳnhhtaja ujarẻnh kamã amnhĩ jarẻnh mar kurê kumrêx. Mẽ kot Tĩrtũm kot mẽ hwỳr rẻnh xwỳnhjê kapêr mar kêt nhũm mỳrapê mẽ kãm mẽ hkurê xwỳnhhaja kot mẽ kêp mẽ ỏ pika pytàr nẽ mẽ himex par ã amnhĩ jarẻnh ma nhũm ja mẽ kêp omnuj tỳx

ně. Hāmri ně hêx rom Jejus mã kãm: —Tk. Kwa nà nhỹx pre kêt pur nhõ dõnja ã mẽ hipêx anhỹr kêt ně. Aně.

¹⁷Hāmri nhũm mẽ kuma ně mẽ omunh o xa. Ně mẽ omunh pê mẽ no kagàr mã mẽ kãm kapěr ně mẽ kãm: —Nà ã mẽ hipêx anhỹr mã mẽ tãm kênã. Mãn ka prem ra Tĩrtũm kapěr ã kagà htũm kot ja jarěnh ma. Harěnh kot: Mẽ kot kěn o amnhĩm õrkwỹ nhĩpêx kaxyw ně kěn maati pumu ně htỹx omnuj ã hkamnhĩx ně hkaga. Mẽ kot hkaga htã Tĩrtũm mẽ kurom mex o kot kěn piitã hakrenh par ã omunh kurê kumrêx. Aně. ã Tĩrtũm kapěr ã kagà htũm kot mẽ ajarěnh te mẽ kot kěn maati punuj ã hkamnhĩx ně hkaga xwỹnhjê jarěnh pyræk o ã mẽ ajarěnh kot anhỹr. Aně.

¹⁸Nhũm pre ã Jejus mẽ kãm te kêp kěn maati pyræk o mẽ kãm amnhĩ jarěnh aně. Hāmri ně axte amnhĩ tã kuxi ně mẽ kãm axte kěn jarěnhhta pyrã ně mẽ kãm: —Nà kot kaj mẽ atõ ixkaga hāmri ně te mēhõ htỹx htēm ně kěn pumunh kêt ně hã htêk ně tēm pyræk o amnhĩ nhĩpêx. Jao ixkutã amnhĩ xãm. Rỳ ka tanhmã amnhĩ to ně ixkaga nhũm te kěn maati hõ htēm ně kot anhĩpy htēm ně axôm par pyræk o anhĩpêx ka amex kêt ně. Aně.

¹⁹Nhũm pre ã Jejus mẽ kãm ujarěnh kãm mẽ harěnh aně. Hāmri nhũm Tĩrtũm kapěr tũm o mẽ ahkre xwỹnhjê mẽ mẽ õ patre krãhtũmjaja kot mẽ kãm kěn jarěnh o te mẽ tãm harěnh pyrækja ma nhũm ja mẽ kêp omnuj tỹx ně. Jakamã nhũm mẽ kãm Jejus pynênh ně haxàr prãm ně. Nom amnhĩ tã kãm mẽ kot mar o kuhê xwỹnhjê puma ně.

Mẽ kot hêx rom Jejus kukjêr ã mẽ harěnh

Matêwre 22.15-22; Makre 12.13-17; mãânên Rõmãn 12.1; 13.6-7

²⁰Hāmri nhũm Tĩrtũm kapěr tũm o mẽ ahkre xwỹnhjê mẽ mẽ õ patre krãhtũmjaja Jejus tãnopxar o kuhê. Hāmri ně ra amnhĩ wỳr mẽmy hkwỳ hã karõ ně mẽ kãm: —E. Mẽ ma Jejus wỳr mra ně te mẽ ate hkôt amnhĩ xunhwỳr kaxyw pyræk o amnhĩ nhĩpêx ně mẽmoj tã ri hkukja. Mẽmoj tã hkukjêr rax ně. Kêr kê Rõm nhõ pahi Sesti kapěr kwỳm ri tanhmã mẽ amã kapěr to ka mẽ ama ně man akupỹn mra ně mẽ inhmã harěnh kurê kumrêx.

Pa mẽ ama nẽ ma hwỳr mra nẽ hã unê nẽ ma Sesti nhỹ hã mẽ pahto amnhĩptàr xwỳnhta wỳr o tẽ nẽ ìhkram haxà. Anẽ.

²¹Hãmri nhũm mẽ kuma nẽ mẽ kãm: —Tôe. Nà kot paj mẽ anẽ. Anẽ. Hãmri nẽ ma hwỳr mra nẽ hêx rom kãm kapër nẽ kãm: —Pa Jejus? Nà ãm hãmri na ka hte Tĩrtũm kapër o mẽ ahkre mex o ri apa. Na ka hte mẽ kamã akahak kêt nẽ. Nẽ mẽ kot tee ri tanhmã ato kapër punuj to htã ka aprĩ hã mẽ ahkre mex o ri apa.

²²Kwa mẽ inhmã mẽmoj jarẽ. Rõm nhõ pahihiti kot mẽ pahte kãm kàxpore hkwy nhõr ã mẽ pahpê Ijaew mã karõta. Kwa xà we ja amã mex nà? Xà kot pu mẽ kãm kugõ nà xà kot pu mẽ kãm õr kêt nẽ? E kwa mẽ inhmã tanhmã harẽnh to. Anẽ.

²³Nhũm prem ã hêx rom kãm kapër anhỹr tã nhũm ra mẽ hamaxpër ã mẽ omu nẽ mẽ kãm:

²⁴—E mẽ atõ anhõ kàxpore htỳxre japêr nẽ inhmã hõ gõ pa omu. Anẽ. Hãmri nhũm mẽ kãm ja gõ nhũm kupy nẽ omu nẽ kànhmã mẽ kãm kupẽ nẽ mẽ kãm: —E mẽhõ nhĩxi nẽ mẽhõ karõ na ja hã? Anẽ. Hãmri nhũm mẽ kãm: —Pahi Sesti karõ nẽ hixi na hã kênã. Anẽ.

²⁵Hãmri nhũm mẽ kuma nẽ mẽ kãm: —Tỳ. Tô kêr ka mẽ mãmrĩ kãm hkwy nhõr o apa. Hã hkarõ nẽ hã hixi. Tãm kot hipêx xwỳnh jakamã õ na. No mẽ kajaja na pre Tĩrtũm mẽ anhĩpêx nhũm mẽ apê õ jakamã kwa kêr ka mẽ kapër kôt pix mã ri amnhĩ nhĩpêx o ri apa. Anẽ.

²⁶Nhũm pre ã Jejus mẽ kãm kapër anẽ nhũm mẽ piitã mar o kuhê. Nhũm mẽ kot hêx rom kãm kapër mã xwỳnhjaja amnhĩ jaêr pê ã kot kàxpore jarẽnh anhỹrja ma. Hãmri nẽ tee ri axte mẽmoj tã hkukjêr nhũm kot pahi Sesti kwỳm ri kot tanhmã harẽnh to kaxyw ãm tee ri tanhmã hkukjêr to kaprỳ. Hãmri nẽ axte tanhmã kãm nẽ hkêt nẽ ãm akryk omunh pê mar o kuhê.

Akupỹm mẽ htĩr jarẽnh

Matêwre 22.23-33; Makre 12.18-27; Juãw 5.21; 6.39; mãänën Wam Korĩt 6.14; 15.12-28; Wam Tesarõn 4.13-18; Apokarip 20.4

27Tã nhũm Satusew nhõ xwỳnh kwỳjaja. Mẽ kot akupỹm mẽ htĩr mã hamaxpěr kêt jakamã mẽ htyk nẽ mẽ hapêx ã mẽ hkamnhĩx. Jakamã na prem tanhmã axpẽn mã Jejus jarẽnh to nẽ axpẽn mã: —E kwa pu mẽ ma hwỳr mra nẽ mẽmoj xihtỳx ã hkukja kê mẽ pama nẽ tee ri tanhmã mẽ pamã harẽnh to hkukamã hamaxpěr. Hãmri nhũm mẽ piitã ja hã omu nẽ àhpumunh tỳx kêt ã omunh kurê kumrẽx. E ma pu mẽ hwỳr. Anẽ nẽ ma hwỳr mra nẽ Parijew nhõ xwỳnhjê pyrà nẽ hêx rom ahkukja nẽ kãm:

28—Pa Jejus? Kwa mẽ inhmã mẽmoj jarẽ. Na pre finat Mojesja Tĩrtũm nhỹ hã mẽ panhĩgêt mã ã karõ anẽ. Mẽ hkra hkêt rãhã mẽ pa nẽ mẽ htyk xwỳnhjaja nhũm mẽ harẽnh o: Koja mẽhõ hprõ nẽ kormã kamã hkra hkêt rãhã pa nẽ ty. Hã koja hkõt htõja hpãnhã hprõta o hprõ nẽ kamã hkra. Hãmri nhũm kato nẽ te kệp htõ htyk xwỳnhhta hkra pyræk. Anẽ. Na pre ã Mojes mẽ kãm karõ anẽ.

29Jakamã kwa ga mẽ ixujarẽnh ma. Koja mẽ kot axpẽn to htõ xwỳnhjaja kệp 7. Nhũm kot waja mẽhõ ho hprõ nẽ wa pa nhũm kamã hkra hkêt rãhã ty. Nhũm hkõt htõ hõta hpãnhã hprõ ho hprõ

30nẽ wa axpẽn to pa. Nhũm mãănẽn ty. Kamã hkra hkêt rãhã ty.

31—Nhũm htõ hõta. Haxwỳja hpãnhã tãm o hprõ nẽ wa axpẽn to pa grire nhũm haxwỳja kamã hkra hkêt rãhã ty. Hãmri nhũm htõ hkwỳjaja piitã nija pyxi nẽ axpẽn pãnhã ho hprõ hpa. No ãm mẽhõ kamã hkra hkêt rãhã ra htyk pa.

32Hãmri nhũm mẽ hprõta mẽ hkõt amnhĩ to hapu nẽ ty.

33Tã Tĩrtũm kot akupỹm nhỹrmã mẽ ho htĩr ronhỹx nhỹ nhỹx kệp nija mjên kumrẽx? Ra piitã kot ho hprõ kênã. E mẽ inhmã ja jarẽ. Anẽ.

34Hãmri nhũm Jejus mẽ kãm: —Nà kaxkwa kamã mẽ kot amnhĩ nhĩpêxja axtem na. Pika ja kamã na htem pa nẽ àptàr nhũm mẽ axpẽn mã mẽ kure. Ja mex.

³⁵No mẽ kot Tĩrtũm kõt amnhĩ xunhwỳr xwỳnhjaja na htem ty hãmri nẽ Tĩrtũm nhõ krĩ kamã kuri axte kãm hprõ hprãm kêt nẽ ri pa. Rỳ ni japêr nẽ kãm mjên prãm kêt nẽ ri pa.

³⁶Hãmri nẽ Tĩrtũm kapêr o mẽ wrỳk xwỳnhjê pyrà nẽ axte htyk kêt nẽ. ãm htĩr tũm rãhã nẽ pa ho pa. Tĩrtũm ra akupỹm kot mẽ ho htĩr jakamã koja mẽ kêp hkra nẽ kuri htĩr tũm nẽ mex nẽ pa ho pa nẽ axte kãm hprõ rỳ mjên prãm kêt nẽ ri pa.

³⁷—Nom mẽ ate akupỹm mẽ htĩr mã ajamaxpêr kêt ã harênhja kot paj mẽ amã harê. Amnepêr na pre Tĩrtũmja pĩ hpõk kamã Mojes mã kapêr nẽ kãm: Ixpê Apraãw nhõ Tĩrtũm na pa. Nẽ mãânên ixpê Apraãw kra Ijak mẽ htãmnhwỳ Jako wa õ Tĩrtũm na pa. Anhỹr o Mojes mã amnhĩ jarê nhũm kuma nẽ hã kagà.

³⁸Kêp apu arĩ mẽ htyk rãhã nhỹx pre ã mẽ harênh anhỹr kêt nẽ. Nhỹx pre mẽ harênh o: “Amnepêr Apraãw nẽ hkra nẽ htãmnhwỳ mẽ htĩr ri ixpê mẽ õ Tĩrtũm na pa pre.” Anhỹr o nhỹx pre mẽ harê. Nom na pre ã amnhĩ jarênh anhỹr kêt nẽ. Mẽ pamã te Apraãwja mẽ htyk nẽ mẽ hapêx pyræk. Nom nhũm prem ra Tĩrtũm ri akupỹm htĩr nẽ mex nẽ pa ho pa. Tã ka htem Tĩrtũm kapêr kwỳm ri akupỹm mẽ htĩr kêt ã mẽ harênh o apa. Anẽ.

³⁹Nhũm pre ã Jejus mẽ kãm kapêr anẽ. Hãmri nhũm Tĩrtũm kapêr tũm o mẽ ahkre ho mẽ pa xwỳnh kwỳjaja kuma nẽ tee ri axte tanhmã kãm nẽ hprãm kaprỳ nẽ kãm: —Tỳ. Nà ãm hãmri na ka ã ja jarênh anẽ. Anẽ.

⁴⁰Hãmri nhũm mẽ axte mẽmoj tã hkukjêr kêt nẽ. Tanhmã kot wem amnhĩ to nẽ hamaxpêr o hakre? Na prem ãm tee ri kãm hamaxpêr o hakrenh prãm kaprỳ ho kuhê. Jejus kot mẽmoj piitã hkukamã àhpumunh tỳx o àhpumunh tỳx.

Jejus kêp pahi finat Tawi nhõ Pahihti hã kot amnhĩ jarênh

Matêwre 22.41-46; Makre 12.35-37; mãânên Rõmãn 1.3-4

⁴¹Tã nhũm Jejus kãnhmã xa nẽ amnhĩ tã tanhmã mẽ kot mar o kuhê xwỳnhjê hkukjêr to. Nom te nhãm mẽhõ hã mẽ hkukjêr pyrà nẽ mẽ kãm: — E kwa mẽ inhmã mẽmoj jarê. Tĩrtũm kot mẽ akaxyw ãm mã xwỳnhhta ã na

pa mẽ akukja. Mo na htem axpën mã kêp finat pahi Tawi kanrêhã htàmnhwỳ pix ã harẽ nẽ mãănẽn kêp ò pahihti hã harênh kêt nẽ?

⁴²Na pre Tawi Tĩrtũm kapêr kwỳ hã kagà nẽ tanhmã harênh to. Tĩrtũm mex ã mẽ grer xàja kwỳ kamã harẽ nẽ hã kagà nẽ hã kagà ho: Na pre Tĩrtũm inhõ Pahihti mã ã kapêr anẽ nẽ kãm: “E amnẽ ixwỳr tẽ nẽ inhĩhkô hã nhỹ nẽ inhmã mẽ ho amnhĩptàr o akrĩ.

⁴³Kot paj mẽ kot kãm akurê xwỳnh piitã mẽ unênh pa nẽ awỳr mẽ o mra nẽ anhĩhkram mẽ haxàr pa.” Anhỹr o pre kãm kapêr. Anẽ.

⁴⁴Na pre ã Tawija Tĩrtũm kot Kris mã kapêr jarênh anẽ. Mẽ kajaja na ka htem ãm kêp Tawi kanrêhã tàmnhwỳ pix ã ri axpën mã harênh o ri apa. No kêt Tawi na pre kêp ò Pahihti hã harênh o pa. Anẽ.

Jejus kot tanhmã Tĩrtũm kapêr tũm o mẽ ahkre xwỳnhjê jarênh to

Matêwre 23.1-12; Makre 12.38-40

⁴⁵Nhũm pre ã Jejus mẽ kãm kapêr anẽ nhũm mẽ piitã mar o kuhê. Hãmri nhũm hpãnhã hkôt mẽ pa ho mẽ pa xwỳnhjê mã kapêr nẽ mẽ kãm: —Kwa mẽ o kora. Kêr ka mẽ Tĩrtũm kapêr tũm o mẽ ahkre xwỳnhjê kot amnhĩ nhĩpêx o amnhĩ nhĩpêx kêt nẽ. ãm mẽ omu nẽ ãm mẽ omu nẽ mẽ kot amnhĩ nhĩpêx kôt amnhĩ nhĩpêx o ri apa hkêt nẽ.

⁴⁶Na htem mẽ piitã mẽ kot mẽ hã hpijaàm kaxyw mẽ ê mex pix kãm ri pa. Nẽ mẽ kãm mẽ piitã mẽ kot amnhĩm mẽ rũnh xwỳnh ã mẽ harênh o mẽ paja na mẽ kãm hprãm. Nẽ mẽ panhõ Tĩrtũm kapêr o mẽ ahkre xà hã ixkre kamã mẽ kãm amnhĩ to rũnh xwỳnhjê hkrĩ xà mex pix ã na mẽ kãm mẽ hkrĩ hprãm. Nẽ mẽmoj tã mẽ hkĩnh ã arĩgro hã nhũm htem mẽ apkur xà hã ixkre hwỳr akuprõ nẽ mẽ kãm mẽ kot amnhĩ to rũnh xwỳnhjê hkrĩ xà mex pix ã mẽ kãm mẽ hkrĩ hprãm. ã na htem amnhĩ nhĩpêx anhỹr o pa.

⁴⁷—Nẽ mẽ kêp mẽ mjên htyk xwỳnhjê ho ajuta ho pa hã amnhĩ jarênh tã ãm amnhĩ to hêx nẽ axtem nẽ mẽ nokupyr pê mẽ kêp mẽ hikukrêx piitã ho hapêx par o pa. Nẽ mẽ kêp mẽ òrkwỹ pytà. Nẽ mẽ hêx rom te tãm mẽ kot amnhĩ nhĩpêx pyrà nẽ Tĩrtũm mã amnhĩ jarênh japjêê ho kuhê. Mỳrapê koja mẽ mex kêt nẽ. Koja Tĩrtũm tanhmã ja hã mẽ hipêx to rax nẽ. Jakamã kwa

kêr ka mẽ ã mẽ kot amnhĩ nhĩpêx anhÿr xwÿnhjê hkôt amnhĩ nhĩpêx o apa hkêt nê. ãm kwarĩ ho kwarĩ. Anê.

Rukre 21

Kêp mjên htyk xwÿnh jarênh

Makre 12.41-44

¹Nhũm Jejus kormã Tĩrtũm mã amnhĩ jarênh xà hã ixkre kamã mẽ omunh o xa. Na pre hte Ijaew piitã ixkreta ho mex kaxyw kãm mẽ hikàxpore hkwÿ nhõr o pa. Jakamã nhũm mẽ hikàxpore rũnh xwÿnhjaja hwÿr agjê nê kamã kàxpore gjênh xà kamã hkwÿ gjê nê ma akupÿm mra.

²Jakamã nhũm mẽhõ ni pê mjên htyk xwÿnh haxwÿja hwÿr axà. Kêp amrakati kumrêx nê hikàxpore tÿxre ãm axkrutre htã mẽ hpãnhã hwÿr axà. Nê kãm Tĩrtũm kĩnh xàj hamê kamã kuxà hãmri nê kato nê ma akupÿm tẽ.

³⁻⁴Hãmri nhũm Jejus arĩ omunh o xa. Kot ã amnhĩ nhĩpêx anhÿr ã omunh o xa nhũm ja kãm mex nê. Hãmri nê hkôt mẽ pa ho pa xwÿnhjê mã harê nê mẽ kãm: —E mãn ka mẽnire htêm mũj pumu. Kêp amrakati nê hikàxpore ãm kêp grire htã amnhĩ pê õr pa. Kwÿjê rom kãm Tĩrtũm kĩnh xàj amnhĩ pê õr par kumrêx. Apkur xà hã hikàxpore na. Mẽ hkwÿjaja na htem hikàxpore hkwÿ ho mra nê kugjê nom arĩ mẽ hikàxpore rax. No nhũm nire nêj mẽ kurom kãm hikàxpore japê hkêt nê. Nê ho õxÿ hkêt nê àmnhĩx piitã Tĩrtũm mã õr pa. Anê.

Mẽ kot amnhĩ tomnuj xwÿnhjê hkukamã mẽ harênh

Matêwre 24.1-2; Makre 13.1-2

⁵Tã hãmri nhũm Jejus kôt mẽ pa ho mẽ pa xwÿnhjaja kormã Tĩrtũm mã amnhĩ jarênh xà hã ixkre kaxwÿnh pumunh o kuhê nê axpên mã harê nê axpên mã harênh o: —Hêxta waa nê. Ixkreja mex kumrêx. Kên rũnh o mẽ kot hipêx jakamã mex o mex. Nê mẽ kot ri Tĩrtũm mã hkĩnh xà nhõr nêj haxwÿja piitã mex. Anê. Hãmri nhũm Jejus mẽ kuma nê mẽ kãm:

⁶—Nà mex tã koja nhÿrmã mẽ kãm Tĩrtũm kurê xwÿnhjaja granh pa. Koja arĩ kên õ axkrutre nê axpên mynh nê nõr kêt nê. Koja piitã angrã nê ahpÿnhã ri hikwÿ. Anê.

⁷Nhũm pre ã mẽ kot hipêx anhÿrja kukamã mẽ kãm mẽ harênh anê nhũm mẽ tee ri hkukamã hamaxpêr nê kãm: —Kwa xà koja mẽ ã hipêx anê? Kwa mẽ inhmã aprĩ hã mẽ kot ixkre grành parta jarê. Xà koja mẽ tokyx ho anê nà xà kormã? Kwa mẽmo koja wÿj ri tanhmã amnhĩ nhĩpêx to? Anê.

⁸Hãmri nhũm mẽ kãm: —Nà nhÿrmã mẽmoj piitã hapêx kaxyw tanhmã amnhĩ nhĩpêx to kumrêx kot paj mẽ amã harê ka mẽ inhma. Koja mẽ ohtô nê mẽ apê ixkrajê hwÿr mra nê hêx rom te pa ixte amnhĩ nhĩpêx pyrãk o amnhĩ nhĩpêx o pa. Nê tanhmã mẽ amã amnhĩ jarênh to nê amnhĩ jarênh o: “E mẽ ixpumu. Pa na pre Tĩrtũm mẽ awÿr inhmê. Ixpê kaxkwa rũm ixwryk xwÿnh na pa.” Anhÿr o mẽ akôt mẽ amã amnhĩ to hêx o pa. Hãmri nê mẽ amã: “E ot pa ra mẽ ato amnhĩptàr kaxyw mẽ awÿr wrÿ.” Anhÿr o amnhĩ jarênh o mẽ akôt pa. Nom kêr ka mẽ ãm mẽ ama nê ãm mẽ ama. ãm mẽ kot mẽ amã amnhĩ to hêx o pa kênã. Kormã akupÿn ixpôx xà hã arĩgrota kormã.

⁹—Nê koja mẽ nhÿri awry hã axpên par o pa. Nê mẽ atãã axpên par o pa. Nom kêr ka mẽ harênh ma nê ri tee ri tokyx mẽmoj piitã hapêx kukamã ajamaxpêr kêt nê. Mẽmoj piitã hapêx xà hã arĩgrota kormã.

¹⁰Koja mẽmoj piitã hapêx kaxyw nhũm ahpÿnhã ri pika piitã hkôt mẽ pa xwÿnhjaja axpên kutã amnhĩ xunhwÿ nê pijapu nê axpên pa.

¹¹Nê koja pika piitã hkôt tanhmã ahpÿnhã mẽ à kute mẽ hamÿ nhũm mẽ amnhĩ xà htÿx kamã hamak o pa. Nê koja pikaja tertet tÿx nê. Nê koja mẽ nhÿri pika hkwÿ kamã prãm xàj hpikapràr pa. Nê koja kaxkwa kamã mẽmoj tanhmã amnhĩ anhĩpêx to nhũm pika nhõ xwÿnhjaja tee ri omu nê kãm ma htÿx kumrêx nê htertet o kuhê. Koja mẽmoj ã amnhĩ nhĩpêx anê pa rĩ kormã akupÿn mẽ awÿr wrÿ nhũm mẽmoj piitã hapêx pa. Koja mẽmoj ã amnhĩ nhĩpêx anê.

¹²—E Tĩrtũm mã amnhĩ jarênh xà hã ixkre grành par xwÿj ri mẽmoj tanhmã hkukamã kot amnhĩ nhĩpêx to hã mẽ ate ixkukjêr xwÿnhhta kot paj hpãnhã mẽ amã harê ka mẽ inhma. Koja mẽ kãm ixkurê xwÿnhjaja mẽ awÿr mra nê ixtã mẽ apynê nê tanhmã ixtã mẽ anhĩpêx to. Nê ma mẽ pikuprõnh xà hã

ixkreja wÿr mẽ ato mra nẽ kamã mẽ kãm tanhmã mẽ ato kapër punuj to. Nhũm mẽ kuma hãmri nẽ ma mẽ ato mra nẽ mẽ ajagjê. Mẽ ate ixkõt apa ho apa jakamã koja mẽ ã mẽ anhĩpêx anẽ. Nẽ mẽ õ pahihti hwÿr mẽ ato mra nẽ mẽ kãm tanhmã mẽ ato kapër punuj to.

13Tã kêr ka mẽ kutã akrĩ nẽ axàmnhĩx mãmri tanhmã mẽ kãm ijarẽnh to ho akrĩ.

14—Nom kwa kêr ka mẽ kãm tanhmã amnhĩ jarẽnh to hkukamã tee ri ajamaxpër o ri mẽ amã mẽ uma hkêt nẽ. Rÿ mẽ ajamaxpër o: “Hêxta waa nẽ. Tanhmã koja we mẽ kot ixkukjêr ã arĩgrota ã pa we ri mẽ kãm ixkapër to?” Anhÿr o tee ri amnhĩ kukamã ajamaxpër kêt nẽ. ãm amnhĩ kaxyw inhmã pix mã ajamaxpër tÿx rãhã nẽ.

15Tanhmã mẽ kot mẽ anhĩpêx to hã arĩgrota ã kot paj tanhmã mẽ akrã hto ka mẽ inhÿ hã tanhmã mẽ kãm amnhĩ jarẽnh to. Hãmri nhũm mẽ amnhĩ tã mẽ ama nẽ axte tanhmã mẽ ato kapër to hkukamã tee ri hamaxpër o kuhê.

16—Nẽ koja mẽ anhĩpêxà nẽ mẽ akatorxà nẽ mẽ atõ nẽ mẽ akràmnhwÿjaja. Nẽ kaxyw krĩ hkõt mẽ akwÿjaja ixtã mẽ atã amÿnê nẽ ma mẽ õ pahi hwÿr mẽ ato mra nhũm mẽ ajagjê nẽ mẽ akwÿjê pa.

17Koja mẽ piitã ixtã mẽ akamã gryk nẽ kãm mẽ akurê nẽ.

18-19Nom mẽ kot ã mẽ anhĩpêx anhÿr mã tã kêr ka mẽ amnhĩ to htÿx nẽ ixkaga hkêt nẽ. Mẽ kot mẽ apar tã ka mẽ kaxkwa kamã akupÿm atĩr kurê kumrêx. Hãmri nẽ ã mẽ kot mẽ anhĩpêx anhÿr xwÿnhjê rom Tĩrtũm mẽ wa ixri atĩr tũm nẽ amex rãhã apa ho apa. Mẽ kot tanhmã mẽ ato htã mẽ ate kaxkwa kamã atĩr tũm nẽ apa mã xwÿnh jakamã kwa kêr ka mẽ tee ri amnhĩ kukamã ajamaxpër o ri apa hkêt nẽ.

20—Koja nhÿrmã nhÿhÿnh pôristi ohtô nẽ mra nẽ Jerujarê hwÿr pøj hãmri nẽ mẽ kãm hipôk pa nẽ kuhê. Ka mẽ ja hã mẽ omu nẽ mẽ kot krĩja grãnh par mã ajamaxpër kurê kumrêx.

21Koja mẽ ã amnhĩ nhĩpêx anẽ ka mẽ amÿm amnhĩ wÿr mẽ omu hãmri nẽ ajapøj nẽ ma aprõt nẽ amrar kurê kumrêx. Mẽ apê jar pika pê Jutej kamã

mě apa xwỳnhjaja ka mẽ omu nẽ mẽ kot mẽ apar pymaj ma aprõt nẽ amrar kurê kumrêx. Hixêt prêk wỳr ajapôj nẽ aprõt nẽ ma mra. —Nẽ kê Jerujarẽ nhõ xwỳnhjaja mẽ umaj haxwỳja hapôj nẽ ma hprõt nẽ ma mrrar o mra. — Nẽ jar kapôt ã ri mẽ pa xwỳnhjaja kê mẽ akupỹm krĩ hwỳr gjêx kêt nẽ. ãm ma mẽ umaj hprõt nẽ mrrar kurê kumrêx.

22—Mẽ kot amnhĩ tomnuj mỳrapê koja Tĩrtũm ã mẽ hwỳr mẽ kãm mẽ hkurê xwỳnhjê rênh anẽ. Kapêr ã kagà htũm ra kot mẽ hkukamã ja jarênh kot anhỹr. Jakamã koja mẽ nhỹrmã mẽ hkukamã mẽ harênh xàja kôt ã mẽ hipêx anẽ.

23—No mẽ htujarô xwỳnhjaja nẽ mẽ hkra karàre xwỳnhjaja koja mẽ kêp mẽmoj omnuj tỳx nẽ. Tanhmã kot mẽ amnhĩ to nẽ hprõt tỳx? Nà pika ja kamã koja mẽ piitã mex kêt nẽ. Mẽ kot amnhĩ tomnuj mỳrapê koja Tĩrtũm ã mẽ hipêx anẽ.

24Koja mẽ nhỹhỹnh krĩ hõ rũm mẽ hwỳr mra nẽ mẽ unê nẽ mẽ hkamnhwỳr o mẽ kupa. Nẽ mẽ hkwỳjê pynê nẽ ma nhỹhỹm ahpỹnhã mẽ õ pika hwỳr amnhĩ kôt mẽ o pa nhũm mẽ kamã mẽ hkôt pa ho pa. Koja mẽ kêp Ijaew kêt xwỳnhjaja Jerujarẽ o amnhĩptà nẽ ã mẽ hipêx anẽ. Nẽ kamã pa ho pa rãhã nhũm Tĩrtũm nhỹrmã akupỹm nê mẽ kator pa. Tã koja mẽ nê mẽ kator parja o pa ra akupỹn mẽ awỳr inhnojarêt. Anẽ. Nhũm pre ã Jejus mẽ kãm mẽ kot Jerujarẽ grành par xwỳnhjê hkukamã harênh anẽ.

Akupỹn Jejus wrỳk xwỳj ri mẽmoj kot tanhmã amnhĩ nhĩpêx to

Matêwre 24.29-35; Makre 13.24-31; mãänën Sikũn Pêtre 3.10; Apokarip 1.7

25Nhũm Jejus arĩ hkôt mẽ pa ho pa xwỳnhjê mã kapêr nẽ mẽ kãm: —Nẽ kot paj nhỹrmã akupỹn mẽ awỳr inhnojarêt nhũm kaxkwa kamã kanhêti nẽ myyti nẽ mytwrỳre axtem tanhmã ri amnhĩ nhĩpêx to. Nhũm gô xujanãr haxwỳja hkokko htỳx jao axpên tak tỳx nẽ. Hãmri nhũm pika piitã hkôt mẽ pa xwỳnhjaja kuma nẽ omu nẽ nẽ kãm ma htỳx nẽ mur nẽ htertet nẽ tee ri amnhĩ kukamã hamaxpêr.

26—Ně koja Tirtūm tanhmā kaxkwa ho àk to nhūm kanhêti piitā pikarêr pa. Hāmri nhūm pika hkôt ri mẽ pa xwỳnhjaja omu mẽ tee ri amnhĩ kukamā hamaxpêr o amnhĩ japrār pa mẽ hikwỹ.

27-28Koja ā mẽmoj amnhĩ nhĩpêx anê ka mẽ ja hã omu mẽ akupỹn mẽ awỳr inhnojarêt mã ajamaxpêr kurê kumrêx. Hāmri mẽ mẽ kot ixkôt amnhĩ xunhwỳr kêt xwỳnhjê rom akĩnh kãm ijapêr arīt o akuhê. —Nà kot paj akupỹn mẽ awỳr wrỳ. Kakrã kamā hirã htỳx kãm akupỹn ixihtỳx kãm mẽ awỳr wrỳ. Hāmri ka mẽ apiitā pika piitā hkôt ano ho ixpumu. Kot paj ā ixwrỳk anê hāmri mẽ mẽmoj punuj piitā pê mẽ apytār pa. Jakamā ka mẽ ā mẽmoj kot amnhĩ nhĩpêx anhỹrja ā omu hāmri mẽ tokyx ixkôt axàpirta mã ajamaxpêr mẽ akĩnh tỳx mẽ. Anê.

29—E ga mẽ pĩ hpār mũj pumu.

30Na hte mẽmo mytwrỳ hã rã nhūm mẽ omu mẽ ô hkukamā hamaxpêr.

31Ja pyrà mẽ koja ā mẽmoj amnhĩ nhĩpêx par anhỹr mẽ ka mẽ omu mẽ akupỹn mẽ awỳr ixwrỳkja mã ajamaxpêr kurê kumrêx.

32Koja akupỹn ixpôx kêt ri mẽ kot ā mẽmoj kot amnhĩ nhĩpêx anhỹr pumunh xwỳnhjaja kormā piitā htyk kêt ri pa ra akupỹn wrỳ.

33—Ně koja nhỹrmā pika mẽ kaxkwa wa hapêx pa. Tã no ãm ixkapêr koja wa uràk mẽ aa hapêx kêt mẽ. Koja ãm rãhã ho rãhã. Kot paj aa ihkjê ho tanhmā mẽnh to hkêt mẽ.

34-35—Ně kwa mẽ o kora. Mẽ axkãm ajamak rom. Mẽ kot ixkôt amnhĩ xunhwỳr kêt xwỳnhjaja na htem kãm tanhmā amnhĩ nhĩpêx to hprãm xà hkôt pix mã tanhmā amnhĩ nhĩpêx to ho ri pa. Jao ãm amnhĩ xàpkur xà mẽ amnhĩ to mex xà mẽ kàxpore pix kukamā hamaxpêr o pa. Nẽ htỳx ri tanhmā amnhĩ tomnuj to ho pa. Nẽ pipãnh kãm tanhmā amnhĩ to ho pa. Tã koja mẽ ã amnhĩ nhĩpêx anhỹr o pa rãhã pa ra mẽ haêr pê akupỹn wrỳ nhūm mẽ tee ri ixpumu mẽ kãm ma htỳx kumrêx. Te tutre htỳx ri harôj kajyr o pa mẽ rapuuti hwỳr àr nhūm kot haê mẽ unênh nhūm tee kãm kator prãm pyræk.

Koja mẽ ã amnhĩ nhĩpêx anê. Nom kêr ka mẽ ho mẽ uràk kêt nê. ãm pa inhmã hprãm xà hkôt pix mã tanhmã inhmã amnhĩ nhĩpêx to rãhã ho ri apa.

³⁶—Tã kêr ka mẽ ã mẽ kot amnhĩ tomnuj o pa anhỹrja kôt amnhĩ nhĩpêx o apa pymaj amnhĩ to Tĩrtũm wỳr rãhã ho apa. Kê tanhmã mẽ ato hihtỳx to ka mẽ ỹ hã ho mẽ uràk kêt nê. Kêr pa nhỹrmã akupỹn wrỳ ka mẽ ixpumu nê mẽ kurom amnhĩ kamã akahak kêt nê akĩnh tỳx nê man ixwỳr mra. Anê. Nhũm pre ã Jejus hkôt mẽ pa ho mẽ pa xwỳnhjê jahkre anê.

³⁷Hãmri nê apkati mẽ Tĩrtũm mã amnhĩ jarênh xà hã ixkre kamã mẽ pikuprõnh xwỳnhjê jahkre ho hkrĩ. Nhũm kamàt nhũm hkôt mẽ pa ho mẽ pa xwỳnhjê mẽ mẽ krĩ rũm hapôj nê ma hixêt prêk pê Oriwêhti hwỳr mra nê kamã amnhĩm hikra nê hikwỹ.

³⁸Nhũm kwỳhtã nhũm mẽ kànhmã hkrĩ nê ma akupỹm krĩm mra nê ixkreja wỳr agjê. Hãmri nhũm mẽ piitã hã akuprõ nê kot mẽ ahkre hã mar o hkrĩ.

Rukre 22

Mẽ kot Jejus ã àmnênh ã mẽ harênh

Matêwre 26.14-16; Makre 14.1-2; Juãw 11.47-57

¹Tã nhũm Ijaew kĩnhã arĩgro pê Pasja àhtêp o mỗ. Pas ã na htem amnepêm Tĩrtũm kot pika pê Ejit pê mẽ hpãmjê kator mã hamaxpêr kaxyw axpên wỳr akuprõ nê hã hkĩnh. Na htem arĩgroja jarênh o: “Pas” anhỹr ã harê. Nê mããnênh harênh o: “Mẽ pahte pãw kaxkrit kêt kur ã arĩgro.” Anhỹr o harê.

²Jakamã nhũm mẽ õ patre krãhtũmjê mẽ Tĩrtũm kapêr tũm o mẽ ahkre xwỳnhjaja ra kãm Jejus pĩr prãm nê. No mẽ kãm hkôt mẽ kot kapêr mar xwỳnhjê pyma nê. Nê tee ri kot tanhmã ho hkukamã hamaxpêr nê axpên mã: —Hêxta waa nê. Kwa tanhmã kot puj wem ho nê mẽ kêp kupĩ? Kot puj mẽ noo mã tanhmã ho nhũm mẽ hã mẽ pakamã gryk tỳx kumrêx. Anê.

Jut Kariot kot Jejus ã àmnênh ã harênh

Matêwre 26.14-16; Makre 14.10-11; Juãw 13.21-30

³⁻⁴Tã nhũm Jut Kariotja. Jejus nhỹ hã mẽ ahkre ho pa xwỳnh pê 12 hõ na pre. Tã axtem nê tanhmã hamaxpêr to nê Satanasti nhỹ hã ma mẽ õ patre krãhtũm mẽ Tĩrtũm mã amnhĩ jarênh xà hã ixkre jamãr xwỳnh krãhtũmjê

hwÿr tẽ. Hãmri nẽ tanhmã Jejus o mẽ mar to nẽ mẽ kãm: —E ot pa mẽ amã Jejus jarẽnh o tẽ. Xà kot paj mẽ amã hã amÿnê ka mẽ hpãnhã inhmã amnhĩre nà? Anẽ.

⁵Hãmri nhũm mẽ kuma nẽ hkĩnh nẽ. Hãmri nẽ kãm: —Nà kot paj mẽ amã amnhĩre.

⁶Hãmri nhũm mẽ kot kãm amnhĩrer ã harẽnh ma nẽ hkĩnh nẽ mẽ kãm: —Tôe. Nà kot paj mẽ amã ho anẽ. Anẽ. Hãmri nẽ ma tẽ nẽ kato. Nẽ Jejus pynênh kaxyw htãnopxar o ri hkôt pa. Mẽ kot mar o pa xwÿnhjê hkàx ã nhÿri unênh nẽ ma mẽ hwÿr o htẽm kaxyw.

Jejus kot ÿ hã mẽ ahkre xwÿnhjê kutã apkur ã harẽnh

Matêwre 26.17-25; Makre 14.12-21; Juãw 13.21-30

⁷Tã nhũm Pasja kato. Amnepêm Ijaewjê nhĩgêjtjaja na prem ôwêhti hkrare hkwy hpar o pa. Tirtũm kot ja hã mẽ omunh nẽ Ejit kãm mẽ kãm mẽ hkurê xwÿnhjê nhĩhkra nẽ mẽ kator kaxyw nhũm prem ã amnhĩ nhĩpêx anẽ. Jakamã na htem arĩ mẽ kêp mẽ hkanrêhã mẽ htãmnhwÿjaja arĩgro pê Pas ã axpên wÿr akuprõ nẽ mẽ kãm hamaxpêr pê mẽ uràk nẽ ôwêhti hkrare hkwy hpa. Hãmri nẽ pãwti kaxkrit kêt kãm kuku.

⁸Jakamã nhũm Jejus ÿ hã mẽ ahkre ho mẽ pa xwÿnhjê wa ho axkrut nẽ mẽ amnhĩ kukamã wa kumẽ. Simãw Pêtre mẽ Juãwja nhũm wa mẽ amnhĩ kukamã wa kumẽ nẽ wa kãm: —E wa ma mẽ ixkukamã tẽ nẽ mẽ ixkutêp Pas ã mẽ panhõ hã apê. Anẽ.

⁹Hãmri nhũm wa kuma hãmri nẽ kãm: —Tôe. Nhÿri kot paj we wa tẽ nẽ mẽ akutêp hã apê? Anẽ.

¹⁰Hãmri nhũm wa kãm: —Nà wa mãmri ma Jerujarẽ hwÿr wa tẽ. Nẽ hwÿr axà nẽ mẽhõ mytita pumunh kurê kumrêx. Nhũm amnhĩm gô ru nẽ amnhĩ kre hã poti xãm nẽ o tẽ. Ka wa omu nẽ hã ajêt nẽ ma hkôt ôrkwy hwÿr tẽ.

¹¹Hãmri nẽ ixkre nhõ dôn pumu nẽ kãm: “E jar na pa wa awÿr tẽ. Jejus na wa inhmẽ pa wa awÿr tẽ. Na awÿr pêr mênh o: ‘Nhÿri kot paj ixkôt ri mẽ pa ho mẽ pa xwÿnhjê mẽ axpên kutã Pas ã apku?’ Anẽ. Na ã awÿr hpêr mênh anẽ.” Anẽ.

12—E ã kãm akapër anẽ kê war ama nẽ ra war amã õrkwỹ nhĩmõk ã ixkre rax õ jahkre. Kamã ra kaxyw mẽ paxàpkur xà hã mẽmoj piitãã. Ka wa omu hãmri nẽ mãmri mẽ ixkutêp kamã mẽmoj tã apê. Anẽ.

13Hãmri nhũm wa kuma nẽ ma krĩm tẽ. Ma tẽ nẽ hwỳr axà hãmri nẽ ra kot wa kãm mẽmoj jarẽnh xà hkõt mẽmoj piitã omu hãmri nẽ mẽ kutêp mẽõ hã àpênh o wa xa.

14Tã nhũm myt axà nhũm mẽ wa hkõt mõi nẽ ixkreta wỳr àpir pa. Hãmri nẽ apkur kaxyw hkrĩ hpa nhũm Jejus mẽ ãhkõ hã nhỹ.

15Hãmri nẽ mẽ kãm tanhmã amnhĩ jarẽnh to nẽ mẽ kãm: —E na pa inhmã Pas ã mẽ anhĩhkõ hã ixàpkur prãm nẽ. Kormã ixte amnhĩ xà htỳx kãm ijamak xwỳj ri.

16Kwa mẽ inhma. Kot paj axte mẽ akutã Pas ã ixàpkur kêt ry rax nẽ. Nom koja nhỹrmã Tĩrtũm akupỹn ixte mẽ ato amnhĩptàr kaxyw inhmẽ hãmri pu mẽ rĩ kormã axte arĩgro mex maatija ã pahkĩnh kãm axpẽn kutã paxàpkur rax nẽ. Anẽ.

17Nhũm ã mẽ kãm amnhĩ jarẽnh anẽ nẽ hpãnhã wĩhti py nẽ o xa nẽ Tĩrtũm mã harẽ nẽ kãm: —Pa Papaj. Nà ãm hãmri na ka hte mẽ inhnê mẽ kãm mẽ ixkurê xwỳnhjê pumunh mex nẽ mẽ ãhkra pẽ mẽ ijabõj. Amex o amex. Anẽ. Hãmri nẽ hpãnhã hkõt mẽ pa ho mẽ pa xwỳnhjê hõ mã kugõ nẽ kãm: —E mĩ. Apy nẽ mẽ axpẽn pãnhã hkwy ho ixkõ.

18ãm hãmri na pa mẽ amã amnhĩ jarẽ. Kot paj axte wĩhti ho ixkõm kêt rãhã nhũm nhỹrmã Inhõ Papaj akupỹn mẽ awỳr inhmẽ. Hãmri pu mẽ rĩ kormã akupỹn ixpõx xà hã arĩgrota ã pahkĩnh rax nẽ. No ãm ra axtem tanhmã hã mẽ pahkĩnh to. Anẽ.

19Hãmri nẽ hpãnhã pãwti py nẽ mã ho anẽ nẽ Tĩrtũm mã harẽ. Hãmri nẽ ho hkry hpa nẽ mẽ piitã mẽ kãm õr pa nẽ mẽ kãm: —E na pa ã pãwti ho hkry nẽ mẽ amã õr anẽ. Koja mẽ ã inhĩpêx anẽ nẽ te mẽ kot ixto hkry hpar pyræk o inhĩpêx pa amnhĩ xà htỳx kamã ijamak kãm ty. Nom mẽ anê kot paj ty. Jakamã kêr ka mẽ ixwakre kamã tõhã axpẽn wỳr akuprõ nẽ ixte mẽ ate

amnhĩ tomnuj pãnhã amnhĩrer kaxyw mẽ anê ixtykja mã ajamexpër pè akĩnh nẽ pãwti hkur o akrĩ. E mẽ mãmrĩ axãmnhĩx aku. Anẽ. Nhũm pre ã mẽ kãm amnhĩ jarẽnh anẽ nhũm mẽ mar pè pãwtita hkur o hkrĩ.

²⁰Hãmri nẽ ra hkur pa. Hãmri nhũm Jejus axte kopta py nẽ mẽ kãm: —Mẽ kot ixpĩr xà hã arĩgro hã koja ixkamrô axkapĩ. Nom koja mẽ amarĩ ixpĩr nhũm ixkamrô amarĩ hpikapĩr kêt nẽ. ãm paa. Pa kot paj mẽ anê mẽ ãhkram amnhĩ jaxà nhũm mẽ ã inhĩpêx anẽ. Koja ixkamrô axkapĩ nhũm Tĩrtũm omu nẽ ixkukwak ri mẽ anê mẽ ate amnhĩ tomnuj piitã te amnhĩ katut kôt rẽnh par pyræk o hipêx nẽ mẽ ato hkra. Amnepêm kot ja hã amnhĩ jarẽnh xà hkôt. Jakamã e mẽ ixkamrô pikapĩrta mã ajamexpër pè wĩhti hkwỳ ho ixkõ. Anẽ.

Jejus ã mẽ kãm àmnênh xwỳnh jarẽnh

Matêwre 26.21-25; Makre 14.18-21; Juãw 13.18-19

²¹Nhũm Jejus arĩ mẽ kãm kapër nẽ mẽ kãm: —Nẽ kot mẽ kãm ixtã àmnênh mã xwỳnhhta na jar mẽ pahkaêx ã mẽ pakutã apkur o nhỹ.

²²Tĩrtũm kãm hprãm xà hkôt koja mẽ tanhmã ixto rax nẽ ixpĩ. Nom kot mẽ kãm ixtã àmnênh mã xwỳnhhta hêxta waa nẽ. ã kot inhĩpêx anhỹrja mỳrapê koja amnhĩ xà htỳx kãm hamak rax kumrêx. Anẽ.

²³Nhũm pre ã Jejus mẽ kãm amnhĩ jarẽnh anẽ. Nhũm mẽ kuma nẽ tee ri axpẽn pumunh o hkrĩ. Hãmri nẽ ri axpẽn kukja nẽ axpẽn mã: —Kwa nà mẽ pahtõ kot pu we ã ri hipêx anẽ? Nà pa hkêt. Anhỹr o tee ri axpẽn kukjêr o hkrĩ.

Mẽ pamã amnhĩ to rũnh prãm kêt ã mẽ pamã karõ

Matêwre 20.20-28; Makre 10.35-45; mããnên Rõmãn 12.3-5; 12.10; 12.16; Epes 4.2-4; Piripos 2.3-8; Xiakre 4.1-10; Wam Pêtre 5.3

²⁴Tã nhũm Jejus nhỹ hã mẽ ahkre ho mẽ pa xwỳnhjaja axpẽn mã tanhmã kapër to ho hkrĩ nẽ axpẽn mã: —Kwa mẽ pahtõ kot puj wem nhỹrmã pahpê pahĩ nẽ mẽ ho amnhĩptàr rax o ri papa? Anẽ. Hãmri nẽ mẽ axpẽn mã: “Nà pa.” Anẽ nẽ nhãnh axpẽn mã: “Nà kêt paa.” Anẽ. Hãmri nhũm mẽ nêtãnh axpẽn mã: “Nà kêt pa kênã.”

²⁵Anhỹr o axpẽn mã kapër o hkrĩ. Hãmri nhũm Jejus tee ri axpẽn mã mẽ kuma nhũm mẽ ã hamaxpër anhỹrja kêp omnuj nẽ nhũm mẽ kãm tanhmã

hã kapër to nẽ mẽ kãm: —E mẽ inhma. Na hte Ijaew kêt xwỳnhjê nhõ pahijaja ã amnhĩ nhĩpêx anhỹr o ri pa nẽ amarĩ hkrĩ xà kamã hkrĩ ho hkrĩ. àhpumunh tỳx jakamã na htem amarĩ ixkre hkre jakry kamã kãm mẽ àpênh xwỳnhjê mã mẽmo mẽ àpênh ã karõ ho hkrĩ. Na htem ã amnhĩ nhĩpêx anhỹr o pa. Nẽ mẽ kot amnhĩm mex ã harênh kaxyw tanhmã mẽ ho mex to ho pa.

26-27Tã kêr ka mẽ ho mẽ uràk kêt nẽ. Kêt ãm te amarĩ ri mẽ apa xwỳnh pyràk o xypên nhĩpêx. Ixpyrà nẽ amarĩ mẽmoj to mẽ kutã anojarêt rãhã ho ri apa. No mẽ ate mẽ ho amnhĩptàr rax kukamã ajamaxpër kêt nẽ.

28Na prem xypên mã ixto hêx nẽ tanhmã ixto kapër punuj to htã ka mẽ ama nẽ ãm mẽ ama nẽ arĩ ixkõt ri apa rãhã nẽ. ãm hãmri na ka htem arĩ ixkõt ri apa anẽ.

29-30Kot paj amnhĩ tã mẽ ato mex rax nẽ. Na pre ra Tĩrtũm nhỹrmã ixte mẽ ato amnhĩptàr o ixkrĩ kaxyw ixãm. Tã ot pa amnhĩ pyrà nẽ mẽ pahkwỳ Ijaew kaxyw mẽ axunhwỳ ka mẽ nhỹrmã mẽ piitã mẽ ho amnhĩptàr o apa. Nẽ mẽ apê ixkràmnhwỳ hã nhỹrmã ixkutã axàpkur o apa. Anẽ.

Jejus kot Simãw Pêtre mã kapër ã harênh

Matêwre 26.31-35; Makre 14.27-31; Juãw 13.36-38

31Tã nhũm Jejus Simãw Pêtre mã kapër nẽ kãm: —Kwa Simãw. Na Satanasti kãm hprĩ hã ixtã mẽ apiitã mẽ kamã hamak prãm nẽ. Tanhmã kot mẽ akrã hto nhũm mẽ ate mẽ kãm ixkurê xwỳnhjê pumaj ixkaga hã kãm mẽ akamã hamak prãm tỳx nẽ. Jakamã ã kot mẽ anhĩpêx anhỹr kaxyw na pre ra amnhĩ to Inhõ Papaj ma nhũm kãm: “Tõe. Kam nẽ mãmri tanhmã mẽ kamã ajamak to.” Anẽ.

32—Tã ate mẽ umaj ixkaga nẽ axte ate amnhĩ kaxyw inhmã ajamaxpër kêt pymaj na pa ra ato Inhõ Papaj wỳr kãm ixihitỳx nẽ Simãw Pêtre. Jakamã kêr ka mẽmo arĩgro hã tee ri ixkaga hã amnhĩ pumu hãmri nẽ tokyx tãm akupỹm ixkõt amnhĩ xãm tỳx nẽ. Kêr kê nhỹrmã akwỳjê hõ tanhmã amnhĩ tomnuj to nẽ tee ri amnhĩ kukamã hamaxpër ka ja hã omu hãmri nẽ kãm ate tanhmã amnhĩ tomnuj tota jarẽ. Kê mẽ ã ate amnhĩ nhĩpêx anhỹr ã ajarênh ma nẽ apyrà nẽ tokyx akupỹm tãm ixkõt amnhĩ xãm tỳx kurê

kumrêx. E kêr ka ã akupÿm ixkôt mẽ piitã mẽ hipêx anhÿr o ri apa Simãw Pêtre. Anê. Nhũm pre ã Simãw Pêtre kot tanhmã amnhĩ nhĩpêx to hkukamã kãm ujarênh anê.

³³Hãmri nhũm tee ri amnhĩ tã kuma nê kãm: —Kwa nà Pahihti. Kot paj ri akwÿm tanhmã amnhĩ tomnuj to hkêt nê. Kojã mẽ te ajaxà nê apĩ htã kot paj arĩ akôt ri ixpa ho ixpa nhũm mẽ pahto amÿrà nê tanhmã pahto. Anê.

³⁴Hãmri nhũm kuma nê kãm: —Nà kojã apkati hkôt krãhyre hkàr kêt ri ka ra mẽ umaj ate ixkôt apa hkêt ã mẽ kãm amnhĩ tã axàprãr o axkrunêpxi kãm ga. Anê.

Jejus kot hkwÿjê mã mẽmoj tã karõ

Matêwre 10.5-15; Rukre 9.1-3

³⁵Hãmri nhũm Jejus arĩ hkôt mẽ pa ho pa xwÿnhjê mã kapêr nê mẽ kãm: —E wam ixte mẽ hwÿr mẽ arênhta ã na ka prem amnhĩ kôt aparkà hkwÿ ho apa hkêt nê. Nê kawà jamàn nê ho apa hkêt nê. Nê mrykà jamàn nê amnhĩ kôt ho apa hkêt nê. ãm mẽ anhÿ kamã mẽ hwÿr apa hã na pa pre mẽ amã karõ. Tã xàn ka prem ã mẽ hwÿr apa anê nhũm mẽ amnhĩ wÿr awÿr kêt nê? Nà xà na prem amnhĩ wÿr mẽ awÿ? Anê. Hãmri nhũm mẽ kãm: —Tÿ na prem amnhĩ wÿr mẽ ixwÿ. Mẽ ixte amnhĩ kôt mẽmoj to ixpa hkêt tã na pa prem amarĩ mẽ kutã ixàpkur mex o ri mẽ hkôt ixpa. Anê.

³⁶⁻³⁷Hãmri nhũm mẽ kãm: —Tôe. Nà mẽ kot mẽ ato mex tã nom kojã mẽ hpãnhã axtem hõ ho mẽ anhĩpêx. Jakamã kêr ka mẽ akupÿm mẽ kãm ijarênh o apa kaxyw anojarêt hãmri nê anhõ mrykà rÿ akawà htu nê ma amnhĩ kôt ho apa. Nê awapo. Kot kaj mẽ awapo hkêt japêr hãmri nê apipro xà ho wênê nê amnhĩm hõ japrô nê ma amnhĩ kôt ho apa. E kêr ka mẽ ã amnhĩ nhĩpêx anê. —Nê Tirtũm kapêr ã kagà htũm kot ra ixkukamã tanhmã ijarênh to nê kot ijarênh kot: Kojã mẽ hipêx o te mẽ kot amnhĩ tomnuj tÿx xwÿnh nhĩpêx pyræk. Anê. ã mẽ kot inhĩpêx anhÿr kukamã ijarênh kot anhÿr. Tã na mẽ ra ã inhĩpêx anhÿr kaxyw. Anê.

³⁸Nhũm pre ã Jejus mẽ kãm kapër aně nhũm mẽ kuma nẽ kãm: —Ota mẽ panhõ wapohti haměxkrut Pahihti. Aně. Hãmri nhũm mẽ kãm: —Tõe. Nà hãmri. Mẽ amnhĩm axi nẽ ho amnhĩm mẽmoj to aně. Aně.

Jejus kot Tĩrtũm mã amnhĩ jarěnh

Matêwre 26.36-46; Makre 14.32-42

³⁹Tã nhũm Jejus kê axte krĩja rũm kato nẽ hixêt pê Oriwêhti hwỳr tẽ nẽ api nhũm hkôt mẽ pa ho mẽ pa xwỳnhjaja ma hkôt mra.

⁴⁰Hãmri nẽ nhỹri hixêt kahti ri hkrĩ nhũm Jejus mẽ kãm: —E kwa kêr ka mẽ ixkutêp amnhĩ to Inhõ Papaj wỳr o akrĩ. Kê mẽ ixkôt tanhmã mẽ ato htã ka mẽ amã mẽ uma xàj ixkaga hkêt nẽ. Arĩ mẽ kutã amnhĩ to htỳx nẽ akuhê. Aně.

⁴¹Hãmri nẽ mẽ kurũm htẽm grire nẽ Tĩrtũm mã amnhĩ jarěnh kaxyw hkõn krã ho tẽm nẽ nhỹ.

⁴²Hãmri nẽ kãm: —Kwa Papaj. Nà na pa ra amnhĩ xà htỳx kukamã ijamaxpěr nẽ amnhĩ kamã ixkahak tỳx kumrěx. Inhmã amnhĩ xà kamã ijamak prãm kêt o ijamak prãm kêt. Jakamã kot kaj amã inhnê ho ajapêx prãm nẽ mãmri inhnê ho ajapêx nhũm mẽ kãm ixkurê xwỳnhjaja tanhmã ixto hkêt nẽ. Rỳ ko. Kot kaj amã mẽ kot tanhmã ixto hprãm hã kê mẽ mãmri tanhmã inhĩpêx to. Nom pam inhmã hprãm xà hkôt kêt. Aně. Nhũm pre ã Jejus amnhĩ to Hipêêxà Tĩrtũm wỳr aně.

⁴³Hãmri nhũm kuma nẽ hwỳr kapër o wrỳk xwỳnhja mẽ nhũm hwỳr wrỳ nẽ kuri xa. Hãmri nẽ õxàhkre kaxwỳnh kãm tanhmã ho hihtỳx to.

⁴⁴Nhũm kê axte amnhĩ to Hipêêxà hwỳr kãm hihtỳx nẽ. Tee ri amnhĩ kukamã hamaxpěr pê amnhĩ kamã kahak tỳx kumrěx. Jao hã gô rax nẽ te hkamrô xàhàr pyràk o pikap ahà.

⁴⁵Hãmri nẽ kànhmã xa nẽ akupỹm hkôt mẽ pa ho mẽ pa xwỳnhjê hwỳr tẽ nẽ mẽ omu nhũm mẽ ra õt pa nẽ hikwỹ. Mẽ kot tee ri Jejus kot mẽ kãm amnhĩ jarěnhja kukamã hamaxpěr o hkaprĩ nẽ õt pa nẽ hikwỹ.

⁴⁶Hãmri nhũm Jejus tẽ nẽ tee ri mẽ omu nẽ mẽ kumra nẽ mẽ kãm: —Kwa nà. Mẽ ri ã amnhĩ nhĩpêx anhỹr kêt nẽ. Kwa mẽ kànhmã akrĩ nẽ amnhĩ to

Inhõ Papaj wỳ kê mẽ ato mẽ axihtỳx. Hãmri nhũm mẽ tanhmã ixkôt mẽ ato ka mẽ inhỹ hã mẽ kutã amnhĩ to htỳx nẽ akuhê. Anẽ.

Mẽ kot Jejus pynênh ã mẽ harênh

Matêwre 26.47-56; Makre 14.43-50; Juãw 18.1-11

⁴⁷Nhũm pre ã Jejus mẽ kãm kapêr anhỹr rôm nhũm hkôt pa ho pa xwỳnh pê Jut Kariotja amnhĩ kôt mẽ kot Jejus pynênh xwỳnhjê ho tẽ. Mẽ ho htêm rax nẽ. Hãmri nẽ kot Jejus kahti hkôt mỳnh kaxyw hwỳr tẽ

⁴⁸nhũm amnhĩ tã omu nẽ kãm: —Kwa Jut. Xà mẽ kahti hkôt mẽ hamỳnh nẽ mẽ hpãr o na htem mẽ kãm mẽ hã amỳnê? Anẽ.

⁴⁹Hãmri nhũm hkôt mẽ pa ho mẽ pa xwỳnhjê hõja tee ri mẽ kot amnhĩ nhĩpêx ã mẽ omu hãmri mẽ õ wapota mã hamaxpêr kurê kumrêx nẽ Jejus mã: —Kwa Pahihti. Xà kot paj mẽ panhõ wapohti py nẽ ho mẽ panê mẽ hkwy hpa? Anẽ.

⁵⁰Hãmri nhũm hõta kuma nẽ mẽ kaxyw ja kapa. Nhũm mẽ õ patre maati mã àpênh xwỳnhja mẽ hkôt tẽ nhũm omu nẽ kãm wapo ho apê. Nẽ kot ho hkrã nhĩpôn mã tã kuhpaw nẽ ho upôk rũm hamak nhĩkjê pix krãhta.

⁵¹Hãmri nhũm Jejus omu nẽ nê kãm kapêr nẽ kãm: —Kwa nà ri ã amnhĩ nhĩpêx anhỹr kêt nẽ. Amarĩ xa. Anẽ. Hãmri nẽ hamakja py nẽ akupỹm kãm hamak ã kuxi nẽ ho mex.

⁵²⁻⁵³Hãmri nẽ mẽ kot unênh mã xwỳnhjê mã tanhmã kapêr to. Mẽ õ patre krãhtũmjê mẽ Tĩrtũm mã amnhĩ jarênh xà hã ixkre jamãr xwỳnhjê krãhtũm mẽ Ijaew nhõ pahijê mẽ nhũm mẽ ho pimràatã mẽ kãm kapêr nẽ mẽ kãm: —Kwa na pa pre apkati mẽ Tĩrtũm nhõrkwy kamã mẽ kãm ixkapêr o ixpa ka prem tokyx ixpynênh kêt tã jarãhã te ixte amnhĩ tomnuj xwỳnh pyrãk o inhĩpêx nẽ ixwỳr wapo nẽ kô hã akapên nẽ ixwỳr ã atêm rax anẽ. No ãm ra mẽ ate tanhmã ixto kaxyw arĩgro kator kênã. Jakamã kot kaj mẽ mãmri tanhmã amã ixto hprãm xà hkôt mãmri tanhmã ixto. Satanasti nhỹ hã ã mẽ ate inhĩpêx anhỹr mã kênã. Anẽ.

Simãw Pêtre kot Jejus kôt pa hkêt ã kot amnhĩ jarênh

Matêwre 26.69-75; Makre 14.66-72; Juãw 18.15-18; 18.25-27

⁵⁴Tã nhũm mẽ Jejus pynê nẽ ma o tẽ. Ma mẽ õ patre maati nhõrkwỹ hwỳr o tẽ. Nhũm Simãw Pêtre ma hapu hã mẽ hkõt hã mẽ omunh o tẽ.

⁵⁵Nhũm mẽ patre maati nhõrkwỹ hwỳr Jejus o axà nẽ hkõt gjêx pa hãmri nhũm Simãw Pêtre kítare hwỳr axà nẽ mẽ kuri xa. Nhũm mẽ kítare kamã amnhĩm kuto nẽ hã ànhunh o hkrĩ nhũm

⁵⁶mẽ ìhkô hã ànhunh o nhỹ. Hãmri nhũm mẽ kãm àpênh xwỳnh niti hirã kamã hprĩ hã omunh kurê kumrêx nẽ mẽ kãm: —Xê pěr myti ja kêp Jejus kõt mẽ pa ho mẽ pa xwỳnhjê hõ na. Anẽ.

⁵⁷Hãmri nhũm tee ri amnhĩ tã kuma nẽ kãm mẽ uma nẽ mẽ kãm amnhĩ tã aprã nẽ kãm: —Tk. Kokỹ. Ixte mēhõ my ata pumunhre hã. Anẽ.

⁵⁸Tã nhũm hpãnhã mēhõ myja kãm: —Kwa nà. ãm hãmri na ajarẽ. Apê Jejus kõt ri mẽ pa xwỳnhjê hõ na ka. Anẽ nhũm kuma nẽ kê axte kãm: —Kwa mẽ ri ã amnhĩ krã hkõt ri ixto axêx anhỹr kêt nẽ. ãm ixte aa mēhõta pumunh kêt kumrêx. Anẽ.

⁵⁹Tã nhũm ja haxwỳja axte omu nẽ kãm: —Kwa ãm hãmri na mẽ ajarẽ. Apê Jejus kwỳ hõ na ka. Uràk nẽ te apê Garirej nhõ xwỳnh pyràk kênã. Anẽ.

⁶⁰Hãmri nhũm tee ri kuma nẽ mẽ kãm amnhĩ tã àprãr kãm hihtỳx nẽ mẽ kãm: —Tk. Ixpê Garirej nhõ xwỳnh kêt. ãm ixte mēhõ mũj pumunh kêt kumrêx tã ka mẽ ãm xatã hkõt ixpa ho ixpa xwỳnh ã ixkamnhĩx o akuhê. Anhỹrja o ra mẽ kãm amnhĩ tã aprãr o axkrunêpxi mẽ nhũm krãhyre kà.

⁶¹Hãmri nhũm Jejus arĩ ixkre kamã ãm tã Simãw Pêtre ho hakêx nẽ omu. Hãmri nhũm amnhĩ tã no pumu nẽ kot hkukamã kãm ã amnhĩ nhĩpêx anhỹr jarênhja mã hamaxpěr kurê kumrêx. Krãhyre hkàr kêt ri kot mẽ kãm amnhĩ tã àprãr o axkrunêpxi hã harênhja mã hamaxpěr nẽ kànhmã hakry hpar o tẽ nẽ hkaprĩ htỳx nẽ.

⁶²Hãmri nẽ hkaprĩ xàj kítare pê kato nẽ tẽ nẽ awry hã xa nẽ mỳr rax kumrêx.

Mẽ kot Jejus tak ã mẽ harênh

Matêwre 26.67-68; Makre 14.65

⁶³Hāmri nhūm mẽ kot Jejus pumunh o kuhê xwỳnhjaja hã hpěr o axkẽ nẽ htak o kuhê.

⁶⁴Nẽ no hpro nẽ htak nẽ kãm: —E atak xwỳnh nhĩxi jarẽ. Apê Tĩrtũm Kra hã ate amnhĩ jarẽnh jakamã mãn uràk nẽ axàhpumunh tỳx. Jakamã e hixi jarẽ. Anẽ.

⁶⁵Hāmri nẽ xatã haprỳ nẽ kãm kapěr punuj nẽ.

Mẽ kot mẽ hkrãhtũm wỳr Jejus o htẽm ã mẽ harẽnh

Matêwre 26.57-68; Makre 14.53-65; Juãw 18.19-24

⁶⁶Tã nhūm myt kator o mõi mẽ nhūm Ijaew nhõ pahijẽ mẽ patre krãhtũmjẽ mẽ Tĩrtũm kapěr tũm o mẽ ahkre xwỳnhjaja axpẽn wỳr pikuprõnh pa. Hāmri nhūm mẽ ma mẽ hwỳr Jejus o tẽ.

⁶⁷⁻⁶⁸Nhūm mẽ omu nẽ tanhmã kot amnhĩ jarẽnh to hã hkukja nẽ kãm: —Kwa mẽ inhmã amnhĩ jarẽ. Xà ka na apê Tĩrtũm kot mẽ ixkaxyw axãm xwỳnhhta? Xà ka kot kaj Rõm nhõ xwỳnhjê pẽ mẽ ixpytã nẽ mẽ ixto amnhĩptàr o apa? Anẽ. Hāmri nhūm mẽ kãm: —Nà kot paj tanhmã mẽ amã amnhĩ jarẽnh to ka mẽ ixkõt ajamaxpěr kêt nẽ. Ixte ãm hāmri mẽ amã amnhĩ jarẽnh tã ka mẽ inhma nẽ ãm inhma. Nẽ kot pa amnhĩ xwar mẽmoj tã mẽ akukja ka mẽ amnhĩ xwar inhmã tanhmã harẽnh to hkêt nẽ. ãm mẽ axêx rom mẽ ate ã ixkukjêr anhỹr kênã.

⁶⁹Tã nom kot paj tokyx ma akupỹm Inhĩpêxà Tĩrtũm wỳr api. Hihtỳx o hihtỳx rãhã nẽ pa ho pa xwỳnh na. Jakamã kot paj hwỳr api nhūm amnhĩ nhĩhkô hã inhỹr pa upòk rũm mẽ apiitã mẽ ato amnhĩptàr o ixkrĩ. Hāmri nẽ nhỹrmã paa tanhmã mẽ ajarẽnh to. Anẽ.

⁷⁰Hāmri nhūm mẽ tee ri kot ã amnhĩ jarẽnh anhỹrja ma nẽ kãm: —Tk. Kwa akatàt kõt mẽ inhmã amnhĩ jarẽ nà. Xà apê Tĩrtũm Kra na ka? Anẽ. Hāmri nhūm mẽ kãm: —Tỳ ixpê Kra na pa. Anẽ.

⁷¹Hāmri nhūm mẽ tee ri ã amnhĩ jarẽnh anhỹrja ã kuma nẽ axpẽn mã: —Kwa mo kaxyw kot puj mẽ axte mẽ hkwỳjê japêr nhūm mẽ tanhmã kot amnhĩ tomnuj to hã harẽ? Tãm kêp Tĩrtũm Kra hã amnhĩ to hêx nhūm mẽ

pahte pahpiitã mar kênã. E kwa tokyx pu mẽ ma Rõm nhõ pahihtì hwỳr o tẽ kê mẽ pamã hã amýnê nẽ mẽ pamã kupĩ. Anẽ.

Rukre 23

Mẽ kot pahi Pirat wỳr Jejus o htẽm ã mẽ harẽnh

Matêwre 27.1-2; 27.11-26; Makre 15.1-5; Juãw 18.28-38

¹Tã nhũm mẽ Jejus o kato nẽ nhãm Pahihti Pirat wỳr o tẽ.

²Hãmri nẽ kutã ãm nẽ tanhmã kãm ho hêx to nẽ kãm: —E ot pa mẽ awỳr jahti ho tẽ. Na hte mẽ inhmã hêx rũnh o pa. Mẽ ixte Pahihti Sesti kapẽr kwỳm ri amnhĩ nhĩpêx prãm xàj tanhmã mẽ inhmã mẽmoj tã karõ hto ho pa. Nẽ axtem nẽ mẽ ixte Sesti mã kàxpore hkwỳ nhõr kêt ã mẽ inhmã karõ. Nẽ Tĩrtũm kot mẽ pakaxyw kêp mẽ panhõ pahi hã ãm xwỳnh ã amnhĩ jarẽ. ã na hte mẽ inhmã amnhĩ to hêx anhỹr o pa. Anẽ.

³Hãmri nhũm Pirat mẽ kuma nẽ Jejus pumu nẽ kãm: —E kwa inhmã amnhĩ jarẽ. Xà apê Ijaew nhõ pahi na ka? Xà ka na htem amnhĩ wỳr akãm hamak o pa? Anẽ. Hãmri nhũm kãm: —Nà ãm hãmri na ka ã ijarẽnh anẽ. Anẽ.

⁴Hãmri nhũm Pirat tanhmã hkukjêr to nẽ tee ri kot amnhĩ jarẽnh ã kuma hãmri nẽ patre krãhtũmjê mã kãm: —Kwa mẽmo mỳrapê kot pa tanhmã mẽ amã hã ixàmnênh to? Kot tanhmã amnhĩ tomnuj tore hã. Nà kot pa kãm inhũre. Anẽ.

⁵Hãmri nhũm mẽ tee ri kuma nẽ kot mẽ kãm hã àmnênh prãm xàj hã kãm kapẽr kãm hihtỳx nẽ. Nẽ kãm: —Kwa nà. Na pre hte pika pê Jutej kamã tanhmã mẽ kãm hêx to ho pa. Hãmri nhũm mẽ ra hã axpẽn kutã amnhĩ xunhwỳ nẽ hã pijapu rũnh o pa. Tã mããnẽn Garirej kamã ã amnhĩ nhĩpêx anhỹr o hkrax nẽ hpãnhã amnẽ mẽ pahwỳr ã amnhĩ nhĩpêx anhỹr kaxyw mõi anẽ. Anẽ.

Mẽ kot Erox wỳr Jejus o htẽm ã mẽ harẽnh

Rukre 9.7-9

⁶Hãmri nhũm Pahi Pirat mẽ kuma nẽ mẽ kãm: —Kwa xà kêp Garirej nhõ xwỳnh na? Anẽ. Hãmri nhũm mẽ kãm: —Tỳ. Kêp Garirej nhõ xwỳnh kênã.

⁷Anê nhũm mẽ kãm: —Tô mẽ ma pahikti Erox ãxipas wỳr mãn o tẽ. Kêp Garirej nhõ xwỳnhjê nhõ pahi na. Tã ra jar Jerujarẽ kamã ham pôj. No axtem ixpê Jutej kamã mẽ pa xwỳnhjê nhõ pahi jakamã kwa mẽ ma õ pahita wỳr mãn o tẽ kê tãm tanhmã mẽ amã ho. Anê.

⁸Hãmri nhũm mẽ kuma nẽ ma pahi Erox ãxipas wỳr o tẽ. Na pre ra Erox ãxipasja xatã Jejus jarẽnh ma nẽ kãm omunh prãm nẽ. Kãm aa kot mẽmoj pumunh kêt õ ho anhỳr ã omunh prãm tỳx jakamã nhũm mẽ ma hwỳr o tẽ nhũm omu nẽ hkĩnh nẽ.

⁹Hãmri nẽ tee ri mẽmoj tã hkukja no nhũm akryk xa nẽ tanhmã kãm nẽ hkêt nẽ.

¹⁰Hãmri nhũm mẽ õ patre krãhtũmjê mẽ Tĩrtũm kapěr tũm o mẽ ahkre xwỳnhjaja kãm ho kapěr punuj nẽ ho hêx kãm hihtỳx nẽ.

¹¹Hãmri nhũm pahi Erox ãxipas mẽ kuma hãmri nẽ õ pòristi mẽ wa kãm kapěr punuj nẽ hã hpěr o axkẽ nẽ tanhmã ri haprỳ to. Hãmri nẽ hã hpěr o pikẽnh kãm kêp pahi hã mẽ ê mexja py nẽ kãm haxà nẽ akupỹm pahi Pirat wỳr kumẽ.

¹²Na pre Pahi Pirat mẽ Pahi Erox ãxipasja wa kãm axpẽn kĩnh kêt nẽ. Tã hãmri nhũm Erox ãxipasja tee ri Jejus kot kãm tanhmã amnhĩ jarẽnh to hã mar prãm xàj tee ri hkukamã hamaxpěr hãmri nẽ Pirat ã hpijaàm kaxyw akupỹm hwỳr kumẽ. Hãmri nhũm amnhĩ tã omu hãmri nẽ wa ra akupỹm kãm axpẽn kĩnh nẽ. Nẽ akupỹm axpẽn mã hpěr o axkẽ nẽ pikunhar o pa pê akupỹm axpẽn to hkràmnhwỳ.

Pirat kot Jejus pĩr ã àmnênh

Matêwre 27.15-26; Makre 15.6-15; Juãw 18.39–19.16; mãânên Atre 3.13-14

¹³Tã nhũm Pirat akupỹm amnhĩ wỳr mẽ hã karõ. Ijaew kwỳjaja nẽ mẽ õ pahijaja nẽ mẽ õ patre krãhtũmjaja nhũm akupỹm amnhĩ wỳr mẽ piitã mẽ hã karõ.

¹⁴Hãmri nhũm mẽ akupỹm hwỳr gjêx pa nẽ kuhê nhũm mẽ kãm: —E na ka mẽ ixwỳr mytita o tẽ nẽ tanhmã inhmã harẽnh to. Kot mẽ akwỳjê mã tanhmã hêx to ho pa hã harẽ. Tã pa ra jar mẽ anoo mã tanhmã hkukjêr to

ně tee ri kot inhmã tanhmã amnhĩ jarēnh to hã kuma. Te kot amnhĩ to mex xwỳnh pyràk. Mě ate tanhmã ho akapěr to htã nom kot anhỹr kêt. Kot amnhĩ to mex xwỳnh na.

15Pahi Eroxa ra ixpyrà ně tee ri tanhmã hkukjêr to nom nhũm tanhmã kãm ně hkêt ně. Nhũm tee ri ja hã omu ně akupỹn ixwỳr kumě. Jakamã kwa mẽmo mỳrapê kot paj mẽ amã hã amỹnê nhũm mẽ amã kupĩ? Tanhmã kot amnhĩ tomnuj tore hã.

16Kot paj ãm mẽ kãm aně kê mẽ htak ně kãm ure kê mãmri ma tẽ. Aně.

17Arĩgro pê Pas ã na pre hte mẽ õ pahi mẽ kot mẽ ho prês nhũm mẽ hkrĩ xwỳnhjaja nhũm pre htem mẽ ho hpỹnh ně mẽ kãm ure. Jakamã na pre ã mẽ kãm kapěr aně ně kot Jejus tak ně kãm urer mã.

18-19Nom nhũm mẽ kuma nhũm ja mẽ kêp omnuj ně nhũm mẽ kãm: —Kwa nà. Apĩ ri. Apĩ ně mẽ inhmã Parapas mã mãn anhũre. Aně. Parapas na pre mẽ õ krĩ kamã õ pòristi mẽ pahi Piratja mẽ kutã amnhĩ xãm ně kêp õ pòristi hõxpĩ. Mỳrapê na prem ra haxà nhũm hkrĩ ho hkrĩ. Jakamã nhũm mẽ Pirat kot kãm urer kaxyw ã kãm kapěr aně.

20Nom nhũm kãm Jejus mã urer prãm jakamã axte hã mẽ hkukja ně mẽ kãm: —Kwa nom mẽmoj mỳrapê kot paj mẽ kãm hã amỹnê nhũm mẽ amã kupĩ?

21Anhỹr tã nhũm mẽ kuma ně ãm kuma. Ně xatã kãm: —Kwa tokyx pĩ kahpa hã anhô kê ty. Aně.

22Hãmri nhũm tee ri mẽ kuma ně mẽ kãm: —Tk. Kwa nà. Tanhmã kot amnhĩ tomnuj tore hã kot pa kêt hã kunhò nhũm ty. Nà kot paj ãm mẽ kãm aně kê mẽ htak ně kãm ure kê ma tẽ. Aně.

23Hãmri nhũm mẽ xatã hã kãm kapěr kãm hihtỳx ně kãm: —Kwa nà. Pĩ kahpa hã mãn anhô kê ty. Anhỹr o ãm xatã kàx pê àmra kamã kãm hã amỹnê.

²⁴Hāmri nhũm Pirat tee ri mẽ kuma hāmri nẽ tã mẽ kãm hprãm xà hkôt mẽ kãm ã amỹnẽ.

²⁵Hāmri nẽ mẽ kãm Parapas mã ure. Ra kot pahi Pirat pê õ pôristi kutã amnhĩ xãm nẽ kêp hõx pĩr tã nhũm mẽ kãm hprãm xà hkôt akupỹm kãm ure. Hāmri nẽ mẽ ãhkram Jejus jaxà. Mẽ kãm hprãm xà hkôt ri mẽ kot tanhmã hipêx to kaxyw.

Mẽ kot pĩ kahpa hã Jejus nhôr ã mẽ harẽnh

Matêwre 27.31-43; Makre 15.21-32; Juãw 19.17-20; 19.27-31; mããnẽn Atre 7.59–8.1

²⁶Tã nhũm pôristijaja Jejus o kato nẽ ma kapôt mã o tẽ. Nẽ kãm õ pĩ kahpa gõ nhũm amnhĩ kaxyw kumỹ nẽ o tẽ. Nom mẽ kot htak rax kurê nhũm hirot tỳx nẽ nhũm mẽ ja hã omu nẽ mẽhõ kot ho ajuta kaxyw mẽ hkapi ho xa. Hāmri nẽ Sirẽn nhõ xwỳnh Simãw hkà htyk pumu. Nhũm pre htỳx hamakêtkati nẽ mẽ kutã krĩm tẽ. Hāmri nhũm mẽ haêr pê unẽ nẽ kãm Jejus o ajuta kaxyw hã karõ nhũm kãm õ pĩ kahpaja mỳ nẽ mẽ hkôt o tẽ.

²⁷Hāmri nhũm mẽ ohtô nẽ Jerujarẽ rũm Jejus kôt mõi. Nhũm mẽni hkwyjaja omu nẽ kãm hkaprĩ xàj mỳr o hkôt mõi.

²⁸Hāmri nhũm mẽ mỳr ã mẽ kuma nẽ mẽ ho hakẽx nẽ mẽ omu nẽ mẽ kãm: —Kwa nà Jerujarẽ nhõ xwỳnhjaja. Mẽ amã ixkaprĩ xàj amỳr kêt nẽ. Kêt mẽ kamjaja amã amnhĩ kaprĩ xàj mãn mur. Nẽ mẽ akrajê kamã axukaprĩ xàj mãn mur.

²⁹Koja mẽ nhỹrmã mẽ apê mẽ anhõ krĩ grành pa ka mẽ apunuj nẽ amnhĩ xà htỳx kamã ajamak o ri apa. Nẽ tee ri mẽ akrajê hkukamã tanhmã ajamxpêr to nẽ ajamxpêr o: “Hêxta gàà nẽ. Na ixkrajaja ixpê amnhĩ xà htỳx kãm hamak o pa. Kêp apu mẽ hkra hkêt xwỳnhjê pyrà nẽ ixkra hkêt nẽ ixpa ro nhỹx inhmã mex nẽ. Nhỹx pa ixkĩnh nẽ.” Anhỹr o kot kaj mẽ nhỹrmã ajamxpêr nom ã ajamxpêr anhỹr kaprỹ.

³⁰—Nẽ kot kaj mẽ apiitã mẽmo punujta pymaj tee ri amã tokyx atyk nẽ ajapêx par prãm kaprỹ nẽ axpẽn mã akapêr o: “Hêxta gàà nẽ. Kot kẽn prêk mũj mẽ panhĩpy rôrôk nẽ tokyx mẽ panhĩmex par ronhỹx mẽ pamã ja mex.” Anhỹr tã no ãm tee ri ã ajamxpêr anhỹr kaprỹ.

31Nom kêt pa. Aa ixte tanhmã amnhĩ tomnuj to hkêt tâ nhũm mẽ ã inhĩpêx anẽ. Nom mẽ ate amnhĩ tomnuj mỳrapê koja mẽ nhỹrmã tanhmã mẽ ato rax o ã mẽ kot inhĩpêx anhỹrja jakrenh pa. Hêxta waa nẽ. Na pa mẽ akukamã ijamaxpêr nẽ ixkaprĩ htỳx nẽ. Anẽ.

32Tã nhũm mẽ ja wa ho hamẽxkrut nẽ tanhmã wa kot amnhĩ tomnuj toja mỳrapê Jejus kôt wa hpĩr kaxyw hkôt mããnẽn wa o tẽ.

33Jakamã nhũm mẽ ra kẽn nhĩxêt te kot mẽ hkrã hi pyræk xwỳnhhta wỳr mẽ o pôj. Mẽ kot kãm “mẽ hkrã hi xà” anhỹr jarẽnhja wỳr mẽ o pôj. Hãmri nẽ Jejus pê ê kapa nẽ pĩ kahpa hã kuxi nẽ prek o ãhkra nẽ hpar o htỳx pa. Hãmri nẽ kànhmã pĩ kahpa xãm nẽ ho htỳx nhũm xa. Hãmri nhũm mẽ hpãnhã wa kot amnhĩ tomnuj xwỳnhhta mã wa ho anẽ nẽ. Nẽ prek o wa ãhkra nẽ wa hpar o htỳx pa hãmri nẽ akutã ho Jejus nhĩjê nẽ wa ãm nhũm wa ajêt.

34Hãmri nhũm Jejus kỳx pê amnhĩ xà htỳx kumrêx kamã hamak o jêt rãhã mẽ ho Tĩrtũm wỳ nẽ kãm: —Kwa Papaj. ãm ixtã jajê pumu. Mẽ kot mẽmoj mex pumunh kêt jakamã na mẽ ã inhĩpêx anẽ. Jakamã ãm ixtã mẽ omu nẽ mẽ kamã axukaprĩ nẽ. Anẽ. Hãmri nhũm hparpê pôristi hkwyjaja axpẽn mã ê hkwy ho pigrành kaxyw hã kẽnre ho jôka ho hkrĩ.

35Nhũm mẽ ohtô rax nẽ Jejus parpê omunh o kuhê. Nhũm mẽ õ pahijaja mẽ noo mã hã hpêr o axkẽ nẽ mẽ kãm: —E jahti na pre te kêp mẽ pakaprĩ xwỳnh ã amnhĩ jarẽnh o ri pa. Nẽ Tĩrtũm kot mẽ pakaxyw ãm xwỳnh ã amnhĩ jarẽnh o ri pa. Jakamã e kwa pu mẽ xa nẽ kot amnhĩ kaxàr nẽ wryk kãm omu. Anẽ.

36Nhũm pôristi mããnẽn tanhmã hã hpêr o pikênh to. Nẽ hparpê kãm wĩhti punuti jahkre nẽ kãm: —Kwa wry nẽ mẽ ixkutã ja hkwy ho ixkõ nà. Anẽ.

37Hãmri nẽ kãm: —E apê Ijaew nhõ pahi hã kot kaj amnhĩ kapa nẽ akupỳn wry. Kwa tokyx pa mẽ ja hã apumu. Anẽ.

38Nhũm pôristija tapti hõ py nẽ tanhmã hã kagà hto. Nẽ hã kagà ho: IJAEW NHÕ PAHI NA JA Anhỹr o hã kagà hãmri nẽ Jejus wỳr api nẽ mỳ ri kunhõ.

Wa kot Jejus nhĩjê nẽ wa jêt xwỳnh wa harẽnh

Matêwre 27.44; Makre 15.32

³⁹Hāmri nhūm wa kot iħkô hã jêt xwỳnhta ô haxwỳja kãm kapêr punuj nê kãm: —Kwa kot kaj apê Tĩrtũm kot mẽ ixkaxyw axãm xwỳnh hã kot kaj amnhĩ kapa nê wrỳ. Nê mããnên amnhĩ kôt wa ixto wrỳ. Anê.

⁴⁰⁻⁴¹Hāmri nhūm ihôta kuma nê hã kãm akir nê kãm: —Tk. Kwa amarĩ ajêt. Xà amã Tĩrtũm pyma hkêt ã na ka ã kêp Krata mã akapêr anê? Nà koja kãm wrỳk prãm nê kot wrỳ. No pajamê pahte amnhĩ tomnuj mỳrapê koja mẽ pahpĩ. No tãm kot tanhmã amnhĩ tomnuj to hkêt tã nhūm mẽ amarĩ ã hipêx anê.

⁴²Anhỹr o kãm kapêr hāmri nê Jejus mã kãm: —Kwa Jejus. Kêr ka nhỹrmã mẽ ixto amnhĩptà hāmri nê inhmã ajamaxpêr nê ixkamã axukapĩ nê ixto mex nê. Anê.

⁴³Hāmri nhūm kãm: —Nà kot kaj jarãhã ma ixkôt kaxkwa hwỳr api nê hpãnhã ixkuri amex nê atĩr tũm nê apa ho apa. ãm hāmri na pa ã amã ixkapêr anê. Anê.

Jejus tyk ã harênh

Matêwre 27.45-56; Makre 15.33-41; Juãw 19.28-30

⁴⁴Tã nhūm kaxkwa nhĩpôk ri myt nhỹr mẽ nhūm te ra kamàt pyræk nhūm kamàt kô rax kumrêx. Nê kamàt kô ho ra hã awry nê. Ja mẽ nhūm akupỹm myt katêr o mō.

⁴⁵⁻⁴⁶Nom nhūm kormã kamàt kôta ã nhūm Jejus ra htyk kaxyw nê àmra kamã Tĩrtũm mã kapêr nê kãm: —E Papaj. Mãmrĩ ixkarô ho amnhĩptà. Anhỹrja kôt hāmri ty. Pu nhūm Tĩrtũm mã amnhĩ jarênh xà hã ixkre kamã hakwakre hã kupêxêja axkjê nê amnhĩ kahê xà mênh kurê kumrêx. Utĩ rax tã kôt ã axkjê nê amnhĩ kahê xà mẽ. Te Jejus htyk o kot mẽ pahte hkôt amnhĩ xunhwỳr xwỳnhjê mã Tĩrtũm wỳr pry jakwa kre kahê xà mênh pyræk o ã amnhĩ nhĩpêx anê.

⁴⁷⁻⁴⁹Hāmri nhūm mẽ piitã mẽmoj ã kot amnhĩ nhĩpêx anhỹr ã omunh o kuhê xwỳnhjaja. Nê kaxyw Jejus kràmnhwỳjaja nhūm mẽ amỹm omunh o kuhê. Nê Garirej rũm mẽni kot Jejus kôt mẽ pa ho mẽ pa xwỳnhjaja mããnên mẽ kuri amỹm hkapĩ nê omunh o kuhê. Nhūm pôristi krãhtũmjê hõja ã mẽmoj

kot amnhĩ nhĩpêx anhÿr ã omu nê tee ri hamaxpêr o: —Hêxta waa nê. Pêr ãm hãmri na pre hte tãm amnhĩ nhĩpêx o pa. Tã pa mẽ amarĩ mẽ mar xà hkôt ixtÿx kupĩ. Anê. Nhũm ã hamaxpêr anhÿrja kôt Tĩrtũm mã mex o mex ã harênh o xa. Nhũm amarĩ mẽ kuhê xwÿnhjaja mãânên mẽmoj ã kot amnhĩ nhĩpêx anhÿrta pumu nê tee ri hkukamã hamaxpêr o ra kãm ma htÿx nê. Hãmri nê awjanã nê ma akupÿm krĩm mrar kurê kumrêx.

Mê kot Jejus jaxàr ã mẽ harênh

Matêwre 27.57-61; Makre 15.42-47; Juãw 19.38-42

50-51Tã nhũm axtem Juje pê Arimatej nhõ xwÿnhja. Arimatejja pika pê Ijaew kamã na. Nhũm Jujeja kot amnhĩ to mex jakamã Tĩrtũm kôt amnhĩ nhĩpêx o pa. Jakamã na pre hkwÿjê rom Tĩrtũm kot mẽ pahwÿr Jejus mẽnh xwÿnh ã omu nê hkôt hamaxpêr. Kêp Ijaew nhõ pahi hõ htã hkwÿjê hkôt hamaxpêr kêt nê. Jakamã nhũm prem kot Jejus pĩr ã amÿnê nhũm tee ri harênh ma nhũm ja kêp omnuj nê.

52Jakamã nhũm Jejus ty nhũm Juje ma pahi Pirat wÿr tẽ nê ã hã kuwÿ nê kãm: —Pa? E ot pa awÿr tẽ. Kwa inhmã htyk xwÿnhhta gõ pa ma o tẽ nê haxà. Anê.

53Hãmri nhũm kuma nê kãm kugõ nhũm ma o tẽ nê haxà. Kaxyw kupêxê hõ py nê ho hkupu nê ma o tẽ nê kên kre kaprÿ kamã haxà. Mẽ kot kormã kamã mẽhõ jaxàr kêt nhũm mẽ kamã Jejus jaxà.

54Arĩgro pê sêsta hã nhũm prem kupĩ nhũm myt xàr o mõi mẽ nhũm Juje ma o tẽ nê haxà. Ijaew kôt xà hã arĩgromnuja wÿr haxà.

55Nhũm Garirej rĩm mẽni hkwÿ kot Jejus kôt pa xwÿnhjaja ma hkôt mra nê kot haxàr kãm omu. Mẽ hkuxwaxà ho gregrer kêt rãhã haxàr kãm omu.

56Hãmri nê ma akupÿm krĩm mra nê kaxyw mẽ hkuxwaxà hkwÿ ho anê. Tã nhũm apkati nhũm mẽ õ arĩgromnu pê sap kator jakamã nhũm mẽ kormã akupÿm hwÿr mrar kêt nê. Hãmri arĩgro mex jamãr pê arĩ hkôkôt o hkrĩ.

Rukre 24

Jejus akupÿm htĩr jarênh

Matêwre 28.1-10; Makre 16.1-8; Juãw 20.1-10

- ¹Tã nhũm apkati nhũm tòmĩk. Hãmri nhũm mēnijaja kwỳhtã kànhmã hkrĩ nē ma akupỹm kēn kreta wỳr mē hkuxwaxà ho mra.
- ²Hãmri nē hwỳr àhtēp o mra nhũm ra hakwakre kahê xà raxta kahê xà hkàx ã xa nhũm mē tee ri omu.
- ³Hãmri nē kēn kre wỳr agjê nē kamã tee ri Jejus japêr no nhũm kamã amrakati.
- ⁴Nhũm mē tee ri axpēn pumunh pê hkukamã hamaxpēr. Hãmri nhũm Tĩrtũm kapēr o wrỳk xwỳnh wa axkrut nē mē haēr pê mē hwỳr kato nē wa xa. Wa ê jaka nē hirã htỳx kãm wa xa.
- ⁵Nhũm mē tee ri wa omu nē kãm wa uma htỳx nē. Nē wa umaj hkõn krã ho rôrôk nē hkrĩ hpa. Nhũm wa mē omu nē mē kãm: —Kwa mon ka mē ri mē htykjê kamã ra akupỹm htĩr xwỳnhhta japêr o ri apa?
- ⁶Jar amrakati. Na ra akupỹm htĩr. Kormã Garirej kamã pa ri kot mē amã amnhĩ jarēnh xà hkôt na ra akupỹm htĩr. Mãn ka mē arĩ kot ã mē amã amnhĩ jarēnh anhỹrja ã anohtỳx japêr.
- ⁷Mē kot unēnh nē pĩ kahpa hã nhôr nhũm htyk nē htyk ã apkati axkrunēpxi hãmri nē akupỹm htĩr ã kot mē amã amnhĩ jarēnhhta mãn ka mē arĩ hã anohtỳx japêr.
- ⁸Anhỹr o mē kãm kapēr nhũm mē kuma hãmri nē ra Jejus kot mē kãm ã amnhĩ jarēnh anhỹrja mã hamaxpēr kurê kumrēx.
- ⁹Hãmri nē awjanã nē ma akupỹm krĩm hkĩnh nē mra. Nē hwỳr pôj nē mē kot Jejus nhỹ hã mē ahkre ho mē pa xwỳnhjê mã awjarē. Mē kēp 11 xwỳnhhtajê mē kaxyw hkwyjê mã awjarē.
- ¹⁰Mēni kot mē kãm ujarēnh xwỳnhhtajê nhĩxi na pre Marir Matarēn nhũm ja kēp Joanã. Nē Xiakre katorxà Marir ôta. Nē kaxyw mēni hõja. Jakamã nhũm mē ma akupỹm Jejus nhỹ hã mē ahkre ho mē pa xwỳnhjê hwỳr mra nē mē kãm awjarē.

11Nom nhũm mẽ kuma nẽ ãm mẽ kuma nẽ htỳx ho amnhĩ krã hkôt mẽ kot ri ã harẽnh anhỹr ã mẽ hkamnhĩx nẽ ãm mẽ kuma.

12Nhũm Simãw Pêtre hamaxpêr hãmri nẽ kànhmã xa nẽ ma kên kreta wỳr hprôt nẽ htẽm kurê kumrẽx. Hãmri nẽ tee ri kên kre kaprỳ kamunh o xa nẽ kamã Jejus kupu xà pix pumu nẽ tee ri hkukamã hamaxpêr hãmri nẽ ma akupỹm tẽ.

Jejus kot Emau hwỳr wa mõi xwỳnh wa hwỳr kator ã harẽnh

Makre 16.12-13

13Tã nhũm ra amỹkry ho mõi nhũm Jejus kwỳjê hõ wa hamẽxkrut nẽ Jerujarẽ rũm kato nẽ ma akupỹm wa õ krĩ pẽ Emau hwỳr wa mõi. Jerujarẽ rũm Emau hwỳr ahkrãnre.

14Jakamã nhũm wa hwỳr pry hã axpẽn mã tanhmã Jejus jarẽnh to ho mõi. Kên kre kamã mẽ kot haxàr nhũm ra ã pikunorja nhũm wa axpẽn mã harẽnh o wa mõi. Nẽ tee ri hkukamã hamaxpêr o wa mõi.

15Hãmri nhũm Jejus tãm tẽ nẽ wa hã ajêt nẽ wa hkôt tẽ.

16Nom nhũm wa hprĩ hã omunh kêt nẽ. Tỳx ho nhãm mẽhõ hã hkamnhĩx nẽ wa arĩ axpẽn mã harẽnh o wa mõi.

17Hãmri nhũm Jejus hêx rom wa kãm: —Kwa mẽmon ka wa axpẽn mã harẽnh o wa mõi? Anẽ. Hãmri nhũm wa hkaprĩ kamã kãm harẽ.

18Ihõ pẽ Kroptija kãm: —Kwa xà na ka Jerujarẽ kamã ri apa htã kamã mẽ kot tanhmã amnhĩ nhĩpêx toja jarẽnh mar kêt nẽ? Kurũm amõi kênã na ka ri mẽmoj mar kêt nẽ ri apa. Anẽ.

19Hãmri nhũm wa kãm: —Nà amrakati ixte mẽmoj maare hã. Kwa mo na wehe? Kwa war aprĩ hã inhmã harẽ pa kuma. Anẽ. Hãmri nhũm wa kãm: —Nà mẽ kot mẽ ixpê tanhmã Jejus pẽ Najare nhõ xwỳnh to kênã. Kêp Tĩrtũm nhỹ hã kapêr jarẽnh o pa xwỳnh na pre. Nẽ Tĩrtũm nhỹ hã tanhmã amnhĩ nhĩpêx to ho pa nhũm prem piitã amnhĩm mex ã harẽ.

²⁰Tã nhũm mẽ panhõ patre krãhtũmjê mẽ mẽ panhõ pahijaja axtem nẽ mẽ kãm hã amỹnê. Mẽ kot pĩ kahpa hã nhôr nhũm htyk kaxyw mẽ kãm hã amỹnê.

²¹Pa prem ixtỳx ho kêp Tĩrtũm kot mẽ pahwỳr mẽnũh xwỳnh ã hkamnhĩx nẽ kot Rõm nhõ xwỳnhjê pê mẽ ixpytãr ã hkamnhĩx tã nhũm prem mẽ ixpê kupĩ. Jãã na prem ã hipêx anẽ nẽ kupĩ. Na ra htyk ã apkati axkrunêpxi.

²²⁻²³—Nẽ jarãhã kwỳhtã mẽni hkwyjaja ma haxàr xà hã kẽn kre hwỳr mra nẽ xep tee kamã hapêr nẽ omunh kêt nẽ. Xep ãm Tĩrtũm kapêr o wryk xwỳnhja wa ho axkrut nẽ wa omu nhũm wa xa. Nhũm mẽ kãm ra akupỹm htĩr ã harẽ nhũm mẽ akupỹn mẽ ixwỳr mra nẽ mẽ ijaêr pê mẽ inhmã harẽ.

²⁴Hãmri nhũm mẽ ixkwỳjaja ma mẽ hpãnhã kẽn kreta wỳr mra nhũm ra mẽ kot harẽnh xà hkôt tee ri kamã hapêr nom nhũm kamã amrakati kumrêx. Anẽ.

²⁵Hãmri nhũm Jejus amnhĩ tã wa kuma nẽ wa kãm tanhmã amnhĩ jarẽnh to nẽ wa kãm: —Hêxta waa nẽ. Pêr ãm mẽ ate mẽmoj mã ajamaxpêr tỳx mex kêt kumrêx. Na pre ra Tĩrtũm nhỹ hã kapêr jarẽnh xwỳnhjaja Tĩrtũm kapêr ã kagà htũm kamã ã kot amnhĩ nhĩpêx anhỹrja kukamã hprĩ hã harẽ nẽ hã kagà. Mẽ akukamã mẽ anhĩgêjtê mã harẽ nẽ hã kagà. Tã ka mẽ kormã aprĩ hã mar tỳx kêt nẽ.

²⁶Kêt mẽ anê na Tĩrtũm kot ãm xwỳnhhta ty. Tã ra akupỹm htĩr nẽ akupỹm kaxkwa hwỳr àpir kaxyw. Kot mẽ ato amnhĩptãr kaxyw ra akupỹm hwỳr àpir mã.

²⁷Amnepêr na pre finat Mojesja tanhmã hkukamã mẽ anhĩgêjtê mã harẽnh to nẽ hã kagà. Nẽ hprĩ hã harẽnh o pa. Nhũm hpãnhã Tĩrtũm nhỹ hã kapêr jarẽnh o mẽ pa xwỳnhjaja ma anẽ nẽ mẽ kãm harẽnh o pa. Anẽ. Nhũm pre ã Jejus wa hkôt hprĩ hã wa kãm amnhĩ jarẽnh anhỹr o tẽ. Te ho nhãm mẽhõ jarẽnh pyrãk nom tãm wa kãm amnhĩ jarẽnh o wa hkôt tẽ. No nhũm kormã wa hprĩ hã kêp Jejus ã omunh kêt nẽ.

28-29Nhũm ã wa kãm amnhĩ jarẽnh anhỹr o mõr rãhã nhũm mẽ ra wa õ krĩ hwỳr hpõx o mõi. Nhũm ra kamàtre nhũm Jejus te kot wa rer nẽ nhỹhỹm ma htẽm kaxyw pyræk o amnhĩ nhĩpêx nhũm wa tee ri omu nẽ kãm: —Kwa xà kot kaj wa ixre nẽ ma tẽ? Ra kamàt o mõr kênã. Kwa ma wa ixkõt tẽ nẽ wa inhõrkwỹ kamã mãn wa ixri pøj. Anẽ. Hãmri nhũm wa kuma nẽ ma wa hkõt tẽ.

30Nẽ mẽ wa õrkwỹ hwỳr pøj nẽ hwỳr agjê. Hãmri nẽ apkur kaxyw hkrĩ nhũm Jejus tãm pãwti py nẽ Tĩrtũm mã harẽ nẽ hpãnhã ho axkjê nẽ wa kãm kugõ.

31Hãmri nhũm wa atã kêp Jejus ã omunh kurê kumrêx. Jao nhũm wa kêp akunok nhũm wa tee ÿr xà kamã hapêr nhũm hkaprỹ mex nẽ xa.

32Hãmri nhũm wa tee ri axpẽn pumu nẽ ri hkukamã hamaxpêr nẽ axpẽn mã: —Hêxta waa nẽ. Xep tãm na. Tãm na pahkõt mõi nẽ pry hã hprĩ hã pamã Tĩrtũm kapêr ã kagà jarẽ pu hkõt pahkĩnh nẽ mar o mõi. Hêxta waa nẽ. Xep tãm na. Anẽ.

33-35Hãmri nẽ wa kànhmã xa nẽ kato nẽ ujanãr kurê kumrêx. Hãmri nẽ ma akupỹm Jerujarẽ hwỳr wa hkwỳjê hwỳr tẽ. Nẽ mẽ hwỳr pøj nẽ axà. Nhũm Jejus nhỹ hã mẽ ahkre ho mẽ pa xwỳnh pê 11jaja ra axpẽn wỳr akuprõ nẽ hkrĩ. Mẽ hkwỳjê mẽ axpẽn wỳr akuprõ nẽ axpẽn mã tanhmã Jejus jarẽnh to ho hkrĩ. Hãmri nhũm wa mẽ hwỳr axà nhũm mẽ wa omu nẽ wa kãm: —Kwa na xep ra Jejus akupỹm htĩr nẽ Simãw Pêtre hwỳr kato. Anẽ. Hãmri nhũm wa mẽ kuma nẽ mẽ kãm: —Tỳ na akupỹm htĩr kênã. Na pa wa ijaxwỳja ham omu. Na pry hã wa ixtã ajêt nẽ ma wa ixkõt mõi nẽ wa inhõrkwỹ kamã pøj. Hãmri pa mẽ ixàpkur kaxyw ixkrĩ nhũm pãwti py nẽ Tĩrtũm mã harẽ nẽ ho axkjê nẽ wa inhmã kugõ pa wa ixprĩ hã kêp Jejus ã omunh kurê kumrêx. Ixprĩ hã omunh jao nhũm wa ixpê hapêx. Anẽ.

Jejus kot hkwỳjê piitã hwỳr kator ã harẽnh

Matêwre 28.16-17; Makre 16.14; Juãw 20.19-23

36Nhũm mẽ kormã axpẽn mã Jejus jarẽnh o hkrĩ rôm nhũm tãm nhỹhỹnh mẽ hwỳr axà nẽ xa. Mẽ haêr pê mẽ hwỳr nhỹhỹnh axà nẽ mẽ kãm: —Pa? Xàn ka mẽ arĩ akrĩ? Anẽ.

³⁷Hāmri nhũm mẽ amnhĩ jaêr pê omunh jao kànhmã hakry hpar o mra. Jao hakryk kãm ma htỳx kãm omunh o hkrĩ.

³⁸Hāmri nhũm mẽ kãm: —Kwa mon ka mẽ amã ixpyma kamã tee ri ixpumunh o akrĩ? Kwa mẽ ixkarõ hã ixkamnhĩx nẽ amã ixpyma hkêt nẽ.

³⁹Na pa akupỹn inhĩ ho mẽ awỳr ixkato nẽ xa. Ga mẽ inhĩhkra kamã prek tatak xàja pumu. Nẽ ixpar kãm omu. Kwa mẽ amã ixpyma hkêt nẽ. E mẽ māmri mra nẽ anhĩhkra ho ixkupê. Kêp apu ixkarõ hpix ronhỹx ka mẽ inhĩ kupênh kêt nẽ. Mo mẽhkarõja i? Nà na pa akupỹm ixtĩr nẽ inhĩ ho mẽ awỳr ixkato. Anẽ.

⁴⁰Hāmri nẽ mẽ kãm amnhĩ nhĩhkra hpẽ nẽ mẽ kãm amnhĩ par pẽ.

⁴¹Tã nom nhũm mẽ arĩ akryk omunh o hkrĩ. Mẽ kot omunh nẽ hkĩnh tã tee ri omunh o hkrĩ. Hāmri nhũm tee ri ja hã mẽ omu nẽ mẽ kãm: —E kwa mẽ inhmã mẽmoj japêr pa kukrẽ. Anẽ.

⁴²Hāmri nhũm mẽ kãm tep gôj kãm ãmta gõ

⁴³nhũm kupy nẽ hkur o nhỹ nhũm mẽ arĩ hã omunh o hkrĩ. Jao ra akupỹm htĩr ã omunh kurê kumrẽx.

Jejus akupỹm nojarêt nẽ hkwyjê mã mẽmoj tã karõ

Matêwre 28.18-20; Makre 16.15-18; mãânên Atre 1.6-8

⁴⁴⁻⁴⁵Hāmri nhũm Jejus hprĩ hã mẽ kãm Tĩrtũm kapêr ã kagà htũm kot hkukamã harênh ã amnhĩ jarẽ nẽ mẽ kãm: —Nà kormã ixtyk kêt ri na pa pre ixprĩ hã mẽ amã amnhĩ kukamã amnhĩ jarẽ. Tĩrtũm kapêr ã kagà htũm kot tanhmã mẽ kot inhĩpêx to hkukamã ijarênhja. Na pre finat Mojes Tĩrtũm nhỹ hã ixkukamã tanhmã ijarênh to. Nẽ Tĩrtũm nhỹ hã kapêr jarênh o mẽ pa xwỳnhjaja Mojes mỳr pê haxwỳja ixkukamã tanhmã ijarênh to. Nẽ Tĩrtũm mex o mex ã mẽ grer ã kagà xwỳnhjaja haxwỳja ixkukamã tanhmã ijarênh to. Jajê piitã na prem Tĩrtũm kapêr ã kagà htũm kamã ixkukamã ijarẽ.

⁴⁶Ně ijarēnh o: Tirtūm kot mẽ pakaxyw ãm xwỳnh pê Krisja koja nhỹrmã ty. Ně htyk o apkati axkruněpxi nẽ akupỹm htĩr. Anhỹr o mẽ kot ijarēnh. Tã pa ra mẽ kot ixkukamã ijarēnh xà hkôt ã mẽ anê amnhĩ nhĩpêx anẽ.

⁴⁷—No ãm Tirtūm kapěr ã kagà htūm kot papxipix ixkukamã ijarēnh kêt. Kamã mãănẽn mẽ kajaja tanhmã mẽ akukamã mẽ ajarēnh kute. Mẽ apê ixkôt amnhĩ xunhwỳr xwỳnhjaja ixwakre kamã tanhmã mẽ ate inhmã amnhĩ nhĩpêx to ho apa hkukamã tanhmã mẽ ajarēnh kute. Nẽ mẽ ajarēnh kot: E mẽ ate ixkôt amnhĩ xunhwỳr xwỳnhjaja. Kêr ka mẽ ma pika piitã hkôt mẽ kãm Tirtūm kot mẽ awỳr mẽnh xwỳnhhta jarēnh o ri mẽ hkôt apa. Mẽ kot mẽ amar nẽ amnhĩ tomnuj kaga nẽ Tirtūm kôt amnhĩ xunhwỳr kaxyw. Kêr kê Tirtūm ja hã mẽ omu nẽ amnhĩ katut kôt mẽ kot amnhĩ tomnuj rēnh pa. E kêr ka mẽ ma krĩ piitã hkôt mẽ kãm ã ja jarēnh anhỹr o ri mẽ hkôt apa. Krĩ pê Jerujarē kumrēx kãm hãmri nẽ rĩ kormã pu hã krĩ kuhê xwỳnh piitã hkôt ajapôj nẽ mẽ kãm harēnh o ri apa. Anẽ. ã Tirtūm kapěr ã kagà htūm kot mẽ akukamã mẽ ajarēnh kot anhỹr.

⁴⁸Tã kêr ka mẽ ã mẽ kãm tanhmã ijarēnh to ho ri apa anẽ.

⁴⁹No ãm kormã. Kêr paj ma akupỹm kaxkwa hwỳr api hãmri nẽ amnhĩ pãnhã mẽ awỳr Tirtūm Karõ rē mãn. Tirtūm kot ixte amnhĩ nhĩpêx ã ijarēnh xà hkôt kot paj amnhĩ pãnhã mẽ awỳr kurẽ. Tã kêr ka mẽ kormã krĩ ja kamã kutêp apa. Kêr kê mẽ awỳr wrỳ nẽ mẽ amã agjê ka mẽ rĩ kormã anhgrà nẽ ma ÿ hã mẽ kãm ijarēnh o ri mẽ hkôt apa. Anẽ.

Jejus kot akupỹm kaxkwa hwỳr àpir ã harēnh

Makre 16.19-20; mãănẽn Atre 1.9-11

⁵⁰Tã nhũm Jejus Jerujarē rũm hkôt mẽ pa ho pa xwỳnhjê kator nẽ ma krĩ pê Petãn wỳr mẽ o mỗ. Nẽ kormã hwỳr mẽ o mỗr ri nhỹri mẽ o xa nẽ kànhmã ìhkra pẽ nẽ mẽ ho Tirtūm wỳ.

⁵¹ã mẽ ho hwỳr anhỹrja rôm nhũm Tirtūm amnhĩ wỳr ho àpir o mỗ nhũm mẽ noo mã ma akupỹm tẽn api.

⁵²Hāmri nhũm mẽ kām mex o mex ã harēnh pê ma akupỹm àpir kām omunh o kuhê. Nhũm ma tẽ nẽ mẽ kêp kakrãm axà nẽ mẽ kêp akunok. Hāmri nhũm mẽ awjanã nẽ ma akupỹm Jerujarẽ hwỳr hkĩnh nẽ pa.

⁵³Hāmri nẽ apkati mẽ Tĩrtũm mã amnhĩ jarēnh xà hã ixkre hwỳr agjê nẽ kamã Tĩrtũm mã mex o mex ã harēnh o hkrĩ rãhã nẽ. Tã ãm ja pix ixkràmnhwỳ Teopre. Ixpê Rukre na pa awỳr kagàja nhĩpêx nẽ kamã Jejus kot tanhmã amnhĩ nhĩpêx to hã harẽ nẽ hã kagà nẽ awỳr kumẽ.

Juãw

Juãw 1

Jejus te kot Tĩrtũm pyrãk ã harẽnh

Matêwre 1.23; Juãw 8.12; 8.58; 10.30; 20.28; mããnẽn Atre 10.36; Sikũn Korĩt 4.4; Piripos 2.6-11; Korosẽ 1.13-17; 2.9; Xitre 2.13; Eprẽw 1.1-4; Wam Juãw 1.1-4; 5.20; Apokarip 1.17-18

¹Amnepê mã kormã mẽmoj kêt ri nhũm kot Tĩrtũm kapẽr o amnhĩrĩt xwỳnhja Tĩrtũm kôt pa ho pa. Te kêp uràk nẽ pa. Wa kot amnhĩ nhĩpêxja ãm tipxi. Nẽ wa àhpumunh ãm tipxi. Nẽ wa hkarõ mããnẽn ãm tipxi. ãm wa tipxi rãhã nẽ pa ho pa.

²Kormã mẽmoj kêt ri na pre Tĩrtũm kapẽr o amnhĩrĩt xwỳnhja Tĩrtũm kôt ri pa ho pa.

³Nẽ Tĩrtũm nhỹ hã na pre mẽmoj piitã hã apê nẽ ho kato. Jao pyka ho kato nẽ kaxkwa ho kato nẽ gô xujanãr o kato. Nẽ kamã mẽmoj piitã Tĩrtũm nhỹ hã ho kator pa. Kop apu mẽmoj to kator kêt ronhỹx mẽmoj amrakati kumrẽx.

⁴Nẽ Tĩrtũm o amnhĩrĩt xwỳnhja pix kukwak ri na hte mẽmoj piitã htĩr nẽ pa. Nẽ ãm pix kukwak ri na htem Tĩrtũm ri htĩr tũm nẽ pa ho pa. Nẽ te myyti kot mẽ pamã mẽmoj piitã hirã ho pa pu mẽ kukwak ri mẽmoj piitã omunh mexja pyrã nẽ na pre hte mẽ pahpiitã mẽ pamã mẽ pahte amnhĩ nhĩpêx nyw nẽ mẽ pajamaxpẽr nyw o amnhĩrĩt pu mẽ pahprĩ hã mar mex nẽ.

⁵Ja kaxyw na pre wrỳ nẽ ri mẽ kãm Tĩrtũm kapẽr jarẽnh o ri mẽ hkôt pa. Jao mẽ kot amnhĩ nhĩpêx nyw jarẽ nhũm mẽ kot amnhĩ tomnuj xwỳnhjaja tee ri kuma nẽ kãm mar prãm kêt nẽ. Nẽ tee ri kãm kapẽr o hapêx prãm kaprỳ.

Juãw Paxis kumrẽx kot tanhmã Jejus jarẽnh to hã harẽnh

Matêwre 3.1-3; Makre 1.1-4; Rukre 3.2-6

⁶Tã nhũm kormã Jejus mẽ kãm kapẽr o pa hkêt ri nhũm Juãw Paxis kumrẽx mō nẽ hkukamã Tĩrtũm nhỹ hã mẽ kãm tanhmã harẽnh to ho pa.

⁷Mě kām mẽ kot amnhĩ nhĩpêx nyw nhõr xwỳnh pê Jejus Kris kukamã mẽ kām harēnh o ri mẽ hkôt pa. Mě kot mar nẽ amnhĩ kaxyw Jejus kôt hamaxpěr kaxyw.

⁸No Juãw Paxisja na pre hte mẽ kām mẽ kot amnhĩ nhĩpêx nyw nhõr o pa hkêt nẽ. Na pre ãm kot mẽ kām òr xwỳnhhta kukamã mẽ kām harēnh o pa.

⁹Jakamã na pre hte mẽ kām harēnh o ri pa nẽ mẽ kām harēnh o: —E ot pa mẽ amã mẽhõ jarēnh o ri ixpa. Kot mẽ pamã mẽ pahte amnhĩ nhĩpêx nyw nhõr xwỳnhhta. Kojax tokyx mẽ pakamã pøj pu mẽ omu. Kojax pøj nẽ mẽ piitã mẽ kām Tĩrtũm kapěr jarēnh o ri pa. Mě pahte pahprĩ hã mar mex kaxyw. Anẽ.

Tĩrtũm kot mẽ ho hkra hprãm xwỳnhjê jarēnh

Rõmãn 8.14; Karatas 3.26; Epes 1.5

¹⁰Tã nhũm Jejus man kot mẽmoj piitã ho kator xwỳnhhta wỳr wỳr nẽ mẽ hkôt ri pa. No nhũm mẽ kot kệp mẽmoj piitã ho kator xwỳnh ã omunh kêt jakamã na prem kapěr ma nẽ ãm kuma nẽ amnhĩ kaxyw hkôt hamaxpěr kêt nẽ.

¹¹Na pre wỳr nẽ mẽ pakamã ã ho kato. Kệp mẽ pahpiitã mẽ pahto kator xwỳnh tã nhũm mẽ ohtô nẽ omu nẽ ãm omu nẽ hkôt amnhĩ nhĩpêx kêt nẽ.

¹²Na prem ãm grêre nẽ kuma nẽ amnhĩ kaxyw hkôt hamaxpěr nẽ hkôt amnhĩ xunhwỳ. Hãmri nhũm amnhĩ tã mẽ omu nẽ mẽ kãm: —E nã ãm hãmri. Ra mẽ ate amnhĩ kaxyw ixkôt ajamaxpěr nẽ ixkôt amnhĩ xunhwỳr jakamã na ka mẽ ixkukwak ri apê Tĩrtũm kraa. Anẽ.

¹³Na htem ã kệp Tĩrtũm kra hprãm xàj Jejus kôt amnhĩ xunhwỳr anẽ. No na htem mẽ katorxà nhõxà hkre rũm hapôx kôt kệp Tĩrtũm kra hkêt nẽ. Rỳ amnhĩ krã hkôt tanhmã amnhĩ nhĩpêx to kukwak ri kệp hkra hkêt nẽ. ãm Tĩrtũm tãm kot mẽ ho hkra pix kukwak ri na htem kệp hkra.

Jejus wỳk nẽ ã ho kator ã harēnh

Matêwre 1.20; mãănên Rõmãn 1.2-4; Piripos 2.6-7; Eprêw 2.9; 4.15; Wam Juãw 4.2

¹⁴Jakamã na pre Tĩrtũm o amnhĩrĩt xwỳnhhta mẽ pahwỳr wỳr nẽ mẽ pakamã ã ho kato nẽ mẽ pakamã pa. Kệp Tĩrtũm Kra hã pixi mex na pre. Nẽ kot

amnhĩ nhĩpêxja te Tĩrtũm kot amnhĩ nhĩpêx pyræk. Uræk nẽ mex o mex. Nẽ uræk nẽ mẽ pakutã nojarêt xwỳnh. Na pre hte katàt kôt Tĩrtũm kapêr jarênh o ri mẽ hkôt pa. Pa prem kuma nẽ mex o mex ã omu.

¹⁵Nhũm Juãw Paxis na pre hkukamã mẽ kãm harênh o ri pa nẽ mẽ kãm: — E ra ixte mẽ amã harênh o ri ixpa xwỳnhhta na ra pøj. Te pa ixte wa nẽ ixkator pyræk nom amnepê mã kormã ixkêt ri nhũm htĩr rãhã nẽ pa ho pa. Ham ĩ ho kator tã kêp Tĩrtũm Kra jakamã uræk nẽ rãhã ho rãhã hã pa xwỳnh na. Jakamã kot amnhĩ to rax o kot ijakrenh par. Anẽ.

¹⁶Nẽ kêp mẽ pakutã nojarêt rãhã nẽ pa ho pa xwỳnh jakamã na hte mẽ pahto mex rãhã pu mẽ kukwak ri pamex nẽ ri papa ho papa.

¹⁷Na pre finat Mojesja mẽ panhĩgêjtjê mã Tĩrtũm kapêr jarênh o ri mẽ hkôt pa nẽ mẽ kãm: —Na pre Tĩrtũm mẽ pahte tãm amnhĩ nhĩpêx o papa hã mẽ pamã karõ. Jakamã kot puj mẽ kot mẽ pamã mẽmoj tã karõ xà hkôt ã amnhĩ nhĩpêx anhỹr o papa nẽ ra tãm amnhĩ nhĩpêx o papa. Anẽ. Nhũm pre Mojesja ã mẽ kãm kapêr o pa anẽ. Hãmri nhũm mẽ kuma no ãm tee ri kãm Tĩrtũm kôt tãm amnhĩ nhĩpêx o pa hprãm kaprỳ. Jakamã nhũm hpãnhã Jejus Krisja wrỳ nẽ mẽ pamã kapêr õ ho kapêr o pa nẽ mẽ pamã: —E mẽ ate Tĩrtũm kôt amnhĩ nhĩpêx o apa hkêt tã nhũm arĩ kãm mẽ ajapê nẽ. Nẽ kãm mẽ ato mex prãm. Jakamã kot kaj mẽ amnhĩ to awỳ nhũm tanhmã mẽ akrã hto ka mẽ ra tãm ri amnhĩ nhĩpêx o apa. ãm hãmri na pa ã mẽ amã ja jarênh anẽ. Anhỹr o mẽ pamã Tĩrtũm kapêr jarênh o pa. Tĩrtũm kapêr na mex o mex.

¹⁸Nẽ aa mẽ pahtõ mẽ pahte pano ho Tĩrtũm pumunh kêt. ãm Kraja pix na kot no ho omunh. Kaxkwa kamã kuri ri pa ho pa jakamã kot omunh mex. Nẽ te kot Hipêêxàja pyræk jakamã na pre wrỳ nẽ hprĩ hã tanhmã kute hã mẽ pamã harênh o pa. Jakamã na pu mẽ ra pahpiitã Tĩrtũm kot amnhĩ nhĩpêx ã omu nẽ mar mex nẽ.

Juãw Paxis kot mẽ kãm Jejus jarênh o pa hã harênh

Matêwre 3.1-12; Makre 1.1-8; Rukre 3.15-17; mãänên Atre 19.4

¹⁹⁻²⁸Na pre Juãw Paxis ma hkwỳjê hkôt mẽ kãm Jejus jarênh o pa nhũm mẽ hkwỳjaja kuma nẽ amnhĩ kaxyw Jejus kôt hamaxpêr nẽ hkôt amnhĩ

xunhwỳ. Hāmri nhūm Juāw Paxis ja hā mẽ omu nē Tĩrtūm mã mẽ hkrã kumrã. Pyhti pē Jotãw nhĩkjê hã krĩ pē Petãn tã ri mẽ hkrã kumrãr o pa. Hāmri nhūm krĩ pē Jerujarẽ kamã Ijaew krãhtũmjaja harẽnh ma nē ma hwỳr hkwỳjê rē. Mẽ kot tanhmã hkukjêr to nhūm kot mẽ kãm tanhmã amnhĩ jarẽnh to kaxyw. Jakamã nhūm mẽõ patre hkwỳjê mẽ Tĩrtūm mã amnhĩ jarẽnh xà hã ixkre kamã mẽ ho ajuta xwỳnh kwỳjê mẽ Parijew nhõ xwỳnh kwỳjê mẽ nhūm mẽ ma hwỳr mra. Juāw Paxis wỳr mra nē omu nē kãm: — Pa. E ot pa mẽ awỳr mra. Kwa mẽ inhmã amnhĩ jarẽ. Apê mẽ atõ na ka we? Xà ka na apê Tĩrtūm kot mẽ ixkaxyw axãm mã xwỳnhhta na ka nà? Xà ka na pa htem amnhĩ wỳr akamã ijamak o ixpa? Anẽ. Hāmri nhūm mẽ kuma nē mẽ kãm: “Nà pa hkêt.” Anẽ hāmri nhūm mẽ kãm: —Tõ mãn xep apê amnepê mã Tĩrtūm nhỹ hã kapêr jarẽnh xwỳnh pē finat Erisja. Hã na ka tanhmã amnhĩ to nē akupỹm atĩr nē mẽ ixkõt apa nà? Anẽ. Hāmri nhūm mẽ kãm: —Nà ixpê Eris kêt. Anẽ. Hāmri nhūm mẽ kãm: —Tõ mãn xep apê finat Mojes kot mẽ kãm harẽnh o pa xwỳnhhta na ka nà? Anẽ. Hāmri nhūm mẽ kuma nē kê axte mẽ kãm: —Nà ixpê tãm kêt. Anẽ. Hāmri nhūm mẽ tee ri kot ã amnhĩ tã aprãr anhỹrja ma nē kãm: —Kwa apê jajê hõ hkêt tã na ka hte mẽ hkrã kumrãr o ri apa. Kwa nà akatàt kõt mẽ inhmã amnhĩ jarẽ. Pa mẽ ama nē ma akupỹm mra nē mẽ kot awỳr mẽ ixrẽnh xwỳnhjê mã tanhmã ajarẽnh to. Tanhmã na ka hte mẽ kãm amnhĩ jarẽnh to ho ri apa? E kwa mẽ inhmã amnhĩ jarẽ pa mẽ ama. Anẽ. Hāmri nhūm tã hprĩ hã mẽ kãm amnhĩ jarẽ. Amnepê mã mẽ hkukamã Tĩrtūm nhỹ hã kapêr jarẽnh xwỳnh pē finat Ijais kot hkukamã tanhmã harẽnh to nē hã kagà xà hkõt nhūm mẽ kãm amnhĩ jarẽ nē mẽ kãm: —Tõe. Nà kot paj ixprĩ hã mẽ amã amnhĩ jarẽ ka mẽ inhma. Amnepê Tĩrtūm kapêr jarẽnh xwỳnhjê hõ pē finat Ijaisja na pre hte mẽ kãm mẽhõ hkukamã harẽnh o ri pa. Mẽhõ kot mẽ panhõ Pahihti hkukamã htẽm nē kapõt ã kutêp mẽ kãm harẽnh o pa xwỳnhhta nhūm pre hkukamã harẽnh o ri pa. Nē mẽ kãm harẽnh o: Koja nhỹrmã mẽhõja kapõt ã mõn pøj nē mẽ kãm tanhmã ujarẽnh to ho ri pa. Nē mẽ kãm ujarẽnh o: “E mẽ inhma. Koja Tĩrtūm tokyx mẽ pahwỳr mẽ panhõ Pahihti mẽ nhūm wrỳ nhūm mẽ piitã omu. Jakamã kwa mẽ tokyx kutêp tãm amnhĩ nhĩpêx o ri apa. Te ho

mě kot mēhō kutêp pry ho mex pyrək o amnhĩ nhĩpêx o ri pa. Jao amnhĩ nhĩ ho tām amnhĩ nhĩpêx nē tām axpēn nhĩpêx o ri apa. Pahihtita kutêp.” —Anhỹr o na pre hte finat Ijaisja kot Pahihti hkukamā harēnh o ri pa xwỳnhhta kukamā harēnh anē. Tā paa. Pa na pre Ijaisja ã ixkukamā ijarēnh anhỹr o pa. Pa na pa hte ã Pahihti kutêp mē kām harēnh o ri ixpa anē. Tā ã ixte harēnh anhỹr xwỳnhhta na ra mē pakamā pa ka mē kormā ja hā omunh kêt nē. Kukamā na pa hte mē piitā mē kot hkôt amnhĩ xunhwỳr ã mē omunh kaxyw gô pix o mē hkrā kumrār o ri mē hkôt ixpa. Nom na pre ra mē pahwỳr Tĩrtũm kot mē pakaxyw ãm xwỳnhhta tām mē pahwỳr wrỳ. Àhpumunh tỳx o kot ijakrenh jakamā na pa hte ãm kukwak ri ixpa nē amnhĩ tã hā xpijaàm o ri ixpa. Anē.

Juāw Paxis kot mē kām Jejus jahkre hā harēnh

Matêwre 3.11; Makre 1.10; Rukre 3.22

²⁹Tā nhũm apkati nhũm Juāw Paxis amnhĩ wỳr Jejus pumu nē mē kot mar o kuhê xwỳnhjê mǎ ĩhkra ho ahkre nē mē kām: —E. Oněj Tĩrtũm kot mē pakaxyw ãm xwỳnhhta tē. Mē pahpê Ijaew na pu htem xatã pahte amnhĩ tomnuj pānhã amnhĩrer kaxyw Tĩrtũm mǎ pahkrit ôwêhti hkra nyw kwỳ hpa nē ho amnhĩ pānhã kām amnhĩrer o papa. No kêt htēm nēj koja nhỹrmǎ kām mē pahpiitā mē pahte amnhĩ tomnuj pānhã amnhĩrer pa.

³⁰Na pa pre ra mē amǎ harēnh o: “Te pa ixte wa nē ixkator nē ixtĩr nē ixpa pyrək. Nom amnepēm kormā ixkêt ri na pre htĩr rāhã nē pa ho pa. Nē ĩ ho wrỳk nē jar kator tã kêp Tĩrtũm Kra jakamā urək nē rāhã nē pa ho pa xwỳnh na. Jakamā kot amnhĩ to rax o kot ijakrenh par.” Anhỹr o pa pre mē amǎ harēnh o ri ixpa ka prem inhma.

³¹—Ixte mē amǎ ã harēnh anhỹr tã ijaxwỳja kormā ixte kêp Tĩrtũm Kra hā omunh kêt nē ãm hkukamā Tĩrtũm nhỹ hā mē amǎ ã harēnh anhỹr o ri ixpa. Nē hkukamā Tĩrtũm mǎ mē akrā kumrār o ri ixpa. Tā na pa kêp Tĩrtũm Kra hā omu nē ã mē amǎ ahkre anē ka mē omu. Anē.

³²⁻³³Nhũm pre ã Juāw Paxis mē kām Jejus jahkre anē nē mē kām: —Nà Tĩrtũm na pre ixte mē akrā kumrār o ixpa kaxyw inhmǎ hā karō. Tā na inhmǎ kot mē pakaxyw ãm xwỳnhhta o amnhĩrĩt nē inhmǎ harēnh o: “Koja

nhÿrmã Ixkarõja mēhõ hwÿr wrÿ nē kuri arĭk. Ka ja hã omu nē kēp Ixkra hã omunh kurê kumrēx. Koja amnhĩ xõ ri amnhĩ pyrà nē mē kãm Ixkarõ nhõr o pa nhũm mē hkarõ mã agjê.” Anhÿr o inhmã harē. Tã na pa ra omu. Na pre Tĩrtũm Karõ kaxkwa rũm te tuuti pyrà nē hwÿr wrÿk o tē nē ĩkre hã xa.

³⁴Pa ã kot hipêx anhÿr ã omu nē kēp Tĩrtũm Kra hã omunh kurê kumrēx. Jakamã na pa ã mē amã ahkre nē mē amã harēnh anē. Anē.

Juãw Paxis kõt pa xwÿnh wa kot Jejus kõt pa hã wa harēnh

Atre 19.4

³⁵Tã nhũm apkati nhũm Juãw Paxis axte Jejus pumu. Kot hkõt ri pa ho pa xwÿnh mē wa nhÿri xa nē omunh o xa.

³⁶Nhũm ra mē hãnh tē nhũm Juãw Paxis omu nē hkõt ri pa xwÿnh wa kãm: —E oněj Tĩrtũm kot mē pakaxyw ãm xwÿnhhta tē. Něj koja mē pahte amnhĩ tomnuj pãnhã amnhĩre. Anē.

³⁷Hãmri nhũm wa kuma nē omu nē ma hkõt tē nē hã ajê.

³⁸Nhũm wa omu nē wa kãm: “Pa mo na?” Anē nhũm wa kot kēp mē ahkre xwÿnh ã omunh jakamã kãm: —Nà wa ixte ma akõt ixtēm nē nhÿri anhõrkwÿ pumunh mã na pa wa akõt tē. Anē.

³⁹Hãmri nhũm wa kãm: —Tõe. Nà wa kam nē rĩ ma ixkõt tē. Anē. Hãmri nhũm wa kuma nē ma hkõt wa tē nē õrkwÿ hwÿr pøj nhũm ra amÿkry nhũm wa hkõt axà nē kuri ÿr o kamàt hãmri nē kato nē ma akupÿm tē.

⁴⁰Kõt htēm xwÿnhjê hõta na pre kēp Andre. Simãw Pêtre htõ na pre. Nē kaxyw hõja. Wa kumã na pre Juãw Paxis Jejus jahkre nē harē nhũm wa ma hkõt tē. Tã wa ra akupÿm wa tē.

⁴¹Hãmri nhũm Andreja htõ Simãw wÿr tē nē kãm: —Kwa na pa wa jarãhã Tĩrtũm kot mē pakaxyw ãm xwÿnhhta pumu. Ma pu hwÿr ka wa ixwar ano ho omu nà. Anē. Ijaew kapēr kãm “Tĩrtũm kot mē pakaxyw ãm xwÿnh” anhÿrja te kot Gres kapēr kãm “Kris” anhÿr jarēnh pyræk. Ijaew na prem ã Jejus jarēnh anē nē harēnh o: “Tĩrtũm kot mē pakaxyw ãm xwÿnh.” Anhÿr o harē.

⁴²Jakamã nhũm ã Andreja htõ mã harënh anë nẽ ma akupÿm hwÿr o tẽ. Nẽ wa hwÿr pøj nhũm wa omu. Wa kęp Juãw kra hã wa omu hãmri nẽ Simãw mã kapër nẽ kãm: —Pa Simãw. Nà apê Simãw tã kot paj axte atã anhïxi hõ mẽ. Kot kaj mãänën apê Septi. Anë. Mẽ pakapër kãm Septija te kęp “kën” jarënh pyræk. No Gres kapër kãm te kęp “Pêtre” jarënh pyræk. No Ijaew kapër kãm kęp “Septi.” Jakamã nhũm pre Jejus ã Simãw Pêtre hã hixi mẽnh anë.

Jejus kot amnhĩ kôt Firipti mẽ Natãnaew wa hwÿr ã harënh

⁴³⁻⁴⁴Tã nhũm apkati nhũm ra Jejus pyka pê Garirej wÿr nojarêt nẽ nhÿri Firipti pumu. Firiptija Andre mẽ Simãw Pêtre wa uræk nẽ krĩ pê Pesêj nhõ xwÿnh na pre. Jakamã nhũm Jejus nhÿri omu nẽ amnhĩ kôt kuwÿ nẽ kãm: —E kwa ma ri ixkôt apa ho apa. Anë.

⁴⁵Hãmri nhũm kuma nẽ ma tẽ nẽ nhÿri Natãnaew pumu nhũm nhÿri pĩ hpàr parpê nhÿ nhũm omu nẽ kãm: —Kwa na pa jarãhã finat Mojes kot amnepêm mẽhõ hã kagà xwÿnhhta pumu. Tĩrtũm kot mẽ pakaxyw ãm xwÿnhhta na. Tĩrtũm nhÿ hã kapër jarënh o mẽ pa xwÿnhjaja kot hkukamã harënh nẽ hã kagà xwÿnhhta. Kęp Najare nhõ xwÿnh nẽ mãänën kęp finat Juje hkra. E kwa tokyx pu hwÿr ka ixkuxwar ano ho omu. Anë.

⁴⁶Hãmri nhũm tee ri kot tanhmã harënh toja ma nẽ kãm: —Tk. Kokÿ. Najare nhõ xwÿnh piitã kot amnhĩ to mexti hã kot kêt we hõ kęp Tĩrtũm kot mẽ pakaxyw ãm xwÿnh. Anë. Hãmri nhũm kãm: —Kwa nà ã akapër anhÿr kêt nẽ. Ma ixkôt tẽ nẽ ixpyrà nẽ ano ho omu mãn. Nẽ rĩ ã ri akapër anë. Anë. Hãmri nhũm kuma nẽ ma hkôt tẽ.

⁴⁷Hãmri nhũm Jejus amnhĩ wÿr wa omu nẽ kuri mẽ kuhê xwÿnhjê mã Natãnaew jarënh kurê kumrëx nẽ harënh o: —E oněj Ijaew õja mẽ pahwÿr hpôx o tẽ. ãm hãmri na hte tãm amnhĩ nhĩpêx o pa. Na hte higêt finat Jako kurom hêx rom ri tanhmã mẽ kãm amnhĩ to hêx to ho pa hkêt nẽ. Na hte ãm kapër mex pix o ri kapër o pa. Anë.

⁴⁸Hãmri nhũm tee ri amnhĩ tã kuma nẽ kãm: —Kwa mẽhõ na pre ã amã ijarënh anë? Aa ixte nhÿri apumunh kêt kumrëx tã ka ri ãm hãmri ã ijarënh

anê. Anê. Hāmri nhūm kām: —Nà mēhō kot tanhmã inhmã ajarēnh to hkêt. ãm pa na pa hte inhno ho apumunh o ixpa. Kormã Firipti kot awÿr htēm nē amã ijarēnh kêt ri pa ra ixprĩ hã inhno ho apumu. Na ka kormã pĩta parpê nhÿ pa apumu. Anê.

⁴⁹Hāmri nhūm tee ri kot hprĩ hã harēnh ã amnhĩ tã kuma nē kām: —Kwa mē ijahkre xwÿnh. Pēr ãm hāmri apê Tĩrtūm Kra kumrēx jakamã na ka ã ijarēnh anê. Xep ka na mē ixte amnhĩ wÿr akām ijamak o ixpa xwÿnhhta na ka. Nà ka na apê mē ixpê Ijaew nhō Pahihtĩ. Anê.

⁵⁰Hāmri nhūm Jejus kuma nē kām: —Nà ãm hāmri na ka ixte pĩ hpar pē apumunh ã ajarēnhja ma nē hkôt pix mã ixpê Tĩrtūm Kra hã ixpumu. Tã kot kaj ja nhĩrô pē axte mēmoj mex o kot ja jakrenh pumu.

⁵¹Koja nhÿrmã kaxkwa axkjê nhūm Tĩrtūm kapēr o mē wrÿk xwÿnhjaja kurūm axpēn japa ka mē omu. Finat Jako pyrà nē mē omu. Ixte Tĩrtūm kot mē akaxyw ixãm xwÿnh wÿr koja mē ã wrÿk nē amnhĩ nhĩpêx anê ka ja hã mē omu. Kwa jam ajamaxpēr tÿx rãhã ho apa. Anê.

Juãw 2

Jejus kot gô ho mē kām wĩhti nhĩpêx ã harēnh

¹Tã nhūm apkati axkrut nē hapêx nhūm Jejus arĩ Garirej kamã pa. Nhūm krĩ pē Kanã kamã axpēn mã wahōj wa rer kaxyw nhūm Jejus katorxà ma mē hwÿr mō.

²Hāmri nhūm mē amnhĩ wÿr Jejus mē hkôt ri mē ixpa xwÿnhjê wÿ pa mē ijaxwÿja ma mē hwÿr mō nē ra mē hwÿr pōj.

³Hāmri nē mē hkôt wa hã ixkĩnh nē apku nē wĩhti hkwÿ ho ixkôm o ixkrĩ. Tã nhūm ra wĩhti mē kēp hapêx nhūm Jejus katorxàja harēnh ma nē Jejus mã harē nē kām: —Xê Jejus. Na xep ra mē kēp wĩhti hapêx pa. Xàt ka tanhmã mē ho ajuta hto mē? Anê.

⁴Hāmri nhūm kām: —Tôe. Kwa tee ri ajamaxpēr kêt nē. Kot paj tanhmã mē kām ho. Nom kot paj kormã ixpê Tĩrtūm kot mē akaxyw ixãm xwÿnh ã pa kormã amnhĩ to amnhĩrĩt kêt nē. Anê.

⁵Hāmri nhūm katorxà kuma nē mẽ kām mẽ àpênh xwỳnhjê hwỳr tē nē mẽ kām: —An koja Jejus mẽ awỳr tē nē tanhmã mẽ amã mẽmoj tã karõ hto ka mẽ ama nē kām ho anhỳr kurê kumrêx. Anê.

⁶Nhūm mẽ kuri kên o poti kêp 6 nē kuhê. Piitã umpỳm rũnh kumrêx. Kojã hõ pyxi nē nỳt nē kamã gô kêp 80 rit nē hkwỳ kamã kêp 100 rit. Ijaew na htem apkur kaxyw nē amnhĩ nhĩhkra kuhõnh japjê rũnh nē kormã apku. Nê apkur pa nē axte amnhĩ nhĩhkra kuhõ. ã mẽ kot xatã amnhĩ nhĩhkra kuhõnh jakamã nhūm pre htem amnhĩ ri ã poti rũnh kwỳ xunhwỳr anê. No nhūm ra hkapyr nē kuhê.

⁷Hāmri nhūm Jejus tē nē omu mẽ àpênh xwỳnhjê mã kām: —E mẽ ma mra nē gô ru nē ho poti kuhê mũj piitã ho nỳt pa. Anê. Nhūm mẽ kuma nē ma mra nē ho nỳt pa.

⁸Hāmri nhūm mẽ kām: —Nà hāmri. Pãnhã hõ kamã gô hkwỳ janhi nē o tē nē mẽ anhõ patrãw mã agõ kê hkwỳ ho ixkõ nē kamã ama. Anê. Hāmri nhūm mẽ mar xà hkôt kām hkwỳ janhi nē hwỳr o tē nē kām kugõ.

⁹⁻¹⁰Nom nhūm gôja arĩ kêp gô kumrêx kêt nē. Jejus kot tanhmã ho jakamã nhūm ra hpãnhã kêp wĩhti. Jakamã nhūm mẽõ patrãw wỳr hkwỳ ho tē nē kām kugõ nhūm hkaki nē kamã ama. Nom Jejus kot gô ho hipêx ã omunh kêt nē. ãm htỳx ho wĩhti kumrêx ã hkamnhĩx nē mex kumrêx ã hkaki. Hāmri nē amnhĩ wỳr mjên nyw xwỳnh mã hpa ho apê nhūm hwỳr tē nhūm kām: —Kwa na htem wĩhti mex o wa nē mẽ kām kugõ hāmri nhūm mẽ hpenh pa nhūm mẽ rĩ kormã hkôt omnu ho hapu nē mẽ kām kugõ. Tã ka pêr mẽ axtem nē wam mẽ kām omnu nhõr pa hāmri nē kormã mex kumrêxja o hapu nē mẽ kām agõ. Kêt wĩhti ja na mex kumrêx. ãm mex o mex. Anê. Jejus kot gô ho hipêx ã omunh kêt jakamã nhūm ã kām kapêr anê. ãm mẽ àpênh xwỳnh pixjaja na prem ja hã omu.

¹¹Nhūm Jejus kormã mẽ kām aa mẽ kot mẽmoj pumunh kêt õ ho anhỳr kêt tã krĩ pê Kanã kamã ã mẽ kām amnhĩ nhĩpêx anhỳr o hkra. Jao amnhĩ to rax o amnhĩ to rax ã mẽ inhmã amnhĩ to amnhĩrĩt. Pa mẽ ixpê hkôt ri ixpa

xwÿnhjaja ã kot amnhĩ nhĩpêx anhÿr ã omu hãmri nê kêp Tĩrtũm kot mẽ pakaxyw ãm xwÿnh ã omunh kurê kumrêx.

¹²Tã nhũm Jejus hpãnhã ma krĩ pê Kapanaũ hwÿr mō. Pa mẽ hkôt ri ixpa xwÿnhjaja nê katorxà nê htōjaja pa mẽ ma ixpiitã hkôt mō. Hãmri nê hwÿr pōj nê kamã mẽ hkôt ixpa hã ixtã apkati grêre nê ma hpãnhã krĩ hō hwÿr ixpa.

Jejus kot Tĩrtũm nhōrkwÿ hwÿr àr ã harēnh

Matêwre 21.12-13; Makre 11.15-19; Rukre 19.45-46

¹³Tã nhũm ra arĩgro pê Pas ahtêp o mō. Pasja ã mẽ ixpê Ijaew na pa htem amnepê m Tĩrtũm kot pika pê Ejit rũm mẽ inhĩgêjtjê kator mã ijamaxpêr kaxyw axpên wÿr akuprō nê hã ixkĩnh. Jakamã nhũm Jejus ma hkwÿjê hkôt krĩ pê Jerujarē hwÿr mō. Pa mẽ ixpê hkôt ri ixpa xwÿnhjaja pa mẽ ma hkôt ixpa. Hãmri nê hwÿr pōj

¹⁴nê Tĩrtũm mã amnhĩ jarēnh xà hã ixkre hwÿr mra nê ixkre puhã kahêja wÿr agjê. Nhũm mẽ kamã axtem nê mẽmoj to wēnê ho kuhê. Mōx o wēnê nê ôwēhti ho wēnê nê tutre ho wēnê ho kuhê. Mẽ kot haprôr nê ho Tĩrtũm mã hkĩnh xà kaxyw mẽ kãm ho wēnê. Nê kàxpore ho pinhpanh xwÿnhjaja haxwÿja mẽ kuri hkrĩ.

¹⁵Hãmri pa mẽ Jejus kôt mẽ hwÿr agjê nê ja hã mẽ omu hãmri nhũm Jejus pê ja omnuj tÿx nê. Jakamã nhũm tee ri mẽ omu hãmri nê amnhĩm mry hkà ho mẽ htak xà nhĩpêx nê ho ixkreja nê mẽ piitã mẽ kator pa. Nê mōx nê ôwēhti nê mẽmoj piitã kator pa. Nê kàxpore ho pinhpanh xwÿnhjaja nhũm mẽ kêp mẽ õ mēsti rēnh pa nhũm mẽ hikàxpore pykap rôrôk pa nê angrà nê hikwÿ.

¹⁶Hãmri nhũm Jejus tutre ho wēnê xwÿnhjê mã kãm: —Kwa mẽ anhō tutre jamÿ nê tokyx ma mra. Na htem Inhĩpêxà nhōrkwÿ kamã mẽmoj to wēnê hkêt nê. Kêp mẽ ujaprôr xà hã ixkre hkêt. E kwa mẽ tokyx ma mra. Anê. Nhũm pre ã mẽ kãm kapêr anê nhũm mẽ tee ri kuma hãmri nê ma mrar kurê kumrêx.

17Pa mẽ hkôt mẽ ixpa ho ixpa xwỳnhjaja ã kot mẽ hipêx anhỹr ã omu hãmri nẽ ra Tĩrtũm kapêr ã kagà htũm kot ã amnhĩ nhĩpêx anhỹrja kukamã hã kagàta mã ijamaxpêr kurê kumrêx. Kagà kot amnepêm Jejus kukamã te ra ã kapêr anhỹr pyræk o harênh. Nẽ harênh kot: Na pa hte Tĩrtũm nhõrkwỹ ho mex rãhã ho ixpa. Nhũm mẽmoj punuj hwỳr axà pa omu nhũm ja inhmã mex kêt nẽ. Anhỹr o kot hkukamã harênh jakamã na pa mẽ ã Jejus kot mẽ hipêx anhỹrja ã omu hãmri nẽ ra hkukamã hã kagàta mã ijamaxpêr kurê kumrêx.

Ijaew krãhtũmjaja kot Jejus kujêr ã mẽ harênh

18Tã nhũm Ijaew krãhtũmjaja tee ri Jejus kot ixkreja nẽ mẽ kator ã omu hãmri nẽ hwỳr mra nẽ kãm: —Pa. Kwa mon ka ri ã Tĩrtũm mã amnhĩ jarênh xà hã ixkreja nẽ mẽ kator anẽ? Mẽhõ na we mẽ ixwỳr amẽ ka ÿ hã ã mẽ hipêx anẽhti? Nà xà Tĩrtũm na mẽ ixwỳr amẽ? E mẽ inhmã aa mẽ ixte mẽmoj pumunh kêt õ ho anẽ. Pa mẽ ja hã apumu hãmri nẽ Tĩrtũm kot mẽ ixwỳr amẽnh xwỳnh ã apumunh kurê kumrêx. E kwa tokyx mẽ inhmã ho anẽ. Anẽ.

19Hãmri nhũm mẽ kuma nẽ mẽ kãm amnhĩ jarẽ. Nom amnhĩ tã kuxi nẽ mẽ kãm awjarẽ nẽ mẽ kãm: —Nà kot paj aa mẽ ate mẽmoj pumunh kêt õ ho pixi nẽ mẽ amã ho anẽ ka mẽ omu. Tĩrtũm nhõrkwỹ jaa. Kot kaj mẽ agrà pa ixtã apkati axkrunêpxi nẽ akupỹm hipêx ka mẽ ja hã ixpumu.

20-22Anhỹr o mẽ kãm kapêr. No ãm ixkreja jarênh kêt nẽ. Na pre ãm amnhĩ tã kuxi nẽ ã mẽ kãm kapêr anẽ. Mẽ kot hpĩr nhũm htyk ã apkati axkrunêpxi nẽ akupỹm htĩr ã mẽ kãm ã amnhĩ jarênh anẽ. Te mẽ kot Tĩrtũm mã amnhĩ jarênh xà hã ixkreta grành nhũm hã apkati axkrunêpxi nẽ akupỹm kot hipêx parta pyræk ã hã kuxi nẽ ã mẽ kãm amnhĩ jarênh anẽ. Jakamã nhũm mẽhprĩ hã mar mex kêt nẽ. ãm tee ri kuma nẽ kãm: —Tk. Kwa ixkre ja na prem hipêx kaxyw nẽ hã amgrà xohtô rax nẽ hipêx. Hã amgrà pê 46 nẽ hipêx par kênã kot ka kêt atã apkati axkrunêpxi pix nẽ akupỹm hipêx. Anẽ. Mẽ kot hpĩr hã mar kêt jakamã na prem ã kãm kapêr anẽ. Pa mẽ hkôt mẽ ixpa ho ixpa xwỳnhjaja ã mẽ kãm kapêr anhỹrja ã kuma nẽ hã inhnohtỳx rãhã ho ri ixpa. Tã nhũm mẽ kot Jejus pĩr nhũm hã apkati axkrunêpxi nẽ akupỹm htĩr

nhõ arĩgrota ã pa mẽ kot ã amnhĩ jarẽnh anhỹrja mã ijamaxpẽr kurê kumrẽx. Nẽ axpẽn mã: —Hêxta waa nẽ. Xep ãm hãmri na pre Pahihti amnhĩ kukamã ã amnhĩ jarẽnh anẽ. Mẽ kot hpĩr nhũm htyk ã apkati axkrunẽpxi nẽ akupỹm htĩr ã amnhĩ kukamã amnhĩ jarẽnh mex nẽ. Te mẽ kot Tĩrtũm nhõrkwỹ grãnh par nhũm hã apkati axkrunẽpxi nẽ akupỹm hipêx ã amnhĩ jarẽnh pyrãk. ãm hãmri na pre amnhĩ kukamã ã amnhĩ jarẽnh anẽ. Anẽ.

Jejus kot mẽ pajamaxpẽr kõt mẽ pahpumunh ã harẽnh

²³Tã nhũm Jejus mẽ hkõt mẽ ixpa ho ixpa xwỹnhjaja arĩ Jerujarẽ kamã ri ixpa ho ixpa. Nhũm ra arĩgro pẽ Pasja kato nhũm mẽ piitã hkĩnh kaxyw axpẽn wỹr akuprõ. Nhũm Jejus mẽ kãm aa mẽ kot mẽmoj pumunh kêt kwỹ ho anhỹr o ri mẽ hkõt pa. Nhũm mẽ omu nhũm mẽ hkwyjaja Tĩrtũm kot mẽ pakaxyw ãm xwỹnh ã hkõt hamaxpẽr tã no ãm hkõt hamaxpẽr tỹx kêt nẽ.

²⁴Jakamã nhũm Jejus amnhĩ tã mẽ hamaxpẽr ã mẽ omu nẽ hamaxpẽr o: — Nà mẽ kot ixkõt hamaxpẽr kryre xwỹnhjaja koja mẽ hã apkati grêre nẽ ixto hamakêtkati nẽ htỹx ri pa. Anẽ.

²⁵Jejus kot mẽ pahte pahtỹx ri amnhĩ tomnuj o papa hã mẽ pahpumunh par. Nẽ pahtỹx ri pajamaxpẽr punuj o papa hã mẽ pahpumunh par. Jakamã na pre ã mẽ harẽnh anẽ.

Juãw 3

Jejus mẽ Nĩkotẽ wa kot axpẽn mã kapẽr ã wa harẽnh

Juãw 1.12-13; mããnẽn Wam Pêtre 1.23

¹Tã nhũm Parijew nhõ xwỹnhjê õ pẽ Nĩkotẽ. Mããnẽn kęp Ijaew krãhtũmjê hõ.

²Jakamã na pre Jejus jarẽnh ma nẽ kãm omunh prãm nẽ. Hãmri nẽ hkwy pymaj kamãt kãm hwỹr tẽ nẽ omu nẽ kãm: —Pa mẽ ijahkre xwỹnh. E ot pa awỹr tẽ. Ra mẽ ixte apumunh mex. Tĩrtũm na pre ate mẽ ijahkre ho apa kaxyw mẽ ixwỹr amẽ ka mẽ ixwỹr wrỹ. Mẽhõ koja apyrã nẽ aa mẽ inhmã mẽ kot mẽmoj pumunh kêt kwỹ ho anhỹr o pa? Nà amrakati kumrẽx. Kop apu Tĩrtũm kot mẽ ixwỹr amẽnẽ kêt ronhỹx ka ã amnhĩ nhĩpêx anhỹr kêt nẽ. Anẽ.

³Hāmri nhūm kuma nē tanhmā kām kapēr to. No ãm amnhĩ tã kuxi nē kām awjarē nē kām: —Na htem piitã mē katorxà nhõxà hkre rūm hapôj. Tã Tĩrtũm kām mē piitã axte mē hapôx prãm. Jakamã kot kaj mē akator o axkrut kêt nē hāmri nē nhỹrmã Tĩrtũm ri atĩr tũm nē apa ho apa hkêt nē. ãm hkrajê pix na htem kuri htĩr tũm nē pa ho pa. Jakamã kwa jam ajamexpēr tỳx nē ri ho apa. Anē.

⁴Hāmri nhūm Nĩkotēja kuma nē tee ri ã kot kām kapēr anhỹrja kukamã hamaxpēr nē kām: —Kwa ra ixaptàr kênã kot pa kêt tanhmã amnhĩ to nē akupỹm ixkatorxà nhõxà hkre hwỹr axà nē axte kurũm ixkato. Anē.

⁵⁻⁷Hāmri nhūm Jejus kām: —Nà na hte mē hkrarejaja mē katorxà nhõxà hkre rūm kagô hkôt hapôj hāmri nē kêp katorxà mē hipêêxà wa hkwỳy. Jao wa kot amnhĩ nhĩpêx kôt amnhĩ nhĩpêx o pa. Ja pyrà nē ka mē atõ amã apê Tĩrtũm kra hprãm hã kot kaj amnhĩ to awỳ nhūm wa Ixkarõja akarõ mã axà hāmri ka ra apê hkraa. Te ra axte akator pyræk o amnhĩ nhĩpêx. Nē te mē hkra kot katorxà nē hipêêxà wa kot amnhĩ nhĩpêx kôt amnhĩ nhĩpêx o pata pyrà nē apãm Tĩrtũm kot amnhĩ nhĩpêx kôt amnhĩ nhĩpêx o ri apa. Nom koja Tĩrtũm mē wa Ixkarõja akarõ mã àr kêt nē ka apê hkra hkêt nē. Jao te axte akator kêt pyræk o amnhĩ nhĩpêx. Jakamã na pa amã te ate akator pijakrut o amnhĩ nhĩpêx pyræk o amã ã ja jarēnh anē. Kwa jam ajamexpēr tỳx rãhã ho ri apa. No ama nē tee ri amnhĩ kukamã ajamexpēr kêt nē.

⁸—E pa ixprĩ hã amã ja jarē ka inhma. Na hte kôk kām nhỹhỹm àpêr prãm xà hkôt àpêr o pa. Pu mē kamã ama no ãm pano ho nhỹhỹnh mōr xà hkôt omunh kêt nē. Nē nhỹhỹm ma mōr xà hkôt omunh kêt nē. Ja pyrà nē na hte Tĩrtũm mē wa Ixkarõja mē hkaxwỳnh mã agjê nē mē ho Tĩrtũm kra nom nhūm mēhprĩ hã kot tanhmã mē ho hã amnhĩ tã omunh kêt nē. Anē.

⁹Hāmri nhūm Nĩkotē ã Jejus kot kām kapēr anhỹr ã kuma nē tee ri hamaxpēr nē kām: —Kwa na pa ixprĩ hã amar kêt nē. Anē.

¹⁰Hāmri nhūm kām: —Kwa mon ka hte Tĩrtũm kapēr tũm o Ijaew jahkre ho apa tã aprĩ hã ixkapēr mar kêt nē?

¹¹Ixte mẽmoj pumunh xà hkôt ixte mẽ amã harēnh o ixpa htã ka mẽ apê Ijaew krãhtũmjaja mẽ amã ixkapêr mar prãm kêt nê. ã mẽ ate anhÿr kumrêx. Kwa jam ajamaxpêr tÿx nê.

¹²Na pa ra Tĩrtũm kot jar tanhmã amnhĩ nhĩpêx to hã harēnh o ixpa htã ka mẽ ãm ama nê ixkôt ajamaxpêr kêt nê. Jakamã xà kot pa hpãnhã mẽ amã kaxkwa kamã tanhmã kot amnhĩ nhĩpêx to hã harē ka mẽ ama nê mar tÿx nê? Nà kot ka mẽ ama nê ãm ama nê hkôt ajamaxpêr kêt nê.

¹³Mêhõ na we ra ma kaxkwa hwÿr api nê kamã mẽmoj mex pumu nê man akupÿn mẽ awÿr wrÿ nê mẽ amã tanhmã harēnh to? Nà amrakati kumrêx. ãm paxipix ixpê Tĩrtũm kot mẽ akaxyw ixãm xwÿnh na pa pre amnê kurũm mẽ awÿr wrÿ hãmri nê ixprĩ hã mẽ amã tanhmã harēnh to ho ri ixpa.

¹⁴—Amnepê m finat Mojesja kormã kapôt ã mẽ o pa ri na pre mẽ kãm kàx o kagã karõja nhĩpêx nê kÿxpê mẽ kãm kunhõ. Kagã kot mẽ hkamnhar xwÿnhjaja kot hwÿr rĩt nê omunh nê akupÿm mex kaxyw mẽ kãm kunhõ. Tã ixpê Tĩrtũm kot mẽ akaxyw ixãm xwÿnh kot paj nhÿrmã kagã karõta pyrã nê kÿx pê pĩ kahpa hã ajêt.

¹⁵Ka mẽ te mẽ kot kagã karõ pumunh nê akupÿm mexta pyrã nê amnhĩ kaxyw inhmã ajamaxpêr nê ixkôt amnhĩ xunhwÿ hãmri nê nhÿrmã Tĩrtũm mẽ wa ixri atĩr tũm nê amex rãhã nê apa ho apa.

¹⁶—Tĩrtũm kãm pika piitã hkôt mẽ apiitã mẽ ajapê htÿx. Nê mẽ ajapê xàj na pre ixpê Kra hã ixpyxi hã mẽ awÿr inhmẽ. Ka mẽ atõ amnhĩ kaxyw ixkôt ajamaxpêr nê ixkôt amnhĩ xãm. Hãmri nê nhÿrmã atyk tã nhũm Tĩrtũm akupÿm ato atĩr ka wa ixkuri atĩr tũm nê amex rãhã nê apa ho apa. Hãmri nhũm Tĩrtũm aa amnhĩ nê nhÿhÿm amēnh kêt kumrêx.

¹⁷No mẽ ate amnhĩ tomnuj mÿrapê tanhmã ixte mẽ anhĩpêx to kaxyw na pre mẽ awÿr inhmēnh kêt nê. ãm ixkukwak ri mẽ atĩr tũm nê mẽ amex rãhã apa ho apa hprãm xàj na pre mẽ awÿr inhmẽ pa mẽ awÿr wrÿ.

¹⁸Jakamã kot ka mẽ atõ amnhĩ kaxyw ixpê Tĩrtũm Kra hã ixkôt ajamaxpêr nê ixkôt amnhĩ xãm nhũm Tĩrtũm ixtã apumu nê ate amnhĩ tomnuj mÿrapê

tanhmã anhîpêx to hkêt nê. No kêt mẽ kot ixkôt amnhĩ xunhwỳr kêt xwỳnhjaja na Tĩrtũm ma mẽ kot amnhĩ xà htỳx kamã hamak tũm xà hwỳr mẽ pa mã xwỳnhjê hã mẽ harê. Mẽ kot ixkôt amnhĩ xunhwỳr kêt mỳrapê. Anê.

Mẽ kot amnhĩ tomnuj o hpimxur prãm kaprỳ ã mẽ harênh

¹⁹Nhũm Jejus arĩ Nĩkotê mã kapêr nê kãm: —Na pre Tĩrtũm amnê pika hwỳr mẽ awỳr inhmê. Mẽ ate amnhĩ tomnuj xwỳnh ã amnhĩ pumunh kaxyw mẽ awỳr inhmê. Tã nhũm mẽ ohtô nê amnhĩ tomnuj gryk ã kãm kapêr mar prãm kêt nê. Jao ixkaga nê kãm ixkapêr mar prãm kêt nê.

²⁰Ra ixprĩ hã ixte mẽ kot tanhmã amnhĩ tomnuj to ho pa hã mẽ omunh mex jakamã mẽ kãm ixkapêr mar prãm kêt. Nê ixte mẽ kot tanhmã amnhĩ tomnuj to ho pa hã mẽ harênh pymaj ixkôt kãm pa hprãm hkêt nê.

²¹No kêt mẽ kot ixkôt amnhĩ xunhwỳr xwỳnhjaja na mẽ kot amnhĩ nhîpêx o pa hã hpiaàm kêt. Na htem àmnhĩx ixkôt amnhĩ nhîpêx o pa. Jakamã koja mẽ piitã ja hã mẽ omu nê Tĩrtũm kot tanhmã mẽ hkrã hto nhũm mẽ ra kãm hkôt pix mã amnhĩ nhîpêx ho pa hprãm ã mẽ omunh kurê kumrêx. Anê. Nhũm pre ã Jejus Nĩkotêja mã kapêr anê.

Juãw Paxis kot Jejus jarênh o pa hã harênh

Juãw 1.19-28

²²Tã pa mẽ ixpê Jejus kôt ri ixpa ho ixpa xwỳnhjaja Jejus kôt Jerujarê rũm ijapôj nê pika pê Jutej kwỳ kamã ixpa. Jejus nhỹ hã Tĩrtũm mã mẽ hkrã kumrãr o ri mẽ hkôt ixpa.

²³Nhũm finat Juãw Paxis haxwỳja mẽ ixpyrà nê mẽ hkrã kumrãr o pa. Krĩ pê Sarĩ htã krĩ pê Enõ mỳri pyhti rax jakamã nhũm pre htem hwỳr mra nhũm kamã mẽ hkrã kumrã.

²⁴Kormã mẽ kot haxàr kêt ri nhũm kamã mẽ hkrã kumrãr o pa.

²⁵Rôm nhũm Ijaew hõja Juãw Paxis kôt mẽ pa ho mẽ pa xwỳnhjê hwỳr tẽ nê Juãw Paxis kot mẽ hkrã kumrãr ã tanhmã mẽ hkukjêr to nhũm mẽ kuma nê tee ri hã axpên kukjêr o kuhê.

²⁶Hāmri nē akupỹm Juāw Paxis wỳr tē nē kām: —Kwa mẽ ijahkre xwỳnh. Pyhti pê Jotāw nhĩkjê hã ate mēhõ pumunh nē tanhmã mẽ inhmã harēnh to xwỳnhhta kôt mẽ pa ho mẽ pa xwỳnhjaja na xep htem apyrà nē mẽ hkrã kumrār o pa nhũm xep mẽ ra ohtô nē mẽ pahkaga nē mẽ hkôt pa. Kwa xà ja amã mex nà? Anē.

²⁷Hāmri nhũm mẽ kuma nē mẽ kām: —Tỳ ja mex kēnã. Tĩrtũm kām hprãm xà hkôt na htem mẽ hwỳr mra nhũm mẽ ixpãnhã mẽ hkrã kumrã. Nà ja mex.

²⁸Ixpê Tĩrtũm kot mẽ pakaxyw ãm xwỳnh kêt. Na pa pre ra mẽ amã ja hã amnhĩ jarē ka prem inhma. ãm hkukamã na pre Tĩrtũm amnē inhmē pa mō nē ã jar ri ixpa anē.

²⁹—Te ixte mẽ umre kot amnhĩ nhĩpêx pyræk. Na htem axpēn mã mẽ rer kaxyw nhũm mẽ umreja myta wỳr tē nē hpa hã kupy nē ma ni hwỳr o tē nē axpēn mã wa kure. Hāmri nhũm hpãnhã mēhõja axpēn tã wa hakre. Nhũm umreja wa kuri hkĩnh nē mar o xa. Tã te ixte mẽ umre kot amnhĩ nhĩpêx pyræk jakamã koja mẽ ma Tĩrtũm kot mẽ pakaxyw ãm xwỳnhhta wỳr mra nē kapēr ma pa mẽ harēnh ma nē ixkĩnh nē.

³⁰Na htem mẽ umre hã hkĩnh kêt nē. Mjên nyw xwỳnhja ã na htem hkĩnh. Tã ja pyrà nē koja mẽ axte ixte mẽ kām Jejus jarēnh mar kaxyw ixwỳr mrar kêt nē. ãm hwỳr koja mẽ hpãnhã mra nē tãm mar o kuhê. Ja mex kumrēx.

³¹Jejus kēp kaxkwa rũm amnē mẽ pahwỳr wrỳk xwỳnh jakamã kot amnhĩ to rax o kot mẽ pahpiitã mẽ pajakrenh par. Mẽ papajaja mẽ pahpê pika nhõ xwỳnh jakamã Jejus kĩnhã mẽ pahte mẽmoj piitã omunh tohtuj anhỳr. Nē pika nhõ xwỳnhjê jamaxpēr pix o pajamaxpēr o ri papa.

³²—Na hte Jejus mẽ kām kaxkwa kamã kot mẽmoj pumunh xwỳnh kwỳjê jarēnh o pa. Nē kamã kot mẽmoj mar xwỳnh kwỳ jarēnh tã nhũm mẽ ohtô nē kuma nē ãm kuma.

³³No mẽ kot mar nẽ amnhĩ kaxyw hkôt hamaxpěr xwỳnhjaja na htem kuma nẽ axpẽn mã harẽnh o: “Nà ãm hãmri na ã Tĩrtũm kapěr jarẽnh anẽ. Nà Tĩrtũm kapěr mex kumrẽx.” Anhỹr o axpẽn mã harẽ.

³⁴—Tĩrtũm na pre mẽ pahwỳr Jejus mẽ nhũm annẽ mẽ pahwỳr wrỳ nẽ Tĩrtũm Karõ nhỹ hã mẽ pamã kapěr jarẽnh o ri mẽ pahkôt pa.

³⁵Tĩrtũm kãm Krata japê htỳx kumrẽx jakamã na pre ìhkram mẽmoj piitã haxàr pa nhũm uràk nẽ hihtỳx o hihtỳx nẽ mẽmoj piitã ho amnhĩptàr o pa.

³⁶Jakamã mẽ kot amnhĩ kaxyw hkôt hamaxpěr nẽ hkôt amnhĩ xunhwỳr xwỳnhjaja koja mẽ nhỹrmã wa kuri htĩr tũm nẽ mex rãhã nẽ pa ho pa. No mẽ kot hkaga xwỳnhjaja koja mẽ ã amnhĩ nhĩpêx anhỹr kêt nẽ. Koja Tĩrtũm mẽ kot amnhĩ xà htỳx kamã hamak tũm xàta wỳr mẽ rẽnh pa. Anẽ.

Juãw 4

¹Tã nhũm Parijew nhõ xwỳnhjaja Jejus jarẽnh ma. Nẽ hkôt mẽ pa xwỳnhjaja ohtô rax o Juãw Paxis kôt mẽ pa xwỳnhjê jakrenh ã mẽ harẽnh ma. Nẽ Jejus kot mẽ hkrã kumrãr rax o Juãw Paxis jakrenh ã harẽnh ma.

²Nom Jejus na pre mẽ hkrã kumrãr kêt nẽ. ãm mẽ ixte hkôt ri mẽ ixpa ho mẽ ixpa xwỳnhjaja na pa prem kãm mẽ hkrã kumrãr o ri ixpa.

³Jakamã nhũm Jejus amnhĩ tã Parijew nhõ xwỳnhjê jarẽnh ma hãmri nẽ mẽ kệp kato nẽ hpãnhã ma akupỹm Garirej wỳr mỗ pa mẽ ma hkôt ixpa.

Mẽhõ ni kot amnhĩ nhĩpêx nyw o amnhĩ nhĩpêx ã harẽnh

Juãw 7.37-39; mããnẽn Apokarip 22.1; 22.17

⁴Tã pa mẽ mỗ nẽ kormã pyka pê Samar mã axà nẽ hkôt ixpa.

⁵Hãmri nẽ krĩ pê Sika hwỳr ixpôx o mỗ. Amnepêm finat Jako kot hkra Juje mã pyka nhõr xwỳnh tã krĩja xa pa mẽ ra hwỳr ixpôx o mỗ.

⁶Nẽ amnepêm Jako kot gôm kakwỳnhhta wỳr pôj. Nhũm ra kaxkwa nhĩpôk ri myt nhỹr mẽ nhũm Jejus ra mrar ryy kurê hkẽngrà nẽ. Hãmri nẽ gôm kakwỳnh mỳ ri tẽm nẽ hkôkôt o nhỹ.

7-8Hāmri pa mẽ kure nẽ mẽ ixàpkur xà japrôr kaxyw ma krĩm ijapêx. Rôm nhũm Samar nhõ xwỳnh nija amnhĩm gô runh mã tẽ nhũm Jejus omu nẽ kãm: —Kwa inhmã anhõ gôta kwỳ pa ho ixkõ. Anẽ.

9Nhũm amnhĩ jaêr pẽ amnhĩ tã kuma. Ijaew na pre htem Samar nhõ xwỳnhjẽ kutã apkur rỳ mẽ hkôt ri pa rỳ mẽ ho mjên kêt nẽ. Rỳ mẽ kutã hkõm kêt nẽ. Tã nhũm Jejus ã gô hã nija wỳr anẽ nhũm tee ri amnhĩ tã kuma nẽ kãm: —Xê pẽr apê Ijaew tã axtem nẽ ri gô hã ixwỳ. Xà ate ixpê Samar nhõ xwỳnh ã ixpumunh kêt? Hãn ka ri hã ixwỳ. Anẽ.

10Hāmri nhũm kuma nẽ kãm amnhĩ jarẽ. No ãm amnhĩ tã kuxi nẽ kãm kapẽr nẽ kãm: —Nà aprĩ hã ate ixpumunh ro nhỹx ka kam gô hã ixwỳ pa amã hkwy. Inhõ gô na axte mã. Tĩrtũm kãm amarĩ mẽ amã őr prãm. Na htem ho ixkõ hāmri nẽ mex nẽ htĩr tũm nẽ pa ho pa. Anẽ.

11Hāmri nhũm tee ri kot ã õ gô jarẽnh anhỹrja ã kuma nẽ htỳx ho gôm kakwỳnh kamã gô hã hkamnhĩx nẽ tee ri hkukamã hamaxpẽr nẽ kãm: —Xê tanhmã kot ka kêt amnhĩ to nẽ inhmã gôta kwỳ janhi? Mo kaxyw anhõ gô janhir xà? Gôm kakwỳnhhta upỳm rax kênã kot ka kêt tanhmã amnhĩ to nẽ hkwy janhi. Nhỹhỹnh kot ka anhõ gô jarẽnh xwỳnhhta kwỳ janhi pa ho ixkõ hāmri nẽ ixtĩr tũm nẽ ixpa ho ixpa?

12Mẽ inhõ gôm kakwỳnhja amnepê mã mẽ panhĩgêt finat Jako nhõ gôm kakwỳnh na pre. Jako hkwyjaja na prem hkakwỳ nhũm kamã gô kato nhũm pre htem hanhi nẽ ho hkõm o pa. Nẽ hkrajaja nẽ hkrit piitã ho hkõm o pa. Jakamã na pre mẽ ixpê hkanrêhã htàmnhwỳjê mã hkaga. Tã xep axtem anhõ gô. Mẽ kot ho hkõm nẽ htĩr tũm kaxyw na xep. Jakamã xê xà ate amnhĩ to rax o mẽ panhĩgêt Jako jakrenh mê? Anẽ.

13Hāmri nhũm Jejus kãm: —Nà mẽ anhõ gôta na htem ho ixkõ nẽ arĩ kãm kôr o pa.

14No ixte amã gô jarẽnh xwỳnhhta kot ka hkwy ho ixkõ hāmri nẽ axte amã kôr kêt kumrêx nẽ apa. Nhũm te akaxwỳnh kãm hinore hprôt pyræk o ka amnhĩ nhĩpêx. Hāmri nẽ te hinore kamã gôja aa grà hkêt pyrà nẽ aa ajapêx

kêt kumrêx. Nhÿrmã atyk tã akupÿm atÿr nê atÿr tÿm nê amex rãhã apa ho apa. Anê.

¹⁵Nhÿm nija kuma hãmri nê kãm: —Xôwehe? Xê tô tokyx inhmã anhõ gôta kwÿ. Pa ho ixkõ nê axte inhmã kôr kêt nê ixpa. Nê axte amnê amnhÿm gô janhir mã inhmrar kêt nê. Xê tokyx inhmã hkwÿ mê? Anê. Tÿx gô kumrêx ã hkamnhÿx nê ã hã àhwÿr anê.

¹⁶Hãmri nhÿm kãm: —Tô ma akupÿm krÿm tẽ nê amjên japrô nê man akupÿn ixwÿr wa tẽ. Anê.

¹⁷Hãmri nhÿm tee ri kuma nê kãm: —Ma mo inhmjên? Inhmjên kêt na pa hte ri ixpa. Anê. Hãmri nhÿm kãm: —Tÿ. Nà ãm hãmri na ka ã amnhÿ jarênh anê.

¹⁸Na ka pre ra amjên kêp 5. Nê my mẽ ri war apa xwÿnh ata te kêp amjên pyræk nom kêp amjên kumrêx kêt. Anê.

¹⁹Hãmri nhÿm amnhÿ jaêr pê kot ã kãm kapêr anhÿrja ma hãmri nê kãm: —Xê pêr aprÿ hã ate ixpumunh par pyræk. Mãn apê Tÿrtÿm nhÿ hã kapêr jarênh o mẽ pa xwÿnhjê hõ mãn ka mê?

²⁰Xê inhmã mẽmoj jarê. Nhÿhÿm kot paj wem axpên kôt mra nê Tÿrtÿm mã mex o mex ã harê? Amnepê mã mẽ panhÿgêjtaja na prem hixêt mũj nhÿmök ã api nê hã kãm amnhÿ jarê nê kãm mex o mex ã harê. No mẽ apê Ijaew na ka htem krÿ pê Jerujarê pix kãm mẽ ixte axpên kôt mrar nê ã amnhÿ nhÿpêx anhÿr ã mẽ inhmã karõ. Xà hixêt nhÿmök ã mẽ ixte kãm amnhÿ jarênhja xà apê omnuj mê? Ma xà apê omnuj kêt? Anê.

²¹Hãmri nhÿm Jejus kãm: —Nà kot kaj mẽ nhÿrmã ãm Jerujarê pix kãm rÿ hixêt mũj nhÿmök pix ã axpên wÿr akuprõ nê Tÿrtÿm mã amnhÿ jarênh kêt nê.

²²Mẽ apê Samar nhõ xwÿnhjaja mẽ ate Tÿrtÿm mã mex o mex ã harênh o apa htã aprÿ hã kot amnhÿ nhÿpêx ã omunh kêt. Nê tanhmã hamaxpêr to ho pa hã omunh kêt. No mẽ ixpê Ijaew na pa mẽ arom kot tanhmã amnhÿ nhÿpêx to nê tanhmã hamaxpêr to hã omunh mex. Mẽ inhÿõ kukwak ri koja

Tirtūm mẽ kot hkôt amnhĩ xunhwỳr xwỳnh piitã nê mẽ kot amnhĩ tomnuj rênh pa.

²³Tã koja mẽ piitã Měpahpãm Tirtūm mã mex o mex ã harênh kaxyw nhỹhỹm pa hkêt nê. Koja mẽ nhỹri pa xà kamã mẽ õpinh xà kaxwỳnh kãm ã kãm amnhĩ jarênh anhỹr o pa. Ja na Tirtūm kãm hprãm. No nhỹhỹm mrar nê nhỹri kuhê xà pix kamã kãm amnhĩ jarênhja nhũm kãm hprãm kêt nê.

²⁴—Nê Tirtūmja mẽ pahpyrà nê ã hkêt jakamã na te kaxkwa nê pika piitã hkôt pa ho pa. Jakamã na htem nhỹri pa nê õpinh xà kaxwỳnh kãm amnhĩ kaxyw kãm hamaxpêr nê kãm mex o mex ã harê nhũm ra amnhĩ tã mẽ kuma. ã mẽ kot amnhĩ nhĩpêx anhỹrja na kãm hprãm. Anê.

²⁵Nhũm pre ã Jejus nija mã kapêr anê nhũm kuma nê kãm: —Ma koja xep nhỹrmã Tirtūm kot mẽ pakaxyw ãm mã xwỳnh pê Krisja mẽ pahwỳr wrỳ hãmri nê hprĩ hã mẽ pamã mẽmoj piitã ho amnhĩrit pu mẽ kuma. Anê.

²⁶Hãmri nhũm kãm: —Kwa nhũm paa. Ixte amã ixkapêr xwỳnhja ixpê Kris na pa. Jakamã na pa ixprĩ hã amã ã ixkapêr anê. Anê.

²⁷Nhũm pre ã kãm amnhĩ jarênh anhỹrja rôm pa mẽ ixte hkôt ri mẽ ixpa ho ixpa xwỳnhjaja ra ixujaprôr pa nê akupỹn hwỳr ixpôx o mra. Hãmri nê amnhĩ jaêr pê kot Samar nhõ xwỳnh nita mã kapêr ã omu nê tee ri hkukamã ijamaxpêr nom tanhmã hã hkukjêr to hkêt nê. Nija kêp Samar nhõ xwỳnh tã nhũm àmnhĩx kãm kapêr o nhỹ. Pa mẽ omu nê ãm omu nê tanhmã hã kãm nê hkêt nê.

²⁸Hãmri nhũm nita gôm kakwỳnh mỳr ri õ poti re nê ma akupỹm krĩm tẽ nê hkwyjê mã awjarê.

²⁹Nê mẽ kãm: —Xê mẽ tokyx ma ixkôt gôm kakwỳnh wỳr mra nê mỳ ri mẽhõ my mũj pumu. Tirtūm kot mẽ pahwỳr mẽnh mã xwỳnhhta na. Aa kot nhỹri ixpumunh kêt tã kot hprĩ hã ixpumunh par. Ixte tanhmã amnhĩ nhĩpêx to hã ixpumunh par. Xê mẽ ma ixkôt mra nê ixpyrà nê kapêr ã ama. Anê.

³⁰Hãmri nhũm mẽ kuma nê ma hkôt Jejus wỳr mrar kurê kumrêx.

31Rôm pa mẽ ixte Jejus kôt ri ixpa ho ixpa xwÿnhjaja tee ri mẽ ixàpkur xà ho Jejus ma nẽ kãm: —E ota mẽ panhõta. Kwa mẽmoj py nẽ aku mãn.

32Anhÿr tã nhũm mẽ inhma nẽ tanhmã mẽ inhmã amnhĩ jarẽnh to. Nom amnhĩ tã kuxi nẽ amnhĩ jarẽ nẽ mẽ inhmã: —Nà kormã. Inhõja axtem na. Mẽ ate inhõja pumunh kêt. Anẽ.

33Hãmri pa mẽ kuma nẽ tee ri hã axpẽn kukja nẽ axpẽn mã: —Kwa mãn ra mẽhõ mẽ paxwakre kamã kãm mẽmoj to tẽ nhũm kukrẽ nà? Anẽ.

34Hãmri nhũm mẽ inhma nẽ mẽ inhmã: —Nà mẽhõ kot kêt ri inhmã mẽmoj to mra pa kuku? Kot paj kot mẽ awÿr inhmẽnh xwÿnhhta mã tanhmã amnhĩ nhĩpêx to hãmri nẽ te ra ixàpkur mex nẽ hã ixihitÿx mex pyræk o amnhĩ nhĩpêx. Tã kot paj ã kãm amnhĩ nhĩpêx anhÿr o ri ixpa rãhã ho ijapêx pa. Jao te ixàpkur rax pyræk.

35Anhÿr o mẽ inhmã amnhĩ jarẽ. Hãmri nẽ ra Samar nhõ xwÿnhjaja mẽ ixwÿr mrar ã mẽ omu nẽ mẽ inhmã tanhmã mẽ harẽnh to nom mẽ hã kuxi nẽ mẽ harẽ nẽ mẽ harẽnh o: —Kot kaj mẽ axte mẽ atã mytwrÿ kêp 4 hãmri nhũm ra mẽ apur kãm mẽ anhõja hamÿnh mã tãm nẽ. Nom kormã. E ka mẽ pahwÿr mẽ mrar xwÿnh nẽj pumu. Ra mẽ kot amnhĩ kaxyw ixkôt hamaxpër nẽ ixkôt amnhĩ xunhwÿr mã tãm jakamã te mẽ apur kãm ra mẽ anhõ jamÿnh mã tãm pyræk. Jakamã ka mẽ atõ ma mẽ hwÿr mō nẽ mẽ kot amnhĩ kaxyw ixkôt hamaxpër nẽ ixkôt amnhĩ xunhwÿr kaxyw mẽ kãm ijarẽ. Hãmri nẽ te ate ixpur kãm inhmã inhõ jamÿnh xwÿnh pyræk o amnhĩ nhĩpêx.

36—Jakamã koja mẽhõ kumrêx mẽ hwÿr tẽ nẽ mẽ kãm Tĩrtũm kapër jarẽ hãmri nẽ te kêp õ pahi mã hpur kãm ahkre ho pa pyræk. Nhũm mẽ kot mar xwÿnhjaja kuma nom kormã hprĩ hã mar tÿx kêt nẽ. Tã kot kaj mẽ atõ wamta kôt mẽ hwÿr tẽ nẽ mẽ kot ixkôt amnhĩ xunhwÿr kaxyw aprĩ hã mẽ kãm ijarẽnh o mẽ hkôt apa hãmri nẽ te apê mẽ anhõ pahi mã hpur kãm axujamÿnh xwÿnh pyræk. Hãmri nhũm mẽ hkwÿjaja mẽ ama nẽ ixkôt amnhĩ xunhwÿ nẽ ixkôt ri amnhĩ nhĩpêx o pa. Hã koja nhÿrmã mẽ apyrà nẽ Tĩrtũm mẽ wa ixri mex rãhã nẽ htĩr tũm nẽ pa ho pa. Ka mẽ amnhĩ tã mẽ omu nẽ

akĩnh nẽ apa. Te mẽ kot mẽ hpur kãm ahkre xwỳnhjaja nẽ mẽ kot hamỳnh xwỳnhjaja mẽõ rũnh pumunh nẽ hkĩnhhta pyræk.

37—Na htem tũhã ã mẽ pur kãm mẽ àpẻnh xwỳnhjẻ jarẻnh anẻ nẻ mẽ harẻnh o: “Axtem mẽ ahkre xwỳnhjaja nẻ axtem mẽ kot hamỳnh xwỳnhjaja.” Anẻ. Tã te mẽ ate mẽ ujarẻnh ja pyræk.

38Na pa pre ra ma mẽ hwỳr mẽ arẻ. Mẻ ate aprỉ hã mẽ kãm ijarẻnh nhũm mẽ kot mẽ amar nẻ amnhỉ kaxyw ixkỏt hamaxpẻr nẻ ixkỏt amnhỉ xunhwỳr kaxyw. Nom mẽ kajaja na ka prem akumrẻx mẽ hwỳr amrar nẻ mẽ kãm ijarẻnh kẻt nẻ. Tỉrtũm kapẻr jarẻnh o mẽ pa xwỳnhjaja na prem kumrẻx mẽ hwỳr mra nẻ ixkukamã mẽ kãm ijarẻnh o ri mẽ hkỏt pa. Te mẽ kot hpur kãm ahkre ho pata pyræk. Tã kot kaj mẽ hpẻnhã mẽ kot amnhỉ kaxyw ixkỏt amnhỉ xunhwỳr kaxyw aprỉ hã mẽ kãm ijarẻnh o apa. Jakamã te mẽ ate mẽ hpur kãm mẽõ jamỳnh xwỳnh kot amnhỉ nhỉpẻxta pyræk. Anẻ.

Mẻ hwỳr kot amnhỉ nhỉpẻx nyw o amnhỉ nhỉpẻx ã mẽ harẻnh

Sikũn Korỉt 5.17; Wam Juãw 4.14

39Rỏm nhũm Samar nhỏ xwỳnh kwỳjaja nija kot mẽ kãm amnhỉ jarẻnh ma hãmri nẻ uræk nẻ amnhỉ kaxyw Jejus kỏt hamaxpẻr. Na pre ra amnhỉ tã tanhmã mẽ kãm Jejus jarẻnh to nẻ mẽ kãm harẻnh o: —Ma aa kot nhỳri ixpumunh kẻt tã ra kot hprỉ hã ixpumunh par. Ixte tanhmã amnhỉ nhỉpẻx to hã ixpumunh par. Anhỳr jakamã nhũm mẽ kuma nẻ uræk nẻ amnhỉ kaxyw hkỏt hamaxpẻr kurẻ kumrẻx.

40Hãmri nẻ man mẽ ixwỳr mra nẻ Jejus pumu nẻ amnhỉ wỳr kuwỳ nẻ kãm: —Pa. E kwa mẽ tokyx anojarẻt kẻt nẻ. Mẻ ma mẽ ixkỏt mẽ inhỏ krỉ hwỳr mỏ nẻ mẽ ixkỏt ri apa grire nẻ arỉ ma mỏ. Anẻ. Hãmri nhũm mẽ kuma nẻ mẽ kãm: —Tỏe. Nà kot paj mẽ anẻ. Anẻ. Hãmri pa mẽ ma mẽ hkỏt mỏ nẻ mẽ õ krỉ kamã mẽ hkỏt ri ixpa hã apkati axkrut.

41Nhũm Jejus mẽ kãm Tỉrtũm kapẻr jarẻnh o ri mẽ hkỏt pa nhũm mẽ axte ohtỏ nẻ kuma nẻ nita pyrà nẻ hkỏt amnhỉ xunhwỳ.

42Hãmri nẻ nita wỳr mra nẻ kãm: —E nà ãm hãmri. Akumrẻx na ka mẽ inhmã Jejus o amnhỉrỉt. Pa mẽ akỏt ma hwỳr mra nẻ mẽ pam omu nẻ kapẻr

ã kuma. Jao apyrà nẽ amnhĩ kaxyw hkôt ijamaxpër nẽ hkôt amnhĩ xunhwỳ. Për ãm hãmri kęp pyka piitã hkôt mẽ pahte amnhĩ tomnuj pãnhã amnhĩrer mã xwỳnhhta na. Anẽ.

Garirej nhõ xwỳnhjaja kot Jejus pumunh ã mẽ harẽnh

Matêwre 13.57

⁴³Tã pa mẽ Jejus kôt Samar rũm ixkato nẽ ma pika pẽ Garirej wỳr mỗ. Kamã Jejus nhõ krĩ pẽ Najare htã pa mẽ hwỳr inhmõr kêt nẽ.

⁴⁴Na pre ra Jejus mẽ inhmã tanhmã õ krĩ nhõ xwỳnhjê jarẽnh to nẽ mẽ harẽnh o: —Tĩrtũm nhỹ hã kapër jarẽnh o mẽ pa xwỳnhjaja na htem amnhĩ nhõ krĩ kamã mẽ kãm Tĩrtũm kapër jarẽnh o pa nhũm mẽ kuma nẽ ãm kuma. Jakamã kot paj Najare hwỳr inhmõr kêt nẽ. Mẽ kãm ixkapër mar prãmre hã.

⁴⁵Anhỹr jakamã na pa prem hwỳr inhmõr kêt nẽ. Pãnhã nhãm krĩ hõ hwỳr mỗ nẽ hwỳr pøj hãmri nhũm mẽ amnhĩ wỳr Jejus pumu nẽ hkĩnh nẽ. Na prem ra krĩ pẽ Jerujarẽ kamã arĩgro pẽ Pas ã mẽ hkĩnh kãm tanhmã kot amnhĩ nhĩpêx to ho pa hã omu. Jakamã amnhĩ wỳr omu nẽ hkĩnh nẽ.

Jejus kot mễhõ hkra ho mex ã harẽnh

⁴⁶Tã pa mẽ kormã Garirej kamã ixpa nẽ akupỹm krĩ pẽ Kanã hwỳr mỗ. Kamã na pre Jejus mẽ kãm gô ho wĩhti nhĩpêx. Jakamã pa mẽ akupỹm mẽ hwỳr mỗ. Nhũm mẽõ pahi nhõ kôwenatôjê hõ hkra myja kęp à htỳx nẽ nõ. Nom Kanã kamã hkêt axtem krĩ hõ pẽ Kapanauĩ kamã.

⁴⁷Jakamã nhũm hipêxàja tee ri hkra pumu hãmri nẽ ra Jejus kot Jutej rũm Kanã hwỳr hpôx ã harẽnh ma nẽ hkra kaxyw kãm hamaxpër nẽ ma hwỳr mõr kurê kumrêx. Hãmri nẽ nhỹri omu nẽ hwỳr tẽ nẽ kãm kapër kãm hihtỳx nẽ kãm: —Pa. E ot pa awỳr tẽ. Na ra ixkra ixpê htyk kaxyw. Kwa ixkamã axukapĩrĩ nẽ ma ixkôt mỗ nẽ akupỹm inhmã ho mex. Anẽ.

⁴⁸Hãmri nhũm kuma nẽ kãm: —Kwa pẽr ãm ixte mẽ amã aa mẽ ate mẽmoj pumunh kêt kwỳ ho anhỹr ã ixpumunh kôt pix mã na ka htem amnhĩ kaxyw ixkôt ajamaxpër. Nom amarĩ amnhĩ kaxyw ixkôt ajamaxpër kêt nẽ. Anẽ.

⁴⁹Hāmri nhũm tee ri kuma nẽ kãm: —Kwa tokyx. Kot kaj tokyx ixkôt amõr kêt koja ixpê ty. Anẽ.

⁵⁰Hāmri nhũm kãm: —Nà koja apê htyk kêt nẽ. Ra ixte akupỹm amã ho mex kênã. Mãmri ma akupỹm mõ nẽ tokyx omu. Na ra akupỹm amã mex. Anẽ. Hāmri nhũm kuma nẽ kaxyw hkôt hamaxpêr kurê kumrêx nẽ ma akupỹm hwỳr mõ. Nẽ mõr o apkati.

⁵¹Nẽ kormã õ krĩ hwỳr hpôx o mõr ri nhũm ra kãm mẽ àpênh xwỳnhjaja kutã mra nẽ nhỹri pry hã hkaxpa nẽ kãm: —Pa. Kwa na ra akra hkà hakry nẽ akupỹm amã mex. Anẽ.

⁵²Hāmri nhũm mẽ kuma nẽ hkĩnh tỳx nẽ. Nẽ mẽ kãm: —Kwa xô wehe? Mẽmo ore hã na pre we ra hkà hakry? Anẽ. Nhũm mẽ kãm: —Nà jãã na pre kaxkwa nhĩpôk ri myt nhỹ nhũm hkà hakry nẽ akupỹm amã mex kurê kumrêx. Anẽ.

⁵³Hāmri nhũm mẽ kuma nẽ mẽ kãm: —Hêxta waa nẽ. Kwa pêr ãm hãmri Jejus kot inhmã akupỹm mex ã harênh xà hã ore kamã na pre akupỹm inhmã mex. Nà ãm hãmri. Anẽ. Hãmri nẽ amnhĩ kaxyw Jejus kôt hamaxpêr kurê kumrêx. Nhũm òrkwỹ kamã ri mẽ pa xwỳnhjaja uràk nẽ amnhĩ kaxyw hkôt hamaxpêr.

⁵⁴Nhũm Jejus ã kãm hkra ho mex anẽ. Na pre ra pika pê Garirej kamã mẽ kot mẽmoj pumunh kêt õ ho anhỹr o tipxi nẽ mẽ kãm gô pix o wĩhti nhĩpêx. Tã ra pyka pê Jutej rũm akupỹm mẽ hwỳr mõ nẽ ã akupỹm mẽ hkrata o mex anẽ.

Juãw 5

Jejus kot himô mỳ ri akupỹm mēhõ ho mex ã harênh

Juãw 7.23; 10.30-33

¹Tã mẽ ixpê Ijaew mẽ ixte Tĩrtũm ã ixkĩnh kaxyw Jerujarẽ hwỳr akuprõ nhũm Jejus haxwỳja ma hwỳr mõ. Pa mẽ hkôt mẽ ixpa ho mẽ ixpa xwỳnhjaja ma hkôt mõ.

²Jerujarē kamā na himôja hikwỹ. Nhỹhỹnh mẽ kot krĩ hwỳr ôwêhti ho gjêx xà htã hikwỹ. Himôja nhĩxi pê na Petes. Nẽ pu hã mẽ à xwỳnhjê nhĩkwỹ xà hã ixkre kêp 5.

³Piitã kamā na pre hte tanhmã mẽ à kute xwỳnhjaja hikwỹ. Mẽ nohkre xwỳnhjaja nẽ mẽ hyk o mẽ pa xwỳnhjaja nẽ mẽ ĩ kamā mẽ htyk xwỳnhjaja. Ām ahpỹnhã tanhmã mẽ à kute xwỳnhjaja ixkre hkwỳja kamā akupỹm mex prãm xàj hikwỹ.

⁴Na pre hte Tĩrtũm kapêr o mẽ wrỳk xwỳnhja tũhã himô hwỳr wrỳ nẽ gô xok. Hãmri nhũm mẽ à xwỳnhjê hũ kot amnhĩ to wa nẽ kumrêx hwỳr wrỳk nẽ kamā mrõr xwỳnhja akupỹm mex. Kwỳjê rom akupỹm mex kurê kumrêx. Jakamã nhũm pre hte mẽ à xwỳnhjaja akupỹm mex prãm xàj gô xok jamãr o hikwỹ.

⁵Jakamã nhũm mẽhũ myja ixkre hũ kamã hikwỹ. Te omnuj nẽ arĩ hikwỹ hã amgrà xohtô rax nẽ. Ra hã amgrà kêp 38.

⁶Jakamã nhũm Jejus mẽ hwỳr tẽ nẽ omu. Nẽ hprĩ hã omu nẽ hamaxpêr o: —Kwa mũj na hte omnuj nẽ ri pa hkêt ã amgrà xohtô rax nẽ. E pa akupỹm ho mex. Anhỹr o hamaxpêr hãmri nẽ kãm: —Pa. E kwa inhmã amnhĩ jarẽ. Xà amã akupỹm amex prãm? Anẽ.

⁷Hãmri nhũm kuma nẽ kãm: —Ku nhũm. Inhmã tokyx akupỹm inhmex prãm tỳx kumrêx kênã. No mẽhũ kot tokyx inhmỳ nẽ mẽ kêp ixto wa nẽ ixkumrêx gô xok kamã inhmrõr? Na pa tee ri ixkumrêx hwỳr ixtẽm nẽ inhmã inhmrõr prãm nhũm mẽ xatã ixpê amnhĩ to wa nẽ mra nẽ kamã mrõ. Anẽ.

⁸Hãmri nhũm Jejus kãm: —Tỳ? Tõe. E na ka akupỹm amex. E kànhmã xa nẽ akupĩp py nẽ ma akupỹm anhõrkwỹ hwỳr tẽ. Anẽ.

⁹Hãmri nhũm kuma nẽ ra akupỹm mex nẽ kànhmã xa nẽ ri mra. Nẽ hkĩnh tỳx nẽ hikupĩp py nẽ ma akupỹm õrkwỹ hwỳr tẽ. Ijaew nhũ arĩgromnu pê sap ã nhũm Jejus kot akupỹm ho mex

¹⁰nhũm ma akupỹm pry hã hikupĩp py nẽ o tẽ. Nhũm Ijaew nhũ pahĩ hkwỳja nhỹhỹnh mra nẽ tee ri kot sap ã hpyr nẽ o htẽm ã omu nẽ kãm: —Tk. Kwa

mě pahpê Ijaew na pu htem mẽ panhõ arĩgromnu hã paxàpênh kêt nê. Finat Mojes kot ja nê mẽ pahkurê htã ka axtem nê akupĩpta py nê nhỹhỹm o tẽ. Anẽ.

¹¹Hãmri nhũm mẽ kuma nê mẽ kãm: —Tỳ. Kot anhỹr tã kot ixto mex xwỳnhta na ã inhmã kapêr anẽ pa mar xà hkôt kupy nê akupỹm inhõrkwy hwỳr tẽ. Anẽ.

¹²Hãmri nhũm mẽ tee ri kuma nê kãm: —Kwa mẽhõ na we ã ri amã karõ anẽ? Anẽ.

¹³Nhũm kormã kot Jejus nhĩxi mar kêt jakamã kot mẽ kãm ahkre kaxyw hakêx nê tee ri hkwỳjê kaêx ã hapêr rĩt o xa. Nom nhũm mẽ ohtô nê pry hã mrar jakamã nhũm tee ri hapêr nhũm Jejus ra ma nhỹhỹm tẽ.

¹⁴Tã nhũm hã ahtũmre nhũm Jejus Tĩrtũm mã amnhĩ jarênh xà hã ixkre hwỳr tẽ nê axà nê kot ho mex xwỳnhta pumu nê kãm: —Pa. E na ka ra akupỹm amex. Nom kwa kêr ka axte tanhmã amnhĩ tomnuj to ho ri apa hkêt nê. Kot kaj axte ã amnhĩ nhĩpêx anẽ hãmri nê apunuj tỳx o wam ate apunujta jakre kãm ga. Anẽ.

¹⁵Hãmri nhũm kuma nê ma tẽ nê kato. Nê ma mẽ õ pahijê hwỳr tẽ nê mẽ kãm: —E na pa ra kot ixto mex xwỳnhta nhĩxi ma. Xep kêp Jejus. Anẽ.

¹⁶Hãmri nhũm mẽ hixi ma nê hã tanhmã axpên mã ho kapêr punuj to. Mẽ õ arĩgromnu hã kot mẽ ho mex o pa jakamã nhũm mẽ axpên jakwa kamã ri hixi ho rê nê nhỹri omu nê tanhmã hã kãm àkjêr to.

¹⁷Hãmri nhũm amnhĩ tã mẽ kuma nê mẽ kãm: —Ku nhũm. Inhĩpêêxà Tĩrtũm na hte apkati mẽ tanhmã mẽ pahto mex to ho pa. Jakamã pa hte uràk nê ã mẽ ho mex rãhã ho ri ixpa anẽ nê aa mẽmo arĩgro hã ja ho anhỹr kaga hkêt nê.

¹⁸Anhỹr o mẽ kãm amnhĩ jarê nhũm mẽ kuma nê kamã gryk tỳx nê. Nom mẽ õ arĩgromnu hã kot mẽ ho mexja pix mỳrapê kamã gryk kêt. Mããnênh Tĩrtũm kêp hipêêxà hã harênhja mỳrapê nhũm prem kamã gryk tỳx kumrêx

ně axpěn mã: —Tk. Kwa na ã amnhĩ jarēnh anhỹr jao te kēp Tĩrtũm pyrāk ã amnhĩ jarē. E kwa pu mẽ kupĩ ri. Aně.

Tĩrtũm Kra kot Hipēêxà nhỹ hã amnhĩ nhĩpêx ã harēnh

Juãw 14.10-13

19Hãmri nhũm Jejus axte mẽ kēp Ijaew nhõ pahijê mã kapēr ně mẽ kãm: — Na pa hte amnhĩ krã hkôt tanhmã amnhĩ nhĩpêx to ho ri ixpa hkêt ně. Na pa hte Inhĩpêêxà kot tanhmã amnhĩ nhĩpêx to hã omunh xà hkôt urāk ně mẽ ho mex o ri ixpa. Kwa mẽ amnhĩ krã him ja jaxà ně kãm ajamaxpēr tỳx ně ho apa.

20—Inhĩpêêxàja kãm ijapêê. Na hte inhmã kot tanhmã mẽ ho mex to piitã ho amnhĩrĩt. Ixte omunh ně urāk ně ÿ hã tanhmã mẽ ho mex to ho ri ixpa kaxyw. Jakamã kot paj ãm akupỹm mẽ à xwỳnhjê ho mex pix o ri ixpa hkêt ně. Kot paj mããnēn mẽ kãm mẽmoj mex o ja jakrenh o anhỹr o ri ixpa ka mẽ hã ixpumu ně ixkamã ano puma ho apa.

21—Ně Inhĩpêêxà kot akupỹm mẽ htyk xwỳnhjê ho htĩr jakamã kot paj urāk ně akupỹm mẽ htyk xwỳnhjê ho htĩr o ri ixpa. Aně.

Mě htĩr tũm ně mẽ pa mã xwỳnhjê jarēnh

Juãw 3.16-17; 3.36; 6.27; 6.40; 6.60; 10.28; 17.2-3; Rõmãn 6.23; Karatas 6.8; Xitre 1.2; Wam Juãw 2.25; 5.11-13

22Nhũm Jejus arĩ mẽ kēp Ijaew nhõ pahijê mã kapēr ně mẽ kãm: —Koja nhỹrmã Inhĩpêêxàja mẽ htĩr tũm ně mẽ pa ho mẽ pa mã xwỳnhjê jarēnh kêt ně. Ja kaxyw na pre pa ixãm.

23Tã mẽ piitã mẽ kot ja hã ixpumunh ně ixtã hpijaàm o ri pa kaxyw na pre mẽ kaxyw ixãm. Te mẽ kot Inhĩpêêxà hã hpijaàmta pyrà ně pa ixtã hpijaàm o pa kaxyw. Jakamã koja mẽhõ ixtã hpijaàm kêt ně hãmri ně mããnēn Inhĩpêêxà hã hpijaàm kêt ã amnhĩ to amnhĩrĩt. Tãm kot mẽ awỳr inhmēnh kēnã.

24Jakamã koja mẽhõ ixkapēr ma ně amnhĩ kaxyw kot mẽ awỳr inhmēnh xwỳnhhta kôt hamaxpēr ně ixkôt amnhĩ xãm. Hã koja nhỹrmã htyk tã ma mẽ kot amnhĩ xà htỳx kamã hamak o pa htũm xàta wỳr mõi kêt ně. Kojã Inhĩpêêxà akupỹm ho htĩr nhũm wa ixri htĩr tũm ně mex kumrēx ně pa ho

pa. Jakamã koja mēhō ixkôt amnhĩ xãm hãmri nē ra kēp wa ixri htĩr tũm nē pa ho pa mã xwỳnh. Kwa mē jam ajamxpēr tỳx rãhã ho apa.

25—No mē kãm ixkapēr mar prãm kêt xwỳnhjaja kēp Inhĩpêêxà mē wa ixri mē htĩr tũm nē mē pa mã xwỳnh kêt. Tã ixpê Tĩrtũm Kra jakamã koja mē ixkapēr ma nē ixkôt amnhĩ xunhwỳ. Hã kot paj amnhĩ tã mē omu nē mē htĩr tũm nē mē pa mã xwỳnh ã mē harē nhũm mē àmnhĩx ri hkĩnh nē pa ho pa. Kwa mē jam ajamxpēr tỳx rãhã ho apa.

26—Nē Inhĩpêêxà tãm kēp mē ho mē htĩr xwỳnh. Tã ixpê Kra jakamã na pre amnhĩ pyrà nē ja kaxyw ixãm.

27—Ra kot mē akaxyw ixãm jakamã na pre mãănēn ixte tanhmã mē ajarēnh to kaxyw ixãm. Wa ixri mē atĩr tũm nē apa ho apa mã xwỳnhjê hã mē ajarēnh rỳ wa ixri mē atĩr tũm nē apa hkêt mã xwỳnhjê hã mē ajarēnh kaxyw.

28-30 Jakamã kot paj nhỹrmã ra mē htyk nē mē hikwỹ xwỳnh piitã mē kãm ixkapēr nhũm mē inhma. Koja mē ixkapēr ma hãmri nē akupỹm htĩr nē pika rũm hapôx pa. Hãmri nhũm mē kot kormã htĩr ri Tĩrtũm kapēr kôt amnhĩ nhĩpêx hkêt xwỳnhjaja mē kot amnhĩ tomnuj mỳrapê ma mē kot amnhĩ xà htỳx kamã hamak tũm xàta wỳr ma hapêx pa. Nom nhũm mē kot amnhĩ to mex xwỳnhjaja. Ra mē kot Tĩrtũm kôt amnhĩ nhĩpêx jakamã koja mē ma Tĩrtũm mē wa ixwỳr api nē wa ixri mex nē hkĩnh rãhã htĩr tũm nē pa ho pa. —Kot paj ja kaxyw tanhmã mē apiitã mē ajarēnh to. Nom kot paj amnhĩ krã hkôt inhmã hprãm xà hkôt tanhmã mē ajarēnh to hkêt nē. Kot paj Inhĩpêêxà kot mē awỳr inhmēnh xwỳnhhta nhỹ hã àhpumunh tỳx xà hkôt tanhmã mē ajarēnh to. Jao ãm hãmri mē ajarē. Kwa mē jam ajamxpēr tỳx nē. No ã ixte mē amã amnhĩ jarēnh anhỹrja ma nē tee ri ajamxpēr kêt nē. Anē.

Mē kot Jejus kēp Tĩrtũm Kra hã harēnh xwỳnhjê jarēnh

Juãw 8.18; Wam Juãw 5.6-8

31 Nhũm Jejus arĩ mē kēp Ijaew nhõ pahijê mã kapēr nē mē kãm: —E na pa ra tanhmã mē amã amnhĩ jarēnh to. Nom kop ãm papxipix ixte ã amnhĩ

jarēnh anhÿr ronhÿx ka mẽ inhma nē ajamaxpēr o: “Ko. Na apu ãm hãmri ã mẽ inhmã amnhĩ jarēnh anē rÿ apu ãm amnhĩ to hêx.” Anhÿr o ajamaxpēr.

³²Nom papxipix na pa hte ã amnhĩ jarēnh anhÿr kêt nē. Inhĩpêêxà haxwÿja na hte ã ijarēnh anē. Nē ãm hãmri na hte tanhmã ijarēnh to ho pa. Tĩrtũmja hêx kêt.

³³No mẽ amã pika nhõ xwÿnhjê pix kapēr mar prãm jakamã na ka prem finat Juãw Paxisja wÿr akwÿjê rē nhũm mẽ ma hwÿr mra nē ixtã hkukja nhũm mẽ kãm tanhmã ijarēnh to. Nē hprĩ hã mẽ kãm ijarē.

³⁴No mẽ apê pika nhõ xwÿnhjaja mẽ ate axpēn mã tanhmã ijarēnh toja na ixpê tanhmã kute hkêt. Kojã mēhõ tanhmã ixto kapēr punuj to rÿ tanhmã ijarēnh mex to pa amnhĩ jarēnh ma nē tee ri amnhĩ kukamã ijamaxpēr o ixkaprĩ hkêt nē. Tã nom Juãw Paxis kapērja mẽ amã mex jakamã na pa ã mẽ amã harēnh anē. Ka mẽ ra kot tanhmã ijarēnh toja ma nē amnhĩ kaxyw ixkôt ajamaxpēr nē ixkôt amnhĩ xunhwÿ nē nhÿrmã ty nē ma mẽ kot amnhĩ xà htÿx kamã hamak tũm xàta wÿr apa hkêt nē.

³⁵—Juãw Paxis na pre te kanê hpôk mex nē mẽmoj to amnhĩrĩt mex pyrã nē mẽ amã Tĩrtũm kapēr o amnhĩrĩt mex o pa. Ka prem te maripôtre kot kanê hã htu pyrã nē hwÿr akuprõ nē mar o akuhê. Nom hkôt ajamaxpēr tÿx kêt nē.

³⁶Na pre hprĩ hã mẽ amã ijarēnh o ri pa. —Tã pa pam mẽ awÿr wrÿ nē Inhĩpêêxà nhÿ hã mẽ akamã aa mẽ ate mẽmoj pumunh kêt kwÿ ho anhÿr o ri ixpa. Mē ate ja hã ixpumunh nē Inhĩpêêxà tãm kot mẽ awÿr inhmēnh kôt ixpumunh kaxyw.

³⁷—Nē Inhĩpêêxàja mãänēn ixpê Kra hã mẽ amã ixto amnhĩrĩt. Ra mẽ anhõpinh xà kaxwÿnh kãm kot mẽ amã ixto amnhĩrĩt tã ka mẽ ama nē ãm ama nē ixkôt ajamaxpēr kêt nē.

³⁸Mē amã mẽ ate hkôt amnhĩ nhĩpêx o apa hprãm kêt. Mē ate kapēr mar tÿx ronhÿx ka mẽ ixkapēr ma nē amnhĩ kaxyw ixkôt ajamaxpēr kurê kumrêx. Ixpê Tĩrtũm kot mẽ awÿr inhmēnh xwÿnh kēnã.

³⁹—Ně Tĩrtũm kapěr ã kagà htũm haxwỳja kot tanhmã ijarěnh to. Ka htem wa ixri atĩr tũm ně apa ho apa hprãm xàj kamã harěnh rãhã ho ri apa. Ně kot tanhmã pa ijarěnh to htã ka mẽ ixkapěr ma ně amnhĩ kaxyw ixkõt ajamxpěr kêt ně. Aně.

Ijaew nhõ pahijaja kot Jejus kaga hã mẽ harěnh

⁴⁰Nhũm Jejus arĩ mẽ kệp Ijaew nhõ pahijê mã kapěr ně mẽ kãm: —Ně pa na ixte Inhĩpêxà mẽ wa ixri ixte mẽ ho mẽ htĩr tũm ně mẽ pa mã xwỳnh ã mẽ harěnh tã ka mẽ amnhĩ kaxyw ixkõt ajamxpěr kêt ně.

⁴¹Nom mẽ ate inhmex ã ijarěnh kêt tã ja ixpê tanhmã kute hkêt. ãm Inhĩpêxà pix kot inhmex ã ijarěnhja na inhmã hprãm.

⁴²Ra ixte mẽ apumunh mex. Mẽ amã Tĩrtũm kĩnh kêt.

⁴³Tãm kot mẽ awỳr inhměnh tã ka mẽ ixpumu ně ixkaga ně ixkõt amnhĩ nhĩpêx kêt ně. Nom koja mễhõ amnhĩ krã hkõt mẽ awỳr tẽ ně tanhmã mẽ ajahkre hto ka mẽ ama ně hkõt amnhĩ nhĩpêx kurê kumrêx.

⁴⁴—ãm pika nhõ xwỳnh pixjaja kot mẽ amex ã mẽ ajarěnhja na mẽ amã hprãm. No Tĩrtũm kot amnhĩm mẽ amex ã mẽ ajarěnhja mẽ amã hprãm ã mẽ ate amnhĩ jarěnh tã mẽ amã ja prãm kêt. Jakamã na ka htem ixkaga kumrêx.

⁴⁵⁻⁴⁶Tã nom kot paj pam nhỹrmã Tĩrtũm mã mẽ apê ixkwỳ hkêt ã mẽ ajarěnh kêt ně. Mo kaxyw kot pa kêt ri ã kãm mẽ ajarěnh aně? Finat Mojes tãm koja ja hã kãm mẽ ajarê. Na ka htem tanhmã ajamxpěr to ně ajamxpěr o: “Kot paj finat Mojes kot mẽ inhmã tanhmã kapěr to hkõt amnhĩ nhĩpêx o ri ixpa hãmri ně nhỹrmã Tĩrtũm ri ixtĩr tũm ně inhmex ně ixpa ho ixpa.” Anhỹr o ajamxpěr nom hkõt amnhĩ nhĩpêx kêt ně. Mojes na pre hte pa ijarěnh o pa. Tã mẽ ate kapěr kõt amnhĩ nhĩpêx ronhỹx ka mẽ amnhĩ kaxyw ixkõt ajamxpěr ně ixkõt amnhĩ xunhwỳ. No mẽ ate ixkaga jakamã koja Mojes tãm Tĩrtũm mã mẽ apê ixkwỳ hkêt ã mẽ ajarê.

⁴⁷Mě ate Mojes kapër kôt amnhĩ nhĩpêx kêt jakamã kot kaj mẽ mãänën ixkôt amnhĩ nhĩpêx hkêt nê. Anê. Nhũm pre ã Jejus Ijaew nhõ pahijê mã kapër anê.

Juãw 6

Jejus kot mẽ ho 5.000 nê mẽ kãm mẽ õ hã harēnh

Matêwre 14.13-21; Makre 6.30-44; Rukre 9.10-17

¹⁻⁴Tã nhũm ra arĩgro pê Pas ahtêp o mō. Pasja ã mẽ ixpê Ijaewjaja na pa htem axpēn wỳr akuprō nê hã ôwêhti hkra nyw kwỳ pa nê ã hkur o ixkrĩ. Amnepēm Tĩrtũm kot pika pê Ejit rũm mẽ inhĩgêjtê kator kaxyw nhũm prem nojarêt nê ã hkwỳ hpar nê ã hkur anê. Tã arĩ mẽ ixpê mẽ hkanrêhã mẽ htãmnhwỳjaja jam ijamaxpêr pê ixkĩnh kaxyw ã amnhĩ nhĩpêx anê. Jakamã nhũm Jejus pàr krem axà nê ma himô pê Garirej ã rêr kaxyw ma xarmã mō nê rê. Himôja nhĩxi hõ pê na Tipe nhũm hã xarmã mō nê rê. Pa mẽ hkôt ixpa ho ixpa xwỳnhjaja ma hkôt ixpa. Hãmri nhũm pika nhõ xwỳnh kwỳjaja Jejus ma mōr kãm omu hãmri nê ma gô kape hã pikap mẽ inhĩhkrep mra. Na pre ra Jejus mẽ kamã mẽ à xwỳnhjê ohtô nê akupỳm mẽ ho mex nhũm mẽ axte omu hãmri nê ma mẽ inhĩhkrep gô mỳ ri hpar o pa. Tã pa mẽ xarmã rê nê pàr rũm ijapôj nê gô mỳ ri kỳxpê ixkrĩ hpa.

⁵Hãmri nhũm mẽ inhĩhkrep mẽ mrar xwỳnhjaja mẽ ixwỳr hpôx o mra nhũm Jejus amnhĩ wỳr mẽ omu nê mẽ inhĩõ pê Firipti mã kapêr nê kãm: —Kwa Firip. Měmoj kot puj mẽ pahwỳr mẽ mōr nējje mã ho anê nhũm mẽ kuku? Tanhmã kot puj mẽ amnhĩ to nê nhỹri mẽ kãm mẽmoj japrô nhũm mẽ kuku? Anê.

⁶Ra tãm kot tanhmã mẽ kãm õ hto hã amnhĩ pumunh mex tã ã mẽ hã Firipti kamã hamak kaxyw mẽ hã hkukjêr anê.

⁷Hãmri nhũm kuma nê tee ri mẽ hkukamã hamaxpêr nê kãm: —Konên. Mẽ ohtô rax kumrêx kênã. Mo mẽ kaxyw mẽ pakàxpore rax? Kot pu mẽ pakàxpore ho 200 nê ho mẽ kãm mẽmoj japrôr tã nhũm mẽ ãm ho hkryre nê kuku nê ho õhy htu hkêt nê. Mẽ ohtô rax o mẽ ohtô rax kênã. Anê.

8-9Hāmri nhūm mẽ inhĩõja kuma nẽ Jejus wỳr tẽ nẽ kãm kapěr. Simãw Pêtre htõ Andreja hwỳr tẽ nẽ kãm: —E ota mẽhõ hkrata amnhĩ kôt õ hkwỹ ho mỗ. No ãm grire. Na pãwti kệp 5 nẽ kaxyw õ tep axkrutre. No mẽ ohtô gri ã kot kêt mẽ hipêx pa. Anẽ.

10Hāmri nhūm kuma nẽ hkôt mẽ ixpa ho mẽ ixpa xwỳnhjê mã kapěr nẽ mẽ inhmã: —Tôe. Nà hāmri. E mẽ kãm anẽ kê mẽ hkrĩ pa. Anẽ. Hāmri pa mẽ kãm anẽ nhūm mẽ pỗ kamã hkrĩ hpa. Na prem ohtô kumrêx. Mẽmyjê pixjaja kệp 5.000. Nẽ kaxyw mẽ hprõ nẽ mẽ hkrajaja. Na prem ohtô ho ohtô. Tã piitã hkrĩ pa.

11-12Hāmri nhūm Jejus mẽhõ hkrata pê õ pãwti jamỳ nẽ o xa nẽ Tĩrtũm mã harẽ nẽ kãm: —Pa Papaj. Na ka hte mẽ inhmã mẽ inhõ ho apa. ãm kapxipix amex o amex. Anẽ. Hāmri nẽ mẽ inhmã pãwtija gõ pa mẽ ô ri mẽ hkrĩ xwỳnhjê mã õr o mra nẽ ho mẽ piitã mẽ hipêx pa. Pãwtija ãm hkryre htã nhūm Jejus tanhmã ho nhūm ra ohtô rax kumrêx. Jakamã pa mẽ ô ri mẽ kãm õr o mra nẽ ho mẽ piitã mẽ hipêx pa. Nhūm Jejus hpãnhã tep axkrutreta py nẽ mã ho anẽ nẽ Tĩrtũm mã harẽ hāmri nẽ amnhĩ xô ri mẽ inhmã kugõ pa mẽ mã ho anẽ nẽ. Te ho pãwti nhĩpêx pyrã nẽ ho mẽ piitã mẽ hipêx. Hāmri pa mẽ ixpiitã apku nẽ inhõhy htũ nhūm arĩ mẽõ jakrêx kwỳ hprã. Hāmri nhūm Jejus mẽ inhmã: —E kwa mẽ hkôt mra nẽ mẽõ jakrêx o akuprõ kê omnu hkêt nẽ. Anẽ.

13Hāmri pa mẽ kuma nẽ ho akuprõ nẽ kawà o 12 nẽ ho nỳt. Pãwti hkryreja ãm kệp 5 pix tã nhūm Jejus tanhmã ho nhūm rũnh kumrêx. Jakamã pa mẽ hakrêx prãr o kawà ho 12 nẽ ho nỳt pa.

14Hāmri nhūm mẽ inhĩhkrep mẽ mõi xwỳnhjaja amnhĩ jaêr pê Jejus kot mẽ kãm mẽõ ho rax ã omu nẽ ri axpẽn mã harênh o: —Kokỹỹ. Tãm mãn pre finat Mojesja amnepêm mẽ panhĩgêjtjê mã harênh o ri pa. Tã ra mẽ pahwỳr wrỳ nà?

15Kwa pu mẽ kãm pakapěr kãm paxihtỳx nẽ ma akupỹm amnhĩ kôt o mỗ nẽ amnhĩ kaxyw ãm kê mẽ pahto amnhĩtãr o pa. Anẽ. Hāmri nhūm Jejus

amnhĩ tã mẽ kapêr ma nhũm ja kêp omnuj nê. Jakamã nhũm mẽ kêp kato nê ma hpãnhã ahte nhỹri hixêr õ hwỳr tẽ.

Jejus kot gô krãhkà hã htẽm ã harẽnh

Matêwre 14.22-27; Makre 6.45-52

16Tã nhũm ra kamàtre pa mẽ Jejus kôt ri ixpa ho ixpa xwỳnhjaja ma akupỹm himô hwỳr mra.

17Nhũm kormã Jejus mẽ ixwỳr akupỹn htẽm kêt jakamã pa mẽ tee ri kamã ama hãmri nê akupỹm pàr mã axà nê ma akupỹm Kapanaũ hwỳr xarmã ixrêr o mỗ.

18Pu nhũm ra kôk àpêr tỳx nhũm gô xatã kànhmã harĩ nê axpẽn wỳr mra nê axpẽn tak tỳx nê.

19Pa mẽ kormã gô nhĩpôk ri mỗ. Nê tee ri rrẽmti ho gô rẽnũ nhĩpêx kaprỳ nom kormã ixrêr kêt nê. Nê kormã inhmôr o ixtã 5 kirôm pix nê. Hãmri nhũm ra Jejus gô krãhkà hã hpar o mẽ ixkôt tẽ. Pa mẽ ixprĩ hã amnhĩ wỳr omunh mex kêt nê ixtỳx mẽkarô hã hkamnhĩx nê mẽ inhmã uma htỳx kumrêx.

20Tã nhũm mẽ inhmã ixkapêr nê mẽ inhmã: —Tk. Kwa mẽ amã ma hkêt nê. Pa na pa mẽ akôt tẽ. Anê.

21Hãmri pa mẽ kapêr ma nê ixkĩnh nê. Nê amnhĩ wỳr pàr kre hwỳr ho api nhũm axà pa mẽ xarmã ixrêr kurê kumrêx nê pàr kre rũm ijàpôx pa.

Mẽ kot Jejus japêr mrar ã mẽ harẽnh

22Tã nhũm apkati nhũm xarpê mẽ kot Jejus wỳr mrar nhũm kot mẽ kãm õ xwỳnhjaja tee ri hapêr o pa nê axpẽn mã: —Kwa nhỹhỹm mãn pre we tẽẽ? Na pre hkôt ri mẽ pa xwỳnhjaja pix mẽ õ pàr kãm ma akupỹm xarmã mỗ nom nhũm Jejusja mẽ hkôt htẽm kêt nê. Nà mãn kormã jar nhỹhỹm ri mrar jakamã pu mẽ kormã omunh kêt nê. Anê.

23Rôm nhũm Tipe rũm pàr kwỳja mẽ hwỳr pôj. Jejus kot mẽ apkur xà ho Tĩrtũm wỳr nê mẽ kãm ho rax xà hã pikata wỳr nhũm mỗn pôj.

24Hāmri nhũm mẽ amnhĩ wỳr omu nẽ tee ri pàr kãm Jejus mẽ hkôt mẽ ixpa ho mẽ ixpa xwỳnhjê japêr hāmri nẽ axpẽn mã: —E kwa pu mẽ ma mẽ hkôt xarmã mō nẽ Kapanau kamã mẽ hapêr. Anẽ. Hāmri nẽ mẽ kãm amnhĩ jarẽ nẽ mẽ õ pàr kwỳ hwỳr agjê nẽ ma mẽ hkôt xarmã mōn rê.

25Hāmri nẽ ra mẽ ixwỳr rê nẽ mẽ ixkôt pøj nẽ mẽ ixkaêx ã Jejus pumu nẽ hwỳr mra nẽ kãm: —Pa mẽ ijahkre xwỳnh. Kwa na pa prem tee ri xarpê ajapêr hāmri nẽ man akôt mōn rê. Kwa tanhmã na ka pre we amnhĩ to nẽ man tẽn rê? Anẽ.

26Hāmri nhũm mẽ kãm: —Nà mẽmo kaxyw na ka wem ri ijapêr o ri ixkôt apa? ãm jãã mẽ ate ixkutã axàpkur nẽ anhõhy htu jakamã na ka mẽ axte ixkutã axàpkur pix kaxyw ijapêr o ri apa. No ixte ã mẽ amã amnhĩ nhĩpêx anhỹr ã ixpumu nẽ ixpê Tĩrtũm Kra hã ixkôt ajamaxpêr kêt nẽ. Kwa mẽ ixpê Kra hã inhmã ajamaxpêr tỳx nẽ kêt wehe. Anẽ.

Jejus te kêp kaxkwa rũm mẽ paxàpkur xà maati pyræk ã kot amnhĩ jarênh

27Nhũm Jejus arĩ hwỳr mẽ mrrar xwỳnhjê mã kapêr nẽ mẽ kãm: —Kwa kêr ka mẽ ri axàpkur xà pix kukamã ajamaxpêr o ri apa hkêt nẽ. Na htem mẽ apkur xà kukwak ri Tĩrtũm mẽ wa ixri htĩr tũm nẽ pa ho pa hkêt nẽ. No kot kaj mẽ amnhĩ kaxyw pa ixkôt ajamaxpêr nẽ ixkôt amnhĩ xunhwỳ. Hã kot kaj mẽ ixkukwak ri nhỹrmã atĩr tũm nẽ wa ixri amex nẽ apa ho apa. Te ixpê mẽ kot mẽ apkur xà hkur nẽ ỹ hã htĩr tũm nẽ pa ho pa xwỳnh pyræk. Ja kaxyw na pre Inhĩpêêxà Tĩrtũm mẽ awỳr papxipix inhmẽ pa mẽ awỳr wrỳ. Anẽ.

28Hāmri nhũm mẽ kuma nẽ kãm: —Kwa tanhmã kot paj wem amnhĩ nhĩpêx to nhũm Tĩrtũm hã mẽ ixpumu nẽ mẽ ixto mex nẽ? Anẽ.

29Hāmri nhũm mẽ kuma nẽ axte mẽ kãm amnhĩ jarẽ nẽ mẽ kãm: —Nà kot kaj mẽ amnhĩ kaxyw pa Tĩrtũm kot mẽ awỳr inhmẽnh xwỳnh kôt ajamaxpêr hāmri nhũm ixtã mẽ apumu nẽ tanhmã mẽ akrã hto ka mẽ ajamakêtkati nẽ axàmnhĩx akĩnh nẽ tanhmã amnhĩ nhĩpêx to ho ri apa. Anẽ.

30Hāmri nhũm mẽ kuma nẽ kãm: —Tôe. Kwa axte mẽ inhmã aa mẽ ixte mẽmoj pumunh kêt õ ho anẽ. Pa mẽ ja hã apumu nẽ amnhĩ kaxyw akôt

ijamxpêr kurê kumrêx. E mẽmo kot ka mẽ inhmã ho anê? Kwa tokyx mẽ inhmã axte mẽmoj tanhmã ho pa mẽ omu.

³¹Amnepêm finat Mojes pyrã kot kapôt ã mẽ panhîgêjtjê ho pa ri na pre hte apkati mẽ mẽ kãm mẽõ mẽ kot kãm “manã” anhÿr xwÿnhta gõ nhũm pre htem hkur o pa. Tĩrtũm kapêr ã kagà htũm kot ja jarênh kot: Na pre kaxkwa rũm mẽ hwÿr mẽ apkur xà rê nhũm mẽ hkur o pa. Anhÿr o kot harênh. Tã kot kaj Mojes nê apkati mẽ mẽ inhmã mẽ inhõ ho ri apa pa mẽ ja hã apumu nê rĩ kormã amnhĩ kaxyw akôt ijamxpêr japêr. Anê.

³²Hãmri nhũm mẽ kãm: —Xà Mojes na pre hte mẽ mẽ kãm kaxkwa rũm mẽ apkur xà rênh o pa? Nà tãm kêt. Inhĩpêxà na pre hte mẽ hwÿr kurê nhũm mẽ hkawrà nê kuku nê kukwak ri hihtÿx nê htĩr nê pa. Tã nhũm ra mẽ awÿr hpãnhã pa ixpê Kra hã inhmẽ. Kwa mẽ ixkapêr ma nê amnhĩ krãm haxàr tÿx nê.

³³Na pre Tĩrtũm inhĩpêx o te amnepêm kot mẽ hwÿr kaxkwa rũm mẽ apkur xà rênhta pyrã nê amnê pika hwÿr inhmẽ. Jakamã te ixpê kaxkwa rũm mẽ apkur xà maati wrÿk xwÿnhta pyrãk. Mẽ ate amnhĩ kaxyw ixkôt ajamxpêr nê ixkôt amnhĩ xunhwÿr hãmri nê ixkukwak ri wa ixri atĩr tũm nê apa ho apa kaxyw. Anê.

³⁴Nhũm pre ã Jejus mẽ kãm amnhĩ jarênh anê nhũm mẽ kuma nom hprĩ hã mar mex kêt nê. ãm htÿx ho axtem mẽ apkur xà mex pix ã harênh ã hkamnhĩx nê kãm: —Kwa tô mẽ inhmã mẽ apkur xà maatita kwÿ gõ pa mẽ apkati mẽ hkur o ri ixpa. Anê.

³⁵Hãmri nhũm mẽ kuma nê amnhĩ tã mẽ kãm: —Nà mẽ apkur xà kumrêxja ãm paa. Te ixpê mẽ apkur xà maati pyrãk. Jakamã kot kaj mẽ atõ amnhĩ kaxyw ixkôt ajamxpêr nê ixkôt amnhĩ nhĩpêx o apa hã kot kaj mẽ akĩnh nê apa. Te ra axàpkur nê anhõhy htu nê akĩnh o ri apa pyrãk. Jao amnhĩ tã ixpumu nê akĩnh nê ajamakêtkati nê ri apa.

³⁶—Ra mẽ ate ixpumunh mex tã kormã amnhĩ kaxyw ixkôt ajamxpêr kêt nê. Kwa mẽ ixkapêr ma nê amnhĩ krãm haxàr tÿx nê.

³⁷Tirtüm kot inhmã mẽ õr mã xwỳnhjaja koja mẽ ixpumu nẽ amnhĩ kaxyw ixkõt hamaxpěr mex kurê kumrẽx. Ẽ mẽ kot amnhĩ nhĩpêx anhỹr xwỳnhjaja kot paj aa amnhĩ nê mẽ hanor kêt nẽ.

³⁸—Nẽ ixte amnhĩ krã hkõt kaxkwa rũm ixwrỳk nẽ inhmã hprãm xà hkõt tanhmã amnhĩ nhĩpêx to ho ixpa kaxyw na pa pre ixwrỳk kêt nẽ. Inhĩpêxà kot mẽ awỳr inhmẽnh jakamã kãm hprãm xà hkõt pix mã na pa hte tanhmã amnhĩ nhĩpêx to ho ri ixpa.

³⁹—Tã mo na hte Inhĩpêxà kãm hprãm? Nà kot inhmã mẽ õr mã xwỳnh piitã nhỹrmã wa ixkuri htĩr tũm nẽ mex nẽ pa ho paja na kãm hprãm. Jakamã nhỹrmã akupỹm mẽ htĩr ẫ arĩgrota ẫ ixte akupỹm mẽ ho htĩr nhũm ixte ẫm pixire nẽ ho ixpikunor kêtja na kãm hprãm.

⁴⁰—Tã kot ka mẽ atõ ixpê Tirtüm Kra hã ixpumu nẽ amnhĩ kaxyw ixkõt ajamaxpěr nẽ ixkõt amnhĩ xãm. Hã kot kaj nhỹrmã atyk tã pa akupỹm mẽ atĩr xà hã arĩgrota ẫ akupỹm ato atĩr ka wa ixkuri atĩr tũm nẽ amex nẽ apa ho apa. Ja na Inhĩpêxàja kãm hprãm. Anẽ. Nhũm pre ẫ Jejus mẽ kãm amnhĩ jarẽnh anẽ.

⁴¹Hãmri nhũm Ijaew nhõ pahijaja mẽ kuri mar o kuhê nẽ tee ri kêp kaxkwa rũm mẽ apkur xà maati pyræk ẫ amnhĩ jarẽnh ma nhũm ja mẽ kãm mex kêt nhũm mẽ kamã gryk nẽ.

⁴²Jakamã axpẽn mã ri harẽnh o: —Tk. Kwa mo na ri ẫ amnhĩ jarẽnh anẽ? Kêp mẽ panhĩõ kênã kot kêt ri kêp kaxkwa nhõ xwỳnh ẫ amnhĩ jarẽ. Kêp Juje mẽ Marir wa hkra na. Mẽ pahte katorxà mẽ hipêxà wa omunh mex kênã kot kêt axtem nẽ kêp kaxkwa nhõ xwỳnh ẫ amnhĩ jarẽ. Anẽ.

⁴³Hãmri nhũm amnhĩ tã mẽ kuma nẽ mẽ kãm: —Kwa mẽ ẫ ijarẽnh anhỹr kêt nẽ.

⁴⁴Koja Inhĩpêxà kot mẽ awỳr inhmẽnh xwỳnhhta tanhmã mẽ hkrã hto nhũm mẽ rĩ kormã amnhĩ tã ja hã ixpumu nẽ amnhĩ kaxyw ixkõt hamaxpěr. Tã ẫ mẽ kot amnhĩ nhĩpêx anhỹr xwỳnhjaja koja mẽ nhỹrmã htyk tã pa akupỹm mẽ ho mẽ htĩr nhũm mẽ wa ixri htĩr tũm nẽ mex kumrẽx nẽ pa ho pa.

⁴⁵—Amnepê m Tirtum kapê jarênh o m pa xwÿnhjaja na prem ã ja jarênh anhÿr o: Koja Tirtum m hkrã kaxwÿnh kãm tanhmã m kãm kapê o amnhÿrit to ho pa. Anhÿr o harênh. Jakamã m kot Tirtum kapê mar nê hkôt amnhÿ nhÿpêx xwÿnhjaja koja m mãânên amnhÿ kaxyw pa ixkôt hamaxpêr nê ixkôt ri amnhÿ nhÿpêx o pa.

⁴⁶—Nê m apê pika nhõ xwÿnhjê hõ aa m ate ixkÿnhã ano ho Inhÿpêêxà pumunh kêt. ãm papxipix na ixte omunh. Kurum na pa pre m awÿr wrÿ.

⁴⁷Tã kot ka m atõ amnhÿ kaxyw ixkôt ajamaxpêr. Hã kot kaj nhÿrmã wa ixkuri atÿr tũm nê amex nê apa ho apa. Kwa m jam ajamaxpêr tÿx nê.

⁴⁸—Nê ixpê m axàpkurxà maati jakamã pa na ixpê akupÿm m ho m htÿr xwÿnh.

⁴⁹Amnepê m panhÿgêjtjaja kormã kapôt ã m pa ri m kot “manã” anhÿr xwÿnhhta kur o ri pata ã na prem kukwak ri htÿr tũm nê pa ho pa hkêt nê. Na prem ri pa nê gaa nê rÿ hpigêt nê htyk pa.

⁵⁰Axtem kaxkwa rũm m apkur xà maati jarênh xwÿnhhta pix kukwak ri na htem nhÿrmã htyk tã akupÿm htÿr nê wa ixri htÿr tũm nê mex nê pa ho pa.

⁵¹ãm paa. Pa na htem inhÿ hkwÿ hkrê hãmri nê wa ixri htÿr tũm nê mex nê pa ho pa. Na pa pre ra amnhÿ grõnh kôt m awÿr wrÿ. Jakamã ka m atõ inhÿ hkwÿ hkrê hãmri nê nhÿrmã atyk tã pa akupÿm ato atÿr ka Tirtum m wa ixri atÿr tũm nê amex nê apa ho apa. Anê.

⁵²Nhũm pre ã Jejus Ijaew mã amnhÿ jarênh anê. No ãm m kãm amnhÿ tã kuxi nê amnhÿ jarê. Jakamã nhũm m tee ri kuma hãmri nê tanhmã hã axpên mã kapêr to. Mê kot hprÿ hã mar kêt nê ãm m kot ï hkwÿ hkrêrja pix jarênh mar jakamã tee ri hamaxpêr nê axpên mã: —Kwa tanhmã kot kêt we amnhÿ to nê m pamã amnhÿ nhÿ hkwÿ gõ pu m kuku? Anê.

⁵³⁻⁵⁴Hãmri nhũm amnhÿ tã m kuma nê m kãm: —Nà m kot inhÿ hkwÿ hkrêr nê ixkamrô hkwÿ ho hkõm xwÿnh pixjaja koja m nhÿrmã Tirtum m wa ixri htÿr tũm nê pa ho pa. Ixte akupÿm m ho m htÿr xà hã arÿgrota ã kot paj m ho m htÿr nhũm m wa ixri htÿr tũm nê mex nê pa ho pa. No

kot kaj mẽ inhĩ hkwỳ hkrēr kêt nẽ ixkamrô hkwỳ ho akôm kêt hãmri nẽ wa ixri atĩr tũm nẽ amex nẽ apa ho apa hkêt nẽ. Kwa mẽ jam ajamaxpěr tỳx rãhã nẽ.

⁵⁵Kêt inhĩja kệp mẽ apkur xà maati na. Nẽ ixkamrôja kệp mẽ hkôm xà maati na. Jakamã na htem inhĩ hkwỳ hkrẽ nẽ ixkamrô hkwỳ ho ixkõ nẽ ra kệp wa ixri mẽ htĩr tũm nẽ mẽ pa ho mẽ pa mã xwỳnh.

⁵⁶Jakamã kot ka mẽ atõ inhĩ hkwỳ hkrẽ nẽ ixkamrô hkwỳ ho ixkõ. Hãmri pa amnhĩ tã apumu nẽ akarõ mã axà ka te apê pa pyræk o amnhĩ nhĩpêx o apa.

⁵⁷Inhĩpêêxà kot mẽ awỳr inhmẽnh xwỳnhhta kukwak ri na pa hte igtĩr tũm nẽ ixpa ho ixpa. Tã ja pyrà nẽ kot kaj mẽ inhĩ hkwỳ hkrẽ hãmri nẽ ixkukwak ri wa ixri atĩr tũm nẽ apa ho apa mã xwỳnh.

⁵⁸—Jakamã na pa ã mẽ amã ixpê kaxkwa rũm mẽ axàpkur xà maati hã amnhĩ jarẽnh anẽ. Amnepêm mẽ panhĩgêjtaja na pre htem kapôt ã mẽõta kur o pa hãmri nẽ gaa nẽ hpigêt nẽ htyk pa. No kêt pa koja mẽ inhĩ hkwỳ hkrẽ hãmri nẽ mẽ kurom wa ixri htĩr tũm nẽ mex nẽ pa ho pa. Anẽ.

⁵⁹Nhũm pre ã Jejus mẽ kãm amnhĩ jarẽnh anẽ. Kormã Kapanaũ kamã Tĩrtũm kapěr o mẽ ahkre xà hã ixkre kamã ã mẽ ahkre anhỹr o xa.

Mẽ ohtô nẽ mẽ kot Jejus kaga hã mẽ harẽnh

Sikũn Korĩt 3.6; Sikũn Pêtre 3.16

⁶⁰Hãmri nhũm mẽ kot Jejus kôt mar o mẽ pa xwỳnhjaja ohtô nẽ ã kapěr anhỹrja ma nẽ tee ri amnhĩ kukamã hamaxpěr nẽ hã axpẽn mã: —Tk. Kwa pěr kapěrja ãm ri katii. Mẽhõ koja we kuma nẽ hkôt hamaxpěr nẽ hkamrô nẽ ĩ kur o ri hkôt pa? Nà mẽ piitã mẽ kãm ja mexti hã. Anẽ.

⁶¹Hãmri nhũm amnhĩ tã mẽ kuma nẽ mẽ kãm: —Kwa xà ixkapěrja mẽ apê omnuj?

⁶²Nà kot paj nhỹrmã ma akupỹm kaxkwa hwỳr api. Ixpê Tĩrtũm kot mẽ akaxyw ixãm xwỳnh ã ma akupỹm hwỳr api. Hãmri ka mẽ ã ixte amnhĩ nhĩpêx anhỹr ã ixpumu nẽ rĩ kormã ixkôt amnhĩ xunhwỳr japêr.

⁶³Na htem mẽmoj kur kukwak ri kêp Tĩrtũm mẽ wa ixri htĩr tũm nẽ pa ho pa xwỳnh kêt nẽ. Rỳ amnhĩ krã hkôt tanhmã amnhĩ nhĩpêx to ho kêp wa ixri htĩr tũm nẽ pa ho pa mã xwỳnh kêt nẽ. Tĩrtũm mẽ wa Ixkarõ tãm na hte mẽ hkarõ mã agjê nẽ mẽ ho Tĩrtũm wa ixkuri mẽ htĩr tũm nẽ mẽ pa ho mẽ pa mã xwỳnh. Tã ỹ hã na pa ã mẽ amã ixkapêr anẽ. Nom mẽ amã amnhĩ tã kuxi nẽ amnhĩ jarẽ. Tã kot kaj mẽ ixkapêr ma nẽ ixkôt amnhĩ nhĩpêx. Hã kot kaj mẽ nhỹrmã wa ixri atĩr tũm nẽ amex nẽ apa ho apa.

⁶⁴⁻⁶⁵No mẽ akwỳjaja na ka mẽ ixkapêr ma nẽ ãm ama nẽ ixkôt ajamaxpêr kêt nẽ. Jakamã na pa ã mẽ amã ixkapêr anẽ nẽ mẽ amã: “Koja Inhĩpêxàja tanhmã mẽ akrã hto ka mẽ rĩ kormã amnhĩ tã ixpumu nẽ amnhĩ kaxyw ixkôt ajamaxpêr.” Anhỹr o mẽ amã ixkapêr. Anẽ. Nhũm ã Jejus mẽ kãm kapêr anẽ. Ra kot mẽ hkukamã mẽ omunh mex. Ra kot amnhĩ kaxyw mẽ kot hkôt hamaxpêr mã xwỳnhjê pumunh nẽ mããnẽn mẽ kamã kot mẽõ pahi nhĩhkram haxàr mã xwỳnhja nhũm mããnẽn ra kot amnhĩ kukamã omunh mex. Jakamã nhũm ã mẽ kãm kapêr anẽ.

⁶⁶Hãmri nhũm mẽ kot hkôt kapêr mar o mẽ pa xwỳnh kwỳjaja tee ri kuma hãmri nẽ hkaga nẽ axte hkôt pa hkêt nẽ.

⁶⁷Hãmri nhũm tee ri mẽ kot hkaga nẽ ma mẽ mrar ã mẽ omu nẽ mẽ ixpê hkôt ixpa ho ixpa xwỳnh pê 12jê mã kapêr nẽ mẽ inhmã: —Pa? No mẽ kajaja. Xà kot kaj mẽ uràk nẽ ixkaga nẽ ma akupỹm mra nà? Anẽ.

⁶⁸Hãmri nhũm Simãw Pêtre kãm: —Nà kot paj mẽ akaga hkêt nẽ. Kapxipix na htem amnhĩ kaxyw akôt hamaxpêr jao kêp Tĩrtũm mẽ war akuri htĩr tũm nẽ pa ho pa mã xwỳnh.

⁶⁹Ka na pre Tĩrtũm mẽ ixwỳr amẽ. Jakamã na pa mẽ amnhĩ kaxyw akôt ijamaxpêr o ri ixpa. Nà kot paj mẽ aa akaga hkêt nẽ. Anẽ.

⁷⁰Hãmri nhũm kuma nẽ kãm: —Nà ixte amnhĩ kaxyw mẽ apê 12jê rênh tã na ka mẽ atõ akwỳjê hkĩnhã axtem nẽ Satanasti hkôt amnhĩ xãm. Anẽ.

⁷¹Nhũm pre ã finat Jut Kariot kot mẽ inhõ pahijê nhĩhkram haxàrja kukamã mẽ inhmã harênh anẽ. Mẽ inhĩ õ na pre. Nẽ kêp Simãw Kariot kra na pre.

Tã ra kot mẽ ìhkram haxàr kaxyw nhũm Jejus kot amnhĩ kukamã omunh jakamã ã mẽ inhmã harēnh anē.

Juãw 7

Jejus tøjaja kot mẽ hkĩnh wỳr amnhĩ kôt hwỳr ã mẽ harēnh

Matêwre 10.36; 13.57-58

¹Tã nhũm Jejus arĩ Garirej kamã ri pa nē kormã akupỹm Jutej wỳr mōr kêt nē. Jutej kamã Ijaew nhō pahijaja ra kot hã àmnēnh nhũm mẽ kot hpĩr ã harēnh jakamã nhũm mẽ umaj kormã hwỳr mōr kêt nē.

²Tã mẽ ixpê Ijaew mẽ ixte ixkre hkryre nhĩpêx nē hã ixkĩnh ã arĩgroja ra ahtêp o mō. Mẽ ixkĩnhta ã na pa pre htem ixpiitã Jutej wỳr axpēn wỳr akuprō nē ahpỹnhã ri amnhĩm ixkre hkryre nhĩpêx nē kamã ixkrĩ.

³Jakamã nhũm Jejus tøjaja hwỳr mra nē kãm nojarêt nē amnhĩ kôt kuwỳ nē kãm: —E kwa tokyx pu mẽ pahkwỳjê hkôt. Ka mẽ kãm aa mẽ kot mẽmoj pumunh kêt kwỳ ho anhỹr o ri mẽ hkôt apa kê mẽ kãm akapēr mar prãm xwỳnhjaja ja hã apumu.

⁴Na ka hte jar te apimxur pyræk o amnhĩ nhĩpêx. E kwa tokyx ma pu mẽ hkôt. Anē.

⁵Katorxà hkôt mẽ kêp Jejus tō htã kormã amnhĩ kaxyw hkôt hamaxpēr kêt jakamã na prem ã kãm kapēr anē.

⁶Hãmri nhũm mẽ kãm: —Nà kormã. Kormã ixte mẽ kãm amnhĩ to amnhĩrĩt xà hã arĩgro kormã kator kêt. Jakamã kot ka mẽ amã mẽ hkôt amrar prãm nē mãmri ma mẽ hkôt mra.

⁷Koja mẽ apumu nē kãm mẽ akurê hkêt nē. Nē mẽ akamã gryk kêt ka mẽ ri tanhmã amnhĩ nhĩpêx to ho mẽ hkôt apa. No pa kot paj mẽ hwỳr mō nē mẽ kãm mẽ kot amnhĩ tomnuj o pa hã mẽ harēnh o ri mẽ hkôt ixpa nhũm mẽ tee ri amnhĩ tã inhma nē ixkamã gryk nē.

⁸Jakamã mẽ mãmri ma mẽ hkôt mō. Kot paj kormã. Kormã ixte mẽ kãm amnhĩ to amnhĩrĩt xà hã arĩgroja kormã kator kêt.

⁹Anē nhūm mẽ tee ri kuma hāmri nē kure nē ma mẽ hkwỳjê hkôt Jutej wỳr mō. Nhūm Jejus kormã Garirej kamã ri pa hã apkati grêre.

¹⁰Hāmri nē kormã ma hapu hã mẽ hkôt mō. Pa mẽ hkôt ri ixpa ho ixpa xwỳnhjaja ma hkôt ixpa.

Mẽ kot ahpỳnhã tanhmã Jejus jarēnh to hã mẽ harēnh

Juãw 7.37-44; 9.22; 10.19-21; 12.42-43

¹¹Rôm nhūm ra mẽ ixpê Ijaew nhõ pahijaja mẽ hkĩnhja kamã mẽ pikuprõnh xwỳnhjê kaêx ã Jejus japêr o ri mra. Nē hã axpēn kukjêr o mra nē axpēn mã: —Kwa nok? Nhỹri mãn we? Anē.

¹²Nhūm Ijaew piitã tanhmã axpēn mã Jejus jarēnh to ho pa. Nē kamã mẽ hkwỳjaja harēnh o: —Nà kot amnhĩ to mex o pa xwỳnh na. Anhỹr o harēnh o pa. Nē kamã mẽ hkwỳjaja axtem nē harē nē harēnh o: —Tk. Kot mẽ no kupy r o pa xwỳnh kênã. Anē.

¹³Nom mẽ õ pahi pymaj mẽ piitã mẽ nom tanhmã harēnh to hkêt nē. ãm axpēn mã pix mã tanhmã harēnh to ho pa.

Jejus kot mẽ hkĩnh xwỳnhjê jahkre hã harēnh

Makre 3.22; Juãw 5.16

¹⁴Tã pa mẽ mẽ hwỳr pōj. Jejus mẽ pa mẽ hkôt ixpa ho ixpa xwỳnhjaja mẽ hwỳr pōj. Kormã mẽ hkĩnhja hapêx kêt ri. Hāmri pa mẽ Jejus kôt Tĩrtũm mã amnhĩ jarēnh xà hã ixkreja wỳr mra nē agjê nhūm Jejus mẽ ahkre ho nhỹ.

¹⁵Hāmri nhūm mẽ inhõ pahijaja tee ri kot tanhmã mẽ ahkre hto hã kuma nē hã axpēn kukja nē axpēn mã: —Kwa mẽ pahkĩnhã kot Tĩrtũm kapêr o istuda hkêt tã ã mẽ ahkre anē. Anē.

¹⁶Hāmri nhūm amnhĩ tã mẽ kuma nē mẽ kãm: —Nà na pa hte amnhĩ krã hkôt tanhmã ri mẽ ajahkre hto hkêt nē. ãm kot mẽ awỳr inhmēnh xwỳnhhta nhỹ hã na pa hte ã mẽ ajahkre anhỹr o ri mẽ akôt ixpa.

¹⁷Tã kot kaj mẽ amã Tĩrtũm kãm hprãm xà hkôt amnhĩ nhĩpêx prãm hã kot kaj mẽ ixte ÿ hã ixkapêr ã ixpumunh kurê kumrêx.

18 Amnhĩ krã hkôt mẽ kãm kapër o ri mẽ pa xwỳnhjaja na htem mẽ kot mẽ mar nẽ mẽ hã hpijaàm pix kaxyw tanhmã mẽ kãm kapër to ho ri pa. No kêt pa na mẽ ate ixkapër mar nẽ kot mẽ awỳr inhmẽnh xwỳnhhta ã apijaàm pix kaxyw na pa hte tanhmã mẽ amã ixkapër to ho ri ixpa. Jakamã ãm hãmri na pa hte mẽ amã ixkapër o ri ixpa.

19—Finat Mojes na pre mẽ panhĩgêjtaja kot tanhmã amnhĩ nhĩpêx to ho pa nhũm Tĩrtũm kot mẽ kãm hã karõ jarẽnh o ri mẽ hkôt pa htã ka mẽ hkôt amnhĩ nhĩpêx kêt nẽ. Tã ixte hkôt amnhĩ nhĩpêx kêt ã ixto axêx nẽ mẽ ate ixpĩr kaxyw ixtã amnhĩ jarẽnh ri apa. Anẽ.

20 Hãmri nhũm mẽ ã Jejus kot mẽ kãm kapër anhỳrja ma nẽ hêx rom kãm: —Kwa mẽ ixtõ na pa apĩr mã ka ri ã mẽ ijarẽnh anẽ? Amrakati kênã. Kwa mãn ka akrã axpã nà? Hã na ka ã ri akapër anẽ. Anẽ.

21 Hãmri nhũm mẽ kãm: —Nà ixte mẽ pahkôt xà hã arĩgro hã akupỳm mễhõ myta ho mex jakamã na ka prem ja hã ixpumu nhũm ja mẽ apê omnuj nẽ. Nẽ te ixte mẽ pahkôt xà hã arĩgro hã ixpijaàm kêt xwỳnh pyrãk ã ijarẽ.

22 Nom na ka htem ixpyrà nẽ mẽ panhõ arĩgromnu hã mẽmoj tã axàpênh o ri apa. E pa mẽ amã mẽmoj jarẽ ka mẽ inhma. Na pre finat Mojes mẽ pamã mẽ pahte mẽ pahkra myre pê my kwỳt kà jakàr ã mẽ pamã karõ. Kukamã higêjtaja kot kãm ja hã karõ xà hkôt. Jakamã na htem mẽ hkra myre hapôj nẽ hã semãn pyxi nẽ hapêx nhũm mẽ kêp mẽmy hkwrỳt kà jakà.

23 Mễ pahkôt xà hã arĩgro hã hõ kator tãã nhũm mẽ hã semãn pyxi nẽ mẽ panhõ arĩgromnu hõ hã kêp my kwỳt kà hkwy krãhta. Mojes kot Tĩrtũm nhỹ hã ja hã mẽ pamã karõ xà hkôt. Jao mẽ panhõ arĩgromnu hã apê. Tã pa pre mẽ apyrà nẽ arĩgromnu hã ixàpênh pê akupỳm mễhõ myta ho mex ka mẽ ja hã ixpumu nẽ axtem nẽ ixtỳx ri ixte amnhĩ nhĩpêx o ixpa xwỳnh ã ijarẽ nẽ mẽ ate ixpĩr kaxyw ã amnhĩ jarẽ.

24 Kwa mẽ amnhĩ krã hkôt tanhmã mẽ harẽnh to ho ri apa hkêt nẽ. ãm mẽ kot tanhmã amnhĩ nhĩpêx to ho pa hã mẽ omu nẽ ajamaxpêr o: “Kwa xà we

Tĩrtũm kãm ja mex nà?” Anhỹr o mãn kêt mẽ ajamaxpěr nẽ rĩ kormã tanhmã mẽ harẽnh to. Anẽ.

²⁵Hãmri nhũm Jerujarẽ nhõ xwỳnh kwỳjaja ja hã kuma nẽ tee ri hkukamã hamaxpěr. Hãmri nẽ hã axpẽn kukja nẽ axpẽn mã: —Kwa xà tãm na mẽ panhõ pahijaja mẽ kot hpĩr kaxyw hã amỹnê?

²⁶Ota jar mẽ pakamã ri pa htã nhũm mẽ ãm omu nẽ kãm tanhmã nẽ hkêt nẽ. Mãn mẽ ãm hãmri kệp Kris ã hkamnhĩx jakamã kapěr ma nẽ ãm kuma nẽ kệp Kris ã tanhmã ho hkêt nẽ. Anẽ.

²⁷Hãmri nhũm mẽhõja kuma nẽ kãm: —Tk. Nà kệp Tĩrtũm kot mẽ pahwỳr mẽnh xwỳnhre hã. Kệp Najare nhõ xwỳnh kênã. Mẽ pahte hipêêxà mẽ katorxà wa omunh mex. No kêt Tĩrtũm kot mẽ pahwỳr mẽnh mã xwỳnhhta koja xep mẽ pahwỳr kato pu mẽ nhỹhỹnh htẽm xà hkôt omunh kêt nẽ. Anẽ.

²⁸Rôm nhũm Jejus arĩ Tĩrtũm mã amnhĩ jarẽnh xà hã ixkreja kamã mẽ ahkre ho nhỹ. Jakamã mẽ kot axpẽn mã harẽnh ã amnhĩ tã mẽ kuma nẽ mẽ kãm: —Xà mẽ ate aprĩ hã ixpumunh nẽ nhỹhỹnh ixtẽm xà hkôt ixpumunh? Nà mẽ ate ja hã ixpumunh kêt. Na pa pre amnhĩ hkrã hkôt mẽ awỳr inhmõr kêt nẽ. Na pre mẽhõ mẽ awỳr inhmẽ. Nom kot mẽ awỳr inhmẽnh xwỳnhja kormã mẽ ate omunh kêt.

²⁹Ãm papxipix na ixte omunh. Kurũm ixwrỳk xwỳnh na pa. Kot mẽ awỳr inhmẽnh nhũm kurũm ixwrỳk jakamã ixte ixprĩ hã omunh par. Anẽ.

³⁰Hãmri nhũm mẽ hkwỳjaja tee ri ã kot amnhĩ jarẽnh anhỹrja ma nẽ ri axpẽn mã harẽnh o: —Kwa Tĩrtũm kot mẽ pahwỳr mẽnh ã kot amnhĩ to hêx kênã. E kwa pu mẽ ã kot amnhĩ to hêx anhỹr ja ã unê nẽ haxà nà? Anhỹr o axpẽn mã hã amỹnê. Nom kormã mẽ kot unênh nẽ haxà xà hã arĩgroja kormã kator kêt jakamã nhũm Tĩrtũmja nê mẽ omunh mex nẽ nhũm mẽ ãm kãm unênh prãm kaprỳ.

³¹No nhũm mẽ hkwỳja mẽ kurom kuma nẽ kệp Tĩrtũm kot mẽ pakaxyw ãm xwỳnh ã omunh kurê kumrẽx nẽ amnhĩ kaxyw hkôt hamaxpěr. Hãmri nẽ axpẽn mã harẽnh o: —Kwa mãn kệp Tĩrtũm kot mẽ pahwỳr mẽnh mã

xwỳnhhta mǎn nà? Mě pahtō kot pu uràk nē aa mẽ kām mẽ kot mẽmoj pumunh kêt o anhỹr rax o ri papa? Amrakati kumrēx. Nà pěr tǎm kēnǎ. Anē.

Pôristi hkwỳ kot Jejus pynênh kaxyw ã mẽ harênh

³²Nhũm prem ã axpên mã Jejus jarênh anhỹr o kuhê hāmri nhũm Parijew nhō xwỳnhjaja hǎ mẽ kuma. Hāmri nē patre krāhtũmjê mẽ mẽ ma Jejus wỳr mẽō pôristi hkwỳ rē nē mẽ kām: —E mẽ ma Jejus wỳr mra nē unê nē man akupỹn o tē. Anē.

³³Hāmri nhũm mẽ kuma nē ma hwỳr mra nē omu nom tokyx unênh kêt nē. Kormǎ kapēr ã mar o kuhê. Nhũm Jejus arĩ mẽ kām kapēr o xa nē mẽ kām: —Nà kot paj jar mẽ akôt ri ixpa hǎ mytwrỳ grêre hāmri nē ma akupỹm kot mẽ awỳr inhmēnh xwỳnhhta wỳr api.

³⁴Ka mẽ tee ri jar ijapêr o ri apa nom nhỹri ixpumunh kêt nē. Nē ma inhmōr xàta wỳr kot kaj mẽ atō ma ixkôt amōr kêt nē. Anē.

³⁵Hāmri nhũm mẽ tee ri ã kot amnhĩ jarênh anhỹrja ma nē axpên mã: —Kwa nhỹhỹm koja we ma mō pu mẽ hkôt papa hkêt nē? Mǎn mẽ pahkwỳjaja kot Gresjê kamǎ mẽ pa xwỳnhjê hwỳr koja ma mō nē hpǎnhǎ mẽ hkôt mẽ ahkre ho pa nà? Hǎ na ã mẽ pamǎ amnhĩ jarênh anē?

³⁶Mo na ri mẽ pahte tee ri hapêr o papa hǎ mẽ pajarē nē mẽ pahte hkôt pamrar kêt ã mẽ pajarē? Anē.

Tĩrtũm Karō te kêp gō nyw pyrək ã harênh

Juǎw 4.13-14; Apokarip 22.1; 22.17

³⁷Tǎ nhũm ra mẽ hkĩnhja hapêx kaxyw hitep xà hǎ arĩgro maatija kato. Jakamǎ nhũm Jejus kànhmǎ xa nē kỳxpê mẽ hpikuprōnh xwỳnhjê mã kapēr nē mẽ kām: —E te mẽ amǎ kôr o apa pyrək xwỳnhjaja. Mě amnē ixwỳr akuprō. Kot kaj mẽ amnhĩ kaxyw ixkôt ajamaxpêr pa tanhmǎ mẽ ato ka mẽ apê Tĩrtũm mẽ wa ixri atĩr tũm nē apa ho apa mã xwỳnh.

³⁸—Kot kaj mẽ ja hǎ amnhĩ pumu hāmri nē ma mẽ kām ixkapêr jarênh o ri mẽ hkôt apa. Te mẽ kām kôr nhũm mẽ ate mẽ kām gō hkwỳ nhũm mẽ kot ho hkôm pyrək o mẽ hipêx o ri mẽ hkôt apa. Hāmri nhũm mẽ ama nē mẽ apyrà nē amnhĩ kaxyw ixkôt hamaxpêr. Pa ixte tanhmǎ mẽ atoja pyrà nē

tanhmã mẽ ho nhũm mẽ apyrà nẽ kęp wa ixri htĩr tũm nẽ pa ho pa mã xwỳnh. Anẽ.

³⁹Nhũm pre ã Jejus mẽ kãm kapěr anẽ. No ãm hã kuxi nẽ mẽ kãm kapěr nẽ hprĩ hã harẽnh kêt nẽ. Tĩrtũm Karõ kot nhỹrmã mẽ kot amnhĩ kaxyw Jejus mã hamaxpěr xwỳnhjê karõ mã gjêxja nhũm ã mẽ kãm hã kuxi nẽ harẽnh anẽ. No kormã akupỹm kaxkwa hwỳr àpir nẽ mex o mex nẽ hkrĩ hkêt jakamã kormã mẽ hwỳr Karõ rẽnh kêt nẽ.

Mẽ kot ahpỹnhã tanhmã Jejus jarẽnh to hã mẽ harẽnh

Juãw 7.11-13; 7.25; 10.19-21

⁴⁰Hãmri nhũm mẽ kot Jejus mar o hkrĩ xwỳnhjaja ã kapěr anhỹrja ã kuma nẽ ahpỹnhã tanhmã harẽnh to nẽ harẽnh o: —Kwa finat Mojes pyrà nẽ kęp Tĩrtũm nhỹ hã kapěr jarẽnh o pa xwỳnh na nà? Anẽ.

⁴¹Nhũm kamã mẽ hkwỳjaja mẽ kãm: —Nà Tĩrtũm kot mẽ pakaxyw ãm xwỳnhhta na. Anẽ. Nhũm kamã mẽ hkwỳjaja ja hã mẽ kuma nẽ mẽ kãm: —Tk. Nà kęp Garirej nhõ xwỳnh kênã kot kêt Tĩrtũm mẽ pakaxyw ãm.

⁴²Tĩrtũm kapěr ã kagà htũm kot kęp Garirej nhõ xwỳnh ã harẽnh kêt. Kęp Pahi Tawi hkanrẽhã hkagrõt nyw jakamã koja uràk nẽ Jutej kamã krĩ pẽ Perěj kamã kato. Jao koja uràk nẽ kęp Jutej nhõ xwỳnh. Anhỹr o ri axpẽn mã harẽ. Mẽ kot htỳx Jejus pika pẽ Garirej kamã kator ã hkamnhĩx jakamã ã axpẽn mã harẽnh anẽ. Nom pika pẽ Jutej kamã na pre kato. Krĩ pẽ Perěj kamã. Tã no nhũm mẽ hkwỳjaja ja hã mar kêt jakamã kęp Tĩrtũm kot mẽ pahwỳr mẽnh xwỳnh kêt ã hkamnhĩx.

⁴³Jakamã nhũm mẽ ã ahpỹnhã axpẽn mã harẽnh anẽ.

⁴⁴Nhũm mẽ hkwỳjaja ra kot unênh kaxyw tã tokyx unênh kêt nẽ.

Pôristi kot Jejus pynênh kêt ã mẽ harẽnh

Matêwre 7.28-29

⁴⁵Tã nhũm patre nhõ pôristijaja. Mẽ kot Jejus pynênh mã hwỳr mrar tã hãmri ã kapěr anhỹrja ã kuma nẽ tee ri hamaxpěr nẽ unênh kêt nẽ. Nẽ awjanã nẽ ahte ã kamã ma akupỹm patre krãhtũmjê mẽ Parijew nhõ

xwỳnhjê hwỳr mra. Hāmri nhũm mẽ omu nẽ mẽ kām: —Pa nok? Tanhmã na ka mẽ amnhĩ to nẽ unênh nẽ ho amõr kêt nẽ? Anẽ.

⁴⁶Hāmri nhũm mẽ kām: —Nà na pa mẽ unênh kêt nẽ. Kapër mex kênã. Te kot mẽ pakapër pyræk kêt jakamã pa mẽ tee ri kapër ã kuma nẽ unênh kêt nẽ. Anẽ.

⁴⁷Hāmri nhũm Parijew nhõ xwỳnhjaja mẽ kuma nẽ mẽ kām: —Tk. Kwa mǎn ka mẽ ra mẽ uræk nẽ tanhmã kot amnhĩ to hêx toja ma nẽ hkõt ajamaxpër nà?

⁴⁸Mẽ ixpê Parijew nhõ xwỳnhjaja nẽ mẽ panhõ pahijaja na pa htem hkõt ijamaxpër kêt nẽ.

⁴⁹No kêt mẽ kot mar nẽ hkõt hamaxpër xwỳnhhtijaja na htem mẽ ixkĩnhã finat Mojes kapër mar kêt nẽ. ãm Jesus kapër pix na htem kuma nẽ hkõt hamaxpër. Mỳrapê koja Tĩrtũm tanhmã mẽ homnuj tỳx to nhũm mẽ rĩ amnhĩ pumu. Anẽ.

Nĩkotê kot Jesus xyr pê kapër ã harênh

Juãw 3.1-21

⁵⁰Hāmri nhũm Nĩkotêja mẽ mar o xa. Mẽ uræk nẽ kêp Parijew nhõ xwỳnh tã na pre ra kamàt õ hã Jesus wỳr tẽ nẽ kām kapër. Jakamã tee ri hã mẽ kapër ma hāmri nẽ yr pê mẽ kām kapër nẽ mẽ kām:

⁵¹—Tk. Kwa kormã mẽ pahte pahprĩ hã kapër mar nẽ tanhmã kot amnhĩ nhĩpêx to hã omunhre hã. Na pre finat Mojesja Tĩrtũm nhỹ hã mẽ panhĩgêjtjê mã ja jarênh o: Kêr ka mẽ aprĩ hã mẽ kapër ã mẽ ama nẽ mẽ kot amnhĩ nhĩpêx ã mẽ omu nẽ rĩ kormã tanhmã mẽ harênh to. Anhỹr tã ka mẽ kormã aprĩ hã Jesus kot amnhĩ nhĩpêx ã omunh kêt tã ra kot amnhĩ tomnuj xwỳnh ã harê. Anẽ.

⁵²Hāmri nhũm mẽ tee ri kuma nẽ kām: —Tk. Kwa xà we uræk nẽ apê Garirej nhõ xwỳnh hã na ka ã yr pê akapër anẽ? Xà Tĩrtũm kapër ã kagà htũm kot Garirej nhõ xwỳnhjê hõ kêp y hã kapër jarênh o pa xwỳnh ã harênh? Nà ã kot harênh anhỹr kêt. Anẽ.

⁵³Nhũm mẽ ã Nĩkotẽ mã kapër anẽ hãmri nẽ angrà nẽ Tĩrtũm nhõrkwỹ rũm hapõj nẽ ma akupỹm õrkwỹ hwỳr àhkurê ho mra.

Juãw 8

Mẽhõ ni kot nhãm mẽ mjên o amnhĩkati hã harẽnh

Xiakre 2.10-13

¹Tã nhũm Jejus Tĩrtũm nhõrkwỹ kamã mẽ ahkre hpa hãmri nẽ kato nẽ ma hixêt prêk pê Oriwêhti hwỳr tẽ. Hãmri nẽ hã api nẽ nhỹri nõ nẽ ra gõr.

²Tã nhũm apkati nẽ myt kator o mõi mẽ nhũm kànhmã nhỹ nẽ akupỹm wrỳ nẽ Tĩrtũm mã amnhĩ jarẽnh xà hã ixkre hwỳr tẽ. No ãm kormã ixkre pu hã kahê hkre kamã nhỹ. Nhũm krĩ nhõ xwỳnhjaja omu nẽ hã hturax nẽ nhũm tanhmã mẽ ahkre hto ho nhỹ.

³Hãmri nhũm Parijew nhõ xwỳnhjê mẽ Tĩrtũm kapër tũm o mẽ ahkre ho mẽ pa xwỳnhjaja hwỳr mẽhõ nija o tẽ. Na ra ham mẽhõ pê mjên o amnhĩkati ho nõ nhũm mẽ ja hã omu nẽ unê nẽ hpa hã kupy nẽ ma Jejus wỳr hkjênh o mõi. Hãmri nẽ mẽ kot mar o kuhê xwỳnhjê kutã ãm nhũm xa.

⁴Hãmri nhũm mẽ Jejus mã: —E ot pa mẽ awỳr jahti ho tẽ ka omu. Na ham mẽhõ pê mjên o amnhĩkati ho nõ. Pa mẽ ja hã omu nẽ unê nẽ man awỳr o tẽ.

⁵E tanhmã kot puj mẽ hipêx to? Na pre finat Mojes Tĩrtũm nhỹ hã mẽ panhĩgêtjê mã ja jarẽnh o: Kojamẽnijê hõ axtem nẽ nhãm mẽhõ pê mjên o amnhĩkati ho nõ ka mẽ ja hã omu nẽ apiitã ahpỹnhã kên rũnh jamỳ nẽ ho htak o apĩ. Anhỹr o kot harẽnh. No ka? Tanhmã kot kaj mẽ inhmã ja jarẽnh to? Tanhmã kot paj mẽ hipêx to nhũm amã mex nẽ? E mẽ inhmã tanhmã mẽ ixte hipêx to jarẽ. Anẽ.

⁶Nhũm mẽ ã hêx rom nija ã Jejus kukjêr anẽ. Kot mẽ kot hpĩr nê mẽ kãm kapër nhũm mẽ kot hã mar nẽ mẽ hkrãhtũmjê hwỳr mõi nẽ kãm kot Mojes kapër kwỳm ri mẽ ahkre hã harẽnh kaxyw nhũm mẽ hêx rom ã hkukjêr anẽ. Hãmri nhũm mẽ kuma nẽ tanhmã hã mẽ kãm nẽ hkêt nẽ. ãm htỳx hikõt nẽ ãhkrakrã ho pyka kagà ho nhỹ.

⁷Nhũm mẽ tee ri omu nẽ axte hã hkukja nhũm kànhmã xa nẽ mẽ kãm: —Tôe. Nà kot ka mẽ atõ aa tanhmã amnhĩ tomnuj to hkêt kumrẽx ã amnhĩ pumu hãmri nẽ kam nẽ rĩ kaxyw kẽn õ py nẽ akumrẽx ho hkura. Kê akwỳjaja rĩ kormã akõt hkwyè jamy nẽ ho htak. Anẽ.

⁸Hãmri nẽ akupỹm hikõt nẽ pyka kagà ho nhỹ.

⁹Hãmri nhũm mẽ tee ri kapẽrja kõt kuma hãmri nẽ mẽ kot mar o kuhê xwỳnhjê rũm angrà nẽ ma mra. Mẽ piitã mẽ kot amnhĩ tomnuj xwỳnh ã amnhĩ pumunh mex jakamã tee ri ã kot mẽ kãm kapẽr anhỹrja ma nẽ angrà nẽ ma akupỹm hpỹnh nẽ axpẽn kõt mrar o xa. Mẽhpigêt kumrẽx nẽ hpãnhã mẽ nywjaja nhũm mẽ hpỹnh nẽ ma axpẽn kõt mrar o ãm kãm hapêx. Nhũm Jejus mẽnija pix wa ahte mẽ kot mar xwỳnhjê kutã wa arĩk.

¹⁰Hãmri nhũm Jejus kànhmã xa nẽ nita mã kapẽr nẽ kãm: —Pa? No mẽ kot ato kapẽr xwỳnhhta mẽ? Xà na mẽhõ kẽn o akuranh kêt nẽ? Anẽ.

¹¹Nhũm kãm: “Ma amrakati.” Anẽ nhũm kãm: —Tôe. Nà kot paj ijaxwỳja tanhmã ato hkêt nẽ. E mamrĩ ma akupỹm anhõrkwỹ hwỳr tẽ. No ãm kêr ka axte ã amnhĩ nhĩpêx anhỹr kêt nẽ. ãm kwarĩ ho kwarĩ. Anẽ.

Jejus kot hprĩ hã amnhĩ jarẽnh

Juãw 1.4; Rõmãn 13.12-14; Epes 5.8-14; Wam Tesarõn 5.5-8

¹²Tã nhũm arĩgro hõ hã nhũm Jejus axte Tĩrtũm nhõrkwỹ hwỳr tẽ nẽ kamã mẽ ahkre ho nhỹ nẽ mẽ kãm: —Nà te ixpê mẽ piitã mẽ õ kanê pyræk. Na hte kanêja mẽ kãm hirã mex nẽ nhũm mẽ kamã rĩt mex o pa. Jao kamàt kô kamã ri pa hkêt nẽ. Ja pyrà nẽ na pa hte Tĩrtũm kot amnhĩ nhĩpêx o amnhĩrĩt mex o ri ixpa. Kot ka mẽ atõ amnhĩ kaxyw inhmã ajamaxpẽr nẽ ixkõt amnhĩ xãm hãmri nẽ tanhmã amnhĩ tomnuj to ho apa hkêt nẽ. ãm Tĩrtũm kãm hprãm xà kõt pix mã tanhmã ri amnhĩ nhĩpêx to ho ri apa. Jao te ate kanê hpôk nhĩrã kamã arĩt mex pyrà nẽ apê wa ixri atĩr tũm nẽ apa ho apa mã xwỳnh. Anẽ.

¹³Hãmri nhũm Parijew nhõ xwỳnhjaja tee ri ã kapẽr anhỹr ã kuma nẽ kãm: —Tk. Kapxipix na ka ã amnhĩ jarẽnh anẽ. Mẽhõ kot ã ate amnhĩ jarẽnh

anhÿrja kôt kot mẽ inhmã ajarënhre hã. Jakamã kot paj mẽ ama nẽ ãm ama. Anẽ.

¹⁴Hãmri nhũm mẽ kãm: —Nà mẽhõ kot ã ijarënh anhÿr kêt tã no ãm hãmri na pa mẽ amã amnhĩ jarë. Ixêx kêt. Mẽ arom ixte nhÿhÿnh ixwrÿk xà hã amnhĩ pumunh mex. Nẽ mẽ arom ma akupÿm nhÿhÿm ixàpir xà hã amnhĩ pumunh mex. Jakamã ãm hãmri na pa ã mẽ amã amnhĩ jarënh anẽ.

¹⁵Na ka htem amnhĩ krã hkôt tanhmã ri ijarënh to. No pa na pa kormã amnhĩ xwar tanhmã mẽ ajarënh to hkêt nẽ.

¹⁶Ixte tanhmã mẽ ajarënh to ronhÿx pa ãm hãmri mẽ ajarë. Nhÿx pa ãm papxipix amnhĩ krã hkôt tanhmã mẽ ajarënh to hkêt nẽ. Nhÿx mãânën Inhĩpêêxà pẽ kot mẽ awÿr inhmënh xwÿnhta inhĩhkô hã pa wa ãm hãmri axpën kôt tanhmã mẽ ajarënh to. Mẽ ate amnhĩ to mex ã mẽ ajarë rÿ mẽ ate amnhĩ tomnuj ã mẽ ajarë.

¹⁷Tĩrtũm kapër ã kagà htũm kot ja jarënh kot: Kojã mẽhõ wa hamëxkrut nẽ tanhmã mẽmoj jarënh to nẽ ãm axpën kôt harënh o htipxi. Hã kot kaj mẽ wa ama nẽ ãm hãmri wa kot harënh kôt ajamaxpër kurê kumrëx.

¹⁸Anhÿr o kot harënh. Tã pa ã amnhĩ jarënh anẽ nhũm Inhĩpêêxà kot mẽ awÿr inhmënh xwÿnhta mãânën ã ijarënh anẽ. Wa ixpijakrut tã ã wa ixte axpën kôt amnhĩ jarënh anhÿr jakamã kwa mẽ ixte tanhmã amnhĩ jarënh toja ma nẽ ixkôt ajamaxpër kêt wehe. Anẽ.

¹⁹Nhũm pre ã Jejus mẽ kãm kapër anẽ. Hãmri nhũm mẽ kuma nẽ kãm: —No nhÿri na we anhĩpêêxà ja? Anẽ. Hãmri nhũm mẽ kãm: —Nà mẽ ate Inhĩpêêxà pumunhre hã. Mẽ ate aprĩ hã ixpumunh ronhÿx ka mẽ mãânën aprĩ hã Inhĩpêêxà pumunh mex kurê kumrëx. Nom mẽ ate ixpumunh mex kêt jakamã na ka mẽ mãânën omunh mex kêt nẽ. Anẽ.

²⁰Nhũm pre ã Jejus mẽ kãm kapër anẽ. Arĩ Tĩrtũm mã amnhĩ jarënh xà hã ixkreja kamã mẽ ahkre ho xa. Mẽ kot kàxpore gjênh xà kuri mẽ ahkre ho xa. Nhũm mẽ kãm hkurê xwÿnhjaja tee ri kot tanhmã mẽ ahkre htoja ma nẽ kãm unênh nẽ haxàr prãm nẽ. Nom kormã mẽ kot ã hipêx anhÿr ã arĩgro

kormã kator kêt jakamã nhũm Tĩrtũmja nê mẽ omunh mex nê nhũm mẽ ãm kãm unênh prãm kaprỳ.

²¹Hãmri nhũm Jejus arĩ mẽ kãm kapêr o xa nê mẽ kãm: —Nà kot paj nhỹrmã mẽ arũm ixkato nê ma akupỹm api. Ka mẽ tee ri ijapêr nom nhỹri ixpumunh kêt nê. Hãmri nê mẽ ate amnhĩ tomnuj o apa rãhã ty nê mẽ atõ ixwỳr axàpir kêt nê. Anê.

²²Hãmri nhũm Ijaew nhõ pahijaja tee ri ã kapêr anhỹrja ã kuma nê axpên mã hã hpêr o pikênh o kuhê nê axpên mã: —Kwa mãn ra kot amnhĩ pĩr kaxyw ã na ri hkôt mẽ paxàpir kêt ã mẽ pajarênh anê nà? Anê.

²³Hãmri nhũm amnhĩ tã mẽ kuma nê mẽ kãm: —Nà mẽ kajaja mẽ apê pyka nhõ xwỳnh na ka mẽ. No pa na mẽ arom ixpê kaxkwa nhõ xwỳnh jakamã mẽ pajamaxpêr kot axpên pyràk kêt.

²⁴Kot kaj mẽ ixpê kaxkwa rũm ixwryk xwỳnh ã ixpumu nê amnhĩ kaxyw inhmã ajamaxpêr nê ixkôt amnhĩ xunhwỳr kêt hã kot kaj mẽ ate amnhĩ tomnuj o apa rãhã nhỹrmã atyk o mẽ kamjaja Tĩrtũm mã amnhĩ pãnhã amnhĩre. Anê.

²⁵Nhũm Jejus ã mẽ inhõ pahijê hkukamã mẽ kot amnhĩ nhĩpêx jarênh anê nhũm mẽ tee ri amnhĩ tã kuma nê kãm: —Kwa mẽ atõ na ka we ri ã mẽ inhmã akapêr anê? Anê. Hãmri nhũm mẽ kãm: —Nà ra ixte mẽ amã amnhĩ jarênh kênã. Xàn ka mẽ kormã aprĩ hã inhmar kêt nê?

²⁶Kot paj nhỹrmã mẽ amã mẽ ate amnhĩ tomnuj piitã ho amnhĩrĩt pa. Na pa kot mẽ awỳr inhmênh xwỳnhhta pix xô ri tanhmã mẽ amã ixkapêr to ho ri ixpa. ãm hãmri na hte tanhmã mẽmoj jarênh to. Na hte hêx kêt nê. Anê.

²⁷Nhũm pre ã Jejus mẽ kãm Hipêêxà kot mẽ hwỳr mênh ã harênh anhỹr tã no nhũm mẽ Hipêêxà kêp Tĩrtũm ã hkôt hamaxpêr kêt nê.

²⁸Jakamã nhũm mẽ kãm: —Nà koja mẽ nhỹrmã pĩ kahpa hã inhô ka mẽ rĩ kormã aprĩ hã ixpê Tĩrtũm rũm mẽ awỳr ixwryk xwỳnh ã ixpumu. Nê ixte amnhĩ krã hkôt ixkapêr o ri ixpa hkêt ã ixpumu. Nê ãm Inhĩpêêxà xô ri ixprĩ hã ixkapêr o ri ixpa hã ixpumu.

²⁹Ixte kām hprām xà hkôt pix mǎ tanhmǎ ri amnhĩ nhĩpêx to ho ri ixpa jakamǎ na hte ixtānopxar mex o ixkôt pa ho pa. Kojā aa ixkaga hkêt nē. Anē.

³⁰Hāmri nhũm mē hkwỳja kuma nē hkwỳjê rom kapêr kôt hamaxpêr

³¹nhũm amnhĩ tǎ mē omu nē mē kām: —Nà ãm hāmri na ka mē tǎ ixkôt ajamaxpêr. Tǎ kêr ka mē ixkôt amnhĩ xunhwỳ nē ixkapêr kôt pix mǎ ri amnhĩ nhĩpêx mex o ri apa. Hāmri pa ja hǎ mē apumu nē mē apê ixkwỳ kumrêx ã mē ajarē.

³²Ãm hāmri na pa hte ã ixkapêr anhỹr o ri ixpa. Tǎ kot kaj mē ixkôt ri amnhĩ nhĩpêx o ri apa hāmri nē aprĩ hǎ inhmar tỳx nē. Nom na hte kormǎ mēmoj kot amnhĩ tǎ mē ato htỳx pyràk o mē anhĩpêx ka mē tee ri amnhĩ krǎ hkôt kām anhũrer prām kaprỳ. Tǎ kot kaj mē ixkôt amnhĩ xunhwỳ nē ixkôt ri amnhĩ nhĩpêx hāmri nē Tĩrtũm nhỹ hǎ tǎm amnhĩ nhĩpêx. Jao ỹ hǎ ate amnhĩ tomnuj mǎ anhũre. Anē.

³³Nhũm pre ã Jejus mē kām kapêr anē hāmri nhũm mē tee ri kuma nē kām: —Kwa mē ixpê mē pahpàr krax finat Apraãw kanrêhǎ htàmnhwỳ kênǎ. Na pre mēmoj te kot amnhĩ tǎ ho htỳx pyràk o hipêx kêt nē. Jakamǎ mēmo kot we mē ixpê hkanrêhǎ htàmnhwỳjê ho htỳx ka we ri ã mē ijarênh anē? Nà amrakati kênǎ. Tǎ kwa mon ka ã mē ijarênh anē? Anē.

³⁴Hāmri nhũm Jejus hprĩ hǎ mē kām awjarē nē mē kām: —Kwa mē ixkapêr ma nē amnhĩ krām haxàr tỳx nē. Nà mē kot amnhĩ tomnuj o mē pa xwỳnhjaja te mē kot amnhĩ tomnuj tǎm ri kot amnhĩ tǎ mē ho htỳx pyràk o mē hipêx. Jakamǎ nhũm mē urer kêt rǎhǎ nē pa ho pa. Nē ã amnhĩ nhĩpêx anhỹr rǎhǎ ho pa.

³⁵Jakamǎ ixkĩnhǎ mē kêp Tĩrtũm kwỳ hkêt. No pa na ixpê Tĩrtũm Kra jakamǎ mããnēn ixpê hkwỳ na pa.

³⁶Tǎ mē kajaja. Kot kaj mē ixpê Tĩrtũm Kra hǎ ixkôt amnhĩ xunhwỳ hǎ kot pa tanhmǎ mē ato ka mē ixpyrà nē apê wa ixkwỳy. Hāmri nhũm mē ate

amnhĩ tomnuj te kot mẽ amã urer pyræk o mẽ anhĩpêx ka mẽ ra wa ixkôt amnhĩ nhĩpêx o ri apa. Anẽ.

Mẽ kêp Tĩrtũm kra hkêt xwỳnhjê jarênh

³⁷Nhũm Jejus arĩ mẽ kãm kapêr nẽ mẽ kãm: —Nà ãm hãmri na ka mẽ apê finat Apraãw kanrêhã htàmnhwỳ hã amnhĩ jarê. Nom mẽ apê hkanrêhã htàmnhwỳ htã uræk nẽ amnhĩ kaxyw Tĩrtũm kôt ajamaxpêr kêt nẽ. Jakamã na ka htem ixkapêr ma nẽ ãm ama nẽ ixkaga. Nẽ axtem nẽ ixpĩr mã. Kop apu Apraãw arĩ mẽ akamã pa ronhỹx ã inhĩpêx anhỹr kêt nẽ.

³⁸Na pa hte Inhĩpêxà hkôt pix mã ri amnhĩ nhĩpêx o ri ixpa. No mẽ kajaja axtem nẽ mẽ ate nhãm mẽ kapêr kôt amnhĩ nhĩpêx jakamã na ka htem ixkĩnhã Inhĩpêxà hkôt amnhĩ nhĩpêx kêt nẽ. Anẽ.

³⁹Hãmri nhũm mẽ tee ri amnhĩ tã kuma nẽ kãm: —Tk. Kwa mon ka ã mẽ ijarênh anẽ? Mẽ ixte Apraãw kôt amnhĩ nhĩpêx o ri ixpa kênã. Anẽ. Hãmri nhũm mẽ kãm: —Nà. Mẽ ate hkôt ri amnhĩ nhĩpêx o apa ronhỹx ka mẽ uræk nẽ Inhĩpêxà kapêr kôt amnhĩ nhĩpêx.

⁴⁰No na ka mẽ ra axtem nẽ ixpĩr mã. ãm hãmri na pre Tĩrtũm inhmã awjarê pa ô ri tanhmã mẽ amã mẽmoj jarênh to ho ri ixpa htã ka mẽ ra axtem nẽ ixpĩr mã. Kwa xà na pre Apraãwja ã mẽ hipêx anhỹr o pa? Nà na pre ã mẽ hipêx anhỹr kêt nẽ.

⁴¹Mẽ ate hkôt amnhĩ nhĩpêx xwỳnhta axtem na. Kêp Apraãw kêt. Nẽ mãñnên kêp Tĩrtũm kêt. Anẽ. Hãmri nhũm mẽ tee ri kuma nẽ kãm: —Tk. Kwa nà ã mẽ ijarênh anhỹr kêt nẽ. Mẽ ixte Apraãw kôt amnhĩ nhĩpêx xwỳnh kênã. Tã ka ri axtem nẽ ã mẽ ijarênh anẽ. Mẽhõ hkôt kot pa kêt wem ri axtem amnhĩ nhĩpêx o ri ixpa? Anẽ.

⁴²Hãmri nhũm mẽ kãm: —Nà mẽ ate Apraãw kôt amnhĩ nhĩpêx ronhỹx ka mẽ ixpumu nẽ uræk nẽ amã ixprãm nẽ. Apraãw kot hkôt amnhĩ nhĩpêx o pa xwỳnhta tãm kot mẽ awỳr inhmênh nhũm mẽ awỳr ixwrỳk kênã. Na pa pre amnhĩ krã hkôt man mẽ awỳr ixwrỳk kêt nẽ. Tãm na pre mẽ awỳr inhmẽ pa wrỳ.

⁴³Kwa mon ka mẽ aprĩ hã ixkapěr mar mex kêt nẽ? Nà mẽ amã ixkôt amnhĩ nhĩpêx prãm kêt jakamã na ka mẽ tee ri ixkapěr ma nẽ aprĩ hã mar mex kêt nẽ.

⁴⁴Mẽ ate hkôt amnhĩ nhĩpêx xwỳnh̄ta Satanasti na. Aa tãm kot amnhĩ nhĩpêx kêt kumrêx. Kêp mẽ hpar o pa xwỳnh̄jê hpãm maati na. Nẽ kêp mẽ kãm hêx o pa xwỳnh̄jê pãm maati na. Ǻ kot amnhĩ nhĩpêx kot anhỹr. Nẽ kãm mẽ kapěr mex mar prãm kêt o pa. Nẽ ãm hêx pix o pa jakamã kêp mẽ hêx xwỳnh̄jê pãm. Ǻ kot amnhĩ nhĩpêx anhỹr xwỳnh̄ tã ka htem hkôt amnhĩ nhĩpêx o ri apa.

⁴⁵—Na pa hte kurom ãm hãmri ixkapěr o ri ixpa. No mẽ kajaja mẽ apê hêx nhi xwỳnh̄ maati ja hkra jakamã mẽ amã ixkapěr mar prãm kêt.

⁴⁶Xà na ka pre mẽ atõ ixte tanhmã amnhĩ tomnuj to hã ixpumu? Nà amrakati. Ixte amnhĩ to mex o ri ixpa xwỳnh̄ na pa. Nẽ tãm ixkapěr o ri ixpa xwỳnh̄ tã ka mẽ inhma nẽ ãm inhma nẽ ixkôt ajamaxpěr kêt nẽ. Kwa mon ka mẽ ja hã ixpumunh nẽ ixkôt ajamaxpěr nẽ ixkôt amnhĩ xunhwỳr kêt nẽ?

⁴⁷Tĩrtũm krajaja na htem kapěr mar tỳx nẽ hkôt amnhĩ nhĩpêx o pa. No mẽ apê hkra hkêt jakamã mẽ amã kapěr mar prãm kêt. Anẽ.

Mẽ kot Jejus kêp Satanasti hkwỳ hã harênh

⁴⁸Hãmri nhũm mẽ ã Jejus kot mẽ harênh anhỹrja ma nẽ kamã gryk tỳx kumrêx. Hãmri nẽ kãm: —Tk. Kwa ate amnhĩ tomnuj o apa xwỳnh̄ti kênã. Ra Satanasti hkwỳ pê mẽkarõmnuti tanhmã kot akrã hto jakamã na ka ã mẽ inhmã akapěr anẽ. Anẽ.

⁴⁹Hãmri nhũm mẽ kãm: —Nà mẽkarõmnuti kot tanhmã ixto hkêt. Na pa hte Inhĩpêxà hã ixpijaàm pix o ri ixpa. Tã mẽ ate ixkĩnhã hã apijaàm kêt jakamã mããnên pa ixtã apijaàm kêt nẽ.

⁵⁰Na pa hte amnhĩ krã hkôt mẽ piitã mẽ kot ixtã hpijaàm prãm xàj tanhmã mẽ kãm ixkapěr to hkêt nẽ. No mẽ piitã mẽ kot ixtã hpijaàm o paja na Inhĩpêxà kãm hprãm. Tã koja nhỹrmã amnhĩ nê ixtã mẽ hpijaàm kêt xwỳnh̄jaja mẽ kot amnhĩ xà htỳx kamã hamak tũm xàta wỳr mẽ rênh pa.

51—Ně kot ka mẽ atõ wa ixkapěr ma ně ixkõt amnhĩ nhĩpêx. Hã kot kaj wa ixri atĩr tũm ně apa ho apa. Kwa mẽ ixkapěr ma ně amnhĩ krãm haxàr tỳx ně. Aně. Nhũm pre ã Jejus Ijaew nhõ pahijê mã kapěr aně.

52Nhũm mẽ kuma ně kãm: —Kwa pěr ãm hãmri na ka hte Satanasti nhỹ hã ã mẽ htĩr tũm ně mẽ pa ho pa hã mẽ harěnh anhỹr o ri axêx o ri apa. Finat Apraãw na pre ri paa ně ty. Tã mẽ kot Tĩrtũm nhỹ hã kapěr jarěnh o mẽ pa xwỳnhjaja na prem uràk ně ri paa ně mãăněn htyk pa. Tã ka axtem ně mẽ kot akapěr kõt amnhĩ nhĩpêx o mẽ pa xwỳnhjaja ari htĩr tũm ně pa ho pa hã mẽ harě. Nà na ka ãm mẽ inhmã mẽ ho axêx o xa.

53Na pre mẽ pahpãm Apraãwja kot amnhĩ to rax tã ty ně hapêx. Nhũm mẽ kot Tĩrtũm nhỹ hã kapěr jarěnh xwỳnhjaja mãăněn mẽ kot amnhĩ to rũnh tã htyk pa ně hapêx. Mẽ kot amnhĩ to rũnh tã htyk pa ně hapêx kẽnã kot kêt mẽ tanhmã amnhĩ to ně ari htĩr tũm ně pa. ãm mẽ ixte akapěr mar ně atã xpijaàm pix prãm xàj na ka ã mẽ inhmã mẽ htĩr tũm ně pa hã mẽ harěnh aně. Nom na ka ã mẽ harěnh anhỹr kaprỳ. Kot paj mẽ ri akapěr mar kêt ně. Aně.

54Hãmri nhũm mẽ kuma ně mẽ kãm: —Nà na pa hte amnhĩ krã hkõt mẽ ate ixtã apijaàm hprãm xàj tanhmã mẽ amã ixkapěr to hkêt ně. Kot paj aně ně ãm ixtỳx ã amnhĩ nhĩpêx anhỹr kaprỳ. No Inhĩpêxà tãm kãm mẽ apiitã mẽ ate ixtã apijaàm o apaja nhũm kãm hprãm. Mẽ ate Tĩrtũm kõt amnhĩ nhĩpêx o apa hã amnhĩ to axêx xwỳnhhta tãm na kãm mẽ ate ixtã apijaàmja nhũm kãm hprãm. Tã ka htem ã amnhĩ nhĩpêx anhỹr kêt ně. Na ka htem ixkuk pumu ně axtem ně ixte Satanasti nhỹ hã mẽ amã ixêx o ri ixpa hã ijarě.

55Mẽ ate Inhĩpêxà hkõt amnhĩ nhĩpêx ã amnhĩ jarěnh tã ãm amnhĩ to axêx o ri apa. No pa na pa hte mẽ arom ãm hãmri hkõt amnhĩ nhĩpêx mex o ri ixpa.

56Amnepêm mẽ pahpàr krax Apraãwja na pre mẽ awỳr ixwỳk kukamã ijarěnh ma ně mẽ arom inhỹ hã hkĩnh tỳx ně pa. Aně. Nhũm pre ã Jejus mẽ kãm amnhĩ jarěnh aně.

⁵⁷Hāmri nhũm mẽ kuma nẽ tee ri kot mẽ kãm tanhmã Apraãw jarẽnh toja ma nẽ kãm: —Tk. Xà na ka pre finat Apraãwja ano ho omu? Nà kormã anyw kênã. Apraãw amnepêm htyk nẽ hapêx kênã kot ka kêt kot akukamã ajarẽnh mar nẽ hkĩnh tỳx ã harẽ. Xàn ka pre ano ho omu? Kormã akator kêt ri na pre amnepêm htyk nhũm mẽ haxàr kênã. Nà na ka ãm mẽ inhmã amnhĩ to axêx. Te amnepêm mẽ hkukamã apa nẽ ate mẽ omunh nẽ mẽ harẽnh pyræk. Kwa akatàt kôt mẽ inhmã awjarẽ. Anẽ.

Jejus kệp rãhã ho rãhã xwỳnh ã harẽnh

⁵⁸Hāmri nhũm Jejus mẽ kãm: —Nà ixêx kêt. ãm hāmri na pa ã mẽ amã amnhĩ jarẽnh anẽ. Amnepêm kormã Apraãw kator kêt ri na pa pre ixrãhã ho ixrãhã ixpa na pa. Ixrãhã ho ixrãhã ixpa xwỳnh jakamã na pa pre hte inhno ho Apraãw pumunh mex o ri ixpa. Kwa mẽ ixkapêr ma nẽ amnhĩ krã him haxàr tỳx nẽ. Anẽ.

⁵⁹Hāmri nhũm mẽ tee ri kot ã amnhĩ jarẽnh anhỹrja ã kuma nẽ kamã gryk tỳx nẽ. Nẽ axpẽn mã: —Kwa tanhmã kot we amnhĩ to nẽ amnepêm rãhã nẽ pa ho pa xwỳnh ã amnhĩ jarẽ? Tĩrtũm pix na rãhã ho rãhã pa xwỳnh. Anẽ. Hāmri nẽ kamã gryk xàj kên rũnh kwỳ kawrà ho ri hprôt nẽ kot ho htak o hpĩr kaxyw. Nom nhũm ra amnhĩ tã mẽ omu nẽ mẽ kệp akunok nẽ Tĩrtũm mã amnhĩ jarẽnh xà hã ixkreja rũm kato nẽ ma tẽ.

Juãw 9

Jejus kot no hkre xwỳnh o mex ã harẽnh

Makre 8.22-26

¹Hāmri nhũm Jejus ma tẽ pa mẽ hkôt ri mẽ ixpa ho mẽ ixpa xwỳnhjaja ma hkôt mra. Hāmri nẽ nhỹri no hkre xwỳnh pumu. Katorxà nhõxà hkre rũm na pre no hkre nẽ kato. Hāmri nẽ ra hprêk nẽ hpriy kamã àhwỳr o hkrĩ.

²Tã hāmri pa mẽ mra nẽ omu nẽ hã Jejus kukja nẽ kãm: —Kwa mẽmoj mỳrapê na pre we myti nẽj no hkre nẽ kato? Xà tãm kot tanhmã amnhĩ tomnuj to mỳrapê nà? Xà katorxà rỳ hipêêxà kot amnhĩ tomnuj mỳrapê na pre ã no hkre nẽ kator anẽ? Anẽ.

³Hāmri nhūm mẽ inhmã: —Nà mēhō kot tanhmã amnhĩ tomnuj to mýrapê no hkre nê kator kêt. Ām Tĩrtũm kot ho mex nhūm mẽ kot ja hã omunh kaxyw na pre ã no hkren kator anê. Tã kot paj Tĩrtũm nhỹ hã no ho mex ka mẽ ja hã ixpumu. Na pa hte kormã jar pikap ri ixpa ri Tĩrtũm mã tanhmã amnhĩ nhĩpêx mex to ho ri ixpa.

⁴Na htem arĩgro hã mẽmoj tã apê nhūm kamàt nhūm mẽ kãm ure nê àpênh kêt nê. Ja pyrà nê na pu htem kormã pahtĩr ri jar pikap ri papa ri Tĩrtũm mã tanhmã amnhĩ nhĩpêx to ho ri papa. Tã kot puj mẽ nhỹrmã ty hāmri nê axte jar ã amnhĩ nhĩpêx anhỹr kêt nê. Jakamã kwa kêr pu mẽ ri jar pikap ri papa ri kãm tanhmã amnhĩ nhĩpêx mex to ho ri papa.

⁵Na pa hte ã kãm amnhĩ nhĩpêx anhỹr jao te kanê hirã mex pyrà nê ixprĩ hã mẽ kãm Tĩrtũm kot amnhĩ nhĩpêx o amnhĩrĩt mex o ri ixpa. Anê.

⁶Nhūm pre ã Jejus mẽ inhmã amnhĩ jarênh anê. Hāmri nê kot nohkre xwỳnhhta no o mex kaxyw hikôt nê argôx mẽ nê ho gyw kwỳ nhĩpêx nê kànhmã xa nê ho no kukõ.

⁷Hāmri nê kãm: —E ma gô gjênh xà pê Siroe hwỳr tẽ nê kamã amnhĩ no kuhõ. Anê. Mẽ pakapêr kãm Siroeja mẽ kot kãm: “Nhỹhỹm mēnh xwỳnh” anhỹr jarênh pyræk. Tã nhūm Jejus hwỳr kumẽ nhūm ma hwỳr tẽ. Hāmri nê kamã amnhĩ no hã gyw kuhõnh pa jao rĩt mex kurê kumrêx. Hāmri nê rĩt mex ã amnhĩ pumu nê hkĩnh tỳx nê ma akupỹm òrkwỹ hwỳr tẽ.

⁸Hāmri nhūm òrkwỹ kuri mẽ òrkwỹ xwỳnhjaja nê mẽ kot pry kamã ahwỳr o hkrĩ hã omunh xwỳnhjaja amnhĩ jaêr pê ra rĩt mex ã omu nê tee ri hã axpẽn kukja nê axpẽn mã: —Kwa pêr pry kamã àhwỳr o hkrĩ xwỳnhhta na nà? Anê.

⁹Hāmri nhūm kamã mẽ hkwỳjaja mẽ kãm: —Tỳ. Tãm na. Anê. Nhūm kamã mẽ hkwỳjaja mẽ kãm: —Nà tãm kêt. Axtem mēhō na. Te kot uræk nom tãm kêt. Anê. Anhỹr o ri axpẽn mã harê. Tã nhūm tãm mẽ kãm amnhĩ jarê nê mẽ kãm: —Tỳ pa kênã. Pa na pa pre hte inhno hkre nê ri ixpa htã ra ixrĩt mex. Anê.

10Hāmri nhūm mẽ tee ri kuma nẽ kām: —Kwa no tanhmã na ka we amnhĩ to nẽ ra arĩt mex?

11Anẽ nhūm mẽ kām: —Nà mẽ kot kām “Jejus” anhỹr xwỳnhhta na ixwỳr tẽ nẽ ixkaxyw gyw kwỳ kagõ nẽ ho inhno kukõ. Hāmri nẽ mẽ kot gõ mã: “Siroe” anhỹr xwỳnhhta kamã ixte amnhĩ no kuhõnh kaxyw hwỳr inhmã anẽ pa ma hwỳr tẽ nẽ kamã amnhĩ no kuhõ nẽ ixrĩt mex kurê kumrẽx. Anẽ.

12Hāmri nhūm mẽ kuma nẽ kām: —No nhỹhỹm na ato mex xwỳnhja ma tẽ? Anẽ. Hāmri nhūm mẽ kām: —Konẽn. Ixte nhỹhỹm htẽm xà hkõt omunhre hã. Anẽ.

13Hāmri nhūm mẽ kuma nẽ ma Parijew nhõ xwỳnhjê hwỳr o mõi nẽ mẽ kām harẽ.

14Nẽ mẽ kām: —E ot pa mẽ awỳr jahti ho tẽ. Na xep Jejusja jarãhã akupỹm kām no ho mex. Mẽ panhõ arĩgromnu htã nhūm hã no ho mex. Anẽ.

15Hāmri nhūm mẽ tee ri mẽ kuma nẽ myta pumu nẽ kām: —E mẽ inhmã amnhĩ jarẽ. Tanhmã na ka pre we amnhĩ to nẽ anohkre nẽ akrĩ htã ra ano mex nẽ? Anẽ. Hāmri nhūm mẽ kām: —Nà na pre Jejus gyw o inhno kukõ nẽ inhmã anẽ pa gõ ho amnhĩ no kuhõ nẽ ixrĩt kurê kumrẽx. Anẽ.

16Hāmri nhūm mẽ kuma nẽ tee ri Jejus ã axpẽn kukjêr o kuhê nẽ axpẽn mã harẽnh o: —Kwa mẽ panhõ arĩgromnu hã kot ho mex jakamã kệp Tĩrtũm rũm mẽ pahwỳr wrỳk xwỳnh kêt. ãm kot amnhĩ tomnuj xwỳnh kênã. Anẽ. Nhūm mẽ hkwỳjaja harẽnh o: —Kwa nà. Kot amnhĩ tomnuj xwỳnh ronhỹx àhpumunh tỳx kõt no ho mex kêt nẽ. Anẽ.

17Hāmri nẽ hpãnhã no mex xwỳnhhta mã kām: —No ka? Ate kot ano ho mex xwỳnh ã amnhĩ tã harẽnh jakamã mẽhõ hã na ka hkamnhĩx? Mẽhõ na wehe? Anẽ. Hāmri nhūm mẽ kām: —Konẽn. Mãn kệp Tĩrtũm kapêr jarẽnh o ri mẽ pa xwỳnh mãn. Hã na ã inhno ho mex anẽ. Anẽ.

18Hāmri nhūm mẽ tee ri kuma nẽ axpẽn mã: —Kwa pẽr aa nohkre hkêt kênã. Na pre ãm amnhĩ to hẽx o pa. E kwa pu mẽ amnhĩ wỳr katorxà nẽ hipêxà

wa hã karõ kê wa man tẽ nẽ tanhmã mẽ pamã harẽnh to. Anẽ. Hãmri nẽ wa hã karõ

¹⁹nhũm wa mẽ hwỳr tẽn axà nhũm mẽ wa kãm: —Pa. E mẽ inhmã mẽmoj jarẽ. Xà we wa akrata na ãm ja nà? Xà tãm na ka hte wa nohkre nẽ kator ã harẽ? Kwa tanhmã na we amnhĩ to nẽ ra rĩt mex? Anẽ.

²⁰Hãmri nhũm wa mẽ kãm: —ỠỠ wa ixkra kênã. Na pre wa ixpê nohkre nẽ kato.

²¹Tã ra tanhmã amnhĩ to nẽ ra rĩt mex. No wa ixte kot ho mex xwỳnhhta pumunh kêt. Kwa mẽ tãm mãn hkukja nẽ ama. Ra àptàr kênã. Kê tãm mãn mẽ amã tanhmã amnhĩ jarẽnh to ka mẽ ama.

²²Anhỳr o mẽ kãm wa hkrata jarẽ. No ãm wa kãm mẽ uma nẽ ã mẽ kãm kapêr anẽ nẽ mẽ kãm Jejus nhĩxi jarẽnh kêt nẽ. Na pre Parijew nhõ xwỳnhhaja ra Jejus nê mẽ kãm kapêr nẽ mẽ kãm: —Ka mẽ atõ Tĩrtũm kot mẽ pakaxyw Jejus xãm ã harẽ hãmri nẽ axte Tĩrtũm kapêr o mẽ ahkre xà hã ixkreja wỳr agjêx kêt kumrêx nẽ rĩ amnhĩ pumu.

²³Anhỳr o nê mẽ hkurê jakamã nhũm wa mẽ umaj ã mẽ kãm hkra jarẽnh anẽ nẽ kot ho mex xwỳnh nhĩxi jarẽnh kêt nẽ.

²⁴Hãmri nhũm mẽ axte amnhĩ wỳr no mex xwỳnhhta ã karõ nẽ kãm: —Kwa akatàt kôt mẽ inhmã amnhĩ jarẽ. Ate kot ano ho mex ã harẽnh xwỳnhhta na kot amnhĩ tomnuj pix o pa xwỳnh kênã kot kêt ano ho mex. Jakamã kwa Tĩrtũm noo mã akatàt kôt mẽ inhmã amnhĩ jarẽ nẽ axêx kêt nẽ. Anẽ.

²⁵Hãmri nhũm mẽ kãm: —Ko ixte ja hã omunh kêt. ãm ja pix na ixte omunh. Na pa pre inhno hkre nẽ ri ixpa htã ra ixrĩt mex nẽ. Anẽ.

²⁶Hãmri nhũm mẽ tee ri kot amnhĩ jarẽnhja ã kuma nẽ kãm: —No tanhmã na we mytita amnhĩ to nẽ amã ano ho mex? Anẽ.

²⁷Hãmri nhũm tee ri axte mẽ kot hã hkukjêr ã mẽ kuma nẽ mẽ kãm: —Kwa ra ixte mẽ amã ãm hãmri amnhĩ jarẽnh griã. Tã ka mẽ inhma nẽ ãm inhma nẽ arĩ hã ixkukja. Mãn ka mẽ amã hkôt amnhĩ xunhwỳr prãm hã na ka mẽ

apří hã ixkukja nà? Mě ate kot amnhĩ nhĩpêx ã aprĩ hã harēnh mar nē hkôt amnhĩ xunhwỳr prãm xàj na ka mẽ aprĩ hã amã harēnh prãm nē. Anē.

28Hãmri nhũm mẽ tee ri kuma nē kamã gryk nē. Nē hã kãm akir nē kãm: — Tk. Ka na ka hte kapēr kôt amnhĩ nhĩpêx. No kêt mẽ pajaja na pa htem finat Mojes kapēr kôt pix mã amnhĩ nhĩpêx.

29Mojes mã na pre hte Tĩrtũm kapēr o pa. Jakamã pa htem ãm hkôt pix mã amnhĩ nhĩpêx o ri ixpa. No ate kot ano ho mex ã harēnh xwỳnhhta mẽ ixte omunh kêt. Nē mēhõ nhỹ hã kot tanhmã amnhĩ nhĩpêx to ho pa xwỳnhja mẽ ixte omunh kêt. Anē.

30Hãmri nhũm tee ri mẽ kuma nē mẽ kãm: —Kwa kot inhmã inhno ho mex nhũm ra ixrĩt mex tã ka mẽ tee ri hkukamã ajamaxpēr nē mēhõ nhỹ hã kot ã amnhĩ nhĩpêx anhỹr o pa hã omunh kêt ã amnhĩ jarē.

31Mě pahte Tĩrtũm kot amnhĩ nhĩpêx ã omunh mex. Kojã mēhõ kot amnhĩ tomnuj xwỳnh mẽmoj tã kuwỳ nhũm kuma nē ãm kuma. No kêt mẽ kot hkôt ri amnhĩ nhĩpêx xwỳnhjaja. Nē mẽ kot kãm mex o mex ã harēnh xwỳnhjaja na htem mẽmoj tã kuwỳ nhũm mẽ kuma nē mẽ kãm tanhmã mẽmoj nhĩpêx to rỳ mẽ kãm mẽmoj gõ.

32Tã aa mẽ pahte mēhõ kot mẽ no ho mex ã harēnh mar kêt tã nhũm ã Jejus inhmã inhno ho mex anē.

33Kêp Tĩrtũm kwỳ hkêt ronhỹx pre inhno ho mex kêt nē. Anē.

34Hãmri nhũm mẽ kuma hãmri nē kãm: —Tk. Kwa pēr ãm akator kôt ate amnhĩ tomnuj o ri apa htã na ka ã mẽ inhmã akapēr anē. Kwa ixkreja rũm akato nē ma atēm kurê kumrêx. Anhỹr o kãm kapēr hãmri nē mẽ amnhĩ nê hano nhũm kato nē ma tẽ.

35Tã nhũm Jejus ra mẽ kot amnhĩ nê hanor ã harēnh ma nē ma hapêr o tẽ nē nhỹri omu. Hãmri nē amnhĩ tã hkukja nom te nhãm mēhõ hã hkukjêr pyrã nē kãm: —Pa? Xàn ka ra Tĩrtũm kot mẽ awỳr mēnh xwỳnhhta amnhĩ kaxyw hkôt ajamaxpēr nà? Anē.

³⁶Hāmri nhūm kormã kot no ho omunh kêt jakamã kêp Jejus ã omunh kêt nê. Na pre kormã no hkre nê ãm kapêr pix ma. Tã ra akupÿm rît mex nom kormã no ho omunh kêt nê. Jakamã nhūm Jejus hwÿr tẽ nê ã kãm kapêr anê nhūm omu nê kormã kêp Jejus ã omunh kêt nê kãm: —Tÿ kot kaj inhmã ahkre pa omu nê hkôt amnhĩ xãm kurê kumrêx. Anê.

³⁷Hāmri nhūm kãm: —Kwa paa. Ixte amã ixkapêr xwÿnhhta pa na pa. Anê.

³⁸Hāmri nhūm kãm: —Kwa xôwehe Pahihti? Nà kot paj amnhĩ kaxyw akôt pix mã ijamaxpêr nê akôt pix mã amnhĩ nhĩpêx o ri ixpa. Anê. Hāmri nê kutã hkôn krã ho tẽm nê nhÿ nê kãm mex o mex ã harênh o nhÿ.

³⁹Hāmri nhūm Jejus kãm: —Nà ixte mẽ apiitã tanhmã mẽ ajarênh to kaxyw na pa pre kaxkwa rûm man mẽ awÿr wrÿ. Ahpÿnhã mẽ amã ixprãm xwÿnhjê jarênh nê ahpÿnhã mẽ kãm ixprãm kêt xwÿnhjê jarênh kaxyw. Mẽ kãm ixprãm kêt xwÿnhjaja kot hprĩ hã Tĩrtũm kapêr mar mex kêt tã na htem htÿx ri kot mar mex ã amnhĩ jarênh o pa. Jakamã te mẽ nohkre xwÿnhjaja kot amnhĩ nhĩpêx pyræk. Nom koja mẽ Tĩrtũm kapêr ma nê ixkôt amnhĩ xunhwÿr japêr. Hāmri nê te ra rît mex pyræk o amnhĩ nhĩpêx. Jao ra hprĩ hã Tĩrtũm kapêr mar mex o pa. Anê.

⁴⁰Nhūm pre ã Jejus kãm kapêr anê. Nhūm Parijew nhõ xwÿnh kwÿjaja kot kuri mar o kuhê xwÿnhjaja ã kapêr anhÿr ã kuma nê amnhĩ tã kãm: —Kwa nà. Xà we mẽ pajaja na ka ã mẽ inhnokre hã mẽ ijarênh anê? Xà mẽ ixte ixprĩ hã Tĩrtũm kapêr mar mex kêt ã na ka mẽ ijarê nà? Anê.

⁴¹Hāmri nhūm mẽ kãm: —ÿÿ kop apu mẽ ate aprĩ hã kapêr mar mex kêt ã amnhĩ jarênh ronhÿx ja mẽ amã mex nê. Tã mẽ ate aprĩ hã mar mex ã amnhĩ to axêx o apa jakamã na ka mẽ ra amnhĩ tomnuj tÿx nê. Na hte Tĩrtũm ja hã mẽ apumu nê amnhĩm mẽ ate amnhĩ tomnuj xwÿnh ã mẽ ajarê. Anê.

Juãw 10

ôwêhti jarênh

Matêwre 9.36; 12.11-12; Rukre 15.3-7

¹Nhūm Jejus arĩ Ijaew mã kapêr nê mẽ kãm: —E pa mẽ amã awjarê ka mẽ inhma nê amnhĩ krã him haxàr tÿx nê ho apa. Mẽ hkrit ôwêhti kot paj mẽ

amã harẽ ka mẽ inhma. Na hte ôwêhti jamãr o pa xwýnhjaja ôwêhti apkur kaxyw mẽ o pa hãmri nhũm kamàt nhũm akupỹm kahê hwỳr mẽ o pa. Kahê jakwakreja ãm pixii. Tã koja mẽhõ kahê xà hkôt hwỳr àr kêt nẽ axtem nẽ tẽ nẽ nhỹhỹnh kahê hã api nẽ ôwêhti hwỳr àr japêr nhũm mẽ omu nẽ kot hkwyè ho àhkĩnh ã omunh kurê kumrẽx.

²—No ôwêhti jamãr o pa xwýnhja na hte mẽ kurom katàt kôt kahê jakwakre rũm ôwêhti hwỳr agjê.

³Nhũm kahê xà jamãr xwýnhja amnhĩ wỳr omu nẽ kãm kahê xà rẽnh kurê kumrẽx nhũm axà. Na hte apkati mẽ ma nhỹhỹm apkur kaxyw mẽ o pa. Nẽ nojarêt nẽ mẽ kãm akir. Ahpỹnhã tanhmã mẽ hixi kute hã mẽ omunh xà hkôt mẽ kãm àkjêr o pa. Hãmri nhũm mẽ kuma nẽ hwỳr mra nẽ hã pikuprõnh pa nhũm mẽ ho hapôj nẽ ma nhỹhỹm ri mẽ apkur kaxyw mẽ o pa.

⁴Ma mẽ apkur kaxyw nhỹhỹm mẽ o pa. Nhũm ôwêhti ra kot kapêr mar mex jakamã ma àmnhĩx ri hkôt apkur o pa.

⁵—Na hte hamãr o pa xwýnh pix kapêr ma nẽ hkôt pa nẽ nhãm mẽhõ hkôt ri pa hkêt nẽ. Kot kapêr mar kêt jakamã tee ri kuma nẽ umaj axkahkũm nẽ hprõt nẽ ma mra. Na hte ôwêhti ã amnhĩ nhĩpêx anẽ. Anẽ.

Jejus te kêp ôwêhti gjênh xà hã hakwakre pyræk

⁶Nhũm pre ã Jejus mẽ kãm ujarẽnh anẽ. Nẽ ujarẽnhja kamã amnhĩ kwỳjê jarẽ nẽ mããnẽn tãm amnhĩ jarẽ. Nom mẽ amnhĩ tã kuxi nẽ mẽ kãm amnhĩ jarẽnh o te ho ôwêhti jarẽnh pyræk nhũm mẽ tee ri kuma nẽ mar mex kêt nẽ.

⁷Jakamã nhũm axte mẽ kãm awjarẽ nẽ mẽ kãm: —E pa ixprĩ hã mẽ amã ixujarẽnhhta jarẽ ka mẽ inhma. Te ixpê ôwêhti jagjênh xà hã hakwakre pyræk. Kwa mẽ ja ma nẽ amnhĩ krã him haxàr tỳx nẽ.

⁸Na pre ra ixkukamã mẽ ohtô nẽ te ãm hãmri mẽ amã Tĩrtũm kapêr jarẽnh pyræk o mẽ akôt ri pa. Nom mẽ amã hêx o pa. Te mẽ kot ôwêhti o àhkĩnh xwýnhhta kot amnhĩ nhĩpêx pyræk. Nom na hte ôwêhtija ãm hamãr xwýnh

pix kapër ma nê nhâm mēhō kapër mar kêt nê. Ja pyrà nê mē kot ixkôt amnhĩ xunhwÿr xwÿnhjaja na htem Tĩrtũm kapër o hêx o mē pa xwÿnhjê ma nê ãm mē kuma nê mē hkôt amnhĩ nhĩpêx kêt nê. Na htem ãm ixkapër pix ma nê ixkôt pix mã amnhĩ nhĩpêx o pa.

9-10—Te ixpê ôwêhti gjênh xà hã hakwakre pyràk. Na hte ôwêhti mēmoj punuj pymaj kahê hwÿr agjê nê kamã mex nê kuhê. Nê kurũm hapôj nê ma apkur o pa. Ja pyrà nê mē kot ixkôt amnhĩ xunhwÿr xwÿnhjaja koja mē ixkukwak ri hkĩnh nê mex nê hamakêtkati nê pa ho pa. Nê nhÿrmã Tĩrtũm mē wa ixri htĩr tũm nê pa ho pa. Ja kaxyw na pa pre man mē awÿr pika hwÿr wrÿ. —No ôwêhti ho àhkĩnh xwÿnhjaja na htem amnhĩm ho ahkĩ nê kupa nê ma amnhĩm o pa. Tã mē kot Tĩrtũm kapër o hêx o mē pa xwÿnhjaja te mē kot jajaja kot amnhĩ nhĩpêx pyràk. Anê.

Jejus te kêp ôwêhti jamãr xwÿnh pyràk

Eprêw 13.20; Apokarip 7.17

11—Nê ôwêhti jamãr mex xwÿnhja koja nhÿri mēhō kêp ôwêhti hōxpĩr kaxyw hwÿr htēm ã omu nê wa hã axpu. Nhũm ho àhkĩnh mã xwÿnhhta ôwêhti jamãr xwÿnh pĩ nhũm ôwêhti nê ty. Tã ixkwÿjaja hamakêtkati nê mex nê pa kaxyw na pa pre amnhĩ grōnh kôt mē hwÿr wrÿ. Jakamã kot paj te ôwêhti jamãr xwÿnh kot amnhĩ nhĩpêx pyràk o amnhĩ nhĩpêx.

12-13—Nê na htem tōhã ôwêhti jamãr xwÿnh nhÿhÿm pa kaxyw nê mēhō mã amnhĩre nhũm wakre kamã kãm hkrit jamãr o pa. Kàxpore pix prãm xàj kãm hamãr o pa. Jakamã koja nhÿhÿnh mry xoprê ra hwÿr kato nhũm amnhĩ wÿr omu nê umaj ôwêhti re nê ma hprôt nê tē. Kãm ôwêhti japê hkêt ãm kãm htĩr pix prãm xàj ôwêhti mã hamaxpêr kêt nê rer pa nê ma tē. Nhũm mry xoprêta ôwêhti hwÿr hprôt nê hkwÿ pynê nhũm hkwÿ umaj axkahkũm nê hprôt nê ma mra. No kêt pa na te ixte ôwêhti mã hamaxpêr kêt nê kot rer nê ma hprôt nê htēm xwÿnhhta pyràk kêt. Kot paj aa ixkwÿjê rer kêt nê. Kot paj mē hkôt ixpa ho ixpa rãhã nê.

14-15—Te ixte ôwêhti jamãr xwÿnh mex pyràk jakamã na pa hte uràk nê ahpÿnhã mē kot ixkôt amnhĩ xunhwÿr xwÿnhjê pumunh mex o ri mē hkôt ixpa. Te mē kêp ixkrit ôwêhti pyràk nhũm te ixpê mē hamãr mex o ri mē

hkôt ixpa nê aa mẽ rer kêt xwỳnhhta pyràk. —Nê mẽ kot ixkôt amnhĩ xunhwỳr xwỳnhjaja ra mẽ ixte amnhĩ nhĩpêx kôt axpên pumunh mex. Nê mẽ inhmã axpên japêê. Te Inhĩpêêxà mẽ wa inhmã axpên japê pyràk. Tã kot paj nhỹrmã mẽ nê tanhmã amnhĩ nhĩpêx to.

16—Mẽ kot ixkôt amnhĩ xunhwỳr xwỳnhjaja piitã kêp Ijaew pix kêt. Koja Ijaew kêt xwỳnh kwỳjaja määnên ixkapêr ma nê ixkôt amnhĩ xunhwỳ nê ixkôt amnhĩ nhĩpêx. Jao ra te kêp ixkrit ôwêhti pyràk. Tã kot paj mẽ ho ixpimràa tã mẽ ho tipxi nê mẽ hamãr o ri mẽ hkôt ixpa.

17—Nê mẽ kot ixkôt amnhĩ nhĩpêx o mẽ pa xwỳnhjaja mẽ mex kaxyw na pa pre amnhĩ grôn kêt mẽ hwỳr wrỳ. Jakamã kot paj nhỹrmã mẽ nê ty. Tã inhmã mẽ nê ixtyk puma hkêt jakamã na Inhĩpêêxà kãm ijapêê. Koja akupỹm ixto ixtĩr.

18Kop apu inhmã mẽ nê ixtyk prãm kêt ronhỹx mẽ kãm ixkurê xwỳnhjaja tee ri kãm ixpĩr prãm kaprỳ. Nom ixte mẽ kot ixkôt amnhĩ nhĩpêx xwỳnhjê nê amnhĩ grôn kêt mẽ hwỳr ixwrỳk kênã. Jakamã kot paj arĩ mẽ kãm amnhĩ grôn kêt amnhĩ gô nê arĩ mẽ kãm xa nhũm mẽ ixpĩ. Nom kot paj akupỹm ixtĩr. Mẽhõ koja tanhmã ixto nê ixpĩr o ixpĩ? Nà koja mẽhõ ixpĩr o ixpĩr kêt nê. Inhĩpêêxà nhỹ hã kot paj nhỹrmã ã amnhĩ nhĩpêx anê nê akupỹm ixtĩr. Anê. Nhũm pre ã Jesus mẽ kãm amnhĩ jarênh anê.

19Hãmri nhũm Ijaew tee ri ã kot amnhĩ jarênh anhỹr ã kuma nê kê axte axpên kwỳm ri tanhmã harênh to ho kuhê.

20Nê kamã mẽ hkwỳjaja harênh o: —Tk. Kwa mẽ mar kêt nê. Satanasti nhỹ hã na hte htỳx ri ã mẽ pamã amnhĩ jarênh anhỹr o pa. Anê.

21Hãmri nhũm mẽ hkwỳjaja mẽ kuma nê mẽ kãm: —Nà kot anhỹr kêt. Xà na htem Satanasti nhỹ hã ã kapêr mex anê nê ã mẽ no hkre xwỳnhjê ho mex anê? Nà kot anhỹr kêt. Satanastija ukaprĩre hã. Anê.

Ijaew nhõ pahijaja kot Jesus kaga hã mẽ harênh

Juãw 5.18; 8.59

22Tã nhũm ra amgrà hapêx pa mẽ ixpê Ijaew akupỹm krĩ pê Jerujarê kamã axpên wỳr akuprõ. Axte mẽ ixte mẽ ixkĩnh kaxyw axpên wỳr akuprõ.

Amnepê mē inhîgêjtaja kot akupÿm Tîrtûm mã amnhî jarênh xà hã ixkre ho mex pa nê ho Tîrtûm wÿr mã hamaxpêr nê hã ixkînh ã arîgroja ã pa mē hwÿr akuprô.

²³Hãmri nhûm Jejus ma mē ixkôt Tîrtûm mã amnhî jarênh xà hã ixkreta wÿr tē no ãm hwÿr àr kêt nê. ãm ixkre hpu hã kahê xà kape hã ri pa. Mē kot kãm: “Pahi finat Sarumãw pa xà” anhÿr xwÿnhhta kamã ri pa.

²⁴Hãmri nhûm kê ra mē inhô pahijaja omu nê hã akuprô nê hêx rom kãm kapêr nê kãm: —Kwa tokyx aprî hã mē inhmã amnhî jarê. Xà apê Tîrtûm Kra na ka nà? Xà ka na pre Tîrtûm mē ixkaxyw axãm? Kwa aprî hã mē inhmã amnhî jarê pa mē ama. Mon ka hte aprî hã mē inhmã amnhî jarênh kêt nê? Na pa mē tee ri ate amnhî nhîpêx ã apumu nê akukamã ijamaxpêr rûnh kumrêx o ri ixpa. Xà ãm hãmri apê Tîrtûm kot mē ixkaxyw axãm xwÿnhhta na ka? Anê.

²⁵Hãmri nhûm mē kãm: —Tk. Ra ixte mē amã amnhî jarênh xohtô htã ka mē inhma nê ãm inhma. Na pa hte xatã Inhîpêxà nhÿ hã mē amã mē ate aa mēmoj pumunh kêt kwÿ ho anhÿr o ri ixpa ka mē ja hã ixpumu nê ãm ixpumu nê ixkôt ajamaxpêr kêt nê.

²⁶Mē apê ixkwÿ hkêt jakamã na ka mē ixkôt ajamaxpêr kêt nê. Te mē apê ixkrit ôwêhti pyræk kêt.

²⁷Ixkwÿjaja na te ho ôwêhti kot hamãr xwÿnh kapêr mar nê hkôt ri pata pyrà nê ixkapêr ma nê ixkôt amnhî nhîpêx o pa. Ixpê mē ô pahîhti hã mē kot ixpumunh mex jakamã na htem ixkôt amnhî nhîpêx mex o pa. Ixte ja hã mē omunh mex nê.

²⁸Koja mē nhÿrmã htyk tã no ãm ixkukwak ri akupÿm htîr hãmri nê Tîrtûm mē wa ixri htîr tûm nê pa ho pa nê aa hapêx kêt nhûm mēhõ ixpê mē utàr kêt nê. Te inhîhkra hpo nhîpôk ri mē hkrî nhûm te mē hã inhîhkra pikamÿr pyræk nhûm mēmoj tee ri ixpê tanhmã mē ho hprãm kaprÿ.

²⁹⁻³⁰Inhîpêxà tãm kot inhmã mē ôr kênã. Hihtÿx o kot mē piitã mē hakrenh par jakamã koja mē inhîhkra po nhîpôk ri hkrî nê mãânên Inhîpêxà nhîhkra

hpo nhĩpôk ri hkrĩ. Te ixpê Inhĩpêêxà Tĩrtũm pyràk jakamã mēhõ kot wa ixpê wa inhĩhkra rũm mē utà? Nà amrakati kumrēx. Anhỹr o mē kãm amnhĩ jarē.

31Hãmri nhũm mē te kēp Tĩrtũm pyràk ã amnhĩ jarēnh ã kuma nē kamã gryk tỳx nē. Hãmri nē kot kēn o htak kaxyw ra kaxyw hkwỳ kawrà ho ri hprõt.

32Hãmri nhũm amnhĩ tã mē omu nē mē kãm: —Kwa ra ixte Inhĩpêêxà nhỹ hã mē amã aa mē ate mēmoj pumunh kêt kwỳ ho anhỹr rax o ixpa. Jao tanhmã mē ho mex to pix o ri ixpa. Tã ka mē axtem nē ã inhĩpêx anhỹr kaxyw. Anē.

33Hãmri nhũm mē kãm: —Nà ã ate amnhĩ nhĩpêx anhỹr ja mỳrapê hkêt. Kêt apê mē inhĩõ htã ri axtem nē te apê Tĩrtũm pyràk ã amnhĩ jarēnhja mỳrapê na pa mē kēn o atak kaxyw. Na pu htem ã amnhĩ jarēnh anhỹr o papa hkêt nē. Anē

34Hãmri nhũm mē kãm: —No ãm hãmri ixte ã amnhĩ jarēnh anhỹr kēnã. Tanhmã na Tĩrtũm kapēr ã kagà htũm kot ja jarēnh to wehe? Na pre Tĩrtũm Ijaew nhõ pahijê mã kapēr nē mē kãm: E mē ate inhỹ hã mē ho amnhĩptàr jakamã te mē apê pa ixpê Tĩrtũm pyràk. Anhỹr o kot mē harēnh.

35Ãm hãmri na Tĩrtũm kapērja. Tãm kot ã mē harēnh kot anhỹr. Mē kot ỹ hã mē kãm kapēr jakamã te mē kēp uràk ã mē harēnh anhỹr kēnã.

36Tã tãm kot ã mē harēnh anhỹr tã hpãnhã mē akaxyw pa ixpê Kra hã ixãm nē mē awỳr inhmēnh nhũm ixwryk nē ixpê Kra hã amnhĩ jarēnh tã ka mē ja hã inhma nē ãm inhma nē ixkôt ajamxpēr kêt nē. Kwa mon ka mē ja hã ixpumunh nē ixkôt ajamxpēr kêt nē?

37Kot paj Inhĩpêêxà mē wa ixàhpumunh kôt mē amã aa mē ate mēmoj pumunh kêt kwỳ ho anhỹr kêt ka mē ja hã ixpumu nē mē rĩ kam nē mãmri ixkôt ajamxpēr kêt nē.

38Mē amã ixkapēr mar prãm kêt tã kwa ixte Tĩrtũm pyrà nē aa mē ate mēmoj pumunh kêt kwỳ ho anhỹr ã ixpumu nē Inhĩpêêxà mē wa ixte amnhĩ nhĩpêx tipxi hkôt ajamxpēr. Anē.

³⁹Hāmri nhũm mẽ kuma nhũm ja mẽ kêp omnuj tỳx nẽ. Te kot Tĩrtũm pyræk ã amnhĩ jarẽnhja nhũm mẽ kêp omnuj nẽ. Jakamã nhũm mẽ ra kot unênh nẽ ixkre rũm ho kator nẽ kapôt ã mẽn̄h nẽ kẽn̄ ho htak kaxyw nhũm kê axte mẽ kêp akunok nẽ ma nhỹhỹm tẽ.

Jejus kot Jotãw nhĩhkjê hã ri pa hã harẽnh

⁴⁰Tã nhũm Jejus ma tẽ nẽ pyhti pẽ Jotãw ã rê. Pa mẽ hkôt ri ixpa ho ixpa xwỳnhjaja ma hkôt mỗ. Finat Juãw Paxis kot Tĩrtũm mã wam mẽ hkrã kumrãr o pa xàta wỳr.

⁴¹Hāmri nhũm mẽ ohtô nẽ mẽ ixwỳr mra nẽ Jejus kapẽr ma nẽ kot tanhmã amnhĩ nhĩpêx to hã omunh o kuhê. Hāmri nẽ hã tanhmã axpẽn mã kapẽr to nẽ axpẽn mã: —Kwa ãm hāmri na pre finat Juãw Paxisja mẽ pamã Jejus jarẽnh o pa. Aa kot mẽ pamã mẽ pahte mẽmoj pumunh kêt kwỳ ho anhỹr kêt tã ãm xatã hkukamã mẽ pamã harẽnh o pa. Kêp Tĩrtũm Kra hã Juãw rom hihtỳx o hihtỳx ã harẽnh o pa. Nẽ Tĩrtũm kot mẽ pakaxyw ãm xwỳnh ã nhũm mẽ pamã harẽnh o pa. Nà ãm hāmri na pre ã mẽ pamã harẽnh anẽ. Anẽ.

⁴²Hāmri nhũm mẽ ohtô nẽ amnhĩ kaxyw Jejus kôt hamaxpẽr nẽ hkôt amnhĩ xunhwỳ.

Juãw 11

Rajare htyk jarẽnh

Juãw 5.21-29; 6.40

¹Rôm nhũm krĩ pẽ Petãn kamã mẽhõ my pẽ Rajareja ra à htỳx nẽ nõ. Na pre htõx wa hamẽxkrut. Hõ kêp Matre nhũm hõ kêp Marir.

²Marir na pre kormã arĩgro hõ hã kot Jejus o mex kaxyw mẽ hkuxwaxà ho hkuxwa nẽ amnhĩ kĩ ho hpar põnh kaxyw. Nom kormã. Jakamã nhũm wa hkamyja wa kêp à htỳx nẽ nõ.

³Hāmri nhũm wa tee ri hkukamã hamaxpẽr nẽ ma krĩ hõ hwỳr Jejus wỳr mẽhõ mẽ nhũm ma hwỳr tẽ. Nẽ hwỳr pøj nẽ omu nẽ kãm: —Pa Pahihtĩ. E ot pa awỳr tẽ. Na ra amã akràmnhwỳ japê htỳx xwỳnhhta à htỳx nẽ nõ nhũm

htõx wa tee ri hkukamã hamaxpêr nê awỳr inhmẽ pa tẽ. Kwa tokyx pu ma hwỳr tẽ ka akupỹm wa kãm ho mex nà? Anẽ.

⁴Hãmri nhũm kuma nê kãm: —Nà à htỳx nê nõi tã koja akupỹm mex. Mẽ kot akupỹm mex ã harẽnh mar hãmri nê Tĩrtũm mẽ wa ixtã hpijaam nê wa ixihtỳx o wa ixihtỳx ã wa ixpumunh kaxyw na ã à htỳx nê nõi anẽ. Nê pa ixpê Tĩrtũm Kra hã akupỹm ho mex ã ixpumunh nê ixkõt hamaxpêr kaxyw na ã à htỳx nê nõi anẽ. Anẽ.

⁵Na pre Jejus kãm Rajare mẽ htõx wa mẽ hapê nê.

⁶Tã à htỳx ã harẽnh ma nê hwỳr mõi tokyx anhỳr kêt nê. Pa mẽ arĩ amnhĩm hikranh xà kamã ri ixpaja o ixtã axte apkati axkrut.

⁷Hãmri nhũm rĩ kormã hwỳr nojarêt nê mẽ inhmã: —E ma pu mẽ jarãhã akupỹm Jutej kamã Rajare hwỳr mõi nê omu. Anẽ.

⁸Hãmri pa mẽ tee ri ja hã kuma nê kãm: —Kwa ham mẽ panhõ pahijaja kot kẽn o atak o apĩr mã tã ka ra akupỹm mẽ hwỳr akra. Kwa pu mẽ hwỳr pamõi kêt nê nà? Anẽ.

⁹Hãmri nhũm mẽ inhmã: —Nà koja mẽ kormã tanhmã ixto hkêt nê. Kormã ixte Tĩrtũm mã tanhmã amnhĩ nhĩpêx to jatur xàm mẽnhre hã. Te ixte kormã arĩgro hã ixrĩt mex nê ixpa pyrã nê kormã Tĩrtũm kot mẽmoj tã inhmã karõ xà hkõt pix mã tanhmã amnhĩ nhĩpêx to ho ri ixpa.

¹⁰Tã kot paj hatur xàm kumẽ nhũm te myt àr nhũm ra kamàt kô pyrãk nhũm mẽ rĩ kormã tanhmã ixto nê ixpĩ. Jakamã e ma pu mẽ hwỳr. Koja mẽ tokyx tanhmã ixto hkêt nê. Anẽ.

¹¹Hãmri nê mẽ inhmã Rajare jarẽnh o: —Na mẽ pahkràmnhwỳ Rajareta ra gõi nê nõi. Tã kot puj mẽ ma hwỳr mõi pa kumra. Anẽ.

¹²⁻¹³Ra htyk ã omunh tã ã mẽ inhmã harẽnh anẽ. Pa mẽ kuma nê ixtỳx ho ãm õt nê nõi ã hkamnhĩx nê kãm: —Kwa mãn ra akupỹm amnhĩ kãm hamak o mõi jakamã na ra amnhĩ krit nê gõi nê nõi. Kwa pu mẽ awjanã nê hwỳr pamõi kêt nê nà? Anẽ.

14Hāmri nhūm mẽ inhma nẽ hprĩ hã mẽ inhmã harẽ nẽ mẽ inhmã: —Nà na pre ty.

15Nom kormã à nẽ hikwýta ã na pa hwýr inhmõr kêt nẽ. Tã kot paj ma hwýr mõi nẽ hã mẽ amã ixàhpumunh tỳx ã amnhĩ to amnhĩrĩt. Ka mẽ ja hã ixpumu nẽ amnhĩ kaxyw ixkõt ajamaxpěr tỳx o ri apa. ã mẽ ate amnhĩ nhĩpêx anhýr kaxyw na pa kormã à nẽ nõr ã hwýr inhmõr kêt nẽ. E ma pu mẽ hwýr. Anẽ.

16Hāmri nhūm mẽ inhĩõ pẽ Tomas pihpohti tee ri ã kapěr anhýrja ã kuma nẽ mẽ inhmã: —Tõe ma pu mẽ hkõt. Kê mẽ mamrĩ hkõt mẽ pahto hpimràatã mẽ panhĩmex pa ri. Anẽ.

17Tã pa mẽ ma hkõt mẽ hwýr mõi nẽ ra Rajare nhõ krĩ hwýr ixpõx o mõi hāmri nẽ harẽnh ma. Ra htyk nhūm mẽ kot haxàr ã arĩgro pẽ kwat ã harẽnh ma.

18-19Nhūm Matre mẽ Marir wa hkamy ho hamak xàj arĩ mýr o hkrĩ. Jakamã nhūm Ijaew kwýjaja Jerujarẽ rĩm ma wa hwýr mra. Mẽ kot wa kãm kapěr nhūm tokyx akupým tãm wa hkrã kaxyw nhūm mẽ wa hwýr mra. Wa õ krĩ pẽ Petãnja Jerujarẽ hwýr ãm 3 kirõm pix jakamã nhūm mẽ ma wa hwýr mra nẽ wa kuri wa kãm kapěr o hkrĩ.

20Rõm nhūm Matre Jejus hpõx o mõi ã harẽnh ma nẽ kànhmã xa nẽ man mẽ ixkutã tẽ. No nhūm Marir arĩ mýr o nhỹ nẽ hkõt htẽm kêt nẽ.

21Hāmri nhūm Matre mẽ ixkutã tẽ nẽ mẽ ixkaxpa nẽ Jejus pumu nẽ mýr kamã kãm kapěr nẽ kãm: —Hêxta gàu nẽ Pahihti. Na pre ra wa ixkamy wa ixpê ty. Kop apu jar mẽ ixkõt ri apa ronhỹx pre htyk kêt nẽ. Xê mon ka pre we tokyx mẽ ixwýr atẽmre hkêt nẽ?

22Tã na pa arĩ akõt ijamaxpěr tỳx nẽ. Kot kaj mẽmoj tã tanhmã Tĩrtũm wýr to nhūm ama nẽ tanhmã amã mẽmoj to. Ra ixte ja hã apumunh mex kẽnã. Anẽ.

23Hāmri nhūm Jejus kuma nẽ kãm: —Kwa tee ri ajamaxpěr nẽ akaprĩ hkêt nẽ. Koja akamy akupým war amã htĩr kãm ga. Anẽ.

24Hāmri nhūm kuma nē kām: —Ma koja anē. Nhỹrmā Tĩrtūm kot mē piitā akupỹm mē ho htĩr xà hã arĩgrota ã koja akupỹm htĩr. Anē. Kamy akupỹm htĩr ã harēnh mar tā Jejus kot akupỹm ho htĩr tokyx anhyr ã hkamnhĩx kēt nē ã kām kapēr anē.

25-26Jakamã nhūm kām: —Nà pa na ixpê akupỹm mē ho mē htĩr xwỳnh. Jakamã mē kot amnhĩ kaxyw ixkôt hamaxpēr nē ixkôt amnhĩ xunhwỳr xwỳnhjaja koja mē htyk tā koja mē hkarō Tĩrtūm mē wa ixri htĩr tūm nē mex nē pa ho pa. Xà ate ja kaxyw ixkôt ajamaxpēr tỳx nà? Anē.

27Hāmri nhūm Matre kuma nē kām: —Xê nhūm. Apê Tĩrtūm Kra hã na pre mē ixkaxyw axãm. Ka na pa htem amnhĩ wỳr akām ijamak o ixpa. Anē. Hāmri nhūm Jejus kām: —Nà ãm hāmri na ka ã ijarēnh anē. E ma akupỹm tē nē atōx mã anē kē tokyx man ixwỳr tē pa omu. Anē.

28Hāmri nhūm kuma nē ma akupỹm tē. Hāmri nē Marir wỳr axà nē kām Jejus jarē. Kôt mē hkrĩ xwỳnhjê hkàx ã kām harē nē kām: —An xê hāmri amỳr kēt nē. Na ra mē pajahkre xwỳnhhta hpōx o mō nē mūtār nhỹ nē atã karō. Anē.

29Hāmri nhūm kuma nē kànhmã xa nē ma mē ixwỳr htēm kurê kumrēx.

30Hāmri pa mē kormã krĩm ixpōx kēt nē. Arĩ Matreja Jejus wỳr htēm xà kamã arĩ ixkrĩ.

31Jakamã nhūm Matre ma tē nē Marir mã Jejus jarē nhūm kato nē man mē ixwỳr tē. Hāmri nhūm Jerujarē rūm wa hwỳr mē mrar xwỳnhjaja omu nē htỳx kot hkamy hã pika pumunh nē mỳr kaxyw htēm ã hkamnhĩx nē man hkôt mra.

32Hāmri nhūm Marir mē hkukamã mē ixwỳr tē nē Jejus pumu nē hpar pē tēm nē kām kapēr pē hipô nē mỳr o nhỹ. Nē kām: —Hêxta gàa nē Pahiiti. Na pre ra wa ixkamy wa ixpê ty. Kop apu jar mē ixkôt ri apa ronhỹx pre htyk kēt nē. Hô mon ka pre we tokyx man mē ixwỳr atēmre hkēt nē? Anē.

33Hāmri nhūm Jejus kuma nē mỳr ã omu. Nē hkôt mē mrar xwỳnhjaja mē mỳr ã mē omu nē kām mē hkaprĩ nē.

³⁴Hāmri nē mẽ kām: —Nhỹri na ka prem haxà? E mẽ hwỳr ixto tẽ pa omu. Anẽ. Hāmri nhũm mẽ kuma nẽ ma hã pyka hwỳr mẽ ixto mỗ

³⁵nhũm Jejus mẽ uràk nẽ hwỳr mỳr o tẽ

³⁶nhũm mẽ ja hã omu nẽ axpẽn mã: —Kwa mãn kãm hapê htỳx. Hã na ho ama nẽ hwỳr mỳr o tẽ. Anẽ.

³⁷Nom nhũm mẽ hkwỳjaja axtem nẽ mẽ kãm: —Tk. Ra kot no hkre xwỳnhta o mex tã mo na we tokyx man kormã htĩr ri hwỳr htẽm nẽ omunh nẽ akupỹm ho mex kêt nẽ? Anẽ.

Jejus kot akupỹm Rajare ho htĩr ã harẽnh

³⁸Tã pa mẽ ra kẽn kre kamã mẽ kot Rajare jaxàr xàta wỳr ixpôx o mỗ nhũm Jejus hkaprĩ nẽ hwỳr tẽ nẽ omu. Nhũm prem ra kẽn rax o hitom

³⁹nhũm omu nẽ mẽ kãm: —E mẽ akwỳjaja nhãm inhmã nê kahê xà mẽ. Anẽ. Hāmri nhũm Matre kuma nẽ tee ri hamaxpẽr nẽ kãm: —Xê ma Jejus. Mẽ ri ã anhỹr kêt nẽ. Ra htyk ã arĩgro kệp 4 kênã. Mãn ra hkatõk nẽ hkro htỳx kumrẽx. Anẽ.

⁴⁰Hāmri nhũm kuma nẽ kãm: —Kwa ri ã ajamaxpẽr anhỹr kêt nẽ Matre. Na pa ra amã ixkapẽr nẽ amã ixkapẽr o: “Kot kaj amnhĩ kaxyw ixkôt ajamaxpẽr tỳx nẽ. Hã kot kaj Tĩrtũm mẽ wa ixihtỳx o wa ixihtỳx xàja pumu.” Anhỹr o amã ixkapẽr. Jakamã kwa ja kaxyw Tĩrtũm mẽ wa ixkôt mãn ajamaxpẽr tỳx nẽ hkêt wehe. Anẽ. Hāmri nhũm kuma nẽ kãm: —Ma ãm hāmri na ka inhmã akapẽr. Ma kot paj kaxyw war amã ijamaxpẽr tỳx nẽ. Anẽ.

⁴¹Rôm nhũm mẽ kãm nhãm kẽn jakwa kre kahê xà mẽ. Hāmri nhũm Jejus Tĩrtũm mã amnhĩ jarẽnh kaxyw kànhmã kaxkwa hwỳr rĩt nẽ kãm: —Pa Papaj. Nà na pa hte tanhmã mẽmoj tã awỳr to ka inhma nẽ tanhmã inhmã mẽmoj nhĩpêx to. Amex o amex Papaj.

⁴²Na ka hte ã inhmã amnhĩ nhĩpêx anẽ. Tã pa jajê noo mã ã amã ixkapẽr anẽ. Ate inhmar nẽ tanhmã Rajare hto nhũm mẽ kot ja hã ixpumunh nẽ ixte anhỹ hã pix mã tanhmã amnhĩ nhĩpêx to ho ri ixpa hã ixpumunh kaxyw. Nẽ ka ate mẽ hwỳr inhmẽnh ã apumunh kaxyw. Anẽ.

⁴³Nhũm pre ã Tĩrtũm mã kapěr aně. Hãmri ně kỳx pê Rajare mã kapěr ně kãm: —Pa Rajare. Kwa tokyx kànhmã nhỹ ně amně mẽ ixwỳr tẽ ně akato. Aně.

⁴⁴Puh nhũm akupỹm htĩr ně hkupu xà rãhã tẽ ně mẽ ixwỳr kato ně xa. Arĩ hkuk ně ãhkra ně hpar kupu rãhã mẽ ixwỳr kato ně xa. Hãmri nhũm Jejus mẽ kãm: —Kwa mẽ atõ nê kupu xà hpôt kê ma akupỹm òrkwỹ hwỳr tẽ. Aně.

⁴⁵Hãmri nhũm mẽ kot Marir mẽ Matre wa hwỳr mrar xwỳnh kwỳjaja ã Jejus kot Rajare nhĩpêx anhỹr ã omu ně amnhĩ kaxyw hkôt hamaxpěr ně hkôt amnhĩ xunhwỳr kurê kumrêx.

⁴⁶Nom nhũm mẽ hkwỳjaja axtem ně omu nhũm ja mẽ kêp omnuj ně. Jakamã nhũm mẽ ma Parijew nhõ xwỳnhjê hwỳr mra ně mẽ kãm harě.

Mẽ kot Jejus pĩr ã amnhĩ grõnh

Matêwre 26.1-5; Makre 14.1-2; Rukre 22.1-2

⁴⁷Hãmri nhũm Parijew nhõ xwỳnhjaja tee ri Jejus kot akupỹm Rajare ho htĩr ã harěnh ma hãmri ně patre krãhtũmjê mẽ amnhĩ wỳr mẽ inhõ juisti ho akuprõ ně axpẽn mã Jejus o kapěr punuj pê hã axpẽn mar o hkrĩ. Hãmri nhũm mẽhõ mẽ kãm: —Kwa tanhmã kot puj mẽ ho? Na ra mẽ kãm mẽmoj pumunh kêt kwỳ ho anhỹr rax o pa.

⁴⁸Kot puj mẽ ãm omu ně tanhmã ho hkêt nhũm mẽ pahkwỳjaja kot ã amnhĩ nhĩpêx anhỹr ã omu ně htỳx ãm hãmri ã kot amnhĩ nhĩpêx anhỹr ã hkamnhĩx. Hãmri ně amnhĩ kaxyw hkôt hamaxpěr ně hkôt amnhĩ xunhwỳ. Jao ra amnhĩ kaxyw kêp mẽ õ pahihti hã ãm. Koja mẽ ã amnhĩ nhĩpêx aně nhũm Rõm kamã pahihtija mẽ kot kator ně hpãnhã Jejus xãm ã harěnh ma. Hãmri ně gryk xàj mẽ pahwỳr õ pòristi hkwy rě nhũm mẽ pahwỳr mra ně mẽ panhĩmex pa ně Tĩrtũm nhõrkwỹ grãnh pa. Kwa tanhmã kot puj wem tokyx amnhĩ nê ho? Aně.

⁴⁹Hãmri nhũm Kajpas mẽ kãm kapěr. Kajpasja na pre amgràja kamã kêp mẽõ patre nhõ pahi maati. Jakamã mẽ kãm: —Nà na pa ra ijamaxpěr. Kwa mẽ inhma.

⁵⁰Nà kot puj mẽ hpĩr tokyx anẽ kê tapxipix ty pu mẽ arĩ mỳrpê pahpiitã pajamakêtkati nẽ ri papa. Anẽ.

⁵¹Nhũm pre ã mẽ kãm kapẽr anẽ. Nom amnhĩ krã hkôt ã mẽ kãm kapẽr anhỹr kêt nẽ. Arĩ kêp mẽõ patre krãhtũmjê nhõ pahi maati jakamã Tĩrtũm nhỹ hã Jejus kot Ijaew nê tykja kukamã ã harẽnh anẽ. Nom ja hã amnhĩ pumunh kêt nẽ.

⁵²Na pre Jejus mẽ ixpê Ijaew pix nê htyk kêt nẽ. Krĩ piitã hkôt Tĩrtũm krajê nê na pre ty. Mẽ piitã mẽ kot axpẽn to hkwy nẽ ri axpẽn to pa kaxyw na pre mẽ nê ty.

⁵³Hãmri nhũm ã Kajpas mẽ kãm kapẽr anẽ nhũm mẽ inhõ pahijaja kuma nhũm ja mẽ kãm mex nẽ. Jakamã nhũm mẽ kot tanhmã Jejus ã àmnênh to nhũm mẽ kot mẽ kãm tanhmã hpĩr to kaxyw ã axpẽn mar anhỹr o pa.

⁵⁴Jakamã nhũm Jejus axte mẽ noo mã ri pa hkêt nẽ. Hãmri ma krĩ pê Epraĩ hwỳr ma mõi. Pa mẽ hkôt ixpa ho ixpa xwỳnhjaja ma hkôt ixpa. Epraĩa kapôt ã krĩ na pre. Jakamã pa mẽ ma hwỳr mõi hãmri nẽ kamã ri ixpa.

⁵⁵Tã nhũm arĩgro pê Pasja ra ahtêp o mõi. Amnepêm finat Mojes kot Ejit rũm mẽ panhĩgêjtjê kator mã hamaxpěr kaxyw na pa pre htem hã ixkĩnh kaxyw Pas ã Jerujarẽ hwỳr akuprõ. Na pa pre htem hwỳr pøj nẽ kamã Tĩrtũm noo mã mẽ inhmex kaxyw tanhmã amnhĩ nhĩpêx to.

⁵⁶⁻⁵⁷Jakamã nhũm ra Ijaew ohtô nẽ ma Jerujarẽ hwỳr pa. Nẽ kãm Jejus pumunh prãm xàj Tĩrtũm mã amnhĩ jarẽnh xà hã ixkre wỳr mra nẽ hwỳr agjê nẽ kamã hapêr nẽ axpẽn mã: —Kwa nok? Xà koja mẽ hpakĩnh wỳr mõi kêt nẽ nà? Anẽ. Nhũm Parijew nhõ xwỳnhjê mẽ mẽ inhõ patre krãhtũmjaja haxwỳja hapêr o kuhê. Nom mẽ kot axtem nẽ unê nẽ haxàr kaxyw. Jakamã mẽ kãm hã karõ nẽ mẽ kãm: —E kêr ka mẽ nhỹri Jejus pumu nẽ man mẽ ixwỳr mra nẽ mẽ inhmã harẽnh kurê kumrêx. Anẽ.

Juãw 12

Marir kot Jejus kuxwa hã harẽnh

Matêwre 26.6-13; Makre 14.3-9; Rukre 7.36-50

¹Tã nhũm ra Pas wỳr apkati grêre. Ra hwỳr apkati kêp 6. Jakamã pa mẽ ma akupỹm krĩ pẽ Petãn wỳr Jejus kôt mỗ. Jejus kot akupỹm Rajare ho htĩr xwỳnhta mẽ õ krĩ hwỳr pa mẽ akupỹm mỗ nẽ Rajare nhõrkwỹ hwỳr pỏj nẽ mẽ hwỳr agjẽ.

²Hãmri nhũm mẽ Jejus pumu nẽ hkĩnh nẽ. Nẽ mẽ inhmã mẽmoj mex nhĩpêx pa mẽ ixàpkur o ixkrĩ. Nhũm Rajare haxwỳja mẽ ixkutã apkur o nhỹ. Nhũm htõx Matre mẽ inhmã mẽõ ho pa nẽ mẽsti hã unhwỳr o xa.

³Hãmri nhũm wa htõx Marir Jejus kukamã tanhmã hamaxpẽr to nẽ hamaxpẽr o: —Ma kot paj tokyx mẽ kot mẽ ixpê hpĩr kukamã mẽ hkuxwaxà ho hkuxwa. Anẽ. Hãmri nẽ kàx rax kãm mẽ hkuxwaxàja py nẽ o tẽ. Ra rit kahti hkôt hitep xà nhũm kupy nẽ hwỳr o tẽ. Mẽ kot mẽmo htwỳm o mẽ hkuxwaxà mex nhĩpêxja na pre hã kàxpore xohtô rax kumrẽx. Jakamã nhũm kupy nẽ Jejus wỳr o tẽ nẽ hpar ã hkapĩr pa nẽ amnhĩ krã hkĩ ho hpar grà ho nhỹ nhũm ra ixkre kuxwa htỳx kumrẽx.

⁴Hãmri nhũm mẽ inhĩõ pẽ Jut Kariotja. Kot kormã mẽ ãhkram Jejus nhõr mã xwỳnhta tee ri ã kot amnhĩ nhĩpêx anhỹr ã omu nhũm ja kêp omnuj nẽ

⁵nhũm mẽ inhmã: —Tk. Kwa pẽr mẽ hkuxwaxà hã kàxpore xohtô rax kumrẽx tã nhũm ri axtem nẽ Jejus par ã hkapĩr pa. Mo na ma o htẽm nẽ ho wẽnê nẽ hpãnhã kàxpore ho rax nẽ hpyr nẽ ho mẽ kêp amrakati xwỳnhjê nhĩpêx kêt nẽ? Kot ho wẽnê ronhỹx hpãnhã kàxpore ho rax kumrẽx nẽ kupy nẽ ho mẽmoj japrôr rax o rax. Tã axtem nẽ amarĩ Jejus par ã hkapĩr pa. Anẽ.

⁶Te kãm mẽ kêp amrakati xwỳnhjê japê pyràk tã kãm mẽ hapê hkêt. ãm hêx rom ã kapẽr anẽ. Na pre hte mẽ inhmã mẽ ixkàxpore jamỳ nẽ mẽ ixkôt mẽ inhmã hamãr o pa. Nom tõhã axtem nẽ mẽ ixpê hkwy ho ahkĩ nẽ ho amnhĩm mẽmoj japrô. Jakamã Marir kot mẽ hkuxwaxà ho hapêx par ã omu nẽ tee ri hpãnhã kàxpore rax mã hamaxpẽr nẽ kamã gryk nẽ ã mẽ inhmã kapẽr anẽ.

⁷Hāmri nhūm Jejus amnhĩ tã hamaxpēr ã omu nē kām: —Tk. Kwa tanhmã kām akapēr to hkêt nē. Ixytk nhūm mē kot ixkuxwa hkukamã na ã inhĩpêx anē.

⁸Na hte mē kēp amrakati xwỳnhjaja mē akôt pa rãhã nē. Ka mē amã mēmo arĩgro hã tanhmã mē ho ajuta hto hprãm nē rĩ mē ho ajuta nē mē kām mēmoj gō. No kêt pa kot paj ri mē akôt ixpa ka mē ixto mex ry ho apa hkêt nē. Kot paj tokyx mē apiitã mē are. Jakamã ãm hāmri na ã inhĩpêx anē. Anē.

Patre krãhtũmjaja kot Rajare hã àmnēnh ã harēnh

⁹Rôm nhūm Jerujarē nhõ xwỳnhjaja ra Jejus Petãn wỳr hpôx ã harēnh ma nē kot omunh mã ma hwỳr mra. No ãm tapxipix pumunh mã hwỳr mrar kêt nē. Mããnēn kot akupỹm ho htĩr xwỳnhhta pumunh mã nhūm mē ma hwỳr mra.

¹⁰⁻¹¹Na pre ra Ijaew ohtô nē Jejus kot akupỹm Rajare ho htĩr ã harēnh ma hāmri nē mē inhõ patre kaga nē Jejus kôt amnhĩ xunhwỳ. Jakamã nhūm patre krãhtũmjaja tee ri ja hã mē omu nē axpēn mã: —Nà kot puj mē Jejus pix pĩr kêt nē. Kot puj mē mããnēn hkôt Rajare pĩ hāmri nhūm wa hixi hamē mē kēp hapêx japêr. Anē.

Jejus kot Jerujarē hwỳr àr ã harēnh

Matêwre 21.1-11; Makre 11.1-11; Rukre 19.28-40

¹²Tã nhūm apkati nhūm Ijaew Jerujarē kamã mē hkĩnhja kryx nē Jejus ra mē hwỳr àhtêp o mōr ã harēnh ma.

¹³Hāmri nē axpēn mã: —Kwa ma pu mē mō nē pô hkwỳ jakà nē kutã ho mra. Anē. Hāmri nē hkwỳ jakà nē hamỳ nē ma kutã ho mra. Hāmri nē ra hkaxpa nē omu nē hkĩnh nē. Nē kām: Pa. Nà ãm hāmri na ka mē ixwỳr mō. Tĩrtũm na pre mē ixwỳr amē ka ã amōr anē. Tĩrtũmja mex o mex. ãm hāmri na pre mē ixwỳr amē. Kot kaj mē inhõ pahi hpãnhã mē ixto amnhĩptàr o ri apa. Anē.

¹⁴Hāmri nhūm Jejus nhỹri jumēnre pumu nē hwỳr tē nē hã nhỹ nhūm mē pimràatã ma akupỹm Jerujarē hwỳr mō. Tĩrtũm kapēr ã kagà htũm ra kot ja jarēnh kot:

¹⁵Pa Jerujarẽ nhõ xwỳnhjaja. Kwa mẽ tee ri amnhĩ kukamã ajamexpër ho amã ma hkêt nẽ. Ota mẽ anhõ pahi nyw ra mẽ awỳr jumẽnre hã nhỹ nẽ hpôx o tẽ. Anẽ.

¹⁶No Jejus kôt mẽ ixpa ho mẽ ixpa xwỳnhjaja pa mẽ ã kot amnhĩ nhĩpêx anhỳrja ã omu nẽ tee ri hkukamã ijamexpër nẽ axpẽn mã: —Kwa mo na ri ã amnhĩ nhĩpêx anẽ nẽ jumẽnre hã nhỹ nẽ mẽ hkôt mõi? Anẽ. Tã nhũm arĩgro hõ hã ty nẽ akupỹm kaxkwa hwỳr api pa prem hã omu hãmri nẽ kormã Tĩrtũm kapër ã kagà htũm kot hkukamã ã harẽnh kot anhỳrja mã ijamexpër kurê kumrẽx. Hãmri nẽ axpẽn mã harẽnh o: —Kwa ãm hãmri na Tĩrtũm kapër ã kagà htũm kot ra ã Kraja jumẽnre hã ỳr nẽ mẽ hkôt mõi ã hkukamã kot harẽnh anhỳrta. Anẽ.

¹⁷Hãmri nhũm Jejus kot Rajare mã kapër pẽ akupỹm ho htĩr ã omunh xwỳnhjaja arĩ nhãm mẽ hkwỳjê mã ujarẽnh o pa.

¹⁸Nhũm mẽ kuma nẽ ma Jejus wỳr omunh mã mra.

¹⁹Hãmri nhũm Parijew nhõ xwỳnhjaja tee ri ja hã mẽ omu nẽ axpẽn mã: —Kwa na pu mẽ tee ri Jejus nẽ mẽ kãm pakapër kaprỳ nhũm mẽ pamar kêt nẽ ra piitã hkôt amnhĩ nhĩpêx o pa. Kwa nà. Anẽ.

Ijaew kêt xwỳnhjê jarẽnh

²⁰Tã nhũm ra Gres kwỳjaja Ijaew kôt hkĩnh kaxyw ma Jerujarẽ hwỳr mẽ hkôt mra nẽ mẽ ãhkõ hã Tĩrtũm mã mex o mex ã harẽnh o hkôt mra.

²¹Jakamã nhũm mẽ nhỹri mẽ inhõ pẽ Firipti pumu nẽ hwỳr mra. Firipti kệp pyka pẽ Garirej kamã krĩ pẽ Pesêj nhõ xwỳnh nhũm Gres nhõ xwỳnhjaja omu nẽ hwỳr mra nẽ kãm: —Pa. Kwa na pa mẽ inhmã Jejus pumunh prãm nẽ. Tanhmã kot pa wem amnhĩ to nẽ omu nẽ kãm ixkapër? Anẽ.

²²Hãmri nhũm mẽ kuma nẽ ma Andre hwỳr mẽ o mra nẽ kãm mẽ harẽ. Hãmri nẽ wa ma Jejus wỳr mẽ o mra nẽ kãm mẽ harẽ nẽ kãm: —Pa Pahihti. Ota Gres nhõ xwỳnhjaja kãm apumunh prãm nẽ awỳr mõi. Mẽ pahkĩnhã mẽ kệp Ijaew kêt tã mẽ kãm apumunh prãm nẽ. Anẽ.

Jejus kot amnhĩ kukamã amnhĩ jarẽnh

Matêwre 16.24-28; mãänën Apokarip 2.10; 12.11

²³Hāmri nhūm Jejus mẽ omu nẽ mẽ kām tanhmã amnhĩ jarēnh to. Kot mẽ ohtô nẽ mẽ nê htyk nhūm mẽ kukwak ri Tĩrtūm wa kuri htĩr tūm nẽ pa ho pa hã mẽ kām amnhĩ jarẽ nẽ mẽ kām: —Nà na ra ixyk ã arĩgro hwỳr apkati grêre. Ixpê Tĩrtūm kot mẽ akaxyw ixãm xwỳnh jakamã kot paj mẽ apiitã mẽ anê ty hāmri nẽ akupỹm ixtĩr nẽ ma kaxkwa hwỳr akupỹm api.

²⁴Mẽ axohtô nẽ nhỹrmã Tĩrtūm mẽ wa ixri atĩr tūm nẽ apa ho apa kaxyw kot paj ã amnhĩ nhĩpêx anẽ. Kwa mẽ ã ixte amnhĩ jarēnh anhỹrja ma nẽ mẽ amnhĩ krãm haxàr tỳx nẽ ri hã apa. Te ixte mẽmo hy kot amnhĩ nhĩpêx pyræk. Na htem pikap hagjê nhūm te htyk pyrà nẽ pika kaxwỳnh kãm hikwỹ. Tã gaa nẽ higrôt nẽ hprêk nẽ ô. Nẽ ô rax kumrêx. Hyja pyxire nẽ hikwỹ htã kamã ô rax kumrêx. Nom koja mẽ hkre hkêt nẽ nhūm ô hkêt nẽ. Na hte ã mẽmo hyja amnhĩ nhĩpêx anẽ. Ja pyrà nẽ kot paj mẽ anê ixyk kêt nẽ te mẽ kot mẽmo hy hkre hkêt nhūm hprêk nẽ ô hkêeta pyræk ka mẽ ixkukwak ri Tĩrtūm mẽ wa ixri atĩr tūm nẽ apa hkêt nẽ. Jakamã kot paj mẽ anê ty nhūm mẽ ijaxà. Hāmri pa akupỹm ixtĩr ka mẽ axohtô nẽ ixkukwak ri wa ixri atĩr tūm nẽ apa ho apa.

²⁵—Nẽ koja mẽ ixpĩ pa mẽ anê ty. Tã mẽ ate ixkôt amnhĩ nhĩpêx o apa xwỳnhjaja. Koja mẽ ixtã mẽ apar mã tã kwa kêr ka mẽ atyk pymaj ixkaga hkêt nẽ. Kwār mẽ māmri tanhmã ixtã mẽ ato ka mẽ nhỹrmã Tĩrtūm mẽ wa ixri axte amnhĩ xà kamã ajamak kêt kumrêx nẽ atĩr tūm nẽ amex nẽ apa ho apa. No kot kaj mẽ ixkĩnhã jar amã amex pix prãm hāmri nẽ nhỹrmã wa ixri atĩr tūm nẽ apa hkêt nẽ.

²⁶Kot kaj mẽ ã ixkôt amnhĩ nhĩpêx anhỹr o ri apa hāmri nhūm mẽ kot inhĩpêx pyræk o mẽ anhĩpêx. Hāmri ka mẽ nhỹrmã ma ixkôt kaxkwa hwỳr api nẽ kamã ixri atĩr tūm nẽ apa ho apa. Hāmri nhūm Inhĩpêxà ixtã mẽ apumu nẽ mẽ ato mex kumrêx. Anẽ.

Tĩrtūm kot Jejus mã kapêr ã harēnh

Matêwre 3.17; 17.5

²⁷Tã nhūm Jejus tee ri amnhĩ kukamã htyk mã hamaxpêr nẽ hkaprĩ htỳx nẽ. Nẽ hkôt mẽ ixpa ho mẽ ixpa xwỳnhjê mã amnhĩ jarẽ nẽ mẽ inhmã: —Hêxta

waa nê. Na pa tee ri amnhĩ kukamã ijamaxpêr. Nê tee ri amnhĩ xà htỳx kamã ijamak kukamã ijamaxpêr pê ra amnhĩ kamã ixkahak nê. Nom ixte pika piitã hkôt mẽ kot ixkôt amnhĩ xunhwỳr xwỳnhjê nê ixtyk kaxyw ixwryk kênã. Jakamã kot paj Inhĩpêêxà kot mẽ kêp ixpytâr kaxyw tanhmã amnhĩ to hwỳr to hkêt nê. Anê.

²⁸Hãmri nê hpãnhã Hipêêxà mã kapêr nê kãm: —Pa Papaj. ãm mẽmoj pixi na inhmã hprãm. Kê mẽ piitã ixkukwak ri amex o amex ã apumu. Ja na kêt inhmã hprãm tỳx kumrêx. Anhỳr o Tĩrtũm mã amnhĩ jarê. Hãmri nhũm kuma nê kaxkwa rũm kãm kapêr. Kỳxpê kãm kapêr nê kãm: —Nà na pa pre ra ã mẽ kãm amnhĩ to amnhĩrĩt anê nhũm mẽ ja hã ixpumu. Tã kot paj axte akukwak ri amnhĩ to amnhĩrĩt nhũm mẽ piitã axte inhmex o inhmex ã ixpumu. Anê.

²⁹Nhũm pre ã Tĩrtũm Jejus mã kapêr anê. Hãmri nhũm mẽ kot mẽ ixkuri mar o kuhê xwỳnhjaja kuma no ãm hprĩ hã kot kãm tanhmã kapêr toja mar mex kêt nê. Nê htỳx ho ãm mẽmoj tã hkamnhĩx. Jakamã nhũm mẽ hkwỳjaja axpên mã: —Kwa mo na wehe? Na mãn katõtøk nà? Anê. Nhũm mẽ hkwỳjaja mẽ kãm: —Nà na katõtøk kêt. Tĩrtũm kapêr o wryk xwỳnh mãn tanhmã kãm kapêr to. Anê.

³⁰Hãmri nhũm Jejus mẽ kãm: —Nà Tĩrtũm tãm na inhmã kapêr. Nom pa ixte mar kaxyw inhmã kapêr kêt nê. Mẽ kajaja mẽ ate ixtã mar kaxyw na kỳx pê ã inhmã kapêr anê. Anê. Hãmri nê mẽ kãm:

³¹—E hãmri. Kot paj tokyx mẽ apiitã mẽ ate amnhĩ tomnuj pãnhã amnhĩrer kaxyw tanhmã amnhĩ nhĩpêx to. Jao määnên Satanasti pê hihtỳx xà ho ijapêx.

³²Koja mẽ pĩ kahpa hã inhô pa kỳxpê ajêt. Tĩrtũm kot mẽ awỳr inhmênh tã nhũm mẽ ã inhĩpêx anê pa ty. Jakamã koja pika piitã hkôt mẽ ohtô nê ixkôt amnhĩ xunhwỳr nê amnhĩ kaxyw inhmã hamaxpêr rãhã ho pa. Anê.

³³Mẽ ixte tanhmã htyk to hã harênh mar kaxyw nhũm pre ã mẽ inhmã amnhĩ jarênh anê.

³⁴Hāmri nhūm mẽ kot mẽ ixkuri mar o kuhê xwỳnhjaja tee ri kot htyk ã amnhĩ jarēnhja ma nẽ kãm: —Kwa mẽ ixte amnhĩ wỳr kamã ijamak o ixpa xwỳnhja htĩr tũm nẽ pa ho pa xwỳnh na. Tĩrtũm kapēr ã kagà htũm kot ã harēnh kot anhỳr tã ka ã ri mẽ kot apĩr nhūm atyk ã amnhĩ jarēnh anẽ. Ate Tĩrtũm kot mẽ ixwỳr amēnh xwỳnh ã amnhĩ jarēnh tã ã ri atyk ã amnhĩ jarēnh anẽ. Kwa xà apê mẽ ixte amnhĩ wỳr kamã ijamak o ixpa xwỳnh kêt? Anẽ.

³⁵Hāmri nhūm mẽ kuma nẽ amnhĩ tã mẽ kãm: —Tỳ ixpê tãm kēnã. Tã kot paj tokyx mẽ are. Jakamã kēr ka mẽ ixte arĩ mẽ akamã ixpa ri ixkôt amnhĩ xunhwỳ nẽ amnhĩ kaxyw ixkôt ajamaxpēr o ri apa. Te ixpê kanê hpôk pyræk jakamã na pa hte mẽ kãm Tĩrtũm kapēr o mẽ ahkre o ri ixpa. Nom kot paj kritpēm mẽ akôt ixpa ry hkêt nẽ. Jakamã kwa kēr ka mẽ tokyx te mẽ kot kanê hpôk nhĩrã kamã ri mẽ pa xwỳnh kot amnhĩ nhĩpêx pyrã nẽ Tĩrtũm kôt amnhĩ nhĩpêx o ri apa. Kormã mẽ akôt ixpa ri. Kot paj tokyx ma mỗ nhūm te ra kamàt kô pyræk. Na hte kamàt kô kamã mẽ pa xwỳnhjaja tee ri rĩt mex mã nom rĩt mex kêt nẽ. Nẽ mẽmoj pumunh mex kêt nẽ.

³⁶Jakamã kwa mẽ tokyx ixte arĩ mẽ akamã ixpa ri amnhĩ kaxyw inhmã ajamaxpēr nẽ ixkôt amnhĩ xunhwỳ. Te ixpê kanê hpôk nhūm kamã mẽ arĩt mex pyræk. Jao ixpyrà nẽ te mẽ apê kanê hpôk nhĩrã mex pyræk o amnhĩ nhĩpêx. Nẽ ixpyrà nẽ tãm ri amnhĩ nhĩpêx o apa. Anẽ. Nhūm pre ã mẽ kãm kapēr anẽ hāmri pa mẽ kệp ixkato nẽ ma nhãm mỗ.

Mẽ hkwỳjaja kot Jejus kôt hamaxpēr kêt ã mẽ harēnh

³⁷Na pre hte Jejus mẽ noo mã mẽ kot aa mẽmoj pumunh kêt kwỳ ho anhỳr rax o pa. Tã nom nhūm mẽ ohtô nẽ hã omu nẽ ãm hã omu nẽ kệp Tĩrtũm kot mẽ pahwỳr mẽnh xwỳnh ã hkôt hamaxpēr kêt nẽ.

³⁸Nom ra mẽ hkukamã Tĩrtũm nhỹ hã kapēr jarēnh o pa xwỳnh pê finat Ijaisja mẽ hkukamã ja hã mẽ harē nẽ hã kagà. Nẽ hã kagàja o: Pa Pahi Maati. Nà ra ixte mẽ kãm ajarēnh o ixpa ryy htã no nhūm mẽ inhma nẽ ãm inhma. Nẽ mẽ kot axihtỳx o axihtỳx ã ajarēnh mar tã no ãm ajarēnh ma nẽ amnhĩ kaxyw akôt hamaxpēr kêt nẽ. Anẽ.

³⁹Mě kām Tirtūm kapēr mar prām kêt jakamã na prem määnēn Jejus kêp Tirtūm kot mẽ pahwỳr mēnh xwỳnh hkôt hamaxpēr kêt nē. Nhũm pre finat Ijaisja axte mẽ hkukamã ja hã mẽ harē nē mẽ hã kagà. Nē hã kagà ho:

⁴⁰Na pre Tirtūmja tanhmã amnhĩ nê mẽ hkrã hto nhũm mẽ hkôt hamaxpēr kêt nē. Ra mẽ kot hihtỳx o hihtỳx ã omunh tã omu nē ãm omu. Nē mẽ kot kapēr mar tã amnhĩ tomnuj kaga hkêt nē. Nē Tirtūm kot mẽ nê mẽ kot amnhĩ tomnuj o hapêx prām xàj hkôt amnhĩ xunhwỳr kêt nē. Anē.

⁴¹Kormã Jejus mẽ hwỳr wrỳk kêt ri nhũm finat Ijaisja hpimtir kām kot amnhĩ to rax kumrêx ã omu nē hkukamã ã harēnh nē hã kagà anē.

⁴²Hāmri nhũm Ijaew krãhtūm kwỳjaja hkwỳjê rom amnhĩ kaxyw Jejus kôt hamaxpēr nē hkôt amnhĩ xunhwỳ. Tã Parijew nhõ xwỳnhjaja kot ã mẽ kot amnhĩ nhĩpêx anhỳr ã mẽ harēnh mar pymaj ja hã amnhĩ to amnhĩrīt kêt nē. Mẽ kot Tirtūm kapēr o mẽ ahkre xà hã ixkreja nê mẽ kator pymaj nhũm mẽ kām amnhĩ to amnhĩrīt kêt nē.

⁴³Na prem hamaxpēr o: —Nà kot paj ja hã amnhĩ to amnhĩrīt nhũm mẽ amnhĩ nê ixtomnuj nē. Hāmri nē amnhĩ pyrà nē axpēn mã inhmex ã ijarēnh kêt nē. Anhỳr o mẽ umaj amnhĩ kukamã hamaxpēr o pa. Nom Tirtūm tãm kot amnhĩm mẽ mex ã mẽ harēnhja nhũm mẽ hkukamã hamaxpēr kêt nē.

Jejus kot Hipêêxà nhỹ hã kapēr ã harēnh

⁴⁴Nhũm Jejus axte mẽ kām kapēr nē kỳx pê kapēr nē mẽ kām: —Nà koja mēhõ amnhĩ kaxyw ixkôt hamaxpēr hāmri nē ixkôt pix mã hamaxpēr kêt nē. Määnēn amnhĩ kaxyw kot mẽ awỳr inhmēnh xwỳnhja kôt hamaxpēr.

⁴⁵Wa ixte amnhĩ nhĩpêxja te tipxi pyràk jakamã koja mẽ tanhmã ixte amnhĩ nhĩpêx to hã ixpumu nē te kot Tirtūm kot amnhĩ nhĩpêx ã omunh pyràk.

⁴⁶—Nē te ixpê kanê hpôk nhũm inhĩrã kamã mẽ apa pyràk kaxyw na pre Inhĩpêêxà mẽ awỳr inhmē pa mẽ awỳr wrỳ. Ixte kapēr o mẽ ajahkre ho ri mẽ akôt ixpa kaxyw. Jakamã koja mēhõ amnhĩ kaxyw ixkôt hamaxpēr nē ixkôt amnhĩ xãm hāmri nē te kanê hpôk nhĩrã kamã rīt mex o pa pyràk o amnhĩ nhĩpêx. Jao amnhĩ nhĩpêx nyw o amnhĩ nhĩpêx o pa.

⁴⁷⁻⁴⁸No mẽ kot ixkapēr mar nẽ ãm mar xwỳnhjaja te mãnẽn Inhĩpêxà kapēr mar nẽ ãm mar pyràk. Mỳrapê koja mẽ nhỹrmã ma kuwy hwỳr pa nẽ mẽ kot amnhĩ tomnuj mỳrapê kamã pa ho pa. Tã no ã mẽ ate amnhĩ nhĩpêx anhỹr o ri mẽ apa kaxyw na pa pre mẽ awỳr ixwỳk kêt nẽ. Ixte mẽ ate amnhĩ tomnuj pãnhã amnhĩrer par kaxyw na pa pre mẽ awỳr wỳ.

⁴⁹—Nẽ na pa hte amnhĩ krã hkôt tanhmã ri mẽ amã ixkapēr to ho ri ixpa hkêt nẽ. ãm kot mẽ awỳr inhmẽn xwỳnhja nhỹ hã na pa hte tanhmã mẽ amã ixkapēr to ho ri mẽ akôt ixpa.

⁵⁰Tã mẽ kot Tĩrtũm kapēr mar nẽ amnhĩ kaxyw hkôt hamaxpēr xwỳnhjaja koja mẽ nhỹrmã wa ixri htĩr tũm nẽ mex nẽ pa ho pa. Jakamã na pa hte tanhmã kot inhmã karõ hto xà hkôt pix mã tanhmã mẽ amã ixkapēr to ho ri ixpa. Anẽ.

Juãw 13

Jejus kot hkwỳjê hpar kuhõnh ã harẽnh

Rukre 22.24-27

¹Tã nhũm ra Pas ã mẽ ixkĩnhta ahtêp. Pas ã na hte mẽ ixpê Ijaewjaja axpẽn wỳr akuprõ nẽ hã ôwêhti hkra nyw pa nẽ ho anẽ nẽ hkur o ixkrĩ. Amnepêm Tĩrtũm kot pika pê Ejit rũm mẽ inhĩgêxjê kator kaxyw nhũm mẽ nojarêt nẽ ã hkwỳ hpar nẽ ho anhỹr nẽ hkwy hkurta pyràk. Na prem nojarêt nẽ mẽ hkra my kot wa mẽ kêp htyk pumaj ôwêhti hkra nyw kwỳ hpa nẽ ho anẽ nẽ ĩ hku. Jakamã nhũm arĩ mẽ ixpê mẽ hkanrêhã mẽ htãmnhwỳjaja ã mẽ kot amnhĩ nhĩpêx anhỹrja mã ijamaxpēr nẽ hã ixkĩnh kaxyw mẽ uràk nẽ hkwy hpa nẽ kuku. Jakamã nhũm ra Pas ahtêp nhũm Jejus amnhĩ kukamã tanhmã hamaxpēr to kurê kumrêx. Ra ma akupỹm Hipêxà hwỳr àpir xà hã arĩgro hwỳr apkati grêre. Jakamã nhũm akupỹm nojarêt ã amnhĩ pumu nẽ kãm mẽ pahte hkôt amnhĩ xunhwỳr xwỳnhjê japê jakamã kãm mẽ pajapê rãhã mẽ panê htyk mã.

²Tã nhũm myt axà pa mẽ Pas ã ixàpkur o ixkrĩ. Nhũm Simãw Kariot kra Jut Kariotja mãnẽn mẽ ixkutã apkur o nhỹ. Kêp mẽ ixkwỳ htã nhũm pre

Satanasti tanhmã hkrã hto nhũm ra axtem nẽ kot mẽ kãm Jejus kurê xwỳnhjê nhĩhkram haxàr kaxyw.

³⁻⁴Tã pa mẽ kormã axpẽn kutã ixàpkur kaxyw ixkrĩ hpa nhũm Jejus kànhmã xa nẽ hinòkà kapa nẽ toajti py nẽ ho amnhĩ krax pre. Kot amnhĩ to rax ã amnhĩ pumunh tã ja hã amnhĩ to jarkrar pê tanhmã ri mẽ inhnoo mã amnhĩ nhĩpêx to ho pa hkêt. Kêp mẽ inhõ pahi htã te kêp mẽ inhmã àpênh xwỳnh pyràk o amnhĩ nhĩpêx o pa.

⁵Jakamã toajti py nẽ ho amnhĩ krax pre nẽ pasiiti hõ py nẽ kamã gô hkwy ru nẽ ho mẽ ixpar kuhõ nẽ toajti o mẽ ixpar grà ho mõi.

⁶Ã mẽ inhĩpêx anhỹr o mõi. Pê ra hpãnhã Simãw Pêtre hpar kuhõnh kaxyw nhũm tee ri amnhĩ tã omu nẽ kãm: —Tk. Kwa apê inhmã axàpênh xwỳnh kêt kênã kot ka kêt ri axtem nẽ ixpar kuhõ Pahihti. Apê mẽ inhõ Pahi kênã kot ka kêt ã mẽ inhĩpêx anẽ. Anẽ.

⁷Hãmri nhũm kãm: —Kwa nà. Kormã ate ja hã amnhĩ tã ixpumunh mex kêt. Nom kot kaj nhỹrmã aprĩ hã amnhĩ tã ixpumu. Anẽ.

⁸Hãmri nhũm kãm: —Nà nom kot kaj ãm ixpar kuhõnh kêt nẽ. Kwarĩ. Anẽ. Hãmri nhũm Jejus kãm: —Tõe. Kot paj apar kuhõnh kêt nẽ ka te apê ixkwỳ hkêt pyràk. Anẽ.

⁹Hãmri nhũm tee ri kuma nẽ kãm: —Tõe mamrĩ ixpar kuhõ. Nom ixpar pix kuhõnh kêt nẽ. Määnẽn inhĩhkra kuhõ nẽ ixkuk kuhõ. Inhmã ixte apyràk prãm tỳx kumrêx kênã. Anẽ.

¹⁰Hãmri nhũm Jejus kãm: —Nà amỹkry hkôt mẽ wỳr xwỳnhjaja na htem mex nẽ axte wỳr kêt rãhã hikwỹ. Na htem ãm amnhĩ par pix kuhõ nẽ hikwỹ. Ja pyrà nẽ Tĩrtũm kot mẽ anê mẽ ate amnhĩ tomnuj ho hapêx par xwỳnhjaja te amỹkry hwỳr mẽ axwỳr nẽ amex pyràk. Ka mẽ te mẽ kot amnhĩ par pix kuhõnh ta pyrà nẽ axte tanhmã amnhĩ tomnuj to hãmri nẽ Tĩrtũm mã amnhĩ jarênh kurê kumrêx kê anê amnhĩ katut kôt ate amnhĩ tomnujta mẽ nẽ ho hapêx. Na pre ra mẽ anê mẽ ate amnhĩ tomnuj o hapêx. No ãm mẽ apiitã

hkêt. Ota arĩ mẽ anhiõja pyxire nẽ arĩ amnhĩ tomnuj rãhã ri pa. Jakamã te wỳr kêt nẽ arĩ grã htyk rax kãm ri pa pyràk. Anẽ.

11Nhũm pre ã Jejus mẽ inhmã kapẽr anẽ. Ra kot hprĩ hã mẽ kot kãm hkurê xwỳnhjê mã òr mã xwỳnhja pumunh jakamã te wỳr kêt nẽ arĩ grã htyk rax kãm ri pa pyràk ã ã harẽnh anẽ.

12Tã mẽ ixpar kuhõnh pa nẽ akupỹm hinòkà py nẽ haxà nẽ nhỹ hãmri nẽ mẽ inhmã: —E mẽmo kaxyw na pa we ã mẽ apar kuhõnh anẽ? Kot paj ixprĩ hã mẽ amã amnhĩ jarẽ ka mẽ inhma.

13-14Na ka htem ixto “mẽ ijahkre xwỳnh” nẽ ixto “pahihti” anhỹr o ijarẽnh o ri apa. ãm hãmri na ka htem ã axpẽn mã ijarẽnh anẽ. Ixpê mẽ ajahkre xwỳnh nẽ mããnẽn ixpê mẽ anhõ pahihti htã inhmã mẽ ate tanhmã axpẽn nhĩpêx to ho apa hprãm xàj na pa ã mẽ apar kuhõnh anẽ. Tã kêt ka mẽ ixpyrà nẽ tanhmã axpẽn to mex to ho ri apa.

15Jao amnhĩ kuxwar axpẽn to mex pê mẽmoj to axpẽn kutã anojarêt rãhã ho ri apa.

16Kwa mẽ ixkapẽr ma nẽ kãm amnhĩ krãm haxàr tỳx rãhã ho ri apa. Mẽ ate amnhĩ to rax o ijakrenh kêt. Te ixpê mẽ anhõ patrãw nhũm mẽ ate inhmã tanhmã amnhĩ nhĩpêx to ho apa xwỳnh pyràk. Nẽ te ixte mẽmoj tã mẽ amã karõ nhũm mẽ ate inhmar nẽ inhmã tanhmã mẽmoj nhĩpêx to pyràk. Tã te ixpê mẽ anhõ patrãw pyràk tã pa ã mẽ apar kuhõnh anẽ. Ka mẽ amnhĩ tã ixpumu hãmri nẽ amnhĩ xwar tanhmã axpẽn to ajuta hto ho ri apa. No ri axpẽn pumu nẽ ajamaxpẽr o: “Tk. Nà ixte amnhĩ to rax o hakrenh kênã kot pa kêt ri tanhmã ho ajuta hto. Kê tãm mãn pa ixto ajuta.” Anhỹr o ajamaxpẽr o ri apa hkêt nẽ.

17—E na pa ã mẽ amã ixujarẽnh anẽ. Kot kaj mẽ inhma nẽ ixujarẽnh kôt ã axpẽn nhĩpêx anhỹr o ri apa. Hã kot kaj mẽ akĩnh nẽ ri apa. Anẽ.

Jejus kot amnhĩ tã hã àmnênh xwỳnh o amnhĩrĩt ã harẽnh

Matêwre 26.20-25; Makre 14.17-21; Rukre 22.21-23

18Nhũm Jejus arĩ mẽ inhmã kapẽr nẽ mẽ inhmã: —Kot kaj mẽ apiitã mẽ akĩnh nẽ apa hkêt nẽ. Ixte mẽ arênh xwỳnhjaja mẽ apiitã mẽ apumunh mex.

Jakamã na pa Tĩrtũm kot mẽ apiitã mẽ ate amnhĩ tomnuj o hapêx par kêt ã mẽ anhĩõja jarẽ. Tĩrtũm kapêr ã kagà htũm kot harẽnh kot: Ixkutã apkur o ÿr xwỳnhjê hõ koja axtem nẽ mẽ kot kãm ixkurê xwỳnhjê nhĩhkram ijaxà. Kêp ixkõt pa ho pa xwỳnh tã koja axtem nẽ ã inhĩpêx anẽ. Anhỹr o kot harẽnh. Tã koja tokyx ã inhĩpêx anẽ.

¹⁹Nom kormã kot ã inhĩpêx anhỹr kêt ri na pa hkukamã mẽ amã harẽ. Jakamã koja ã inhĩpêx anẽ ka mẽ ja hã ixpumu nẽ ra ixte amnhĩ kukamã mẽ amã amnhĩ jarẽnhta mã ajamaxpêr nẽ ixpê Tĩrtũm rũm mẽ awỳr ixwryk xwỳnh kõt ajamaxpêr tỳx kurê kumrẽx.

²⁰—Kwa mẽ ixkapêr ma nẽ amnhĩ krã kamã kãm ajamaxpêr tỳx o ri apa. Koja mẽhõ ixte mẽ hwỳr mẽ arẽnh xwỳnhjê hã tanhmã mẽ ato mex to. Hãmri nẽ te pa kot tanhmã ixto mex to pyræk. Nẽ koja mẽhõ tanhmã pa ixto mex to nẽ mãänẽn te kot mẽ awỳr inhmẽnh xwỳnhhta tanhmã ho mex to pyræk. Anẽ.

²¹Nhũm pre ã Jejus mẽ inhmã kapêr anẽ. Hãmri nẽ tee ri amnhĩ kukamã hamaxpêr nẽ hkaprĩ nẽ mẽ inhmã: —Hêxta waa nẽ. Nà kot kaj mẽ atõ mẽ kot kãm ixkurê xwỳnhjê nhĩhkram ijaxà. Kwa mẽ amnhĩ krã kamã ixkapêrja mã ajamaxpêr tỳx nẽ. Anẽ.

²²Hãmri pa mẽ amnhĩ tã kuma nẽ tee ri axpẽn pumunh o ixkrĩ.

²³Ixpê Juãw na pa pre ixpê Jejus kràmnhwỳ mex ã ìhkô hã ixàpkur o inhỹr

²⁴nhũm Simãw Pêtreja ixpumu nẽ inhmã nomgõr nẽ kawax pê inhmã: —Kwa mẽ pahtõ nhĩxi hã hkukja nà? Anẽ.

²⁵Hãmri pa kuma nẽ Jejus mã kãm: —Kwa Pahihti. Mẽ ixtõ koja we ã anhĩpêx anẽ? Anẽ.

²⁶Hãmri nhũm mẽ inhmã: —Nà kot paj pãwti hõ py nẽ guhkrax kãm ho mry kagô nhek nẽ kot mẽ ìhkram ijaxàr mã xwỳnhhta mã kugõ ka mẽ hkõt omu. Anẽ. Hãmri nẽ kupy nẽ ho mry kagô nhek nẽ Simãw Kariot kra Jut Kariotja mã kugõ nhũm kupy.

27Pyrja kôt nhům Satanasti tanhmã hkrã hto. Hãmri nhům Jejus te kot kãm amnhĩ to nojarêt pyræk o amnhĩ tã kãm kapêr nê kãm: —E kwa tokyx nã. Anê.

28-30Hãmri nhům kuma nê kato nê ma kamàt kô kamã htêm kurê kumrêx. Hãmri pa mẽ ixàpkur o ixkrĩ xwỳnhjaja Jejus kot ã kãm kapêr anhỹrja ã kuma nê tee ri hkukamã ijamaxpêr. Hãmri nê kot ma mẽ hkĩnh ã mẽõ hkwỳ japrôr kaxyw ma htêm ã hkamnhĩx. Nhům mẽ ixkwỳjaja axtem Jejus kot mẽ kêp amrakati xwỳnhjê mã mẽmoj nhõr ã kãm karõ nhům ma mẽ hwỳr htêm ã hkamnhĩx. Kêp mẽ inhmã mẽ ixkàxpore jamãr o pa xwỳnh jakamã pa mẽ ã ixtỳx mẽmoj tã hkamnhĩx anê.

Jejus akupỹm nojarêt nê mẽ kãm mẽmoj tã karõ hã harênh

Matêwre 22.39-40; mãänên Wam Juãw 3.11-24

31-32Hãmri nhům Jejus mẽ inhmã: —Nà kot kaj mẽ tokyx mẽmoj pumu nê Tĩrtũm mã mex o mex ã harê nê ijaxwỳja inhmã inhmex o inhmex ã ijarê. Kot kaj mẽ tokyx mẽmojta pumu kãm ga.

33—Te mẽ apê ixkra pyræk tã kot paj arĩ ri mẽ akôt ixpa grire hãmri nê ma akupỹm api. Kot kaj mẽ tee ri jar ijarê o ri apa nom nhỹri ixpumunh kêt nê. Nê kormã tokyx ma ixkôt apa hkêt nê.

34—E kot paj axte mẽ amã mẽmoj tã karõ. Kormã ixte mẽ amã ja hã karõ hkêt. Kêr ka mẽ amã axpên kĩnh o ri apa. Te pa inhmã mẽ ajapê pyræk o axpên nhĩpêx rãhã ho ri apa.

35Kot kaj mẽ ã amnhĩ nhĩpêx anê nhům mẽ akwỳjaja ja hã mẽ apumu nê mẽ apê ixkwỳ hã mẽ apumunh kurê kumrêx. Anê.

Simãw Pêtre kot Jejus ã amnhĩ to hêx kukamã harênh

Matêwre 26.31-35; Makre 14.27-31; Rukre 22.31-34

36Nhům Jejus ã kot mẽ ixrer nê ma nhỹhỹm mõi ã amnhĩ jarênh anê hãmri nhům Simãw Pêtre tee ri kot amnhĩ jarênh ma nê kãm: —Kwa Pahiti. Nhỹhỹm kot kaj kêt mõi pa mẽ akôt ixpa hkêt nê? Anê. Hãmri nhům kãm: —Nà ma inhmõi xàta wỳr kot kaj mẽ kormã ma ixkôt apa hkêt nê. Nom kot kaj mẽ nhỹrmã ma ixkôt apa. Anê.

³⁷Hāmri nhūm Simāw Pêtre kām: —Kwa mo kot pa mẽ omu nẽ tokyx ma akôt inhm̄rar kêt nẽ? Inhm̄ã akôt ixtyk pyma hkêt kênã. Kwār mẽ māmri atã ixpĩ. Inhm̄ã ajapê htỳx kumrêx kênã. Anẽ.

³⁸Hāmri nhūm Jejus kām: —Xà ãm hāmri na ka ã inhm̄ã amnhĩ jarēnh anẽ Simāw Pêtre? Xà amã ixkôt atyk pyma hkêt? Kwa o kora. Koja apkati hkôt krāhyre hkàr kêt ri ka ra mẽ umaj ate ixkôt apa hkêt ã amnhĩ tã axàprār o axkrunēpxi kām ga. Kwa amnhĩ krã kamã ixkapērja mã ajamaxpēr tỳx nẽ. Anẽ.

Juãw 14

Jejus kot Tĩrtũm nhõ krĩ jarēnh

Eprêw 11.16

¹Nhūm Jejus arĩ mẽ inhm̄ã kapēr nẽ mẽ inhm̄ã: —Kwa ã ixte mẽ amã amnhĩ jarēnh anhỹrja ma nẽ tee ri amnhĩ kukamã ajamaxpēr nẽ akaprĩ hkêt nẽ. Arĩ amnhĩ kaxyw Tĩrtũm mẽ wa inhm̄ã ajamaxpēr tỳx rãhã ho ri apa.

²Inhĩpêêxà nhõ krĩ kamã ixkre xohtôô. ãm hāmri na pa ã mẽ amã harēnh anẽ. Tã kot paj ma akupỹm hwỳr api nẽ mẽ akutêp mã amã mẽ anhõrkwỳ ho mex.

³Hāmri nẽ ho mex pa nẽ rĩ man akupỹn mẽ awỳr wrỳ. Hāmri nẽ ma akupỹm amnhĩ kôt mẽ ato ixàpir pa ka mẽ Tĩrtũm mẽ wa ixkôt apa rãhã apa ho apa. Jakamã kwa mẽ ri akaprĩ nẽ apa hkêt nẽ. Anẽ.

Jejus te kêp Tĩrtũm wỳr pry pyræk

Epes 2.18

⁴—Nẽ ma nhỹhỹm inhm̄õr xàta ra mẽ ate harēnh mar mex. Nẽ hwỳr pryja mããnēn mẽ ate harēnh mar mex. Anẽ.

⁵Hāmri nhūm Tomas tee ri kuma nẽ kām: —Kwa mẽ ixte nhỹhỹm amõr xàta pumunhre hã kot pa kêt mẽ hwỳr pryja pumu. Anẽ.

⁶Hāmri nhūm kām: —Kwa paa. Te ixpê Inhĩpêêxà hwỳr pry pyræk. Na htem amnhĩ kaxyw inhm̄ã hamaxpēr nẽ ixkôt amnhĩ xunhwỳ hāmri nẽ nhỹmã ixkukwak ri pix mã ma Inhĩpêêxà mẽ wa inhõ krĩ hwỳr api. Ixkukwak ri pix

mã na htem hprĩ hã Tirtũm kapër ma. Nẽ ixkukwak ri pix mã na htem wa ixri htĩr tũm nẽ pa ho pa.

⁷Kot kaj mẽ aprĩ hã ixpumu nẽ mããnẽn te aprĩ hã Inhĩpêêxà pumunh pyræk. Tã ra mẽ ate tanhmã ixte amnhĩ nhĩpêx to hã ixpumunh mex jakamã mããnẽn te ra mẽ ate Inhĩpêêxà kot amnhĩ nhĩpêx ã omunh mex pyræk. Anẽ.

Jejus mẽ Tirtũm wa kot amnhĩ nhĩpêx tipxi hã wa harẽnh

Juãw 1.1; 10.30; Piripos 2.6; Korosẽ 2.9

⁸Nhũm Jejus ã mẽ inhmã kapër anẽ nhũm Firipti kuma nẽ kãm: —Kwa nom mẽ inhmã inhno ho Anhĩpêêxà pumunh prãm. Kot pa mẽ omu nẽ ixkĩnh tỳx kumrẽx. Anẽ.

⁹Hãmri nhũm Jejus kãm: —Kwa na pa pre ra mẽ akõt ri ixpa ryy nẽ. Ka mẽ aprĩ hã ixpumunh mex nẽ. Kêt ra mẽ kot ixpumunh mex xwỳnhjaja te mẽ kot mããnẽn Inhĩpêêxàja no ho omunh mex pyræk.

¹⁰Wa ixte amnhĩ nhĩpêxja ãm tipxi. Xà ate kormã amnhĩ krã hi mã ixkapër jaxàr tỳx kêt? Inhĩpêêxà mẽ wa ixte amnhĩ nhĩpêxja ãm tipxi. Nẽ kot axpẽn pyræk. Jakamã na pa hte amnhĩ krã hkõt ri tanhmã amnhĩ nhĩpêx to ho ri ixpa hkêt nẽ. ãm Inhĩpêêxà nhỹ hã na pa hte ri tanhmã mẽ amã ixkapër to ho ri ixpa. Nẽ hihtỳx xà ho tanhmã amnhĩ nhĩpêx to ho ri ixpa. Ka mẽ ja hã ixpumu nẽ te ano ho Inhĩpêêxà pumunh pyræk.

¹¹Kwa mẽ ixkapër ma nẽ hkõt ajamaxpër tỳx nẽ. Inhĩpêêxà mẽ wa ixte amnhĩ nhĩpêxja ãm tipxi. Nẽ kot axpẽn pyræk. Rỳ ka mẽ tee ri ja kukamã ajamaxpër japêr hãmri nẽ ixte aa mẽ ate mẽmoj pumunh kêt kwỳ ho anhỹr ã mãn ixpumu nẽ ja hã wa ixte amnhĩ nhĩpêx tipxi kõt ajamaxpër.

¹²—Kwa mẽ ixkapër ma nẽ amnhĩ krã kamã amnhĩ krãm haxàr tỳx nẽ. Mẽ ate amnhĩ kaxyw ixkõt ajamaxpër xwỳnhjaja kot kaj mẽ ixte tanhmã amnhĩ nhĩpêx to ho ixpa hã ixpumu nẽ ixkõt ã amnhĩ nhĩpêx anhỹr o ri apa. Kot paj akupỹm Inhĩpêêxà hwỳr api nẽ kuri ixpa ho ixpa. Ka mẽ ixwakre kamã ixihtỳx xà ho tanhmã mẽ akwỳjê mã amnhĩ nhĩpêx to ho ri apa.

13—Ně kot kaj mẽ apê ixkwỳ hã tanhmã mẽmoj tã ixwỳr to pa mẽ ama mẽ mẽ amã tanhmã mẽmoj nhĩpêx to. Mẽ kot omunh mẽ Inhiĩpêxà mex o mex ã omunh kurê kumrêx kaxyw.

14Nà kot kaj mẽ apê ixkwỳ hã mẽmoj tã ixwỳ pa mẽ ama mẽ mẽ amã tanhmã mẽmoj to. Anẽ.

Jejus kot mẽ pahwỳr Tĩrtũm mẽ wa Karõ rênh ã kot amnhĩ jarênh

Juãw 7.37-39; 16.7-17; Atre 2.1-4; mããnên Rõmãn 5.5; Wam Korĩt 12.7-11; Epes 3.16; Wam Juãw 2.27

15Nhũm Jejus arĩ mẽ inhmã kapêr mẽ mẽ inhmã: —Nà kot kaj mẽ amã ixkĩnh hã kot kaj mẽ ixkapêr kôt pix mã ri amnhĩ nhĩpêx rãhã ho ri apa.

16—Kot paj akupỹm kaxkwa hwỳr api hãmri mẽ mẽ ato Inhiĩpêxà wỳ nhũm inhma mẽ mẽ awỳr kot mẽ ato ajuta xwỳnh maatita rẽ nhũm man mẽ awỳr wrỳ mẽ mẽ akaxwỳnh mã agjê. Hãmri mẽ mẽ akôt tanhmã mẽ ato ajuta hto ho pa rãhã ho pa.

17Wa Ixkarõ koja mẽ awỳr kurẽ nhũm mẽ amã agjê. Hãmri mẽ hprĩ hã mẽ amã Tĩrtũm kapêr o amnhĩrĩt o mẽ akôt pa ka mẽ aprĩ hã mar mẽ mẽ. No mẽ kêp Tĩrtũm kra hkêt xwỳnhjaja koja hprĩ hã wa Ixkarõ jarênh mar kêt mẽ. Mẽ kot wa ixkôt amnhĩ xunhwỳr kêt jakamã koja mẽ hkarõ mã gjêx kêt mẽ. ãm mẽ ate ixkôt amnhĩ nhĩpêx o apa xwỳnhjê pix wỳr koja wrỳ mẽ mẽ awỳr agjê mẽ mẽ akamã pa ho pa.

18—Ně ixte mẽ arer mẽ ma inhmõr mã tã kot kaj mẽ te mẽ hã awrãre pyrà mẽ ahte atỳx ri apa pyrãk kêt mẽ. Kot paj te pa akupỹn mẽ awỳr ixwrỳk pyrà mẽ mẽ awỳr wa Ixkarõ rẽ nhũm mẽ akãm agjê mẽ mẽ akamã pa ho pa.

19—Ně koja tokyx mẽ kot amnhĩ kaxyw Tĩrtũm mã hamaxpêr kêt xwỳnhjaja axte ixpumunh kêt mẽ. No mẽ papajaja kot puj mẽ tokyx axte nhỹri axpên pumu. —Ně kot paj akupỹm ixtĩr hãmri mẽ ixtĩr tũm mẽ ixpa ho ixpa ka mẽ ixkukwak ri ajaxwỳja nhỹrmã Tĩrtũm mẽ wa ixri atĩr tũm mẽ apa ho apa.

20—Tã koja wa Ixkarõ mẽ awỳr wrỳ mẽ mẽ akarõ mã agjê ka mẽ aprĩ hã Tĩrtũm mẽ wa ixte amnhĩ nhĩpêx ã wa ixpumunh mẽ mẽ kurê kumrêx. Te wa ixte amnhĩ nhĩpêx tipxi pyrãk o ka mẽ hã wa ixpumu. Nẽ mããnên mẽ

papajaja te ra mẽ pahtipxi nẽ ri mẽ papa pyræk ka mẽ hã amnhĩ pumunh mex kurê kumrẽx.

21—Nẽ mẽ kãm ixkĩnh xwỳnhjaja na htem ixkapěr ma nẽ hkõt amnhĩ nhĩpêx o pa. Jakamã nhũm Tĩrtũm ixtã mẽ omu nẽ kãm mẽ hapê htỳx nẽ. Pa mããnẽn amnhĩ tã mẽ omu nẽ inhmã mẽ hapê htỳx nẽ. Jakamã kot paj mẽ kãm amnhĩ to amnhĩrĩt nhũm te mẽ kot no ho ixpumunh pyræk. Anẽ. Nhũm pre ã Jejus hkõt mẽ ixpa ho mẽ ixpa xwỳnhjê mã amnhĩ jarẽn anẽ.

22Hãmri nhũm Jutre hõja. Jut Kariot kêt axtem Jutre hõja Jejus axte kot mẽ inhmã pix mã kot amnhĩ to amnhĩrĩt ã harẽnhja ma nẽ kãm: —Kwa aprĩ hã mẽ inhmã mẽmoj jarẽ mẽ ijahkre xwỳnh. Mon ka mẽ kêp akwỳ hkêt xwỳnhjê mã axte amnhĩ to amnhĩrĩt kêt ã amnhĩ jarẽ? Nẽ ãm mẽ papxipix mã amnhĩ to amnhĩrĩt ã amnhĩ jarẽ? Anẽ.

23Hãmri nhũm kãm: —Nà mẽ amã ixkĩnh xwỳnhjaja na ka htem ixkapěr ma nẽ hkõt amnhĩ nhĩpêx. Nhũm Inhĩpêêxà ja hã mẽ apumu nẽ ixtã kãm mẽ ajapê htỳx nẽ. Hãmri pa wa mẽ akõt ixpa ho ixpa. Jao mẽ amã amnhĩ to amnhĩrĩt mex o ixpa.

24Na pa hte amnhĩ krã hkõt ri mẽ kãm ixkapěr o ixpa hkêt nẽ. ãm Inhĩpêêxà nhỹ hã na pa hte mẽ kãm ixkapěr o ri ixpa. Kot mẽ awỳr inhmẽn xwỳnhhta nhỹ hã. Tã nhũm mẽ kãm inhmar prãm kêt jakamã na pa hte wa mẽ kãm mẽ apyrà nẽ amnhĩ to amnhĩrĩt o ixpa hkêt nẽ.

25—E na pa kormã ixte mẽ akõt ri ixpa ri ã mẽ amã amnhĩ jarẽn anẽ.

26Tã koja Inhĩpêêxà ixpãnhã mẽ awỳr wa Ixkarõ rẽ. Ixte hã mẽ amã ixàhwỳr xà hkõt. Hãmri nhũm man mẽ awỳr wrỳ nẽ mẽ akaxwỳnh mã agjê nẽ mẽ akõt ri tanhmã mẽ ato ajuta hto ho pa. Nẽ ra ixte ã mẽ amã ixkapěr anhỹrja koja hprĩ hã mẽ amã ho amnhĩrĩt mex nẽ. Ka mẽ amnhĩ krã kamã kãm ajamaxpěr nẽ hã ano htỳx nẽ ho apa. Anẽ.

Jejus kêp mẽ pajamakêtkati nhõr xwỳnh

Rômãn 5.1; Karatas 5.22; Piripos 4.7; Korosẽ 3.15

27Nhũm Jejus arĩ mẽ inhmã kapěr nẽ mẽ inhmã: —Nẽ mẽ kêp ixkwỳ hkêt xwỳnhjaja na htem tee ri amnhĩ kukamã hamaxpěr o ri pa. Jao hkaprĩ nẽ

pa. No pa na pa hte mẽ kurom ijamakêtkati nê ixkĩnh nê ri ixpa ho ixpa. Tã kot paj tanhmã mẽ ato ka mẽ ixpyrà nê ajamakêtkati nê axàmnhĩx akĩnh nê ri apa. Jakamã kwa mẽ ixte amnhĩ jarẽnh ma nê tee ri amnhĩ kukamã ajamaxpêr o amã ma ho ri apa hkêť nê.

28—Na pa pre ra mẽ amã ma ixàpir nê nhỹrmã man akupỹn mẽ awỳr ixwỳk ã mẽ amã amnhĩ jarẽ. Tã na pa ra ma akupỹm Inhĩpêêxà hwỳr ixàpir mã. Kot amnhĩ to rax o kot ijakrenh. Kot paj akupỹm hwỳr api nê kuri inhmex nê ixpa ho ixpa. Tã ka mẽ amã ixkĩnh hã kot kaj mẽ ma akupỹm hwỳr ixàpir ã ijarẽnh ma nê inhỹ hã akĩnh nê.

29—Kormã ma akupỹm ixàpir kêt ri na pa ã mẽ amã amnhĩ kukamã amnhĩ jarẽnh anê. Kêr pa mẽmo arĩgro hã ma akupỹm api ka mẽ ja hã ixpumu nê ajamaxpêr o: “Nà ãm hãmri na pre mẽ inhmã amnhĩ kukamã akupỹm Hipêêxà hwỳr àpir ã amnhĩ jarẽ.” Anhỹr o ajamaxpêr. Jao ixkôt ajamaxpêr tỳx rãhã ho ri apa.

30—Kot paj tokyx axte tanhmã mẽ amã ixkapêr to hkêť nê. Mẽ kêp ixkwỳ hkêť xwỳnhjê nhõ pahihiti Satanastija na ra kot tanhmã ixto kaxyw. Nom koja tee ri tanhmã kãm ixto hprãm kaprỳ. Kurom ixihtỳx o ixihtỳx o ixte hakrenh par jakamã koja tanhmã ixto hkêť nê.

31Kwãr kãm tanhmã ixto hprãm xà hkôt tanhmã ixto pa omu. Inhmã Inhĩpêêxà hkôt ixte amnhĩ nhĩpêx prãm jakamã kot paj jahti mã arĩ xa nhũm te tanhmã kot ixto pyràk o inhĩpêx nom tanhmã ixto hkêť nê. Mẽ ate inhmã Inhĩpêêxà japê htỳx ã ixpumunh kaxyw kot paj ã mẽ anoo mã amnhĩ nhĩpêx anê. Nê mẽ ate ixte kãm tanhmã amnhĩ nhĩpêx to ho ri ixpa rãhã mẽ kot ixpĩr ã ixpumunh kaxyw. E hãmri. Ma pu mẽ mỗ nê amnhĩ to Tĩrtũm wỳ. Anê. Nhũm pre ã Jejus hkôt mẽ ixpa ho mẽ ixpa xwỳnhjê mã kapêr anê. Pa mẽ kuma nê kànhmã ixkuhê nê inhnojarêť nhũm axte mẽ inhmã awjarẽ.

Juãw 15

Jejus te kêp mẽmo krô pyràk

Karatas 2.20; Wam Juãw 2.28

¹Nhũm Jejus arĩ mẽ inhmã kapër nẽ mẽ inhmã: —Nà te ixpê mẽmo pĩ pẽ “uwa” anhỹr xwỳnhhta kahkô maati pyràk. Nẽ Inhĩpêxàja te kot uwa hkre nẽ hamãr o pa xwỳnhhta pyràk.

²Nẽ mẽ kot ixkôt amnhĩ xunhwỳr xwỳnhjaja te mẽ kot uwa kahkô rũm krô pyràk. Na hte mẽ hkwỳjaja htỳx ri kêp ixkwỳ hã amnhĩ jarẽnh ã amnhĩ to hêx. Jao te kot krôja rã htã ô hkêt pyràk. Kojã rã htã ô hkêt nẽ nhũm kot hamãr xwỳnhja tee ri omu nẽ kahkô nê krãhta nẽ kumẽ. No kojã ô mex nẽ nhũm omu nẽ hkĩnh nẽ. Hãmri nẽ rã nẽ ô rax kaxyw tanhmã ho mex to. Tã na hte Tĩrtũm uwa krô jamãr xwỳnhhta pyrã nẽ ã mẽ ate ixkôt amnhĩ xunhwỳr xwỳnhjê nhĩpêx anẽ.

³No mẽ kajaja na ka prem mẽ kot ixkwỳ hã amnhĩ to hêx xwỳnhjê rom ixkapër mar tỳx nẽ. Nẽ amnhĩ kaxyw inhmã ajamaxpër nẽ ixkôt amnhĩ nhĩpêx mex o apa. Jao te mẽ ate krô rã nẽ ô rũnh pyràk o amnhĩ nhĩpêx.

⁴—Na hte krôja amnhĩ krã hkôt ô hkêt nẽ. ãm kahkô pix kukwak ri na hte rã nẽ ô. Ja pyrã nẽ kot kaj mẽ ixkukwak ri pix mã inhmã hprãm xà hkôt ri tanhmã amnhĩ nhĩpêx to ho apa. Jakamã kwa kêt ka mẽ ixkapër pix mãn mar o apa pa mẽ akôt ixpa ho ixpa.

⁵Te ixpê kahkô nhũm te mẽ apê krô pyràk jakamã kot kaj mẽ inhmã hprãm xà hkôt tanhmã amnhĩ nhĩpêx to ho ri apa nẽ te krô rã nẽ ô rũnh pyràk o amnhĩ nhĩpêx. No kot kaj mẽ amnhĩ krã hkôt ri amnhĩ nhĩpêx o ri apa nẽ te krô grà nẽ ô hkêt pyràk o amnhĩ nhĩpêx.

⁶Na hte uwa krô nhõ dõnja nhỹri hã krô grà pumu hãmri nẽ kahkô nê hakà nẽ ma o mra nẽ kuwy kamã kurẽ nẽ ho hxêt pa. Ja pyrã nẽ mẽ kot htỳx ri ixkôt amnhĩ xunhwỳr ã amnhĩ jarẽnh xwỳnhjaja kojã mẽ nhỹrmã amnhĩ xà htỳx kamã hamak rãhã ho pa.

⁷—Tã no mẽ kajaja. Kêt ka mẽ ixkapër kôt pix mã amnhĩ nhĩpêx rãhã ho ri apa. Te mẽ pahtipxi nẽ ri papa pyràk o amnhĩ nhĩpêx. Hãmri nẽ mãmri amã hprãm xà hkôt mẽmoj tã Tĩrtũm wỳ nhũm ama nẽ amã mẽmoj tã ate hwỳr xàta kôt kugõ.

⁸Kot kaj mẽ Inhĩpêêxà mẽ wa ixkapêr kôt amnhĩ nhĩpêx o ri apa nhũm mẽ piitã ja hã mẽ apumu nê hamaxpêr o: “Hêxta waa nê. Jajaja na htem Tĩrtũm kot amnhĩ nhĩpêx o amnhĩ nhĩpêx o pa. Mãn Tĩrtũmja mex o mex.” Anhỹr o hamaxpêr.

⁹—Nê na pa hte Inhĩpêêxà kãm ijapê pyræk o inhmã mẽ ajapê nê. Tã kêr ka mẽ amarĩ inhmã mẽ ajapê hã ri ixkôt amnhĩ nhĩpêx mex o apa.

¹⁰Na pa hte ãm Inhĩpêêxà kapêr kôt pix mã ri amnhĩ nhĩpêx o ri ixpa. Jakamã na pa hte kãm ijapê hã ixkĩnh nê ri ixpa. Tã kêr ka mẽ ixpyrà nê ixkapêr kôt pix mã tanhmã amnhĩ nhĩpêx to ho ri apa. Nê ixpyrà nê inhmã mẽ ajapê hã amnhĩ pumu nê akĩnh nê ri apa.

¹¹—E na pa ã mẽ amã ixkapêr anê. Mẽ ate inhmar nê ixpyrà nê axàmnhĩx ajamakêtkati nê akĩnh nê ri apa kaxyw. Tã kêr ka mẽ ã amnhĩ nhĩpêx anê nê te pa ixte ã amnhĩ nhĩpêx anhỹr pyræk. Anê.

Jejus kot mẽ pamã axpên kĩnh tỳx ã mẽ pamã karõ

¹²Nhũm Jejus arĩ mẽ inhmã kapêr nê mẽ inhmã: —E kêr ka mẽ te inhmã mẽ ajapê pyræk o mẽ amã axpên japê ho mẽ amã axpên kĩnh o ri apa. Jao axpên to mex o ri axpên kôt apa.

¹³Koja mẽhõ kãm hkràmnhwỳ japê htỳx nê nhũm ra mẽhõ mẽmo mỳrapê kot kêp hpĩr mã nhũm tee ri hã omu nê nê kãm amnhĩ mẽ nhũm kupĩ. Hãmri nhũm mẽ ja hã omu nê kãm hkràmnhwỳ japê htỳx ã nê htyk ã axpên mã harê.

¹⁴⁻¹⁵—E kot paj axte mẽ apê inhmã mẽ axapênh xwỳnh ã mẽ ajarênh kêt nê. Na hte mẽ õ patrãwjaja hprĩ hã kãm mẽ apênh xwỳnhjê mã amnhĩ jarênh kêt nê. Na htem ãm mẽ apênh pix ã mẽ kurê. Nom mẽ kajaja mẽ ate ixkapêr mar nê hkôt pix mã amnhĩ nhĩpêx jakamã kot paj hpãnhã mẽ apê ixkràmnhwỳ hã mẽ ajarê. Na htem axpên to hkràmnhwỳ nê ma nhỹhỹm pa kaxyw nê tanhmã amnhĩ kukamã hkràmnhwỳ mã amnhĩ jarênh to. Tã mẽ apê ixkràmnhwỳ jakamã na pa hte ã amnhĩ kukamã mẽ amã amnhĩ jarênh

aně. Nom ja pix jarēnh kêt nē. Na pa hte mǎānēn Inhīpêêxà xô ri mē amǎ mēmoj piitǎ ho amnhīrīt o mē akôt ixpa.

16—Nē mē kajaja na ka prem ixpê mē akràmnhwỳ kaxyw ixām kêt nē. Pa na pa pre amnhī kaxyw inhmǎ mē aprām. Ixkapēr kôt pix mǎ ri mē ate tanhmǎ amnhī nhīpêx to ho apa kaxyw. Te uwa krô ô rǔnh nē aa grà hkêeta pyrāk. Jakamǎ kot kaj mē mēmoj tǎ Inhīpêêxà wỳ nhǔm mē ama nē mē ate mēmoj tǎ hwỳr xà hkôt amǎ kugō.

17—E. Kwa kêr ka mē amǎ axpēn kǐnh nē tanhmǎ axpēn to ajuta hto ho axpēn mǎ mēmoj kutǎ anojarēt pix o mǎn kêt ri apa. Nà ja na kêt inhmǎ hprām. Aně.

Mē kot Jejus kwỳjê kamǎ gryk xwỳnhjê jarēnh

Matêwre 10.22; mǎānēn Juǎw 7.7; 17.14; Wam Juǎw 3.13

18—Nē koja ixkwỳ hkêt xwỳnhjaja kǎm mē aprām nōkati. Tǎ kêr ka mē amnhī tǎ mē omu nē tee ri amnhī kukamǎ ajamaxpēr kêt nē. Ixkumrêx na prem kǎm ixprām nōkati. Tǎ koja mē mǎ ixtǎ mē ato aně nē kǎm mē aprām kêt nē.

19Mē apê mē hkwỳ ronhỹx mē amnhī tǎ mē apumu nē kǎm mē ajapê nē. Nom apê mē hkwỳ hkêt. Ra ixte amnhī kaxyw mē arēnh jakamǎ na htem tee ixtǎ mē apumu nē kǎm mē akǐnh kêt o kǎm mē akurê nē.

20Koja mē ixtǎ hpjaàm kêt nē nē mǎānēn mē atǎ hpjaàm kêt nē. Nē mē anhīpêx o te mē kot pa ixpê mē anhō patrǎw nhīpêx pyrāk. Ka mē ixpyrà nē amnhī xà htỳx kǎm ajamak o ri apa. Na pa pre ra mē amǎ ja jarē. Nom koja mē akwỳjaja jajê rom te ra mē kot ixkapēr mar nē hkôt amnhī nhīpêxta pyrà nē mǎānēn mē akapēr ma nē hkôt amnhī nhīpêx o pa. Kwa kêr ka mē ixkapērja mǎ mǎn ajamaxpēr tỳx rǎhǎ ho ri apa.

21—Koja mē ixtǎ tanhmǎ mē anhīpêx to. Mē kot Tǐrtǔm kapēr kôt amnhī nhīpêx kêt jakamǎ koja mē ã ixtǎ mē anhīpêx aně. Tǐrtǔm kot mē awỳr inhmēnh kôt hamaxpēr kêt nē ã mē anhīpêx aně.

²²Ixwryk nē mē kām Tirtūm kapēr jarēnh o ri ixpa htā nhūm mē inhma nē ām inhma nē ixkôt amnhĩ nhĩpêx kêt nē. Jakamã koja mē kot amnhĩ tomnuj xwỳnh ã amnhĩ to hpimxur kêt nē.

²³—Nē koja mēhō kêp ixprām nōkati nē määnēn te kêp Inhĩpêxà prām nōkati pyrāk.

²⁴Na pa pre mē piitã mē hkôt aa mē kot mēmoj pumunh kêt kwỳ ho anhỹr o ri mē hkôt ixpa nhūm mē hã ixpumu. ãm papxipix na pa pre ã amnhĩ nhĩpêx anhỹr o ri mē hkôt ixpa nhūm mē hã ixpumu. Kêp ãm mē kot ja hã ixpumunh kêt ronhỹx prem axpēn mã ijarēnh o: “Tk. Mē pahte mēhōja nhỹhỹnh mē pahwỳr hpôx ã omunhre hã kot puj kêt mē ri hã pahpijaàm o ri papa.” Anhỹr o nhỹx prem axpēn mã ijarē. Tã ra mē kot ja hã ixpumunh mex tã axtem nē Inhĩpêxà mē wa mē kām wa ixkurê nē. Jao mē kot amnhĩ tomnuj xwỳnh ã amnhĩ to hpimxur kêt nē.

²⁵No Tirtūm kapēr ã kagà htūm kot mē hkukamã mē harēnh nē mē hã kagà nē kot mē hã kagà kot: Mēmo tanhmã kute mỳrapê na htem kām ixkurê? Nà ãm amarĩ na htem kām ixkurê ho pa. Anē. Tã ã ixtã kagà kot anhỹr xà hkôt na htem ã kām ixkurê anē. Jakamã koja mē määnēn ixtã kām mē akurê nē. Nom kêr ka mē arĩ mē kām ixkapēr jarēnh o ri mē hkôt apa nē tee ri amnhĩ kukamã ajamaxpēr kêt nē.

²⁶—Nē tokyx ma akupỹm Inhĩpêxà hwỳr ixàpir mã tã kot paj hwỳr pōj nē aa mē ato ijamakêtkati hkêt nē. Kot paj amnhĩ pãnhã mē awỳr wa Ixkarō rē. Mē kot kām: “Mē kutã nojarêt xwỳnh maati” anhỹr xwỳnhhta kot paj mē awỳr kurē nhūm ixpãnhã mē awỳr wrỳ nē mē amã agjê nē hprĩ hã mē amã Tirtūm mē wa ixto amnhĩrĩt o ri mē akôt pa.

²⁷Kot kaj mē ama hãmri nē ma mē piitã mē hkôt ri mē kām ixkapēr jarēnh o ri apa. Na pa pre ra mē kām Tirtūm kapēr jarēnh ryy ho mē hkôt ri ixpa ka mē ixkôt ri inhmar o apa ry nē. Jakamã kêr ka mē ixwakre kamã arĩ mē kām ixkapēr jarēnh o ri mē hkôt ri apa. Anē.

Juãw 16

¹Nhũm Jejus arĩ mẽ inhmã kapër nẽ mẽ inhmã: —Nẽ mẽ kot nhỹrmã ixtã tanhmã mẽ anhĩpêx to nhũm mẽ ate tee ri amnhĩ kukamã ajamaxpër nẽ mẽ umaj ixkaga pymaj na pa hte ã mẽ amã ixprĩ hã mẽmoj jarẽnh ry anẽ.

²Kot kaj mẽ kãm ixkapër jarẽnh o ri apa nhũm mẽ hkwỳjaja tee ri mẽ ama nhũm ja mẽ kệp omnuj nẽ. Nhũm mẽ Tĩrtũm kapër o mẽ ahkre xà hã ixkreja rũm amnhĩ nẽ mẽ ajano nẽ mẽ akwỳjê hpar o pa. Hãmri nẽ hamaxpër o: “E pu mẽ axte mẽ hkwỳjê pynê nẽ mẽ kupa. Tĩrtũm kãm ja mex kênã.” Anhỹr o htỳx hamaxpër o pa.

³Mẽ kot hprĩ hã Inhĩpêxà mẽ wa ixkapër mar mex kêt nẽ ã htỳx wa inhmã ja mex ã wa ijarẽnh anẽ.

⁴Nom mẽ ate ixkôt amnhĩ xunhwỳrta krax kãm na pa pre ã mẽ amã mẽ harẽnh anhỹr kêt nẽ. Arĩ mẽ akôt ixpa kênã. Kot ka mẽ ixkôt apa rãhã amã mẽ uma hkêt nẽ. Tã pa ra akupỹm inhnojarêt nẽ ã mẽ amã mẽ harẽnh anẽ. Jakamã koja mẽ nhỹrmã ã mẽ anhĩpêx anẽ ka mẽ amnhĩ tã mẽ omu nẽ ra ixte mẽ akukamã ã mẽ harẽnh anhỹrja mã ajamaxpër kurê kumrẽx nẽ tee ri amnhĩ kukamã ajamaxpër kêt nẽ. E kwa ixkapërja mãn mẽ amnhĩ krã him haxàr tỳx nẽ ri hã apa. Anẽ.

Jejus mẽ Tĩrtũm wa hkarõ jarẽnh

⁵⁻⁶Nhũm Jejus arĩ mẽ inhmã kapër nẽ mẽ inhmã: —E na pa ra kot mẽ awỳr inhmẽnh xwỳnhta wỳr ra akupỹm inhnojarêt ka mẽ ixte amnhĩ jarẽnh ã inhma nẽ akaprĩ nẽ. Nẽ tee ri amnhĩ kukamã ajamaxpër tã mẽ atõ aprĩ hã ma inhmõr xà ã ixkukjêr kêt nẽ. Rỳ inhmã: “Kwa mo kaxyw kot kaj kêt mẽ ixre nẽ ma akupỹm mõi? Xà we ja amã mex?” Anhỹr o mẽ atõ ixkukjêr kêt nẽ.

⁷Kêt ma akupỹm ixàpirja mẽ amã mex kumrẽx. Kop ãm akupỹm ixàpir kêt ronhỹx mẽ amã mẽmoj kutã nojarêt xwỳnhta ixpãnhã mẽ awỳr wrỳk kêt nẽ. Tã kot paj ma akupỹm api nẽ amnhĩ pãnhã mẽ awỳr kurê. Jakamã kwa mẽ ja ma nẽ tãm ajamaxpër o ri apa.

⁸Koja ixpãnhã mẽ awỳr wrỳ hãmri nẽ mẽ kệp ixkwỳ hkêt xwỳnhjê mã mẽmoj to axkrunẽpxi nẽ ho amnhĩrĩt. Koja mẽ kãm mẽ kot tanhmã amnhĩ

tomnuj to xà ho amnhĩrĩt. Nẽ mãănẽn mẽ kãm tanhmã mẽ kot amnhĩ to mex to xà ho amnhĩrĩt. Nẽ mãănẽn Tĩrtũm kot nhỹrmã mẽ kot amnhĩ tomnuj mỳrapê tanhmã mẽ homnuj to xàta nhũm mãănẽn mẽ kãm ho amnhĩrĩt. Koja mẽ kãm ja piitã ho amnhĩrĩt.

⁹—Jakamã koja mẽ ja kukamã tanhmã hamaxpěr to nẽ hamaxpěr o: “Kwa kot paj xep amnhĩ tomnuj kaga nẽ amnhĩ kaxyw Tĩrtũm Kra Jejus mã ijamaxpěr nẽ hkôt amnhĩ xãm kêt nhũm Tĩrtũm nhỹrmã ixte amnhĩ tomnuj mỳrapê tanhmã ixto.

¹⁰Nà kot paj hkôt amnhĩ xãm hãmri nẽ ra uràk nẽ Tĩrtũm kapěr kôt tãm ri amnhĩ nhĩpêx o ixpa. Na pre Jejus tãm ri amnhĩ nhĩpêx o pa nhũm Tĩrtũm amnhĩ wỳr ho api pa mẽ axte jar nhỹri omunh kêt nẽ.

¹¹Na xep Tĩrtũm nhỹrmã kot ma kuwy hwỳr mẽ kêp Jejus kwỳ hkêt xwỳnhjê nhõ pahi maatija mẽnẽ ã ra amnhĩ kukamã hã amnhĩ jarẽ. Jakamã kwa arĩ ixpê hkwỳ jakamã kot paj tokyx Jejus kôt amnhĩ xãm kêt nhũm hkôt kuwy hwỳr inhmẽ.” Anhỹr o hamaxpěr. Koja ã wa Ixkarõja mẽ kêp ixkwỳ hkêt xwỳnhjê mã mẽmoj to amnhĩrĩt mex anẽ.

¹²—Nẽ na pa kormã mẽ amã mẽmoj piitã ho amnhĩrĩt kêt nẽ. Kormã mẽ ate aprĩ hã mẽmoj pumunh nẽ mar mã tãm kêt.

¹³Tã koja ixpãnhã wa Ixkarõ mẽ awỳr wrỳ nẽ mẽ akarõ mã agjê hãmri nẽ hprĩ hã mẽ amã Tĩrtũm kot amnhĩ nhĩpêx o amnhĩrĩt o mẽ akôt pa ho pa. Nom koja amnhĩ krã hkôt tanhmã mẽ amã ho amnhĩrĩt to hkêt nẽ. Koja ãm Tĩrtũm pix xô ri mẽ amã ho amnhĩrĩt o mẽ akôt pa. Jao hprĩ hã mẽ amã ixkôt mẽ ate amnhĩ nhĩpêx nyw o mẽ amã amnhĩrĩt o mẽ akôt pa. ã koja hprĩ hã ra ixte mẽ amã ixujarẽnẽ xà hkôt axte mẽ amã mẽmoj to amnhĩrĩt mex o pa anẽ.

¹⁴—Nẽ koja hprĩ hã mẽ amã pa ixto amnhĩrĩt o pa. Jao mẽ amã inhmex o inhmex ã ixto amnhĩrĩt o mẽ akôt pa.

¹⁵Inhĩpêêxà mẽ wa ixkapërja ãm htipxi. Tã koja wa Ixkarõ ixkapër xõ ri ã mẽ amã mẽmoj to amnhĩrĩt anẽ. Jao ra wa ijamẽ wa ixkapër o amnhĩrĩt mex o pa. Koja ã wa mẽ apê ixkwỳ hã mẽ ato mex o pa anẽ. Anẽ.

Mẽ kot akupỹm Jejus tĩr ã omunh ã mẽ harẽnh

¹⁶Nhũm Jejus arĩ mẽ inhmã kapër nẽ mẽ inhmã: —Nẽ kot paj tokyx mẽ ano pê akunok ka mẽ axte amnhĩ kaêx ã ixpumunh kêt nẽ. Nom kwa kêr ka mẽ tee ri ixkapërja kukamã ajamaxpër kêt nẽ. Kot paj ixtã apkati grêre ka mẽ axte ixpumu. Anẽ.

¹⁷⁻¹⁸Nhũm pre ã Jejus hkõt mẽ ixpa ho mẽ ixpa xwỳnhjê mã kapër anẽ. Pa mẽ tee ri ã kapër anhỹr ã kuma nẽ axpẽn mã: —Kwa mo na ri ã amnhĩ jarẽnh anẽ? Nẽ tokyx mẽ pano pê pikunor tã hã apkati grêre nhũm axte mẽ pahte omunh ã amnhĩ jarẽ nẽ akupỹm Hipêêxà hwỳr àpir ã amnhĩ jarẽ. Për kapërja ãm ri katii. Anẽ.

¹⁹Nhũm amnhĩ tã mẽ inhma nẽ mẽ inhmã: —Kwa xà na ka mẽ kormã aprĩ hã ixkapër ã inhmar kêt nẽ?

²⁰Kot paj ty nhũm mẽ kêp ixkwỳ hkêt xwỳnhjaja ijarẽnh ma nẽ hkĩnh nẽ. No mẽ kajaja kot kaj mẽ akapri nẽ amỳr o apa. Nẽ gaa nẽ akupỹm akĩnh nẽ. Kwa mẽ ixkapërja ma nẽ kãm ajamaxpër tỳx o apa.

²¹Te mẽ ate mẽ hpijagri xwỳnh kot amnhĩ nhĩpêx pyræk. Na htem õhy xà nẽ gaa nẽ ra õhy xà htỳx nẽ. Nẽ hkĩnh kêt nẽ tee ri amnhĩ nhĩpêx o hikwỹ. Tã gaa nẽ hpijagri nhũm hkrare kato nhũm omu nẽ akupỹm hkĩnh nẽ axte õhy xà htỳx mã hamaxpër kêt nẽ.

²²Tã ã mẽ ate amnhĩ nhĩpêx anhỹr kaxyw. Kot kaj mẽ akĩnh kêt nẽ ri apa. Tã kot paj akupỹm tokyx ixtĩr nẽ axte mẽ awỳr ixkato ka mẽ ixpumu nẽ akĩnh nẽ. Hãmri nẽ akĩnh rãhã ri apa ho apa. Nhũm mẽhõ mẽ apumu nẽ tee ri tanhmã mẽ akĩnh nê mẽ ato kaprỳ ka mẽ arĩ akĩnh rãhã ri apa ho apa.

²³—Nẽ ixte akupỹm kaxkwa hwỳr ixàpir nẽ amnhĩ pãnhã mẽ awỳr wa Ixkarõ rẽnh nhũm mẽ awỳr wrỳk nẽ hprĩ hã mẽ amã mẽmoj piitã ho amnhĩrĩt jakamã kot kaj mẽ axte amã mẽmoj tã ixkukjêr prãm kêt nẽ. Anẽ.

Jejus kwỳjaja kot àmnhĩx mẽmoj tã Tĩrtũm wỳr

Matêwre 18.19-20; Juãw 14.13-14

Nhũm Jejus arĩ mẽ inhmã kapêr nẽ mẽ inhmã: —E kwa mẽ ã ixkapêr anhỹrja ma nẽ amnhĩ krã kamã kãm ajamexpêr tỳx nẽ ho apa. Kot kaj mẽ apê ixkwỳ hã mẽmoj tã Inhĩpêêxà wỳ nhũm mẽ ama nẽ mẽ ate hã axàhwỳr xà hkôt mẽ amã mẽmoj tanhmã ho rỳ mẽ amã mẽmoj gõ.

24Na ka mẽ kormã apê ixkwỳ hã mẽmoj tã axàhwỳr kêt nẽ. Tã kêt ka mẽ amã mẽmoj tã hwỳr prãm nẽ mãmri mẽmoj tã hwỳr o apa. Kê mẽ ama hãmri nẽ tanhmã mẽ amã mẽmoj nhĩpêx to ka mẽ amnhĩ tã omu nẽ akĩnh nẽ.

25—Nẽ na pa pre mẽ amã mẽmoj jarênh kaxyw nẽ mẽmoj tã haxwỳ nẽ mẽ amã ixujarênh rax nẽ. Nom kot paj axte ã mẽ amã ri ixujarênh anhỹr kêt nẽ. Kot paj tã ixprĩ hã mẽ amã tanhmã Inhĩpêêxà jarênh to ka mẽ aprĩ hã mar mex kurê kumrêx.

26Hãmri nẽ mẽ kamjaja mẽ apê ixkwỳ hã tanhmã amnhĩ to hwỳr to ho apa. Jakamã mo kaxyw kot pa kêt axte tanhmã mẽ ato hwỳr to? Kot kaj mẽ kamjaja amnhĩ to hwỳr jakamã arĩ ixte mẽ ato hwỳr kaxyw ixto presija hkêt nẽ.

27—Na ka mẽ ra amã ijapê nẽ. Nẽ ixte Inhĩpêêxà rũm mẽ awỳr ixwryk ã ixpumu. Jakamã nhũm Inhĩpêêxàja ixtã mãănên kãm mẽ ajapê nẽ. Tã kot kaj mẽ kamjaja mẽmoj tã amnhĩ to hwỳr o apa nhũm mẽ ama nẽ kãm mẽ ajapê htỳx kãm mẽ amã mẽmoj gõ.

28—Na pa pre Inhĩpêêxà rũm amnẽ mẽ awỳr wrỳ. Hãmri nẽ kãm hprãm xà hkôt tanhmã amnhĩ nhĩpêx to hpar o mỗ nẽ ra akupỹm hwỳr inhnojarêt kaxyw. Anẽ. Nhũm pre ã Jejus mẽ inhmã amnhĩ jarênh anẽ.

29Pa mẽ tã ixprĩ hã mar mex nẽ. Hãmri nẽ kãm: —Tỳ. Nà na pa mẽ tã ixprĩ hã ate amnhĩ jarênh ma. Ka amnhĩ tã haxwỳr nẽ axujarênh kêt jakamã pa mẽ tã ixprĩ hã amar mex nẽ.

30Pêr ãm ate mẽmoj piitã omunh par xwỳnh na ka. Jakamã ate mẽ ijamexpêr piitã hkôt aprĩ hã mẽ ixpumunh par kumrêx kênã kot ka tanhmã mẽ

ijamxpër to hã mẽ ixkukja. ãm hãmri na ka Tĩrtũm rũm awryk ã amnhĩ jarẽ. Anẽ.

³¹Hãmri nhũm mẽ inhma nẽ mẽ inhmã: —Xà ãm hãmri na ka mẽ ixkõt ajamxpër tỳx nẽ?

³²Kwa mẽ o kora. Kot kaj mẽ tokyx mẽ umaj ixre nẽ anhrà nẽ ma ahpỹnhã mẽ anhõ krĩ hwỳr mra. Mẽ kot ixkõt tanhmã mẽ anhĩmex to pymaj kot kaj mẽ ã amnhĩ nhĩpêx anẽ kãm ga. Kot paj ahte mẽ kãm ixãm pyræk o amnhĩ nhĩpêx nom ahte ixãm kêt nẽ. Inhiĩpêxà aa kot ixrere hã.

³³—E ixkukwak ri mẽ ajamakêtkati nẽ axãmnhĩx mẽ apa kaxyw na pa ã mẽ amã ixkapër anẽ. Nom mẽ kêp ixkwỳ hkêt xwỳnhjaja koja nhỹrmã ixtã mẽ atomnuj tỳx o pa. Tã kêr ka mẽ amã mẽ uma nẽ tee ri amnhĩ kukamã ajamxpër o ri apa hkêt nẽ. Nhỹrmã ixte mẽmoj punuj piitã ho ijapêx par ã arĩgrota ã kot paj mẽ atã mẽ ho ijapêx par kumrẽx. Anẽ.

Juãw 17

Jejus kot amnhĩ to Tĩrtũm wỳr ã harẽnh

Rõmãn 8.34; Eprẽw 7.25

¹Tã nhũm Jejus mẽ inhmã kapër pa nẽ hpãnhã kaxkwa hwỳr rĩt nẽ Tĩrtũm mã amnhĩ jarẽ nẽ kãm: "Pa Papaj. E na pa ra amã hprãm xà hkõt tanhmã amã amnhĩ nhĩpêx to hpar o mẽ nẽ akupỹm awỳr inhnojarêt kaxyw. Jakamã kot kaj ixpê Akra hã ma akupỹm amnhĩ wỳr ixto api. Mẽ kot ja hã ixpumunh nẽ amã amex o amex ã ajarẽnh o pa kaxyw.

²Na ra pyka piitã hkõt ri mẽ pa xwỳnh kwỳjaja amnhĩ kaxyw ixkõt hamaxpër nẽ ixkõt amnhĩ xunhwỳ nom ka na ka pre inhmã mẽ agõ. Ixte mẽ htĩr tũm nẽ mẽ pa mã xwỳnh ã mẽ harẽnh kaxyw. Jakamã koja mẽ nhỹrmã ixkukwak ri pakuri htĩr tũm nẽ pa ho pa.

³Na mẽ ra ixkapër mar mex nẽ. Nẽ ixpê Jejus Kris pẽ ate mẽ hwỳr inhmẽnh xwỳnhja kõt hamaxpër mex nẽ. Nẽ apê Tĩrtũm ã ãm apyxi mex ã mããnẽn akõt hamaxpër mex nẽ. Nẽ amex o amex ã akõt hamaxpër nẽ kãm akĩnh nẽ. Jakamã koja mẽ nhỹrmã pakuri htĩr tũm nẽ pa ho pa. Nà koja mẽ anẽ.

⁴Amnepê̄m amnê̄ pyka ja hwÿr inhnojarê̄t nhũm ate tanhmã ixte amnhĩ nhĩpê̄x to hã inhmã karõta na pa ra hatur xàm mênh kaxyw. Na pa xatã mē kãm akapê̄r jarê̄nh o ri mē hkôt ixpa. Jao ra mē kãm apê̄ Pahi Maati hã apixi mex ã ajarê̄ nê̄ amex o amex nê̄ axàhpumunh o axàhpumunh ã mē kãm ajarê̄nh o ri ixpa.

⁵Jakamã e Papaj. Kêr ka tokyx ixpê̄ akra hã ma akupÿm amnhĩ wÿr ixto api. Pa akupÿm awÿr pôj nê̄ te amnepê̄m akuri ixpaja pyrã nê̄ axte akuri ixpa ho ixpa.” Anê̄.

Jejus kot hkwÿjê̄ ho Tirtũm wÿr ã harê̄nh

Nhũm Jejus arĩ Tirtũm mã kapê̄r nê̄ kãm:

⁶“E Papaj. Nà ra ate pyka hkôt inhmã mē òr xwÿnhjaja na pa ra mē kãm akapê̄r jarê̄nh ryy ho ri mē hkôt ixpa nhũm mē akapê̄r kôt pix mã amnhĩ nhĩpê̄x o pa.

⁷Tã ixte anhÿ hã tanhmã amnhĩ nhĩpê̄x to ho ri ixpaja ra mē kot ja hã ixpumunh mex.

⁸Na pa pre hte axô ri mē ahkre ho ri ixpa nhũm mē amnhĩ kaxyw ixkôt hamaxpê̄r mex nê̄. Nê̄ ate mē hwÿr inhmênh nhũm mē hwÿr ixwÿrkja ã mē kot ixpumunh mex.

⁹⁻¹⁰Tã ot pa mē ho awÿr o xa. Nom na pa mē kêp ixkwÿ hkwÿt xwÿnhjê̄ ho awÿr kêt nê̄. ãm ate inhmã mē òr xwÿnhjê̄ pix o na pa awÿ. Mē kêp akra jakamã mãânên mē kêp ixkraa. Jakamã na htem pamã pamex o pamex ã pajarê̄nh o ri pa.

¹¹Axihtÿx o axihtÿx jakamã na ka pre amnhĩ xwar inhmã axihtÿx xà hkwÿ gō pa te ixte axihtÿx pyrãk. Tã na pa ra akupÿm awÿr inhnojarê̄t kaxyw. Kot paj jar pyka hkôt ri ixpa ry hkwÿt nê̄. Nom ixkwÿjaja koja mē arĩ kamã pa jakamã kwa Papaj. Kêr ka inhmã mē omunh mex nê̄ kê mē inhÿ hã tãm ri amnhĩ nhĩpê̄x o pa. Nê̄ pahpyrã nê̄ te ixkre tipxi kamã mē htixpi nê̄ mē pa pyrãk o axpên kôt pa.

¹²Kormã mẽ kamã ixpata ã ate inhmã axihtỳx xà hkwỳ nhõrta o pa mẽ htãnopxar mex o ri mẽ hkõt ixpa. Jakamã nhũm mẽ ri ixkõt amnhĩ nhĩpêx o pa. ãm Jut Kariot pix koja mẽ hkĩnhã tanhmã amnhĩ tomnuj to nẽ hapêx. No ãm ra akapêr ã kagà kot hkukamã ã kot amnhĩ nhĩpêx anhỹr ã harênh xàja kõt koja ã amnhĩ nhĩpêx anẽ nẽ hapêx.

¹³Tã na pa ra akupỹm awỳr inhnojarêr kaxyw jakamã na pa ixte tokyx mẽ rer mã xwỳnhjê ho awỳr o xa. Kormã mẽ hkõt ri ixpa ri. Mẽ kot inhmar nẽ ixpyrà nẽ hkĩnh nẽ hamakêtkati nẽ ri pa kaxyw.

¹⁴Na pa pre ra mẽ kãm akapêr jarênh ry nẽ nhũm mẽ ixpyrà nẽ akõt pix mã amnhĩ nhĩpêx o ri pa. Jakamã nhũm hte mẽ kêp ixkwỳ hkêt xwỳnhjaja tee ri ja hã mẽ omu nẽ axtem nẽ kãm mẽ hkurê nẽ. Nom mẽ kêp mẽ hkwỳ hkêt jakamã na htem ã mẽ kamã gryk anẽ.

¹⁵Tã na pa ã mẽ ho awỳr anhỹr o xa. Nom mẽ kot amnhĩ tomnuj xwỳnhjê hkàx ã mẽ pa kaxyw na pa mẽ ho awỳr kêt nẽ. Koja mẽ arĩ mẽ hkõt ri pa. Nom mẽ uràk nẽ amnhĩ tomnuj o pa pumaj na pa ã mẽ ho awỳr anẽ.

¹⁶Mẽ kêp mẽ hkwỳ hkêt. Axtem mẽ kot amnhĩ nhĩpêx. Te mẽ kot mẽ pahte amnhĩ nhĩpêx pyràk jakamã kê mẽ amarĩ mẽ hkõt pa htã mẽ kot amnhĩ nhĩpêx kõt amnhĩ nhĩpêx o pa hkêt nẽ. ãm pahkõt pix mã amnhĩ nhĩpêx o pa.

¹⁷Akapêr pix na mex o mex jakamã koja mẽ hkõt amnhĩ nhĩpêx o pa nẽ gaa nẽ te pahte amnhĩ nhĩpêx pyràk o amnhĩ nhĩpêx.

¹⁸Na ka pre amnẽ mẽ hwỳr inhmẽ pa pre ixte mẽ kãm akapêr jarênh o ri ixpa kaxyw mẽ hwỳr wrỳ. Nẽ amnhĩ pyrà nẽ mẽ kot akapêr jarênh o mẽ hkõt pa kaxyw pa mẽ kurê nẽ ma mẽ hwỳr mẽ kurẽ.

¹⁹Inhmã mẽ hapê jakamã kot paj amnhĩ grõnh kõt nhãm mẽ kot axpẽn mã ri inhgrõnh o pa xwỳnhjê mã amnhĩ gõ. Amã hprãm xà hkõt. Ixkwỳjaja kot ja hã ixpumunh nẽ ixpyrà nẽ amã hprãm xà hkõt pix mã tanhmã amnhĩ nhĩpêx to ho pa kaxyw.” Anẽ.

Jejus kot hkrajê piitã ho Tirtũm wỳr

²⁰Nhũm Jejus arĩ Tĩrtũm mã amnhĩ jarẽ nẽ kãm: "Tã na pa ã jajê ho awỳr anẽ Papaj. Nom ixkõt mẽ pa ho mẽ pa xwỳnhjê pix o na pa awỳr kêt nẽ. Mããnẽn mẽ ô ri nhỹrmã mẽ kot ixkõt amnhĩ xunhwỳr mã xwỳnhjaja na pa mẽ ho ixpimràa tã mẽ ho awỳ.

²¹Kê mẽ pahpyrà nẽ te hamaxpěr tipxi pyrà nẽ ri axpẽn to pa. Nẽ pahte amnhĩ nhĩpêx kõt pix mã amnhĩ nhĩpêx o pa. Kojã mẽ ã amnhĩ nhĩpêx anhỹr o pa nhũm mẽ kêp pahkwỳ hkêt xwỳnhjaja pahtã mẽ omu nẽ ate mẽ hwỳr inhmẽn ã apumunh kurê kumrêx.

²²Nẽ kojã mẽ ixkukwak ri panhỹ hã te pahpyrà nẽ hamaxpěr tipxi nẽ ri pa pyràk o amnhĩ nhĩpêx o pa.

²³Na pa htem te ixkre tipxi kamã mẽ ixtipxi pyràk o axpẽn nhĩpêx o ri ixpa. Te pahte axpẽn nhĩpêxta pyràk. Tã kojã mẽ ixwakre kamã ã axpẽn nhĩpêx anhỹr o pa nhũm mẽ kêp pahkwỳ hkêt xwỳnhjaja ja hã mẽ omu nẽ hamaxpěr o: 'Nà pěr ãm hãmri na pre Tĩrtũm tãm mẽ pahwỳr Jejus mẽ. Kãm hapê htỳx tã mẽ pahwỳr kumẽ nhũm wrỳ nẽ amnhĩ xwar kãm hkwyjê japê nẽ.' Anhỹr o kojã axpẽn mã pajarẽn o pa.

²⁴Amnepêm amrakati ri pa pre amã ijapê hã ri ixpa. Tã ot pa jajê ho awỳ. Ka na ka pre inhmã mẽ agõ. Tã ma awỳr inhmõr mã xàta wỳr na pa inhmã mẽ àpir prãm nẽ. Kojã mẽ nhỹrmã ma pahwỳr api pu mẽ pahpiitã pahpimràatã pamã axpẽn japê hã ri papa ho papa.

²⁵E Papaj. Amex o amex tã mẽ kêp ixkwỳ hkêt xwỳnhjaja na kormã ate mẽ hwỳr inhmẽn xwỳnh ã ixkõt hamaxpěr kêt nẽ. Nom mẽ kot ixkõt amnhĩ xunhwỳr xwỳnhjaja na mẽ kurom ja hã ixkõt hamaxpěr mex nẽ.

²⁶Na pa ra ixprĩ hã mẽ kãm akapěr o amnhĩrĩt o ri ixpa. Tã kot paj axte mẽ kãm akapěr kwỳ jarẽ. Amã ijapêta pyrà nẽ mẽ kãm axpẽn kĩnh ã axpẽn to pa kaxyw na pa mẽ kãm hã karõ. Kot paj inhĩ hã mẽ hkõt ixpa hkêt tã kojã Pahkarõja mẽ hwỳr wrỳ nẽ mẽ hkarõ mã agjê nẽ te pa mẽ hkõt ixpa pyràk o mẽ hipêx. Ja na pa inhmã hprãm. Tã kojã anẽ. Jakamã na pa ã mẽ ho

awÿr anê. Tã ãm ja pix Papaj.” Anê. Nhũm pre ã Jejus õ Papaj mã mẽ inhnoo mã amnhĩ jarênh anê pa mẽ ixpiitã hã kuma.

Juãw 18

Mẽ kot Jejus pynênh ã mẽ harênh

Matêwre 26.47-56; Makre 14.43-50; Rukre 22.47-53

¹Tã nhũm Jejus mẽ ixto Hipêêxà hwÿr pa. Hãmri nê ixkreja rũm ma tẽ nê Jerujarê rũm kato nê ma gô pê Kirõ hwÿr tẽ pa mẽ hkôt ixpa ho ixpa xwÿnhjaja ma hkôt mra. Nê gô hã rê nê hikjê hã mẽ kot mẽmo pĩ hkô hkre xwÿnhja wÿr mra nê parpê ixkrĩ hpa.

²Na pre hte Jejus xatã hwÿr amnhĩ kôt mẽ ixto pa ho kuhê. Jakamã nhũm Jut Kariot kot mẽ kãm õr mã xwÿnhhta ra kot hwÿr mẽ ixpa ho ixkuhê xàta pumunh mex.

³Jakamã pa mẽ hwÿr pøj nê ixkrĩ hpa nhũm mẽ mẽ ixwÿr mra. Jut Kariot mẽ pòristijaja. Rõm nhõ xwÿnhjê nhõ pòristijê mẽ patre nhõ pòristijaja nhũm mẽ mẽ ixwÿr Jut Kariot kôt mra. Ijaew nhõ pahijê nhỹ hã mẽ ixwÿr mra. Piitã wapohti jamÿ nê pô hpòk nê kanê jamÿ nê mẽ ixwÿr hpòk o kato.

⁴⁻⁵Hãmri nhũm Jejus amnhĩ wÿr mẽ omu nê kànhmã xa nê ma mẽ kutã tẽ. Jut Kariot kot mẽ kãm õr kaxyw nhũm amnhĩ tã omunh mex jakamã amnhĩ wÿr mẽ omu nê ma mẽ kutã tẽ. Hãmri nê mẽ hkaxpa nê mẽ omunh o xa nhũm Jut Kariot mẽ kuri xa nhũm Jejus mẽ omu nê mẽ kãm: —Pa. Mẽmoj japêr na ka mẽ pô hpòk o ri apa? Anê. Hãmri nhũm mẽ kãm: —Nà Jejus pê Najare nhõ xwÿnh japêr o na pa mẽ ri ixpa. Anê. Hãmri nhũm mẽ kãm: —Tÿ ot pa xa. Pa na ixpê Jejus. Anê.

⁶Hãmri nhũm mẽ kuma nê tee ri axpên pumu nê umaj katê ho axkamẽ nê kuhê. Nom katê ho pikamênh o ra rôròk pa nê hikwÿ.

⁷Hãmri nê kànhmã kuhê hpa nhũm Jejus axte mẽ kãm: —Kwa mẽ inhmã amnhĩ jarê. Mẽhõ japêr o na ka mẽ apa? Anê. Hãmri nhũm mẽ kãm: —Jejus pê Najare nhõ xwÿnhhta japêr o na mẽ ri ixpa kênã. Anê.

⁸Hāmri nhūm mẽ kām: —Kwa ra ixte mẽ amã amnhĩ jarēnh kēnã. Paa. Ijapêr o na ka mẽ ri apa. Jakamã kwa kêr ka mẽ ixkôt ri mẽ pa xwỳnhhtaja tanhmã mẽ ho hkêt nẽ. Kê mẽ māmri anhgrà nẽ ma mra.

⁹Anhỹr o mẽ inhnê mẽ kām kapêr. Na pre ra ham Hipêêxà mã mẽ ixtã kām amnhĩ jarē nẽ kām: —Kormã mẽ kamã ixpa ri ate inhmã ixihtỳx xà nhõrta o na pa mẽ htãnopxar mex o ri mẽ hkôt ixpa. Anhỹr o mẽ ixtã kām amnhĩ jarēnh jakamã nhūm ã mẽ inhnê mẽ kot unēnh mã xwỳnhjê mã kapêr anẽ.

Simãw Pêtre kot mēhō pê hamak krāhyr ã harēnh

Matêwre 26.51-54; Makre 14.47; Rukre 22.49-51

¹⁰Hāmri nhūm Simãw Pêtre tee ri Jejus ã mẽ omu hāmri nẽ õ wapo kapa nẽ jam ho apê nẽ ho hamak nhĩkjê krāhta. Mawti jamak krāhta. Mawtija mẽõ patre mã apēnh xwỳnhjê hõ na pre nhūm Simãw Pêtre hamak krāhta.

¹¹Hāmri nhūm Jejus ja hã omu nẽ nê kām kapêr nẽ kām: —Tk. Kwa nà amarĩ xa nẽ akupỹm awapota hkàm haxà. Ixte mẽ anê amnhĩ xà htỳx kamã ijamak kaxyw na pa pre Inhĩpêêxà rŭm amnẽ mẽ awỳr pika hwỳr wrỳ. Kêt inhmã kām hprãm xà hkôt pix mã na inhmã tanhmã amnhĩ nhĩpêx to ho ixpa hprãm. Jakamã kwār mẽ māmri tanhmã kām ixto hprãm xà hkôt māmri tanhmã ixto. Anẽ.

Mẽ kot Anas wỳr Jejus o htēm ã mẽ harēnh

Matêwre 26.57-58; Makre 14.53-54; Rukre 22.54

¹²Tã nhūm pōristi mẽ mẽ hkrāhtŭm nẽ mẽõ patre nhõ pōristijaja Jejus pynê nẽ hpa hpre hpa

¹³nẽ ma Anas wỳr o tẽ. Anasja Kajpas piinhõ na pre. Nhūm Kajpas kormã amgràja ã Anas pyrà nẽ kêp mẽõ patre maati.

¹⁴Jakamã na pre ra Ijaew nhõ pahijê mã Jejus jarēnh o: —Nà kot puj mẽ Jejus pĩr tokyx anẽ. Kê tapxipix ty pu mẽ arĩ mỳrpê pahpiitã pajamakêtkati nẽ ri papa. Anẽ. Jakamã nhūm mẽ Jejus pynê nẽ kormã ma patre maati hwỳr o tẽ.

Simãw Pêtre kot Jejus kôt pa hkêt ã kot amnhĩ jarēnh

Matêwre 26.69-75; Makre 14.66-72; Rukre 22.54-62

¹⁵Hāmri pa ixpê Juāw mẽ ixkràmnhwỳ Simāw Pêtre mẽ pa wa ma mẽ hkôt wa tẽ. Nhũm mẽ ra mẽ inhõ patre maati nhõrkwỹ hwỳr Jejus o axà. Nhũm patre maati kot ixpumunh jakamã nhũm kãm àpênh xwỳnhja ixpumu nẽ inhmã anẽ pa mẽ hkôt axà.

¹⁶Nom nhũm Simāw Pêtre arĩ kapôt ã hakwa krem xa. Hāmri pa omu nẽ akupỹm hwỳr tẽ nẽ mẽhõ niti kot hakwa kre jamār o ãm xwỳnhja mã anẽ nhũm kãm kahê xà mẽ nhũm mẽ ixkôt axà.

¹⁷Hāmri nhũm nita hprĩ hã omu nẽ kãm: —Xêê. Pêr apê mẽ kot unênh nẽ o mõi mũj kôt ri mẽ pa xwỳnhjê hõ na ka mê? Anẽ. Hāmri nhũm kuma nẽ kãm: —Tk. Nà ixte mẽhõ myti ata pumunhre hã. Anẽ.

¹⁸Hāmri nhũm ra kôt ã kamàt nẽ ra kryy nẽ nhũm mẽ àpênh xwỳnh kwỳ mẽ mẽõ patre nhõ pōristi hkwỳjaja amnhĩm kuto nẽ hã ànhunh o kuhê. Nhũm Simāw Pêtre mẽ omu nẽ mẽ hwỳr tẽ nẽ mẽ ìhkô hã ànhunh o xa.

Patre maati kot Jejus kukjêr ã harênh

Matêwre 26.59-66; Makre 14.55-64; Rukre 22.66-71

¹⁹Rôm nhũm Anasja hêx rom tanhmã Jejus kukjêr to nẽ kãm: —E kwa inhmã amnhĩ jarẽ. Tanhmã na ka hte we akôt mẽ pa ho mẽ pa xwỳnhjê jahkre hto ho apa wehe? Anẽ.

²⁰Hāmri nhũm amnhĩ tã kãm: —Nà na pa hte mẽ piitã mẽ noo mã ri mẽ kãm ixkapêr o ixpa. Tĩrtũm kapêr o mẽ ahkre xà hã ixkre kamã nẽ Tĩrtũm mã amnhĩ jarênh xà hã ixkre kamã pa hte mẽ piitã mẽ noo mã ri mẽ kãm tanhmã ixkapêr to ho ri ixpa. Na pa hte nhỹri ixpimxur pê ri mẽ kãm tanhmã ixkapêr to ho ri ixpa hkêt nẽ.

²¹Tã ka ixtã mẽ kot inhmar o kuhê xwỳnhjaja tanhmã ixtã mẽ hkukjêr to hkêt nẽ. ãm papxipix ri ixkukja. Kwa ixtã mẽ hkukja kê mẽ kot tanhmã ixkapêr mar to xà hkôt tanhmã amã ijarênh to nà? Anẽ.

²²Hāmri nhũm patre nhõ pōristi hõja kuma nẽ hwỳr tẽ nẽ kãm: —Tk. Kwa na htem ã patre maati mã kapêr anhỹr kêt nẽ. Na htem hã hpijaàm o kãm kapêr. Tã na ka axtem nẽ ri ã kãm akapêr anẽ. Anẽ. Hāmri nẽ hinep hkura.

²³Hāmri nhūm Jejus amnhĩ tã omu nẽ kãm: —Kwa kot pa tanhmã mẽ amã amnhĩ to ixêx to ka mẽ hã inhma nẽ rĩ kormã tanhmã axpẽn mã ixto akapẽr to rỳ hã ixtak. Nom ãm hāmri ixte mẽ amã amnhĩ jarēnh tã ka axtem nẽ ri inhĩnep ixtak. Anẽ.

²⁴Hāmri nhūm Anas tanhmã mar to hpa hāmri nẽ umre Kajpas wỳr kumẽ. Na pre Kajpasja kormã hitom kãm ri tanhmã amnhĩ nhĩpêx to ho nhỹ nhūm Anas mẽ kãm anẽ nhūm mẽ kuma nẽ hwỳr Jejus o tẽ nẽ ho axà. Arĩ hpa hpre rãhã hwỳr o tẽ nẽ ho axà nhūm xa nẽ kãm amnhĩ jarẽ.

Simãw Pêtre kot axte Jejus kôt pa hkêt ã amnhĩ tã aprãr ã harēnh

Matêwre 26.71-75; Makre 14.69-72; Rukre 22.58-62

²⁵Nhūm Simãw Pêtre arĩ mẽ ãhkô hã ànhunh o xa nhūm mẽhõja kãm kapẽr nẽ kãm: —Kwa pẽr apê Jejus kôt ri mẽ pa xwỳnhjê hõ na ka. Anẽ. Hāmri nhūm kuma nẽ kãm: —Tk. Kokỹ ixte mẽhõ nẽj pumunhre hã. Anẽ.

²⁶Hāmri nhūm hpãnhã mẽõ patre maati mã àpênh xwỳnhja mããnēn omu. Simãw Pêtre kot kêp hamak krãhyr xwỳnhhta kwỳ na pre. Jakamã nhūm hprĩ hã omunh mex kurê kumrêx nẽ kãm: —Kwa nà ka na ka mũtar pĩ hkôta kamã mẽ ãhkô hã xa pa apumu. Anẽ.

²⁷Hāmri nhūm tee ri kuma nẽ axte mẽ kãm amnhĩ tã aprãr kãm hihtỳx nẽ. Jao ra mẽ kãm amnhĩ tã aprãr o axkrunêpxija mẽ nhūm krãhyre hkàr kurê kumrêx. Ra Jejus kot hkukamã harēnh xà hkôt kêp hkwỳ hkêt ã amnhĩ tã aprãr o axkrunêpxi.

Jejus kot Pirat mã amnhĩ jarēnh

Matêwre 27.1-2; 27.11-31; Makre 15.1-20; Rukre 23.1-5; 23.13-25

²⁸Hāmri nhūm mẽ ixpê Ijaew hkrãhtũmjaja ra Kajpas rũm Jejus o kato nẽ ma Pirat wỳr o tẽ. Piratja na pre te Rõmjê nhõ pahi pê Sesti mã mẽ ixpê Ijaew jamãr o pa nhūm mẽ ma hwỳr o tẽ. Nhūm ra myt kator grire nhūm mẽ hwỳr o tẽ nẽ òrkwỹ kapem o xa. Pirat kêp Ijaew kêt jakamã nhūm mẽ òrkwỹ hwỳr gjêx kêt nẽ kapôt ã kuhê. Na hte Ijaew kormã Pas ã hkĩnh hāmri nẽ nhãm mẽ kêp Ijaew kêt xwỳnhjê nhõrkwỹ hwỳr gjêx kêt nẽ. Koja mẽ hwỳr agjê nẽ amnhĩ tomnu nẽ Pas ã apkur kêt nẽ. Jakamã nhūm mẽ Pirat wỳr Jejus o tẽ no ãm hwỳr o àr kêt nẽ. ãm ixkre kapem o xa.

29Hāmri nhūm Pirat mẽ hwỳr kato nẽ omu nẽ hã mẽ hkukja nẽ mẽ kãm: —Kwa tanhmã na we amnhĩ tomnuj to ka mẽ ixwỳr o tẽ? Anẽ.

30Hāmri nhūm mẽ kãm: —Nà kot amnhĩ tomnuj o pa xwỳnh kênã. Jakamã na pa mẽ awỳr o tẽ. Ate tanhmã kot amnhĩ tomnuj to hã harẽnh mar nẽ mỳrapê tanhmã ho kaxyw. Anẽ.

31Hāmri nhūm mẽ kuma nẽ mẽ kãm: —Tk. Kwa mẽ kamjaja ma amnhĩ kôt o tẽ nẽ amnhĩ krã hkôt tanhmã ho. Mẽ ate tanhmã kot amnhĩ nhĩpêx to hã omunh xà hkôt. Anẽ. Hāmri nhūm mẽ tee ri kuma nẽ kãm: —Kwa amnepêm mẽ ixpê Ijaewjaja na pa pre htem kên o mẽ kot amnhĩ tomnuj xwỳnhjê tak o mẽ kupa. Tã na ra Rôm nhõ pahihtija mẽ pamjaja mẽ ixte mẽ hpar nê mẽ ixkurê. Tapxipix kãm mẽ hpar ã àmnênh prãm. Jakamã kot kaj ÿ hã mẽ inhmã tanhmã hã axàmnênh to kê mẽ kupĩ. Ra ja kaxyw mẽ kot mẽ ixkaxyw axãm kênã. Anẽ.

32Rôm nhõ xwỳnhjaja na htem mẽ kot amnhĩ tomnuj xwỳnhjê hpar kaxyw nẽ pĩ kahpa hã mẽ hanhô nẽ mẽ kupa. Nhūm Jejus amnhĩ kukamã tanhmã mẽ kot hpĩr to hã mẽ omunh mex jakamã ra hprĩ hã mẽ inhmã mẽ kot tanhmã hipêx to hã mẽ harẽ. Jakamã nhūm pre ã Ijaew Pirat kot mẽ kãm hpĩr prãm xàj ã kãm kapêr kãm xihtỳx anẽ.

33Hāmri nhūm mẽ kuma nẽ akupỳm òrkwỳ hwỳr axà nẽ amnhĩ wỳr Jejus ã karõ nhūm hwỳr axà nhūm kãm: —E kwa inhmã amnhĩ jarẽ. Xà apê Ijaew nhõ pahi na ka? Xà ka na htem amnhĩ wỳr akãm hamak o pa? Anẽ.

34-36Hāmri nhūm kãm: —Tỳ ãm hāmri na ka ã ijarênh anẽ. Nom jar pika ja kamã ixpê mẽõ pahi hkêt. Axtem ixpê mẽõ pahi na pa. Mo kaxyw na ka ã ixkukjêr anẽ? Xà na pre mẽhõ ixte mẽ anhõ pahi Sesti kutã ixãm ã amã ijarẽ ka ama nẽ tee ri ixkukamã ajamaxpêr? Nà xà ãm hāmri amã Tĩrtũm kot Ijaew wỳr inhmênh ã ixpumunh prãm? Mo kaxyw na ka ã ixkukjêr anẽ? Anẽ. Hāmri nhūm tee ri kuma nẽ kãm: —Tk. Mo kot pa kêt ri axtem nẽ Tĩrtũm kot Ijaew wỳr amênh ã akukja? Mẽ apyrà nẽ ixpê Ijaew kêt kênã. Mẽ kot ixwỳr ato htẽm xwỳnhjaja na mẽ ã ate amnhĩ jarênh anhỳr ã ajarênh anẽ. Nà mẽ akwỳjê mẽ mẽ anhõ patre krãhtũmjaja na mẽ ã inhmã ajarênh

aně. Jakamã e aprĩ hã inhmã amnhĩ jarẽ. Tanhmã na ka we amnhĩ tomnuj to nhũm mẽ ixwỳr ato tẽ? Aně. Hãmri nhũm kuma nẽ kê axte kãm: —Nà ixpê pyka ja kamã mẽ õ pahi hkêt. Kop ãm ixpê pyka ja kôt mẽ õ pahi ronhỹx ra ixkôt ri mẽ pa xwỳnhjaja tanhmã ixtã mẽ ato. Nom jar ixpê mẽ õ pahi hkêt. ãm axtem ixpê mẽ õ pahi na pa. ãm hãmri na pa ã amã amnhĩ jarẽnh aně. Aně.

³⁷Nhũm ã kãm amnhĩ jarẽnh aně hãmri nhũm tee ri kuma nẽ kãm: —Xà apê mẽ õ pahi hõ na ka? Aně. Hãmri nhũm kãm: —Tỳ. Nà ãm hãmri na ka ã ijarẽnh aně. Na pa pre amnẽ pikaja wỳr wrỳ nẽ jar mẽ akamã ixkato nẽ mẽ akamã ixaptàr. Ixte tanhmã mẽ kãm ixkapěr to ho ri ixpa kaxyw na pa pre wrỳ nẽ mẽ akamã ixpa nẽ ãm hãmri mẽ kãm ixkapěr o ri ixpa. Na pa hte tãm ixkapěr o ri ixpa. Tã mẽ kot ixkapěr mar nẽ ixkôt ri amnhĩ nhĩpêx o mẽ pa xwỳnhjaja na htem ixpê mẽ õ pahihti hã ijarẽnh o pa. Aně.

³⁸Hãmri nhũm Pirat kot tãm kãm kapěr ã amnhĩ jarẽnhja ã kuma nẽ kãm: —Tk. Aa ixte pika ja kamã mēhõ pumunh nhũm tãm kapěr o pare hã. Aně. Hãmri nẽ kapěr ã kuma nẽ tee ri hkukamã hamaxpěr. Hãmri nẽ akupỹm Ijaew wỳr ho kato nẽ mẽ kutã o xa nẽ mẽ kãm: —Kwa tanhmã kot amnhĩ tomnuj tore hã.

³⁹E mẽ inhma. Na pa hte amgrà mẽ arĩgro pê Pas kãm mẽ amã mẽ hagjênh xà rũm mẽ akwỳjê ho hpỹnh nẽ mẽ hapôj nhũm mẽ hamakêtkati nẽ amnhĩx ri pa. Ka mẽ ja hã omu nẽ Pas ã akĩnh nẽ. Jakamã e. Pa mẽ amã mẽ anhõ “pahihti” jarẽnhja mã inhũre. E na pa ra kãm inhũre. Aně.

⁴⁰Hãmri nhũm mẽ tee ri ã kapěr anhỹr ã kuma nhũm ja mẽ kêp omnuj tỳx nẽ. Nhũm mẽ hã kàx pê gryk kamã kãm kapěr kãm hihtỳx nẽ kãm: —Tk. Kwa nà kãm anhũrer kêt nẽ. Kêt Parapas mã mãn anhũre. Aně. Parapasja na pre hte tanhmã amnhĩ tomnuj tỳx to ho ri pa nhũm prem mỳrapê unê nẽ haxà. Tã nhũm mẽ axtem nẽ Pirat kot kãm urer prãm xàj Jejus kaga.

Juãw 19

Mẽ kot Jejus tak ã mẽ harẽnh

Matêwre 27.27-31; Makre 15.16-21; Rukre 23.20-25

¹Tã nhũm Pirat akupỹm òrkwỹ hwỳr Jejus o axà nẽ ò pòristijê mã hã amỹnê nhũm mẽ hwỳr mra nẽ htak o kuhê.

²Hãmri nẽ kêp pahi hã hpêr o pikênh kaxyw kãm pahi hã mẽ ahkà nhĩpêx nẽ hkrãm haxà. Nom axtem mẽmo mrônhĩ te kot ronh kanêre pyræk xwỳnhja nhũm mẽ hikãx nẽ hkrãm haxà. Nẽ kêp pahi hã mẽ ê kamrêk py nẽ kãm haxà.

³Hãmri nẽ xatã hwỳr mra nẽ hinep htak nẽ hã hpêr o pikênh o xa nẽ kãm: —E apê Ijaew nhõ pahi punuti na ka. Anẽ.

⁴Hãmri nhũm Piratja akupỹm Ijaew wỳr kato nẽ mẽ kãm: —E koja inhõ pòristi akupỹm mẽ awỳr ho kato ka mẽ omu. Na pa tee ri kot tanhmã amnhĩ tomnuj to hã hkukja. Pêr tanhmã kot amnhĩ tomnuj to hkêk kêñã. Anẽ.

⁵Hãmri nhũm Jejus kato nẽ arĩ pahi hã àhkà tu nẽ ê kamrêk jaxà nẽ o xa nhũm Pirat mẽ kãm: —E kwa mẽ omu nẽ kamã axukapĩrĩ hkêk wehe. Anẽ.

⁶Hãmri nhũm patre krãhtũmjê mẽ mẽõ pòristijaja tee ri ja hã kuma nhũm ja mẽ kêp omnuj nẽ. Hãmri nẽ hã kãm kapêr kãm hihtỳx nẽ kãm: —Tk. Kwa nà pĩ kahpa hã mãn anhô. Kê pĩ kahpa hã mãn ajêk nẽ ty. Anẽ. Hãmri nhũm tee ri hã mẽ kuma nẽ mẽ kãm: —Nà mẽ kam nẽ ma amnhĩm o tẽ nẽ mẽ kam amnhĩm ho anẽ. No pa kot paj ho anhỹr kêk nẽ. Mo mỳrapê kot pa kêk hã amỹnê nhũm mẽ kupĩ? Nà kwarĩ kot pa ho anhỹr kêk nẽ. Anẽ.

⁷Hãmri nhũm mẽ tee ri kuma nẽ kãm: —Kwa kêp Tĩrtũm Kra hã amnhĩ jarênh kêñã. Mẽ inhĩgêkaja na prem ã mẽ ixte amnhĩ jarênh anhỹrja nê mẽ inhmã kapêr pa htem ã amnhĩ jarênh anhỹr kêk nẽ. Kojã mẽhõ ã ri amnhĩ jarênh anẽ nhũm mẽ ja mỳrapê kupĩ. Anẽ.

⁸Hãmri nhũm Pirat tee ri Jejus kêp Tĩrtũm Kra hã amnhĩ jarênhja ma nẽ kãm uma nẽ kãm tanhmã ho hprãm kêk nẽ.

⁹Hãmri nẽ akupỹm òrkwỹ hwỳr ho axà nẽ axte hkukja nẽ kãm: —Kwa aprĩ hã inhmã amnhĩ jarê. Nhỹhỹnh na ka pre mẽ ixwỳr mỗ? Anẽ. Nom nhũm axte tanhmã kãm nẽ hkêk nẽ. ãm arĩ akryk mar o xa.

¹⁰Nhũm tee ri omu hãmri nẽ kãm: —Kwa xà ate ixpumunh kêt? Inhỹ hã na htem mẽ kupa nẽ inhỹ hã akupỹm mẽ hapôj. Tã ka pẽr aprĩ hã inhmã tanhmã amnhĩ jarẽnh to hkêt nẽ ri akryk akuhê. Anẽ.

¹¹Hãmri nhũm Jejus kãm: —Nom Tĩrtũm nhỹ hã pix mã na ka hte ã amnhĩ nhĩpêx anẽ. Kêp ãm Tĩrtũm kãm ja prãm kêt ronhỹx ka tee ri tanhmã amã ixto hprãm hkaprỹ. Tãm kot mẽ ixkaxyw axãm kênã. Tã mẽ kot awỳr inhmẽnh nẽ ri ixtyk ã ijarẽnh xwỳnh pê Ijaew nhõ pahijaja. Ra mẽ kot ixkaga jakamã na mẽ ã amã ijarẽnh anẽ. Jakamã mẽ kot amnhĩ tomnuj tỳx o ajakrenh. Anẽ.

¹²Hãmri nhũm Piratja tee ri ã kapẽr anhỹr ã kuma nẽ kot kãm urer prãm nẽ. Hãmri nẽ akupỹm Ijaew wỳr kato nẽ hã mẽ kãm kapẽr nhũm mẽ tee ri kot kãm urer kaxyw ã amnhĩ jarẽnhja ma nẽ kãm ja prãm kêt kumrêx. Jakamã kàxpê nê kãm kapẽr nẽ kãm: —Kwa nà ra kêp mẽ inhõ pahi hã kot amnhĩ to hêx kênã. Kot mẽhõ ã ri amnhĩ jarẽnh anẽ nhũm Rõm kamã mẽ panhõ pahi Sestija ja hã harẽnh ma nẽ kamã gryk tỳx nẽ. Tã kot kaj kãm anhũre nhũm ajarẽnh ma nẽ akamã gryk nẽ. Anẽ.

¹³Hãmri nhũm tee ri mẽ kuma hãmri nẽ ma pahi kot tanhmã mẽ harẽnh to xà hã kên pota wỳr ma tẽ nẽ hã nhỹ. Mẽ ixpê Ijaew kapẽr kãm mẽ ixte kãm: “Kapata” jarẽnh xwỳnhta wỳr kot tanhmã Jejus jarẽnh to kaxyw ma hwỳr tẽ nẽ hã nhỹ nhũm mẽ hwỳr o tẽ.

¹⁴Hãmri nhũm ra arĩgro pê sêsta. Mẽ ixpê Ijaewjaja mẽ ixte Pas ã amnhĩ tomnuj mỳrapê mry hkwỳ hpar nẽ Tĩrtũm kôt pix mã amnhĩ nhĩpêx ã amnhĩ jarẽnh xà hã arĩgroja kato. Jakamã nhũm kaxkwa nhĩpôk ri myt nhỹ nhũm Piratja mẽ kot Jejus kator ã harẽnh prãm xàj arĩ mẽ kãm ho mẽ õ pahi hã harẽ nẽ mẽ kãm: —E ota mẽ anhõ Pahihtita. Anẽ.

¹⁵Hãmri nhũm mẽ tee ri ã harẽnh anhỹrja ã kuma nẽ kãm: —Kwa apĩ ri. Ma o tẽ nẽ pĩ kahpa hã anhõ kê tokyx ty. Anẽ nhũm tee ri mẽ kuma nẽ mẽ kãm: —Kwa nà. Kêp mẽ anhõ pahi kênã kot paj kêt ri axtem nẽ mẽ apê kupĩ. Anẽ. Hãmri nhũm mẽ kãm: —Nà kêp mẽ inhõ pahi hkêt. Pahi Sesti pix na kêp

mě inhõ pahi. Aně. Mě kām Sesti hkīnh kêt tã ã kām Jejus htyk prām xàj ri harēnh aně.

16Hāmri nhům Pirat tee ri ja hã mẽ kuma nẽ tã Jejus ã pōristi mã karõ nẽ mẽ kām: —E mẽ māmřĩ ma o tẽ nẽ pĩ kahpa hã anhõ kê ty. Aně. Hāmri nhům mẽ kuma nẽ ma o tẽ.

Mě kot pĩ kahpa hã Jejus nhõr ã mẽ harēnh

Matêwre 27.32-44; Makre 15.21-32; Rukre 23.26-43

17Hāmri nhům pōristija Jejus mã õ pĩ kahpa gõ nhům kutu nẽ ma mẽ hkôt hkjēnh o mō. Nhům mẽ krĩ rům ho kato nẽ ma hixêt prêk wỳr o tẽ. Hixêt prêkja mẽ kot harēnh o: “Korkot” aně. No mẽ ixpê Ijaewjê kapěr kām na pa pre htem harēnh o “Mě hkrã hi xà” anhỹr xwỳnhhta wỳr nhům mẽ ma o tẽ nẽ hã ho api.

18Hāmri nẽ pikap pĩ kahpa xi nẽ hã Jejus xi nhům hã nõ nhům mẽ prek o ãhkra ho htỳx nẽ hpar o htỳx. Hāmri nẽ kaxyw hkakwỳ nẽ hkakwỳnh pa nẽ kamã pĩ kahpata xãm nẽ hity hpa nhům Jejus kỳx pê ajêt. Hāmri nhům mẽ mãănēn wa ho haměxkrut nẽ pĩ kahpa hã wa kunhõ nhům wa kuri ajêt. Wa kot tanhmã amnhĩ tomnuj to xwỳnhja wa ho akutã Jejus nhĩjê nhům wa uràk nẽ kỳxpê ajêt.

19Hāmri nhům Piratja õ pōristi mã aně nhům mẽ tap õ py nẽ hã tanhmã kagà hto nẽ kagà ho: IJAEW NHÕ PAHI JEJUS NA JÁ KÊP NAJARE NHÕ XWỠNH

20Nom mẽ ixpê Ijaew kapěr pix kãm hã kagà hkêt nẽ. Mãănēn Gresjê kapěr kãm nẽ Raxĩjê kapěr kãm nhům mẽ mãănēn hã kagà nẽ Jejus mỳri kunhõ. Hāmri nhům Ijaew kwỳjaja Jerujarẽ rům hwỳr mra nẽ mẽ kot ã hã kagà nhĩpêx anhỹrta pumu nẽ kamã harẽ. Jerujarẽja hixêt prêeta wỳr jawỳ jakamã nhům mẽ kurům ohtô nẽ hwỳr mra nẽ omunh o kuhê.

21Hāmri nhům patre hkrãhtũmjaja tee ri ã Jejus jarēnh anhỹr ã kagàta pumu nhům ja mẽ kêp omnuj nẽ. Jakamã nhům mẽ ma Pirat wỳr mra nẽ kãm: —Kwa mon ka ri hã mẽ kãm aně nhům mẽ axtem nẽ ã ri kagà nhĩpêx aně? Kwa nà kêp mẽ inhõ pahi hkêt. ãm htỳx ri kot ã kot amnhĩ jarēnh anhỹr o

pa kênã. Kwa hã kagàja o anhĩpa nẽ hpãnhã hã kagà ho: “Kêp Ijaew nhõ pahi hã kot amnhĩ to hêx xwỳnh.” Anhỹr o hpãnhã hã hipêx nẽ anhô nà? Anẽ.

²²Hãmri nhũm mẽ kuma nẽ mẽ kãm: —Tk. Nà pa ho ixpinphanh kêt nẽ. Ra ixte hã kagà hpar kênã. Anẽ.

Pôristijaja kot axpẽn mã Jejus xê ho pigrành

Matêwre 27.35-36; 27.55-56; Makre 15.24; Rukre 23.34

²³Hãmri nhũm pôristijaja kot axpẽn mã Jejus xê o pigrành kaxyw amnhĩ tã haxwỳr o tẽ. Mẽ kêp 4 no nhũm Jejus xê kêp 5 jakamã nhũm mẽ amnhĩ kôt ho 4 nẽ haxwỳ nhũm pyxi nẽ hprã. ê rytita. Na pre hipêx muxre. Nhỹhỹnh hkayr xà pumunh kêt kumrẽx.

²⁴Jakamã nhũm mẽ omu nẽ kãm hkĩnh nẽ. Hãmri nhũm hõ kot amnhĩm hpyr nẽ ho arĩk kaxyw nhũm mẽ hã kênre ho jôka. Na pre ra Tĩrtũm kapêr ã kagà htũm kot mẽ hkukamã ja hã mẽ harênh nẽ mẽ harênh kot: Na prem axpẽn mã ixê o anhgrà nẽ hã kênre ho jôka ho hkrĩ. Anhỹr o kot mẽ hkukamã mẽ harênh. Tã nhũm mẽ ra hkôt ã amnhĩ nhĩpêx anhỹr o hkrĩ.

Jejus kot Juãw nhĩhkram katorxà jaxàr ã harênh

²⁵Nhũm Jejus par pê katorxà xa. Nẽ htõx nẽ Kropti hprõ Marir nẽ Marir Matarênh mẽ nhũm mẽ Jejus katorxà nhĩhkô hã Jejus pumunh o kuhê. Nhũm amnhĩ tã mẽ omu

²⁶nẽ mẽ kuri pa ixpê Juãw pumu. Hãmri nẽ kêp ixkràmnhwỳ mex ã ixtã katorxà mã kapêr nẽ kãm: —E ota Juãwta. Kojaxpãnhã te kêp akra pyræk o anhĩpêx nẽ tanhmã ato ajuta hto ho pa. Anẽ.

²⁷Hãmri nẽ hpãnhã pa inhmã kapêr nẽ inhmã: —E Juãw. Kêr ka te kêp akatorxà pyræk o inhmã hipêx mex o ri apa. Anhỹr jakamã pa kuma nẽ kot inhmã hã karõ xà hkôt inhõrkwỹ hwỳr haxà nẽ amnhĩ kôt ri ho ixpa.

Jejus htyk ã harênh

Matêwre 27.45-56; Makre 15.33-41; Rukre 23.44-49

²⁸Tã nhũm Jejus ra amnhĩ pumu hãmri nẽ hamaxpêr o: —Nà Inhĩpêêxà kot mẽmoj tã inhmã karõta na pa ra kãm ho anhỹr o hitep xà xir kaxyw. Anẽ. Hãmri nẽ kãm kôr ã amnhĩ jarẽ. Nom ra hkukamã Tĩrtũm kapêr ã kagà htũm

kot htyk kaxyw nê kãm kôr kukamã harênh jakamã nhũm ã amnhĩ jarênh anê nê kapêr o: Nà na pa ra inhmã kôr nê. Anê.

²⁹Nhũm hpar pê guhkrax kãm wĩhti punureta ãm jakamã nhũm mẽ ã kot amnhĩ jarênh anhỹrja ma nê kaxyw mẽmo rerek py nê o tẽ nê kaxyw pĩ ryti hõ py nê ho hkanhwỳ. Nê akupỹn o tẽ nê ho wĩhti mã haxà nê kãm kupê.

³⁰Nhũm hkaô nê hkaôr pa hãmri nê kapêr o: E nà hãmri na pa ra mẽ piitã mẽ kot amnhĩ tomnuj pãnhã amnhĩrer pa. Jao ra Inhĩpêêxà kãm hprãm xà hkôt kãm tanhmã amnhĩ nhĩpêx to jatur xàm kumê. Anhỹr o amnhĩ jarênhja kôt ahpãr mã hkrã nê ty.

Mẽ kot kô xwa ho Jejus kamnhwỳr ã harênh

Wam Juãw 5.6-8

³¹Nhũm ra sêsta nhũm apkati nhũm mẽ inhõ arĩgromnu pê sap kaxyw. Sapja ã na hte mẽ ixpê Ijaew mẽ ixkĩnh pê Pas ã ixkĩnh rũnh o ixpa. Nhũm mẽ kãm sap ã arĩ mẽ htyk nê mẽ harir xwỳnhjê pumunh prãm kêt jakamã nhũm Ijaew krãhtũmjaja ma Pirat wỳr mra nê kãm: —Kwa pôristi mã anê kê mẽ tokyx mẽ hte hi kukê kê mẽ htyk tokyx anê. Kê mẽ tokyx mẽ o wrỳ nê ma mẽ o mra nê mẽ hagjê. Kormã sap kêt ri. Anê.

³²Hãmri nhũm mẽ kuma nê õ pôristijê mã anê nhũm mẽ ma mẽ hwỳr mra nê akutã wa kot Jejus nhĩjê nê jêt xwỳnhhta wa kumrêx wa hte hi hkwỳr.

³³Hãmri nê hpãnhã Jejus wỳr tẽ nê omu nhũm ra htyk mex nê ajêt nhũm mẽ ja hã omu nê kêp hte hi hkwỳnh kêt nê.

³⁴Nhũm pôristi hõja kô xwa py nê ho ihkjê rũm hkanhwỳ nhũm hkamrô mẽ ĩ kagô ahkà nê hprõt nhũm mẽ hkwỳja omunh o kuhê.

³⁵Nê ixpê Juãw na pa pre ijaxwỳja mẽ ĩhkô hã xa nê ja hã omunh jakamã pa ã mẽ amã hã kagà anê. ãm hãmri na pa mẽ amã harê nê hã kagà. Mẽ ate kamã harênh nê harênh mar nê hkôt ajamaxpêr kaxyw.

³⁶Na pre ra Tĩrtũm kapêr ã kagà htũm kamã ra hkukamã tanhmã kot mẽ pahwỳr mẽnh xwỳnhhta jarênh to nê hã kagà. Nê hã kagà kot: Koja mẽ

nhỹhỹnh hi hkwỹnh kêt nẽ. Anẽ. Tã nhũm mẽ ra hã kagàja kôt ã hipêx anẽ nẽ kệp hi hkwỹnh kêt nẽ.

³⁷Nẽ Tĩrtũm kapêr ã kagà htũmja mãânên ja hã harênh kot: Mẽ kot hpĩr nẽ hkanhwỳr xwỳnhja koja mẽ hpar pê omunh o kuhê. Anẽ. Tĩrtũm kapêr ã kagà htũm kamã ã Jejus tyk kukamã harênh kot anhỹr.

Mẽ kot Jejus jaxàr ã mẽ harênh

Matêwre 27.57-61; Makre 15.42-47; Rukre 23.50-56

³⁸Tã nhũm Juje pê Arimatej nhõ xwỳnhja Jejus ra htyk ã omu nẽ ma Pirat wỳr tẽ nẽ hã kãm kapêr. Kot ma o mõi nẽ tokyx haxàr kaxyw. Na pre ra Jejus kôt amnhĩ xãm nom Ijaew krãhtũmjê pymaj mẽ kãm amnhĩ to amnhĩrĩt kêt nẽ. Jakamã nhũm ma Pirat wỳr tẽ nẽ hã kãm kapêr nẽ kãm: — Pa e ot pa awỳr tẽ. Ixte mẽmoj tã amã ixkapêr kaxyw. Kot kaj apu inhmã “y” anhỹr japêr. Kwa xà kot pa ma Jejus o mõi nẽ haxà? Anẽ. Hãmri nhũm kuma nẽ kãm: “Nà mãmrĩ ho anẽ.” Anẽ hãmri nhũm ma hwỳr tẽ nẽ ho wry nẽ kumy nẽ ma haxàr mã o mõi.

³⁹Nhũm Nĩkotêja ma hkôt tẽ. Amnepê mã kot kamàt kãm Jejus wỳr htẽm nẽ wa axpẽn mã kapêr o yĩr xwỳnhhta. Jakamã ma Juje hkôt tẽ. Nẽ amnhĩ kôt mẽ hkuxwa xà hkwỳ ho mõi. ãm ho mõi rax kumrêx. Ho 34 kir nẽ kutu nẽ o mõi. Mẽ hkuxwa xàja na pre mẽ kot mẽmo kuxwa xà mã “mĩra” nẽ “aroe” anhỹr jarênhja nhũm kaxyw hkwỳ jakà nẽ ho ahkà nẽ ho mẽ hkuxwa xà nhĩpêx. Hãmri nẽ kutu nẽ ma Juje kot Jejus jaxàr nhũm kot ho hkuxwa kaxyw hkôt o mõi.

⁴⁰Hãmri nhũm wa ho kupêxê kukõnh pa nẽ ho Jejus kupu. Mẽ ixpê Ijaew mẽ ixte mẽ htykjê jagjênh kaxyw ã mẽ hipêx anhỹr xà hkôt nhũm wa ã hipêx anẽ nẽ haxà.

⁴¹Nhũm ra mẽ kot pĩ kahpa hã nhõr xà tã mẽ kot mẽmo pĩ ho pa nẽ hkre xwỳnh kwỳ kuhê. Nẽ kamã kẽn kre nyw. Kormã mẽ kot kamã mẽ htykjê hõ jaxàr kêt xwỳnhhta.

⁴²Jakamã nhũm wa omu nẽ axpẽn mã: —E kwa pu hwỳr Jejus o tẽ nẽ kamã mãn tokyx haxà. Kêr pu kormã sap kêt ri ra tanhmã amnhĩ to hpa. Anẽ.

Hāmri nē hwỳr kumỳ nē o tē nē kamã haxà nē hã hitom pa hāmri nē ma akupỹm krĩm wa tē.

Juãw 20

Jejus akupỹm htĩr ã harēnh

Matêwre 28.1-10; Makre 16.1-8; Rukre 24.1-12

¹Tã nhũm sap tē nē hapêx nē hpãnhã semãn nyw krax xà pê tãmĩk. Hāmri nhũm Marir Matarēn kwỳhtã kãnhmã nhỹ. Kormã myt kator kêt ri kãnhmã nhỹ nē ma kēn kreta wỳr tē. Nē hwỳr pøj nē tee ri hitom xà hã kēn rax pumu. Nhũm ra nhãm hakwa kre kuhpa hã ri hikwỹ nhũm omu nē tee ri hkukamã hamaxpēr pê omunh o xa.

²Hāmri nē awjanã nē ma akupỹm hprõt nē nhỹri Simãw Pêtre nē pa ixpê Jejus krãmnhwỳ mex ã wa ixpumu nē hkaprĩ kamã wa inhmã harē nē wa inhmã: —Xê na pēr mẽ pahpê mẽ panhõ Pahihti kapa nē nhỹhỹm ma o tē. Xê nhỹhỹm mãn pre wem o tē? Anē.

³Hāmri pa wa kuma nē hwỳr ixprõt kurê kumrēx.

⁴Hāmri pa Simãw Pêtre mã wa nē ixkumrēx hwỳr pøj.

⁵Nom kormã kēn kre hwỳr ixàr kêt ri kormã hakwa krem inhĩkôt nē kaxwỳnh kãm nōr xà kamã Jejus japêr ixrĩt o xa. Nhũm kupêxê nhĩrê pix nō pa omu.

⁶Hāmri nhũm Simãw Pêtre ixkôt tē nē ixrom krem àr kurê kumrēx nē kupêxê nhĩrêta pumu.

⁷Nē hkrã kupu xà pumu nhũm axtem hkrã muxre nē ahte nō.

⁸Hāmri pa hkôt axà nē nōr xà kaprỳ pumu nē ijamaxpēr o: —Hêxta waa nē. Nà mãn akupỹm htĩr. Hã na nōr xà hkaprỳ mex nē. Nà mãn akupỹm htĩr kãm ga. Anē.

⁹Ra Tĩrtũm kapēr ã kagà htũm kot ja kukamã akupỹm htĩr ã harēnh tã pa wa kormã ixprĩ hã ja hã omunh kêt nē. Tã kēn kre kaprỳ pumu nē kãm ijamaxpēr kurê kumrēx.

¹⁰Hāmri nē wa ixkato nē awjanã nē ma akupỹm wa ixkwỳjê hwỳr wa tē.

Jejus kot Marir Matarēn wỳr kator ã harēnh

Makre 16.9-11

¹¹No nhũm Marir Matarēnja arĩ kēn kre kapem hkaprĩ nē mỳr o xa. Nē mỳr pē hikôt nē kēn kre kamu

¹²nē kamã Tĩrtũm kapēr o wrỳk xwỳnh wa ho axkrut nē wa omu. Nhũm wa ê jakajre kamã wa nhỹ. Nhũm hōja hkrãm nhỹ nhũm hōja htem nhỹ.

¹³Hāmri nē wa Marir Matarēn mã kapēr nē kãm: —Kwa mon ka ri omu nē amỳr o xa? Anē. Nhũm kãm: —Xê nhũm. Na prem ma nhỹhỹm mẽ ixpê mẽ inhõ Pahihtija mỳ nē ma o tē nē hpãnhã nhỹri kuxi. Anē.

¹⁴Rôm nhũm Jejus tãm tē nē hkatut kôt xa nhũm Marir Matarēn ho hakēx nē omu nom hprĩ hã omunh kêt nē. Omu nē htỳx ho axtem mēhõ hã hkamnhĩx.

¹⁵Hāmri nhũm kãm: —Kwa mon ka ri amỳr o xa? Mēhõ na ka ri hapēr arĩt pē amỳr o xa? Anē. Hāmri nhũm kuma nē htỳx ho pĩ hkre jamār xwỳnh ã hkamnhĩx nē kãm: —Xê xà ka na ka mẽ ixpê mẽ inhõ Pahihti ho ahkĩ nē ma o tē nē nhỹri axi mê? Xê ka japēr nē akatàt kôt inhmã harē. Nhỹri inhmã nōr xà jarē pa ma hwỳr tē nē kumỳ nē man akupỹn o tē nē akupỹm kēn kre kamã kuxi. Anē.

¹⁶Hāmri nhũm Jejus kãm hixi jarē nē kãm: —Kwa Marir Matarēn. Amnē ixpumu nē arĩ ã akapēr anē nà. Anē. Hāmri nhũm jatã hprĩ hã kuma nē ho hakēx nē amnhĩ jaēr pē hprĩ hã omu nē kãm: —Xê Pahihti. Xep ka na ka. Hêxta gàu nē. Anē. Nom mẽ ixpê Ijaew kapēr kãm Pahita jarēnh o: “Raponĩ” anē. Nhũm ã kãm kapēr anē hāmri nē axte ma nhỹhỹm kēp htēm pymaj hpa hã kupy.

¹⁷Hāmri nhũm kãm: —Kwa inhmã anhũre. Na pa kormã ma akupỹm Inhĩpêxà hwỳr ixàpir kêt nē. E tokyx ma akupỹm tē nē ixtõ nē ixtõxjê mã ijarē. Na ka prem apê ixkràmnhwỳ pix tã ra mẽ apê ixtõ nē ixtõx na ka mẽ. Jakamã ma akupỹm mẽ hwỳr tē nē mẽ kãm ijarē. Nē mẽ kãm: “Na Jejus mẽ awỳr pēr mēnh o: ‘Kot paj tokyx ma akupỹm Inhĩpêxà Tĩrtũm wỳr api. Nom

kêp pa Inhîpêêxà pix kêt mãänën kêp mẽ Anhîpêêxà na. Nê mãänën kêp mẽ anhõ Tirtüm na.' Anhÿr o mẽ awÿr pÿr mẽ." Anê. E ma akupÿm mẽ hwÿr tẽ nê tokyx ã mẽ kãm ijarênh anê. Anê.

¹⁸Hãmri nhũm kuma nê ma akupÿm mẽ ixwÿr tẽ nê mẽ inhmã awjarẽ nê mẽ inhmã: —Xê na pa ham mẽ panhõ Pahitita pumu. Na akupÿm mẽ pamã htÿr. Anê. Hãmri nê mẽ inhmã kot tanhmã kãm kapÿr to hã harẽ pa mẽ kuma nê tee ri hkukamã ijamaxpÿr.

Jejus kot hkwyjê hwÿr kator ã harênh

Rukre 24.36-43

¹⁹Tã nhũm tòmîk nê kamàt pa mẽ Jejus kôt ixpa ho ixpa xwÿnhjaja axpÿn wÿr akuprõ hãmri nê Ijaew krãhtümjê pymaj hakwakre kahê hpa nê axpÿn mã ixkapÿr o ixkrî. Nhũm Jejus mẽ ijaêr pê nhÿhÿnh mẽ ixwÿr axà nê mẽ ixkuri xa nê mẽ inhmã: —Pa. Xà kormã mẽ anhõt kêt? Anê.

²⁰Hãmri nê mẽ inhmã amnhî nhîhkra kamã prek tatak xà jahkre nê hakÿx kôt mẽ kot hkanhwÿr xàja nhũm mẽ inhmã hahkre. Pa mẽ akupÿm htÿr kãm omu nê ixkînh tÿx kumrêx.

²¹Hãmri nhũm mẽ inhmã: —E kwa kêr ka mẽ tee ri amnhî kukamã ajamaxpÿr o amã ma ho ri apa hkêt nê. Na pre Inhîpêêxàja mẽ awÿr inhmẽ pa pre wrÿ. Tã kot paj amnhî pyrà nê mẽ piitã mẽ hwÿr mẽ arê. Anê.

²²Hãmri nê mẽ ixkaxyw htyyxà mẽ nê mẽ inhmã Tirtüm mẽ wa Karõ jarẽ nê mẽ inhmã: —E koja Tirtüm mẽ wa Ixkarõja wrÿ nê mẽ akarõ mã gjêx pa.

²³Ka mẽ ÿ hã ma mẽ piitã mẽ hwÿr apa nê mẽ kãm Tirtüm kapÿr jarênh o ri mẽ hkôt apa. Nê nhÿri mēhõ pumu nê inhÿ hã kãm: “Kot kaj Tirtüm kôt amnhî xãm nhũm amnhî tã apumu nê anê ate amnhî tomnuj rênh pa.” Anê. Ka mẽ ã kãm akapÿr anê nhũm mẽ ama nê hkôt amnhî xãm nhũm Tirtüm amnhî tã omu nê nê kot amnhî tomnuj rênh pa. Nom koja mẽ ama nê ãm mẽ ama nê hkôt amnhî xãm kêt japêr ka mẽ inhÿ hã kãm: “Nà kot kaj Tirtüm kôt amnhî xãm kêt nê nhũm anê ate amnhî tomnuj rênh kêt nê.” Anhÿr o kãm akapÿr nhũm Tirtüm ho anê nê nê rênh kêt nê. E kêr ka mẽ ã inhÿ hã

amnhĩ nhĩpêx anhÿr o ri apa. Aně. Nhũm pre ã Jejus mẽ inhmã kapêr aně hãmri ně kato ně ma nhÿhÿm tẽ.

Jejus kot Tomas mã kapêr ã harěnh

Matêwre 28.17

²⁴No nhũm mẽ inhĩõ pê Tomas pihpohtita kormã mẽ ixkĩnhã akupÿm Jejus htĩr kãm omunh kêt ně. Na pre ma kape hã tẽ nhũm wakre kamã mẽ ixwÿr axà ně mẽ inhmã kapêr hãmri ně ma nhÿhÿm tẽ. Jakamã nhũm Tomas akupÿn mẽ ixwÿr tẽ ně axà pa mẽ kãm harě nhũm tee ri mẽ inhma ně mẽ ixkôt hamaxpêr kêt ně.

²⁵Ně mẽ inhmã: —Nà kot pa ãhkra kamã prek tatak xà pumu ně kamã inhĩhkra hkrã jaxà. Ně hakÿx kôt hkanhwÿr xàta pa mã ho aně ně omu ně kamã inhĩhkra hkrã jaxà ně rĩ kormã akupÿm htĩr kôt ijamaxpêr. Aně.

²⁶Tã nhũm semãn pyxi ně hapêx pa mẽ axte axpên wÿr akuprõ ně axte Ijaew krãhtũmjê pymaj amnhĩ tã kahê htÿx ně ixkrĩ. Nhũm Tomas tã mẽ ixkuri nhÿ. Hãmri nhũm Jejus axte nhÿhÿnh mẽ ixwÿr axà ně mẽ inhmã: —Pa. Na ka mẽ rĩ akrĩ. Aně.

²⁷Hãmri ně Tomas pumu ně hwÿr tẽ ně kãm ãhkra pẽ ně kãm: —E ota inhĩhkra kamã prek tatak xàta. Mãmrĩ kamã anhĩhkra hkrã jaxà. Ně hpãnhã ijakÿx kôt mẽ kot ixkanhwÿr xà kamã mã ho aně ně haxà ně akupÿm ixtĩr kôt ixpumunh kurê kumrěx. Aně.

²⁸Hãmri nhũm kuma ně kãm: —Nà pêr ãm hãmri apê inhõ Pahihti Tĩrtũm na ka. Aně.

²⁹Hãmri nhũm kãm: —Tÿ. ãm ano ho ixpumunh kôt pix mã na ka ixkôt ajamaxpêr. Tã no ãm koja mẽ nhÿrmã mẽ amÿr pê mẽ pa xwÿnhjaja mẽ akĩnhã mẽ no ho ixpumunh kêt tã akupÿm ixtĩr ã ijarěnh mar pix tã ixkôt hamaxpêr. Ja na mex kumrěx. Aně.

Juãw kot tanhmã amnhĩ jarěnh to hã harěnh

Rõmãn 15.4; Wam Juãw 5.13

³⁰Na pre Jejus kormã mẽ ixto pa ri mẽ inhnoo mã mẽmoj tanhmã hipêx to rax ně nom kot paj kagàja kamã piitã hã kagà hpar kêt ně.

³¹ ãm hkwỳ pix na pa mẽ amã hã kagà. Mẽ ate mẽ ixpyrà nẽ omunh nẽ kêp Tĩrtũm Kra hã kot mẽ pakaxyw ãm xwỳnh ã omunh nẽ hkôt amnhĩ xunhwỳr kaxyw na pa ã mẽ amã harẽnh nẽ hã kagà anẽ. Tã kot kaj mẽ amnhĩ kaxyw hkôt ajamxpěr nẽ hkôt amnhĩ xunhwỳ hãmri nẽ nhỹrmã atyk tã nhũm akupỹm mẽ ato mẽ atĩr ka mẽ ixpyrà nẽ kuri amex nẽ atĩr tũm nẽ apa ho apa. Tã pa ã mẽ amã mẽmoj piitã harẽnh nẽ hã kagà anẽ.

Juãw 21

Jejus kot hkwỳjê hwỳr kator ã harẽnh

Matêwre 26.32; 28.7; 28.10

¹ Tã nhũm Jejus axte hkôt mẽ ixpa ho mẽ ixpa xwỳnh kwỳjê hwỳr kato. Himô pê Tipeja mỳri.

² Pa mẽ ixpê 7 nẽ axpẽn wỳr akuprõ. Na pre Simãw Pêtre nẽ Tomas pihpohti nẽ Natãnaew. Natãnaewja Garirej kamã krĩ pê Kanã nhõ xwỳnh na pre. Nẽ wa pa wa ixpê Jepetew krata wa nẽ wa inhĩõ wa pijakruuta wa. Pa prem wa mẽ nhỹri axpẽn wỳr akuprõ.

³ Hãmri nhũm Simãw Pêtre mẽ inhmã: —E pa jarãhã ma tep wỳr tẽ nẽ hkwỳmnê. Anẽ. Pa mẽ kuma nẽ kãm: —Tôe. Nà pa mẽ ijaxwỳja ma akôt mõ. Anẽ. Hãmri nẽ mẽ ma himô rax pê Tipeja wỳr mõ nẽ kanôre mã agjê nẽ gôx kãm kryhti rẽnh o ixkuhê. Nom tee ri ho tep õmnênh kaxyw rẽnh o ixkuhê nẽ hõmnênh kêt nẽ ixtã apkati nhũm tep amrakati kumrêx.

⁴ Tã nhũm myt kato nhũm Jejus gô mỳri xa. Pa mẽ ixpiitã omu no ãm ixprĩ hã kêp Jejus ã omunh kêt nẽ. Tã no nhũm tãm xa.

⁵ Hãmri nẽ mẽ inhmã kapěr nẽ mẽ inhmã: —Pa. E mãn ka mẽ ra tep kwỳmnênh rax nẽ nà? Anẽ. Hãmri pa mẽ kãm: —Tk. Nà mo tep? Amrakati kumrêx kênã. Anẽ.

⁶ Hãmri nhũm mẽ inhmã; —Xô wehe? Tôe. Axte mẽ axupôk rũm kryhti mẽ nẽ omu. Anẽ. Hãmri pa mẽ mar xà hkôt ho anẽ nẽ kumẽ. Hãmri nhũm kamã tep hipu rax kumrêx nhũm utĩ rax nẽ. Pa mẽ tee ri ixte ho ixàpir kaxyw ri hkukjê.

⁷Hāmri pa kêp Jejus ã omunh kurê kumrêx nê Simãw Pêtre mã kãm: —Kwa pêr mẽ panhõ Pahihtita na. Anê. Hāmri nhũm inhma nê hkĩnh tỳx nê akupỹm hinôkà jaxà nê gôx kãm mrõ nê ma hwỳr ho nana ho tẽ.

⁸Hāmri pa mẽ hkôt kanôre kamã kryhti kjênh o mỗ. Ra amgrà hwỳr amgrire. Wỳr 100 met pix jakamã pa mẽ hwỳr ixpôx tokyx anê.

⁹Nê pàr o hkre kura nê kuxi nê ijabôx pa nê Jejus wỳr ixprôt nê mra. Nhũm ra mẽ ixkutêp kuto nê par nhĩpêx nê nhỹhỹnh tep kwỳ par kãm haxwỳ nê ho àr o nhỹ. Nê kaxyw pãwti nê amnhĩ ri haxwỳ nê o nhỹ.

¹⁰Hāmri nê mẽ ixpumu nê mẽ inhmã: —E mẽ amnê anhõ tep o mra pu mẽ hkuxôt nê kuku. Anê.

¹¹Hāmri nhũm Simãw Pêtre akupỹm pàr wỳr tẽ nê kryhti ho htỳx xà hpôt nê amgrà hwỳr hkjênh o mỗ. Kamã tep rũnh pix. Nê ohtô nê. Kamã kêp 153 nê hikwỳ htã nhũm nhỹhỹnh kryhti hkwy pikaxônkh kêt nê.

¹²Hāmri nhũm Jejus mẽ inhmã: —E kwa mẽ tokyx mra pu mẽ apku. Anê. Hāmri pa mẽ kuma nê hwỳr mra nê ixkrĩ pa. Hāmri nê tee ri omunh o ixkrĩ. Mẽ ixprĩ hã omunh mex kêt tã kot ã mẽ inhmã amnhĩ nhĩpêx anhỹr ã omu nê kêp mẽ inhõ Pahihtiti hkôt omunh kurê kumrêx jakamã hixi hã hkukjêr kêt nê. ãm akryk omunh o ixkrĩ.

¹³Hāmri nhũm mẽ inhmã pãwti ho hkry pa. Nê hpãnhã tep jamỳ nê mã ho anê nê ho hkry pa nê ho mẽ inhĩpêx pa pa mẽ ixàpkur o ixkrĩ.

¹⁴Nhũm Jejus akupỹm htĩr kãm ra ahpỹnhã mẽ ixwỳr hapôx o axkrunêpxi.

Jejus kot akupỹm tãm Simãw Pêtre xãm

Atre 20.28-31; Wam Pêtre 5.1-4

¹⁵Tã pa mẽ ra ixàpkur pa nê kànhmã ixkuhê nê gô mỳ ri mra. Hāmri nhũm Jejus Juãw hkra Simãw Pêtre mã tanhmã kapêr to. Nom ixpê Juãw nhũm kêp ixkra hkêt axtem Juãw ã hkra na pre. Jakamã nhũm Jejus kãm kapêr nê kãm: —Kwa Simãw. Xà we amã ijabê ho ate pika hkôt mẽmoj piitã hakrenh par nà? Anê. Hāmri nhũm kuma nê kãm: —Tỳ inhmã ajapê htỳx kênã Pahihtiti. Ra ate ja hã amnhĩ tã ixpumunh mex. Inhmã ajapêê. Anê. Hāmri nhũm kuma nê kãm: —Tôe. Nà kêr ka inhmã mẽ kot ixkôt amnhĩ

xunhwÿr xwÿnhjê jahkre mex o ri mẽ hkôt apa. Te ho ôwêhti hkrare jamãr xwÿnh kot hamãr mex o ri hkôt pata pyræk. Anẽ. Hãmri nhũm kãm: —Tôe. Nà kot paj amã mẽ ho anẽ. Anẽ.

¹⁶Tã nhũm hã ahtũmre nhũm kê axte kãm: —Kwa Simãw. Xà we ãm hãmri na ka inhmã amnhĩ jarẽ. Xà we amã ijapêê nà? Anẽ. Hãmri nhũm kãm: —Tÿ. Ra ate inhmã ajapê hã ixpumunh kênã. Anẽ. Hãmri nhũm kê axte kãm: —Tôe. Kêr ka inhmã mẽ kot ixkôt amnhĩ xunhwÿr mã xwÿnhjê jahkre mex o ri mẽ hkôt apa. Te ho ôwêhti jamãr xwÿnh kot ôwêhti jamãr mex o hkôt pa xwÿnh kot amnhĩ nhĩpêx pyræk. Anẽ. Hãmri nhũm kãm: —Nà kot paj amã mẽ ahkre mex o ri mẽ hkôt ixpa. Anẽ.

¹⁷Tã hãmri nhũm hã ahtũmre nhũm kê axte kãm: —Kwa Simãw. Xà we ãm hãmri na ka inhmã amnhĩ jarẽ? Xà we amã ijapê htÿx kumrêx nà? Anẽ. Hãmri nhũm tee ri amnhĩ tã kuma nẽ hkaprĩ nẽ. Ra kot amnhĩ tã hkukjêr o axkrunêpxi jakamã nhũm hkaprĩ nẽ tee ri hamaxpêr. Hãmri nẽ kãm: —Kwa Pahihti. Ate mẽmoj piitã omunh par. Nẽ ate inhmã ajapê htÿx ã ixpumunh par kênã. Anẽ. Hãmri nhũm kê axte kãm: —Tôe. Kêr ka inhmã mẽ kot ixkôt amnhĩ xunhwÿr mã xwÿnhjê jahkre mex o ri mẽ hkôt apa. Te ho ôwêhti jamãr xwÿnh kot hamãr mex o ri pata pyræk. Anẽ. Hãmri nhũm kãm: —Nà kot paj amã mẽ ho anẽ Pahihti. Anẽ.

Simãw Pêtre tanhmã htyk to hkukamã harênh

¹⁸Nhũm Jejus arĩ Simãw Pêtre mã kapêr nẽ kãm tanhmã htyk to hkukamã harênh to nẽ kãm: —Kwa ixkapêr ma nẽ amnhĩ krã him haxàr tÿx nẽ hã apa Simãw Pêtre. Nà kormã anyw ri na ka pre hte ma nhÿhÿm apa kaxyw nẽ anojarêt hãmri nẽ anhĩnôhkà mex jagjê nẽ ma nhÿhÿm amã apa hprãm xà hkôt ri apa. Tã kot kaj apigêt nhũm mẽ apynê nẽ akahti hpre nẽ apa hpre nẽ ma nhÿhÿm ato mỗ ka mẽ kãm amnhĩ gõ nẽ amnhĩ nê tanhmã mẽ kãm nẽ hkêt nẽ. Amã mẽ hkôt amôr prãm kêt tã mãmri mẽ kãm amnhĩ gõ kê mẽ ma nhÿhÿm ato mỗ.

¹⁹Tã kêr ka arĩ ixkôt amnhĩ xãm tÿx nẽ atĩr prãm xàj mẽ umaj axte ixkaga hkêt nẽ. Hãmri nhũm mẽ apĩ nẽ tanhmã atyk to hã apumu nẽ amã Tĩrtũm

kĩnh ã apumunh mex kurê kumrêx. Hãmri nê atã Pahi Maati Tĩrtũm mex o mex ã harê. Anê. Nhũm pre ã Jejus Simãw Pêtre tyk kukamã kãm ujarênh anê. Hãmri nê kãm: —E kêr ka ixte amnhĩ to htỳx nê amarĩ mẽ kãm ixãm nhũm mẽ kot ixpĩrja pyrà nê ã amnhĩ nhĩpêx anê. Anê. Hãmri nhũm kuma nê kãm: —Tôe. Nà kot paj hãmri tã ã amnhĩ nhĩpêx anê Pahihti. Anê.

Juãw tyk kukamã tanhmã harênh to hkêt ã harênh

²⁰Nhũm pre ã Jejus Simãw Pêtre mã tanhmã htyk to hkukamã harênh anê. Hãmri nhũm kuma nê ixpê Juãw ã ixto hakêx nê ixpê Jejus kràmnhwỳ mex ã ixpumu. Kormã Jejus htyk kêr ri kamàt kãm mẽ ixàpkur o ixkrĩta ã na pa pre ãhkô hã ixàpkur o nhỹ nê kot mẽ kãm òr mã xwỳnhta nhĩxi hã hkukja.

²¹Jakamã nhũm Simãw Pêtre ixto hakêx nê ixpumu nê ixtã Jejus kukja nê kãm: —Kwa no pěr pahkôt mõi mũj? Tanhmã koja we htyk to? Anê. Hãmri nhũm kãm:

²²—Nà kot paj amã tanhmã htyk to hkukamã harênh hkêt nê. Kot pa inhmã arĩ kritpêm pa rãhã pa akupỹn ixwryk prãm nhũm arĩ pa nê htyk kêr rãhã pa akupỹn wrỳ. Kêr ka ri htyk kukamã tee ri tanhmã ajamaxpěr to hkêt nê. ãm ixkôt pix mã ate amnhĩ nhĩpêx tỳx pix kukamã mãn ajamaxpěr o ri apa.

²³Anhỹr o kãm ijarênh jakamã nhũm mẽ ixkwỳjaja kot ã ijarênh anhỹrja ã kuma ma nê htỳx nhỹrmã ixtyk kêr ã ixkamnhĩx. Nê gaa nê rĩ piitã axpên mã ã ijarênh anhỹr o pa. Nom na pre ã ijarênh anhỹr kêr nê. Na kêr pre ijarênh o: —Kot pa inhmã arĩ ri kritpêm pa rãhã pa akupỹn ixwryk prãm nhũm arĩ pa nê htyk kêr rãhã pa akupỹn wrỳ. Anhỹr o ijarê. Nom ãm hãmri ixtyk kêr rãhã nhũm akupỹn wrỳ ã ijarênh kêr nê.

Juãw kot Jejus kot tanhmã amnhĩ to hã kagà hpar kêr ã kot amnhĩ jarênh

Juãw 20.30-31

²⁴E na pa mẽ amã Jejus kot tanhmã amnhĩ nhĩpêx to ho pa hã harê nê hã kagà. Ixpê hkôt ri ixpa ho ixpa xwỳnhjê hõ na pa ãm hãmri ã hã kagà anê. Ka mẽ kamã harê nê ama nê ãm hãmri ixte kagà nhĩpêx kôt ixpumunh mex kurê kumrêx.

²⁵No na pre Jejus ãm ja pix o anhÿr o pa hkêt nẽ. Na pa ãm mẽ amã hkwÿ pix jarẽ nẽ hã kagà. Na pre tanhmã ri mẽmoj to rax kumrẽx o ri pa. Nom kęp ãm ixte kot tanhmã ri amnhĩ nhĩpêx to piitã hã kagà hpar ronhÿx hã kagàja katutxô rax kumrẽx. Jao te ra kaxkwa htêp o mõi pyræk. Tã ãm ja pix. Na hapêx.

Atre

Atre 1

Tirtüm Karō jarēnh

Matêwre 28.16; Makre 16.14; Rukre 24.36; Juāw 20.19

¹Pa Teopre? Xà amex? E ot pa axte awỳr kagà nhīpêx nē kumē. Nà wam ixte awỳr kagà nhīpêx nē mēnhta kamã na pa pre amã Jejus kot tanhmã amnhī nhīpêx to hã harē nē hã kagà. Kot tanhmã amnhī nhīpêx to ho pa nē tanhmã mē ahkre hto ho paja krax rŭm pa pre piitã hã kagà hpa nē awỳr kumē.

²⁻⁴Kormã akupỹm kaxkwa hwỳr àpir xwỳj ri na pre ỹ hã mē ahkre ho pa kaxyw hkôt mē pa xwỳnh kwỳjê rê. Tã nhŭm mē kãm hkurê xwỳnhjaja kupĩ nhŭm amnhī xà htỳx kãm hamak rax kãm ty. Hãmri nhŭm Tirtüm akupỹm ho htĩr. Nom nhŭm ma akupỹm kaxkwa hwỳr àpir kurê kumrêx kêt nē. Na pre xatã mē kot ỹ hã mē ahkre ho mē pa xwỳnh maatijê hwỳr hapôj nhŭm mē akupỹm htĩr kãm omu. Na pre hte nhỹri mē hwỳr hapôj nē tanhmã mē ahkre hto nē mē kãm: —Na pre Tirtüm mē ato hkra nē tãm mē ate amnhī nhīpêx o apa kaxyw mē axunhwỳ. Anhỹr o mē ahkre hã arĩgro ho 40. Hãmri nē kormã mē kamã pa ri axte tanhmã mē kãm kapêr to. Tirtüm Karō nhỹ hã mē kãm kapêr nē mē kãm: —E kêr ka mē krĩ ja kamã ri apa nē tokyx ma nhỹhỹm apa hkêt nē. Kê Inhīpêxà Tirtüm mē awỳr amnhī Karō rē mãn. Ra ixte mē amã harēnh xà hkôt koja mē awỳr kurē nhŭm mē awỳr wrỳ nē mē akarō mã agjê ka mē rĩ kormã anhgrà nē ma nhỹhỹm krĩ hkôt ri mē kãm kapêr jarēnh o ri mē hkôt apa.

⁵—Juāw Paxis na pre hte Tirtüm mã gôx kãm mē hkrã kumrār o pa. Tã koja Tirtüm tokyx mē awỳr amnhī Karō rē. Kot ixpãnhã amnhī kaxyw mē ato mē amã ma hkêt kaxyw mē awỳr kurē. Koja hã apkati grêre nhŭm mē awỳr kurē nhŭm ixpãnhã mē awỳr wrỳ nē mē amã agjê nē mē akamã mē akôt pa ho pa. Ka mē rĩ kormã Jerujarē rŭm ajapôj nē ma mē kãm Tirtüm kapêr jarēnh o ri mē hkôt apa. Anē.

Jejus akupỹm kaxkwa hwỳr àpir ã harēnh

Makre 16.19; Rukre 24.50

⁶Tã nhũm mẽ axte akuprõ. Jejus nẽ ÿ hã mẽ ahkre ho mẽ pa xwỳnh maatijaja nhũm mẽ hixêt pê Oriwêhti nhĩmõk ã axte axpẽn wỳr akuprõ. Hãmri nhũm mẽ amnhĩ tã Jejus kukja nẽ kãm: —Kwa Pahihiti mẽ inhmã mẽmoj jarẽ. Xà kot kaj tokyx apê Tĩrtũm kot mẽ ixwỳr amẽnh xwỳnh ã amnhĩ jarẽ nẽ Rõm nhõ xwỳnhjê nẽ mẽ pahpê Ijaew kator nà? Hãmri pa mẽ pamjaja amnhĩ to amnhĩptàr o ri ixpa. Anẽ.

⁷Hãmri nhũm mẽ kãm: —Nà Inhĩpêxà pix na ã mẽmoj kot anhỹrja kukamã àhpumunh. Tapxipix na kot mẽmoj tanhmã ho hã arĩgro nẽ mẽmoj tanhmã ho hã mytwrỳ pumunh mex. No mẽ kajaja mo kaxyw kot ka mẽ amnhĩ katorta kukamã amnhĩ jarẽn ma?

⁸Nà kot paj ãm mẽ amã mẽmoj to pyxire nẽ hkukamã harẽ. Koja Tĩrtũm tokyx mẽ awỳr amnhĩ Karõ rẽ nhũm ixpãnhã kot mẽ ato amnhĩptàr kaxyw mẽ akarõ mã agjê. Hãmri ka mẽ ma pyka piitã hkõt anhrà nẽ ma mẽ kãm ixkapêr jarẽn o ri mẽ hkõt apa. Jar Jerujarẽ kamã nẽ pika pê Jutej kõt nẽ nhãm pika pê Samar kamã nẽ pika piitã hkõt mẽ kãm ijarẽn o ri mẽ hkõt apa. ã mẽ ate amnhĩ nhĩpêx anhỹr pix kukamã kot paj mẽ amã harẽ. Anẽ.

⁹Nhũm pre ã Jejus mẽ kãm kapêr anẽ hãmri nẽ mẽ kêp kànhmã àpir o tẽ nẽ mẽ noo mã ma kaxkwa hwỳr àpir o tẽ nẽ kakrãm axà nẽ mẽ kêp akunok.

¹⁰Hãmri nhũm mẽ tee ri hapêr o kuhê rãhã nhũm mẽhõ myja wa axkrut nẽ mẽ hwỳr wrỳ nẽ mẽ kutã wa xa. Wa ê hakaj nẽ wa xa.

¹¹Hãmri nẽ mẽ kãm: —Pa Garirej nhõ xwỳnhjaja? Kwa mo kaxyw na ka mẽ tee ri kaxkwa pumunh o akuhê? Tĩrtũm na akupỹm amnhĩ wỳr Kra Jejus o api ka mẽ àpir kãm omu. E mẽ tee ri hkukamã ajamaxpêr kêt nẽ. Koja nhỹrmã man akupỹn mẽ awỳr wrỳ. Te mẽ arũm kaxkwa hwỳr àpirja pyrà nẽ akupỹn mẽ awỳr wrỳ ka mẽ omu. Anẽ.

Akupỹm Jerujarẽ hwỳr mẽ mrar ã mẽ harẽnh

Rukre 24.52

¹²Tã nhũm Jejus nhỹ hã mẽ ahkre ho mẽ pa xwỳnh maatijaja wa kuma nẽ awjanã nẽ ma akupỹm krĩm mra. Hixêt pê Oriwêhti rũm ma akupỹm Jerujarẽ hwỳr mra. Wỳr jawỳ nhũm mẽ akupỹm hpõx tokyx anẽ.

¹³Hāmri nē akupỹm kỳx pē ixkreja wỳr api nē agjê. Na pre Simāw Pêtre nē Juāw nē Xiakre nē Andrehti nē Firipti nē Tomas nē Patoromew nē Matêwre nē Xiakre hō pē Apew kraja nē Simāw Jerox nē Jut pē Xiakre hkraja. Mē piitā Jejus nhỹ hã mē ahkre ho mē pa xwỳnh maatijaja na pre mē.

¹⁴Nē mǎānēn mē hkôt mē hkwỳjaja. Jejus katorxà Marir nē Jejus tōjaja nē Jejus kot tanhmã mēni ho mex to xwỳnh kwỳjaja nhũm prem kỳx pē ixkreja wỳr Jejus nhỹ hã mē ahkre ho mē pa xwỳnh maatijê hkôt gjêx pa. Hāmri nē xatã axpēn wỳr akuprō nē Tĩrtũm mǎ amnhĩ jarēnh o hkrĩ.

Tĩrtũm kot Jut Kariot pǎnhã mēhō xǎm ǎ harēnh

Matêwre 27.3-10; Juāw 15.27

¹⁵⁻¹⁹Tǎ nhũm mē kot Jejus kôt amnhĩ xunhwỳr xwỳnhjaja ra kēp 120. Jakamã nhũm mēmo arĩgro hã axpēn wỳr akuprō nē hkrĩ. Nhũm Simāw Pêtre kǎnhmã xa nē tanhmã mē kǎm Jut Kariot jarēnh to nē mē kǎm: —E Jejus kôt ixtō nē ixtōxjaja. Pa mē amã tanhmã finat Jut Kariot jarēnh to ka mē inhma. Na pre axtem nē mē pahkwỳjê mǎ Jejus ǎ amỹnê nē hpǎnhã kǎxpore hkwỳ jamỳ nē o tē nē ho amnhĩm pyka hkwỳ japrō. Tǎ tanhmã amnhĩ to nē nhỹri ò pyka kamã tēm nē amnhĩ tu katōk nē hkrêx kato nē ty nē hkamrō ho ò pyka xy hpa. Jakamã nhũm Jerujarē nhō xwỳnhjaja harēnh ma nē pykaja ǎ hixi mē nhũm kēp “pyka kamrōhti.” No mē pahpê Ijaew kapēr kǎm kēp “Ajetǎm.” Amnepēm na pre Tĩrtũm Karō finat Tawi mǎ Jut Kariot kukamã tanhmã harēnh to. Kormã kator nē kot tanhmã amnhĩ to hkêt tǎ nhũm ra hkukamã omu nē Tawi mǎ harē. Kot axtem nē mē kǎm Jejus ǎ àmnēnhja nhũm hkukamã omu nē Tawi mǎ harē nhũm kuma nē ô ri hã kagà. Tǎ nhũm kot hkukamã hã kagà hkôt nhũm ǎ Jejus nhĩpêx anē. Jut Kariotja mē panhĩō na pre. Na pre Jejus mē pahpyrà nē amnhĩm kuta. Mē pahpyrà nē ỹ hã kapēr jarēnh o pa kaxyw. Tǎ nhũm axtem nē ǎ hipêx anē.

²⁰Nom na pre Tawi kot Tĩrtũm mex ǎ grer ǎ kagà kot ra hkukamã tanhmã harēnh to. Kagà hkwỳ pē Sam kamã kot harēnh kot: Kot amnhĩ tomnuj xwỳnhhta nhōrkwỹ koja hkaprỳn kuhê ho kuhê nhũm mēhōj mỳr pē kamã pa hkêt kumrêx. Koja ǎm arĩ hkaprỳn kuhê ho kuhê. Nom kot Jejus mǎ tanhmã amnhĩ nhĩpêx to ho paja kê mēhō mỳr pē ho amnhĩptà nē hpǎnhã

Jejus nhỹ hã mẽ ahkre ho pa. Anẽ. Ǻ Tĩrtũm kapẽr Ǻ kagà htũm kot Jut Kariot kukamã harẽnh kot anhỹr.

²¹Jakamã e ixkwỳjaja. Kot puj mẽ hpãnhã mẽ atõ xãm ka Jut mỳr pẽ mẽ pahpê Jejus nhỹ hã mẽ ahkre ho ixpa xwỳnhjê hkôt Jejus akupỹm htĩr Ǻ harẽnh o apa.

²²E mẽ atõ na ka pre mẽ ixpyràn finat Juãw Paxis kot Jejus hkrã kumrãr Ǻ omu? Nẽ Jejus kot ri tanhmã amnhĩ nhĩpêx to ho pa xà hkrax rũm ka mẽ ixkôt ri omunh o ri apa? Nẽ htyk kãm omu mẽ akupỹm htĩr kãm omu mẽ ma akupỹm kaxkwa hwỳr àpir kãm omu? E mẽ atõ na ka pre mẽ ixpyràn Ǻ kot amnhĩ nhĩpêx anhỹr Ǻ omunh par o ri hkôt apa? Ǻ mẽ ate kot amnhĩ nhĩpêx anhỹr Ǻ omunh o apa xwỳnhjê hõ kot paj mẽ ata ka Jut Kariot mỳr pẽ mẽ ixpyràn ma mẽ kãm Jejus akupỹm htĩr Ǻ harẽnh o ri apa. Anẽ.

²³Nhũm pre Ǻ Simãw Pêtre mẽ kãm kapẽr anẽ. Hãmri nhũm mẽ kuma mẽ axpẽn pumunh o hkrĩ hãmri mẽ Maxitre mẽ Jujere wa kãm hamaxpẽr. Jujere na pre hixi axkrunẽpxi. Na pre kêp Jujere mẽ kêp Pasapas mẽ kêp Justi.

²⁴⁻²⁵Hãmri nhũm mẽ wa hã Tĩrtũm kukja mẽ kãm: —Pa Tĩrtũm? Nà na pre finat Jut Kariotja Jejus kaga mẽ ty mẽ kot amnhĩ tomnuj mỳrapê ma mẽ kot amnhĩ xà htỳx kamã hamak tũm xàta wỳr ma mẽ. Tã ot pa mẽ ixte mẽhõ kot mỳr pẽ mẽ ixpyrã mẽ Jejus nhỹ hã mẽ ahkre ho pa kaxyw mẽhõ hã akukjêr kaxyw akuprõ. Ate mẽ ixpiitã tanhmã mẽ ixte amnhĩ nhĩpêx to ho ixpa hã mẽ ixpumunh par Tĩrtũm. Ate mẽ ijamaxpẽr kôt mẽ ixpumunh par mẽ mẽ ixte tanhmã amnhĩ nhĩpêx to hã mẽ ixpumunh par. Jakamã e. Ota Maxitre mẽ Jujereja wa nhỹ. Nhỹ kot kaj amnhĩm ata? Kot paj mẽ kẽn pijakrutja Ǻ wa hixi xi mẽ ho àk mẽ hõ py. Hãmri ka amã hprãm xwỳnhhta ta. Kêr pa mẽ kẽn pumunh kêt rãhã hõ py mẽ hã hixi pumu mẽ amã hprãm xwỳnh kôt omunh kurê kumrẽx. Anẽ.

²⁶Nhũm prem Ǻ Tĩrtũm mã kapẽr anẽ hãmri mẽ kẽnja o axkamur mẽ ho àk mẽ omunh kêt rãhã ja py mẽ omu nhũm hã Maxitre nhĩxi nõ. Jakamã nhũm Jejus nhỹ hã mẽ ahkre ho mẽ pa xwỳnh maatijaja amnhĩ kôt kumẽ nhũm mẽ akupỹm kêp 12.

Atre 2

Tirtüm Karõ kot mẽ hwỳr wrỳk ã harẽnh

Rukre 24.49; Atre 4.31; 8.15; 10.44; 19.2

¹Tã nhũm mẽ hkĩnh pê Pêtekos kato nhũm mẽ kot Jejus kôt amnhĩ xunhwỳr xwỳnhjaja nhỹri axpẽn wỳr akuprõ nẽ hã hkĩnh. Pêtekosja ã na pre hte Ijaew mẽ hpur kãm mẽõ rũnh ã hkĩnh kaxyw axpẽn wỳr akuprõ nẽ hã hkĩnh. Jakamã nhũm mẽ kot Jejus kôt amnhĩ xunhwỳr xwỳnhjaja haxwỳja axpẽn wỳr akuprõ.

²Hãmri nẽ kaxkwa kamã mẽmoj ma. Nhũm mẽmoj te kôk xàpêr tỳx krihkrit pyræk o mẽ hwỳr wrỳk o mõi nẽ mẽ pikuprõnh xà hã ixkreja wỳr axà nhũm mẽ piitã kuma.

³Hãmri nhũm mẽmoj te kuwy jakrax pyrækja ahpỹnhã mẽ hwỳr anghrà nẽ mẽ hkrã nhĩmõk ã hikwỹ.

⁴⁻¹³Tirtüm Karõ na pre. Tãm mẽ hwỳr wrỳk jakamã ã ri mẽ hipêx anẽ. Hãmri nẽ kot mẽ ho amnhĩptàr kaxyw mẽ hkarõm gjêx pa nhũm mẽ ÿ hã tanhmã kapêr to ho kuhê. Nom mẽ kapêr o kapêr kêt nẽ. Axtem mẽ kapêr kwỳ ho kapêr. Tirtüm Karõ kot tanhmã mẽ ho jakamã nhũm mẽ axtem mẽ kapêr kwỳ ho kapêr. Jao ahpỹnhã mẽ kapêr kwỳ ho Tirtüm mã mex o mex ã harẽ. Na pre Ijaew kwỳjaja ahpỹnhã pyka hõ kamã ri mẽ hkôt pa nẽ mẽ kapêr ma nẽ ho kapêr o pa. Tã akupỹm Jerujarẽ hwỳr pan pøj nẽ kamã ri pa ho pa. Hãmri nẽ mẽmojta ma nẽ ma Jejus kwỳjê hwỳr hprõt nẽ ahpỹnhã mẽ kapêr ã mẽ kuma nẽ tee ri mẽ omunh o kuhê. Amnhĩ jaêr pê mẽ kuma nẽ tanhmã axpẽn mã mẽ harẽnh to ho: —Kokỹỹ. Garirej nhõ xwỳnhjaja kot mẽ pakapêr mar kêt tã ra tanhmã amnhĩ to nẽ ahpỹnhã ri mẽ pakapêr o kapêr. Ahpỹnhã mẽ pakapêr nẽ ahpỹnhã mẽ panhõ pyka htã nhũm mẽ ã ri mẽ pakapêr o kapêr anẽ. Na pika pê Pat nẽ Met nẽ Erãw nẽ Mêsopotãm nẽ Jutej nẽ Kapatos nẽ Põt nẽ As nẽ Prik nẽ Pãpir nẽ Ejit nẽ Sirên wỳr Ripja nẽ krĩ pê Rõm nẽ gô hipòk pê Kret nẽ Arap. Nẽ mẽ pahkwỳjaja mẽ pahpê Ijaew kumrêx nẽ mẽ pahkwỳjaja amarĩ ri amnhĩ to Ijaew. ãm ahpỹnhã mẽ panhõ pyka nẽ ahpỹnhã ri mẽ pakapêr. —Tã pu mẽ ahpỹnhã mẽ pakapêr kãm mẽ kapêr

ma. Tirtüm mex ã mẽ kot axpën mã harënhja pu mẽ hã mẽ mar mex nẽ. Anẽ. Nhũm prem ã axpën mã mẽ harënh anẽ nẽ tee ri mẽ omunh o kuhê. Amnhĩ jaêr pê amnhĩ kapër kãm mẽ kapër ma nẽ tee ri hamaxpër nẽ axpën mã: —Kokỹỹ. Tanhmã mãn pre wem amnhĩ to nẽ ra mẽ pakapër ma nẽ mẽ pakapër o kapër? Anẽ. Nhũm mẽ hkwyjaja axtem nẽ ri mẽ hã hpër o axkẽ nẽ axpën mã: —Tk. ãm mẽ pipãnh ã ã ri mẽ kot amnhĩ nhĩpêx anhỹr kênã. Anẽ.

Simãw Pêtre kot mẽ kãm ujarënh

Atre 3.12-26

¹⁴Hãmri nhũm Simãw Pêtre ã mẽ kapër anhỹrja ma hãmri nẽ kyx pê mẽ kãm kapër nẽ mẽ kãm: —E Jerujarẽ nhõ xwýnhjaja nẽ mẽ apê ixkwý Ijaew. Pa mẽ amã mẽmoj jarẽ ka mẽ inhma nẽ inhmar tỳx nẽ.

¹⁵Na ka mẽ atỳx ri mẽ ixpipãnh ã mẽ ixkamnhĩx. Mẽ ixkrã pipãnh kêt. Kormã myt kaxkwa nhĩpôk wỳr htẽm kênã. Na hte Ijaew kwýhtã kagôxyhti ho hkôm kêt nẽ.

¹⁶Ja na pre Tirtüm amnepê mã ã mẽ ixte amnhĩ nhĩpêx anhỹrja kukamã mẽ ijarẽ nhũm ỹ hã kapër o pa xwýnh finat Joew mẽ ixkukamã hã kagà. Nẽ hã kagà ho:

¹⁷Koja nhỹrmã mẽmoj piitã hapêx kaxyw pa mẽ piitã mẽ hwỳr Ixkarõ rẽ nhũm ma mẽ hwỳr wrỳ nẽ mẽ hkarõ mã agjê. Hãmri nhũm mẽ hkanrêhã mẽ hkra xàptàr nywjaja ma mẽ kãm ixkapër jarënh o ri mẽ hkôt pa. Koja mẽ hpimtir kãm amnhĩ kukamã mẽmoj pumu. Nẽ mẽhpigêtjaja haxwýja. Kot paj mẽ hpimtir kãm tanhmã mẽ kãm ixkapër to.

¹⁸Nẽ kot paj mẽ kot ixkôt ri tanhmã amnhĩ nhĩpêx to ho mẽ pa xwýnhjê hwỳr Ixkarõ rẽ nhũm mẽ ỹ hã ma mẽ kãm tanhmã ixkapër jarënh to ho ri mẽ hkôt pa.

¹⁹Kot paj kaxkwa kamã nẽ pyka kamã aa mẽ kot mẽmoj pumunh kêt kwý ho anẽ nhũm mẽ amnhĩ jaêr pê omu. Jao nhỹri mẽ hkamrô pumu nẽ kuwy pumu nẽ kuwy hkũm pumu hãmri nẽ tee ri amnhĩ kukamã hamaxpër.

20Ně koja myyti ahtyk nhũm mytwrÿre haxwÿja te mry kamrô pyræk. Pahihti Jejus akupÿn hpôx xà hã arĩgro xwÿj ri koja mẽmoj ã amnhĩ nhĩpêx aně. Akupÿn hpôx xà hã arĩgro koja mex kumrêx.

21Tã koja mēhō mẽmoj kot ã amnhĩ nhĩpêx anhÿr ã omu nē amnhĩ kaxyw inhmã hamaxpěr nē amnhĩ to ixwÿ pa kuma nē ho ixkra nē mẽmoj punujta pê utà. Aně. Na pre ã Tĩrtũm kapěr aně nhũm finat Joewja mẽ pamã hã kagà.

22E pa mẽ amã tanhmã Jejus jarěnh to ka mẽ inhma. Nà Najare nhõ xwÿnh na pre. Mě pahte Tĩrtũm nhÿ hã kot tanhmã amnhĩ nhĩpêx to ho pa hã omunh kaxyw na pre Tĩrtũm mẽ pahwÿr kumě nhũm ÿ hã mẽ panoo mã tanhmã amnhĩ nhĩpêx to ho pa. Ně aa mẽ pahte mẽmoj pumunh kêt kwÿ ho anhÿr o pa pu prem hã omu.

23—Tã ka prem tanhmã kaxyw ajamaxpěr punuj to nē apĩ. Tĩrtũm ra kot amnepê mã ja kukamã ja hã mẽ apumunh mex tã mẽ pahwÿr kumě ka mẽ axtem nē apĩ. Jao mẽ kot htÿx ri amnhĩ nhĩpêx o mẽ pa xwÿnhjê mã agõ nhũm mẽ kupĩ. Pĩ kahpa hã kunhõ nhũm ty. No ãm mẽ kajaja na ka prem mẽ kãm hã amÿnê nhũm mẽ ã mẽ amã hprãm xà hkôt hipêx aně nē mẽ amã kupĩ.

24—Tã nhũm Tĩrtũm akupÿm ho htĩr nhũm akupÿm htĩr o htĩr nhũm mẽ htykja tee ri kot amnhĩ kôt mēnh prãm kaprÿ.

25Amnepêm na pre finat Tawija Jejus akupÿm htĩr kukamã harě. Te Jejus tãm kapěr pyræk o kapěr nē kapěr o: Na hte Pahi Maati ixkôt pa ho pa rãhã nē. Kot inhĩhkô hã ixtãnopxar o pa jakamã kot paj inhmã ma hkêt nē ri ixãmnhĩx ijamakêtkati nē ri ixpa.

26-27Pa Tĩrtũm? Nà kot paj nhÿrmã ixtyk tã arĩ amnhĩ wÿr akãm ama. Kot kaj mẽ htykjê kamã ixkarõ rer kêt nē. Ixte akapěr kôt amnhĩ nhĩpêx mex o ri ixpa jakamã koja inhĩ kormã omnu nē hkro hkêt ri ka akupÿm ixto ixtĩr. Jakamã na pa inhmã ixtyk puma hkêt nē ixkĩnh nē ijamakêtkati nē ri ixpa. Ně amnhĩ kĩnh jarěnh rãhã ho ri ixpa.

²⁸Na ka pre akupÿm ixto ixtîr ã amnhĩ jarẽ pa ixtîr tũm nẽ ixpa ho ixpa kaxyw. Tã ate ixkõt ri apa rãhã jakamã pa ixkĩnh nẽ ri ixpa. Anẽ.

²⁹Ã na pre mẽ panhĩgêt finat Pahi Tawija Jejus htyk nẽ akupÿm htĩr kukamã harẽnh anẽ. No tãm amnhĩ jarẽnh kêt nẽ. Tawija na pre ty nhũm mẽ haxà nhũm htem arĩ haxà xà hã pika ho mex o pa. Tã tãm ã kot amnhĩ jarẽnh anhÿr ro nhÿx akupÿm htĩr nhũm mẽ arĩ haxà xà kaprÿ ho mex o pa hkêt nẽ.

³⁰Pahi Tawi kêp Tĩrtũm nhÿ hã kapêr jarẽnh o pa xwÿnh jakamã nhũm Tĩrtũm kãm hkanrêhã htãmnhwÿ Jejusja kukamã harẽ nẽ kãm: Koja nhÿrmã akanrêhã atãmnhwÿjê hõ amÿr pê apyrà nẽ mẽ ho amnhĩptàr o pa. ãm hãmri na pa amã ja jarẽ. Anẽ.

³¹Nhũm pre ã Tĩrtũm Tawi mã mẽ pakaxyw ãm mã xwÿnhhta jarẽnh anẽ nhũm kuma. Nẽ mar tÿx jakamã hkukamã htyk nẽ akupÿm htĩr ã harẽ nẽ hã kagà. Nẽ hã kagà ho: Koja Tĩrtũm mẽ htykjê kamã hkarõ rer kêt nẽ nhũm aa ï omnu nẽ hkro kêt. Anẽ. ã na pre finat Tawija Jejus Kris kukamã harẽ nẽ hã kagà anẽ.

³²Kot harẽnh xwÿnh Jejusja tãm na pre Tĩrtũm akupÿm ho htĩr pa mẽ pamjaja akupÿm htĩr kãm omu. Hãmri nẽ mẽ ixte omunh xà hkõt ã mẽ amã harẽnh anẽ. Anẽ. Nhũm pre ã Simãw Pêtre mẽ kãm Jejus jarẽnh anẽ. Hãmri nẽ mẽ kãm:

³³—Na pre Tĩrtũm akupÿm amnhĩ wÿr Kra Jejus o api. Hãmri nẽ kãm anẽ nhũm ìhkô hã mẽmoj piitã ho amnhĩptàr o hkrĩ. Hãmri nhũm Tĩrtũm kot kãm amnhĩ jarẽnh xà hkõt kãm amnhĩ Karõ gõ. Tã nhũm ra amnhĩ pyrà nẽ mẽ ixwÿr kurẽ nhũm jarãhã mẽ ixwÿr te kuwy jakrax pyrà nẽ mẽ ixwÿr wrÿ nẽ mẽ ixkarõ hwÿr gjêx pa. Hãmri pa mẽ ÿ hã ahpÿnhã mẽ akapêr o ixkapêr ka mẽ inhma. Tã mẽ akwÿjaja axtem nẽ mẽ xpipãnh ã mẽ ixkamnhĩx.

³⁴No finat Tawija na pre tãm kaxkwa hwÿr àpir ã amnhĩ jarẽnh kêt nẽ. Jejus kot ï ho kaxkwa hwÿr àpirja na pre harẽ nẽ harẽnh o: Na pre Tĩrtũm inhõ Pahihti mã kapêr nẽ kãm:

³⁵“E jar inhĩhkô hã nhỹ. Pa amã mẽ kãm akurê xwỳnhjê gô ka mẽ ho amnhĩptàr o akrĩ.” Anẽ. ã na pre finat Tawija Tĩrtũm kapër jarēnh anẽ. Nom tãm ĩ rãhã kaxkwa hwỳr àpir ã amnhĩ jarēnh kêt nẽ. Pahihti Jejus na pre ã hã harēnh anẽ.

³⁶Jakamã kwa ixkwỳ Ijaew. Mẽ inhma nẽ inhmar tỳx nẽ. Mẽ ate Jejus ã axàmnhēnh nhũm mẽ kot mẽ amã pĩ kahpa hã hpĩr xwỳnhhta. Tãm na pre Tĩrtũmja kệp mẽ panhõ Pahihti kaxyw ãm. Nẽ kệp mẽ papytār xwỳnh kaxyw mẽ pakaxyw ãm. Anẽ.

³⁷Nhũm pre ã Simãw Pêtre mẽ kãm ujarēnh anhỹr o xa. Hãmri nhũm mẽ tee ri ujarēnhja ma nẽ hkaprĩ nẽ. Nẽ tee ri amnhĩ kukamã hamaxpër nẽ hamaxpër o: —Hêxta waa nẽ. Për ãm hãmri na pre Jejus mẽ pamã amnhĩ jarēnh tã pu prem amnhĩ kaxyw hkôt pajamaxpër kêt nẽ axtem nẽ kupĩ. Anẽ. Hãmri nẽ amnhĩ tã mẽ hkukja nẽ Simãw Pêtre mã: —Kwa ã kot anhỹr jakamã tanhmã kot paj mẽ amnhĩ nhĩpêx to? Anẽ.

³⁸Hãmri nhũm mẽ kãm: —Nà kêt ka mẽ tee ri ate amnhĩ tomnuj mã ajamaxpër nẽ akaprĩ nẽ. Hãmri nẽ Jejus Kris kôt amnhĩ xunhwỳ. Pa mẽ ja hã mẽ apumu nẽ Jejus nhỹ hã mẽ akrã kumrã. Hãmri nhũm Tĩrtũm ja hã mẽ apumu nẽ te amnhĩ katut kôt mẽ ate amnhĩ tomnuj piitã rēnh par pyrà nẽ axte kãm hamaxpër kêt nẽ. Hãmri nẽ mẽ ixkuxwar mẽ awỳr amnhĩ Karõ rẽ.

³⁹Kãm mẽ awỳr rēnh prãm. Mẽ amã nẽ mẽ akanrēhã mẽ akra nẽ mẽ atàmnhwỳjê mã nẽ mẽ kot kormã Tĩrtũm kapër mar kêt xwỳnhjê mã. ãm mẽ kot amnhĩ to hwỳr xwỳnh piitã nhũm kãm mẽ hwỳr rēnh prãm. Anẽ.

⁴⁰Nhũm pre ã Simãw Pêtre mẽ kãm ujarēnh anẽ. Mẽ kãm kapër xihtỳx o kapër ry nẽ. Hãmri nẽ mẽ kãm: —Koja nhỹrmã Tĩrtũm mẽ kot tanhmã amnhĩ tomnuj to ho mẽ pa xwỳnhjaja tanhmã mẽ homnuj tỳx to. Jakamã kwa mẽ tokyx mẽ ate amnhĩ tomnuj kaga kê tanhmã mẽ ato hkêt nẽ. Anẽ.

⁴¹Hãmri nhũm mẽ hkwỳjaja kapër mar tỳx nẽ amnhĩ kaxyw Jejus kôt hamaxpër nẽ hkôt amnhĩ xunhwỳ. Mẽ ohtô rax nẽ hkôt amnhĩ xunhwỳ. Mẽ kệp 3.000 nẽ hkôt amnhĩ xunhwỳ. Hãmri nhũm mẽ kot Jejus nhỹ hã kapër

jarēnh o mẽ pa xwỳnhjaja mẽ hkrã kumrãr pa. Mẽ kệp Jesus kwỳ hã amnhĩ to amnhĩrĩt kaxyw mẽ hkrã kumrãr pa.

⁴²Hãmri nhũm mẽ ra mẽ kot Jesus kôt amnhĩ nhĩpêx xwỳnhjê hkôt amnhĩ nhĩpêx o pa nhũm Jesus nhỹ hã mẽ ahkre xwỳnh maatijaja apkati mẽ Jesus kapêr o mẽ ahkre nhũm mẽ mar tỳx nẽ ra Jesus kôt amnhĩ nhĩpêx mex o mỗ. Nẽ gaa nẽ hkôt amnhĩ nhĩpêx mex o pa. Mẽ kãm kapêr mar prãm tỳx jakamã na pre htem axpẽn wỳr akuprõ nẽ axpẽn kutã apku nẽ Tĩrtũm mã amnhĩ jarēnh o hkrĩ. Nẽ mẽ kãm axpẽn to mex pix prãm o axpẽn kôt pa ho pa.

Jesus kwỳ kot tanhmã amnhĩ nhĩpêx to hã mẽ harēnh

Atre 4.32-35

⁴³Tã nhũm Jesus nhỹ hã mẽ ahkre ho mẽ pa xwỳnh maatijaja xatã Tĩrtũm nhỹ hã aa mẽ kot mẽmoj pumunh kêt kwỳ ho anhỹr o ri krĩ nhõ xwỳnhjê hkôt pa nhũm mẽ piitã ja hã mẽ omu. Amnhĩ jaêr pê mẽ omu nẽ mẽ kamã no pyrna ho tee ri tanhmã Tĩrtũm mã hamaxpêr to.

⁴⁴Nhũm mẽ kot Jesus kôt amnhĩ xunhwỳr xwỳnh piitã mẽmoj to axpẽn kutã nojarêr o pa. Jao axpẽn pê ri mẽmoj to õxỳ hkêt nẽ pa.

⁴⁵Jakamã nhũm mẽhõ kệp amrakati nhũm mẽ ja hã omu hãmri nẽ õ pyka hkwy ho wēnê rỳ mẽ hikukrêx kwỳ ho wēnê nẽ kàxpore jamỳ nẽ ma o mra nẽ mẽ kãm kugõ. Na pre hte ã mẽ kot Jesus kôt amnhĩ xunhwỳr xwỳnhjaja axpẽn nhĩpêx anhỹr o pa.

⁴⁶Hãmri nẽ apkati mẽ Tĩrtũm mã amnhĩ jarēnh xà hã ixkre hwỳr mra nẽ kãm mex o mex ã harẽ. Nẽ hamakêtkati nẽ àmnhĩx ri hkĩnh kãm axpẽn nhõrkwỹ hkôt ri apkur o pa.

⁴⁷Pê Tĩrtũm mã mex o mex ã harēnh o ri axpẽn kôt pa. ã mẽ kot amnhĩ nhĩpêx anhỹr o pa jakamã nhũm krĩ nhõ xwỳnh piitã kãm mẽ hkĩnh nẽ. Nẽ mẽ hkwyjaja apkati mẽ mẽ hwỳr mra nẽ mẽ hkôt axkamẽ nẽ mẽ urak nẽ Jesus kôt amnhĩ xunhwỳ nhũm Tĩrtũm ja hã mẽ omu nẽ mẽ ho hkra. Jakamã nhũm mẽ ra ohtô rax kumrêx o mỗ.

Atre 3

Te grà xwỳnh jarēnh

Juãw 14.12-14; Atre 14.8-10

¹Tã nhũm apkati hõ hã nhũm Simãw Pêtre mẽ Juãw wa ma Tĩrtũm mã amnhĩ jarēnh xà hã ixkre hwỳr wa tẽ. Na pre hte myt àhpanh grire nhũm mẽ piitã kot Tĩrtũm mã amnhĩ jarēnh kaxyw hwỳr mra. Jakamã nhũm Simãw Pêtre mẽ Juãw wa haxwỳja ma hwỳr wa mra.

²Nhũm mēhõja hakwakrem hkrĩ. Katorxà nhõxà hkre rũm hte grà nẽ kator xwỳnhhta. Nẽ arĩ hkrĩ ho hkrĩ nẽ aa kànhmã ãm nẽ ri pa hkêt nẽ. Nhũm hte hkràmnhwỳjaja apkati mẽ hamỳ nẽ ma o pa nẽ Tĩrtũm mã amnhĩ jarēnh xà hã ixkre jakwakrem hkrĩ nhũm mẽ hwỳr o hkrĩ. Hakwakreja mẽ kot kãm: “Mẽ gjêx xà mex” anhỹr xwỳnhhta kapem hwỳr mẽ mrar xwỳnhjê hwỳr o hkrĩ.

³Tã nhũm Simãw Pêtre mẽ Juãw wa tẽ nẽ ixkreja wỳr wa àr o tẽ nhũm hte grà xwỳnhhta wa omu nẽ kàxpore hã wa kuwỳ

⁴nhũm Simãw Pêtre omu nẽ kãm: —E amnẽ wa ixpumu. Anẽ.

⁵Hãmri nhũm kuma nẽ htỳx ho wa kot kãm kàxpore hkwy nhõr ã wa hkamnhĩx nẽ wa omu

⁶nhũm Simãw Pêtre kãm: —Nà ixkàxpore hkêt. Nom kot paj Jejus Kris xàhpumunh xà ho tanhmã anhĩpêx to. E pa Jejus Kris pê Najare nhõ xwỳnhhta nhỹ hã amã ixkapêr jakamã tokyx kànhmã xa nẽ ri mra. Anẽ.

⁷Hãmri nẽ upôk rũm hpa hã kupy nẽ kànhmã ãm nhũm hte mex nẽ kànhmã xa nẽ amnhĩ te karo ho ri mra.

⁸Hãmri nẽ hte mex ã amnhĩ pumu nẽ hkĩnh tỳx nẽ. Nẽ hkĩnh xàj ma wa hkôt harĩ ho tẽ nẽ wa hkôt ixkrem axà. Tĩrtũm mã mex o mex ã harēnh pê harĩ ho wa hkôt tẽn axà.

⁹Hãmri nhũm mẽ piitã amnhĩ jaêr pê akupỹm mex ã omu nẽ kamã no pyma nẽ.

10Ně axpěn mã: —Kokỹỹ mũjti na pre hte mẽ gjêx xà mex kamã mẽ hwỳr rãhã ho hkrĩ htã nhũm Tĩrtũm tanhmã ho nhũm kãnhmã xa nẽ ri mrar mex kurê kumrêx. Hêxta waa nẽ. Anẽ.

Simãw Pêtre kot mẽ kãm ujarênh

Rukre 24.46-47; Atre 2.14-36

11Hãmri nhũm hte mex xwỳnhja Simãw Pêtre mẽ Juãw wa hkôt ixkre hwỳr axà nẽ wa kuri xa. Nhũm mẽ piitã amnhĩ jaêr pê harênh ma nẽ hwỳr hprôt nẽ agjê nẽ omu. Mẽ kot ixkre nhĩkjê jarênh o: “Pahi Sarumãw nhõ” anhỹr xwỳnh jarênhja wỳr nhũm mẽ hprôt nẽ hte mex xwỳnhhta kamã no pyma ho kuhê. Nẽ kuri Simãw Pêtre mẽ Juãw wa omu nẽ axpěn mã wa harênh o: —Hêxta waa nẽ. Tanhmã na we wa amnhĩ to nẽ akupỹm kãm hte ho mex nhũm ri mra? Anẽ nẽ wa kamã no pyma nẽ.

12Hãmri nhũm Simãw Pêtre mẽ kuma nẽ mẽ kãm: —Pa ixkwỳjaja. Kwa mẽmo na ka mẽ ri mẽ ixkamã ano pyma ho akuhê? Xà wa ixàhpumunh tỳx xà ho na pa wa ho mex? Nà ja kot anhỹr kêt. Rỳ xà wa ixte Tĩrtũm kôt amnhĩ nhĩpêx mex o ixpaja o na pa wa ho mex? Nà mãnên ja kot anhỹr kêt.

13-17Mẽ ate omunh xwỳnhhta Jejus tãm kot ho mex kênã. Kot amnhĩ kaxyw kãm hamaxpêr tỳx jakamã nhũm akupỹm ho mex ka mẽ omu. —Finat Apraãw nẽ Ijak nẽ Jako mẽ hkwỳjaja kot hkôt amnhĩ nhĩpêx o pa xwỳnh pê Tĩrtũmja. Tãm na pre akupỹm Kra Jejus o htĩr nẽ mex o mex ã harê. Mẽ ate hã axàmnênh nhũm mẽ kot hpĩr xwỳnhhta. Pahihti Pirat kot kãm urer kaxyw tã ka mẽ nê kãm akapêr kãm axihtỳx nẽ. Nom Jejus tãm kot amnhĩ nhĩpêx o pa xwỳnh na pre. Na pre hte amnhĩ nhĩpêx mex rãhã ho pa htã ka mẽ axtem nẽ hkaga. Nhũm pahihti Pirat mẽ ate kot kãm urer kêt ã axihtỳx nhũm kãm urer kêt nẽ õ pôristi mã kugõ nhũm mẽ amã kupĩ. Mẽ kajaja mẽ amã hprãm xà hkôt mẽ amã kupĩ. Tĩrtũm kot mẽ pahwỳr mênh tã ka mẽ axtem nẽ apĩ. —Nom mẽ ate kêp Tĩrtũm Kra hã omunh kêt jakamã na ka prem ã hipêx anẽ. Mẽ kot mẽ ato amnhĩptàr xwỳnhjê mẽ na ka prem amarĩ apĩ. Na prem mẽ axàmnênh xà hkôt mẽ amã pĩ kahpa hã kunhõ nẽ ã hpĩr anẽ. Kêp akupỹm mẽ pahto mẽ pahtĩr xwỳnh tã ka prem axtem nẽ apĩ. No nhũm Tĩrtũm akupỹm ho htĩr pa prem akupỹm htĩr kãm omu.

18—Amnepê̄m Tĩrtũm nhỹ hã kapê̄r jarê̄nh o mẽ pa xwỳnhjaja na prem Tĩrtũm kot mẽ pakaxyw ãm xwỳnhja kukamã tanhmã harê̄nh to nê hã kagà nê mẽ kãm harê̄nh o pa. Kot amnhĩ xà htỳx kãm hamak kãm htykja kukamã nhũm pre htem harê̄nh o pa. Tã ã Tĩrtũm kot kukamã harê̄nh anhỹr xàja kôt ka mẽ ã hipê̄x anê nê apĩ.

19—Jakamã kwa mẽ tee ri mẽ ate amnhĩ tomnuj ã amnhĩ pumu nê tokyx hkaga. Hãmri nê amnhĩ to Tĩrtũm wỳ kê mẽ anê mẽ ate amnhĩ tomnuj piitã amnhĩ katut kôt rê̄nh pa.

20Hãmri nê mẽ ato mex nê ka mẽ kukwak ri akĩnh nê ajamakê̄tkati nê axãmnhĩx ri apa. Kojã nhỹrmã akupỹn mẽ pahwỳr Jejus mẽ. Ra kot mẽ pakaxyw ãm kênã.

21—Nom kojã tokyx akupỹn wrỳk kê̄t nê. Kojã kormã kaxkwa kamã pa rãhã nhũm Tĩrtũm akupỹm kot mẽmoj piitã ho mex par mẽ nhũm rĩ kormã akupỹn mẽ pahwỳr wrỳ. Amnepê̄m Tĩrtũm nhỹ hã kapê̄r jarê̄nh o pa xwỳnhjaja kot ja kukamã harê̄nh nê hã kagà xà hkôt.

22—Na pre finat Mojes haxwỳja Tĩrtũm nhỹ hã mẽ pahpãmjê̄ mã tanhmã ja jarê̄nh to nê harê̄nh o: Kojã nhỹrmã mẽ panhõ Pahi Maati Tĩrtũmja te kot ra mẽ akaxyw pa ixãmja pyrã nê axte mẽ panhĩõ xãm. Mẽ panhĩõ kojã. Kojã nhỹrmã inhmỳr pê̄ mõn pøj nê mẽ amã Tĩrtũm kapê̄r jarê̄nh o pa. Ka mẽ kapê̄r ma nê mar tỳx nê kapê̄r kôt amnhĩ nhĩpê̄x o ri apa.

23Kojã mẽhõ kuma nê ãm kuma nê hkôt amnhĩ nhĩpê̄x kê̄t nê nhũm Tĩrtũm tee ri ja hã omu nê kê̄p hkra hkê̄t ã harê̄nh kurê̄ kumrê̄x. Anê.

24Ã na pre finat Mojesja mẽ kãm Jejus kukamã ujarê̄nh anê. No ãm tapxipix na pre ã harê̄nh anhỹr kê̄t nê. Tĩrtũm nhỹ hã mẽ kapê̄r o mẽ pa xwỳnh piitã na prem ã mẽ kãm harê̄nh anhỹr o pa. Kot harê̄nh o pa xwỳnh kot wa finat Sãmuewja nê hkôt mẽ hkwỳjê̄ piitã ã Jejus kukamã hkwỳjê̄ mã harê̄nh anhỹr o pa.

25—Tã mẽ pahpê̄ mẽ hkamrô hkwỳ na pu mẽ. Mẽ pahpê̄ mẽ hkanrê̄hã mẽ htãmnhwỳy. Mẽ pakaxyw na pre Tĩrtũm ã mẽ kãm kapê̄r anê. Nê Kraja

kukamã finat Apraãw mã kãm: Kojã nhÿrmã akanrêhã atãmnhwÿjê hõ pyka piitã hkõt mẽ piitã mẽ ho mex o pa nhũm mẽ kukwak ri mex kumrêx nẽ ri pa. Anẽ.

²⁶Ã kot Kra hkukamã harênh anhÿr tã mẽ pakumrêxjê hwÿr na pre kumẽ. Kot mẽ pahto mex nhũm mẽ pahte amnhĩ tomnuj kaga kaxyw nhũm mẽ pahpê Ijaew kumrêxjê hwÿr kumẽ. Anẽ. Nhũm pre ã Simãw Pêtreja hte grã xwÿnh pumunh o mẽ kuhê xwÿnhjê mã ujarênh anẽ.

Atre 4

Simãw Pêtre mẽ Juãw wa kot mẽ àptàr tũmjê mã kapêr ã wa harênh

Rukre 21.12-13

¹⁻⁴Nhũm Simãw Pêtre mẽ Juãw wa arĩ mẽ kãm Tĩrtũm kapêr jarênh o wa xã nẽ mẽ kãm: —Nà na pre Jejus ty nhũm Tĩrtũm akupÿm ho htĩr. Tã kot akupÿm ho htĩr jakamã kojã nhÿrmã uràk nẽ akupÿm mẽ htyk xwÿnh piitã mẽ ho htĩr pa. Anẽ. Hãmri nhũm mẽ kot wa mar o kuhê xwÿnh kwÿjaja wa kuma nẽ wa hkõt hamaxpêr nẽ wa urà nẽ Jejus kõt amnhĩ xunhwÿ. Jakamã nhũm ra mẽ kot Jejus kõt amnhĩ xunhwÿr xwÿnhjaja ohtô rax kumrêx. Ra mẽ kêp 5.000. Hãmri nhũm axtem mẽ hkwÿjaja wa hwÿr mra nẽ wa mar o kuhê. Mẽ õ patre nhõ pôristi krãhtũm mẽ Satusew nhõ xwÿnh kwÿjê mẽ nhũm mẽ ma Simãw Pêtre mẽ Juãw wa hwÿr mra nẽ tee ri wa kot mẽ ahkre hã wa mar o kuhê. Nẽ mẽ kãm akupÿm mẽ htĩr jarênhja ma nẽ wa kamã gryk nẽ. Satusew nhõ xwÿnhjaja na pre htem akupÿm mẽ htĩr kõt hamaxpêr kêt jakamã nhũm wa akupÿm mẽ htĩr jarê nhũm mẽ tee ri wa kuma nẽ hamaxpêr punuj nẽ wa kamã gryk kato. Hãmri nẽ wa hã amÿnê nhũm mẽ wa unê nẽ ma wa o tẽ nẽ mẽ hagjênh xà kamã wa haxà. Ra myt grire nhũm mẽ wa haxà. Wa kot mẽ hagjênh xà kamã hã apkati nhũm rĩ kormã mẽ kot ujarênh ã tanhmã wa ho kaxyw.

⁵⁻⁶Tã nhũm apkati nhũm mẽ ohtô nẽ wa ujarênh ã wa mar kaxyw Jerujarê kamã axpên wÿr akuprõ. Ijaew pigêtjaja nẽ mẽ àptàr tũm kwÿjaja. Nẽ mẽ kot finat Mojes kapêr o mẽ ahkre ho mẽ pa xwÿnhjaja. Nẽ mẽ õ patre maati

Anas mẽ hkwỳja. Nẽ Ijaew nhõ juisti Kajpas mẽ Juãw õ mẽ Aresãnja. Nhũm mẽ kot Simãw Pêtre mẽ Juãw wa mar kaxyw axpẽn wỳr akuprõ.

⁷Hãmri nẽ wa hã karõ nhũm pôristi wa hwỳr tẽ nẽ wa haprõ nẽ ma mẽ hwỳr wa o tẽ nẽ wa ho axà nẽ mẽ kutã wa ÿr nhũm wa nhỹ. Hãmri nhũm mẽ wa omu nẽ wa kãm: —E mẽ inhmã amnhĩ jarẽ. Mẽhõ xàhpumunh xà ho na ka pre wa hte grà xwỳnhta ho mex? Mẽhõ na pre hwỳr war amẽ ka wa ho mex? Anẽ.

⁸Hãmri nhũm Simãw Pêtre mẽ kãm awjarẽ. Tĩrtũm Karõ kot kãm hamaxpěr o hihtỳx jakamã nhũm ÿ hã Ijaew pigêtjê mẽ mẽ àptàr tũmjê mã awjarẽ nẽ mẽ kãm:

⁹—Tõe mẽhõ kot ho mex xwỳnhja ã mẽ ate wa ixkukjêr

¹⁰jakamã kot paj mẽ amã harẽ ka mẽ ixte harẽnhja ma. Wa ixpyrà nẽ mẽ apê Ijaew kêr ka mẽ wa ixkapěr mar tỳx nẽ. Jejus Kris pê Najare nhõ xwỳnhta. Mẽ ate hpĩr nhũm Tĩrtũm kot akupỹm ho htĩr xwỳnhta. Tãm na pre àhpumunh tỳx o akupỹm hte grà xwỳnhta o mex. ÿ hã ixte kaxyw kãm ixkapěr nhũm tãm akupỹm ho mex.

¹¹Tĩrtũm kot mex o mex ã harẽnh nẽ mẽ pakaxyw ãm tã ka prem axtem nẽ hkaga. Nom Tĩrtũm kapěr ã kagà htũm kot ra mẽ akukamã ã mẽ ate amnhĩ nhĩpêx anhỹr ã mẽ ajarẽnh nẽ mẽ ajarẽnh kot: Mẽ kot kẽn o amnhĩm õrkwỹ nhĩpêx kaxyw nẽ nhỹri kẽn maati pumu nẽ htỳx omnuj ã hkamnhĩx nẽ hkaga. Mẽ kot hkaga htã nhũm Tĩrtũm mẽ kurom mex o kot kẽn piitã hakrenh par ã omunh kurê kumrêx. Anhỹr o kot mẽ ajarẽnh. Te mẽ ate kẽn maati kaga xwỳnh ã mẽ ajarẽnh pyràk. Tã ka mẽ ã mẽ kot mẽ akukamã mẽ ajarẽnh anhỹrja kôt te mẽ ate kẽn maati kaga pyrà nẽ Jejus kaga nẽ apĩ. Tĩrtũm kot amnhĩm mex o mex ã omunh nẽ harẽnh tã ka prem axtem nẽ hkaga.

¹²Tapxipix na hte mẽ panê mẽ pahte amnhĩ tomnuj rê. Mẽhõ koja uràk nẽ àhpumunh tỳx o mẽ panê kurê? Mẽhõ koja ahpỹnhã pyka piitã hkôt uràk nẽ ã mẽ panhĩpêx mex anẽ? Nà ãm amrakati kumrêx. ãm Jejus pix. Tapxipix

na pre Tĩrtũm ja kaxyw ãm jakamã tapxipix na kêp mẽ pahkaprĩ xwỳnh maati. Anẽ.

¹³Nhũm pre ã Simãw Pêtreja mẽ kãm kapêr anẽ. Hãmri nhũm mẽ amnhĩ jaêr pê kuma nẽ axpẽn mã: —Kwa wa kãm mẽ pahpyma wa hã hkwỳ jêt kêt kumrêx. Te ri wa htỳx ri wa pa pyràk tã wa hamaxpêr tỳx kumrêx. Mãn wa kêp Jejus kôt mẽ pa ho mẽ pa xwỳnh kwỳ jakamã na wa ã kapêr anẽ nà? Anẽ.

¹⁴Hãmri nẽ tee ri kot tanhmã mẽmoj tã wa kãm àkjêr to hkukamã hamaxpêr. No nhũm hte grà xwỳnh ra kot mẽ hwỳr àr nẽ Simãw Pêtre wa kuri mex nẽ ãm nhũm mẽ kot no ho omunh jakamã wa kãm àkjêr kêt nẽ.

¹⁵Hãmri nẽ wa kãm anẽ nhũm wa mẽ kêp kato nẽ kapôt ã xa nhũm mẽ tanhmã wa kãm nẽ kaxyw wa hã axpẽn ma nẽ axpẽn mã:

¹⁶—Kwa tanhmã kot puj mẽ wa ho? Ra jar Jerujarẽ kamã mẽ piitã mẽ kot akupỹm hte grà xwỳnhhta mex ã wa omunh kênã kot puj kêt mẽ kãm wa kot ho mex hkêt ã wa harẽ.

¹⁷Tã mẽ kot harênh o hprôt pymaj kot puj mẽ axte Jejus jarênh o pa nê wa hkurê. Kê hte grà xwỳnh jarênhja ãm jar mẽ pakamã hapêx. Nà kot puj mẽ ã wa kãm karõ anẽ. Anẽ.

¹⁸Nhũm mẽ wa hã axpẽn mar pa hãmri nẽ akupỹn wa hã karõ nhũm wa akupỹn mẽ hwỳr axà nhũm mẽ wa kãm: —E Simãw Pêtre mẽ Juãw wa. Wa mãmrĩ ma tẽ. Nom kêr ka wa mẽ ixkapêr mar kumrêx. Kêr ka wa axte ri tanhmã mẽ kãm Jejus jarênh to ho ri apa hkêt nẽ. ãm kwarĩ ho kwarĩ. Anẽ.

¹⁹Hãmri nhũm wa tee ri mẽ kuma nẽ mẽ kãm: —Nà Tĩrtũm tãm kot ja hã wa inhmã karõ kênã kot pa kêt wa mẽ akapêr ma nẽ harênh o ixpa hkêt nẽ.

²⁰Na pa pre wa Jejus kôt ri ixpa nẽ xatã kot tanhmã amnhĩ nhĩpêx to hã omunh o hkôt ixpa. Nẽ xatã tanhmã mẽ ahkre hto hã mar o hkôt ixpa. Nẽ akupỹm htĩr kãm omu. Jakamã tanhmã kot pa wa amnhĩ to nẽ mẽ kãm ja jarênh kêt nẽ? Nà kot pa wa mẽ akapêr mar xà hkôt ã amnhĩ nhĩpêx anhỹr hkêt nẽ. Anẽ.

21-22Hāmri nhūm mẽ kuma nẽ tee ri mẽ kot tanhmã wa ho kaxyw. Te grã xwỳnhhta hte grã nẽ hkrĩ ho hã amgrã pẽ 40 tã ra akupỹm mex nhūm mẽ piitã ja hã omu nẽ hã axpẽn mã Tĩrtũm mex o mex ã harẽnh o ri pa. Jakamã nhūm mẽ utàr xwỳnhjaja mẽ kuma nẽ kãm mẽ uma nẽ. Hāmri nẽ mẽ umaj tanhmã Simãw Pẽtre mẽ Juãw wa ho hkêt nẽ. ãm axte wa kot Jejus jarẽnh o pa nẽ wa kãm kapẽr kãm hihtỳx nẽ wa hano nhūm wa ma tẽ.

Mẽ kot amnhĩ to Tĩrtũm wỳr ã mẽ harẽnh

Matêwre 18.19-20

23Tã nhūm Simãw Pẽtre mẽ Juãw wa ma akupỹm Jejus kôt htõ nẽ htõxjẽ hwỳr wa tẽ nẽ mẽ kãm amnhĩ jarẽ. Nẽ patre krãhtũmjẽ mẽ mẽ àptàr tũmjaja kot Jejus kapẽr jarẽnh nẽ wa hkurê kamã hihtỳxja nhūm amnhĩ tã mẽ kãm mẽ harẽ.

24Hāmri nhūm mẽ wa kuma nẽ amnhĩ to Tĩrtũm wỳr kurê kumrẽx nẽ kãm: —Pa Pahi Maati? Nà mẽmoj piitã ho akator xwỳnhhta na ka. Na ka pre kaxkwa ho akato nẽ pyka ho akato nẽ gô xujanãr o akato. Hāmri nẽ kamã mẽmoj piitã ho akator pa.

25-26Amnepêm na pre mẽ inhĩgêt Tawija amã tanhmã amnhĩ nhĩpêx to ho pa. Nẽ Akarõ nhỹ hã akapẽr kwỳ jarẽ nẽ hã kagà. Nẽ kagàja kamã mẽ kot Pahihti Jejus kutã amnhĩ xunhwỳr xwỳnhjẽ jarẽ nẽ mẽ hã kagà. Mẽ hkukamã mẽ hã kagà nẽ mẽ hã kagà ho: Mẽmo mỳrapê na prem Ijaew kêt xwỳnhjaja Tĩrtũm kutã amnhĩ xunhwỳ? Nẽ Ijaew haxwỳja. Mẽmo mỳrapê na prem htỳx ri hamaxpẽr o ri pa? Nẽ pyka piitã hkôt pahijaja na prem Pahi Maati kutã amnhĩ xunhwỳr pa. Nẽ kot mẽ pakaxyw ãm xwỳnh Jejus Krisja nhūm mẽ mããnẽn kutã amnhĩ xunhwỳr pa. Nẽ mẽ kot hpĩr kaxyw mẽ kãm hã amỳnê. Kwa mẽmo mỳrapê na prem axtem nẽ ã amnhĩ nhĩpêx anẽ? Anẽ. ã na pre finat Tawija Akarõ nhỹ hã mẽ harẽ nẽ hã kagà anẽ Tĩrtũm.

27ãm hāmri na pre mẽ hkukamã mẽ hã kagà. Ra mẽ kot ã amnhĩ nhĩpêx anhỹr kẽnã. Krĩ ja kamã na prem ã amnhĩ nhĩpêx anhỹr kaxyw axpẽn wỳr akuprõ. Pahi Erox nẽ pahi Põn Pirat nẽ mẽ ixkwỳjaja nẽ mẽ kệp Ijaew kêt xwỳnhjaja axpẽn wỳr akuprõ nẽ Akra Jejus kutã amnhĩ xunhwỳ nẽ mẽ kot

hpĩr kaxyw hã amÿnê. Kot tãm amnhĩ nhĩpêx o pa nhũm ate mẽ ixkaxyw ãm xwÿnhja nhũm mẽ axtem nê kutã amnhĩ xunhwÿ.

28—Nom amnepêm kormã mẽ ixkêt ri na ka pre mẽ hkukamã ã mẽ kot amnhĩ nhĩpêx anhÿr ã mẽ omu. Mẽ kot tanhmã apê Akra Jejus to nê hpĩrta kukamã ka pre hã mẽ omu. Tã mẽ ixwÿr amẽ nhũm prem kupĩ. No ãm ajamaxpêr xà hkôt.

29—Tã ka mẽ omu. Na mẽ Jejus ã mẽ ixkamã gryk tÿx nê tanhmã hã mẽ ixto kaxyw. Jakamã kot kaj mẽ ixpê amã tanhmã amnhĩ nhĩpêx to ho ixpa xwÿnhjaja ka tanhmã mẽ ixkrã hto pa mẽ inhmã mẽ uma hkêt nê mẽ hkôt ixpa ho ixpa. Mẽ kot tanhmã mẽ ixto hã mẽ ixkagrônh tã pa mẽ inhmã mẽ uma hkêt nê ixãmnhĩx ri ixkĩnh nê ri ixpa. Nê anhÿ hã mẽ kutã amnhĩ to htÿx nê arĩ mẽ kãm akapêr jarênh o ri mẽ hkôt ixpa. Mẽ kot Jejus ã tanhmã mẽ ixto htãã.

30—Akra Jejus mex o mex jakamã kot paj mẽ àhpumunh tÿx xà ho tanhmã mẽ piitã mẽ ho mex to ho ri mẽ hkôt ixpa. Mẽ à xwÿnhjaja akupÿm mẽ o mex. Nê mẽ kot aa mẽmoj pumunh kêt kwÿ ho anê. Kê mẽ omu nê axàhpumunh o axàhpumunh ã apumunh mex kurê kumrêx. E ãm ja pix na ra hapêx. Anê.

31Nhũm prem ã amnhĩ to Tĩrtũm wÿr anê. Puh nhũm ixkreja mẽ kãm htertet tÿx nê nhũm Tĩrtũm Karõ axte tanhmã mẽ hkrã hto nhũm mẽ ÿ hã kãm mẽ uma hkêt nê. ãm amnhĩ to htÿx nê mẽ kãm Tĩrtũm kapêr jarênh rãhã ho ri mẽ hkôt pa.

Jejus kwÿjjaja tanhmã kot axpên nhĩpêx to hã mẽ harênh

Atre 2.42-47

32-33Nhũm Jejus nhÿ hã mẽ ahkre ho mẽ pa xwÿnh maatijaja. Na pre Tĩrtũmja mẽ ho mẽ kãm ma hkêt jakamã nhũm pre htem akupÿm Jejus htĩr kôt mẽ kãm harênh o ri mẽ hkôt pa. Nhũm Tĩrtũm mẽ kot Jejus kôt amnhĩ xunhwÿr xwÿnh piitã mẽ kutã nojarêt rãhã ho pa nhũm mẽ ra ohtô rax nê. Nê mẽ kãm axpên to mex pix prãm o ri axpên kôt pa. Mẽ ohtô htã te mẽ tipxi pyræk. Nê axpên pê mẽmoj to õxÿ hkêt nê. Na pre htem axpên mã mẽ

hikukrêx nê mẽ apkur xà jarênh o: “Inhõ pix kêt mẽ pahpiitã mẽ panhõ na.” Anhÿr o ri mẽmoj tã axpên kutã nojarêr o ri pa. No kêt axpên mã mẽmoj jarênh o: “Tk. Nà ãm inhõ pix na.” Anhÿr o harênh kêt nê.

34-35 Na pre htem tõiã õ ixkre hõ ho wênê. Rÿ õ pyka hkwÿ ho wênê nê kàxpore jamÿ nê ma o mra nê Jejus nhÿ hã mẽ ahkre ho mẽ pa xwÿnhjê mã kugõ nhũm mẽ hamÿ nê mẽ kêp amrakati xwÿnhjê mã ho anhrà. Hãmri nhũm mẽ amnhĩm hamÿ nê ho amnhĩm awjaprô. Jakamã na pre hte mẽ hkwÿjaja kãm prãm nê ri pa rÿ ê hkêt nê ri pa hkêt nê.

36-37 Jujere na pre ã amnhĩ nhĩpêx anê nê mẽ kaxyw õ pika hkwÿ ho wênê. Hãmri nê kàxpore py nê o tẽ nê Jejus nhÿ hã mẽ ahkre xwÿnh maatijê mã kugõ. Jujereja Ijaew nhõ patre ho ajuta xwÿnh na pre. Gõ hipõk pẽ Sipre kamã na pre kato. Kêp Jujere htã no nhũm Jejus nhÿ hã mẽ ahkre ho mẽ pa xwÿnhjaja na prem kãm: “Panãpe” Anê. Mẽ kapêr kãm Panãpeja te kêp “mẽ hamaxpêr o mẽ hihtÿx o pa xwÿnh” anhÿr pyræk. Jakamã nhũm õ pika hkwÿ ho wênê nê kàxpore py nê o tẽ nê Jejus nhÿ hã mẽ ahkre xwÿnhjê mã kugõ nhũm mẽ kupy nê mẽ kêp amrakati xwÿnhjê mã ho anhrà.

Atre 5

Ananĩs mẽ Sapire wa kot amnhĩ to hêx ã wa harênh

Karatas 6.7; Eprêw 10.26-31

1 Tã nhũm Ananĩs mẽ hprõ Sapire wa Jujere jarênh ma nê uræk nê õ pyka hkwÿ ho wênê.

2 Hãmri nê kàxpore py. Nom na pre wa ra hã axpên ma. Jakamã nhũm Ananĩs Jujere kĩnhã kàxpore hkwÿ pix py nê o tẽ nê Jejus nhÿ hã mẽ ahkre xwÿnh maatijê mã kugõ. Nom katàt kôt mẽ kãm õr ã amnhĩ jarênh kêt nê. Kot kàxpore ho pikjêr nê amnhĩm hkwÿ ho àrĩk ã amnhĩ jarênh kêt nê. ãm mẽ kãm amnhĩ jarênh o hêx. Te piitã õr par pyræk o amnhĩ nhĩpêx nê mẽ kãm: —E ota ixkàxporeta. Na pa wa inhõ pika hkwÿ ho wênê nê kàxpore hpy nê hpãnhã Jujere pyrà nê man mẽ awÿr piitã o tẽ. Anê.

3 Hãmri nhũm Simãw Pêtre ra ã kot amnhĩ nhĩpêx anhÿr ã omu hãmri nê kãm: —Tk. Kwa mon ka axtem nê Satanasti kapêr ma nê hkôt amnhĩ nhĩpêx

ně te akàxpore piitã òr pyràk ã amnhĩ to axêx aně? Te ate piitã òr pyràk tã no ãm hkwỳ pix gõ. Hêxta waa ně. Na ka axtem ně Tĩrtũm Karõ mã akàxpore nhõr par o axêx.

⁴Anhõ pyka kênã. Ně hpãnhã kàxporeja anhõ kênã. Kot kaj amã tanhmã ho hprãm xà hkõt mãmrĩ tanhmã ho. Amã piitã ho axàrĩk prãm ně mãmrĩ piitã ho arĩk. Rỳ amã hkwỳ hpix nhõr prãm ně mãmrĩ hkwỳ pix gõ. No ri ate òr par pyràk o amnhĩ to axêx kêt ně. Te ate mẽ inhmã pix mã axêx pyràk nom mẽ inhmã pix mã hkêt. Na ka mããněn te Tĩrtũm mã axêx pyràk. Aně.

⁵⁻⁶Nhũm pre ã Simãw Pêtre Ananĩs mã kapěr aně nhũm kuma ně pykap tẽm ně htyk kurê kumrẽx. Hãmri nhũm mẽ àptàr nywjaja hwỳr tẽ ně kupêxê ho hkupu ně kumỳ ně ma o tẽ ně haxà. Hãmri nhũm mẽ kot ã kot amnhĩ nhĩpêx anhỹr ã harẽnh mar xwỳnhjaja tee ri harẽnh ma ně kãm ma htỳx ně.

⁷Tã nhũm ra hã ahtũm ně. Ra hã 3 ore ně hapêx nhũm Ananĩs prõ Sapireja htỳx hamakêtkati ně mẽ hwỳr tẽ ně axà. Kormã mjên htyk ã harẽnh mar kêt ně hamakêtkati ně hkĩnh ně mẽ hwỳr tẽ ně axà.

⁸Hãmri nhũm Simãw Pêtre omu ně hêx rom hkukja ně kãm: —Pa? E kwa inhmã mẽmoj jarẽ. Tanhmã na prem war anhõ pykaja pãnhã war amã amnhĩrer to? Xà ãm hãmri na amjên mẽ inhmã harẽ nà? Aně. Hãmri nhũm kuma ně mjên pyrà ně kãm ho hêx ně kãm: —Yỹ. ãm hãmri kot amã harẽnh kênã. Aně.

⁹Hãmri nhũm Simãw Pêtre tee ri kuma ně kãm: —Tk. Hêxta waa ně. Kwa mon ka war ajamẽ war akàxpore ho te Tĩrtũm mã axêx pyràk? Mãn ka wa ajamaxpěr o: “Koja Tĩrtũm ja hã wa ixpumu ně ãm hã wa ixpumu ně tanhmã hã wa ixto hkêt ně.” Anhỹr o mãn ka wa ajamaxpěr nà? Nom na ka wa ãm kãm axêx kaprỳ. Oněj ra mẽ kot amjên jaxàr xwỳnhjaja akupỹn hpõx o mra. Koja mẽ anhĩpêx o te hipêx pyrà ně mããněn ato tẽ ně ajaxà ka rĩ amnhĩ pumu.

10Aně nhũm kuma nẽ mjên pyrà nẽ pykap tẽm nẽ htyk kurê kumrẽx. Hãmri nhũm mẽ kot mjên jaxàr xwỳnhjaja mra nẽ mẽ hwỳr agjê nẽ omu nhũm ra htyk mex nẽ nõ nhũm mẽ kumỳ nẽ ma o tẽ nẽ mjên nhĩhkô hã haxà.

11Hãmri nhũm mẽ piitã wa harẽnh ma nẽ kãm ma htỳx nẽ. Mẽ kot Jejus kôt amnhĩ xunhwỳr xwỳnhjê mẽ amarĩ ri mẽ pa xwỳnhjaja nhũm mẽ tee ri wa hkukamã hamaxpěr o kãm ma htỳx kumrẽx.

Mẽ kot aa mẽmoj pumunh kêt kwỳ ho anhỳr ã mẽ harẽnh

Makre 16.17-20; Atre 19.11-12

12-14Na pre hte Jejus kôt mẽ kot amnhĩ xunhwỳr xwỳnhjaja xatã Tĩrtũm mã amnhĩ jarẽnh xà hã ixkre hwỳr akuprõ. Mẽ kot ixkre nhĩkjê mã: “Pahi Sarumãw nhõ” anhỳr xwỳnh jarẽnhja wỳr nhũm pre htem akuprõ. Nhũm mẽ piitã kãm mẽ hkĩnh nẽ mẽ ohtô nẽ mẽ hkôt akuprõ nẽ mẽ uràk nẽ Jejus kôt amnhĩ xunhwỳ. Mẽnijaja nẽ mẽmyjaja. No nhũm mẽ hkwỳja Ananĩs mẽ Sapire wa kot amnhĩ nhĩpêxja mã hamaxpěr nẽ kãm mẽ hkôt mrar pyma nẽ. Kãm mẽ hkĩnh tã kãm mẽ hkôt mrar pyma nẽ. Nhũm pre hte Jejus nhỹ hã mẽ ahkre ho mẽ pa xwỳnhjaja aa mẽ kot mẽmoj pumunh kêt kwỳ ho anhỳr o ri mẽ piitã mẽ hkôt pa.

15Jakamã nhũm pre htem mẽ à xwỳnhjê jamỳ nẽ ma mẽ hwỳr mẽ o mra nẽ Simãw Pêtre kutêp pry kamã mẽ haxwỳ nẽ mẽ kãm: —E mẽ jar anhĩkwỹ. Kê Simãw Pêtre ja kôt mẽ ajãnh tẽ nẽ mẽ akupênh o akupỹm mẽ ato mex rỳ nhũm hkarõ pix mẽ atã harir ka mẽ akupỹm amex japêr. Anhỳr o mẽ kãm kapěr hãmri nhũm mẽ kupĩp kãm kutêp hikwỹ.

16Nẽ Jerujarẽ pu hã krĩ hkwỳ kamã. Mẽ à xwỳnhjaja nẽ mẽkarõmnuti kot tanhmã mẽ ho xwỳnhjaja nhũm pre htem mẽ hamỳ nẽ ma mẽ ìhkrep mẽ o mra nhũm mẽ piitã akupỹm mex pa.

Mẽ kot Jejus kwỳjê jagjênh ã mẽ harẽnh

Rukre 21.12-15; Juãw 15.26-27; Atre 4.1-22

17Tã nhũm mẽ õ patre maati mẽ hkràmnhwỳ Satusew nhõ xwỳnhjaja tee ri akupỹm mẽ mex ã mẽ harẽnh ma nẽ axpẽn mã: —Tk. Kwa na mẽ ra ohtô nẽ Jejus gryk ã mẽ pahte mẽ ahkre kaga nẽ ãm hkôt pix mã ri amnhĩ nhĩpêx o

pa. Anê. Hāmri nê Jejus nhỹ hã mẽ ahkre maati xwỳnhjê kamã gryk nê ra tanhmã mẽ ho kaxyw.

18Hāmri mẽ unê nê mẽ hagjê nhũm mẽ hagjênh xà kamã hkrĩ hpa.

19Tã nhũm kamàt nhũm Tĩrtũm kapêr o mẽ wrỳk xwỳnhja ma mẽ hagjênh xà hwỳr mẽ hwỳr wrỳ nê mẽ hwỳr axà nê mẽ kãm hakwakre kahê xà mẽ nê mẽ kator pa. Hāmri nê mẽ kãm:

20—E mẽ ma akupỹm Tĩrtũm mã amnhĩ jarênh xà hã ixkre hwỳr mra nê axte mẽ kãm awjarê. Tanhmã mẽ kot amnhĩ nhĩpêx to nê Jejus kôt amnhĩ nhĩpêx nyw o amnhĩ nhĩpêx ã mẽ kãm hã karõ kê mẽ ama. Anê.

21Hāmri nhũm mẽ kuma nê ma akupỹm hwỳr hapêx kurê kumrêx. Nhũm myt kator o mõi mẽ nhũm mẽ hwỳr agjê nê mẽ kãm Tĩrtũm kapêr jarênh o kuhê. Tã nhũm mẽõ patre maati mẽ hkôt ri mẽ pa xwỳnhjaja amnhĩ wỳr mẽ àptàr tũm xwỳnhjê hwỳ nhũm mẽ piitã axpên wỳr pikuprõnh pa. Hāmri nê htỳx arĩ Jejus kwỳjaja mẽ hagjênh xà kamã mẽ hkrĩ hã mẽ hkamnhĩx nê amnhĩ wỳr mẽ hã karõ.

22Nhũm pōristijaja ma kot mẽ haprõi kaxyw mẽ hagjênh xà hã ixkre hwỳr mra nê tee ri kamã mẽ hapêr nhũm mẽ kamã amrakati. Hāmri nhũm mẽ akupỹm mẽ pikuprõnh xwỳnhjê hwỳr hprõt nê mẽ kãm:

23—Nà na pōristi hkwỳjaja arĩ hakwakrem ixkre jamār mex nhũm hakwakre arĩ kahê htỳx nê xa. Tã pa mẽ hwỳr agjê nê tee ri hkre kamã mẽ hapêr nhũm mẽ kamã amrakati kumrêx. Anê.

24Hāmri nhũm mẽ kuma nê tee ri hamaxpêr.

25Rôm nhũm ja mẽ hwỳr tẽn axàn mẽ kãm: —Kwa jãã mẽ ate mẽ hagjênh xwỳnhjaja na mẽ axte Tĩrtũm mã amnhĩ jarênh xà hã ixkre kamã mẽ ahkre ho kuhê pa ham mẽ omu nê mẽ kurũm tẽ. Anê.

26Hāmri nhũm patre nhõ pōristi krãhtũmja kuma nê mẽ hwỳr pōristi hkwỳ rẽ nhũm mẽ ma mẽ hwỳr mra nê mẽ hwỳr agjê nê kê axte mẽ unê nê akupỹm mẽ o mra. Nom tanhmã mẽ ho hkêt nê. Mẽ kot hkôt ri mẽ pikamênh xwỳnhjê pymaj mẽ ho mex nê mẽ o mõi. Nê mẽ hã axpên mã: —Nà kot puj

mẽ tanhmã mẽ ho nhũm mẽ ja hã mẽ pahpumu nẽ kẽn o mẽ pahkapê nẽ tanhmã amnhĩ to nẽ hã mẽ panhĩmex. Anẽ.

²⁷Hãmri nẽ mẽ ho mex nẽ akupỹm mẽ o mõn mẽ hwỳr mẽ ho agjê nẽ mẽ pikuprõnh xwỳnhjê kutã mẽ hkrĩ. Hãmri nhũm mẽõ patre maatija mẽ kãm:

²⁸—Kwa ra mẽ ixte Jejus kapêr jarênh nê mẽ akurê htã ka xep mẽ ãm mẽ inhma nẽ arĩ mẽ kãm harênh o ri apa. Nẽ jar Jerujarê kamã mẽ piitã mẽ kãm harê. Nẽ mẽ pajaja mẽ ixte Jejus pĩr ã ka mẽ ri mẽ kãm mẽ ijarênh o apa. Anẽ.

²⁹Hãmri nhũm Simãw Pêtre mẽ kuma nẽ mẽ amnhĩ tã mẽ kãm kapêr nẽ mẽ kãm: —Tỳ kot kaj mẽ Tĩrtũm kapêr kuhpa hã mẽ inhmã mẽmoj tã karõ pa mẽ ama nẽ ãm mẽ ama nẽ ãm Tĩrtũm kapêr pix ma nẽ hkõt ri amnhĩ nhĩpêx.

³⁰Amnepêtm mẽ panhĩgêjtaja na prem Tĩrtũm kõt pix mã amnhĩ nhĩpêx o pa. Tã ka prem axtem nẽ kêp mẽ kãm Kra Jejus ã amỹnê nhũm mẽ pĩ kahpa hã kunhõ nẽ kupĩ. Nom nhũm Tĩrtũm akupỹm ho htĩr

³¹nẽ kêp mẽ panhõ Pahihtĩ hã harê. Nẽ kêp mẽ pahkaprĩ xwỳnh mex ã harê. Hãmri nẽ ra amnhĩ ri ỹr nhũm ãhkõ hã mẽmoj piitã ho amnhĩptar o hkrĩ. Nhũm kãm: “Koja Ijaew mẽ kot amnhĩ tomnuj kaga nẽ akõt amnhĩ xunhwỳ pa ja hã mẽ omu nẽ amnhĩ katut kõt mẽ kot amnhĩ tomnuj rênh pa nẽ mẽ ho ixkra.” Anẽ.

³²Tã mẽ pajaja mẽ ixte Jejus htyk nẽ akupỹm htĩr ã omunh mex jakamã na pa hte Tĩrtũm Karõ nhỹ hã ã mẽ amã harênh anẽ. Karõja na pre Tĩrtũm mẽ ixte hkõt amnhĩ nhĩpêx xwỳnhjê hwỳr kurê nhũm mẽ ixwỳr wrỳ nẽ mẽ ixkarõ mã agjê. Tã ỹ hã na pa htem ri ã harênh anhỹr o ri mẽ akõt ixpa. Anẽ.

³³Hãmri nhũm mẽ kuma nẽ mẽ kamã gryk tỳx nẽ. Nẽ mẽ kãm mẽ himex prãm nẽ mẽ kãm mẽ hã amỹnê.

³⁴Hãmri nhũm Kamariewtija tee ri ja hã mẽ omu hãmri nẽ kànhmã xa nẽ Jejus nhỹ hã mẽ ahkre xwỳnh maatijê xyr pê hkwỳjê mã kapêr. Parijew nhõ xwỳnh na pre. Nẽ kêp Tĩrtũm kapêr ã kaga htũm o mẽ ahkre ho pa xwỳnhjê

hõ na pre. Nhũm mẽ piitã kãm hkĩnh nẽ. Jakamã nhũm kànhmã xa nẽ pôristi mã anẽ nhũm mẽ amnhĩ nê Jejus nhỹ hã mẽ ahkre ho mẽ pa xwỳnhjê kator nhũm mẽ kapôt ã kuhê.

35Hãmri nhũm Kamariewtija mẽ nê tanhmã mẽ kãm kapêr to nẽ mẽ kãm: — E ixkwỳjaja. Kwa kêr pu mẽ tanhmã mẽ ho hkukamã pajamaxpêr mex nẽ.

36Mãn arĩ mẽ ate finat Tetastija jarẽnh ã anohtỳx nẽ ho apa japêr. Mytwrỳ hõ hã na pre mẽ kãm amnhĩ to rax ã amnhĩ jarẽnh o pa. Hãmri nhũm hkôt ri mẽ pa xwỳnhjaja ohtô nẽ. Mẽ kêp 400. Tã nhũm prem mẽ kêp Tetasti pĩ nhũm hkôt ri mẽ pa xwỳnhjaja axpên pê anhrà nẽ ma hapêx.

37—Tã nhũm mẽ kot mẽ piitã mẽ ho kôta xà hã arĩgroja ã nhũm Garirej nhõ xwỳnh pê finat Jut haxwỳja hkôt mẽ pa xwỳnhjaja ohtô nẽ. Tã nhũm mẽ mãânẽn mẽ kêp kupĩ nhũm hkôt ri mẽ pa xwỳnhjaja haxwỳja axpên pê anhrà nẽ ma hapêx.

38—Jakamã kwa pu mẽ tanhmã jajê ho hkêt nẽ. Pu mẽ ãm mẽ omu. Koja mẽ amnhĩ krã hkôt ã ujarẽnh anhyr o pa japêr hã koja Tetasti mẽ Jut wa hkôt pa xwỳnhjê pyrà nẽ tokyx axpên pê anhrà nhũm Jejus jarẽnh o paja hapêx o hapêx.

39Nom koja mẽ ãm hãmri Tĩrtũm nhỹ hã ã mẽ ahkre ho pa anhyr japêr hã kot puj mẽ tee ri ja ho pajapêx mã. Jakamã kwarĩ. Kot puj mẽ tanhmã mẽ ho nẽ te mẽ pahte Tĩrtũm kutã amnhĩ xunhwỳr pyræk. Anẽ. Nhũm pre ã Kamariewti Jejus nhỹ hã mẽ ahkre ho mẽ pa xwỳnh maatijê xyr pê hkwỳjê mã kapêr anẽ.

40Hãmri nhũm mẽ kuma nẽ kãm: —Tỳ nà ãm hãmri na ka ã akapêr anẽ. Kot puj xep mẽ tanhmã mẽ ho hkêt nẽ. Anẽ. Hãmri nẽ akupỹn mẽ hã karõ nhũm mẽ akupỹn mẽ hwỳr agjê. Hãmri nhũm mẽ pôristi mã mẽ hã amỹnê nhũm mẽ htak. Hãmri nhũm mẽ àptàr tũmrejaja mẽ kãm: —E mẽ mãmrĩ ma akupỹm mra. Nom kêr ka mẽ axte mẽ kãm Jejus kapêr jarẽnh o ri apa hkêt kumrêx. Anẽ.

⁴¹Hāmri nhūm mẽ kām ure nhūm mẽ ma mra. Kĩnh nẽ ma mra nẽ axpẽn mã: —Nà kwār mẽ Jejus ã mẽ pahtak nẽ tanhmã hã mẽ pahto. Kwār mẽ māmri ã hã mẽ pahto anẽ. Kot pu mẽ hkaga hkêt nẽ. Ra Tĩrtũm kot ja hã mẽ pahpumunh mex kênã. Anhỹr o axpẽn mã kapěr o axpẽn jamaxpěr o hihtỳx mex o pa.

⁴²Hāmri nẽ arĩ apkati mẽ hkwỳjê mã Jejus kapěr jarēnh o mẽ ahkre ho mẽ hkôt pa. Tĩrtũm mã amnhĩ jarēnh xà hã ixkre kamã nẽ nhām mẽ ỏrkwỹ kamã ri mẽ ahkre ho pa. Tĩrtũm kot mẽ pakaxyw Jejus xãm ã mẽ kām harēnh o ri mẽ hkôt pa.

Atre 6

Mẽ kệp mẽ mjên htyk xwỳnhjê jarēnh

Wam Ximotre 3.8-9

¹Tã nhūm mẽ kot Jejus kôt amnhĩ xunhwỳr xwỳnhjaja ohtô rax kumrẽx o mỗ. Mẽ piitã kệp Ijaew no nhūm mẽ hkwỳjaja axtem Gres kapěr o kapěr nhūm mẽ hkwỳjaja Ijaew kapěr o kapěr. Na pre hte Ijaew kapěr o kapěr xwỳnhjaja apkati mẽ mẽ kệp mẽ mjên htyk xwỳnhjê mã mẽõ ho pa. No ãm mẽ piitã mẽ hipêx o axpẽn pyràk kêt jakamã nhūm Gres kapěr o mẽ kapěr xwỳnhjaja tee ri ã mẽ kot amnhĩ nhĩpêx anhỹr ã mẽ omu nẽ mẽ kamã gryk nẽ. Hāmri nẽ mẽ kām: —Kwa na ka htem amnhĩ kamã mẽ kệp mẽ mjên htyk xwỳnhjê mã mẽõ ho rũnh nẽ agõ. No mẽ ixkamã jajê mã na ka htem ãm ho hkryre nẽ agõ. Kwa mẽ ri ã mẽ hipêx anhỹr kêt nẽ. Mẽ hipêx o axpẽn pyràk nà. Anẽ.

²Hāmri nhūm Jejus nhỹ hã mẽ ahkre xwỳnh maatijaja mẽ hã mẽ kapěr ma hāmri nẽ mẽ piitã mẽ ho akuprõ nẽ mẽ kām: —Kwa kêt ka mẽ ja hã axpẽn mã axàkjêr kêt nẽ. E pu mẽ kot mẽ kệp mẽ mjên htyk xwỳnhjê mã õ ho pa kaxyw mẽ akwỳjê rê. No mẽ pajaja kot paj ja ho anhỹr o ri ixpa hkêt nẽ. Kot pa mẽ anẽ nẽ Jejus kapěr o ri mẽ ajahkre hkêt nẽ nhūm ja mex kêt nẽ. Jakamã mẽ atõ kot kaj mẽ akatàt kôt mẽ kām mẽ õ ho apa?

³E mẽ amnhĩ kamã mẽ ho 7 nẽ mẽ arê pu mẽ kệp mẽ mjên tyk xwỳnhjê mã õ ho pa kaxyw mẽ unhwỳ. Tãm mẽ hamaxpěr xwỳnhjaja. Nẽ mẽ ate axpẽn

mã mẽ mex ã mẽ harēnh xwỳnhjaja. Nē Tĩrtũm Karõ nhỹ hã mẽ kot amnhĩ nhĩpêx o mẽ pa xwỳnhjaja. ã mẽ kot amnhĩ nhĩpêx anhỹr xwỳnhjaja ka mẽ ho 7 nē arê pu mẽ kaxyw mẽ unhwỳ.

⁴Nom mẽ pajaja kot paj mẽ akôt arĩ mẽ amã Tĩrtũm kapēr jarēnh o ri mẽ ajahkre pix tãnopxar o ri ixpa. Anē.

⁵Hãmri nhũm mẽ kuma nhũm ja mẽ kãm mex nē. Nhũm mẽ ma mra nē axpēn mã hkwỳjê nhĩxi jarē hãmri nē mẽ ho 7 nē mẽ kurê. ã mẽ hixi kot anhỹr. Estewãw. Estewãwja na pre Jejus kôt amnhĩ nhĩpêx mex o pa. Tĩrtũm Karõ kaxwỳnh mã àr nē ho amnhĩptàr jakamã nhũm pre hte tãm ri amnhĩ nhĩpêx o pa. Nē kaxyw Firipti nē Prokot nē Nĩkanõ nē Timã nē Parmēnti nē Nĩkoraw. Nĩkorawja krĩ pē ãxiok nhõ xwỳnh na pre. Kêp Ijaew kêt tã kãm Tĩrtũm kĩnh o pa. Tã ra mãănēn Kra Jejus kôt amnhĩ xãm.

⁶Jakamã nhũm mẽ mẽ kêp 7tajê rê nē Jejus nhỹ hã mẽ ahkre xwỳnh maatijê hwỳr mẽ o mra. Hãmri nhũm mẽ omu nē mẽ àpēnh ã mẽ unhwỳr kaxyw mẽ hã ìhkra jaxwỳ nē mẽ ho Tĩrtũm wỳ. Hãmri nhũm mẽ kêp mẽ mjên htyk xwỳnhjê mã mẽ õ ho pa nē mẽ piitã mẽ hipêx o axpēn pyræk.

⁷Tã nhũm mẽ ra ohtô rax nē Tĩrtũm kapēr ma nē hkôt amnhĩ nhĩpêx o pa. Jakamã nhũm Jerujarē kamã mẽ kot Jejus kôt amnhĩ xunhwỳr xwỳnhjaja ra ohtô rax kumrēx. Nē mẽ õ patre hkwỳ haxwỳja ohtô nē mẽ uræk nē amnhĩ kaxyw hkôt hamaxpēr nē hkôt amnhĩ xunhwỳ.

Mẽ kot Estewãw pynēnh ã mẽ harēnh

Rukre 21.14-15

⁸Tã nhũm Estewãwja. Kot mẽ kêp mẽ mjên htyk xwỳnhjê mã mẽ õ ho pa xwỳnhjê hõja. Tĩrtũm kot kutã nojarêt mex jakamã na pre hte ÿ hã àhpumunh tỳx o aa mẽmoj pumunh kêt kwỳ ho anhỹr o ri mẽ hkôt pa.

⁹Hãmri nhũm Ijaew kwỳjaja tee ri ja hã omu nhũm ja mẽ kêp omnuj tỳx nē nhũm mẽ hã kãm akir. Uræk nē mẽ kêp Ijaew nē Jerujarē kamã ri mẽ hkôt pa htã ahpỹnhã mẽ õ pyka. Mẽ kot kãm “Ripetat” xwỳnh kwỳ na pre mẽ. Nē ahpỹnhã mẽ õ krĩ. Mẽ hkwỳjaja kêp Sirēn nhõ xwỳnh. Nē mẽ hkwỳjaja kêp Aresãn nhõ xwỳnh. Nē mẽ hkwỳjaja kêp Siris nhõ xwỳnh. Nē mẽ

hkwỳjaja kêp As nhõ xwỳnh. Ahpỳnhã mẽõ pika nẽ mẽ õ krĩ htã na prem Jerujarẽ kamã ri axpẽn kôt pa ho pa. Tã Estewãw kot ã amnhĩ nhĩpêx anhỹr o pa hã omu nhũm ja mẽ kêp omnuj tỳx nẽ nhũm mẽ hã kãm akir.

¹⁰No nhũm Tĩrtũm Karõ nhỹ hã hamaxpêr tỳx o mẽ kãm kapêr nhũm mẽ kuma nẽ tee ri kutã tanhmã kãm nẽ hprãm kaprỳ.

¹¹Hãmri nẽ ma mra nẽ tanhmã ho hêx to kaxyw amnhĩ kwỳjê rê nẽ mẽ kãm hã amỳnê nẽ mẽ kãm: —E kêr ka mẽ krĩ nhõ xwỳnhjê mã Estewãw o axêx nẽ tanhmã mẽ kãm ho akapêr punuj to ho ri mẽ hkôt apa. Kê mẽ ama nẽ kamã gryk kato. Kot kaj mẽ ã amnhĩ nhĩpêx anẽ pa mẽ hpãnhã mẽ amã amnhĩre. Anẽ. Hãmri nhũm mẽ kuma nẽ ma mra nẽ hapôj nẽ ma krĩ nhõ xwỳnhjê mã tanhmã ho hêx to ho ri mẽ hkôt pa nẽ mẽ kãm: —E mẽ amnẽ akuprõ nẽ mẽ inhma. Kwa kêr ka mẽ Estewãwti kapêr mar kêt nẽ. Na hte finat Mojes mẽ Tĩrtũm wa ho kapêr punuj pix o ri pa. Pa mẽ ra kot wa ho kapêr punuj ã kuma. Anẽ.

¹²Hãmri nhũm mẽ kuma. Krĩ nhõ xwỳnhjê mẽ nẽ mẽ àptàr tũmrejê mẽ Tĩrtũm kapêr tũm o mẽ ahkre ho mẽ pa xwỳnhjaja nhũm mẽ tee ri mẽ kot Estewãw o hêxja ma nẽ kamã gryk nẽ. Hãmri nẽ ma hwỳr mra nẽ unê nẽ ma mẽ õ juisti hwỳr o tẽ.

¹³Hãmri nhũm mẽ kãm ho hêx xwỳnhjaja mẽ hkôt mra nẽ juisti mã tanhmã ho hêx to nẽ mẽ kãm: —E jahti na hte finat Mojes kot Tĩrtũm nhỹ hã mẽ pahte tanhmã amnhĩ nhĩpêx to hã karõ ho hêx rãhã ho pa. Nẽ Tĩrtũm mã amnhĩ jarênh xà hã ixkreja nhũm tanhmã ho hêx to pa mẽ kuma.

¹⁴Na hte mẽ kãm: “Koja nhỹrmã Jejus pê Najare nhõ xwỳnh Tĩrtũm mã amnhĩ jarênh xà hã ixkreja grành pa kãm ga.” Anhỹr o mẽ kãm hêx o pa. Nẽ Mojes kot mẽ pahte amnhĩ nhĩpêx ã karõ nê mẽ pahkurê pa prem kuma. Anẽ.

¹⁵Nhũm prem ã mẽõ juisti mã Estewãw o hêx anẽ. Hãmri nhũm mẽ kuma nẽ Estewãw wỳr rĩt nẽ hkuk pumu nhũm te kot Tĩrtũm kapêr o mẽ wryk

xwỳnhjê kuk nhĩrã rax pyrã nẽ xa nhũm mẽ tee ri omu nẽ kamã no puma nẽ.

Atre 7

Estewãw kot juistijê mã ujarẽnh

¹Hãmri nhũm mẽ õ patre maatija Estewãw mã kapër nẽ kãm: —E mẽ inhmã amnhĩ jarẽ. Xà ãm hãmri na mẽ ri ã ajarẽnh anẽ nà? Anẽ.

²Hãmri nhũm kuma nẽ mẽ piitã mẽ kãm kapër. Mẽ kãm kapër ryy nẽ mẽ kãm: —Tõe kot paj mẽ amã mẽ panhĩgêt finat Apraãw tanhmã harẽnh to ka mẽ inhma. Amnepêm na pre Tĩrtũm maatija Apraãw wỳr kato. Kormã pyka pê Mēsopotãm kamã pa ri. Kormã kot ma krĩ pê Arã hwỳr mõi kêt ri nhũm hwỳr kato nẽ kãm:

³“E kêt ka mẽ anhõ krĩ pê akato nẽ akwỳjê re nẽ ma mõi. Kot paj ma nhỹhỹm hpãnhã pyka hõ hwỳr mẽ ato mõi.” Anẽ.

⁴—Hãmri nhũm kuma nẽ amnhĩ to akuprõ nẽ ma mõi. Õ pyka pê Katej pê kato nẽ ma krĩ pê Arã hwỳr mõi nẽ hpãnhã kamã pa. Tã nhũm hipêêxà Terahti kêt ty nhũm Tĩrtũm amnẽ jar mẽ panhõ pyka hwỳr kumẽ. Jar mẽ papapxà hwỳr kumẽ.

⁵—Nom nhũm kormã kãm pykaja nhõi kêt nẽ. Kormã kãm hkwỳ ho greire nẽ õr kêt nẽ. Na pre ãm kãm: E kot paj nhỹrmã amã pykaja gõ. Amã nẽ akanrêhã akra nẽ atàmnhwỳjê mã kugõ ka mẽ kamã ri apa ho apa. Anhỹr o kãm mẽ panhõ pika pê Kanaãja jarẽ. Apraãw kormã hkra hkêt ri nhũm ã kãm kapër anẽ.

⁶Hãmri nẽ kãm: Koja akanrêhã atàmnhwỳjaja nhỹrmã ma nhỹhỹm pyka hõ hwỳr pa nẽ hpãnhã kamã pa. Mẽ õ pyka kamã pa hkêt tã nhãm pyka hõ kamã pa hãmri nẽ pika nhõ xwỳnhjê mã àpênh rũnh o pa nhũm pyka nhõ xwỳnhjaja mẽ hipêx kati rũnh o pa. Nẽ mẽ àpênh ã mẽ kãm amnhĩrer kêt nẽ. ãm mẽ homnuj o pa hã amgrà xohtõ rax kumrêx. Nhũm mẽ hã amgrà pê 400.

⁷Nom kot paj mẽ hã mẽ homnuj tỳx nẽ. Akanrêhã atàmnhwỳjê hã mẽ homnuj tỳx nẽ nhũm mẽ rĩ kormã mẽ kurũm kato nẽ man akupỹn pa nẽ jar pôj. Hãmri nẽ jar inhmã inhmex o inhmex ã ijarênh rãhã ho pa. Anẽ.

⁸Hãmri nẽ kãm: E pu axpẽn ma. Koja ka nẽ akanrêhã akra nẽ atàmnhwỳjaja ka mẽ ixkôt ri amnhĩ nhĩpêx o apa hã kot paj mẽ ato ixkra. Tã koja ja amã mex japêr hã kêr ka mẽ amnhĩ my kwrýt kà hkwỳ jakà. Nẽ koja mẽ akrajaja hapôj nẽ my ka mẽ mã mẽ ho anẽ nẽ mẽ kêp mẽmy kwrýt kà hkwỳ jakà. Mẽ piitã mẽ kot mẽ apê ixkra hã mẽ apumunh kaxyw kot kaj mẽ ã amnhĩ nhĩpêx anẽ. Anhỹr o Apraãw mã kapêr nhũm kuma nẽ mar xà hkôt hkra Ijak my kwrýt kà hkwỳ krãhta. Kormã hkaràre ri. Kormã hã arĩgro pê 8 pix ri nhũm kêp hkwỳ krãhta. —Tã nhũm Ijak hprêk nẽ hprô nẽ hkra. Hãmri nẽ mã hkra Jako ho anẽ nẽ. Nhũm Jako hprêk nẽ mã hkra pê 12jê ho anẽ nẽ mẽ piitã mẽmy kwrýt kà hkwỳ jakàr pa. ã na pre mẽ pahpàr kraxjaja amnhĩ nhĩpêx anhỹr o pa.

⁹—Jako hkrajê hõ na pre kêp Juje. Nhũm Juje htôjaja hipêêxà hkôt kamã gryk nẽ axtem nẽ mẽ urojê mã ho wẽnê nhũm mẽ kêp haprô nẽ ma pyka pê Ejit wỳr o mỗ. Amarĩ Ejit nhõ xwỳnhjê mã àpênh o pa kaxyw. Tã no nhũm Tĩrtũm arĩ tãnopxar rãhã ho hkôt pa.

¹⁰Hãmri nẽ Ejit kãm mẽ kot homnuj xwỳnhjê nhĩhkra rũm hkapa nẽ tanhmã hkrã hto nhũm àhpumunh tỳx nẽ hamaxpêr mex nẽ. Jakamã nhũm Ejit nhõ xwỳnhjê nhõ pahi Paraohtija omu nẽ kãm hkĩnh nẽ. Kot tãm amnhĩ nhĩpêx nẽ àhpumunh tỳx kôt omu nẽ kãm hkĩnh nẽ. Hãmri nẽ amnhĩ ri kumẽ nhũm ãhkô hã àpênh o pa. Kãm òrkwỹ pumu nẽ Ejit nhõ xwỳnhjê ho amnhĩptàr o pa.

¹¹—Rôm nhũm mẽ hpur kãm mẽmoj nhĩgrôt mex kêt nẽ nhũm mẽ kêp mẽ apkur xà hã mẽ òja ra ri mẽ kêp kryre. Ejit kamã nẽ jar Kanaã kamã nhũm mẽ apkur xà hã mẽ òja mẽ kêp hapêx par o mỗ. Nhũm mẽ piitã prãm xàj ra hiire nẽ kãm prãm tỳx o pa nhũm mẽ panhĩgêjtaja hãmri prãm xàj tee ri amnhĩ xàpkur xà hã mẽmoj japêr.

12—Tã nhũm Jakoja Ejit kãm arĩ mẽ apkur xà hã mẽ õ rax ã harēnh ma nẽ ma hwỳr hkra hkwỳjê rẽ. Mẽ panhĩgêtjaja nhũm ma mẽ hwỳr mẽ kurẽ nhũm mẽ ma mẽ hwỳr mra. Hãmri nẽ mẽ hwỳr pôj nẽ mẽ kêp mẽmo hy hkwỳ japrô nẽ ma akupỹm o mra. Wam mẽ mōrta ã mẽ kêp mẽmoj japrô nẽ ma akupỹm o mra.

13—Tã nhũm mẽ kêp mẽmo hy japrô xwỳnhja hapêx nhũm mẽ axte akupỹm mẽ hwỳr mra. Hãmri nhũm mẽ htõ Juje mẽ kãm amnhĩ to amnhĩrĩt nẽ kêp mẽ htõ hã mẽ kãm amnhĩ jarẽ. Mẽ kot ra htyk ã hkamnhĩx tã nhũm mẽ kãm amnhĩ jarẽ. Hãmri nhũm Paraohiti mẽ kêp Juje htõ hã mẽ harēnh ma.

14—Tã nhũm Juje amnhĩ wỳr hipêêxà Jako mẽ htàmnhwỳjaja mẽ hã karõ nhũm mẽ piitã ma Ejit wỳr hapêx. Mẽ kêp 75 nẽ ma Ejit kamã Juje hwỳr hapêx hãmri nẽ kamã pa ho pa.

15—Ã kot anhỹr jakamã nhũm Jakoja ma Ejit wỳr mō nẽ hpãnhã kamã pa ho pa. Tã hãmri kamã ty. Nhũm hkrajê piitã Ejit kãm pa hãmri nẽ gaa nẽ htyk pa.

16Hãmri nhũm mẽ hkanrêhã mẽ hkrajaja mẽ hamỳ nẽ ma akupỹm Kanaã hwỳr krĩ pê Sikẽ hwỳr mẽ o pa nẽ kamã mẽ haggê. Na pre mẽ hkukamã finat Apraãw kot Amōr krajê pê kēnkre japrô nẽ kamã hprõ jaxà. Jakamã nhũm prem mỳr pê ma hwỳr mẽ o pa nẽ kamã mẽ haggê hãmri nẽ ma akupỹm Ejit wỳr pa.

17—Tã gaa nẽ rĩ ohtô rax kumrêx o mō. Mẽ panhĩgêtjaja ohtô rax kumrêx o mō. Hãmri nhũm Tĩrtũm kot Apraãw mã mẽ õ pyka jarēnh xwỳnhja nhũm kot mẽ kãm õr kaxyw.

18No nhũm Ejit nhõ pahi kot Juje ho mex xwỳnhhta na pre ra ty nhũm axtem hpãnhã hōja mẽ ho amnhĩptàr o pa. Nẽ aa Juje jarēnh mar kêt nẽ. Kormã pahi xàr nyw kêt ri htyk jakamã nhũm mỳr pê harēnh mar kêt nẽ.

19Hãmri nẽ hkwỳjê homnuj o pa. Tanhmã mẽ panhĩgêtjê nhĩpêx to ho pa. Nẽ mẽ kãm mẽ hkra my hapôx xwỳnhjê hã amỹnê. Mẽ hapôx nhũm mẽ kot pikap mẽ rēnh nhũm mẽ htyk kaxyw nhũm mẽ kãm mẽ hã amỹnê.

20—Rôm nhũm finat Mojesja kato. Nẽ mexre. Hãmri nhũm katorxà Ejit nhõ xwỳnhjê kot kêp hpĩr pymaj òrkwỳ kamã ri mẽ kêp ho hpimxur o pa hã mytwrỳ axkrunẽpxi.

21—Tã nhũm ra htỳxre nhũm katorxà mẽ hipêêxà wa tee ri hkukamã hamaxpěr hãmri mẽ mẽ kot wa kêp hpĩr pymaj kumỳ mẽ ma o tẽ mẽ kaxyw à nhĩpêx mẽ nhỹri gô nhĩpôk ri pō kamã ho amũxu. Tã nhũm Paraohiti hkra nija ra gôx mã wỳr mã tẽ mẽ ra omu hãmri mẽ amnhĩm kumỳ mẽ ma o tẽ mẽ ho hkra.

22Jakamã nhũm Mojes Ejit nhõ xwỳnhjê kamã hprêk. Hãmri mẽ mẽ àhpumunh xà hã kagà pumunh pa. Nẽ hihtỳx mẽ mẽ kãm kapěr kãm hihtỳx mex o pa.

23—Tã hãmri ra hã amgrà pê 40 mẽ hapêx nhũm Mojes hamaxpěr mẽ ra kãm amnhĩ kwỳ pê Ijaewjê pumunh prãm mẽ mẽ hwỳr tẽ.

24-25Hãmri mẽ htẽm kôt ja wa omu. Nhũm Ejit nhõ xwỳnhja Ijaewja homnuj o xa nhũm Mojes tẽn tee ri hã omu mẽ hamaxpěr o: “E pa ma wa hwỳr tẽ mẽ ixkwỳ mũj ã Ejit nhõ xwỳnhhta pĩ kê ixkwỳjaja ja hã ixpumu mẽ Tĩrtũm kot mẽ hwỳr inhmẽnh ã ixpumu. Ixte Ejit nhõ xwỳnhjê nẽ mẽ kator kaxyw mẽ ja hã ixpumunh kurê kumrêx.” —Anhỹr o hamaxpěr hãmri mẽ wa hwỳr tẽ mẽ amnhĩõja nẽ Ejit nhõ xwỳnh pĩ. Tã no nhũm hkwỳjaja kot hpĩr ã harẽnh mar tã tanhmã amnhĩ kaxyw kãm hamaxpěr to hkêt mẽ.

26Nhũm apkati nhũm mẽhõja war axkrut mẽ axte pijapu ho wa xa. Hamẽ wa kêp Ijaew. Jakamã nhũm Mojes akupỹm mẽ hwỳr tẽ mẽ tee ri axpẽn tã wa omu nhũm ja kêp omnuj mẽ. Hãmri nhũm wa hwỳr tẽ mẽ axpẽn nẽ wa kãm kapěr mẽ wa kãm: “Pa? Kwa war ajamẽ war apê Ijaew kênã na ka wa ri axtem mẽ ã axpẽn nhĩpêx anẽ.” Anẽ.

27Hãmri nhũm kot amnhĩ kaxyw hkryx xwỳnhja kuma mẽ nhãm amnhĩ nẽ hkujate mẽ kãm: “Tk. Kwa xà apê mẽ inhõ pahi hã na ka ã wa inhmã akapěr anẽ? Nà apê mẽ inhõ pahi hkêt kênã.

²⁸Kot kaj inhîpêx o te ate Ejit nhõ xwÿnhhta nhîpêx pyrà nê wa ixtõ hpîr kêt nê.” Anê.

²⁹—Hâmri nhũm tee ri kuma nê ra kãm ma nê Ejit rũm kator kurê kumrêx nê ma pyka pê Mijiã hwÿr mõi nê kamã hpãnhã pa. Kamã hprõ nê hkra. Nhũm hkra myja wa hamêxkrut.

³⁰—Tã nhũm Mijiã kamã pa hã axte hã amgrà pê 40. Hâmri nê mêmõ arĩgro hã kapõt ã krã hakÿx pê Sinai kape hã ri pa nhũm Tĩrtũm kãm kapêr. Nom nhũm Mojes omunh kêt nê. ãm utĩ kaõk kamã kuwy hpõk pix pumu.

³¹Amnhĩ jaêr pê ã kot amnhĩ nhîpêx anhÿr ã omu hãmri nê amnhĩ tã hprĩ hã omunh kaxyw hwÿr tẽ nhũm Tĩrtũm kãm:

³²Pa Mojes? E ixpê Tĩrtũm na pa. Ixpê akukamã anhĩgêt Apraãw nhõ Tĩrtũm na pa. Nê ixpê Apraãw kra Ijak mẽ htãmnhwÿ Jako wa õ Tĩrtũm na pa. Anê. Hâmri nhũm tee ri kuma nê kãm ma xaj htertet tÿx nê. Hâmri nê umaj axte pĩ hpõkja wÿr rĩt kêt nê. ãm nhãm hkrã nê rĩt o xa.

³³Hâmri nhũm Tĩrtũm kãm: E kwa ixpê Tĩrtũm maati hã ixtã apijaãm ã aparkà kapa nê apar kênh nê xa.

³⁴Na pa ra ixkra Ijaewjaja Ejit kãm mẽ omu. Na ra Ejit nhõ xwÿnhjaja ixpê mẽ homnuj tÿx kumrêx rãhã ho pa nhũm mẽ amnhĩ xà hã maj tee ri amnhĩ nhîpêx. Pa ja hã mẽ omu nê inhmã mẽ hkaprĩ nê. Jakamã kot paj Ejit nhõ xwÿnhjê nhĩhkra rũm mẽ kator pa. E ka kot paj mẽ hwÿr amê ka ma akupÿm mẽ hwÿr mõi nê mẽ kurũm mẽ kator. Anhÿr o kãm mẽ kaxyw karõ.

³⁵Ra Ijaew kot Mojes hkaga tã nhũm mẽ kaxyw ãm nê ma akupÿm kot mẽ hwÿr mênh kaxyw. Na prem ra omu nê hkaga. Te mẽ ate Jejus kagaja pyrà nê hkaga. Jakamã nhũm pijapu xwÿnhhta tee ri amnhĩ tã omu nê kamã gryk nê amnhĩ nê kãm kapêr nê kãm: “Tk. Kwa xà apê mẽ inhõ pahi hã na ka ã wa inhmã akapêr anê? Nà apê mẽ inhõ pahi kêt.” Anhÿr tã nhũm Tĩrtũm mẽ kaxyw tãm xãm. Kot mẽ ho amnhĩptàr nê Ejit nhõ xwÿnhjê rũm mẽ kator kaxyw. Ja kaxyw na pre pĩ hpõk kamã kãm kapêr nê mẽ kaxyw ãm.

³⁶—Jakamã nhũm Mojes ma akupỹm Ejit wỳr mō nē mẽ kurũm hkwỳjê kator nē ma mẽ o pa. Na pre mẽ ho mex nē Tĩrtũm nhỹ hã mẽ kãm aa mẽ kot mẽmoj pumunh kêt kwỳ ho anhỹr o ri mẽ o pa. Ejit kamã nē mããnēn mẽ kot gô xujanãr mã: “Gô kamrêk” anhỹr xwỳnhta kamã. Nē kapôt ã mẽ kãm ã amnhĩ nhĩpêx anhỹr o mẽ o pa. Nē kapôt ã ri mẽ o pa ho ra hã amgrà pê 40.

³⁷—Tã tãm na pre mẽ panhĩgêjtjê mã mẽhõ hkukamã mẽ kãm tanhmã harēnh to nē mẽ kãm harēnh o: “Koja Tĩrtũm nhỹrmã te ra mẽ akaxyw pa ixãm pyrà nē inhmỳr pê mẽ panhĩõ xãm. ỹ hã mẽ amã kapêr jarēnh o pa kaxyw nhũm nhỹrmã mẽ akaxyw ãm ka mẽ omu.” —Anhỹr o ã Jejus kukamã harēnh anē.

³⁸Na pre Mojes kapôt ã mẽ panhĩgêjtjê ho pa nhũm mẽ krã hakỳx pê Sinaija wỳr pa. Mẽ panhĩgêjtjaja hãmri hwỳr pa nhũm Tĩrtũm kapêr o mẽ wryk xwỳnhja mẽ kaxyw Mojes mã kapêr nhũm ô ri mẽ kãm awjarē nē hã kagà. Mẽ kot mar nē hkôt amnhĩ nhĩpêx nyw o amnhĩ nhĩpêx o pa kaxyw nhũm mẽ kãm Tĩrtũm kapêr jarēnh o pa. Nē mẽ pajaxwỳja. Mẽ pahte hkôt amnhĩ nhĩpêx nyw o amnhĩ nhĩpêx o papa kaxyw na pre mẽ pamã hã kagà.

³⁹Tã no nhũm mẽ panhĩgêjtjaja Mojes ma nē ãm kuma nē hkaga kumrêx nē akupỹm Ejit wỳr hkrà.

⁴⁰Jakamã nhũm Mojes kormã nhỹri mẽ kaxyw Tĩrtũm mã kapêr o ãm rôm nhũm mẽ wakre kamã htõ Arãw wỳr mra nē kãm: “Kwa Mojes ra kot tanhmã amnhĩ to kēnã. Kot Ejit rũm mẽ pakator nē mẽ pahto mōr tã ra nhỹri arĩk nē tanhmã amnhĩ to. Jakamã e. Kwa hpãnhã mẽ inhmã mẽmo karõ nhĩpêx pu mẽ ho panhõ sãnti kê tãm ma akupỹm Ejit wỳr mẽ pahto pa.” Anē.

⁴¹—Hãmri nhũm mẽ kuma nē mẽ kãm kàx o môx krare karõ ho sãnti nhĩpêx nē mẽ kãm ãm. Hãmri nhũm mẽ axtem nē te ho Tĩrtũm nhĩpêx pyràk o hipêx nē kãm ôwêhti hkwỳ pa nē kãm haxwỳ nē hã apku. Hãmri nē ã amnhĩ nhĩpêx anhỹr ã amnhĩ pumu nē hkĩnh nē.

⁴²Hãmri nhũm Tĩrtũm tee ri ja hã mẽ omu nhũm ja kêp omnuj tỳx nē nhũm mẽ hkaga hpa. Jakamã nhũm prem amnhĩ krã hkôt ri myyti nē mytwrỳre nē kanhêti karõ nhĩpêx nē te mẽ kot Tĩrtũm nhĩpêx pyràk o hipêx o pa.

Hāmri nē amnhĩ kaxyw kumã pix mã hamaxpēr o pa hã amgrà xohtô nē. Tã nhũm Tĩrtũm nhỹ hã kapēr jarēnh o mẽ pa xwỳnhjaja tanhmã mẽ kãm kapēr to nē mẽ hã kagà. Te Tĩrtũm tãm mẽ kãm kapēr pyràk o mẽ kãm kapēr nē hã kagà kot: Pa mẽ apê Ijaewjaja? E mẽ inhma. Amnepēm mẽ ate kapôt ã ri mẽ apa hã amgrà pê 40ta ã. Xà we inhmã na ka prem akrit kwỳ hpar o apa?

⁴³Nà inhmã hkêt. Na ka prem axtem nē ri amnhĩ krã hkôt amnhĩm mẽmo karõ nhĩpêx nē hipêx o te mẽ ate pa inhĩpêx pyràk. Pê kãm akrit kwỳ hpar nē òr o ri apa. Mẽ anhõ mẽmo karõ nhĩpêxta mẽ ate amnhĩm hã hixi pê Mõrok mẽnh xwỳnhja ka pre htem à kamã amnhĩ kôt ho apa. Nē amnhĩm kanhêti karõ nhĩpêx nē hã hixi mẽ nhũm kêp Repã. Ka mẽ ixkuhpa hã wa kêp mẽ apãm ã harēnh o ri apa. Tã ã mẽ ate amnhĩ nhĩpêx anhỹrja mỳrapê kot paj pãnhã nhỹhỹm mẽ arē. Kojã mẽ akutã amnhĩ xunhwỳr xwỳnhjaja mẽ apynê nē ma pyka pê Papirõn rũm hamũ mẽ ato hapêx ka mẽ amarĩ mẽ kãm axàpēnh rũnh o ri apa kãm ga. Anẽ. ã na pre Tĩrtũm mẽ panhĩgêjtê mã kapēr anẽ nhũm ÿ hã kapēr jarēnh o pa xwỳnhja mẽ kãm hã kagà.

⁴⁴—Tã nhũm mẽ panhĩgêjtaja kormã kapôt ã ri pa ri amnhĩ kôt mry kà ho ixkre ho pa. Tĩrtũm mã kapēr xà hã ixkreja nhũm prem amnhĩ kôt ri o pa. Mẽ kot kãm “Tĩrtũm nhõrkwỹ kaàkre” anhỹr xwỳnhja. Tĩrtũm kot mẽ kãm hã karõ xà hkôt nhũm mẽ hipêx nē amnhĩ kôt ri o pa. Na pre Tĩrtũm hprĩ hã Mojes mã tanhmã kot hipêx to hã karõ nhũm mẽ hkôt hipêx nē amnhĩ kôt ri o pa.

⁴⁵—Tã nhũm Mojes ty nhũm hpãnhã Jojueja amnhĩ kôt mẽ o pa. Ma Tĩrtũm kot mẽ kãm pyka mex nhõrta wỳr Mojes mỳr pê mẽ o pa. Hāmri nē hwỳr mẽ o pøj nhũm Tĩrtũm mẽ nē mẽ kot ra kamã mẽ pa ho mẽ pa xwỳnhjê japôj nhũm mẽ pãnhã kamã pa ho pa. Nē amnhĩ kôt Tĩrtũm nhõrkwỹ kaàkreta o pa. Rãhã nhũm finat Tawija mẽ hpãnhã mẽ ho amnhĩptà.

⁴⁶Na pre Tĩrtũm Tawi kot tanhmã amnhĩ nhĩpêx to ho pa hã omu nē kãm hapê nē. Jakamã nhũm Tawi kãm kapēr nē kãm: “Pa Tĩrtũm? Kwa xà kot paj amã ixkre mex ò nhĩpêx nà? Mẽ ixpê Ijaewjaja mẽ ixte kamã amã amex

o amex ã ajarēnh o ixkrī kaxyw pa hipêx. Xà kot paj amã hipêx?” Anhÿr tã no nhũm Tĩrtũm kormã kãm ja prãm kêt nẽ.

⁴⁷Jakamã nhũm Tawi hkra Sarumãwja hipêêxà mÿr pê hpãnhã kêp mẽ õ pahi nẽ kãm hipêx.

⁴⁸Nom xà na hte Tĩrtũm maatija mẽ pahte kãm panhĩhkra ho ixkre nhĩpêx xwÿnh kamã hkrĩ? Nà kaxkwa kamã na hkrĩ xà. Na pre ra Tĩrtũm nhÿ hã kapêr jarēnh o pa xwÿnhja Tĩrtũm kot tanhmã mẽ pajamãr to ho pa hã kagà nẽ hã kagà ho:

⁴⁹Na pa hte kaxkwa rũm pyka hkôt mẽ piitã mẽ hamãr mex o ixkrĩ. Tã tanhmã kot paj amnhĩ to nẽ mẽ ìhkra ho mẽ kot inhmã ixkre nhĩpêxta wÿr axà nẽ kamã ixpa ho ixpa?

⁵⁰Nà ixte mẽmoj piitã ho ixkator xwÿnh kênã kot pa kêt ã amnhĩ nhĩpêx anẽ. Anẽ. Nhũm pre ã Tĩrtũm amnhĩ tã mẽ kãm kapêr anẽ nhũm ÿ hã kapêr jarēnh xwÿnhja ô ri mẽ pamã hã kagà.

⁵¹—E kwa mẽ inhma ixkwÿjaja. Mẽ akrã hihtÿx kumrêx jakamã mẽ amã Tĩrtũm kapêr mar prãm kêt. Na ka htem mẽ panhĩgêjtê pyrã nẽ amnhĩ nê Tĩrtũm Karõ kaga nẽ kapêr mar kêt nẽ.

⁵²Na pre hte Tĩrtũm nhÿ hã kapêr o mẽ pa xwÿnhjaja mẽ panhĩgêjtê hwÿr mra nẽ mẽ kãm kapêr jarēnh o ri mẽ hkôt pa. Tã nhũm mẽ hkaga nẽ mẽ hipêx kati ho pa. Na pre htem Jejus wrÿk kukamã mẽ kãm: “E koja nhÿrmã kot Tĩrtũm kapêr mar nẽ hkôt amnhĩ nhĩpêx mex rãhã xwÿnh maatija mẽ pahwÿr wrÿ.” Anhÿr o mẽ kãm harēnh o pa. Tã no nhũm mẽ kãm ja mar prãm kêt jakamã axtem nẽ hã mẽ hpar o pa. Mẽ kot mẽ kãm Jejus jarēnh o mẽ pa xwÿnhjê hpar o pa. Tã nhũm tãm mẽ pahwÿr wrÿ ka mẽ omu nẽ mẽ kot amnhĩ nhĩpêxta pyrã nẽ hã amÿnê nhũm prem mẽ amã kupĩ.

⁵³—Tĩrtũm kapêr o mẽ wrÿk xwÿnhjaja kot Tĩrtũm nhÿ hã tanhmã mẽ pahte amnhĩ nhĩpêx to ho papa hã mẽ pamã karõ nhũm mẽ ate mar tã mẽ apê hprãm nõkati. Nẽ ama nẽ ãm ama nẽ hkôt amnhĩ nhĩpêx o ri apa hkêt nẽ. Anẽ.

Mě kot Estewāw pīr ā mẽ harēnh

Rukre 21.16-19; 23.34; Atre 22.20

⁵⁴Hāmri nhũm juistijaja tee ri Estewāw xujarēnh ma nē kamā gryk tỳx nē kām kapēr punuj nē.

⁵⁵Nom nhũm Tirtũm Karōja tanhmã hkrã hto nhũm kām mẽ uma hkêt nē. Hāmri nē kànhmã rīt nē kaxkwa pumunh o xa nē kamā Tirtũm rũm hirã rax pumu. Nhũm Jejus Tirtũm nhĩhkô hã xa nhũm omu nē hkĩnh nē mẽ kām:

⁵⁶—Kokỹỹ. Na kaxkwa axkjê nhũm kamā Tirtũm nhỹ pa omu. Nhũm kuri kot mẽ pahwỳr mēnh xwỳnh Jejusja xa. Hêxta waa nē. Nà na pa jarãhã wa omu nē ixkĩnh tỳx kumrēx. Anē.

⁵⁷Hāmri nhũm mẽ kuma nē kamā gryk tỳx nē. Hāmri nē kām mar prãm kêt nē kêp amnhĩ jamak pro. Hāmri nē gryk xàj àmra htỳx nē hwỳr hprôt

⁵⁸nē unê nē krĩ pê ho kato nē ma o tẽ nē nhỹri o xa. Hāmri nē kẽn o htak o hpĩr kaxyw amnhĩ nhĩnôkà hkwrỳ nē mēhõ my pê Sawti mã kugõ nhũm mẽ kām hamỳ. Hāmri nhũm mẽ kẽn rũnh kwỳ jamỳ nē o mra nē Estewāw wỳr rēnh prêprêk o kuhê. Nē ho ĩ kamā htak nē hkrãx pê htak.

⁵⁹Hāmri nhũm ra htyk kaxyw nē Jejus mã amnhĩ jarẽ nē kām: —Pa Pahihti Jejus? E koja ixkarõ awỳr api ka ixto amnhĩptà. Anē.

⁶⁰Hāmri nē hkõn krã ho tēm nē nhỹ nē axte kām amnhĩ jarẽ nē mẽ kot hpĩr xwỳnhjê nē kām kapēr nē kām: —Kwa Pahihti. Mẽ kot ixpĩr tã kwa tanhmã ixtã mẽ ho hkêt nē. Anhỹr o mẽ nē Jejus mã kapērja kôt ra ty.

Atre 8

Mě kot Estewāw jaxàr ā mẽ harēnh

Atre 22.4; 26.9-11

¹⁻²Hāmri nhũm mẽ kot Jejus kôt amnhĩ nhĩpêx xwỳnhjaja Estewāw wỳr mra nē htyk kām omu nē hkaprĩ nē. Nē mur nē kumỳ nē ma o mō nē haxà. Nom nhũm Sawtija mẽ kot hpĩr ā omu nhũm ja kām mex nē.

Sawti kot Jejus kwỳjê nhĩpêx kati ho pa hã harēnh

Atre 1.8

Tã nhũm Jerujarẽ kamã Ijaewjaja mẽ kot Jejus kôt amnhĩ xunhwỳr xwỳnhjê homnuj tỳx o pa. Hãmri nhũm mẽ tee ri amnhĩ kukamã hamaxpêr nẽ mẽ hkwỳjaja mẽ umaj hapôj nẽ ma pika hkwỳ hkôt hpigrành pa. Mẽ hkwỳjaja Jutej wỳr ma pa nhũm mẽ hkwỳjaja Samar hwỳr ma pa. ã na prem mẽ umaj nhỹhỹm hpigrành par anẽ. ãm Jejus nhỹ hã mẽ ahkre xwỳnh maati pixjaja na prem Jerujarẽ kamã arĩk nẽ nhỹhỹm mõi kêt nẽ. Simãw Pêtre nẽ Juãw nẽ Xiakre nẽ Andre nẽ Firipti nẽ Patoromew nẽ Matêwre nẽ Makre nẽ Tomas nẽ Xiakre hõja nẽ Simãw õ nẽ Maxitreja. ãm jajaja pix na prem arĩk.

³Nhũm Sawti haxwỳja Jejus kôt mẽ kot amnhĩ xunhwỳr xwỳnhjê homnuj o pa. Mẽ kot Jejus kaga hprãm xaj tanhmã mẽ hipêx to ho pa. Na pre hte mẽ òrkwỹ hwỳr agjê nẽ mẽ unê. Měmyjê pynê nẽ mēnijê pynê nẽ ma mẽ o mra nẽ mẽ hagjênh xà kamã mẽ hagjê. Mẽ urak nẽ kêp Ijaew tã ã mẽ hipêx anhỹr o pa.

⁴Tã nhũm mẽ umaj Jerujarẽ rũm pika hõ hwỳr mẽ hpigrành xwỳnhhtaja amarĩ pika hkwỳ hkôt ri pa hkêt nẽ. Na prem ma mẽ piitã mẽ kãm Jejus kapêr jarênh o ri mẽ hkôt pa. Kêp Tĩrtũm kot mẽ pakaxyw ãm xwỳnh ã harênh rãhã ho ri mẽ hkôt pa.

Wajaga kot amnhĩ tã Firipti mar ã harênh

Juãw 2.23-24

⁵⁻¹²Tã nhũm Firipti haxwỳja ma mõi. Ma krĩ pê Samar hwỳr mõi nẽ kamã mẽ kãm Tĩrtũm kot mẽ pakaxyw ãm xwỳnhhta jarênh o pa. Samar kamã na pre wajaga Simãwti ri Samar nhõ xwỳnhjê hkôt mẽ no kupyw rãhã ho ri mẽ hkôt pa. Nẽ àhpumunh tỳx ã amnhĩ to jarkrar o ri pa. Jakamã nhũm mẽ kot amnhĩ nhĩpêx ã omu nẽ kamã no pyma nẽ. Nẽ htỳx ho ãm hãmri kot amnhĩ jarênh ã hkamnhĩx. Jakamã nhũm pre mẽ kãm tanhmã ri amnhĩ to hêx to ho pa pê mẽ no kupyw rãhã ho ri pa nhũm mẽ amnhĩ jaêr pê omu. Mẽ kot amnhĩ to hkryre xwỳnhjaja nẽ mẽ kot amnhĩ to rũnh xwỳnhjaja nhũm mẽ amnhĩ jaêr pê kot tanhmã amnhĩ nhĩpêx to hã omunh o hkôt pa. Nẽ ri axpên mã harênh o: —Kokỹỹ. Wajagaja àhpumunh tỳx kumrêx. Tĩrtũm nhỹ hã mãn te ã amnhĩ nhĩpêx anhỹr o pa nà? Mãn pre Tĩrtũm kãm àhpumunh xà hkwỳ gõ nhũm ỹ hã ã amnhĩ nhĩpêx anhỹr o pa. Anẽ. Hãmri nẽ hkôt

hamaxpër o ri hkôt amnhĩ nhĩpêx o pa. Tã nhũm Firipti mẽ õ krĩ hwỳr mỗ nẽ mẽ kãm Jejus Kris jarênh o ri mẽ hkôt pa nẽ mẽ kãm: —Jejus kêp Tĩrtũm kot mẽ pahwỳr mênh xwỳnh jakamã kot kaj mẽ amnhĩ kaxyw hkôt ajamaxpër nẽ hkôt amnhĩ xunhwỳ nhũm Tĩrtũm hã mẽ apumu nẽ mẽ ato hkra. Anẽ. Hãmri nẽ Tĩrtũm nhỹ hã akupỹm tanhmã mẽ kute xwỳnhjê ho mex to ho pa. Mẽ ĩ kamã mẽ htyk xwỳnhjaja nẽ mẽ hyk o mẽ pa xwỳnhjaja nhũm mẽ ohtô nẽ akupỹm mẽ ho mex o pa. Nẽ mẽ hkwỳjê nê mẽkarõmnuti hkwỳ jano nhũm mẽ àmra htỳx o mẽ hkaga nẽ ma mẽ kurũm hapôx nẽ mra. ã Firiptija Jejus nhỹ hã mẽ ho mex o pa anẽ nhũm mẽ piitã ja hã omu nẽ kapër ma nẽ hkĩnh nẽ. Nẽ kapër mar tỳx nẽ hkôt hamaxpër. Jao wajaga Simãwti kaga nẽ hpãnhã amnhĩ kaxyw Jejus kôt pix mã hamaxpër nẽ hkôt amnhĩ xunhwỳ. Hãmri nhũm Firipti ja hã mẽ omu nẽ mẽ hkrã kumrã. Měmyjaja nẽ mēnijaja nẽ mẽ piitã mẽ hkrã kumrã. Ra mẽ kot Jejus kôt amnhĩ xunhwỳr ã mẽ piitã mẽ kãm amnhĩ to amnhĩrĩt kaxyw nhũm mẽ hkrã kumrã pa.

¹³Hãmri nhũm wajaga Simãwti haxwỳja Jejus kapër ma nẽ mẽ uràk nẽ amnhĩ kaxyw hkôt hamaxpër nẽ hkôt amnhĩ xãm nhũm Firipti hkrã kumrã. Hãmri nhũm hkĩnh nẽ Firipti hkôt ri pa. Nẽ aa mẽ kot mẽmoj pumunh kêt kwỳ ho anhỹr o ri pa hã omu nẽ kamã no pyma ho hkôt ri pa. Nẽ kot Tĩrtũm nhỹ hã akupỹm mẽ ho mex ã omu nẽ tee ri hamaxpër.

¹⁴Tã hãmri nhũm Jerujarẽ kamã Jejus nhỹ hã mẽ ahkre xwỳnh maatijaja Samar nhõ xwỳnhjê jarênh ma. Ra mẽ kot Tĩrtũm kapër kôt amnhĩ nhĩpêx ã mẽ harênh ma nẽ hkĩnh nẽ. Hãmri nẽ ma mẽ hwỳr Simãw Pêtre mẽ Juãw wa kumẽ.

¹⁵⁻¹⁷Hãmri nhũm wa ma mẽ hwỳr wa mỗ nẽ pôj. Hãmri nhũm Firipti wa omu nẽ wa kãm krĩ nhõ xwỳnhjê jarẽ nẽ wa kãm: —Nà na pa pre mẽ kãm Jejus kapër jarẽ nhũm mẽ inhma nẽ hkôt amnhĩ xunhwỳ. Jakamã pa pre mẽ hkrã kumrã. Nom na kormã Tĩrtũm Karõja mẽ hkarõ mã gjêx kêt nẽ. Anẽ. Hãmri nhũm wa mẽ harênh ma nẽ mẽ himõk ã wa ĩhkra jaxwỳr o ri mẽ hkôt mra. Ja kôt nhũm Tĩrtũm Karõ mẽ hwỳr wrỳ nẽ mẽ hkarõ mã gjêx pa.

18-19Hāmri nhūm wajaga Simāwja mẽ amnhĩ tã wa omunh o xa nẽ hamaxpēr o: —Kokỹỹ. Kwa wa kot mẽ hã ìhkra jaxwỳrja kôt na hte Tĩrtũm Karõ mẽ hkarõ mã agjê. Hêxta waa nẽ. Inhmã ã mẽ hipêx anhỹr o ri ixpa hprãm tỳx. E pa ixkàxpore hkwỳ jamỳ nẽ o tẽ nẽ wa kãm kugõ kê wa tanhmã ixto pa wa uràk nẽ ã mẽ hipêx anhỹr o ri ixpa. Nà kot paj anẽ. Anẽ. Hāmri nẽ wa hwỳr tẽ nẽ wa kãm: —E ota ixkàxporeta. Kwa amnhĩm apy nẽ hpãnhã tanhmã ixto pa war apyrà nẽ mẽ hã inhĩhkra jaxwỳr o ri mẽ hkôt ixpa kê Tĩrtũm Karõja mẽ hkarõ mã agjê. Inhmã ja ho anhỹr prãm tỳx. Anẽ.

20-23Hāmri nhūm wa tee ri ã kapēr anhỹrja ã omu nhūm Pêtre kãm: —Tk. Kwa ajamaxpērja mex kêt. Xà na htem kàxpore ho Tĩrtũm mã amnhĩrer pê ỹ hã mẽ ho hwỳr o pa nhūm Karõ mẽ hwỳr agjê? Nà na htem kàxpore ho Tĩrtũm Karõ japrôr kêt nẽ. Kot kaj wa ixpyrà nẽ ã mẽ hipêx anhỹr kêt nẽ. Ajamaxpērja mexre hã. Kormã ate Tĩrtũm kôt amnhĩ xãm tỳx kêt jakamã na ka atỳx ã ri ajamaxpēr anẽ. —Na ka ã wa ixte Tĩrtũm nhỹ hã mẽ hipêx anhỹr ã wa ixpumu nẽ amã wa ixpyrà nẽ ã mẽ hipêx anhỹr o ri apa hprãm xàj ajamaxpēr punuj nẽ. Nhūm ajamaxpēr punuj te kot apa hã apyr ka tee ate kêp amnhĩ kjênh pyràk. Kwa tokyx ajamaxpēr punuj ã amnhĩ pumu nẽ akaprĩ nẽ tokyx hkaga. Hāmri nẽ amnhĩ to Tĩrtũm wỳ kê amnhĩ katut kôt ajamaxpēr punujja mẽ ka axte ã ajamaxpēr anhỹr kêt nẽ. ã mẽ hamaxpēr punuj anhỹr xwỳnhjaja koja mẽ nhỹrmã ma kuwy hwỳr pa. Anẽ.

24Hāmri nhūm tee ri amnhĩ tã kuma nẽ hkaprĩ nẽ wa kãm: —Kwa xà wehe? Tô tokyx ixto Tĩrtũm wỳ kê ã ijamaxpēr anhỹrja mỳrapê hwỳr inhmênh kêt nẽ. Anẽ.

25Tã nhūm Simāw Pêtre mẽ Juāw wa Samar nhõ xwỳnhjê mã Pahihti Jejus kapēr jarênh pê ho mẽ ahkre hāmri nẽ ma akupỹm Jerujarẽ hwỳr mō. Ma pyka pê Samar hkôt mẽ kãm Jejus kapēr jarênh o ma akupỹm mō.

Firipti mẽ Exiop nhõ xwỳnh wa harênh

ljais 53.7-8

26Hāmri nhūm Firipti arĩ Samar kamã arĩk. Hāmri nhūm Tĩrtũm kapēr o mẽ wrỳk xwỳnhja hwỳr wrỳ nẽ kãm: —Pa? E ot pa awỳr wrỳ nẽ tẽ. Nà kêr ka tokyx akato nẽ ma mō nẽ Jerujarẽ rùm kànhmã Kas wỳr pry kahpêr ta nẽ

hã juk nẽ ma hã mõi. Kapõt ã pry nõrta kahpêr ta nẽ hã mõi. E kwa tokyj. Anhÿr o kãm kapêr hãmri nẽ ma akupÿm tẽ nẽ kaxkwa hwÿr api.

²⁷Hãmri nhũm Firipti kuma nẽ kato nẽ ma hwÿr mõi kurê kumrêx. Mõi hãmri nẽ pryja kahpêr ta nẽ hã mõi. Hãmri nhũm ra mõi myja mõi. Exiop nhõ xwÿnh na pre. Exiop kamã mõi pahi na pre niti. Hixi pê na pre Kâtatre. Nhũm pry hã mõi xwÿnhja kêp kãm kàxpore jamãr o pa xwÿnh. Exiop kamã te kêp mõi õ kôwenatô pyræk. Tã kot Tirtũm mã mex o mex ã harênh kaxyw ma Jerujarẽ hwÿr mõi.

²⁸Hãmri nẽ akupÿm Exiop wÿr kormã mõi. Õ pàr kãm nhÿ nẽ Tirtũm kapêr ã kagà htũm kamã kapêr o mõi. Tirtũm nhÿ hã kapêr o pa xwÿnh pê Ijais kot Tirtũm kapêr ã kagà htũmja nhũm kamã kapêr o mõi.

²⁹Hãmri nhũm Tirtũm Karõ Firipti mã harẽ nẽ kãm: —E mõi mÿj wÿr aprõt nẽ tẽ nẽ hã ajêt nẽ ma hkõt tẽ. Anẽ.

³⁰Hãmri nhũm kuma nẽ ma hwÿr hprõt nẽ hã ajêt nẽ kot kagà kamã kapêr ã kuma. Ijais kot Tirtũm kapêr ã kagà htũm kamã kapêr ã kuma nẽ kãm: —Pa? Mãn ka aprĩ hã ate kamã akapêr xwÿnhhta ma nà? Anẽ.

³¹Hãmri nhũm kãm: —Nà ixte maare hã. Mõi kot hprĩ hã inhmã harẽ pa ixprĩ hã kuma? Xàt ka ixwÿr api nẽ ixri nhÿ nẽ aprĩ hã inhmã harênh o ixkõt mõi nà? Anẽ. Hãmri nhũm kuma nẽ hwÿr api nẽ ãhkõ hã nhÿ nẽ kagàta pumunh o nhÿ.

³²Nhũm hã kagà kot: Na htem ôwêhti par kaxyw nhũm amarĩ mẽ kãm akryk kuhê. Nẽ mẽ kot kêp hkĩ jakàr kaxyw nhũm ma anẽ nẽ amarĩ mẽ kãm akryk kuhê. Tã na pre mõiõja ôwêhti kot amnhĩ nhĩpêx pyræk o amnhĩ nhĩpêx. Jakamã nhũm mẽ kot tanhmã hipêx to htã no nhũm arĩ mẽ kãm akryk xa. Amnhĩ nẽ tanhmã mẽ kãm kapêr punuj to hkêt nẽ. ãm arĩ mẽ kãm xa.

³³Na prem homnuj tÿx nẽ ri hipêx kati rax nẽ. Aa kot tanhmã amnhĩ tomnuj to hkêt kumrêx tã nhũm mẽ ã hipêx anẽ nhũm mõiõ yr pê tanhmã nẽ mẽ kãm kapêr to hkêt nhũm prem kupĩ. Nhũm amnhĩ kanrêhã hkra hkêt rãhã

ty. Jakamã kot puj mẽ hkrajê nhĩxi mar kêt nẽ. Kra hkêt rãhã htyk kênã. Anẽ.

³⁴Nhũm pre ã Exiop nhõ xwỳnh Tĩrtũm kapẽr ã kagà htũm kamã harẽnh anẽ. Hãmri nẽ tee ri ã kot mẽhõ jarẽnh anhỹrja kukamã hamaxpẽr nẽ hã Firipti kukja nẽ kãm: —Kwa aprĩ hã inhmã mẽhõja jarẽ. Mẽhõ na prem ã hipêx rax anẽ? Xà kot kagà xwỳnhhta na prem ã hipêx anẽ nà xà nhãm mẽhõ na prem ã hipêx anẽ? E kwa aprĩ hã inhmã harẽ pa ã mẽ kot hipêx anhỹr xwỳnh kôt omu. Anẽ.

³⁵Hãmri nhũm kãm: —Tôe kot paj amã harẽ. Nà Jejus na prem ã hipêx anẽ nhũm prem hã kagà. Anẽ. Hãmri nẽ hprĩ hã kãm kot kamã harẽnh xwỳnhhta jarẽ. Jejus kot tanhmã mẽ panê amnhĩ nhĩpêx toja nhũm hprĩ hã kãm harẽnh o hkôt mỗ.

³⁶Hãmri nhũm wa kormã mỗ nẽ pry htã himô hãnh mỗ nhũm Exiop nhõ xwỳnh omu nẽ Firipti mã kãm: —E mũj gô mũj nỗ. Xà kot kaj kamã ixkrã kumrã nà? Anẽ.

³⁷Nhũm kãm: —Nà kot kaj amnhĩ kaxyw Jejus Kris kôt ajamaxpẽr nẽ hkôt amnhĩ xãm hã kot paj akrã kumrãr kurê kumrẽx. Anẽ. Hãmri nhũm kãm: —Tỳ. Kêp Tĩrtũm Kra kênã kot paj kêt amnhĩ kaxyw hkôt ijamaxpẽr kêt. Anẽ.

³⁸Hãmri nẽ pàr o mrar xwỳnh mã anẽ nhũm pàr o nỗ nhũm wa kato nẽ himô hwỳr wrỳ nhũm Firipti hkrã kumrã. Kot Jejus kôt amnhĩ xãm ã hkrã kumrã.

³⁹Hãmri nẽ wa akupỹm api nhũm Tĩrtũm Karõ Firipti mỳ nẽ ma nhỹhỹm o mỗ nhũm Exiop nhõ xwỳnhja axte omunh kêt nẽ. Hãmri nẽ ma akupỹm papxà hwỳr mỗ. Ra kot Jejus kôt amnhĩ xãm jakamã hkĩnh nẽ ma akupỹm mỗ.

⁴⁰Rôm nhũm Firipti krĩ pê Ajôt kamã pỏj. Tĩrtũm Karõ kot Exiop nhõ xwỳnh pê kator nẽ tanhmã ho nẽ Ajôt wỳr o mỗ hãmri nẽ kamã kumẽ. Hãmri nhũm mẽ kãm Jejus kot tanhmã mẽ panê amnhĩ nhĩpêx to hã harẽnh pê ma krĩ hỏ hwỳr mẽ kãm ujarẽnh anhỹr o pa rãhã krĩ pê Sejarej wỳr mỗ nẽ pỏj.

Atre 9

Sawti kot Jejus kôt amnhĩ xãm ã harënh

Atre 22.6-11; 26.12-18

¹Rôm nhũm Sawtija xatã Jerujarë kamã Pahihti Jejus kôt mẽ kot amnhĩ xunhwỳr xwỳnhjaja tanhmã mẽ homnuj tỳx to ho ri mẽ hkôt pa. Kãm mẽ himex par prãm jakamã na pre hte ã amnhĩ nhĩpêx anhỳr pix o pa. Tã ra hamaxpěr nẽ ma patre maati hwỳr tẽ nẽ mẽ hã amnhĩ jarẽ nẽ kãm:

²—E ot pa awỳr tẽ. Kwa inhmã kagà nhĩpêx pa kupy nẽ ma krĩ pê Tamas kãm mẽ pahpê Ijaew xàptàr tũmrejê hwỳr o mỗ nẽ mẽ kãm kugõ. Kê mẽ kamã harẽ nẽ omu hãmri nẽ hkôt inhĩkra kamã Jejus kôt mẽ kot amnhĩ nhĩpêx xwỳnhjê jagjê. Mënijaja nẽ mẽmyjaja. Hãmri pa mẽ unê nẽ man akupỳn awỳr mẽ o mỗ ka mẽ omu nẽ kam tanhmã mẽ hipêx to. Anẽ. Hãmri nhũm kuma nhũm ja kãm mex nẽ. Hãmri nhũm kãm kagà nhĩpêx nẽ kugõ nhũm kupy nẽ hkôt mẽ pa xwỳnhjê mẽ ro hã ma Tamas wỳr mẽ hwỳr mỗr kurê kumrëx.

³Mỗõ mẽ ra hpôx o mỗr mẽ nhũm puh kaxkwa rũm hirã rax kumrëx wrỳ nẽ hã ajêt nhũm hipôk ri xa.

⁴Hãmri nẽ tee ri omu nẽ kãm ma xàj pykap tẽm nẽ akryk nỗ. Hãmri nhũm kaxkwa rũm mẽhỗ kãm kapěr nẽ kãm: —Pa Sawti? Hêxta waa nẽ. Kwa mon ka hte ixtomnuj tỳx o ri apa? Anẽ.

⁵Hãmri nhũm amnhĩ jaêr pê kuma nẽ kãm: —Kwa mẽ atõ na ka ã inhmã akapěr anẽ pahihti? Anẽ. Hãmri nhũm kãm: —Kwa nhũm ixpê Jejus ixte amã ixkapěr kênã. Pa na ka hte ixpê ixkôt mẽ kot amnhĩ xunhwỳr xwỳnhjê nhĩpêx kati ho apa. Jao te pa ate ixtomnuj tỳx pyràk.

⁶Nom kot kaj axte ã amnhĩ nhĩpêx anhỳr kêt kumrëx. E kànhmã xa nẽ mãmri ma krĩ hwỳr tẽ. Kot kaj hwỳr pøj nhũm mẽhỗ awỳr tẽ nẽ mẽmoj tã amã karõ ka ama nẽ hkôt amnhĩ nhĩpêx. Anẽ.

⁷Nhũm pre ã Jejus Sawti mã kapêr anê. Nhũm hkôt mẽ pa xwỳnhjaja mẽmoja ma no ãm hprĩ mar nê mẽmoj pumunh kêt nê. Hãmri nê tee ri hamaxpêr nê kãm ma xàj akryk kapêr kêt kumrêx nê kuhê.

⁸Hãmri nhũm Sawti kànhmã xa nom rĩt kêt nê tee ri rĩt mã nhũm mẽ hpa hã kupy nê ma krĩm o mỗ.

⁹Nê Tamas wỳr o pỏj nê nhỹri mẽhỗ nhõrkwỹ hwỳr ho axà nhũm kamã nohkre nê arĩ hkrĩ. Tee ri amnhĩ kukamã hamaxpêr o hkrĩ. Nê apkur kêt nê hkôm kêt o ra hã apkati axkrunêpxi.

¹⁰Tamas kamã na pre mẽhỗ my pê Ananĩsja pa. Kot Jejus kôt amnhĩ xunhwỳr xwỳnhjê hõ na pre. Jakamã nhũm Jejus hwỳr kato nê kãm kapêr. Te hpimtir kãm hwỳr kator nê kãm kapêr pyrà nê kãm: —Pa Ananĩs? Anê. Nhũm kãm: —Ỗ? Ot pa xa. Mo na Pahihti? Anê.

¹¹Nhũm Jejus kãm: —E kêr ka akato nê ma mẽ kot kãm: “Pry katàt” anhỹr xwỳnhhta wỳr tẽ. Hãmri nê kamã Jut nhõrkwỹ japêr. Kamã na Tas nhõ xwỳnh pê Sawtija hkrĩ. Na no hkre nê inhmã amnhĩ jarênh o hkrĩ. Ka hwỳr axà nê omu.

¹²Ate hwỳr atêm nê inhỹ hã hã anhĩhkra xir nhũm akupỹm rĩt mex kaxyw na ato amỹti. Jakamã e ma hwỳr tẽ nê ã hipêx anê. Anê.

¹³Hãmri nhũm Ananĩs tee ri kuma nê kãm Sawti puma ho amnhĩ kamã kahak nê. Hãmri nê kãm: —Kwa nà Pahihti. Tãm na xep hte Jerujarê kamã mẽ kot amnhĩ kaxyw akôt mẽ hamaxpêr xwỳnhjê nhĩpêx kati ho pa. Pa ra mẽ hã harênh ma.

¹⁴Tã na xep ra jar Tamas wỳr pỏj. Patre krãhtũm kapêr nhỹ hã kot mẽ ixpê akôt amnhĩ xunhwỳr xwỳnhjê pynênh nê ma akupỹm hwỳr mẽ ixto mỗr kaxyw. Tãn ka ri hwỳr ijano. Kwa nà ri ixto anhỹr kêt nê Pahihti. Anê.

¹⁵Nhũm Jejus kãm: —Nà mamrĩ ma hwỳr tẽ. Ra ixte amnhĩ kaxyw ãm kênã. Jakamã koja ã mẽ anhĩpêx anhỹrta hpãnhã ma mẽ piitã mẽ kãm ixkapêr jarênh o pa. Mẽ apê Ijaew mã nê mẽ anhõ pahi hkwỳjê mã nê mẽ kêp Ijaew kêt xwỳnhjê mã. Koja mẽ piitã mẽ kãm ixkapêr jarênh mex o ri mẽ hkôt pa.

¹⁶Koja mẽ ixtã homnuj tỳx nẽ nhũm amnhĩ xà htỳx kamã hamak o pa. Nom kot paj ixprĩ hã mẽ kot tanhmã ixtã hipêx to hkukamã kãm ixujarênh pa nhũm amnhĩ kukamã amnhĩ jarênh ma. E tokyx mãmri ma axãmnhĩx hwỳr tẽ. Anẽ.

¹⁷Hãmri nhũm kuma nẽ kato nẽ ma Sawti hwỳr htẽm kurê kumrêx. Hãmri nẽ ixkre hwỳr axà nẽ omu nẽ hkrã hã ìhkra xi nẽ kãm: —Pa Jejus kôt ixtõ Sawti? E na Pahihti Jejus awỳr inhmẽ pa awỳr tẽ. Pry kahti ri kot awỳr kator xwỳnhta. Tã akupỹm arĩt nhũm Tĩrtũm Karõ kot akarõ mã àr kaxyw na awỳr inhmẽ pa tẽ. Anẽ.

¹⁸Hãmri nhũm mẽmoj te tep kà pyrækja Sawti no rũm hapôj nẽ rôrôk nhũm akupỹm rĩt mex kurê kumrêx. Hãmri nẽ kànhmã xa nhũm Ananĩs hkrã kumrã. Ra amnhĩ kaxyw Jejus kôt hamaxpêr ã hkrã kumrã.

¹⁹Hãmri nhũm nhỹ nẽ apku nẽ akupỹm hihtỳx.

Sawti kot Tamas kamã Jejus kapêr jarênh

Sikũn Korĩt 11.22-23

Nhũm Sawti Tamas kãm mẽ kot Jejus kôt amnhĩ xunhwỳr xwỳnhjê hkôt amnhĩ xãm nẽ mẽ hkôt ri pa nẽ tokyx ma akupỹm mõi kêt nẽ.

²⁰Kormã mẽ hkôt ri pa nẽ Ijaew nhõ Tĩrtũm kapêr o mẽ ahkre xà hã ixkre hwỳr mra nẽ kamã mẽ kãm Jejus kapêr jarê. Kêp Tĩrtũm Kra hã harênh o kuhê.

²¹Hãmri nhũm mẽ amnhĩ jaêr pẽ ã harênh anhỹrja ma nẽ tee ri hamaxpêr nẽ axpẽn mã: —Kokỹỹ. Kwa tãm na xep pre Jerujarê kamã amnhĩ kaxyw Jejus kôt mẽ kot amnhĩ xunhwỳr xwỳnhjê homnuj tỳx o pa. Tã xep jar kot mẽ hkwyjê pynênh nẽ ma mẽ o mõi nẽ Jerujarê kamã patre krãhtũmjê mã mẽ õr kaxyw na pre man mẽ pahwỳr mõi. Tã ra tanhmã hamaxpêr to nẽ axtem nẽ mẽ pamã Jejus kapêr jarênh o mẽ pajahkre ho pa. Anẽ.

²²Hãmri nhũm Sawti arĩ Tamas kãm Ijaew mã tanhmã Jejus jarênh to kamã hihtỳx o mẽ hkôt pa nẽ mẽ kãm: —Nà Jejus Krisja na pre Tĩrtũm mẽ pakaxyw ãm nẽ mẽ pahwỳr kumẽ. ãm hãmri na pa mẽ amã ja jarê. Anẽ. Hãmri nhũm mẽ kuma nẽ tee ri kutã tanhmã kapêr to hkukamã hamaxpêr.

²³Tã ra hã apkati xohtô nê nhũm Tamas kãm Ijaew kwỳjaja kot Sawti pĩr kaxyw hã axpẽn ma.

²⁴Hãmri nhũm mēhōja hã ama nê Sawti hwỳr tẽ nê kãm mē harē nê kãm: —Kwa Sawti kēr ka axkãm ajamak rom. Na mē pahkwỳjaja atã amỳnê. Na mē ra krĩ puhã kahê xà hã hakwakre piitã hamār ho kuhê. Kot kaj nhỹhỹm akato nhũm mē apumu nê apynê nê apĩ. Anê.

²⁵Jakamã nhũm kamàt nhũm Sawti hkôt ri mē pa xwỳnhjaja kawà rax ò mỳ nê hwỳr o tẽ nê kãm ãm nhũm hwỳr axà nê nhỹ. Hãmri nhũm mē hkagrĩ nê kẽn o krĩ puhã kahêja nhĩrô pê ho wrỳ nhũm mē kệp kato nê ma mō.

Sawti kot Jejus kwỳjê hkôt pikamēnh ã harēnh

Karatas 1.15-24

²⁶Tã nhũm Sawti krĩ pê Tamas rũm kato nê ma akupỹm Jerujarē hwỳr mō hãmri nê hwỳr pōj. Hãmri nê mē kot Jejus kôt amnhĩ xunhwỳr xwỳnhjê hkôt amnhĩ jarēnh kaxyw mē hwỳr tẽ. Hãmri nhũm mē tee ri amnhĩ wỳr omu nê kot Jejus kôt amnhĩ xãm ã amnhĩ to hêx ã hkamnhĩx hãmri nê amnhĩ kamã kahak o amnhĩ nê hkurê nê mē piitã kãm uma nê.

²⁷Ãm Panãpe pix ãm hãmri kot Jejus kôt amnhĩ xãm kôt hamaxpēr. Hãmri nê ma hwỳr tẽ nê haprô nê ma Jejus nhỹ hã mē ahkre xwỳnh maatijê hwỳr o tẽ nê yr pê mē kãm kapēr nê mē kãm: —Kwa ãm hãmri na Sawti amnhĩ jarē. Na ra mē pahpyrà nê Jejus kôt amnhĩ xãm. Na xep pre Tamas wỳr pry hã kormã mō nhũm xep Pahihti Jejus hwỳr kato nê kaxkwa rũm kãm kapēr nhũm kuma nê hkôt amnhĩ xãm. Jakamã nhũm xep ra axtem kot amnhĩ nhĩpêx nyw o Tamas nhõ xwỳnhjê mã Jejus kapēr jarēnh o ri mē hkôt pa. Ra amnhĩ kamã kãm mē uma hkêt nê àmnhĩx ri mē kãm harēnh o ri mē hkôt pa. Anê.

²⁸Hãmri nhũm mē kuma nê amnhĩ kôt Sawti mē nhũm mē hkôt ri pa. Hãmri nê Jerujarē kamã mē piitã mē kãm Jejus kapēr jarēnh o pa. Kãm Jejus kôt amnhĩ xunhwỳr kêt xwỳnhjê pyma hkêt nê àmnhĩx ri mē kãm kapēr jarēnh o ri mē hkôt pa.

²⁹Ně Ijaew kwỳ pē Gresjē kapēr o mẽ kapēr xwỳnhjē mã nhũm xatã mẽ kãm Jejus jarēnh o ri mẽ hkôt pa. Kêp Tĩrtũm kot mẽ pakaxyw ãm xwỳnh ã harēnh rãhã ho ri mẽ hkôt pa. No nhũm mẽ kãm mar prãm kêt nẽ ra kot Jejus ã hpĩr mã.

³⁰Hãmri nhũm mẽ kot Jejus kôt amnhĩ xunhwỳr xwỳnh kwỳjaja mẽ harēnh ma nẽ mẽ kêp ho kato nẽ ma krĩ pē Sejarej wỳr o mỗ. Hãmri nẽ kurũm ma akupỹm ỗ krĩ pē Tas wỳr kumẽ nhũm ma akupỹm mỗ.

³¹Tã ra Sawti kot Jejus kôt amnhĩ xãm jakamã nhũm mẽ kãm mẽ hkurē xwỳnhjaja axte Jejus ã tanhmã hkwỳjē hto hkêt nhũm mẽ piitã hamakêtkati nẽ àmnhĩx ri pa. Pika pē Jutej kamã nẽ Garirej kamã nẽ Samar kamã nhũm mẽ piitã hamakêtkati nẽ àmnhĩx ri pa. Hãmri nẽ Tĩrtũm mã mex o mex ã harēnh o ri pa. Nhũm Tĩrtũm Karõ tanhmã mẽ hkrã hto nhũm mẽ ra kapēr kôt amnhĩ nhĩpêx mex o mỗ. Hãmri nhũm mẽ ohtô rax nẽ mẽ uràk nẽ Jejus kôt amnhĩ xunhwỳ nẽ hkwỳjē hkôt axkamẽ.

Enejti akupỹm mex ã harēnh

Atre 3.1-10

³²Tã nhũm Simãw Pêtreja ma mẽ kot Jejus kôt amnhĩ xunhwỳr xwỳnhjē mã Tĩrtũm kapēr jarēnh o mẽ ahkre kaxyw ma krĩ piitã hkôt pa. Jakamã krĩ pē Rit wỳr mỗ

³³nẽ hwỳr pøj nẽ kamã Enejti pumu. Nhũm ã kamã htyk pa nẽ kupĩp kãm hikwỹ rãhã hã amgrà pē 8.

³⁴Hãmri nhũm Simãw Pêtre omu nẽ Jejus nhỹ hã kãm kapēr nẽ kãm: —Pa Enejti? E na Jejus Kris akupỹm ato mex. Jakamã e kànhmã xa nẽ akupĩpta py. Anẽ. Hãmri nhũm akupỹm mex nẽ kànhmã xa nẽ amnhĩ pumu nẽ hkĩnh o hkĩnh.

³⁵Hãmri nhũm krĩja kamã nẽ krĩ hõ pē Sarõ kamã mẽ piitã harēnh ma nẽ mẽ kot amnhĩ tomnuj kaga hpa nẽ hpãnhã Jejus kôt amnhĩ xunhwỳ nẽ hkôt amnhĩ nhĩpêx o pa.

Tapitre akupỹm htĩr ã harēnh

Rukre 8.49-56; Atre 20.7-12

³⁶Nhũm Tapitreja krĩ pẽ Jope kamã na pre pa. Gres kapẽr kãm hixi pẽ Nokre. Mẽ kapẽr kãm Nokreja te kẽp “karà” anhỹr jarẽnh pyræk. Na pre ra Tapitre pẽ Nokreja Jejus kõt amnhĩ xãm nẽ mẽ piitã mẽ ho mex o ri mẽ hkõt pa. Nẽ mẽ kẽp amrakati xwỳnhjẽ kamã ukapĩ ho ri mẽmoj to mẽ kutã nojarêt o ri mẽ hkõt pa.

³⁷Tã ra à htỳx nẽ hãmri ty. Hãmri nhũm mẽ tee ri omu nẽ hkapĩ nẽ mỳr rax nẽ. Nẽ kumỳ nẽ kuhõ hãmri nẽ kormã haxàr kêt ri kỳx pẽ ixkre kamã kuxi nẽ kuri mỳr o hkrĩ.

³⁸Nhũm Simãw Pẽtre kormã krĩ hõ pẽ Rit kamã ri pa. Rit rũm Jope hwỳr jawỳ jakamã nhũm Jope kamã mẽ kot Jejus kõt amnhĩ xunhwỳr xwỳnhjaja Simãw Pẽtre jarẽnh ma hãmri nẽ hwỳr ja wa ho hamẽxkrut nẽ wa kumẽ. Nhũm wa ma hwỳr tẽ nẽ hwỳr pøj nẽ omu nẽ kãm: —Pa? E jar na pa wa awỳr tẽ. Na Jejus kõt mẽ pahtõx Tapitre ham mẽ pahpẽ ty. Kwa tokyx kormã mẽ kot haxàr kêt ri ma wa ixkõt hwỳr tẽn omu nà? Anẽ.

³⁹Hãmri nhũm wa kuma nẽ ma wa hkõt htẽm kurẽ kumrẽx. Hãmri nẽ Jope hwỳr pøj nẽ mẽ hwỳr tẽ nhũm mẽ kỳx pẽ htyk nẽ nõr xwỳnhja wỳr ho api nhũm hwỳr axà. Nhũm kuri mẽ kẽp mẽ mjên htyk xwỳnhjaja hkapĩ nẽ mỳr o hkrĩ. Hãmri nhũm Simãw Pẽtre mẽ hwỳr axà nhũm mẽ omu nẽ kãm Tapitre kormã htĩr ri kot tanhmã mẽ ho mex to hã harẽ. Nẽ mẽ ê hkwỳ jamỳ nẽ kãm kupẽ nẽ kãm: —Ga ja pumu. Tyk xwỳnhta na pre mẽ inhmã hkay nẽ kugõ. Na pre hte mẽ ixto mex o pa. Tã mẽ ixpẽ ty. Hẽxta gàà nẽ. Na pa mẽ ixkapĩ htỳx kumrẽx. Anẽ.

⁴⁰Hãmri nhũm mẽ kuma nẽ mẽ kator pa hãmri nẽ htyk xwỳnhta ri hkõn krã ho nhỹ nẽ ho Tĩrtũm wỳ. Hãmri nẽ htyk xwỳnhta mã kapẽr nẽ kãm: —Pa Tapitre? E kwa kànhmã nhỹ. Anẽ. Pu nhũm no amra nẽ Simãw Pẽtre pumu nẽ kànhmã nhỹ.

⁴¹Hãmri nhũm hpa hã kupy nẽ kànhmã ãm nẽ kapõt ã mẽ kuhẽ xwỳnhjẽ mã anẽ nhũm mẽ akupỹm wa hwỳr agjẽ nhũm mẽ kãm: —E ota. Na Tĩrtũm

akupÿm mẽ amã ho htĩr. Anẽ. Hãmri nhũm mẽ amnhĩ jaêr pê omu nẽ hkĩnh tÿx nẽ.

⁴²Hãmri nhũm Jope kamã mẽ piitã harẽnh ma nẽ mẽ ohtô nẽ amnhĩ kaxyw Jejus kôt hamaxpêr nẽ hkôt amnhĩ xunhwÿ.

⁴³Hãmri nhũm Simãw Pêtre Jope kamã ri pa hã apkati xohtô nẽ tokyx mẽ kurũm kato nẽ ma krĩ hõ hwÿr mõi kêt nẽ. Na pre mry kà ho mẽmoj nhĩpêx o pa xwÿnh pê Simãw ri pøj nẽ kuri pa hã apkati xohtô nẽ.

Atre 10

Konẽre kot Simãw Pêtre hã karõ hã harẽnh

Rukre 7.1-10

¹Tã nhũm Ijaew kêt xwÿnh Konẽre. Kêp Rõmjê nhõ pôristi krãhtũm na pre. Õ pôristija pika pê Itar nhõ xwÿnh na pre mẽ nhũm Konẽre kêp mẽ hkrãhtũm. Krĩ pê Sejarej kamã.

²Konẽreja kot amnhĩ to mex o pa xwÿnh na pre. Kêp Ijaew kêt tã na pre hte õrkwÿ kamã hkwyjê mẽ Tĩrtũm ã hpijaàm nẽ kãm mex o mex ã harẽnh o pa. Apkati mẽ kãm amnhĩ jarẽ. Nẽ mẽ kêp amrakati xwÿnhjê mã kàxpore hkwy nhõr o pa.

³Jakamã nhũm mẽmo arĩgro hã ra myt japanh grire nhũm mẽmoj pumu. Te hpimtir kãm kot omunh pyrã nẽ kaxkwa kamã Tĩrtũm kapêr o wrÿk xwÿnh pumu. Nhũm hwÿr wrÿ nẽ tanhmã kãm kapêr to nẽ kãm: —Pa Konẽre? Anẽ.

⁴Nhũm tee ri omu nẽ kãm ma htÿx kumrêx. Hãmri nẽ kãm: —Mo na? Anẽ. Hãmri nhũm kãm: —Nà ate amnhĩ to Tĩrtũm wÿr o apaja nhũm ra amnhĩ tã ama nhũm ja kãm mex nẽ. Nẽ ate mẽ kêp amrakati xwÿnhjê mã kàxpore hkwy nhõr o apaja nhũm ja mãänên kãm mex nẽ.

⁵—Jakamã e inhma. Kêr ka ma Jope hwÿr amã mẽ àpênh xwÿnh kwÿ rẽ kê mẽ ma hwÿr mra nẽ kamã mẽhõ pê Simãw Pêtre japrô nẽ man akupÿn awÿr o mõi.

⁶Simãw kot mry kà ho mẽmoj nhĩpêx o pa xwỳnhhta nhõrkwỹ kamã na hte pa. Õrkwỹja gô mỳ ri na. E hwỳr mẽ arẽ kê mẽ ma hwỳr mỗ nẽ haprô nẽ man awỳr o mỗ kê amã mẽmoj mex jarẽ ka ama. Anẽ.

⁷Nhũm pre ã Tĩrtũm kapêr o wrỳk xwỳnhja Konẽre mã kapêr anẽ hãmri nẽ kato nẽ ma akupỹm api. Hãmri nhũm kot mar xà hkôt jajê rê nẽ Simãw Pêtre hwỳr mẽ kurẽ. Kãm àpênh xwỳnhjê ho hamẽxkrut nẽ kaxyw ò pòristi hõ. Pòristija na pre hte Konẽre pyrà nẽ Tĩrtũm ã hpijaàm o pa.

⁸Jakamã nhũm mẽ kurê nẽ mẽ kãm kapêr hãmri nẽ ma Jope hwỳr Simãw Pêtre hwỳr mẽ kurẽ nhũm mẽ kato nẽ ma hwỳr mỗ.

⁹Hãmri nhũm apkati nhũm kaxkwa nhĩpòk ri myt nhỹ nhũm mẽ hwỳr hpòx o mỗ.

Simãw Pêtre tanhmã hpimtir to hã harênh

Atre 11.5; Karatas 2.11-21

Rôm nhũm Simãw Pêtre kot Tĩrtũm mã amnhĩ jarênh kaxyw ixkre nhĩmòk ã api nẽ himòk po hã kãm amnhĩ jarênh o nhỹ.

¹⁰Hãmri nẽ ra kãm prãm nẽ nom nhũm mẽ kormã kãm ò hã àpênh jakamã nhũm arĩ ixkre nhĩmòk ã Tĩrtũm mã amnhĩ jarẽ. Hãmri nẽ Konẽre pyrà nẽ te hpimtir kãm kot mẽmoj pumunh pyrà nẽ mẽmoj pumu nhũm Tĩrtũm Konẽre hkukamã tanhmã kãm mẽmoj to amnhĩrit to. No ãm hã kuxi nẽ kãm harênh jakamã nhũm Simãw Pêtre te hpimtir kãm kot mẽmoj pumunh pyrà nẽ mẽmoj pumu.

¹¹Nhũm kaxkwa katêr nhũm kurũm mẽmoj te kot mẽ hpiipro xà pyræk xwỳnhja pyka hwỳr wrỳk o mỗ. Nẽ hatur xà piitã axpên tã akuprõ nẽ ajêt nẽ wrỳk o mỗ nhũm omu.

¹²Mẽ hpiipro xàta kamã mẽmo mry piitã hikwỹ. Mẽmo mry hpar o ri pa xwỳnhjaja nẽ htu mỳr pê ri pa xwỳnhjaja nẽ mẽmo àk kỳx pê htor o ri mrar xwỳnh piitã mẽ hpiipro xàja kamã hikwỹ nhũm omu.

¹³Hāmri nhũm Tĩrtũm kām: —Pa Simāw Pêtre? Mãn ka ra amã prãm nẽ nà? E kànhmã xa nẽ axàmnhĩx māmri mryta õ kapi nẽ apĩ nẽ ho anẽ nẽ aku. Piitã mẽ ate hkur mã mex. Anẽ.

¹⁴Hāmri nhũm tee ri kuma nẽ kām: —Kwa nà Pahi Maati. Mẽ ixpê Ijaew mẽ ixte mry piitã hkur kêt. ãm hkwỳ pix na pa htem kuku. No mry jaja aa mẽ ixte hõ hkwỳ hkrêr kêt. Anẽ.

¹⁵Hāmri nhũm Tĩrtũm kām: —Nà kot anhỹr tã kot paj pam amã mẽmoj jarẽ ka kamã anhõkre kahak kêt nẽ. Māmri amnhĩm hõ kapi nẽ apĩ nẽ ho anẽ nẽ axàmnhĩx hkwỳ hkre. Anẽ.

¹⁶Nhũm pre ã kām mry hã karõ anhỹr o axkrunẽpxi. Simāw Pêtre kot māmri Ijaew kêt xwỳnhjê hkõt pa nẽ àmnhĩx ri mẽ kutã apkur nhũm Tĩrtũm kām ja mex nhũm kot hã amnhĩ pumunh kaxyw nhũm ã kām harênh anhỹr o axkrunẽpxi. Hāmri nhũm mẽ hpiro xàja ma akupỹm kaxkwa hwỳr àpir o mõi nẽ akunok.

¹⁷Hāmri nhũm Pêtre te hkrākator pyræk jao tee ri hpimtir kukamã hamaxpêr o nhỹ nẽ hamaxpêr o: —Kwa mo kaxyw na Tĩrtũm ã inhmã ja hã karõ anẽ? Anẽ. Rôm nhũm Konêre kot hwỳr mẽ rênh xwỳnhjaja ra hwỳr hpõx o mõi. Ijaew kêt xwỳnhtaja Simāw nhõrkwỹ hã mẽ hkukjêr o mõi nẽ hwỳr pøj nẽ hakwakrem kuhê.

¹⁸Hāmri nẽ õrkwỹ nhõ xwỳnhjê mã kām: —Pa na ka mẽ arĩ akrĩ? E Simāw Pêtre hwỳr na pa mẽ mõi. Xà jar na hte pa nà? Anẽ. Hāmri nhũm mẽ kām: —Tỳ. Omũj kỳx pẽ ixkre nhĩmõk ã na nhỹ. Anẽ.

¹⁹Nhũm Simāw Pêtre arĩ kot mẽmoj pumunhta kukamã hamaxpêr o nhỹ nhũm Tĩrtũm Karõ kām mẽ hpõx xwỳnhjê jarẽ nẽ kām: —E Simāw Pêtre. Ota Ijaew kêt xwỳnhjaja axkrunẽpxi nẽ ajapêr o mõi nẽ ra anhõrkwỹ hwỳr pøj.

²⁰Mẽ hwỳr wrỳ nẽ mẽ kot amã mẽmoj jarênh ma nẽ māmri axàmnhĩx ma mẽ hkõt mõi. Tanhmã ajamaxpêr to hkêt nẽ. Pa na pa awỳr mẽ kumẽ nhũm mẽ mõi. Anẽ.

²¹Hāmri nhūm kuma nē mẽ hwỳr wrỳ nē mẽ omu nē mẽ kām: —Pa? Xà pa na ka mẽ ijapêr o mō? E ot pa xa. Kam nē mẽ inhmã mẽmoj jarẽ pa mẽ ama. Mẽmo kaxyw na ka mẽ ixwỳr mō? Anẽ.

²²Hāmri nhūm mẽ kām: —Nà mẽ inhõ patrãw Konẽre na awỳr mẽ inhmẽ pa mẽ mō. Na hte tãm amnhĩ nhĩpêx o pa. Nẽ Tĩrtũm ã hpijaàm nẽ kãm mex o mex ã harẽnh o pa. Nhūm mẽ inhõ krĩ kamã Ijaew kãm hkĩnh nẽ. Tã na Tĩrtũm kapêr o wrỳk xwỳnhja ham hwỳr wrỳ nẽ kãm ajarẽ. Kot amnhĩ wỳr atã karõ nhūm ate hwỳr amõr nẽ kãm axujarẽnh kaxyw kãm ajarẽnh jakamã nhūm mẽ ixte ajaprõr kaxyw awỳr mẽ inhmẽ pa mẽ man awỳr mō. Anẽ.

²³Hāmri nhūm mẽ kuma nē mẽ kām: —Tõe nà na pa mẽ ama. E mẽ agjê nẽ akrĩ nẽ jar mẽ ixri nõ kê apkati pu mẽ rĩ ma akupỹm mō. Anẽ. Hāmri nhūm mẽ kuma nē mẽ hwỳr agjê. Tã nhūm apkati nhūm mẽ akupỹm nojarêt nhūm Simãw Pêtre ma mẽ hkõt mō. Nhūm Jope kamã mẽ kot Jejus kõt amnhĩ xunhwỳr xwỳnh kwỳjaja ma mẽ hkõt mō. Nhūm mẽ mõi o kamàt.

²⁴Hāmri nhūm apkati nhūm mẽ Sejarej wỳr hpõx o mō. Nhūm ra Konẽre mẽ kutêp amnhĩ wỳr hkwỳjê ho akuprõ nhūm mẽ Simãw Pêtre kutêp õrkwỹ kamã akuprõ nẽ hkrĩ.

²⁵Hāmri nhūm mẽ hwỳr pøj nē mẽ hwỳr àr kaxyw nhūm Konẽre amnhĩ wỳr omu nē kànhmã xa nē kutã tẽ nẽ hpar pê hkõnkrã ho tẽm nẽ nhỹ.

²⁶Hāmri nhūm tee ri ja hã omu nē pa hã kupy nē kànhmã ãm nẽ kãm: —Kwa kànhmã xa. Ixpê Tĩrtũm kêt tã ka ri ã inhĩpêx anẽ. Anẽ.

²⁷Hāmri nẽ hkõt õrkwỹ hwỳr axà nẽ kutêp mẽ pikuprõnh xwỳnhjê pumu nẽ mẽ kãm:

²⁸—Pa na ka mẽ arĩ akrĩ? E mãn ra mẽ ate mẽ ixpê Ijaew kot amnhĩ nhĩpêx ã mẽ ixpumunh mex. Na pa htem mẽ apê axtem nhõ xwỳnhjê hkõt ri ixpa hkêt nẽ. Nẽ mẽ anhõrkwỹ hwỳr inhgjêx kêt nẽ. Tã ham Tĩrtũm inhmã mẽ ixte ã amnhĩ nhĩpêx anhỹr o ixpaja nê ixkurê nẽ inhmã: “Kot paj pam mẽ hkwỳjaja mex ã mẽ harẽ ka mẽ kamã anhõkre kahak kêt nẽ.”

²⁹—Anhÿr jakamã ka xep pre ixtã karõ pa inhîtõt kêt nẽ man mẽ awÿr inhmõr kurê kumrëx. E mẽ inhmã mẽmoj jarẽ pa mẽ ama. Mẽmo kaxyw na ka mẽ ixtã karõ? Anẽ.

³⁰Hãmri nhũm Konẽre kãm: —Nà jãã na pa pre jar inhõrkwÿ kamã Tĩrtũm mã amnhĩ jarẽnh o nhÿ. Ra myt xàpanh grire pa kãm amnhĩ jarẽ. Hãmri nhũm Tĩrtũm kapër o wryk xwÿnh ixwÿr wry nẽ hirã rax kãm xa.

³¹Hãmri nẽ inhmã: “Pa Konẽre? E na hte Tĩrtũm ate kãm amnhĩ jarẽnhta mar o hkrĩ. Nẽ ate mẽ kęp amrakati xwÿnhjê ho mex o apaja nhũm hã apumu.

³²Jakamã e ma Jope hwÿr amã mẽ àpênh xwÿnh kwÿ rẽ kê mẽ ma hwÿr mõi nẽ kamã Simãw Pêtre japrõ nẽ man akupÿn awÿr o mõi. Mry kà ho mẽmoj nhĩpêx o pa xwÿnh Simãw nhõrkwÿ kamã na hte pa. Õrkwÿja gõi mÿ ri na.” Anẽ.

³³—Ã kot inhmã kapër anhÿr jakamã na pa kuma hãmri nẽ awÿr jajê rënh kurê kumrëx. Tã ka mẽ hkõt man mẽ ixwÿr mõi nẽ ã apõx anẽ. ãm hãmri na ka mẽ hkõt mõi. Mẽ apê Ijaew kot amnhĩ nhĩpêx kuhpa hã amnhĩ nhĩpêx nẽ axãmnhix man mẽ ixwÿr mõi. Tã ot pa mẽ Tĩrtũm noo mã ixkrĩ. Kam nẽ mãmrĩ ÿ hã mẽ inhmã mẽmoj jarẽ pa mẽ ama. Anẽ.

Simãw Pêtre kot Konẽre mã ujarënh

³⁴Hãmri nhũm Simãw Pêtre Konẽre kot kãm amnhĩ jarënhja ma nẽ mẽ kãm awjarẽ nẽ mẽ kãm: —Nà ãm hãmri na Tĩrtũm mẽ akukamã tanhmã inhmã kapër to. Xep kãm mẽ ixpê Ijaew pix japê hkêt. Kãm mẽ pahpiitã mẽ pajapê nẽ mẽ panhĩpêx o xepên pyræk.

³⁵Koja ahpÿnhã pyka piitã hkõt mēhõ mẽ ixpyrà nẽ kęp Ijaew kêt tãã hkõt amnhĩ xãm nẽ hã hpijaàm pê kãm mex o mex ã harẽ nẽ tãm amnhĩ nhĩpêx. Hãmri nhũm Tĩrtũm ja hã omu nhũm ja kãm mex nẽ.

³⁶—Na pre ra mẽ ixpê Ijaew mã tanhmã Kra Jejus Kris jarënh to. Jejus kot mẽ panê htyk kukwak ri na hte mẽ ixte hkõt amnhĩ xunhwÿr xwÿnhjê ho hkra. Tã ra mãänën ã mẽ apê Ijaew kêt xwÿnhjê mã ã amnhĩ jarënh anẽ nẽ

Jejus htyk kukwak ri mẽ ate mẽ ixpyrà nẽ hkôt amnhĩ xunhwỳr xwỳnhjê ho hkra. Jakamã Jejus Krisja kêp mẽ pahpiitã mẽ panhõ Pahшти.

37-38—Mãn ka prem ra harẽnh ma. Mẽ ixpê Ijaew nhõ pika pê Jutej kumrêx kãm na pre Juãw Paxisja Jejus kukamã mẽ kãm harẽ nẽ mẽ hkrã kumrãr o pa. Mẽ piitã mẽ kot amnhĩ tomnuj kaga nẽ Tĩrtũm kôt amnhĩ xunhwỳr ã mẽ omunh xà hkôt mẽ hkrã kumrã. Jejusja krĩ pê Najare kamã na pre hprêk. Tã hwỳr na pre Tĩrtũm amnhĩ Karõ mẽ nhũm wrỳ nẽ hkarõ mã axà nẽ hkôt pa ho pa. Jakamã nhũm àhpumunh o àhpumunh nẽ ma krĩ piitã hkôt tanhmã mẽ ho mex to ho ri mẽ hkôt pa. Pika pê Garirej kumrêx kamã mẽ piitã ri mẽ kãm Tĩrtũm kapêr jarẽnh o pa. Nẽ mẽkarõmnuti kot Satanasti nhỹ hã tanhmã mẽ ho xwỳnhjaja nhũm mẽ nẽ mẽkarõmnuti japôx o pa. ã na pre Tĩrtũm nhỹ hã amnhĩ nhĩpêx anhỹr o pa.

39—Tã Jejus nhỹ hã hkrajê jahkre ho mẽ ixpa xwỳnhjaja na pa prem kot ri tanhmã amnhĩ to ho pa hã omunh par o ri hkôt ixpa. Mẽ ixpê Ijaew nhõ pyka kamã nẽ mẽ inhõ krĩ pê Jerujarẽ kamã kot ri tanhmã amnhĩ nhĩpêx to ho paja pa prem piitã omunh o hkôt ri ixpa. Tã nhũm prem axtem nẽ mẽ ixpê pĩ kahpa hã kunhõ nẽ kupĩ.

40Hãmri nhũm htyk o apkati axkrunêpxi nhũm Tĩrtũm akupỹm ho htĩr nẽ akupỹm mẽ ixwỳr kumẽ pa prem akupỹm htĩr kãm omu.

41No nhũm mẽ piitã akupỹm htĩr kãm omunh kêt nẽ. ãm mẽ ixwỳr pix na pre kato nẽ mẽ ixkutã apku pa mẽ papxipixjaja akupỹm htĩr ã omu. Hãmri nhũm Tĩrtũm mẽ ixte ma mẽ piitã mẽ kãm akupỹm htĩr ã harẽnh o ri ixpa kaxyw mẽ ixrê.

42-43Amnepê m Tĩrtũm nhỹ hã kapêr jarẽnh o mẽ pa xwỳnhjaja na prem Jejus kukamã tanhmã hã kagà hto nẽ mẽ kãm harẽnh o pa. Nẽ mẽ kãm: Koja nhỹrmã mẽhõja man mẽ pahwỳr wrỳ nẽ mẽ panê tanhmã amnhĩ nhĩpêx to. Ka mẽ atõ amnhĩ kaxyw hkôt ajamexpêr nẽ hkôt amnhĩ xãm hã koja Tĩrtũm ja hã apumu nẽ mẽhõ kot tanhmã mẽ panê amnhĩ nhĩpêx to xwỳnhta kukwak ri amnhĩ katut kôt ate amnhĩ tomnuj rẽnh pa nẽ axte kãm hamaxpêr kêt nẽ. Anẽ. Na pre Tĩrtũm nhỹ hã kapêr jarẽnh o mẽ pa xwỳnhjaja Jejus

kukamã ã harēnh nē hã kagà anē. Tã koja Jejus nhÿrmã akupÿn wrÿ hãmri nē mẽ htyk xwÿnhjê nē arĩ mẽ htĩr xwÿnhjê mẽ pahto pimràatã tanhmã mẽ pajarēnh to. Mẽ pahte tanhmã amnhĩ nhĩpêx to ho papa hã mẽ pahpumunh kôt tanhmã mẽ pajarēnh to. Hãmri nē Tĩrtũm mẽ wa kuri mẽ pahĩr tũm nē mẽ papa ho papa mã xwÿnhjê jarē nē mããnēn wa kuri mẽ htĩr tũm kêt xwÿnhjê jarē. Mẽ pahpiitã tanhmã mẽ pajarēnh to kaxyw na pre Tĩrtũm mẽ pakaxyw Jejus xãm. Tã ã kot mẽ pajarēnh anhÿrja kukamã na pre mẽ ixte mẽ amã tanhmã harēnh to ho ixpa kaxyw mẽ awÿr mẽ ixrē. Mẽ ate kapêr mar nē tokyx Jejus kôt amnhĩ xunhwÿr kaxyw. Anē.

⁴⁴Nhũm Simãw Pêtre ã mẽ kãm ujarēnh anhÿr rôm nhũm Tĩrtũm mẽ kot mar o hkrĩ xwÿnhjê hwÿr amnhĩ Karõ rē nhũm mẽ hwÿr wrÿ nē mẽ hkarõ mã gjêx pa.

⁴⁵⁻⁴⁶Hãmri nhũm mẽ Tĩrtũm mã mex o mex ã harēnh o hkrĩ. No ãm mẽ kapêr kãm harēnh kêt nē. Mẽ kapêr kwÿ hõ ho kãm mex o mex ã harē. Aa mẽ kot mẽ kapêr mar kêt tã ra ho kapêr mex nē. Jakamã nhũm Jope rũm mẽ kot Simãw Pêtre hkôt mẽ mõi xwÿnhjaja. Ijaew kwÿ kot ra Jejus kôt amnhĩ xunhwÿr xwÿnhjaja amnhĩ jaer pê ja hã mẽ omu nē axpēn mã: —Hêxta waa nē. Mẽ kêp Ijaew kêt tã nhũm Tĩrtũm kot mẽ panhĩpêx pahpyrà nē mẽ hwÿr amnhĩ Karõ rē nhũm mẽ hwÿr wrÿ nē mẽ kãm agjê. Nà ãm hãmri na mẽ pahpyrà nē ã mẽ hipêx anē. Anē. Hãmri nhũm Simãw Pêtre mẽ kuma nē mẽ kãm:

⁴⁷—Kwa pu mẽ hkrã kumrãr kurê kumrêx. Ra Tĩrtũm Karõ kot mẽ pahpyrà nē mẽ hkarõ mã gjêx kēnã kot kêt mēhõ mẽ nē tanhmã mẽ pahpê àmnàr to. Ra mẽ kot mẽ pahpyrà nē Jejus kôt amnhĩ xunhwÿr kēnã. Anē.

⁴⁸Hãmri nē Konēre mẽ hkwÿjê mã kãm: —E kot paj mẽ ate Jejus Kris kôt amnhĩ xunhwÿr ã mẽ akrã kumrã. Anē. Hãmri nē mẽ hkrã kumrãr pa nhũm mẽ Simãw Pêtre mã kãm: —Kwa kormã anojarêt kêt nē. Kritpēm ri mẽ ixkôt ri apa hã atã apkati grēre nē kormã ma akupÿm mõi. Anē. Hãmri nhũm mẽ kuma nē mẽ hkôt ri pa hã apkati grēre hãmri nē nojarêt nē ma akupÿm mõi.

Atre 11

Simāw Pêtre kot hkwỳjê mã Konëre jarënh

Atre 10.1-48

1-2Hāmri nhũm Simāw Pêtre ma akupỹm mō. Jutej kamã krĩ pê Jerujarë wỳr ma akupỹm mō hāmri nẽ pōj. Hāmri nhũm Jutej kamã Jejus nhỹ hã mẽ ahkre xwỳnh maatiijê mẽ mẽ kot Jejus kôt amnhĩ xunhwỳr xwỳnhjaja Ijaew kêt xwỳnhjê jarënh ma. Konëre mẽ hkwỳ kot mẽ uràk nẽ Jejus kôt amnhĩ xunhwỳr ã mẽ harënh ma. Jakamã nhũm Simāw Pêtre akupỹm mẽ hwỳr pōj nhũm mẽ omu nẽ mẽ hã àhkukjêr kurê kumrêx. Hāmri nhũm mẽ hkwỳjaja mẽ hã kãm akir nẽ kãm:

3—Kwa mẽ pahpê Ijaew pyrà nẽ mẽ kot amnhĩ my kwỳt kà jakàr kêt tã ka mẽmo hwỳr mẽ hwỳr mō mẽ kuri pōj nẽ mẽ kutã apku. Anë.

4Hāmri nhũm Pêtre tee ri mẽ kuma hāmri nẽ hprĩ hã mẽ kãm amnhĩ jarë. Nẽ tanhmã Tĩrtũm kot kãm Ijaew kêt xwỳnhjê jarënh to hã mẽ kãm harë nẽ mẽ kãm:

5—Kwa mẽ ã ri ajamaxpêr anhỹr kêt nẽ. E pa mẽ amã amnhĩ jarë ka mẽ inhma măn. Nà na pa pre jãã Jope kamã Tĩrtũm mã amnhĩ jarënh o nhỹ nẽ te ixpimtir kãm mẽmoj pumunh pyràk. Nhũm mẽmojja te mẽ hpiipro xà pyrà nẽ kaxkwa rũm ixwỳr wrỳk o mō pa ixprĩ hã omu.

6Nhũm kamã mry piitãã. Mry xoprê nẽ mry xuwapô nẽ mry hpar o ri pa xwỳnhjaja nẽ mry htu mỳr pê ri pa xwỳnhjaja nẽ àk. Nẽ mẽ pahte hkur xwỳnhjaja nẽ mẽ pahte hkur kêt xwỳnhjaja.

7Kamã mry piitã pa omu. Hāmri nhũm Tĩrtũm inhmã: “Pa Simāw Pêtre? Mãn ka ra amã prãm nẽ nà? E kànhmã xa nẽ axàmnhĩx mãmri mryta ò kapi nẽ apĩ nẽ ho anë nẽ aku. Piitã mẽ ate hkur mã mex.” Anë.

8—Pa tee ri kuma nẽ kãm: “Kwa Pahi Maati. Mẽ ixpê Ijaewjaja mẽ ixte mryja piitã hkur kêt. ãm hkwỳ hpix na pa htem kuku. No ja hkwỳ aa mẽ ixte hõ hkwỳ hkrêr kêt.” Anë.

⁹Nhũm inhmã: “Nà nom kot anhÿr tãã. Kot paj pam amã mẽmoj jarẽ ka kamã anhõkre kahak kêt nẽ. Jakamã e mãmri amnhĩm hõ kapi nẽ apĩ nẽ ho anẽ nẽ axàmnhĩx hkwỳ hkrẽ.” Anẽ.

¹⁰—Na pre ã Ijaew kêt xwỳnhjê hwỳr inhmõr kukamã inhmã karõ ho axkrunẽpxi anẽ. Nom hã kuxi nẽ inhmã mẽ pahte mry kur kêeta jarẽ. Hãmri nhũm mẽ hpiro xàja ma akupỹm kaxkwa hwỳr api nẽ kakrãm axà nẽ akunok.

¹¹Hãmri nhũm Ijaew kêt xwỳnhjaja mẽ ixwỳr axkrunẽpxi nẽ mra nẽ pøj. Konẽreja Sejarej rùm ixwỳr mẽ rẽnh xwỳnhjaja nhũm mẽ mra nẽ ixwỳr pøj.

¹²Hãmri nhũm Tĩrtũm Karõ ma mẽ hkõt inhmẽ. Mẽ kệp Ijaew kêt tã nhũm ixàmnhĩx ma mẽ hkõt ixpa kaxyw mẽ hkõt inhmẽ pa ma mẽ hkõt mõ. Nhũm Jope kamã mẽ kot Jejus kõt amnhĩ xunhwỳr xwỳnh kwỳjaja kệp 6ja ma mẽ ixkõt mõ. Pa mẽ mõ nẽ Sejarej kamã Konẽreja wỳr pøj.

¹³Hãmri nhũm mẽ ixpumu nẽ mẽ inhmã amnhĩ jarẽ. Tĩrtũm kapër o wryk xwỳnh kot hwỳr wryk nẽ õrkwỹ hwỳr àr nẽ tanhmã kãm kapër toja nhũm inhmã harẽ. Na xep pre kãm: “E kêr ka ma Jope hwỳr amã mẽ àpênh xwỳnh kwỳjê rẽ kê mẽ ma hwỳr mõ. Hãmri nẽ kamã Simãw Pêtre japrõ nẽ man akupỹn awỳr o mõ kê tanhmã mẽ amã ujarẽnh to.

¹⁴Koja mẽ amã tanhmã mẽ apê Tĩrtũm kra hprãm xaj tanhmã mẽ ate amnhĩ nhĩpêx to hã mẽ amã karõ ka mẽ ama nẽ mar tỳx nẽ hkõt amnhĩ nhĩpêx. Ka mẽ anhõrkwỹ kamã akwỳjê mẽ apimràatã ama nẽ mar tỳx nẽ. Hãmri nẽ kot mẽ amã hã karõ xà hkõt amnhĩ nhĩpêx nhũm Jejus mẽ ate amnhĩ tomnuj pẽ mẽ apytàr pa.” Anẽ. —Na xep pre ã Tĩrtũm kapër o wryk xwỳnhja kãm ijarẽnh anẽ. Jakamã nhũm ixwỳr jajê rẽ pa ma mẽ hkõt mõ.

¹⁵Hãmri nẽ kormã mẽ kãm tanhmã Jejus jarẽnh to. Tanhmã kot mẽ panê amnhĩ nhĩpêx to hã harẽ. Nẽ kormã mẽ kãm ixujarẽnh o ixãm rôm nhũm Tĩrtũm Karõ te wam kot mẽ panhĩpêxta pyrà nẽ mẽ hwỳr wry nẽ mẽ hkarõ mã gjêx pa.

¹⁶Pa ja hã mẽ omu nẽ Pahihti Jejus kot akupỹm kaxkwa hwỳr nojarêt nẽ tanhmã mẽ pamã kapêr tota mã ijamaxpêr kurê kumrêx. Na pre mẽ pamã: “Finat Juãw Paxis na pre hte gô ho mẽ hkrã kumrãr o pa. Tã koja Tĩrtũm ta hpãnhã mẽ awỳr amnhĩ Karõ rẽ nhũm mẽ akarõ mã agjê.” Anẽ. —Ã na pre Pahihti Jejus akupỹm nojarêt nẽ mẽ pamã kapêr anẽ. Jakamã pa ã kot mẽ hipêx anhỳr ã mẽ omu nẽ ã kapêr anhỳrja mã ijamaxpêr kurê kumrêx.

¹⁷Na pu prem Pahihti Jejus Kris kôt amnhĩ xunhwỳ nhũm Tĩrtũm ja hã mẽ pahpumu nẽ mẽ pahwỳr amnhĩ Karõ rẽ. Tã te kot mẽ panhĩpêxta pyrã nẽ mããnẽn Ijaew kêt xwỳnhhtajê hwỳr kurê nhũm mẽ hkarõ mã agjê. Mẽ kêp Ijaew kêt tã nhũm mẽ pahpyrã nẽ mẽ hwỳr kurê nhũm mẽ hkarõ mã agjê. Tĩrtũm tãm kot amnhĩ krã hkôt mẽ hwỳr rênh kênã kot pa kêt mẽ nê tanhmã kêp ixàmnrã to. Anẽ.

¹⁸Nhũm pre ã Simãw Pêtre mẽ kãm amnhĩ jarênh anẽ nhũm mẽ kuma nẽ tãm hamaxpêr nẽ hkĩnh nẽ. Nẽ axte mẽ hã tanhmã kãm nẽ hkêt nẽ. ãm mẽ hã Tĩrtũm mã mex o mex ã harẽ. Hãmri nẽ axpên mã: —Nà ãm hãmri. Mẽ kêp Ijaew kêt tã na prem Jejus kôt amnhĩ xunhwỳ nhũm Tĩrtũm kot mẽ panhĩpêxta pyrã nẽ amnhĩ katut kôt mẽ kot amnhĩ tomnuj rênh pa. Nhỹrmã wa hkuri mẽ pahpyrã nẽ htĩr tũm nẽ pa ho pa kaxyw nhũm ã mẽ hipêx anẽ. Nà ãm hãmri na ã kot mẽ panhĩpêx pyrã nẽ mẽ hipêx anẽ. Anẽ.

ãxiok kamã Jejus kwỳ jarênh

Atre 4.36-37

¹⁹Tã ra mẽ kot kên o Estewãw kapêr o hpĩr xwỳj ri mẽ kot ã hipêx anhỳrta pyrã nẽ mẽ kot Jejus kôt amnhĩ xunhwỳr xwỳnhjaja omnuj tỳx o pa. Jakamã nhũm mẽ hkwỳjaja mẽ umaj ma ahpỹnhã krĩ hkwỳ hkôt pigrãnh pa. Wẽnĩs wỳr nẽ Sipre hwỳr nẽ ãxiok hwỳr nhũm mẽ ma ahpỹnhã krĩ hkwỳ hkôt anhgrã nẽ kamã pa ho pa. Nẽ mẽ kãm tanhmã Pahihti Jejus kot mẽ panê amnhĩ nhĩpêx to hã harênh o ri mẽ hkôt pa. No ãm kormã Ijaew pix mã harênh o pa.

²⁰Tã hãmri nhũm mẽ hkwỳjaja Sipre mẽ Sirên rũm ãxiok hwỳr pan pøj. Hãmri nẽ kamã mẽ kêp Ijaew kêt xwỳnhjê mã Pahihti Jejus kot amnhĩ

nhĩpêx jarênh o pa. ã mẽ kot amnhĩ nhĩpêx anhÿr jakamã na mẽ ra ahpÿnhã ri mẽ kãm harênh o ri pa. Ijaew mã nẽ mãănẽn Ijaew kêt xwÿnhjê mã

²¹nhũm mẽ ma mẽ hkôt ri Pahiti Jejus nhÿ hã mẽ kãm kapêr jarênh o ri mẽ hkôt pa. Hãmri nhũm mẽ ohtô nẽ amnhĩ nhĩpêx tũm kaga hpa nẽ hpãnhã amnhĩ kaxyw Jejus kôt hamaxpêr nẽ hkôt amnhĩ xunhwÿ.

²²Hãmri nhũm Jerujarê kamã Jejus kwÿjaja mẽ harênh ma nẽ mẽ hwÿr Panãpe mẽ. ãxiok hwÿr mẽ hwÿr kumẽ. Ma mẽ hwÿr mõi nẽ Jejus kôt mẽ hamaxpêr o hihtÿx kaxyw.

²³Hãmri nhũm ma mẽ hwÿr mõi nẽ mẽ hwÿr pøj nẽ mẽ omu. Tĩrtũm kot mẽ ho mex ã mẽ omu hãmri nẽ mẽ ÿ hã hkĩnh nẽ. Nẽ mẽ kãm: —Nà ãm hãmri na ka mẽ ra Jejus kôt amnhĩ xunhwÿ nẽ hkôt amnhĩ nhĩpêx mex o ri apa. Tã kêr ka mẽ ãm kapêr kôt pix mã ri amnhĩ nhĩpêx rãhã ho ri apa nẽ aa hkaga hkêt nẽ. Anẽ.

²⁴Panãpeja na pre tãm amnhĩ nhĩpêx o pa. Nẽ amnhĩ kaxyw Jejus kôt pix mã hamaxpêr mex o pa. Nẽ Tĩrtũm Karõ hkôt amnhĩ nhĩpêx rãhã jakamã na pre hte ÿ hã mẽ kãm Pahiti Jejus kot mẽ panê tanhmã amnhĩ nhĩpêx to hã harênh o ri mẽ hkôt pa. Hãmri nhũm mẽ kuma nẽ ohtô nẽ Jejus kôt amnhĩ xunhwÿ.

²⁵Tã nhũm Panãpe ãxiok rũm kato nẽ kot Sawti japrôr kaxyw ma krĩ pê Tas hwÿr mõi.

²⁶Hãmri nẽ hwÿr pøj nẽ Sawti pumu nẽ haprô nẽ ma akupÿm amnhĩ kôt ãxiok hwÿr o mõi. Hãmri nẽ kamã mẽ kot Jejus kôt amnhĩ xunhwÿr xwÿnhjê hkôt wa ri pa hã amgrà pyxi nẽ hapêx. Nẽ mẽ ho ohtô nẽ ri mẽ kãm Jejus kapêr o mẽ ahkre ho ri mẽ hkôt pa. Jakamã nhũm krĩ nhõ xwÿnhjaja mẽ kot Jejus kôt amnhĩ nhĩpêx xwÿnhjê pumu nẽ mẽ hã mẽ hixi rẽ nẽ mẽ harênh o: “Kris tõi nẽ htõxjaja” anhÿr o mẽ harẽ. ãxiok kumrêx kãm na prem ã mẽ kot Jejus kôt amnhĩ xunhwÿr xwÿnhjê jarênh anẽ. Jakamã nhũm mẽ piitã ã mẽ harênh anhÿr o pa.

²⁷Tã nhũm Panãpe mẽ Sawti wa kormã ãxiok kamã paja rôm nhũm Tĩrtũm nhỹ hã kapěr jarėnh xwỳnh kwỳjaja mẽ hwỳr mran pøj. Jerujarė rũm mẽ hwỳr mran pøj.

²⁸Hãmri nhũm mẽ piitã mẽ kot mẽ kapěr mar kaxyw mẽ hwỳr akuprõ. Jakamã nhũm hõ pê Akapôja kànhmã xa nẽ tanhmã mẽ kãm ujarėnh to. Tĩrtũm Karõ nhỹ hã mẽmoj kukamã mẽ kãm awjarė nẽ mẽ kãm: —Kwa okora kêr ka mẽ axkãm ajamak rom. Kojã tokyx pika piitã hkôt mẽ apkur xà hã mẽõja mẽ kêp hkryre nẽ mẽ piitã mẽ hipêx kêt nẽ. Anẽ. Tã nhũm gaa nẽ ujarėnh xàja kôt mẽmoj ã amnhĩ nhĩpêx anẽ. Kormã Pahihti Krawti kot mẽ ho amnhĩptàr ri nhũm mẽmoj ã amnhĩ nhĩpêx anẽ. No nhũm kormã ã amnhĩ nhĩpêx anhỹr kêt ri nhũm Akapôja kukamã ã mẽ kãm ujarėnh anẽ.

²⁹Hãmri nhũm mẽ kuma nẽ tee ri Jutej kamã Jejus kôt mẽ hkwỳjê hkukamã hamaxpěr nẽ axpẽn mã: —E kwa pu mẽ Jutej kamã Jejus kôt mẽ pahtõ nẽ pahtõxjê mã pahkàxpore hkwỳ gõ kê mẽ ho amnhĩm awjaprõ nẽ hkur o pa. Anẽ. Hãmri nẽ mẽ kaxyw kàxpore hkwỳ ho akuprõ. Nhũm mẽ hikàxpore hkryre xwỳnhjaja ãm mẽ kãm ho hkryre nẽ kugõ nhũm mẽ hikàxpore rũnh xwỳnhja mẽ kãm ho rũnh nẽ kugõ.

³⁰Jakamã nhũm mẽ ho hpikuprõnh pa nẽ Panãpe mẽ Sawti wa kot mẽ hwỳr o mõi nẽ mẽ kãm õr kaxyw wa kãm kugõ. Hãmri nhũm wa hamỳ nẽ ma Jutej kamã Jerujarė hwỳr mẽ hwỳr o mõi. Hãmri nẽ hwỳr pøj nẽ mẽ kot Jejus kapěr o mẽ ahkre xwỳnhjê mã kugõ. Hãmri nhũm mẽ kãm Jejus kôt mẽ htõ nẽ htõxjê mã o anhrà nhũm mẽ hamỳ nẽ hkĩnh nẽ ho amnhĩm awjaprõ.

Atre 12

Mẽ kot Simãw Pêtre pynênh nẽ haxàr ã mẽ harênh

Matêwre 18.19-20

¹Tã nhũm mẽ õ pahi Eroxa õ pòristi mã Kris kwỳjê hã amỹnê nhũm mẽ mẽ hipêx kati nẽ nhũm mẽ amnhĩ xà htỳx kamã hamak o pa.

²Juãw tõi Xiakreja nhũm mẽ pahi Erox nhỹ hã unê nẽ hkanhwỳr o kupĩ.

³Hāmri nhūm Ijaew kām ja mex jakamā nhūm pahi Erox hpānhā mẽ kām Simāw Pêtre hā amÿnê nhūm unê nê haxà. Mẽ kot pāwti kaxkrit kêt kur ã mẽ hkĩnh xà hā arĩgro pê Pasja ã nhūm prem unê.

⁴Na pre Erox Simāw Pêtre hkukamā hamaxpêr o: —Nà koja mẽ hkĩnh hapêx pa Ijaew nom kupĩ nhūm rĩ amnhĩ pumu. Anê. Hāmri nhūm pôristi kot Simāw Pêtre jamār xwÿnhjaja kêp 16. Nhūm mẽ axpên pānhā kêp 4 kapên nê hamār rāhā ho kuhê.

⁵Nhūm arĩ mẽ hagjênh xà kamā hkrĩ ho hkrĩ. Hāmri nhūm Kris kôt htõ nê htõxjaja harênh ma nê tee ri hkukamā hamaxpêr hāmri nê axpên wÿr akuprõ nê ho Tĩrtũm wÿr rāhā ho hkrĩ.

Tĩrtũm kapêr o wÿk xwÿnh kot Simāw Pêtre kator ã harênh

⁶Tā nhūm ra mẽ hkĩnh hapêx nhūm kamāt. Hāmri nhūm pahi Erox kot tanhmā Simāw Pêtre ho xà hā arĩgroja wÿr nhūm kamāt nhūm pôristijaja arĩ mẽ hagjênh xà kamā hamār mex o kuhê. Nhūm kuri wa hamêxkrut nê akutā hijê nê hamār o nō. Kàx o akutā kām ê nê wa ho nō nhūm wa hkaêx kām htÿx gõr nê nō. Nhūm ja wa hakwa krem mǎānên hamār o xa.

⁷Puh nhūm Tĩrtũm kapêr o wÿk xwÿnhjê hõja mẽ hwÿr axà nê wÿhtak rax kām xa. Hāmri nê Simāw Pêtre grêk nê kumra nê kām: —Pa Simāw Pêtre? E kwa tokyj kànhmā xa pu mō. Anê. Hāmri nhūm hkrākato nê omu nê kànhmā ãm kurê kumrêx nhūm kaxprexà hā kàxja axrê nê pykap rôrôk nê hikwÿ. No nhūm kuri pôristi wa nōr xwÿnhhta wa mar kêt nê. Wa arĩ òt tÿx nê nō.

⁸Hāmri nhūm Tĩrtũm kapêr o wÿk xwÿnhja Simāw Pêtre mǎ: —E tokyx anhō kamīs jaxà nê amnê ixkôt tē pu pakato nê ma tē. Anê.

⁹Hāmri nhūm kamīs nê hparkà jaxà nê ma hkôt tē. No ãm kormā amnhĩ pumunh mex kêt nê. Te hpimtir kām ã kot amnhĩ nhĩpêx anhÿr pyrāk ã amnhĩ kamnhĩx.

¹⁰Hāmri nhūm wa hakwakrem pôristi wa kot hamār o wa ãm xwÿnhja hānh wa tē nê wa hakre nê hpānhā ihõja wa hānh wa tē no nhūm mẽ òt tÿx nê

hkrĩ nẽ wa omunh kêt nẽ. Nhũm wa hakwakre nhĩtep xà hkôt wa tẽn kato nẽ hpãnhã krĩ nẽ kahê xà hã hakwakreja wỳr wa tẽ. Hãmri nhũm tãm wa kãm amnhĩ kahê xà mẽ nhũm wa kato nẽ pry hã tẽ. Ja kôt nhũm Tĩrtũm kapẽr o wrỳk xwỳnhja akunok nhũm Simãw Pêtre axte omunh kêt nẽ.

¹¹Hãmri nẽ hprĩ hã amnhĩ pumunh kurê kumrẽx nẽ hamaxpẽr o: —Kwa te ixpimtir kãm ã ixte amnhĩ nhĩpêx anhỹr pyràk tã xep ixpimtir kêt. Tĩrtũm na ixwỳr kapẽr o wrỳk xwỳnhja mẽ nhũm ixwỳr wrỳ nẽ mẽ kêp ixkator. Pahi Eroxo ra kot ixpĩr nhũm ixkwỳ Ijaew kãm ja prãm tã nhũm mẽ kêp ixkator. Nà ãm hãmri na Tĩrtũm ã mẽ kêp ixkator anẽ. Anẽ.

¹²Hãmri nẽ Marir nhõrkwỹ hwỳr htẽm kurê kumrẽx. Juãw Makre katorxà Marirja nhũm õrkwỹ hwỳr tẽ nhũm mẽ ra kamã hpikuprõnh rax nẽ ho Tĩrtũm wỳr o hkrĩ nhũm tãm mẽ hwỳr tẽ.

¹³Hãmri nẽ kormã kapôt ã hakwa krem mẽ kãm kahê xà tatak o xa nhũm ixkre kamã mẽ kãm ãpênh xwỳnh Rotreja kuma nẽ hwỳr tẽ.

¹⁴Hãmri nhũm kãm kapẽr nhũm amnhĩ jaêr pê kuma nẽ hkĩnh nẽ. Nẽ kormã kãm kahê xà mẽnh kêt ri ma akupỹm tẽ nẽ mẽ kot ho Tĩrtũm wỳr xwỳnhjê hwỳr axà nẽ mẽ kãm: —Xê pẽr Simãw Pêtre na tẽ nẽ kapôt ã hakwakrem xa nẽ inhmã kapẽr.

¹⁵Hãmri nhũm mẽ tee ri kuma nẽ kãm: —Kwa arĩ mẽ hagjênh xà kamã hkrĩ kênã. Mãn ka tanhmã amnhĩ krã amnhĩ to hã na ka ri atỳx ã akapẽr anẽ. Anẽ. Hãmri nhũm mẽ kãm: —Ma tanhmã kot pa kêt ri ixkrã amnhĩ to? ãm hãmri na pa mẽ amã harẽ. Mẽ kam nẽ mra nẽ omu. Anẽ. Nom nhũm mẽ kuma nẽ ãm kuma nẽ kãm: —Nà tãm kêt. Kaxkwa rũm Tĩrtũm mã hamãr o pa xwỳnh mãn amã kapẽr nom tãm kêt. Anẽ.

¹⁶Rôm nhũm Simãw Pêtre arĩ hakwakre tatak o xa. Hãmri nhũm mẽ jatã hwỳr mra nẽ kãm kahê xà mẽ nẽ amnhĩ jaêr pê omu nẽ hkĩnh nẽ.

¹⁷Hãmri nhũm kànhmã mẽ kãm ãhkra hpẽ nẽ mẽ ho hpinhkrênh pa nẽ mẽ kãm: —Nà Tĩrtũm na ixwỳr kapẽr o wrỳk xwỳnhja mẽ nhũm ixwỳr wrỳ nẽ pôristi pê ixkator. Anẽ. Hãmri nẽ mẽ kãm: —E kêr ka mẽ Xiakre nẽ Jejus

kôt mẽ pahtõ nẽ pahtõxjê mã ijarẽ kê mẽ ijarẽnh mar kurê kumrẽx. Nom kot paj ixkato nẽ ma krĩ hõ hwỳr mỗ. Anẽ. Hãmri nẽ mẽ kêp kato nẽ ma mỗ.

¹⁸Tã nhũm apkati nhũm pôristi kot hamãr o hkrĩ xwỳnhjaja hkrã hapôj nẽ tee hapêr nẽ nhỹri omunh kêt nẽ. Hãmri nẽ tee ri amnhĩ kukamã hamaxpêr o kãm ma htỳx kumrẽx nẽ axpẽn mã: —Kwa tanhmã na pre we amnhĩ to nẽ mẽ pahpê akunok? Tanhmã koja we pahi Erox hã mẽ pahkukja pu mẽ harẽnh to? Anẽ.

¹⁹Hãmri nhũm pahi Erox hpikunor ã harẽnh ma nẽ axtem pôristi hkwỳjê mã anẽ nhũm mẽ mra nẽ tee ri mẽ haggjênh xà kamã hapêr nom nhỹri omunh kêt nẽ. Hãmri nhũm Erox mẽ kot hamãr xwỳnhjê kamã gryk tỳx kumrẽx nẽ amnhĩ wỳr mẽ hã karõ nẽ mẽ kãm: —Kwa nok? Mẽ ate hamãr rãhã ho akuhê hã ixte mẽ amã karõ htã nhũm tanhmã amnhĩ to nẽ akunok. Nà kot paj mẽ anhĩmex ka mẽ rĩ amnhĩ pumu. Anẽ. Hãmri nhũm mẽ tee ri kãm amnhĩ tã àprãr kaprỳ nhũm mẽ hã amỳnê nhũm mẽ ho kator nẽ ma mẽ o mra nẽ mẽ himex. Hãmri nhũm pahi Erox Jutej rũm kato nẽ ma Sejarej wỳr mỗ nẽ hpãnhã kamã pa ho pa.

Pahi Erox tanhmã htyk to hã harẽnh

Wam Pêtre 1.24-25

²⁰Krĩ pê Xir mẽ Sito wa kamã mẽ pa xwỳnhjaja na pre htem pahi Erox nhõ pyka hwỳr pa nẽ mẽ kêp amnhĩm apkur xà hã mẽõ japrôr o pa. Tã nhũm Erox kot mẽmoj mỳrapê mẽ kamã gryk jakamã nhũm mẽ tee ri mẽ kêp ujaprôr kaxyw mẽ hwỳr mra nom nhũm mẽ kãm mẽmoj kwỳ ho wẽnê hkêt nẽ. Hãmri nhũm mẽ tee ri amnhĩ kukamã hamaxpêr nẽ pahi Erox nhõ kôwenatô Pratôja wỳr mra nẽ kãm: —E awỳr na pa mẽ mra. Kwa mẽ ixyr pê pahi Erox mã tanhmã akapêr to kê ama nẽ mẽ ixkamã gryk kêt nẽ. Pa mẽ axte mẽ awỳr mra nẽ mẽ apê mẽmoj kwỳ japrôr o ri ixpa. Anẽ.

²¹Hãmri nhũm mẽ kuma nẽ hwỳr tẽ nẽ mẽ yr pê tanhmã kãm kapêr to nhũm kuma hãmri nẽ kot tanhmã mẽ kãm kapêr to kaxyw mẽ kãm arĩgro hta. Tã

nhũm ra kot arĩgro hyr xwỳnhhta kato nhũm Erox kệp pahi hã ê mex jaxà nẽ tẽ nẽ kệp pahi hã mẽ hkrĩ xà kamã nhỹ nẽ tanhmã mẽ kãm kapẽr to.

²²Mẽ kãm kapẽr ryy nẽ. Hãmri nhũm mẽ kuma nẽ hêx rom kãm mex o mex ã harẽ. Nẽ kỳx pêê axpẽn mã harẽ nẽ harẽnh o: —Kwa pahi Erox kệp mẽ panhĩõ hkêt. Pêr kaxkwa rũm Mẽpahpãm na pre mẽ pahwỳr wrỳ nẽ ã mẽ pamã kapẽr mex anẽ. Anẽ. Hãmri nẽ te kệp Tĩrtũm pyræk o hipêx nẽ kãm mex o mex ã harẽ. Nom hêx rom ã harẽnh anẽ. Kot mẽ mar nẽ kãm mẽ hkĩnh nẽ akupỹm mẽ kãm mẽmoj to wẽnê hprãm xàj nhũm mẽ hêx rom ã axpẽn mã mex ã harẽnh anẽ.

²³Hãmri nhũm mẽ kuma nhũm ja kãm mex nẽ nhũm hkĩnh nẽ mẽ mar o nhỹ nẽ kệp Tĩrtũm pyræk ã harẽnhja nê tanhmã mẽ kãm nẽ hkêt nẽ. Jakamã nhũm tee ri amnhĩ tã omu nẽ hwỳr kapẽr o wrỳk xwỳnhjê hõ mẽ nhũm hwỳr wrỳ nẽ tanhmã ho nhũm õhy kamã kutõj rax nẽ htyk tokyx anẽ.

Panãpe mẽ Sawti wa akupỹm ãxiok hwỳr mõi ã wa harẽnh

Atre 11.27-30

²⁴Tã nhũm mẽ ra ohtô nẽ Tĩrtũm Kra Jejus kot tanhmã mẽ panê amnhĩ nhĩpêx to hã harẽnh ma nẽ hkôt amnhĩ xunhwỳ.

²⁵Hãmri nhũm Panãpe mẽ Sawti wa ra Kris kôt htõ nẽ htõxjê mã kàxporeta jamỳ nẽ ma Jerujarẽ hwỳr o mõi nẽ mẽ kãm kugõ. Hãmri nẽ ma akupỹm ãxiok hwỳr nojarêt nẽ war amnhĩ kôt Juãw Makre o mõi. Hãmri nẽ mẽ ma mõi nẽ akupỹm mẽ hwỳr pøj.

Atre 13

Tĩrtũm kot Panãpe mẽ Sawti wa hyr

Atre 9.15-16; Rõmãn 1.1

¹Ãxiok kamã Kris kôt mẽ kot axpẽn to htõjaja kot Tĩrtũm nhỹ hã kapẽr o mẽ ahkre ho pa xwỳnhjê nhĩxi ã kot anhỹr. Na pre Panãpe nẽ Sawti nẽ Simeãw kà htykre nẽ Rusti pê Sirẽn nhõ xwỳnh nẽ pahi Erox kràmnhwỳ Mãnahēja.

²Jakamã nhũm prem mẽmo arĩgro hã axpẽn wỳr akuprõ nẽ Tĩrtũm mã mex o mex ã harẽnh kaxyw apkur kêt rãhã kãm amnhĩ jarẽnh o hkrĩ. Hãmri nhũm Tĩrtũm Karõ mẽ kãm tanhmã kapẽr o amnhĩrit to nẽ mẽ kãm: —E kêt

ka mẽ Panãpe mẽ Sawti war ata nẽ wa kot inhmã tanhmã amnhĩ nhĩpêx to ho pa kaxyw wa ãm. Anẽ.

³Hãmri nhũm mẽ kuma nẽ wa hyr kurê kumrêx nẽ wa himôk ã mẽ ìhkra jaxwỳ nẽ wa ho Tĩrtũm wỳ. Hãmri nẽ wa kot Tĩrtũm mã tanhmã amnhĩ nhĩpêx to ho pa kaxyw wa kumẽ nhũm wa ma mỗ.

Wajaga kot Jesus nê hkràmnhwỳ kurê hã harênh

Atre 8.9-24

⁴⁻⁵Tã nhũm Tĩrtũm Karõ krĩ pê Serêw wỳr Panãpe mẽ Sawti wa kumẽ nhũm wa ma hwỳr mỗ. Nẽ amnhĩ kôt Juãw Makre ho mỗ. Kot tanhmã wa ho ajuta hto ho wa hkôt pa kaxyw. Hãmri nẽ wa mẽ mỗ nẽ Serêw wỳr pôj nẽ pàr krem axà nẽ ma gô hipôk pê Sipre hwỳr mỗ. Hãmri nẽ gô hipôk ã krĩ pê Saramĩn wỳr pôj nẽ Ijaew nhõ Tĩrtũm kapêr o mẽ ahkre xà hã ixkre hwỳr tẽ nẽ kamã Jesus kot mẽ panê tanhmã amnhĩ nhĩpêx to hã mẽ kãm harênh o wa xa.

⁶⁻⁸Tã nhũm mẽ krĩa rũm kato nẽ hpãnhã gô hipôk kôt mỗ nẽ hatur xà kamã krĩ pê Papos wỳr pôj. Hãmri nẽ kamã wajaga Pajesus pumu. Gresjê kapêr kãm hixi pê Erĩm. Erĩm haxwỳja kêp Ijaew. Na pre hte hêx rom te kêp Tĩrtũm nhỹ hã kapêr jarênh o pa xwỳnh pyræk o amnhĩ nhĩpêx nẽ ma mẽ kãm ujarênh o ri mẽ hkôt pa. No ãm mẽ kãm amnhĩ to hêx o pa. Gô hipôkja ã pahi Sejupaw hkràmnhwỳ na pre. Pahi Sejupawja àhpumunh tỳx jakamã na pre Panãpe mẽ Sawti wa harênh ma nẽ kãm wa kapêr mar prãm nẽ wa kot kãm Tĩrtũm kapêr jarênh kaxyw amnhĩ wỳr wa kuwỳ. Nom nhũm hkràmnhwỳ wajaga Erĩmja kãm wa hkĩnh kêt nẽ wa nê kãm kapêr kãm hihtỳx nẽ kãm: —Kwa nà wa kapêr mar kêt nẽ. Kot kaj war ama nẽ wa uræk nẽ amnhĩ kaxyw Jesus kôt ajamaxpêr nẽ hkôt amnhĩ xãm. Kwarĩ wa kapêr mar kêt nẽ. Anẽ.

⁹Hãmri nhũm Sawti ra axtem pãnhã hixi. Ra hpãnhã kêp Pawre. Nhũm Tĩrtũm Karõ ra hkarõ mã àr jakamã nhũm ÿ hã wajagata pumu nẽ wa nê hkràmnhwỳ mã kapêr ã kãm akir nẽ kãm:

¹⁰—Tk. Kwa pěr apê Satanasti hkwỳ hã na ka ã wa inhnê kãm akapěr anê. Na ka hte mẽmoj punuj pix kukamã ajamaxpěr nê mẽmoj mex nê mẽ no kupyri o apa. Tĩrtũm kapěr mex kumrêx tã ka axtem nê nê mẽ hkurê ho ri apa.

¹¹Ã ate amnhĩ nhĩpêx anhỹrja mỳrapê koja Tĩrtũm tanhmã ato ka ano hkre nê arĩt kêt o atã apkati xohtô nê kãm ga. Anê. Hãmri nhũm no hkre kurê kumrêx nê tee ri rĩt kaxyw no pikrar pỹnh o xa nom mẽmoj pumunh kêt nê. Hãmri nê mẽhõ kot hpa hã hpyr nê õrkwỹ hwỳr ho mõi kaxyw ri amnhĩ pu hã mẽ hapêr pênh o xa.

¹²Hãmri nhũm hkràmnhwỳ pahĩtija tee ri ja hã omu nê amnhĩ kaxyw Jejus kôt hamaxpěr nê hkôt amnhĩ xãm kurê kumrêx. Hãmri nê Pawre mẽ Panãpe wa kot tanhmã Tĩrtũm kapěr jarênh to hã wa kuma nê hamaxpěr o: —Hêxta waa nê. Aa ixte ã mẽhõ kapěr kot anhỹr mar kêt tã pa jarãhã kuma. Nà ãm hãmri na Jejus jarênhja. Anê.

Pawre mẽ Panãpe ãxiok õ hwỳr wa mõi ã wa harênh

Atr 15.38

¹³Tã nhũm Pawre mẽ Panãpe mẽ Juãw Makre wa mẽ krĩ pê Papos rũm kato nê hpãnhã ma pyka hõ hwỳr mõi. Pàr kãm ma pyka pê Pãpir wỳr mõi nê kamã krĩ pê Perke hwỳr pøj. Hãmri nhũm Juãw Makre tanhmã hamaxpěr to nê tee ri axte wa hkôt mõi kukamã hamaxpěr hãmri nê wa hkaga nê awjanã nê ma akupỹm Jerujarê hwỳr ahte mõi.

¹⁴Jakamã nhũm Pawre mẽ Panãpe wa ahte Perke rũm kato nê hamũ pika pê Pisit kãm krĩ pê ãxiok wỳr mõi nê hwỳr pøj. Nhũm Ijaew nhõ arĩgromnu pê sap kato nhũm wa Tĩrtũm kapěr o mẽ ahkre xà hã ixkre hwỳr wa tẽ nê hwỳr axà nê nhỹ.

¹⁵Hãmri nhũm mẽhõ mẽ kãm Tĩrtũm kapěr ã kagà htũm kwỳ kamã harênh o xa. Mojes mẽ Tĩrtũm nhỹ hã kapěr o mẽ pa xwỳnh kot kapěr ã kagà hkwỳ kamã nhũm mẽ kãm kamã harênh o xa. Hãmri nê kamã harênh pa nhũm mẽ ahkre xwỳnhjaja Pawreja wa omu nê wa hwỳr mẽhõ mẽ nhũm wa hwỳr

tē nē wa kām: —E na mẽ ijahkre xwỳnhjaja war ate mẽ inhmã axujarēnh prãm nē mãmri mẽ inhmã mẽmoj jarēnh kaxyw nhũm mẽ war atã anē. Anē.

16Hãmri nhũm wa kuma nhũm Pawre kànhmã xa nē mẽ hpinhkrēnh kaxyw mẽ kãm kànhmã ìhkra nhũm mẽ omu nē hpinhkrēnh pa nhũm mẽ kãm awjarē. Amnhĩ kwỳ pē Ijaewjê mẽ mẽ kēp Ijaew kêt xwỳnhjê kãm Tĩrtũm kĩnh xwỳnhjê mã nhũm mẽ kãm awjarē. Nē mẽ kãm kapēr ryy nē. Tĩrtũm kot tanhmã mẽ hkukamã Ijaew nhĩgêt nē pãmjê nhĩpêx to hã mẽ kãm awjarē nē mẽ kãm: —E kot paj mẽ amã awjarē ka mẽ inhma.

17Nà mẽ ixpê Ijaew nhõ Tĩrtũmja amnepēm na pre mẽ ixpê Ijaew pãmjê rē. Kormã Ejit kãm mẽ pa ri nhũm amnhĩ kaxyw mẽ kurê nē mẽ ho ohtô rax kumrêx. Hãmri nē mẽ kaxyw hihtỳx jakamã Ejit rũm mẽ kator pa.

18Hãmri nē mẽ ho mex ryy ho mẽ hkôt pa. Mẽ kot kapôt ã ri pa hã amgrà pē 40 kamã mẽ kot htỳx ri tanhmã amnhĩ nhĩpêx to ho pa htã nhũm mẽ kamã ukapri ryy ho mẽ hkôt pa.

19-20Na pre mẽ kãm pyka pē Kanaã kamã mẽ pa xwỳnhjê nhĩmex pa. Kanaã kamã mẽ pa xwỳnhjaja ahpỳnhã axpēn kaxyw mẽõ krĩ pē 7ja nhũm mẽ kãm mẽ ho hapêx pa. Hãmri nē hpãnhã mẽ inhĩgêtjê mã pykaja o hpigrành pa. Mẽ ixpê Ijaew nhĩgêtjê mã ho hpigrành pa nhũm mẽ kamã pa hã amgrà xohtô nē. Hã amgrà pē 450. Tã nhũm Tĩrtũm hpãnhã mẽ kãm juisti hkwỳ rē nē mẽ kaxyw mẽ unhwỳ nhũm mẽ ho pa. Tã nhũm hpãnhã Sãmuew mẽ ho amnhĩptà nē mẽ o pa. Kēp Tĩrtũm nhỹ hã kapēr jarēnh o pa xwỳnhjê hõ nhũm Tĩrtũm mẽ kaxyw ãm.

21—Tã nhũm mẽ ixpãmjaja axpēn ma nē ra te krĩ hkwỳ kamã mẽ uràk nē mẽõ pahi kot Sãmuew pãnhã mẽ ho amnhĩptàr o pa hprãm xàj amnhĩ to Tĩrtũm wỳ nē kãm: “Pa Tĩrtũm. Kwa mẽ ixkaxyw pahi hõ xãm kê mẽ ixto amnhĩptàr o pa nà. Ja na mẽ inhmã hprãm tỳx kumrêx.” —Anhỹr o amnhĩ to hwỳr jakamã nhũm mẽ kuma nē mẽ kaxyw Sawti xãm. Kisti hkra na pre. Nē mẽ inhĩgêt Pějãmĩ kanrêhã htàmnhwỳ na pre. Hãmri nhũm Tĩrtũm mẽ kaxyw ãm nhũm kēp mẽõ pahi nē mẽ ho amnhĩptàr o pa hã amgrà pē 40.

²²Tã nhũm Tĩrtũm kator nẽ hpãnhã mẽ kaxyw Tawi xãm. Hãmri nẽ harẽnh o: “Nà Jese hkra Tawija na hte inhmã hprãm xà hkôt amnhĩ nhĩpêx mex o pa.” Anẽ.

²³—Tã Jejus kêp Tawi hkanrêhã htãmnhwỳ na pre. Kukamã na pre Tĩrtũm mẽ ixpê Ijaew nhĩgêjtê mã harẽ nẽ harẽnh o: “Koja nhỹrmã Tawi hkanrêhã htãmnhwỳjê hõ mẽ ate amnhĩ tomnuj pê mẽ apytà.” Anhỹr o hkukamã mẽ kãm harẽ.

²⁴No nhũm kormã Jejus kot mẽ ixpê Ijaewjê mã amnhĩ to amnhĩrĩt kêt ri nhũm Juãw Paxis kumrêx hkukamã mẽ ixwỳr mỗ nẽ mẽ inhmã Tĩrtũm kapêr jarẽnh o ri mẽ ixkôt pa. Nẽ mẽ ixte amnhĩ tomnuj kaga nẽ hpãnhã tãm amnhĩ nhĩpêx o ixpa hã mẽ ixpumunh kôt mẽ ixkrã kumrãr ã mẽ inhmã karõ ho pa.

²⁵—Tã mẽ kãm kapêr o pa ryy nẽ ra hatur xàm mẽnũh kaxyw nẽ amnhĩ tã tanhmã mẽ inhmã kapêr to nẽ mẽ inhmã: “Na ka mẽ ixpumu nẽ atỳx Tĩrtũm kot mẽ akaxyw pa ixãm ã ixkamnhĩx nom pa hkêt. Kot mẽ pakaxyw ãm mã xwỳnhta kukamã na pa pre mỗ. Tãm kot amnhĩ to rax o ijakrenh. Nẽ kot amnhĩ to mex o kot ijakrenh. Jakamã na pa hte ãm kukwak ri ixpa nẽ amnhĩ tã hã ixpijaàm o ixpa.” Anẽ. —Na pre ã Juãw Paxisja mẽ inhmã Jejus jarẽnh anhỹr o pa.

²⁶—Tã kwa mẽ inhma mẽ apê Apraãw kanrêhã htãmnhwỳjaja nẽ mẽ apê Ijaew kêt xwỳnh kãm Tĩrtũm kĩnh xwỳnhjaja. E mẽ apiitã ixkapêr ma nẽ kãm ajamaxpêr tỳx rãhã ho ri apa. Nà mẽ pahpiitã mẽ pakaxyw na Tĩrtũm kapêrja. Kot mẽ pahte amnhĩ tomnuj pê mẽ papytãr ã amnhĩ jarẽnhja mẽ ixpê Ijaew pix kaxyw kêt. Mẽ pahpiitã mẽ pakaxyw na. Mẽ pahpiitã mẽ pahte ja mar nẽ hkôt amnhĩ nhĩpêxja na Tĩrtũm kãm hprãm.

²⁷Nom Jerujarẽ nhõ xwỳnhjê mẽ mẽ àptãr tũmrejaja na prem Jejus kêp Tĩrtũm kot mẽ pakaxyw ãm xwỳnh ã harẽnh mar tã hkôt hamaxpêr kêt nẽ. Na pre htem mẽ inhõ arĩgromnu pê sap ã akuprõ nẽ axpẽn mã Tĩrtũm kapêr ã kagà htũm kamã ujarẽnh o hkrĩ. Kagàja kamã Tĩrtũm nhỹ hã mẽ kapêr o mẽ pa xwỳnhjaja kot hprĩ hã Jejus jarẽnh nẽ hã kagà nhũm mẽ kot mar tã

hpřĩ hã mar tỳx kêt nẽ. Jakamã na prem axtem nẽ mẽ kãm hã amỹnẽ. Tĩrtũm nhỹ hã kapẽr jarẽnh xwỳnhjaja kot mẽ hkukamã mẽ harẽnh xàja kôt nhũm mẽ kot hpĩr kaxyw mẽ kãm hã amỹnẽ.

28-29 Kot tanhmã amnhĩ tomnuj to hkêt tã nhũm mẽ amarĩ hã pahi Pirat wỳ. Kot mẽ kãm hã àmnẽnh nhũm ò pòristijaja kot hpĩr kaxyw nhũm mẽ hã kuwỳ nhũm mẽ kãm kupĩ. Ra Tĩrtũm kapẽr ã kagà htũm kot mẽ hkukamã mẽ harẽnh xà hkôt. Hãmri nhũm mẽ kot hkôt pa ho pa xwỳnhjaja pĩ kahpa nẽ ho wrỳ nẽ ma o tẽ nẽ kẽn kre kamã haxà.

30 Tã nhũm Tĩrtũm akupỹm ho htĩr

31 nhũm xatã hkôt mẽ pa ho pa xwỳnhjê hwỳr hapôj. Kormã htyk kêt ri ra Garirej rũm Jerujarẽ hwỳr hkôt mẽ pa ho mẽ pa xwỳnhjê hwỳr xatã mẽ hwỳr hapôx o pa. Jao hã arĩgro xohtô nẽ nhũm prem piitã omu. Tã mẽ tãmjaja na htem mẽ ixpê Ijaew mã harẽnh o pa.

32-33—Amnepêm Tĩrtũm na pre mẽ ixpê Ijaew nhĩgêjtjê mã tanhmã Kra Jejus jarẽnh to. Kormã mẽ pahwỳr wrỳk kêt ri tanhmã mẽ kãm harẽnh to. Jakamã ra kot hkukamã harẽnh xà hkôt nhũm pre mẽ pahwỳr wrỳ nẽ tanhmã mẽ panê amnhĩ nhĩpêx to. Tã mẽ ate harẽnh mar kaxyw na pa wa man mẽ awỳr mỗ. Amnepêm finat Tawi na pre Tĩrtũm kapẽr kwỳ hã kagà. Tĩrtũm mex ã mẽ grer xà pê Sam 2ja kamã hã kagà. Te Tĩrtũm tãm Jejus mã kapẽr pyràk o hã kagà nẽ hã kagà ho: Apê Ixkra na ka. Tã mẽ piitã mẽ kot apê Ixkra hã apumunh kurê kumrẽx kaxyw na pa jarãhã mẽ kãm ato amnhĩrĩt. Anẽ. Nhũm pre ã Tĩrtũm Jejus mã kapẽr anẽ nhũm Tawi ô ri mẽ pamã hã kagà.

34—Amnepêm na pre Tĩrtũm tanhmã Kra Jejus kukamã harẽnh to. Mẽ kot hpĩr nhũm kot akupỹm ho htĩr kukamã hã amnhĩ jarẽ. ĩ hkro pymaj kot mẽ htykjê pê hkaxàr nẽ akupỹm ho htĩr ã nhũm hkukamã hã amnhĩ jarẽ. Te Kraja mã amnhĩ jarẽnh pyrà nẽ amnhĩ jarẽnh o: E kot paj ato mex rax nẽ. Ixte Tawi mã amnhĩ jarẽnh xà hkôt. Anhỹr o hkukamã harẽnh xà hkôt akupỹm ho htĩr nhũm axte htyk kêt ã harẽ.

35—Nẽ kagàja nhãm hô hõ kot tanhmã Jejus jarẽnh kute. Te Jejus tãm Tĩrtũm mã kapẽr pyrà nẽ harẽnh o: Ixpê Akra hã ixte akapẽr kôt ri amnhĩ

nhîpêx rãhã ho ixpa jakamã kot kaj ixpumunh mex pa inhî hkro hkêt nê. Anê. Tirtûm kapêr ã kagà htûm kot ã Jejus jarênh kot anhÿr.

³⁶Nom ã Tawi jarênh anhÿr kêt nê. Tawi na pre Tirtûm kapêr kôt amnhî nhîpêx mex o pa hãmri nê ty nhûm prem mẽ panhîgêjtê nhîhkô hã haxà hãmri nhûm ï hkro nê hapêx.

³⁷—Tã no Jejusja Tirtûm kot akupÿm ho htîr jakamã nhûm Tawi pyràn ï hkro nê hapêx kêt nê.

³⁸—E mẽ inhmar tÿx nê ixkwÿjaja. Kra Jejus pix kukwak na hte Tirtûm amnhî katut kôt mẽ pahte amnhî tomnuj rê.

³⁹Jakamã kot kaj mẽ ãm Mojes kapêr kôt pix mã ri amnhî nhîpêx nhûm Tirtûm tee ri ja hã mẽ apumu nê amnhî katut kôt mẽ ate amnhî tomnuj rênh kêt nê. Jejusja tapxipix na pre htyk o Tirtûm mã mẽ pahte amnhî tomnuj piitã hpãnhã amnhîrer pa.

⁴⁰⁻⁴¹Amnepêm na pre Tirtûm kapêr nhÿ hã kapêr xwÿnhjê hõja mẽ kãm Tirtûm kapêr jarê nê hã kagà. Te Tirtûm tãm mẽ kot kapêr ã hpêr o pikênh xwÿnhjê mã kapêr pyrà nê mẽ kãm: E kot paj aa mẽ ate mẽmoj pumunh kêt ò ho anê. Nhûm mẽhõ mẽ amã harê ka mẽ harênh ma nê ãm ama. Nhûm mẽ kot omunh mex xwÿnhjê hõ kot hprî hã mẽ amã harênh tã ka mẽ ãm ama nê hkôt ajamxpêr kêt nê. Hãmri nê tee ri tanhmã kãm ajamxpêr to ho ri apa. Anê. ã Tirtûm mẽ kãm kapêr anhÿr jakamã kwa mẽ o kora. Apu mẽ kajaja na pre ã mẽ ajarênh anê rÿ ko. Anê.

⁴²Nhûm pre ã Pawre mẽ kãm ujarênh ryy anê. Hãmri nê Panãpe mẽ wa ixkreta rûm kator kaxyw nhûm mẽ kot mar o hkrî xwÿnhjaja tee ri ma wa mõi ã wa omu nê ma wa hkôt mra nê wa kãm: —Kwa war axujarênhja na mex kumrêx. Mẽ inhmã axte mar prãm. Xà koja axte sap kato ka wa akupÿn mẽ ixwÿr wa tẽ nê axte mẽ inhmã awjarê? Anê. Hãmri nhûm wa mẽ kãm: —Tõe. Nà kot paj war anê. Anê.

⁴³Hãmri nê wa ma tẽ nhûm mẽ hkwÿja ma wa hkôt mra. Ijaew kwÿjaja nê Ijaew kêt xwÿnh kãm Tirtûm kînh xwÿnhjaja nhûm mẽ ma wa hkôt mra.

Hāmri nhūm wa pry hã mẽ kãm kapēr o mō. Tĩrtũm kot mẽ kutã nojarêt rãhã ho pa nhūm mẽ kot amnhĩ tã omunh nẽ hkõt amnhĩ nhĩpêx tỳx rãhã ho pa nẽ hkaga hkêt ã mẽ kãm kapēr o mō.

⁴⁴Tã nhūm axte sap nhūm krĩ nhõ xwỳnh piitã axte Tĩrtũm kapēr mar kaxyw ixkre wỳr akuprõ. Ijaewjaja nẽ Ijaew kêt xwỳnhjaja.

⁴⁵Hāmri nhūm Ijaew kwỳjaja tee ri mẽ amnhĩ wỳr Ijaew kêt xwỳnhjê pumu nẽ mẽ hã Pawre mẽ Panãpe wa kamã gryk nẽ. Mẽ kãm Ijaew kêt xwỳnhjaja kot Tĩrtũm kapēr mar prãm kêt jakamã mẽ hã wa kamã gryk nẽ. Hāmri nẽ Pawre kapēr ma nẽ xatã kãm kapēr punuj nẽ kãm: —Tk. Kwa na ka Tĩrtũm kapēr jarēnh o axêx. Ja kot anhỹr kêt. Anẽ.

⁴⁶Nom nhūm wa kãm mẽ uma hkêt nẽ. Wa ãm Tĩrtũm Karõ nhỹ hã amnhĩ to htỳx nẽ wa mẽ kãm kapēr. Nẽ amnhĩ tã tanhmã mẽ kãm kapēr to nẽ mẽ kãm: —Nà wa ixpyrà nẽ mẽ apê Ijaew jakamã na pa mẽ akumrëxjê mã Tĩrtũm kot mẽ pakaxyw Jejus xãm ã harẽ. Tã ka mẽ ama nẽ ãm ama nẽ te mẽ ate hkaga pyrà nẽ ã wa inhmã akapēr anẽ nẽ wa ixte kapēr o ixêx ã wa ijarẽ. Pěr ãm mẽ ate mẽ amã Tĩrtũm mẽ Kra wa kuri mẽ atĩr tũm nẽ mẽ apa hprãm kêt. Jakamã kot paj wa mẽ apê ixkato nẽ hpãnhã ma Ijaew kêt xwỳnhjê mã Jejus kapēr jarēnh o ri mẽ hkõt ixpa.

⁴⁷Tĩrtũm kapēr ã kagà htũm ã kot mẽ ixte amnhĩ nhĩpêx anhỹrja kukamã mẽ ijarẽ nẽ mẽ ijarēnh o: Mẽ ate Ijaew kêt xwỳnhjê mã ixkapēr jarēnh o ri apa kaxyw na pa pre mẽ kaxyw mẽ arê. Jakamã koja pyka piitã hkõt mẽ pa xwỳnhjaja ohtô nẽ mẽ akapēr ma nẽ ixkra hkõt amnhĩ xunhwỳ. Koja mẽ ã amnhĩ nhĩpêx anẽ pa ja hã mẽ omu nẽ mẽ ho ixkra. Anẽ. Tĩrtũm kot ã ja kukamã mẽ ijarēnh anhỹr jakamã kot paj wa mẽ apê ixkato nẽ mẽ apãnhã ma Ijaew kêt xwỳnhjê mã Tĩrtũm kapēr jarēnh o ri mẽ hkõt ixpa. Anẽ.

⁴⁸Hāmri nhūm Ijaew kêt xwỳnhjaja amnhĩ tã wa kapērja ma nẽ hkĩnh nẽ Tĩrtũm kapēr mex o mex ã harẽ. Hāmri nhūm ra Tĩrtũm kot nhỹrmã amnhĩ ri mẽ htĩr tũm nẽ mẽ pa ho mẽ pa kaxyw mẽ rēnh xwỳnhjaja amnhĩ kaxyw Pahihti Jejus kõt hamaxpēr nẽ hkõt amnhĩ xunhwỳ.

⁴⁹Tã nhũm pika pê ãxiok kamã mẽ piitã Tĩrtũm kapěr jarėnh ma.

⁵⁰Nom nhũm Ijaew xàptàr tũmrejaja kãm Pawre mẽ Panãpe wa hkĩnh kėt jakamã na prem krĩ hkôt mẽ kot amnhĩ to rũnh xwỳnhjê mã wa ho kapěr punuj o pa. Mẽ õ pahi mẽ mẽni kot amnhĩ to rũnh xwỳnhjaja nhũm mẽ kãm tanhmã wa ho kapěr to nhũm mẽ kuma nẽ mẽ hkôt hamaxpěr. Mėnijaja kãm Tĩrtũm prãm tã amnhĩ kaxyw Jejus kôt hamaxpěr kėt jakamã tanhmã mẽ kot Pawre mẽ Panãpe wa ho hêx toja ma nẽ hkôt hamaxpěr nẽ wa kamã gryk nẽ. Jakamã nhũm mẽ ohtô nẽ tanhmã wa hipêx to nẽ amnhĩ nẽ wa hano.

⁵¹Hãmri nhũm wa mẽ kệp kato nẽ xa nẽ mẽ kot Tĩrtũm kapěr kaga hã amnhĩ pumunh kaxyw mẽ noo mã wa hparkà kapa nẽ nẽ awjagrô kapĩ nẽ ma wa tẽ. Hãmri nẽ ma krĩ pê Ikõn wỳr hpãnhã wa mỗ.

⁵²Hãmri nhũm ãxiok kamã mẽ kot Jejus kôt amnhĩ xunhwỳr xwỳnhjaja hkĩnh nẽ ri pa. Tĩrtũm Karõ kot mẽ hkarõ mã gjêx jakamã nhũm mẽ hkĩnh nẽ ri pa ho pa.

Atre 14

Pawre mẽ Panãpe wa kot Ikõn wỳr mỗr ã wa harėnh

Matêwre 10.34-35

¹Hãmri nhũm Pawre mẽ Panãpeja wa ãxiok rũm kato nẽ hpãnhã ma krĩ pê Ikõn wỳr wa mỗ. Hãmri nẽ hwỳr pøj nẽ Ijaew nhõ Tĩrtũm kapěr o mẽ ahkre xà hã ixkre hwỳr wa tẽ nẽ kamã mẽ kãm Jejus jarėnh o nhỹ. Mẽ kãm harėnh kãm hihtỳx jakamã nhũm mẽ hkwỳjaja wa kuma nẽ amnhĩ kaxyw hkôt hamaxpěr nẽ hkôt amnhĩ xunhwỳ. Ijaew kwỳjaja nẽ mẽ kệp Ijaew kėt xwỳnh kwỳjaja nhũm mẽ ohtô nẽ Jejus kôt amnhĩ xunhwỳ.

²Tã nhũm mẽ hkwỳjaja kãm Jejus jarėnh mar prãm kėt nẽ. Hãmri nẽ kato nẽ ma Ijaew kėt xwỳnh kwỳjê hwỳr mra nẽ tanhmã mẽ kãm Pawre mẽ Panãpe wa ho hêx to nẽ wa ho kapěr punuj nẽ nhũm mẽ mar xà hkôt wa kamã gryk nẽ.

³Nom nhũm wa tokyx kator nẽ ma mỗr kėt nẽ arĩ Tĩrtũm Karõ nhỹ hã amnhĩ to htỳx nẽ mẽ kãm Tĩrtũm kapěr jarėnh o ri mẽ hkôt pa. Nẽ kệp mẽ kutã

nojarêť xwỳnh ã harēnh o pa. Nē ŷ hã mẽ kãm aa mẽ kot mẽmoj pumunh kêt kwỳ ho anhỳr o ri mẽ hkôt pa. Jakamã nhũm mẽ hkwỳjaja ja hã wa omu nē wa kapēr ma nē hamaxpēr o: —Kwa ãm hãmri na wa Tĩrtũm kēp mẽ pakamã ukapřĩ xwỳnh ã harē. Pēr ŷ hã wa kot ã amnhĩ nhĩpêx anhỳr o pa kēnã. Anē.

⁴Hãmri nhũm Ijaew kêt xwỳnh kwỳjaja wa hkôt hamaxpēr nē wa hkôt amnhĩ xunhwỳ. No nhũm mẽ hkwỳjaja wa hkôt hamaxpēr kêt nē. Ra mẽ kot Ijaew kwỳ kot tanhmã wa ho kapēr punuj toja ma nē mẽ hkôt hamaxpēr jakamã nhũm krĩ nhõ xwỳnhjaja axpēn kwỳm ri tanhmã wa hkôt hamaxpēr to ho pa. Jao axpēn kwỳm ri wa hkôt hamaxpēr o pa.

⁵Tã nhũm wa hkôt hamaxpēr kêt xwỳnhjaja axpēn wỳr akuprõ nē wa hã amỳnê. Ijaew kwỳjaja nē Ijaew kêt xwỳnh kwỳjaja nē mẽ õ pahijaja nhũm mẽ kot kēn o wa htak o wa hpĩr kaxyw wa hã amỳnê.

⁶Hãmri nhũm wa amnhĩ tã ama nē mẽ kēp kato nē hpãnhã ma pika hõ hwỳr mõ. Ma Rikõn kãm krĩ hkwỳ hwỳr hpãnhã mõ. Risti wỳr nē Tepe wỳr nē pu hã krĩ hkwỳ hwỳr wa mõ.

⁷Wa mõ nē pøj nē ma mẽ kãm Jesus kot tanhmã mẽ panê amnhĩ nhĩpêx to hã harēnh o ri mẽ hkôt pa.

Te grà xwỳnh jarēnh

Atre 3.1-10

⁸Nhũm Risti kamã mẽhõ my hte grà nē hkrĩ xwỳnhja. Katorxà nhõxà kre rĩm hte grà nē kator jakamã ri pa hkêt nē arĩ hkrĩ xà kamã hkrĩ ho hkrĩ.

⁹Jakamã nhũm Pawre mẽ kãm ujarēnh o xa nhũm kuri mar o nhỹ. Hãmri nē hamaxpēr o: —Nà pēr Tĩrtũm àhpumunh o àhpumunh. Mãn kot ixto mex kaxyw àhpumunh tỳx. Nà koja ixto mex. Anē. Hãmri nhũm Pawre ã hamaxpēr anhỳr ã omu

¹⁰nē kàx pē kãm kapēr nē kãm: —E kwa kànhmã xa. Anē. Hãmri nhũm kuma nē kànhmã ãm kurê kumrēx nē ri mra. Nē amnhĩ te kamã hamak o ri mra nē hkĩnh tỳx kumrēx.

11Hāmri nhūm kuri mẽ kuhê xwỳnhjaja Pawre kot ã hipêx anhỹrja ã omu nê htỳx wa kêp kaxkwa kamã mẽhpãm ã wa hkamnhĩx nê hkĩnh nê axpẽn mã: —Kwa pěr mẽpahpãm na wa. Mẽpahpãm Jupti mẽ Měkurtija na wa panhĩ hã amnhĩ jahkre nê mẽ pahwỳr wrỳ. Nà ãm hāmri na wa mẽ pahwỳr wrỳ. Anê. Nom mẽ kapěr pê Rikaôn o axpẽn mã kapěr jakamã nhūm Pawre mẽ Panãpe wa mẽ mar kêt nê. Wa kot mẽ kapěr mar kêt jakamã ã mẽ kot wa harênh anhỹrja mar kêt nê htỳx wa xa.

12Nhūm mẽ ã wa kêp mẽhpãm ã wa harênh anê nê hkĩnh tỳx nê. Panãpeja nhūm prem kêp mẽ hpãm Jupti hã hkamnhĩx no Pawreja nhūm prem kêp mẽhpãm Měkurti hã hkamnhĩx. Pawreja Měkurti pyrà nê kapěr japjê rũnh jakamã nhūm mẽ kêp hã hkamnhĩx.

13Na prem krĩ htã mẽhpãm Juptija mã amnhĩ jarênh xà hã ixkre nhĩpêx nê hkarõ nhĩpêx. Hāmri nê hwỳr akuprõ nê kãm mex o mex ã harê nê amnhĩ to hwỳr o pa. Jakamã nhūm Jupti nhõ patrejaja Pawre mẽ Panãpe wa kêp mẽhpãm ã wa harênh ma hāmri nê wa hã hkwỳjê mã kãm: —Kwa pu mẽ wa kãm môx kwỳ hpa nê pixôrã hkwỳ rê. Hāmri nê wa kãm wa mex o wa mex ã wa harê nê wa kêp mẽpahpãm ã amnhĩ to wa kuwỳ. Wa kêp mẽpahpãm kênã. Anê. Hāmri nê ra ã wa hipêx anhỹr kaxyw

14nhūm wa tee ri mẽ kot amnhĩ nhĩpêx ã mẽ omu nhūm ja wa kêp omnuj tỳx nê. Jakamã nhūm wa amnhĩ pê hinôkà kaxôn pa nê mẽ kutã hprõt nê ã mẽ kot wa hipêx anhỹrja nê mẽ kãm kapěr kãm hihtỳx nê.

15Nê mẽ kãm: —Kwa mẽ ri ã wa inhĩpêx anhỹr kêt nê. Wa ixpê mẽapãm kêt kênã kot ka kêt mẽ ã wa inhĩpêx anê. Nom mẽapãmja na ka htem ãm amnhĩ to hwỳr kaprỳ nê kãm mex o mex ã harênh kaprỳ o ri apa. Tã mẽ ate ã amnhĩ nhĩpêx anhỹr kaga nê hpãnhã Tĩrtũm kôt amnhĩ xunhwỳr nê amnhĩ to pix wỳr o apa kaxyw na pa pre wa mẽ awỳr mō nê pøj. Tĩrtũmja mẽ ate mẽ apãm jarênhta rom htĩr o htĩr. Na pre mẽmoj piitã ho kato. Kaxkwa ho kato nê pyka ho kato nê gô xujanār o kato. Nê kamã ri mẽmoj piitã ho kator pa.

16—Amnepê mē pa xwỳnhjaja na pre htem amnhĩ krã hkôt pix mã tanhmã ri amnhĩ nhĩpêx to ho pa nhũm Tĩrtũm ja hã mē omu nē ãm mē omu nē tanhmã mē ho hkêt nē.

17Mē pahte amnhĩ tã omunh kaxyw na hte amarĩ tanhmã mē pahto mex to ho pa. Na hte mē pahwỳr na rē nhũm mē pahpur go mex nē. Nhũm mē pamã tanhmã mē pahpur kãm mēmo hyja to nhũm ra mē pamã ô rũnh nē. Pu htem hamỳ nē ho paxàpkur mex nē pahkĩnh nē ri papa. Tĩrtũm pix kukwak ri na pu htem ã amnhĩ nhĩpêx anhỳr o ri papa. Anē.

18Nhũm pre ã Pawre mē kot wa kãm môx parja nē mē kãm kapēr kãm hihtỳx anē. No nhũm mē kuma nē ãm kuma nē wa kãm mry hkwỳ hpar kaxyw wa hã hihtỳx nē. Jakamã kritpê m nhỹx prem wa kãm hkwỳ pa. Tã tanhmã hamaxpēr to nē hkaga nē wa kãm hpar kêt nē.

Mē kot Pawre pĩr ã àmnênh ã mē harênh

Sikũn Ximotre 3.10-11

19Tã nhũm Ijaew kwỳjaja mē hwỳr mran pøj. Krĩ pē ãxiok mē lkõn rũm ma mē hwỳr mran pøj nē mē kãm Pawre ho hêx o mē hkôt pa nhũm mē kuma nē axtem nē Pawre kamã gryk kato. Hãmri nē mē kot hpĩr kaxyw kên runh kwỳ jamỳ nē ho htak prêprêk o kuhê. Hãmri nhũm amnhĩ xà htỳx kamã ama nē tēm nē akryk nõ nhũm mē omu nē htỳx ho ra htyk ã hkamnhĩx. Hãmri nē hwỳr tē nē hpa hã kupy nē ma hkjênh o mō nē krĩ pum kumē nē ma akupỹm mra.

20Hãmri nhũm Jejus kôt mē kot axpên to htõjaja tee ri ã mē kot hipêx anhỳr ã omu nē hkaprĩ htỳx nē hwỳr hprõt nē omu nē mỳr o kuhê. Hãmri nhũm te htyk pyrà nē nõr tã Jejus nhỹ hã akupỹm hihtỳx mex nē kànhmã nhỹ hãmri nē ma akupỹm mē hkôt krĩm tē. Tã nhũm apkati nhũm Panãpe mē wa krĩja rũm kato nē ma wa mō. Pãnhã ma krĩ pē Tepe hwỳr wa mō.

Pawre mē Panãpe akupỹm ãxiok wỳr wa mōr ã wa harênh

21-22Tã nhũm wa ma Tepe hwỳr mō nē pøj. Hãmri nē kamã mē kãm Jejus tanhmã kot mē panê amnhĩ nhĩpêx to hã harênh o ri mē hkôt wa pa nhũm mē wa kuma nē ohtô nē Jejus kôt amnhĩ xunhwỳ. Tã nhũm wa kato nē awjanã nē ma akupỹm pika pē Pisit wỳr wa mō. Nē kamã krĩ hkwỳ hkôt ri

ra mẽ kot Jejus kôt amnhĩ xunhwỳr xwỳnhjê jahkre ho ri mẽ hkôt pa. Krĩ pê Risti nê Ikôn nê ãxiokja kôt. Nê mẽ ahkre kamã Jejus kôt mẽ ho mẽ hihtỳx o wa pa nê mẽ kãm: —E ra mẽ ate Jejus kôt amnhĩ xunhwỳr jakamã koja mẽ kãm Jejus kurê xwỳnhjaja tee ri ja hã mẽ apumu nê hã tanhmã mẽ anhĩpêx to. Tã kêr ka mẽ ãm amnhĩ tã mẽ omu nê ãm mẽ omu nê Jejus kaga hkêt nê. Nê arĩ hkôt amnhĩ nhĩpêx mex o ri apa rãhã nhỹrmã ma ò krĩ hwỳr api nê Tĩrtũm wa kuri amex kumrêx nê atĩr tũm nê apa ho apa. Anê.

²³Hãmri nê ahpỳnhã krĩ piitã hkôt ri mẽ kot pastô nhỹ hã mẽ ahkre kaxyw mẽ hkwyjê rê nê mẽ kaxyw mẽ unhwỳ nê mẽ ho Tĩrtũm wỳ. àpkur kêt rãhã mẽ ho kuwỳ nê kãm: —Pa Tĩrtũm? E jajê pumu. Mẽ kot krĩ ja kamã pastô nhỹ hã akrajê jahkre ho pa kaxyw na pa wa mẽ unhwỳ. Jakamã e kêr ka mẽ kutã anojarêt rãhã ho ri mẽ hkôt apa. Anê. Hãmri nê wa mẽ kêp kato nê ma hpãnhã nhỹhỹm wa mỗ.

²⁴Pyka pê Pisit kamã mỗ nê hpãnhã nhãm pyka pê Pãpir kôt mỗ. Wa ma mẽ kãm tanhmã Jejus kapêr jarênh to ho mẽ hkôt mỗ.

²⁵Hãmri nê krĩ pê Perke hwỳr wa pôj nê kamã mẽ kãm Jejus kot tanhmã amnhĩ nhĩpêx to hã harê hãmri nê mẽ kurũm kato nê axte mỗ. Pãnhã ma krĩ pê Atari hwỳr wa mỗ.

²⁶Hãmri nê hwỳr pôj nê hpãnhã kurũm akupỹm ãxiok wỳr wa mỗ. Pàr rax kãm ma akupỹm mỗ. ãxiokja kamã na pre wa nojarêt nhũm Jejus kôt wa htõ nê wa htõxjaja wa ho Tĩrtũm wỳ nê ma krĩ hkwyjê hwỳr wa kumê. Wa kot ma mẽ hkôt tanhmã Jejus kot mẽ panê amnhĩ nhĩpêx to hã harênh o wa pa kaxyw wa kumê. Jakamã nhũm wa ra ja ho anhỹr pa nê akupỹm mẽ hwỳr wa mỗ.

²⁷Hãmri nê wa akupỹm pôj nê Jejus kôt mẽ kot axpên to htõ nê htõxjê ho akuprõ nê mẽ kãm amnhĩ jarê nê mẽ kãm: —Nà ãm hãmri na pa wa ra ixkàhkĩnh pê akupỹn mẽ awỳr pôj. Na pre Tĩrtũm wa ixkutã nojarêt rãhã ho wa inhĩhkô hã pa. Jakamã pa pre wa ma ÿ hã Ijaew kêt xwỳnhjê mã Jejus jarênh o ixpa nhũm mẽ hkwyjaja wa inhma nê hkôt amnhĩ xunhwỳ.

²⁸Anhÿr o wa mẽ kãm kapër hãmri nẽ wa tokyx ma nhÿhÿm krĩ hõ hwÿr axte mõr kêt nẽ. War arĩ ãxiok kamã Jejus kõt wa htõ nẽ htõxjê hkõt ri pa.

Atre 15

Jerujarẽ kamã Jejus kwÿ hpikuprõnh ã mẽ harẽnh

Matêwre 23.1-4; Karatas 2.1-5; 5.1-16

¹Tã hãmri nhũm Ijaew kwÿjaja ãxiok wÿr Jejus kwÿ pê Ijaew kêt xwÿnhjê hwÿr mõn pøj. Pika pê Jutej rũm mẽ hwÿr pøj nẽ tanhmã mẽ ahkre hto ho pa. Nom axtem nẽ Tirtũm kapër kuhpa hã mẽ ahkre nẽ mẽ kãm: —Kot ka mẽ amã Jejus kõt amnhĩ xunhwÿr prãm hãmri nẽ mẽ ixpyrà nẽ finat Mojes kot mẽ pamã karõ xà hkõt amnhĩ my kwrÿt kà kwÿ jakà nẽ rĩ kormã hkõt amnhĩ xunhwÿ. Kot kaj mẽ ã amnhĩ nhĩpêx anhÿr kêt nẽ nhũm Tirtũm tee ri ja hã mẽ apumu nẽ amnhĩ katut kõt mẽ ate amnhĩ tomnuj rẽnh nẽ mẽ ato hkra hkêt nẽ. Anẽ.

²Hãmri nhũm Pawre mẽ Panãpe tee ri mẽ kapër anhÿrja ma nhũm wa kêp ja omnuj tÿx nẽ. Hãmri nhũm wa mẽ kãm: —Tk. Kwa kot anhÿr kêt. Na hte Tirtũm mẽ pahte amnhĩ my kwrÿt kà jakà ã mẽ pahpumunh kõt mẽ pahto hkra hkêt nẽ. Anẽ. Hãmri nẽ tee ri mẽ kapërja nẽ mẽ kãm kapër no nhũm mẽ ãm wa kuma nẽ wa hkõt hamaxpër kêt nẽ. Nẽ arĩ ã mẽ ahkre anhÿr o mẽ hkõt pa. Jakamã nhũm mẽ ja hã axpẽn mã kapër rax nẽ. Hãmri nhũm Jejus kwÿ pê Ijaew kêt xwÿnhjaja amnhĩ tã Pawre mẽ Panãpe wa hkukja nẽ wa kãm: —Kwa xà kot paj mẽ apyrà nẽ amnhĩ my kwrÿt kà jakà nhũm Tirtũm kãm ja mex nẽ nà? Kwa wa ma akupÿm Jerujarẽ hwÿr mõ nẽ ja hã Jejus nhÿ hã mẽ ahkre xwÿnh maatijê mẽ mẽ kot Jejus kwÿ jahkre xwÿnhjê kukja nẽ hã mẽ ama. Nẽ ota mẽ ixkwÿjaja koja ma war akõt mra. Kê mẽ tanhmã mẽ amã ja jarẽnh to ka mẽ ama nẽ man akupÿn mẽ ixwÿr mra nẽ tanhmã mẽ inhmã mẽ kapër jarẽnh to. Anẽ. Hãmri nhũm wa mẽ kãm: “Tõe. Nà kot paj mẽ anẽ.” Anẽ.

³Hãmri nẽ wa mẽ ma Jerujarẽ hwÿr mõ. Ma pyka pê Wẽnĩs mẽ Samar hkõt ma hwÿr mõ. Hãmri nẽ nhÿri Jejus kõt mẽ htõ nẽ htõxjê pumu nẽ mẽ kãm

Ijaew kêt xwỳnhjê jarê. Mẽ hkwỳjaja mẽ uràk nẽ Jejus kôt amnhĩ xunhwỳr ã mẽ harênh o mỗ. Hãmri nhũm mẽ harênh ma nẽ mẽ ỹ hã hkĩnh nẽ.

⁴Hãmri nhũm mẽ ra Jerujarê hwỳr Jejus kôt mẽ htõjê hwỳr mỗn pỏj. Hãmri nẽ mẽ ahkre xwỳnhjê mẽ Jejus nhỹ hã mẽ ahkre xwỳnh maatijê pumu nhũm mẽ haxwỳja amnhĩ wỳr mẽ omu nẽ hkĩnh nẽ. Nẽ tanhmã mẽ ho mex to nẽ mẽ kãm kapêr mex nẽ. Hãmri nhũm Pawre mẽ Panãpe wa mẽ kãm amnhĩ jarê. Tĩrtũm kot wa ãhkô hã wa hkôt pa nhũm wa ỹ hã kot Ijaew kêt xwỳnhjê mã kapêr o pa nhũm mẽ hkwỳja kot wa mar nẽ Jejus kôt amnhĩ xunhwỳr ã nhũm wa mẽ kãm amnhĩ jarê.

⁵Nhũm Jejus kwỳjê kamã mẽ kêp Parijew nhõ xwỳnh kwỳjaja. Mẽ kêp Parijew tã hkwỳjê rom Jejus kôt amnhĩ xunhwỳ. Jakamã nhũm mẽ tee ri Pawre mẽ Panãpe wa kot Ijaew kêt xwỳnhjê jarênh ma nẽ kànhmã kuhê nẽ wa kãm: —Kwa kê mẽ pahpyrà nẽ amnhĩ my kwỳt kà jakà nẽ finat Mojes kot Tĩrtũm nhỹ hã mẽ pamã mẽmoj tã karõ hkôt amnhĩ nhĩpêx o pa. No kot mẽ ã amnhĩ nhĩpêx anhỹr kêt nhũm ja mẽ pahpê omnuj nẽ. Anẽ.

⁶Hãmri nhũm Jejus nhỹ hã mẽ ahkre xwỳnh maatijê mẽ mẽ hkwỳjê jahkre xwỳnhjaja mẽ kuma nẽ hapỏj nẽ nhỹri akuprõ. Ijaew kêt xwỳnh kot Jejus kôt amnhĩ xunhwỳr xwỳnhjaja kot tanhmã amnhĩ nhĩpêx to hã axpẽn mar kaxyw nhỹri akuprõ.

⁷Hãmri nẽ mẽ hã axpẽn mar ryy nẽ. Hãmri nhũm Simãw Pêtre tã kànhmã xa nẽ mẽ kãm: —Nà na pre Tĩrtũm mẽ pahkapi nẽ Ijaew kêt xwỳnhjê kaxyw pa ixta. Ixte mẽ kãm Jejus kot tanhmã mẽ panê amnhĩ nhĩpêx to hã harênh o ri mẽ hkôt ixpa nhũm mẽ kot inhmar nẽ hkôt amnhĩ xunhwỳr kaxyw nhũm mẽ kaxyw ixta. Ra mẽ ate ja hã ixpumunh mex.

⁸⁻⁹Tĩrtũm kot tanhmã ri mẽ pakute hkôt mẽ pahpumunh par jakamã te kot ra mẽ panhĩpêxta pyrà nẽ mãănẽn Ijaew kêt xwỳnhjê nhĩpêx. Mẽ kot mẽ pahpyrà nẽ amnhĩ kaxyw Jejus kôt hamaxpêr jakamã nhũm Tĩrtũm te ra mẽ panhĩpêx pyrà nẽ amnhĩ katut kôt mẽ kot amnhĩ tomnuj rẽ nẽ mẽ ho hkra. Hãmri nẽ mẽ hwỳr amnhĩ Karõ rẽ nhũm mẽ hkarõ mã agjê. Tĩrtũm tãm kot amnhĩm mẽ rênh kênã.

10—Tã xà mẽ pahpê Ijaew na pu htem wam Tĩrtũm kot finat Mojes mã kapêr kôt amnhĩ nhĩpêx mex o papa? Nà na pu htem hkôt amnhĩ nhĩpêx mex kêt nê. Nê mẽ panhĩgêjtaja na xep prem haxwỳja hkôt amnhĩ nhĩpêx mex o pa hkêt nê. Mẽ pahpiitã mẽ pahpê hihtỳx kênã. Tã Ijaew kêt xwỳnhjaja kot hkôt amnhĩ nhĩpêx o pa hã ka mẽ ra mẽ kãm karõ kaxyw. Kwa kot kaj mẽ anê nhũm Tĩrtũm tee ri ja hã mẽ apumu nhũm ja kêp omnuj nê. Kãm ja prãm kêt.

11Kwa mẽ ã mẽ kãm hã karõ anhỳr kêt nê. Mẽ panhõ pahihti Jejus na hte mẽ pahpiitã mẽ pakutã nojarêt o axpên pyræk. Jakamã Ijaew kêt xwỳnhjaja nê mẽ pahpê Ijaewjaja kot puj mẽ amnhĩ kaxyw hkôt pajamaxpêr nê hkôt amnhĩ xunhwỳ. Hãmri nhũm Tĩrtũm ja hã mẽ pahpumu nê mẽ panhĩpêx o axpên pyrà nê Jejus kukwak ri amnhĩ katut kôt mẽ pahte amnhĩ tomnuj rê nê mẽ pahto hkra. No na hte mẽ pahte amnhĩ my kwỳt kà jakàr rỳ finat Mojes kapêr kôt amnhĩ nhĩpêx ã mẽ pahpumunh kôt mẽ pahto hkra hkêt nê. Anê.

12Nhũm pre ã Simãw Pêtre mẽ kãm kapêr anê. Hãmri nhũm hpãnhã Panãpe mẽ Pawreja mẽ kãm amnhĩ jarê. Tĩrtũm kot tanhmã wa ho nhũm wa kot Ijaew kêt xwỳnhjê hwỳr wa mõi ã amnhĩ jarê. Nê Tĩrtũm nhỹ hã mẽ kãm aa mẽ kot mẽmoj pumunh kêt kwỳ ho anhỳr o ri mẽ hkôt pa hã mẽ kãm amnhĩ jarê nhũm mẽ piitã akryk wa mar o hkrĩ nê wa ujarênhta hkukamã hamaxpêr.

13Hãmri nhũm Simãw Pêtre mẽ Panãpe wa mẽ kãm ujarênh pa hãmri nhũm Xiakre wa hpãnhã kànhmã xa nê mẽ kãm kànhmã ìhkra pẽ nê mẽ kãm:

14—E pa ijaxwỳja mẽ amã ixkapêr ka mẽ inhma. Nà na pu mẽ ra Simãw Pêtre kapêr ma. Tĩrtũm kot wam amnhĩ kaxyw Ijaew kêt xwỳnh kwỳjê rênh ã mẽ harênhja pu mẽ ra kuma.

15Ãm hãmri na ã mẽ harênh anê. Amnepêm Tĩrtũm kapêr nhỹ hã mẽ kapêr o mẽ pa xwỳnhjaja na prem ra ja kukamã Tĩrtũm kot tanhmã mẽ hipêx to hã amnhĩ jarênh kukamã hã kagà. Te ho tãm kot kãm kapêr pyrà nê hã kagà ho:

¹⁶Amnepê m finat Tawija na pre hte inhmã amnhĩ kwỳjê ho amnhĩptàr o pa. Mẽ kêp Ijaewjaja nhũm pre inhmã mẽ ho amnhĩptàr o pa. Hãmri nhũm mẽ gaa nẽ axpên pê anhrà nẽ ahpỹnhã ri pa. Tã ixpê Tĩrtũm kot paj nhỹrmã ma mẽ hwỳr wrỳ nẽ axte mẽ ho akuprõ nẽ tãm mẽ unhwỳr pa.

¹⁷Jakamã Ijaewjê kukwak ri koja Ijaew kêt xwỳnh kwỳjaja mããnẽn ixkõt amnhĩ xunhwỳ. Pa te ixte Ijaewjê nhĩpêx pyrà nẽ mẽ ho ixkra.

¹⁸Ã mẽ hkukamã ijamaxpêr anhỹr xà hkõt.

¹⁹Anhỹr o mẽ harênh jakamã nhũm ra mẽ hkwỳjaja mẽ higêt kot amnhĩ nhĩpêx kaga hpa nẽ hpãnhã Tĩrtũm kõt amnhĩ xunhwỳ. Jakamã kwa kêr pu mẽ axte ja nhĩjuk ri mẽ kãm mẽmoj tã karõ hkõt nẽ. Ja pix na mex.

²⁰Ãm ja pix kot puj mẽ kãm hã karõ nẽ hã kagà nẽ mẽ hwỳr kumẽ: Mẽ kot sãnti hã mẽ õ hkur nê kot puj mẽ hkurê. Nẽ mẽ kot mẽmo mry hpar nẽ hkamrô runh kêt rãhã hkur nê mẽ hkurê. Nẽ mẽ kot mẽmo mry kamrô kur nê mããnẽn mẽ hkurê. Nẽ mẽmyjaja kot amnhĩ prõ pix tãnopxar ã mẽ kãm karõ. Nẽ mẽnijaja haxwỳja kot amnhĩ mjên pix tãnopxar ã mẽ kãm karõ. — ãm ja pix kot puj mẽ kãm hã kagà nẽ mẽ kãm hã karõ.

²¹Mẽ panhĩgêjtjê mã finat Mojes kot ã mẽ kãm karõ anhỹrja na htem arĩ krĩ piitã hkõt ã mẽ kãm hã karõ anẽ. Mẽ panhõ arĩgromnu pê sap ã na htem arĩ ri Tĩrtũm kapêr o mẽ ahkre xà hã ixkre kamã ã mẽ kãm hã karõ anẽ. Anẽ.

Mẽ kot Ijaew kêt xwỳnhjê hwỳr kagà mẽnh ã mẽ harênh

Karatas 5.1

²²Hãmri nhũm mẽ Xiakre kapêr mar o hkrĩ. Jejus nhỹ hã mẽ ahkre ho mẽ pa xwỳnh maatijaja nẽ mẽ kot hkwỳjê jahkre xwỳnhjaja nẽ Kris kwỳjê piitã Xiakre kapêr ma nhũm ja mẽ kãm mex nẽ. Jakamã nhũm mẽ axpên mã: — Tôe. Nà ãm hãmri na Xiakre ã Ijaew kêt xwỳnhjê jarênh anẽ. Nà ja mex. Pu mẽ ã ãxiok nhõ xwỳnhjê mã ja hã kagà anẽ hãmri nẽ mẽ hwỳr kumẽ. Koja Pawre mẽ Panãpeja wa kupy nẽ ma akupỹm mẽ hwỳr o mõi nẽ mẽ kãm kugõ. E mẽ pahtõ kot puj mẽ ma wa hkõt mẽ hwỳr mõi? Anẽ. Hãmri nhũm mẽ kuma nẽ Siras mẽ Jut Pasapas wa kuta. Jejus kõt mẽ kot axpên to htõ nẽ

htõxjaja kot axpën mã hamẽ wa kot amnhĩ to mex xwýnh ã wa harẽnh jakamã nhũm mẽ ma Pawre mẽ Panãpe wa hkõt mõi kaxyw wa kuta.

²³Hãmri nẽ ãxiok kamã Kris kwý pẽ Ijaew kêt xwýnhjê kaxyw kagà nhĩpêx nẽ kamã ã mẽ kãm kapër anẽ nẽ mẽ kãm: Pa? ãxiok mẽ Sir mẽ Siris kamã Ijaew kêt xwýnhjaja? Xà mẽ amex? Mẽ ixpê Jejus kõt mẽ atõjaja na pa mẽ awýr kagàja nhĩpêx nẽ mẽ awýr kumẽ. Mẽ ixpê Jejus kõt mẽ kot amnhĩ xunhwýr xwýnhjê jahkre ho ixpa xwýnhjaja nẽ Jejus nhỹ hã mẽ ahkre ho mẽ pa xwýnh maatijaja pa mẽ awýr kumẽ.

²⁴Na xep ra ja rũm mẽ ixkwýjaja ma mẽ awýr mõi nẽ mẽmoj tã tanhmã mẽ amã karõ hto. Mẽ ate amnhĩ my kwýrýt kà jakàr nẽ amnepêm mẽ inhĩgêt Mojes kapër kõt amnhĩ nhĩpêx o apa hã mẽ amã karõ. Ka xep mẽ tee ri ja kukamã ajamaxpër. No mẽ pajaja na pa prem mẽ awýr mẽ rẽnh kêt nẽ. ãm amnhĩ krã hkõt na prem mẽ awýr mõi nẽ ã mẽ amã ja hã karõ anẽ.

²⁵Tã pa tee ri mẽ harẽnh ma nhũm ja mẽ ixpê omnuj týx nẽ. Jakamã na pa mẽ jar akuprõ nẽ mẽ akaxyw mẽ inhĩõja wa kuta. Wa kot ma Panãpe mẽ Pawre wa hkõt mẽ awýr wa mõi nẽ mẽ amã mẽ ixkapër jarẽnh kaxyw. Panãpe mẽ Pawreja mẽ inhmã wa hapê htýx.

²⁶Na hte mẽ amã Pahihti Jejus Kris kapër jarẽnh o pa kaxyw wa amnhĩ grõnh kõt mẽ amã harẽnh o pa.

²⁷Tã pa mẽ akupým mẽ awýr wa kumẽ nẽ wa hkõt mẽ pahtõ Jut mẽ Siras wa kumẽ. Mẽ ixte mẽ amã kagà kamã mẽ ixkapërja nhũm wa kot hprĩ hã mẽ amã harẽnh kaxyw pa mẽ wa hkõt mẽ awýr wa kumẽ.

²⁸⁻²⁹E ja pix nẽ kot paj mẽ akurê: Kêr ka mẽ sãnti hã mẽ õ hkur kêt nẽ. Nẽ mẽmo mry kamrõ kur kêt nẽ. Jao mẽmo mry pa nẽ hkamrõ runh kêt rãhã hkur kêt nẽ. Kamrõ runh pa nẽ rĩ kormã tanhmã ho nẽ aku. Nẽ kêr ka mẽ amyjaja amnhĩ prõ pix tãnopxar o apa. Nẽ mẽ anijaja ajaxwýja amnhĩ mjên pix tãnopxar o apa. E ãm ja pix kot paj mẽ amã hã karõ. Tĩrtũm Karõ kãm ja mex. Nẽ mẽ inhmã mããnẽn ja mex. Kot kaj mẽ ã amnhĩ nhĩpêx anhýr o ri apa nẽ amex nẽ apa. Tã ãm ja pix. Mẽ ixpê Jejus kwýjê jahkre xwýnhjê mẽ Jejus nhỹ hã mẽ ahkre xwýnh maatijê mẽ pa mẽ mẽ awýr kagàja nhĩpêx

ně kumě. E kêr ka mẽ amex ně akĩnh ně ri axpěn kôt apa. Ām ja pix na hapêx. Aně. Nhũm prem ã kagà kamã mẽ kãm mẽmoj tă karõ aně.

³⁰Hãmri ně Jut wa mẽ kãm kugõ ně ma ãxiok wỳr wa mẽ kumě nhũm wa mẽ ma akupỹm hwỳr o mỗ. Jut ně Siras ně Pawre ně Panãpeja nhũm wa mẽ ma akupỹm mẽ hwỳr o mẽ mỗ. Mỗõ hãmri ně mẽ hwỳr pôj. Hãmri ně Jejus kwỳjê ho akuprõ ně mẽ kãm kagàja gõ

³¹nhũm mẽ kupy ně kamã harẽ ně kuma. Kamã mẽ kot mẽ kãm mẽmoj tă karõ kamã harẽ ně kuma ně ỹ hã hkĩnh ně akupỹm tãm hamaxpěr.

³²Jut mẽ Siras wa kêp Tĩrtũm nhỹ hã kapěr o pa xwỳnh na pre wa. Jakamã na prem mẽ hwỳr mỗn pôj hãmri mẽ kãm tanhmã ujarěnh to ho pa. Mẽ kot Jejus kôt pix mã hamaxpěr o pa kaxyw mẽ kãm ujarěnh o pa ně mẽ kãm: — E kêr ka mẽ mãmri Jejus kôt amnhĩ nhĩpêx mex rãhã ho ri apa ně aa hkaga hkêt ně. Aně.

³³Hãmri ně mẽ hkôt ri pa hã apkati xohtô ně. Hãmri ně wa akupỹm Jerujarẽ hwỳr nojarêr mẽ mẽ kãm amnhĩ jarẽ nhũm mẽ wa kuma ně wa kãm: —Tôe. Nà wa mãmri ma akupỹm mỗ. Koja Tĩrtũm war apumunh mex ně ka wa ma akupỹm amex ně akà hkĩnh pê akwỳjê hwỳr akato. Aně.

³⁴Hãmri nhũm wa nojarêr tă nhũm Siras tanhmã hamaxpěr to ně hitôt ně mẽ kuri arĩk nhũm Jut Pasapas pix ma akupỹm hkwỳjê kot mẽ hwỳr wa mẽnh xwỳnhjê hwỳr mỗ.

³⁵Hãmri nhũm Pawre mẽ Panãpe wa Siras pyrà ně kormã ãxiok kamã pa. Hãmri ně Jejus kôt mẽ htõ hkwỳjê mẽ pimràatã mẽ ahkre ho pa. Tĩrtũm kapěr o mẽ hkôt mẽ ahkre ho pa.

Pawre mẽ Panãpe wa kot axpěn pê pikjêr ã wa harěnh

Atre 13.13; Korosẽ 4.10

³⁶Hãmri nhũm Pawre mẽ Panãpe war arĩ mẽ hkôt ri pa hã apkati xohtô ně. Tã nhũm Pawre hamaxpěr ně Panãpe mã: —Kwa ma pu ma akupỹm ra pahte krĩ hkwỳ hkôt mẽ kãm Jejus jarěnh o papa xwỳnhjê hkôt akupỹm mỗ. Pu ma mẽ hwỳr mỗ ně Jejus kôt pahtõ ně pahtõxjê kot tanhmã ri amnhĩ nhĩpêx to hã mẽ omu. Aně.

³⁷Hāmri nhūm kuma nē kām: —Tôe. Nà pu ma mō. Nom kêr pu ma amnhĩ kôt Juãw Makre ho mō kê axte pahto ajuta ho pahkôt mō. Anē.

³⁸Hāmri nhūm Pawre tee ri kuma nhūm ja kêp omnuj nē nhūm kām: —Tk. Kwa na pre pahkôt pa htã Pãpir kamã tanhmã hamaxpër to nē pahkaga nē ma akupỹm Jerujarẽ hwỳr mō. Jakamã kwarĩ koja axte pahkôt mōr kêt nē. Anē.

³⁹Hāmri nhūm Panãpe tee ri hã hihtỳx no nhūm kêp hkaga kumrẽx. Jakamã nhūm wa ja hã axpẽn pê axkjê nē ma ahpỹnhã mō. Nhūm Panãpe amnhĩ kôt Juãw Makre ho mō nē wa ma pàr kãm gô hipôk pê Sipre hwỳr wa mō.

⁴⁰Nhūm Pawre axtem amnhĩ kôt Siras wỳ nē ma wa mō. Hāmri nē wa nojarêt nhūm Jejus kôt wa htōjaja wa ho Tĩrtũm wỳ nē kãm: —Pa Tĩrtũm. E koja Pawre mẽ Siras wa ma krĩ hkwỹ hkôt mẽ kãm akapër jarẽnh o ri wa pa. Jakamã kêr ka wa htãnopxar o ri wa hkôt apa. Anē. Hāmri nhūm wa kato nē ma krĩ hkôt ri Jejus kapër o mẽ ahkre ho wa pa.

⁴¹Wa ma pyka pê Sir mẽ Siris kôt Jejus kôt mẽ htō nē mẽ htōxjê pumunh nē Jejus kôt mẽ ho mẽ hihtỳx o wa pa kaxyw.

Atre 16

Ximotre kot Pawre mẽ Siras wa hkôt ri pa hã harẽnh

Wam Ximotre 1.1-2; Sikũn Ximotre 1.5; Piripos 2.19-22

¹⁻³Tã nhūm Pawre mẽ Siras wa ma akupỹm krĩ pê Tepe hwỳr wa mō nē hwỳr pøj nē hpãnhã kurũm ma Risti hwỳr mō. Hāmri nē wa hwỳr pøj nē kamã Ximotre pumu. Ximotre na pre ra katorxà pyrà nē Jejus kôt amnhĩ xãm nhūm mẽ kot Jejus kôt axpẽn to htō xwỳnhjaja kãm hapê nē. Nē kot Jejus kapër kôt amnhĩ nhĩpêx mex o pa hã axpẽn mã harẽ. Krĩ pê Risti mẽ Ikõn kamã nhūm prem ã axpẽn mã Ximotre jarẽnh anhỹr o pa. Jakamã nhūm Pawre mẽ Siras wa mō nē mẽ hwỳr pøj nē Ximotre kot amnhĩ nhĩpêx ã omu nhūm Pawre kãm war amnhĩ kôt o mōr prãm nē. Nom Ximotre hkamrô pihkàr na pre. Katorxà kêp Ijaew nhūm hipêxà kêp Gres jakamã nhūm ã Ximotre hkamrô pihkàr anē. Nhūm Ijaew kot katorxà hkôt kêp Ijaew ã

omunh jakamã nhũm Pawre hamaxpēr nē mẽ kaxyw kêp my kwyrýt kà krãhta nē arĩ kormã mẽ hwỳr amnhĩ kôt o mō.

⁴Hãmri nē mẽ ma krĩ hkwỳ hkôt mō. Mōō nē Ijaew kêt xwỳnhjaja ra kot amnhĩ kaxyw Jejus kôt hamaxpēr xwỳnhjê jahkre ho mẽ hkôt pa. Ra Jerujarẽ kãm mẽ kot Jejus kwỳjê jahkre ho pa xwỳnhjê mẽ Jejus nhỹ hã mẽ ahkre xwỳnh maatijaja mẽ kot mẽ kãm mẽmoj tã karōta nhũm mẽ ma mẽ kãm harēnh o ri mẽ hkôt pa.

⁵Hãmri nhũm mẽ kuma nē ra Jejus kôt amnhĩ nhĩpêx mex o mō. Hãmri nhũm apkati mẽ krĩ nhõ xwỳnh kwỳjaja mẽ uràk nē Jejus kôt amnhĩ xunhwỳ. Jakamã nhũm mẽ ra ohtô rax o mō.

Pawre tanhmã hpimtir to hã harēnh

Rômãn 15.18-21

⁶Tã nhũm Pawre mẽ Siras mẽ Ximotre mẽ ma pyka pê As wỳr nojarêt. Mẽ kot mẽ kãm tanhmã Jejus jarēnh to ho pa kaxyw mẽ hwỳr nojarêt tã nhũm Tĩrtũm Karõ kormã mẽ nê mẽ hkurê. Jakamã nhũm mẽ hpãnhã ma pyka hkwỳ pê Prik mẽ Karatas wa hkôt pa. Ixpê Rukre na pa pre mẽ hã ajêt nē ma mẽ hkôt ixpa ho ixpa.

⁷Hãmri nē mẽ pyka pê Mĩs ã mō nē hpãnhã ma Pitĩn wỳr inhmōr mã tã no nhũm Tĩrtũm Karõ axte kê mẽ nê mẽ ixkurê.

⁸Jakamã pa mẽ arĩ Mĩs jakàr ã mō nē gô xujanãr mỳ ri krĩ pê Tôx wỳr pøj.

⁹Tã nhũm kamàt pa mẽ ixpiitã gōr nē inhĩkwỹ nhũm Pawre tanhmã hpimtir to. Nhũm xep pika pê Masetōn nhõ xwỳnhja mẽ amnhĩ wỳr hwỳr kãm hihtỳx o xa nhũm hprĩ hã omu nē kapēr ma. Nhũm xep pre kãm: —Pa Pawre? Kwa amnẽ Masetōn wỳr mẽ ixwỳr mō nē tanhmã mẽ ijahkre hto. Anẽ.

¹⁰Hãmri nhũm Pawre hkrãkato nē mẽ inhmã hpimtir jarẽ. Pa mẽ kuma nē axpẽn mã: —Tô kwa tokyx pu mẽ hwỳr. Tĩrtũm kot mẽ hwỳr mẽ parēnh kênã. E pu mẽ ma mẽ hwỳr mō nē mẽ kãm Jejus jarēnh o mẽ ahkre. Anẽ. Hãmri nē amnhĩ to akuprõ nē mẽ hwỳr inhnojarêt kurê kumrẽx.

Ritre kot Jejus kôt amnhĩ xãm ã harēnh

Piripos 1.1

¹¹Hāmri pa mẽ ma Masetõn wỳr mō. Tôx rûm ma pàr kãm hwỳr mō. Hāmri nẽ gô nhĩpôk pê Samõtas wỳr pøj nhũm mẽ hã pàr nhô. Hāmri nhũm apkati pa mẽ axte mō nẽ Masetõn kamã krĩ pê Nẽap wỳr pøj.

¹²Hāmri nẽ pàr rûm ija pøj nẽ hpãnhã kurũm hamũ krĩ pê Piripos wỳr ixpar o mō. Piriposja Masetõn kamã krĩ maati na. Rõm nhõ xwỳnhjaja na prem ho kato. Jakamã pa prem ma hwỳr mō nẽ pøj nẽ tokyx axte kurũm nhỹhỹm inhmõr kêt nẽ.

¹³Hāmri nhũm sap kato pa mẽ axpẽn mã: —Kwa pyhti mỳri mãn hte Ijaewjaja axpẽn wỳr akuprõ nẽ Tĩrtũm mã amnhĩ jarẽnh o hkrĩ nà. E kwa pu mẽ hwỳr nẽ gô mỳri mẽ hapêr o ri papa. Anẽ. Hāmri nẽ ma hwỳr mra nẽ mẽ hapêr o ri ixpa nhũm ãm mẽni pixjaja axpẽn wỳr akuprõ. Pa mẽ omu nẽ mẽ kuri ixkrĩ nẽ mẽ kãm Jejus kapêr jarẽnh o mẽ ahkre o ixkrĩ.

¹⁴Nhũm mẽ kot mẽ inhmar o hkrĩ xwỳnhjê hõ pê Ritreja. Krĩ pê Xijaxir nhõ xwỳnh na pre. Nẽ kêp kupêxê mex o wẽnê xwỳnh. Na pre hte kãm Tĩrtũm prãm o pa. Jakamã nhũm Pawre kot mẽ ahkre ho ỹrja rôm nhũm Pahihti Jejus tanhmã Ritre hkrã hto nhũm hprĩ hã Pawre kapêr mar tỳx nẽ.

¹⁵Hāmri nẽ amnhĩ kaxyw Jejus kôt hamaxpêr nẽ hkôt amnhĩ xãm kurê kumrêx. Ôrkwỹ kamã hkwỳjê mẽ nhũm mẽ hkôt amnhĩ xunhwỳr pa. Jakamã pa mẽ kêp Jejus kwỳ hã mẽ hkrã kumrã. Mẽ piitã mẽ kot mẽ kêp Tĩrtũm kra hã mẽ omunh kaxyw. Hāmri nhũm Ritre amnhĩ kôt mẽ ixwỳ nẽ mẽ inhmã: —An kot kaj mẽ ixte Jejus kôt amnhĩ xãm tỳx ã ixpumu hã kot kaj mẽ ma ixkôt mō nẽ hpãnhã inhõrkwỹ kamã pøj nẽ apa. Anẽ. Pa mẽ kuma nẽ ma hkôt mō.

Mẽ kot Pawre mẽ Siras wa haxàr ã mẽ harẽnh

Makre 1.23-26; 1.34

¹⁶Tã nhũm arĩgro hõ hã pa mẽ Tĩrtũm mã amnhĩ jarẽnh kaxyw axte pyhti mỳri mẽ pikuprõnh xàja wỳr mō. Hāmri nẽ pry kamã mẽ kãm àpênh xwỳnh nija pumu. Ra mẽkarõmnuti kot tanhmã hkrã hto nhũm ỹ hã àhpumunh tỳx xwỳnhja. Nhũm hte mẽkarõmnuti nhỹ hã mẽ kãm mẽmo hkukamã tanhmã

ujarēnh to ho pa. Jakamã nhũm ò patrãwjaja kukwak ri ujamýnh rũnh pê hkĩnh nẽ pa.

¹⁷Jakamã pa mẽ mō nhũm nija mẽ ixpumu nẽ mẽ ixtã ajêt nẽ ma mẽ ixkôt mō. Hãmri nẽ mẽ kãm mẽ ijarēnh o mẽ ixkôt mō nẽ mẽ kãm: —Xê mẽ mran jajê pumu. Na htem Tĩrtũm maati mã tanhmã amnhĩ nhĩpêx mex to ho pa. Tĩrtũm kot mẽ ate amnhĩ tomnuj pê tanhmã mẽ apytâr to hã mẽ amã ujarēnh kaxyw na mẽ awỳr mra. Anẽ.

¹⁸Nẽ ãm xatã mẽ kãm mẽ ijarēnh o mẽ ixkôt paja o ra hã apkati xohtô nẽ. Tã nhũm Pawre ra kãm mar kaga nẽ nê mẽkarõmnuti mã kapêr nẽ kãm: —Tk. Kwa kêp akato nẽ ma tẽ. Pa Jejus Kris nhỹ hã amã ixkapêr ka inhma nẽ kêp akato nẽ ma atẽm kurê kumrêx. Anẽ. Hãmri nhũm kuma nẽ kêp kato nhũm akupỹm tãm hkrã.

¹⁹Jakamã nhũm ò patrãwjaja tee ri ja hã omu nẽ gryk tỳx nẽ axpẽn mã: —Kwa ra mẽkarõmnutijaja kêp kator jakamã koja axte mẽmoj kukamã tanhmã ujarēnh to hkêt nẽ. Pu mẽ kukwak ri axte paxujamýnh kêt nẽ. Anẽ. Hãmri nẽ Pawre mẽ Siras wa kamã gryk tỳx nẽ. Hãmri nẽ wa unê nẽ ma mẽ kot axpẽn mar xà hã ixkre hwỳr wa hkjênh o tẽ

²⁰nẽ mẽ kot mẽ ho amnhĩptâr xwýnhjê mã tanhmã wa ho hêx to nẽ mẽ kãm: —Kwa mẽ amnẽ Ijaewja wa omu. Na hte wa mẽ panhõ krĩ kamã hêx pix o pa nhũm mẽ tee ri wa kapêr ma nẽ wa kamã gryk tỳx nẽ.

²¹Mẽ ixte amnhĩ nhĩpêx te kot axpẽn pyræk kêt tã nhũm wa mẽ kot amnhĩ nhĩpêx o mẽ pajahkre kaxyw nhỹhỹnh mẽ pahwỳr mō. Nom mẽ pahpê Rõm nhõ xwýnhjaja axtem mẽ pahte amnhĩ nhĩpêx kênã kot pu kêt wa kuma nẽ wa kapêr kôt amnhĩ nhĩpêx. Anẽ.

²²Hãmri nhũm mẽ kuma nẽ piitã wa kamã gryk tỳx nẽ. Hãmri nhũm mẽ ho amnhĩptâr xwýnhjaja wa kêp wa ê kaxôn h o hkapa nẽ wa hã mẽ ò pōristi mã amýnê nẽ mẽ kãm: —E mẽ ma wa o tẽ nẽ mẽ htak xà ho wa htak. Anẽ.

²³Hāmri nhūm mẽ kuma nẽ ma wa o tẽ nẽ wa htak rax nẽ. Hāmri nẽ wa haxà nẽ mẽ hagjênh xà jamār xwỳnh mã kãm: —E kêr ka ja wa omunh mex nẽ kê wa kator kêt nẽ. Anẽ.

²⁴Hāmri nhūm mẽ kuma nẽ wa o tẽ nẽ ixkre jatur xà kamã wa haxà nẽ wa kator pymaj hamẽ wa htem pĩ jaxà nẽ ho htỳx nhūm wa arĩ hte tỳx nẽ nhỹ.

²⁵Tã nhūm kamàt. Nẽ kôt ã kamàt nhūm wa Tĩrtũm mã amnhĩ jarẽ nẽ mex o mex ã wa grer o wa nhỹ nhūm wa uràk nẽ mẽ hagjênh xwỳnhjaja wa mar o hkrĩ.

²⁶Puh nhūm pyka mẽ kãm htertet tỳx nẽ nhūm mẽ hã ixkreja amnhĩ to àpêr tỳx nẽ amnhĩ kahê xà rênh pa. Nhūm mẽ hagjênh xwỳnhjê kaxpre xà piitã mẽ nê pirênh pa.

²⁷Hāmri nhūm mẽ hamār o kuhê xwỳnhja pika tertet kamã ama nẽ hkrākato. Hāmri nẽ mẽ hã ixkre jakwakre kahê xà rênh parja pumu nẽ mẽ hagjênh xwỳnhjaja hapôx par ã mẽ hkamnhĩx nẽ tee ri amnhĩ kukamã hamaxpêr. Hāmri nẽ pahi kot mẽ hã hpĩr pymaj õ wapo kapa nẽ ra tãm kot ho amnhĩ pĩr kaxyw.

²⁸Hāmri nhūm Pawre tee ri ja hã omu nẽ kàx pê kãm amỹra nẽ kãm: —Kwa amnhĩ pĩr kêt nẽ. Ot pa mẽ arĩ ixpiitã ixkuhê. Na pa mẽ ixtõ ixkator nẽ ixprôt kêt nẽ. Anẽ.

²⁹Hāmri nhūm kuma nẽ kanê hã ahwỳ nẽ kuwy nẽ mẽ hwỳr axà nẽ mẽ piitã mẽ omu. Hāmri nẽ Pawre mẽ Sirasja wa omu nẽ wa hwỳr kãm ma ho htertet o tẽ. Hāmri nẽ wa hã hpijaàm kaxyw wa kutã tẽm nẽ hkõnkrã ho nhỹ.

³⁰Hāmri nẽ kànhmã xa nẽ wa ho kato nẽ ixkre kapem wa o xa nẽ wa kãm: —Kwa tanhmã kot pa amnhĩ nhĩpêx to kê Tĩrtũm war apyrà nẽ ixte amnhĩ tomnuj pê ixpytà? Anẽ.

³¹Hāmri nhūm wa kãm: —Nà kot kaj amnhĩ kaxyw Jejus Kris kôt ajamaxpêr nẽ hkôt amnhĩ xãm nhūm Tĩrtũm ja hã apumu nẽ amnhĩ katut kôt ate amnhĩ tomnuj piitã rênh pa. Nhūm anhõrkwỹ kamã akwỳjaja apyrà nẽ Jejus kôt amnhĩ xunhwỳ nhūm ã mẽ hipêx anẽ. Anẽ.

³²Hāmri nē wa ma hkôt ōrkwỹ hwỳr tē nē hprĩ hã mē kãm Tĩrtũm kapēr jarē nhũm mē wa mar o hkrĩ.

³³Hāmri nhũm mē hagiēnh xà jamār xwỳnhja wa kãm wa htak xà kuhõ. Kormã kamàt kô hkwỳ kamã wa kãm kuhõ nē hkane. Hāmri nhũm wa mē kot Jejus kôt amnhĩ xunhwỳr par ã mē omu nē mē hkrã kumrã. Mē hamār xwỳnh mē hkwỳjê mē hkrã kumrãr pa.

³⁴Hāmri nhũm mē kot amnhĩ kaxyw Tĩrtũm kôt hamaxpēr jakamã piitã hkĩnh nē. Hāmri nhũm mē hamār xwỳnhja ōrkwỹ hwỳr Pawre mē Siras wa o tē nē wa kãm õ nhũm wa apku nhũm ma akupỹm mē hagiēnh xà hwỳr wa o tē nē akupỹm wa haxà.

Mē kot Pawre mē Siras wa kãm urer ã mē harēnh

Atre 22.25-29

³⁵Hāmri nhũm apkati nhũm krĩ pytār xwỳnhjaja mē õ pōristi mã anē nhũm mē hagiēnh jamār xwỳnh wỳr tē nē kãm: —E na mē papytār xwỳnhjaja ate Pawre mē Siras wa kãm anhũrer nhũm wa mãmri ma akupỹm htēm kaxyw hã karõ. Anē.

³⁶Hāmri nhũm mē kuma nē wa hwỳr axà nē wa kãm: —E na krĩ pytār xwỳnhjaja ixte war akator kaxyw war atã inhmã karõ. Jakamã e wa mãmri axàmnhix ma mõ. Anē.

³⁷Hāmri nhũm Pawre kãm: —Nà wa ixte tanhmã amnhĩ tomnuj to hkêt tã nhũm mē kot wa ixpynēnh nē wa ixtak. Wa ijaxwỳja wa ixpê Rõm nhõ xwỳnh tã nhũm prem axtem nē mē piitã mē noo mã wa ixtak nē wa ijaxà. Mē kot amarĩ Rõm nhõ xwỳnh tak nē mē hagiēnh kêt tã nhũm mē ã mē noo mã ã wa inhĩpêx anē. Kormã wa ixte tanhmã amnhĩ tã ixaprãr to hkêt tã nhũm mē ã wa inhĩpêx anē. Jakamã kwarĩ kot kaj mē no hkàx ã wa ixkator kêt nē. Kê mē kot wa ijaxàr xwỳnhjaja tãm man mra nē wa ixkator pa war arĩ ma mõ. Anē.

³⁸Hāmri nhũm pōristija kuma nē ma akupỹm mē hwỳr mra nē mē kãm wa kapēr jarē. Hāmri nhũm mē tee ri mē uràn wa kêp Rõm nhõ xwỳnh ã wa harēnh ma nē kãm ma htỳx nē.

³⁹Hāmri nē ma wa hwỳr tē nē wa hwỳr axà nē wa kām: —Pa? E māmri war akato nē axàmnhix ma mō. Na pa prem war anhîpêx kati rax nē. Tã kêr ka wa axte ja mã ajamaxpêr hkêt nē. Kê ja âm jar mē pakamã hapêx. Anē. Hāmri nē wa kator nē wa kām: —E kwa wa mē inhō krī pê akato nē ma nhỹhỹm mō. Anē.

⁴⁰Hāmri nhũm wa kuma nē kato nē ma akupỹm Ritre nhõrkwỹ hwỳr wa tē. Hāmri nē Jejus kôt wa mē htõjê pumu nē wa mē kām amnhĩ jarē nē mē kām: —E kot paj hāmri wa mã mō. Nom kêr ka mē arĩ Jejus Kris kôt amnhĩ nhîpêx mex rãhã ho ri apa nē aa hkaga hkêt nē. Anē. Hāmri nē wa mē kurũm kato nē ma krī hõ hwỳr wa mō.

Atre 17

Tesarõn kamã mē kot wa kamã gryk ã mē harēnh

Wam Tesarõn 1.1; 2.13-14

¹⁻²Tã nhũm Pawre mē Sirasja wa ma krī hkwỳ hkôt pa. Piripos rũm ma Apiporip mē Apôrõn kôt wa mō hāmri nē ra Tesarõn wỳr wa pøj. Na pre hte Pawre nhỹri pøj nē Ijaew nhõ Tĩrtũm kapêr o mē ahkre xà hã ixkre hwỳr agjê nē kamã mē kãm Jejus kapêr jarēnh o kuhê. Jakamã nhũm wa mō nē Tesarõn wỳr pøj nē ixkre hwỳr mē hwỳr tē nē mē kãm ujarēnh o xa. Nē mē kãm ujarēnh o hã arĩgromnu pê sap o axkrunēpxi.

³Nē hprĩ hã mē kãm tanhmã Tĩrtũm kapêr jarēnh to nē mē kãm: —Nà Tĩrtũm kapêr ã kagà htũm kot mē pakaxyw âm xwỳnh jarēnh. Amnhĩ xà htỳx kamã hamak kãm htyk hāmri nē akupỹm htĩr ã nhũm kot hkukamã harēnh. Tã na pre Jejusja ã amnhĩ nhîpêx anē. Tãm kêp Krisja. Tĩrtũm kot mē pakaxyw âm xwỳnhhta na. Anē.

⁴Hāmri nhũm mē hkwỳja kuma nē wa hkôt hamaxpêr nē wa uràk nē Jejus kôt amnhĩ xunhwỳ. Ijaew kwỳjê nē Ijaew kêt xwỳnh kwỳjaja nē mēni kot amnhĩ to rũnh xwỳnh kwỳjaja nhũm mē ohtô nē amnhĩ kaxyw Jejus kôt hamaxpêr nē hkôt amnhĩ xunhwỳ.

⁵Tã nhũm Ijaew kwỳjaja tee ri hkwỳ kot wa hkôt amnhĩ xunhwỳr ã mē omu nē mē hã Pawre mē Siras wa kamã gryk tỳx nē. Hāmri nē ma mra nē wa

kaxyw mẽ kot amnhĩ tomnuj tỳx xwỳnh kwỳjê ho akuprõ nẽ mẽ kãm wa hã amỹnê. Jakamã nhũm mẽ ma kapêr punuj pê wa hapêr o ri mra nhũm mẽ piitã mẽ omu nẽ mẽ kuma. Hãmri nhũm mẽ wa hapêr o ra Jasãw nhõrkwỹ hwỳr mra. Nẽ mẽ kot Pawre mẽ Siras pynênh nẽ ma mẽ utàr xwỳnhjê hwỳr wa o htêm kaxyw mẽ kêp kahê xà mẽ nẽ mẽ hwỳr agjê.

⁶Hãmri nẽ tee ri õrkwỹ kamã wa hapêr nhũm wa kamã amrakati. Jakamã nhũm mẽ Jasãw mẽ kot Jejus kôt axpên to htõ xwỳnh kwỳjê pynê nẽ ma mẽ kot mẽ ho amnhĩptàr xwỳnhjê hwỳr mẽ o mra. Hãmri nẽ mẽ kãm tanhmã Pawre mẽ Siras wa ho hêx to. ãm kapêr punuj kãm kàx pê mẽ kãm wa harẽ nẽ mẽ kãm: —Kwa na hte Pawre mẽ Siras wa pyka piitã hkôt mẽ kãm ri mẽmoj to hêx o pa. Tã wa ra mẽ panhõ krĩ hwỳr pøj nẽ jar mẽ pamã ri tanhmã hêx to ho ri mẽ pahkôt pa.

⁷Jasãw nhõrkwỹ kamã na pre wa pøj nhũm amnhĩ wỳr wa kuwỳ. Na hte wa hkôt mẽ hamaxpêr xwỳnhjaja pahшти Sesti kapêr kwỳm ri kuhpa hã kapêr o pa nẽ axtem nẽ mẽõ pahi pê “Jesús” anhỹr xwỳnhja kapêr kôt amnhĩ nhĩpêx o pa. Anẽ.

⁸Hãmri nhũm mẽ kot mẽ ho amnhĩptàr xwỳnhjê mẽ krĩ nhõ xwỳnhjaja mẽ kuma nẽ gryk tỳx kumrêx.

⁹Hãmri nẽ Jasãw mã kãm: —E kot paj mẽ apê mẽ akàxpore hkwỳ jamỳ. Ka mẽ ajapøj nẽ ma mẽ panê Pawre mẽ Siras wa hano nhũm wa kato nẽ ma mõi pa rĩ akupỹm mẽ amã kugõ. Anẽ. Hãmri nẽ mẽ kêp mẽ hikàxpore hkwỳ jamỳ.

Pawre mẽ Siras kot Perej wỳr mõi ã wa harênh

¹⁰Tã nhũm ra kamàt nhũm mẽ kot Jejus kôt axpên to htõjaja hãmri Pawre mẽ Sirasja wa ma krĩ pê Perej wỳr wa kumẽ. Hãmri nhũm wa kato nẽ ma hwỳr mõi nẽ hwỳr pøj. Hãmri nẽ Ijaew nhõ Tĩrtũm kapêr o mẽ ahkre xà hã ixkre hwỳr htêm kurê kumrêx nẽ wa axà.

¹¹Perej kamã Ijaew na pre te mẽ kot Tesarõn kamã Ijaew pyræk kêt nẽ. Mẽ kurom mẽ kãm Tĩrtũm kapêr mar prãm nẽ. Jakamã nhũm pre Pawre mẽ Siras Tĩrtũm kapêr o mẽ ahkre ho pa. Apkati mẽ mẽ ahkre mex o pa nhũm

mě wa kuma nē hkīnh nē. Nē Tirtūm kapēr ā kagà htūm kamā wa kot mě ahkreta japēr nē kamā omu nē axpēn mā wa harēnh o: —Nà ām hāmri na wa ā Tirtūm kapēr o mě pajahkre anē. Tirtūm kapēr ā kagà htūm hkôt na hte wa mě pajahkre. Anē.

¹²Hāmri nē ohtô nē Jejus kôt amnhĩ xunhwỳ. Ijaew kwỳ nē Ijaew kêt xwỳnh kwỳ nē mēni kot amnhĩ to rūnh xwỳnhjaja nhūm mě ohtô nē Jejus kôt amnhĩ xunhwỳ.

¹³Tā nhūm Tesarōn kām Ijaewjaja Pawre jarēnh ma. Kot Perej nhõ xwỳnhjê mā Tirtūm kapēr jarēnh o pa hā harēnh ma. Hāmri nē ma mě hwỳr mra nē mě kām tanhmā ho hēx to nhūm krī nhõ xwỳnhjaja mě kuma nē ra Pawre kamā gryk tỳx nē.

¹⁴Jakamā nhūm Jejus kôt mě htōjaja mě harēnh ma nē mě umaj Pawre kator nē ma gô xujanār wỳr o mō. No nhūm Siras mě Ximotre wa Perej kamā mě kuri arīk.

¹⁵Hāmri nhūm mě hkwỳjaja ma Pawre o mō. Ma krī pē Atenas wỳr o mō. Hāmri nē hwỳr o pōj nē kamā kure. Hāmri nē ra akupỹm Perej wỳr nojarêt nhūm Pawre mě kām: —E kêr ka mě ma akupỹm mō nē Siras mě Ximotre wa kām ijarē kê war amnhĩm nojarêt nē tokyx man ixkôt wa mō. Anē.

Pawre kot Atenas nhõ xwỳnhjê mā kapēr ā harēnh

Rōmān 1.18-20

¹⁶Tā nhūm Pawreja kormā Atenas kamā pa. Siras mě Ximotre wa kamā hamak o ri kormā kamā mě kot amnhĩ nhīpēx ā mě omunh o pa. Na pre Atenas nhõ xwỳnhjaja sānti ho ohtô rax nē mě õ krī kamā unhwỳ nhūm Pawre ri omunh o ri kuhê ho pa. Na pre htem ahpỹnhā mēmo karō nhīpējja o te Tirtūm nhīpēx pyrà nē kutā hkōn krā ho rôrôk nē hkrī nē kām mex o mex ā harēnh o pa. Hāmri nhūm Pawre tee ri ja hā mě omunh o ri mě hkôt pa nē hkaprī nē.

¹⁷Hāmri nē ma amnhĩ kwỳjê nhõ Tirtūm kapēr o mě ahkre xà hā ixkre hwỳr pa nē kamā mě ahkre ho kuhê. Ijaewjê mě Ijaew kêt xwỳnh kot Tirtūm ā hpijaàm xwỳnhjê mā nhūm Tirtūm kapēr jarēnh o kuhê. Nē apkati mě mě

kot mẽmoj to wênê xà hwỳr mra nê mẽ ujaprôr xwỳnhjê mã Tĩrtũm kapěr jarēnh o kuhê.

18Hãmri nhũm mẽ mar o pa. Atenas nhõ xwỳnhjaja na prem axpēn kôt amnhĩ nhĩpêx o pa hkêt nê. Mẽ hkwỳjaja kêp Epikure hkôt amnhĩ nhĩpêx xwỳnh. Nê mẽ hkwỳjaja axtem kêp Etok kôt amnhĩ nhĩpêx xwỳnh. Hãmri nhũm Pawre mẽ kãm Jejus kot tanhmã mẽ panê amnhĩ nhĩpêx to hã harēnh o pa nê akupỹm htĩr ã harēnh o pa. Hãmri nhũm mẽ tee ri kuma nê hã axpēn kukjêr o kuhê nê axpēn mã: —Tk. Kwa mo na hte myti ata harēnh o pa? Anê. Nhũm mẽ hkwỳja mẽ kãm: —Ko. Axtem mẽpahpãm õ na hte tanhmã harēnh to. Anê.

19-21Atenas nhõ xwỳnhjê mẽ axtem krĩ hõ nhõ xwỳnhjaja na prem kãm mẽ ujarēnh nyw mar prãm nê. Jakamã nhũm prem mẽmoj jarēnh nyw ma hãmri nê ãm axpēn mã harēnh pix o ri pa. Tã ra Pawre xujarēnh nyw ma nê ma amnhĩ kôt mẽ kot axpēn mar xà hã ixkre hwỳr o tẽ. Ixkre pê Areopja wỳr nhũm prem amnhĩ kôt o tẽ nê kãm: —E kwa aprĩ hã mẽ inhmã ate mẽmo jarēnh nywta jarē pa mẽ ama. Mẽ inhmã mar prãm. Anê.

22Hãmri nhũm mẽ kuma nê mẽ kãm ujarēnh o xa. Mẽ kot axpēn mar xà hã ixkre kamã Atenas nhõ xwỳnhjê mã awjarē nê mẽ kãm: —E nà na ka htem anhõ mẽmo karõ nhĩpêx xohtõta ã apijaàm pê kãm amnhĩ jagrer o ri apa. Pa hte ja hã mẽ apumunh o mẽ akôt ixpa.

23Na pa ra mẽ anhõ sãnti piitã hkôt omunh o ri ixpa nê o mũj hõ kuhê xà kaprỳja wỳr ixkato. Nhũm himõk ã mẽmo karõ nhĩpêx amrakati nom à hã kagà kot: MỄPAHPÃM PUMUNH KÊT KUHÊ XÀ NA JA ã mẽ ate hã kagà kot anhỹr. Mẽ ate omunh kêt tã ka htem arĩ hã apijaàm o ri apa. No pa na ixte mẽhõja jarēnh mar mex. Tã kot paj mẽ amã harê ka mẽ inhma.

24—Mễpahpãm mẽ ate omunh kêt ã amnhĩ jarēnhhta Tĩrtũm na. Tãm na pre pyka ho kato nê kamã mẽmoj piitã ho kator pa. Gõ ho kato nê mry ho kato nê panhĩ ho kato. ãm mẽmoj piitã ho kator par kumrêx. Na hte pika kamã nê kaxkwa kamã mẽmoj piitã ho amnhĩptàr mex rãhã ho pa. Jakamã mẽmo

kaxyw kot puj mẽ jar kãm òrkwỹ nhĩpêx? Tãm kêp mẽmoj piitã ho kator xwỳnh jakamã kot mẽmoj to presija hkêt.

²⁵Kêp mẽmoj piitã hpãm jakamã mẽmoj piitã ò na. Jakamã tanhmã kot pu wem amnhĩ to nẽ kãm mẽmoj gõ? Tãm kot mẽmoj piitã ho kator nẽ ho htĩr nẽ kot mẽmoj piitã òr kênã kot puj kêt mẽ amnhĩ pyrã nẽ kãm mẽmoj gõ.

²⁶Na pre mẽ pahkukamã ahpỹnhã mẽ pahpiitã mẽ papapxà jarẽ nẽ mẽ pakator hã arĩgro jarẽ. Na pre mẽ pahpãm kot wa Atãwja nhĩpêx. Jakamã nhũm Atãw kêp mẽ pahpiitã mẽ pahpàr krax.

²⁷—Tã mẽmo kaxyw na pre ã Tĩrtũm mẽ panhĩpêx mex anẽ? Nà ãm mẽ pahte amnhĩ kaxyw hkôt pajamaxpêr nẽ hkôt amnhĩ xunhwỳr kaxyw na pre mẽ panhĩpêx. Ja mẽ pahpê hihtỳx kêt. Kojã mẽhõ kãm Tĩrtũm prãm nhũm amnhĩ tã omunh kurê kumrêx.

²⁸—Nẽ Tĩrtũm pix kukwak ri na pu htem pahtĩr nẽ tanhmã amnhĩ nhĩpêx to ho ri papa. Mẽ akwỳ kot kagà jahkre xwỳnhja na pre ja hã kagà nẽ hã kagà ho: “Mẽ pahpê mẽpahpãm kra na pu htem papa.” Anẽ. ã hã kagà kot anhỹr.

²⁹—Tã ka prem amnhĩm mẽmo karõ nhĩpêx. òr o hkwỳ nhĩpêx nẽ prat o hkwỳ nhĩpêx nẽ kên o hkwỳ nhĩpêx. Hãmri nẽ hipêx pa nẽ ho mẽpahpãm ã harẽ nẽ ri hã apijaàm o apa. No mẽ ãm amnhĩ krã hkôt mẽ ate hipêx. Tĩrtũm te kot ja pyræk kêt.

³⁰—Amnepêp mẽ pa xwỳnhjaja na prem mẽ apyrã nẽ ã mẽmoj nhĩpêx anhỹr o pa nhũm Tĩrtũm ja hã mẽ omu nẽ ãm mẽ omu nẽ hã tanhmã mẽ hipêx to hkêt nẽ. Kormã mẽ kot kapêr mar kêt jakamã nhũm pre ja hã mẽ omu nẽ ãm mẽ omu. Tã na ra mẽ pahte mẽmo karõ nhĩpêx o mẽpahpãm nẽ mẽ pamã kapêr. Mẽ pahte hpãnhã amnhĩ kaxyw ãm kôt pix mã pajamaxpêr o papaja na kãm hprãm.

³¹Kojã nhỹrmã tanhmã mẽ pahte amnhĩ nhĩpêx to ho papa hã mẽ pahpumunh kôt tanhmã mẽ pajarênh to. Nẽ amnhĩ ri mẽ htĩr tũm nẽ mẽ pa ho pa xwỳnhjê jarẽ nẽ amnhĩ ri mẽ pa hkêt xwỳnhjê jarẽ. Na pre ra ã mẽ harênh anhỹr kaxyw arĩgro hta. Arĩgrota ã kot hprĩ hã kãm tanhmã mẽ

pajarēnh to kaxyw na pre ra Jejusja xām. Kaxyw na pre akupỹm ho htĩr. Nē akupỹm ho htĩr jao kot nhỹrmã kãm tanhmã mẽ pajarēnh to xwỳnh ã ho amnhĩrĩt. Anē.

³²Nhũm pre ã Pawre mẽ kãm Tĩrtũm kapēr jarēnh anē nhũm mẽ mar o kuhê. Kot mẽ kãm Jejus tyk nē akupỹm htĩr ã harē nhũm mẽ mar o kuhê. Nhũm mẽ hkwyjaja kuma nē ãm kuma nē axtem nē ri hã akunha. Nom nhũm mẽ hkwyjaja mẽ kurom mar tỳx nē Pawre mã kãm: —E kwa mẽ inhmã ja mar prãm. Apkati hõ hã ka axte mẽ inhmã ja jarē pa mẽ ixprĩ hã mar mex nē. Anē.

³³Hãmri nhũm Pawre akupỹm nhỹri hpõx xà hã ixkre hwỳr ma tē.

³⁴Hãmri nhũm Xiônĩs pē Areop kãm mẽ kãm kapēr xwỳnh nē mēhõ ni pē Tãmaris nē mẽ hkwyjaja kapēr mar tỳx nē amnhĩ kaxyw Jejus kõt hamaxpēr nē hkõt amnhĩ xunhwỳ. Hãmri nē Pawre kõt pa.

Atre 18

Pawre Korĩt wỳr mõi ã harēnh

Wam Korĩt 1.1-3

¹Tã nhũm Pawre krĩ pē Atenas rũm kato nē ma krĩ pē Korĩt wỳr mõi nē põi.

²Hãmri nē nhỹri Akirti pumu. Haxwỳja kēp Ijaew. Krĩ pē Põt kamã na pre kato. Tã ma pyka pē Itar wỳr mõi nē Itar kamã krĩ pē Rõm kamã hpãnhã pa. Pa ho pa htã nhũm mẽ õ pahihtĩ Krawti tanhmã hamaxpēr to hãmri nē mẽ amnhĩ nē Ijaew piitã mẽ hanor pa. Jakamã nhũm Akirti kato nē hprõ Prisire mẽ wa ma Korĩt wỳr mõi. Hãmri nē hwỳr põi nē kamã pa ho pa. Jakamã nhũm Pawre Korĩt wỳr põi nē wa omu

³nē wa kuri põi nē wa hkõt ri pa. Nē Siras mẽ Ximotre wa kamã hamak pē wa ãhkõ hã àpēnh o pa. Wa uràk nē kupēxē pytĩ ho ixkre nhĩpēx nē ho wēnē ho ri wa hkõt pa.

⁴Hãmri nhũm sap kato nhũm ma Tĩrtũm kapēr o mẽ ahkre xà hã ixkre hwỳr pa nē kamã mẽ kãm Tĩrtũm kapēr jarēnh o hkrĩ. Ijaew mẽ Ijaew kēt xwỳnhjē

mã nhũm mẽ kãm ujarēnh o hkrĩ. Nẽ mẽ kãm Jejus kot mẽ panê tanhmã amnhĩ nhĩpêx to hã harẽ.

⁵Tã nhũm Siras mẽ Ximotre wa ma Masetõn rũm Pawre wỳr mõn pøj. Jakamã nhũm Pawre axte ixkre nhĩpêx ã àpēnh kêt nẽ. Pãnhã apkati mẽ Ijaewjê jahkre ho pa. Mẽ kãm tanhmã Jejus jarēnh to ho ri mẽ hkôt pa. Kêp Tĩrtũm kot mẽ pakaxyw ãm xwỳnh ã harēnh o ri mẽ hkôt pa. Xatã mẽ kãm ujarēnh o pa.

⁶Nom nhũm mẽ kãm mar prãm kêt nẽ kamã gryk kato nẽ kãm kapēr punuj nẽ. Nhũm Pawre tee ri amnhĩ tã mẽ kuma nẽ mẽ kãm: —E ixte mẽ amã Jejus kot mẽ panê tanhmã amnhĩ nhĩpêx to hã harēnh tã ka mẽ amã mar prãm kêt nẽ. Nà mẽ kam nẽ mẽ mãmri ate amnhĩ tomnuj kãm ty nẽ arĩ kam amnhĩ pumu no ãm amnhĩ tã tanhmã inhmã nẽ hkêt nẽ. Ra mẽ ate Tĩrtũm kapēr kaga kēnã. Nà kot paj mẽ akaga nẽ ma hpãnhã Ijaew kêt xwỳnhjê hkôt ri mẽ kãm ja jarēnh o ri ixpa. Anẽ. Hãmri nẽ kànhmã xa nẽ hinòkà kapa nẽ ho apê. Mẽ kot hkaga hã amnhĩ pumunh kaxyw nhũm mẽ noo mã ã amnhĩ nhĩpêx anẽ.

⁷Hãmri nẽ ixkre rũm kato nẽ hijuk ri Ijaew kêt xwỳnh pê Xijutre nhõrkwỹ hwỳr tẽ nẽ hpãnhã Xijutre hkôt pa ho pa. Xijutre kêp Ijaew kêt tã amnhĩ kaxyw Tĩrtũm mã hamaxpēr rãhã ho pa.

⁸Tã nhũm Ijaew õ pê Kriptija hkwỳjê rom amnhĩ kaxyw Pahihti Jejus kôt hamaxpēr nẽ hkôt amnhĩ xãm. Kêp Ijaew nhõ Tĩrtũm kapēr o mẽ ahkre xà hã ixkre kamã mẽ ahkre xwỳnh na pre. Jakamã òrkwỹ kamã hkwỳjê mẽ mẽ hpimràatã Pahihti Jejus kôt amnhĩ xunhwỳr pa. Nẽ krĩa kamã ra Ijaew kêt xwỳnh ohtô nẽ Kripti pyrà nẽ amnhĩ kaxyw Jejus kôt hamaxpēr nẽ hkôt amnhĩ xunhwỳ. Jakamã nhũm Pawre mẽ kêp Jejus kwỳ hã mẽ piitã mẽ hkrã kumrã.

⁹Tã nhũm kamàt nhũm Pawre gõr nẽ nõ nẽ amỹti nhũm kêwe Pahihti Jejus axte hwỳr kato nẽ kãm kapēr nẽ kãm: —Pa Pawre? E kwa kêr ka mãmri axamnhix ri atar mẽ kãm ijarēnh rãhã ho ri apa nẽ amnhĩ kamã akahak o ri mẽ hkôt apa hkêt nẽ.

¹⁰Kot paj atānopxa nhūm mēhō tanhmã ato hkêt nē. Krī ja kamã koja mē ohtō nē ixkôt amnhĩ xunhwỳ. Anē.

¹¹Nhūm pre ã Pahihti Jejus Pawre hpimtir kãm kãm kapēr anē. Jakamã nhūm Korīt kãm arī ri mē hkôt pa ryy nē. Arī mē hkôt pa hã amgrà pyxi nē hkôt mytwrỳ kêp 6. Jao Tĩrtũm kapēr o mē ahkre ho ri mē hkôt pa.

¹²Tã nhūm Korīt nhō xwỳnhjê nhō pika pê Gres kamã mē ho amnhĩptàr xwỳnh nyw Gartija. Korīt kãm pa jakamã nhūm Ijaew xàptàr tũmrejaja Pawre pynê nē ma hwỳr o tē nē kãm tanhmã ho hêx to.

¹³Jakamã nhūm Ijaew pikuprõnh xà hã ixkre kamã mē kãm kapēr xwỳnh Sostenesja Garti mã Pawre o hêx nē kãm: —Kwa jahti na hte mē ixpê Ijaew kot amnhĩ nhĩpêx kwỳm ri mē ahkre ho pa. Jao mē ixte axtem nē tanhmã Tĩrtũm kôt ri amnhĩ nhĩpêx to ho ri ixpa kaxyw mē inhmã karō ho pa. Nom mē ixte amnhĩ nhĩpêx kuhpa hã mē inhmã karō. Anē.

¹⁴Hãmri nhūm ra Pawre kot Garti mã amnhĩ jarēnh mã tã nhūm Garti amnhĩ to wa nē hã mē kãm kapēr nē mē kãm: —Tk. Kwa kot tanhmã amnhĩ tomnuj tore hã. Kot tanhmã amnhĩ tomnuj to nhūm mē ate inhmã harēnh ronhỹx pa arī mē ama nē tanhmã mē amã hipêx to.

¹⁵No xep ãm kot mē axàptàr tũmrejaja kot amnhĩ nhĩpêx kuhpa hã pix mã kot amnhĩ nhĩpêx o pa kênã. Nē mē ate mē ahkre kuhpa hã kot ri mē ahkreja pix mỳrapê na ka mē kamã agryk nē ã inhmã ho akapēr anē. Nà kot paj ja hã tanhmã ho hkêt nē. Ka mē kam nē amnhĩ krã hkôt tanhmã ho hprãm xà hkôt tanhmã ho. Anē.

¹⁶Hãmri nē amnhĩ nê mē hano.

¹⁷Hãmri nhūm mē tee ri kuma nē ra Sostenes kamã gryk nē. Kot Garti mã tanhmã Pawre jarēnh to htã nhūm kuma nē ãm mar jakamã nhūm mē hã Sostenes kamã gryk. Hãmri nē unê nē Garti noo mã htak o xa. Nē htak rax nē. Nom nhūm hã mē omu nē ãm mē omu nē nê tanhmã mē kãm nē hkêt nē.

Pawre kot akupỹm ãxiok wỳr mōr ã harēnh

18Tã nhũm Pawre arĩ Korĩt kamã mẽ hkõt pa nẽ gaa nẽ nojarêť nẽ Jejus kõt htõjê mã amnhĩ jarẽ nẽ mẽ kãm: —E kot paj ma akupỹm pika pê Sir wỳr mỗ. Anẽ. Hãmri nẽ mẽ kêp kato nẽ ma hwỳr mỗ. Nẽ ma amnhĩ kõt Akirti mẽ hprõ Prisire wa o mỗ. Mỗõ nẽ krĩ pê Sênkrej wỳr pỏj. Nhũm Pawre amnhĩ kukamã mẽmoj tã tanhmã Tĩrtũm mã amnhĩ jarẽnh to nẽ amnhĩ jarẽnh xà hkõt amnhĩ krã hkênh pa. Ijaew kot amnhĩ nhĩpêx xà hkõt ã amnhĩ nhĩpêx anẽ. Hãmri nẽ mẽ pàr wỳr agjê nẽ Sênkrej rũm kato nẽ ma Sir wỳr mỗ.

19-21Mỗõ nẽ krĩ pê Epes wỳr pỏj. Hãmri nhũm Pawre mẽ hkwỳjaja pàr rũm hapỏj nẽ krĩ hwỳr agjê nẽ Ijaew nhõ Tĩrtũm kapêr o mẽ ahkre xà hã ixkre hwỳr mra nẽ hwỳr agjê nhũm Pawre mẽ kãm Tĩrtũm kapêr jarẽnh o nhỹ. Hãmri nhũm mẽ kuma nẽ kãm mar prãm nẽ. Nẽ kãm: —Kwa anojarêť kêt nẽ. Kritpêť mẽ ixkõt ri apa ryre nẽ Tĩrtũm kapêr o mẽ ijahkre. Mẽ inhmã ja mar prãm. Anhỳr tã no nhũm mẽ kãm: —Nà kot paj ma mỗ. Nom koja Tĩrtũm nhỹrmã akupỹn mẽ awỳr inhmẽ pa man akupỹn mẽ awỳr mỗ nẽ axte kapêr o mẽ ajahkre. Anẽ. Hãmri nẽ ma mỗ. Ma Epes rũm pàr kãm mỗ. Nom nhũm Akirti mẽ Prisireja wa Epes kamã arĩk nẽ hpãnhã kamã pa ho pa.

22Tã nhũm Pawre krĩ pê Sejarej wỳr pỏj. Hãmri nẽ hpãnhã kurũm ma akupỹm Jerujarẽ hwỳr mỗ. Kot Jejus kõt htõjê pumunh mã ma mẽ hwỳr mỗ. Hãmri nẽ mẽ hwỳr pỏj nẽ mẽ omu nẽ tanhmã mẽ kãm amnhĩ jarẽnh to nẽ mẽ kêp kato nẽ ma akupỹm ãxiok wỳr mỗ.

23Hãmri nẽ hwỳr pỏj nẽ kamã mẽ hkõt ri pa ryy nẽ mẽ kurũm kato nẽ hpãnhã ma akupỹm pyka pê Prik mẽ Karatas wa hwỳr mỗ. Nẽ kamã mẽ kot Jejus kõt amnhĩ xunhwỳr xwỳnhjê jahkre ho pa. Mẽ kot Jejus kõt amnhĩ nhĩpêx tỳx rãhã ho pa kaxyw mẽ hkõt mẽ ahkre mex o ri mẽ hkõt pa.

Apor kot Epes kãm Tĩrtũm kapêr jarẽnh

Epes 1.1-2; Wam Korĩt 3.6-9

24Tã nhũm Epes wỳr Ijaew õ pê Aporja mỗ nẽ hwỳr pỏj. Krĩ pê Aresãn kamã na pre kato. Na pre hte amnhĩ kaxyw Tĩrtũm kõt pix mã hamaxpêr nẽ kapêr ã kagà htũm mar tỳx nẽ. Jakamã mẽ kãm harẽnh mex o pa nhũm mẽ piitã kãm mar prãm nẽ.

²⁵Nom kormã Jejus jarënh jatur xà mar kêt jakamã ãm mẽ kãm hkrax pix jarënh o pa. Juãw Paxis kot tanhmã mẽ ahkre htoja nhũm mar tỳx nẽ. Nẽ tanhmã kot mẽ hkrã kumrãr to ho paja nhũm mããnẽn mar tỳx nẽ. Jakamã na pre hte mẽ kãm ja pix jarënh o pa. No Jejus kệp Tĩrtũm kot mẽ pahwỳr mẽnh xwỳnh ã harënhja nhũm kormã mar kêt nẽ. Tã Epes wỳr mỗ nẽ pøj.

²⁶Hãmri nẽ Ijaew nhõ Tĩrtũm kapër o mẽ ahkre xà hã ixkre hwỳr axà nẽ kamã mẽ kãm ujarënh o nhỹ. Amnhĩ kamã kahak kêt nẽ àmnhĩx ri mẽ kãm ujarënh mex nẽ. Hãmri nhũm Prisire mẽ Akirti wa kot mẽ kãm ujarënh ã kuma nẽ war axpẽn mã: —Kwa mãn kormã Jejus jarënh piitã mar kêt. E pu amnhĩ kôt panhõrkwỹ hwỳr o tẽ nẽ pahprĩ hã kãm harënh jatur xàm kumẽ kê hprĩ hã mar pa. Anẽ. Hãmri nẽ war amnhĩ kôt kuwỳ nẽ hprĩ hã kãm ujarënh jatur xàm kumẽ nhũm hprĩ hã harënh piitã mar tỳx nẽ.

²⁷Tã ra pyka pê Gres wỳr nojarêt nẽ Jejus kôt htõjê mã amnhĩ jarë nhũm mẽ kuma nhũm ja mẽ kãm mex nẽ. Hãmri nẽ Gres kamã Jejus kôt mẽ htõjê mã kagà nhĩpêx. Apor kot mẽ hwỳr amnhĩ kôt o mõi nẽ mẽ kãm õr nhũm mẽ kot omunh nẽ kamã harënh nẽ ho mex kaxyw mẽ kãm hipêx. Hãmri nẽ hipêx pa nẽ kãm kugõ nhũm kupy nẽ mẽ kurũm kato nẽ ma mẽ hwỳr mỗ. Hãmri nẽ mẽ hwỳr pøj. Gres nhõ xwỳnh kwỳjaja na prem ra Jejus kôt amnhĩ xunhwỳ. Tĩrtũm kot mẽ kutã nojarêt jakamã nhũm mẽ ra hkôt amnhĩ xunhwỳ. Jakamã nhũm Apor mẽ hwỳr pøj hãmri nẽ mẽ ãhkô hã tanhmã mẽ ho ajuta hto ho pa.

²⁸Nẽ xatã Ijaew mã tanhmã Jejus jarënh to kamã hihtỳx o mẽ hkôt pa nẽ mẽ kãm: —Nà Jejusja tãm na pre Tĩrtũm mẽ pakaxyw ãm. Tĩrtũm kapër ã kagà htũm kamã ã harënh kot anhỹr. Anẽ.

Atre 19

Pawre akupỹm Epes wỳr mõi ã harënh

Rukre 3.15-16

¹Tã nhũm Apor kormã Korĩt kãm pa ri nhũm Pawre ma akupỹm Epes wỳr mỗ. Ma krãhakỳx kôt akupỹm hwỳr mỗ. Hãmri nẽ hwỳr pøj nẽ mẽ kot Jejus

kôt amnhĩ nhĩpêx o mẽ pa xwỳnhjê pumu. Nhũm mẽ kormã Jejus jarēnh jatur xà mar kêt nê.

²Jakamã nhũm Pawre mẽ hwỳr mō nê mẽ omu nê Tĩrtũm Karō hã mẽ hkukja nê mẽ kãm: —Kwa mẽ ate Jejus kôt amnhĩ xunhwỳr xà hã arĩgrota ã xà na pre Tĩrtũm Karō mẽ akarō mã agjê? Anê. Hãmri nhũm mẽ kuma nê kãm: —Nà mẽ ixte Tĩrtũm Karō jarēnh mar kêt. Anê.

³Hãmri nhũm mẽ kãm: —No mẽmoj kôt na prem mẽ akrã kumrã? Anê. Nhũm mẽ kãm: —Nà Juãw Paxis kot mẽ hkrã kumrãr o paja kôt na prem mẽ ixkrã kumrã. Anê.

⁴Hãmri nhũm Pawre mẽ kãm: —Nà Juãw Paxis na pre Ijaew mã kapêr o: “Kot kaj mẽ mẽ ate amnhĩ tomnuj kaga nê hpãnhã tãm amnhĩ nhĩpêx pa hã mẽ akrã kumrã.” Anhỹr o mẽ kãm kapêr o pa. Nê mẽ kãm Jejus jarēnh o: “Koja tokyx mẽhō ixkôt hapu hã mẽ pahwỳr kato nê tanhmã amnhĩ nhĩpêx to ho pa. Ka mẽ omu nê amnhĩ kaxyw hkôt ajamaxpêr nê hkôt amnhĩ xunhwỳ.” Anê. Tã Jejusja na pre ã mẽ kãm harēnh anhỹr o pa. Anê.

⁵Nhũm pre ã Pawre mẽ kãm Juãw Paxis mẽ Jejus wa harēnh anê nê hpãnhã Jejus nhỹ hã mẽ hkrã kumrã.

⁶Hãmri nê hpãnhã mẽ hã ãhkra jaxwỳ nhũm Tĩrtũm Karō mẽ hwỳr wrỳ nê mẽ hkarō mã gjêx pa. Hãmri nhũm mẽ ã hã ahpỹnhã axtem mẽ kapêr kwỳ ho kapêr nê ã hã Tĩrtũm mex o mex ã harēnh o kuhê.

⁷Ã mẽ kot amnhĩ nhĩpêx anhỹr xwỳnhjaja kêp 12.

⁸Tã nhũm Pawre Epes kãm Ijaew nhō Tĩrtũm kapêr o mẽ ahkre xà hã ixkre hwỳr mrar ã mytwrỳ axkrunêpxi. Amnhĩ kamã kahak kêt nê hprĩ hã Ijaew mã hprĩ hã Jejus jarē nê mẽ kãm: —E pa mẽ amã Jejus jarē ka mẽ inhma. Nà Tĩrtũm kot mẽ pahwỳr mẽnh xwỳnhhta na. Nê mẽ pahte kamã pajamak o papa xwỳnhhta na. Jakamã kot ka mẽ amnhĩ kaxyw hkôt ajamaxpêr nê hkôt amnhĩ xunhwỳ nhũm Tĩrtũm ja hã mẽ apumu nê mẽ ato hkra. Anê. Hãmri nhũm mẽ hkwyjaja kuma nê hkôt hamaxpêr kurê kumrêx.

⁹Nom nhũm mẽ hkwỳjaja kuma nẽ ãm kuma nẽ Jejus o kapěr punuj nẽ. Mẽ piitã mẽ noo mã kuhê nẽ ho kapěr punuj tỳx nẽ. Nhũm Pawre tee ri ja mẽ omu hãmri nẽ mẽ kurũm kato. Mẽ pikuprõnh xà hã ixkreta rũm kato nẽ hpãnhã nhãm mẽ kot kãm “Xirãn kot mẽ ahkre xà hã ixkre” anhỹr xwỳnhja wỳr hpãnhã mỗ. Nẽ amnhĩ kôt mẽ kot Jejus kôt amnhĩ xunhwỳr xwỳnhjê ho pa nẽ hpãnhã ixkreta kamã mẽ ahkre ho pa. Apkati mẽ hwỳr mra nẽ mẽ ahkre.

¹⁰Jao hã amgrà axkrut. Jakamã nhũm pyka pê As kamã mẽ piitã Pahihti Jejus jarẽnh ma. Ijaew nẽ Ijaew kêt xwỳnhjaja nhũm mẽ piitã harẽnh ma.

Wajaga hkwỳ jarẽnh

¹¹Tã nhũm Pawre Tĩrtũm nhỹ hã mẽ kãm aa mẽ kot mẽmoj pumunh kêt kwỳ ho anhỹr o ri mẽ hkôt pa.

¹²Jakamã nhũm pre htem hwỳr mra nẽ kêp ê hkwỳ jamỳ nẽ ma mẽ à xwỳnhjê hwỳr o mra nẽ mẽ hã haxwỳ nhũm mẽ akupỹm mex. Nẽ mẽkarõmnuti kot tanhmã mẽ ho ho pa xwỳnhjê hã nhũm prem mããnẽn mẽ hã ê kwỳ jaxwỳ nhũm mẽkarõmnutija mẽ kurũm hapôj nẽ ma mrar kurê kumrẽx nhũm mẽ akupỹm tãm hkrã.

¹³⁻¹⁴Tã nhũm mẽõ patre maati Sewahtija hkra my kêp 7 nẽ piitã kêp wajaga. Hãmri nẽ mẽ kãm Pawre pyrã nẽ mẽ nê mẽkarõmnuti japôx o pa hprãm nẽ. Jakamã kormã Jejus kôt amnhĩ xunhwỳr kêt tã mẽ kot ã hã Pawre pyrã nẽ mẽhõ nê hkwỳ janor kaxyw nẽ kãm: —E Pawre kot Jejus jarẽnh o ri pa xwỳnhta nhỹ hã kot paj amã ixkapěr. Jakamã e kwa tokyx myta rũm akato nẽ ma tẽ. Anẽ.

¹⁵Hãmri nhũm mẽkarõmnutija mẽ kuma nẽ ãm mẽ kuma nẽ mẽ kãm: —Tk. Mẽ apê Jejus mẽ Pawre wa hkwỳ hkêt tã mẽ nê ã mẽ inhmã akapěr anhỹr o apa. Nà Jejus mẽ hkwỳ pixjaja na htem Tĩrtũm nhỹ hã mẽ kêp mẽ ijapôx o pa. Mẽ apê mẽ hkwỳ hkêt kênã. Nà pa ixkatoore kaxyw ã. Anẽ.

¹⁶Hāmri nhūm mēkarōmnuti kot tanhmā ho xwỳnhta mēkarōmnuti nhỹ hā wajagajê pynê nē mē htak rax o kêp mē ê kaxôn h pa nhūm mē tee ri amnhĩ nhĩpêx. Hāmri nē hkênh nē òrkwỹ rūm hapôj nē ma umaj hprôt nē mra.

¹⁷Hāmri nhūm Epes kamā mē piitā ã kot mē hipêx anhỹr ã mē harênh ma nē tee ri hamaxpêr nē kām ma nē. Ijaew nē Ijaew kêt xwỳnhjaja nhūm mē piitā tee ri kām hamaxpêr o pa. Nē Pahшти Jejus mā mex o mex ã harê.

¹⁸Jakamā nhūm mē kot Jejus kôt amnhĩ xunhwỳr nyw xwỳnhjaja piitā tanhmā amnhĩ jarênh to. Nē mē hkwỳjaja amnhĩ jarênh o: —Nà kormā ixte Jejus kôt amnhĩ xām kêt ri na pa pre ã amnhĩ tomnuj anhỹr o ri ixpa. Tã Jejus kôt amnhĩ xām hāmri nē axte ã amnhĩ nhĩpêx anhỹr kêt nē. Anê. Nhūm mē hkwỳjaja kêp wajaga htã mē uràk nē Jejus kôt amnhĩ xunhwỳ hāmri nē amnhĩ jarênh o: —Nà ijaxwỳja kormā Jejus kôt amnhĩ xām kêt ri na pa pre hte nē mē no kupy r nē mē y pix o ri mē hkôt ixpa. Tã Jejus kôt amnhĩ xām hāmri nē axte ã amnhĩ nhĩpêx anhỹr kêt nē. Pãnhã axtem amnhĩ nhĩpêx nyw o amnhĩ nhĩpêx o ri ixpa. Anê.

¹⁹Hāmri mē ò wajaga xàhpumunh xà hã kagà jamỳ nē ma o mra nē kaxyw kuto nē kamā rênh pa nē mē piitā mē noo mā ho xêt pa. Wajaga xàhpumunh xà hã kagàja ã kàxpore xohtô rax kumrêx tã nhūm mē Jejus gryk ã hamỳ nē o mra nē ho hxêt pa nhūm hapêx.

²⁰Hāmri nhūm krĩ nhõ xwỳnhjaja ã mē kot amnhĩ nhĩpêx anhỹr ã mē omu nē ohtô rax nē mē uràk nē Jejus kôt amnhĩ xunhwỳ.

Pawre kot Rôm wỳr hkrà hã harênh

Rômãn 1.13-15; 15.22-29

²¹Tã nhūm Pawre ra akupỹm Jerujarê hwỳr nojarê t nē hamaxpêr o: —E kot paj ixkato nē hpãnhã ma Masetôn mē Gres wa hkôt ma akupỹm Jerujarê hwỳr mō. Ma mē kot Jejus kôt amnhĩ xunhwỳr xwỳnhjê pumunh o mē hkôt mō. Hāmri nē Jerujarê hwỳr pôj nē kamā tanhmā amnhĩ to hpa hāmri nē hpãnhã ma Rôm wỳr mō. Anê.

²²Hāmri nē hkôt ho ajuta ho wa pa xwỳnh Ximotre mē Eras wa kām amnhĩ jarê nē wa kām: —E kêr ka wa ma ixkukamā Masetôn wỳr wa mō. Kot paj

kormã jar As kamã ixpa grire hãmri nẽ ma war akôt mō pu mẽ hamũ ma Jerujarẽ hwỳr mō. Anẽ. Hãmri nhũm wa kuma nẽ kato nẽ ma hkukamã Masetõn wỳr mō.

Mẽ kot sãnti hã Pawre mã àkjêr ã mẽ harẽnh

Sikũn Korĩt 1.8-9

²³Rôm nhũm Epes nhõ xwỳnhjaja tee ri Pawre kot tanhmã Pahihti Jejus jarẽnh to hã kuma nhũm ja mẽ kêp omnuj nẽ. Nhũm mẽ Jejus ã kamã gryk tỳx nẽ.

²⁴Na prem amnhĩ kaxyw Tĩrtũm kôt hamaxpêr kêt nẽ. Na prem axtem sãnti ho mẽ hpãm nẽ amnhĩ to hwỳr pê hã hpijaàm nẽ kãm mex o mex ã harẽnh o pa. Mẽ õ sãntija ni Xiãnre na pre. Nhũm mẽ kãm ixkre nhĩpêx nẽ kamã hkarõ nhĩpêx xãm. Hãmri nẽ hwỳr akuprõ nẽ hã hkĩnh nẽ hkarõ hã hpijaàm nẽ kãm mex o mex ã harẽ. Nhũm pre hte Temêtja Xiãnre nhõrkwỹ karõ hkryre hkwỳ nhĩpêx nẽ mẽ kãm ho wẽnê ho pa. Prat o hipêx nẽ ho wẽnê ho pa. Jao ra hã mẽ àpênh xwỳnhjê mẽ nhũm mẽ kot haprôr xwỳnhjê kukwak ri kàxpore jamỳnh rũnh o pa.

²⁵—Jakamã nhũm Pawre mẽ hwỳr mō nẽ pôj nẽ mẽ kãm Mẽpahpãm Tĩrtũm jarẽnh o ri mẽ hkôt pa nhũm Temêt tee ri kuma nhũm ja kêp omnuj nẽ. Hãmri nhũm hamaxpêr nẽ mẽ kot urak nẽ Xiãnre nhõrkwỹ karõ hkryre nhĩpêx nẽ ho wẽnê ho pa xwỳnhjê ho akuprõ nẽ mẽ kãm: —E kwa mẽ inhma. Na pu htem mẽpanã Xiãnre nhõrkwỹ karõ hkryre pãnhã kàxpore jamỳnh rũnh o papa.

²⁶Tã mãn ka mẽ ra ham hpôx xwỳnh Pawreja pumu nẽ kapêr ma. Na hte jar mẽ panhõ krĩ kamã nẽ As piitã hkôt mẽ kãm mẽpanã Xiãnre karõ nẽ mẽ kãm kapêr o pa. Xep mẽ pahte mẽ hkarõ nhĩpêxja kêp mẽpanã kumrêx kêt ã mẽ kãm harẽnh o pa nhũm xep mẽ ohtô nẽ kuma nẽ ra hkôt hamaxpêr.

²⁷—Kwa ja mex kêt. Kojã mẽ kapêr ma nẽ hkôt amnhĩ nhĩpêx hãmri nẽ axte mẽ pahte ixkre karõ hkryre nhĩpêx xwỳnhhta japrôr kêt nẽ. Hãmri nẽ mẽ paxàpênh o kapêr punuj nẽ. No ãm ja pix omnuj kêt. Kojã mẽpanã Xiãnre mã amnhĩ jarẽnh xà hã ixkreja kaga hpa. Nẽ haxwỳja karõja kaga. Mẽ piitã

kām hapê kênã. As kamã nê pyka piitã hkôt mẽ piitã kām hapê nê hwỳr mra nê amnhĩ to hwỳr o pa. Kêp mẽpanã mex kumrêx tã koja mẽ Pawre kapêr gryk ã hkaga hpa nê axte kām hamaxpêr kêt nê. Hãmri pu mẽ axte mẽ kukwak ri pakàxpore rax nê papa hkêt nê. Kwa tanhmã kot puj mẽ amnhĩ nhĩpêx to? Anê.

²⁸Hãmri nhũm mẽ tee ri ã kapêr anhỳr ã kuma nê Pawre kamã gryk tỳx kumrêx. Nê gryk xàj kàx pêê kapêr nê xatã kapêr tỳx kām kapêr punuj nê. Nê kapêr o: —Xiãre na mex kumrêx. Kêp mẽ pahpê Epes nhõ xwỳnhjê nã maati na. Anhỳr o kàxpêê kapêr o kuhê.

²⁹Hãmri nhũm krĩ nhõ xwỳnh piitã mẽ kuma nê mẽ hwỳr hprôt nê haxwỳja gryk nê kàxpêê mẽ hkôt ã harênh anhỳr o kuhê. Hãmri nê gryk xàj Pawre hkôt ri wa pa xwỳnhja wa unê nê ma mẽ kot axpên mar xà hã ixkre hwỳr wa hkjênh o tẽ. Masetõn nhõ xwỳnh wa kêp Gajore mẽ Aristakja nhũm mẽ wa unê.

³⁰Hãmri nhũm Pawre mẽ kot wa unênh ã mẽ omu nê tee ri wa hkukamã hamaxpêr nê mẽ hkôt hprôt nê mẽ kām tanhmã kapêr to kaxyw nom nhũm mẽ kot Jesus kôt amnhĩ xunhwỳr xwỳnhjaja ja nê kām kapêr kām hihtỳx nê.

³¹Hãmri nhũm As kamã mẽ kot mẽ ho amnhĩptàr xwỳnh kwỳjaja ã mẽ kot amnhĩ nhĩpêx anhỳr ã mẽ omu nê Pawre hwỳr hpêr mẽ. Mẽ kām hkĩnh jakamã kot mẽ hkôt htêm nhũm mẽ kot hpĩr pymaj hwỳr hpêr mẽ nê mẽ hkôt htêm nê hkurê kamã hihtỳx nê.

³²Rôm nhũm mẽ piitã mẽ kot axpên mar xà hã ixkre hwỳr pikuprõnh pa nê kàx pê kapêr punuj o kuhê. Nom axpên kôt kapêr kêt nê. ãm axpên kwỳm ri kàx pê tanhmã kapêr punuj to ho. Nhũm mẽ hkwỳjaja hprĩ hã mẽ mar kêt tã amarĩ amnhĩ krã hkôt kàx pê kapêr punuj nê.

³³Nhũm Ijaew kwỳjaja tee ri ja hã mẽ omu nê axpên mã: —Tk. Kwa okora. Koja mẽ nã Xiãre hã gryk hãmri nê tanhmã mẽ pahpê Ijaew to nà? Anê. Hãmri nê hamaxpêr nê mẽ hwỳr amnhĩõ pê Aresãnja mẽ nê kām: —Kwa ma mẽ hwỳr tẽ nê mẽ kām tanhmã mẽ pahtã axàprãr to. Pawre kêp mẽ pahkwỳ htã tãm na mẽ kām mẽ gryk jaxà. No mẽ papajaja na pu mẽ kām mẽ gryk

jaxàr kêt nê. Anê. Hāmri nhūm mẽ kuma nê mẽ hwỳr tẽ nê xa nê tee ri kot mẽ ho hpinhkrênh kaxyw kànhmã mẽ kãm ìhkra pěr kaprỳ.

³⁴Nhūm mẽ omu nom hpinhkrênh kêt nê arĩ kàx pêt kapěr punuj ã 2 or. Nê kàx pê kapěr o: —Měpanã Xiānreja mex o mex. Kêp mẽ pahpê Epes nhõ xwỳnhjê nã mex na. Anê.

³⁵Tã nhūm mẽ õ pahi nhõ kôwenatô jatã tanhmã Epes nhõ xwỳnhjê ho hpinhkrênh to hāmri nê ja nê mẽ kãm kapěr nê mẽ kãm: —Kwa mẽ anhĩkrê. Mẽ piitã kot Xiānre mex o mex ã omunh kênã. Nê mẽ pahpê kãm amnhĩ jarênh xà hã ixkre jamār xwỳnh ã mẽ kot mẽ pahpumunh mex. Nê kaxkwa rūm karõ kot mẽ pahwỳr tẽm nhūm mẽ pahpê hamār o papa xwỳnh ã nhūm mẽ kot mẽ pahpumunh mex.

³⁶Jakamã mēhõ kot kêt we mẽ pahpê hamār xwỳnh kêt ã mẽ pajarẽ? Ra mẽ piitã mẽ kot ja hã mẽ pahpumunh jakamã kwa mẽ anhĩkrê nê ri ã akapěr anhỹr kêt nê.

³⁷No mẽ ate wa unênh nê amnhĩ kôt wa ho atẽm xwỳnhhta wa. Wa kot tanhmã mẽpanã Xiānre ho kapěr punuj to rỳ kêp õ ixkre kamã àhkĩnh kêt tã ka mẽ amarĩ wa unê nê amnẽ amnhĩ kôt wa o tẽ.

³⁸—Kwa kê Temêt mẽ hkwỳjaja kãm tanhmã wa ho kapěr to hprãm nê ma pahihti hwỳr wa o tẽ nê kumã mǎn tanhmã wa ho kapěr to. Mẽmoj tã axpẽn mã mẽ kapěr xà hã arĩgrota ãã.

³⁹Rỳ ka mẽ amã mẽmoj jarênh prãm nê arĩgroja ã mǎn rĩ kormã mẽmoj jarẽ.

⁴⁰No jarãhã mẽ ate amnhĩ nhĩpêxja te mẽ ate pahihti kutã amnhĩ xunhwỳr nê ho akapěr punuj pyræk. Kojã Rõm nhõ xwỳnhjê nhõ pahi mẽ ajarênh ma hāmri nê mẽ ate kamã agryk ã amnhĩ kamnhĩx. Hāmri nê mẽ atã ixkukja pa tanhmã kãm mẽ ajarênh to? Mēhõ nhỹ hã na ka mẽ ã apikuprõnh nê amnhĩ nhĩpêx anê? Nà amnhĩ krã hkôt na ka mẽ akuprõ nê ã amnhĩ nhĩpêx anê. Anê.

⁴¹Hāmri nê mẽ kãm kapěr pa nê mẽ hano nhūm mẽ angrà nê ma akupỹm òrkwỹ hwỳr hapêx.

Atre 20

Pawre ma Masetõn mẽ Gres wa hwỳr mõi ã harẽnh

¹Hãmri nhũm Pawre ra nojarêt. Jerujarẽ hwỳr mõi mã nom kormã pika pê Masetõn kumrẽx wỳr mõi nẽ kurũm ma akupỹm Jerujarẽ hwỳr mõi mã. Hãmri nẽ nojarêt nẽ mẽ kot Jejus kõt amnhĩ xunhwỳr xwỳnhjẽ ho akuprõ nẽ mẽ kãm amnhĩ jarẽ nẽ mẽ kãm: —E kot paj ma mõi. Nom kêr ka mẽ arĩ ixwakre kamã Tĩrtũm kapẽr kõt amnhĩ nhĩpẽx mex rãhã ho ri apa nẽ aa hkaga hkêt nẽ. Anẽ. Hãmri nẽ mẽ kãm: —E mẽ mãmri ixwa kre kamã axãmnhĩx ajamakêtkati nẽ ri apa. Anẽ. Hãmri nẽ kato nẽ ma Masetõn wỳr mõi.

²Nẽ hwỳr pøj nẽ kamã krĩ hkwỳ hkõt mõi nẽ nhỹri mẽ kot Jejus kõt amnhĩ xunhwỳr xwỳnhjẽ pumu nẽ Tĩrtũm kapẽr o mẽ ahkre. Mẽ kot hkõt amnhĩ nhĩpẽx mex nẽ kãm hprãm xà hkõt pix mã amnhĩ nhĩpẽx kaxyw mẽ kãm kapẽr o ri mẽ hkõt pa. Hãmri nẽ kato nẽ ma mõi nẽ pyka pê Gres wỳr pøj.

³Nẽ kamã mẽ hkõt pa hã mytwrỳ axkrunẽpxi hãmri nẽ akupỹm pyka pê Sir wỳr nojarêt. Nẽ ma pàr kãm hwỳr mõi kaxyw nẽ amnhĩ tã Sir kamã Ijaew kwỳ kot tanhmã harẽnh to hã amnhĩ jarẽnh ma. Na prem ra hã axpẽn mã amỹnê nẽ axpẽn mã: —E koja amnẽ mẽ pahwỳr mõi pu mẽ nhỹri omu nẽ hpĩr kurê kumrẽx. Anẽ. Hãmri nhũm Pawre amnhĩ tã mẽ kapẽr ma nẽ pàr kaga nẽ mẽ hwỳr mõi kêt nẽ. Hãmri nẽ awjanã nẽ Jerujarẽ hwỳr Masetõn kamã pa.

⁴Nhũm Jejus kõt htõ hkwỳjaja ma hkõt mõi. ã mẽ hixi kot anhỹr. Perej nhõ xwỳnh Sopatõja. Piro hkra na pre. Nẽ Tesarõn nhõ xwỳnh Aristak mẽ Sikũn wa. Nẽ Tepe nhõ xwỳnh Gajoreja. Nẽ As nhõ xwỳnh Xikitre mẽ Torow wa. Nẽ Ximotreja. Jajaja na prem ma Pawre hkõt Jerujarẽ hwỳr mõi.

⁵Nẽ pa ixpê Rukre ixte mẽ amã ja jarẽnh nẽ hã kagà xwỳnhja na pa axte Pawre hã ajêt nẽ hkõt mõi. Jakamã nhũm jajaja piitã ma wa ixkukamã Tôx wỳr mõi nẽ kamã wa ixkãm hamak o pa.

⁶Tã pa wa ma krĩ pê Piripos rŭm ixkato nê pàr kãm ma mẽ hkôt mŏ. Arĩgro pê Pas jakành mẽ ma mẽ hkôt mŏ. Tã wa ixtã arĩgro pê 5 nê mẽ hkôt Tôx wÿr pŏj nê kamã mẽ omu nê mẽ hkôt ixpa hã ixtã ũ semã.

Pawre kot akupÿm Exik o htĩr ã harēnh

Juãw 5.21; Atre 9.36-43

⁷Tã nhũm sap nê kamàt pa mẽ kot Jejus kôt amnhĩ xunhwÿr xwÿnhjê hkôt akuprŏ nê axpēn kutã apku nhũm Pawre mẽ kãm kapēr. Ra apkati hkôt mẽ inhnojarēt kaxyw jakamã nhũm mẽ kãm Tĩrtũm kapēr jarēnh ryy nê. Ra kôt ã kamàt nhũm arĩ mẽ kãm harēnh o nhÿ.

⁸⁻⁹Ixkre hprēk axpēn nhĩpy axkrunēpxi nhĩtep xà kamã na pa prem akuprŏ nê mar o ixkrĩ. Ixkreja kamã kanê ohtô nê hpŏk o harir. Jakamã nhũm Pawre arĩ mẽ kãm ujarēnh o nhÿ nhũm mēhŏ xàptàr nyw Exikja ra ōtxwa htÿx nê mẽ ixkuri ōt o nhÿ. Janere hã ōt o nhÿ. Tã ra gŏr nê janere pê kato nê ahparmã tē nê pykap tēm. Pa mẽ tee ri omu nê ahparmã hwÿr ixprŏt nê wrÿ nê omu nhũm htyk mex nê nŏ. Kÿj rŭm ahpar mã htēm ryy jakamã htyk mex nê nŏ. Hãmri nhũm hkwÿjaja tee ri omu nê hkaprĩ htÿx nê kumÿ nê mÿr o hkrĩ.

¹⁰Hãmri nhũm Pawre mẽ ixkôt wrÿ nê hwÿr tē nê htyk ã omu nê kumÿ nê mẽ kãm: —E mẽ amÿr kêt nê. Ra htyk tã koja Tĩrtũm akupÿm mẽ pamã ho htĩr. Anhÿrja kôt nhũm akupÿm htĩr.

¹¹⁻¹²Hãmri nhũm mẽ akupÿm htĩr ã omu nê hkĩnh tÿx kumrēx. Hãmri pa mẽ akupÿm kÿx pê ixkre hwÿr api nhũm Pawre mẽ inhmã pãwti hkwÿ nhĩrê nê mẽ inhmã kugŏ pa mẽ Jejus kot mẽ panê htyk mã ijamaxpēr pê kuku. Hãmri nhũm Pawre axte mẽ kãm kapēr o ÿr rãhã nhũm myt kato pa mẽ kēp angrà nê ma ixpa.

Pawre Mĩrēt wÿr mŏr ã harēnh

¹³Hãmri pa mẽ inhnojarēt nhũm Pawre mẽ ixte hkôt mẽ inhmŏr xwÿnhjê mã: —E kêr ka mẽ ma pàr kãm ixkukamã mŏ. Kot paj ahte ma kÿx pê mẽ akôt ixpar o Asôt wÿr mŏ. Hãmri nê hwÿr pŏj nê mẽ anhŏ pàr mã axà pu mẽ ma pahpimràatã ma hamũ mŏ. Anē.

¹⁴Hāmri pa mẽ kuma nẽ ma mō nẽ mẽmo arĩgro hã Asôt kamã axpẽn wỳr pōj. Hāmri nhũm Pawre mẽ ixkôt pàr wỳr axà pa mẽ ma krĩ pẽ Mĩtirẽn wỳr mō.

¹⁵Nẽ hwỳr pōj nẽ kurũm kormã mō nhũm apkati pa mẽ gō hipôk pẽ Kiw jakrenh o mō. Nẽ hakre nẽ mō nhũm apkati pa mẽ gō hipôk pẽ Sãm wỳr pōj nẽ hã pàr nhô. Hāmri nhũm apkati pa mẽ axte mō nẽ Mĩrêt wỳr pōj.

¹⁶Nom nhũm ra Pawre nojarêt nẽ. Kãm tokyx As rũm kator nẽ Jerujarẽ hwỳr mōr nẽ tokyx hpôx prãm nẽ. Kãm mẽ hkĩnh pẽ Pẽtekos xwỳj ri hwỳr hpôx prãm jakamã nojarêt tỳx pa mẽ Epes wỳr inhmōr kêt nẽ.

Pawre kot Epes kamã Kris kwỳjê mã amnhĩ jarẽnh

¹⁷Tã pa mẽ Mĩrêt wỳr pōj nhũm Pawre amnhĩ wỳr Epes wỳr Jejus kwỳ jahkre ho mẽ pa xwỳnhjê hã karō.

¹⁸Hāmri nhũm mẽ man mẽ ixwỳr mō nhũm Pawre mẽ omu nẽ mẽ kãm amnhĩ jarẽ nẽ mẽ kãm: —Nà ixte mẽ amã amnhĩ jarẽnh kaxyw na pa mẽ atã karō. Ra mẽ ate tanhmã ixte amnhĩ nhĩpêx to hã ixpumunh mex. Wam mẽ awỳr As wỳr ixpôxta ã ka prem aprĩ hã ixpumunh mex nẽ.

¹⁹Na pa pre mẽ akôt ri mẽ amã tanhmã amnhĩ nhĩpêx to ho ri ixpa. Te ixpê mẽ amã ixàpênh xwỳnh pyræk. Nẽ Pahшти Jejus mã tanhmã amnhĩ nhĩpêx to ho ri mẽ akôt ixpa. Nẽ ixkwỳ Ijaew kwỳ kot Jejus kapêr kaga hã mẽ omu nẽ ixkaprĩ nẽ inhmỳr o ixpa. Nhũm prem Jejus ã ixtomnuj pa amnhĩ xà htỳx kamã ijamak o ri mẽ hkôt ixpa.

²⁰Nom arĩ ri Tĩrtũm kapêr o mẽ ajahkre ho ri mẽ akôt ixpa rãhã nẽ aa hkaga hkêt nẽ. Mẽ anhōrkwỹ kamã nẽ mẽ ahkre xà hã ixkre kamã. Mẽ ate tãm amnhĩ nhĩpêx prãm xàj pa pre ã mẽ ajahkre mex anhỹr rãhã ho ri mẽ akôt ixpa.

²¹—Nẽ mẽ ixpê Ijaewjê mẽ mẽ apê Ijaew kêt xwỳnhjê mẽ pa pre mẽ ajahkre ho axpẽn pyræk. Mẽ apiitã mẽ ate amnhĩ tomnuj kaga nẽ hpãnhã Tĩrtũm kôt amnhĩ nhĩpêx kaxyw. Nẽ amnhĩ kaxyw mẽ panhō Pahшти Jejus Kris kôt ajamaxpêr kaxyw na pa pre mẽ akôt ri mẽ ajahkre rãhã ho ri ixpa.

²²—Tã ra Tĩrtũm Karõ kot akupỹm Jerujarẽ hwỳr inhmẽnh jakamã pa kormã hwỳr mõi. Kot paj hwỳr pøj nhũm krĩ nhõ xwỳnhjaja Jejus ã ixtomnuj nẽ nom tanhmã mẽ kot ixtoja kukamã ixte ixprĩ hã ixàhpumunh kêt.

²³Ja pix na ixte omunh. Na pa hte nhỹri pøj nhũm htem Jejus ã ixpynẽ nẽ mẽ hagiẽnh xà kamã ijagjẽ nẽ tanhmã inhĩpêx to. Tĩrtũm Karõ na pre ra ã mẽ kot inhĩpêx anhỹrja kukamã inhmã mẽ harẽ. Jakamã ixte amnhĩ kukamã amnhĩ tã ixàhpumunh mex. Kot paj xep akupỹm Jerujarẽ hwỳr pøj nhũm mẽ ixpumu nẽ Jejus ã tanhmã inhĩpêx to.

²⁴Tã no pa amnhĩ kamã ixkahak kêt o inhmã mẽ uma hkêt nẽ. Kojã mẽ kãm ixpĩr prãm nẽ mãmrĩ ixpĩ. Inhmã ixtyk pymã hkêt. ãm mẽmoj pixi na inhmã hprãm. Ra Pahihti Jejus kot mẽmoj tã inhmã karõ xàja na inhmã kormã ixtĩr ri hatur xàm mẽnh prãm. Tĩrtũm kãm mẽ pajapê hã kot mẽ pahto mex prãm xàj mẽ pahwỳr Kra Jejus mẽnh nhũm mẽ panê tanhmã amnhĩ nhĩpêx to hã harẽnhja na inhmã mẽ piitã mẽ kãm harẽnh jatur xàm mẽnh prãm.

²⁵—Tã e ixkràmnhwỳjaja. Na pa pre mẽ akõt mẽ ajahkre rãhã ho ri ixpa. Mẽ ate Jejus kõt amnhĩ nhĩpêx mex rãhã ho ri apa kaxyw. Tã kot puj pẽr mẽ axte axpẽn pumunh kêt nẽ.

²⁶⁻²⁷—Na pa pre ra mẽ amã Tĩrtũm kapẽr piitã harẽnh pa. Mẽ ate mar tỳx nẽ hkõt pix mã amnhĩ nhĩpêx o apa kaxyw. Jakamã kojã mẽ anhõ krĩ nhõ xwỳnhjê hõ amnhĩ kaxyw Jejus kõt hamaxpẽr prãm kêt nẽ rĩ tãm. Kwãr mãmrĩ kot amnhĩ tomnuj kamã ty nẽ arĩ tãm amnhĩ pumu no ãm kê amnhĩ tã tanhmã inhmã nẽ hkêt nẽ.

²⁸—E mẽ ate Kris kwỳ jahkre ho apa xwỳnhjaja. Kêr ka mẽ amnhĩ pumunh mex o ri apa. Nẽ mẽ kot Jejus kõt amnhĩ xunhwỳr xwỳnhjê jamãr mex o ri apa. Ja kaxyw na pre Tĩrtũm Karõ mẽ kaxyw mẽ axunhwỳ. Tĩrtũm Kra Jejus kot htyk o Tĩrtũm mã mẽ pahte amnhĩ tomnuj piitã hpãnhã amnhĩrer pa jakamã kêr ka mẽ kãm mẽ omunh mex o ri mẽ hkõt apa. Te ôwêhti jamãr xwỳnh kot ôwêhti jamãr mex o ri pata pyrãk.

29—Kot paj ma mō nhūm mēmojjaja ixpānhã mē awỳr pōj nē mē ate Jejus kaga hprām xàj tanhmã mē amã hêx to ho ri mē akôt pa.

30Nē mē akwỳjaja mē urà nē tanhmã hamaxpēr punuj to nē mē ate Jejus kaga hprām xàj hêx rom tanhmã mē amã kapēr to ho ri mē akôt pa.

31Jakamã kwa mē o kora. Kêr ka mē axkãm ajamak rom nē ri apa. Kê jajaja nhỹrmã ã mē amã kapēr anē ka mē ama nē mē hkôt ajamaxpēr kêt nē. Mē ate mē mar nē mē hkôt ajamaxpēr pymaj na pa pre mē akôt ri mē ajahkre ho ri ixpa hã ixtã amgrà axkrunēpxi. Arĩgro hã nē kamàt kãm mē ajahkre rũnh o ri ixpa. Nē mē ate mē amã mē hêx xwỳnhjê hkôt amnhĩ xunhwỳr pymaj mē ajahkre pê te inhmỳr pyræk o ri mē akôt ixpa.

32—E kot paj Tĩrtũm nhĩhkram mē ajagjênh pa. Kojã mē atãnopxar o ri mē akôt pa nē mē akutã nojarêt rãhã ho pa. Hãmri ka mē ãm hkôt pix mã amnhĩ nhĩpêx. Jao Jejus kaga hkêt nē. Hãmri nhūm nhỹrmã Tĩrtũm mē pahpê hkrajê piitã tanhmã mē pahto mex to.

33—Na pa pre mē akôt ixpa ry htã no ãm aa mēmoj tã mē awỳr kêt nē. Mē axê hkwỳ hã mē awỳ rỳ mē akàxpore hã mē awỳr o ri ixpa hkêt nē.

34Na pa pre amnhĩ pa kukwak ri amnhĩm ixujaprôr pê ixàpkur o ri mē akôt ixpa. Nē ixkôt mē pa xwỳnhjê mã ixujaprôr o ri ixpa. Ra mē ate ja hã ixpumunh mex.

35—Tã mēmo kaxyw na pa pre ã mē akôt amnhĩ nhĩpêx anhỹr o ri ixpa? Nà mē ate ja hã ixpumunh nē ixpyrà nē ã amnhĩ nhĩpêx anhỹr o ri apa kaxyw. Nē ixpyrà nē tanhmã mē kute xwỳnhjê ho ajuta hto ho ri mē apa kaxyw. Na pre Pahihti Jejus ja jarênh o: “Kojã mēhõ amã mēmoj gõ ka amnhĩm apy nē akĩnh nē. Nom kot kaj kam nhãm mēhõ mã mēmoj gõ hãmri nē akĩnh tỳx o ate mēhõ mã mēmoj nhõrta jakre.” Anē.

36Na pre ã Pawre mē kãm ujarênh anhỹr pa hãmri pa mē ra inhnojarêt. Hãmri nhūm mē piitã hkõnkrã ho hkrĩ pa nhūm Pawre mē ho Tĩrtũm wỳ.

37-38Hãmri nhūm mē piitã kãm Pawre hkĩnh tỳx jakamã mỳr rax o kuhê. Tee ri kot axte mē kot axpên pumunh kêt ã mē kãm amnhĩ jarênhja ma nē hkaprĩ

htỳx nẽ. Nẽ hkaprĩ xàj kahti hkôt hamỳ nẽ mur. Hãmri nẽ ma Jerujarẽ hwỳr hkujaêk kaxyw mẽ ixkôt pàr wỳr hkaprĩ nẽ mẽ ixkôt mỳr o mỗ.

Atre 21

Pawre kot Jerujarẽ hwỳr hpôx ã harẽnh

¹Tã pa mẽ gô mỳri Jejus kôt mẽ ixtôjê re nẽ pàr krem agjê nẽ axte mỗ. Ma gô hipôk pê Kosti hwỳr ixkatàt kôt mỗ nẽ hã ajêt. Hãmri nhũm apkati pa mẽ axte hamũ mỗ nẽ hpãnhã gô hipôk pê Roxti hwỳr mỗ nẽ hwỳr pôj nẽ hã pàr xi. Hãmri nẽ hpãnhã axte krĩ pê Patar wỳr mỗ.

²Hãmri nẽ hwỳr pôj nẽ pàr rũm ijapôj nẽ pàr õ pumu. Nhũm ra pyka pê Wẽnĩs wỳr nojarêt pa mẽ hwỳr agjê nẽ ma kamã axte mỗ.

³Mỗõ nẽ amỳm amnhĩ kukamã gô hipôk pê Sipre pumu. Hãmri nẽ upôk rũm hakrenh mã mỗ nẽ pyka pê Sir wỳr mỗ nẽ kamã Xir hwỳr pôj nẽ hã pàr nhô. Pàr pãm kot krĩ kamã pàr kukrêx rer kaxyw pa mẽ kormã hã ajêt nẽ tokyx axte nhãm inhmõr kêt nẽ.

⁴Hãmri pa mẽ kutêp api nẽ krĩ kamã mẽ kot Jejus kôt axpên to htõ nẽ htõx xwỳnhjê japêr o mỗ. Hãmri nẽ nhỹri mẽ omu nẽ mẽ hkôt ri ixpa ho ixtã ù semãn. Nhũm prem Tĩrtũm Karõ nhỹ hã Pawre mã kapêr nẽ kãm: —Kwa Pawre mẽ inhma. Kot ka Jerujarẽ hwỳr pôj nhũm xep mẽ kãm akurê xwỳnhjaja tanhmã anhĩpêx to. Tĩrtũm Karõ na ã akukamã mẽ inhmã ajarẽnh anẽ. Jakamã kwa hwỳr amõr kêt nẽ. Na pa mẽ tee ri akukamã ijamaxpêr. Anẽ.

⁵Hãmri nhũm amnhĩ tã mẽ kuma nẽ ãm mẽ kuma nẽ Jerujarẽ wỳr hkrà kamã hihtỳx nẽ. Jakamã nhũm semãn hapêx pa mẽ axte inhnojarêt. Axte Jerujarẽ hwỳr kormã inhmõr kaxyw inhnojarêt. Nhũm Jejus kôt mẽ ixtôjaja mẽ kot mẽ ixkujaêk kaxyw piitã pàr wỳr mẽ ixkôt mỗ. Mẽ hprõ nẽ mẽ hkrajê mẽ nhũm mẽ pimràatã mẽ ixkôt mỗ. Hãmri pa mẽ pàr wỳr pôj nẽ gô mỳ ri ixpiitã ixkõnkrã ho ixkrĩ hpa nẽ amnhĩ to Tĩrtũm wỳ.

⁶Hāmri nē mẽ kām amnhĩ jarēnh pa nē mẽ noo mã pàr krem agjê nē ma axte mō nhũm mẽ awjanã nē ma akupỹm òrkwỹ hwỳr hapêx. Hāmri pa mẽ kurũm kormã ma Jerujarē hwỳr mō.

⁷Mōõ nē krĩ pē Poremax wỳr pōj nē hã ajêt. Hāmri nē pàr rũm ijapôj nē axte krĩ kamã Jejus kôt mẽ ixtō nē mẽ ixtōxjê japêr o mō nē nhỹri mẽ omu nē mẽ kuri amnhĩm hikra.

⁸Tã nhũm apkati pa mẽ axte mō. Pãnhã ma krĩ pē Sejarej wỳr mō. Hāmri nē hwỳr pōj nē Firipti kuri pōj. Firiptija kormã nyw ri mẽ kot Jerujarē kamã mẽ mjên htyk xwỳnhjê mã mẽ apkur xà nhõr ho pa kaxyw mẽ ho 7 nē mẽ unhwỳr xwỳnhhtajê hõ na pre. Tã hpãnhã kêp Tĩrtũm kapêr jarēnh o pa xwỳnh.

⁹Nhũm hkra nijaja kêp kwat. Piitã mjên kêt nē hkukrit rãhã pa. Mẽ kêp Tĩrtũm nhỹ hã kapêr o mẽ pa xwỳnh na pre mẽ. Jakamã pa mẽ mẽ kuri pōj.

¹⁰Hāmri nē mẽ hkôt ri ixpa hã ixtã apkati grêre nhũm Akapô Jutej rũm man mẽ ixwỳr mõn pōj. Kêp Tĩrtũm nhỹ hã kapêr jarēnh o pa xwỳnh na pre.

¹¹Hāmri nē mẽ ixwỳr pōj nē Pawre pumu nē hkukamã kot tanhmã harēnh to kaxyw hwỳr tẽn kêp hprexà kapa nē ho amnhĩ te hpre nē ho amnhĩ pa hpre nē xa. Hāmri nē mẽ inhnoo mã Tĩrtũm Karõ nhỹ hã mẽ kot tanhmã hipêx to hkukamã kãm awjarē nē kãm: —E kot kaj Jerujarē hwỳr pōj nhũm Ijaew xàptàr tũmjaja apumu nē ã anhĩpêx anê nē apa hpre nē ate hpre hãmri nē Ijaew kêt xwỳnhjê nhĩhkram ajaxà. Kojã mẽ ã anhĩpêx anê. Anê.

¹²Hāmri pa mẽ tee ri ã ujarēnh anhỹrja ma nē Pawre kamã ixkahak tỳx nē ixkaprĩ nē inhmỳr o ixkrĩ. Nē xatã kot mẽ hwỳr mõr nê kãm ixkapêr kãm ixihtỳx nē kãm: —Kwa mẽ ixkapêr ma Pawre. Mẽ hwỳr amõr kêt o mẽ hwỳr amõr kêt. Anê.

¹³Hāmri nhũm mẽ inhmã: —Tk. Kwa mẽ amỳr kêt nē. Na pa mẽ apumu nē ixkaprĩ nē. Nà kot paj ma mẽ hwỳr mō. Kwãr mẽ mãmri Pahihti Jejus ã tanhmã ixto rỳ hã ixpĩ. Ixte amnhĩ kamã ixkahak kêt. Anê.

14Hāmri pa mẽ tee ri mẽ hwỳr mōr nê hkurê kaprỳ nê kām: —Tôe. Nà kam nê Tirtũm kām hprãm xà hkôt māmri mẽ hwỳr mō rỳ mẽ hwỳr amōr kêt nê. Anê.

15Tã pa mẽ ra inhnojarêt nê amnhĩ to ixpikuprōnh pa nê ma Pawre hkôt Jerujarê hwỳr tã ma mō.

16Hāmri nhũm Sejarej kamã Jesus kôt mẽ ixtō hkwỳjaja ma mẽ ixkôt mō. Pa mẽ mōõ nê Jerujarê hwỳr pōj. Hāmri nhũm mẽ ixkôt mẽ mōr xwỳnhjaja mẽ ixto mō nê Mēnasō nhōrkwỹ hwỳr mẽ ixto pōj. Mēnasōja Sipre kamã na pre kato. Tã hpãnhã Jerujarê hwỳr ahpa nê kamã ri pa ho pa. Na pre ra Jesus kôt amnhĩ xãm ã hã amgrà xohtô nê. Tã pa mẽ kuri pōj.

Pawre mẽ Xiakre wa harēnh

Atre 15.3-21; Wam Korĩt 9.19-22; 10.32-33

17Tã pa mẽ Jerujarê hwỳr pōj nhũm Jesus kôt mẽ ixtōjaja mẽ ixpumu nê hkĩnh nê.

18Hāmri nhũm apkati pa mẽ ma Pawre hkôt Xiakre hwỳr mō. Nhũm mẽ kot Tirtũm kapēr o mẽ ahkre xwỳnh piitã ra kuri akuprō nê mẽ ixkutêp hkrĩ.

19Jakamã nhũm Pawre mẽ hwỳr axà nê mẽ kām tanhmã amnhĩ nhĩpêx to ho pa hã amnhĩ jarê nê mẽ kām: —Pa na ka mẽ rĩ akrĩ. E ot pa axte mẽ apumunh mã mō. Ixte mẽ amã amnhĩ jarēnh ã amnhĩ jarēnh kaxyw. Nà na pa pre ma Ijaew kêt xwỳnhjê hkôt ixpa nê mẽ kām Jesus kot mẽ panê tanhmã amnhĩ nhĩpêx to jarēnh o ri mẽ hkôt ixpa. Nhũm Tirtũm inhĩhkô hã ixkutã nojarêt mex jakamã nhũm prem inhma nê ohtô rax nê mẽ pahpyrà nê Jesus kôt amnhĩ xunhwỳ. Anê.

20-25Hāmri nhũm mẽ Ijaew kêt xwỳnh kwỳjaja kot Jesus kôt amnhĩ xunhwỳr ã mẽ harēnh ma nê mẽ ỹ hã hkĩnh nê mẽ hã Tirtũm mã mex o mex ã harê. Hāmri nê Pawre mã kām: —Nà na pa prem ra mẽ harēnh ma. Hāmri nê mẽ kām kagà nhĩpêx nê mẽmoj tã mẽ kām karō nê mẽ hwỳr kumê. Mẽ kot omunh nê kamã harēnh nê hkôt amnhĩ nhĩpêx o pa kaxyw. Na pa prem kagàja kamã mẽ kot sãnti nhō hkur nê mẽ hkurê. Nê mry kamrô hkur nê mẽ hkurê. Nê mẽmo mry hpar nê hkamrô runh kêt rãhã hkur nê mẽ hkurê. Nê

mẽ kot amnhĩ prõ pix tãnopxar kaxyw mẽ kãm hã karõ. Nẽ mënijaja kot amnhĩ mjên pix tãnopxar kaxyw mẽ kãm hã karõ. Nẽ nhãm mẽ kot axpên to amnhĩkati nê mẽ hkurê. ã na pa prem ja hã kagà nẽ mẽ hwÿr mën hã. Jakamã e mẽ inhma. Na ra mẽ pahpê Ijaew kwÿjaja ohtô rax kumrêx nẽ mẽ pahpyrà nẽ Jejus kôt amnhĩ xunhwÿ. Mãn ka pre mẽ harênh ma. Na htem Jejus kôt amnhĩ nhĩpêx o pa jao mãănên Tĩrtũm nhÿ hã Mojes kapêr kôt amnhĩ nhĩpêx mex o pa. Tã nhÿri mẽ kot tanhmã ato hêx to hã ajarênh ma. Na ka xep hte Ijaew kêt xwÿnhjê nhõ krĩ kamã pøj hãmri nẽ mẽ õ krĩ kamã Ijaew kwÿjê pumu nẽ mẽmoj nê tanhmã mẽ kãm akapêr to ho ri apa. Nom Ijaew kêt xwÿnhjê mã ka xep hte ã mẽmoj nê akapêr anhÿr kêt nẽ. ãm Ijaew mã pix mã ka xep hte mẽ kot finat Mojes kapêr kôt amnhĩ nhĩpêx nê mẽ hkurê ho ri apa. Nẽ mẽ panhĩgêt kot amnhĩ nhĩpêx kuhpa hã mẽ kot mẽ hkra my kwÿr kà jakàr nê ka xep hte mẽ hkurê ho ri apa. Nẽ mẽ kot mẽ panhĩgêt kôt amnhĩ nhĩpêx nê ka xep hte mãănên mẽ hkurê ho ri apa. Mẽ kêp Ijaew tã ka xep pre hte ã mẽmoj nê mẽ hkurê anhÿr ho ri apa. Na prem jar ã Ijaewjê mã ato hêx o pa anê nhũm mẽ kuma nẽ mẽ hkôt hamaxpêr kurê kumrêx. Jao ra ate mẽ pahpê Ijaew kot amnhĩ nhĩpêx kôt amnhĩ nhĩpêx kêt ã akamnhĩx. —Tã ra mẽ kot apôx ã ajarênh mar jakamã tanhmã kot kaj we mẽ kãm amnhĩ tã axàprãr to? Nẽ tanhmã kot kaj we mẽ noo mã amnhĩ nhĩpêx to kê mẽ arĩ mẽ pahte amnhĩ nhĩpêx kôt ate amnhĩ nhĩpêx o apa hã apumu? E na pa mẽ ra ijamaxpêr. Kot ka ã amnhĩ nhĩpêx anê. Na ra jar mẽ pahkwÿjaja kêp kwat nẽ Tĩrtũm mã tanhmã amnhĩ jarênh to jatur xàm mën hã kaxyw amnhĩ krã hkên h mã. Jakamã e kêr ka ma mẽ hkôt tẽ nẽ mẽ urak nẽ amnhĩ krã hkên h nẽ kam nẽ mẽ ate amnhĩ krã kênhta pãnhã amnhĩre. Kot kaj ã mẽ hkôt amnhĩ nhĩpêx anê hãmri nhũm mẽ pahkwÿjaja arĩ mẽ pahte amnhĩ nhĩpêx o ate amnhĩ nhĩpêx o apa hã apumu nẽ mẽ kot ato hêx ã apumunh kurê kumrêx. Nẽ arĩ ate finat Mojes kapêr kôt amnhĩ nhĩpêx o ri apa hã apumu. Anê.

²⁶Hãmri nhũm Pawre mẽ kuma nẽ mẽ kãm: —Tôe. Nà ãm hãmri na ka mẽ inh mã awjarê. Nà kot paj ã amnhĩ nhĩpêx anê. Anê. Jakamã nhũm apkati nhũm ma mẽ kêp 4tajê o mõi nẽ mẽ mex kaxyw tanhmã amnhĩ nhĩpêx to.

Hāmri nē Tīrtūm mā amnhī jarēnh xà hā ixkre hwỳr mra nē agjê nē mẽ õ patre mā mẽ amnhī jarē nē kām: —E ot pa mẽ awỳr mra. Na pa prem ra mẽmoj tã tanhmã Tīrtūm mā amnhī jarēnh to. Tã kot paj mẽ axte ixtã ù semãn hāmri nē hatur xàm mēnh kaxyw akupỹn awỳr mra nē amã mẽmoj gõ ka mẽ inhmã Tīrtūm mā agõ nē hkôt kām mẽ ijarē. Nē pa kot paj mẽ ixpiitã hpãnhã amã amnhĩre. Anē.

Mẽ kot Pawre pynēnh ã mẽ harēnh

Atre 24.12

27Tã nhũm semãnja hapêx kaxyw nhũm pika pê As rŭm Ijaew kwỳjaja ma mra nē Tīrtūm mā amnhī jarēnh xà hā ixkre hwỳr agjê. Hāmri nē kamã Pawre pumu nē kamã gryk tỳx nē hwỳr hprôt nē unê nē tanhmã hkwỳjê mã ho hêx to nē ho kapêr punuj nē. Nē mẽ kām:

28—E mẽ amnē mra nē jahti pumu. Na hte krī piitã hkôt ri mẽ pahkwỳjê mã tanhmã ri hêx to ho pa. Tīrtūm nhỹ hā finat Mojes kapêr nhũm mẽ kām ho kapêr punuj o pa. Nē mẽ pahte Tīrtūm mā amnhī jarēnh xà hā ixkreja nhũm hte mããnēn tanhmã mẽ kām ho kapêr punuj to. Mẽ pahpyrà nē kêp Ijaew tã mẽ pahpê hkwỳ ho kapêr o pa. Tã ra axtem nē amnhī kôt Tīrtūm nhõ ixkre hwỳr Ijaew kêt xwỳnh kwỳjê ho agjê. Mẽ kot hwỳr gjêx kêt kumrêx tã nhũm axtem nē amnhī kôt mẽ ho agjê. Anē.

29Na pre krīja kamã Ijaew kêt xwỳnh Topĩja Pawre hkôt pa nhũm mẽ omu. Kêp Epes nhõ xwỳnh nhũm mẽ kot pry ã Pawre hkôt pa hā omu. Tã hā ahtũm nē Tīrtūm mā amnhī jarēnh xà hā ixkre kamã Pawre pumu nē htỳx amnhī kôt Topĩ ho àr ã hkamnhĩx nē ã mẽ kām harēnh anē.

30Hāmri nhũm mẽ kuma nē Pawre kamã gryk tỳx nē. Nē hwỳr hprôt nē unê nē ixkre rŭm ho kato nē kêp hakwa kre kahê.

31-32Hāmri nē ma o tẽ nē htak rax nē. Ra mẽ kot htak o hpĩr mã tã nhũm mẽhõja pōristi krãhtũm wỳr hprôt nē kām awjarē nē kām: —Kwa o mũj mẽ ra kot axpēn nhĩmex kaxyw pijapu ho kuhê. Anē. Hāmri nhũm tee ri kuma nē pōristi hkwỳjê mã anē nē mẽ ma mẽ hwỳr hprôt kurê kumrêx. Nhũm mẽ arĩ Pawre htak tã amnhī wỳr mẽ omu nē mẽ umaj kām ure.

33Hāmri nhũm pôristi krāhtũm Pawre hã amÿnê nhũm pôristijaja unê nê kàx o mẽ hkaxprexà ho axkrut nê ho hkaxpre pa. Hāmri nhũm mẽ hkrāhtũm Pawre hã mẽ hkukja nê mẽ kām: —Kwa mẽ atõ inhmã jahti jarẽ. Tanhmã na hixi te? Tanhmã na we amnhĩ tomnuj to hã na ka mẽ ã hipêx anẽ? Anẽ.

34Hāmri nhũm mẽ kuma nê piitã anhĩpê kàxpê kām tanhmã harẽnh to. Nom axpẽn kwÿm tanhmã ri kām harẽnh to. Hāmri nhũm tee ri hprĩ hã kot mẽ mar kaxyw hāmri nê pôristi mã anẽ nhũm mẽ kêp Pawre ho kato nê ma mẽ àpênh xà hã ixkre hwÿr o tẽ.

35-36Hāmri nhũm Ijaew kwÿ ohtô nê pry hã axpẽn nhĩgãnh o hkôt mra. Nê gryk xàj kapêr punuj tÿx o mẽ hkôt mō nê kàx pê pôristi mã kapêr nê mẽ kām: —Kwa mẽ apĩhti ri. Mexti hã. Mẽmo kaxyw na ka mẽ ri amã hapê ho apahti? Anẽ. Jakamã nhũm pôristija tee ri mẽ kuma hāmri nê mẽ kot tanhmã ho pymaj kumÿ nê kÿx pê mẽ kêp kupẽ nê o mō. Jao ixkreja wÿr mẽ àpir xà hã ho àpir o mō.

37Nê kot ho àr kaxyw tã nhũm Pawre mẽ hkrāhtũm mã kām: —E pa amã mẽmoj jarẽ ka inhma. Anẽ. Mẽ kapêr o kām kapêr hāmri nhũm amnhĩ jaêr pê kuma nê kām: —Kwa xà na ka mẽ ixpyrà nê Gresjê kapêr o akapêr?

38Na pa ixtÿx apê Ejit nhõ xwÿnh pê mẽ hpar o apa xwÿnhhta ã akamnhĩx. Ham na pre mẽ inhõ pahĩhti kutã amnhĩ xãm nê kot hkurê kaxàr kaxyw mẽ ho ajuta xwÿnhjê ho 4.000 nê mẽ hkurê nê ma kapôt ã mẽ o pa. Nom tãm na xep Gresjê kapêr o kapêr kêt nê. Anẽ.

39Hāmri nhũm Pawre kām: —Nà ixpê Ejit nhõ xwÿnhhta kêt. Ixpê Ijaew na pa. Pyka pê Siris kamã krĩ rax pê Tas kamã na pa pre ixkato. E xà kot paj ixkôt mẽ mōr xwÿnh nêj mã ixkapêr nà? Anẽ.

40Hāmri nhũm kām: —Tôe. Kam nê māmri tanhmã mẽ kām akapêr to. Anẽ. Hāmri nhũm mẽ àpir xàta ã kÿx pê mẽ mÿri xa nê kànhmã mẽ kām ìhkra pẽ nhũm mẽ omu nê hpinhkrênh pa nhũm mẽ kām amnhĩ jarẽ.

Atre 22

Pawre kot kām hkurê xwÿnhjê mã amnhĩ jarênh

Atre 9.1-19; 26.1-23

¹⁻²Nhũm Pawre amnhĩ kwỳ Ijaew kapër o mẽ kãm kapër nẽ mẽ kãm: —E ixkwỳjaja. Pa mẽ amã amnhĩ jarẽ ka mẽ inhma. Anẽ. Hãmri nhũm kot mẽ kapër o kapër ma nẽ hpinhkrênh pa nẽ akryk mar o kuhê nhũm mẽ kãm:

³—Nà ixpê mẽ anhĩõ na pa. Ijaxwỳja ixpê Ijaew. Pyka pê Siris kamã krĩ pê Tas kamã na pa pre ixkato no ãm jar Jerujarẽ kamã na pa pre ixàptàr. Kamariew na pre hte ijahkre ho pa. Finat Mojes kot Tĩrtũm nhỹ hã mẽ panhĩgêtjê mã kapërja nhũm pre hprĩ hã ho ijahkre ho pa. Na pa pre mẽ apyrà nẽ inhmã Tĩrtũm kôt amnhĩ nhĩpêx prãm nẽ.

⁴—Jakamã na pa pre mẽ pahkwỳ kot Jejus kôt amnhĩ xunhwỳr xwỳnhjê japêr o ixpa nẽ nhỹri mẽ kãm ixkato nẽ mẽ unê. Měmyjê pynê nẽ mẽnijê pynê. Hãmri nẽ mẽ kot mẽ hpar kaxyw mẽ hagiênh o ri ixpa.

⁵Na pa pre ã mẽ hipêx o ri ixpa anẽ. Mẽ panhõ patre maati nẽ mẽ àptàr tũmrejaja ra mẽ kot ja hã ixpumunh mex. Mẽ tãmjaja na prem krĩ pê Tamas kãm mẽ pahkwỳjê kaxyw kagà nhĩpêx nẽ inhmã kugõ pa kupy nẽ ma mẽ hwỳr o mỗ. Ixte mẽ õ krĩ kamã Jejus kwỳjê pynênh par nẽ man akupỹn Jerujarẽ hwỳr mẽ ho inhmõr nhũm mẽ kot tanhmã mẽ ho kaxyw.

⁶—Tã ra myt apha pa mẽ hwỳr ixàhtêp o mỗ. Puh nhũm kaxkwa rũm hirã rax kumrêxja ixwỳr wrỳ nẽ ixtã ajêt pa hipôk ri xa.

⁷Hãmri nẽ umaj pykap tẽm nhũm mẽhõ kapër nẽ inhmã: “Pa Sawti? Hêxta waa nẽ. Kwa mon ka hte axtem nẽ ixtomnuj tỳx o ri apa?” Anẽ.

⁸Hãmri pa kãm: “Kwa mẽ atõ na ka ri ã inhmã akapêr anẽ pahihiti?” Anẽ nhũm inhmã: “Ixpê Najare nhõ xwỳnh Jejus. Pa na ka hte ixpê ixkôt mẽ kot amnhĩ xunhwỳr xwỳnhjê homnuj tỳx o ri apa. Jao te pa ixtomnuj pyræk.”

⁹—Anhỹr o inhmã kapêr nhũm ixkôt mẽ pa xwỳnhjaja kuma no ãm hprĩ hã mar mex kêt nẽ. ãm hirã raxta pix pumu.

¹⁰Tã pa kãm: “No tanhmã kot pa we amnhĩ to Pahihti?” Anẽ nhũm inhmã: “E kànhmã xa nẽ mãmri ma Tamas wỳr mỗ. Kot kaj hwỳr pøj nhũm mẽhõ awỳr tẽ nẽ mẽmoj tã amã karõ ka ama nẽ hkôt amnhĩ nhĩpêx.” Anẽ.

11—Nhũm pre ã inhmã kapër anẽ. Hãmri pa hirã rax pumunh o ixãm kurê ra inhno hkre nẽ ixrĩt kêt nhũm ixkõt mẽ pa xwỳnhjaja ixpa hã ixpy nẽ ma Tamas wỳr ixto mỗ nẽ ixto pỏj.

12—Tã nhũm Tamas nhỗ xwỳnh pê ãnãnĩsti ixwỳr tẽ. Na pre hte Tĩrtũm kapër ã kagà htũm kõt amnhĩ nhĩpêx mex nhũm Tamas kamã Ijaew piitã kãm hkĩnh nẽ axpẽn mã mex ã harẽ.

13Jakamã nhũm ixwỳr tẽ nẽ inhmã: “Pa Jejus kõt ixtõ Sawti? E akupỹm rĩt.” Anhỳrja kõt pa akupỹm ixrĩt mex kurê kumrẽx nẽ omu.

14Hãmri nhũm inhmã: “Nà mẽ panhĩgêjtjê nhỗ Tĩrtũm na amnhĩ kaxyw ata. Ate kapër mar nẽ hkõt tanhmã amnhĩ nhĩpêx to ho apa kaxyw. Nẽ ate kaxkwa kamã Kra mex pumunh nẽ kapër mar kaxyw. Tã ka xep ham hirã rax kamã omu nẽ kapër ma.

15Jakamã kêr ka ma mẽ piitã mẽ kãm ate omunh xwỳnhja jarẽnh o ari mẽ hkõt apa. Nẽ mẽ kãm kapër jarẽnh o mẽ ahkre ho ri apa.

16E tokyx kànhmã xa nẽ Jejus mã amnhĩ jarẽ nẽ hkõt amnhĩ xãm kê anê ate amnhĩ tomnuj rênh pa. Hãmri pa apê hkwy hã akrã kumrã ka ma mẽ kãm kapër jarẽnh o ri apa.” Anẽ. —Nhũm pre ã ãnãnĩsti inhmã kapër anẽ.

17—Tã pa man akupỹn jar Jerujarẽ hwỳr mẽ awỳr mỗ. Hãmri nẽ jar Tĩrtũm mã amnhĩ jarẽnh xà hã ixkre kamã kãm amnhĩ jarẽnh o ixãm rôm axte mẽmoj pumu.

18Nhũm Jejus axte ixwỳr kato nẽ xa nẽ inhmã kapër nẽ inhmã: “E inhma. Jerujarẽ nhỗ xwỳnhjaja kãm ixkapër mar prãm kêt jakamã kot kaj mẽ kãm ixkapër jarẽ nhũm mẽ amar kêt nẽ. Jakamã kwa tokyx akato nẽ hpãnhã ma nhỹhỹm mỗ.” Anẽ. —Hãmri pa tee ri ã kapër anhỳrja ã kuma nẽ kãm:

19“Kwa nà koja mẽ inhma Pahihti. Ra mẽ kot ixte amnhĩ nhĩpêx ã ixpumunh mex. Ixte amnhĩ nhĩpêx tũmta kõt mẽ kot ixpumunh mex. Na pa pre hte krĩ piitã hkõt mra nẽ Tĩrtũm kapër o mẽ ahkre xà hã ixkre kamã mẽ kot akõt amnhĩ kaxyw hamaxpêr xwỳnhjê pynê nẽ mẽ hta nẽ mẽ hagjênh xà kamã mẽ hagjê nhũm mẽ kot ja hã ixpumunh mex.

²⁰Nhũm mẽ kot akapēr jarēnh o pa xwỳnh Estewãw pĩrta pa pre hã mẽ omu nhũm ja inhmã mex pa mẽ kãm mẽ hinôkà jamỳnh o hã mẽ omunh o xa. Na pa pre ã amnhĩ nhĩpêx anhỹr o ri ixpa. Tã hpãnhã akôt amnhĩ xãm hãmri nẽ akôt amnhĩ nhĩpêx o ri ixpa. Jakamã koja mẽ ixte amnhĩ nhĩpêx nyw ã ijarēnh ma nẽ kãm ixkapēr mar prãm nẽ.” Anẽ.

²¹—Pa pre ã Jejus mã amnhĩ jarēnh anẽ nhũm inhmã: “Nà. Kêr ka mãmri krĩja rũm akato nẽ ma nhỹhỹm mỗ. Kot paj hpãnhã ma Ijaew kêt xwỳnhjê hwỳr amẽ ka hpãnhã ma mẽ hwỳr mỗ nẽ mẽ hkôt mẽ kãm ixkapēr jarēnh o ri apa.” Anẽ.

²²Nhũm pre Pawre ã amnhĩ hkwỳjê mã amnhĩ jarēnh anẽ nhũm mẽ arĩ mar o kuhê rãhã Ijaew kêt xwỳnhjê jarēnh ma nẽ kamã gryk tỳx nẽ. Ijaew kêt xwỳnhjaja kot mẽ uràk nẽ Tĩrtũm kapēr marja nhũm mẽ kãm hprãm kêt jakamã nhũm Pawre ã mẽ harēnh anẽ nhũm mẽ kuma nẽ kamã gryk tỳx kumrẽx. Nẽ gryk xàj kapēr punuj nẽ kapēr o: —Kwa mẽ mãmri apĩhti ri. ãm hpĩr mã htãmti kênã. Anẽ.

²³Hãmri nẽ gryk xàj amnhĩ nhĩnôkà hkwrỳ nẽ ho apê nẽ pyka jamỳ nẽ kànhmã ri ho ahkapê.

Pawre kot pôristi krãhtũm mã amnhĩ jarēnh

Atre 16.35-39

²⁴Hãmri nhũm pôristi krãhtũmja tee ri ã mẽ kot amnhĩ nhĩpêx anhỹr ã mẽ omu nẽ mẽ kapēr ma nẽ pôristijê mã kapēr nẽ mẽ kãm: —Kwa tanhmã na we jahti amnhĩ tomnuj to nhũm mẽ ã kamã gryk tỳx anẽ? E mẽ tokyx ixkre hwỳr ho axà nẽ mẽ htaç xà ho htaç kê mẽ pamã tanhmã amnhĩ jarēnh to. Anẽ.

²⁵Hãmri nhũm mẽ kuma nẽ ho axà nẽ htaç kaxyw kormã hpre ho xa. Hãmri nhũm pôristi krãhtũm nhõ kôwenatôja mẽ hkôt axà nẽ hã mẽ omunh o xa nhũm Pawre omu nẽ amnhĩ tã kãm kapēr nẽ kãm: —Kwa kormã ixte tanhmã mẽ amã amnhĩ jarēnh to hkêt tã ka mẽ ixtak kaxyw. Ixpê Ijaew tã mããnēn ixpê Rõm nhõ xwỳnh kênã. Xà na htem ã Rõm nhõ xwỳnhjê nhĩpêx anẽ? Anẽ.

²⁶Hāmri nhūm tee ri ã amnhĩ jarēnh anhỹrja ã kuma nē pōristi krāhtūmjaja wỳr hprōt nē kām: —Kwa taxy pu mẽ tanhmã ho hkêt nē. Xep kêp Rôm nhõ xwỳnh kênã. Anē.

²⁷Hāmri nhūm tee ri kuma nē Pawre hwỳr axà nē kām: —Kwa xà ãm hāmri na ka amnhĩ jarē? Xà apê Rôm nhõ xwỳnh na ka? Anē. Hāmri nhūm kām: —Tỳ. ãm hāmri ixte mẽ amã amnhĩ jarēnh kênã. Ixpê Rôm nhõ xwỳnh na pa. Anē.

²⁸Hāmri nhūm kām: —Kwa pa na pa pre amnhĩ to Rôm nhõ xwỳnh prãm xàj amnhĩ pãnhã mẽ kām amnhĩrer rax nē. Anē. Nhūm Pawre kām: —Tỳ nom pa na pa pre amnhĩ pãnhã mẽ kām amnhĩrer kêt nē. Inhĩpêxà hkôt ixpê Rôm nhõ xwỳnh na pa. Anē.

²⁹Hāmri nhūm mẽ kuma nē tee ri hamaxpêr o kām ma nē. Nē kām ma ho hkaga kurê kumrêx. Nhūm mẽ hkrāhtūm nhõ pahija mãănēn kām ma nē. Kêp Rôm nhõ xwỳnh tã nhūm mẽ axtem nē kot unēnh nē kàx o hkaxpreja mã hamaxpêr nē kām ma nē. Na htem ã Rôm nhõ xwỳnhjê nhĩpêx anhỹr kêt nē. Na htem tanhmã mẽ hkukjêr to nē hprĩ hã mẽ kuma nē rĩ kormã tanhmã mẽ hipêx to.

Pawre kot Ijaew xàptàr tūmrejê mã amnhĩ jarēnh

Matêwre 23.27-28

³⁰Tã nhūm apkati nhūm pōristi krāhtūmjaja Ijaew kwỳ ho akuprõ. Mẽõ patre maati nē patre krāhtūmjaja nē mẽ àptàr tūmrejaja nhūm kot mẽ kām tanhmã Pawre jarēnh to kaxyw mẽ ho hpikuprõnh pa. Hāmri nē Pawre pê hkaxpre xà rê nē ma mẽ hwỳr o tẽ nē mẽ kutã ỹr.

Atre 23

¹Hāmri nhūm mẽ omu nē mẽ kām amnhĩ jarē nē mẽ kām: —E ixkwỳjaja. Pa mẽ amã amnhĩ jarē ka mẽ inhma. Na pa hte Tĩrtūm nom tãm amnhĩ nhĩpêx o ixpa nē mẽ pahpê Ijaew mẽ pahte amnhĩ nhĩpêx kwỳm ri tanhmã amnhĩ nhĩpêx to hkêt nē. Anē.

²Hāmri nhūm mẽ õ patre maati ãnãnĩsti kuma nē kamã gryk nē. Axtem ãnãnĩsti hõ na pre. Hāmri nē ã Pawre kot amnhĩ jarēnh anhỹrja ã kuma nē

kamã gryk nê. Hãmri nê mẽ kot mar o kuhê xwỳnhjê mã kãm: —Kwa mẽ atõ hakwap hkurahti ri. Tãm kot amnhĩ nhĩpêxti hã. Na ãm mẽ pamã amnhĩ to hêx o xa. Anê.

³Hãmri nhũm Pawre kuma nê hwỳr rĩt nê omu nê kãm: —Nà ka koja Tĩrtũm akura kãm ga. Te ate finat Mojes kot ỹ hã kapêr kôt amnhĩ nhĩpêx pyrãk tã ri axtem nê ri mẽ kot ijakwap ixkuranh kaxyw ri mẽ kãm ixtã amỳnê. Anê.

⁴Hãmri nhũm kuri mẽ kuhê xwỳnhja tee ri ã kãm kapêr anhỳrja ã kuma nê kãm: —Kwa kêp patre maati kênã kot ka kêt ri ã kãm akapêr anê. Anê.

⁵Hãmri nhũm amnhĩ jaêr pê ja hã kuma nê kãm: —Kwa ixte ja hã omunh kêt jakamã na pa ã ixtỳx kãm ixkapêr anê. Ixte kêp patre maati hã omunh ronhỹx pa ã kãm ixkapêr anhỳr kêt nê. Tĩrtũm kapêr ã kagà htũm kot ja nê mẽ pamã kapêr kênã. Mẽ pahte tanhmã mẽ panhõ pahi ho pakapêr punuj to nê mẽ pamã kapêr. Tã pa ãm ixtỳx ã kãm ixkapêr anê. Anê.

⁶⁻⁸Hãmri nê hprĩ hã mẽ kot mar o hkrĩ xwỳnhjê pumu. Nhũm mẽ kamã Satusew nhõ xwỳnh kwỳ nê Parijew nhõ xwỳnh kwỳ. Satusew mẽ Parijew nhõ xwỳnhjaja na htem axpên kwỳm ri tanhmã mẽ htykjê jarênh to. Satusew nhõ xwỳnhjaja na htem mẽ htyk nê mẽ hkarõ mẽ ro hã mẽ hapêx o mẽ hapêx ã mẽ hkamnhĩx. Nê Tĩrtũm kapêr o mẽ wrỳk xwỳnh kêt ã mẽ harênh o pa. No Parijewjaja na hte mẽ kurom mẽ htyk nê akupỳm mẽ htĩr ã mẽ hkamnhĩx nê Tĩrtũm kapêr o mẽ wrỳk xwỳnh ã mẽ hkamnhĩx. Nhũm Pawre kot ja hã mẽ omunh jakamã tanhmã hamaxpêr to hãmri nê mẽ kãm kapêr. Na pre Parijew nhõ xwỳnhjê pyrã nê mẽ htyk nê akupỳm mẽ htĩr kôt hamaxpêr nê Tĩrtũm kapêr o mẽ wrỳk xwỳnh kôt hamaxpêr. Jakamã mẽ omu nê kàx pê mẽ kãm kapêr nê mẽ kãm: —Nà ijaxwỳja ixpê Parijew nhõ xwỳnh. Nhũm inhĩpêxà haxwỳja kêp Parijew nhõ xwỳnh. Jakamã na pa hte mẽ apê Parijew nhõ xwỳnhjê pyrã nê mẽ htyk nê akupỳm mẽ htĩr kôt ijamaxpêr. Tã ãm ja pix mỳrapê na ka mẽ ixpynê nê ã inhĩpêx anê. Anê. Hãmri nhũm Parijew mẽ Satusew nhõ xwỳnhjaja kuma nê ja hã axpên kãm gryk nê. Nê hã axpên mã akir.

⁹Hāmri nē ra axpēn mā àkjêr rax nē. Hāmri nhūm Parijew kwỳ pē Mojes kapēr o mē ahkre ho mē pa xwỳnhjaja kànhmã kuhê nē mē kãm Pawre hã àprār kãm hihtỳx nē mē kãm: —Kwa pēr tanhmã kot amnhĩ tomnuj tore hã. Mãn ãm hpimtir kãm na pre ã ri kaxkwa kamã mēmoj mar anē. Rỳ apu Tĩrtũm kapēr o wrỳk xwỳnh kãm tanhmã kapēr to nhūm pre Tamas wỳr pry kamã mar o xa rỳ ko. Anē.

¹⁰Hāmri nhūm Satusew nhõ xwỳnhjaja tee ri Tĩrtũm kapēr o mē wrỳk xwỳnh kot kãm kapēr ã harēnhja ma nē hã axpēn mā àkjêr rax nē. Hāmri nhūm pōristi krãhtũmja tee ri mē kot axpēn mā àkjêr ã mē omu hāmri nē pōristi mã kãm: —Kwa mē Pawre hwỳr tē nē mē kēp utà nē ma akupỹm o tē nē haxà. Kot ka mē ho anhỹr kêt nhūm mē tanhmã hamaxpēr to nē gryk xàj axpēn nhĩkra kamã hkaxôn pa. Anē. Hāmri nhūm mē kuma nē hwỳr tē nē mē kēp utà nē akupỹm o tē nē ixkre hwỳr ho axà.

Jejus kot Pawre jamaxpēr o hihtỳx ã harēnh

Atre 18.9-10

¹¹Tã nhūm kamàt nhūm Jejus tãm Pawre hwỳr kato nē kãm: —Pa Pawre? Kwa tee ri amnhĩ kukamã ajamaxpēr o amnhĩ kamã akahak kêt nē. Kot kaj te ra ate jar Jerujarē kamã mē kãm ijarēnhta pyrà nē ma krĩ pē Rõm wỳr mō nē krĩ nhõ xwỳnhjê mã ijarē. Anē.

Mē kot Pawre hã àmnēnh ã mē harēnh

Sikũn Ximotre 4.18

¹²⁻¹³Tã nhūm apkati nhūm Ijaew kwỳjaja axpēn wỳr akuprõ. Mēmyjaja kēp 40 nē axte hkôt mē hkwỳjaja axpēn wỳr akuprõ. Mē kot Pawre pĩr kaxyw hã axpēn mar kaxyw hã akuprõ nē hã axpēn mã amỹnê nē axpēn mã: —Tôe. Nà kot puj mē hpĩr kaxyw amnhĩ jagri htỳx o paxàpkur kêt rãhã kupĩ nē rĩ kormã apku nē ixkõ. Nà kot puj mē ho anē. Ra Tĩrtũm noo mã mē pahte ja hã amnhĩ jarēnh kēnã. Anē.

¹⁴Hāmri nē mē ma mē õ patre krãhtũmjê mē mē àptàr tũmrejê hwỳr mra nē mē kãm hã amnhĩ jarē nē mē kãm: —Ot pa mē amã amnhĩ jarēnh mã mra. Nà kot paj mē tã Pawre pĩ. Kot paj mē kormã hpĩr kêt ri ixàpkur kêt rãhã kupĩ. Ra mē ixte Tĩrtũm noo mã ja hã amnhĩ jarēnh xà hkôt.

¹⁵Jakamã e mẽ inhma. Kêr ka mẽ axêx rom pôristi krãhtũm mã anê kê apkati kê man mẽ awỳr Pawre ho tẽ. Te mẽ ate aprĩ hã hkukjêr kaxyw pyrãk o kãm axêx. Koja mẽ kormã mẽ awỳr ho hpôx kêt ri pa mẽ unên kupĩ. Anê.

¹⁶Hãmri nhũm Pawre tàmnhwỳ mẽ kot ã hã amnhĩ jarênh anhỳrja ma hãmri nẽ ma pôristi xàpênh xà hã ixkrej wỳr Pawre hwỳr hprôt nẽ kãm mẽ harẽ.

¹⁷Hãmri nhũm kuma nẽ amnhĩ wỳr pôristi krãhtũm nhỹ hã mẽ hamãr xwỳnh ã karõ nẽ kãm: —Kwa ma mẽ akrãhtũm wỳr ixtàmnhwỳta o tẽ kê kãm mẽmoj jarẽ nà? Anê.

¹⁸Hãmri nhũm kuma nẽ ma hwỳr o tẽ nẽ kãm: —E Pawre na inhmã anê pa awỳr htàmnhwỳ ho tẽ. Kot tanhmã amã ujarênh to kaxyw. Anê.

¹⁹Hãmri nhũm omu nẽ hpa hã kupy nẽ o tẽ nẽ ahte mẽ hkàx ã o xa nẽ kãm: —E mãmri inhmã mẽmoj jarẽ pa ama. Mẽmo na ka te inhmã harênh kaxyw? Anê.

²⁰⁻²¹Hãmri nhũm kãm: —Nà Ijaew xàptàr tũmrejaja na mẽ kot inhĩgêt Pawre pĩr kaxyw hã amnhĩ jarẽ pa amã harênh o tẽ. Koja xep mẽ hã awỳ. Xep apkati nhũm ate ma mẽ hwỳr mẽ hkukjêr xà hã ixkre hwỳr ho amõr nhũm mẽ kot hprĩ hã kot amnhĩ nhĩpêx ã hkukjêr kaxyw. Nom koja mẽ ãm amã amnhĩ to hêx. Koja xep mẽ kêp 40 nẽ pry kamã kutêp amũxu nẽ kuhê. Na mẽ ra hã axpên mar pa nẽ axpên mã: “Kot puj mẽ paxàpkur kêt rãhã Pawre pĩ nẽ rĩ kormã apku nẽ ixkõ.” Anhỳr o amnhĩ jarẽ pa mẽ kuma. Jakamã na mẽ kormã ate mẽ hwỳr mẽnh kaxyw akãm ama. Kwa mẽ hwỳr ho amõr kêt nẽ. Anê.

²²Hãmri nhũm kuma nẽ kãm: —Tôe. Nà na pa ra ama. Mãmri ma akupỹm tẽ. Nom kêr ka inhmar kumrêx. Kêr ka nhãm mẽhõ mã ja jarênh kêt kumrêx. ãm kwarĩ ho kwarĩ. Anê. Hãmri nhũm kuma nẽ kato nẽ ma akupỹm tẽ.

Mẽ kot Ijaew pymaj nhỹhỹm Pawre mẽnh ã mẽ harênh

²³⁻²⁴Tã nhũm pôristi krãhtũmja amnhĩ wỳr ã hã pôristi jamãr o mẽ pa xwỳnh wa ho hamêxkrut nẽ wa hã karõ nẽ wa kãm: —E wa inhma. Koja kôt ã kamàt ka wa ma krĩ pê Sejarej wỳr Pawre ho mõi kê hkà hkĩnh pê pahihti

Peris wỳr pỳj. Nẽ amnhĩ kôt pờristi ho 200 nẽ o mỗ. Nẽ kê mẽ kêp 70 nẽ kawar ã hkrĩ nẽ mẽ akôt mỗ. Nẽ kê mẽ kêp 200 nẽ wapo jamỳ nẽ mẽ akôt o mỗ. Kê mẽ ã ohtô rax anẽ. Nẽ Pawre kot kawar ã ỳr nẽ mỗr kaxyw ka mẽ kãm hõ ho mỗ. E kêr ka mẽ ã axohtô nẽ hkôt amõr anẽ kê hkà hkĩnh pẽ pahшти Peris wỳr pỳj. Anẽ.

25Hãmri nẽ pahшти Peris mã kagà nhĩpêx nẽ kamã kãm Pawre jarẽ nẽ kãm:

26Pa pahшти Peris? Xà amex? Ixpê Kraw Risas na pa awỳr kagà mẽ.

27E ot pa awỳr Ijaew pẽ Pawre mẽ. Na pre hkwỳja kot hpĩr kaxyw unênh tã pa mãânên kêp Rõm nhõ xwỳnh ã harênh ma hãmri nẽ hwỳr inhõ pờristi rẽ nhũm mẽ hwỳr hprõt nẽ mẽ kêp utà.

28Hãmri nẽ Ijaew xàptàr tũmrejê hwỳr o tẽ. Mẽ kot inhmã tanhmã kot amnhĩ tomnuj to hã harênh kaxyw.

29Tanhmã kot amnhĩ tomnuj to nhũm mẽ kot haxàr rỳ hpĩr ronhỹx ja mex nẽ. No xep ãm kot mẽ higêtjê kot amnhĩ nhĩpêx kôt amnhĩ nhĩpêx kêt pix mỳrapê na mẽ kamã gryk.

30Tã pa mẽ kot hpĩr kaxyw hã mẽ harênh ma nẽ mẽ umaj awỳr kumẽ. Hãmri nẽ kamã mẽ gryk xwỳnhjê mã ajarẽ. Jakamã koja mẽ mẽmo arĩgro hã awỳr pỳj nẽ tanhmã kot amnhĩ nhĩpêx to hã amã harẽ ka kam ja hã mẽ ama nẽ tanhmã ho. Tã ãm ja pix na pa amã harẽ. Ixpê Kraw Risas na pa awỳr kagàja mẽ. Tã mãn ka arĩ ixte amã harênhja ma. Anẽ.

31Tã nhũm kamàt nhũm mẽ hkrãhtũm kot mẽ kãm karõ xà hkôt nhũm pờristijaja ma Pawre o mỗ. Hãmri nẽ krĩ pẽ ãxipat wỳr pỳj nẽ kamã amnhĩm hikra.

32Nhũm apkati nhũm mẽ kot mẽ hkôt pykap mỗr xwỳnhjaja mẽ õ pahi kot mẽ kãm hã karõ xà hkôt awjanã nẽ ma akupỹm mỗ nhũm kawar ã mẽ mỗr xwỳnh pixjaja ma Pawre ho mỗ.

33Hãmri nẽ mỗ nẽ Sejarej wỳr pỳj nẽ pahшти Peris nhĩhkram Pawre jaxà nẽ kãm kagàja gõ nẽ awjanã nẽ ma akupỹm hapêx.

³⁴Hāmri nhūm Perisa kagàja py nē omu. Nē omunh pa nē Pawre mã kām: —E inhmã amnhĩ jarẽ. Tanhmã na anhõ pyka hixi te? Anẽ. Nhūm kām: —Kêp Siris. Anẽ.

³⁵Nhūm kām: —Tôe. Kê mẽ kot ato kapêr xwỳnhjaja pøj pa kormã ixprĩ hã mẽ kot tanhmã ajarẽnh to ma mãn. Anẽ. Hāmri nē õ pôristi mã anẽ nhūm mẽ ma Pawre o tẽ. Ma pahi Erox htyk xwỳnh nhõrkwỹ hwỳr o tẽ nẽ kamã haxà nhūm hkrĩ ho hkrĩ.

Atre 24

Ijaew kot tanhmã Pawre ho kapêr punuj to hã mẽ harẽnh

Rukre 21.12-13; Atre 25.7

¹Tã nhūm arĩgro kêp 5 nẽ hapêx nhūm Ijaew kwỳjaja Sejarej wỳr pøj. Mẽ õ patre maati ãnãñisti nẽ Tetur nẽ kaxyw mẽ àptàr tũmrejaja nhūm mẽ ma hwỳr mō nẽ pøj. Tetur kêp axiwôkat ã mẽ yr pê kapêr xwỳnh jakamã nhūm mẽ kot tanhmã Pawre o kapêr punuj to kaxyw pahi Peris wỳr amnhĩ kôt o mō.

²Hāmri nhūm mẽ amnhĩ wỳr Pawre hã karõ nhūm pôristi haprô nẽ mẽ hwỳr o tẽn ho axà. Hāmri nhūm Teturja pahihti Peris mã Pawre kot tanhmã amnhĩ tomnuj to hã harẽ nẽ kām: —E pahihti inhma. Nà na ka hte tãm mẽ inhĩpêx nẽ mẽ ixto mex o apa. Jakamã nhūm hte nhãm pika hkwỳ nhõ xwỳnhjaja mẽ ixkurê kaxàr kaxyw mẽ ixwỳr hprôt kêt nẽ. Pa htem ixpiitã akukwak ri ijamakêtkati nẽ ixãmnhĩx inhmex nẽ ixpa.

³Nẽ mẽ ixkĩnh rãhã ho ixpa. Hêxta waa nẽ. Mẽ ixpiitã inhmã akĩnh.

⁴E kot paj amã awjarẽ ka inhma. Kot paj ixujarẽnh o hakotre ka inhma nẽ tokyx ma akupỹm tẽ.

⁵Nà Pawre na hte amnhĩ tomnuj pix o pa. Kêp Jejus pê Najare nhõ xwỳnhhta kôt amnhĩ nhĩpêx o mẽ pa xwỳnhjê nhõ pahi na. Jakamã na hte pyka piitã hkôt mẽ ixpê Ijaew tanhmã axpẽn kaxyw mẽ ixkryx to ho pa.

⁶Jãã na pre Tĩrtũm mã amnhĩ jarẽnh xà hã ixkre hwỳr amnhĩ kôt mẽ kệp Ijaew kêt xwỳnh kwỳjê ho agjê nẽ mẽ ixpê ixkreja omnu kaxyw mã tã pa mẽ omu nẽ unê.

⁷Tã nhũm pôristi krãhtũm Risasja mẽ ixpê utà

⁸nẽ awỳr mẽ ixte tanhmã amã harẽnh to xwỳnhjê rẽ. Tã ot pa mẽ ixkrĩ. Nẽ ota Pawre nhỹ. Kam kot amnhĩ nhĩpêx ã hkukja kê tanhmã amã amnhĩ jarẽnh to ka ama nẽ ixte amã harẽnh xà hkôt tanhmã mar to. Anẽ.

⁹Hãmri nhũm Ijaew hkwỳ haxwỳja kãm: —Nà ãm hãmri na ã amã harẽnh anẽ pahihti. Anẽ.

Pawre kot pahihti mã amnhĩ jarẽnh

Rukre 21.14-19

¹⁰Hãmri nhũm pahihti Peris Pawre mã anẽ nhũm kot kãm amnhĩ tã àprãr kaxyw kànhmã xa nẽ kãm: —Nà na ka ra inhõ pyka kamã mẽ ixto amnhĩptàr mex o atã amgrà xohtô nẽ pahihti. Jakamã na pa pre ate ixkapêr mar kaxyw ã ajarẽnh ma nẽ ixkĩnh nẽ.

¹¹—E kot paj amã amnhĩ jarẽ ka inhma. Ham na pa pre Jerujarẽ hwỳr mỗ nẽ pøj. Na pa hwỳr ixpôx ã ixtã arĩgro pê 12 pix. Kam nẽ ixtã ixkwỳjê kukja nẽ mẽ ama. Ixte Tĩrtũm mã amnhĩ jarẽnh xà hã ixkre kamã Tĩrtũm mã mex o mex ã harẽnh kaxyw na pa pre hwỳr mỗ.

¹²No na pa pre nhỹri axpẽn kaxyw tanhmã ri mẽ hkryx to hkêt nẽ. Nẽ mẽ ixte Tĩrtũm mã amnhĩ jarẽnh xà hã ixkre kamã rỳ kapêr o mẽ ahkre xà hã ixkre kamã rỳ nhỹri pry kamã tanhmã axpẽn kaxyw ri mẽ hkryx to hkêt nẽ. ãm amrakati ho amrakati.

¹³Mẽ kot ã ri ijarẽnh anhỹrja amrakati kumrêx. Mẽhõ kot ã ixte amnhĩ nhĩpêx anhỹr ã ixpumunh kêt tã na htem amnhĩ krã hkôt amã ijarẽnh o hêx.

¹⁴Na htem mẽ ixte Jejus kôt amnhĩ nhĩpêx xwỳnhjaja mẽ ixte amnhĩ nhĩpêx mex kêt ã mẽ ijarẽ nom kot anhỹr kêt. ãm mẽ inhĩgêjtjê nhõ Tĩrtũm kapêr nywja kôt na pa hte amnhĩ nhĩpêx mex o ri ixpa rãhã nẽ. Nhũm ixkwỳjaja htỳx axtem kapêr ò hkôt ixte amnhĩ nhĩpêx o ixpa hã ixkamnhĩx no ãm kapêr ò hkêt. Ijaxwỳja na pa hte mẽ uràk nẽ finat Mojes kapêr ã kagà mar

o ixpa. Nē Tirtūm nhỹ hã mẽ kapēr o mẽ pa xwỳnh kot kapēr ã kagàja pa hte mẽ uràk nē hkôt amnhĩ nhĩpêx mex o ri ixpa.

¹⁵Nē mẽ uràk nē Tirtūm kot nhỹrmã akupỹm mẽ ho htĩr kôt pa hte ijaxwỳja ijamaxpēr tỳx nē. Mẽ htyk xwỳnh piitãã. Mẽ kot amnhĩ to mex xwỳnhjê mẽ mẽ kot amnhĩ tomnuj xwỳnhjê mẽ mẽ ho hpimràatã akupỹm mẽ ho htĩrja kôt pa hte mẽ uràk nē ijamaxpēr tỳx o ri ixpa.

¹⁶Jakamã na pa hte tãm amnhĩ nhĩpêx rãhã nē. Tirtūm noo mã nē mẽ piitã mẽ noo mã tãm ri amnhĩ nhĩpêx mex rãhã nē.

¹⁷—Tã na pa pre pyka hkwỳ hkôt ri ixpa hã ixtã amgrà xohtô nē. Hãmri nē ma akupỹm Jerujarē hwỳr ixkwỳjê hwỳr mō. Amarĩ ixte mẽ kãm kàxpore hkwỳ nhõr kaxyw pa akupỹm mẽ hwỳr mō. Nē mãănēn Tirtūm mã mẽmoj nhõr kaxyw.

¹⁸Hãmri nē mẽ ixte amnhĩ nhĩpêx xà hkôt pa mẽ amnhĩ to mex pa nē ma tēn Tirtūm mã amnhĩ jarēnh xà hã ixkre hwỳr axà nhũm mẽ kamã ixpumu. Nom na pa pre ri ixkreja kamã tanhmã amnhĩ tomnuj to hkêt nē. Rỳ tanhmã ixkapēr punuj to hkêt nē. Na pa prem ãm inhgrêre nē akryk ixkuhê nhũm mẽ ixpumu.

¹⁹Pika pê As rũm Ijaew kwỳjaja na prem ixkre kamã ixpumu. Nar mẽ tãmjaja mãn awỳr mra nē tanhmã amã ijarēnh to.

²⁰—Nē jar mẽ kot ixto kapēr xwỳnhjaja. Na pa pre mẽ àptàr tũmrejê mã amnhĩ jarēnh pa nhũm mẽ inhma nē tanhmã inhmã nē hkêt nē. Kam nē ja hã mẽ hkukja nē mẽ ama.

²¹Rỳ ko. Kojã apu mẽ amã ãm ja pix ã ijarēnh japêr. Na pa pre mẽ kãm ixkapēr nē mẽ kãm: “Na pa hte mẽ htyk nē akupỹm mẽ htĩr kôt ijamaxpēr tỳx nē. Tã ja pix mỳrapê na ka prem ixpynê nē ã inhĩpêx anē.” Anhỹr o mẽ kãm ixujarēnh jakamã nhũm apu mẽ hkwỳjaja kêp ja omnuj nē. Jakamã kojã apu mẽ amã ja hã ijarēnh japêr. Nom ja pix jarê. Anē. ã na pre Pawreja pahĩ Peris mã amnhĩ jarēnh anē.

Peris mẽ hprō wa kot Pawre mar ã wa harēnh

²²Tã nhũm pahihiti Peris kot mẽ kot Jejus kôt amnhĩ xunhwỳr xwỳnhjê kot amnhĩ nhĩpêx ã mẽ omunh mex jakamã hãmri Pawre mar pa nẽ ho kapêr xwỳnhjê mã kãm: —Nà hãmri. Na pa ra mẽ ama. E mẽ mamrĩ ma mra. Kê pôristi krãhtũm Risasja mỗ nẽ pøj pa wa ixprĩ hã mẽ ate tanhmã harẽnh toja ma nẽ rĩ kormã tanhmã Pawre jarẽnh to. Anẽ.

²³Hãmri nẽ hpãnhã pôristi pytàr xwỳnh mã Pawre jarẽ nẽ kãm: —E mẽ ma akupỹm ixkre hwỳr o tẽ nẽ kamã hamãr o apa. No ãm kwãr mãmrĩ àmnhĩx ri ixkre kamã tanhmã amnhĩ to ho ri pa. Nẽ kê hkrãmnhwỳjaja mãmrĩ hwỳr mẽmoj to mra kê kuku. Anẽ. Hãmri nhũm mẽ kuma nẽ ma o tẽ nẽ akupỹm ixkre hwỳr ho axà nhũm kamã pa ho pa.

²⁴Tã ra hã apkati grêre nhũm Peris mẽ hprõ wa ma Pawre hwỳr tẽ. Prõ haxwỳja kêp Ijaew. Hixi pê na pre Turujire. Jakamã nhũm wa ma Pawre nhõrkwỹ hwỳr wa tẽ. Nhũm Peris Pawre hã karõ nhũm kato nẽ wa hwỳr tẽ nẽ wa kãm awjarẽ. Tanhmã wa kot amnhĩ to nẽ amnhĩ kaxyw Jejus Kris kôt hamaxpêr nẽ hkôt amnhĩ xãm prãm xàj hprĩ hã wa kãm harẽ.

²⁵Nẽ wa kãm: —Nà na htem Jejus Kris kôt amnhĩ nhĩpêx nẽ tãm ri amnhĩ nhĩpêx o pa. Kãm tanhmã amnhĩ tomnuj to hprãm tã ho anhỹr kêt nẽ. Nẽ arĩ Jejus kot amnhĩ nhĩpêx kôt amnhĩ nhĩpêx o pa. Kojã Tĩrtũm nhỹrmã mẽ pahpiitã mẽ pahte tanhmã amnhĩ nhĩpêx to ho papa hã mẽ pahpumunh xà hkôt tanhmã mẽ pajarẽnh to. Mẽ pahte tãm amnhĩ nhĩpêx xwỳnh ã mẽ pajarẽ rỳ mẽ pahte amnhĩ tomnuj xwỳnh ã mẽ pajarẽ. Anẽ. Nhũm pre ã Pawre Peris mẽ Turujire wa kãm kapêr anẽ. Hãmri nhũm Peris tee ri ujarẽnhja ma nẽ kãm ma nẽ. Kot amnhĩ tomnuj o pa xwỳnh ã amnhĩ pumu nẽ ã kãm kapêr anhỹrja mar pyma nẽ. Hãmri nẽ Pawre mã kãm: —E hãmri. Nà na pa wa ra ama. Mamrĩ ma akupỹm tẽn axà. Kot paj mẽmo arĩgro hã mẽmoj to anhỹr kêt nẽ axte amnhĩ wỳr atã karõ ka axte tanhmã wa inhmã axujarẽnh to. Anẽ.

²⁶Nẽ htỳx hamaxpêr o: —Nà kot paj mẽmo arĩgro hã axte amnhĩ wỳr hã karõ kê ixwỳr tẽ nẽ ixte kator prãm xàj inhmã amnhĩrer japêr. Anẽ. Hãmri

ně xatã amnhĩ wỳr hã karõ htã no nhũm aa kot kator kaxyw tanhmã kãm
ně hkêt nẽ.

²⁷Tã nhũm amgrà axkrut nẽ hapêx nhũm Pos Pesti pahi Peristi hpãnhã kêp
mẽ õ pahi nẽ mẽ ho amnhĩptà. Jakamã nhũm Peris akupỹm õ krĩ hwỳr
nojarêt nẽ Pawre mã ìhkra karo hkêt rãhã ma mõi. Na pre hamaxpěr o: —
Nà kot paj Pawre kator nhũm Ijaew ja hã ijarênh ma nẽ ixkamã gryk nẽ. Nà
kwār mẽ hagjênh xà hã ixkre kamã hkrĩ ho hkrĩ. Kot paj kator kêt nẽ. Anẽ.
Hãmri nẽ kãm ìhkra karo hkêt rãhã ma akupỹm õ krĩ hwỳr mõi. Jakamã
nhũm Pawre arĩ ixkre kamã kêp prês nẽ hkrĩ ho hkrĩ.

Atre 25

Pawre Rõm wỳr hkrà ã harênh

¹Tã nhũm pahi nyw Pos Pesti krĩ pê Sejarej wỳr mõi pøj. Hãmri nẽ kamã ri
pa hã apkati axkrunêpxi pix nẽ ma Jerujarẽ hwỳr mõi.

²Hãmri nẽ hwỳr pøj nhũm Ijaew kwỳjaja omu nẽ hwỳr mra nẽ kãm Pawre
ho kapěr nẽ hã hwỳr kurê kumrêx. Mõi patre krãhtũmjê mẽ Ijaew xàptàr
tũmrejaja nhũm mẽ hwỳr mra nẽ kãm:

³—Pa pahihti? E ot pa mẽ awỳr mra. Kwa xà kot ka Pawre hã karõ kê man
awỳr mõi ka jar kot tanhmã amnhĩ tomnuj to hã hkukja nẽ ama? Anẽ. No
ãm hêx rom ã hã kãm kapěr anẽ. Kot hã karõ nhũm mẽ kot pry hã hpĩr
kaxyw nhũm mẽ hêx rom ã kãm kapěr anẽ.

⁴Hãmri nhũm mẽ kuma nẽ mẽ kãm: —Tk. Kwa ra Sejarej kamã kêp prês nẽ
hkrĩ kênã kot pa kêt amnhĩ wỳr hã karõ. Kot pa tokyx ma akupỹm hwỳr mõi.

⁵Jakamã kêr ka mẽ axàptàr tũmjaja ma ixkõt mra. Hãmri nẽ Sejarej kamã
inhmã tanhmã kot amnhĩ tomnuj to hã harênh to pa mẽ ama nẽ rĩ kormã
tanhmã harênh to. Anẽ.

⁶Hãmri nẽ mẽ kamã pa hã apkati grêre nẽ ma akupỹm Sejarej wỳr mõi.
Hãmri nẽ hwỳr pøj nhũm apkati nhũm mẽ hkukjêr xà hã ixkre hwỳr tẽ nẽ
mẽ kot mẽ mar xà hã mẽ hkrĩ xà kamã nhỹ nẽ amnhĩ wỳr Pawre hã karõ.

⁷Nhũm mẽ hwỳr o tẽ nẽ ỹr nhũm hkwỳ kot Jerujarẽ rũm mẽ mõi xwỳnhjaja kãm hipõk nẽ pahi Pos Pesti mã tanhmã ho kapẽr to nẽ ho kapẽr punuj tỳx nẽ. Kot tanhmã amnhĩ tomnuj to ho pa hã ho kapẽr o kuhê. Nom mẽ kot ã kot amnhĩ nhĩpêx anhỹr ã omunh kêt tã ãm amnhĩ hkrã hkõt ri tanhmã ho hêx to.

⁸Jakamã nhũm Pawre tee ri amnhĩ tã mẽ kot ho hêxja ma nẽ kànhmã xa nẽ Pos Pesti mã amnhĩ tã aprã nẽ mẽ kãm: —Nà aa ixte ã amnhĩ nhĩpêx anhỹr kêt. Na pa finat Mojes kot Tĩrtũm nhỹ hã kapẽr nhĩrõp ixãm nẽ hkwỳm ri tanhmã amnhĩ nhĩpêx to hkêt nẽ. Nẽ mẽ ixte Tĩrtũm mã amnhĩ jarẽnh xà hã ixkre kamã ri tanhmã ixtỳx ri amnhĩ nhĩpêx to hkêt. Nẽ pahihti Sesti kapẽrja pa pre hirõp ixãm nẽ tanhmã amnhĩ tomnuj to hkêt nẽ. Aa ixte ã amnhĩ nhĩpêx anhỹr kêt kumrêx. Anẽ.

⁹Hãmri nhũm Pos Pesti kuma nẽ tanhmã hkukamã hamaxpẽr to nẽ hamaxpẽr o: —Kwa nhỹ krĩ kamã kot pa we Pawre kot inhmã tanhmã amnhĩ jarẽnh toja ma nhũm Ijaew ja hã kãm ixkĩnh japêr? Nà mẽõ krĩ pẽ Jerujarẽ hwỳr kot paj akupỹm mẽ hwỳr o mõi nẽ kamã mãn hkukja nẽ kuma. Nà ja na mex. Nà kot paj anẽ. Anẽ. Hãmri nẽ Pawre mã kãm: —E xà kot puj ma akupỹm Jerujarẽ hwỳr mõi pa kamã axte mẽ kot ajarẽnh ma nẽ tanhmã ajarẽnh to nà? Anẽ.

¹⁰Hãmri nhũm kãm: —Nà jar ixte pahihti Sesti nhỹ hã mẽ kot mẽ hkukjêr xà hã ixkre kamã inhỹr nẽ amnhĩ jarẽnh kênã. Jar na htem mẽ hkukja nẽ tanhmã ri mẽ mar to. Na pa pre tanhmã ixkwỳjê ho hkêt nẽ. Mẽmo kaxyw kot pa akupỹm mẽ hwỳr mõi nẽ axte mẽ kãm amnhĩ jarẽ?

¹¹Kop apu pa tanhmã ixte amnhĩ tomnuj to ronhỹx mẽ mãmri ja hã ixpĩ pa mẽ kêp tanhmã ri amnhĩ to hkêt nẽ. Nom mẽ kot ixto hêx pix o ã ijarẽnh anhỹr kênã. Jakamã mẽmo mỳrapê kot kaj mẽ ãhkram ijaxà? E Rõm kãm pahi maati Sesti hwỳr mãn inhmẽ pa kumã mãn amnhĩ jarẽ. Anẽ. Pahi Sesti kêp pyka piitã hkõt mẽ ho amnhĩptàr xwỳnh maati jakamã nhũm Pawre kot mar kaxyw hwỳr hkrã.

¹²Hāmri nhūm Pos Pesti kuma nē ma tē nē hã õ kôwenatôjê ma. Hāmri nē hã axpēn mar pa nē akupỹm hwỳr tē nē kãm: —Tôe. Nà kot paj pahi maati Sesti wỳr amē. Ra hwỳr akrà kēnã. Anē.

Pos Pesti kot Akrip mã Pawre jarēnh

¹³Tã nhūm apkati grêre nē hapêx nhūm pahi hõ pê Akripja ma Pos Pesti hwỳr mō. Tõx Perēnīs mē wa mō.

¹⁴Hāmri nē wa hwỳr pōj nē kuri wa pa hã apkati grêre nhūm Pos Pesti wa kãm Pawre jarē nē wa kãm: —E pa war amã mēhõ jarē. Na pre pahi Perisja mē hagjēnh xà kamã mēhõ jaxà nē kormã kator kêt ri nhūm mē àpēnh nē kator pa hpãnhã àpēnh o amnhĩptà.

¹⁵Tã ra ma Jerujarē hwỳr mō nhūm Ijaew nhõ patre krãhtũmjê mē mē àptàr tũmrejaja inhmã ho kapēr punuj rax nē. Nē ixte mē kãm hpĩr kaxyw inhmã hã àmnēnh kãm hihtỳx nē.

¹⁶Nom pa mē kēp ja kaga nē mē kãm: “Nà mē ixpê Rõm nhõ xwỳnhjaja na pa htem ã mē hipêx anhỳr kêt nē. Na pa htem mē kot ho kapēr xwỳnh noo mã tanhmã hkukjêr to nhūm tanhmã amnhĩ tã àprãr to pa htem kuma nē rĩ kormã tanhmã mē ho. No na pa htem kormã mē kot tanhmã amnhĩ jarēnh to hkêt ri tanhmã mē ho hkêt nē.” Anē.

¹⁷—Jakamã nhūm prem kaxyw Sejarej wỳr pōj nhūm apkati pa hã mē hkukjêr kurê kumrēx. Nē mē kot mē hkukjêr xà hã mē hkrĩ xà kamã nhỹ nē ixte hkukjêr kaxyw amnhĩ wỳr Pawre hã karõ.

¹⁸Na pa pre ijamaxpēr o: “Mãn pre tanhmã amnhĩ tomnuj tỳx to hã na mē inhmã harēnh kaxyw.”

¹⁹Anhỳr ã hkamnhĩx tã te kot amnhĩ to mex xwỳnh pyræk. ãm kot mē hkôt amnhĩ nhĩpêx kêt pix ã nhūm mē inhmã harē. Nē kaxyw mēhõ htyk xwỳnh jarē. Mē kot kãm “Jejus” anhỳr xwỳnhja na xep hte mē kãm akupỹm htĩr ã harēnh o pa. ãm ja pix na prem inhmã harē.

²⁰Pa tee ri ixte nhỹri ixprĩ hã tanhmã mē kot harēnh to hã mē mar kaxyw hkukamã ijamaxpēr. Hāmri nē hã Pawre kũkja nē kãm: “Xà kot puj ma

akupỹm Jerujarẽ hwỳr mō pa axte akwỳ kot tanhmã ajarẽnh to ma nẽ rĩ kormã tanhmã ajarẽnh to nà?”

²¹Anhỹr tã no nhũm akupỹm Jerujarẽ hwỳr mōr kaga kumrẽx nẽ amnhĩm Rōm kãm pahi maati Sesti jarẽ. Ixte ma hwỳr mẽn̄h nhũm kot kãm amnhĩ jarẽnh nhũm kot mar nẽ tãm tanhmã harẽnh to kaxyw. Jakamã pa kormã ixte hwỳr mẽn̄h kaxyw amnhĩ xa hã akupỹm mẽ hagjênh xà kamã haxà nhũm arĩ hkrĩ ho hkrĩ. Anẽ.

²²Hãmri nhũm Akrip kuma nẽ kãm: —Xôwehe? Kwa na pa inhmã tanhmã kapêr to mar prãm nẽ. Anẽ. Hãmri nhũm kãm: —Tôe. Nà kê apkati pa hã karō ka tanhmã kapêr mar to. Anẽ.

²³Jakamã nhũm apkati nhũm Akrip mẽ htōx Perênĩs wa pahi hã mẽ ê mex jagjê nẽ ma mẽ hkukjêr xà hã ixkre hwỳr wa tẽ. Pôristi krãhtũm kwỳjê mẽ Sejarej kamã mẽ kot amnhĩ to rũnh xwỳnh kwỳjê mẽ nhũm mẽ hwỳr akuprō. Nhũm mẽ piitã Akrip mẽ htōx wa kêp pahi hã wa ê mex ã wa omu nẽ wa kamã no pyrna nẽ. Hãmri nhũm Pos Pesti Pawre hã karō nhũm mẽ haprô nẽ ma mẽ hwỳr o tẽ.

²⁴Hãmri nhũm Pos Pesti omu nẽ Akrip mẽ htōx mẽ mẽ kot mar o hkrĩ xwỳnhjê mã kãm: —E pahihti Akrip mẽ mẽ apikuprōnh xwỳnhjaja. Ota Pawre xa. Jerujarẽ kamã nẽ jar Sejarej kamã na pre hkwỳjaja inhmã ho kapêr rax nẽ. Hãmri nẽ ixte hpĩr kaxyw inhmã hã àmnên̄h kãm hihtỳx nẽ.

²⁵Nom mẽmoj mỳrapê kot pa kêt kupĩ? Tã nhũm amnhĩm pahi maati Sesti jarẽ pa ma hwỳr mẽn̄h kaxyw.

²⁶⁻²⁷Nom na htem amarĩ pahi maati Sesti hwỳr mẽ rên̄h kêt nẽ. Na htem kãm mẽ kot tanhmã amnhĩ tomnuj to hã kagà nẽ hwỳr kagà mẽ ro hã mẽ kurẽ. No jahti kot tanhmã amnhĩ tomnuj toja na ixte omunh kêt. Te inhmã tanhmã kot amnhĩ tomnuj to hkêt pyræk. Jakamã na pa mẽ awỳr o tẽ. Mẽ ate kapêr mar nẽ kot tanhmã amnhĩ tomnuj to hã inhmã harẽnh nhũm ixte hã kagà nẽ pahi Sesti hwỳr mẽn̄h kaxyw. Jakamã e mẽ kam nẽ hkukja nẽ ama nẽ tanhmã mar to. Anẽ.

Atre 26

Pawre kot pahiti Akrip mā amnhī jarēnh

Atre 8.3; 9.1-19; 22.1-21

¹Hāmri nhūm Akrip Pos Pesti kot tanhmā Pawre jarēnh toja ma nē Pawre mā kām: —E māmri mẽ inhmā amnhī jarē pa mẽ ama. Anē. Hāmri nhūm kuma nē kām amnhī jarēnh kaxyw kànhmā kām ĩhkra pē nē kām:

²⁻³—Hêxta waa nē. Nà na pa amā amnhī jarēnh kaxyw nē ixkīnh nē pahi Akrip. Ra ate mẽ ixpê Ijaew kot amnhī nhīpêx ã mẽ ixpumunh mex. Nē mẽ ixte tanhmā amnhī nhīpêx to hã mẽ ixte axpēn kukjêrta ate hã mẽ ixpumunh mex. Jakamā na pa amā amnhī jarēnh kaxyw nē ixkīnh nē. E tokyx anojarêt kêt nē inhma. Pa amā ixujarēnh jatur xàm kumē ka aprī hã inhma.

⁴Nà ixkwỳjaja ra mẽ kot ixte amnhī nhīpêx ã ixpumunh mex. Ixprire rūm ixpapxà kamā nē määnēn Jerujarē kamā ixte tanhmā amnhī nhīpêx to ho ixpaja mẽ kot hã ixpumunh mex.

⁵Ixpê mẽ hkwỳ pē Parijew nhõ xwỳnh kwỳjê hã mẽ kot ixpumunh. Kojja mẽ apu ja hã amā ijarēnh japêr rỳ ko. Mẽ ixpê Parijew nhõ xwỳnhjaja na pa htem amnepêm finat Mojes kot Tirtūm nhỹ hã mẽ inhīgêjtjê mã mẽmoj tã karõ xà hkôt amnhī nhīpêx mex o ixkwỳjê jakre.

⁶—Amnepêm na pre Tirtūm mẽ inhīgêjtjê mã tanhmā amnhī jarēnh to. Kot nhỹrmã mẽ piitã akupỹm mẽ ho htĩr ã amnhī jarē. Tã ixte ja kôt ijamaxpêr pix mỳrapê na prem kot hã amā ixto kapêr kaxyw awỳr ixto mō.

⁷Mẽ ixpê Ijaew nhīgêjtjê piitã na prem Tirtūm kapêr kôt hamaxpêr o ri pa. Kot nhỹrmã akupỹm mẽ ho htĩr ã amnhī jarēnh kôt hamaxpêr tỳx o pa. Amnepêm finat Jako mẽ hkra pē 12jaja na prem hkôt hamaxpêr. Nē ixpê mẽ hkanrêhã mẽ htàmnhwỳ na pa hte ijaxwỳja ja kôt ijamaxpêr tỳx rãhã ho ri ixpa. Tã ãm mẽmoj pixi mỳrapê na ixkwỳjaja ã amā ixto kapêr punuj anē.

⁸Mẽ kot ixpyrà nē ja kôt hamaxpêr ã amnhī jarēnh tã nhūm pre Tirtūm akupỹm Kra Jejus o htĩr nom nhūm mẽ ixkīnhã ja kôt hamaxpêr kêt. Nom Tirtūm kêp akupỹm mẽ pahto pahtĩr xwỳnh kênã.

⁹—Amnepê̄m kormã Jejus kôt ijamaxpê̄r kêt ri na pa pre ijaxwỳja mẽ uràk nê akupỳm htĩr kôt ijamaxpê̄r kêt nê. Nê ixtỳx ijamaxpê̄r o: “Kot paj Jejus pê Najare nhõ xwỳnh kôt mẽ kot amnhĩ xunhwỳr xwỳnhjê nhĩpê̄x kati ho ixpa nhũm Tĩrtũm ja hã ixpumu nhũm ja kãm mex nê.”

¹⁰—Anhỳr jakamã pa pre hte tanhmã mẽ homnuj tỳx to ho ri ixpa. Jao Jerujarê kamã mẽ inhõ patre krãhtũmjê nhỹ hã mẽ unê nê mẽ hagjênh xà kamã mẽ hagjênh o ixpa nhũm mẽ kot mẽ himex kaxyw mẽ hã inhmã amnhĩ jarê nhũm ja inhmã mex nê. Pa mẽ harênh ma nê ixkĩnh nê.

¹¹Pa pre hte xatã tanhmã mẽ hipê̄x to nê mẽ kot Jejus kaga hprãm xàj mẽ hipê̄x kati rũnh nê. Tĩrtũm kapê̄r o mẽ ahkre xà hã ixkre piitã kamã pa pre hte ã mẽ hipê̄x anê. Nê mẽ kamã inhgryk tỳx jakamã ma krĩ hkwỳ hkôt mẽ hapê̄r o ri ixpa. ã na pa pre mẽ hipê̄x anhỳr o ri ixpa.

¹²—Tã axte ixte mẽ hkwỳjê pynênh nê mẽ hagjênh kaxyw ma Tamas wỳr mỗ. Mẽ inhõ patre krãhtũmjê nhỹ hã ma mẽ hwỳr mỗ.

¹³Hãmri nhũm ra kaxkwa nhĩpôk ri myt nhỹ pa kormã pry hã inhmôr ri kaxkwa rũm mẽmo nhĩrãja pumu. Nhũm hirã htỳx o myt jakre nê ixtã ajê̄t pa ixkôt ri mẽ pa xwỳnhjê mẽ hipôk ri ixkuhê.

¹⁴Hãmri nê mẽ inhmã ma xàj pykap ixrôrôk pa nhũm kaxkwa rũm mẽhõj inhmã kapê̄r. Mẽ ixpê̄ Ijaew kapê̄r o kapê̄r nê inhmã: “Pa Sawti? Hê̄xta waa nê. Kwa mon ka hte axtem nê ixtomnuj tỳx o ri apa? Nom na ka tee ri ã amnhĩ nhĩpê̄x anhỳr kaprỳ.” Anê.

¹⁵Hãmri pa tee ri kuma nê kãm: “Kwa mẽ atõ na ka ã inhmã akapê̄r anê?” Anê. —Hãmri nhũm inhmã: “Ixpê̄ Jejus na pa amã ixkapê̄r. Pa na ka hte ixpê̄ ixkôt mẽ kot amnhĩ xunhwỳr xwỳnhjê homnuj tỳx o apa ho te pa ixtomnuj tỳx pyràk.

¹⁶E kànhmã xa. Ate inhmã tanhmã amnhĩ nhĩpê̄x to ho apa kaxyw na pa amã amnhĩ to amnhĩrĩt. Jarãhã ate ixpumunh xà hkôt ate mẽ kãm ma ijarênh nê mẽ kãm ixkapê̄r jarênh o mẽ ahkre ho ri mẽ hkôt apa kaxyw na pa amnhĩ kaxyw ata. Kot paj nhỹrmã axte awỳr ixkato nê tanhmã amã

ixkapër to ka inhma nê ma mẽ kãm ixkapër jarênh o ri mẽ hkôt apa. Ja kaxyw na pa amnhĩm ata.” Anhÿr o inhmã kapër.

17Hãmri nê inhmã: “E kot paj Ijaew mẽ Ijaew kêt xwÿnhjê hwÿr amẽ nê anê mẽ omunh mex nê nhũm mẽhõ apĩr kêt nê.

18Kêr ka ma mẽ hkôt mẽ kãm ixkapër jarênh o ri apa kê mẽhprĩ hã kuma. Mẽ kot amnhĩ tomnuj kaga nê amnhĩ kaxyw ixkôt hamaxpër nê ixkôt amnhĩ xunhwÿr kaxyw. Hãmri nhũm Tĩrtũm ja hã mẽ omu nê ixkukwak ri amnhĩ katut kôt mẽ kot amnhĩ tomnuj piitã rênh pa nê axte kãm hamaxpër kêt nê. Hãmri nê mẽ ho hkra. Koja mẽ ã amnhĩ nhĩpêx anê hãmri nê axte Satanasti nhÿ hã tanhmã amnhĩ nhĩpêx to hkêt nê. Pãnhã Tĩrtũm kôt pix mã amnhĩ nhĩpêx o pa.” Anẽ.

19—Ã na pre Pahihti Jejus inhmã kapër anẽ. Tã kot kaxkwa rũm inhmã ixapênh jarênh ã karõja pa pre mar tÿx nê hkôt amnhĩ nhĩpêx rãhã ho ri ixpa pahi Akrip.

20Jakamã na pa pre ma mẽ hkôt mẽ kãm kapër jarênh o ri ixpa. Tamas kumrêx hwÿr nê hpãnhã Jerujarê hwÿr nê hpãnhã pika pê Jutej piitã hkôt Ijaew mã kapër jarênh o ri ixpa. Tã hpãnhã Ijaew kêt xwÿnhjê mã harẽ. Na pa hte mẽ kãm ixkapër o: “Kwa mẽ ate amnhĩ tomnuj kaga nê hpãnhã Tĩrtũm kôt amnhĩ xunhwÿ. Hãmri nê hkôt pix mã amnhĩ nhĩpêx o ri apa. Mẽ piitã mẽ kot apê hkwy hã mẽ apumunh kaxyw.” Anẽ.

21—Ãm ja pix mÿrapê na pre ixkwÿjaja ixpynê. Tĩrtũm mã amnhĩ jarênh xà hã ixkre kamã ixpynê nê ra mẽ kot ixpĩr kaxyw.

22-23Nom na hte Tĩrtũm ixtãnopxa nê ixto ixihtÿx mex rãhã ho pa pa arĩ mẽ kãm harênh o ri ixpa. Mẽ kot amnhĩ to rũnh xwÿnhjê mã nê mẽ kêp amrakati xwÿnhjê mã nê mẽ piitã mẽ kãm harênh o ri ixpa. Finat Mojes mẽ Tĩrtũm nhÿ hã kapër jarênh o mẽ pa xwÿnhjaja kot ra hkukamã tanhmã harênh to xà hkôt pa hte mẽ kãm harênh o ri ixpa. Nê mẽ kãm: “Tĩrtũm kot mẽ pakaxyw ãm xwÿnhhta na pre amnhĩ xà htÿx kamã hamak kãm ty. Tã nhũm Tĩrtũm akupÿm ho htĩr. Kumrêx na pre akupÿm ho htĩr jakamã kumrêx na pre tanhmã mẽ kãm kapër to ho ri mẽ hkôt pa. Mẽ kot amnhĩ kaxyw hkôt

hamaxpër nê hkôt amnhĩ xunhwÿr xwÿnh piitã uràk nê nhÿrmã Tirtũm mẽ wa õ krĩ kamã htĩr tũm nê pa ho pa hprãm xàj mẽ harēnh o pa. Mẽ ixpê Ijaew nê mãânēn mẽ apê Ijaew kêt xwÿnhjaja nhũm pre ã mẽ pajarēnh anē.” Anhÿr o pa hte mẽ kãm harēnh o ri mẽ hkôt ixpa pahi Akrip. Anē.

²⁴Nhũm Pawre kormã kot mẽ kãm amnhĩ jarēnh par kêt ri nhũm Pos Pesti tee ri tanhmã Jejus jarēnh to hã kuma nê kàx pê kãm kapër nê kãm: —Kwa na ka akrã axpã nà? Për ate kagà pumunh tÿx kurê akrã pipãnh pyràk o ri atÿx ã ri mẽ inhmã axujarēnh anē. Anē.

²⁵Hãmri nhũm kãm: —Nà ixkrã pipãnh kêt. ãm hãmri na pa mẽ amã awjarē.

²⁶Jerujarē kamã na prem Jejus pĩ nhũm mẽ piitã omu. Tã nhũm akupÿm htĩr hãmri nê hpimxur pê ri pa hkêt nê. Na pre mẽ ohtô nê akupÿm htĩr kãm omu. Pahi Akrip ra kot ja mar mex jakamã na pa ixàmnhĩx ã mẽ amã harēnh anē.

²⁷Anhÿr o kãm kapër hãmri nê pahi Akrip wÿr rĩt nê kãm: —Kwa pahi Akrip. Xà Tirtũm nhÿ hã kapër jarēnh o mẽ pa xwÿnhjaja kot Jejus kukamã tanhmã harēnh toja kôt na ka hte ajamaxpër? Nà ra hkôt ajamaxpër kēnã. Ra ixte ajamaxpër kôt apumunh mex. Anē.

²⁸Hãmri nhũm tee ri kuma nê kãm: —Tk. Kwa xà kot kaj ã inhmã akapër anē pa ama nê apyrà nê amnhĩ kaxyw Jejus kôt ijamaxpër? Nà na ka ixte ã ate Jejus jarēnh anhÿrja kôt ijamaxpër ã ixkamnhĩx kaprÿ. Anē.

²⁹Hãmri nhũm Pawre kãm: —Ko. Kot kaj ixpyrà nê amnhĩ kaxyw hkôt ajamaxpër pa ixkĩnh nê. Nom kaxipix kêt. Mẽ apiitã mẽ ate inhmar o akrĩ xwÿnhjaja mãânēn. Mẽ ate mẽ ixpyrà nê Jejus kôt amnhĩ xunhwÿr na inhmã hprãm. ãm ixpyrà nê mẽ apê prēs pix na inhmã hprãm kêt. Anē.

³⁰Hãmri nhũm pahi Akrip nê htõx Perēnĩs nê pahi Pox Pesti nê mẽ hkôt mẽ mõi xwÿnhjaja kànhmã kuhê nê ma mrar kaxyw.

³¹Nê nojarêt nê Pawre hã axpēn mã: —Kwa tanhmã kot amnhĩ tomnuj to hkêt kēnã kot kêt mẽ haxà rÿ kupĩ. Anē.

³²Hāmri nhūm Akripja Pos Pesti mǎ kām: —Kwa kop apu kot amnhĩ kaxyw pahi maati Sesti hwỳr hkrà hkêt ronhỹx pu mẽ ra kator. Anẽ.

Atre 27

Mẽ kot Rôm wỳr Pawre mẽnh ã mẽ harẽnh

Atre 23.11; 25.12

¹Tǎ nhūm mẽ pyka pẽ Itar wỳr pahi maati Sesti hwỳr Pawre mẽnh kaxyw. Itar kamǎ mẽ õ krĩ maati na pre kệp Rôm. Jakamǎ nhūm Pawre mẽ mẽ kot mẽ hagjênh xà kamǎ mẽ hkrĩ xwỳnh mẽ ho hpimrààtǎ ma mẽ o mra nẽ pôristi krǎhtũm Jurti nhĩhkram mẽ haxàr pa. Kot ma Rôm wỳr mẽ o mõi kaxyw. Jurtija kệp Itar kamǎ mẽ õ pahi maati hǎ pôristi krǎhtũm nhūm prem ma mẽ kām mẽ o mõi kaxyw ìhkram mẽ hagjênh pa. Ixpê Rukre na pa pre inhmǎ Pawre hkôt inhmõi prǎm nẽ mẽ hǎ ajêt nẽ mẽ hkôt mõi.

²Tǎ pa mẽ ra inhnojarêt nhūm Aristak haxwỳja ma mẽ ixkôt mõi. Pyka pẽ Masetõn nhõ xwỳnh na pre. Õ krĩ pẽ na pre Tesarõn. Jakamǎ nhūm ma wa ixkôt mõi. Hāmri nhūm pàrja nojarêt. Atamĩx rũm pàr nhūm ra As wỳr nojarêt pa mẽ hwỳr inhgjêx pa nẽ ma kamǎ mõi.

³Hāmri nhūm apkati pa mẽ krĩ pẽ Sito hwỳr pøj nẽ hǎ pàr xi. Nhūm pôristi krǎhtũm Jurtija Pawre ho mex jakamǎ pa mẽ Sito hwỳr pøj nhūm Pawre mǎ anẽ pa mẽ ixkato nẽ ma ixkràmnhwỳjê hwỳr mra nẽ mẽ kutǎ apku nẽ ma akupỹm pàr wỳr mra.

⁴Tǎ pa mẽ axte mõi. Nom nhūm kôk mẽ ixkutǎ àpêr tỳx jakamǎ pa mẽ umaj juk nẽ gô hipôk kupu ho mõi. Gô hipôk pẽ Sipreja pa mẽ upôk rũm ma hkupu ho mõi nhūm mẽ inhnê kôk pẽ àmnàr mex nẽ.

⁵Hāmri pa mẽ mõi nẽ pyka pẽ Siris mẽ Pǎpir wa hakrenh o mõi nẽ pyka pẽ Ris kamǎ Mira hwỳr pøj nẽ hǎ pàr xi nẽ ijapôx pa.

⁶Hāmri nhūm pôristi krǎhtũmja Aresãnrir rũm pàr pumu nhūm ra Itar wỳr nojarêt. Pa mẽ hwỳr inhgjêx kurê kumrêx hāmri nẽ ma kamǎ axte mõi.

⁷Hāmri nhūm pàrja kôk kutǎ tee ri mõi prêprêk kaxyw nẽ ãm amnhĩm hprĩ nẽ mõi ã apkati xohtô nẽ pa mẽ tokyx ixpôx kêt nẽ. Tǎ Sito hwỳr ixàhtêp o

mõ nom nhũm kôk mẽ ixkutã hihtỳx rax kumrẽx. Jakamã pa mẽ juk nẽ gô hipôk pê Kret jatur xà jahpa nẽ ma kape hã mẽ nhũm mẽ inhnê kôk pê àmnàr mex nẽ. Hãmri pa mẽ ma Sarmôn jakrenh o mẽ

⁸nhũm pàr kôk kutã amnhĩm hprĩ nẽ kape hã mẽ. Pa mẽ mẽ nẽ jatã Rasej tã pàr nhĩkwỹ xà mex wỳr pôj nẽ kamã pàr xi.

⁹Nom pàr kot amnhĩm hprĩ nẽ mõi jakamã nhũm ra kôk xàpêr tỳx nẽ kamã kry htỳx ã mytwrỳ mẽ ixtã kato. Mytwrỳja ã mẽ kot kôk xàpêr tỳx pymaj nhỹhỹm pàr kãm mrar kêt. Jakamã nhũm Pawre tokyx mẽ inhmõi nẽ pàr nhõ xwỳnhjê mã kapêr kãm hihtỳx nẽ mẽ kãm:

¹⁰—Kwa pu mẽ jar kôk xàpêr tỳx jamãr o ri papa nà. Kê kôk mẽ kry htỳxja hapêx pu mẽ rĩ kormã axte mẽ. Kot puj mẽ anhỹr kêt nẽ kôk xàpêr tỳx kãm mẽ nhũm nhỹri pàrja mẽ pahpê axà nhũm gô mẽ apê mẽ akukrêx o hapêx pa. Pu mẽ pajaxwỳja axkaprã.

¹¹Anhỹr o mẽ kãm kapêr tã no nhũm mẽ kuma nẽ ãm kuma. Pàr pãm mẽ pàr o mrar xwỳnh wa nojarêr tỳx nẽ kapêr ma nẽ ãm kuma. Nhũm pôiisti krãhtũm wa nojarêr ã wa kuma nẽ haxwỳja Pawre mar kêt nẽ.

¹²Nhũm mẽ kot pàr nhĩkwỹ xà mex jarênhja mẽ kot mex ã harênh tã mẽ kêp omnuj nẽ. Hã na wrỳk nẽ kôk xàpêr tỳx nhũm mẽ kêp omnuj tỳx nẽ. Jakamã nhũm mẽ piitã Pawre rom ra nojarêr nẽ. Mẽ kãm tokyx krĩ pê Wẽnĩs wỳr hpôx prãm jakamã nojarêr tỳx nẽ. Gô hipôk pê Kret kamã na Wẽnĩsja. Nẽ kamã kôk xàpêr tỳx kêt jakamã nhũm mẽ hwỳr nojarêr nẽ axpẽn mã: —E kwa pu mẽ tokyx Wẽnĩs wỳr mẽ nẽ kamã mãn kôk xàpêr tỳx japêx jamãr o papa. Anẽ. Hãmri nẽ piitã hwỳr nojarêr.

Kôk kot pàr o àpêr tỳx ã harênh

¹³Tã nhũm kahpa hkôt kôk xàpêrja katàt kôt kawax pê apê nhũm mẽ kamã ama nẽ axpẽn mã: —E hãmri. Tokyx pu mẽ mẽ. Anẽ. Jakamã pa mẽ pàr o htỳx xà ho api nẽ axte mẽ. Ma gô hipôk pê Kret jakàr ã mẽ.

¹⁴Puh nhũm na wrỳ nẽ kôk àpêr tỳx kumrẽx. Mẽ kot kãm “kôk xàpêr tỳx maati” anhỹr xwỳnhja gô hipôk rũm mẽ ixto àpêr tỳx kumrẽx o mẽ.

¹⁵Hāmri nē mẽ ixkutā àpêr tỳx nhũm pàr tee ri kutā hkarôt. Pa mẽ kormã Wẽnĩs wỳr ixpôx kêt ri ra ho awjanã nhũm amnhĩ krã hkôt kôk kôt mỗ.

¹⁶⁻¹⁷Hāmri nē mỗ nē gô hipôk pê Krawti jahpa nē hakàr ã mỗ nhũm mẽ inhnê kôk pê amýtà nhũm amnhĩm hprĩ nē kawax pê apê. Hāmri pa mẽ pàr krare kot mẽ ixkôt mỗr xwỳnhja pa mẽ kumỳ nē pàr rax kãm kumẽ. Ra kamã gô rax tã pa mẽ ixkarôt tỳx nē nê hkapĩr pa nē ho api nē pàr rax kãm kumẽ nē ho htỳx. Hāmri nē hpãnhã kôk xàpêr tỳx pymaj pàr rax kaxpre hpa. Hāmri nē kôk kot pykahti grà maati pê Sirteja wỳr pàr mẽnh nhũm kot amnhĩ to pykahti xãm o htêm pymaj nhũm mẽ kot ho mrrar xà hã kupêxê rax o wrỳ nhũm pàr amnhĩ krã hkôt ma kôk kôt mỗ.

¹⁸Tã nhũm apkati nhũm kôk arĩ mẽ ixpê pàr o àpêr tỳx nē arĩ na wrỳk rax rãhã nẽ. Jakamã pa mẽ pàr àr pymaj nê mẽ hikukrêx kwỳ gôx kãm rẽnh pa. Kaxkritre nẽ àr kêt kaxyw.

¹⁹Tã nhũm apkati pa mẽ hpãnhã pàr kre kamã ri nê hikukrêx kwỳ rê nẽ gôx kãm kurẽ.

²⁰Nhũm kôk arĩ àpêr tỳx kumrêx ã apkati xohtôô nẽ. Nẽ na wrỳk rax rãhã jakamã pa mẽ kanhêti pumunh kêt nẽ myt pumunh kêt o mẽ ixtã apkati xohtô rax kumrêx. Hāmri nẽ tee ri ahkapi nẽ tee ri amnhĩ kukamã ijamaxpêr. Nẽ ixtyk par pix kukamã ijamaxpêr o ixkaprĩ nẽ ixkrĩ.

²¹Hāmri nẽ mẽ inhmã ma xàj ixàpkur kêt ryy nẽ. Hāmri nhũm Pawre tee ri ja hã mẽ ixpumu nẽ pàr nhõ xwỳnh wa kãm kapêr nẽ wa kãm: —Kwa na pa pre tee ri Kret kãm man mẽ pamôr nê war amã ixkapêr. Kop apu mũtar mãn mẽ kuri arĩ ri mẽ hkôt mẽ papa ronhỹx pu mẽ pajamakêtkati nẽ paxàmnhĩx ri papa. Tã nhỹx pu mẽ ri mẽ hikukrêxja gôx kãm rẽnh par kêt nẽ.

²²Nom kwa kêr ka mẽ tee ri amnhĩ kukamã ajamaxpêr kêt nẽ. Kot puj mẽ pahtô pahtyk kêt nẽ. ãm pàrja pix koja axà nẽ hapêx.

²³Ixpê Tĩrtũm krajê hõ na pa. Na pa hte kãm tanhmã amnhĩ nhĩpêx to ho ri ixpa. Jakamã na pre kamàt ja kamã ixwỳr kapêr o wrỳk xwỳnhjê hõ mẽ nhũm ixwỳr wrỳ nẽ inhmã awjarẽ

²⁴nē inhmā: “Pa Pawre? Kwa tee ri amnhī kukamā ajamxpēr o amā ma hkēt nē. Kot kaj akà hkīnh pê ma Itar kamā Rōm wȳr mō nē pōj nē pahi maati Sesti pumu nē kām amnhī jarē. Jakamā koja Tīrtūm akōt mē mōr xwȳnh piitā omunh mex nē ka mē atō tanhmā amnhī to hkēt nē.” Anē.

²⁵—Ā kot inhmā kapēr anhȳr jakamā kwa mē amnhī to htȳx nē tee ri amnhī kukamā ajamxpēr kēt nē. Tīrtūm kapēr o wrȳk xwȳnh kot inhmā ujarēnh xà hkōt koja Tīrtūm ā mē panhīpēx anē. Ixte ja hā omunh mex kēnā.

²⁶Koja xep kōkja nhȳri gō hipōk ā pàr krakrak pa. Nom mē papajaja kot puj mē pahkà hkīnh pê hwȳr pahpōx pa. Anē.

²⁷Tā pa mē mōō nē ā inhmōr anhȳrja ā ixtā semān axkrut nē ra gō rax pê Ariax kōt axà. Kamāt kām hkōt axà nhūm kōkja arī pàr o apēr tȳx rāhā ho mō. Hāmri nhūm kōt ā kamāt nhūm pàr o mrar xwȳnhja ra pàr kot pykahti grà htēp ā hkamnhīx.

²⁸Jakamā nhūm mē gō xupȳm pumunh xà ho gō pumu nhūm upȳm kēp 36 met. Hāmri nhūm hā ahtūmre nē axte omu nhūm ra hpānhā kēp 27 met pix. Jao ra pàr kot gō kokwe htēp o mōr ā omu.

²⁹Hāmri nē kot kēn kuranh nē hā pikrakrak pymaj katē rūm ho htȳx xà ho 4 nē gōx kām kurē nhūm arī ajēt. Hāmri nhūm mē tokyx kām arīgro hprām o arīgro mā nojarēt o hkrī.

³⁰Hāmri nhūm pàr kām mē àpēnh xwȳnhjaja tanhmā hamxpēr to nē hēx rom pàr krare ho wrȳk o tē. Mē kot mē ixrer nē ahte xarmā mōr nē rēr nē tokyx gō hipōk wȳr hpōx kaxyw. No ām hēx rom te mē kot axte pàr krā rūm ho htȳx xà hō mēnh kaxyw pyrāk o amnhī nhīpēx nē kaxyw ho wrȳk o tē.

³¹Nom nhūm Pawre mē hamxpēr ā mē omu hāmri nē pōristi mē mē hkrāhtūm mā mē harē nē mē kām: —Kwa koja mūjjaja mē pare nē ahte pàr krare kamā xarmā mōn rē ka mē apikaprār pa kām ga. Anē.

³²Hāmri nhūm mē tee ri kuma nē mē hwȳr hprōt nē mē kēp pàr krare pê hkaxpre xà jakà nhūm gōx kām tēm nē ma gō hkōt hkaprȳn mō.

³³Tã hãmri nhũm ra myt kator o mõi nhũm Pawre akupỹm mẽ piitã mẽ ho mẽ hamaxpěr o hihtỳx kaxyw mẽ kãm: —Kwa na ka mẽ tee ri amnhĩ kukamã ajamaxpěr o akapĩr nẽ axàpkur kêt o atã semãn axkrut.

³⁴E pu mẽ mẽmoj krẽ nẽ ho amnhĩ xihtỳx. Kot puj mẽ pahtõ pahtyk kêt nẽ. ãm hãmri na pa mẽ amã ixkapěr. Anẽ.

³⁵Hãmri nẽ mẽmoj py nẽ mẽ noo mã Tĩrtũm mã harẽ nẽ hkur o xa

³⁶nhũm mẽ ja hã omunh xà hkõt akupỹm tãm hamaxpěr o mõi. Hãmri nẽ amnhĩm mẽõ hkwỳ jamỳ nẽ kumẽ kuku.

³⁷Pàr kãm mẽ inhmõr xwỳnhjaja na pa prem ixpê 276.

³⁸Tã pa mẽ ra ixàpkur pa. Hãmri nẽ pàr kaxkrit kaxyw mẽ apkur xà hã mẽmoj y jakrêxja gõx kãm hkapĩr pa.

Pàr mẽ kệp pikrakrak ã harẽnh

³⁹Tã nhũm ra myt kator mex nẽ nhũm mẽ amnhĩ kukamã gõ hipõk pumu nẽ axpẽn mã: —Kwa nhỹ pika na mũj wehe? Anẽ. Hãmri nẽ nhỹri hakàx ã amnhĩm nõi xà mex pumu nẽ hwỳr pàr o mõi kaxyw hã axpẽn ma.

⁴⁰Hãmri nẽ kaxyw pàr o htỳx xà jakà nhũm axrê nẽ gõx kãm rõi rõi pa. Nẽ pĩ ho pàr o juk xà nhõ xê xàja nhũm mẽ mããnẽn krãhta. Hãmri nẽ akupỹm mrrar xà hã kupẽxê nhõ nhũm kõi ho hikot nẽ ma gõ jakàx wỳr o mõi.

⁴¹Nom nhũm pàr kormã hakàx pẽ awry hã mõi ri amnhĩ to kokwe kura nẽ pyka nhĩmõk ã nõ nhũm mẽ tee ri kot hkaxàr nẽ akupỹm gõ xupỹm mã mẽnh kaxyw. Nom nhũm gõ kot pàr nhĩxõ htak tỳx kurê nhũm mẽ ixpê pikrakrak par o mõi.

⁴²Jakamã nhũm põi ristijaja tee ri omu hãmri nẽ ra mẽ kệp prẽsjê nhĩmex kaxyw. Mẽ kot gõx kãm rõi rõi nẽ gõ hipõk wỳr hpa ho nana nẽ mẽ kệp pikunor pymaj kot mẽ himex kaxyw.

⁴³Nom nhũm mẽ hkrãhtũmja kãm Pawre pĩr prãm kêt jakamã ja nẽ mẽ hkurê nẽ mẽ inhmã: —E mẽ ate apa ho gõ rẽnũh mex xwỳnhjaja. Akumrẽx mra nẽ mroi nẽ ho nana ho mra nẽ rẽ.

⁴⁴No mẽ ate apa ho nana punuj xwỳnhjaja kêr ka mẽ tapti rỳ pàr kukrêx ò mỳ nễ hã ajêt nễ hã ma mỗn rê. Anễ. Hãmri pa mẽ ã amnhĩ nhĩpêx anễ nễ ixpiitã ixkà hkĩnh pê ixrêr pa.

Atre 28

Gô hipôk pê Maw kamã mẽ pa hã mẽ harênh

Makre 16.17-18

¹Tã pa mẽ ixpiitã ixkà hkĩnh pê ixrêr pa. Nhũm gô hipôk ã mẽ pa xwỳnhjaja mẽ inhmã gô hipôk nhĩxi jarễ nhũm xep kêp Maw.

²Nhũm Maw nhỗ xwỳnhjaja mẽ ixto mex nễ. Nhũm axte na wrỳk rax nễ nhũm kry htỳx kumrêx nhũm mẽ ixkamã ukaprĩ nễ mẽ inhmã kuto nễ mẽ inhmã kapêr mex nễ.

³Hãmri nhũm Pawre kuwy kaxyw ri pĩ kawrà ho mra nễ kuwy hwỳr o tễ nễ hã haxwỳr o xa. Hãmri nhũm kagã xoprê ò wênên xihtỳxja kuwy kagro pymaj pĩ rùm kato nễ ãhkra hã kunha nễ hã àpêr o ajêt.

⁴⁻⁵Hãmri nhũm Pawre omu nễ amnhĩ nê ho apê nễ kuwy kamã kumễ nhũm kamã tễm nễ xêt pa. Hãmri nhũm gô hipôk nhỗ xwỳnhjaja tee ri ja hã omu nễ axpên mã: —Kwa ga mẽmyti mũj pumu. Mãn kêp mẽ hpar o pa xwỳnh na. Hã na kagã ò wênên xihtỳxta kunha. Nà koja ty nễ rĩ amnhĩ pumu. Ra hkà hkĩnh pê gô rùm mẽ pahwỳr rêr tã koja tã ty kãm ga. Anễ.

⁶Hãmri nhũm mẽ tee ri kot tanhmã amnhĩ to hã hkamnhĩx nễ hamãr o kuhê. à htỳx nễ ãhkra hikot rỳ htyk kurê kumrêx ã hkamnhĩx tã nhũm tanhmã amnhĩ kamã hamak to hkêt nễ. ãm htỳx ri hkĩnh nễ kapêr nễ hpikunhar o ri mra. Hãmri nhũm mẽ tee ri omu nễ axpên mã: —Kwa tanhmã kot amnhĩ tore hã. Kêp mẽ hpar o pa xwỳnh kêt. Mãn kêp kaxkwa kamã mẽpahpãmjê hõ nà? Hã na kagã kunha nhũm tanhĩ to hkêt nễ. Anễ.

⁷Nhũm gô hipôk ã mẽ ò pahihtì pê Puptija. Õrkwỹ hã jawỳ jakamã nhũm amnhĩ kôt mẽ ixwỳ pa mẽ ma hkôt mỗ nễ kuri hkôt ixpa ho ixtã apkati axkrunêpxi nhũm mẽ ixto mex nễ.

⁸Nhũm ra Pupti nhĩpêxà kêp à nê nõ. Kà kagro htỳx nê haôk. Hãmri nhũm Pawre hwỳr tẽ nê omu nê hã ãhkra xi nê ho Tĩrtũm wỳ nhũm akupỹm ho mex kurê kumrêx.

⁹Hãmri nhũm gô hipôk nhõ xwỳnhja harênh ma nê Pawre hwỳr mẽ à xwỳnh piitã o mra nhũm mẽ omu nê Tĩrtũm nhỹ hã akupỹm mẽ ho mex pa.

¹⁰⁻¹¹Hãmri nhũm gô hipôk nhõ xwỳnhjaja mẽ ixto mex rax nê.

Pawre axte Rôm wỳr nojarêt ã harênh

Rômãn 1.10-12; 15.30-32

Tã pa mẽ gô hipôta kamã ixpa hã mytwrỳ axkrunêpxi. Hãmri nhũm kôk xàpêr tỳxta hapêx pa mẽ axte inhnojarêt nê ma mỗ. Pàr ò kamã hpãnhã mỗ. Aresãnrir rũm pàrja pa mẽ hpãnhã kamã mỗ. Mẽ kot kãm “sãnti pihpo” anhỹr xwỳnhhta kamã. Na pre gô hipôk kamã haxwỳja kôk xàpêr tỳx hapêx jamãr xa hã hikwỹ htã ra axte nojarêt. Hãmri nhũm gô hipôk nhõ xwỳnhja ma mẽ inhmôr xà hã mẽ inhmã mẽ ixàpkur xà hkwỳ nhõr rax nê. Hãmri pa mẽ pàr wỳr inhgjêx pa nê ma kamã mỗ.

¹²Mỗõ nê Sirakus wỳr pôj nê hã pàr xi. Hãmri nê krĩa kamã mẽ ixtã apkati axkrunêpxi nê axte mỗ.

¹³Mỗõ hãmri nê Rekre hwỳr pôj nê hã pàr xi. Hãmri nê kamã mẽ ixtã apkati. Nhũm ra kahpa hkôt kôkja kawax pê àpêr mex jakamã pa mẽ ma hkôt mỗ. Nê mẽ ixtã apkati axkrut nê Potew wỳr pôj nê hã pàr xi.

¹⁴Hãmri nê pàr rũm ijapôj nê krĩa kamã Jesus kôt mẽ ixtõ nê htõx kwỳjê pumu nhũm mẽ amnhĩ wỳr mẽ ixwỳ. Pa mẽ ma mẽ hkôt mra nê mẽ hkôt ri ixpa hã ixtã ù semãn. Hãmri nê ma Rôm wỳr hpãnhã ixpar o mỗ.

¹⁵Hãmri nê kormã amỳm inhmôr ri nhũm Rôm kãm Jesus kôt mẽ ixtõ nê ixtõxjaja mẽ ijarênh ma nê man mẽ ixkutã mra. Ma krĩa pê Prasxi Apja mẽ “Wẽn Pijakrunêpxi” anhỹr xwỳnh jarênhja wa hwỳr mẽ ixkutã mra. Hãmri pa mẽ axpên kaxpa nhũm Pawre mẽ omu nê hkĩnh nê. Nê mẽ hã Tĩrtũm mã amnhĩ jarê nê kãm: —Pa Tĩrtũm? Nà ãm hãmri na ka mẽ ixkutã jajê rê. Na pa mẽ omu nê ixkĩnh nê. Nà amex o amex Tĩrtũm. Anê.

16Hāmri pa mẽ ma mẽ hkôt Rôm wỳr mỗ nễ pôj. Jatã Itar kãm Rôm wỳr pôj. Hāmri nhũm pôristi krãhtũm Pawre mã: —E kot paj mẽ hagjênh xà kamã ajaxàr kêt nễ. Kot kaj amã nhỹri ixkre kamã apa hprãm nễ mamrĩ kamã apa. Nom koja pôristi hõ akôt pa ho pa. Anhỹr jakamã nhũm nhỹri ixkre kamã pahihtĩ Sesti kot mar kaxyw kamã hamak o pa.

Pawre kot Rôm kamã tanhmã amnhĩ nhĩpêx to hã harênh

Atre 17.5-6

17Tã nhũm Pawre Rôm kamã hã apkati axkrunêpxi nễ amnhĩ wỳr Ijaew xàptàr tũmrejê hwỳ nhũm mẽ hã akuprõ nhũm mẽ kãm amnhĩ jarê nễ mẽ kãm: —E ixkwỳjaja. Pa mẽ amã amnhĩ jarê ka mẽ inhma. Nà na pa pre mẽ panhĩgêjtê kapêr nhĩrôp tanhmã ixãm to hkêt nễ rỳ ixte tanhmã mẽ pahkwỳjê hõ hto hkêt tã nhũm mẽ pahkwỳjaja amarĩ ixpynê. Jerujarê kamã ixpynê nễ Rôm nhõ xwỳnhjê nhĩhkram ijaxà.

18Hāmri nhũm mẽ ixte amnhĩ nhĩpêx ã ixkukja nễ tee ri mẽ kot mẽmoj mỳrapê ixpĩr kaxyw tanhmã ixkukjêr to kaprỳ. Jakamã nhũm mẽ kãm ixkator prãm nễ.

19Nom nhũm mẽ pahkwỳjaja kãm ja mex kêt jakamã pa pre jar pahi maati Sesti kot ixte kãm amnhĩ jarênh ã inhmar kaxyw amnhĩm harê nễ man hwỳr mỗ. Kot paj tanhmã kãm mẽ pahkwỳjê ho ixkapêr punuj to hkêt nễ. ãm ixte amnhĩ tã tanhmã mar to hpix kaxyw na pa hwỳr mỗ.

20—Tã pa amnhĩ wỳr mẽ awỳ. Ixte mẽ amã amnhĩ jarênh kaxyw. Mẽ pahkaprĩ xwỳnhhta. Mẽ pahte kormã kamã pajamak o papa xwỳnh Jejusta. ãm ixte amnhĩ kaxyw hkôt ijamaxpêr pix mỳrapê na prem ã kàx o ixkaxpre anê. Anê.

21Hāmri nhũm mẽ kuma nễ kãm: —Nà jar tanhmã ajarênh kute hkêt. Na pre Jutej kamã mẽ pahkwỳjaja tanhmã ajarênh to hã kagà nễ mẽ ixwỳr mẽnh kêt nễ. Nễ ham mẽ kurũm mẽ hpôx xwỳnhjaja na prem tanhmã mẽ inhmã ajarênh to hkêt nễ.

²²No na xep hte pyka piitã hkôt mẽ kãm mẽ ate Jesus kôt amnhĩ xunhwỳr xwỳnhjê kurê nê. Na pa pre mẽ ajarênh ma nê mẽ inhmã axujarênh mar prãm nê. Anê.

²³Hãmri nhũm mẽ kot mar kaxyw arĩgro hta. Tã nhũm mẽ kot arĩgro hyr kato nhũm mẽ Pawre nhõrkwỹ hwỳr pikuprõnh rax nê nhũm mẽ kãm awjarê. Mẽ kãm ujarênh ry nê. Nê ho kamàt. Nê mẽ kãm: —Nà mẽ pahte amnhĩ wỳr kamã pajamak o papa xwỳnh Jesusja. Kot kaj mẽ atõ amnhĩ kaxyw hkôt ajamaxpêr nê hkôt amnhĩ xãm nhũm Tĩrtũm ja hã apumu nê ato hkra. Anê. Nhũm pre ã mẽ kãm kapêr anê. Nê finat Mojes kot Tĩrtũm nhỹ hã Jesus kukamã tanhmã hã kagà htoja nhũm mẽ kãm harê. Nê Tĩrtũm nhỹ hã kapêr jarênh o mẽ pa xwỳnhjaja kot tanhmã hã kagà htoja nhũm mẽ kãm harê.

²⁴Hãmri nhũm mẽ hkwỳjaja kuma nê hkôt hamaxpêr nê amnhĩ kaxyw Jesus kôt hamaxpêr nê hkôt amnhĩ xunhwỳ. No nhũm mẽ hkwỳjaja kuma nê ãm kuma nê kãm axte mar prãm kêt nê.

²⁵⁻²⁹Jakamã kànhmã kuhê nê nojarêt nhũm Pawre mẽ kãm: —Nà amnepêm na pre Tĩrtũm finat Ijaisti mã tanhmã kapêr to. ỹ hã kot mẽ panhĩgêjtê mã tanhmã kapêr jarênh to kaxyw. Tĩrtũm Karõ nhỹ hã kot mẽ kãm kapêr nê tanhmã mẽ harênh to kaxyw. Te Tĩrtũm tãm mẽ kãm kapêr pyràk mẽ kãm kapêr. Nê ãm hãmri tanhmã mẽ pahkwỳjê jarênh to. Na pre mẽ kãm: E Ijaisti. Kêr ka ma akwỳjê hkôt ri mẽ kãm tanhmã ixkapêr jarênh to ho ri apa. Nê mẽ kãm: “Kot kaj mẽ ajamak o axumar tỳx tã aprĩ hã ixkapêr mar kêt nê. Nê mẽ ano ho arĩt tỳx tã aprĩ hã ixte amnhĩ nhĩpêx ã ixpumunh kêt nê. Mẽ amã ixkapêr mar prãm kêt jakamã te mẽ ate mar pymaj amnhĩ jamak pro pyràk o amnhĩ nhĩpêx o ri apa. Nê mẽ amã ixte amnhĩ nhĩpêx ã ixpumunh prãm kêt jakamã te mẽ ate ixte amnhĩ nhĩpêx ã ixpumunh pymaj te mẽ anomnhõt pyràk o amnhĩ nhĩpêx o ri apa. Jao amnhĩ kaxyw ixkôt ajamaxpêr kêt nê. Kop mẽ amã ixkapêr mar prãm ronhỹx ka mẽ aprĩ hã inhmar tỳx nê. Nê aprĩ hã ixte amnhĩ nhĩpêx ã ixpumunh mex nê. Jao amnhĩ tomnuj kaga hpa nê ixkôt amnhĩ xunhwỳ. Pa ja hã mẽ apumu nê mẽ ato

mex nê. Tã ka mẽ ã amnhĩ nhĩpêx anhỹr kêt nê.” Anhỹr o kêr ka mẽ kãm ixkapêr jarênh o ri mẽ hkôt apa Ijaisti. Anê. Na pre ã Tĩrtũm mẽ panhĩgêjtê kaxyw Ijaisti mã kapêr anê nhũm ô ri mẽ kãm ujarênh o pa nê mẽ pamã hã kagà. Jakamã kwa mẽ okora. Kêr ka mẽ jajê pyrà nê ã amnhĩ nhĩpêx anhỹr hkêt nê. Kwa mẽ inhma nê inhmar tỳx nê. Ijaew kêt xwỳnhjaja kot kapêr marja na ra Tĩrtũm kãm hprãm nê. Jakamã koja mẽ hwỳr mẽ kot kapêr jarênh o mẽ pa xwỳnh kwỳjê rê nhũm mẽ hkôt mẽ kãm ujarênh o pa nhũm mẽ kuma nê mẽ akurom kãm mar prãm nê. Anê. Hãmri nhũm mẽ kuma nê hapôx pa nê ma akupỹm axpên mã tanhmã kapêr jarênh to ho mra.

³⁰Hãmri nhũm pahi maati Sesti tokyx amnhĩ wỳr Pawre hwỳ nê tanhmã mar to hkêt nhũm òrkwỹ kamã kêp prês nê pa ho hã amgrà axkrut. Nê tãm òrkwỹ pãnhã mẽ kãm amnhĩre. Nhũm pre krĩ nhõ xwỳnhjaja ohtô nê hwỳr mra nhũm amnhĩ wỳr mẽ omu nê hkĩnh nê.

³¹Na pre hte amnhĩ wỳr mẽ kuwỳ nê mẽ kãm Tĩrtũm kapêr jarênh o hkrĩ. Mẽ kot Tĩrtũm Kra Pahihti Jejus Kris kôt amnhĩ xunhwỳr nhũm Tĩrtũm kot ja hã mẽ omunh nê amnhĩ katut kôt mẽ kot amnhĩ tomnuj rênh par nê mẽ ho hkra hã mẽ kãm ujarênh o hkrĩ. Nê mẽ kot hkôt amnhĩ xunhwỳr xwỳnhjê jahkre. Tanhmã mẽ kot Jejus kôt amnhĩ nhĩpêx mex to ho pa hã mẽ kãm karõ ho hkrĩ. Hãmri nhũm mēhõ ja nê tanhmã kãm kapêr to hkêt nê. Tã ãm ja pix Teopre. Ixpê Rukre na pa awỳr kagàja nhĩpêx nê kumê. Nê kamã amã tanhmã mẽ pahkwỳjê jarênh to. Tã ãm ja pix na hapêx.

Rõmãn

Rõmãn 1

¹Pa Rõm nhõ xwỳnhjaja? Xà mẽ amex? E ot pa mẽ awỳr kagà nhĩpêx nẽ kumẽ. Tĩrtũm na pre mẽ akaxyw ixãm. Ixte mẽ amã Jejus kot tanhmã mẽ panê amnhĩ nhĩpêx to hã harẽnh o ri ixpa kaxyw. Na pre ixpê Pawre hã ixpumu nẽ ixãm. Jakamã na pa ã mẽ awỳr kagà nhĩpêx nẽ mẽnh anẽ. Ixte Jejus nhỹ hã mẽ ahkre ho ri ixpa xwỳnh na pa. Na pa hte kãm tanhmã amnhĩ nhĩpêx to ho ri ixpa. Tã ã mẽ awỳr kagà nhĩpêx nẽ mẽnh anẽ.

²Amnepêm na pre Tĩrtũm nhỹ hã kapêr jarẽnh o ri mẽ pa xwỳnhjaja mẽ pakukamã mẽ panhĩgêjtjê mã Jejus kukamã tanhmã harẽnh to ho ri pa. Nẽ mẽ kãm kapêr jarẽnh o mẽ hkôt pa nẽ mẽ kãm: —Koja nhỹrmã Tĩrtũm mẽ pahpiitã mẽ panê tanhmã kot amnhĩ nhĩpêx to mã xwỳnh mẽ nhũm mẽ hpiitã hprĩ hã harẽnh ma nẽ omu. Anẽ. Nhũm prem ã Jejus kukamã mẽ kãm harẽnh anhỹr o ri mẽ hkôt pa. Tĩrtũm kapêr ã kagà htũm kamã harẽnh xà hkôt tanhmã mẽ kãm harẽnh to.

³Tĩrtũm Kra Jejus Krisja na pre mẽ kãm harẽnh o ri mẽ hkôt pa. Mẽ panhõ Pahihti na. Kêp Tĩrtũm Kra htã na pre mẽ pahpyrà nẽ ì ho amnhĩ nhĩpêx nẽ wrỳ nẽ katorxà nhõxà hkre rũm kato. Jakamã kêp Tĩrtũm Kra pix kêt mããnẽn katorxà hkôt kêp higêr Tawi hkanrêhã htàmnhwỳ.

⁴Kêp Tĩrtũm Kra htã nhũm prem axtem nẽ tanhmã hamaxpêr to nẽ kupĩ. Nom nhũm Tĩrtũm kêp amnhĩ Kra hã akupỹm ho htĩr. Jakamã na pu htem harẽnh ma nẽ kãm pajamaxpêr o: —Jejus kêp Tĩrtũm Kraa. Mẽ kot kêp hpĩr tã nhũm akupỹm ho htĩr. Jakamã nhũm Tĩrtũm pyrà nẽ hihtỳx o hihtỳx. Anẽ.

⁵Tã ã Tĩrtũm kot Kra nhĩpêx anhỹrja ri na mããnẽn pa ixto mex nẽ mẽ akaxyw ixãm. Jakamã na pa hte ma krĩ piitã hkôt mẽ kãm tanhmã Jejus Kris jarẽnh to ho ri mẽ hkôt ixpa. Ijaew mã nẽ Ijaew kêt xwỳnhjê mã. Mẽ kot harẽnh mar nẽ amnhĩ kaxyw kãm hamaxpêr nẽ kapêr kôt pix mã amnhĩ nhĩpêx mex kaxyw.

6-7Ně mẽ apê Rôm nhõ xwỳnhjaja. Na ka prem Jejus kôt amnhĩ xunhwỳ nhũm Tĩrtũm ja hã mẽ apumu nẽ mẽ ato hkra nẽ mẽ apê Jejus mẽ wa hkwy hã mẽ ajarẽ. Mẽ ate hkôt amnhĩ nhĩpêx kaxyw nhũm pre ã mẽ ajarẽnh anẽ. Tã ot pa kagà nhĩpêx nẽ mẽ awỳr mẽn h kaxyw. Tĩrtũm kot mẽ ato hkra xwỳnhjê hwỳr. Tĩrtũm kãm mẽ ajapêê. Na pa hte mẽ ato mẽ panhĩpêêxà maati Tĩrtũm mẽ Pahihti Jejus Kris wa hwỳr rãhã ri ixpa. Nẽ mẽ ato wa hwỳr o: —Kwa kêr ka wa Rôm kamã war akrajê pumunh mex nẽ mẽ kutã anojarêt rãhã nẽ. Kê mẽ hamakêtkati nẽ àmnhĩx ri tanhmã amnhĩ nhĩpêx to ho ri pa. Anẽ.

Pawre kot Rôm nhõ xwỳnhjê pumunh prãm ã amnhĩ jarẽnh

Atre 28.15-16; Rômãn 15.22-29

8Ně na ka prem amnhĩ kaxyw Jejus Kris mã ajamaxpêr nẽ hkôt amnhĩ xunhwỳ nhũm krĩ piitã hkôt mẽ pa xwỳnhjaja mẽ ajarẽnh ma. Nẽ mẽ ate amnhĩ nhĩpêx nyw ã mẽ ajarẽnh ma nẽ axpẽn mã tanhmã mẽ ajarẽnh to ho pa. Nẽ mẽ ajarẽnh o: —Kwa na xep Rôm kãm mẽ hkwyjaja amnhĩ kaxyw Jejus mã hamaxpêr tỳx nẽ. Nẽ hkôt amnhĩ nhĩpêx mex rãhã ho ri pa. Anẽ. Pa ã mẽ kot mẽ ajarẽnh anhỳrja ma nẽ ixkĩnh tỳx nẽ. Nẽ Tĩrtũm mã mẽ anhỳ hã ixkĩnh ã amnhĩ jarẽnh o ri ixpa.

9Na pa hte mẽ ato hwỳr rãhã ho ri ixpa. Nẽ nhỹri mẽ kãm Tĩrtũm Kra Jejus kapêr jarẽnh o ri ixpa nẽ mẽ amã ijamaxpêr nẽ mẽ ato kuwỳ. Nẽ tanhmã Tĩrtũm mã amnhĩ nhĩpêx to ho ixpa pê mẽ amã ijamaxpêr nẽ mẽ ato kuwỳ. Tĩrtũm kot ja hã ixpumunh mex.

10Na pa hte tanhmã kãm amnhĩ jarẽnh to kaxyw nẽ mẽ akaxyw amnhĩ to kuma nẽ kãm: —Pa Tĩrtũm? Na pa ra inhmã ma Rôm wỳr inhmõr nẽ kamã akôt ixkwỳjê pumunh prãm tỳx kumrêx. Xà kot ka tokyx mẽ hwỳr inhmẽ nà? Anẽ.

11Na pa ra inhmã mẽ awỳr inhmõr prãm tỳx nẽ. Na pre Tĩrtũm Karõ tanhmã ixkrã hto pa y hã kapêr ã kagà mar tỳx nẽ. Nẽ hkôt mẽmoj mex pumunh rax nẽ. Tã ra inhmã ma mẽ awỳr inhmõr nẽ amnhĩ xô ri mẽ amã harẽnh prãm

ně. Mě ate inhmar ně aprĩ hã Jejus Kris kôt amnhĩ xunhwỳr tỳx ně hkôt amnhĩ nhĩpêx mex rãhã ho ri apa kaxyw.

¹²Kot paj nhỹrmã ma mẽ awỳr mỗ. Nễ mẽ awỳr pỏj pu mẽ axpẽn pumu ně pahkĩnh nễ. Mễ pahte amnhĩ kaxyw Jejus Kris mã pajamaxpẻr mex o papa hã axpẽn pumu ně pahkĩnh nễ. Nễ mẽ pahpiitã hkôt amnhĩ nhĩpêx mex o ri papa.

¹³E ixkwỳjaja. Xatã ixte mẽ awỳr ixkrà htã nhũm mẽmoj xatã tanhmã ixpẻ àmtàr to pa kormã jar ixpa. Nom kot paj nhỹrmã ma mẽ awỳr mỗ. Mễ ate ja hã inhmar kaxyw na pa ã Tĩrtũm noo mã mẽ amã amnhĩ jarẻnh anễ. Na pa pre krĩ hkwỳ kamã mẽ apẻ Ijaew kẻt xwỳnh kwỳjẻ hwỳr ixpa. Nễ mẽ kãm Jejus kot mẽ panẻ tanhmã amnhĩ nhĩpêx to hã harẻnh o ri mẽ hkôt ixpa. Nhũm mẽ hkwỳjaja inhma ně hkôt amnhĩ xunhwỳ. Ja kaxyw na pa inhmã ma mẽ anhỏ krĩ hwỳr inhmỏr prãm nễ. Mễ akwỳjaja kot ixkapẻr mar nễ mẽ apyrà nễ Jejus kôt amnhĩ xunhwỳr kaxyw.

¹⁴Na pre ra Tĩrtũm ixte kapẻr o mẽ ajahkre ho ixpa kaxyw mẽ piitã mẽ kaxyw ixãm. Tanhmã ri mẽ kute xwỳnhjẻ kaxyw. Mễ kãm ma ho mẽ pa xwỳnhjẻ mẽ mẽ kãm ma hkẻt o mẽ pa xwỳnhjẻ mã. Nễ mẽ kot kagà pumunh xwỳnhjẻ mẽ mẽ kot kagà pumunh kẻt xwỳnhjẻ mã. Mễ piitã mẽ kaxyw na pre ixãm. Ixte mẽ kãm Jejus kot tanhmã mẽ panẻ amnhĩ nhĩpêx to hã harẻnh o ri mẽ hkôt ixpa kaxyw.

¹⁵Jakamã na pa ra inhmã mẽ apẻ Rỏm nhỏ xwỳnhjẻ hwỳr inhmỏr prãm nễ. Ixte mẽ anhỏ krĩ kamã mẽ piitã mẽ kãm ja jarẻnh o ri ixpa nhũm mẽ kot inhmar nễ mẽ pahpyrà nễ Jejus kôt amnhĩ xunhwỳr kaxyw.

Jejus kot mẽ panẻ htyk ã harẻnh

Sikũn Ximotre 1.6-12

¹⁶Nễ Jejus kot mẽ panẻ htyk ã harẻnhja ãm hãmri na. Harẻnhja mex o mex. Na htem kuma ně kãm hamaxpẻr ně amnhĩ kaxyw hkôt hamaxpẻr ně hkôt amnhĩ xunhwỳ. Hãmri nhũm Tĩrtũm ja hã mẽ omu ně mẽ nẻ mẽ kot amnhĩ tomnuj o hapẻx pa ně mẽ ho hkra. Nom mẽ ixpẻ Ijaew nhỏ xwỳnhjẻ pix kẻt. Mããnẻn mẽ apẻ Ijaew kẻt xwỳnhjaja nhũm kãm mẽ pajapẻ ho axpẽn pyrẻk.

Jakamã na pu htem Jejus kôt amnhĩ xunhwỳ nhũm Tĩrtũm ja hã mẽ pahpumu nẽ mẽ pahto hkra. Ja kaxyw àhpumunh tỳx o àhpumunh tỳx.

17 ãm mẽ kot amnhĩ kaxyw Jejus mã hamaxpěr xwỳnh pixjaja na hte mẽ ho hkra. Kapěr ã kagà htũm kot tanhmã ja jarěnh to nẽ harěnh kot: Na hte Tĩrtũm mẽ kot amnhĩ kaxyw Kra mã hamaxpěr ã mẽ omunh xà hkôt mẽ ho hkra nhũm mẽ amnhĩ kaxyw kãm hamaxpěr rãhã ho pa. Jao ra ô ri tãm amnhĩ nhĩpêx o pa. Anẽ.

Mẽ pahpiitã mẽ pahte amnhĩ tomnuj xwỳnh ã mẽ pajarěnh

Atre 14.15; 17.22-29; Apokarip 9.20-21

18 Nẽ mẽ kot amnhĩ tomnuj o ri mẽ pa xwỳnhjaja na hte Tĩrtũm axtem tanhmã mẽ harěnh to. Na htem Tĩrtũm kapěr ma nom amnhĩ tomnuj gryk ã ãm kuma. Nẽ mẽ hkwỳjaja kot kapěr mar pymaj kapěr ô ho mẽ kệp àmnàr rãhã ho ri pa nhũm Tĩrtũm ja hã mẽ omu nhũm ja kệp omnuj nẽ.

19-20 Te mẽ kot Tĩrtũm kot amnhĩ nhĩpêx ã omunh kêt pyràk o amnhĩ nhĩpêx tã mẽ kot omunh mex. Tĩrtũm kot mẽmoj to kator krax rũm ra kot mẽ pamã amnhĩ to amnhĩrĩt mex. Pu mẽ pano ho omunh kêt tã no ãm kot amnhĩ nhĩpêx kôt ra kệp Tĩrtũm ã omunh mex nẽ. Nẽ kệp mẽmoj piitã ho kator xwỳnh ã omunh mex nẽ. Nẽ mex o mex ã omu nẽ hihtỳx o hihtỳx hã omu. Tĩrtũm kot amnhĩ nhĩpêx kot amnhĩrĩt mex nhũm mẽ kot omunh mex tã hkôt amnhĩ xunhwỳr kêt nẽ. Nẽ axtem nẽ hamaxpěr o: —Tk. Tĩrtũm kot inhmã amnhĩ to amnhĩrĩtre hã kot pa kêt ri hkôt amnhĩ nhĩpêx. Kot pa inhno ho omu nẽ rĩ kormã hkôt amnhĩ nhĩpêx japêr. Anẽ. Ra mẽ kot amnhĩ nhĩpêx ã omunh mex tã ri ã hamaxpěr anẽ. Jakamã nhũm Tĩrtũm tee ri ja hã mẽ omu nhũm ja kệp omnuj tỳx nẽ.

21 Mẽ kot amnhĩ nhĩpêx ã omunh mex tã amnhĩ kaxyw tanhmã kãm hamaxpěr hto hkêt. Rỳ arĩ hamaxpěr japêr nẽ kãm: —Nà Tĩrtũm. ãm hãmri amex kumrêx. ãm amex o amex. Apê Tĩrtũm ã ãm apixi mex kumrêx na ka. ãm hãmri na ka hte mẽ ixto mex o apa. Anhỳr o amnhĩ kaxyw kãm kapěr kêt nẽ. Nẽ ãm htỳx tanhmã hamaxpěr punuj to pix o ri pa. Te kamàt kô

kamã ri mẽ pa xwỳnhjê kot amnhĩ nhĩpêx pyrà nẽ mẽmoj mex pumunh kêt nẽ.

²²Mẽ kot àhpumunh tỳx ã amnhĩ to jarkrar o ri pa htã no ãm te mẽ hkrã kanhĩn kêt nẽ mẽ hamaxpêr kêt pyràk o amnhĩ nhĩpêx.

²³Jakamã na htem amnhĩm mẽmo karõ nhĩpêx. Mẽmo htyk mã xwỳnhjê hõ karõ nhĩpêx. Tanhmãn panhĩ karõ rỳ mẽmo mry karõ rỳ mẽmo kuwênh karõ. Rỳ mẽmo kagã karõ nhĩpêx. Hãmri nẽ ho õ sãnti nẽ te ri ho Tĩrtũm nhĩpêx pyràk o hipêx. Jao hpar pê hkõn krã ho rôrôk nẽ amnhĩ to kuwỳ nẽ kãm amnhĩ jagrer pê kãm mex o mex ã harẽ. Tĩrtũmja sãnti rom htĩr o htĩr tã nhũm mẽ axtem nẽ sãnti gryk ã hkaga nẽ ã amnhĩ nhĩpêx o pa anẽ.

²⁴Jakamã nhũm tee ri ã mẽ kot amnhĩ nhĩpêx anhỹr ã mẽ omu nẽ amnhĩ pyrà nẽ mẽ hkaga nẽ ãm mẽ omu. Jakamã nhũm mẽ ãm amnhĩ krã hkôt tanhmã ri amnhĩ tomnuj to ho pa. Nẽ axpên kãm ri tanhmã hpijaàm kêt to. ã na htem htỳx ri amnhĩ tomnuj anhỹr o pa.

²⁵Tĩrtũm kapêrja ãm hãmri htã nhũm mẽ axtem nẽ te amnhĩ pum rênh pyràk o hipêx nẽ kãm hamaxpêr kêt nẽ. Nẽ hpãnhã ri mẽ hêx xwỳnhjê kapêr pix ma nhũm ja te mẽ kãm mex pyràk. Na htem ã amnhĩ nhĩpêx anẽ hãmri nẽ axtem nẽ Tĩrtũm kot mẽmoj nhĩpêx pix parpê rôrôk nẽ amnhĩm mex o mex ã harẽ. Nom kot hipêx xwỳnh Tĩrtũm parpê mãn ã amnhĩ nhĩpêx anhỹr kêt nẽ. Nom kot mẽmoj nhĩpêx xwỳnhhta mex o mex jakamã koja mẽ kot hkôt amnhĩ nhĩpêx xwỳnhjaja jajê rom kãm mex o mex ã harênh tũm rãhã ho ri pa.

²⁶No mẽ kot amnhĩ tomnuj xwỳnhjaja na hte Tĩrtũm amnhĩ pyrà nẽ mẽ hkaga nhũm mẽ htỳx amnhĩ krã hkôt ri tanhmã amnhĩ tomnuj to ho ri pa. Jao mẽni hkwỳjaja axtem nẽ axpên gryk ã mjên kaga nẽ axpên nhĩõ ho mjên.

²⁷Nhũm mẽmy hkwỳjaja mããnên axtem nẽ amnhĩ kwỳjê my gryk ã hprõ kaga nẽ axpên nhĩõ ho hprõ. Na htem ã axpên kamã hpijaàm kêt o pa anẽ. Mỳrapê koja mẽ à pix kãm amnhĩ xà htỳx kamã hamak o pa.

²⁸Na htem amnhĩ tomnuj gryk ã Tĩrtũm mã hamaxpěr kêt nhũm tee ri amnhĩ tã mẽ omu nẽ hamaxpěr o: —Mẽ kãm amnhĩ tomnuj pix prãm jakamã kwãr mẽ mãmri ã amnhĩ nhĩpêx anẽ. Kot paj axte ja nê tanhmã mẽ kãm ixkapěr to hkêt nẽ. Anẽ. Jakamã nhũm mẽ arĩ htỳx ri amnhĩ krã hkôt tanhmã amnhĩ tomnuj to ho ri pa rãhã nẽ.

²⁹Hãmri nẽ mẽmoj punuj pix mã hamaxpěr. Nẽ kãm amnhĩ mex pix prãm mã hamaxpěr. Nẽ kãm axpẽn tomnuj pix prãm. Nẽ mẽmoj tã axpẽn kãm gryk pix prãm. Nẽ mẽ kãm axpẽn par pix prãm. Nẽ mẽmoj tã ri kãm axpẽn mã àkjêr prãm. Nẽ mẽmoj tã kãm axpẽn mã hêx prãm. Nẽ kãm axpẽn kaxyw tanhmã hamaxpěr punuj to pix prãm. Nẽ kãm tanhmã axpẽn to kapěr punuj to pix prãm.

³⁰Nẽ kãm mẽmoj tã axpẽn to hêx pix prãm. Nẽ kãm Tĩrtũm prãm kêt o ri pa. Nẽ mẽmoj tã axpẽn mã àkjêr o ri pa. Nẽ mẽmoj tã amnhĩ to jarkrar rãhã ho ri pa. Nẽ tanhmã amnhĩ tomnuj to pix kukamã hamaxpěr. Nhũm mẽ katorxà nẽ mẽ hipêxà tee ri ja nê tanhmã mẽ kãm kapěr to no nhũm mẽ mar kêt kumrêx.

³¹Ã mẽ kot amnhĩ nhĩpêx anhỹr o ri mẽ pa xwỳnhjaja na hte Tĩrtũm kãm mẽmoj mex nhũm mẽ kêp omnuj nẽ nhũm Tĩrtũm kêp mẽmoj omnuj nhũm mẽ kãm mex nẽ. Nẽ axpẽn mã mẽmoj tanhmã ho hã amnhĩ jarênh tã ho anhỹr kêt nẽ. Nẽ axpẽn kãm ukapri ho ri pa hkêt nẽ.

³²Tĩrtũm kapěr ã kagà htũm kot tanhmã mẽ hkukamã mẽ harênh to nẽ mẽ harênh kot: ã mẽ kot amnhĩ nhĩpêx anhỹr o ri mẽ pa xwỳnhjaja koja mẽ nhỹrmã ty hãmri nẽ amnhĩ xà htỳx kamã hamak rãhã ho ri pa ho pa. Anẽ. Nhũm mẽ kot amnhĩ tã ja mar tỳx tã aa amnhĩ tomnuj kaga hkêt nẽ. Arĩ ã amnhĩ nhĩpêx anhỹr o pa rãhã nẽ. Nhũm mẽ hkwỳjaja mẽ kot amnhĩ tomnuj ã mẽ omu nẽ mẽ uràk nẽ ã amnhĩ nhĩpêx anhỹr o ri mẽ hkôt pa nhũm mẽ amnhĩ pyrà nẽ mẽ omu nẽ hkĩnh nẽ. Na htem ã amnhĩ nhĩpêx anhỹrja gryk ã Tĩrtũm kaga nhũm tee ri amnhĩ tã mẽ omu nẽ amnhĩ pyrà nẽ mẽ hkaga nẽ ãm mẽ omu. Jakamã nhũm mẽ amnhĩ tomnuj tỳx pix rãhã ho pa.

Rōmān 2

Mē kot amnhī tomnuj xwỳnhjê hkukamā mē harēnh

Matêwre 7.1-5; Sikûn Tesarôn 1.6; Eprêw 9.27; Sikûn Pêtre 2.4; 3.7; Jutre 6-14; Apokarip 6.15; 20.11

¹Nē kot ka mē atō ã mē kot amnhī tomnuj anhỹr xwỳnhjê kot amnhī nhĩpêx ã mē harēnh ma nē ã ajamaxpêr anē nē ajamaxpêr o: —Tk. Mē kot amnhī tomnuj pix o ri pa xwỳnh kênã. No pa na ã ixte amnhī nhĩpêx anhỹr o ri ixpa hkêt. Mē kurom ixte tãm amnhī nhĩpêx o ri ixpa xwỳnh na pa. Anhỹr o amnhī jarē. Kwa nà mē ã ajamaxpêr anhỹr kêt nē. Mē pajaxwỳja na pu htem tōhã mē uràk nē tanhmã amnhī tomnuj to. Tã ka mē ã mē kot amnhī tomnuj ã mē harēnh anē nē te ka ate amnhī jarēnh pyràk.

²Tĩrtũm kapêr ã kagà htũm kot mē kot amnhī tomnuj o ri mē pa xwỳnhjê jarēnh kot: Mē kot amnhī tomnuj mỳrapê koja mē nhỹrmã amnhī xà htỳx kamã hamak rãhã ho ri pa. Anē. ãm hãmri ã mē harēnh kot anhỹr.

³Mãn ka mē atō tanhmã amnhī kukamã ajamaxpêr to nē ajamaxpêr o: —Nà koja Tĩrtũm nhỹrmã amnhī nē kuwy hwỳr mē kot amnhī tomnuj xwỳnhjê rē. No pa koja hwỳr inhmēnh kêt nē. Anē. Kwa mē ã ajamaxpêr anhỹr kêt nē. Kot ka mē ã amnhī kukamã ajamaxpêr anhỹr tã tōhã mē uràk nē tanhmã amnhī tomnuj to. Jakamã koja Tĩrtũm mē uràk nē hã tanhmã mē ato.

⁴Kot kaj mē atō tanhmã amnhī tomnuj to hãmri nē ãm ja hã amnhī pumu nē ajamaxpêr o: —Ixte amnhī tomnuj xwỳnh tã na hte Tĩrtũm ja hã ixpumu nē ãm ixpumu nē hã tanhmã ixto hkêt nē. Kêp mē ixkamã ukapri xwỳnh jakamã na hte gryk tokyx anhỹr kêt nē. Jakamã kot paj arĩ tanhmã amnhī tomnuj to ho ri ixpa nē aa jam inhũrer kêt nē. Tĩrtũm kot ja hã tanhmã ixtore kaxyw hã. Anhỹr o ajamaxpêr. No ãm ja kot anhỹr kêt. Na hte Tĩrtũm kormã amnhī tã mē pajamã. Mē pahte amnhī tomnuj kaga nē hpãnhã hkôt amnhī xunhwỳr kaxyw na hte kormã amnhī tã mē pajamã. Jakamã na kormã tanhmã ate amnhī tomnuj tota ã tanhmã ato hkêt nē.

⁵Mē akrã hihtỳx jakamã mē amã hkôt amnhī xunhwỳr prãm kêt. Na ka htem tanhmã amnhī tomnuj to pix kukamã ajamaxpêr o ri apa. Nē gaa nē ra anhỹr kumrêx. Nhũm Tĩrtũm tee ri ja hã mē apumu nhũm ja kêp omnuj tỳx o mō.

Jakamã koja nhÿrmã tanhmã mẽ ajarënh to nẽ gryk tÿx kãm tanhmã mẽ atomnuj tÿx to. ãm hãmri na hte mẽ pahte amnhĩ nhĩpêx ã mẽ pahpumunh xà hkôt ahpÿnhã tanhmã mẽ panhĩpêx to.

⁶Koja nhÿrmã mẽ pahpiitã kormã mẽ pahtĩr ri mẽ pahte amnhĩ nhĩpêx ã mẽ pahpumunh xà hkôt tanhmã mẽ panhĩpêx to. Mẽ kot amnhĩ to mex o ri mẽ pa xwÿnhjaja nhũm mẽ ho mex nẽ. Nẽ mẽ kot amnhĩ tomnuj o ri mẽ pa xwÿnhjaja nhũm mẽ homnuj nẽ. Koja nhÿrmã mẽ pahpiitã mẽ pahto hpimràatã ã mẽ panhĩpêx anẽ.

⁷Mẽ kot hkôt tãm ri amnhĩ nhĩpêx o pa pê kãm Tĩrtũm kot amnhĩm mẽ mex ã mẽ harënh prãm xwÿnhjaja koja nhÿrmã amnhĩm mẽ mex ã mẽ harẽ. Hãmri nhũm mẽ kuri htĩr tũm nẽ hkĩnh nẽ mex kumrëx nẽ pa ho pa.

⁸Nom mẽ kot amnhĩ mã pix mã ri hamaxpêr o ri mẽ pa xwÿnhjaja. Nẽ mẽ kot tanhmã amnhĩ tomnuj to gryk ã Tĩrtũm kapêr kaga xwÿnhjaja koja kãm mẽ hkĩnh kêt nẽ tanhmã mẽ homnuj tÿx to.

⁹Mẽ kot amnhĩ tomnuj xwÿnh piitã koja mẽ nhÿrmã amnhĩ xà htÿx kamã hamak rãhã nẽ pa ho pa. Ijaew kumrëxjaja nẽ hpãnhã Ijaew kêt xwÿnhjaja nhũm mẽ amnhĩ xà htÿx kamã hamak rãhã nẽ pa ho pa. Mẽ kot amnhĩ tomnuj tÿx o paja mÿrapê.

¹⁰No kêt tãm mẽ kot amnhĩ nhĩpêx xwÿnhjaja koja Tĩrtũm mẽ ho mex rax rãhã ho pa ho pa. Nẽ amnhĩm mẽ kot amnhĩ to mex xwÿnhjê hã mẽ harẽ. Nẽ tanhmã mẽ ho mex to nhũm mẽ kamã amnhĩ krit nẽ pa ho pa. Hamakêtkati nẽ hkĩnh nẽ àmnhĩx ri pa ho pa. Ijaew kwÿ kumrëxjaja nẽ mããnën Ijaew kêt xwÿnh kwÿjaja nhũm mẽ mex nẽ hamakêtkati nẽ hkĩnh nẽ àmnhĩx ri pa ho pa.

¹¹Koja Tĩrtũm nhÿrmã ahpÿnhã mẽ pahte amnhĩ nhĩpêx ã mẽ pahpumunh xà hkôt tanhmã mẽ pajarënh to pê tanhmã mẽ panhĩpêx to. Mẽ ixpê Ijaewjaja nẽ mẽ apê Ijaew kêt xwÿnhjaja nhũm ã mẽ pahpiitã mẽ panhĩpêx anẽ.

¹²Amnepê m na pre finat Mojes mã tanhmã kapêr to nhũm kuma nê ô ri hã kagà hpa. Mẽ ixpê Ijaew ri na kapêr ã kagàja. Ra mẽ ixte mar tỳx jakamã koja mẽ ixtõ ra kapêr mar tỳx tã hkôt amnhĩ nhĩpêx kêt hãmri nhũm Tĩrtũm tee ri amnhĩ tã omu nê ã amnhĩ nhĩpêx anhỹrja mỳrapê nhỹrmã ma mẽ kot amnhĩ xà htỳx kamã hamak tũm xàta wỳr kumẽ. Kot kapêr mar tỳx tã hkôt amnhĩ nhĩpêx kêt mỳrapê nhũm ã hipêx anẽ. No kêt mẽ apê Ijaew kêt xwỳnhjaja mẽ ixkĩnhã mẽ ari Tĩrtũm kapêr ã kagà hkêt jakamã koja mẽ ate kapêr nhĩrõp mẽ akuhê hã mẽ apumunh kôt tanhmã mẽ anhĩpêx to hkêt nẽ. Koja hpãnhã mẽ ate tanhmã amnhĩ tomnuj to ho apa mỳrapê mẽ kot amnhĩ xà htỳx kamã hamak o pa tũm xàta wỳr mẽ arẽ.

¹³Na hte mẽ kot kapêr mar ã mẽ omunh xà hkôt amnhĩm mẽ kot amnhĩ to mex xwỳnh ã mẽ harẽnh kêt nẽ. ãm mẽ kot kapêr kôt amnhĩ nhĩpêx ã mẽ omunh xà hkôt pix mã na hte amnhĩm mẽ kot amnhĩ to mex xwỳnh ã mẽ harẽ.

¹⁴No mẽ hkwỳjaja kormã kot kapêr mar kêt tã te ra mẽ kot mar mex pyræk o amnhĩ nhĩpêx. Jao amnhĩ krã hkôt tãm ri amnhĩ nhĩpêx kurê kumrẽx. Te kot Ijaew pyrà nẽ Tĩrtũm kapêr mar tỳx nẽ hkôt amnhĩ nhĩpêx o ri pata pyræk.

¹⁵Na htem amnhĩ krã hkôt tanhmã amnhĩ nhĩpêx mex to. Te Tĩrtũm kapêr kot mẽ hkrãm gjêx pyræk o amnhĩ nhĩpêx o pa. Jakamã tee ri tanhmã amnhĩ tomnuj to hã amnhĩ pumu nẽ hkaprĩ nẽ. Nẽ tãm amnhĩ nhĩpêx ã amnhĩ pumu nẽ hkĩnh nẽ.

¹⁶Tã koja nhỹrmã Tĩrtũm Jejus Kris mã anẽ nhũm kuma hãmri nẽ mẽ piitã kormã mẽ htĩr ri tanhmã mẽ kot amnhĩ nhĩpêx to hã mẽ omunh xà hkôt tanhmã mẽ harẽnh to. Nẽ mẽ hamaxpêr kôt mẽ omunh mex xà hkôt tanhmã mẽ harẽnh to. Mẽ papajaja mẽ pahte axpên jamaxpêr kôt axpên pumunh kêt tã Jejus kot mẽ pajamaxpêr kôt mẽ pahpumunh par. Tã na pa hte mẽ kãm Jejus kot tanhmã amnhĩ nhĩpêx to hã harẽnh o ixpa pê ã mẽ kãm ixujarẽnh anhỹr o ri ixpa.

Pawre kot hkwỳjê mã kapêr

Rõmãn 3.19-20

17Ně ixpyrà ně mẽ apê Ijaew kwỳjaja na ka mẽ axtem ně Ijaew kêt xwỳnhjê mã tanhmã amnhĩ to jarkrar o ri apa ně mẽ kãm: —Nà mẽ ixpê Ijaew ri Tĩrtũm kapêr ã kagà jakamã ãm mẽ papxipixjaja na hte Tĩrtũm amnhĩm mẽ inhmex ã mẽ ijarê. Ně ãm mẽ papxipixjaja na hte mẽ ixto hkra.

18Ně mẽ papxipixjaja na mẽ ixte Tĩrtũm kãm hprãm xà hkôt mẽmoj pumunh par ně mẽ kot amnhĩ to mex xà pumunh par ně mẽ kot amnhĩ tomnuj xà pumunh par. Mẽ apê Ijaew kêt xwỳnhjê rom mẽ ixte mẽmoj piitã omunh par kumrêx. Aně.

19-20Ně amnhĩ jarênh o: —Nà te mẽ ixpê mẽ nohkre xwỳnhjê pa hã mẽ hamỳnh ně ri mẽ ho ixpa xwỳnh pyræk. Jakamã Ijaew kêt xwỳnh pê htỳx ri mẽ pa xwỳnhjaja na pa htem mẽ kãm Tĩrtũm kapêr tũm o mẽ ahkre mex o ri ixpa. Kormã mẽ kot hprĩ hã mar kêt jakamã na pa htem ho mẽ ahkre ho ri mẽ hkôt ixpa. Mẽ kurom mẽ ixte mar par kênã.

21Anhỳr ã amnhĩ jarênh ně mẽ ate kapêr o mẽ ahkre ho apa htã hkôt amnhĩ nhĩpêx kêt ně. Ně mẽ ate mẽ kot axpên pê àhkĩnh nê mẽ hkurê htã no ãm mẽ kamjaja axpên pê axàhkĩnh o ri apa.

22Ně mẽ amã sãnti hkĩnh kêt ã amnhĩ jarênh tã axtem ně hwỳr agjê ně hpar pê kàxpore nhĩkwỹ xwỳnh o axàhkĩnh o ri apa. Ně mẽ kot axpên prõ ho amnhĩkati nê mẽ hkurê ho apa htã mẽ kamjaja ã ri amnhĩ nhĩpêx anhỳr o ri apa.

23Ně mẽ ate Tĩrtũm kapêr ã kagà mex o mex ã harênh tã hkôt amnhĩ nhĩpêx hkêt ně. Jakamã nhũm mẽ akwỳjaja ja hã mẽ apumu ně mẽ apyrà ně Tĩrtũm ã hpijaàm kêt o pa.

24Tĩrtũm kapêr ã kagà htũm kot tanhmã mẽ ate amnhĩ nhĩpêx ã mẽ ajarênh to ně mẽ ajarênh kot: Mẽ kêp Ijaew kêt xwỳnhjaja na htem Ijaew kot htỳx ri amnhĩ nhĩpêx o ri mẽ pa hã mẽ omu ně mẽ ỹ hã tanhmã Tĩrtũm o kapêr punuj to ho ri pa. Aně.

25Mẽ pahpê Ijaew na pu htem mẽ pahkrajaja mẽ hapôx kôt kormã mẽ hkryre ri pu htem mẽ kêp mẽmy kwryt kà jakà. Finat Mojes kot Tĩrtũm nhỹ hã mẽ

panhîgêjtê mã hã karõ xà hkôt na pu htem ã mẽ hipêx anê. Mẽ pahte Tĩrtũm mã mẽ pahkrajê nhõr ã amnhĩ to amnhĩrĩt kaxyw. Jakamã na pu htem arĩ Mojes kapêr kôt ã mẽ hipêx anê nhũm Tĩrtũm kãm ja mex nê. Nom kot pu mẽ kapêr kwỳm ri tanhmã amnhĩ nhĩpêx to ho papa nhũm ja kêp omnuj tỳx nê hãmri pu mẽ tee ri mẽ pahkrajê my kwryt kà jakàr kaprỳ. Na hte Tĩrtũm ã mẽ pahkrajê nhĩpêx anhỹr ã mẽ pahpumunh kôt amnhĩm mẽ pamex ã mẽ pajarênh kêt nê. Nom mẽ pahte kapêr kôt amnhĩ nhĩpêx mex o papa pê mẽmy kwryt kà jakàrja nhũm kãm mex nê.

²⁶Ijaew kêt xwỳnhjaja kot ã mẽ hkrajê nhĩpêx anhỹr kêt tã ra mẽ hkwyjaja Tĩrtũm kapêr ma nê hkôt amnhĩ nhĩpêx o ri pa. Jao te mẽ kot amnhĩ my kwryt kà jakàr pyràk o amnhĩ nhĩpêx. Jakamã nhũm Tĩrtũm ja hã mẽ omu nê mẽ kãm: —Nà ãm hãmri. Mẽ ate amnhĩ my kwryt kà jakàr kêt tã mẽ apê ixkra na ka mẽ. Anê.

²⁷Mẽ kot amnhĩ jakàr kêt tã Tĩrtũm kapêr kôt amnhĩ nhĩpêx mex o ri pa nhũm amnhĩ tã mẽ omu nê mẽ arom amnhĩm mẽ kot amnhĩ to mex xwỳnh ã mẽ harê. Mẽ kot amnhĩ jakàr kêt tãã. No mẽ kajaja mẽ ate Tĩrtũm nhỹ hã Mojes kapêr ã kagà mar tỳx tã hkôt amnhĩ nhĩpêx kêt nê. Ja mỳrapê koja ja hã mẽ apumu nê Ijaew kêt xwỳnhjê kĩnhã mẽ ate amnhĩ tomnuj xwỳnh ã mẽ ajarê. Ra mẽ ate amnhĩ jakàr tã mẽ ate amnhĩ tomnuj xwỳnh ã mẽ ajarê.

²⁸Nê kot ka mẽ atõ tanhmã amnhĩ to jarkrar to nê amnhĩ jarênh o: —Nà ixpê Ijaew jakamã na hte Tĩrtũm mẽ kot inhmy kwryt kà krãhyr kôt ixto kraa. Anê. Nom xà na hte Tĩrtũm ã mẽ pahte amnhĩ nhĩpêx anhỹr ã mẽ pahpumunh kôt mẽ pahto hkra? Nà kot anhỹr kêt. Na htem ãm htỳx ã amnhĩ to jarkrar anhỹr kaprỳ ho pa.

²⁹Nê Tĩrtũm Karõ kot mẽ hkarõ mã gjêx xwỳnhjaja kêp Tĩrtũm kra jakamã na htem Tĩrtũm kãm hprãm xà hkôt amnhĩ nhĩpêx. Nom ri amnhĩ krã hkôt tanhmã amnhĩ nhĩpêx to ho pa hkêt nê. Rỳ htỳx hamaxpêr o: —Nà kot paj Mojes kapêr ã kagà hkôt amnhĩ nhĩpêx nhũm Tĩrtũm ja hã ixpumu nê amnhĩm inhmex ã ijarê nê ixto hkra. Anhỹr o hamaxpêr kêt nê. Na htem hamaxpêr o: —Nà ra Tĩrtũm Karõ kot ixkarõm àr jakamã ixpê hkra nhũm

amnhĩm inhmex ã ijarẽ. Jakamã kot paj ãm kôt pix mã ri amnhĩ nhĩpêx o ri ixpa rãhã ty. Kwãr mãmrĩ ixkwỳjaja amnhĩm inhmex kêt ã ijarẽ. Anẽ. Kêr ka mẽ ã ajamxpêr anhỹr o ri pa. ã mẽ hamaxpêr anhỹr na mex o mex.

Rõmãn 3

¹Nẽ mãn ka mẽ ra tee ri tanhmã amnhĩ kukamã ajamxpêr to nẽ ajamxpêr o: —Kwa mo kaxyw na pa ixpê Ijaew? Mon pa pre we ixpê Ijaew kêtre hkêt nẽ? Mẽ kêp Ijaew kêt xwỳnhjaja kot amnhĩ jakàr kêt tã nhũm Tĩrtũm mẽ pahpyrà nẽ mẽ ho hkra. Anẽ. Kwa mẽ ã ri ajamxpêr anhỹr kêt nẽ.

²Mẽ pahpê Ijaew na pre Tĩrtũm Ijaew kêt xwỳnhjê rom mẽ pahto mex rax nẽ. Na pre amnepê mã mẽ panhĩgêt mã tanhmã kapêr to. Mẽ pahpiitã mẽ pahte mar nẽ hkôt amnhĩ nhĩpêx kaxyw. Nom Ijaew kêt xwỳnhjê nhĩgêt mã ã kapêr anhỹr kêt nẽ. ãm mẽ pahpê Ijaew nhĩgêt pix mã kapêr. Jakamã mẽ pahpê Ijaew mã ja mex kumrêx.

³Nom kot kaj mẽ atõ ja ma nẽ ajamxpêr o: —Nà Tĩrtũm kot mẽ ixto mex mã mẽ ixtã amnhĩ jarênh tã no nhũm xep mẽ inhĩgêt kwỳjaja hkôt amnhĩ nhĩpêx kêt nẽ. Na xep prem kapêr kwỳm ri amnhĩ tomnuj o pa. Jakamã ko. Koja Tĩrtũm mẽ ixpê mẽ hkanrêhã mẽ htãmnhwỳjaja tanhmã mẽ ixto mex to japêr ko. Anẽ.

⁴Kwa mẽ ri ã ajamxpêr anhỹr kêt nẽ. Tĩrtũm na hte mẽ pahpiitã mẽ pakurom mẽmoj tã amnhĩ jarênh o hêx kêt nẽ. Tã ra kot tanhmã mẽ pahtã amnhĩ jarênh to xà hkôt koja ã mẽ pahto mex anẽ. Kapêr ã kagà htũm kot mẽhõ tanhmã Tĩrtũm mã kapêr to nẽ harênh kot: Pa Tĩrtũm. Nà ãm kapxipix na ka hte mẽmoj tã amnhĩ jarênh xà hkôt amnhĩ nhĩpêx o ri apa. Jakamã na htem ãm axpên mã axêx ã akapêr ã ajarênh kaprỳ. Anhỹr o harẽ.

⁵No kot ka mẽ atõ atỳx ajamxpêr nẽ ajamxpêr o: —Xà koja Tĩrtũm tanhmã mẽ ixte amnhĩ tomnuj to hã mẽ ixpumu nẽ gryk? Nà koja gryk kêt nẽ. Jakamã kot paj arĩ amnhĩ tomnuj o ri ixpa. Kê mẽ piitã ja hã ixpumu nẽ ixrom Tĩrtũm tapxipix kot amnhĩ to mex o pa xwỳnh ã harênh o pa. Nà ja mex. Jakamã kot paj arĩ amnhĩ tomnuj rãhã ho ri ixpa nhũm mẽ Tĩrtũm pix

mã mǎn kot tǎm amnhĩ nhĩpêx xwỳnh ǎ harê. Hǎmri nhũm Tĩrtũm amnhĩ tǎ ixpumu nê tanhmǎ ixto hkêt nê. Kojǎ tanhmǎ ixto japêr hǎmri nê ixpyrà nê amnhĩ tomnuj nê. Anê. Kot kaj mê ǎ ajamaxpêr anê nê ǎm amnhĩ krǎ hkôt ǎ ajamaxpêr anhỹr kaprỳ. Nom ǎ ajamaxpêr anhỹrja Tĩrtũm jamaxpêr kôt kêt.

⁶Kwa mê ri ǎ ajamaxpêr punuj anhỹr kêt nê. Tĩrtũm kot mê pahpyrà nê aa kot amnhĩ tomnujre hǎ. Kop ǎm mê pahpyrà nê tanhmǎ kot amnhĩ tomnuj to ronhỹx tanhmǎ kot we amnhĩ to nê mê pahte amnhĩ tomnuj xwỳnh ǎ mê pajarê? Nhỹx mê pahpyrà nê ǎ amnhĩ jarênh anê. Nà ǎ mê ajamaxpêr anhỹrja mex kêt.

⁷⁻⁸E pa ixprĩ hǎ mê amǎ ja jarê ka mê inhma. Kot kaj mê atō amnhĩ kukamǎ ajamaxpêr o: —E kot paj mǎmrĩ ri mêmoj tǎ ixêx o ri ixpa kê mê ixêx nhi hǎ ixpumu nê ixrom Tĩrtũm pix mǎ mǎn kot amnhĩ to mex ǎ harê. Nê ǎm pix mǎ mǎn hêx kêt xwỳnh ǎ harê. Hǎmri nhũm Tĩrtũm amnhĩ tǎ ixpumu nê mê ǎ mê kot harênh anhỹrja ma nhũm ja kǎm mex nê nhũm hkĩnh nê. Jakamǎ ixêx o ri ixpaja ǎ tanhmǎ ixto hkêt nê. Ra mê kot ixrom tǎm kot amnhĩ nhĩpêx o pa xwỳnh ǎ harênh jakamǎ nhũm ixêx nhita ǎ tanhmǎ ixto hkêt japêr. Jakamǎ kot paj ixte amnhĩ tomnuj o ri ixpaja mǎ inhũrer kêt nê. Kêr kê mê ja hǎ ixpumu nê ixrom Tĩrtũm tapxipix kot amnhĩ to mex xwỳnh ǎ harê. Anhỹr o ajamaxpêr nom mê ajamaxpêrja kot anhỹr kêt. Na hte akwỳjaja pa ixpê Pawre ixêx o ixpa hǎ ri axpên mǎ ijarê no na pa hte ixêx o ri ixpa hkêt nê. ǎ mê ajamaxpêr anhỹr o ri apa xwỳnhjaja kojǎ Tĩrtũm mê atomnuj tỳx nê kǎm ga.

Mê mê pahte amnhĩ tomnuj xwỳnh ǎ mê pajarênh

Wam Korĩt 6.9; Karatas 3.22; Xitre 3.3

⁹Tǎ tanhmǎ kot puj mê pahpê Ijaew amnhĩ jarênh to? Xà kot pu mê pahte amnhĩ to mex o Ijaew kêt xwỳnhjê jakrenh ǎ amnhĩ jarê? Nà mê pahte ǎ amnhĩ nhĩpêx anhỹyre hǎ. Mê pahpê Ijaew nê Ijaew kêt xwỳnhjaja. Mê pahpiitǎ mê pahte amnhĩ tomnuj o axpên pyræk. Na pa pre ra mê amǎ ja jarê.

10Tirtũm kapẽr ã kagà htũm kot ja jarẽnh kot: Mẽhõ na we aa kot amnhĩ tomnuj kêt kumrẽx nẽ pa?

11Nẽ mẽhõ na we kot mẽmoj mex piitã omunh par? Nẽ mẽhõ na kãm Tirtũm prãm?

12Nà amrakati kumrẽx. Na mẽ ra piitã hkaga hpa. Nẽ kapẽr kwỳm ri tanhmã amnhĩ tomnuj to ho pa. ãm mẽhõ pyxire nẽ amnhĩ to mex o ri pa hkêt kumrẽx.

13Na htem kapẽr punuj pix o ri pa. Jakamã Tirtũm noo mã mẽ kot amnhĩ nhĩpêxja te kot mẽmoj tyk nẽ hkro punuj pyræk. Na htem ãm ri hêx pix kukamã ri hamaxpẽr o pa. Tanhmã mẽ hêx to xàja te kêp kagã xoprê nhõ wenẽn xihtỳx pyræk.

14Nẽ na htem mẽ piitã mẽmoj nhĩxi ho ri axpẽn mã mẽ hixi jarẽnh o pa. Nẽ ri tanhmã axpẽn japrỳ hto ho pa.

15Nẽ tanhmã kapẽr mã gêt kãm mẽ kãm kapẽr to.

16Nẽ tanhmã mẽ hkwyjê homnuj to. Jakamã nhũm mẽ piitã ri hkaprĩ nẽ mex kêt nẽ pa.

17Nhũm htem ãm axpẽn mã mẽ gryk xà pix o kapẽr o pa.

18Nẽ Tirtũm ã hpijaàm kêt o pa. Na htem kapẽr ma nẽ ãm kuma nẽ kãm hkĩnh kêt o pa. ã na htem amnhĩ nhĩpêx anhỹr rãhã ho pa. Anẽ. ã Tirtũm kapẽr ã kagà htũm kot mẽ pajarẽnh anhỹr.

19Mẽ pahpê Ijaew ra mẽ pahte ja jarẽnh mar tỳx. Tirtũm kapẽr ã kagà htũm kwỳ na. Na hte ã mẽ kot amnhĩ tomnuj xwỳnhjê jarẽnh anẽ. Nẽ mããnẽn mẽ papajaja. Mẽ pahpê Ijaew na hte ã mẽ pajarẽnh anẽ. No ãm mẽ papaxipix hkêt. Krĩ piitã hkôt ri mẽ pa xwỳnhjaja nhũm ã mẽ harẽnh kot anhỹr. Ijaew kêt xwỳnhjaja nẽ mẽ pahpê Ijaew. Mẽ pahpiitã mẽ pahte amnhĩ tomnuj xwỳnh jakamã mẽmo kaxyw kot pu mẽ pahte amnhĩ tomnuj kêt ã ri amnhĩ to jarkrar o papa? Kot puj mẽ ã amnhĩ jarẽnh anhỹr kaprỳ. Jakamã koja

Tĩrtũm mẽ pahpiitã mẽ pahte amnhĩ tomnuj mỳrapê tanhmã mẽ panhĩpêx to.

²⁰Mẽ pahtõ koja mẽ pahte kapêr kôt pix mã amnhĩ nhĩpêx o papa hã mẽ pajarẽ? Nẽ mẽ pahtõ mã koja mẽ pamã kapêr nẽ mẽ pamã: —Nà na ka hte akatàt kôt ixkapêr kôt pix mã amnhĩ nhĩpêx mex nẽ. ãm hãmri na ka hte ã amnhĩ nhĩpêx anhỹr o apa. Anhỹr o mẽ pahtõ mã kot we ã kapêr anẽ? Nà aa kot mẽ pahtõ mã kapêr anhỹr kêt. Na pu htem ãm kapêr ma nẽ tee ri amnhĩ kukamã pajamaxpêr. Mẽ pahte amnhĩ tomnuj ã amnhĩ pumunh kaxyw na pre mẽ pamã kapêr ã kagà htũmja gõ. Mẽ pahtõ mẽ pahte kapêr ã kagà hkôt amnhĩ nhĩpêx mex o papa hkêt kênã kot kêt ri amnhĩm mẽ pahte amnhĩ to mex xwỳnh ã mẽ pajarẽ.

Tanhmã Tĩrtũm kot mẽ pahto hkra to hã harẽnh

Atre 17.30-31; Karatas 2.16-21; Piripos 3.7-9; Xitre 3.5; Xiakre 2.10

²¹Nẽ na hte Tĩrtũm mẽ pahte kapêr kôt amnhĩ nhĩpêx ã mẽ pahpumunh kôt amnhĩm mẽ pahte amnhĩ to mex xwỳnh ã mẽ pajarẽnh kêt nẽ. Jakamã mẽhõ kukwak ri koja we ã mẽ pajarẽnh anẽ? Nà nhãm mẽhõ kot tãm amnhĩ nhĩpêx rãhã ho pa hã omunh pix kukwak ri koja ã mẽ pajarẽnh anẽ. Tã mẽhõ kukwak ri kot ã mẽ pajarẽnh anhỹr xwỳnhhta na pre ra mẽ pamã ho amnhĩrit. Amnepêem Tĩrtũm kapêr ã kagà htũm kamã na pre mẽhõ hkukamã tanhmã harẽnh to. Nẽ Tĩrtũm nhỹ hã mẽ kapêr jarẽnh o pa xwỳnhjaja haxwỳja kukamã tanhmã harẽnh to ho pa.

²²Jejus Krisja na prem hkukamã harẽnh o pa. Tãm na pu htem hkôt amnhĩ xunhwỳ nẽ amnhĩ kaxyw kãm pajamaxpêr rãhã ho papa nhũm Tĩrtũm ja pix ã mẽ pahpumunh kôt amnhĩm mẽ pahte amnhĩ to mex xwỳnh ã mẽ pajarẽ. Mẽ kot Jejus kôt amnhĩ xunhwỳr xwỳnh piitãã. Mẽ ixpê Ijaew nẽ mẽ apê Ijaew kêt xwỳnhjaja. Mẽ pahpiitã mẽ pahte axpên pyræk jakamã kot puj mẽ pahtõ Jejus kôt amnhĩ xãm nhũm Tĩrtũm Kra Jejus kot amnhĩ to mex pix o pa kukwak ri mẽ pahpumu nẽ amnhĩm pajarẽnh o: —Nà ãm hãmri. Ra kot ixkra Jejus kôt amnhĩ xãm jakamã ra inhmã te Jejus kot amnhĩ nhĩpêx pyrà nẽ amnhĩ to mex o pa. Anẽ.

²³No mẽ pahtõ na mẽ pahte Tĩrtũm mẽ Jesus wa uràk nẽ amnhĩ nhĩpêx mex rãhã ho ri papa? Nà amrakati kumrêx. Mẽ pahpiitã mẽ pahte amnhĩ tomnuj xwỳnh kênã.

²⁴Tã Tĩrtũm kot mẽmoj tã mẽ pakutã nojarêr rãhã jakamã na hte Jesus Kris kukwak ri amarĩ amnhĩm mẽ pahte amnhĩ to mex xwỳnh ã mẽ pajarênh o pa. Mẽ pahte Jesus kôt amnhĩ xunhwỳr xwỳnh piitã nhũm ã mẽ pajarênh anẽ. Ra Jesus kot htyk o mẽ pahte amnhĩ tomnuj piitã hpãnhã amnhĩrer par jakamã na hte Tĩrtũm Jesus kukwak ri amarĩ mẽ pahte amnhĩ to mex xwỳnhjê hã mẽ pajarẽ. Te mẽ pahte amnhĩ tomnuj kêt kumrêx pyràk mẽ pajarẽ.

²⁵⁻²⁶Na pre mẽ pahwỳr Jesus mẽ nhũm mẽ pahwỳr wrỳ nẽ mẽ panê ty nẽ htyk o mẽ pahte amnhĩ tomnuj piitã hpãnhã amnhĩrer pa. Jakamã kot pu mẽ pahtõ amnhĩ kaxyw hkôt pajamxpêr nhũm Tĩrtũm ja hã mẽ pahpumu nẽ Kra kukwak ri amnhĩ katut kôt mẽ pahte amnhĩ tomnuj piitã rênh pa. Jao te aa mẽ pahte amnhĩ tomnuj kêt kumrêx pyràk ã mẽ pahpumu. No kêt amnepêr kormã Jesus wrỳk nẽ mẽ panê htyk kêt ri mẽ pa xwỳnhjaja. Tanhmã na pre Tĩrtũm mẽ kot hkôt amnhĩ xunhwỳr xwỳnhjê nhĩpêx to? Kormã Jesus mẽ panê htyk kêt ri mẽ pa xwỳnhjaja tanhmã na pre mẽ hipêx to? Nà na pre mẽ hkwỳjaja amnhĩ kaxyw Tĩrtũm kôt hamxpêr nẽ hkôt amnhĩ xunhwỳ nhũm amnhĩ tã mẽ omu nẽ amnhĩm mẽ harênh o: —Nà ãm hãmri. Kojã nhỹrmã Ixkra ma mẽ hwỳr wrỳ nẽ mẽ nê ty nẽ htyk o mẽ kot amnhĩ tomnuj pãnhã amnhĩrer pa. Jakamã kojã mẽ tãmjaja amnhĩ tomnuj pãnhã amnhĩrer kêt nẽ. Anẽ. Tã nhũm Jesus tãm mẽ pahwỳr wrỳ nẽ mẽ pahpiitã mẽ panê ty. Jakamã nhũm Tĩrtũm ra mẽ pahte hkôt amnhĩ xunhwỳr xwỳnhjaja Kra kukwak ri amnhĩ katut kôt mẽ pahte amnhĩ tomnuj piitã rênh pa. No na hte amarĩ ã mẽ panhĩpêx anhỹr kêt nẽ. ãm Jesus tyk pix kukwak ri na hte ã mẽ panhĩpêx anẽ. ãm hãmri na hte ã mẽ panhĩpêx mex anẽ. Na hte tãm mẽ panhĩpêx rãhã ho pa.

²⁷Jakamã kot puj mẽ ã pajamxpêr anẽ nẽ pajamxpêr o: —Nà na pa hte amnhĩ to mex rãhã o ri ixpa. Amnhĩ to mex o mẽ piitã mẽ hakrenh pa. Anhỹr

o pajamxpër kêt nê. Koja mēhō ã hamaxpër anê nê ãm amnhĩ jarēnh o hêx. Na hte Tĩrtũm mē pahte amnhĩ to mex ã mē pahpumunh kôt amnhĩm mē pahte amnhĩ to mex xwỳnh ã mē pajarēnh kêt nê. Mē pahte amnhĩ to mex rãhãre hã. Nom na pu htem amnhĩ kaxyw Jejus mã pajamxpër nê hkôt amnhĩ xunhwỳ nhũm ja hã mē pahpumu nê rĩ kormã amnhĩm mē pamex ã mē pajarē.

²⁸E pa axte tanhmã mē amã ja jarēnh to ka mē aprĩ hã inhma. Mēmoj pumunh kôt na hte Tĩrtũm mē pahte amnhĩ to mex xwỳnh ã mē pajarēnh wehe? Xà mē pahte kapēr tũm kôt amnhĩ nhĩpêx o ri papa hã mē pahpumunh kôt? Nà na hte ja hã mē pahpumunh kôt ã mē pajarēnh anhỹr kêt nê. Mē pahte hkôt amnhĩ nhĩpêx rãhã ho papare hã. ãm mē pahte amnhĩ kaxyw Kra Jejus kôt pajamxpër nê hkôt amnhĩ xunhwỳr ã mē pahpumunh kôt pix mã na hte mē pahte amnhĩ to mex xwỳnh ã mē pajarē. Ja pix ã mē pahpumunh kôt na hte ã mē pajarēnh anê.

²⁹Nê xà Tĩrtũm kêp mē ixpê Ijaew pix nhõ Tĩrtũm pix na? Nà kêp mē ixpix nhõ Tĩrtũm kêt. Kêp mē ixpê Ijaew nhõ Tĩrtũm nê mããnēn kêp mē apê Ijaew kêt xwỳnhjê nhõ Tĩrtũm.

³⁰Nê Tĩrtũm ãm pyxi mex. Axtem hõ kêt. Na hte mē pahpiitã mē panhĩpêx o xypēn pyræk. Jakamã na hte mē kot amnhĩ kaxyw Jejus kôt hamaxpër o mē pa xwỳnhjê pumu nê mē kot amnhĩ to mex xwỳnh ã mē harē. Mē ixpê Ijaew nê mããnēn mē apê Ijaew kêt xwỳnhjaja.

³¹Tã koja mēhō htỳx hamaxpër o: —Nà ixte amnhĩ kaxyw Jejus kôt ijamxpër mex o ixpa nhũm Tĩrtũm kot amnhĩm inhmex ã ijarēnh jakamã kot paj axte kapēr kôt amnhĩ nhĩpêx kêt nê. Kot paj ãm amnhĩ krã hkôt amnhĩ nhĩpêx o ri ixpa. Ra Tĩrtũm kot ixto hkra kēnã. Anhỹr o ajamxpër japêr. Kwa mē ã ri ajamxpër anhỹr kêt nê. Na htem amnhĩ kaxyw Jejus kôt hamaxpër hãmri nê kãm hkôt amnhĩ nhĩpêx prãm rãhã nê pa ho pa.

Rõmãn 4

Apraãw kot amnhĩ kaxyw Tĩrtũm kôt hamaxpër

Karatas 3.6-18; Xiakre 2.23

¹Ně mẽ panhīgêť finat Apraãwja kêp mẽ pahpê Ijaew pàr krax. Tã mẽmoj tã na pre Tĩrtũm omu nẽ kot amnhĩ to mex xwỳnh ã harẽ?

²Xà kot kãm tanhmã amnhĩ nhĩpêx to hã karõ xà hkôt amnhĩ nhĩpêx mex ã omunh xà hkôt nhũm pre ã harẽnh anẽ? Nà ja kôt kêt. Kop apu ja kôt ã kot harẽnh anhỹr ronhỹx Apraãw amnhĩ tã omu nẽ Tĩrtũm mã amnhĩ to jarkrar nẽ kãm: —Pa Tĩrtũm? E mãn ka ixpumu. Na pa hte akapêr kôt amnhĩ nhĩpêx mex o ri ixpa. Anhỹr o nhỹx pre kãm amnhĩ to jarkrar. No na pre tanhmã kãm amnhĩ to jarkrar to hkêt nẽ.

³Tã mẽmoj tã omunh xà hkôt na pre Tĩrtũm amnhĩm mex ã harẽ? Nà Tĩrtũm kapêr ã kagà htũm kot tanhmã Apraãw jarẽnh to kot: Na pre Apraãw amnhĩ kaxyw Tĩrtũm kôt hamaxpêr nẽ hkôt amnhĩ xãm nhũm amnhĩ tã omu nẽ amnhĩm mex ã harẽ. Anẽ.

⁴Mẽ õ patrãwjaja na htem kãm mẽ àpênh xwỳnhjaja àpênh mex ã mẽ omunh xà hkôt mẽ kãm amnhĩre.

⁵No Tĩrtũm na hte ã mẽ panhĩpêx anhỹr kêt nẽ. Na hte mẽ pahte tãm amnhĩ nhĩpêx ã mẽ pahpumunh kôt amnhĩm mẽ pahte amnhĩ to mex xwỳnh ã mẽ pajarẽnh kêt nẽ. ãm mẽ pahte amnhĩ kaxyw Kra Jejus kôt pajamaxpêr nẽ hkôt amnhĩ xunhwỳr ã mẽ pahpumunh kôt pix mã na hte amnhĩm ã mẽ pajarẽnh anẽ. Ra mẽ pahte amnhĩ tomnuj o ri papa htã hpãnhã amnhĩ kaxyw Jejus kôt pajamaxpêr xwỳnh pixjaja na hte ã mẽ pajarẽnh anẽ.

⁶Jakamã na hte mẽ pamã amnhĩ jarẽnh o: —Ixte mẽ amex ã mẽ ajarẽnh tã no ãm mẽ ate amnhĩ to mex kôt mẽ apumunh kôt na pa ã mẽ ajarẽnh anhỹr kêt nẽ. ãm mẽ ate amnhĩ kaxyw Ixkra mẽ wa ixkôt ajamaxpêr nẽ wa ixkôt amnhĩ xunhwỳr ã mẽ apumunh kôt na pa hte ã mẽ ajarẽnh anẽ. Anẽ. Pu mẽ ã kot pamã kapêr anhỹr ã amnhĩ tã kuma nẽ pahkĩnh nẽ. Pahi finat Tawi na pre haxwỳja ja jarẽnh o:

⁷Na hte Tĩrtũm amnhĩ katut kôt mẽ pahte amnhĩ tomnuj piitã rẽnh pa nẽ axte kãm hamaxpêr kêt nẽ. Jakamã pu mẽ ja hã amnhĩ pumu nẽ pahkĩnh nẽ.

⁸Ně amnhĩ kukamã pajamaxpěr o: “Hêxta waa ně. Na pa pre amnhĩ tomnuj o ixpa ně tee ri ja hã amnhĩ pumu ně ixkaprĩ ně. Hãmri ně amnhĩ to Tĩrtũm wỳ nhũm inhma ně ixte amnhĩ tomnuj o hapêx pa ně axte kãm hamaxpěr kêt ně. Nà ãm hãmri. Ja mex kumrêx.” Aně.

⁹Tã mẽ kot ja hã amnhĩ pumunh ně hkĩnh xwỳnhjaja mẽmojaja na mẽ? Xà mẽ kot amnhĩ my kwỳt kà jakàr xwỳnh pix kwỳjaja na pre pahi Tawija ã mẽ harênh aně nà? Nà mẽ tapxipixjaja kêt. Mããněn mẽ kot amnhĩ jakàr kêt xwỳnh kwỳjaja. Tanhmã na pre ra Tĩrtũm kapěr ã kagà htũm kot finat Apraãw jarênh to? Na pre harênh o: Na pre Apraãw amnhĩ kaxyw Tĩrtũm kôt hamaxpěr ně hkôt amnhĩ xãm nhũm amnhĩ tã omu ně amnhĩm mex ã harě. Aně.

¹⁰Xà Apraãw ra kot amnhĩ my kwỳt kà krãhyr nhĩrô pê na pre Tĩrtũm amnhĩm mex ã harě? Nà kormã kot amnhĩ krãhyr kêt ri na pre ã harênh aně.

¹¹Kormã kot amnhĩ krãhyr kêt ri kãm kapěr ně kãm: —E ate amnhĩ kaxyw inhmã ajamaxpěr ně ixkôt amnhĩ xãm ã ixte apumunh kôt na pa amnhĩm amex ã ajarě. Anhỹr o kãm kapěr hãmri ně rĩ kormã kãm tanhmã amnhĩ krãhyr to hã kãm karõ nhũm kuma ně mar xà hkôt amnhĩ my kwỳt kà hkwy krãhta. Kot Tĩrtũm mã amnhĩ nhõr ã amnhĩ to amnhĩrĩt kaxyw ã amnhĩ nhĩpêx aně. Nom kormã amnhĩ krãhyr kêt ri na pre Tĩrtũm amnhĩm mex ã harě. Tã Ijaew kêt xwỳnhjaja kot amnhĩ jakàr kêt tã mẽ hkwyjaja Apraãw pyrà ně amnhĩ kaxyw Tĩrtũm mã hamaxpěr ně kãm amnhĩ nhõr jakamã Apraãw te kệp mẽ hpàr krax maati pyræk.

¹²Ně mããněn mẽ pahpê Ijaew. Kot puj mẽ pahtõ amnhĩ kaxyw Tĩrtũm kôt pajamaxpěr nhũm amnhĩ tã mẽ pahpumu ně mẽ pamex ã mẽ pajarě. No ãm mẽ pahte amnhĩ jakàr ã mẽ pahpumunh kôt ã mẽ pajarênh anhỹr kêt ně. ãm Apraãw pyrà ně amnhĩ kaxyw Tĩrtũm kôt pajamaxpěr pix ã mẽ pahpumunh kôt na hte mẽ pamex ã mẽ pajarě. Kormã Apraãw kot amnhĩ my kwỳt kà krãhyr kêt ri ra kot amnhĩ kaxyw Tĩrtũm mã hamaxpěr jakamã kệp mẽ pahpê Ijaew mẽ pahte uræk ně amnhĩ kaxyw Tĩrtũm mã pajamaxpěr

xwỳnhjê hpàr krax maati. Ijaew kêt xwỳnhjê pyrà nê kêp mễ pahpàr krax maati.

Tĩrtũm kot Apraãw mã mẽmoj mex jarẽnh

Karatas 3.22

¹³Amnepê m na pre Tĩrtũm Apraãw mã tanhmã kapêr to nê kãm: —E koja nhỹrmã akanrêhã akra nê atàmnhwỳjaja amỳrpê apyrà nê krĩ piitã hkôt mễ kêp mễ ò pahi. Anẽ. Tã tanhmã Apraãw kot amnhĩ nhĩpêx to hã omunh xà hkôt na pre ã kãm kapêr anẽ? Xà kot kãm tanhmã amnhĩ nhĩpêx to hã karõ nhũm kot hkôt amnhĩ nhĩpêx mex ã omunh xà hkôt na pre hkĩnh nê ã kãm kapêr anẽ? Nà kot anhỹr kêt. Mễ pahtõ kot pu we Tĩrtũm kapêr xà hkôt pix mã amnhĩ nhĩpêx mex rãhã ho ri papa? Mễ pahpê hihtỳx kênã. ãm kot amnhĩ kaxyw Tĩrtũm kôt hamaxpêr nhũm kot amnhĩ tã omunh nê amnhĩm mex ã harẽnh kôt pix mã na pre ã kãm kapêr anẽ.

¹⁴Kop apu kot kãm tanhmã kapêr to nê kãm: —E Apraãw. Kot kaj ixkapêr piitã ama nê hkôt amnhĩ nhĩpêx mex rãhã ho ri apa. Hã koja nhỹrmã akanrêhã akra nê atàmnhwỳjaja kêp krĩ piitã hkôt mẽõ pahihti. Anhỹr o kãm kapêr ronhỹx ãm kãm ã kapêr anhỹr kaprỳ. Apraãw aa kot kapêr piitã hkôt amnhĩ nhĩpêx mex o pare hã. Kop apu ã kãm kapêr anhỹr ronhỹx pre kuma nê tee ri amnhĩ kukamã hamaxpêr nê hamaxpêr o: —Kwa nà. Ra ixte Tĩrtũm kôt amnhĩ xãm tã tanhmã kot pa amnhĩ to nê kapêr piitã hkôt amnhĩ nhĩpêx mex rãhã ho ri ixpa? Kot paj tee ri inhmã ã amnhĩ nhĩpêx anhỹr o ixpa hprãm kaprỳ. Jakamã koja nhỹrmã ixkanrêhã ixkra nê ixtàmnhwỳjaja kêp mễ ò pahi hkêt nê pa. Hêxta waa nê.

¹⁵Koja Tĩrtũm ixte kapêr kwỳm ri tanhmã ixte amnhĩ tomnuj to hã ixpumu nê tanhmã ixtomnuj to. No mẽhõ kot we kapêr piitã hkôt amnhĩ nhĩpêx mex rãhã ho pa? Nà amrakati kumrêx. Anhỹr o nhỹx pre hamaxpêr.

¹⁶No na pre Tĩrtũm ã kãm kapêr anhỹr kêt nê. Ra kot hprĩ hã mẽ pahte amnhĩ nhĩpêx ã mẽ pahpumunh mex kênã. Na pre ãm kãm: —E ate amnhĩ kaxyw ixkôt ajamaxpêr nê ixkôt amnhĩ xãm jakamã kot paj amarĩ ato mex nê. Anẽ. Tĩrtũm na hte mẽmoj tã amnhĩ jarẽnh o amnhĩ to hêx kêt nê. Na hte mẽmoj tã amnhĩ jarẽnh xà hkôt tanhmã mẽmoj nhĩpêx to ho ri pa.

Jakamã koja mẽ pahte Apraãw pyrà nẽ amnhĩ kaxyw hkõt pajamxpěr xwỳnh piitã mẽ pahto mex nẽ. Nẽ xà na pre ã mẽ pamã kapěr anẽ nẽ mẽ pamã: —E kot kaj mẽ ixkapěr kõt pix mã ri amnhĩ nhĩpêx o ri apa hã kot paj mẽ ato mex rax nẽ. Anhỹr o mẽ pamã kapěr? Nà na pre ã mẽ pamã kapěr anhỹr kêt nẽ. Na pre mẽ pamã: —Kot kaj mẽ finat Apraãw pyrà nẽ amnhĩ kaxyw ixkõt ajamxpěr nẽ ixkõt amnhĩ xunhwỳ hã kot paj mẽ ato mex nẽ. Anhỹr o mẽ pamã kapěr. Tã Apraãw kumrêx kot mẽ pakukamã amnhĩ kaxyw hkõt hamaxpěr jakamã te kêp mẽ pahpiitã mẽ pahte uràk nẽ ã amnhĩ nhĩpêx anhỹr xwỳnhjê pàr krax maati pyràk.

¹⁷Amnepêm na pre Tĩrtũm tanhmã Apraãw mã kapěr to. Kot tanhmã kãm kapěr toja Tĩrtũm kapěr ã kagà htũm kamã na. Na pre kãm: Kot kaj apê ahpỹnhã ri mẽ urojê hpàr krax. Anẽ. Kormã Apraãw kra hkêt tã nhũm hkra hkukamã ã kãm kapěr anẽ. Hãmri nhũm kuma nẽ hkõt hamaxpěr kurê kumrêx nẽ hamaxpěr o: —Hêxta waa nẽ. Ra ixprõ mẽ wa ijamẽ wa ixpigêt tỳx nẽ wa ixkra hkêt kumrêx. Kot paj wa tanhmã amnhĩ to nẽ tokyx ty. Tã ra Tĩrtũm kot ixkra nẽ ixtàmnhwỳjê hkukamã ã inhmã mẽ harênh anhỹr kênã. Jakamã kot pa xep wa ixpigêt tỳx tã tanhmã amnhĩ to nẽ ixkra. Nà kot pa xep wa anẽ. Nẽ koja ixkraja tanhmã amnhĩ to nẽ ixpê htyk japêr tã koja Tĩrtũm akupỹm inhmã ho htĩr. Nà koja inhmã ho anẽ. Ra kot inhmã ixkra nẽ ixkanrêhã ixtàmnhwỳ xohtô jarênh kênã. Anẽ.

¹⁸⁻¹⁹Na pre ra hpigêt tỳx nẽ. Ra hã amgrà pê 100 nẽ hkurẽ kêt nẽ pa. Nhũm hprõ mããnên hpigêx tỳx nẽ. Nẽ õhy kamã hkra hkêt kumrêx. Kormã wa hkra hkêt tã nhũm Tĩrtũm Apraãw mã hkra nẽ htàmnhwỳ xohtô hã harẽ. Nẽ kêp mẽ urojê xohtôjê pàr krax ã kãm harẽ. Hãmri nhũm kuma nẽ amnhĩ kaxyw hkõt hamaxpěr tỳx kurê kumrêx.

²⁰Nẽ ã amnhĩ nhĩpêx anhỹr rãhã ho pa. Na pre war amnhĩ kra hã amnhĩ jarênh ma nẽ tee ri amnhĩ kukamã hamaxpěr kêt nẽ. ãm Tĩrtũm tãm kot wa kãm wa hkra jarênh pix mã hamaxpěr pê amnhĩ kaxyw kãm hamaxpěr tỳx o ri wa pa. Nẽ hamaxpěr o: —Nà ra wa ixpigêt tỳx kumrêx tã koja xep

Tĩrtũm wa inhmã wa ixkra hõ gã. Nà koja wa inhmã kugõ. Hêxta waa nẽ. ãm hãmri Tĩrtũmja mex o mex.

²¹Nà kot wa inhmã wa ixkra jarẽnh xà hkõt koja wa inhmã kugõ. Ja kaxyw àhpumunh o àhpumunh. Tĩrtũmja hêx kêt. Anẽ.

²²Hãmri nhũm Tĩrtũm ã hamaxpêr anhÿr ã omu nẽ amnhĩm mex ã harẽ. Nẽ kot kãm amnhĩ jarẽnh xà hkõt wa kãm wa hkraja gã.

²³Nom na pre amnhĩm Apraãwja pix mex ã harẽnh kêt nẽ.

²⁴Kot puj mẽ pahtõ uràk nẽ amnhĩ kaxyw hkõt pajamaxpêr nhũm amnhĩ tã mẽ pahpumu nẽ ra kot Apraãw jarẽnhhta pyrã nẽ amnhĩm mẽ pamex ã mẽ pajarẽ. Na pre mẽ panhõ Pahihti Jejus ty nhũm Tĩrtũm akupÿm ho htĩr. Tã mẽ papajaja na pu prem amnhĩ kaxyw Jejus kõt pajamaxpêr nhũm Tĩrtũm ja hã mẽ pahpumunh kõt mẽ pahte amnhĩ to mex xwÿnh ã mẽ pajarẽ.

²⁵Na pre mẽ pahwÿr Kra Jejus mẽ nhũm mẽ pahwÿr wrÿ. Tã nhũm mẽ axtem nẽ kupĩ nom nhũm amarĩ htyk kêt nẽ. Na pre htyk o mẽ pahte amnhĩ tomnuj pãnhã amnhĩrer pa. Ja kaxyw na pre Tĩrtũm mẽ pahwÿr kumẽ. Jakamã nhũm prem kupĩ nhũm akupÿm ho htĩr. Tã mẽmo kaxyw na pre Tĩrtũm ã mẽ pahwÿr Kraja mẽnh nhũm mẽ panê htyk anẽ nhũm akupÿm ho htĩr? ãm kot kukwak ri amnhĩm mẽ pahte amnhĩ kaxyw hkõt pajamaxpêr xwÿnhjaja mẽ pahte amnhĩ to mex xwÿnh ã mẽ pajarẽnh pix kaxyw.

Rõmãn 5

Tĩrtũm kot mẽ pahto hkwÿ hã harẽnh

Matêwre 5.12; Sikũn Korĩt 4.8; 5.18-21; Xiakre 1.2-4; Wam Pêtre 4.12; 5.9

¹Nẽ na pu prem amnhĩ tomnuj o ri papa nhũm Tĩrtũm ja hã mẽ pahpumu nhũm ja kêp omnuj nẽ. Jakamã nhũm Jejus amnhĩ grõnh kõt wrÿ nẽ mẽ panê ty. Nhũm Tĩrtũm htykja kukwak ri mẽ pahto hkwÿ. Mẽ pahte amnhĩ kaxyw hkõt pajamaxpêr nẽ hkõt amnhĩ xunhwÿr ã mẽ pahpumu hãmri nẽ ã mẽ panhĩpêx anẽ pu mẽ ra pahpê hkwÿ hã papa.

²Na pre Jejus Tĩrtũm mã mẽ pajarẽnh o: —E jajê pumu. Na mẽ ra amnhĩ kaxyw pamã hamaxpêr nẽ pahkõt amnhĩ xunhwÿ. Anẽ. Hãmri nhũm kuma

ně mẽ pahto mex ně mẽ pakutã nojarêť rãhã ho pa. Tã kot puj mẽ pahpê hkrajaja nhÿrmã pano ho Tĩrtũm mex o mex xwÿnhja pumu. Jakamã na pu htem amnhĩ kukamã ã pajamaxpêť anhÿr o pahkĩnh ně papa ně pajamaxpêť o: —Hêxta waa ně. Kot paj nhÿrmã inhno ho Tĩrtũm mex o mex ã omu ně kuri ixpa ho ixpa. Nà ãm hãmri. Inhmã omunh prãm tÿx kumrêx. Anê.

3-4Ně na htem Jejus ã mẽ pahtomnuj ně pu mẽ pahpunuj ně ri papa. Pamex kêt ně tã tee ri amnhĩ kukamã pajamaxpêť o ri pahkaprĩ ně papa hkêt ně. Kwãr mẽ mãmri ã mẽ panhĩpêx anê. Pu mẽ pahpunuj kurê Jejus kôt amnhĩ xunhwÿr tÿx o kormã mō. Ně mẽ umaj hkaga hkêt ně. Arĩ amnhĩ wÿr kamã pajamak o papa. Jao amnhĩ kaxyw kumã pix mã kãm pajamaxpêť tÿx rãhã pahkĩnh ně ri papa. Kot puj mẽ ã amnhĩ nhĩpêx anhÿr o ri papa nhũm Tĩrtũm ja hã mẽ pahpumu nhũm ja kãm mex ně. Hãmri nhũm ja kaxyw tanhmã mẽ pahto paxihtÿx to pu mẽ pahpunuj tã hkôt pajamaxpêť tÿx rãhã ně.

5Ně ra mẽ kot Jejus ã tanhmã mẽ panhĩpêx to htã pu mẽ amnhĩ kaxyw tee ri kãm pajamaxpêť kaprÿ hkêt ně. Ra kot mẽ pamã amnhĩ Karō nhōr nhũm kot mẽ pahkarō mã gjêx kênã kot pu kêt mẽ ri tee ri amnhĩ kaxyw kãm pajamaxpêť kaprÿ. Na hte Karōja mẽ pahkarō kamã mẽ pamã Tĩrtũm kapêť jarênh o amnhĩrĩt ně kãm mẽ pajapê htÿx ã harênh o amnhĩrĩt rãhã ně.

6Amnepê mã na pre mẽ piitã amnhĩ tomnuj o ri pa ně tee ri kãm amnhĩ to mex rãhã hprãm kaprÿ. Mêhō kot we ja kaxyw tanhmã mẽ hkrã hto? Jakamã nhũm Tĩrtũm ja hã mẽ omu hãmri ně mẽ kaxyw Kra Jejus mã kãm: —E inhma. Ka kot kaj mẽ kot tanhmã amnhĩ tomnuj to ho paja ã ma mẽ hwÿr wrÿ. Ixte mẽ nê atyk kaxyw agrōnh kôt mẽ hwÿr amênh jakamã kot kaj wrÿ ně mẽ kãm ixkapêť jarênh o ri mẽ hkôt apa. Rãhã nhũm mẽ hkwyjaja apĩ ka mẽ piitã mẽ nê ty. Anê. Hãmri nhũm kuma ně kãm: —Tôe. Nà kot paj amã hprãm xà hkôt ã amnhĩ nhĩpêx anê. Anê. Hãmri ně man amnhĩ grōnh kôt mẽ pahwÿr wrÿ.

7-8Xà koja mêhō kãm axpên japê xaj axpên nê ty nà? Xà kot mêhō tãm kot amnhĩ nhĩpêx xwÿnh tã nhũm mẽ kot hpĩr kaxyw nhũm hkrãmnhwÿja kãm hapê ně. Ně nê amnhĩ grōnh kôt mẽ kãm xa nhũm mẽ kupĩ nhũm nê ty? Nà

kot apu nê htyk japêr ko. No mẽ papajaja. Na pu htem mēhō hkràmnhwỳta kĩnhã arĩ amnhĩ tomnuj rãhã ho ri papa htã nhũm Tĩrtũmja arĩ kãm mẽ pajapê nê. Nê kãm mẽ pajapê xàj mẽ pahwỳr Kris mẽ nhũm mẽ panê ty. Arĩ mẽ pahte amnhĩ tomnuj rãhã ho papa tãã. Na pre ã Tĩrtũmja kãm mẽ pajapê hã ã mẽ pahwỳr mēnh anê.

⁹Na pre ty nhũm hkamrô hkwỳ axkapĩ nhũm Tĩrtũm ja hã omunh xà hkôt tãm amnhĩm mẽ paxunhwỳ. Tã Jejus kukwak ri koja ma mẽ kot amnhĩ xà htỳx kamã hamak tũm xàta wỳr mẽ parēnh kêt nê. Mẽ pahpê hkwỳ kênã kot kêt hwỳr mẽ parê.

¹⁰Nom kormã mẽ pahpê hkwỳ hkêt ri na pu prem te ra kutã amnhĩ xunhwỳr pyræk o amnhĩ nhĩpêx. Tã nhũm Kra mẽ panê ty pu mẽ hkôt amnhĩ xunhwỳ. Jakamã nhũm Tĩrtũm Jejus tyk kukwak ri mẽ pahto hkwỳ. Nê ra akupỹm Kra ho htĩr jakamã kot puj mẽ pahte hkôt amnhĩ xunhwỳr xwỳnhjaja nhỹrmã wa uræk nê wa kuri pahtĩr tũm nê pamex kumrêx nê papa ho papa.

¹¹Nê mẽ pahpê kuwy rax wỳr mẽ papa mã xwỳnh kêt jakamã na pu htem pahkĩnh nê pajamakêtkati nê ri papa. Nom ja pix ã na pu htem ã amnhĩ nhĩpêx anhỹr kêt nê. Mẽ pahpê Tĩrtũm kràmnhwỳ jakamã na pu htem mããnēn pahkĩnh nê ri papa. Pahihti Jejus Kris kot mẽ panê htyk ã omunh xà hkôt na pre Tĩrtũm mẽ pahte hkôt amnhĩ xunhwỳr xwỳnhjê ho hkwỳ jakamã na pu htem pahkĩnh nê pajamakêtkati nê ri papa.

Atãw mẽ Kris wa harēnh

Wam Korĩt 15.20-22, 45-49

¹²⁻¹³Nê amnepēm na pre Tĩrtũm finat Mojes mã tanhmã kapêr to. Hãmri nhũm kuma nê Ijaew kot tanhmã amnhĩ nhĩpêx to ho pa kaxyw mẽ kãm mẽmojta ã karō nê mẽ kãm hã hkagà. Mẽ kot kamã harēnh nê mar nê Tĩrtũm kôt amnhĩ nhĩpêx kaxyw. Hãmri nhũm mẽ tee ri ã kot mẽ kãm mẽmoj tã karōja ma nê tanhmã axpēn mã kapêr to nê axpēn mã: —Kwa na pu htem ã amnhĩ nhĩpêx anhỹr kêt nê. Na pu htem ãm amnhĩ tomnuj tỳx kumrêx o ri papa nê amnhĩ to mex kêt kumrêx. Anê. ãm hãmri na prem ã amnhĩ jarēnh anê. Mẽ pahpiitã mẽ pahte amnhĩ tomnuj xwỳnh kênã. My kot wa pê finat Atãwja kumrêx na pre tanhmã mẽ pahte amnhĩ tomnuj to ho hkra. Mỳrapê

na pre htír tũm nẽ ri pa ho pa hkõt nẽ. Na pre ri pa nẽ gaa nẽ rĩ hpigêt tỳx nẽ ty. Tã mỳr pẽ ri mẽ papa xwỳnhjaja na pu htem uràk nẽ tanhmã amnhĩ tomnuj to ho ri papa. Mỳrapê na pu htem ri papa nẽ gaa nẽ Atãw pyrà nẽ pahtyk pa. Tĩrtũm kot mẽ pahtã Atãw mã kapẽr xà hkõt.

14-19 Jakamã na prem kormã Mojes kator xwỳj ri pika piitã hkõt ri pa nẽ gaa nẽ haxwỳja htyk pa. Mẽ kot amnhĩ tomnuj mỳrapê ty. Atãw pyrà nẽ Tĩrtũm kot mẽmo xô nẽ hkurê xwỳnhhta krẽr kêt tã uràk nẽ tanhmã amnhĩ tomnuj to ho ri pa. Hãmri nẽ mỳrapê ty. Na pre ã Atãwja mẽ pahpiitã mẽ pamã Tĩrtũm kapẽr nhĩrôp ãm nẽ amnhĩ tomnuj o hkrax anẽ nẽ mẽmo xôta krẽ. Jao te mẽ pahpiitã mẽ pahte uràk nẽ kumẽ hkur pyràk o mẽ panhĩpêx. Mỳrapê nhũm htem arĩ pika piitã hkõt hapôj nẽ kormã hprĩre htã ra Atãw pyrà nẽ tanhmã amnhĩ tomnuj to ho ri pa. Jakamã nhũm Tĩrtũm Atãw kot tanhmã amnhĩ tomnuj to hã omunh xà hkõt mẽ pakukamã hamaxpẽr o: — Nà koja mẽ Atãw pyrà nẽ amnhĩ tomnuj o ri pa. Mỳrapê kot paj ma mẽ kot amnhĩ xà htỳx kamã hamak tũm xàta wỳr mẽ rẽnh pa. Anẽ. Tã Jejus Kris mẽ Atãw wa harẽnhja kot axpẽn pyràk jakamã na hte Atãw kanrẽhã hkra nẽ htàmnhwỳjaja Atãw kot amnhĩ nhĩpêx kôt amnhĩ nhĩpêx o ri pa rãhã nẽ. Uràk nẽ amnhĩ tomnuj rãhã ho ri pa. Nhũm axtem Jejus kôt mẽ kot amnhĩ xunhwỳr xwỳnhjaja Jejus kôt amnhĩ nhĩpêx rãhã ho ri pa. Te mẽ kệp hkanrẽhã hkra nẽ htàmnhwỳjê pyrà nẽ uràk nẽ tãm amnhĩ nhĩpêx. Na htem ã ahpỳnhã amnhĩ nhĩpêx anhỳr o ri pa. Na pre Jejus mẽ pahte amnhĩ tomnuj pãnhã amnhĩrer par kaxyw mẽ panê ty. Jakamã mẽ pahte hkõt amnhĩ xunhwỳr xwỳnhjaja na hte Tĩrtũm ja hã mẽ pahpumunh kôt mẽ pahto hkra. Kot puj mẽ nhỹrmã pahtyk tã nhũm akupỹm mẽ pahto mẽ pahtír pu mẽ wa kuri pahtír tũm nẽ papa ho papa. Atãw kot Tĩrtũm kapẽr nhĩrôp ãm jakamã na hte Tĩrtũm mẽ pahpiitã mẽ pahte amnhĩ tomnuj xwỳnh ã mẽ pajarẽ. Nom nhũm Jejus Atãw rom kot Tĩrtũm kapẽr mar nẽ hkõt amnhĩ nhĩpêx rãhã jakamã na hte Tĩrtũm mẽ pahte hkõt amnhĩ xunhwỳr xwỳnhjaja amnhĩm mẽ pahte amnhĩ to mex xwỳnh ã mẽ pajarẽ. Nhũm Atãw kot Jejus kĩnhã Tĩrtũm kapẽr nhĩrôp ãm mỳrapê na hte mỳr pẽ mẽ pa xwỳnhjaja ohtô nẽ pa nẽ gaa nẽ Atãw pyrà nẽ htyk pa. Hãmri nẽ kormã htír ri amnhĩ to mex o pa

hkêt mỳrapê ma mẽ kot amnhĩ xà htỳx kamã hamak tũm xàta wỳr ma hapêx. Tã nhũm Tĩrtũmja mex o mex jakamã na hte Jejus Kris mẽ wa mẽ pakamã ukapřĩ nẽ. Jakamã na pre mẽ pahwỳr Jejus mẽ nhũm mẽ pahwỳr wrỳ hãmri nẽ htyk o mẽ pahte amnhĩ tomnuj pãnhã amnhĩre. Nhũm Tĩrtũm ã kot amnhĩ nhĩpêx anhỳr kukwak ri mẽ pahte hkôt amnhĩ xunhwỳr xwỳnhjaja amarĩ tanhmã mẽ pahto mex to ho ri pa. Atãw kot amnhĩ tomnuj pix pumunh kôt na pre Tĩrtũm mẽ pahpiitã mẽ pahte amnhĩ tomnuj xwỳnh ã mẽ pajarẽ. Tã nhũm Jejus mẽ pakamã ukapřĩ nẽ mẽ panê ty nhũm Tĩrtũm ja hã omunh xà hkôt ra mẽ pahte amnhĩ kaxyw hkôt pajamaxpêr xwỳnhjaja te mẽ pahte aa tanhmã amnhĩ tomnuj to hkêt pyràk o mẽ panhĩpêx. Na hte amarĩ ã mẽ panhĩpêx anẽ. Nẽ Atãw kot amnhĩ tomnuj mỳrapê na htem piitã ri pa nẽ tanhmã amnhĩ to nẽ ty rỳ ri pa nẽ gaa nẽ wejre nẽ ty. No na pre Jejus Krisja aa kot amnhĩ tomnuj kêt kumrêx tã amarĩ mẽ panê ty. Jakamã nhũm Tĩrtũm ra kukwak ri mẽ pahte hkôt amnhĩ xunhwỳr xwỳnhjê kutã nojarêt rãhã nẽ mẽ pakukamã hamaxpêr o: —Nà mẽ kot Ixkra hkôt amnhĩ xunhwỳr xwỳnhjaja na pa mẽ omunh pa. Tã kot paj Ixkrata kukwak ri tãm mẽ unhwỳ nhũm mẽ nhỹrmã wa ixri mex nẽ htĩr tũm nẽ pa ho pa. Anẽ.

20-21Nẽ na pre Tĩrtũm tanhmã finat Mojes mã kapêr to. Mẽ piitã mẽ kot amnhĩ tomnuj o ri mẽ pa hã amnhĩ pumunh kaxyw. Hãmri nẽ mẽ kot kapêr mar nẽ hkôt amnhĩ nhĩpêx o pa kaxyw tanhmã mẽ kaxyw Mojes mã kapêr to. Nhũm kuma nẽ amnhĩ xô ri mẽ kãm hã kagà nẽ mẽ kãm harênh o ri mẽ hkôt pa. No nhũm prem kapêr ma nẽ ãm kuma nẽ hkwỳm pix mã ri tanhmã amnhĩ tomnuj to ho pa. Nẽ pika piitã hkôt ja arĩ rãhãã. Ja mỳrapê koja mẽ nhỹrmã ty nẽ ma mẽ kot amnhĩ xà htỳx kamã hamak tũm xàta wỳr ma pa. Nom Tĩrtũm arĩ kãm pika piitã hkôt mẽ papa xwỳnhjê japê nẽ. Mẽ pahte amnhĩ tomnuj o papa tã nhũm kãm mẽ pahto mex prãm nẽ. Jakamã na pre mẽ pahwỳr Kra Jejus Kris mẽ nhũm mẽ pahwỳr wrỳ. Mẽ panê htyk o kot mẽ pahte amnhĩ tomnuj pãnhã amnhĩrer kaxyw. Tã kukwak ri kot puj mẽ pahte amnhĩ kaxyw hkôt pajamaxpêr xwỳnhjaja nhỹrmã Tĩrtũm mẽ wa kuri pahĩr tũm nẽ pa mex nẽ papa ho papa.

Rõmãn 6

Mě kot mẽ pahkrã kumrãr ã mẽ harēnh

Sikũn Korĩt 5.17; Karatas 2.19-20; 5.24; 6.14; Epes 4.17-24; Korosē 3.1-11; Wam Pētre 4.1-6

¹Ně mẽ pahte arĩ tōhã tanhmã amnhĩ tomnuj to htã nhũm Tĩrtũm arĩ kãm mẽ pajapê nẽ. Nẽ arĩ mẽ pakutã nojarêr rãhã nẽ. Jakamã xà kot kaj mẽ atõ ã harēnh anhỹrja ma nẽ atỳx ri ã ajamaxpēr anẽ nẽ ajamaxpēr o: —Nà Tĩrtũm kãm ijapê nẽ kot ixkutã nojarêr rãhã ho ri pa jakamã mo kaxyw kot pa Jejus kôt amnhĩ nhĩpêx o ri ixpa? Nà kot paj ho anhỹr kêt nẽ. Anẽ. Ka ã mẽ atõ atỳx ri ajamaxpēr anhỹr japêr. Kwa xà ajamaxpērja mex? Nà mex kêt.

²Ã ajamaxpēr anhỹrja mẽ hamaxpēr mex xà hkôt kêt. Ra mẽ pahte Jejus kôt amnhĩ xunhwỳr nẽ mẽ pahte amnhĩ tomnuj kaga jakamã nhũm mẽ pahte amnhĩ tomnujja te ra mẽ pahpê hapêx pyràk. Jakamã kot puj mẽ arĩ tanhmã amnhĩ tomnuj to ho ri papa hkêt nẽ.

³Měmo kaxyw na htem Tĩrtũm mã mẽ pahkrã kumrã? Nà mẽ pahte ra Jejus kôt amnhĩ xunhwỳr ã amnhĩ to amnhĩrĩt kaxyw. Te Jejus htyk nhũm mẽ pahte amnhĩ tomnujja haxwỳja hkôt htyk nẽ hapêx par pyràk o amnhĩrĩt kaxyw. Jakamã na pu htem pajamaxpēr o: —Nà kot paj axte tanhmã amnhĩ tomnuj to ho ri ixpa hkêt nẽ. Anẽ.

⁴Na htem Tĩrtũm mã gôx kãm mẽ pahkrã kumrã nhũm mẽ pahte amnhĩ nhĩpêx tũmja te mẽ kot Jejus kôt haxwỳja haxàr pyràk. Hãmri nhũm mẽ akupỹm mẽ pahto api. Te Tĩrtũm hihtỳx o hihtỳx o kot akupỹm Kra Jejus ho htĩr pyràk. Te mẽ pahtyk tã nhũm akupỹm kot mẽ pahto mẽ pahtĩr pyràk. Pãnhã mẽ pahte amnhĩ nhĩpêx nyw o amnhĩ nhĩpêx kaxyw.

⁵Nhũm mẽ pahte amnhĩ nhĩpêx tũmja te Jejus kôt htyk nẽ hapêx par pyràk. Nẽ mẽ pahte amnhĩ nhĩpêx nywja te Jejus akupỹm htĩr pyràk o amnhĩ nhĩpêx.

⁶Amnepēm na pu pre htem amnhĩ tomnuj rãhã ho ri papa. Te mẽ kãm mẽ àpēnh xwỳnhjaja kot mẽ õ patrãw mã àpēnh rãhãta pyràk. Tã nhũm Kris mẽ panê ty. Kot mẽ panê mẽ pahte amnhĩ tomnuj pãnhã amnhĩrer nẽ ho hapêx

par kaxyw mẽ panê ty. Jakamã te mẽ pahte amnhĩ tomnuj mẽ pajamaxpěr punujja te pĩ kahpa hã Jejus kôt harir nẽ htyk nẽ hapêx par pyræk. Pãnhã mẽ pahte amnhĩ nhĩpêx nyw pix o amnhĩ nhĩpêx kaxyw. Nẽ mẽ pajamaxpěr nyw pix o pajamaxpěr papa kaxyw.

⁷Na hte mẽ htyk xwỳnhjaja axte tanhmã amnhĩ tomnuj to hkêt nẽ. Tã kêr pu mẽ uræk nẽ axte ã amnhĩ nhĩpêx anhỹr kêt nẽ.

⁸Na pu prem Jejus kot mẽ panê htyk ã harênh ma nẽ pajamaxpěr o: —Nà ra Jejus kot mẽ panê htyk jakamã kot paj ixte amnhĩ nhĩpêx tũm kaga hpa nẽ hpãnhã kot amnhĩ nhĩpêx kôt pix mã ri amnhĩ nhĩpêx o ri ixpa. Te ra ixtyk nẽ axte tanhmã ixte amnhĩ tomnuj to ho ri ixpa hkêt pyræk. Jao amnhĩ nhĩpêx nyw pix o amnhĩ nhĩpêx o ri ixpa. Anẽ.

⁹Nẽ Jejus htyk nhũm Tĩrtũm akupỹm ho htĩr jakamã koja axte htyk kêt nẽ. Ra mẽ pahte ja mar mex.

¹⁰Na pre ãm htyk tipxi htã htykja o mẽ pahpiitã mẽ pahte amnhĩ tomnuj pãnhã amnhĩre. Tã ra akupỹm htĩr o htĩr nẽ kaxkwa kamã Tĩrtũm mã tanhmã amnhĩ nhĩpêx to ho ri pa.

¹¹Tã mẽ papajaja kot puj mẽ ã kot amnhĩ nhĩpêx anhỹrja ma nẽ ã pajamaxpěr anẽ nẽ pajamaxpěr o: —Nà ãm hãmri. Te ixte Jejus pyrà nẽ ra ixtyk pyræk jakamã kot paj axte amnhĩ tomnuj o ri ixpa hkêt nẽ. Te ixte Jejus pyrà nẽ akupỹm ixtĩr nẽ ãm Tĩrtũm kôt pix mã amnhĩ nhĩpêx o ri ixpata pyræk o kot paj hpãnhã amnhĩ nhĩpêx o ri ixpa. Anẽ.

¹²Jakamã kot ka mẽ atõ nhỹrmã tanhmã amnhĩ kukamã ajamaxpěr punuj to japêr hãmri nẽ ajamaxpěr o: —Nà inhmã ã amnhĩ tomnuj anhỹr prãm nẽ. Omnuj tã kot paj ho anẽ. Nà ixte ho anhỹr mã kênã. Anhỹr o ajamaxpěr japêr tã kwa mẽ ã ajamaxpěr anhỹr kêt nẽ.

¹³Kêt Tĩrtũm mã mãn amnhĩ gõ nẽ hkôt amnhĩ nhĩpêx o ri apa. Hãmri nẽ amnhĩ krã kamã mẽmoj mex pix mã ajamaxpěr nẽ tãm akapêr. Nẽ mẽ kot amnhĩ to mex xwỳnhjê kôt pix mã mãn ri apa. Na ka pre htem akapêr punuj nẽ. Nẽ ajamaxpěr punuj nẽ. Nẽ mẽ kot amnhĩ tomnuj o mẽ pa xwỳnhjê hkôt

ri apa. Nē kagôxÿhti japrô nē ho akôm o ri mē hkôt apa. Tã ra hpãnhã Tĩrtũm mã amnhĩ gō nē axte ã amnhĩ nhĩpêx anhÿr kêt nē.

¹⁴Amnepê m na pu prem tanhmã mē pahte amnhĩ nhĩpêx to ho papa hkukamã pajamxpêr nē pajamxpêr o: —Nà kot paj Tĩrtũm kapêr kôt pix mã mãn ri amnhĩ nhĩpêx o ri ixpa nē amnhĩ to mex o ri ixpa nhũm Tĩrtũm ja hã ixpumu nē amnhĩm inhmex ã ijarē. Nà kot paj anē. Anhÿr tã no ãm tee ri mē pamã hkôt amnhĩ nhĩpêx o ri papa hprãm kaprÿ nē arĩ ri kapêr kwÿm tanhmã amnhĩ nhĩpêx to ho ri papa. Tã ra hpãnhã axtem pajamxpêr o: —Nà Tĩrtũm kot ixkutã nojarêt rãhã ho pa xwÿnh. Tã ra ixte hkôt amnhĩ xãm jakamã koja tanhmã ixto pa hkôt amnhĩ nhĩpêx mex o ri ixpa. Nà koja ixto anē. Anhÿr jakamã ra amnhĩ kaxyw kãm pajamxpêr tÿx o mēmoj punuj kutã amnhĩ to htÿx nē.

Mē pahte Tĩrtũm mã tanhmã amnhĩ nhĩpêx to hã mē pajarēnh

Juãw 8.34

¹⁵Tã ã kot anhÿr jakamã tanhmã kot puj wem pajamxpêr to? Xà kot pu mē ã pajamxpêr anē nē pajamxpêr o: —Nà na hte Tĩrtũmja ixte kapêr kôt amnhĩ nhĩpêx o ixpa hã ixpumunh kôt amnhĩm inhmex ã ijarēnh kêt nē. ãm kēp ixkutã nojarêt rãhã nē amarĩ amnhĩm inhmex ã ijarēnh xwÿnh jakamã kot paj arĩ amnhĩ tomnuj rãhã nē aa ja kaga hkêt nē. Anhÿr o kot puj mē pajamxpêr? Nà kot puj mē ã pajamxpêr anhÿr kêt nē. ã mē pajamxpêr anhÿrja mex kêt.

¹⁶Koja mēhō nhÿri kot amnhĩ tomnuj tÿx xwÿnhjê hō pumu nē kãm amnhĩ jarēnh japêr nē kãm: —E inhma. Kot paj ãm akôt pix mã tanhmã amnhĩ nhĩpêx to ho ri ixpa. Jakamã e inhmã mēmoj tã karō pa ama nē amã tanhmã ho ho ri ixpa. Anhÿr o kãm kapêr japêr. Hãmri nē ã amnhĩ nhĩpêx anhÿr tã amnhĩ tomnuj pix o ri pa. Tã ã mē kot amnhĩ nhĩpêx anhÿr o mē pa xwÿnhjaja koja nhÿrmã ty hãmri mē kot amnhĩ xà htÿx kamã hamak tũm xàta wÿr ma hapêx. No koja mēhō Tĩrtũm mã amnhĩ jarēnh nē kãm: —Pa Tĩrtũm. E kot paj ãm akapêr kôt pix mã ri amnhĩ nhĩpêx o ri ixpa. Anhÿr o kãm amnhĩ jarē nē hkôt amnhĩ nhĩpêx mex o pa. Nē tãm amnhĩ nhĩpêx o ri

pa. Hāmri nē nhỹrmã ty nē ma õ krĩ hwỳr api nē Jejus mẽ Tĩrtũm wa kuri htĩr tũm nē mex rãhã nē pa ho pa.

¹⁷Tã mẽ kajaja na ka xep prem tee ri mẽ amã mẽ ate amnhĩ tomnuj mã anhũrer prãm tã nhũm te tãm kot amnhĩ tã mẽ ato htỳx pyràk o mẽ anhĩpêx ka mẽ tee ri kãm anhũrer prãm kaprỳ. Tã nhũm Tĩrtũm tanhmã mẽ akrã hto ka mẽ kapêr ma nē amnhĩ kaxyw hkôt ajamaxpêr tỳx nē ãm hkôt pix mã amnhĩ nhĩpêx. Pa ja hã mẽ ajarênh ma nē mẽ anhỹ hã ixkĩnh nē. Nē Tĩrtũm mã ixte mẽ ajarênh mar nē mẽ anhỹ hã ixkĩnh ã amnhĩ jarẽ.

¹⁸Na pre Tĩrtũm tanhmã mẽ akrã hto ka mẽ amnhĩ tomnuj mã anhũrer pa nē hpãnhã hkôt pix mã amnhĩ nhĩpêx.

¹⁹E kot paj ixprĩ hã tanhmã mẽ amã ja jarênh to. Te ixte ixkrajê jahkre pyràk o kot paj mẽ amã awjarẽ. Nà amnepêem na ka prem ajamaxpêr punuj kôt amnhĩ tomnuj o ri apa. Nē gaa nē ra amnhĩ tomnuj pix kukamã ajamaxpêr. Tã kêr ka mẽ arĩ ã amnhĩ nhĩpêx anhỹr kêt nē. Pãnhã tãm ri ajamaxpêr o ri apa. Jao gaa nē ra Tĩrtũm kãm hprãm xà hkôt tãm amnhĩ nhĩpêx mex nē.

²⁰Na ka prem tee ri amã amnhĩ tomnuj mã anhũrer prãm kaprỳ. Te tãm kot amnhĩ tã mẽ ato htỳx nē amnhĩ kôt mẽ ato pa pyràk o mẽ anhĩpêx.

²¹Xàn ka prem ã amnhĩ tomnuj anhỹr o apa nē akĩnh nē ajamakêtkati nē ri apa? Nà na ka prem akĩnh nē apa hkêt nē. Tã na ka prem Jejus kôt amnhĩ xunhwỳ nē tee ri ate tanhmã amnhĩ tomnuj to hã amnhĩ pumu nē akaprĩ nē apijaàm nē. ã mẽ kot amnhĩ tomnuj anhỹr o pa xwỳnhjaja na htem ja mỳrapê ty nē ma mẽ kot amnhĩ xà htỳx kamã hamak tũm xàta wỳr pa.

²²No na pre ra Tĩrtũm tanhmã mẽ akrã hto ka mẽ amnhĩ tomnuj kaga hpa. Te Tĩrtũm tãm kot hpãnhã amnhĩ tã mẽ ato htỳx nē amnhĩ kôt mẽ ato pa pyràk ka mẽ ra ãm hkôt pix mã amnhĩ nhĩpêx mex o ri apa. Nē hpãnhã amã kapêr kôt pix mã amnhĩ nhĩpêx mex prãm. Nē hkôt pix mã amnhĩ nhĩpêx hprãm. Jakamã kot kaj mẽ nhỹrmã kuri amex kumrêx nē atĩr tũm nē ri apa ho apa.

²³Na hte mẽ kãm àpênh o ri mẽ pa xwỳnhjaja mẽ kãm mẽmoj tã apê nê àpênh pa nê hpãnhã amnhĩrer xà jamỳ. Ja pyrà nê koja mẽ kot amnhĩ tomnuj xwỳnhjaja nhỹrmã ty hãmri nê ma mẽ kot amnhĩ xà htỳx kamã hamak tũm xàta wỳr ma pa. No mẽ pahte amnhĩ kaxyw Jejus Kris kôt pajamxpêr xwỳnhjaja na hte Tĩrtũm ja hã mẽ pahpumu nê mẽ pajarênh o: —Nà ãm hãmri. Jajaja koja nhỹrmã Ixkra mẽ wa Ixkuri mex kumrêx nê htĩr tũm nê pa ho pa. Hêxta waa nê. Nà ãm hãmri koja mẽ anê. Anê. Xà tãm mẽ pahte amnhĩ nhĩpêx ã mẽ pahpumunh kôt na hte ã mẽ pajarênh anê? Nà ãm mẽ pahte Kra Jejus Kris kôt amnhĩ xunhwỳr ã mẽ pahpumunh kôt pix mã na hte ã mẽ pajarênh anê.

Rômãn 7

Mẽ pahte amnhĩ tomnuj kot axte amnhĩ tã mẽ pahto htỳx kêt ã harênh

Rômãn 8.2; 10.4; Karatas 4.1; Epes 2.2; Korosê 3.7

¹E Jejus kôt ixkwỳjaja. Nà Tĩrtũm kot mẽ pakaxyw tanhmã Mojes mã kapêr tota na ka mẽ ra mar tỳx nê. Na pu htem kormã pahtĩr ri hkôt amnhĩ nhĩpêx o ri papa. Tã ty hãmri nê axte hkôt amnhĩ nhĩpêx kêt nê. Ra mẽ ate ja mar tỳx. E pa mẽ amã ja hã ejêp jarê ka mẽ inhma.

²Nà finat Mojes kot Tĩrtũm nhỹ hã mênijaja kot tanhmã amnhĩ nhĩpêx to ho pa hã mẽ kãm karõja. Koja mễhõ ho mjên hãmri nê ãm kôt pix mã ri pa ho pa nê aa hkaga hkêt nê. No koja nhỹrmã mjên kêp ty nhũm ahte ri pa. Hãmri nê kãm axte mễhõ ho mjên prãm nê mãmri axte mễhõ ho mjên. Ja tanhmã kute hkêt.

³Nom koja wam mjên arĩ htĩr japêr nhũm hprõ tanhmã hamaxpêr to nê hkaga nê hpãnhã nhãm mễhõ ho mjên. Hã koja Tĩrtũm pê ja homnuj nê. Nom koja mjên ra kêp ty nhũm mỳrpê axte kãm mễhõ ho mjên prãm nê mãmri ho mjên. Ja na Tĩrtũm pê homnuj kêt. Ra wam mjênja htyk kênã. ã Tĩrtũm kot Mojes mã mẽ pakaxyw mẽmoj tã karõ kot anhỹr.

⁴Tã ja pyrà nê na pu prem amnepêm pajamaxpêr o: —Ixte Tĩrtũm kapêr kôt pix mã amnhĩ nhĩpêx o ri ixpa jakamã nhũm Tĩrtũm ja hã ixpumu nê amnhĩm inhmex ã ijarê. Anê. Tã pu mẽ ra tanhmã pajamaxpêr to nê hpãnhã

pajamxpěr ò ho pajamxpěr o: —Nà na xep hte Tĩrtũm mẽ ixte kapěr kòt amnhĩ nhĩpêx ã mẽ ixpumunh kòt amnhĩm mẽ inhmex xwỳnh ã mẽ ijarênh kêt nê. Mẽ ixte hkòt amnhĩ nhĩpêx mex o ri ixpare hã. Kêt ãm Kris kot mẽ inhnê htyk nhũm mẽ ixte amnhĩ kaxyw hkòt ijamxpěr nê hkòt amnhĩ xunhwỳr pix ã mẽ ixpumunh kòt na hte mẽ inhmex ã mẽ ijarê. ãm ja pix ã mẽ ixpumunh kòt na hte mẽ ixto hkra nê mẽ ixkutã nojarêt o pa. Kra Jejus pix kukwak ri na hte ã mẽ inhĩpêx anhỳr o pa. Anê. ã mẽ pajamxpěr nyw kot anhỳr. Jakamã te mẽ pahte mễhõ kot mjên nyw xwỳnh gryk ã axte mjên htyk xwỳnh mã hamaxpěr kêêta pyràk o na pu htem amnhĩ nhĩpêx o papa. Jao Kris kapěr kòt pix mã amnhĩ nhĩpêx o ri papa. Nê Tĩrtũm noo mã tãm ri amnhĩ nhĩpêx. Nê axte mẽ pahte amnhĩ tomnuj kukamã tanhmã pajamxpěr to hkêt nê.

⁵Nê amnepê mã mẽ pahte amnhĩ krã hkòt tanhmã mẽ pahte amnhĩ nhĩpêx to ho ri papata ã na pu prem amnhĩ tomnuj pix o ri papa. Ra mẽ pahte Tĩrtũm kapěr mar tỳx tã kuma nê ãm kuma nê ri papa nê ri hkòt amnhĩ nhĩpêx kêt nê. Mỳrapê nhũm Tĩrtũm tee ri ja hã mẽ pahpumu nê mẽ pahtyk nê ma mẽ kot amnhĩ xà htỳx kamã hamak tũm xà hwỳr papa mã xwỳnhjê hã mẽ pajarê.

⁶Nê amnepêm na pu pre htem ã pajamxpěr anhỳr o: —Nà kot paj Tĩrtũm kapěr kòt pix mã amnhĩ nhĩpêx o ri ixpa nhũm amnhĩ tã ixpumu nê ixte amnhĩ tomnuj kêt xwỳnh ã ijarê. Anhỳr o pajamxpěr no ãm tee ri ã pajamxpěr anhỳr kaprỳ. Nê arĩ tanhmã amnhĩ tomnuj to ho ri papa. Tã hpãnhã te Jejus Kris kòt pahtyk pyràk o amnhĩ nhĩpêx nê hpãnhã Karõ nhỹ hã tãm amnhĩ nhĩpêx. Jao ra tee ri mẽ pamã Tĩrtũm kapěr kòt amnhĩ nhĩpêx prãm kaprỳ hkêt nê. Ra Tĩrtũm Karõ nhỹ hã amnhĩ nhĩpêx nyw o amnhĩ nhĩpêx mex o ri papa.

Tĩrtũm kapěr ã kagà htũm kot tanhmã mẽ pajarênh to

Rômãn 3.20; 5.20; Karatas 3.23-24

⁷Tã Tĩrtũm mẽ pahte kapěr kòt ri amnhĩ nhĩpêx ã mẽ pahpumunh kòt amnhĩm mẽ pamex ã mẽ pajarênh kêt jakamã mẽmo kaxyw na kapěr ã kagà htũmja? Nà mẽ pahte mar nê pahprĩ hã Tĩrtũm noo mã mẽ kot amnhĩ tomnuj

xà jarēnh mar nē omunh mex kaxyw na. Na hte mē pahkwỳjê kukrêx kīnh o pamã ho panhō hprãm nê mē pamã karō. Ā kot mēmoj punuj piitã nê mē pamã karō kot anhỹr. Tã mē pahte ja mar kêt ronhỹx pu mē Tĩrtũm kēp ja homnuj ã harēnh mar kêt nē.

⁸Tã ra mē pahte harēnh mar nē kēp ja homnuj ã harēnh ma. Mē pamã axpēn kukrêx kīnh o ho pamã panhō hprãmja määnēn kēp ja homnuj ã harēnh mar tã nom aa hkaga hkêt nē arĩ pamã axpēn kukrêx kīnh o pamã ho panhō hprãm tỳx rãhã ho ri papa. Kop ãm Tĩrtũm kapēr kêt ronhỹx pu mē kot amnhĩ tomnuj xàja aa mar kêt kumrêx nhũm te mē pamã amrakati pyræk.

⁹Amnepê mã ixte Tĩrtũm kapēr mar kêt ri na pa pre ixtỳx ri amnhĩ kukamã ijamaxpēr o ri ixpa nē ijamaxpēr o: —E kot paj nhỹrmã Tĩrtũm ri ixtĩr tũm nē inhmex nē ixpa ho ixpa. Anhỹr tã hpãnhã pamã axpēn kukrêx kīnh o ho pamã panhō hprãm nê kapërta ma nē ja hã amnhĩ pumunh kurê kumrêx. Hãmri nē tee ri amnhĩ kukamã ijamaxpēr nē ijamaxpēr o: —Hêxta waa nē. Nà ã ixte amnhĩ nhĩpêx anhỹr o ixpa jakamã kot paj nhỹrmã ty nhũm Tĩrtũm akupỹm ixto ixtĩr pa kuri ixtĩr tũm nē ixpa ho ixpa hkêt nē. Hêxta waa nē. Ixte amnhĩ tomnuj xwỳnh na pa. Kot paj nhỹrmã ty nhũm Tĩrtũm ma mē kot amnhĩ xà htỳx kamã hamak tũm xàta wỳr amnhĩ nē inhmẽ. Anẽ. Hãmri nē ixkaprĩ nē tee ri amnhĩ kukamã ijamaxpēr o ri ixpa.

¹⁰Tã hpãnhã axtem ijamaxpēr o: —Nà kot paj Tĩrtũm kapēr kôt pix mã mãn ri amnhĩ nhĩpêx o ri ixpa hãmri nē nhỹrmã ixtyk tã hwỳr api nē kuri ixtĩr tũm nē inhmex nē ixpa ho ixpa. Nà kot paj anẽ. Anhỹr ã ijamaxpēr tã no ãm tee ri inhmã hkôt amnhĩ nhĩpêx o ixpa hprãm kaprỳ. Na pa pre xatã kapēr nhĩrôp ixkuhê nē tee ri ja hã amnhĩ pumu nē ijamaxpēr o: —Kwa tanhmã kot pa amnhĩ nhĩpêx to nē ãm Tĩrtũm kôt pix mã ri amnhĩ nhĩpêx? Na pa hte tee ri inhmã ã amnhĩ nhĩpêx anhỹr prãm tỳx kaprỳ. Ām ixte amnhĩ tomnuj pix o ri ixpa xwỳnh jakamã ãm hãmri koja amnhĩ nê kuwyta wỳr inhmẽ. Nà koja ixto anẽ. Hêxta waa nē. Tanhmã kot paj we ja nê kãm ixkapēr to? Anẽ.

11No mēhō koja Tīrtūm kapēr kôt amnhī nhīpêx mex o ri pa? Na pu htem pahpiitã tee ri pamã ho anhÿr prãm kaprÿ. Mē pahpê hihtÿx kumrêx jakamã na pa pre ixtÿx ixte Tīrtūm kuri ixtīr tūm nē ri ixpa hã amnhī kukamã amnhī jarēnh kaprÿ. Ām xatã kapēr nhīrôp ixkuhê nē amnhī tomnuj pix o ri ixpaja mÿrapê koja mē kot amnhī xà htÿx kamã hamak tūm xàta wÿr amnhī nē inhmē.

12Kot anhÿr tã tanhmã kot puj mē Tīrtūm kapēr ã kagà htūmta jarēnh to? Nà kot mē pamã mē pahte amnhī nhīpêx ã karôta mex kumrêx. Mex o mex.

13Mex kumrêx tã na htem kuma nē tee ri kãm hkôt amnhī nhīpêx hprãm kaprÿ. Jao nhÿrmã ty nē ma kuwy hwÿr pa. Kêt pa na pa pre ra mar nē omunh mex tã hkôt amnhī nhīpêx mex kêt nē. Jao ra ixte amnhī tomnuj xwÿnh ã amnhī pumu. Na pa pre tee ri inhmã hkôt amnhī nhīpêx o ri ixpa hprãm tã no ãm xatã kapēr nhīrôp ixkuhê nē hkwÿm ri amnhī nhīpêx rãhã ho ri ixpa. Tã ra tee ri ja hã amnhī pumu nē amnhī kukamã ijamaxpēr o: — Nà na pa hte ãm tee ri inhmã Tīrtūm kôt amnhī nhīpêx prãm kaprÿ no ãm ho anhÿr kêt nē. Ām ixte amnhī tomnuj pix o ixpa xwÿnh na pa. Ja mÿrapê koja Tīrtūm amnhī nē ma kuwy hwÿr inhmē. Nà koja ixto anē. Anē.

Mē pahte mē pamã amnhī tomnuj kaga hprãm kaprÿ hã mē pajarēnh

Karatas 5.17

14Nē Tīrtūm kapēr ã kagà htūmta Tīrtūm kapēr na. Nē Tīrtūm kīnhã ãm inhī pix na pa ri ixpa jakamã tanhmã kot pa amnhī to nē kapēr kôt ri amnhī nhīpêx mex o ri ixpa?

15Inhmã tãm ixte amnhī nhīpêx prãm tã no ãm amnhī tomnuj pix o ri ixpa. Mēmoj ixpê omnuj tã pa hte ra hkôt tanhmã amnhī tomnuj to ho ri ixpa. Hāmri nē ja hã amnhī pumu nē tee ri amnhī kukamã ijamaxpēr o: —Hêxta waa nē. Mon pa hte axtem nē ã amnhī nhīpêx anhÿr o ri ixpa? Mēmoj ixpê omnuj nhūm inhmã ho anhÿr prãm kêt tã ra ho anē. Nhūm mēmoj mex nhūm inhmã ho anhÿr prãm tã ho anhÿr kêt nē. Mon pa hte axtem nē ã amnhī nhīpêx anhÿr o ri ixpa? Anē.

¹⁶ ã ixte amnhĩ nhĩpêx anhÿr o ri ixpa htã ra Tĩrtũm kapêr mexta ma hãmri nê ra ijamaxpêr o: —Nà Tĩrtũm kapêrja mex kumrêx tã pa tee ri inhmã hkôt amnhĩ nhĩpêx mex hprãm kaprÿ ho ri ixpa. Hêxta waa nê. Anê.

¹⁷ Inhmã amnhĩ tomnuj prãm kêt tã arĩ ixkaxwÿnh kãm ijamaxpêr punuj nhÿ hã ã amnhĩ nhĩpêx anhÿr o ri ixpa.

¹⁸ Nê inhmã tãm amnhĩ nhĩpêx prãm tã no ãm tee ri ã inhmã amnhĩ nhĩpêx anhÿr prãm kaprÿ. Tanhmã kot pa amnhĩ to nê tãm amnhĩ nhĩpêx o ri ixpa? Na pa tee ri inhmã ja ho anhÿr prãm kaprÿ. Ixte amnhĩ tomnuj xwÿnh na pa. Nê aa ixte amnhĩ to mex kêt kumrêx xwÿnh.

¹⁹ Inhmã mẽmoj mex kôt pix mã amnhĩ nhĩpêx prãm tã no ãm ã amnhĩ nhĩpêx anhÿr kêt nê. Nê ãm hkwÿm ri tanhmã amnhĩ tomnuj to ho ri ixpa. Mẽmoj ixpê omnuj tã pa hkôt amnhĩ nhĩpêx o ri ixpa.

²⁰ Ixte Tĩrtũm kapêr kôt amnhĩ nhĩpêx kêt jakamã na pa hte ã amnhĩ tomnuj anhÿr o ri ixpa. Mẽmoj ixpê omnuj pa inhmã ho anhÿr prãm kêt tã ra hkôt amnhĩ nhĩpêx. Ixte Tĩrtũm kapêr kôt amnhĩ nhĩpêx kêt jakamã ã amnhĩ nhĩpêx anhÿr o ri ixpa.

²¹ Nê mẽmoj mex nhũm inhmã hkôt amnhĩ nhĩpêx prãm tã ra hkwÿm ri amnhĩ nhĩpêx. ã ixte amnhĩ nhĩpêx anhÿr xwÿnh na pa.

²² Nê inhmã Tĩrtũm kapêr mar nê hkôt ri amnhĩ nhĩpêx prãm tã

²³ nom ixte amnhĩ tomnuj xwÿnh jakamã hkôt amnhĩ nhĩpêx kêt nê. Na pa tee ri ja hã amnhĩ pumu nê amnhĩ kukamã ijamaxpêr o: —Nà kot paj axte amnhĩ tomnuj kêt nê. Kot paj ãm amnhĩ to mex pix kukamã ijamaxpêr o ri ixpa. Anhÿr tã no ãm arĩ amnhĩ tomnuj o ri ixpa nê amnhĩ to mex kêt. Ixte amnhĩ tomnuj xwÿnh jakamã na pa hte ã amnhĩ nhĩpêx anhÿr rãhã ho ri ixpa nê tee ri inhmã amnhĩ tomnuj kaga hprãm kaprÿ.

²⁴ Hêxta waa nê. Na pa ixkaprĩ htÿx nê ri ixpa. ã ixte amnhĩ nhĩpêx anhÿr o ri ixpaja mÿrapê kot paj nhÿrmã ty nê ma mẽ kot amnhĩ xà htÿx kamã hamak tũm xàta wÿr ma mō. Mẽhō kot tanhmã ixkrã hto pa ã amnhĩ nhĩpêx anhÿrja kaga?

²⁵Nà mẽ panhõ Pahihti Jejus Krisja pix. Tãm koja ixte amnhĩ tomnuj kutã tanhmã ixto ixihtỳx to. Jakamã na pa axte tee ri amnhĩ kukamã ijamaxpěr kêt nẽ. Pãnhã ixkĩnh nẽ ri ixpa nẽ Tĩrtũm mã kãm: —Pa Tĩrtũm. Nà ãm hãmri amex o amex. Anẽ. Tã ra ixte Jejus Kris kôt amnhĩ xãm jakamã koja tãm tanhmã ixto ixihtỳx to pa rĩ kormã Tĩrtũm kapěr kôt amnhĩ nhĩpêx mex o ri ixpa. No kot pa pam amnhĩ krã hkôt amnhĩ tomnuj rãhã ho ri ixpa. ã ixte anhỹr xwỳnh na pa.

Rõmãn 8

Tĩrtũm Karõ kot mẽ pahto tãm mẽ pahte amnhĩ nhĩpêx xwỳnh ã harẽnh

Karatas 5.16-26

¹Nẽ Jejus Kris kệp mẽmoj punuj kutã mẽ pahto mẽ paxihtỳx xwỳnh jakamã mẽ pahte hkôt amnhĩ xunhwỳr xwỳnhjaja na pu htem ỹ hã amnhĩ tomnuj o ri papa hkêt nẽ. Jao mẽ pahte kuwy hwỳr papa mã xwỳnh kêt.

²Te ra mẽ pahtyk nhũm Tĩrtũm kot akupỹm mẽ pahto mẽ pahtĩr pyrãk jakamã nhũm Karõja mẽ pahkarõ mã agjê pu mẽ ỹ hã tãm amnhĩ nhĩpêx o ri papa. Te tãm kot amnhĩ nhĩpêx pyrãk o amnhĩ nhĩpêx nhũm Karõ mẽmoj punuj piitã kutã mẽ pahto mẽ paxihtỳx. Kệp mẽ pajamaxpěr punuj kutã mẽ pahto mẽ paxihtỳx xwỳnh jakamã kot puj mẽ nhỹrmã mẽ kot amnhĩ xà htỳx kamã hamak tũm xàta wỳr papa hkêt nẽ.

³Nom kormã mẽ pahte Jejus kôt amnhĩ xunhwỳr kêt ri na pu prem tee ri pamã Tĩrtũm kapěr piitã hkôt amnhĩ nhĩpêx prãm kaprỳ nhũm mẽ pahpê hihtỳx kumrẽx. Jakamã tanhmã koja Tĩrtũm amnhĩ to nẽ amnhĩ mã mẽ pamex xwỳnh ã mẽ pajarẽ? Na pre tee ri amnhĩ tã mẽ pajamã hãmri nẽ mẽ pahwỳr Kraja mẽ nhũm man mẽ pahwỳr wrỳ nẽ mẽ pahpyrà nẽ ã ho mẽ pakamã kato. Nom mẽ parom aa tanhmã amnhĩ tomnuj to hkêt kumrẽx nẽ ri pa. Tã mẽ kot hpĩr tã nhũm amarĩ htyk kêt nẽ. Na pre htyk o mẽ pahte amnhĩ tomnuj piitã hpãnhã amnhĩrer pa. Jakamã tãm kệp mẽ pajamaxpěr punuj kutã mẽ pahto paxihtỳx xwỳnh. Na pu htem hkôt amnhĩ xunhwỳ hãmri nẽ kukwak ri amnhĩ tomnuj o ri papa hkêt nẽ.

⁴Pānhā Tīrtūm kot amnhī nhīpêx kôt amnhī nhīpêx o ri papa nê axte mẽ pahte amnhī nhīpêx tūm kôt amnhī nhīpêx kêt nê. Hāmri hpānhā Tīrtūm Karō kot amnhī nhīpêx kôt pix mā amnhī nhīpêx. Nê hamaxpēr kôt pix mā pajamaxpēr. Ja kaxyw na pre Tīrtūm mẽ pahwỳr Kraja mẽ nhūm wrỳ nê mẽ pahpiitā mẽ panê ty.

⁵Nê mẽ kot amnhī krā hkôt tanhmā amnhī nhīpêx to ho ri mẽ pa xwỳnhjaja na htem htỳx ri tanhmā hamaxpēr to xà hkôt amnhī nhīpêx o ri pa. No kêt Tīrtūm Karō kot mẽ pahkarō mā gjêx xwỳnhjaja na pu htem mẽ kurom te Jejus jamaxpēr pyrāk o pajamaxpēr o papa.

⁶Nê mẽ kot amnhī krā hkôt amnhī nhīpêx xwỳnhjaja koja mẽ nhỹrmā ty nê ma kuwy hwỳr pa nê kamā pa ho pa. No mẽ pahte Tīrtūm Karō hkôt amnhī nhīpêx xwỳnhjaja kot puj mẽ pajamaxpēr nyw o pajamaxpēr nê amnhī nhīpêx nyw o amnhī nhīpêx. Jao paxàmnhīx ri pajamakêtkati nê ri papa. Nê nhỹrmā ty hāmri nê Tīrtūm mẽ Jejus wa kuri akupỳm pahtīr tūm nê pamex kumrêx nê papa ho papa.

⁷Nê mẽ kot amnhī krā hkôt ri amnhī nhīpêx xwỳnhjaja kām Tīrtūm kīnh kêt. Nê kām kapēr mar prām kêt jakamā tanhmā kot mẽ amnhī to nê hkôt amnhī nhīpêx?

⁸Koja mēhō amnhī krā hkôt kām hprām xà hkôt pix mā amnhī nhīpêx hāmri nhūm Tīrtūm tee ri ja hā omu nê hkīnh kêt nê.

⁹No mẽ papajaja na pu htem mẽ urāk nê ã amnhī nhīpêx anhỳr kêt nê. Ra Tīrtūm Karō kot mẽ pahkarō mā gjêx jakamā na pu htem hkôt pix mā amnhī nhīpêx hprām. No koja Tīrtūm Karō mēhō kaxwỳnh mā àr kêt nê nhūm kêp hkra hkêt nê.

¹⁰⁻¹¹Tā mẽ papajaja. Mẽ pahte amnhī tomnuj mỳrapê koja mẽ pakrāhkàja nhỹrmā ty. No nhūm Tīrtūm ra kot amnhīm mẽ pahte amnhī to mex xwỳnh ã mẽ pajarēnh nhūm Kris Karō kot mẽ pahkarō mā gjêx jakamā koja mẽ pahkarōja htyk kêt nê. Mẽ pakrāhkà pix koja ty nhūm mẽ pahkarōja ma kaxkwa hwỳr àpir kurê kumrêx. Tā nhūm nhỹrmā Tīrtūm akupỳm mẽ

pakrãhkà ho htír nẽ akupým mẽ pahkarõja mẽ pakrãhkàm hagjê pu mẽ wa kuri pahtır tũm nẽ papa ho papa.

¹²Jakamã e kwa ixkwỳjaja. Kêr pu mẽ axte ri mẽ pajamaxpêr tũm kôt amnhĩ nhĩpêx o ri papa hkêt nẽ.

¹³Kot puj mẽ arĩ ã amnhĩ nhĩpêx anhỹr o ri papa hãmri nẽ nhỹrmã ty nẽ ma mẽ kot amnhĩ xà htỳx kamã hamak tũm xàta wỳr papa. Jakamã kêr pu mẽ mẽmo arĩgro hã pamã tanhmã amnhĩ tomnuj to hprãm hãmri nẽ amnhĩ kukamã pajamaxpêr o: —Nà inhmã ã amnhĩ nhĩpêx anhỹr prãm tã kot paj Tĩrtũm Karõ nhỹ hã ja kutã amnhĩ to htỳx nẽ ho anhỹr kêt nẽ. Anẽ. Kot puj mẽ ã pajamaxpêr anẽ hãmri nẽ nhỹrmã kuwy wỳr papa hkêt nẽ. Pãnhã Tĩrtũm mẽ Jesus wa kuri pamex nẽ pahtır tũm nẽ ri papa ho papa.

¹⁴Mẽ kot Tĩrtũm Karõ hkôt amnhĩ nhĩpêx xwỳnhjaja kêp Tĩrtũm kraa.

¹⁵Nom amnepêm kormã mẽ pahte hkôt amnhĩ xunhwỳr kêt ri. Nẽ kormã mẽ pamã kapêr mar prãm kêt ri nhũm kot amnhĩ tã mẽ pahpumunh nẽ tanhmã mẽ pahto pumaj na pu prem pamã uma ho ri papa. Tã hkôt amnhĩ xunhwỳ nhũm Karõja mẽ pahkarõ mã gjêx jakamã na pu htem ra pamã uma hkêt nẽ ri papa. Karõ kot mẽ pahpê Tĩrtũm kra hã mẽ pajarênh jakamã pu mẽ amnhĩ kamã kot tanhmã mẽ panhĩpêx to puma hkêt nẽ ri papa. Nẽ paxàmnhĩx pajamakêtkati nẽ kãm amnhĩ jarẽ nẽ kãm amnhĩ jarênh o: —Pa Inhĩpêxà maati? Ot pa ixpê akra hã amã amnhĩ jarênh kaxyw amnhĩ kaxyw amã ijamaxpêr. Anẽ. Jao ra mẽ pamã uma hkêt nẽ ri papa.

¹⁶Karõ kot mẽ pahkarõ mã gjêx nhũm mẽ pahte amnhĩ tã omunh jakamã na pu htem pajamaxpêr o: —Nà Tĩrtũm Karõ kot ixkarõ mã àr jakamã ixpê hkra na pa. Anẽ.

Nhỹrmã mẽmoj piitã akupým mex par ã harênh

Sikũn Korĩt 4.16-18; Korosẽ 3.4; Wam Pêtre 4.13

¹⁷Nẽ mẽ kãm Tĩrtũm prãm kêt xwỳnhjaja na htem te mẽ kot Tĩrtũm Kra Jesus nhĩpêx pyrak o mẽ panhĩpêx pu mẽ pahpunuj nẽ ri papa. Nom kot puj mẽ nhỹrmã Tĩrtũm mex o mex xwỳnhja kuri pamex kumrêx nẽ papa. Mẽ

pahpê hkra jakamã kot puj mẽ Kra Jejus pyrà nê õ krĩ kamã kuri pamex kumrêx nê ri papa ho papa.

¹⁸Jar Jejus ã mẽ pahpunuj nê ri papa htã kot puj mẽ nhÿrmã kuri pamex kumrêx nê papa ho papa. Hãmri nê mẽ pamex o pamex ã amnhĩ pumu nê jar pika ja kamã tanhmã mẽ pahpunuj toja mã axte pajamxpêr kêt kumrêx.

¹⁹Nê pika hkôt Tĩrtũm kot mẽmoj ho kator xwÿnhjaja na htem Tĩrtũm kot mẽ pahto mex par jatur xàm mẽnh ã arĩgro jamãr rãhã ho pa. àk nê mry nê pĩ nê gô nê mẽmoj piitã mẽ pajamãr o pa. Te kot mẽ pakukamã hamaxpêr o: —Kwa mẽmo arĩgro hã koja Tĩrtũm hkrajê piitã ho amnhĩrĩt nê mẽ ho mex par jatur xàm kumẽ pu mẽ ja hã mẽ omu? Hêxta waa nê. Inhmã tokyx ja hã mẽ omunh prãm tÿx. Koja tokyx ã mẽ hipêx anê pa ixkĩnh tÿx kumrêx. Anhÿr o hamaxpêr pyræk.

²⁰Mẽmo kaxyw na hte mryja ã mẽ pakukamã hamaxpêr anê? Nà amnepê mã Tĩrtũm kot mẽmoj piitã ho katorta ã nhũm pre piitã mex o mex. Pĩ nê mry nê gô. Mẽmoj piitã mex kumrêx rãhã nê. Aa grà nê htyk kêt kumrêx. Tã Atãw kot amnhĩ tomnuj mÿrapê nhũm ra ÿ hã mẽmoj piitã homnu par jakamã na hte mẽmoj htĩr nê pa nê gaa nê ty nê hapêx. Nê mẽ pahpur kãm ahkagrõt punuj hapôj. Atãw kot amnhĩ tomnuj mÿrapê nhũm Tĩrtũm kapêr xà hkôt ã mẽmoj omnu hpar anê.

²¹Nom koja arĩ rãhã ho rãhã hkêt nê. Koja nhÿrmã Tĩrtũm akupÿm mẽmoj piitã ho mex pa nhũm mex o mex nê axte grà rÿ axte htyk nê hapêx kêt nê. Nê axte omnu nê hikwÿ hkêt nê. Koja mẽ pahpyrà nê mex o mex. Jakamã na htem Tĩrtũm kot mẽ pahto mex par jatur xàm mẽnh xà hã arĩgro jamãr rãhã ho pa.

²²Te mẽhõ ni hpijagri kaxyw õhy xà htÿx nê tokyx kãm hpijagri hprãm xàj àmra ho nõi pyræk o amnhĩ nhĩpêx pẽ mẽ pahto mex jatur xàm mẽnh ã arĩgrota jamãr o pa.

²³Nê mẽ papajaja na pu htem tanhmã pahpunuj to nê jajê pyrà nê te amnhĩ kamnhêr o ri papa pyræk. Rÿ tanhmã paxà kute nê ri papa. Rÿ pamã prãm nê paxàà nê ri papa. Nê tanhmã mẽ pahpunuj to nê ri papa. Jao te pĩ nê gô

ně mryja pyrà ně amnhĩ tã Tĩrtũm kot mẽ pahto mex par jatur xàm mēnh ã arĩgro jamār rãhã ho ri papa. Na pre Tĩrtũm mẽ pahwỳr Karõ rē nhũm mẽ pahkarõ mã agjê ně mẽ pakukamã Tĩrtũm tanhmã kot mẽ pahto mex to hã mẽ pamã ho amnhĩrĩt ně mẽ pamã ho amnhĩrĩt o: —Koja nhỹrmã Tĩrtũm mẽ ato mex par jatur xàm kumẽ ně mẽ piitã mẽ kãm mẽ apê hkra hã mẽ ato amnhĩrĩt. Hãmri ně mẽ amã mẽ anhi nyw gõ ka mẽ axte axà ně ri apa ně atyk kêt ně. Hãmri ně Tĩrtũm ri amex kumrēx ně ri apa ho apa. Nà kot kaj mẽ nhỹrmã ã amnhĩ nhĩpêx anẽ. Anẽ. Ǻ Tĩrtũm Karõ kot mẽ pakukamã mẽ pajarēnh anhỹr jakamã na pu htem amnhĩ tã kot mẽ pahto mex jatur xàm mēnh pix jamār o ri papa.

²⁴Nom na kormã ã mẽ pahto mex anhỹr kêt ně. Kormã mẽ pamã mẽ panhi nyw nhõr kêt ně. Nom ra kot mẽ pahto hkra jakamã pu mẽ ja hã amnhĩ pumu ně pajamaxpēr o: —Nà ra Tĩrtũm kot ixto hkra jakamã koja nhỹrmã mããnēn inhmã inhĩ nyw gõ. Nà koja inhmã kugõ.

²⁵Anhỹr o pajamaxpēr tã kormã. Na pu htem kormã amnhĩ tã hamār rãhã ho ri papa ně aa hkaga hkêt ně papa.

Mẽ pahte Tĩrtũm Karõ nhỹ hã Tĩrtũm mã amnhĩ jarēnh

²⁶Ně na pu htem Tĩrtũm mã amnhĩ jarēnh kaxyw nhũm hte Karõja mẽ pahto ajuta pu mẽ ỹ hã pakatàt kôt kãm tanhmã amnhĩ jarēnh to. No kot puj mẽ amnhĩ krã hkôt kãm amnhĩ jarēnh mex kêt ně. Na pu htem ja kaxyw tee ri amnhĩ kukamã pajamaxpēr o: —Kwa tanhmã kot pa Tĩrtũm mã amnhĩ jarēnh to? Tanhmã kot pa mẽmoj tã ixàhwỳr to rỳ amnhĩ to hwỳr to? Nà kot paj amnhĩ krã hkôt ja ho anhỹr mex kêt ně. Hêxta waa ně. Anẽ. No nhũm Tĩrtũm Karõ ra kot mẽ pahkarõ mã gjêx jakamã na hte tanhmã mẽ pahkrã hto pu mẽ ỹ hã kãm amnhĩ jarēnh mex ně pakatàt kôt mẽmoj tã kuwỳ. Te Karõja tanhmã mẽ pakute hã mẽ pahpumunh ně mẽ pakamã ukapřĩ xàj tãm mẽ pahto hwỳr pyræk.

²⁷Jakamã pu mẽ ỹ hã tanhmã Tĩrtũm mã amnhĩ jarēnh to nhũm mẽ pamar kurê kumrēx. Ra kot mẽ pajamaxpēr kôt mẽ pahpumunh par kēnã. Nhũm

ra Karõ kot mẽ pahkarõ mã gjêx jakamã na pu htem kãm hprãm xà hkõt kãm amnhĩ jarẽ nõ tanhmã amnhĩ to paxàhwỳr to.

Tĩrtũm kot mẽ pamã mẽmoj piitã ho mex ã harẽnh

Rõmãn 8.37; Pĩripos 1.12; Wam Pẽtre 5.10

28Nẽ mẽ pamã Tĩrtũm kĩnh xwỳnhjaja. Tĩrtũm kot mẽ pahto hkra xwỳnhjaja. Koja mẽmoj mẽ pakamã tanhmã amnhĩ to htã kêr pu mẽ ãm ja hã amnhĩ pumu nõ tee ri amnhĩ kukamã pajamxpẽr kêt nõ. Koja te mẽ pahpẽ omnuj pyræk tã koja nhỹrmã hpãnhã mẽ pamã mex nõ. Koja Tĩrtũm nhỹrmã tanhmã mẽ pamã mẽmojta o mex to.

29Amnepẽ mã mẽmoj piitã hkêt ri na pre Tĩrtũm mẽ pakukamã tanhmã mẽ pajarẽnh to nõ mẽ pajarẽnh o: —E kot paj nhỹrmã mẽ kot Ixkra Jejus kõt amnhĩ xunhwỳr xwỳnhjẽ ho ixkra jakamã nhũm mẽ Jejus pyrà nõ kệp ixkraa. Nẽ uræk nõ ixkapẽr kõt amnhĩ nhĩpẽx o pa. Jao pa ra ixkra xohtõ nõ. Nà ja na inhmã hprãm. Anẽ.

30Tã pu htem pajapõj nõ ri papa. Hãmri nõ kapẽr ma nõ amnhĩ kaxyw Kra Jejus kõt pajamxpẽr nõ hkõt amnhĩ xunhwỳ. Hãmri nhũm Tĩrtũm ja hã mẽ pahpumu nõ pahto hkra nõ amnhĩm mẽ pamex xwỳnh ã mẽ pajarẽ nõ mẽ pahto mex nõ. Nẽ te ho Kra Jejus nhĩpẽx pyræk o mẽ panhĩpẽx. Jao nhỹrmã wa kuri mẽ pahpũr tũm nõ papa ho papa mã xwỳnh ã mẽ pajarẽ.

Mẽhõ kot Tĩrtũm pẽ aa mẽ papytãr kêt ã harẽnh

Rõmãn 5.1

31Tã ã Tĩrtũm kãm mẽ pajapẽ nõ mẽ pahto mex kot anhỹr. ã kot mẽ panhĩpẽx mex anhỹr jakamã ra mẽ pahkõt pa ho pa rãhãã. Jakamã mẽhõ koja ãhkra pẽ mẽ pahpytã? Nẽ mẽhõ koja tanhmã ri kệp mẽ pahto? Nà koja kệp mẽ papytãr rỳ tanhmã kệp mẽ pahto hkêt nõ.

32Tĩrtũm kãm Kra Jejus japẽ htỳx tã na pre mẽ pahpẽ nẽ hkêt nõ mẽ pahwỳr kumẽ. Te kot mẽ pamã õr pyræk o hipẽx nhũm mẽ pahwỳr wrỳ nõ mẽ panẽ ty. Tã ra Tĩrtũm kot mẽ pamã õr jakamã koja mããnẽn kãm mẽ pahpẽ Kra hkõt amnhĩ xunhwỳr xwỳnhjẽ japẽ nõ mẽ pahto mex rãhã ho ri pa. Nà koja ã mẽ pahto mex anẽ.

³³Jakamã mēhō koja kām mẽ pahte amnhĩ tomnuj xwỳnh ã mẽ pajarẽ? Ra tãm kot mẽ pahto hkra nẽ mẽ pahte amnhĩ to mex xwỳnh ã mẽ pajarēnh kēnã kot kêt mēhō kām tanhmã mẽ pahto kapēr punuj to nhũm mẽ kuma. Koja mẽ tee ri kām tanhmã mẽ pahto kapēr to kaprỳ.

³⁴Na pre ra Jejus Kris mẽ pahte amnhĩ tomnuj pãnhã amnhĩrer kaxyw mẽ panê ty nhũm Tĩrtũm akupỹm ho htĩr. Hãmri nhũm ma akupỹm kaxkwa hwỳr api nẽ Pahi Maati krĩ xà kamã Tĩrtũm nhĩhkô hã hkrĩ ho hkrĩ. Nẽ Tĩrtũm mã mẽ pakutã nojarêt rãhã ho kuri hkrĩ ho hkrĩ. Jakamã mēhō koja kēp mẽ kot amnhĩ xà htỳx kamã hamak tũm xàta wỳr mẽ pajano? Nà amrakati kumrēx.

³⁵Nẽ Krisja kaxkwa kamã Tĩrtũm nhĩhkô hã hkrĩ ho hkrĩ htã mãănēn jar mẽ pahkôt pa ho pa. Kām mẽ pajapê htỳx jakamã kot puj mẽ tanhmã pahpunuj to htã nhũm arĩ kām mẽ pajapê nẽ mẽ pahkôt pa ho pa. Rỳ nhũm mẽ kot hkôt amnhĩ xunhwỳr kêt xwỳnhjaja tanhmã hã mẽ pahto htã nhũm arĩ kām mẽ pajapê kamã mẽ pahkôt pa ho pa. Rỳ mẽ pamã prãm nẽ ri papa. Rỳ mẽ paxê hkêt nẽ pamã kry nẽ ri papa htã nhũm arĩ kām mẽ pajapê kamã mẽ pahkôt pa ho pa. Rỳ ra mẽ kot hã mẽ panhĩmex kaxyw rỳ hã mẽ pahpar kumrēx. Tã nhũm arĩ kām mẽ pajapê kamã mẽ pahkôt pa ho pa rãhã nẽ. Kām mẽ pajapê kamã mẽ pahkôt pa ho pa rãhã jakamã pu mẽ tee ri amnhĩ kukamã pajamaxpēr kêt nẽ. ãm hkôt paxàmnhĩx ri pajamakêtkati nẽ ri papa ho papa.

³⁶Tĩrtũm kapēr ã kagà htũm te mẽ papajaja mẽ pahte kām tanhmã amnhĩ jarēnh to pyrà nẽ mẽ pajarēnh kot: Pa Tĩrtũm. Na htem atã mẽ ixtomnuj tỳx o pa. Nẽ ra mẽ kot mẽ inhĩmex kaxyw. Nẽ mẽ inhĩpêx o te mẽ kot ôwêhti ho mōr nẽ hpar kaxyw tanhmã hipêx to pyràk. Jakamã na pa mẽ ra ixtyk kaxyw. Anhỳr o kot mẽ pajarēnh.

³⁷Tã kwār mẽ ã mẽ panhĩpêx anẽ. Arĩ Kris kām mẽ pajapê kamã mẽ pahkôt pa ho pa rãhã jakamã mẽ kot tanhmã mẽ pahto htã pu mẽ arĩ amnhĩ kaxyw kām pajamaxpēr tỳx rãhã ho ri papa. Nhũm arĩ mẽ kutã mẽ pahto paxihtỳx pu mẽ arĩ mẽ kām pakuhê.

³⁸Měmoj koja tanhmã mě pahto nhũm Tĩrtũm tee ri ja hã mě pahpumu nẽ kãm mě pajapê hkêt nẽ? Nà amrakati kumrẽx. Koja mẽhõ rỳ mẽmoj mẽ pahpê àmnàr kêt nẽ. Na hte jar pika ja kamã Kris kãm mẽ pajapê kamã mẽ pahkõt pa ho pa. Nẽ kot puj mẽ nhỹrmã ty nhũm arĩ kãm mẽ pajapê kamã mẽ pahkõt pa ho pa rãhã nẽ. Jakamã koja mẽkarõ rỳ mẽkarõmnuti rỳ jar pika ja kamã mẽ kãm Tĩrtũm prãm kêt xwỹnhjaja mẽ pahpê àmnàr kêt nẽ. Rỳ mẽmoj tanhmã kute. Rỳ kormã hapu hã mẽmoj tanhmã kute. Koja mẽmoj piitã tee ri tanhmã kęp mẽ pahto htã nhũm Kris arĩ kãm mẽ pajapê kamã mẽ pahkõt pa ho pa rãhã nẽ nhũm mẽmoj tee ri mẽ pahpê àmnàr kaprỳ.

³⁹Nẽ koja kỳj rũm mẽmoj wrỳ nẽ tanhmã kęp mẽ pahto japêr. Rỳ pyka rũm mẽmoj kato nẽ tanhmã kęp mẽ pahto japêr. Rỳ kuwy rỳ kòk xàpêr tỳx tanhmã kęp mẽ pahto. Tã nhũm mẽ panhõ Pahihti Jejus Kris arĩ kãm mẽ pajapê kamã mẽ pahkõt pa ho pa rãhã nẽ. Te Tĩrtũm kãm mẽ pajapê pyrãk o kãm mẽ pajapê htỳx kãm mẽ pahkõt pa ho pa rãhã jakamã nhũm mẽmoj tee ri mẽ pahpê àmnàr kaprỳ.

Rõmãn 9

Ijaew jarẽnh

Atre 3.25; Rõmãn 3.1-2

¹⁻²Nẽ na pa tee ri ixkwỳ Ijaew kot tanhmã amnhĩ nhĩpêx to ho pa hã mẽ omu nẽ ixkaprĩ nẽ. Ixpyrà nẽ mẽ kęp Ijaew tã ixkĩnhã amnhĩ kaxyw Kris kõt hamaxpêr kêt jakamã nhũm Kris tee ri kãm mẽ hamakêtkati nẽ àmnhĩx ri mẽ pa hprãm kaprỳ. Pa tee ri mẽ hkukamã ijamaxpêr nẽ ixkaprĩ nẽ ri ixpa. Nẽ aa ixkaprĩ ixpê kator kêt kumrẽx. Mẽ kot inhmã mẽ hkĩnh kêt ã amnhĩ tã ijarẽnh tã inhmã mẽ hkĩnh kênã. ãm hãmri na pa ã amnhĩ jarẽnh anẽ. Tĩrtũm Karõ kot ja hã ixpumunh mex nẽ inhmã: —Nà ãm hãmri na ka amã mẽ hkĩnh ã amnhĩ jarẽ. Anẽ.

³Mẽ kęp ixkwỳ na mẽ. Mẽ ixpàr kraxja ãm pixi mex. Tã nhũm mẽ ixkĩnhã amnhĩ kaxyw Kris kõt hamaxpêr kêt jakamã kop ãm Tĩrtũm kot mẽ nê kuwy hwỳr pa inhmẽnh ronhỹx ja inhmã mex. Nhỹx pa kãm: —Kwa Tĩrtũm. Amnhĩ nê kuwy hwỳr ixkwỳjê rẽnh kêt nẽ. Inhmã mẽ hapê htỳx kumrẽx.

Mě hpãnhã pa mãn mẽ nê hwÿr inhmẽ nà. Anhÿr o nhÿx pa kãm ixkapër. Nom kot paj amnhĩ to ã ixàhwÿr anhÿr kaprÿ. Tĩrtũm kot mẽ kamã ukapřĩ htã no nhũm mẽ amnhĩ kaxyw Kris mã hamaxpër kêt jakamã tanhmã koja amnhĩ to nẽ mẽ hpãnhã pa mẽ nê kuwy wÿr inhmẽ nhũm mẽ ixrom kuri htĩr tũm nẽ pa ho pa? Mẽ kot hkôt amnhĩ xunhwÿyẽ hã.

⁴Mẽ ixpê Ijaew nhĩgêtjaja na pre Tĩrtũm amnepê mã mẽ ho mex rax nẽ. Nẽ kãm mẽ ho hkra hprãm nẽ. Nhũm prem tanhmã kot amnhĩ nhĩpêx mex to hã no ho omunh o pa. Nẽ hirã htÿx kãm ri pa hã omu nhũm mẽ kãm: —E kot kaj mẽ ixkapër ma nẽ ixkôt amnhĩ nhĩpêx o ri apa. Hã kot paj mẽ akôt ixpa ho ixpa nẽ mẽ ato mex nẽ ka mẽ axpën kanrêhã axàmnàr rax nẽ. Hãmri pa mẽ amã pika mex gõ ka mẽ kamã ajamakêtkati nẽ axàmnhĩx ri apa ho apa. Anhÿr o mẽ kãm kapër. Hãmri nẽ mẽ kaxyw Mojes mã tanhmã kapër to nẽ mẽ kaxyw kãm mẽmoj piitã hã karõ. Mẽ kot tanhmã amnhĩ tomnuj to hãmri nẽ tee ri ja hã amnhĩ pumunh nẽ tanhmã amnhĩ to Tĩrtũm wÿr to nhũm kot mẽ mar nẽ mẽ nê ja ho hapêx par kaxyw. Finat Mojes kot amnhĩ xõ ri mẽ kãm ujarênh nhũm mẽ kot mar nẽ hkôt amnhĩ nhĩpêx mex o ri pa kaxyw.

⁵Mẽ ixkukamã mẽ ixpãmjaja. Apraãw nẽ Ijak nẽ Jako kanrêhã mẽ hkra nẽ mẽ htàmnhwÿjaja na pre mẽ. Mẽ hwÿr na pre Tĩrtũmja Kra Jejus Kris mẽ nhũm mẽ hwÿr wrÿ nẽ mẽ kamã ĩ ho ĩ ho kator jakamã haxwÿja kêp Ijaew na pre. Kêp Měpahpãm nẽ mex o mex nẽ hihtÿx o hihtÿx tã Ijaew wÿr wrÿ nẽ mẽ kamã kato. Hãmri nhũm Ijaew kêt xwÿnhjaja harênh ma nẽ tee ri hamaxpër nẽ hamaxpër o: —Hêxta waa nẽ. Kêp ãm Jejus mẽ papa kamã mãn kator ronhÿx mẽ pamã mex kumrêx. Anẽ.

⁶No nhũm kormã Ijaew hwÿr wrÿk kêt ri nhũm Tĩrtũm ra kot mẽ ho hkra kaxyw mẽ hã amnhĩ jarê nhũm mẽ hkwÿja kãm ja prãm kêt nẽ hkaga. Tã xà na pre Tĩrtũm kot mẽ ho hkra hã amnhĩ jarênh ã amnhĩ to hêx? Nà aa hêx kêt kênã kot kêt ri mẽmoj tã amnhĩ jarê nẽ hã amnhĩ to hêx. Jakamã na pre mẽ hkwÿjaja hkwÿjê rom hkaga hkêt nẽ nhũm amnhĩ tã mẽ omu nẽ mẽ ho

hkra. Nom mẽ piitã mẽ ho hkra hkêt nẽ. Mẽ hkwỳjaja kot hkaga jakamã nhũm ãm mẽ hkwỳjê pix o hkra.

⁷Nẽ finat Apraãwja na pre hkanrêhã hkra nẽ htàmnhwỳ xohtô nẽ. Tã xà na pre Tĩrtũm htàmnhwỳ piitã mẽ ho hkra hã amnhĩ jarẽ? Nà mẽ piitã ã mẽ harẽnh anhỹr kêt nẽ. ãm mẽ hkwỳjê pix na pre mẽ ho hkra hã mẽ harẽ. Apraãw kra Ijak kôt hkanrêhã htàmnhwỳ pixjaja nhũm kot mẽ ho hkra hã mẽ harẽ.

⁸⁻⁹Nẽ Apraãw kormã hprõ kamã hkra hkêt ri na pre kãm àpênh xwỳnh kamã hkra nhũm kato nẽ myre nẽ hixi pê Ismael. Nom kêp Apraãw prõ kumrêx kamã hkra hkêt. Prõ kuprỳ kamã hkra na pre. Tã nhũm Tĩrtũm kãm hkra kumrêx kukamã harẽ nẽ kãm: —E kot paj ma tẽ hãmri nẽ mẽmo arĩgro hã akupỹn awỳr tẽ nhũm ra aprõ hpijagri nhũm war akra myre. Anẽ. Tã nhũm hprõ Saraja htujarô. Nẽ gaa nẽ hpijagri nhũm hkraja myre. Hixi pê Ijak. Kêp Apraãw prõ kamã hkra jakamã Tĩrtũm nom kêp Apraãw kra kumrêx. Jakamã hkra Ijak kanrêhã htàmnhwỳjaja na pre Tĩrtũm kot mẽ ho hkra hã mẽ harẽ. Ra kot Apraãw mã ja hã amnhĩ jarẽnh xà hkôt.

¹⁰Tã nhũm Ijakja hprêk nẽ Repek o hprõ. Nẽ gaa nẽ ra haxwỳja wa hkra nhũm hkraja wa ahpo nẽ kato nẽ wa hamẽ my. Kot wa pê Ejau nhũm kot hapu pê Jako.

¹¹⁻¹²Nom nhũm kormã wa kator kêt ri nhũm Tĩrtũm wa hkukamã tanhmã wa harẽnh to. àhpumunh xà hkôt wa katorxà mã wa harẽ nẽ kãm: —E kot paj amã war akra wa hkukamã tanhmã wa harẽnh to ka inhma. Nà koja wa kato nẽ gaa nẽ hprêk hãmri nhũm kot haputa amnhĩ to rax o kot wa jakre. Anẽ. Kot wata koja kot hapu kĩnhã amnhĩ to grire nẽ ri pa nhũm ã wa hkukamã wa harẽnh anẽ. Kãm wa kot tanhmã amnhĩ nhĩpêx to hprãm xà hkôt ã wa harẽnh anẽ. Kormã wa kot tanhmã amnhĩ tomnuj to rỳ tanhmã amnhĩ to mex to hã kot wa omunh kêt tã kãm hprãm xà hkôt ã wa hkukamã wa harẽnh anẽ.

¹³Tirtūm kapēr ā kagà htūm kot wa harēnh nē wa hā kagà kot: Ejau rom Jako kanrēhā hkra nē htāmnhwỳ pixjaja na pre Tirtūm amnhīm mẽ ho hkra. Anē.

¹⁴Mān ka mẽ Tirtūm kot ā wa harēnh anhỹrja ma nē ajamaxpēr o: —Tk. Kwa ja mexti hā. Mo na pre hamē wa hkanrēhā wa hkra nē wa htāmnhwỳ piitā ho hkra hkēt nē? Anē. Kwa mẽ ā ajamaxpēr anhỹr kēt nē. Tirtūm na hte kām hprām xà hkôt tanhmā mẽ panhĩpêx to ho pa pu mẽ kot tanhmā mẽ panhĩpêx to hā omu nē ām omu nē amnhĩ tã tanhmā kām nē hkēt nē.

¹⁵Na pre finat Mojes mã amnhĩ jarēnh o: Inhmā hprām xà hkôt na pa hte mẽ omu nē tanhmā mẽ kamā ixukapřĩ hto ho ri ixpa. Nē inhmā hprām xà hkôt na pa hte ahpỹnhā tanhmā mẽ hipêx to ho ri ixpa. Anhỹr o kām amnhĩ jarē.

¹⁶Nom tanhmā mẽ pahte amnhĩ nhĩpêx to hā mẽ pahpumunh kôt na hte mẽ pakamā ukapřĩ hkēt nē. Ām tām kām hprām xà hkôt na hte tanhmā mẽ pakamā ukapřĩ hto ho pa.

¹⁷Amnepê mã Ejit kām mẽ õ pahihti Paraohiti hwỳr na pre Mojes mẽ nhūm ma hwỳr mō nē kām tanhmā Tirtūm kapēr jarēnh to nē kām: —E Tirtūm na awỳr inhmē pa mō. Tām na pre apê Ejit nhō xwỳnhjê nhō pahi kaxyw axām. Akrā hihtỳx tã nhūm mẽ kaxyw axām. Tã ra xatā àhpumunh tỳx o tanhmā anhĩpêx to. Krĩ piitā hkôt ri mẽ pa xwỳnhjaja kot atã harēnh mar nē àhpumunh o àhpumunh ā omunh kaxyw. Tã ixte amā ja jarēnh kaxyw na pre awỳr inhmē pa man awỳr mō. Anē.

¹⁸Ā na hte Tirtūm kām hprām xà hkôt tanhmā mẽ panhĩpêx anhỹr to ho pa. Jao mẽ hkwỳjê kamā ukapřĩ ho pa. No mẽ hkwỳjaja nhūm tee ri mẽ hkrā hihtỳx ā mẽ omu nē ām mẽ omu nhūm mẽ amnhĩ krā hkôt ri tanhmā amnhĩ tomnuj to ho ri pa.

Tirtūm kēp mẽ pakamā ukapřĩ xwỳnh ā harēnh

¹⁹Nē kot kaj mẽ atō Tirtūm kot ā mẽ hipêx anhỹrja ā harēnh ma nē tanhmā hā ixkukjêr to nē inhmā: —Kwa na xep hte Tirtūm ahpỹnhā tanhmā mẽ hipêx to. Nē mẽ hkwỳjê kamā ukapřĩ ho pa nē mẽ hkwỳjaja mẽ hkrā hihtỳx

ã mẽ omu nẽ ãm mẽ omu nẽ mẽ kamã ukapřĩ hkêt nẽ. Jakamã kwa mo na hte mẽ kot amnhĩ tomnuj xwỳnh ã mẽ harẽ? Tãm kot ã mẽ hipêx anhỹr kênã kot kêt mẽ kot amnhĩ tomnuj xwỳnh ã mẽ harẽ. Anhỹr o ajamaxpêr japêr.

²⁰Kwa mẽ ri ã atỳx Tĩrtũm jarênh anhỹr kêt nẽ. E pa mẽ amã ejêp jarẽ ka mẽ inhma. Xà kot mễhõ gyw kwỳ ho amnhĩm poti nhĩpêx nhũm tee ri amnhĩ tã omu nẽ amnhĩ tã tanhmã kãm kapêr to nẽ kãm: “Tk. Kwa mon ka ri ã inhĩpêx anẽ?” Anhỹr o amnhĩ tã kãm kapêr? Nà koja kãm tanhmã nẽ hkêt nẽ.

²¹Hipêx xwỳnh kãm hprãm xà hkôt kot ã hipêx anhỹr kênã kot kêt amnhĩ tã kãm akir. Koja amnhĩm gyw kwỳ kakwỳ nẽ ho poti ho axkrut nẽ hipêx. Nẽ hõ ho muxre. Ho mex kumrêx nhũm xa. Nhũm ihõja mã ho anẽ nẽ hipêx no ãm wamta kĩnhã ho hanhàjti nhũm omnajti nẽ xa. No ãm tãm kot hamẽ wa hipêx prãm xà hkôt wa hipêx kênã.

²²Tã na hte ã Tĩrtũm mẽ panhĩpêx anẽ. Te poti pynajre pyrã nẽ mẽ pahkwỳjê nhĩpêx nhũm mẽ kãm kapêr mar prãm kêt nẽ htỳx ri tanhmã amnhĩ tomnuj to ho ri pa. Hãmri nhũm amnhĩ tã mẽ omu nẽ te amnhĩ nẽ mẽ rênh kaxyw pyrãk o mẽ hipêx no ãm kormã hamaxpêr o: —Nà kot paj nhỹrmã mẽ kot amnhĩ tomnuj mỳrapê mẽ ho ijabêx pa nhũm mẽ piitã ja hã ixpumu nẽ inhmã ixàhpumunh o ixàhpumunh ã ijarẽ. Nẽ inhmã mẽmoj punuj piitã hkĩnh kêt kumrêx ã axpên mã ijarẽ. Anẽ.

²³Nom na hte jajê rom mẽ pahkwỳjê nhĩpêx o te poti mexta nhĩpêx pyrã nẽ amnhĩ kaxyw mẽ paxunhwỳ nẽ mẽ pahto hkra kaxyw. Nẽ mẽ pajarênh o: — Nà koja mẽ amnhĩ kaxyw Ixkra Jejus mã hamaxpêr nẽ hkôt amnhĩ xunhwỳ pa ja hã mẽ omu nẽ mẽ kamã ixukapřĩ ho ri ixpa. Nẽ mẽ ho mex pê mẽ kutã inhnojarêt rãhã ho ri ixpa. Hãmri nhũm mẽ nhỹrmã Ixkra mẽ wa ixri htĩr tũm nẽ mex nẽ pa ho pa. Kot paj ã mẽ ho mex anẽ nhũm mẽ amnhĩ tã ixpumu nẽ inhmã inhmex o inhmex ã ijarênh o pa. Anẽ. ã na hte Tĩrtũm ahpỳnhã mẽ pahpiitã mẽ panhĩpêx anẽ.

²⁴Nẽ na hte mẽ ixpê Ijaew pix o hkra hkêt nẽ. Na hte mããnên mẽ apê Ijaew kêt xwỳnhjê ho hkra.

²⁵Amnepê mã mẽ kãm kapêr jarênh o ri mẽ pa xwỳnhjê hõ pê finat Ojejja na pre te Tĩrtũm tãm kot Ijaew kêt xwỳnhjê jarênh pyrà nẽ mẽ harênh o: Amnepê na pa pre mẽ ho ixkra hkêt tã kot paj mẽ hkwỳjê ho ixkra. Na pa pre mẽ kamã ixukaprĩ hkêt tã pa ra inhmã mẽ hapê nẽ.

²⁶Nẽ ixte mẽ kêp ixkra hkêt ã mẽ harênh tã kot paj ra mẽ kêp ixkra hã mẽ harẽ. Ixpê mẽõ Tĩrtũm kot paj ã mẽ harênh anẽ. Anẽ.

²⁷Hãmri nhũm finat Ijais Ojej pãnhã tanhmã Ijaew jarênh to. Ijaisja Tĩrtũm nhỹ hã kapêr jarênh o ri pa xwỳnhjê hõ na pre. Jakamã nhũm Tĩrtũm kãm tanhmã mẽ ijarênh to nhũm kuma nẽ ô ri mẽ ixkukamã mẽ inhĩgêxjê mã ujarênh o pa nẽ hã kagà. Nẽ hã kagà ho: Ijaew na mẽ ohtô rax kumrêx. Te gô xujanâr mỳri pykahti grà hkryre xohtô pyràk. Tã koja mẽ piitã ixkôt amnhĩ xunhwỳr kêt nẽ. Koja mẽ ãm grêre nẽ amnhĩ kaxyw inhmã hamaxpêr nẽ ixkôt amnhĩ xunhwỳ. Jakamã mẽ tapxipixjaja koja hkwỳjê rom nhỹrmã inhõ krĩ hwỳr api.

²⁸No mẽ kot amnhĩ kaxyw inhmã mẽ hamaxpêr kêt xwỳnhjaja kot paj tokyx tanhmã mẽ harênh to. Mẽ kot amnhĩ tomnuj mỳrapê tanhmã mẽ harênh to nhũm mẽ ma mẽ kot amnhĩ xà htỳx kamã hamak tũm xàta wỳr ma pa. Nà kot paj tokyx ã mẽ hipêx anẽ. Anhỹr o mẽ harẽ.

²⁹Nom nhũm kormã ã mẽ harênh anhỹr kêt ri nhũm ra wam tanhmã mẽ harênh to nẽ mẽ harênh o: Amnepê Sotõ mẽ Komo kamã mẽ pa xwỳnhjaja na prem amnhĩ tomnuj tỳx rãhã ho ri pa. Mỳrapê nhũm Tĩrtũm xàhpumunh o àhpumunh xwỳnhja tee ri ja hã mẽ omu hãmri nẽ kaxkwa rũm mẽ ô krĩ wa hipy mẽmoj pôôta rẽ. Nhũm mẽ hã rôrôk nẽ mẽ ho hkaxàr pa nhũm mẽ hapêx. Tã na pu htem mẽ uràk nẽ amnhĩ tomnuj o ri papa. Jakamã kop ãm Tĩrtũm kot mẽ pahkwỳjê kamã ukaprĩ kêt ronhỹx pu mẽ ra mẽ uràk nẽ pahpiitã pajapêx pa. Anẽ.

Ijaew kwỳ kot Jesus kêt amnhĩ xunhwỳr kêt ã mẽ harênh

Rômãn 10.1-4

³⁰Nẽ Ijaew kêt xwỳnhjaja na prem Ijaew pyrà nẽ kãm Tĩrtũm prãm kêt tã Jesus jarênh ma nẽ Ijaew rom amnhĩ kaxyw hkôt hamaxpêr nẽ hkôt amnhĩ

xunhwỳ. Hāmri nhūm Tĩrtūm ja hā mẽ omu nẽ mẽ ho hkra nẽ mẽ kot amnhĩ to mex xwỳnhjê hā mẽ harẽ.

31-32Hāmri nhūm Ijaew tee ri mẽ kot Jejus kôt amnhĩ xunhwỳr ã mẽ omu nhūm ja mẽ kām mex kêt nẽ. Hāmri nhūm mẽ hamaxpêr o: —Tk. Kwa ra mẽ ixte finat Mojes kapêr kôt amnhĩ nhĩpêx mex o ri mẽ ixpa xwỳnh jakamã koja Tĩrtūm ja hā mẽ ixpumu nẽ mẽ ixte amnhĩ to mex xwỳnhjê hā mẽ ijarẽ nẽ mẽ inhnê mẽ ixte amnhĩ tomnuj rênh pa. No kot paj mẽ Ijaew kêt xwỳnhjê pyrà nẽ Jejus kôt amnhĩ xunhwỳr kêt nẽ. ãm kwarĩ ho kwarĩ. Anhỹr ã amnhĩ jarẽ. No ãm ã mẽ hamaxpêr anhỹrja mex kêt. Na prem htỳx Tĩrtūm noo mã kot amnhĩ to mex ã amnhĩ jarênh kaprỳ nẽ arĩ ri tanhmã amnhĩ tomnuj to ho ri pa. Te pry kamã kên nōr nhūm mẽ kot nhām nê mẽnh kaxyw hkamnār nẽ ho amnhĩ par krã hi kukênh pyræk o na htem amnhĩ nhĩpêx. Jao amnhĩ krã hkôt tanhmã amnhĩ nhĩpêx to ho pa hprām xàj te Jejus kapêrja nhām amnhĩ nê rênh pyræk o hipêx. Jakamã koja mẽ Tĩrtūm nhõ krĩ hwỳr àpir kêt nẽ.

33Tĩrtūm kapêr ã kagà htūm kot ja jarênh kot: E mẽ inhma. Kot paj nhỹrmã Ijaewjê hwỳr mẽhõ mẽ nhūm mẽ hkôt kapêr o pa. Nom koja mẽ kapêr mar kêt nẽ. Koja mẽ kuma nẽ ãm kuma. Te pry kamã kên nōr nhūm mẽ kot nhām pry nê mẽnh kaxyw hkamnār nẽ ho amnhĩ par krã hi kukênh pyræk o koja mẽ amnhĩ nhĩpêx. No te mẽ kot nhām pry nê mẽnh kaxyw hkamnār kêt pyræk xwỳnhjaja koja mẽ kurom nhỹrmã ma Tĩrtūm nhõ krĩ hwỳr api. Hāmri nẽ hkĩnh nẽ pa ho pa. Anẽ. Nom kên kumrêx jarênh kêt nẽ. Na prem Jejus ã kuxi nẽ ã harênh anẽ. Ijaew te mẽ kot kên nhĩpêx pyræk o Jejus nhĩpêx nẽ amnhĩ kaxyw hkôt hamaxpêr kêt nẽ axtem nẽ hkaga nẽ ãm kamã gryk pix o ri pata ã nhūm mẽ harẽ. No mẽ kot amnhĩ kaxyw hkôt hamaxpêr ronhỹx Jejus te kên kot mẽ kêp àmnār pyræk kêt nẽ. Jakamã ã mẽ harênh kot anhỹr.

Rōmãn 10

1Hêxta waa nẽ. Ijaxwỳja ixpê Ijaew. Mẽ kêp ixkwỳ jakamã kêp apu mẽ kot amnhĩ kaxyw Jejus mã hamaxpêr nẽ hkôt amnhĩ xunhwỳr ronhỹx pa ixkĩnh

tỳx kumrëx. Inhmã mẽ kêp Tĩrtũm kra hprãm tỳx kumrëx kênã. Inhmã ja prãm xàj na pa hte mẽ ho Tĩrtũm wỳr rãhã ho ri ixpa.

²Ra ixte mẽ omunh mex. Mẽ kãm Tĩrtũm mã tanhmã amnhĩ nhĩpêx to hprãm tã no ãm mẽ kot hprĩ hã kapêr mar kêt. Jakamã na htem tee ri tanhmã kãm amnhĩ nhĩpêx to ho ri pa hprãm kaprỳ.

³Nhũm pre Tĩrtũm tee ri amnhĩ tã mẽ omu nẽ hamaxpêr o: —Koja mẽhõ amnhĩ kaxyw Ixkra Kris kôt hamaxpêr nẽ hkôt amnhĩ xãm pa ja hã omu nẽ kot amnhĩ to mex xwỳnh ã harẽ nẽ ho ixkra kurê kumrëx. Nom na hte Ijaew ohtô nẽ ã amnhĩ nhĩpêx anhỳr kêt nẽ. Anhỳr o mẽ harẽ. ãm hãmri na ã mẽ harênh anẽ. Na htem ãm axtem nẽ hamaxpêr o: —Tk. Kot paj amnhĩ kaxyw Kris kôt ijamaxpêr nẽ hkôt amnhĩ xãm kêt nẽ. Kot paj ãm pam amnhĩ krã hkôt tãm ri amnhĩ nhĩpêx o ri ixpa. Mẽ ixpê Ijaewjê mẽ ixte amnhĩ nhĩpêx xà hkôt. Hãmri nhũm Tĩrtũm ja hã ixpumu nẽ amnhĩm inhmex ã ijarẽ. Nom kot paj Kris kôt amnhĩ xãm kêt nẽ. ãm kwarĩ ho kwarĩ. Anhỳr ã amnhĩ jarẽ.

⁴Nom na htem ãm htỳx ri amnhĩ krã hkôt amnhĩ to mex o pa hã amnhĩ kamnhĩx kaprỳ. Koja mẽ tee ri kãm finat Mojes kapêr kôt amnhĩ nhĩpêx o ri pa hprãm kaprỳ. Jejus tapxipix na pre tãm amnhĩ nhĩpêx mex rãhã ho pa. Na pre Tĩrtũm kapêr kôt amnhĩ nhĩpêx mex o ri pa nẽ aa kapêr õ nhĩrôp ãm nẽ hkwỳm ri tanhmã amnhĩ tomnuj to hkêt nẽ. Kot amnhĩ tomnuj kêt xwỳnh ã ãm pixi mex na. Jakamã tapxipix kukwak ri na hte Tĩrtũm amnhĩm mẽ pahte amnhĩ to mex xwỳnh ã mẽ pajarẽ.

Tĩrtũm kãm mẽ pahpiitã mẽ pahto hkra hprãm ã harênh

⁵Nẽ amnepêr na pre finat Mojes Tĩrtũm nhỹ hã Ijaew mã tanhmã ujarênh to nẽ hã kagà. Nẽ mẽ kãm ujarênh o: —E kot kaj mẽ atõ Tĩrtũm nhỹ hã ixujarênh ma nẽ hkôt amnhĩ nhĩpêx mex o ri apa nẽ hkwỳm ri tanhmã amnhĩ nhĩpêx to hkêt nẽ. Hã koja Tĩrtũm hã apumu nẽ amnhĩm ate amnhĩ to mex xwỳnh ã ajarẽ ka nhỹrmã kuri atĩr tũm nẽ amex nẽ apa ho apa. Anẽ.

⁶ã mẽ kãm kapêr anhỳr tã mẽ pahte Mojes kapêr xà hkôt amnhĩ nhĩpêx o papaja na mẽ pahpê hihtỳx kumrëx. Tĩrtũm kapêr tũm na. Kapêr ã kagà kamã kot mẽ pamã mẽ pahte tanhmã amnhĩ nhĩpêx to hã karõja ohtô rax

kumrëx jakamã pu mẽ tee ri pamã piitã hkôt amnhĩ nhĩpêx prãm kaprÿ. Nhũm Tĩrtũm tee ri amnhĩ tã mẽ pajamã hãmri nẽ mẽ pahwÿr Kra Jejus mẽ. Jakamã na pu htem amnhĩ kaxyw hkôt pajamexpër nẽ hkôt amnhĩ xunhwÿ nhũm Tĩrtũm hã mẽ pahpumu nẽ kukwak ri mẽ pahto hkra kurê kumrëx. Kra kukwak ri kot mẽ pahto hkra kaxyw kot mẽ pahwÿr mẽnũh nhũm mẽ kot hpĩr nhũm akupÿm ho htĩr jakamã na pu htem harẽnhja ma nẽ pajamexpër o: —Nà na xep pre Jejus ixto ixpê Tĩrtũm kra. Anẽ. Nom xà na hte Tĩrtũmja ã mẽ pamã kapër anẽ nẽ mẽ pamã: —E kot kaj mẽ ma kaxkwa hwÿr api nẽ Kris japrô nẽ man amnhĩ kôt akupÿn o wrÿ pa ja hã mẽ apumu nẽ mẽ ato ixkra. Anhÿr o mẽ pamã kapër? Nà na hte ã mẽ pamã kapër anhÿr kêt nẽ. Tanhmã kot puj mẽ amnhĩ to nẽ ã amnhĩ nhĩpêx anẽ?

⁷Rÿ xà na hte ã mẽ pamã kapër anẽ nẽ mẽ pamã: —E na pre Krisja ty. Jakamã mẽ kam nẽ ma hwÿr mra nẽ akupÿm amnhĩm ho htĩr. Hãmri pa ja hã mẽ apumu nẽ mẽ ato ixkra. Anhÿr o mẽ pamã kapër? Nà na hte ã mẽ pamã kapër anhÿr kêt nẽ. Tanhmã kot pu mẽ amnhĩ to nẽ akupÿm ho htĩr? Ja pyrã nẽ na hte Tĩrtũm mẽ pamã mẽmoj tã karõ pu mẽ kãm ho anhÿr nhũm ja hã mẽ pahpumunh kôt mẽ pahto hkra hkêt nẽ.

⁸Ãm mẽ pahte amnhĩ kaxyw Jejus kôt pajamexpër nẽ hkôt amnhĩ xunhwÿr ã mẽ pahpumunh kôt pix mã na hte mẽ pahto hkra. Hãmri nẽ mẽ pahwÿr Karõ rẽ nhũm mẽ pahkarõ mã gjêx jakamã mẽ pahte Tĩrtũm kãm hprãm xà hkôt amnhĩ nhĩpêx o papaja na mẽ pahpê hihtÿx kêt. Te kapër ra mẽ pahkrã hi kaxwÿnh kãm hikwÿ pyrãk o pu mẽ piitã mẽ kãm harẽnh o ri mẽ hkôt papa. Jakamã na pa hte mẽ piitã mẽ kot amnhĩ kaxyw Jejus kôt hamexpër kaxyw tanhmã mẽ kãm harẽnh to ho ri mẽ hkôt ixpa nẽ mẽ kãm:

⁹—Kot ka mẽ atõ Jejus kêp anhõ Pahihti hã harẽ nẽ Tĩrtũm kot akupÿm ho htĩr kôt ajamexpër. Hã koja Tĩrtũm ja hã apumu nẽ anê ate amnhĩ tomnuj o hapêx nẽ ato hkra. Ãm ja pix ã mẽ pahpumunh kôt na hte mẽ pahto hkra. Anẽ.

¹⁰Nẽ na pu htem mẽ pahkrãhi kaxwÿnh kãm amnhĩ kaxyw Jejus mã pajamexpër. Nẽ mẽ pajakwa ho kêp mẽ panhõ Pahihti hã harẽ. Hãmri nhũm

Tĩrtũm ja hã mẽ pahpumu nẽ amnhĩm mẽ pahte amnhĩ to mex xwỳnh ã mẽ pajarẽ nẽ mẽ pahto hkra.

11-13Tã mẽ pahte amnhĩ kaxyw Jejus kôt pajamexpěr nẽ hkôt amnhĩ xunhwỳr xwỳnhjaja kot puj mẽ pahkĩnh nẽ papa ho papa. Mẽ pahpiitã. Ijaew nẽ Ijaew kêt xwỳnhjaja. Mẽ pahpiitã mẽ panhõ Pahi Maatija ãm pyxi mex na. Jakamã koja Ijaewjê hõ rỳ Ijaew kêt xwỳnhjê hõ amnhĩ to kuwỳ nhũm kuma nẽ ho hkra. Kapěr ã kagà htũm kot ja jarẽnh kot: Mẽ kãm kệp Tĩrtũm kra hprãm xwỳnhjaja koja mẽ amnhĩ to Tĩrtũm wỳ nhũm mẽ kuma nẽ Jejus kot mẽ nê htyk kukwak ri mẽ nê mẽ kot amnhĩ tomnuj o hapêx nẽ mẽ ho hkra nhũm mẽ hkĩnh nẽ pa. Anẽ.

14-15Xà na htem kormã amnhĩ kaxyw Kris mã hamaxpěr kêt rãhã amnhĩ to Tĩrtũm wỳ nhũm mẽ kuma nẽ mẽ ho hkra? Nà tanhmã kot wem amnhĩ to nẽ amnhĩ kaxyw kãm hamaxpěr kêt rãhã amnhĩ to kuwỳ? Na hte Tĩrtũm ma mẽ hwỳr mẽ hkwỳjê rẽ nhũm mẽ ma mẽ hwỳr mra nẽ Tĩrtũm kapěr o mẽ ahkre ho ri mẽ hkôt pa. Nhũm mẽ hkwỳjaja mẽ kuma nẽ amnhĩ kaxyw Jejus kôt hamaxpěr nẽ amnhĩ to Tĩrtũm wỳ. Kapěr ã kagà htũm kot ja jarẽnh kot: Koja mẽmoj mex jarẽnh xwỳnhjaja ma mẽ hwỳr mra. Nẽ mẽ hwỳr hpôx o mỗ nhũm mẽ amỳm amnhĩ wỳr mẽ omu nẽ hkĩnh nẽ. Anẽ.

16Tã ra mẽ piitã kot kapěr mar tã piitã amnhĩ kaxyw hkôt hamaxpěr kêt nẽ. Jakamã nhũm finat Ijais tee ri ja hã mẽ omu nẽ Tĩrtũm mã mẽ harẽnh o: Pa Pahi Maati. Kwa ra mẽ kot akapěr mar tỳx tã akôt amnhĩ nhĩpêx kêt nẽ. Mẽ kãm akapěr kôt amnhĩ nhĩpêx o pa hprãm kêt. Na htem ãm grêre nẽ akôt amnhĩ xunhwỳ nẽ akôt amnhĩ nhĩpêx o ri pa. Anẽ.

17Kot anhỳr tã ãm mẽ kot Kris kapěr jarẽnh mar kôt pix mã na htem amnhĩ kaxyw hkôt hamaxpěr. Koja mẽ harẽnh mar kêt tã tanhmã koja wem amnhĩ to nẽ amnhĩ kaxyw hkôt hamaxpěr nẽ hkôt amnhĩ xunhwỳ?

18Mãn ka mẽ atõ atỳx ã ajamaxpěr anhỳr o: —Ko mãn Ijaew kormã Jejus kot mẽ panê tanhmã amnhĩ nhĩpêx to hã harẽnh mar kêt jakamã na mẽ kormã hkôt amnhĩ xunhwỳr kêt nẽ. Anhỳr o ajamaxpěr. Nom ja kot anhỳr kêt. Ijaew piitã ra mẽ kot harẽnh mar kênã. Tĩrtũm kapěr ã kagà htũm kot

ja hã mẽ harẽnh kot: Na prem ma mẽ piitã mẽ kãm ja jarẽnh o ri mẽ hkõt pa nhũm mẽ piitã kuma. Anẽ.

¹⁹Tã mãn ka prem ra ja ma nẽ atỳx ajamxpěr o: —Kot anhỹr tã no mãn kormã hprĩ hã Jejus jarẽnh mar kêt jakamã mẽ hkõt amnhĩ xunhwỳr kêt nẽ. Anẽ. Nom ja haxwỳja kot anhỹr kêt. Ra mẽ kot hprĩ hã harẽnh mar mex tã kuma nẽ ãm kuma nẽ amnhĩ kaxyw kãm hamaxpěr kêt nẽ. No mẽ apê Ijaew kêt xwỳnh kwỳjaja na ka mẽ kurom harẽnh ma nẽ amnhĩ kaxyw hkõt ajamxpěr nẽ hkõt amnhĩ xunhwỳr kurê kumrẽx. Hãmri nhũm Ijaew tee ri ja hã mẽ apumu nẽ mẽ akamã gryk tỳx nẽ. Nom ra Tĩrtũm kot ã mẽ hkukamã mẽ kot amnhĩ nhĩpêx anhỹr ã mẽ omunh nẽ mẽ harẽnh kot anhỹr kênã. Na pre finat Mojes mẽ kãm tanhmã hã kagà hto. Te Tĩrtũm tãm kot mẽ hã kagà pyrã nẽ kapêr ã kagà htũm kamã kot mẽ harẽnh kot: Mẽ ate mẽ kamã mẽ akahak o apa xwỳnhjaja. Mẽ kot htỳx ri amnhĩ nhĩpêx o mẽ pa hã mẽ ate mẽ harẽnh tã no kot paj mẽ arom amnhĩm mẽ kot amnhĩ to mex xwỳnhjê hã mẽ harẽ. Kot kaj mẽ tee ri ja hã mẽ omu nẽ mẽ kamã agryk tỳx kumrẽx. Nẽ mãănẽn pa ixte mẽ ho mex ã ixpumu nẽ mẽ hã ixkamã agryk nẽ. Anẽ.

²⁰Nẽ finat Ijais na pre haxwỳja ã mẽ harẽnh anẽ. Na pre kãm amnhĩ kwỳ pê Ijaew puma hkêt nẽ xatã Tĩrtũm nhỹ hã tanhmã mẽ kãm Ijaew kêt xwỳnhjê jarẽnh to ho pa. Te Tĩrtũm tãm kot mẽ harẽnh pyrãk o mẽ kãm: Nà Ijaew kêt xwỳnhjaja kot Tĩrtũm japêr kêt tã koja tãm mẽ kãm amnhĩ to amnhĩrĩt nhũm mẽ hkõt amnhĩ xunhwỳ. Mẽ kot kormã amnhĩ kaxyw kãm hamaxpěr kêt tã koja tãm mẽ kãm amnhĩ to amnhĩrĩt. Anẽ.

²¹Ã Ijaew kêt xwỳnhjê jarẽnh kot anhỹr. Nẽ axte mã tanhmã Ijaewjê jarẽnh to kot: Te mẽ katorxà kot tanhmã hkrajê ho mex to kaxyw tee ri amnhĩ wỳr mẽ kãm àkjêr pyrãk o na hte Tĩrtũm Ijaewjê nhĩpêx o pa. Jao tee ri kãm tanhmã mẽ ho mẽ mex to hprãm tã no nhũm mẽ amnhĩ tã kuma nẽ ãm kuma nẽ hkõt amnhĩ nhĩpêx kêt nẽ. Anẽ.

Rõmãn 11

Tĩrtũm kot Ijaew kamã ukapĩ hã harẽnh

Matêwre 13.10-17

¹Tã ra Ijaew kot Tĩrtũm kaga jakamã mãn ka mẽ atõ mẽ harẽnh ma nẽ ajamaxpẽr o: —Mãn pre Tĩrtũm tee ri amnhĩ tã mẽ omu nẽ amnhĩ pyrã nẽ mẽ hkaga. Anhỹr o ajamaxpẽr. Nom na pre mẽ hkaga hkêt nẽ. Ijaxwỳja ixpê Ijaew na pa. Mẽ uràk nẽ ixpê Ijaew pàr krax pê finat Apraãw kanrẽhã htàmnhwỳ Pẽjamĩ kanrẽhã hõ na pa. Tã xà na pre Tĩrtũm ixkaga? Nà kot ixkaga hkêt.

²Amnepêm kormã mẽmoj piitã hkêt ri na pre mẽ ixpê Ijaew hkukamã mẽ ixto hkra hã amnhĩ jarẽ. Tã nhũm amgrà xohtõ nẽ hapêx nhũm mẽ hapôj hãmri nẽ Tĩrtũm kôt amnhĩ nhĩpêx o pa hkêt nẽ. Hãmri nhũm finat Erisja tee ri mẽ kot amnhĩ nhĩpêx ã mẽ omunh o pa nẽ Tĩrtũm mã tanhmã mẽ harẽnh to nẽ mẽ hã kagà. Nẽ hã kagà ho:

³Kwa Tĩrtũm. Mẽ ixte amã amnhĩ jarẽnh xà hã mēsti hkwỳ na prem ra hkrakrak pa. Nẽ anhỹ hã akapẽr jarẽnh o ri mẽ pa xwỳnh kwỳ nhĩmex rax nẽ. ãm papxipix na pa arĩ ixtĩr nẽ ri ixpa nom nhũm mẽ ra kot ixpĩr kaxyw ixtã amnhĩ jarẽ. Anẽ.

⁴Tã tanhmã na Tĩrtũm kutã kãm kapẽr to? Na pre kãm: Nà kapxipix na ka arĩ atĩr kêt nẽ. Arĩ mẽ ohtõ nẽ apyrã nẽ amnhĩ kaxyw ixkôt hamaxpẽr. Mẽ ohtõ. Arĩ mẽ kęp 7.000 nẽ akwỳjê rom ri sãnti Paaw kutã hkõnkrã ho hkrĩ nẽ kãm mex ã harẽnh kêt nẽ. Anẽ.

⁵Tã arĩ ã jarãhã mẽ kot ã amnhĩ nhĩpêx anhỹr kẽnã. Tĩrtũm kãm Ijaew japê jakamã mẽ kamã ukapriĩ. Jakamã nhũm ra mẽ hkwỳjaja mẽ pahpyrã nẽ amnhĩ kaxyw Kris kôt hamaxpẽr nhũm Tĩrtũm mẽ ho hkra.

⁶Nom mẽ kot amnhĩ to mex ã mẽ omunh xà hkôt mẽ ho hkra hkêt nẽ. Amarĩ kãm mẽ hapê htũm xà hkôt na hte mẽ ho hkra. Kop apu mẽ kot amnhĩ to mex ã mẽ omunh xà hkôt kot mẽ ho hkra ronhỹx amarĩ mẽ ho hkra hkêt nẽ. Nhỹx mẽ kot tanhmã amnhĩ nhĩpêx to ho pa hã mẽ omunh xà hkôt pix mã mẽ ho hkra.

⁷Ijaew piitã Tĩrtũm kot amnhĩm mẽ mex ã mẽ harẽnh prãm tã no ãm mẽ grẽre nẽ hamaxpẽr xà hkôt Jejus kôt amnhĩ xunhwỳ. Na htem ohtõ rax nẽ

kapër ma nẽ ãm kuma nẽ tee ri kot amnhĩm mẽ mex ã mẽ harẽnh prãm xàj amnhĩ krã hkõt tanhmã amnhĩ nhĩpêx to ho ri pa. Nom ra mẽ kot Jejus kaga jakamã ã amnhĩ nhĩpêx anhỹr kaprỳ. Mẽ kot hkaga jakamã te ri mẽ hamak kro nẽ Tĩrtũm kapër mar kêt pyrà nẽ pa.

⁸Tĩrtũm kapër ã kagà htũm kot mẽ harẽnh kot: Tĩrtũm na hte mẽ kãm kapër mar prãm kêt xwỳnhjê pumu nẽ ãm mẽ omu nhũm htem htỳx ri pa ho pa. Nẽ Tĩrtũm mã hamaxpër kêt o ri pa. Mẽ kot kapër mar tã hprĩ hã mar tỳx kêt nẽ. Nẽ mẽ kot kapër ã kagà kamã harẽnh tã hprĩ hã mar tỳx kêt nẽ. Jakamã na htem amnhĩ kaxyw hkõt hamaxpër kêt o pa. Tã na htem arĩ jarãhã ã amnhĩ nhĩpêx anhỹr o ri pa. Te mẽ nohkre nẽ mẽ hamak kro xwỳnh kot amnhĩ nhĩpêx pyræk. Anẽ.

⁹Nẽ amnepêm na pre pahi finat Tawija amnhĩ kwỳ Ijaew jarẽnh o: Na htem htỳx ri hkĩnh kãm apkur o pa. Te tutre kãm prãm nẽ kot rapuuti hwỳr àr nẽ tee ri kãm kator prãm kaprỳ pyræk. Ja pyrà nẽ mẽ kot Tĩrtũm kapër mar kêt mỳrapê koja Tĩrtũm tanhmã mẽ ho nhũm mẽ tee ri kãm mex prãm kaprỳ.

¹⁰Te mẽ nohkre xwỳnhjaja tee ri mẽ hpa nhĩpêx o pa pyræk. Nẽ omnuj nẽ à nẽ ho gjêx o ri pa pyræk o amnhĩ nhĩpêx o ri pa. Anhỹr o mẽ harẽ.

¹¹Tã arĩ Ijaew Jejus kaga nẽ kãm kapër mar prãm kêt jakamã xà na Tĩrtũm tee ri ja hã mẽ omu nẽ mẽ hkaga kumrêx? Nà kot mẽ hkaga hkêt. ãm mẽ tãmjaja kêp Jejus prãm nõkati jakamã nhũm tee ri ja hã mẽ omu nẽ mẽ hpãnhã Ijaew kêt xwỳnhjê mã amnhĩ to amnhĩrĩt nẽ mẽ hkwyjê ho hkra. Jakamã koja Ijaew kwỳjaja ja hã mẽ omu nẽ tee ri hamaxpër nẽ hamaxpër o: —Kwa na xep Ijaew kêt xwỳnh kwỳjaja Jejus kõt amnhĩ xunhwỳ nhũm Tĩrtũm ja hã mẽ omu nẽ mẽ ho hkra. Kwa mon pu prem axtem nẽ ri Jejus kaga? E pu mẽ kuxwar amnhĩ kaxyw hkõt mãn pajamaxpër nẽ hkõt amnhĩ xunhwỳ kê Tĩrtũm ja hã mẽ pahpumu nẽ Ijaew kêt xwỳnhjê pyrà nẽ mẽ pahto hkra. Hãmri nẽ amnhĩ mã mẽ pahte amnhĩ to mex xwỳnh ã mẽ pajarẽ. Anẽ. ã Ijaewjaja hamaxpër anhỹr kaxyw na pre Tĩrtũm Ijaew kêt xwỳnhjê mã amnhĩ to amnhĩrĩt.

¹²Hāmri nhūm mẽ amnhĩ tã omu nẽ hkĩnh nẽ pa. No nhūm Ijaew kwỳjaja. Mẽ kām Jejus prām nõkati ho mẽ pa xwỳnhjaja mẽ hkĩnhã hkaprĩ nẽ pa. Tã koja mẽ nhỹrmã amnhĩ kaprĩ hã amnhĩ pumu nẽ amnhĩ kĩnh kêt ã amnhĩ pumu hāmri nẽ Tĩrtũm kôt amnhĩ xunhwỳr nẽ amnhĩ kaxyw Kra Jejus Kris mã hamaxpěr japêr. Koja mẽ ã amnhĩ nhĩpêx anẽ hāmri nẽ Ijaew kêt xwỳnhjê pyrà nẽ hkĩnh nẽ ri pa. Hāmri nhūm Tĩrtũm ja hã mẽ omu nẽ Ijaew kêt xwỳnhjê mẽ mẽ ho hpimràatã mẽ ho mex rax nẽ nhūm mẽ hkĩnh nẽ hamakêtkati nẽ pa ho pa.

Tĩrtũm kot Ijaew kêt xwỳnhjê ho hkra hã harẽnh

¹³E kot paj hpãnhã mẽ apê Ijaew kêt xwỳnhjê mã ixkapěr nẽ mẽ atã kagà. Na pre Jejus ma mẽ awỳr inhmẽ. ỹ hã ixte mẽ ajahkre ho ri mẽ akôt ixpa kaxyw. Pa pre ma krĩ hkwỳ kamã mẽ akwỳjê hwỳr mō nẽ ixkĩnh kām mẽ kām kapěr jarẽnh o ri mẽ hkôt ixpa. Nhūm mẽ hkwỳjaja inhma nẽ amnhĩ kaxyw Jejus kôt hamaxpěr nẽ hkôt amnhĩ xunhwỳ.

¹⁴Tã koja apu ixkwỳjaja mẽ harẽnh mar japêr. Ijaew tee ri mẽ apê Ijaew kêt xwỳnhjê jarẽnhja ma hāmri nẽ ra amnhĩ kamã gryk japêr. Jao mẽ apyrà nẽ Jejus kôt amnhĩ xunhwỳ nẽ nhỹrmã kuri htĩr tũm nẽ mex nẽ pa ho pa.

¹⁵Kormã mẽ kot amnhĩ kaxyw kām hamaxpěr kêt jakamã na pre Tĩrtũm hpãnhã mẽ apê Ijaew kêt xwỳnhjê mã amnhĩ to amnhĩrĩt. Ka mẽ ra krĩ piitã hkôt axohtô nẽ hkôt amnhĩ xunhwỳ nẽ hkôt amnhĩ nhĩpêx mex o ri apa. Tã koja Ijaewjaja nhỹrmã amnhĩ kaxyw Tĩrtũm mã hamaxpěr nẽ mẽ apyrà nẽ Jejus kôt amnhĩ xunhwỳr japêr. Hāmri nẽ te mēhō hkra kêp htyk nhūm hkaprĩ htã nhūm hkraja tanhmã amnhĩ to nẽ akupỹm kām htĩr nhūm kot omunh nẽ hkĩnh tỳx kumrẽxta pyræk o amnhĩ nhĩpêx. Jao Tĩrtũm mẽ kot hkôt amnhĩ xunhwỳr ã mẽ omu nẽ hkĩnh nẽ. Pu mẽ pahpimràatã uræk nẽ pahkĩnh nẽ ri papa.

¹⁶E pa mẽ amã mẽ ujarẽnhja ã ejêp kwỳ jarẽ. Koja mẽmo pĩ hpàr jarê mex nẽ hã koja pàr mex nẽ xa. Ja pyrà nẽ Ijaew pàr krax finat Apraãwja kumrẽx na pre amnhĩ kaxyw Tĩrtũm mã hamaxpěr nhūm ho hkra. Jakamã koja nhỹrmã hkanrẽhã htãmnhwỳjaja uræk nẽ amnhĩ kaxyw kām hamaxpěr

nhũm mã mẽ ho anẽ nẽ mãănẽn mẽ ho hkra nhũm mẽ mex nẽ pa. Te kot mẽmo pĩ hpàr jarê mexja nhỹ hã pàr mexta pyràk.

17Nẽ na htem akunĩ kamã mẽmo pĩ hpa jakà nẽ hamỳ nẽ ma amnhĩ kôt o mra. Nẽ ixkre kapem ra mẽ kot mẽmo pĩ hkreja hpa jakàr nẽ rẽn h xwỳnh xwakre kamã wam pĩ hpa jakàr xwỳnhhta nhô nẽ axpẽn tã hkaxpre nẽ gaa nẽ axpẽn jamỳnh mex nẽ grà hkêt nẽ. Nẽ arĩ htĩr mex nẽ. Te kệp hpa kumrẽx pyràk. Tã Ijaew kwỳ kot amnhĩ kaxyw Jejus kôt hamaxpěr xwỳnhjaja te mẽ kệp ixkre kapem pĩ hpàrta pyràk. No mẽ hkwyjaja mẽ kot Jejus kaga xwỳnhjaja te mẽ kệp mẽ kot kệp hpa jakàr nẽ rẽnhta pyràk. Jakamã nhũm Tĩrtũm te mẽ kot pàr pẽ hpa jakàr nẽ rẽnhta pyràk o mẽ hipêx nẽ mẽ hkaga. Nẽ axtem te mẽ kot mẽmoj pàr pa jakàr nẽ hpãnhã kamã axtem pĩ hpa janhõr nẽ hã hkaxpreta pyràk o mẽ apê Ijaew kêt xwỳnhjê nhĩpêx nẽ mẽ amã amnhĩ to amnhĩrĩt. Ka mẽ ra amnhĩ kaxyw Jejus mã ajamaxpěr nẽ hkôt amnhĩ xunhwỳ nhũm Tĩrtũm mẽ ato mex nẽ.

18Tã kêt ka mẽ arĩ Ijaew o mex o ri apa. Tanhmã ri mẽ hipêx to mã ajamaxpěr to hkêt nẽ. Rỳ ajamaxpěr o: —Nà ãm hãmri na Tĩrtũm mẽ hkaga nẽ ãm kãm mẽ papxipixjê japê. Anhỹr o ajamaxpěr kêt nẽ. Ijaew te ixkre kapem pĩ hpàr mexta pyràk. No mẽ kajaja te mẽ ate akunĩ rũm pĩ hpa kot ixkre kapem pàr mex pix kukwak ri htĩr nẽ hã harirta pyràk. Kêt akunĩ rũm pĩ hpa jakàr kukwak ri na hte ixkre kapem pàrta htĩr nẽ kuhê hkêt nẽ. Kop apu pàrta mex kêt ronhỹx ra akunĩ rũm hpaja grà pa. Ja pyrà nẽ Ijaew kukwak ri kot kaj mẽ nhỹrmã Tĩrtũm ri atĩr tũm nẽ apa ho apa. Jakamã kwa kêt ka mẽ ate amnhĩ to rũnh o mẽ hakrenh ã amnhĩ to jarkrar kêt nẽ.

19Mãn ka mẽ atõ ajamaxpěr o: —Ra Tĩrtũm kot Ijaew kaga nẽ hpãnhã mẽ pajaja mẽ ixto hkra jakamã mãn kãm mẽ ijapê ho mẽ hakre. Ra mẽ hpãnhã mẽ ixto hkra kênã. Anẽ.

20Nà ãm hãmri na pre Tĩrtũm Ijaew kwỳ kaga. Mẽ kot Jejus kôt amnhĩ xunhwỳr kêt mỳrapê na pre te mẽmo pĩ hpa jakàr nẽ rẽnhta pyràk o mẽ hipêx. Ka mẽ ra mẽ kurom amnhĩ kaxyw hkôt ajamaxpěr jakamã nhũm Tĩrtũm te kot akunĩ kamã pĩ hpa jakàr nẽ ho htẽm nẽ ixkre kapem pĩ hpàr

mex ã hanhôr nê hã hkaxpre pyræk o mẽ anhîpêx. Nom kwa kêr ka mẽ ja hã amnhî pumu nê ri hã Ijaewjê mã amnhî to jarkrar kêr nê. ãm amnhî to mex nê Tirtûm kapêr kôt amnhî nhîpêx mex o ri apa. No kot kaj mẽ ã amnhî nhîpêx anhÿr kêr nhûm amnhî tã mẽ apumu nê ra kot Ijaew kwÿ nhîpêxta pyrà nê tanhmã mẽ ato nê mẽ akaga.

²¹ ã Ijaew jarênh kot anhÿr. Te mẽ kêp pàr mex pyræk. Tã nhûm mẽ kot Jejus kôt amnhî xunhwÿr kêr jakamã nhûm Tirtûm te kot pî hpa jakàr nê rênhta pyræk o mẽ hipêx nê mẽ homnuj nê. Kot kaj mẽ uræk nê ã amnhî nhîpêx anê nhûm mã mẽ ato anê nê.

²² Ijaew kot Jejus kôt amnhî xunhwÿr kêr jakamã nhûm Tirtûm mẽ hpãnhã mẽ apê Ijaew kêr xwÿnhjê mã amnhî to amnhîrît. Tã ka mẽ Ijaew rom amã Jejus prãm nhûm Tirtûm ja hã mẽ apumu nê amnhî pyrà nê kãm mẽ aprãm nê mẽ akamã ukapří rãhã nê pa ho pa. Tã kwa mẽ okora. Kêr ka mẽ hkôt pix mã amnhî nhîpêx o ri apa rãhã ty. Kot kaj mẽ hkaga nhûm amnhî tã mẽ apumu nê te Ijaew kot hkaga xwÿnhjê nhîpêx pyræk o mẽ anhîpêx nê mẽ akaga.

²³ Kojã Ijaew nhÿrmã Jejus kôt amnhî xunhwÿr japêr nhûm Tirtûm ja hã mẽ omu nê mẽ ho hkra. Te mẽ kot pàr pa jakàr nê rênh nhûm grà par xwÿnh nhûm kot akupÿm amnhîm hamÿnh nê ixkre kapem pàr wÿr o htêm nê akupÿm hã hanhôr nê hã hkaxpre ho htÿx nhûm kukwak ri akupÿm htírta pyræk. Ja kêp tanhmã kute hkêr. Kot ã hipêx anhÿr kaxyw àhpumunh tÿx.

²⁴ Mẽ apê Ijaew kêr xwÿnhjaja te mẽ ate akunî kamã pî hpa jakàr nê ixkre kapem pàr ã hanhôr nê hã kaxpreta pyræk. Jao Jejus kôt amnhî xunhwÿ nhûm mẽ ato hkra kurê kumrêx. No Ijaew te mẽ kêp ixkre kapem pàrta pyræk jakamã Tirtûm kot akupÿm hanhôrta tanhmã kêp kute hkêr. Kêp Tirtûm kênã kot tanhmã kêp kute. Jakamã kojã mẽ hkôt amnhî xunhwÿ nhûm amnhî tã mẽ omu nê mẽ ho hkra kurê kumrêx.

Tirtûm kot mẽ piitã mẽ kamã ukapří hã harênh

Matêwre 23.37-39; Rukre 21.24; Juãw 10.16

²⁵E kot paj mẽ amã mẽmoj to amnhĩrĩt ka mẽ inhma. Nà na pa ra mẽ amã Ijaew krã xihyt̃x xwỳnhjê jarẽ ka mẽ harẽnh ma. Ra mẽ kot Jesus kaga hã mẽ harẽnhja. Tã koja mẽ ã amnhĩ nhĩpêx anhỹr o pa rãhã hkêt nẽ. Na hte Tĩrtũm kormã amnhĩ tã mẽ apê Ijaew kêt xwỳnhjê jamãr o pa. Amnepê m na pre amnhĩ kaxyw mẽ akukamã tanhmã mẽ akwỳjê jarẽnh to. Tã kot kaj mẽ kot tanhmã mẽ ajarẽnh to xwỳnh piitã Jesus kôt amnhĩ xunhwỳr pa nhũm rĩ Ijaew amnhĩ to hapu nẽ kormã hkôt amnhĩ xunhwỳ. ã mẽ kot amnhĩ nhĩpêx anhỹr kaxyw. Jakamã kwa kêr ka mẽ ri ja hã amnhĩ to jarkrar o ri mẽ hkôt apa hkêt nẽ. Mẽ pahpyrà nẽ mẽ kot Jesus kôt amnhĩ xunhwỳr mã xwỳnh kênã.

²⁶Koja Tĩrtũm nhỹrmã Ijaew piitã ho hkra. Kapêr ã kagã htũm kot mẽ harẽnh kot: Nhỹrmã kot mẽ ate amnhĩ tomnuj pê mẽ apytãr mã xwỳnhja Ijaew õ koja. Jako hkanrêhã htãmnhwỳjê hõ koja. Koja nhỹrmã wrỳ nẽ mẽ ate amnhĩ tomnuj pê mẽ apytã nẽ mẽ ate amnhĩ tomnuj o hapêx pa. Anẽ. Anhỹr o kot harẽnh.

²⁷Nẽ mããnẽn ja: Kot paj mẽ nê mẽ kot amnhĩ tomnuj o ijapêx pa. Amnepê mã ixte mẽ hkukamã mẽ hã amnhĩ jarẽnh xà hkôt. Anẽ.

²⁸Nom arĩ mẽ kãm Jesus mar prãm kêt jakamã te mẽ kot kutã amnhĩ xunhwỳr pyrãk o amnhĩ nhĩpêx. Tã ã mẽ kot amnhĩ nhĩpêx anhỹrja ri ka mẽ kamjaja mẽ hpãnhã mẽ apê Tĩrtũm kra. Nom nhũm Tĩrtũm arĩ kãm mẽ hapêê. Na pre amnepê mã kot tanhmã mẽ ho mex to hkukamã tanhmã mẽ hã amnhĩ jarẽnh to. Mẽ hpàr kraxjê mã tanhmã mẽ hã amnhĩ jarẽnh to. Finat Apraãw mẽ Ijak mẽ Jakoja mã mẽ hkanrêhã mẽ htãmnhwỳjê hã tanhmã amnhĩ jarẽnh to.

²⁹Na hte Tĩrtũm mẽmoj tã tanhmã amnhĩ jarẽnh to nẽ ãm hãmri hã amnhĩ jarẽ nẽ amnhĩ jarẽnh xà hkôt tanhmã hipêx to. No na hte mẽmoj tã amnhĩ jarẽnh tã gaa nẽ ho hamakêtkati hkêt nẽ. Rỳ hpãnhã axtem tanhmã hipêx to hkêt nẽ. Na hte mẽmoj tã amnhĩ jarẽnh xà hkôt tanhmã hipêx to. Tã ra amnepê mã kot Ijaew o mex ã amnhĩ jarẽnh jakamã koja nhỹrmã mẽ ho mex rax nẽ ã mẽ hipêx anhỹrja o hamakêtkati hkêt nẽ.

³⁰No mẽ kajaja mẽ apê Ijaew kêt xwỳnhjaja. Amnepêm na ka prem ajaxwỳja Tĩrtũm kôt amnhĩ nhĩpêx kêt nê. Tã nhũm mẽ akamã ukapĩ nê kãm mẽ ajapê nê. Ka mẽ ra harênh ma nê hkôt amnhĩ xunhwỳ nê hkôt amnhĩ nhĩpêx mex nê. No ãm Ijaew kukwak ri. Mẽ kot kapêr kôt amnhĩ nhĩpêx o pa hkêt jakamã nhũm Tĩrtũm mẽ hpãnhã nhãm mẽ amã amnhĩ to amnhĩrĩt nê mẽ ato mex rax nê. Jakamã te Ijaew kukwak ri mẽ amex nê ri mẽ apa pyræk.

³¹Tã koja nhỹrmã kot mẽ anhĩpêxta pyrà nê Ijaew ho hkra. Nê mẽ apyrà nê mẽ kamã ukapĩ nê. Mẽ kot mẽ apyrà nê amnhĩ kaxyw Kra hkôt hamaxpêr xwỳnhjaja nhũm mẽ apyrà nê mẽ ho hkra nê mẽ ho mex nê.

³²Mẽ apê Ijaew kêt xwỳnhjaja nê mẽ ixpê Ijaew mẽ pahte xpên pyræk. Na pu htem pahpiitã Tĩrtũm kapêr piitã hkôt amnhĩ nhĩpêx rãhã ho ri papa hkêt nê. Tã kot puj mẽ tee ri ja hã amnhĩ pumu nê amnhĩ to kuwỳ nhũm mẽ pama nê amarĩ mẽ pakamã ukapĩ nê mẽ pahto mex nê.

Pawre kot Tĩrtũm mex o mex ã harênh

Epes 3.20; Korosê 1.16; Wam Korĩt 2.9; 2.16

³³Tĩrtũmja àhpumunh tỳx o àhpumunh tỳx. Nê ukapĩ ho ukapĩ nê mex o mex. Mẽ pahtõ na pu uræk nê ã amnhĩ nhĩpêx anhỹr o papa? Nà amrakati kumrêx. Nê mẽ pahtõ na pahte Tĩrtũm jamaxpêr kôt omunh? Nà mẽ pahte hamaxpêr kôt omunh kêt.

³⁴Kapêr ã kagà htũm kot ja jarênh kot: Mẽ pahte Tĩrtũm jamaxpêr kôt omunh kêt. Nê kot pu mẽ pahtõ mẽmoj tã hakre hkêt nê. Mẽ parom àhpumunh o àhpumunh xwỳnh kênã.

³⁵Nê mẽ pahtõ kot puj we kãm pakapêr nê kãm: “Kwa Tĩrtũm. Ra ixte amã mẽmoj nhõrta pãnhã kwa amnhĩ xwar inhmã mẽmoj gõ.” Anê. Nà mẽmoj piitã õ kênã kot puj kêt ri ã kãm mẽmoj nhõr ã amnhĩ jarênh anê. Anê.

³⁶Tãm na pre amnhĩ kaxyw mẽmoj piitã ho kator pa. Nê ãm pix kukwak ri na mẽmoj piitã htĩr nê pa. Jakamã kwa pu mẽ kãm mex o mex ã mãn harênh rãhã ho ri papa.

Rõmãn 12

Mẽ pahte Tĩrtũm mã amnhĩ nhõr ã mẽ pajarênh

Wam Korīt 6.20; Epes 4.1; Piripos 4.8-9; Korosē 1.10; Wam Tesarōn 4.1-3; Wam Pêtre 2.11

¹Kwa Jejus kôt ixkwỳjaja. Tĩrtũm na hte mẽ pahto mex nẽ mẽ pakamã ukapřĩ rãhã jakamã na pa ã mẽ amã ixkapěr anẽ. Kwa mẽ tokyx kãm amnhĩ jarẽ nẽ kãm amnhĩ gõ. Te mẽ ate kãm hkĩnh xà nhõr pyràk o amnhĩ nhĩpêx nẽ kãm amnhĩ gõ. Jao mẽ amã kapěr kôt pix mã amnhĩ nhĩpêx o ri apa hprãm ã kãm amnhĩ jarẽ. Nẽ kãm hprãm xà hkôt pix mã tanhmã amã amnhĩ nhĩpêx to ho ri apa hprãm ã kãm amnhĩ jarẽ. Kot kaj mẽ ã kãm amnhĩ jarẽnh anẽ nhũm amnhĩ tã mẽ ama nẽ hkĩnh nẽ. ã mẽ pahte kãm amnhĩ jarẽnh anhỹrja na kãm mar prãm.

²Nẽ kêr ka mẽ kãm Tĩrtũm prãm kêt xwỳnhjaja kot amnhĩ nhĩpêx o ri amnhĩ nhĩpêx o ri apa hkêt nẽ. Nẽ mẽ amnhĩ to Tĩrtũm mãn wỳ kê mẽ amã mẽ ajamaxpěr mex jagjê. Kojã mẽ ama nẽ mẽ amã hagjê ka mẽ ra aprĩ hã hamaxpěr xà hkôt mẽ pahte amnhĩ to mex xà pumunh mex nẽ. Na pu htem hkôt amnhĩ nhĩpêx o ri papa nhũm amnhĩ tã mẽ pahpumu nẽ hkĩnh nẽ. Pu mẽ pajaxwỳja ã hã pahkĩnh nẽ ri papa.

Kris kwỳjaja kot tanhmã axpẽn nhĩpêx to hã mẽ kãm karõ

Rõmãn 12.1-11; Epes 4.11-16; Wam Pêtre 4.10-11

³Nẽ na pre Tĩrtũm ixto mex nẽ. Nẽ mẽ akaxyw ixãm. Ixte mẽ amã Kra Jejus kot tanhmã mẽ panê amnhĩ nhĩpêx to hã harẽnh o ri mẽ akôt ixpa kaxyw. Tã na pa ã kagàja kamã mẽ amã harẽnh anẽ. Jakamã kwa kêr ka mẽ amnhĩ to jarkrar o ri mẽ kãm apa hkêt nẽ. ãm kwarĩ ho kwarĩ. Rỳ atỳx ri ajamaxpěr o: —Nà pa na ixte amnhĩ to mex o ixte ixkwỳjê piitã mẽ hakrenh par. Anhỹr ã amnhĩ to jarkrar o ri mẽ hkôt apa hkêt nẽ. Kêt mẽ ãm amnhĩ jarẽnh o: —Na pa pre amnhĩ kaxyw Jejus kôt ijamaxpěr nhũm Tĩrtũm ixpumu nẽ ixto hkra. Jakamã na pa hte Jejus Kris pix kukwak ri tãm amnhĩ nhĩpêx o ri ixpa. No amnhĩ krã hkôt ã amnhĩ nhĩpêx anhỹr kêt nẽ. Anẽ.

⁴E pa mẽ amã mẽmoj jarẽ ka mẽ inhma. Nà mẽ panhĩja pyxi htã kamã mẽmoj xohtôô. Na kamã mẽ pano nẽ mẽ pajakwa. Nẽ kamã mẽ pajamak nẽ mẽ pahte. Na pu htem mẽ pano ho rĩt nẽ mẽ pajakwa ho pakapěr. Nẽ mẽ pajamak o ri ama nẽ mẽ pahte ho ri mra.

⁵Ja pyrà nê Kris kôt mẽ pahte amnhĩ xunhwỳr xwỳnhja ãm pyxi tã hkôt mẽ pahte amnhĩ xunhwỳr xwỳnhjaja mẽ paxohtôô. Jakamã na pu htem ahpỳnhã tanhmã axpẽn to mex to ho ri papa. Jao Kris kôt axpẽn to pahtô nê pahtôx o papa.

⁶Tĩrtũm na hte mẽ pahpê hkwỳ hã ahpỳnhã mẽ pamã tanhmã mẽmoj tã karô to nê kaxyw mẽ pahto mẽ paxihtỳx. Tã kêr pu mẽ ra kot mẽ pamã mẽmoj tã karô xà hkôt kãm amnhĩ nhĩpêx rãhã ho ri papa. Jakamã koja mẽhõ ate Tĩrtũm kapêr jarênh o ri apa kaxyw axãm nê amã anê ka Tĩrtũm kamnàr rom mẽ kãm kapêr jarênh mex o ri mẽ hkôt apa.

⁷Rỳ ate akwỳjê mã tanhmã axàpênh to ho ri apa kaxyw axãm ka mẽ kãm axàpênh mex o ri mẽ hkôt apa. Rỳ ate Tĩrtũm kapêr ho mẽ ahkre ho ri apa kaxyw axãm ka ho mẽ ahkre mex o ri apa.

⁸Rỳ ate Tĩrtũm kapêr o ri Jejus kôt mẽ akwỳjê jamaxpêr o hihtỳx o ri apa kaxyw axãm ka mẽ kãm kapêr jarênh pê mẽ ho mẽ hihtỳx mex o ri mẽ hkôt apa. Rỳ ka mẽ atõ akukrêx rax japêr nê ate mẽ kêp amrakati xwỳnhjê mã mẽmoj nhõr o ri apa kaxyw axãm ka axàmnhĩx ri mẽ kãm mẽmoj nhõr o ri mẽ hkôt apa. Rỳ ate akwỳjê ho amnhĩptàr kaxyw axãm ka mẽ ho amnhĩptàr mex o ri apa. Rỳ ate tanhmã mẽ akwỳjê ho mex to nê mẽmoj to mẽ kutã anojarêr o ri apa kaxyw axãm ka akĩnh kãm ã mẽ hipêx anhỳr rãhã ho ri apa nê tanhmã akapêr punuj to hkukamã ri ajamaxpêr o ri mẽ hkôt apa hkêt nê.

⁹Nê kêr ka mẽ apiitã amã axpẽn kĩnh kãm axpẽn to mex rãhã ho ri apa nê ri axêx rom amã axpẽn kĩnh ã amnhĩ jarênh o ri apa hkêt nê. Nê mẽ kot amnhĩ tomnuj xà piitã hkaga hpa nê hpãnhã mẽ kot amnhĩ to mex xà pix pyr tỳx nê hkôt amnhĩ nhĩpêx rãhã ho ri apa.

¹⁰Nê mẽ apê Kris kwỳ hã amã axpẽn kĩnh kãm tãm axpẽn nhĩpêx o ri apa. Nê mẽ akwỳjaja mẽ kot amnhĩ to mex xwỳnh ã mẽ harênh o ri mẽ hkôt apa. No mẽ ri atỳx ajamaxpêr o: —Nà koja mẽhõ ixkumrêx ixte tãm amnhĩ nhĩpêx xwỳnh ã ijarê pa rĩ kormã amnhĩ xwar tãm kot amnhĩ nhĩpêx xwỳnh

ã harẽ. Anhÿr o ajamaxpër kêt nẽ. Kêr ka akumrêx tãm kot amnhĩ nhĩpêx xwÿnh ã harẽ.

11Nẽ kêr ka mẽ Tĩrtũm mã mẽmoj to anhÿr kaxyw nẽ kamã amã kaga hkêt kãm tanhmã kãm mẽmoj to ho ri apa. Jao akĩnh kamã kãm ho anhÿr mex nẽ.

12Nẽ mẽ nhÿrmã Tĩrtũm kot kaxkwa kamã mẽ ato mex rax kukamã ajamaxpër nẽ akĩnh rãhã kãm mẽmoj to anhÿr o ri apa. Nẽ kêr ka mẽ tanhmã amnhĩ to rÿ nhũm mẽhõ tanhmã mẽ ato ka mẽ akaprĩ nẽ ri apa htã no ãm tee ri amnhĩ kukamã ajamaxpër o Tĩrtũm kaga hkêt nẽ. Arĩ amnhĩ to hwÿr rãhã ho ri apa.

13Nẽ koja Kris kôt atõjê hõ kêp amrakati ka mẽ ja hã omu nẽ anhõ mẽmoj japêr nẽ mãmrĩ kãm hkwÿ gõ. Nẽ amnhĩ wÿr awÿ nẽ tanhmã ho mex to.

14Nẽ mẽ kot tanhmã mẽ atomnuj to xwÿnhjaja kêr ka mẽ amnhĩ tã mẽ omu nẽ agryk nẽ wajaga kot tanhmã amã ho kaxyw hwÿr atêm nẽ kãm tanhmã hã axàmnhẽnh to hkêt nẽ. Kêt ãm ho Tĩrtũm pix wÿ nẽ kãm: —Pa mẽ ijamãr mex xwÿnh maati. Nà na ixkwÿjê hõja ã inhĩpêx anẽ. Tã nom kêr ka ixtã tanhmã homnuj to hkêt nẽ. ãm tanhmã ho mex to. Anhÿr o mãn mẽ ho awÿ.

15Nẽ koja akwÿjê hõ mẽmoj tã hkĩnh nẽ. Ka omu nẽ uràk nẽ ÿ hã akĩnh nẽ. No koja mẽmoj tã hkaprĩ nẽ mÿr o nhÿ ka omu nẽ ra uràk nẽ ÿ hã akaprĩ nẽ.

16Nẽ kêr ka mẽ piitã mẽ hipêx o axpên pyràk o ri apa. Te mẽ ate amnhĩ to rax o akwÿjê jakrenh o te mẽmoj kamã akahak o amnhĩ nhĩpêx pyràk kêt nẽ. Nẽ axàhpumunh tÿx o ate mẽ piitã mẽ hakrenh par pyràk o ri amnhĩ nhĩpêx o ri apa hkêt nẽ.

17Nẽ koja mẽhõ tanhmã ato htã ka ãm amnhĩ tã omu nẽ tanhmã amnhĩ tã ho hkêt nẽ. Nẽ mẽ piitã mẽ noo mã tãm ri amnhĩ nhĩpêx o ri apa.

18-19Nẽ kêr ka mẽ tãm ri axpên mã akapêr rãhã ho ri apa. Nẽ kot kaj akràmnhwÿ mẽ wa tanhmã axpên nhĩpêx to. Hãmri ka wa akupÿm tãm axpên xãm kaxyw kãm akapêr tã nhũm ama nẽ ãm ama nẽ akaga. Ka ãm

amnhĩ tã omu nẽ kamã agryk kêt nẽ. Kojã Tĩrtũm tãm tanhmã atã ho. Kapẽr ã kagà htũm kot ja jarẽnh kot: Kêr ka mẽ amnhĩ tã tanhmã kot ato xwỳnh to hkêt nẽ. Pa kot paj mẽ atã tanhmã ho. Anẽ. Nẽ harẽnh kot:

²⁰Kêr ka mẽ amã mẽ kãm mẽ akurê xwỳnhjê o mex pix o ri apa. Kê mẽ kãm prãm ka ja hã mẽ omu nẽ mẽ kamã axukaprĩ nẽ mẽ kãm mẽmoj kwỳ gõ kê mẽ kuku. Rỳ nhũm mẽ kãm kôr ka mẽ kãm gô hkwỳ kê mẽ ho ixkô. Kot kaj mẽ ã amnhĩ tã mẽ hipêx mex anẽ nhũm mẽ tee ri amnhĩ tã mẽ apumu nẽ amnhĩ kamã hpijaàm jao mẽ atã amnhĩ kamã gryk nẽ. Anẽ.

²¹Nom kot kaj mẽ amnhĩ tã tanhmã mẽ homnuj to hãmri nẽ ajaxwỳja uràk nẽ amnhĩ tomnuj nẽ. Ja pymaj kêr ka mẽ amnhĩ rom tãm mẽ hipêx. Hãmri nhũm mẽ amnhĩ tã mẽ apumu nẽ mẽ apyrà nẽ tãm mẽ anhĩpêx japêr. E kêr ka mẽ ã axpẽn nhĩpêx o ri apa anẽ.

Rômãn 13

Mẽ pahto amnhĩptàr xwỳnhjê jarẽnh

Matêwre 22.21; Xitre 3.1; Wam Pêtre 2.13-17

¹Nẽ kêr ka mẽ kot mẽ ato amnhĩptàr xwỳnhjê kapẽr ma nẽ kapẽr kôt ri amnhĩ nhĩpêx rãhã ho ri apa. Tĩrtũm kot mẽ pakaxyw mẽ unhwỳr kênã. Mẽ kot mẽ pahto amnhĩptàr o pa kaxyw na hte mẽ unhwỳ.

²Jakamã kojã mẽhõ mẽ kapẽr ma nẽ ãm kuma nẽ hkôt amnhĩ nhĩpêx kêt nẽ hãmri nẽ te kot Tĩrtũm kapẽr mar nẽ ãm mar pyràk o amnhĩ nhĩpêx. Hãmri nhũm Tĩrtũm tee ri ja hã omu nẽ nhỹrmã tanhmã hã ho.

³Xà na hte tãm mẽ kot amnhĩ nhĩpêx xwỳnhjaja kãm mẽ kot mẽ ho amnhĩptàr xwỳnhjê puma ho pa? Nà na htem kãm mẽ uma hkêt kãm ri pa. ãm mẽ kot amnhĩ tomnuj xwỳnh pixjaja na amnhĩ kamã kãm mẽ uma ho pa. Tã ka mẽ amã mẽ kot mẽ ato amnhĩptàr xwỳnhjê puma hprãm kêt xwỳnhjaja kêr ka mẽ kapẽr ma nẽ hkôt amnhĩ nhĩpêx kê amnhĩ tã mẽ apumu nẽ hkĩnh nẽ. Nẽ amnhĩm mẽ ate amnhĩ to mex xwỳnh ã mẽ ajarẽ.

⁴Tĩrtũm nhỹ hã mẽ panhõ pahi kot mẽ pahto amnhĩptàr jakamã na htem mẽ kãm mẽ pahto mex prãm nẽ. Nẽ kot pu mẽ pahtõ axtem nẽ tanhmã amnhĩ tomnuj to hãmri nhũm tee ri ja hã pajarẽnh ma nẽ tanhmã hã mẽ pahto. ãm

hāmri na hte ã mẽ pahto amnhĩptàr xwỳnhjaja mẽ panhĩpêx anê. Tĩrtũm kãm hprãm xà hkôt.

⁵Jakamã kwa mẽ kapêr ma nê hkôt ri amnhĩ nhĩpêx mex rãhã ho ri apa. Nom amã kot tanhmã ato pix pymaj hkôt ri amnhĩ nhĩpêx kêt nê. Mããnên ã amnhĩ kukamã ajamaxpêr anê nê ajamaxpêr o: —Nà Tĩrtũm kot mẽ ixkaxyw unhwỳr jakamã na pa hte kapêr ma nê hkôt amnhĩ nhĩpêx mex o ri ixpa. Anhỹr o ajamaxpêr.

⁶Nê mẽ pahto amnhĩptàr xwỳnhjaja kot Tĩrtũm nhỹ hã tanhmã mẽ panhĩpêx to ho pa jakamã na pu htem mẽ àpênh pãnhã mẽ kãm amnhĩre. Mẽ pahpiitã axpên kaxyw kãm kàxpore ho hkryre nê kugõ. Tanhmã kot ho mẽ pamã mẽmoj to mex to kaxyw.

⁷Jakamã kêr ka mẽ hã apijaàm o ri apa kamã mãmri mẽ kãm kàxpore hkwỳ ho hkryre nê òr o ri apa. Mẽ kot hã àhwỳr xà hkôt.

Mẽ pahte tanhmã axpên nhĩpêx to hã mẽ pamã karõ

Matêwre 22.39-40; Karatas 5.13-15; Wam Juãw 3.11-24

⁸Nê kêr ka mẽhõ ho tewên japêr nê tokyx kãm amnhĩre. Nê mẽ amã axpên kĩnh o aa ho ajamakêtkati hkêt nê. Jao mẽmoj to axpên kutã anojarêt rãhã ho ri apa. Kot kaj mẽ ã axpên nhĩpêx anê nê Tĩrtũm kapêr piitã hkôt amnhĩ nhĩpêx mex o ri apa.

⁹Amnepê mã na pre finat Mojesja Tĩrtũm nhỹ hã Ijaew mã mẽmoj tã karõ nê mẽ kãm: Kêr ka mẽ aprõ pix tãnopxa nê nhãm mênijê hõ kamã ri akurê ho apijaàm kêt o apa hkêt nê. Nê mẽ anijaja mẽ amjên pix tãnopxa nê nhãm ri mẽmyjê hõ kamã akurê ho apijaàm kêt o ri apa hkêt nê. Nê mẽ ri axpên par kêt nê. Nê mẽ ri axpên pê axàhkĩnh o ri apa hkêt nê. Nê mẽ amã ri axpên kukrêx kĩnh o ri amã ho anhõ hprãm o ri apa hkêt nê. Anê. Nê mããnên ja: Kêr ka mẽ nhãm mẽ axpên nhĩpêx o te ka amã amnhĩ tã ma pyræk. Jao tãm axpên nhĩpêx o ri apa. Anê. ã kot mẽ kãm hã karõ kot anhỹr. Kot puj mẽ ã pamã pahkwỳjê kĩnh anê nê mããnên wam finat Mojes kot mẽmoj tã mẽ panhĩgêjtê mã karõ hkôt amnhĩ nhĩpêx o ri papa rãhã nê. Jao axpên par kêt nê. Nê axpên pê paxàhkĩnh kêt nê. Nê axpên kutã panojarêt rãhã nê.

¹⁰Koja mēhō kām amnhī tā ma pyrāk o hkwỳjê nhīpêx nē mē ho mex pix o pa. Jakamā kot kaj mē amā ri axpēn kīnh nē mēmoj to axpēn kutā anojarēt pix nē. Jao Tīrtūm kapēr piitā hkôt amnhī nhīpêx mex o ri apa.

¹¹Amnepê mā mē pahte amnhī kaxyw Jejus kôt pajamexpēr xà hā arīgrota ã na pre kormā akupỹn mē pahwỳr hpôx xà hā arīgro kormā hwỳr awry rax nē. Tā ra hwỳr ahtêp o mō. Koja tokyx akupỹn mē pahwỳr wrỳ nē ma akupỹm kaxkwa hwỳr mē pahto api. Jakamā kwa kêr pu mē arī hamār rāhā ho ri apa. Jao tanhmā amnhī tomnuj to kaxyw nē pajamexpēr o: —Kwa koja Jejus tanhmā amnhī to nē jarāhā akupỹn wrỳk japêr. Tā kot pa ri ã amnhī nhīpêx anē nhūm wrỳ nē tee ri ja hā ixpumu pa amnhī kamā ixpijaàm tỳx nē. Nà kot paj ã amnhī tomnuj anhỳr kêt nē. Anē. Hāmri nē Jejus kamā ajamak pê kutêp Tīrtūm kapēr kôt pix mā ri amnhī nhīpêx mex rāhā ho ri papa.

¹²Na pu htem kamāt kām gōr nē arīgro jamār pê kamā pajamak o panhīkwỹ. Arīgro te kêp Jejus akupỹn wrỳk pyrāk. Jakamā kwa pu mē kamā pajamak pê kām panojarēt rāhā ho ri papa nē amnhī nē tanhmā mē omnu xà kute pumunh mex o ri papa. Te ho pôristi kot amnhī nē mē kot kām mē hkurê xwỳnhjê pumunh mex pyrāk o Jejus kutêp tām amnhī nhīpêx o ri papa. Na pre tanhmā mē pahkrā hto pu mē ỹ hā tām ri amnhī nhīpêx. Tā kêr pu mē arī ã amnhī nhīpêx anhỳr o ri papa nē te mē pahte arīgro hā mē pa xwỳnhjê kot amnhī nhīpêx pyrāk o amnhī nhīpêx.

¹³Kot puj mē ã amnhī nhīpêx anē nē mē piitā mē noo mā tee ri tanhmā mē pahte amnhī tomnuj to mā pajamexpēr kêt nē. Jao amnhī kamā pahpijaàm nē ri papa hkêt nē. Nē pajamakêtkati nē paxàmnhīx ri papa. Te ho hirā kamā ri mē pa xwỳnhjê kot amnhī nhīpêx pyrā nē ãm ri paxàmnhīx tām amnhī nhīpêx o ri papa. Nē mē pahprō pix tănopxar o ri papa. Nē mē pahpipānh nē ri papijapu ho ri papa hkêt nē. Nē mēmoj tā axpēn mā paxàkjêr hkêt nē. Nē mēmoj tā axpēn kām pagryk kêt nē.

¹⁴Nom kot puj mē axtem nē ã amnhī tomnuj anē nē mē pahte amnhī nhīpêx tūm kôt pix mā amnhī nhīpêx. Tā kêr pu mē ã amnhī nhīpêx anhỳr pumaj

hpãnhã amnhĩ to Pahihti Jejus Kris wỳ nẽ kãm: —Pa Jejus. Nà kormã jar apa ri na ka pre mẽ kot tanhmã amnhĩ tomnuj to kutã axihtỳx o axihtỳx nẽ aa tanhmã amnhĩ tomnuj to hkêt nẽ. Tã inhmã apyrà nẽ ixte amnhĩ tomnuj kutã ixihtỳx o ixihtỳx o ixpa hprãm. Anẽ. Jao mẽ pajamaxpěr tũmja te ra kot amnhĩ tã mẽ pahto htỳx kêt pyræk o pu mẽ amnhĩ nhĩpêx o ri papa.

Rõmãn 14

Mẽ pahte Kris kôt pahkwỳjê mã paxàkjêr kêt ã mẽ pamã karõ

Matêwre 7.1-5; Rõmãn 2.1; Wam Korĩt 10.23-33; Xiakre 4.11

¹Nẽ koja mẽhõ kormã Jejus kôt amnhĩ xãm nyw ri kormã hkôt hamaxpěr tohtuj anẽ. Hãmri nẽ htỳx tanhmã hamaxpěr to nẽ mẽmoj mex kaga. Ka mẽ ja hã omu nẽ ãm omu nẽ hã tanhmã kãm nẽ hkêt nẽ. Kwãr mãmrĩ ã amnhĩ nhĩpêx anẽ. Koja gaa nẽ rĩ hprĩ hã Tĩrtũm kapěr mar tỳx nẽ hãmri nẽ hkôt mẽmojta pumunh mex nẽ.

²Jakamã koja Jejus kôt akwỳjê hõ mẽ apkur xà piitã hkur pymaj tanhmã hõ kute hã harẽ nẽ hkaga nẽ hamaxpěr o: —Nà kot pa ja hkur kêt nẽ. Kot pa apu kuku nẽ hkur o amnhĩ tomnuj nẽ. Anẽ. Kwãr mãmrĩ ã hamaxpěr anẽ nẽ hkur kêt nẽ. Nom mẽ pahte Jejus kôt amnhĩ xunhwỳr tỳx xwỳnhjaja na pu htem paxàmnhĩx Jejus kamnàr rom mẽmoj piitã kuku. Nom mẽ pahkĩnhã ham mẽ kot hkôt amnhĩ xunhwỳr xwỳnhjaja kormã kapěr piitã mar kêt jakamã kwãr mẽ mãmrĩ anẽ nẽ mẽmoj kur kêt nẽ.

³Nom kêr ka mẽ ri tanhmã hã mẽ kãm akapěr to hkêt nẽ. Rỳ mẽ kãm: —Kwa mẽ ixpyrà nẽ mẽmoj piitã aku. Anhỳr o mẽ kãm akapěr kêt nẽ. Ano ho ãm hã mẽ omu. Nẽ mẽ ate mẽmoj piitã hkur kêt xwỳnhjaja kêr ka mẽ ajaxwỳja mẽ ixte mẽmoj piitã hkur ã tanhmã mẽ inhmã axàkjêr to hkêt nẽ. Mẽ ixte mẽmoj piitã hkur o ixpa hã mẽ ixpumu nẽ ãm hã mẽ ixpumu nẽ hã tanhmã mẽ inhmã axàkjêr to hkêt nẽ. Rỳ hã mẽ inhmã: —Kwa nà kot kaj mẽ ja kur o amnhĩ tomnuj nẽ. Anhỳr o hã mẽ inhmã akapěr kêt nẽ. Ano ho ãm ja hã mẽ ixpumu. Mẽ pahte ahpỳnhã tanhmã paxàpkur to htã Tĩrtũm kot mẽ pahte Kra Jejus kôt amnhĩ xunhwỳr xwỳnh piitã mẽ pahto hkra kênã.

⁴Jakamã kwa mẽmoj tã tanhmã axpën mã axàkjêr to ho ri apa hkêt nê. Koja Kris kôt atōjê hõ axtem tanhmã hamaxpêr to ka mẽ tee ri ja hã omu nê tanhmã hã kãm nê hkêt nê. Rỳ ajamaxpêr o: —Tk. Na hte ã ri amnhĩ nhĩpêx anhỹr o pa. Ja omnuj. Pa na pa hte ã amnhĩ nhĩpêx anhỹr kêt nê. Anhỹr o ri axpën kukamã ajamaxpêr hkêt nê. Mẽ pahpê Tĩrtũm kêt kênã kot pu kêt mẽ ã ri axpën kukamã pajamaxpêr anê. Tĩrtũm pix na hte tanhmã mẽ pajarênh to xwỳnh. àhpumunh o àhpumunh xwỳnh jakamã koja tanhmã mẽ hkrã hto nhũm mẽ rĩ kormã tãm hamaxpêr pê àmnhĩx ri tanhmã amnhĩ nhĩpêx to ho pa.

⁵Nê koja Jejus kôt atōjê hõ mẽmo arĩgromnu jarê nê hã àpênh kêt nê. Ka mẽ apê hkwyjaja tee ri ja hã omu nê ajamaxpêr o: —Nà arĩgro piitã mẽ pamã mex kênã. Kot paj mãmri arĩgro piitã hã apê. Anhỹr o ajamaxpêr japêr. Nom kêr ka mẽ ja hã axpën mã tanhmã axàkjêr to hkêt nê. Na pu htem ahpỳnhã pamã tanhmã mẽ pahte amnhĩ nhĩpêx to hprãm xà hkôt tanhmã amnhĩ nhĩpêx to. No tanhmã ri hã axpën mã paxàkjêr to ho ri papa hkêt nê.

⁶Kêt mẽ kot arĩgromnu jarênh xwỳnhjê mẽ mẽ pahte arĩgro piitã mex ã harênh xwỳnhjaja mẽ pahpiitã mẽ pahpê Tĩrtũm kraa. Jakamã mẽ pahpiitã na pu htem pajamaxpêr o: —Na pa hte Tĩrtũm kãm hprãm xà hkôt ã amnhĩ nhĩpêx anhỹr o ri ixpa. Anê. Nê mẽ pahte mẽmoj piitã hkur xwỳnhjaja nê mẽ kot mẽmoj kwỳ hkur kêt xwỳnh piitã mẽ pahpê Tĩrtũm kraa. Mẽ pahpiitã mẽ pamã kãm hprãm xà hkôt amnhĩ nhĩpêx prãm jakamã na pu htem paxàpkur kaxyw nê Tĩrtũm mã amnhĩ jarê nê kãm: —Pa mẽ ijamãr mex xwỳnh maati. Nà ãm hãmri na ka hte apkati mẽ mẽ inhmã mẽ inhõ ho apa. Amex o amex Tĩrtũm. Anhỹr o kãm amnhĩ jarê. Hãmri nê kormã hkamnàr rom paxàmnhĩx ri tanhmã mẽõ kuteta ku.

⁷⁻⁸Mẽ pahpê Tĩrtũm kra jakamã na pre ra mẽ pakukamã tanhmã mẽ pajarênh to. Mẽ pakukamã pahtyk ã arĩgro jarê nê mẽ pahte pahtĩr ri tanhmã ri amnhĩ nhĩpêx to ho papa hkukamã hamaxpêr. No mẽ papajaja na pu htem amnhĩ krã hkôt tanhmã mẽ pahte amnhĩ nhĩpêx to kukamã paxàhpumunh kêt.

⁹Jakamã na pre Kris ja hã mẽ pahpumu nẽ tãm mẽ pakaxyw amnhĩ to kêp mẽ panhõ Pahihti nẽ mẽ panê ty. Hãmri nẽ akupým htĩr. Kêp mẽ panhõ Pahihti hã akupým htĩr. Kêp mẽ pahte hkôt amnhĩ xunhwỳr xwỳnhjê nhõ Pahihti kaxyw. Jakamã kêp ra mẽ pahkwỳ htyk xwỳnhjê nhõ Pahihti nẽ mããnẽn kêp arĩ mẽ pahtĩr xwỳnhjê nhõ Pahihti.

¹⁰No mẽ papajaja mẽ pahpê Kris kôt mẽ pahkwỳjê nhõ pahi hkêt jakamã kêr mẽ Kris kôt akwỳjê hõ tanhmã amnhĩ nhĩpêx to hã omu hãmri nẽ tanhmã ho akapêr to hkêt nẽ. Rỳ ajamaxpêr o: —Kwa na ã amnhĩ nhĩpêx anẽ. Inhmã ja mex kêt. Anhỳr o ajamaxpêr kêt nẽ. Koja nhỹrmã Tĩrtũm tãm mẽ pahpiitã tanhmã mẽ pahte amnhĩ nhĩpêx to hã mẽ pahpumunh xà hkôt tanhmã mẽ pajarênh to. Nom kêr pu mẽ papajaja amnhĩ hkrã hkôt ã axpẽn jarênh anhỳr kêt nẽ.

¹¹⁻¹²Kot puj mẽ nhỹrmã pahpiitã Tĩrtũm kutã pahkrĩ nẽ kãm tanhmã amnhĩ jarênh to. Kormã mẽ pahtĩr ri tanhmã mẽ pahte amnhĩ nhĩpêx to ho papa hã kãm pahprĩ hã amnhĩ jarẽ. Kê mẽ pama nẽ tanhmã mẽ pajarênh to. Kapêr ã kagà htũm kot mẽ pakukamã mẽ pajarênh kot: Koja nhỹrmã mẽ piitã ixpê mẽ õ pahi hã ixkutã hkõn krã ho rôrôk nẽ hkrĩ nẽ inhmã inhmex o inhmex ã ijarẽ. Nẽ mẽ piitã ixpê Tĩrtũm ã ixpyxi mex ã ijarẽ. ãm hãmri na pa ã mẽ hkukamã mẽ harênh anẽ. Anẽ.

Mẽ pahte Kris kôt pahkwỳjê ho mex ã mẽ pamã karõ

Wam Korĩt 8.9-13

¹³Nẽ kwa kêr ka mẽ akwỳ kot Jejus kôt amnhĩ xunhwỳr tohtuj anhỳr xwỳnhjaja tanhmã mẽ kot amnhĩ nhĩpêx to ho pa hã mẽ omu nẽ ja nẽ tanhmã mẽ kãm akapêr to hkêt nẽ. ãm mẽ noo mã tãm ri amnhĩ nhĩpêx rãhã ho ri apa. Mẽ kot ja hã mẽ apumunh nẽ mẽ akôt amnhĩ nhĩpêx kaxyw. No kot ka mẽ kot tanhmã amnhĩ nhĩpêx toja ã kãm akapêr nhũm ama nẽ tee ri amnhĩ kukamã hamaxpêr nẽ hkaprĩ nẽ.

¹⁴E kot pa hpãnhã mẽ paxàpkur xà hã tanhmã mẽ panhõ jarênh to. Ixte Pahihti Jejus jamaxpêr xà hkôt tanhmã ijamaxpêr to ho ri ixpa jakamã kot paj ixkatàt kôt mẽ amã tanhmã mẽ panhõ jarênh to nẽ ãm hãmri harẽ. Nà mẽ paxàpkur xàja ãm pixi nẽ omnu hkêt. Piitã mex o mex. Nom koja mẽhõ

tee ri mēmo mē apkur xà hō pumu nē hamaxpēr o: —Nà kot paj ja hkur kêt nē. Kot paj apu kuku nē ho amnhĩ tomnuj nē. Anē. Hāmri nē hkur kêt nē. Tã kwār māmri ã hamaxpēr anē nē hkur kêt nē. Nom na ãm amnhĩ krã hkôt Tĩrtũm kēp ja omnuj ã hkamnhĩx. Kēp omnuj kêt. Ra kot mēmo mē paxàpkur xà piitã mex ã harēnh.

¹⁵Tã kot kaj mē kot mēmoj kur kêt xwỳnhta py nē o tē nē kot hkaga xwỳnh noo mã hkur o xa nhũm apumu nē tee ri hamaxpēr nē hkaprĩ nē. Jakamã kot ka mē ã noo mã amnhĩ nhĩpêx anhỹrja o ho mex kêt nē. Kwa mē ã ri axpēn nhĩpêx anhỹr hkêt nē. Kot ka mē ã axpēn nhĩpêx anē nē te amnhĩ pix kukamã ajamaxpēr pyrãk o amnhĩ nhĩpêx. Jao akwỳjê ho mex kukamã ajamaxpēr kêt nē. Kris kãm mē hapê htỳx kôt mē kot amnhĩ tomnuj pãnhã amnhĩrer kaxyw ra nê htyk kēnã kot ka kêt mē axtem nē ri ã mē noo mã mē kot mēmoj kur kēeta kur anē. Rỳ koja apu tee ri kot mēmoj kur kēeta kur ã mē apumu nē tanhmã amnhĩ tomnuj to. Jao Kris kaga japêr. Jakamã kwa mē ã mē noo mã mēmojta kur kêt nē.

¹⁶Mēmo mē apkur xàja mex tã nhũm mē akwỳjê hō kãm mex kêt japêr ka mē noo mã hkur kêt nē. Nē tanhmã hã kãm nē hkêt nē. Kot kaj mē anē nhũm Kris kra hkêt xwỳnhjaja tee ri ja hã mē apumu nē tanhmã axpēn mã mē apê Kris kwỳjê ho kapêr punuj to.

¹⁷Mē pahpê Tĩrtũm krajaja na pu htem paxàpkur xà nē pahkõm xà pix kukamã pajamaxpēr o ri papa hkêt nē. Na pu htem amnhĩ mē pahkwỳjê mex kukamã pajamaxpēr. Nē mē pahte tãm amnhĩ nhĩpêx kukamã pajamaxpēr. Nē tãm axpēn nhĩpêx kukamã pajamaxpēr. Kot puj mē ã amnhĩ nhĩpêx anē nhũm Tĩrtũm Karõ ja hã mē pahpumu nē mē pahto mē pahkĩnh nē. Pu mē pahkĩnh nē pajamakêtkati nē ri axpēn kôt papa.

¹⁸Tã kot puj mē ã Kris mã tanhmã amnhĩ nhĩpêx to ho ri papa anē nhũm Tĩrtũm ja hã mē pahpumu nhũm ja kãm mex nē. Nē Kris kôt mē pahkwỳjê mã haxwỳja ja mex nē.

¹⁹Jakamã kēr pu mē tãm axpēn mã pakapêr o ri papa. Nē pajamakêtkati nē axpēn kôt ri pajapôj. Nē Kris kôt tanhmã axpēn to paxihtỳx to ho ri papa.

²⁰No kot ka mẽ axàpkur xà gryk ã akwỳ hkukamã ajamaxpër kêt nẽ atỳx ri mẽhõ noo mã mẽmoj kur japêr. Kêp omnuj tã ka mẽ ãm amnhĩ pix kukamã ajamaxpër nẽ noo mã hkur japêr. Hãmri nhũm ja hã mẽ apumu nẽ ra kot Tĩrtũm kaga mã. Ra kêp hkra jakamã kwa mẽ noo mã mẽ kot mẽmoj punuj ã harẽnh xwỳnhhta kur kêt nẽ. Nom mẽ paxàpkur xàja piitã mex. Tĩrtũm kot mẽ pamã òr jakamã piitã mẽ panhõõ. Tã koja akwỳjê hõ Tĩrtũm kêp mẽmoj omnuj ã hkamnhĩx tã ka mẽ noo mã aku nẽ ho amnhĩ tomnuj nẽ.

²¹Kêr pu mẽ pahkwỳjaja tanhmã kot amnhĩ tomnuj to pymaj pu mẽ pahte amnhĩ nhĩpêx kukamã pajamaxpër mex o papa. Mẽmo mẽõ nẽ mẽmo kagõ pê wĩhtija. Tĩrtũm kot mẽ pamã mẽmoj piitã òr tã no nhũm mẽ pahkwỳjaja kêp ja omnuj nẽ pu mẽ noo mã hkur rỳ ho pahkõm kêt nẽ. Mẽmo mry nẽ mẽmo wĩhti pu mẽ noo mã hkur rỳ ho pahkõm kêt nẽ.

²²Nẽ kêr ka mẽ atõ mẽmoj krêr kaxyw nẽ hkukamã ajamaxpër o: —Nà kot paj ja krê. Tĩrtũm kãm ja mex kênã. Anẽ. Hãmri nẽ mãmri Tĩrtũm kamnàr rom axàmnhĩx akrê. Kãm ja mex kênã kot ka kêt ri tee ri hkrêr kaxyw hkukamã ajamaxpër nẽ hkaga.

²³No kot kaj mẽ atõ mẽmoj to anhỳr kaxyw nẽ tee ri amnhĩ kukamã ajamaxpër nẽ ajamaxpër o: —Ko kot paj apu ja ho anẽ nhũm Tĩrtũm hã ixpumu nhũm ja kêp omnuj nẽ rỳ ko. Anẽ. Hãmri nẽ tee ri amnhĩ kukamã ajamaxpër. Tã ra ã amnhĩ nhĩpêx anẽ nẽ akrê rỳ mẽmoj to anẽ. Hãmri nhũm Tĩrtũm tee ri ã ate amnhĩ nhĩpêx anhỳr ã apumu nhũm ja kêp omnuj nẽ. Ate hkamnàr rom mẽmoj to anhỳr kêt nẽ amarĩ amnhĩ krã hkõt ho anhỳr jakamã ho amnhĩ tomnuj nẽ.

Rõmãn 15

Mẽ pahte amnhĩ pix kukamã pajamaxpër kêt ã mẽ pamã karõ

Makre 10.45; Wam Korĩt 10.24; Piripos 2.3-5

¹Nẽ kêr pu mẽ pahte ra Jejus kõt amnhĩ xunhwỳr tỳx xwỳnhjaja amnhĩ kõt kormã mẽ kot Jejus kõt amnhĩ xunhwỳr totuj janhỳr xwỳnhjê jamãr mex nẽ. Jao mẽ kamã pagryk tokyx anhỳr kêt nẽ. ãm mẽ kutã panojarêt pix o papa. Jao ra amnhĩ pix kukamã pajamaxpër kêt nẽ.

²Mãänēn amnhĩ mẽ Kris kôt mẽ pahkwỳjê hkukamã măn mẽ pajamaxpēr. Jao mẽ kot tãm amnhĩ nhĩpêx kaxyw mẽ ho mex o ri papa.

³Kris na pre jar pa ri amnhĩ pix kukamã hamaxpēr kêt nē. Na pre mãänēn õ Papaj kukamã hamaxpēr. Jakamã Tĩrtũm kapēr ã kagà htũm kot kãm kapēr jarēnh kot: Pa Papaj. Na hte mẽ pahkurê xwỳnhjaja ixto kapēr punuj nē. Nom mãänēn ã ato kapēr o pa anē. Anē.

⁴Mẽ pakaxyw na Tĩrtũm kapēr ã kagàja. Mẽ pahte kamã harēnh nē mar nē amnhĩ kaxyw hkôt pajamaxpēr tỳx o ri papa kaxyw. Jakamã na pu htem tanhmã pahpunuj to htã kapēr kwỳ ma nē pahkĩnh nē. Jao tee ri amnhĩ kukamã pajamaxpēr o ri pahkaprĩ hkêt nē. ãm nhỹrmã Tĩrtũm kot mẽ pahto mex kukamã pajamaxpēr o akupỹm paxihtỳx nē pahkĩnh nē ri papa. Mẽ pahkĩnh nē ri papa kaxyw na Tĩrtũm kapēr ã kagàja.

⁵⁻⁶Na pu htem Tĩrtũm kamnàr rom pahkĩnh nē. Nē axpēn kamã paxukaprĩ ho ri papa. Jakamã na pa hte tanhmã mẽ ato Tĩrtũm wỳr to nē kãm: —Pa Tĩrtũm. Apê mẽ ijamār xwỳnh maati na ka. Nē apê mẽ inhõ Pahihti Jejus Kris nhõ Papaj na ka. Nà xep ra Rõm nhõ xwỳnh kwỳjaja kãm akapēr kôt amnhĩ nhĩpêx prãm jakamã kwa tanhmã mẽ hkrã ho mex to kê mẽ hamakêtkati nē ajamaxpēr kôt hamaxpēr rãhã ho ri akôt pa. Hãmri nhũm mẽ amnhĩ tã apumu nē piitã amex o amex ã ajarē. Anhỹr o pa hte mẽ ato kuwỳ.

Ijaew kêt xwỳnhjê jarēnh

Atre 10.34; Rõmãn 9.24; Karatas 3.28

⁷Nē kwa kêr ka mẽ amã axpēn tã ma ho ri apa. Te ho Kris kãm mẽ pahtã mata pyràk. Jao axpēn to mex pix o apa. Kot kaj mẽ ã axpēn nhĩpêx anē nhũm mẽ piitã axpēn tã mẽ apumu nē mẽ anhỹ hã Tĩrtũm mã mex o mex ã harē.

⁸Amnepēm Tĩrtũm Ijaew mã tanhmã Kris jarēnh to. Kormã pika hwỳr wrỳk kêt ri nhũm hkukamã nhỹrmã mẽ hwỳr wrỳk nē mẽ kamã kator ã harē. Tã nhũm mẽ hwỳr wrỳ nē mẽ kamã kato. Ijaew hkanrēhã htàmnhwỳjê kamã kato nē mẽ ho mex o ri mẽ hkôt pa. Mẽ kot amnhĩ tã omunh nē ã hamaxpēr

anhÿr kaxyw. Nĕ hamaxpĕr o: —Amnepĕm Tĭrtŭm kot mĕ panhĭgĕt mĕ hkukamĕ harĕnh xà hkôt na mĕ ixwÿr Kraja mĕ nhŭm wrÿ nĕ mĕ ixto mex o ri pa. Nà ãm hãmri na pre mĕ ixwÿr kumĕ. Anhÿr o hamaxpĕr kaxyw.

⁹Nĕ mĕ apĕ Ijaew kĕt xwÿnhjaja mĕ ajaxwÿja mĕ ate tanhmĕ kot amnhĭ nhĭpĕx to hã harĕnh mar nĕ Tĭrtŭm mĕ mex o mex ã harĕnh kaxyw. Nĕ Tĭrtŭm kot mĕ akamĕ ukapri hã mĕ ate amnhĭ tã omunh nĕ mex o mex ã harĕnh kaxyw na pre wrÿ. Tĭrtŭm kapĕr ã kagà htŭm kot tanhmĕ mĕ ixpĕ Ijaew jarĕnh to nĕ mǎãnĕn tanhmĕ mĕ apĕ Ijaew kĕt xwÿnhjĕ jarĕnh to nĕ mĕ pajarĕnh kot: Kot paj Ijaew kĕt xwÿnhjĕ jamak mĕ amĕ amex ã ajarĕnh o ri mĕ hkôt ixpa. Nĕ amex ã inhgrer o ri mĕ hkôt ixpa. Anĕ.

¹⁰Nĕ ja: Kwa mĕ apĕ Ijaew kĕt xwÿnh mĕ mĕ apĕ Ijaew. Kĕr ka mĕ apiitã Tĭrtŭm nhÿ hã akĭnh nĕ ri apa. Anĕ.

¹¹Nĕ mǎãnĕn ja: E kĕr ka mĕ apĕ Ijaew kĕt xwÿnhjaja nĕ krĭ piitã hkôt mĕ apa xwÿnhjaja mĕ apiitã Tĭrtŭm mĕ mex o mex ã harĕnh o ri apa. Anhÿr o kot harĕnh.

¹²Nĕ Tĭrtŭm nhÿ hã kapĕr o pa xwÿnh finat Ijais haxwÿja Ijaew mĕ Jejus jarĕnh o: Koja nhÿrmĕ Jese kanrĕhã htàmnhwÿjĕ hōja mĕ pahwÿr kato. Hãmri nĕ mĕ pahpĕ Ijaew mĕ Ijaew kĕt xwÿnhjĕ ho amnhĭptar o pa. Jakamĕ nhŭm mĕ amnhĭ kaxyw hkôt hamaxpĕr o pa. Anĕ.

¹³Nĕ na pa hte tanhmĕ mĕ ato Tĭrtŭm wÿr to ho ri ixpa nĕ kãm: —Pa Tĭrtŭm. Kwa kĕr ka Rōm nhō xwÿnhjĕ ho mex kĕ mĕ amnhĭ kaxyw Akra hkôt hamaxpĕr mex o ri pa. Jao hkôt hkĭnh nĕ hamakĕtkati nĕ ri axpĕn to pa. Nĕ kĕ Akarō mĕ ho mĕ hihtÿx o pa kĕ mĕ amnhĭ kaxyw amĕ mǎn hamaxpĕr tÿx rãhã ho ri pa. Anĕ.

Pawre kot hpri hã amnhĭ jarĕnh

Sikŭn Pĕtre 1.12-13

¹⁴E Kris kôt ixkwÿjaja. Nà ra ixte mĕ ajarĕnh mar mex. Na ka xep htem amnhĭ to mex o ri apa. Nĕ mĕmoj to axpĕn kutã anojarĕt rãhã ho ri apa. Nĕ mĕ kot tanhmĕ Tĭrtŭm kapĕr kôt amnhĭ nhĭpĕx to xàja ka mĕ omunh mex nĕ ho axpĕn jahkre ho ri apa.

¹⁵Tã ot pa kagà ja kamã mẽ amã ixujarënh kãm ixihýtëx nẽ. Tĩrtũm nhỹ hã. Ra mẽ ate mẽmoj mar mex tã pa axte mẽ amã harẽ. Mẽ ate mar tỳx nẽ hã anohtỳx kaxyw. Nà ã ixte amnhĩ nhĩpêx anhỹr kaxyw na pre Tĩrtũm mẽ akaxyw ixãm.

¹⁶Ixte Jejus Kris mã mẽ apê Ijaew kêt xwỳnhjê mã kapêr jarënh o ri mẽ akôt ixpa kaxyw. Nẽ mẽ ato hwỳr o ri ixpa kaxyw. Tã pa hte krĩ hkwȳ kamã ã mẽ akwỳjê mã harënh anhỹr o ri mẽ hkôt ixpa. Nẽ Jejus jarënhja pa hte mẽ hkôt mẽ kãm harënh o ri ixpa. Mẽ kot mar nẽ hkĩnh kãm hkôt amnhĩ nhĩpêx mex kaxyw. Hãmri nhũm Tĩrtũm Karõ mẽ kãm mẽ hamaxpêr nyw jagjê nhũm Tĩrtũm hã mẽ omu nhũm ja kãm mex nẽ nhũm hkĩnh nẽ hamaxpêr o: —Nà ãm hãmri. Kojã mẽ nhỹrmã wa ixri htĩr tũm nẽ mex nẽ pa ho pa. Anẽ.

¹⁷Tã na pa ixte Jejus Kris nhỹ hã Tĩrtũm mã tanhmã amnhĩ nhĩpêx to ho ixpa hã amnhĩ pumu nẽ ixkĩnh nẽ.

¹⁸⁻¹⁹Na pa hte ỹ hã mẽ apê Ijaew kêt xwỳnhjê mã Tĩrtũm kapêr jarënh o ri mẽ akôt ixpa. Nẽ mẽ anoo mã tanhmã ri Kris kot mẽ amã amnhĩ nhĩpêx to hã harẽ. Nẽ mẽ amã aa mẽ kot mẽmoj pumunh kêt kwỳ ho anhỹr o ri mẽ akôt ixpa. Tĩrtũm Karõ nhỹ hã. Nhũm hte mẽ akwỳjaja amnhĩ jaêr pê omu nẽ kamã no pyma nẽ. Hãmri nẽ mẽ pahpyrà nẽ Jejus kôt amnhĩ xunhwỳ. Nom pa hte ã amnhĩ nhĩpêx anhỹr ã amnhĩ pumu nẽ ri hã amnhĩ to jarkrar kêt nẽ. ãm ixte Kris pix nhỹ hã mẽ kãm ixkapêr ã mẽ kãm amnhĩ jarënh o ri mẽ hkôt ixpa. Tã pa ra Jerujarẽ rũm Irir wỳr krĩ piitã hkôt mẽ kãm Kris kapêr jarẽ. Tĩrtũm Karõ kot tanhmã ixto hihtỳx to jakamã pa mẽ piitã mẽ kãm harënh mex nẽ.

²⁰Na pa hte mẽ hwỳr inhnojarêr nẽ ã ijamaxpêr anẽ nẽ ijamaxpêr o: —Kormã mẽ kot Kris jarënh mar kêt xwỳnhjê hwỳr kot paj mỗ. Nom ra mẽ kot harënh mar xwỳnhjê nhõ krĩ hwỳr inhmõrja inhmã prãm kêt. Anẽ.

²¹Tĩrtũm kapêr ã kagà htũm kot kapêr mar kêt xwỳnhjê jarënh kot: Kormã mẽ kot Tĩrtũm kapêr mar kêt xwỳnhjaja kojã mẽ kuma nẽ hprĩ hã mar tỳx nẽ. Anẽ.

Pawre kot Rõm wỳr hkrà hã amnhĩ jarënh

Rômân 1.8-15

²²Hêxta waa nê. Inhmã mẽ apumunh prãm tỳx nê Rôm kãm Jejus kôt ixkwỳjaja. Na pa hte xatã mẽ awỳr ixkrà nom kormã mẽ awỳr inhmõr kêt nê. Kormã ixte krĩ hkwỳ kamã mẽ kãm Kris jarênh o ri ixpa jakamã kormã mẽ awỳr inhmõr kêt nê.

²³Na pa ra xatã mẽ awỳr ixkrà hã ixtã amgrà xohtô nê. Tã ra jar mẽ kãm Kris kot mẽ panê tanhmã amnhĩ nhĩpêx toja jarênh pa.

²⁴Jakamã kot paj tokyx ma mẽ awỳr mō. Hãmri nê mẽ awỳr pōj pu mẽ axpên pumu nê pahkĩnh nê axpên mã pakapêr o papa. Pa mẽ akôt ri ixpa tãmtã hamũ pyka pê Espãnhã wỳr ma mō. Nê kot paj inhnojarêr ka mẽ ixto Tĩrtũm wỳ nê inhmã ixàpkur xà hkwỳ gō pa ma mẽ hwỳr pry hã hkur o mō.

²⁵⁻²⁶No na pa kormã mẽ awỳr inhnojarêr kêt nê. Kot paj ja rũm awjanã nê akupỹm Jerujarê hwỳr mō. Kamã Kris kôt mẽ pahkwỳjaja kêp amrakati nê ri pa nhũm pika pê Gres mẽ Masetõn kamã Kris kôt mẽ pahkwỳjaja mẽ harênh ma nê mẽ kãm kàxpore hkwỳ ho akuprõ nê mẽ kaxyw inhmã kugõ. Tã kot paj ma mẽ hwỳr o mō nê mẽ kãm kure nê rĩ kormã ma mẽ awỳr mō.

²⁷Jerujarê kamã Kris kôt mẽ pahkwỳjaja Ijaew na mẽ. Mẽ kumrêx na prem Kris kôt amnhĩ xunhwỳ. Hãmri nhũm mẽ hkwỳjaja ma mẽ apê Ijaew kêt xwỳnhjê mã kapêr jarênh o ri mẽ akwỳ hkôt pa. Hãmri nhũm pika pê Gres kamã mẽ pa xwỳnhjaja mẽ kapêr ma nê mẽ uràk nê Kris kôt amnhĩ xunhwỳr kurê kumrêx. Jakamã amnhĩ xwar kãm nhãm krĩ hõ kamã Kris kôt mẽ pahkwỳjê ho mex prãm nê. Hãmri mẽ kãm kàxpore hkwỳ ho akuprõ nê mẽ kaxyw inhmã kugõ.

²⁸⁻²⁹Tã kot paj ma Jerujarê hwỳr mẽ kãm o mō nê mẽ kãm kure hãmri nê awjanã nê rĩ kormã ma Rôm wỳr mẽ awỳr mō. Hãmri nê mẽ awỳr pōj pu mẽ axpên pumu nê pahkĩnh nê. Nê axpên mã Jejus Kris mex o mex ã harê nê kãm tanhmã amnhĩ jarênh to ho papa. Jao pahkĩnh nê papa. Tã pa hpãnhã hamũ ma Espãnhã wỳr mō.

³⁰Nê na pu prem Jejus Kris o panhõ Pahihti. Jao te mẽ pahpê hkôt axpên to pahtõ nê pahtõx pyràk o axpên nhĩpêx. Nê Karõ nhỹ hã pamã axpên kĩnh

ně. Jakamã kwa Jejus kôt ixkwỳjaja. Kêr ka mẽ ixpê mẽ atõ hã ixto Tĩrtũm wỳr kãm axihtỳx nẽ.

³¹Kêr pa ma pyka pê Jutej kamã Jerujarẽ kamã Kris kôt mẽ pahkwỳjê hwỳr mõ nẽ mẽ kãm kàxporeta gõ nhũm mẽ omu nẽ Ijaew kêt xwỳnhjê kot mẽ kãm õr ã mẽ omunh tã tee ri hamaxpêr kêt nẽ. ãm hkĩnh kãm mãmri àmnhĩx hamỳ nẽ ho amnhĩm awjaprô. Nẽ kêr ka mẽ ixto awỳ kê inhnê mẽ kêp mẽ pahkwỳ hkêt xwỳnhjê pumunh mex nẽ.

³²E kêr ka mẽ ã ixto Tĩrtũm wỳr anẽ. Kê ixte ma Jerujarẽ rũm ma Rõm wỳr pàr kãm inhmõrta ã kê ixpumunh mex nẽ. Pa inhmex pê mẽ kurũm ma mẽ awỳr mõn pøj pu mẽ tokyx axpên pumu nẽ pahkĩnh nẽ. Pa mẽ ate tanhmã amnhĩ nhĩpêx to ho ri apa hã mẽ apumunh o mẽ akôt ri ixpa nẽ ixkĩnh nẽ.

³³Tã ãm ja pix. Kê Tĩrtũm mẽ akôt pa ho pa. Tãm na hte tanhmã mẽ pahto pu mẽ ã hã pajamakêtkati paxàmnhĩx ri pahkĩnh nẽ ri papa.

Rõmãn 16

Pawre kot ahpỹnhã hkràmnhwỳjê mã kapêr

¹Ku nẽ mãănẽn ja. Ot pa mẽ awỳr Kris kôt pahtõx Pepreja mẽ awỳr kumẽ. Na hte krĩ pê Sẽnkrej kamã Kris kôt mẽ pahkwỳjê tanhmã mẽ ho mex to ho ri mẽ hkôt pa.

²Nẽ mãănẽn pa na hte tanhmã ixto mex to. Tã kê mẽmo arĩgro hã mẽ awỳr pøj ka mẽ kêp Kris kôt mẽ pahtõx ã omu nẽ ho mex nẽ tanhmã ho ajuta hto.

³Nẽ kêr ka mẽ atar Kris kôt ixkràmnhwỳjê mã ijarẽ. Na pa hte mẽ kãm ijamaxpêr rãhã ho ri ixpa. Nẽ Akirti mẽ hprõ Prisireta ka mẽ wa kãm ijarẽ. Na pre hte wa inhĩhkô hã Jejus Kris mã tanhmã amnhĩ nhĩpêx mex to ho wa pa.

⁴Jao wa amnhĩ grõnh kôt mẽ kãm ixkurê xwỳnhjê pê ixpytã. Pa amnhĩ tã wa omu nẽ inhmã wa hkĩnh nẽ. No ãm papxipix inhmã wa hkĩnh kêt nẽ. Na pre Ijaew kêt xwỳnh kwỳ pê Kris kwỳjaja ixtã wa harẽnh ma nẽ haxwỳja kãm wa hkĩnh nẽ.

⁵Ně na hte Kris kwỳjaja wa ōrkwỹ kamã axpěn wỳr akuprō. Mě kot Tirtũm mã amnhĩ jarēnh nē kapēr ã kagà hkwỳ mar kaxyw axpěn wỳr akuprō. Tã kêr ka mẽ mẽ kãm ijarē. Ně Kris kôt mẽ pahtō Epēnre mã ijarē. Kêp ixkràmnhwỳ mex na. Inhmã hkĩnh. Kumrēx na pre jar pika pê As kamã amnhĩ kaxyw Kris kôt hamaxpēr nē hkôt amnhĩ xãm.

⁶Ně Kris kôt mẽ pahtōx Marir ka mẽ kãm ijarē. Na xep hte tanhmã mẽ ato mex to rũnh o pa.

⁷Ně Kris kôt mẽ pahtō ārōhti mẽ Jũhti wa kãm ijarē. Ixpyrà nē wa kêp Ijaew na wa. Kormã ixte Kris kôt amnhĩ xãm kêt ri na pre wa kumrēx hkôt amnhĩ xãm. Na hte Jejus nhỹ hã mẽ ahkre ho mẽ pa xwỳnhjaja wa kot Kris kapēr jarēnh mex ã wa harē. Tã ã amnhĩ nhĩpêx anhỹrja mỳrapê na pre mẽ hkwỳjaja wa unê nē wa haxà pa prem ixpimràatã ixpê prês nē mẽ hagjēnh xà kamã ixkrĩ.

⁸Ně Kris kôt mẽ pahtō ãpřitre mã ka mẽ ijarē. Kêp Kris kôt ixkràmnhwỳ mex na.

⁹Ně Kris kôt mẽ pahtō Upãnre mã ijarē. Na hte ixpyrà nē Kris mã tanhmã amnhĩ nhĩpêx to ho ri pa. Ně Kris kôt mẽ pahtō Etaki mẽ ijarē. Kêp ixkràmnhwỳ mex na.

¹⁰Ně Kris kôt mẽ pahtō Apes ka mẽ kãm ijarē. Na prem ra Kris ã hipêx punuj nē no nhũm mẽ kutã amnhĩ to htỳx nē Kris kaga hkêt nē. Ně Aristopti nhōrkwỹ kamã hkwỳjê mã ijarē.

¹¹Ně Kris kôt mẽ pahtō Erojãwti mã ijarē. Ixpyrà nē kêp Ijaew na. Ně Nasisti nhōrkwỹ kamã Kris kwỳjaja ka mẽ kãm ijarē.

¹²Ně Kris kôt mẽ pahtōx Xiripēre mẽ Xiripos wa kãm ijarē. Wa kêp Pahihti Jejus mã tanhmã amnhĩ nhĩpêx mex to xwỳnh na wa. Ně Kris kôt mẽ pahtōx Pesixti mã ijarē. Haxwỳja kêp ixkràmnhwỳ na. Na hte Pahihti Jejus mã tanhmã amnhĩ nhĩpêx mex to ho ri pa.

¹³Ně Kris kôt mẽ pahtō Rupti mã ijarē. Na hte Kris kôt amnhĩ nhĩpêx mex o ri pa. Ně katorxà mã ijarē. Na pre te ixpê hkra nhĩpêx pyræk o inhĩpêx.

14Ně Kris kôt mẽ pahtõ Asĩnre mã ně Prekõxti ně Emes ně Patopas ně Emas mẽ. Jajê piitã mẽ pahkwỳ kot mẽ hwỳr pikuprõnh xwỳnhjê mẽ mẽ ho apimràatã mẽ kãm ijarẽ.

15Ně Kris kôt mẽ pahtõ Pirorti mã ně mẽ pahtõx Juure mẽ Nẽrew wa ně htõxja ně mẽ pahtõ Orĩpti wa mẽ kãm ijarẽ. Ně mẽ pahkwỳ kot mẽ hwỳr pikuprõnh xwỳnhjê mẽ mẽ ho apimràatã mẽ kãm ijarẽ. E kêr ka mẽ jajê piitã mẽ kãm ijarẽ. Na pa hte mẽ kãm ijamaxpěr rãhã ho ri ixpa.

16Nom mẽ tapxipixjaja kêr. ã mẽ apiitã mã na pa hte ijamaxpěr rãhã ho ixpa. Ně ota jar Kris kwỳjaja mẽ awỳr hpěr mẽ.

17Kwa ixkràmnhwỳjaja. Na ka mẽ ra aprĩ hã Tĩrtũm kapěr mar tỳx ně. Tã kêr ka mẽ amnhĩ nê mẽ kot Tĩrtũm kapěr o hêx xwỳnhjê pumunh mex o apa. Mẽ kãm axpẽn nê mẽ ato hpigrành par prãm. Ně mẽ ate Kris kaga ně hpãnhã mẽ kot amnhĩ nhĩpêx o amnhĩ nhĩpêxja mẽ kãm hprãm jakamã kwa mẽ amnhĩ nê mẽ omunh mex ně axkãm ajamak rom.

18Na htem ã amnhĩ nhĩpêx anhỳr o Pahihti Kris mã tanhmã amnhĩ nhĩpêx to ho pa hkêt ně. ãm amnhĩ hkrã hkôt tanhmã ri hkwỳjê jahkre hto ho pa. Kot mẽ no kupyw kaxyw tanhmã mẽ kãm hêx to ho ri mẽ hkôt pa. Te mẽ ahkre mex pyræk tã mẽ ahkre mex kêr ně. Jakamã nhũm htỳx ri mẽ pa xwỳnhjaja mẽ kot mẽ ahkreja ma nhũm te mẽ kãm mex pyræk. Jakamã kwa mẽ okora mẽ amnhĩ nê mẽ omunh mex ně.

19Na ka htem mẽ kurom Kris kôt amnhĩ nhĩpêx mex ně nhũm xep mẽ piitã mẽ apumu ně axpẽn mã ja hã mẽ ajarẽnh o ri pa. Pa mẽ ajarẽnh ma ně ixkĩnh ně. Tã kêr ka mẽ arĩ ajamaxpěr mex rãhã ho ri ajamaxpěr o apa. Ně amnhĩ nhĩpêx mex rãhã ně. No tanhmã ajamaxpěr punuj to ho ri amnhĩ tomnuj o ri apa hkêt ně. ã mẽ ate amnhĩ nhĩpêx anhỳrja na inhmã hprãm.

20Ně na hte Satanasti mẽ hkwỳjaja mẽ ate Jejus kaga hprãm xàj mẽ akôt tanhmã ri mẽ anhĩpêx to ho ri pa htã kêr ka mẽ amnhĩ tã mẽ omu ně tee ri amnhĩ kukamã ajamaxpěr kêr ně. Koja gaa nhũm Tĩrtũm mẽ hipêx o te mẽ kot kagã xoprê hkrã xôm ně hpĩr pyræk o mẽ hipêx. Jakamã ã mẽ kot mẽ anhĩpêx anhỳr tã koja Tĩrtũm mẽ amã mẽ ajamakêtkati xàja gõ. Tapxipix na

kot mẽ pajamakêtkati xà nhõr kaxyw àhpumunh tỳx. Nẽ na pa hte mẽ ato Pahihti Jejus wỳ nẽ kãm: —Pa Pahihti. Kwa kêr ka Rõm kãm akwỳjê pumu nẽ mẽ ho mex nẽ mẽmoj to mẽ kutã anojarêr rãhã ho ri apa. Anẽ.

²¹Nẽ ota mẽ pahtõ Ximotreja mẽ awỳr hpër mẽ. Na hte inhĩhkô hã Kris mã tanhmã amnhĩ nhĩpêx to ho ri pa. Nẽ ixtõ Rusti mẽ Jasãwti mẽ Sosipa wa mẽ haxwỳja mẽ awỳr hpër mẽ.

²²Nẽ kot inhmã ixkapër ã kagà xwỳnh Testi haxwỳja mẽ awỳr hpër mẽ. Kêp Kris kôt mẽ pahtõ na.

²³Nẽ Kris kôt mẽ pahtõ Gajre haxwỳja mẽ awỳr hpër mẽ. Õrkwỹ kamã na hte Kris kwỳjaja axpên wỳr akuprõ nẽ kamã Tĩrtũm mã amnhĩ jarẽ nẽ kapër ã kagà kamã harẽ nẽ mar o hkrĩ. Õrkwỹ kamã na pa pre pøj. Nẽ mẽ pahtõ Eras haxwỳja mẽ awỳr pěr mẽ. Na hte jar krĩ ja kamã Rõm nhõ pahihti mã õ kàxpore jamãr pê ho mẽmoj to anhỳr o pa. Nẽ Kris kôt pahtõ Kwatre haxwỳja mẽ awỳr hpër mẽ. E jajaja piitã na mẽ awỳr hpër rẽ.

²⁴E kê Pahihti Jejus Krisja mẽ akutã nojarêr rãhã ho pa.

Pawre kot Tĩrtũm mex o mex ã harẽnh

Epes 1.3; 3.20-21; Wam Ximotre 1.17; Eprêw 13.20; Jutre 24-25

²⁵Nẽ kwa kêr pu mẽ Tĩrtũm mã mex ã harẽnh rãhã ho ri papa. Nẽ ixte mẽ amã Jejus Kris jarẽnhã ã ka prem ama nẽ hkôt amnhĩ xunhwỳ. Tã koja mẽ ato mẽ axihtỳx ka mẽ hkôt axihtỳx kãm hkôt ri amnhĩ nhĩpêx mex o ri apa. Amnepêm na pre Tĩrtũm mẽ apê Ijaew kêt xwỳnhjê ho hkra kaxyw hã amnhĩ jarẽnh kêt nẽ. Kormã ja ho hpimxur ryy nẽ.

²⁶Tã ã mẽ anhĩpêx anhỳrja o amnhĩrĩt nẽ ỹ hã mẽ kapër jarẽnh o ri pa xwỳnhjê mã kapër nẽ mẽ kãm: —E Jejus kot tanhmã amnhĩ nhĩpêx to ho pata kêr ka mẽ piitã mẽ kãm hã kagà kê mẽ pyka piitã hkôt kamã harẽ nẽ kuma. Nom kê Ijaew pixjaja mar kêt nẽ. Kê pika piitã hkôt kamã harẽ nẽ kuma. Panhĩ nẽ kupẽ nẽ kupẽ hkà htykre nẽ mẽ hkà haka nẽ mẽ hkà kamrêkjaja. Kê mẽ piitã Jejus jarẽnh ma nẽ amnhĩ kaxyw hkôt hamaxpër nẽ hkôt amnhĩ xunhwỳ. Hãmri nẽ hkôt amnhĩ nhĩpêx mex o ri pa. Anẽ. Nhũm pre ã mẽ pakaxyw mẽ kãm kapër anẽ nhũm prem kuma nẽ hã kagà.

²⁷Nà Tĩrtũmja tapxipix na àhpumunh tỳx xwỳnh ã ãm pyxi mex. Nẽ tapxipix kêp mẽ pahpiitã Mẽpahpãm. Tã kêr pu mẽ Jejus Kris kot mẽ panê htyk ã omunh xà hkôt Tĩrtũm pix mã mex o mex ã mãn harẽnh rãhã ho papa. Tã ãm ja pix. Ixpê Pawre na pa ã mẽ awỳr ixpêr mẽnh anẽ. Na hapêx.

Wam Korīt

Wam Korīt 1

¹Pa Korīt kām Jejus kôt ixkwỳjaja. Xà mẽ amex? Ot pa mẽ awỳr kagàja nhĩpêx nẽ kumẽ. Ixpê Pawre na pa Kris kôt mẽ pahtõ Sostenes mẽ wa awỳr ixpêr mẽ. Tã kagàja nhĩpêx nẽ mẽ awỳr kumẽ. Tĩrtũm na pre ixte Jejus Kris nhỹ hã mẽ ajahkre ho ri ixpa kaxyw ixãm.

²Tã ot pa mẽ awỳr kagà nhĩpêx nẽ mẽnh mã. Korīt kãm ixpyrà nẽ mẽ apê Tĩrtũm krajê hwỳr. Tĩrtũm kot amnhĩ kaxyw mẽ axunhwỳr jakamã na ka prem amnhĩ tomnuj kaga nẽ Kris kôt amnhĩ xunhwỳ nẽ hkôt amnhĩ nhĩpêx mex o ri apa. Krĩ piitã hkôt mẽ kot amnhĩ to Jejus Kris wỳr o mẽ pa xwỳnhjê pyrà nẽ. Mẽ panhõ Pahihti Jejus Krisja ãm pixi mex na.

³Nẽ Tĩrtũm kêp Měpahpãm maati nẽ Jejus Kris kêp mẽ panhõ Pahihti jakamã na pa hte mẽ ato wa hwỳr rãhã o ri ixpa nẽ mẽ ato wa hwỳr o: — Kwa Tĩrtũm mẽ Jejus wa. Kêr ka wa Korīt nhõ xwỳnhjê kutã anojarêr rãhã ho wa ri apa. Nẽ mẽ ho mex rãhã nẽ. Kê mẽ amnhĩ tã war apumunh kôt ri hamakêtkati nẽ hkĩnh nẽ àmnhĩx tanhmã ri amnhĩ nhĩpêx to ho ri pa. Anẽ.

Tĩrtũm kot Jejus Kris kukwak ri mẽ pahto mex ã harênh

Sikũn Pêtre 1.2; Wam Tesarõn 5.23-24

⁴Nẽ mẽ ate amnhĩ kaxyw Jejus Kris kôt ajamaxpêr o ri apa jakamã na hte Tĩrtũm mẽ ato mex nẽ. Tã pa hte kãm amnhĩ jarênh kaxyw nẽ kãm mẽ ajarênh o: —Pa Tĩrtũm. ãm hãmri na ka pre Korīt nhõ xwỳnh kwỳjê ho akra. Nà ja mex o mex. Anẽ.

⁵Nẽ ra mẽ ate Kris kôt amnhĩ xunhwỳr jakamã na ka mẽ ra amex kumrêx nẽ ri apa. Nẽ aprĩ hã Kris kot amnhĩ nhĩpêx pumunh mex nẽ aprĩ hã akwỳjê mã harênh o ri mẽ hkôt apa.

⁶Na pa pre mẽ awỳr mō nẽ mẽ amã Kris kot amnhĩ nhĩpêx ã harênh o ri mẽ akôt ixpa. Ka prem inhma nẽ hkôt amnhĩ xunhwỳr tỳx kurê kumrêx.

⁷Jakamã nhũm Tĩrtũm mẽ ate kãm tanhmã amnhĩ nhĩpêx to ho apa kaxyw mẽ ato mẽ axihtỳx. Nẽ kaxyw mẽ amã mẽ ate axpên to mex xà piitã mẽ amã

kugõ. Mě ate Jejus kot akupÿn mẽ pahwÿr wrÿk jamãr pê hapêr arÿt o apa pê tanhmã kãm axpën nhÿpêx to ho apa kaxyw.

⁸Koja Tÿrtÿm tanhmã mẽ akrã hto ka mẽ hkõt pix mã ri amnhÿ nhÿpêx rãhã nhÿm Pahihti Jejus Krisja akupÿn mẽ pahwÿr wrÿ. Hãmri nẽ mẽ ate amnhÿ nhÿpêx ã mẽ apumu nẽ mẽ ajarënh o: —Nà ãm hãmri na hte jajaja amnhÿ to mex pix o ri pa. Anẽ.

⁹Nẽ koja Tÿrtÿm ra kot amnhÿ jarënh xà hkõt mẽ ato mex nẽ. Ra kot mẽ ate Pahihti Jejus Kris kõt apa kaxyw amnhÿm mẽ axunhwÿr jakamã koja ra kot amnhÿ jarënh xà hkõt mẽ ato mex rãhã nẽ.

Mě pahte mẽmoj tã axpën pê pahpigrãnh kêt ã mẽ pamã karõ

Rõmãn 15.5-6; Sikÿn Korÿt 13.11; Epes 4.1-6; Piripos 2.1-4; Wam Pêtre 3.8

¹⁰⁻¹¹E Kris kõt ixkwÿjaja. Na ka xep htem mẽmoj tã axpën mã axàkjêr pix o ri apa nhÿm pre Krojre hkwÿjaja amnẽ ixwÿr pøj nẽ inhmã mẽ ajarë. Kwa nà mẽ ã amnhÿ nhÿpêx anhÿr kêt nẽ. Kêr ka mẽ axpën kõt ri amnhÿ nhÿpêx rãhã ho ri apa. Nẽ axpën kõt ri ajamaxpêr rãhã nẽ. Te ixkre tipxi kamã mẽ ri apa pyrãk o mãn kêt mẽ axpën nhÿpêx o ri axpën kõt apa. Nẽ mẽ axpën kutã anojarêt rãhã ho ri apa. No mẽmoj tã axpën mã axàkjêr pê axpën pê apigrãnh kêt nẽ. Na pa Pahihti Jejus Kris nhÿ hã mẽ amã ã ja hã karõ anẽ.

¹²Nẽ na ka xep htem ahpÿnhã ri mẽ apê mẽ ixkwÿ hã amnhÿ jarënh o ri apa. Jao mẽ akwÿjaja pa ixkõt ri amnhÿ nhÿpêx xwÿnh ã amnhÿ jarë. Nẽ mẽ akwÿjaja axtem Apor kõt ri amnhÿ nhÿpêx xwÿnh ã amnhÿ jarë. Nẽ mẽ akwÿjaja axtem Simãw Pêtre hkõt amnhÿ nhÿpêx xwÿnh ã amnhÿ jarë. Nẽ mẽ akwÿjaja axtem Kris kõt amnhÿ nhÿpêx o ri apa xwÿnh ã amnhÿ jarë. ã na ka xep htem ahpÿnhã amnhÿ jarënh anhÿr o ri pa.

¹³Kwa nà ka mẽ ã ahpÿnhã amnhÿ jarënh anẽ nẽ te mẽ ate Kris o apigrãnh pyrãk o hipêx. Kwa mon ka hte mẽ akwÿjaja apê ixkwÿ hã amnhÿ jarë? Xà pa na pa pre pÿ kahpa hã ajêt nẽ mẽ anê ty? Nà Kris pix na pre mẽ panê hã ajêt nẽ ty. Xà mẽ apê pa ixkwÿ hã amnhÿ jarënh kaxyw na prem mẽ akrã kumrã? Nà mẽ apê Kris kwÿ hã amnhÿ jarënh kaxyw na prem ã mẽ anhÿpêx anẽ. Mě kot ja hã mẽ apumunh xwÿnhjaja kot mẽ apê Kris kwÿ hã mẽ

apumunh kaxyw. Tã na ka xep htem axtem nẽ ã ri ahpÿnhã mẽ kãm amnhĩ jarẽnh anhÿr o ri apa.

14-15Kop ãm ixte amnhĩ kôt mẽ axunhwÿr prãm ronhÿx pa mẽ ato mẽ axohtô nẽ mẽ akrã kumrã nẽ mẽ amã: “E ra mẽ apê ixkwÿ na ka mẽ.” Anẽ. Nom na pa pre ã mẽ amã ixkapẽr anhÿr kêt nẽ. ãm hãmri na pa pre ãm mẽ ato grêre nẽ mẽ akrã kumrã. ãm Kripti mẽ Gajre wa pix.

16Ku nẽ xep mãânẽn Estepti nẽ kaxyw mẽ hkwÿjaja. ãm jajê pixjaja. Nom ko apu axte mẽ hkwÿ ko. Ixte mẽ hkrã kumrãr xwÿnhjê mã ijamaxpẽr tÿx kêt.

17Na pre Kris ixte mẽ hkrã kumrãr o ri ixpa kaxyw ixãm kêt nẽ. ãm ixte mẽ kãm kapẽr jarẽnh o ri mẽ hkôt ixpa pix kaxyw na pre ixãm. Nẽ na pa hte amnhĩ krã hkôt ri ixujarẽnh o ri mẽ akôt ixpa hkêt nẽ. Kot pa ã amnhĩ nhĩpêx anẽ nhũm mẽ ixkapẽr mex ã inhma nẽ pa ixkôt amnhĩ xunhwÿ. Ja pymaj na pa hte amnhĩ krã hkôt ri tanhmã ixujarẽnh to ho ri ixpa hkêt nẽ. Na pa hte ãm ixprĩ hã Kris kot tanhmã mẽ panê amnhĩ nhĩpêx to hã harẽnh o ri mẽ hkôt ixpa. Mẽ pahpiitã mẽ panê htyk ã harẽnhja pa hte mẽ kãm harẽ. Mẽ kot hprĩ hã mar nẽ hkôt amnhĩ xunhwÿr kaxyw. Jao amnhĩ krãm mẽ ujarẽnh mexta jagjênh nẽ hã no htÿx kaxyw. Pa ja hã mẽ omu nẽ ixkĩnh nẽ ijamaxpẽr o: —Na htem ixkapẽr ma nẽ Jejus kôt amnhĩ xunhwÿr kurê kumrẽx. Nà ãm hãmri na pa hte mẽ kãm ixkapẽr kaprÿ ho ri ixpa hkêt nẽ. Anẽ.

18No kêt mẽ pahte Tĩrtũm kot mẽ pahto hkra xwÿnhjaja ra mẽ pahte Kris pĩ kahpa hã mẽ panê htyk ã harẽnh mar nẽ pahkĩnh nẽ papa xwÿnh na pu mẽ. Jakamã na pu htem pajamaxpẽr o: —Nà ãm hãmri na Tĩrtũm Kraja htyk kukwak ri mẽ ixto mex nẽ mẽ ixto hkra. Mẽ ujarẽnhja mex kumrẽx. Anẽ. No kêt mẽ kêp hkra hkêt xwÿnhjaja na htem tee ri Kris tyk ã harẽnh ma nẽ hamaxpẽr o: —Tk. Tanhmã kot kêt we amnhĩ to nẽ mẽ panê ty? ãm amarĩ mẽ kot amnhĩ krã hkôt pĩ kahpa hã nhôr nẽ hpĩr kênã. Anẽ.

Tĩrtũm kra hkêt xwÿnhjê jarẽnh

Matêwre 11.25-26; Wam Korĩt 3.19

¹⁹Ně Tirtūm kapēr ā kagà htūm kot mẽ kēp hkra hkēt xwỳnhjê jarēnh kot: Mẽ kot htỳx ri àhpumunh tỳx ã amnhĩ to jarkrar o pa htã kot paj mẽ kēp ja ho ijapêx pa nhūm mẽ ã amnhĩ jarēnh anhỹr kaprỳ. Aně.

²⁰Jakamã mẽ àhpumunh tỳx ã mẽ kot amnhĩ to jarkrar xwỳnhjaja nẽ mẽ kot Mojes kapēr o mẽ ahkre ho ri mẽ pa xwỳnhjaja nẽ mẽ kapēr rūnh xwỳnhjaja. Mẽ kot Tirtūm Kra hkôt amnhĩ xunhwỳr kêt jakamã te mẽ àhpumunh kêt pyràk. Tirtūm kra hkēt xwỳnhjaja kot mẽ àhpumunh tỳx ã mẽ harēnh tã no ãm Tirtūm noo mã te mẽ àhpumunh kêt pyràk. Ně te htỳx ri mẽ kot amnhĩ nhĩpêx o pa pyràk.

²¹Tirtūm àhpumunh o àhpumunh jakamã na pre ra mẽ hkukamã hamaxpēr o: —Nà kot paj mẽ àhpumunh tỳx ã mẽ omunh xà hkôt mẽ ho ixkra hkēt nẽ. ãm mẽ kot ixkra Jesus kot mẽ nê htyk ã harēnh mar nẽ amnhĩ kaxyw hkôt hamaxpēr pix ã mẽ omunh xà hkôt kot paj mẽ ho ixkra. Aně.

²²⁻²⁴No Ijaewjaja kãm amnhĩ krã hkôt pix mã amnhĩ nhĩpêx prãm jakamã na pa hte mẽ ixpê Jesus kwỳjaja mẽ hwỳr mra nẽ mẽ kãm Kris kapēr jarēnh o ri ixpa nhūm mẽ inhma nẽ ãm mẽ inhma. Ně te mẽ kot mẽ inhmar kêt pyrà nẽ mẽ inhmã: —Tk. Nà kot paj mẽ tokyx axujarēnh kôt amnhĩ nhĩpêx kêt nẽ. Kot kaj mẽ inhmã mẽ ixte aa mẽmoj pumunh kêt õ ho aně pa mẽ ja hã apumu nẽ axihtỳx ã apumu nẽ rĩ kormã hkôt amnhĩ nhĩpêx. Anhỹr o inhmã kapēr. Tã no pa mẽ kãm ã amnhĩ nhĩpêx anhỹr kêt nẽ. ãm Kris kot mẽ panê pĩ kahpa hã htykja pix pa htem mẽ kãm harēnh o ri ixpa. Ja kamã nhūm mẽ hkwỳjaja mẽ inhma nẽ ãm mẽ inhma nẽ Kris xihtỳx kêt ã ãm amarĩ htyk ã harẽ. No mẽ hkwỳjaja. Tirtūm kot amnhĩ kaxyw mẽ unhwỳr xwỳnhjaja na htem mẽ kurom mẽ inhma nẽ ra mẽ inhmar tỳx kurê kumrêx. Ně mẽ inhmã kapēr o: —Nà ãm hãmri na Krisja Tirtūm pyrà nẽ hihtỳx o hihtỳx. ãm hãmri na ka ã harēnh aně. Aně. No Ijaew kêt xwỳnhjaja na Ijaew pyrà nẽ kãm amnhĩ krã hkôt amnhĩ nhĩpêx o pa hprãm kêt nẽ. Ně mẽ kãm mẽ àhpumunh tỳx pix prãm o pa. Jakamã na pa htem mẽ kãm Kris kapēr jarēnh o ri mẽ hkôt ixpa nhūm mẽ hkwỳjaja mẽ inhma nẽ Ijaew kwỳjê pyrà nẽ ãm mẽ inhma nẽ mẽ inhmã: —Tk. Nà na ka htem ãm ri axêx o ri apa.

Kot pa mẽ akapēr mar kêt nẽ. Kot paj mẽ axàhpumunh tỳx ã mẽ apumu nẽ rĩ kormã mẽ ama nẽ mẽ akôt amnhĩ nhĩpêx. Anhỹr tã pa mẽ ãm arĩ Kris kot mẽ panê htykja pix pa mẽ kãm harẽnh o ri mẽ hkôt ixpa. Nhũm mẽ hkwỳjaja mẽ inhma nẽ mẽ inhmã: —Nà mẽ axàhpumunh kêt jakamã na ka htem atỳx ri ã ja jarẽnh anẽ. Anhỹr tã no nhũm mẽ hkwỳjaja. Tĩrtũm kot amnhĩ kaxyw mẽ unhwỳr xwỳnhjaja na htem mẽ inhma nẽ mẽ inhmã kapēr o: —Nà ãm hãmri na ka mẽ ã Krisja jarẽnh anẽ. Tĩrtũm pyrà nẽ àhpumunh o àhpumunh kênã. Anẽ.

25Tĩrtũm mẽ Jejus wa mẽ pakurom àhpumunh o àhpumunh nẽ hihtỳx o hihtỳx.

Tĩrtũm mẽ parom hihtỳx o hihtỳx ã harẽnh

Matêwre 11.25; Sikũn Korĩt 12.7-10; Xiakre 2.5

26E Kris kôt ixtõ nẽ ixtõxjaja. Amnepê mã Tĩrtũm kot amnhĩm mẽ axunhwỳrta ã tanhmã na ka prem amnhĩ nhĩpêx to ho ri apa? Nà na ka prem axohtõ nẽ jar mẽ noo mã axàhpumunh kêt nẽ ri apa. Nẽ mẽ apê pahi hkêt nẽ ri apa. Mẽ axohtõ nẽ amnhĩ to hkryre nẽ ri apa.

27Tã nhũm Tĩrtũm amnhĩ kôt mẽ ate amnhĩ to hkryre xwỳnhjê xunhwỳ. Kojã nhỹrmã kot tanhmã mẽ pahpiitã mẽ pajarẽnh to xà hã arĩgrota kato hãmri nhũm mẽ àhpumunh tỳx ã amnhĩ to jarkrar xwỳnhjaja Tĩrtũm kot mẽ kurom mẽ pahto hkra hã mẽ pahpumu hãmri nẽ tee ri amnhĩ kukamã hamaxpēr nẽ amnhĩ kamã hpijaàm tỳx nẽ. Nẽ mẽ hihtỳx ã amnhĩ to jarkrar xwỳnhjaja haxwỳja. Nhũm Tĩrtũm kot mẽ kurom mẽ pahto hkra hã mẽ pahpumu nẽ tee ri amnhĩ kukamã hamaxpēr nẽ amnhĩ kamã hpijaàm tỳx nẽ.

28Na hte Tĩrtũm amnhĩ kaxyw mẽ kot amnhĩ to hkryre xwỳnhjê xunhwỳ. Nẽ mẽ kot mẽ kamã kahak o pa xwỳnhjê xunhwỳ. Jar pyka ja kamã mẽ hkwỳ kot mẽ hkaga htã nhũm Tĩrtũm amnhĩ mã mẽ unhwỳ. Mẽmo kaxyw na hte ã amnhĩm mẽ unhwỳr anẽ? Nà mẽ kot nhỹrmã tee ri mẽ àhpumunh tỳx ã amnhĩ jarẽnh xwỳnhjê pumunh nẽ axpẽn mã mẽ harẽnh o: —Kwa mẽ pahte mẽ àhpumunh tỳx ã mẽ harẽnh tã nhũm Tĩrtũm mẽ pahpyrà nẽ amnhĩ kaxyw mẽ unhwỳr kêt nẽ. Nà te mẽ àhpumunh kêt pyræk. Anhỹr o axpẽn

mã mẽ harēnh kaxyw na pre Tirtūm amnhīm mẽ kot amnhĩ to hkryre xwỳnhjê xunhwỳ.

²⁹Jakamã kot puj mẽ nhỹrmã Tirtūm mã amnhĩ to jarkrar pê tanhmã kãm amnhĩ jarēnh to hkêt nẽ. Rỳ kãm: —Kwa ga ixpumu Tirtūm. Na pa hte ã amnhĩ nhĩpêx anẽ nẽ ã amnhĩ nhĩpêx anẽ. Kwa ja hã ixpumu nẽ ixto akra nà? Anhỹr o amnhĩ to hwỳr kêt nẽ.

³⁰Ăm Jejus pix kukwak ri na hte Tirtūm mẽ pahto hkra. Tãm na pre Tirtūm noo mã amnhīm mẽ paxunhwỳ. Mẽ pahte uràk nẽ pahpê hkra kaxyw. Jakamã na pu htem ãm pix kukwak ri amnhĩ nhĩpêx mex o ri papa. Nhũm mẽ pamã àhpumunh tỳx xà hkwỳ gō. Tã ra kot mẽ pahte amnhĩ tomnuj pê mẽ papytār jakamã kot puj mẽ nhỹrmã pahtyk tã no ãm akupỹm pahtĩr nẽ Tirtūm mẽ wa kuri pahtĩr tũm nẽ pamex kumrêx nẽ papa ho papa.

³¹Tã ã Jejus kot mẽ panhĩpêx kot anhỹr jakamã Tirtūm kapêr ã kagà htũm kot ja jarēnh kot: Kot ka mẽ amã mẽmoj tã jarkrar prãm nom kêr ka mẽ kamjaja amnhĩ to jarkrar kêt nẽ. Mẽ panhõ Pahihti ra kot mẽ panê tanhmã amnhĩ nhĩpêx toja pix ã tanhmã ho jarkrar to ho ri apa. Anẽ.

Wam Korĩt 2

Pawre kot tanhmã Kris jarēnh to hã harēnh

Sikũn Korĩt 4.1-7; Wam Pêtre 3.15

¹⁻²E Kris kôt ixtõ nẽ ixtõxjaja. Amnepê mã ixte mẽ awỳr inhmõrta ã na pa pre inhnojarêt nẽ ijamaxpêr o: —Kot paj ma mẽ hwỳr mō nẽ mẽ kãm Kris kapêr jarê. Kot amnhĩ grōnh kôt mẽ inhnê htykja pa mẽ kãm harê. Ăm ja pix jarēnh o ri mẽ hkôt ixpa. Nom kot paj mẽ kapêr japjê xwỳnhjê pyrà nẽ mẽ kãm ixkapêr japjê hkêt nẽ. Rỳ mẽ uràk nẽ te ixàhpumunh tỳx o ri ixkapêr japjê pyràk o ri mẽ kãm ixkapêr japjê hkêt nẽ. Kot paj ãm ixkatàt kôt ri mẽ kãm tanhmã Jejus jarēnh to pix o ri mẽ hkôt ixpa. Anhỹr o mẽ akukamã ijamaxpêr. Hãmri nẽ ma mẽ awỳr mō nẽ mẽ awỳr pōj nẽ mẽ amã Jejus kot mẽ panê htyk nẽ akupỹm htĩrja pix jarēnh rãhã ho ri ixpa.

³Na pa pre tee ri amnhĩ kukamã ijamaxpêr nẽ ijamaxpêr o: —Hêxta waa nẽ. Tanhmã kot pa we mẽ kãm Tirtūm kapêr jarēnh to nhũm mẽ inhmar tỳx nẽ

hkôt amnhĩ xunhwỳr kurê kumrêx wehe? Kot paj amnhĩ krã hkôt mẽ kãm harēnh kêt nē. Ja kaxyw ijamaxpēr tỳx kêt kēnã. Kot paj amnhĩ krã hkôt mẽ kãm harē nhũm mẽ ãm inhma nē hkôt amnhĩ xunhwỳr kêt nē. Nà kot paj Tĩrtũm nhỹ hã mẽ kãm tanhmã ixkapēr to kê tãm tanhmã mẽ hkrã hto kê mẽ inhma nē hkôt amnhĩ xunhwỳr japêr. Anhỹr o ijamaxpēr.

⁴Nē mẽ ate inhmar kaxyw na pa pre ixêx rom tanhmã mẽ ano kupyw to ho ri ixpa hkêt nē. Rỳ mẽ pajaja mẽ ixàhpumunh xà hkôt tanhmã mẽ amã ixkapēr to hkêt nē. Na pa pre ãm Tĩrtũm Karõ nhỹ hã mẽ amã awjarē. Mẽ ate mar nē hihtỳx o hihtỳx ã omunh kaxyw.

⁵Jakamã na ka prem Tĩrtũm xihtỳx ã omu nē amnhĩ kaxyw hkôt ajamaxpēr kurê kumrêx. No pa ixàhpumunh tỳx ã ixpumunh kôt ixkôt ajamaxpēr kêt nē. Na ka prem ixkapēr ma nē ajamaxpēr o: —Nà Tĩrtũm na mẽ parom àhpumunh o àhpumunh nē hihtỳx o hihtỳx. Anhỹr o ajamaxpēr kôt ajamaxpēr kurê kumrêx.

Tĩrtũm Karõ kot mẽ pamã àhpumunh xà nhõr ã harēnh

Matêwre 7.6; Juãw 14.22; 16.13-15; Xiakre 3.13-18

⁶Nē na hte Tĩrtũm kra hkwyjaja Tĩrtũm kot amnhĩ nhĩpêx ã omunh mex. Nē hamaxpēr ã omunh mex. Jakamã na pa hte mẽ ahkre japjê ho mẽ hkôt ixpa. Nom jar pika ja kamã mẽ pajamaxpēr tỳx xà ho mẽ ahkre hkêt nē. Rỳ pika piitã hkôt mẽ utàr xwỳnhjê jamaxpēr tỳx xà ho ri mẽ ahkre ho ri ixpa hkêt nē. Kojã nhỹrmã mẽ àhpumunh xàja mẽ kêp hapêx pa.

⁷Jakamã na pa hte ãm Tĩrtũm xàhpumunh xà pix o mẽ ahkre o ri ixpa. Amnepê mã kormã mẽmoj piitã hkêt ri na pre Tĩrtũm amnhĩ kukamã amnhĩ jarēnh o: —Mẽ kot amnhĩ kaxyw Ixkra hkôt mẽ hamaxpēr o mẽ pa xwỳnhjaja kot paj mẽ ho ixkra nhũm mẽ mex kumrêx nē pa ho pa. Anhỹr o mẽ harē. Nom mẽ kot hkôt amnhĩ xunhwỳr kêt xwỳnhjaja nhũm kormã mẽ kãm ja ho amnhĩrĩt kêt nē. Tã ja na pa hte ra mẽ kãm harēnh rãhã ho ri mẽ hkôt ixpa nhũm mẽ Tĩrtũm kãm mẽ pahto hkra hprãm hã harēnh ma.

⁸Nom pika piitã hkôt mẽ ho amnhĩptàr xwỳnhjaja na mẽ kormã ja mar kêt nẽ. Kêp apu mẽ kot mar ronhỹx prem pĩ kahpa hã mẽ panhõ Pahihti nhôr nẽ hpĩr kêt nẽ. Mex o mex tã nhũm prem axtem nẽ ã hipêx anẽ.

⁹Mẽ kot mẽmoj mex pumunh kêt tã Tĩrtũm kapêr ã kagà htũm kot mẽmoj mex jarẽnh kot: Na pre Tĩrtũm mẽ kãm hkĩnh xwỳnhjê kutêp mẽmoj mex kwỳ jaxwỳ nhũm mex o mex nẽ mẽ ahã hikwỹ. Aa mẽhõ kot mẽmoj mex o mexja pumunh kêt. Nẽ aa mẽhõ kot ã mẽmoj kot anhỹr pumunh kêt. Nẽ aa ã mẽmoj mex kot anhỹr kukamã hamaxpêr kêt. Tã nhũm Tĩrtũm mẽ kutêp hkwỳ jaxwỳ. Anhỹr o kot harẽnh tã no nhũm mẽ kot hkôt amnhĩ xunhwỳr kêt xwỳnhjaja ã kapêr anhỹrja mar kêt nẽ.

¹⁰Mẽ pamã na pre Tĩrtũm ja ho amnhĩrĩt. Na pre ra mẽ pamã Karõ gõ nhũm mẽ pamã gjêx o mẽ pamã mẽmoj to amnhĩrĩt mex nẽ. Tĩrtũm Karõja àhpumunh tỳx o àhpumunh tỳx. Nẽ kot hprĩ hã Tĩrtũm jamaxpêr pumunh par.

¹¹No mẽ papajaja na pu htem axpên jamaxpêr kôt axpên pumunh kêt nẽ. Na pu htem papam amnhĩ jamaxpêr ã amnhĩ pumu. Ja pyrã nẽ Tĩrtũm Karõ pix na hte Tĩrtũm jamaxpêr pumunh.

¹²No mẽ pahpê hkrajaja na hte mẽ pahkarõja pix mẽ pakamã pa hkêt nẽ. Na hte mããnẽn Tĩrtũm Karõja mẽ pakamã pa nẽ mẽ pamã tanhmã mẽmoj to amnhĩrĩt to ho mẽ pahkôt pa. Nẽ Tĩrtũm kot mẽ pakutêp mẽmoj mex jaxwỳrja nhũm ja kukamã mẽ pamã harẽnh o amnhĩrĩt.

¹³Jakamã na pa htem amnhĩ krã hkôt ri mẽ kãm ixujarẽnh kêt nẽ. ãm Tĩrtũm Karõ nhỹ hã na pa hte ixprĩ hã mẽ kãm kapêr jarẽnh o ri mẽ hkôt ixpa. Ra Tĩrtũm Karõ kot mẽ amã gjêx xwỳnhjê mã pa ỹ hã ixkapêr.

¹⁴No mẽ kãm Tĩrtũm Karõ kapêr mar prãm kêt xwỳnhjaja na htem Tĩrtũm kot amnhĩ nhĩpêx pumu nẽ hprĩ hã omunh kêt nẽ. Mẽ kãm kapêr mar prãm kêt jakamã na htem ri kot tanhmã mẽ pahto mex to hã harẽnh ma nẽ hamaxpêr o: —Tk. Kwa mo kaxyw na htem ri ã Tĩrtũm jarẽnh anẽ? Tanhmã kot we amnhĩ to nẽ mẽ pahto mex? Nà kot anhỹr kêt. Anẽ.

¹⁵Nom mẽ pahpê Tĩrtũm kra hkwỳ hã mẽ pahte Karõ kapêr mar mex xwỳnhjaja na pu hte mẽ kurom Tĩrtũm kot amnhĩ nhĩpêx ã omunh mex nẽ. Nẽ Karõ xô ri mar mex nẽ nhũm mẽ kot Karõ kapêr mar kêt xwỳnhjaja tee ri ã mẽ pahte amnhĩ nhĩpêx anhỹr ã mẽ pahpumu. Nom hprĩ hã mẽ pahte Tĩrtũm kôt amnhĩ nhĩpêx pumunh kêt nẽ.

¹⁶Tĩrtũm kapêr ã kagà htũm kot ja jarênh kot: Mẽhõ na kot Tĩrtũm jamaxpêr pumunh? Nẽ mẽhõ na pre we kãm hamaxpêr gõ? Nà amrakati kumrêx. Tapxipix na àhpumunh tỳx o àhpumunh tỳx. Anẽ. Tã mẽ papajaja mẽ pahte Tĩrtũm Karõ kapêr mar tỳx xwỳnhjaja na pu htem Kris xô ri pahprĩ hã hamaxpêr kôt omunh mex nẽ.

Wam Korĩt 3

Mẽ kot Tĩrtũm mã tanhmã amnhĩ nhĩpêx to xwỳnhjê jarênh

Wam Korĩt 14.20; Karatas 5.16-21; Epes 4.14; Eprêw 5.11

¹E Kris kôt ixtõ nẽ ixtõxjaja. Pa mẽ amã mẽmoj jarê ka mẽ inhma nẽ kãm ajamaxpêr. Nà amnepê mã kormã mẽ ate Kris kôt amnhĩ nhĩpêx tohtuj anhỹrta ã tanhmã na ka prem amnhĩ nhĩpêx to ho ri apa wehe? Na ka prem arĩ ajamaxpêr tũm kôt pix mã amnhĩ nhĩpêx. Kormã mẽ ate Tĩrtũm Karõ hkôt amnhĩ nhĩpêx mex kêt jakamã na ka pre htem mẽhprĩre kot amnhĩ nhĩpêx pyràk o amnhĩ nhĩpêx. Nẽ mẽ uràk nẽ kormã mẽmoj piitã omunh kêt nẽ. Jakamã na pa pre mẽ amã ixujarênh kaxyw nẽ te mẽ ate kormã Tĩrtũm kapêr mar kêt xwỳnhjê pyràk o mẽ anhĩpêx nẽ mẽ amã tanhmã ixujarênh to.

²Mẽ hkaràre na htem mẽ hkà kagô pix kaô nẽ kormã mẽ apkur xà mex kur kêt nẽ. Ja pyrà nẽ na pa pre te ixte mẽ ato hpjaôr pyrà nẽ mẽ amã Tĩrtũm kapêr piitã harênh par kurê kumrêx kêt nẽ. ãm mẽ amã hkwỳ pix jarê ka prem ama nẽ Jesus kôt amnhĩ xunhwỳ. Tã na pa hte arĩ mẽ amã hkwỳ pix jarênh o ri ixpa nẽ kormã piitã ho mẽ ajahkre jatur xàm mẽnh kêt nẽ.

³Na ka htem arĩ te mẽ apê Kris kwỳ hkêt pyràk o amnhĩ nhĩpêx o apa. Nẽ mẽmoj kôt axpên kãm agryk axpên mã axàkjêr o apa. ã amnhĩ nhĩpêx anhỹr jao arĩ mẽ ate amnhĩ nhĩpêx tũm kôt amnhĩ nhĩpêx rãhã nẽ.

⁴Na hte mẽ akwỳjaja amnhĩ jarēnh o: “Ixpê Pawre hkwỳ na pa.” Aně. Ně mẽ akwỳjaja amnhĩ jarēnh o: “Pa na ixpê Apor kwỳ na pa.” Aně. Kwa na ka htem ã amnhĩ jarēnh anhỳr o te mẽ apê Kris kwỳ hkêt pyræk.

⁵Apor mẽ pa ãm wa ixte Tĩrtũm kapěr o mẽ ajahkre xwỳnh pix na pa wa. Wa ixpê mẽ anhõ pahihiti hkêt kēnã kot ka kêt mẽ axtem nẽ mẽ apê ahpỳnhã wa ixkwỳ hã amnhĩ jarē. Na pa pre wa mẽ amã Tĩrtũm kapěr jarēnh o ri mẽ akôt ixpa ka prem wa inhma nẽ amnhĩ kaxyw hkôt ajamaxpěr tỳx nẽ. Ně hkôt amnhĩ xunhwỳ nom wa pa wa ixkôt amnhĩ xunhwỳr kêt nẽ. Na pa wa ãm Tĩrtũm kapěr o mẽ ajahkre nom amnhĩ kôt mẽ axunhwỳr kêt nẽ.

⁶⁻⁹E pa ixprĩ hã mẽ amã war amnhĩ jarē ka mẽ inhma. Te wa ixpê Tĩrtũm pur kãm wa ixàpēnh xwỳnh pyræk no mẽ kajaja te mẽ apê hpur pyræk. Na htem hpur karê nhũm hirã nhũm mẽ kamã ahkre ho pa. Ja pyrà nẽ na pa pre ixkumrēx mẽ awỳr ixpa nẽ mẽ amã Tĩrtũm kapěr jarēnh o ri mẽ akôt ixpa. Te mẽ kot pur kãm ahkre ho ri pata pyræk. Tã nhũm Apor ixpãnhã ma mẽ awỳr pa nẽ te mẽ kot pur karēta pyræk o mẽ anhĩpēx nẽ mẽ amã Tĩrtũm kapěr o mẽ ajahkre mex o ri pa. Xà na hte pur karēr xwỳnhja rỳ kamã ahkre xwỳnhja tãm tanhmã mẽmo hy hto nhũm ra higrõt nẽ hprēk nẽ ô? Nà na htem ãm ahkre hpa nhũm arĩ hikwỳ. Nhũm Tĩrtũm tãm tanhmã hyta to nhũm higrõt nẽ hprēk nẽ ô. Ja pyrà nẽ na hte Tĩrtũm mẽ ho hkra nẽ tanhmã mẽ ho nhũm mẽ amnhĩ kaxyw hkôt hamaxpěr tỳx nẽ hkôt amnhĩ nhĩpēx mex o pa. Nom mẽ kãm harēnh o pa xwỳnhhta kôt amnhĩ xunhwỳr kêt nẽ. Ně na hte pur karēr xwỳnh rỳ kamã ahkre xwỳnhja tãm tanhmã hyta to nẽ ho hĩr kêt nẽ. Tĩrtũm pix na hte tanhmã ho nhũm higrõt. Ja pyrà nẽ na pa hte Tĩrtũm kapěr o mẽ ajahkre o ri mẽ akôt ixpa nom pa tanhmã mẽ ato ka mẽ apê Tĩrtũm kra nẽ ri apa hkêt nẽ. Tanhmã kot pa mẽ ato ka mẽ apê hkra? Tapxipix na kot mẽ pahto hkra kaxyw àhpumunh. Ně tapxipix na hte tanhmã mẽ pahkrã hto pu mẽ kãm hprãm xà hkôt amnhĩ nhĩpēx mex o ri papa. Ně pur karēr xwỳnh mẽ pur kãm ahkre xwỳnhja wa. Hamẽ wa àpēnh mex jakamã koja hamẽ wa kot pur kãm àpēnh pãnhã amnhĩm ujamỳnh rax nẽ. Ja pyrà nẽ kot paj mẽ ixte Tĩrtũm kapěr o mẽ ajahkre ho ri mẽ akôt ixpa

xwỳnhjaja nhũm Tĩrtũm nhỹrmã mẽ ixàpênh pãnhã mẽ inhmã amnhĩrer mex nẽ. Nẽ te mẽ ate Tĩrtũm nhõ ixkre pyræk.

¹⁰Nẽ pa te ixpê Tĩrtũm mã ixkre hã ixàpênh xwỳnh pyræk jakamã na pre Tĩrtũm mẽ akaxyw tanhmã ixto pa mẽ amã tanhmã kot amnhĩ nhĩpêx to hã harênh o ri mẽ akôt ixpa. Te ixte õ ixkre kaxyw ãm xà maati xãm pyræk o mẽ anhĩpêx. Jao mẽ amã kapêr jarênh o ri mẽ akôt ixpa. Mẽ ate amnhĩ kaxyw hkôt ajamxpêr nẽ hkôt amnhĩ xunhwỳr kaxyw. Tã na ka prem hkôt amnhĩ xunhwỳ nhũm ixpãnhã Tĩrtũm kapêr o mẽ ahkre ho mẽ pa xwỳnh kwỳjaja mẽ awỳr mra nẽ mẽ amã kapêr jarênh jatur xàm kurẽ. Nẽ hprĩ hã ho mẽ ajahkre ho ri mẽ akôt pa. Te ho mẽ kot ixkre krax nhĩpêx pyræk o mẽ anhĩpêx. Nẽ kwa mẽ ate mẽ ahkre o mẽ apa xwỳnhjaja kêr ka mẽ akatàt kôt mẽ ahkre mex rãhã ho ri mẽ hkôt apa.

¹¹Nẽ Jejus Kris tapxipix na pu htem hkôt amnhĩ xunhwỳ nhũm mẽ panê mẽ pahte amnhĩ tomnuj o hapêx. Jakamã te kêp kỳxpê ixkre nhĩmõk ã nõr xà maatita pyræk.

¹²Nẽ na htem tõhã ixkre nhĩpêx kaxyw nẽ pĩ htỳx jakà nẽ ho hipêx nhũm kritpêm mẽ kãm mex ry nẽ kuhê. No na htem tõhã nojarêr kãm ixkre hã apê nẽ pĩ rerek o hipêx nhũm mẽ kãm mex ry hkêt nẽ. Kojã rôr nhyre hwỳr mra nẽ mẽ kêp hapôk nẽ homnu. Ja pyrà nẽ na hte Tĩrtũm kapêr o mẽ ahkre ho ri mẽ pa xwỳnh kwỳjaja te mẽ kot katàt kôt pĩ htỳx o ixkre nhĩpêxta pyrà nẽ katàt kôt mẽ ahkre ho ri mẽ hkôt pa. No nhũm mẽ hkwỳjaja axtem nẽ te mẽ kot pĩ rerek o ixkre nhĩpêxta pyræk o amnhĩ nhĩpêx nẽ htỳx ri Tĩrtũm kapêr kwỳm ri tanhmã mẽ ahkre hto ho pa. Jao hkwỳm ri amnhĩ nhĩpêx rãhã ho ri pa.

¹³Nẽ kojã mẽhõ pĩ htỳx pix o amnhĩm òrkwỹ nhĩpêx hãmri nhũm mẽmo arĩgro hã tanhmã amnhĩ to nẽ kêp pôr. No ãm hã pỏja pix xêt pa nhũm kãm hikwỹ xà nẽ òkwa êja arĩ piitã mex nhũm ixkre hpãm axte hã pô janhỏr o nyw. No kojã pĩ rerek o hipêx nhũm mẽmo arĩgro hã kêp pôr hãmri nẽ piitã kêp kaxàr pa. Ja pyrà nẽ kojã nhỹrmã Krisja akupỹn mẽ pahwỳr wrỳ hãmri nẽ mẽ pahte kãm tanhmã amnhĩ nhĩpêx to ho papaja piitã hã mẽ

pahpumunh kôt tanhmã mẽ pajarênh to. Kojã mẽ pahkwỳjaja mẽ pahte mẽ kot pĩ htỳx o ixkre nhĩpêxta pyrã nễ Tĩrtũm mã mẽ pahte amnhĩ nhĩpêx mex o mẽ papa xwỳnhjê xàpênh pumu nễ mẽ pahte amnhĩ to mex xwỳnh ã mẽ pajarê. Hãmri nễ hpãnhã mẽ kot pĩ rerek o ixkre nhĩpêxta pyrã nễ mẽ kot kãm amnhĩ nhĩpêx mex kêt xwỳnhjê pumu nễ mẽ kot amnhĩ to mex kêt xwỳnh hã mẽ harê.

14Nễ pĩ htỳxja na hte tanhmã amnhĩ to nễ hpôr no ãm arĩ mex nễ kuhê nhũm mẽ piitã arĩ mex ã omu. Ja pyrã nễ kojã Krisja mẽ kot kãm tanhmã amnhĩ nhĩpêx mex to ho mẽ pa xwỳnhjê pumu nễ mẽ kot tanhmã kãm amnhĩ nhĩpêx to hpãnhã mẽ kãm amnhĩre nhũm mẽ piitã mẽ kot amnhĩ to mex ã mẽ omu.

15No pĩ rerekja na hte pôr nễ kaxàr pa. Ja pyrã nễ mẽ kot Kris mã amnhĩ nhĩpêx mex hkêt xwỳnhjaja kojã Tĩrtũm mẽ kãm amnhĩrer kêt nễ. Nom arĩ mẽ kêp hkra jakamã kojã mẽ arĩ kuri htĩr tũm nễ pa. No ãm mẽ kot Tĩrtũm mã amnhĩ nhĩpêx mex kêt jakamã kojã mẽ hkwỳjê hkĩnh ã amnhĩm mẽmoj mex kwỳ jamỳnh kêt nễ. Te mẽhõ nhõrkwỳ kêp hpôr nhũm mẽ hkukrêx kwỳ jamỳnh kêt nễ ỹ kamã kurũm hapôx pyræk.

16-17E pa mẽ amã mẽmoj jarê. Ra mẽ ate mar tã mãn ka mẽ ra tanhmã amnhĩ to nễ hã ano hkêt rỳ ko. Nà te mẽ pahpê Tĩrtũm nhõrkwỳ pyræk. Tĩrtũm nhõrkwỳja õ na. Tã mẽ pahpê hkra nhũm Karõ kot mẽ pakaxwỳnh mã gjêx jakamã te mẽ pahpê òrkwỳ pyræk. Jakamã mẽ kot kapêr kwỳm ri mẽ ajahkre o ri mẽ pa xwỳnhjaja te mẽ kot Tĩrtũm nhõrkwỳ grành xwỳnh pyræk. Kojã mẽ nhỹrmã amnhĩ xà htỳx kamã hamak o pa.

Mễ pahte amnhĩ to jarkrar kêt ã mẽ pamã karõ

Wam Korĩt 1.10-25

18Nễ kot kaj mẽ atõ axàhpumunh tỳx o amnhĩ to jarkrar o ri apa japêr. Kwa mẽ jam anhũre nễ axte ri ã amnhĩ nhĩpêx anhỹr kêt nễ. Nễ te mẽ ate amnhĩ nễ axàhpumunh tỳx xàja nhãm rênh par pyræk o amnhĩ nhĩpêx. Mễ paxàhpumunh xàja pika kamã mẽ àhpumunh pix jakamã kêr ka mẽ te amnhĩ

nê nhâm rênh pyrà nê hpãnhã Tĩrtũm xàhpumunh xà hkôt pix mã amnhĩ nhĩpêx o ri apa.

¹⁹No pika kamã mẽ àhpumunh xwỳnhjaja Tĩrtũm noo mã te mẽ hkrã pipãnh nê htỳx ri pata pyràk. Tĩrtũm kapêr ã kagà htũm kot mẽ harênh kot: Pika ja kamã mẽ àhpumunh tỳx ã mẽ kot amnhĩ to jarkrar xwỳnhjaja Tĩrtũm noo mã te mẽ kot amnhĩ to hêx o pa pyràk. Anê.

²⁰Nê mãânên mẽ harênh kot: Mẽ kot amnhĩ xàhpumunh tỳx ã amnhĩ to jarkrar o ri mẽ pa xwỳnhjaja na hte Tĩrtũm mẽ omu nê mẽ kot ã amnhĩ jarênh anhỹr kaprỳ hã mẽ harê. Anê.

²¹⁻²²Jakamã kwa kêr ka mẽ axte mẽ apê ixkwỳ rỳ mẽ apê Apor kwỳ hã amnhĩ jarênh o ri apa hkêt nê. Mẽ apê wa ixkwỳ hkêt kênã. Nê mẽ apê nhâm mễhõ hkwỳ hkêt. Mẽ pahpiitã mẽ pahpê Kris kwỳ na pu mẽ. Nê kot puj mẽ nhỹrmã pahtyk tã akupỹm pahtĩr nê Tĩrtũm mẽ Jesus wa kuri pamex nê pahtĩr tũm nê ri papa. Jakamã kwa mẽ tee ri amnhĩ kukamã ajamaxpêr kêt nê. Nê jarãhã mẽmoj piitã mẽ panhõ. Nê kormã mẽmoj kot amnhĩrĩt kêt xwỳnhjaja haxwỳja mẽ panhõ na. ãm mẽmoj piitã mẽ panhõ jakamã te mẽ pahpê mẽmoj piitã mẽõ pahi pyràk.

²³No mẽ papajaja axtem Kris kêp mẽ panhõ Pahihti. Nê Tĩrtũm kêp Kris nhõ Pahihti.

Wam Korĩt 4

Tĩrtũm pix kot tanhmã mẽ pajarênh to xwỳnh ã harênh

Eprêw 13.17

¹Nê mẽ pajaja mẽ ixpê mẽ anhõ pahi hkêt. ãm mẽ ixte Kris mã tanhmã amnhĩ nhĩpêx to ho ixpa xwỳnh pix jakamã Tĩrtũm kormã kapêr kwỳ ho amnhĩrĩt kêtja na pa htem mẽ amã ho amnhĩrĩt o ri mẽ akôt ixpa. Ja kaxyw na pre mẽ ixunhwỳ.

²Na pre Kris tanhmã mẽ inhmã kapêr to nê mẽ inhmã: —E kêr ka mẽ ixkapêr pix o măn mẽ ahkre ho ri mẽ hkôt apa. Anê.

³⁻⁴Kumã pix mã ixte amnhĩ nhĩpêx o ri ixpa jakamã koja tapxipix ixte kãm amnhĩ nhĩpêx ã ixpumunh kôt tanhmã ijarênh to. Ixte kãm amnhĩ nhĩpêx mex ã ijarê rỳ ixte kãm amnhĩ nhĩpêx mex kêt ã ijarê. ãm tapxipix koja tanhmã ijarênh to. No koja nhãm mēhō rỳ mē atō ã ijarênh anē pa ama nē ãm ama. Rỳ papam tanhmã kãm ixte amnhĩ nhĩpêx mex to hã kãm amnhĩ jarênh japêr hãmri nē ãm ixtỳx kãm ã amnhĩ nhĩpêx anhỹr ã amnhĩ jarênh kaprỳ. Pahihti Kris pix kot hprĩ hã mē pahte amnhĩ nhĩpêx kôt pahpumunh jakamã tapxipix koja tanhmã mē pajarênh to.

⁵Jakamã kwa kêr ka mē ri mē kot Tĩrtũm mã tanhmã amnhĩ nhĩpêx to hã mē omunh xà hkôt tanhmã mē harênh to hkêt nē. Koja nhỹrmã Pahihti Krisja akupỹn mē pahwỳr wrỳ nē rĩ tãm tanhmã mē pahte amnhĩ nhĩpêx to hã mē pahpumunh xà hkôt tanhmã mē pajarênh to. Nē mē kot hpimxur pē tanhmã amnhĩ tomnuj to ho mē pa xwỳnhjaja nhũm mē piitã mē noo mã mē kãm ja ho amnhĩrĩt nhũm mē ja hã mē omu. Nē mē pahpiitã mē pajamaxpêr xà ho amnhĩrĩt nhũm mē piitã hprĩ hã ja hã axpên pumu. Hãmri nhũm Tĩrtũm rĩ kormã mē pahte kãm tanhmã amnhĩ nhĩpêx mex to ho pa xwỳnhjê jarê.

⁶E Jejus kôt ixkwỳjaja. Nà na pa ã mē amã Apor mē wa amnhĩ jarênh anē. Mē ate inhmar nē Tĩrtũm kapêr ã kagà hkôt tanhmã wa ijarênh to kaxyw. Kot kaj mē ã amnhĩ nhĩpêx anē hãmri nē ahpỹnhã tanhmã mē ixte Kris kapêr jarênh xwỳnhjê jarênh to hkêt nē. Nē axpên mã mē ijarênh o: —Nà tãm kot Kris kapêr jarênh mex o kot hkwỳjê jakrenh jakamã kot paj hkôt pix mã mãn ri ixpa. Anhỹr o axpên mã mē ixtō jarênh kêt nē. Kot kaj mē ã mē ixtō jarênh anē nē te mē ixtō jarkrar pyràk o amnhĩ nhĩpêx.

⁷Kwa mēhō na pre mē amã tanhmã ri mē ijarênh to ka mē mar xà hkôt ã mē ijarênh anē? Nē mē ixkapêr mex ã mē ixkwỳjê jarê nē mē ixkapêr mex kêt ã mē ixkwỳjê jarê. Nà na ka mē ãm amnhĩ krã hkôt ã mē ijarênh anē nom Kris xàhpumunh xà ho ã mē ijarênh anhỹr kêt nē. ãm mē ixte Tĩrtũm kapêr o mē ajahkre xwỳnhjaja na pa prem mē amã mēmoj jarê ka mē ama nē mē

inhỹ hã hkôt axàhpumunh mex nẽ. No amnhĩ krã hkôt mẽ axàhpumunh kêt kênã kot ka kêt mẽ ã ahpỹnhã tanhmã mẽ ixto jarkrar anhỹr to ho ri apa.

⁸Te mẽ ate Apor mẽ wa ixrom Tirtũm kapẽr mar par nẽ hkôt amnhĩ nhĩpêx mex pyræk. Te wa ixrom mẽ ate Jejus nhĩhkô hã mẽ ho amnhĩptàr pyræk. Hêxta waa nẽ. Kop apu ãm hãmri mẽ ate ìhkô hã mẽ ho amnhĩptàr ronhỹx pa ijaxwỳja mẽ apyrà nẽ ã amnhĩ nhĩpêx anẽ. Hãmri nẽ ixkĩnh tỳx kumrêx.

⁹Nom ja kot anhỹr kêt.

Jejus nhỹ hã mẽ ahkre xwỳnhjê jarênh

Sikũn Korĩt 4.8-10; Eprêw 12.1

Nẽ mẽ ixpê Jejus nhỹ hã mẽ ajahkre ho mẽ ixpa xwỳnhjaja te Tirtũmja axtem tanhmã mẽ inhĩpêx to pyræk pa mẽ inhmex kêt nẽ ixpa. Te mẽ ixte gyw kãm amnhĩ rênh nhũm mẽ kot mẽ ixkamã ôkre kahak pyræk o na htem mẽ inhĩpêx. Jakamã na hte mẽ hkwỳjaja mẽ ixpumu nẽ mẽ ixkapẽr ma nẽ ãm mẽ inhma nẽ axpẽn mã mẽ ijarênh o: —Tk. Kot mẽ ahkreja mexti hã. Kwa pu mẽ himex ri. Anhỹr jakamã te ra mẽ ixtyk nẽ mẽ inhĩkwỳ nhũm mẽ piitã mẽ ixtã htu nẽ mẽ ixpumunh nẽ ma pa pyræk o amnhĩ nhĩpêx. Jakamã na htem mẽ ixte mẽ ahkre ma nẽ ãm kuma nẽ ma pa. Nom Tirtũm kapẽr o mẽ wrỳk xwỳnhjaja na htem ja hã mẽ pahpumu nẽ axpẽn mã mẽ pajarênh o: —Kwa mẽ kot Jejus ã mẽ hipêx kati htã nhũm mẽ arĩ hkôt amnhĩ nhĩpêx mex nẽ aa hkaga hkêt nẽ. Hêxta waa nẽ. Nà ãm hãmri na htem ã amnhĩ nhĩpêx anhỹr o pa. Anẽ.

¹⁰Na hte mẽ kot mẽ ixkapẽr mar xwỳnh kwỳjaja kãm mẽ ixkĩnh kêt nẽ tanhmã mẽ ixto kapẽr punuj to. No mẽ kajaja nhũm mẽ ã mẽ ato kapẽr anhỹr kêt nẽ. Na htem mẽ ixkrã pipãnh ã mẽ ijarẽ no mẽ kajaja nhũm mẽ Kris nhỹ hã mẽ axàhpumunh tỳx ã mẽ ajarẽ. Nẽ mẽ ixte Tirtũm kapẽr kôt amnhĩ nhĩpêx mex kêt ã mẽ ijarẽ no mẽ kajaja na htem Tirtũm kôt mẽ ate amnhĩ nhĩpêx mex ã mẽ ajarẽ. Nẽ mẽ kot mẽ ixkamã ôkre kahak tỳx tã mẽ akamã ôkre kahak kêt nẽ mẽ kãm mẽ akapẽr mar prãm nẽ.

¹¹Na pa htem arĩ Kris ã ixpunuj nẽ ixpa. Nẽ mẽ inhmã prãm nẽ mẽ inhmã kôr nẽ ri ixpa. Nẽ mẽ ixê pikaxônhre nẽ ri ixpa. Nhũm htem Kris ã mẽ ixtak

rũnh nẽ. Pa mẽ inhõrkwỹ hkêt nẽ nhãm ri ixpa nẽ nhãm ri ixpa. Na pa htem arĩ ã amnhĩ nhĩpêx anhỹr o ri ixpa.

12-13Nẽ ixàpkur xà kaxyw ixàpênh rũnh o ri ixpa. Nhũm hte mẽ kãm Jejus prãm kêt xwỳnhjaja mẽ ijaprỳ ho pa htã pa mẽ amnhĩ kurom mẽ kãm ixkapêr mex nẽ mẽ kãm: —E kê Tĩrtũm mẽ ato mex nẽ ka mẽ amex nẽ apa. Anẽ. Nẽ mẽ kot mẽ inhĩpêx kati htã pa htem mẽ kutã amnhĩ to htỳx nẽ arĩ mẽ hkôt ixpa. Na htem te mẽ kot ahpunuj nhĩpêx pyræk o mẽ inhĩpêx nẽ mẽ ixwỳr mrar kêt nẽ. ã na htem mẽ ixte Jejus nhỹ hã mẽ ahkre o mẽ ixpa xwỳnhjê nhĩpêx anẽ.

Pawre te kêp mẽ hpãm pyræk ã kot amnhĩ jarênh

Wam Tesarõn 2.11-12

14-15E Kris kôt ixkwỳjaja. Na pa ã mẽ amã kagà nẽ mẽnh anẽ. Nom mẽ ate inhmar nẽ amnhĩ kamã apijaàm kaxyw kêt. Inhmã mẽ ajapê jakamã na pa ã mẽ amã ixkapêr nẽ hã kagà nẽ mẽnh anẽ. Na mẽ ra ohtô nẽ ixpãnhã mẽ awỳr pa nẽ mẽ amã Tĩrtũm kapêr o mẽ ajahkre. Nom ixkumrêx na pa pre mẽ amã kapêr jarê ka prem inhma nẽ Kris hkôt amnhĩ xunhwỳ nẽ amnhĩ kaxyw hkôt ajamaxpêr tỳx nẽ. Jakamã paxipix te ixpê mẽ apãm nhũm te mẽ apê ixkra pyræk.

16Jakamã kwa mẽ ixte amnhĩ nhĩpêx kôt ixpumu nẽ ixkôt mãn kêt mẽ amnhĩ nhĩpêx o ri apa.

17ã mẽ ate amnhĩ nhĩpêx anhỹr kaxyw na pa pre ijamaxpêr nẽ ma mẽ awỳr Ximotre mẽ. Haxwỳja Kris kôt te kêp ixkra pyræk. Nẽ inhmã hapêê. Na hte jar Kris mã tanhmã amnhĩ nhĩpêx mex to ho pa. Tã pa pre mẽ awỳr kumẽ. Koja ma mẽ awỳr mỗ nẽ pøj nẽ mẽ amã Kris kapêr jarênh o ri mẽ akôt pa. Nẽ mẽ amã tanhmã ijarênh to nẽ mẽ amã: —Nà Pawre na hte Jejus Kris jamaxpêr kôt hamaxpêr o pa. Nẽ kot amnhĩ nhĩpêx kôt amnhĩ nhĩpêx o pa. Nẽ krĩ piitã hkôt mẽ kot uræk nẽ ã amnhĩ nhĩpêx o pa anhỹr kaxyw mẽ ahkre mex o pa. Anẽ.

¹⁸Ně na xep mẽ akwỳjaja te ra àhpumunh tỳx pyrà ně tanhmã ijarěnh to ně ijarěnh o: —Pawreja akupỳn mẽ pahwỳr mōr ã amnhĩ jarěnh tã koja akupỳn mōr kêt ně kãm ga. ãm kapěr kati xwỳnh na.

¹⁹Anhỹr ã ijarěnh tã koja Tĩrtũm kãm tokyx ma mẽ awỳr inhmōr prãm hã kot pa ma mẽ awỳr inhmōr kurê kumrěx. Hãmri ně pōj ně ixprĩ hã ã mẽ kot ixto kapěr anhỹr xwỳnhhtajê pumu. Ně mēhō kot ã mẽ kãm ijarěnh anhỹr xwỳnhhta ã ahkukja.

²⁰Tĩrtũm krajaja na htem hkôt pix mã amnhĩ nhĩpêx jakamã na htem hkôt tanhmã amnhĩ nhĩpêx to hã mẽ omu ně rĩ kormã kêp hkra hã mẽ harě. Tã kot paj nhỹrmã mẽ awỳr pōj ně ã ixto kapěr anhỹr xwỳnhjê pumu ně ixprĩ hã mẽ kot amnhĩ nhĩpêx ã mẽ omu ně rĩ kormã tanhmã mẽ harěnh to. Jao Tĩrtũm nhỹ hã mẽ kot mẽ ajahkre hã mẽ omu rỳ amnhĩ krã hkôt mẽ kot mẽ ajahkre hã mẽ omu ně rĩ kormã tanhmã mẽ harěnh to.

²¹Jakamã kwa mẽ tokyx ixkutêp tãm amnhĩ nhĩpêx o ri apa. Kêr pa mō mẽ awỳr pōj ně mẽ ate tãm amnhĩ nhĩpêx ã mẽ apumu ně ixkĩnh ně. Ně mẽmoj tã mẽ amã ixàkjêr kêt ně. Ně mẽ amã ixkapěr mex pix o ri mẽ amã ixkapěr. Te mẽ hipêêxà kot hkrajê mã kapěr mex pyràk o mẽ amã ixkapěr mex ně. Hãmri pu mẽ axpên pumu ně pahkĩnh ně.

Wam Korĩt 5

Mēhō kot tanhmã amnhĩ tomnuj to hã harěnh

Sikũn Korĩt 2.5-11

¹Ně kwa na pa pre tee ri mẽ anhĩōja jarěnh ma ně ixkaprĩ htỳx ně. Na xep hte amnhĩ tomnuj tỳx pê nã puro hã hpijaàm kêt o pa. Kwa mẽ pahpê Kris kwỳjaja mẽ pahte ã amnhĩ nhĩpêx anhỹr kêt nhũm mẽ kot Kris kôt amnhĩ xunhwỳr kêt xwỳnhjaja haxwỳja ã amnhĩ nhĩpêx anhỹr kêt tã nhũm ra mẽ anhĩōja kot Kris kôt amnhĩ xãm tã ã amnhĩ nhĩpêx aně. Kwa ja omnuj tỳx kumrěx.

²Na xep ri ã amnhĩ nhĩpêx anhỹr o pa ka mẽ ja hã omu ně ãm omu ně nê tanhmã kãm ně hkêt ně. Amarĩ hã omunh o ri hkôt apa. Mě ate Tĩrtũm kôt axàhpumunh tỳx ã amnhĩ jarěnh tã no ãm ja hã omu ně ãm hã omu ně nê

tanhmã kãm nê hkêt nê. Kwa nà. Mẽ tee ri kot ã amnhĩ nhĩpêx anhÿrja ã omu nê akaprĩ nê hkêt wehe. Nê mẽ tokyx amnhĩ nê hano kê mẽ akôt Tĩrtũm mã amnhĩ jarênh xà hã ixkre hwÿr axte mrar kêt nê.

3-5 Ixte mẽ apê awry htã ã kot amnhĩ nhĩpêx anhÿr ã harênh ma nê hkukamã tanhmã ijamaxpêr to. Nà ra ixte mẽ awÿr ixpôx ronhÿx pa mẽ ato akuprõ. Pahihti Jejus nhÿ hã mẽ ato akuprõ nê mẽ amã kot amnhĩ tomnuj xwÿnhhta jarê nê mẽ anê hanor kurê kumrêx. Jakamã e kêr ka mẽ mãmri ã amnhĩ nê hipêx anê. Mẽ panhõ Pahihti Jejus nhÿ hã amnhĩ nê hano nê te Satanasti mã rer pyræk kê tee ri ja hã amnhĩ pumu nê tokyx kãm urer japêr. Hãmri nê akupÿm tãm amnhĩ nhĩpêx. Kê nhÿrmã Pahihti akupÿn mẽ pahwÿr wrÿ nhũm ma mẽ pahkôt õ krĩ hwÿr api.

6 Mẽ ate Tĩrtũm kapêr jarênh mar mex ã amnhĩ jarênh tã kormã amnhĩ nê ã kot amnhĩ nhĩpêx anhÿr xwÿnhhta janor kêt nê. Kwa mẽ tokyx amnhĩ nê hano. Na htem pãwti nhĩpêx kaxyw nê kamã kot ho hikot xà ho hkryre nê kamã kurê nê gaa nê rĩ ho piitã hikot pa. Ja pyrã nê kot ka mẽ amnhĩ nê kot amnhĩ tomnuj xwÿnhhta janor kêt nê hãmri nê gaa nê ra uræk nê apiitã ã amnhĩ nhĩpêx anhÿr o ri apa.

7 Kwa mẽ tokyx amnhĩ nê hano. Kêr ka mẽ arĩ amnhĩ to mex pix o ri axpên kôt apa nê tãm ri amnhĩ nhĩpêx o ri axpên kôt apa. Na pre ra Jejus Kris mẽ pahte amnhĩ to mex o papa kaxyw mẽ panê ty. Mẽ pahpiitã mẽ panê ty.

8 Jakamã na pu htem ãm amnhĩ to mex pix o ri papa. Nê tãm amnhĩ nhĩpêx o ri papa. Jao tanhmã amnhĩ tomnuj to ho ri papa hkêt nê.

9 Nê wam ixte mẽ awÿr kagà nê mênhta kamã na pa pre mẽ amã: —Kêr ka mẽ nhãm mẽ kot mênijê kamã hpijaàm kêt o mẽ pa xwÿnhjê hkôt ri apa hkêt nê. ãm ri mẽ hkàx ã apa. Anhÿr o mẽ amã hã karõ.

10-11 Nom na pa pre mẽ piitã ã mẽ nê mẽ akurê anhÿr kêt nê. ãm mẽ kêp Kris kwÿ hã amnhĩ jarênh tã ã ri amnhĩ tomnuj anhÿr xwÿnh pixjaja na pa pre mẽ nê mẽ akurê. Kojã mēhõ kêp Kris kôt mẽ pahtõ rÿ mẽ pahtõx ã amnhĩ jarênh tã mẽ kamã hpijaàm kêt o ri pa ka mẽ ja hã omu nê hkôt ri apa hkêt kurê kumrêx. Nê mẽ kãm nhãm mẽ hkukrêx kĩnh o kãm ho õ hprãm o ri mẽ

pa xwÿnhjaja. Nĕ sãnti kutã hkõn krã ho rôrôk nĕ hkrĩ nĕ kãm mex ã harĕnh o ri mĕ pa xwÿnhjaja. Nĕ mĕ kot axpĕn to kapĕr punuj o ri mĕ pa xwÿnhjaja. Nĕ mĕ pipãnh o ri mĕ pa xwÿnhjaja. Nĕ axpĕn pĕ ri mĕ àhkĩnh o mĕ pa xwÿnhjaja. Koja mĕhõ kĕp Kris kwÿ hã amnhĩ jarĕnh tã ã amnhĩ nhĩpĕx anhÿr o ri pa ka mĕ ja hã mĕ omu nĕ hkõt ri apa hkĕt kumrĕx. Nĕ mĕ kutã axàpkur kĕt nĕ. ãm mĕ hkàx ã ri mra. No mĕ kĕp Kris kwÿ hkĕt xwÿnhjĕ nĕ na pa pre ã mĕ akurĕ anhÿr kĕt nĕ. Mĕ piitã ã mĕ kot amnhĩ nhĩpĕx anhÿr o pa kĕnã. Na htem axpĕn kãm hpijaàm kĕt o ri pa. Nĕ mĕ kãm axpĕn kukrĕx kĩnh o kãm ho õ hprãm o ri pa. Nĕ sãnti kutã hkõn krã ho rôrôk nĕ hkrĩ nĕ kãm amnhĩ jagrer pĕ amnhĩ to hwÿr o pa. Nĕ mĕ axpĕn pĕ àhkĩnh pix o pa. Kris kwÿ hkĕt xwÿnhjaja na htem ã amnhĩ nhĩpĕx anhÿr o pa. Tã tanhmã kot ka wem amnhĩ to nĕ mĕ hkàx ã ri apa? Mĕ piitã ã mĕ kot amnhĩ nhĩpĕx anhÿr kĕnã. Kot puj mĕ nhÿrmã Tĩrtũm nhõ krĩ mex wÿr api nĕ rĩ kormã mĕ hkàx ã ri papa.

12-13 Nĕ mĕ kĕp Kris kwÿ hkĕt xwÿnhjaja na pa hte mĕ kot amnhĩ tomnuj ã mĕ omu nĕ ãm mĕ omu nĕ tanhmã hã mĕ kãm nĕ hkĕt nĕ. Tĩrtũm tãm koja nhÿrmã ja hã tanhmã mĕ hipĕx to. No koja Kris kõt mĕ pahtõ rÿ mĕ pahtõxjĕ hõ tanhmã amnhĩ tomnuj to ho pa pu mĕ pahtõ ja hã omu nĕ nĕ tanhmã kãm pakapĕr to kurĕ kumrĕx. Tĩrtũm kapĕr ã kagà htũm kot ja jarĕnh kot: Kĕr ka mĕ amnhĩ nĕ Kris kõt akwÿjĕ hõ kot tanhmã amnhĩ tomnuj to ho pa xwÿnhjĕ jano. ã harĕnh kot anhÿr.

Wam Korĩt 6

Mĕ pahte Kris kwÿjĕ ho pakapĕr kĕt

Matĕwre 5.38-40

¹Nĕ na ka xep htem Kris kõt atõ rÿ atõxjĕ hõ mĕ ka wa tanhmã axpĕn tomnuj to nĕ axtem nĕ juisti hwÿr axpĕn to mra. Mĕ apyrã nĕ kĕp Kris kwÿ hkĕt tã ka htem ma hwÿr amnhĩ to mra nhũm war axpĕn tã war ama nĕ tanhmã war ajarĕnh to. Kwa mon ka htem axtem nĕ ã Kris kwÿ hkĕt xwÿnhjĕ hwÿr mĕ amnhĩ to amrar anĕ? Kĕt mĕ Kris kõt anhĩõ hwÿr mãn kĕt mĕ amnhĩ to

mra nẽ kumã mãn amnhĩ jarẽ kê axpẽn tã war ama nẽ axpẽn tã tanhmã war amã kapẽr to.

²Ra mẽ ate ja mar tỳx tã hkõt amnhĩ nhĩpêx kêt nẽ. Mẽmoj ãm grire htã ka wa tokyx akupỹm hã tãm axpẽn xãm kêt nẽ. Rỳ Kris kõt war atõjê hõ hwỳr wa amnhĩ to atẽm nhũm akupỹm tãm axpẽn tã war axãm kêt nẽ. ãm axtem nẽ mẽ kêp Kris kõt mẽ atõ hkêt xwỳnhjê hwỳr amnhĩ to mra. Kwa mẽ ã amnhĩ nhĩpêx anhỹr kêt nẽ. Mẽ pahpê Kris kwỳjaja kot puj mẽ nhỹrmã Kris nhĩhkõ hã mẽ kêp hkwỳ hkêt xwỳnhjê tanhmã mẽ harẽnh to.

³Nẽ Tĩrtũm kapẽr o mẽ wryk xwỳnhjaja kot puj mẽ mããnẽn nhỹrmã tanhmã mẽ harẽnh to ho pahkrĩ. Jakamã kwa mãmrĩ ã mẽ pahte amnhĩ nhĩpêx anhỹrja kukamã akupỹm tanhmã axpẽn xunhwỳr to ho apa. Mẽmoj tã mẽ atõjê hõ wa kot tanhmã axpẽn to hã wa omu nẽ tokyx akupỹm axpẽn tã wa kãm akapẽr kê wa tokyx akupỹm tãm axpẽn nhĩpêx. ã mẽ kot axpẽn nhĩpêx anhỹr o paja na kêt mex.

⁴No na ka xep htem arĩ Kris kõt mẽ akwỳ hkêt xwỳnhjê hwỳr axpẽn to mra nẽ mẽ kãm amnhĩ jarẽ. Kwa mẽ ri ã amnhĩ nhĩpêx anhỹr kêt nẽ.

⁵Mẽ tokyx tee ri ja hã amnhĩ pumu nẽ amnhĩ kamã apijaàm kêt wehe. Xà mẽ akamã Kris kõt mẽ atõjê hõ pixire nẽ kot tãm akupỹm mẽ axunhwỳr kaxyw amrakati kumrẽx?

⁶Na ka xep htem mẽmoj tã axpu. Kris kõt mẽ atõjê hõ mẽ mẽmoj tã axpu nẽ ra mẽ kêp Kris kwỳ hkêt xwỳnhjê hwỳr amnhĩ to mra. Kot tãm akupỹm mẽ unhwỳr xwỳnhjê hwỳr amnhĩ to mra.

⁷Mẽ apijapu ho apa jakamã na ka mẽ amnhĩ tomnuj tỳx nẽ. Hãmri nẽ te mẽ apê Kris kwỳ hkêt xwỳnh pyrà nẽ mẽ hwỳr amnhĩ to mra. Kwa kwãr Kris kõt anhĩõ mãmrĩ apê ahkĩ rỳ tanhmã anhĩpêx to. Ka mẽ ãm amnhĩ tã omu kê tapxipix tanhmã amnhĩ tomnuj to.

⁸Ja mex tã mẽ ate ã amnhĩ nhĩpêx anhỹr kêt. Na ka htem axpẽn pẽ ahkĩ. Mẽ ate Kris kõt axpẽn to atõ nẽ atõx tã axtem nẽ ã axpẽn nhĩpêx anẽ. Te mẽ apijaàm kêt pyræk o amnhĩ nhĩpêx o ri apa.

9-10 Mě kot tanhmã amnhĩ tomnuj to xwỳnhjaja koja mẽ nhỹrmã ma Tĩrtũm nhõ krĩ mex wỳr àpir kêt nẽ. Ra mẽ ate ja jarẽnh mar tỳx. Měmyjê hõ kot nhãm mẽnijê hõ ho amnhĩ kati xwỳnhjaja. Nẽ mẽnijê hõ kot nhãm mẽmyjê hõ ho amnhĩ kati xwỳnhjaja. Nẽ mẽnijaja axtem nẽ mẽ kot amnhĩõ ho mjên o ri mẽ pa xwỳnhjaja. Nẽ mẽmyjaja haxwỳja axtem nẽ amnhĩõ ho hprõ ho ri mẽ pa xwỳnhjaja. Nẽ mẽ àhkĩnh o ri mẽ pa xwỳnhjaja. Nẽ mẽ kãm nhãm mẽ hkukrêx kĩnh o kãm ho õ hprãm o ri mẽ pa xwỳnhjaja. Nẽ ri mẽ pipãnh o mẽ pa xwỳnhjaja. Nẽ ri axpẽn to kapěr punuj o mẽ pa xwỳnhjaja. Nẽ mẽ kot amnhĩ to sãnti hwỳr o mẽ pa xwỳnhjaja. Ǻ mẽ kot amnhĩ nhĩpêx anhỹr xwỳnh piitã koja mẽ Tĩrtũm nhõ krĩ hwỳr àpir kêt nẽ.

11 Kormã mẽ ate Kris kôt amnhĩ xunhwỳr kêt ri na ka pre mẽ akwỳjaja Ǻ amnhĩ nhĩpêx anhỹr o ri apa. Tã amnhĩ kaxyw Jejus kôt ajamaxpěr nẽ hkôt amnhĩ xunhwỳ. Hãmri nhũm Tĩrtũm Karõ mẽ Pahihti Jejus Krisja wa mẽ anê mẽ ate amnhĩ tomnuj piitã rênh pa nẽ mẽ apê Tĩrtũm kra hã mẽ axunhwỳ nẽ amnhĩm mẽ ate amnhĩ to mex xwỳnh Ǻ mẽ ajarẽ.

Mě pahte tãm amnhĩ nhĩpêx o papa hã mẽ pamã karõ

Matêwre 5.27; Rõmãn 12.1-2; Epes 5.3; Korosẽ 3.5; Wam Tesarõn 4.1-8

12 Nẽ na ka hte mẽ akwỳjaja amnhĩ jarẽnh o: —Nà na pa hte pa inhmã tanhmã amnhĩ nhĩpêx to hprãm xà hkôt amnhĩ krã hkôt amnhĩ nhĩpêx o ri ixpa. Anẽ. Mě ate Ǻ amnhĩ jarẽnh anhỹr tã no Ǻm mẽ ate amnhĩ jarẽnhja mex kêt. Měmoj piitã mẽ pamã mex kêt. Na pu htem pamã hprãm xà hkôt mẽmoj to anẽ nẽ gaa nẽ ra ho amnhĩ pyrà nẽ ho anhỹr pix o papa. Nẽ gaa nẽ kãm panhũrer kêt kumrêx. Jao ra pahpipãnh pix o ri papa. Rỳ paxêx pix o ri papa. Rỳ paxàhkĩnh pix o ri papa. Jakamã kêr pu mẽ pamã tanhmã amnhĩ nhĩpêx to hprãm xà hkôt tanhmã amnhĩ nhĩpêx to ho papa hkêt nẽ. Ǻm amnhĩ mẽ amnhĩ kaxyw Jejus mã pajamaxpěr pix nẽ.

13 Nẽ na htem amnhĩ jarẽnh o: —Nà kot paj inhmã prãm nẽ mãmri mẽmoj ku. Nẽ inhmã nhãm mẽhõ kamã xpijaàm kêt prãm nẽ mãmri Ǻ amnhĩ nhĩpêx anẽ. Ja tanhmã inhmã kute hkêt. Anẽ. Tã koja nhỹrmã Tĩrtũm mẽ panhĩja o hapêx pa. Na pre mẽ pahte nhãm mẽ kamã pahpijaàm kêt o papa

kaxyw mẽ panhĩpêx kêt nê. ãm mẽ pahte mẽ panhĩpêx xwỳnh maatija mã tanhmã amnhĩ nhĩpêx mex to ho papa pix kaxyw na pre mẽ panhĩpêx.

¹⁴Nê na pre Pahihtija ty nhũm Tĩrtũm akupỹm ho htĩr. Ja pyrà nê kot puj mẽ nhỹrmã mẽ pajaxwỳja ty nhũm akupỹm mẽ pahto mẽ pahtĩr. Ja kaxyw tapxipix pix na àhpumunh tỳx o àhpumunh tỳx.

¹⁵Na pu htem Kris kôt amnhĩ xunhwỳr kôt pahpê hkwỳ nê te pahpê ĩ pyràk. Jakamã kwa mẽ ja hã anohtỳx nê axte nhãm mẽ hkuprỳjê hwỳr amrar nê mẽ ho amnhĩkati hkêt nê. Tĩrtũm kêp ja omnuj. Te mẽ pahte Kris nhĩ pyràk jakamã kot kaj mẽ ã amnhĩ nhĩpêx anhỹr jao te Kris tãm kot ã amnhĩ nhĩpêx anhỹr o pa pyràk. Kwa ja mex kêt. Xà kot we Krisja ã amnhĩ nhĩpêx anê? Nà koja ã amnhĩ nhĩpêx anhỹr kêt nê.

¹⁶Tĩrtũm kapêr ã kagà htũm kot ja jarênh kot: Kot ka mẽ atõ mênijê hõ ho aprõ nhũm kêp aprõ kumrêx. Hãmri nê te ra war atipxi pyràk o axpên nhĩpêx. Anê. ã kot aprõ mẽ wa ajarênh anhỹr jakamã kwa kêr ka mẽ atỳx ri nhãm mẽ hkuprỳjê hwỳr apa hkêt nê. Kot kaj mẽ ã amnhĩ nhĩpêx anê nê Tĩrtũm noo mã te ate aprõ kuhpa hã hkuprỳta o aprõ pyràk. Te wam aprõta kuhpa hã war atipxi pyràk.

¹⁷Na pu htem Pahihti Jejus Kris kôt amnhĩ xunhwỳ nhũm amnhĩ tã mẽ pahpumu nê mẽ pamã Karõ gõ nhũm mẽ pamã agjê. Pu mẽ ra Karõja kôt te ra Jejus mẽ wa pahtipxi nê ri papa pyràk o axpên nhĩpêx. Jao Kris jamaxpêr mẽ mẽ pajamaxpêrja te wa kot axpên pyràk. Nê Kris kot amnhĩ nhĩpêx mẽ mẽ pahte amnhĩ nhĩpêxja te kot axpên pyràk.

¹⁸Jakamã kwa kêr ka mẽ amnhĩ prõ pix tãnopxar o ri apa. Nê mẽ anijaja amjên pix tãnopxar o ri apa. No mẽ nhãm mẽmyjê ho amnhĩkati ho ri apa hkêt nê. Nê mẽ amyjaja nhãm mênijê ho amnhĩkati ho ri apa hkêt nê. Kot ka mẽ nhãm mẽmoj tanhmã omnuj kute ho anê no ãm amnhĩ nhĩ homnu hkêt nê. Nom kot kaj mẽ nhãm mênijê ho amnhĩkati rỳ nhãm mẽmyjê ho amnhĩkati hãmri nê ra amnhĩ nhĩ homnu hpa.

¹⁹Mẽ panhĩ kamã na hte Tĩrtũm Karõ agjê nê kamã hkrĩ. Tĩrtũm na pre mẽ pahwỳr kurê nhũm mẽ pahkarõ mã agjê pu mẽ te mẽ pahpê òrkwỳ pyràk.

Jakamã na pu htem amnhĩ krã hkôt pahtỳx ri mẽmoj tanhmã ho ho papa hkêt nẽ. ãm Tĩrtũm jamaxpěr xà hkôt pix mã na pu htem tanhmã mẽmoj nhĩpêx to ho papa.

²⁰Na pre ra Jejus mẽ pahte amnhĩ tomnuj pãnhã amnhĩrer kaxyw mẽ pahpiitã mẽ panê ty. Te htyk o amnhĩm mẽ pajaprôr pyràk o mẽ panhĩpêx. Jakamã kwa kêr pu mẽ ãm hkôt pix mã mãn ri amnhĩ nhĩpêx rãhã ho ri papa. Kê mẽ pahkwỳjaja ja hã mẽ pahpumunh kôt Tĩrtũm mã mex o mex ã harênh o ri pa.

Wam Korĩt 7

Mẽ mjên mẽ mẽ hprõ wa kot axpên to mex ã mẽ pamã karõ

Epes 5.22; Korosẽ 3.18; Eprêw 13.4

¹Nẽ ota mẽ ate ixwỳr kagà nẽ mẽnhta na pre ixwỳr pøj pa omu. Nẽ kamã mẽ ate mẽ aprõ hã ixkukjêr xwỳnhta pa kamã harẽ nẽ omu. Tã kot paj mẽ amã tanhmã harênh to ka mẽ inhma. Nà kot ka mẽ amyjê hõ amã aprõ hkêt nẽ ahte ri apa hprãm nẽ kam nẽ aprõ hkêt apa. Ja tanhmã kute hkêt. Nom kêr ka mẽ hkuprỳjê ho presija ho ri apa hkêt nẽ.

²Na htem tõhã kãm hprõ hprãm kêt nẽ ri pa nẽ gaa nẽ mẽ hkuprỳjê hõ pumu rỳ mẽ kêp mẽ hprõjê hõ pumu nẽ kamã hpijaàm kêt o ri pa. Ja pymaj kêr ka mẽ amyjaja mãmrĩ aprõ nẽ mẽ anijaja mãmrĩ amjên.

³Nẽ mẽ anijaja. Koja mẽ amjên akamã hkurẽ ka mẽ mãmrĩ kãm amnhĩ gõ kê mẽ anĩ. Nẽ mẽ amyjaja mããnên. Koja mẽ aprõ mẽ akamã hkurẽ ka mẽ mãmrĩ mẽ anĩ.

⁴ãm ka amã tanhmã amnhĩ nhĩpêx to hprãm xà hkôt pix mã amnhĩ nhĩpêx kêt nẽ. Mããnên amã aprõ kot kãm tanhmã amnhĩ nhĩpêx to hprãm xà hkôt mããnên hkôt kãm amnhĩ nhĩpêx.

⁵Nẽ kot kaj mẽ mẽmo arĩgro hã amã Tĩrtũm mã amnhĩ jarênh ryy hprãm japêr. Hãmri nẽ aprõ mã: —E kot puj jarãhã axpên to amnhĩkati hkêt nẽ. Kot puj ãm Tĩrtũm pix mã amnhĩ jarênh o amỹkry. Anẽ. Hãmri nẽ mãmrĩ ã amnhĩ nhĩpêx anẽ. No kwa kêr ka mẽ ãm ja ho anhỳr o apkati pixi nẽ kãm anhũre. Nhũm jãã ka mẽ amã axpên to amnhĩkati hprãm nẽ mãmrĩ tanhmã

axpën nhîpêx to. No kot kaj mẽ ã amnhĩ nhîpêx anhÿr kêt o hã atã apkati xohtô nê gaa nê ra akurê xàj axtem nê Satanasti jamaxpêr o ajamaxpêr. Jao nhãm mēhō ni hwÿr mra nê aprō kuhpa hã kamã akurê ho kamã apijaàm kêt. Rÿ nhũm mēnijaja nhãm mēmyjê hō hwÿr mra nê mjên kuhpa hã kamã hkurê ho war axpën kamã hpijaàm kêt.

⁶E mẽ ate ja hã ixkukjêr jakamã na pa ã ixprĩ hã mẽ amã ja jarēnh anē. Ka mẽ akwÿjaja amã aprō hprãm nê māmri aprō nê ri apa. Nê mẽ akwÿjaja amã aprō hprãm kêt nê māmri aprō hkêt nê ri apa. Nom kot pa paa mẽ amã mẽ aprō hã ixàmnēnh kêt nê. Ka mẽ kam amnhĩ krã hkôt ajamaxpêr xà hkôt tanhmã amnhĩ nhîpêx to.

⁷Na pa hte ixprō hkêt nê ri ixpa nom inhmã ja mex pa hte ahte ixpa.

Mẽ mjên kêt nê mẽ hprō kêt xwÿnhjê jarēnh

Nê kormã mẽ aprō hkêt xwÿnhjaja. Ka mẽ ixpyrà nê aprō hkêt nê ri apa ronhÿx inhmã ja mex nê. Na hte mēmy hwÿjaja hprō kêt nê ri pa nhũm Tirtũm ja hã mẽ omu nê tanhmã mẽ ho nhũm mẽ mex nê ri pa nê mēnijê kamã hkurê ho mẽ kamã hpijaàm kêt o ri pa hkêt nê. No na hte mẽ hwÿjaja hprō hkêt nê ri pa nê gaa nê ra hkurê xàj mēnijê kamã hpijaàm kêt. ã mẽ ate amnhĩ nhîpêx anhÿr pymaj kêr ka mẽ amã aprō hprãm nê māmri aprō. Tirtũm mã ja mex kēnã.

⁸E mẽ aprō hkêt nê mẽ amjên kêt xwÿnhjaja. Nê ra mẽ apê mẽ aprō htyk rÿ mẽ amjên htyk xwÿnhjaja. Pa mẽ amã mēmoj jarē. Nà kot kaj mẽ ixpyrà nê mẽ aprō hkêt nê ri apa rÿ mẽ amjên kêt nê ri apa nhũm ja inhmã mex nê.

⁹No kot ka mẽ atō ra akurê japêr nê māmri aprō rÿ māmri amjên. Ja mãnēn tanhmã kute hkêt.

Mẽ pahte axpën kaga hkêt ã mẽ pamã karō

Matêwre 5.31; 19.3-9; Makre 10.2

¹⁰E kot paj hpãnhã ra mẽ ate axpën to amjên nê axpën to aprō xwÿnhjê mã ixkapêr. Nom kot paj amnhĩ krã hkôt tanhmã ixkapêr to hkêt nê. Pahihti Jesus Kris kapêr xà hkôt kot paj mẽ amã ixkapêr. Jakamã e kêr ka mẽ anijaja mẽ amjên kaga hkêt nê.

¹¹Nom kot kaj mẽ tanhmã ajamxpěr to nẽ hkaga japêr hãmri nẽ ahte ri apa nẽ axte nhãm mẽhõ ho amjên kêt nẽ. Rỳ tee ri amnhĩ kukamã ajamxpěr nẽ mãmri akupỹm amjênta wỳr tẽ nẽ akupỹm hkôt ri apa. No kêr ka mẽ axte nhãm mẽhõ ho amjên kêt nẽ. Nẽ ra mẽ amyjaja kêr ka mẽ ajaxwỳja ã amnhĩ nhĩpêx anẽ nẽ mẽ aprõ kaga hkêt nẽ. E kêr ka mẽ ã amnhĩ nhĩpêx anhỹr o ri apa.

¹²Nẽ mẽ ate ixwỳr kagà mẽn̄h kamã axpẽn tã ixkukjêrta kot paj hpãnhã mẽ amã harẽ. Na Pahihti Jejusja ja hã tanhmã inhmã nẽ hkêt nẽ. ãm amnhĩ krã hkôt kot paj mẽ amã tanhmã harẽnh to ka mẽ inhma. Ka mẽ amyjê hõ ra Kris kôt amnhĩ xãm nom nhũm aprõ kormã hkôt amnhĩ xãm kêt japêr. Nom koja kãm arĩ ri akôt pa hprãm ka hkaga hkêt nẽ. Kê arĩ ri akôt pa.

¹³Nẽ mẽ anijaja. Ka mẽ ajaxwỳja ra apê Kris kwỳ hã ri apa nhũm amjên kêp hkwỳ hkêt tã arĩ ri akôt pa hprãm nẽ arĩ ri akôt pa ka hkaga hkêt nẽ.

¹⁴Kêp Kris kwỳ hkêt tã koja akôt Kris kwỳjê hkôt ri pa. Rỳ mẽ aprõ kêp Kris kwỳ hkêt tã koja akôt Kris kwỳjê hkôt ri pa. Jao Tĩrtũm kapêr mar o pa nẽ gaa nẽ apyrà nẽ hkôt amnhĩ xãm japêr. Nẽ mẽ akra kêp Kris kwỳ hkêt xwỳnhjaja haxwỳja mẽ akôt Kris kwỳjê hkôt ri pa nẽ Tĩrtũm kapêr mar o pa nẽ gaa nẽ akôt Jejus kôt amnhĩ xunhwỳr japêr.

¹⁵Nom koja aprõ kêp Kris kwỳ hkêt ã kãm akaga hprãm nẽ rĩ tãm mãmri akaga. Rỳ amjên kêp Kris kwỳ hkêt ã kãm akaga hprãm nẽ rĩ tãm mãmri akaga. Kêr ka mẽ kot akaga nê tee ri kãm tanhmã akapêr to hkêt nẽ. Kwãr mãmri akaga ka ahte ajamakêtkati nẽ axãmnhĩx ri apa. Mẽ pajamakêtkati nẽ mẽ pamex nẽ ri papaja na Tĩrtũm kãm hprãm.

¹⁶No koja amjên kêp Kris kwỳ hkêt tã kãm mẽ akaga hprãm kêt nẽ ka mẽ hkaga hkêt nẽ. Rỳ aprõ kêp Kris kwỳ hkêt tã ka mẽ kam hkaga hkêt nẽ. Koja arĩ ate amnhĩ nhĩpêx ã apumunh o ri akôt pa nẽ gaa nẽ rĩ apyrà nẽ Kris kôt amnhĩ xãm japêr.

¹⁷Jakamã kot ka mẽ aprõ rỳ amjên ra Kris kôt ahte amnhĩ xãm. Hãmri nẽ wa arĩ ri axpẽn kôt ri apa ho apa. Na pa hte krĩ piitã hkôt Jejus kôt mẽ

pahkwỳjê mã ã ixujarēnh anhỹr o ri ixpa. Tã kêr ka mẽ ã amnhĩ nhĩpêx anhỹr o ri apa.

Kris kôt amnhĩ xunhwỳr kêt ri tanhmã mẽ pakute hã mẽ pajarēnh

¹⁸Ja pyrà nê kot kaj mẽ ra amy kwryt kà jakàr japêr. Tã ra Kris kôt amnhĩ xãm nê arĩ arãhã ri apa. Rỳ amnhĩ jakàr kêt rãhã hkôt amnhĩ xãm japêr nê arĩ arãhã ri apa. Mo kaxyw kot ka kêt amnhĩ jakà?

¹⁹Tĩrtũm na hte mẽ pahte amnhĩ my kwryt kà jakàr ã mẽ pahpumunh kôt tanhmã mẽ pajarēnh to hkêt nê. Rỳ mẽ pahte amnhĩ jakàr kêt ã mẽ pahpumunh kôt mãănēn tanhmã mẽ pajarēnh to hkêt nê. ãm mẽ pahte hkôt amnhĩ nhĩpêx pix ã mẽ pahpumunh kôt na hte tanhmã mẽ pajarēnh to.

²⁰Jakamã kêr pu mẽ pahte Kris kôt amnhĩ xunhwỳr kêt ri tanhmã mẽ pakuteja arĩ rãhã ri papa.

²¹Ka mẽ akwỳjaja ate nhãm mẽ kãm mẽ axàpênh o apa htã Jesus kôt amnhĩ xunhwỳ. Tã kêr ka mẽ mãmrĩ mẽ kãm axàpênh o ri apa. Nom koja anhõ patrãwja amnhĩ nê mẽ ajano ka mẽ mãmrĩ ma mra nê amnhĩ mã tanhmã axàpênh to ho ri apa.

²²Nê koja mēhõ Kris kôt amnhĩ xãm. Tanhmãn kêp mẽ õ patrãw rỳ kot mẽ kãm mẽ àpênh xwỳnhjê hõ. Tã Kris kôt amnhĩ xãm hãmri nê arĩ amnhĩ nhĩpêx tũm kôt ri amnhĩ nhĩpêx o pa hkêt nê. Ra Kris kôt amnhĩ nhĩpêx nyw o amnhĩ nhĩpêx o pa. Jao ra tanhmã amnhĩ tomnuj to hkêt nê. Te kot õ patrãw punuj kaga nê hpãnhã õ patrãw mex kapêr kôt amnhĩ nhĩpêx pix o pa pyræk.

²³Na pre Jesus mẽ pahte amnhĩ tomnuj piitã hpãnhã amnhĩrer kaxyw mẽ panê ty. Te htyk o kot amnhĩm mẽ pajaprôr pyræk o mẽ panhĩpêx. Jakamã kwa kêr ka mẽ jar mẽ anhõ patrãw kôt pix mã amnhĩ nhĩpêx o ri apa hkêt nê. Mẽ mãănēn Tĩrtũm kapêr kôt amnhĩ nhĩpêx o ri apa.

²⁴Jakamã kêr pu mẽ pahte Kris kôt amnhĩ xunhwỳr kêt ri tanhmã mẽ pakuteta pu mẽ arĩ rãhã ri hã papa. Ra mẽ pahte amnhĩ jakà rỳ mẽ pahte amnhĩ jakàr kêt. Rỳ ra mẽ pahte nhãm mēhõ mã paxàpênh o papa rỳ amnhĩ

mã paxàpênh o papa. Rỳ ra mẽ pahprõ nẽ ri papa rỳ mẽ pahprõ hkêt nẽ ri papa. Pu mẽ pahte Kris kôt amnhĩ xunhwỳr kêt ri tanhmã mẽ pakuteta ãm arĩ rãhã hã ri papa. Jao Tĩrtũm kãm hprãm xà kôt pix mã amnhĩ nhĩpêx o ri papa.

Mẽ hprõ nẽ mẽ mjên kêt xwỳnhjê jarênh

Matêwre 19.10-12

25Nẽ mẽ ate ixwỳr kagà mênhta kamã na ka mẽ mããnên kormã mẽ hprõ hkêt xwỳnhjê hã ixkukja. Tã kot paj mẽ amã tanhmã mẽ harênh to. Nom Pahihti Jesus Kris na pre ja hã tanhmã inhmã nẽ hkêt nẽ. ãm pa kot paj ãm amnhĩ krã hkôt tanhmã hã mẽ amã ixkapêr to. Na pre Pahihti mẽ akaxyw tanhmã ixkrã hto pa hte ỹ hã tanhmã mẽ amã mẽmoj tã karõ hto ho ri ixpa. Jakamã e mẽ inhma nẽ inhmar tỳx nẽ.

26-27Nà ra mẽ kãm mẽ pahkurê xwỳnhjaja Kris ã mẽ pahtomnuj o pa jakamã koja ixpyrà nẽ mẽ hprõ hkêt rãhã mẽ pa xwỳnhjaja ahte ri pa nhũm ja mex nẽ. Nhũm mẽ umaj amnhĩ pix tãnopxar o ri pa. Nẽ mẽ aprõ xwỳnhjaja kêr ka mẽ kãm mẽ pahkurê xwỳnhjê pymaj mẽ aprõ kaga hkêt nẽ. ãm pix tãnopxar o ri apa.

28Tã kot ka mẽ atõ amã aprõ hprãm nẽ mãmrĩ aprõ. Ja mããnên tanhmã ixpê kute hkêt. Nẽ mẽ anijaja mẽ amã amjên prãm nẽ mãmrĩ amjên. Ja tanhmã ixpê kute hkêt. Nom kot ka mẽ akwỳjê pyrà nẽ aprõ rỳ amjên. Nẽ gaa nẽ akra. Hãmri nẽ tanhmã mẽmoj kute kamã ka tee ri wa mẽ amnhĩ kukamã ri ajamxpêr o ri apa. Ja pymaj na pa hte mẽ amjên kêt nẽ mẽ aprõ hkêt ã mẽ amã awjarẽ.

29Nẽ Kris tokyx akupỹn mẽ pahwỳr wrỳk kaxyw jakamã kwa ra mẽ aprõ nẽ apa xwỳnhjaja. Kêr ka mẽ amnhĩ prõ nẽ amnhĩ kra pix kukamã ajamxpêr o ri apa hkêt nẽ. Te ho mẽ hprõ hkêt nẽ mẽ pa xwỳnhjaja kot amnhĩ nhĩpêx pyrà nẽ Kris kutêp kumrêx mã ajamxpêr pê tanhmã amnhĩ nhĩpêx to ho apa nẽ arĩ kormã aprõ nẽ akrajê ho hapu nẽ tanhmã mẽ kutã anojarêt to ho apa.

³⁰Kris kot tokyx akupÿn mẽ pahwÿr wrÿk jakamã kwa mẽ ri amÿr o ri mẽ apa xwÿnhjaja. Kêr ka mẽ kutêp tee ri amnhĩ kaprĩ pix mã ajamaxpêr o akaprĩ nê ri apa hkêt nê. Nê mẽ akĩnh nê ri apikunhar o ri mẽ apa xwÿnhjaja kêr ka mẽ Kris kutêp amnhĩ kĩnh xà pix mã ajamaxpêr o ri apa hkêt nê. Nê ri mẽ axujaprôr o ri mẽ apa xwÿnhjaja kêr ka mẽ Kris kutêp tanhmã axujaprôr to pix kukamã ri ajamaxpêr kêt nê.

³¹Nê mẽ apê mẽ ate mẽmoj to wênê ho ri mẽ apa xwÿnhjaja Kris kutêp ãm ri mẽ akukrêx pix kukamã ajamaxpêr kêt nê. Kojã mẽ panhõ pika piitã hkôt mẽ pakukrêxja nê mẽmoj piitã arĩ rãhã hkêt nê.

³²Jakamã kot kaj mẽ akukrêx pix kukamã ajamaxpêr nê amnhĩ pix kukamã ajamaxpêr nhũm ja apê omnuj nê. Kris kwÿ pê mẽ hprõ hkêt xwÿnhjaja na htem Pahihti Jejus Kris kãm hprãm xà hkôt pix mã kãm tanhmã amnhĩ nhĩpêx to ho ri pa hprãm. Jao ãm pix kutã tanhmã nojarêt to rãhã ho ri pa.

³³No kêt ra mẽ hprõ nê mẽ pa xwÿnhjaja na htem hprõ pix kukamã kãm tanhmã amnhĩ nhĩpêx to ho pa hprãm. Jao pix kukamã amnhĩ nhĩpêx o pa.

³⁴Mê kãm Tĩrtũm kapêr kôt amnhĩ nhĩpêx prãm tã no ãm mããnên kãm hprõ kapêr mar nê hkôt kãm tanhmã amnhĩ nhĩpêx to ho ri pa hprãm. Nê mẽnijaja kot Jejus kôt amnhĩ nhĩpêx nê kormã mẽ mjên kêt xwÿnhjaja na htem kãm Pahihti Jejus kãm hprãm xà hkôt pix mã kãm tanhmã amnhĩ nhĩpêx to ho pa hprãm. Nê ãm pix mã hamaxpêr o pa. Nê ãm hkôt pix mã amnhĩ nhĩpêx o pa. No ra mẽ mjên nê mẽ pa xwÿnhjaja na htem arĩ ri mẽ hikukrêx tânopxar o pa. Nê mjên mã hprãm xà hkôt tanhmã kãm amnhĩ nhĩpêx to ho pa. Jakamã tanhmã kot wem amnhĩ to nê Jejus kãm prãm xà hkôt pix mã amnhĩ nhĩpêx o pa?

³⁵E ixte mẽ ato ajuta kaxyw na pa ã mẽ amã ixkapêr anê. Jakamã na pa mẽ ate mẽhõ ho aprõ nê mẽ akurê hkêt nê. ãm mẽ ate Tĩrtũm kapêr kôt pix mã amnhĩ nhĩpêx o apa hã na pa mẽ amã karõ. Mẽ ate kumã pix mã ajamaxpêr o ri apa pix kaxyw. Nê kumã pix mã tanhmã ri amnhĩ nhĩpêx to ho apa kaxyw na pa mẽ amã tanhmã mẽmoj tã karõ hto.

Mẽ kot mẽ hprõ mã xwÿnhjê jarênh

³⁶E kot paj hpãnhã mẽ ate mēhō ho aprō mã xwỳnhjê mã ixkapēr ka mẽ ixkapēr ma. Nà kot kaj mẽ atō ate ho aprō mã xwỳnhhta kukamã ajamaxpēr o: —Nà kot paj ho ixprō hkêt nē. Inhmã hkĩnh tỳx tã kot paj ho ixprō hkêt nē. Kot paj ãm ixprō hkêt nē ahte ri ixpa. Anē. Hãmri nē ahte ri apa. Tã ra tee amnhĩ kurē kamã ama nē ajamaxpēr o: —Hêxta waa nē. Mon pa pre ho ixprō hkêt nē ahte ri ixpa? Anē. Hãmri nē mãmri ma hwỳr tē nē kãm amnhĩ jarē nē ho aprō. Ra ate aprō hkêt nē ahte ri apa hã amnhĩ jarēnh tã no ãm mãmri ho aprō. Ja tanhmã kute hkêt kēnã.

³⁷Nom kot kaj ho aprō hkêt ã amnhĩ jarē nē mããnēn akurē hkêt nē ri apa. Hãmri nē mãmri ho aprō hkêt nē ri ahte ri apa. Ja mããnēn tanhmã kute hkêt.

³⁸Kot ka ho aprō nē war amex nē apa. Rỳ kot ka ho aprō kêt nē mããnēn amex kumrēx nē ri apa. Ja na mex o ate mēhō ho aprō nē ho apata jakrenh.

Mẽ kệp mẽ mjên tyk xwỳnhjê jarēnh

³⁹E kot paj hpãnhã mẽ apê mẽ amjên tyk xwỳnhjê mã ixkapēr. Nà koja amjên arĩ htĩr ri ka ãm hkôt pix mã axkamē nē hkaga hkêt nē. No koja nhỹrmã apê ty hãmri ka tee ri amnhĩ kukamã ajamaxpēr hãmri nē amã axte amjên prãm nē mãmri axte amjên. Nom kwa kēr ka mẽ amnhĩ pyrà nē Kris kôt akwỳjê hō pix o amjên. No mamri nhãm mēhō ho amjên kêt nē.

⁴⁰No kot ka mẽ axte amjên kêt nē ahte ri apa hãmri nē axàmnhĩx ri ajamakêtkati nē apa. No na pa ãm amnhĩ krã hkôt mẽ amã ã ja jarēnh anē. Mãn Tĩrtũm Karō mã mããnēn ja mex nē.

Wam Korĩt 8

Sãnti hã mẽ apkur xà jarēnh

Rõmãn 14.13-23; Wam Korĩt 10.14-22; 13.2; Karatas 5.13; Wam Pêtre 4.8; Wam Juãw 3.18

¹Nē mẽ ate ixwỳr kagà mēnhhta kamã na ka prem mããnēn sãnti hã mẽ apkur xà hã ixkukja. Tã kot paj mẽ amã tanhmã ja jarēnh to ka mẽ inhma. Nà na hte Kris kôt pahkwỳ hkêt xwỳnhjaja mẽmo karō ho sãnti nhĩpêx mã mẽõ hkwy nhĩpêx nē hwỳr o mra. Hãmri nē hpar pē haxwỳ nē kutã hkõn krã ho rôrôk nē hkrĩ nē kãm mex o mex ã harē nē kãm amnhĩ jagrer pē amnhĩ to

kuwỳ. Hāmri nē kām amnhĩ jagrer pa nē akupỹm amnhĩm mẽõta jamỳ nē ma o mra nē hkwỳjê mã ho wēnê. Na htem ã amnhĩ nhĩpêx anhỹr o pa. Tã na ka prem kagàta kamã mẽ ate mẽ kêp mẽõ japrôr nē hkur ã ixkukja. Nà ra mẽ ate sãnti pumunh mex. ãm mẽ kot ìhkra pix o hipêx ã omunh mex jakamã na pu htem hã pamã mẽ apkur xàta hkur prãm nē mãmri paxàmnhĩx ri kuku. Ja tanhmã Tĩrtũm pê kute hkêt. Ra mẽ pahte ja pumunh mex. Tã nom kwa kêr pu mẽ ja hã Kris kôt mẽ pahkwỳjê mã amnhĩ to jarkrar o ri papa hkêt nē. Nē ja hã mẽ kurom paxàhpumunh tỳx ã mẽ kãm amnhĩ to jarkrar hkêt nē. Kot pu mẽ ã amnhĩ nhĩpêx anhỹr o mẽ hamaxpêr o hihtỳx hkêt nē. Kêr pu mẽ ãm mẽ kamã paxukapri pê tanhmã mẽ ho mex to ho papa. Nē Kris kôt mẽ hamaxpêr o hihtỳx o papa. ã mẽ pa hte amnhĩ nhĩpêxja na Tĩrtũm kãm hprãm.

²No koja mẽhõ mẽmoj pumunh tỳx ã amnhĩ to jarkrar o ri pa nē ãm tee ri ã amnhĩ jarēnh anhỹr kaprỳ.

³No koja mẽhõ àhpumunh tỳx kêt tã kãm Tĩrtũm kĩnh nhũm amnhĩ tã omu nē kãm hapê nē ho hkra. Kêt ja na mex o mex.

⁴E kot paj ixpri hã mẽ amã tanhmã sãnti hã mẽ apkur xàta jarēnh to ka mẽ inhma. Nà Měpahpãmja pixii. Axtem hõ hkêt. Nom mẽ kot sãnti nhĩpêxta ãm mẽ kot ìhkra o hipêx jakamã htĩr kêt. Ra mẽ pahte ja jarēnh mar tỳx nē omunh mex.

⁵Na htem ohtô nē ri sãnti kêp Měpahpãm ã hkamnhĩx o pa. Kaxkwa kamã mẽmo karõ nhĩpêxja nē pika kamã mẽmo karõ nhĩpêxja nhũm htem kêp Měpahpãm ã harēnh ho pa. Nom ja kot anhỹr kêt.

⁶Měpahpãmja ãm pixi ho pixi mex. Mě panhõ Tĩrtũmja. Tãm na pre mẽmoj piitã ho kator pa. Jakamã na pu htem kapêr kôt pix mã amnhĩ nhĩpêx o ri papa. Nē mẽ panhõ Pahihti haxwỳja pixii. Pahihti Jejus Krisja. Na pre Tĩrtũm nhĩhkô hã mẽmoj piitã ho kator pa. Na pu htem ja hã omunh xà hkôt ri pamex nē ri papa. Ra mẽ pahte ja jarēnh mar tỳx nē omunh mex. Jakamã na pu htem paxàmnhĩx ri mẽmoj piitã hkur o papa. Tĩrtũm kot mẽmoj piitã ho kator par kēnã.

⁷Tã no ãm ham mẽ kot Kris kôt amnhĩ xunhwỳr xwỳnhjaja na htem mẽ pahkĩnhã kãm sãnti hã mẽ apkur xà hkur puma nẽ. Ham mẽ kot sãnti kaga nẽ amnhĩ kaxyw Kris kôt amnhĩ xunhwỳr jakamã kormã Tĩrtũm kôt amnhĩ nhĩpêx tohtuj anẽ. Jakamã na htem tee ri sãnti hã mẽ apkur xàja pumu nẽ hamaxpêr o: —Nà kot paj ja kur kêt nẽ. Kot paj anẽ nhũm apu Tĩrtũmja pê ja omnuj nẽ. Anẽ.

⁸Nom na kêt hte Tĩrtũm mẽ paxàpkur xà hã mẽ pahpumunh kôt mẽ pahte amnhĩ to mex xwỳnh ã mẽ pajarênh kêt nẽ. Kot puj mẽ mẽmoj ku rỳ mẽmoj kur kêt nẽ nhũm ja hã mẽ pahpumunh kôt tanhmã mẽ pamex ã pajarênh to hkêt nẽ. Jakamã na pu htem mãmri paxàmnhĩx ri mẽmoj tã mẽ apkur xà hkur o papa nẽ tanhmã amnhĩ to hkêt nẽ.

⁹⁻¹⁰Nom kwa mẽ okora. Kêr ka mẽ sãnti mã amnhĩ jarênh xà hã ixkre hwỳr agjêx nẽ kamã axàpkur hkêt nẽ. Kot kaj mẽ atõ ã amnhĩ nhĩpêx anẽ nhũm mẽhõ kormã kot Kris kôt amnhĩ xãm tohtuj anhỳr xwỳnhja ja hã mẽ apumu nẽ tee ri hamaxpêr. Axàhpumunh tỳx ã ate amnhĩ jarênh tã sãnti nhõrkwỹ kamã axàpkur o nhỹ nhũm ja hã apumu nẽ tanhmã amnhĩ nhĩpêx to wehe? Koja ja kêp omnuj tã apyrà nẽ tẽ nẽ axà nẽ mẽ kutã apku. Hãmri nẽ apkur pa nẽ tee ri amnhĩ kukamã hamaxpêr o: —Hêxta waa nẽ. Kwa mon pa axtem nẽ ri ã mẽmojja kur anẽ? Nà na pa anẽ nẽ ra amnhĩ tomnuj tỳx nẽ. Anẽ. Hãmri nẽ hkaprĩ nẽ pa.

¹¹Ate axàhpumunh tỳx ã amnhĩ jarênh tã amnhĩ kôt atõja mex kukamã ajamaxpêr kêt nẽ. Kris ra mỳrapê htyk tã nhũm ã ate sãnti hã mẽõ hkur ã apumu nẽ tee ri hamaxpêr o Jejus hkôt amnhĩ nhĩpêx mex kêt nẽ.

¹²Kormã kot Kris kôt amnhĩ xãm tỳx kêt tã tee ri ja hã mẽ apumu nẽ hamaxpêr mex kêt nẽ. Jakamã ka Kris noo mã amnhĩ tomnuj nẽ.

¹³Tã ã ixte Kris kôt ixkwỳjê nhĩpêx anhỳr pymaj koja ixtõjê hõ kãm mẽmoj kur pyma nẽ. Nẽ htỳx ho Tĩrtũm kêp omnuj ã hkamnhĩx. Pa ja hã omu nẽ ijaxwỳja axte hkur kêt nẽ. Ixte mex ã omunh tã no ãm kot tee ri ja hã ixpumunh nẽ hamaxpêr o: —Kwa Tĩrtũm kêp ja mex kêt tã nhũm Pawreja ri kuku. Jakamã kot paj ijaxwỳja uràk nẽ kuku. Omnuj tãã. Anhỳr o

hamaxpër pymaj kot paj uràk nê mêmota kur kêt nê. Na pa hte ã Kris kôt ixtôjê mex kukamã ri ijamaxpër anhÿr o ixpa.

Wam Korît 9

Pawre kot amarĩ Tirtüm kapër o mẽ ahkre hä amnhĩ jarênh

Atre 9.1-18; 20.33-35; Sikün Korît 11.7-9

¹Nê ixte Jejus nhÿ hä mẽ ahkre ho mẽ pa xwÿnhjê hõ jakamã na pa hte Tirtüm kapër o mẽ ajahkre ho ri ixpa. Na pa pre inhno ho mẽ panhõ Pahihti Jejus pumu nê mẽ amã harênh o ri mẽ akôt ixpa ka prem inhma nê hkôt amnhĩ xunhwÿ.

²Mẽ hkwÿjaja kot axpën mã ixpê Jejus nhÿ hä mẽ ahkre xwÿnh kêt ã ijarênh tã mẽ kajaja mẽ ate ja hä ixpumunh mex. Ixte mẽ amã mẽ ujarênh mexja jarênh nhũm mẽ ate mar nê hkôt amnhĩ xunhwÿrja kukwak ri na ka mẽ apê Jejus kwÿy.

³Jakamã koja mẽ atã ixto kapër japêr kot paj ã mẽ kãm mẽ ajarênh anê.

⁴Nê ixte Jejus nhÿ hä kapër jahkre o ixpa xwÿnh jakamã kot paj inhmã Kris kwÿjê kutã amarĩ ixàpkur prãm nê mãmri mẽ kutã apku. Ja tanhmã kute hkêt tã kot paj ã amnhĩ nhĩpêx anhÿr kêt nê. Kot paj ixàpkur kaxyw nê amnhĩ pãnhã amnhĩre nê rĩ kormã apku. Na pa hte ã amnhĩ nhĩpêx anhÿr o ri mẽ akôt ixpa.

⁵Rÿ kot pa ixkwÿjê pyrã nê inhmã Kris kôt ixkwÿjê hõ ho ixprõ hprãm nê mãmri ho ixprõ. Nê wa ma krĩ piitã hkôt Kris kwÿjê kukwak ri ixàpkur o ixpa hprãm nê wa mãmri ã amnhĩ nhĩpêx anhÿr o ixpa. Ja mex kênã. Na hte ã Simãw Pêtre mẽ Jejus tõ kot hapujaja amnhĩ nhĩpêx anhÿr o pa nhũm ja tanhmã kêp kute hkêt. No ãm mẽ hkĩnhã ixprõ hkêt na pa hte ri ixpa.

⁶Nê ixkwÿjaja na htem apkur xà hpãnhã àpênh o pa hkêt nê. Na htem Jejus nhÿ hä kapër jarênh o ri pa nhũm hte Jejus kwÿjaja mẽ kãm mẽ apkur xà gõ nhũm mẽ amarĩ hkur o pa. Tã no pa na pa hte Panãpe mẽ wa ã amnhĩ nhĩpêx anhÿr kêt nê. Na pa hte wa mry kà ho ixkre nhĩpêx nê mẽ kãm ho

wênê nê hpãnhã amnhĩm awjaprô. Na pa hte wa ã amnhĩ pa kukwak ri ixujaprô nê ho ixàpkur o ri ixpa anê.

⁷Mê kãm pur kãm harôj jamÿnh o mẽ pa xwÿnhjaja na htem amarĩ hkwÿ jamÿ nê ho apkur o pa. Nê motre jamãr o mẽ pa xwÿnhjaja haxwÿja amarĩ hkà kagô janê nê ho hkõm o pa. Nê pôristijaja na hte mẽ õ pahija mẽ àpênh pãnhã mẽ kãm amnhĩrer o pa. Jajê piitã na htem mẽ àpênh pãnhã mẽ kãm amnhĩrer o pa. Ja pyrà nê te ixpê mẽ amã ixàpênh o ixpa xwÿnh pyræk jakamã ixte mẽ ajahkreta pãnhã kot ka mẽ inhmã inhõ ho apa nhũm ja mãänën mex nê.

⁸No ãm papxipix na pa hte ja mex ã harênh kêt nê. Tĩrtũm kapêr ã kagà htũm haxwÿja kot ja mex ã harênh.

⁹Kamã na pre finat Mojesja Tĩrtũm nhÿ hã harênh kot: Koja akrit amã àpênh o pa ka omu nê ho mex nê. Kãm õ mex nê. Anhÿr o kot harênh. Xà na pre Tĩrtũmja ãm mẽ pahkrit pix kukamã ukaprĩ nê ã harênh anê nà? Nà kot anhÿr kêt.

¹⁰Mãänën mẽ pahpê panhĩ kaxyw na pre ã ja jarênh anê. Mẽ pahte mẽ hpur kãm paxàhkre xwÿnhjaja nê mẽ pahte kamã paxujamÿnh o papa xwÿnhjaja. Jajê kaxyw mẽ pahte pur kukwak ri amarĩ paxàpkur o ri papa kaxyw ã pre ã ja jarênh anê.

¹¹Tã ja pyrà nê na pa hte mẽ awÿr mõ nê mẽ amã Tĩrtũm kapêr jarênh o ri mẽ akôt ixpa. Nê mẽ akôt ho mẽ ajahkre ho ri ixpa ka htem inhmã ixàpênhhta pãnhã amnhĩrer kêt nê. Ixkwÿjaja kot Tĩrtũm kapêr o mẽ ajahkre hpãnhã mẽ ate mẽ kãm amnhĩrer tã pa inhmã amnhĩrer kêt nê. Na pa pre mẽ ajahkreta pãnhã mẽmoj tã mẽ awÿr kêt nê. ãm nhãm ixàpênh õta kukwak ri na pa hte ixàpkur o ri ixpa.

¹²Nê na hte mẽ ixkwÿjaja mẽ awÿr mra nê Tĩrtũm kapêr o mẽ ajahkre o ri mẽ akôt pa. Hãmri nê hpãnhã mẽ apkur xà hã mẽ awÿ ka mẽ kãm mẽmoj gõ. No kêt pa na pa hte mẽ uræk nê ixàpkur xà hã mẽ awÿr kêt nê. Kot pa apu hã mẽ awÿ ka mẽ tanhmã ixto akapêr to nê axpên mã ijarênh o: —Pêr ãm mẽ pahte kãm amnhĩrer pix kaxyw na hte Pawre mẽ pahwÿr mra nê mẽ

pamã Jejus Kris kot tanhmã mẽ panê amnhĩ nhĩpêx to hã harênh o pa. Pêr ãm apkur xà pix prãm xàj ã kot mẽ pamã ujarênh anhỹr o pa. Jakamã kot puj mẽ kuma nê ãm kuma. Anhỹr o axpên mã ijarênh pymaj na pa hte mẽ ajahkre hpãnhã mẽmoj tã mẽ awỳr kêt nê. Na pa hte ãm mry kà ho ixkre nhĩpêx nê ho wênê nê ja pix kukwak ri ixàpkur o ri ixpa. Nê amarĩ ri mẽ ajahkre ho ri mẽ akôt ixpa.

¹³Nê Tĩrtũm mã amnhĩ jarênh xà hã ixkre kamã mẽ àpênh xwỳnhjaja na htem hwỳr mẽ mrar xwỳnhjaja mẽ àpênh pãnhã mẽ kãm amnhĩre. Nê mẽ kot mẽ kãm Tĩrtũm mã mẽmoj nhõr o kuhê xwỳnhjaja na htem mããnên mẽ àpênh pãnhã mẽ kãm amnhĩre.

¹⁴Nê Pahihti Krisja na pre ja hã mẽ pakukamã pahtã karõ kot: —Kêr ka mẽ kot tanhmã mẽ amã ijarênh to ho ri mẽ pa xwỳnhjê mã amnhĩrer o ri apa. Anê.

¹⁵Tã no na pa hte aa mẽmoj tã ixàhwỳr kêt nê. Nê mẽ ate inhmã amnhĩrer kaxyw pa mẽ amã ja jarênh kêt nê. Aa ixte mẽmoj tã mẽ awỳr kêt. Kot paj apu anê nê ixpijaàm nê. Rỳ kot pa apu anê nê mẽ akukwak ri ixàpkur o ri ixpa hãmri nhũm mẽ akwỳjaja ja hã ixpumu nê hã ijarênh o: —Tk. Na hte amarĩ mẽ pajahkre o ri pa hkêt nê. ãm mẽ apkur xà pix prãm xàj na hte ã mẽ pajahkre ho pa anê. Anê. Jakamã na pa hte mẽmoj tã mẽ awỳr kêt nê.

¹⁶Ixte mẽ amã mẽ ujarênh mexja jarênh o ri ixpa htã na pa hte ja hã amnhĩ to jarkrar o ri ixpa hkêt nê. Pahihti Jejus na pre ja hã inhmã karõ pa hte kãm ho anhỹr o ri ixpa. Kot paj kãm ho anhỹr kêt nê ixpunuj nê ri ixpa.

¹⁷Kêp ãm amnhĩ krã hkôt mãn tanhmã mẽ amã ixujarênh to ho mẽ akôt ri ixpa ronhỹx pa hpãnhã ixàmnhĩx kàxpore hã mẽ awỳ. No ãm ã ixte amnhĩ nhĩpêx anhỹr kêt. Tĩrtũm tãm kot inhmã ja hã karõ jakamã na pa hte amarĩ ixàmnhĩx ri mẽ amã kapêr jarênh o mẽ ajahkre ho ri mẽ akôt ixpa nê mẽmoj tã ixàhwỳr o ri ixpa hkêt nê.

¹⁸Ixte amarĩ ri mẽ amã mẽ ujarênh mexta jarênh o ri ixpaja na inhmã hprãm. Ja na inhmã mex. Na pa hte ã amnhĩ nhĩpêx anhỹr o ri ixpa nhũm ja inhmã

mex pa ixkĩnh nẽ ri ixpa. Jakamã na pa hte hpãnhã ixàhwỳr kêt nẽ. Nẽ inhmã mẽmoj prãm o ri ixpa hkêt nẽ.

¹⁹Nẽ nhãm mẽ kãm tanhmã ixàpênh to ho ixpa hkêt tã pa hte mẽ piitã tanhmã mẽ kãm amnhĩ nhĩpêx to ho ri ixpa. Pê mẽ kãm Jejus kapêr jarênh o ri ixpa. Jakamã na mẽ ra ohtô nẽ ixujarênh ma nẽ amnhĩ kaxyw Jejus kôt hamaxpêr nẽ hkôt amnhĩ xunhwỳ.

Pawre kot tãm mẽ piitã mẽ hipêx o pa hã amnhĩ jarênh

Wam Korĩt 10.33

²⁰Nẽ na pa hte Ijaewjê hwỳr ixpa nẽ mẽ kot amnhĩ nhĩpêx kôt amnhĩ nhĩpêx o ri mẽ hkôt ixpa. Ixte mẽ kurom Tĩrtũm kot finat Mojes mã mẽmoj tã karõ hkôt amnhĩ nhĩpêx o ixpa hkêt tã mẽ hkôt ri ixpa nẽ mẽ uràk nẽ hkôt amnhĩ nhĩpêx o ri ixpa. Mẽ kot ja hã ixpumunh nẽ ixte mẽ kãm Jejus jarênh mar nẽ ixpyrà nẽ amnhĩ kaxyw hkôt hamaxpêr kaxyw.

²¹Tã pa hpãnhã mẽ kêp Ijaew kêt xwỳnhjê hwỳr ixpa nẽ mẽ kot amnhĩ nhĩpêx kôt amnhĩ nhĩpêx o ri mẽ hkôt ixpa. Mẽ kot ja hã ixpumunh nẽ ixkapêr mar nẽ ixpyrà nẽ amnhĩ kaxyw Jejus kôt hamaxpêr kaxyw. Tĩrtũm mẽ Kris wa hamaxpêr xà hkôt na pa hte ahpỹnhã mẽ kot amnhĩ nhĩpêx xwỳnhjê hwỳr mra nẽ ã amnhĩ nhĩpêx anhỹr o ri mẽ hkôt ixpa.

²²Nẽ na pa hte kormã mẽ kot Kris kôt amnhĩ xunhwỳr tohtuj anhỹr xwỳnhjê hkôt ri ixpa nẽ te ixte ho mẽ uràk nẽ kormã hkôt amnhĩ xãm nyw pyràk o amnhĩ nhĩpêx o ri mẽ hkôt ixpa. Mẽ kot ja hã ixpumunh nẽ ixkapêr mar nẽ hkôt amnhĩ nhĩpêx mex kaxyw. ã na pa hte mẽ piitã mẽ hkôt ri ixpa nẽ mẽ hkôt amnhĩ nhĩpêx o ri ixpa anẽ. Mẽ kot ja hã ixpumunh nẽ inhmar nẽ ixpyrà nẽ Kris kôt amnhĩ nhĩpêx tỳx kaxyw.

²³Mẽ kot mẽ ujarênh mex mar kaxyw na pa hte mẽ piitã mẽ hkôt ã amnhĩ nhĩpêx anhỹr o ri ixpa. Tĩrtũm kot mẽ ho hkra nẽ mẽ ho mex kaxyw. Nẽ mãänën pa kot mẽ hã ixto mex kaxyw.

Pawre kot htỳx ri amnhĩ nhĩpêx kêt ã kot amnhĩ jarênh

Sikũn Ximotre 4.7; Eprêw 12.1-3

²⁴Mẽ hprõt xwỳnhjaja na htem hprõt tỳx no nhũm mēhõ pixi nẽ wam hkwyjê re nẽ wam tẽn pøj nhũm htem ja hã omu nẽ kãm mẽ hkĩnhxà gõ. Ja pyrà nẽ

kêr ka mẽ apiitã tãm amnhĩ nhĩpêx mex rãhã ho ri apa kê Tĩrtũm mẽ apumu nẽ nhỹrmã ja pãnhã mẽ amã mẽmoj mex gõ.

²⁵Nẽ mẽ hprõt xwỳnhjaja na htem mẽ hkĩnhxà hpyr prãm xàj mẽ hprõt xà hã arĩgro hwỳr apkati mẽ hprõt o kuhê. Prõt tỳx prãm xàj. Tã mẽ hprõt xà hã arĩgrota ã nhũm hkwỳjê pê amnhĩ to wa nẽ amnhĩm hkĩnhxà py. Nom koja hkĩnhxàja kritpêm kãm mex ry hkêt nẽ. Koja gaa nẽ hapêx tokyx anẽ. Tã nom kot puj mẽ Tĩrtũm kapêr kôt amnhĩ nhĩpêx mex o ri papa. Nẽ mẽ hprõt xwỳnhjê kot hkĩnhxà hpyr prãm xàj apkati mẽ hprõt o kuhêta pyrà nẽ apkati mẽ hkôt amnhĩ nhĩpêx mex o ri papa. Hãmri nhũm amnhĩ tã mẽ pahpumu nẽ nhỹrmã mẽ pamã hkĩnhxà mex õ gõ. No ãm jar hkĩnhxà kurom koja aa mẽ pahpê hapêx kêt nẽ. Koja mẽ pamã mex rãhã ho rãhã.

²⁶Nẽ na hte mẽ hprõt xwỳnhjaja htỳx ri tanhmã hprõt to ho pa hkêt nẽ. Na htem hkwỳjê pê amnhĩ to wa kaxyw hprõt nẽ nhỹri mẽ àhuk xàta pix pumunh pê hwỳr hprõt nẽ mra hãmri nẽ kamã ahtwỳ. Nẽ kamã àhuk pix kukamã hamaxpêr o hprõt tỳx nẽ mra. Ja pyrà nẽ na pa hte apkati mẽ Tĩrtũm kôt pix mã amnhĩ nhĩpêx o ri ixpa. Nhỹrmã kot inhmã mẽmoj mex nhõr kaxyw. Nẽ mẽ pijapu mex xwỳnhjaja na htem htỳx ri nhỹhỹnh axpên tak kêt nẽ. Na htem nhỹhỹnh kot mẽ htak o mẽ rênh xà pix kamã mẽ htak o mẽ rênh kukamã hamaxpêr pê kamã mẽ htak. Ja pyrà nẽ na pa hte ixtỳx ri tanhmã amnhĩ nhĩpêx to ho ri ixpa hkêt nẽ. Na pa hte Tĩrtũm mã ijamaxpêr pê tanhmã amnhĩ nhĩpêx to rãhã ho ixpa. Kot nhỹrmã inhmã mẽmoj mex nhõr kaxyw.

²⁷No na pa hte ixtỳx ri amnhĩ jamaxpêr xà hkôt tanhmã amnhĩ nhĩpêx to ho ri ixpa hkêt nẽ. Kot pa ã amnhĩ nhĩpêx anẽ nẽ ixte mẽ kãm Jesus kapêr jarênh o ri ixpa htã ãm ri ixtỳx ri ã amnhĩ nhĩpêx anhỹr kaprỳ nhũm Tĩrtũmja tee ri ja hã ixpumu nẽ inhmã mẽmoj mex nhõr kêt nẽ.

Wam Korĩt 10

Ijaew kot amnhĩ nhĩpêx

Rõmãn 15.4; Eprêw 3.8-11; Jutre 5

¹E Kris kôt ixkwỳjaja. Kot paj mẽ amã amnepê mã mẽ ixpê Ijaew hkukamã mẽ inhĩgêtjaja tanhmã mẽ harênh to ka mẽ inhma. Mẽ kot pahi finat Mojes kôt ri mẽ pa xwỳnhjaja kot paj mẽ amã harê. Mẽ pahte mẽ uràk nẽ pahtỳx ri amnhĩ nhĩpêx pymaj kot paj mẽ amã tanhmã mẽ harênh to ka mẽ inhma. Mãn ka mẽ arĩ mẽ harênh ã anohtỳx japêr. Na prem piitã pika pê Ejit kamã pa htã kurũm kator pa. Hãmri nẽ ma kapôt ã kakrã pumunh o hkôt pa ho pa. Pry hkêt jakamã nhũm pre Tĩrtũm tanhmã kakrã hto nhũm ma mẽ hkukamã pa nhũm mẽ omu nẽ hkôt pa. Hãmri nẽ ra gô xujanãr mẽ kot kãm: “Gô kamrêk” anhỹr xwỳnhja wỳr pøj nẽ tee ri rêr prãm xàj amnhĩ kukamã hamaxpêr. Hãmri nhũm Tĩrtũm mẽ kãm hkôt ã ho amgrà nhũm mẽ hkôt mex pê rêr pa nẽ axte kakrã hkôt pa ho pa.

²Finat Mojes kot mẽ o pa jakamã nhũm prem kêp hkwỹ hã amnhĩ jarẽ nẽ kãm amnhĩ jarênh o: —Nà kot paj mẽ akapêr ma nẽ akôt ri amnhĩ nhĩpêx o ixpa. Anẽ. Te mẽ pahpê Kris kwỳ hã amnhĩ jarênh kaxyw mẽ kot gôx kãm mẽ pahkrã kumrãr nhũm mẽ pahte Kris mã amnhĩ jarênhhta pyràk.

³Na prem kapôt ã ri pa nhũm Tĩrtũm tãm kaxkwa rũm mẽ hwỳr mẽ apkur xà rẽ nhũm mẽ hkawrà nẽ ho apkur o pa.

⁴Tã ra kôr xàj hirot nhũm Tĩrtũm tanhmã mẽ kãm kên prêkja to nhũm kurũm mẽ kãm gô axkapĩ nhũm mẽ ho ixkõ nẽ akupỹm hihtỳx. ã Krisja mẽ hkôt mẽ ho mẽ hihtỳx o pa anẽ. Mẽ kot no ho omunh kêt tã nhũm mẽ hkôt mẽ ho mẽ hihtỳx o pa.

⁵Tã no nhũm mẽ ohtô nẽ Tĩrtũm kôt amnhĩ nhĩpêx kêt nẽ. Kot mẽ ho mex kumrêx tã nhũm mẽ ãm amnhĩ tã omu nẽ ãm omu nẽ kapêr kôt amnhĩ nhĩpêx kêt nẽ. ãm kapêr kwỳm ri tanhmã amnhĩ tomnuj to ho pa nhũm tee ri amnhĩ tã mẽ omu nẽ tanhmã mẽ ho nhũm mẽ hkwỹja hpikaprãr pa. Hãmri nhũm arĩ mẽ htĩr xwỳnhjaja kapôt ã mẽ hagiênh pa nẽ axte ma pa.

⁶Jakamã kwa kêr pu mẽ kot ã amnhĩ nhĩpêx anhỹr ã mẽ harênh ma nẽ hã pano htỳx nẽ ho papa hãmri nẽ ho mẽ uràk kêt nẽ. Mẽ uràk nẽ pahtỳx ri tanhmã amnhĩ nhĩpêx to ho ri papa hkêt nẽ.

⁷Nē na pre mē hkwỳjaja sānti kutā hkōn krā ho rôrōk nē hkrī nē kām amnhī jagrer pē amnhī to kuwỳ. Tīrtūm kapēr ā kagà htūm kot mē kot amnhī nhīpêx anhÿr ā mē harēnh kot: Na prem sānti kutā apkur o hkrī nē kām amnhī jagrer o hkrī nē gaa nē pipānh pix o pa. Jao axpēn kamā hpijaàm kêt o pa. Anhÿr jakamā kwa kêr pu mē ā mē kot amnhī nhīpêx anhÿrja ā pano htỳx nē ho mē uràk hkêt nē.

⁸Nē na pre mē hkwỳjaja htỳx ri mjēn nē hprō kuhpa hā nhām ri mē kamā hpijaàm kêt o pa. Mÿrapê nhūm arīgro pixi hā mē ohtō rax kumrēx nē axkaprā. Mē kēp 23.000 nē pikaprār pa. Tā ā Tīrtūm kot mē panhīpêx anhÿr pymaj kêr pu mē ja hā pano htỳx nē ho mē uràk kêt nē. Ām kwarī ho kwarī.

⁹Nē na pre mē hkwỳjaja axtem nē htỳx ri tanhmā axpēn mā Tīrtūm jarēnh to nē harēnh o: —Nà Tīrtūmja gryk tokyx anhÿr kêt jakamā kwa pu mē ā amnhī tomnuj anhÿr o papa. Koja mē pahpumu nē tanhmā mē pahto hkêt nē. Anhÿr tā nhūm tee ri ja hā mē kuma nē mē omu nhūm ja kām mex kêt nē nhūm mē hwÿr kagā xoprê nhō wenēn xihtỳx kwỳ rē nhūm mē hwÿr mra nē mē hkamhar o mē hkwỳjê pa. Tā ā kot mē panhīpêx anhÿr pymaj kwa kêr pu mē ja hā pano htỳx nē mē uràk nē amnhī tā Tīrtūm kamā pajamak o papa hkêt nē. Kwarī ho kwarī.

¹⁰Nē na pre mē hkwỳjaja axtem nē Tīrtūm o kapēr punuj nē nhūm tee ri amnhī tā mē kuma nē mē hwÿr kapēr o wrÿk xwÿnh mē nhūm ma mē hwÿr wrÿ nē ÿ hā mē hkwỳjê nhīmex. Tā ā kot mē panhīpêx anhÿr pymaj kwa kêr pu mē ja hā pano htỳx nē ho mē uràk nē Tīrtūm o pakapēr punuj kêt nē.

¹¹Na pre mē ixpê Ijaew nhīgêtjaja ā htỳx ri amnhī nhīpêx o pa anē. Tīrtūm kapēr ā kagà htūm kot ā mē kot amnhī nhīpêx anhÿr piitā harēnh par. Mē panhō ejēp kaxyw. Mē pahte kamā harēnh nē mē harēnh mar tỳx nē mē uràk nē ā amnhī nhīpêx anhÿr kêt kaxyw. Ra Jejus akupÿn mē pahwÿr wrÿk xà hā arīgro hkukamā grêre jakamā kwa kêr pu mē kutêp mē kurom kapēr kôt pix mā ri amnhī nhīpêx mex rāhā ho ri papa.

Mē pahte mēmoj punuj nē amnhī to htỳx ā mē pamā karō

Matēwre 4.1; 6.9-13; Wam Korīt 1.8; Sikūn Pêtre 2.9; Jutre 24

¹²Tã kêr ka mẽ ã Ijaew kot amnhĩ nhĩpêx anhỹr ã mẽ harênhja ma nê ã ajamaxpêr anhỹr kêt nê. Rỳ mẽ ajamaxpêr o: —Nà mẽmoj piitã kutã ixihýtêx kênã kot pa hkêr mẽ uràk nê ã amnhĩ nhĩpêx anhỹr o ri ixpa. Anhỹr o mẽ ajamaxpêr kêt nê. Kot kaj mẽ ã amnhĩ jarênh anê nê ra mẽ uràk nê tanhmã amnhĩ tomnuj to.

¹³Nê na prem kapôt ã pare ri omnuj nê ri pa. Nhũm mẽkarõmnuti tanhmã mẽ hkrã hto nhũm mẽ tanhmã amnhĩ tomnuj to ho pa. Ja pyrã nê na hte arĩ mẽ pahte amnhĩ tomnuj hprãm xàj tanhmã mẽ pahkrã hto ho pa. Mẽ pahpiitã ã mẽ pahto anhỹr o ri mẽ pahkôt pa. Nom nhũm Tĩrtũm ra kot mẽ pamã amnhĩ jarênh xà hkôt mẽ panê omunh mex rãhã ho pa. Jakamã na pu htem tanhmã amnhĩ tomnuj to hkukamã pajamaxpêr nhũm ja hã mẽ pahpumu nê mẽ panê mẽkarõmnuti mã kapêr. Nê kutã mẽ pahto paxihýtêx nê pu mẽ ÿ hã amnhĩ tomnuj kêt nê. Nê ãm kôt pix mã amnhĩ nhĩpêx mex o ri papa.

Mẽ kot sãnti mã mẽmoj nhõr xwỳnhjê jarênh

Wam Korĩt 8.1-13; Karatas 4.8; Apokarip 9.20

¹⁴Jakamã e Kris kôt ixkwỳjaja. Kêr ka mẽ amnhĩ kaxyw sãnti hkôt ajamaxpêr o ri apa hkêr nê. Nê amnhĩ to hwỳr kêt nê. ãm kwarĩ ho kwarĩ.

¹⁵E mẽ axàhpumunh tỳx ã amnhĩ jarênh jakamã kot paj mẽ amã mẽmoj jarê ka mẽ aprĩ hã inhmar tỳx japêr.

¹⁶Nà na pu htem tõhã Jejus kot mẽ panê htyk mã pajamaxpêr kaxyw axpên wỳr akuprõ. Hãmri nê mẽmo kagô hkwỳ ru nê Tĩrtũm mã mex ã harê nê mẽmoj o pahkõm pê Jejus kot mẽ panê hkamrõ pikapĩr mã pajamaxpêr. Nê hpãnhã pãwti hõ py nê axpên mã ho hkry nê mẽ kot Kris pĩr nê ĩ kamã hkamnhwỳr nhũm mẽ panê htykja mã pajamaxpêr pê kuku.

¹⁷Pãwtita ãm pixire htã pu htem axpên mã ho hkry nê pahpiitã kuku. Mẽ pahpê Kris kwỳ hã mẽ pahte amnhĩ jarênh nhũm mẽ pahkwỳ kot ja hã mẽ pahpumunh kaxyw. Te mẽ pahtipxi nê ri mẽ papa pyrãk nê pãwti pixire htã pu mẽ pahpiitã kuku.

¹⁸E kot paj hpãnhã mẽ amã amnepê mã ljaew kot tanhmã amnhĩ nhĩpêx to jarẽ ka mẽ inhma. Na pre htem Tĩrtũm mã mex ã harẽnh nẽ kãm amnhĩ nhõr ã kot amnhĩ tã mẽ omunh kaxyw nhũm prem tanhmã amnhĩ nhĩpêx to. Jao kãm mẽ apkur xà hkwỳ gõ nẽ kãm mex o mex ã harẽ. Hãmri nẽ amnhĩ mã mẽmojta kwỳ xà nẽ hkur o hkrĩ. Jao ra Tĩrtũm mã mex o mex ã harẽ nẽ kãm kêp hkra hã amnhĩ jarẽ.

¹⁹Nom mẽ kot sãnti mã mẽmoj nhõr xwỳnhjaja na htem kãm mẽmo mẽ apkur xà hkwỳ gõ nom ãm kãm õr kaprỳ. Tanhmã kot we amnhĩ to nẽ amnhĩ tã mẽ omu? Mo rĩt kaxyw no? ãm mẽ ìhkra ho mẽ kot amnhĩm hipêx kênã. Jakamã na htem ãm kãm mẽ apkur xà hkwỳ nhõr kaprỳ.

²⁰Mẽ kot sãnti mã mẽmoj nhõr xwỳnhjaja na htem Tĩrtũm mã õr kêt nẽ. Mẽkarõmnuti mã na htem kugõ. Jakamã kot kaj mẽ urak nẽ sãnti mã mẽmoj gõ nẽ apê mẽkarõmnuti hkwỳ hã amnhĩ to amnhĩrit nẽ apê hkwỳ hã ri apa. Jakamã mẽ ate sãnti mã mẽmoj nhõrta na inhmã hprãm kêt kumrêx.

²¹Kot kaj mẽ panhõ Pahihti Jejus kot mẽ panê htyk ã mẽmoj kagõ hkwỳ ho ixkõ hãmri nẽ ma mra nẽ hpãnhã sãnti pê mẽkarõmnuti hã mẽmoj to ixkõ. Hãmri nhũm Tĩrtũmja tee ri ja hã mẽ apumu nhũm ja kêp omnuj tỳx nẽ. Rỳ ka mẽ Pahihti Jejus kot mẽ panê htyk ã pãwti hkwỳ hku nẽ hpãnhã ma mra nẽ sãnti pê mẽkarõmnuti hã mẽmoj hku. Hãmri nhũm Tĩrtũm kêp ja omnuj tỳx nẽ. Mẽ pahte ã amnhĩ nhĩpêx anhỹrja na axpên kuhpa hã.

²²Jakamã kot ka mẽ ã amnhĩ nhĩpêx anẽ nẽ te ra mẽ amã mẽkarõmnuti hkĩnh nẽ mããnên amã Tĩrtũm kĩnh pyrak o amnhĩ nhĩpêx. Nẽ te Tĩrtũm kurom mẽ kajaja mẽ axàhpumunh tỳx pyrak o amnhĩ nhĩpêx. Nhũm tee ri amnhĩ tã mẽ apumu nẽ mẽ akamã gryk tỳx nẽ. Kwa mẽ okora. Kojã Tĩrtũm akamã gryk ka amex kêt kumrêx.

Mẽ pamã Kris kôt mẽ pahkwỳjê hkĩnh pê mẽ ho mex ã mẽ pamã karõ

Matêwre 20.28; Rõmãn 14.1–15.7; Piriapos 2.1-4

²³Nẽ na htem tõhã amnhĩ jarẽnh o: —Nà kot pa inhmã mẽmoj to anhỹr prãm nẽ ixãmnhĩx ã amnhĩ nhĩpêx anhỹr o ri ixpa. Anẽ. Tã no ãm mẽmoj piitã mẽ pamã mex kêt. Na htem kãm mẽmoj to anhỹr prãm xà hkôt mẽmoj piitã

tanhmã ho ho ri pa nẽ tanhmã amnhĩ tomnuj to. Hãmri nhũm mẽ hkwỳjaja ja hã mẽ omu nẽ mẽ uràk nẽ tanhmã ri amnhĩ tomnuj to. Jao Kris kôt amnhĩ xunhwỳr tỳx kêt nẽ.

²⁴Jakamã kwa kêr pu mẽ amnhĩ pix kukamã pajamaxpêr pê tanhmã amnhĩ nhĩpêx to ho papa hkêt nẽ. Mããnẽn amnhĩ kwỳjê hkukamã pajamaxpêr pê tanhmã mẽ ho mex to ho ri papa pê tãm ri amnhĩ nhĩpêx o papa.

²⁵Nẽ kot kaj mẽ amnhĩ xàpkur xà japrôr kaxyw ma nhỹhỹm mra nẽ mãmri axàmnhĩx ri amã mẽmoj prãm xà hkôt mẽmoj japrô. Nom kêr ka mẽ axujaprôrja kêp sãnti xàpkur xà hã mẽ hkukjêr kêt nẽ. ãm axàmnhĩx ri mẽ kêp mẽmoj japrôr o ri apa.

²⁶Tĩrtũm kapêr ã kagà htũm kot ja jarênh kot: Pika piitã hkôt mẽmoj piitã kêp Tĩrtũm nhõ na. Anẽ. Jakamã mẽ mãmri axàmnhĩx ri mẽmoj piitã haprô nẽ mẽmoj piitã hkur o apa.

²⁷Tã koja mẽ kêp Kris kwỳ hkêt xwỳnhjê hõ ate kutã axàpkur kaxyw amnhĩ wỳr awỳ ka amã hwỳr amõr prãm nẽ mãmri ma hwỳr mõ. Nhũm mẽmoj to amã anhõ ka axàmnhĩx ri mãmri aku. No ri tee ri amnhĩ kukamã ajamaxpêr nẽ tanhmã hã hkukjêr to hkêt nẽ. Rỳ kãm: —Kwa xà we mryja sãnti hã mẽ apkur xà na nà? Anhỹr o hã mẽ hkukjêr kêt nẽ. ãm mãmri axàmnhĩx hkur o akrĩ.

²⁸⁻²⁹Nom koja Kris kôt mẽ kot amnhĩ xãm tohtuj anhỹr xwỳnhjê hõ mẽ awỳr axà nẽ tee ri ja hã apumu nẽ amã: —Kwa sãnti hã mẽ apkur xà na ka ri mẽ kutã hkur o akrĩ. Anhỹr o amã kapêr ka ama nẽ hkaga kurê kumrêx nẽ hkur kêt nẽ. Amã mex tã Kris kôt atõja kêp omnuj jakamã ka hkaga nẽ hkur kêt nẽ. No kot ka ãm ama nẽ arĩ hkur o anhỹr japêr. Kot amã harênh xwỳnhhta kêp omnuj tã ka arĩ noo mã hkur japêr. Nhũm ja hã apumu nẽ tee ri Tĩrtũm kapêr kukamã tanhmã hamaxpêr to. Hãmri nẽ apyrà nẽ kuku nẽ gaa nẽ tee ri amnhĩ kukamã hamaxpêr nẽ amnhĩ mã: —Hêxta waa nẽ. Sãnti nhõja mex kêt tã pa ri kuku. Kwa na pa pêr hkurja o amnhĩ tomnuj nẽ. Hêxta waa nẽ. Anẽ. Hãmri nẽ tee ri amnhĩ kukamã hamaxpêr o hkapri nẽ. ã kot amnhĩ nhĩpêx anhỹr pymaj koja mẽhõ ã mẽmo mẽ apkur xà nê amã kapêr anẽ ka

ama nẽ hkaga kurê kumrẽx. Jao amnhĩ pix kukamã ajamxpěr kêt nẽ. Mããnẽn Kris kôt atõ nẽ atõxjê mex kukamã ajamxpěr. Nom koja amã kêp sãnti hã mẽ apkur xà hã harẽ ka ama nẽ ã ajamxpěr anhỹr japêr nẽ ajamxpěr o: —Nà kêp omnuj tã kot paj mamrĩ kuku. Ja inhmã mex kênã.

³⁰Ra ixte Tĩrtũm mã harẽnh nẽ ixãmnhĩx hkur o inhỹr kênã kot kêt ã nẽ inhmã kapêr anẽ. Anẽ. Kwa mẽ ã ajamxpěr anhỹr kêt. Kot kaj mẽ ã ajamxpěr anẽ hãmri nẽ Kris kôt atõ rỳ atõx mex kukamã ajamxpěr kêt nẽ.

³¹Jakamã kêr ka mẽ tãm tanhmã amnhĩ nhĩpêx to ho ri apa. Nẽ axapênh mex nẽ. Kêr kê mẽ piitã ja hã mẽ apumu nẽ mẽ apumunh kôt amnhĩm Tĩrtũm mex ã harẽ.

³²Nẽ kêr ka mẽ piitã mẽ noo mã tãm ri amnhĩ nhĩpêx o apa. Ijaew noo mã nẽ Ijaew kêt xwỳnhjê noo mã. Nẽ Jejus kwỳjê noo mã. Mẽ piitã mẽ noo mã tãm ri amnhĩ nhĩpêx rãhã ho ri apa. Mẽ kot tee ri mẽmoj tã mẽ apumunh nẽ hpijaàm pymaj ka mẽ tãm ri mẽ piitã mẽ noo mã tanhmã amnhĩ nhĩpêx mex to ho ri apa.

³³Na pa hte ã amnhĩ nhĩpêx anhỹr o ri ixpa. No na pa hte pa amnhĩ pix kukamã ijamxpěr kêt nẽ. Mẽ piitã mẽ mex kukamã na pa hte ijamxpěr o ri ixpa. Pê tanhmã amnhĩ nhĩpêx to ho ri ixpa. Mẽ kot ja hã ixpumunh nẽ ixpyrà nẽ Jejus kôt amnhĩ xunhwỳr nẽ ãm kôt pix mã ri amnhĩ nhĩpêx o pa kaxyw.

Wam Korĩt 11

¹Na pre hte Kris ã ã amnhĩ nhĩpêx anẽ nẽ mẽ piitã mẽ mex kukamã hamxpěr rãhã ho ri pa. Tã na pa hte uràk nẽ ã amnhĩ nhĩpêx anẽ. Jakamã kwa kêr ka mẽ ixpyrà nẽ ã amnhĩ nhĩpêx anhỹr o mãn ri apa.

Mėnijaja mẽ mjên ã hpijaàm ã mẽ kãm karõ

Epes 5.22; Wam Pêtre 3.1-6

²Nẽ na ka xep htem arĩ ra ixte tanhmã mẽ amã ixkapêr toja mã ajamxpěr tỳx o ri apa. Na pa pre Kris kôt mẽ pahtõ nẽ mẽ pahtõxjaja xpên wỳr pikuprõnh nẽ tanhmã amnhĩ nhĩpêx to hã mẽ amã karõ ka prem inhma nẽ

mě uràk nē ã amnhĩ nhĩpêx anē. Ām hāmri na ka htem ã amnhĩ nhĩpêx anhỹr o apa. Ja na inhmã mex.

³Na pa pre krĩ hō kamã mēnijaja kot amnhĩ krã hpro hã mẽ amã mẽ harē. Ka prem inhma nhũm mẽ akwỳjaja kãm ja mex nē nhũm mẽ akwỳjaja tee ri ja kukamã ajamaxpēr. No mẽmo kaxyw na hte mēnijaja amnhĩ krã hpro? E kot paj ixprĩ hã mẽ amã ja jarē ka mẽ inhma. Nà Tĩrtũm kēp Kris jamār xwỳnh nhũm Kris kēp Tĩrtũm mã mẽ inhmyjê jamār xwỳnh. No mẽ anijaja mẽ amjên kēp Kris mã mẽ ajamār xwỳnh. Na hte mēnijaja ohtô nē ra mẽ mjên ã amnhĩ to amnhĩrĩt kaxyw amnhĩ krã hpro nē ri pa. No mẽ inhmyjaja na pa htem ã amnhĩ nhĩpêx anhỹr kêt nē. Na pa htem amarĩ ixkrã hkênh nē ixpa.

⁴Jakamã na pa htem Tĩrtũm kapēr mar xà hã ixkre hwỳr axpēn wỳr akuprō nē Tĩrtũm nhỹ hã mẽ anijê mã kapēr jarēnh o ixkuhê. Rỳ Tĩrtũm mã tanhmã mẽ pajarēnh to. No ãm amnhĩ krã hpro hkêt rãhã kãm mẽ ajahkre rỳ kãm mẽ pajarē. Kot pa mẽ amnhĩ krã hpro nē te mẽ apê ixprōjaja mẽ apê mẽ ijamār xwỳnh ã mẽ ajarēnh pyràk. Jao te mẽ ixte mẽ ijamār xwỳnh Kris ã ixpijaàm kêt pyràk o amnhĩ nhĩpêx.

⁵No mẽ anijaja mẽ ixte Kris mã mẽ ajamār xwỳnh jakamã na ka htem Tĩrtũm nhỹ hã mẽ inhmã kapēr jarēnh rỳ kãm mẽ pajarēnh kaxyw nē amnhĩ krã hpro. Mě ixte Kris mã mẽ ajamār xwỳnhjê hã apijaàm kaxyw ã amnhĩ nhĩpêx anē nē mẽ amnhĩ krã hpro. Kot ka mẽ ã amnhĩ nhĩpêx anhỹr kêt nē te mẽ ate mẽ ixtã apijaàm kêt pyràk o amnhĩ nhĩpêx nhũm mẽ amjên tee ri ja hã apumu nē hpijaàm nē. Te ate amnhĩ krã hkênh nē ri apa nhũm tee ri apumunh nē hpijaàm pyràk.

⁶Kot kaj mẽ amnhĩ krã hkênh nē ri apa nē amnhĩ kamã apijaàm nē ri apa. Mě anijaja na ka htem akrã hkĩ japjê nē kamã amex nē ri apa. No kot ka mẽ amnhĩm akrã hkênh nē apunuj nē amnhĩ kamã apijaàm nē ri apa. Jakamã kêt ka mẽ Tĩrtũm mã amnhĩ jarēnh kaxyw nē amnhĩ krã hpro. Nom kot ka mẽ amjên ã apijaàm kêt nē ri apa hprãm japêr nē mamrĩ amnhĩm akrã hkênh nē ri amnhĩ kuk ã apijaàm kêt nē ri apa.

⁷No mẽ inhmyjaja na pa htem amnhĩ krã hpro hkêt nẽ. Te mẽ ixpê Tĩrtũm pyræk nhũm mẽ anijaja te mẽ apê Tĩrtũm kra pyræk o na pu htem axpẽn nhĩpêx. Tĩrtũm krajaja na htem mẽmoj tã Tĩrtũm mã karõ hkêt nẽ. Ja pyrã nẽ mẽ anijaja na ka htem mẽ inhmyjê mã mẽmoj tã karõ kamã axihtỳx o apa hkêt nẽ. Na ka htem mẽ ixtã apijaàm kãm mẽmoj tã mẽ ixwỳ.

⁸Amnepê mã Tĩrtũm kot mẽmoj to kator krax rũm na pre myja kumrêx nhĩpêx hãmri nẽ kêp õkwa i hõ kapa nẽ ho kãm hprõ nhĩpêx. No na pre nija kumrêx nhĩpêx nẽ õkwa i ho kãm mjên nhĩpêx kêt nẽ.

⁹Myja mã na pre hprõ nhĩpêx. No nija mã mjên nhĩpêx kêt nẽ.

¹⁰Jakamã kêr ka mẽ anijaja amjên ã apijaàm ã amnhĩ to amnhĩrĩt kaxyw hãmri nẽ mẽ inhmã Tĩrtũm nhỹ hã tanhmã akapêr jarênh to kaxyw rỳ kãm amnhĩ jarênh kaxyw hãmri nẽ amnhĩ krã hpro nẽ akuhê. Hãmri nhũm Tĩrtũm kapêr o mẽ wrỳk xwỳnhjaja ja hã mẽ apumu nẽ hkĩnh nẽ tee ri mẽ akukamã hamaxpêr kêt nẽ.

¹¹⁻¹²Nẽ wam ni kator xwỳnhta na pre myja rũm kato. Tã na pa htem jarãhã mẽ inhmyjaja hpãnhã mẽ anijê rũm ijaôj. Tĩrtũm jamaxpêr xà hkôt. Tãm na pre ã mẽ pahte amnhĩ nhĩpêx anhỹr kaxyw ã mẽ panhĩpêx anẽ. Tã mẽ ixpê Pahihti Kris kwỳ hã mẽ inhmyjaja nẽ mẽ anijaja na pu htem ri ahte papa hkêt nẽ. Na pu htem axpẽn kutã pamã axpẽn hkĩnh o papa nẽ mẽmoj to axpẽn kutã panojarêr o ri papa. Nẽ axpẽn to presija ho papa. Na hte mẽ anijaja mẽ amjên o presija ho apa. Nẽ mẽ amyjaja na ka htem mẽ aprõ ho presija ho apa. Tã kêr ka mẽ anijaja mẽ amjên ã apijaàm o ri hkôt apa.

¹³Jakamã kwa mẽ kot amnhĩ krã hproja kukamã ajamaxpêr tỳx nẽ. Xà mẽ anhõ krĩ kamã mênijaja mẽ mjên ã hpiaàm ã amnhĩ to amnhĩrĩt kaxyw amnhĩ krã hpro nà? Kojã mẽ ja kaxyw ã amnhĩ nhĩpêx anhỹr japêr kê mẽ rĩ mẽ anoo mã Tĩrtũm mã amnhĩ jarênh kaxyw nẽ kupê xê hkwỳ ho amnhĩ krã hprõ nẽ rĩ kãm amnhĩ jarê. Nom kojã mẽ ã amnhĩ nhĩpêx anhỹr kêt nhũm mẽmyjaja tee ri ja hã mẽ omunh nẽ ho kapêr hkêt japêr hãmri kê mẽ rĩ amnhĩ krã hpro hkêt nẽ ri pa.

14Mě kot mẽ pahte amnhĩ nhĩpêx ã mẽ pahpumunh nẽ hkĩnh kaxyw na pu htem tanhmã amnhĩ nhĩpêx to ho ri papa. Na htem mẽ pahkrã hkĩ jarẽnh o: “Koja mẽmyjaja hkrã hkĩ japjê nẽ ri pa nẽ ra kamã omnajti.” Anhỹr jakamã na pa htem amnhĩ krã hkênh nẽ ri ixpa.

15No mẽ anijaja na htem mẽ ajarẽnh o: “Měnijaja na htem hkrã hkĩ japjê nẽ ri pa nẽ kamã muxti.” Anhỹr jakamã na ka htem akrã hkĩ japjê nẽ ri apa. Mě akĩ te kêp mẽ akrã hpro xà pyræk. Na ka htem ã amnhĩ nhĩpêx anhỹr o apa.

16E na pa ra mẽ amã krĩ hkwỳ kamã Kris kwỳ nijaja kot mjên ã hpijaàm ã amnhĩ to amnhĩrĩt kaxyw tanhmã amnhĩ nhĩpêx to hã mẽ harẽ. Tã koja mẽhõ nija tee ri ja ma nhũm ja kêp omnuj japêr. Nhũm amnhĩ jarẽnh o: —Kêt. Kot paj tanhmã inhmã amnhĩ nhĩpêx to hprãm xà hkôt tanhmã ri amnhĩ nhĩpêx to ho ri ixpa. Koja inhmjên ja hã ixpumu nẽ hpijaàm nẽ rĩ tãm. Anhỹr ã amnhĩ jarẽ ka mẽ tee ri ã kot amnhĩ jarẽnh anhỹrja ã ama nẽ kãm: —Kwa nà ã ri ajamaxpêr anhỹr kêt nẽ. Na hte Kris kwỳjaja ã hamaxpêr anhỹr kêt nẽ. Anẽ.

Jejus tyk mã mẽ pajamaxpêr pê tanhmã mẽ pahte amnhĩ to hã mẽ pajarẽnh

Matêwre 26.26-30; Makre 14.22-26; Rukre 22.19-20

17Nẽ na ka xep htem Tĩrtũm mã amnhĩ jarẽnh xà hã ixkre hwỳr axpên wỳr akuprõ nẽ kamã amnhĩ to mex kêt nẽ. Na ka htem tanhmã amnhĩ tomnuj to pa tee ri mẽ ajarẽnh ma nẽ ixkaprĩ nẽ. Nẽ amnhĩm mẽ amex ã mẽ ajarẽnh kêt nẽ.

18Na ka xep htem axpên wỳr akuprõ nẽ mẽmoj tã axpên mã akir nẽ axpên pê anhrà. Nẽ ahpỹnhã mẽmoj mã ajamaxpêr jao ra mẽ amã axpên kĩnh kêt nẽ. Na pa tee ri ã mẽ ajarẽnh anhỹrja ma nẽ ixkaprĩ htỳx nẽ.

19Xà na hte Tĩrtũm ahpỹnhã tanhmã mẽ pahte amnhĩ anhĩpêx to hã mẽ pahpumunh kôt kãm mẽ pajapê hkêt ã amnhĩ jarẽ? Nà na hte ã amnhĩ nhĩpêx anhỹr kêt nẽ. Kãm mẽ pajapê ho axpên pyræk kênã.

20Nẽ na hte Kris kwỳjê piitã tõhã axpên wỳr akuprõ nẽ Jejus tyk mã hamaxpêr kaxyw pãwti hkwỳ hku. Tã mẽ kajaja na ka xep htem ja kaxyw

axpën wÿr akuprõ nom axtem nẽ Jejus tyk mã ajamaxpër pẽ axàpkur kêt nẽ. ãm mẽ axàpkur pix kukamã ajamaxpër nẽ axtem nẽ axàpkur rũnh o akrĩ.

²¹Jao amnhĩ pix kukamã ajamaxpër. Mẽ akwÿjaja wam mrar nẽ hpõx nẽ mẽ apkur xà hã mẽ hkrĩ xwÿnhjaja na xep htem hkwÿjê rom mẽõta pinh pa. Nẽ wĩhtija nhũm mẽ mããnẽn hpenh pa nẽ axtem nẽ ho axpã. Jakamã nhũm mẽ akwÿjaja kot amnhĩ to hapu nẽ hpõx xwÿnhjaja mẽmojta ã hprãr pa.

²²Kwa mon ka mẽ amã hprãm nẽ anhõrkwÿ kamã axàpkur kêt nẽ? Mẽ kot Tĩrtũm mã amnhĩ jarẽn hã ixkre kamã na htem apkur rũnh hkêt nẽ. Ka mẽ ã amnhĩ nhĩpêx anẽ nhũm mẽõ hkêt xwÿnhjaja amnhĩ to hapu nẽ mra nẽ mẽõ hã prã nẽ amnhĩ kamã hpiaàm nẽ. Kwa xà kot pa ã mẽ ate amnhĩ nhĩpêx anhÿr ã mẽ ajarẽn ma nẽ ixkĩnh nẽ mẽ ate amnhĩ nhĩpêx mex ã mẽ ajarẽ? Nà kot paj ã mẽ ajarẽn anhÿr kêt nẽ.

²³Pahihti Jejus na pre ja hã tanhmã inhmã kapër to nẽ inhmã: —Kêr ka mẽ tõhã axpën wÿr akuprõ nẽ axàpkur pẽ ixtyk mã mãn mẽ ajamaxpër pẽ ã amnhĩ nhĩpêx anẽ nẽ ã amnhĩ nhĩpêx anẽ. Anẽ. Jakamã kot paj ixprĩ hã amnhĩ xõ ri mẽ amã kot tanhmã inhmã kapër tota jarẽ ka mẽ inhma. Nà Jejus kormã htyk kêt ri Jut Kariot ra kot pôristi mã hã àmnênh kaxyw nhũm kamàt nhũm Jejus mẽ ÿ hã mẽ ahkre xwÿnhjê mẽ apkur kaxyw hkrĩ hpa. Hãmri nhũm Jejus pãwti hõ py nẽ o xa

²⁴nẽ Tĩrtũm mã harẽ nẽ kãm: —Pa Papaj. Nà ãm hãmri na ka hte mẽ inhmã mẽ inhõ mex o apa. Anẽ. Nẽ hpãnhã pãwja o hkry pa nẽ ho mẽ kot ÿ hã mẽ ahkre ho mẽ pa xwÿnhjê nhĩpêx pa nẽ mẽ kãm: —E na pa ã pãwti ho hkry nẽ mẽ amã õr anẽ. Kojã mẽ ã inhĩpêx anẽ nẽ te mẽ kot ixto hkry hpar pyræk o inhĩpêx pa amnhĩ xà htÿx kamã ijamak kãm ty. Nom mẽ anê kot paj ty. Jakamã e kêr ka mẽ ixwakre kamã tõhã axpën wÿr akuprõ nẽ ixte mẽ ate amnhĩ tomnuj pãnhã amnhĩrer kaxyw mẽ anê ixtyk mã ajamaxpër pẽ akĩnh nẽ pãwta kur o akrĩ. E mẽ mãmrĩ axàmnhĩx aku. Anẽ.

²⁵Hãmri nẽ hpãnhã kop kãm wĩhtita py nẽ o xa nẽ mẽ kãm: —E kop kãm wĩhtija te kęp Tĩrtũm kot mẽ atã amnhĩ jarẽn nyw xà jarẽn pyræk. Ixtyk

kukwak ri koja mẽ ato hkra. Kot paj ty nhũm ixkamrô mẽ anê axkapĩ. Jakamã e. Mẽ kopja kamã wĩhti ho akõm o axpẽn nhĩpêx. Nẽ ho akõm pẽ ixte mẽ anê ixtyk mã ajamaxpêr. Anẽ.

²⁶Tã ã kot amnhĩ jarẽnh anhỹr jakamã na pu htem axpẽn wỳr akuprõ nẽ pãwti hkwỳ hku nẽ mẽmo kagô hkwỳ o ixkõ. Nẽ ho pahkõm pẽ axpẽn mã Jejus tyk jarẽnh o pahkrĩ. Tã kêr pu mẽ arĩ ã amnhĩ nhĩpêx anhỹr o ri papa rãhã nhũm Jejus akupỹn mẽ pahwỳr wrỳ.

²⁷Jakamã kot kaj mẽ tõhã mẽmo arĩgro hã kot mẽ panê htykja mã ajamaxpêr kaxyw axpẽn wỳr akuprõ. Hãmri nhũm mẽ anhĩõ mẽ awỳr axà nẽ nhỹ. Nom axtem nẽ Jejus tyk mã hamaxpêr kêt japêr. Nẽ htỳx pãwti kur o nhỹ. Nẽ hkõt amarĩ mẽmo kagô ho hkõm o nhỹ. Koja ã htyk mã hamaxpêr kêt rãhã amnhĩ nhĩpêx anẽ nẽ te Jejus o kapêr pyræk o amnhĩ nhĩpêx. Te ho kapêr o: —Nà Jejus amarĩ htyk nhũm hkamrô amarĩ hpikapĩr kênã. Na pre mẽ panê htyk kêt nẽ. Anhỹr o ho kapêr pyræk.

²⁸Jakamã kwa kêr ka mẽ ate pãwta kur kaxyw nẽ taxy kormã tanhmã ate amnhĩ nhĩpêx to mã ajamaxpêr nẽ ajamaxpêr o: —Kwa mãn pa Tĩrtũm kapêr kõt amnhĩ nhĩpêx mex rãhã ho ri ixpa nà? Anhỹr o mãn ajamaxpêr. Hãmri nẽ ate hkõt amnhĩ nhĩpêx mex ã amnhĩ pumu nẽ amarĩ axàmnhĩx aku. No kot ka mẽ kormã mẽmoj punuj kaga hkêt nẽ arĩ ri ho anhỹr o pa hãmri nẽ kãm ajamaxpêr nẽ hkur kêt nẽ. Rỳ tanhmã tee ri tanhmã ate amnhĩ tomnuj tota mã ajamaxpêr nẽ akaprĩ nẽ. Hãmri nẽ tokyx Tĩrtũm mã amnhĩ jarẽ nẽ amnhĩ to mex prãm xàj amnhĩ to awỳ hãmri nẽ arĩ kormã axàmnhĩx pãwtita ku.

²⁹Koja mẽhõ mẽ akõt axà nẽ mẽmoj kukamã hamaxpêr pẽ htỳx pãwti nhĩrênhta õ py hkur o nhỹ. Hãmri nhũm Tĩrtũm tee ri ja hã omu nẽ hã tanhmã ho.

³⁰Na ka mẽ ra axohtô nẽ ã amnhĩ nhĩpêx anẽ nẽ atỳx ri mẽmoj kukamã ajamaxpêr pẽ pãwta ku. Jejus kot mẽ panê htykja mã ajamaxpêr kêt pẽ atỳx tanhmã ajamaxpêr to pẽ hkwỳ hkur o akrĩ. Mỳrapê na ka mẽ ra ja hã axà nẽ ri apa. Nẽ mẽ akwỳjaja ra htyk rax nẽ.

³¹Nom kot ka mẽ axpën wỳr akuprõ hãmri nẽ akupỳm tãm axpën kõt ajamaxpër nẽ axpën kõt amnhĩ nhĩpêx nẽ rĩ kormã pãwtita ku. Hãmri nhũm Tĩrtũm ja hã mẽ apumu nẽ tanhmã mẽ ato hkêt nẽ.

³²Na hte mẽ pahte tanhmã amnhĩ tomnuj to hã mẽ pahpumu nẽ hã tanhmã mẽ pahto. Mẽ pahte ja hã amnhĩ pumunh nẽ axte ã amnhĩ nhĩpêx anhỳr kêt kaxyw na hte ã mẽ pahpê hkrajê nhĩpêx anẽ. Jakamã kot puj mẽ nhỹrmã mẽ kệp hkra hkêt xwỳnhjê hkõt kuwyta wỳr ma papa hkêt nẽ.

³³Jakamã e Kris kõt ixtõ nẽ ixtõxjaja. Kêr ka mẽ axte Pahihti Jejus tyk mã ajamaxpër kaxyw axpën wỳr akuprõ. Hãmri nẽ ra axpën wỳr apikuprõnh pa hã axpën pumu nẽ rĩ kormã pãwti hkwỳ hku nẽ hkur pê Jejus kot mẽ panê htyk mã ajamaxpër o akrĩ.

³⁴Nẽ ka mẽ atõ ra amã prãm japêr nẽ anhõrkwỹ kamã apku nẽ rĩ kormã mẽ hkõt tẽ. Jao ra anhõhy htu nẽ ajamakêtkati nẽ akwỳjê jamãr o nhỹ. Kê mẽ hpõx pa ka mẽ atipxi nẽ Pahihti Jejus tyk mã ajamaxpër pê hkur o akrĩ. Hãmri nhũm Tĩrtũm ja hã mẽ apumu nẽ hkĩnh nẽ tanhmã mẽ ato hkêt nẽ. Na ka prem mẽ ate inhmã kagà nẽ mẽnhta kamã mẽmoj tã ixkukjêr rax nẽ. Tã na pa ra kagà ja kamã mẽ amã hkwỳ jarênh rax nẽ. Nom kot paj piitã harênh par kêt nẽ. Kot paj ãm mẽ amã hkwỳ pix jarẽ. Hãmri nẽ nhỹrmã ma mẽ awỳr mõ nẽ mẽ apumu nẽ kormã axte mẽ amã harênh jatur xãm kumẽ.

Wam Korĩt 12

Mẽ kot Tĩrtũm kapêr o hêx xwỳnhjê jarênh

Rõmãn 12.6-8; Wam Korĩt 14.29; Wam Pêtre 4.10-11; Wam Juãw 4.1-2

¹Nẽ kot paj hpãnhã mẽ amã tanhmã Tĩrtũm Karõ jarênh to ka mẽ inhma. Tanhmã kot mẽ pahkrã hto nhũm mẽ pahte ahpỳnhã tanhmã kãm amnhĩ nhĩpêx to ho papaja kot paj mẽ amã harẽ.

²Amnepê mã kormã mẽ ate Kris kõt amnhĩ xunhwỳr kêt ri na ka prem sãnti hkõt ri amnhĩ nhĩpêx o ri apa. Kapêr kêt tã ka prem hkõt ri amnhĩ nhĩpêx rãhã ho ri apa. Te kot mẽ ano kupyw pyræk ka mẽ kãm mex o mex ã harênh o ri apa. Nẽ kãm amnhĩ jagrer pê amnhĩ to hwỳr o ri apa. ã na ka prem amnhĩ nhĩpêx anhỳr o ri apa.

³Tã ra hpãnhã Tĩrtũm kõt amnhĩ xunhwỳ. Na htem ohtô nẽ Tĩrtũm nhỹ hã kapẽr jarẽnh o pa hã amnhĩ jarẽnh tã no ãm mẽ hkwyjaja ja hã amnhĩ to hêx. Tã kot paj ixprĩ hã mẽ amã tanhmã mẽ harẽnh to. Koja mẽhõ mẽ kãm Tĩrtũm nhỹ hã kapẽr jarẽnh o pa hã amnhĩ jarẽ hã koja Jejus o kapẽr punuj o pa hkêt nẽ. Koja harẽnh o: —Jejus kêp mẽ panhõ Pahihti jakamã kwa pu mẽ hkõt amnhĩ xunhwỳ nẽ hkõt amnhĩ nhĩpêx o ri papa. Anhỹr o harẽ. Koja mẽhõ ã mẽ amã kapẽr anẽ ka mẽ ama nẽ mẽ kot Tĩrtũm nhỹ hã kapẽr jarẽnh o pa xwỳnh ã omunh kurê kumrêx. No koja mẽ amã ã kapẽr anhỹr kêt nẽ ka mẽ ama nẽ Tĩrtũm kapẽr o hêx o pa hã omunh kurê kumrêx.

Tĩrtũm Karõ kãm mẽ pahte axpẽn to mex prãm ã harẽnh

Rõmãn 12.6; Epes 4.7; Wam Pêtre 4.10

⁴Nẽ ahpỹnhã kot tanhmã mẽ panhĩpêx to xwỳnhja ãm pixii. Kêp Tĩrtũm Karõ. Na hte mẽ pahkarõ mã agjê nẽ ahpỹnhã tanhmã mẽ pahte axpẽn to mex kaxyw tanhmã mẽ panhĩpêx to. Kot tanhmã mẽ panhĩpêx to xàja ohtô. Mẽ pahte ahpỹnhã ri tanhmã kãm amnhĩ nhĩpêx to nẽ tanhmã axpẽn to mex to ho ri papa kaxyw na. Tĩrtũm Karõ na hte ja kaxyw tanhmã mẽ pahkrã hto.

⁵Nẽ mẽ pahte kãm tanhmã amnhĩ nhĩpêx to ho papa xwỳnhja haxwỳja ãm pixii. Kêp Pahihti Jejus. Tã na pu htem ahpỹnhã kãm tanhmã amnhĩ nhĩpêx to ho ri papa.

⁶Nẽ kot mẽ pahto ajuta nhũm mẽ pahte ahpỹnhã tanhmã axpẽn to mex to ho papa xwỳnhja haxwỳja ãm pyxii. Kêp Tĩrtũm. Na pu htem ahpỹnhã tanhmã hkõt axpẽn xunhwỳr tỳx to kaxyw tanhmã axpẽn to mex to ho papa.

⁷Nẽ Karõja na hte ahpỹnhã tanhmã axpẽn kaxyw mẽ panhĩpêx to pu mẽ axpẽn to ajuta mex o ri papa.

⁸Jakamã na pu hte mẽ pahkwỳjaja Tĩrtũm Karõ nhỹ hã ma mẽ pahkwỳjê mã Tĩrtũm kapẽr jarẽnh o ri mẽ hkõt papa. Nẽ mẽ pahkwỳjaja ma ã hã paxàhpumunh mex pê ma ri kapẽr o mẽ ahkre ho mẽ hkõt papa.

⁹Ně mẽ pahkwỳjaja Karõ nhỹ hã Tĩrtũm kot tanhmã mẽ pahto ajuta hto kaxyw hkõt pajamaxpěr tỳx nẽ. Nẽ mẽ pahkwỳjaja akupỹm mẽ à xwỳnhjê ho mex o papa nhũm mẽ akupỹm mex nẽ pa.

¹⁰Ně mẽ pahkwỳjaja aa mẽ kot mẽmoj pumunh kêt kwỳ ho anhỹr o ri mẽ hkõt papa. Nẽ mẽ pahkwỳjaja Tĩrtũm kapěr mar tỳx nẽ ô ri mẽ kãm harẽnh o mẽ hkõt ri papa. Nẽ mẽ pahkwỳjaja Tĩrtũm Karõ nhỹ hã tanhmã mẽ kot amnhĩ nhĩpêx to hã mẽ omunh o papa. Rỳ pahprĩ hã mẽkarõmnuti nhỹ hã mẽ kot amnhĩ nhĩpêx ã mẽ omunh o papa. Nẽ mẽ pahkwỳjaja nhãm mẽ kapěr mar kêt tã ra mẽ kapěr o pakapěr. Nẽ mẽ pahkwỳjaja mẽ kapěr o pakapěrja ma nẽ mẽ kot mar kêt xwỳnhjê mã harẽ. Kormã aa pahte mar kêt tã ra pahprĩ hã mar mex nẽ mẽ kãm harẽ.

¹¹Ã na hte Tĩrtũm Karõ kãm hprãm xà hkõt tanhmã mẽ panhĩpêx to pu mẽ ahpỹnhã ỹ hã ã axpẽn nhĩpêx anhỹr o ri axpẽn kõt papa.

Te mẽ pahpê Kris nhĩ pyræk ã mẽ pajarẽnh

Rõmãn 12.3-8; Epes 1.22-23; 4.11-16; Korosẽ 3.15

¹²E pa hpãnhã mẽ amã mẽ panhĩ kamã tanhmã mẽmoj jarẽnh to ka mẽ inhma nẽ hã anohtỳx nẽ. Mẽ panhĩja ãm pixi htã no ãm kamã mẽmoj xohtô. Kamã mẽ pahte nẽ kamã mẽ pahpa nẽ kamã mẽ pajakwa. Nẽ mẽ panhĩnhu nẽ mẽ pano. ã mẽ panhĩ kamã mẽmoj xohtô kot anhỹr. Ja pyrà nẽ Kris nhĩja ãm pixi htã te mẽ pahpê ĩ kamã mẽmoj xohtôta pyræk. Mẽ pahkwỳjaja te mẽ pahpê hte pyræk. Nẽ mẽ pahkwỳjaja te mẽ pahpê ĩhkra pyræk. Nẽ mẽ pahkwỳjaja te mẽ pahpê no pyræk.

¹³Mẽ pahpê Kris kwỳjaja axpẽn kaxyw mẽ paxohtô. Mẽ ixpê Ijaewjaja nẽ mẽ apê Ijaew kêt xwỳnhjaja. Nẽ amarĩ ri mẽ kãm mẽ axàpênh o mẽ apa xwỳnhjaja nẽ amnhĩ mã ri mẽ axàpênh o mẽ apa xwỳnhjaja. ã ahpỹnhã mẽ paxohtô kot anhỹr tã nhũm Tĩrtũm Karõ te mẽ pahpê Kris nhĩ pixi pyræk o mẽ panhĩpêx. Nhũm Krisja mẽ pahpiitã mẽ pamã Karõ gõ nhũm mẽ pahkarõ mã agjê. Pixi htã mẽ pahpiitã mẽ pahkarõ mã agjê.

¹⁴Ně mẽ panhĩja pixi tã kamã tanhmã mẽ pakute xàja ohtô. Tã Kris nhĩja te kot mẽ panhĩja pyræk. Uræk nẽ kamã mẽ paxohtô. Jakamã na pu htem

ahpÿnhã tanhmã kãm amnhĩ nhĩpêx to ho ri papa. Karõ kot tanhmã amnhĩ kaxyw mẽ panhĩpêx to xà hkôt.

¹⁵Ně kop ãm mẽ pahparja kapêr ronhÿx tee ri mẽ panhĩhkra pumu nẽ amnhĩ mã: —Hêxta waa nẽ. Kêp ãm ixpê mẽ ïhkra ronhÿx pa inhmex nẽ ijarir. No ãm ixpê mẽ hpar pix jakamã pêr ãm mẽ hkĩnhã ixpê mẽ hkwỳ hkêt ãm ixpê mẽ hatur xà pix na pa. Anhÿr o amnhĩ jarênh japêr. Nom ja kot anhÿr kêt. Axtem nhÿhÿm kot mẽ pahto pa kaxyw na mẽ pahparja. Nẽ axtem mẽmoj tã mẽ paxàpênh rÿ mẽmoj jamÿnh kaxyw na mẽ panhĩhkraja. Na pu htem hamẽ wa ho presija rãhã ho papa. Ja pyrã nẽ kot puj mẽ pahkwÿjê hõ mẽ parom Tĩrtũm Karõ nhÿ hã mẽmoj tã àpênh tÿx ã omu nẽ hkĩnhã mẽ pahte amnhĩ to warê hkêt ã amnhĩ jarênh o papa hkêt nẽ.

¹⁶Ně mẽ pajamakja kapêr ronhÿx kapêr o: —Hêxta waa nẽ. Kêp apu ixpê mẽ no ronhÿx pa inhmex nẽ ijarir. No ãm ixpê mẽ umar xà pix jakamã pêr ãm ixte ho warê hkêt kumrêx. Anhÿr o amnhĩ jarênh japêr. Nom ja kot anhÿr kêt. Hamẽ wa mex kênã. Axtem ho mẽ paxumar kaxyw na mẽ pajamakja. Nẽ axtem ho mẽ parĩt kaxyw na mẽ panoja.

¹⁷Kêp ãm mẽ pano pix ronhÿx pu mẽ parĩt pix nẽ paxumar kêt nẽ ri papa. Rÿ kêp ãm pajamak pix ronhÿx pu mẽ paxumar pix nẽ parĩt kêt nẽ mẽ paxupãr kêt nẽ ri papa.

¹⁸Mẽ panhĩja pixi htã kamã hikukrêx xohtôô. Na pre Tĩrtũm amnhĩ krã hkôt kamã mẽmoj piitã hipêx nẽ hanhõ.

¹⁹Kêp ãm mẽ panhĩja kamã ãm mẽmoj pixi ronhÿx pu mẽ pamex kêt nẽ papa.

²⁰Tã no ãm kot anhÿr kêt. Mẽ panhĩja ãm pixi htã kamã hikukrêx xohtôô.

²¹Jakamã na hte mẽ panoja amnhĩ nẽ mẽ panhĩhkra mã kãm: —Tk kwa ma tẽ. Ixte ato presijare hã. Anhÿr o kãm kapêr kêt nẽ. Rÿ mẽ pahkrãja amnhĩ nẽ mẽ pahpar mã kãm: —Tk kwa ma tẽ. Na pa ato presija hkêt nẽ. Anhÿr o kãm kapêr kêt nẽ. Ja pyrã nẽ kot puj mẽ nhÿri Kris kôt panhĩõ pumu nẽ pamex o pahte hakrenh ã amnhĩ jarênh kêt nẽ.

²²Ně mẽ panhĩ kamã mẽmoj kwỳ te hirerek pyræk tã no pu mẽ arĩ pamã hapê nẽ. Ja pyrà nẽ kêr pu mẽ kormã mẽ kot Kris kôt amnhĩ xunhwỳr tohtuj anhỹr xwỳnhjaja pu mẽ pamã mẽ hkĩnh kãm tanhmã mẽ kutã panojarêt to ho ri papa.

²³⁻²⁴Ně na pu htem mẽ panhĩ kamã mẽ pakukrêx kwỳ hã pahpijaàm nẽ hpro nẽ ri ho papa. Ně hkwỳ hã pahpijaàm kêt nẽ hpro hkêt nẽ ho ri papa. Ně hkwỳ mẽ pahpê omnajti htã pu mẽ ho mex nẽ ri ho papa. Tĩrtũm kot ã mẽ panhĩpêx anhỹr jakamã na pu htem mẽ pakamã mẽ pakukrêx kwỳ mẽ pahpê omnajti htã pu mẽ ho mex nẽ ri ho papa. Ja pyrà nẽ kêr pu mẽ Tĩrtũm kôt mẽ pahtõ nẽ mẽ pahtõx piitã ho mex o ri papa. Ně tãm mẽ hipêx. Mẽ pahkwỳjaja muxre nẽ mẽ pahkwỳjaja omnajti htãã. Tanhmã mẽ kute htã pu mẽ kêp mẽ Jesus kôt mẽ pahtõ nẽ mẽ pahtõx ã mẽ ho mex o ri apa.

²⁵Ně na hte mẽ panhĩ kamã mẽ pahpar nẽ mẽ panhĩhkra nẽ piitã axpẽn kôt àpênh mex o pa. No na hte mẽ pahparja nhỹhỹm ma mra nhũm ihõja hkwỳm nhỹhỹm ma mrrar kêt nẽ. Na hte wa axpẽn kôt àpênh mex o pa. Ja pyrà nẽ kêr pu mẽ pahpê Tĩrtũm krajaja axpẽn kôt amnhĩ nhĩpêx rãhã ho ri papa. Nẽ axpẽn to mex rãhã ho ri papa. No ri axpẽn kwỳm ri tanhmã amnhĩ nhĩpêx to ho ri papa hkêt nẽ.

²⁶Na pu htem tõhã nhỹhỹnh panhĩ kamã paxà nẽ ri papa. Pahkrã tãtæk rỳ pakatut gêk. Jao te mẽ panhĩ piitã kamã mẽ paxà pyræk. Nẽ nhỹhỹnh akupỹm pamex nẽ te panhĩ piitã hkôt akupỹm pamex pyræk. Ja pyrà nẽ koja Kris kôt panhĩõ nhỹhỹnh à nẽ ri pa. Rỳ tanhmã amnhĩ to nẽ ra hkaprĩ nẽ ri pa pu mẽ ja hã omu nẽ ÿ hã pahkaprĩ nẽ papa. No koja mẽmoj tã hkĩnh nẽ pa pu mẽ ja hã omu nẽ ÿ hã pahkĩnh nẽ papa.

Te mẽ pahpê Kris nhĩ pixi pyræk ã mẽ pa jarênh

²⁷Ně mẽ pahpê Kris kwỳjaja te mẽ pahpê Kris nhĩ pixi pyræk. Ahpỹnhã mẽ pahte tanhmã amnhĩ nhĩpêx to ho papa htã mẽ pahpê Kris kwỳ jakamã te mẽ pahpê ï pixi pyræk.

²⁸Ně mẽ pahte Kris kôt tanhmã pahkwỳjê ho ajuta hto ho papa kaxyw na pre Kris ahpỹnhã tanhmã mẽ paxunhwỳr to. Mẽ pahkwỳjaja mẽ pahte ÿ hã

nhām mẽ kām kapēr jarēnh o papa kaxyw mẽ paxunhwỳ. Nễ mẽ pahkwỳjaja mẽ pahte ỹ hã tanhmã kapēr jarēnh to ho ri papa kaxyw mẽ paxunhwỳ. Nễ mẽ pahkwỳjaja Tĩrtũm kapēr jarēnh o mẽ ahkre ho ri mẽ papa kaxyw mẽ paxunhwỳ. Nễ mẽ pahkwỳjaja mẽ pahte aa mẽ kot mẽmoj pumunh kêt kwỳ ho anhỹr o ri papa kaxyw mẽ pa xunhwỳ. Nễ mẽ pahkwỳjaja akupỹm mẽ à xwỳnhjê ho mex o mẽ papa kaxyw mẽ pa xunhwỳ. Nễ mẽ pahkwỳjaja mẽ kapēr o mẽ hihtỳx o mẽ papa kaxyw mẽ pa xunhwỳ. Nễ mẽ pahkwỳjaja mẽ pahte tanhmã mẽ ho ajuta ho ho ri papa kaxyw mẽ pa xunhwỳ. Nễ mẽ pahkwỳjaja nhām mẽ kapēr ò ho mẽ pakapēr o mẽ papa kaxyw mẽ pa xunhwỳ. Ǻ na pre ahpỹnhã mẽ pahpê hkwỳjê piitã mẽ paxunhwỳr anẽ.

²⁹No na pu htem pahpiitã axpẽn kôt Tĩrtũm kapēr o mẽ ahkre ho ri papa hkêt nễ. Nễ mẽ pahpiitã ỹ hã tanhmã pakapēr to ho ri papa hkêt nễ. Nễ mẽ pahpiitã kapēr jarēnh o ri papa hkêt nễ. Nễ mẽ pahpiitã aa mẽ kot mẽmoj pumunh kêt kwỳ ho anhỹr o ri papa hkêt nễ.

³⁰Nễ mẽ pahpiitã akupỹm mẽ à xwỳnhjê ho mex o ri papa hkêt nễ. Nễ mẽ pahpiitã mẽ kapēr ò ho ri pakapēr o ri papa hkêt nễ. Nễ mẽ pahpiitã ri mẽ kapērja ma nễ pakapēr kām pahkwỳjê mã harēnh o ri papa hkêt nễ. Na pu htem ahpỹnhã tanhmã Kris kôt mẽ pahkwỳjê ho ajuta hto ho ri papa.

³¹Tã kêr pu mẽ pahpiitã pamã axpẽn kĩnh pê tanhmã axpẽn to mex to ho ri papa. Ja na mex o kot mẽmoj piitã hakrenh par. E kot paj ixprĩ hã tanhmã mẽ amã ja jarēnh to ka mẽ inhma.

Wam Korĩt 13

Mễ pahte axpẽn kamã paxukaprĩ ho papa hã mẽ pamã karõ

Juãw 13.31-35; Karatas 5.13-15; Korosẽ 3.12-14

¹Kot pa ma mẽ piitã ahpỹnhã mẽ kapēr kām mẽ kām Tĩrtũm kapēr jarēnh o ri ixpa japêr. Ǻm mẽ piitã mẽ kapēr o ixkapêr mex o mẽ kām harēnh o ri ixpa japêr. Nễ Tĩrtũm kapēr o mẽ wrỳk xwỳnhjê kapêr o mẽ ahkre ho ri ixkwỳjê hkôt ixpa japêr. Tã inhmã mẽ hkĩnh kêt kām ixte mẽ ahkre ho ri ixpa ronhỹx mẽ inhma nễ Ǻm inhma. Nhũm ixkapêrja te ixte rat tatak pyræk o pa tee ri Tĩrtũm kapêr o mẽ ahkre kaprỳ ho ri mẽ hkôt ixpa nhũm Tĩrtũm

tee ri inhmã mẽ hkĩnh kêt ã ixpumu nẽ inhmã: —Nà amã mẽ hkĩnh kêt jakamã na ka tee ri ixkapër o mẽ ahkre kaprỳ. Anẽ.

²Rỳ kot paj Tĩrtũm xàhpumunh tỳx o mẽ kãm kapër pimxur kwỳ jarẽnh o ri ixpa japêr. Rỳ Tĩrtũm mẽ kurom inhmã mẽmoj to amnhĩrĩt pa omu nẽ mẽ kãm harẽnh o ri ixpa japêr. Rỳ pa Tĩrtũm kot amnhĩ nhĩpêx piitã omunh par japêr. Rỳ ixte amnhĩ kaxyw hkôt ijamaxpêr tỳx kôt ỹ hã kẽn krã hprêk õ mã ixkapër nhũm kot inhmar nẽ inhmar xà hkôt nhãm pikamẽnh japêr. Tã inhmã ixkwỳjê hkĩnh kêt kãm ã amnhĩ nhĩpêx anẽ nhũm Tĩrtũm tee ri ja hã ixpumu nẽ inhmã: —Nà amã mẽ hkĩnh kêt jakamã te axàhpumunh tỳx kêt kumrêx pyræk. Na ka tee ri ã mẽ kãm ixkapër jarẽnh anhỹr o ri apa kaprỳ. Anẽ.

³Rỳ pa mẽ kêp amrakati xwỳnhjê mã ixkukrêx nhõr par japêr. Rỳ Kris ã mẽ kãm amnhĩ grõnh kôt mẽ kãm xa nhũm mẽ hã ixpĩr japêr. Tã inhmã mẽ hkĩnh kêt kãm ã amnhĩ nhĩpêx anẽ nhũm Tĩrtũm tee ri ja hã ixpumu nẽ inhmã: —Nà ã ate mẽ kãm amnhĩ nhĩpêx anhỹr o ri apa htã amã mẽ hkĩnh kêt jakamã na ka tee ri ã mẽ kãm amnhĩ nhĩpêx anhỹr kaprỳ. Anẽ.

⁴Kot puj mẽ pamã axpẽn kĩnh hã kot puj mẽ kritpêm mẽ piitã mẽ kãm pahprĩ ho papa. Jao axpẽn kãm pagryk tokyx anhỹr kêt nẽ. Nẽ pamã axpẽn to mex pix prãm. Nẽ mẽmoj tã axpẽn kamã pagryk kurê kumrêx kêt nẽ. Nẽ mẽmoj tã amnhĩ to jarkrar o ri papa hkêt nẽ. Kot puj mẽ pamã axpẽn kĩnh hã kot puj mẽ ã amnhĩ nhĩpêx anhỹr o ri papa hkêt nẽ.

⁵Nẽ kot puj mẽ axpẽn kamã paxukaprĩ ho papa hã kot puj mẽ tãm axpẽn nhĩpêx rãhã ho papa. Jao amnhĩ pix kukamã pajamaxpêr o ri papa hkêt nẽ. Nẽ mẽ pagryk tokyx anhỹr kêt nẽ. Rỳ axpẽn kãm pagryk tokyx anhỹr hkêt nẽ. Rỳ koja mẽhõ tanhmã mẽ panhĩpêx kati hto pu mẽ ãm amnhĩ tã omu nẽ axte kot tanhmã mẽ panhĩpêx tota mã pajamaxpêr kêt nẽ.

⁶Nẽ kot puj mẽ pamã axpẽn kĩnh o papa hã kot puj mẽ tee ri mẽhõ kot tanhmã amnhĩ tomnuj to hã omu nẽ pahkaprĩ nẽ. Rỳ tanhmã kot amnhĩ to mex to hã omu nẽ pahkĩnh nẽ.

⁷Ně kot puj mẽ pamã axpẽn kĩnh o papa hã kot puj mẽ arĩ Tĩrtũm kot mẽ pahto mex par jatur xà mẽnh xà hã arĩgro jamãr rãhã ho ri papa. Ně mẽ kot Kris ã tanhmã mẽ pahto htã pu mẽ tee ri amnhĩ kukamã tanhmã pajamaxpěr to hkêt nẽ. ãm mẽ kutã amnhĩ to htỳx nẽ mẽ kãm pakuhê nẽ arĩ amnhĩ kaxyw Tĩrtũm mã pajamaxpěr tỳx rãhã nẽ.

⁸Ně kot puj mẽ pamã axpẽn kĩnh o papa hãmri nẽ aa mẽ pahte ã amnhĩ nhĩpêx anhỹrja mã panhũrer kêt nẽ. Ně arĩ mẽ pamã axpẽn kĩnh rãhã ho papa ho papa. Jar pika ja kamã mẽ pahte Tĩrtũm nhỹ hã mẽ kãm kapěr jarẽnh o ri papa htã kot puj mẽ nhỹrmã ma õ krĩ hwỳr api hãmri nẽ kuri axte ã kãm amnhĩ nhĩpêx anhỹr kêt nẽ. Mo kaxyw kot puj mẽ axte ri mẽhõ mã kapěr jarẽ? Kot puj mẽ õ krĩ hwỳr api nẽ ra mẽ pahpiitã paxàhpumunh o axpẽn pyræk. Ně na pu htem tũhã mẽ kapěr õ ho pakapěr o ri papa. Nom kot puj mẽ nhỹrmã Tĩrtũm nhõ krĩ hwỳr api hãmri nẽ kuri axte nhãm ri mẽ kapěr o pakapěr kêt nẽ. Ně na pu htem jar mẽ pahkwỳjaja mẽ paxàhpumunh mex kôt Tĩrtũm kapěr jarẽnh o ri papa. Tã kot puj mẽ nhỹrmã õ krĩ hwỳr api hãmri nẽ axte ã amnhĩ nhĩpêx anhỹr kêt nẽ. ãm mẽ pamã axpẽn kĩnh pixja kot puj mẽ arĩ õ krĩ kamã mẽ pamã axpẽn kĩnh tũm rãhã papa ho papa.

⁹Jar mẽ pahpiitã mẽ paxàhpumunh tohtuj anhỹr o pakapěr jakamã na pu htem kormã Tĩrtũm kapěr jarẽnh tohtuj anhỹr o ri papa.

¹⁰Tã kot puj mẽ nhỹrmã õ krĩ hwỳr api nẽ kuri paxàhpumunh jatur xàm mẽnh pa. Jakamã nhũm jar mẽ paxàhpumunh tohtuj anhỹr xwỳnhta mẽ pahpê hapêx.

¹¹E pa mẽ amã ja hã ejêp jarẽ ka mẽ inhma. Nà amnepê mã ixprĩre ri na pa pre ixtỳx ri mẽhprĩjê kot amnhĩ nhĩpêx o amnhĩ nhĩpêx nẽ mẽ hamaxpěr o ijamaxpěr. Ně mẽ kapěr mex kêt o ixkapěr o ri ixpa. Tã ra ixaptàr hãmri nẽ mẽ àptàrjê jamaxpěr o ijamaxpěr o ri ixpa. Te ra mẽ pahte kaxkwa kamã mẽ paxàhpumunh jatur xàm mẽnh parta pyræk mẽ aptàrjê jamaxpěr o ijamaxpěr o ri ixpa.

¹²Ja pyrà nẽ na pu htem kormã Tĩrtũm kot amnhĩ nhĩpêx ã omunh tohtuj anhỹr. Te mẽ pahte amnhĩ pumunh xà pynajre kamã pahprĩ hã amnhĩ

pumunh mex kêêta pyræk. Nom kot puj mẽ nhÿrmã õ krÿ hwÿr api hãmri nẽ pahprÿ hã paxàhpumunh jatur xàm kumẽ. Te Tÿrtũm kot hprÿ hã tanhmã mẽ pakute hã mẽ pahpumunh parja pyræk.

¹³E arÿ mẽ pahte Tÿrtũm kôt amnhÿ nhÿpêx o papa xàja na axkrunêpxi. Mẽ pahte hkôt amnhÿ nhÿpêx o papa rãhã ho papa kaxyw. Wamta na ja: Kêr pu mẽ arÿ amnhÿ kaxyw Tÿrtũm mã pajamaxpêr mex rãhã ho ri papa. Nẽ hkôt ja: Kêr pu mẽ arÿ Tÿrtũm kot mẽ pahto mex par jatur xà mênh xà hã arÿgro jamãr rãhã ho papa. Nẽ hkôt ja: Kêr pu mẽ arÿ pamã axpên kÿnh pê tanhmã axpên to mex to rãhã ho papa. Ja na mex o kot wamta wa hakrenh. E kêr pu mẽ ã amnhÿ nhÿpêx anhÿr rãhã ho ri papa.

Wam Korÿt 14

Tÿrtũm Karõ kot mẽ pahto mẽ paxihtÿx ã harênh

Wam Korÿt 12.7-11; 12.27-31

¹E kêr ka mẽ arÿ amã axpên kÿnh pê axpên to mex rãhã ho ri apa nẽ aa jam anhÿrer nẽ ho ajamakêtkati hkêr nẽ. Nẽ amnhÿ to Tÿrtũm Karõ mãn amnhÿ to awÿ kê mẽ amã tanhmã mẽ ajamaxpêr to ka mẽ ahpÿnhã tanhmã axpên to mex to ho ri axpên kôt apa. Nẽ kêr ka mẽ ã ajamaxpêr anẽ nẽ ajamaxpêr o: —Inhmã mẽ hkÿnh o ri ixpa hprãm tÿx. Nẽ Tÿrtũm Karõ kot tanhmã ixto nhũm ixte ahpÿnhã tanhmã mẽ ho ajuta hto ho ixpaja pa mãânên inhmã ho anhÿr prãm. Nẽ kot tanhmã ijakwa hto nhũm ixte ahpÿnhã mẽ kapêr õ ho ixkapêrja pa mãânên inhmã ho anhÿr hprãm. No kêt ixte Tÿrtũm nhÿ hã mẽ kãm kapêr jarênhja na inhmã ho anhÿr prãm tÿx kumrêx. Anẽ.

²⁻⁴Mẽ pakamã mẽ kapêr õ ho Tÿrtũm mã kapêr xwÿnhjaja na htem Tÿrtũm Karõ nhÿ hã ãm kumã pix mã kapêr õta o kãm kapêr nhũm tapxipix mẽ kuma. No mẽ papajaja na pu htem tee ri mar o pahkrÿ nom mar kêt nẽ. ãm kapêr xwÿnhhta pix koja mẽ pakurom amnhÿ ma. Nom koja mẽ pakapêr kãm Tÿrtũm mã amnhÿ jarẽ pu mẽ mar mex nẽ. Nhũm mẽ pakapêr kãm Tÿrtũm nhÿ hã mẽ pamã kapêr jarẽ pu mẽ pahprÿ hã kuma. Jao mẽ pamã kapêr kôt amnhÿ nhÿpêx prãm nẽ. Nẽ mẽmoj tã pahkaprÿ nẽ ri papa htã mẽ kuma nẽ amnhÿ kaxwÿnh kãm amnhÿ to paxihtÿx.

⁵Mě apiitã mẽ ate nhãm mẽ kapěr õ ho Tĩrtũm mã amnhĩ jarẽnhja na mex. Nom mẽ ate mẽ akapěr o mẽ akwỳjê mã Tĩrtũm kapěr jarẽnh o ri mẽ apaja na mex o wamta jakre. Kot ka mẽ nhãm mẽ kapěr õ ho Tĩrtũm mã amnhĩ jarẽ nhũm mẽ akwỳjaja mẽ amar kêt jakamã ka mẽ ã akapěr anhỹrja o Kris kôt mẽ ho mẽ hamaxpěr o hihtỳx kêt nẽ. ãm kapxipix amnhĩ ma. Rỳ koja kapěr õja mar mex xwỳnhjê hõ amar japêr nẽ mẽ akapěr kãm akwỳjê mã harẽ. Hã koja ja mex nẽ. Nom kot kaj mẽ apiitã ma mẽ kapěr kãm mẽ kãm Tĩrtũm kapěr jarẽnh o ri apa nhũm mẽ piitã hprĩ hã amar mex nẽ. Nẽ amar xà hkôt Tĩrtũm kapěr kôt amnhĩ nhĩpêx mex nẽ.

⁶Jakamã e Kris kôt ixtõ nẽ ixtõxjaja. Kot paj apu nhỹrmã ma mẽ awỳr mõ hãmri nẽ nhãm mẽ kapěr õ ho mẽ amã ixkapêr japêr ka mẽ inhmar kêt nẽ. Nom kot paj mẽ akapěr o mẽ amã ixkapêr ka mẽ apiitã aprĩ hã inhmar mex nẽ. Pa Tĩrtũm nhỹ hã mẽ amã mẽmoj jarẽ rỳ tanhmã kot amnhĩ nhĩpêx toja pa mẽ amã harẽ. Rỳ Karõ nhỹ hã mẽ amã mẽmoj jarẽnh o ã mẽ amã Tĩrtũm kapêr jarẽnh anẽ ka mẽ aprĩ hã inhmar mex nẽ.

⁷Nom mẽ kapêr õ ho mẽ kapêr o mẽ akôt ri mẽ pa xwỳnhjaja te mẽhõ kot htỳx ri wiorãwti kakrênh xwỳnh pyræk. Koja htỳx ri hkakrênh o xa nhũm mẽ tee ri kot grer mar mã. Rỳ nhũm mẽhõ htỳx ri pifti kakôr o xa nhũm mẽ tee ri mẽmo mẽ grer mar mã.

⁸Pôristijaja na htem amarĩ ri tanhmã amnhĩ nhĩpêx to ho pa nhũm mẽ hkrãhtũmja mẽ kãm pifti kakô nhũm mẽ kuma nẽ mẽ pijapu mã hamaxpêr kurê kumrêx nẽ hwỳr hprôt. Nom koja kawax pê hkakô rỳ htỳx ri tanhmã hkakôr to nhũm mẽ kuma nẽ ãm kuma.

⁹Ja pyrà nẽ kot kaj mẽ kapêr õ ho akwỳjê mã akapêr nhũm mẽ ama nẽ ãm mẽ ama. Ka te ãm mẽ kãm ajakwa momok pyræk o axãm o amnhĩ nhĩpêx.

¹⁰Nẽ ahpỳnhã mẽ pakapêr xohtôô. Na htem ahpỳnhã mẽ kapêr o amnhĩ kwỳjê mã kapêr nẽ axpên mar mex nẽ.

¹¹Nom koja mēhō nh̄h̄nh pika hō rūm ixw̄ȳr mō nē mē kapēr o inhmā kapēr pa mar kêt nē. Nē amnhī xwar kutā ixkapēr o kām ixkapēr nh̄m ixpyrà nē inhmar kêt nē.

¹²Jakamā kot kaj mē amā Tīrtūm Karō xiht̄yx xà ho amā tanhmā kām amnhī nh̄pêx to ho apa hprām hā kot kaj mē amnhī to awȳ nē kām: —Kwa amnhī kôt ijamaxpēr o axiht̄yx Tīrtūm. Pa anh̄y hā ixkapēr o ma Kris kôt ixkw̄ȳjê ho mē hamaxpēr o ixiht̄yx o ri mē hkôt ixpa. Kê mē akapēr ma nē Kris kôt amnhī xunhw̄ȳr t̄yx nē. Nē hkôt amnhī nh̄pêx mex o ri pa. Anē.

¹³Nē kêr ka mē nhām mē kapēr ò ho Tīrtūm mā amnhī jarēnh xw̄ȳnhjaja amnhī to Tīrtūm Karō w̄y nē kām: —Ixte mē kapēr ò ho ixkapēr tā ixte amnhī mar kêt. Jakamā kwa tanhmā ixto ijamaxpēr mex to pa amnhī mar mex nē ixkapēr kām ixprī hā Kris kôt ixkw̄ȳjê mā ja jarē kê mē inhmar t̄yx nē. Anē.

¹⁴Nom kot paj nhām mē kapēr ò ho Tīrtūm mā mex ã harēnh tā amnhī mar kêt nē. Te ixpimt̄ir kām ixkarō pix kapēr pyrāk. No kot paj pam amnhī krā hkôt ixkapēr o kām mex ã harē hāmri nē ra amnhī mar mex nē.

¹⁵Nà ja na inhmā mex jakamā kot paj nhām mē kapēr ò ho Tīrtūm mā mex ã harē nē kām gre. Nē mǎānēn ijamaxpēr xà hkôt ixkapēr o mǎānēn kām mex ã harē nē kām gre. Nà ja na inhmā mex.

¹⁶Nom kot puj mē ma mē kot Tīrtūm kapēr mar xà hā ixkre hw̄ȳr mra nē kamā Tīrtūm mā mex ã harē. Tā pa nhām mē kapēr ò ho kām ixkapēr japêr. Ka mē ate inhmar o akrī xw̄ȳnhjaja tee ri inhma. Jakamā tee ri inhma nē ixkôt Tīrtūm mā akapēr kêt nē. R̄y kām: —Nà ãm hāmri na ã amex ã ajarēnh anē Tīrtūm. Anh̄ȳr o kām akapēr kêt nē. Mē ate inhmaare hā kot ka mē ã kām akapēr anē. Jakamā kot paj ri mē akamā mē kapēr ò ho ixkapēr kêt nē. ãm mē akapēr pix o mē anom Tīrtūm mā mex ã harē.

¹⁷Kot paj mē kapēr ò ho Tīrtūm mā mex o mex ã harēnh mex tā ka mē mēmo mē kapērja aprī hā mar kêt jakamā inhmar pē Tīrtūm kôt amnhī xunhw̄ȳr t̄yx kêt nē.

18Na pa hte tōhã mẽ arom nhãm mẽ kapêr õ ho Tĩrtũm mã amnhĩ jarẽ. Nom nhỹri ahte nhỹ nẽ ã kãm amnhĩ jarẽnh anẽ. ãm hãmri na pre Tĩrtũm ja kaxyw tanhmã ixto pa hte ã amnhĩ nhĩpêx anhỹr o ri ixpa.

19Tã na pu htem Tĩrtũm mã mex o mex ã harẽnh kaxyw nẽ ma mẽ kot kãm amnhĩ jarẽnh xà hã ixkreta wỳr axpẽn wỳr mra pa mẽ pikuprõnh xwỳnhjê kapêr o mẽ kãm ixkapêr. Nom kot paj nhãm mẽ kapêr õ ho mẽ kãm ixkapêr ry rax kumrêx tã no nhũm mẽ inhmar kêt nẽ. Nom kot paj mẽ kapêr o ãm ixkapêr krãnre htã no nhũm mẽ inhmar mex kurê kumrêx. Ja na inhmã mex.

20Kwa mẽ ixkapêr ma nẽ mar tỳx nẽ. Nẽ mẽhprĩrejê jamaxpêr o ajamaxpêr kêt nẽ. ãm Kris kôt mẽ àptàr tũmjê jamaxpêr o mãn kêt mẽ ajamaxpêr o ri apa. ãm mẽmoj pixire hkôt kot kaj mẽ ãm hãmri te mẽhprĩjê jamaxpêr pyrak o ajamaxpêr. Mẽhprĩjaja na htem mẽmoj punuj kukamã hamaxpêr kêt nẽ. Na htem ãm htỳx pa. Tã kêt ka mẽ urak nẽ mẽmoj punuj kukamã ajamaxpêr o ri apa hkêt nẽ.

21Amnepêm na pre Tĩrtũm tanhmã Ijaewjê mã kapêr to. Mẽ kapêr o mẽ kãm kapêr tã no nhũm mẽ kuma nẽ ãm kuma. Jakamã nhũm tee ri ja hã mẽ omu nẽ amnhĩ tã tanhmã mẽ harẽnh to. Tanhmã mẽ harẽnh toja Tĩrtũm kapêr ã kagà htũm kamã na. Kot mẽ harẽnh kot: E kot paj ma mẽ hwỳr axtem pika hõ rũm pôristi hkwy rê kê mẽ ma mẽ hwỳr mra nẽ mẽ unê. Hãmri nẽ amnhĩ kapêr o mẽ kãm kapêr nhũm mẽ tee ri mẽ kuma no ãm hkôt mẽmoj pumunh kêt nẽ. Kojã mẽ ã mẽ hipêx anhỹr tã nhũm mẽ arĩ kãm ixkapêr mar nẽ amnhĩ kaxyw ixkôt hamaxpêr prãm kêt nẽ. Anẽ. Tĩrtũm kapêr ã kagà htũm kot ã mẽ harẽnh kot anhỹr.

22Jakamã kot kaj mẽ Tĩrtũm mã amnhĩ jarẽnh xà hã ixkre hwỳr akuprõ nẽ mẽ kapêr õ ho Tĩrtũm mã amnhĩ jarẽnh japêr. Nhũm Kris kôt amnhĩ xunhwỳr kêt xwỳnhjaja mẽ akôt agjê nẽ hkrĩ nẽ tee ri mẽ akapêr ma nẽ Kris kôt amnhĩ xunhwỳr kêt nẽ. Tanhmã kot mẽ amnhĩ to nẽ hkôt amnhĩ xunhwỳ? Mẽ kot akapêrta maare hã. No kot ka mẽ akapêr o Tĩrtũm nhỹ hã mẽ kãm akapêr nhũm mẽhprĩ hã amar mex nẽ. Jao tanhmã hamaxpêr to nẽ mẽ apyrà nẽ Kris kôt amnhĩ xunhwỳr japêr.

²³Nom kot ka mẽ apiitã nhãm mẽ kapêr õ ho Tĩrtũm mã mex ã harẽ nhũm amarĩ ri mẽ pa xwỳnhjaja mẽ awỳr agjê nẽ mẽ akapêr ã mẽ ama nẽ hã mẽ apumu. Hãmri nẽ tee ri hamaxpêr nẽ mẽ akrã pipãnh ã axpẽn mã mẽ ajarẽ.

²⁴Nom koja mẽ awỳr agjê ka mẽ akatàt kôt mẽ amnhĩ kapêr o Tĩrtũm kapêr jarẽnh o akuhê nhũm mẽhprĩ hã mẽ amar mex nẽ. Hãmri nẽ amnhĩ kapêr o akapêr ma nẽ hamaxpêr o: —Hêxta waa nẽ. Xep ixte amnhĩ tomnuj xwỳnh na pa. Nà ãm hãmri na mẽ Tĩrtũm kapêr jarẽ. Nà ãm hãmri na kêt ja. Anẽ.

²⁵Hãmri nẽ mẽ amã tanhmã kot amnhĩ tomnuj to hã amnhĩ jarẽnh pa hãmri nẽ hkaga nẽ Jesus kôt amnhĩ xunhwỳ. Nẽ hkõnkrã ho htẽm nẽ hkrĩ nẽ Tĩrtũm mã mex o mex ã harẽ. Hãmri nẽ mẽ amã: —Nà ãm hãmri na hte Tĩrtũm mẽ akamã pa ho pa. Anẽ.

Tĩrtũm nhõrkwỹ kamã mẽ pahte tanhmã amnhĩ nhĩpêx to hã mẽ pamã karõ

Atre 2.42; 5.12-13; Eprêw 10.25

²⁶E Jesus kôt ixkwỳjaja. Kot paj hpãnhã axtem mẽ amã mẽmoj tã karõ. Mẽ kot Tĩrtũm mã amnhĩ jarẽnh xà hã ixkre kamã tanhmã mẽ ate amnhĩ nhĩpêx to hã karõ ka mẽ inhma. Nà kêt ka mẽ axpẽn wỳr akuprõ nẽ akrĩ ka mẽ atõ amã Tĩrtũm mã mex ã harẽnh ã mẽ grer o agrer prãm hãmri nẽ mãmri kãm ho gre. Hãmri nẽ agrer pa kê apãnhã mẽhõ kànhmã xa nẽ Tĩrtũm kapêr kwỳ ho mẽ ajahkre. Nẽ ho anhỳr pa nhũm hpãnhã mẽhõ kànhmã xa nẽ Tĩrtũm kot tanhmã ho mex to hã mẽ amã amnhĩ jarẽ. Nẽ amnhĩ jarẽnh pa hãmri nhũm mẽhõ nhãm mẽ kapêr õ ho mẽ amã ujarẽnh japêr. Hãmri nẽ ujarẽnh pa kê mẽhõ hpãnhã mẽ akapêr o hprĩ hã mẽ amã kapêrta jarẽ. E kêt ka mẽ axpẽn wỳr akuprõ nẽ Kris kôt axpẽn to axihtỳx kaxyw ã axpẽn pãnhã amnhĩ nhĩpêx anẽ.

²⁷Nẽ ka mẽ atõ amã nhãm mẽ kapêr õ ho mẽ kãm akapêr prãm japêr. Nom kêt ka mẽ axohtõ nẽ ã mẽ kãm amnhĩ nhĩpêx anhỳr kêt nẽ. ãm mẽ atõ wa axkrutre rỳ axkrunêpxire nẽ mẽ kapêr õ ho mẽ kãm akapêr. Hãmri nẽ axpẽn pãnhã akapêr pa kê mẽhõ kot hprĩ hã mẽ kapêr õta mar japêr nẽ mẽ apãnhã xa nẽ mẽ akapêr o mẽ kãm harẽ kê mẽhprĩ hã mar mex nẽ.

²⁸Nom koja ja kaxyw mēhō amrakati japêr ka mē kapêr ò ho akapêr kêt nē. ãm kapxipix nhÿri ahte Tirtûm mã akapêr.

²⁹Nē kê Tirtûm nhÿ hã kapêr jarēnh xwÿnhjê hō wa axkrut rÿ axkrunēpxi nē mē ajahkre ka mē aprĩ hã mar o akrĩ. Hãmri nē mar pa nē tanhmã mē harēnh to. ãm hãmri Tirtûm nhÿ hã kapêr ã mē harē rÿ ho hêx ã mē harē.

³⁰Nē koja mēhō Tirtûm nhÿ hã mēmoj jarēnh o xa. Rôm nhûm Tirtûm mē kaxyw mē atō mã ajamaxpêr kwÿ gō. Ka kapêr o ãm xwÿnhhta mã kànhmã anhĩkra pē kê apumu nē anhĩkrê. Hãmri ka hpãnhã xa nē mē kãm tanhmã ajamaxpêr tota jarē.

³¹Nom kêr ka mē anhĩpê mē kãm akapêr hkêt nē. ãm axpên pãnhã Tirtûm kapêr o axpên jahkre nē ho axpên jamaxpêr o axihtÿx. Ja mex.

³²⁻³⁴Nom kêr ka mē axpên wÿr akuprō nē apiitã anhĩpê atÿx ri akapêr kêt nē. Ja na Tirtûm kêp hprãm nōkati. Mē ate axpên pãnhã axpên mã akapêrja na kãm hprãm. Jakamã kê mē kot Tirtûm nhÿ hã mē kapêr jarēnh o pa xwÿnhjaja taxy axpên jahkre hã axpên jamã. Nhûm mēhō kumrêx kapêr pa hãmri ka hpãnhã mē kãm akapêr. Nē kê mēnijaja amarĩ mē ahkreja mar o hkrĩ. Ijaew kot amnhĩ nhĩpêx xà hkôt. Jakamã kwa mē anijaja. Kêr ka mē amarĩ akryk mē mar o akrĩ nē axpên mã akapêr o akrĩ hkêt nē.

³⁵No kot kaj mē tee ri mēmoj ma nē mar mex kêt japêr tã hã axpên kukjêr kêt nē. ãm akryk arĩ mar o akrĩ. Hãmri nē akupÿm anhōrkwÿ hwÿr tē nē rĩ kormã hã amjên kukja. Nom kot ka mē apikuprōnh xà hã ixkre kamã axpên mã akapêr o akrĩ nhûm mē amjênjaja tee ri ja hã mē apumu nē hpijaàm nē.

³⁶E na pa ã Tirtûm mã amnhĩ jarēnh xà hã ixkre kamã tanhmã mē pahte amnhĩ nhĩpêx to hã mē amã karō anē. Tã te mē apê ja mex kêt pyræk. Kwa mon ka wem ja ma nhûm mē apê omnuj nē? Xà mē ate Tirtûm kapêr mar mex o ijakrenh kôt na ka mē ã ajamaxpêr anē? Xà na pre Tirtûm mē akumrêx mã kapêr? Hã na ka mē ã ajamaxpêr anē? Rÿ xà mē kapxipix mã na pre kapêr? Hã na ka mē ixkapêr ma nhûm mē apê omnuj nē? Nà ixkumrêx na

pa pre mẽ awỳr inhmõr nẽ mẽ amã Tĩrtũm kapěr jarẽnh kẽnã kot ka kêt mẽ axtem nẽ ã ajamaxpěr anẽ.

³⁷Kot kaj mẽ atõ ã ajamaxpěr anhỹr japêr nẽ ajamaxpěr o: —Nà na pre Tĩrtũm tanhmã inhmã kapěr to pa ô ri mẽ kãm ixujarẽnh mex o ri ixpa. Anhỹr o ajamaxpěr. Rỳ ajamaxpěr o: —Nà na pre Tĩrtũm Karõ mẽ kaxyw tanhmã ixto pa ỹ hã tanhmã mẽ ho mex to ho ri ixpa. Anhỹr o ajamaxpěr. Kot kaj mẽ ã ajamaxpěr anẽ hãmri nẽ mããnẽn pa ã ixte amnhĩ nhĩpêx anhỹr ã ixpumunh mex kurê kumrêx. Amnhĩ pyrà nẽ ixte Tĩrtũm nhỹ hã mẽ kãm ixkapěr xwỳnh ã ixpumunh nẽ hã ijarẽnh kurê kumrêx.

³⁸Nom koja ja hã ijarẽnh kêt ka mẽ ja hã omu hãmri nẽ tanhmã kot mẽ amã kapěr toja ma nẽ ãm ama.

³⁹E Kris kôt ixtõ nẽ ixtõxjaja. Kêr ka mẽ amnhĩ to Tĩrtũm Karõ wỳ kê ma mẽ ate mẽ kãm Tĩrtũm kapěr jarẽnh o ri apa kaxyw mẽ ato mẽ axihtỳx. Nẽ koja mẽhõ kãm nhãm mẽ kapěr õ ho kapěr prãm ka mẽ ja nê kãm akapěr kêt nẽ. Kwãr mãmrĩ ã amnhĩ nhĩpêx anẽ.

⁴⁰Nom kêr ka mẽ ate Tĩrtũm mã amnhĩ jarẽnh xà hã ixkre kamã axpẽn pãnhã axpẽn mã akapěr nom anhĩpê kãm akapěr hkêt nẽ.

Wam Korĩt 15

Kris akupỳm htĩr kumrêx ã harẽnh

Atre 2.23-36; 10.39-41; Wam Korĩt 6.14

¹E Kris kôt ixkwỳjaja. Kot paj axte mẽ amã Jejus kot mẽ panê tanhmã amnhĩ nhĩpêx to hã harẽ ka mẽ inhma. Na pa pre ra mẽ amã ja jarẽ ka mẽ ama nẽ hkôt amnhĩ xunhwỳ. Nẽ hkôt amnhĩ nhĩpêx mex o ri apa.

²Na pa pre mẽ amã harẽ ka mẽ amnhĩ kaxyw kãm ajamaxpěr tỳx nẽ nhũm Tĩrtũm mẽ ato hkra. Tã ka htem arĩ kapěr kôt amnhĩ nhĩpêx mex o ri apa. Koja mẽhõ kot Tĩrtũm kapěr mar tã amnhĩ kaxyw hkôt hamaxpěr kêt nẽ nhũm Tĩrtũm tee ri amnhĩ tã omu nẽ ho hkra hkêt nẽ.

³Na pa pre amnhĩ krã hkôt mẽ amã tanhmã Kris jarẽnh to hkêt nẽ. Ixte kapěr mar xà hkôt na pa hte amnhĩ xõ ri mẽ amã tanhmã harẽnh to ho ri ixpa.

Jejus jarēnhja na mex o kot mẽ ujarēnh piitã hakrenh par kumrēx. Tã tãm kot paj mẽ amã harē. Na pre Krisja mẽ pahte amnhĩ tomnuj pãnhã amnhĩrer kaxyw mẽ panê ty. Tĩrtũm kapēr ã kagà htũm kot hkukamã harēnh xà hkôt.

⁴Hãmri nhũm mẽ kēn kre kamã haxà nhũm kamã nōr o apkati. Nē axte hã apkati. Hãmri nhũm Tĩrtũm akupỹm ho htĩr. Kapēr ã kagà htũm kot hkukamã harēnh xà hkôt.

⁵Tã nhũm Simãw Pêtre kumrēx akupỹm htĩr ã omu nhũm hpãnhã Jejus nhỹ hã mẽ ahkre ho mẽ pa xwỹnh maatiijaja haxwỳja omu.

⁶Hãmri nhũm mẽ kot hkôt mẽ pa xwỹnh pē 500 jakrenh xwỹnh piitã anhĩpê haxwỳja akupỹm htĩr kãm omu. Na pre ra mẽ hkwyjaja ty nhũm mẽ hkwyjaja arĩ htĩr nē pa.

⁷Jakamã nhũm prem ra akupỹm htĩr kãm omu. Hãmri nhũm hpãnhã Xiakreja omu. Nhũm hpãnhã y hã mẽ ahkre o mẽ pa xwỹnh piitã omu. Akupỹm htĩr kãm omu.

⁸Tã pa na pa pre ijaxwỳja amnhĩ to hapu nē akupỹm htĩr kãm omu. Te ixpê mẽ hkra kot hapu pyrà nē amnhĩ to hapu nē omu. Na pre kaxkwa kamã inhmã kapēr o xa pa ixprĩ hã omu.

⁹No mẽ kot ixpyrà nē Kris nhỹ hã mẽ ahkre ho mẽ pa xwỹnh maati hkwyjaja na mẽ mex o kot ijakrenh. Na pa pre hte mẽ hkĩnhã amnhĩ tomnuj tỳx nē. Jao Kris pē hkrajê homnuj tỳx o ri ixpa. Tã hkôt amnhĩ xãm hãmri nē tee ri ã amnhĩ nhĩpêx anhỹr ã amnhĩ pumu nē amnhĩ kamã ixpijaàm tỳx nē. Jakamã na pa hte Kris nhỹ hã kapēr jarēnh o ixpa hã amnhĩ pumu nē ixte hkôt amnhĩ xãm kêt ri tanhmã ixte amnhĩ nhĩpêx toja mã ijamaxpēr nē ixpijaàm nē.

¹⁰Na pa pre amnhĩ tomnuj tỳx o ixpa htã nhũm Tĩrtũm arĩ kãm ijapê nē. Nē ixkamã ukaprĩ nē. Pa pre hkôt amnhĩ xãm nhũm ixto hkra pa ra kãm tanhmã amnhĩ nhĩpêx to mex rãhã ho ixpa. Jakamã na hte tee ri amnhĩ tã ixpumu nē tanhmã hamaxpēr to hkêt nē. Rỳ hamaxpēr o: —Hêxta waa nē. Inhmã Pawre japê nē ixte ho mex tã nhũm ixkôt amnhĩ nhĩpêx kêt kumrēx. Anhỹr

o tee ri hamaxpër kêt nê. Na pa hte kãm tanhmã amnhĩ nhĩpêx to ho ixpa rĩnh o ÿ hã mẽ kapër o pa xwỳnh kwỳjê jakre ho ixpa. Nom amnhĩ krã hkôt mẽ ahkre hkêt nê. Ja kaxyw na pre Tĩrtũmja ixto ixihtỳx pa ÿ hã kãm tanhmã amnhĩ nhĩpêx to ho ri ixpa nhũm ja hã ixpumu nê hkĩnh nê.

11Nê Jejus jarẽnhja ãm pixii. Axtem hõ hkêt. Nê ÿ hã mẽ ahkre ho mẽ pa xwỳnhjê kapërja nê pa ixte mẽ amã harẽnhja kot axpẽn pyræk. Harẽnh tipxi. Kris kot mẽ pahte amnhĩ tomnuj mỳrapê mẽ panê htyk nhũm Tĩrtũm kot akupỹm ho htĩr ã wa harẽnhja na pa hte pix jarẽnh o ri mẽ akôt ixpa. Ka prem inhma nê amnhĩ kaxyw hkôt ajamaxpër tỳx nê.

Tĩrtũm kot akupỹm mẽ pahto mẽ pahĩr ã harẽnh

Rukre 20.37

12Nê kwa ra ixte mẽ amã Kris htyk nê akupỹm htĩr ã harẽnh tã ka xep mẽ akwỳjaja axtem nê mẽ htyk nê akupỹm mẽ htĩr kêt ã mẽ hkamnhĩx o ri apa.

13Kwa mẽ ajamaxpërja mex kêt. Kêp apu ãm hãmri mẽ ate ã mẽ harẽnh anhỹr ronhỹx pre Kris haxwỳja akupỹm htĩr kêt nê. Nhỹx pre htyk o ty.

14Nê kêp apu Kris akupỹm htĩr kêt ronhỹx pa mẽ ãm mẽ amã kapër jarẽnh o ixpa kaprỳ. Ka mẽ ajaxwỳja amnhĩ kaxyw hkôt ajamaxpër kaprỳ.

15Nê kêp ãm akupỹm mẽ htĩr kêt ronhỹx pa mẽ ixte mẽ amã Tĩrtũm kapër jarẽnh o ri ixpa xwỳnhjaja mẽ amã ho ixêx o ri ixpa. Na pa htem mẽ amã Tĩrtũm ra kot akupỹm Jejus o htĩr ã harẽnh o mẽ akôt ixpa. Tã kêp apu akupỹm mẽ htĩr kêt ronhỹx pa mẽ ãm mẽ amã harẽnh o ixêx.

16Nê kêp apu akupỹm mẽ htĩr kêt ronhỹx pre Kris haxwỳja akupỹm htĩr kêt nê. Nhỹx pre ãm amarĩ tyn hapêx.

17Nê Kris amarĩ htyk nê hapêx ronhỹx kot pu mẽ ri amnhĩ kaxyw hkôt pajamaxpër nê hkôt amnhĩ xunhwỳr kaprỳ. Nê Kris amarĩ htyk nê hapêx ronhỹx pre Tĩrtũm Jejus kukwak ri mẽ panê mẽ pahte amnhĩ tomnuj o hapêx kêt nê. Nhỹx pu mẽ pahpiitã nhỹrmã ma kuwy hwỳr pajapêx pa.

18Ně kêp apu Kris htyk ně hapêx ronhỹx ra mẽ kot amnhĩ kaxyw hkôt hamaxpêr tã ra htyk xwỳnhjaja ma mẽ kot amnhĩ tomnuj mỳrapê kuwyta wỳr hapêx.

19Ně kêp apu Kris htyk kumrêx ně hapêx ronhỹx pu mẽ kormã pahtyk kêt xwỳnhjaja tee ri amnhĩ wỳr kamã pajamak o ri papa kaprỳ. Ně pahpê hkra hã amnhĩ jarênh kaprỳ. Jao pahkaprĩ htỳx o mẽmoj piitã hakrenh par kumrêx ně ri papa.

Kris kumrêx akupỹm htĩr ã harênh

Atre 26.23; Sikũn Korĩt 4.14; Piripos 3.10-11; Wam Tesarõn 4.15-18; Apokarip 20.1-15

20Nà mẽ htyk ně nhỹrmã akupỹm mẽ htĩr kêt ã mẽ harênhja kot anhỹr kêt. Ra Tĩrtũm kot akupỹm Kris o htĩr jakamã koja mããnên hkra htyk xwỳnhjaja nhũm mẽ piitã Jejus pyrã ně nhỹrmã akupỹm mẽ ho htĩr pa. Jakamã na pu htem Kris akupỹm htĩrja mã pajamaxpêr ně amnhĩ kukamã pajamaxpêr o: —Nà ra Tĩrtũm kot akupỹm Jejus o htĩr jakamã koja uràk ně nhỹrmã akupỹm mẽ pahte hkôt amnhĩ xunhwỳr xwỳnh piitã mẽ pahto mẽ pahtĩr. Nà koja ã mẽ panhĩpêx aně. Ja kaxyw àhpumunh tỳx kumrêx xwỳnh kênã. Aně.

21Ně amnepêm na pre Tĩrtũm my kot waja nhĩpêx. Hãmri nhũm kot tanhmã amnhĩ tomnuj to ho ra mẽ htykja o hkrax. Tã nhũm wamta kôt my hõta wamta rom amnhĩ to mex o mẽ htyk tã akupỹm mẽ ho htĩr o hkrax.

22-23Tã mẽ pahpê wam my pê Atãw kanrêhã tàmnhwỳ jakamã kot puj mẽ uràk ně nhỹrmã ty. No ãm mããnên mẽ pahpê Kris kraa. Kris kumrêx na pre akupỹm htĩr. Tã koja nhỹrmã akupỹn mẽ pahwỳr wrỳ hãmri nhũm Tĩrtũmja kot hipêx pyrã ně akupỹm mẽ pahto mẽ pahtĩr. Mẽ pahte hkôt amnhĩ xunhwỳr ã mẽ pahpumunh kôt akupỹm mẽ pahto mẽ pahtĩr pa. No ãm kormã.

Kris nhỹrmã kot mẽ htyk o hapêx ã harênh

Juãw 11.25; Rõmãn 6.23; Wam Korĩt 15.54; Sikũn Ximotre 1.10; Eprêw 2.14; Apokarip 20.14

24-28Ně koja Kris arĩ mẽ ho amnhĩptàr rãhã nhũm Tĩrtũm mẽ kot kutã amnhĩ xunhwỳr xwỳnhjê pê mẽ hihtỳx xà ho hapêx pa. Kapêr ã kagà htũm kot ja jarênh kot: Koja nhỹrmã Tĩrtũm Kris kot kãm mẽ ho amnhĩptàr kaxyw ãm.

Anē. Jakamã Jejus tapxipix koja mẽ ho amnhĩptàr o pa. Koja Tĩrtũm pix mẽ ho amnhĩptàr kêt nẽ. Nom koja pahi hkwỳjê hõ axte nhãm mẽ ho amnhĩptàr kêt kumrẽx. Tã mẽ kot mẽkarõmnuti hkõt kãm tanhmã amnhĩ to ho mẽ pa xwỳnhjaja koja Tĩrtũm ma amnhĩ nẽ kuwy hwỳr mẽ rẽnh pa. Nẽ mẽhtykja o hapêx nhũm mẽhõ axte htyk kêt kumrẽx. Jakamã koja Jejus Kris mẽmoj punuj piitã ho hapêx nẽ Mẽpahpãm Tĩrtũm nhĩhkram akupỹm mẽmoj piitã haxàr pa. Tĩrtũm jamaxpẽr xà hkõt ã mẽmoj to anhỹr par anẽ hãmri nẽ ìhkram mẽmoj jaxàr pa. Nẽ mããnẽn tãm kãm amnhĩ gõ. Jakamã nhũm Tĩrtũm tapxipix mẽmoj piitã ho amnhĩptàr pa.

Mẽ htyk xwỳnhjê jarẽnh

²⁹Nẽ na hte mẽ pahkwỳjaja kormã kệp Tĩrtũm kra hkõt tã Jejus kõt mẽ kot amnhĩ xunhwỳr nẽ mẽ htyk xwỳnhjê mã hamaxpẽr o pa. Hãmri nẽ mẽ kãm nhỹrmã axte mẽ omunh prãm xàj mẽ uràk nẽ Jejus kõt amnhĩ xunhwỳ nhũm mẽ hkrã kumrã. Tã akupỹm mẽ htĩr kêt ronhỹx mẽ ãm ã pajamaxpẽr anhỹr kaprỳ.

³⁰Nẽ paa. Na pa hte ma mẽ kãm Tĩrtũm kapẽr jarẽnh o ri mẽ hkõt ixpa. Nhũm mẽ hkwỳjaja ja hã inhma nẽ ixkamã gryk nẽ ixtã amỳnê pa mẽ mỳrapê ixpunuj nẽ ri ixpa. No ãm amnhĩ to htỳx nẽ arĩ ri mẽ kãm Kris kapẽr jarẽnh o ri mẽ hkõt ixpa. Tã kệp ãm nhỹrmã akupỹm ixtĩr mã kêt ronhỹx pa tee ri ã amnhĩ nhĩpêx anhỹr o ri ixpa kaprỳ.

³¹Na htem apkati mẽ ixtã tanhmã àmnẽn to ho ri pa. ãm hãmri na pa mẽ amã ã mẽ harẽn anẽ. Nom na pa hte tee ri amnhĩ kukamã ijamaxpẽr o ri ixkaprĩ nẽ ixpa hkõt nẽ. Mẽ kot ixpĩr mã tã pa hte mẽ ate Pahihti Jejus Kris kõt amnhĩ nhĩpêx mex ã mẽ apumunh kõt ixkĩnh nẽ ri ixpa. Nhũm te ixkamã mẽmoj kêt pyràk pa hte ri ixpa.

³²Na pa hte jar Epes kamã mẽ oprê xwỳnhjê kutã amnhĩ to htỳx pẽ mẽ kãm Jejus kapẽr jarẽnh o ri mẽ hkõt ixpa nhũm mẽ kãm mar prãm kêt jakamã hã ixtomnuj tỳx nẽ. No nhỹrmã ixtyk nẽ akupỹm ixtĩr mã kêt ronhỹx pa mẽ kệp Kris kwỳ hkõt xwỳnhjê jamaxpẽr o ijamaxpẽr nẽ mẽ uràk nẽ ijamaxpẽr o: Ixte ixtyk ã arĩgro pumunh kêt jakamã kot paj mãmrĩ mẽmoj piitã hkur o

ri ixpa. Nē māmri mẽmoj piitã ho ixkõm o ri ixpa. Nē māmri mẽmoj piitã ri tanhmã ho ho ri ixpa. Ixtyk nē axte ixte ã amnhĩ nhĩpêx anhỹr o ixpare kaxyw ã. Anhỹr o nhỹx pa ijamaxpêr o ixpa. Kêp ãm Tĩrtũm kot akupỹm mẽ pahto mẽ pahĩr mã kêt ronhỹx pu mẽ ã mẽ kêp Kris kwỳ hkêt xwỳnhjê jamaxpêr anhỹrja kôt pajamaxpêr pix o ri papa. No ãm ja kot anhỹr kêt.

³³Na htem mẽmoj jarênh o: —Mẽ kot htỳx ri amnhĩ tomnuj xwỳnhjê hkôt ri mẽ pa xwỳnhjaja koja mẽ gaa nē mẽ kot amnhĩ nhĩpêx kôt amnhĩ nhĩpêx o ri pa. Anẽ. ãm hãmri na ã mẽ harênh anhỹrja. Jakamã kwa mẽ okora. Kêr ka mẽ ã amnhĩ nê mẽ kot amnhĩ nhĩpêx anhỹr o mẽ pa xwỳnhjê pumunh mex o ri apa.

³⁴Kwa mẽ tokyx mẽ ate tanhmã amnhĩ tomnuj to hã amnhĩ pumu nē axte ã amnhĩ nhĩpêx anhỹr kêt nē. Nē mẽ ate Tĩrtũm kot akupỹm mẽ ho htĩr kêt ã harênh xwỳnhjaja. Te mẽ ate Tĩrtũm kot amnhĩ nhĩpêx ã omunh kêt pyræk. Tã mẽ ate tokyx ja hã amnhĩ pumunh nē amnhĩ kamã apijaàm kaxyw na pa ã mẽ amã ixkapêr anẽ.

Mẽ panhĩ nyw jarênh

Rukre 20.34-36; Rõmãn 8.10-11; Sikũn Korĩt 5.1; Piripos 3.20-21

³⁵Nē mãn ka mẽ atõ akupỹm mẽ htĩr ã mẽ harênh ma nē tee ri mẽ hkukamã ajamaxpêr nē hã ri tanhmã axpên kukjêr to nē axpên mã: —Kwa tanhmã koja we Tĩrtũm akupỹm hkra htyk xwỳnhjê ho htĩr to? Ra mẽ htyk nē mẽ ĩ katõk nē hapêx par mã kênã. Tanhmã kot wem amnhĩ to nē akupỹm htĩr? Nē tanhmã koja we mẽ ĩ nywja kute wehe? Anẽ.

³⁶Nà na ka mẽ atỳx ri ã ajamaxpêr anẽ nē tee ri mẽ hkukamã ajamaxpêr. E kot paj ixprĩ hã ja hã ejêp jarê ka mẽ inhma. Nà na htem mẽmo y hkre. Te mẽ kot mẽ htyk jaxàr pyræk o hipêx nē hkre nhũm hikwỹ nē gaa nē higrõt hapôj. Nom te kêp mẽmo yta pyræk kêt.

³⁷ãm hy pix na htem hkre. No higrõt kre hkêt nē. Rỳ tanhmãn pàr nywja kre hkêt nē. ãm hy pix na htem hkre. Tã nhũm higrõt hapôj nē hprêk nē gaa nē ô.

³⁸Tĩrtũm na hte hamaxpěr xà hkôt tanhmã ho nhũm higrôt hapôj nẽ hprêk nẽ ô. Tã ja pyrà nẽ kot puj mẽ Tĩrtũm jamaxpěr xà hkôt pahtyk tã koja akupỹm mẽ pahto mẽ pahtĩr nẽ mẽ pamã mẽ panhĩ nyw gõ.

³⁹Nẽ mẽmo hy piitã te kot axpẽn pyràk kêt. Ahpỹnhã na. Ja pyrà nẽ ahpỹnhã ri mẽmoj piitã ĩ. Na axtem mẽ panhĩ nẽ axtem mry nhĩ nẽ axtem àk nhĩ nẽ axtem tep nhĩ. Mẽmoj piitã ahpỹnhã ri ĩ.

⁴⁰⁻⁴¹Nẽ kaxkwa kamã haxwỳja mẽmoj piitã ahpỹnhã no ãm muxre. Myytija mex. Nẽ mytwrỳreja axte mã no ãm haxwỳja mex. Nẽ kanhêti haxwỳja mex. Haxwỳja axte mã. Kamã hkwy hpôk kryre nẽ kamã hkwy hpôk rũnhti no ãm piitã mex. Nẽ jar pika ja kamã haxwỳja mẽmoj piitã mex. No ãm te kot kaxkwa kamã mẽmoj jarir xwỳnhja mex pyràk kêt. Axtem na raa.

⁴²Tã koja mẽ panhĩ nywja haxwỳja axte mã. Te kot panhĩ htũm pyràk kêt. Na htem ty nhũm mẽ ma mẽ o mra nẽ mẽ hagjê. Nhũm mẽ hikwỹ nẽ gaa nẽ ĩ rerek nẽ hapêx. Tã koja Tĩrtũm akupỹm tanhmã mẽ pahto mẽ pahtĩr to pu mẽ hpãnhã pamex kumrêx. Hãmri nẽ axte mã mẽ panhĩ nyw mex o mex jakamã koja axte htyk nẽ ĩ rerek kêt nẽ.

⁴³Na htem ty nhũm mẽ hagjê nhũm htyk xwỳnhhta tanhmã amnhĩ to hkêt nẽ amarĩ hikwỹ. Omnuy nẽ ĩ nhenhek nẽ hikwỹ. Tã koja Tĩrtũm akupỹm mẽ ho mẽ htĩr nẽ mẽ kãm mẽ ĩ nyw gõ nhũm mẽ hpãnhã mex kumrêx nẽ hihtỳx nẽ Tĩrtũm nhõ krĩ kamã pa ho pa.

⁴⁴Mẽ htyk nhũm mẽ kot mẽ hagjênh xwỳnhjaja na htem arĩ ĩ htũm ã hikwỹ. ãm jar pika ja pix kãm ri mẽ papa kaxyw na mẽ panhĩ htũmja. No mẽ panhĩ nywja axtem Tĩrtũm nhõ krĩ kamã ri mẽ papa kaxyw jakamã koja mẽ panhĩ nywja axte mã. Tĩrtũm Karõ koja mẽ pamã kugõ.

Mẽ panhĩ nyw te kot Kris nhĩ pyràk ã harênh

Rukre 20.34-36

⁴⁵⁻⁴⁶Nẽ Tĩrtũm kapêr ã kagà htũm kot Atãw jarênh kot: Na pre Tĩrtũm my kot wa Atãwja nhĩpêx. Jakamã Atãw kêp pika nhõ xwỳnh na pre. Anẽ. ã Atãw jarênh kot anhỹr. Ja pyrà nẽ na pu htem pakatorxà nhõhy rũm pajapôj nẽ Atãw pyrà nẽ pahpê pika nhõ xwỳnh. Tã nhũm Atãwja pa nẽ gaa nẽ

hpigêt nê ty. Jakamã kot puj mẽ uràk nê papa nê gaa nê ty. Nom nhũm Krisja Atãw kurom kêp akupỹm mẽ ho mẽ htĩr xwỳnh jakamã kot puj mẽ pahpê hkwỳjaja Atãw pyrà nê nhỹrmã mẽ pahtyk tã nhũm Kris akupỹm mẽ pahto mẽ pahtĩr. Hãmri nhũm Tĩrtũm Karõ mẽ pamã mẽ panhĩ nyw gõ pu mẽ axte pahtyk kêt nê. Pãnhã axte mã mẽ pahpê kaxkwa nhõ xwỳnh.

⁴⁷Nê Atãw na pre Tĩrtũm pika ho hipêx nê ho htĩr nhũm ri pa. Nom Kris na pre Atãw rom kaxkwa rũm mẽ pahwỳr wrỳ.

⁴⁸Tã mẽ pahpê pika nhõ xwỳnhjaja te mẽ pahpê Tĩrtũm kot wam my nhĩpêx xwỳnhhta pyràk. No mẽ pahte kaxkwa hwỳr ma papa mã xwỳnhjaja te mẽ pahte kaxkwa rũm my kot mẽ pahwỳr wrỳk xwỳnh Krista pyràk.

⁴⁹Tã kormã mẽ pahpê pika nhõ xwỳnh jakamã te mẽ pahpê my pika ho hipêx xwỳnhhta nhĩ pyràk. Nom kot puj mẽ nhỹrmã ty hãmri nê hpãnhã te pahpê kaxkwa rũm my kot mẽ pahwỳr wrỳk xwỳnhhta nhĩ pyràk.

Axte mẽ pahtyk kêt kumrêx ã mẽ pajarênh

Juãw 11.25; Sikũn Korĩt 5.4; Wam Tesarõn 4.13-18

⁵⁰Nê kot puj mẽ panhĩ htũm rãhã Tĩrtũm nhõ krĩ hwỳr paxàpir kêt nê. Panhĩ htũm na hte ty nê rerek nê hapêx. Jakamã koja Tĩrtũm Karõ mẽ pamã mẽ panhĩ nyw gõ pu mẽ rĩ kormã ma õ krĩ hwỳr pajapêx pa nê kamã papa ho papa.

⁵¹⁻⁵²E mẽ inhma. Na pre kormã Tĩrtũm mẽ amã mẽmoj to amnhĩrĩt kêt tã ra inhmã ho amnhĩrĩt. Jakamã kot paj ÿ hã mẽ amã harê ka mẽ inhma. Nà kot puj mẽ pahpiitã mẽ pahtyk kêt nê. Koja nhỹrmã Tĩrtũm kapêr o mẽ wrỳk xwỳnhjê hõja mẽ pamã pifti kakô. Mẽ pajaêr pê hkakô. Hãmri nhũm Tĩrtũm kra ra mẽ htyk nê mẽ hikwỹ xwỳnhjaja akupỹm ï nyw o htĩr kurê kumrêx. Nê kormã mẽ pahtyk kêt xwỳnhjaja kot pu mẽ mẽ pahtyk kêt ri mẽ uràk nê panhĩ nyw kurê kumrêx. Hãmri pu mẽ pahpiitã pahtĩr o pahtĩr tũm nê papa.

⁵³Koja Tĩrtũm mẽ panhĩpêx o te mẽ pahte paxê htũm o papinhĩpanh nê hpãnhã paxê nyw jagjênh pyràk. Jao mẽ panhĩ htũm o hapêx nê hpãnhã mẽ pamã mẽ panhĩ nyw gõ pu mẽ axte pahtyk kêt kumrêx nê ri papa ho papa.

⁵⁴Tĩrtũm kapẽr ã kagà htũm kot ja jarẽnh kot: Na ra Tĩrtũmja mẽhtyk ho hapêx pa. Anẽ. Te ra kot ho hapêx par pyràk o ã harẽnh kot anhỹr. No ãm kormã. Jakamã kot puj mẽ nhỹrmã panhĩ nyw nẽ ri papa nẽ mẽ pahtõ axte pahtyk kêt kumrẽx.

⁵⁵Mẽ pahtykja te mẽ kot makre par nhũm axte kot mẽ hkamnhwỳr kêtja pyràk. Urà nẽ koja Tĩrtũm akupỹm mẽ pahto mẽ pahtĩr pu mẽ axte pahtyk kêt nẽ. Nẽ axte ri pamã ma hkêt nẽ papa. Nẽ axte paxà hkêt nẽ.

⁵⁶Tĩrtũm kapẽr ã kagà htũmja ã mẽ pakukamã mẽ pajarẽnh kot anhỹr. Mẽ pahte amnhĩ tomnuj xwỳnh jakamã kot puj mẽ nhỹrmã ty.

⁵⁷Nom nhũm Tĩrtũm àhpumunh tỳx o àhpumunh tỳx jakamã na hte Pahihti Jejus Kris kukwak ri mẽ pahte hkôt amnhĩ xunhwỳr xwỳnhjê nẽ mẽ pahte amnhĩ tomnuj rênh pa. Pu mẽ nhỹrmã mẽ pahtyk tã nhũm akupỹm mẽ pahto pahtĩr.

Mẽ pahte Jejus mã tanhmã amnhĩ nhĩpêx mex to hã mẽ pamã karõ

Karatas 6.9; Korosẽ 1.10

⁵⁸Jakamã e kwa Jejus kôt ixkwỳjaja. Kêr ka mẽ arĩ Pahihti Jejus kôt mãn amnhĩ xunhwỳr tỳx rãhã ho ri apa. Nẽ kapẽr kôt pix mã ri amnhĩ nhĩpêx rãhã nẽ kãm tanhmã amnhĩ nhĩpêx mex to ho ri apa. Kot kaj mẽ ã amnhĩ nhĩpêx anẽ hãmri nẽ kãm tanhmã amnhĩ nhĩpêx to kaprỳ ho ri apa hkêt nẽ. ãm hãmri kãm mẽmoj to anhỹr mex rãhã ho ri apa.

Wam Korĩt 16

Mẽ kệp amrakati xwỳnhjê jarẽnh

Atre 11.27-30; Rõmãn 15.25-27; Sikũn Korĩt 8.1-24; 9.1-5; Wam Ximotre 6.18

¹Nẽ na pa pre krĩ pê Karatas kamã tanhmã Jerujarẽ kamã Kris kwỳjê jarẽnh to. Ijaew kwỳ kot mẽ pahpyrà nẽ Jejus kôt amnhĩ xunhwỳr ã mẽ harẽ nẽ mẽ kệp amrakati hã mẽ harẽ hãmri nẽ mẽ kãm: —E. Kwa kêr ka mẽ kãm mẽ akàxpore hkwỳ ho akuprõ nẽ ma mẽ hwỳr amẽ. Anhỹr o mẽ kãm ixkapẽr. Jakamã kwa kêr ka mẽ uràk nẽ mẽ kaxyw mẽ kãm kàxpore hkwỳ ho akuprõ.

²Mẽ panhõ arĩgromnu pê sap ã hkwỳ ho akuprõ. Kot kaj mẽ akàxpore rax japêr nẽ mẽ kaxyw hkwỳ ho rax nẽ axi. Nom kot kaj akàxpore grire japêr

ně mẽ kaxyw mẽ kãm ho grire ně agõ. Kêr pa mẽmo arĩgro hã ma mẽ awỳr mõ ka mẽ ra mẽ kaxyw ho apikuprõnh rax ně.

³Ně ma mẽ kot mẽ kãm ho mõi mã xwỳnhjaja ka mẽ ixkutêp mẽ akwỳjê rê. Kêr pa põi ně mẽ omu hãmri ně mẽ kaxyw kagà nhĩpêx ně kamã mẽ harẽ. Ně mẽ kãm kugõ nhũm mẽ ma Jerujarẽ hwỳr kàxpore mẽ ro hã amnhĩ kõt o mõi ně mẽ kãm kugõ. Mẽ kot kamã harẽnh ně mar hãmri ně mẽ kamjaja mẽ ate mẽ kaxyw mẽ rênh ã mẽ ajarẽnh ma.

⁴Rỳ kot ka mẽ amã mẽ hkõt inhmẽnh prãm ně mãmri mẽ hkõt inhmẽ pa ma mẽ hkõt mõi.

Pawre kot amnhĩ kukamã amnhĩ jarẽnh

Atre 19.21-22

⁵Nom kot paj tokyx mẽ awỳr inhmõi kêt ně. Kot paj ja rũm ixkato ně hpãnhã ma pika pê Masetõn wỳr mõi. Hãmri ně mẽ hkõt ixpa grire ně ma kormã mẽ awỳr Korĩt wỳr mõi.

⁶Hãmri ně põi ně mẽ akõt ri ixpa ryy ně. Ně ixtã amgrà pixi ně hapêx ně rĩ kormã ma axte nhãm krĩ hõ hwỳr mõi. Ně inhnojarêt ka mẽ ixto Tĩrtũm wỳr ně inhmã ixàpkur xà hkwỳ gõ pa ma mẽ hwỳr pry hã hkur o mõi.

⁷No ixte mẽ awỳr ixpõx ně tokyx mẽ akurũm ixkator ně hpãnhã ma nhãm krĩ hõ hwỳr inhmõi ja na inhmã hprãm kêt. Jakamã koja Tĩrtũm kãm ja mex pa arĩ ri mẽ akõt ri ixpa hã ixtã mytwrỳ xohtõ ně tokyx ma nhãm inhmõi kêt ně.

⁸Kot paj kormã jar Epes kamã ri ixpa rãhã nhũm mẽ hkĩnh pê Pêtekos kato ně hapêx pa rĩ kormã ma Masetõn wỳr mõi.

⁹Na pa hte jar kormã mẽ kãm Jejus kapêr jarẽnh o ri mẽ hkõt ixpa nhũm mẽ ohtõ ně inhmar o pa. Mẽ kãm mar prãm. Tã no nhũm mẽ hkwỳjaja ohtõ ně mẽ kêp ja omnuj ně nhũm mẽ hã ixkamã gryk ně ixtomnu o pa.

Mẽ kot Ximotre ho mex ã mẽ harẽnh

Hapuhã Juãw 5

¹⁰Ně kwa koja Ximotre mẽmo arĩgro hã mẽ awỳr pøj ka mẽ omu ně ho mex ně. Ně mẽ amnhĩ nhõrkwỹ hwỳr awỳ kē mẽ akutã apkur o pa. Na hte ixpyrà ně Pahihti Jejus mã tanhmã amnhĩ nhĩpêx to mex o pa.

¹¹Kormã mẽ pahkĩnhã nyw tã kêr ka mẽ tee ri ja hã omu ně ri axpẽn mã tanhmã harẽnh to hkêt ně. Mẽ ãm akapêr mex pix o kãm akapêr. Ně koja akupỹn nojarêt ka mẽ pry hã kãm apkur xà hkwỳ gō kē mex pē man akupỹn ixwỳr mō pa tokyx omu. Kot paj jar mẽ pahkwỳjê mẽ akupỹn hpôx kamã ijamak o ixpa.

¹²Ně na pa hte xatã jar mẽ pahtō Aporja ma mẽ awỳr mōr kaxyw mẽ awỳr hano. Kot jar mẽ pahtō hkwỳjê mẽ ma mẽ awỳr mōr kaxyw. Nom kormã. Koja xep mẽ jar tanhmã amnhĩ to hpa ně rĩ kormã ma mẽ awỳr mō.

Kagà jatur xà kamã Pawre kot mẽmoj tã karō

Epes 6.10-12; Sikũn Ximotre 1.7; Wam Pêtre 5.8-9

¹³E kwa kêr ka mẽ arĩ amnhĩ wỳr Jejus kamã ajamak rãhã ho ri apa. Ně hamãr pē kutêp tãm amnhĩ nhĩpêx o ri apa. Ně amnhĩ kaxyw hkôt ajamaxpêr tỳx rãhã ně.

¹⁴Ně mẽ amã axpẽn kĩnh pē tanhmã axpẽn to mex to.

¹⁵Mãn ka mẽ ra Estepti mẽ hkwỳjê jarẽnh ma. Mẽ hkumrêxjaja na prem pika pē Gres kamã Kris kôt amnhĩ xunhwỳ. Tã xep mẽ ra Kris kôt hkwỳjê ho mex o ri mẽ hkôt pa.

¹⁶Kêr ka mẽ ã mẽ kot amnhĩ nhĩpêx anhỹr xwỳnhjê kapêr ma ně hkôt ri amnhĩ nhĩpêx o ri apa. Mẽ kot Kris mã mẽ ajamãr xwỳnh piitã kêr ka mẽ kapêr ma ně mẽ hkôt ri amnhĩ nhĩpêx mex ně.

¹⁷Ně ota Estepti ně Akajkre ně Putunatrete na mẽ ra jar pøj. Pa mẽ Sostenes mẽ wa mẽ omu ně wa ixkĩnh ně. Te ixte mẽ apumunh ně ixkĩnh tỳxta pyrãk.

¹⁸Na xep prem ma mẽ awỳr mō ně tanhmã mẽ amã kapêr to ka prem mẽ ama ně akĩnh ně. Tã mẽ ra amnē ixwỳr mō ně tanhmã inhmã kapêr mex to pa mẽ kuma ně ijaxwỳja ixkĩnh ně. Kwa kêr pu mẽ ã mẽ kot mẽ panhĩpêx anhỹr xwỳnhjê ho mex o papa.

19-20Ně ota jar pika pê As kamã Kris kôt mẽ pahkwỳjaja piitã mẽ awỳr hpěr mẽ. Ně Akir mẽ hprõ Prisireja wa. Ně wa õrkwỳ kamã mẽ kot Tĩrtũm mã amnhĩ jarẽnh kaxyw mẽ pikuprõnh xwỳnh piitã mẽ awỳr hpěr mẽ. Ně kêr ka mẽ nhỹri axpẽn pumu nẽ mẽ apê Kris kôt mẽ ate axpẽn to atõ nẽ atõx ã axpẽn mã akapěr mex nẽ akĩnh nẽ.

21E kot paj kagà jatur xà kamã inhĩhkra ho mẽ amã amnhĩ nhĩxi nhĩpêx ka mẽ omu. Koja inhmã ixkapěr ã kagà xwỳnhhta ja hã kagà hkêt nẽ. Pa kot paj hipêx. Ixpê Pawre na pa ã amnhĩ nhĩxi nhĩpêx anẽ ka mẽ omu.

22Ně kwa kêr ka mẽ arĩ amã Pahihti Jejus kĩnh o ri apa. Koja mẽhõ kãm hkĩnh kêt hã koja Tĩrtũm ja hã homnuj tỳx kumrêx. E “maranat.” Mẽ pakapěr kãm na htem maranat jarẽnh o: “Kwa tokyx akupỳn mẽ ixwỳr wrỳ Pahihti.” Anẽ.

23E kê Pahihti Jejus Krisja mẽ ato mex nẽ mẽ akutã nojarêt rãhã ho pa.

24Ixpyrà nẽ mẽ apê Jejus Kris kwỳ jakamã na pa hte inhmã mẽ akĩnh nẽ. Tã ãm ja pix. Ixpê Pawre na pa ã mẽ awỳr kagà nhĩpêx nẽ mẽnh anẽ.

Sikũn Korĩt

Sikũn Korĩt 1

¹Pa Korĩt kãm Tĩrtũm krajaja. Xà mẽ apiitã mẽ amex na ka mẽ apa? E ot pa mẽ awỳr kagà nhĩpêx nẽ kumẽ. Mẽ amã nẽ mẽ anhõ pika pê Gres kamã Tĩrtũm krajê mẽ mẽ ato ixpimràatã mẽ awỳr hipêx nẽ kumẽ. Ixpê Pawre na pa hte Tĩrtũm jamaxpěr xà hkõt ma Jejus Kris nhỹ hã krĩ piitã hkõt hkrajê jahkre ho ri ixpa. Tã Kris kõt mẽ pahtõ Ximotre mẽ wa mẽ awỳr hipêx nẽ kumẽ.

²E kê Měpahpãm Tĩrtũm mẽ Pahihti Jejus Kris wa mẽ ato mex rãhã ho pa. Nẽ mẽmoj to mẽ akutã nojarêr rãhã ho pa. Ka mẽ wa kukwak ri ajamakêtkati nẽ amex nẽ ri akĩnh nẽ apa ho apa.

Pawre kãm amnhĩ xà htỳx kamã hamak pyma hkêt ã harẽnh

Rõmãn 1.11-12; Korosẽ 1.11; Sikũn Tesarõn 2.16

³⁻⁴Nà Tĩrtũm kệp mẽ panhõ Pahihti Jejus Kris nhĩpêxà na. Nẽ kệp Měpahpãm maati jakamã na hte mẽ pakamã ukapřĩ nẽ tanhmã mẽ pahto mex to ho pa. Kot puj mẽ mẽmoj tã tanhmã amnhĩ to nẽ pahkapřĩ nẽ ri papa nhũm ja hã mẽ pahpumu hãmri nẽ hamaxpěr pix o akupỳm mẽ pahto mẽ paxihtỳx. Mẽmo kaxyw na hte ã mẽ pahto mex anẽ? Nà mẽ pahte amnhĩ tã omunh nẽ amnhĩ pyræk mẽ hkapřĩ nẽ ri mẽ pa xwỳnhjê jamaxpěr o hihtỳx o mẽ hkõt papa kaxyw. Ja kaxyw na hte mẽ pajamaxpěr o hihtỳx. Jakamã kwa pu mẽ kãm mex o mex ã mãn harẽnh rãhã ho papa.

⁵Na htem tõhã ixto Kris nhĩpêx pyrà nẽ tanhmã ixto pa amnhĩ xà htỳx kamã ijamak o ri ixpa. Tã nhũm Tĩrtũm inhĩpêx o te Kris nhĩpêx pyrà nẽ hamaxpěr pix o tanhmã ixkrã hto pa mẽ kutã amnhĩ to htỳx nẽ arĩ mẽ hkõt ixpa.

⁶⁻⁷Na pa hte mẽ amã Kris kapěr jarẽnh o ixpa. Mẽ ate inhmar nẽ hkõt amnhĩ nhĩpêx kaxyw. Jakamã na hte mẽ kãm Tĩrtũm kapěr mar prãm kêt xwỳnhjaja tõhã mẽ atã ixtomnuj nẽ pa amnhĩ xà htỳx kamã ijamak o ri ixpa. Tã kwār mẽ mãmřĩ ã inhĩpêx anẽ. Mẽ ate Jejus kõt amnhĩ xunhwỳr tỳxja na inhmã hprãm. Na htem tanhmã Kris ã inhĩpêx to nhũm Tĩrtũm mẽ hã ixpumu nẽ tanhmã ixkrã hto pa inhmã amnhĩ xà htỳx kamã ijamak pyma

hkêt nê ixpa. Nê arĩ mē hkôt mē kām kapēr jarēnh rāhā ho ri ixpa. Na hte Tirtūm amarĩ ã inhīpêx anhÿr kêt nê. Mē ate ã kot inhīpêx anhÿr ã ixpumunh nê ixpyrà nê amnhĩ kaxyw kām ajamaxpēr tÿx kaxyw na hte ã inhīpêx anê. Mē ate ja hā ixpumunh nê ã ajamaxpēr anhÿr kaxyw nê mē ajamaxpēr o: — Nà kot pa nhÿrmā Pawre pyrà nê tōhā mē mÿrapê amnhĩ xà htÿx kamā ijamak o ixpa. Hāmri nhūm Tirtūm ja hā ixpumu nê te ho Pawre nhīpêx pyrà nê tanhmā ixto pa inhmā amnhĩ xà htÿx kamā ijamak puma hkêt nê ixpa. Nà koja ã inhīpêx anê. Anhÿr o mē ajamaxpēr kaxyw na hte Tirtūm mē kutā ixto ixihtÿx. Mē ate ja hā ixpumunh nê akupÿm tām ajamaxpēr pē Karō nhÿ hā amnhĩ to axihtÿx kaxyw. Jakamā na pa tee ri mē akukamā ijamaxpēr kêt nê.

Tirtūm kēp mē papytār xwÿnh ã harēnh

⁸E Kris kôt ixkwÿjaja. Kot paj ixprĩ hā mē amā tanhmā amnhĩ jarēnh to ka mē inhma. Na pa pre ma pika pē As wÿr mō nê mē kām Jejus kapēr jarēnh o ri mē hkôt ixpa. Hāmri nhūm mē hkwyjaja ja hā ixtomnuj tÿx nê pa amnhĩ xà htÿx kamā ijamak pē mē hkôt ixpa. Kironhÿx pa pre mē kamā ty.

⁹Na pa pre tee ri amnhĩ kukamā ijamaxpēr o: —Koja pēr mē ixpĩ. Tanhmā kot pa we amnhĩ to nê tokyx mē kēp amnhĩ pytà? Kot paj tee ri inhmā mē kēp amnhīptār prām. Tirtūm pix na ja kaxyw mē kutā àhpumunh tÿx. Rÿ nhūm mē kot ixpīr tã nhūm kot akupÿm ixto ixtīr kaxyw tapxipix na àhpumunh tÿx. Nà kot paj amnhĩ kaxyw tapxipix mē mǎn ijamaxpēr o ri ixpa nhūm amnhĩ tã ixpumu nê hkīnh nê. ã ixte amnhĩ nhīpêx anhÿr o ixpaja na kām hprām. Anê.

¹⁰Tã nhūm pre ã inhīpêx anê nê xatā mē kēp ixpytār o ixkôt pa. Koja ã mē kēp inhīpêx anhÿr rāhā ho pa. Nà ã kot inhīpêx anhÿr mē kēnā.

¹¹Nom kwa kêr ka mē apiitā arĩ ixto Tirtūm wÿr rāhā ho ri apa kê mē ama nê mē kām ixkurê xwÿnhjê kutā ixto ixihtÿx rāhā ho pa. Nê ixto mex rāhā nê. Hāmri nhūm mē ohtô nê kot mē kēp tanhmā ixpytār to hā ixtā omu nê ixtā kām mex o mex ã harē.

Pawre kot mē kām amnhĩ tã aprār ã harēnh

Wam Korīt 2.1-5

¹²Ně na xep pre atar Kris kôt mẽ pahkwỳjaja tanhmã ixto kapěr punuj to ně Jejus kot mẽ awỳr inhměnh kêt ã mẽ amã ixto hêx. Ně ijakwa nhĩkjê ho inhmã mẽ akĩnh ně ijakwa nhĩkjê ho mẽ ato ixkapěr punuj ã ijarěnh o ri pa. Nom ixte ã amnhĩ nhĩpêx anhỳr kêt. Aa ixte tanhmã mẽ ano kupyř to hkêt. ãm hãmri na pa mẽ amã amnhĩ jarě ně tãm mẽ amã ixkapěr o ri ixpa ně tãm ri mẽ anhĩpêx o ri ixpa. No ijamaxpěr tũm kôt tanhmã mẽ anhĩpêx to hkêt ně. ãm Tĩrtũm kot mẽmoj to mẽ pakutã nojarêt ã omunh xà hkôt pix mã na pa hte ỹ hã mẽ ato mex o ri ixpa. Ijamaxpěr nyw o. Na pa hte Tĩrtũm pyrã ně mẽ piitã mẽ ho mex ně. No mẽ kajaja ixpyřan mẽ apê hkra jakamã na pa hte mẽ ato mex kumrêx o ri ixpa.

¹³Na pa hte mẽ amã kagà hkwỳ nhĩpêx ně ixprĩ hã mẽ amã tanhmã mẽmoj jarěnh to. Mẽ ate kamã harěnh ně mar mex kurê kumrêx kaxyw. No na pa hte mẽ amã tanhmã ixêx to rỳ tanhmã mẽ ano kupyř to hkêt ně.

¹⁴ã ixte amnhĩ nhĩpêx anhỳr o ri ixpa htã kormã mẽ apiitã ja hã ixpumunh mex kêt ně. Ně Jejus kot mẽ awỳr inhměnh ã ixpumunh mex kêt ně. Jakamã na hte mẽ akwỳjaja ixto akapěr punuj o pa. Tã kot kaj mẽ nhỹrmã ãm hãmri Jejus kot mẽ awỳr inhměnh ã axpěň mã ijarě pa mẽ ama ně ixkĩnh ně. Hãmri nhũm nhỹrmã mẽ panhõ Pahihti Jejus mẽ pahwỳr akupỹn wrỳ pa kãm mẽ ajarě ně kãm: —E Pahihti. Jajê mã na pa pre akapěr jarěnh o ixpa nhũm mẽ inhma ně akôt amnhĩ xunhwỳr kurê kumrêx ně tãm amnhĩ nhĩpêx mex o pa. Anhỳr o kãm mẽ ajarě. Hãmri ně ã mẽ ate amnhĩ nhĩpêx anhỳr ã mẽ apumunh kôt ixkĩnh ně. Ka mẽ ajaxwỳja akĩnh pê tanhmã kãm ijarěnh to ho akuhê.

Pawre hêx kêt ã kot amnhĩ jarěnh

Wam Korĩt 16.5-6

¹⁵⁻¹⁶Ně na pa pre ra mẽ awỳr ixkrã. Ixte ma mẽ awỳr inhmõr nhũm mẽ ate ixpumunh ně akĩnh ã mẽ akamnhĩx ně mẽ awỳr ixkrã ně ijamaxpěr o: —Nã ma Masetõn wỳr inhmõr xwỳj ri kot paj ma Korĩt kumrêx wỳr mõ. Hãmri ně Kris kôt ixkwỳjê pumu ně rĩ kormã hamũ Masetõn wỳr mõ. Ně mẽ kamã ri ixpa tãmtã awjanã ně akupỹn Korĩt wỳr mõ ně axte mẽ omu. Jao Tĩrtũm kapěr o mẽ ahkre ho axkrut nhũm mẽ amnhĩ tã ixpumu ně hkĩnh ně. Hãmri

pa akupÿm Jutej wÿr inhnojarêt nhÿm mẽ pry hã ixàpkur xà hã inhmã mẽmoj kwÿ nhõr japêr. Anhÿr o ijamaxpêr.

¹⁷Tã kormã jar tanhmã amnhĩ nhĩpêx to ho ixpa ka xep mẽ tee ri amnhĩ wÿr ixkãm ama nẽ axpên mã ijarênh o: —Kwa Pawre kot ra mẽ pahwÿr nojarêt ã amnhĩ jarênh tã amnhĩm nojarêt kêt kumrêx. Mãn pre ãm mẽ pamã amnhĩ to hêx nà? Ra kot mẽ pamã amnhĩ jarênh tã tokyx hpôx kêtne hã. Anẽ.

¹⁸Kwa mẽ ri ã inhmã ajamaxpêr anhÿr kêt nẽ. Na pa pre mẽ amã ixêx kêt nẽ. Na pa hte Tĩrtũm noo mã ãm hãmri mẽmoj jarênh o ri ixpa nẽ mẽ amã mẽmoj jarênh o ixêx kêt nẽ. Nà ãm hãmri na pa pre ma mẽ awÿr inhmõr ã amnhĩ jarẽ.

¹⁹Na pa pre ra Ximotre mẽ Siras mẽ wa mẽ amã Jejus Kris jarênh o ri mẽ akõt ixpa. Jejus kêp Tĩrtũm Kra hã harẽ nẽ kot amnhĩ nhĩpêx te kot Tĩrtũm kot amnhĩ nhĩpêx pyræk ã harênh o ri ixpa. Jejus haxwÿja amnhĩ to hêx kêt. Kot mẽmoj tã amnhĩ jarênh xà hkõt na hte ãm hãmri tanhmã amnhĩ nhĩpêx to. Tã ã kot amnhĩ nhĩpêx anhÿrja kõt na pa inhmã ixte amnhĩ nhĩpêx o ixpa hprãm nẽ.

²⁰Ra Tĩrtũm Jejus Kris kukwak ri kot mẽ pahto mex ã amnhĩ jarênh jakamã na pu htem axpên mã harênh o: —Koja Tĩrtũm Jejus kukwak ri mẽ pahto mex rax nẽ. Ra kot mẽ pahtã amnhĩ jarênh xà hkõt. Nà Tĩrtũm mex o mex. Anẽ.

Tĩrtũm kot mẽ pa hwÿr Karõ rênh ã harênh

Rõmãn 8.14; Epes 1.13

²¹Nà Tĩrtũmja mex o mex. Kot mẽ pahpê hkra kaxyw amnhĩm mẽ paxunhwÿr jakamã na hte tanhmã mẽ pahkrã hto pu mẽ Kris kõt amnhĩ nhĩpêx mex o papa.

²²Na pu htem Kris kõt amnhĩ xunhwÿ nhÿm Tĩrtũm ja hã mẽ pahpumu nẽ mẽ pahwÿr Karõ rẽ nhÿm mẽ pahwÿr agjê. Mẽ piitã mẽ kot mẽ pahpê hkra hã mẽ pahpumunh kaxyw. Te mẽ kot tanhmã mẽ hikukrêx kagà hto nhÿm mẽ kot kêp õ dõn ã omunhta pyræk. Tã koja Tĩrtũm Karõ mẽ pakamã hkrĩ pu mẽ ja hã amnhĩ pumunh kõt Tĩrtũm kot nhÿrmã mẽ pahto mex rax ã

amnhĩ tã omunh kurê kumrêx. Ra kot mẽ pahto mex tã koja nhỹrmã mẽ pahto mex rax o wam kot mẽ pahto mex raxta jakre.

Pawre kãm mẽ kãm àkjêr prãm kêt ã kot amnhĩ jarênh

Wam Korĩt 4.21; Sikũn Korĩt 10.1-2

²³E Kris kôt ixtõ nê ixtõxjaja. Kot paj kormã ma mẽ awỳr inhmõr kêt ri ixprĩ hã mẽ amã tanhmã amnhĩ jarênh to ka mẽ ixte amnhĩ jarênh ma. Tĩrtũm tãm mẽ arom kot ijamaxpêr kôt ixpumunh mex jakamã kot paj noo mã ixprĩ hã mẽ amã tanhmã amnhĩ jarênh to ka mẽ inhma. Na pa pre ra mẽ awỳr inhnojarêt tã no ãm tee ri amnhĩ kukamã ijamaxpêr nê ijamaxpêr o: —Nà kot paj taxy kormã ma mẽ hwỳr inhmõr kêt nê. Kot paj tokyx mẽ hwỳr mõn pøj nê kot amnhĩ tomnuj xwỳnhta ã mẽ kãm akir nê nê tanhmã mẽ kãm ixkapêr to. Hãmri nhũm mẽ amnhĩ tã inhma nê hkaprĩ nê tee ri amnhĩ kukamã hamaxpêr. ã mẽ kot amnhĩ nhĩpêx anhỹr pymaj kot paj kormã mẽ hwỳr inhmõr kêt nê. Anhỹr o ijamaxpêr.

²⁴Inhmã ma mẽ awỳr inhmõr nê tanhmã mẽ ate amnhĩ nhĩpêx to hã axte mẽ amã karõ kamã ixihỳx prãm kêt. Mẽ akwỳjê rom ra mẽ ate Kris hkôt amnhĩ xunhwỳr tỳx kênã. Tã mẽ ate hkôt amnhĩ nhĩpêx mex o akĩnh nê apaja na inhmã hprãm.

Sikũn Korĩt 2

¹Na pa pre ma mẽ awỳr mõ nê mẽmoj tã mẽ amã akir nê nê tanhmã mẽ amã ixkapêr to ka prem inhma nê akaprĩ nê ri apa. Tã inhmã akupỹm mẽ awỳr inhmõr nê axte mẽ amã ixàkjêr prãm kêt jakamã na pa kormã mẽ awỳr inhmõr kêt nê.

²Kot kaj mẽ akĩnh nê apa pa ijaxwỳja ixkĩnh nê ixpa. No kot paj ma mẽ awỳr mõ nê mẽmoj tã mẽ amã akir ka mẽ tee ri inhma nê akaprĩ nê. Pa mẽ apumu nê ijaxwỳja ixkaprĩ nê.

³Ja pymaj na pa pre wam ixte mẽ awỳr kagà mênhta kamã mẽmoj nê tanhmã mẽ amã ixàkjêr to. Mẽ ate kamã harênh nê mar nê tokyx kormã mẽ awỳr inhmõr xwỳj ri tanhmã mẽ ate amnhĩ tomnuj tota kaga nê tãm amnhĩ nhĩpêx kaxyw. Kêr pa mẽmo arĩgro hã ma mẽ awỳr mõn pøj nê mẽ ate tãm

amnhĩ nhĩpêx o apa hã mẽ apumu nẽ ixkaprĩ hkêt nẽ ixkĩnh nẽ. Ka mẽ ajaxwỳja ixpumu nẽ akĩnh nẽ.

⁴Jakamã na pa pre ã mẽ amã kagàta nhĩpêx nẽ mẽ awỳr mēnh anẽ. Nẽ kamã mẽmojta nê tanhmã mẽ amã ixàkjêr to. Na pa pre ixkaprĩ htỳx nẽ tee ri mẽ akukamã ijamaxpêr o inhmỳr rax pê mẽ amã mẽmojta ã kagà. No ãm mẽ akaprĩ kaxyw na pa pre mẽ amã hipêx kêt nẽ. ãm mẽ ate kamã harēnh nẽ inhmar nẽ ajamaxpêr o: —Hêxta waa nẽ. Nà Pawre na kãm mẽ pahkĩnh tỳx kumrêx. Hã na pre mẽ pahte tanhmã amnhĩ tomnuj to hã mẽ pajarēnh ma nẽ tee ri mẽ pakukamã hamaxpêr pê kagàja kamã hã mẽ pamã akir nẽ mẽ pahwỳr kumẽ. Nà kãm mẽ pahkĩnh tỳx kãm na ã mẽ pamã kapêr kãm hihtỳx anẽ. Anhỳr o ajamaxpêr kaxyw na pa pre hipêx nẽ mẽ awỳr kumẽ.

Mẽ kot axte amnhĩ tomnuj mã hamaxpêr kêt ã mẽ kãm karõ

Rukre 17.3-4; Wam Korĩt 5.1-13; Karatas 6.1-2

⁵⁻⁹Nẽ wam kagàta kamã na pa pre mẽ amã mẽ akwỳjê hõ kot nã kaàkre kamã hpijaàm kêeta pa mẽ amã tanhmã hã karõ hto. Ra mẽ ate harēnh mar tã nê kãm akapêr kêt nẽ. Tã mẽ ate inhmar nẽ nê tanhmã kãm akapêr to nẽ amnhĩ nê hanor kaxyw na pa pre mẽ awỳr kagàja mẽ. Hãmri nẽ ijamaxpêr o: —Ko. Kojã mẽ ixkapêr mar xà hkôt amnhĩ nê hanor japêr. Anẽ. Tã ka xep prem kamã harẽ nẽ ama nẽ tee ri ja hã amnhĩ pumu nẽ akaprĩ nẽ. Nẽ ixpyrà nẽ apijaàm nẽ. Hãmri nẽ ijamaxpêr xà hkôt amnhĩ nê hanor kãm axihtỳx nẽ. ãm hãmri na ka prem ã hipêx anẽ. Nhũm xep tee ri ja hã amnhĩ pumu nẽ hkaprĩ nẽ hkaprĩ xàj ri mỳr o pa. Jao ra ã amnhĩ nhĩpêx anhỳrta kaga nẽ akupỹm tãm amnhĩ nhĩpêx. Tã ra ã kot amnhĩ nhĩpêx anhỳr jakamã kwa mẽ tokyx akupỹm amnhĩ wỳr awỳr kê axte mẽ awỳr mra nẽ mẽ akôt pa. Ra kot amnhĩ tomnujta kaga jakamã kêr ka mẽ axte kãm ajamaxpêr kêt nẽ. Akupỹm tãm kãm akapêr kê tokyx akupỹm tãm hamaxpêr nẽ hkĩnh nẽ pa. Kot kaj mẽ tokyx ã hipêx anhỳr kêt nẽ nhũm tee ri amnhĩ kukamã hamaxpêr nẽ hkaprĩ nẽ pa. Ja pymaj kwa mẽ amã hkĩnh ã kãm amnhĩ jarẽ nẽ akupỹm tãm kãm akapêr pê tãm hipêx o ri apa. Kê amnhĩ tã mẽ apumu nẽ akupỹm hkĩnh nẽ tãm hamaxpêr.

¹⁰E kêr ka mẽ axte kot tanhmã amnhĩ tomnuj tota mã ajamaxpêr kêt nê. Kwarĩ ho kwarĩ. Kot kaj mẽ ã hipêx anê pa ijaxwỳja ma hipêx anê. No pa na pre tanhmã ixtomnuj to hkêr nê. ãm Jejus kapêr kwỳm na pre ri ã amnhĩ nhĩpêx anê. Tã ra kot amnhĩ tomnujta kaga jakamã kot paj Jejus nhỹ hã akupỹm tãm hipêx nê kot amnhĩ tomnujta o ijamakêtkati tokyx anê nê axte kãm ijamaxpêr kêt nê. Mẽ apiitã mẽ amex nê ri mẽ apa kaxyw. Jakamã kêr ka mẽ ajaxwỳja mẽ amex nê apa kaxyw ã amnhĩ nhĩpêx anê nê axte kãm ajamaxpêr kêt nê.

¹¹Kwa mẽ tokyx ja ho ajamakêtkati. Kê Satanasti tee ri ja hã mẽ apumu nê mẽ amã mẽ ate tanhmã amnhĩ tomnuj to hprãm xàj tee ri tanhmã ri mẽ ato ho pa kaprỳ. Kêr pu mẽ Satanasti kot amnhĩ nhĩpêx kôt amnhĩ nhĩpêx o ri papa hkêr nê. Ra mẽ pahte Tĩrtũm kapêr kuhpa hã tanhmã kot amnhĩ nhĩpêx to ho pa hã omunh mex kênã.

Pawre kot Xitre japêr o pa hã harênh

¹²Nê na pa pre ja rũm ixkato nê ma Tôx wỳr mỗ. Ixte mẽ kãm Kris jarênh o mẽ hkôt ixpa kaxyw ma mẽ hwỳr mỗ. Nhũm Pahihti Kris ixkukamã tanhmã mẽ hkrã hto jakamã pa pre mẽ hwỳr pỏj nhũm mẽ piitã kãm ixujarênh mar prãm nê. Pa pre mẽ kãm Tĩrtũm kapêr jarênh ryy ho mẽ hkôt ixpa.

¹³Na pa pre Xitre ra mẽ hwỳr ixkukamã hpỏx ã hkamnhĩx tã nhỹri omunh kêr nê. Hãmri nê ijamaxpêr o: —Hêxta waa nê. Inhmã Korĩt kãm Jejus kwỳjê jarênh mar prãm. Na pa tee ri mẽ hkukamã ijamaxpêr o ixpa. Nom kormã Xitre mẽ kurũm akupỹn hpỏx kêr. Mãn kormã Masetõn kamã pa. Anhỹr o ijamaxpêr hãmri nê mẽ kãm amnhĩ jarê nê ixkato nê ma Masetõn wỳr krĩ hkwyỳ hkôt hapêr o mỗ. Tã ra hwỳr ixkato nê omu.

Te mẽ pahpê mẽhkuxwa xà pyràk ã mẽ pajarênh

Epes 5.2; Piripos 4.18

¹⁴⁻¹⁶Nà Tĩrtũmja mex o mex. Na hte mẽ pahto mex rãhã ho pa. Nê mẽ kot mẽ panê àmnàr xwỳnhjaja nhũm hte tanhmã mẽ ho pu mẽ ma paxàmnhĩx ri mẽ hkôt mẽ kãm Kris kapêr jarênh o ri papa. Te mẽ pahte mẽ hkuxwa xà ho ri mẽ hkuxwa ho papa pyràk. Mẽ pahte Kris kôt amnhĩ nhĩpêx jakamã Tĩrtũm mã te mẽ pahkuxware nê ri mẽ papa pyràk. Nê te mẽ kãm Kris jarênh

o ri papa pê te mẽ hkuxwa xà ho mẽ hkuxwa ho ri mẽ hkôt papa pyræk. Nhũm hte mẽ hkwyjaja mẽ pama nẽ kãm mar prãm nẽ. Nẽ mẽ paxujarẽnhja haxwỳja te kot mẽ hkuxwa xà kuxwa mex nhũm htem hpār nẽ kãm ho amnhĩ kuxwa hprãm pyræk. Jao kãm mẽ pamar prãm nẽ Kris kôt amnhĩ xunhwỳ. No nhũm mẽ hkwyjaja axtem nẽ mẽ kêp mẽ pamar prãm nõkati. Mẽ kumã Tĩrtũm kapērja te kêp wenẽn kuxỳ htỳx nhũm mẽ kot hpār nẽ htyk pymaj amỳm kuhê pyræk. Jao kapēr kaga nẽ kêp amỳm amnhĩ xunhwỳ. Nẽ na pu htem amnhĩ krã hkôt mẽ kãm Kris kapēr jarẽnh o ri papa hkêt nẽ. ãm Tĩrtũm nhỹ hã pix mã tanhmã harẽnh to ho papa.

Pawre kot katàt kôt Tĩrtũm kapēr o mẽ ahkre hã harẽnh

¹⁷Na hte mẽ kot mẽ kêp Kris nhỹ hã mẽ ahkre hã amnhĩ to hêx xwỳnhjaja te Tĩrtũm kapēr o wẽnê pyræk o mẽ hkôt pa. Jao kàxpore hprãm xàj amnhĩ krã hkôt tanhmã mẽ kãm harẽnh to nhũm htem mẽ kuma nẽ hpãnhã tanhmã mẽ kãm amnhĩrer to. Nom pa na pa hte ã amnhĩ nhĩpêx anhỹr kêt nẽ. Nẽ mẽ uræk nẽ amnhĩ krã hkôt Tĩrtũm kapēr jahkre ho ixpa hkêt nẽ. Tĩrtũm kot mẽ akaxyw ixãm jakamã na pa hte ixkatàt kôt Kris nhỹ hã amarĩ mẽ amã kapēr jarẽnh o ri mẽ akôt ixpa. No mẽ uræk nẽ kàxpore prãm xàj mẽ amã harẽnh kêt nẽ. Tĩrtũm kot ja hã ixpumunh mex.

Sikũn Korĩt 3

¹Mẽ kêp Kris nhỹ hã mẽ ahkre hã amnhĩ to hêx xwỳnhjaja na htem nhỹhỹm nojarêt nẽ mẽ kot mar xwỳnhjê mã: —E kot paj ma nhãm krĩ hõ hwỳr mō nẽ Tĩrtũm kapēr o mẽ ahkre. Jakamã kwa mẽ kaxyw inhmã kaga nhĩpêx nẽ kamã ixte Tĩrtũm kapēr o mẽ ajahkre mex xwỳnh ã ijarẽ nẽ hã kagà. Hãmri nẽ inhmã agō pa ma amnhĩ kôt o mō nẽ mẽ kot inhmar mã xwỳnhjê mã kugō kê mẽ kamã harẽ nẽ ijarẽnh ma nẽ kãm ixkapēr mar prãm nẽ. Anhỹr o na htem amnhĩ to mẽ hwỳr o pa. No pa na inhmã ã amnhĩ nhĩpêx anhỹr prãm kêt. Inhmã nhãm mẽ kãm amnhĩ to jarkrar prãm kêt. Mẽ ate ja hã ixpumunh mex. Ra mẽ piitã mẽ kot ixkatàt kôt ixte Tĩrtũm kapēr jarẽnh mex ã ixpumunh mex jakamã mo kaxyw kot pa ri amnhĩ kôt kaga jamỳ nẽ ho ixpa? Nà kot pa amnhĩ kôt hõ ho inhmōr kaxyw hã ixàhwỳr kêt nẽ.

²⁻³Mě kajaja te mẽ apê inhõ kagà pyràk. Na ka prem ixte mẽ ajahkre ma nẽ Jejus kôt amnhĩ xunhwỳr kurê kumrêx. Hãmri nhũm Tĩrtũm mẽ amã amnhĩ Karõ rẽ nhũm mẽ amã agjê ka mẽ ỹ hã amnhĩ nhĩpêx nyw o amnhĩ nhĩpêx o apa. Hãmri nhũm mẽ akwỳjaja amnhĩ jaêr pê mẽ ate amnhĩ nhĩpêx nyw ã mẽ apumu nẽ mẽ atã axpẽn mã ijarênh o: —Hêxta waa nẽ. Pêr ãm hãmri na pre Kris mẽ hwỳr Pawre mẽ. Na pre ma mẽ hwỳr mỗ nẽ mẽ kãm Tĩrtũm kapêr o mẽ ahkre nhũm mẽ kuma nẽ amnhĩ tomnuj kaga hpa nẽ hpãnhã Tĩrtũm kapêr kôt amnhĩ nhĩpêx nẽ tãm ri amnhĩ nhĩpêx o pa. ãm hãmri na hte Pawre mẽ ahkre mex o pa. Hêxta waa nẽ. Anhỳr o mẽ atã ijarênh jakamã mo kaxyw kot pa kagà hkwy jamỳ nẽ amnhĩ kôt ho ixpa? Nà mẽ kajaja te mẽ apê inhõ kagà pyràk.

⁴Na pa pre Jejus kôt amnhĩ xãm nhũm Tĩrtũm ja hã ixpumu nẽ tanhmã inhmã kapêr o amnhĩrit to nẽ inhmã: —E Pawre. Kêr ka ma mẽ kãm ixkapêr jarênh o ri mẽ hkôt apa. Anhỳr jakamã na pa hte Tĩrtũm kamnàr rom ã amnhĩ nhĩpêx anhỳr o ri mẽ hkôt ixpa.

⁵Nom amnhĩ krã hkôt mẽ ahkre hkêt nẽ. Tanhmã kot pa we amnhĩ to nẽ amnhĩ krã hkôt mẽ kãm kapêr o mẽ ahkre mex nẽ? Nà Tĩrtũm pix na hte ja kaxyw tanhmã ixkrã hto pa ô ri mẽ ahkre ho ri ixpa.

Tĩrtũm kapêr nyw jarênh

⁶Nẽ Tĩrtũm na hte tanhmã ixkrã hto pa Karõ nhỹ hã mẽ piitã mẽ kãm kapêr nyw jarênh o ri ixpa. Amnepêm Tĩrtũm kot Ijaew mã mẽmoj tã karõ xwỳnhhta. Mojes kot kapêr tũm jarênh o pa xwỳnhhta mex tã no nhũm mẽ tee ri hkôt kãm amnhĩ nhĩpêx prãm o pa. Nẽ xatã kamã harẽ nẽ omunh tã tee ri kot hkôt kãm amnhĩ nhĩpêx prãm. Tã mẽ kot hkôt amnhĩ nhĩpêx kêt mỳrapê na prem pikaprãr pan hapêx. No kêt Tĩrtũm kapêr nywja. Jejus jarênhja. Na hte Tĩrtũm Karõ tanhmã mẽ pahkrã hto pu mẽ Jejus kôt amnhĩ nhĩpêx o ri papa. Jao mẽ pahpê pahtĩr tũm nẽ papa mã xwỳnh. No na hte nhãm mẽ hkwỳjaja kãm harênhja mar prãm kêt nẽ amnhĩ jarênh o: —Nà kot paj amnhĩ krã hkôt ã amnhĩ nhĩpêx anẽ nẽ ã amnhĩ nhĩpêx anẽ nhũm Tĩrtũm ja hã ixpumu nẽ ixtĩr tũm nẽ ixpa mã xwỳnh ã ijarê. Anhỳr tã no ãm

ã amnhĩ jarēnh anhÿr kaprÿ. Tĩrtũm Karõ nhÿ hã mẽ kot amnhĩ to mex o mẽ pa xwÿnh pixjaja koja mẽ htĩr tũm nẽ pa ho pa.

⁷Nẽ Tĩrtũm kapěr tũmta na pre Mojes mẽ kãm harēnh kaxyw nhũm mẽmoj tanhmã amnhĩ nhĩpêx to rax kumrêx. Naja hkrakrak nẽ haxēnh nẽ kamã kamàt kô htyk. Hãmri nhũm Tĩrtũm mẽ kot hkôt amnhĩ nhĩpêx kaxyw kẽn po hã mẽ kãm mẽmoj tã karõ nhũm Mojes kumÿ nẽ mẽ hwÿr o wrÿ nẽ mẽ kãm kamã harẽ. Tĩrtũm kot hirã htÿx kamã kãm kapěr nhũm kuri mar o ãm jakamã uràk nẽ ÿ hã hkuk nhĩrã htÿx kumrêx nẽ mẽ kãm kapěr jarēnh o xa. Jakamã nhũm mẽ tee ri kot hprĩ hã omunh mex kaxyw no ãm nom gêk tÿx nẽ. Tã gaa nhũm hkuk kãm hirãja amnhĩm hprĩ nẽ hapêx o mō. Na pre ã Tĩrtũm Ijaewjê mã kapěr tũm nhõr anẽ. Hãmri nhũm Mojesja ô ri mẽ kãm kamã harẽ nẽ harēnh pa hãmri nẽ mẽ kãm: —E kêr ka mẽ Tĩrtũm kapěr mar tÿx nẽ hkôt amnhĩ nhĩpêx mex rãhã ho ri apa. Kêr ka mẽ nhÿrmã atyk tã kê akupÿm mẽ ato mẽ atĩr ka mẽ õ krĩ kamã kuri atĩr tũm nẽ amex nẽ apa ho apa. Anẽ. Hãmri nhũm mẽ kuma nẽ kãm: —Tõe. Nà kot paj mẽ hkôt pix mã ri amnhĩ nhĩpêx mex rãhã ho ri ixpa. Anhÿr ã amnhĩ jarēnh tã no ãm hkôt amnhĩ nhĩpêx kêt nẽ nhũm Mojes tee ri mẽ kot amnhĩ nhĩpêx ã mẽ omu nẽ mẽ kãm: —Nà mẽ ate Tĩrtũm kapěr kôt amnhĩ nhĩpêx kêt jakamã kot kaj mẽ nhÿrmã ty nẽ Tĩrtũm pẽ awry rax kumrêx nẽ ri apa. Anẽ.

⁸Tã na hte Tĩrtũm jarãhã axtem tanhmã mẽ pamã kapěr to. Pãnhã kapěr nyw o kapěr nẽ mẽ pamã: —Kot kaj mẽ Ixkra Jejus kôt amnhĩ xunhwÿ pa hã mẽ apumu nẽ mẽ ato ixkra. Hãmri nhũm Ixkarõ mẽ amã agjê. Anẽ. Kapěr ja na mex kumrêx o kot kapěr tũm jakrenh.

⁹Kapěr tũmja mex tã nhũm htem hkôt amnhĩ nhĩpêx kêt nẽ. Jakamã na htem ty nẽ Tĩrtũm pẽ awry rax ã ri pa. No kapěr nywja na tũmta rom mex o mex. Na hte Tĩrtũm mẽ pamã kapěr nywja jarēnh o: —Kot paj tanhmã mẽ akrã hto ka mẽ amnhĩ to mex pix o ri apa. Jao ixkôt ri amnhĩ nhĩpêx mex o ri apa. Anẽ.

¹⁰Nẽ kapěr tũmja te kot kanê hpôk kryre pyràk. No kapěr nywja mex o kot tũm jakrenh jakamã te kot mẽmo hpôk rũnh o kanê hpôk kryre jakrenh

pyràk. Jakamã nhũm mẽ kot hirã rax kãm ri mrar gryk ã hpòk grire nhĩrã kamã mrar kêt pyràk.

11Tĩrtũm kapěr tũm te kot Mojes kuk pyràk. Na pre kamã hirã rax tã gaa nẽ amnhĩm hprĩ nẽ kamã hirã hapêx o mõi. Nẽ gaa nẽ hapêx. No kêt Tĩrtũm kapěr nywja te kot Tĩrtũm nhĩrã htỳx rãhã ho rãhãta pyràk. Koja uràk nẽ aa hapêx kêt kumrẽx.

Ijaewjê jarẽnh
Rõmãn 11.7-10

12Nẽ Tĩrtũm kapěr nywja mex o mex jakamã na pa hte ixãmnhĩx mẽ kãm harẽnh o ri ixpa.

13Te ixte Mojes kot amnhĩ nhĩpêx pyràk kêt. Na pre hte Mojes ixkĩnhã àmnhĩx Ijaewjê mã Tĩrtũm kapěr jarẽnh o ri pa hkêt nẽ. Mẽ kot hkuk kãm hirãta ra hapêx o mõi ã omunh nhũm hpjaàm pymaj na pre kupêxê puroore ho amnhĩ kuk pro nẽ ri mẽ hkôt pa.

14Jakamã nhũm prem hprĩ hã hkuk kãm hirã pumunh mex kêt nẽ. Nẽ Tĩrtũm kapěr ã kagà htũmja nhũm prem mããnẽn hprĩ hã mar mex kêt nẽ. Mẽ hkrã hihtỳx jakamã te mẽ kot amnhĩ jamak pro nẽ mẽmoj mar mex kêt pyràk jakamã mẽ kot mar tã hprĩ hã mar kêt nẽ. Nẽ hkôt ri amnhĩ nhĩpêx mex kêt nẽ. No mẽ kot Kris kôt amnhĩ xunhwỳr xwỳnhjaja na hte Tĩrtũm amnhĩ tã mẽ omu nẽ te mẽ nẽ mẽ hamak hpro xàta rẽn par nẽ rẽn pyràk o mẽ hipêx nhũm mẽhprĩ hã kapěr mar tỳx nẽ.

15Tã na hte Ijaewjaja arĩ jarãhã Mojes kot Tĩrtũm kapěr ã kagà htũm kamã harẽnh o pa. Nom arĩ mẽ hkrã hihtỳx jakamã te mẽ kot amnhĩ jamak pro nẽ kamã harẽnh o pa pyràk o amnhĩ nhĩpêx jakamã kormã hprĩ hã mar kêt nẽ.

16Tã koja mẽ hkwỳjaja Pahihti Jejus Kris kôt amnhĩ xunhwỳ nhũm amnhĩ tã omu nẽ te kot mẽ hamak nẽ hpro xà hpyr nẽ mẽnh pyràk o mẽ hipêx nhũm mẽhprĩ hã kapěr nyw mar tỳx nẽ.

17Pahihti mẽ Karõja wa htipxi jakamã na hte mẽ pakamã agjê nẽ hprĩ hã mẽ pamã kapěr o amnhĩrĩt o pa.

¹⁸Ra mẽ pahte Pahihti Kris kôt amnhĩ xunhwỳr jakamã te mẽ pahte mẽ kot amnhĩ jamak pro xwỳnh kot amnhĩ nhĩpêx pyràk kêt. Nhũm Pahihti Karõja tanhmã mẽ panhĩpêx to pu mẽ ra hkôt amnhĩ nhĩpêx mex o mỗ. Jakamã na htem mẽ pahte amnhĩ nhĩpêx nyw pumunh kôt Tĩrtũm kot tãm amnhĩ nhĩpêx ã omunh kurê kumrêx. Kormã mẽ pahte hkôt amnhĩ nhĩpêx mex kumrêx kêt tã ra hkôt amnhĩ nhĩpêx mex o mỗ. Jao te tãm kot amnhĩ nhĩpêx pyràk o amnhĩ nhĩpêx o mỗ.

Sikũn Korĩt 4

Jejus kapêr te kêp kanê pyràk ã harênh

Wam Korĩt 2.1-5; Sikũn Korĩt 1.12; Wam Tesarõn 2.1

¹Nẽ na pre Tĩrtũm ixto mex mẽ tanhmã kãm ixapênh to hã inhmã karõ. Ixte ma mẽ kãm kapêr jarênh o ri mẽ hkôt ixpa kaxyw. Jakamã na pa hte ixàmnhĩx mẽ hkôt mẽ kãm harênh o ri ixpa.

²Nhũm mẽ hkwỳjaja axtem mẽ ixêx o ri ixpa hã ijarênh tã ixte ã amnhĩ nhĩpêx anhỳr kêt. Na pa hte amnhĩ tomnuj o ri ixpa hkêt mẽ. Mẽ hkwỳjaja kot mẽ no kupyw mẽ kãm Tĩrtũm kapêr o hêx o pa htã pa na pa hte ã amnhĩ nhĩpêx anhỳr kêt mẽ. Ixpĩ hã mẽ kãm harênh o ixpaja na inhmã hprãm jakamã na pa hte ixkatat kôt harênh o ri mẽ hkôt ixpa. Mẽ piitã mẽ kot ixêx kêt kôt ixpumunh mex kaxyw. Tĩrtũm kot ixêx kêt kôt ixpumunh mex.

³No nhỹrmã mẽ htyk mẽ ma kuwy hwỳr mẽ pa mã xwỳnh pixjaja na htem hprĩ hã ixkapêr mar mex kêt mẽ.

⁴⁻⁶Satanasti tãm kêp mẽ hpãm. Kêp mẽ kãm Tĩrtũm kapêr mar prãm kêt xwỳnh piitã mẽ hpãm. Jakamã na pa hte mẽ kãm tanhmã Jejus jarênh to. Kêp Tĩrtũm Kra hã harê mẽ te kot Tĩrtũm kot amnhĩ nhĩpêx pyràk ã harênh o ri ixpa. Hãmri nhũm Satanasti tee ri ja hã ixpumu nhũm ja kêp omnuj mẽ. Jakamã nhũm tanhmã Tĩrtũm nê mẽ hkrã hto mẽ te mẽ hamak pro pyràk o mẽ hipêx. Mẽ kot hprĩ hã Jejus jarênh mar mẽ hkôt amnhĩ xunhwỳr pymaj nhũm ã nê mẽ hipêx anê. Jejus jarênh te kêp kanê hpòk mex pyràk jakamã mẽ kot mar kêt xwỳnhjaja te kamàt kô kamã ri mẽ pa pyràk. No nhũm

Satanasti tãm kot nê mẽ no kupyri jakamã nhũm htem ã ri kamàt kô kamã mẽ pa pyræk o amnhĩ nhĩpêx anê. Amnepê mã kormã mẽmoj kêt ri nhũm kamàt kô pix. Tã nhũm Tĩrtũm tanhmã kapêr to nê kapêr o: —E kê hirã kato. Anê. Hãmri nhũm ra kapêr xà hkôt hirã kator kurê kumrêx. Tã ja pyrã nê na pa pre kamàt kô kamã ixtỳx ri ixpa pyræk nhũm Tĩrtũm te kot inhmã kanê hpôk nhũm hirã pyræk o inhĩpêx pa mex o mex ã omunh kurê kumrêx. Hãmri nê Jejus Kris kot amnhĩ nhĩpêx ã omu nê te Tĩrtũm kot amnhĩ nhĩpêx ã omunh pyræk. Wa kot amnhĩ nhĩpêx te kot axpên pyræk. Nê na pa hte pam tanhmã amnhĩ jarênh to ho ri ixpa hkêt nê. ãm Jejus Krisja pix na pa hte harê. Tapxipix na kêp mẽ panhõ Pahihti. Jakamã hkĩnhã te ixpê mẽ amã ixapênh xwỳnh pyræk o na pa hte mẽ amã kapêr jarênh o ri mẽ akôt ixpa.

Pawre te kêp poti grære nhĩpêx pyræk ã harênh

Wam Korĩt 2.4-5; Sikũn Korĩt 11.23; 12.9

⁷Nê Tĩrtũm ixrom hihtỳx o hihtỳx. No pa na hkĩnhã ixihtỳx kêt. Te ixpê poti grære nhĩpêx pyræk jakamã na pa hte Tĩrtũm xihhtỳx xwỳnh pix nhỹ hã mẽ kãm kapêr jarênh o ri mẽ hkôt ixpa. Nhũm htem inhma nê ãm hãmri ixte y hã ixkapêr ã ixpumunh kurê kumrêx. No pa ixte amnhĩ krã hkôt ixkapêr ã ijarênh kêt nê.

⁸Na pa hte mẽ hkôt mẽ kãm Jejus jarênh o ri ixpa nhũm mẽ hkwỳja tõhã inhma nê ja hã inhĩpêx kati nê pa amnhĩ xà htỳx kamã ama. Nom nhũm Tĩrtũm mẽ kutã tanhmã ixkrã hto pa inhmã amnhĩ xà kamã ijamak pyma hkêt nê arĩ mẽ kãm kapêr jarênh o ri mẽ hkôt ixpa. Nê amnhĩ kaxyw Jejus kôt pix mã ijamaxpêr tỳx rãhã pê tee ri amnhĩ kukamã ijamaxpêr o ri ixpa hkêt nê.

⁹Nê mẽ kãm ixkurê xwỳnhjaja ohtôô. Na htem xatã Jejus ã tanhmã ixtomnuj to htã pa kormã ixtyk kêt nê. Na pa hte Tĩrtũm kamnàr rom arĩ mẽ hkôt ixpa nhũm Tĩrtũm ixkôt pa ho pa.

¹⁰Na htem Jejus pyrã nê ixpĩr kaxyw tanhmã inhĩpêx to. No ãm ko. Koja mẽ nhỹrmã ixpĩ rỳ ko. Ixte amnhĩ kukamã ixàhpumunh kêt. Kot paj ãm arĩ ixtĩr ri mẽ kãm Jejus jarênh o ri mẽ hkôt ixpa. Kêr kê mẽ hkwỳjaja ixkapêr ma nê axpên mã tanhmã Jejus jarênh to nê harênh o: —Nà pêr ãm hãmri na pre

Jejus akupÿm htír nê tanhmã hkwÿjê ho mex to. ãm hãmri na hte Pawre ja hã harê. Anê.

11Mê kot Jejus ã ixpír mã tã pa arĩ mẽ kãm akupÿm htír ã harê. Tĩrtũm na hte ja kaxyw tanhmã ixkrã hto pa arĩ mẽ kãm harênh o ri mẽ hkôt ixpa.

12Na pa pre ra mẽ amã harê ka prem inhma nê Jejus kôt amnhĩ xunhwÿr kurê kumrêx nê amnhĩ nhĩpêx nyw o amnhĩ nhĩpêx o ri apa. Jakamã ixpyrà nê mẽ apê atĩr tũm nê apa mã xwÿnh. Nhũm htem piitã mẽ ate Jejus kôt amnhĩ xunhwÿr ã mẽ apumu. Tã nhũm mẽ kot Jejus ã ixpír kaxyw. Nom kwãr mẽ mãmrĩ ixpĩ. Ja inhmã tanhmã kute hkêt. Mẽ kot ixpír mã tã kot paj arĩ Jejus kapêr jarênh o ri ixpa rãhã ty. Ra mẽ kot ixkapêr mar nê Jejus kôt amnhĩ xunhwÿr xwÿnhjaja mẽ pahpyrà nê kêp htír tũm nê pa ho pa mã xwÿnh kênã.

13Jakamã kwãr mẽ mãmrĩ ixpĩ. Na pa hte arĩ amnhĩ kaxyw Tĩrtũm kôt ijamaxpêr mex rãhã nê. Amnepê mã na pre Pahi finat Tawija tanhmã Tĩrtũm kapêr jarênh to nê harênh o: ãm hãmri na Tĩrtũm kapêrja. Hêx kêt jakamã na pa hte mẽ kãm harênh rãhã ho ri ixpa. Anê. Tã pa hte Tawi pyrà nê mẽ piitã mẽ kãm Tĩrtũm kapêr jarênh o ri ixpa. Tĩrtũm kot mẽ pamã tanhmã mẽmoj to hêx to hkêt.

14Ra kot amnhĩ jarênh xà hkôt akupÿm Pahihti Jejus o htír jakamã kot puj mẽ nhÿrmã urak nê ty nhũm akupÿm mẽ pahto mẽ pahtĩr nê ma war amnhĩ wÿr mẽ pahto api.

15Amnepêm na pa pre ma mẽ awÿr mō nê mẽ akôt mẽ amã Tĩrtũm kapêr jarênh o ri ixpa. Ka prem inhma nê Jejus kôt amnhĩ xunhwÿr nê ixpyrà nê Tĩrtũm mã mex o mex ã harê. Jakamã kwãr mẽ mãmrĩ Jejus ã tanhmã inhĩpêx to. Kojã mẽ gaa nê rĩ mẽ hkwÿjaja mẽ pahpyrà nê Jejus kôt amnhĩ xunhwÿr nê Tĩrtũm mã mex o mex ã harê.

Pawre tee ri amnhĩ kukamã hamaxpêr kêt ã kot amnhĩ jarênh

Rômãn 8.17; Sikũn Korĩt 1.7; Wam Pêtre 1.3-9; 4.12-16; 5.10

16Jakamã na pa tee ri amnhĩ kukamã ijamaxpêr o ixkaprĩ nê ixpa hkêt nê. Mẽ kot Jejus ã tanhmã ixtomnuj to htãã pa hte ixãmnhix kapêr jarênh o ri

ixpa. Ra ixpigêt nê ixirerek o inhmôr tâ inhôpinh xà kaxwỳnh kãm ijamaxpêr o Jejus kôt amnhĩ nhĩpêx mex o mỗ.

¹⁷Mê kãm ixkurê xwỳnhjaja na htem Jejus ã inhĩpêx kati htã ã inhĩpêx anhỹr japjê hkêt nê. Nom kot paj nhỹrmã ty nhũm Jejus akupỹm ixto ixtĩr pa Tĩrtũm mẽ wa kuri inhmex kumrêx nê ixpa ho ixpa. Mê kot ixtomnujja na mẽ ho apkati grêre no kot paj nhỹrmã Tĩrtũm mẽ Krata wa kuri inhmex kumrêx nê ixtĩr tũm nê ri ixpa ho ixpa. Jao rãhã ho rãhã.

¹⁸Jakamã na pa tee ri mẽ kot tanhmã ixtomnuj tota kukamã ijamaxpêr o ri ixpa hkêt nê. Ja koja tokyx hapêx. Na pa hte ãm nhỹrmã Tĩrtũm nhõ krĩ kamã inhmex nê ixkĩnh rãhã ri ixpaja pix kukamã ijamaxpêr o ri ixpa.

Sikũn Korĩt 5

Mê panhĩ nyw jarênh

Piripos 3.21; Sikũn Pêtre 1.13-14

¹Nê mẽ panhĩja te kot tyrti hô ho ixkre pyræk. Na htem tyrti hô ho ixkre nhĩpêx nhũm gaa nê hapêx. Tã mẽ panhĩja na hte uræk nê hapêx tokyx anê. Na pu htem ri papa nê gaa nê pawej nê ty. Tã nhũm Tĩrtũm hpãnhã mẽ pahpê hkrajê mã mẽ panhĩ nyw gõ pu mẽ kuri õ krĩ kamã pamex kumrêx nê pahĩr tũm nê papa ho papa.

²⁻³Na pu htem jar pahpunuj nê papa. Nê mẽ paxà nhi nê mẽ pahkaprĩ nê. Mê panhĩ htũmja te kot mẽ paxê htũm pyræk jakamã na pu htem ty nê te paxê htũm kwrỳnh nê hpãnhã nyw jagjênh pyræk o amnhĩ nhĩpêx. Tã na pu htem amnhĩ kukamã panhĩ nywja mã pajamaxpêr o ri papa. Kot pu mẽ kaxkwa kamã pahkarõ pix nê ri papa hkêt nê. Mê panhĩ nyw ã kot puj mẽ ri papa ho papa.

⁴Nê na pu htem jar pahpunuj nê pamex kêt nê ri papa. Nê tokyx mẽ pahtyk nê panhĩ htũm o pajapêx nê hpãnhã panhĩ nyw ã mẽ papa hprãm. Tã koja Jejus tokyx akupỹn wrỳk japêr pu mẽ pahtyk kêt rãhã tokyx panhĩ nywta o panhĩ nyw. Nom koja tokyx akupỹn wrỳk kêt japêr pu mẽ nhỹrmã ty nhũm Tĩrtũm akupỹm mẽ pahto mẽ pahĩr nê mẽ pamã mẽ panhĩ nyw gõ pu mẽ ho panhĩ nyw.

⁵⁻⁶Na pre ra Tirtüm mẽ panhĩ nyw kukamã hamaxpër nẽ mẽ pahtã tanhmã amnhĩ jarënh to. Nẽ mẽ pahwỳr Karõ rẽ nhũm mẽ pahkarõ mã agjê pu mẽ ja hã amnhĩ pumu nẽ pahkĩnh nẽ pajamaxpër o: —Nà ra Tirtüm kot ixwỳr amnhĩ Karõ mën̄h nhũm ixkarõ mã àr jakamã koja mãänën nhỹrmã inhmã inhĩ nyw gõ. Kormã inhĩ htũm kamã ixpa nẽ Pahihti Jejus mẽ wa õ krĩ kamã ixpa hkêt tã koja nhỹrmã inhmã inhĩ nywja gõ pa inhĩ nyw o wa kuri ixpa ho ixpa. Nà koja ã inhĩpêx anẽ. Anhỹr o pajamaxpër pẽ pahkĩnh nẽ papa.

⁷Nẽ mẽ pahte jar pano ho nhỹri Jejus pumunh kêt tã no ãm panhõpinh xà kaxwỳnh kãm kãm pajamaxpër mex nẽ.

⁸Jakamã na pu mẽ tee ri amnhĩ kukamã pajamaxpër o papa hkêt nẽ. Na pu htem ãm tokyx mẽ pahtyk nẽ ma Pahihti Jejus nhõ krĩ hwỳr paxàpir jamãr o papa. Õ krĩja kêp mẽ papapxà kumrêx jakamã na pu htem ma hwỳr paxàpir pix kukamã pajamaxpër rãhã nẽ.

⁹No ãm mẽ pamã ja pix prãm kêt. Na pu htem mãänën pamã Jejus mã hprãm xà hkôt nhỹri tanhmã kãm amnhĩ nhĩpêx to ho ri papa hprãm o papa. Jar mẽ panhĩ htũm rãhã rỳ mũtar kuri õ krĩ mex kãm mẽ panhĩ nyw ã tanhmã kãm amnhĩ nhĩpêx to ho ri papaja na mẽ pamã hprãm.

¹⁰Nẽ na hte Krisja jar mẽ pahte tanhmã amnhĩ nhĩpêx to hã mẽ pahpumunh o hkrĩ. Mẽ pahte tãm amnhĩ nhĩpêxja nẽ mẽ pahte amnhĩ tomnujja nhũm hte hã mẽ pahpumunh rãhã ho hkrĩ. Tã koja nhỹrmã kot mẽ pahte tanhmã amnhĩ nhĩpêx to hã mẽ pahpumunh kôt tanhmã mẽ panhĩpêx to. Mẽ pahte tãm amnhĩ nhĩpêx o ri papa xwỳnhjaja koja ra mẽ panê htyk kukwak ri mẽ pahto mex nẽ. No mẽ kot amnhĩ tomnuj o mẽ pa xwỳnhjaja koja mẽ homnuj tỳx nẽ. Jakamã na pa inhmã kãm hprãm xà hkôt pix mã amnhĩ nhĩpêx o ixpa hprãm nẽ.

Mẽ pajamaxpër nyw jarënh

Römãn 6.4-6; Sikũn Korĩt 4.2; Epes 4.22-24; Korosẽ 3.9-10

¹¹Nẽ Tirtüm kot hprĩ hã mẽ pahpumunh rãhã ho hkrĩ jakamã inhmã kãm hprãm xà hkôt pix mã amnhĩ nhĩpêx o ri ixpa hprãm. Mãn ka mẽ ra ja hã

ixpumunh mex nê rỳ ko. Mě piitã mẽ kot hkôt amnhĩ xunhwỳr prãm xàj na pa hte mẽ kãm kapěr jarěnh o ri ixpa.

12Nom ixte ja hã amnhĩ to jarkrar o ri ixpa hkêt. ãm mẽ ate inhmar nê mẽ kêp Kris nhỹ hã mẽ ahkre hã amnhĩ to hêx xwỳnhjê mã tanhmã ijarěnh to kaxyw na pa ã mẽ amã amnhĩ jarěnh anê. Mě kot Tĩrtũm kapěr jahkre mex kumrêx ã amnhĩ to jarkrar tã na htem hkôt amnhĩ nhĩpêx kêt nê. Tã mẽ ate aprĩ hã ixte Tĩrtũm kapěr kôt amnhĩ nhĩpêx mex ã ixpumunh nê tanhmã mẽ kãm ijarěnh to kaxyw na pa ã te ixte amnhĩ to jarkrar pyràk o mẽ amã amnhĩ jarěnh anê.

13-14Mě kot ixkrã pipãnh ã ijarěnh tã Tĩrtũm na mẽ akaxyw ixãm pa hte mẽ amã kapěr jarěnh o ri mẽ akôt ixpa. Ixkrã pipãnh kêt. Ixte Tĩrtũm kãm hprãm xà hkôt tanhmã amnhĩ nhĩpêx to xwỳnh na pa. Tã mẽmo kaxyw na pa hte ã kapěr jarěnh rũnh anhỹr o ri mẽ akôt ixpa? Nà inhmã mẽ akĩnh kênã. Mě ate Tĩrtũm kôt tãm amnhĩ nhĩpêx prãm xàj na pa hte ã mẽ amã kapěr jarěnh anhỹr rãhã nê. Kris na pre tanhmã ixto pa inhmã mẽ akĩnh nê. Te tãm kãm mẽ ajapê pyràk. Na pre Kris amnhĩ grõnh kôt mẽ pahpiitã mẽ nê ty. Tĩrtũm kot mẽ pahte amnhĩ tomnuj mỳrapê tanhmã mẽ pahto pymaj nhũm mẽ pahpiitã mẽ panê ty. Jakamã te mẽ pahpiitã Jejus kôt mẽ pahtyk pyràk o na pu htem amnhĩ nhĩpêx. Jao te mẽ pahte amnhĩ nhĩpêx tũmja mẽ pahpê hapêx par pyràk o pu mẽ amnhĩ nhĩpêx nyw o amnhĩ nhĩpêx o ri papa.

15Mě pajamxpěr nyw o tãm mẽ pahte amnhĩ nhĩpêx o papa kaxyw na pre Jejus mẽ panê ty. Jakamã na pu htem axte amnhĩ pix kukamã ri pamã mẽmoj prãm o ri papa hkêt nê. Na pu htem mããnên Tĩrtũm kãm hprãm xà hkôt tanhmã kãm amnhĩ nhĩpêx to ho ri papa. Ja kaxyw na pre Tĩrtũm akupỹm Kris o htĩr pu mẽ kukwak ri pajamxpěr nyw o amnhĩ nhĩpêx o papa.

16Jao mẽ piitã mẽ hkrã hkà hã mẽ omunh xà hkôt pix mã tanhmã mẽ harěnh to hkêt nê. Mě kot amnhĩ tomnuj ã mẽ harěnh rỳ mẽ kot amnhĩ to mex ã mẽ harěnh kêt nê. Amnepê mã na pa pre ã Kris jarěnh anê nê harěnh o: —

Nà Krisja na hte mẽ pahte amnhĩ nhĩpêx kôt amnhĩ nhĩpêx kêt nê. ãm ri kot mẽ pahte amnhĩ nhĩpêx kwým ri amnhĩ nhĩpêx jakamã kot amnhĩ tomnuj tỳx xwỳnh na. Anhỹr ã harênh o ixpa. Tã axte ã harênh anhỹr hkêt nê. Kot amnhĩ tomnuj xwỳnh kêt jakamã na pa hte hpãnhã hkôt pix mã tanhmã kãm amnhĩ nhĩpêx to ho ri ixpa.

Mẽ pahpê Tĩrtũm kràmnhwỳ hã mẽ pajarênh

Rômãn 5.1; 5.10; Epes 6.20; Korosê 1.20

17Nê koja mẽhõ Kris kôt amnhĩ xãm nhũm kot amnhĩ nhĩpêx tũmja kêp hapêx nhũm hpãnhã kot amnhĩ nhĩpêx nyw pix o amnhĩ nhĩpêx nê hamaxpêr nyw pix o hamaxpêr.

18Tĩrtũm na hte tanhmã mẽ pahto pu mẽ ã amnhĩ nhĩpêx anhỹr o ri papa. Na pu prem pamã hkurê htã nhũm Kris kukwak ri mẽ pahte hkôt amnhĩ nhĩpêx xwỳnhjê ho hkràmnhwỳ. Hãmri nê tanhmã mẽ pahte amnhĩ nhĩpêx to hã mẽ pamã karõ nê mẽ pamã: —E kêt ka mẽ ma krĩ piitã hkôt ri mẽ kãm ixkapêr jarênh o ri apa kê mẽ ama nê mẽ apyrà nê Kris kôt amnhĩ xunhwỳ. Pa ja hã mẽ omu nê ixte mẽ anhĩpêx pyrà nê mẽ ho ixkràmnhwỳ. Anê.

19Jakamã na pa hte ma mẽ kãm kapêr jarênh o ri mẽ hkôt ixpa nê mẽ kãm: —E pa mẽ amã mẽmoj mex jarê ka mẽ inhma. Nà na pre Krisja mẽ pahte amnhĩ tomnuj mỳrapê mẽ panê ty. Nê htyk o Tĩrtũm mã mẽ pahpãnhã amnhĩrer par kumrêx. Jakamã na ra Tĩrtũmja Kris kukwak ri kãm mẽ pahpiitã mẽ pahto hkràmnhwỳ prãm. Koja kukwak ri mẽ pahte amnhĩ tomnuj piitã ho hamakêtkati nê axte kãm hamaxpêr kêt kumrêx. Kãm mẽ pahto hkràmnhwỳ hprãm jakamã koja ã mẽ panhĩpêx anê. Jakamã e kwa mẽ tokyx Kris kôt amnhĩ xunhwỳ kê Tĩrtũm kot inhĩpêx pyrà nê mẽ ato hkra nê mẽ ato hkràmnhwỳ. Anhỹr o mẽ kãm harênh o ri mẽ hkôt ixpa.

20Kris kot mẽ apiitã mẽ awỳr inhmênh jakamã na pa hte ã hã mẽ amã kapêr jarênh o ri mẽ akôt ixpa nê mẽ amã: —E Tĩrtũm kãm mẽ ajapê jakamã na mẽ awỳr inhmê pa mỗ. Jakamã kwa mẽ tokyx amnhĩ tomnuj kaga nê hkôt amnhĩ xunhwỳ. Kê amnhĩ tã mẽ apumu nê mẽ ato hkràmnhwỳ. Anê.

²¹Krisja aa kot tanhmã amnhĩ tomnuj to hkêt kumrêx tã nhũm pre Tĩrtũmja te mẽ kot amnhĩ tomnuj tỳx kumrêx xwỳnh pyràk o hipêx. Tã mẽmo kaxyw na pre ã hipêx anê? Nà mẽ panê kênã. Mẽ pahte hkôt amnhĩ xunhwỳr nhũm kot mẽ panhĩpêx o te aa mẽ pahte amnhĩ tomnuj kêt kumrêx xwỳnh pyràk o mẽ panhĩpêx kaxyw na pre ã mẽ panê Krata nhĩpêx anê.

Sikũn Korĩt 6

¹Tã kot ã Kra nhĩpêx anhỳr jakamã kwa mẽ ixkapêr ma nê mar tỳx nê. No mẽ ama nê ãm mar kêt nê. Tĩrtũm kãm mẽ pajapê htỳx jakamã mẽ pakutã nojarêt rãhã ho pa. Kumã na pa hte ã mẽ amã kapêr jarênh anhỳr o ri mẽ akôt ixpa.

²Amnepê mã na pre Ijaew mã kapêr nê mẽ kãm: Na ka prem amex kêt nê ri apa nê amnhĩ to ixwỳ pa pre mẽ ama nê mẽmojta pê mẽ apytã nê mẽ ato mex nê. Anê. Jakamã kwa mẽ inhma. Tĩrtũm kãm mẽ ate amnhĩ tomnuj pê mẽ apytãr prãm tỳx jakamã kwa mẽ tokyx amnhĩ to awỳ kê ã kêp mẽ apytãr anê.

Mẽ kot Kris ã tanhmã Pawre nhĩpêx to hã mẽ harênh

Sikũn Korĩt 4.7; 11.23-33; Korosê 1.10

³⁻⁴Nê mẽ kot Tĩrtũm kapêr mar nê hã ixtomnuj tã pa hte amnhĩ katut kôt mẽ kot tanhmã ixtomnuj toja rê nê ho ijamakêtkati tokyx anê. Nê arĩ mẽ kãm kapêr jarênh rãhã ho ri mẽ hkôt ixpa. Mẽ kot mar nê ãm mar nê hkaga pymaj na pa hte ã amnhĩ nhĩpêx anhỳr rãhã nê. Mẽ kot ja hã inhĩpêx punuj tã pa arĩ mẽ kãm harênh o ri mẽ hkôt ixpa.

⁵Mẽ kot Kris ã ixtak nê ijagjênh nê tanhmã ixto kaxyw ixtã htu htã pa hte mẽ kutã amnhĩ to htỳx nê ixkuhê. Na pa pre hte Tĩrtũm mã mẽ kãm kapêr jarênh rax nê. Jao tũhã inhôt kêt nê inhõtswa ho ri mẽ hkôt ixpa. Nê tũhã inhmã prãm tỳx nê ri ixpa. Tã no ãm arĩ mẽ kãm kapêr jarênh rãhã nê.

⁶Inhmã tanhmã ixte amnhĩ tomnuj to hprãm kêt. Inhmã Tĩrtũm kot amnhĩ nhĩpêx kôt pix mã amnhĩ nhĩpêx prãm. Nê inhmã inhgryk tokyx anhỳr prãm kêt. ãm inhmã mẽ piitã mẽ hkĩnh kãm mẽ ho mex pix prãm. ã na pa hte

Tĩrtũm Karõ nhỹ hã amnhĩ nhĩpêx anhỹr o ri mẽ hkõt ixpa. Mẽ kot ja hã ixpumunh nẽ ra Tĩrtũm kapêr ma nẽ hkõt amnhĩ xunhwỳr kaxyw.

⁷Na pa hte ixkatàt kõt mẽ kãm ixkapêr mex pix nẽ. Tĩrtũm xihtỳx xwỳnhja nhỹ hã ri mẽ kãm kapêr jarẽnh jao tãm amnhĩ nhĩpêx nẽ tãm ri ijamaxpêr o ri mẽ hkõt ixpa. Jakamã na htem ja hã ixpumu nẽ ixte Tĩrtũm kapêr jarẽnh ma nẽ hkõt amnhĩ xunhwỳ.

⁸Na hte mẽ hkwỳjaja kãm ixkĩnh nẽ nhũm mẽ hkwỳjaja axtem kãm ixkurê nẽ. Nẽ mẽ hkwỳjaja amnhĩm inhmex ã ijarẽ nhũm mẽ hkwỳjaja axtem axpẽn mã tanhmã ixto kapêr punuj to. Mẽ kot ixêx nhi hã ijarẽnh tã pa hte ixkatàt kõt mẽ kãm ixkapêr o ri ixpa. Nom kwãr mẽ mãmri tanhmã ri ixto kapêr to. Ja tanhmã inhmã kute hkêt.

⁹Na hte mẽ hkwỳjaja ixkamã òkre kahak nẽ pika piitã hkõt axpẽn mã tanhmã ijarẽnh to ho pa. Mẽ kãm ixpĩr prãm tã no pa arĩ ixtĩr nẽ ixpa. Mẽ kot Jesus ã ixtomnuj tỳx tã kormã ixpĩr kêt nẽ pa ri ixtĩr nẽ ixpa.

¹⁰Ixte Kris ã amnhĩ xà htỳx kamã ijamak o ri ixpa htã arĩ ixkĩnh nẽ ixpa. Nẽ ixkàxpore hkêt tã nhũm mẽ ohtô nẽ ixte mẽ kãm Jesus kapêr jarẽnh kukwak ri mex nẽ pa. Nẽ ixkukrêx rax kêt tã nhũm Tĩrtũm ixto mex nẽ pa inhmex nẽ ixpa. Tã kot paj nhỹrmã ò krĩ kamã kuri inhmex kumrêx nẽ ixtĩr tũm nẽ ixpa ho ixpa. Jakamã na pa hte arĩ mẽ kãm Jesus kapêr jarẽnh o ri mẽ hkõt ixpa.

¹¹E Korĩt kãm ixkràmnhwỳjaja. Na pa ixprĩ hã mẽ amã amnhĩ nhĩpêx jarẽnh par kumrêx.

¹²Inhmã mẽ akĩnh tỳx tã te mẽ amã ixkĩnh kêt pyràk.

¹³Kwa te mẽ ate ixto mẽ akatut nẽ akuhê pyràk o inhĩpêx kêt nẽ. Amnhĩ pyrà nẽ amã ixkĩnh nẽ hkêt wehe. Te mẽ apê ixkra pyràk o na pa ã mẽ amã ixkapêr anẽ.

Te mẽ pahpê Tĩrtũm nhõrkwỹ pyràk ã mẽ pajarẽnh

Wam Korĩt 10.20-22; 15.33; Epes 5.3-14; Sikũn Ximõtre 2.4; Xiakre 4.4-5; Wam Pêtre 2.11; 4.1-6

¹⁴Nẽ kêt ka mẽ kot Kris kõt amnhĩ xunhwỳr kêt xwỳnhjê mẽ mẽ mẽmoj tã tanhmã axpẽn mar to hkêt nẽ. Rỳ mẽhõ ho amjên rỳ mẽhõ ho aprõ hkêt nẽ.

Ahpÿnhã mẽ pajamxpër kênã. Tanhmã kot we mẽ hamaxpër nyw xwÿnhjaja nẽ mẽ hamaxpër tũm xwÿnhjaja amnhĩ to nẽ axpën kôt hamaxpër nẽ ri axpën kôt pa? Nà koja mẽ ã amnhĩ nhĩpêx anhÿr kêt nẽ. Ahpÿnhã mẽ pajamaxpër. Na hte hirã htÿxja kamàt kô mẽ pihkàr kêt nẽ.

¹⁵Xà na hte Kris mẽ Satanasti wa axpën kôt hamaxpër? Nà wa kot axpën kôt hamaxpër kêt. Ahpÿnhã wa hamaxpër nẽ ahpÿnhã wa kot amnhĩ nhĩpêx. Nẽ ahpÿnhã hirã nẽ ahpÿnhã kamàt kô. Nẽ mẽ pahpê Kris kwÿjaja nẽ mẽ kêp hkwy hkêt xwÿnhjaja ahpÿnhã mẽ pajamaxpër nẽ ahpÿnhã mẽ pahte amnhĩ nhĩpêx.

¹⁶Na pu htem Tĩrtũm mã amnhĩ jarênh xà hã ixkre kamã sãnti xunhwÿr nẽ amnhĩ to hwÿr pê kãm mex o mex ã harênh kêt nẽ. Axtem na sãntija. Mẽ panhõ Tĩrtũmja sãnti rom htĩr tũm rãhã nẽ pa ho pa xwÿnh. Nẽ mẽ papajaja te mẽ pahpê Tĩrtũm nhõrkwy pyræk. Kapër ã kagà htũm kot ja jarênh kot: Ixkrajaja te kêp inhõrkwy nhũm ixpê õ dõn pyræk. Te ixpê inhõrkwy kamã ixpa xwÿnh pyræk jakamã kot paj ixkrajê kamã ri ixpa ho ixpa. Ixpê Mẽhpãm na pa. Anẽ.

¹⁷⁻¹⁸ã Tĩrtũm xihtÿx xwÿnhja kot amnhĩ jarênh anhÿr jakamã na hte mẽ kot amnhĩ tomnuj xwÿnhjê nẽ mẽ pahkurê ho: Kêr ka mẽ hkôt ri apa hkêt nẽ. Kwarĩ ho kwarĩ. Nẽ mẽ hkôt ri amnhĩ nhĩpêx o apa hkêt nẽ. Kot kaj mẽ ixkapër ma nẽ ixkôt amnhĩ nhĩpêx hã kot paj amnhĩ wÿr mẽ awÿ nẽ mẽ ato ixkra. Nẽ pa kot paj ixpê Mẽapãm maati. Anẽ.

Sikũn Korĩt 7

¹Tã ã Tĩrtũm kot mẽ pahto hkra nẽ mẽ pahkôt pa ho pa hã amnhĩ jarênh kot anhÿr jakamã kwa ixkràmnhwÿjaja. Kêr pu mẽ kapër ma nẽ tanhmã amnhĩ tomnuj to hkêt nẽ. Nẽ mẽmoj punuj kukamã pajamaxpër kêt nẽ. Nẽ ãm kapër kôt pix mã amnhĩ nhĩpêx mex rãhã nẽ.

Pawre kot Korĩt nhõ xwÿnhjê nhÿ hã hkĩnh ã harênh

²Nẽ kwa Kris kôt ixtõ nẽ ixtõxjaja. Kêr ka mẽ tee ri amnhĩ tã tanhmã inhmã ajamaxpër to hkêt nẽ. Na pa pre tanhmã mẽ atõ hto hkêt nẽ. Rÿ tanhmã mẽ

atō hto ka mẽ ja hã ixpumu nẽ ixkõt tanhmã amnhĩ tomnuj to hkêt nẽ. Rỳ pa pre ixêx rom tanhmã mẽ anokupyr to ho ri ixpa hkêt nẽ. Kwa mẽ amã ixkĩnh nẽ tokyx ixkõt ajamaxpêr kêt wehe.

³Mẽ ate inhmar nẽ amnhĩ tã apijaàm kaxyw na pa ã mẽ amã ixkapêr anhỹr kêt nẽ. Inhmã mẽ akĩnh kênã. Na pa pre inhmã mẽ akĩnh ã amnhĩ jarênh rax nẽ. Inhmã ri mẽ akõt ixpa rãhã ho ixpa hprãm. Rỳ ka mẽ nhỹrmã apiitã apikaprãr par japêr pa inhmã mẽ akõt ixtyk prãm nẽ.

⁴Na pa hte ra mẽ amã ijamaxpêr pê ixkĩnh nẽ ixpa. Nà kot kaj mẽ ixkapêr ma nẽ Jejus kõt amnhĩ nhĩpêx mex nẽ. Tã kêr ka mẽ ã amnhĩ nhĩpêx anhỹr rãhã nẽ. Na pa hte jar ra amnhĩ xà htỳx kamã ijamak o ri ixpa htã no ãm mẽ amã ijamaxpêr nẽ ixkĩnh nẽ.

⁵Nẽ na pa pre amnẽ Masetõn wỳr kormã Xitre japêr o mō. Hãmri nẽ Masetõnja wỳr pōj nẽ hapêr pê mẽ kãm Jejus kapêr jarênh o ri mẽ hkõt ixpa. Hãmri nhũm mẽ kãm ixkurê xwỳnhjaja Kris ã inhĩpêx punuj nẽ hã inhmã àkjêr pix o pa. Hãmri nẽ ma Masetõn kamã krĩ piitã hkõt ri mẽ kãm ixto kapêr punuj nẽ pa amnhĩ tã mẽ mar o ri mẽ hkõt ixpa. Nẽ mẽ kajaja mẽ ate Kris kaga nẽ nhãm mẽ hamaxpêr kõt amnhĩ nhĩpêx pymaj na pa pre tee ri mẽ akukamã ijamaxpêr o ri mẽ hkõt ixkaprĩ nẽ ixpa.

⁶Tã Tĩrtũm kêp mẽ hkaprĩ xwỳnhjê pumunh nẽ akupỹm mẽ ho mẽ hkĩnh xwỳnh jakamã na pre ixkaprĩ hã ixpumu nẽ ixwỳr Xitre mẽ. Pa pre omu nẽ akupỹm ixkĩnh nẽ tãm ijamaxpêr.

⁷No ãm Xitre pumunh kõt pix mã ixkĩnh kêt. Na pre ixwỳr pōj nẽ tanhmã inhmã mẽ ajarênh to nẽ mẽ ate tanhmã ho mex to hã mẽ ajarẽ. Nẽ mẽ amã ixpumunh prãm tỳx ã mẽ ajarẽ. Nẽ Kris kõt mẽ atōta hpijaàm kêt o pa nhũm ixte kagà kamã hã mẽ amã ixàkjêr nhũm mẽ ate ja hã omunh nẽ ra amnhĩ kamã apijaàm o akaprĩ htỳx ã mẽ ajarẽ. Nhũm Tĩrtũm kot inhnê mẽ kãm ixkurê xwỳnhjê pumunh mex kaxyw mẽ ate ixto hwỳr ã mẽ ajarẽ. Na pre ã inhmã mẽ ajarênh anẽ pa kuma nẽ mẽ anhỹ hã ixkĩnh tỳx kumrêx.

⁸⁻⁹Nẽ wam ixte mẽ amã kagàta nhĩpêx kêt ri na pa pre tee ri mẽ ate amnhĩ nhĩpêx ã mẽ ajarênh ma nẽ mẽ akaxyw hipêx. Nẽ kamã mẽ ate hpijaàm kêt

xwỳnhhta kot tanhmã amnhĩ nhĩpêx to hã omunh nẽ ãm omunh o arĩ hkôt apa hã kagàta kamã mẽ amã akir hãmri nẽ Xitre mã kugõ nhũm kupy nẽ ma mẽ awỳr o mỗ. Tã ka xep prem kamã harẽ nẽ ama nẽ amnhĩ kamã apijaàm nẽ. Nẽ akaprĩ nẽ ajamxpêr o: —Hêxta waa nẽ. ãm hãmri na Pawre ã mẽ ijarênh anẽ. Na pa mẽ ã amnhĩ nhĩpêx anẽ nẽ amnhĩ tomnuj tỳx nẽ. Anẽ. Tã nhũm Xitre akupỳn ixwỳr pỏj nẽ inhmã mẽ ajarẽ. Pa mẽ ajarênh ma nẽ tee ri ijamxpêr nẽ ijamxpêr o: —Hêxta waa nẽ. Mon pa pre axtem nẽ ã ri mẽ kãm ixàkjêr anẽ? Nà na xep prem kagàta kamã harẽ nẽ kuma nẽ hkaprĩ htỳx nẽ. Anẽ. Tã ãm hãmri na pa pre ã mẽ akaxyw hipêx nẽ mẽmojta ã mẽ amã ixàkjêr anẽ. Na ka xep prem kamã harẽ nẽ ama nẽ tee ri ajamxpêr o ra akaprĩ nẽ. Nom Tĩrtũm kãm hprãm xà hkôt na ka prem ja hã amnhĩ pumu nẽ ã akaprĩ anẽ. Tã xep ra akupỳm tãm amnhĩ nhĩpêx nẽ akupỳm Tĩrtũm kôt amnhĩ nhĩpêx mex nẽ. Jao akupỳm akĩnh nẽ ri apa. Jakamã ãm hãmri na pa pre mẽ awỳr wam kagàta mẽnh nẽ mẽmoj tã ã mẽ amã ixàkjêr anẽ.

¹⁰Koja Tĩrtũm krajê hỏ tanhmã amnhĩ tomnuj to. Hãmri nẽ tee ri ja hã amnhĩ pumu nẽ amnhĩ kamã hpijaàm nẽ akupỳm Tĩrtũm kôt tãm amnhĩ nhĩpêx. Hãmri nẽ akupỳm mex nẽ tãm hamaxpêr pê hkĩnh nẽ ri pa. Nẽ axte tee ri amnhĩ kukamã hamaxpêr hkêt nẽ. Ja na Tĩrtũm kãm hprãm. Tã koja mẽ kêp hkra hkêt xwỳnhjê pyrà nẽ tanhmã amnhĩ tomnuj to nẽ ra hpijaàm japêr. Nom hkwỳjaja kot ja hã omunh pix mỳrapê hpijaàm nẽ arĩ Tĩrtũm kôt amnhĩ nhĩpêx kêt japêr. Hã koja nhỹrmã ty nẽ Tĩrtũm kra kot akupỳm hkôt tãm amnhĩ nhĩpêx xwỳnhjê kĩnhã Tĩrtũm pê awry rax kumrêx nẽ ri pa.

¹¹Mẽ pahte Tĩrtũm kapêr kwỳm ri tanhmã amnhĩ nhĩpêx to hã tee ri amnhĩ pumunh nẽ amnhĩ kamã hpijaàm nẽ akupỳm tãm amnhĩ nhĩpêxja na Tĩrtũm kãm hprãm. Tã na ka xep ã amnhĩ nhĩpêx anẽ. Wam ixte mẽ awỳr kagà mẽnhhta na ka xep prem kamã tanhmã ixte nã puro kamã hpijaàm kêt xwỳnhhta ã mẽ amã ixàkjêr tota kamã akapêr nẽ ama. Hãmri nẽ tee ri mẽ ate kormã kot amnhĩ tomnuj ã kãm axàkjêr kêt ã amnhĩ kukamã ajamxpêr nẽ amnhĩ kamã apijaàm nẽ. Nom Tĩrtũm kãm hprãm xà hkôt. Mẽ ate jam ajamxpêr pê amnhĩ kamã apijaàmja na kãm hprãm. Tã ka mẽ hpijaàm xwỳnhhta kamã agryk nẽ kãm akapêr o: —Kwa mẽ pahpê Jejus kwỳjaja mẽ

pahte ã amnhĩ nhĩpêx anhÿr kêt tã ka ã amnhĩ nhĩpêx anê. Nà na ka amnhĩ tomnuj tÿx kumrêx. Kot kaj ã amnhĩ nhĩpêx anê pa mẽ hã apumu nê gaa nê apyrà nê ã amnhĩ tomnuj anê. Kwa ja kaga nê axte ã amnhĩ nhĩpêx anhÿr kêt nê. Nê akupÿm Tĩrtũm kôt amnhĩ xãm tÿx nê hkôt amnhĩ nhĩpêx rãhã ho ri apa. Anê. Hãmri nhũm krĩ nhõ xwÿnhjaja ja hã mẽ ajarênh ma nê mẽ apê jamnuj ã mẽ apumunh kurê kumrêx. ãm hãmri na ka prem ã kãm akapêr anê.

¹²Nê ixte mẽ awÿr kagà nê mênhta kamã na pa pre nã puro kamã hpijaàm kêt xwÿnhhta mã tanhmã ixàkjêr to hkêt nê. Rÿ nã purota mã tanhmã ixàkjêr to hkêt nê. Na pa pre mẽ apê Kris kwÿjê hwÿr kagà nhĩpêx nê kamã tanhmã mẽ amã hpijaàm xwÿnhhta ã karõ hto. Mẽ ate kamã harênh hãmri nê inhÿ hã amnhĩ nê hanor nhũm Korĩt nhõ xwÿnh piitã kot ã mẽ ate amnhĩ nhĩpêx anhÿr ã mẽ apumunh kaxyw. Nê mẽ ate Tĩrtũm nom ã hipêx anhÿr jao mẽ amã ixkĩnh pê ixkapêr kôt ã hipêx anhÿr ã amnhĩ pumunh kaxyw.

¹³Tã nhũm Xitre ixwÿr pøj nê tanhmã inhmã mẽ ajarênh to. Na xep pre mẽ awÿr nojarêr nê tee ri amnhĩ kukamã hamaxpêr. Mẽ ate kagàta kamã harênh nê ijarênh mar nê kamã agryk pymaj tee ri amnhĩ kukamã hamaxpêr. Tã ma mẽ awÿr mõi pøj nê mã amã kugõ. Ka xep prem kamã harê nê ama nê hkôt amnhĩ nhĩpêx kurê kumrêx nhũm mẽ ate amnhĩ nhĩpêx ã mẽ apumu nê hkĩnh nê. Hãmri nê tãm hamaxpêr. Tã ra akupÿn ixwÿr mõi nê inhmã mẽ ajarê pa mẽ ajarênh ma nê ijaxwÿja ixkĩnh nê.

¹⁴Na pre kormã mẽ awÿr nojarêr pa kãm tanhmã mẽ amex ã mẽ ajarênh to. Tã nhũm xep ma mẽ awÿr mõi pøj nê mẽ apumu nê hamaxpêr o: —Nà pêr ãm hãmri na pre Pawre inhmã mẽ mex ã harê. Mẽ mex kênã. Anê.

¹⁵Tã nhũm pre mẽ arũm kato nê ra man akupÿn ixwÿr mõi pøj nê inhmã mẽ ajarênh o: —Na pa pre ma mẽ hwÿr mõi nê mẽ kãm ixkapêr o ri mẽ hkôt ixpa nhũm mẽ ixkapêr ma nê ixkôt amnhĩ nhĩpêx kurê kumrêx nê ixto mex nê. Kormã ixte mẽ hwÿr inhmõr kêt tã mẽ harênh ma nê inhmã mẽ hkĩnh nê. Tã pa ma mẽ hwÿr mõi nhũm mẽ ixto mex rax nê pa ra inhmã mẽ hkĩnh tÿx kumrêx. Anê.

¹⁶ ã inhmã mẽ ajarēnh anē pa mẽ ajarēnh ma nē ixkĩnh tỳx nē. ãm hãmri na ka htem mẽmoj tã amnhĩ jarēnh xà hkôt tanhmã amnhĩ nhĩpêx to ho apa.

Sikũn Korĩt 8

Mẽ kot Kris kôt mẽ hkwỳjê pê õxỳ hkêt ã mẽ kãm karõ

Atre 11.27-30; Rõmãn 15.25-27; Wam Korĩt 16.1-4

¹E Kris kôt ixkwỳjaja. Kot paj hpãnhã mẽ amã jar Masetõn kamã tanhmã Jejus kwỳjaja kot amnhĩ nhĩpêx to hã mẽ harē ka mẽ harēnh ma. Na hte Tĩrtũm mẽ kutã nojarêť nhũm mẽ mex nē pa.

²Mẽ hkwỳjaja kot Kris ã mẽ hipêx kati nhũm mẽ kot amnhĩ xà htỳx kãm hamak o pa htã hkĩnh nē hamakêtkati nē ri pa. Nē mẽ hkàxpore hkryre htã ho õxỳ hkêt nē pa. Na htem àmnhĩx ri mẽ kêp amrakati xwỳnhjê mã hkwỳ nhõr o pa.

³⁻⁴Tã na prem Jerujarē kamã Kris kôt mẽ pahkwỳjê jarēnh ma. Mẽ kêp amrakati hã mẽ harēnh ma nē kãm mẽ hkaprĩ nē. Nē mẽ kãm mẽ hwỳr mẽmoj rēnh nē mẽ ho ajuta hprãm nē. No ãm pa ixte mẽ kãm hã karõ xà hkôt kêt. Mẽ tãmjaja mẽ hamaxpêr xà hkôt na prem ã hamaxpêr anē nē mẽ kaxyw kàxpore ho pikuprõnh rax nē. Hãmri nē inhmã kugõ nē inhmã: — Kwa na pa prem Jerujarē kamã Kris kôt mẽ pahkwỳjê jarēnh ma nē mẽ inhmã mẽ hkaprĩ nē mẽ kãm mẽ ixkàxpore hkwỳ ho akuprõ. Jakamã e amỳ nē ma mẽ hwỳr o mõi nē mẽ kãm agõ kê mẽ tokyx ho amnhĩm awjaprõ nē kuku. Anē.

⁵Pa mẽ kuma nē ixtỳx ho ãm kàxpore grire hã hkamnhĩx nē ijamaxpêr o: — Kwa mo mẽ hikàxpore rax koja mẽ ri ho akuprõ nē mẽ kãm kugõ? ãm mẽ hikàxpore hkryre kênã. Anhỹr o ijamaxpêr tã no nhũm mẽ kaxyw ho rax nē ho akuprõ. Mẽ hikàxpore hkryre htã mẽ kãm õr rax nē. Hãmri nē inhmã amnhĩ jarēnh o: —Na pa mẽ ra Pahihti Jejus Kris mã amnhĩ gõ. Mẽ ixte tanhmã kãm amnhĩ nhĩpêx to ho ri ixpa kaxyw. Jakamã e tanhmã mẽ inhmã mẽmoj tã karõ hto. Kot pa mẽ ama nē akapêr kôt amnhĩ nhĩpêx. Ja na pa mẽ inhmã hprãm nhũm Tĩrtũm haxwỳja kãm ja prãm. Anē.

⁶Na pa pre ã mẽ kot amnhĩ nhĩpêx anhÿr ã mẽ omu nẽ mẽ apê Korĩt nhõ xwÿnhjê mã ijamaxpêr kurê kumrêx. Hãmri nẽ Xitre mã mẽ ajarê. Na pre mẽ awÿr mõi nẽ mẽ amã Jerujarê nhõ xwÿnhjê jarê. Mẽ ate mẽ kãm kàxpore hkwÿ ho apikuprõnh kaxyw. Tã pa pre jam ijamaxpêr nẽ ra akupÿm mẽ awÿr mẽnh mã nẽ kãm: —Kwa ma akupÿm Korĩt wÿr mõi nẽ mẽ kãm anê kê mẽ ra kot amnhĩ jarênh xà hkôt Jerujarê nhõ xwÿnhjê kaxyw kàxpore hkwÿ ho akuprõ nẽ tokyx mẽ hwÿr kumê. Ra mẽ kãm Kris kôt mẽ hkwÿjê hkĩnh ã amnhĩ jarênh kênã. E kwa tokyj. Anê.

⁷Na ka htem amnhĩ to mex o ri apa. Nẽ amnhĩ kaxyw Kris hkôt ajamaxpêr tÿx nẽ. Nẽ ma mẽ kãm Tĩrtũm kapêr jarênh mex o ri mẽ hkôt apa. Nẽ mẽ ajamaxpêr mex nẽ. Nẽ mẽ piitã mẽ ho mex o ri apa. Nẽ mẽ amã ixkĩnh o ri apa. Jakamã kwa kêr ka mẽ axàmnhĩx mẽ kêp amrakati xwÿnhjê mã mẽ akàxpore hkwÿ nhõr o apa. Jao mẽ amã Tĩrtũm kĩnh tÿx ã amnhĩ to amnhĩrĩt.

⁸Ixte ã mẽ amã ja hã karõ anhÿr tã hã mẽ atã ixihtÿx kêt nẽ. ãm mẽ kamã axukapri hkôt mẽ ate mẽ kãm axàmnhõr o apa kaxyw na pa ã mẽ amã ixkapêr anê. Masetõn kamã mẽ pahkwÿjaja kot amnhĩ nhĩpêxta pyrã nẽ.

⁹Ra mẽ ate Jejus Kris kãm mẽ pajapê hã kot tanhmã amnhĩ nhĩpêx to hã mar mex. Amnepêm na pre kaxkwa kamã mex kumrêx nẽ ri pa ho pa nhũm mẽmoj piitã kêp õ htã nhũm rer pa nẽ mẽ pahwÿr wrÿ nẽ mẽ pakamã kêp amrakati nẽ ri pa. Hikàxpore hkêt nẽ ri pa. Tã mẽmo kaxyw na pre ã mẽmoj mex piitã rer par nẽ mẽ pahwÿr wrÿk anê? ãm kot mẽ pahto mex pix kaxyw. Kot mẽ pahto mex nhũm mẽ pahte kukwak ri mẽ paxàmnhĩx ri mẽ pajamakêtkati nẽ mẽ papa kaxyw na pre ã amnhĩ nhĩpêx anê. Mẽ pahte nhÿrmã uràk nẽ kaxkwa kamã pamex kumrêx nẽ ri papa ho papa kaxyw.

¹⁰E kwa kêr ka mẽ tokyx kàxpore hkwÿ ho apikuprõnh pa nẽ Jerujarê nhõ xwÿnhjê hwÿr amê. Mẽ akumrêxjaja na ka prem ham amgrà hapêxta kamã ra mẽ kaxyw ho apikuprõnhja krax. Mẽ amã mẽ ho mex prãm xaj ham ho hkrax tã no ãm kormã hatur xàm mẽnh nẽ mẽ hwÿr mẽnh kêt nẽ.

¹¹Kwa mẽ tokyx ja ho ajapêx nà. Na ka prem ate ho anhÿr krax ã akĩnh pê kàxpore hkwỳ ho apikuprõnh o apa. Tã kêr ka mẽ arĩ akĩnh rãhã ho apikuprõnh par jatur xàm amẽ. No mẽ ri atỳx tanhmã ajamxpêr to hkêt nẽ. Rỳ mẽ ajamxpêr o: —Nà kormã. Kot paj nhÿrmã ixkàxpore rax nẽ rĩ kormã mẽ hwỳr hkwỳ mẽ. Anhÿr o mẽ ri ajamxpêr hkêt nẽ. Mẽ ate tanhmã akàxpore hkre kamã kute hã omunh xà hkôt mẽ kãm hkwỳ pix gõ.

¹²Kêr ka mẽ axàmnhĩx akĩnh kãm mẽ kãm ho akuprõ. Ate amnhĩ kàxpore pumunh xà hkôt. Ka mẽ akàxpore rax nẽ mẽ kãm ho rax nẽ agõ. Rỳ mẽ akàxpore grire nẽ mẽ kãm ho grire nẽ agõ. Ja na kêt mex.

¹³No mẽ ate mẽ kãm òr par nhũm mẽ arom mẽ hikàxpore rax nẽ ri paja mex kêt.

¹⁴Nom ra mẽ akàxpore rũnh jakamã kwa mẽ amnhĩ kutã mẽ kãm hkwỳ ho hkryre nẽ ho akuprõ kê mẽ apyrà nẽ hikàxpore nẽ ri pa. Kêr ka mẽ nhÿrmã tanhmã amnhĩ to nẽ axà nẽ nhũm akàxpore apê hapêx nhũm mẽ ajarẽnh ma nẽ amnhĩ kuxwar mẽ ato ajuta nẽ mẽ amã hkwỳ ho akuprõ nẽ mẽ awỳr kumẽ. Ka mẽ akàxpore ho axpẽn pyrà nẽ ri apa.

¹⁵Amnepêm Tĩrtũm kot kaxkwa rũm Ijaewjê hwỳr mẽõ rẽnh nhũm mẽ kot apkati mẽ amnhĩm hkawrà nẽ ho apkur o pata ã na pre Tĩrtũm kapêr ã kagà htũmja ã mẽ harẽnh anẽ nẽ mẽ harẽnh kot: Na pre mẽ hkra xohtô xwỳnhjaja mẽ apkur xà hkawrà rũnh nẽ. Nẽ gõj kãm unhwỳ nẽ kuku nẽ piitã ho õhy htu. Nhũm mẽ hkra grêre xwỳnhjaja haxwỳja hkwỳ kawrà no ãm ho hkryre nẽ hkawrà. Nẽ gõj kãm unhwỳ nẽ kuku nẽ haxwỳja ho õhy htu hpa. Na pre htem apkati mẽ ã amnhĩ nhĩpêx anhÿr o pa. Anẽ. Ja pyrà nẽ kêr ka mẽ akàxpore ho axpẽn pyræk o ri ho apa.

Xitre mẽ hkràmnhwỳjê jarẽnh

¹⁶Nẽ Xitre na pre ixpyrà nẽ kãm mẽ ato ajuta hprãm nẽ. Na pre inhmã mẽ atã amnhĩ jarẽ pa pre kuma nhũm ja inhmã mex nẽ pa ixkĩnh nẽ. Nẽ ijamxpêr o: —Nà ãm hãmri na Tĩrtũm tanhmã Xitre hkrã hto nhũm ã hamxpêr mex anẽ. Anẽ.

¹⁷Tã pa ma akupÿm mẽ awÿr mör ã hkukja nhũm inhma nẽ hkĩnh nẽ mẽ awÿr nojarêt kurê kumrẽx. Nom kormã ixte kãm mẽ ajarẽnh kêt ri nhũm tãm amnhĩ kukamã hamaxpêr nẽ mẽ awÿr hkrà.

¹⁸Tã na ra nojarêt kaxyw. Kot paj ma hkôt Kris kôt mẽ pahtôjê hõ mẽ kê ma hkôt mõi. Kôt ixte mẽnh xwÿnhhta na hte mẽ kãm Tĩrtũm kapêr jarẽnh mex nẽ nhũm htem amnhĩm mex ã harẽ.

¹⁹Na pre jar Jejus kwÿjaja kot ma ixkôt Jerujarẽ hwÿr kàxpore hkwÿ ho mör kaxyw nhũm prem amnhĩm mẽ kurê. Tã koja Xitre mẽ wa mẽ awÿr mõi pøj ka mẽ kãm kàxporeta gõi nhũm man akupÿn o mõi pa wa rĩ kormã ma Jerujarẽ hwÿr mẽ kãm o mõi. Mẽ kot hamÿnh nẽ mẽ pamã mẽ hkĩnh ã kot amnhĩ tã mẽ pahpumunh kaxyw. Nẽ Tĩrtũm mã mex o mex ã harẽnh kaxyw.

²⁰⁻²¹Nom kàxpore rax nhũm ixte mẽ hwÿr o inhmör nhũm mẽ kot hã ixkamnhĩx pymaj kot paj ma amnhĩ kôt Kris kôt mẽ pahtõta o mõi. Ixte Xitre hkôt mẽ awÿr mẽnh xwÿnhhta pa ma amnhĩ kôt o mõi. Nom ixàhkĩnh o ixpare hã. Tĩrtũm kot ja kôt ixpumunh mex tã kot paj ma amnhĩ kôt o mõi.

²²Nẽ ot pa ma Xitre wa hkôt axte mẽ awÿr ja mẽ. Kêr kê mẽ axkrunêpxi nẽ ma ixkukamã mẽ awÿr mõi. Ixte wa hkôt mẽnh xwÿnhhta ixte kot amnhĩ nhĩpêx ã omunh mex. Na hte kãm mẽ piitã mẽ ho ajuta ho pa hprãm nẽ. Tã mẽ ajarẽnh ma nẽ inhmã mẽ ajarẽnh o: —Nà koja mẽ Jerujarẽ nhõ xwÿnhjê mã kàxpore nhõr rax nẽ kãm ga. Mẽ kot amnhĩ to mex kênã. Anẽ. Jakamã ra mẽ awÿr hkrà. Tã koja ma Xitre wa hkôt mõi nẽ mẽ ato ajuta ka mẽ tokyx kàxpore ho apikuprõnh pa.

²³Nẽ koja mẽhõ tanhmã Xitre hã mẽ akukjêr to ka mẽ kêp ixkràmnhwÿ mex ã harẽ. Nẽ kot inhĩhkõ hã mẽ ho ajuta mex o pa hã harẽ. Na pre ra jar Kris kwÿjaja mẽ akaxyw kuta nẽ ma mẽ awÿr kumẽ. Jakamã koja ma mẽ awÿr mõi nhũm Kris kôt mẽ pahtôjê hõ wa pijakrutja wa ma hkôt mõi. Na hte wa haxwÿja Kris kôt amnhĩ nhĩpêx mex o pa.

²⁴Koja mẽ awÿr pøj ka mẽ omu nẽ mẽ ho mex nẽ. Nẽ mẽ amã mẽ hkĩnh nẽ. Kê krĩ piitã hkôt Kris kôt mẽ pahkwÿjê piitã mẽ hã mẽ ajarẽnh ma nẽ axpẽn mã mẽ amex ã mẽ ajarẽ. Nẽ mẽ ajarẽnh o: —Pêr ãm hãmri na pre Pawreja

mẽ pamã Korĩt kãm mẽ pahkwỳjê jarẽ. Na xep pre Xitre mẽ hkwyta ma mẽ hwỳr mỗ nhũm mẽ ho mex rax nẽ. Ra Pawre kot mẽ pamã mẽ harẽnh xà hkôt. Anẽ.

Sikũn Korĩt 9

Mẽ kot kàxpore ho pikuprõnh ã mẽ harẽnh

1-2Kwa ixkràmnhwỳjaja. Kot paj Jerujarẽ nhõ xwỳnhjê kaxyw mẽ atã ixihtỳx kêt nẽ. Ra mẽ amã mẽ ho ajuta hprãm jakamã na pa pre Masetõn kamã Kris kôt mẽ pahkwỳjê mã mẽ ajarẽnh o: —Pika pê Gres kamã Kris kôt mẽ pahkwỳjaja na prem ham amgrà hapêxta kamã Jerujarẽ kamã mẽ pahkwỳjê jarẽnh ma nẽ kãm mẽ ho ajuta hprãm. Anẽ. Hãmri nhũm mẽ ajarẽnh ma nẽ mẽ apyrà nẽ kãm tanhmã mẽ ho ajuta hto hprãm.

3-4Tã ot pa mẽ awỳr Xitre mẽ hõta wa mẽ ho ixpimràatã wa mẽ kumẽ. Mẽ kot kàxpore hã mẽ akukjêr kaxyw. Kêr pa mytwrỳ hõ hã ma Masetõn nhõ xwỳnh kwỳjê mẽ mẽ awỳr mỗ nẽ ra ixte mẽ kãm kàxpore hkwy ho mẽ apikuprõnh ã mẽ ajarẽnh kôt mẽ ate ho apikuprõnh rax ã mẽ apumu nẽ ixkĩnh nẽ. Nom kot pa mỗ nẽ tee ri hapêr nẽ te ixte Masetõn nhõ xwỳnhjê mã mẽ ato ixêx pyrà nẽ ixpijaàm nẽ. Ka mẽ ajaxwỳja amnhĩ kamã apijaàm nẽ.

5Ã mẽ pahte amnhĩ nhĩpêx anhỳr pymaj na pa ã mẽ amã kagàja nhĩpêx nẽ Xitre mã òr nẽ ma amnhĩ kukamã mẽ awỳr mẽnh anẽ. Nẽ hkôt wa mõi mã xwỳnhhta mẽ ho ixpimràatã amnhĩ kukamã wa mẽ kumẽ. Tã kê mẽ awỳr pôi nẽ mẽ amã kagàja gõ ka mẽ kamã harẽ nẽ ama nẽ tokyx kàxpore ho apikuprõnh jatur xàm amẽ. Kêr pa mẽ hapu hã mẽ awỳr mỗ ka mẽ ra mẽ ixkutêp ho apikuprõnh pa nẽ mẽ kãm agõ nẽ ajamakêtkati nẽ apa. No pa ixte mẽ amã mẽ ate ho apikuprõnh kaxyw mẽ atã ixihtỳx kêt.

6Na htem piitã ã hamaxpêr anhỳr o pa nẽ hamaxpêr o: —Kot ka apur rax nẽ kamã anhõ rax nẽ. Nom kot ka apur grire nẽ kamã anhõ grire. Anhỳr o hamaxpêr jakamã kêr ka mẽ apiitã ajamakêtkati nẽ Jerujarẽ nhõ xwỳnhjê mã kàxpore nhõr mex nẽ. Kêr ka mẽ ho apikuprõnh pa nhũm rax nẽ. Te

mēhō ihpur rax nē kamā ō raxta pyrāk. Kê Tirtūm ā mē ate amnhī nhīpêx anhÿr ā mē apumu nē nhÿrmā mē ato mex nē.

⁷Nom kêr ka mē anhōxÿ kamā mē kām ōr kêt nē. Mē pahte pahkīnh kām panhōxÿ hkêt kām mē kêp amrakati xwÿnhjê mā mēmoj nhōr o papaja na Tirtūm kām hprām.

⁸⁻⁹Koja mē hā mē apumu hāmri nē amnhīm mē amex ā mē ajarēnh rāhā ho pa. Mē kām Tirtūm kīnh xwÿnhjaja na htem àmnhīx ri mē kêp amrakati xwÿnhjê mā mēmoj nhōr o pa. Te Tirtūm kot amnhī nhīpêx pyrāk. Na hte àmnhīx ri mē pamā mēmoj nhōr o pa. Mē pahwÿr na rē nhūm wrÿ. Nhūm mē pamā mē paxàpkur xà nhōr o pa. Nē tanhmā mē pahto pu mē paxà hkêt nē pajamakêtkati nē paxàpēnh o papa. Nē pamex nē ri papa. Panhō rūnh nē ri papa. Jakamā kwa pu mē urāk nē paxàmnhīx ri mē kêp amrakati xwÿnhjê mā mēmoj nhōr o papa.

¹⁰E pa ixprī hā mē amā ja jarē ka mē inhma. Nà na hte ā Tirtūm mē pamā mē paxàpkur xà nhōr o pa anē. Kot kaj apur kām ahkre nhūm tanhmā amā mēmo hyta nhīpêx to nhūm amā hapôx mex nē amā ô rūnh nē ka anhō rax nē. Nē hkwÿ ho axàpkur o apa nē axte hkwÿ hkre. Tā kêr ka mē ā Tirtūm kot mē ato mex anhÿr ā amnhī pumu hāmri nē urāk nē axàmnhīx ri mē kêp amrakati xwÿnhjê mā axàmnhōr pē mē ho mex o ri apa. Nhūm Tirtūm mē hā mē apumu nē mē amā mēmoj nhōr rāhā nē. Ka mē amnhī pyrā nē mē kêp amrakati xwÿnhjê mā hkwÿ nhōr o apa.

¹¹Koja Tirtūm mē ato mex rax nē ka mē anhō mēmoj rax nē. Ja o amnhī xwar mē kêp amrakati xwÿnhjê kaxyw kàxpore hkwÿ jaxwÿ. Kêr pa mē amā hkwÿ jamÿ nē ma Tirtūm kôt mē pahkwÿjê mā o mō nē mē kām kugō kê mē omu nē hkīnh nē. Nē mē atā Tirtūm mā mex o mex ā harē.

¹²Hāmri nē mē akukwak ri mex nē ri pa. Nē axpēn mā Tirtūm mex o mex ā harēnh o ri pa.

¹³Koja mē amnhī tā mē apumu nē hkīnh nē. Hāmri nē Tirtūm mā amnhī tā tanhmā mē ajarēnh to nē kām: —Pa Tirtūm. Nà ām hāmri na pre Korīt kām akôt mē ixkwÿjaja amnhī jarē. Na htem akôt pix mā amnhī nhīpêx mex o ri

pa. Jao mẽ ixpê õxỳ hkêt nẽ mẽ inhmã kàxpore hkwỳ nhõr rax nẽ. àmnhĩx ri hamakêtkati nẽ mẽ inhmã hkwỳ nhõr rax nẽ. No ãm mẽ papxipix na htem ã mẽ inhĩpêx anhỹr kêt nẽ. Na htem mẽ kêp amrakati xwỳnh piitã ã mẽ hipêx anhỹr o pa. ãm hãmri na ka pre tanhmã mẽ hkrã hto nhũm mẽ anhỹ hã ã amnhĩ nhĩpêx anhỹr o pa. Amex o amex Tĩrtũm. Anẽ.

¹⁴Hãmri nẽ mẽ ato hwỳr o: —Pa Tĩrtũm. ãm hãmri na hte Korĩt nhõ xwỳnhjaja amnhĩ pyrã nẽ mẽmoj to mẽ ixkutã nojarêr o pa. Jakamã aa mẽ ixte amnhĩ tã mẽ inhno ho mẽ omunh kêt tã mẽ inhmã mẽ hkĩnh nẽ. Kwa kêt ka mẽ ixtã mẽmoj to mẽ kutã anojarêr rãhã ho apa Tĩrtũm. Anhỹr o mẽ ato kuwỳ.

¹⁵Tĩrtũmja mex o mex. Nom na hte mẽ pahto mex pê mẽ pamã kàxpore nhõr kêt nẽ. Kra Jejusja na pre mẽ pamã kugõ. Kãm mẽ pajapê ho mẽ pahwỳr kumẽ nhũm mẽ pahwỳr wrỳ nẽ mẽ pahpiitã mẽ pahte amnhĩ tomnuj pãnhã amnhĩrer kaxyw mẽ panê ty. Ja na mex o kot mẽ pamã kàxpore nhõr jakrenh. Mẽhõ koja uràk nẽ ã mẽ panê htyk anẽ? Nà amrakati ho amrakati. ãm Jejus pix na pre ã amnhĩ nhĩpêx anẽ.

Sikũn Korĩt 10

Pawre kêp Tĩrtũm Karõ nhỹ hã kapêr xwỳnh ã harênh

Epes 6.10-20; Wam Tesarõn 5.8

¹E Kris kôt ixkwỳjaja. Nà ixpê Pawre kot paj mẽ akwỳ kot tanhmã ixto kapêr to xwỳnhjê mã amnhĩ jarẽ ka mẽ apiitã inhma. Nà na hte Kris mẽ pakamã gryk tokyx anhỹr kêt nẽ. Na hte mẽ pahto mex japjê nẽ. Tã inhmã uràk nẽ ã mẽ anhĩpêx anhỹr prãm nẽ. No na hte mẽ akwỳjaja axpên mã tanhmã ixto kapêr punuj to nẽ ri axpên mã: —Pawre na hte nhỹri krĩ kamã pa nẽ mẽ pamã kagà nhĩpêx nẽ mẽ pahwỳr kurẽ nẽ kamã mẽmoj tã mẽ pamã kapêr kãm hihtỳx nẽ hã mẽ pamã akir. Tã amnẽ mẽ pahwỳr mõ hãmri nẽ te kãm mẽ pahpyma pyrãk o mẽ pamã kapêr o pa. Anhỹr o ijarẽ.

²Nom inhmã mẽ awỳr inhmõr nẽ mẽmoj tã mẽ amã ixàkjêr prãm kêt tã kot paj nhỹrmã mẽ awỳr mõ ka mẽ tanhmã amnhĩ tomnuj to ho apa japêr. Pa ja hã mẽ apumu nẽ hã mẽ amã akir kãm ga.

³Na pa htem jar pika ja kamã Tirtũm kwỳ hkêt xwỳnhjê kaêx ã ri ixpa nom mẽ uràk nê amnhĩ krã hkôt tanhmã amnhĩ nhĩpêx to ho ixpa hkêt nê. Nê mẽ uràk nê amnhĩ krã hkôt tanhmã ijamaxpêr to ho ixpa hkêt nê. Na pa htem Tirtũm Karõ nhỹ hã àhpumunh xà ho amnhĩ nhĩpêx o ri ixpa.

⁴Nê Tirtũm xàhpumunh tỳx xà ho mẽ kãm kapêr jarênh o ri ixpa. Mẽ kot mar nê hkôt amnhĩ nhĩpêx kaxyw. Nê àhpumunh tỳx o na pa htem mẽ kot Tirtũm kôt amnhĩ xunhwỳr pymaj mẽ kêp àmnàr xwỳnhjaja tanhmã mẽ nê mẽ ho.

⁵Na htem htỳx ri tanhmã Tirtũm nê hkwỳjê mã kapêr to ho pa. Amnhĩ kaxyw hkôt mẽ hamaxpêr kêt kaxyw tanhmã nê mẽ kãm kapêr to. Na pa htem ja hã mẽ omu nê Tirtũm xàhpumunh tỳx xà ho tanhmã mẽ kãm ixkapêr to nhũm mẽ tee ri inhma nê axte mẽ kêp àmnàr kêt nê. Pa mẽ kãm Tirtũm kapêr jarê nhũm mẽ ohtô nê kuma nê Kris kôt amnhĩ xunhwỳ nê hkôt amnhĩ nhĩpêx o pa.

⁶Tã mẽ kajaja kot kaj mẽ Tirtũm kôt amnhĩ nhĩpêx mex tã mẽ atõ ra kapêr nhĩrôp xa nê tanhmã amnhĩ tomnuj to. Pa ja hã apumu rỳ hã ajarênh ma nê hã amã akir.

⁷Mẽ ate Tirtũm kot mẽ awỳr inhmênh kêt ã axpên mã ijarênh tã kot kaj mẽ atõ ãm hãmri apê Kris kwỳ hã amnhĩ pumu nê ra mãănên pa ixpê hkwỳ hã ixpumunh kurê kumrêx. Mẽ apyrà nê ixpê hkwỳ kênã.

⁸Na pa pre ma mẽ awỳr mỗ nê tanhmã mẽ amã amnhĩ jarênh to nê mẽ amã: —Tirtũm na pre mẽ awỳr inhmê pa mỗ. Ixte ỹ hã mẽ amã kapêr jarênh o ri mẽ akôt ixpa kaxyw. Anê. Tã pa hte arĩ ã amnhĩ jarênh anhỹr o ri ixpa. ãm hãmri na pre Tirtũm mẽ awỳr inhmê pa hte ãm hãmri mẽ amã kapêr jarênh o ri mẽ akôt ixpa. Na pa hte Tirtũm nhỹ hã mẽ amã ixkapêr nê kapêr o ixêx o amnhĩ to jarkrar kêt nê. Ixte tanhmã mẽ atomnuj to ho ri ixpa kaxyw na pre Tirtũm mẽ awỳr inhmênh kêt. Mẽ amã ixkapêr mex nhũm mẽ ate inhmar nê Kris kapêr kôt amnhĩ nhĩpêx mex o apa kaxyw na pre mẽ awỳr inhmê.

⁹E kwa Kris kôt ixkwỳjaja. Na pa hte mẽ amã ixpuma kaxyw mẽ awỳr kagà rēnh kêt nē. Mẽ ate kamã harēnh nē tee ri amnhĩ kukamã ajamaxpēr o amnhĩ kamã amã ma kaxyw kêt.

¹⁰Mẽ akamã mẽ kãm ixkĩnh kêt xwỳnhjaja na htem ijarēnh o: —Pawre na hte awry hã pa nē mẽ pahwỳr kagà rēnh nē kamã te kēp pahi ho amnhĩ nhĩpēx pyrà nē mẽmoj tã mẽ pamã kapēr kãm hihtỳx nē. Tã mẽ pahwỳr pōj hãmri nē kapēr kaxyw nom kapēr kãm hihtỳx o kapēr kêt nē. Jakamã mo kaxyw kot puj mẽ hwỳr mra nē kapēr ma? Anhỳr o ijarē.

¹¹Nom ã ixte anhỳr kêt. Kwa mẽ inhma. Kot paj nhỹrmã ma mẽ awỳr mō hãmri nē te kagà ja kamã mẽ amã ixkapēr pyræk o mẽ amã ixkapēr nē ixkapēr xihtỳx o mẽ amã ixkapēr kãm ga.

¹²Na hte mẽ akwỳjaja kot amnhĩ to mex o mẽ ajakrenh ã amnhĩ to jarkrar o ri pa. No ãm amnhĩ krã hkôt pix mã na htem ã ri amnhĩ jarēnh anē. Na hte Tĩrtũm ã mẽ harēnh anhỳr kêt nē.

¹³Tã inhmã mẽ uræk nē ã amnhĩ jarēnh anhỳr prãm kêt. ãm ixte Tĩrtũm kot tanhmã inhmã karō hto xà hkôt amnhĩ nhĩpēx o ixpaja na inhmã hprãm. Tã mẽ kajaja mẽ awỳr na pre inhmē.

¹⁴Ra kot mẽ awỳr inhmēnh jakamã ixkumrēx na pa pre mẽ awỳr mō nē mẽ akôt ri mẽ amã tanhmã Kris jarēnh to ho ri ixpa. Tĩrtũm kãm nhỹhỹm ixpa hprãm xà pix wỳr na inhmã ixpa hprãm.

¹⁵No kêt mẽ kot amnhĩ krã hkôt htỳx ri Tĩrtũm kapēr jahkre o mẽ pa xwỳnhjaja na htem nhỹri krĩ kamã mẽ kot Kris kôt amnhĩ xunhwỳr ã mẽ harēnh ma nē mẽ hã amnhĩ to jarkrar o ri pa. Te tãm kot mẽ hwỳr mōr nē mẽ kãm ujarēnh nhũm mẽ kot mẽ mar xà hkôt Kris kôt amnhĩ xunhwỳr pyræk. Nē mẽ hã amnhĩ to jarkrar o: —E na pa pre ma mẽ hwỳr mō nē mẽ kãm Tĩrtũm kapēr jarē nhũm mẽ inhma nē hkôt amnhĩ xunhwỳr kurē kumrēx. Ixkukwak ri na prem ã amnhĩ nhĩpēx anē. Anē. Nom ã amnhĩ nhĩpēx anhỹrja ã amnhĩ to hēx. No pa na pa hte ho mẽ uræk kêt nē. Koja Tĩrtũm ma nhỹri krĩ hwỳr ixkwỳjê hō mẽ nhũm ma hwỳr mō nē mẽ kãm Kris kapēr jarē. Hãmri nhũm mẽ kuma nē Kris kôt amnhĩ xunhwỳ. Pa mẽ

harēnh ma nē mē ŷ hā ixkīnh nē nom pa ixkukwak ri mē kot hkôt amnhī xunhwÿr ã amnhī to jarkrar kêt nē. Ixte mē hwÿr ixpa nē mē kām ixujarēnhre hā kot pa hkêt mē hā amnhī to jarkrar. Ām Tirtūm kām nhÿhÿm ixpa hprām xà pix wÿr na pa hte ixpa nē mē kām kapēr jarē. Jakamā kot kaj mē nhÿrmā Kris kôt amnhī nhÿpêx mex o ri apa pa ja hā mē apumu nē mē are nē hpānhā ma krī hō hwÿr Kris kot mē hwÿr inhmēnh xà hō hwÿr mō. Ka mē ja hā ixto Tirtūm wÿr o apa.

¹⁶Kot paj mē anhō krī kamā mē piitā mē kām Jejus kapēr jarēnh pa hāmri nē hpānhā ma krī hkwÿr hkôt ijapôx o ri ixpa nē kamā mē kām harēnh o ri mē hkôt ixpa. Kormā aa mē kot mar kêt kumrêx xwÿnhjê mā harēnh o ri mē hkôt ixpa. Na pa hte ã mē hwÿr ixpa nē mē kām ixujarēnh anē. Jakamā nhÿm mē ja hā ixpumu nē mē kot Tirtūm kapēr mar xwÿnhjê pix wÿr ixpa hā ijarēnh kêt nē.

¹⁷Nē Tirtūm kapēr ã kagà htūm kot mēmoj tā mē kot amnhī to jarkrar ã harēnh kot: Kêr ka mē kamjaja amnhī mex ã amnhī to jarkrar kêt nē. Ām Tirtūm pix mā mǎn mex o mex ã harēnh o ri ho jarkrar o ri apa. Anē.

¹⁸Kot pu mē Tirtūm noo mā amnhī to mex ã amnhī to jarkrar nē ãm amnhī to jarkrar kaprÿ. Nom koja Tirtūm tām ja hā mē pahto jarkrar nē ãm hāmri mē pahte amnhī to mex xwÿnh ã pahto jarkrar.

Sikūn Korīt 11

Jejus kot mē hwÿr mē rēnh ã amnhī to hêx xwÿnhjê jarēnh

Matêwre 7.15; Rômān 16.17; Karatas 1.6-9; Korosê 2.8; Sikūn Pêtre 2.1

¹E kot paj te mē hkrā pipānh xwÿnh kot htÿx ri amnhī jarēnh pyrāk o tanhmā mē amā amnhī to jarkrar to. Kwa mē inhma nē ixkamā agryk kêt nē. No mē ixkapēr kumrêx mǎn ma.

²Inhmā mē akīnh. Te ho Mēpahpām Tirtūm kām mē akīnhhta pyrāk. Te mē apê mēhō kukrit kām my hkīnh nē kot ho mjên prām xwÿnhhta pyrāk. Kām mēmyjê piitā mē hkīnh kêt ãm kām pix kīnh. Ja pyrā nē kêr ka mē amā Kris kīnh o nhām amā mē hkīnh xwÿnhjê jakre. Te ho mēhō ni kot kām myta pix kīnh nē kām ho mjên prām xwÿnhhta pyrāk. Ja na pa inhmā hprām.

³Ra mẽ amã Kris kĩnh tỳx o apa nẽ hkôt amnhĩ nhĩpêx mex o ri apa htã nhũm mẽ kot amnhĩ krã hkôt htỳx ri Tĩrtũm kapêr jahkre ho mẽ pa xwỳnhjaja tee ri ja hã mẽ ajarênh ma nẽ axpẽn mã mẽ ajarênh o: —Kwa nà ja mex kêt. Koja mẽ Pawre kapêr ma nẽ ãm kuma nhũm ja mex nẽ. No mẽ pahkôt mẽ kot amnhĩ nhĩpêxja na mẽ pamã mex. Ja na kêt mẽ pamã mex o mex. Anẽ. Hãmri nẽ ra kot Kris nê tanhmã mẽ amã hêx to kaxyw. Te amnepê mã kagã kot mẽ panã kot wa pê Ewa mã hêx nhũm kot mar nẽ hkôt amnhĩ nhĩpêxta pyræk.

⁴Na pa pre ra mẽ awỳr mỗ nẽ mẽ amã tanhmã Jejus jarênh to. Nẽ tanhmã mẽ amã Tĩrtũm Karõ jarênh to. Nẽ tanhmã wa kot mẽ pahto hkra hto hã mẽ amã wa harẽ ka prem inhma nẽ mar tỳx nẽ. Tã nhũm ra mẽ kot htỳx ri Tĩrtũm kapêr jahkre xwỳnhjaja ixpãnhã mẽ awỳr mỗ nẽ Jejus kapêr kwỳm ri tanhmã mẽ amã ujarênh to nẽ mẽ amã harênh o hêx rãhã ho pa. Nẽ Tĩrtũm Karõja nhũm mẽ amã tanhmã ho hêx to. Nẽ ixte mẽ amã Tĩrtũm kapêr jarênh kwỳm ri ixpãnhã tanhmã mẽ amã harênh to ho pa. Na ka prem mẽ ama nẽ ãm hãmri harênh ã hkamnhĩx. Kwa kêt ka mẽ ri mẽ ujarênh piitã mar nẽ hkôt amnhĩ nhĩpêx kêt nẽ. Mẽ kot Jejus jarênh tã no ãm katàt kôt harênh kêt nẽ. ãm ri ho hêx o pa. Ka htem ama nẽ ãm hãmri harênh ã hkamnhĩx nẽ mẽ amã mẽ mar prãm nẽ. Mẽ kot mẽ amã harênh o hêx o pa htã ka mẽ ama nẽ ra mẽ hkôt amnhĩ nhĩpêx kaxyw. Kwa mẽ ri ã amnhĩ nhĩpêx anhỳr hkêt nẽ.

⁵Kris kot mẽ awỳr mẽ rênh ã mẽ kot amnhĩ jarênh tã amnhĩ to hêx. Ka prem ama nẽ ãm hãmri mẽ kot mẽ amã harênh ã mẽ hkamnhĩx. Nom na pre Krisja mẽ awỳr mẽ rênh kêt nẽ. Kêt pa na pre mẽ awỳr inhmẽ.

⁶Mẽ hkĩnhã ixkapêr krór pyræk tã no ãm ixte Tĩrtũm kapêr mar tỳx. Nẽ kot amnhĩ nhĩpêxja na ixte omunh par. Ra mẽ ate ja hã ixpumunh mex.

⁷Na pa pre mẽ akôt ri mẽ amã Jejus jarênh o ri ixpa no ãm hpãnhã mẽmoj tã mẽ awỳr o ri ixpa hkêt nẽ. Xà amarĩ ixte mẽ amã harênh nẽ hpãnhã mẽmoj tã mẽ awỳr kêtja mẽ apê omnuj?

8-9Kormã ixte mẽ amã Tĩrtũm kapẽr jarẽnh o ri ixpata ã na pa pre hte tõhã kàxpore ho presija no ãm aa hã mẽ awỳr kêt nẽ. Jar Masetõn kamã Kris kõt mẽ pahkwỳjaja na prem ixwỳr hkwỳ rẽnh o pa pa ho ixàpkur xà japrõr o ri mẽ akõt ixpa. Mẽ kumã ixte Tĩrtũm kapẽr jarẽnh o ri ixpa hkõt tã pa hte mẽ kukwak ri mẽ akõt ho ixàpkur o ri ixpa. Tã kot paj arĩ ã mẽ akõt ixpa nẽ ã amnhĩ nhĩpêx anẽ nẽ mẽmoj tã mẽ awỳr o ri ixpa hkõt nẽ.

10Ja inhmã mex. Jakamã kot paj amarĩ mẽ anhõ pika pê Gres kãm ã mẽ amã Tĩrtũm kapẽr jarẽnh o ixpa anẽ nẽ mẽmoj tã mẽ awỳr kêt nẽ. ãm hãmri na pa ã mẽ amã amnhĩ jarẽnh anẽ. Kris pyrã nẽ ixêx kêt kênã.

11Xà we inhmã mẽ akĩnh kêt kõt na pa hte ã mẽ amã Tĩrtũm kapẽr jarẽnh pãnhã mẽ awỳr kêt anẽ? Nà inhmã mẽ akĩnh jakamã na pa hte kapẽr jarẽnh pãnhã mẽ awỳr o ri ixpa hkõt nẽ. Inhmã mẽ akĩnh tỳx kênã. Tĩrtũm kot ja hã ixpumunh mex.

12No mẽ kot amnhĩ krã hkõt htỳx ri Tĩrtũm kapẽr jahkre xwỳnhjaja na htem mẽ ajahkre hpãnhã kàxpore hã mẽ awỳr pix o pa. Nẽ mẽ amã tanhmã amnhĩ to hêx to nẽ mẽ amã: —Nà mẽ ixte Pawre kot amnhĩ nhĩpêx pyrãk. Mẽ ixte amnhĩ nhĩpêxja kot axpẽn pyrãk. Anhỳr o mẽ amã amnhĩ to hêx. Nom ixte ho mẽ uràk kêt kumrêx. Mẽ ixte amnhĩ nhĩpêx kot axpẽn pyrãk ronhỹx pa mẽ uràk nẽ kàxpore hã mẽ awỳr o ri ixpa. Nom ixte ã amnhĩ nhĩpêx anhỳr kêt. Kot paj aa ã amnhĩ nhĩpêx anhỳr o ixpa hkõt nẽ.

13Ã mẽ kot amnhĩ nhĩpêx anhỳr xwỳnhjaja na pre Tĩrtũm mẽ awỳr mẽ rẽnh kêt nẽ. Mẽ kot Kris nhỹ hã mẽ ahkre xwỳnh ã amnhĩ jarẽnh tã ãm amnhĩ to hêx.

14Mẽ õ pahi Satanastija te mẽmoj mex jarẽnh pyrãk tã no ãm na hte mẽ pano kupyrr pê mẽ pamã tanhmã hêx to ho mẽ pahkõt pa. Te kot mẽmoj mex ã ãm hãmri kot harẽnh pyrãk tã no ãm ho hêx.

15Tã hkõt mẽ kot amnhĩ nhĩpêx xwỳnhjaja na htem uràk nẽ te tãm mẽ kot amnhĩ nhĩpêx xwỳnhjê pyrã nẽ mẽ pahwỳr mra nẽ tanhmã mẽ pamã hêx to.

Satanasti pyrà nẽ mẽ pano kupyw tanhmã mẽ pamã hêx to. Nom koja Tirtũm nhỹrmã mẽ pahtã mẽ homnuj tỳx kumrêx nhũm mẽ rĩ amnhĩ pumu.

Tanhmã mẽ kot Kris ã Pawre nhĩpêx to ã mẽ harênh

Atre 9.23-25

16E kot paj axte te ixtỳx ri amnhĩ to jarkrar pyràk o mẽ amã tanhmã amnhĩ jarênh to ka mẽ inhma nẽ ixkamã agryk kêt nẽ.

17Pahihti Kris nhỹ hã kot paj mẽ amã amnhĩ jarênh kêt ãm amnhĩ krã hkôt kot paj mẽ amã amnhĩ jarẽ.

18Na htem ohtô nẽ mẽ ate mẽ hã apijaàm kaxyw tanhmã mẽ amã amnhĩ to jarkrar to ho pa. Tã kot paj mẽ uràk nẽ amnhĩ krã hkôt mẽ amã amnhĩ to jarkrar ka mẽ inhma.

19Mẽ ate amnhĩ xàhpumunh tỳx ã amnhĩ jarênh tã ka htem htỳx ri mẽ kot amnhĩ to jarkrar o ri mẽ pa xwỳnhjê kapêr ma nẽ mẽ hkôt ajamaxpêr nẽ mẽ hkôt amnhĩ nhĩpêx kurê kumrêx.

20Mẽ kot Kris nhỹ hã mẽ ahkre hã amnhĩ to hêx xwỳnhjaja mẽ pakurom mẽ kot amnhĩ to rax xwỳnh ã amnhĩ jarênh jakamã na htem mẽmoj tã mẽ amã karõ ho pa. Nẽ mẽ kãm hprãm xà hkôt nhỹhỹm mẽ arẽ nẽ nhỹhỹm mẽ arẽ. Nẽ mẽ apa pix kukwak ri apkur o pa. Nẽ mẽmoj tã mẽ ajakwap mẽ atak o pa. ã mẽ kot mẽ anhĩpêx anhỹr tã ka te mẽ ate atũm kêt pyrà nẽ atỳx ri mẽ kapêr ma nẽ mẽ hkôt amnhĩ nhĩpêx o ri apa.

21Tã ixte mẽ uràk nẽ ã mẽ anhĩpêx anhỹr kêt tã kot paj mẽ uràk nẽ mẽ amã tanhmã amnhĩ to jarkrar to ka mẽ inhmar japêr. Te ixtỳx ri amnhĩ jarênh pyràk o kot paj mẽ amã amnhĩ jarẽ nom ãm hãmri mẽ amã amnhĩ jarẽ.

22Mẽ kot Jejus nhỹ hã mẽ ahkre hã amnhĩ to mẽ hêx xwỳnhjaja na htem mẽ amã tanhmã amnhĩ to jarkrar to nẽ mẽ amã: —E mẽ inhma. Mẽ ixpê Ijaew na pa mẽ. Mẽ arom mẽ ixpê finat Apraãw kanrêhã htàmnhwỳ jakamã kwa mẽ ixkapêr ma nẽ mẽ ixkôt amnhĩ nhĩpêx. Anẽ. Nom ijaxwỳja ixpê Ijaew tã pa hte mẽ uràk nẽ ja hã amnhĩ to jarkrar hkêt nẽ.

23Nẽ mẽ kot Kris kapêr jarênh mex o pa hã amnhĩ jarênh tã pa na pa hte harênh mex o mẽ hakre. Te ixkrã pipãnh pyràk o ã mẽ amã amnhĩ jarênh

anhÿr tãã. E pa mẽ amã tanhmã amnhĩ jarënh to ka mẽ inhma. Nà na pre Kris ã mẽ kãm ixkurê xwÿnhjaja mẽ kot amnhĩ to jarkrar xwÿnhjê hkĩnhã Kris ã ixpynênh nê ijagjênh xohtô nê. Nê mẽ hkĩnhã tõiã ixtak rũnh kumrêx. Pa mẽ hkĩnhã xatã mẽ kot tanhmã ixto hã kritpêm ronhÿx pa pre ty.

²⁴Na pre Ijaew krãhtũmjaja Kris ã ixkatut kãm ixtak rũnh nê. Nê ixtak xàja pĩ hã mry kà janhôr o ixtak. Nê ixtak kaxyw nê ixtak xà jatur xà kamã kàx xwa gixre janhô nê ho ixtak rũnh o ixkatut kà rê. Ixtak o 39 hãmri nê rĩ kormã mẽ kot ixpĩr pymaj inhmã ure. Na pre htem nhÿri ixpynê nê ã inhĩpêx anê. Na prem ã inhĩpêx anhÿr o 5 wês.

²⁵Nê na prem ra mẽ kot ixpĩr kaxyw nê kën rũnh kwÿ jamÿ nê ho ixtak o kuhê. Nê Rõm nhõ xwÿnhjaja haxwÿja pĩ ho ixtak rax kumrêx. ã inhĩpêx anhÿr o axkrunêpxi. Nê na pa pre hte gô xujanãr kãm nhÿhÿm Jejus jarënh o ri ixpa kaxyw pàr kãm mẽ hwÿr ixpa nhũm pàrja tanhmã amnhĩ to nê agjê. Kritpêm nhÿx pre hte gõiã ixpĩ. Pa pre ã amnhĩ nhĩpêx anhÿr o axkrut. Tã arĩgro hõ hã kê axte pàr õ mã axà nê ma axte krĩ hõ hwÿr mõi. Nhũm kê pàrta axte mẽ ixpê axà nhũm gõiã nhÿx kê axte ixpĩ. Pa pàr jakà hã kumÿ nê hã ijêt o amÿkry. Nê ho apkati. Tã nhũm nhÿhÿnh pàr õja mõi nhũm kamã mẽ mõi xwÿnhjaja ixpumu nê ixwÿr pàr o mõi nê amnhĩ wÿr ixto api nê ma amnhĩ kõt ixto mõi.

²⁶Na pa pre amnhĩ xà htÿx kamã ijamak o ri ã mẽ kãm Kris kapêr jarënh o ri ixpa anê. Kironhÿx pre gõiã tãmja ixpĩ. Nhũm mẽ àhkĩnh nhi xwÿnhjaja kironhÿx prem mããnnênh ixpĩ. Nê Ijaew nê Ijaew kêt xwÿnhjaja tõiã tanhmã ixtomnuj to ho pa. Pa pre krĩ hkwÿ hwÿr ixpa rÿ kapôt ã ixpa nhũm mẽ ixtã amÿnê. Pa pre gõiã xujanãr kãm pàr kãm ri ixpa nê nhÿx kamã ty. Nhũm mẽ kêp Kris kwÿ hã amnhĩ to hêx xwÿnhjaja haxwÿja tanhmã ixtomnuj to pa mẽ ÿ hã amnhĩ xà htÿx kamã ijamak o ri ixpa. ã na prem Kris ã inhĩpêx anhÿr o pa.

²⁷Nê na pa Jejus kapêr jarënh o ri ixpa kurê ixkëngrà nê ri ixpa. Nê tõiã inhõt kêt ã ixtã apkati. Nê tõiã inhmã prãm nê inhmã kôr nê ri ixpa. Nê tõiã ixê mex kêt nê inhmã kry nê ri ixpa.

²⁸Na pa hte Kris kapër jarēnh o ri ixpa pē ã amnhĩ nhĩpêx anē. Nom ja pix kêt. Na pa hte krĩ piitã hkôt Kris kwỳjê hkukamã tee ri ijamaxpēr nē ijamaxpēr o: —Hêxta waa nē. Mãn mẽ arĩ Kris kôt amnhĩ nhĩpêx mex japêr rỳ ko. Mãn mẽ ra kapër kwỳm ri tanhmã amnhĩ tomnuj to rỳ ra hkaga. Anhỹr o ijamaxpēr o ixpa.

²⁹Nē na hte mēhō Tĩrtũm kapër nhĩrôp xa nē tanhmã amnhĩ tomnuj to pa tee ri omu nē ixkaprĩ htỳx kumrêx. Kojã mēhō tanhmã Tĩrtũm nē mēhō mã kapêr to nhũm kuma nē Tĩrtũm kôt amnhĩ nhĩpêx kêt pa tee ri ja hã omu nē nē kêp àmnàr xwỳnhhta kamã inhgryk tỳx kumrêx.

³⁰E Kris kôt ixkwỳjaja. Na pa ã mẽ amã amnhĩ jarēnh anē. Te ixte amnhĩ to ijarkrar pyràk no ãm mẽ ate ixirerek xwỳnh ã ixpumunh pix kaxyw.

³¹Ãm hãmri na pa ã mẽ amã amnhĩ jarēnh anē. Ixêx kêt. Pahihti Jejus nhĩpêxà Tĩrtũm kot ja hã ixpumunh mex. Tĩrtũmja mex o mex. Kojã mex o mex tũm nē pa rãhã ho pa. Tãm kot ixirerek ã ixpumunh mex.

³²Kormã krĩ pē Tamas kãm ixpare ri na pre mẽ õ pahi Arêtja mẽ kãm ixtã amỳnê nhũm pôristijaja krĩ hpu hã kahê xà nhõ hakwakre piitã kãm hipôk pa nē ixkãm hamak o kuhê. Pa tee inhmã nhỹhỹnh ixkator nē ma mẽ umaj ixprôt nē ixtēm prãm nē ixirerek xwỳnh ã amnhĩ pumunh kurê kumrêx.

³³Tã nhũm Kris kôt mẽ pahkwỳjaja hamaxpēr nē kawà rax mỳ nē o tē nē inhmã ãm pa hwỳr axà nē kamã nhỹ. Hãmri nhũm mẽ pàr nhõr o kahê nhĩrô pē ixto wrỳ pa ixkato nē mẽ kêp amũxu nē amnhĩm ixprĩ nē ma tē nē mẽ kêp akunok. ã na pre Tĩrtũm ixirerek xwỳnh ã inhmã ixto amnhĩrĩt anē.

Sikũn Korĩt 12

Tĩrtũm kot Pawre mã mẽmoj to amnhĩrĩt ã harēnh

¹E Kris kôt ixkwỳjaja. Nà inhmã amnhĩ to jarkrar hprãm kêt tã kot paj tanhmã mẽ amã amnhĩ jarēnh to ka mẽ inhma nē hã ixtã apijaàm japêr. Na hte Tĩrtũm tōhã inhôt kãm ixkarõ mã tanhmã kapêr to.

²⁻³Amnepê mã amgrà hõ hã na pre tanhmã ixkrã hto nē õ krĩ hwỳr amnhĩ wỳr ixto api. Na pre ra hã amgrà pē 14 ãn. Apu inhĩ rãhã ixto api rỳ apu ãm

ixkarõ pix o api rỳ ko. Ixte ja hã amnhĩ pumunh mex kêt. Tĩrtũm pix kot ja hã ixpumunh.

⁴Na pre ixto api pa pøj nẽ õ krĩ kamã axtem tanhmã mẽ kapër to hã mẽ kuma. Na prem mẽmoj mex kumrẽx jarẽ pa kuma nẽ ixkĩnh nẽ. Nẽ inhmã mar prãm nẽ. Hãmri nẽ ijamaxpër o: —Hêxta waa nẽ. Mẽmoj jarẽnhja mex kumrẽx. Nà kot paj akupỹm wrỳ nẽ ixkwỳjê mã harẽ kê mẽ ixpyrà nẽ kuma. Nà kot paj anẽ. Anhỹr tã nhũm Tĩrtũm Karõ ja nê ixkurê nẽ inhmã: —Nà kêr ka mẽ kãm ja jarẽnh kêt nẽ. ãm kapxipix kot kaj ama nẽ ri hã apa.

⁵Anhỹr jakamã pa pre paxipix mẽ arom mẽmojja pumu nẽ kuma nom kot paj ri hã amnhĩ to jarkrar kêt nẽ. Kot paj ãm Jejus pix tanhmã harẽnh to ho ri ixpa. Jao ixrom mex o mex ã harẽ. Nẽ ixrom hihtỳx o hihtỳx nẽ àhpumunh o àhpumunh ã harẽnh o ri ixpa.

⁶Nẽ ixte Tĩrtũm nhõ krĩ hwỳr ixàpirja ãm hãmri ixte hã amnhĩ jarẽnh tã kot paj ja hã amnhĩ to jarkrar o ri ixpa hkêt nẽ. Mẽ ate ja hã inhmar kôt inhmex ã ijarẽnhja na inhmã hprãm kêt. Nom kot ka mẽ ixte tãm amnhĩ nhĩpêx ã ixpumu nẽ tãm ixkapër ã inhma hãmri nẽ rĩ kormã inhmã inhmex ã ijarẽ. ã mẽ ate amnhĩ nhĩpêx anhỹrja na inhmã hprãm.

⁷Na pre Tĩrtũm inhõt kãm inhmã mẽmoj mex kwỳ jarẽnh rax nẽ. Hãmri nẽ hpãnhã inhmã: —E na ka akwỳjê rom inhõ krĩ hwỳr api nẽ mẽ kurom mẽmoj mex pumunh rax nẽ. Tã ate ja hã amnhĩ pumunh nẽ ma mẽ kãm hã amnhĩ to jarkrar o ri apa pymaj kot paj Satanasti mã anẽ nhũm inhma nẽ tanhmã atomnuj to ho pa. Nom ijamaxpër xà hkôt koja ã anhĩpêx anẽ. Anhỹr jakamã nhũm tanhmã inhĩpêx to pa inhmex kêt nẽ ixpa. Te mrõnhĩ rax nhỹhỹnh kot ixkamnhwỳr nhũm inhmã tee ri hkaxàr prãm kaprỳ nẽ ỹ hã ho inhgỳx rãhã nẽ ixpaja pyræk.

⁸Tã pa tee ri ja hã amnhĩ pumu nẽ amnhĩ to Jejus wỳ nẽ kãm: —Kwa Pahihti. Na pa ra mẽmojta nhỹ hã ixpunuj nẽ ixirerek nẽ ixpa. Kwa inhnê ata pa akupỹm ixihỳx nẽ ijamakêtkati nẽ ri ixpa nà? Anhỹr o amnhĩ to hwỳr o axkrunẽpxi.

⁹Hāmri nhūm inhmā: —Nà kot paj anê hyr kêt nê. Kot paj ãm akutã inhnojarêt rãhã ho ri akôt ixpa. Ka axirerek nê apa htã ixihyt̃x xwỳnh ã ixpumunh kôt ixkamnàrom tanhmã inhỹ hã amnhĩ nhĩpêx to ho ri apa. Anê. ã inhmã kapêr anhỹr jakamã na pa ixpunuj nê ri inhĩrot nê ixpa htã ixrom hiht̃x xwỳnhhta nhỹ hã ixkĩnh nê ixpa. Nê kurom ixirerek xwỳnh pix ã amnhĩ to jarkrar o ri ixpa.

¹⁰Jakamã kot paj Kris ã ixpunuj nê ri ixpa htã ixkĩnh nê ijamakêtkati nê ri ixpa. Kwār mẽ māmĩrĩ hã tanhmã ixto kapêr to nê tanhmã hã inhĩpêx to pa amnhĩ xà ht̃x kamã ijamak o ri ixpa. Nê ixpê amrakati nê inhĩrot nê ri ixpa htã Kris nhỹ hã tanhmã kãm amnhĩ nhĩpêx mex to rãhã ho ri ixpa.

Pawre kot tee ri mẽ hkukamã hamaxpêr ã harênh

¹¹Tã mẽmo kaxyw na pa ã mẽ amã amnhĩ jarênh anê? Nà mẽ ate ixtã apijaàm kêt jakamã na pa ã mẽ amã amnhĩ jarênh anê. Mẽ kêp Kris nhỹ hã mẽ ajahkre xwỳnh ã amnhĩ to hêx xwỳnhjaja na ka htem ixrom kot amnhĩ to rũnh xwỳnh ã mẽ harê nê mẽ hã apijaàm o ri apa. Nom ixte amnhĩ to grire xwỳnh tã mẽ kot amnhĩ to rũnh o ijakrenh kêt.

¹²Na pa pre mẽ akamã ri ixpa nê Tĩrtũm nhỹ hã aa mẽ ate mẽmoj pumunh kêt kwỳ ho anhỹr rax o ri mẽ akôt ixpa. Nê ỹ hã akupỹm mẽ à xwỳnhjê ho mex. Nê mẽ nohkre xwỳnhjê no ho mex. Na pa pre hte ã mẽ amã mẽmoj nhĩpêx anhỹr o ri mẽ akôt ixpa. Amnhĩ xà ht̃x kamã ijamak o ri ixpa htã Tĩrtũm xiht̃x xà ho amnhĩ to ht̃x nê ã mẽ amã mẽmoj to anhỹr o ri mẽ akôt ixpa. Mẽ ate omunh nê Tĩrtũm àhpumunh t̃x ã omunh kurê kumrêx kaxyw. Nê ixpê Kris nhỹ hã mẽ ajahkre hã ixpumunh kurê kumrêx kaxyw na pa pre ã mẽ amã amnhĩ nhĩpêx anhỹr o ri mẽ akôt ixpa.

¹³Xàn pa pre nhãm krĩ hkwỹ kamã Kris kôt mẽ pahkwỳjê ho mex tã mẽ kajaja tanhmã mẽ ato mex to hkêt nê? Nà na pa pre hte mẽ anhĩpêx o axpên pyræk. ãm mẽmoj pixire na pa pre mẽ uræk nê mẽ awỳr kêt nê. Nhãm krĩ hkwỹ kamã ixpata ã na pa pre mẽmoj to presija nhūm prem inhmã òr o pa. Tã pa pre mẽ mō nê mẽ akôt ixpa nê mẽmoj to presija htã hã mẽ awỳr kêt nê. Kwa mẽ ã ixte amnhĩ jarênh anhỹrja ma nê ixkamã agryk kêt nê.

¹⁴Tã ot pa ra akupÿm mẽ awÿr inhnojarêt kaxyw. Na pa pre ra mẽ awÿr inhmôr o axkrut. Tã ra axte mẽ awÿr inhnojarêt kaxyw. Kot paj mẽ awÿr mō nē mẽ akôt ixpa nom te wam ixtēmta pyrà nē mẽmoj tã ri mẽ awÿr kêt nē. ãm mẽ amã ixkĩnh pix na inhmã hprãm. Mẽ apiitã te mẽ apê ixkra pyræk. Na hte mẽ hkrarejaja mẽ katorxà nē mẽ hipêêxà mã ujaarôr o pa hkêt nē. Mẽ hipêêxà nē mẽ katorxà na hte hkrare mã kot mẽmoj to presija xà hkôt kãm haprôr o pa nom mẽmoj tã hwÿr kêt nē. Ja pyrà nē kot paj mẽ apê ixkra pyræk ã mẽmoj tã mẽ awÿr kêt nē.

¹⁵Kot kaj mẽ mẽmoj to presija japêr nē inhmã harē pa ixàmnhĩx ixkĩnh kãm mẽ amã ixkàxpore piitã ôr par pyræk o amnhĩ nhĩpêx. Nē mẽ amã tanhmã amnhĩ nhĩpêx to ho ixpa rãhã ixtykja na inhmã hprãm. Inhmã mẽ akĩnh tÿx kumrêx tã mẽ kajaja mẽ amã ixkĩnhja mẽ atã hkwÿ jêt kêt kumrêx.

¹⁶Ixte amnhĩ mã mẽmoj tã mẽ awÿr kêt tã na hte mẽ akwÿjaja ixêx rom ixte nhãm mẽ kêp amrakati xwÿnhjê mã kàxpore hã mẽ awÿr o ixpa hã ixkamnhĩx.

¹⁷Kwa tanhmã na pa pre ri mẽ ano kupyrr to? Xà ja kaxyw na pa pre mẽ awÿr ixkràmnhwÿta wa kumê?

¹⁸Na pa pre Xitre hã ixihtÿx nē mẽ awÿr kumê. Nē Kris kôt mẽ pahtôja pa Xitre hkôt kumê nhũm wa ma mẽ awÿr mō. Tã xà na pre Xitre tanhmã mẽ ano kupyrr to? Nà na pre ã mẽ anhĩpêx anhÿr kêt nē. Tã wa ixte amnhĩ nhĩpêx nē wa ijamaxpêrja kot axpên pyræk. Nà na pa hte uræk nē mẽ ano kupyrr o ri ixpa hkêt nē.

¹⁹Mãn ka mẽ axpên mã mẽ ijarênh o: —Nà Pawre mẽ hkwÿjaja mẽ kãm amnhĩ to rũnh xwÿnh prãm jakamã na ã Pawre kagàja kamã mẽ pamã amnhĩ tã àprâr anē. Anhÿr o mẽ ijarênh japêr nom mẽ inhmã amnhĩ tã tanhmã ixàprâr to hprãm kêt. ãm mẽ inhmã mẽ akĩnh nē mẽ ato mex prãm jakamã na pa htem tanhmã mẽ amã amnhĩ nhĩpêx to ho ri ixpa. Na pa Tĩrtũm noo mã Kris nhÿ hã ã mẽ amã mẽ amnhĩ jarênh anē.

²⁰Tã kot paj jatã ma mẽ awÿr mō ka mẽ akwÿjaja tanhmã amnhĩ tomnuj to japêr. Mẽmoj tã axpên mã axàkjêr o apa. Rÿ mẽmoj tã axpên kãm agryk. Rÿ

axpën kãm agryk tokyx anhÿr o apa. Rÿ axpën pê anhõxÿ. Rÿ axpën to akapër punuj o apa. Rÿ mẽ ajakwa kamã nhãm mẽ hixi ho rêr o ri apa. Rÿ amnhĩ to rũnh prãm xàj anhmã amnhĩ nhĩpêx to ho apa. Kot kaj mẽ ã amnhĩ nhĩpêx anhÿr o ri apa pa ja hã mẽ apumu nẽ ixkaprĩ htÿx kumrêx ka mẽ tee ri amnhĩ tã ixpumu.

²¹Xà kot paj mẽ awÿr mõi nẽ mẽ apumu ka mẽ akwÿjaja arĩ mẽ aprõ kuhpa hã nhãm mēnijê ho amnhĩkati ho ri apa? Rÿ arĩ tanhmã ajamexpër punuj to ho apa? Rÿ atÿx ri apijaàm kêt o apa? Kot ka mẽ arĩ ã amnhĩ nhĩpêx anẽ pa ja hã mẽ apumu nẽ ixkaprĩ xàj inhmÿr rax nẽ. Nẽ mẽ anhÿ hã Tĩrtũm noo mã ixpijaàm tÿx kumrêx.

Sikũn Korĩt 13

Pawre kot tanhmã amnhĩ kukamã mẽ kãm karõ hto

¹Tĩrtũm kapër ã kagà htũm tanhmã mẽ kot amnhĩ tomnuj to xwÿnhjê jarēnh kot: Koja mẽhõ tanhmã amnhĩ tomnuj to nhũm mẽhõ pyxi nẽ ã amnhĩ nhĩpêx anhÿr ã omu nẽ awÿr tẽ nẽ amã harẽ ka mẽ ama nẽ ãm ama nẽ hkõt ajamexpër kêt nẽ. No koja mẽmojaja axkrut rÿ axkrunēpxi nẽ hã omu nẽ awÿr mra nẽ axpën kõt amã harẽ ka mẽ ama nẽ mẽ hkõt ajamexpër kurê kumrêx. Anẽ. Tã ra mẽ awÿr inhmõr o axkrut tã kot paj akupÿm mẽ awÿr mõi nẽ mẽ apumu.

²Hapu hã mẽ awÿr inhmõrta ã na pa pre mẽ akwÿ kot tanhmã amnhĩ tomnuj to hã mẽ omu nẽ hã mẽ kãm akir nẽ mẽ kãm: —Kot kaj mẽ amnhĩ tomnuj kaga nẽ tãm amnhĩ nhĩpêx kêt kot paj nhÿrmã akupÿn mẽ awÿr mõi nẽ ã mẽ ate amnhĩ nhĩpêx anhÿr ã mẽ apumu nẽ hã mẽ atomnuj tÿx kumrêx kãm ga. Anẽ. Jakamã kot paj mẽ ma mẽ awÿr mõi nhũm mẽ akwÿjaja arĩ mẽ ate amnhĩ tomnuj o apa hã inhmã mẽ ajarẽ pa mẽ atã mẽ kuma nẽ tanhmã mẽ ato htÿx nẽ.

³Kot kaj mẽ ja hã ixpumu nẽ aprĩ hã ixte Kris nhÿ hã ixkapër xwÿnh ã ixpumunh tÿx kurê kumrêx. Kris ixrom hihtÿx o hihtÿx. Na pre ra mẽ ate amnhĩ tomnuj o apata mÿrapê tanhmã mẽ anhĩpêx to. Tã kot kaj mẽ kormã

ã ate amnhĩ nhĩpêx anhÿrja kaga hkêt hã koja tee ri ja hã mẽ apumu nẽ mẽ anhĩpêx kati nẽ.

⁴Amnepêm na pre Krisja te hihtÿx kêt pyrà nẽ ãm arĩ mẽ kãm xa nhũm mẽ unê nẽ pĩ kahpa ã kunhõ nẽ kupĩ. Tã nhũm Tĩrtũmja àhpumunh tÿx o akupÿm ho htĩr nhũm akupÿm htĩr o htĩr nẽ Tĩrtũm nhÿ hã hihtÿx o hihtÿx ã amnhĩ to amnhĩrĩt. Ja pyrà nẽ wam mẽ awÿr inhmõrta ã na pa pre hte mẽ akamã te Kris kormã htyk kêt ri hihtÿx kêeta pyrà nẽ mẽ akõt ixpa. Tã kot paj ma akupÿm mẽ awÿr mõ hãmri nẽ te Kris ra akupÿm htĩr nẽ hihtÿx o hihtÿxta pyrà nẽ Tĩrtũm xihtÿx xà ho tanhmã mẽ kot amnhĩ tomnuj xwÿnhjê nhĩpêx to. Hãmri nhũm mẽ amnhĩ tã ixpumu nẽ Tĩrtũm nhÿ hã ijamaxpêr tÿx ã ixpumunh kurê kumrêx.

⁵Kwa mẽ aprĩ hã tanhmã mẽ ate amnhĩ nhĩpêx to hã amnhĩ pumu. Xàn ka htem ãm hãmri amnhĩ kaxyw Jejus Kris kõt ajamaxpêr o ri apa nà? Kot kaj mẽ apê hkwÿ hã koja mẽ akaxwÿnh kãm mẽ akamã hkrĩ rãhã nẽ. Nom koja mẽ akaxwÿnh kãm mẽ akamã hkrĩ hkêt ka mẽ ãm apê hkwÿ hã amnhĩ jarênh kaprÿ.

⁶No pa na ixte ja hã amnhĩ pumunh mex. Ixpê Jejus kwÿ na pa. Ra ixkamã hkrĩ nẽ ixkõt pa ho pa jakamã ixpê hkwÿ na pa. Tã mẽ ate ja hã ixpumunh mexja na inhmã hprãm. Na pa hte ixpê Jejus kwÿ hã amnhĩ jarênh kaprÿ hkêt nẽ.

⁷Nẽ na pa hte mẽ ato tanhmã Tĩrtũm wÿr to ho ri ixpa nẽ mẽ ato hwÿr o: — Pa Tĩrtũm. Kwa tanhmã Korĩt nhõ xwÿnhjê hkrã hto kê mẽ tanhmã amnhĩ tomnuj to ho pa hkêt nẽ. Anhÿr o mẽ ato kuwÿ. Mẽmo kaxyw na pa hte ã mẽ ato hwÿr anê? Ixte mẽ ajahkre mex ã amnhĩ to amnhĩrĩt kaxyw kêt. ãm mẽ ate amnhĩ to mex rãhã ho ri apa kaxyw. Kot kaj mẽ ã amnhĩ nhĩpêx anhÿr o ri apa hãmri nhũm axtem mẽhõ mẽ awÿr mõn pøj nẽ tanhmã mẽ amã mẽ ijarênh to nẽ mẽ ijarênh o: —Kwa Pawre mẽ hkwÿjaja na htem Tĩrtũm kapêr kwÿm ri Korĩt nhõ xwÿnhjê jahkre ho pa. Anhÿr tã pa amnhĩ tã mẽ kuma nẽ ãm mẽ kuma.

⁸Na pa hte Tirtũm kapēr kutã amnhĩ xunhwỳr kêt nẽ. Na pa hte ãm mẽ ate hkõt amnhĩ nhĩpêx o ri apa hã mẽ amã karõ kamã ixihỳx rãhã ho ri mẽ akõt ixpa.

⁹Jakamã kot kaj mẽ hkõt amnhĩ nhĩpêx mex o apa pa ja hã mẽ apumu nẽ ixkĩnh nẽ. Mẽ kot axpẽn mã ixirerek ã ijarẽnh o pa htãã. ã mẽ ate amnhĩ nhĩpêx anhỳr o apa kaxyw na pa hte mẽ ato Tirtũm wỳr o ri ixpa nẽ kãm: —Pa Tirtũm. Kwa tanhmã Korĩt nhõ xwỳnhjê hkrã hto kê mẽ kot amnhĩ tomnuj kaga hpa nẽ hpãnhã akapēr kõt pix mã mãn amnhĩ nhĩpêx rãhã nẽ. Anẽ.

¹⁰Tã pa kormã mẽ awỳr inhmõr xwỳj ri ã amnhĩ kukamã kagà nhĩpêx nẽ mẽnh anẽ. Mẽ ate kamã harẽnh nẽ mar nẽ tokyx akupỹm tãm amnhĩ nhĩpêx kaxyw. Kot pa mẽ awỳr mõi nẽ Pahihti nhỹ hã mẽ ate amnhĩ tomnuj ã mẽ amã akir. Nom inhmã ã mẽmoj tã mẽ amã ixàkjêr anhỳr prãm kêt. ãm ÿ hã kapēr o mẽ ajahkre mex nhũm mẽ ate inhmar nẽ hkõt amnhĩ nhĩpêx rãhã ho apaja na inhmã hprãm.

¹¹E Kris kõt ixkwỳjaja. ãm ja pix. Kwa kêr ka mẽ ixkapēr mar tỳx nẽ hkõt amnhĩ nhĩpêx mex nẽ. Nẽ Tirtũm kõt pix mã ri tanhmã amnhĩ nhĩpêx to ho apa rãhã ho apa. Nẽ tãm ri amnhĩ nhĩpêx. Nẽ axpẽn kõt ajamakêtkati nẽ akĩnh nẽ axãmnhix ri apa. Kot kaj mẽ ã amnhĩ nhĩpêx anhỳr o apa nhũm Tirtũm mẽ akõt pa ho pa. Kãm mẽ pajapê htỳx kumrêx. Kêp mẽ pamã mẽ pahkĩnh nẽ mẽ pajamakêtkati jagjênh xwỳnh.

¹²⁻¹⁴Nẽ ota jar Kris kõt mẽ pahkwỳjaja pa mẽ ixpimràatã mẽ awỳr ixpēr mẽ. Mẽ ixpiitã mẽ inhmã mẽ akĩnh tỳx jakamã na pa mẽ awỳr ixpēr mẽ. Nẽ kê Pahihti Jejus Kris mẽmoj to mẽ akutã nojarêt rãhã ho pa. Nhũm Tirtũm arĩ kãm mẽ ajapê rãhã ho pa. Nhũm Karõ tanhmã mẽ akrã hto ka mẽ axpẽn to mex pix kukamã mãn ajamaxpēr o apa. Tã e ixkwỳjaja. ãm ja pix. Ixpê Pawre na pa mẽ awỳr kagàja nhĩpêx nẽ ã mẽnh anẽ.

Karatas

Karatas 1

¹⁻²Pa Karatas nhõ xwýnhjaja? Xà mẽ amex? Ixpê Pawre na pa mẽ awỳr ixpêr mẽ nê mẽmoj tã mẽ amã karõ. Měpahpãm Tĩrtũm mẽ Jejus Kris na pre wa mẽ akaxyw ixãm. Ixte wa ỹ hã ma ri mẽ akõt mẽ ajahkre o ri ixpa kaxyw. Na pre Jejus ty nhũm Tĩrtũm akupỹm ho htĩr. Hãmri nhũm wa mẽ akaxyw ixãm. Pyka ja kamã na pre mẽhõ mẽ akaxyw ixãm kêt nê. Tĩrtũm mẽ Jejus Kris na pre wa ixãm. Jakamã na pa ã mẽ awỳr kagà nhĩpêx nê mẽnh anê. Mẽ apê Tĩrtũm krajê hwỳr. Nê ota jar krĩ ja kamã ixpyrà nê Kris kõt mẽ pahkwỳjaja mẽ awỳr hpêr mẽ.

³E kê Měpahpãm Tĩrtũm mẽ Pahihti Jejus Kris wa mẽmoj to mẽ akutã nojarêr rãhã ho pa. Nê mẽ ato mex rãhã nê. Ka mẽ wa ỹ hã akĩnh nê ajamakêtkati nê axàmnhĩx ri apa.

⁴Nà na pre Krisja amnhĩ grõnh kõt mẽ pahwỳr wrỳ nê mẽ panê ty. Mẽ pahte amnhĩ tomnuj pãnhã amnhĩrer kaxyw mẽ panê ty. Měpahpãm Tĩrtũm kãm hprãm xà hkõt. Tã mẽmo kaxyw na pre ã mẽ panê amnhĩ nhĩpêx anê? Nà pika ja kamã mẽ kot amnhĩ nhĩpêxja omnuj tỳx jakamã nhũm amnhĩ grõnh kõt te mẽ kot amnhĩ tomnuj pê mẽ papytãr pyrãk o mẽ panhĩpêx nê ã mẽ panê htyk anê.

⁵Jakamã kwa kêr pu mẽ Tĩrtũm mã mex o mex ã mãn harênh o ri papa. Nà kot puj mẽ ã amnhĩ nhĩpêx anhỹr rãhã ho ri papa.

Mẽ ujarênh pixi ãm hãmri hã harênh

Rõmãn 16.17; Sikũn Korĩt 11.3-4; Epes 4.14; Korosê 2.8; Sikũn Pêtre 2.1-3

⁶Kwa ixkrãmnhwỳjaja. Na pa pre mẽ ate tanhmã amnhĩ nhĩpêx to hã mẽ ajarênh ma nê ixkaprĩ nê tee ri mẽ akukamã ijamaxpêr. Na pre Tĩrtũmja Kris kukwak ri mẽ ato mex nê. Nê mẽ ate hkõt amnhĩ nhĩpêx o apa hprãm xaj te kot amnhĩ wỳr mẽ awỳr pyrãk o mẽ anhĩpêx ka mẽ hkõt amnhĩ xunhwỳ. Tã xep tanhmã mẽ ajamaxpêr to nê ra hkaga kaxyw. Ra axtem mẽ ujarênh õja ma nê gryk ã Tĩrtũm kaga kaxyw. Pa tee ri mẽ ajarênh ma nê ixkaprĩ nê. Kwa mon ka mẽ axtem nê ri ã amnhĩ nhĩpêx anhỹr mã?

⁷Jejus jarēnh pix na ãm hãmri. Mo mẽ ujarēnh mex ò kot ka kêt mẽ ama nẽ hkôt amnhĩ nhĩpêx? Nà amrakati kumrêx. ã mẽ amã ujarēnh anhÿr xwÿnhjaja na htem Kris kapêr o pihkàr rũnh kumrêx o pa nẽ katàt kôt harēnh kêt nẽ. Ka xep mẽ ama nẽ aJamaxpêr kati rũnh nẽ.

⁸Na pa pre ma mẽ awÿr mō nẽ ãm hãmri mẽ amã Jejus kot tanhmã mẽ panẽ amnhĩ nhĩpêx to hã harẽ ka prem inhma. Tã koja mēhō mẽ awÿr mō nẽ mẽ amã nhãm mẽ ujarēnh ò jarẽ nhũm Tĩrtũm ja hã omu nẽ nhÿrmã ma mẽ kot amnhĩ xà htÿx kamã hamak tũm xà hwÿr kumẽ nhũm ma hwÿr mō nẽ aa kator kêt nẽ. Mẽ pahtō rÿ Tĩrtũm kapêr o wrÿk xwÿnhjê hō koja ã amnhĩ nhĩpêx anẽ nhũm ja hã omu nẽ ma kuwy pê himôta wÿr amnhĩ nẽ kumẽ.

⁹E kot paj axte mẽ amã ja jarẽ ka mẽ aprĩ hã inhma. Koja mēhō mẽ awÿr mō nẽ mẽ ate hkôt amnhĩ xunhwÿr xwÿnhhta kwÿm ri tanhmã mẽ amã ujarēnh to. Hã koja Tĩrtũm omu nẽ nhÿrmã ma mẽ kot amnhĩ xà htÿx kamã hamak tũm xà hwÿr kumẽ nhũm ma hwÿr mō nẽ kamã pa ho pa nẽ aa kator kêt kumrêx.

Tĩrtũm pix kãm Pawre hkĩnh hprãm ã kot jarēnh

Juãw 5.44; Atre 26.9-20; Karatas 2.6

¹⁰Nẽ koja mēmojaja ixkapêr ma nẽ kãm mar prãm kêt o kãm ixkĩnh kêt japêr nẽ mãmri kãm ixkĩnh kêt. Tĩrtũm kãm ixkĩnhja pix na inhmã hprãm. Kop apu mẽ piitã kãm ixkĩnhja mãn inhmã hprãm ronhÿx pa Kris nhÿ hã kapêr jarēnh o ri ixpa hkêt nẽ.

Tĩrtũm kot Pawre mã Kra Jejus o amnhĩrĩt ã harēnh

Sikũn Korĩt 1.12; Wam Tesarõn 2.4

¹¹⁻¹²E Jejus kôt ixkràmnhwÿjaja. Nà ixte mẽ ujarēnh mex jarēnh o ixpaja na pre jar pika ja kamã mēhō amnhĩ krã hkôt inhmã harēnh rÿ inhmã ahkre hkêt nẽ. Jejus Kris tãm na pre ixwÿr kato nẽ inhmã ho amnhĩrĩt. Jakamã mex o kot pika jakamã mẽ ujarēnh piitã hakrenh par.

¹³⁻¹⁵E kot paj ixprĩ hã mẽ amã tanhmã amnhĩ jarēnh to ka mẽ inhma. Tanhmã Tĩrtũm kot amnhĩ kaxyw ixãm to hã pa mẽ amã amnhĩ jarẽ. Nà na pre kormã ixkêt ri ixkukamã hamaxpêr nẽ amnhĩm ixta nẽ amnhĩ kaxyw ixãm nẽ kot ixto mex ã ixtã amnhĩ jarẽ. Tã pa pre ixkato nẽ gaa nẽ ixàptàr

nom kormã Jejus Kris kôt amnhĩ xãm kêt nẽ. Na pa pre axtem nẽ inhmã mẽ ixpê Ijaew kot amnhĩ nhĩpêx kôt pix mã amnhĩ nhĩpêx o ri ixpa hprãm nẽ. Nhũm pre ixpyrà nẽ arĩ mẽ nywjaja haxwỳja kãm mẽ hkôt pix mã ri amnhĩ nhĩpêx o pa hprãm nẽ. No inhmã mẽ hkôt amnhĩ nhĩpêx mex o mẽ hakrenh par prãm jakamã na pa pre mẽ inhĩgêt kôt amnhĩ nhĩpêx mex kumrêx o ri ixpa. Mẽ kapêr piitãã hkôt amnhĩ nhĩpêx mex nẽ. Tã ã amnhĩ nhĩpêx anhỹr o ixpa kaprỳ. Na pa pre axtem nẽ mẽ kot Tĩrtũm Kra Jejus Kris kôt amnhĩ xunhwỳr xwỳnhjê nhĩpêx kati ho ri mẽ hkôt ixpa nẽ inhmã mẽ himex prãm tỳx kumrêx. ã na pa pre amnhĩ nhĩpêx anhỹr o ri ixpa. Ra mẽ ate ja hã ixpumunh mex.

16-17Tã pa pre ma Tamas wỳr mỗ. Kamã tanhmã Kris kwỳjê nhĩpêx to kaxyw ma mẽ hwỳr mỗ. Hãmri nẽ kormã mẽ hwỳr ixàhtêp o inhmõr mẽ nhũm Tĩrtũm tanhmã ixto nẽ inhmã Kra Jejus o amnhĩrĩt pa jatã omu. Kêp Tĩrtũm Kra hã pa ixprĩ hã omu. Nhũm inhmã kapêr nẽ ixte kãm tanhmã amnhĩ nhĩpêx to ho ri ixpa kaxyw ixàpênh ã inhmã karõ nẽ Ijaew kêt xwỳnhjê hwỳr inhmẽ. Ixkwỳ Ijaew wỳr inhmẽnh kêt nẽ. Na pre inhmã: —E kêr ka ma Ijaew kêt xwỳnhjê hkôt ri mẽ kãm ixkapêr jarênh o ri apa. Anhỹr jakamã pa pre kuma nẽ hkôt amnhĩ xãm kurê kumrêx nẽ ã amnhĩ nhĩpêx anhỹr o ri ixpa. Jao tanhmã ixte kêp hkwỳjê nhĩpêx tota kaga nẽ ma pyka pê Arap wỳr mỗ. Nom tanhmã amnhĩ tã Jejus kwỳjê kukjêr to hkêt nẽ. Nẽ Jerujarẽ hwỳr inhmõr nẽ Jejus nhỹ hã mẽ ahkre xwỳnh maatijaja tanhmã amnhĩ tã mẽ kukjêr to hkêt nẽ. ãm Tĩrtũm kot inhmã hã karõ xà hkôt ma Arap wỳr mỗ nẽ kamã kapôt ã ri ixpa. Kamã na pre Tĩrtũmja inhmã Jejus Kris kot tanhmã amnhĩ nhĩpêx to ho amnhĩrĩt o pa. Hãmri nẽ inhmã kapêr pa amnhĩ tã kuma hãmri nẽ ma akupỳm Tamas wỳr mỗ.

18Tã nhũm ra amgrà axkrunêpxi nẽ hapêx pa Tamas rũm ixkato nẽ ma Jerujarẽ hwỳr Simãw Pêtre hwỳr mỗ. Hãmri nẽ kuri pôj nẽ hkôt ixpikamênh ã ixtã semãn axkrut.

¹⁹Nom mẽ kot Jejus nhỹ hã hkwỳjê jahkre ho mẽ pa xwỳnh maati hkwỳjê hõ pumunh kêt kumrẽx. ãm Simãw Pêtre mẽ Pahihti Jejus tõ Xiakreja pix wa omu.

²⁰ãm hãmri na pa ã amnhĩ jarẽnh anẽ. Tĩrtũm kot ja hã ixpumunh mex.

²¹Tã pa pre mẽ kurũm ixkato nẽ hpãnhã ma pika hkwỳ hkõt ijapôx o mẽ hkõt ixpa. Ma pika pê Sir mẽ Sirisja wa hwỳr mõ.

Mẽ kot amnhĩ jaêr pê Pawre kot amnhĩ nhĩpêx nyw ã omunh ã mẽ harẽnh

²²Nom Jutej kamã Kris kwỳjaja na prem kormã ixpumunh kêt nẽ. ãm Simãw Pêtre mẽ Xiakre pix na pre wa ixpumu.

²³Na pre ra mẽ hkwỳjaja tanhmã hkwỳjê kot axpẽn mã ijarẽnh toja ma. Na prem ijarẽnh o: —Kwa Jejus ã mẽ panhĩpêx kati htỳx o pa xwỳnhhta na pre tanhmã hamaxpêr to nẽ hpãnhã mẽ kãm Jejus kapêr jarẽnh o ri mẽ hkõt pa. Mẽ kot amnhĩ kaxyw hkõt hamaxpêr kaxyw. Ra kot Jejus nẽ mẽ pahkurê htã hpãnhã mẽ kãm kapêr jarẽnh o ri mẽ hkõt pa. Anẽ.

²⁴Hãmri nhũm Kris kwỳjaja amnhĩ jaêr pê ijarẽnh ma nẽ inhỹ hã hkĩnh nẽ. Nẽ ixtã Tĩrtũm mã mex o mex ã harẽ.

Karatas 2

Pawre kot Kris kwỳ hkrãhtũmjê mã amnhĩ jarẽnh

Atre 15.1-11

¹⁻²Tã nhũm amgrà pê 14 nẽ hapêx nhũm Tĩrtũm akupỹm Jerujarẽ hwỳr inhmẽ pa ma akupỹm mõ. Panãpe nẽ Xitre mẽ pa mẽ mõ nẽ mẽ hwỳr pøj. Hãmri nẽ Kris kwỳ hkrãhtũmjê hwỳr mra nẽ mẽ kãm amnhĩ jarẽ. Mẽ tapxipixjê mã amnhĩ jarẽ nẽ ixte Ijaew kêt xwỳnhjê mã Jejus kapêr jarẽnh o ixpa hã amnhĩ jarẽ. Na pa pre ra amnhĩ kukamã ijamaxpêr o: —Koonẽn. Kot pa apu mẽ kãm amnhĩ jarẽ nhũm mẽ inhma nẽ ixte Tĩrtũm kapêr kwỳm ri mẽ ahkre ho ixpa hã ixkamnhĩx rỳ hã inhmã akir. Na pa hte Ijaew kêt xwỳnhjê mã Kris jarẽnh o ixpa no ãm mẽ ixpê Ijaew pyrã nẽ finat Mojes kapêr kõt mẽ kot amnhĩ my kwrýt kà jakàr ã mẽ kãm karõ hkêt nẽ. ãm mẽ kot Kris kõt amnhĩ xunhwỳr pix kaxyw na pa hte mẽ kãm hã karõ ho ixpa. Tã kot paj Kris kõt mẽ ixkrãhtũmjê mã ja hã amnhĩ jarẽ nhũm mẽ inhma nẽ

tanhmã hamaxpêr to nhũm ja mẽ kêp omnuj japêr nhũm mẽ tanhmã amnhĩ to nê ixte Kris kapêr jarênh o ixpaja nê ixkurê. Jakamã nhũm ra ixte mẽ kãm Kris kapêr jarênh o ixpa nhũm mẽ kot inhmar xwỳnhjaja ijarênh ma nê tee amnhĩ kukamã hamaxpêr o ra hkaprĩ nê pa. Anhỹr o ijamaxpêr.

³Tã na prem ixte amnhĩ jarênhja ma nê ja nê tanhmã inhmã nê hkêt nê. Pa mẽ kãm amnhĩ jarênh pa nhũm mẽ inhma nhũm Ijaew kêt xwỳnhjaja kot amnhĩ jakàr kêtja nhũm mẽ kãm mex nê. Mẽ kêp tanhmã kute hkêt nê. Nhũm Ijaew kêt xwỳnh Xitre ixkôt pa nhũm mẽ kot omunh tã kot mẽ ixpyrà nê amnhĩ my kwỳt kà krãhyr ã kãm karõ hkêt nê.

⁴Tã nhũm mẽ kêp Jejus kwỳ hã amnhĩ jarênh o hêx xwỳnhjaja mẽ ixtã akuprõ. Nom hêx rom mẽ ixte Kris kôt amnhĩ nhĩpêx ã mẽ ixpumunh pix kaxyw. Hãmri nê ixkapêr ma nê Xitre hã inhmã akir nê inhmã: —Kwa na pre Xitre Jejus kôt pix mã amnhĩ xãm nom finat Mojes kot mẽ pahpê Ijaew kot amnhĩ nhĩpêx ã karõ hkôt amnhĩ nhĩpêx kêt nê. Kwa ja mex kêt. Na htem Jejus kôt amnhĩ xunhwỳ nê mãănên finat Mojes kapêr kôt amnhĩ nhĩpêx. Jakamã kwa kãm anê kê amnhĩ my kwỳt kà krãhta. Finat Mojes kot mẽ panhĩgêjtjê mã hã karõ xà hkôt.

⁵Anhỹr tã pa prem mẽ kuma nê ãm mẽ kuma. Kot pa ri mẽ kãm ja hã karõ hkêt nê. ãm Jejus kapêr kôt pix mã kot puj mẽ amnhĩ nhĩpêx o papa nê finat Mojes kapêr mẽ Jejus kapêr o papihkàr kêt nê. Kot puj mẽ anhỹr o Jejus kapêr o ahkà nhũm ja mex kêt nê. Jejus kapêr kãm mo mẽ kot mẽmy kwỳt kà jakàr ã mẽ kãm karõ? Amrakati. Jakamã na pa pre ãm mẽ pano kupyw o mẽ pa xwỳnhtajê kapêr ma nê ãm mẽ kuma.

⁶Tã pa pre ra Ijaew kwỳ pê Jejus kôt ixkwỳ hkrãhtũmjê mã amnhĩ jarênh pa. Tanhmã ixte Ijaew kêt xwỳnhjê mã Jejus kapêr jarênh to hã mẽ kãm amnhĩ jarê nhũm mẽ inhma nhũm ja mẽ kãm mex nê. Jakamã Ijaew kêt xwỳnhjaja kot mẽ ixpê Ijaew pyrà nê finat Mojes kapêr kôt amnhĩ nhĩpêxja nhũm mẽ tanhmã mẽ kaxyw inhmã hã karõ hto hkêt nê. Tĩrtũm na hte mẽ kêp mẽ hkrãhtũm ã mẽ omunh xà hkôt mẽ hkwỳjê rom tanhmã mẽ ho mex to hkêt nê. Na hte mẽ pahpiitã mẽ panhĩpêx o axpên pyràk. Jakamã na pa

hte ijaxwỳja Jejus kôt mẽ ixkrähtũmjaja kot amnhĩ to rax o ijakrenh ã tanhmã ijamaxpěr to hkêt nẽ.

⁷Na pa pre mẽ kãm amnhĩ jarẽnh pa nhũm mẽ inhma nẽ axpẽn mã: —Nà ãm hãmri na pre Tĩrtũm ahpỹnhã Pawre mẽ Simãw Pêtre wa kãm wa àpẽn h ã karõ nẽ Ijaewjê hwỳr Simãw Pêtre mẽ nẽ axtem Ijaew kêt xwỳnhjê hwỳr Pawre mẽ. Wa kot ahpỹnhã mẽ hkôt mẽ kãm Jejus kapěr jarẽnh o ri pa kaxyw. Nà ãm hãmri na hte wa ã amnhĩ nhĩpêx anhỳr o pa. Nà ja mex. Anẽ.

⁸Ra Tĩrtũm kot Ijaew wỳr Simãw Pêtre mẽnh tã hpãnhã Ijaew kêt xwỳnhjê kaxyw pa ixãm. ỹ hã wa ixte mẽ kãm Jejus kapěr jarẽnh o ri mẽ hkôt wa ixpa kaxyw.

⁹Jakamã nhũm mẽ ixkrähtũm Xiakre mẽ Simãw Pêtre mẽ Juãwja ixte mẽ kãm amnhĩ jarẽnh ma nẽ hkĩnh nẽ. Tĩrtũm kot ixto mex nẽ Ijaew kêt xwỳnhjê hwỳr inhmẽnh ã ixte amnhĩ jarẽnhja ma nẽ hkĩnh nẽ. Hãmri nẽ Panãpe mẽ wa inhmã kapěr nẽ wa inhmã: —Nà ãm hãmri. Kot puj xep mẽ anẽ. Ka mẽ Panãpe wa kot kaj wa ma Ijaew kêt xwỳnhjê hkôt mẽ kãm Jejus kapěr jarẽnh o ri apa. No mẽ pajaja kot paj mẽ axtem mẽ pahkwỳ Ijaew kôt harẽnh o ri ixpa. ã kot puj mẽ ahpỹnhã mẽ hwỳr papa anẽ.

¹⁰Nom kêr ka wa inhmar kumrẽx. Kêr ka wa mẽ ixpyrà nẽ Kris kôt mẽ pahkwỳjê pê amrakati xwỳnhjê ho mex o ri apa. Mẽmoj to mẽ kutã anojarêt rãhã ho ri apa. Anhỳr o wa inhmã kapěr pa wa mẽ kuma nẽ mẽ kãm: —Tôe. Nà kot paj wa anẽ. Ra ã wa ixte amnhĩ nhĩpêx anhỳr kaxyw kênã. Anẽ.

Pawre kot Simãw Pêtre mã àkjêr ã harẽnh

Atre 10; Rõmãn 3.21-31; 6.1-14

¹¹⁻¹⁴Tã nhũm Simãw Pêtreja man mẽ ixwỳr krĩ pê ãxiok wỳr mõi. Nẽ jar mẽ ixkôt ri pa. Ixpyrà nẽ kêp Ijaew tã Kris kôt Ijaew kêt xwỳnhjê hkôt pa nẽ mẽ kutã apkur o pa. Ixpyrà nẽ àmnhĩx ri mẽ kutã apkur o ri mẽ hkôt pa. Ijaew kêt xwỳnhjaja kot amnhĩ my kwỳt kà jakàr kêt jakamã na pa htem mẽ kutã ixàpkur kêt nẽ. Tã ra mẽ ixte Kris kôt amnhĩ xunhwỳr jakamã ja mẽ ixpê tanhmã kute hkêt. Na pa htem ixàmnhĩx mẽ hkôt ixpa nẽ mẽ kutã apku. Ra mẽ ixte Kris kôt amnhĩ xunhwỳr kênã kot pa hkêt ri mẽ hkôt ixpa hkêt. Na

pa htem ixàmnhĩx mẽ hkôt tanhmã amnhĩ nhĩpêx to ho ri ixpa. Tã nhũm Xiakre kot mẽ ixwỳr mẽ rēnh xwỳnhjaja haxwỳja mẽ ixwỳr mỗ. Mẽ ixpyrà nẽ mẽ kệp Ijaew tã mẽ ixpyrà nẽ Kris kôt amnhĩ xunhwỳ. Jakamã ra mỗ nẽ mẽ ixwỳr pôj. Hãmri nhũm Simãw Pêtre mẽ omu nẽ mẽ umaj axte Ijaew kêt xwỳnhjê kutã apkur kêt nẽ. Axtem nẽ ôja py nẽ o tẽ nẽ mẽ hkàx ã ahte apkur o nhỹ. Hãmri nhũm ra mẽ ixri Ijaew kwỳ pê Kris kôt mẽ pahkwỳjaja ja hã omu nẽ piitã uràk nẽ ã amnhĩ nhĩpêx anẽ nẽ Simãw Pêtre ri Ijaew kêt xwỳnhjê hkàx ã apkur o hkrĩ. Nhũm ixkôt pa xwỳnh Panãpeja haxwỳja ja hã mẽ omu nẽ mẽ uràk nẽ ã amnhĩ nhĩpêx anẽ nẽ mẽ hkàx ã apku. Hãmri pa tee ri ja hã mẽ omu nhũm ja inhmã mex kêt nẽ. Na prem ã amnhĩ nhĩpêx anhỹr o Tĩrtũm kapêr ã kagà htũm kamã mẽ ujarēnh mex kwỳm ri amnhĩ nhĩpêx. Jakamã pa ã mẽ kot amnhĩ nhĩpêx anhỹrja nê Simãw Pêtre mã ixkapêr. Mẽ piitã mẽ noo mã xa nẽ ã kot amnhĩ nhĩpêx anhỹrja nê kãm ixkapêr nẽ kãm: —Tk. Kwa nà Simãw Pêtre. Ri ã amnhĩ nhĩpêx anhỹr kêt nẽ. Pahpê Ijaew tã kormã pahkwỳjaja hpôx kêt ri ka hte ixpyrà nẽ axàmnhĩx Ijaew kêt xwỳnhjê kutã axàpkur o ri apa. Tã amnhĩ wỳr mẽ pahkwỳjê pumu nẽ axtem nẽ mẽ hkàx ã axàpkur o akrĩ. Kwa nà na ka ã amnhĩ nhĩpêx anẽ nẽ ra axtem amnhĩ nhĩpêx. Te ate mẽ kãm akapêr nẽ mẽ kãm: “Kot kaj mẽ ixpyrà nẽ amnhĩ my kwỳt kà jakà pa rĩ mẽ akôt ri ixpa nẽ mẽ akutã ixàpkur o ixpa.” Anhỹr pyràk. Kwa ja mex kêt.

¹⁵—Mẽ pahpê Ijaew na pu htem mẽ kệp Ijaew kêt xwỳnhjê jarēnh o: “Mẽ kot mẽ pahte amnhĩ nhĩpêx kôt amnhĩ nhĩpêx kêt xwỳnhjaja.” Anẽ.

¹⁶Tã mẽ pahpê Ijaew tã na hte Tĩrtũmja mẽ pahte mẽ panhĩgêt kot amnhĩ nhĩpêx kôt mẽ pahte amnhĩ nhĩpêx ã mẽ pahpumunh kôt mẽ pahto hkra hkêt nẽ. Ra mẽ pahte ja pumunh mex. ãm mẽ pahte amnhĩ kaxyw Jejus Kris kôt pajamxpêr ã mẽ pahpumunh kôt pix mã na hte mẽ pahto hkra. Kot pu mẽ amnhĩ kaxyw hkôt pajamxpêr nhũm ja hã mẽ pahpumunh kôt pix mã mẽ pahto hkra.

¹⁷—Mẽ pahpê Kris kwỳ jakamã na hte Tĩrtũm amnhĩm mẽ pamex ã mẽ pajarẽ nẽ mẽ pahte amnhĩ tomnuj xwỳnh kêt ã mẽ pajarẽ. Jakamã na pu

htem paxàmnhĩx ri Ijaew kêt xwỳnhjê kot Kris kôt amnhĩ xunhwỳr xwỳnhjê hkôt ri papa ho papa. Ra Tĩrtũm kot mẽ pahpyrà nẽ amnhĩm mẽ mex ã mẽ harẽnh kênã. Tã koja mẽhõ kormã ja mar kêt nẽ tanhmã hã mẽ pajarẽnh to nẽ mẽ pajarẽnh o: “Tk. Ra mẽ kot amnhĩ kaxyw Kris kôt hamaxpěr tã axtem nẽ Ijaew kêt xwỳnhjê hkôt ri pa. Jakamã arĩ mẽ kot amnhĩ tomnuj xwỳnh kênã.” Anhỹr o mẽ pajarẽnh japěr. Nom ãm mẽ pahte amnhĩ tomnuj xwỳnh ã mẽ pajarẽnh kaprỳ. Na pu htem Kris kôt amnhĩ nhĩpêx nẽ ra tãm amnhĩ nhĩpêx mex o papa.

18No kot pu mẽ hkôt ri amnhĩ nhĩpêx o papa htã tanhmã pajamaxpěr to nẽ pahte amnhĩ nhĩpêx tũm o awjanã hãmri nẽ amnhĩ tomnuj tỳx kumrêx.

19—Tã tanhmã kot puj wem amnhĩ to nẽ mẽ panhĩgêt kot amnhĩ nhĩpêx piitã hkôt amnhĩ nhĩpêx mex o ri papa? Na pu htem pajamaxpěr o: “Kot paj ã amnhĩ nhĩpêx anẽ nẽ ã amnhĩ nhĩpêx anẽ nhũm Tĩrtũm ja hã ixpumu nẽ amnhĩm inhmex ã ijarẽ.” Anhỹr o pajamaxpěr. Hãmri nẽ finat Mojes kot mẽ panhĩgêjtê mã kapěr piitã hkôt ri mnhĩ nhĩpêx o papa nom tõhã hkwỳm ri tanhmã amnhĩ tomnuj to. Jakamã nhũm Tĩrtũm ja hã mẽ pahpumunh kôt mẽ pamex ã mẽ pajarẽnh kêt nẽ. Kapěr ã kagà htũm kot ã ja jarẽnh kot anhỹr. Nom kot puj mẽ amnhĩ kaxyw Kris kôt pajamaxpěr nhũm ja hã mẽ pahpumunh kôt amnhĩm mẽ pamex ã mẽ pajarẽ. Hãmri pu mẽ Tĩrtũm kôt amnhĩ nhĩpêx o ri papa nẽ axte mẽ pahpê Ijaew nhĩgêjtê kot amnhĩ nhĩpêx kôt amnhĩ nhĩpêx hkêt nẽ. Te ra mẽ pahtyk nẽ axte hkôt amnhĩ nhĩpêx kêt pyrà nẽ pãnhã Tĩrtũm kapěr kôt pix mã ri amnhĩ nhĩpêx o ri papa.

20—Nẽ na prem pĩ kahpa hã Kris nhô nẽ kupĩ nhũm mẽ pahte amnhĩ tomnuj te ãhkô hã jêt nẽ haxwỳja htyk pyràk. Jakamã na pu htem amnhĩ tomnuj kaga nẽ Kris kôt amnhĩ xunhwỳ nhũm Karõ mẽ pahkarõm agjê pu mẽ te Jejus Kris kot amnhĩ nhĩpêx pyràk o amnhĩ nhĩpêx o papa. Jao hpãnhã mẽ pahte amnhĩ nhĩpêx nyw pix o amnhĩ nhĩpêx o ri papa. Kris kãm hprãm xà hkôt pix mã tanhmã ri amnhĩ nhĩpêx to ho papa. Kris kêp Tĩrtũm Kra htã kãm mẽ pajapê kamã mẽ panê htyk jakamã na pu htem amnhĩ kaxyw kôt pix mã pajamaxpěr rãhã ho papa.

²¹—Ăm hāmri na pre Tirtūm mẽ pahto mex kumrēx nē mẽ pahwỳr Krisja mẽ nhūm mẽ pahwỳr wrỳ nē mẽ panê ty. Tã na pa pre kapērja ma nē mar tỳx nē hã ri ixpa nē ho ijamakêtkati hkêť nē. Tã kop apu Tirtūm kot mẽ pahte mẽ panhīgêťjê kot amnhĩ nhĩpêx o amnhĩ nhĩpêx ã mẽ pahpumunh kôť mẽ pamex ã mẽ pajarēnh ronhỹx pre Krisja ãm mẽ panê htyk kaprỳ. Mo kaxyw nhỹx pre mẽ panê ty? Anē. Ā na pa Simãw Pêtre mã ixkapêr anē nhūm mẽ piitã apkur pê hã inhmar o hkrĩ.

Karatas 3

Mẽ pahte amnhĩ krã hkôť pahpê Tirtūm kra hkêť ã mẽ pajarēnh

Karatas 5.16-23; Epes 2.8; Piriapos 3.9; Sikūn Ximotre 1.9; Xitre 3.4-7

¹Kwa Karatas nhõ xwỳnhjaja. Te ri mẽ ajamxpêr kêt kumrēx pyrãk. Amnepê mã mẽ awỳr inhmôrta ã na pa pre mẽ amã tanhmã Kris htykja jarēnh to. Pĩ kahpa hã mẽ panê htyk ã harê ka mẽ aprĩ hã inhma. Tã nhūm Tirtūm kapêr jarēnh o mẽ hêx xwỳnhjaja ixpãnhã mẽ awỳr mra nē tanhmã mẽ amã ujarēnh to ka mẽ ama nē mẽ ajamxpêr o apihkàr rax nē. Jao axte Kris tyk mã ajamxpêr kêt nē.

²E mẽ inhmã mẽmoj jarê. Mẽmoj tã mẽ apumunh kôť na pre Tirtūm mẽ awỳr amnhĩ Karõ rē nhūm mẽ awỳr agjê? Xà mẽ anhīgêť kot amnhĩ nhĩpêx kôť mẽ ate amnhĩ nhĩpêx ã mẽ apumunh kôť? Nà na pre ja hã mẽ apumunh kôť mẽ awỳr rēnh kêt nē. Na ka prem Kris jarēnh ma nē amnhĩ kaxyw hkôť ajamxpêr nhūm ja hã mẽ apumunh kôť mẽ awỳr kurê nhūm mẽ awỳr agjê.

³Na pu htem amnhĩ krã hkôť tanhmã amnhĩ nhĩpêx to ho pahpê Tirtūm kra hkêť nē. Tirtūm Karõ pix kukwak ri na pu htem pahpê hkra. Tã ka mẽ axtem nē ajamxpêr o: —Nà Tirtūm ra kot ixto hkra jakamã kot paj arĩ ri mẽ inhīgêť kot amnhĩ nhĩpêx kôť amnhĩ nhĩpêx o ixpa rãhã nē inhmex kumrēx nē ri ixpa. Anē. Kwa ã mẽ ajamxpêr anhỳrja mex kêt.

⁴Mẽ akwỳ kot Kris ã mẽ atomnuj tã ka mẽ amnhĩ xà htỳx kamã ajamak o ri apa htã Kris kaga hkêť nē. Tã ra axtem nē mẽ kapêr o mẽ hêx xwỳnhjê jamxpêr kôť ajamxpêr o te Kris ã amnhĩ xà kamã ajamak kaprỳ pyrãk. Kwa nà mẽ ri mẽ hkôť ajamxpêr kêt nē.

⁵Na pre Tirtüm mẽ awỳr amnhĩ Karõ rē nhũm mẽ awỳr agjê nē mẽ amã aa mẽ ate mẽmoj pumunh kêt kwỳ ho anhỳr o ri mẽ akamã pa ho pa. Xà mẽ anhĩgêt kot amnhĩ nhĩpêx kêt mẽ ate amnhĩ nhĩpêx ã mẽ apumunh kêt na pre ã mẽ amã amnhĩ nhĩpêx anẽ? Nà ja kêt kêt. ãm mẽ ate Kris kapêr mar nē amnhĩ kaxyw hkôt ajamaxpêr ã mẽ apumunh kêt pix mã na pre ã mẽ amã amnhĩ nhĩpêx anẽ.

Tirtüm kot amnhĩ tã finat Apraãw pumunh kêt mex ã harēnh

Rômãn 4.1-25; Xiakre 2.23

⁶Nē mẽ ixpê Ijaew pàr krax finat Apraãw na pre amnhĩ kaxyw Tirtüm kêt hamaxpêr nhũm amnhĩ tã omu nē kãm: Nà ate amnhĩ kaxyw inhmã ajamaxpêr tỳx jakamã na pa amnhĩm amex ã ajarẽ. Amex kumrêx Apraãw.

⁷Anhỳr o kãm kapêr jakamã mẽ pahte uràk nē amnhĩ kaxyw hkôt pajamaxpêr xwỳnhjaja te mẽ pahpê Apraãw tàmnhwỳ pyràk.

⁸Nē mẽ apê Ijaew kêt xwỳnhjaja. Na hte Tirtüm mẽ pahto hpimràk tã mẽ pahte amnhĩ kaxyw kãm pajamaxpêr ã mẽ pahpumunh kêt amnhĩm mẽ pamex ã mẽ pajarẽ nē mẽ pahto hkra. Amnepêr na pre Apraãw mã kapêr nē kãm: E ate amnhĩ kaxyw ixkôt ajamaxpêr jakamã kot paj akukwak ri pyka piitã hkôt mẽ piitã mẽ ho mex nē. Anhỳr o kãm kapêr jao mãänēn mẽ apê Ijaew kêt xwỳnhjê jarẽ.

⁹Jakamã mẽ pahte Apraãw pyrà nē amnhĩ kaxyw Tirtüm kêt pajamaxpêr xwỳnhjaja kot puj mẽ pahpiitã uràk nē pamex kumrêx nē papa ho papa.

Tanhmã Tirtüm kot mẽ panê pĩ kahpa hã jêt xwỳnh nhĩpêx to hã harēnh

Rômãn 4.14; 7.10; Wam Korit 15.56

¹⁰Nē koja mēhõ hamaxpêr o: —E kot paj finat Mojes kapêr kêt ri amnhĩ nhĩpêx o ri ixpa nhũm Tirtüm ja hã ixpumu nē amnhĩm inhmex ã ijarẽ nē ixto hkra. Anẽ. No ãm ja kot anhỳr kêt. Tirtüm kapêr ã kagà htũm kot ja jarēnh kot: Ixte amnhĩm mẽ mex ã mẽ harēnh kaxyw mẽ kot Mojes kapêr kêt amnhĩ nhĩpêx xwỳnhjaja koja mẽ ãm mẽmoj pixire nē hirôp kuhê. Rỳ mẽmoj pixire nē hkôt amnhĩ nhĩpêx kêt pa ja hã mẽ omu nē hã mẽ homnuj tỳx kumrêx. Anhỳr jakamã tanhmã kot pu mẽ amnhĩ to nē Mojes kapêr piitã hkôt amnhĩ nhĩpêx nē aa ho pixi nē hirôp pakuhê hkêt? Nà kot puj mẽ ho

anhÿr kêt nê. Kot puj mẽ tee ri pamã ja ho anhÿr prãm kaprÿ. Jakamã Tirtũm kot amnhĩm mẽ mex ã mẽ harẽnh kaxyw mẽ kot ã amnhĩ nhĩpêx anhÿr mã xwÿnhjaja koja mẽ mex kêt nê.

¹¹Na hte Tirtũm mẽ kot finat Mojes kapêr kôt amnhĩ nhĩpêx o mẽ pa hã mẽ omunh xà hkôt mẽ mex ã mẽ harẽnh kêt nê. ãm mẽ kot amnhĩ kaxyw hkôt hamaxpêr xwÿnh pixjaja na hte ã mẽ harẽnh anê. Kapêr ã kagà htũm kot mẽ harẽnh kot: Mẽ kot amnhĩ kaxyw ixkôt hamaxpêr xwÿnhjaja na pa hte mẽ mex ã mẽ harẽnh o ixpa. Mẽ tapxipixjaja koja mẽ nhÿrmã Ixkra mẽ wa ixri mex kumrêx nê htĩr tũm nê pa ho pa. Anê.

¹²Nom na htem amnhĩ kaxyw Tirtũm mã hamaxpêr pê finat Mojes kapêr kôt amnhĩ nhĩpêx o pa hkêt nê. Mojes kapêr ã kagà kot ja jarẽnh kot: Mẽ kot ixkapêr piitã hkôt amnhĩ nhĩpêx mex o mẽ pa xwÿnh pixjaja koja mẽ htĩr tũm nê pa ho pa. Anê.

¹³Tã kot pu mẽ ãm kapêr o pixire nê hirôp pakuhê hãmri nê mÿrapê pahtĩr tũm nê papa hkêt nê. Nê hpãnhã mẽ kot amnhĩ xà htÿx kamã hamak tũm xàta hwÿr ma papa. Ja pymaj na pre Krisja ĩ ho mẽ pahwÿr wrÿ nê mẽ pahte amnhĩ tomnuj mÿrapê mẽ panê ty. Tirtũm kot mẽ pahte amnhĩ tomnuj mÿrapê tanhmã mẽ pahto pymaj ã mẽ panê htyk anê. Jakamã nhũm Tirtũm mẽ pahte amnhĩ tomnuj ã mẽ pahpumunh kôt mẽ pakuhpa hã Kraja homnuj nê. Kapêr ã kagà htũm kot ja jarẽnh kot: Pĩ kahpa hã jêt xwÿnhhta na pre Tirtũm homnuj tÿx kumrêx. Anê.

Mẽ kot amnhĩ kaxyw Kris kôt mẽ hamaxpêr xwÿnhjê jarẽnh

¹⁴Tã ã Jejus Kris kot mẽ panê amnhĩ nhĩpêx anhÿr kukwak ri na pre Tirtũm kot Apraãw nhĩpêx pyrà nê mẽ ixpê Ijaew pix o mex kêt nê. Mããnên mẽ apê Ijaew kêt xwÿnhjê ho mex nê. Jakamã koja mẽhõ. Ijaew õ rÿ Ijaew kêt xwÿnhjê hõ amnhĩ kaxyw Kris kôt hamaxpêr nhũm Tirtũm hã omu nê ho hkra nê hwÿr Karõ mẽ nhũm kãm axà.

Tirtũm kot finat Mojes kukamã mẽ pahto mex ã harẽnh

Rõmãn 3.19-20; 5.20-21; 11.32; Eprêw 6.13-18

¹⁵E ixkrãmnhwÿjaja. Kot paj ixprĩ hã mẽ amã ja jarê ka mẽ inhma. Nà koja mẽhõ wa hamêxkrut nê mẽmoj tã axpên ma. Pika hã war axpên ma rÿ

mëmoj tã war axpën ma. Hãmri nẽ wa hã axpën mar pa nhũm ja ãm hãmri nẽ ãm rãhãã. Koja nhãm mëhõ tẽ nẽ axtem tanhmã harënh to hkêt nẽ.

16Ja pyrã nẽ na hte ã Tirtũm mëmoj tã amnhĩ jarënh anẽ. Na hte mëmoj jarë nhũm arĩ rãhãã. Na hte jarãhã mëmoj jarë nhũm jãã nhũm axtem hijuk ri mëmoj jarënh kêt nẽ. Na hte ãm kapër pÿnh nẽ. Tã na pre Apraãw mã hkanrẽhã htãmnhwÿjê hõ kukwak ri Apraãw o mex ã amnhĩ jarë. Tãmnhwÿ piitã kukwak ri ho mex ã amnhĩ jarënh kêt nẽ. ãm kanrẽhã htãmnhwÿ Krisja pix kukwak ri ã Apraãw o mex ã kãm amnhĩ jarënh anẽ.

17E kot paj hpãnhã axtem tanhmã mẽ amã harënh to. Na hte Tirtũm kot mëmoj tã amnhĩ jarënh xà hkôt tanhmã mëmoj to ho pa rãhã nẽ. ã na pre finat Apraãw mã kot ho mex ã amnhĩ jarënh anẽ. Tã ra hã amgrã pê 430 nẽ hapêx nhũm hpãnhã finat Mojes mã kapër. Kot mar nẽ amnhĩ xõ ri Ijaew mã harënh o ri mẽ hkôt pa kaxyw. Tã no nhũm ra kot Apraãw mã mëmoj jarënh ta arĩ hã no htÿx rãhã nẽ aa ho hamakêtkati hkêt nẽ. Nẽ kot Mojes mã tanhmã kapër toja nẽ Apraãw mã tanhmã kapër toja nhũm hamẽ wa ho hamakêtkati hkêt nẽ. Nhũm wa hamẽ arĩ rãhã ho rãhã.

18Tã mẽ ano kupyw o ri mẽ pa xwÿnhjaja na htem htÿx tanhmã mẽ amã harënh to nẽ mẽ amã harënh o: —Kwa kot puj mẽ Mojes kapër kôt amnhĩ nhĩpêx o papa hkêt nẽ nhũm Tirtũm tee ri ja hã mẽ pahpumu nẽ mẽ pahto mex kêt nẽ. Anẽ. Nom ja kot anhÿr kêt. Kop apu ã kot anhÿr ronhÿx Tirtũm ra wam kot tanhmã Apraãw mã kapër tota ra ho hamakêtkati. Nom na hte arĩ kãm hamaxpër rãhã nẽ ho pigrãnh nẽ ho hapêx kêt nẽ. Na pre Apraãw mã kãm: Kot kaj amnhĩ kaxyw ixkôt ajamaxpër hã kot paj ato mex kumrêx. Anẽ. Tã kot ho mex ã amnhĩ jarënhja arĩ rãhãã. Na hte arĩ mẽ kot amnhĩ kaxyw hkôt hamaxpër xwÿnhjê ho mex nẽ. Nom mẽ kot Mojes kapër kôt amnhĩ nhĩpêx o pa hã mẽ omunh xà hkôt mẽ ho mex kêt nẽ. ãm mẽ kot amnhĩ kaxyw hkôt hamaxpër xwÿnh pixjaja na hte mẽ ho mex.

Mo kaxyw na Mojes kapër ã kagà?

Rõmãn 3.20; 5.20; 7.7

19-20Tã mo kaxyw na Mojes kapër ã kagàja? Nà mẽ pahte tanhmã amnhĩ tomnuj to ho papa hã amnhĩ pumunh nhũm Tirtũm kot ã mẽ pahte amnhĩ

nhĩpêx anhỹrja nê mẽ pahkurê kaxyw. Na pre Mojes Tĩrtũm nhỹ hã mẽmoj nê mẽ pahkurê. Mẽ pahte axpẽn pê paxàhkĩnh nê mẽ pahkurê. Nẽ mẽ pahte axpẽn mã paxêx o ri papa nê mẽ pahkurê. Ǻ mẽmoj nê mẽ pahkurê anẽ. Mẽ pahprĩ hã kapêr mar nẽ tãm amnhĩ nhĩpêx o papa kaxyw. Ja kaxyw na pre Tĩrtũm Ijaew kaxyw Mojes mã kapêr gõ. Na pre kaxkwa rũm kapêr o wrỳk xwỳnhjaja kumrêx kãm harẽ nhũm kuma nẽ Ijaew mã hã kagà. Jakamã na htem harẽnh o: “Mojes kapêr” anhỹr o harẽ. Tã Apraãw kanrêhã htàmnhwỳ Krisja kormã kator kêt ri nhũm Ijaew Mojes kapêr ma nẽ hkôt ri amnhĩ nhĩpêx o pa. Tã nhũm Krisja kator o Mojes kapêr o hapêx. Ra Tĩrtũm kot Kris kukamã ho mex ã amnhĩ jarẽnh xà hã arĩgrota kator mẽ nhũm Mojes kapêr hapêx. No na pre Tĩrtũm Ijaew mã ujarẽnh kaxyw tãm mẽ kãm ujarẽnh kêt nẽ. Kapêr o wrỳk xwỳnhjê mã na pre harẽ nhũm mẽ amnhĩ xô ri Mojes mã mẽ kaxyw kãm awjarẽ. Kot mẽ ô ri mẽ kãm harẽnh kaxyw. No Apraãw mã na pre Tĩrtũm tãm kapêr. Na pre hwỳr kapêr o wrỳk xwỳnhjê hõ mẽnh kêt nẽ. Tãm kot kãm kapêr jakamã kapêrja na mex o Ijaew kaxyw Mojes mã kapêr jakrenh.

²¹Nẽ na pre Tĩrtũm tanhmã mẽ pamã kapêr o amnhĩrĩt to nẽ mẽ pamã: —E kot paj amnhĩ kaxyw ixkôt mẽ ajamaxpêr ã mẽ apumunh kôt pix mã mẽ amex ã mẽ ajarẽ. Anhỹr o mẽ pamã kapêr. Tã xà na pre kapêrja nhĩjuk ri axte amnhĩ jarẽ nẽ amnhĩ jarẽnh o: —E kot paj mẽ ate Mojes kapêr kôt amnhĩ nhĩpêx mex o apa hã mẽ apumunh kôt mẽ amex ã mẽ ajarẽ. Anhỹr o mẽ pamã kapêr? Xà na hte mẽmoj jarẽ nhũm jãã nhũm ra hijuk ri axtem mẽmoj jarẽ? Nà Tĩrtũm kapêr ãm hpỳnh kênã. Kop ãm mẽ pahte Mojes kapêr kôt amnhĩ nhĩpêx o papa hã mẽ pahpumunh kôt mẽ pamex ã mẽ pajarẽnh ronhỹx mẽ pamã: —Ǻm ja pix ã mẽ apumunh kôt kot paj mẽ amex ã mẽ ajarẽ. Anẽ.

²²Nom na pre ã kapêr anhỹr kêt nẽ. Kapêr ã kagà htũm kot ja jarẽnh o: Mẽ apiitã mẽ ate amnhĩ tomnuj o mẽ apa xwỳnh na ka mẽ. Anhỹr jakamã tanhmã kot puj mẽ amnhĩ to nẽ Mojes kapêr kôt amnhĩ nhĩpêx mex o papa? Mẽ pahpiitã mẽ pahte amnhĩ tomnuj xwỳnh kênã. Mẽ pahte kapêr piitã hkôt amnhĩ nhĩpêx kêt jakamã koja Tĩrtũm ja hã mẽ pahpumunh kôt mẽ pamex

ã mẽ pajarēnh kêt nē. Koja ãm mẽ pamã kapēr o: —Kot kaj mẽ amnhĩ kaxyw Jejus Kris mã ajamxpēr pa ja hã mẽ apumunh kôt mẽ amex ã mẽ ajarē nē mẽ ato ixkra nē mẽ ato mex o ri ixpa. Anē.

Mojes kapēr te kēp Kris xwỳj ri mẽ hamār xwỳnh pyràk ã harēnh

Rômãn 10.4; Karatas 4.1

²³Nē kormã Kris kot mẽ pahwỳr wrỳk nē mẽ panê htyk xwỳj ri na pre Ijaew Mojes kapēr ma nē hkôt amnhĩ nhĩpêx o ri pa. Nhũm kapērja te kot amnhĩm mẽ unēnh nhũm mẽ kot hkôt pix mã amnhĩ nhĩpêx o ri pa pyràk. Na prem Tĩrtũm kot mẽ mex ã mẽ harēnh prãm xàj ãm pix ma nē hkôt amnhĩ nhĩpêx o pa. Nom kapēr piitã hkôt amnhĩ nhĩpêx mex kêt nē.

²⁴Te mẽhprĩre nhũm Mojes kapēr te kēp mẽ hamār xwỳnh pyràk. Mẽhprĩ jamār xwỳnhjaja na htem mẽhprĩjê pumu nē tãm mẽ kot amnhĩ nhĩpêx kaxyw tanhmã mẽ ahkre hto ho mẽ hkôt pa. Ja pyrà nē na pre Ijaew tãm amnhĩ nhĩpêx o pa kaxyw Mojes kapēr ma nē hkôt amnhĩ nhĩpêx o ri pa. Jejus Kris kutêp ã amnhĩ nhĩpêx anhỹr o ri pa. Tã nhũm Jejus tãm kaxkwa rũm wrỳ pa mẽ ixkwỳ pixjaja mẽ ixkwỳjê rom amnhĩ kaxyw hkôt ijamxpēr. Hãmri nhũm Tĩrtũm ja hã mẽ ixpumunh kôt mẽ inhmex ã mẽ ijarēnh kurê kumrêx.

Jejus kukwak ri mẽ pahpê Tĩrtũm kra ã mẽ pajarēnh

Juãw 1.12; Rômãn 8.14; Epes 1.5

²⁵⁻²⁶Tã ra mẽ ixte amnhĩ kaxyw Kris kôt ijamxpēr jakamã na pre Tĩrtũm mẽ ixto hkra pa mẽ ra te ixpê hkra xàptàr pyràk o amnhĩ nhĩpêx nē kapēr kôt amnhĩ nhĩpêx mex o ri ixpa. Jao Mojes kapēr kaga. Te mẽhprĩre ra mẽ ahkre kamã mẽ àptàr nē kot mẽ ahkre xwỳnh kaga pyràk. Hãmri pa mẽ ixpê Tĩrtũm kra xàptàrjaja hãmri axte Mojes kapēr kôt amnhĩ nhĩpêx hkêt nē.

²⁷Tã mẽ kajaja na ka pre mẽ ixpyrà nē amnhĩ kaxyw Kris kôt ajamxpēr nhũm mẽ akwỳ kot mẽ apê Jejus kwỳ hã mẽ apumunh kaxyw nhũm mẽ akrã kumrã. Hãmri ka mẽ Jejus kot amnhĩ nhĩpêx kôt pix mã amnhĩ nhĩpêx o ri apa.

²⁸Tã ra mẽ pahpê Jejus Kris kôt amnhĩ xunhwỳr xwỳnh jakamã na hte Tĩrtũm ahpỹnhã ri tanhmã mẽ pakute hkôt mẽ pahpumunh kêt nē. Mẽ pahpê

Ijaew rỳ mẽ pahpê Ijaew kêt xwỳnhjaja. Rỳ mẽ pahpê nhãm mẽ kãm paxàpênh xwỳnh rỳ amnhĩ mã mẽ paxàpênh xwỳnh nhũm hte ja hã mẽ pahpumunh kôt tanhmã mẽ pajarênh to hkêt nê. Rỳ mẽ anijê hkôt rỳ mẽ inhmyjê hkôt mẽ pahpumunh kôt tanhmã mẽ pajarênh to kêt nê. ãm mẽ pahte Jejus Kris kôt amnhĩ xunhwỳr ã mẽ pahpumunh kôt pix mã na hte ã mẽ pahpumunh o pa anê.

²⁹Nê na pre Tĩrtũm Apraãw mã hkanrêhã htàmnhwỳ Jejus Kris o mex ã amnhĩ jarê. Tã Kris kêp mẽ panhõ Pahihti jakamã pu mẽ Tĩrtũm noo mã uràk nê te mẽ pahpê Apraãw tàmnhwỳ pyràk. Jakamã koja Apraãw nhĩpêxta pyrà nê mẽ pahto mex rax nê.

Karatas 4

Mojes kapêr te axte mẽ pahpynênh kêt pyràk ã harênh

Rômãn 7.1; 8.14-17; Karatas 3.23

¹E kot paj axte mẽ amã tanhmã mẽhprĩjê jarênh to ka mẽ inhma. Koja mẽhõ ra hkra mã mẽmo hikukrêx nhõr kaxyw. Hikukrêx nê õ pika. Õ mẽmoj piitã õr kaxyw. No nhũm hkraja kormã hprĩre nê hamaxpêr mex kêt jakamã nhũm kormã hprêk jamãr o pa. Nhũm hkraja arĩ te kãm àpênh o pa xwỳnh kot amnhĩ nhĩpêx pyrà nê amnhĩ krã hkôt ri amnhĩ nhĩpêx o pa hkêt nê. Kormã hipêêxà kapêr kôt ri amnhĩ nhĩpêx o pa. Nhũm hipêêxàja kot kãm õ mẽmoj piitã õr kaxyw no ãm kormã hprêk jamã.

²Tã kormã hkraja hprĩre ri nhũm hipêêxà tanhmã amnhĩ to nê ty. Nom nhũm hkraja mỳr pê kormã õ mẽmoj o amnhĩptàr kêt nê. Kormã hprĩre jakamã nhũm hipêêxà mỳr pê kot kãm hamãr o pa xwỳnhja kormã kãm hamãr o pa. Tã nhũm hipêêxà kot kãm amgrà jarênh xwỳnhhta kato nhũm tãm mẽmoj piitã ho amnhĩptà. Ra àptàr mex nê hamaxpêr mex nê amnhĩm ho amnhĩptàr pa.

³Tã Ijaew na prem ã amnhĩ nhĩpêx anê. Amnepêm kormã mẽ kot Mojes kapêr kôt ri amnhĩ nhĩpêx o pata ã na prem te mẽhprĩre hamaxpêr kêeta pyràk. Te kormã mẽ àptàr kêt pyrà nê jar pika ja kamã mẽ kot amnhĩ nhĩpêx tũm kôt pix mã amnhĩ nhĩpêx o pa. Mẽ kot amnhĩ nhĩpêx tũm te kot amnhĩm

mě unênh nê mẽ kãm ê pyræk o mẽ hipêx nhũm mẽ hkôt pix mã amnhĩ nhĩpêx o ri pa.

⁴Tã nhũm Tĩrtũm kot Kra hkukamã mẽ pahwỳr mênh xà hã arĩgrota kato hãmri nhũm mẽ pahwỳr kumẽ nhũm mẽ pahwỳr wrỳ nê mẽ pahpyrà nê mēhõ nhõhy rũm kato. Nê mẽ pahpyrà nê gaa nê hprêk nê mẽ ixpê Ijaew rom Mojes kapêr piitã hkôt amnhĩ nhĩpêx mex kumrêx o ri pa.

⁵Jao te kot Mojes kapêr pê mẽ papytâr pyræk o mẽ panhĩpêx pu mẽ hpãnhã pahpê Tĩrtũm kra kaxyw.

⁶Tã mẽ ixpê Ijaew kwỳjaja nê mẽ apê Ijaew kêt xwỳnh kwỳjaja ra mẽ pahpê Tĩrtũm kra jakamã na pre mẽ pahwỳr Kra Jejus Karõja rē nhũm mẽ pamã agiê. Hãmri nê mẽ pamã kapêr o: —Ra mẽ apê Tĩrtũm kra jakamã kêt ka mẽ kãm amnhĩ jarênh kaxyw nê kãm: “Pa Papaj” anê. Kêt ka mẽ ã kãm akapêr anê. Anê.

⁷Jakamã na pu mẽ ra te pahpê mẽ kãm paxàpênh xwỳnh pyræk kêt nê. Ra mẽ pahpê Tĩrtũm kra jakamã na hte mẽ panhĩpêx o te Kra Jejus nhĩpêx pyrà nê mẽ pahto mex nê.

Mojes kapêr kôt mẽ kot amnhĩ nhĩpêx xwỳnhjê jarênh

Sikũn Korĩt 11.3-4; Korosê 2.16-19; Eprêw 6.1; Wam Pêtre 1.14

⁸Nê amnepê mã kormã mẽ ate amnhĩ kaxyw Jejus kôt ajamaxpêr kêt ri na ka prem Tĩrtũm jarênh mar kêt nê. ãm atỳx ri sãnti mã mex ã harê nê kãm amnhĩ jagrer o ri apa. Nê amã mẽmoj kĩnh nê amã hprãm xàj tanhmã amnhĩ to hwỳr to ho ri apa. Te mẽ kãm mẽ àpênh o mẽ pa xwỳnhjaja kot amnhĩ nhĩpêx pyrà nê sãnti mã tanhmã amnhĩ nhĩpêx to ho ri apa. Nom sãntija kêp Tĩrtũm kêt.

⁹Tã ka prem Tĩrtũm jarênh ma nê hkôt amnhĩ xunhwỳ nhũm amnhĩ tã mẽ apumu. Tã tãm kot amnhĩ kaxyw mẽ paxunhwỳr jakamã kwa mon ka mẽ ra axtem nê akupỹm sãnti hkôt amnhĩ nhĩpêx kaxyw? Nà mẽ ajamaxpêrja mex kêt. Sãnti nhĩpêxta tanhmã koja amnhĩ to nê mẽ ato ajuta? ãm mẽ kot ìhkra ho hipêx pix jakamã hihtỳxti hã. Amarĩ kuhê xà kamã kuhê ho kuhê xwỳnh kênã. Tã te kot akupỹm amnhĩ kôt mẽ arênh kaxyw pyræk o mẽ anhĩpêx ka

mě ra axtem nē akupŷm hkôt amnhĩ nhĩpêx kaxyw. Kwa nà mẽ ã ri amnhĩ nhĩpêx anhŷr kêt nē.

¹⁰Nē na ka htem amnhĩ kukamã ajamaxpêr o: —Na pre hte Ijaewjaja Mojes kapêr xà hkôt arĩgro hkwŷ hã axtem tanhmã amnhĩ nhĩpêx to nē mẽmo mytwrŷ hã tanhmã amnhĩ nhĩpêx to nē mẽmo amgrà hã tanhmã amnhĩ nhĩpêx to. Tã kot paj mẽ uràk nē ã amnhĩ nhĩpêx anhŷr o ixpa. Kê Tĩrtũm ja hã ixpumu nē inhmex ã ijarē. Anē. Kwa mẽ ã ajamaxpêr anhŷr kêt nē. Mon ka htem axtem nē ri ã ajamaxpêr anē? Na hte Tĩrtũm ã mẽ pahte amnhĩ nhĩpêx anhŷr ã mẽ pahpumunh kôt mẽ pamex ã mẽ pajarēnh kêt nē.

¹¹Na pa ja hã mẽ ajarēnh ma nē tee ri mẽ akukamã ijamaxpêr. Te ixte Tĩrtũm kapêr o mẽ ajahkre kaprŷ ho ri ixpa pyràk.

Karatas nhõ xwŷnhjaja kot Pawre ho mex ã mẽ harēnh

Wam Korĩt 9.21-23

¹²Kwa ixkràmnhwŷjaja. Ixpê Ijaew tã te ixpê Ijaew kêt pyràk o amnhĩ nhĩpêx o ri mẽ apê Ijaew kêt xwŷnhjê hkôt ri ixpa. Jao Kris kapêr gryk ã mẽ inhĩgêjtjaja kot amnhĩ nhĩpêx kaga nē axte hkôt amnhĩ nhĩpêx kêt nē. Tã kwa mẽ ixpyrà nē ã amnhĩ nhĩpêx anē. Wem ma amnhĩ to amõr gri kêt wehe. Wam ixte mẽ awŷr inhmõrta ã na pa pre mẽ amã Tĩrtũm kapêr jarēnh o ri mẽ akôt ixpa ka prem inhma nhũm ja mẽ amã mex nē ka mẽ ja hã tanhmã ixto hkêt nē.

¹³Na pa pre ixàà nē mẽ awŷr mō nhũm ixàja ixto htŷx nē pa tokyx ixkator nē ma akupŷm mẽ arũm inhmõr kêt nē arĩ mẽ amã Tĩrtũm kapêr jarēnh o ixpa.

¹⁴Kormã ixà nē tanhmã ixkute htã ka prem ja hã ixpumu nē ixto mex nē ixkamã anhõkre kahak kêt nē. Na ka prem te ixto Jejus Kris nhĩpêx pyràk o inhĩpêx. Nē te ixto Tĩrtũm kapêr o wrŷk xwŷnh nhĩpêx pyràk o inhĩpêx.

¹⁵Jao mẽ amã ixkĩnh nē ã inhĩpêx anē nē mẽ amã ixto mex pix prãm. Nē nhŷri ixpumu nē ixkamã axukaprĩ nē inhmã akapêr o: —Hêxta waa nē. Anopxàà. Inhmã amnhĩ no kaxàr nē amã õr prãm nom tanhmã kot pa mẽ amnhĩ to nē hkapa nē amã kugõ? Anē. Nē mẽ amã inhmã mẽmoj mex pix

nhõr prãm. Tã ra tanhmã ajamxpěr to nẽ axtem nẽ te mẽ amã ixkĩnh kêt pyræk o inhĩpêx.

Mẽ no kupyw xwỳnhjaja kot mẽ hamaxpěr o pihkàr ã mẽ harẽnh

16Nẽ na pa pre ãm hãmri mẽ amã Tĩrtũm kapěr jarẽnh o ri mẽ akõt ixpa. Nom ra mẽ amã mar prãm kêt jakamã na ka mẽ axtem nẽ inhĩpêx o te ixte mẽ akutã amnhĩ xãm pyræk.

17Mẽ amã Tĩrtũm kapěr o mẽ hêx xwỳnhjaja te mẽ kãm mẽ akĩnh pyræk o mẽ anhĩpêx no ãm mẽ kãm akĩnh kêt. Na htem mẽ amex kaxyw tanhmã mẽ amã kapěr to hkêt nẽ. ãm mẽ ate mẽ mar nẽ mẽ gryk ã ixkaga nẽ mẽ hkõt ri amnhĩ nhĩpêx o apa pix prãm xàj na htem mẽ akõt tanhmã mẽ amã hêx to ho pa.

18Pa mẽ harẽnh ma hãmri nẽ mẽ kamã inhgryk o ã mẽ amã mẽ harẽnh anhỹr kêt nẽ. Kojã mẽhõ mẽ awỳr mra nẽ ixwakre kamã rỳ inhnoo mã mẽ amã mẽmoj mex jarẽ nhũm ja inhmã mex nẽ. No nhũm mẽ amã mẽ hêx xwỳnhjaja axtem nẽ mẽ ajamaxpěr o pihkàr pix kaxyw na htem mẽ awỳr mra nẽ mẽ amã ã ujarẽnh o pa anẽ.

Pawre kot tee ri mẽ hkukamã hamaxpěr ã harẽnh

19Te mẽ apê ixkra pyræk jakamã na pa hte mẽ ate amnhĩ nhĩpêx ã mẽ apumu nẽ tee ri ijamaxpěr nẽ ixkaprĩ htỳx nẽ. Te nhỹhỹnh ixà htỳx nẽ ixte amnhĩ xà htỳx kamã ijamak o ri ixpaja pyræk. Rỳ te mẽ hpijagri ho mẽ hikwỹ xwỳnh õhy xà htỳxta pyræk. Mẽ ate Kris kõt amnhĩ nhĩpêx mex o apa hprãm xàj na pa hte ã amnhĩ nhĩpêx anhỹr o ri ixpa.

20Hêxta waa nẽ. Kop apu ra mẽ awỳr ixpõx nẽ mẽ akõt ixpa ronhỹx pa ixkĩnh tỳx kumrêx. Nhỹx pa ra ixprĩ hã mẽ amã ixkapěr ka mẽ inhma. Nẽ amnhĩ tã inhmã mẽ akĩnh tỳx ã mẽ akamã inhgryk kêt ã ixpumunh kurê kumrêx. No kagà pix kãm ixkapěrja ka mẽ kamã harẽ nom aprĩ hã inhmar mex kêt nẽ. Na pa tee ri mẽ akukamã ijamaxpěr o ixkaprĩ htỳx nẽ ixpa.

Mojes kapěr kõt mẽ kot amnhĩ nhĩpêx xwỳnhjê jarẽnh

Eprêw 12.18-29

²¹Kwa mẽ amã arĩ Mojes kapër kôt amnhĩ nhĩpêx o ri mẽ apa hprãm xwỳnhjaja. Mãn ka mẽ kormã aprĩ hã Mojes kapër piitã mar par kêt jakamã na ka mẽ amã hkôt amnhĩ nhĩpêx prãm. E pa ixprĩ hã mẽ amã tanhmã harēnh to ka mẽ inhma.

²²Nà Tĩrtũm kapër ã kagà htũm kot finat Apraãw jarēnhja. Na pre hkra myja wa hamēxkrut. Prõ Sara kamã ja nẽ kot amnhĩm haprôr nhũm ri kãm àpēnh o pa xwỳnh Aga kamã ja.

²³Kãm àpēnh xwỳnh kamã ja na pre mẽ pahpiitã mẽ pahpyrà nẽ amarĩ kato. No hprõ Sara kamã ja. Sara na pre ra hpigêx tỳx nẽ. Ra hkamrô hkêt ryy nẽ pa htã nhũm Tĩrtũm kot wa hkra hkukamã wa kãm ujarēnh xà hkôt nhũm Apraãwja htu nhũm wa hkrata kato. Tĩrtũm kot hkukamã wa kãm harēnh xà hkôt nhũm kamã hkra nhũm kato.

²⁴⁻²⁵Tã wa nita ã wa harēnh kot anhỹr. Na pre Tĩrtũm mẽmoj jarē. Te ho wa uràk o wa harē no ãm hã kuxi nẽ ã wa harēnh anẽ. Jakamã ni wa harēnhja te kot Tĩrtũm kapër pijakruuta pyràk. Wam ni Agata te kot hixêt prêk pê Sinai nhĩmõk ã Tĩrtũm kot Mojes mã kapërta pyràk. Hixêtja pika pê Arap kamã na pre. Jakamã nhũm Tĩrtũm Ijaew kaxyw Mojes mã kapër nhũm kuma nẽ amnhĩ xô ri mẽ kãm hã kagà. Tã na hte arĩ jarãhã mẽ hkwyjaja hamaxpēr o: —E kot paj mẽ panhĩgêt finat Mojes kapër kôt amnhĩ nhĩpêx o ri ixpa nhũm Tĩrtũm ja hã ixpumu nẽ amnhĩm inhmex ã ijarē nẽ ixto hkra. Anhỹr o hamaxpēr no ãm ã hamaxpēr anhỹr kaprỳ. ã mẽ hamaxpēr anhỹr xwỳnhjaja te mẽ kêp Apraãw mã àpēnh xwỳnh Aga hkrata pyràk. Nẽ krĩ pê Jerujarē kêp Ijaew nhõ krĩ jakamã haxwỳja te kêp Agata pyràk. Nhũm krĩ nhõ xwỳnhjaja haxwỳja te mẽ kêp Aga hkrata pyràk. Na htem htỳx Tĩrtũm kot mẽ omunh nẽ mẽ ho hkra hprãm xàj Mojes kapër kôt amnhĩ nhĩpêx o pa hã amnhĩ jarēnh kaprỳ. Jakamã haxwỳja te mẽ kêp mẽ kãm mẽ àpēnh o pa xwỳnh pyràk.

Jejus kôt mẽ kot amnhĩ kaxyw hamaxpēr xwỳnhjê jarēnh

²⁶Nẽ hapu hã Tĩrtũm kapërta. Apraãw prõ kumrêx Saraja te kêp kaxkwa kamã Jerujarē õja pyràk. Krĩ ja kamã mẽ pa mã xwỳnhjaja te mẽ kêp mẽ

kām mẽ àpênh xwỳnhjê pyràk kêt. Ra mẽ kot amnhĩ kaxyw Kris mã hamaxpêr nê hkôt amnhĩ xunhwỳr jakamã na htem hamaxpêr o: —Ixte amnhĩ kaxyw Kris mã ijamaxpêr nê hkôt amnhĩ xãm jakamã na Tĩrtũm ixpumu nê amnhĩm inhmex ã ijarê nê ixto hkra. Anê. ãm hãmri na mẽ ã wamtajê rom hamaxpêr anê. Tã ã mẽ hamaxpêr anhỳr xwỳnhjaja te mẽ kêp Sara hkra pyràk.

²⁷Tĩrtũm kapêr ã kagà htũm kot ja jarênh kot: E kormã akra hkêt nê apa htã kêr ka mãmrĩ akĩnh nê ri apa. Nê kormã apijagri hkêt tã kêr ka akĩnh tỳx nê ri apa. Kormã amjên kot akamã hkra hkêt nê te kot akaga pyràk tã kot kaj akra nê akanrêhã atàmnhwỳ xohtô rax nê. Mẽ ohtô rax o ra amjên kot nhãm hprô hõ kamã hkrata jakre. Anê. ã kapêr kot anhỳr o mẽ kot amnhĩ kaxyw Kris kôt hamaxpêr xwỳnhjê hkukamã mẽ ohtô hã mẽ harê.

²⁸E ixkràmnhwỳjaja. Te mẽ apê Ijak kanrêhã htàmnhwỳ pyràk. Kojã mêhõ amnhĩ kaxyw Kris kôt hamaxpêr hãmri nê te kêp Apraãw mẽ hprô Sara wa hkra Ijak kanrêhã htàmnhwỳ pyràk. Na pre Tĩrtũm amnepê mã kormã Ijak kator kêt ri ra hkukamã hamaxpêr nê Apraãw mã harê. Nê mẽ papajaja nhũm Tĩrtũm Ijak pyrã nê mẽ pakukamã mẽ pamã hamaxpêr nê amnhĩm mẽ paxunhwỳr ã amnhĩ jarê. Tã ra mẽ ate amnhĩ kaxyw Kris kôt ajamaxpêr jakamã te mẽ apê Ijak kanrêhã htàmnhwỳ pyràk.

²⁹Nhũm Apraãw kot Aga kamã hkra Ismaewja na pre hprô kumrêx kamã hkrata pumu nê kãm hkĩnh kêt nê kamã gryk pix o pa. Nê tanhmã hipêx to pê ri haprỳ ho ri hkôt pa. Tã mẽ kot amnhĩ krã hkôt amnhĩ to Tĩrtũm kra hprãm xwỳnhjaja na htem ã mẽ pahte Kris kôt amnhĩ xunhwỳr xwỳnhjê nhĩpêx anhỳr o pa. Na htem Tĩrtũm kot mẽ pahto hkra hã mẽ pahpumu nê Ismaew kot Ijak nhĩpêx pyrã nê mẽ pakamã gryk pix o pa. Nê tanhmã mẽ pahptomnuj to pê mẽ pahto kapêr o ri pa.

³⁰Tã no ãm kwãr mẽ mãmrĩ ã mẽ panhĩpêx anê. Kojã mẽ pahpyrã nê nhỹrmã Tĩrtũm nhõ krĩ hwỳr àpir kêt nê. Tĩrtũm kapêr ã kagà htũm kot mẽ harênh kot: Na pre Tĩrtũm Apraãw mã kapêr nê kãm: “E kêr ka amnhĩ nê ate haprô nhũm kot amã àpênh o ri pa xwỳnh mẽ hkrata wa hano. Kojã hkrata amỳr

pê amnhĩm mẽmoj to àrĩk kêt nẽ. Ate aprõ kumrẽx kamã akrata pix koja hõja rom amỳr pê mẽmoj piitã ho amnhĩptàr pa.” Anẽ.

³¹Tã te mẽ pahpê àpênh xwỳnh kamã hkrata pyràk kêt. Te mẽ pahpê Apraãw prõ kumrẽx kamã hkrata pyràk. Te Tĩrtũm kot Ijak kukamã hamaxpěr pyràk o na pre mẽ pakukamã hamaxpěr.

Karatas 5

¹Nẽ Kris kot mẽ pahte amnhĩ nhĩpêx tũm pê mẽ papytãr jakamã kwa ixkrãmnhwỳjaja. Kêr ka mẽ arĩ ate amnhĩ nhĩpêx tũm kôt amnhĩ nhĩpêx kêt nẽ. Ra Kris kot ja pê mẽ papytãr nhũm mẽ paxãmnhĩx ri papa kênã.

Mẽ pahpê Tĩrtũm kra hprãm xàj tanhmã mẽ pahte amnhĩ nhĩpêx to

Juãw 8.32; 8.36; Korosẽ 2.20

²E mẽ inhma. Kot kaj mẽ atõ Tĩrtũm kot ato hkra hprãm xàj amnhĩ my kwryt kà krãhta hã kot kaj mẽ ãm amarĩ ã amnhĩ nhĩpêx anhỳr kaprỳ. Na hte Tĩrtũm ja hã mẽ omu nẽ ãm hã mẽ omu. Kot kaj ã amnhĩ nhĩpêx anẽ nhũm Krisja ãm ate amnhĩ tomnuj mỳrapê anẽ htyk kaprỳ pyràk o amnhĩ nhĩpêx.

³Hãmri nhũm Tĩrtũm tee ri ja hã mẽ apumu nẽ te kot ã mẽ amã kapěr anhỳr pyrã nẽ mẽ amã kapěr o: —E ra amã apê Kris kwỳ hprãm xàj amnhĩ my kwryt kà krãhyr jakamã kot kaj mããnẽn Mojes kapěr piitã hkôt amnhĩ nhĩpêx o ri apa. Anhỳr o mẽ amã kapěr pyràk.

⁴Nom kot kaj mẽ atõ amnhĩ kukamã ajamaxpěr o: —Nà kot paj Mojes kapěr piitã hkôt amnhĩ nhĩpêx o ri ixpa nhũm Tĩrtũm ja hã ixpumu nẽ inhmex ã ijarẽ nẽ ixto hkra kãm ga. Anẽ. No ãm ja kot anhỳr kêt. Na hte Tĩrtũm ã mẽ pahte amnhĩ nhĩpêx anhỳr ã mẽ pahpumunh kôt mẽ pahto hkra hkêt nẽ. Jakamã kot kaj mẽ ã amnhĩ nhĩpêx anẽ nẽ te ate Kris kutã amnhĩ xãm pyràk nhũm Tĩrtũm ato mex kêt nẽ.

⁵Nom kot ka mẽ axtem ajamaxpěr o: —Ra ixte amnhĩ kaxyw Kris kôt ijamaxpěr nẽ hkôt amnhĩ xãm jakamã koja Tĩrtũm hã ixpumu nẽ inhmex ã ijarẽ. Karõ ra kot ã inhmã ja ho amnhĩrĩt anhỳr kênã. Anhỳr o ajamaxpěr. ãm hãmri ã mẽ ajamaxpěr anhỳrja.

⁶Jakamã mẽ pahpê Kris kôt amnhĩ xunhwỳr xwỳnhjê kamã ra mẽ kot amnhĩ my kwỳt kà jakàr xwỳnhjaja nhũm mẽ pahkwỳjaja ã amnhĩ nhĩpêx anhỳr kêt nê. Tã nhũm Tĩrtũm ja hã mẽ pahpumu nhũm ja tanhmã kêp kute hkêt. Na hte mẽ pahte amnhĩ my kwỳt kà jakàr ã mẽ pahpumu nê ãm hã mẽ pahpumu. No kot pu mẽ Jesus Kris kôt amnhĩ nhĩpêx mex o ri papa. Nê amnhĩ kaxyw hkôt pajamaxpêr tỳx o ri papa. Nê mẽ pamã axpên kĩnh pê tãm ri axpên nhĩpêx o ri papa. Ja na kêt Tĩrtũm kãm hprãm.

⁷Ra mẽ ate Kris kôt amnhĩ nhĩpêx mex o ri apa htã nhũm mẽ hêx xwỳnhjaja mẽ awỳr mra nê tee ri ã mẽ ate amnhĩ nhĩpêx anhỳr ã mẽ apumu nê tanhmã mẽ amã Tĩrtũm kapêr o hêx to. Ka mẽ ama nê axte Tĩrtũm kôt amnhĩ nhĩpêx mex hkêt nê.

⁸No ãm ã mẽ kot mẽ amã mẽ ujarênh anhỳr xwỳnhjaja na pre Tĩrtũm mẽ awỳr mẽ rênh kêt nê. Tĩrtũm kot amnhĩ wỳr mẽ awỳr xwỳnh kênã kot kêt axtem nê mẽ awỳr kapêr o mẽ amã hêx o mẽ pa xwỳnhjê rê.

⁹Nê koja mễhỗ pixi nê tanhmã amnhĩ tomnuj to nhũm mẽ piitã ja hã omu nê uràk nê kãm tanhmã amnhĩ tomnuj to hprãm.

¹⁰No kêt mẽ apê Kris kwỳ na ka mẽ. Ixte ja hã mẽ apumunh mex. Kot kaj mẽ axte ixkapêr ma nê akupỳm Kris kôt amnhĩ nhĩpêx mex o ri apa. Nà kot kaj mẽ ã amnhĩ nhĩpêx anê nê axte mẽ kot mẽ apê àmnàr xwỳnhjê kapêr mar nê mẽ hkôt amnhĩ nhĩpêx kêt nê. Koja Kris mẽ atã mẽ homnuj tỳx kumrêx nhũm mẽ rĩ amnhĩ pumu.

Pawre kot mẽ kot amnhĩ jakàr ã mẽ kãm karõ hkêt ã harênh

¹¹Nê na hte Tĩrtũm kapêr o mẽ hêx xwỳnhjaja tanhmã mẽ amã ixto hêx to ho pa. Ixte mẽ kãm Tĩrtũm kot mẽ ho hkra kaxyw mẽ kot amnhĩ my kwỳt kà jakàr ã mẽ kãm karõ hã ixto ri hêx o pa. Nom ixte anhỳr kêt ixkràmnhwỳjaja. Kop apu ixte mẽ kãm ja hã karõ ho ixpa ronhỳx Ijaew krãhtũmjaja ja hã ijarênh ma nhũm ja mẽ kãm mex nê nhũm mẽ axte Kris ã tanhmã inhĩpêx to hkêt nê. Nom ixte ja hã mẽ kãm karõ hkêt. ãm ixte mẽ kãm Kris kot mẽ panê pĩ kahpa hã htyk jarênh pix mỳrapê na htem ixkamã gryk nê.

12Hêxta waa nê. Mě kot mẽ amã hêx o pa pê mẽ ajamaxpêr o pihkàr xwỳnhjaja kop mẽ ãm mẽ anhõ krĩ rũm hapôx nê ma nhỹhỹm hapêx ronhỹx pa ixkĩnh tỳx kumrêx.

Mě pahte axpên to mex o papa hã mẽ pamã karõ

Wam Korĩt 13; Eprêw 13.3; 13.16; Wam Pêtre 1.22; Wam Juãw 3.11

13-14Kwa ixkràmnhwỳjaja. Nà na pre Kris amnhĩ kaxyw mẽ parê. Axte mẽ pahte amnhĩ nhĩpêx tũm kôt amnhĩ nhĩpêx kêt kaxyw. Ra kot ã mẽ pahte amnhĩ nhĩpêx anhỹr pê mẽ papytâr jakamã kêr ka mẽ amnhĩ tã ja ma nê axte atỳx ri amã hprãm xà hkôt tanhmã amnhĩ nhĩpêx to ho ri apa hkêt nê. Mě ãm amã axpên kĩnh pix o ri axpên kôt apa. Nê nhãm mẽ hipêx o te ka amã amnhĩ tã ma pyràk o mẽ hipêx. Jao mẽ piitã tãm mẽ hipêx o ri apa. Kot kaj mẽ ã amnhĩ nhĩpêx anê nê te mẽ ate wam Tĩrtũm kapêr piitã hkôt amnhĩ nhĩpêx pyràk.

15No kot kaj mẽ axtem nê axpên kãm axoprê ho ri apa hãmri nê te ra mẽ ate axpên to ajapêx par o amõr pyràk o amnhĩ nhĩpêx. Te mry xoprê kot axpên par o pata pyràk. Kwa mẽ ã amnhĩ nhĩpêx anhỹr hkêt nê. Mě ãm axpên to mex pix nê mẽ axpên kãm axukapĩ ho ri axpên kôt apa.

Mě pahte amnhĩ nhĩpêx nyw jarênh

Matêwre 26.41; Rõmãn 8.1-11

16Nê kwa kêr ka mẽ amnhĩ to Tĩrtũm Karõ wỳ kê mẽ amã mẽ ate amnhĩ nhĩpêx nyw jagjê ka mẽ axte ate amnhĩ nhĩpêx tũm kôt amnhĩ nhĩpêx hkêt nê. ãm mẽ ate amnhĩ nhĩpêx nyw kôt pix mã mãn amnhĩ nhĩpêx o ri apa.

17Tĩrtũm Karõ kot amnhĩ nhĩpêxja nê mẽ pahte amnhĩ nhĩpêx tũmja wa kot axpên pyràk kêt. Te wa kot axpên kutã amnhĩ xãm nê wa pijapu pyràk. Jakamã kot puj mẽ pahte amnhĩ nhĩpêx tũm o amnhĩ nhĩpêx nê Tĩrtũm Karõ mã hprãm xà hkôt amnhĩ nhĩpêx hkêt nê.

18No kot puj mẽ Tĩrtũm Karõ hkôt amnhĩ nhĩpêx nê ra jar pika ja kamã mẽ kot amnhĩ nhĩpêx kôt ri amnhĩ nhĩpêx kêt nê. Ra axtem mẽ pahte amnhĩ nhĩpêx nyw o amnhĩ nhĩpêx.

19Jar mẽ kot amnhĩ nhĩpêx tũmta mex kêt. Ra mẽ piitã mẽ kot ja pumunh mex. Na htem htỳx ri hkwỳjê kamã hpijaàm kêt o pa. Jao mẽmyjaja hprõ

kuhpa hã nhãm mēnijê ho amnhĩkati. Nhũm mẽ hprōjaja mẽ mjên kuhpa hã nhãm mẽmyjê ho amnhĩkati. Nẽ mẽmy hkwỳjaja axtem nẽ mẽmyjê hkwỳ ho amnhĩkati. Nẽ mẽni hkwỳ haxwỳja axtem nẽ mẽnijê hkwỳ ho amnhĩkati.

²⁰Nẽ mẽ kãm mẽmoj mẽ hikukrêx japê htỳx o kãm Tĩrtũm kĩnh jakre. Nẽ mẽmoj kaxyw ma wajaga hwỳr amnhĩ to pa. Nẽ hkwỳjê kamã oprê ho ri pa. Nẽ mẽmoj tã axpẽn kãm gryk pix nẽ. Nẽ mẽmoj to axpẽn pê õxỳ nẽ. Nẽ mẽmo mỳrapê axpẽn pê anhrà nẽ amỳm ahpỳnhã ri pa.

²¹Nẽ mẽmoj tã axpẽn kamnhĩx rãhã ho ri pa. Nẽ axpã nẽ mẽ grer kãm ri axpẽn kãm hpijaàm kêt o ri pa. ã na htem mẽ kot amnhĩ nhĩpêx tũm kôt amnhĩ nhĩpêx o ri mẽ pa xwỳnhjaja amnhĩ nhĩpêx anẽ. ã mẽ kot amnhĩ nhĩpêx anhỳr xwỳnhjaja koja mẽ Tĩrtũm nhõ krĩ hwỳr gjêx kêt nẽ. Ra ixte mẽ amã ja jarẽnh tã pa axte mẽ amã harẽ. Mẽ ate hã ano htỳx rãhã ho ri apa kaxyw.

²²No mẽ kot amnhĩ nhĩpêx nywja axtem na. Tĩrtũm Karõ hkôt mẽ kot amnhĩ nhĩpêx nyw o amnhĩ nhĩpêx xwỳnhjaja na htem axtem kãm axpẽn kĩnh nẽ. Nẽ hkĩnh nẽ ri hamakêtkati nẽ àmnhĩx ri axpẽn kôt pa. Nẽ gryk tokyx anhỳr hkêt nẽ. ãm axpẽn to mex pix o ri axpẽn kôt pa. Nẽ tãm axpẽn nhĩpêx. Nẽ kot mẽmoj tã amnhĩ jarẽnh xà hkôt tanhmã mẽmoj to.

²³Nẽ axpẽn mã kapêr mã hprĩ ho ri axpẽn mã kapêr. Nẽ mẽmoj punuj piitã nê amnhĩ to htỳx o ri pa. ã na hte mẽ kot Tĩrtũm Karõ hkôt amnhĩ nhĩpêx o mẽ pa xwỳnhjaja Karõ nhỹ hã amnhĩ nhĩpêx nyw o amnhĩ nhĩpêx anhỳr o pa. Jao mããnẽn Mojes kapêr kwỳm ri amnhĩ nhĩpêx hkêt nẽ. Jakamã koja mẽhõ mẽ pahte amnhĩ nhĩpêx nyw nê tanhmã mẽ pahkurê hto hkêt nẽ.

²⁴Tã mẽ pahpê Jejus Kris kwỳ jakamã na pu mẽ pahte amnhĩ nhĩpêx tũmja nhĩpêx o te mẽ pahte amnhĩ nê hpĩr pyrà nẽ axte hkôt amnhĩ nhĩpêx kêt nẽ.

Tĩrtũm Karõ hkôt mẽ pahte amnhĩ nhĩpêx ã mẽ pamã karõ

Epes 4.23-24; Korosẽ 3.10

²⁵Tã ra Tĩrtũm Karõ kot mẽ pahto hkra jakamã kwa kêt pu mẽ ãm kôt pix mã amnhĩ nhĩpêx nyw o amnhĩ nhĩpêx o ri papa.

²⁶Kot puj mẽ ã amnhĩ nhĩpêx anê hãmri nê mẽmoj tã mẽ pahkwỳjê mã amnhĩ to jarkrar o ri papa hkêt nê. Kot puj mẽ ã amnhĩ nhĩpêx anê nhũm mẽ pakamã gryk nê. Jakamã kêr pu mẽ ã amnhĩ nhĩpêx anhỹr o ri papa hkêt nê.

Karatas 6

Mẽ pahte tanhmã axpên to ajuta hto hã mẽ pamã karõ
Matêwre 18.15-17; Rukre 17.3-4; Sikün Tesarõn 3.14-15; Xiakre 5.19-20

¹⁻³Kwa ixkràmnhwỳjaja. Mẽ apê Tĩrtũm Karõ hkôt amnhĩ nhĩpêx o ri mẽ apa xwỳnhjaja. Koja Kris kôt akwỳjê hõ tanhmã amnhĩ tomnuj to ka mẽ ja hã omu nê ã amnhĩ nhĩpêx anhỹrja nê kãm akapêr. Nom kêr ka mẽ kamã agryk kamã kãm tanhmã nê hkêt nê. ãm kãm akapêr mã aprĩ ho kãm akapêr nê akupỹm tãm ãm. Nom kwa kêr ka mẽ amnhĩ pumunh mex nê uràk nê ã amnhĩ tomnuj anhỹr kêt nê. Kot ka mẽ atõ ã kot amnhĩ nhĩpêx anhỹr ã omu nê ãm omu nê nê tanhmã kãm akapêr to hkêt nê. Nê ajamaxpêr o: —Tk. Kwār mãmri ã amnhĩ nhĩpêx anê. Pa ja nê tanhmã kãm ixkapêr to hkêt nê. Kurom ixte amnhĩ nhĩpêx mex o ri ixpa kênã. Anhỹr o ajamaxpêr japêr. Kwa mẽ ã ajamaxpêr anhỹr kêt nê. Kot kaj mẽ ã ajamaxpêr anê nê nê kãm akapêr kêt nê hãmri nê te ate amnhĩ to mex ã amnhĩ jarênh kaprỳ pyràk. Nê kêr ka mẽ axpên to ajuta mex o ri axpên kôt apa. Jao Kris kôt amnhĩ nhĩpêx mex nê.

⁴⁻⁵Nê na htem piitã amnhĩm àpênh pix tãnopxar o pa. Jakamã kêr ka mẽ amnhĩ tãnopxar pê tãm amnhĩ nhĩpêx rãhã ho ri apa. Hãmri nê ja hã amnhĩ pumu nê akĩnh nê. Nom kwa kêr ka mẽ ate amnhĩ nhĩpêx mex o akwỳjê jakrenh ã mẽ kãm amnhĩ to jarkrar o ri apa hkêt nê.

⁶Nê kêr ka mẽ kot Tĩrtũm kapêr o mẽ ajahkre xwỳnhjê ho mex nê mẽ kãm mẽmoj nhõr o ri apa.

⁷Koja Tĩrtũm nhỹrmã mẽ pahtĩr ri mẽ pahte amnhĩ nhĩpêx ã mẽ pahpumunh kôt tanhmã mẽ pajarênh to. Hãmri pu mẽ tee ri amnhĩ kukamã pajamaxpêr nom amnhĩ nê tanhmã kãm paxêx to hkêt nê. Koja mēhõ kãm amnhĩ to hêx

ně te tām kot amnhĩ mã hêx pyræk nom kot puj mẽ Tĩrtũm mã amnhĩ nê tanhmã paxêx to hkêt nê.

⁸Jakamã kot kaj mẽ amnhĩ krã hkôt tanhmã ri amnhĩ nhĩpêx to rãhã ho apa hãmri nê nhỹrmã ty nê Tĩrtũm pê awry rax ã ri apa. Nom kot kaj mẽ Tĩrtũm Karõ mã hprãm xà hkôt pix mã amnhĩ nhĩpêx nê nhỹrmã ty nhũm Tĩrtũm akupỹm ato atĩr ka kuri amex nê ajamakêtkati atĩr tũm nê ri apa ho apa.

Mẽ pahte axpẽn to mex rãhã hã mẽ pamã karõ

Atre 20.35; Wam Korĩt 15.58; Xitre 3.14; Eprêw 13.3; 13.16; Xiakre 1.27

⁹Jakamã kwa kêr ka mẽ arĩ tãm ri amnhĩ nhĩpêx nê tãm axpẽn nhĩpêx o ri axpẽn kôt apa nê jam anhũrer kêt nê. Mẽ ã amnhĩ nhĩpêx o ri apa anhỹr rãhã ty nhũm Tĩrtũm nhỹrmã ja hã mẽ ato mex rax nê.

¹⁰Tã kêr pu mẽ arĩ Kris kôt pahtõjê ho mex rãhã ho ri papa. Nom mẽ tapxipixjê ho mex kêt nê. Pu mẽ mẽ piitã mẽ ho mex o axpẽn pyræk.

¹¹E ixte mẽ amã kagà nhĩpêx nê mênh nhũm mẽ ate ja hã ixpumunh kaxyw kot paj pam kagà jatur xà hã inhĩhkra ho inhĩxi nhĩpêx ka mẽ ixte inhĩxi hã kagà rũnhtita pumu.

Jejus kot mẽ panê htyk ã Pawre kãm harênh prãm ã harênh

Wam Korĩt 1.22-24; 2.1-2

¹²Nê mẽ amã Tĩrtũm kapêr o mẽ hêx xwỳnhjaja na htem hamaxpêr o: —Nà kot paj Karatas nhõ xwỳnhjê mã Kris pĩ kahpa hã htyk ã harênh o ri ixpa hkêt nê. Kot pa anê nhũm mẽ ixpê Ijaew kwỳjaja ja hã inhma nê hã tanhmã inhĩpêx to. Ja pymaj kot paj mẽ kãm tanhmã harênh to hkêt nê. Kot paj ãm mẽ kot amnhĩ my kwrýt kà jakàr pix ã mẽ kãm karõ kê mẽ ixkapêr xà hkôt ã amnhĩ nhĩpêx anê. Pa hã mẽ omu nê ma ixkwỳjê mã mẽ hã amnhĩ to jarkrar o ri ixpa. Anê.

¹³Te mẽ kot finat Mojes kapêr kôt ri amnhĩ nhĩpêx pyræk tã no na htem ã amnhĩ nhĩpêx anhỹr kêt nê. Ra mẽ kot amnhĩ jakàr tã no ãm Mojes kapêr piitã hkôt amnhĩ nhĩpêx hkêt nê. ãm hkwỳ hkôt pix mã amnhĩ nhĩpêx o pa. Nom kot kaj mẽ ama nê mẽ uræk nê amnhĩ jakà nhũm mẽ ja hã mẽ apumu nê hkĩnh nê. Nê ma ri mẽ hkwỳjê mã mẽ atã amnhĩ to jarkrar o ri pa nê mẽ kãm: —E Karatas nhõ xwỳnhjaja na pa prem mẽ kot amnhĩ my kwrýt kà

jakàr ã mẽ kãm karõ nhũm mẽ inhma nẽ mẽ pahpyrà nẽ ã amnhĩ nhĩpêx anẽ. Anẽ.

¹⁴No pa na pa hte ã mẽ kãm mẽmoj tâ karõ anhÿr o ri ixpa hkêt nẽ. ãm Tĩrtũm kot mẽ pahto hkra kaxyw mẽ panhõ Pahihti Jejus Kris kot mẽ nẽ htykja pix na pa hte mẽ kãm harẽ. Ra kot inhnê htyk jakamã te pa ixte kuri ijêt nẽ ixtyk pyræk. Jakamã ra jar pika ja kamã mẽ kot amnhĩ nhĩpêxja te ixpê htyk nẽ hapêx pyræk pa axte hkôt amnhĩ nhĩpêx kêt pyræk.

¹⁵No mẽ kot amnhĩ my kwryt kà jakàr xwÿnhjaja nẽ mẽ kot amnhĩ jakàr kêt xwÿnhjaja na hte Tĩrtũm ja hã mẽ omu nẽ ãm mẽ omu. ãm mẽ pahte amnhĩ nhĩpêx nyw o amnhĩ nhĩpêx o ri papaja pix na kãm hprãm.

¹⁶Kot kaj mẽ ã amnhĩ nhĩpêx anhÿr o ri apa nẽ apê Tĩrtũm kra mex nhũm mẽ ato mex rax nẽ. Nẽ mẽmoj to mẽ akutã nojarêt rãhã nẽ. Ka mẽ axãmnhĩx ajamakêtkati nẽ ri apa ho apa.

¹⁷Nẽ na prem Kris ã ixtak rax nẽ nhũm ixkatut ã ixtak xà arĩ rãhã nẽ pa hte hã ixpa. Ixte Jejus Kris mã tanhmã amnhĩ nhĩpêx to xwÿnh ã ixto amnhĩrĩt xà na. Jakamã kê mēhõ axte Jejus kot mẽ awÿr inhmēnh ã tee ri ixpumu nẽ tanhmã hã ixkukjêr to hkêt nẽ.

¹⁸E ixkrãmnhwÿjaja. Kê Pahihti Jejus Kris mẽmoj to mẽ akutã nojarêt nẽ mẽ ato mex rãhã ho pa. Nà koja mẽ ato anẽ. ãm ja pix na hapêx. Ixpê Pawre na pa ã mẽ amã kagà nhĩpêx nẽ mẽ awÿr mēnh anẽ.

Epes

Epes 1

¹Pa Epes kãm Kris kôt ixkwỳjaja. Xà mẽ amex na ka mẽ apa? E ot pa mẽ awỳr kagà nhĩpêx nẽ kumẽ. Ixpê Pawre na pa hipêx nẽ mẽ awỳr kumẽ. Ixpê Jejus Kris nhỹ hã mẽ ahkre ho mẽ ixpa xwỳnh na pa. Tĩrtũm kãm hprãm xà hkôt. Tã pa ã mẽ awỳr kagà nhĩpêx nẽ mẽ awỳr mẽnh anẽ. Mẽ apê Tĩrtũm krajê hwỳr. Na ka xep htem Jejus Kris kôt amnhĩ nhĩpêx mex o ri apa. ãm hãmri na ka htem ã amnhĩ nhĩpêx anẽ.

²E kê Mẽpahpãm Tĩrtũm mẽ Pahihti Jejus Kris wa mẽ ato mex nẽ mẽmoj to mẽ akutã nojarêt rãhã ho pa. Ka mẽ wa ÿ hã axàmnhĩx ajamakêtkati nẽ akĩnh pê tanhmã amnhĩ nhĩpêx to ho ri apa.

Tĩrtũm kot mẽ pakukamã amnhĩm mẽ parênh ã harênh

Rômãn 8.28-30; Wam Korĩt 1.21-22; Wam Tesarõn 1.4; Sikũn Tesarõn 2.13; Wam Pêtre 1.2

³Na hte mẽ panhõ Pahihti Jejus Kris nhĩpêxà Tĩrtũmja mẽ pahto mex rãhã ho pa. Mẽ pahpê Kra Kris kwỳ hã mẽ pahpumunh kôt tanhmã mẽ pahto mex to ho pa. Ra wa Karõja mẽ pahkarõ mã gjêx jakamã te ra mẽ pahte kaxkwa kamã wa kuri mẽ pamex nẽ mẽ papa pyræk. Tã ra mẽ pahte jar pika ja kamã paxàmnhĩx pajamakêtkati mẽ pamex nẽ ri papa jakamã kwa kêr pu mẽ amnhĩm ãm mex o mex ã harênh rãhã nẽ.

⁴⁻⁵Amnepê mã kormã mẽmoj kêt ri na pre Tĩrtũm mẽ pakukamã amnhĩm mẽ parê. Kris kukwak ri amnhĩm mẽ parê. Tã mẽmo kaxyw na pre ã mẽ pakukamã mẽ parênh anẽ? ãm mẽ pahte kapêr kôt pix mã amnhĩ nhĩpêx o ri papa kaxyw. Jao tãm kot amnhĩ nhĩpêx pyrà nẽ noo mã tãm amnhĩ nhĩpêx o ri papa. Kãm mẽ pajapê jakamã na pre mẽ pakukamã tanhmã hamaxpêr to nẽ hamaxpêr o: —Nà Ixkra Jejus Kris koja nhỹrmã ma mẽ hwỳr wrỳ nẽ mẽ nê ty. Tã mẽ kot mẽ nê htyk ã harênh mar nẽ amnhĩ kaxyw hkôt hamaxpêr xwỳnhjaja kot paj mẽ ho ixkra. Nà kot paj ã mẽ hipêx anẽ. Anẽ.

⁶No mẽ papajaja tanhmã mẽ pahte amnhĩ nhĩpêx mex to hã mẽ pahpumunh kôt na pre ã mẽ pahto hkra hã mẽ pajarênh anhỹr kêt nẽ. ãm Kra Kris pix kukwak ri na pre ã mẽ pajarênh anẽ. Kãm Kra japê jakamã na hte mẽmoj to

mẽ pahpê hkwỹ hã mẽ pakutã nojarêr rãhã ho pa. Jakamã na pu htem amnhĩ tã kãm mex o mex ã harẽnh o papa.

7-8Na pre Krisja mẽ panê htyk o Tĩrtũm mã mẽ pahte amnhĩ tomnuj pãnhã amnhĩre. Nhũm Tĩrtũm ã kot amnhĩ nhĩpêx anhỹr ã omunh xà hkôt mẽ pahte hkôt amnhĩ xunhwỳr xwỳnhjê nê mẽ pahte amnhĩ tomnuj rênh pa. Koja aa tanhmã hã mẽ pahto hkêt nê. Pu mẽ axte amnhĩ amnhĩ tomnuj o papa hkêt nê. Hêxta waa nê. Kãm mẽ pajapê htỳx kumrêx jakamã na pre ã mẽ pahto mex rax anê. ãm mex o mex nê àhpumunh o àhpumunh.

9-10Amnepêr na pre hamaxpêr o: —Nà na pa ra kaxkwa ho ixkato nê kamã mẽmoj piitã ho ixkato. Nê pika ho ixkato nê kamã mẽmoj piitã ho ixkato. Tã koja nhỹrmã Ixkra Kris mẽmoj piitã ho amnhĩptàr o pa. Kaxkwa kamã nê pika piitã hkôt mẽmoj piitã ho amnhĩptà nê tapxipix inhỹ hã kêp mẽõ Pahihti. Koja ã amnhĩ nhĩpêx anhỹr xà hã arĩgro kato nhũm ã amnhĩ nhĩpêx o pa anê. Nà ja na inhmã hprãm. Anê. ã Tĩrtũm amnhĩ kukamã hamaxpêr anhỹrja kôt na pre Kris kêp mẽ panhõ Pahihti hã harê. Tã nhỹrmã mẽ pahto amnhĩptàr kaxyw koja mẽ pakaxyw ãm. Amnepêr ri mẽ pa xwỳnhjê mã kot kormã ja ho amnhĩrĩt kêt tã ra jarãhã mẽ pamã ho amnhĩrĩt.

11Kris kukwak ri na pre amnhĩm mẽ parê. Ra kot mẽ pakukamã mẽ pahtã amnhĩ jarẽnh xà hkôt.

12Tã mẽ ixpê Ijaew kwỳ kumrêx mẽ ixte Kris kôt amnhĩ xunhwỳr jakamã koja mẽ piitã mẽ inhỹ hã Tĩrtũm mã mex o mex ã harẽnh o ri pa.

13Nê mẽ kajaja na ka prem mẽ ixpyrà nê Tĩrtũm kapêr ma nê ajaxwỳja hkôt amnhĩ xunhwỳ. ãm hãmri na Tĩrtũm kapêrja. Tã ka prem ama nê hkôt amnhĩ xunhwỳ. Hãmri nhũm amnhĩ tã mẽ apumu nê kot inhĩpêx pyrà nê mẽ anê mẽ ate amnhĩ tomnuj piitã rênh pa nê mẽ ato hkra. Hãmri nê mẽ awỳr Karõ rê nhũm mẽ awỳr wrỳ nê mẽ akarõ mã agjê nê mẽ akamã pa ho pa. Kris kukwak ri na pre mẽ awỳr kurê. Amnepêr mã na pre mẽ pakukamã hamaxpêr o: —Koja mẽ Ixkra hkôt amnhĩ xunhwỳ pa ja hã mẽ omu nê mẽ ho ixkra nê mẽ hwỳr Ixkarõ rê. Hãmri nhũm mẽ hkarõ mã agjê nê mẽ kamã hkrĩ ho hkrĩ.

14 Anhÿr jakamã na pre mẽ pahwÿr kurẽ nhũm mẽ pahwÿr wrÿ nẽ mẽ pahwÿr agjê nẽ mẽ pakamã hkrĩ ho hkrĩ. Pu mẽ ja hã amnhĩ pumu nẽ pajamaxpër o: —Nà ra Tĩrtũm kot ixwÿr Karõ mẽn̄h jakamã na ixkarõ hwÿr axà nẽ kamã hkrĩ ho hkrĩ. Tã koja ra kot mẽ ixtã amnhĩ jarẽnh xà hkõt ja hã ixto mex nẽ. Ra kot ixto hkra kẽnã. Jakamã koja nhÿrmã ma amnhĩ wÿr ixto api pa kuri inhmex kumrẽx nẽ ixpa ho ixpa. Hãmri nẽ kukwak ri axte tanhmã amnhĩ tomnuj to ho ri ixpa hkêt nẽ. Anẽ. Jakamã koja mẽ piitã ã kot mẽ ho mex anhÿr ã amnhĩ tã kamã ama nẽ amnhĩ tã omu nẽ kãm mex o mex ã harẽnh rãhã ho pa.

Pawre kot Epes nhõ xwÿnhjê ho Tĩrtũm wÿr ã harẽnh

Piripos 1.9; Korosẽ 1.9-12; Wam Tesarõn 5.23; Sikũn Tesarõn 1.11; 2.16; Eprẽw 13.20

15 Nẽ na ka xep htem amnhĩ kaxyw Kris kõt ajamaxpër tÿx pẽ amã Tĩrtũm krajê piitã mẽ hkĩnh o mẽ ho mex o apa. Na pa pre mẽ ajarẽnh ma nẽ ixkĩnh tÿx nẽ.

16-18 Nẽ xatã mẽ ato Tĩrtũm wÿr o ri ixpa nẽ mẽ ato hwÿr o: —Pa Mẽinhĩpêxà maati Tĩrtũm. Nà amex o amex. Ka na ka pre mẽ ixwÿr mẽ inhõ Pahihti Jejus Krisja mẽ nhũm mẽ ixwÿr wrÿ nẽ hprĩ hã mẽ inhmã ate tanhmã amnhĩ nhĩpêx to ho apa hã ato amnhĩrĩt. Tã Epes kãm akrajaja na xep htem akõt pix mã ri amnhĩ nhĩpêx rãhã ho ri pa. ãm hãmri na htem ã amnhĩ nhĩpêx anẽ. —Nẽ kwa Tĩrtũm. Kê Akarõ tanhmã mẽ hkrã hto kê mẽhprĩ hã akapër mar tÿx rãhã ho pa. Jao ra ate mẽ ixkukamã mẽ ixtã tanhmã mẽ ixto mex to hã amnhĩ jarẽnhja kê mẽ kãm hamaxpër tÿx rãhã ho pa. Nẽ ate nhÿrmã mẽ ixpê akrajaja mẽ ixpiitã tanhmã mẽ ixto mex to jarẽnhja kê mẽ kãm hamaxpër tÿx pẽ hkĩnh rãhã ho pa ho pa.

19-20 —Nẽ kê mẽ axàhpumunh o axàhpumunh ã ate akupÿm Akra Kris o htĩr ã apumunh mex nẽ Tĩrtũm. Na ka pre axàhpumunh xà ho akupÿm ho htĩr nẽ ma akupÿm anhõ krĩ hwÿr ho api nẽ amnhĩ nhĩhkõ hã ÿr nhũm arĩ hkrĩ ho hkrĩ. Apyrà nẽ kot mẽ ixto amnhĩptàr kaxyw. ã axàhpumunh xà htÿx kot anhÿr. Tã kê akrajê piitã ja hã apumu nẽ axàhpumunh tÿx o ate tanhmã mẽ ixto ajuta hto ho apa hã apumu. Anhÿr o na pa hte mẽ ato hwÿr o ri ixpa.

²¹Ně Krisja àhpumunh tỳx o mẽkarõmnuti piitã hakrenh. Ně hihtỳx o mẽ hakrenh jakamã krĩ nhõ xwỳnhjê mã te mẽ àhpumunh tỳx kêt pyràk o na htem htỳx ri amnhĩ nhĩpêx o pa pyràk. Ně Krisja hihtỳx o pika piitã hkõt pahi piitã mẽ hakrenh par kumrêx. Ně hihtỳx o kot pika piitã hkõt mẽmoj piitã mẽ hakrenh par. Jakamã mẽhõ koja we tanhmã kot amnhĩ nhĩpêx to hã kãm karõ rỳ kãm hamaxpêr gõ? Nà amrakati kumrêx. Ra kot ã amnhĩ nhĩpêx anhỳr rãhã nẽ pa ho pa xwỳnh kênã. Ně hihtỳx o hihtỳx rãhã nẽ pa ho pa xwỳnh. Ně àhpumunh o àhpumunh rãhã nẽ pa ho pa xwỳnh. Ně hihtỳx o kot jar pika ja kõt mẽ pajakrenh par nẽ hihtỳx o Tĩrtũm nhõ krĩ kamã mẽ mẽmoj piitã hakrenh par. Tã koja mẽmoj piitã ho amnhĩptàr rãhã htĩr tũm nẽ pa ho pa.

Kris te kêp mẽ pahkrã pyràk ã harênh

Rõmãn 12.4; Wam Korĩt 12.12; Epes 4.16; Korosẽ 3.25

²²Na pre Tĩrtũmja Kra Kris nhĩhkram mẽmoj piitã haxàr pa. ỹ hã kot nhỹrmã ho amnhĩptàr o pa kaxyw. Jakamã kot mẽ pahto amnhĩptàr xwỳnh ã kêp mẽ panhõ Pahihti. Nẽ te kêp mẽ pahkrã pyràk. Nẽ mẽ papajaja te mẽ pahpê ã pyràk jakamã na pu htem hkõt ri amnhĩ nhĩpêx o papa.

²³Na hte mẽ panhĩja mẽ pahkrã kamã mẽ pajamaxpêr xà hkõt tanhmã amnhĩ nhĩpêx to. Ja pyrà nẽ na pu htem mẽ pahkrã pyràk xwỳnh Krisja kapêr ma nẽ hkõt tanhmã ri amnhĩ nhĩpêx to ho ri papa. Koja mẽhõ ãm hkrã pix nẽ ã hkõt nẽ pa hãmri nẽ mex kêt nẽ. Na htem hkrã nẽ mããnẽn ã nẽ pa nẽ mex nẽ. Ja pyrà nẽ na hte Kris mẽ pahte hkõt amnhĩ nhĩpêx o papa hã mẽ pahpumu nẽ hkĩnh nẽ mex nẽ pa. Pu mẽ pajaxwỳja hkõt ri amnhĩ nhĩpêx ã amnhĩ pumu nẽ pahkĩnh nẽ pamex nẽ papa ho papa.

Epes 2

Tanhmã Tĩrtũm kot mẽ pahto hkra hto ã harênh

Wam Korĩt 6.11; Xitre 2.11–3.7

¹Ně amnepê mã na pu pre htem Tĩrtũm kàx ã tanhmã amnhĩ tomnuj to ho ri papa.

²Ně jar mẽ kot amnhĩ nhĩpêx o amnhĩ nhĩpêx. Jao amnhĩ tomnuj pix o ri papa. Ně mẽkarõmnuti nhõ pahi Satanasti kapêr kõt pix mã ri amnhĩ nhĩpêx

rãhã nẽ. Na pre hte tanhmã mẽ pahkôt mẽ pahto ho pa. Mẽ pahte tanhmã amnhĩ tomnuj to kaxyw mẽ pamã mẽ pajamaxpër punuj jagjê. Pu mẽ amnhĩ tã omunh kêt tã ÿ hã amnhĩ tomnuj o papa. Satanastija kêp mẽ kot Tĩrtũm kapër kwým ri amnhĩ nhĩpêx o mẽ pa xwýnhjê nhõ pahihtĩ na. Tã pu pre htem pahtýx ri hkôt amnhĩ nhĩpêx pix o ri papa.

³Mẽ pahpiitã tanhmã amnhĩ tomnuj to hprãm xà hkôt pix mã tanhmã amnhĩ nhĩpêx to. Nẽ mẽmoj punuj kukamã pajamaxpër nẽ ra hkôt ã amnhĩ tomnuj anẽ. ã na pu prem mnĩ nhĩpêx anẽ nhũm Tĩrtũm ja hã mẽ pahpumu nhũm ja kãm mex kêt nẽ. Jakamã nhũm tee ri mẽ pakukamã hamaxpër nẽ hamaxpër o: —Hêxta waa nẽ. Na htem ixkapër kwým ri tanhmã amnhĩ tomnuj to rãhã ho pa. ã mẽ kot amnhĩ nhĩpêx anhýr o mẽ pa xwýnhjaja koja mẽ nhýrmã ixri htĩr tũm nẽ mex nẽ pa ho pa hkêt nẽ. Ixkĩnhã mẽ kot amnhĩ tomnuj xwýnh jakamã tanhmã kot mẽ amnhĩ to nẽ ixri htĩr tũm nẽ pa ho pa? Nà mẽ kot amnhĩ tomnuj mýrapê koja mẽ nhýrmã ma amnhĩ xà htýx kamã hamak tũm xàta wýr ma hapêx pa. Nà koja mẽ anẽ. Hêxta waa nẽ. Inhmã ma hwýr mẽ pa prãm kêt tã ra ma hwýr mẽ pa kaxyw. Anhýr o hamaxpër.

⁴⁻⁵Nẽ amnepêm kormã mẽ pahte amnhĩ tomnuj o papata ã te mẽ pahte amnhĩ xà htýx kamã pajamak tũm xà hwýr pryta ã mẽ papa pyræk. Nom Tĩrtũm kãm mẽ pajapê nẽ mẽ pakamã ukaprĩ jakamã na pre mẽ pahto mex rax nẽ. Nẽ akupým Kris o htĩrja ri te ra mẽ pahte amnhĩ xà htýx kamã pajamak tũm xà hwýr pryta nê mẽ pahto ujanār pyræk o mẽ panhĩpêx. Mẽ pakamã ukaprĩ nẽ kãm mẽ pajapê ho ã mẽ panhĩpêx anẽ. Amarĩ ã mẽ panhĩpêx anẽ nẽ mẽ panê mẽ pahte amnhĩ tomnuj rênh pa. Jakamã kot puj mẽ pahte Kra hkôt amnhĩ xunhwýr xwýnhjaja nhýrmã amnhĩ xà htýx kamã mẽ hamak tũm xàta wýr papa hkêt nẽ.

⁶Ra Tĩrtũm akupým Jejus Kris o htĩr jakamã te ra Jejus kôt akupým mẽ pahpê hkwýjê ho mẽ pahtĩr pyræk. Jakamã te ra õ krĩ kamã ãhkô hã mẽ pamex kumrêx nẽ pahkrĩ pyræk.

⁷Měmo kaxyw na pre Tirtūm kām mẽ pajapê hkôt ã mẽ pahwỳr Jejus Kris mẽnh nhũm mẽ panê htyk aně? Nà kām mẽ pajapê htỳx ã mẽ pahte pahprĩ hã amnhĩ tã omunh kaxyw na pre ã mẽ pahwỳr mẽnh aně. Tã kot puj mẽ nhỹrmã kaxkwa kamã hwỳr pōj nhũm mẽ pamã amnhĩ jarěnh o: —E mẽ amnẽ ixpumu. Inhmã mẽ ajapê htỳx jakamã na pa pre mẽ akamã ixukapřĩ xàj ma mẽ awỳr Ixkra Jejus Krisja mẽ nhũm amnhĩ grōnh kôt mẽ awỳr wrỳ nẽ mẽ anê ty. Inhmã mẽ ajapê htỳx jakamã na pa pre ã mẽ awỳr mẽnh nhũm mẽ anê htyk aně. Inhmã mẽ apê ixkrajê japê xàj na pa pre ã mẽ ato mex rax aně. Anhỹr o mẽ pamã kapěr hãmri nẽ mẽ pahto mex rãhã ho pa.

⁸⁻⁹Xà na pu prem pahpê hkra hprãm xàj amnhĩ krã hkôt mẽ papamjaja kām tanhmã amnhĩ to mex to nẽ kām: —E kwa Tirtūm. Na pa ã amnhĩ to mex aně nẽ ã amnhĩ to mex aně. Jakamã kwa ja hã ixpumu nẽ ixto akra nà? Anhỹr o na pu prem amnhĩ to kuwỳ? Nà na pu prem ã amnhĩ to hwỳr anhỹr kêt nẽ. Na pu prem amnhĩ kaxyw hkôt pajamaxpěr nẽ hkôt amnhĩ xunhwỳ nhũm ja pix ã mẽ pahpumunh kôt mẽ panê mẽ pahte amnhĩ tomnuj rê nẽ mẽ pahto hkra. Kām mẽ pajapê nẽ mẽmoj to mẽ pakutã nojarêt rãhã ho pa jakamã na hte ã mẽ panhĩpêx mex aně. Jakamã na pu htem amnhĩ tã omu nẽ pajamaxpěr o: —Nà na xep hte Tirtūmjaja mẽ pahte tanhmã amnhĩ nhĩpêx to ho papa hã mẽ pahpumunh kôt mẽ pahto hkra hkêt nẽ. Ām mẽ pahte amnhĩ kaxyw kām pajamaxpěr ã mẽ pahpumunh kôt pix mã na hte mẽ pahto hkra. Aně.

¹⁰Nẽ Tirtūm tapxipix na hte tanhmã mẽ pahto pu mẽ amnhĩ to mex rãhã ho papa. Nom kormã kot mẽ pahto hkra hkêt ri na pu prem ã amnhĩ nhĩpêx anhỹr kêt nẽ. Tã Jejus Kris kôt amnhĩ xunhwỳ nhũm Tirtūm ja hã mẽ pahpumu nẽ mẽ pamã mẽ pahte amnhĩ nhĩpêx nyw jagjê pu mẽ ỹ hã tãm amnhĩ nhĩpêx o ri papa. Amnepêm tanhmã kot mẽ pakukamã hamaxpěr to xà hkôt. No na hte tanhmã mẽ pahte amnhĩ krã hkôt amnhĩ nhĩpêx to hã mẽ pahpumunh kôt mẽ pahto hkra hkêt nẽ.

Tirtūm krajaja te kot axpěn to htō nẽ htōx pyrāk

Karatas 3.28; Korosě 1.21-23

11E mẽ apê Ijaew kêt xwỳnhjaja. Na ka htem mẽ akatorxà nhõhy rùm ajapôj hãmri nê mẽ ixpê Ijaew pyrà nê amnhĩ my kwỳt kà jakàr kêt nê. Jakamã na pre ixkwỳjaja mẽ akurom amnhĩ jakàr ã amnhĩ to jarkrar o ri pa nê amnhĩ jarēnh o: —Ra mẽ ixte amnhĩ my kwỳt kà jakàr ã mẽ ixpumunh kôt na hte Tĩrtũm mẽ ixto hkra. Tã Ijaew kêt xwỳnhjaja kot mẽ ixkĩnhã amnhĩ jakàr kêt jakamã mẽ kêp hkra hkêt. Nê mãnēn mẽ kêp mẽ pahkwỳ hkêt. Anhỹr o mẽ ajarēnh o pa.

12ãm hãmri na prem mẽ apê mẽ ixkwỳ hkêt ã mẽ ajarē. Na pa prem mẽ akurom amnhĩ my kwỳt kà jakà nê mẽ akurom Kris kamã ijamak o ri ixpa. Jakamã nhũm Tĩrtũm kot mẽ ixto mex ã amnhĩ jarē pa mẽ mẽ apyrà nê tee ri amnhĩ kukamã ijamaxpēr o ri ixpa hkêt nê. Nê mẽ akurom amnhĩ kaxyw Tĩrtũm mã ijamaxpēr. Nà ãm hãmri na prem mẽ apê mẽ ixkwỳ hkêt ã mẽ ajarē.

13Te Tĩrtũm kàx ã ri mẽ apa pyràk tã ka mẽ arĩ ã amnhĩ nhĩpêx anhỹr kêt nê. Jejus Kris kot mẽ panê htyk nhũm mẽ ate hkôt amnhĩ xunhwỳr jakamã ra mẽ apê hkwỳy. Jao arĩ hkàx ã ri apa hkêt nê. Te mẽ ixpê Ijaew kwỳ pyrà nê hpãnhã kuri ra ri apa pyràk.

14Jakamã na pu htem Kris kukwak ri ra axpēn nhĩpêx nyw o axpēn nhĩpêx o ri papa. Mẽ ixpê Ijaewjaja nê mẽ apê Ijaew kêt xwỳnhjaja na pu htem te ra ixkre tipxi kamã ri papa pyràk. Nom amnepēm na pu prem ã axpēn nhĩpêx anhỹr kêt nê. Mẽ pahte amnhĩ nhĩpêx tũmja ahpỹnhã na pre. Na pu prem pamã axpēn kurê nê axpēn kàx ã ri papa. Nê nhỹri axpēn pumu nê te pahte axpēn pumunh kêt pyrà nê nhãm parĩt o ri mra. Tã nhũm Kris mẽ panê htyk o mẽ pahte amnhĩ tomnuj piitã hpãnhã amnhĩrer pa. Mẽ ixpê Ijaew nê mẽ apê Ijaew kêt xwỳnhjaja. Nê htyk o te ra kot mẽ pahte axpēn nhõrkwỹ hwỳr axpēn wỳr o papa pyràk. Jao mẽ pamã axpēn kurê ho hapêx nê hpãnhã tãm axpēn kaxyw mẽ paxunhwỳ pu mẽ hpãnhã axpēn to mex rãhã ho ri papa.

15Amnepēm Mojes kot Tĩrtũm nhỹ hã mẽ ixpê Ijaew mẽ ixte tanhmã amnhĩ nhĩpêx to ho ixpa hã karõja. Na pa prem mẽ apê Ijaew kêt xwỳnhjaja mẽ

ate Tirtūm kôt amnhĩ nhĩpêx kêt ã mẽ apumu nẽ mẽ akamã inhgryk nẽ. Nẽ axpẽn mã mẽ ajarẽnh o: —Nà mẽ pahkĩnhã mẽ kot Mojes kapêr kôt amnhĩ nhĩpêx kêt jakamã koja Tirtūm mẽ ho hkra hkêt nẽ. Anhỹr tã nhũm Kris mẽ pahwỳr wrỳ nẽ mẽ pahpiitã mẽ panê htyk o mẽ pahte hkôt amnhĩ xunhwỳr ã mẽ pahpumunh kôt pix mã mẽ pahto Tirtūm kra. Jakamã pa mẽ axte mẽ ate Mojes kapêr kôt amnhĩ nhĩpêx kêt ã mẽ apumunh kôt mẽ apê Tirtūm kra hkêt ã mẽ ajarẽnh kêt nẽ. Hãmri nẽ mẽ ixpê Ijaew nẽ mẽ apê Ijaew kêt xwỳnhjaja pu mẽ axte axpẽn kãm pagryk o ri papa hkêt nẽ. Ra te ixkre tipxi kamã mẽ pahte axpẽn kôt ri papa pyràk.

¹⁶Kris na pre pĩ kahpa hã mẽ panê htyk o ã mẽ panhĩpêx anẽ nẽ mẽ pahte axpẽn kôt amnhĩ nhĩpêx o papa kaxyw mẽ paxunhwỳ. Nom Tirtūm jamaxpêr xà hkôt ã mẽ panhĩpêx anẽ. Jakamã na pu htem arĩ pamã axpẽn kurê ho papa hkêt nẽ.

¹⁷Na pre Kris mẽ pahwỳr wrỳ nẽ ã mẽ panhĩpêx anẽ. Mẽ apê Ijaew kêt xwỳnhjaja mẽ ate kormã Tirtūm kapêr mar kêt xwỳnhjaja nẽ mãänẽn mẽ ixpê Ijaew mẽ ixte kapêr mar mex xwỳnhjaja nhũm pre akupỹm tãm mẽ pahte axpẽn kôt amnhĩ nhĩpêx o papa kaxyw mẽ paxunhwỳ.

¹⁸Hãmri nhũm Tirtūm mẽ pahwỳr amnhĩ Karõ rẽ nhũm mẽ pahkarõ mã agjê. Kris kukwak ri pix mã mẽ pahwỳr kurê pu mẽ ỹ hã paxàmnhĩx ri kãm tanhmã amnhĩ jarẽnh to ho ri papa.

¹⁹Hãmri nẽ te mẽ pahpê nhãm axpẽn kaxyw mẽ urojê pyrà nẽ axpẽn kàx ã ri papa hkêt nẽ.

Te mẽ pahpê Tirtūm nhõrkwỹ pyràk ã mẽ pajarẽnh

Wam Korĩt 3.16; Sikũn Korĩt 6.16; Wam Pêtre 2.5

²⁰Nẽ mẽ pahpê Jejus kwỳ jakamã te mẽ pahte ixkre tipxikamã ri papa pyràk. Nẽ te mẽ pahpê ixkre nhĩpêx mex pyràk. Nẽ Kris te kêp ixkre hkrax mã kuhê xà nẽ kỳxpê kãm nõi xà maatija pyràk. Nẽ mẽ kot Jejus nhỹ hã mẽ ahkre xwỳnhjaja nẽ mẽ kot Tirtūm nhỹ hã kapêr o ri mẽ pa xwỳnhjaja te mẽ kêp ixkre nhõkwa êja pyràk. Nẽ mẽ papajaja te mẽ pahpê ixkre nhĩmõk ã põja pyràk.

²¹Ixkre mā kuhê xà nê k̀yxpê kām nōr xà maati kukwak ri pix mā na hte ôkwa ê nê hã pōja k̀yxpê mex nê axpēn tã harir. Ja pyrà nê ãm Kris kukwak ri pix mā na pu htem te ixkre tipxi kamã ri papa pyràk o axpēn nhīpêx mex o ri papa. Te mē pahpê mē kot ixkre rax kumrēx nhīpêx o mōr nhūm muxre nê ãm xẁyñhta pyràk.

²²Na htem amnhīm ōrkwỹ nhīpêx nê hipêx pa nê hẁyr agjê nê kamã pa ho pa. Ja pyrà nê na hte Tĩrtũm Karōja mē pahpê hkrajê karō mā agjê nê mē pakamã pa ho pa. Te mē pahpê Tĩrtũm nhōrkwỹ pyràk. Mē ixpê Ijaew nê mē apê Ijaew kêt xẁyñhjaja Tĩrtũm mā te mē pahpê ōrkwỹ pyràk.

Epes 3

Pawre kot Ijaew kêt xẁyñhjê mā mēmoj to amnhĩrīt ã harēnh

Rōmān 15.14-21; Korosē 1.24-29

¹Tã te mē pahpê Tĩrtũm nhōrkwỹ pyràk jakamã na pa hte jar mē hagjēnh xà kamã mē ato hẁyr rãhã ho ixkrĩ. Na pa pre hte ma mē apê Ijaew kêt xẁyñhjê hẁyr ixpa nê ixprĩ hã mē amã Jejus kapēr jarēnh o ri mē akôt ixpa. M̀yrapê na prem ixpynê nê ijaxà pa arĩ jar ixkrĩ ho ixkrĩ. Nom arĩ amnhĩ kaxyw Tĩrtũm mā ijamaxpēr t̀yx pē mē ato hẁyr rãhã ho ixkrĩ.

²Na pre kām ijapê hã mē apê Ijaew kêt xẁyñhjê kaxyw ixãm. Ma ixte ri mē akôt ixpa nê mē amã kapēr jarēnh o ri mē akôt ixpa kaxyw. Ra mē ate ja hã ijarēnh mar mex.

³Na pre mē pahto hpimràatã tanhmã mē pahto mex to hã inhmã amnhĩ to amnhĩrīt pa pre omu. Mē kajaja nê mē pajaja. Pika piitã hkôt mē piitãã tanhmã mē ho mex to. Na pre kormã kot mēhō mā ja jarēnh kêt tã inhmã ho amnhĩrīt pa pre omu. Tã kagà ja kamã kot paj mē amã hkẁy ho grēre nê ho amnhĩrīt nê mē amã hã kagà ka mē ixpyrà nê kamã harē nê ama.

⁴Jaopri hã mar mex nê.

⁵Amnepēm mē pahkêt ri mē pa xẁyñhjê mā Tĩrtũm kot ja ho amnhĩrīt kêt tã nhūm Karō mē ixkẁyjê kumrēx mā ho amnhĩrīt. ỹ hã kapēr o ri mē pa xẁyñh mē mē ixpê Jejus nhỹ hã mē ajahkre o mē ixpa xẁyñhjê kumrēx mā

ho amnhĩrĩt. Mě ixte kãm tanhmã amnhĩ nhĩpêx to ho ixpa xwỳnhjê mã ho amnhĩrĩt pa prem omu.

⁶Na pre mẽ inhmã tanhmã mẽ ato amnhĩrĩt to pa prem ja hã mẽ apumu nẽ mẽ akukamã ijamaxpêr o: —Nà ãm hãmri koja xep Ijaew kêt xwỳnhjaja mẽ ixpê Ijaew pyrà nẽ Tĩrtũm kapêr ma nẽ Jejus Kris kôt amnhĩ xunhwỳ nhũm Tĩrtũm ã mẽ kot amnhĩ nhĩpêx anhỹr ã mẽ omu nẽ mẽ ixpyrà nẽ mẽ ho hkra nẽ mẽ ho mex o pa. Anẽ.

⁷Tã nhũm Tĩrtũmja mẽ awỳr inhmẽ. Ixte mẽ amã ja jarênh o ri mẽ akôt ixpa nhũm tokyx mẽ ate mar kaxyw. Na pre ixto mex nẽ kãm hprãm xà hkôt mẽ akaxyw ixãm nẽ ixte ỹ hã kãm tanhmã amnhĩ nhĩpêx to ho ixpa kaxyw ixto ixihtỳx nẽ mẽ awỳr inhmẽ.

⁸Tã mo kaxyw na pre mẽ akaxyw ixãm? Te ixte ja kaxyw inhmex kêt pyræk. Ixkwỳjaja ja kaxyw mex o kot ijakrenh tã nhũm pre ixpumu nẽ tanhmã hamaxpêr to nẽ mẽ akaxyw ixãm nẽ mẽ awỳr inhmẽ. Ixte mẽ amã mẽmoj mex kumrêx jarênh o ri mẽ akôt ixpa kaxyw. Na pre inhmã: —Kêr ka ma Ijaew kêt xwỳnhjê hwỳr mỗ nẽ mẽ kãm Jejus Kris kapêr jarênh o ri mẽ hkôt apa. Nẽ mẽ kãm: “Kot kaj mẽ Jejus Kris kôt amnhĩ xunhwỳ hãmri nẽ kukwak ri amex nẽ apa.” Anẽ.

⁹Koja mẽ apê Ijaew kwỳjê pyrà nẽ amnhĩ kaxyw Ixkra Kris kôt hamaxpêr nẽ hkôt amnhĩ xunhwỳ pa hã mẽ omu nẽ mẽ ho ixkra. Kormã aa ixte mẽ kãm ja hã amnhĩ to amnhĩrĩt kêt tã pa akumrêx mã harê. E ma mẽ hkôt ri mẽ kãm ã ijarênh anhỹr o ri apa kê mẽ ijarênh ma. Anhỹr o mẽ pahto kator xwỳnh maatija inhmã kapêr.

¹⁰Tã mẽmo kaxyw na hte mẽ pahto hpimràatã mẽ pahto hkra? Nà kaxkwa kamã kapêr o mẽ wrỳk xwỳnh pytàr xwỳnhjaja nẽ mẽkarõmnuti kot mẽ pahte amnhĩ nhĩpêx nyw o papa hã mẽ pahpumunh kôt axpên mã tanhmã Tĩrtũm jarênh to kaxyw. Nẽ harênh o: —Kokỹỹ. Tĩrtũm àhpumunh tỳx o àhpumunh tỳx jakamã na hte tanhmã mẽ hipêx to nhũm mẽ tãm amnhĩ nhĩpêx mex o pa. Nà Tĩrtũm àhpumunh o àhpumunh nẽ hihtỳx o hihtỳx.

Anē. Kojā mẽ ate amnhĩ to mex o apa hã mẽ apumu nē ã axpẽn mã Tĩrtũm jarẽnh anē.

¹¹Amnepẽm kormã mẽmoj kêt ri na pre Tĩrtũm mẽ pakukamã mẽ pahtã tanhmã amnhĩ jarẽnh to hãmri nē Jejus kukwak ri ã mẽ panhĩpêx anē. Jao mẽ piitã mẽ kãm àhpumunh o àhpumunh ã amnhĩ to amnhĩrĩt.

¹²Tã pu mẽ ra Jejus kukwak ri amnhĩ kamã pamã Tĩrtũm pyma hkêt nē. Kãm mẽ pajapê kênã kot pu kêt mẽ ri amnhĩ kamã pamã uma ho papa. Kot puj mẽ paxãmnhĩx ri kãm amnhĩ jarẽnh rãhã ho ri papa. Te ra pahte hwỳr paxàpir nē pano ho omunh nē kãm pakapěr o pakuhê pyræk.

¹³Jakamã kwa kêr ka mẽ kot mẽ atã tanhmã ixtomnuj to hã ijarẽnhja ma nē tee ri ixkukamã ajamaxpěr hkêt nē. Kwãr mẽ mãmri tanhmã inhĩpêx to. ãm ixte mẽ amã amnhĩ jarẽnh ma nē axpẽn mã ijarẽnh o: —Hêxta waa nē. Mãn Pawre kãm mẽ pajapê hã na pre amnhĩ grõnh kôt mẽ pamex kaxyw mẽ pahwỳr mra nē mẽ pamã Tĩrtũm kapěr jarẽnh o pa. Mẽ kot ja hã tanhmã hipêx kati hto htã nhũm jam urer kêt nē. Anē.

Kris kãm mẽ pajapê kamã tanhmã mẽ panê amnhĩ nhĩpêx to

Juãw 3.16; Wam Juãw 3.1

¹⁴Nē na pa hte mẽ ato Mẽpanhĩpêxã maati hwỳr kãm ixihitỳx o ixpa.

¹⁵Kêp mẽ pahte hkôt amnhĩ xunhwỳr xwỳnhjê nhõ Pahi Maati mex kumrẽx na. Kra hkwỳjaja ra kaxkwa kamã kuri htĩr tũm nē pa ho pa nē arĩ pyka ja kamã mẽ pahpê hkwỳjaja kormã jar papa. Nom te mẽ pahpiitã mẽ pahte ixkre tipxi kamã Tĩrtũm kôt ri papa pyræk.

¹⁶Jakamã na pa hte mẽ ato hwỳr o: —Pa Tĩrtũm. Nà amex o amex. E ot pa Epes nhõ xwỳnhjê ho awỳr o ixkrĩ. Kwa kê Akarõ mẽ kãm axàhpumunh xà hkwỳ gõ kê mẽ akôt ri amnhĩ nhĩpêx rãhã ho pa.

¹⁷—Nē kê mẽ amnhĩ kaxyw Kris kôt hamaxpěr tỳx o pa. Te mẽmo pĩ hpàr jarê kot pika kaxwỳnh kãm pimành nē pika jamỳnh tỳxta pyræk. Nhũm kôk xàpêr tỳx tã tee kot kãm mẽnh prãmta pyræk. Kê mẽ pĩ hpàr jarê kot pika jamỳnh pyrã nē kãm axpẽn kĩnh o pa. Jao mẽmoj to axpẽn kutã nojarêt rãhã ho pa.

18-19—Ně kê krĩ piitã hkôt mẽ akrajê pyrà ně amnhĩ tã Kris kãm mẽ hapê htỳx o mẽ hapê htỳx ã amnhĩ pumu. Jao uràk ně mẽ kãm axpẽn kĩnh tỳx o pa. Nề kê mẽ ate amnhĩ nhĩpêx pix o amnhĩ nhĩpêx rãhã ho pa. Nề ajamaxpêr pix o hamaxpêr rãhã ho pa. Jao te mẽmo pĩ hpàrta pyrà ně akôt hihtỳx nẽ. Anẽ.

20Kot puj mẽ ã amnhĩ to Tĩrtũm wỳr anẽ nhũm mẽ pama nẽ ra àhpumunh tỳx xà ho ã mẽ panhĩpêx anẽ. Ra kot mẽ pakamã pa ho pa kênã.

21ã Tĩrtũm Jejus Kris kukwak ri mẽ pahpê hkrajê nhĩpêx anhỹr jakamã kwa pu mẽ pahpê hkra xwỳnhjaja kêr pu mẽ kãm mex o mex ã harẽnh rãhã ho papa. Nà kot puj mẽ ã kãm anhỹr o papa.

Epes 4

Te ixkre tipxi kamã axpẽn kôt ri mẽ papa pyràk

Rômãn 15.5; Piripos 2.1-4; Korosê 3.12-17; Wam Pêtre 3.8

1Nề ra mẽ kot Kris ã ijaxàr nhũm ixkrĩ htã pa ã inhmã mẽ akĩnh xàj mẽ amã ixkapêr nẽ hã kagà anhỹr o ixkrĩ. Kwa kêr ka mẽ Tĩrtũm kot amnhĩ nhĩpêx kôt amnhĩ nhĩpêx mex rãhã ho ri apa. Ja kaxyw na pre amnhĩ kôt mẽ awỳ ka prem hkôt amnhĩ xunhwỳ.

2Nề kêr ka mẽ amã amnhĩ to rax o akwỳjê jakrenh prãm o ri apa hkêt nẽ. Nề mẽ agryk tokyx anhỹr kêt nẽ. ãm axpẽn kãm axukaprĩ pix o mãn ri axpẽn kôt apa. Kê mẽhõ tee tanhmã ri mẽ ato htã ka mẽ kamã agryk tokyx anhỹr kêt nẽ. ãm mẽ amã ri axpẽn hkĩnh pix o mãn ri axpẽn kôt apa.

3Ra Tĩrtũm Karõ kot mẽ pahkarõ mã gjêx par jakamã te mẽ pahte ixkre tipxi kamã axpẽn kôt ri mẽ papa pyràk. Jakamã kêr ka mẽ axpẽn to mex pix kukamã mãn kêt ajamaxpêr o ri axpẽn kôt apa. Nề tãm axpẽn nhĩpêx. Jao ajamakêtkati nẽ axàmnhĩx ri axpẽn kôt ri apa ho apa.

4Te mẽ pahte ixkre tipxi kamã ri axpẽn kôt papa pyràk jakamã mẽ pahpiitã mẽ pahkarõ kamã Tĩrtũm Karõja hkrĩ ho hkrĩ. Jakamã kot puj mẽ nhỹrmã ma õ krĩ hwỳr api nẽ kamã mẽ pamex rãhã papa ho papa.

⁵Ně mẽ panhõ Pahihtija ãm pixii. Na pu prem pahpiitã amnhĩ kaxyw hkõt pajamaxpěr jao ra mẽ pahpê hkraa. Tã mẽ pahpê Kris kwỳ hã amnhĩ to amnhĩrĩt kaxyw na prem Tĩrtũm mã mẽ pahkrã kumrã. ã mẽ panhĩpêx anhỹr o axpẽn pyrãk o mẽ panhĩpêx o pa anẽ.

⁶Ně Tĩrtũm haxwỳja ãm pixii. Kêp mẽ pahpiitã mẽ panhĩpêêxà maati na. Na hte mẽ pahpê hkrajê mã àhpumunh xà hkwy gõ pu mẽ ỹ hã kãm tanhmã amnhĩ nhĩpêx to ho papa. Nhũm hte mẽ pahkarõ kamã pa ho pa. Jakamã te mẽ pahte ixkre tipxi kamã ri axpẽn kõt papa pyrãk.

Kris kot ahpỹnhã tanhmã mẽ pahto mex to hã harẽnh

Rõmãn 12.3-8; Wam Korĩt 12.1-12; Wam Pêtre 4.10-11

⁷⁻⁸Ně Tĩrtũm kapěr ã kagà htũm kot Kris jarẽnh kot: Na pre mẽ kot kutã amnhĩ xunhwỳr xwỳnhjê pytãr pa nẽ ma akupỹm kaxkwa hwỳr api. Tã arĩ jar pika hkõt mẽ pahpê hkwyjê mã tanhmã mẽ pahto paxihtỳx to ho pa. Na hte Krisja tanhmã mẽ pahte ahpỹnhã kãm amnhĩ nhĩpêx to ho papa kaxyw tanhmã mẽ pahto paxàhpumunh to. Kãm hprãm xà hkõt.

⁹Tĩrtũm kapěr ã kagà htũm kot akupỹm kaxkwa hwỳr àpir ã harẽnh. ãm tapxipix na pre ã pika hwỳr wrỳk nẽ akupỹm kaxkwa hwỳr àpir anẽ. Na pre ty nhũm mẽ haxà. Hãmri nhũm akupỹm htĩr nẽ kato nẽ ma akupỹm api. Tapxipix na pre ã amnhĩ nhĩpêx anẽ.

¹⁰Tã akupỹm kaxkwa hwỳr àpir xwỳnhta na hte kaxkwa kamã nẽ pika hkõt amnhĩm mẽmoj piitã tanhmã ho ho hkrĩ.

¹¹Na pre ahpỹnhã tanhmã mẽ pahto mex to. Ahpỹnhã mẽ pahte tanhmã kãm amnhĩ nhĩpêx to ho papa kaxyw na pre mẽ paxunhwỳ. Nẽ mẽ pahkwỳjaja mẽ pahte krĩ piitã hwỳr pamrar nẽ ỹ hã hkrajê mã kapěr jarẽnh o papa kaxyw mẽ paxunhwỳ. Nẽ mẽ pahkwỳjaja mẽ pahte krĩ pixi kamã Tĩrtũm nhỹ hã hkrajê jahkre ho ri mẽ hkõt papa kaxyw mẽ paxunhwỳ. Nẽ mẽ pahkwỳjaja mẽ pahte pahprĩ hã mẽ piitã mẽ kãm tanhmã mẽ kot amnhĩ nhĩpêx to nẽ Jejus kõt amnhĩ xunhwỳr ã mẽ kãm harẽnh o papa kaxyw mẽ paxunhwỳ. Nẽ mẽ pahkwỳjaja mẽ pahpê pastõ kaxyw mẽ paxunhwỳ. Nẽ mẽ

pahkwỳjaja mẽ pahte mẽ kãm Tĩrtũm kapěr ã kagà jarėnh o mẽ ahkre ho papa kaxyw mẽ paxunhwỳ.

¹²ã kot puj mẽ pahpiitã ahpỹnhã Kris mã tanhmã amnhĩ nhĩpêx to ho ri papa aně. Kot puj mẽ ã mẽ hipêx anhỹr o ri papa nhũm mẽ pamar tỳx ně. Ně gaa ně mẽ pahpyrà ně Tĩrtũm mã amnhĩ nhĩpêx mex o pa. Pu mẽ pahpiitã hkôt amnhĩ nhĩpêx mex o papa.

¹³Ně gaa ně mẽ pahpiitã mẽ pahpê Tĩrtũm kra hã Jejus kot amnhĩ nhĩpêx kôt omunh mex ně. Ně amnhĩ kaxyw hkôt pajamxpěr tỳx ně. Jao te ra hkôt mẽ paxaptàr mex pyràk. Ně te kot amnhĩ nhĩpêx pyràk o amnhĩ nhĩpêx.

¹⁴Měhprĩrejaja na htem nhãm hamaxpěr ně nhãm hamaxpěr o pa. Te kòk xàpêr ně nhãm mẽmoj to mrar ně nhãm mẽmoj to mrar pyràk. Nom kêr pu mẽ ho mẽ uràk kêt ně. ãm Kris kôt pix mã pajamxpěr tỳx o papa. Jakamã nhũm mẽ tee ri mẽ pahte hkwỳm ri tanhmã amnhĩ tomnuj to hprãm xàj tanhmã mẽ pahto kaprỳ. Nom kêr pu mẽ mẽ mar kêt ně. ãm pakatàt kôt mẽ aptàr kot amnhĩ nhĩpêx o amnhĩ nhĩpêx o papa. Jao Kris kôt xpẽn to paxihtỳx o papa.

¹⁵Tãm xpẽn mã pakapěr ně pamã xpẽn kĩnh o xpẽn mã paxêx kêt ně. Kwa kêr pu mẽ ã amnhĩ nhĩpêx anhỹr o mãn papa. Jao te mẽ pahkrã Kris kot amnhĩ nhĩpêx pyràk o amnhĩ nhĩpêx mex o mỗ.

¹⁶Ně mẽ panhĩ kamã tanhmã mẽ pakuteja piitã na hte mẽ pahkrã kamã mẽ pajamxpěr xà hkôt xpẽn kôt ahpỹnhã tanhmã xpẽn to ajuta hto. Te ixkre pixi kamã mẽ pahte xpẽn kôt tanhmã xpẽn to ajuta hto ho ri papa pyràk.

Kris kôt mẽ pahte amnhĩ nhĩpêx nyw ã mẽ pamã karõ

Korosẽ 3.5-11; Wam Pêtre 4.7

¹⁷E kot paj Pahihti nhỹ hã mẽ amã mẽmoj jarě ně nê mẽ amã ixkapěr kãm ixihtỳx ně ka mẽ inhma. Nà kêr ka mẽ axte mẽ kêp Tĩrtũm kra hkêt xwỳnhjê kot amnhĩ nhĩpêx o amnhĩ nhĩpêx o ri apa hkêt ně. Na htem htỳx ri tanhmã hamaxpěr punuj to ho ri amnhĩ tomnuj o pa.

¹⁸Jao Tĩrtũm mã hamaxpěr kêt ně pa. Kãm hamaxpěr prãm kêt kumrẽx ně pa. Te mẽ kot omunh ně nhãm hkrã pyràk o amnhĩ nhĩpêx. Rỳ te mẽhõ wa

kot axpën kãm gryk kãm axpën nhĩpêx pyræk o hipêx. Jao te kamàt kô kamã ri pa pyrà nê Tĩrtũm kot amnhĩ nhĩpêx pumunh kêt nê pa. Jakamã koja mẽ nhỹrmã kuri htĩr tũm nê pa hkêt nê.

¹⁹Na htem tanhmã amnhĩ tomnuj to htã amnhĩ kamã hpijaàm kêt nê pa. Nê axpën kamã hpijaàm kêt rãhã ho pa. ãm amnhĩ pix kukamã hamaxpêr nê tanhmã amnhĩ tomnuj to ho ri pa.

²⁰⁻²¹Nom Jejus Krisja ã kot amnhĩ nhĩpêx anhỹr kêt. Mẽ kurom tãm kot amnhĩ nhĩpêx mex o pa xwỳnh nê tãm kapêr o pa xwỳnh na. Na pa pre ma mẽ awỳr mỗ nê ixprĩ hã mẽ amã ja hã harẽ ka prem inhma nê inhmar tỳx nê.

²²Na pa pre mẽ amã: —Kwa mẽ ri axte amnhĩ nhĩpêx tũm kôt amnhĩ nhĩpêx o ri apa hkêt nê. Ja na omnuj tỳx. Na ka prem ã amnhĩ nhĩpêx anê nê ajamaxpêr punuj pix o ri apa. Jao amnhĩ tomnuj rãhã nê. Tã kêt ka mẽ amnhĩ nê awry hã mẽnh pyrà nê axte ã amnhĩ tomnuj anhỹr o ri apa hkêt nê.

²³—Nê kêt ka mẽ axte mẽ ajamaxpêr tũm nê mẽ ate amnhĩ nhĩpêx tũm kôt ri amnhĩ nhĩpêx kêt nê. Nê mẽ ajamaxpêr nyw nê mẽ ate amnhĩ nhĩpêx nyw kôt pix mã ri amnhĩ nhĩpêx o ri apa. Te mẽ kot mẽ ê htũm kwrỳnh nê rēnh nê hpãnhã nyw jagjêx nê ri hã pata pyrà nê ãm amnhĩ nhĩpêx nyw kôt pix mã amnhĩ nhĩpêx o ri apa.

²⁴Mẽ ajamaxpêr nyw nê mẽ ate amnhĩ nhĩpêx nywja axtem na. Te Tĩrtũm jamaxpêr nê kot amnhĩ nhĩpêxta pyræk. Jakamã kwa kêt ka mẽ kãm hprãm xà hkôt pix mã tanhmã amnhĩ nhĩpêx to ho ri apa. Jao kãm amnhĩ nhĩpêx mex o ri apa. Nê kapêr kôt ri amnhĩ nhĩpêx. Anê. Na pa pre ã mẽ amã ixkapêr anê. Tã kêt ka mẽ arĩ ixkapêr kôt pix mã amnhĩ nhĩpêx.

²⁵Mẽ pahpê Kris nhĩ jakamã te pahte ixkre htipxi kamã axpën kôt amnhĩ nhĩpêx pyræk jakamã kwa mẽ axte axpën mã mẽmoj to axêx kêt nê. Nê amarĩ axpën xô ri axpën mã mẽmoj to axêx kêt nê. ãm tãm axpën mã mẽmoj jarēnh o ri apa.

²⁶Ně kot kaj mẽ mẽmoj tã agryk japêr. Rỳ mẽhõ kamã agryk rỳ amarĩ agryk japêr. Tã kêr ka ho ajapêx tokyx aně agryk japjê hkêt nẽ. Kêr kê kormã kamàt kêt ri ka akupỹm tãm akrã nhũm ja amã mex nẽ.

²⁷Nom kot ka mẽ arĩ kamã agryk o ri apa nhũm mẽkarõmnuti nhõ pahi Satanastija ja hã mẽ apumu nẽ te mẽ ate amnhĩ tomnujta ã mẽ apynênh pyræk o mẽ anhĩpêx. Ka mẽ ra hkôt tanhmã amnhĩ tomnuj to. Ja pymaj kêr ka mẽ agryk japjê hkêt nẽ. Satanasti kãm hprãm xà hkôt ã amnhĩ nhĩpêx anhỹr kêt nẽ.

²⁸Ně mẽ axàhkĩnh o mẽ apa xwỳnhjaja kêr ka mẽ axte mẽ kêp axàhkĩnh hkêt nẽ. Mẽmoj tã apê nẽ hpãnhã kàxpore jamỳ nẽ ho amnhĩm awjaprô. Ně mẽ kêp amrakati xwỳnhjê mã mẽmoj japrôr o ri apa. Kêr ka mẽ ate amnhĩ nhĩpêx tũmta pãnhã ã amnhĩ nhĩpêx nyw o amnhĩ nhĩpêx anhỹr o ri apa.

²⁹Ně kêr ka mẽ amã axpẽn kĩnh kamã tãm axpẽn mã akapêr o ri apa. Ně akapêr mã agêt kãm ri axpẽn mã akapêr kêt nẽ. ãm axpẽn mã akapêr mã aprĩ ho axpẽn mã akapêr. Ně mẽ amã axpẽn kĩnh nẽ mẽ amã axpẽn to mex pix prãm xàj tãm axpẽn mã ri akapêr o ri apa.

³⁰Tĩrtũm na pre mẽ pahwỳr amnhĩ Karõ rẽ nhũm mẽ pahpê hkra hã mẽ pahkarõ mã agjê nẽ mẽ pakamã hkrĩ ho hkrĩ. Kojã mẽ pakamã hkrĩ ho hkrĩ rãhã nhũm nhỹrmã Tĩrtũm amnhĩ wỳr mẽ pahto api pu mẽ kuri pahĩr tũm nẽ papa ho papa. Jakamã kwa kêr ka mẽ tanhmã amnhĩ tomnuj to ho amnhĩ kamã Tĩrtũm Karõ mã hkaprĩ jagjênh kêt nẽ. Ně kãm hpijaàm jagjênh kêt nẽ. Kojã mẽ pahte amnhĩ tomnuj ã mẽ pahpumu nẽ mẽ pahkaga hkêt tã tee ri ja hã mẽ pahpumu nẽ hkaprĩ nẽ. Jakamã kêr pu mẽ ãm kãm hprãm xà hkôt pix mã tanhmã ri amnhĩ nhĩpêx to ho ri papa.

³¹Ně kêr ka mẽ axte ri axàhkurê ho ri apa hkêt nẽ. Ně agryk kãm axpẽn mã tanhmã akapêr punuj to hkêt nẽ. Rỳ axpẽn japrỳ ho ri apa hkêt nẽ. Ně atỳx ri axpẽn tã apêr o apikênh kêt nẽ. Ně ri axpẽn tã mẽ kãm axàmnênh kêt nẽ.

³²Kêt mẽ ãm axpẽn to mex pix nẽ axpẽn kãm axukaprĩ ho ri apa. Nhũm mẽhõ tanhmã mẽ ato ka mẽ ãm amnhĩ tã omu nẽ tanhmã ho hkêt nẽ tanhmã kot atoja ho ajamakêtkati kurê kumrêx. Tĩrtũm na pre Kris kukwak ri mẽ

pahte amnhĩ tomnuj grành pa nẽ axte kãm hamaxpěr kêt nẽ. Tã kêt ka mẽ uràk nẽ mēhõ kot tanhmã atomnuj tota tokyx ho ajamakêtkati nẽ axte kãm ajamaxpěr kêt nẽ.

Epes 5

¹Nẽ koja mēhõ kãm hkra japê nhũm amnhĩ tã omu nẽ hkĩnh nẽ. Hãmri nẽ nhỹrmã hkra nẽ amnhĩ pyrà nẽ kãm hapê nẽ. Ja pyrà nẽ Tĩrtũm kãm mẽ pahpê hkwyjê japê jakamã kêt pu mẽ amnhĩ pyrà nẽ pamã pahkwỳjê hkĩnh tỳx o papa.

²Kris haxwỳja kãm mẽ pajapê jakamã na pre htyk o mẽ panê mẽ pahte amnhĩ tomnuj pãnhã amnhĩrer pa. Kêp Tĩrtũm Kra htã amnhĩ mex pix kukamã hamaxpěr kêt nẽ ã mẽ panê amnhĩ nhĩpêx anẽ. Tã ã kãm mẽ pajapê anhỹr jakamã nhũm Tĩrtũm ja hã omu nhũm ja kãm mex nẽ. Te ho mẽ hkuxwa xà mex kuxwa pyràk. Jakamã kêt pu mẽ amnhĩ tã omu nẽ uràk nẽ pamã axpẽn kĩnh o axpẽn to mex o mãn ri papa.

Mẽ pahte amnhĩ tomnuj kaga hã kot mẽ pamã karõ

Sikũn Korĩt 6.14–7.1; Korosẽ 3.16-17; Wam Juãw 1.5-10; 2.15

³Nẽ mẽ pahpê Tĩrtũm kra jakamã kêt pu mẽ pahprõ pix tãnopxar o ri papa nẽ nhãm mēnijê hõ kamã pahpijaàm kêt o ri papa hkêt nẽ. Nẽ kêt pu mẽ amnhĩ pix kukamã pajamaxpěr kêt nẽ. ãm ja ho anhỹr hkêt kumrẽx. Mẽ pahpê Tĩrtũm kra kẽnã kot pu kêt axtem nẽ ã amnhĩ nhĩpêx anhỹr o ri papa. Tĩrtũm krajaja na htem ã amnhĩ nhĩpêx anhỹr kêt nẽ.

⁴Nẽ määnẽn mẽ pakapěrja. Kêt pu mẽ ri tanhmã axpẽn mã pakapěr punuj to hkêt nẽ. Nẽ ri axpẽn japyrỳ hkêt nẽ. Nẽ amnhĩ krã hkõt pahtỳx ri tanhmã pakapěr to hkêt nẽ. ãm tãm axpẽn mã pakapěr mex nẽ axpẽn mã Tĩrtũm mex o mex ã harẽn h o ri papa.

⁵Nẽ Tĩrtũm kapěr kõt amnhĩ nhĩpêx kêt xwỳnhjaja nẽ axpẽn kãm mẽ hpijaàm kêt xwỳnhjaja nẽ amnhĩ pix kukamã mẽ hamaxpěr o pa xwỳnhjaja. ã mẽ kot amnhĩ nhĩpêx anhỹr xwỳnhjaja kêp Tĩrtũm mẽ Kris wa hkra hkêt. Na htem ã amnhĩ nhĩpêx anhỹrja gryk ã wa kãm hamaxpěr kêt nẽ.

⁶Ně koja nhỹrmã mēhõ mē awỳr mō nē mē ate tanhmã amnhĩ tomnuj to prãm xàj hêx rom amã kapěr nē mē amã: —Kwa mon ka hte mē ixpyrà nē ã amnhĩ nhĩpêx anhỹr kêt nē? Ja mex kênã. Aně. Koja ã mē amã kapěr aně ka mē ama nē ãm ama. ã mē kot amnhĩ nhĩpêx anhỹr xwỳnhjaja koja Tĩrtũm nhỹrmã ja hã mē homnuj tỳx kumrêx.

⁷Jakamã kwa kêr ka mē ate ho mē kot amnhĩ nhĩpêx pyræk pymaj mē hkôt ri apa hkêt nē. Kwarĩ ho kwarĩ.

Mē pahte amnhĩ nhĩpêx nyw jarênh

Juãw 1.4; 3.19; 8.12; 12.35; Rõmãn 13.12; Wam Tesarõn 5.5; Wam Juãw 1.5

⁸Amnepêm kormã mē ate Tĩrtũm kôt amnhĩ xunhwỳr kêt ri na ka prem te kamàt kô kamã ri apa pyrà nē atỳx ri tanhmã amnhĩ tomnuj to ho ri apa. Tã ra Jejus kôt amnhĩ xunhwỳ hãmri nē te hirã kamã mē apa xwỳnh pyræk. Jakamã kwa kêr ka mē hpãnhã Tĩrtũm kãm hprãm xà hkôt pix mã mãn ri amnhĩ nhĩpêx o apa. Ra mē apê hirã kamã mē apa xwỳnh kênã.

⁹Kot kaj mē ã amnhĩ nhĩpêx aně nē tãm amnhĩ nhĩpêx mex nē tãm akapěr o apa.

¹⁰Jao Tĩrtũm kãm hprãm xà hkôt pix mã amnhĩ nhĩpêx o ri apa

¹¹⁻¹²ně te kamàt kô kamã ri mē pa xwỳnhjaja kot amnhĩ nhĩpêx pyræk o amnhĩ nhĩpêx kêt nē. ã mē kot amnhĩ nhĩpêx anhỹr xwỳnhjaja na htem hpimxur pê tanhmã amnhĩ tomnuj tỳx to ho pa. Nom kot paj ixprĩ hã mē amã tanhmã mē kot amnhĩ tomnuj to hã mē harênh kêt nē. Kot pa mē amã harě nē ixpijaàm tỳx nē. Ixte harênh mã xwỳnhja omnuju. Tã kêr ka mē uræk nē ã amnhĩ nhĩpêx anhỹr kêt nē. ãm mē noo mã tãm ri amnhĩ nhĩpêx o ri apa.

¹³Mē kot ja hã mē apumunh nē tee ri tanhmã kot amnhĩ tomnuj to hkukamã hamaxpěr kaxyw. Jao amnhĩ tomnuj kaga japêr.

¹⁴Te mē kot kanê hpôk rax kãm mēmoj piitã omunh mexta pyræk. Tĩrtũm kapěr ã kagà htũm kot ja jarênh kot: Mē amã Tĩrtũm prãm kêt xwỳnhjaja te ra mē atyk nē mē anhĩkwỹ pyræk. Ně te kamàt kô kamã mē anhõt nē mē anhĩkwỹ pyræk. Jakamã kwa te mē akrã hapôx nē kànhmã mē akrĩ pyræk o

amnhĩ nhĩpêx nê Tĩrtũm kôt amnhĩ xunhwỳ. Kê Kris tanhmã mẽ akrã hto ka mẽ te myt kato nhũm mẽ ate arĩgro hã ri apa pyræk o amnhĩ nhĩpêx. Anê.

Tĩrtũm krajaja kot tanhmã amnhĩ nhĩpêx to hã mẽ kãm karõ

Korosẽ 4.5; Sikũn Ximotre 4.2

15Nê kwa kêr ka mẽ amnhĩ pumunh mex o ri apa. Nê mẽ ri htỳx ri mẽ kot amnhĩ nhĩpêx xwỳnhjê hkôt amnhĩ nhĩpêx kêt nê. Nê ãm amnhĩ to mex pix o ri apa.

16Na htem ra Kris ã mẽ pahtomnuj o pa pu mẽ pamex kêt nê ri papa. Tã nom kêr pu mẽ apkati mẽ arĩ Tĩrtũm mã tanhmã amnhĩ nhĩpêx to ho papa mã panhũrer kêt nê.

17Nê ãm Tĩrtũm pix mã amnhĩ jarẽnh o ri papa nê kãm: —Pa Tĩrtũm. Inhmã akôt pix mã amnhĩ nhĩpêx prãm jakamã kwa ixte amã mẽmoj to anhỹr kaxyw ixkrãm ijamaxpêr mex jagjê nê ho amnhĩrĩt mex pa tanhmã amã amnhĩ nhĩpêx to ho ri ixpa. Anhỹr o amnhĩ to kuwỳ. Nom kêr pu mẽ pahtỳx ri pajamaxpêr kôt tanhmã kãm amnhĩ nhĩpêx to hkêt nê.

18Nê kêr pu mẽ ri pahpipãnh o papa hkêt nê. Kwarĩ ho kwarĩ. Kot puj mẽ ã amnhĩ nhĩpêx anê nê te kagõxỳhti kot amnhĩ tã mẽ pahkaxpre pyræk o mẽ panhĩpêx pu mẽ tee ri pamã hkaga hprãm kaprỳ. Te kot amnhĩm mẽ pahto àrĩk pyræk o mẽ panhĩpêx nhũm ja mex kêt nê. Na htem pipãnh kãm hamaxpêr mex kêt nê ãm htỳx ri tanhmã amnhĩ nhĩpêx to ho pa. Tã kêr pu mẽ ã amnhĩ nhĩpêx anhỹr hkêt nê ãm Tĩrtũm Karõ pix hkôt mãn ri amnhĩ nhĩpêx o ri papa.

19Nê kêr pu mẽ axpẽn wỳr akuprõ nê pahkĩnh kãm Tĩrtũm mã mex o mex ã harẽnh pê ho pagrer o pahkrĩ.

20Nê mẽ pamex nê ri papa rỳ pahpunuj nê ri papa htã arĩ kãm mex o mex ã harẽnh rãhã ho ri papa. Kêp Mẽpanhĩpêxà maati jakamã mẽ pahpê Pahihti Jejus Kris kwỳ hã pu mẽ kãm mex ã harẽnh rãhã ho papa nê aa ho pajamakêtkati hkêt nê.

21Nê kêr ka mẽ Kris ã apijaàm rãhã o ri apa. Jao axpẽn kôt ajamaxpêr nê axpẽn kôt ri amnhĩ nhĩpêx mex o ri apa.

Tanhmã mẽ hprõ nẽ mẽ mjên kot axpẽn nhĩpêx to hã mẽ kãm karõ

Wam Korõt 11.3; Korosẽ 3.18-19; Wam Pêtre 3.1-7

²²Nẽ kêr ka mẽ anijaja mẽ amjên ã apijaàm o ri apa. Nẽ mẽ hamaxpêr mex ã mẽ omu nẽ mẽ hkõt ri amnhĩ nhĩpêx o ri apa. Te mẽ ate Pahihti Kris kapêr kõt amnhĩ nhĩpêx o ri apata pyræk.

²³Kris kêp mẽ pakamã ukapří xwýnh nẽ kêp mẽ papytâr xwýnh jakamã te kêp mẽ pahpiitã mẽ pahkrã pyræk. Nẽ mẽ papajaja te mẽ pahpê ĩ pyræk. Jakamã na pu htem pahpê ĩja te mẽ pahkrã kot tanhmã hamaxpêr to xà hkõt amnhĩ nhĩpêx o papaja pyræk. Ja pyrà nẽ kêr ka mẽ anijaja mẽ amjên jamaxpêr mex ã mẽ omu nẽ mẽ hkõt amnhĩ nhĩpêx mex nẽ.

²⁴Mẽ pahpê Kris kwỳ jakamã na pu htem hkõt amnhĩ nhĩpêx mex o ri papa. Ja pyrà nẽ kêr ka mẽ amjên kõt amnhĩ nhĩpêx mex o ri apa.

²⁵Nẽ mẽ amyjaja. Kêr ka mẽ amã aprõ hã ma ho ri apa. Te ho Kris kot mẽ pahtã ma ho pata pyræk. Na pre kãm mẽ pajapê xàj amnhĩ grõnh kõt mẽ pahwỳr wrỳ nẽ mẽ panê ty. Tã kêr ka mẽ uræk nẽ ã amã aprõ hã ma ho apa anẽ.

²⁶Na pre Kris kãm mẽ pajapê xàj mẽ pahte amnhĩ tomnuj pê mẽ pahpytã. Te mẽhõ my kãm mẽhõ ni hkĩnh nẽ mẽmoj punuj pê utâr nẽ ho hprõta pyræk. Nhũm te mẽ kot axpẽn mã wa rer kaxyw nhũm nija ma gõx mã htem nẽ wỳr nẽ amnhĩ to mex nhũm mẽ kot axpẽn kaxyw wa ho mexta pyræk. Hãmri nẽ te ra axpẽn mã wa rer nhũm wa kot axpẽn kõt pa ho pata pyræk. Ja pyrà nẽ na pre Jejus kãm mẽ pajapê nẽ kãm amnhĩ kuri mẽ papa ho mẽ papa hprãm xàj mẽ pahwỳr wrỳ nẽ mẽ pahte amnhĩ tomnuj pê mẽ pahpytã nẽ mẽ pamã Tĩrtũm kapêr jarẽnh o pa. Tã mẽ pahpê hkrajaja na pu htem kapêr ma nẽ hkõt amnhĩ nhĩpêx o papa ho amnhĩ tomnuj kaga. Te gõx kãm mẽ paxwỳr nẽ mẽ pahte amnhĩ nẽ amnhĩ grã htyk kuhõnh par pyræk. Jao Tĩrtũm kapêr kõt pix mã amnhĩ nhĩpêx o ri papa. Te ra paxwỳr nẽ amnhĩ nẽ tanhmã mẽ pahte amnhĩ tomnuj to grành par pyræk. Nẽ te mjên mã xwýnh wỳr nẽ amnhĩ to mex pyræk.

27ã mẽ pahte amnhĩ nhĩpêx anhÿr jakamã te mẽ pamex nẽ ri papa pyræk. Hãmri nhũm Krisja ja hã mẽ pahpumu nẽ kãm mẽ pajapê htÿx nẽ. Jakamã koja nhÿrmã akupÿn wrÿ nẽ ma akupÿm amnhĩ kôt mẽ pahto api pu mẽ kuri pa htĩr tũm nẽ papa ho papa.

28Nẽ xà mẽ amyjaja mẽ amã amnhĩ japêê? Nà mẽ amã amnhĩ japê ho na ka htem amã amnhĩ tã ma ho apa. Tã kêr ka mẽ aprõ nhĩpêx o te ka amã amnhĩ tã mata pyræk. Jao tãm mẽ hipêx o ri apa. Te war apixire nẽ war apa pyræk o wa axpẽn nhĩpêx. Kot kaj mẽ tanhmã hipêx to nẽ te ate amnhĩ nhĩ tanhmã hipêx to pyræk.

29-30Na htem amnhĩ nhĩ ho mex pix o pa nẽ kamã gryk kêt nẽ. Nẽ kãm prãm nẽ apku. Nẽ kãm kôr nẽ ixkõ. Nẽ nhÿhÿnh à nẽ amnhĩ kane. Na pu htem ã amnhĩ to mex o ri papa anẽ. Ja pyrà nẽ te mẽ pahpê Kris nhĩ pyræk jakamã na hte mẽ pahto mex o pa. Te mẽ pamã mẽ papa mẽ pahte amnhĩ nhĩ hã mata pyræk.

31Tĩrtũm kapêr ã kagà htũm kot ja jarênh kot: Koja mẽmyjê hõ hprõ kaxyw hãmri nẽ hipêêxà nẽ katorxà wa òrkwÿ kaga nẽ ãm hprõ kôt pix mã hpãnhã ri pa ho pa. Te wa tipxi nẽ ri pa pyræk o wa axpẽn nhĩpêx o pa. Anẽ.

32Na pre Tĩrtũm ã ja jarênh anẽ. Kapêrja mex tã amnepê mã mẽ pa xwÿnhjaja na prem hprĩ hã mar tÿx kêt nẽ. Na prem htÿx mẽ mjên kot tanhmã mẽ hprõ nhĩpêx to pix ã hkamnhĩx no ãm ja pix kêt. Mãänên te mẽ pahpê Kris nhĩ pyrà nẽ tãm mẽ pahte amnhĩ nhĩpêx nẽ axpẽn nhĩpêx o papa hã ã mẽ pajarênh kot anhÿr. Te ixkre tipxi kamã mẽ pahte Kris kôt mẽ papa pyræk o ã mẽ pajarênh anẽ.

33Jakamã kwa kêr ka mẽ amyjaja mẽ amã mẽ aprõ japê ho ri apa. Te ka amã amnhĩ tã ma pyræk o mẽ hipêx. Jao tãm mẽ hipêx. Nẽ mẽ anijaja kêr ka mẽ ajaxwÿja mẽ amjên ã apijaàm o ri apa.

Epes 6

Mẽ hkrajaja kot tanhmã hipêêxà nẽ katorxà nhĩpêx to hã mẽ kãm karõ

Korosẽ 3.20-21

¹Ně mẽ apê mẽ hkrajaja kêr ka mẽ anhĩpêêxà nẽ mẽ akatorxà wa kapêr ma nẽ hã ano htỳx nẽ wa hkôt ri amnhĩ nhĩpêx rãhã ho ri apa. Mẽ amã Pahihti Kris kôt amnhĩ nhĩpêx prãm xàj ã amnhĩ nhĩpêx anhỹr o ri apa. Kot kaj mẽ ã amnhĩ nhĩpêx anhỹrja o amnhĩ nhĩpêx mex o ri apa.

²⁻³Tĩrtũm kapêr ã kagà htũm kot ja jarênh kot: Kêr ka mẽ anhĩpêêxà nẽ mẽ akatorxà wa kapêr ma nẽ wa hkôt ri amnhĩ nhĩpêx. Kot kaj mẽ ã amnhĩ nhĩpêx anẽ nẽ amex nẽ kritpê m atĩr nẽ ri apa ry nẽ. Anhỹr jakamã kot kaj mẽ amã kritpê m atĩr nẽ ri apa hprãm hã kêr ka mẽ ã amnhĩ nhĩpêx anhỹr o ri apa. Kormã mẽ aprĩre htã ã amnhĩ nhĩpêx anẽ. E kêr ka mẽ ã mẽ anhĩpêêxà nẽ mẽ akatorxà nhĩpêx anhỹr o ri apa.

⁴Ně mẽ apê mẽ hipêêxà nẽ mẽ katorxà kêr ka mẽ akrajê gryk kaxyw mẽ kãm apêr o apikênh hkêt nẽ. Tãm mẽ kãm akapêr nẽ Pahihti Jejus kapêr o mẽ ahkre ho ri apa. E kêr ka mẽ ã akrajê nhĩpêx anhỹr o ri apa.

Mẽ pahte mẽ panhõ patrãw kapêr kôt amnhĩ nhĩpêx ã mẽ pamã karõ

Korosê 3.22–4.1; Wam Ximotre 6.1-2; Xitre 2.9-10; Wam Pêtre 2.18-25

⁵Ně mẽ ate mẽ kãm mẽ axàpênh o mẽ apa xwỳnhjaja kêr ka mẽ anhõ patrãw kapêr ma nẽ hkôt amnhĩ nhĩpêx mex o ri apa. Te mẽ ate Kris kapêr mar nẽ hkôt amnhĩ nhĩpêx pyràk. Jao mẽ hã apijaàm rãhã nẽ.

⁶Nom kêr ka mẽ ãm mẽ noo mã pix mã ri mẽ kãm axàpênh mex kêt nẽ. Mããnên mẽ wa kre kamã mẽ kãm axàpênh mex rãhã nẽ. Ja na Tĩrtũm kãm hprãm. Mẽ apê Tĩrtũm Kra Kris mã tanhmã amnhĩ nhĩpêx to ho apa xwỳnh jakamã kêr ka mẽ anhõ patrãw mã axàpênh mex o ri apa.

⁷Ně mẽ akĩnh kãm mẽ kãm axàpênh mex nẽ. Te mẽ ate Pahihti mã akĩnh kãm tanhmã kãm amnhĩ nhĩpêx to pyrà nẽ mẽ kãm tãm amnhĩ nhĩpêx pê axàpênh mex o ri apa.

⁸Kot puj mẽ amnhĩ kaxyw Tĩrtũm mã pajamaxpêr pê pahkĩnh kãm tãm amnhĩ nhĩpêx o ri papa nhũm Pahihti ja hã mẽ pahpumu nẽ nhỹrmã ja hã mẽ pahto mex rax nẽ. Mẽ pahpê hkrajê piitãã. Mẽ pahte mẽ kãm paxàpênh xwỳnhjaja nẽ amnhĩ mã mẽ paxàpênh xwỳnhjaja nhũm nhỹrmã mẽ pahpiitã mẽ pahte tãm amnhĩ nhĩpêx xwỳnhjê ho mex rax nẽ.

Měo patrāwjaja kot tanhmā kām mẽ àpênh xwỳnhjê nhípêx to

Korosê 4.1

⁹Ně mẽ apê mẽ õ patrāwjaja kêr ka mẽ amā mẽ àpênh xwỳnhjê ho mex nẽ mẽ àpênh ã mẽ kām axàkjêr o ri apa hkêt nẽ. Tãm mẽ hipêx. Kaxkwa kamā mẽ panhõ Pahi Maatija mãânên kêp mẽ õ Pahi Maati jakamā ã mẽ hipêx mex anhỹr o apa. Tãm na kām mẽ pahpiitã mẽ pajapê ho axpên pyrāk. E kêr ka mẽ ã mẽ hipêx anhỹr o ri apa.

Tanhmā mẽ pahte Satanasti kutã amnhĩ to htỳx to hã mẽ pamã karõ

Rõmãn 16.20; Sikũn Korĩt 10.3-5; Wam Tesarõn 5.8-11; Xiakre 4.7; Wam Pêtre 5.8-11

¹⁰E kot paj hpãnhã tanhmā mẽ pahte mẽkarõmnuti nhõ pahi Satanasti kutã amnhĩ to htỳx to jarẽ ka mẽ inhma. Kêr ka mẽ Pahihti nhỹ hã kutã amnhĩ to htỳx rãhã nẽ apa. Ate tanhmā amnhĩ tomnuj to hprãm xàj tanhmā kot ato htã ka Tĩrtũm xihtỳx o anhõpinh xà kaxwỳnh kām kutã amnhĩ to htỳx nẽ. Rỳ koja ate mẽmoj mex o anhỹr nê tanhmā ato ka mẽ amnhĩ tã hamaxpêr ã omu nẽ ãm omu nẽ arĩ Tĩrtũm xihtỳx nhỹ hã tãm ajamaxpêr mex rãhã ho ri apa.

¹¹Na hte pòristijaja pijapu kaxyw hãmri nẽ amnhĩ nê kàx o mẽ ê jagjê nhũm mẽ tee ri kām mẽ hkamnhwỳr prãm hkapyrỳ. Tã ja pyrã nẽ koja Satanasti mẽ ate kapêr kôt tanhmā amnhĩ nhípêx to hprãm xàj tanhmā mẽ ato ka mẽ amnhĩ tã hamaxpêr ã omu hãmri nẽ Tĩrtũm xihtỳx nhỹ hã kutã amnhĩ to htỳx nẽ. Jao mẽ ate amnhĩ nhípêx nyw pix o amnhĩ nhípêx nẽ mẽ ajamaxpêr nyw pix o ajamaxpêr. Kot kaj mẽ ã amnhĩ nhípêx anẽ nhũm Satanasti tee ri tanhmā kām mẽ ato hprãm hkapyrỳ.

¹²Mẽ pahpê Tĩrtũm kra jakamā mẽ kot mẽ pakutã amnhĩ xunhwỳr xwỳnh maatijaja axtem na mẽ. Mẽ kêp mẽkarõmnuti jakamā mẽ pahkĩnhã mẽ ì hkêt. ãm mẽ hkarõ kaxkrit pix na mẽ. Na htem kòk kôt tanhmā amnhĩ tomnuj tỳx to ho pa. Nẽ mẽ hihtỳx. Na htem arĩ jar pika ja kamā mẽ kêp Tĩrtũm kra hkêt xwỳnhjê ho amnhĩptã nhũm htem mẽ hkôt ri htỳx tanhmā ri amnhĩ tomnuj tỳx to ho pa. Nom amnhĩ tã mẽ omunh kêt nẽ.

¹³Jakamā kwa kêr ka mẽ Tĩrtũm kot mẽ akarõ mã amnhĩ Karõ jagjênh xwỳnhhta kôt pix mã amnhĩ nhípêx o apa. Jao mẽ ate amnhĩ nhípêx nyw kôt

pix mã măn ri mẽ amnhĩ nhĩpêx. Kêr kê mẽkarõmnuti tee ri kãm tanhmã mẽ ato hprãm kaprỳ ka mẽ arĩ Tĩrtũm Karõ xihtỳx nhỹ hã kutã amnhĩ to htỳx rãhã ho apa.

¹⁴Jakamã kwa kêr ka mẽ axkãm ajamak rom nẽ te ho sỏrdat kot pijapu kaxyw ê jagjênh pyràk o amnhĩ nhĩpêx. Na htem amnhĩ nê mỏx kà ho mẽ ê jagjê nẽ mẽ hpre xà ho amnhĩ pre hpa. Nẽ hipy kàx o mẽ hinô kà jagjê. Hãmri nẽ rĩ kormã ma mẽ kãm mẽ hkurê xwỳnhjê kutã mra nẽ axpu. No mẽ kajaja kêr ka mẽ kurom amnhĩ krãm Tĩrtũm kapêr jaxàr tỳx nẽ hkỏt pix mã ri ajamaxpêr rãhã ho ri apa. Nẽ hkỏt ri amnhĩ nhĩpêx mex nẽ. Jao te sỏrdat pijapu kaxyw kot amnhĩ nhĩpêxta pyràk.

¹⁵Na hte sỏrdatjaja hpar kà jagjê nẽ aa hopỏx kêt nẽ. Ầm rãhã gỏr nẽ hikwỹ. Jao ra mẽ kutã pijapu kaxyw amnhĩ grỏnh rãhã gỏr nẽ hikwỹ. Tã kêr ka mẽ ma mẽ kãm Jesus kot tanhmã mẽ panê amnhĩ nhĩpêx to hã harênh o apa kaxyw nẽ sỏrdat pyrà nẽ amnhĩ grỏnh kỏt ma mẽ hwỳr apa nẽ amnhĩ kamã akahak kêt nẽ.

¹⁶Nẽ sỏrdatjaja na htem amnhĩ nê amnàr xà hã kàx po jamỳ nẽ ho kuhê nhũm mẽ tee ri kãm mẽ hkamnhwỳr prãm kaprỳ. Ja pyrà nẽ koja Satanasti tanhmã mẽ ato ka mẽ Tĩrtũm kêp mẽ anhỏ pahi hã hihtỳx o kot Satanasti jakrenhja mã ajamaxpêr kurê kumrêx nẽ ầm hkỏt pix mã amnhĩ nhĩpêx. Na hte Satanasti te kot mẽ pahwỳr krur rênh pyràk o mẽ panhĩpêx. Jao xatã mẽ pahte Tĩrtũm kaga hprãm xàj tanhmã mẽ pahto. Nẽ mẽ pahte Tĩrtũm mã tanhmã amnhĩ nhĩpêx to pymaj xatã tanhmã mẽ pahto kaprỳ. Pu mẽ amnhĩ tã omu hãmri nẽ Tĩrtũm Karõ xihtỳx nhỹ hã Tĩrtũm kỏt pix mã amnhĩ nhĩpêx.

¹⁷Nẽ na hte sỏrdatjaja kàx o mẽ hkrãjapap jagjê nẽ pijapu kaxyw mẽ kutã mra nhũm mẽ tee ri mẽ hkrã jayr prãm kaprỳ. Ja pyrà nẽ kêr ka mẽ amnhĩ kaxyw Tĩrtũm kỏt pix mã ajamaxpêr rãhã ho ri apa. Nẽ ra kot mẽ ato hkra mã ajamaxpêr rãhã nẽ. Kê Satanasti tee ri kãm mẽ akrã kamã mẽ amã mẽ ajamaxpêr punuj jagjênh prãm hkaprỳ. Nẽ sỏrdatjaja na htem mẽ kutã wapo jamỳ nẽ ho kuhê. Nom mẽ papajaja mẽ panhỏ wapoja na axtem kêp Tĩrtũm

kapër. Na hte Tirtüm Karõ mẽ pahkrã kamã kapër o amnhĩrĩt pu htem pix mã pajamaxpër o papa nhũm Satanasti tee ri kãm mẽ pahkrãm mẽ pajamaxpër punuj jagjênh prãm kaprỳ. Te mẽ papijapu nhũm mẽ pahte amnhĩ nê ho pakrihkrit pyræk o hipêx.

18ã Satanasti pê mẽ pahte amnhĩ nê amnhĩ nhĩpêx kot anhỹr. Jakamã kêr pu mẽ amnhĩ to Tirtüm pix wỳr o ri papa kê Satanasti kutã mẽ pahto paxihtỳx pu mẽ hkôt tanhmã amnhĩ tomnuj to hkêt nê. Nê kêr pu mẽ mẽmoj to anhỹr kaxyw nê ra Tirtüm Karõ nhỹ hã amnhĩ to Tirtüm wỳ. Nê kãm amnhĩ jarênh rãhã ho papa nê aa ja ho pajamakêtkati hkêt nê. Nê Tirtüm krajê piitã mẽ ho hwỳr rãhã ho ri papa.

19Nê kwa kêr ka mẽ mããnên ixto Tirtüm wỳr rãhã nê. Kot tanhmã ixto nhũm ixàmnhĩx ixte mẽ kãm kapër jarênh mex o ri mẽ hkôt ixpa kaxyw. Mẽ kot ja hã tanhmã ixto htã pa arĩ ixàmnhĩx mẽ kãm harênh mex o ri mẽ hkôt ixpa. Nê ixprĩ hã mẽ kãm Jesus kot tanhmã mẽ panê amnhĩ nhĩpêx to hã harê. Kormã mẽ kot hprĩ hã ja mar mex kêt.

20Tã ixte mẽ kãm ja jarênh kaxyw na pre Tirtüm mẽ hwỳr inhmẽ nhũm prem hã ijaxà pa arĩ mẽ hagjênh xà kamã ixkrĩ ho ixkrĩ. Jakamã kwa mẽ ixto Tirtüm wỳ kê tanhmã ixto ixihtỳx to pa arĩ mẽ kãm kapër jarênh o ixkrĩ. Ja na Tirtüm kãm hprãm nê ijaxwỳja inhmã ja prãm.

Kagà jatur xà

Korosê 4.7-8

21Nê ot pa mẽ awỳr Xikitre mẽ. Kot paj mẽ amã kagàja nhĩpêx pa nê kãm kugõ nhũm kupy nê ma mẽ awỳr o mỗ. Hãmri nê mẽ awỳr o pøj nê mẽ amã kugõ nê mẽ amã tanhmã ijarênh to ka mẽ ijarênh ma nê akĩnh nê. Xikitre na hte Pahihti mã tanhmã amnhĩ nhĩpêx mex to o pa. Kris kôt mẽ pahtõ na. Nê inhmã hapêê.

22Tã ot pa mẽ awỳr kumê. Kê mẽ awỳr pøj nê mẽ amã ijarê ka mẽ kam ama nê akupỳm tãm akrã nê tee ri ixkukamã ajamaxpër kêt nê.

23E ixkràmnhwỳjaja. Kê Mẽpahpãm Tirtüm mẽ Pahihti Jesus Krisja wa tanhmã mẽ akrã hto ka mẽ ajamakêtkati nê axàmnhĩx ri apa. Nê mẽ amã

axpën kĩnh o ri axpën kôt apa. Nẽ mẽ apiitã wa hkôt ajamxpěr mex o ri apa.

²⁴E mẽ amã mẽ panhõ Pahihti Jejus Kris kĩnh rãhã ho apa xwỳnhjaja. Kê Tĩrtũm mẽ ato mex nẽ mẽmoj to mẽ akutã nojarêt rãhã ho pa. Tã ãm ja pix na hapêx. Ixpê Pawre na pa mẽ awỳr kagàja nhĩpêx nẽ kumẽ.

Piripos

Piripos 1

¹Pa Piripos kamã Jejus Kris kôt ixkwýjaja. Xà mẽ amex na ka mẽ apa? E ixpê Pawre na pa mẽ amã kagàja nhîpêx nê kamã mẽ amã amnhî jarê nê mẽ awýr kumê. Nhũm Ximotre haxwýja kãm ja mex nê. Wa ixpê Jejus mã tanhmã amnhî nhîpêx to ho wa ixpa xwýnh jakamã na pa wa mẽ awýr hipêx nê kumê. Mẽ ate Tĩrtũm kapêr o mẽ ajahkre xwýnhjê hwýr nê mẽ kãm mẽ ate tanhmã amnhî to xwýnhjê hwýr nê mẽ ate mẽ mar o akrĩ xwýnhjê hwýr. Mẽ apê Kris kôt wa ixtõ nê wa ixtõxjê ho ixpimràatã mẽ awýr hipêx nê kumê.

²E kê Měpanhîpêêxà maati Tĩrtũm mẽ Pahшти Jejus Kris wa mẽmoj to mẽ akutã nojarêr rãhã nê ka mẽ axãmnhĩx ri ajamakêtkati nê ri apa ho apa.

Pawre kot Piripos nhõ xwýnhjê ho Tĩrtũm wýr ã harênh

Epes 1.15-19; Korosê 1.9-12

³Na pa hte xatã mẽ amã ijamaxpêr o ixkrĩ nê mẽ panhõ Tĩrtũm kot tanhmã mẽ ato mex toja pa kãm ijamaxpêr nê ixkĩnh nê ixkrĩ.

⁴Nê Tĩrtũm mã mẽ ajarênh nê mẽ ato kuwý. Ixkĩnh kãm mẽ ato kuwý.

⁵Wam ixte mẽ awýr inhmõrta ã na pa pre mẽ amã Jejus kot mẽ panê tanhmã amnhî nhîpêx to hã harênh o ri mẽ akôt ixpa. Ka prem inhma nê hkôt amnhî xunhwýr tỳx nê hkôt amnhî nhîpêx o ri apa. Jakamã inhmã axpên kaxyw ri kàxpore hkwý nhõr o apa. Te ham mẽ ate ixwýr mênhta pyræk pa pre mẽ akukwak ri amnhĩm ho ixujaprõr o ri ixpa pê nhãm ri mẽ kãm Jejus jarênh o ri mẽ hkôt ixpa. Na pa hte arĩ jam ijamaxpêr rãhã ho ixkĩnh nê ixkrĩ. Nê Tĩrtũm mã mẽ ate ixto mex ã kãm mẽ ajarênh o ixkrĩ.

⁶Nê na pa pre ma mẽ awýr mõ nê mẽ amã Jejus jarê ka prem inhma nê hkôt amnhî xunhwý nhũm Tĩrtũm ja hã mẽ apumunh mex nê. Hãmri nê mẽ ate hkôt amnhî to htỳx kaxyw tanhmã mẽ ato mẽ axihtỳx to. Tã koja arĩ mẽ ato mẽ axihtỳx rãhã nhũm Jejus Kris nhỹrmã akupỳn mẽ pahwýr wrý. Koja ã mẽ ato mex anê.

⁷Na hte tanhmã ixto mex tota pyrã nẽ tanhmã mẽ ato mex to ho pa nẽ mẽ akutã nojarêt rãhã ho pa. Nẽ kormã mẽ kot ijaxàr kêt ri pa pre ma mẽ piitã mẽ kãm Jejus jarẽnh o ri ixpa. Nẽ ãm hãmri mẽ kãm harẽ. Mẽ kot mar nẽ hkôt amnhĩ xunhwỳr tỳx kaxyw pa pre mẽ hkôt harẽnh rãhã ho ri ixpa. Ka prem ja kaxyw inhmã kàxpore hkwỳ gõ pa pre ho amnhĩm ixujaprôr pê mẽ hkôt ri mẽ kãm harẽnh o ri ixpa. Tã nhũm prem jar Rôm kamã ijaxà pa arĩ ixkrĩ htã ka mẽ axte ixwỳr hkwỳ mẽ. Jakamã na pa hte mẽ amã ijamaxpěr rãhã ho ixkrĩ nẽ inhmã mẽ akĩnh tỳx nẽ.

⁸Te Jejus Kris kãm mẽ ajapê htỳx pyræk. Tĩrtũm kot ja hã ixpumunh mex.

⁹⁻¹⁰Na pa hte mẽ ato kuwỳ nẽ kãm: —Pa Tĩrtũm. E Piripos nhõ xwỳnhjê pumu. Na mẽ ra kãm axpẽn kĩnh o axpẽn kôt pa. Kwa tanhmã mẽ hipêx to kê mẽ arĩ kãm axpẽn kĩnh tỳx pix nẽ. Jao axpẽn to mex rãhã ho pa. Nẽ tanhmã mẽ hkrã hto kê mẽ amnhĩ krãm akapěr jaxàr tỳx nẽ. Jao tãm amnhĩ nhĩpêx mex nẽ hamaxpěr mex o ri pa. Nom kormã mẽ kot ja pumunh tohtuj anhỹr. Tã kêr ka tanhmã mẽ ho kê mẽ ã amnhĩ nhĩpêx anhỹr rãhã Jejus Kris akupỹn mẽ ixwỳr wrỳ. Anhỹr pa hte mẽ ato hwỳr o ixpa.

¹¹Nà koja Jejus Kris mẽ akaxwỳnh kãm mẽ ato mẽ axihtỳx ka mẽ ỹ hã axihtỳx pê tãm ri amnhĩ nhĩpêx nẽ tãm axpẽn nhĩpêx o ri axpẽn kôt apa. Nhũm mẽ piitã ja hã mẽ apumu nẽ axpẽn mã Tĩrtũm mex o mex ã harẽ.

Pawre kãm Kris kôt amnhĩ nhĩpêx prãm ã harẽnh

Atre 28.30-31; Epes 6.19-20; Sikũn Ximotre 2.9

¹²E Kris kôt ixtõ nẽ ixtõxjaja. Kot paj mẽ amã tanhmã amnhĩ jarẽnh to ka mẽ inhma. Na prem ra Jejus ã ixtomnuj tỳx nẽ hã ijaxà pa amnhĩ xà htỳx kamã ijamak o ixkrĩ. Nom mẽ kot ã inhĩpêx anhỹr tã pa hte arĩ ixkrĩ xà kamã mẽ kãm Jejus jarẽnh o ixkrĩ. Jakamã na mẽ ra ohtô nẽ tanhmã kot mẽ panê amnhĩ nhĩpêx to hã harẽnh ma.

¹³Pôristi kot inhĩhkô hã ixtãnopxar xwỳnhjê mẽ ixwỳr mẽ mrar xwỳnh piitã ixte Kris kapěr jahkre ho ixpa pix ã mẽ kot ijaxàr ã ijarẽnh ma.

¹⁴Nẽ jar Kris kôt mẽ pahtõ nẽ mẽ pahtõxjaja haxwỳja ijarẽnh ma nẽ ohtô nẽ ixpyrà nẽ Kris nhỹ hã amnhĩ to htỳx nẽ arĩ hkwỳjê mã kapěr jarẽnh rãhã ho

pa. Ixpyrà nē kām mē uma hkêt nē mē kutā amnhĩ to htỳx pē mē kām harēnh rāhã ho pa.

15-18Nē na pre mē hkwỳjaja ixte mē amã Kris jarēnh o ixpa hã ijarēnh ma nē hã ixkamã gryk nē axtem hamaxpēr nē ixwakre kamã gryk kām mē kām Kris kapēr jarēnh o pa. Na htem hamaxpēr o: —E kot paj ma Pawre kot ra mē hwỳr mōr xwỳnhjê hwỳr mō nē kot ra mē kām Jejus kapēr jarēnh nhĩpy axte mē kām harēnh o ri mē hkôt ixpa. Hāmri nhũm mē inhma nē inhgryk ã Pawre kaga. Hāmri nhũm mē haggjēnh xà kamã arĩ hkrĩ tã tee ri mē hã ijarēnh ma nē hkaprĩ nē rĩ amnhĩ pumu. Nà kot paj anē. Anhỳr o hamaxpēr tã pa mē harēnh ma nē ixkaprĩ hkêt nē. Mē kot mē amã hprĩ hã Kris kapēr jarēnh kēnã kot pa kêt tee ri mē harēnh ma nē ixkaprĩ. Kwār mē māmri ri ixkamã gryk kām kapēr jarēnh o ri pa. Pa mē harēnh ma nē ixkĩnh nē. Nom na hte mē hkwỳjaja jajê rom kām ixkĩnh kām mē kām Kris kapēr jarēnh o pa. Nē tãm hamaxpēr pē mē kām harēnh o pa. Ra mē kot ixpumunh mex jakamã nhũm Tĩrtũm kot jar mē hwỳr inhmēnh nhũm ixte ãm hāmri mē kām kapēr mex jarēnh o ri ixkrĩ hã ixpumunh mex. Jakamã kwār mē māmri tanhmã inhmã hamaxpēr to xà hkôt mē ujarēnh mexja jarēnh o pa. Mē kām ixkĩnh kām harē rỳ ixkamã gryk kām ri harēnh o pa. ãm hāmri Kris kapēr jarēnh o pa jakamã pa mē harēnh ma nē ixkĩnh nē.

19Nē ra mē ate ixto Tĩrtũm wỳr o apa jakamã koja Karōja ixkaxyw tanhmã jar Rōm kamã pahĩti nhĩpêx to nhũm tokyx ixkator japêr. Pa ixàmnhĩx ijamakêtkati nē ri ma mē akôt ixpa.

20Nom inhmã Jejus kām hprãm xà hkôt pix mã tanhmã amnhĩ nhĩpêx to ho ixpa hprãm. Jakamã koja mē ixkator pa ixkĩnh nē arĩ kām tanhmã amnhĩ nhĩpêx to ho ri ixpa. Nom koja mē tanhmã hamaxpēr to nē ixpĩ pa mē kutā mē kām amnhĩ to htỳx nē ixãm rāhã nhũm mē ixpĩ pa ijamakêtkati nē ty. Kê mē ja hã ixpumu nē ixtã Kris mex o mex ã harē. ãm Jejus kām hprãm xà hkôt pix mã na inhmã amnhĩ nhĩpêx prãm.

21Tã kot paj tanhmã amnhĩ to nē arĩ ixtĩr japêr hã kot paj ãm kôt pix mã amnhĩ nhĩpêx rāhã ho ixpa. Nom koja mē tanhmã hamaxpēr to nē hã ixpĩ

pa ty nhũm Tĩrtũm ma kaxkwa hwỳr ixkarõ ho àpir kurê kumrêx. Pa Tĩrtũm mẽ Krata wa kuri inhmex o inhmex nẽ wa kuri ixpa ho ixpa.

22-23Tã nhỹ na we inhmã mex o hõ jakrenh wehe? Na pa tee ri amnhĩ kukamã ijamaxpěr. Inhmã tokyx ixtyk nẽ Kris kuri ixpa hprãm. Ja na inhmã hprãm o inhmã hprãm. Nom ko. Kot pa arĩ ixtĩr nẽ arĩ mẽ kãm Jejus kot tanhmã mẽ panê amnhĩ nhĩpêx to hã harênh rãhã ho ri ixpa. Ko. Ja mãânẽn inhmã mex.

24No mẽ amã na arĩ ixtĩr nẽ ixpaja mẽ amã hprãm

25jakamã kot paj pěr tokyx ixtyk kêt nẽ. Kot paj arĩ ri mẽ amã Kris kôt mẽ ato mẽ axihtỳx o ri mẽ akôt ixpa. Jao ãm ho hkrãnre ka mẽ ra amnhĩ kaxyw kãm ajamaxpěr nẽ hkôt amnhĩ xunhwỳr tỳx nẽ. Jao akĩnh nẽ apa.

26Tã kot paj nhỹrmã akupỹm ixtĩr rãhã mẽ awỳr mỗ ka mẽ ixpumu nẽ akĩnh nẽ. Jejus Kris kot akupỹm ixkator ã akĩnh nẽ. Hãmri nẽ ixtã Jejus mã mex o mex ã harẽ.

Mẽ pahte Jejus ã pahpunuj tã mẽ pahte amnhĩ to htỳx ã mẽ pamã karõ

Rukre 6.22; Sikũn Korĩt 2.14-16; Xiakre 1.12; Jutre 3

27Jakamã e kêt ka mẽ Jejus Kris kapěr kôt pix mã amnhĩ nhĩpêx. Nẽ axpẽn kôt axpẽn to axihtỳx pẽ mẽ kãm Jejus kot tanhmã mẽ panê amnhĩ nhĩpêx to hã harênh o ri apa kê mẽ ama nẽ mẽ pahpyrà nẽ hkôt amnhĩ xunhwỳ. E kêt ka mẽ ã amnhĩ nhĩpêx anhỹr o ri apa. Kêt pa nhỹrmã mẽ hagiênh xàja rũm ixkator japěr nẽ nhỹri ja hã mẽ ajarênh ma rỳ ma mẽ anhõ krĩ hwỳr mỗ nẽ ja hã mẽ apumu nẽ ixkĩnh nẽ.

28Nom kwa kêt ka mẽ amã mẽ kot Kris ã tanhmã mẽ ato xwỳnhjê pyma hkêt nẽ. Mẽ kot tanhmã mẽ anhĩpêx kati hto htã kêt ka mẽ kutã amnhĩ to htỳx nẽ mẽ hkôt apa. Kêt kê mẽ amnhĩ tã mẽ apumu nẽ tee ri hamaxpěr hãmri nẽ axpẽn mã: —Kwa mẽ pahte Kris ã tanhmã mẽ hipêx to htã na htem amnhĩ to htỳx nẽ arĩ mẽ pamã harênh o ri pa. Pěr mẽ kãm mẽ pahpyma hkêt. Mãn hte Tĩrtũm tanhmã mẽ ho nhũm mẽ y hã kãm mẽ pahpyma hkêt nà? Kwa tanhmã kot puj mẽ ho nhũm mẽ Jejus kapěr jarênh o pata kaga? Nà kot puj mẽ ãm tee ri hã tanhmã mẽ ho kaprỳ. Mãn ãm hãmri na htem nhỹrmã

Tĩrtũm kuri htĩr tũm nẽ pa ho pa hã amnhĩ jarẽnh o pa nà? Anẽ. Koja mẽ ã mẽ ajarẽnh anẽ. Tĩrtũm kot mẽ ato mẽ axihtỳx ã mẽ apumunh kõt.

²⁹Na pre tanhmã mẽ ato ka mẽ Kris kõt amnhĩ xunhwỳ. Tã mẽ kot tanhmã hã mẽ anhĩpêx to htã na hte Tĩrtũm mẽ kutã tanhmã mẽ ato ka mẽ ÿ hã amnhĩ to htỳx nẽ apa.

³⁰Ijaxwỳja na pa hte amnhĩ xà htỳx kamã ijamak o ixkrĩ. Na pre htem Jejus ã ixtomnuj o pa ka prem ja hã ijarẽnh ma nẽ hã ixpumu. Tã ota kê mẽ ra axte tanhmã hã inhĩpêx to. Pa kê amnhĩ xà htỳx kãm ijamak o ixkrĩ ka mẽ ijarẽnh ma. Tã xep mẽ ixpyrà nẽ Kris ã amnhĩ xà htỳx kamã ajamak o apa. Nom kwa kêr ka mẽ tee ri amnhĩ kukamã ajamxpêr o akaprĩ nẽ apa hkêt nẽ.

Piripos 2

Jejus kãm mẽ pajapê xàj tanhmã kot amnhĩ nhĩpêx to hã harẽnh

Rõmãn 15.5-6; Epes 4.1-6; Piripos 2.18

¹Nẽ ra mẽ pahte Jejus kõt amnhĩ xunhwỳr jakamã pu mẽ tee ri amnhĩ kukamã pajamxpêr o pahkaprĩ nẽ ri papa hkêt nẽ. ãm kãm mẽ pajapêja mã pajamxpêr rãhã ho pahkĩnh nẽ pajamakêtkati nẽ ri papa. Nhũm Karõ mẽ pahkarõ mã agjê nẽ mẽ pahto mex nẽ mẽmoj to mẽ pakutã nojarêr o ri mẽ pakamã pa.

²Tã kêr ka mẽ axpẽn mar mex nẽ mẽmoj tã axpẽn mã axàkjêr o ri apa hkêt nẽ. Te ri ixkre pixi kamã mẽ atipxi nẽ axpẽn kõt amnhĩ nhĩpêx pyræk. Nẽ Tĩrtũm kãm hprãm xà hkõt pix mã ajamxpêr o ri apa. Nẽ mẽ amã axpẽn kĩnh o ri apa. Kot kaj mẽ ã amnhĩ nhĩpêx anẽ pa ja hã mẽ apumu rỳ hã mẽ ajarẽnh ma nẽ ixkĩnh tỳx kumrêx.

³Nẽ kwa kêr ka mẽ axpẽn pumu nẽ ã ajamxpêr anhỹr kêt nẽ. Mẽ ajamxpêr o: —Tk. Kot pa ri tanhmã jahti ho ajuta hto ho ixpa hkêt nẽ. Ixte amnhĩ to rax o hakrenh kênã kot pa hkêt ri ho ajuta. Kê tãm mãn tanhmã ixto ajuta hto. Anhỹr o ajamxpêr kêt nẽ. Kêt nhỹri mẽhõ pumu nhũm tanhmã kute ka hã omu nẽ ajamxpêr o: —Hêxta waa nẽ. Kwa tanhmã kot pa we ho ajuta htoo? Anhỹr o ajamxpêr hãmri nẽ ajamxpêr xà hkõt tanhmã ho ajuta hto.

⁴Jao Jejus pyrà nẽ mẽmoj to axpẽn kutã anojarêt o ri apa. No ri amnhĩ pix kukamã ajamaxpěr o apa hkêt nẽ.

⁵Kêr pu mẽ te Jejus tanhmã hamaxpěr toja pyræk o pajamaxpěr o ri papa.

⁶Kêp Tĩrtũm Kra kumrẽx jakamã te uræk tã xà na pre ja hã amnhĩ pumu nẽ amnhĩ pix kukamã ã hamaxpěr anẽ nẽ hamaxpěr o: Te ixte Tĩrtũm pyræk jakamã mẽmoj piitã inhõ na. Jakamã kot paj jar kaxkwa kamã inhmex nẽ ixkĩnh nẽ ixpa ho ixpa nẽ aa rer nẽ nhỹhỹm inhmõr kêt kumrẽx. Anhỹr o na pre hamaxpěr? Nà na pre ã hamaxpěr anhỹr kêt nẽ.

⁷⁻⁸Kãm mẽ pajapê xàj na pre kaxkwa kamã mẽmoj mex piitã rer pa nẽ man mẽ pahwỳr wrỳ nẽ mẽ pahpyrà nẽ ã ho katorxà nhõhy rũm kato. Kêp mẽ panhõ Pahihti htã te kêp mẽ panhĩõ nẽ te kot amnhĩ to grire pyræk o amnhĩ nhĩpêx o ri pa. Nẽ Tĩrtũm kãm hprãm xà hkôt pix mã amnhĩ nhĩpêx o pa. Nẽ ãm kôt pix mã amnhĩ nhĩpêx o pa rãhã nhũm prem kupĩ nhũm arĩ mẽ kãm xa nẽ tanhmã amnhĩ tã mẽhõ hto hkêt nẽ. Na prem hipêx kati nẽ. Te kêp mẽ kot amnhĩ tomnuj tỳx xwỳnhjê nhĩpêx pyræk o hipêx nẽ pĩ kahpa hã kunhõ nẽ kupĩ. Tã no nhũm mẽ kêp tanhmã amnhĩmnuj to hkêt nẽ arĩ mẽ kãm xa. Mẽ panê na pre ã amnhĩ nhĩpêx anẽ.

⁹Hãmri nhũm Tĩrtũm ã kot amnhĩ nhĩpêx anhỹr ã omu nẽ akupỹm ho htĩr nẽ akupỹm amnhĩ wỳr ho api. Nẽ mex o mex ã harẽ. Nẽ kot nhỹrmã mẽ pahpiitã mẽ pahto amnhĩptàr kaxyw mẽ pakaxyw ãm.

¹⁰Jakamã kot puj mẽ nhỹrmã pahpiitã Jejus kutã pahkõnkrã ho rôrôk nẽ pahkrĩ hpa nẽ kàx pêê kãm mex o mex ã harẽ. Mẽ pahpiitãã. Kaxkwa kamã mẽ pa xwỳnhjaja nẽ pika piitã hkôt mẽ papa xwỳnhjaja. Nẽ mẽ htyk xwỳnh piitã koja mẽ akupỹn htĩr pu mẽ pahpimràatã Jejus kutã pahkõnkrã ho parôrôk nẽ pahkrĩ hpa nẽ kãm mex o mex ã harẽ.

¹¹Nẽ kãm: Pa Pahihti Jejus. Nà ãm hãmri na apê mẽ inhõ Pahi Maati hã apyxi mex na ka. Jakamã mẽ ixtõ kot paj mẽmoj tã tanhmã amã karõ hto? Nà kot paj mẽ ixtõ ã amnhĩ nhĩpêx anhỹr kêt nẽ. Anẽ. Kot puj mẽ nhỹrmã ã

Jejus mã pakapêr anê. Jao mãânên Tĩrtũm hihtỳx o hihtỳx nê àhpumunh o àhpumunh ã omu. Nê mex o mex ã omu.

Te mẽ pahpê kanhêti pyræk ã mẽ pajarênh

Matêwre 5.14-16

12-13Tã kwa ixkràmnhwỳjaja. Inhmã mẽ akĩnh. Kwa kêr ka mẽ arĩ Tĩrtũm kôt amnhĩ nhĩpêx mex rãhã nê. Te ixte mẽ akamã ixpare ri mẽ ate amnhĩ nhĩpêx mexta pyræk o ixwakre kamã amnhĩ nhĩpêx mex o ri apa. Na pre ra Tĩrtũm mẽ panê mẽ pahte amnhĩ tomnuj rê nê tanhmã mẽ pahto pu mẽ ÿ hã kapêr kôt amnhĩ nhĩpêx o ri papa. Jakamã kwa kêr pu mẽ axte tanhmã amnhĩ tomnuj to ho papa hkêt nê. Nê mẽ pahte Tĩrtũm kapêr kwỳm ri amnhĩ nhĩpêx pymaj ãm hkôt pix mã amnhĩ nhĩpêx o ri papa.

14Nê kêr ka mẽ mẽmoj to anhỳr kaxyw nê agryk kãm tanhmã ri ho hkêt nê. Nê mẽmoj tã axàpênh kaxyw nê ri hã axpên mã akapêr kati kamã ho anhỳr kêt nê.

15-16Mẽ kot amnhĩ tomnuj xwỳnhjaja na htem ã amnhĩ nhĩpêx anhỳr o pa. No kêt mẽ kajaja. Mẽ ate mẽ hkôt apa htã kêr ka mẽ hkôt amnhĩ nhĩpêx kêt nê. Mẽ kurom mẽ apê Tĩrtũm kra jakamã kêr ka mẽ hkôt pix mã amnhĩ nhĩpêx o ri apa. Nê tanhmã amnhĩ tomnuj to rỳ tanhmã ajamaxpêr punuj to hkêt nê. Mẽ kot amnhĩ tomnuj xwỳnhjaja te ri kamàt kô kamã ri mẽ kêp àhkĩnh o ri mẽ pa xwỳnhjê kot amnhĩ nhĩpêx pyræk. Tã kot kaj mẽ hkôt tãm ri amnhĩ nhĩpêx o apa nê te ate kanhêti ja kamàt kô kamã hirã ho harir pyræk o amnhĩ nhĩpêx. Jao mẽ kãm Tĩrtũm kapêr jarênh o ri mẽ hkôt apa. Mẽ kot amar nê apyrà nê nhỹrmã kuri htĩr tũm nê pa ho pa kaxyw. Kot kaj mẽ ã amnhĩ nhĩpêx anê nhũm nhỹrmã Jejus Kris akupỹn mẽ pahwỳr wrỳk ã arĩgrota ã pa mẽ apumu nê ixkĩnh nê. Nê ixkĩnh kãm Jejus mã mẽ ajarê nê kãm mẽ ajarênh o: —Kwa Pahihti. E jajê pumu. Na pa pre mẽ kãm akapêr jarênh o ri mẽ hkôt ixpa nhũm mẽ inhmar tỳx nê nê akapêr kôt amnhĩ nhĩpêx o ri pa. Jakamã na pa pre mẽ kãm akapêr jarênh kaprỳ hkêt nê. Anhỳr o kãm mẽ ajarê.

17Na pa pre mẽ akôt mẽ amã Tĩrtũm kapêr jarênh o ri ixpa ka prem inhma nê hkôt amnhĩ xunhwỳ. Jakamã te ixte Tĩrtũm mã mẽ ato ixkĩnh xà nê kãm

mě anhõr pyræk. Ně koja jar Rõm nhõ pahihtija tanhmã ixto hkêt japêr. Rỳ tanhmã ixto. Nom kwãr mẽ mãmri tanhmã kãm ixto hprãm xà hkôt tanhmã ixto rỳ ixpĩ. Koja mẽ ã ixte mẽ anhĩpêx anhỹr ã ixpĩ pa ixkĩnh mẽ. Ně tanhmã ijamaxpêr to hkêt kãm ty. Jakamã na pa ra ã mẽ kot inhĩpêx anhỹrja kukamã mẽ amã amnhĩ kĩnh ã amnhĩ jarẽ ka mẽ inhma.

18Tã kêr ka mẽ ixpyrà mẽ ajaxwỳja ixtã akĩnh mẽ apa.

Ximotre mẽ Eparoxit wa harênh

19Ně koja Pahihti Jejus kãm ja prãm hã kot paj ma mẽ awỳr Ximotre mẽ nhũm ma mẽ awỳr mõi mẽ ri mẽ akôt pa mẽ tanhmã mẽ ate amnhĩ nhĩpêx to hã mẽ apumu. Hãmri mẽ man akupỹn ixwỳr mõi mẽ inhmã mẽ ajarẽ pa mẽ ajarênh ma mẽ ixkĩnh mẽ tee ri mẽ akukamã ijamaxpêr o ixkrĩ hkêt mẽ. ãm tãm mẽ akukamã ijamaxpêr o ixkrĩ.

20Ximotre tapxipix na ixpyrà mẽ kãm mẽ akĩnh mẽ kãm mẽ ato ajuta hprãm. Na hte mẽ ajarênh rãhã ho pa.

21Nom jar mẽ piitã Ximotre kĩnhã amnhĩ mex pix kukamã hamaxpêr o pa mẽ kãm Jejus Kris kôt tanhmã amnhĩ nhĩpêx to ho pa hprãm kêt mẽ.

22Ximotre te kêp ixkra pyræk. Na hte ixkôt pa mẽ ixpyrà mẽ Jejus mã tanhmã amnhĩ nhĩpêx mex to ho pa. Pa pre wa ijamẽ mẽ kãm mẽ ujarênh mex jarênh o wa ri mẽ hkôt ixpa.

23Tã koja mẽ tanhmã ixtã axpên mar to. Apu mẽ kot ixpĩr ã amnhĩ jarẽ rỳ ixkator ã amnhĩ jarẽ. Pa tanhmã amnhĩ tã mẽ mar to mẽ rĩ kormã ma mẽ awỳr Ximotre mẽ kê ma mẽ awỳr mõi mẽ mẽ amã tanhmã ijarênh to.

24Ně koja Pahihti Jejus kãm ja mex pa ijaxwỳja ma mẽ awỳr mõi pu mẽ axte axpên pumu.

25Ně kot paj tokyx ma akupỹm mẽ awỳr Kris kôt mẽ pahtõ Eparoxit mẽ. Na ka prem kãm kàxpore gõi nhũm man ixwỳr o mõi mẽ inhmã kugõ. Hãmri mẽ jar inhmã àpênh rax mẽ ixpyrà mẽ mẽ ujarênh mexja jarênh o pa.

26-27Tã ra à htỳx mẽ. Kironhỹx pre mẽ pahpê ty. Tã nhũm Tĩrtũm omu mẽ kamã ukapri mẽ. Ně määnên pa ixkamã ukapri mẽ. Ně tee ri ixte à htỳx ã

omunh nẽ ixkaprĩ htỳx pymaj akupỹm inhmã ho mex nhũm ra akupỹm mex nẽ ri pa. Hãmri nẽ kãm mẽ apumunh prãm nẽ. Mẽ ate à htỳx ã harẽnh mar nẽ akaprĩ hã mẽ ajarẽnh ma nẽ tee ri mẽ akukamã hamaxpěr.

²⁸Jakamã inhmã akupỹm tokyx mẽ awỳr mẽn̄h prãm. Tã koja mẽmo arĩgro hã mẽ awỳr pøj ka mẽ omu nẽ akĩnh nẽ tãm ajamaxpěr. Pa ijaxwỳja jar ixkĩnh nẽ tãm ijamaxpěr.

²⁹⁻³⁰Na ka prem ixwỳr amẽ nhũm man ixwỳr mō nẽ jar ixri mẽ kãm Kris kapěr jarẽnh o ri mẽ hkõt pa rãhã nhỹx hã ty nom kot amnhĩ kamã kahak kêt. Jakamã kê akupỹm mẽ awỳr pøj ka mẽ omu nẽ akĩnh nẽ. Nẽ kahti hkõt amỳ nẽ ho mex nẽ. Kêp Kris kôt mẽ pahtō mex kênã. ã na htem Kris mã mẽ kot tanhmã amnhĩ nhĩpêx to ho mẽ pa xwỳnhjê nhĩpêx mex anhỹr o pa.

Piripos 3

Mẽmoj tã mẽ pahpumunh kôt Tĩrtũm kot tãm mẽ paxunhwỳr ã harẽnh

Piripos 2.18; 4.4

¹E Kris kôt ixtō nẽ ixtōxjaja. Kris kêp mẽ panhō Pahihti jakamã kwa mẽ jam ajamaxpěr nẽ akĩnh rãhã ho ri apa. Na pa ra mẽ amã mẽmoj jarẽnh rax nẽ. Nẽ hã kagà rax tã kormã inhmã ja ho anhỹr kaga hkêt nẽ. Kot paj axte mẽ amã hkwȳ hã kagà. Mẽ ate hã ano htỳx nẽ ho apa kaxyw.

²Jakamã e kwa mẽ okora. Kêr ka mẽ amnhĩ nê mẽ kot Tĩrtũm kapěr o hêx xwỳnhjê pumunh mex o ri apa. Na htem tanhmã mẽ amã kapěr ho pa nẽ mẽ amã: —Kot kaj mẽ ixpê Ijaewjê pyrà nẽ amnhĩ my kwrȳt kà jakà hãmri nẽ apê Tĩrtũm kra. Anẽ.

³Nom ja kot anhỹr kêt. Mẽ pahte amnhĩ jakàr kôt mẽ pahpê Tĩrtũm kra hkêt. ã kot anhỹr ronhỹx pu mẽ amnhĩ krã hkõt tanhmã amnhĩ nhĩpêx to ho pahpê hkra. Nom ja kot anhỹr kêt. Mẽ ate amnhĩ jakàr kêt tã mẽ ixpyrà nẽ amnhĩ kaxyw Jejus Kris mã ajamaxpěr jakamã mẽ ixpyrà nẽ mẽ apê Tĩrtũm kra na ka mẽ. Na ka htem mẽ ixpyrà nẽ Karō nhỹ hã kãm mex o mex ã harẽnh o ri apa nẽ mẽ ixpyrà nẽ Jejus kukwak ri akĩnh nẽ ri apa. Nom na pu htem pahpê hkra kaxyw amnhĩ jakàr kêt nẽ.

⁴Kop ãm amnhĩ krã hkôt mẽ pahte amnhĩ to Tĩrtũm kra ronhỹx pa ra amnepẽm amnhĩ to hkra nẽ ri ixpa. Na pa pre ixpẽ hkra hprãm xàj amnhĩ krã hkôt tanhmã ri amnhĩ nhĩpẽx to rax o ixpa nom ã amnhĩ nhĩpẽx anhỹr kaprỳ. E pa ja hã mẽ amã amnhĩ jarẽ ka mẽ ijarẽnh ma.

⁵Na pa pre ixkato nẽ kormã ixtã semãn pixire nhũm mẽ ixpẽ Ijaew ã inhmy kwrýt kà krãhta. Nom pa ã mẽ kot inhĩpẽx anhỹr kôt ixpẽ Tĩrtũm kra hkêt nẽ. Nẽ inhĩpẽxà hkôt ixpẽ finat Pẽjamĩ kanrẽhã htãmnhwỳ jakamã ixpẽ Ijaew mex na pa. Nẽ Ijaew kapẽr o ixkapẽr o ri ixpa. Nom ja kôt ixpẽ Tĩrtũm kra hkêt. Nẽ mããnẽn ixpẽ Parijew nhõ xwỳnh jakamã na pa pre Tĩrtũm kot finat Mojes mã mẽ pakaxyw mẽmoj tã karõ kôt pix mã amnhĩ nhĩpẽx o ixpa hprãm.

⁶Jao tee ri mẽ kot Jejus kôt amnhĩ nhĩpẽx xwỳnhjẽ pumu nẽ mẽ homnuj tỳx o ri ixpa. Na pa pre ijamaxpẽr o: “Nà mũjjaja na htem mẽ ixkwỳm ri amnhĩ nhĩpẽx o pa.” Anẽ nẽ mẽ hipẽx kati ho ri ixpa. Nẽ ijamaxpẽr o: “Ra ixte finat Mojes kot Tĩrtũm nhỹ hã kapẽr piitã hkôt amnhĩ nhĩpẽx mex jakamã na pa hte tanhmã ri amnhĩ tomnuj to ho ri ixpa hkêt nẽ.” Anẽ.

⁷ã na pa pre ixpẽ Tĩrtũm kra hprãm xàj amnhĩ nhĩpẽx anhỹr o ixpa. Tã nom ãm ã amnhĩ nhĩpẽx anhỹr hkaprỳ. Na htem ã ri amnhĩ nhĩpẽx anhỹr kôt kẽp Tĩrtũm kra hkêt nẽ. Tã pa hpãnhã amnhĩ kaxyw Kris kôt ijamaxpẽr nhũm ixto hkra kurẽ kumrẽx.

⁸Ra ixte Jejus Kris kôt amnhĩ xãm jakamã Jejus kẽp inhõ Pahihti pa inhmã kapẽr kôt pix mã amnhĩ nhĩpẽx o ri prãm. No hkrax rũm ixte amnhĩ nhĩpẽx tũmja na pa ra Jejus gryk ã hkaga hpa. Te ixte mẽmoj punuj pyr nẽ amnhĩ katut kôt mẽnh nẽ axte kãm ijamaxpẽr kêt pyræk. Jao amnhĩ kaxyw Jejus kôt pix mã ijamaxpẽr o ri ixpa.

⁹Nom kormã ã ijamaxpẽr anhỹr kêt ri na pa pre ixtỳx ri ijamaxpẽr o: —Nà ixte Mojes kot Tĩrtũm nhỹ hã kapẽr kôt amnhĩ nhĩpẽx o ixpa jakamã koja Tĩrtũm ja hã ixpumu nẽ ixto hkra. Anhỹr tã nom ja kot anhỹr kêt. Na htem amnhĩ krã hkôt tanhmã ri amnhĩ nhĩpẽx to ho pa nhũm Tĩrtũm ãm ja hã mẽ omu nẽ ãm hã mẽ omu nẽ mẽ ho hkra hkêt nẽ. Nom koja mẽ Kris kôt amnhĩ

xunhwỳ nhũm ja hã mẽ omu nẽ mẽ ho hkra kurê kumrêx. Jakamã ixte Kris kôt amnhĩ xãm ã ixpumunh kôt pix mã na pre ixto hkra nẽ inhmex ã ijarẽ.

¹⁰Hãmri pa ra inhmã Kris kôt pix mã amnhĩ nhĩpêx o ri ixpa hprãm. Na pre ty tã akupỹm htĩr nẽ hihtỳx nẽ àhpumunh tỳx o tanhmã amnhĩ nhĩpêx to ho pa. Tã ijaxwỳja inhmã uràn ã amnhĩ nhĩpêx anhỹr prãm. Nẽ inhmã uràk nẽ amnhĩ xà htỳx kutã amnhĩ to htỳx nẽ ixpa hprãm. Mẽ kot hã ixpĩr mã tã pa uràk nẽ Tĩrtũm kapêr kaga hkêt nẽ ãm kôt pix mã amnhĩ nhĩpêx o ri ixpa rãhã uràk nẽ hã ty. Ja na inhmã ho anhỹr prãm.

¹¹Kê Tĩrtũm kot hipêxta pyrà nẽ akupỹm ixto ixtĩr pa wa kuri ixtĩr tũm nẽ ixpa ho ixpa.

¹²Inhmã Kris kôt pix mã amnhĩ nhĩpêx o ixpa hprãm tỳx kumrêx. Kormã ixte hkôt amnhĩ nhĩpêx o inhmõr nẽ kormã hatur xàm mẽnh kêt tã inhmã tokyx hatur xàm mẽnh prãm. Na pa ã inhmã amnhĩ nhĩpêx anhỹr prãm tỳx kumrêx. Nẽ na pa hte ixte amnhĩ tomnuj kêt ã amnhĩ to jarkrar o ri ixpa hkêt nẽ. Na pa hte arĩ tõhã tanhmã amnhĩ tomnuj to nom inhmã ã amnhĩ nhĩpêx anhỹr prãm kêt. Nẽ na pa kormã ixprĩ hã Kris kot amnhĩ nhĩpêx mar o inhmõr nẽ hatur xàm mẽnh kêt tã inhmã hkôt amnhĩ nhĩpêx o inhmõr nẽ tokyx hatur xàm mẽnh prãm. Ja kaxyw na pre Jejus Kris amnhĩ kaxyw ixta.

¹³Na pa hte mẽ akurom papxipix ixte Jejus kãm hprãm xà hkôt amnhĩ nhĩpêx o ixpa hã amnhĩ to jarkrar kêt nẽ. Nom ra ixte tanhmã amnhĩ tomnuj to ho ixpata pa axte kãm ijamaxpêr kêt nẽ. Te amnhĩ katut kôt ixte rênh par pyràk o hipêx nẽ axte kãm ijamaxpêr kêt nẽ. Nẽ Jejus kãm hprãm xà hkôt pix mã amnhĩ nhĩpêx prãm xàj amnhĩ kaxyw kãm ijamaxpêr o ri ixpa.

¹⁴Koja nhỹrmã Tĩrtũm ixpê Kris kwỳ hã amnhĩ wỳr ixwỳ nẽ inhmã: —E amnẽ ixwỳr api Pawre. Kot kaj jarãhã amnẽ mẽ ixwỳr api. Anhỹr o nhỹrmã inhmã kapêr jakamã na pa hte amnhĩ tã ãm pix jamãr rãhã ho ixpa. Pê ra Jejus kot amnhĩ nhĩpêx piitã omunh par o mỗ. Nà kot paj gaa nẽ hkôt pix mã amnhĩ nhĩpêx mex o ri ixpa.

¹⁵Kwa kêr pu mẽ pahpiitã ã pajamaxpêr anẽ. Jao amnhĩ wỳr hamãr pê hkôt pix mã amnhĩ nhĩpêx o ri papa. Mẽ pahpiitã mẽ pahpê Kris kwỳ kênã. Nom

kot ka mẽ atõ ja kaxyw tee ri amnhĩ kukamã ajamaxpěr nẽ ajamaxpěr o: — Nà tanhmã kot paj we amnhĩ to nẽ Jejus kõt amnhĩ nhĩpêx mex rãhã o ri ixpa? Ja kaxyw ixàhpumunh tỳxre hã. Anẽ. Hãmri nẽ ã ajamaxpěr anhỹr o apaja apê hihtỳx japêr. Hã koja Tĩrtũm hprĩ hã tanhmã amã ja kukamã harẽnh to nẽ kaxyw ato axihtỳx ka ixpyrà nẽ hkõt pix mã ri amnhĩ nhĩpêx o apa.

16Jakamã kêr pu mẽ ãm Tĩrtũm kãm hprãm xà hkõt pix mã tanhmã kãm amnhĩ nhĩpêx to ho papa. Ra mẽ pahte hkõt amnhĩ nhĩpêx o papa xàja kõt pix mã arĩ amnhĩ nhĩpêx rãhã ho papa.

17E Kris kõt ixtõ nẽ ixtõxjaja. Na pa ra mẽ anoo mã Jejus kõt tãm ri amnhĩ nhĩpêx o ri ixpa. Tã kêr ka mẽ ja hã ixpumu nẽ ixpyrà nẽ hkõt amnhĩ nhĩpêx o ri apa. Hãmri nẽ nhỹri mẽ kot ixpyrà nẽ ã amnhĩ nhĩpêx anhỹr xwỳnhjê hõ pumu nẽ uràk nẽ ã amnhĩ nhĩpêx anẽ.

18-19Jejus kot mẽ pamã mẽ pahte amnhĩ tomnuj mỳrapê pĩ kahpa hã mẽ panê htykja nhũm mẽ ra ohtõ nẽ hprĩ hã mar tã hkõt amnhĩ xunhwỳr kêt nẽ. Mẽ kãm ã kot amnhĩ nhĩpêx anhỹrja ã mar prãm nõkati. Jakamã te mẽ kãm Jejus kurê xwỳnh pyràk. Na htem hã hpiaàm kêt kãm tanhmã ri amnhĩ tomnuj to ho pa. Nẽ kãm amnhĩ mex pix prãm. Nẽ tanhmã amnhĩ tomnuj to nẽ ja hã amnhĩ pumu nẽ hkĩnh nẽ. Nom tee ri ja hã amnhĩ pumu nẽ hkaprĩ nẽ ri pa hkêt nẽ. Tã ã mẽ kot amnhĩ nhĩpêx anhỹr jakamã koja mẽ nhỹrmã ma mẽ kot amnhĩ xà htỳx kamã hamak o pa tũm xàta wỳr hapêx. Nà koja mẽ ã amnhĩ nhĩpêx anẽ. Ra ixte mẽ amã ja hã mẽ harẽnh rax tã pa axte mẽ amã mẽ harẽ. Inhmã mẽ hkaprĩ hkõt na pa hte xatã mẽ amã ja hã mẽ harẽ.

20Kêt mẽ papajaja mẽ kurom mẽ pahpê kaxkwa nhõ xwỳnh nom kormã. Koja nhỹrmã Jejus Kris akupỹn mẽ pahwỳr kaxkwa rũm wrỳ. Mẽ papytår xwỳnh maati Pahihtija akupỹn wrỳ hãmri nẽ ma akupỹm amnhĩ kõt mẽ pahto api. Jakamã na pu htem arĩ pahkĩnh pê amnhĩ wỳr kamã pajamak rãhã ho ri papa.

21Na pu htem jar pyka ja kamã Jejus kĩnhã paxirerek nẽ pahpunuj nẽ ri papa. Nom koja nhỹrmã akupỹn mẽ pahwỳr wrỳ hãmri nẽ amnhĩ pyrà nẽ

mě pamã mě panhĩ nyw gõ pu mẽ uràk nẽ paxihtỳx kãm pahtĩr tũm nẽ papa ho papa. ã kot mẽ panhĩpêx anhỹr kaxyw àhpumunh o àhpumunh. Tã koja àhpumunh tỳx kãm mẽmoj piitã ho amnhĩptàr pa. Pu mẽ pahpiitã hkõt amnhĩ nhĩpêx mex rãhã ho ri papa.

Piripos 4

Pawre kot mẽmoj tã mẽ kãm karõ

Epes 4.3; Piripos 2.2; Korosẽ 3.15

¹E Kris kõt ixtõ nẽ ixtõxjaja. Inhmã mẽ ajapêê. Na pa hte mẽ ato ijamak o ixkrĩ nẽ mẽ amã ijamaxpêr nẽ ixkĩnh nẽ. Nẽ jar mẽ pahkwỳjê mã mẽ ajarênh o ri ixkrĩ. E kwa kêr ka mẽ arĩ Pahihti kapêr kõt pix mã mãn amnhĩ nhĩpêx mex rãhã ho ri apa.

²Nẽ wa ka Ewox mẽ Sĩxika wa. Na ka xep hte wa mẽmoj tã axpên kamã agryk rãhã ho ri apa. Kwa wa ã amnhĩ nhĩpêx anhỹrja mã anhũre nẽ tãm axpên nhĩpêx. Pahihti Kris kõt war ate axpên to war atõx kênã kot ka kêt wa axtem nẽ mẽmoj tã axpên kamã agryk o ri apa.

³Nẽ ka Xikitre. Apê ixkràmnhwỳ mex jakamã kêr ka axpên tã wa nita wa kãm akapêr kãm axihtỳx nẽ kê war ama nẽ akupỹm tãm axpên nhĩpêx. Na pre wa ra Kremên mẽ hkwỳjê mẽ hpimràatã ixpyrà nẽ Jejus kot tanhmã mẽ panê amnhĩ nhĩpêx to hã harênh o ri pa. Tĩrtũm nhõ kagà kamã mẽ hixi piitã hikwỹ. Mẽ pahtĩr tũm nẽ mẽ papa mã xwỳnhjaja ra Tĩrtũm nhõ kagà kamã mẽ panhĩxi jaxwỳr par.

⁴Nẽ kêr ka mẽ apê Pahihti hkwỳ hã akĩnh nẽ ri apa. Mẽ ate ã amnhĩ nhĩpêx anhỹr o apaja na pa inhmã hprãm tỳx jakamã kot paj axte mẽ amã harẽ. Kwa kêr ka mẽ akĩnh nẽ ri axpên kõt apa.

⁵Pahihti Jejus ra akupỹn mẽ pahwỳr nojarêr jakamã kêr ka mẽ kutêp mẽ piitã ri mẽ ho mex o ri mẽ hkõt apa.

⁶Nẽ kêr ka mẽ tee ri amnhĩ kukamã ajamaxpêr o ri apa hkêt nẽ. Arĩ amnhĩ to Tĩrtũm wỳr rãhã nẽ. Kot ka mẽ mẽmo arĩgro hã apê amrakati japêr nẽ tee ri ja hã amnhĩ pumu nẽ amnhĩ to awỳ kê mẽ ama nẽ mẽ amã mẽmoj gõ. Rỳ mẽ ate mẽmoj tã hwỳr xwỳnhhta tanhmã mẽ amã hipêx to ka mẽ amnhĩ tã

omu nê kãm: —Nà ãm hãmri na ka ã inhîpêx anê nê inhmã ja gõ Tirtũm. Amex o amex. Anhÿr o kãm amnhĩ jarê.

⁷Kot kaj mẽ ã amnhĩ to hwÿr anhÿr o ri apa nhũm tanhmã mẽ akrã hto ka mẽ mẽ apê Jejus Kris kwÿ hã ajamakêtkati nê axàmnhix ri apa. Hãmri nê mẽmoj tã tee ri amnhĩ kukamã ajamxpêr o ri akaprĩ nê apa hkêr nê. ãm akĩnh rãhã ri apa. Tirtũm kot tanhmã mẽ pahto nhũm mẽ pajamakêtkati nê ri mẽ papaja mẽ pahte amnhĩ tã omunh kêt. ãm tapxipix kot ã mẽ panhîpêx anhÿr kukamã àhpumunh tÿx.

⁸E Kris kôt ixtõ nê ixtõxjaja. Nà ixkapêr ã kagà jatur xà na ja. Kwa kêr ka mẽ ixujarênh mar tÿx nê hkôt amnhĩ nhîpêx o apa. Nê kêr ka mẽ axapênh mex pix kukamã ri ajamxpêr o apa. Nê mẽmoj mex pix kukamã ri ajamxpêr. Nê axpên mã akapêr mex pix kukamã ri ajamxpêr. Nê akatàt kôt akapêr xàptàr pix o axpên mã akapêr hkukamã ri ajamxpêr o ri apa. Nê tãm ri amnhĩ nhîpêx hkukamã mãn ajamxpêr o ri apa. Nê mẽ piitã ri mẽ ho mex o apa hkukamã ajamxpêr. Nê mẽ akapêr mex pix kukamã mãn ajamxpêr o ri apa. E kêr ka mẽ ã amnhĩ nhîpêx anhÿrja kukamã ajamxpêr rãhã ho ri apa.

⁹Nê mẽ akôt ixpare ri na pa pre Kris kôt amnhĩ to mex pix nê tãm ixkapêr o ri ixpa. Tã kêr ka mẽ ixpyrà nê ã amnhĩ nhîpêx anê. Koja Tirtũm ja hã mẽ apumu nê mẽ akôt ri pa ho pa. Kêp mẽ pamã mẽ paxàmnhix pajamakêtkati xà nhõr xwÿnh na.

Mê kot Pawre hwÿr mẽmoj mẽnh nhũm kot omunh nê hkĩnh ã harênh

Sikũn Korĩt 11.7-9; Piripos 1.5

¹⁰Nê amnepêh na ka prem xatã tanhmã ixto mex to ho ri apa. Tã axte ã inhîpêx anhÿr prãm nom mẽ apê awry nê ixpa jakamã ka xep prem tee ri tanhmã ixto mex to hkukamã ajamxpêr kaprÿ. Tã jar mẽ kot ijaxàr ã ijarênh ma nê ixwÿr Eparoxit mẽ nhũm man ixwÿr mõ nê inhmã kàxporeta gõ. Mẽ amã ijapê hã ixwÿr amê pa omu nê ixkĩnh tÿx nê. Nê ixkĩnh kãm Tirtũm mã mẽ ajarê. ãm hãmri na ka prem ixwÿr amê.

11-12Ně na pa hte tanhmã ixkute htã arĩ ixkĩnh nẽ ijamakêtkati nẽ ri ixpa. Jakamã kot pa mẽmo arĩgro hã ixpê amrakati nẽ inhmã prãm japêr tã no ãm tee ri amnhĩ kukamã ijamaxpêr o ri ixkaprĩ hkêr nẽ. Arĩ ixkĩnh rãhã ixãmnhĩx ri ixpa. Rỳ pa inhõ mẽmoj rax japêr nẽ mããnẽn ixkĩnh nẽ ixãmnhĩx ri ixpa. Na pa pre tõhã inhõ rax nẽ ixpa. Nẽ tõhã inhõ hkêr nẽ ixpa. Tã arĩ ixkĩnh rãhã nẽ ixpa ho ixpa.

13Na hte Kris mẽmoj piitã hkukamã ixto ixihtỳx pa ỹ hã mẽmoj kutã ixihtỳx nẽ ixpa. Jao mẽmo arĩgro hã inhmã prãm tỳx nẽ ri ixpa htã ỹ hã kutã ixihtỳx nẽ ixãmnhĩx ri ixpa.

14Tã jar ixpunuj nẽ ixkrĩ ka mẽ ijarẽnh ma nẽ ixwỳr kàxpore hkwỳ rẽ. ãm hãmri na ka prem ixwỳr arẽ.

15Amnepêr na pa pre mẽ anhõ pika pê Masetõn rũm ixkato nẽ mẽ piitã mẽ kãm Jejus kot tanhmã mẽ panê amnhĩ nhĩpêx to hã harẽnh o ri ixpa ka mẽ xatã ixwỳr kàxpore hkwỳ rẽ pa ho amnhĩm ixujaprõr o ri mẽ hkõt ixpa. Mẽ apê Piripos kamã Kris kõt ixtõ nẽ ixtõx pixjaja na ka prem ã inhĩpêx anẽ. Krĩ hkwỳ kamã Kris kõt mẽ pahkwỳjaja na mẽ akĩnhã ã inhĩpêx anhỳr kêt nẽ. ãm mẽ kapxipix na ka pre ã ixto mex anẽ.

16Tesarõn kamã ixpare ri na pa pre ixpê amrakati kumrẽx nẽ ri mẽ hkõt ixpa ka mẽ xatã ixwỳr kàxpore hkwỳ rẽ pa pre ho amnhĩm ixujaprõr rãhã ho ri mẽ hkõt ixpa.

17Nom mẽ ate ixwỳr hkwỳ rẽnh kaxyw mẽ akamã ijamak o ri ixpa hkêr nẽ. Rỳ ijamaxpêr o: —Ko. Kojã Piripos nhõ xwỳnhjaja ijarẽnh ma nẽ kãm ixkaprĩ nẽ ixwỳr kàxpore hkwỳ rẽnh japêr. Anhỳr o mẽ akukamã ijamaxpêr kêt nẽ. Nom ra mẽ ate ixwỳr hkwỳ rẽnh jakamã kojã Tĩrtũm ja hã mẽ apumu nẽ mẽ ato mex nẽ. ã mẽ pahte axpẽn kutã panojarêr anhỳrja na kãm hprãm.

18Tã nhũm Eparoxitja ham mẽ arũm kato nẽ man ixwỳr mõ nẽ inhmã kàxporeta gõ. Kwa na ka mẽ inhmã õr rax nẽ. Kojã tokyx ixpê hapêx kêt pa kritpêr ho ixàpkur o ixkrĩ. Tã ot pa ho kõta nẽ tanhmã hkre kamã kute pumunh xà hkõt hã kagà nẽ mẽ awỳr kumẽ. Nà mẽ ate ixwỳr axãmnhõrta

na Tirtũm omu nẽ ixtã mẽ apumu nhũm ja kãm mex kumrẽx. Te mẽ kot mẽ hkuxwaxà hpãr nhũm mẽ kãm mexta pyræk nhũm ja kãm mex nẽ.

19Nà koja Tirtũm mẽ apê Jejus Kris kwỳ hã mẽ amã mẽ ate mẽmoj to presija xà nhõr rãhã ho pa. Mẽmoj piitã kêp õ kênã.

20E kêr pu mẽ Mẽpanhĩpêêxà maati Tirtũm mã mex o mex ã harẽnh rãhã o papa. Ja na inhmã hprãm.

21-22Nẽ ot pa mẽ jar ixpiitã mẽ apê Jejus Kris kôt mẽ ixkwỳjê hwỳr kagàja kamã mẽ ixpẽr mẽ. Mẽ ixpyrà nẽ mẽ apê Tirtũm kra hã. Pa nẽ Kris kôt mẽ pahtõ nẽ mẽ pahtõxjaja. Nẽ Rõm nhõ pahi mã mẽ àpênh xwỳnh kot Kris kôt amnhĩ xunhwỳr xwỳnhjaja mããnẽn. ãm jar mẽ ixpê Tirtũm krajê piitã pa mẽ awỳr ixpẽr mẽ.

23E kê Pahihti Jejus Kris mẽmoj to mẽ akutã nojarêt rãhã nẽ. Jao mẽ ato mex o pa. Tã ãm ja pix. Ixpê Pawre na pa mẽ awỳr kagàja nhĩpêx nẽ kumẽ.

Korosē

Korosē 1

¹Pa Koros kamā Kris kôt ixkwỳjaja. Xà mẽ amex na ka mẽ apa? Ixpê Pawre na pa mẽ awỳr kagàja nhĩpêx nẽ mẽ awỳr kumẽ. Kris kôt mẽ pahtõ Ximotre mẽ wa kumẽ. Ixte Jejus Kris nhỹ hã mẽ ahkre ho mẽ ixpa xwỳnhjê hõ na pa. Tĩrtũm kãm hprãm xà hkôt.

²Tã pa mẽ awỳr kagà nhĩpêx nẽ kumẽ. Mẽ apê Kris kôt mẽ ixtõ nẽ ixtõx na ka mẽ. Na ka xep htem Kris kapêr kôt amnhĩ nhĩpêx mex o ri apa. E kê Tĩrtũm mẽ apê hkra hã mẽ akutã nojarêt rãhã nẽ. Ka mẽ amex nẽ ajamakêtkati nẽ axàmnhĩx ri tanhmã amnhĩ nhĩpêx ho ri apa.

Koros nhõ xwỳnh kwỳjaja kot Jejus kôt amnhĩ xunhwỳr ã mẽ harênh

Wam Tesarõn 1.2-5

³⁻⁴Na pa ra Ximotre mẽ wa mẽ ajarênh ma. Mẽ ate amnhĩ kaxyw Jejus Kris kôt ajamxpêr tỳx nẽ hkôt amnhĩ nhĩpêx mex o apa hã mẽ ajarênhja ma. Nẽ mẽ kot Tĩrtũm kôt amnhĩ xunhwỳr xwỳnh piitã mẽ amã mẽ hkĩnh ã mẽ ho mex o apa hã mẽ ajarênhja ma nẽ wa ixkĩnh nẽ. Jakamã na pa wa Pahihti Jejus Nhĩpêxà Tĩrtũm mã amnhĩ jarênh kaxyw nẽ kãm mẽ anhỹ hã wa ixkĩnh ã amnhĩ jarẽ.

⁵Na pre Epas ma mẽ awỳr mõi nẽ mẽ amã Jejus kot tanhmã mẽ panê amnhĩ nhĩpêx to hã harênh o mẽ akôt pa. ãm hãmri kot mẽ amã harênhja. Tã ka xep prem ama nẽ amnhĩ kaxyw hkôt ajamxpêr nẽ hkôt amnhĩ xunhwỳ. Hãmri nẽ amnhĩ wỳr Jejus jamãr o ri apa. Kojã nhỹrmã akupỹn mẽ pahwỳr wrỳ nẽ amnhĩ pyrà nẽ ma akupỹm kaxkwa hwỳr mẽ pahto api nẽ mẽ pahto mex kumrêx o mẽ pahkôt pa ho pa. Tã ka xep htem amnhĩ kaxyw hkôt ajamxpêr tỳx nẽ ã kot amnhĩ nhĩpêx anhỹr kutêp amnhĩ wỳr kamã ajamak rãhã nẽ. Nẽ mẽ amã mẽ kot Tĩrtũm kôt amnhĩ xunhwỳr xwỳnhjê hkĩnh tỳx nẽ.

⁶Na hte Tĩrtũm ãm hãmri mẽ pahto mex pix rãhã ho pa. Nẽ mẽmoj to mẽ pakutã nojarêt rãhã nẽ. Tã wam mẽ ate harênh marta ã ka mẽ hkôt amnhĩ xunhwỳr kurê kumrêx nẽ ri kapêr kôt axpên kôt amnhĩ nhĩpêx mex pix o ri

apa. Jao hkôt pix mã amnhĩ nhĩpêx mex nê. Tã na hte pika piitã hkôt ri mẽ pa xwỳnh kwỳjaja mẽ apyrà nê Jejus jarênh ma nê hkôt amnhĩ xunhwỳ. Nê mẽ apyrà nê axtem hkôt pix mã amnhĩ nhĩpêx nê kapêr kôt amnhĩ nhĩpêx mex o ri pa.

⁷Nê mẽ awỳr mōrta ã na pre Epasja mẽ amã Tĩrtũm kapêr jarênh o ri mẽ akôt pa ka prem ama nê amnhĩ kaxyw hkôt ajamaxpêr nê hkôt amnhĩ xunhwỳ. Epasja wa ixpyrà nê kot Kris mã tanhmã amnhĩ nhĩpêx to ho pa xwỳnh. Nê wa inhmã hapêê. Na pre katàt kôt mẽ amã Tĩrtũm kapêr jarênh pa. Kot mẽmoj to mẽ pakutã nojarêr rãhã hã harênh o ri mẽ akôt pa.

⁸Tã man akupỹn wa ixwỳr mōn pōj nê wa inhmã tanhmã mẽ ajarênh to. Tĩrtũm Karō nhỹ hã mẽ amã Kris kôt atō nê atōx piitã mẽ hkĩnh o ri apa hã mẽ ajarê. Pa wa mẽ ajarênh ma nê wa ixkĩnh tỳx kumrêx.

Pawre mẽ Ximotre wa kot Koros kãm hkwỳjê ho Tĩrtũm wỳr ã wa harênh

Epes 1.15-23; 3.14-21; Piripos 1.9; Wam Tesarōn 5.23-24; Sikũn Tesarōn 1.11; 2.16

⁹Nê na pre Epas akupỹn wa ixwỳr pōj nê wa inhmã tanhmã mẽ ajarênh to. Mẽ ate amnhĩ kaxyw Jejus kôt ajamaxpêr o apa nê mẽ amã Kris kôt akwỳjê piitã mẽ hkĩnh o ri apaja nhũm wa inhmã mẽ ajarê. Pa wa mẽ ajarênh ma nê mẽ ato Tĩrtũm wỳr rãhã o jar mẽ hagjênh xà kamã ixkrĩ. Nê arĩ mẽ ato hwỳr rãhã ho ixkrĩ. Nê mẽ ato hwỳr o: —Pa Tĩrtũm. Ot pa Ximotre mẽ wa Korosê nhõ xwỳnhjê ho awỳr kaxyw amã mẽ harê. Kwa tanhmã mẽ hamaxpêr to kê mẽ amã hprãm xà hkôt pix mã amã tanhmã amnhĩ nhĩpêx to ho pa. Nê Akarō nhỹ hã hprĩ hã akapêr ma nê ãm hkôt pix mã tanhmã amnhĩ nhĩpêx to ho pa. Anê.

¹⁰Na pa hte wa ã mẽ ato Tĩrtũm wỳr anhỹr rãhã ho ixkrĩ. Kot kaj mẽ ã amnhĩ nhĩpêx anhỹr o ri apa nê Jejus kot amnhĩ nhĩpêx o amnhĩ nhĩpêx mex o ri apa. Nê aprĩ hã Tĩrtũm kot amnhĩ nhĩpêx ã omunh mex o mō. Jao mẽmoj to axpên kutã anojarêr pix o ri apa hprãm. Hãmri nhũm Tĩrtũm ja hã mẽ apumu nê hkĩnh nê.

¹¹Tĩrtũmja mẽ pakurom mẽmoj piitã kaxyw àhpumunh o àhpumunh. Nê mẽmoj piitã kaxyw hihtỳx o hihtỳx. Jakamã na pa hte wa mẽ ato hwỳr o:

—Pa Tirtũm. Kwa tanhmã Koros nhõ xwỳnhjê ho kê mẽ axihtỳx nhỹ hã mẽmoj punuj kutã amnhĩ to htỳx nẽ. Mẽ kot Jejus ã tanhmã mẽ ho nhũm mẽ kot amnhĩ xà kamã hamak tã kê mẽ tee ri amnhĩ kukamã hamaxpêr o hkaprĩ nẽ ri pa hkêt nẽ. ãm anhỹ hã mẽ hkurê xwỳnhjê kutã amnhĩ to htỳx nẽ hkĩnh kãm ri pa ho pa. Anẽ. Na pa hte wa ã mẽ ato hwỳr anẽ.

¹²Na pre ra Tirtũm amnhĩ ri mẽ pakutêp mẽmoj mex kwỳ jaxwỳ. Mẽ pahpê hkrajê mã haxwỳ. Tã ka mẽ ỹ hã tãm amnhĩ nhĩpêx o apa jao mẽ ate mẽmoj mex jamỳnh mã tãm. Õ krĩ nhĩrã rax kumrêx kamãã. Jakamã kwa mẽ kot Jejus ã tanhmã mẽ pahto htã kêr pu mẽ arĩ Tirtũm mã mex o mex ã harênh rãhã ho ri papa.

¹³Nẽ Satanasti kêp kamàt kô kamã mẽ kot amnhĩ tomnuj ho mẽ pa xwỳnhjê pãm. Tãm na hte mẽ ho amnhĩptàr o pa nẽ hkôt na pu prem amnhĩ nhĩpêx o papa rãhã nhũm Tirtũm tee ri ja hã mẽ pahpumu. Hãmri nẽ kãm kêp mẽ papytãr prãm xàj mẽ pahwỳr Kra japê htỳx kumrêx xwỳnhja mẽ. Nhũm mẽ pahwỳr wrỳ nẽ mẽ panê htyk o mẽ pahte amnhĩ tomnuj pãnhã kãm amnhĩre. Tã pu prem hkôt amnhĩ xunhwỳ nhũm Tirtũm hã mẽ pahpumu nẽ mẽ panê mẽ pahte amnhĩ tomnuj o hapêx pa. Te kot amnhĩ katut kôt rênh par pyrãk. Jao Satanasti pê mẽ pahpytã nhũm hpãnhã Jejusja tãm kêp mẽ pahto amnhĩptàr o pa xwỳnh.

¹⁴Ra htyk o mẽ pahte amnhĩ tomnuj piitã hpãnhã amnhĩrer jakamã na pu htem hkôt amnhĩ xunhwỳ nhũm mẽ pahte amnhĩ tomnuj o hapêx pu mẽ axte Satanasti hkôt ri amnhĩ nhĩpêx kêt nẽ. ãm Jejus kôt pix mã amnhĩ nhĩpêx o ri papa.

Kris mẽ Tirtũm wa kot amnhĩ nhĩpêx te wa kot axpên pyrãk ã harênh

Juãw 1.1-5; Korosê 2.9; Eprêw 1.1-14

¹⁵Nẽ Krisja te kot Tirtũm pyrãk. Mẽ pahte pano ho Tirtũm pumunh kêt tã Kra Kris kot amnhĩ nhĩpêx ã harênh mar kôt mããnên Tirtũm kot amnhĩ nhĩpêx ã omunh mex nẽ. Amnepê mã kormã mẽmoj kêt ri nhũm Jejus pa ho pa rãhã nẽ. Jakamã kot amnhĩ to rax o Tirtũm kot mẽmoj to katorja piitã hakrenh par kumrêx.

¹⁶Na pre hipêxà Tirtùm nhỹ hã mẽmoj piitã ho kator pa. Kaxkwa kamã nẽ pika hkôt mẽmoj piitã ho kator pa. Nẽ kaxkwa kamã mẽ pahte pano ho mẽmoj pumunh par xwỳnhjaja nhũm pre ho kato. Nẽ kamã mẽ pahte pano ho mẽmoj pumunh kêt xwỳnhjaja nhũm pre mãănẽn ho kato. Nẽ kapër o wrỳk xwỳnhjaja nẽ mẽ hkrãhtũmjaja nhũm pre mẽ ho kato. Nẽ pika kamã mẽ ho amnhĩptàr xwỳnhjaja nhũm pre mẽ piitã mẽ ho kator pa. Kãm hprãm xà hkôt Tirtùm nhỹ hã mẽmoj piitã ho kator pa.

¹⁷Tã na hte arĩ kaxkwa kamã nẽ pika hkôt mẽmoj piitã hamãr rãhã ho pa. Kêp apu kot hamãr kêt ronhỹx mẽmoj piitã akupỹm hapêx pa.

¹⁸Nẽ tãm na hte mẽ pahpê hkrajê ho amnhĩptàr o pa. Te kêp mẽ pahkrã nhũm te mẽ pahpê ã pyràk jakamã na pu htem kapër kôt pix mã amnhĩ nhĩpêx o papa. Kumrêx na pre akupỹm htĩr o htĩr jakamã kot amnhĩ to rax o mẽmoj piitã hakrenh par.

¹⁹Nẽ na pre Tirtùm ã hamaxpër anẽ nẽ hamaxpër o: “Nà Ixkra mẽ wa ixte amnhĩ nhĩpêxja te kot axpẽn pyràk. Nẽ wa ixihytỳx mãănẽn te kot axpẽn pyràk. Nẽ wa inhmex xà mẽ wa ixàhpumunhja te kot axpẽn pyràk. ã wa ixte amnhĩ nhĩpêx kot anhỹr. Wa ixte amnhĩ nhĩpêxja na mex kumrêx.” Anẽ.

²⁰Tã Jejus kot pĩ kahpa hã mẽ panê tyk nẽ hkamrô pikapĩr kukwak ri na hte Tirtùm mẽ kot hkôt amnhĩ xunhwỳr xwỳnh piitã mẽ ho hkra nhũm mẽ hamakêtkati nẽ àmnhĩx pa ho pa. Kaxkwa kamã nẽ pika piitã hkôt mẽ kot Jejus kôt amnhĩ xunhwỳr xwỳnhjaja na htem ã amnhĩ nhĩpêx mex anhỹr o pa. ã Jejus kot mẽ panê htyk anhỹr jakamã kot amnhĩ to rax o kot mẽmoj piitã hakrenh par.

Jejus kêp tãm mẽ paxunhwỳr xwỳnh ã harẽnh

²¹Nẽ mẽ papajaja na pu prem pamã Tirtùm prãm kêt o ri papa. Te hkàx ã ri papa pyrà nẽ kutã amnhĩ xunhwỳ nẽ pajamaxpër punuj nẽ tanhmã amnhĩ tomnuj to pix o ri papa.

²²Tã Jejus kôt amnhĩ xunhwỳ nhũm amnhĩ tã mẽ pahpumu. Hãmri nẽ ra mẽ panê htyk jakamã amnhĩ tã mẽ pahpumu nẽ Tirtùm noo mã tãm mẽ paxunhwỳ. Te aa mẽ pahte tanhmã amnhĩ tomnuj to hkêt pyràk o mẽ

panhîpêx nê tãm mẽ paxunhwỳ. Pu mẽ arĩ pahpê Tĩrtũm kutã amnhĩ xunhwỳr xwỳnh kêt nê hpãnhã pahpê hkràmnhwỳy.

²³Na pre Tĩrtũm mẽ pahte amnhĩ kaxyw Kra Kris kôt pajamaxpêr nê hkôt amnhĩ xunhwỳr ã mẽ pahpumunh kôt ã mẽ pahto mex anê. Tã kêt pu mẽ arĩ hkôt amnhĩ nhîpêx o ri papa nê aa hkaga hkêt nê. Mẽ kot Kris ã tanhmã mẽ pahto htã pu mẽ arĩ hkôt amnhĩ nhîpêx mex rãhã ho ri papa. Kormã mẽ kot jar ijaxàr kêt ri na pa pre hte mẽ kãm ã harênh anhỹr o ri mẽ hkôt ixpa. Tã ka prem Jejus jarênh ma nê hkôt amnhĩ xunhwỳr kurê kumrêx. Nhũm krĩ piitã hkôt ri mẽ pa xwỳnh kwỳjaja mẽ apyrà nê harênh ma nê hkôt amnhĩ xunhwỳ nê hkôt amnhĩ nhîpêx o pa.

Pawre kêp Ijaew kêt xwỳnhjê mã Jejus jarênh xwỳnh ã harênh

Epes 3.1-13

²⁴Nê ixte mẽ amã Kris kot tanhmã mẽ panê amnhĩ nhîpêx to hã harênh o ixpaja ã na prem tanhmã ixto htỳx nê pa amnhĩ xà htỳx kãm ijamak o ri ixpa. Tã arĩ Tĩrtũm kãm hprãm xà hkôt ã amnhĩ nhîpêx anhỹr jakamã na pa ixkĩnh nê jar ixkrĩ. Ixte Kris kwỳjê kaxyw amnhĩ xà kamã ijamak tỳx o ixkrĩ. Te mẽ apê Kris nhĩ pyràk xwỳnhjê mãã. Tã pa te ixpê Kris kot amnhĩ nhîpêx pyràk o mẽ akaxyw amnhĩ xà htỳx kãm ijamak o ixkrĩ.

²⁵Na pre Tĩrtũm mẽ apê Ijaew kêt xwỳnhjê kaxyw ixãm. Ixte mẽ amã kapêr piitã harênh par nhũm mẽ ate mar nê hkôt amnhĩ nhîpêx mex o ri apa kaxyw.

²⁶Na pre kormã mēhõ mẽ awỳr mōr nê mẽ amã harênh kêt nê. Tã ra Tĩrtũm kãm mẽ ate mar prãm nê. Kãm mẽ apê Ijaew kêt xwỳnhjê mẽ mẽ pahpê Ijaew xwỳnhjê japê o axpên pyràk. Nom na pre amnepêm ri mẽ pa xwỳnhjê mã kormã ja hã amnhĩ to amnhĩrĩt kêt nê. Tã ra jarãhã mẽ pahpê Kris kwỳjê mã ja ho amnhĩrĩt. Mããnên kãm mẽ apê Ijaew kêt xwỳnhjê japê hã amnhĩ to amnhĩrĩt.

²⁷Mẽ apê Ijaew kêt tã na ka prem Kris kôt amnhĩ xunhwỳ nhũm Tĩrtũm Karõ mẽ akarõ mã agjê nê mẽ akamã pa ho pa. Ka mẽ ra hkôt amnhĩ nhîpêx jakamã kot kaj mẽ ixpyrà nê nhỹrmã kuri atĩr tũm nê amex rãhã ho apa ho

apa. Ja na mex kumrêx. Tã ja na Tĩrtũm kãm mẽ ate mar prãm nẽ mẽ akaxyw ixãm.

²⁸Jakamã na pa pre Ximotre mẽ wa mẽ apiitã mẽ amã Kris kot mẽ panê tanhmã amnhĩ nhĩpêx to hã harênh kãm ixihyt̃x o ri mẽ akôt ixpa. Nẽ kapêr o mẽ ajahkre ho ri mẽ akôt wa ixpa. Nẽ jar mẽ hagjênh xà kamã krĩ piitã hwỳr kagà nhĩpêx nẽ mẽ hwỳr kurẽ. Mẽ kot kamã harênh nẽ mar nẽ amnhĩ tomnuj kaga nẽ hpãnhã Kris kôt amnhĩ xunhwỳr nẽ ãm kôt pix mã amnhĩ nhĩpêx o pa kaxyw. Kêr pa nhỹrmã kãm mẽ ate inhmar nẽ hkôt amnhĩ xunhwỳr xwỳnhjê jahkre nẽ kãm: —E Pahihti. Ota akwỳjaja. Na htem akôt amnhĩ nhĩpêx mex rãhã ho ri pa. Anẽ.

²⁹ã ixte kãm mẽ piitã mẽ harênh anhỹrja na inhmã hprãm. Ja kaxyw na pre Jejus ixto ixihyt̃x. Jakamã na pa hte Tĩrtũm nhỹ hã tanhmã kapêr o mẽ ahkre hto ho ri mẽ hkôt ixpa. Jao mẽ ho Tĩrtũm wỳr o ri ixpa nẽ mẽ kãm kagà nhĩpêx nẽ mẽ hwỳr kurẽ nẽ kamã kapêr o mẽ ahkre o ri ixpa.

Korosẽ 2

Pawre kot Jejus kapêr o Koros nhõ xwỳnhjê o hiht̃x ã harênh

Epes 3.14-19; Piriapos 1.9

¹E kot paj mẽ amã tanhmã amnhĩ jarênh to ka mẽ inhma. Na pa hte mẽ ato Tĩrtũm wỳr rãhã ho ixkrĩ. Mẽ kajaja nẽ krĩ pê Ratisej kamã Jejus kôt mẽ pahkwỳjaja. Kormã ixte mẽ apumunh kêt tã pa hte mẽ ato Tĩrtũm wỳr kãm ixihyt̃x ãhã ho ixkrĩ.

²Mẽmo kaxyw na pa hte ã mẽ ato hwỳr anẽ? Nẽ mẽmo kaxyw na pa hte mẽ amã kagà nhĩpêx nẽ mẽ awỳr kurẽ? Nà ãm mẽ ate kamã harênh nẽ mar nẽ Jejus kapêr kôt axpên to axihyt̃x o ri apa kaxyw. Nẽ mẽ amã axpên kĩnh o ri apa kaxyw. Pê te mẽ ate ixkre tipxi kamã axpên kôt amnhĩ nhĩpêx o ri apa pyræk. Jao aprĩ hã Tĩrtũm kot amnhĩ nhĩpêx pumunh mex nẽ amnhĩ kaxyw hkôt ajamaxpêr t̃x nẽ. Kot kaj mẽ ã amnhĩ nhĩpêx anẽ nẽ Kris kot amnhĩ nhĩpêxta pumunh pa. Na pre Tĩrtũm tokyx mẽ kãm Kris o amnhĩrĩt kêt tã ra mẽ pamã ho amnhĩrĩt.

³Tĩrtũm kot amnhĩ nhĩpêx nê kapêrja na pu htem Kris nhỹ hã pahprĩ hã omunh nê mar mex nê.

⁴Jakamã koja mẽmojaja mẽ awỳr mra hãmri nê hêx rom Tĩrtũm kapêr kwỳm ri tanhmã mẽ amã mẽmoj jarênh to. Te mẽ àhpumunh tỳx pyràk o mẽ amã harê no ãm mẽ àhpumunh kêt. Ka mẽ ama nê ãm mẽ ama nê Kris kaga hkêt nê.

⁵Nê kormã arĩ Jejus ã ijaxàr nê ixkrĩ nê kormã mẽ akôt ixpa hkêt tã ot pa hte mẽ amã ijamaxpêr rãhã ho ixkrĩ. Nê ra tanhmã mẽ ajarênh mar to. Na ka xep htem Kris kôt amnhĩ nhĩpêx tỳx o ri apa. Te ahkrô pê kukryt mut kuxêêti kot pĩ kupu htỳxta pyràk. Nê ka xep htem arĩ amnhĩ kaxyw Kris mã ajamaxpêr tỳx o ri apa. Pa mẽ ajarênh ma nê ixkĩnh tỳx nê.

⁶Na ka prem Pahihti Jejus Kris kôt amnhĩ xunhwỳr pa. Tã kêr ka mẽ arĩ hkôt amnhĩ nhĩpêx mex rãhã ho apa. Kêp mẽ panhõ Pahihti kênã.

⁷Jakamã mẽ ãm kôt pix mã amnhĩ xunhwỳr tỳx nê aa hkaga hkêt nê. Te mẽmo pĩ hpàr jarêja pika kaxwỳnh kãm pimành nê kot pika jamỳnh tỳxta pyràk. Nhũm kôk xàpêr tỳx tã tee kot mênh kaxyw pyràk. Tã kêr ka mẽ pĩ hpàrta pyrà nê hkôt amnhĩ xunhwỳr tỳx nê hkôt amnhĩ nhĩpêx mex o ri apa. Ra Epas kot mẽ ajahkre ho pa xà hkôt. Nê amnhĩ krãm Kris kapêr jaxàr tỳx nê aa ho ajamakêtkati hkêt nê. Pê akĩnh kãm Tĩrtũm mã mex o mex ã harênh rãhã ho ri apa.

⁸Nê kwa kêr ka mẽ kot hêx rom mẽ amã tanhmã kapêr to ho mẽ pa xwỳnhjaja ka mẽ amnhĩ nê mẽ omunh mex nê. Nê mẽ kapêr mar hkêt nê. Mẽ ate Kris kaga hprãm xàj na htem tanhmã mẽ amã hêx to ho ri mẽ akôt pa. Te amnepêm mẽ kot Tĩrtũm kapêr kwỳm ri tanhmã mẽ ahkre hto xwỳnhjê pyràk. Hinhu hikôôti kapêr kôt na htem tanhmã mẽ amã hêx to nom Kris nhỹ hã mẽ amã kapêr kêt nê. Jakamã kwa mẽ amnhĩ nê mẽ omunh mex nê.

⁹Nê Kris mẽ Tĩrtũm wa kot amnhĩ nhĩpêx kot axpên pyràk. Nê wa hamaxpêr kot axpên pyràk.

¹⁰Tã kêr pu mẽ pajaxwỳja wa hamaxpěr o pajamaxpěr nẽ wa kot amnhĩ nhĩpêx o amnhĩ nhĩpêx. Jakamã kwa mẽ kot Tĩrtũm kapěr kwỳm ri tanhmã mẽ kapěr to xwỳnhjê kot amnhĩ nhĩpêx o amnhĩ nhĩpêx kêt nẽ. Nẽ mẽ kapěr ma nẽ ãm mẽ ama. Kris na hihtỳx o hihtỳx o kot mẽkarõmnuti nhõ pahi piitã mẽ hakrenh par. Nẽ hihtỳx o hihtỳx o kot Tĩrtũm kapěr o mẽ wrỳk xwỳnhjê piitã mẽ hakrenh par. Nẽ àhpumunh o àhpumunh o kot mẽmoj piitã hakrenh par jakamã kêr ka mẽ kapěr kôt pix ma nẽ hkôt pix mã ri amnhĩ nhĩpêx o ri apa.

Mẽ pahte amnhĩ nhĩpêx nyw jarẽnh

Rõmãn 6.3; Karatas 5.24

¹¹Nẽ na hte ixkwỳ Ijaewjaja mẽ hkra nhỹrmã hprêk nẽ Tĩrtũm kôt amnhĩ nhĩpêx ã mẽ harẽnh kaxyw mẽ kêp mẽmy kwỳt kà jakà. Tã mẽ kajaja. Mẽ apê Ijaew kêt xwỳnhjaja na pre Kris mẽ anhĩpêx o te mẽ kot amnhĩ jakarta pyràk. Jao te kot mẽ anê mẽ ate amnhĩ nhĩpêx tũm jakàr par pyràk o mẽ anhĩpêx ka mẽ ra amnhĩ nhĩpêx nyw o amnhĩ nhĩpêx o apa. Nhũm htem mẽ ate amnhĩ nhĩpêx nyw ã mẽ apumu nẽ mẽ ate Jejus kapěr kôt amnhĩ nhĩpêx ã mẽ apumunh kurê kumrêx.

¹²Tã na pu htem jarãhã mẽ pahte Tĩrtũm kôt amnhĩ nhĩpêx o papa hã amnhĩ jarẽnh kaxyw amnhĩ jakàr kêt nẽ. Na pu htem hpãnhã amnhĩ kaxyw Tĩrtũm xihtỳx o hihtỳx xwỳnhja kôt pajamaxpěr. Kot mẽ panê pahte amnhĩ tomnuj rẽnh par kôt pajamaxpěr hãmri nhũm mẽ gôx kãm mẽ pahkrã kumrã. Te mẽ pahte gôx kãm mẽ pahte amnhĩ nhĩpêx tũm rer par pyràk o amnhĩ nhĩpêx. Te Jejus htyk nhũm mẽ kot haxàr nhũm nõr nhũm mẽ pahte amnhĩ tomnujja ãhkô hã nõr nẽ hapêx par pyràk. Tã pu htem ra gôj rũm pahkrã hapôj. Te Tĩrtũm kot akupỹm Kris o htĩr pyràk. Jao ra mẽ pahte Kris kôt amnhĩ nhĩpêx nyw o amnhĩ nhĩpêx o papa hkrax ã amnhĩ to amnhĩrĩt.

¹³Amnepêm kormã mẽ pahte Jejus kôt amnhĩ xunhwỳr kêt ri na pu prem ri amnhĩ tomnuj to nẽ tanhmã pajamaxpěr punuj to ho ri papa. Tĩrtũm noo mã te ra mẽ pahtyk pyràk. Tã Tĩrtũm te akupỹm Kris kôt mẽ pahto pahtĩr pyràk o mẽ panhĩpêx nẽ mẽ panê mẽ pahte amnhĩ tomnuj piitã ho hapêx nẽ axte kãm hamaxpěr kêt kumrêx.

¹⁴Te mẽ pahte tanhmã amnhĩ tomnuj to ho papa nhũm Tĩrtũm kot ja hã mẽ pahpumunh nẽ mẽ pahte amnhĩ tomnuj piitã hã kagà hpar pyræk. Nẽ kot kagàja pyr nẽ Kris nhĩhkô hã pĩ kahpa hã nhôr pyræk. Jao te kot mẽ pahte amnhĩ tomnuj ã kagàta hkaxônh nẽ rẽnh par pyræk o hipêx.

¹⁵Hãmri nhũm Krisja pĩ kahpa hã htykja o mẽkarômnuti mẽ mẽ õ pahi Satanasti wa mẽ ho hirerek pa. Jao hihtỳx o kot mẽ hakrenh par ã amnhĩ to amnhĩrĩt. Te mẽ kot kutã amnhĩ xunhwỳr xwỳnh piitã mẽ noo mã mẽ ho krihkrit par nẽ ma akupỳm õ krĩ hwỳr hkĩnh nẽ grer o môrta pyræk.

¹⁶Nẽ koja mẽmojaja mẽ awỳr mra nẽ tee ri mẽ ate mẽmoj kur o akrĩ hã mẽ apumu nẽ mẽ amã: —Kwa na hte Tĩrtũm kôt mẽ kot amnhĩ xunhwỳr xwỳnhjaja ja kur kêt nẽ. Nẽ ja ho hkôm kêt nẽ. Nẽ mẽ panhõ arĩgromnu pẽ sap ã ri mẽmoj tã àpênh kêt nẽ. Nẽ mytwrỳ nyw ã mẽmoj tã àpênh kêt nẽ. Na htem ã Tĩrtũm ã hkĩnh o pa anẽ. Tã ã mẽ ate mẽ ixkôt amnhĩ nhĩpêx anhỳr kêt jakamã mãn mẽ apê Tĩrtũm kra hkêt nà. Anẽ. Tã nom kêr ka mẽ kapêr ma nẽ ãm ama.

¹⁷Amnepê mormã mẽ pahte Kris kôt amnhĩ xunhwỳr kêt ri na pu prem ã amnhĩ nhĩpêx anhỳr o papa. Tã Jesus kôt amnhĩ xunhwỳ hãmri nẽ axte ã amnhĩ nhĩpêx anhỳr kêt nẽ. Pãnhã kapêr pix ma nẽ hkôt pix mã amnhĩ nhĩpêx o ri papa.

Mẽ pahte mẽ kot Tĩrtũm kapêr o mẽ hêx xwỳnhjê mar kêt ã mẽ pamã karõ

¹⁸Nẽ koja mẽmojaja mẽ awỳr mra nẽ hêx rom tanhmã mẽ amã amnhĩ jarênh to nẽ mẽ amã: —Na pre Tĩrtũm ãm mẽ papxipix mẽ inhmã amnhĩ to amnhĩrĩt. Jakamã kwa mẽ ixkapêr ma. Kot kaj mẽ inhmar kêt nẽ hãmri nẽ mẽ amex kêt nẽ apa. Anhỳr o mẽ amã kapêr japêr ka mẽ ama nẽ ãm mẽ ma. Rỳ nhũm mẽ amã: —Tĩrtũm mẽ parom kot amnhĩ to rax o kot mẽ pahpiitã mẽ pajakrenh par jakamã kwa mẽ tanhmã amnhĩ to hwỳr to hkêt nẽ. Kot ka mẽ anẽ nhũm mẽ ama nẽ mẽ akamã gryk nẽ. No kêt mẽ amnhĩ to kapêr o wrỳk xwỳnhjê mãn wỳ. Koja mẽ ama nẽ mẽ akamã gryk kêt nẽ tanhmã mẽ amã mẽmoj nhĩpêx to. Anẽ. Koja mẽ ã mẽ amã kapêr anẽ ka mẽ ama nẽ ãm mẽ ama. Te ho mẽ àhpumunh tỳx kãm mẽ kot ã mẽ amã kapêr anhỳr pyræk

no ãm mẽ kapërja mex kêt. Na htem amnhĩ krã hkôt te amnhĩ to rax pyræk o ã mẽ amã kapër jao mẽ hamaxpër tũm o hamaxpër o ri pa. No mẽ apyrà nẽ mẽ hamaxpër nyw o hamaxpër kêt nẽ.

19ãm mẽ kot Tĩrtũm kapër kwỳm ri mẽ ahkre jakamã mẽ kệp Jejus kwỳ hkêt. No mẽ papajaja mẽ pahpê Jejus kwỳ na pu mẽ. Nhũm Jejus kệp mẽ panhõ Pahihti jakamã na hte tanhmã mẽ pahto paxihtỳx to pu htem kukwak ri tanhmã axpẽn to ajuta hto ho ri papa. Nẽ hkôt axpẽn to paxihtỳx o ri papa. Mẽ pahpiitã mẽ pahte hkôt amnhĩ nhĩpêx mex o ri papa kaxyw. Tĩrtũm kãm hprãm xà hkôt.

Mẽ pahte amnhĩ krã hkôt tãm amnhĩ nhĩpêx kêt ã mẽ pajarênh

Karatas 3.1-5; 5.1-9; Epes 2.8; Piriapos 3.9

20-21Nẽ wam mẽ pahte amnhĩ nhĩpêx tũm nẽ mẽ pajamaxpër tũmta te kot Kris kôt htyk nẽ mẽ pahpê hapêx par pyræk jakamã na pu htem arĩ hkôt amnhĩ nhĩpêx kêt nẽ. Nẽ mẽkarõmnuti hkôt amnhĩ nhĩpêx kêt nẽ. Tã no nhũm xep ra mẽhõja mẽ awỳr mỗ nẽ hêx rom mẽmoj nê tanhmã mẽ amã kapër to nẽ mẽ amã: —Kwa mẽ ja jamỳnh kêt nẽ. Nẽ ja hkur kêt nẽ. Nẽ ja kupênh kêt nẽ. Anhỳr o mẽmoj nê mẽ akurê ho pa. Xep mẽ ã mẽmoj nê mẽ akurê anẽ ka xep mẽ ama nẽ mẽ hkôt amnhĩ nhĩpêx. Kwa nà mon ka mẽ ri axtem nẽ mẽ hkôt amnhĩ nhĩpêx?

22Tĩrtũm kot mẽmojja nê tanhmã mẽ pahkurê htore hã. ãm mẽ kot amnhĩ krã hkôt mẽmoj nê mẽ akurê ka mẽ ama nẽ mẽ hkôt amnhĩ nhĩpêx. Mẽmoj kur nê mẽ akurê xwỳnhhta na htem kuku nhũm hapêx kurê kumrêx. Mo koja we Tĩrtũm omu nhũm kệp omnuj? Nà ja kot anhỳr kêt kênã. Mẽ ãm amnhĩ krã hkôt mẽ kot ja nê mẽ akurê.

23Tã ã mẽmoj nê mẽ akurê anhỳr xwỳnhjaja na ka htem nhỳri mẽ omu nẽ mẽ kapër ma nẽ atỳx ajamaxpër o: —Nà te Tĩrtũm kôt amnhĩ nhĩpêx mex o pa pyræk. Te mẽ àhpumunh tỳx pyræk o ã mẽ inhmã mẽmoj jarênh anẽ. Anẽ. No ãm mẽ kot mẽmoj jarênhja kot anhỳr kêt. ã mẽ kot amnhĩ nhĩpêx anhỳr xwỳnhjaja kệp Tĩrtũm kra hkêt. Na htem ãm amnhĩ krã hkôt mẽmoj nê mẽ akurê ho pa. Nẽ hã amnhĩ to jarkrar o ri pa. Mẽ ate ja hã mẽ mar nẽ mẽ kot amnhĩ to rũnh ã mẽ hkamnhĩx kaxyw. Na htem kot amnhĩ tomnuj pymaj

tanhmã amnhĩ nhĩ hto ho pa. No ãm ri ã amnhĩ nhĩpêx anhÿr kaprÿ. Nê ãm htÿx Tĩrtũm kapêr o mẽ wrÿk xwÿnhjê hwÿr kaprÿ ho pa.

Korosê 3

Mê pajamexpêr nyw nê mẽ pahte amnhĩ nhĩpêx nyw jarênh

Rômãn 6.4-11

¹Nê na pre Tĩrtũm akupÿm Kris o htĩr nhũm mẽ pahte hkôt amnhĩ xunhwÿr jakamã te Tĩrtũm kot Kris nhĩpêx pyrã nê akupÿm mẽ pahto mẽ pahtĩr pyrãk o mẽ panhĩpêx. Jakamã kwa kêr pu mẽ axte pahte amnhĩ nhĩpêx tũm kôt amnhĩ nhĩpêx kêt nê. Te Kris pyrã nê ra kaxkwa hwÿr paxàpir nê kamã ri papa pyrãk o amnhĩ nhĩpêx. Jao pajamexpêr nyw pix o pajamexpêr nê pahte amnhĩ nhĩpêx nyw pix o amnhĩ nhĩpêx o ri papa. Te Kris kot amnhĩ nhĩpêx pyrãk. Na pre akupÿm kaxkwa hwÿr api nê Tĩrtũm nhĩhkô hã mẽ ho amnhĩptàr xà kamã hkrĩ ho hkrĩ.

²⁻³Nê ra mẽ pahte Kris kôt amnhĩ xunhwÿr jakamã te jar pika hkôt pajapêx par nê Tĩrtũm wa kuri kaxkwa kamã pamex nê papa ho papa pyrãk. Jakamã kwa kêr pu mẽ pahte amnhĩ nhĩpêx nyw mã mãn pajamexpêr rãhã ho papa. Nê axte mẽ pahte amnhĩ nhĩpêx tũm mã pajamexpêr kêt nê.

⁴Kris kêp akupÿm mẽ pahto mẽ pahtĩr xwÿnh. Kojã nhÿrmã akupÿn mẽ pahwÿr wrÿ hãmri nhũm Tĩrtũm te ho mex raxta pyrãk o mẽ panhĩpêx nê mẽ pahto mex rax kumrêx.

Mê pahte akupÿm amnhĩ nhĩpêx tũm o paxujanãr kêt ã mẽ pamã karõ

Epes 4.17-5.2

⁵Jakamã kwa kêr ka mẽ axte ate amnhĩ nhĩpêx tũm kôt amnhĩ nhĩpêx kêt nê. Te ra mẽ apê htyk nê hapêx par pyrã nê axte kãm ajamexpêr kêt nê. Jakamã axte ri axpên mjên rÿ axpên prõ ho amnhĩkati hkêt nê. Nê nhãm ri mẽmyjê hõ rÿ mẽnijê hõ ho amnhĩkati hkêt nê. Nê mẽ amã tanhmã amnhĩ tomnuj to hprãm kêt nê. Nê mẽ amã akukrêx rax prãm kêt nê. Kot ka mẽ ã amnhĩ nhĩpêx anê nê gaa nê akukrêx rax gryk ã axte Tĩrtũm mã ajamexpêr kêt nê.

⁶ã mẽ kot amnhĩ nhĩpêx anhỹr xwỳnhjaja Tĩrtũm kãm mẽ hprãm kêt. Koja nhỹrmã tanhmã ja hã mẽ homnuj tỳx to.

⁷Amnepêm kormã mẽ ate Kris kôt amnhĩ xunhwỳr kêt ri na ka prem ã amnhĩ nhĩpêx anhỹr o ri apa.

⁸⁻⁹Tã kêr ka mẽ axte ã amnhĩ nhĩpêx anhỹr kêt nẽ. Nẽ mẽ ri axpẽn kãm agryk o ano hkà karôt o axpẽn pumunh kêt nẽ. Nẽ mẽ axpẽn kamã axàhkurê hkêt nẽ. Ri tanhmã axpẽn tomnuj to ho apa hkêt nẽ. Rỳ axpẽn jakwa kamã mẽmoj ma nẽ ri axpẽn xô ri tanhmã ri axpẽn mã ho axêx to ho ri apa hkêt nẽ. Nẽ mẽ akapêr mã agêt o ri mẽ kãm akapêr kêt nẽ. Nẽ mẽ ri mẽmoj to axpẽn mã axêx hkêt nẽ. ã mẽ ate amnhĩ nhĩpêx anhỹr tũmta ra mẽ apê hapêx par kênã.

Mẽ pahte amnhĩ nhĩpêx nyw kôt amnhĩ nhĩpêx ã mẽ pamã karô

Rômãn 12.2; Epes 4.23; Wam Pêtre 2.11

¹⁰Nẽ na ka mẽ ra mẽ ate amnhĩ nhĩpêx nyw o amnhĩ nhĩpêx o ri apa. Jao ra mẽ pahto kator xwỳnh maatija kôt amnhĩ nhĩpêx mex o mỗ. Kot kaj mẽ gaa nẽ rĩ hkôt amnhĩ nhĩpêx mex kumrêx o ri apa. Kãm hprãm xà hkôt.

¹¹Nẽ mẽ pahpê Kris kwỳjaja ahpỹnhã na pu mẽ. Na mẽ pakamã Ijaew nẽ Ijaew kêt xwỳnhjaja. Nẽ mẽ pakamã panhĩ nẽ kupê. Nẽ mẽ kãm àpênh xwỳnhjaja nẽ mẽ kot amnhĩ mã ri àpênh xwỳnhjaja. ãm ahpỹnhã mẽ pahpê Kris kwỳjaja mẽ pahte anhỹr tã na hte Tĩrtũm tanhmã mẽ pakute hkôt mẽ pahpumunh kêt nẽ. Na hte mẽ panhĩpêx o axpẽn pyrà nẽ mẽ pahpiitã mẽ pakamã pa ho pa pu htem pahpimràatã hkôt ri amnhĩ nhĩpêx o papa.

¹²Nẽ Tĩrtũm kãm mẽ pajapê nẽ kãm mẽ pajapê xàj mẽ pakukamã amnhĩm mẽ parê. Mẽ pahte kãm tanhmã amnhĩ nhĩpêx to ho ri papa kaxyw mẽ pakukamã mẽ parê. Jakamã kêr ka mẽ axpẽn kamã axukaprí ho ri axpẽn kôt apa. Nẽ axpẽn to mex pix o ri axpẽn kôt apa. Nẽ mẽ amã amnhĩ to rax o axpẽn jakrenh prãm kêt nẽ. Nẽ mẽ ãm amnhĩ pix kukamã ri ajamaxpêr kêt nẽ. Amnhĩ mẽ nhãm mẽ hkukamã ajamaxpêr o ri apa. Nẽ mẽ ri agryk tokyx anhỹr kêt nẽ.

¹³Ně koja mēhō tanhmã mě ato ka mě amnhĩ tã omu ně tanhmã amnhĩ tã ho hkêt nē. Ām ja ho ajamakêtkati kurê kumrêx ně axte kãm ajamaxpěr o ri apa hkêt nē. Ra Jejus kot mě panê mě pahte amnhĩ tomnuj piitã rēnh par kēnã kot pu kêt mě amnhĩ tã tanhmã mēhō hto. Tã kêr ka mě axpěn to mex o ri apa ně amnhĩ tã tanhmã axpěn to ho ri apa hkêt nē.

¹⁴E kêr ka mě ã axpěn nhĩpêx anhỹr o ri apa. No ãm ja pix kêt. Ně mě määnēn amã axpěn kĩnh pê axpěn kutã anojarêt rãhã nē. Kot kaj mě ã amnhĩ nhĩpêx anē ně määnēn ra ixte mēmoj tã mě amã karōta ka mě ho anhỹr mex kurê kumrêx. Mě pamã axpěn kĩnhja na mex kumrêx o kot mēmoj piitã hakrenh par.

¹⁵Ně kêr ka mě Kris kukwak ri anhōxàhkre kaxwỳnh kãm akĩnh ně ajamakêtkati ně tãm ri axpěn nhĩpêx o ri axpěn kôt apa. Te ixkre tipxi kamã mě ate axpěn kôt ri amnhĩ nhĩpêx pyræk. Ā mě pahte amnhĩ nhĩpêx anhỹr o papa kaxyw na pre Tĩrtũm amnhĩ wỳr mě pahwỳ. Mě pahte hkôt amnhĩ xunhwỳr kaxyw. Ně kêr ka mě Tĩrtũm mã amnhĩ jarēnh kaxyw ně kãm Kra Jejus ã akĩnh ã amnhĩ jarēnh o ri apa.

Mě pahte Tĩrtũm mã mex ã pagrer ã mě pamã karō

Epes 5.19

¹⁶Ně kêr ka mě Kris kapěr piitã hkôt amnhĩ nhĩpêx mex nē. Ně kapěr o axpěn jahkre mex o ri axpěn kôt apa. Tĩrtũm kot amnhĩ nhĩpêx o axpěn jahkre ho ri axpěn kôt apa. Ně kãm agrer o ri apa. Kãm mex o mex ã agrer o ri axpěn kôt apa. Ně kãm kukwak ri akĩnh ã amnhĩ jarēnh o kãm gre.

¹⁷Ně kêr ka mě Měpahpãm Tĩrtũm mã amnhĩ jarēnh o: —Pa Tĩrtũm. Nà ãm hãmri na ka pre mě ixwỳr Akra Jejus mě nhũm mě ixwỳr wrỳ ně mě inhnê ty. Anhỹr o kãm amnhĩ jarē. Hãmri ně ãm Pahihti Jejus kot amnhĩ nhĩpêx kôt pix mã tanhmã ri amnhĩ nhĩpêx to rỳ ãm kôt pix mã tanhmã akapěr to ho ri apa.

Tanhmã mě pahte axpěn nhĩpêx to hã mě pamã karō

Epes 5.22–6.9

¹⁸Ně mě anijaja. Tĩrtũm kot myja kumrêx nhĩpêx ně hkôt kãm hprō nhĩpêx jakamã kêr ka mě amjên ã apijaàm o apa. Ně mě hamaxpěr mex ã mě omu

ně mẽ hkôt ri amnhĩ nhĩpêx mex ně. Ā mẽ ate amnhĩ nhĩpêxja na Tĩrtũm kãm hprãm.

¹⁹Ně mẽ amyjaja kêr ka mẽ amã mẽ aprõ japê ně. Te amã amnhĩ tã ma pyræk o mẽ hipêx o ri apa. Jao tanhmã mẽ homnuj to hkêt ně.

²⁰Ně mẽ apê mẽ hkrajaja kêr ka mẽ anhĩpêxà ně akatorxà wa hã apijaàm ně wa kapêr ma ně wa hkôt ri amnhĩ nhĩpêx. Ā mẽ ate amnhĩ nhĩpêx anhỹrja na Tĩrtũm kãm hprãm. Koja ã mẽ ate amnhĩ nhĩpêx anhỹr ã mẽ apumu ně hkĩnh ně.

²¹Ně kêr ka mẽ apê mẽ hipêxà ně mẽ katorxà mẽ akra gryk kaxyw mẽ kãm apêr o apikênh kêt ně. Kot kaj mẽ ã mẽ hipêx anê nhũm mẽ tee ri amnhĩ tã mẽ ama ně hkaprĩ ně.

²²Ně mẽ ate mẽ kãm tanhmã amnhĩ nhĩpêx to ho ri mẽ apa xwỳnhjaja kêr ka mẽ anhõ patrãw kapêr ma ně hkôt amnhĩ nhĩpêx. Ně mẽ noo mã mẽ kãm tanhmã amnhĩ nhĩpêx mex to ně mãănẽn mẽ wa kre kamã mẽ kãm tanhmã amnhĩ nhĩpêx mex to. Nom mẽ kot axàpênh ã apumunh ně hã kãm akĩnh pix kaxyw axàpênh mex kêt ně. Mãănẽn mẽ amã Pahihti Kris kĩnh ã akatàt kôt mẽ kãm mẽmoj tã axàpênh mex ně. Mẽ noo mã ně mãănẽn mẽ wakre kamã.

²³Ně mẽ akĩnh kãm mẽ kãm axàpênh mex o ri apa. Te mẽ ate Pahihti mã akĩnh kãm tanhmã kãm amnhĩ nhĩpêx to pyrà ně tãm amnhĩ nhĩpêx o tãm mẽ kãm axàpênh mex o ri apa.

²⁴Te mẽ anhõ patrãw pix mã axàpênh pyræk nom kumã pix mã hkêt. Mãănẽn mẽ panhõ Pahihti Krisja mã. Jakamã kot kaj mẽ ã amnhĩ kaxyw Tĩrtũm mã ajamaxpêr pê akĩnh kãm anhõ patrãw mã mẽmoj tã apê nhũm Pahihtija ja hã mẽ apumu ně nhỹrmã mẽ ato mex rax ně.

²⁵E kêr ka mẽ ã mẽ anhõ patrãw mã axàpênh mex o ri apa anê. No kot kaj mẽ kapêr kwỳm amnhĩ krã hkôt ri tanhmã amnhĩ nhĩpêx to nhũm Tĩrtũm tee ri ja hã mẽ apumu hãmri ně nhỹrmã tanhmã hã mẽ anhĩpêx to. Na hte

ã mẽ kot amnhĩ tomnuj xwỳnhjê piitã mẽ hipêx anê nê mẽ hipêx o axpên pyræk. Jakamã kwa kêr ka mẽ anhõ patrãw mã axàpênh mex rãhã ho ri apa.

Korosê 4

¹Nê mẽ apê mẽ õ patrãw kêr ka mẽ kot mẽ amã mẽ àpênh xwỳnhjê ho mex nê tanhmã mẽ homnuj to hkêt nê. Mẽ uræk nê kaxkwa kamã mẽ anhõ Patrãw maatija hkrĩ. Kot mẽ pahte tanhmã amnhĩ nhĩpêx to nê tanhmã mẽ pajamaxpêr to hã mẽ pahpumunh rãhã jakamã kêr ka mẽ noo mã mẽ ho mex rãhã ho ri apa. E kêr ka mẽ apiitã ã axpên to mex anhỹr o ri apa.

Mẽ pahte Tĩrtũm mã amnhĩ jarênh rãhã hã mẽ pamã karõ

Matêwre 7.7; Rukre 11.1-8; Atre 1.14; Epes 6.18

²Nê kêr ka mẽ xatã Tĩrtũm mã amnhĩ jarênh rãhã ho ri apa. Nê tanhmã mẽhõ kot amnhĩ nhĩpêx to hã harênh ma nê ho Tĩrtũm wỳ. Nê mẽ ate kãm amnhĩ jarênh kamã kãm mex o mex ã harê.

³⁻⁴Nê mãânên ixto awỳ kê mẽ tokyx ixkator japêr. Pa ixàmnhĩx mẽ kot kormã Kris jarênh mar kêt xwỳnhjê mã harênh o ri mẽ hkôt ixpa. ã ixte amnhĩ nhĩpêx anhỹrta ã na prem ixpynê nê ijaxà pa kormã jar ixkrĩ. Jakamã kwa mẽ mãmrĩ ja hã ixto Tĩrtũm wỳr o apa.

Mẽ pahte apkati mẽ mẽ pahkwỳjê mã Jejus jarênh ã mẽ pamã karõ

Epes 5.16

⁵Nê kêr ka mẽ kêp Kris kwỳ hkêt xwỳnhjê hkôt nhỹhỹm ri apa nê tãm ri Tĩrtũm kapêr kôt amnhĩ nhĩpêx o mẽ hkôt ri apa.

⁶Nê kê mẽhõ awỳr tẽ nê tanhmã Jejus ã akukjêr to ka amã hkĩnh ã aprĩ hã kãm awjarê. Ahpỹnhã tanhmã mẽ kot hã akukjêr to xà hkôt tanhmã mẽ kãm harênh to kê mẽhprĩ hã mar mex nê.

Pawre kot Koros wỳr Xikitre mẽ Ones wa mẽnh ã harênh

Epes 6.21-22

⁷⁻⁸Nê ot pa mẽ awỳr mẽ pahtõ Xikitre mẽnh mã. Kot ma mẽ awỳr ixte mẽ amã ixkapêr ã kagà nhĩpêx o mõi kaxyw. Na hte ixkôt Tĩrtũm mã amnhĩ nhĩpêx o ri pa. Inhmã hapêê. Tã kot paj mẽ awỳr kumê kê ma mẽ awỳr mõi

ně hprĩ hã mẽ amã ijarẽ. Mẽ ate ijarẽnh mar ně tãm ajamaxpěr ně akĩnh kaxyw.

⁹Mẽ akwỳ Onesti hkôt koja ma mẽ awỳr mỗ. Mããnẽn Kris kôt kệp mẽ pahtỗ hã mẽ pamã hapê xwỳnh na. Na hte Tĩrtũm kapěr kôt amnhĩ nhĩpêx mex rãhã ho ri pa. Tã Xikitre mẽ koja wa ma mẽ awỳr mỗ. Hãmri ně mẽ awỳr pỏj ně jar tanhmã mẽ ixte amnhĩ nhĩpêx to hã mẽ ijarẽ ka mẽ ama.

Kris kôt mẽ hkwỳ kot mẽ hwỳr hpěr mẽn ĩ mẽ harẽnh

¹⁰Ně ota Aristakja ixpyrã ně kệp prês ně hkrĩ. Tã mẽ awỳr hpěr mẽ. Ně Panãpe htỗ Juãw Makreja mããnẽn mẽ awỳr hpěr mẽ. Na pa pre ra mẽ amã Juãw Makre jarẽ. Tã koja mẽmo arĩgro hã akupỹn mẽ awỳr mỗr japêr ka mẽ omu ně ho mex ně.

¹¹Ně Jejus Justija mããnẽn mẽ awỳr hpěr mẽ. Jajaja mẽ ixpyrã ně kệp Ijaew. Tã mẽ tapxipixjaja na htem ixpyrã ně mẽ ixpê Ijaew kwỳjê rom mẽ kãm Tĩrtũm kapěr nyw o mẽ ahkre ho ri mẽ hkôt pa. Tĩrtũm kot Kra Kris kôt mẽ kot amnhĩ xunhwỳr xwỳnhjê ho hkra hã harẽnh nywja na htem mẽ kãm harẽnh o ri mẽ hkôt pa. Pa ja hã mẽ omu ně ixkĩnh ně.

¹²Ně mẽ anhiỗ Epasja mããnẽn mẽ awỳr hpěr mẽ. Na hte Jejus Kris mã tanhmã amnhĩ nhĩpêx mex to ho pa. Ně mẽ ato Tĩrtũm wỳr rãhã ho pa ně mẽ ato hwỳr o: —Pa Tĩrtũm. E kwa tanhmã Koros kamã akrajê ho kê mẽ akôt amnhĩ xunhwỳr tỳx ně. Ně amã hprãm xà hkôt pix mã amnhĩ nhĩpêx o ri pa. Ně amnhĩ kaxyw Kris kôt pix mã hamaxpěr tỳx rãhã ně. Anẽ.

¹³ãm hãmri na hte mẽ ato hwỳr o pa. Nom mẽ kapxipix o hwỳr kêt ně. Mããnẽn krĩ pê Ratisej kamã ně krĩ pê Jerop kamã Kris kôt mẽ pahtỏjê ho hwỳr o ri pa. Mẽ ate Tĩrtũm kôt amnhĩ nhĩpêx mex o apa kaxyw. Ixte ja hã omunh mex.

¹⁴Ně jar mẽ pahtỗ tỏtỏ Rukre mẽ Tẽmtija wa mããnẽn mẽ awỳr hpěr mẽ. Tỏtỏ Rukreja kệp ixkrãmnhwỳ mex na.

¹⁵Ně kêr ka mẽ krĩ pê Ratisej kamã Kris kôt mẽ pahkwỳjê mã ijarẽ. Ně Nĩpare mã nẽ õrkwỹ hwỳr mẽ pikuprõnh nẽ Tĩrtũm mã mex o mex ã harẽnh o mẽ hkřĩ xwỳnhjê mã mããnẽn ijarẽ.

¹⁶Ně e kêr ka mẽ ixte mẽ awỳr kagà mẽnħja kamã harẽnh pa nẽ hpãnhã krĩ pê Ratisej kamã Kris kôt mẽ pahkwỳjê hwỳr amẽ kê mẽ apyrà nẽ kamã harẽ nẽ piitã kuma. Ně mẽ kãm anẽ kê ra ixte mẽ hwỳr kagà mẽnħ xwỳnhħta kê mẽ amã kugõ ka mẽ kuxwar kamã harẽ nẽ ama.

¹⁷Ně kêr ka mẽ Akip mã ijarẽ kê ra Tĩrtũm kot kãm mẽmoj tã karõ xwỳnhħta kê ho anhỹr jatur xàm kumẽ. Kêp hkra hã kê tãm kãm àpẽnħ jatur xàm kumẽ.

¹⁸Tã ãm ja pix. E paj pam amnhĩ nhĩhkra ho hatur xà hã kagà. Mẽ ate ixte mẽmoj tã kagà pumunh nẽ hkôt inhmã ajamaxpěr kaxyw. Ně ixte mẽ awỳr mẽnħ ã ijarẽnħ mar kaxyw. Kwa kêr ka mẽ arĩ ixpê prês ã ixto Tĩrtũm wỳr rãhã ho ri apa. E kê Tĩrtũmja mẽmoj to mẽ akutã nojarêt nẽ mẽ ato mex nẽ ka mẽ amex nẽ ajamakêtkati nẽ apa ho apa. Tã ãm ja pix. Ixpê Pawre na pa mẽ awỳr kagàja nhĩpêx nẽ ã mẽ awỳr mẽnħ anẽ.

Wam Tesarõn

Wam Tesarõn 1

¹Pa mẽ apê Tesarõn kamã Jejus kwỳ hã axpên wỳr mẽ apikuprõnh xwỳnhjaja? Xà mẽ amex na ka mẽ apa? Ixpê Pawre na pa mẽ awỳr kagàja nhĩpêx nẽ mẽ awỳr kumẽ. Siras mẽ Ximotre mẽ pa mẽ awỳr kumẽ. Mẽ pahpê Mẽpanhĩpêêxà maati Tĩrtũm mẽ Pahihti Jejus Kris wa hkwỳ jakamã na pa htem mẽ ato Tĩrtũm wỳr rãhã ho ri ixpa. Kot mẽ akutã nojarêr rãhã nhũm mẽ ajamakêtkati nẽ axàmnhĩx mẽ apa kaxyw.

²⁻³Nà mẽmoj kêt. Na pa htem mẽ amã ijamaxpêr nẽ mẽ anhy hã ixkĩnh nẽ ixpa hãmri nẽ mẽ awỳr kagàja mẽ. Na pa htem mẽ ato Tĩrtũm wỳr rãhã ho ri ixpa nẽ kãm mẽ ajarênh o: —Pa Tĩrtũm. E mãn ka Tesarõn kamã akrajê pumu. ãm hãmri na ka pre tanhmã mẽ hkrã hto nhũm mẽ akôt amnhĩ nhĩpêx mex o pa. Na htem amnhĩ kaxyw akôt hamaxpêr tỳx nẽ. Jao mẽ piitã mẽ kamã ukaprĩ kamã tanhmã mẽ ho ajuta hto ho pa. Nhũm mẽ kãm mẽ ixkurê xwỳnhjaja Pahihti Jejus Kris ã tanhmã mẽ ho ho pa htã nhũm mẽ tee ri amnhĩ kukamã hamaxpêr o hkaprĩ nẽ Jejus mẽ war akaga hkêt nẽ. Arĩ war anhy hã amnhĩ to htỳx nẽ Pahihti Jejus kutêp tanhmã kãm amnhĩ nhĩpêx to ho pa. ãm hãmri na htem ã amnhĩ nhĩpêx anẽ Tĩrtũm. Na pa htem mẽ kot ã amnhĩ nhĩpêx anhyrja mã ijamaxpêr nẽ ixkĩnh nẽ. Anhyr o pa htem mẽ ato kuwỳ.

⁴E Kris kôt ixkwỳjaja. Nà Tĩrtũm kãm mẽ ajapê jakamã na pre amnhĩm mẽ arê. Kot mẽ ato hkra nhũm nhỹrmã kuri mẽ amex nẽ atĩr tũm nẽ apa ho apa kaxyw. Ra mẽ ixte ja hã mẽ ajarênh mar mex.

Mẽ piitã mẽ kot Tesarõn nhõ xwỳnhjê jarênh mar ã mẽ harênh

⁵Nẽ na pa prem ma mẽ awỳr mỗ nẽ mẽ amã Jejus jarênh o mẽ akôt ixpa. Kot mẽ panê tanhmã amnhĩ nhĩpêx to hã harênh o ri mẽ akôt ixpa. Nom pa mẽ amnhĩ krã hkôt mẽ amã ixujarênh kêt nẽ. ãm Tĩrtũm Karõ nhỹ hã na pa prem hihtỳx xà ho tanhmã mẽ amã ixkapêr to ka prem mẽ inhma nẽ mẽ ixkôt ajamaxpêr kurê kumrêx. Na pa prem tãm amnhĩ nhĩpêx o ri ixpa ka mẽ ja hã mẽ ixpumunh o ri mẽ ixkôt apa.

⁶Tã Jejus kôt amnhĩ xunhwỳ nẽ hkôt amnhĩ nhĩpêx mex nẽ. Nẽ mẽ ixkôt amnhĩ nhĩpêx mex nẽ. Mẽ kot Jejus ã tanhmã mẽ ato htã ka htem Tĩrtũm Karõ nhỹ hã akĩnh nẽ hkôt amnhĩ nhĩpêx mex rãhã ho ri apa.

⁷Tã nhũm pika pê Masetõn mẽ Gres wa kamã Jejus kôt mẽ pahkwỳjaja ã mẽ ate amnhĩ nhĩpêx anhỹr ã mẽ ajarẽnh ma nẽ mẽ apyrà nẽ ã amnhĩ nhĩpêx anhỹr o pa.

⁸Na ka prem tanhmã Jejus kot mẽ panê amnhĩ nhĩpêx to hã harẽnh o ri mẽ hkôt apa nhũm mẽ piitã mẽ akapêr ma. Nom mẽ tapxipixjaja mar kêt nẽ. Na mẽ ra ohtô nẽ mẽ ajarẽnh ma nẽ mẽ apyrà nẽ ma mẽ kãm Jejus jarẽnh o pa. Ra mẽ ate Jejus kôt amnhĩ xunhwỳr ã amnhĩ jarẽnh o ri apa nhũm mẽ piitã kot mẽ amar jakamã mẽ pajaja na pa htem mẽ kãm ã mẽ ajarẽnh anhỹr kêt nẽ. Mo kaxyw? Ra mẽ kot mẽ ajarẽnh mar mex kênã.

⁹Na pa htem nhỹri krĩ hõ hwỳr pøj nhũm mẽ ixpumu nẽ ra mẽ tãmjaja mẽ inhmã mẽ ajarẽnh kurê kumrêx. Nẽ mẽ ajarẽnh o: —Kwa Tesarõn kamã Kris kôt mẽ pahkwỳjaja na xep kãm mẽ akĩnh nẽ. Amnepêr na pre htem amnhĩm sãnti nhĩpêx nẽ kêp mẽhpãm ã harẽ nẽ amnhĩ to hwỳr o pa. Tã ka xep prem ma mẽ hwỳr mõi nẽ mẽ kãm Tĩrtũm kapêr jarẽ nhũm mẽ ama nẽ Tĩrtũmja sãnti rom ãm hãmri hã omunh kurê kumrêx. Hãmri nẽ gryk ã sãnti kaga hpa nẽ Tĩrtũm kôt amnhĩ xunhwỳ nẽ hkôt pix mã amnhĩ nhĩpêx mex o pa.

¹⁰Nẽ amnhĩ wỳr Tĩrtũm Kra kamã hamak rãhã ho ri pa. Anẽ. ãm hãmri na ka htem amnhĩ wỳr kamã hamak rãhã ho apa. Na pre ty nhũm Hipêêxà Tĩrtũm akupỹm ho htĩr. Tã koja nhỹrmã akupỹn mẽ pahwỳr kumẽ nhũm akupỹn mẽ pahwỳr wrỳ. Hãmri pu mẽ ãm pix kukwak ri mẽ kot amnhĩ xà htỳx kãm hamak o pa htũm xàta wỳr papa hkêt nẽ.

Wam Tesarõn 2

Pawre kot amnhĩ jarẽnh

Sikũn Korĩt 1.12; 4.1-6

¹⁻²Nẽ kormã mẽ awỳr mẽ inhmõr kêt ri na pa prem kormã Piripos nhõ xwỳnhjê mã Tĩrtũm kapêr jarẽnh o ri mẽ hkôt ixpa. Nom nhũm mẽ hkwỳjaja kãm mẽ inhmar prãm kêt nẽ. Na prem Jejus ã mẽ inhmã kapêr punuj nẽ mẽ

inhîpêx kati pa prem amnhî xà htỳx kamã ijamak o mẽ hkôt ixpa. Na ka prem ja hã mẽ ijarênh ma. ã mẽ kot mẽ inhîpêx anhỳr tã pa mẽ tee ri amnhî kukamã ijamaxpêr pê Tirtũm kapêr jarênh kaga hkêt nê. Na pa prem arĩ mẽ kãm Jejus kot tanhmã mẽ panê amnhî nhîpêx to hã harênh o ri mẽ hkôt ixpa. Tã mẽ awỳr inhnojarêt nê Tirtũm nhỹ hã amnhî to htỳx nê ma mẽ awỳr mỗ. Hãmri nê mẽ amã tanhmã Jejus jarênh to ho ri ixpa. Ka prem mẽ inhma hãmri nê axohtô nê hkôt amnhî xunhwỳ.

³Nom pa prem ixêx rom tanhmã mẽ amã ixkapêr to hkêt nê. Rỳ mẽ inhmã mẽmoj prãm xàj mẽ ano kupyrr pê mẽ amã ixkapêr kêt nê.

⁴Rỳ mẽ ate mẽ ixkapêr mar nê mẽ inhmex ã mẽ ijarênh kaxyw pa tanhmã mẽ amã ixkapêr to hkêt nê. ãm Tirtũm kot mẽ inhmar nê tapxipix mẽ inhmex ã mẽ ijarênh pix prãm xàj na pa prem mẽ amã kapêr jarênh o ri mẽ akôt ixpa. Tirtũm tapxipix na hte tanhmã mẽ pakute hkôt mẽ pahpumunh rãhã ho pa. Tãm na pre mẽ ixte kapêr jarênh o ri ixpa kaxyw mẽ ixunhwỳ.

⁵Xàn pa prem mẽ ijakwa nhĩkjê ho mẽ ate tãm amnhî nhîpêx ã mẽ ajarê hãmri nê mẽ ijakwa nhĩkjê ho mẽ ato ixkapêr punuj nê? Nà na pa prem ã amnhî nhîpêx anhỳr kêt nê. Na pa prem ixkatàt kôt mẽ ate amnhî nhîpêx ã mẽ apumunh kôt tanhmã mẽ ajarênh to ho ri ixpa. Nê xà mẽ ate mẽ ixkapêr mar nê akĩnh nê hpãnhã mẽ inhmã amnhĩrer kaxyw na pa prem mẽ awỳr mỗ nê mẽ amã Jejus kapêr o mẽ ajahkre? Nà na pa prem kàxpore prãm xàj mẽ amã ixkapêr kêt nê. Tirtũm kot ja kôt mẽ ixpumunh mex.

⁶Rỳ xà mẽ ate mẽ inhmex ã mẽ ixto jarkrar kaxyw na pa prem mẽ awỳr mỗ? Nà mãănênh ja kaxyw kêt. ã mẽ ate mẽ ijarênh anhỳr prãm xàj na pa htem Tirtũm kapêr o mẽ ajahkre ho ri ixpa hkêt nê.

⁷Rỳ xàn pa pre mẽ awỳr mỗ nê mẽ amã amnhî jarênh o: —E mẽ ixte Jejus nhỹ hã ixkapêr o ixpa xwỳnh jakamã kot paj mẽ amã tanhmã ixkapêr to ka mẽ inhma nê hpãnhã mẽ inhmã amnhĩre. Anhỳr o mẽ amã ixkapêr? Nà na pa pre ã mẽ amã ixkapêr anhỳr kêt nê. Na pa prem te mẽ katorxà kot hkrajê nhîpêx pyràk o mẽ anhîpêx nê amarĩ mẽ ajahkre ho ixpa nê mẽmoj tã mẽ awỳr kêt nê.

⁸Mě inhmã mẽ akĩnh jakamã na pa prem mẽ amã ixprĩ hã Tĩrtũm kapěr piitã harẽnh par o mẽ akõt ixpa nẽ mẽ kot ja hã tanhmã mẽ ixto pymaj tee ri amnhĩ kukamã ijamaxpěr o ri ixkaprĩ hkêt nẽ. ãm ixàmnhĩx ri tanhmã Jejus kot mẽ panê amnhĩ nhĩpêx to hã harẽnh o mẽ akõt ixpa.

⁹Mě apê mẽ ixkwỳ jakamã na pa prem tanhmã mẽ amã ixkapěr to hpãnhã mẽ ixàpkur xà rỳ mẽmoj tã mẽ awỳr kêt nẽ. Na pa prem mẽ pamjaja mẽmoj tã ixàpênh pê mẽ amã ixkapěr o ri ixpa. Nẽ ixàpênh rũnh kumrêx. Arĩgro hã nẽ kamàt kãm. Mãn arĩ mẽ ate ã mẽ ixte amnhĩ nhĩpêx anhyrja ã anohtỳx japêr ko.

¹⁰Na pa prem tãm amnhĩ nhĩpêx o mẽ akõt ixpa. Tĩrtũm kãm hprãm xà hkõt. Jao tanhmã amnhĩ to mex to rãhã ho ri ixpa ka prem amnhĩ tã mẽ ixpumu. Nhũm Tĩrtũm haxwỳja ja hã mẽ ixpumu.

¹¹Na pa pre mẽ apê mẽ ixkra pyrak mẽ anhyrja o ri mẽ akõt ixpa.

¹²Jao mẽ amã ixkapěr mex nẽ. Nẽ mẽ akaprĩ nẽ apa xwỳnhjaja pa prem akupỳm mẽ ajamaxpěr o mẽ axihtỳx hãmri nẽ mẽ apiitã mẽ amã ixkapěr nẽ mẽ amã: —Kwa kêr ka mẽ Tĩrtũm kõt amnhĩ nhĩpêx mex rãhã ho ri apa nẽ aa hkaga hkêt nẽ. Anẽ. Tĩrtũm tãm na pre amnhĩ wỳr mẽ pahwỳ pu prem hkõt amnhĩ xunhwỳ. Tã koja nhỹrmã amnhĩ wỳr mẽ pahto api pu mẽ Kra Jejus kukwak ri wa kuri pamex kumrêx nẽ ri papa ho papa. Jakamã kwa kêr ka mẽ hkõt amnhĩ nhĩpêx mex rãhã ho ri apa.

Jejus kwỳjaja kãm Jejus kõt amnhĩ xunhwỳr hkêt xwỳnhjê puma hkêt

Atre 17.1-9

¹³Nẽ ma mẽ awỳr mẽ inhmõrta ã na pa prem mẽ amã Tĩrtũm kapěr jarẽnh o ri mẽ akõt ixpa ka prem mẽ inhma nẽ mẽ ixte amnhĩ krã hkõt mẽ ixkapěr ã mẽ ixkamnhĩx kêt nẽ. Na ka prem ãm hãmri mẽ ixte Tĩrtũm kapěr jarẽnh ã mẽ ixpumunh kurê kumrêx nẽ amnhĩ kaxyw hkõt ajamaxpěr nẽ Jejus mẽ Hipêêxà wa hkõt amnhĩ xunhwỳ. Jakamã na pa hte mẽ amã ijamaxpěr nẽ mẽ anhy hã ixkĩnh nẽ. Hãmri nẽ Tĩrtũm mã mẽ anhy hã ixkĩnh jarẽnh o ri ixpa. Nà na ka htem arĩ Tĩrtũm kapěr kõt amnhĩ nhĩpêx mex nẽ.

¹⁴Nhũm hte mẽ akwỳjaja tee ri ja hã mẽ apumu nẽ Jejus ã mẽ atomnuj nẽ. Nom mẽ kapxipixjaja ã mẽ anhĩpêx anhỹr kêt nẽ. Jutej kamã Ijaew kwỳjaja na prem mẽ apyrà nẽ Jejus kôt amnhĩ xunhwỳ nhũm mẽ hkwỳjaja tee ri ja hã mẽ omu nẽ hã mẽ hipêx kati ho pa.

¹⁵Amnepê m Ijaew na prem Tĩrtũm nhỹ hã mẽ kãm kapêr o mẽ pa xwỳnhjê homnuj nẽ mẽ hkwỳjê hpar o pa. Hãmri nhũm hpãnhã mẽ hkanrêhã mẽ htãmnhwỳjaja mẽ urak nẽ Pahihti Jejusja pĩ. Tã jarãhã mããnẽn ã Jejus ã mẽ panhĩpêx anẽ nhũm Tĩrtũm tee ri mẽ pahtã mẽ omu nhũm ja kêp omnuj tỳx kumrêx nhũm mẽ pahtã mẽ kamã gryk nẽ. Na hte mẽ apê Ijaew kêt xwỳnhjê ho hkra nhũm Ijaew kãm ja prãm kêt

¹⁶Jakamã na htem mẽ akwỳ kot Tĩrtũm kôt amnhĩ xunhwỳr pymaj mẽ anê mẽ ixkurê nẽ mẽ inhmã: —Kwa Ijaew kêt xwỳnhjê mã Tĩrtũm kapêr jarênh kêt nẽ. Ja mex kêt. Anẽ. Mẽ ate Jejus kôt amnhĩ xunhwỳr nẽ nhỹrmã Tĩrtũm wa kuri atĩr tũm nẽ apaja mẽ kãm hprãm kêt jakamã na htem ã mẽ anê àmnar o pa anhỹrja o amnhĩ tomnuj nẽ. Mẽ kot amnhĩ tomnuj tỳx o mẽ pa xwỳnh jakamã na Tĩrtũm mẽ kamã gryk nẽ. Koja nhỹrmã mẽ kot amnhĩ xà htỳx kamã hamak tũm xà hwỳr mẽ rênh pa.

Pawre akupỹm Tesarõn nhõ xwỳnhjê hwỳr hkrà hã harênh

Atre 17.10-13

¹⁷Nẽ ma mẽ awỳr mẽ inhmõr tã mẽ anhõ krĩ kamã mẽ kêp Kris kwỳ hkêt xwỳnhjaja na pre mẽ ixpumu nẽ mẽ anê mẽ ijano pa prem ijapõj nẽ hpãnhã ma nhỹhỹm krĩ hõ hwỳr ixpa. Nom arĩ mẽ amã ijamaxpêr rãhã nẽ mẽ ato ijamak o ri ixpa nẽ xatã akupỹm mẽ awỳr ixkrà.

¹⁸Na pa prem inhmã akupỹm mẽ awỳr inhmõr prãm tỳx nẽ. Ixpê Pawre na pa pre xatã mẽ awỳr ixkrà htã nhũm Satanasti tanhmã mẽ anê ixpê amnar to pa kormã mẽ awỳr inhmõr kêt nẽ. ãm tee ri inhmõr prãm kaprỳ.

¹⁹⁻²⁰Mẽ inhmã mẽ akĩnh tỳx. Mẽ ate Tĩrtũm kôt amnhĩ nhĩpêx mex jakamã koja nhỹrmã Pahihti Jejus akupỹn mẽ pahwỳr wrỳ pa mẽ akuri xa nẽ kãm mẽ ajarênh o: —Pa Pahihti. E Tesarõn nhõ xwỳnhjê pumu. Na ka pre mẽ hwỳr inhmẽ pa mẽ hwỳr mõi nẽ mẽ kãm ajarẽ nhũm prem inhma nẽ amnhĩ

kaxyw akôt hamaxpër tỳx nẽ akôt amnhĩ xunhwỳ. Tã na htem akôt tãm amnhĩ nhĩpêx rãhã ho pa. Anhỹr o kãm mẽ ajarẽ nẽ mẽ anhỹ hã ixkĩnh tỳx kumrẽx.

Wam Tesarõn 3

Pawre kot Tesarõn wỳr Ximotre mẽn̄h ã harẽn̄h

Atre 17.14-15; 18.5

1-5Nẽ kormã mẽ akôt ixpa ri na pa pre Kris kwỳ hkêt xwỳnhjaja kot Kris ã tanhmã mẽ atomnuj to hkukamã mẽ amã mẽ harẽ ka prem mẽ inhma. Na htem ã Kris ã mẽ pahkurê xwỳnhjaja mẽ panhĩpêx anhỹr o pa. Tã nhũm prem ã mẽ anhĩpêx anẽ pa mẽ ajarẽn̄h ma nẽ tee ri mẽ akukamã ijamaxpër nẽ axpẽn̄ mã mẽ ajarẽn̄h o: —Hêxta waa nẽ. Kwa mẽ kot Jejus ã tanhmã mẽ homnuj toja mỳrapê mãn mẽ tee ri amnhĩ kukamã hamaxpër nẽ Jejus kaga rỳ ko. Mãn ra Satanasti tanhmã mẽ kãm Jejus o hêx to nhũm mẽ kuma nẽ tanhmã hamaxpër to nẽ hkaga. Kwa mãn pu prem ãm mẽ kãm Tĩrtũm kapër jarẽn̄h kaprỳ nà? Anẽ. Hãmri nẽ tee ri mẽ akukamã ijamaxpër nẽ mẽ awỳr Ximotre mẽn̄h kaxyw nẽ kãm: —Mãn ra Tesarõn nhõ xwỳnhjaja Jejus ã tanhmã mẽ homnuj to nhũm mẽ amnhĩ xà htỳx kamã hamak o ra tee ri amnhĩ kukamã hamaxpër. Kwa ma mẽ hwỳr mỗ nẽ ja hã mẽ omu. Hãmri nẽ mẽ kot Kris kôt amnhĩ xunhwỳr tỳx kaxyw mẽ hamaxpër o axihtỳx. Hãmri nẽ akupỹn wa ixwỳr mỗ nẽ wa inhmã tanhmã mẽ harẽn̄h to. Kot paj Siras mẽ wa akutêp jar Atenas kamã wa arĩk. Anẽ. Hãmri nẽ mẽ awỳr kumẽ. Ximotre na hte Siras mẽ wa inhĩhkô hã mẽ kãm Tĩrtũm kapër jarẽn̄h o pa. Nẽ Kris kot tanhmã mẽ panê amnhĩ nhĩpêx toja nhũm wa inhĩhkô hã mẽ kãm harẽn̄h o pa. Tã pa pre mẽ awỳr kumẽ nhũm ma mẽ awỳr mỗ pa Siras mẽ wa Atenas kamã kutêp arĩk.

Ximotre akupỹn mỗr nẽ Pawre mã mẽ harẽn̄h

6Tã nhũm ra ham akupỹn mẽ arũm wa ixwỳr mỗ nẽ wa inhmã tanhmã mẽ ajarẽn̄h to pa wa mẽ ajarẽn̄h ma nẽ ixkĩnh nẽ. Na ka xep htem arĩ amnhĩ kaxyw Kris kôt ajamaxpër tỳx rãhã nẽ. Jao mẽ amã mẽ piitã mẽ hkĩnh nẽ tanhmã mẽ ho mex to ho ri apa. Nẽ arĩ mẽ inhmã ajamaxpër nẽ ixpyrà nẽ mẽ amã mẽ ixpumunh prãm o ri apa.

⁷Nà ãm hãmri na ka htem ã amnhĩ nhĩpêx anê. Na pa wa ra jar ixpunuj nê ixpa nê Kris ã amnhĩ xà htỳx kamã ijamak tã mẽ ajarênh ma nê tãm ijamaxpêr.

⁸Tesarôn nhõ xwỳnhjaja kot Kris ã tanhmã mẽ anhĩpêx to htã ka mẽ arĩ hkôt amnhĩ xunhwỳr tỳx rãhã nê. Pa wa mẽ ajarênh ma nê mẽ anhỹ hã ixkĩnh pê tanhmã Pahihti Jejus mã amnhĩ nhĩpêx to ho ri ixpa.

⁹Nà na pa hte wa mẽ anhỹ hã ixkĩnh nê. Nê xatã Tĩrtũm mã mẽ ajarê nê kãm: —Pa Tĩrtũm. Nà ãm hãmri na ka pre amnhĩ kôt Tesarôn kãm akwỳjê xunhwỳr tỳx nê nhũm htem akôt amnhĩ nhĩpêx mex rãhã ho pa. ãm hãmri na ka hte ã mẽ hipêx anê. Na pa hte mẽ kot amnhĩ nhĩpêx mã ijamaxpêr o ri ixpa nê ixkĩnh nê. Anhỹr o kãm mẽ ajarê.

¹⁰⁻¹¹Nom kãm ja pix jarênh kêt nê. Na pa hte wa mãănên arĩgro hã nê kamàt kãm amnhĩ to Měpanhĩpêxà Tĩrtũm mẽ Pahihti Jejus Kris wa hwỳr kãm ixihtỳx rãhã ho ixpa nê wa kãm: —Kwa Tĩrtũm mẽ Jejus wa. Na pa wa ra inhmã Tesarôn wỳr inhmõr nê mẽ pahkwỳjê pumunh prãm tỳx nê. Kormã mẽ kot akapêr jatur xà mar kêt. Tã wa inhmã akupỹm mẽ hwỳr wa inhmõr nê mẽ kãm akapêr jatur xàm mênh prãm. Mẽ kot mar nê akôt amnhĩ nhĩpêx mex o pa kaxyw. Kwa xàt ka wa akupỹm mẽ hwỳr wa inhmẽ nà? Anê. Na pa hte wa ã amnhĩ to wa hwỳr rãhã ho ixpa anê. Tã koja wa akupỹm mẽ awỳr wa inhmẽ pa wa ma mẽ awỳr inhmõr kurê kumrêx.

¹²Koja Tĩrtũm tanhmã mẽ akrã hto ka mẽ amã axpên kĩnh pê tanhmã axpên to ajuta hto ho ri apa. Nê mẽ amã akwỳjê hã ma ho te mẽ kam amã amnhĩ tã ma pyràk o ri apa. ã kot kaj mẽ apiitã axpên nhĩpêx anê. Te wa inhmã mẽ akĩnh pê tanhmã mẽ ato mex to pyràk.

¹³Koja Tĩrtũm ja kaxyw tanhmã mẽ akrã hto ka mẽ tãm ajamaxpêr mex nê. Kêr kê Jejus nhỹrmã akupỹn wrỳ. Mẽ kot hkôt amnhĩ xunhwỳr xwỳnhjê mẽ ro hã akupỹn wrỳ. Hãmri ka mẽ Měpanhĩpêxà Tĩrtũm kutã amnhĩ kukamã ajamaxpêr nê tãm mẽ ate amnhĩ nhĩpêx ã amnhĩ pumunh kôt akĩnh nê apikunhar o kuri akuhê. No ri tee ri amnhĩ kamã ajamaxpêr nê ajakwamnajre nê akuhê hkêt nê.

Wam Tesarõn 4

Tĩrtũm kãm mēmoj prãm ã harēnh

Rõmãn 13.11-14; Epes 5.3-14

¹E Jejus kõt ixkwỳjaja. Na pa prem ma mẽ awỳr mō nē Tĩrtũm kapēr o mẽ ajahkre ho ri mẽ akõt ixpa. Mẽ ate mar nē Tĩrtũm kãm hprãm xà hkõt tanhmã amnhĩ nhĩpêx to kaxyw. Ka prem mẽ inhma nē hkõt amnhĩ nhĩpêx mex o ri apa. Tã kot paj axte ja hã tanhmã mẽ amã karõ hto. Pahihti Jejus nhỹ hã axte mẽmoj tã mẽ amã karõ. Jakamã kwa kêr ka mẽ arĩ Tĩrtũm kapēr kõt pix mã ri amnhĩ nhĩpêx mex nē ÿ hã amnhĩ to htỳx pê ã amnhĩ nhĩpêx anhỹr o ri apa.

²Na pa prem ra Jejus nhỹ hã mẽ amã mẽmoj tã karõ. Mẽ ate hkõt amnhĩ nhĩpêx prãm xàj mẽ amã hã karõ ka prem mẽ inhma.

³Nà mẽ pahte tãm amnhĩ nhĩpêx o papaja na Tĩrtũm kãm hprãm. No kêt mẽ pahtỳx ri nhãm mēnijê ho amnhĩkati o papaja na kãm hprãm kêt.

⁴Jakamã kwa kêr ka mẽ amyjaja aprõ pix tãnopxar o ri apa. No mẽ ri nhãm mēnijê ho amnhĩkati ho ri apa hkêt nē. Nē mẽ anijaja kêr ka mẽ amjên pix tãnopxar o ri apa. No mẽ ri nhãm mẽmyjê ho amnhĩkati ho ri apa hkêt nē.

⁵Jejus kwỳ hkêt xwỳnhjaja kot htỳx ri kãm hprãm xà hkõt mēnijê hwỳr mrar nē mẽ ho amnhĩkati htã kêr ka mẽ ho mẽ uràk kêt nē. Kwarĩ ho kwarĩ.

⁶ã mẽ kot amnhĩ nhĩpêx anhỹr xwỳnhjaja koja Tĩrtũm nhỹrmã mẽ homnuj tỳx kumrêx. Na pa prem ra mẽ amã ja jarẽ ka prem mẽ inhma. Jakamã kwa kêr ka mẽ ã amnhĩ nhĩpêx anhỹr o ri apa hkêt nē.

⁷Xà na pre Tĩrtũm ã mẽ pahte amnhĩ nhĩpêx anhỹr kaxyw amnhĩ wỳr mẽ pahwỳ nē mẽ pahto hkra? Nà ja kaxyw na pre mẽ pahto hkra hkêt nē. ãm mẽ pahte tãm amnhĩ nhĩpêx o ri papa kaxyw nē tãm ri axpēn nhĩpêx o ri papa kaxyw na pre mẽ pahto hkra.

⁸Jakamã kot kaj mẽ atõ ja hã mẽ inhma nē ãm mẽ inhma nē arĩ ã amnhĩ nhĩpêx anē. Hãmri nē mẽ pajaja mẽ ixkapēr nhĩrõp axãm kêt nē. Tĩrtũm

kapër nhîrôp kot kaj xa. Nê mãânên kot mẽ pahwỳr Karõ mẽnh xwỳnhja kapër nhîrôp kot kaj xa.

⁹Nê mẽ amã axpên kỉnh pê axpên to mex o apa hprãm xàj na pre Tĩrtũm tanhmã mẽ amã kapër o amnhĩrit to ka htem ã axpên nhĩpêx anhỹr o ri apa. Jakamã kot paj mẽ axte ja hã tanhmã mẽ amã nê hkêt nê.

¹⁰Na ka mẽ ra amã axpên kỉnh pê te mẽ kam amã amnhĩ tã ma pyræk o axpên nhĩpêx o ri apa. Nê pika pê Masetõn kamã Kris kôt mẽ akwỳjaja ka mẽ mãânên amã mẽ hkỉnh pê ã mẽ hipêx anê. Tã kêr ka mẽ arĩ ã amnhĩ nhĩpêx anhỹr rãhã nê.

¹¹Kot kaj mẽ ã amnhĩ nhĩpêx anê hãmri nê ajamakêtkati nê axàmnhĩx axàpênh pix tãnopxar o ri apa. Jao mẽ hakwa kamã nhãm tanhmã mẽ hixi jarênh to ho ri apa hkêt nê. Nê ãm amnhĩ pix tãnopxar o ri apa. Nê amnhĩ pa kukwak ri axàpkur kaxyw amnhĩm axàpênh mex o ri apa. Na pa prem ra ã ja hã mẽ amã karõ anê.

¹²Kot kaj mẽ ã amnhĩ nhĩpêx anê hãmri nê amã prãm xàj axàhwỳr o ri apa hkêt nê. Nhũm Kris kwỳ hkêt xwỳnhjaja mẽ ate amnhĩ nhĩpêx ã mẽ apumu nê axpên mã mẽ ate tãm amnhĩ nhĩpêx xwỳnhjê hã mẽ ajarênh kurê kumrêx.

Kris kwỳ htyk xwỳnhjê jarênh
Matêwre 24.29-31; Wam Korĩt 15.51-58

¹³E Kris kôt ixkwỳjaja. Na ka xep mẽ tee ri Kris kôt akwỳ htyk xwỳnhjê hkukamã ajamaxpêr. Jakamã kot paj ixprĩ hã tanhmã mẽ amã mẽ harênh to ka mẽ inhma. Nà Kris kwỳ hkêt xwỳnhjaja na htem ty nhũm mẽ hkwỳjaja tee ri mẽ hkukamã hamaxpêr o hkaprĩ nê. Mẽ htyk nê ma Jejus wỳr àpir kêt jakamã na htem mẽ mỳr pê hkaprĩ htỳx nê pa. No mẽ papajaja na pu htem ho mẽ uræk kêt nê.

¹⁴Jejus na pre ty nhũm Tĩrtũm akupỹm ho htĩr. Tã ra ã kot hipêx anhỹr jakamã koja nhỹrmã Jejus akupỹn wrỳ nê mẽ kot hkôt amnhĩ xunhwỳr nê htyk xwỳnhjê karõ nhũm man amnhĩ kôt kaxkwa rũm mẽ o wrỳ. Na pu htem ã ja kôt pajamaxpêr anê.

15-16 Na pre Pahihti Jejus inhmã hkôt mẽ pahkwỳ htyk xwỳnhjê jarēnh o: — Kot paj nhỹrmã akupỹn mẽ awỳr wrỳ ka mẽ ate ixkôt amnhĩ nhĩpêx xwỳnh piitã ma ixkutã axàpir o mỗ. Nom kot kaj mẽ arĩ atĩr nẽ apa xwỳnhjaja akumrêx axàpir kêt nẽ. Kormã. Kojã Tĩrtũm kapêr o mẽ wrỳk xwỳnh krãhtũmja Tĩrtũm mã pifti kakô. Kakôr tỳx pa ixkwỳ htyk nẽ hikwỹ xwỳnhjê mã ixkapêr nẽ ixàmra kamã mẽ kumra. Nhũm mẽ hkarõ akupỹn mẽ hwỳr wrỳ nẽ mẽ kãm gjêx pa. Hãmri nhũm mẽ akupỹm htĩr nẽ kànhmã hkrĩ hpa nẽ ma kumrêx ixkutã àpir o mỗ.

17 Hãmri ka mẽ ate ixkôt amnhĩ xunhwỳr xwỳnh arĩ mẽ atĩr nẽ apa xwỳnhjaja ka mẽ hã ajêt nẽ mẽ atipxi nẽ ma ixkutã axàpir o mỗ pu mẽ kakrã kamã axpẽn kaxpa. Hãmri nẽ mẽ pahpimràatã ma kaxkwam api nẽ inhõ krĩ hwỳr pôj. Kaj mẽ Tĩrtũm mẽ wa ixkuri amex kumrêx nẽ atĩr tũm nẽ apa ho apa. Anẽ.

18 ã Pahihti Jejus inhmã mẽ pakukamã mẽ pajarēnh anẽ. Jakamã kwa kêr ka mẽ tee ri mẽ pahkwỳ htyk xwỳnhjê hkukamã ajamaxpêr hkêt nẽ. ã ixujarēnh anhỹrta ã anohtỳx pê axpẽn jamaxpêr o axihtỳx o ri axpẽn kôt apa.

Wam Tesarõn 5

Mẽ pahte akupỹn Jejus wrỳk xà hã arĩgro pumunh kêt ã harēnh

Matêwre 24.32–25.13; Wam Pêtre 3.8-13

1-2 Nẽ mẽ pahte Jejus akupỹm wrỳk xà hã arĩgro pumunh kêt jakamã kot paj mẽ amã tanhmã hã kagà hto hkêt nẽ. Kojã nhỹrmã akupỹn mẽ pahwỳr nojarêt hãmri nẽ te kot mẽ ahkĩnh xwỳnh kot amnhĩ nhĩpêx pyrã nẽ mẽ pajaêr pê mẽ pahwỳr wrỳ.

3 Jakamã kojã kormã wrỳk kêt ri nhũm Kris kwỳ hkêt xwỳnh kot amnhĩ wỳr kamã hamak kêt xwỳnhjaja hãmri mex nẽ pa hã amnhĩ pumu nẽ hkĩnh nẽ pa. Nẽ axpẽn mã kapêr o: —Nà kojã Tĩrtũm tanhmã mẽ pahto hkêt nẽ. Arĩ mẽ pamex nẽ ri mẽ papa kênã. Nà kot puj mẽ paxàmnhĩx ri pajamakêtkati nẽ ri papa ho papa. Anhỹr o axpẽn mã kapêr rôm nhũm puh Jejus mẽ haêr pê akupỹn wrỳ. Hãmri nẽ ma mẽ kot amnhĩ xà htỳx kamã hamak o pa htũm

xà hwỳr mẽ rēnh pa nhũm mẽ tee ri kēp hpimxur prām kaprỳ. Te mẽ htujarô xwỳnh kot amnhĩ nhĩpêx pyràk. Na htem mex nē pa htã hpijagri kaxyw õhy xà htỳx kumrēx nē tee ri kām õhy xà hkêt prām kaprỳ ho hikwỹ.

⁴Nom mẽ kajaja kot kaj mẽ urà nē amnhĩ jaēr pē akupỹm wrỳk kām omu nē tee ri amnhĩ kukamã ajamaxpēr o akaprĩ hkêt nē.

⁵Mẽ pahpê Jejus kwỳ jakamã na pu htem kapēr kôt ri tãm amnhĩ nhĩpêx o ri papa. Jao te mẽ pahte mẽ kēp Jejus kwỳ hkêt xwỳnhjê kot amnhĩ nhĩpêx pyràk kêt.

⁶Na htem mẽ pahkĩnhã akupỹn wrỳk kukamã hamaxpēr kêt nē. Te htỳx ri mẽ õt rãhã ho hikwỹ pyràk. Nom mẽ papajaja na pu htem akupỹn wrỳk kamã pajamak o papa pē kām tanhmã amnhĩ nhĩpêx mex to rãhã ho ri papa.

⁷Te kot ja pyràk. Na htem kamàt kām gõr nē mẽmoj mã hamaxpēr kêt nē htỳx hikwỹ. Nē mẽ hkwỳjaja kamàt kām axpã nē htỳx ri tanhmã amnhĩ tomnuj to ho pa. Jao hamaxpēr mex kêt nē. Tã mẽ kēp Jejus kwỳ hkêt xwỳnhjaja hte mẽ uràk nē htỳx ri tanhmã amnhĩ tomnuj to ho pa nē akupỹn Jejus wrỳk mã hamaxpēr kêt nē.

⁸No kêt mẽ papajaja. Mẽ pahte hkôt amnhĩ xunhwỳr xwỳnhjaja. Kêr pu mẽ ho mẽ uràk kêt nē. Satanasti kām mẽ pahte amnhĩ tomnuj prām tã mẽ pahte kām hprãm xà hkôt amnhĩ nhĩpêx pymaj kêr pu mẽ mẽmoj punuj pē amnhĩ to htỳx rãhã ho ri papa. Nē amnhĩ kaxyw Jejus kôt pajamaxpēr tỳx rãhã nē. Nē mẽ pamã mẽ piitã mẽ hkĩnh pē mẽ kutã panojarêt rãhã ho ri papa. Nē nhỹrmã Tĩrtũm mẽ hkra Jejus wa kuri pahĩr tũm nē papa ho papa hkukamã mãn pajamaxpēr rãhã o ri papa. Kot puj mẽ ã amnhĩ nhĩpêx anē hãmri nhũm Satanasti tee ri mẽ pahte amnhĩ tomnuj prãm xàj mẽ pahkrãm pajamaxpēr punuj jagjēnh kaprỳ.

⁹Xà na pre Tĩrtũm mẽ pakamã gryk kām mẽ kot amnhĩ xà htỳx kamã hamak tũm xà hwỳr mẽ pajanor kaxyw mẽ parê? Nà na pre ja kaxyw mẽ parēnh kêt nē. ãm Pahihti Jejus Kris kukwak ri kot amnhĩ katut kôt mẽ pahte amnhĩ tomnuj rēnh par nē mẽ pahto hkra kaxyw na pre mẽ parê.

10Tã mẽmo kaxyw na pre Krisja mẽ panê ty? Nà nhỹrmã Tĩrtũm mẽ wa kuri mẽ pamex kumrẽx nẽ pahtĩr tũm nẽ papa ho papa hprãm xàj na pre mẽ panê ty. Jakamã koja nhỹrmã akupỹm amnhĩ kôt ma mẽ pahto àpir kaxyw akupỹn mẽ pahwỳr wrỳ pu mẽ amnhĩ kaxyw hkôt pajamxpěr xwỳnh piitã ma hkôt kaxkwa hwỳr api hãmri nẽ Tĩrtũm wa kuri pamex nẽ pahtĩr tũm nẽ papa ho papa. Kormã mẽ pahtĩr ri mẽ papa xwỳnhjaja nẽ ra mẽ htyk nẽ hikwỹ xwỳnhjaja nhũm akupỹm mẽ ho htĩr. Hãmri nẽ mẽ pahto hpimràatã amnhĩ kôt mẽ pahto àpir pa. Mẽ pahte hkôt amnhĩ xunhwỳr xwỳnh piitã koja Jejus nhỹrmã akupỹn wrỳ nẽ ã mẽ panhĩpêx mex anẽ.

11Tã ã kot anhỹr jakamã kwa kêr ka mẽ jam ajamxpěr o apa pẽ axpẽn jamxpěr o hihtỳx o ri axpẽn kôt apa. Nẽ Jejus kôt axpẽn jamxpěr o hihtỳx o ri axpẽn kôt apa. Ra ã mẽ ate axpẽn nhĩpêx anhỹr tã kêr ka mẽ arĩ ho anhỹr rãhã ho ri apa nẽ aa hkaga hkêt nẽ.

Tĩrtũm kapěr o mẽ pajahkre xwỳnhjê jarẽnh

Karatas 6.6; Wam Ximotre 5.17-19

12Nẽ kwa Kris kôt ixkwỳjaja. Na hte mẽ kot Tĩrtũm kapěr o mẽ ajahkre xwỳnhjaja mẽ ajahkre mex pẽ Tĩrtũm mã mẽ ajamãr mex o pa. Na htem ã mẽ anhĩpêx mex anhỹr rãhã ho ri mẽ akôt pa. Tã kwa kêr ka mẽ amnhĩ tã mẽ omu nẽ mẽ kapěr mar tỳx nẽ.

13Nẽ mẽ hã apijaam pẽ tanhmã mẽ ho mex to ho apa. Nẽ kwa kêr ka mẽ tãm axpẽn nhĩpêx nẽ axàmnhĩx ri ajamakêtkati nẽ axpẽn kôt ri apa ho apa.

Mẽ pahte tanhmã Kris kôt mẽ pahkwỳjê nhĩpêx to hã mẽ pamã karõ

Epes 4.1-6

14Nẽ koja Kris kôt mẽ anhĩõ kãm kaga nẽ pa ka mẽ ja hã omu nẽ kãm anẽ kê ã amnhĩ nhĩpêx anhỹr kêt nẽ. Kê hpãnhã amnhĩ xàpkur xà kaxyw àpẽn ho pa. Nẽ mẽ kãm ma ho mẽ pa xwỳnhjaja ka mẽ kãm mẽ hamxpěr o axihtỳx o ri mẽ hkôt apa. Nẽ kormã amnhĩ kaxyw Jejus kôt mẽ hamxpěr tohtuj anhỹr xwỳnhjaja ka mẽ tanhmã Jejus kôt mẽ ho mẽ axihtỳx to kê mẽ hkôt amnhĩ nhĩpêx mex o pa. E kêr ka mẽ ã mẽ axpẽn nhĩpêx anhỹr o ri apa nẽ axpẽn kamã agryk tokyx anhỹr kêt nẽ.

¹⁵Ně koja mēhō tanhmã atomnuj to ka mẽ ãm omu ně amnhĩ tã tanhmã ho hkêt ně. ãm ho mex o ri apa. Ně mẽ piitã tanhmã mẽ ho mex to hpix kukamã ajamaxpēr rãhã ně.

¹⁶ã mẽ pahte amnhĩ nhĩpêx anhỹr o papaja na Tĩrtũm kãm hprãm. Mě pahpê hkra hã pahkĩnh rãhã papaja na kãm hprãm.

¹⁷Ně mẽ pahte Tĩrtũm mã amnhĩ jarēnh rãhã ho papaja na mããnēn kãm hprãm.

¹⁸Ně tanhmã mẽ pakute htã arĩ Tĩrtũm mã mex o mex ã harēnh o papaja na mããnēn kãm hprãm. Mě pahkĩnh ně papa kamã kãm mex o mex ã harē. Rỳ mẽ pahpunuj ně papa htã arĩ kãm mex o mex ã harē. Rỳ nhũm mēhō tanhmã mẽ panhĩpêx to htã pu mẽ arĩ kãm mex o mex ã harē. ã mẽ pahte amnhĩ nhĩpêx anhỹr o papaja na Tĩrtũm kãm hprãm.

Mě pahte tanhmã Tĩrtũm Karō nhĩpêx to hã mẽ pamã karō

¹⁹Ně koja Tĩrtũm Karō mẽ amã mẽmoj tã tanhmã kapēr o amnhĩrĩt to ka mẽ ama ně hkôt amnhĩ nhĩpêx kurê kumrēx. Rỳ mēhō mã tanhmã akapēr to kurê kumrēx. No kêr ka mẽ ama ně ãm ama ně atỳx ri hã apa hkêt ně.

²⁰Rỳ nhũm mēhō Tĩrtũm Karō nhỹ hã tanhmã mẽ amã kapēr to ka mẽ ama ně agryk ně tanhmã ho akapēr punuj to hkêt ně.

²¹Koja Tĩrtũm kapēr kôt tanhmã mẽ amã mẽmoj jarēnh to ně ãm hãmri Tĩrtũm Karō nhỹ hã harēnh ã amnhĩ jarē. Ka mẽ ama ně hkôt amnhĩ nhĩpêx.

²²No koja Tĩrtũm kapēr kwỳm ri tanhmã mẽmoj jarēnh to hãmri ně Tĩrtũm Karō nhỹ hã ja jarēnh kêt ně. ãm amnhĩ krã hkôt harē. Ka mẽ tee ri ama ně amnhĩ krã kamã kapēr xir tỳx kêt ně. Jao hkôt amnhĩ nhĩpêx kêt ně.

Tanhmã Pawre kot mẽ ho Tĩrtũm wỳr to hã harēnh

Wam Tesarōn 3.3

²³Ně na pa hte mẽ ato Tĩrtũm wỳr o ri ixpa ně kãm: —Pa Tĩrtũm. Nà ate mẽ inhmã mẽ ijamakêtkati xà nhõr jakamã na pa htem anhỹ hã ixãmnhĩx ijamakêtkati ně ri ixpa. Jakamã kwa kêr ka tanhmã Tesarōn kamã akwỳjê ho kê mẽ amnhĩ to mex rãhã ri pa. Jao tãm amnhĩ nhĩpêx ně tãm ri

hamaxpěr rãhã nhũm Pahihti Jejus Kris akupÿn mẽ ixwÿr wrÿ. Anhÿr o mẽ ato kuwÿ.

²⁴Tã koja ã mẽ anhĩpêx anẽ. Ra kot amnhĩ jarẽnh xà hkôt. ã mẽ anhĩpêx anhÿr kaxyw na pre amnhĩm mẽ arê.

Kagà jatur xà

²⁵E Kris kôt ixkwÿjaja. Kwa kêr ka mẽ amnhĩ xwar ixto Tĩrtũm wÿr o apa.

²⁶Nẽ kêr ka mẽ atar Kris kôt mẽ pahkwÿjê piitã mẽ kãm mẽ ijarẽ.

²⁷⁻²⁸Nẽ kê Pahihti Jejus Kris mẽ akutã nojarêt rãhã ho pa. Ixte Pahihti nhÿ hã ã mẽ amã ixkapěr nẽ hã kagà anhÿr jakamã kêr ka mẽ atar Kris kwÿjê piitã mẽ kãm kamã harẽ kê mẽ piitã ixkapěr ma. Tã ãm ja pix na hapêx. Ixpê Pawre na pa ã mẽ amã kagà nhĩpêx nẽ mẽ awÿr mẽnh anẽ.

Sikũn Tesarõn

Sikũn Tesarõn 1

¹Pa Tesarõn nhõ xwỳnh kot Tĩrtũm kapěr mar kaxyw axpẽn wỳr mẽ apikuprõnh xwỳnhjaja? Xà mẽ amex na ka mẽ apa? Ixpê Pawre na pa axte mẽ awỳr kagà nhĩpêx nẽ kumẽ. Siras mẽ Ximotre mẽ pa mẽ awỳr kumẽ. Nà mẽ pahpê Mẽpanhĩpêxà maati Tĩrtũm mẽ Kra Jejus Kris kwỳ na pu mẽ.

²Jakamã na pa htem mẽ ato wa hwỳr rãhã ho ri ixpa. Wa kot mẽ akutã nojarêt rãhã ka mẽ ajamakêtkati nẽ apa kaxyw. Nẽ mẽmoj to mẽ akutã wa nojarêt rãhã ho pa kaxyw.

Tĩrtũm kot nhỹrmã hkrajê nhĩpêx kati xwỳnhjê homnuj tỳx ã harẽnh

Wam Pêtre 4.12-19

³Nẽ na ka htem amnhĩ kaxyw Tĩrtũm mã ajamaxpěr tỳx mex o ri apa. Nẽ axpẽn kutã anojarêt rãhã nẽ. Na pa htem ã mẽ ate amnhĩ nhĩpêx anhỹrja mã ijamaxpěr nẽ mẽ anhỹ hã ixkĩnh nẽ Tĩrtũm mã mẽ anhỹ hã ixkĩnh ã amnhĩ jarẽ.

⁴Nẽ nhỹhỹm ixpa nẽ nhỹri krĩm agjê nẽ kamã Tĩrtũm kôt mẽ pahkwỳjê mã mẽ ato amỹra nẽ mẽ kãm: —E pa mẽ amã Tesarõn kamã Kris kwỳjê jarẽ ka mẽ inhma. Nà mẽ õ krĩ kamã mẽ hkwỳjaja na htem Kris ã mẽ hipêx kati ho pa nhũm htem amnhĩ xà htỳx kamã hamak pê mex kêt nẽ pa. Tã nom tee ri amnhĩ kukamã hamaxpěr o Jejus kaga hkêt nẽ. Na htem arĩ hkôt amnhĩ nhĩpêx mex rãhã ho pa. Anẽ.

⁵ã mẽ ate mẽ kutã amnhĩ nhĩpêx anhỹr o apaja na hte Tĩrtũm hã mẽ apumu nẽ hkĩnh nẽ pa. Nẽ mẽ akukamã hamaxpěr o: —Mẽ kot Ixkra Jejus ã tanhmã mẽ hipêx to ho pa htã ãm hãmri na htem mẽ kutã amnhĩ to htỳx o pa nẽ mẽ umaj wa ixkaga hkêt nẽ. Na htem ã amnhĩ nhĩpêx anẽ nẽ mẽ kêp ixkra hã amnhĩ to amnhĩrĩt mex nẽ. Nà koja mẽ nhỹrmã wa ixri mex kumrêx nẽ htĩr tũm nẽ pa ho pa. Anhỹr o hamaxpěr.

⁶Nẽ mẽ kot Kris ã mẽ anhĩpêx punuj xwỳnhjaja koja Tĩrtũm nhỹrmã mẽ atã mẽ homnuj tỳx nẽ nhũm mẽ amnhĩ xà htỳx kamã hamak rãhã ho pa. ãm hãmri koja ã mẽ atã mẽ hipêx anẽ.

7-10 Koja Pahihti Jejusja nhÿrmã man akupÿn pika hwÿr hirã htÿx kãm wrÿ nhÿm Tÿrtÿm kapÿr o mẽ wrÿk xwÿnh xihtÿx xwÿnhjaja man hkôt wrÿ. Koja mẽ wrÿ hãmri nẽ mẽ kot amnhÿ tomnuj xwÿnhjê homnuj tÿx kumrêx. Jao ma mẽ kot amnhÿ xà htÿx kamã hamak tÿm xàta wÿr mẽ rênh pa nhÿm mẽ kamã htÿr tÿm nẽ amnhÿ xà htÿx kamã hamak rãhã ho pa ho pa. Koja ã Pahihtija amnhÿ nẽ mẽ kot hkôt amnhÿ xunhwÿr kêt xwÿnhjê rênh anẽ nhÿm mẽ pahkÿnhã Tÿrtÿm mẽ Krata wa kuri mex nẽ pa hkêt nẽ. Nẽ mẽ pahkÿnh ã wa mex o wa mex nẽ wa hihtÿx o wa hihtÿx ã wa omunh kêt nẽ. Koja Pahihti Jejus nhÿrmã akupÿn wrÿ nẽ ã mẽ panê mẽ hipêx anẽ. Koja wrÿ pu mẽ amnhÿ kaxyw hkôt pajamxpÿr xwÿnhjaja amnhÿ wÿr omu nẽ pahkÿnh nẽ. Hãmri nẽ amnhÿ nhÿ nyw ã amnhÿ pumu nẽ kãm: —Hêxta waa nẽ. Amex o amex Pahihti. Na ka pre mẽ inhnê ty hãmri nẽ mẽ inhmã mẽ inhÿ nyw gõ. Kot paj mẽ Tÿrtÿm mẽ war ari inhmex kumrêx nẽ ixtÿr tÿm nẽ ixpa ho ixpa. ãm hãmri na ka ã mẽ ixto mex anẽ. Nà amex kumrêx o amex kumrêx Pahihti. Anẽ. ã kot puj mẽ pahpê hkwyjaja amnhÿ tã kãm mex o mex ã harênh anẽ. Ra mẽ ate mẽ ixkapÿr mar nẽ hkôt amnhÿ xunhwÿr jakamã kot kaj mẽ ixpyrà nẽ ã kãm mex o mex ã harênh anẽ.

Pawre kot Tesarôn nhõ xwÿnhjê ho Tÿrtÿm wÿr ã harênh

11-12 Nẽ na pa htem mẽ ato Tÿrtÿm wÿr rãhã ho ixpa nẽ kãm: —Pa Tÿrtÿm? E Tesarôn kãm akrajaja na pa mẽ ho awÿ. Na ka hte Akra Pahihti Jejus Kris mẽ wa mẽ ho mex rax o apa. Jao amnhÿm mẽ arê nhÿm mẽ ra kãm amnhÿ to mex prãm nẽ. Na htem amnhÿ kaxyw Jejus mã hamaxpÿr rãhã pê mẽmoj to xypÿn kutã nojarêt o pa. Jakamã kwa tanhmã mẽ hkrã hto kê mẽ akôt ã amnhÿ nhÿpêx anhÿr rãhã ho pa. Kêr ka mẽ kot akôt amnhÿ nhÿpêx o pa hã mẽ omu nẽ akÿnh nẽ mẽ kãm mẽ mex ã mẽ harê. Nhÿm mẽ ate tanhmã mẽ ho mex to hã amnhÿ tã apumu hãmri nẽ mẽ amnhÿ pyrà nẽ amã amex o amex ã ajarênh rãhã ho pa. Anẽ.

Sikÿn Tesarôn 2

Kot amnhÿ tomnuj tÿx kumrêx xwÿnh maati jarênh

Matêwre 24.23-25; Makre 13.14-23; Rukre 21.20-24; Wam Juãw 2.18-19; Apokarip 13.1-18

¹Ně koja nhỹrmã mẽ panhõ Pahihti Jejus Kris akupỹn wrỳ pu mẽ ma kutã api nẽ kakrã kamã hkaxpa. Jakamã kwa Jejus kôt ixkwỳjaja.

²Koja mēhõ mẽ awỳr mō nẽ mẽ amã Jejus ra akupỹn wrỳk ã harēnh japēr. Rỳ tanhmã mẽ amã Jejus hpôx xà hã arĩgro jarēnh o hêx to nẽ mẽ amã: — Kwa na ra Jejus akupỹn nojarêt. Koja tokyx akupỹn mẽ pahwỳr wrỳ. Semãn ja kamã rỳ ko. Apu hõ hã koja apu wrỳ rỳ ko. Anhỹr o harẽ. Nẽ Tĩrtũm Karõ nhỹ hã ã kot mẽ amã harēnh anhỹr ã amnhĩ jarẽ rỳ nhãm mēhõ kot ã kãm harēnh anhỹr ã harẽ. Rỳ pa ixte harēnh nẽ hã kagà hã ijarẽ. Nom kwa kêr ka mẽ kapēr ma nẽ ãm ama nẽ hkôt ajamaxpēr kêt nẽ. Rỳ ama nẽ tee ri amnhĩ kukamã ajamaxpēr kêt nẽ. Koja mēhõ ã mẽ amã Jejus tokyx wrỳk ã harēnh anẽ nẽ ãm amnhĩ krã hkôt ã harēnh anhỹr o hêx. Nom Tĩrtũm Karõ nhỹ hã rỳ pa inhỹ hã rỳ nhãm Kris kôt mẽ panhĩõ nhỹ hã ã harēnh anhỹr kêt nẽ.

³⁻⁴Jakamã kêr ka mẽ ãm mẽ kot harēnh o hêxja ma nẽ hkôt ajamaxpēr kêt nẽ. Kormã Pahihti Jejusja akupỹn nojarêt kêt. E kot paj ixprĩ hã mẽ amã ja jarẽ ka mẽ inhma. Nà kormã Pahihti akupỹn nojarêt kêt ri koja mẽ ohtô rax kumrēx nẽ Tĩrtũm kutã amnhĩ xunhwỳ nẽ kãm hkurê ho pa. Nẽ amnhĩ tomnuj tỳx o pa. Hãmri nhũm ra kot amnhĩ tomnuj tỳx kumrēx xwỳnh maatija amnhĩ to amnhĩrĩt. Nom na pre ra Tĩrtũm tanhmã kot hipêx to hkukamã hã amnhĩ jarẽ. Koja xep gaa nẽ ma mẽ kot amnhĩ xà htỳx kamã hamak tũm xàta wỳr kumẽ nhũm kamã amnhĩ xà htỳx kamã hamak o pa rãhã nẽ pa ho pa. Tã nom kormã Pahihtija akupỹn wrỳk nẽ ma hwỳr mēnh kêt ri koja mẽ piitã omu nẽ kêp Mēhpãm maati pixi hã harēnh kaxyw mẽ kêp mẽ õ sãnti piitã hkrakrak pa. Nẽ mẽ kot mẽmo karõ ho amnhĩ pãm ã harēnh xwỳnhja nhũm piitã hkrakrak pa. Hãmri nẽ axtem nẽ Tĩrtũm mã amnhĩ jarēnh xà hã ixkre jatur xà kamã hitom wỳr axà nẽ kamã nhỹ nẽ hêx rom mẽ piitã mẽ kãm kêp Tĩrtũm ã amnhĩ to hêx nẽ mẽ kãm: —E mẽ amnẽ ixpumu. Ixpê mẽ anhõ Tĩrtũm na pa. Pa kot kaj mẽ inhmã inhmex o inhmex ã ijarẽ. No kêr ka mẽ anhõ sãnti ho apãm o apa hkêt nẽ. Kwarĩ ho kwarĩ.

Ãm paxipix ixpê Měapãm maati nê paxipix ixpê mẽ anhõ Tĩrtũm. Anhỹr o amnhĩ to hêx.

⁵Na pa pre arĩ mẽ akõt ixpa ri ã mẽ amã harênh anê. Mãn arĩ mẽ ate ja hã anohtỳx rỳ ko.

⁶Nom kormã ã kot amnhĩ nhĩpêx anhỹr xà hã arĩgrota kormã kator kêt. Mêhõ kormã kot kêp àmnàr jakamã nhũm kormã kator kêt nê. Ra mẽ ate kêp àmnàr xwỳnhja jarênh mar. Tã koja hpôx xà hã arĩgro kato nhũm kêp àmnàr xwỳnhja kãm pry kaprã nhũm rĩ kormã mỗ.

⁷Nom na hte ra hpimxur pê Tĩrtũm nê mẽ piitã mẽ hkurê ho pa. Mẽ kot Tĩrtũm kõt amnhĩ xunhwỳr pymaj tanhmã nê mẽ ho ho pa. Nom kormã kêp àmnàr xwỳnhja kêp àmnàr jakamã nhũm hte mẽ noo mã tanhmã mẽ ho hkêt nê. Tã koja Tĩrtũm nhỹrmã kêp àmnàr xwỳnhja mã anê nhũm kuma nê kãm ure nhũm rĩ kormã amnhĩ to amnhĩrĩt nê mẽ piitã mẽ noo mã mỗ nê Tĩrtũm nê tanhmã mẽ kãm hêx to ho pa.

⁸⁻¹²Koja kato nê Satanasti mẽ wa mẽ piitã tanhmã mẽ nokupyr to ho ri mẽ hkõt pa. Nê hêx rom mẽ kãm aa mẽ kot mẽmoj pumunh kêt kwỳ ho anhỹr o ri pa. Koja wa hêx rom te Tĩrtũm kot amnhĩ nhĩpêx pyrãk o ã amnhĩ nhĩpêx anê. Hãmri nhũm mẽ kot Jejus kõt amnhĩ xunhwỳr kêt xwỳnhjaja ja hã wa omu nê wa hkõt hamaxpêr kurê kumrêx. Nê ãm hãmri wa kapêr ã wa hkamnhĩx. Kop apu ra mẽ kot Tĩrtũm kapêr mar nê hkõt amnhĩ xunhwỳr ronhỹx ra Tĩrtũm amnhĩ tã mẽ omu nê mẽ ho hkra. Nom koja mẽ kãm kapêr mar prãm kêt nê. Ãm wa kot amnhĩ to hêx o wa pa xwỳnhja kõt pix mã koja mẽ kãm amnhĩ nhĩpêx prãm. Ja mỳrapê koja Tĩrtũm tee ri ja hã mẽ omu hãmri nê mẽ nê wa kot amnhĩ tomnuj tỳx xwỳnhja wa omunh kêt nhũm wa tanhmã mẽ kãm amnhĩ nhĩpêx to nhũm mẽ wa omu nê wa hkõt hamaxpêr kurê kumrêx. Hãmri nê wa gryk ã Tĩrtũm kaga jakamã nhũm nhỹrmã mẽ kot amnhĩ xà htỳx kamã hamak tũm xàja wỳr mẽ rênh pa. Koja Satanasti mẽ kot amnhĩ tomnuj tỳx kumrêx xwỳnh maatita ã hêx rom tanhmã mẽ no kupyr to anhỹr o pa rãhã nhũm Pahihti Jejusja hirã rax kãm akupỹn mẽ pahwỳr wrỳ. Hãmri nê kot amnhĩ tomnuj tỳx kumrêx xwỳnh maatita ã

amÿnê nhũm mẽ kãm hpĩr kurê kumrêx nhũm hapêx. Koja ã amnhĩ nhĩpêx anê.

Tĩrtũm kot tanhmã mẽ pahto mex to hã harênh

Rõmãn 8.28-30; Wam Tesarõn 2.13; 5.23-24

13Nê amnepêh kormã mẽmoj kêt ri na pre Tĩrtũm amnhĩm mẽ arê. Mẽ ate kapêr mar nê hkôt amnhĩ xunhwÿr nhũm kot mẽ ato hkra kaxyw mẽ arê. Kãm mẽ ajapêê. Na pre mẽ awÿr amnhĩ Karõ rê nhũm mẽ akarõ mã agjê nê tanhmã mẽ ajamexpêr to ka mẽ ÿ hã tãm amnhĩ nhĩpêx rãhã ho ri apa. Na pa htem ja hã mẽ amã ijamexpêr nê mẽ anhÿ hã ixkĩnh kãm Tĩrtũm mã mẽ ajarênh o ri ixpa.

14Na pre mẽ awÿr mẽ ixrê. Mẽ ixte mẽ awÿr ixpa nê mẽ amã tanhmã Jejus kot mẽ panê amnhĩ nhĩpêx to hã harênh o ixpa kaxyw. Mẽ ate mẽ inhmar nê Jejus kôt amnhĩ xunhwÿr nhũm Tĩrtũm kot Pahihti Jejus Kris o mex pyrà nê tanhmã mẽ ato mex to kaxyw.

15Jakamã kwa kêr ka mẽ ra mẽ ixte wam mẽ awÿr kagà mênhta kamã harê nê mar tÿx nê. Nê mẽ akôt mẽ ixpa ri tanhmã mẽ ixte mẽ ajahkre htoja mã ajamexpêr mex nê hã ano htÿx nê hkôt amnhĩ nhĩpêx rãhã ho ri apa. Jao Jejus kôt amnhĩ nhĩpêx mex o ri apa Kris kôt ixkwÿjaja.

16Mêpanhĩpêêxà maati mẽ Pahihti Jejus Kris wa kãm mẽ pajapê htÿx kumrêx. Na hte wa tanhmã mẽ pajamexpêr o hihtÿx to ho pa pu mẽ wa ÿ hã tãm pajamexpêr o ri papa. Nê wa ÿ hã nhÿrmã wa kuri pamex nê pahtĩr tũm nê papa hkukamã pajamexpêr kaprÿ ho papa hkêt nê.

17Na pa htem mẽ ato wa hwÿr o ixpa nê wa kãm: —Pa Tĩrtũm mẽ Jejus wa? Kwa kêr ka wa tanhmã Tesarõn kamã akrajê mã mẽ hamexpêr o hihtÿx to kê mẽ war anhÿ hã tãm amnhĩ nhĩpêx nê tãm hamexpêr. Jao kapêr mex rãhã nê pa ho pa. Anê.

Sikũn Tesarõn 3

Tanhmã mẽ pahte axpên to Tĩrtũm wÿr to hã kot mẽ pamã karõ

Korosê 4.2-4

¹Ně kwa Kris kôt mẽ ixtõ ně ixtõxjaja. Kêr ka mẽ amnhĩ xwar mẽ ixto Tĩrtũm wỳr rãhã ho ri apa. Mẽ ixte krĩ piitã hkôt mẽ kãm Jejus jarẽnh o ri mẽ hkôt ixpa nhũm mẽ kot mẽ inhmar ně amnhĩ kaxyw Jejus kôt hamaxpěr kaxyw. Jao mẽ apyrà ně hkôt amnhĩ nhĩpêx mex o pa kaxyw.

²Nom koja mẽ piitã ã amnhĩ nhĩpêx anhỹr kêt ně. Mẽ hkwyjaja kãm Jejus jarẽnh mar prãm kêt jakamã kwa mẽ ixto Tĩrtũm wỳ kêt mẽ inhnê mẽ omunh mex ně nhũm mẽ Jejus ã tanhmã mẽ ixto hkêt ně.

³Ně koja Pahihti tanhmã mẽ akrã hto ka mẽ ajamaxpěr mex ně ỹ hã hkôt amnhĩ xunhwỳr tỳx o ri apa. Jakamã nhũm Satanasti mẽ ate amnhĩ tomnuj hprãm xàj tee ri tanhmã mẽ anhĩpêx to kaprỳ nhũm Pahihti mẽ anê omunh mex ně. Ra kot mẽ atã amnhĩ jarẽnh xà hkôt.

⁴Koja ã mẽ anê hipêx anẽ ka mẽ ỹ hã tanhmã mẽ ixte mẽmoj tã mẽ amã karõ xà hkôt amnhĩ nhĩpêx mex o ri apa.

⁵Tã kêt Pahihti tanhmã mẽ akrã hto ka mẽ Tĩrtũm pyrà ně mẽ piitã mẽ kamã axukaprĩ ho ri apa. Ně Pahihti Kris pyrà ně mẽmoj punuj kutã amnhĩ to htỳx ně. Jao hkôt amnhĩ nhĩpêx mex rãhã ho ri apa.

Mẽ kãm kaga xwỳnhjê jarẽnh

Wam Korĩt 4.12; Epes 4.28; Wam Tesarõn 4.9-12

⁶E kot paj hpãnhã Kris kôt mẽ pahkwỳ kãm kaga xwỳnhjê jarẽ ka mẽ inhma. Pahihti Jejus nhỹ hã kot paj mẽ amã tanhmã mẽ harẽnh to. Nà koja mẽ akwyjaja kãm kaga ně amnhĩm mẽmoj tã àpênh kêt japêr. Ně mẽ ixte mẽ axàpênh mex o apa hã mẽ amã karõja kuhpa hã amnhĩm mẽmoj tã àpênh kêt japêr. Koja mẽ ã amnhĩ nhĩpêx anẽ ka mẽ ja hã mẽ omu hãmri ně mẽ hkôt ri apa hkêt ně.

⁷⁻⁸Xà mẽ pajaja na pa prem ma mẽ awỳr mō ně mẽ akôt inhmã kaga ně mẽmoj tã ixàpênh kêt ně ri ixpa? Nà na pa prem mẽ apa kukwak ri ixàpkur pymaj ixàpênh rũnh ně amnhĩ pa pix kukwak ri ixàpkur o ri ixpa. Na ka prem mẽ inhmã mẽmo mẽ apkur xà ho mra pa prem amarĩ amnhĩm hamỳnh ně hkur kêt ně. Na pa prem hpãnhã mẽ amã amnhĩre ně kormã kuku. Tã kêr ka mẽ ã amnhĩ nhĩpêx anhỹr o ri axpẽn kôt apa ně amnhĩ pa pix kukwak ri

apku. Nē mẽ amã kaga hã nhãm akwỳjê hpa kukwak ri axàpkur o ri apa kêt nē.

⁹Na pa prem amnhĩ pa pix kukwak ri ixàpkur o ri mẽ akôt ixpa. Mẽ ate ja hã mẽ ixpumunh nē mẽ ixpyrà nē ã amnhĩ nhĩpêx anhỹr kaxyw. Nom mẽ ixte Jejus mã tanhmã mẽ ajahkre hto nhũm mẽ ate mẽ inhmar nē hpãnhã mẽ inhmã mẽ ixàpkur xà nhõrja Jejus mã tanhmã kute hkêt tã pa prem ã amnhĩ nhĩpêx anhỹr kêt nē. Mẽ ate ja hã mẽ ixpumunh nē mẽ ixpyrà nē ã amnhĩ nhĩpêx anhỹr kaxyw na pa prem amnhĩ pa pix kukwak ri ixàpkur o ri mẽ akôt ixpa.

¹⁰Na pa prem mẽ amã ja hã karõ ho: —Koja mēhõ kãm kaga nē àpênh kêt nē ka mẽ ja hã omu nē kãm õ hkêt nē. Kwār māmri apkur kêt nē kãm prãm nē ri pa nē amnhĩ pumu. Anē.

¹¹Tã xep ra mẽ akwỳjaja ã amnhĩ nhĩpêx anē nē kãm kaga nē àpênh kêt nē amarĩ ri pa. Nē xep htỳx ri axpên jakwa kamã nhãm mẽ hixi ho rêr o ri pa.

¹²Kwa mẽ inhma Jejus kôt ixkwỳjaja. Kot paj Pahihti Jejus nhỹ hã mẽ amã mẽ kot ã amnhĩ nhĩpêx xwỳnhjê jarē ka mẽ inhma nē mẽ inhmar tỳx nē. Kêr ka mẽ kãm kaga xwỳnhjê mã anē kê mẽ jam ure nē hpãnhã àpênh mex o pa. Jao mẽ apyrà nē amnhĩ pa kukwak ri apkur o pa. Kêr ka mẽ ã mẽ kãm ixkapēr jarēnh anē.

¹³Nē kwa kêr ka mẽ axpên to mex o apata kaga hkêt nē.

¹⁴E na pa mẽ ã Tirtũm nhỹ hã mẽmoj tã mẽ amã karõ nē hã kagà anē. Tã koja mēhõ kamã harē nē kuma nē ãm kuma nē hkôt amnhĩ nhĩpêx kêt ka mẽ ja hã omu nē hkôt ri apa hkêt nē. Tokyx kot ja hã amnhĩ pumunh nē amnhĩ tã hpijaàm kaxyw.

¹⁵Nom arĩ Kris kôt kêp mẽ akwỳ jakamã kêr ka mẽ arĩ kêp mẽ atõ rỳ atõx ã tãm hipêx nē kãm akapēr mex o ri apa. Nom te ho kêp mẽ akwỳ hkêt pyràk o kãm akapēr kêt nē.

Tanhmã Pawre kot mẽ ho Jejus wỳr to hã harēnh

16-18 Nē na pa hte mē ato Pahihti Jesus wỳr rāhã ho ixpa. Kot mē pamã mē pajamakêtkati xà nhõr jakamã na pa htem mē ato kuwỳ nē kãm: —Pa Pahihti? Kwa kêr ka Tesarõn kamã akwỳjê pumu nē mēmoj to mē kutã anojarêt rāhã ho ri mē hkôt apa. Kê mē hamakêtkati nē àmnhĩx pa ho pa. Anē. Tã ãm ja pix. Ixpê Pawre na pa kagà jatur xà kamã inhĩhkra ho amnhĩ nhĩxi nhĩpêx. Na hte kagà nhĩpêx xwỳnh inhmã ixkapêr ã kagà. Nē hã kagà hpa pa hpãnhã hatur xà kamã pam inhĩxi nhĩpêx. Tã na hapêx.

Wam Ximotre

Wam Ximotre 1

¹Pa Ximotre? Xà amex? Ixpê Pawre na pa awÿr kagà nhîpêx nê kumê. Ixte Jejus Kris nhÿ hã mẽ ahkre ho ixpa kaxyw na pre Měpapytâr xwÿnh Tĩrtũm mẽ Jejus Kris wa ixta nê ixãm. Jejus kamã na pu htem pajamak rãhã ho ri papa.

²Nà ra ate ixkapêr mar xà hkôt Jejus kôt amnhĩ xãm jakamã te apê ixkra pyræk Ximotre. Jakamã na pa hte ato Měpanhîpêêxà maati Tĩrtũm mẽ panhõ Pahihti Jejus Kris wa hwÿr o ixpa nê ato wa hwÿr o: —Pa Tĩrtũm mẽ Pahihti wa. E Ximotre ho na pa war awÿr kaxyw. Kwa kêr ka wa kamã axukapřĩ nê kutã war anojarêt rãhã ho wa ri apa. Kot kaj wa ã ho mex anê nhũm war anhÿ hã hamakêtkati nê àmnhix pa ho pa. Anhÿr o na pa hte war ato kuwÿ

Tĩrtũm kapêr o mẽ ahkre xwÿnhjê jarênh

Rômãn 16.17; Wam Ximotre 6.3; Sikũn Ximotre 2.23; Xitre 1.5-16

³Nê na pu pre wa Epes kamã papa tã pika pê Masetõn wÿr panojarêt nê tee ri Epes kamã Tĩrtũm kapêr ho hêx o mẽ ahkre xwÿnhjê kapêr ma. Jakamã na pa pre amã: —E Ximotre kêr ka Masetõn wÿr ixkôt amõr kêt nê. ãm jar Epes kamã arík nê ixwakre kamã Tĩrtũm kapêr o mẽ hêx xwÿnhjê mã akapêr nê ã mẽ hêx anhÿrja nê mẽ hkurê ho ri mẽ hkôt apa. Anhÿr o amã harê hãmri nê Epes kamã are nê ma Masetõn wÿr ahte mõ.

⁴Mê hêx xwÿnhjaja amnepêm panhîgêjtjaja kot tanhmã amnhĩ nhîpêx to nê tanhmã ujarênh toja nhũm htem mẽ kãm harênh pix o pa. Nê mẽ hixi piitã harênh o pa. Na htem ã amnhĩ krã hkôt hkwÿjê mã ujarênh anhÿr o pa. Jao axpên kwÿm ri mẽ ahkre nê mẽ hã axpên mã àkjêr o pa. ã mẽ kot amnhĩ nhîpêx anhÿr jao Tĩrtũm nhÿ hã kãm hprãm xà hkôt mẽ ahkre hkêt nê. Kojã mẽhõ Tĩrtũm nhÿ hã kapêr o mẽ ahkre hãmri nê amnhĩ kaxyw kãm hamaxpêr tÿx pê tanhmã mẽ ahkre hto. Nom ixte amã mẽ harênh xwÿnhjaja Tĩrtũm nhÿ hã mẽ ahkre hkêt jakamã na pa pre inhnojarêt nê ã amã mẽ harênh anê nê mẽ kuri Epes kamã are.

⁵Tã kêr ka arĩ mẽ ahkre ho ri mẽ hkôt apa Ximotre. Nẽ Kris kôt mẽ pahkwỳjê mã anẽ kê mẽ amnhĩ kaxyw Jejus kôt hamaxpěr tỳx pê hamaxpěr mex o pa. Jao tanhmã hamaxpěr punuj to hkôt amnhĩ nhĩpêx kêt nẽ. Nẽ mẽ kãm anẽ kê mẽ te kãm amnhĩ tã ma pyræk o nhãm kãm mẽ hã ma ho pa.

⁶Ixte amã mẽ hêx xwỳnh jarênh xwỳnhjaja na htem ã mẽ ahkre anhỹr kêt nẽ. Na htem htỳx ri amnhĩ krã hkôt tanhmã mẽ ahkre hto.

⁷Tĩrtũm kot finat Mojes mã mẽmoj tã karõja mẽ kot mar tỳx ã amnhĩ kamnhĩx nẽ ho mẽ ahkre hprãm tã no ãm hprĩ hã mar kêt nẽ htỳx ri ho mẽ ahkre ho pa.

⁸Tĩrtũm kot Mojes mã mẽmoj tã karõja mex. Mẽ kot mar nẽ hkôt amnhĩ nhĩpêx o pa kaxyw na pre.

⁹No na pre mẽ kot tãm amnhĩ nhĩpêx xwỳnhjê mã ã hã karõ anhỹr kêt nẽ. ãm mẽ kot amnhĩ tomnuj xwỳnhjê mã na pre hã karõ. Mẽ kot mẽ õ pahi kapěr mar kêt xwỳnhjê mã. Nẽ mẽ kot Tĩrtũm kapěr nhĩrôp kuhê ho mẽ pa xwỳnhjê mã. Nẽ Tĩrtũm ã mẽ hpijaàm kêt xwỳnhjê mã. Nẽ mẽ kot mẽ hipêxà nẽ mẽ katorxà hpar xwỳnhjê mã.

¹⁰Nẽ mẽ hprõ kuhpa hã nhãm mênijê ho amnhĩkati xwỳnhjê mã. Nẽ mẽ mjên kuhpa hã nhãm mẽmyjê ho amnhĩkati xwỳnhjê mã. Nẽ mẽmyjaja kot mênijê kuhpa hã kãm amnhĩ kwỳ myjê hkĩnh nẽ mẽ ho amnhĩkati xwỳnhjê mã. Nẽ mênijaja kot mẽmyjê kuhpa hã kãm amnhĩ kwỳ nijê hkĩnh nẽ mẽ ho amnhĩkati xwỳnhjê mã. Nẽ mẽ kot mẽmoj to àhkĩnh nẽ nhãm mẽ kãm ho wênê o mẽ pa xwỳnhjê mã. Nẽ ri mẽ hêx o mẽ pa xwỳnhjê mã. ã mẽ kot Tĩrtũm kapěr kwỳm ri amnhĩ nhĩpêx anhỹr o mẽ pa xwỳnh piitã mẽ kaxyw na pre Mojes mã mẽmojta ã karõ. Mẽ kãm Jejus prãm kêt xwỳnhjê mã. Mẽ kot mar nẽ tãm amnhĩ nhĩpêx kaxyw.

¹¹Tã pa na pa hte Pahihti kot tanhmã mẽ panê amnhĩ nhĩpêx to hã harênh o ri mẽ hkôt ixpa. Ja kaxyw na pre Tĩrtũm ixãm. Tĩrtũmja mex o mex. Tãm na pre ja kaxyw ixãm.

Tanhmã Pahihti Jejus Kris kot Pawre ho mex to hã harênh

Atre 26.9-18

¹²Nē Pahihti Jejus Kris na hte ixto mex rāhā ho pa. Na hte tanhmā ixto pa ŷ hā mẽ piitā mẽ kām tanhmā kot mẽ panê amnhĩ nhĩpêx to hā harēnh o ri mẽ hkôt ixpa. Na pre ixte ā amnhĩ nhĩpêx anhỹrja kukamā inhmā ixàpēnh ā karō nē inhmā: —E ate amnhĩ kaxyw ixkôt ajamxpēr mex jakamā kēr ka ma mẽ piitā mẽ hkôt ri mẽ kām ixkapēr jarēnh o ri apa. Anē.

¹³Nom amnepēm na pa pre hkôt ijamxpēr kêt nē. Ām axtem nē haprỳ rūnh nē ho ixkapēr punuj o ri ixpa. Nē hkwỳjê ho ixkrihkrit nē mẽ haprỳ nē mẽ htak. Nom kormā amnhĩ kaxyw Kris kôt ijamxpēr kêt jakamā ixtỳx ā mẽ hipêx anhỹr o ixpa nhũm Pahihti ja hā ixpumu nē ixkamā ukapřĩ nē mẽ hā tanhmā ixto hkêt nē.

¹⁴Nē kām ijapê xàj mẽmoj to ixkutā nojarêt rāhā ho pa nē tanhmā ixkrā hto pa ra amnhĩ kaxyw hkôt ijamxpēr nē hkôt amnhĩ xām. Hāmri nē kukwak ri ra inhmā hkwỳjê hkĩnh nē hpānhā mẽ ho mex o ri mẽ hkôt ixpa.

¹⁵Nē Jejus Kris ra wrỳk nē mẽ pahte amnhĩ tomnuj piitā hpānhā amnhĩrer kaxyw mẽ panê htyk ā harēnhja na pa hte harēnh o ri ixpa. Ā kot amnhĩ nhĩpêx anhỹrja na mex o mex. Kê mẽ piitā kuma nē hā nohtỳx rāhā ho pa. Kormā ixte hkôt amnhĩ xām kêt ri na pa pre amnhĩ tomnuj tỳx kumrēx o mẽ piitā mẽ hakrenh

¹⁶nhũm Tĩrtũm ixpumu nē ixkamā ukapřĩ nē. Hāmri nē amnhĩ kaxyw ixām. Mẽ piitā mẽ kot ja hā ixpumunh nē axpēn mā ā ijarēnh anhỹr kaxyw. Nē ijarēnh o: —Kwa Pawre na pre amnhĩ tomnuj tỳx kumrēx o pa nhũm Jejus Kris ja hā omu nē kamā gryk tokyx anhỹr kêt nē. Na pre tanhmā hkrā hto nhũm ra tām amnhĩ nhĩpêx o pa. Kwa pu mẽ uràk nē amnhĩ kaxyw Jejus kôt pajamxpēr nē hkôt amnhĩ xunhwỳ. Kēr pu mẽ Pawre pyrà nē nhỹrmā Tĩrtũm mẽ Kraja wa kuri pamex nē pahtĩr tũm nē papa ho papa. Anhỹr o axpēn mā ijarēnh nē ixpyrà nē Jejus kôt amnhĩ xunhwỳr kaxyw na pre Tĩrtũm ā ixto mex anē.

¹⁷Jakamā na pa hte kām amnhĩ jarēnh kaxyw nē kām: —Pa Tĩrtũm? Nà kapxipix apê Pahi Maati. Nē arāhā ho arāhā nē amex o amex. Mẽ ixte inhno

ho aa apumunh kêt tã kapxipix apê Měinhĩpêêxà maati. Tã koja nhỹrmã mẽ piitã ã amã amex o amex ã ajarēnh anhỹr o pa. Aně.

Ximotre kot tanhmã Epes nhõ xwỳnhjê jahkre hto hã kãm karõ

Wam Korĩt 5.1-5

¹⁸Ně te apê ixkra pyræk Ximotre. Tã kot paj mẽmoj tã amã karõ ka inhma nẽ inhmar tỳx nẽ. Nà Pahihti Jejus mã ate tanhmã amnhĩ nhĩpêx to ho apa kaxyw na pa prem axãm nhũm Tĩrtũm nhỹ hã kapêr o mẽ pa xwỳnhjaja axàpênh kukamã amã kapêr nẽ amã: —E ate ma mẽ kãm Pahihti Jejus jarēnh o apa kaxyw Tĩrtũm kot axãm jakamã kêr ka ã amnhĩ nhĩpêx anhỹr o ri mẽ hkõt apa. Aně. Tã kot paj ijaxwỳja kagàja kamã amã ixkapêr nẽ mẽmoj tã amã karõ. Ka mar tỳx nẽ hkõt amnhĩ nhĩpêx mex pê Tĩrtũm mã amnhĩ nhĩpêx mex o ri apa. Jao aprĩ hã mẽ kãm tanhmã Jejus jarēnh to ho ri mẽ hkõt apa.

¹⁹Ně amnhĩ kaxyw Jejus mã ajamaxpêr mex nẽ. Nẽ mẽmoj punuj pumu nẽ amã ho anhỹr prãm tã Jejus nhỹ hã nê amnhĩ to htỳx nẽ ho anhỹr kêt nẽ. Jao tãm amnhĩ nhĩpêx ã amnhĩ pumunh mex o ri apa. Nom kot kaj ja nê amnhĩ to htỳx kêt nẽ tanhmã amnhĩ tomnuj to hãmri nẽ te ate Pahihti Jejus kaga pyræk. Na pre pahkwỳjaja ã amnhĩ nhĩpêx anhỹr o hkaga nẽ axte kãm hamaxpêr kêt nẽ.

²⁰Iměnew mẽ Aresãnja na pre wa ã amnhĩ nhĩpêx aně nẽ tanhmã Tĩrtũm o kapêr punuj to. Mỳrapê na pa pre Satanasti nhĩhkram wa haxà. Kot tanhmã wa ho nhũm wa kot tee ri amnhĩ tomnujta ã amnhĩ pumunh nẽ tokyx tãm amnhĩ nhĩpêx nẽ axte ã amnhĩ nhĩpêx anhỹr kêt kaxyw.

Wam Ximotre 2

Tanhmã mẽ pahte Tĩrtũm mã amnhĩ jarēnh to hã mẽ pamã karõ

Rukre 11.2-4; Atre 10.34-35; Epes 6.18

¹E kot paj hpãnhã tanhmã mẽ pahte Tĩrtũm mã amnhĩ jarēnh to hã amã karõ Ximotre. Ka inhma nẽ ixô ri ho mẽ pahkwỳjê jahkre ho ri mẽ hkõt apa. E ja kumrêx kot paj mẽ kaxyw amã hã karõ. Kêr ka mẽ piitã mẽ ho Tĩrtũm wỳr ho ri pa. Nẽ kãm mẽ harẽ nẽ mẽ kaxyw mẽmoj tã axàhwỳr o ri apa. Kêr kê ama nẽ tanhmã mẽ ho mex to. Kê mẽ amnhĩ tã omu nẽ ã kãm kapêr aně

ně kām: —Pa Tĩrtũm? Nà ãm hāmri na ka ã mẽ ixto mex aně. Amex o amex. Aně.

²Ně mẽ kām aně kê mẽ õ pahi ně mẽ ho amnhĩptàr xwỳnh piitã mẽ ho ahwỳr o pa ho: —Pa Tĩrtũm? Kwa kêr ka mẽ inhõ pahi mẽ mẽ kot mẽ ixto amnhĩptàr xwỳnh piitã tanhmã mẽ ho kê mẽ ixto mex o pa. Kêr pa mẽ ijamakêtkati ně ixàmnhĩx ixpa pê amã tanhmã amnhĩ nhĩpêx to ho ri ixpa. Ně ixàmnhĩx mẽ hkôt tãm amnhĩ nhĩpêx. Aně.

³Kot puj mẽ ã mẽ ho mẽ papytàr xwỳnh Tĩrtũmja wỳr o papa aně nhũm mẽ pama nhũm ja kām mex ně. E kêr ka ã mẽ kām ja hã karõ aně Ximotre.

Tĩrtũm kām mẽmoj prãm ã harěnh

Sikũn Pêtre 3.9

⁴Ně mẽ piitã mẽ kot kapěr mar ně amnhĩ kaxyw Jejus kôt hamaxpěr ně hkôt amnhĩ xunhwỳrja na Tĩrtũm kām hprãm.

⁵Ja kaxyw na pre mẽ pahwỳr Kra Jejus mẽ nhũm man mẽ pahwỳr wrỳ. Tĩrtũmja tapxipix na kêp Měpahpãm. Ně Kra Jejusja tapxipix na kot Tĩrtũm mã tãm mẽ paxunhwỳr mã xwỳnh. Ja kaxyw na pre amnhĩ grõnh kôt wrỳ mẽ pahpyrà ně ĩ ho ĩ ně kato.

⁶Hāmri ně gaa ně àptàr hāmri ně mẽ pahpiitã mẽ panê ty. Jao Tĩrtũm mã mẽ pahte amnhĩ tomnuj piitã hpãnhã amnhĩrer pa. Tã mẽ pahpiitã mẽ pahte kot ã amnhĩ nhĩpêx anhỳr ã harěnh mar ně tokyx hkôt amnhĩ xunhwỳrja na Tĩrtũm kām hprãm.

⁷Ja kaxyw na pre ixãm. Ixte Ijaew kêt xwỳnhjê mã Tĩrtũm kapěr jarěnh o ri mẽ hkôt ixpa kaxyw. Ně Jejus nhỹ hã tanhmã mẽ kām ixkapěr to ho ri ixpa kaxyw. Ně tanhmã kot mẽ panê amnhĩ nhĩpêx to hã harěnh kaxyw. ãm hāmri na pa ã amnhĩ jarěnh aně. Ixêx kêt. Na pa hte Ijaew kêt xwỳnhjê hkôt ixpa ně ã mẽ kām ixkapěr aně ně mẽ kām: —E mẽ ate Tĩrtũm Kra Jejus kôt amnhĩ xunhwỳrja na Tĩrtũm kām hprãm. Jakamã kwa mẽ tokyx amnhĩ kaxyw hkôt ajamaxpěr ně hkôt amnhĩ xunhwỳ. Aně.

Ikrêsti kamã tanhmã mẽ pahte amnhĩ nhĩpêx to hã mẽ pamã karõ

⁸Ně kot kaj mẽ tōhã Tĩrtũm kapěr mar kaxyw axpẽn wỳr akuprõ. Hãmri nẽ Tĩrtũm mã amnhĩ jarẽ nom kêr ka mẽ mẽmoj tã axpẽn kamã agryk kamã kãm amnhĩ jarẽnh kêt nẽ. Rỳ mẽmoj tã axpẽn mã axàkjêr kamã kãm amnhĩ jarẽnh kêt nẽ. ãm tãm mẽ ajamaxpěr pix o kãm amnhĩ jarẽ. Nẽ tãm amnhĩ nhĩpêx kamã kãm amnhĩ jarẽ. Ja na inhmã hprãm. Tã kêr ka ã Epes nhõ xwỳnhjê mã ja hã akarõ anẽ Ximotre.

Mënijaja kot tanhmã amnhĩ nhĩpêx to kaxyw mẽ hã kãm karõ

Wam Korĩt 14.34; Epes 5.22; Xitre 2.3; Wam Pêtre 3.1-7

⁹Ně kot paj hpãnhã Kris kõt mẽ pahtõxjaja tanhmã kot amnhĩ nhĩpêx to hã mẽ kaxyw amã karõ ka inhma. Nà mẽmyjaja kot mẽ omunh nẽ kãm mẽ hkĩnh prãm xàj kê mẽ htỳx ri mẽ noo mã tanhmã amnhĩ nhĩpêx to hkêt nẽ. Nẽ ja prãm xàj tanhmã ê jagjênh to hkêt nẽ rỳ tanhmã ri mrar to hkêt nẽ. Rỳ mẽ kãm mẽ hkĩnh prãm xàj õkrexê mex jagjênh rỳ mẽ ãhkra kamã kàx mex jagjênh nẽ ri hã mẽ hkõt pa kêt nẽ. Rỳ ja kaxyw tanhmã ri amnhĩ kĩ jaxwỳr to nẽ ri hã mẽ hkõt pa kêt nẽ. Rỳ mẽ ê mex jagjê nẽ mẽ noo mã htỳx ri hpijaàm kêt o pa hkêt nẽ. Kê mẽmyjaja kãm mẽ hkĩnh prãm xàj ã htỳx ri amnhĩ nhĩpêx anhỳr o pa hkêt nẽ.

¹⁰Mẽ kãm anẽ kê mẽ kãm Tĩrtũm mãn kĩnh xàj mẽ piitã mẽ kutã mẽmoj to nojarêt o pa.

¹¹Ně mẽ kãm anẽ kê mẽ Tĩrtũm kapěr mar kaxyw mẽ pikuprõnh xà hwỳr agjê nẽ akryk Tĩrtũm kapěr mar o hkrĩ nẽ htỳx ri axpẽn mã kapěr o hkrĩ kêt nẽ.

¹²Ně kê mẽ ikrêsti kamã Tĩrtũm kapěr o mẽmyjê jahkre hkêt nẽ. Rỳ kamã mẽmoj tã tanhmã mẽ kãm karõ hto hkêt nẽ. ãm akryk Tĩrtũm kapěr mar o hkrĩ.

¹³Mẽmo mỳrapê koja mẽ ã amnhĩ nhĩpêx anẽ? Nà na pre Tĩrtũm my kot wa finat Atãwja kumrêx nhĩpêx nẽ kormã hprõ Ewa o hapu nẽ hipêx.

¹⁴Ně Atãwja na pre kagã kapěr mar nẽ hkõt amnhĩ nhĩpêx kêt nẽ. Prõ na pre mar xà hkõt Tĩrtũm kapěr nhĩrõp xa nẽ tanhmã amnhĩ tomnuj to.

¹⁵Mÿrapê na htem mēnijaja hpijagri ho hikwỹ nhũm mē hkrajaja à htỳx kãm hapôj. Tã nom koja mē Jesus kôt amnhĩ xunhwỳ nē ã ixte mē kaxyw amã mēmoj tã karõ xà hkôt amnhĩ nhĩpêx hãmri nē nhỹrmã mex kumrêx nē htĩr tũm nē pa ho pa. E kêr ka ã mēnijê mã mēmoj tã karõ anê Ximotre.

Wam Ximotre 3

Pastô kot tanhmã amnhĩ nhĩpêx to kaxyw mē hã kãm karõ

Xitre 1.5-9

¹E kot paj hpãnhã tanhmã pastô jarênh to. Koja mēhõ kãm kêp Kris kwỳjê nhõ pastô nē Tĩrtũm kapêr o mē ahkre hprãm nē ãm hãmri ã hamaxpêr anê. Ja mex.

²Jakamã koja mēhõ kãm kêp pastô hprãm hãmri nē ã amnhĩ nhĩpêx anhỹr o apa. Koja mē piitã mē noo mã tãm ri amnhĩ nhĩpêx. Nē hprõ pix tãnopxar o pa. Nē mēmoj punuj kutã amnhĩ to htỳx nē. Nē tãm hamaxpêr. Nē àmnhĩx amnhĩ wỳr mē piitã mē kuwỳ. Nē Tĩrtũm kapêr o mē ahkre mex nē.

³No kê mē kagôxỳhti japrôr nē ho pipãnh o pa hkêt nē. Nē àhkurê ho pa hkêt nē. Nē mē piitã mē kamã ukaprĩ ho ri mē hkôt pa. Jao mē kutã nojarêt rãhã ho pa. Nē amnhĩm kàxpore rax o pikuprõnh prãm xàj tanhmã amnhĩ nhĩpêx to hkêt nē.

⁴⁻⁵Nē hkrajê jahkre mex o pa nhũm mē kapêr ma nē hkôt amnhĩ nhĩpêx. Nē hã hpijaàm kãm tãm amnhĩ nhĩpêx. Koja mē hkrajê jahkre mex kêr nē hãmri nē mãänēn Kris kwỳjê jahkre mex kêr nē. Jakamã nhũm hkrajê mē Kris kwỳjaja tãm amnhĩ nhĩpêx kêr nē.

⁶⁻⁷Nē kê mē kot Jesus kôt amnhĩ xunhwỳr kêr xwỳnhjê noo mã tãm amnhĩ nhĩpêx rãhã ho pa. Mē kot ja hã mē omunh nē mē hã hpijaàm o pa kaxyw. Nom koja mē tanhmã amnhĩ tomnuj to nhũm mē tee ri ja hã mē omu nē mē ho kapêr punuj nē. Satanasti kãm hprãm xà hkôt. Nē kê mē kot Kris kôt amnhĩ xunhwỳr nyw xwỳnhjaja kêr pastô hkêt nē. Koja mē kêp pastô hãmri nē mēmo arĩgro hã tanhmã hamaxpêr to nē amnhĩ to rax prãm xàj tanhmã amnhĩ to jarkrar to ho pa. Hãmri nhũm Tĩrtũm tee ri ja hã omu nē te kot Satanasti nhĩpêx pyræk o hipêx nē tanhmã homnuj to. Ja pymaj kê mē kot

Kris kôt amnhĩ xunhwỳr nyw xwỳnhjaja kęp pastô hkêt nẽ. E pastô na hte ã amnhĩ nhĩpêx anhỳr o pa kamã Jesus kwỳjê jahkre nẽ tanhmã mẽ ho ajuta hto ho mẽ hkôt pa Ximotre.

Mẽ kot Kris kôt hkwỳjê ho ajuta xwỳnhjê kaxyw mẽ hã kãm karõ

Atre 6.1

⁸Nẽ kot paj hpãnhã amã mẽ kot Kris kôt hkwỳjê ho ajuta xwỳnhjê jarẽ ka inhma Ximotre. Nà koja mẽhõ kãm Kris kôt hkwỳjê ho ajuta hprãm hã koja ã amnhĩ nhĩpêx anhỳr o pa. Koja mẽ htỳx ri mẽmoj tã mẽ kãm hpër o pikênh o pa hkêt nẽ. Nẽ tanhmã mẽmoj to hêx to ho pa hkêt nẽ. Nẽ kagôxỳhti japrõr nẽ ho pipãnh o pa hkêt nẽ. Nẽ amnhĩm kàxpore ho pikuprõnh nẽ ho rax prãm xàj tanhmã amnhĩ nhĩpêx to hkêt nẽ.

⁹Nẽ kê Tĩrtũm kapër piitã hkôt hamaxpër o pa. Ra Tĩrtũm kot mẽ pamã kapër piitã ho amnhĩrĩt jakamã koja Kris kôt hkwỳjê ho ajuta xwỳnhjaja kapër piitã hkôt hamaxpër pẽ hkôt amnhĩ nhĩpêx mex rãhã ho pa.

¹⁰⁻¹³Nẽ kê mẽ amnhĩ prõ pix tãnopxar o pa. Nẽ pastô pyrà nẽ mẽ hkrajê jahkre mex nhũm mẽ hkôt ri amnhĩ nhĩpêx mex o pa. Nẽ kê mẽ hprõjaja mjên pyrà nẽ mẽ piitã mẽ noo mã tãm ri amnhĩ nhĩpêx. Nẽ hkwỳjê ho kapër rỳ mẽ axpën jakwa kamã ri axpën mã mẽ hixi ho rêr o pa hkêt nẽ. Nẽ mjên pyrà nẽ mẽmoj punuj kutã amnhĩ to htỳx o ri pa. Nẽ amnhĩ to mex rãhã nẽ. E koja mẽhõ kãm Kris kwỳjê ho ajuta ho pa hprãm hã koja ã amnhĩ nhĩpêx anhỳr o pa. Nom kêr ka mẽ kot mẽ ho ajuta kaxyw mẽ unhwỳr tokyx anhỳr kêt nẽ Ximotre. Taxy mẽ kamã ama nẽ aprĩ hã mẽ kot ri tanhmã amnhĩ nhĩpêx to hã mẽ omu mãn. Hãmri nhũm mẽ piitã mẽ mex ã mẽ harẽ ka mẽ hã mẽ ama nẽ rĩ kormã mẽ kot mẽ ho ajuta ho pa kaxyw mẽ unhwỳ. Hãmri nhũm mẽ amnhĩ tã omu nẽ axpën mã mex ã harẽ. Nẽ amnhĩ kaxyw Jesus Kris mã hamaxpër mex o pa hã mẽ omu nẽ mẽ hã hpijaàm o pa.

Pawre kot Ximotre mã amnhĩ jarẽnh

¹⁴Nẽ inhmã awỳr inhmõr nẽ apumunh prãm Ximotre. Nom kot pa amnhĩ kukamã ã mẽmoj tã amã karõ nẽ hã kagà anẽ.

¹⁵Kêr pa tokyx awỳr inhmõr kêt japêr ka ixte amã mẽmoj ã kagàta kamã harẽ nẽ ixkutêp ho mẽ ahkre ho ri apa. Mẽ kot mar nẽ hprĩ hã mẽ õ pastô

ně mẽ kot mẽ ho ajuta ho mẽ pa xwỳnhjaja kot tanhmã amnhĩ nhĩpêx to hã mẽ harênh mar kaxyw. Mẽ pahpê Kris kwỳjaja mẽ pahpê Tĩrtũm kra jakamã na pu htem kapêr kôt ri amnhĩ nhĩpêx nẽ pakatàt kôt mẽ piitã mẽ kãm pakapêr o papa. Jao tanhmã mẽ kãm Jejus Kris jarênh to ho ri papa.

Pawre kot Jejus mex o mex ã mẽ grer jarênh

¹⁶Nẽ Jejusja mex o mex. Amnepêm kormã mẽ pahte harênh mar kêt tã pu prem harênh ma hãmri nẽ mex o mex ã pagrer o papa. Nẽ pagrer o: Kris kêp Mẽpahpãm tã na pre mẽ pahwỳr wrỳ nẽ mẽ pahpyrà nẽ ì ho ì nẽ kato. Nhũm pre Tĩrtũm Karôja mex o mex ã harê. Nhũm Tĩrtũm kapêr o mẽ wrỳk xwỳnhjaja omunh o pa. Nhũm ahpỳnhã pika piitã hwỳr tanhmã kot mẽ panê amnhĩ nhĩpêx to hã harênhja anhrà. Nhũm hte mẽ hkwỳjaja harênh ma nẽ amnhĩ kaxyw hkôt hamaxpêr nẽ hkôt amnhĩ xunhwỳ. Tã nhũm pika kamã àpênh jatur xàm kumẽ nhũm Tĩrtũm akupỳm amnhĩ wỳr ho api. Na pu htem ã Jejus mex o mex ã pagrer anẽ.

Wam Ximotre 4

Mẽ kot Tĩrtũm kapêr kwỳm ri tanhmã Kris kwỳjê jahkre hto xwỳnhjê jarênh

Matêwre 24.4-13; Korosê 2.16-19; Sikũn Ximotre 3.1-9; Sikũn Pêtre 2.1-3; Jutre 3-16

¹Nẽ nhỹrmã Jejus akupỳn mẽ pahwỳr wrỳk kaxyw koja pika nhõ xwỳnh kwỳjaja ma hkwỳjê mã tanhmã Tĩrtũm kapêr o hêx to ho pa. Na pre Tĩrtũm Karô hprĩ hã mẽ hkukamã tanhmã mẽ harênh to. Kojaxep Satanasti hkwỳjaja Jejus kwỳjê hwỳr mra nẽ hêx rom tanhmã mẽ kãm kapêr to. Satanasti nhỹ hã mẽ kãm hêx o pa nhũm mẽ hkwỳjaja mẽ kuma nẽ mẽ hkôt hamaxpêr nẽ Jejus kaga. ã koja mẽ Jejus akupỳn mẽ pahwỳr wrỳk kukamã amnhĩ nhĩpêx anẽ.

²Nẽ Satanasti nhỹ hã mẽ kãm mẽmoj to hêx xwỳnhjaja ãm Satanasti pix mar o pa jakamã koja mẽ hamaxpêr mex kêt nẽ. Kojaxep mẽ mẽmoj punuj pumu nẽ htỳx mex ã hkamnhĩx.

³Tã koja mẽ Tĩrtũm kapêr kwỳm ri ã Jejus kwỳjê mã hêx ho pa anẽ nẽ mẽ kãm: —Kwa kêr ka mẽ axpên mã ri mẽ rer o apa hkêt nẽ. Tĩrtũm kãm ja prãm kêt. ãm ahte ri mẽ papaja na kãm hprãm. Anẽ. Nẽ mẽ kot mẽmoj mex

kur ã mẽ omu nẽ nê mẽ kãm kapër nẽ mẽ kãm: —Kwa na htem ata hkur kêt nẽ. Tĩrtũm pê omnuj kẽnã kot ka kêt ri aku. Anhỹr o koja mẽ kãm kapër o pa.

⁴Nom Tĩrtũm na pre mẽ pamã mẽ apkur xà piitã ho kato. Mẽ paxàmnhĩx mẽ pahte piitã hkur o papa kaxyw. Jakamã mẽ pahpê hkrajaja na pu htem mẽmoj kaga hkêt nẽ. Na pu htem mẽmoj kur kaxyw nẽ Tĩrtũm mã harẽ hãmri nẽ paxàmnhĩx kuku.

⁵Tĩrtũm kot mẽ paxàpkur xà piitã mex ã harẽnh jakamã na pu htem kãm harẽnh pê paxàmnhĩx piitã hkur o papa.

Pawre kot mẽmoj tã Ximotre mã karõ

Sikũn Ximotre 1.6-14; Xitre 2.1-8

⁶E Ximotre. Ixte mẽmoj tã amã karõta kêr ka ho Kris kôt pahkwỳjê jahkre mex o ri mẽ hkôt apa. Kot kaj ã mẽ ahkre anhỹr jao ra Jejus Kris mã axapênh mex nẽ. Na ka pre harẽnh ma nẽ hkôt amnhĩ xãm hãmri nẽ hkôt amnhĩ nhĩpêx mex nẽ. Tã kêr ka arĩ hkôt amnhĩ nhĩpêx mex rãhã kê mẽ piitã ja hã apumu.

⁷Nẽ mẽ ujarẽnhja kot paj tanhmã amã hã karõ hto. Mẽ panhĩgêt xujarẽnh kamã mo Tĩrtũm jarẽnh? Amrakati kumrêx. Jakamã kêr ka mẽ hkôt ajamxpër o ri apa hkêt nẽ. ãm Tĩrtũm kapër kôt pix mã ajamxpër tỳx rãhã ho ri apa. Tĩrtũm kapërja ãm hãmri na.

⁸Nẽ na htem amnhĩ karo hprãm xàj tanhmã amnhĩ karo hto ho pa. Ja mex. Tanhmã kute hkêt. Na htem tanhmã amnhĩ karo hto nẽ gaa nẽ ra hkarore nẽ pa. No kêt mẽ kot Tĩrtũm kapër kôt ri amnhĩ nhĩpêx o paja na mex o mẽ hkarota jakre. Na htem Tĩrtũm kapër kôt ri amnhĩ nhĩpêx hãmri nẽ mex nẽ hkĩnh nẽ pa ho pa. Hãmri nẽ nhỹrmã kaxkwa kamã Tĩrtũm mẽ Kra Jejus wa kuri mex nẽ htĩr tũm nẽ pa ho pa. Ja na mex o mex.

⁹ãm hãmri ixte amã ja jarẽnh jakamã kwa kêr ka ja hã anohtỳx nẽ ri ho apa Ximotre.

¹⁰Nẽ Tĩrtũmja rãhã ho rãhã. Tã na pu pre amnhĩ kaxyw Kra Jejus kôt pajamxpër nẽ hkôt amnhĩ xãm nhũm Tĩrtũm pahto hkra. Kãm mẽ piitã mẽ

ho hkra hprãm jakamã na htem pahpyrà nẽ amnhĩ kaxyw Kra hkõt hamaxpër nẽ hkõt amnhĩ xunhwỳ nhũm amnhĩ tã mẽ omunh xà hkõt mẽ ho hkra. Ja kaxyw na pu htem mẽ piitã mẽ kãm Jejus kot tanhmã mẽ panẽ amnhĩ nhĩpêx to hã harẽnh rãhã o ri mẽ hkõt papa. Jao Tĩrtũm mã paxàpênh mex nẽ.

11E kêr ka ã ja ho pahkwỳjê jahkre anhỹr ho ri mẽ hkõt apa. Mẽ kot amar nẽ akapër kõt amnhĩ nhĩpêx mex ho pa kaxyw.

12Nẽ kormã anyw tã kêr ka mẽ piitã mẽ noo mã tãm ri akapër nẽ tãm amnhĩ nhĩpêx o apa. Mẽ kot Jejus ã tanhmã ato htã arĩ amnhĩ kaxyw kãm ajamaxpër tỳx nẽ. Nẽ mẽ piitã mẽ kutã anojarêt nẽ ajamaxpër mex pix o ri apa. Kot kaj kormã anyw tã ã mẽ noo mã amnhĩ nhĩpêx anẽ nhũm mẽ hã apumu nẽ kãm akapër mar prãm nẽ. Anyw ã apumunh tã kãm akapër mar prãm nẽ.

13Nẽ kêr ka mẽ ate Tĩrtũm kapër mar kaxyw axpên wỳr akuprõ ka arĩ ixkutêp mẽ kãm Tĩrtũm kapër tũm ã kagà kamã akapër rãhã ho apa. Nẽ aprĩ hã tanhmã ho mẽ ahkre hto nẽ ho mẽ ahkre mex nẽ Ximotre.

14-15E kêr ka ã amnhĩ nhĩpêx anhỹr o ri mẽ hkõt apa nẽ amã ho anhỹr kaga hkêt nẽ. Mẽ piitã mẽ kot ate Jejus mã amnhĩ nhĩpêx mex o amõr ã apumunh kaxyw. Kormã ate mẽ kãm Jejus jarẽnh o apa hkêt ri na pre pastô nhỹ hã mẽ kapër xwỳnhjaja ate Jejus mã tanhmã amnhĩ nhĩpêx to ho apa kaxyw axãm. Hãmri nẽ anhĩmõk ã mẽ ìhkra jaxwỳ nẽ axàpênh kukamã tanhmã ajarẽnh to nẽ ato Tĩrtũm wỳ. Hãmri nhũm ate mẽ kãm kapër jarẽnh o ri apa kaxyw amã ajamaxpër o hihtỳx. Tã kêr ka ÿ hã ã kãm amnhĩ nhĩpêx anhỹr rãhã ho ri apa.

16Nẽ kwa kêr ka amnhĩ pumunh mex nẽ Ximotre. Jao tãm ri amnhĩ nhĩpêx nẽ akatàt kõt Tĩrtũm kapër o mẽ ahkre ho ri mẽ hkõt apa. Kot kaj ã amnhĩ nhĩpêx anẽ hãmri nhũm mẽ ama nẽ apyrà nẽ Jejus kõt amnhĩ xunhwỳ. Hãmri nẽ pahpyrà nẽ nhỹrmã Tĩrtũm wa kuri htĩr tũm nẽ pa ho pa.

Wam Ximotre 5

Tanhmã mẽ pahte Kris kôt mẽ pahkwỳjê nhĩpêx to kaxyw mẽ pamã karõ

Sikũn Ximotre 2.24-25

¹⁻²E kot paj hpãnhã Kris kôt pahkwỳjê hõ kot tanhmã amnhĩ tomnuj to nhũm ate tanhmã ja nê kãm akapêr to hã amã karõ. Nà koja mēhõ tanhmã ri amnhĩ tomnuj to ka harēnh ma hãmri nē ma hwỳr tē nē ja nē tanhmã kãm akapêr to. Nom kêr ka kãm akapêr mã agêt kêt nē. Koja mēwejjê õ tanhmã amnhĩ tomnuj to ka te kêp anhĩpêxà rỳ akatorxà pyræk o kãm akapêr. Jao hã apijaàm o tanhmã kãm akapêr to. Rỳ koja apyrà nē mẽ nywjê hõ tanhmã amnhĩ tomnuj to ka te kêp atõ pyræk o kãm akapêr. Rỳ mēnijê nyw õ amnhĩ tomnuj japêr ka te kêp atõx pyræk o kãm akapêr. Jao hã apijaàm o kot amnhĩ tomnujja nē tanhmã kãm akapêr to. E kêr ka mẽ kot amnhĩ tomnuj nē ã mẽ pahkwỳjê mã akapêr anhỹr o apa Ximotre.

Mẽ kêp mẽ mjên htyk xwỳnhjê jarēnh

Xiakre 1.27

³Nē kot paj hpãnhã Kris kôt pahkwỳ pē mẽ mjên htyk xwỳnhjê jarē. Nà koja mēhõ nija hkra hkêt nē htàmnhwỳ hkêt nē pa nhũm mjên kêp ty ka mẽ apê Kris kôt hkwyjaja ja hã omu nē mẽmoj to kutã anojarêt rãhã ho ri apa.

⁴Nom koja ra hkra rỳ ra htàmnhwỳ japêr kê mẽ tãmjaja tanhmã ho ajuta hto ho pa. Kãm õ nē kãm mẽmoj nhõr o pa. Kormã mēhprĩre ri na pre mẽ õ wôwô nē mẽ katorxà nē mẽ hipêxà mẽ hamãr mex pē mẽ kãm õ ho pa. Tã ra mẽ àptàr jakamã kê mẽ amnhĩ pyrà nē mẽ hamãr mex pē mẽmoj to mẽ kutã nojarêt rãhã ho pa. Ja na Tĩrtũm kãm hprãm. ã mẽ kot hkwyjê kamã ukapřĩ ho pa jakamã te mẽ kot Tĩrtũm mã àpēnh pyræk.

⁵No koja mēhõ ni ra wejre nē ahte ri pa. Nē hkra nē htàmnhwỳ hkêt nē ri pa. Tã kê ja hã amnhĩ pumu nē Tĩrtũm kamnàr rom amnhĩ to hwỳr o pa. Nē mẽ piitã mẽ ho hwỳr o pa. Jao tãm hamaxpêr. Ka mẽ apê Kris kôt hkwyjaja ja hã omu hãmri nē mẽ kam nē tanhmã kutã anojarêt to ho ri apa.

⁶No koja mẽ ã amnhĩ nhĩpêx anhỹr kêt nē. Nē htỳx ri mẽ grer wỳr mra nē hpijaàm kêt o ri mra ka mẽ ja hã mẽ omu nē mẽ ho ajuta hkêt nē. Na htem ã amnhĩ nhĩpêx anhỹr o pa nē arĩ htĩr tã te ra htyk nē hikwỹ pyræk.

⁷E kêr ka ã ja hã Kris kôt pahkwỳjê mã karõ anẽ. Kê mẽ ama nẽ ã mẽ mjên htyk xwỳnhjê nhĩpêx anhỹr o pa.

⁸Nom koja mẽhõ amnhĩ kwỳjê ho mex kêt japêr. Nẽ õrkwỹ kamã hprõ nẽ hkrajaja nẽ hipêxà nẽ katorxà nhũm mẽ kãm mẽ apkur xà nhõr kêt japêr. Koja mẽ ã amnhĩ nhĩpêx anhỹr jao Jejus kaga nẽ te mẽ kot hkôt amnhĩ xunhwỳr kêt xwỳnhjaja kot amnhĩ nhĩpêx pyræk o amnhĩ nhĩpêx nom amnhĩ tomnuj tỳx o mẽ hakre.

⁹Nẽ mẽ mjên htyk nẽ mẽ hkra nẽ mẽ htàmnhwỳ hkêt xwỳnhjaja kêr ka mẽ tanhmã mẽ ho ajuta hto kaxyw hãmri nẽ mẽ hixi piitã hã kagà. Nom kwa kêr ka aprĩ hã tanhmã mẽ amnhĩ nhĩpêx to hã mẽ omu nẽ rĩ kormã mẽ hixi hã kagà. Koja mẽhõ kormã mjên htĩr ri tãm hipêx nẽ nhãm mẽmyjê ho amnhĩkati hkêt nẽ. Nẽ ra hã amgrà pê 60 rỳ ra hã 60 jakre.

¹⁰⁻¹¹Nẽ tãm mẽ piitã mẽ hipêx o pa. Nẽ hkrajaja kormã htĩr ri nhũm mẽ hamãr mex nẽ mẽ ahkre mex o pa. Nẽ nhãm krĩ hõ nhõ xwỳnhjaja õ krĩ hwỳr pøj nhũm mẽ omu nẽ amnhĩ nhõrkwỹ hwỳr mẽ kuwỳ. Nẽ mẽ kêp amrakati xwỳnhjê ho mex o pa. Koja mẽ ã amnhĩ nhĩpêx anẽ ka ja hã mẽ omu nẽ rĩ kormã mẽ ho ajuta kaxyw mẽ hixi hã kagà. Nom mẽ hixi hã kagà kaxyw nẽ mẽmoj tã mẽ hkukja nẽ mẽ kãm: —E kot kaj ã amnhĩ nhĩpêx anhỹr o apa hã inhmã amnhĩ jarẽ pa ama nẽ rĩ kormã anhĩxi hã kagà. Kot kaj axte amjên kêt nẽ. Nẽ tanhmã Kris kôt akwỳjê ho mex to ho ri apa. Nhũm mẽhõ mẽmo mỳrapê hkaprĩ nẽ pa ka ja hã omu nẽ tanhmã ho ajuta hto. E kot kaj ã amnhĩ nhĩpêx anhỹr o apa hã amnhĩ jarẽ pa ama nẽ anhĩxi hã kagà. Hãmri nhũm Kris kôt akwỳjaja amã axàpkur xà nhõr o pa. Anẽ. ã mẽ kãm akapêr anẽ nhũm mẽ ama nẽ amã: —Ỡ. Ma kot paj ã amnhĩ nhĩpêx anẽ. Anhỹr ã amnhĩ jarẽ ka mẽ ama nẽ mẽ hixi hã kagà. No kormã mẽ hã amgrà pê 60 kêt xwỳnhjaja kêr ka kormã mẽ hixi hã kagà hkêt nẽ. Koja mẽ tanhmã mẽ kot amnhĩ nhĩpêx to ho pa hã mẽ kãm karõja ma nẽ wam tajê pyrà nẽ amã: —Ỡ. Ma kot paj ã amnhĩ nhĩpêx anẽ. Na pa Jejus Kris noo mã ã amnhĩ jarẽnh anẽ. Anhỹr ã amnhĩ jarẽnh tã gaa nẽ ra hkurẽ hapøj nẽ ra kot amnhĩ jarẽnhta kwỳm ri tanhmã amnhĩ nhĩpêx to nẽ axte mjên.

¹²Ra amnhĩ jarēnh o: —Ma kot paj ãm Jejus mã pix mã tanhmã amnhĩ nhĩpêx to ho ri ixpa nê axte inhmjên kêt nê. Anhÿr tã tanhmã hamaxpêr to nê kot amnhĩ jarēnh kwÿm ri axte mjên. Jao te Jejus mã amnhĩ to hêx pyrâk nhũm Tĩrtũm pê jamnuj. Ja pymaj kêr ka mẽ kormã mẽ hã amgrà pê 60 kêt xwÿnhjê nhĩxi hã kagà hkêt nê. Kormã mẽ hã amgrà pê 60 kêt xwÿnhjaja arĩ mẽ hkĩnh tÿx

¹³jakamã kot kaj mẽ kãm mẽ apkur xà nhõr o apa nhũm mẽ ja hã amnhĩ tã mẽ apumu nê axte amnhĩm àpênh kêt nê. ãm kãm kaga nê htÿx ri nhãm mẽ hwÿr mra nê nhãm mẽ hwÿr mra. Nê amnhĩ pumunh mex kêt nê htÿx ri axpên jakwa kamã ri mẽ hixi ho rêr o pa. Nê nhÿri mẽmoj pumu rÿ tanhmã mẽmoj jarēnh mar to hãmri nê ma htÿx ri hkwyjê mã harēnh o mra. Koja mẽ ã amnhĩ nhĩpêx anhÿr o pa hãmri nhũm mẽ kêp Kris kwÿ hkêt xwÿnhjaja ja hã mẽ omu nê mẽ hkôt mẽ pahpê Kris kôt pahkwÿjê ho kapêr punuj nê.

¹⁴ã mẽ kot amnhĩ nhĩpêx anhÿr o pa pymaj kêr ka kormã mẽ nyw xwÿnhjê mã anê kê mẽ mãmri axte mjên nê o pa. Hãmri nê hkra nê hkrajê jamãr o pa. Ja na inhmã hprãm. Koja mẽ ã amnhĩ nhĩpêx anê hãmri nhũm mẽ kêp Kris kôt pahkwÿ hkêt xwÿnhjaja mẽ hkôt tanhmã mẽ pahto kapêr punuj to hkêt nê.

¹⁵Mãn ka ra Kris kôt pahkwÿjê nyw pê mẽ mjên htyk xwÿnh kwÿjaja tanhmã amnhĩ tomnuj to hã mẽ harēnh ma. Na prem Jejus kaga nê Satanasti hkôt amnhĩ nhĩpêx o pa.

¹⁶E kêr ka mẽ ã Kris kwÿ pê mjên htyk xwÿnhjê nhĩpêx o apa anê Ximotre. Nom koja mẽ akwÿ kamã mẽhõ nhõ wôwô mjên rÿ katorxà mjên kêp ty kê tãm kãm õ ho pa. Kêr kê Kris kôt pahkwÿjaja ãm mẽ kêp mẽ mjên htyk xwÿnh pê mẽ hkra nê mẽ htãmnhwÿ hkêt nê ahte ri mẽ pa xwÿnh pixjaja tanhmã mẽ ho ajuta hto ho pa.

Mẽ pahpê Kris kôt pahkwÿjê hkrãhtũm kaxyw mẽ pahtã kãm karõ

Atre 14.23; Wam Korĩt 9.7-14; Karatas 6.6; Wam Tesarõn 5.12; Wam Pêtre 5.1-4

¹⁷⁻¹⁸Nê kot paj hpãnhã amã Kris kôt mẽ pahkrãhtũmjê jarê. Tĩrtũm kapêr ã kagà htũm kot mẽ harēnh kot: Kêr ka Tĩrtũm kapêr o mẽ ajahkre xwÿnhjaja

mě ahkre pãnhã mẽ kãm amnhĩre. Aně. Ně määñnẽn mẽ harěnh ã kuxi nẽ mẽ harěnh o: Koja akrit amã àpěnh o pa ka ho mex nẽ kãm õ mex o apa. Aně. Æ ja jarěnh kot anhỹr jakamã koja Kris kôt mẽ akrãhtũmja Kris mã tanhmã mẽ ato mex to ho pa ka mẽ amnhĩ tã kãm amnhĩrer mex o ri apa. Kot Tĩrtũm kapěr o mẽ ajahkre mex jakamã ka mẽ amnhĩ tã kãm amnhĩrer mex nẽ.

¹⁹Ně koja mēhõ pixi nẽ mẽ awỳr tẽ nẽ amã Kris kôt mẽ akrãhtũm kot tanhmã amnhĩ tomnuj to hã harěnh to ka ama nẽ ãm ama. Nom koja wa haměkrut rỳ mẽ axkruněpxi nẽ mẽ awỳr mra nẽ axpěñ kôt tanhmã harěnh to ka mẽ ama nẽ ãm hãmri mẽ kot tanhmã kot amnhĩ tomnuj tota kôt ajamaxpěr.

²⁰Hãmri nẽ Kris kwỳjê piitã mẽ noo mã kot amnhĩ tomnuj xwỳnhnta mã tanhmã kot amnhĩ tomnuj to nẽ kãm akapěr kê axte ã amnhĩ nhĩpêx anhỹr kêt nẽ. Mě piitã mẽ kot hã amar nẽ nhỹrmã tanhmã amnhĩ tomnuj to nhũm ate uràk nẽ hã tanhmã mẽ kãm axàkjêr to pymaj tanhmã amnhĩ tomnuj to hkêt nẽ.

²¹E Tĩrtũm noo mã na pa ã amã mẽ kaxyw mẽmoj tã karõ aně Ximotre. Ně Jejus Kris mẽ Tĩrtũm kapěr o mẽ wryk xwỳnhjê noo mã pa ã amã karõ aně. Jakamã kêr ka inhmar tỳx nẽ hkôt amnhĩ nhĩpêx o ri apa. Jao mẽ piitã mẽ hipêx o axpěñ pyràk. Nom kêr ka akrãmnhwỳ kot tanhmã amnhĩ tomnuj to hã omu nẽ axtem nẽ ãm omu nẽ ajamaxpěr o: —Nà kệp ixkrãmnhwỳ kẽnã kot paj kêt ja nẽ tanhmã kãm ixkapěr to. Pa ho anhỹr kêt nẽ. Anhỹr o ajamaxpěr kêt nẽ. Mě piitã mẽ hipêx o axpěñ pyràk.

²²Ně kêr ka anojarêt kãm mẽ kot Tĩrtũm mã tanhmã amnhĩ nhĩpêx to ho mẽ pa kaxyw mẽ unhwỳr kêt nẽ. Aprĩ hã tanhmã mẽ kot amnhĩ nhĩpêx ã hã mẽ omu nẽ mẽ hkapi nẽ rĩ kormã mẽ unhwỳ rỳ tee ri mẽmoj tã mẽ omu nẽ mẽ hkaga. Ně koja mēhõ tanhmã amnhĩ tomnuj to ka ja hã omu rỳ harěnh ma hãmri nẽ uràk nẽ ã amnhĩ nhĩpêx anhỹr kêt nẽ. Arĩ Tĩrtũm kôt amnhĩ nhĩpêx pê tãm ri amnhĩ nhĩpêx pix o apa.

²³⁻²⁵Na htem tōhã tanhmã amnhĩ tomnuj to nhũm mēhõ ja hã mẽ omu nẽ mẽ harěnh kurê kumrěx. Kris kôt mẽ hkrãhtũm kormã kot tanhmã hã kãm nẽ hkêt ri nhũm mẽ ja hã mẽ omu nẽ tanhmã mẽ harěnh to. Nom na htem

tõhã hpimxur pê tanhmã amnhĩ tomnuj to nhũm Tĩrtũm pix ja hã mẽ omu. Tã koja nhỹrmã mẽ piitã mẽ kãm ja ho amnhĩrĩt nhũm mẽ piitã harẽnh ma nẽ hkõt omu. Nẽ mẽ kot amnhĩ to mex xwỳnhjaja haxwỳja. Na htem tõhã mẽ noo mã tanhmã mẽhõ ho mex to nhũm hkwỳjaja ja hã omu nẽ axpẽn mã mex ã mẽ harẽ. Nẽ tõhã hpimxur pê tanhmã mẽhõ ho mex to nhũm mẽhõ ja hã omunh kêt nẽ. ãm Tĩrtũm pix ã kot amnhĩ nhĩpêx anhỹr ã omu. Tã koja nhỹrmã mẽ piitã mẽ kãm ja ho amnhĩrĩt nhũm mẽ piitã harẽnh ma nẽ hkõt omu. Nẽ kwa Ximotre. Axà nẽ anhõhymnuj nẽ ri apa jakamã kwa kêr ka gô pix o akôm o apa hkõt nẽ. Mããnẽn wĩhti hkwỳ ho ixkõ kêr ka anhõhy mex japêr.

Wam Ximotre 6

Mẽ kãm mẽ àpênh xwỳnhjê kaxyw mẽ hã kãm karõ

Epes 6.5-9; Korosẽ 3.22-4.1; Xitre 2.9-10; Wam Pêtre 2.18-25

¹E kot paj mẽ akwỳjaja mẽ kãm mẽ àpênh o mẽ pa xwỳnhjê kaxyw mẽmoj tã amã karõ. Mẽ kãm anẽ kê mẽ õ patrãw ã hpijaam o ri pa. Jao mẽ kapêr ma nẽ hkõt kãm àpênh mex nẽ. Koja mẽ ã amnhĩ nhĩpêx anẽ nhũm amnhĩ tã mẽ omu nẽ hamaxpêr o: —Kwa pêr Tĩrtũm kapêr na mex kumrêx. Inhmã àpênh xwỳnhja na hte hkõt amnhĩ nhĩpêx pê amnhĩ to mex o pa. Pêr ãm hãmri na hte Pawre ho mẽ ahkre ho pa. Anhỹr o hamaxpêr.

²Nẽ koja mẽ õ patrãw ra Kris kõt amnhĩ xãm japêr ka kãm mẽ àpênh xwỳnhjê mã anẽ kê Kris kõt mẽ kêp mẽ htõ hã mẽ kãm àpênh mex o ri pa. Nom kê mẽ uràk nẽ kêp Kris kõt hkwỳ hã mẽ omu nẽ hamaxpêr o: —Nà Kris kõt ixtõ kênã kot paj kêt ri kapêr kõt amnhĩ nhĩpêx nẽ kãm ixapênh mex o ri ixpa. Anhỹr o hamaxpêr kêt nẽ. Kê kêp Kris kõt htõ hã kãm ho mex prãm xàj kãm àpênh mex o pa. E kêr ka mẽ kãm mẽ àpênh o mẽ pa xwỳnhjê mã ã tanhmã mẽ àpênh to ho pa hã karõ anẽ Ximotre.

Tĩrtũm kapêr kwỳm ri mẽ ahkre xwỳnhjê jarẽnh

Rukre 12.13-21; Xiakre 5.1-6

³Nẽ na hte Kris kwỳ hkõt xwỳnh kwỳjaja Kris kwỳjê mã Tĩrtũm kapêr o hêx o pa. Nẽ htỳx ri Jejus kapêr kwỳm ri tanhmã harẽnh to ho pa. ãm hãmri na

Tirtũm mẽ Pahihti Jejus Kris wa kapër tã nhũm htem htỳx ri tanhmã ho hêx to ho ri mẽ hkôt pa.

⁴Mẽ kot amnhĩ to rũnh xwỳnh ã amnhĩ to jarkrar tã mẽ àhpumunh tỳx kêt. Na htem tanhmã Tirtũm kapër kute hã axpẽn mã akir nẽ mẽmoj tã axpẽn kãm gryk o pa. Nẽ axpẽn mã kapër punuj nẽ mẽmoj tã axpẽn kamnhĩx o pa.

⁵Nẽ hamaxpër mex kêt jakamã mẽmoj tã axpẽn mã àkjêr pix o pa. Na htem ã amnhĩ nhĩpêx anhỹr o Tirtũm kapër mar tỳx kêt nẽ. Hãmri nẽ htỳx ri hamaxpër nẽ hamaxpër o: —Kot paj Tirtũm kapër o mẽ ahkre ho ixpa nhũm mẽ inhma nẽ inhmã amnhĩrer mex nẽ pa ixkàxpore rax nẽ ri ixpa. Nà kot paj ã amnhĩ nhĩpêx anhỹr o ri ixpa. Ja inhmã mex. Anhỹrja o kãm hikàxpore rũnh prãm o amnhĩ to amnhĩrĩt o pa.

Kàxpore jarênh

⁶⁻⁸E kot paj hpãnhã amã tanhmã kàxpore jarênh to ka inhma Ximotre. Xà na pu htem pakatorxà nhõhy rũm pajapôj nẽ amnhĩ kôt kàxpore hkwỳ jamỳ nẽ ho pajapôj? Nà na pu htem pahkênh nẽ panhỹ kamã pajapôj. Tã kot puj mẽ ja pyrà nẽ nhỹrmã ty nẽ mã ho anẽ nẽ panhỹ kamã ma papa. Jakamã kêr pu mẽ kormã pika ja kamã pahtĩr nẽ papa ri paxàpkur xà nẽ mẽ paxê pix tãnopxar pê pahkĩnh nẽ ri papa. Pakàxpore rũnh kêt tã na pu htem Tirtũm kamnàr rom pahkĩnh nẽ pajamakêtkati nẽ papa. Jao pajamaxpër o: —Nà ixkàxpore rax kêt nẽ ixkukrêx rax kêt tã na hte Jejus ixkôt pa ho pa nẽ mẽmoj to ixkutã nojarêt rãhã ho pa. Jakamã ixkàxpore rax kêt tã ixkĩnh nẽ ijamakêtkati nẽ ixàmnhĩx ixpa. Anhỹr o pajamaxpër o papa.

⁹⁻¹⁰Mẽ kot amnhĩm kàxpore o pikuprõnh rũnh xwỳnhjaja na htem kàxpore pix kukamã hamaxpër o pa nẽ gaa nẽ kàxpore rũnh gryk ã amnhĩ tomnuj o pa. Na pre mẽ pahkwỳjaja kàxpore rũnh prãm xàj Jejus kaga. Tã ra mẽ hikàxpore rũnh tã hkĩnh nẽ hamakêtkati nẽ pa hkêt nẽ. Na htem omnuj nẽ hkaprĩ nẽ pa. ã na htem mẽ hikàxpore rũnh xwỳnh kwỳjaja amnhĩ nhĩpêx anhỹr o pa. Jao kàxpore pix kukamã hamaxpër nẽ gaa nẽ ra gryk ã mẽ kot amnhĩ to mex xà kaga hpa nẽ htỳx ri tanhmã amnhĩ tomnuj to ho pa. Nẽ tanhmã hkwỳjê nhĩpêx punuj to. Te tutre kot harôj xành ã htỳx rapuuti hwỳr

gjêx nê tee ri kãm kator prãm kaprÿ pyræk. ã mē kot amnhĩ nhĩpêx anhÿr o pa jakamã koja nhÿrmã Tĩrtũm ma mē kot amnhĩ xà htÿx kamã hamak tũm xà hwÿr mē kurē.

Pawre kot Ximotre mã mēmoj tã karõ

Korosē 4.17; Wam Ximotre 4.14; Sikũn Ximotre 2.1-7

11Nē kwa Ximotre kêr ka mē uræk nē kàxpore rax prãm xaj amnhĩ tomnuj o apa hkêt nē. Ate Tĩrtũm mã tanhmã amnhĩ nhĩpêx to ho apa xwÿnh jakamã kêr ka kãm hprãm xà hkôt pix mã amnhĩ nhĩpêx o ri apa. Jao Tĩrtũm pyrà nē ate amnhĩ jarēnh xà hkôt amnhĩ nhĩpêx o ri apa. Nē amã Kris kôt akwÿjê hkĩnh pê mēmoj to mē kutã anojarêt o ri apa. Nē Kris kôt mē hkwÿ hkêt xwÿnhjaja kot Kris ã tanhmã ato htã ka arĩ hkôt amnhĩ nhĩpêx mex nē mē piitã mē ho mex o ri mē hkôt apa.

12Na ka pre Kris kôt mē pahkwÿjê noo mã tanhmã amnhĩ jarēnh to. Tĩrtũm kot amnhĩ wÿr awÿr nhũm ate Jejus kôt amnhĩ xãm nē amã kãm tanhmã amnhĩ nhĩpêx to ho apa hprãm ã amnhĩ jarē nhũm ikrēsti kamã mē piitã ja hã ama. Jakamã kwa kêr ka arĩ Jejus kôt amnhĩ nhĩpêx mex rãhã ho ri apa. Hãmri nē nhÿrmã Tĩrtũm mē Kra wa kuri amex kumrēx nē atĩr tũm nē apa ho apa.

13-14E na pa mēmoj tã amã karõ rax ka piitã kamã harē nē mar pa. Tã kêr ka inhmã ja hã tanhmã amnhĩ jarēnh to. Mēmoj piitã ho htĩr xwÿnh Tĩrtũm mē Jejus Kris wa noo mã tanhmã ja hã inhmã amnhĩ jarēnh to. Jejus htyk kaxyw nē àmnhĩx kot Pahi Põn Pirat mã amnhĩ jarēnh xwÿnhhta noo mã amnhĩ jarē nē inhmã amnhĩ jarēnh o: —Nà kot paj ate mēmoj tã inhmã karõ piitã hkôt amnhĩ nhĩpêx rãhã nhũm Pahihti Jejus Kris akupÿn mē pahwÿr wrÿ. ãm hãmri na pa ã amã amnhĩ jarēnh anē Pawre. Anhÿr o inhmã amnhĩ jarē.

Tĩrtũm mex o mex ã mē gre

15Nē koja Tĩrtũm akupÿn mē pahwÿr Jejus mēnh xà hã arĩgro jarē hãmri nhũm kot harēnh xàta wÿr pøj nhũm akupÿn mē pahwÿr kumē. Tĩrtũmja mex o mex. Tapxipix kêp mēmoj piitã ho amnhĩptàr xwÿnh maati. Nē kêp jar mē ho amnhĩptàr xwÿnh piitã mē õ Pahi Maati.

16Ně tapxipix na rāhā ho rāhā ně mex o mex jakamā puhā hirā rax kumrēx. Tā hkīnhā mẽ pahte amnhī tomnuj xwỳnh jakamā kot puj mẽ puhā hirā raxja kutā hkêt nē. Jao hwỳr mẽ pamrar kêt nē. Ně aa mēhō kot no ho Tĩrtũm pumunh kêt tā kwa kēr pu mẽ pahpiitā kām mex o mex ně hihtỳx o hihtỳx ã harēnh rāhā ho papa.

Axte mẽ hikàxpore rũnh xwỳnhjê jarēnh

Rukre 16.9

17Ně kēr ka Kris kwỳjê kamā mẽ hikàxpore rũnh xwỳnhjê mã anē kê mẽ kot amnhī to rũnh kôt amnhī to àmra ho pa hkêt nē. Ně amnhī kaxyw mẽ hikàxpore rũnh kôt hamaxpēr o pa hkêt nē. Kàxpore na hte hapêx tokyx anē. Mẽ kām anē kê mẽ hpānhā amnhī kaxyw Tĩrtũm kôt mǎn hamaxpēr tỳx rāhā ho pa. Na hte àmnhīx tanhmā mẽ pahto mex to ho pa ně mẽ pahpê õxỳ hkêt nē. Jao mẽ pahwỳr na rē nhũm mẽ pahpur go mex ně pu mẽ kamā panhō rũnh o papa. Ně mẽ pamā myyti ho hirā pu mẽ kukwak ri parĩt mex pē mẽmoj tā paxàpēnh o papa. ã Tĩrtũm kot mẽ pahto mex kot anhỳr pu mẽ kukwak ri pahkīnh ně pajamakêtkati ně ri papa. Tā kēr ka mẽ hikàxpore rũnh xwỳnhjê mã anē kê mẽ amnhī kaxyw kumā pix mã mǎn hamaxpēr rāhā ho pa.

18Ně mẽ kām anē kê mẽ hikàxpore ho hkwỳjê pē õxỳ hkêt nē ho tanhmā mẽ ho mex to ho pa. Ně àmnhīx ho tanhmā mẽ kēp amrakati xwỳnhjê ho ajuta hto ho pa.

19Koja mẽ ã amnhī nhĩpêx anē nhũm Tĩrtũm ja hā mẽ omu ně hkīnh ně õ krĩ kamā mẽ kutêp mẽ kām mẽmoj mex o akuprõ. Jakamā nhũm mẽ kormā jar htĩr ně pa ri mex ně pa ně mǎānēn nhỹrmā kaxkwa kamā mex kumrēx o jar pika ja kamā mex ně pata jakre. E kēr ka ã mẽ hikàxpore rũnh xwỳnhjê mã ja hā karõ anē Ximotre.

Pawre kot Ximotre mã mẽmoj tā karõ jatur xà

Korosē 4.17; Wam Ximotre 6.14; Sikũn Ximotre 1.13; 4.5

20Ně ra Tĩrtũm kot ate kapēr o mẽ ahkre ho apa kaxyw axām jakamā kēr ka tām amnhī nhĩpêx pē mẽ ahkre mex rāhā ho ri apa. Jao Tĩrtũm kapēr o hêx o ri mẽ ahkre xwỳnhjê hkôt apa hkêt nē. Na htem mẽ kuma ně mẽ kapēr

mex ã mẽ hkamnhĩx nom mẽ kapěr mex kêt. Jakamã kwa kêt ka mẽ kot tanhmã mẽ ahkre hto hã mẽ ama nẽ ãm mẽ ama.

²¹Na pre ra mẽ pahkwỳjaja mẽ kuma nẽ mẽ kapěr gryk ã Jejus kaga. E ãm ja pix. Kê Tĩrtũm mẽ apiitã mẽ akutã nojarêt rãhã ho pa. Ixpê Pawre na pa ã amã ixkapěr ã kagà anẽ.

Sikũn Ximotre

Sikũn Ximotre 1

¹Pa Ximotre? Xà amex? Ixpê Pawre na pa amã ixkapêr nê hã kagà nê awỳr kumê. Ixpê Jejus nhỹ hã hkwỳjê jahkre ho ixpa xwỳnh na pa. Tĩrtũm na pre ja kaxyw ixãm. Tĩrtũm Kra Jejus Krisja kot puj mẽ pahpê hkwỳjaja nhỹrmã kukwak ri pamex kumrêx nê pahtĩr tũm nê ri papa ho papa.

Pawre kot Ximotre ho Tĩrtũm mẽ Jejus wa hwỳr ã harênh

Atre 16.1-2

²⁻³Te apê ixkra pyræk Ximotre. Jakamã na pa hte ato Mẽpanhĩpêêxà maati Tĩrtũm mẽ Pahihti Jejus Kris wa hwỳr rãhã ho ri ixpa. Na pa hte mẽ pakukamã mẽ panhĩgêr pyræk nê tãm ijamaxpêr o ixpa pê Tĩrtũm mã tanhmã amnhĩ nhĩpêx to ho ri ixpa. Jakamã na pa hte ato Kra Jejus mẽ wa hwỳr rãhã ho ri ixpa. Arĩgro hã nê kamàt kãm amã ijamaxpêr nê ato wa kuwỳ nê wa kãm: —Pa Tĩrtũm mẽ Pahihti wa. E ixte ixkra puro Ximotre ho war awỳr kaxyw war amã ijamaxpêr. Na ka hte wa ho mex nhũm war akôt amnhĩ nhĩpêx mex o pa. Te õ wôwô mẽ katorxà wa kot amnhĩ nhĩpêx pyræk. Na pa hte kot amnhĩ nhĩpêx o paja mã ijamaxpêr nê ÿ hã ixkĩnh nê. War ate kamã axukaprĩ ho ri apa kaxyw na pa ho war awỳ. War ate kutã war anojarêr rãhã ho ri war apa nhũm hamakêtkati nê àmnhĩx ri pa ho pa kaxyw. Anê.

Pawre kot Ximotre nhỹ hã hkĩnh ã harênh

⁴Nê na ka pre hte ixkôt ixto ajuta ho ri ixkôt apa htã pa pre nhỹhỹm inhnojarêr nê axtem axapênh õ hã amã karõ hãmri nê Epes kamã are nê ma mõ. Ka amã ijapê xàj tee ri ma inhmõr ã ixpumu nê amỳr rax nê. Na pa hte arĩ ja hã inhnohtỳx nê ri ho ixpa Ximotre. Jao ra ato ama nê. Tã kot puj nhỹrmã axte axpên pumu nê pahkĩnh tỳx nê.

⁵Nê na pa hte akatorxà Enĩtre mẽ anhõ wôwôre Rojti wa kãm ijamaxpêr rãhã ho ri ixpa. Na pre wa kumrêx amnhĩ kaxyw Jejus kôt hamaxpêr nê hkôt amnhĩ xãm. Tã ka wa hkanrêhã wa uræk nê ã amnhĩ nhĩpêx anê. Ixte ja hã apumunh mex.

⁶Na pa pre ate tanhmã Jejus mã amnhĩ nhĩpêx to ho ri apa kaxyw axãm kaxyw anhĩmõk ã inhĩhkra xi nẽ ato Tĩrtũm wỳ. Kot tanhmã akrã hto nhũm ate Karõ nhỹ hã tanhmã amnhĩ nhĩpêx to ho apa kaxyw. Tã kêr ka arĩ ã kãm amnhĩ nhĩpêx anhỹr rãhã ho ri apa.

⁷Na pu htem Tĩrtũm Karõ nhỹ hã pamã ma ho papa hkêt nẽ. Na pu htem ỹ hã pamã mẽ piitã mẽ hkĩnh pê paxàmnhĩx tanhmã mẽ ho ajuta hto ho papa. Nẽ ỹ hã kapêr o mẽ ahkre htỳx o ri mẽ hkôt papa. Nẽ mẽmoj punuj kutã amnhĩ to htỳx rãhã nẽ. Jao amnhĩ to mex pix nẽ.

⁸Jakamã kwa kêr ka amã mẽ kãm Jejus jarênh o apa pymaj tee ri amnhĩ kukamã ajamaxpêr kêt nẽ. Nẽ mẽ kot Jejus ã ijaxàr nhũm arĩ ixkrĩ hã ijarênh ma nẽ mẽ kot ixkuxwar ajaxàr pymaj mẽ kãm Tĩrtũm kapêr o mẽ ahkre hkukamã tee ri ajamaxpêr kêt nẽ. Mẽ kot ã anhĩpêx anhỹr mã tã kêr ka amnhĩ kamã akahak kêt nẽ. ãm Tĩrtũm nhỹ hã hihtỳx xà ho amnhĩ to htỳx nẽ ixpyrà nẽ ma mẽ kãm Jejus kot mẽ panê tanhmã amnhĩ nhĩpêx to hã harênh to rãhã ho ri mẽ hkôt apa. Mẽ kot tanhmã hã anhĩpêx to htãã.

⁹Na pu htem Jejus kôt amnhĩ xunhwỳ nhũm Tĩrtũm ja hã mẽ pahpumu nẽ Jejus kukwak ri amnhĩ katut kôt mẽ pahte amnhĩ tomnuj piitã rênh pa nẽ mẽ pahto hkra. Hãmri nẽ mẽ pahte hkôt pix mã amnhĩ nhĩpêx o papa kaxyw mẽ paxunhwỳ. ãm Jejus pix kukwak ri na hte mẽ pahto hkra nẽ ã mẽmoj to mẽ pakutã nojarêt rãhã ho pa anẽ. No na hte mẽ pahte amnhĩ to mex ã mẽ pahpumunh kôt mẽ pahto hkra hkêt nẽ. Amnepêm kormã mẽmoj piitã hkêt ri na pre mẽ pakukamã hamaxpêr o: —Koja mẽ nhỹrmã Ixkra Jejus Kris kôt amnhĩ xunhwỳ pa ja hã mẽ omu nẽ Ixkra kukwak ri mẽ ho mex nẽ. Anẽ.

¹⁰Tã kormã mẽ pahte amnhĩ tã ã kot mẽ pajarênh anhỹrja mar kêt jakamã na pre Jejus mẽ pahwỳr wrỳ nẽ tanhmã mẽ pahto mex to. Na pre ty nhũm Tĩrtũm akupỹm ho htĩr. Jakamã na pu htem ra amnhĩ kaxyw hkôt pajamaxpêr nẽ hkôt amnhĩ xunhwỳ hãmri nẽ nhỹrmã mẽ pahtyk tã nhũm Tĩrtũm kot Kra Jejus nhĩpêx pyrà nẽ akupỹm mẽ pahto mẽ pahĩr pu mẽ Jejus kukwak ri wa kuri pamex nẽ pahĩr tũm nẽ papa ho papa. Jakamã na pu htem mẽ pamã pahtyk pyrna ho papa hkêt nẽ.

11Amnepê m na pre Tirtûm ixâm nê tanhmã inhmã ixapênh ã karõ hto nê inhmã: —E Pawre kêr ka Jejus nhỹ hã ma hkwỳjê jahkre ho ri mē hkôt apa. Nê ixkapêr o mē ahkre mex nê. Kêr ka ã amnhĩ nhĩpêx anhỹr rãhã ho ri mē hkôt apa. Anê.

12Tã ã kot inhmã kapêr anhỹr nhũm ixte kapêr kôt amnhĩ nhĩpêx o ixpaja mỳrapê na htem Jejus ã tanhmã inhĩpêx kati hto ho pa. Pa hte ixpunuj nê amnhĩ xà htỳx kamã ijamak o ri Jejus mã tanhmã amnhĩ nhĩpêx to ho ri mē hkôt ixpa. Tã nom tee ri ja hã amnhĩ pumu nê amnhĩ kamã xpijaàm nê ixkaprĩ hkêt nê. Ixte amnhĩ kaxyw hkôt ijamaxpêr xwỳnhja na ixte tanhmã kot amnhĩ nhĩpêx to hã omunh mex jakamã kot paj ty nhũm mē arĩ inhmỳr pê Tirtûm kapêr mar o pa. Mē kot ja hã ixpĩr tã koja mē apê Kris kôt ixkwỳjaja inhmỳr pê arĩ mē kãm harênh o apa. Koja mē ã axpên mỳr pê amnhĩ nhĩpêx anhỹr o pa rãhã nhũm Pahihti Jejus akupỹn mē pahwỳr wrỳ.

13Kwa Ximotre. Ra ixte amã mēmoj tã karõ rax jakamã kêr ka mar tỳx nê hkôt amnhĩ nhĩpêx rãhã o ri apa. Jao Jejus Kris nhỹ hã mē piitã mē noo mã amnhĩ kaxyw kãm ajamaxpêr tỳx rãhã nê. Nê mē piitã mē ho mex o ri apa.

14Ate mē kãm tanhmã Jejus jarênh to ho ri apaja ãm hãmri na. Tã koja mēhõ htỳx ri tanhmã ho kapêr punuj to rỳ axtem nê tanhmã harênh to ka ja hã ama nê nê kãm akapêr kãm axihtỳx nê. Tirtûm Karõ ra kot akarõ hwỳr àr jakamã kêr ka ã hã ã Jejus jarênhja jamãr mex o ri apa anê.

Pawre kot tanhmã amnhĩ jarênh to

Sikũn Ximotre 4.16-18

15Nê mãn ka pre ra pika pê As kamã Kris kwỳ kot ixkaga hã mē harênh ma. Na pre Pijerti mē Emosti mē mē ohtô nê tanhmã hamaxpêr to nê ixto ajuta hkêt nê.

16-18ãm Oněspti pix na pre mē kurom ijarênh ma nê man ixwỳr Rõm wỳr mō nê ijapêr o ri mē hkôt mra nê ixwỳr kato. Hãmri nê xatã ixwỳr mra nê tanhmã ixto mex to. Jao akupỹm ijamaxpêr o hihtỳx. Ixpê prês nê ixkrĩ htã kêp ixkrãmnhwỳ hã amnhĩ jarênh ã hpijaàm kêt nê. Nê amnepê m kormã krĩ pê Epes kamã ixpa ri na pre mããnên tanhmã ixto mex to ho pa. Tã ã kot

inhîpêx mex anhÿr o pa jakamã na pa hte ho Pahihti Jejus wÿ nê kãm: —Pa Pahihti? Onësipti o na pa awÿ. Kot ixto mex rãhã ho pa jakamã kwa kêr ka ixtã omu nê kutã anojarêt rãhã ho apa. Nê ôrkwÿ kamã hkwÿjaja mãânên tanhmã mē ho mex to. Hãmri nê nhÿrmã akupÿn mē ixwÿr wrÿ nê ixtã kamã axukaprÿ hã tanhmã ho mex to. Anē.

Sikûn Ximotre 2

Mē pahte Jejus kôt amnhî nhîpêx pix prãm ã mē pamã karõ

Wam Ximotre 6.11-16

¹E Ximotre. Jejus Kris kot mēmoj to mē pakutã nojarêt rãhã jakamã kwa kêr ka ÿ hã amnhî to htÿx nê kãm tanhmã amnhî nhîpêx to ho apa hã amnhî kamã akahak o ri apa hkêt nê.

²Ra ate pa tanhmã Tirtûm kapër o mē ahkre htoja mar jakamã kêr ka amnhî xô ri ã Jejus kôt mē pahkwÿjê jahkre ho apa anē. Mē kot amar nê pahpyràn expên xô ri ho expên jahkre ho pa kaxyw.

³⁻⁴Sôrdat na htem mē hkrãhtûm kãm prãm xà hkôt tanhmã amnhî nhîpêx to. Jao tanhmã kute htã kapër ma nê hkôt amnhî nhîpêx. Tanhmãn à rÿ kãm prãm rÿ tanhmã omnuj to htã kutã amnhî to htÿx nê mē hkrãhtûm kôt amnhî nhîpêx. Na htem amnhî xapênh kukamã tee ri hamaxpër o pa hkêt nê. ãm mē hkrãhtûm kapër kôt pix mã amnhî nhîpêx o pa hprãm. Tã kêr ka mē uràk nê Pahihti Jejus kôt amnhî nhîpêx rãhã ho ri apa hprãm. Mē kot hã tanhmã atomnuj to htãã.

⁵Nê mē hprõt tÿx xwÿnhjaja na htem hkwÿjê pê amnhî to wa hprãm xàj ãm ja pix kukamã hamaxpër. Hãmri nê hprõt tÿx prãm xàj mēmoj kot mē ho hirerek kêt nê amnhî jagri htÿx nê. Hãmri nê hprõt tÿx o hkwÿjê jakre nê amnhî to wa nê pøj nê kot amnhî to wa hã mēmoj to kãnja. Tã kêr ka mē uràk nê amã Pahihti Jejus kot amnhî nhîpêx kôt pix mã amã amnhî nhîpêx prãm.

⁶Nê pur kãm mē àpênh xwÿnhjaja na htem mē hpur kãm àpênh pix tãnopxar o pa nê àpênh rÿnh nê. Kãm kaga hkêt kãm àpênh o pa. Tã àpênh rÿnhja kukwak ri ihpur kãm õ rÿnh nê ho apkur mex o pa. Nom koja mē kãm kaga

ně àpênh mex kêt nê hāmri nê ò grire nê apkur mex kêt nê. Tã kêt ka pur kãm mẽ àpênh rũnh xwỳnhjê pyrà nê Pahihti Jejus mã amnhĩ nhĩpêx mex o apa. Nê mẽ uràk nê amã kaga hkêt kãm axàpênh pix tânopxar o ri apa.

⁷E na pa ã ajahkre anê Ximotre. Tã kêt ka ixte ajahkreja ma nê kãm ajamaxpêr rãhã nê. Koja Pahihti tanhmã akrã hto ka aprĩ hã mar tỳx nê.

⁸Nê kêt ka Pahihti Jejus Kris mã ajamaxpêr rãhã ho ri apa. Na pre katorxà hkôt kêp Pahi finat Tawi kanrêhã htàmnhwỳ hã mẽ pahpyrà nê ì ho ì nê kato nê panhõ pika kamã pa ho pa. Tã nhũm prem kupĩ nhũm amnhĩ xà htỳx kamã hamak kãm ty. Hāmri nhũm Tĩrtũm akupỹm ho htĩr nhũm akupỹm htĩr o htĩr. ã na pre hte harênh anhỹr rãhã ho ri mẽ hkôt ixpa.

⁹Mỳrapê na prem ijaxà pa arĩ jar ixkrĩ ho ixkrĩ. Na htem ixte amnhĩ tomnuj xwỳnh pyràk o inhĩpêx nê axte ixte Jejus kapêr jarênh o ixpa pymaj ijaxà. Tã ã mẽ kot inhĩpêx anhỹr tã na hte Kris kôt pahtõjaja arĩ ixpãnhã mẽ kãm harênh o ri pa. Koja mẽ tee ri kãm Jejus jarênh o hapêx prãm kaprỳ.

¹⁰Jakamã kwār mẽ māmri ã inhĩpêx anê. Koja mẽ arĩ Jejus kot tanhmã mẽ panê amnhĩ nhĩpêx toja mar o pa nhũm mẽ hkwỳjaja hkôt amnhĩ xunhwỳ nê nhỹrmã pahpyrà nê kêp Jejus Kris kwỳ hã Tĩrtũm mẽ wa kuri mex nê htĩr tũm nê pa ho pa.

Kris kwỳ kot tanhmã amnhĩ tã grer to hã mẽ harênh

¹¹Na pu htem mẽ pahpê Kris kwỳ hã ã amnhĩ tã pagrer anê: Mẽ kot Kris ã mẽ panhĩmex tã kot puj mẽ akupỹm pahtĩr nê kuri pamex nê pahtĩr tũm nê papa ho papa.

¹²Mẽ kot tanhmã Kris ã mẽ pahtomnuj to htã kot puj mẽ arĩ hkôt amnhĩ nhĩpêx o papa rãhã ty nê nhỹrmã ìhkô hã mẽ ho amnhĩptàr o papa. Nom kot puj mẽ amnhĩ kamã pakahak pê mẽ pahpê Jejus kwỳ hkêt ã amnhĩ jarê hã koja Jejus amnhĩ xwar mẽ pahpê hkwỳ hkêt ã mẽ pajarê.

¹³Nê mẽ pahte amnhĩ kaxyw Jejus kôt pajamaxpêr kêt tã tanhmã amnhĩ jarênh to xà hkôt tanhmã amnhĩ nhĩpêx to. Aa kot mẽmoj tã amnhĩ jarênh kuhpa hã ri tanhmã amnhĩ nhĩpêx to hkêt. Anê.

Mẽ kot Tĩrtũm kapêr o mẽ ahkre mex xwỳnhjê jarênh

Wam Pêtre 3.15-16

14E Ximotre. Ixte ã mëmoj tâ amã karõ anhÿrja kêr ka ho mẽ ahkre rãhã ho ri mẽ hkôt apa. Kê mẽ ama nẽ kãm hamaxpêr rãhã nẽ. Nẽ mẽ kãm anẽ kê mẽ Tirtũm kapêr o mẽ ahkre mex o ri pa nẽ kapêr ã tanhmã axpên mã àkjêr to hkêt nẽ. Kojã mẽ hã axpên mã akir hãmri nẽ amnhĩ to mex kêr nẽ. Hãmri nhũm mẽ kot mẽ kapêr mar xwÿnhjaja ja hã mẽ omu nẽ tee ri Tirtũm kapêr kukamã hamaxpêr nẽ hkôt amnhĩ nhĩpêx mex kêr nẽ.

15Nẽ na htem mẽ kãm mẽ àpênh mex xwÿnhjaja mẽ õ patrãw kapêr ma nẽ hkôt mëmoj tâ àpênh mex nẽ. Nhũm õ patrãwja hwÿr mra nẽ àpênh ã omu. Hãmri nhũm amnhĩ wÿr omu nẽ àmnhix noo mã apê. Kãm àpênh mex jakamã amnhĩ kamã kãm uma hkêt nẽ. Ja pyrã nẽ kêr ka Tirtũm noo mã kãm amnhĩ nhĩpêx mex rãhã nẽ aprĩ hã kapêr o mẽ ahkre mex o ri mẽ hkôt apa. Kê ã ate amnhĩ nhĩpêx anhÿr ã apumu nẽ anhÿ hã hkĩnh nẽ. Ka àpênh xwÿnhhta pyrã nẽ amnhĩ kamã amã uma hkêt nẽ noo mã kãm amnhĩ nhĩpêx mex o ri apa.

16No mẽ kot Tirtũm kapêr o hêx o mẽ pa xwÿnhjaja kêr ka mẽ hkôt ri apa hkêt nẽ. Nẽ mẽ kapêr mar nẽ ri mẽ hkôt axãm hkêt nẽ. Na htem mẽ kapêr ma nẽ mẽ hkôt amnhĩ nhĩpêx o pa nẽ kãm Tirtũm kapêr mar prãm kêr nẽ. Nẽ gaa nẽ te kêp mar pumaj amnhĩ jamak pro pyrãk o amnhĩ nhĩpêx.

17Tÿx ri tanhmã mẽ ahkre hto xãja te kot mẽ hkànhy aa mex kêr nẽ ra omnuj tÿx o mörja pyrãk. Jao mẽ kot mẽ kapêr mar o mẽ pa xwÿnhjaja mẽ mar pê ra mẽ hkôt amnhĩ tomnuj tÿx o mõ. Na hte ra Imënew mẽ Pijertija wa ã htÿx ri amnhĩ krã hkôt mẽ ahkre anhÿr o pa.

18Nẽ Tirtũm o hêx o mẽ hkôt pa nẽ nhÿrmã akupÿm mẽ pahto mẽ pahtír kêr ã harênh o pa. Hãmri nhũm mẽ amnhĩ tâ wa kuma nẽ tee ri amnhĩ kukamã hamaxpêr pê Jesus kaga nẽ axte amnhĩ kaxyw hkôt hamaxpêr kêr nẽ. Nom wa kapêrja kot anhÿr kêr.

19Kêr Tirtũm kapêrja ãm hãmri na. Kot mëmoj to hêx kêr jakamã na pu htem amnhĩ kaxyw hkôt pajamaxpêr kaprÿ hkêt nẽ. Kapêr ã kagã htũm kot tanhmã mẽ pahpê hkrajê jarênh to nẽ harênh kot: Tirtũm na kot hkrajê piitã

omunh mex rãhã ho pa xwỳnh. Anhỹr o mẽ pajarẽnh. Nẽ mẽ pamã mẽmoj tã karõ kot: Kê mẽ kot Jejus kôt amnhĩ xunhwỳr xwỳnhjaja amnhĩ tomnuj o pa hkêt nẽ. Anẽ.

Tĩrtũm krajaja te kệp prat mex pyrãk ã mẽ harẽnh

²⁰Nẽ mẽ hikàxpore rũnh xwỳnhjaja mẽ õ xijere nẽ mẽ õ prat xohtõõ. Prat kwỳ muxre nẽ hkwỳ omnajre. Prat pynajre na htem mãmri kamã apku no prat muxreja ãm mẽmoj mex pix kaxyw na htem mẽsti hã haxwỳ nẽ kamã apku. Kasamêt ã rỳ mẽ hkra krã hkênh ã mẽ hkĩnh nhũm htem mẽsti hã haxwỳ nẽ kamã apku.

²¹Tã mẽ kot Tĩrtũm kapẽr o hêx o mẽ pa xwỳnhjê hkôt hamaxpẽr kêt nẽ mẽ hkôt amnhĩ tomnuj kêt xwỳnhjaja te mẽ kot prat muxre pyrãk. Na htem tãm amnhĩ nhĩpêx nẽ tanhmã hamaxpẽr punuj to ho pa hkêt nẽ. Hãmri nhũm Tĩrtũm ja hã mẽ omu nẽ mẽ ỹ hã hkĩnh nẽ. Hãmri nẽ te mẽ kot prat muxre jaxwỳr nẽ kamã apkur pyrã nẽ mẽ kot kãm tanhmã amnhĩ nhĩpêx to ho pa kaxyw mẽ unhwỳ.

Mẽ pahte tãm amnhĩ nhĩpêx ã mẽ pamã karõ

²²Nẽ mẽ àptàr nyw jamaxpẽr punujja kêr ka te ate hamỳnh nẽ amnhĩ katut kôt rẽnh par pyrãk o hipêx Ximotre. Jao axte ho ajamaxpẽr o ri apa hkêt nẽ. Nom mẽ hamaxpẽr mexja kêr ka hamỳ nẽ amnhĩ krã him hagjê nẽ ho ajamaxpẽr rãhã ho ri apa. Jao tãm amnhĩ nhĩpêx nẽ amnhĩ kaxyw Tĩrtũm kôt ajamaxpẽr rãhã nẽ. Nẽ amã mẽ kệp Kris kôt akwỳjê hkĩnh pê tanhmã mẽ ho ajuta hto ho ri mẽ hkôt apa. Jao mẽmoj to mẽ kutã anojarêt rãhã nẽ. Na hte ã Pahihti Jejus kôt amnhĩ nhĩpêx xwỳnhjaja amnhĩ nhĩpêx anhỹr o pa.

²³Nẽ kêr ka mẽ kot htỳx ri amnhĩ krã hkôt mẽ ahkre ho mẽ pa xwỳnhjê hkôt apa hkêt nẽ. Te ate mẽ kệp awry hã ri apa pyrã nẽ mẽ kapẽr ma nẽ ãm ama. Na htem mẽ kapẽr mar o pa nẽ ra hã axpẽn mã tanhmã àkjêr to ho pa. Jakamã kwarĩ mẽ hkôt ri apa hkêt nẽ.

²⁴Mẽ pahte Tĩrtũm mã amnhĩ nhĩpêx o papa xwỳnhjaja na pu htem mẽ kurom mẽmoj tã axpẽn mã paxàkjêr o ri papa hkêt nẽ. Na pu htem ãm mẽ

piitã mẽ kamã paxukapřĩ pẽ mẽ ho mex nẽ mẽ kamã pagryk tokyx anhỹr kêt nẽ. Nẽ Tĩrtũm kapẽr o mẽ ahkre mex nẽ. Na hte ã mẽ pahte Tĩrtũm mã tanhmã amnhĩ nhĩpêx to xwỳnhjaja amnhĩ nhĩpêx o papa anẽ.

25-26 Jakamã koja mẽhõ ate Tĩrtũm kapẽr o mẽ ahkreja ma nẽ tanhmã ho amã kapẽr to ka ama nẽ amnhĩ tã tanhmã kãm akapẽr punuj to hkêt nẽ. ãm kamã axukapřĩ ho tanhmã hã kãm akapẽr mex to. Na hte Satanasti te kot amnhĩm mẽ unênh pyræk o mẽ hipêx nẽ tanhmã mẽ kãm Tĩrtũm kapẽr o hêx to nhũm mẽ kuma nẽ hkôt hamaxpẽr nẽ kapẽr kôt amnhĩ nhĩpêx. Tã kot kaj mẽ kamã axukapřĩ ho mẽ kãm akapẽr mex nẽ nhũm Tĩrtũm tanhmã mẽ hkrã hto nhũm mẽ ama nẽ hkôt amnhĩ xunhwỳr japêr. Te Tĩrtũm kot Satanasti pẽ amnhĩm mẽ utàr pyræk. Jakamã nhũm mẽ hpãnhã Tĩrtũm kapẽr mex ã harẽ nẽ harênh o: —Nà pẽr ãm hãmri na Tĩrtũm kapẽrja. ãm mex o mex. Anẽ.

Sikũn Ximotre 3

Jejus akupỹn wrỳk kukamã mẽ kot amnhĩ tomnuj xwỳnhjê jarênh
Matêwre 24.4-13; Korosê 2.16-19; Wam Ximotre 4.1-5; Sikũn Pêtre 2.1-3; Jutre 3-16

1Nẽ Jejus akupỹn mẽ pahwỳr wrỳk xwỳj ri mẽ kot tanhmã amnhĩ nhĩpêx toja kot paj hpãnhã ixpřĩ hã amã harẽ ka inhmar tỳx nẽ Ximotre. Koja Jejus akupỹn mẽ pahwỳr nojarêt pu mẽ pahpê hkwỳjaja pahpunuj nẽ papa.

2Nẽ Kris kwỳ hkêt xwỳnhjaja koja mẽ amnhĩ pix kukamã hamaxpẽr o pa. Jao hikàxpore rax o pikuprõnh pix kukamã hamaxpẽr pẽ hkwỳjê pẽ õxỳ htỳx o pa. Nẽ mẽmoj tã amnhĩ to jarkrar o pa. Nẽ tanhmã hkwỳjê japřỳ hto ho pa. Nẽ mẽ hipêxà nẽ mẽ katorxà hã hpijaàm kêt o pa. Nẽ Tĩrtũm ã hpijaàm kêt o pa. Nhũm mẽhõ tanhmã mẽ ho mex to nhũm mẽ amnhĩ tã mẽ omu nẽ ãm mẽ omu nẽ amnhĩ tã tanhmã mẽ kãm nẽ hkêt nẽ. Rỳ mẽ kãm: “Nà ãm hãmri na ka ã ixto mex anẽ. Nà ja mex.” Anhỹr o mẽ kãm kapẽr kêt nẽ.

3Mẽ ukapřĩ hkêt jakamã koja mẽhõ tanhmã mẽ homnuj to nhũm amnhĩ tã mẽ omu nẽ kamã gryk kurê kumrêx nẽ aa gryk o hapêx kêt nẽ. Nẽ amnhĩ tã tanhmã hkwỳjê ho hêx to ho pa. Nẽ htỳx ri kãm hprãm xà hkôt tanhmã

amnhĩ tomnuj to. Nẽ oprê ho pijapu pix kukamã hamaxpêr. Nẽ axtem nẽ kãm mẽmoj mex pumunh prãm rỳ mẽmoj mex mar prãm kêt nẽ.

⁴Nẽ mēhõ ho hkràmnhwỳ htã axtem nẽ mẽ kãm mẽ hkurê xwỳnhjê nhĩhkram haxà. Nẽ hamaxpêr mex kêt o tanhmã amnhĩ tomnuj to rãhã ho ri pa. Nẽ amnhĩ to rũnh o mẽ piitã mẽ hakrenh par ã amnhĩ to jarkrar o ri pa. Nẽ amnhĩ krã hkôt kãm amnhĩ nhĩpêx prãm xà hkôt amnhĩ nhĩpêx o pa nẽ kãm Tĩrtũm kãm prãm xà hkôt amnhĩ nhĩpêx prãm kêt nẽ.

⁵Hãmri nẽ mẽ kêp hkra hã amnhĩ jarênh o pa htã aa hkôt amnhĩ nhĩpêx kêt. ã Tĩrtũm kra hkêt xwỳnhjaja amnhĩ nhĩpêx kot anhỹr jakamã kwa kêt ka ã mẽ hkôt apa hkêt nẽ Ximotre.

⁶⁻⁷Na htem hêx rom hkwỳjê nhõrkwỹ hwỳr agjê nẽ kamã tanhmã mēnijê mã hêx to. Mẽ kot mẽ mar nẽ tanhmã amnhĩ tomnuj to hãmri nẽ ja hã amnhĩ pumu nẽ tee ri amnhĩ kukamã hamaxpêr kaxyw. Nẽ mẽ kãm mẽ kapêr nyw mar prãm tã nhãm mẽ kapêr ma nẽ nhãm mẽ kapêr mar nẽ aa Tĩrtũm kapêr mar nẽ amnhĩ kaxyw hkôt hamaxpêr kêt nẽ. Jakamã nhũm mẽ kot amnhĩ tomnuj xwỳnhjaja hêx rom mẽ hwỳr mra nẽ mẽ õrkwỹ hwỳr agjê nẽ tanhmã mẽ kãm mẽmoj to hêx to.

⁸Te kot amnepê m finat Jãnre mẽ finat Jãmtija wa kot amnhĩ nhĩpêxta pyræk. Na pre finat Mojestija Tĩrtũm nhỹ hã tanhmã mẽ ahkre hto ho pa nhũm Jãnre mẽ Jãmti wa kãm mar prãm kêt nẽ. Nẽ tanhmã ja nê hkwỳjê mã kapêr to ho pa. Tã ã mẽ kot amnhĩ tomnuj anhỹr o mẽ pa xwỳnhjaja na htem wa uræk nẽ kãm Tĩrtũm kapêr mar prãm kêt nẽ kapêr nê tanhmã hkwỳjê mã kapêr to ho pa. Nhũm mẽ hamaxpêr mex kêt jakamã ãm mẽmoj punuj pix kukamã hamaxpêr nẽ mẽ kuma nẽ amnhĩ kaxyw Jejus kôt hamaxpêr kêt nẽ.

⁹Tã nom koja mẽ hkwỳjaja tokyx hprĩ hã mẽ kot mẽmoj to hêx ã mẽ omu hãmri nẽ axte mẽ hkôt hamaxpêr kêt nẽ nhũm mẽ rĩ amnhĩ pumu. Te amnepê m mẽ kot hprĩ hã Jãnre mẽ Jãmti wa kot tanhmã amnhĩ tomnuj to hã wa omunhta pyræk.

Mẽ pahte Jejus ã pahpunuj tã hkaga hkêt ã mẽ pamã karõ

Atre 13.50–14.7; 14.19-22

¹⁰E Ximotre. Ate ixkôt apa ryy jakamã ra ate tanhmã ixte amnhĩ nhĩpêx ho ixpa hã ixpumunh mex. Ixte tanhmã Tĩrtũm kapêr o mẽ ahkre hto ho ixpaja. Nẽ inhmã mẽmoj to anhỹr prãm xwỳnhja. Nẽ ixte amnhĩ kaxyw Kris kôt ijamaxpêrja. Nẽ inhgryk tokyx anhỹr kêtja. Nẽ ixte tanhmã Kris kôt ixkwỳjê ho mex to ho ri ixpaja. Nẽ ixpunuj mẽ ixpa htã arĩ Kris kôt amnhĩ nhĩpêx mex o ixpaja. ã ixte amnhĩ nhĩpêx anhỹr o ixpaja ate ixpumunh mex.

¹¹Na pa pre krĩ pê ãxiok mẽ Ikõn mẽ Ristija kamã mẽ kãm Jejus jarênh o ixpa nhũm mẽ hkwỳjaja Jejus ã tanhmã inhĩpêx to pa amnhĩ xà htỳx kamã ijamak o ri mẽ hkôt ixpa. Tã nhũm Pahiti Kris xatã mẽ kêp ixpytã pa ixtĩr pê mẽ ãhkra rũm ijapôx o ixpa.

¹²Na hte Kris kwỳ hkêt xwỳnhjaja mẽ pahte Kris kôt amnhĩ nhĩpêx o papa hã mẽ pahtomnuj o pa.

¹³Nẽ mẽ kot Tĩrtũm kapêr o hêx o mẽ pa xwỳnhjaja koja arĩ mẽ kêp Kris kwỳ hã amnhĩ to hêx pê mẽ nokupyr. Nẽ mẽ kãm Tĩrtũm kapêr o hêx o pa. Jao ra mẽ tãmjaja amnhĩ nokupyr o pa mẽ amnhĩ tomnuj tỳx kumrêx.

Pawre kot tanhmã Tĩrtũm kapêr ã kagà jarênh to

Rõmãn 15.4; Sikũn Pêtre 1.19-21

¹⁴⁻¹⁵No ka Ximotre. Amnepêm aprĩre rũm na pa pre mẽ ixohtô mẽ Tĩrtũm kapêr o ajahkre ho ixpa. Akatorxà mẽ anhõ wôwôre mẽ pa mẽ Kris kwỳjaja pa prem ho ajahkre rãhã ho akôt ixpa ka mẽ inhmar tỳx mẽ amnhĩ kaxyw Jejus kôt ajamaxpêr. Jakamã kwa kêr ka arĩ hkôt ajamaxpêr mex rãhã ho ri apa. Tĩrtũm kapêrja na htem mar pê amnhĩ kaxyw Jejus Kris kôt hamaxpêr mẽ hkôt amnhĩ xunhwỳ nhũm Tĩrtũm ja hã mẽ omunh xà hkôt mẽ ho hkra.

¹⁶Tĩrtũm kapêr ã kagàja Tĩrtũm kapêr na. Na htem ho mẽ ahkre ho pa. Koja mẽhõ hkwỳm ri tanhmã amnhĩ tomnuj to mẽ kapêr ma mẽ tee ri amnhĩ tomnujja kukamã hamaxpêr o ra hkaprĩ mẽ. Rỳ tanhmã amnhĩ tomnuj to htã kapêr ã kagà kamã kapêr mẽ Tĩrtũm kot ã kot amnhĩ tomnuj anhỹrja nê mẽ pamã kapêr ã harênh ma mẽ amnhĩ tomnujta kaga kurê kumrêx. Rỳ kamã kapêr mẽ Tĩrtũm kot tanhmã mẽ pahte amnhĩ to mex to hã mẽ pamã karõ kamã harẽ mẽ kuma. Hãmri mẽ ã hã hkôt amnhĩ nhĩpêx mex rãhã mẽ. ã na

hte Tirtūm kapēr kagàja mẽ kot mar nē hkôt amnhĩ nhĩpêx xwỳnhjê ho mex anē.

¹⁷Na hte mẽ kot Tirtūm mã amnhĩ nhĩpêx o mẽ pa xwỳnhjaja kamã harē nē hkôt amnhĩ nhĩpêx mex pē mẽ piitã mẽ ho mex nē ho mẽ ahkre mex rãhã ho pa.

Sikūn Ximotre 4

Pawre kot mẽmoj tã Ximotre mã karō

Korosē 4.5-6

¹Nē koja nhỹrmã Jejus Krisja akupỹn mẽ pahwỳr wrỳ hãmri nē mẽ pahpiitã tanhmã mẽ pajarēnh to. Ra mẽ htyk xwỳnhjaja nē arĩ mẽ pahtĩr xwỳnhjaja nhũm tanhmã mẽ pahte amnhĩ nhĩpêx to ho papa hã mẽ pahpumunh kôt tanhmã mẽ pajarēnh to. Jao Tirtūm mẽ wa kuri mẽ pahtĩr tũm nē papa ho papa hã mẽ pajarē rỳ wa kuri pahtĩr tũm nē papa hkêt ã mẽ pajarē. Jakamã kwa Ximotre kot paj Tirtūm mẽ Jejus Krisja wa noo mã mẽmoj tã amã karō ka inhmar tỳx nē.

²⁻⁴Koja nhỹrmã mẽ kêp Tirtūm kra hkêt xwỳnhjaja axte kãm Tirtūm kapēr mar prãm kêt nē nhãm mẽ kapēr pix mar prãm o ri pa. Jao amnhĩ kukamã hamaxpēr o: —Nà inhmã Tirtūm kapēr mar prãm kêt. Kot mẽmoj piitã nē mẽ hkurê kênã. Kot paj hpãnhã mēhō kot mẽmoj nē mẽ hkurê hkêt xwỳnhjê kapēr pix mar o ri ixpa. Nà kot paj anē. Ja na inhmã hprãm. Nom kot paj axte Tirtūm kapēr mar kêt nē. Anhỹr jao kapēr kaga nē hpãnhã htỳx ri nhãm mẽ ujarēnh pix ma nē hkôt hamaxpēr. Koja mẽ ã amnhĩ nhĩpêx anhỹr o pa. Jakamã kwa kêr ka arĩ mẽ kãm Jejus kot tanhmã mẽ panê amnhĩ nhĩpêx to hã harēnh rãhã ho ri mẽ hkôt apa Ximotre. Mẽ kãm mar prãm kêt tã mãmri ri mẽ kãm harē. Nē nhỹri mēhō pumu nē kãm harē. Mẽ kãm mar prãm xwỳnhjê mã harē nē mẽ kãm mar prãm kêt xwỳnhjaja ka mãănēn mẽ kãm harē. Nhũm mēhō tanhmã amnhĩ tomnuj to ka hã omu nē tanhmã nē kãm akapēr to kê hkaga tokyx anē nē akupỹm tãm amnhĩ nhĩpêx. Rỳ nhũm mēhō tãm amnhĩ nhĩpêx o pa ka ja hã omu nē hã kãm akapēr nē kãm: —Ăm hãmri

na ka hte Tĩrtũm kõt amnhĩ nhĩpêx mex nê. Anê. Hãmri nê anojarêk kêt kãm mē kãm Tĩrtũm kapêr o mē ahkre rãhã ho ri apa.

⁵Nê tãm ri amnhĩ nhĩpêx rãhã nê. Mē kot Jejus ã tanhmã anhĩpêx to htã kêr ka ÿ hã amnhĩ to htỳx nê arĩ mē kãm kapêr jarēnh o ri mē hkõt apa. Jao Tĩrtũm mã amnhĩ nhĩpêx mex rãhã nê. Kêr ka ã mē hkõt amnhĩ nhĩpêx anhỹr o ri apa Ximotre.

Pawre kot ra htyk kaxyw ã amnhĩ jarēnh

Atre 20.17-35

⁶Nê mē kot ixpĩr xà hã arĩgroja ra hwỳr ahtêp o mō. Kot paj pêr tokyx ty. Amnepêm na prem Tĩrtũm mã mēmoj nhõr kaxyw nê mē hkõm xà kamã mēmo kagõja py nê mē kot Tĩrtũm mã mēmoj nhõr xà hã mêtija ã hkapĩr pa nhũm hapêx. Tã te ixpê mē hkõm xà kamã mēmo kagõ pikapĩrta pyræk. Kot paj tokyx ty nê jar ijapêx.

⁷Na pa ra Pahihti Jejus mã amnhĩ nhĩpêx mex o ri ixpa. Mē kot tanhmã hã ixtomnuj to htã pa hkaga hkêt nê arĩ hkõt amnhĩ nhĩpêx mex rãhã ra ixtyk kaxyw.

⁸Ixte Pahihti kãm hprãm xà hkõt amnhĩ nhĩpêx mex o ri ixpa jakamã koja amnhĩ tã tanhmã ixto mex to. Nom papxipix ixto mex kêt nê. Na hte ãm hãmri tãm mē pahpiitã mē panhĩpêx. Jakamã nhỹrmã kot mē piitã tanhmã mē harēnh to xà hã arĩgrota ã koja mē pahkĩnh pē mē pahte amnhĩ wỳr kamã pajamak o papa xwỳnh piitã mē pamã mã mēmoj mex gõ.

Pawre kot amnhĩ wỳr Ximotre hwỳr

⁹Kwa na pa ra ato ijamak tỳx nê Ximotre. Kwa kêr ka amnhĩm anojarêk nê tokyx tanhmã amnhĩ to hpa nê man ixwỳr mō.

¹⁰Na pre ra Kresêx ma Karatas wỳr mō nhũm Xitre ma pika pē Tawmas wỳr mō. Nhũm Tēmti ra tanhmã hamaxpêr to nê àpēnh gryk ã ixkaga nê ma akupỹm Tesarõn wỳr mō.

¹¹ãm Rukre pix na arĩ ixkõt pa jakamã kêr ka anojarêk hãmri nê ahte amõr kêt nê. Makre mã anê kê man akõt ixwỳr mō nê tanhmã ixto ajuta hto ho pa.

¹²Ně Xikitre na pa pre ra Epes wỳr kumě.

¹³Ně Torôt kām Kapti nhōrkwỹ kamã ixte kry pê inhō kamĩs pa hkà ryti rer jakamã kêr ka anojarêt nē inhmã apy nē man inhmã o mō. Nē inhō kagàta ka mǎānēn inhmã amỳ nē o mō. Nē mēmo mry kà hã ixte mēmoj tã kagàta ka mǎānēn apy nē mǎn inhmã o mō. E kêr ka anojarêt nē ixkukrêxja jamỳ nē ixwỳr ho mō.

Tanhmã Aresãnti kot Pawre nhĩpêx to hã harēnh

¹⁴⁻¹⁵Ně na pre kàx o mēmoj nhĩpêx xwỳnh Aresãntija ixtomnuj nē. Pa pre mē kām Tĩrtũm kapēr o mē ahkre ho ri mē hkôt ixpa nhũm tee ri inhma nē kām mar prām kêt nē. Hāmri nē ixkutã amnhĩ xãm nē inhĩpêx kati nē. Nom koja Pahihti Jejus ixtã tanhmã ho. Kwa kêr ka amnhĩ nē omunh mex nē Ximotre.

Pahihti Jejus kot Pawre mǎ hamaxpēr o hihtỳx ã harēnh

¹⁶Ně pahi kot mē mar xà hã ixkre kamã wam ixte mē kām amnhĩ jarēnh ta ã na pre mēhō ixyr pê mē kām tanhmã ijarēnh to hkêt nē. Na prem piitã mē umaj ixkaga hpa. Nom kwār mē māmri ã amnhĩ nhĩpêx anē. Tĩrtũm kot ixtã tanhmã mē hoja na inhmã hprām kêt.

¹⁷ãm Pahihti Jejusja pix na pre mē kurom ixkaga hkêt nē. Na pre ixto ixihtỳx nē pa ỹ hã mē kām tanhmã mē panê kot amnhĩ nhĩpêx to hã harēnh pa. Nhũm Ijaew kêt xwỳnh kot inhmar o hkrĩ xwỳnhjaja ixujarēnh mar o hkrĩ nhũm Tĩrtũm inhnê tanhmã mē ho nhũm mē xpĩr kêt nē.

¹⁸Koja Pahihti mē kutã ixto ixihtỳx rãhã nē mēmo arĩgro hã amnhĩ wỳr ixto api. Pa Tĩrtũm mē wa kuri inhmex kumrêx nē ixtĩr tũm nē ixpa ho ixpa. Pahihti mex o mex jakamã kêr pu mē kām mex o mex ã harēnh rãhã ho papa nē aa jam panhũrer kêt nē.

Pawre kot tanhmã hkràmnhwỳjê jarēnh to

¹⁹Ně kêr ka Prisire mē mjên Akir wa kām ijarē. Nē Onēsipti hprō nē hkrajaja ka mǎānēn mē kām ijarē.

²⁰No Eras kormã Korĩt kãm pa. Nẽ Toropti na pre à nẽ pa Mĩrêt kãm kure nhũm ixkõt mõi kêt nẽ.

²¹Kwa kêr ka amnhĩm anojarêt nẽ amgrà pê man tokyx ixwỳr mõi Ximotre. Nẽ ota Epti mẽ Prutěhti mẽ Rĩnre mẽ Krawreja awỳr hpěr mẽ. Nẽ jar Kris kõt pahkwỳjê piitã awỳr hpěr mẽ.

²²E kê Pahihti Jejus ato mex rãhã nẽ mẽ apiitã mẽ akutã nojarêt rãhã ho pa. Tã ãm ja pix. Ixpê Pawre na pa awỳr kagàja nhĩpêx nẽ kumẽ.

Xitre

Xitre 1

¹Pa Xitre? Xà amex? Ixpê Pawre na pa awỳr kagà nhípêx nê kumê. Na pa hte Tĩrtũm mã tanhmã amnhĩ nhípêx to ho ixpa. Nê ixpê Jejus Kris nhỹ hã hkrajê jahkre o ixpa xwỳnh jakamã na pa hte mẽ kot amnhĩ kaxyw hkôt hamaxpêr tỳx kaxyw tanhmã mẽ kãm ixkapêr to ho ri ixpa. Nê mẽ kot hprĩ hã mar kaxyw Tĩrtũm kapêr o mẽ ahkre mex nê.

²Mẽ kot inhmar nê nhỹrmã htyk nê ma Tĩrtũm mẽ Jejus wa hwỳr àpir nê wa kuri htĩr tũm nê pa ho pa hã amnhĩ kukamã hamaxpêr kaxyw. Amnepê m na pre Tĩrtũm ã mẽ pahpê hkrajê hkukamã mẽ pajarênh anê. Nê ãm hãmri ã mẽ pajarênh anê. Na hte mẽmoj tã amnhĩ to hêx kêt nê.

³Tã ra mẽ pakukamã mẽ pamã mẽmoj to amnhĩrĩt nê inhmã kapêr o: —E Pawre kêr ka ma mẽ hpiitã mẽ hkôt ri apa nê mẽ kãm ixkapêr jarê nê mẽ kãm: “Kot kaj mẽ amnhĩ kaxyw Tĩrtũm Kra hkôt ajamaxpêr nê hkôt amnhĩ xunhwỳ nhũm Tĩrtũm ja hã mẽ apumu nê mẽ ato hkra. Ka mẽ nhỹrmã atyk tã nhũm amnhĩ wỳr mẽ ato api ka mẽ wa kuri amex kumrêx nê atĩr tũm nê apa ho apa.” Anhỹr o mẽ kãm ixkapêr jarênh o ri mẽ hkôt apa Pawre.

⁴Anhỹr o inhmã kapêr tã pa ã amã ixkapêr nê hã kagà anê Xitre. Pajamê pahte amnhĩ kaxyw Jejus kôt pajamaxpêr nê hkôt amnhĩ xãm jakamã te apê ixkra pyræk. Jakamã na pa hte ato Měpanhĩpêêxà maati Tĩrtũm mẽ mẽ papytâr xwỳnh Jejus Krisja wa hwỳr rãhã ho ri ixpa nê wa kãm: —Pa Tĩrtũm mẽ Pahihtĩ wa. Nà Xitre ho na pa wa awỳ. Kwa kêr ka wa kutã anojarêt rãhã ho ri apa. Kê wa akukwak ri hamakêtkati nê àmnhĩx pa ho pa. Anê.

Kris kwỳ hkrãhtũmjaja kot tanhmã amnhĩ nhípêx to kaxyw mẽ hã kãm karõ

Wam Ximotre 3.1-13

⁵Nê na pa pre Kret rũm inhnojarêt hãmri nê amã axàpênh ã karõ nê Kret kãm are nê man mō. Na pa pre amã: —E kêr ka jar arĩk nê mẽ kãm ixkapêr jarênh jatur xàm mênh o mẽ hkôt apa. Nê Kris kôt pahkwỳjê mã mẽ hkrãhtũmjê xunhwỳ. Kret kãm krĩ piitã hkôt. Na pa pre ixprĩ hã tanhmã

amã mẽ harēnh to. Tã kêr ka ate inhmar xà hkôt mẽ hkwỳjê kapi nẽ mẽ unhwỳ. Koja mẽ ã amnhĩ nhĩpêx anhỹr o pa ka ja hã mẽ omu nẽ mẽ unhwỳ.

⁶Koja mẽ tãm amnhĩ nhĩpêx o pa nhũm mẽ piitã axpēn mã mẽ mex ã mẽ harē. Nẽ mẽ hprō pix tãnopxar o pa nẽ kuhpa hã nhãm mēnijê ho amnhĩkati hkêt nẽ. Nẽ kê mẽ hkrajaja hipêêxà pyrà nẽ amnhĩ kaxyw Jejus kôt hamaxpēr o pa. Jao hipêêxà nẽ katorxà wa kapēr ma nẽ wa hkôt amnhĩ nhĩpêx. No ri htỳx ri amnhĩ tomnuj o pa hkêt nẽ. Anhỹr o na pa pre mẽ hã amã karō.

⁷Jejus kôt pahkwỳjê hkrãhtũmjaja kot Tĩrtũm nhỹ hã hkrajê mã kapēr mex o pa jakamã na htem tãm amnhĩ nhĩpêx o pa. Nẽ amnhĩ pix kukamã hamaxpēr o pa hkêt nẽ. Nẽ gryk tokyx anhỹr kêt nẽ. Nẽ kagôxỳhti japrōr nẽ ho pipãnh o pa hkêt nẽ. Nẽ oprê ho pa hkêt nẽ. Nẽ kàxpore rũnh prãm xàj hêx rom tanhmã amnhĩ nhĩpêx to hkêt nẽ. Na htem ã amnhĩ nhĩpêx anhỹr hkêt nẽ.

⁸Ãm àmnhĩx amnhĩ nhōrkwỹ hwỳr mẽ hwỳr o pa. Nẽ mẽ piitã mẽ kutã nojarêt rãhã nẽ. Nẽ tãm hamaxpēr nẽ tãm mẽ piitã mẽ hipêx o pa. Nẽ amnhĩ tomnuj pymaj amnhĩ to htỳx pê Tĩrtũm kôt amnhĩ nhĩpêx mex rãhã ho pa.

⁹Nẽ mẽ kot Tĩrtũm kapēr mar tỳx jakamã kê mẽ arĩ hã nohtỳx nẽ mar tỳx xà hkôt amnhĩ xô ri ho hkwỳjê jahkre mex o pa. Nẽ ho mẽ piitã mẽ hamaxpēr o hihtỳx o pa. Nhũm mēhō Tĩrtũm kapēr kwỳm ri tanhmã ujarēnh to nhũm hã kuma nẽ hprĩ hã kãm tanhmã harēnh to kê mar mex nẽ. E Xitre. Na hte ã Jejus kwỳjê hkrãhtũmjaja amnhĩ nhĩpêx anhỹr o pa. Jakamã kêr ka aprĩ hã Kret kãm Jejus kôt pahkwỳjê kapi nẽ mẽ kot tanhmã amnhĩ nhĩpêx to ho pa hã mẽ omu. Nhũm mēhō ã amnhĩ nhĩpêx anẽ ka ja hã omu hãmri nẽ kêp Jejus kwỳjê hkrãhtũm kaxyw ãm.

Kret nhō xwỳnhjaja kot tanhmã amnhĩ tomnuj to hã mẽ harēnh

Xitre 3.9-11

¹⁰Nẽ atar Kret kãm na hte mẽ ohtô nẽ kãm mẽ õ pahi kapēr mar prãm kêt nẽ htỳx ri tanhmã Kris kwỳjê mã kapēr to ho pa. Na hte Ijaew kwỳjaja ã amnhĩ nhĩpêx anhỹr o pa. Jao Ijaew kêt xwỳnh kot Jejus kôt amnhĩ xunhwỳr

xwỳnhjê mã kãm: —Kwa mẽ ixpyrà nẽ mẽ ixpê Ijaewjê kot amnhĩ nhĩpêx kôt mãn amnhĩ nhĩpêx kêt wehe.

¹¹Anhỹr o mẽ kãm kapêr jakamã kwa kêr ka ã mẽ kapêr anhỹrja nê mẽ kãm akapêr kãm axihtỳx nẽ. Na htem hpijaàm kêt o hikàxpore hprãm xàj ã mẽ kãm kapêr anhỹr o pa. Jao mẽ hamaxpêr o ahkà nhũm mẽ kuma nẽ tee ri hamaxpêr.

¹²Na pre ra mẽ hkwỳjê hõ tanhmã mẽ harẽnh to. Mẽ ahkre xwỳnhjê hõja mẽ harẽnh o: —Kret nhõ xwỳnhjaja na htem hêx pix o pa. Nẽ oprê nẽ kãm kaga nẽ apkur xà pix kukamã hamaxpêr o pa. Anẽ.

¹³ãm hãmri ã mẽ harẽnh kot anhỹr. ã mẽ kot amnhĩ nhĩpêx anhỹr jakamã kwa mẽ kot amnhĩ nhĩpêxja nê mẽ kãm akapêr kãm axihtỳx o ri mẽ hkôt apa Xitre. Kê mẽ ã amnhĩ nhĩpêx anhỹr kêt nẽ. Nẽ mẽ kãm anẽ kê mẽ amnhĩ kaxyw Tĩrtũm kôt mãn hamaxpêr tỳx nẽ.

¹⁴Nẽ kê mẽ axte Ijaewjê xujarẽnh nẽ mẽ kot amnhĩ nhĩpêx kôt amnhĩ nhĩpêx kêt nẽ. ã mẽ kot amnhĩ nhĩpêx o pa hã mẽ kãm karõ xwỳnhjaja na prem Tĩrtũm kapêr kaga hpa.

¹⁵Mẽ kot Jejus kôt amnhĩ xunhwỳr xwỳnhjaja tãm mẽ hamaxpêr o pa jakamã na htem Tĩrtũm kot mẽmoj piitã ho kator xwỳnh pumu nẽ piitã mex ã harẽ. No mẽ kêp Jejus kwỳ hkêt xwỳnhjaja na htem hamaxpêr punuj pix o pa. Nẽ mẽmoj mex pumu nẽ mex kêt ã harẽ. Mex tã nhũm mex kêt ã harẽnh o pa.

¹⁶Nẽ mẽ kêp Tĩrtũm kra hã amnhĩ jarẽnh tã amnhĩ tomnuj pix o pa. Jao kêp hkra hã amnhĩ jarẽnh o hêx nẽ kapêr kwỳm ri amnhĩ nhĩpêx pix o pa. Nhũm Tĩrtũm tee ri ja hã mẽ omu nẽ kãm mẽ hkĩnh kêt nẽ. Tĩrtũm mã mẽ kot amnhĩ to mex kwỳ mẽ hã jêt kêt kumrẽx.

Xitre 2

¹E Xitre kot paj tanhmã ate mẽ ahkre hto hã amã karõ ka inhma nẽ amnhĩ xô ri mẽ kãm hã karõ ho ri apa.

Měmy wejjaja kot tanhmã amnhĩ nhĩpêx to kaxyw mẽ hã kãm karõ

²Ně kêr ka mĕmy wejjê mã anĕ kê mĕ amnhĩ to àptàr mex nĕ pa. Nĕ pipãnh nĕ ri pa hkĕt nĕ. Nĕ mĕ gryk kaxyw htÿx ri hkwÿjê hã hpĕr o pikĕnh kĕt nĕ. Kê mĕ tãm hamaxpĕr nĕ tãm amnhĩ nhĩpĕx o pa. Nĕ amnhĩ kaxyw Jejus kôt hamaxpĕr tÿx rãhã nĕ. Nhũm mĕ hkwÿjaja kot mĕmoj tã tanhmã mĕ homnuj to htã kê mĕ arĩ tãm amnhĩ nhĩpĕx o pa nĕ amnhĩ tã tanhmã mĕ ho hkĕt nĕ. E kêr ka ã mĕmy wejjê mã ja hã akarõ anĕ.

Mĕni wejjaja kot tanhmã amnhĩ nhĩpĕx to kaxyw mĕ hã kãm karõ

Wam Korĩt 14.34-35; Wam Ximotre 2.9-15; 3.11; Wam Pĕtre 3.1-6

³⁻⁴Nĕ mĕni wejjê mã anĕ kê mĕ kãm Jejus kĩnh xàj tãm ri amnhĩ nhĩpĕx o pa. Jao axpĕn jakwa kamã nhãm mĕ hixi ho rĕr o pa hkĕt nĕ. Nĕ kagõxÿhti ho pipãnh o pa hkĕt nĕ. Nĕ mĕ kãm anĕ kê mĕni xàptàr nywjê jahkre mex o pa. Mĕ kot mĕ mar nĕ mĕ uràk nĕ tãm amnhĩ nhĩpĕx kaxyw. Jao mĕ kãm mĕ mjĕn nĕ mĕ hkrajê japê hã mĕ kãm mĕmoj to anhÿr o mĕ kutã nojarĕt rãhã ho pa. Kêr ka ã mĕni wejjê mã akapĕr anĕ.

Mĕni xàptàr nywjaja kot tanhmã amnhĩ nhĩpĕx to kaxyw mĕ hã kãm karõ

⁵Nĕ mĕni xàptàr nywjê mã anĕ kê mĕ tãm hamaxpĕr pĕ tãm amnhĩ nhĩpĕx o pa. Nĕ mĕ õrkwÿ kamã àpĕnh mex o pa. Nĕ mĕ mjĕn kapĕr ma nĕ hkôt amnhĩ nhĩpĕx. E. ã mĕni xàptàr nywjê mã karõ anĕ. Koja mĕ ã amnhĩ nhĩpĕx anhÿr o pa hãmri nhũm mĕ piitã mĕ kot amnhĩ nhĩpĕx ã mĕ omu nĕ mĕ harĕnh o: —Tĩrtũm kapĕrja mex kumrĕx. Mĕ kot hkôt amnhĩ nhĩpĕx o mĕ pa xwÿnhjaja na htem tãm amnhĩ nhĩpĕx mex o pa. Anĕ.

Mĕmy xàptàr nywjaja kot tanhmã amnhĩ nhĩpĕx to kaxyw mĕ hã kãm karõ

Wam Ximotre 4.12; Sikũn Ximotre 2.22; Wam Pĕtre 5.5

⁶Nĕ kêr ka mĕmy xàptàr nywjê mã anĕ kê mĕ mĕmoj punuj pĕ amnhĩ to htÿx o pa. Mĕ hamaxpĕr punuj nĕ mĕ kot tanhmã amnhĩ tomnuj to pĕ amnhĩ to htÿx o pa.

⁷Nĕ kêr ka ajaxwÿja tãm amnhĩ nhĩpĕx rãhã ho ri mĕ hkôt apa Xitre. Mĕ kot ja hã apumunh nĕ akôt amnhĩ nhĩpĕx o pa kaxyw. Nom kêr ka tanhmã mĕ ahkre hto hkwÿm ri tanhmã amnhĩ nhĩpĕx to hkĕt nĕ. ãm Tĩrtũm ã apijaàm o akatàt kôt mĕ kãm kapĕr o mĕ ahkre pĕ tãm amnhĩ nhĩpĕx o ri apa.

⁸Ně kêr ka tãm akapêr rãhã ho ri apa. Kêr kê mẽ kãm mẽ pahkurê xwýnhjaja ja hã ama ně amnhĩ kamã hpijaàm hãmri ně apê Kris kwỳ hã tanhmã ato kapêr punuj to hkêt japêr.

Mě kãm mẽ àpênh xwýnhjaja kot tanhmã amnhĩ nhĩpêx to kaxyw mẽ hã kãm karõ

Epes 6.5-8; Korosê 3.22-25; Wam Ximotre 6.1-2; Wam Pêtre 2.18-25

⁹Ně kêr ka mẽ kãm mẽ àpênh o mẽ pa xwýnhjê mã anê kê mẽ õ patrãw kãm hprãm xà hkôt amnhĩ nhĩpêx o pa. Jao mẽ kapêr ma ně hkôt amnhĩ nhĩpêx mex ně. Ně amnhĩ tã tanhmã mẽ kãm kapêr punuj to hkêt ně.

¹⁰Ně kê mẽ kêp mẽmoj to àhkĩnh kêt ně. Ně tãm mẽ hipêx rãhã ně. Ně kãm hkukrêx jamãr mex o pa. Koja mẽ ã amnhĩ nhĩpêx anhỹr o pa nhũm mẽ õ patrãw amnhĩ tã mẽ omu ně mẽ ý hã hkĩnh ně pa. Hãmri ně hamaxpêr o: — Hêxta waa ně. Inhmã àpênh xwýnhhta na hte inhmã àpênh mex o pa. Na hte ixkukrêx ně ixkrit jamãr mex ně ixpê mẽmoj to àhkĩnh kêt ně. Nà mẽ kot Tĩrtũm kapêr kôt amnhĩ nhĩpêx o mẽ pa xwýnhjaja na htem tãm amnhĩ nhĩpêx o pa. Pêr Tĩrtũm kapêr ãm hãmri na. ãm mex o mex. Anê. E Xitre kêr ka mẽ kãm mẽ àpênh xwýnhjê mã ã mẽ kot amnhĩ nhĩpêx anhỹr ã karõ.

Tanhmã Jejus kãm mẽ pajapê xaj amnhĩ nhĩpêx to hã harênh

Epes 2.8-10; Wam Tesarõn 1.9-10

¹¹Ně Tĩrtũm kot mẽmoj to mẽ pakutã nojarêt rãhã ho pa jakamã na hte mẽ pahte Kra hkôt amnhĩ xunhwỳr xwýnhjê ho hkra pu mẽ nhỹrmã wa kuri pahtĩr tũm ně papa ho papa.

¹²Na hte ã mẽ pamã kapêr o amnhĩrĩt anê ně mẽ pamã: —E kêr ka mẽ apê ixkra hã tãm amnhĩ nhĩpêx rãhã ho ri apa ně axte tanhmã amnhĩ tomnuj to ně tanhmã ajamaxpêr punuj to hkêt ně. Mě ate amnhĩ tomnuj pê amnhĩ to htỳx ně ixkapêr kôt pix mã ri amnhĩ nhĩpêx rãhã ně. Anê.

¹³Na pu htem ã amnhĩ nhĩpêx anhỹr o papa jao pahkĩnh ně mẽ papytãr xwýnh Jejus Kris jamãr o papa. Koja nhỹrmã mẽ panhõ Tĩrtũm xihtỳx xwýnhja akupỳn mẽ pahwỳr kumê pu mẽ mex o mex ã omu.

¹⁴Na pre Jejus amnhĩ grõnh kôt mẽ pahwỳr wrỳ ně mẽ pahpiitã mẽ pahte amnhĩ tomnuj pãnhã amnhĩrer kaxyw htyk o Tĩrtũm mã amnhĩrer pa. Měmo

kaxyw na pre ã mẽ panê amnhĩ nhĩpêx anê? Nà mẽ pahpê hkwỳja na kãm hprãm. Nẽ mẽ pahte tãm ri Tĩrtũm kapêr kôt amnhĩ nhĩpêx o papaja na kãm hprãm. Nẽ mẽ pahte uràk nẽ mẽ piitã mẽ kutã panojarêt rãhã ho papaja na kãm hprãm. Jakamã na pre ã mẽ panê amnhĩ nhĩpêx anê.

¹⁵E Xitre. Ixte mẽmoj tã amã karõja kêr ka ho Kris kwỳjê jahkre mex o apa kê mẽ ama nẽ kapêr kôt amnhĩ nhĩpêx o pa. Nhũm mẽhõ tanhmã amnhĩ tomnuj to ka hã omu nẽ Tĩrtũm nhỹ hã tanhmã nê kãm akapêr to kê axte hkêt nẽ. Tã mãn ka inhma. Kêr ka ã Kris kwỳjê jahkre mex o apa anê.

Xitre 3

Tanhmã Kris kwỳ kot amnhĩ nhĩpêx to hã mẽ kãm karõ

Rõmãn 13.1-10; Epes 2.1-10

¹Nẽ kêr ka Kris kôt akwỳjê mã anê kê mẽ ho amnhĩptar xwỳnhjê kapêr ma nẽ mẽ hkôt amnhĩ nhĩpêx o pa. Nẽ mẽmoj to mẽ kutã nojarêt rãhã ho pa.

²Nẽ mẽ kãm anê kê mẽ tanhmã hkwỳjê mã kapêr punuj to ho pa hkêt nẽ. Rỳ mẽmoj tã mẽ kãm àkjêr kêt nẽ. Kê mẽ tãm mẽ hipêx nẽ mẽ kamã ukapĩr pê mẽ ho mex rãhã ho pa. Na hte ã Kris kwỳjaja axpẽn nhĩpêx o pa anê.

³Kormã mẽ pahte hkôt amnhĩ xunhwỳr kêt ri na pu prem ã amnhĩ nhĩpêx anhỹr kêt nẽ. Na pu prem Tĩrtũm mã pajamaxpêr kêt nẽ kapêr kôt ri amnhĩ nhĩpêx hkêt nẽ. Nẽ amnhĩ tomnuj pix kukamã pajamaxpêr o ri papa. Nẽ amnhĩ pix kukamã pajamaxpêr. Jao mẽ pamã pam amnhĩ nhĩpêx prãm xà kôt pix mã tanhmã amnhĩ nhĩpêx to ho ri papa. Nẽ axpẽn tomnuj nẽ. Nẽ axpẽn kãm pagryk rãhã ho papa. ã mẽ pahte amnhĩ nhĩpêx anhỹr ho papa jakamã nhũm pre mẽ piitã kãm mẽ pahkĩnh kêt nẽ. Pu mẽ pajaxwỳja pamã mẽ hkĩnh kêt nẽ.

Tanhmã Tĩrtũm kot mẽ pahto mex to hã harênh

Rõmãn 5.6-8; Epes 2.4-10

⁴Tã pu prem Tĩrtũm kêp mẽ papytãr xwỳnh ã harênh ma. Kot tanhmã mẽ panê amnhĩ nhĩpêx to hã harênh ma nẽ mex o mex nẽ mẽ pakamã ukapĩr hã harênh ma.

⁵⁻⁶Hāmri nē amnhĩ kaxyw hkôt pajamxpēr nē hkôt amnhĩ xunhwỳ nhũm amnhĩ tã mẽ pahpumu nē mẽ pahto hkra. Nom mẽ pahte tanhmã amnhĩ to mex to hã mẽ pahpumunh kôt mẽ pahto hkra hkêt nē. Mẽ pahte tanhmã amnhĩ to mex tore hã. Na pre mẽ pakamã ukaprĩ nē ã mẽ papytâr anē. Tã tanhmã na pre mẽ papytâr to wehe? Nà na pre Jejus Kris kukwak ri te kot mẽ pane mẽ pahte amnhĩ tomnuj piitã kuhõnh par pyræk o mẽ panhĩpêx. Hāmri nē mẽ pahwỳr amnhĩ Karõ rē nhũm mẽ pahwỳr agjê nē mẽ pamã mẽ pahte amnhĩ nhĩpêx nyw gõ. ã na pre Tĩrtũm Jejus Kris kot mẽ panê htyk kukwak ri mẽ pahto mex rax anē hāmri nē mẽ pahwỳr amnhĩ Karõ rēnh anē.

⁷Tã mẽmo kaxyw na pre ã mẽ pahto mex anē? Nà kãm mẽ pajapê jakamã na pre ã mẽ panhĩpêx anē. Mẽ pahte amnhĩ tomnuj xwỳnh tã kãm mẽ pajapê htỳx nē kãm tanhmã mẽ pahto hprãm kêt nē. Nē mẽ pahwỳr Kra Jejus mẽ nhũm wrỳ nē mẽ pahte amnhĩ tomnuj pãnhã mẽ panê ty. Jakamã mẽ pahte amnhĩ kaxyw hkôt pajamxpēr nē hkôt amnhĩ xunhwỳr xwỳnhjaja Jejus kukwak ri mẽ pahpê Tĩrtũm kraa. ã na pre Jejus mẽ pahto mex anē. Jakamã kot puj mẽ nhỹrmã Tĩrtũm mẽ wa kuri pahtĩr tũm nē pamex nē papa ho papa. Koja wa nhỹrmã ã mẽ pahto mex anē.

⁸ãm hāmri na pa amã ã ja jarēnh anē Xitre. Jakamã kwa kêr ka inhma nē inhmar tỳx nē. Nē ho amnhĩ kaxyw Tĩrtũm kôt mẽ hamaxpēr xwỳnhjê jahkre mex o ri apa. Kê mẽ amar xà hkôt tãm ri amnhĩ nhĩpêx o pa.

⁹Nē mẽ kot htỳx ri mẽmoj tã axpēn mã àkjêr o mẽ pa xwỳnhjaja kêr ka mẽ hkôt apa hkêt nē. Nē mẽ hkukamã mẽ higêt kôt apa hkêt nē. Rỳ finat Mojes kot Tĩrtũm nhỹ hã kapēr ã axpēn mã mẽ àkjêr xwỳnhjê hkôt apa hkêt nē. Na htem ã ri axpēn mã àkjêr anhỹr o pa nē tãm amnhĩ nhĩpêx kêt nē.

¹⁰Nē koja mẽ akwỳjê hõ amnhĩ krã hkôt tanhmã hkwỳjê mã kapēr to nhũm mẽ kuma nē hã axpēn mã akir nē axpēn pē pikjêr kaxyw. Ka ja hã omu nē ã kapēr anhỹrja nê kãm akapēr kê axte hkêt nē. Hāmri nhũm ama nē ãm ama nē arĩ ã mẽ kãm kapēr anhỹr japêr ka axte nê kãm akapēr. Tã ra ate nê kãm akapēr o axkrut tã nhũm arĩ ã kapēr anhỹr o axkrunêpxi japêr ka ja hã

omu hāmri nē mẽ amnhĩ nē hano kê axte mẽ apê Kris kwỳjê hkôt ri pa hkêt nē.

11 ã mẽ kot amnhĩ nhĩpêx anhỹr o mẽ pa xwỳnhjaja na mẽ ra Jejus wỳr pry kaga nē htỳx ri tanhmã amnhĩ tomnuj to ho pa. Nē ã amnhĩ nhĩpêx anhỹr o pa jao kêp Kris kwỳ hkêt ã amnhĩ to amnhĩrĩt.

Pawre kot kagà jatur xà kamã tanhmã Xitre mã kapêr to

12 Nē kot paj tokyx ma Nĩkop wỳr mō. Kêr pa tokyx hwỳr pōj nē amgrà pē krĩ nhō xwỳnhjê hkôt ixpa. Jakamã kot paj tokyx ma awỳr Atēmti rỳ Xikitre mẽ. Kê mō nē awỳr pōj ka tokyx tanhmã amnhĩ to hpa nē man ixwỳr mō pu mẽ Nĩkop kamã axpēn pumu.

13 Nē ota mẽ akuri Apor mẽ axiwôkat Jēntija. Koja wa mẽmo arĩgro hã ma krĩ hō hwỳr nojarêt ka wa kãm mẽ apkur xà hkwỳ gō kê wa ma ã kamã mōr kêt nē.

14 Nē kêr ka Kris kwỳjê mã anē kê mẽ arĩ òrkwỹ pix kãm hkrĩ ho hkrĩ hkêt nē. Kê mẽ tanhmã axpēn to mex to ho axpēn kôt pa. Nhũm mẽhō kêp amrakati kê mẽ tanhmã ho ajuta hto. Mẽ kãm anē kê mẽ ã axpēn nhĩpêx anhỹr o pa.

15 Nē ota jar Kris kôt pahkwỳjê piitã awỳr hpêr mẽ Xitre. Nē kêr ka atar Kris kôt mẽ pahkràmnhwỳjê mã mẽ ijarẽ. E ãm ja pix. Kê Pahihti Jejus mẽ akutã nojarêt rãhã ho pa. Ixpê Pawre na pa amã ã ixkapêr nē hã kagà nē awỳr mẽnh anē.

Piremõ

Piremõ 1

¹Pa ixkràmnhwỳ Piremõ? Xà amex? Ixpê Pawre na pa awỳr kagà nhípêx nẽ kumẽ. Apê Kris kôt ixtõ hã inhmã akĩnh. Na ka hte ixpyrà nẽ Kris mã tanhmã amnhĩ nhípêx to ho apa. Ta ot pa awỳr kagàja kamã ixpêr mẽ.

²Amã nẽ anhõrkwỳ kamã Tĩrtũm kapêr mar kaxyw mẽ kêp Jejus kwỳ hã mẽ pikuprõnh xwỳnhjê hwỳr. Nẽ Kris kôt pahtõx Apti mẽ Akip wa hwỳr kumẽ. Akipja na hte mẽ pahpyrà nẽ Pahihti Jejus mã tanhmã amnhĩ nhípêx to ho pa.

³Na pa hte mẽ ato Mẽpanhĩpêêxà maati Tĩrtũm mẽ Pahihti Jejus Kris wa hwỳr rãhã ho ri ixpa. Kot mẽmoj to mẽ akutã nojarêr rãhã nhũm wa ỹ hã mẽ ajamakêtkati nẽ axàmnhĩx apa ho apa kaxyw.

Pawre kot Piremõ nhỹ hã hkĩnh ã harẽnh

⁴⁻⁵Na pa pre ajarẽnh ma Piremõ. Na htem xatã tanhmã inhmã ajarẽnh to nẽ ajarẽnh o: —Hêxta waa nẽ. Piremõ na hte amnhĩ kaxyw Pahihti Jejus Kris kôt hamaxpêr tỳx nẽ kãm mẽ ixpê Kris kôt hkwỳjê piitã hkĩnh pê tanhmã mẽ ixto mex to ho ri mẽ ixkôt pa. Anhỹr o inhmã ajarẽ pa mẽ kuma nẽ anhỹ hã ixkĩnh nẽ ato Tĩrtũm wỳr rãhã ho ixpa nẽ ato hwỳr o: —Pa Tĩrtũm. Na xep hte Piremõ kãm akĩnh tỳx nẽ akwỳjê ho mex rãhã ho pa. ãm hãmri na hte ã mẽ hipêx anhỹr o pa.

⁶Na xep mẽ piitã mẽ kãm tanhmã Jejus kot mẽ inhnê amnhĩ nhípêx to hã harẽnh o ri mẽ hkôt pa. Jakamã kêr ka tanhmã mẽ kot mar xwỳnhjê hkrã hto kê mẽhprĩ hã mar tỳx nẽ Kris kot tanhmã mẽ ho mex to hã amnhĩ tã omu. Anhỹr o ato kuwỳ.

⁷Ate Kris kwỳjê ho mex o apa jakamã te ate pa ixto mex pyràk Piremõ. Na htem anhỹ hã hkĩnh nẽ pa. Pa ijaxwỳja ajarẽnh ma nẽ anhỹ hã ixkĩnh tỳx nẽ jar mẽ hagjênh xà kamã ixkrĩ.

Piremõ kot Onesti kamã ukaprĩ hã Pawre kot kãm karõ

Rõmãn 15.7; Epes 4.31

⁸Nà ixte amã mẽmoj jarënhja tanhmã kute hkêt. Kot paj ãm amã mẽmoj jarë nẽ hã awỳ. Nom kot paj Kris nhỹ hã amã tanhmã hã karõ hto hkêt nẽ.

⁹Kot paj ãm pahte axpën to pahkràmnhwỳ hã hã awỳ. Ra ixwej tỳx nẽ Kris ã arĩ mẽ hagjênh xà kamã ixkrĩ htã mẽmoj tã awỳ ka inhma nẽ inhmã ho anhỹr japêr ko.

¹⁰E amã àpênh xwỳnh Onestija na ixte amã harênh kaxyw. Na pre man ixwỳr mỗ. Ixpê prês nẽ ixkrĩ nhũm ixwỳr mỗ. Pa omu nẽ kãm Jejus jarë nhũm inhma nẽ pahpyrà nẽ amnhĩ kaxyw hkôt hamaxpêr nẽ hkôt amnhĩ xãm. Jakamã te kêp ixkra pyràk. Hãmri nẽ ixto ajuta mex o pa.

¹¹Xep kormã Jejus kôt amnhĩ xãm kêt ri na pre amã àpênh mex kêt nẽ. Nẽ kãm kaga nẽ htỳx ri tanhmã àpênh to ho pa. Tã ra Jejus kôt amnhĩ xãm hãmri nẽ katàt kôt inhmã àpênh mex o pa. Nẽ ixto ajuta mex nẽ. Koja akupỹm amã apê hãmri nẽ amã àpênh mex nẽ.

¹²Jakamã ot pa akupỹm awỳr kumẽ ixkràmnhwỳ. Nom inhmã hapê jakamã koja ma akupỹm mỗ pa ho ama nẽ. Tã kot paj akupỹm awỳr kumẽ.

¹³Kot jar ixri arĩk nẽ apãnhã tanhmã ixto ajuta hto ho paja na inhmã hprãm.

¹⁴Jakamã kot kaj amã akupỹn ixwỳr mẽnh prãm nẽ mãmri ixwỳr amẽ. Nom ixte ja pumunh kêt. Kam nẽ amã hprãm xà hkôt tanhmã kãm akapêr to. Kãm anẽ kê akuri arĩk nẽ amã àpênh o pa rỳ akupỹn ixwỳr amẽ.

¹⁵Nom konẽn. Mãn akupỹm awỳr mỗr nẽ kêp Kris kôt akwỳ hã amã àpênh mex kaxyw na pre Tĩrtũm ixwỳr kumẽ nhũm ixwỳr mỗ nẽ ixri Jejus kôt amnhĩ xãm nẽ ixri pa hã mytwrỳ hkwỳ hapêx pa akupỹm awỳr kumẽ.

¹⁶Nom ra kêp amã àpênh xwỳnh pix kêt mấãnẽn kêp Kris kôt atõõ. Jakamã kot kaj wa atar axpën kôt Pahihti Jejus kôt tãm amnhĩ nhĩpêx o ri apa. Nom mấãnẽn kêp ixkràmnhwỳ mex ã inhmã hapê.

¹⁷Jakamã kot kaj ixpê Kris kôt akràmnhwỳ hã ijarẽ hã kot kaj mấãnẽn inhmã ho mex o apa.

¹⁸Ně wam amã àpênh o pata ã mãn pre apê mẽmoj to ahkĩ rỳ akàxpore hkwỳ ho ahkĩnh japêr. Tã pa kot paj hpãnhã amã amnhĩre. Ka inhmã tanhmã kàxpore jarênh to pa amã amnhĩre.

¹⁹Ixpê Pawre kot paj tanhmã kot ato tewên toja pãnhã amã amnhĩre. E pa amnhĩ nhĩhkra ho ã amã amnhĩ jarênh ã kagà aně. Nom ajaxwỳja na ka tanhmã ixto tewên to Piremõ. Na pa pre amã Jejus kot mẽ panê htyk ã harê ka pre inhmar xà hkôt hkôt amnhĩ xãm. Jao ixpyrà ně atĩr tũm ně apa ho apa mã xwỳnhta pãnhã te ate ixto tewên pyràk.

²⁰E kwa ixkràmnhwỳ. Ixpyrà ně apê Kris kwỳ jakamã kêr ka ixkamã axukapĩrĩ hã inhmã Onesti ho mex ně. Kêr pa ja hã ajarênh ma ně ixkĩnh ně tãm ijamaxpêr.

²¹Nà ra ixte apumunh mex kênã. Kot kaj ixte hã awỳrta kôt hipêx. Ja kaxyw na pa amã kagàja nhĩpêx ně awỳr kumě. Nom kot kaj ãm ja pix ho anhỳr kêt ně. Kot kaj ixte hã awỳrja kôt amnhĩ krã hkôt tanhmã ho mex to. Nà kot kaj ho aně.

Pawre kãm Piremõ hwỳr mõi ně omunh prãm ã harênh

²²Ně Tĩrtũm kot mẽ awỳr inhmênh kaxyw mẽ ate ixto hwỳr o apa jakamã koja apu tokyx ma mẽ awỳr inhmě. Jakamã kwa kêr ka ixkutêp tanhmã mẽmoj to mex to. Kêr pa mẽmo arĩgro hã mõi awỳr pøj ka ra ixkutêp tanhmã amnhĩ to hpa ně ãm ixpix kãm ajamak o apa.

²³Ně ota Epasja awỳr hpêr mẽ. Na hte ixpyrà ně Jejus Kris ã mẽ hagjênh xà kamã kêp prês ně hkrĩ ho hkrĩ.

²⁴Ně Makre ně Aristak ně Těmti ně Rukre mẽ awỳr hpêr mẽ. Na htem ixpyrà ně Kris mã tanhmã amnhĩ nhĩpêx to ho pa nom ixrom mẽ kêp prês kêt.

²⁵E kê Pahihti Jejus Krisja akutã nojarêr rãhã ho pa. Ta ãm ja pix. Ixpê Pawre na pa amã kagà ně awỳr kumě.

Eprêw

Eprêw 1

¹Pa Kris kôt ixkwỳjaja? Xà mẽ amex? E ot pa mẽ amã kagà nhĩpêx nẽ mẽ awỳr kumẽ. Amnepê m Tĩrtũm na pre mẽ panhĩgêjtê hwỳr ỹ hã kapêr jarênh o ri mẽ pa xwỳnhjê rẽ nhũm mẽ xatã mẽ kãm kapêr jarênh o ri mẽ hkôt pa. Ahpỹnhã tanhmã mẽ kãm kapêr to ho amnhĩrĩt o mẽ hkôt pa. Nhũm Tĩrtũm xatã mẽ hkanrêhã mẽ hkra nẽ mẽ htàmnhwỳjê hwỳr mẽ hkwỳjê rẽ nhũm mẽ kãm kapêr jarênh o ri mẽ hkôt pa. Nom mẽ kãm kapêr piitã harênh kurê kumrêx kêt nẽ. Na prem ãm hkwỳ pix jarê. Tã nhũm hpãnhã mẽ hkwỳjaja wamtajê mỳr pê mẽ hwỳr mra nẽ axte mẽ kãm hkwỳ jarênh o ri pa. Jao ra mẽ kãm harênh jatur xàm mênh o mỗ.

²⁻³Tã nhũm Tĩrtũm Kraja mẽ pahwỳr wrỳ nẽ mẽ pamã kapêr jarênh jatur xàm kumẽ. Kêp Tĩrtũm Kra jakamã te kot amnhĩ nhĩpêx pyrã nẽ pa. Uràk nẽ mex o mex. Nẽ wa hihtỳx xàja tipxi. Nẽ wa àhpumunh tỳxja mãânên tipxi. Jakamã mẽ pahte pano ho Tĩrtũm pumunh kêt tã Jejus pumunh pê te mẽ pahte Tĩrtũm pumunh pyràk. Uràk nẽ kot amnhĩ to rax o mẽ pahpiitã mẽ pajakrenh par. Amnepê m kormã mẽmoj kêt ri nhũm Jejus Tĩrtũm kukwak ri mẽmoj piitã ho kator pa. Tã koja Tĩrtũm nhỹrmã kãm mẽmoj piitã òr pa. Kaxkwa kamã mẽmoj piitã nẽ jar pika piitã hkôt nhũm kãm piitã òr pa. Nẽ Jejus xàhpumunh xà pix kukwak ri na mẽmoja arĩ rãhãã. Na pre mẽ panê mẽ pahte amnhĩ tomnuj piitã hpãnhã amnhĩrer par kaxyw mẽ panê ty. Hãmri akupỹm htĩr hãmri nẽ ma akupỹm kaxkwa hwỳr api. Tĩrtũm xihtỳx o hihtỳx xwỳnhja wỳr akupỹm api. Nẽ ò krĩ kamã upôk rũm pahi maati hkrĩ xà hã kuri hkrĩ ho hkrĩ. Nẽ ìhkô hã mẽ pahto amnhĩptàr rãhã ho hkrĩ.

Jejus mẽ Tĩrtũm kapêr o mẽ wrỳk xwỳnhjê jarênh

⁴⁻⁵Nẽ Jejus kot amnhĩ to rax o Tĩrtũm kapêr o mẽ wrỳk xwỳnhjê jakrenh jakamã na pre ã Tĩrtũm kãm kapêr anẽ nẽ kãm: Na ka amnhĩ to rax o mẽ kot ixkapêr o mẽ wrỳk xwỳnhjê jakre. Mẽ kot inhmã tanhmã amnhĩ nhĩpêx to ho mẽ pa xwỳnh na mẽ. No mẽ kurom apê Ixkra kumrêx jakamã amex o

ate mẽmoj piitã hakrenh par. Nẽ apê pika nhõ xwỳnhjê hwỳr ixte amẽnh mã xwỳnh na ka. Nà apê Ixkra kumrẽx. Kot paj jarãhã ixpê anhĩpêêxà hã mẽ piitã mẽ kãm amnhĩ to amnhĩrĩt. Pa na ixpê anhĩpêêxà. Anhỹr o Kra Jejus mã kapêr. Na pre kapêr o mẽ wrỳk xwỳnhjê mã ã kapêr anhỹr kêt nẽ. Jejus mã pix mã ã kapêr anẽ.

⁶Nẽ koja nhỹrmã akupỳn mẽ pahwỳr Kra mẽnh kaxyw hãmri nẽ kapêr o mẽ wrỳk xwỳnhjê mã kãm: E ota Ixkrata. Ixkra kumrẽx na. Kot amnhĩ to rax o mẽ piitã mẽ hakrenh par. Jakamã kêr ka mẽ apiitã kutã arôrôk nẽ kãm mex o mex ã harẽ. Anhỹr o mẽ kãm kapêr.

⁷Nẽ kapêr o mẽ wrỳk xwỳnhjê na pre axtem tanhmã mẽ harẽn h to nẽ mẽ harẽn o: Ixkapêr o mẽ wrỳk xwỳnhjaja na pa hte nhỹhỹm mẽ kurẽ nhũm htem inhmar xà hkôt ma nhỹhỹm mra nẽ inhmã tanhmã amnhĩ nhĩpêx to. Te ixte ma nhỹhỹm kôk nẽ kuwyja mẽnh nhũm ixkapêr kôt nhỹhỹm môrja pyràk. Anhỹr o mẽ harẽ.

⁸No ã Krata jarẽn h anhỹr kêt nẽ. Na pre tanhmã kãm kapêr to nẽ amnhĩ pyrà nẽ kêp Tĩrtũm ã harẽ nẽ kãm: Pa Tĩrtũm? E ka kot kaj mẽ ho amnhĩptà rãhã ho akrĩ. Nẽ akatàt kôt mẽ ho amnhĩptà.

⁹Koja mẽ tãm amnhĩ nhĩpêx ka ja hã mẽ omu nhũm ja amã mex nẽ. No koja mẽ tanhmã amnhĩ tomnuj to ka ja hã mẽ omu nhũm ja apê omnuj nẽ. Mẽ kot tanhmã amnhĩ tomnuj to ho paja na omnuj tỳx. Tã ate inhmã hprãm xà hkôt amnhĩ nhĩpêx jakamã na pa mẽ kaxyw axãm ka akĩnh kãm mẽ ho amnhĩptà. Ixpê anhõ Tĩrtũm na pa ã amã ixkapêr anẽ. Anẽ.

¹⁰Hãmri nẽ kãm: Pa Pahihti. Nà amnepêm kormã mẽmoj kêt ri na ka pre ixkukwak ri pika nẽ kaxkwa ho akato. ãm hãmri na ka pre ã amnhĩ nhĩpêx anẽ.

¹¹Tã nom koja nhỹrmã hamẽ wa hapêx pa. ãm kaxipix kot kaj kurom arĩ arãhãã nẽ aa ajapêx kêt nẽ. Kaxkwa nẽ pika koja wa nhỹrmã te ixkre hã pô htũm kot amnhĩ nhĩpêx pyràk.

¹²Kot kaj wa hipêx o te mẽ kot ixkre nê pô htũm mã hikranh par nê hpãnhã hã nyw janhôr pyræk. Jao pika nê kaxkwa htũm o ajapêx pa nê hpãnhã nyw nhĩpêx. Kaxkwa nyw nhĩpêx nê pika nyw nhĩpêx. Nom kot kaj pika nê kaxkwa tũmta pyrà nê aa awej nê axirerek kêt nê. Kot kaj arĩ anyw nê axihtỳx rãhã apa ho apa nê aa ajapêx kêt nê. Arãhã atĩr tũm nê apa ho apa xwỳnh na ka.

¹³E jar inhĩhkô hã nhỹ nê inhmã mẽ ho amnhĩptàr o akrĩ. Kot paj mẽ kãm akurê xwỳnhjê pynênh pa nê man awỳr mẽ o mra nê anhĩhkram mẽ haxàr pa. Anẽ. ã na pre Tĩrtũmja Kra Jejus mã kapêr anẽ. No kapêr o mẽ wrỳk xwỳnhjê mã ã kapêr anhỹr kêt nê.

¹⁴E kot paj hpãnhã ixprĩ hã mẽ amã Tĩrtũm kapêr o mẽ wrỳk xwỳnhjê jarẽ ka mẽ inhma. Tĩrtũm mã na htem tanhmã amnhĩ nhĩpêx to ho pa. Na hte nhỹrmã kuri mẽ htĩr tũm nê mẽ pa mã xwỳnhjê hwỳr mẽ kurẽ nhũm mẽ ma mẽ hwỳr wrỳ nê tanhmã mẽ ho ajuta hto ho pa. Na htem ã amnhĩ nhĩpêx anhỹr o pa.

Eprêw 2

Mẽ pahte Jejus kaga hkêt ã mẽ pamã karõ

¹Tã ã Tĩrtũmja Kra kot amnhĩ to rax o kapêr o mẽ wrỳk xwỳnhjê jakrenh ã harênh kot anhỹr jakamã kwa kêr pu mẽ kapêr mar tỳx rãhã nê hkôt pix mã amnhĩ nhĩpêx o papa. Kot pu mẽ ho anhỹr kêt hãmri nê gaa nê hkaga.

²Na pre Tĩrtũm kapêr o mẽ wrỳk xwỳnhjaja amnepê mã mẽ panhĩgêjtjê hwỳr wrỳ nê Tĩrtũm nhỹ hã mẽ kot tanhmã amnhĩ nhĩpêx to ho pa hã mẽ kãm karõ nê ma akupỹm api. Nê katàt kôt ri mẽ kãm Tĩrtũm kapêr jarênh o pa. Hãmri nhũm mẽ kot hkôt amnhĩ nhĩpêx nê mar mex xwỳnhjaja nhũm mẽmoj mẽ kãm mex nê. No nhũm mẽ kot mar nê ãm mar xwỳnhjaja koja mẽmoj mẽ kêp omnuj nê.

³Koja nhỹrmã mẽmoj mẽ kêp omnuj tỳx kumrêx nhũm mẽ tee ri amnhĩ tã omu nê tee ri kêp amnhĩptàr prãm kaprỳ nê mex kêt nê pa. Nom mẽ kot Tĩrtũm kapêr mar tỳx xwỳnhjaja koja mẽmoj mẽ kãm mex o mex. Koja

Tirtūm amnhĩ katut kôt mẽ kot amnhĩ tomnuj rēnh pa nē axte kām hamaxpēr kêt nhūm mẽ kuri htīr tūm nē mex rāhā nē pa ho pa. Na pre Pahihti Jejus mẽ kot kapēr mar o kuhê xwỳnhjê kumrēx mã ã ja jarēnh anē nē mẽ kām: —Nà kot kaj mẽ amnhĩ kaxyw inhmā ajamaxpēr nhūm Tirtūm ixtā mẽ apumu nē mẽ anē mẽ ate amnhĩ tomnuj piitā ho hapêx pa nē axte kām hamaxpēr kêt nē. Anē. Hāmri nhūm mẽ kot kapēr mar nē hkôt mẽ pa ho mẽ pa nē xwỳnhjaja mar tỳx nē amnhĩ xô ri mẽ pamā harēnh o ri pa. Nē mẽ pamā: —Nà ãm hāmri. Nà ã ja jarēnh kot anhỹr. Anē.

⁴Hāmri nē mẽ pamā aa mẽ pahte mẽmoj pumunh kêt kwỳ ho anhỹr o ri mẽ pahkôt pa. Tirtūm Karō kot ja kaxyw mẽ ho mẽ àhpumunh tỳx jakamā nhūm mẽ ỹ hā ahpỳnhā tanhmā mẽ pamā amnhĩ nhĩpêx to ho pa. Mẽ pahte ja hā mẽ omunh nē kamā pano pyma kaxyw. Nē ã mẽ pajamaxpēr anē nē pajamaxpēr o: —Nà ãm hāmri na mẽ pamā ã Jejus jarēnh anē nē ỹ hā ã amnhĩ nhĩpêx anhỹr o pa. Anhỹr o pajamaxpēr kaxyw na prem ã mẽ pahkôt amnhĩ nhĩpêx anhỹr o pa.

Mẽ pahpê Jejus tō nē htōx ã mẽ pajarēnh

Juāw 1.14; Rōmān 8.3-4; Piriopos 2.5-11; Korosē 2.9; Wam Juāw 4.2

⁵Nē na pre Tirtūm amnhĩ kukamā tanhmā amnhĩ jarēnh to nē nhỹrmā kot akupỹm mẽmoj piitā ho nyw nē tām mẽmoj piitā ho amnhĩptār o pa hā amnhĩ jarē. No na pre kapēr o mẽ wrỳk xwỳnhjê mã ã mẽ kot amnhĩ nhĩpêx anhỹr ã mẽ kām karō hkêt nē. Kojā jajaja mẽ pahto amnhĩptār o pa hkêt nē.

⁶Tirtūm kapēr ã kagà htūm kot ja jarēnh kot: Kwa Tirtūm. Nà ãm hāmri na ka hte pika ja kamā ri mẽ ixpa xwỳnhjê jamār mex rāhā ho apa. Akĩnhā amarĩ ri mẽ ixpa xwỳnh tã amā mẽ ijapêê. Nē mẽ ixkutā anojarêt rāhā ho apa.

⁷Na ka hte tanhmā mẽ inhĩpêx to pa mẽ te mẽ ixpê akapēr o mẽ wrỳk xwỳnhjê pyrāk. Jao mẽ urāk nē akukwak ri mẽ inhmex nē ixpa ho ixpa. Mẽ uràn mẽ ixàhpumunh nē ixihitỳx kêt tã mẽ inhmex nē ixpa.

⁸Na ka pre ra ate mẽmoj to akator xwỳnh piitā mẽ inhĩhkram haxà. Nà ãm hāmri na ka pre ã mẽ inhĩpêx anē Tirtūm. Amex o amex. Anē. Na pre ra

mëmoj piitãã më panhîhkram haxà. Pika nê kaxkwa nê kapêr o më wryk xwÿnhjaja nê mëkarõmnuti nê kot mëmoj piitãã hipêxja nhûm më panhîhkram haxàr pa. Më pahte îhkô hã ho amnhîptàr o papa kaxyw. No na pu më kormã piitã ho amnhîptàr kêt nê.

⁹No kêt Jejusja na Tirtûm më pakurom îhkram mëmoj piitã haxàr par kumrêx. Kormã pika ja kamã ri pare ri na pre tanhmã amnhî nhîpêx to nê Tirtûm kapêr o më wryk xwÿnhjê hkînhã te amnhî to grire pyrã nê amnhî xà htÿx kamã hamak kãm ty. Tirtûm kãm më pahto mex prãm xaj ã më pahpiitã më panê htyk anê. Tã nhûm Tirtûm akupÿm ho htîr nê akupÿm amnhî wÿr ho api nê kêp Pahi Maati mex o mex ã harê. Na pre ã Jejusja më panê amnhî nhîpêx anê nhûm Tirtûm ja hã omu nê kukwak ri më pahto mex nê.

¹⁰Nê Tirtûm kot mëmoj piitã ho kator jakamã mëmoj piitã õ na. Na pre më pakukamã hamaxpêr o: —Inhmã ixkra xohtô hprãm. Kot paj nhÿrmã man amnhî wÿr më ho api kê më ixri mex rãhã nê pa ho pa. Nà kot paj ã më hipêx anê. Nê Ixkra Jejus koja kêp më õ Pahihti. Koja më urak nê mëmoj punuj pumunh o pa hãmri nê à htÿx kamã hamak o kêp më õ Pahihti mã tãm. Anê.

¹¹Na hte Jejus më panê më pahte amnhî tomnuj rê nê hpãnhã më pamã më pahte amnhî nhîpêx nyw jagjê nhûm Tirtûm ja hã më pahpumunh kôt më pahto hkra. Kêp Jejus Nhîpêxã nê kêp Mëpanhîpêxã maati jakamã nhûm Jejusja më pahpê htõ nê më pahpê htõx ã më pajarê nê më panhÿ hã hkînh nê.

¹²Tirtûm kapêr ã kagà htûm ã më pajarênh kot anhÿr. Kamã Jejusja Mëpanhîpêxã maati mã më pajarênh kot: Koja ixtõ nê ixtõxjaja akapêr mar kaxyw axpên wÿr akuprõ pa ma më hkôt mra nê më kãm akapêr jarê nê më îhkô hã amex ã gre. Anê.

¹³Hãmri nê kãm: Kot paj amnhî kaxyw akôt pix mã ijamaxpêr mex o ri ixpa. Anê. Hãmri nê hpãnhã kãm: Ot pa akrajê hkôt ri ixpa ho ixpa. Ka na ka pre

mẽ kêp ixtõ nẽ ixtõx kaxyw inhmã mẽ agõ. Koja mẽ ixpyrà nẽ amnhĩ kaxyw amã hamaxpêr rãhã ho pa Tĩrtũm. Anẽ.

¹⁴Nẽ mẽ pahpê pika nhõ xwỳnhjaja na pu htem ãm ri panhĩ pix ã papa. Nẽ panhĩ kamã pahkamrô hã ri papa. Jakamã na pre Jejus kot mẽ panê htyk kaxyw mẽ pahwỳr wrỳ nẽ mẽ pahpyrà nẽ ì ho mẽ pakamã kato. Tã mẽmo kaxyw na pre ì ho ì nẽ mẽ pahkôt pa? Nà ì ho htyk o Satanasti pê hihtỳx xà ho hapêx par kaxyw na pre ã amnhĩ nhĩpêx anẽ. Satanasti kêp mẽ kot amnhĩ tomnuj xwỳnhjê hpãm nẽ kêp mẽ htyk xwỳnhjê hpãm.

¹⁵Jakamã na hte kot mẽ pahtã ìhkra pikamỳr pyràk o mẽ panhĩpêx pu mẽ ÿ hã pamã pahtyk pyma nẽ ri papa. Tã ra Jejus kot mẽ pahwỳr wrỳk nẽ te kêp mẽ papytãr pyràk o mẽ panhĩpêx jakamã pu mẽ tee ri pahtyk kukamã pajamaxpêr o ri pamã ma ho papa hkêt nẽ.

¹⁶Nẽ Tĩrtũm kapêr o mẽ wrỳk xwỳnhjê ho mex kaxyw na pre Jejus pika hwỳr wrỳk kêt nẽ. Mẽ panhĩgêt finat Apraãw pyrà nẽ mẽ panhĩ ho panhĩ xwỳnhjê ho mex kaxyw na pre wrỳ.

¹⁷Ijaew nhõ patrejaja na pre htem mẽ kot amnhĩ tomnuj mỳrapê mẽ hpãnhã Tĩrtũm mã mry hkwỳ pa nẽ hkamrô kapĩ nẽ mẽ ho Tĩrtũm wỳ. Kot hã mẽ omunh nẽ mẽ mex ã mẽ harênh kaxyw. Tã nhũm Jejus wrỳ nẽ mẽmo mryta pyrà nẽ ã mẽ panê hkamrô pikapĩr anẽ. Kaxyw na pre mẽ pahtõ maatija mẽ pahwỳr ì ho ì nẽ wrỳ nẽ mẽ pahpyrà nẽ ni nhõhy rũm kato. Jao kêp mẽ pahto Tĩrtũm wỳr xwỳnh maati. Na pre Tĩrtũm kãm hprãm xà hkôt mẽ panê mẽ pahte amnhĩ tomnuj pãnhã amnhĩrer pa. Tã kot mẽ pahpyrà nẽ mẽmoj punuj pumunh nẽ amnhĩ xà htỳx kamã hamak o pa jakamã kêp mẽ pakamã ukapĩrĩ xwỳnh ã pixi mex na.

¹⁸Kormã htyk kêt ri na pre mẽ pahpyrà nẽ omnuj nẽ ri pa. Nhũm mẽkarõmnuti nhõ pahi kot tanhmã amnhĩ tomnuj to hprãm xàj tee ri hkôt kãm ahkrox o pa hkapyrỳ nhũm hkôt amnhĩ nhĩpêx kêt nẽ amnhĩ nê ho axtem nẽ. Jakamã koja Satanastija uràk nẽ tanhmã mẽ panhĩpêx to nhũm Jejus mẽ pahtã omu nẽ amnhĩ pyrà nẽ tanhmã kêp mẽ panhĩpêx to pu mẽ ÿ hã kutã amnhĩ to htỳx nẽ papa.

Eprêw 3

Jejus kot amnhĩ to rax o Mojes jakrenh ã harēnh

Juãw 1.17-18

¹E ixkràmnhwỳjaja. Ra Tĩrtũm kot mẽ pahte kapēr mar nē tãm amnhĩ nhĩpêx o ri papa kaxyw mẽ pahto hkra jakamã kwa kêr ka mẽ Jejus kot tanhmã mẽ pamã amnhĩ nhĩpêx toja mã ajamxpēr rãhã ho ri apa. Na pre Tĩrtũm mẽ pahwỳr kumē nhũm mẽ pahwỳr wrỳ nē Tĩrtũm kapēr o mẽ pajahkre ho ri mẽ pahkôt pa. Nē te kêp mẽ panhõ patre pyrã nē mẽ pahto Tĩrtũm wỳr o pa.

²Na pre Tĩrtũm finat Mojes kwỳ kaxyw Mojesja xãm nhũm kãm hprãm xà hkôt tanhmã mẽ hipêx to ho pa. Tã nhũm hpãnhã mẽ pakaxyw Kra Jejusja xãm nhũm Mojes pyrã nē Tĩrtũm kãm hprãm xà hkôt pix mã tanhmã mẽ panhĩpêx to ho pa. Hamē na pre wa Tĩrtũm jamaxpēr xà hkôt tanhmã kãm mẽ panhĩpêx to ho pa.

³Koja mēhõ amnhĩm ixkre mex nhĩpêx nē hipêx pa nhũm hkwỳjaja hwỳr mra nē omu nē mex kumrēx ã harē. Nom kot hipêx xwỳnhhta àhpumunh xà hkôt hipêx jakamã tãm na mex o kot ixkreta jakrenh. Ja pyrã nē finat Mojes kot amnhĩ to rax tã nhũm Jejus kot amnhĩ to rax o kot hakrenh. Mojes te kêp ixkre nhĩpêxta pyrãk no Jejus te kêp ixkre nhĩpêx xwỳnhhta pyrãk jakamã kot amnhĩ to rax o kot Mojes jakrenh.

⁴Nē mẽ kot ahpỳnhã amnhĩ krã hkôt tanhmã ixkre nhĩpêx to jakamã kot hipêx xwỳnhhta na mex o ixkreja jakrenh. Tã ja pyrã nē Tĩrtũm kot mẽmoj piitã ho kator jakamã kot amnhĩ to rax o kot mẽmoj piitã ho kator xwỳnh jakrenh par.

⁵Nē finat Mojes na pre hte Tĩrtũm kãm hprãm xà hkôt tanhmã amnhĩ nhĩpêx to ho pa. Nē ma kãm hkwỳjê piitã hkôt mẽ kãm kapēr jarēnh o ri pa. Tĩrtũm tanhmã kot mẽ kãm kapēr tota kukamã nhũm mẽ kãm harēnh o mẽ hkôt pa. No ãm Tĩrtũm mã tanhmã amnhĩ nhĩpêx to ho hpa xwỳnh pix na pre.

⁶Nē Kris haxwỳja na pre hte Tĩrtũm kãm hprãm xà hkôt tanhmã amnhĩ nhĩpêx to ho pa. Nom Mojes rom kêp Tĩrtũm Kra kumrēx jakamã kurom kêp

mě panhō Pahihiti kumrēx. Tã kwa kêr pu mẽ kãm hprãm xà hkôt pix mã tanhmã kãm amnhĩ nhĩpêx to ho ri papa. Mě kot hã tanhmã mẽ panhĩpêx to htã pu mẽ ÿ hã mẽ kutã amnhĩ to htỳx nẽ papa nẽ pajamaxpêr o: —Nà ixpunuj nẽ ixpa htã kot paj ixpunuj rãhã ixpa ho ixpa hkêt nẽ. Koja nhỹrmã Tĩrtũm ixto mex kumrēx pa axte tanhmã ixpunuj to nẽ ixpa hkêt nẽ. Hêxta waa nẽ. Nà ja inhmã hprãm tỳx kumrēx. Anhỹr o amnhĩ kukamã pajamaxpêr o papa.

Mě pahte Tĩrtũm kaga hkêt ã mẽ pamã karõ

Wam Korĩt 10.1-11; Jutre 5

7-8 Amnepêm na pre mēhōja tanhmã Tĩrtũm Karõ nhỹ hã kapêr to nẽ kapêr o: E kêr ka mẽ Tĩrtũm kapêr mar tỳx o apa. No ama nẽ ãm ama nẽ ri hã apa hkêt nẽ. Rỳ kapêr pẽ akrã hihtỳx o apa hkêt nẽ. Mě akukamã mẽ anhĩgêtjaja na prem ã amnhĩ nhĩpêx anẽ nẽ Tĩrtũm kapêr pẽ hkrã hihtỳx o pa. Kapôt ã Mojes kôt mẽ pata ã na prem kãm Tĩrtũm kapêr mar prãm kêt nẽ. Nẽ tee ri amnhĩ kukamã hamaxpêr nẽ akupỹm Ejit wỳr hkrà nẽ axpẽn mã: “Kwa na pu mẽ ra pahpunuj tỳx nẽ papa nhũm Tĩrtũm ãm ja hã mẽ pahpumu nẽ tanhmã mẽ pahto mex to hkêt nẽ. Mãn ra mẽ pahkaga nà? E kwa pu mẽ awjanã nẽ ma akupỹm Ejit wỳr mãn papa.” Anẽ.

9-10 Na prem ã axpẽn mã kapêr anhỹr o ri pa hã amgrà pẽ 40. Tĩrtũm xatã kot tanhmã mẽ ho mex to nhũm mẽ kot amnhĩ tã omunh tã ãm omu nẽ htỳx ri amnhĩ hkrã hkôt pa. Nhũm tee ri amnhĩ tã mẽ omu nẽ mẽ kamã gryk nẽ. Hãmri nẽ hamaxpêr o: “Nà pẽr mẽ hamaxpêr kot mẽ hã hkwy jêt kêt kumrēx. Te mẽ hamak kre hkêt pyrã nẽ ixkapêr mar kêt nẽ.” Anhỹr o hamaxpêr.

11 Hãmri nẽ mẽ kãm: “E mẽ inhma. ã mẽ ate amnhĩ nhĩpêx anhỹrja mỳrapê kot kaj mẽ ma ixte mẽ amã pika mex nhõr mã xwỳnhta wỳr apa hkêt nẽ.” Anhỹr o mẽ kãm kapêr. Anẽ. ã mēhōja Tĩrtũm Karõ nhỹ hã te Tĩrtũm tãm kot mẽ kãm kapêr pyrãk o mẽ harēnh anẽ.

12 Jakamã kwa mẽ okora ixkrãmnhwỳjaja. Kêr ka mẽ amnhĩ to mex o apa. Tĩrtũm kêp Měpahpãm ã pixi mex tã kot kaj mẽ tanhmã ajamaxpêr punuj

to rỳ amnhĩ kaxyw hkôt ajamxpěr kêt hãmri nẽ te ate amnhĩ katut kôt ãm pyræk o hipêx nẽ hkaga. Kwa mẽ ã amnhĩ nhĩpêx anhỹr kêt nẽ.

13Kêt mẽ Kris kôt axpẽn to axihtỳx o ri apa. Nẽ apkati mẽ ã axpẽn nhĩpêx anhỹr rãhã nẽ. Kot kaj mẽ anhỹr kêt hãmri nẽ mẽ amã Tĩrtũm kapěr mar prãm kêt ã amnhĩ to amnhĩrĩt. Jao tanhmã amnhĩ tomnuj to ho ri apa nẽ atỳx ajamxpěr o: —Nà ixte ã amnhĩ tomnuj anhỹr tã nhũm Tĩrtũm ja hã ixpumu nẽ ãm hã ixpumu. Anhỹr o ajamxpěr japêr. Rỳ mẽ ajamxpěr o: — Nà na pa hte ã amnhĩ tomnuj anẽ nhũm Tĩrtũm ja hã ixpumu nhũm ja kãm mex nẽ. Anhỹr o ajamxpěr japêr.

14Kwa mẽ ri ã ajamxpěr anhỹr kêt nẽ. Amnepê mã mẽ pahte Kris kôt amnhĩ xunhwỳr nhũm kot mẽ pahto hkrata ã na pu prem amnhĩ kaxyw hkôt pajamxpěr o papa. Tã kêr pu mẽ arĩ ã amnhĩ nhĩpêx anhỹr tỳx o papa rãhã ty.

15Tĩrtũm kapěr ã kagà htũm kot ja jarẽnh kot: E kêr ka mẽ Tĩrtũm kapěr ma nẽ mar tỳx nẽ. No ama nẽ ãm mar nẽ ri hã apa hkêt nẽ. Rỳ mẽ kot hkaga xwỳnhjê pyrà nẽ kệp akrã hihtỳx kêt nẽ. Anẽ.

16Mẽ panhĩgêjtjaja na prem Mojes kôt pika pê Ejit rũm kato nẽ hkĩnh nẽ ma kapôt ã kormã pika mex wỳr pa. Nom Tĩrtũm kapěr mar nẽ hkôt amnhĩ nhĩpêx rãhã hkêt nẽ. Na prem kuma nẽ hkôt amnhĩ nhĩpêx o hã apkati grêre htã ra mẽmoj nhỹ hã omnuj nẽ pa hã amnhĩ pumu nẽ tee ri amnhĩ kukamã hamxpěr.

17Jao xatã kapěr nhĩrôp kuhê nẽ amnhĩ hkrã hkôt pix mã amnhĩ nhĩpêx o pa ho ra hã amgrà pê 40. Hãmri nhũm tee ri amnhĩ tã mẽ omu nhũm ja kệp omnuj nẽ. Jakamã nhũm mẽ piitã kapôt ã ri pa nẽ gaa nẽ pikaprãr pa.

18Mẽ kot kapěr mar kêt jakamã nhũm mẽ kãm: —Nà ã mẽ ate amnhĩ nhĩpêx anhỹr o ri apaja mỳrapê kot kaj mẽ ixte mẽ amã mẽ amex nhõr mã xwỳnhhta wỳr apa hkêt nẽ. Anẽ.

¹⁹Tã mẽ kot amnhĩ kaxyw Tĩrtũm kõt hamaxpěr o pa hkõt jakamã na prem pika mexta wỳr hpôx kêt rãhã pikaprãr pa. Nhũm mẽ hkra nẽ mẽ htàmnhwỳjê pixjaja na prem mẽ mỳr pê hwỳr pøj nẽ kamã pa.

Eprêw 4

Mẽ pahte Tĩrtũm kukwak ri pajamakêtkati nẽ ri papa hã mẽ pajarẽnh

¹Mẽ pahte Tĩrtũm kukwak ri pajamakêtkati nẽ ri papa ho papaja Tĩrtũm kãm hprãm jakamã kwa kêr pu mẽ amnhĩ pumunh mex o papa. Nẽ wam mẽ panhĩgêt rom Tĩrtũm kapěr mar tỳx nẽ hkõt mãn kêt ri amnhĩ nhĩpêx mex rãhã nẽ. Kêr pu mẽ kurom mẽ pajamak kãm amnhĩ krit xà hã pika mexta wỳr pøj.

²Mẽ kot mẽ pahpyrà nẽ Tĩrtũm kapěr mar mex tã na htem amnhĩ kaxyw hkõt hamaxpěr kêt nẽ. Te mẽ kot mar kêt pyræk.

³ãm mẽ kot amnhĩ kaxyw Kris mã hamaxpěr xwỳnh pixjaja na htem kukwak ri hamakêtkati nẽ ri pa ho pa. Amnepê mã mẽmoj piitã hkõt ri na pre Tĩrtũm mẽmoj piitã ho kator pa hãmri nhũm apkati nhũm axte mẽmoj tã àpênh kêt nẽ. ãm õ krĩ kamã arĩ hamakêtkati nẽ hkøkõt o hkrĩ. Tã mẽ pahte uræk nẽ pajamakêtkati nẽ papa ho papaja na kãm hprãm. No wam ri mẽ pa xwỳnhjaja mẽ kot amnhĩ tomnuj mỳrapê na pre Tĩrtũm mẽ kot urà nẽ hamakêtkati nẽ paja nê mẽ hkurê. Kapěr ã kagà htũm kot harẽnh kot: Na pre Tĩrtũm tee ri amnhĩ tã mẽ kot hipêx ã mẽ omu nhũm ja kêp omnuj nẽ. Hãmri nhũm mẽ kãm: “Nà kot kaj mẽ ixkukwak ri axàmnhĩx ajamakêtkati nẽ apa hkõt nẽ.” Anẽ.

⁴Nẽ kot harẽnh kot: Na pre Tĩrtũm àpênh ã arĩgro kêp 6 hãmri nhũm arĩgro pê 7ta ã nhũm axte mẽmoj tã àpênh kêt nẽ. Na pre arĩ hkøkõt o nhỹ. Arĩgro pê 7 ã arĩ hamakêtkati nẽ hkøkõt o nhỹ. Anẽ.

⁵Nẽ mẽ kot kapěr mar nẽ ãm mar xwỳnhjê jarẽnh kot: Kot kaj mẽ aa ixkukwak ri axàmnhĩx nẽ ajamakêtkati nẽ apa hkõt nẽ. Anẽ.

⁶Mě panhīgêjtjaja kot amnhĩ kaxyw Tĩrtũm kôt hamaxpěr kêt jakamã na prem hamakêtkati nẽ ri pa hkêt nẽ. Tã mẽ papajaja na Tĩrtũm arĩ kãm mẽ paxàmnhĩx nẽ pajamakêtkati nẽ papa hprãm.

⁷Amnepêm Ijaew Tĩrtũm kôt hamaxpěr kêt jakamã na prem kapôt ã pikaprãr pa. Hãmri nhũm amgrà xohtô nẽ hapêx nhũm Tĩrtũm mẽ hkanrêhã mẽ htàmnhwỳjê hõ pê finat Tawija mã kapěr nhũm kuma nẽ mẽ pamã tanhmã kapěr tota ã kagà nẽ hã kagà kot: Kwa kêr ka ixkapěr ma nẽ mar tỳx nẽ. No mẽ anhīgêjtjê pyrà nẽ akrã hihtỳx ho inhma nẽ ãm inhmar kêt nẽ. Anẽ. Na pa pre ra mẽ amã ã ja jarênh anẽ.

⁸Na pre finat Jojueja finat Mojes mỳr pê ma pika pê Kanaã hwỳr mẽ hkanrêhã mẽ hkrajê o pa nẽ hwỳr mẽ o pøj. Tã nhũm prem Jojue kukwak ri hamakêtkati nẽ pa ho pa hkêt nẽ. Kêp ãm kukwak ri ã amnhĩ nhĩpêx anhỹr ronhỹx Tĩrtũm axte mẽ kãm mẽ hamakêtkati nẽ mẽ hamak kãm amnhĩ krit nẽ mẽ pata hkukamã harênh kêt nẽ.

⁹Nom mẽ pahte kukwak ri pajamakêtkati nẽ pajamak kãm amnhĩ krit nẽ ri papa ho papaja na Tĩrtũm arĩ kãm hprãm.

¹⁰Na pre arĩgro pê 6ja ã mẽmoj piitã ho kator pa nhũm apkati nhũm hamakêtkati nẽ hkôkôt o nhỹ. Tã kot puj mẽ pahpê hkrajaja amnhĩ to kuwỳ nhũm tanhmã mẽ pahkrã hto pu mẽ kukwak ri uràk nẽ paxàmnhĩx nẽ pajamakêtkati nẽ papa ho papa. Te Tĩrtũm àpênh pa nhũm apkati nhũm hamakêtkati nẽ hkôkôt o ỹrta pyràk.

¹¹Jakamã kwa kêr pu mẽ amnhĩ to kuwỳ kê ã mẽ panhĩpêx anẽ pu mẽ uràk nẽ ã amnhĩ nhĩpêx anhỹr rãhã ho papa. Nom kot pu mẽ pahkwỳ Ijaewjê pyrà nẽ kapěr kwỳm amnhĩ nhĩpêx o papa hãmri nẽ mẽ urà nẽ paxàmnhĩx pajamakêtkati nẽ papa hkêt nẽ.

Tĩrtũm kapěr te kot wapo xwa gix pyràk ã harênh

¹²Nẽ Tĩrtũm kapêrja te ã ho tanhmã kot mẽmoj to kaxyw hihtỳx pyràk. Nẽ te wapo xwa gix pyràk. Koja mẽhõ õ wapo xwa mex nẽ ho mẽmoj jakàr mex nẽ. Ho mry hi jakàr mex pê kaxwỳnh kãm hi kanhĩn o amnhĩrĩt. Ja pyrà nẽ

na hte Tirtũm kapër mẽ pajamxpër o amnhĩrit nẽ mex ã harẽ rỳ omnuj ã harẽ.

¹³Nẽ na htem Tirtũm pẽ mẽmoj to pimxur kêt nẽ. Na hte hprĩ hã mẽmoj piitã omunh pa. Nẽ mẽ pajamxpër kôt mẽ pahpumunh pa. Na pu htem ã kot mẽmoj piitã omunh par anhỹr xwỳnhja noo mã tanhmã amnhĩ nhĩpêx to rãhã ho papa.

Jejus kệp mẽ panhõ patre maati hã harẽnh

Eprêw 10.19-25; Wam Juãw 2.1-2

¹⁴Nẽ Ijaew nhõ patrejaja na pre htem Tirtũm mã amnhĩ jarẽnh xà hã ixkre hwỳr agjê nẽ kamã mẽ ho Tirtũm wỳr o pa. Ja pyrã nẽ na pre ra Jesus Tirtũm nhõ krĩ hwỳr api nẽ kamã mẽ pahto hwỳr o hkrĩ. Kệp Kra kumrêx jakamã kệp mẽ pahto Tirtũm wỳr xwỳnh maati. Jakamã kwa kêt pu mẽ amnhĩ kaxyw hkôt pajamxpër tỳx rãhã ho papa.

¹⁵Satanasti na pre te kot mẽ panhĩpêx pyrãk o Jesus nhĩpêx. Nẽ tee ri kot tanhmã kãm kapër to nhũm kot mar nẽ tanhmã amnhĩ tomnuj to hprãm xàj ãm ri kãm ahkrox kaprỳ nhũm kutã amnhĩ to htỳx nẽ hkôt amnhĩ nhĩpêx kêt nẽ. Tã kot Satanasti kot amnhĩ nhĩpêx ã omunh mex jakamã na hte kệp mẽ pahtãnopxar mex o pa. Kot mẽ paxirerek kôt mẽ pahpumunh mex.

¹⁶Jakamã kwa kêt pu mẽ amnhĩ tã kamã pahpijaàm kêt kãm paxàmnhĩx ri amnhĩ to hwỳr o papa. Kệp mẽ pakutã nojarêt xwỳnh nẽ kệp mẽ pakamã ukaprĩ xwỳnh jakamã kêt pu mẽ tee ri mẽmoj tã amnhĩ pumu nẽ amnhĩ to hwỳr kurê kumrêx. Hãmri nẽ ỹ hã paxàmnhĩx nẽ pajamakêtkati nẽ ri papa.

Eprêw 5

¹Nẽ mẽ panhõ patre maati Jesusja Tirtũm na pre mẽ pakaxyw ãm. Kệp mẽ pahkwỳ hã mẽ pakaxyw ãm nhũm hte mẽ pahto Tirtũm wỳr o pa. Nẽ kãm mẽ pahkĩnh xà nhõr o pa. Kot ja hã mẽ pahpumunh nẽ mẽ pahte kapër kwỳm tanhmã amnhĩ nhĩpêx to ho papa hã mẽ pakamã gryk o hapêx tokyx anhỹr kaxyw.

²Mẽ panhĩgêjtaja na pre htem mẽ õ patre maati hwỳr mra nẽ kãm tanhmã amnhĩ tomnuj to hã amnhĩ jarẽ nhũm mẽ kuma nẽ mẽ kamã ukaprĩ nẽ. Mẽ

urà nê kormã kot Tĩrtũm kôt amnhĩ nhĩpêx totuj anhỹr jakamã na pre mẽ kot tanhmã amnhĩ jarẽnh toja ma nê mẽ kamã ukapĩ nê.

³Hãmri nê mẽ hpãnhã Tĩrtũm mã mẽmoj gõ nê mããnẽn amnhĩ pãnhã kãm mẽmoj gõ. Mẽ uràk nê kot amnhĩ tomnuj o paja mỳrapê amnhĩ pãnhã kãm mẽmoj gõ.

⁴No na pre hte patrejaja amnhĩ krã hkôt kêp patre maati kaxyw amnhĩ xunhwỳr kêt nê. Tĩrtũm kot mẽ kaxyw mẽ unhwỳr jakamã na pre mẽ kaxyw finat Arãwja xãm nhũm kêp mẽ õ patre maati hã mẽ ho Tĩrtũm wỳr o pa.

⁵Nê Kris haxwỳja kêp mẽ panhõ pahi maati hã tãm kot amnhĩ xãm kêt. Tĩrtũm na pre mẽ pakaxyw ãm nê tanhmã kãm kapêr to nê kãm: Nà apê Ixkra na ka. Kot paj jarãhã ixpê Anhĩpêxã hã mẽ kãm amnhĩ jarẽ. Anê.

⁶Nê hpãnhã kãm: Kot kaj Mekijetek pyrã nê apê patre maati hã mẽ ho ixwỳr rãhã ho ri apa. Anê.

⁷Jejus kormã pika ja kamã pa ri na pre amnhĩ to Tĩrtũm wỳr rãhã ho pa. Tõhã hkapĩ nê tee ri mẽmoj tã amnhĩ pumu nê amnhĩ to kuwỳ. Nê tee ri mẽ kot hpĩrta kukamã hamaxpêr nê mỳr kãm amnhĩ to kuwỳ. Kop apu Tĩrtũm kãm mẽ kot kêp hpĩr prãm kêt ronhỹx pre tanhmã nê mẽ kãm hkurê xwỳnhjê ho nhũm mẽ hpĩr kêt nê. Jakamã nhũm pre ã amnhĩ to hwỳr anê. No ãm Tĩrtũm kãm prãm xà hkôt kãm amnhĩ nhĩpêx prãm jakamã nhũm kuma no ãm tanhmã nê mẽ ho hkêt nhũm prem kupĩ.

⁸Kêp Tĩrtũm Kra kumrêx tã amnhĩ xà htỳx kãm hamak kãm ty. Jao Tĩrtũm kãm hprãm xà hkôt amnhĩ nhĩpêx ã amnhĩ pumunh mex nê.

⁹Na pre amnhĩ xà htỳx kãm hamak o amnhĩ mex o amnhĩ mex ã mẽ kãm amnhĩ to amnhĩrĩt. Jakamã na hte mẽ kot kapêr kôt ri amnhĩ nhĩpêx o mẽ pa xwỳnhjê mã mẽ kot amnhĩ nhĩpêx nyw jagjê nê nhỹrmã Tĩrtũm mẽ wa kuri mẽ htĩr tũm nê mẽ pa mã xwỳnhjê hã mẽ harẽ.

¹⁰Jakamã na pre Tĩrtũm Mekijetek pyrã nê kêp patre maati kaxyw ãm.

Mẽ pahte Kris kaga nê mẽ pahkurê

Wam Korĩt 3.1-2; 13.11; 14.20; Epes 4.11-16

¹¹Ně Jejus kêp mē pahto Tĩrtũm wȳr xwȳnh maati hã harēnhja inhmã ixprĩ hã mē amã harēnh par prãm tã ka mē kormã inhmar tȳx kêt nē. Pa tee ri ixprĩ hã mē amã harēnh kaprȳ. Te mē amã mar prãm kêt o amõr pyræk.

¹²Amnepê mã mē ate Kris kôt amnhĩ xunhwȳr nē kapēr mar tȳx tã kormã nhãm amnhĩ xõ ri ho amnhĩ kwȳjê jahkre ho ri apa hkêt nē. Te mē ate hã ano hkêt pyræk jakamã na pa hte arĩ mē amã kapēr kot amnhĩrĩt mex xwȳnh kwȳ ho mē ajahkre ho pa. No kot amnhĩrĩt mex kêt xwȳnh o mē ajahkre hkêt nē. Te mē hkaràre kot amnhĩ nhĩpêx pyræk o na ka htem amnhĩ nhĩpêx o apa. Na hte mē hkaràre mēõ mex kur kêt nē. Ām kormã katorxà hkà pix kaõ. Ja pyrà nē ãm Tĩrtũm kapēr kot amnhĩrĩt mex xwȳnhhta pix na ka mē mar tȳx o apa nom kapēr kot amnhĩrĩt mex kêt xwȳnhja ka mē mar mex kêt nē.

¹³Ně mē hkaràre kormã Tĩrtũm kapēr mar kêt jakamã na htem kormã mēmoj mex nē mēmoj punuj pumunh kêt nē. Tã te mē ate mē kot amnhĩ nhĩpêx pyræk.

¹⁴Mē kot Tĩrtũm kapēr mar mex xwȳnhjaja na htem hprĩ hã kapēr piitã mar tȳx nē. Kot amnhĩrĩt mex xwȳnhhta mar tȳx nē mããnēn kot amnhĩrĩt mex kêt xwȳnhja nhũm mēhprĩ hã piitã mar tȳx nē. Te ho mē àptàr kot mēõ mex kur o pata pyræk. Jao ra mē àptàr jamaxpēr o hamaxpēr o ri pa nē hamaxpēr o: —Kot paj tãm amnhĩ nhĩpêx o ri ixpa nhũm ja inhmã mex nē. Nom kot paj axtem tanhmã amnhĩ tomnuj to nhũm ja ixpê omnuj nē. Jakamã kot paj tãm amnhĩ nhĩpêx pix o ri ixpa nhũm Tĩrtũm mã ja mex nē. Anē.

Eprêw 6

¹⁻²Na pu prem ra Tĩrtũm kapēr kot amnhĩrĩt mex xwȳnhhta kwȳ ma. Tãm na ja: Kris kot mē panê tanhmã amnhĩ nhĩpêx to hã harēnhja. Ně mē pahte amnhĩ tomnuj kaga hã kot mē pamã karõja. Ně amnhĩ kaxyw Tĩrtũm kôt mē pajamaxpēr ã mē pamã karõja. Ně mē pahpê Tĩrtũm kra hã amnhĩ to amnhĩrĩt kaxyw mē kot mē pahkrã kumrãr ã pamã karõja. Ně mē pahte Tĩrtũm mã tanhmã amnhĩ nhĩpêx to ho papa hkukamã mē kot mē pahkrã

hã ìhkra jaxwỳr nẽ mẽ pahto Tĩrtũm wỳr ã mẽ pamã karõja. Nẽ mẽ pahtyk nẽ akupỹm mẽ pahtĩr ã mẽ pajarẽnhja. Nẽ Tĩrtũm kot nhỹrmã mẽ kot amnhĩ xà htỳx kãm hamak tũm xà hwỳr mẽ kệp hkra hkêt xwỳnhjê janorja. Mẽmojja piitã pu mẽ ra harẽnh mar tỳx nẽ. Prĩ hã kot amnhĩrĩt mex. Tã kwa kêt pu mẽ hpãnhã hijuk ri kot amnhĩrĩt mex kêt xwỳnh kwỳ ma. Jao mẽ pahpê Tĩrtũm kra xàptàr mex nẽ ri papa.

³Jakamã kwa kêt pu mẽ kot amnhĩrĩt mex xwỳnh kumrẽx kwỳ ma nẽ hpãnhã hijuk ri kot amnhĩrĩt mex kêt xwỳnh kwỳ ma. Nẽ axpẽn mã harẽnh rãhã ho ri papa. Nà koja Tĩrtũm kãm ja prãm pu mẽ ã amnhĩ nhĩpêx anhỹr rãhã o ri papa.

⁴⁻⁶Na pre ra mẽ pahkwỳjaja Kris kaga nẽ htỳx ri amnhĩ nhĩpêx o pa. Mẽ kot kapêr mar tỳx tã axtem nẽ hkaga jakamã koja mẽ axte kapêr mar kêt nẽ. Ra mẽ kãm mar prãm kêt. Kot puj mẽ tee ri axte mẽ kãm harẽnh o papa kaprỳ. Na prem hprĩ hã kuma. Tĩrtũm kãm mẽ ho hkra hprãm ã harẽnhja nhũm prem hprĩ hã kuma nẽ kãm mar prãm nẽ hkôt amnhĩ xunhwỳ. Hãmri nhũm Tĩrtũm Karõ te mẽ panhĩpêx pyrã nẽ mẽ hkarõ mã agjê nẽ mẽ kot amnhĩ to mex o pa kaxyw tanhmã mẽ hkrã hto nhũm prem ÿ hã tanhmã kãm amnhĩ nhĩpêx to ho pa. Nẽ kãm Tĩrtũm kapêr mar prãm nẽ. Nẽ axpẽn mã mex o mex ã harẽnh o pa. Nẽ aa mẽ kot mẽmoj pumunh kêt kwỳ pumu nẽ axpẽn mã harẽnh o: —Nà Krisja ãm hãmri àhpumunh tỳx o àhpumunh tỳx. Koja nhỹrmã akupỹn mẽ pahwỳr wrỳ nẽ axte mẽ pamã àhpumunh tỳx o amnhĩrĩt pu mẽ omu. Anhỹr o kapêr tã tanhmã hamaxpêr to nẽ hkaga. Jakamã te mẽ kot axte Tĩrtũm pê Krata pĩ hã nhôr nẽ hpĩr pyræk. Nẽ te mẽ piitã mẽ noo mã tanhmã haprỳ hto nẽ tanhmã kãm kapêr punuj to pyræk. Jakamã kot pu mẽ tee ri akupỹm tãm mẽ unhwỳr prãm kaprỳ.

⁷Na hte Tĩrtũm mẽ pahto mex rãhã ho pa. Jao mẽ pamã mẽ pahpur ã na rẽ pu mẽ kamã panhõ rũnh nẽ. Jakamã mẽ kot amnhĩ kaxyw Kris kôt hamaxpêr nẽ hkôt amnhĩ xunhwỳr prãm xwỳnhjaja te mẽ hpur mex nẽ kamã mẽmoj ô rũnh pyræk. Nẽ uræk nẽ amnhĩ to mex o pa.

⁸Nom koja mẽ hpur kãm mẽmoj nhĩgrõt mex kêt japêr. Kamã mrõnhĩ nẽ kahpare nẽ mẽmoj punuj pix hapôj nhũm mẽ tee ri omu nẽ hkaga kurê kumrêx. Tã mẽ kot Kris kaga xwỳnhjaja te pur punuj kot amnhĩ nhĩpêxta pyràk nhũm Tĩrtũm te kêp pur nhõ dõn pyràk. Jao tee ri amnhĩ tã mẽ kot amnhĩ nhĩpêx ã mẽ omu nẽ mẽ hkaga kurê kumrêx nẽ ma mẽ kot amnhĩ xà htỳx kãm hamak tũm xà pê kuwyta wỳr mẽ rẽnh pa.

⁹E ixkràmnhwỳjaja. Inhmã mẽ akĩnh jakamã na pa ã mẽ amã mẽ kot Kris kaga xwỳnhjê jarẽnh anẽ. Nom te mẽ ate mẽ uràk kêt. Kris kôt mẽ ate amnhĩ xunhwỳr xwỳnh mex na ka mẽ. Ra mẽ ate hkôt amnhĩ xunhwỳr tỳx jakamã te mẽ apê pur mexta pyràk.

¹⁰Na ka htem Kris kôt mẽ akwỳjê ho mex o ri apa. Te mẽ amã amnhĩ tã ma pyràk o axpẽn nhĩpêx o ri apa nhũm Tĩrtũm ja hã mẽ apumu. Tã koja tanhmã ja hã mẽ ato mex to. Kot tãm mẽ panhĩpêx o pa jakamã koja tanhmã mẽ ate axpẽn nhĩpêx mex tota ã tanhmã mẽ ato mex to.

¹¹Tã kêt ka mẽ arĩ ã axpẽn nhĩpêx anhỳr o ri apa rãhã ty kê nhỹrmã ja hã mẽ ato mex nẽ. ã mẽ ate amnhĩ nhĩpêx anhỳr o apaja na inhmã hprãm tỳx kumrêx.

¹²Kot kaj mẽ ã amnhĩ nhĩpêx anẽ hãmri nẽ amã kaga nẽ apa hkêt nẽ. Nẽ amnhĩ nhĩpêx o te Tĩrtũm kra hkwỳ htyk xwỳnhjaja kormã htĩr ri kot amnhĩ nhĩpêxta pyràk. Na prem amnhĩ kaxyw Tĩrtũm mã hamaxpêr tỳx rãhã ho pa. Kot mẽ ho mex ã mẽ hã amnhĩ jarẽnhja nhũm prem amnhĩ tã kamã hamak rãhã ho pa. Tã amnhĩ tã kamã hamak o pa ry rax rãhã ty nhũm Tĩrtũm ra kot mẽ hã amnhĩ jarẽnh xà hkôt mẽ ho mex nẽ. Tã kêt ka mẽ uràk nẽ ã amnhĩ nhĩpêx anhỳr o ri apa rãhã ty.

¹³⁻¹⁵ã na pre finat Apraãwja amnhĩ nhĩpêx anẽ. Kormã hkra hkêt tã nhũm Tĩrtũm kãm hkra nẽ kanrêhã htàmnhwỳjê hkukamã tanhmã mẽ harẽnh to nẽ kãm: —Pa Apraãw. E inhma. Kot paj aprõ mẽ war ato mex nẽ. Kot kaj war akra hãmri nẽ gaa nhũm akanrêhã war atàmnhwỳjaja ohtô rax kumrêx. ãm hãmri na pa ã mẽ hkukamã amã mẽ harẽnh anẽ. Kot paj amã amnhĩ jarẽnh xà hkôt ã anhĩpêx anẽ. Ixpê mẽ anhĩpêx xwỳnh na pa ã amã amnhĩ

jarēnh anē. Anē. Tã ã kãm wa hkra jarēnh anhÿr tã nhũm wa tokyx hkra hkêt nē. Nom tee ri ja hã amnhĩ pumu nē Tĩrtũm kot wa kãm hêx ã hkamnhĩx kêt nē. ãm hkamnàr rom ã hamaxpēr anē nē hamaxpēr o: —Nà kot paj wa nhÿrmã ixkra. Tĩrtũm tãm kot wa inhmã wa ixkra jarēnh kēnã. Anē. Tã nhũm amgrà xohtô rax kumrēx nē hapêx nhũm wa hkra. Nhũm axte amgrà hkwÿ hapêx nhũm wa hkanrēhã htàmnhwÿ hkwÿ. Ra Tĩrtũm kot mẽ hkukamã Apraãw mã mẽ harēnh xà hkôt. Tĩrtũmja hihtÿx o hihtÿx nē àhpumunh o àhpumunh jakamã na pre amnhĩ jarēnh xà hkôt ã wa kãm wa hkra nē wa htàmnhwÿjê nhõr anē. Kot ra wa kãm hã amnhĩ jarēnh xà hkôt. No ri nhãm mēhõ nhĩxi jarēnh kôt wa kãm wa hkra jarēnh kêt nē. Mēhõ kot we hihtÿx o hihtÿx o Tĩrtũm jakre nhũm we ri hixi jarēnh kôt ã wa kãm mẽ harēnh anē? Amrakati kumrēx. Jakamã na pre wa kãm amnhĩ jarēnh o: — Nà ixàhpumunh xà hkôt na pa ã war amã war akra jarēnh anē. Anē.

¹⁶No pika ja kamã na htem ã amnhĩ jarēnh anhÿr kêt nē. Na htem mēhõ mã tanhmã mẽmoj tã amnhĩ jarēnh to kaxyw nē mēhõ hihtÿx o kot hakrenh xwÿnh nhĩxi jarēnh kôt amnhĩ jarē. Nē amnhĩ jarēnh o: —Nà ixte jahti noo mã ã amã amnhĩ jarēnh anhÿr jakamã ãm hãmri na pa ã amnhĩ jarēnh anē. Anē. Kot hã amnhĩ to hêx nhũm hihtÿx o kot hakrenh xwÿnhta kot hã harēnh mar nē hã tanhmã homnuj to pymaj na htem ã mẽ hixi jarēnh kôt mẽmoj tã amnhĩ jarēnh anē. Hãmri nē kot tanhmã hã ho pymaj ra kot amnhĩ jarēnh xà hkôt tanhmã mẽmoj nhĩpêx to.

¹⁷Nom Tĩrtũm na hte uràk nē nhãm mēhõ nhĩxi jarēnh kôt ri mẽmoj tã amnhĩ jarēnh kêt nē. Na hte tãm amnhĩ jarēnh xà hkôt mẽmoj to anē nē aa hã amnhĩ to hêx kêt nē. Na pre mẽ pahpê hkrajê mã kãm: —Kot paj nhÿrmã mẽ ato mex rax nē. ãm hãmri na pa mẽ amã amnhĩ jarē. Ixte amnhĩ pumunh xà hkôt na pa ã mẽ amã amnhĩ jarēnh anē. Anē. Mē pahte ãm hãmri kot amnhĩ jarēnhja mar nē amnhĩ to hêx kêt ã omunh kurê kumrēx kaxyw. Koja Tĩrtũm mẽmoj tã ã amnhĩ jarēnh anē hãmri nē hijuk ri axtem hpãnhã tanhmã amnhĩ jarēnh to hkêt nē.

¹⁸Jakamã koja nhÿrmã ma amnhĩ wÿr mẽ pahto àpir ã amnhĩ jarẽ hãmri nẽ ãm hãmri amnhĩ jarẽ nẽ amnhĩ jarẽnh o: —Nà ãm hãmri ixte amnhĩ pumunh xà hkôt na pa mẽ amã ja hã amnhĩ jarẽ. Anẽ. Koja ã amnhĩ jarẽnh anẽ hãmri nẽ hijuk ri axte hpãnhã tanhmã mẽmoj jarẽnh to hkêt nẽ. Ra kot ã amnhĩ jarẽnh anhÿrja koja arĩ rãhã nẽ. Jakamã e kwa kêr ka mẽ tee ri amnhĩ kukamã ajamaxpêr o ri apa hkêt nẽ. Ra mẽ pamex nẽ ri papa kaxyw Tĩrtũm kôt amnhĩ xunhwÿr jakamã kêr pu mẽ arĩ kot mẽ pahto mex rax xà hã arĩgrota jamãr rãhã ho ri papa.

¹⁹Na hte kanôre ho htÿx xàja kanôre ho htÿx nhũm ma gô hkôt pa hkêt nẽ. Ja pyrã nẽ kot puj mẽ Tĩrtũm kot mẽ pahto mex xà kamã pajamak o papa hãmri nẽ hkaga hkêt nẽ. Amnepê mã na pre hte mẽ panhõ patre maatija Tĩrtũm mã amnhĩ jarẽnh xà hã ixkre hwÿr agjê nẽ hkôt ã kupêxê ho hitom maati hwÿr agjê nẽ kamã mẽ ho Tĩrtũm wÿr o kuhê. Tã nhũm Jejus akupÿm kaxkwa hwÿr api nẽ Tĩrtũm ri hkrĩ hãmri nẽ patre maatita pãnhã tãm mẽ pahto hwÿr o hkrĩ.

²⁰Na pre ra mẽ pakukamã kaxkwa hwÿr api nẽ kamã pa ho pa nẽ finat Mekijetekja pyrã nẽ kêp mẽ panhõ patre maati. Tã koja mẽ pahto Tĩrtũm wÿr rãhã nẽ pa ho pa.

Eprêw 7

Patre Mekijetek jarẽnh

¹⁻³E kot paj ixprĩ hã mẽ amã tanhmã finat Mekijetekja jarẽnh to ka mẽ inhma. Krĩ pê Sarẽ kamã na pre kêp mẽ õ pahi nẽ mããnên kêp mẽõ patre. Sarẽja mẽ pakapêr kãm kêp: “Mẽ hamakêtkati nẽ ri mẽ pa xwÿnhjê nhõ krĩ.” Jakamã Mekijetekja mẽ pakapêr kãm kêp: “Mẽ hamakêtkati nẽ ri mẽ pa xwÿnhjê nhõ pahi.” Nẽ mããnên kêp: “Pahi kot tãm amnhĩ nhĩpêx o pa xwÿnh.” Nẽ Mekijetek nhĩpêxà nẽ katorxà nẽ higêt nhĩxija mẽ pahte harẽnh mar kêt. Nẽ kator ã arĩgro nẽ htyk ã arĩgroja mããnên mẽ pahte harẽnh mar kêt. Tĩrtũm kapêr ã kagà htũm kot tanhmã ja jarẽnh to hkêt. ãm Jejus pyrã nẽ kêp patre hã mẽ ho Tĩrtũm wÿr rãhã ho pa xwÿnh pix ã kot harẽnh. ãm ja pix na mẽ pahte harẽnh mar. Nẽ kot amnhĩ to rax xwÿnh

jakamã na pre Apraãw nhÿri omu nẽ hã hpijaàm kaxyw kãm hikukrêx kwÿ gõ. Na pre hkwÿjê mẽ ra mẽ urojê kutã amnhĩ xunhwÿ nẽ pijapu nẽ mẽ kêp mẽ õ pahi ho 4 nẽ mẽ himex. Nẽ mẽ kêp mẽ hikukrêx kwÿptà nẽ hamÿ nẽ ma õ krĩ hwÿr o mõ. Nẽ kormã pry hã mör ri Mekijetek kaxpa nhũm amnhĩ wÿr omu nẽ kãm: —Pa Apraãw? E kê Tĩrtũm ato mex nẽ ka amex nẽ apa. Anẽ. Nhũm amnhĩ tã kuma nẽ hkĩnh nẽ. Hãmri nẽ kãm mẽ hikukrêx kwÿptà xwÿnhta hkwÿ gõ nhũm hamÿ nẽ ma amnhĩm o mõ.

⁴Na pre Apraãw kot amnhĩ to rax ã omu nẽ kãm mẽmojta kwÿ gõ. Kêp mẽ pahpê Ijaew pàr krax jakamã mãänën kot amnhĩ to rax tã Mekijetekja uràk nẽ kot amnhĩ to rax ã omu nẽ kãm mẽmota kwÿ gõ.

⁵Finat Mojes kot Ijaew mã Tĩrtũm kapër jarënh xà hkôt kãm kugõ. Na pre mẽ kãm: —Mẽ akwÿ pê finat Rewi hkanrêhã htàmnhwÿjaja kêp mẽ anhõ patre jakamã kêr ka mẽ kãm mẽ akukrêx kwÿ nhör o ri apa. Kot kaj mẽ akrit kêp 10 nẽ kãm ho pixi nẽ agõ. Nẽ mẽ akàxpore kêp 10 nẽ kãm hõ gõ. Kêr ka mẽ ã mẽ kãm mẽ akukrêx nẽ mẽ akrit kwÿ nhör o apa anẽ. Nẽ kêr ka mẽ kãm mẽmoj mex pix gõ. Mẽ kêp mẽ akwÿ na mẽ. Mẽ apiitã mẽ apê Apraãw kanrêhã htàmnhwÿ jakamã kêr ka mẽ ã mẽ hipêx anhÿr o apa. Anẽ.

⁶Tã Mekijetekja kêp Rewi hkwÿ hkêt tã nhũm Apraãw amarĩ ã hipêx anẽ nẽ kãm pahi htyk xwÿnhjê kukrêxta kwÿ gõ. Jao hikukrêxta kamã mẽmoj kêp 10 nhũm omu nẽ kamã kãm ho hpÿnh nẽ kugõ. Na pre ã kãm mẽmoj nhör anẽ. Hãmri nhũm amnhĩm hamÿ nẽ kãm: —Nà ãm hãmri koja Tĩrtũm ato mex rax nẽ. Anẽ. Ra Tĩrtũm kot Apraãw kanrêhã kãm htàmnhwÿ ho ohtô nẽ mẽ hkukamã mẽ harënh jakamã nhũm Mekijetekja ã kãm Tĩrtũm kot ho mex ã harënh anẽ.

⁷Mẽ kot amnhĩ to rũnh o mẽ hakrenh xwÿnh pixjaja Tĩrtũm kot mẽ ho mex kaxyw mẽ ho àhwÿr o pa jakamã na pre Apraãw o Tĩrtũm wÿ. Jao kot amnhĩ to rax o kot hakrenh ã amnhĩ to amnhĩrĩt.

⁸Hãmri nẽ Rewi hkanrêhã htàmnhwÿ kot amnhĩ nhĩpêx pyrã nẽ Apraãw o Tĩrtũm wÿ nẽ kêp mẽmojta jamÿ. Mẽ uràk nẽ mẽmoj kamã kêp 10ja rũm ho hpÿnh nẽ amnhĩm hamÿ. Nom kot amnhĩ to rax o Rewi hkanrêhã

htàmnhwỳjê jakrenh. Tĩrtũm kapěr ã kagà htũm kot Rewi hkanrêhã htàmnhwỳjê htyk par ã mẽ harênh tã tanhmã Mekijetek htyk ã harênh to hkêt jakamã kot amnhĩ to rax o kot Rewi hkwỳjê jakrenh.

9-10Nẽ kot pry kamã Apraãw kaxparta ã kormã Rewi kator kêt tã kêp Apraãw kanrêhã htàmnhwỳ mẽ xwỳnh. Jakamã nhũm Apraãwja Mekijetek mẽ mẽ hikukrêxta kwỳ nhõr jao te Rewi mẽ õr pyræk. Tã nhũm amgrà xohtô nẽ hapêx nhũm Rewi hkanrêhã htàmnhwỳjaja hapôj nẽ kêp mẽ õ patre nẽ ri pa. Jao Mekijetek pyrà nẽ mẽ kêp mẽ hikukrêx kwỳ jamỳnh o ri pa.

11Nẽ finat Mojes na pre Ijaewjê mẽ tanhmã Rewi hkanrêhã htàmnhwỳjê jarênh to. Kormã mẽ hapôx kêt ri nhũm hkwỳjê mẽ tanhmã mẽ harênh to. Mẽ kêp patre hã mẽ harê. Tã nhũm mẽ hapôj nẽ hprêk nẽ mẽ ho Tĩrtũm wỳr o ri mẽ hkôt pa. Nom mẽ kot tãm amnhĩ nhĩpêx o pa kaxyw na prem tanhmã mẽ hkrã hto hkêt nẽ. Tanhmã kot mẽ amnhĩ to nẽ ã mẽ hipêx anẽ? Jakamã nhũm Tĩrtũm mẽ hpãnhã mẽ pahwỳr kỳj rũm mễhõja mẽ nhũm mẽ pahwỳr wrỳ. Nom kêp Rewi hkanrêhã htàmnhwỳ hkêt. Nẽ mãnẽn kêp Rewi hpãm Arãw kanrêhã htàmnhwỳ hkêt. Axtem te Mekijetek kot amnhĩ nhĩpêx pyræk xwỳnh na pre. Jejus Krisja. Tãm na pre mẽ pahwỳr wrỳ hãmri nẽ tanhmã mẽ pahkrã hto pu mẽ ỹ hã tãm amnhĩ nhĩpêx o papa.

12No Mojes kapěr kot Rewi hkanrêhã htàmnhwỳ pixjaja kêp mẽ ho Tĩrtũm wỳr xwỳnh ã mẽ harênh. Tã nhũm Krisja mẽ pahwỳr wrỳ nẽ mẽ hpãnhã kêp mẽ pahto àhwỳr o pa xwỳnh. Jakamã na pu htem axte Mojes kapěr kôt amnhĩ nhĩpêx kêt nẽ. Pãnhã Jejus kapěr kôt pix mã amnhĩ nhĩpêx o papa.

13-14Nẽ Jejus kêp Rewi hkanrêhã htàmnhwỳ hkêt. Katorxà hkôt kêp Apraãw tàmnhwỳ Juta hkanrêhã htàmnhwỳ na pre. Ra mẽ pahte ja mar mex. Aa Juta hkanrêhã htàmnhwỳjaja kêp patre hkêt. Na pre Tĩrtũm jajê mẽ mẽ kot mẽmoj nhõr xà hã mễsti kunĩhtita ã kãm mẽmoj nhõr nẽ hkwỳjê ho hwỳr ã mẽ kãm karõ hkêt nẽ. Âm Apraãw tàmnhwỳ Rewi hkanrêhã htàmnhwỳjê mẽ pix mã na pre ã mẽ kãm ja hã karõ anẽ. Tã nhũm Jejus wrỳ nẽ mẽ hpãnhã mẽ pahto hwỳr o pa. Mẽ uræk nẽ kêp Rewi hkanrêhã htàmnhwỳ

hkêt axtem kêp Juta hkanrêhã htàmnhwỳ htã Rewi hkwỳjê hpãnhã mẽ pahto Tĩrtũm wỳr o pa.

Mekijetek pyrà nẽ mẽ pahto Tĩrtũm wỳr xwỳnh jarẽnh

15-19Nẽ Ijaewja na prem Mojes kapẽr mar tỳx nẽ hkôt amnhĩ nhĩpêx tã aa amnhĩ to mex kêt nhũm Tĩrtũm tee ri ja hã mẽ omu nẽ hamaxpẽr o: —Nà Rewi hkanrêhã htàmnhwỳjaja kêp mẽ õ patre nẽ mẽ ho ixwỳr o pa htã nhũm mẽ arĩ htỳx ri amnhĩ tomnuj pix o pa. Jakamã koja mẽ axte ri mẽ ho ixwỳr o pa hkêt nẽ. Anẽ. Hãmri nẽ mẽ pakaxyw mẽ pahto àhwỳr xwỳnhja ta nẽ ãm. Kra Jejusja nhũm kuta nẽ ãm. Tãm na hte Rewi hkwỳjê rom tanhmã mẽ pahkrã hto pu mẽ kukwak ri tãm amnhĩ nhĩpêx nẽ Tĩrtũm kôt amnhĩ nhĩpêx mex nẽ. Jao nhỹrmã ma mẽ pahte Tĩrtũm nhõ krĩ hwỳr paxàpirja jamãr o papa. Jejus na hte Mekijetek pyrà nẽ kêp mẽ panhõ patre maati nẽ mẽ pahto Tĩrtũm wỳr rãhã ho pa. Kêp Rewi hkanrêhã htàmnhwỳ hkêt tã Tĩrtũm pyrà nẽ kêp htĩr tũm nẽ pa ho pa xwỳnh jakamã na pre Tĩrtũmja mẽ pakaxyw kuta nẽ mẽ pahwỳr kumẽ. Kapẽr ã kagà htũm kot harẽnh kot: Kot kaj Mekijetek pyrà nẽ mẽ ho ixwỳr rãhã ho ri apa. Anẽ.

20-21No Rewi hkwỳjê mã na pre ã kapẽr anhỹr kêt nẽ. ãm Jejus pix mã ã kapẽr anẽ nẽ kãm: E kot kaj apê mẽ ho ixwỳr rãhã o apa xwỳnh. Kot paj nhỹrmã apãnhã axtem mẽhõ xãm kêt nẽ. ãm kapxipix kot kaj mẽ ho ixwỳr o apa rãhã ho rãhã. ãm hãmri na pa amã ã ixkapẽr anẽ. Ixpê Pahi Maati hã ã ajarẽnh anẽ.

22Anhỹr jao Jejus kot amnhĩ to rax o Rewi hkwỳjê jakrenh par ã ho amnhĩrĩt. Mẽ kot Ijaew mã Tĩrtũm kapẽr jarẽnh nhũm mẽ kot mar nom hkôt amnhĩ nhĩpêx kêt jakamã nhũm Tĩrtũm mẽ hpãnhã Jejus xãm. Tapxipix na hte tanhmã mẽ pahkrã hto pu mẽ tãm amnhĩ nhĩpêx mex o ri papa.

23Rewi hkwỳjaja na prem axpẽn mỳr pê kêp mẽõ patre nẽ ri pa htã htyk pa nẽ hapêx.

24Nom Jejusja htĩr tũm nẽ pa ho pa xwỳnh jakamã koja mẽ uràk nẽ aa hapêx kêt. Koja mẽ pahto Tĩrtũm wỳr rãhã ho pa nẽ aa jam urer kêt nẽ.

²⁵ã Jejus kot amnhĩ nhĩpêx anhÿr jakamã te kêp Tĩrtũm wÿr mẽ panhõ pry pyræk. Na pu htem hkôt amnhĩ xunhwÿ nhũm mẽ panê mẽ pahte amnhĩ tomnuj piitã rênh pa nẽ mẽ pahpê Tĩrtũm kra hã mẽ pajarẽ.

²⁶Nẽ ãm hãmri kêp mẽ pahto Tĩrtũm wÿr xwÿnh maati mex na. Mẽ pakurom tãm kot amnhĩ nhĩpêx mex o pa nẽ aa kot tanhmã amnhĩ tomnuj to hkêt. Tã ra Tĩrtũm kot amnhĩ wÿr ho àpir jakamã nhũm ra kuri mẽ pahto hwÿr rãhã ho pa.

²⁷Nẽ kot amnhĩ to rax o wam mẽõ patre maati jê jakrenh. Wamtaja na prem hkwÿjê pyrà nẽ amnhĩ tomnuj o pa. Jakamã na prem apkati mẽ amnhĩ tomnuj pãnhã Tĩrtũm mã mẽmoj gõ nẽ kãm amnhĩ jarẽ nẽ amnhĩ to kuwÿ. Hãmri nẽ rĩ kormã kot nhãm mẽ hwÿr mẽ mrar xwÿnhjê mã mẽ ho anẽ nẽ mẽ hpãnhã Tĩrtũm mã mẽmoj nhõr pê mẽ ho kuwÿ. No kêt Jejusja wam patre maati rom aa kot amnhĩ tomnuj kêt jakamã na pre hte mẽ uræk nẽ amnhĩ tomnuj pãnhã Tĩrtũm mã mẽmoj nhõr o pa hkêt nẽ. ãm mẽ papajaja na pre mẽ pahte amnhĩ tomnuj pãnhã htyk o kãm amnhĩre. ãm htyk tipxi htã mẽ pahpiitã mẽ pahpãnhã amnhĩrer pa. Jakamã koja axte ã amnhĩ nhĩpêx anhÿr kêt nẽ. Mo kaxyw kot kêt axte mẽ panê ty?

²⁸Mojes kapêr kôt na pre Ijaew amnhĩm Rewi hkwÿjê xunhwÿ nhũm mẽ kêp mẽ õ patre nẽ ri pa. Tã no nhũm mẽ uræk nẽ arĩ amnhĩ tomnuj o pa nhũm Tĩrtũm tee ri mẽ omu nẽ mẽ hpãnhã mẽ pakaxyw Krata xãm nẽ kãm: —Nà kapxipix mẽ kurom ate tãm amnhĩ nhĩpêx o apa jakamã kapxipix kot kaj mẽ hpãnhã mẽ ho ixwÿr o apa rãhã ho rãhã. Anẽ.

Eprêw 8

Jejus kêp mẽ pahto Tĩrtũm wÿr xwÿnh maati hã harênh

Rukre 22.20; Sikũn Korĩt 3.6-11

¹E kot paj axtem tanhmã mẽ amã mẽ pahto Tĩrtũm wÿr xwÿnh maatita jarênh to ka mẽ inhma. Na hte kaxkwa kamã Tĩrtũm nhĩhkô hã hkrĩ. ĩhkô hã kêp Pahi Maati hã hkrĩ xà hã upôk rũm hkrĩ ho hkrĩ.

²Wam patre maati jaja na prem Tĩrtũm nhõrkwÿ kaàkre wÿr mra nẽ kamã hitom maati kamã mẽ ho Tĩrtũm wÿr o pa. Nom nhũm Jejus na hte mẽ

kurom kaxkwa kamã Tirtũm nhõrkwỹ mex kãm mẽ pahto àhwỳr o hkrĩ. Òrkwỹ kaàkreja na prem ìhkra ho hipêx nom kaxkwa kamã òrkwỹ mexja na pre mẽhõ ìhkra ho hipêx kêt nẽ. Tirtũm na pre tanhmã hipêx to nhũm kamã Jejusja mẽ pahto hwỳr o hkrĩ.

³Nẽ mẽ pahpê Ijaew nhõ patre maatijaja na prem mẽ ho hwỳr kaxyw nẽ mẽ kot amnhĩ tomnuj pãnhã Tirtũm mã mẽmoj nhõr kôt mẽ ho kuwỳ. No Kris na hte ã amnhĩ nhĩpêx anhỳr kêt nẽ. Ra htyk o kot kãm amnhĩ nhĩ nhõr jakamã na hte wam patre maati pyrã nẽ xatã kãm mẽmoj nhõr kêt nẽ.

⁴Tã na hte arĩ Ijaew Mojes kapêr kôt amnhĩm Rewi hkwỳ kêp mẽ õ patre kaxyw mẽ unhwỳ nhũm mẽ ho Tirtũm wỳr o pa. No Jejus kêp Rewi hkanrêhã htãmnhwỳ hkêt. Katorxà hkôt kêp Juta hkanrêhã htãmnhwỳ jakamã kop apu arĩ jar pika ja kamã htĩr nẽ pa ronhỹx Ijaew nhõ patre pyrã nẽ kêp mẽ ho Tirtũm wỳr o pa xwỳnh kêt. ãm Rewi hkanrêhã htãmnhwỳ pixjaja na htem mẽ kaxyw kãm mẽmoj gõ nẽ hkôt mẽ ho kuwỳ.

⁵Jar na htem arĩ ã amnhĩ nhĩpêx anhỳr o pa nom kaxkwa kamã na htem ã amnhĩ nhĩpêx anhỳr hkêt nẽ. Nẽ jar Tirtũm nhõrkwỹ kaàkreja te kot kaxkwa kamã òrkwỹ mexta pyrãk. Na pre Mojes òrkwỹ kaàkre nhĩpêx kaxyw nhũm Tirtũm tanhmã kãm hã karõ hto nẽ kãm: —E jãã hixêt prêk nhĩmõk ã axãmta ã na pa pre amã ixkreta kukamã ixprĩ hã tanhmã mẽ ate hipêx to hã amã karõ. Tã kêr ka ã hipêx anẽ. Anẽ. Hãmri nhũm kuma nẽ kot kãm hã karõ xà hkôt hipêx. Hãmri nhũm mẽ õ patre maati ixkreja kamã mẽ ho Tirtũm wỳr o pa. Na prem ã amnhĩ nhĩpêx anhỳr o pa.

⁶Tã nhũm ra Tirtũm axtem mẽ hpãnhã mẽ pakaxyw Kris xãm nhũm hte mẽ pahto hwỳr mex o wamtajê jakre. Na hte kaxkwa kamã mẽ pahpiitã mẽ pahpumunh mex rãhã ho hkrĩ nẽ wamtajê rom tanhmã mẽ pahkrã hto pu mẽ tãm amnhĩ nhĩpêx o ri papa. Tirtũm kot finat Mojes mã kapêrja mex nẽ nom axtem na pre. Tã kapêr nyw na mex o kot wam kapêr jakrenh. Kapêr nyw kôt kot puj mẽ pahtyk tã akupỹm pahťĩr nẽ nhỹrmã Tirtũm mẽ Jejus wa kuri pamex nẽ pahťĩr tũm nẽ papa ho papa nẽ axte pahtyk kêt nẽ.

⁷Kêp apu Tirtûm kot Mojes mã kapêr kôt mẽ kot tãm amnhĩ nhĩpêx o pa ronhỹx pre Tirtûm axte kapêr nyw ã kagà hkêt nẽ.

⁸Nom wam kapêr tũmta na pre mẽ mar tỳx htã arĩ amnhĩ tomnuj rãhã ho pa nhũm tee ri ja hã mẽ omu nẽ mẽ kãm: Nà kot paj axte nhỹrmã mẽ apê Ijaew mã axtem tanhmã ixkapêr to.

⁹Amnepê m mẽ anhĩgêjtê mã na pa pre ixkapêr. Na pa pre Ejit pê mẽ kator nẽ mẽ kot tanhmã amnhĩ nhĩpêx to ho pa kaxyw tanhmã hã mẽ kãm karõ hto. Nom na prem ixkapêr ma nẽ ãm kuma nẽ ixkôt amnhĩ nhĩpêx kêt nẽ. Pa tee ri ja hã mẽ omu hãmri nẽ mẽ hkaga.

¹⁰Tã kot paj mẽ apê mẽ hkanrêhã mẽ htãmnhwỳ nywjê mã axtem ixkapêr ka mẽ ixkapêr nywja ma. Kot paj nhỹrmã tanhmã mẽ akrã hto ka mẽ ixkapêr nyw mar tỳx nẽ hã ano htỳx nẽ ho apa. Nẽ akĩnh nẽ apa. Nẽ ixkôt ri amnhĩ nhĩpêx mex o apa. Nẽ axpên mã ijarênh o: “Nà ãm hãmri Tirtûm kêp mẽ panhõ Tirtûm na.” Anhỹr o ri axpên mã ijarênh o apa. Pa amnhĩ tã mẽ ama nẽ mẽ apumu nẽ amnhĩ xwar mẽ apê ixkra hã amnhĩm mẽ ajarẽ.

¹¹Kot kaj mẽ apiitã ixte amnhĩ nhĩpêx kôt ixpumunh mex o ri apa. Mẽ akàxpore rũnh xwỳnhjaja nẽ mẽ akàxpore hkryre xwỳnhjaja mẽ apiitã ixpumunh mex jakamã kot kaj mẽ ri axte ixtã tanhmã axpên kukjêr to ho ri apa hkêt nẽ.

¹²Nẽ kot paj mẽ ato mex rax o ixpa. Nẽ axte tanhmã mẽ ate amnhĩ tomnu hto ho apaja mã ijamaxpêr kêt nẽ. Anẽ.

¹³Nẽ koja mẽmoj ra htũm hãmri nẽ hapêx tokyx anẽ. Ja pyrã nẽ na pre Tirtûm mẽ pamã kapêr tũmta jarênh o: —E kêr ka mẽ axte ixkapêr tũm mar kêt nẽ. Pãnhã ixkapêr nyw pix mãn mar o apa nẽ ãm kôt pix mã mãn amnhĩ nhĩpêx rãhã ho ri apa. Anẽ.

Eprêw 9

Tirtûm nhõrkwỹ kaàkre jarênh

¹Nẽ amnepê m na pre finat Mojesja mẽ panhĩgêt nẽ mẽ pahpãmjê mã tanhmã Tirtûm nhõrkwỹ kaàkre jarênh to. Tanhmã mẽ kot hipêx to nẽ kamã tanhmã

amnhĩ nhĩpêx to hã mẽ kãm karõ. Nẽ kamã tanhmã mẽ kot amnhĩ to Tĩrtũm wỳr to hã mẽ kãm karõ. Nẽ tanhmã mẽ hkwỳjê ho hwỳr toja nhũm pre mããnẽn mẽ kãm hã karõ. No Tĩrtũm nhõrkwỹ kaàkreja kêp õrkwỹ kumrêx kêt. ãm mẽ kot omunh nẽ kaxkwa kamã õrkwỹ kumrêx mã hamaxpêr kaxyw na pre.

²Jakamã nhũm prem Mojes kapêr ma nẽ hipêx. Kamã hitom hamêxkrut. Wam hitom kamã na pre kanê hprêêti xãm nẽ kutã mêsti xãm. Nẽ mêsti nhĩmõk ã Tĩrtũm mã õ pãwti jaxwỳ. Mẽ panhõ patre na pre htem Tĩrtũm mã kugõ nẽ mêsti ã kãm haxwỳ hãmri nẽ hkwỳjê ho kuwỳ. Tã hitom ja na prem kêp Tĩrtũm nhõ hitom mex ã harê.

³⁻⁴Nẽ hitom wa hkaêx kãm na pre kupêxê ho hakwakre kahê xàja ajê. Haturxà kamã hitomja na prem Tĩrtũm nhõ hitom maati hã harê. Tĩrtũm na pre te hirã htỳx kãm hwỳr wrỳ nẽ te kamã hkrĩ pyræk. Nẽ kamã na pre Tĩrtũm mã mẽhkuxwa xà ho xêt xà hã mês kunĩhtija kuhê. Na prem ôr o hipêx nẽ kamã ãm nhũm kuhê. Nhũm pre hte mẽõ patre hwỳr agjê nẽ kutã kuhê nẽ mẽ ho Tĩrtũm wỳ. Nẽ mês kunĩhti haxwỳja hitom maati kamã kuhê. Na prem pĩ ho hipêx nẽ ôr o hpro nẽ kamã ãm. Mêstija kaxwỳnh kãm na pre htem mẽmoj jagjê. Tĩrtũm kot ljaew mã tanhmã mẽ kot amnhĩ nhĩpêx to ho pa hã karõ nẽ kên po hã mẽ kãm hã kagàja nhũm prem kamã kuxà nhũm hikwỹ. Nẽ mããnẽn ôr o xijereja xà nhũm hikwỹ. Nẽ xijere kamã amnepê mã Tĩrtũm kot kaxkwa rũm mẽ hwỳr mẽõ rênh kwỳ hikwỹ. Mẽõja mẽ kot kãm: “Manã” anhỹr xwỳnhja na prem hkwỳ hkawrà nẽ xijere kamã kugjê hãmri nẽ mêsti kamã kuxà. Nẽ finat Arãw nhõ kô kot ho amnhĩ kaxpar xà htũmta nhũm prem kamã kuxà. Tĩrtũm kot tanhmã ho nhũm kurũm pixôrà muxre hapôx xwỳnhhta nhũm prem mããnẽn mês kunĩhti kamã kuxà nhũm hikwỹ.

⁵Nẽ himõk ã Tĩrtũm kapêr o wrỳk xwỳnh wa hkarõ nhĩpêxja wa hamêxkrut nẽ axpên kutã wa hkõn krã ho hkrĩ. Axpên wỳr hara koror nẽ wa hkrĩ. Patre maati kot omunh nẽ Tĩrtũm kot mẽ hkôt pa ho paja mã hamaxpêr kaxyw. Nẽ wa hkaêx kãm ahkaprỳja Tĩrtũm kot mẽ nê mẽ kot amnhĩ tomnuj rênh

mã hamaxpêr xà na pre. ã Tĩrtũm nhõrkwỹ kaàkre kot anhỹr. No kot paj ixprĩ hã mẽ amã piitã harẽnh par kêt nẽ.

⁶Na pre hte mẽõ patre apkati mẽ wam hitom wỳr agjê nẽ kamã Ijaew ho Tĩrtũm wỳr o pa.

⁷No hitom maatija ãm mẽ õ patre maati pix na pre hwỳr agjê. Nom apkati mẽ hwỳr pa nẽ gjêx kêt ãm amgrà pỹnh kãm hwỳr gjêx pỹnh nẽ. Nẽ hwỳr gjêx kaxyw nẽ mẽmo mry pa nẽ hkamrô ru nẽ o pa nẽ hitom maati hwỳr ho agjê. Hãmri nẽ ho mês kunĩhti nhĩmõk kamĩ nẽ Tĩrtũm mã kãm: —Pa Tĩrtũm. E ota mry kamrôta. Mẽ ixpê akwỳjaja mẽ ixte amnhĩ tomnuj jakamã na pa mẽ amnhĩ pãnhã mẽmo mry nhõkre jakà nẽ kupĩ nẽ hkamrô ru nẽ man awỳr o mra. Te kot mẽ ixte amnhĩ tomnuj mỳrapê htyk pyræk. Jakamã kwa ã mẽ ixte amnhĩ nhĩpêx anhỹrja ã mẽ ixpumunh hkôt mẽ inhnê mẽ ixte amnhĩ tomnuj rê. Anhỹr o mẽ amnhĩ to kuwỳ.

⁸Nẽ patre maati pix na pre hitom maatija wỳr agjê nẽ mẽ ho Tĩrtũm wỳ. Ijaew na prem ixkre kapem hamãr o kuhê nẽ hwỳr gjêx kêt nẽ. Tĩrtũm Karõ kot hã mẽ kãm karõ xà hkôt. Te Tĩrtũm pê amỳm kuhê pyræk. Tã na htem jarãhã arĩ Ijaew kanrẽhã mẽ hkra nẽ mẽ htãmnhwỳjaja ã amnhĩ nhĩpêx anhỹr o pa. Jao mẽ higêtjê pyrã nẽ Tĩrtũm pê amỳm kuhê.

⁹Mẽ kot arĩ Tĩrtũm mã mry hpar nẽ hkamrô ho mẽmoj kamĩr nẽ amnhĩ to hwỳr o pa htã na htem arĩ hamaxpêr punuj pix o pa.

¹⁰Tĩrtũm kapêr tũm kot tanhmã mẽmoj tã mẽ kãm karõ hto. Na pre tanhmã mẽ apkur xà hã mẽ kãm karõ hto nhũm htem pix kur o pa. Nẽ tanhmã mẽ hkõm xà hã mẽ kãm karõ hto nhũm htem pix o hkõm o pa. Nẽ tanhmã amnhĩmnuj to hã tanhmã mẽ kot amnhĩ kuhõnh to hã karõja nhũm htem hkôt pix mã tanhmã amnhĩ kuhõnh to ho pa. Nẽ tanhmã mẽ kot ri mẽ hikukrêx kuhõnh to hã mẽ kãm karõja nhũm htem kôt pix mã tanhmã kuhõnh to ho pa. ã na pre Tĩrtũm Kris kukamã mẽ kãm mẽmoj tã karõ rax anẽ. Kris kutêp pix mã ã mẽ kot amnhĩ nhĩpêx anhỹr kaxyw. No mẽ pahte arĩ ã amnhĩ nhĩpêx anhỹr kaxyw kêt. Na pre ra Kris mẽ pahwỳr wrỳ nẽ Tĩrtũm kapêr tũm o hapêx nẽ hpãnhã mẽ pamã kapêr nyw jarẽ pu mẽ

hpãnhã nywta kôt pix mã amnhĩ nhĩpêx o papa. Kapër nywja mex o mex. Nẽ mex o wamta jakrenh.

Kris htyk o mẽ pahte amnhĩ tomnuj pãnhã amnhĩrer ã harẽnh

11Tã na pre Krisja tãm mẽ pahwỳr wrỳ nẽ kêp mẽ pahto Tĩrtũm wỳr xwỳnh maati nẽ patre hpãnhã mẽ pahto hwỳr o pa. Nom jar pika ja kamã mẽ kot mẽ ãhkra ho Tĩrtũm nhõrkwỳ kaàkre nhĩpêxta wỳr àr nẽ kamã mẽ pahto hwỳr kaxyw na pre wrỳk kêt nẽ. Na pre ra akupỹm kaxkwa hwỳr api nẽ kamã õrkwỳ mex wỳr axà nẽ kamã tanhmã mẽ pahto mex to nẽ tanhmã mẽ pahto Tĩrtũm wỳr to rãhã ho hkrĩ.

12ã kaxkwa kamã Tĩrtũm nhõ hitom maatija wỳr àr tipxi htã mẽ pahpiitã mẽ pahte amnhĩ tomnuj pãnhã amnhĩrer pa. Nom mẽmo mry kamrô ho mẽ pahpãnhã amnhĩrer kêt nẽ. Mõx kamrô rỳ motre kamrô ho mẽ pahpãnhã amnhĩrer kêt nẽ. Amnhĩ kamrô ho na pre mẽ pahpãnhã amnhĩre. Tyk nẽ hkamrô pikapĩrta o mẽ pahpiitã mẽ pahpãnhã amnhĩrer pa.

13Nẽ amnepêm Ijaew kot Tĩrtũm kapër tũm kôt amnhĩ nhĩpêx mex o pa hkêt jakamã nhũm tee ri mẽ omu nẽ mẽ kot amnhĩ tomnuj o mẽ pa xwỳnh ã mẽ harẽ. Jakamã na pre mẽõ patre xatã mry kamrô ho mẽ hkamĩ. Mõx kamrô nẽ motre kamrô ho mẽ hkamĩ. Na pre mõx krare hkwỳ hpa nẽ ho hxêt nẽ hprà ho hkwỳjê kamĩ. ã na prem xatã mẽ hipêx anhỳr o pa. Tĩrtũm kot ja hã mẽ omunh nẽ mẽ mex ã mẽ harẽnh kaxyw. Nom te mẽ krãhkà pix mex pyrà nẽ mẽ hkrã kaxwỳnh kãm arĩ hamaxpër punuj o pa.

14ã na prem amnhĩ nhĩpêx anhỳr o pa. Nom Krisja mẽ kurom aa tanhmã amnhĩ tomnuj to hkêt jakamã na pre mẽ pahte amnhĩ tomnuj xwỳnhjê nẽ ty. Te mẽ kot amnhĩ nẽ mõx rỳ motre hpar nẽ hkamrô runhta pyræk o amnhĩ nhĩpêx nẽ mẽ panê Tĩrtũm mã amnhĩ gõ nhũm pre mẽ kãm hkurê xwỳnhjaja kupĩ. Na pre Tĩrtũm Karõja ã kot mẽ panê htyk anhỳr kaxyw tanhmã ho hihtỳx to. Karõja aa hapêx kêt kumrẽx rãhã nẽ pa ho pa xwỳnh jakamã na pre Kris tykja kukamã tanhmã ho hihtỳx to nhũm mẽ panê ty. Tapxipix na mẽ pahte tãm amnhĩ nhĩpêx o papa kaxyw kêp tanhmã mẽ pahkrã hto xwỳnh. Jakamã na pu htem ra pajamaxpër nyw o pajamaxpër o papa nẽ

pajamxpër o: —Na pa pre tee ri inhmã amnhĩ krã hkôt tãm amnhĩ nhĩpêx o ixpa hprãm kaprÿ nê ãm amnhĩ tomnuj pix o ri ixpa. Tã Kris kot inhnê htyk o hkamrô pikapĩr ã harênh ma nê amnhĩ kaxyw hkôt ijamaxpër tÿx nê nhũm amnhĩ tã ixpumu nê ixte tãm amnhĩ nhĩpêx o ixpa kaxyw ixãm. Jakamã kot paj ãm Tĩrtũm pix mã kãm tanhmã amnhĩ nhĩpêx to ho ri ixpa. Tĩr rãhã nê pa ho pa xwÿnh jakamã kot paj nhÿrmã kuri uràk nê ixtĩr tũm nê ixpa ho ixpa. Anê.

15Nê amnepê mã na prem piitã Tĩrtũm kapër tũm kôt amnhĩ nhĩpêx mex o pa hkêt nê. Mẽ kot xatã hkôt amnhĩ nhĩpêx o pa hã amnhĩ jarênh tã hkôt amnhĩ nhĩpêx kêt nê. Jakamã na pre Kris wrÿ nê mẽ pahte hkôt amnhĩ xunhwÿr mã xwÿnhjê mã Tĩrtũm kapër nyw jarê nê mẽ pamã: —Kot paj mẽ anê ty nhũm Tĩrtũm ã ixte amnhĩ nhĩpêx anhÿrja kukwak ri mẽ ato mex rãhã ho pa. Anê. Hãmri nê amnhĩ jarênh xà hkôt mẽ pahte amnhĩ tomnuj piitã hpãnhã amnhĩrer kaxyw mẽ panê ty.

16-17Te jar pika ja kamã mēhō htyk kukamã hkrajê mã tanhmã amnhĩ jarênh to pyràk. Na htem htyk kaxyw nê hkrajê mã: —Nà kot paj mẽmo arĩgro hã ty ka mẽ inhmÿr pê ixpê ixkukrêx kwÿ o arĩk. Anhÿr o na htem amnhĩ jarê. Hãmri nê ty nhũm hkrajaja amnhĩm õ mẽmoj to arĩk pa. Mẽ hipêêxà kukwak ri mẽ hikukrêx mex nê mÿr pê o pa. No kormã htĩr ri nhũm mẽ kormã kêp hamÿnh kêt nê. Ja pyrà nê na pre Tĩrtũmja Jejus htyk kukwak ri tanhmã mẽ pahto mex to pu mẽ kukwak ri mẽ pamex nê pahkĩnh nê ri papa.

18Nê Tĩrtũm kapër tũm kôt na pre hte mẽ õ patre mry pa nê ãm hkamrô runh kôt pix mã mẽ ho Tĩrtũm wÿr o pa nhũm amnhĩ tã mẽ omunh xà hkôt mẽ kuma nê tanhmã mẽ ho mex to.

19Na pre finat Mojesja Ijaew mã Tĩrtũm kapër tũm piitã harê nê harênh pa hãmri nê mōx õxpĩ nê kaxyw motre hōxpĩ. Hãmri nê xijere kamã hamẽ wa hkamrô runh pa nê kamã gō hkwÿ ru. Hãmri nê kaxyw mẽmo pĩ hpa hkryre pê “isop” jarênhja kwÿ kukê. Nê kaxyw ôwêhti hkĩ kamrêkre hkwÿ hpy nê isop mẽ ho pihkàr pa nê mry kamrô o go. Hãmri nê ho hkwÿjê kamĩ. Nê ho Tĩrtũm kapër ã kagà tũmta kamĩ.

20-22Hāmri nē ho anhỹr pa nē mẽ kām: —Nà na Tĩrtũmja ixte mry kamrô ho mẽ akamĩr pumunh kôt mẽ pamã kapēr o: “E kot kaj mẽ ixkapēr kôt amnhĩ nhĩpêx o ri apa hã kot paj tanhmã mẽ ato mex to rãhã ho ri ixpa ka mẽ amex nē akĩnh nē ajamakêtkati nē ri apa. Jakamã kêr ka mẽ mry kamrô ho mẽmoj piitã hkamĩr pa. Nē ho amnhĩ kamĩ. Kêr pa ja hã mẽ apumu hãmri nē axte tanhmã mẽ ate amnhĩ tomnuj tota mã ijamaxpēr kêt nē.” Anē. ã na Tĩrtũm mẽ pamã kapēr anē. Anē. Hãmri nē hpãnhã mry kamrôta o ôrkwỹ kaàkre kamĩ. Nē hkre kamã mẽmoj kuhê xwỳnh piitã nhũm ho hkamĩr pa. ã na pre mẽ ô patre mẽ mex kaxyw mẽ hipêx anhỹr o pa. Mẽ kot tũhã mẽmoj to hpỹnhre nē ho hkamĩr kêt jakamã kironhỹx pre mẽmoj piitã ã hipêx anhỹr o pa. Kop apu mẽ kot mry hpar nē hkamrô runh kêt ronhỹx pre Tĩrtũm arĩ mẽ kot amnhĩ tomnuj mã hamaxpēr rãhã ho pa.

23Na prem ã Tĩrtũm nhõrkwỹ kaàkre kamã mẽmoj kuhê xwỳnh piitã mex kaxyw hipêx anē. Te Tĩrtũm kot mẽ pahto mex nhũm mẽ pahte nhỹrmã ma kaxkwa hwỳr ô krĩ hwỳr paxàpirta pyrã nē. Nom mẽ kot mry hpar nē hkamrô runhta kukwak ri mẽ pamex nē papa hkêt. ãm mẽhõ kamrô kukwak ri mẽ pamex xwỳnhhta pix kukwak ri na mẽ pahpê pahtĩr tũm nē papa mã xwỳnh. Ja na mex o mry kamrô piitã hakrenh pa.

24Jejus Krisja pix kukwak ri. Tãm na pre patre pyrã nē mẽ pahto Tĩrtũm wỳr kaxyw mẽ ãhkra ho Tĩrtũm nhõrkwỹ kaàkre nhĩpêxta wỳr gjêx kêt nē. ãm ixkre kaàkre pix na pre. Na pre kaxkwa kamã Tĩrtũm nhõ krĩ hwỳr axà. Tã arĩ kamã Tĩrtũm nhĩhkô hã mẽ pahto hwỳr rãhã ho hkrĩ.

25Nē Ijaew nhõ patre maati na hte amgrã mẽ ôrkwỹ kaàkre kamã hitom maati hwỳr gjêx tipxi. Nē amnhĩ kôt mry kamrô ru nē ho agjê. Tĩrtũm kot hã omunh nē axte mẽ kot amnhĩ tomnuj mã hamaxpēr hkêt kaxyw. Nom Kris na pre mẽ uràk nē mẽmo mry pa nē Tĩrtũm mã hkamrô kapĩr kêt nē. Kamrô na pre mẽ panê axkapĩ. Nom patre pyrã nē amgrã mẽ ã amnhĩ nhĩpêx anhỹr kêt nē. Na pre htyk o Tĩrtũm mã amnhĩ nhõr tipxi.

26Kêp apu patre pyrã nē amgrã mẽ mẽ panê htyk o pa ronhỹx ra mẽ panê htyk xohtô rax kumrêx. Nhỹx pre amnepê mã Tĩrtũm kot mẽmoj piitã ho

katorta rûm amgrà mẽ mẽ panê htyk o pa ho hkrax. Jao xatã htyk o amgrà xohtô rax kumrêx. Nom ja kot anhÿr kêt. Na pre mẽ pahwÿr wrÿ nê mẽ panê htyk tipxi htã htykja o mẽ pahte amnhĩ tomnuj piitã hpãnhã amnhĩrer par kumrêx. Jakamã mo kaxyw koja axte ty?

²⁷ãm pahtyk tipxi htã koja Tĩrtũm nhÿrmã akupÿm mẽ pahpiitã mẽ pahto pahtĩr nê ahpÿnhã tanhmã mẽ pajarênh to nê ahpÿnhã tanhmã mẽ panhĩpêx to. Kormã mẽ pahtĩr ri mẽ pahte amnhĩ nhĩpêx ã mẽ pahpumunh xà hkôt tanhmã mẽ panhĩpêx to.

²⁸Ja pyrà nê na pre Krisja ãm mẽ panê htyk tipxi htã mẽ pahto ohtô nê mẽ panê mẽ pahte amnhĩ tomnuj piitã rênh pa. Hãmri nhũm Tĩrtũm akupÿm ho htĩr nê akupÿm amnhĩ wÿr ho api. Tã koja nhÿrmã akupÿn mẽ pahwÿr wrÿ. Nom axte mẽ pahte amnhĩ tomnuj pãnhã amnhĩ rer kaxyw mẽ panê htyk kaxyw wrÿk kêt nê. Ra kot mẽ pahte amnhĩ tomnuj pãnhã amnhĩrer kênã. Koja akupÿn wrÿ nê mẽ pahte amnhĩ wÿr kamã pajamak o papa xwÿnhjaja ma akupÿm amnhĩ kôt kaxkwa hwÿr mẽ pahto àpir pa. Ra mẽ pahtyk tã nhũm akupÿm mẽ pahto mẽ pahtĩr nê ma amnhĩ kôt mẽ pahto àpir pa pu mẽ kuri pamex nê pahtĩr tũm nê papa ho papa.

Eprêw 10

Kris kot mẽ panê htyk tipxi hã harênh

¹Nê arĩ mẽ kot Tĩrtũm kapêr tũm kôt amnhĩ nhĩpêx o mẽ pa xwÿnhjaja kormã hprĩ hã Tĩrtũm kot tanhmã mẽ pahto mex to hã harênh mar tÿx kêt. Na prem kormã hkwÿ pix ma. Na hte mẽ õ patreja amgrà mẽ kãnhmã kaxkwa hwÿr mry kamrôta pẽ nê mẽ amnhĩ to Tĩrtũm wÿ. Kot ja hã mẽ omunh nê axte mẽ kot amnhĩ tomnuj mã hamaxpêr hkêt kaxyw. Tã ã mẽ kot amnhĩ nhĩpêx anhÿr tã arĩ Tĩrtũm kapêr kwÿm amnhĩ nhĩpêx rãhã

²jakamã na prem xatã kãm mẽmo mry kamrô runh o pa. Kêp apu tãm amnhĩ nhĩpêx nê tãm ri hamaxpêr ronhÿx arĩ ã amnhĩ nhĩpêx anhÿr o pa hkêt nê. Nê xatã amnhĩ pãnhã mry hpar nê hkamrô ho Tĩrtũm nhõrkwÿ kaàkre kamã mẽmoj kamĩr kêt nê.

³Nom na prem tãm amnhĩ nhĩpêx o pa hkêt nê. Mẽ kot amgrà mẽ Tĩrtũm kot mẽ nê mẽ kot amnhĩ tomnuj rênh kaxyw mẽ kot kãm mẽmo mry hpar o pa htã no ãm hkôt amnhĩ nhĩpêx xwỳnh ã amnhĩ jarênh kêt nê. Arĩ mẽ kot amnhĩ tomnuj o pa jakamã na prem mry hparta ã amnhĩ pumu nê tee ri amnhĩ kukamã hamaxpêr o hkaprĩ nê pa.

⁴Nom na hte môx kamrô rỳ motre kamrôja mẽ panê mẽ pahte amnhĩ tomnuj rênh kêt nê.

⁵⁻⁸Jakamã na pre Krisja mẽ pahwỳr nojarêt nê Tĩrtũm mã amnhĩ jarênh o: Pa Tĩrtũm? E kot paj ma mẽ hwỳr wrỳ. Mẽ kot amnhĩ pãnhã amã mry hparta apê hprãm nõkati nê amã hkĩnh kêt. Ate mẽ nê mẽ kot amnhĩ tomnuj rênh kaxyw mẽ kot amã mẽmo mry hparta amã hprãm kêt. ãm ixkukamã na ka pre ã mẽ kot amnhĩ nhĩpêx anhỳr kaxyw mẽ kãm ja hã karõ. Mẽ kot mry nhĩpêx o te pa ixte mẽ nê ixtyk nê ixkamrô pikapĩr pyræk o na prem ixkukamã ã amnhĩ nhĩpêx anê. Jakamã na ka ra mẽ kaxyw inhmã inhĩ gõ pa mẽ uræk nê inhĩ ho inhĩ. Tã kot paj ma mẽ hwỳr wrỳ. Ixte amã hprãm xà hkôt pix mã ixte tanhmã amã mnhĩ nhĩpêx to ho ixpa kaxyw. Akapêr ã kagà htũm kot tanhmã ixkukamã ijarênh to xà hkôt kot wrỳ nê ã amã amnhĩ nhĩpêx anê. Anê. Hãmri nê man mẽ pahwỳr wrỳ.

⁹Kot Tĩrtũm kapêr tũm o hapêx par nê hpãnhã tãm mẽ panê htyk kaxyw wrỳ. Jakamã na pre nojarêt nê Tĩrtũm mã amnhĩ jarênh o: —E ixte amã hprãm xà hkôt amnhĩ nhĩpêx kaxyw kot paj ma mẽ hwỳr wrỳ.

¹⁰Anhỳr jakamã wrỳ nê Tĩrtũm kãm hprãm xà hkôt mẽ panê ty. Na pre nhãm mẽhõ mẽ kãm hkurê xwỳnhjê mã õr nhũm mẽ kot hpĩr nhũm amarĩ htyk kêt nê. Na pre amnhĩ grõnh kôt mẽ kãm amnhĩ gõ nhũm prem kupĩ. Hãmri nhũm htyk o mẽ pahte hkôt amnhĩ xunhwỳr xwỳnhjê o Tĩrtũm kra. Mẽ kot xatã mry hparta rom htyk tipxi tã mẽ pahpiitã mẽ pahte amnhĩ tomnuj pãnhã amnhĩrer pa.

¹¹Nê mẽ õ patrejaja na htem apkati mẽ Tĩrtũm nhõrkwỹ kaàkre kamã kãm tanhmã amnhĩ nhĩpêx to. Nê apkati mẽ hkwỳjê hpãnhã mry hkwỳ hpa nê

hkamrô ru nê mẽ ho Tĩrtũm wỳ. Tã nom ja hã mẽ omunh xà hkôt mẽ nê mẽ kot amnhĩ tomnuj rênh kêt nê.

¹²No kêt Kris na pre mẽ kot xatã mry hpar xwỳnhhta rom ãm htyk tipxi htã mẽ pahte amnhĩ tomnuj piitã hpãnhã amnhĩre. Hãmri nê ma akupỹm kaxkwa hwỳr api nê Tĩrtũm nhĩhkô hã Pahi Maati hkrĩ xà kamã upôk rũm hkrĩ ho hkrĩ.

¹³Koja kuri hkrĩ rãhã nhũm Tĩrtũmja ãhkram mẽ kot kutã amnhĩ xunhwỳr xwỳnhjê jaxàr pa. Ja kaxyw na kormã kuri hamãr o hkrĩ.

¹⁴ãm htyk tipxi htã htykja o mẽ pahte hkôt amnhĩ xunhwỳr xwỳnhjê ho Tĩrtũm kra pu mẽ ra hpãnhã tãm amnhĩ nhĩpêx rãhã ho papa. Nê pajamxpêr mex o ri papa. Tĩrtũm kãm hprãm xà hkôt.

¹⁵Amnepê m mẽ kot Tĩrtũm nhỹ hã kapêr jarênh o mẽ pa xwỳnhjaja na prem mẽ panhĩgêjtê mã kapêr o pa. Tĩrtũm Karô nhỹ hã mẽ kãm kapêr nê mẽ kãm:

¹⁶—E na Tĩrtũm mẽ pamã amnhĩ jarê nê amnhĩ jarênh o: Kot paj nhỹrmã axtem ixkapêr nyw o mẽ amã ixkapêr. Nê mẽ akrãm hagjê ka mẽ mar tỳx pê hã ano htỳx nê ho apa. Ixkapêr tũm na pa pre mẽ amã kên pota ã hã kagà. Nom ixkapêr nyw kot paj axtem mẽ akrãm hagjê.

¹⁷Nê kot paj axte mẽ ate amnhĩ tomnuj mã ijamxpêr kêt nê. Anhỹr o mẽ pamã amnhĩ jarênh. Anê.

¹⁸Tã ra axte mẽ pahte amnhĩ tomnuj mã hamxpêr kêt ã kot amnhĩ jarênh jakamã mo kaxyw kot pu mẽ arĩ amnhĩ pãnhã kãm mẽmo mry hpar nê hkamrô runh o papa? Tã mẽ pahkwỳjaja na hte arĩ kãm ja ho anhỹr prãm o pa. E kwa mẽ axte ã amnhĩ nhĩpêx anhỹr kêt nê ixkwỳjaja.

Akupỹm mẽ pahte amnhĩ nhĩpêx tũm o paxujanãr kêt ã mẽ pamã karô

Matêwre 27.51; Rukre 23.45; Rômãn 5.1-2; Epes 3.12; Eprêw 4.14-16

¹⁹⁻²⁰E ixkrãmnhwỳjaja. Ra Jesus kot mẽ panê htyk o hkamrô pikapĩr jakamã na pu htem arĩ tee ri amnhĩ kukamã pajamxpêr hkêt nê. Tĩrtũm axte kot mẽ pahte amnhĩ tomnuj mã hamxpêr kêt jakamã na pu htem paxãmnhĩx amnhĩ to hwỳr o papa. Te paxãmnhĩx òrkwỹ kaàkre kamã hitom maati hwỳr

pagjêx nê kamã amnhĩ to hwÿrta pyræk. Jao ra mẽ papamjaja amnhĩ to hwÿr o papa nhũm patre axte mẽ pahto hwÿr kêt nê. Jejus na pre htyk o mẽ pamã hitom maati wÿr hakwakre kahêxà hã kupêxêja kôt ã ho axkjê. Jao mẽ paxàmnhĩx hwÿr mẽ pagjêx kaxyw mẽ pamã kahê xà mẽ.

²¹Tã ra kêp Tĩrtũm nhõ krĩ kamã mẽ pahto hwÿr xwÿnh maati na. Nê mex kumrêx o jar pika ja kamã patre kot mẽ ho hwÿr o pa xwÿnhhta jakrenh.

²²Jakamã e kwa kêr pu mẽ mãmri paxàmnhĩx amnhĩ to Tĩrtũm wÿr o papa. Ra Jejus kot mẽ panê htyk nhũm mẽ pahte amnhĩ kaxyw hkôt pajamexpêr rãhã ho papa jakamã kêr pu mẽ axte mẽ pahpê amnhĩ tomnuj xwÿnh ã amnhĩ jarênh kêt nê. Kêr pu mẽ nhÿrmã tanhmã pajamexpêr punuj to rÿ tanhmã amnhĩ tomnuj to hãmri nê tee ri ja hã amnhĩ pumu nê pahkaprĩ kamã amnhĩ to Tĩrtũm wÿr kurê kumrêx. Jejus ra kot mẽ pahte amnhĩ tomnuj pãnhã amnhĩrer par jakamã kot puj mẽ Tĩrtũm mã tanhmã mẽ pahte amnhĩ tomnuj to hã amnhĩ jarê nhũm mẽ pama nê axte kãm hamaxpêr kêt nê. Pu mẽ te paxwÿr nê pahte amnhĩ nê pagrã htyk kuhõnh par nê akupÿm pamex pyræk. Nê axte paxàmnhĩx amnhĩ to Tĩrtũm wÿr o papa.

²³Nê mẽ kot Kris ã tanhmã mẽ pahto htã kwa kêr pu mẽ tee ri amnhĩ kukamã pajamexpêr kêt nê. Rÿ pajamexpêr o: —Konên. Koja mẽ tanhmã hamaxpêr to nê Kris ã ixpĩ rÿ ko. Pa apu mẽ kot ixpĩr pymaj akupÿm ixte amnhĩ nhĩpêx tũm o awjanã nê akupÿm hkôt amnhĩ nhĩpêx japêr rÿ ko. Anê. Kwa pu mẽ tee ri ã pajamexpêr anhÿr hkêt nê. Pu kêt mẽ pajamexpêr o: —Nà mẽ kot Kris ã tanhmã ixto htã kot paj aa hkaga hkêt nê. Mẽ kot hã ixpĩr mã tã kot paj hkaga hkêt kumrêx. Anhÿr ã amnhĩ jarê.

²⁴Nê kêr ka mẽ akwÿjê mã anê kê mẽ mẽmoj to axpên kutã nojarêt rãhã ho ri axpên kôt pa. Jao tanhmã axpên to mex to o ri axpên kôt pa.

²⁵Na pre ra mẽ pahkwÿjaja tanhmã hamaxpêr to nê axte mẽ pahkôt pikuprõnh nê Tĩrtũm kapêr mar o hkrĩ hkêt nê. No kêr pu mẽ ho mẽ uræk kêt nê. Kêr pu mẽ arĩ xatã axpên wÿr akuprõ nê mẽ pahte tee ri amnhĩ kukamã pajamexpêr nê axpên mã pakapêr o papa. Kêt mẽ panhõ Pahihtija

ra akupÿn mẽ pahwÿr wrÿk kaxyw jakamã kwa kêr pu mẽ kutêp arÿ axpën mã pajamaxpër mex nhõr pê tãm axpën nhÿpêx mex rãhã ho i papa.

²⁶Mẽ pahkwÿjaja kot Tÿrtũm kapër mar mex tã na htem kuma nẽ ãm kuma. Kwa kêr ka mẽ ho mẽ uràk kêt nẽ. Kris kot mẽ panê htyk ã harênhja mẽ kot mar mex tã na htem kuma nẽ ãm kuma nẽ hkaga kumrêx. Jakamã mẽhõ koja Kris pyrã nẽ htyk o mẽ kot amnhÿ tomnuj pãnhã amnhÿre? Nà amrakati kumrêx. ãm Jejus pix na pre Tÿrtũm ja kaxyw ãm. Tapxipix na pre ã mẽ panê amnhÿ nhÿpêx anẽ. Tã nhũm mẽ kot hkagaja mÿrapê koja mẽ nhÿrmã mẽ tãmjaja mẽ kot amnhÿ tomnuj pãnhã amnhÿre.

²⁷Mẽ kot Tÿrtũm kutã amnhÿ xunhwÿr xwÿnh na mẽ. Amnepêm na pre Tÿrtũm mẽ kot kutã amnhÿ xunhwÿr xwÿnhjê kaxyw mẽ kot amnhÿ xà htÿx kamã hamak tũm xàta nhÿpêx. Tã ra mẽ kot Jejus kaga jakamã koja nhÿrmã ma hwÿr mẽ rênh pa nhũm mẽ tee ri kãm hwÿr pa hprãm kêt kaprÿ.

²⁸Amnepêm finat Mojesja kormã htÿr ri na pre hte mẽhõ pixi nẽ kapër kaga nẽ akupÿm kot amnhÿ nhÿpêx tũm o awjanã nẽ tanhmã amnhÿ tomnuj to nhũm hkwyjaja ja hã omu. Tanhmãn axkrut rÿ axkrunêpxi nẽ ja hã omu. Hãmri nẽ ma Mojes wÿr mra nẽ axpën kôt kãm tanhmã kot amnhÿ tomnuj to hã harẽ. Hãmri nhũm harênh ma nẽ mẽ kãm hã amÿnê nhũm tee ri kãm htÿr prãm kaprÿ. Mẽ kot akupÿm amnhÿ nhÿpêx tũm o ujanãr nẽ amnhÿ tomnuj o paja mÿrapê na prem mẽ kupa. ã na pre htem mẽ hipêx anhÿr o pa.

²⁹Nẽ koja mẽhõ tanhmã Tÿrtũm Kra Jejus o kapër punuj to. Tÿrtũm kapër ã kagã htũm kot ra mẽ kot kêp Tÿrtũm Kra hã harênh mar mex tã axtem nẽ tanhmã ho kapër punuj to ho pa. Kot mẽ panê htyk nẽ hkamrô pikapÿr kôt kot mẽ pahte amnhÿ tomnuj pãnhã amnhÿrer ã harênh mar tã kuma nẽ ãm kuma nẽ harênh o: —Nà mẽ pahpyrà nẽ kot amnhÿ tomnuj xwÿnh nhũm mẽ kot hã hpÿr kênã. Na pre mẽ panê htyk kêt nẽ. Anhÿr ã harẽ. Nẽ Tÿrtũm Karõja nhũm mããnên tanhmã ho kapër punuj to. Kêp mẽ pakutã nojarêt xwÿnh tã nhũm axtem nẽ tanhmã ho kapër punuj to. Mÿrapê koja nhÿrmã Tÿrtũm tanhmã homnuj tÿx to. Homnuj tÿx o mẽ kot Mojes kapër kaga nhũm

mýrapê kot mẽ hparta jakre. Jakamã kwa kêr ka mẽ ã amnhĩ nhĩpêx anhỹr hkêt nê.

³⁰Tĩrtũm kapêr ã kagà htũm kot ja jarênh kot: Ixpê Tĩrtũm kot paj mẽ kot amnhĩ tomnuj xwỳnhjê homnuj tỳx nê. Anê. Nê mẽ kot tãm amnhĩ nhĩpêx xwỳnhjê jarênh kot: Mẽ kot amnhĩ to mex o mẽ pa xwỳnhjaja kot paj nhỹrmã mẽ ho mex rax nê. No mẽ kot amnhĩ tomnuj o mẽ pa xwỳnhjaja kot paj nhỹrmã mẽ homnuj tỳx nê. Anê. Ra mẽ pahte ã kapêr anhỹr xwỳnhja kot amnhĩ nhĩpêx ã omunh mex.

³¹Jakamã kwa mẽ okora. Kêr ka mẽ amnhĩ to mex rãhã ho ri apa. Tĩrtũm rãhã ho rãhã nê hihtỳx o hihtỳx jakamã koja mẽmoj tã akamã gryk ka amex kêt o amex kêt.

³²Nê amnepê m mẽ ate Jejus kôt amnhĩ xunhwỳr krax kãm na prem Jejus ã mẽ atomnuj tỳx tã ka prem mẽ umaj hkaga hkêt nê. Tã kêr ka mẽ arĩ ã amnhĩ nhĩpêx anhỹrja kukamã mãn ajamaxpêr nê hã anohtỳx rãhã ho apa. Jao arĩ ã amnhĩ nhĩpêx anê nê mẽ umaj Jejus kaga hkêt nê.

³³Na prem mẽ piitã mẽ noo mã tanhmã mẽ amã kapêr punuj to nê tanhmã mẽ anhĩpêx to. Nê tũhã tanhmã mẽ akwỳjê homnuj tỳx to ka mẽ tee ri ja hã mẽ omu nê mẽ kamã axukapĩ nê. Nê mẽ hkôt axkamẽ nhũm prem mã mẽ ato anê nê.

³⁴Na prem mẽ akwỳjê jagjê ka prem ja hã mẽ omu nê ma mẽ haghênh xà hã ixkre hwỳr mẽ hwỳr mra nê tanhmã mẽ ho mex to. Nhũm prem mẽ apê mẽ akukrêx kwỳptà nê ma amnhĩm o pa ka mẽ ãm amnhĩ tã mẽ omu nê ajamaxpêr o: —Kwãr mẽ mãmri ma amnhĩm hamỳn o pa. Koja nhỹrmã Tĩrtũm inhmã ixkukrêx mex o kot ja jakrenhta kwỳ nhõr rax nê pa amnhĩm hamỳ nhũm aa ixpê hapêx kêt nê. Hãmri nhũm axte mẽhõ aa ixpê utàr kêt nê. Jar mẽ ixkukrêxta mex ti hã. Anê. Jao mẽ kot mẽ apê utàr tã ka mẽ akapĩ nã apa hkêt nê. ã amnhĩ kukamã ajamaxpêr anhỹr pê akĩnh nê apa. ãm hãmri na ka prem ã amnhĩ kukamã ajamaxpêr anê.

³⁵Na ka prem mẽ kutã amnhĩ to htỳx kãm ã apa anẽ. Tã kwa kêr ka mẽ arĩ ã amnhĩ nhĩpêx anhỹr o ri apa. Kêr kê nhỹrmã Tĩrtũm ja hã mẽ ato mex rax nẽ.

³⁶Nẽ kêr ka mẽ arĩ amnhĩ kaxyw Tĩrtũm mã ajamaxpêr rãhã ho ri apa. Mẽ kot Jejus ã tanhmã mẽ ato htã ka mẽ hkaga hkêt nẽ. Kot kaj mẽ ã amnhĩ nhĩpêx anhỹr o apa nhũm Tĩrtũm ja hã mẽ apumu nhũm ja kãm mex nẽ. Hãmri nhũm ra kot amnhĩ jarẽnh xà hkôt nhỹrmã amã mẽmoj mex nhõr rax nẽ. Jakamã kwa mẽ kot tanhmã mẽ anhĩpêx to hã amnhĩ pumu nẽ tee ri amnhĩ kukamã ajamaxpêr o ri akapri hkêt nẽ. Kot kaj mẽ Kris ã apunuj rãhã apa hkêt nẽ.

³⁷Tĩrtũm kapêr ã kagà htũm kot Jejus jarẽnh kot: Koja mẽ pahwỳr wrỳk mã xwỳnhhta tokyx wrỳ. Na ra wrỳk kaxyw nojarêt. Anẽ.

³⁸Nẽ harẽnh kot: Ixkôt mẽ kot amnhĩ nhĩpêx mex o mẽ pa xwỳnhjaja koja mẽ amnhĩ kaxyw ixkôt hamaxpêr tỳx rãhã nẽ. Jao nhỹrmã ixri htĩr tũm nẽ mex rãhã nẽ pa ho pa. Nẽ koja mẽhõ ixkaga pa tee ri kãm ixkĩnh kêt ã omu. Anẽ.

³⁹No mẽ papajaja te mẽ pahte mẽ kot Jejus kaga nhũm kot amnhĩ tã mẽ homnuj mã xwỳnhjê pyræk kêt. Arĩ mẽ pahte amnhĩ kaxyw hkôt pajamaxpêr rãhã jakamã koja nhỹrmã amnhĩ wỳr mẽ pahto api.

Eprêw 11

Amnhĩ kaxyw Tĩrtũm kôt mẽ hamaxpêr mex xwỳnhjê jarẽnh

Sikũn Pêtre 3.5-7

¹Nẽ na htem Kris ã mẽ panhĩpêx kati ho pa pu mẽ pahpunuj rãhã nẽ ri papa. Te Kris kot mẽ pahto mex kêt pyræk pu htem mẽmoj punuj pix kãm ri papa nẽ kormã Tĩrtũm kot mẽ pahto mex ã amnhĩ tã omunh kêt nẽ. Tã ã mẽ pahte anhỹr tã kwa kêr pu mẽ arĩ kapêr kôt amnhĩ nhĩpêx rãhã ho papa. Mẽ pahte pano ho Tĩrtũm pumunh kêt tã kot mẽ pahkôt pa ho pa hã amnhĩ kaxyw kãm pajamaxpêr tỳx rãhã ho papa. Jakamã na pu htem ãm kapêr kôt pix mã amnhĩ nhĩpêx o papa.

²Amnepê mã mẽ pakukamã mẽ panhîgêjtaja na prem no ho Tĩrtũm pumunh kêt tã amnhĩ kaxyw kãm hamaxpêr nê kapêr kôt amnhĩ nhĩpêx o pa nhũm amnhĩ tã mẽ omu nhũm ja kãm mex nê.

³Nê mẽ papajaja na pu htem pajaxwỳja mẽ pano ho omunh kêt tã amnhĩm harênh o: —Nà amnepêkormã mẽmoj piitã amrakati ri nhũm Tĩrtũm ãm kapêr pix o mẽmoj piitã ho kato. Ixte inhno ho ja hã omunh kêt tã kot ã amnhĩ nhĩpêx anhỹr ã amnhĩ jarênhja jakamã kot paj hkôt ijamaxpêr tỳx rãhã ho ri ixpa. Anê.

⁴Na pre finat Atãw nhĩpêx nê kaxyw hprõ Ewa nhĩpêx. Hãmri nhũm wa hkra Apewja htõ Kaĩ rom amnhĩ kaxyw Tĩrtũm kôt hamaxpêr tỳx o pa. Jakamã nhũm wa Tĩrtũm mã mẽmoj gõ. Nhũm Apew kot Kaĩ rom Tĩrtũm kãm hprãm xà hkôt kãm mẽmoj nhõr jakamã nhũm amnhĩ tã omu nê kot amnhĩ to mex xwỳnh ã harê nê kot kãm õr xwỳnhhta nhũm mex ã harê. Tã Apew amnepêk htyk tã pu htem arĩ harênh mar rãhã ho papa nê kãm pajamaxpêr o: —Apew na pre hte amnhĩ kaxyw Tĩrtũm kôt hamaxpêr tỳx rãhã ho pa. Anhỹr ã kãm pajamaxpêr.

⁵Nê Atãw kanrêhã htãmnhwỳ Enokja na pre haxwỳja amnhĩ kaxyw Tĩrtũm mã hamaxpêr tỳx o pa. Jao hkamnàr rom kãm hprãm xà hkôt pix mã tanhmã kãm amnhĩ nhĩpêx to ho pa nhũm amnhĩ tã omu nê amnhĩm mex ã harê. Jakamã na pre htyk kêt nê. Na pre Tĩrtũm htĩr rãhã ma amnhĩ wỳr ho api nhũm hkwỳjaja tee ri hapêr o pa. Jakamã na pu htem arĩ axpên mã Enok kot amnhĩ kaxyw Tĩrtũm kôt hamaxpêr mex o pa hã harênh o papa.

⁶Mẽ kot amnhĩ kaxyw Tĩrtũm mã mẽ hamaxpêr kêt xwỳnhjaja na hte Tĩrtũm mẽ mex ã mẽ harênh kêt nê. Tã mẽ papajaja kêr pu mẽ Enok pyrà nê amnhĩ kaxyw kãm pajamaxpêr tỳx rãhã ho papa. Nê pajamaxpêr o: —Tĩrtũmja htĩr rãhã ho rãhã. Kojã nhỹrmã mẽ ixte amnhĩ kaxyw hkôt ijamaxpêr xwỳnhjê ho mex rax nê. Nà kojã mẽ ixto anê. Anhỹr o mẽ pajamaxpêr nhũm Tĩrtũm amnhĩ tã mẽ pajamaxpêr ã mẽ pahpumu nê mẽ pahte amnhĩ to mex ã mẽ pajarê. No mẽ kot amnhĩ kaxyw kãm hamaxpêr kêt xwỳnhjaja na hte ã mẽ harênh anhỹr kêt nê.

⁷Ně Enok kanrēhã htàmnhwỳ Noehtija na pre haxwỳja amnhĩ kaxyw Tĩrtũm mã hamaxpěr tỳx o pa. Jao hkamnàr rom amnhĩm pàr raxja nhĩpêx. Na pre ra Tĩrtũm na rax kukamã tanhmã kãm ujarēnh to. Kormã aa na wrỳk nhũm Noehiti kot omunh kêt tã Tĩrtũm kapěr ma nẽ mar xà hkôt amnhĩm pàr rax kumrēxta nhĩpêx. Ōrkwỹ kamã hkwỳjê mẽ mẽ amnhĩm hipêx. No mẽ kot Tĩrtũm kapěr mar nẽ ãm mar xwỳnhjaja na pre Tĩrtũm gô tàm o mẽ hanhi nẽ mẽ himex pa. Nom Noehtija nhũm kot amnhĩ to mex xwỳnh ã harẽ. Kot amnhĩ kaxyw hkôt hamaxpěr rãhã ho pa jakamã nhũm pre ã mex ã harēnh anẽ.

⁸Ně Noehiti kanrēhã htàmnhwỳ Apraãwja na pre haxwỳja amnhĩ kaxyw Tĩrtũm mã hamaxpěr tỳx o pa. Na pre Tĩrtũm kot kãm pika nhõr ã kãm amnhĩ jarẽ nẽ ra kot ma hwỳr mēnh kaxyw. Hãmri nhũm Apraãw kuma nẽ hkamnàr rom õ pika kaga nẽ ma pika hõja wỳr pa. Aa kot ma hwỳr mõr nẽ omunh kêt tã Tĩrtũm kapěr mar xà hkôt õ pika kaga nẽ ma hwỳr pa ho pa.

⁹Hãmri nẽ hwỳr pøj nẽ omu nhũm Tĩrtũm kãm: —E pika ja kot paj nhỹrmã akanrēhã akra nẽ atàmnhwỳjê mã kugõ. Anẽ. Hãmri nhũm kuma nẽ pikaja kamã pa ho pa. Ra kamã axtem mẽ uro hkwỳjaja ri pa nhũm Tĩrtũm kormã mẽ kator kêt ri nhũm mẽ õ pika hwỳr pøj nẽ mẽ kamã pa ho pa. Nom amnhĩm ōrkwỹ mex nhĩpêx kêt nẽ. Kormã kệp õ pika kumrēx kêt ã hkamnhĩx jakamã ãm mry kà o ixkre nhĩpêx nẽ kamã pa ho pa. Nẽ nhỹhỹm pa kaxyw nẽ kugrà nẽ ma amnhĩ kôt o pa. Amnhĩ kaxyw Tĩrtũm mã hamaxpěr rãhã jakamã ã amnhĩ nhĩpêx anhỹr o pa. Nẽ Apraãw kra Ijak nẽ htàmnhwỳ Jakoja wa Apraãw pyrà nẽ mry kà ho ōrkwỹ nẽ ma amnhĩ kôt o pa. Nhũm Tĩrtũm kot Apraãw mã kapěr pyrà nẽ wa kãm wa hkanrēhã wa hkra nẽ wa htàmnhwỳjê mã pika nhõr ã amnhĩ kukamã wa kãm amnhĩ jarẽ.

¹⁰Jakamã nhũm Apraãw kormã Tĩrtũm nhõ krĩ hwỳr àpir xa hã amnhĩ tã hamãr pẽ kot ho õ pika mã xwỳnhjê kamã pa ho pa. Kaxkwa hwỳr àpir mã xwỳnhhta mex kumrēx. Tĩrtũm kot hipêx jakamã koja mry kà ho ixkre nhĩpêxta rom aa hapêx kêt nẽ. Jakamã nhũm Apraãw mẽ pahpyrà nẽ ma kot hwỳr àpir xa hã amnhĩ tã Tĩrtũm jamãr rãhã ho pa.

11-12Tã ra hpigêt tỳx nẽ hkurẽ hkêt nẽ pa. Te ra ri htyk kaxyw pa pyræk. Nhũm hprõ Sara haxwỳja hpigêx tỳx nẽ. Kamrô hkêt ã amgrà xohtô rax kumrêx. Nhũm wa aa hkra hkêt nẽ pa htã nhũm Tĩrtũm nhỹrmã wa hkra hã wa kãm awjarẽ nhũm wa kuma nẽ amnhĩ kaxyw hkôt hamaxpêr kurê kumrêx. Nom amnhĩ tã kuma nẽ tee ri amnhĩ kukamã hamaxpêr hkêt nẽ. Na pre wa kuma nẽ axpên mã: —Nà kot puj xep hãmri tã pahkra. Tĩrtũm kot hã ã pajarênh anhỹr kênã. Anẽ. Tã ã wa kot hkra kaxyw Tĩrtũm mã hamaxpêr anhỹr jakamã na pre Apraãwja hprõ htũ. Ra wa hamẽ hpigêt tỳx kumrêx tã nhũm htũ. Nhũm wa hkra Ijakja gaa nẽ wa kãm kato. Jakamã nhũm wa gaa nẽ rĩ wa hkanrêhã wa htãmnhwỳ xohtô rax o ohtô rax. Ohtô ho kaxkwa kamã kanhêti xohtô jakre. Nẽ ohtô ho gô xujanãr mỳri pikahti grà hkryre jakre. Jakamã nhũm mẽ tee ri mẽ ho kôta hpar mã. Nhũm Apraãw kêp mẽ hpàr krax.

13Tã nhũm Apraãw nẽ Ijak nẽ Jakoja mẽ ri pa tãmtã nẽ htyk pa nẽ hapêx. Tĩrtũm kormã kot mẽ kãm pika jarênhhta nhõr xwỳj ri ra htyk pa. Nom kormã mẽ htĩr ri tanhmã kãm hamaxpêr to nẽ hamaxpêr o: —Nà kormã Tĩrtũm kot mẽ inhmã pika jarênhja nhõr kêt tã koja nhỹrmã inhmỳr pẽ ixkanrêhã ixkra nẽ ixtãmnhwỳjê mã kugõ. Nà koja mẽ kãm kugõ. Ra kot hã inhmã amnhĩ jarênh kênã kot kêt mẽ kãm õr kêt. Anhỹr o kaxyw kãm hamaxpêr rãhã ho pa. Jao hkĩnh nẽ hamaxpêr o: —Nà inhõ krĩja axtem na. Na pa hte jar pika ja kamã ri mẽ hkôt ri ixpa. Te ixpê mẽ uro pyrã nẽ ri mẽ hkôt ixpa nom jar inhõ krĩ hkêt. Inhõ krĩ na kêt axte mã. Anẽ.

14-15Na prem ã õ krĩ hõ hkukamã hamaxpêr anhỹr o pa. No õ krĩ htũmta mẽ kot hkaga nẽ pika hõ hwỳr mõr xwỳnhhta na prem ã harênh anhỹr kêt nẽ. Kop apu mẽ kot amnhĩm tãm mãn jarênh ronhỹx prem awjanã nẽ ma akupỹm hwỳr pa. Na prem axtem krĩ hõ jarẽ nẽ kormã hwỳr mõr kêt ã amnhĩ jarênh o pa.

16Tã nhỹ krĩ na prem ã harênh anẽ? Nà kaxkwa kamã Tĩrtũm nhõ krĩja. Tãm na mex kumrêx jakamã nhũm prem kormã hwỳr ma àpir xa hã mẽ pahpyrà nẽ amnhĩ tã Tĩrtũm jamãr rãhã ho pa nhũm amnhĩ tã mẽ omu nẽ hkĩnh nẽ.

Ně mẽ kot tãm amnhĩ nhĩpêx ã mẽ omu ně mẽ kêp hkra hã mẽ harênh ã hpijaàm kêt ně. Hãmri ně mẽ kutêp tanhmã õ krĩ ho mex to ho pa.

17-18Na pre ra tanhmã Apraãw mã hkra Ijakja jarênh to ně kãm: —Akra Ijak kanrêhã hkra ně htàmnhwỳjaja koja mẽ kêp ixkra. Aně. Tã ra kot amnhĩ tã Apraãw kamã hamak kaxyw hkukamã hamaxpêr ně hamaxpêr o: —Xà we Apraãw kãm ixkĩnh tỳx kumrêx ně kãm ixkôt amnhĩ nhĩpêx rãhã ho pa hprãm nà? Xà we kãm ixkĩnh tỳx o hkrata jakrenh? E pa kop we ja hã amnhĩ tã kamã ama ně omu mãn. Aně. Hãmri ně kot hkra hpĩr ně kãm õr ã kãm karõ. Hãmri nhũm kuma ně ra kot kãm hpĩr kaxyw. Kot Tĩrtũm kot amnhĩ nhĩpêx ã omunh mex jakamã hkamnàr rom kot kãm hpĩr kaxyw.

19Ně hamaxpêr o: —Nà Tĩrtũm akupỹm kot mẽ ho htĩr xwỳnh kênã. Anhỹr jakamã kãm hkra hpĩr pyma hkêt ně ra kot kãm hpĩr mã tã nhũm Tĩrtũm amnhĩ tã omu ně nê kãm kapêr nhũm kuma ně hpĩr kêt ně wa ma akupỹm õrkwỹ hwỳr mõ. Tã ã kot hkra nhĩpêx anhỹr jakamã Apraãw mã te Ijak htyk ně akupỹm htĩr pyræk.

20Ně Ijakja na pre haxwỳja amnhĩ kaxyw Tĩrtũm mã hamaxpêr tỳx o pa. Jao hkamnàr rom amnhĩ kra wa kãm Tĩrtũm kot wa ho mex kukamã wa kãm harê. Kra Jako mẽ Ejauta wa kãm harê ně wa kãm: —E koja nhỹrmã Tĩrtũm inhmỳr pê war ato mex rãhã ho pa. Aně.

21Ně Jakoja na pre haxwỳja amnhĩ kaxyw Tĩrtũm mã hamaxpêr tỳx o pa. Jao hkamnàr rom hkra Juje mã Tĩrtũm kot mẽ ho mex kukamã harê. Na pre Jakoja hkra ně htàmnhwỳ mẽ hpimràatã hprãm xàj ma Ejit wỳr pa ně kamã pa ho pa. Tã nhũm Jako hpigêt tỳx ně ra htyk kaxyw. Hãmri ně hkra Juje mẽ hkra wa mẽ kãm kapêr ně mẽ kãm: —E na pa tee amnhĩ kamã ama. Na pa ra ixyk kaxyw. Nom koja Tĩrtũm nhỹrmã inhmỳr pê mẽ ato mex rax ně. Aně. Hãmri ně amnhĩ kaxpar xà hã pĩ hã amnhĩ kaxpa ně kànhmã xa ně Tĩrtũm mã mex o mex ã harê. Hãmri ně akupỹm nõi xà kamã nõn ty.

22Ně Jujeja na pre haxwỳja amnhĩ kaxyw Tĩrtũm mã hamaxpêr tỳx o pa. Jao htyk kaxyw ně hkamnàr rom hkwỳjê mã tanhmã amnhĩ jarênh to. Ra hpigêt ně htyk kaxyw ně hkwỳjê mã tanhmã amnhĩ tã karõ hto ně mẽ kãm: —E na

pa ra ixtyk kaxyw. Tã koja Tĩrtũm inhmȳr pē nhȳrmã Ejit rũm mẽ akator nē ma akupȳm mẽ panhõ pika hwȳr mẽ ato pa. Ra kot mẽ panhĩgēt Apraãw mã amnhĩ jarēnh xà hkõt. Jakamã kwa mẽ inhma. Kêr ka mẽ akupȳm anojarēt nē ma amnhĩ kõt ixtã kasãwja mȳ nē amnhĩ kõt ixto mō. Hãmri nē mũtar mẽ panhõ pika kamã mẽ anhõ krĩ htã ijaxà pa jawȳ mẽ akuri ixtã pyka. Anē.

²³Nē Mojes katorxà mẽ hipêêxàja na pre wa haxwȳja jajê pyrà nē amnhĩ kaxyw Tĩrtũm mã hamaxpēr tȳx o pa. Juje hkanrēhã htàmnhwȳ na pre wa. Jakamã nhũm Ejit nhõ pahija tee ri Ijaew xohtô rax kumrēx ã mẽ omu nhũm ja kēp omnuj nē. Hãmri nhũm mẽ hkra myjaja mẽ hapôx kõt mẽ hamȳnh xwȳnhjaja kot mẽ hpar ã mẽ kãm karõ. Tã nhũm Mojes kato nhũm hipêêxà mẽ katorxàja wa omu nhũm muxre nhũm wa tee ri hkukamã hamaxpēr. Hãmri nē pahi Paraohti mã mẽ hkra jamȳnh xwȳnh kot wa kēp hpĩr pymaj ho pimxur o hã mytwrȳ axkrunēpxi. Tĩrtũm kamnàr rom wa amnhĩ tã kãm uma hkēt nē ã kēp hkra ho hpimxur anē.

²⁴Nē Mojes na pre haxwȳja amnhĩ kaxyw Tĩrtũm mã hamaxpēr tȳx o pa. Kormã karàre ri na pre Paraohti hkra nija omu nē amnhĩm kumȳ nē ho hkra nē amnhĩ kõt o pa. Rãhã nhũm àptàr nhũm Ejit nhõ xwȳnhjaja kēp pahi Paraohti htàmnhwȳ hã axpēn mã harē. Hãmri nhũm tee ri amnhĩ tã mẽ kuma nē amnhĩ tã mẽ kãm aprã nē mẽ kãm: —Kwa mẽ ã ijarēnh anhȳr kēt nē. Ixpê mẽ akwȳ hkēt. Anē.

²⁵ãm kãm Tĩrtũm kwȳjê kõt pix mã ri pa ho pa hprãm. Nē kãm Ejit nhõ pahi hkõt amnhĩ tomnuj prãm kēt nē. ãm mẽ kot amnhĩ tomnuj pix o paja na mẽ kãm hprãm nhũm ja hã mẽ omu nē tee ri mẽ hkukamã hamaxpēr nē hamaxpēr o: —Nà kot paj mẽ hkõt ri ixpa hkēt kumrēx. Mē hkĩnh nē pa htã koja mẽ gaa nē ty nhũm mẽ hkĩnhja mẽ kēp hapêx. Nà kot paj Tĩrtũm kwȳjê hkõt mãn ri ixpa ho ixpa. Mē kot Tĩrtũm ã mẽ inhĩpêx kati htã pa arĩ mẽ hkõt ixpa ho ixpa.

²⁶Inhmã Ejit nhõ xwȳnhjê hkõt ixkukrēx rax nē ri ixpa hprãm kēt. Kwãr mẽ mãmri Tĩrtũm ã tanhmã inhĩpêx to. Koja mẽ ã inhĩpêx anē pa ixpunuj nē ri

ixpa htã koja Tĩrtũm nhĩrmã ixto mex rax nẽ. Nà kot paj Ejit nhõ pahihtĩ hkõt ri ixpa hkõt nẽ. Anhĩr jao ra mẽ pahpyrà nẽ Kris gryk ã mẽ hkaga.

27Tã akupỹm mẽõ pika hwỳr Ijaewjê ho mõi kaxyw nhũm Ejit nhõ pahihtija tee ri ja hã omu nẽ kamã gryk tỳx nẽ. No nhũm Mojesja amnhĩ kaxyw Tĩrtũm kõt hamaxpěr tỳx o hkamnàr rom kãm mẽ uma hkõt nẽ. Nẽ mẽ kệp hkwyjê kator pa nẽ ma akupỹm mẽõ pika hwỳr amnhĩ kõt mẽ o pa. Tĩrtũm kamnàr rom ã mẽ kệp mẽ ho kator anẽ. Aa kot no ho omunh kêt tã amnhĩ kaxyw kãm hamaxpěr tỳx nẽ hkamnàr rom mẽ kator nẽ hamakêtkati nẽ mẽ o pa.

28Nẽ hkamnàr rom mẽ hkĩnh ã arĩgro mẽ kot kãm “Pas” anhĩr xwỳnhta ho hkra. Kormã Ejit rũm kator kêt ri. Nẽ kaxyw amnhĩ kwỳjê mã hã karõ nẽ mẽ kãm: —E pa mẽ amã Tĩrtũm kapěr jarẽ ka mẽ inhma. Nà kot puj xep mẽ jarãhã ôwêhti hkwy pa nẽ hkamrô ru. Nẽ hkamrô ho panhõrkwỹ jakwakre hã pĩ kukõ. Hãmri nẽ ĩ kuxõt nẽ kuku. Koja kamàt nhũm mẽ kot amnhĩ tomnuj xwỳnhjê pẽ mẽ hkra my kot wa piitã mẽ hpar mã xwỳnhja mõi. Hãmri nẽ mẽ pamỳ ri mõi nẽ ã mẽ pahte mẽ panhõrkwỹ nhĩpêx anhĩrja ã omu nẽ tanhmã mẽ pahkrajê ho hkõt nẽ. Tĩrtũmja ã mẽ pahte amnhĩ nhĩpêx anhĩr kaxyw ã inhmã karõ anẽ. Jakamã e pu mẽ hkamnàr rom ã amnhĩ nhĩpêx anẽ kê mẽ pahkrajaja mẽ pahpê htyk kêt nẽ. Anẽ. Hãmri nẽ ã mẽ kot Ejit rũm kator xà hã arĩgrota ã mẽ hkĩnh o kator kra. Mẽ hkĩnhja na htem kãm “Pas” anẽ.

29Nẽ Ijaewjaja na prem haxwỳja Ejit rũm kormã Mojes kõt mẽ pa ri uràk nẽ amnhĩ kaxyw Tĩrtũm mã hamaxpěr. Jakamã na prem ra gõi xujanàr pẽ “Gõi Kamrêk” anhĩr xwỳnhja mỳ ri kuhê nhũm Tĩrtũm mẽ kãm ho axkjê. Nẽ mẽ kãm hkõt ã ho amgrà nhũm mẽ hã hkamnàr rom mex nẽ rêt pa. No nhũm mẽ hkõt mẽ kot mẽ himex kaxyw mẽ mrar xwỳnhjaja. Ejit nhõ põiристijaja nhũm gõi akupỹm mẽ hã axkamur nẽ mẽ himex pa.

30-31Nẽ Ijaew kot Mojes mỳr pẽ Jojue hkõt pa ri mẽ uràk nẽ amnhĩ kaxyw Tĩrtũm kõt hamaxpěr o pa. Na prem ra Tĩrtũm kot mẽ kãm pika nhõr xwỳnhta wỳr põi nhũm Tĩrtũm krĩ pẽ Jeriko hwỳr mẽ kurẽ. Mẽ kot kamã mẽ pa xwỳnh pẽ utàr kaxyw mẽ hwỳr mẽ kurẽ. Mẽõ krĩ pu hã kahêja kẽn

tỳx pix o na pre. Nē hprêk rax kumrêx. Nē krī nhõ xwỳnhjaja kãm Tĩrtũm kapêr mar prãm kêt. Hãmri nhũm Tĩrtũm mẽ hã Ijaewjê mã amỳnê nē mẽ kãm: —E mẽõ krĩa kot paj mẽ amã kugõ nom kêt ka mẽ inhmar kumrêx. Kêt ka mẽ apkati mẽ mẽ õ krĩ hwỳr mra nē kupu hpỳnh o atã apkati kêp 7 nē rĩ ma akupỳm mra. Anê. Hãmri nhũm mẽ kuma nē mar xà hkôt ma Jeriko hwỳr mra. Hãmri nē hwỳr pøj nē Tĩrtũm kamnàr rom krĩ puhã kahêja kupu hpỳnh o hã apkati kêp 7. Hãmri nhũm apkati pê 7ta ã nhũm kên tỳx o kahêja mẽ kêp amnhĩ krakrak nē rôrôk pa. Nhũm mẽ mra nē hkôt krĩ hwỳr agjê nē krĩ nhõ xwỳnhjê nhĩmex pa. Nom krĩ kamã kuprỳ pê Raapja Ijaew pyrã nē amnhĩ kaxyw Tĩrtũm mã hamaxpêr o pa jakamã nhũm mẽ kormã mẽ himex kaxyw mẽ hwỳr mõi kêt ri amnhĩ kukamã mẽ hkwỳjaja kot mẽ hã ukapi ho pa kaxyw mẽ hwỳr mẽ kurê. Hãmri nhũm Raapja mẽ kêp amnhĩ pyrã nē Tĩrtũm kôt hamaxpêr ã mẽ omu nē hkwỳ kot mẽ himex pymaj amnhĩ nhõrkwỹ kamã mẽ kêp mẽ ho amũxu nhũm mẽ hkà hkĩnh pê ma akupỳm hkwỳjê wỳr mõi. Jakamã nhũm mẽ kot mẽ himex kaxyw mẽ hwỳr mra hãmri nē amnhĩ pyrã nē tanhmã Raap mẽ õ fãmii ho hkêt nhũm mẽ arĩ htĩr nē pa. Mẽ urak nē amnhĩ kaxyw Tĩrtũm kôt hamaxpêr o pa hã omunh xà hkôt tanhmã mẽ ho hkêt nē.

³²ã na pre mẽ kot amnhĩ kaxyw Tĩrtũm kôt mẽ hamaxpêr xwỳnhjaja Tĩrtũm kamnàr rom amnhĩ nhĩpêx anhỳr o pa. Nom jajê pixjaja na prem ã amnhĩ nhĩpêx anhỳr hkêt nē. Mãănêñ Giteãw nē Parak nē Sãsõ nē Jepte nē Tawi nē Sãmuew nē Tĩrtũm nhỹ hã mẽ kapêr o pa xwỳnhjaja. Jajê piitã na prem wamtajê pyrã nē amnhĩ kaxyw Tĩrtũm kôt hamaxpêr tỳx rãhã ho pa. Nom kot paj ixprĩ hã tanhmã mẽ kot hkamnàr rom amnhĩ nhĩpêx to hã mẽ harênh kêt nē. Kot pa anê nē tokyx harênh par kêt nē. Mẽ ohtô rax kumrêx jakamã na pa ãm hkwỳ pix jarê nē hã kagà.

³³Na prem hkwỳjaja Tĩrtũm kamnàr rom ma mẽ kot amnhĩ tomnuj xwỳnhjê nhõ krĩ hwỳr mra nē mẽ kêp mẽ õ pika pytã. Nē mẽ hkwỳjaja Tĩrtũm kamnàr rom mẽ ho amnhĩptàr mex o pa. Nhũm prem kãm Tĩrtũm kurê xwỳnhjaja mẽ hkwỳjê pynê nē ahkrehti kamã mry xoprê hkwỳ nhĩpy mẽ kurê. Nhũm prem amnhĩ tã mẽ omu nē amnhĩ kaxyw Tĩrtũm mã hamaxpêr kurê kumrêx

nhũm amnhĩ tã mẽ omu mẽ nê te mry jakwa ho pikamỳr tỳx pyràk o mẽ hipêx nhũm ãm mẽ omunh o kuhê nê tanhmã mẽ ho hkêt nê. ã na prem Tĩrtũm kamnàr rom amnhĩ nhĩpêx anhỹr o pa.

³⁴Nhũm mẽ kot kuwy rax kãm mẽ hkwỳjê rēnh tã nhũm mẽ kot amnhĩ kaxyw Tĩrtũm mã hamaxpēr tỳx nhũm amnhĩ tã mẽ omu nê mẽ nê tanhmã kuwy ho nhũm mẽ hxêt kêt nê. Nhũm pre mẽ hkwỳjaja wapo ho mẽ hkamnhwỳr o mẽ hkwỳjê hpar kaxyw nhũm mẽ amnhĩ kaxyw Tĩrtũm mã hamaxpēr nhũm amnhĩ tã mẽ omu nê mẽ nê tanhmã mẽ ho nhũm mẽ amnhĩ rē nê mẽ umaj hprõt nê ma mra. Mẽ hihtỳx kêt tã Tĩrtũm kamnàr rom ỹ hã hihtỳx nê mẽ kãm mẽ hkurê xwỳnhjê ho krihkrit pa nhũm mẽ ma akupỹm hapêx.

³⁵Nê mẽni hkwỳjaja na prem haxwỳja amnhĩ kaxyw Tĩrtũm mã hamaxpēr tỳx o pa. Jao mẽ hkrajaja mẽ kēp htyk tã nhũm prem Tĩrtũm kamnàr rom mẽ ho kuwỳ nhũm mẽ kuma nê akupỹm mẽ kãm mẽ ho htĩr. ã na prem amnhĩ kaxyw Tĩrtũm mã hamaxpēr pē mex nê pa anē. No na pre mẽ hkwỳjaja mẽ uràk nê amnhĩ kaxyw kãm hamaxpēr tỳx tã nhũm Tĩrtũm tokyx mẽ ho mex kêt nê. Na pre mẽ kãm mẽ hkurê xwỳnhjaja Tĩrtũm ã mẽ par kaxyw. Nê mẽ hkwỳjaja Tĩrtũm ã mẽ hipêx kati ho pa nhũm mẽ amnhĩ xà htỳx kãm hamak kãm ty. Nhũm mẽ himex kaxyw nê mẽ kãm: —Kwa mẽ Tĩrtũm kaga. Kot kaj mẽ hkaga pa mẽ amã inhũre nê mẽ anhĩmex kêt nê. Anē. No nhũm mẽ kuma nê ãm mẽ kuma nê amnhĩ kaxyw kãm hamaxpēr tỳx pē mẽ kãm: —Nà mẽ kam nê māmĩrĩ ixpĩ. Inhmã ixtyk pyma hkêt. Kot paj ty nhũm Tĩrtũm akupỹm ixto ixtĩr pa kuri inhmex kumrēx nê ri ixtĩr tũm nê ixpa ho ixpa. Anhỹr o mẽ kãm amnhĩ jarēnh jakamã hãmri Tĩrtũm kaga hkêt rãhã nhũm mẽ himex.

³⁶Nê mẽ kãm mẽ hkurê xwỳnhjaja na prem Kris ã mẽ hkwỳjê mã hpēr o pikēnh pē mẽ hta xà ho mẽ hta rũnh o pa. Nê kàx o mẽ hkwỳjê hpa hpre nê mẽ hte hpre nhũm mẽ kēp prēs nê hkrĩ ho hkrĩ.

³⁷⁻³⁸Nhũm prem kēn rũnh o mẽ hkwỳjê hta o mẽ kupa. Nê mẽ hayr o mẽ hkwỳjê pa. Nê mẽ hkamnhwỳr o mẽ hkwỳjê pa. ã na prem Kris kôt mẽ

hamaxpêr ã mẽ omunh xà hkôt mẽ hipêx anhÿr o pa. Jakamã na pre mẽ hkwÿjaja mẽ umaj mẽõ krĩ rÿm hapôj nê ma hprôt nê mra. Nê te mẽ õ krĩ hkêt pyrà nê kapôt ã kêp amrakati nê ri pa. Mẽ ê hkêt nê ôwêhti hkà ho ê nê ri hã pa. Nê motre kà ho amnhĩ pre nê ri hã pa. Nê kên prêk ã api nê kre kamã hpimxur o pa. Nê pika hkre kamã hpimxur o pa. Nhũm mẽ kãm mẽ hkurê xwÿnhjaja te mẽ kêp ahpunu nê mẽ kêp ahkro pyràk o mẽ hipêx nê axpên mã mẽ harênh o: —Nà mẽ mexti hã. Kwa pu mẽ piitã mẽ himex paa ri. Anhÿr o mẽ harênh tã nhũm Tĩrtũm mẽ uràk nê ã mẽ harênh anhÿr kêt nê. Na pre mẽ mex kumrêx ã mẽ harê. Nê nhÿrmã kuri mẽ mex nê pa ho pa hkukamã mẽ harê.

³⁹ã na prem Tĩrtũm kamnàr rom mẽ kãm mẽ hkurê xwÿnhjê kutã amnhĩ to htÿx kãm htyk o pa anê. Nhũm Tĩrtũm ja hã mẽ omu nê hkĩnh nê kãm mẽ hapê htÿx nê. No nhũm mẽ kormã htĩr ri amnhĩm Tĩrtũm kot mẽ ho mex xà jamÿnh kêt rãhã ty.

⁴⁰Tã mo na pre Tĩrtũm kormã mẽ htĩr ri hkwÿjê pyrà nê mẽ ho mex kêt nê? Nà na pre kormã mẽ hkukamã hamaxpêr o: —Nà kot paj kormã mẽ ho mex kêt nê. Kot pa mẽ mÿr pê mẽ kot ixkôt amnhĩ xunhwÿr mã xwÿnhjê jamãr grire mãn. Kêr pa inhõ krĩ kamã mẽ ho ixpimràatã mẽ ho mex rax kumrêx. Nà kot paj ã mẽ ho mex anê. Ja na kêt inhmã mex o kormã mẽ htĩr ri ixte mẽ ho mexta jakrenh. Anê. Jao ra ã mẽ papajaja mẽ pakukamã hamaxpêr anê.

Eprêw 12

Mẽ pahte Jejus pyrà nê mẽmoj kutã amnhĩ to htÿx ã mẽ pamã karõ

Piripos 3.12-21

¹Na pre mẽ pakukamã mẽ panhĩgêt kwÿjaja amnhĩ kaxyw Tĩrtũm mã hamaxpêr pê ã amnhĩ xà htÿx kamã hamak o pa anê. Tã te ra mẽ kot kÿj rÿm kaxkwa rÿm mẽ pahpumunh nê tanhmã mẽ pamã kapêr to pyrà nê mẽ pamã kapêr o: —E mẽ inhma mẽ ixkanrêhã mẽ ixtãmnhwÿjaja. Na pa prem ã Tĩrtũm kamnàr rom amnhĩ nhĩpêx o ixpa anê. Mẽ kot ja hã mẽ inhĩpêx kati htã pa prem Jejus kaga hkêt nê. Tã kêr ka mẽ ixpyrà nê ã mẽ kãm mẽ

akurê xwÿnhjê kutã amnhĩ to htÿx anê. Nê mẽ ixpyrà nê amnhĩ kaxyw Tĩrtũm kôt pix mã ajamaxpêr tÿx rãhã ho ri apa. Anê. Jakamã kwa kêr pu mẽ uràk nê ã amnhĩ nhĩpêx anhÿr rãhã ho mãn ri papa. Te mẽ hprôt xwÿnhjaja kot amnhĩ nhĩpêx pyràk o amnhĩ nhĩpêx. Na htem hprôt tÿx kaxyw mẽmoj pytĩ jamÿnh nê ho hprôt hkêr nê. Na htem ÿ kamã hprôt o hprôt tÿx nê wam hkwÿjê mã wa nê mra. Ja pyrà nê kêr pu mẽ pahte Tĩrtũm kapêr kôt amnhĩ nhĩpêx mex o papa kaxyw tanhmã mẽ pahte amnhĩ tomnuj to hã amnhĩ pumu nê hkaga kurê kumrêx. Mẽ pahte amnhĩ tomnuj o papa xàja te mex pyràk no ãm mex kêt. Te ho mẽ hprôt xwÿnh kot axtem nê mẽmoj pytĩ mÿnh nê tee ri ho hprôt tÿxta pyràk. Kot puj mẽ tanhmã amnhĩ tomnuj to ho papa nê Tĩrtũm kapêr kôt amnhĩ nhĩpêx mex kêt nê. Jakamã kwa kêr pu mẽ Tĩrtũm kapêr gryk ã amnhĩ tomnuj nê amnhĩ to htÿx rãhã ho papa. Te ho mẽ hprôt nê nhÿri mẽ àhuk xà pix kukamã hamaxpêr rãhã hprôt tÿx xwÿnhhta pyrà nê ãm Jejus mã pajamaxpêr tÿx rãhã ho papa.

²E kot paj mẽ amã Jejus kot tanhmã mẽ panê amnhĩ nhĩpêx toja jarê ka mẽ inhma. Nà kot mẽ panê mẽ pahte amnhĩ tomnuj pãnhã amnhĩrer kaxyw htyk nhũm mẽ pahte hkôt amnhĩ xunhwÿr jakamã na hte mẽ pamã pajamaxpêr nyw gô pu mẽ amnhĩ kaxyw hkôt pajamaxpêr ho ri papa. Na pre mẽ kãm hkurê xwÿnhjaja kot pĩ kahpa hã nhôr nê hpĩr mã nhũm mẽ kutã mẽ kãm amnhĩ to htÿx nê arĩ mẽ kãm xa nhũm prem kupĩ. Tã tee ri amnhĩ kukamã hamaxpêr o Tĩrtũm kaga hkêr nê. Na pre hamaxpêr o: —Nà kwãr mẽ mãmrĩ ixpĩ. Kot paj ty nhũm Inhĩpêêxà akupÿm ixto ixtĩr pa kuri inhmex kumrêx nê ixtĩr tũm nê ixpa ho ixpa. Anê. Tã na ra kaxkwa kamã Tĩrtũm xupòk rũm mex nê hkrĩ ho hkrĩ.

³Jakamã kwa kêr pu mẽ kot ã mẽ panê amnhĩ nhĩpêx anhÿrja mã pajamaxpêr rãhã ho ri papa. Mẽ kot hipêx kati htã nhũm mẽ kutã amnhĩ to htÿx nê xa. Tã kêr pu mẽ uràk nê mẽ kãm mẽ pahkurê xwÿnhjê kutã amnhĩ to htÿx rãhã ri papa. Jao tee ri amnhĩ kukamã pajamaxpêr o mẽ umaj Tĩrtũm kaga hkêr nê.

⁴Na ka htem ma mẽ kot amnhĩ tomnuj xwỳnhjê hwỳr mra nẽ mẽ kot amnhĩ tomnuj kaga kaxyw tanhmã mẽ kãm akapêr to nhũm mẽ ja hã mẽ ama nhũm ja mẽ kêp omnuj nhũm mẽ amnhĩ tã tanhmã mẽ atomnuj to. Nom wam mẽ kot mẽ pahkwỳjê nhĩpêxta pyrà nẽ kormã mẽ atõxpĩr kêt nẽ.

Tĩrtũm kot tanhmã hkrajê nhĩpêx to hã harênh

Juãw 15.1-2; Eprêw 5.7-8; Xiakre 1.2-4

⁵Nẽ mãn ka mẽ arĩ Tĩrtũm kapêr ã kagà htũm kwỳ hã ano htỳx japêr. Mẽ pahpê Tĩrtũm krajê mã kapêr jarênh kot: Kojã Pahi Maati tanhmã mẽ ate amnhĩ tomnuj to nẽ mẽ amã kapêr ka mẽ ama nẽ mar tỳx nẽ mẽmojta kaga kurê kumrêx. No mẽ ama nẽ tee ri kot nẽ akurê xwỳnhhta kukamã ajamaxpêr o ri akapĩrĩ o axtem nẽ Tĩrtũm kaga hkêt nẽ. Ama nẽ kot amã mẽmoj nẽ kapêr xwỳnhhta kaga kurê kumrêx.

⁶Na hte Tĩrtũm kãm mẽ pajapê hã tanhmã mẽ pahte amnhĩ tomnuj to hã mẽ pahpumu nẽ hã tanhmã mẽ panhĩpêx to. Tãm mẽ pahte amnhĩ nhĩpêx o papa kaxyw. Kot mẽ pahpê hkra hã mẽ pajarênh jakamã na hte ã mẽ pahte tãm amnhĩ nhĩpêx o papa kaxyw mẽ panhĩpêx anẽ. Anẽ.

⁷Jakamã kot kaj mẽ tanhmã amnhĩ tomnuj toja mỳrapê tanhmã apunuj kute nẽ ri apa htã no ãm tee ri amnhĩ kukamã ajamaxpêr hkêt nẽ. Kêt mẽ ãm ajamaxpêr o: —Nà ixte tãm amnhĩ nhĩpêx kaxyw na Tĩrtũm ã inhĩpêx anẽ. Ixpê hkra hã ixte amnhĩ to mex o ixpa prãm xàj ã inhĩpêx anẽ. Anhỳr o mãn kêt ajamaxpêr. Na hte mẽ hipêêxà mẽ hkra kot amnhĩ to mex kaxyw ã mẽ hipêx anẽ. Tã Tĩrtũm na hte mẽ uràk nẽ ã mẽ panhĩpêx anẽ.

⁸No kojã mẽhõ hkra kot tanhmã amnhĩ tomnuj to hã omu nẽ ãm omu nẽ hã tanhmã ho hkêt nẽ. Hã kojã hkraja te hipêêxà hkêt nẽ hã awrãre nẽ ri pa pyràk. Tã mẽ pahpê Tĩrtũm krajaja kot puj mẽ tanhmã amnhĩ tomnuj to nhũm ja hã mẽ pahpumu nẽ hã tanhmã mẽ pahto. Nom mẽ kêp hkra hkêt xwỳnhjaja nhũm hte ja hã mẽ omu nẽ ãm hã mẽ omu nẽ hã kormã tanhmã mẽ hipêx to hkêt nẽ.

⁹Nẽ na hte mẽ panhĩpêêxà mẽmoj tã mẽ pamã karõ pu htem kuma nẽ hkõt amnhĩ nhĩpêx. Ja mex. Nom kaxkwa kamã Mẽpahpãm maatiã mẽ pahte

mar nê hkôt amnhĩ nhĩpêxja na kêt mex kumrêx. Kot puj mē ã amnhĩ nhĩpêx anê nê nhĩrmã kuri pamex nê pahtĩr tũm nê papa ho papa.

¹⁰Nê mēhprĩre na htem hamaakro nhũm mē hipêxà tanhmã hã mē ho. Hã mē hkaprêprêk rỳ hã mē kãm akir. Amnhĩ krã hkôt tanhmã mē hipêx to. Mē kot ja hã amnhĩ pumunh nê axte hkêt kaxyw. Ja mex. Tã mē papajaja. Mē pahpê Tĩrtũm kra na pu htem tũhã tanhmã amnhĩ tomnuj to nhũm mē pahpumu nê tanhmã hã mē pahto. Mē pahte amnhĩ pumunh nê axte hkêt kaxyw. Uràk nê amnhĩ to mex pix o papa kaxyw.

¹¹Na hte mēmoj tã tanhmã mē panhĩpêx to pu mē tee ri amnhĩ pumu nê pahkaprĩ nê pahkĩnh kêt nê ri papa. Nom kot puj mē tokyx tanhmã amnhĩ tomnuj tota kaga nê akupỹm Tĩrtũm kôt tãm amnhĩ nhĩpêx o papa nê akupỹm pahkĩnh nê pajamakêtkati nê ri papa.

Mē pahte Tĩrtũm kaga hkêt ã mē pamã karõ

¹²Jakamã e kwa kêr ka mē amnhĩ to htỳx nê apa. Mē kot Kris ã tanhmã mē anhĩpêx to htãã. ãm Tĩrtũm kôt pix mã amnhĩ nhĩpêx mex pê akĩnh nê apa.

¹³Kêr kê Kris kôt atõjê hõ tee ri mēmoj tã amnhĩ pumunh kôt ra Tĩrtũm kaga kaxyw tã ã mē ate amnhĩ nhĩpêx anhỹr ã mē apumu nê mē apyrà nê akupỹm hkôt amnhĩ xãm tỳx nê hkaga hkêt nê.

¹⁴Nê kêr ka mē tãm ri axpên nhĩpêx o ri apa. Jao axpên kôt ajamakêtkati nê ri apa nê amnhĩ to mex pix kukamã ajamxpêr. No kot kaj mē anhỹr kêt nê nhĩrmã mē panhõ Pahi Maati hwỳr axàpir nê kuri amex nê apa hkêt nê.

¹⁵Na hte Tĩrtũm mē pahto mex nê mēmoj to mē pakutã nojarêt rãhã o pa. Jakamã kwa kêr ka mē hkaga hkêt nê. Nê tanhmã ri ajamxpêr punuj to ho ri apa hkêt nê. Kot ka mē ã amnhĩ nhĩpêx anê nhũm Kris kôt mē pahkwỳjaja ja hã mē apumu nê mē apyrà nê tanhmã amnhĩ tomnuj.

¹⁶Nê kêr ka mē axpên kãm apijaàm kêt o ri apa hkêt nê. Nê te finat Ejau kot amnhĩ nhĩpêx pyràk o ri apa hkêt nê. Na pre Tĩrtũm ã hpijaàm kêt nê hkwỳjê kamã hpijaàm kêt o pa. Nê Tĩrtũm mã hamxpêr kêt kumrêx. Kêp Ijak kra kot wa jakamã koja nhĩrmã hipêxà mỳr pê kêp hikukrêx nê õ pika piitã ho

àrìk pa. Hāmri nhūm hipêêxà kot ho Tirtūm wỳr nhūm kot ho mex kaxyw mǎ tǎ nhūm axtem nē mēmo arĩgro hǎ kām prām xàj kot kēp mēmoj to àrìk mǎ xwỳnhta htō Jako mǎ hkaga hpa. Mǎnkwrỳtre gōj kām ǎm prām xàj kām hkaga hpa. Jakamǎ nhūm Jako hpǎnhǎ te kēp Ijak kra kot wa pyrà nē mỳr pē ò mēmoj piitǎ ho àrìk mǎ.

17Gaa nhūm Ejau tee ri ǎ amnhĩ nhĩpêx anhỹrja mǎ hamaxpēr o hkaprĩ nē. Nē tee ri kām Jako kot akupỹm kām mēmojta nhōr prām kaprỳ. Nē mur nē hǎ hipêêxà wỳ no nhūm axte kām mēmoj nhōr kêt nē. Nhūm kot ho Tirtūm wỳr kaxyw tee ri amnhĩ to kuwỳ no nhūm kuma nē ǎm kuma nē kām ho anhỹr kêt nē.

18Nē amnepê mǎ Tirtūm kot mē panhĩgêxjê mǎ kapēr kaxyw na prem hixêt prêk pē Sinai jarēnhja wỳr akuprō nē hparpê kuhê. Hāmri nhūm hixêt nhĩmōk ǎ kuwy hpōk rax kumrêx. Nē kuwy mỳr ri kakrǎ htyk ajêt. Nē kōk àpêr tỳx nē. Nhūm Ijaewjaja hixêt krax ǎ omu nē kām maa ho htertet o kuhê.

19-21Hāmri nhūm mēhō pifti kakô nhūm Tirtūm hixêt nē mē kām kapēr nē mē kām: —E mē inhma. Kêr ka mē hixêt ǎ axàpir kêt nē. Kot kaj mē atō hǎ api rỳ mē akrit ò hǎ api ka mē ja hǎ omu nē kaxyw kēn rũnh kwỳ jamỳ nē ho htak o apĩ. Anē. Hāmri nhūm mē piitǎ tee ri kuma nē kām ma htỳx kumrêx nē amnhĩ nē kām: —Kwa hāmri Tirtūm. Axte mē inhmǎ mēmoj jarēnh kêt nē. Mojes pix mǎ mǎn mē ixkaxyw tanhmǎ kām akapēr to. Anē. Jakamǎ nhūm Mojes Tirtūm mǎ amnhĩ jarēnh nē kapēr mar kaxyw hixêtja ǎ api. Kām ma nē htertet rǎhǎ mō nē hǎ api.

22Nom mē kām ma ho Tirtūm mǎ amnhĩ jarēnh tǎ mē papajaja na pu htem mē kurom paxàmnhĩx kām amnhĩ jarēnh o papa. Na pu htem kām amnhĩ jarēnh kaxyw nē hixêt prêk ǎ paxàpir kêt nē. Te ra mē pahte ma kaxkwa hwỳr ò krĩ hwỳr paxàpir nē pano ho omunh pē kām amnhĩ jarēnh pyràk. Ò krĩja mex o mex. Kamǎ kapēr o mē wrỳk xwỳnhjaja ohtô o ohtô. Na htem kamǎ hkĩnh rǎhǎ ho pa ho pa.

²³Ně ō krī hwỳr na hte hkra xàpir xwỳnhjaja ri pa. Ně mẽ papajaja na pu htem kãm amnhĩ jarēnh kaxyw nẽ te kaxkwa kamã kuri pakuhê nẽ kãm amnhĩ jarēnh pyræk o amnhĩ nhĩpêx. Te mẽ pahpê hkra kot wa pyræk jakamã mẽ pamã uma hkêt. Nhũm pre Tĩrtũm ra ō kagà kamã mẽ pakutêp amnhĩm mẽ panhĩxi hã kagà hpa. Na hte mẽmoj piitã hamãr o hkrĩ. Ně krĩja kamã amnepêm kormã Kris kot mẽ pahwỳr wrỳk kêt ri nhũm ra amnhĩ kaxyw Tĩrtũm kôt hamaxpêr mex xwỳnhjaja haxwỳja ra kamã ri pa. Ra Tĩrtũm kot mẽ ho hkra jakamã nhũm mẽ kuri ri pa ho pa.

²⁴Ně Jejus haxwỳja kamã pa ho pa. Na pre mẽ panê htyk nẽ hkamrô pikapĩrja o mẽ pahte amnhĩ tomnuj pãnhã amnhĩre. Jakamã na pu htem hkôt amnhĩ xunhwỳ nhũm mẽ pahto hkra pu mẽ paxàmnhĩx ri Tĩrtũm mã amnhĩ jarēnh nẽ amnhĩ to hwỳr o papa. Amnepêm na pre Tĩrtũm tee ri Kaĩ kot htõ Apew pĩr nẽ hkamrô pikapĩrja ã omu nẽ hamaxpêr o: —Nà ã kot amnhĩ nhĩpêx anhỳr jakamã kot paj hã homnuj tỳx nẽ. Anẽ. Tã ra hpãnhã Jejus kot mẽ panê htyk nẽ hkamrô pikapĩrja ã omu nẽ ra axtem hamaxpêr o: —Nà ãm hãmri na Ixkrajaja mẽ nê ty. Jakamã mẽ kot hkôt amnhĩ xunhwỳr xwỳnhjaja kot pa Ixkra kukwak ri mẽ kot amnhĩ tomnuj mỳrapê tanhmã mẽ ho hkêt nẽ. Anhỳr o mẽ pakukamã hamaxpêr. ã hamaxpêr anhỳrja mex o mex.

²⁵Na pre Mojes Tĩrtũm nhỹ hã mẽ panhĩgêxjê mã xatã mẽ kãm Tĩrtũm kapêr jarēnh o ri pa nhũm mẽ kuma nẽ hkôt amnhĩ nhĩpêx o pa. Tã gaa nẽ ra hã nohkêt pa nẽ akupỹm mẽ kot amnhĩ nhĩpêx tũm o awjanã nhũm Tĩrtũm tee ri ja hã mẽ omu nẽ mỳrapê tanhmã mẽ hipêx to. Tã nhũm Krajaja kaxkwa rũm mẽ pahwỳr wrỳ nẽ mẽ pamã kapêr. Jakamã kwa mẽ okora kêr pu mẽ panhĩgêjtê pyrã nẽ mẽ pahte amnhĩ nhĩpêx tũm o paxujanãr kêt nẽ. Kot puj mẽ anẽ nhũm Tĩrtũm ja hã mẽ pahpumu nẽ mẽ uræk nẽ ja hã tanhmã mẽ panhĩpêx to.

²⁶Amnepêm Tĩrtũm kot hixêt prêk pê Sinai kamã mẽ kãm kapêrja. Na pre kapêr tỳx o pika ho àk nhũm htertet tỳx nẽ. Tã koja nhỹrmã axte pika ho àk

ně kaxkwa ho àk nhũm wa hamě htertet tỳx kumrěx. Koja axte ho anhỳr ho pixi ně axte ho anhỳr kêt ně.

²⁷Tã nhỹrmã axte mẽmoj to àk ã amnhĩ jarěnh jakamã koja mẽmoj to kator xwỳnhta piitã ho àk. Ně mẽ pahte panhĩhkra ho mẽmoj nhĩpêx xwỳnhja nhũm ho àk nhũm htertet tỳx kãm hpigrành pa ně hapêx. Nhũm mẽmoj htertet ně hpigrành kêt xwỳnh pixjaja arĩ rãhã ho rãhã.

²⁸No Tĩrtũm nhõ krĩ koja htertet ně hapêx kêt ně. Ně mẽ papajaja mẽ pahpê hkra jakamã te ra kuri õ krĩ kamã ri mẽ papa pyràk. Jakamã kot puj mẽ mẽ uràk ně pajapêx kêt ně. Jakamã e kwa kêr pu mẽ amnhĩ tã Tĩrtũm mã mex o mex ã harěnh ně hã pahpijaàm rãhã ho papa. Ně tanhmã amnhĩ tomnuj to hã amnhĩ pumu ně Tĩrtũm pumaj mẽmojta kaga kurê kumrěx. ã mẽ pahte amnhĩ nhĩpêx anhỳr o papaja na Tĩrtũm kãm hprãm.

²⁹Hihtỳx o hihtỳx jakamã koja mẽmoj tã akamã gryk kot kaj amex kêt o amex kêt.

Eprêw 13

Mě pahte Tĩrtũm kãm hprãm xà hkôt amnhĩ nhĩpêx ã mẽ pamã karõ

Rõmãn 12.1-2; Epes 4.1-3; Korosẽ 1.10-11; Wam Tesarõn 4.1-12; Wam Pêtre 2.11-12; Wam Juãw 3.17-18

¹Ně e kwa Kris kôt ixtõ ně ixtõxjaja. Kêr pu mẽ arĩ Kris kôt pahkwỳjê ho mex o mãn axpẽn kôt ri papa. Ně kêr pu mẽ tanhmã pahpunuj to hã amnhĩ pumunh tã axpẽn to mex mã panhũrer kêt ně. ã axpẽn nhĩpêx anhỳr rãhã ho papa.

²Ně amnepê mã na pre mẽmojaja nhỹhỹnh mra ně mẽ panhĩgêjtjê hõ hwỳr pøj. Hãmri nhũm mẽ omu ně htỳx axtem krĩ hõ nhõ xwỳnh ã mẽ hkamnhĩx tã no nhũm mẽ kêp Tĩrtũm kapêr o mẽ wrỳk xwỳnh kwỳ na prem. Hãmri nhũm amnhĩ nhõrkwỹ hwỳr mẽ kuwỳ nhũm mẽ ma hkôt mra ně kuri pøj ně kutã apku. Jakamã kwa koja nhỹhỹnh krĩ hõ rũm mẽmojaja ma mẽ awỳr mõ ka mẽ omu ně axàmnhĩx amnhĩ nhõrkwỹ hwỳr mẽ hwỳr kurê kumrěx kê mẽ ari pøj. ã mẽ hipêx anhỳr o apa hãmri ně nhỹrmã mẽ panhĩgêjtja pyrà ně amnhĩ wỳr Tĩrtũm kapêr o mẽ wrỳk xwỳnhjê hõ hwỳr japêr. Mě uràk ně

ja hã mẽ omunh kêt tã atỳx amnhĩ wỳr mẽ awỳ nhũm ja mẽ amã mex o mex.

³Nễ kêr ka mẽ ra mẽ kot Jejus ã mẽ akwỳjê pynênh nễ mẽ hagjênh xwỳnhjê mã ajamaxpêr rãhã ho ri apa nễ mẽ ho ajamakêtkati hkêt nễ. Te mẽ kajaja mẽ ìhkô hã mẽ hagjênh xà kamã apunuj nễ akrĩ pyràk o mẽ kãm ajamaxpêr o ri apa. Jao mẽ kamã axukaprĩ ho mẽ hwỳr mra nễ mẽ kãm mẽmoj nhõr o ri apa.

⁴Nễ mẽ kot axpên to hprõja na mex. Nom kêr ka mẽ amyjaja ãm aprõ pix tãnopxar o ri apa. Nễ mẽ anijaja mẽ ajaxwỳja amjên pix tãnopxar o ri apa. No mẽ hkuprỳjê hwỳr mẽ mrar xwỳnhjaja nễ nhãm mẽ kêp mẽ hprõ ho amnhĩkati xwỳnhjaja nễ nhãm mẽ kêp mẽ mjên o amnhĩkati xwỳnhjaja koja Tĩrtũm ja hã mẽ omu nễ mẽ homnuj tỳx kumrêx.

⁵⁻⁶Nễ kêr ka mẽ akàxpore rũnh kêt ã amnhĩ pumu nễ tee ri amnhĩ kukamã ajamaxpêr o akaprĩ hkêt nễ. Na pre Tĩrtũm mẽ pamã kapêr o: Kot paj akôt ri ixpa rãhã ho ixpa nễ aa arer rỳ akaga hkêt kumrêx. Anhỹr jakamã kot kaj mẽ akàxpore grire htã akaprĩ nễ apa hkêt nễ. Aa Tĩrtũm kot mẽ pahkaga hkêt ã amnhĩ jarênh jakamã mẽmoj kot pu wem omu nễ pamã nhãm ri mẽ uma ho papa? Tĩrtũm kot mẽ pahkôt pa ho pa kênã. Jakamã na pu htem pajamaxpêr o: Nà Pahi Maatija ra kot ixkôt pa ho pa xwỳnh jakamã mẽmo kot pa hkêt ri inhmã uma ho ixpa? Mẽmo kot kêt ri tanhmã kêp ixto? Anhỹr o pajamaxpêr o papa.

⁷Nễ mẽ kot Kris mã mẽ ajamãr o mẽ pa xwỳnh ra mẽ htyk xwỳnhjaja ka mẽ arĩ mẽ kot tanhmã amnhĩ nhĩpêx to ho paja mã ajamaxpêr rãhã ho ri apa. Na prem Tĩrtũm kapêr o mẽ ajahkre mex nễ. Nễ tãm ri amnhĩ nhĩpêx o ri mẽ akôt pa. Nễ amnhĩ kaxyw Tĩrtũm kôt pix mã hamaxpêr rãhã ty. Tã kêr ka mẽ uràk nễ ã amnhĩ nhĩpêx anhỹr o ri apa rãhã ty.

⁸Nễ Jejus Krisja arĩ rãhãã. Nễ amnepê mã kot amnhĩ nhĩpêxja mããnên arĩ rãhãã. Aa kot amnhĩ nhĩpêxja nhĩjuk ri axtem tanhmã amnhĩ nhĩpêx to hkêt.

⁹Nễ kwa kêr ka mẽ Tĩrtũm kôt amnhĩ nhĩpêx rãhã ho ri apa. Na hte kapêr o hêx xwỳnhjaja mẽ awỳr mra nễ mẽ amã: —Amnepêm mẽ ate Tĩrtũm kot mẽ

amex ã mẽ ajarẽnh kaxyw mẽ ate kãm mẽmo mry nhõr nẽ akupỹm hamỹnh nẽ hkur o apa htã ra ja ho anhỹr kaga. Kwa mẽ ja ho awjanã nẽ axte ã amnhĩ nhĩpêx anhỹr o ri apa. Kê Tĩrtũm ja hã mẽ apumunh kõt mẽ amex ã mẽ ajarẽ. Anhỹr o mẽ amã kapêr. Nom xà na hte Tĩrtũm ã mẽ pahte amnhĩ nhĩpêx anhỹr ã mẽ pahpumunh kõt mẽ pamex ã mẽ pajarẽ? Xà na htem mẽmo mẽ apkur xà hkur pê amnhĩ kaxyw Jejus kõt hamaxpêr tỳx o pa? Nà na htem anhỹr kêt nẽ. Na pu htem mẽmoj kur kõt pamã Tĩrtũm kĩnh kêt nẽ. Kêt mẽ paxàpkur xàja mẽ panhĩ pix o hihtỳx kaxyw na. Na hte Jejus kõt mẽ pahto paxihtỳx kêt nẽ. ãm Tĩrtũm kot amarĩ kãm mẽ pajapê nẽ mẽmoj to mẽ pakutã nojarêt jakamã na pu htem ja hã amnhĩ pumu nẽ amnhĩ kaxyw hkõt pajamaxpêr tỳx o papa.

10Tĩrtũmja Jejus kot mẽ panê htyk ã omunh xà hkõt ra kot mẽ pamex ã mẽ pajarẽnh jakamã mo kaxyw kot pu mẽ axte kot mẽ pamex ã mẽ pajarẽnh kaxyw kãm mẽmo mry gõ nẽ hkwỳ hku? Koja mẽhõ akupỹm Tĩrtũm kapêr tũm o ujanãr jao Jejus kot nê htyk nẽ hkamrô pikapĩrja kaga.

11Amnepêm na pre patre maatiijaja tõhã mẽ kãm mẽmo mry hpar xwỳnh hkamrô ru nẽ guhkrax kãm kuru nẽ hamỳ nẽ ma o mra nẽ Tĩrtũm nhõrkwỹ kaàkre hwỳr hitom maati hwỳr ho agjê. Tĩrtũm kot mẽ omunh nẽ axte mẽ kot amnhĩ tomnuj mã hamaxpêr kêt kaxyw. Hãmri nhũm hpãnhã ã mỳ nẽ krĩ pê ho kato nẽ ma o mra nẽ nhỹri amỳm hkwỳjê hkàx ã ho hxêt pa. Tĩrtũm kapêr tũm kõt na prem ã amnhĩ nhĩpêx anhỹr o pa.

12Tã ja pyrã nẽ na prem ma krĩ pê amỳm Jejus o tẽ nẽ kupĩ nhũm hkamrô axkapĩ. Kot mẽ pahte amnhĩ tomnuj pãnhã amnhĩrer nẽ mẽ pahto mẽ pahpê Tĩrtũm kra kaxyw ã htyk nẽ hkamrô pikapĩr anẽ.

13Na prem Tĩrtũm kapêr tũm gryk ã Jejus kaga nẽ pòristijê mã anẽ nhũm mẽ ma krĩ pê ho kato nẽ o tẽ nẽ kupĩ. Tã kêr pu mẽ jajê rom Jejus gryk ã mãn Tĩrtũm kapêr tũm kaga. Kwãr mẽ mãmrĩ Jejus pyrã nẽ Tĩrtũm ã tanhmã mẽ pahto nẽ amnhĩ nê nhỹhỹm mẽ pajano.

14Kêt jar mẽ papapxàja kêp mẽ papapxà kumrêx kêt. Nẽ jar mẽ panhõ krĩja kêp mẽ panhõ krĩ kumrêx kêt. Mẽ pamã te kot pô nhĩrõnh o ixkre pix pyræk.

No kêt mẽ panhõ krĩ kumrëx koja jar mẽ panhõ krĩ rom aa hapêx kêt nê. Tã tãm na pu mẽ kormã ma hwỳr papa kaxyw arĩ amnhĩ tã Tĩrtũm jamãr o papa.

¹⁵Nê na htem Ijaew arĩ ohtô nê amnhĩ pãnhã Tĩrtũm mã mry hpar ho pa. Nom mẽ papajaja kot puj mẽ axte ã amnhĩ nhĩpêx anhỳr hkêt nê. Kot puj mẽ ãm Jejus kukwak ri Tĩrtũm mã mex o mex ã harênh rãhã ho mãn papa. Jao te mẽ pahte kãm hkĩnh xà nhõr pyræk o amnhĩ nhĩpêx.

¹⁶Nê kêt pu mẽ arĩ axpên to mex o ri axpên kôt papa. Nê kê mēhõ kêp amrakati japêr ka ja hã omu nê amnhĩ kutã kãm anhõ mēmoj kwỳ. ã kot puj mẽ axpên nhĩpêx anhỳr rãhã ho ri axpên kôt papa. Kot puj mẽ anê nê te mẽ pahte Tĩrtũm mã hkĩnh xà nhõr pyræk o amnhĩ nhĩpêx. ã mẽ pahte amnhĩ nhĩpêx anhỳrja na mex o mex.

¹⁷Nê kêt ka mẽ Kris kôt mẽ akrãhtũmjê kapêr ma nê mẽ hkôt amnhĩ nhĩpêx mex nê. Na htem Tĩrtũm mã mẽ ajamãr o ri mẽ akôt pa. Kojã mẽ nhỹrmã mẽ kot tanhmã mẽ anhĩpêx to hã Tĩrtũm mã amnhĩ jarê. Jakamã mẽ kãm mẽ ato ajuta prãm. Tã kêt ka mẽ kapêr ma nê mẽ hkôt ri amnhĩ nhĩpêx mex o ri apa. Kêt kê mẽ amnhĩ tã mẽ apumu nê hkĩnh nê. No kot kaj mẽ ama nê ãm mẽ ama nhũm mẽ tee ri amnhĩ tã mẽ apumu nê hkaprĩ nê. Jao tee ri kot tanhmã mẽ ato ajuta mex to hkukamã hamaxpêr.

¹⁸Nê kwa kêt ka mẽ ixto Tĩrtũm wỳr rãhã ho apa. Inhmã Tĩrtũm noo mã tanhmã amnhĩ tomnuj to hprãm kêt. ãm inhmã amnhĩ to mex pix o ri ixpa hprãm.

¹⁹Nê kêt ka mẽ ixto awỳ kê tokyx akupỹm mẽ awỳr inhmê. Na pa ra inhmã mẽ apumunh prãm tỳx nê.

Kagà nhĩpêx xwỳnh kot tanhmã mẽ ho Tĩrtũm wỳr to hã harênh

Epes 3.14-19; Piripos 1.0-11; Wam Tesarõn 3.9-13; 5.23; Sikũn Tesarõn 1.11-12; 2.16-17

²⁰Nê mẽ panhõ Pahihti Jejus Krisja na hte mẽ panhĩpêx o te ôwêhti jamãr xwỳnh kot hkrit jamãr pyræk o pa. Jakamã kêp mẽ pajamãr xwỳnh maati mex na. Na pre mẽ panê ty nhũm Tĩrtũm akupỹm mẽ pamã ho htĩr nê mẽ pamã harênh o: —E ra Ixkra kot mẽ anê htyk jakamã kêt ka mẽ ãm ixkapêr

nyw kôt pix mã ri amnhĩ nhĩpêx o ri apa. Kot kaj mẽ ã amnhĩ nhĩpêx anê hãmri nê nhỹrmã ty pa akupỹm mẽ ato mẽ atĩr ka mẽ ixri atĩr tũm nê apa ho apa. Anê. Tĩrtũm kêp mẽ pahto mẽ pajamakêtkati nê ri mẽ papa xwỳnh na.

²¹Tã na pa hte tanhmã mẽ ato hwỳr to ho ixpa nê mẽ ato hwỳr o: —Pa Tĩrtũm. E kwa tanhmã ixkwỳjê ho mex to kê mẽ kãm akapêr kôt pix mã amnhĩ nhĩpêx o pa hprãm. Nê mẽ kãm tãm amnhĩ nhĩpêx o pa hprãm. Nê kê Jejus haxwỳja tanhmã mẽ ho mex to kê mẽ war amã hprãm xà hkôt pix mã war amã tanhmã ri amnhĩ nhĩpêx to ho pa. Anê. E kêr pu mẽ arĩ Jejus Kris mã mex o mex ã harênh rãhã ho papa.

Kagà jatur xà kamã mẽmoj jarênh

²²E Kris kôt ixkràmnhwỳjaja. Nà na pa ã mẽ amã kagà nhĩpêx anê. Jejus kôt mẽ ato mẽ axihtỳx kaxyw. No na pa ho ry nê hipêx kêt nê. Ixte ho grire nê hipêx jakamã kwa kêr ka mẽ kamã harê nê mar tỳx nê hkôt amnhĩ nhĩpêx mex o ri apa.

²³Nê mãn ka mẽ ra Ximotre jarênh mar japêr. Na pre Kris ã mẽ hagiênh xà kamã hkrĩ hã apkati xohtô nê. Tã nhũm xep mẽ ra kator. Tã koja kormã mẽ awỳr inhmõr xwỳj ri man ixwỳr mỗ nê hpôx japêr kot paj ma amnhĩ kôt mẽ awỳr o mỗ ka mẽ omu.

²⁴Nê kêr ka mẽ kot Kris mã mẽ ajamãr xwỳnhjê mã ijarê. Nê atar Tĩrtũm krajê piitã mẽ kãm ijarê. Nê ota jar Tĩrtũm kra hkwỳja piitã mẽ awỳr hpêr mẽ.

²⁵E kê Tĩrtũm mẽ apiitã mẽ ato mex o pa. Tã ãm ja pix. Na pa ã mẽ amã hã kagà ho anê. Na hapêx.

Xiakre

Xiakre 1

¹Pa ixkwỳjaja. Xà mẽ amex? E ixpê Xiakre na pa. Ixte Tĩrtũm mẽ Pahihti Jejus Kris wa kãm tanhmã amnhĩ nhĩpêx to xwỳnh na pa. Jakamã kot paj kagàja nhĩpêx nẽ pika piitã hkõt mẽ apiitã mẽ awỳr kurẽ. Mẽ apê Tĩrtũm krajê hwỳr.

Mẽ pahpunuj tã mẽ pahte amnhĩ kaxyw Tĩrtũm kõt pajamxpêr

Rukre 6.20-23; Rõmãn 5.3-5; Korosê 1.11; Wam Pêtre 4.12-19

²⁻³E ixkwỳjaja. Kêr ka mẽ atõ tanhmã amnhĩ to rỳ tanhmã apunuj to. Rỳ mẽhõ tanhmã Jejus ã mẽ anhĩpêx to. Tã kêr ka mẽ ja hã amnhĩ pumu nẽ tee ri amnhĩ kukamã ajamxpêr o ri akaprĩ hkêt nẽ. Arĩ akĩnh kãm amnhĩ kaxyw Tĩrtũm kõt ajamxpêr tỳx rãhã ho ri apa. Kot kaj mẽ ã amnhĩ nhĩpêx anẽ nẽ gaa nẽ rĩ mẽmoj punuj pê Jejus kõt amnhĩ xunhwỳr tỳx nẽ. Jakamã kwa kêr ka mẽ tanhmã apunuj to hã amnhĩ pumu nẽ ã mẽ ate amnhĩ nhĩpêx anhỳrja kukamã ajamxpêr pê akĩnh nẽ ri apa.

⁴Nom kêr ka mẽ tee ri tanhmã apunuj to hã amnhĩ pumu nẽ akaprĩ xàj Tĩrtũm kaga hkêt nẽ. ãm amnhĩ kaxyw hkõt ajamxpêr tỳx rãhã ho ri apa. Kot kaj mẽ ã amnhĩ nhĩpêx anẽ nẽ gaa nẽ Tĩrtũm noo mã tãm amnhĩ nhĩpêx mex o ri apa. Nẽ kãm hprãm xà hkõt pix mã amnhĩ nhĩpêx o apa.

Mẽ pahte tanhmã amnhĩ kute hã amnhĩ pumunh kõt amnhĩ to Tĩrtũm wỳr ã mẽ pamã karõ

Matêwre 21.18-22

⁵Nẽ kêr ka mẽ mẽmoj mỳrapê tanhmã apunuj to hãmri nẽ tee ri ja hã amã Tĩrtũm mã ajamxpêr tỳx prãm nhũm apê ja hihtỳx japêr. Rỳ mẽmoj tanhmã apê amnhĩ nhĩpêx to ka tee ri hkukamã ajamxpêr japêr. Kêr ka mẽ ã ajamxpêr anhỳr japêr hãmri nẽ amnhĩ to Tĩrtũm wỳr kurê kumrêx. Kot amã ajamxpêr mex nhõr nhũm ate ỹ hã tãm ajamxpêr kaxyw amnhĩ to awỳ. Kot kaj mẽ ã amnhĩ to hwỳr anẽ nhũm amnhĩ tã mẽ ama nẽ mẽmojta kutã tanhmã ato axihtỳx to kurê kumrêx ka ỹ hã hkõt ajamxpêr tỳx mex o ri apa. Jao tanhmã akute htã akĩnh nẽ ajamakêtkati nẽ ri apa. Koja Tĩrtũm tee

ri amã mẽmoj kôt ajamxpêr tỳx prãm kaprỳ hã apumu nẽ hã amã àkjêr kêt nẽ. Koja ate amnhĩ to hwỳrta ma nẽ tanhmã ato mex to.

⁶Nom kêr ka mẽ amnhĩ to hwỳr kãm tee ri amnhĩ kukamã ajamxpêr kati hkêt nẽ. Rỳ ajamxpêr o: —Koonẽn. Koja apu Tĩrtũm inhmã ja ho anhỳr japêr. Anhỳr o tee ri amnhĩ kukamã ajamxpêr kati hkêt nẽ. ãm akĩnh kãm tanhmã ate amnhĩ to hwỳr toja kukamã ajamxpêr o: —Nà koja inhmã ho anẽ. Ixte amnhĩ kaxyw kãm ijamxpêr nẽ amnhĩ to hwỳr xà hkôt koja inhmã tanhmã amnhĩ nhĩpêx to. Anhỳr o hkamnàr rom ã amnhĩ kukamã ajamxpêr anẽ. Nom kot kaj mẽ tanhmã amnhĩ to hwỳr to nẽ tee ri amnhĩ kukamã ajamxpêr kati nẽ hkôt ajamxpêr tỳx kêt nẽ. Nẽ te kôk nhãm àpêr nẽ nhãm àpêrta pyrà nẽ nhãm ri ajamxpêr nẽ nhãm ri ajamxpêrja o hkôt ajamxpêr kêt nẽ. Kot kaj mẽ ã amnhĩ nhĩpêx anẽ nhũm Tĩrtũm tee ri ja hã mẽ apumu nhũm ja kãm mex kêt nẽ.

⁷⁻⁸ã mẽ hamxpêr anhỳr xwỳnhjaja na htem nhãm hamxpêr nẽ nhãm hamxpêr jao hamxpêr mex kêt nẽ. Jakamã kot kaj mẽ ã ajamxpêr anhỳr o amnhĩ to Tĩrtũm wỳ hãmri nẽ ãm amnhĩ to hwỳr kaprỳ. Koja ama nẽ ãm ama. Nom kot kaj mẽ tanhmã akute hã amnhĩ kaxyw hkôt ajamxpêr tỳx pẽ amnhĩ to awỳ. Nẽ tee ri amnhĩ kukamã ajamxpêr kati hkêt kãm tanhmã amnhĩ to hwỳr to nhũm amnhĩ tã ama nẽ hkĩnh nẽ tanhmã amã mẽmoj nhĩpêx to. Mẽ ate hã axàhwỳr xà hkôt tanhmã mẽ amã mẽmoj nhĩpêx to.

Mẽ kệp amrakati xwỳnh mẽ mẽ kot amnhĩ to rũnh xwỳnhjê jarẽnh

Eprêw 13.5-6; Wam Pêtre 1.24-25

⁹Nẽ kwa mẽ akàxpore hkêt xwỳnhjaja. Jar mẽ apê amrakati htã mẽ apê Tĩrtũm kra na ka mẽ. Jakamã kêr ka mẽ akàxpore rũnh kêt tã mẽ apê Tĩrtũm kra hã amnhĩ pumunh kôt ajamakêtkati nẽ nẽ akĩnh nẽ apa.

¹⁰⁻¹¹Nẽ mẽ akàxpore rũnh xwỳnhjaja. Mẽ akàxpore rũnh nẽ mẽ akukrêx rũnh tã kot kaj mẽ nhỹrmã ty nẽ piitã rer pa nẽ mẽ kệp amrakati xwỳnhjê pyrà nẽ anhỹ kamã Tĩrtũm kuri akrĩ nhũm tanhmã mẽ ajarẽnh to. Te mẽ apê mẽmo pixôrã kot amnhĩ nhĩpêx pyræk. Na hte kwỳhtã axpẽn pẽ axpôt nẽ muxre nẽ mex nẽ harir. Tã gaa nẽ rĩ hã myt xàhpanh mẽ nhũm ra nhôore. Nẽ gaa nẽ ra grà pa nẽ rôrôk nẽ hapêx. Tã kot kaj mẽ nhỹrmã uræk nẽ ty nẽ

akukrêx rer pa. Jakamã kwa kêr ka mẽ akàxpore rûnh pumunh kôt akĩnh nê ri apa hkêt nê. Kêt ãm mẽ apê Tĩrtũm kra hã mãn amnhĩ pumunh kôt akĩnh nê apa.

Mẽ pahpunuj kôt pagryk nê mẽ pahkurê

¹²Nê kot kaj mẽ atõ tanhmã apunuj to htã arĩ amnhĩ kaxyw Tĩrtũm mã ajamaxpêr tỳx rãhã ho ri apa. No tanhmã apunuj to hã amnhĩ pumu nê hkaga hkêt nê. Rỳ kot tanhmã ato xwỳnhhta kêr ka mẽ amnhĩ tã kamã agryk nê tanhmã ho hkêt nê. ãm Jejus kôt pix mã amnhĩ nhĩpêx rãhã ho ri apa. Kêr kê Tĩrtũm amã hkĩnh ã amnhĩ tã apumu nê amex ã ajarê. Ka nhỹrmã kuri amex kumrêx nê atĩr tũm nê apa ho apa. Ra kot mẽ pakukamã mẽ pahtã amnhĩ jarênh xà hkôt. Jakamã kêr ka mẽ tanhmã apunuj to htã ã amnhĩ kukamã ajamaxpêr anhỹr pê akĩnh nê apa.

¹³Nê Tĩrtũm aa kãm tanhmã amnhĩ tomnuj to hprãm kêt. Nê mẽ papajaja mẽ pahte tanhmã amnhĩ tomnuj to kaxyw na hte mẽ pamã tanhmã àmnênh to rỳ mẽ pamã mẽ pajamaxpêr punuj jagjênh kêt nê. Jakamã kot ka mẽ atõ amã tanhmã amnhĩ tomnuj to hprãm tã kwa kêr ka Tĩrtũm tãm kot ja kaxyw mẽ akrãm mẽ ajamaxpêr punuj jagjênh to hã hkamnhĩx kêt nê.

¹⁴⁻¹⁵Mẽ papamjaja na pu htem pajamaxpêr punuj xà hkôt tanhmã amnhĩ tomnuj to. No Tĩrtũm Karõ na hte mẽ pamã mẽ pajamaxpêr punuj jagjênh kêt nê. Mẽ papamjaja na pu htem pajamaxpêr punuj nê gaa nê ra hkôt tanhmã amnhĩ tomnuj to. Hãmri nê gaa nê ã amnhĩ nhĩpêx anhỹr rãhã ho ri papa. Mẽ kot amnhĩ tomnuj o mẽ pa xwỳnhjaja koja mẽ nhỹrmã ty hãmri nê Tĩrtũm mẽ Kra wa kuri htĩr tũm nê pa ho pa hkêt nê.

Tĩrtũm kot tanhmã mẽ pahto mex to hã harênh

Xiakre 3.17-18; Sikũn Pêtre 1.3-4

¹⁶Nê e ixkwỳjaja. Tĩrtũm kot mẽ pahte amnhĩ tomnuj prãm xàj mẽ pamã mẽ pajamaxpêr punuj jagjênh kêt jakamã kwa kêr ka mẽ ã ajamaxpêr anhỹr kêt nê.

¹⁷Na hte mẽ pahto mex pix o pa. Na pre myyti ho kato. Kapêr pix o ho kato. Nê mytwrỳre ho kato. Nê kanhêti ho kato. Ja piitã ho kato nhũm mẽ pamã hirã mex o harir. Na hte mytwrỳre tõhã hirã mex o pa. Nê gaa nê nyw kaxyw

ně kamàt kô. Ně gaa ně nyw mẽ nhũm akupỹm hirã. Ā na hte amnhĩ nhĩpêx anhỹr o pa. No Tĩrtũmja ã kot anhỹr kêt. Kot amnhĩ nhĩpêxja ãm rãhã ho rãhã. Na hte mẽ pahto mex pix o pa. No tũhã tanhmã mẽ pahto mex to nhũm jãã nhũm tanhmã mẽ pahtomnuj to hkêt ně.

¹⁸Tã kapěr pix o kot ã mẽmoj to kator kot anhỹr. Ně mẽ pamã kapěr o amnhĩrĩt. Kãm mẽ pahto hkra hprãm xàj mẽ pamã Jejus kot tanhmã mẽ panê amnhĩ nhĩpêx toja nhũm pre mẽ pamã ho amnhĩrĩt. Na pu prem kuma ně hkôt amnhĩ xunhwỳ nhũm amnhĩ tã mẽ pahpumu ně mẽ pahto hkra. Mẽ pahpê Ijaew kumrẽxjaja na pre mẽ pahto hkra.

Mẽ pagryk o papa nê mẽ pahkurê

Rõmãn 12.17-21; Epes 4.25–5.2

¹⁹E ixkwỳjaja. Kwa mẽ ixkapěr ma ně hã anohtỳx ně ho apa. Kojã mẽhõ Tĩrtũm kapěr o mẽ ajahkre kaxyw mẽ awỳr mũ ně mẽ amã kapěr jarẽ ka mẽ mar tỳx ně. Kojã mẽ ate tanhmã amnhĩ tomnuj to nê mẽ amã kapěr ka mẽ amnhĩ tã ama ně kamã agryk kêt ně.

²⁰Mẽ gryk o mẽ pa xwỳnhjaja na htem Tĩrtũm kapěr kôt ri amnhĩ nhĩpêx kêt ně.

²¹Jakamã kwa kêt ka mẽ axte amnhĩ tomnuj rỳ ajamaxpěr punuj o ri apa hkêt ně. Na htem ohtô ně ã amnhĩ nhĩpêx anhỹr o pa nom kêt ka mẽ kurom Tĩrtũm kapěr mãn amnhĩ krã him haxàr tỳx ně. Kapěr o mẽ ajahkre xwỳnhjaja na htem ho mẽ ajahkre mex o pa. Tã kêt ka mẽ ama ně amã hkôt amnhĩ nhĩpêx prãm rãhã ho ri apa. Na pu htem Tĩrtũm kapěr ma ně hkôt amnhĩ nhĩpêx o papa hãmri ně nhỹrmã Tĩrtũm mẽ Kra wa kuri pahtĩr tũm ně pa mex ně papa ho papa.

Mẽ pahte Tĩrtũm kapěr kôt amnhĩ nhĩpêx ã mẽ pamã karõ

Matêwre 7.24-27; Wam Juãw 2.3-6

²²Ně kwa mẽ okora. Kêt ka mẽ ãm Tĩrtũm kapěr ma ně ãm mar kêt ně. Mããnẽn hkôt amnhĩ nhĩpêx rãhã ho ri apa. Kot kaj mẽ ama ně ãm ama ně hkôt amnhĩ nhĩpêx kêt ně hãmri ně apê Tĩrtũm kra hã amnhĩ jarẽnh kaprỳ. Jao nhỹrmã Tĩrtũm mẽ Kra wa kuri atĩr tũm ně apa hkêt ně.

23-24 Te ho mēhō kot amnhĩ pumunh xà hpyr nē kamã amnhĩ pumunh nē amnhĩ krã hkĩ jaê rỳ amnhĩ kuk tyk pumunh pyræk. Tã te kot ãm ja hã amnhĩ pumunh nē kot amnhĩ to mex kêt rãhã akupỹm amnhĩ pumunh xà xir nē ma htēm nē axte amnhĩ kuk tyk rỳ amnhĩ krã kĩ jaêrta mã hamaxpēr kêt pyræk. Mē kot Tĩrtũm kapēr mar nē ãm mar nē hkôt amnhĩ nhĩpêx kêt xwỳnhjaja te kot ja jarēnh pyræk.

25 Tã kêt ka mē ã amnhĩ nhĩpêx anhỹr kêt nē. Mē ate Tĩrtũm kapēr kôt amnhĩ nhĩpêx o apa kaxyw xatã kamã harē nē mar tỳx o apa. Jao hkôt amnhĩ nhĩpêx mex o apa. Tĩrtũm kot mē pahte tanhmã amnhĩ nhĩpêx to ho papa hã mē pamã karō xàja ãm hãmri na. Na htem hkôt amnhĩ nhĩpêx nhũm Tĩrtũm ja hã mē omu nē mē ho mex nē nhũm mē àmnhĩx hamakêtkati nē hkôt amnhĩ nhĩpêx o pa.

26 Nom koja mēhō kêp Tĩrtũm kra hã amnhĩ jarēnh tã htỳx ri kapēr punuj o ri pa hãmri nē ãm kêp hkra hã amnhĩ jarēnh kaprỳ. Mē pahpê Tĩrtũm krajaja na pu htem ã pakapēr anhỹr kêt nē.

27 Axtem mē pahte amnhĩ nhĩpêx. Na pu htem mē hã awrã rỳ mē kêp mē mjên tyk xwỳnhjê ho mex nē mē hã pahpēr o pahpikēnh o papa hkêt nē. Nē tanhmã mē kute hã mē omu nē mē ho ajuta ho papa. ã na pu htem pahpê Tĩrtũm krajaja amnhĩ nhĩpêx anhỹr o papa nhũm Mēpanhĩpêêxà Maati Tĩrtũm ja hã mē pahpumu nē hkĩnh nē. No na pu htem mē kot amnhĩ tomnuj o mē pa xwỳnhjê hkôt ri amnhĩ nhĩpêx kêt nē ãm Tĩrtũm kapēr xà kôt pix mã amnhĩ nhĩpêx nhũm amnhĩ tã mē pahpumu nē hkĩnh nē.

Xiakre 2

Mē pahte mē piitã mē hipêx o axpēn pyræk ã mē pamã karō

Rômãn 2.11; Korosê 3.25

1 E ixkwỳjaja. Pahihti Jejus Krisja mex o mex. Tã ra mē ate hkôt amnhĩ xunhwỳr jakamã kwa kêt ka mē apê hkwỳ hã mē piitã tãm mē hipêx o apa. Nē mē hipêx o axpēn pyræk.

2 Jakamã kot kaj mē nhỹrmã Tĩrtũm kapēr mar kaxyw axpēn wỳr akuprō nhũm hikàxpore rax xwỳnhhta mē akôt axà. ê mex nē ôr o ãhkra kamã kàx

hāmri nē mẽ akôt axà. Nhũm hkôt mēhõ pē amrakati xwỳnhja tē nē axà. Nom wamta kĩnhã kēp amrakati nē ê omnajti nē pikaxônhti. Hāmri nē hikàxpore rax xwỳnhhta hkôt mẽ awỳr tēn axà.

³Tã tanhmã kot kaj wem ri wa hipêx to? Xà kot kaj mẽ wa hipêx o axpēn pyràk nà? Nà xà kot kaj mẽ ã wa hipêx anē nē wam àr xwỳnhhta ê mex ã omunh xà hkôt kãm kadêre hõ gõ nē kãm: —E ota kadêre. Mãmri hã nhỹ. Anē. Hāmri nē ê pynajti xwỳnhhta pumu nē axtem nē kãm: —E atar pikap nhỹ. Anhỹr o ahpỳnhã wa kãm akapēr?

⁴Kot kaj mẽ ahpỳnhã ã wa hipêx anē nē amnhĩ tomnuj nē. Wam àr xwỳnhhta ka kãm akapēr mex nē tanhmã ho mex to. No hkôt hõta omnajti hã omunh xà hkôt te kamã anhõkre kahak pyràk o hipêx. Kot kaj mẽ ã ahpỳnhã wa hipêx anē nhũm Tĩrtũm tee ri ja hã mẽ apumu nhũm ja kēp omnuj nē.

⁵Kwa mẽ inhma ixkwỳjaja. Mẽ kēp amrakati xwỳnhjaja mẽ hikàxpore hkêt tã na hte mẽ hkwỳjaja amnhĩ kaxyw Tĩrtũm kôt hamaxpēr nē hkôt amnhĩ xunhwỳ nhũm amnhĩ tã mẽ omu nē kot mẽ panhĩpêx pyrà nē mẽ ho hkra. Jakamã jar mẽ kēp amrakati htã na htem amnhĩ kaxyw Tĩrtũm kôt hamaxpēr tỳx rãhã ho pa. Jakamã koja mẽ nhỹrmã kuri htĩr tũm nē mex kumrēx nē pa ho pa. Mẽ kãm Tĩrtũm kĩnh o mẽ pa xwỳnh piitã koja mẽ nhỹrmã ã mex nē ri pa anē.

⁶Nom kot kaj mẽ ahpỳnhã mẽ hipêx nē amnhĩ tomnuj nē. E pa mẽmoj tã mẽ akukja. Mẽmojaja na htem tanhmã mẽ ato hêx to? Nē mẽmojaja na htem juisti mã tanhmã mẽ ato kapēr punuj to? Xà mẽ kēp amrakati xwỳnhjaja? Nà mẽ tãm kêt. Mẽ hikàxpore rũnh xwỳnhjaja na htem ã mẽ anhĩpêx anhỹr o pa.

⁷Nē ra mẽ ate hkôt amnhĩ xunhwỳr xwỳnhja nhũm mẽ axtem nē tanhmã mẽ apê ho kapēr to ho pa. Tã ka htem mẽ kēp amrakati xwỳnhjê rom mẽ kãm akapēr mex nē mẽ kãm kadêre mex gõ nhũm mẽ hã hkrĩ.

⁸Tĩrtũm kapēr ã kagà htũm kot ja jarēnh kot: Kêr ka mẽ piitã mẽ hipêx o te ka amã amnhĩ tã ma pyràk. Anē. ã kot mẽ pamã karõ kot anhỹr. Kapērja

mex kumrêx. Kot puj mē ã axpēn nhîpêx anhÿr jao Tîrtûm kãm hprãm xà hkôt amnhî nhîpêx mex nê.

⁹Nom kot puj mē ã amnhî nhîpêx anhÿr kêt nê ahpÿnhã tanhmã mē hikàxpore rûnh xwÿnhjê ho mex to nê ahpÿnhã tanhmã mē kêp amrakati xwÿnhjê nhîpêx to japêr. Hã kot puj mē Tîrtûm kapêr htûmta nhîrôp pakuhê nê amnhî tomnuj nê.

¹⁰Kot pu mē kapêr tûm piitã hkôt ri amnhî nhîpêx mex o ri papa htã ãm pixire nê hirôp pakuhê. Jao te pahte kapêr piitã hirôp pakuhê pyræk.

¹¹Na pre Tîrtûm mē pahte mē pahprô pix tãnopxar o papa hã mē pamã karô. Nê mē pamjên pix tãnopxar o papa hã mē pamã karô. Nê mē pahte axpēn par nê mē pahkurê. Jakamã kot puj mē pahprô pix tãnopxar mex o ri papa japêr. Nê mē pamjên pix tãnopxar mex o ri papa japêr tã tanhmã pajamxpêr to nê pahkwÿjê hõxpî. Jao te Tîrtûm kapêr tûm piitã hirôp pakuhê hpar pyræk o amnhî nhîpêx.

¹²⁻¹³Koja nhÿrmã Tîrtûm mē pahtîr ri tanhmã axpēn nhîpêx to ho papa hã mē pahpumunh kôt tanhmã mē pajarênh to. Mē pamã axpēn kînh ã axpēn to mex o papa hã mē pahpumunh kôt mē pajarê rÿ mē pamã axpēn kînh kêt ã axpēn nhîpêx o papa hã mē pahpumunh kôt mē pajarê. Jakamã mē kamã mē ukaprî kêt xwÿnhjaja koja nhÿrmã ja hã mē omu nê mē uræk nê mē kamã ukaprî hkêt nê. Nom mē kamã mē ukaprî ho mē pa xwÿnhjaja koja ja hã mē omu nê mē uræk nê mē kamã ukaprî nê mē nê mē kot amnhî tomnuj piitã rênh pa. Jakamã kwa kêr ka mē amnhî to mex nê tãm axpēn nhîpêx o ri axpēn kôt apa. Nê axpēn mã akapêr mex nê axpēn kamã axukaprî pix kukamã ajamxpêr o apa.

Amnhî kaxyw Tîrtûm kôt mē hamaxpêr xwÿnhjê jarênh

Rukre 3.8-14

¹⁴Nê kwa ixkwÿjaja. Koja mēhõ kot amnhî kaxyw Jejus kôt hamaxpêr nê hkôt amnhî xãm ã amnhî jarênh tã hkôt ri amnhî nhîpêx kêt nê. Hã koja nhÿrmã ty hãmri nê tanhmã kot we amnhî to nê Tîrtûm mē Jejus wa kuri

htír tũm nẽ pa ho pa? Nà koja anhỹr kêt nẽ. Kêp hkra hã amnhĩ jarẽnh tã hkôt amnhĩ nhĩpêx kêt jakamã koja nhỹrmã wa hwỳr àpir kêt nẽ.

¹⁵Nẽ xà koja mẽhõ kêp amrakati nẽ ri pa. Nẽ ê pynajre pix jagjê nẽ ri hã pa. Nẽ õ hkêt nẽ ri kãm prãm nẽ pa.

¹⁶Ka mẽ ja hã omu nẽ tanhmã kãm akapêr to nẽ kãm: —Kwa ã amnhĩ nhĩpêx anhỹr kêt nẽ. Anhõrkwỹ hwỳr tẽn axê mex japêr nẽ axà nẽ amnhĩm mẽmoj japêr nẽ aku. Koja Tĩrtũm ato mex rax nẽ. Anhỹr o kãm akapêr tã kãm mẽmoj nhõr kêt nẽ. Tã xà koja we ama nẽ amar xà hkôt ê mex jagjê nẽ apkur mex o ri pa? Nà kot ka mẽ ã kãm akapêr anẽ nẽ ho ajuta hkêt nẽ nhũm arĩ kãm prãm nẽ ê hkêt nẽ omnuj nẽ ri pa. Na htem mẽ kapêr pix o mẽ ho mex kêt nẽ. Kot kaj mẽ ã kãm akapêr anẽ nẽ ãm kãm mẽmoj tã karõ kaprỳ.

¹⁷Ja pyrà nẽ koja mẽhõ ra amnhĩ kaxyw Jejus kôt hamaxpêr nẽ hkôt amnhĩ xãm ã amnhĩ jarẽnh tã kapêr kôt ri amnhĩ nhĩpêx kêt japêr. Hã koja ãm kêp hkra hã amnhĩ jarẽnh kaprỳ.

¹⁸Nẽ kot kaj mẽ atõ ã ajamaxpêr anẽ nẽ ajamaxpêr o: —Nà Jejus kwỳjaja na htem ahpỹnhã tanhmã amnhĩ nhĩpêx to ho pa. Na hte mẽ hkwỳjaja amnhĩ kaxyw Jejus kôt hamaxpêr tỳx pix o ri pa. Nẽ mẽ hkwỳjaja tanhmã hkwỳjê ho mex to ho ri pa. ã na htem ahpỹnhã tanhmã amnhĩ nhĩpêx anhỹr to ho pa. Anẽ. Kwa mẽ ri ã ajamaxpêr anhỹr kêt nẽ. Mẽ hkwỳjê ho mex o mẽ pa xwỳnhjaja na htem Tĩrtũm hkôt hamaxpêr pẽ mããnẽn hkôt amnhĩ nhĩpêx nẽ hkwỳjê ho mex o pa. Koja mẽhõ amnhĩ kaxyw Jejus kôt hamaxpêr hã koja mããnẽn hkôt amnhĩ nhĩpêx pẽ tanhmã hkwỳjê ho mex to ho pa. Na htem amnhĩ kaxyw hkôt hamaxpêr pix o pa hkêt nẽ. Na htem mããnẽn hkôt mẽ piitã mẽ ho mex o ri pa.

¹⁹Na ka hte mẽ akwỳjaja ã ajamaxpêr anẽ nẽ ajamaxpêr o: —Nà Tĩrtũmja pyxi mex o pyxi mex. Tã kot paj jam ijamaxpêr rãhã ho ri ixpa nẽ ra ixpê hkra hã ri ixpa. Nom kot paj kapêr kôt amnhĩ nhĩpêx o ri ixpa hkêt nẽ. Anhỹr o ajamaxpêr nẽ ã ajamaxpêr anhỹr kaprỳ. Nẽ ãm hãmri na ka htem Tĩrtũm pyxi mex o pyxi mex ã harẽ. Nom na htem jam hamaxpêr kôt pix mã kêp

hkra hkêt nê. Mëkarõmnutijaja na htem haxwỳja Tĩrtũm pyxi mex o pyxi mex kôt hamaxpêr tã mẽ kêp hkra hkêt. Na htem ã hamaxpêr anhỹr pê kãm uma ho pa.

²⁰ã mẽ ajamaxpêr anhỹrja mex kêt. Koja mẽhõ amnhĩ kaxyw Tĩrtũm kôt hamaxpêr ã amnhĩ jarênh tã hkôt amnhĩ nhĩpêx o pa hkêt japêr. Hãmri nê ãm amnhĩ kaxyw hkôt hamaxpêr ã amnhĩ jarênh hkapyr. E kot paj ixprĩ hã mẽ amã ja jarê ka mẽ inhma.

²¹Mẽ panhĩgêt finat Apraãw na pre amnhĩ kaxyw Tĩrtũm mã hamaxpêr nê hkôt ri amnhĩ nhĩpêx mex o pa. Tã nhũm amnhĩ tã kamã hamak kaxyw hkra Ijak ã kuwỳ nhũm kuma nê ra kot kãm hpĩr nê òr kaxyw nhũm Tĩrtũm amnhĩ tã omu nê amnhĩm mex ã harê. Hãmri nê kot hkra hpĩr nê kãm kapêr.

²²Ra kot amnhĩ kaxyw hkôt hamaxpêr nê hkôt amnhĩ xãm jakamã mããnên hkôt amnhĩ nhĩpêx nê ra kot kãm hkra nhõr kaxyw Tĩrtũm amnhĩ tã omu nê amnhĩm mex ã harê. Na pre ã finat Apraãw Tĩrtũm kapêr kôt amnhĩ nhĩpêx mex anhỹr o pa. Jao amnhĩ kaxyw hkôt hamaxpêr mex ã amnhĩ to amnhĩrĩt.

²³Nê kormã Apraãw wa hkra hkêt ri nhũm Tĩrtũm wa kãm hkra jarê nhũm kuma nê hkra hkukamã amnhĩ kaxyw Tĩrtũm kôt hamaxpêr tỳx o pa nhũm amnhĩ tã omu nê mex ã harê. Nê kêp hkràmnhwỳ hã harê. Kapêr ã kagà htũm kot ja jarênh kot: Na pre Apraãw hkra hkukamã amnhĩ kaxyw Tĩrtũm kôt hamaxpêr tỳx nhũm amnhĩ tã omu nê amnhĩm mex ã harê. Anê.

²⁴ã na pre finat Apraãwja hkra kaxyw Tĩrtũm kôt hamaxpêr anhỹrja o ra hkôt amnhĩ nhĩpêx nê ra kot kãm hpĩr kaxyw. Nom kop apu amnhĩ kaxyw hkôt hamaxpêr pix nê hkôt amnhĩ nhĩpêx kêt ronhỹx pre Tĩrtũm tee ri amnhĩ tã omu nê amnhĩm mex ã harênh kêt nê. Na htem amnhĩ kaxyw Tĩrtũm mã hamaxpêr nê mããnên hkôt ri amnhĩ nhĩpêx mex o pa nhũm amnhĩ tã mẽ omu nê amnhĩm mẽ mex ã mẽ harê.

²⁵Mẽhõ ni kuprỳ finat Raapja na pre ã amnhĩ nhĩpêx anê nê amnhĩ kaxyw Tĩrtũm kôt hamaxpêr pê tanhmã hkôt amnhĩ nhĩpêx to ho pa. Na pre Ijaew myja wa hamêxkrut nê ma Raap nhõ krĩ hwỳr wa tẽ. Mẽ hã ukapi nê kot

mě hkurê kaxàr kaxyw mẽ hwỳr wa tẽ. Hãmri nhũm Raap Tĩrtũm kot wa mẽnh ã wa omunh kurê kumrẽx nẽ p̄risti kot tanhmã wa ho pymaj amnhĩ nhõrkwȳ kamã mẽ kêp wa ho amũxu nẽ wa nẽ mẽ kãm tanhmã hêx to. Nẽ hpãnhã nhãm pry hõ hkõt akupỹm wa kumẽ nhũm wa hkà hkĩnh pẽ ma akupỹm mex nẽ tẽ. Hãmri nhũm Tĩrtũm wa hã Raap pumu nẽ amnhĩm mex ã harẽ.

²⁶Tã kot kaj mẽ atõ amnhĩ kaxyw Tĩrtũm kõt ajamxp̄r ã amnhĩ jarẽnh tã hkõt amnhĩ nhĩpêx kêt japêr. Hãmri nẽ apê hkra hã amnhĩ jarẽnh kaprỳ. Te ra mẽhõ htyk nẽ nõr tã nhũm mẽ kot arĩ htĩr ã harẽnh kaprỳta pyræk.

Xiakre 3

Mẽ kot Tĩrtũm kapêr o mẽ ahkre xwỳnhjê jarẽnh

¹Nẽ kwa Kris kõt ixkwỳjaja. Mẽ axohtõ nẽ mẽ amã Tĩrtũm kapêr o mẽ ahkre hprãm tã kormã ja kaxyw mẽ apiitã mẽ amex kêt. Mẽ ixte Tĩrtũm kapêr o mẽ ajahkre xwỳnhjaja kot paj mẽ tanhmã amnhĩ tomnuj to japêr nhũm Tĩrtũm ja hã mẽ ixpumu nhũm ja kêp omnuj nẽ. Mẽ ixte kapêr o mẽ ajahkre ho mẽ ixpa kênã kot pa hkêt mẽ ri tanhmã amnhĩ tomnuj to ho ri ixpa. Jakamã kot kaj mẽ Tĩrtũm kapêr piitã hkõt ri amnhĩ nhĩpêx mex nẽ rĩ kormã ho akwỳjê jahkre ho ri apa.

²Nẽ mẽ pahpiitã na pu htem tõhã mẽ pajakwa ho tanhmã amnhĩ tomnuj to. Mẽmoj tã axpên kãm pagryk nẽ tanhmã mẽ kãm pakapêr punuj to. Nom koja mẽhõ tanhmã kapêr punuj toja nẽ amnhĩ to htỳx nẽ hãmri nẽ tãm amnhĩ nhĩpêx o pa.

Mẽ pajakwa jarẽnh

Epes 4.29

³Na htem nhỹhỹm kawar o juk kaxyw hakwam kàx jagjê nẽ kãm nhỹhỹm o htêm prãm xà hkõt ma nhỹhỹm ho juk o tẽ. Kàxja hkryre nhũm kawar rũnh tã no nhũm kãm ma nhỹhỹm ho mrar prãm xà hkõt ho juk o mra.

⁴Nẽ gô xujanãr kãm pàr rũnh ta rũnh tã na hte kòk àpêr tỳx nẽ ma nhỹhỹm o pa. Nẽ pĩ ho pàr o juk xàta hkryre htã ma nhỹhỹm ho juk o mõ. Nhỹhỹm pàr o mrar xwỳnh kãm o mõr prãm xà hkõt o mõ.

⁵Ja pyrà nê mẽ pajakwaja hkryre htã na htem ho kapêr o tanhmã mẽ hipêx to ho pa. Tõhã ho kapêr mex nê nhũm mẽ kuma nê hkĩnh nê. Nê tõhã ho kapêr punuj nê nhũm mẽ tee ri mẽ kapêr ã mẽ kuma nê hkaprĩ nê rỳ kapêr xwỳnhhta kamã gryk nê. Mẽ pajakwa hkryreja te kot kuwy jakrax kryre pyræk. Kot ka kuwy jakrax grille ho tẽ nê nhỹri põti kamã amẽ nhũm kôk ho apê nhũm hpôk rax tokyx anê. Hãmri nê ma pà ho hkaxàr par o mỗ nê ho hkaxàr pa.

⁶Mẽ pajakwaja mã kot anhỹr. Kot kaj atỳx ri tanhmã ho akapêr punuj to nhũm mẽ ama nê axpẽn mã anhĩxi ho krĩ nhĩpêx ka amex kêt nê apa. Rỳ ka atỳx ri ajakwa ho tanhmã akwỳjê ho akapêr to nhũm mẽ tee ri amnhĩ tã ama nê hkaprĩ nê rỳ akamã gryk nê. Satanasti nhỹ hã na htem ã mẽ hakwa ho kapêr punuj anê.

⁷Na htem tõhã mẽmo mry xoprê pynê nê tanhmã ho nê ra ho kãm ma hkêt. Kagã rỳ hagrôre rỳ àati rỳ gôx kãm mẽmo mryja nhũm htem unê nê tanhmã ho nhũm kãm ma hkêt nê mẽ hkôt pa ho pa. Nom na htem mry piitã ã hipêx anhỹr kêt nê.

⁸Tã mẽ pajakwa te mẽ kot tee ri mẽmo mry ho kãm ma hkêt kaprỳ xwỳnhhta pyræk. Na pu htem amnhĩ krã hkôt pajakwa ho pakapêr mex pix kêt nê. Tanhmã kot puj mẽ pakapêr punuj kêt kaxyw amnhĩ jakwa hto? Mẽ pakapêr punuj te kot kagã xoprê kot mẽ hkamnhar nê õ wenên o mẽ hparta pyræk.

⁹⁻¹⁰Na pu htem tõhã pajakwa ho tãm pakapêr nê tõhã pakapêr punuj nê. Nê tõhã Pahi Maati Tĩrtũm mã mex o mex ã harênh tã ra axtem nê tanhmã mẽhõ japrỳ hto. Tĩrtũm kot mẽ pahto amnhĩ pyrà nê mẽ panhĩpêx tã pu htem axtem nê tanhmã axpẽn japrỳ hto ho ri papa. Jao te pahte Tĩrtũm japrỳ pyræk. Kwa ixkwỳjaja. Kêr pu mẽ pahpê Tĩrtũm krajaja ã pakapêr punuj anhỹr hkêt nê. ãm mẽ pajakwa ho mẽmoj mex pix jarênh o ri papa.

¹¹⁻¹²Xà koja pà kamã hinore pyxi htã kamã gô xành nê mããnên kamã gô xenh nōkati? Nà koja anhỹr kêt nê. Na hte kamã gô mex pix nê rỳ kamã gô xenh nōkati pix nê. Nê xà koja jààxô hpàr ã rãrãj harir? Rỳ ahkrô xô hã mánkwrỳtre harir? Nà na hte ahpỹnhã hpàr ã harir. Ja pyrà nê kêr pu mẽ

pahpê Tirtûm krajaja pajakwa ho pakapêr punuj pê ho papikamÿr tÿx nê. Nê te hinore kamã gô mex pixta pyrà nê êmoj mex pix jarênh o ri papa. No mê pajakwa nhîkjê ho tãm pakapêr nê hikjê ho pakapêr punuj kêt nê. ãm pakapêr mex pix o pakapêr o ri papa. Kwa kêr pu mê ã amnhî nhîpêx anhÿr rãhã ho papa.

Tirtûm kôt mê àhpumunh xwÿnhjê jarênh

Wam Korîit 2.6-16

¹³Nê kwa mê axàhpumunh tÿx xwÿnhjaja kêr ka mê amnhî to mex o ri apa. Nê mê piitã tãm mê hipêx mex nê mê amã axpên japê hã axpên to ajuta mex o ri apa. Tirtûm kapêr xà hkôt. Kot kaj mê ã amnhî nhîpêx anê nê axàhpumunh mex ã amnhî to amnhîrît.

¹⁴Nom kot ka mê mêmoj tã axpên kamã agryk o ri apa. Rÿ amnhî pix kukamã ajamaxpêr o ri apa hãmri nê ãm ate Tirtûm kapêr kôt amnhî nhîpêx ã amnhî jarênh kaprÿ.

¹⁵ã mê kot amnhî nhîpêx anhÿr xwÿnhjaja na htem Tirtûm kôt amnhî nhîpêx kêt nê. Mê kêp Tirtûm kra hkêt xwÿnh pixjaja na htem ã amnhî nhîpêx anhÿr o pa. Jao mêkarõmnuti kot amnhî nhîpêx kôt pix mã amnhî nhîpêx o pa.

¹⁶Axpên kamã mê gryk o mê pa xwÿnhjaja na htem amnhî pix kukamã hamaxpêr jao tanhmã amnhî tomnuj to ho pa. Nê amnhî tã mê kamã mê gryk xwÿnhjê homnuj o pa. Tã ã mê pahte amnhî nhîpêx anhÿr pumaj kwa kêr pu mê mêmoj tã axpên kamã pagryk o ri papa hkêt nê.

¹⁷Mê kot Tirtûm kôt amnhî nhîpêx xwÿnhjaja na htem jajê rom tãm axpên nhîpêx rãhã o pa. Nê axpên kamã ukapri pix o ri axpên kôt pa. Nê tãm hamaxpêr o pa. Nê mê piitã mê hipêx o axpên pyræk. Nê axpên tã hpijaàm o ri pa. Nê tanhmã ri axpên no kupyry to hkêt nê. Nê ri oprê ho pa hkêt nê. Nê mê axpên kamã ôkre kahak kêt nê. Nê mê piitã mê ho mex o axpên pyræk. Nê tãm mê piitã mê hipêx rãhã nê. ã na htem Tirtûm kôt mê kot amnhî nhîpêx xwÿnhjaja amnhî nhîpêx anhÿr o pa.

¹⁸Kot puj mẽ ã amnhĩ nhĩpêx anẽ nẽ pajamakêtkati nẽ paxàmnhĩx pahkĩnh nẽ ri papa. Nhũm nhỹri mēhõ wa axpẽn kãm gryk pu mẽ wa omu rỳ wa harēnh ma hāmri nẽ mẽ pahtõ ma wa hwỳr tẽ nẽ wa kãm pakapēr nẽ tãm akupỹm wa ãm. Hāmri nhũm wa ra mẽ pahpyrà nẽ tãm amnhĩ nhĩpêx pẽ hamakêtkati nẽ wa ri pa. àmnhĩx ri hkĩnh nẽ wa ri pa.

Xiakre 4

Mẽ kot amnhĩ pix kukamã mẽ hamaxpēr xwỳnhjê jarēnh

Matêwre 20.20-28; Juãw 16.24

¹Nẽ kwa mon ka hte mẽ akwỳjaja axpẽn mã akapēr mã agêt o axpẽn kãm agryk pix o apa? Na ka htem ã amnhĩ nhĩpêx anhỹr o amnhĩ pix kukamã ajamaxpēr. Nẽ mẽ amã amnhĩ jamaxpēr kôt pix mã ri amnhĩ nhĩpêx prãm. No Tĩrtũm kãm hprãm xà hkôt amnhĩ nhĩpêx prãm kêt nẽ.

²Na ka htem nhỹri mẽmoj pumu nẽ tee ri ho amã anhõ hprãm kaprỳ. Nẽ amã ho anhõ hprãm xàj õ xwỳnhhta pĩr nẽ kêp utàr mã. Nẽ na ka htem tanhmã axpẽn kukrêx kute hã omu nẽ amã ho anhõ hprãm nẽ hã õ xwỳnhhta mẽ wa axpu. No mẽ amã hprãm xwỳnhhta mẽ ate hõ hã Tĩrtũm wỳr ronhỹx ra mẽ ama nẽ mẽ amã hõ gõ. Tã mẽ ate hã axàhwỳr kêt jakamã nhũm mẽ amã õr kêt nẽ.

³Rỳ ka mẽ tõhã mẽmoj tã awỳ nhũm kot mẽ amar tã mẽ amã õr kêt nẽ. Kot mẽ amã õr nhũm mẽ ate ho anhõxỳ ho apa pymaj na hte tõhã mẽ amã mẽ ate hã axàhwỳr xwỳnhhta nhõr kêt nẽ.

⁴Kormã mẽ ate hkôt amnhĩ nhĩpêx mex kêt. Te mẽni hõ ra mjên tã nhãm kot mēhõ my ho amnhĩkati pyræk o na ka htem amnhĩ nhĩpêx o apa. Jao mẽ amã mẽ apê Tĩrtũm kra hprãm tã axtem nẽ mẽ kãm hprãm kêt xwỳnhjê hkôt amnhĩ nhĩpêx o ri apa nẽ mẽ uræk nẽ tanhmã amnhĩ tomnuj to ho ri apa. Nẽ mẽ ate amnhĩ tomnuj gryk ã mẽ amã Tĩrtũm prãm kêt ã amnhĩ to amnhĩrĩt.

⁵Tĩrtũm kapēr ã kagà htũm kot tanhmã Karõ jarēnh to nẽ harēnh kot: Na pre Tĩrtũm mẽ pahwỳr amnhĩ Karõ rẽ nhũm mẽ pahwỳr wrỳ nẽ mẽ pakamã agjê nẽ mẽ pahkôt pa ho pa. Mẽ pahte hkôt pix mã amnhĩ nhĩpêx o papaja

na kãm hprãm. Anẽ. ãm hãmri ã harẽnh kot anhÿr jakamã kwa kêr ka mẽ harẽnh ma nẽ kãm ajamaxpër tÿx rãhã ho ri apa.

⁶Na hte Tirtũm mẽmoj to mẽ pakutã nojarêt rãhã pu mẽ ÿ hã tãm amnhĩ nhĩpêx o ri papa. Kapër ã kagà kot ja jarẽnh kot: Mẽ kãm Tirtũm kôt amnhĩ nhĩpêx prãm kêt xwÿnhjaja na hte Tirtũm amnhĩ tã mẽ omu nẽ mẽ kutã amnhĩ xunhwÿ. No mẽ kãm hkôt ri amnhĩ nhĩpêx prãm xwÿnhjaja na hte amnhĩ tã mẽ omu nẽ mẽ ho mex o pa nhũm htem hihtÿx xà nhÿ hã mẽ kãm hprãm kêt xwÿnhjê hkôt ri amnhĩ nhĩpêx kêt nẽ. Anẽ.

⁷Jakamã kwa kêr ka mẽ Tirtũm kapër kôt pix mã mãn ri amnhĩ nhĩpêx o ri apa. Kêr kê Satanasti tanhmã mẽ ate amnhĩ tomnuj to hprãm xàj tanhmã mẽ ato ka mẽ Tirtũm Karõ nhÿ hã ãm ama nẽ hkôt amnhĩ nhĩpêx kêt nẽ. Nhũm tee ri amã àhkrox kaprÿ nẽ akaga nẽ ma tẽ.

⁸Nẽ kot kaj mẽ Tirtũm kapër kôt pix mã ri amnhĩ nhĩpêx o apa nhũm amnhĩ tã mẽ apumu nẽ te kot mẽ apa hã mẽ ajamÿnh nẽ mẽ ato pa pyræk o mẽ anhĩpêx. Jao mẽ ato mex o ri mẽ akôt pa ho pa. Nẽ mẽ atãnopxar rãhã ka mẽ ajamakêtkati nẽ akĩnh nẽ ri apa. Nẽ kêr ka mẽ tanhmã amnhĩ tomnuj to hãmri nẽ tee ri ja hã amnhĩ pumu nẽ hkaga kurê kumrêx nẽ axte ã amnhĩ nhĩpêx anhÿr kêt nẽ. Rÿ ka mẽ tanhmã ajamaxpër punuj to hãmri nẽ ja hã amnhĩ pumu nẽ hkaga nẽ hpãnhã tãm ajamaxpër pix o ri apa. Mẽ apê Tirtũm kra hã kêr ka mẽ ãm hkôt pix mã ri tãm amnhĩ nhĩpêx o ri apa.

Mẽ pahte amnhĩ tomnuj ã tanhmã amnhĩ nhĩpêx to hã mẽ pamã karõ

Wam Juãw 1.5-10

⁹Nẽ kêr ka mẽ tee ri ate tanhmã amnhĩ tomnuj to hã amnhĩ pumu nẽ akaprĩ xàj mur nẽ akĩnh kêt nẽ. Nẽ akaprĩ xàj amÿr rax nẽ.

¹⁰Hãmri nẽ Tirtũm mã amnhĩ jarẽnh o: —Pa Tirtũm. Na pa ã amnhĩ tomnuj anẽ. Nom kot paj axte hkêt nẽ. ãm inhmã akapër kôt pix mã ri amnhĩ nhĩpêx prãm. Anhÿr o kãm akapër kê mẽ ama nẽ mẽ ate amnhĩ tomnujta ã tanhmã mẽ ato hkêt nẽ. ãm mẽ ato mex nẽ ka mẽ akupÿm ajamakêtkati nẽ axãmnhix akĩnh nẽ ri apa.

Mẽ pahte axpën to pakapër nê mẽ pahkurê

Matêwre 7.1-5; Rõmãn 2.1-3; 14.10-13; Wam Korit 4.5

11E ixkwỳjaja. Kwa kêr ka mẽ anhiõ kot tanhmã amnhĩ tomnuj to hã omu nẽ tanhmã ho akapêr punuj to hkêt nẽ. Tĩrtũm kapêr ã kagà htũm kot ja nẽ mẽ pahkurê kamã hihtỳx jakamã kot ka mẽ ri ã amnhĩ nhĩpêx anẽ nẽ te ate Tĩrtũm kapêr tũm kwỳ omnuj ã harênh pyræk. Rỳ te axàhpumunh tỳx o ate Tĩrtũm jakrenh ã amnhĩ to jarkrar pyræk. Jao kapêr kôt amnhĩ nhĩpêx kêt nẽ. Na htem Tĩrtũm kapêr ã kagà htũm kwỳ mex ã harẽ nẽ hkwỳ omnuj ã harênh kêt nẽ. Piitã mex kênã.

12Nẽ Tĩrtũmja tapxipix na kêp mẽ pahto amnhĩptàr xwỳnh maati. Nẽ tapxipix na hte mẽ pahte tanhmã amnhĩ nhĩpêx to hã mẽ pahpumunh hkôt tanhmã mẽ pajarênh to. Mẽ pahte amnhĩ to mex xwỳnh ã mẽ pajarẽ rỳ mẽ pahte amnhĩ tomnuj xwỳnh ã mẽ pajarẽ. ãm tapxipix kot ã mẽ pajarênh kot anhỹr xwỳnh. Tã ka mẽ axtem nẽ kapêr kwỳm ri tanhmã akwỳjê ho akapêr punuj to ho ri apa.

Mẽ pahte Tĩrtũm mã pajamaxpêr pê kãm amnhĩ jarênh ã mẽ pamã karõ

Rukre 12.13-21

13E kwa mẽ inhma ixkwỳjaja. Na ka hte mẽ akwỳjaja tanhmã amnhĩ kukamã ajamaxpêr to nẽ akwỳjê mã amnhĩ jarênh o: —Koja apkati pa ma krĩ hõ hwỳr mō nẽ kamã mẽ kãm ixàpênh o ixpa hã ixtã amgrà pyxi nẽ hpãnhã kàxpore jamỳnh rax nẽ man akupỳn mō. Anhỹr o amnhĩ jarẽ.

14Kwa mẽ ã amnhĩ kukamã amnhĩ jarênh anhỹr kêt nẽ. Mẽ pahtõ mẽ pahte amnhĩ kukamã paxàhpumunh mex? Amrakati kênã. Kot ka mẽ ã amnhĩ kukamã amnhĩ jarênh anhỹr tã kormã ã amnhĩ nhĩpêx anhỹr kêt ri tanhmã amnhĩ to nẽ ty. Rỳ tanhmã amnhĩ to nẽ axà hãmri nẽ nhỹhỹm amõr kêt nẽ. Te mẽ pahpê namê pyræk na pu htem ri papa nẽ tanhmã amnhĩ to nẽ ty nẽ pajapêx tokyx anẽ.

15Jakamã mẽ ã amnhĩ kukamã amnhĩ jarênh anhỹr kêt nẽ. Kêt amnhĩ jarênh o: —Koja Tĩrtũm kãm ja prãm koja apkati pa ã amnhĩ nhĩpêx anẽ nẽ ã amnhĩ nhĩpêx anẽ. Anhỹr o Tĩrtũm kamnàr o tanhmã amnhĩ kukamã amnhĩ jarênh to.

¹⁶No mẽ ate amnhĩ krã hkôt amnhĩ kukamã amnhĩ jarēnhhta Tĩrtũm jamaxpěr xà hkôt kêt. ãm amnhĩ krã hkôt mẽ ate amnhĩ kukamã amnhĩ jarēnh kēnã. ã mẽ ate amnhĩ jarēnh anhỹrja mex kêt.

¹⁷Ně mẽ kot tãm amnhĩ nhĩpêxja kot kaj mẽ ate mar mex tã hkôt amnhĩ nhĩpêx kêt japêr hãmri nẽ amnhĩ tomnuj o apa.

Xiakre 5

Mẽ hikàxpore rũnh xwỳnhjê jarēnh

Rukre 12.13-21; Wam Ximotre 6.9-10; Apokarip 18.14

¹Ně kwa mẽ akàxpore rũnh xwỳnhjaja. Mẽ inhma nẽ inhmar tỳx nẽ. Nhỹrmã mẽ amex kêt jakamã kwa mẽ tee ri amnhĩ kukamã ajamaxpěr o ra akapřĩ nẽ amỳr o apa kurê kumrêx.

²Tĩrtũm noo mã mẽ akàxpore te ra mẽ apê hapêx par pyræk. Te ra mẽ anhỹ kamã mẽ ate amnhĩ tomnuj xwỳnh ã kutã akrĩ pyræk.

³Mẽ ate mẽ akukrêx nẽ mẽ akàxpore ho apikuprõnh rũnh tã ka htem mẽ akwỳjê pê ho anhõxỳ ho ri apa. Mỳrapê koja nhỹrmã tanhmã mẽ apê amnhĩ to nẽ omnu pa ka mẽ ho apikuprõnh rax kapřỳ. Hãmri nẽ mẽ ate amnhĩ tomnuj mỳrapê Tĩrtũm mẽ Kra wa kuri atĩr tũm nẽ apa ho apa hkêt nẽ. ãm kuwy kamã mẽ amnhĩ xà htỳx kamã ajamak rãhã ho ri apa.

⁴Na ka htem apur kãm mẽ àpênh xwỳnhjê mã amnhĩrer kêt nẽ. Nhũm mẽ tee ri amnhĩ tã mẽ ajamã hãmri nẽ mẽ atã amnhĩ to Pahi Maati Tĩrtũm xihtỳx xwỳnhhta wỳr o pa nhũm mẽ atã mẽ kuma.

⁵Mẽ akĩnhã mẽ kêp amrakati htã ka htem ãm ja hã mẽ omu nẽ mẽ àpênh pãnhã mẽ kãm amnhĩrer kêt nẽ amnhĩ pix kukamã ajamaxpěr. Nẽ amã prãm xà hpix kukamã amnhĩm mẽmoj japrôr pê akĩnh o ri apa. Jao te mẽ apê môx htwỳm nhũm mẽ kot hpĩr nẽ hkrêr mã mex ã harēnh xwỳnhhta pyræk. Mỳrapê kot kaj mẽ môxta pyrã nẽ nhỹrmã ty hãmri nẽ Tĩrtũm mẽ Kra wa kuri atĩr tũm nẽ apa ho apa hkêt nẽ.

⁶Nom ja pix kêt. Na ka htem mẽ anhõ krĩ kamã mẽ anhõ pahi mã tanhmã akwỳjê ho axêx to ho ri apa. Mẽ kot tanhmã atomnuj to hkêt tã ka mẽ kãm

mě ho axêx rûnh nê. Tã koja nhÿrmã Tÿrtũm mẽ hã tanhmã mẽ ato rax kumrêx ka mẽ rĩ amnhĩ pumu.

Mě pahte Jejus kutêp amnhĩ kaxyw kãm pajamaxpêr o papa hã mẽ pamã karõ
Sikũn Pêtre 3.1-13

⁷E ixkwÿjaja. Koja mēhõ tanhmã mẽ atomnuj to htã ka mẽ arĩ amnhĩ kaxyw Jejus mã ajamaxpêr rãhã ho ri apa. Pê akupÿn hpôx xà hã arĩgro jamãr rãhã nê. Te pur nhõ dõn kot amnhĩ nhĩpêx pyræk. Koja hpur kãm ahkre nê ahkre hpa hãmri nê arĩ hamãr o pa nê kãm nojarêt kêt nê hã na wrÿk jamãr o pa. Jao hamakêtkati nê ô jamãr rãhã ho pa.

⁸Tã kêr ka mẽ uræk nê arĩ Pahihti akupÿn hpôx xà hã arĩgro jamãr rãhã ho ri apa. Koja tokyx akupÿn mẽ pahwÿr wrÿ. Jakamã kêr ka mẽ kutêp mẽ kot mẽ atomnuj xwÿnhjê kutã amnhĩ to htÿx nê ri apa. Nom tee ri amnhĩ kukamã ajamaxpêr o Jejus kaga hkêt nê. Arĩ hamãr pê akĩnh nê ajamakêtkati nê ri apa. Koja akupÿn mẽ pahwÿr wrÿ nê mẽ pahto mex rax kumrêx.

⁹Nê kêr ka mẽ axpên to akapêr o ri apa hkêt nê. Kot ka mẽ ã amnhĩ nhĩpêx anê nhũm Tÿrtũm mẽ ama nê tanhmã mẽ ajarênh to. Kot mẽ pahpumunh xà hkôt tanhmã mẽ pajarênh to xwÿnh na. Tã ra tanhmã kot mẽ pahpiitã mẽ pajarênh to xà hã arĩgroja ra ahtêp o mõ.

¹⁰E ixkwÿjaja. Kêr ka mẽ wam mẽ kot Tÿrtũm nhÿ hã kapêr jarênh xwÿnhjaja kot amnhĩ nhĩpêx mã ajamaxpêr rãhã nê. Na prem Tÿrtũm nhÿ hã mẽ kãm kapêr o ri mẽ hkôt pa nhũm mẽ hkwÿjaja ja hã tanhmã mẽ hipêx to nhũm mẽ amnhĩ xà htÿx kamã hamak rãhã ho pa. Tã tee ri amnhĩ kukamã hamaxpêr pê Tÿrtũm kaga hkêt nê. Na prem arĩ ÿ hã kapêr jarênh rãhã ho ri mẽ hkôt pa. Tã kêr ka mẽ kot amnhĩ nhĩpêx pyræk o amnhĩ nhĩpêx nê Tÿrtũm kaga hkêt nê.

¹¹Na prem amnhĩ xà htÿx kamã hamak o pa rãhã ty hãmri nê Tÿrtũm kuri mex nê hkĩnh nê pa ho pa. Ra mẽ ate finat Johti jarênh mar mex. Na pre omnuj tÿx nê pa htã amnhĩ tã Pahi Maati Tÿrtũm kamã gryk nê hkaga hkêt nê. Hãmri nhũm amnhĩ tã omu nê gaa nê ho mex rax nê nhũm akupÿm mex

kumrëx nê pa. Pahi Maatija ukaprĩ ho ukaprĩ nê mex o mex jakamã na pre ã Johti ho mex anê. Tã koja ho mexta pyrã nê ã mẽ pahto mex anê.

Mẽ pahte tanhmã amnhĩ nhĩpêx to hã mẽ pamã karõ

Matêwre 5.33-37; 18.15; Rõmãn 12.15; Karatas 6.1-2; Jutre 22-23

¹²E ixkwỳjaja. Pa mẽ amã mẽmoj jarê ka mẽ inhma nê inhmar tỳx nê. Kêr ka mẽ mẽmoj tã amnhĩ jarênh kaxyw hãmri nê akatàt kôt amnhĩ jarênh kurê kumrëx. Nê amnhĩ jarênh o: “Nà kot paj ja ho anê.” Anê. Rỳ amnhĩ jarênh o: “Nà kwarĩ pa ja ho anhỳr kêt nê.” Anhỳr o amnhĩ jarênh kurê kumrëx. Kê mẽ akwỳjaja ãm hãmri mẽ ate amnhĩ jarênh ã mẽ apumunh kurê kumrëx nê axêx ã mẽ akamnhĩx kêt nê. Mẽ apê Tĩrtũm kra kênã kot ka kêt mẽ ri axtem nê amnhĩ jarênh o axêx.

¹³Nê koja mẽ anhĩõ mẽmoj tã tanhmã amnhĩ to nê omnuj nê. Ka mẽ ja hã omu nê kãm anê kê amnhĩ kaxyw Tĩrtũm mã hamaxpêr pê amnhĩ to hwỳr rãhã ho pa. Rỳ koja hkĩnh nê ri pa ka mẽ ja hã omu nê kãm anê kê hkĩnh kãm mex o mex ã grer o pa.

¹⁴Rỳ koja à nê nõ ka mẽ ja hã omu nê kãm anê kê amnhĩ wỳr pastô nhỹ hã mẽ kapêr xwỳnh kwyjê hã karõ. Kê mẽ hwỳr mra nê Jejus nhỹ hã mẽmo twỳm kwỳ ho hkukõ nê ho Tĩrtũm wỳ.

¹⁵Kê mẽ ã mẽ à xwỳnhjê hwỳr mrar nê mẽ ho Tĩrtũm wỳr o pa anê. Koja mẽ ho kuwỳ nhũm mẽ kuma nê akupỹm mẽ ho mex. Nhũm mẽ tanhmã amnhĩ tomnuj to japêr kê mẽ ja hã amnhĩ jarê kê Tĩrtũm mẽ kuma nê ja hã tanhmã mẽ ho hkêt nê.

¹⁶Jakamã kêr ka mẽ atõ tanhmã amnhĩ tomnuj to nê tee ri ja hã amnhĩ pumu hãmri nê tokyx akwỳjê mã amnhĩ jarê kê mẽ tokyx ato Tĩrtũm wỳ. Kê atã mẽ kuma nê tanhmã akrã hto ka axte ã amnhĩ nhĩpêx anhỳr kêt nê. Nê ra amex nê apa. Nê koja mẽhõ Tĩrtũm kôt pix mã amnhĩ nhĩpêx mex rãhã ho pa. Hãmri nê mẽmoj tã kuwỳ nhũm kuma nê kãm tanhmã mẽmoj to.

¹⁷Te finat Eris kot mẽmoj tã hwỳr nhũm kot mar nê kãm ho anhỳrta pyrãk. Erisja kêp mẽ panhĩõ na pre. Tã na pre hkwỳjaja amnhĩ tomnuj pix o pa nhũm tee ri mẽ omu nê mẽ hã na wrỳk kêt kaxyw ho Tĩrtũm wỳr kãm hihtỳx

ně. Hāmri nhūm kuma ně kām ho aně nhūm na wrỳk kêt ry rax kumrěx. Hã amgrà axkruněpxi ně hkôt mytwrỳ kêp 6. Mě kot amnhĩ tomnuj tỳx o paja mỳrapê.

¹⁸Tã nhūm Eris axte mẽ ho kuwỳ nhūm axte mẽ hwỳr na rě nhūm akupỹm katàt kôt wrỳk mex ně. Nhūm akupỹm mẽ hpur kām mẽ òja mẽ kām mex ně akupỹm mẽ kām ô rũnh ně. Tã ã Tĩrtũm kot Eris mar ně kām mẽmoj nhĩpêx anhỹrja pyrà ně koja mẽ pama ně mẽ pamã mẽmoj tanhmã ho.

¹⁹Ně e mẽ inhma ixkwỳjaja. Koja mẽhõ Tĩrtũm kapěr mar tỳx ně te kêp hkra pyràk o amnhĩ nhĩpêx. Tã tanhmã hamaxpěr to ně kapěr kaga ně htỳx ri amnhĩ tomnuj pix o pa. Ka mẽ ja hã omu ně hwỳr mra ně kot amnhĩ tomnuj nê kām akapěr kām axihtỳx kê tokyx hkaga ně akupỹm Tĩrtũm kôt amnhĩ xãm tỳx ně ãm hkôt pix mã amnhĩ nhĩpêx.

²⁰Koja amnhĩ tã mẽ ama ně Tĩrtũm kôt amnhĩ xãm tỳx nhūm amnhĩ tã omu ně kot tanhmã amnhĩ tomnuj tota ho hamakêtkati ně amnhĩ katut kôt kurě nhūm nhỹrmã kuri htĩr tũm ně mex ně pa ho pa. Koja amnhĩ tomnuj tỳx o pa htã hkaga hpa nhūm Tĩrtũm ja hã omu ně hã tanhmã ho hkêt ně axte tanhmã kot amnhĩ tomnuj tota mã hamaxpěr kêt ně. Tã ãm ja pix. Ixpê Xiakre na pa ã mẽ awỳr kagà nhĩpêx ně mẽnh aně.

Wam Pêtre

Wam Pêtre 1

¹Pa mẽ ate Jejus kôt amnhĩ xunhwỳr nhũm Tĩrtũm kot mẽ ato hkra xwỳnhjaja. Xà mẽ amex? Ot pa mẽ awỳr kagà nhĩpêx nẽ kumẽ. Ixpê Simãw Pêtre na pa. Ixte Jejus nhỹ hã hkrajê jahkre ho mẽ ixpa xwỳnhjê hõ na pa mẽ awỳr kagà nẽ kumẽ. Na xep pre Kris ã mẽ kãm mẽ pahkurê xwỳnhjaja tanhmã mẽ anhĩpêx to ka mẽ panhõ pika rũm mẽ umaj anhrà nẽ ma ahpỹnhã krĩ hkôt ri apa. Jao mẽ akwỳjaja ma pika pê Põt kamã krĩ hkwỳ hkôt apa. Nẽ mẽ akwỳjaja pika pê Karatas wỳr apa. Nẽ mẽ akwỳjaja pika pê Kapatos wỳr apa. Nẽ mẽ akwỳjaja pika pê As wỳr apa. Nẽ mẽ akwỳjaja Pitĩn wỳr apa. ã ahpỹnhã pika hkôt mẽ apigrành par anẽ. Tã ot pa mẽ awỳr kagà nhĩpêx nẽ mẽ apiitã mẽ awỳr kurẽ. Mẽ apỹnh nẽ mẽ ate kamã harẽnh nẽ ixkapêr mar kaxyw.

²Na pre Mẽpahpãm Tĩrtũmja amnhĩm mẽ pahte amnhĩ kaxyw kãm pajamxpêr xwỳnhjê rê nẽ mẽ pahtã amnhĩ jarẽnh o: —Kot paj jajê ho ixkra. Na pre ra Ixkra Jejus Kris ixpê mẽ nê ty nẽ htyk o hkamrô axkapĩ nhũm mẽ harẽnh ma nẽ hkôt amnhĩ xunhwỳ. Tã nhũm Ixkarõ mẽ hkarõ mã agjê nhũm mẽ ra inhmã hprãm xà kôt pix mã ri inhmã tanhmã amnhĩ nhĩpêx to ho pa. Anhỹr o mẽ pahtã amnhĩ jarẽnh. Tã kê mẽ akutã nojarêr rãhã ho ri mẽ akôt pa ka mẽ ỹ hã axamnhĩx ajamakêtkati nẽ akĩnh nẽ ri apa.

Mẽ pahte amnhĩ kukamã pajamxpêr pê pahkĩnh o papa hã mẽ pamã karõ

Rukre 12.32-34; Rõmãn 8.18-25; Sikũn Korĩt 4.16-18

³Nẽ na pre mẽ panhõ Pahihti Jejus Krisja ty nhũm Hipêêxà Tĩrtũm akupỹm ho htĩr. Tã kot mẽ pakutã nojarêr rãhã ho pa jakamã na pre mẽ pahpê hkrajê mã mẽ pajamxpêr nyw jagjê pu mẽ ỹ hã pahte amnhĩ nhĩpêx nyw o amnhĩ nhĩpêx o papa. Hãmri nẽ Jejus akupỹm htĩrja mã pajamxpêr nẽ amnhĩ kukamã pajamxpêr o: —Kot paj nhỹrmã ty nhũm Tĩrtũm kot Jejus nhĩpêx pyrà nẽ akupỹm ixto ixtĩr pa wa kuri ixtĩr tũm nẽ inhmex kumrêx rãhã ixpa ho ixpa. Nà koja ã inhĩpêx anẽ. Anhỹr o pajamxpêr jakamã kwa kêr pu mẽ Tĩrtũm mã mex o mex ã mãn harẽnh rãhã ho papa.

⁴Na ra mẽ pakutêp ò krĩ kamã mẽmoj piitã ho mex nê. Ò krĩ kamã mẽmoj kot omnu nê hapêx kêt jakamã na pu htem amnhĩ tã hamãr rãhã ho papa.

⁵Nê mẽ kot Kris ã mẽ atomnuj mýrapê na ka mẽ amnhĩ xà htýx kamã ajamak o ri apa nom arĩ amnhĩ kaxyw Tĩrtũm mã ajamexpêr rãhã ho ri apa. Hihtýx o hihtýx jakamã koja mẽ pahkôt pa ho pa nê mẽ pamã pajamexpêr o hihtýx rãhã nhũm nhỹrmã Jejus akupým mẽ pahwýr wrý. Hãmri pu mẽ hkôt ri amnhĩ nhĩpêx mex rãhã ho ri papa. Ra Tĩrtũm kot mẽ pakukamã mẽ pajarênh xà hkôt.

⁶Jar mẽ pahte arĩ amnhĩ xà htýx kãm pajamak o papa htã na pu htem Tĩrtũm nhỹrmã kot mẽ pahto mexta kukamã pajamexpêr hãmri nê tee ri amnhĩ kukamã pajamexpêr kêt nê. Mẽ pahpê mẽ pahpunuj tũm nê ri papa ho papa mã xwýnh kêt.

⁷Na hte Tĩrtũm mẽ panhĩpêx o te mẽ kot ôr nhĩpêx pyræk. Na htem hprĩ hã tanhmã ôr kute hã omu. Kêp ôr kumrêx ã omu rý mẽmoj mẽ ho pihkàr ã omunh kaxyw kuwy kamã kurê. Nhũm piitã ôr nê pigãnh pa japêr nhũm mẽ omu nê harênh o: —Nà ãm hãmri. Kêp ôr kumrêx nê mẽmoj mẽ ho pihkàr kêt. Anê. Na hte Tĩrtũm ã mẽ panhĩpêx anê. Jakamã mẽ pahpê Jejus kôt amnhĩ nhĩpêx o mẽ papa xwýnhjaja mẽ pahte tũhã tanhmã pahpunuj to htã no nhũm mẽ panê ja rênh kêt nê. Na hte amnhĩ tã mẽ pahpumu nê hamexpêr o: —Kot paj kormã ja hã mẽ hamã nê tokyx akupým mẽ ho mex kêt nê. Koja mẽ omnuj nê pa htã tee ri amnhĩ kukamã hamexpêr nê ixkaga hkêt nê arĩ amnhĩ kaxyw ixkôt hamexpêr rãhã ho pa. Hãmri nhũm mẽ hkwýjaja ja hã mẽ omu nê mẽ kêp ixkra hã mẽ omunh kurê kumrêx. Te mẽ kot hprĩ hã ôr pumunh nê kêp ôr kumrêx ã omunhta pyræk. Anê. Jakamã kêp pu mẽ arĩ amnhĩ kaxyw hkôt pajamexpêr rãhã ho papa. Mẽmo mýrapê mẽ pahpunuj nê ri papa htã arĩ hkôt pajamexpêr rãhã nhũm Jejus nhỹrmã akupýn mẽ pahwýr wrý. Hãmri nhũm Tĩrtũm mẽ pahpumu nê mẽ pamã: —Nà ãm hãmri na ka prem amnhĩ kaxyw ixpix mã ajamexpêr rãhã ho ri apa. Mẽ kot ixtã tanhmã mẽ atomnuj to nhũm mẽ ate amnhĩ xà htýx kamã ajamak o apa htã aa ixkaga hkêt nê arĩ amnhĩ kaxyw inhmã ajamexpêr rãhã ho ri apa. Nà ãm

hāmri mẽ ate amnhĩ to mex kumrêx xwỳnh na ka mẽ. Kot paj mẽ piitã mẽ kãm ja hã mẽ ajarẽ. Anhỹr o mẽ pamã kapêr. Nẽ ôr o mẽ hikukrêxja mex tã koja arĩ mex rãhã hkêt nẽ. Koja mẽhõ kãm tanhmã homnu hto hprãm nẽ homnu hpa. No mẽ papajaja kot puj mẽ arĩ amnhĩ kaxyw Tĩrtũm mã pajamxpêr rãhã ho papa hāmri nẽ ôrta pyrã nẽ pajapêx kêt nẽ. Kurom mẽ pamex tũm nẽ aa pajapêx kêt nẽ papa ho papa.

8-9Nẽ Jejusja aa mẽ ate ano ho omunh kêt tã na ka htem kãm mẽ ajapê htỳx nẽ kot mẽ panê tanhmã amnhĩ nhĩpêx to hã harênh ma nẽ mẽ amã hkĩnh nẽ. Nẽ amnhĩ kaxyw hkôt ajamxpêr mex rãhã ho ri apa. Jakamã na pre Tĩrtũm ja hã mẽ apumu nẽ mẽ ato hkra nẽ mẽ apê õ krĩ kamã wa kuri amex nẽ apa mã xwỳnh ã mẽ ajarẽ. Ja kaxyw na pu prem amnhĩ kaxyw hkôt pajamxpêr rãhã jao pahkĩnh nẽ ri papa. Nẽ tee ri tanhmã amnhĩ kĩnh tỳx ã amnhĩ jarênh to hkukamã pajamxpêr. Kormã aa ã mẽ pahkĩnh anhỹr kêt tã mẽ pahkĩnh tỳx nẽ ri papa.

10Nẽ Tĩrtũm kot mẽ pahto mex pê mẽ panê mẽ pahte amnhĩ tomnuj rênh par nhũm kuri mẽ pahtĩr tũm nẽ mẽ papa hã mẽ pajarênhja. Amnepê mã Tĩrtũm nhỹ hã kapêr jarênh o ri mẽ pa xwỳnhjaja na pre mẽ pakukamã ã mẽ pajarênh anhỹrja ma nẽ tee ri hamaxpêr nẽ tee ri hã axpên kukjêr o ri axpên kôt pa. Nom hprĩ hã mar mex kêt nẽ. Tã arĩ ri mẽ pakukamã hkwỳjê mã ja hã mẽ pajarênh o ri pa.

11Na pre Tĩrtũm Karõja Kris tyk kukamã mẽ kãm ã mẽ pajarênh anhỹr o amnhĩrĩt. Kormã Kris kaxkwa kamã pa ri. Kormã wrỳk nẽ katorxà nhõxàhkre rũm kator kêt ri nhũm pre hkukamã mẽ kãm tanhmã ho amnhĩrĩt to. Mẽ kot hpĩr nhũm kot amnhĩ xà htỳx kãm hamak kãm mẽ panê htykja ã hkukamã mẽ kãm harênh o amnhĩrĩt. Nhũm Tĩrtũm kot akupỹm ho htĩr nẽ kãm mex o mex ã harênhja nhũm hkukamã mẽ kãm harênh o amnhĩrĩt. No ãm hprĩ hã mẽ kãm mẽhõ nhĩxi hkôt harênh kêt jakamã nhũm prem harênh ma nẽ tee ri hkukamã ri hamaxpêr nẽ tee ri hã axpên kukjêr o ri axpên kôt pa. Nẽ hã axpên kukjêr o: —Kwa mẽhõ koja we ã amnhĩ nhĩpêx anẽ? Xà koja tokyx ã amnhĩ nhĩpêx anẽ nà kormã? Anhỹr o hã axpên kukjêr o ri pa.

¹²Hāmri nhūm Tirtūm axte mẽ kām Jejus jarēnh kwỳ ho amnhĩrīt nẽ mẽ kām: —Nà mẽ anoo mã koja ã amnhĩ nhĩpêx anhỹr hkêt nẽ. Mẽ amỹr pê mẽ akanrêhã mẽ akra nẽ mẽ atàmnhwỳjê noo mã koja kato nẽ mẽ hkôt ã amnhĩ nhĩpêx anhỹr o pa. Anẽ. Mẽ papamjaja mẽ panoo mã kator nẽ ã kot amnhĩ nhĩpêx anhỹr o paja o ã mẽ kām ho amnhĩrīt anẽ. Amnepêm Tirtūm nhỹ hã kapēr o ri mẽ pa xwỳnhjaja nẽ jarãhã mẽ ixte Jejus nhỹ hã mẽ ahkre ho ri ixpa xwỳnhjaja mẽ ixkapēr ãm pixii. Na pa htem wantajê pyrà nẽ Tirtūm Karõ nhỹ hã àhpumunh tỳx xà ho mẽ amã tanhmã Jejus jarēnh to ho ri mẽ akôt ixpa. Nhūm hte Tirtūm kapēr o mẽ wrỳk xwỳnhjaja mẽ ixkapēr ma nẽ tee ri hamaxpēr o mẽ pahpyrà nẽ kām hprĩ hã harēnh mar par prãm nẽ.

Mẽ pahte Tirtūm pyrà nẽ tãm amnhĩ nhĩpêx ã mẽ pamã karõ

Epes 4.1-3; Korosẽ 1.10-12; Sikũn Pêtre 3.10-13; Wam Juãw 3.1-6

¹³E kwa Kris kôt ixtõ nẽ ixtõxjaja. Kêr ka mẽ Jejus kutêp mẽmoj punuj kutã amnhĩ to htỳx rãhã ho ri apa. Nẽ Tirtūm mã amnhĩ nhĩpêx mex rãhã nẽ. Pê tãm ajamaxpēr nẽ tãm amnhĩ nhĩpêx o apa. Nẽ mẽ ã ajamaxpēr anhỹr o: — Nà koja nhỹrmã Jejus akupỹn mẽ ixwỳr wrỳ hāmri nhūm Tirtūm ixto mex rax nẽ. Nà koja ã inhĩpêx anẽ. Anẽ.

¹⁴Nẽ kêr ka mẽ Tirtūm kapēr kôt pix mã mãn ri amnhĩ nhĩpêx mex rãhã ho ri apa. Te mẽhprĩre kot mẽ hipêxà kapēr mar nẽ hkôt amnhĩ nhĩpêx pyræk. Kormã mẽ ate Kris kôt amnhĩ xunhwỳr kêt ri na ka prem ate amnhĩ nhĩpêx tũm kôt ri tanhmã amnhĩ tomnuj to ho ri apa.

¹⁵Tã kêr ka mẽ hpãnhã amnhĩ to mex o mãn ajamaxpēr o apa nẽ Tirtūm pyrà nẽ amnhĩ tomnuj o apa hkêt nẽ. Tirtũmja kot amnhĩ to mex pix o pa xwỳnh na.

¹⁶Kapēr ã kagà htũm kot ja jarēnh kot: Kêr ka mẽ ixpyrà nẽ amnhĩ to mex pix o ri apa. Anẽ.

¹⁷Tã koja nhỹrmã kêp Mẽpahpãm maati hã hprĩ hã mẽ pahte amnhĩ nhĩpêx ã mẽ pahpumunh hkôt tanhmã mẽ pajarēnh to. Tãm mẽ pahte amnhĩ nhĩpêx kôt mẽ pajarẽ rỳ mẽ pahte amnhĩ tomnuj kôt mẽ pajarẽ. Hāmri nẽ ahpỹnhã mẽ panhĩpêx. Mẽ pahto mex nẽ rỳ mẽ pahtomnuj nẽ. Jakamã kwa pu mẽ

nhỹrmã kot tanhmã mẽ pahtomnuj to pymaj hkôt pix mã amnhĩ nhĩpêx o ri papa rãhã nẽ.

¹⁸Nẽ kormã mẽ pahte Jejus kôt amnhĩ xunhwỳr kêt ri na pu prem mẽ panhĩgêt pyrã nẽ pahtỳx ri amnhĩ tomnuj o ri papa. Tã nhũm Krisja te amnhĩm mẽ pajaprôr pyrãk o mẽ panhĩpêx. Mẽ pahte hpãnhã kapêr kôt pix mã amnhĩ nhĩpêx o papa kaxyw. No mẽmoj to na pre mẽ pahpãnhã amnhĩre? Nà ra mẽ pahte ja jarênh mar tỳx. Na pre kàxpore ho mẽ pahpãnhã amnhĩrer kêt nẽ. Rỳ ôr o mẽ hikukrêx ã ohtô ho mẽ pahpãnhã amnhĩrer kêt nẽ. Rỳ prat o mẽ hikukrêx ã ohtô ho mẽ pahpãnhã amnhĩrer kêt nẽ. Jajaja hapêx tokyx anhỹr mã xwỳnh na.

¹⁹Na pre ã mẽ hpãnhã amnhĩrer anẽ nẽ tãm mẽ panê ty nẽ htyk o amnhĩ nhĩ ho mẽ pahpãnhã amnhĩrer pa. Nhũm hkamrô axkapĩ. Te amnepê mã mẽ panhĩgêt kot amnhĩ pãnhã Tĩrtũm mã ôwêhti hkrare hpar nhũm hkamrô pikapĩrta pyrãk. ôwêhti krare mexre pix na prem kãm kupa. Mex nẽ tanhmã kute hkêt xwỳnh pix. Tã Krisja aa tanhmã amnhĩ tomnuj to hkêt kumrêx nẽ mẽ panê ty nẽ htyk o Tĩrtũm mã mẽ pahte amnhĩ tomnuj piitã hpãnhã amnhĩrer pa.

²⁰Amnepê mã kormã mẽmoj kêt ri na pre Tĩrtũm kot ã mẽ pahpãnhã amnhĩrer anhỹr kaxyw mẽ pakukamã kuta nẽ ãm. Tã nhũm amgrà ohtô nẽ hapêx nhũm mẽ pahwỳr kumẽ nhũm man mẽ pahwỳr wrỳ. Kot ã mẽ pahpãnhã amnhĩ nhĩpêx anhỹr kaxyw.

²¹Tã nhũm prem kupĩ nhũm Tĩrtũm akupỹm ho htĩr nẽ mex o mex ã harẽ. Mẽ pahte ja hã harênh mar kôt amnhĩ kaxyw Tĩrtũm pix mã pajamaxpêr o ri papa kaxyw. Nẽ mẽ pahte amnhĩ wỳr Jejus jamãr rãhã ho ri papa kaxyw.

²²Tã pu prem ra kot ã mẽ panê amnhĩ nhĩpêx anhỹr ã harênh ma nẽ mẽ pahte amnhĩ tomnuj kaga nẽ hkôt amnhĩ xunhwỳ. Jao amnhĩ to mex pix o ri papa. Nẽ mẽ pamã Kris kôt mẽ pahkwỳjê hkĩnh o papa. Tã kwa kêr pu mẽ arĩ pamã axpên kĩnh tỳx rãhã ho papa.

Te mẽ pakatorxà rũm mẽ pajapôx pyrãk o axte mẽ pajapôx ã mẽ pajarênh

Juãw 3.1-21

²³Ně na pu prem mẽ pakatorxà nhõxàhkre rùm mẽ pajapôx pyrà ně axte mẽ pajapôx pyràk o amnhĩ nhĩpêx. Jao ra mẽ pahpê Tĩrtũm kra ně ri papa. Na hte mẽ pakatorxà ně mẽ panhĩpêêxàja wa ri pa ně gaa ně mẽ pahpê ty. No kêt Měpanhĩpêêxà maati Tĩrtũmja wa kurom rãhã ho rãhã. Tã ra mẽ pahte amnhĩ kaxyw kapêr kôt pajamaxpêr o pahpê hkra jakamã kot puj mẽ uràk ně nhỹrmã pahtĩr tũm ně papa rãhã ho papa. Ně Tĩrtũm kapêrja Tĩrtũm pyrà ně rãhãã. Koja aa hapêx kêt ně.

²⁴Kapêr ã kagà htũm kot ja jarênh kot: Pika piitã hkôt mẽ pa xwýnhjaja te mẽ kot pōti grà pyràk. Ně mẽ kot amnhĩ to mex xàja te kot kapôt ã pixôrà pyràk. Na hte pōti tokyx grà ně hapêx. Ně pixôràja haxwýja arĩgro htýx mẽ nhũm grà tokyx aně ně rarak pa ně hapêx.

²⁵No Tĩrtũm kapêr koja pōti mẽ pixôràta wa kurom aa hapêx kêt ně. Koja arĩ rãhã ho rãhã. Aně. Tã kapêrja tãm na htem mẽ pamã kamã harě pu mẽ pahpiitã mar o papa.

Wam Pêtre 2

Mě pahte Tĩrtũm kot amnhĩ nhĩpêx kôt amnhĩ nhĩpêx ã mẽ pamã karõ

Rõmãn 12.2; Wam Korĩt 3.16-17; Epes 2.19-22

¹Ně kwa kêr pu mẽ axte tanhmã amnhĩ tomnuj to ho ri papa hkêt ně. Rý tanhmã axpên mã paxêx to hkêt ně. Ně paxêx rom tanhmã ri axpên nokupyr to hkêt ně. Ně mẽmoj tã axpên kãm pagryk kêt ně. Ně tanhmã axpên japyrý hto hkêt ně. Kêr pu mẽ ã amnhĩ nhĩpêx anhỹr o papa hkêt kumrêx.

²Mě hkaràre na htem ãm kãm pijaôr pix prãm. Ně gaa ně htýxre ně ra hprêk o mõ. Tã kêr ka mẽ pijaôr pix prãm xwýnhjê pyrà ně amã Tĩrtũm kapêr mar ně hkôt pix mã amnhĩ nhĩpêx o apa hprãm. Jao mar týx pê ra hkôt amnhĩ nhĩpêx mex o mõ ně gaa ně hkôt amnhĩ nhĩpêx mex o apa. Te mẽ karàre pijaôr ně gaa ně ra hprêk o mōrta pyràk.

³Ra mẽ ate Jesus kot mẽ pahto mex ã omunh mex kênã.

⁴Ně na htem kên o ixkre nhĩpêx kaxyw hãmri ně hkwý kawrà ně ri hkapi. Nhũm hõ mex kêt nhũm mẽ tee ri omu ně nhãm kumẽ. Tã ja pyrà ně na pre

mě pahkwỳjaja tee ri Kris pumu nē htỳx mex kêt ã hkamnhĩx nē te mẽ kot kēn mēnh̄ta pyr̀ak o hipêx nē hkaga. No nhũm Tĩrtũmja amnhĩm Kris mex o mex ã harē. Te ho mēhõ kot kēn mex kêt ã hkamnhĩx nē mēnh̄ nhũm mēhõ kot mex ã omunh nē amnhĩm mỳnh̄ta pyr̀ak. Nom Krisja kēn rom kēp htĩr tũm nē pa xwỳnh jakamã nhũm pre Tĩrtũm mẽ pakaxyw ãm pu prem hkõt amnhĩ xunhwỳ.

⁵Nē Tĩrtũm na hte nhỹrmã mẽ pahtĩr tũm nē wa kuri mẽ papa mã xwỳnh ã mẽ pajarē. Te mẽ pahpê kēn nhũm Tĩrtũm te kot amnhĩ Karõ mã mẽ pahto ixkre nhĩpêx pyr̀ak. Jakamã na hte Jejus Kris tanhmã mẽ pahkrã hto pu mẽ Tĩrtũm kõt amnhĩ nhĩpêx mex rãhã ho ri papa. Nē tanhmã kãm amnhĩ nhĩpêx mex to nhũm ja hã mẽ pahpumu nē hkĩnh nē.

⁶Tĩrtũm kapēr ã kagà htũm kot tanhmã Kris jarēnh to. Nē hã kuxi nē tanhmã harēnh to. Te kēp kēn pyr̀ak ã harē nē harēnh kot: Kot paj nhỹrmã Ijaew wỳr mēhõ mẽ nhũm mẽ hkõt pa ho pa. Koja te kēp kēn o inhõrkwỹ nhĩpêx kaxyw kēn maati mex kumrēxta pyr̀ak. Koja amnhĩ kaxyw hkõt mẽ hamaxpēr xwỳnhjaja nhỹrmã ma inhõ krĩ hwỳr api nē hkĩnh nē mex rãhã nē pa ho pa. Anē.

⁷Tã ra amnhĩ kaxyw hkõt mẽ pajamaxpēr xwỳnhjaja. Kēn pyr̀ak xwỳnh pē Jejusja na mẽ pamã mex o mex. No mẽ kot hkaga xwỳnhjaja na htem hamaxpēr punuj xwỳnh ã hkamnhĩx nē hkaga nē kãm hkĩnh kêt nē. Tĩrtũm kapēr ã kagà htũm kot mẽ harēnh kot: Na prem kēn o amnhĩm õrkwỹ nhĩpêx kaxyw hkawrà ho pa nē kēn maatija pumu nē htỳx omnuj ã hkamnhĩx nē hkaga. Mẽ kot hkaga htã nhũm Tĩrtũm mẽ kurom mex o kot kēn piitã hakrenh par ã omunh kurê kumrēx. Anē.

⁸Nē mãănēn harēnh kot: Koja mẽ kapēr mar kêt kumrēx. Te pry kamã kēn nõr nhũm mẽ kot nhãm pry nē mēnh̄ kaxyw hkamnār o amnhĩ par krã hi kukēnh pyr̀ak o koja mẽ amnhĩ nhĩpêx. Anē. Mẽ kot Kris kapēr mar tã hkõt amnhĩ xunhwỳr kêt jakamã te ho mẽ kot amnhĩ nē kēn kamnār o amnhĩ par krã hi kukēnh pyr̀ak o koja mẽ amnhĩ nhĩpêx. Jakamã koja nhỹrmã Tĩrtũmja

ja hã tanhmã mẽ ho htỳx kumrẽx. Ra kot amnhĩ kukamã mẽ kãm amnhĩ jarẽnh xà hkõt.

⁹No mẽ papajaja na pre Tĩrtũm jajê rom amnhĩ kõt mẽ paxunhwỳ. Nhỹrmã õ krĩ kamã mẽ papa ho papa kaxyw. Nẽ mẽ pahte mex o mex ã harẽnh kaxyw. Na pu htem Ijaew nhõ patre pyrà nẽ Pahi Maati Tĩrtũm mã tanhmã amnhĩ nhĩpêx to ho papa. Nom kormã mẽ pahte Kris kõt amnhĩ xunhwỳr kêt ri te mẽ pahpê kamàt kô kamã mẽ pahtỳx ri mẽ papa xwỳnh pyràk. Tã Jejus kõt amnhĩ xunhwỳ nẽ hpãnhã te mẽ pahpê hirã mex kãm ri mẽ papa xwỳnh pyrà nẽ tãm amnhĩ nhĩpêx rãhã ho papa. Ra mẽ pahpê Tĩrtũm kra jakamã na pu htem amnhĩ to mex rãhã ho ri papa. Nẽ Mẽpahpãm maati Tĩrtũm mã tanhmã amnhĩ nhĩpêx to ho ri papa. Te mẽ kot mẽ ho àhwỳr xwỳnhjaja kot kãm amnhĩ nhĩpêx o pata pyràk. ã na pre Tĩrtũm mẽ pahte amnhĩ nhĩpêx anhỹr o papa kaxyw mẽ panhĩpêx.

¹⁰Amnepêm kormã mẽ pahpê hkra hkêt ri na pre mẽhõ mẽ pakamã ukapĩrĩ hkêt kumrẽx pu htem pahpunuj nẽ ri papa. Tã Jejus kõt amnhĩ xunhwỳ nhũm Tĩrtũm mẽ pahto hkra pu mẽ pahpê hkra hã ri papa nhũm mẽ pakamã ukapĩrĩ rãhã ho mẽ pahkõt pa.

Mẽ pahpê Tĩrtũm mã tanhmã amnhĩ nhĩpêx to xwỳnh ã mẽ pajarẽnh

Rõmãn 13.1-7; Xitre 3.1

¹¹E ixkràmnhwỳjaja. Ra mẽ pahpê Tĩrtũm kra jakamã mẽ pahpê õ krĩ nhõ xwỳnh. Te mẽ pahpê jar pika nhõ xwỳnh kêt pyràk jakamã kwa kêr pu mẽ arĩ mẽ pahte amnhĩ nhĩpêx tũm o amnhĩ nhĩpêx kêt nẽ. Nẽ mẽ pajamaxpêr tũm o pajamaxpêr kêt nẽ. Ra axtem mẽ pajamaxpêr nyw nẽ axtem mẽ pahte amnhĩ nhĩpêx nyw kênã. Mẽ pahte amnhĩ nhĩpêx tũmja te kãm akupỹm mẽ pahte hkõt amnhĩ to paxujanãr prãm pyràk. Mẽ pahte axte hkõt amnhĩ nhĩpêx o ri papa kaxyw. Tã nom kêr pu mẽ anhỹr kêt nẽ.

¹²E kwa kêr ka mẽ anhõ krĩ kamã akwỳ kot Kris kõt amnhĩ xunhwỳr kêt xwỳnhjê noo mã tãm ri amnhĩ nhĩpêx o ri apa. Mẽ kot Kris ã tanhmã mẽ anhĩpêx to rỳ tanhmã hã mẽ ato kapêr punuj to htãã. Kot kaj mẽ ã mẽ hkõt amnhĩ nhĩpêx anhỹr o ri apa hãmri nhũm mẽ tee ri mẽ apumu nẽ hamaxpêr o: —Kwa mẽ ixte mẽ kot amnhĩ tomnuj xwỳnh ã mẽ harẽnh tã mẽ kot amnhĩ

to mex pix xwỳnh na mẽ. Anẽ. Hãmri nẽ nhỹrmã mẽ pahpyrà nẽ Tĩrtũm kõt amnhĩ xunhwỳ nẽ kãm mex o mex ã harẽ nẽ kãm: —Kwa Tĩrtũm. Na pre hte akrajaja anhy hã amnhĩ to mex rãhã nẽ pa ho pa pa ja hã mẽ omu. Nà xep amex o amex Tĩrtũm. Anẽ.

¹³Nẽ mẽ apê Pahihti Jejus Kris kõt amnhĩ nhĩpêx xwỳnh jakamã kêr ka mẽ anhõ krĩ kamã mẽ anhõ pahihti kapêr ma nẽ kapêr kõt mãn amnhĩ nhĩpêx mex o ri apa. Nẽ mẽ anhõ pika kamã mẽ anhõ prêjitênja ka mẽ kapêr ma nẽ hkõt amnhĩ nhĩpêx. Mẽ kot mẽ ato amnhĩptàr xwỳnhjaja ka mẽ piitã mẽ kapêr ma nẽ mẽ kapêr kõt pix mã amnhĩ nhĩpêx rãhã ho ri apa.

¹⁴Nẽ mẽ anhõ pahi nhỹ hã mẽ kapêr o mẽ pa xwỳnhjaja na htem mẽ akaxyw mẽ unhwỳ. Mẽ kot amnhĩ tomnuj xwỳnhjaja nhũm tanhmã mẽ kot mẽ ho kaxyw. Nẽ tãm mẽ kot amnhĩ nhĩpêx o ri mẽ pa xwỳnhjaja nhũm mẽ kot mẽ õ pahi mã mex ã mẽ harẽnh kaxyw.

¹⁵Tã kêr ka mẽ kapêr ma nẽ mẽ hkõt tãm amnhĩ nhĩpêx rãhã ho ri apa. Hãmri nhũm mẽ ato kapêr punuj xwỳnhjaja ja hã mẽ apumu nẽ axte tanhmã mẽ ato kapêr to hkêt nẽ. ã mẽ ate amnhĩ nhĩpêx anhyr o apaja na Tĩrtũm kãm hprãm.

¹⁶Nẽ mẽ pahpê Tĩrtũm kra jakamã na pu htem paxàmnhĩx kãm tanhmã amnhĩ nhĩpêx to ho ri papa. Nom kêr pu mẽ pahpê hkra hã pahtỳx ri amnhĩ nhĩpêx kêt nẽ.

¹⁷Nẽ kêr ka mẽ piitã mẽ ho mex o ri apa. Nẽ mẽ ato amnhĩptàr xwỳnhjê ho mex nẽ mẽ hã apijaàm rãhã ho ri apa. Nẽ mẽ apê Kris kõt mẽ ate axpên to mẽ atõ nẽ mẽ atõxjê hã amã axpên kĩnh pê axpên to mex nẽ. Nẽ Tĩrtũm ã apijaàm rãhã nẽ.

Mẽ kãm mẽ apênh xwỳnhjaja kot tanhmã amnhĩ nhĩpêx to hã mẽ kãm karõ

Epes 6.5-8; Korosẽ 3.22-25; Wam Ximotre 6.1-2; Xitre 2.9-10

¹⁸Nẽ mẽ apê mẽ kãm mẽ axapênh xwỳnhjaja kêr ka mẽ anhõ patrãw kapêr ma nẽ hkõt ri amnhĩ nhĩpêx. Kot mẽ ato mex o pa rỳ mẽ atomnuj o pa htã ka mẽ arĩ mẽ hã apijaàm pê hkõt ri amnhĩ nhĩpêx.

¹⁹Tanhmã kot mẽ anhipêx punuj to htã ka mẽ arĩ kãm axapênh mex rãhã nẽ. Kêr kê Tirtũm ja hã mẽ apumu nẽ mẽ ato mex nẽ ka mẽ ajamakêtkati nẽ axamnhĩx ri kãm axapênh o apa.

²⁰Nom kot kaj tanhmã amnhĩ tomnuj to nhũm anhõ patrãw ja hã apumu nẽ hã atak ka amnhĩ xà htỳx kamã ama nẽ rĩ amnhĩ pumu. No kot kaj akatàt kôt kãm axapênh mex tã nhũm amarĩ atak japêr tã kêr ka amnhĩ tã kamã agryk kêt nẽ. Arĩ kãm amnhĩ to htỳx kamã kãm xa nẽ amnhĩ tã tanhmã ho hkêr nẽ. Hãmri nhũm Tirtũm ja hã apumu nẽ ato mex nẽ.

²¹Amnepêm na pre mẽ pahte hkôt amnhĩ xunhwỳr xwỳnhjaja Kris pyrã nẽ mẽ paxà htỳx kamã pajamak o papa hkukamã ja hã mẽ pahpumunh mex. Na pre Kris mẽ pakaxyw amnhĩ xà htỳx kãm hamak tỳx tã amnhĩ to htỳx nẽ mẽ kãm xa. Tã kêr pu amnhĩ xà htỳx kamã pajamak tã ỹ hã uràk nẽ amnhĩ to htỳx nẽ papa.

²²Krisja aa tanhmã amnhĩ tomnuj to hkêr nẽ pa ho pa. Nẽ aa mẽmoj tã amnhĩ to hêx o pa hkêr.

²³Mẽ kot kãm kapêr punuj tã nhũm amnhĩ tã tanhmã mẽ kãm nẽ hkêr nẽ. Nẽ mẽ kãm kapêr punuj kêt nẽ. Nhũm prem homnuj tỳx kumrêx nhũm amnhĩ xà htỳx kamã hamak tã amnhĩ tã mẽ kãm àkjêr nẽ tanhmã mẽ haprỳ hto hkêr nẽ. Na pre ãm hamaxpêr o: “Nà Tirtũm kot ixtã mẽ omunh mex kênã. Kojã nhỹrmã mẽ piitã tanhmã mẽ kot amnhĩ nhĩpêx to hã mẽ omunh xà hkôt tanhmã mẽ hipêx to. Tãm kojã àhpumunh tỳx xà hkôt tanhmã ixtã mẽ harênh to. Mẽ kurom àhpumunh tỳx o àhpumunh tỳx xwỳnh kênã.” Anẽ.

²⁴Kris na pre te kawà kamã mẽ pahte amnhĩ tomnuj piitã gjênh nẽ ho nỳt nẽ htur rãhã pĩ kahpa hã mẽ panê htyk pyrãk o amnhĩ nhĩpêx. Mẽ pahte axte tanhmã amnhĩ tomnuj to hkêr prãm xaj. Pãnhã mẽ pahte amnhĩ to mex pix o ri papa kaxyw. Tã ã kot amnhĩ xà htỳx kãm hamak anhỹr o jêt jakamã kot puj mẽ pahte hkôt amnhĩ xunhwỳr xwỳnhjaja aa mẽ pahte amnhĩ tomnuj pãnhã amnhĩrer kêt nẽ. Ra Jesus htyk o kot mẽ panê amnhĩrer par kênã.

²⁵Na pu pre te mẽ pahpê ôwêhti pikunor pyrà nê pahtỳx ri papa. Tanhmã amnhĩ tomnuj to rãhã ho ri papa. Tã nhũm Kris te kot ôwêhti jamãr xwỳnh kot ôwêhti pikunor mã katorta pyràk o mẽ panhĩpêx. Pu mẽ hkôt amnhĩ xunhwỳ nê hkôt amnhĩ nhĩpêx mex o ri papa. Jao hkôt papa ho papa.

Wam Pêtre 3

Mẽ mjên mẽ mẽ hprô kot tanhmã axpên nhĩpêx to hã mẽ kãm karô

Wam Korĩt 7; Epes 5.22-25; Korosê 3.18-19; Wam Ximotre 2.9-15

¹Nê kêr ka mẽ anijaja mẽ amjên kapêr ma nê hkôt amnhĩ nhĩpêx. Akĩnhã kormã kot Tĩrtũm kôt amnhĩ nhĩpêx kêt japêr tã arĩ kapêr ma nê hkôt amnhĩ nhĩpêx mex o ri apa. Kê mẽ ate amnhĩ nhĩpêx ã mẽ apumu nê mẽ apyrà nê Kris kôt amnhĩ xunhwỳr japêr. Mẽ kãm Tĩrtũm kapêr mar prãm kêt tã koja mẽ ã mẽ ate amnhĩ nhĩpêx anhỳr ã mẽ apumunh kôt mẽ apyrà nê amnhĩ kaxyw hkôt hamaxpêr japêr.

²Na htem mẽ ate Tĩrtũm kapêr kôt tãm ri amnhĩ nhĩpêx o apa hã mẽ apumunh o ri mẽ akôt pa.

³Jakamã kêr ka mẽ anijaja amnhĩ mex pix kukamã ajamaxpêr o ri apa hkêt nê. Rỳ ajamaxpêr o: —Ma kot paj mẽ hkuxwaxà ho amnhĩ krã hkĩ kuxwa mex nê inhôkrexê mex jagjê nê ri hã mra. Nê kupêxê mex kwỳ japrô nê ho amnhĩm ixê mex nhĩpêx hãmri nê hagjê nê ri hã mra. Kot paj ã amnhĩ nhĩpêx anê nhũm mẽ piitã ja hã ixpumu nê kãm ixkĩnh nê inhmex ã ijarê. Ma kot paj ã amnhĩ nhĩpêx anê. Anhỳr o ri amnhĩ kukamã ajamaxpêr kêt nê.

⁴Tĩrtũm na hte ã mẽ pahte amnhĩ nhĩpêx anhỳr ã mẽ pahpumu nê ãm hã mẽ pahpumu. Mẽ ôkrexê nê mẽ ê mex na hte hapêx tokyx anê. No mẽ panhõpinhxà kaxwỳnh kãm tãm ri mẽ pajamaxpêr nê pakamã amnhĩkrit nê papaja. Kot kaj mẽ ã amnhĩ nhĩpêx anhỳr o ri apa hãmri nhũm Tĩrtũm ja hã mẽ apumu nhũm ja kãm mex nê.

⁵Amnepê mã mẽ pakukamã mẽ panhõ wôwô nê mẽ panãjaja. Mẽ hkwy kot Tĩrtũm kôt amnhĩ nhĩpêx xwỳnhjaja na prem ã amnhĩ nhĩpêx anhỳr o pa. Mẽ kot mjên kôt amnhĩ nhĩpêx o pa jakamã na prem amnhĩ tã mẽ omu nê mẽ ho mex nê kãm mẽ hapê nê.

⁶Mě panhõ wôwô finat Saraja na pre ã amnhĩ nhĩpêx anhỹr o pa. Jao mjên Apraãw kapêr ma nê hkôt amnhĩ nhĩpêx. Nê kêp õ pahi hã harê nê hkôt pix mã amnhĩ nhĩpêx o ri pa. Tã kot kaj mẽ uràk nê amnhĩ to htỳx nê ã amnhĩ nhĩpêx anhỹr o apa. Hãmri nê amnhĩ tã amã amjên puma hkêt nê apa nê te apê Sara hkra pyràk.

⁷Nê mẽ amyjaja kêr ka mẽ tãm mẽ aprõ nhĩpêx o ri mẽ hkôt apa. Mẽ akĩnhã mẽ hihtỳx kêt jakamã mẽ kamã axukaprĩ rãhã ho ri mẽ hkôt apa. War ajamẽ war apê Jejus kukwak ri war atĩr tũm nê apa mã xwỳnh jakamã kêr ka mẽ ho mex rãhã ho ri mẽ hkôt apa. Tĩrtũm kãm war ajamẽ war ajapê jakamã kot kaj mẽ ã mẽ hipêx anhỹr o ri apa hãmri nê ra axàmnhĩx mẽmoj tã amnhĩ to Tĩrtũm wỳ nhũm mẽ amar kurê kumrêx.

Tĩrtũm krajaja kot amnhĩ xà htỳx kamã hamak ã mẽ harênh

Rômãn 12.9-21; Korosê 1.10; Wam Tesarõn 5.14-15

⁸E Kris kôt ixkràmnhwỳjaja. Nà ixkapêr jatur xà na ja. Kêr ka mẽ ri axpên kôt ajamaxpêr mex pê axpên to mex rãhã ho ri apa. Nê mẽ ate Kris kôt axpên to atõ nê atõx ã amã axpên kĩnh o ri apa. Jao axpên kamã axukaprĩ nê mẽmoj to axpên kutã anojarêt rãhã nê.

⁹Na pu prem Jejus kôt amnhĩ xunhwỳ nhũm Tĩrtũm mẽ pahto hkra nê mẽ pahto mex ã amnhĩ jarê. Tã koja mẽhõ tanhmã mẽ anhĩpêx to rỳ tanhmã mẽ ato kapêr punuj to. Nom kêr ka mẽ ama nê amnhĩ tã tanhmã ho rỳ tanhmã ho akapêr punuj to hkêt nê. ãm te Tĩrtũm kot mẽ panhĩpêx pyràk o mẽ hipêx nê mẽ ho mex pix o ri mẽ hkôt apa. Ja na Tĩrtũm kãm hprãm.

¹⁰Kapêr ã kagà htũm kot ja jarênh kot: Kot kaj mẽ amã amex nê akĩnh nê ri apa hprãm hã kot kaj mẽ ã amnhĩ nhĩpêx anê: Kot kaj mẽ ri akapêr punuj o ri apa hkêt nê. Nê mẽmoj tã amnhĩ to axêx o ri apa hkêt nê.

¹¹Nê te mẽ ate amnhĩ katut kôt ate amnhĩ tomnuj rênh o apa pyrà nê hpãnhã amnhĩ to mex pix o ri apa. Nê mẽ amã tãm axpên nhĩpêx pix prãm o ri axpên kôt apa. Nê mẽ amã ajamakêtkati nê axpên kôt apa hprãm rãhã ho ri apa.

¹²Na hte Tĩrtũmja ã mẽ kot amnhĩ nhĩpêx anhỹr o pa xwỳnhjê jamãr mex rãhã ho pa. Nhũm mẽ tanhmã amnhĩ to hwỳr to nhũm mẽ mar kurê kumrêx.

No mẽ kot amnhĩ tomnuj o mẽ pa xwỳnhjaja na hte mẽ kutã amnhĩ xãm nẽ ãm mẽ omu nẽ mẽ ho mex kêt nẽ. Anẽ. Tĩrtũm kapẽr ã kagà htũm kot ã mẽ harẽnh kot anhỹr.

¹³Nẽ kot kaj mẽ amã amnhĩ to mex pix o apa hprãm nhũm mẽhõ ja hã tanhmã mẽ atomnuj to hkêt nẽ.

¹⁴No kot kaj mẽ amnhĩ to mex pix o apa htã nhũm mẽhõ ja hã apumu nẽ tanhmã hamaxpẽr to nẽ atomnuj ka amnhĩ xà htỳx kamã ajamak japêr. Tã koja Tĩrtũm nhỹrmã ja hã tanhmã mẽ ato mex to. Jakamã kwa kêt ka mẽ tee ri mẽhõ kot tanhmã mẽ atomnuj to hkukamã ajamaxpẽr pê amã mẽ uma ho ri apa hkêt nẽ. Nẽ tee ri amnhĩ kukamã ajamaxpẽr o akaprĩ nẽ ri apa hkêt nẽ.

¹⁵ãm amnhĩ kaxyw Kris mã mãn ajamaxpẽr tỳx rãhã nẽ mẽ panhõ Pahihti hã apijaàm rãhã ho ri apa. Nhũm mẽhõ ja hã mẽ apumu nẽ tanhmã hã mẽ akukjêr to nẽ mẽ amã: —Kwa mẽmo kaxyw na ka pre Kris kôt amnhĩ xãm nẽ hkôt ri amnhĩ nhĩpêx o apa? Anẽ. Ka mẽ ama hãmri nẽ aprĩ hã kãm amnhĩ jarẽnh kurê kumrêx.

¹⁶Nom kêt ka mẽ akapẽr mã aprĩ kamã kãm amnhĩ jarẽ. Tĩrtũm kapẽr kôt amnhĩ nhĩpêx o apa hã mẽ kãm amnhĩ jarẽ. Koja mẽ Kris ã mẽ ato kapẽr punuj rỳ hã mẽ atã hpẽr o axkẽ nẽ pikunhar japêr ka mẽ ãm amnhĩ tã mẽ ama nẽ ãm mẽ ama. Kwãr mẽ mãmri ã mẽ anhĩpêx anẽ. Kêt ka mẽ amnhĩ tã mẽ omu nẽ arĩ amnhĩ to mex rãhã ho ri apa. Kêt kê mẽ tee ri amnhĩ tã mẽ apumu nẽ hpijaàm nẽ.

¹⁷Nẽ koja mẽ akwỳjaja mẽ ate Tĩrtũm kapẽr kôt amnhĩ nhĩpêx mex o apa hã mẽ apumu nẽ hã tanhmã mẽ anhĩpêx to htã kêt ka mẽ arĩ Tĩrtũm kôt amnhĩ nhĩpêx o ri apa. Ja na kãm hprãm. Nom kot kaj mẽ tanhmã amnhĩ tomnuj to nhũm mẽ ja hã mẽ apumu nẽ pahihti mã mẽ ajarẽ nhũm kuma nẽ ja hã tanhmã mẽ amã àkjêr to ka mẽ ra apijaàm nẽ.

¹⁸Nẽ Krisja na pre mẽ panê ty. ãm htyk tipxi tã mẽ pahpiitã mẽ pahpãnhã amnhĩre. Mẽ pakurom aa kot tanhmã amnhĩ tomnuj to hkêt tã mẽ pahte amnhĩ tomnuj piitã hpãnhã amnhĩrer pa. Mẽ pahte hkôt amnhĩ xunhwỳr nẽ

nhỹrmã ma Tĩrtũm nhõ krĩ hwỳr paxàpir nẽ kamã pahtĩr tũm nẽ papa ho papa kaxyw. Mẽ kot hpĩr tã nhũm Tĩrtũm akupỹm ho htĩr nhũm htĩr o htĩr.

19-20 Nom kormã akupỹm htĩr kêt ri na pre hkarõ pix o mẽ htyk xwỳnhjê hwỳr mõ. Ahpunu kamã mẽ hkarõ kêp prês nẽ hkrĩ xwỳnhjê hwỳr mõ nẽ mẽ kot Noehti kapêr mar nẽ hkôt amnhĩ nhĩpêx kêt nhũm gô htàm kot mẽ hanhir par xwỳnhjê mã kapêr. Tĩrtũm kot nhỹrmã mẽ kot amnhĩ tomnuj mỳrapê kuwy maati wỳr mẽ rênh ã mẽ hkukamã mẽ kãm awjarẽ. Amnepêm kormã Noehti kot pàr raxta nhĩpêx o kuhê ri na prem kãm Tĩrtũm kapêr mar prãm kêt nẽ. Nhũm amnhĩ tã mẽ omu nẽ mẽ kamã gryk tokyx anhỹr kêt nẽ. Arĩ amnhĩ tã mẽ hamãr o pa. Mẽ kot hkôt amnhĩ xunhwỳr nẽ hkôt amnhĩ nhĩpêx prãm xàj arĩ mẽ hamãr ry ho pa. No ãm tee ri mẽ hamãr kaprỳ nhũm mẽ amnhĩ kaxyw hkôt hamaxpêr kêt nẽ htỳx ri amnhĩ tomnuj o pa. Mẽ ãm grêre nẽ Noehti kapêr ma nẽ gô htàm pymaj hkôt pàr raxta wỳr agjê. ãm mẽ kêp 8 pix nẽ hwỳr agjê nhũm gô htàm mẽ hanhir kêt nẽ. Tĩrtũm na pre mẽ nê omunh mex nẽ. No mẽ kot amnhĩ tomnuj xwỳnhjaja nhũm gô htàmja mẽ hanhir o mẽ himex pa. Nhũm mẽ kêp 8ja pix arĩ htĩr nẽ mex nẽ pàr raxta kamã gô krãhkà hã mex rãhã pa.

21 Gô tàmja kêp hprĩ hã mẽ pahte Jejus kôt amnhĩ xunhwỳr ã mẽ pahto amnhĩrĩt xà na. Mẽ pahte amnhĩ nhĩpêx tũm kaga nẽ hpãnhã amnhĩ nhĩpêx nyw o amnhĩ nhĩpêx o papa hã mẽ pahto amnhĩrĩt xà. Jakamã na htem mẽ pahkrã kumrã. Nom mẽ kot mẽ panê mẽ pagrã kugràn h kaxyw kêt ra mẽ pahte Jejus kôt amnhĩ xunhwỳr ã amnhĩ to amnhĩrĩt kaxyw na htem mẽ pahkrã kumrã. Ra mẽ pahte Tĩrtũm kapêr kôt amnhĩ nhĩpêx o papa hã amnhĩ to amnhĩrĩt kaxyw. Pu mẽ ra mẽ pahte amnhĩ nhĩpêx nyw o amnhĩ nhĩpêx ã amnhĩ to amnhĩrĩt. Te mẽ pahte gôx kãm mẽ pahte amnhĩ tomnuj rer par pyrà nẽ hpãnhã amnhĩ nhĩpêx nyw o amnhĩ nhĩpêx o papa.

22 Nẽ na pre Jejus akupỹm htĩr nẽ ma akupỹm Tĩrtũm nhõ krĩ hwỳr api nẽ Tĩrtũm nhĩhkô hã pahihti hã mẽ hkrĩ xà kamã hkrĩ ho hkrĩ. Hãmri nẽ ra Tĩrtũm kapêr o mẽ wryk xwỳnh nẽ pahi piitã mẽ ho amnhĩptàr o hkrĩ.

Wam Pêtre 4

Mě pahte amnhĩ nhĩpêx nyw o amnhĩ nhĩpêx ã mẽ pamã karõ

Epes 4.17-24; Korosẽ 3.1-11

¹Ně na prem Kris pĩ nhũm amnhĩ xà htỳx kãm hamak kãm htyk kaxyw tã arĩ mẽ kãm xa. Ra kot amnhĩ xà hkukamã amnhĩ tã mẽ omunh tã tee ri amnhĩ kukamã hamaxpěr o amnhĩ tã tanhmã ri mẽ kot hpĩr mã xwỳnhjê homnuj to hkêt nẽ. Arĩ mẽ kãm xa nhũm prem kupĩ. Tã kêr pu mẽ uràk nẽ ã amnhĩ nhĩpêx anhỳr o ri papa. Mě kot hã tanhmã mẽ panhĩpêx to htã pu mẽ uràk nẽ amnhĩ xà htỳx kãm pajamak tã tanhmã amnhĩ tã mẽ ho hkêt nẽ. Na hte ra mẽ htyk nẽ mẽ hikwỹ xwỳnhjaja axte amnhĩ tomnuj kêt nẽ. Tã kêr pu mẽ uràk nẽ axte tanhmã amnhĩ tomnuj to ho ri papa hkêt nẽ.

²Jakamã kêr pu mẽ axte mẽ pahte amnhĩ nhĩpêx tũm kôt amnhĩ nhĩpêx o papa hkêt nẽ. Ně mẽ pajamexpěr tũm kôt axte pajamexpěr o papa hkêt nẽ. ãm Tĩrtũm kãm hprãm xà hkôt pix mã tanhmã amnhĩ nhĩpêx to ho papa rãhã ty.

³Amnepêm kormã mẽ pahte Jejus kôt amnhĩ xunhwỳr kêt ri na pu prem mẽ kêp Tĩrtũm kra hkêt xwỳnhjê hkôt amnhĩ nhĩpêx. Jao nhãm mēnijê pumu nẽ mẽ kamã pahpijaàm kêt hprãm. Ně pahpipãnh o ri papa. Ně mẽ pahpipãnh kaxyw axpẽn wỳr akuprõ nẽ mēnijê kamã pahpijaàm kêt. Ně sãnti hwỳr pahkõnkrã ho pahkrĩ nẽ kãm amnhĩ jagrer.

⁴Tã Kris kôt amnhĩ xunhwỳ hãmri nẽ mẽ pahte amnhĩ nhĩpêx nyw o amnhĩ nhĩpêx o papa. Hãmri nhũm arĩ mẽ kot amnhĩ nhĩpêx tũm o amnhĩ nhĩpêx xwỳnhjaja tee ri ja hã mẽ pahpumu nẽ hêx rom amnhĩ kôt mẽ pamã tanhmã ri àhkrox to ho pa. Pu mẽ axte mẽ hkôt amnhĩ nhĩpêx kêt nhũm mẽ tee ri ja hã mẽ pahpumu nẽ mẽ pakamã gryk kato nẽ tanhmã mẽ pahto kapěr punuj to.

⁵Tã koja Tĩrtũm nhỹrmã amnhĩ wỳr mẽ hã karõ nhũm mẽ ma hwỳr mra nẽ kutã hkrĩ. Ně kormã mẽ htĩr ri tanhmã mẽ kot amnhĩ nhĩpêx to ho pa hã kãm amnhĩ jarēnh pa. Hãmri nhũm mẽ kot amnhĩ nhĩpêx ã tanhmã mẽ hipêx to. Kojã mẽ pahpiitã tanhmã mẽ pajarēnh to. Mě htyk xwỳnhjaja nẽ kormã

mě pahťir nē mě papa xwỳnhjaja nhũm mě pahpiitã tanhmã mě pajarēnh to.

⁶Na pre Jejus ty hãmri nē kormã akupỹm htĩr kêt rãhã hkarõ pix o ma amex wỳr tẽ nē kamã mě htĩr ri amnhĩ kaxyw Tĩrtũm mã hamaxpěr xwỳnhjê mã awjarẽ. Na prem mẽ kot amnhĩ tomnuj mỳrapê ra wej nē ty nē arĩ amex kãm ri pa. Jakamã nhũm Jejusja hkarõ ho ma mẽ hwỳr tẽ nē mẽ kãm: —E na pa ra mẽ ate amnhĩ tomnuj pãnhã amnhĩrer pa. Tã kormã mẽ atĩr ri mẽ ate amnhĩ kaxyw Tĩrtũm kôt ajamaxpěr jakamã kot kaj mẽ ma hwỳr api nē wa ixkuri wa ixpyrà nē atĩr tũm nē amex nē apa ho apa. Anẽ.

Mě pahpê Kris kwỳ hã tanhmã mẽ pahte axpẽn nhĩpêx to hã mẽ pamã karõ

Rõmãn 12.6-8; Wam Korĩt 12.1-11

⁷Nẽ koja tokyx mẽ panhõ pikaja mẽ pahpê hapêx nē kamã mẽmoj piitã hapêx pa. Jakamã kwa kêr ka mẽ ate amnhĩ nhĩpêx ã amnhĩ pumunh mex o apa. Nẽ mẽ atỳx ri ajamaxpěr ri apa hkêt nẽ. Nẽ mẽmoj punuj nê amnhĩ to htỳx o ri apa ho ajamaxpěr nyw pix o amnhĩ to Tĩrtũm wỳr rãhã ho ri apa.

⁸Nẽ kwa kêr ka mẽ amã axpẽn kĩnh o ri axpẽn kôt apa. Ja na mex o mex. Kot kaj mẽ ã axpẽn nhĩpêx anẽ nhũm Kris kôt atõ rỳ atõxjê hõ tanhmã atomnuj to japêr ka amnhĩ tã omu nē ãm omu. Amã hkĩnh o ãm amnhĩ tã omu. Jao axte kot tanhmã atoja mã ajamaxpěr kêt nẽ.

⁹Nẽ kêr ka mẽ axãmnhĩx ajamakêtkati nē amnhĩ nhõrkwỹ hwỳr axpẽn wỳ nẽ axpẽn to mex o ri apa. Nom kêr ka mẽ agryk kãm amnhĩ wỳr mẽ hwỳr kêt nẽ.

¹⁰Na pre ra Tĩrtũm mẽ pahpê hkra hã ahpỹnhã tanhmã mẽ pamã mẽmoj tã karõ hto nẽ ã mẽ pahte amnhĩ nhĩpêx anhỹr o papa kaxyw mẽ pahto mẽ paxihtỳx. Mẽ pahte ahpỹnhã tanhmã axpẽn to mex to ho ri axpẽn kôt papa kaxyw. Tã kêr ka mẽ ra kot mẽmoj tã mẽ amã karõ hkôt axpẽn nhĩpêx o ri axpẽn kôt apa.

¹¹Koja ma mẽ ate akwỳjê mã kapêr jarēnh o ri apa kaxyw mẽ amã karõ ka mẽ ama nẽ akatàt kôt ỹ hã mẽ kãm harēnh mex o ri mẽ hkôt apa. Rỳ tanhmã

axpën to ajuta hto ho ri apa kaxyw mẽ axunhwÿr japêr ka mẽ amnhĩ tã omu nẽ hkamnàr rom mẽ ho ajuta mex rãhã ho ri apa. Mẽ apiitã Jejus nhÿ hã ã amnhĩ nhĩpêx anhÿr o ri apa. Kêr kê Jejus kôt mẽ akwÿjaja amnhĩ tã mẽ apumu nẽ mẽ anhÿ hã Tĩrtũm mã mex o mex ã harẽ.

Jejus kwÿjaja kot amnhĩ xà htÿx kamã hamak o pa hã mẽ harẽnh

Rukre 6.20-23; Juãw 16.1-4; Sikũn Tesarõn 1.3-12; Sikũn Ximotre 3.13; Eprêw 12.3; Xiakre 1.2-4

12E Kris kôt ixkràmnhwÿjaja. Koja Kris kwÿ kêt xwÿnhjaja Kris ã tanhmã mẽ anhĩpêx to nom kwa kêr ka mẽ tee ri amnhĩ kukamã ajamaxpêr o akapřĩ nẽ apa hkêt nẽ. Kêt mẽ akĩnh rãhã axpën kôt ri apa. Na htem ã mẽ pahpê Kris kwÿjê nhĩpêx anhÿr o pa. Jakamã kwa mẽ amnhĩ tã mẽ omu nẽ tee ri amnhĩ kukamã ajamaxpêr kêt nẽ.

13Mẽ arĩ akĩnh nẽ ri apa. Mẽ kot Kris pyrà nẽ mẽ panhĩpêx punuj tãã. Kêr kê Jejus nhÿrmã akupÿn mẽ pahwÿr wrÿ pu mẽ omu nẽ pahkĩnh tÿx o pahkĩnh tÿx.

14Kwãr mẽ mãmřĩ mẽ pahpê Kris kwÿ hã tanhmã mẽ panhĩpêx to. Na htem ã Tĩrtũm Karõ kot mẽ pahkarõ mã gjêx xwÿnhjê nhĩpêx o pa anẽ.

15Nẽ mẽ apê Kris kwÿ jakamã kwa kêr ka mẽ amnhĩ to mex rãhã o ri apa. Jao mẽ hpar o ri apa hkêt nẽ. Nẽ ri axàhkĩnh o ri apa hkêt nẽ. Nẽ nhãm mẽ hkaêx mã agjêx o ri apa hkêt nẽ. Nẽ tanhmã mẽ homnuj to ho ri apa hkêt nẽ. Kot kaj mẽ ã amnhĩ nhĩpêx anhÿr o ri apa nhũm mẽ anhõ pahihtĩ ja hã tanhmã mẽ ato ka mẽ amnhĩ kamã apijaàm tÿx nẽ.

16Nom koja mẽ apê Kris kwÿ hã tanhmã mẽ anhĩpêx to ka mẽ ja hã amnhĩ tã mẽ omu nẽ amnhĩ kamã apijaàm kêt nẽ. ãm Tĩrtũm pix mã amnhĩ jarẽ nẽ kãm: —Pa Tĩrtũm. Ixpê akra Kris kwÿ hã na mẽ ã ixtomnuj anẽ. Nom ixpê akra jakamã kwãr mẽ mãmřĩ tanhmã inhĩpêx to. Amex o amex o ate ixto akra jakamã kwãr mẽ mãmřĩ ã inhĩpêx anhÿr o pa. Anẽ.

17Nẽ koja Tĩrtũm tokÿx mẽ pahpiitã tanhmã mẽ pahte amnhĩ nhĩpêx to hã mẽ pahpumu nẽ tanhmã mẽ panhĩpêx to. Mẽ pahpê hkrajaja koja tanhmã mẽ pahte amnhĩ nhĩpêx to hã tanhmã mẽ pahto mex to. Hãmri nẽ hpãnhã mẽ kêp hkra hkêt xwÿnhjê ho hapu nẽ tanhmã mẽ hipêx to. Mẽ kot amnhĩ

kaxyw hkôt hamaxpër kêt jakamã nhũm mẽ pahkĩnhã tanhmã mẽ homnuj tỳx to.

¹⁸Kapër ã kagà htũm kot ja hã mẽ pajarẽnh kot: Mẽ kot Tĩrtũm kapër kôt amnhĩ to mex xwỳnhjaja na htem àmnhĩx amnhĩ xà htỳx kamã hamak o pa kamã ty nhũm Tĩrtũm ma õ krĩ hwỳr amnhĩ wỳr mẽ ho àpir kurê kumrẽx. Nom mẽ kot amnhĩ tomnuj xwỳnhjaja koja mẽ hkĩnhã amnhĩ xà htỳx kamã hamak rãhã nẽ pa ho pa nẽ aa mex kêt nẽ. Anẽ.

¹⁹Tã koja Tĩrtũm kãm ja prãm japêr kwãr mẽ mãmri Kris ã tanhmã mẽ pahomnuj to. Nom kêt pu mẽ Tĩrtũm kamnàr rom amnhĩ to mex pix o ri papa. Kêp mẽ panhĩpêx xwỳnh maati jakamã ra kot amnhĩ jarẽnh xà hkôt koja tanhmã ri mẽ pamã amnhĩ nhĩpêx to ho pa.

Wam Pêtre 5

Tĩrtũm krajaja kot tanhmã amnhĩ nhĩpêx to hã mẽ kãm karõ

Atre 20.28-31

¹E kot paj hpãnhã mẽ apê Kris kwỳ hkrãhtũmjê mã ixkapêr ka mẽ inhma. Ijaxwỳja ixpê mẽ akrãhtũmjê hõ na pa. Na pa pre mẽ akurom Kris htyk kãm omu. Nom kot puj mẽ nhỹrmã pahpimràatã mex o mex ã omu nẽ uràk nẽ mẽ pamex nẽ ri papa ho papa.

²⁻³Jakamã e Kris kôt mẽ hkrãhtũmjaja kêt ka mẽ atar Kris kôt pahkwỳjê jamãr mex nẽ. Ra Tĩrtũm kot mẽ ate kãm hkwyjê jamãr kaxyw mẽ axunhwỳr jakamã kêt ka mẽ omunh mex rãhã ho mẽ hkôt ri apa. Te ho ôwêhti jamãr xwỳnh kot ôwêhti jamãr mexta pyràk. Te mẽ kêp Tĩrtũm krit ôwêhti nhũm mẽ ate kãm mẽ hamãr o apa xwỳnh pyrà nẽ kãm mẽ omunh mex rãhã ho ri mẽ hkôt apa. Nẽ akĩnh pê tanhmã ri mẽ ho ajuta hto ho ri mẽ hkôt apa. Ja na Tĩrtũm kãm hprãm. Nom kêt ka mẽ ano hkà karôt kãm mẽ ho ajuta hkêt nẽ. Rỳ kàxpore hprãm xàj mẽ kãm tanhmã amnhĩ nhĩpêx to hkêt nẽ. ãm amarĩ tanhmã mẽ kutã anojarêt to pix kukamã ajamaxpêr o ri mẽ hkôt apa. Nẽ kêt ka mẽ kãm mẽmoj tã karõ kamã axihtỳx kêt nẽ. Mẽ akapêr mã aprĩ kamã mẽ kãm mẽmoj jarẽ kê mẽ amnhĩ tã mẽ apumu nẽ mẽ apyrà nẽ ã axpẽn nhĩpêx anhỹr o pa.

⁴E kêr ka mẽ ã Kris kôt mẽ akwỳjê jamãr mex pê mẽ hipêx o apa anê. Hãmri nhũm mẽ pajamãr xwỳnh maatija ja hã mẽ apumu nê nhỹrmã akupỳn mẽ pahwỳr wry nê mẽ ato mex rax nê.

⁵Nê e mẽ amy xàptàr nywjaja. Kêr ka mẽ Kris kôt mẽ akrãhtũmjê kapêr ma nê mẽ hkôt ri amnhĩ nhĩpêx mex o ri apa. Nê kwa kêr ka mẽ apiitã axpên nhĩpêx o te anhiõ kot amnhĩ to rax o ajakrenh pyrãk. Tĩrtũm kapêr ã kagà htũm kot ja jarênh kot: Mẽ kot amnhĩ to jarkrar o ri mẽ pa xwỳnhjaja na hte Tĩrtũm mẽ kutã amnhĩ xunhwỳ. No mẽ kot amnhĩ to hkryre nê axpên tã hpijaàm o mẽ pa xwỳnhjaja na hte mẽ ho mex o pa.

⁶Anhỹr ã mẽ harênh jakamã kwa kêr ka mẽ Tĩrtũm ã apijaàm rãhã ho ri apa ixkwỳjaja. Nê axpên mã ri amnhĩ to jarkrar o ri apa hkêt nê. Kêr kê Tĩrtũm xihỳx xwỳnhja ja hã mẽ apumu hãmri nê nhỹrmã kot mẽ pahto mex xà hã arĩgroja kato nhũm mẽ ate amnhĩ to mex xwỳnh ã mẽ ajarê nê mẽ ato mex rax nê.

⁷Nê kêr ka mẽ tee ri amnhĩ kukamã ajamaxpêr pê akaprĩ ho ri apa hkêt nê. ãm te mẽ ate Tĩrtũm mã akaprĩ nhõr pyrãk o amnhĩ nhĩpêx nê axãmnhĩx akĩnh nê akaprĩ hkêt nê apa. Tĩrtũm kêp mẽ pajamãr xwỳnh maati kênã kot ka kêt mẽ ri akaprĩ nê ri apa.

⁸Nê kwa mẽ okora. Kêr ka mẽ amnhĩ nê kot mẽ pakutã amnhĩ xunhwỳr xwỳnh maati Satanastija pumunh mex rãhã ho ri apa. Na hte mẽ panhĩpêx o te ropkror kot akunĩ kamã mry ho krihkrit o ri mrar pyrãk o mẽ panhĩpêx. Jao mẽ pahte Kris kaga hprãm xàj apkati mẽ tanhmã nê mẽ pahto ho ri mẽ pahkôt pa.

⁹Na hte ã pika piitã hkôt Kris kôt mẽ pahtõ nê mẽ pahtõxjê nhĩpêx anhỹr o pa nhũm mẽ pahpyrà nê amnhĩ xà htỳx kamã hamak o pa pê omnuj nê pa. Jakamã kwa kêr ka mẽ Kris kôt amnhĩ xunhwỳr tỳx nê kutã amnhĩ to htỳx rãhã ho ri apa.

¹⁰Tĩrtũm kãm mẽ pajapê jakamã na hte mẽmoj to mẽ pakutã nojarêt rãhã ho ri pa. Na pre mẽ pamex nê nhỹrmã mẽ pahte kuri tãm amnhĩ nhĩpêx o papa mã xwỳnh ã mẽ pajarê. Kris kukwak ri ã mẽ pajarênh anhỹr jakamã

mě ate jar Kris ã apunuj ně ri apa htã kot kaj mẽ kritpêm ã amnhĩ nhĩpêx anhỹr ry hkêt ně. Koja Tĩrtũm mẽ akrã kamã mẽ ajamaxpěr xihtỳx jagjê ka mẽ akupỹm amex ně axihtỳx pê ate amnhĩ nhĩpêx nyw o amnhĩ nhĩpêx rãhã ho ri apa.

11Tĩrtũmja hihtỳx o hihtỳx ně àhpumunh o àhpumunh. Nễ hihtỳx xà ně àhpumunh xà koja aa kêp hirerek ně hapêx kêt kumrêx. ãm hãmri na mẽ kot harênh kot anhỹrja.

Pêtre kapěr jatur xà

12Nễ ota Kris kôt mẽ pahtõ Sirastija na inhmã mẽ akaxyw kagàja nhĩpêx pa mẽ awỳr mễnh kaxyw. Na pa hte kãm ixkapěr nhũm inhma ně inhmã hã kagà. Na hte Kris kapěr kôt amnhĩ nhĩpêx rãhã ho ri pa. Tã inhmã kagàja nhĩpêx. Mễ ate kamã harênh ně mar ně tãm ajamaxpěr kaxyw. Nễ Tĩrtũm kãm mẽ ajapê ně kot mẽmoj to mẽ akutã nojarêt ã mẽ ate kamã harênh kaxyw. Tã kêt ka mẽ kãm mẽ ajapê hã amnhĩ tã harênh ma ně kapěr kôt pix mã amnhĩ nhĩpêx mex rãhã ho ri apa. Mễ akwỳjaja kot tanhmã hã mẽ ato htãã.

13Nễ ota jar Papirõn kamã Kris kôt mẽ pahtõ ně mẽ pahtõxjaja mẽ awỳr hpěr mẽ. Tĩrtũm kot mẽ pahpyrà ně mẽ ho hkra jakamã mẽ kêp mẽ atõ ně mẽ atõx ã mẽ awỳr hpěr mẽ. Nễ Xiakre mǎãnên mẽ awỳr hpěr mẽ. Te kêp ixkra pyræk.

14Nễ kêt ka mẽ nhỹri apê Kris kwỳ hã axpẽn pumu ně mẽ axpẽn to atõ ně atõx ã axpẽn mã akapěr mex kurê kumrêx. E kê Tĩrtũm mẽ apê Kris kwỳ hã mẽ amã mẽ ajamakêtkati ně mẽ apa xà gõ ka mẽ axàmnhĩx ajamakêtkati ně amex ně ri apa ho apa. Tã ãm ja pix. Ixpê Simãw Pêtre na pa ã mẽ awỳr kagà ně mễnh anễ.

Sikũn Pêtre

Sikũn Pêtre 1

¹Pa Kris kôt ixtõ nẽ ixtõxjaja. Xà mẽ amex? Ot pa mẽ awỳr kagà nhĩpêx nẽ krĩ piitã hkôt mẽ awỳr kurẽ. Ixpê Simãw Pêtre na pa wam ixte kagà nhĩpêx nẽ mẽ awỳr mẽnh tã axte hõ nhĩpêx. Ixte Jejus Kris nhỹ hã mẽ ajahkre ho ixpa xwỳnh ã mẽ amã hipêx nẽ kumẽ. Na pa hte Jejus mã amnhĩ nhĩpêx mex o ri ixpa. Nẽ mẽ papytâr xwỳnh Jejus Krisja Tĩrtũm pyrà nẽ mex o mex. Nẽ wa kot amnhĩ nhĩpêxja mex o mex. Jakamã na pre wa tanhmã mẽ pahkrã hto pu mẽ amnhĩ kaxyw wa hkôt pajamaxpêr tỳx rãhã ho ri papa. Na ka htem ixpyrà nẽ ã amnhĩ nhĩpêx anẽ. Tã pa mẽ amã kagàja nhĩpêx.

²Nà Tĩrtũm mẽ mẽ panhõ Pahihti Jejus wa kot amnhĩ nhĩpêxja na ka mẽ ra harẽnh mar tỳx nẽ. Wa kot tanhmã amnhĩ nhĩpêx to nẽ tanhmã wa hamaxpêr toja ka mẽ mar tỳx nẽ wa hkôt pix mã amnhĩ nhĩpêx. Tã kêr ka mẽ arĩ ã amnhĩ nhĩpêx anhỹr rãhã ho ri apa. Jao axãmnhĩx ajamakêtkati nẽ akĩnh nẽ apa ho apa. Na pa hte ã mẽ ato Tĩrtũm mẽ Pahihti Jejus Kris wa hwỳr o ri ixpa anẽ. Na hte Tĩrtũm mẽ ato mex nẽ mẽ akutã nojarêr rãhã ho pa.

Tĩrtũm kot mẽ pahto mex o pa hã harẽnh

Epes 2.12-13; Wam Tesarõn 1.2-4; Sikũn Pêtre 3.18

³Nẽ Tĩrtũmja àhpumunh tỳx o àhpumunh tỳx jakamã na pu htem hkôt amnhĩ xunhwỳ nhũm amnhĩ tã mẽ pahpumu nẽ mẽ pamã àhpumunh tỳx xà hkwỳ gõ. Hãmri pu mẽ ra uràk nẽ amnhĩ to mex nẽ tãm amnhĩ nhĩpêx o ri papa. Tã kot puj mẽ nhỹrmã ma õ krĩ hwỳr api.

⁴Na pre mẽ pakukamã amnhĩ jarẽnh o: —Kot paj nhỹrmã ixkrajê mã ixte amnhĩ nhĩpêx mex kwỳ gõ nhũm mẽ inhỹ hã ho tãm ri amnhĩ nhĩpêx mex o pa. Nẽ ixpyrà nẽ hamaxpêr mex o pa. Anhỹr jao te ra mẽ pamã hkĩnh xà mex kwỳ nhõr pyràk o mẽ panhĩpêx. Nẽ te ra kot mẽ pahkrãm hamaxpêr mex jagjênh nẽ mẽ pamã kot amnhĩ nhĩpêx mex jagjênh pyràk. Mẽmo kaxyw na pre ã mẽ panhĩpêx mex anẽ? Nà uràk nẽ tãm mẽ pahte amnhĩ nhĩpêx mex rãhã o ri papa kaxyw. Jao mẽ pahte mẽ kêp hkwỳ hkêr xwỳnhjê hkôt amnhĩ nhĩpêx kêt nẽ. Nẽ mẽ hamaxpêr punuj o pajamaxpêr kêt nẽ. Nẽ

hpãnhã mẽ pahte Tĩrtũm kõt pix mã amnhĩ nhĩpêx rãhã ho papa. ã mẽ pahte amnhĩ nhĩpêx anhỹrja na mex o mex.

⁵Tã ã Tĩrtũm kot mẽ panhĩpêx mex anhỹr jakamã kwa kêr ka mẽ kapêr mar tỳx nẽ hkõt pix mã amnhĩ nhĩpêx mex o ri apa. Jao amnhĩ kaxyw hkõt ajamaxpêr rãhã nẽ. Kot kaj mẽ ã amã amnhĩ nhĩpêx anhỹr o apa hprãm hã kot kaj mẽ mããnẽn amã tãm amnhĩ nhĩpêx o apa hprãm. Nẽ mẽ amã Tĩrtũm kapêr piitã mar prãm o ri apa.

⁶Hãmri nẽ piitã mar pa nẽ mẽmoj punuj piitã nê amnhĩ to htỳx nẽ. Nhũm mẽ kêp Kris kwỳ hkêt xwỳnhjaja Kris ã tanhmã mẽ anhĩpêx to htã ka mẽ ãm amnhĩ tã mẽ omu nẽ mẽ umaj mẽ amã Kris kaga hprãm kêt nẽ. Nẽ mẽ amã Tĩrtũm mã amnhĩ jarẽn hã rãhã ho apa hprãm. Nẽ mẽ amã kapêr mar rãhã ho apa hprãm.

⁷Nẽ mẽ amã Kris kõt mẽ atõ nẽ mẽ atõxjê ho mex pix o ri apa hprãm. Jao te mẽ amã amnhĩ tã ma pyræk o mẽ piitã mẽ hipêx o ri mẽ hkõt apa.

⁸E kêr ka mẽ ã amnhĩ nhĩpêx anhỹr o ri apa. Kot ka mẽ ã amnhĩ nhĩpêx anẽ nẽ mẽ panhõ Pahihti Jejus Kris kõt amnhĩ nhĩpêx mex o mõ. Hãmri nhũm mẽ akwỳjaja mẽ apumu nẽ mẽ apê Kris kwỳ hã mẽ ajarẽn hã kurê kumrêx.

⁹No kot ka mẽ atõ ixkapêr mar tã hkõt amnhĩ nhĩpêx kêt nẽ hãmri te Tĩrtũm kot anê ate amnhĩ tomnuj rẽn hã par mã ajamaxpêr kêt pyræk.

¹⁰⁻¹¹No na ka htem ã amnhĩ nhĩpêx anhỹr kêt nẽ. Ra mẽ ate Pahihti Jejus Kris kõt amnhĩ nhĩpêx mex jakamã na htem ja hã mẽ apumu nẽ Tĩrtũm kot mẽ ato hkra hã mẽ ajarẽn hã kurê kumrêx. Kot kaj mẽ ã hkõt amnhĩ nhĩpêx anhỹr o apa nẽ mẽmo arĩgro hã apunuj nẽ apa htã Jejus kaga hkêt nẽ. Hãmri nẽ nhỹrmã ma Tĩrtũm nhõ krĩ hwỳr api nhũm mẽ apumu nẽ mẽ ato mex rax nẽ. Hãmri ka mẽ õ krĩ kamã mẽ panhõ Pahihti Jejus Kris wa kuri atĩr tũm nẽ amex nẽ apa ho apa.

¹²Nẽ na ka mẽ ra Tĩrtũm kot amnhĩ nhĩpêx mar tỳx nẽ amnhĩ krã kamã kot amnhĩ nhĩpêx mã ajamaxpêr tỳx o ri apa. Tã nom kot paj arĩ mẽ amã ja jarẽn hã rãhã ho ri ixpa.

¹³Kormã ixtîr ri kot paj xatã mẽ amã harênh o amnhîrît. Ja na kêt inhmã hprãm. Mẽ ate nhÿrmã tanhmã ri ajamaxpêr to nê hkaga pumaj.

¹⁴Na pre mẽ panhõ Pahihti Jejus Krisja inhmã tokyx ixtyk ã ijarê. Kot paj xep kritpêr ri ixtîr nê ixpa hkêt nê.

¹⁵Jakamã na pa kormã ixtîr ri ã mẽ amã kagã nhîpêx anê. Mẽ ate inhmÿr pê arî omunh nê kamã harênh nê Tîrtûm kot amnhî nhîpêx mã ajamaxpêr tÿx rãhã ho ri apa kaxyw.

Pêtre kot no ho Jejus pumunh ã amnhî jarênh

Matêwre 17.1-5; Makre 9.1-8; Sikûn Ximotre 3.16-17

¹⁶Nê na pa pre ra tanhmã mẽ amã mẽ panhõ Pahihti Jejus Krisja jarênh to. Hihtÿx o hihtÿx ã harê nê àhpumunh tÿx o àhpumunh tÿx ã harê. Nê nhÿrmã akupÿn mẽ pahwÿr wrÿk ã harê. No na pa pre amnhî krã hkôt ã harênh anhÿr kêt nê. Na pa pre inhno ho Jejus hihtÿx o hihtÿx ã omunh o hkôt ixpa nê ixte omunh xà hkôt ã mẽ amã harênh anê.

¹⁷⁻¹⁸Amnepê mã kormã ixkwÿjê mẽ mẽ ixte arî hkôt ixpa ri pa prem hkôt hixêt prêk nhîmök wÿr api. Pa nê kaxyw Xiakre nê Juãw mẽ pa mẽ hkôt ixpimràatã hixêt ã api nê himök ã ixkuhê. Hãmri nhûm Tîrtûm tanhmã Jejus to nhûm hirã htÿx kãm xa. Hãmri nhûm Mëpahpãm Tîrtûmja mẽ inhmã kapêr. Kaxkwa kamã hirã htÿx rax rûm mẽ inhmã kapêr o: —E ota Ixkrata xa. Inhmã hapê ho inhmã hapê. Anê. Tã ra ixte mar xà hkôt pa amnhî xô ri mẽ amã harê nê hã kagã.

¹⁹Na pa prem ã hixêt prêk nhîmök ã Jejus pumunh nê Tîrtûm kot tanhmã harênh to hã mar anê. Hãmri nê ijamaxpêr o: —Nà ãm hãmri na pre amnepêr Tîrtûm nhÿ hã kapêr jarênh o mẽ pa xwÿnhjaja Jejus kukamã ã harênh anhÿr o pa. Anê. Mẽ kot tanhmã Jejus kukamã harênh toja te kot kamàt kô kamã kanê hpôk nhîrã hkryre pyræk. Tã koja nhÿrmã akupÿn wrÿ hãmri nê te myt kator nê hirã mex nhûm mẽ pahte mẽmoj pumunh mex pyræk. Jakamã kwa kêr pu mẽ kot tanhmã Jejus kukamã harênh toja mar tÿx rãhã nhûm nhÿrmã te myt kator pyrã nê akupÿn mẽ pahwÿr wrÿ.

²⁰Tĩrtũm kapẽr ã kagà htũm kot tanhmã ỹ hã kapẽr jarẽnh xwỳnhjê jarẽnh to. Mẽ kot mẽmoj kukamã ujarẽnh ã mẽ harẽ. Nẽ Jejus kukamã tanhmã ujarẽnh to hã mẽ harẽ. Æ mẽ kot mẽmoj kukamã harẽnh kot anhỹr. Nom na pu htem amnhĩ krã hkõt ã mẽ ujarẽnh anhỹrja mar tỳx kêt nẽ. Koja Tĩrtũm Karõ hprĩ hã mẽ pamã ho amnhĩrĩt pu mẽ rĩ kormã pahprĩ hã mar tỳx nẽ.

²¹Na pre ỹ hã kapẽr jarẽnh o mẽ pa xwỳnhjaja amnhĩ krã hkõt hkwyjê mã ujarẽnh o pa hkõt nẽ. Tĩrtũm Karõ na pre tanhmã mẽ hkrã hto nhũm mẽ ỹ hã hkwyjê mã tanhmã harẽnh to ho pa nẽ ỹ hã mẽ pamã hã kagà.

Sikũn Pẽtre 2

Tĩrtũm kapẽr jarẽnh o hẽx xwỳnhjê jarẽnh

Korosẽ 2.16-17; Wam Ximotre 4.1-5; Sikũn Ximotre 3.1-9; Jutre 3-16

¹Nẽ amnepẽm na pre Ijaew kwỳjaja te mẽ kẽp Tĩrtũm nhỹ hã kapẽr jarẽnh xwỳnh pyràk. Nom Tĩrtũm kapẽr kwỳm ri hkwyjê mã tanhmã ho hẽx to ho pa. Tã koja nhỹrmã mẽmojaja mẽ uràk nẽ mẽ awỳr mra nẽ ã mẽ amã Tĩrtũm kapẽr o hẽx o pa anẽ. Nẽ kapẽr kwỳm ri tanhmã mẽ ajahkre hto ho mẽ amã hẽx o mẽ akõt pa. Mẽ ate mẽ mar nẽ amnhĩ nhĩpẽx nyw kaga nẽ hpãnhã mẽ kot amnhĩ tomnuj kõt apa hprãm xàj nhũm mẽ hẽx rom tanhmã mẽ ajahkre hto ho pa. Pahihti Jejus kot mẽ nẽ htyk tã nhũm mẽ hkõt amnhĩ nhĩpẽx kêt nẽ axtem nẽ ri kapẽr o hẽx o pa. Mỳrapê koja Tĩrtũm tokyx mẽ kot amnhĩ xà htỳx kamã hamak tũm xà hwỳr mẽ rẽnh pa.

²Koja mẽ ohtô nẽ mẽ kapẽr ma nẽ kãm mẽ mar prãm nẽ. Nẽ mẽ hkõt hamaxpẽr nẽ mẽ hkõt amnhĩ nhĩpẽx o pa. Jao ra hpijaàm kêt nẽ mẽ hkõt htỳx ri tanhmã amnhĩ tomnuj to ho ri pa. Tã ã mẽ kot Tĩrtũm kapẽr o mẽ hẽx xwỳnhjê mar nẽ mẽ hkõt amnhĩ nhĩpẽx anhỹr jakamã koja mẽ kãm Tĩrtũm kapẽr mar prãm xwỳnhjaja mẽ kot amnhĩ nhĩpẽx ã mẽ omu nẽ Tĩrtũm kapẽrja mex kêt ã harẽnh japêr.

³Tĩrtũm kapẽr o mẽ hẽx o mẽ pa xwỳnhjaja na htem kàxpore pix prãm xàj mẽ awỳr mra nẽ tanhmã mẽ amã kapẽr jarẽnh o hẽx to ho pa nhũm Tĩrtũm ja hã mẽ omunh rãhã ho hkrĩ. Na hte nhỹhỹm mrar kêt nẽ rỳ htỳx õt o hikwỹ hkõt nẽ. Na hte arĩ mẽ kot amnhĩ nhĩpẽx ã mẽ omunh rãhã ho hkrĩ. Tã koja

nhỹrmã ma mẽ kot amnhĩ xà htỳx kamã hamak tũm xàta hwỳr mẽ kurẽ nhũm mẽ ma hwỳr hapêx pa.

⁴Nẽ amnepê mã kaxkwa kamã Tĩrtũm kapêr o mẽ wryk xwỳnh kwỳjaja na prem axtem nẽ Tĩrtũm kapêr nhĩrôp kuhê nhũm tee ri amnhĩ tã mẽ omu hãmri nẽ amnhĩ nê mẽ kator pa. Mẽ kamã ukapĩrĩ hkêt nẽ amnhĩ nê mẽ kator pa hãmri nẽ mẽ kot amnhĩ xà htỳx kamã hamak tũm xàta wỳr mẽ hano. Nhũm prem ma hwỳr pa nẽ ahkre xupỳm kãm kamàt kô kamã arĩ hkrĩ ho hkrĩ. Tĩrtũm kot mẽ piitã tanhmã mẽ harẽnh to xà hã arĩgroja jamãr o hkrĩ. Nẽ tee ri kãm hapôx prãm kaprỳ ho hkrĩ.

⁵Nẽ amnepêm pika kamã ri mẽ pa xwỳnhjaja na prem haxwỳja piitã amnhĩ tomnuj pix o ri pa. Jakamã nhũm Tĩrtũm ja hã mẽ omu nẽ mẽ kamã ukapĩrĩ hkêt nẽ. Nẽ mẽ hwỳr na rax mẽ. Mẽ kãm kapêr mar prãm kêt jakamã nhũm mẽ hwỳr kumẽ nhũm wryk rax kumrẽx nẽ mẽ hanhir pa nẽ mẽ himex. ãm Noehiti mẽ hkwỳ pẽ 7 pixjaja nhũm mẽ kurom htĩr nẽ hkà hkĩnh nẽ mex nẽ pa. Noehiti kormã na xwỳj ri kot mẽ kãm Tĩrtũm kapêr jarẽnh o ri mẽ hkôt pa htã nhũm mẽ kuma nẽ ãm kuma. Mỳrapê na prem piitã pikaprãr pa.

⁶Nẽ Sotõ mẽ Gomo wa kamã mẽ pa xwỳnhjaja haxwỳja na prem amnhĩ tomnuj tỳx kumrẽx o pa nhũm Tĩrtũm wantajê pyrà nẽ mẽ kamã ukapĩrĩ hkêt nẽ. Na pre kaxkwa rũm mẽ hipy mẽmo hpôk kwỳ rẽ nẽ ho mẽ ho hapêx pa. Tã mẽmo kaxyw na pre ã mẽ hipêx anẽ? Nà mẽ piitã mẽ kot mẽ harẽnh mar nẽ hamaxpêr o: —Na hte ã Tĩrtũm mẽ kot amnhĩ tomnuj xwỳnhjê nhĩpêx anẽ. Anhỹr o hamaxpêr kaxyw na pre ã mẽ hipêx anẽ.

⁷⁻⁸Nom Rohtija na pre Tĩrtũm Sotõ nê kator jakamã nhũm htyk kêt nẽ. Na pre hkwỳjê rom tãm amnhĩ nhĩpêx tã mẽ kot amnhĩ tomnuj tỳx xwỳnhjê nhõ krĩ kamã ôrkwỹ nẽ ri pa. Nẽ apkati mẽ tee ri mẽ kot amnhĩ nhĩpêx ã mẽ omu nẽ mẽ ỹ hã hkapĩrĩ nẽ tee ri mẽ hkukamã hamaxpêr o pa. No nhũm mẽ amnhĩ tomnuj ã amnhĩ pumunh nẽ tokyx tãm amnhĩ nhĩpêx kêt nẽ. Nẽ apkati mẽ tanhmã amnhĩ tomnuj to nẽ kapêr punuj o pa nhũm Rohti tee ri mẽ omu nẽ hkapĩrĩ htỳx nẽ pa.

⁹Tã nhũm Tĩrtũm mẽ himex kaxyw nẽ mẽ nê kator nẽ mẽ himex pa. Na hte ã Tĩrtũm mẽmoj punuj pê mẽ kot amnhĩ kaxyw kãm hamaxpěr nẽ hkôt amnhĩ nhĩpêx xwỳnhjê pytàr anẽ. No mẽ kot amnhĩ tomnuj xwỳnhjaja na hte axtem mẽ hipêx. Tã koja nhỹrmã mẽ pahpiitã tanhmã mẽ pajarênh to xà hã arĩgro kato nhũm ma mẽ kot amnhĩ xà htỳx kamã hamak tũm xà wỳr mẽ rênh pa. ãm tapxipix kot ã mẽ hipêx anhỹr kaxyw àhpumunh tỳx.

¹⁰Tã mẽ hpijaàm kêt kãm amnhĩ tomnuj o mẽ pa xwỳnhjaja nẽ mẽ kot Tĩrtũm kapěr mar nẽ ãm mar xwỳnhjaja koja nhỹrmã mẽ homnuj tỳx nẽ. Nẽ Tĩrtũm kapěr o hêx o ri mẽ pa xwỳnhjaja na htem amnhĩ to jarkrar pix o pa. Nẽ Tĩrtũm kapěr o mẽ wrỳk xwỳnhjê hã hpijaàm kêt nẽ. Nẽ axtem nẽ mẽ ho kapěr punuj pê tanhmã mẽ haprỳ hto ho pa.

¹¹Tã nhũm htem amnhĩ tã mẽ kuma nẽ ãm mẽ kuma. Mẽ kurom mẽ hihtỳx kumrêx tã no ãm amnhĩ tã Tĩrtũm mã tanhmã mẽ ho kapěr to hkêt nẽ.

¹²Nẽ mry xoprê na hte htỳx ri pa ho pa. Tã Tĩrtũm kapěr o mẽ hêx o mẽ pa xwỳnhjaja htem mry xoprêta pyrà nẽ htỳx ri hamaxpěr mex kêt o pa. Jao hprĩ hã mẽmoj mar kêt tã htỳx ri hijuk ri tanhmã mẽmoj jarênh to. Nẽ mry xoprêja htỳx pa nhũm mẽ kot hparja pyrà nẽ mẽ kot Tĩrtũm kapěr o hêx o mẽ pa xwỳnhjaja koja Tĩrtũm nhỹrmã kuwy hwỳr mẽ ho hapêx nẽ kamã mẽ rênh pa.

¹³Nẽ koja nhỹrmã Tĩrtũm mẽ kot tanhmã mẽ ama hêx to ho pa hã mẽ omunh xà hkôt mẽ homnuj tỳx nẽ. Na htem hpijaàm kêt nẽ mẽ piitã mẽ noo mã tanhmã amnhĩ tomnuj to ho pa. Kamàt kãm nẽ arĩgro hã. Nẽ mẽ kãm tanhmã amnhĩ nhĩpêx to hprãm xà hkôt pix mã amnhĩ tomnuj o pa. Na htem te mẽ kêp Kris kôt mẽ atõjê pyrà nẽ mẽ akôt Tĩrtũm kapěr mar xà hã ixkre hwỳr agjê nẽ mẽ anhĩhkô hã mẽ kot Jejus tyk mã hamaxpěr kaxyw pãwti hkwy hku. Nom htỳx hkur o hkrĩ nẽ htyk mã hamaxpěr kêt nẽ. Kãm Jejus kĩnh kêt tã hêx rom hpijaàm kêt kãm mẽ anhĩhkô hã htỳx ri hkur o hkrĩ.

¹⁴Nẽ nhỹri krĩ hwỳr pøj nẽ mênijê pumu nẽ kãm mẽ hkĩnh nẽ. Ra mẽ mjên ri pa htã nhũm mẽ kãm mẽ ho amnhĩkati hprãm nẽ mẽ kamã hpijaàm kêt o ri pa. Nẽ kormã mẽ kot Kris kôt amnhĩ xunhwỳr tohtuj anhỹr xwỳnhjê hwỳr

mra nê hêx rom tanhmã mẽ kãm kapêr to pê mẽ no kupyw o ri mẽ hkôt pa. Mẽ kot mẽ mar nê Kris kaga nê mẽ hkôt ri amnhĩ nhĩpêx prãm xàj ã mẽ hipêx anhỹr o pa. Na htem hikàxpore rũnh o pikuprõnh pix kukamã hamaxpêr o ra ho õxỳ nê. ã na htem amnhĩ nhĩpêx anhỹr o pa. Tã ra Tĩrtũm kot mẽ homnuj tỳx kaxyw mẽ hã amnhĩ jarẽ.

15-16Te mẽ kot kamàt kô kamã pry juk ã hpikunor nê htỳx ri pa pyràk o na htem amnhĩ nhĩpêx nê kãm Tĩrtũm kapêr mar prãm kêt nê amnhĩ tomnuj pix o pa. Amnepêm Peo hkra Paraãwta kêp Tĩrtũm nhỹ hã kapêr jarẽnh o pa xwỳnh tã axtem nê kàxpore rax prãm xàj tanhmã amnhĩ tomnuj to kaxyw. Nhũm Tĩrtũm tee ri ja hã omu nê Paraãw krit jumẽnreja tanhmã hakwa hto nhũm kãm kapêr. Jumẽnre kapêr kêt tã nhũm Tĩrtũm tanhmã hakwa hto nhũm kãm kapêr nê tanhmã kot amnhĩ tomnuj to kaxywta ã kãm akir nhũm amnhĩ tã kuma hãmri nê ã amnhĩ nhĩpêx anhỹr kêt nê. Tã mẽ kot Tĩrtũm kapêr o mẽ hêx ho mẽ pa xwỳnhjaja na htem Paraãw pyrà nê kàxpore rax prãm xàj tanhmã amnhĩ tomnuj to pix prãm.

17Te hino ra grà nhũm mẽ tee ri kamã gô japêr pyràk o na htem amnhĩ nhĩpêx. Rỳ te kakrã hapôx nhũm mẽ kot omunh nê na wrỳk ã hkamnhĩx kaprỳ pyràk. Tã ra Tĩrtũm mẽ kaxyw kamàt kô htỳx pê mẽ kot amnhĩ xà htỳx kamã hamak tũm xàta o mẽ nê.

18Na htem htỳx ri amnhĩ tomnuj o pa hã mẽ amã amnhĩ to jarkrar o ri pa. Jakamã nhũm mẽhõ ra amnhĩ tomnuj kaga kaxyw nhũm mẽ tee ri ja hã omu nê kot ã amnhĩ nhĩpêx anhỹr pymaj tanhmã nê kãm kapêr to nê mẽ kãm: — Kwa ixte amnhĩ tomnuj o ixpa htã nhũm Tĩrtũm ja hã ixpumu nê ãm ixpumu nê arĩ inhmex ã ijarẽ. Na pa hte mẽ hkuprỳjê hwỳr mra nhũm ja hã ixpumu nê ãm ixpumu nê hã tanhmã ixto hkêt nê. Jakamã kwa mẽ ixpyrà nê arĩ ã amnhĩ nhĩpêx anhỹr o ri apa. Koja Tĩrtũm tanhmã hã ato hkêt nê. Anê. Hãmri nhũm mẽ tee ri kuma nê ra hamaxpêr kati nê.

19Na htem mẽ kãm kapêr o: —Kwa mẽ ixpyrà nê mãmrĩ amã tanhmã amnhĩ tomnuj to hprãm xà hkôt amnhĩ nhĩpêx o ri apa. Mẽhõ kot kêt ja nê tanhmã amã kapêr to? Anê. Mẽ kot amnhĩ tomnuj xàja te kêp mẽ õ patrãw pyràk

jakamã na htem ãm kôt pix mã amnhĩ nhĩpêx o pa. Jakamã kot pu mẽ tanhmã amnhĩ tomnuj to. Nẽ gaa nõ axte. Nẽ gaa nõ ra ho amnhĩ pyrãk. Hãmri nõ tee ri pamã hkaga hprãm kaprỳ nhũm te kêp mẽ panhõ patrãw pyrãk o mẽ panhĩpêx pu mẽ ãm kôt pix mã ri amnhĩ nhĩpêx o ri papa.

²⁰Nẽ koja mẽhõ ra Tĩrtũm kapêr ma. Nẽ mẽ panhõ Pahihti Jejus Kris jarênhja nhũm hprĩ hã kuma. Kêp mẽ pahte amnhĩ tomnuj pê mẽ papytãr xwỳnh ã harênh ma. Tã nhũm mẽ kot Tĩrtũm kapêr o mẽ hêx xwỳnhjaja hwỳr mra nõ tanhmã kãm ho hêx to nhũm mẽ kuma nõ kot amnhĩ nhĩpêx tũm o awjanã. Jao amnhĩ tomnuj tỳx o kormã kot Tĩrtũm kapêr mar kêt ri kot amnhĩ tomnujta jakre.

²¹Kêp ãm aa kot Tĩrtũm kapêr mar kêt rãhã htyk ronhỳx ja kãm mex nõ. Nom ra kot mar mex tã ãm kuma nõ hkaga jakamã koja mex kêt kumrêx.

²²Mẽ kot ã mẽ kot amnhĩ nhĩpêx anhỳr ã mẽ harênh kot: Rop na hte ôjaĩr nõ akupỳm ôjaĩrta ku. Nẽ hagrô na htem unê nõ hkumrã nhũm muxre. Tã nhũm mẽ kãm ure nhũm akupỳm hprôt nõ mra nõ akupỳm gyw o amnhĩ tomnu pa. Anẽ. Tã mẽ kot Tĩrtũm kapêr o mẽ hêx xwỳnhjê mar nõ mẽ hkôt amnhĩ nhĩpêx xwỳnhjaja te mẽ kot rop mẽ hagrô wa kot amnhĩ nhĩpêxta pyrã nõ Tĩrtũm kapêr kaga nõ akupỳm mẽ kot amnhĩ nhĩpêx tũm o awjanã nõ htỳx ri amnhĩ nhĩpêx o pa.

Sikũn Pêtre 3

Tĩrtũm kot pika ho hapêx kaxyw kormã amnhĩ tã mẽ pajamãr ã harênh

Matêwre 24.29-31; Xiakre 5.7-11; Apokarip 19.11-16; 21.1-8

¹E Kris kôt ixkrãmnhwỳjaja. Na pa pre ra wam kagãta nhĩpêx nõ mẽ awỳr kurẽ. Tã ra axte hkôt ja nhĩpêx. Hamẽ wa kamã na pa mẽ amã Tĩrtũm kot tanhmã amnhĩ nhĩpêx to hã harẽ. Nẽ Jejus Kris nhỹrmã akupỳn mẽ pahwỳr wrỳk ã harẽ. Mẽ ate mar nõ tãm amnhĩ nhĩpêx nõ tãm ajamaxpêr o kutêp mẽ apa kaxyw.

²Amnepê mã Tĩrtũm nhỹ hã kapêr jarênh o ri mẽ pa xwỳnhjaja na prem Tĩrtũm kot nhỹrmã mẽ pahwỳr mẽhõ mênh mã xwỳnhhta jarênh o pa. Kot nhỹrmã mẽ pahwỳr wrỳk nõ mẽ pahto amnhĩptãr o pa hã harênh o pa. Tã

kêr ka mẽ kapêr ma nê hã ano htỳx nê hkôt ajamaxpêr tỳx rãhã ho ri apa. Nê Jejus kot mẽ awỳr mẽ rênh xwỳnhjaja ka mẽ kapêr ma. Mẽ kot mẽ amã mẽmoj jarênh o mẽ pa xwỳnhjaja na htem tanhmã mẽ amã Pahihti Kris jarênh to ho ri mẽ akôt pa. Nê tanhmã kot mẽ panê amnhĩ nhĩpêx to hã harê. Tã kêr ka mẽ kapêr ma nê hã ano htỳx nê kãm ajamaxpêr tỳx rãhã ho ri apa.

³Nê kwa mẽ inhma. Nhỹrmã Kris akupỳn mẽ pahwỳr wrỳk xwỳj ri koja mẽ kot amnhĩ tomnuj tỳx xwỳnhjaja mẽ awỳr mra. Mẽ hpijaàm kêt o pa xwỳnh jakamã koja mẽ tanhmã mẽ akamã amnhĩ tomnuj to ho pa. Nê mẽ apê Kris kwỳ hã mẽ apumu nê mẽ atã hpêr o pikênh o pa.

⁴Nê htỳx ri Kris ã mẽ akukja nê mẽ amã: —Kwa no Krisja? Amnepêm akupỳn wrỳk nê mẽmoj piitã tanhmã hipêx to hã amnhĩ jarênh tã arĩ Tĩrtũm kot mẽmoj to kator krax rũm mẽmoj amarĩ rãhãã. Ra mẽ panhĩgêjtjaja pikaprãr par tã nhũm kormã akupỳn wrỳk kêt nê. Kot mẽ pamã amnhĩ to hêx kênã. Mo kaxyw koja kêt akupỳn mẽ pahwỳr wrỳ? Kot mẽ pamã amnhĩ to hêx kênã. Anê.

⁵⁻⁶Nom ã mẽ kot harênh anhỹrja kot anhỹr kêt. Tĩrtũm kot mẽmoj to kator krax rũm mẽmoj amarĩ rãhã hã mẽ kot harênhja kot anhỹr kêt. Na pre Tĩrtũm kapêr pix o kaxkwa nê pika ho kato. Nhũm gô hkwỳja kapêr mar xà hkôt pika hã amnhĩ jahkre. Nhũm hpãnhã panhĩ nhĩpêx. Tã no nhũm mẽ kapêr mar kêt kumrêx. Nê mẽ kot amnhĩ tomnuj tỳx mỳrapê na pre Tĩrtũm gô ho mẽ himex pa. Jao mẽ hwỳr na rax mẽ nhũm mẽ hanhir o mẽ ho hapêx. No nhũm mẽ kot Jejus wrỳk ã hpêr o pikênh xwỳnhhtaja kãm ã mẽ harênh anhỹrja mar prãm kêt. Ra mẽ kot mar tã kãm mar prãm kêt nê arĩ mẽmoj piitã rãhã hã ri harênh o pa.

⁷Pika nê kaxkwaja arĩ rãhã htã koja Tĩrtũm nhỹrmã mẽ pahpiitã mẽ pahte tanhmã amnhĩ nhĩpêx to hã mẽ pahpumunh kôt tanhmã mẽ pajarênh to. Nê mẽ kot amnhĩ xà htỳx kamã hamak tũm xà hwỳr mẽ kot amnhĩ tomnuj xwỳnhjê rênh pa. Hãmri nhũm rĩ kormã kaxkwa nê pikaja wa pôr nhũm himôk ã mẽmoj piitã hkaxàr pa nê hapêx.

⁸Ně amgrà pē 1.000ja mẽ pamã amgrà xohtô rax kumrêx no Tĩrtũm mã te arĩgro pixire pyræk.

⁹Tã ra kot mẽ pamã tokyx Jejus akupỹn wrỳk ã harēnh tã nhũm kormã wrỳk kêt jakamã nhũm htem tōhã tee ri hamãr o pa nē hamaxpēr o: —Hêxta waa nē. Tĩrtũm kot tokyx akupỹn mẽ pahwỳr Jejus mēnh ã amnhĩ jarēnh tã tokyx mēnh kêt nē. Anhỹr o harēnh tã no ãm kot anhỹr kêt. Na kormã amnhĩ tã mẽ kot amnhĩ tomnuj xwỳnhjê jamãr o pa. Mẽ kot amnhĩ tomnuj kaga nē hkôt amnhĩ xunhwỳr prãm xàj kormã amnhĩ tã mẽ hamã. Kãm mẽ kot amnhĩ xà htỳx kamã hamak tũm xàta wỳr mēhō ho pixire nē mōr prãm kêt jakamã na kormã amnhĩ tã mẽ hamã.

¹⁰Tã koja nhỹrmã mẽ panhō Pahihtija akupỹn mẽ pahwỳr wrỳ. Te mẽ àhkĩnh xwỳnh kot amnhĩ nhĩpêx pyræk o mẽ pajaêr pē akupỹn wrỳ. Pu mẽ pahtỳx ri tanhmã paxàpēnh to ho ri papa nē akupỹn wrỳk ã hkamnhĩx kêt rãhã nhũm mẽ pajaêr pē akupỹn wrỳ. Hãmri nē ma akupỹm amnhĩ kôt mẽ pahte hkôt amnhĩ xunhwỳr xwỳnhjê ho àpir par kurê kumrêx. Hãmri nhũm rĩ kormã kaxkwa kaxàr o hkrihkrit tỳx kãm hapêx pa. Nē kanhêti mẽ myt nē mytwrỳre kaxàr pa. Nē pikaja nē määnēn kamã mẽmoj piitã kaxàr pa.

¹¹⁻¹²Koja nhỹrmã ã mẽmoj hapêx par anē. Jakamã kwa kêt pu mẽ Jejus kutêp tãm ri amnhĩ nhĩpêx rãhã ho ri papa. Nē Tĩrtũm kapēr kôt pix mã amnhĩ nhĩpêx rãhã nē. Nē kãm hprãm xà hkôt tanhmã kãm amnhĩ nhĩpêx to ho ri papa. Kêr kê Jejus akupỹn wrỳ nē ã mẽ pahte amnhĩ nhĩpêx anhỹr ã mẽ pahpumu. Koja wrỳ nhũm rĩ kormã kaxkwa nē pikaja wa kaxàr pa. Nhũm kuwy mỳri kaxkwa kamã mẽmoj harir xwỳnhja xêr nē ôr pa nē hapêx.

¹³Tã kwār mãmri mẽmoj ã amnhĩ nhĩpêx anē. Koja Tĩrtũm axte mẽmoj mex nhĩpêx. Na pre amnhĩ kukamã ja jarēnh o: Kot paj axte pika nē kaxkwa hō nhĩpêx nhũm mex o mex. Nhũm mẽ kot amnhĩ kaxyw Jejus mã hamaxpēr nē hkôt amnhĩ xunhwỳr nhũm ixte mẽ mex ã mẽ harēnh xwỳnh pixjaja koja mẽ pika nywja kamã mex nē pa ho pa. Anē.

¹⁴Jakamã kwa ixkràmnhwỳjaja. Kêr ka mẽ Kris kutêp kapēr kôt amnhĩ nhĩpêx mex rãhã ho ri apa. Jao kutêp ajamakêtkati nē axàmnhĩx axpēn kôt

apa. Kêr ka mẽ nhÿrmã amnhĩ wÿr omu nê tee ri amnhĩ kukamã ajamaxpêr kêt nê. Ate tãm amnhĩ nhÿpêx o apa hã amnhĩ pumu nê akĩnh nê amnhĩ wÿr omunh o akuhê.

¹⁵Nom arĩ Jejus kãm mẽ pahkwÿjê ho hkra hprãm jakamã na kormã amnhĩ tã mẽ hamã nê tokyx akupÿn wrÿk kêt nê. Na pre Jejus kôt mẽ pahtõ Pawre Tÿrtũm nhÿ hã ã mẽ pamã ja hã kagà anê. Pawreja ixkràmnhwÿ mex na.

¹⁶Na hte mẽ pakaxyw kagà nhÿpêx nê kamã mẽ pahte Jejus kutêp tãm amnhĩ nhÿpêx o papa hã mẽ pamã karõ. Na hte tõhã mẽmoj tã kagà pu mẽ kamã harê nê tee ri pahprĩ hã mar mã no ãm mar mex kêt nê. Hãmri nhũm Tÿrtũm kapêr o mẽ hêx o mẽ pa xwÿnhtaja haxwÿja kuma hãmri nê amnhĩ krã hkôt hijuk ri tanhmã ho hêx to. Te mẽ kot hprĩ hã mar nê harênh pyræk nom hprĩ hã mar kêt nê. ã na htem Tÿrtũm kapêr ã kagà piitã ho hêx o pa anê. Mÿrapê koja mẽ nhÿrmã amnhĩ xà kamã hamak tÿx kumrêx.

¹⁷Tã e Kris kôt ixkràmnhwÿjaja. Ra mẽ ate mẽ harênh mar jakamã kwa mẽ okora. Mẽ amnhĩ nê mẽ omunh mex nê mẽ hkôt amnhĩ nhÿpêx kêt nê. Kot kaj mẽ anê nê Tÿrtũm kôt amnhĩ nhÿpêx mex kêt nê.

¹⁸Na ka htem mẽ papytâr xwÿnh Pahihti Jejus Kris kôt ri amnhĩ nhÿpêx o apa. Tã kêr ka mẽ arĩ hkôt amnhĩ nhÿpêx mex rãhã ho ri apa. Nê hkôt amnhĩ xunhwÿr tÿx nê. Kêr kê amnhĩ tã mẽ apumu nê mẽmoj to mẽ akutã nojarêt nê. Krisja mex o mex nê hihtÿx o hihtÿx. Tã kêr pu mẽ kãm mex o mex ã mãn harênh rãhã ho ri papa. Tã ãm ja pix. Ixpê Simãw Pêtre na pa ã mẽ amã ja hã kagà nê mẽ awÿr mẽnh anê.

Wam Juãw

Wam Juãw 1

Jejus kêp Tirtûm kapêr o amnhîrit xwÿnh ã harênh

Juãw 1.1-4; Eprêw 1.1-4

¹Pa ixpyrà nê mē ate Jejus kôt amnhî xunhwÿr xwÿnhjaja? Xà mē amex? E ot pa mē amã kagàja nhîpêx nê mē awÿr kumê. Ixte mē amã Tirtûm kapêr o amnhîrit xwÿnh jarênh kaxyw. Amnepê mã kormã mēmoj amrakati ri nhûm pre ra rãhã ri pa ho pa. ãm kukwak ri pix mã na pu htem Tirtûm mē wa kuri pahtîr tûm nê papa ho papa mã xwÿnh. Tã ÿ hã mē ixte kapêr o mē ajahkre ho ri mē ixpa xwÿnhjaja na pa prem ixpiitã kormã akupÿm kaxkwa hwÿr àpir kêt ri inhno ho omunh o ri hkôt ixpa. Nê mē ijamak o kapêr mar o ri hkôt ixpa. Nê mē inhîhkra ho hkupênh o ri hkôt ixpa.

²Na pre kaxkwa kamã Hipêêxà hkôt ri pa ho pa htã amnê pika hwÿr mē pahwÿr wrÿ. Hãmri nê jar mē pakamã kato pa pre mē ixkwÿjaja omu. Tã mē ixte omunh xà hkôt na pa htem amnhî xô ri tanhmã mē amã harênh to. Koja nhÿrmã akupÿm mē pahto mē pahtîr pu mē kuri pahtîr tûm nê pamex nê papa ho papa.

³Na pa prem tanhmã kapêr to hã mar o ri hkôt ixpa. Nê kot tanhmã mē kãm amnhî nhîpêx to hã omunh o ri hkôt ixpa. Ta kagàja kamã amnhî xô ri ixprî hã mē amã harê nê hã kagà. Mē ate ixpyrà nê aprî hã kot tanhmã amnhî nhîpêx to ho pa hã harênh mar kaxyw. Jao mē pahpiitã te ixkre tipxi kamã mē papa pyræk o amnhî nhîpêx o papa nê axpên kôt pajamaxpêr o ri papa. Jao Mēpanhîpêêxà Maati mē Kra Jejus Kris wa hkôt amnhî nhîpêx mex o ri papa.

⁴Tã pa mē amã kagàja nhîpêx nê mē awÿr kumê. Mē ate kamã harênh nê mar hãmri nê mē ixpyrà nê ajamakêtkati nê akînh nê ri apa kaxyw.

Tirtûm mex o mex ã harênh

Juãw 8.12; Epes 5.3-21; Wam Tesarôn 5.5; Eprêw 4.14-16; 9.11-14

⁵Nê Jejus kot tanhmã mē inhmã Tirtûm jarênh toja kot paj amnhî xô ri mē amã hã kagà. Nà Tirtûm kot amnhî nhîpêxja mex o mex. Aa kot tanhmã amnhî tomnuj to hkêt. Mex o mex jakamã na hte tanhmã mē kot amnhî

tomnuj to mã amnhĩ jagjênh kêt. ãm kot amnhĩ to mex o kot amnhĩ to mex rãhã nẽ pa ho pa xwỳnh na.

⁶Kot mẽ pahte amnhĩ tomnuj kêt ã mẽ pamã karõ jakamã kot puj mẽ pahpê hkra hã amnhĩ jarênh tã amnhĩ tomnuj pix o ri papa nẽ ãm pahpê hkra hã amnhĩ jarênh kaprỳ nẽ amnhĩ to paxêx. Tĩrtũm krajaja na htem amnhĩ tomnuj o pa hkêt nẽ.

⁷Nom kot puj mẽ hkôt amnhĩ nhĩpêx nẽ uràk nẽ tãm ri amnhĩ nhĩpêx o papa. Nẽ kapêr kôt ri amnhĩ nhĩpêx. Hãmri nẽ te ixkre tipxi kamã ri Tĩrtũm mẽ Kra Jejus Kris wa hkôt axpên to papa pyràk o amnhĩ nhĩpêx. Na pre Jejus mẽ panê ty nẽ hkamrô axkapĩ. Jao mẽ pahte hkôt amnhĩ xunhwỳr xwỳnhjaja mẽ panê mẽ pahte amnhĩ tomnuj piitã hpãnhã amnhĩrer pa. Jakamã ãm kukwak ri pix mã na pu htem tãm amnhĩ nhĩpêx o ri papa.

Mẽ pahpiitã mẽ pahte amnhĩ tomnuj xwỳnh ã mẽ pajarênh

⁸Nẽ mẽ pahte tõiã tanhmã amnhĩ tomnuj to jakamã kot puj mẽ aa pahte amnhĩ tomnuj kêt ã amnhĩ jarẽ hãmri nẽ ã amnhĩ jarênh anhỹr o paxêx. Tĩrtũm kot mẽ pahpiitã mẽ pahte amnhĩ tomnuj ã mẽ pahpumunh xwỳnh kênã.

Mẽ pahte amnhĩ tomnuj nẽ tanhmã amnhĩ nhĩpêx to hã mẽ pamã karõ

Xiakre 4.9-10

⁹Nẽ mẽ pahpê Tĩrtũm krajaja na pu htem tanhmã amnhĩ tomnuj to hãmri nẽ tee ri ja hã amnhĩ pumu nẽ pahkaprĩ nẽ. Nẽ tokyx amnhĩ to Tĩrtũm wỳ. Hãmri nhũm mẽ pama nẽ Jejus kukwak ri tanhmã hã mẽ pahto hkêt nẽ. ãm amnhĩ katut kôt tanhmã mẽ pahte amnhĩ tomnuj tota rẽ nẽ axte kãm hamaxpêr kêt nẽ. Ra kot mẽ pahtã amnhĩ jarênh xà hkôt. Na hte Tĩrtũm amnhĩ jarênh xà hkôt tanhmã amnhĩ nhĩpêx to. Tã ra kot mẽ pahpê hkrajaja mẽ pahte amnhĩ tomnuj piitã amnhĩ katut kôt rênh par ã amnhĩ jarênh jakamã na pre ã mẽ panhĩpêx anẽ. Na hte mẽmoj tã tanhmã amnhĩ jarênh to hãmri nhũm apkati nhũm ihkjê ho kumẽ nẽ axtem tanhmã mẽmoj jarênh to hkêt nẽ.

¹⁰Ra kot mẽ pahpiitã mẽ pahte amnhĩ tomnuj xwỳnh ã mẽ pajarênh jakamã kot puj mẽ pahtõ ã mẽ pajarênh anhỹrja ma nẽ hkôt pajamaxpêr kêt japêr.

Rỳ kuma nẽ ãm kuma nẽ pajamaxpěr o: —Nà ixte tanhmã amnhĩ tomnuj tore hã. Anhỹr o amnhĩ jarẽ. Hãmri nẽ te ate Tĩrtũm hêx xwỳnh ã harẽnh pyræk. Jao amã kapěr mar prãm kêt ã amnhĩ to amnhĩrĩt.

Wam Juãw 2

Jejus kęp mẽ paxyr pê Tĩrtũm mã kapěr xwỳnh ã harẽnh

Wam Ximotre 2.5; Eprêw 9.11-14

¹⁻²E mẽ ate amnhĩ tomnuj o apa hkêt kaxyw na pa ã mẽ amã ixkapěr nẽ hã kagà anẽ. Mẽ ate kamã harẽnh nẽ mar hãmri nẽ tanhmã amnhĩ tomnuj to hkêt kaxyw. Jejus Kris na pre mẽ pahpiitã mẽ pahte amnhĩ tomnuj pãnhã amnhĩrer kaxyw mẽ panê ty. Jakamã kot puj mẽ pahpê hkrajaja tanhmã amnhĩ tomnuj to nhũm ja hã mẽ pahpumu nẽ te kęp mẽ paxyr pê Tĩrtũm mã kapěr xwỳnh pyræk o amnhĩ nhĩpêx. Mẽ pakurom aa kot amnhĩ tomnuj kêt jakamã na hte mẽ paxyr pê Tĩrtũm mã kapěr nhũm kuma. Hãmri nẽ kukwak ri pix mã mẽ pahte tanhmã amnhĩ tomnuj to piitã amnhĩ katut kôt rẽnh pa nẽ axte kãm hamaxpěr kêt nẽ.

Tĩrtũm krajaja kot Tĩrtũm kôt amnhĩ nhĩpêx ã mẽ kãm karõ

³Nẽ na pu htem Tĩrtũm kôt ri amnhĩ nhĩpêx o papa hã amnhĩ pumunh kôt pahpê hkra hã amnhĩ pumunh mex nẽ.

⁴Nom koja mẽhõ kęp hkra hã amnhĩ jarẽnh tã hkôt amnhĩ nhĩpêx kêt nẽ ãm kęp hkra hã amnhĩ to hêx.

⁵Na htem Tĩrtũm kapěr kôt amnhĩ nhĩpêx o pa pê kãm hkĩnh tỳx ã amnhĩ to amnhĩrĩt. Nẽ kęp hkra hã amnhĩ to amnhĩrĩt mex o pa.

⁶Jakamã kêt ka mẽ apê Jejus Kris kwỳ hã amnhĩ jarẽnh xwỳnhjaja hkôt pix mã amnhĩ nhĩpêx mex o ri apa.

Mẽ pamã axpẽn kĩnh ã mẽ pamã karõ

Juãw 13.34-35; Wam Juãw 3.14-18

⁷E Kris kôt ixkràmnhwỳjaja. Inhmã mẽ akĩnh jakamã na pa ã mẽ amã mẽmoj jarẽnh nẽ hã kagà anẽ. Kot paj mẽ amã mẽmoj nyw jarẽnh kêt nẽ. Ra mẽ ate mẽmoj mar xwỳnhhta kot paj axte mẽ amã harẽ. Mẽ pamã axpẽn kĩnh nẽ

tām axpën nhîpêx o papa hã Tirtûm kot mẽ pamã karõta. Ra mẽ ate mar tã kot paj axte mẽ amã harẽ nẽ hã kagà.

⁸Wam Tirtûm kot mẽ pamã axpën kînh ã mẽ pamã karõja kormã Jejus kot mẽ panê htyk hkêt ri kot mẽ pamã hã karõta na. Tã ra Jejus kãm mẽ pajapê xàj mẽ panê htyk jakamã na pa axte ã mẽ ate axpën nhîpêx anhÿr o apa hã mẽ amã karõ nẽ hã kagà. Mẽ ate Kris pyrã nẽ amã axpën kînh xàj tanhmã axpën kutã anojarêt to ho ri apa kaxyw. Nom kormã mẽ pahte Jejus kôt amnhî xunhwÿr kêt ri na pu prem ã axpën nhîpêx anhÿr kêt nẽ. Tã hkôt amnhî xunhwÿ hãmri nẽ ã axpën to mex o papa anẽ.

⁹⁻¹¹Tã koja mẽhõ kot Jejus kôt amnhî nhîpêx ã amnhî jarênh tã kãm hkwÿjê hkînh kãm àmnhîx ri mẽ kutã nojarêt o pa hkêt nẽ. Hãmri nẽ kot Jejus kôt amnhî nhîpêx ã amnhî jarênh ã amnhî to hêx. Jao te htÿx ri kamàt kô kamã pa pyrãk. No koja mẽhõ kãm hkwÿjê hkînh kãm mẽ kutã nojarêt o pa nẽ mããnẽn Jejus kôt amnhî nhîpêx mex o pa. Jao te hirã kamã ri pa pyrãk. Jakamã tanhmã hkwÿjê homnuj to ho pa hkêt nẽ mẽ piitã mẽ ho mex o axpën pyrãk o pa.

Juãw kot mẽ piitã ahpÿnhã tanhmã mẽ kãm kapër to

¹²⁻¹⁴E kot pa ahpÿnhã tanhmã mẽ amã ixkapër to nẽ hã kagà. Mẽ apiitã te mẽ apê ixkra pyrãk. Na ka prem Jejus kôt amnhî xunhwÿ nhũm Tirtûm ja hã mẽ apumu nẽ Kra kukwak ri mẽ ate amnhî tomnuj piitã amnhî katut kôt rênh pa nẽ axte kãm hamaxpër kêt nẽ. Jakamã ra mẽ ate Tirtûm kêp Mẽpanhîpêêxà Maati hã omunh mex. Nẽ mẽ ate Jejus kôt amnhî xunhwÿr ã amgrà xohtô xwÿnhjaja. Amnepêm amrakati ri Jejus ra rãhã ri pa ho pa xwÿnhja kôt mẽ ate amnhî xunhwÿr xwÿnhjaja kot paj mẽ amã tanhmã ixkapër to nẽ hã kagà. Nẽ mẽ akwÿjaja ham Jejus kôt mẽ ate amnhî xunhwÿr xwÿnhjaja ra mẽ ate Tirtûm kapër mã ajamaxpër rãhã ho ri apa. Jakamã na hte Satanasti mẽ ate amnhî tomnuj prãm xàj tee ri tanhmã mẽ akrã hto ka mẽ Jejus nhÿ hã kutã amnhî to htÿx pê hkôt amnhî nhîpêx kêt nẽ.

Mẽ kot amnhî tomnuj xwÿnhjaja tanhmã kot amnhî nhîpêx to

Matêwre 6.24; Eprêw 11.24-26; Xiakre 4.4

¹⁵Ně kër ka mẽ amã Tĩrtũm kôt amnhĩ nhĩpêx prãm xàj mẽ kot amnhĩ tomnuj xwỳnhjê hkôt amnhĩ nhĩpêx kêt nẽ. Nẽ mẽ hamaxpêr punuj xwỳnhjê hkôt ri amnhĩ nhĩpêx kêt nẽ. Kot kaj mẽ hkôt amnhĩ nhĩpêx hãmri nẽ amã Tĩrtũm kĩnh kêt ã amnhĩ to amnhĩrĩt.

¹⁶Mẽ kot amnhĩ tomnuj xwỳnhjaja na htem mẽmoj punuj mã hamaxpêr nẽ hkôt tanhmã amnhĩ tomnuj to. Nẽ mẽmoj pumu nẽ ra kãm ho õ hprãm nom Tĩrtũm pê ja omnuj ã hkamnhĩx kêt nẽ. Rỳ tanhmã mễhõ kot amnhĩ tomnuj to hã omu nẽ hkôt kãm amnhĩ nhĩpêx prãm. Nẽ tanhmã amnhĩ to jarkrar to ho ri pa. ã na hte mẽ kot amnhĩ tomnuj xwỳnhjaja amnhĩ nhĩpêx anhỹr o pa. Mẽ kot amnhĩ nhĩpêxja Mễpanhĩpêxà Tĩrtũm kãm hprãm kêt.

¹⁷Koja nhỹrmã mẽ kot tanhmã amnhĩ tomnuj toja piitã hapêx pa. Nẽ mẽ hamaxpêr punujja mãănẽn nhỹrmã hapêx pa. Nẽ mẽ kot amnhĩ tomnuj o mẽ pa xwỳnhjaja koja mẽ amnhĩ xà htỳx kamã hamak rãhã ho pa ho pa. No Tĩrtũm kôt mẽ kot amnhĩ nhĩpêx o mẽ pa xwỳnhjaja koja mẽ kurom kuri htĩr tũm nẽ mex nẽ hkĩnh nẽ pa ho pa.

Kãm Kris kurê xwỳnh maati jarěnh

Wam Juãw 4.1-6; Sikũn Juãw 7-11

¹⁸E Kris kôt ixkwỳjaja. Kris akupỹn mẽ pahwỳr wrỳk kukamã koja mẽmoj tanhmã amnhĩ nhĩpêx to. Na pre ra Kris kôt mẽ panhĩõja mẽ pamã ã harěnh anẽ nẽ harěnh o: —Koja mẽ panhõ Pahihti Kris akupỹn mẽ pahwỳr wrỳk kaxyw hãmri nhũm kêp Kris ã amnhĩ to hêx xwỳnh maati kumrêx nhỹhỹnh kato. Hãmri nẽ hêx rom te Kris pyrà nẽ tanhmã mẽ kãm kapêr to nẽ tanhmã mẽ hipêx to ho pa nhũm rĩ kormã Kris akupỹn mẽ pahwỳr wrỳ. Anẽ. Na pre hkukamã ã harěnh anẽ ka mẽ harěnh ma. Tã ra mẽ kêp Kris ã amnhĩ to hêx xwỳnhjaja ohtô nẽ mra nẽ kãm hkurê xwỳnh maatita kukamã tanhmã amnhĩ nhĩpêx to pê mẽ kãm amnhĩ to hêx o pa. Jakamã na pa ixprĩ hã mẽ amã tanhmã mẽ harěnh to. Koja tokyx kêp Kris ã amnhĩ to hêx xwỳnh maatita nhỹhỹnh mẽ pahwỳr kato.

¹⁹Na pre hkwỳjaja mẽ pahpê Kris kwỳjê hkôt ri pa htã mẽ pahkĩnhã kêp Kris kwỳ hkêt. Kêp hkwỳ ronhỹx arĩ mẽ pahkôt Kris kôt amnhĩ nhĩpêx o pa. Nom

axtem nê àhpumunh tỳx pyrà nê mẽ pahkaga nê htỳx tanhmã amnhĩ tomnuj to ho pa. Jao kêp Jejus kwỳ hkêt ã amnhĩ to amnhĩrĩt.

20No kêt mẽ pahpê Tĩrtũm krajaja na pre Jejus mẽ pahwỳr Karõ rê nhũm mẽ pahkarõ mã agjê nê mẽ pahkrãm kapêr mex jagjê. Jakamã na pu mẽ mẽ kêp Kris kwỳ hkêt xwỳnhjê rom Tĩrtũm kapêr mar mex nê.

21Xà mẽ ate Tĩrtũm kapêr ã kagà pumunh kêt kôt na pa ã mẽ amã ixkapêr nê hã kagà anê? Nà ra mẽ ate omunh nê mar mex kênã. Tã mẽ ate mẽ kot tanhmã Jejus o hêx to xwỳnhjê pumunh mex nê mẽ harênh mar mex kaxyw na pa ã mẽ awỳr kagà nhĩpêx nê mẽnh anê. Kêr kê mẽ mẽmo arĩgro hã mẽ awỳr agjê nê tanhmã mẽ amã Jejus o hêx to ka mẽ aprĩ hã mẽ omunh mex kurê kumrêx.

22Tanhmã na htem Jejus o hêx to? E kot paj ixprĩ hã mẽ amã tanhmã mẽ harênh to ka mẽ inhma. Nà koja mẽhõ mẽ amã tanhmã harênh to nê harênh o: —Nà Jejus kêp Tĩrtũm Kra hkêt. Tĩrtũm kot mẽ pahwỳr mẽnh kêt tã ka htem atỳx kapêr kôt ri amnhĩ nhĩpêx o ri apa. Kwa kêt mẽ ixkapêr kôt mãn ri amnhĩ nhĩpêx o ri apa. Anhỳr o mẽ amã kapêr ka mẽ ama nê kãm Kris mẽ Tĩrtũm wa hkĩnh kêt xwỳnh ã omunh kurê kumrêx.

23Koja mẽhõ Tĩrtũm Kra Jejus kaga nê mãănênh Hipêêxà kaga. No koja mẽhõ Tĩrtũm Kra hkôt amnhĩ xàm nê mãănênh Hipêêxà hkôt amnhĩ xãm.

Mẽ pahte Kris kaga pymaj tanhmã amnhĩ nhĩpêx to hã mẽ pamã karõ

24Amnepêem mẽ ate Jejus kôt amnhĩ xunhwỳrta ã na ka prem kêp Tĩrtũm Kra hã Tĩrtũm kot mẽ pahwỳr mẽnh xwỳnh ã harênh ma. Tã kêr ka mẽ arĩ amnhĩ kaxyw hkôt ajamaxpêr nê hkôt pix mã amnhĩ nhĩpêx o ri apa. Kot kaj mẽ anê nê Mẽpanhĩpêêxà Maati mẽ Kra wa hkôt amnhĩ nhĩpêx mex o apa rãhã ty.

25Hãmri nê wa kuri atĩr tũm nê amex kumrêx nê apa ho apa. Ra Jejus kot ja jarênh xà hkôt.

26Na pa ã mẽ amã ixkapêr nê hã kagà anê. Mẽ aprĩ hã mẽ amã Jejus o hêx xwỳnhjê kapêr mar nê mẽ kot mẽ amã hêx kôt mẽ omunh mex kaxyw.

²⁷Tĩrtũm Karõ na pre mẽ akarõ mã gjêx pa nẽ mẽ amã Tĩrtũm kapêr piitã o amnhĩrĩt mex o mẽ akõt pa. Jakamã mẽmo kaxyw kot kaj mẽ Tĩrtũm kapêr o hêx xwỳnhjaja kot tanhmã harênh toja ma? Ra Tĩrtũm Karõ kot mẽ amã ho amnhĩrĩt o mẽ ajahkre mex o pa kênã kot ka kêt mẽ nhãm mẽ kapêr ma. Na hte Tĩrtũm Karõja mẽ urà nẽ Tĩrtũm kapêr ho hêx kêt nẽ. ãm katat kõt kot ho amnhĩrĩt mex jakamã kwa kêt ka mẽ mar tỳx nẽ hkõt ri amnhĩ nhĩpêx mex rãhã ho ri apa.

Mẽ pahte tãm ri amnhĩ nhĩpêx ã mẽ pamã karõ

Juãw 14.25-26; 15.1-8

²⁸E Jejus kõt ixkrajaja. Kêr ka mẽ arĩ Kris kõt amnhĩ nhĩpêx mex rãhã ho ri apa. Kê nhỹrmã akupỹn mẽ pahwỳr wrỳk o tẽ ka mẽ amnhĩ wỳr omu nẽ akĩnh nẽ. Nẽ akĩnh kãm axàmnhĩx kutã mra nẽ hkaxpa nẽ amnhĩ kamã amã uma hkêt nẽ. Rỳ mẽmoj tã amnhĩ tã apijaàm kêt nẽ. ãm axàmnhĩx akĩnh nẽ ma kutã mra.

²⁹Krisja mex o mex jakamã na pu htem uràk nẽ amnhĩ to mex o ri papa. Mẽ pahte amnhĩ to mex o papa xwỳnhjaja uràk nẽ mẽ pahpê Tĩrtũm kra na pu mẽ.

Wam Juãw 3

Tĩrtũm krajê hkukamã tanhmã mẽ harênh to

Rõmãn 8.18; Sikũn Korĩt 3.18; Sikũn Pêtre 3.11-14

¹Nẽ Mẽpanhĩpêxà Maati kãm mẽ pajapê htỳx kumrêx jakamã na pre mẽ pahte hkõt amnhĩ xunhwỳr ã mẽ pahpumunh kõt mẽ pahpê hkra hã mẽ pajarẽ pu mẽ pahpê hkra nẽ ri papa. Ja na mẽ pamã mex o mex. Nom mẽ kot hkõt amnhĩ xunhwỳr kêt xwỳnhjaja kot hprĩ hã ja hã mẽ pahpumunh kêt jakamã na htem mẽ pahte tãm amnhĩ nhĩpêx ã mẽ pahpumu nẽ tee ri hamaxpêr.

²E Kris kõt ixkwỳjaja. Ra mẽ pahpê Tĩrtũm kra htã kormã mẽ pahte amnhĩ kukamã mẽ pahprĩ hã ja hã amnhĩ pumunh mex kêt. Kojã nhỹrmã Jejus akupỹn mẽ pahwỳr wrỳ pu mẽ pano ho tanhmã kute hã omunh mex nẽ.

Hāmri nē tā te kot amnhĩ nhĩpêx pyrāk o amnhĩ nhĩpêx mex o papa. Ra mẽ pahte ja mar mex.

³ã mẽ pahte amnhĩ kukamã pajamaxpêr anhỹr o papa xwỳnhjaja na pu htem kormã amnhĩ wỳr Jejus kamã pajamak o papa. Pê urāk nē mẽmoj punuj mã pajamaxpêr kêt o papa. Nē urāk nē tanhmã amnhĩ tomnuj to hkêt nē.

Tĩrtũm krajaja kot amnhĩ tomnuj o pa hkêt ã mẽ kãm karõ

⁴Nē mẽ kot amnhĩ tomnuj o mẽ pa xwỳnhjaja na htem Tĩrtũm kapêr kwỳm ri amnhĩ nhĩpêx o pa. Tã kot puj mẽ tanhmã amnhĩ tomnuj to hāmri nē mẽ urāk nē kapêr kwỳm ri amnhĩ nhĩpêx.

⁵No Jejus na pre mẽ pahte amnhĩ tomnuj pãnhã amnhĩrer kaxyw mẽ pahwỳr wrỳ. Aa kot amnhĩ tomnuj kêt jakamã tapxipix kot mẽ pahpãnhã amnhĩrer mã tãm. Ra mẽ pahte ja jarēnh mar mex.

⁶Jakamã mẽ pahpê hkwỳjaja na pu htem ri pahtỳx tanhmã amnhĩ tomnuj to ho papa hkêt nē. ã mẽ kot amnhĩ nhĩpêx anhỹr xwỳnhjaja kêp hkwỳ hkêt.

⁷Nom koja mēhõ Kris pyrà nē tãm amnhĩ nhĩpêx o pa hāmri nē kêp Tĩrtũm kraa. Jakamã kwa koja mēhõ Tĩrtũm kapêr kwỳm ri tanhmã mẽ amã kapêr to ka mẽ ama nē ãm ama.

⁸Mẽ kot amnhĩ tomnuj o mẽ pa xwỳnhjaja na htem Satanasti hkôt ã amnhĩ nhĩpêx anhỹr o pa. Satanastija Tĩrtũm kot mẽmoj to kator krax rũm nhũm ã kot amnhĩ tomnuj anhỹr o pa xwỳnh na. Tã ã kot amnhĩ nhĩpêx anhỹr o paja o hapêx par kaxyw na pre Tĩrtũm Kra Jejusja amnē pika hwỳr wrỳ.

⁹Nom mẽ papajaja mẽ pahpê Tĩrtũm kra na pu mẽ. Na pre mẽ pahwỳr amnhĩ Karõ rē nhũm mẽ pahkarõ mã gjêx pa nē mẽ pahkôt pa ho pa. Jakamã tanhmã kot puj wem amnhĩ to nē Satanasti pyrà nē pahtỳx ri amnhĩ tomnuj o papa? Nà kot puj mẽ ã amnhĩ nhĩpêx anhỹr kêt nē.

¹⁰Koja mēhõ tãm amnhĩ nhĩpêx kêt nē hāmri nē mãänēn hkwỳjê kamã ukaprĩ hkêt nē. Hāmri nē ã amnhĩ nhĩpêx anhỹr o kêp Tĩrtũm kra hkêt ã amnhĩ to amnhĩrĩt. ãm kêp Satanasti hkra hã amnhĩ to amnhĩrĩt kurê kumrêx.

Mě pamã axpën kĩnh o te Jejus kãm mẽ pahkĩnh pyrãk ã mẽ pamã karõ

Matêwre 22.39; Rukre 10.25-37; Juãw 13.31-35

11Ně kêr ka mẽ arĩ amã axpën kĩnh pê tãm axpën nhĩpêx o ri apa rãhã nẽ. Te amnepê mã mẽ ate Jejus kõt amnhĩ xunhwỳr ã arĩgrota ã mẽ kot mẽ amã ja hã karõ pyrã nẽ.

12No mẽ ri finat Kaĩ kot amnhĩ nhĩpêx pyrãk o amnhĩ nhĩpêx kêt nẽ. Kêp Satanasti hkra jakamã na pre htõja pĩ. Kurom kot tãm amnhĩ nhĩpêx ã omu nẽ kamã gryk nẽ kupĩ.

13Tã koja mẽ kêp Tĩrtũm kra hkêt xwỳnhjaja Kaĩ pyrã nẽ kêp mẽ aprãm nõkati nom kêr ka mẽ amnhĩ tã mẽ omu nẽ tee ri amnhĩ kukamã ajamaxpêr kêt nẽ.

14Kormã mẽ pahte Jejus kõt amnhĩ xunhwỳr kêt ri na pu prem mẽ urãk nẽ amnhĩ tomnuj o papa. Jao mẽ pahpê kuwy hwỳr papa mã xwỳnh. Tã mẽ pahte Jejus kõt amnhĩ xunhwỳr jakamã ra pahpê Tĩrtũm mẽ Kra wa kuri pahtĩr tũm nẽ papa mã xwỳnh. Jakamã na pu htem mẽ kêp hkra hkêt xwỳnhjê kurom pamã mẽ piitã mẽ hkĩnh o tanhmã mẽ ho mex to ho papa. Mẽ kãm amnhĩ kwỳjê hkĩnh kêt xwỳnhjaja arĩ mẽ kêp kuwy hwỳr mẽ pa mã xwỳnh na mẽ. Ra mẽ pahte ja jarẽnh mar mex.

15Mẽ kãm mẽ hpar prãm o mẽ pa xwỳnhjaja koja nhỹrmã Tĩrtũm mẽ Kra wa kuri htĩr tũm nẽ pa ho pa hkêt nẽ. Ra mẽ pahte mããnẽn ja mar mex. Jakamã kwa mẽ amã akwỳjê hprãm nõkati ho ri mẽ apa xwỳnhjaja. Tĩrtũm noo mã te ra mẽ ate mẽ hpar pyrãk jakamã kot kaj mẽ arĩ ã amnhĩ nhĩpêx anhỹr o ri apa hãmri nẽ nhỹrmã Tĩrtũm nhõ krĩ hwỳr axàpir kêt nẽ.

16-18E ixkwỳjaja. Kwa kêr pu mẽ pajakwa pix o pamã axpën kĩnh ã amnhĩ jarẽnh kêt nẽ. Mããnẽn axpën kutã panojarêt o ri papa. Nẽ tanhmã axpën to mex to. Tanhmã na pre Jejus kãm mẽ pajapê hã amnhĩ nhĩpêx to? Nà na pre kãm mẽ pamex prãm xàj mẽ panê ty. Kãm amnhĩ tã ma hkêt kãm mẽ pakamã ukaprĩ xàj mẽ panê ty. Tã kêr pu mẽ urãk nẽ pahkwỳjê kamã paxukaprĩ ho mẽ kutã panojarêt rãhã ho papa. Jao mẽ paxàpkur xà hã panhõ pumu nẽ nhỹri pahkwỳjê hõ pumu nhũm kêp amrakati. Pu mẽ tee ri ja hã

omu hāmri nē kām mẽ panhōta kwỳ gō. Kot pu mẽ ã amnhĩ nhĩpêx anhỹr kêt nē hāmri nē pamã Tĩrtũm kĩnh ã amnhĩ jarẽnh kaprỳ.

¹⁹Nē kot puj mẽ ã axpẽn to mex o papa anẽ nē ra pahte Tĩrtũm kôt amnhĩ nhĩpêx mex ã amnhĩ to amnhĩrĩt. Hāmri nē ra paxàmnhĩx kām tanhmã amnhĩ jarẽnh to ho papa. Amnhĩ kamã pamã uma hkêt nē paxàmnhĩx pajamakêtkati nē kām tanhmã amnhĩ jarẽnh to.

Mẽ paxàmnhĩx amnhĩ to Tĩrtũm wỳr ã mẽ pamã karõ

²⁰Nē kot puj mẽ mẽmo arĩgro hã tanhmã amnhĩ tomnuj to hāmri nē tee ri ja hã amnhĩ pumu nē amnhĩ kamã pagryk nē. Na hte Tĩrtũm tanhmã mẽ pahte amnhĩ tomnuj to hã mẽ pahpumu nom arĩ kām mẽ pajapêê. Mẽ parom àhpumunh o àhpumunh jakamã kot mẽ pahte amnhĩ tomnuj prãm kêt ã mẽ pahpumunh mex.

²¹Jakamã puj mẽ ã kām pajamaxpěr anẽ nē amnhĩ kamã pamã uma hkêt kām paxàmnhĩx tanhmã ri amnhĩ to hwỳr to ho ri papa.

²²Kot puj mẽ hkôt amnhĩ nhĩpêx o papa rãhã nē mẽmoj tã kuwỳ. Nē kām hprãm xà hkôt amnhĩ nhĩpêx o papa hã amnhĩ pumunh kôt mẽmoj tã kuwỳ. Hāmri nhũm mẽ pama nē tanhmã mẽ pamã mẽmoj to rỳ mẽ pamã mẽmoj gō.

Te ixkre pixi kamã mẽ pahtipxi pyræk ã mẽ pamã karõ

²³Nē tanhmã mẽ pahte amnhĩ nhĩpêx to ho papa hã na hte Tĩrtũm mẽ pamã karõ? Nà mẽ pahte amnhĩ kaxyw Kra Jejus Kris kôt pajamaxpěr nē hkôt amnhĩ nhĩpêx o papa hã na hte mẽ pamã karõ. Nē kapěr xà hkôt pamã axpẽn kĩnh o mẽmoj to axpẽn kutã panojarêt o papa hã na hte mẽ pamã karõ. Na hte ã mẽ pahte amnhĩ nhĩpêx anhỹr ã mẽ pamã karõ anẽ.

²⁴Jakamã kot puj mẽ kapěr xà hkôt axpẽn nhĩpêx o papa nē te ixkre tipxi kamã mẽ pahte axpẽn kôt Tĩrtũm kôt ri papa pyræk. Ra kot mẽ pahwỳr Karõ rẽnh nhũm kot mẽ pahkarõ mã gjêx jakamã na hte mẽ pahkôt pa ho pa hã amnhĩ to amnhĩrĩt.

Wam Juãw 4

Mě kot Kris kapěr jarěnh ã amnhĩ to hêx xwỳnhjê jarěnh

Wam Korĩt 12.1-3; Wam Juãw 2.18-26; Sikũn Juãw 7-11

1-3Ně koja mēhõ Tĩrtũm kapěr o mẽ ajahkre kaxyw mẽ amã tanhmã Jejus Kris jarěnh to ně ãm hãmri harě ně harěnh o: —Na pre Tĩrtũm Kra Jejus mẽ pahwỳr wrỳ ně ĩ ho ĩ ho mẽ pakamã kato. Tĩrtũm tãm na pre mẽ pahwỳr kumě nhũm wrỳ. Anhỳr o mẽ amã harě ka mẽ ama ně kapěr kôt ajamaxpěr kurê kumrěx. Ām hãmri na hte Tĩrtũm Karõ nhỹ ã harěnh aně. No koja Jejus kêp Tĩrtũm Kra hkêt ã harě ka mẽ ama ně ãm ama ně hkôt ajamaxpěr kêt ně. Kãm Kris kurê xwỳnh maati nhỹ hã kapěr xwỳnhjaja na hte ã harěnh anhỳr o pa. Na ka prem ra kãm Kris kurê xwỳnh maatiya tokyx hpôx ã harěnh ma. Tã na ra y hã kapěr xwỳnhjaja ohtô ně pika piitã hkôt mẽ hkôt pa ně te Tĩrtũm Karõ nhỹ hã mẽ kãm kapěr pyrãk o amnhĩ nhĩpêx o pa. Nom ãm amnhĩ to hêx o pa. Jakamã e kwa ixkwỳjaja. Koja mēhõ mẽ awỳr mra ně tanhmã mẽ amã Tĩrtũm kapěr jarěnh to ka mẽ aprĩ hã ama ně rĩ kormã kêp Tĩrtũm nhỹ hã kapěr jarěnh xwỳnh ã harě rỳ kot amnhĩ to hêx xwỳnh ã harě.

4Kêt mẽ papajaja jajê rom mẽ pahpê Tĩrtũm kra na pu mẽ. Ně Tĩrtũm Karõ kot ra mẽ pahkarõ mã gjêx xwỳnhhta hihtỳx o jajê piitã mẽ hakrenh. Jakamã na pu htem y hã mẽ kutã amnhĩ to htỳx o papa nhũm mẽ tee ri tanhmã mẽ pamã Jejus o hêx to kaprỳ. Pu mẽ kuma ně ãm mẽ kuma.

5Mě kêp Tĩrtũm kra hkêt jakamã na htem hkôt amnhĩ nhĩpêx kêt ně. Mě kot amnhĩ nhĩpêxja axtem na. Jakamã na htem Tĩrtũm kapěr kwỳm ri tanhmã hkra hkêt xwỳnhjê mã kapěr to ho pa nhũm mẽ kuma ně kãm mẽ mar prãm ně.

6Nom mẽ ixte Tĩrtũm kapěr o mẽ ajahkre xwỳnhjaja na pa htem mẽ kurom Tĩrtũm nhỹ hã ixkatat kôt ãm hãmri mẽ amã kapěr jarěnh o ri ixpa. Jakamã ka mẽ apê hkra hã mẽ amã mẽ inhmar prãm ně. No mẽ kêp hkra hkêt xwỳnhjaja kãm mẽ inhmar prãm kêt. Na pu htem pahprĩ hã mẽ kapěr ã mẽ kuma ně rĩ kormã tanhmã mẽ harěnh to. Tĩrtũm nhỹ hã kapěr ã mẽ harě rỳ kãm hkurê xwỳnh maati nhỹ hã kapěr ã mẽ harě.

Tĩrtũm kãm mẽ pajapê hã tanhmã amnhĩ nhĩpêx to hã harěnh

Juãw 3.16-21; Rõmãn 5.5-9; 8.35-37

⁷E ixkwỳjaja. Na hte Tĩrtũm tanhmã mẽ pahpê hkrajê ho pu mẽ pamã axpẽn kĩnh nẽ. Jakamã kêr pu mẽ ã axpẽn nhĩpêx anhỹr jao axpẽn to mex pix nẽ. ã Tĩrtũm kot mẽ panhĩpêx anhỹr jakamã kêr pu mẽ pahpê hkrajaja ỹ hã ã axpẽn nhĩpêx anhỹr o ri papa.

⁸Koja mẽhõ Tĩrtũm kĩnhã kãm mẽ hkwỳjê hkĩnh kêt hãmri nẽ mẽ kamã ukaprĩ hkêt o pa. Hãmri nẽ kêp Tĩrtũm kra hkêt ã amnhĩ to amnhĩrĩt mex nẽ.

⁹⁻¹⁰Tĩrtũm kãm mẽ pajapê htỳx kumrêx. Kormã mẽ pamã hkĩnh kêt ri nhũm kumrêx amnhĩ rom kãm mẽ pajapê ho pa. Nẽ kãm mẽ pajapê xàj mẽ pahwỳr Kra pyxita mẽ. Mẽ pahte amnhĩ tomnuj pãnhã kot mẽ panê htyk kaxyw. Mẽ pahte kukwak ri amnhĩ nhĩpêx nyw o amnhĩ nhĩpêx nẽ nhỹrmã wa kuri pahĩr tũm nẽ pamex nẽ papa ho papa kaxyw. ã na pre Tĩrtũm mẽ pahwỳr Kra mẽnũ anhỹr o kãm mẽ pajapê hã amnhĩ to amnhĩrĩt.

¹¹E ixkwỳjaja. Tĩrtũm kãm mẽ pajapê htỳx jakamã kwa kêr pu mẽ uràk nẽ pamã axpẽn kĩnh o papa. Nẽ axpẽn kamã paxukaprĩ nẽ.

¹²Aa mẽ pahtõ pahte pano ho Tĩrtũm pumunh kêt tã na hte mẽ pakamã pa ho pa. Pu mẽ kãm mẽ pajapêta pyrã nẽ ỹ hã pamã axpẽn kĩnh o papa.

¹³Na pre mẽ pahwỳr Karõ rẽ nhũm mẽ pahkarõ mã agjê pu mẽ ỹ hã kot amnhĩ nhĩpêx o amnhĩ nhĩpêx o papa.

¹⁴Nẽ mẽ ixpê Jejus nhỹ hã mẽ ajahkre xwỳnhjaja. Mẽ ixte kot amnhĩ nhĩpêx nẽ kot mẽmoj tanhmã ho hã omunh o ri hkôt ixpa jakamã na pa htem ma mẽ piitã mẽ kãm harẽnh o ri mẽ hkôt ixpa. Nẽ mẽ kãm harẽnh o: —Tĩrtũm na pre mẽ pahwỳr Kraja mẽ. Kot mẽ pahpiitã mẽ panê htyk kaxyw mẽ pahwỳr kumẽ. Anẽ.

¹⁵Mẽ kot Jejus kêp Tĩrtũm Kra hã harẽnh o pa xwỳnhjaja na hte Tĩrtũm mẽ kamã pa ho pa nhũm htem ỹ hã ã Kra jarẽnh anhỹr o pa.

¹⁶Na pu mẽ ra pahprĩ hã Tĩrtũm kãm mẽ pajapê hã amnhĩ tã omu. Kãm mẽ pajapê htỳx kumrẽx ã amnhĩ tã omu. Jakamã kot puj mẽ uràk nẽ ỹ hã pamã mẽ piitã mẽ hkĩnh o papa. Tĩrtũm mẽ mẽ pahtipxi nẽ ri papa kênã.

Mẽ kãm axpẽn kĩnh xwỳnhjaja kãm Tĩrtũm puma hkêt ã mẽ harẽnh

¹⁷Nẽ kot puj mẽ pamã axpẽn kĩnh o papa nẽ mãnẽn Kris kôt amnhĩ nhĩpêx ho papa. Hãmri nhũm nhỹrmã Tĩrtũm kot Kra mẽ wa kuri mẽ htĩr tũm nẽ mẽ pa ho mẽ pa mã xwỳnhjê nhĩxi jarẽnh kaxyw pu mẽ tee ri amnhĩ kukamã pajamaxpêr kêt nẽ. Ra amnhĩ nhĩxi jarẽnh ma nẽ pahkĩnh nẽ.

¹⁸Nẽ koja mẽhõ kãm hkwyjê hkĩnh kêt nẽ tanhmã hõ homnuj to. Hãmri nẽ kot amnhĩ tã tanhmã ho pymaj kãm uma ho hwỳr mrar kêt nẽ. No koja kãm hkwyjê hkĩnh nẽ tanhmã mẽ ho mex to ho pa nẽ kãm mẽ uma hkêt nẽ.

¹⁹Tĩrtũm kumrẽx na pre kãm mẽ pajapê nẽ mẽ pakukamã tanhmã mẽ pahto mex to. Tã pu mẽ ra amnhĩ pyrà nẽ pamã hkĩnh o papa. Nẽ pamã mẽ piitã mẽ hkĩnh o papa.

²⁰Nẽ koja mẽhõ kãm Tĩrtũm kĩnh ã amnhĩ jarẽnh tã kãm hkwyjê hõ hprãm nõkati hãmri nẽ ra kãm Tĩrtũm prãm kêt ã amnhĩ to amnhĩrĩt. Kot kaj mẽ ano ho akwyjê pumunh o apa xwỳnhhta amã hkĩnh kêê tã tanhmã kot ka we amnhĩ to nẽ ate ano ho Tĩrtũm pumunh kêêta amã hkĩnh ã amnhĩ jarẽ? Nà ka ã amnhĩ jarẽnh anhỹr o amnhĩ to axêx.

²¹Na pre Tĩrtũm mẽ pamã kapêr o amnhĩrĩt o: Kot kaj mẽ amã ixkĩnh hã kot kaj mẽ mãnẽn amã akwyjê hkĩnh o mẽ ho mex o ri apa. Anẽ.

Wam Juãw 5

Tĩrtũm nhỹ hã mẽ pamã axpẽn kĩnh ã mẽ pamã karõ

¹Nẽ Tĩrtũm kot mẽ pahwỳr Jejus mẽnh ã harẽnhja. Koja mẽhõ kuma nẽ amnhĩ kaxyw hkôt hamaxpêr nẽ Jejus kôt amnhĩ xãm hã koja Tĩrtũm ja hã omu nẽ ho hkra. Nẽ koja mẽhõ kãm Tĩrtũm kĩnh hã koja mãnẽn kãm hkwyjê hkĩnh o pa.

²Ja pyrà nẽ kot puj mẽ pamã Tĩrtũm kĩnh nẽ kapêr kôt amnhĩ nhĩpêx. Hãmri nẽ mãnẽn pamã krajê piitã mẽ hkĩnh ho papa.

³Ně kot puj mẽ pamã Tĩrtũm kĩnh nẽ nhũm kapěrja mẽ pahpê hihtỳx kêt nẽ. Pu mẽ pamã Tĩrtũm kĩnh ã kapěr kôt amnhĩ nhĩpêx mex o ri papa.

⁴⁻⁵Na pu prem amnhĩ kaxyw Tĩrtũm Kra Jejus kôt pajamaxpěr nẽ hkôt amnhĩ xunhwỳ nhũm Tĩrtũm ja hã mẽ pahpumu nẽ mẽ pahto hkra pu mẽ ỹ hã amnhĩ nhĩpêx nyw o amnhĩ nhĩpêx o papa. No ri tanhmã amnhĩ tomnuj to ho ri papa hkêt nẽ.

Měmoj axkruněpxi nẽ kot Jejus kệp Tĩrtũm Kra hã ho amnhĩrĩt

Juãw 1.32-34; 3.36; 5.31; 15.26

⁶Ně Jejus pix na pre Tĩrtũm mẽ pakaxyw ãm nhũm kệp Kra hã mẽ pahwỳr wrỳ. Hãmri nhũm Juãw Paxisja pyhti kamã hkrã kumrã. Kệp Tĩrtũm Kra hã hkrã kumrã. Tã nhũm Tĩrtũm kapěr kôt ma tanhmã amnhĩ nhĩpêx to ho pa. Nẽ ri hkwỳjê mã kapěr jarěnh o ri mẽ hkôt pa. Tã nhũm mẽ kupĩ nhũm kệp Tĩrtũm Kra hã pĩ kahpa hã ajêt nẽ ty nẽ hkamrô axkapĩ. ã mẽ panê amnhĩ nhĩpêx anẽ nhũm Tĩrtũm Karõja kệp Kra hã mẽ pamã ho amnhĩrĩt. ãm hãmri na hte ã tanhmã mẽmoj to amnhĩrĩt to anẽ. Měmoj to hêx kêt jakamã na pre Jejus kệp Tĩrtũm Kra hã mẽ pamã ho amnhĩrĩt.

⁷Ně kệp Tĩrtũm Kra hã mẽ pamã mẽmoj to axkruněpxi nẽ ho amnhĩrĩt.

⁸Tĩrtũm Karõ na pre kệp Kra hã mẽ pamã ho amnhĩrĩt pu prem kệp Kra hã omu. Nẽ Juãw Paxis kot hkrã kumrãrta ã pu mẽ mãănẽn kệp Tĩrtũm Kra hã kot ho amnhĩrĩtja ã omu. Nẽ mãănẽn kệp Tĩrtũm Kra hã pĩ kahpa hã jêt nẽ htyk nẽ hkamrô pikapĩrta ã mẽ pamã ho amnhĩrĩt pu mẽ kệp Kra hã omu. E mẽ pamã mẽmoj to axkruněpxi nẽ Jejus kệp Tĩrtũm Kra hã kot ho amnhĩrĩt xwỳnh na jajaja.

⁹Ně na pu htem jar pahkwỳjaja kot axpẽn mar xà hã ixkre kamã mẽ kapěr ma nẽ mẽ hkôt pajamaxpěr. Tã koja Tĩrtũm tanhmã mẽ pamã mẽmoj to amnhĩrĩt to pu mẽ hkôt pajamaxpěr kurê kumrêx. Kệp Tĩrtũm kẽnã kot pu kêt mẽ kapěr prã nẽ hkôt pajamaxpěr kêt. Tãm na pre mẽ pamã Jejus kệp Kra hã ã ho amnhĩrĩt anẽ.

¹⁰Jakamã mẽ pahte Tĩrtũm Kra hkôt amnhĩ xunhwỳr xwỳnhjaja na pu prem Jejus kệp Kra hã harěnh ma nẽ hkôt pajamaxpěr kurê kumrêx. No mẽ kệp

hkra hkêt xwỳnhjaja na htem Tĩrtũm kot kêp Kra hã harẽnh ma nẽ ãm kuma nẽ amnhĩ kaxyw hkôt hamaxpěr kêt nẽ. Jao te Tĩrtũm kêp Hipêêxà hã amnhĩ to hêx pyræk ã harẽ.

11E kot paj ixprĩ hã mẽ amã tanhmã ja jarẽnh to ka mẽ inhma. Nà na pre Tĩrtũm Krata mẽ pahpiitã panê ty. Jakamã kot puj mẽ pahte hkôt amnhĩ xunhwỳr xwỳnhjaja nhỹrmã ty nhũm Tĩrtũm akupỹm mẽ pahto mẽ pahtĩr. Pu mẽ wa kuri pamex nẽ pahtĩr tũm nẽ papa ho papa.

12Mẽ pahpê Jejus kwỳjaja kot puj mẽ ã pahtĩr tũm nẽ papa anẽ. No mẽ kêp hkwỳ hkêt xwỳnhjaja koja mẽ nhỹrmã ty nẽ mẽ pahpyrà nẽ wa hwỳr àpir kêt nẽ.

13Na ka prem ixpyrà nẽ amnhĩ kaxyw Tĩrtũm Kra hkôt ajamaxpěr nẽ hkôt amnhĩ xunhwỳ. Tã pa ã mẽ amã kagàja nhĩpêx anẽ. Mẽ ate kamã harẽnh nẽ mẽ pahte nhỹrmã Tĩrtũm mẽ Kra wa hwỳr mẽ paxàpir ã mẽ pajarẽnhja mar nẽ amnhĩ kaxyw hkôt ajamaxpěr o ri apa kaxyw nẽ kapěr prãr o ri apa hkêt nẽ.

Mẽ pahte paxàmnhĩx mẽmoj tã Tĩrtũm wỳr ã mẽ pajarẽnh

Juãw 14.13-14

14Nẽ mẽ pahpê Tĩrtũm krajaja na pu htem paxàmnhĩx pajamakêtkati nẽ mẽmoj tã tanhmã hwỳr to ho papa. Kot puj mẽ kãm hprãm xà hkôt mẽmoj tã kuwỳ nhũm mẽ pama.

15Na pu htem mẽmoj tã kuwỳ nhũm mẽ pamar mex nẽ mẽ pahte mẽmoj tã hwỳr xà hkôt tanhmã mẽ pamã mẽmoj nhõr to rỳ tanhmã mẽmoj to. Ra mẽ pahte ja mar mex.

Tĩrtũm kot tanhmã hkra hkêt xwỳnhjê nhĩpêx to hã harẽnh

Rukre 22.31-32

16-17Nẽ koja Kris kôt mẽ anhiõ tanhmã amnhĩ tomnuj to ka mẽ atõ tee ri ja hã omu nẽ ho Tĩrtũm wỳ. Ho awỳ kê nê tanhmã kot amnhĩ tomnuj tota o hapêx nẽ ja nê ho htỳx kê axte ã amnhĩ nhĩpêx anhỳr kêt nẽ. Kot puj mẽ pahtõ tanhmã amnhĩ tomnuj to nhũm Tĩrtũm tee ri ja hã mẽ pahpumu nhũm ja kêp omnuj nẽ. Tã kot puj mẽ amnhĩ tomnujta kaga nhũm ja hã mẽ pahpumunh kôt tanhmã hã mẽ pahto hkêt nẽ. ãm mẽ kot amnhĩ nhĩpêx pixi

koja ho hamakêtkati hkêt nê. Kojã mēhō Tirtūm kaga ho hkaga nê aa hkôt amnhĩ xãm kêt nê. Hāmri nhūm tee ri amnhĩ tã omu nhūm ja kēp omnuj tỳx kumrēx. Jakamã koja aa ho hkra hkêt nê. Nê aa kot hkaga ho hamakêtkati hkêt nê pa ho pa. Jakamã koja hkaga xwỳnhhta nhỹrmã ty nê kuri htĩr tūm nê pa ho pa hkêt nê.

¹⁸Nê mē pahpê Tirtūm krajaja na pu htem amnhĩ tomnuj o papa hkêt nê. Tirtūm Kra Jejus kot ja pymaj mē panê Satanasti pumunh mex jakamã nhūm tee ri mē pahte tanhmã amnhĩ tomnuj to hprãm xàj mē pano kupyry kaprỳ ho ri pa. Ra mē pahte ja mar mex.

¹⁹Mē pahpê Tirtūm kra na pu mē. No mē kēp hkra hkêt xwỳnhjaja Satanasti kot amnhĩ tã mē ho htỳx pyrək o mē hipêx jakamã nhūm htem tanhmã amnhĩ tomnuj to ho pa. Mē pahte ja mar mex.

²⁰Nê määnēn ja mē pahte mar mex. Na pre Tirtūm Kra mē pahwỳr wrỳ nê mē pamã tanhmã Tirtūm o amnhĩrīt to ho pa. Tapxipix kēp Mēpahpãm ã mē pamã ho amnhĩrīt. Tã Jejus kukwak ri mē pahpê Tirtūm kra jakamã kot puj mē nhỹrmã wa kuri pahtĩr tūm nê pa mex nê papa ho papa.

²¹E Kris kôt ixkwỳjaja. Kêr ka mē Tirtūm kapêr kôt pix mã măn ri amnhĩ nhĩpêx o ri apa rãhã nê. No nhãm mē kot Tirtūm kapêr kwỳm ri mē amã kapêr o hêx xwỳnhjê kapêr ma nê ãm mē ama nê mē hkôt amnhĩ nhĩpêx hkêt nê. Tã ãm ja pix. Ixpê Juãw na pa krĩ piitã hkôt mē amã kagà nhĩpêx nê kurē.

Sikũn Juãw

Sikũn Juãw 1

¹Pa Jejus kôt ixtõx. Xà mẽ amex? E ot pa mẽ amã kagà nhĩpêx nẽ mẽ awỳr kumẽ. Akrajaja nẽ apê mẽ hkatorxà mẽ mẽ ato ixpimràatã mẽ awỳr kumẽ. Ixpê Juãw pigêtre na pa. Inhmã mẽ akĩnh nom papxipix inhmã mẽ akĩnh kêt. Mẽ pahpyrà nẽ mẽ kot Tĩrtũm kôt amnhĩ xunhwỳr xwỳnhjaja haxwỳja kãm mẽ akĩnh.

²Mẽ pahte Tĩrtũm kapêr kôt ri amnhĩ nhĩpêx rãhã ho ri papa jakamã na pu htem pamã axpẽn kĩnh o ri papa.

³Na pa hte mẽ pahto Mẽpanhĩpêêxà maati Tĩrtũm wỳr o ixpa nẽ kãm: —Pa Tĩrtũm. Ot pa mẽ amnhĩ to awỳ. Akra Jejus Kris mẽ mẽ amnhĩ to war awỳ. Kêr ka wa mẽ ixkamã axukapĩ nẽ mẽ ixkutã war anojarêt rãhã ho ri apa. Nẽ tanhmã mẽ ixkrã hto pa mẽ ixamnhĩx ijamakêtkati nẽ ixkĩnh nẽ mẽ inhmã axpẽn kĩnh nẽ axpẽn to mex o ri axpẽn kôt ixpa. Nẽ tãm ri amnhĩ nhĩpêx. Anẽ.

Mẽ pamã axpẽn kĩnh kãm axpẽn to mex ã mẽ pamã karõ

Juãw 13.34-35; Wam Juãw 2.7-9; 3.14-18

⁴Nẽ na pa pre akra hkwyjê pumu nhũm mẽ inhmã amnhĩ jarẽ pa mẽ kuma nẽ mẽ ỹ hã ixkĩnh nẽ. Na xep prem Tĩrtũm kôt amnhĩ xunhwỳ nẽ hkôt ri amnhĩ nhĩpêx mex o pa. Mẽ kot Mẽpanhĩpêêxà Maati Tĩrtũm kapêr ã kagà hkôt amnhĩ nhĩpêx ã inhmã amnhĩ jarẽ pa mẽ kuma nẽ ixkĩnh nẽ.

⁵⁻⁶Jakamã na pa ã amã ixkapêr nẽ hã kagà anẽ. E kwa Kris kôt ixtõx. Kêr pu mẽ pamã axpẽn kĩnh o ri papa hã mẽmoj to axpẽn kutã panojarêt rãhã ho ri papa. ã ixujarênh anhỹrja nyw kêt. Annepê mã mẽ ate Jejus kôt amnhĩ xunhwỳr ã arĩgrota ã na prem ã mẽ amã karõ anẽ. Tã kêr pu mẽ arĩ pamã axpẽn kĩnh pê Tĩrtũm kapêr piitã hkôt amnhĩ nhĩpêx mex o ri papa. Kapêr ã kagà kot ã mẽ pahte amnhĩ nhĩpêx anhỹr ã mẽ pamã karõ.

Tĩrtũm kapêr o mẽ hêx xwỳnhjê jarênh

Rõmãn 16.17-18; Wam Ximotre 5.22; Wam Juãw 2.18-26; 4.1

⁷Nẽ mẽ kot Tĩrtũm kapêr o hêx o ri mẽ pa xwỳnhjaja na mẽ ra ma krĩ piitã hkôt mẽ kãm tanhmã ho hêx to ho pa nẽ mẽ kãm: —Jejus kêp Tĩrtũm Kra

hkêt ãm mẽ panhĩõ na pre. Na pre Tĩrtũm mẽ pahwỳr mẽnh kêt nẽ. ãm mẽ panhĩõ rũm na pre kato. Anhỳr o mẽ kãm ho hêx o pa. Kãm Kris kurê xwỳnh maatija nhỹ hã na htem ã ri ho hêx o pa anẽ.

⁸Jakamã kwa mẽ amnhĩ nê mẽ omunh mex nẽ mẽ ama nẽ ãm mẽ ama. Kot kaj mẽ kapêr ma nẽ mẽ hkôt ajamaxpêr hãmri nẽ mẽ ixte Tĩrtũm kapêr o mẽ ajahkreta kaga. Kwa mẽ arĩ mẽ ate amnhĩ nhĩpêx nyw pix o mãn amnhĩ nhĩpêx rãhã o ri apa. Nẽ arĩ mẽ amã axpên kĩnh kãm tanhmã axpên to ajuta hto rãhã ho ri apa. Kêr kê Tĩrtũm ja hã mẽ apumu nẽ nhỹrmã mẽ ato mex nẽ.

⁹Nom kot kaj mẽ nhãm mẽ kapêr punujja kôt amnhĩ nhĩpêx nẽ Kris kôt amnhĩ nhĩpêx kêt nẽ nhũm Tĩrtũm mẽ akôt pa hkêt nẽ. Nom kot ka mẽ arĩ Kris kôt amnhĩ nhĩpêx mex nẽ hãmri nhũm Tĩrtũm mẽ Kra Jejusja wa mẽ akôt ri pa ho pa rãhã nẽ.

¹⁰Jakamã koja ã Tĩrtũm kapêr ã kagà kuhpa hã Jejus o hêx xwỳnhjaja mẽmo arĩgro hã mẽ anhõ krĩ hwỳr pøj ka mẽ omu nẽ amnhĩ nhõrkwỹ hwỳr mẽ hwỳr kêt nẽ. Nẽ tanhmã mẽ kãm akapêr to hkêt nẽ. ãm ri mẽ hkàx ã ri mra.

¹¹No kot kaj mẽ ã mẽ hipêx anhỳr kêt nẽ mẽ hwỳr mra nẽ mẽ mar o akuhê hãmri nẽ te mẽ ate mẽ hkôt amnhĩ nhĩpêx o amnhĩ nhĩpêx pyræk. Ja pumaj kêr ka mẽ nhỹri mẽ omu nẽ mẽ htêp kêt kumrêx.

Kagà jatur xà

Hapuhã Juãw 13-15

¹²E Kris kôt ixtõx. Ixkapêr jatur xà na ja. Ixkapêr ã kagàja ãm hakotre nom inhmã mẽ amã ixkapêr ry hprãm. Jakamã kot paj mẽmo arĩgro hã ma mẽ awỳr mõi pu mẽ axpên pumu nẽ pahkĩnh nẽ. Pa rĩ kormã mẽ amã ixkapêr jatur xàm kumẽ ka mẽ aprĩ hã inhma.

¹³Nẽ ota jar Kris kôt atõx krajaja awỳr hpêr mẽ. E ixpê Juãw pigêtre na pa ã awỳr kagàja nhĩpêx nẽ mẽnh anẽ.

Hapuhã Juãw

Hapuhã Juãw 1

¹Pa ixkràmnhwỳ Gajore? Xà amex? E ot pa awỳr kagàja nhĩpêx nẽ kumẽ. Apê ixkràmnhwỳ mex na ka. Inhmã akĩnh.

²⁻³Na pre ra Kris kôt pahtõ hkwỳjaja ixwỳr pøj nẽ tanhmã inhmã ajarẽnh to. Na ka xep hte Tĩrtũm kôt amnhĩ nhĩpêx mex rãhã ho ri apa. Pa ajarẽnh ma nẽ anhỹ hã ixkĩnh nẽ. Nẽ ato Tĩrtũm wỳr o ixpa. Kot ato mex nhũm amex nẽ ajamakêtkati nẽ apa ho apa kaxyw. Nẽ axà hkêt nẽ amex nẽ ri apa kaxyw.

⁴Ixte Tĩrtũm kapêr o mẽ ajahkre o ri ixpa jakamã te mẽ apê ixkra pyræk. Tã pa tanhmã ate mẽ pahkwỳjê nhĩpêx to ho apa hã ajarẽnh ma nẽ ixkĩnh nẽ.

Gajore kot tanhmã Jejus kôt hkwỳjê ho mex to hã harẽnh

Wam Korĩt 16.10-11

⁵E ixkràmnhwỳ. Na ka xep hte Jejus kôt pahtõjê ho mex o ri apa. Aa ate mẽ omunh kêt tã nhũm htem ma anhõ krĩ hwỳr pa ka mẽ omu nẽ apê Jejus kôt mẽ htõ hã mẽ ho mex nẽ. ãm hãmri na ka hte ã mẽ hipêx anhỹr o ri apa Gajore.

⁶Na pre ra mẽ hkwỳjaja akupỹn ixwỳr pøj nẽ mẽ ixpê Kris kwỳjê mã amnhĩ tã ajarẽ. Amã mẽ hkĩnh nẽ ate tanhmã mẽ ho mex to hã ajarẽ. Nhũm prem nojarêt ka xep pre mẽ kãm pry hã mẽ apkur xà hã mẽmoj gõ nhũm mẽ inhmã ajarẽ. Nà ãm hãmri na ka hte ã mẽ ho mex o apa anẽ. ã ate mẽ hipêx anhỹr o apata ã na hte Tĩrtũm apumu nẽ hkĩnh nẽ.

⁷Na htem krĩ piitã hkôt mẽ kãm Kris kot tanhmã mẽ panê amnhĩ nhĩpêx to hã harẽnh kaxyw ma mẽ hwỳr pa. Nom mẽ apkur xà hprãm xàj mẽ kot Kris kôt amnhĩ xunhwỳr kêt xwỳnhjê hwỳr pa hkêt nẽ.

⁸Jakamã kwa kêr pu mẽ papajaja mẽ pahpê Jejus kôt mẽ htõ hã mẽ kãm mẽõ hkwỳ nhõr o papa. Kot puj mẽ ã mẽ ho ajuta anẽ nẽ te mẽ pajaxwỳja mẽ ãhkõ hã ri mẽ kãm Kris jarẽnh o ri papa pyræk.

Xotre kãm Juãw kapêr mar prãm kêt ã harẽnh

Matêwre 20.25-28; 23.1-12

⁹Ně ra ixte anhõ krĩ kamã mẽ apê Kris kwỳjê mã kagà ně mẽnh nhũm mẽ ate kamã harēnh̄ta. Na xep pre Xotreja kuma ně ãm kuma. Kêp mẽ akrãhtũm prãm xàj kãm ixkapēr mar prãm kêt ně.

¹⁰Na xep hte tanhmã ixto hêx to ho pa. Nom papxipix ixto hêx kêt ně. Mããnēn Kris kôt mẽ pahtõjaja nhỹhỹnh krĩ hõ rũm mẽ awỳr pan pøj nhũm xep tanhmã mẽ amã mẽ ho hêx to. Ně mẽ hpôx ã mẽ omu nom amnhĩ nhõrkwỹ hwỳr mẽ hwỳr kêt ně. Tã ka mẽ kurom amnhĩ nhõrkwỹ hwỳr mẽ awỳ nhũm xep tee ri ja hã mẽ apumu ně mẽ akamã gryk ně mẽ hã mẽ amã akir ně Tĩrtũm mã amnhĩ jarēnh xà hã ixkre nê mẽ ajano. Na xep hte ã amnhĩ nhĩpêx anhỹr o pa. Jakamã kot paj nhỹrmã ma mẽ awỳr mō hãmri ně mẽ apiitã mẽ anoo mã hã kãm akir. Tanhmã kot mẽ ixto hêx to ně tanhmã kot amnhĩ tomnuj to hã kãm akir ka mẽ apiitã hã inhma.

Mẽ pahte mẽ kot amnhĩ tomnuj xwỳnhjê hkôt amnhĩ nhĩpêx kêt ã mẽ pamã karõ

Rukre 6.45; Rõmãn 12.9

¹¹E kwa ixkràmnhwỳ. Kêr ka ã Xotre kot amnhĩ tomnuj o pa anhỹrja kôt amnhĩ nhĩpêx kêt ně. Mẽ kot amnhĩ tomnuj o mẽ pa xwỳnhjaja na htem Tĩrtũm kôt amnhĩ nhĩpêx kêt ně. No kêt mẽ kot amnhĩ to mex o ri mẽ pa xwỳnhjaja na mẽ kêp Tĩrtũm kra jakamã kêr ka mẽ ã mẽ kot amnhĩ nhĩpêx anhỹr xwỳnhjê kôt pix mã amnhĩ nhĩpêx.

Temētre jarēnh

¹²Ně Temētre na hte tãm ri amnhĩ nhĩpêx ně ãm hãmri Tĩrtũm kapēr o mẽ ahkre mex ně nhũm mẽ piitã axpēn mã mex ã harē. Pa hte ijaxwỳja mẽ kãm mex ã harēnh o ri mẽ hkôt ixpa ka htem inhma. ãm hãmri na pa hte tanhmã harēnh to ho ri ixpa.

Kagà jatur xà

Sikũn Juãw 12-13

¹³E kagàja kamã na pa ãm ja pix jarē ně hã kagà ně awỳr kumẽ Gajore. Na pa kormã harēnh jatur xà mẽnh kêt ně.

¹⁴Nom kot paj tokyx ma awỳr mō hãmri ně rĩ kormã amã hatur xàm kumẽ. E kê Tĩrtũm akutã nojarêt rãhã ho pa. Ně ota jar Kris kôt akràmnhwỳjaja

awỳr hpěr mẽ. Nễ kêr ka atar Kris kôt ixkràmnhwỳjê mã ijarẽ. Tã ãm ja pix.
Ixpê Juãw pigêtre na pa ã awỳr kagà nhĩpêx nễ mẽnh anẽ.

Jutre

Jutre 1

¹Pa Jejus kôt ixtō nē ixtōxjaja. Xà mẽ amex? E ot pa mẽ amã kagà nhĩpêx nē mẽ awỳr kurē. Tĩrtũm kot ixpyrà nē amnhĩ kaxyw mẽ axunhwỳr xwỳnhjê hwỳr. Mēpanhĩpêêxà Maati Tĩrtũm kãm mẽ pahpiitã mẽ pajapê jakamã na hte Kra Jejus Kris mẽ wa mẽ pahtãnopxar mex rãhã ho pa. Ixpê Jutre na pa hte Jejus Kris mã tanhmã amnhĩ nhĩpêx to ho ri ixpa. Nē ixpê Xiakre htõ na pa.

²Na pa hte mẽ ato Tĩrtũm wỳr ho ixpa nē kãm: —Pa Tĩrtũm. Kwa mẽ kot Akra Jejus kôt amnhĩ xunhwỳr xwỳnhjê pumu nē amã mẽ hapê hã mẽ kamã axukapřĩ rãhã ho apa. Kê mẽ kamã amnhĩ krit nē àmnhĩx hamakêtkati nē ri tanhmã amnhĩ nhĩpêx to ho pa. Nē mẽ kãm axpẽn kĩnh o ri axpẽn kôt pa. Anẽ.

Mẽ kot Tĩrtũm kapěr o hêx xwỳnhjê jarěnh

Wam Ximotre 1.18-20; 6.12

³E ixkràmnhwỳjaja. Nà inhmã mẽ akĩnh. Na pa pre jãã mẽ amã kagà hkwy nhĩpêx kaxyw. Mẽ pahte Jejus Kris kukwak ri amnhĩ nhĩpêx nyw ã tanhmã mẽ pajarěnh to nē hã kagà kaxyw tã kormã harěnh kêt nē. Kot paj axtem mẽmoj jarě. Na pre Tĩrtũm mẽ pamã kot amnhĩ nhĩpêx o amnhĩrĩt pa. Nē kapěr o amnhĩrĩt pa. Mẽ pahte mar nē hkôt amnhĩ nhĩpêx kaxyw. Jakamã kêr pu mẽ kapěr mar tỳx nē amnhĩ krã hi kamã haxàr tỳx nē hã papa. Nom koja mẽhõ kapěr kuhpa hã tanhmã mẽ amã kapěr o hêx to ka mẽ ama nē ãm ama.

⁴Na xep ra kapěr o mẽ hêx xwỳnhjaja mẽ akôt pa nē mẽ apyrà nē Jejus kôt amnhĩ xunhwỳr ã amnhĩ jarě nom amnhĩ to hêx. Ka xep mẽ aprĩ hã mẽ hêx ã mẽ omunh kêt nē mẽ kêp Jejus kôt mẽ atõ hã mẽ hkamnhĩx nē atỳx amnhĩ nhõrkwỹ hwỳr mẽ awỳ. Nom mẽ kot Tĩrtũm kapěr o hêx pix kaxyw na htem mẽ akôt pa nē mẽ amã kapěr o: —Tĩrtũm kãm mẽ pajapê htỳx kumrêx nē mẽ pakutã nojarêt ho pa jakamã kwa kêr pu mẽ mãmřĩ nhãm mēnijê ho amnhĩkati ho papa. Koja ja hã mẽ pahpumu nē tanhmã hã mẽ pahto hkêt nē. Kãm mẽ pajapê kẽnã kot kêt hã tanhmã mẽ pahto. No kêt Jejus Krisja

mě ate kêp mẽ panhõ Pahihti hã harě nom kêp mẽ panhõ patrãw rỳ kêp mẽ panhõ Pahihti hkêt. Aně. Ā Tĩrtũm kapěr kuhpa hã mẽ amã harěnh anhỹr o pa. Tĩrtũm kapěr ã kagà htũm kot amnepêm mẽ hkukamã tanhmã mẽ harěnh to ně mẽ harěnh kot: Ā mẽ kapěr anhỹr o paja mỳrapê koja mẽ mex kêt ně pa. Koja Tĩrtũm mẽ homnuj tỳx kumrěx. Anhỹr o kot mẽ harěnh. Tã pa mẽ amã ixprĩ hã mẽ harě ně hã kagà. Mě ate inhmar ně amnhĩ nê mẽ omunh mex kaxyw.

Tĩrtũm kot tanhmã mẽ kot amnhĩ tomnuj xwỳnhjê nhĩpêx to hã harěnh

Sikũn Pêtre 2.1-17; Sikũn Ximotre 3.1-9

⁵Ně amnepê mã mẽ panhĩgêjtaja kormã Ejit kamã mẽ pa ri nhũm Tĩrtũm Ejit nhõ xwỳnhjê rũm mẽ kator pa. Hãmri nhũm mẽ hkwỳjaja tanhmã hamaxpěr to ně axtem ně amnhĩ kaxyw hkôt hamaxpěr kêt ně. Nhũm tee ri amnhĩ tã mẽ omu ně ã mẽ kot amnhĩ nhĩpêx anhỹr xwỳnhjê nhĩmex pa. Ra mẽ ate mẽ harěnh mar mex tã pa axte mẽ amã mẽ harě.

⁶Ně Tĩrtũm kapěr o mẽ wrỳk xwỳnh kwỳjaja. Na prem Tĩrtũm nhỹ hã kapěr o pa htã tanhmã hamaxpěr punuj to ně ra kãm ja ho anhỹr prãm nõkati ně Tĩrtũm kaga. Jakamã nhũm mẽ hã amỳnê nhũm mẽ unê ně kàx o mẽ hkaxpre pa. Ně nhỹri pika kaxwỳnh kãm kamàt kô htyk kãm mẽ kurê nhũm mẽ arĩ kamã hkrĩ ho hkrĩ. Nom koja nhỹrmã Tĩrtũm kot tanhmã mẽ pahpiitã mẽ pajarěnh to xà hã arĩgro kato nhũm mẽ rĩ kormã hapôx pa. Hãmri ně kot amnhĩ tomnuj mỳrapê ma mẽ kot amnhĩ xà htỳx kamã hamak tũm xàta wỳr ma hapêx.

⁷Ně krĩ pê Sotõ ně Komo nhõ xwỳnhjaja na prem haxwỳja kãm Tĩrtũm kapěr kôt amnhĩ nhĩpêx prãm kêt ně. Ně krĩja wa hpuhã krĩ hkwỳ kamã ri mẽ pa xwỳnhjaja haxwỳja mẽ uràk ně ně kãm kapěr mar prãm kêt ně. Na prem amnhĩ tomnuj tỳx rãhã ho pa. Ně axtem ně axpěn pê ri mẽ hprõ ho amnhĩkati ho pa. Ně mẽmy hkwỳjaja ri axtem ně axpěn to amnhĩkati ho pa. Hãmri nhũm Tĩrtũm tee ri mẽ kot amnhĩ nhĩpêxja ã omu ně mẽ hipy kuwy hpôk kwỳ rě nhũm mẽ amnhĩ wỳr omu ně kãm ma xàj tee ri hprõt kaprỳ. Ně hprõt kaxyw òrkwỹ rũm hapôj ně hxêt pa ně hapêx. Na hte ã Tĩrtũm mẽ kot amnhĩ tomnuj o mẽ pa xwỳnhjê nhĩpêx aně. Jakamã koja nhỹrmã kuwy

hpôk rãhã xwỳnhhta wỳr mẽ piitã mẽ rēnh pa nhũm mẽ kamã amnhĩ xà htỳx kamã hamak rãhã ho pa ho pa nē aa à hapêx kêt nē. Nē à htỳx rãhã papa ho pa. Tã mẽ pahte Sotō mẽ Komo nhõ xwỳnhjê jarēnh mar nē mẽ pahte amnhĩ tomnuj kaga kurê kumrēx kaxyw na pre Tĩrtũm ã mẽ pamã mẽ harēnh o amnhĩrĩt anē.

Mẽ hpijaàm kêt xwỳnhjê jarēnh
Sikũn Pêtre 2.10

⁸Nē mẽ kot Tĩrtũm kapēr o pihkàr xwỳnhjaja na htem ã mẽ kot amnhĩ nhĩpêx anhỹr xwỳnhjê pyrã nē amnhĩ tomnuj tỳx pix o ri pa. Jakamã na htem tanhmã hpimtir punuj to hãmri nē hkrã hapôj nē hpimtir xà hkôt tanhmã amnhĩ tomnuj to. Jao hkwyjê kamã hpijaàm kêt o pa. Rỳ mēnijê hõ rỳ mēmyjê hõ nhũm mẽ axpēn kãm hpijaàm kêt o pa. Rỳ Tĩrtũm kapēr o mẽ wrỳk xwỳnhjê ho kapēr punuj nē. Kapēr mã gêt o tanhmã mẽ ho kapēr punuj to. ã na htem hpimtir punuj xà hkôt amnhĩ tomnuj o pa anē.

⁹Tĩrtũm kapēr o mẽ wrỳk xwỳnh krãhtũm Mikewja. Kêp mẽ hkrãhtũm tã aa mẽ kãm kapēr mã gêt kêt nē. Na pre Mojes ty nhũm Mikew ra ma hwỳr tēn wrỳ. Nē kuri Satanasti pumu hãmri nē Mojes nhĩ nē tanhmã kãm kapēr to. Nom kapēr mã gêt o kãm kapēr kêt nē. ãm kapēr mã hprĩ ho kãm kapēr nē kãm: —Kwa ãm omu kê nō. Kot kaj tanhmã ho nhũm Tĩrtũm apumu nē hã tanhmã hã ato. Anē.

¹⁰⁻¹¹Nom ixte mẽ amã mẽ hpimtir punuj jarēnh xwỳnhjaja. Mẽ kot Tĩrtũm kapēr o pihkàr xwỳnhjaja kot hprĩ hã Tĩrtũm kot amnhĩ nhĩpêx ã harēnh mar kêt jakamã na htem htỳx ri ho kapēr o haprỳ ho pa. Te ho mry xoprēja hamaxpēr kêt nē htỳx ri amnhĩ nhĩpêx o pa pyrãk. Nom koja nhỹrmã Tĩrtũm mẽ homnuj tỳx nē. Te mẽ kot finat Kaĩ kot amnhĩ tō hpĩr xwỳnh kot amnhĩ nhĩpêxta pyrãk. Nē te mẽ kot finat Paraãw kot amnhĩ nhĩpêx pyrã nē kàxpore rũnh prãm xàj Tĩrtũm kapēr kuhpa hã tanhmã amnhĩ nhĩpêx to ho pa. Nē te mẽ kot finat Kore kot amnhĩ nhĩpêx pyrã nē Tĩrtũm kot mẽ kaxyw mẽ õ pahi xãm xwỳnhhta kutã amnhĩ xunhwỳ. Mỳrapê koja mẽ jajê pyrã nē kuwy hpôk rãhã xwỳnhhta wỳr ma hapêx pa.

¹²Na ka htem apê Jejus kwỳ hã axpën wỳr akuprõ. Nẽ tõhã mẽ apê hkwy hã amã axpën kĩnh ã axàpkur kaxyw axpën wỳr akuprõ. Nhũm ixte mẽ amã mẽ harënh xwỳnhjaja mẽ akõt agjê nẽ mẽ akutã apku. Jakamã kwa mẽ o kora mẽ amnhĩ nê mẽ omunh mex nẽ. Mẽ hipêx o te mẽ ate mẽ axàpkur xà hã mẽ anhõ kamã kënre pumunh nẽ hanhir nẽ rënh pyrà nẽ amnhĩ nhĩhkô hã mẽ pumu nẽ amnhĩ nê hanor kurê kumrëx. Na htem hpijaàm kêt kãm amnhĩ pix kukamã hamaxpër pê apkur rũnh o pa. Te na wrỳk kaxyw htyk rax nẽ mõi nhũm mẽ kot omunh nẽ wrỳk ã hkamnhĩx tã nhũm kôk kot nhãm mën nhũm wrỳk kêeta pyræk o na htem amnhĩ nhĩpêx. Jao te mẽ kot ãm hãmri mẽ amã Tĩrtũm kapër jarënh mex pyræk tã mẽ amã ho hêx. Nẽ te mẽ kệp mẽmo pĩ hpàr ra ô mã tãm tã ãm htỳx rã nẽ aa ô hkêt nhũm mẽ kot krãhyr nẽ mën nhũm grà parta pyræk.

¹³Nẽ te mẽ kệp gô xujanãr kot amnhĩ nhĩpêx pyræk. Na hte gô xujanãrja hakàx wỳr kapê nẽ mra nhũm hamrô kỳxpê amgrà kamã arĩk nhũm gô awjanã nẽ ma akupỹm hipôk wỳr mra. Ja pyræk na htem ma nhỹhỹm mra nẽ mẽ kãm mẽmoj jarë nẽ nhãm mra nẽ mẽ kãm mẽmoj jarë nẽ ma akupỹm mẽ kurũm mra. Nhũm mẽ mar xà hkõt amnhĩ tomnuj rãhã ho pa. Nẽ te mẽ kot kaxkwa hã kanhêre nhỹhỹm htêm nhũm mẽ kot nhỹhỹm htêm xà hkõt omunh kêeta pyræk. Jakamã koja Tĩrtũm nhỹrmã kamàt kô kamã mẽ rënh pa nhũm mẽ aa hapôx kêt nẽ.

Mẽ kot amnhĩ tomnuj xwỳnhjê hkukamã mẽ harënh

Apokarip 20.11-15

¹⁴Nẽ na pre finat Enokja amnepê mã ã mẽ kot amnhĩ tomnuj anhỹr xwỳnhjê hkukamã tanhmã mẽ harënh to. Mẽ kot Tĩrtũm kapër o pihkàr o ri mẽ pa xwỳnhjaja nhũm mẽ hkukamã mẽ harë. Enokja finat Atãw kanrêhã htãmnhwỳ na pre. Tã ã mẽ kot amnhĩ tomnuj anhỹr xwỳnhjê hkukamã mẽ harënh o: Koja nhỹrmã Pahihtija man pika hwỳr akupỹn wrỳ. Kapër o mẽ wrỳk xwỳnh xohtô rax mẽ mẽ hpimràatã akupỹn wrỳ.

¹⁵Hãmri nẽ mẽ pahpiitã kormã mẽ pahtĩr ri mẽ pahte tanhmã amnhĩ nhĩpêx to ho papa hã mẽ pahpumunh xà hkõt tanhmã mẽ pajarënh to. Hãmri nẽ mẽ kot Tĩrtũm kapër o hêx o pa xwỳnhjê pumu nẽ tanhmã mẽ harënh to nẽ

mê harênh o: “Jajaja na pre mê kãm Inhîpêxà Tîrtûm prãm kêr nê ri kapêr kwÿm pix mã amnhî nhîpêx o pa. Nê kapêr punuj o pa. ã na prem amnhî nhîpêx anhÿr rãhã ho pa.” Anhÿr o mê harê nê amnhî nê kuwy hwÿr mê kurê nhûm mê amnhî xà htÿx kãm hamak o pa rãhã nê pa ho pa. Anê. ã na pre finat Enokja mê hkukamã mê harênh anê.

16 ãm hãmri na mê harê. Tã na hte arî mê hkwÿjaja ã amnhî nhîpêx anê. Nê hamaxpêr mex kêr nê. Na htem nhãm tanhmã mê ho kapêr punuj to pix kukamã hamaxpêr. Nê amnhî krã hkôt htÿx ri tanhmã amnhî tomnuj to ho pa. Nê amnhî to jarkrar rãhã nê. Nê hêx rom mê kêp mêmoj jamÿnh kaxyw tanhmã mê kãm hêx to.

17 E Kris kôt ixkrãmnhwÿjaja. Kojaja mê ã mê amã Tîrtûm kapêr o hêx anhÿr o mê akôt pa ka mê ama nê ãm mê ama nê mê kapêr mar kêr nê. ãm mê panhõ Pahîti Jejus Kris nhÿ hã mê ajahkre o mê pa xwÿnhjaja kot tanhmã mê amã mê harênh toja mã mãn kêr ajamaxpêr tÿx rãhã o ri apa.

18 Na prem mê amã mê harênh o: —Jejus akupÿn wrÿk xwÿj ri koja mêmojaja mê awÿr mran pøj. Nom mê kot Jejus kapêr kwÿm amnhî krã hkôt tanhmã amnhî nhîpêx to xwÿnhjaja koja mê. Hãmri nê mê apê Jejus kwÿ hã mê apumu nê mê atã akunha nê mê atã hpêr o axkê nê Tîrtûm ã hpêr o axkê nê kapêr ã kagà hã hpêr o axkê. Anê.

19 ã mê kot amnhî nhîpêx anhÿr xwÿnhjaja mê pahpê Jejus kwÿjaja mê pahte axpên kutã amnhî xunhwÿrja na mê kãm hprãm. Mê kamã Tîrtûm Karõ gjêx kêr jakamã mê kãm amnhî krã hkôt pix mã tanhmã amnhî tomnuj to ho pa hprãm.

Mê pahte Kris akupÿn wrÿk jamãr pê tanhmã amnhî nhîpêx to hã mê pamã karõ

Matêwre 24.45-51; Rukre 12.25-40; Karatas 6.1-2; Xiakre 5.19-20; Sikûn Pêtre 3.12-15

20 Kwa mê apê Jejus kôt ixtõ nê ixtõxjaja kêr ka mê ã mê kot amnhî nhîpêx anhÿr o mê pa xwÿnhjê rom apkati mê amnhî kaxyw Jejus pix mã mãn ajamaxpêr rãhã ho ri apa. Te mê kot mê hakre hã ra àptâr nê amnhî krãm mê hakre xà jagjênh tÿxta pyræk. Jao Tîrtûm kapêr mar tÿx nê hkôt amnhî nhîpêx mex o ri apa. Nê Karõ nhÿ hã amnhî to hwÿr rãhã nê.

²¹Ně Tirtům kām mẽ pajapê hã kām ajamxpěr rãhã ho ri apa. Ně Pahihti Jejus Kris kām mẽ pajapê hã kām ajamxpěr tỳx rãhã ho apa. Koja nhỹrmã kām mẽ pajapê hã akupỹn mẽ pahwỳr wrỳ nẽ tanhmã mẽ pahto mex to pu mẽ kuri pahtĩr tũm nẽ pahkĩnh nẽ papa ho papa. Tã kър pu mẽ arĩ akupỹn mẽ pahwỳr wrỳk xà hã arĩgro jamãr rãhã ho papa.

²²Ně mẽ pahkwỳjaja kormã mẽ kot Jejus kôt amnhĩ xunhwỳr tỳx kêt xwỳnhjaja kър ka mẽ kamã axukaprĩ nẽ aprĩ hã mẽ kãm Tirtům kapěr jarẽnh o ri mẽ hkôt apa.

²³Na pre ra mẽ hkwỳjaja mẽ kot Tirtům kapěr o pihkàr xwỳnhjê kapěr ma nẽ mẽ hkôt amnhĩ nhĩpêx. Jakamã kър ka mẽ ja hã mẽ omu nẽ te mẽ ate kuwy hpôk rũnh nê mẽ hpa hã mẽ hamỳnh nẽ nhãm mẽ rẽnh pyràk o mẽ hipêx. Jao mẽ kot nhỹrmã Tirtům kapěr o pihkàr xwỳnhjê hkôt kuwy hpôk rũnh ta wỳr pa pymaj mẽ nê mẽ kãm akapěr kãm axihtỳx o ri mẽ hkôt apa. Kê mẽ ama nẽ mẽ hkaga nẽ mẽ hkôt ri amnhĩ nhĩpêx kêt nẽ. Nẽ htỳx ri mẽ kot amnhĩ tomnuj o mẽ pa xwỳnhjaja kър ka mẽ kamã axukaprĩ ho ri apa nẽ mẽ kamã agryk tokyx anhỹr kêt nẽ. Xatã mẽ kãm Tirtům kapěr jarẽnh rãhã ho ri mẽ hkôt apa. Nom kwa mẽ okora kър ka mẽ kot amnhĩ nhĩpêx o amnhĩ nhĩpêx o ri apa hkêt nẽ. Kwarĩ ho kwarĩ.

Jutre kot Tirtům mã mex o mex ã harẽnh

Wam Pêtre 1.5-7

²⁴Ně kър pu mẽ Tirtům mã amnhĩ jarẽnh kaxyw nẽ ã kãm amnhĩ jarẽnh anẽ nẽ kãm: —Pa Tirtům. Nà ãm hãmri na ka hte amnhĩ kôt mẽ ixunhwỳr tỳx nẽ pa mẽ akaga hkêt nẽ akôt amnhĩ nhĩpêx rãhã ho ri ixpa. Kot kaj nhỹrmã amnhĩ wỳr mẽ ixto api pa mẽ Akra mẽ war akuri axte tanhmã amnhĩ tomnuj to hkêt nẽ. Nẽ amnhĩ to mex pê anhĩrã htỳx rax kãm ixpa. Jao ixkĩnh tỳx nẽ ixpa ho ixpa.

²⁵—Apê mẽ inhõ Tirtům ã apyxi mex kumrêx na ka. Na ka pre Pahihti Jejus Kris kukwak ri mẽ ixpiitã mẽ ixte amnhĩ tomnuj pê mẽ ixpytã. Nẽ na ka hte anhĩrã htỳx rax rãhã ri apa. Nẽ amex o amex nẽ axihtỳx o axihtỳx nẽ axàhpumunh o axàhpumunh. Nẽ apê mẽ inhõ Pahi Maati hã apyxi mex na ka. Amnepê mã kormã mẽmoj kêt ri ka pre ã amnhĩ nhĩpêx anhỹr o apa rãhã

ně. Tã arĩ ã ate amnhĩ nhĩpêx anhỹr ho apa ho rãhãã. Ně kot kaj apkati mẽ
ã ate amnhĩ nhĩpêx anhỹr ho rãhãã. ã ate amnhĩ nhĩpêx anhỹr o apa ho rãhã
ho rãhã. Tã ãm ja pix na hapêx. Aně. E kêr pu mẽ ã Tĩrtũm mã mex o mex
ã harẽnh anhỹr o papa. ãm ja pix. Ixpê Jutre na pa mẽ awỳr kagàja nhĩpêx
ně kumě.

Apokarip

Apokarip 1

1-2E kot paj mẽ amã awjarẽ nẽ hã kagà. Ixpê Juãw ixte Tĩrtũm mã tanhmã amnhĩ anhĩpêx to ho ixpa xwỳnh kot paj mẽmoj jarẽ nẽ hã kagà. Na pre Tĩrtũmja Jejus mã mẽmoj kukamã tanhmã ujarẽnh to ho ra kãm ho amnhĩrĩt pa. Kot amnhĩ xô ri mẽ pahte hkôt amnhĩ xunhwỳr xwỳnhjê mã harẽnh kaxyw. Hãmri nhũm kuma nẽ kot amnhĩ xô ri inhmã ujarẽnh kaxyw man ixwỳr kapêr o wrỳk xwỳnh mẽ nhũm man ixwỳr wrỳ nẽ ô ri inhmã mẽmoj to amnhĩrĩt pa. ãm hãmri ã inhmã mẽmoj to amnhĩrĩt anẽ. Tã kot paj amnhĩ xwar mẽ apê Jejus kôt ri mẽ apa xwỳnhjê mã harẽ nẽ hã kagà. Mẽ ate mar nẽ axkãm ajamak rom nẽ ri apa kaxyw. Nà ixte hã kagà mã xwỳnhja koja tanhmã amnhĩ to nẽ tokyx mẽ pahwỳr wrỳ.

3Jakamã kwa kêr ka mẽ aprĩ hã kagàja kamã harẽ nẽ ama nẽ hkôt pix mã amnhĩ nhĩpêx nẽ mẽ piitã mẽ kãm kamã harẽnh o ri mẽ hkôt apa. Kot kaj mẽ ã amnhĩ nhĩpêx anẽ nhũm Tĩrtũm ja hã mẽ ato mex ka mẽ akĩnh nẽ apa ho apa. Nẽ mẽ kot mẽ axujarẽnh mar nẽ hkôt amnhĩ nhĩpêx xwỳnhjaja koja Tĩrtũm ja hã mẽ omu nẽ mẽ ho mex nẽ nhũm mẽ apyrà nẽ hkĩnh nẽ pa ho pa.

Juãw kot krĩ pê 7 kôt Jejus kwỳjê hwỳr kagà rẽnh

4E ixpê Juãw kot paj atar pika pê As kamã krĩ pê 7 piitã hkôt mẽ apê Jejus kwỳ hã axpẽn wỳr mẽ apikuprõnh xwỳnhjê hwỳr kagà nẽ kurẽ ka mẽ kamã harẽ nẽ ama. Na pa hte mẽ ato Tĩrtũm wỳr rãhã ho ri ixpa. Nẽ mẽ ato hwỳr o: —Pa Tĩrtũm. Kwa kêr ka pika pê As kamã akrajê ho mex nẽ mẽmoj to mẽ kutã anojarêt rãhã ho apa. Kê mẽ hamakêtkati nẽ àmnhĩx ri pa ho pa. Ja na inhmã hprãm. Anẽ. Tĩrtũmja rãhã ho rãhã. Amnepêm kormã mẽmoj kêt ri nhũm pre ra rãhã ho rãhã. Nẽ koja nhỹrmã mẽmoj akupỹm hapêx par tã nhũm Tĩrtũm aa hapêx kêt kumrêx. Koja arĩ rãhã ho rãhã. Na hte kaxkwa kamã kot mẽ pahto amnhĩptàr ã hkrĩ xà kamã mẽ papytàr rãhã ho hkrĩ. Nẽ Tĩrtũm Karõ te kot Tĩrtũm kot mẽ pahto amnhĩptàr xà hã hkrĩ xà kapem

kanê maati pixi kamã kwrýt pê 7 xãm xwýnhhta pyræk. Na hte Tirtùm nhĩhkô hã hkrĩ ho hkrĩ. Tã kê mẽ ato mex rãhã ho pa.

⁵Nẽ Jejusja na pre hte Tirtùm kapër o mẽ ahkre mex o pa nẽ aa hkaga hkêt nẽ. Tã nhũm prem axtem nẽ kupĩ. Hãmri nhũm Tirtùm akupỹm ho htĩr. Jejus kumrẽx ho htĩr nhũm htĩr o htĩr. Nẽ kêp pika piitã hkôt pahi piitã nhõ Pahihti. Kãm mẽ pajapê htỳx jakamã na pre mẽ panê ty nẽ hkamrôja te mẽ panê hpikapĩr pyræk o amnhĩ nhĩpêx. Nẽ htyk o mẽ pahte amnhĩ tomnuj pãnhã amnhĩre. Jao te mẽ pahte amnhĩ tomnuj pê mẽ papytâr par pyræk o mẽ panhĩpêx.

⁶Nẽ na pre mẽ pahpê patre nẽ mẽ piitã mẽ ho Hipêêxà Tirtùm wỳr o papa kaxyw mẽ paxunhwỳ. Nẽ kêp mẽ panhõ Pahi Maati hã kãm hprãm xà hkôt mẽ pahte kãm tanhmã amnhĩ nhĩpêx to ho papa kaxyw mẽ paxunhwỳ. Jakamã kwa kêr pu mẽ kãm mex o mex nẽ hihtỳx o hihtỳx ã mãn harẽnh rãhã ho papa.

⁷Nẽ koja tokyx akupỹn mẽ pahwỳr kakrã kamã wrỳ pu mẽ pahpiitã wrỳk kãm omu. Nhũm mẽ kot hpĩr xwýnhjaja tee ri amnhĩ wỳr omu. Nẽ pika piitã hkôt ri mẽ pa xwýnhjaja omu nẽ mẽ kot amnhĩ tomnuj jakamã tee ri amnhĩ kukamã hamaxpër o kãm ma htỳx kumrẽx. Hãmri nẽ kãm ma xàj mur nẽ htertet o kuhê. Koja nhỹrmã Jejus akupỹn wrỳ nhũm mẽ amnhĩ wỳr omu nẽ ã amnhĩ nhĩpêx anẽ.

⁸Nẽ Tirtùm na hihtỳx o hihtỳx nẽ àhpumunh o àhpumunh. Nẽ aa kot mẽhõ ni rũm kator kêt. Na hte amnhĩ jarẽnh o: —Ixrãhã ixpa xwýnh na pa. Amnepê mã kormã mẽmoj piitã hkêt ri pa pre ra ixrãhã ri ixpa ho ixpa. Nẽ koja nhỹrmã mẽmoj akupỹm hapêx tã pa arĩ ixrãhãã. Anẽ.

Juãw kot Jejus akupỹm htĩr ã omunh

⁹Nẽ ixpê Jejus kôt mẽ atõ Juãw na pa hte mẽ apyrà nẽ Jejus kôt amnhĩ nhĩpêx nhũm hte mẽ kãm Jejus kurê xwýnhjaja mẽ apyrà nẽ hã inhĩpêx kati ho pa. Mẽ pahte hkôt ri amnhĩ nhĩpêx o papa jakamã na htem hã mẽ pahtomnuj tỳx rãhã ho pa. Tã pu htem ÿ hã mẽ kutã amnhĩ to htỳx nẽ arĩ hkôt amnhĩ nhĩpêx. Jakamã na pa pre Tirtùm kapër o mẽ ajahkre rãhã ho

ri mẽ akôt ixpa. Nẽ Jejus kęp mẽ panhõ Pahihti hã mẽ amã harẽ. Mỳrapê na prem hã ixpynê nẽ man amnẽ ixto tẽ nẽ jar gô hipôk pê Patos kãm inhmẽ pa kamã ixpê prês nẽ ixpa ho ixpa.

¹⁰Tã nhũm tòmĩk pa Tĩrtũm mã amnhĩ jarẽnh o nhỹ. Hãmri nhũm Karõ tanhmã ixkrã hto pa te ixpimtir kãm mẽmoj pumunh pyrã nẽ amnhĩ katut kôt mẽhõ kapër ma. Te kot pifti kakôr tỳx pyrãk pa kuma.

¹¹Hãmri nhũm inhmã kapër nẽ inhmã: —Pa Juãw? E kot paj amã mẽmoj to amnhĩrĩt ka omu nẽ akwỳjê mã hã kagà. Nẽ hã kagà hpa hãmri nẽ ahpỹnhã krĩ hkwỳ hkôt mẽ kęp ixkwỳ hã axpẽn wỳr mẽ pikuprõnh xwỳnhjê hwỳr arẽ. Mẽ kot kamã harẽnh nẽ mar nẽ axkãm hamak rom nẽ ri pa kaxyw. Epes wỳr nẽ Emĩnã hwỳr nẽ Pekamõ hwỳr nẽ Xijaxir wỳr nẽ Satre hwỳr nẽ Pirate hwỳr nẽ Raxisej wỳr. Krĩ pê 7ja piitã hwỳr ixkapër ã kagà nẽ mẽ hwỳr arẽ kê mẽ apyrã nẽ mẽmoj jarẽnhja ma. Anẽ.

¹²Hãmri pa ixte mẽhõja pumunh kaxyw ho ijakẽx nẽ kanê hkwỳ pumu. Kanê kęp 7 nẽ piitã ôr o.

¹³Nẽ kanê nhĩpôk ri mẽhõja te panhĩ pyrã nẽ pahi hã ê mex kãm xa. êja hpar kõn kôt hitep nhũm xa. Nẽ pahi hã mẽ hinô hpre xà ho amnhĩ nhĩnô hpre nẽ xa. Hinô pre xàja ôr pix o.

¹⁴Nẽ hkrã hkĩ te kaxàt nhĩ jaka pyrã nẽ hakaajre. Nẽ no te kuwy hpôk pyrã nẽ hkarỳr tỳx nẽ.

¹⁵Nẽ hpar te mẽmo kàx karỳr tỳx pyrãk. Nẽ kapër te gô hprõt tỳx koko pyrãk.

¹⁶Na pre upôk rũm kanhêti ho 7 nẽ hamỳ nẽ o xa. Nẽ hakwa rũm wapo põm kato nẽ akutã wa gixre nẽ ajêt. Nẽ hkuk kamã hirã htỳx kumrẽx. Te myt kot mẽ pano hã harir nhũm gêk tỳx pyrãk. ã mẽhõja kot anhỳr.

¹⁷Pa tee ri tanhmã kute hã omu nẽ inhmã ma htỳx kumrẽx nẽ umaj tẽm nẽ hpar pê te ixtyk pyrã nẽ nõ. Hãmri nhũm ixtã upôk rũm ãhkraja xi nẽ inhmã kapër nẽ inhmã: —Kwa amã ixpuma hkêt nẽ. Pa na pa. Amnepê mã kormã

měmoj kator kêt ri pa pre raa. Nê ixrãhãã. Koja nhÿrmã mẽmoj akupÿm hapêx pa arĩ ixrãhã ixpa ho ixpa.

18—Na pa pre ty tã akupÿm ixtÿr. Nê ixtÿr o ixtÿr. Kam ixpumu. Kot paj axte ixtyk kêt nê. Ixpê mẽhtykjê hpãm jakamã papxipix na pa hte mẽ htyk ã arĩgro jarê nhũm mẽ hã ty nê ma mẽhtykjê papxà hwÿr ma pa.

19—E kêr ka ate mẽmoj pumunh xwÿnhta pumunh tÿx nê akwÿjê mã hã kagà. Nê mẽmoj kormã kot amnhĩ nhĩpêx kêt nhũm ate omunh mã xwÿnhta ka inhÿ hã mẽ kãm hã kagà. Mẽ kot kamã harênh nê mar tÿx kaxyw.

20—Nê kot paj axte ixprĩ hã ate mẽmoj pumunh xwÿnhta jarê ka inhma. Nà kanê pê 7ta te mẽ kot krĩ hkwÿ pê 7 kamã mẽ kêp ixkwÿ hã axpên wÿr mẽ pikuprõnh xwÿnhjê pyràk. Nê inhĩhkra kamã kanhêti pê 7ta te kêp inhmã mẽ kot mẽ hamãr xwÿnhjê pyràk. Anê.

Apokarip 2

Epes kamã Jejus kwÿjê hwÿr kagà

1Nhũm Jejus arĩ inhmã kapêr nê inhmã: —E kêr ka krĩ pê Epes kamã ixkwÿjê jamãr xwÿnh wÿr kagà nê amê. Nê kagàja kamã mẽ kãm ixkapêr jarê nê mẽ kãm: Pa Epes kamã ixkapêr mar kaxyw axpên wÿr apikuprõnh xwÿnhjaja. Ot pa mẽ awÿr ixpêr mẽ. Ixpê ixupôk o kanhêti ho 7 nê hamÿnh nê ho ixãm xwÿnhta na pa. Nê ixpê ôr o kanê pê 7 nhĩpôk ri ixpa xwÿnhta na pa ã mẽ awÿr ixpêr mẽnh anê.

2Na pa hte tanhmã mẽ ate amnhĩ nhĩpêx to ho apa hã mẽ apumunh mex o ixpa. Na ka htem inhmã amnhĩ nhĩpêx mex nê pa ja hã mẽ apumu. Mẽ kot ixtã mẽ anhĩpêx kati htã ka mẽ kutã amnhĩ to htÿx nê ixkaga hkêt nê. Nê mẽ kot amnhĩ tomnuj xwÿnhjê hkôt amnhĩ nhĩpêx o ri apa hkêt nê. Nhũm ixte mẽ awÿr mẽ rênh ã amnhĩ to hêx xwÿnhjaja mẽ awÿr pan pøj ka mẽ aprĩ hã mẽ kot amnhĩ to hêx ã mẽ omu. Hãmri nê tee ri mẽ kot amnhĩ nhĩpêx ã mẽ omu nê amnhĩ nê mẽ hanor kurê kumrêx. ãm hãmri na ka htem ã mẽ hipêx anê.

³Ně mẽ kām ixkurê xwỳnhjaja kot tanhmã ixtã mẽ atomnuj tỳx to htã ka mẽ kutã amnhĩ to htỳx nẽ aa ixkaga hkêt nẽ. Nẽ ixkôt amnhĩ nhĩpêx mex rãhã ho ri apa. ãm hãmri na ka htem ã amnhĩ nhĩpêx anhỹr o ri apa.

⁴ãm mẽmoj pixi na ixpê omnuj. Amnepê mã kormã mẽ ate ixkôt amnhĩ xunhwỳr nyw ri na ka prem amã axpẽn kĩnh nẽ axpẽn to mex o ri apa. Nẽ mẽ amã axpẽn tã ma ho te mẽ amã amnhĩ tã ma pyràk o axpẽn nhĩpêx. Tã tanhmã ajamaxpêr to nẽ axte ã axpẽn nhĩpêx anhỹr kêt nẽ. Jao te mẽ amã ixkĩnh kêt pyràk o amnhĩ nhĩpêx. Pa tee ri ja hã mẽ apumu nhũm ja inhmã mex kêt nẽ.

⁵Kwa mẽ tokyx ja hã amnhĩ pumu nẽ akupỹm mẽ ate ixkôt amnhĩ xunhwỳr nyw ri mẽ ate axpẽn nhĩpêxta o akupỹm axpẽn nhĩpêx o apa. Kot kaj mẽ anhỹr kêt kot paj te mẽ apê mẽ anhõ kanê hpyr nẽ kapôt ã mẽnh pyràk o mẽ anhĩpêx ka mẽ ri apa nẽ gaa nẽ apikaprãr pa. Tã mẽhõ koja mẽ amỳr pê mẽ anhõ krĩ kamã mẽ kãm ijarẽnh o pa?

⁶Ně mẽ kêp Nikoraw nhõ xwỳnhjaja na ka htem mẽ kot tanhmã amnhĩ tomnuj to hã mẽ omu nẽ ixpyrà nẽ apê ja hprãm nõkati nẽ mẽ hkôt ri amnhĩ nhĩpêx kêt nẽ. Pa ja hã mẽ apumu nẽ ixkĩnh nẽ.

⁷Tã ixte mẽ amã ixkapêr jatur xà na ja. Kot kaj mẽ amã ixkapêr mar prãm hã kot kaj mẽ ã Tĩrtũm mẽ wa Ixkarõ nhỹ hã ixte mẽ amã ixkapêr anhỹrja ma nẽ kãm ajamaxpêr tỳx rãhã ho ri apa. Tĩrtũm nhõ krĩ kamã mẽmo pĩ hpàr kuhê xwỳnh. Mẽ kot ô hkur nẽ axte htyk kêt nẽ pa ho pa mã xwỳnhta. Kot kaj mẽ ate amnhĩ tomnuj nê amnhĩ to htỳx nẽ arĩ inhmã hprãm xà hkôt amnhĩ nhĩpêx rãhã ty pa akupỹm mẽ ato mẽ atĩr nẽ ma pĩ hpàrta wỳr mẽ arẽ. Ka mẽ ma hwỳr mra nẽ ô hõ hta nẽ akre nẽ axte atyk kêt kumrêx nẽ apa ho apa. E ãm ja pix na hapêx. Anẽ. —E Juãw. Kêr ka Epes kamã ixkwỳjê jamãr o pa xwỳnhta wỳr ã ixkapêr ã kagà anẽ nẽ mẽ hwỳr amẽ. Anẽ. Hãmri pa kuma nẽ ô ri mẽ kãm hã kagà hpa.

Emĩnã kamã Jejus kwỳjê hwỳr kagà

⁸Hãmri nhũm hpãnhã Emĩnã nhõ xwỳnhjê kaxyw inhmã kapêr nẽ inhmã: —Nẽ hpãnhã Emĩnã kamã ixkwỳjê jamãr xwỳnh wỳr kagà nẽ mẽ hwỳr amẽ.

Ně mẽ kãm ixkapěr jarě ně mẽ mẽ kãm: Pa Emĩnã kamã ixkapěr mar kaxyw axpẽn wỳr mẽ apikuprõnh xwỳnhjaja. Ot pa mẽ awỳr ixpěr mẽ. Ixrãhã ho ixrãhã ixpa xwỳnhhta na pa. Amnepêm kormã mẽmoj piitã hkêt ri na pa pre ixrãhã ně ri ixpa. Kojã nhỹrmã mẽmoj akupỹm hapêx pa arĩ ixrãhã ho ixrãhã ně ri ixpa. Na pa pre ty no ãm akupỹm ixtĩr o ixtĩr. Tã pa ã mẽ awỳr ixpěr mẽnh aně.

⁹Nà na pa hte mẽ ate tanhmã amnhĩ nhĩpêx to ho apa hã mẽ apumunh rãhã ho ixpa. Na hte mẽ kãm ixkurê xwỳnhjaja ixtã mẽ atomnuj to ka mẽ apê amrakati ně ri apa. Nom mẽ ate tãm amnhĩ nhĩpêx jakamã te mẽ apê mẽ hikukrêx rũnh kumrêx xwỳnhjê kot amnhĩ nhĩpêx pyrã ně ixkukwak ri akĩnh rãhã ri apa. Na hte mẽ kêp Ijaew ã amnhĩ to hêx xwỳnhjaja mẽ ato kapěr punuj rũnh o pa. Mě kot Tĩrtũm kôt amnhĩ nhĩpêx ã amnhĩ jarênh tã no ãm hkôt amnhĩ nhĩpêx kêt ně. ãm Satanasti kôt pix mã na htem amnhĩ nhĩpêx o pa.

¹⁰Tã mẽ kãm ixkurê xwỳnhjaja kot ixtã mẽ atomnuj tỳx o pa htã kêr ka mẽ amnhĩ tã mẽ omu ně tee ri amnhĩ kukamã ajamaxpěr kêt ně. Ně arĩ mẽ kutã amnhĩ to htỳx ně. Kojã Satanasti mẽ akwỳjê pynê ně mẽ ajagjê. Hãmri ně mẽ ate ixkaga hprãm xàj tanhmã mẽ anhĩpêx kati hto ka mẽ hagjênh xà kamã amnhĩ xà htỳx kamã ajamak o atã arĩgro pê 10. Nom kêr ka mẽ kutã amnhĩ to htỳx ně ixkaga hkêt ně. Mě kot mẽ apar mã tã ka mẽ kutã amnhĩ to htỳx ně. Kot kaj mẽ aa ixkaga hkêt ně ixkôt ri amnhĩ nhĩpêx rãhã ty pa akupỹm mẽ ato mẽ atĩr ně ma amnhĩ wỳr mẽ ato api. Hãmri ka mẽ Tĩrtũm mẽ wa ixri amex ně atĩr tũm ně apa ho apa ně axte atyk kêt ně apa.

¹¹E ixkrajaja. Kot kaj mẽ amã ixkapěr mar prãm hã kot kaj mẽ ã Tĩrtũm mẽ wa Ixkarõ nhỹ hã ixte mẽ amã ixkapěrja anhỹr ma ně kãm ajamaxpěr tỳx rãhã ho ri apa. Kot kaj mẽ ate amnhĩ tomnuj nê amnhĩ to htỳx ně inhmã hprãm xà hkôt pix mã amnhĩ nhĩpêx rãhã ty. Hã kot paj akupỹm mẽ ato mẽ atĩr ka mẽ ma kuwyta wỳr apa hkêt ně. E. ãm ja pix. Na hapêx. Aně. —E Juãw. Kêr ka Emĩnã kamã ã ixkrajê mã ixkapěr ã kagà aně. Aně. Hãmri pa kuma ně ô ri mẽ kãm hã kagà.

Pekamō kamā Jejus kwỳjê hwỳr kagà

Sikūn Korīṯ 6.14–7.1

12Nhūm Jejus arī inhmā kapēr nē hpānhā inhmā: —E hpānhā Pekamō kamā ixkrajê jamār o pa xwỳnhja wỳr kagà nē mẽ hwỳr amē. Nē mẽ kām ixkapēr jarē nē mẽ kām: Pa Pekamō kamā ixkapēr mar kaxyw axpēn wỳr mẽ apikuprōnh xwỳnhjaja. Ot pa mẽ awỳr ixpēr mẽ. Ixpê ijakwa rūm pōm wapo akutā wa gix nē kator nē ãm xwỳnhhta na pa mẽ awỳr ixpēr mẽ.

13Na pa hte mẽ anhō krī nhō xwỳnhjaja kot tanhmā amnhī tomnuj to ho pa hā mẽ omunh mex nē. Mē kot Satanasti kōt pix mā ri amnhī nhīpêx o pa jakamā mẽ anhō krī te kêp Satanasti nhō krī pyrāk. ãxipas kot mẽ hkōt mẽ kām ixkapēr o mẽ ahkre ho pa nē aa hkaga hkêt tā nhūm prem axtem nē ixtā kupī. Ka mẽ ja hā mẽ omunh tā mẽ umaj ixkaga hkêt nē arī ixkōt amnhī nhīpêx rāhā ho ri apa. ãm hāmri na ka htem ã amnhī nhīpêx anē.

14Měmoj pixi na ixpê omnuj. Na hte mẽ akwỳjaja axtem nē Paraāw kapēr kōt amnhī nhīpêx o pa. Na pre Paraāwja Parak mā tanhmā kapēr to nhūm kuma nē amnhī xō ri tanhmā mẽ anhīgêt mā kapēr to ho pa. Nom ixkapēr kōt kêt ixkapēr kuhpa hā tanhmā mẽ kām kapēr to nē mẽ kām: “Mě māmri ma sānti hā mẽ hkīnh mā xwỳnhjê hkōt mra nē sānti hā apku nē hā akīnh. Nē mẽ urāk nē axpēn pē axpēn prō ho amnhīkati nē axpēn pē ri axpēn mjên o amnhīkati nē mẽ ã ri amnhī nhīpêx anhỳr o ri apa. Ja mex kēnā.” Anhỳr o mẽ anhīgêt mā kapēr o pa nhūm mẽ kuma nē mẽ hkōt amnhī nhīpêx. Tā ka mẽ akwỳjaja mẽ urāk nē ã amnhī nhīpêx anhỳr o apa. Kwa ja mex kêt.

15Na hte mẽ akwỳjaja Nikorawjê kapēr kōt ixkapēr kuhpa hā tanhmā amnhī nhīpêx to ho pa. Ja määnēn mex kêt.

16Tā ra mẽ akwỳjaja ã amnhī tomnuj anhỳr o pa ka mẽ ja hā mẽ omu nē ãm mẽ omu nē nē tanhmā mẽ kām akapēr to hkêt nē. Kwa mẽ ate ã amnhī nhīpêx anhỳr xwỳnhjaja. Kêr ka mẽ tokyx ja kaga nē akupỹm ixkōt ri amnhī nhīpêx mex nē. Kot kaj mẽ anhỳr kêt kot paj tokyx mẽ awỳr wrỳ nē te ijakwa rūm pōm wapo kator xwỳnhhta o mẽ hkanhwỳr pyrāk o mẽ anhīpêx. Nom ixkapēr xihtỳx pix o tanhmā mẽ anhīpêx to.

¹⁷E kot kaj mẽ amã ixkapër mar prãm hã kot kaj mẽ ã Tĩrtũm mẽ wa Ixkarõ nhỹ hã ixte mẽ amã ixkapër anhỹrja ma nẽ kãm ajamaxpër tỳx rãhã ho ri apa. Nẽ kot kaj mẽ ate amnhĩ tomnuj nẽ amnhĩ to htỳx nẽ inhmã hprãm xà hkõt amnhĩ nhĩpêx rãhã ty. Hã kot paj akupỹm mẽ ato mẽ atĩr hãmri nẽ ra pam mẽ amã mẽ anhõ ka mẽ hkur o apa. Te amnepêm Ijaew kapõt ã pa nhũm ixte mẽ hwỳr “manã” anhỹr xwỳnhta rẽn h nhũm mẽ kot hkur o pata pyræk. Nom ixte mẽ amã mẽ anhõja na hpimxur. ãm papxpix na pa hte mẽ kãm õr o ixpa. Nẽ kot paj mẽ atã mẽ anhĩxi nyw rẽ. Jao kẽn jakare hkwỳ hã ahpỹnhã mẽ anhĩxi nyw jaxwỳ nẽ mẽ amã kugõ. Ka mẽ hamỳ nẽ kapxpix amnhĩ nhĩxi nyw pumunh o apa. E ãm ja pix. Na hapêx. Anẽ. —E Juãw. Kêr ka Pekamõ kamã ixkrajê hwỳr ã ixkapër anhỹr ã kagà nẽ mẽ hwỳr amẽ. Anẽ. Hãmri pa kuma nẽ ô ri mẽ kãm hã kagà.

Xijaxir kamã Jejus kwỳjê hwỳr kagà

Jutre 3-23

¹⁸Nhũm Jejus arĩ inhmã kapër nẽ inhmã: —E hpãnhã Xijaxir kamã ixkwỳjê jamãr xwỳnh wỳr kagà nẽ amẽ nẽ mẽ kãm ixkapër jarẽ nẽ mẽ kãm: Pa Xijaxir kamã ixkapër mar kaxyw mẽ apikuprõnh xwỳnhjaja. E ot pa mẽ awỳr ixpër mẽ. Ixpê Tĩrtũm Kra na pa. Ixpê inhno te kot kuwy hpøk karỳr tỳx pyræk xwỳnhta na pa. Nẽ ixpê ixpar te kot kàx karỳr tỳx pyræk xwỳnhta na pa mẽ awỳr ixpër mẽ.

¹⁹Na pa hte mẽ ate amnhĩ nhĩpêx kõt mẽ apumunh mex o ri ixpa. Na ka htem amnhĩ kaxyw inhmã ajamaxpër pẽ inhmã amnhĩ to mex o ri apa. Mẽ akwỳ kot ixtã tanhmã mẽ anhĩpêx to htã ka mẽ umaj aa ixkaga hkêt nẽ. Nẽ arĩ amã ixkĩnh tỳx kãm tanhmã amnhĩ nhĩpêx to ho ri apa. Nẽ axpẽn to mex nẽ ixkõt pix mã amnhĩ nhĩpêx o ri apa. Jao ra ixkõt amnhĩ nhĩpêx mex o wam mẽ ate ixkõt amnhĩ nhĩpêxta jakre. Nà ja inhmã mex kumrẽx.

²⁰ãm mẽmoj pixi na ixpê omnuj. Mẽ akõt niti ri pa xwỳnh Jejapewtita. Kêp Tĩrtũm nhỹ hã kapër jarẽn h o pa xwỳnh ã amnhĩ to hêx xwỳnhhtita. Na hte ixkapër kupa hã tanhmã mẽ ajahkre hto ka htem ama nẽ nẽ tanhmã kãm nẽ hkêt nẽ. Na hte mẽ amã: “Xê mẽ mãmri ri mẽ hkuprỳjê hwỳr mra nẽ mẽ ho amnhĩkati. Nẽ axpẽn pẽ mẽ aprõ nẽ mẽ amjên o amnhĩkati. Nẽ mẽ kot sãnti

hã mẽ hkĩnh nẽ hã apkur xwỳnhjê hkôt mra nẽ mẽ hkôt amnhĩ nhĩpêx. Tĩrtũm kãm ja mex kênã.” Anhỹr o mẽ amã kapêr o pa. Nẽ inhmã ja mex ã ijarẽ nom inhmã ja mex kêt. Tã ra mẽ akwỳjaja kapêr ma nẽ hkôt amnhĩ nhĩpêx ka mẽ ja hã mẽ omunh tã amnhĩ nê nitita janor kêt nẽ nhũm arĩ ri mẽ amã hêx o ri mẽ akôt pa.

²¹Ra kot ã amnhĩ nhĩpêx anhỹr o mẽ akôt pa ry rax kumrêx tã pa kormã ja hã tanhmã ho hkêt nẽ kormã amnhĩ tã hamã. Kot ã amnhĩ nhĩpêx anhỹr kaga kaxyw na pa kormã hamãr o ri ixpa. No nhũm aa hkaga hkêt nẽ.

²²Mỳrapê kot paj tokyx tanhmã ho nhũm amnhĩ xà htỳx kamã hamak o hikwỹ. Tã mẽ kot kapêr mar nẽ hkôt amnhĩ nhĩpêx xwỳnhjaja kot amnhĩ tomnuj ã amnhĩ pumu nẽ hkaga hkêt hã kot paj mã mẽ ho anẽ nẽ. Mããnẽn tanhmã mẽ homnuj to nhũm mẽ nitita pyrã nẽ amnhĩ xà htỳx kamã hamak o hikwỹ.

²³Nẽ nitita kot paj kêp hkrajê nhĩmex pa. Ka mẽ apê ixkrajaja ja hã ixpumu nẽ ixte mẽ apiitã ahpỹnhã tanhmã mẽ ajamaxpêr to hkôt mẽ apumunh ã ixpumu. Nẽ ixte ahpỹnhã mẽ apiitã tanhmã mẽ ate amnhĩ nhĩpêx to ho apa hã mẽ apumunh xà hkôt tanhmã mẽ anhĩpêx to hã ixpumu.

²⁴Na hte mẽ akwỳjaja akwỳjê rom nita kapêr ma nẽ ãm kuma nẽ hkôt amnhĩ nhĩpêx kêt nẽ. Nẽ mẽ kapêrja mẽ kot kãm: “Satanasti kapêr pimxur” anhỹr xwỳnhhta kôt nhũm mẽ amnhĩ nhĩpêx kêt nẽ. Na htem ixkôt pix mã amnhĩ nhĩpêx mex o ri pa. Tã ã mẽ ate ixkôt amnhĩ nhĩpêx anhỹr o apa xwỳnhjaja kot paj mẽ amã ja pix ã karõ ka mẽ inhma.

²⁵Kêr ka mẽ arĩ ixkôt pix mã amnhĩ nhĩpêx o ri apa rãhã pa akupỹn mẽ awỳr wrỳ. ãm ja pix ã kot paj mẽ amã karõ.

²⁶Nẽ kot kaj mẽ ate amnhĩ tomnuj nê amnhĩ to htỳx nẽ arĩ inhmã hprãm xà hkôt amnhĩ nhĩpêx rãhã ty. Hãmri pa ja hã mẽ apumu nẽ nhỹrmã mẽ ate krĩ hkwỳ hkôt mẽ pa xwỳnhjê ho amnhĩptàr o apa kaxyw mẽ axunhwỳ. Ka mẽ apê mẽ õ pahĩti nẽ inhmã mẽ ho amnhĩptàr o ri apa.

²⁷Na pre Inhĩpêxà ixte pika piitã hkôt ri mẽ pa xwỳnhjê ho amnhĩptàr kaxyw ixãm. Tã kot paj nhỹrmã amnhĩ pyrà nẽ mẽ kaxyw mẽ axunhwỳ ka mẽ inhmã mẽ hamãr o apa. Nhũm mễhõ ixkapêr kwỳm ri tanhmã amnhĩ nhĩpêx to ka mẽ ja hã omu nẽ hã tanhmã ho. Te mẽ kot poti punuj mỳnh nẽ mễnh nẽ hkrakrak pyràk.

²⁸Kot paj ã mẽ ate mẽ hipêx anhỹr o apa kaxyw mẽ axunhwỳ. No ãm ja pix kêt. Kot paj te ixte mẽ amã kanhêti hõ nhõr pyràk o mẽ anhĩpêx. Arĩgro hkôt kanhêti no hpôk rax japôx xwỳnhhta kot paj te ixte mẽ amã õr pyràk ka mẽ ixri atĩr tũm nẽ apa ho apa.

²⁹E ixkrajaja. Kot kaj mẽ amã ixkapêr mar prãm hã kot kaj mẽ ã Tĩrtũm mẽ wa Ixkarõ nhỹ hã ixte mẽ amã ixkapêr anhỹrja ma nẽ kãm ajamaxpêr tỳx rãhã ho ri apa. Anẽ. —E Juãw. Kêr ka ã Xijaxir kamã ixkrajê kaxyw ixkapêr ã kagà nẽ mẽ hwỳr mễnh anẽ. Anẽ. Hãmri pa kuma nẽ ô ri mẽ kãm hipêx nẽ mẽ hwỳr kumẽ.

Apokarip 3

Satre kamã Jejus kwỳjê hwỳr kagà

Rukre 12.35-40

¹Nhũm Jejus arĩ inhmã kapêr nẽ inhmã: —E hpãnhã Satre kamã ixkwỳjê jamãr xwỳnh wỳr kagà nẽ mẽ kãm ixkapêr jarẽ nẽ mẽ kãm: Pa Satre kamã ixkrajaja. E ot pa mẽ awỳr ixpêr mẽ. Ixpê inhĩhkra ho kanhêti pê 7 jamỳnh nẽ xãm xwỳnhhta na pa. Nẽ ixpê inhĩhkra ho Tĩrtũm Karõ ãm pyxi htã te kamã kêp 7 jamỳnh nẽ ho ixãm xwỳnhhta na pa mẽ amã ixkapêr. Na pa hte mẽ ate tanhmã ri amnhĩ nhĩpêx to hã mẽ apumunh rãhã ho ixpa. Mễ piitã kot axpẽn mã mẽ ate ixkôt amnhĩ nhĩpêx ã mẽ ajarênh tã ã mẽ ate amnhĩ nhĩpêx anhỹr kêt. Na ka htem ixkuhpa hã pix mã amnhĩ nhĩpêx o apa. Jakamã te inhmã ra mẽ atyk nẽ mẽ anhĩkwỹ pyràk.

²Na ka htem ãm akrành mã ixkôt ri amnhĩ nhĩpêx nom Tĩrtũm mẽ wa ixkôt amnhĩ nhĩpêx mex kêt nẽ. Ra Tĩrtũm mẽ wa ixte ja hã mẽ apumunh mex. Mễ ate kormã wa inhnoo mã tãm ri amnhĩ nhĩpêx kêt jakamã kwa mẽ tokyx

ja hã amnhĩ pumu nẽ ate amnhĩ tomnuj mã anhũre nẽ wa ixkõt amnhĩ xunhwỳr tỳx nẽ.

³Kêr ka mẽ amnepê mã kormã mẽ ate ixkõt amnhĩ nhĩpêx nyw ri mẽ kot ixkapêr o tanhmã mẽ ajahkre htoja mã ajamaxpêr nẽ amnhĩ tomnuj mã anhũre. Nẽ ixkapêr kõt pix mã mãn amnhĩ nhĩpêx o ri apa. Kot kaj mẽ anhỹr kêt kot paj nhỹrmã mẽ ajaêr pê akupỹn mẽ awỳr wrỳ nẽ ja hã tanhmã mẽ ato.

⁴ãm mẽ agrêre nẽ amã ixkõt amnhĩ nhĩpêx prãm. Jao tãm ri amnhĩ nhĩpêx nẽ mẽ kot amnhĩ tomnuj xwỳnhjê hkõt amnhĩ nhĩpêx kêt nẽ. Te mẽ axê jakare kamã apa nẽ tanhmã amnhĩ pê htyk to hkêt pyræk. Tã kot kaj mẽ nhỹrmã ixri mẽ axê jakare kamã apa ho apa. Ra mẽ ate ja ho anhỹr mã tãm kênã. Ja na Tĩrtũm kãm hprãm.

⁵Nẽ krĩ piitã hkõt mẽ ate amnhĩ tomnuj nê amnhĩ to htỳx nẽ inhmã hprãm xà hkõt amnhĩ nhĩpêx rãhã atyk xwỳnh piitã kot ka mẽ nhỹrmã Tĩrtũm mẽ wa ixri amex nẽ atĩr tũm nẽ apa ho apa. Ra mẽ hixija Mẽpahpãm Maati nhõ kagàja kamã na. Kamã mẽ atĩr o mẽ atĩr mã xwỳnhjê nhĩxi piitã hã kagà. Kot paj kagàta kamã aa mẽ anhĩxi grành kêt nẽ. Hãmri nẽ Inhipeêxà mẽ kapêr o mẽ wrỳk xwỳnhjê mã mẽ ajarẽnh o: “E mẽ jajê pumu. Ixkwỳ na mẽ.” Anhỹr o mẽ kãm mẽ ajarẽ.

⁶E ixkwỳjaja. Kot kaj mẽ amã ixkapêr mar prãm hã kot kaj mẽ ã Tĩrtũm mẽ wa Ixkarõ nhỹ hã ixte mẽ amã ixkapêr anhỹrja ma nẽ kãm ajamaxpêr tỳx rãhã ho ri apa. Tã ãm ja pix. Na hapêx. Anẽ. —E Juãw. Kêr ka ã Satrejê mã ixkapêr ã kagà nẽ mẽ hwỳr mẽnh anẽ. Anẽ. Hãmri pa kuma nẽ ô ri mẽ kãm hã kagà.

Pirate kamã Jesus kwỳjê hwỳr kagà

Wam Tesarõn 2.13-16

⁷Nhũm Jesus arĩ inhmã kapêr nẽ inhmã: —E hpãnhã Pirate kamã ixkwỳjê jamãr xwỳnh hwỳr kagà nhĩpêx nẽ amẽ nẽ mẽ kãm ixkapêr jarẽ nẽ mẽ kãm kãm: Pa Pirate kamã mẽ ate ixkapêr mar kaxyw mẽ apikuprõnh xwỳnhjaja. E ot pa mẽ awỳr ixpêr mẽ. Inhmex o inhmex xwỳnh na pa. Aa ixêx kêt nẽ

ixpa xwỳnh. Amnepê mã na pre mēhōja pahi Tawi mã ōrkwỹ mex ã saf jamār o pa. Tã pa hte uràk nē Inhĩpêêxà Tĩrtũm nhõ krĩ hwỳr mē gjêx xà hã saf jamỳ nē ho ixpa. Ām papxipix inhõ saf jakamã papxipix na pa hte mē ate ixkõt amnhĩ xunhwỳr xwỳnhjaja mē agjêx kaxyw mē amã kahê xà rē nē ixkra hkêt xwỳnhjê pê kahê. Kot paj mē apê ixkrajê mã kahê xà rē ka mē hwỳr agjê. Hãmri pa mē atã kahê nhũm ixkra hkêt xwỳnhjaja tee ri kãm mē akõt gjêx prãm kaprỳ.

⁸Na pa hte tanhmã mē ate amnhĩ nhĩpêx to ho apa hã mē apumunh mex o ri ixpa. Mē agrêre htã na ka htem ixkapêr kõt amnhĩ nhĩpêx mex nē aa ixkaga hkêt nē. Jakamã kot paj te ixte mē amã Tĩrtũm nhõ hakwakre kahê xà mēnh pyràk o mē anhĩpêx ka mē axàmnhĩx ajamakêtkati nē ma mē kãm Tĩrtũm kapêr o mē ahkre ho ri mē hkõt apa. Nhũm mē hkwỳjaja tee ri ã mē ate amnhĩ nhĩpêx anhỹrja nê mē amã kapêr kaprỳ ka mē arĩ ho mē ahkre ho ri mē hkõt apa.

⁹Nē mē anhõ krĩ kamã mē akwỳjaja na prem ra Satanasti hkõt amnhĩ xunhwỳ nē hêx rom mē amã amnhĩ to hêx nē mē amã: “E mē ixpê Ijaew mex jakamã kwa mē ixkapêr ma nē mē ixkõt amnhĩ nhĩpêx.” Anhỹr o mē amã karõ htã no ãm mē kot Satanasti hkõt amnhĩ nhĩpêx xwỳnh na mē. Tã kot paj nhỹrmã tanhmã mē homnuj to nhũm mē tee ri amnhĩ pumu nē akupỹm mē awỳr mra nē mē akutã hkõnkrã ho rôròk nē hkrĩ nē mē amã: “Nà mē kajaja na ka pêr mē ixrom Jejus kõt amnhĩ nhĩpêx. Mãn kãm mē ajapêê.” Anē.

¹⁰Mē kot ixtã mē atomnuj tỳx nhũm mē ate amnhĩ xà htỳx kamã ajamak tã aa mē umaj ixkaga hkêt nē. Nē arĩ ixte mē amã mēmoj tã karõ xà hkõt mē kutã amnhĩ to htỳx rãhã arĩ ixkõt ri amnhĩ nhĩpêx o apa. Jakamã mē kot nhỹrmã mē kãm ixkurê xwỳnhjaja pika piitã hkõt tanhmã mē homnuj tỳx to nhũm mē amnhĩ xà htỳx kamã ama. Tã kot paj mē anê mē omunh mex nē nhũm mē tanhmã mē ato hkêt nē ka mē amex nē ri apa ho apa.

¹¹E kot paj tokyx akupỹn mē awỳr wrỳ nē mē ate ixkõt pix mã amnhĩ nhĩpêx ã mē ato mex rax kumrêx. Jakamã kwa mē mãmri ã amnhĩ nhĩpêx anhỹr o

inhmã hprãm xà hkôt pix mã amnhĩ nhĩpêx rãhã ty. Kot ka mẽ anhỹr kêt kot pa mẽ amã mẽmoj mex nhõr kêt nẽ.

¹²Nẽ kot kaj mẽ kot amnhĩ tomnuj xwỳnhjê kutã amnhĩ to htỳx nẽ inhmã hprãm xà hkôt pix mã amnhĩ nhĩpêx rãhã ty. Hã kot paj amnhĩ kôt mẽ ato mẽ axihtỳx nẽ ka mẽ aa ixkaga hkêt nẽ. Nẽ kot paj nhỹhỹnh mẽ atã mẽ inhĩxi ho axkrunêpxi nẽ haxwỳ. Inhĩpêxà nhĩxi nẽ inhĩxi nyw nẽ Inhĩpêxà nhõ krĩ nhĩxija kot paj nhỹhỹnh mẽ atã haxwỳ. Tĩrtũm nhõ krĩ mẽ kot kãm: “Jerujarẽ nyw” anhỹr xwỳnhta koja nhỹrmã tanhmã amnhĩ to nẽ ra kaxkwa rũm pika wỳr wỳr.

¹³E ixkwỳjaja. Kot kaj mẽ amã ixkapêr mar prãm hã kot kaj mẽ ã Tĩrtũm mẽ wa Ixkarõ nhỹ hã ixte mẽ amã ixkapêr anhỹrja ma nẽ kãm ajamaxpêr tỳx rãhã ho ri apa. Tã ãm ja pix. Na ra hapêx. Anẽ. —E Juãw. Kêr ka ã Pirate kamã ixkrajê mã ixkapêr ã kagà anẽ. Anẽ. Hãmri pa kuma nẽ ô ri mẽ kãm hã kagà.

Raxisej kamã Jejus kwỳjê hwỳr kagà

¹⁴Nhũm pre Jejus arĩ inhmã kapêr nẽ inhmã: —E hpãnhã krĩ pê Raxisej kamã ixkrajê jamãr xwỳnh wỳr kagà nhĩpêx nẽ amẽ. Nẽ mẽ kãm ixkapêr jarênh o: Pa Raxisej kamã ixkrajaja. Ot pa mẽ awỳr ixpêr mẽ. ãm hãmri ixkapêr o ixpa nẽ aa ixêx kêt xwỳnhta na pa. Jakamã ãm hãmri na pa hte Tĩrtũm kapêr o mẽ ajahkre o ixpa nẽ aa ja kaga hkêt nẽ. Pa na ixpê mẽmoj piitã hpàr krax.

¹⁵⁻¹⁶Na pa hte mẽ ate tanhmã amnhĩ nhĩpêx to ho apa hã mẽ apumunh rãhã ho ixpa. Kop apu mẽ ate ixkôt amnhĩ nhĩpêx mex ronhỹx pa ja hã mẽ apumu nẽ ixkĩnh nẽ. Nom mẽ ate ã amnhĩ nhĩpêx anhỹr kêt. No mããnẽn aa ixkaga hkêt nẽ. Na ka htem ri atỳx amnhĩ krã hkôt pix mã tanhmã amnhĩ nhĩpêx to ho apa nhũm ja ixpê omnuj nẽ. Kot kaj mẽ arĩ ã amnhĩ nhĩpêx anhỹr o apa pa hpãnhã amnhĩ nê mẽ akurê. Te mẽ kot gô xenh nõkati janhir nẽ tee hkakinh nẽ akupỹm hkapĩr pyràk.

17Mě ate inhmã hprãm xà hkôt amnhĩ nhĩpêx ã amnhĩ jarênh tã ã amnhĩ nhĩpêx anhÿr kêt nê. Nê ixkapêr mar tÿx nê amnhĩ kaxyw inhmã ajamaxpêr mex kêt nê.

18Kwa mẽ tokyx ja hã amnhĩ pumu nê akupÿm ixkôt amnhĩ xunhwÿr tÿx nê. Kêr pa ja hã mẽ apumu nê amnhĩ katut kôt mẽ ate amnhĩ tomnuj rê nê tanhmã mẽ akrã hto ka mẽ inhnoo mã tãm amnhĩ nhĩpêx mex o ri apa. Hãmri pa mẽ amã tanhmã amnhĩ to amnhĩrît to ka mẽ aprĩ hã ixte amnhĩ nhĩpêx ã ixpumunh mex nê ixkôt amnhĩ nhĩpêx mex rãhã o ri apa.

19Xà inhmã mẽ ajapê hkêt ã na pa ã mẽ amã ixkapêr anê? Nà inhmã mẽ apiitã mẽ ajapê htÿx kênã. Nom inhmã mẽ ajapê htã ka htem ixkôt amnhĩ nhĩpêx kêt nê. Na pa tee ri amnhĩ tã mẽ apumu nê ja hã tanhmã mẽ atomnuj tÿx to. Tokyx mẽ ate amnhĩ tomnuj mã anhÿrer nê hpãnhã tãm amnhĩ nhĩpêx kaxyw. Jakamã kwa mẽ tokyx ate amnhĩ tomnuj kaga nê akupÿm amnhĩ kaxyw inhmã ajamaxpêr ho ri apa.

20Na htem hkwyjê nhõrkwÿ hwÿr gjêx kaxyw hakwa krem kãm àkjêr o kuhê nhũm mẽ kuma nê mẽ kãm anê nhũm mẽ hwÿr agjê. Nê mẽ ixkre hkre kamã axpên mã kapêr o hkrĩ rÿ axpên mã kapêr pê mẽmoj to hkôm o hkrĩ. Ja pyrà nê ot pa mẽ ajamãr o ixpa. Mẽ ate inhmã anhÿr nhũm ixte mẽ akôt ixpa ho ixpa nhũm mẽ pahte axpên to mex o papa kaxyw.

21Kormã mẽ kot ixpĩr kêt ri na pa pre mẽ kot amnhĩ tomnuj xwÿnhjê kutã amnhĩ to htÿx o ixpa. Amnhĩ to htÿx nê ri ixpa kamã ixtyk jakamã nhũm Inhĩpêxà akupÿm ixto ixtĩr nê akupÿm amnhĩ wÿr ixto api. Hãmri nê amnhĩ nhĩhkô hã mẽ ho amnhĩptàr ã hkrĩ xà kamã inhÿr pa ixkrĩ ho ixkrĩ nê ìhkô hã mẽ piitã mẽ ho amnhĩptàr o ixkrĩ. Tã kot kaj mẽ atõ ixpyrà nê ate amnhĩ tomnuj nê amnhĩ to htÿx nê. Nê inhmã hprãm xà hkôt pix mã amnhĩ nhĩpêx rãhã ty. Hã kot paj amnhĩ pyrà nê wa ixte mẽ ato amnhĩptàr ã ixkrĩ xàja kamã amnhĩ nhĩhkô hã mẽ akrĩ ka mẽ wa inhĩhkô hã wa inhmã mẽ ho amnhĩptàr o akrĩ.

22E ixkwÿjaja. Kot kaj mẽ amã ixkapêr mar prãm hã kot kaj mẽ ã Tĩrtũm mẽ wa Ixkarõ nhÿ hã ixte mẽ amã ixkapêr anhÿrja ma nê kãm ajamaxpêr tÿx

rãhã ho ri apa. Tã ãm ja pix. Na hapêx. Anê. —E Juãw. Kêr ka Raxisej kamã ixkrajê mã ixkapêr ã kagà nê mẽ hwÿr amê. Nê kagàja piitã krĩ hkwÿ kamã ahpÿnhã ixkwÿjê hwÿr arê kê mẽ kamã harê nê ixkapêr ma. Anê. Nhũm pre ã Jejus inhmã kapêr anê. Pa kuma nê ô ri mẽ piitã mẽ kãm hã kagà hpa.

Apokarip 4

Tĩrtũm kot mẽ ho amnhĩptàr ã hkrĩ xà jarênh

¹Tã pa axte mẽmoj pumu nhũm kaxkwa hwÿr mẽ gjêx xà hã hakwakreja amnhĩ kahê xà mẽ pa omu. Hãmri nhũm axte mẽhõ kapêr tÿx xwÿnhhta. Te kot pifti kakôr tÿx pyràk xwÿnhhta axte inhmã kapêr nê inhmã: —E amnê ixwÿr api pa mẽmoj nhÿrmã kot tanhmã amnhĩ nhĩpêx to hkukamã amã ho amnhĩrĩt ka omu. Anê.

²Hãmri nhũm Tĩrtũm Karõ tanhmã ixto nê ixto api pa kaxkwa kamã mẽmoj pumunh o xa. Tĩrtũm kot mẽ ho amnhĩptàr ã hkrĩ xà maatita pa pre omu. Nhũm kamã mẽhõja nhÿ.

³Kuk kamã hirã htÿx kumrêx. Te mẽmo kên kamrêk karÿr jaxênh tÿx pyràk. Nê kot mẽ ho amnhĩptàr ã hkrĩ xà puhã màxwÿxti grãgrãreja kãm hipòk nê harir pa omunh o xa.

⁴Nhũm hkrĩ xà maati puhã mẽ ho amnhĩptàr o hkrĩ xà kêp 24. Kamã mẽ àptàr tũmjaja hkrĩ. Mẽ piitã ôr o mẽ ahkà htu nê ê jakare nê hkrĩ.

⁵Nê Tĩrtũm hkrĩ xà maatija rũm na katõtòk nê hkrakrak nê haxênh japà nê hikwÿ. Nê hkrĩ xà kapem kanê maati pixi kamã kwÿrÿt pê 7ja pòk rãhã ho kuhê. Kanêja te Tĩrtũm Karõ pyràk.

⁶Nê hkrĩ xà kapem mẽmo te gò rax pyràkja hkarÿr jaxênh tÿx kumrêx nê nõ. Te ho kàx karÿr jaxênh tÿx pyrà nê hkarÿÿre. Nê hkrĩ xà puhã mẽmoj tĩr nê kuhê pê kwat kuhê. Nê òkwa nê katut piitã hkòt no. ãm no xohtò rax kumrêx. Na pre ã mẽmoj kêp kwatja no xohtò anê pa omu.

⁷Wamta te kot mry pê rêãwti pyràk. Nê hkòt ja te kot môx myti pyràk. Nê hapu hã hkuk te panhĩ hkuk pyràk. No hapu hã ja te kot àànhàhti htor kaxyw hara koror pyràk.

⁸Ně piitã hara kêp 6. Ně ĩ piitã kamã no. Nhũm prem Tĩrtũm mã mex o mex ã grer rãhã ho kuhê nẽ aa pinhkrênh kêt nẽ. Nẽ kãm grer o: Amex o amex Tĩrtũm. Nẽ axihtỳx o axihtỳx. Nẽ aa ate amnhĩ tomnuj kêt kumrêx. Amnepê mã kormã mẽmoj kêt ri ka ra arãhã ri apa. Tã arĩ arãhã ri apa xwỳnh na ka. Kot kaj aa ajapêx kêt nẽ. ãm hãmri na ka hte mẽ ixto mex rãhã ho apa. Nẽ amex o amex Tĩrtũm. Anẽ.

⁹⁻¹⁰Nhũm prem xatã mẽ ho amnhĩptàr hkrĩ xà kamã hkrĩ xwỳnhja mẽ kot kãm “Rãhã pa xwỳnh” anhỹr xwỳnhhta mã ã grer anhỹr o kuhê. Kãm mex o mex ã grer pê tanhmã kot mẽ ho mex to hã harẽ. Hãmri nhũm mẽ àptàr tũm pê 24jaja mããnên kutã hkõn krã ho rôrôk nẽ hipô hpa nẽ hkrĩ. Nẽ amnhĩ krã rũm ôr o mẽ ahkàja kwry nẽ hpar pê haxwỳ. Kêp mẽ õ Pahi Maati hã hã hpijaàm kaxyw wamtajê pyrã nẽ mex o mex ã harênh o hkrĩ nẽ kãm:

¹¹ãm hãmri na pa htem amex o amex ã ajarẽ Tĩrtũm Apê mẽ inhõ Pahi Maati na ka. Nẽ apê mẽ inhõ Tĩrtũm na ka. Na ka pre mẽmoj piitã ho akato. Axàhpumunh tỳx nẽ ajamaxpêr tỳx o mẽmoj piitã amã hprãm xà hkôt ho akator pa. Jakamã na pa htem ã amex o amex ã ajarênh anẽ. Mẽ ixrom axihtỳx mex kumrêx na ka hte apa Tĩrtũm. Anẽ.

Apokarip 5

Mẽ pahte amnhĩ tomnuj pãnhã amnhĩrer xwỳnh jarênh

Juãw 1.29; Piripos 2.5-11

¹Tã pa pre arĩ te kaxkwa kamã mẽmoj pumu. Mẽ ho amnhĩptàr ã hkrĩ xà maatita kamã hkrĩ xwỳnh nhĩhkra kamã kagà pa omunh o xa. Upôk rũm omu. No ãm axtem kagà kaxkep na pre. Nẽ akutã hã kagà nẽ menh ê ho ho htỳx xàja kêp 7.

²Hãmri nhũm Tĩrtũm kapêr o wrỳk xwỳnh xihtỳx xwỳnhja kapêr tỳx kãm kapêr o: —E mẽ atõ na ate kagà mũj pyr nẽ ho htỳx xà hpôt mã tãm? Anẽ.

³Hãmri nẽ tee ri mẽ piitã mẽ hkapi nom nhũm ja kaxyw mẽhõ amrakati kumrêx. Kaxkwa kamã amrakati nẽ pika kamã mããnên amrakati nẽ pika hkarak ri amrakati. Nhỹri mẽhõ kot kagà kaxkepta pyr nẽ hpôt nẽ omunh mã tãm xwỳnhja amrakati ho amrakati.

⁴Nhũm tee ri mēhō japêr nom mēhō pumunh kêt nē. Pa tee ri ja hã omu nē ixkaprĩ htỳx nē inhmỳr o xa.

⁵Hãmri nhũm pahi hōja ixpumu nē inhmã: —Kwa amỳr kêt nē. E mēhō mũj pumu. Juta kanrēhã htàmnhwỳ xihtỳx xwỳnhta. Pahi Tawi kanrēhã htàmnhwỳ te kêp mry pê rēãw xihtỳx pyràk o hihtỳx xwỳnh mũj pumu. Kot mē kãm hkurê xwỳnhjê kutã amnhĩ to htỳx nē mēmoj punuj piitã ho hapêx kaxyw mã xwỳnh jakamã tapxipix na kot kagàta hpyr nē ho htỳx xà hpôt par mã tãm. E ka omu. Anē.

⁶Hãmri pa kuma nē hwỳr rĩt nē Jejusja pumu. Kot mē pahte amnhĩ tomnuj pãnhã amnhĩrer xwỳnhta mē ho amnhĩptàr o hkrĩ xà maati kapem xa. Mēmoj htĩr pê kwat mē àptàr tũm pê 24jê nhĩpôk ri xa. Mē kãm hkurê xwỳnhjaja kot hpĩr nhũm ra akupỳm htĩr nē xa. Nom ra axtem nē xa. àhpumunh tỳxja te kot pahi xàhpumunh pyràk. Nē hpàr kêp 7. Nē no mããnēn kêp 7. Noja te Tĩrtũm Karõ pyrà nē kêp pika piitã hkôt pa xwỳnh. ã Jejusja axtem nē ãm anē pa omu.

⁷Hãmri nhũm mē pahto amnhĩptàr o hkrĩ xwỳnhta wỳr tē nē ãhkra kamã kêp kagà kaxkepta py.

⁸Hãmri nhũm mē htĩr pê kwat mē mē àptàr tũmjaja hpar pê hkõn krã ho rôrôk nē hkrĩ hpa nē hipô nē hkrĩ. Piitã wiorãwti jamỳ nē ôr o xijere kamã mēhkuxwa xà jamỳ nē o hkrĩ. Nhũm Tĩrtũm krajaja Tĩrtũm mã tanhmã amnhĩ jarēnh to nhũm mē mar o hkrĩ. Te xijere kamã mēhkuxwa xà hpãr o hkrĩ pyrà nē mē kuma.

⁹⁻¹⁰Jakamã nhũm mē hkõn krã ho hkrĩ xwỳnhjaja mē pahte amnhĩ tomnuj pãnhã amnhĩrer xwỳnhta kutã kãm greer o hkrĩ. Mē greer nyw o kãm gre nē kãm: Na prem apĩ ka atyk o mē piitã mē kot amnhĩ tomnuj pãnhã amnhĩrer pa. Ahpỳnhã pika piitã hkôt mē urojê piitã hpãnhã amnhĩrer pa. Nē ahpỳnhã ri mē kapêr xwỳnh kwỳjê piitã mē hpãnhã amnhĩrer pa. Atyk o mē kot amnhĩ tomnuj piitã hpãnhã amnhĩrer pa. Jakamã nhũm mē kot akôt amnhĩ xunhwỳr xwỳnhjaja kêp Tĩrtũm kra nē ri pa. Ka ra mē panhõ Tĩrtũm mã mē kêp patre kaxyw mē unhwỳ nhũm htem pika piitã hkôt mē ho amnhĩptàr o

pa. Tã atyk o ate pika piitã hkôt mẽ hpãnhã amnhĩrer jakamã kapxipix na ate kagàta pyr nẽ ho htỳx xà hpôt mã tãm. Anẽ.

¹¹Hãmri nhũm Tĩrtũm kapẽr o mẽ wrỳk xwỳnhjaja nhỹhỹnh hapôj nẽ kuhê. Mẽ ohtô rax o ohtô rax. Ohtô rax o mẽ pajamaxpẽr jakrenh. Hãmri nẽ Tĩrtũm kot mẽ ho amnhĩptàr ã hkrĩ xà maatija wỳr mra nẽ kãm hipôk pa. Nẽ mẽmoj tĩr nẽ kuhê xwỳnhjê mẽ mẽ àptàr tũmjê mã hipôk pa nẽ mẽ pahte amnhĩ tomnuj pãnhã amnhĩrer xwỳnhhta mã kapẽr.

¹²Kàx pẽ kãm kapẽr nẽ kãm: ãm hãmri na pa htem amex o amex ã inhgrer o ixkuhê. Mẽ ixrom axihtỳx o axihtỳx. Nẽ mẽmoj piitã anhõõ. Nẽ ate mẽmoj piitã hkukamã axàhpumunh par. Nẽ amex o amex jakamã na pa htem amã amex pix ã inhgrer o ri ixpa. Anẽ.

¹³Tã nhũm mẽmoj piitã Tĩrtũm mẽ Jejus wa kãm wa mex o wa mex ã harẽ. Pika hkôt panhĩ nẽ mry nẽ àk nẽ mẽmoj piitãã. Nẽ pika hkrak ri nẽ gô hkrak ri mẽmoj piitãã. Nẽ mẽ htykjaja. Nhũm mẽ piitã wa kãm wa mex o wa mex ã wa harẽ nẽ wa kãm: E ate mẽ ixto amnhĩptàr ã akrĩ xà kamã akrĩ xwỳnh mẽ kot mẽ ixte amnhĩ tomnuj pãnhã amnhĩrer xwỳnh mẽ war amex o wa amex. Nẽ war axihtỳx o war axihtỳx. Nẽ war axàhpumunh o war axàhpumunh. Na pa htem ã war ajarẽnh anhỹr rãhã ixpa ho ixpa. Anẽ.

¹⁴Hãmri nhũm mẽmoj tĩr pẽ kwatjaja mẽ kuma nẽ mẽ kãm: —Nà ãm hãmri na ka mẽ ã wa harẽnh anẽ. Wa mex o wa mex kumrẽx. Anẽ. Hãmri nhũm mẽ àptàr tũmjaja Tĩrtũm mẽ Jejus wa hpar pẽ hkõn krã ho rôrôk nẽ hkrĩ hpa nẽ haxwỳja wa kãm wa mex o wa mex ã wa harẽ.

Apokarip 6

Kagà ho htỳx xà pẽ 7 jarẽnh

Matêwre 24.3-14; Sikũn Tesarõn 2.3; Wam Juãw 2.18

¹Tã pa arĩ kaxkwa kamã mẽ pahte amnhĩ tomnuj pãnhã amnhĩrer xwỳnh kot tanhmã amnhĩ nhĩpêx to hã omunh o xa. Nhũm kagà kaxkepta py nẽ wam ho htỳx xà pôt. Hãmri nhũm mẽmo tĩr pẽ kwatjê hõja kapẽr tỳx kumrẽx. Te na katõtõk tỳx pyràk o mẽhõj mã kapẽr nẽ kãm: —E amnẽ mẽ ixwỳr tẽ. Anẽ.

²Hāmri nhūm kawar jakajre nhỹhỹnh hwỳr hpôx o tẽ. Nhūm mēhōja õ kuxê mỳ nẽ hã nhỹ nẽ tẽ. Hāmri nhūm nhām mēhōja hwỳr tẽ nẽ kām pahĩ hã mē ahkà htũ. Hāmri nẽ kām tanhmã kapēr to nhūm kuma nẽ mē kot kām Tĩrtũm mē Jejus wa kurê xwỳnhjê nhĩmex par kaxyw hakẽx nẽ ma pika hwỳr tẽn wrỳ.

³Hāmri nhūm mē pahte amnhĩ tomnuj pãnhã amnhĩrer xwỳnhja wam kagà ho htỳx xàta kôt axte ja pôt. Hāmri nhūm mēmoj tĩr pẽ kwatjê hōja axtem mēhōj mã kapēr nẽ kām: —E amnẽ mē ixwỳr tẽ. Anẽ.

⁴Hāmri nhūm kawar kamrêk mē hwỳr hpôx o tẽ. Nhūm mēhō hã nhỹ nẽ tẽ. Nhūm nhām mēhōja kām wapo gõ nẽ ma pika hwỳr htẽm nẽ wrỳk kaxyw hano. Kot hwỳr wrỳk nẽ pikap mē pa xwỳnhjê kurê huk kaxyw. Mē kot axpẽn par kaxyw ma mē hwỳr kumẽ. Hāmri nhūm kuma nẽ wapota py nẽ hakẽx nẽ ma mē hwỳr tẽn wrỳ.

⁵Hāmri nhūm mē pahte amnhĩ tomnuj pãnhã amnhĩrer xwỳnhja kagà ho htỳx xà hõ pôt. Na pre ra ho axkrut nẽ hpôt tã hpãnhã axte hkôt ja pôt. Hāmri nhūm mēmoj tĩr pẽ 4jê hõta mēhōj mã kapēr nẽ kām: —E amnẽ mē ixwỳr tẽ. Anẽ Hāmri nhūm kawar tykre mē hwỳr hpôx o tẽ. Nhūm hã ỹr xwỳnhja mēmoj to peja xà hã parãs mỳ nẽ o tẽ.

⁶Hāmri nhūm mē htĩr pẽ kwatjê rũm mēhōja kām kapēr nẽ kām: —E kêr ka ma pika hwỳr mē hwỳr tẽn wrỳ nẽ mē kām myt pyxi kamã mē àpẽn pãnhã mē kām mēmoj to hkryre nẽ anhõ parãsta kamã ho peja nẽ mē kām õr o apa. Nom mē apkur xà hã orti nẽ wĩhti ka mē kêp tanhmã ho hkêt nẽ. Anẽ. Hāmri nhūm kuma nẽ hakẽx nẽ ma tẽn mē hwỳr wrỳ.

⁷Tã nhūm mē pahte amnhĩ tomnuj pãnhã amnhĩrer xwỳnhja axte kagà ho htỳx xà hõ hpôt. Na pre ra ho axkrunẽpxi nẽ hpôt tã hpãnhã axte hkôt ja pôt. Hāmri nhūm mēmoj tĩr pẽ kwat kot hitep xwỳnhja mēhōj mã kām: —E amnẽ mē ixwỳr tẽ. Anẽ.

⁸Hāmri nhūm kawar rãrààre mē hwỳr hpôx o tẽ. Nhūm mēhō hã nhỹ nẽ tẽ. Hã ỹr xwỳnh nhĩxi na pre kêp “Mēhtyk” anẽ. Hāmri nhūm mēhōja kām kapēr nẽ kām: —E ma pika hwỳr wrỳ nẽ tanhmã mē ho kê mē ohtô nẽ

tanhmã amnhĩ to nẽ axkaprã. Kê mẽ hkwỳjaja pijapu kamã axpẽn pa nẽ mẽ hkwỳjaja prãm xàj ty nẽ mẽ hkwỳjaja tanhmã à htỳx kute kamã ty. Nẽ mẽmo mry xoprêja mẽ hkwỳjê pa. E ma mẽ hwỳr wrỳ nẽ tanhmã mẽ ho ho apa. Anẽ. Hãmri nhũm kuma nẽ hakẽx nẽ ma pika hwỳr tẽn wrỳ. Hãmri nhũm mẽ htykjê papxàja tanhmã amnhĩ to nẽ te kot hã jêt nẽ ma hkôt mõi nẽ pika hwỳr wrỳk pyræk pa pre arĩ omunh o xa.

⁹Hãmri nhũm mẽ pahte amnhĩ tomnuj pãnhã amnhĩrer xwỳnhja axte kagà ho htỳx xà hõ hpôt. Na pre ra ho kwat nẽ hpôt tã hpãnhã axte ja pôt. Hãmri nẽ hpôtja kôt pa ra mẽ kot Tĩrtũm mã mẽmoj nhõi xà hã mẽsti pumu. Nẽ hkrak ri mẽ hkarõjê pumu. Mẽ kot hkwỳjê hkôt ri mẽ kãm Tĩrtũm kapẽr jarẽnh nẽ Jejus kệp mẽ õ Pahihti hã harẽnh o pa nhũm mẽ kot hã mẽ hpar xwỳnhjê karõja pa pre mẽ omu. Nhũm mẽ mẽsti hkrak ri amnhĩ to Tĩrtũm wỳr o hkrĩ.

¹⁰Kỳx pẽ kãm kapẽr nẽ kãm: —Ăm hãmri amex o amex Pahi Maati. Aa ate mẽmoj tã tanhmã amnhĩ to axêx to hkêt kumrẽx. Kwa xà kot kaj tokyx pika hkôt mẽ kot mẽ inhĩmex xwỳnhjaja tanhmã mẽ ixtã mẽ ho nà? Anẽ.

¹¹Hãmri nhũm mẽhõja mẽ hwỳr tẽn nẽ mẽ kãm mẽ ê jakajre gõ nhũm mẽ hagjê. Hãmri nhũm mẽ kãm: —E mẽ mamrĩ atar akôkôt o akrĩ. Kojã Tĩrtũm kormã tanhmã mẽ kot mẽ atomnuj xwỳnhjê ho hkêt nẽ. Kê mẽ axte mẽ apyrà nẽ mẽ akwỳjê nhĩmex mãn. Kojã mẽ Tĩrtũm jamaxpẽr xà hkôt axte mẽ akwỳjê pa nhũm rĩ kormã mẽ ato hpimràatã tanhmã mẽ atã mẽ hipêx to. Jakamã e mẽ atar kutêp mãmri akôkôt o akrĩ. Anẽ.

¹²Hãmri nhũm mẽ pahte amnhĩ tomnuj pãnhã amnhĩrer xwỳnhhta axte kagà ho htỳx xà hõ hpôt pa omu. Na pre ra ho 5 nẽ hpôt tã hpãnhã hkôt axte ja pôt. Hãmri nhũm pika htertet tỳx kumrẽx. Nẽ myyti ahtyk nẽ mytwrỳre te kệp mẽ hkamrô kamrêk tỳx pyrà nẽ ajêt.

¹³Nẽ kanhêti tanhmã amnhĩ to nẽ axrê nẽ pikap rôi rôi pa. Te kôi xapêr tỳx nẽ kot pàrerekre kormã ràx tã kot kãm hikranh par pyrà nẽ piitã rênh pa nhũm rôi rôi.

14Hāmri nhūm kaxkwaja te kagà kaxkep pyrà nē amnhĩ to kaxkep o tē. Nē pika piitā hkôt kēn prēk nē hixēt prēk maati piitā te hkrĩ xà rūm hapôx nē mrrar nē nhām hkrĩ pyrāk. Nhūm gô hipôk piitā haxwỳja te hikwỳ xà rūm hapôx nē mrrar nē nhām hikwỳ pyrāk. Pika htertēt tỳx nhỹ hã ã mēmoj amnhĩ nhĩpêx anē.

15Hāmri nhūm pika hkôt mē piitā tee ri mēmoj ã amnhĩ nhĩpêx anhỹr ã omu nē kām ma nē htertēt tỳx kumrēx. Mē ho amnhĩptār xwỳnhjaja nē pōristi krāhtūmjaja nē mē kot amnhĩ to rūnh xwỳnhjaja nē mē hihtỳx xwỳnhjaja nē mē kām mē àpēnh xwỳnhjaja nē amnhĩ mǎ mē àpēnh xwỳnhjaja. Ām piitā mēmoj ã kot amnhĩ nhĩpêx anhỹr ã omu nē tee ri amnhĩ kukamā hamaxpēr nē kām ma ho kām ma. Hāmri nē hpimxur kaxyw ma kēn prēk kre japêr o hprôt nē mra.

16-17Hāmri nē amnhĩ to kēn prēk wỳ nē kām: —Kwa na ra mē ixto amnhĩptār ã hkrĩ xà maati kamā hkrĩ xwỳnh mē kot mē ixte amnhĩ tomnuj pānhã amnhĩrer xwỳnhhta wa mē ixkamā gryk tỳx kumrēx. Ra wa kot tanhmā mē ixtomnuj to xà hã arĩgrota kato. Kojā wa mē ixtomnuj tỳx nē pa mē kutā hkēt nē. Kwa tokyx mē inhĩpy arôrôk nē wa kēp mē ixto amũxu. Anē.

Apokarip 7

Mē kot Tĩrtūm mǎ hkrajē kagà

Apokarip 9.4

1Tǎ pa arĩ kaxkwa kamā mēmoj pumu. Nhūm Tĩrtūm kapēr o mē wrỳk xwỳnh pē kwatja piitā ahpỳnhã pika nhĩtep xà hkôt kôk jatur xà hã hamỳ nē ho kuhê. Pika piitā hkôt kôk hpinhkrēnh par nē àpêr kêt nē gô xujanār kôt àpêr kêt kaxyw hatur xà hã hamỳ nē ho kuhê. Nē pà piitā hkôt àpêr nē tanhmā pĩ hkwy ho pymaj nhūm mē ã amnhĩ nhĩpêx anē nē nē hatur xà hã hamỳ nē ho kuhê.

2Na pre ra Tĩrtūm ja hã mē kām karō nē mē kām: —E kêr ka mē ma pika hwỳr wrỳ nē pika nē gô xujanārja tanhmā wa homnu hto. Anē. Hāmri nhūm mē kuma nē hwỳr wrỳ nē kormā nē kôk ho htỳx. Hāmri nhūm Tĩrtūm kapēr o wrỳk xwỳnhjê hōja myt japôx xà rūm mē hwỳr hpôx o tē. Nē ĩhkra kamā

mě kot Tirtūm kra hã mẽ hixi jarēnh xà hã kagàta py nẽ o tẽ. Hãmri nẽ kàx pẽ mẽ kot pika mẽ gô xujanār homnu mã xwỳnhjê mã kapēr nẽ mẽ kãm:

³—Kwa taxy pa Tirtūm krajê nhōkrã kagà hpa măn. Kêr ka mẽ omu nẽ mẽ tapxipixjaja tanhmã mẽ ho hkêt nẽ. Anẽ.

⁴⁻⁸Hãmri nẽ mẽ hkagà pa. Ahpỹnhã Ijaew pigrành xwỳnhjaja mẽ ho ohtô rax kumrẽx nẽ tanhmã mẽ hkagà hto. Pa tanhmã mẽ kute hã mẽ harēnh ma nhũm xep mẽ ohtô rax kumrẽx. Juta kamã mẽ kêp 12.000. Nẽ Rupẽ kamã mẽ kêp 12.000. Nẽ Gax kamã mẽ kêp 12.000. Nẽ As kamã mẽ kêp 12.000. Nẽ Natari kamã mẽ kêp 12.000. Nẽ Manase kamã mẽ kêp 12.000. Nẽ Simeãw kamã mẽ kêp 12.000. Nẽ Rewi kamã mẽ kêp 12.000. Nẽ Isaka kamã mẽ kêp 12.000. Nẽ Jepurõ kamã mẽ kêp 12.000. Nẽ Juje kamã mẽ kêp 12.000. Nẽ Pějãmĩ kamã mẽ kêp 12.000. ã mẽ ohtô rax kot anhỹr. Hãmri nẽ mẽ piitã mẽ pikamỳr par kãm mẽ kêp 144.000. Piitã kêp Apraãw kanrêhã htàmnhwỳ na pre mẽ. Tã ã axpẽn kaxyw mẽ ohtô rax kumrẽx kot anhỹr tã nhũm mẽ hkagà pa.

Tirtūm kra hkwỳjê jarēnh

Apokarip 14.1-5

⁹Tã pa axtem mẽmoj pumu. Nhũm mẽ ohtô rax nẽ Tirtūm nhō krĩ kamã kuhê. Ahpỹnhã ri pika piitã hkôt mẽ urojaja. Nẽ ahpỹnhã ri mẽ kapēr xwỳnhjaja nhũm prem pika piitã kurũm kot mẽ ho amnhĩptàr ã hkrĩ xà maatija kamã hkrĩ xwỳnh pẽ Tirtūm mẽ mẽ pahte amnhĩ tomnuj pãnhã amnhĩrer xwỳnhja wa kutã kuhê. Mẽ ohtô rax kumrẽx jakamã pa tee ri mẽ piitã mẽ ho kōta hpar prãm kaprỳ. Nẽ piitã ê jakare kamã kuhê. Nẽ hkĩnh nẽ hkĩnh xàj pô hkwỳ jamỳ nẽ ho àpêr o kuhê.

¹⁰Hãmri nẽ kỳx pẽ Tirtūm mẽ Jesus wa kãm kapēr nẽ wa kãm: Hêxta waa nẽ. War amex o war amex Pahi Maati. Na ka pre Akra Jesus kukwak ri mẽ ixte amnhĩ tomnuj ã tanhmã mẽ ixto hkêt nẽ. War ajamẽ mẽ ixkamã axukaprĩ rãhã ho apa xwỳnh na ka wa. Jakamã pa mẽ inhmex nẽ war awỳr api nẽ war akuri inhmex nẽ ijamakêtkati nẽ ixpa ho ixpa. ãm hãmri na ka hte wa mẽ ixto mex rax kumrẽx o apa. War amex o war amex. Anẽ.

11Hāmri nhūm Tīrtūm kapēr o mẽ wrýk xwýnhjaja Tīrtūm krī xà mã hipôk nẽ hkõn krã ho rôrôk nẽ hkrī hpa. Nẽ mẽ àptàr tūmjê mẽ mẽ htīr nẽ kuhê xwýnhjaja mẽ ìhkô hã kãm hipôk nẽ wam tajê pyràk nẽ hkõn krã ho rôrôk nẽ hkrī. Hāmri nẽ mẽ ohtô kot Tīrtūm mẽ Jejus wa kãm kapēr ã mẽ kuma hāmri nẽ Tīrtūm ã hpijaàm kaxyw hpar pê htu mýr pê hikwý hpa nẽ kãm mex o mex ã harẽ nẽ kãm:

12“Ăm hāmri na mẽ ã ajarēnh anẽ Tīrtūm. Amex o amex. Na ka hte mẽ ixto mex o apa. Mẽ ixrom axàhpumunh o axàhpumunh. Nẽ mẽ ixrom axihtýx o axihtýx. Jakamã na ka hte mẽ ixpiitã mẽ ixto mex kumrēx rãhã ho apa. Ă ate anhýr rãhã o rãhã jakamã na pa htem amã amex o amex ã ajarēnh rãhã ho ixpa.” Anẽ.

13Hāmri pa mẽ omunh o ixãm rôm nhūm mẽ àptàr tūmjê hõja ixwýr tẽ nẽ mẽ ê jaka kamã mẽ hkĩnh xàj pô jamýnh nẽ ho kuhê xwýnhjê hã ixkukja nẽ inhmã: —E mãn ate mẽ ê jakare kamã mẽ kuhê xwýnh mũjjê pumunh nà? Tanhmã na prem amnhĩ nhípêx to nẽ amnẽ api? Xà ate mẽ omunh? Anẽ.

14Hāmri pa kuma nẽ kãm: —Nà ixte mẽ omunh kêt. Kêt ka na ixrom ate mẽ omunh. Anẽ. Hāmri nhūm inhmã mẽ harēnh o: —Nà na pre mẽ hkwyjaja Jejus ã mẽ homnuj týx kumrēx nẽ mẽ kupa. Tã mẽ kêp Jejus kwý jakamã na pre mẽ nê mẽ kot amnhĩ tomnuj o hapêx nẽ te amnhĩ kamrô ho mẽ nê mẽ kot amnhĩ tomnuj piitã kuhõnh par pyràk o mẽ hipêx. Jakamã nhūm mẽ ê jaka kamã mex nẽ hkĩnh týx nẽ pa.

15Nẽ Tīrtūm kot mẽ pahto amnhĩptàr ã hkrī xà maati kutã kãm mex o mex ã harēnh rãhã ho kuhê. Na hte mẽ ho mex rãhã ho pa. Mẽ hkôt pa ho pa jakamã koja mẽmoj tanhmã kêp mẽ ho hkêt nẽ.

16-17Nẽ mẽ pahte amnhĩ tomnuj pãnhã amnhĩrer xwýnh kot Tīrtūm krī xà maati kamã ãm xwýnhhta na hte mẽ hamãr mex rãhã ho mẽ hkôt pa. Te mẽ kot mẽ hkrit jamãr mex pyràk. Nẽ te mẽ kot mẽ hkrit kôm o pa nhūm htīr nẽ pa pyràk. Koja mẽ kuri htīr tūm nẽ hkôt pa ho pa. Nẽ axte kãm prãm kêt nẽ. Nẽ axte kãm kôr kêt nẽ. Nhūm arĩgro htýxja axte mẽ hkà ho hxêt kêt nẽ. Koja Tīrtūm te mẽ kot mẽ hkra no kagô nhĩnhĩnh par pyràk o mẽ hipêx

nhũm mẽ axte hkaprĩ nẽ mỳr o pa hkêt nẽ. Pãnhã hkĩnh nẽ mex rãhã kuri pa ho pa. Anẽ.

Apokarip 8

Kagà kaxkep o htỳx xà kot hitep jarēnh

¹Tã pa arĩ kaxkwa kamã mẽmoj pumu nhũm mẽ pahte amnhĩ tomnuj pãnhã amnhĩrer xwỳnhja kagà kaxkep o htỳx xà kot hitepta pôt. Hãmri nhũm kaxkwa kamã mẽmoj piitã hpinhkrēnh pa nhũm mẽhõ kapēr kêt kumrēx. Nẽ hpinhkrēnh par o ra hã ahtũm ry mex nẽ.

²Hãmri nhũm Tĩrtũm kutã kapēr o wrỳk xwỳnh pê 7 nẽ mẽ kuhê xwỳnhjaja. Nhũm kapēr o wrỳk xwỳnhjê hõja mẽ hwỳr tẽ nẽ mẽ piitã mẽ kãm pifti gõ.

³⁻⁴Hãmri nhũm kapēr o wrỳk xwỳnhjê hõja ôr o xijere py nẽ Tĩrtũm mã mẽhkuxwa xà ho xêt xà hã mēs kunĩhti hwỳr o tẽ. Mẽ ho amnhĩptàr ã hkrĩ xà maati kutã ôr o mēstija wỳr o tẽ nẽ kuri o xa. Hãmri nhũm mẽ kãm kamã mẽhkuxwa xà hkwỳ runh rax nẽ nhũm mēsti hã ho xêt o xa. Rôm nhũm Tĩrtũm krajaja Tĩrtũm mã tanhmã amnhĩ jarēnh to. Jakamã nhũm mẽhkuxwa xà xêt kũm mẽ mẽ kot Tĩrtũm mã amnhĩ jarēnh xàja mẽ nhũm ahkà nẽ Tĩrtũm kapēr o wrỳk xwỳnh nhĩhkra kamã xijere rũm Tĩrtũm kutã kàx mã àpir o pa.

⁵Hãmri nhũm kapēr o wrỳk xwỳnhja xijere kamã kuwy hpòk kwỳ ho nỳt nẽ ahpar mã pika hwỳr kumẽ nhũm ma tẽ nẽ pikap tēm nhũm pika htertet tỳx nẽ kamã na katõtõk nẽ haxēnh nẽ hkrakrak.

Mẽ kot pifti kakôr ã mẽ harēnh

⁶Hãmri nhũm Tĩrtũm kapēr o wrỳk xwỳnh pê 7 kot pifti jamỳnh xwỳnhjaja ra kot pafti kakôr mã.

⁷Jakamã nhũm wamta õ pifti kakô nhũm na mē te kot jêr krã jakot pyræk xwỳnh mẽ kuwy te kot mẽmo kamrô kamrêk pyræk xwỳnhhta pikap rôròk pa. Nẽ nhỹhỹnh pika hkwỳ ho rax nẽ ho kaxàr pa. Nẽ põtĩ nẽ akunĩ hkwỳ ho rax kumrēx nẽ ho kaxàr pa.

⁸Hāmri nhūm wam ām xwỳnh nhījuk ri ām xwỳnhja ō pifti kakō nhūm mēmoj te kēn krā hprēk pōk pyrā nē kaxkwa rūm ahpar mā tē nē gō xujanār nhīkjē kamā hpōk rāhā tēn mrō. Hāmri nhūm gō nhīkjē kamā gōja mēmo hkamrō hā amnhī jahkre hpa.

⁹Jakamā nhūm gōx kām mēmoj htīr nē ri mrar xwỳnhjaja pikaprār pa. Nē gōx kām pār gō krāhkā hā pa xwỳnhja haxwỳja gjēx pa. Nē pār kām mē pa xwỳnhjaja haxwỳja hājē nē pikaprār pa. No nhūm gō mex kām pār kām mē pa xwỳnhjaja mē kurom arī htīr nē.

¹⁰Tā nhūm wam ām xwỳnhhta wa hijuk ri ām xwỳnhja ō pifti kakō. Hāmri nhūm kanhēti rax kumrēxja axta nē hpōk o ma ahpar mā tēn pikap tēm nē pyhti nē hino hkwỳ ho ohtō nē homnu hpa.

¹¹Kanhēti nhīxi pē na pre “mēmoj xỳ xà” anhỹr jakamā nhūm tēm nē pyhti nē hino hkwỳ ho ohtō nē homnu pa. Nhūm prem hwỳr mra nē hkwỳ janhi nē ho ixkō nhūm y nē nhūm mē ohtō nē ho ixkō nē axkaprā.

¹²Hāmri nhūm hpānhā Tīrtūm kapēr o wrỳk xwỳnhjē hōja ō pifti kakō. Na pre ra ho axkrunēpxi nē hkakōr tā hpānhā ra axte hō ja kakō. Hāmri nhūm mēhōja tē nē myyti kura nhūm hkwỳ ahtyk nē hirā hkēt nē. Nhūm mytwrỳre nē kanhēti mā ho anē nē myyti pyrā nē hkwỳ ahtyk nē hirā hkēt nē harir. Jakamā nhūm kamāt kām hirā mex kēt nē. Nē arīgro hā myytija haxwỳja hirā mex kēt nē.

¹³Hāmri pa kaxkwa kamā àanhàhti pumu nhūm kỳx pē ri htor o pa pē tanhmā kapēr to nē kapēr o: —Hēxta waa nē. Kormā kot pifti kakōr xwỳnhjaja axkrunēpxi nē kormā hkakōr kēt nē. Koja mē tokyx hkakō nhūm pika hkōt ri mē pa xwỳnhjaja amnhī xà htỳx kamā hamak tỳx o pa. Na pa tee ri mē hkukamā ijamaxpēr nē inhmā mē hkaprī htỳx nē. Hēxta waa nē. Koja mē omnuj tỳx kumrēx. Anē.

Apokarip 9

¹Tā pa axte mēmoj pumu. Nhūm Tīrtūm kapēr o wrỳk xwỳnhjē hō ō pifti kakō. Na prem ra ho kwat nē hkakōr tā hpānhā axte hōja ja kakō. Hāmri

nhũm kanhêti hõ axta nẽ pikap tẽm kurê kumrẽx nhũm mẽhõja omu nẽ hwỳr tẽ nẽ kãm mẽmoj tã saf gõ. Satanasti jagjênh xà hã ahkre xupỳm o htỳx xà hã safja nhũm kanhêti mã kugõ.

²Hãmri nhũm kupy nẽ ahkrehtita wỳr o tẽ nẽ kahê xà mẽ nhũm kurũm kuwy hkũm hapôx rax nẽ. Nẽ ma kàx mã àpir o pa nẽ myyti hpro hpa nhũm kamàt kô rax kumrẽx.

³⁻¹¹Nẽ kuwy hkũmja rũm mẽmoj te krit pyræk xwỳnh kwỳjaja pikap rôrôk nẽ kuhê. Te kot krit pyræk tã mẽ hkuk te panhĩ hkuk pyræk. Nẽ mẽ hkrã hkĩ te mẽnijê hkrã hkĩ japjê pyræk. Nẽ ôr o mẽ ahkà jagjê. Nẽ mẽ wa japjê htỳx kumrẽx. Te rêãwti xwa japjê pyræk. Nẽ kàx o mẽ hinô hkà. Nhũm mẽ htor o hara hkoko htỳx o mra. Te ho kawar xohtô pijapu kaxyw kot mẽ hkjênh xà kamã mẽ htur nẽ mẽ hkjênh o hprôt nhũm hkoko htỳx pyræk. Nẽ mẽ hkamnhwỳr o pa kaxyw mẽ hanhyja te kot makre janhy pyræk. ã kriitija kot anhỹr. Nẽ te nhỹhỹm oprê kaxyw nojarêt nẽ mẽ hkrit kawar hã hikukrêx mex rênh pyræk. Mẽõ pahija ahkre xupỳmta kamã kêp mẽ hkrãhtũm. Ijaew kapêr kãm hixi pê “Apatõ.” No Gres kapêr kãm kêp “Aporiãw.” No mẽ pakapêr kãm kêp “mẽ hpar o pa xwỳnh.” Hãmri nhũm Tĩrtũm kriiti mã kapêr nẽ mẽ kãm: —E kêr ka mẽ ma pika piitã hkôt te makre kot amnhĩ nhĩpêx pyrã nẽ ri mẽ hkôt mẽ hkamnhwỳr o apa. ã amnhĩ nhĩpêx anhỹr o mẽ atã mytwrỳ pê sĩk. No ãm kêr ka mẽ hpar kumrẽx kêt nẽ. ãm mẽ kot amnhĩ xà htỳx kãm hamak pix kaxyw tanhmã mẽ ho ho apa. Te makre kot mẽ hkamnhwỳr nhũm à htỳx kumrẽxta pyræk. No mẽ ate mẽ hkamnhwỳr nhũm mẽ hkamnhwỳr xàja koja à htỳx o makre kot mẽ hkamnhwỳr jakre. Nom ra mẽ kot Tĩrtũm kra hã mẽ hkagà xwỳnhjaja kêr ka mẽ omu nẽ ãm mẽ omu nẽ tanhmã mẽ ho hkêt nẽ. Mẽ kêp ixkwỳ na mẽ. Nẽ põ nẽ prãt ka mẽ ãm omu nẽ tanhmã ho hkêt nẽ. ãm mẽ kot panhĩ nhõkrã kagà hkêt xwỳnh pixjaja ka ã mẽ hipêx anhỹr o ri mẽ hkôt apa. Nom kêr ka mẽ hpar kêt nẽ. Kê mẽ tee ri amnhĩ xà hã maj kãm tokyx htyk nẽ hapêx prãm hkaprỳ ho pa. E ma mẽ hwỳr mra nẽ ã mẽ hipêx anhỹr o ri apa. Anẽ. Hãmri nhũm mẽ kuma nẽ ma mẽ hwỳr mra.

¹²Na ra pika hkôt wam mẽ homnu xà pyxi nẽ hapêx. No ãm arĩ hamẽxkrut.

¹³Jakamã nhũm Tĩrtũm kapêr o wrỳk xwỳnhjê hõja axte õ pifti kakô. Na prem ra ho sĩk nẽ hkakôr tâ axte hkôt hõja hkakô. Nhũm Tĩrtũm kutã ôr o mẽsti rũm mẽhõja tanhmã kapêr to. Mẽsti janhà rũm kapêr.

¹⁴Pifti kakôr xwỳnhhta mã kapêr nẽ kãm: —E na ra mẽ kot mẽ hkwỳjê nhĩmex ã arĩgrota kato. Jakamã kêr ka ma pyhti pê Erax wỳr wrỳ nẽ gô mỳ ri Satanasti mã mẽ àpênh xwỳnh pê kwatja pumu. Na prem ra mẽ hpa hpre nhũm mẽ gô mỳr ri arĩ hkrĩ ho hkrĩ. Ka mẽ omu nẽ mẽ kãm mẽ hpa hpre xà hpôt pa kê mẽ ma mẽ hkôt ri mẽ hpar o pa. Anẽ.

¹⁵Na pre ra Tĩrtũm mẽ kot mẽ hkwỳjê nhĩmex o pa kaxyw mẽ kurê nẽ gô mỳ ri mẽ unhwỳ nhũm mẽ kormã mẽ hpar xà hã arĩgro jamãr o hkrĩ. Jakamã nhũm ã pifti kakôr xwỳnhhta mã mẽ harênh anẽ nhũm kuma nẽ ma tẽ nẽ mẽ hwỳr wrỳ nẽ mẽ kãm mẽ hpa hpre xà hpôt pa. Hãmri nhũm mẽ ma pika piitã hkôt ri mẽ hpar o mẽ hkôt pa. Nẽ mẽ ho ohtô rax kumrêx nẽ mẽ himex.

¹⁶Nẽ ma amnhĩ kôt pôristi ho ohtô rax nẽ o pa. Piitã kawar ã hkrĩ nẽ mẽ hkôt hprôt nẽ hkoko ho mra. Mẽ kêp 200.000.000 hã mẽ harẽ pa mẽ harênh ma. Mẽ ohtô rax o mẽ ohtô rax.

¹⁷Na pa pre arĩ te ixpimtir kãm mẽ omunh pyràk. Nhũm kawar ã mẽ hkrĩ xwỳnhjaja. Mẽ hinô kàja axtem kàx o. Nẽ hkamrêkja te kuwy hpôk kamrêk pyràk. Nẽ ràràrja te mẽ hkurôt kane xà pê ẽsôf ràràr pyràk. Nẽ kakrã htyk. ã kàx o mẽ hinô hkà kot anhỳr. Nẽ mẽ hkrit kawarti hkrãja te rêãwti krã pyràk. Nẽ mẽ hakwa rũm kuwy hpôk mẽ ẽsôfti mẽ kuwy hkũm axpẽn kôt hapôx o pa.

¹⁸⁻¹⁹Nẽ kawarti jamy axtem te kêp kagã xoprê hkrã pyràk nhũm mẽ hamy ho mẽ hkamhar o mẽ kupa. Nẽ mẽ hakwa rũm kuwy hkũm mẽ kuwy hpôk mẽ ẽsôfti hapôx xwỳnhhta mã mẽ ho anẽ nẽ. Jakamã nhũm kawartijaja mẽ hkôt ri hamy mẽ hakwa ho mẽ hpar o pa nẽ mẽ ohtô rax kumrêx nẽ mẽ himex.

20-21Tã nom nhũm arĩ mẽ htĩr nẽ ri mẽ pa xwỳnhjaja. Mẽ kot mẽ hkwỳjê hpar kêt xwỳnhjaja hãmri ja hã mẽ omunh tã arĩ amnhĩ tomnuj o pa nẽ kãm urer kêt nẽ. Arĩ tanhmã amnhĩ tomnuj to ho pa. Axpẽn pê hprõ nẽ mjên o amnhĩkati nẽ axpẽn pê ahkĩ. Nẽ axpẽn par o ri pa nẽ tanhmã axpẽn xy hto ho pa. ã htỳx ri amnhĩ nhĩpêx anhỹr o pa nẽ kãm urer kêt nẽ. ãm Satanasti hkôt pix mã ri amnhĩ nhĩpêx o pa. Nẽ amnhĩm sãnti hkwỳ nhĩpêx. Pĩ ho hipêx nẽ kàx o hipêx nẽ kẽn o hipêx. Nẽ hipêx pa nẽ amnhĩ to hwỳr o pa. Nom mo kot mẽ mar kaxyw sãnti jamak kre? Nẽ kot mẽ omunh kaxyw mo no? Nẽ ri mrar nẽ mẽ ho utàr kaxyw mo hte? Na htem arĩ ã amnhĩ to hwỳr kaprỳ anhỹr o pa.

Apokarip 10

Kagà kaxkep grire jarēnh

1Tã pa arĩ mẽmoj pumu. Nhũm axte Tĩrtũm kapēr o wrỳk xwỳnh xihtỳxjê hõja pika hwỳr wrỳk o tẽ. Nẽ êja kakrã ho na pre. Nẽ hkrã mỳ ri màxwỳxti ajêt. Nẽ hkuk te myt no kamã hirã htỳx pyràk. Nẽ akutã hte kamã te kuwy hpòk pyràk.

2Nẽ ìhkra kamã kagà kaxkep grire ra pipôt nhũm ma o tẽ nẽ o wrỳ nẽ o xa. Nẽ gô xujanãr kãm upòk rũm hte xãm nẽ kỳx pê amgrà kamã apke rũm hte xãm nẽ o xa pa ixprĩ hã omu.

3Hãmri nhũm kàx pêê amỹra. Te rēãw hkàr tỳx pyràk. Nhũm hpãnhã kaxkwa kamã mēhõja kãm kapēr. Te na katõtòk o 7 wēs pyràk pa ixprĩ hã tanhmã kapēr to hã kuma.

4Hãmri nẽ ra mẽ amã ã kagà kaxyw nhũm mẽ ja nê inhmã kapēr nẽ inhmã: —Kwa nà kwarĩ ja kot kaj hã kagà hkêt nẽ. ãm ja pix kot kaj akwỳjê mã hã kagà hkêt nẽ. ãm kapxipix mãn ama nẽ ri hã apa. Anhỹr jakamã pa mẽ amã hã kagà hkêt nẽ. ãm papxipix kuma nẽ ri hã ixpa.

5Tã nhũm Tĩrtũm kapēr o wrỳk xwỳnh kot gô xujanãr kãm upòk rũm hte xãm nẽ apke amgrà kamã ãm xwỳnhhta hãmri Tĩrtũm nhỹ hã kapēr kaxyw nẽ kànhmã ìhkra pẽ.

6-7Tirtūm pê kaxkwa nē pika nē gô xujanār o kator nē kamā kot mēmoj piitā ho kator xwỳnhja. Nē htír rāhā nē pa ho pa xwỳnhja. Nhūm ỹ hā kapēr nē kapēr o: —E hāmri. Amnepê mā na pre Tirtūm ỹ hā mē kām kapēr o ri mē pa xwỳnhjê mā tanhmā amnhī kukamā amnhī jarēnh to. Tanhmā kot pika piitā hkôt mē pa xwỳnhjê nhīpêx to hā amnhī jarē. Nē mēmo arīgro hā mē kot amnhī tomnuj mỳrapê tanhmā kot mē hipêx to hā mē hkukamā mē hā amnhī jarē. Tā ra ā mē hipêx anhỹr xà hā arīgro kato. Jakamā koja kapēr o wrỳk xwỳnh kot hitepta ò pifti kakô hāmri nhūm mēmojja ā amnhī nhīpêx anhỹr kurê kumrēx. Ām hāmri na pa mē amā ja jarē. Anē.

8Pa mar o ixām rôm nhūm wam inhmā kapēr xwỳnhhta axte inhmā kapēr nē inhmā: —E ma pika hwỳr wrỳ nē gô xujanār kām upôk rūm hte xām nē amgrà kamā apke rūm hte xām xwỳnhhta wỳr tē nē kēp kagà kaxkep grire pipôt xwỳnhhta py. Anē.

9Hāmri pa kuma nē ma hwỳr wrỳ nē hā kuwỳ nhūm inhmā kugō nē inhmā: —E mī. Apy nē akrē. ànhre. Te kot menh xành pyrāk. Nom kot kaj akrē nē anhōhy xà. Nom māmri apy nē akrē. E mī. Anē.

10Hāmri pa kēp kupy nē hkaki nhūm ànhre. Pa hkrēr pa hāmri nē inhōhy xà kurê kumrēx.

11Hāmri nhūm kot inhmā òr xwỳnhhta inhmā: —Nà ām hāmri na ka apy nē akrē. Jakamā kēr ka ano ho ate mēmoj piitā omunh xwỳnhja nē ajamak o ate mēmoj mar xwỳnhja nē ate tanhmā Tirtūm kapēr mar toja ka piitā hā kagà hpa. Hāmri nē ate omunh xà hkôt akwỳjê mā piitā harēnh o apa. Mē kot nhỹrmā Tirtūm kot tanhmā mē piitā mē hipêx to hā harēnh mar kaxyw. Ahpỹnhā ri pika piitā hkôt mē urojê piitā koja nhỹrmā ā mē hipêx anē. Ahpỹnhā ri mē kapēr xwỳnh piitā. Nē mē ò pahijaja. Ām mē piitā koja nhỹrmā ā mē hipêx anē. Anē.

Apokarip 11

Tirtūm nhỹ hā kapēr xwỳnh pijakrut wa harēnh

¹Tã nhũm mēhōj inhmã mēmoj to mīdi xà hã pī ryre gō nē inhmã: —E ja py nē Jerujarē hwȳr wrȳ nē kamã Tĩrtũm mã amnhĩ jarēnh xà hã ixkreja o mīdi. Nē ixkre kamã amnepēm mē kot amnhĩ tomnuj pãnhã Tĩrtũm mã ôwēhti nhōr xà hã mēstita mã ho anē nē ho mīdi. Nē ixkre kamã mē kot Tĩrtũm mã amnhĩ jarēnh o mē hkrĩ xwȳnhjaja ka aprĩ hã mē ho kōta.

²—No ixkre kapem pikaja ka ho mīdi hkēt nē. Ra Tĩrtũm kot mē kot amnhĩ tomnuj xwȳnhjē mã hkaga jakamã koja mē htȳx ri kãm hprãm xà hkôt tanhmã homnu hto ho pa. Nē Jerujarē piitã hkôt ri homnu ho paja ã hã amgrà axkrunēpxi nē hkôt mytwrȳ kēp 6.

³—Koja Tĩrtũm ma ỹ hã kapēr xwȳnh ho hamēxkrut nē mē hwȳr wa kumē nhũm wa ma mē hwȳr wrȳ nē mē kãm Tĩrtũm kapēr jarēnh o ri mē hkôt pa. Hãmri nē tee ri mē kot tanhmã amnhĩ tomnuj to hã mē omu nē hkaprĩ nē. Hãmri nē wa hkaprĩ xàj xak punure kaxô nē haxà nē mē kãm Tĩrtũm kapēr jarēnh o ri wa pa hã amgrà axkrunēpxi nē hkôt mytwrȳ kēp 6. Jakamã e. Pija py nē ma mē hwȳr wrȳ nē ixkreta o mīdi. Anē.

⁴Wa pijakrut wa kot Tĩrtũm nhỹ hã kapēr jarēnh o wa pa xwȳnhhta wa. Na htem wa kot amnhĩ nhĩpêx ã wa harēnh ma nē mēmo pī hpār pê oriwēhti kot tanhmã amnhĩ nhĩpêx toja mã hamaxpēr kurê kumrēx. Nē amnepēm Tĩrtũm nhỹ hã kapēr o pa xwȳnh pê Jakaris kot kanê hpôk xãmta mã mããnēn hamaxpēr. Oriwēhti xôja htwȳm rax kumrēx nhũm htem htwȳm opôj nē ho kanê ho nȳt nē hpôk nē kȳx pê unhwȳ nhũm mē piitã hirã kamã rĩt mex o ri mra. Nē kanê hpôk mexja te kot Tĩrtũm kapēr pyræk. Nē kanê xãm xàja te kot Tĩrtũm nhỹ hã kapēr jarēnh o wa pa xwȳnhhta wa uræk. Nē oriwēhtija haxwȳja te kot wa uræk. Ra Tĩrtũm Karō kot wa hkarō mã àr jakamã na hte wa hprĩ hã mē kãm Tĩrtũm kapēr jarēnh o pa nhũm mē kot mar xwȳnhjaja te kanê nhĩrã kamã ri rĩt mex nē ri pa pyrà nē hprĩ hã mar tȳx nē.

⁵Tã koja mēhō tanhmã wa hipêx to kaxyw wa hwȳr tē nhũm wa hakwa rũm kuwy hpôk kato nē kot tanhmã wa ho mã xwȳnhhta o hxēt o kupĩ.

⁶Ně koja wa Tirtūm xàhpumunh tỳx xà ho tanhmã ri mẽ hã mẽmoj nhĩpêx to pẽ mẽ kãm kapêr jarênh o ri mẽ hkôt pa. Jao tanhmã na hto nhũm mẽ hã wryk kêt ry nẽ. Rỳ tanhmã mẽ kêp gô hto nhũm mẽ hkamrô hã mẽ kêp amnhĩ jahkre. Koja wa ã Tirtūm nhỹ hã mẽ kêp mẽmoj nhĩpêx anhỹr ho wa pa. Nẽ xatã wa kãm hprãm xà hkôt tanhmã mẽmoj tomnu hto.

⁷Nẽ mẽ kãm kapêr o pa pẽ ã mẽ hipêx anhỹr o wa hã amgrà axkrunêpxi nẽ hkôt mytwrỳ kêp 6 nẽ rĩ kormã ho hapêx. Hãmri nhũm ahkre xupỳm rũm Satanasti nhõ kôwenatôja kato nẽ ma wa hwỳr tẽ nẽ nhỹri pry kahti ri wa unê nẽ wa kupĩ nhũm wa pry kamã ty nẽ nõ.

⁸Hãmri nhũm mẽ wa haxàr kêt nẽ nhũm wa arĩ pry kamã nõ. Krĩ kapem na prem pĩ kahpa hã Jejus nhõ nẽ kupĩ. Krĩ nhõ xwỳnhjaja mẽ kot amnhĩ tomnuj tỳx xwỳnh na mẽ. Te ho amnepêm krĩ pẽ Sotõ mẽ pika pẽ Ejit kamã mẽ kot amnhĩ tomnuj xwỳnhjê kot amnhĩ nhĩpêx pyræk.

⁹Jakamã nhũm mẽ kot wa haxàr nê axpên kurê nhũm wa pry kamã arĩ ty nẽ nõ nhũm mẽ piitã wa hwỳr mra nẽ wa omu. Nẽ ahpỹnhã krĩ piitã hkôt mẽ pa xwỳnhjaja tanhmã amnhĩ to nẽ ja hã wa omu. Ahpỹnhã ri pika piitã hkôt mẽ urojaja. Nẽ ahpỹnhã ri mẽ kapêr xwỳnh piitã. Hãmri arĩ ahpỹnhã mẽ õ krĩ kamã pa htã tanhmã amnhĩ to nẽ wa htyk ã wa omunh ã hã apkati axkrunêpxi nẽ hkôt hã myt apha.

¹⁰Koja mẽ wa htyk ã wa omu hãmri nẽ hkĩnh nẽ. Nẽ hkĩnh xàj axpên mã hkĩnh xà nhõr o pa. Wa kot kormã htĩr ri tanhmã mẽ homnuj to ho ri mẽ hkôt paja mã hamaxpêr nẽ wa htyk ã wa omu nẽ hkĩnh tỳx nẽ.

¹¹Tã koja wa htyk ã apkati axkrunêpxi nẽ hkôt hã myt apha hãmri nhũm Tirtūm wa kamã htyyxà rẽ nẽ akupỹm wa ho wa htĩr nhũm wa kànhmã xa nẽ ri mra. Hãmri nhũm mẽ kot wa omunh xwỳnhjaja tee ri hã wa omu nẽ kãm wa uma htỳx kumrêx. ãm kãm wa uma ho kãm wa uma.

¹²Hãmri nhũm kaxkwa kamã mẽhõja wa kãm kapêr nẽ wa kãm: —E war amnẽ mẽ ixwỳr war api. Anẽ. Hãmri nhũm wa kuma nẽ ma kakrã kamã àpir o mõ. Nhũm mẽ kãm wa hkurê xwỳnhjaja tee ri wa àpir ã wa omu.

¹³Hāmri nhūm pika htertēt tỳx nē. Nē krī kamā ixkre ohtô nē grành pa nē mẽ hkwỳ nhīmex rax nē nhūm mẽ ohtô rax kumrēx nē axkaprã. Mẽ kệp 7.000 nē pikaprār pa. Hāmri nhūm arĩ mẽ htĩr nē ri mẽ pa xwỳnhjaja tee ri mẽ omu nē kãm ma xàj htertēt tỳx nē axpēn mã: —Kwa Tĩrtũm mãn ã mẽ panhĩpêx anē. Hihtỳx o hihtỳx jakamã kaxkwa rũm ã mẽ panhĩpêx anē pu mẽ pahpiitã pano ho ixkre pigrành ã omu. Anē.

¹⁴E na ra amnhĩ xà htỳx kamã hamak xàja hamēxkrut nē hapêx. Tã no ãm arĩ mẽ kaxyw pyxi nē arĩk.

Mẽ kot pifti kot hitep kakôr ã harēnh

Apokarip 4.8; 5.9-14; 7.9-12; 14.2-5; 15.3-4; 19.1-2

¹⁵Tã nhūm Tĩrtũm kapēr o wrỳk xwỳnh kot hitepja ã pifti kakô nhūm kaxkwa kamã mẽ pa xwỳnhjaja kàx pê kapēr o: E ãm hāmri. Na ra Mẽpahpãm Maati mẽ Jesus Krisja wa kệp krī piitã hkôt mẽ piitã mẽ ã Pahihti na wa. Kojã Mẽpahpãm Maati kệp Pahi Maati rãhã nē pa ho pa xwỳnh. Anē.

¹⁶Hāmri nhūm mẽ àptàr tũm pê 24jaja. Tĩrtũm kot mẽ pahto amnhĩptàr o hkrĩ xà mã hipôk nē mẽ hkrĩ xwỳnhjaja. Hāmri ã mẽ kapēr anhỹrja ma nē Tĩrtũm ã hpijaàm kaxyw hpar pê rôrôk pa nē htũ mỳr pê hikwỹ. Hāmri nē kãm mex o mex ã harē nē kãm:

¹⁷Pa Pahi Maati Tĩrtũm. Nà ãm hāmri mẽ ixrom axàhpumunh o axàhpumunh nē axihtỳx o axihtỳx. Amnepê mã kormã mẽmoj kêt ri na ka pre arãhã apa ho apa. Tã arĩ arãhã apa ho apa. ãm hāmri apê mẽ ixpiitã mẽ ixto amnhĩptàr xwỳnh. Nà ãm hāmri amex o amex.

¹⁸Kot kaj tokyx mẽ piitã tanhmã mẽ kot amnhĩ nhĩpêx to ho pa hã mẽ omunh xà hkôt tanhmã mẽ harēnh to. Nē ra mẽ htyk xwỳnhjaja kot kaj mẽ piitã akupỹm mẽ ho mẽ htĩr pa nhūm mẽ pika rũm hapôx pa nē ma mra nē arĩ mẽ htĩr xwỳnhjê nhĩhkô hã akutã hkrĩ pa. Ka mẽ piitã mẽ omu nē tanhmã mẽ kot amnhĩ nhĩpêx to ho pa hã mẽ omunh hkôt tanhmã mẽ harēnh to. Mẽ kot amnhĩ tomnuj xwỳnhjaja kot kaj ma mẽ kot amnhĩ xà htỳx kamã hamak o pa htũm xà hwỳr amnhĩ nē mẽ arē nhūm mẽ ma hwỳr hapêx. Hāmri nē

tee ri amnhĩ kukamã hamaxpër nẽ gryk tỳx kumrẽx. Ka hpãnhã mẽ kot akõt amnhĩ xunhwỳr nẽ akapër kõt amnhĩ nhĩpêx o mẽ pa xwỳnh piitã mẽ omu nẽ tanhmã mẽ ho mex to. Mẽ kot amnhĩ to rũnh xwỳnhjaja nẽ mẽ kot amnhĩ to hkryre xwỳnhjaja. Nẽ amnepêm mẽ kot anhỹ hã mẽ kapër o mẽ pa xwỳnhjaja. Akrajê piitã kot atã hpijaàm xwỳnhjaja kot kaj kormã mẽ htĩr ri tanhmã amnhĩ to mex hã mẽ omunh xà hkõt tanhmã mẽ ho mex to. ã kot kaj tokyx mẽ piitã ahpỹnhã mẽ omunh xà hkõt mẽ hipêx anẽ. Anẽ.

¹⁹Hãmri nhũm kaxkwa kamã Tĩrtũm nhõrkwỹ hã hakwakre kahê xà amnhĩ mẽ pa kamã ôr o mês kunĩhtita pumu. Pu nhũm na hkatõtõt nẽ haxênh nẽ hkrakrak nẽ na mê te kot jêr krã hakotre pyræk xwỳnhja pikap rôrøk rax nẽ. Nẽ pika htertet tỳx o htertet tỳx pa arĩ omunh o xa.

Apokarip 12

Mẽhõ ni mẽ kagãmnuti wa harênh

¹Tã pa axte mẽmoj pumu. Kaxkwa kamã aa mẽ pahte mẽmoj pumunh kêt xwỳnhja pa omu. Nhũm mẽhõ nija xê te myt no mã hirã htỳx pyræk. Nẽ hpar nhõkwa kamã mytwrỳre ajêt. Nẽ kanhêti ho 12 o mẽ ahkà tu nẽ o xa.

²Na ra htujarô nẽ hpijagri kaxyw õhy xà nẽ amnhĩ kamnhêr o xa.

³Tã pa axte mẽmoj pumu. Aa mẽ pahte mẽmoj ã kot anhỹr pumunh kêt xwỳnh õja pa omu. Kagãmnuti nom ãm axtem hkà kamrêk tỳx kumrẽx. Nẽ rax kumrẽx. Nẽ hkrã kêp 7. Nẽ hkrã piitã kamã ôr o pahi hã mẽ ahkà htu nẽ o nõ. Nẽ hkrã kamã pàr kêp 10.

⁴Tã nhũm hamy ho apêr o kaxkwa kamã kanhêti ho ohtô nẽ pikap kurẽ. Hãmri nẽ õhy xà nẽ amnhĩ kamnhêr o ãm xwỳnhhta wỳr tẽ nẽ hkra kator nhũm kot kêp krêr kaxyw kutã hamãr o nõ.

⁵Hãmri nhũm hkra kato nẽ myre. Hihtỳx o hihtỳx ã kot pika piitã hkõt mẽ piitã mẽ ho amnhĩptàr mã xwỳnh na pre. Nhũm kagãmnutija kot kêp utàr nẽ hkrêr mã tã nhũm Tĩrtũm kapër o wrỳk xwỳnhjê hõja hwỳr wrỳ nẽ kêp kumỳ nẽ ma Tĩrtũm wỳr kaxkwa kamã kot mẽ pahto amnhĩptàr ã hkrĩ xà maatija wỳr ho api.

⁶Hāmri nhūm kagāmnuti tee ri ma kot kêp o mōr ã omu nē hpānhā nita o apkjê nē kot tanhmā ho kaxyw nhūm amnhĩ tã omu nē umaj hprōt nē ma tē nē nhỹri kapôt ã amūxu. Ra Tĩrtūm kot hkukamā kām hpimxur xà nhĩpêx xà hwỳr hprōt nē ma tē nē kamā kêp amūxu. Nhūm Tĩrtūmja nē kagā pumunh mex nhūm kêp hpimxur mex ã amgrà axkrunêpxi nē hkôt hã mytwrỳ kêp 6.

Mē kot kaxkwa kamā mēkarōmnuti kurê kaxàr ã mē harēnh

⁷Tã nhūm mē ra kaxkwa kamā kurê kaxàr kaxyw. Kagāmnuti mē hkwyjaja nhūm mē ra Tĩrtūm kurê kaxàr kaxyw kutã amnhĩ xunhwỳ. Jakamā nhūm Tĩrtūm kapēr o mē wrỳk xwỳnhjê hkrãhtūm Mikewja ma mē hwỳr amnhĩ kôt hkwyjê o mra nē mē pijapu ho kuhê.

⁸Hāmri nhūm kagāmnuti tee mē kutã amnhĩ to htỳx kaprỳ nhūm Tĩrtūm kapēr o mē wrỳk xwỳnhjaja amnhĩ nē mē ho axtem nē kaxkwa rūm mē kator o mē kator.

⁹Satanasti pē kagāmnutita kagā kot ni kator ewa mã hêx xwỳnh na pre. Nē hêx rom tanhmā hêx to ho pa xwỳnh. Jakamā nhūm Mikew mē hkwyjaja hkwyjê mē mē ho hpimràatã amnhĩ nē pikap mē rēnh pa.

¹⁰Hāmri nhūm kaxkwa kamā mēhōja axte kàxpê kapēr nē kapēr o: E ãm hāmri. Na ra Tĩrtūm hihtỳx o hihtỳx o mē panê mēmoj punuj piitã ho hapêx par kumrêx. Na pre hte Satanasti pē mēkarōmnutija xatã hwỳr mra nē kām tanhmā Jejus kwỳjê ho kapēr punuj to ho pa. Tã koja axte mē ho kapēr kêt kumrêx. Ra Tĩrtūm kot amnhĩ nē kator o kator nhūm ra ma mōr o mōr kēnã. Koja Tĩrtūm pika piitã hkôt mē ho amnhĩptàr xwỳnhjê japôx pa nē hpānhā mē kaxyw Kra Krisja xām nhūm pika piitã hkôt mē ho amnhĩptàr rãhã ho pa. Nà ãm hāmri. Ja mex o mex.

¹¹Na pre Jejus kôt mē pahtō nē mē pahtōxjaja mēkarōmnuti kutã amnhĩ to htỳx nē pa. No ãm amnhĩ nhỹ hã ã kutã amnhĩ nhĩpêx anhỹr kêt. Mē pahte amnhĩ tomnuj pãnhã amnhĩrer xwỳnhhta na pre ty nē hkamrô ho mē kuhō nē mē nē mē kot amnhĩ tomnuj o hapêx. Jakamā nhūm prem kukwak ri Satanasti kutã amnhĩ to htỳx rãhã pa. Nhūm mē kot Jejus ã mē himex par

kaxyw tã nhũm mẽ kãm htyk pyma hkêt nẽ. ãm Jejus kôt arĩ amnhĩ to htỳx nẽ mẽ hkôt pa rãhã nẽ. Jao arĩ mẽ kãm Jejus kot mẽ panê tanhmã amnhĩ nhĩpêx to hã harênh o ri mẽ hkôt pa.

¹²Tã Tĩrtũm ra kot mẽ panê mẽmoj punuj o hapêx par jakamã kwa kaxkwa kamã mẽ apa xwỳnhjaja kêr ka mẽ akĩnh nẽ apa. Nom gô xujanãr kãm nẽ pika kamã mẽ pa xwỳnhjaja hêxta waa nẽ. Koja mẽ mex kêt nẽ. Nẽ ra Mikew mẽ hkwỳjaja kot amnhĩ nê kaxkwa rũm mẽkarõmnuti mẽ hkwỳjê kator nẽ pikap mẽ rênh par jakamã nhũm Satanastija gryk tỳx kumrêx. Tĩrtũm kot ma mẽ kot amnhĩ xà htỳx kamã hamak o pa tũm xàta wỳr mẽnh xà hã arĩgro hwỳr amgrà grêre nhũm tee ri amnhĩ kukamã hamaxpêr nẽ gryk tỳx o gryk tỳx. Anẽ.

¹³Hãmri nhũm kagãmnutija mẽ kot amnhĩ nê kaxkwa rũm kator ã amnhĩ pumu nẽ gryk tỳx nẽ. Nẽ gryk xàj ma akupỹm ni kot hkra myre ho pijagri xwỳnhta wỳr tẽ nẽ tanhmã ho kaxyw hkôt ho krihkrit.

¹⁴⁻¹⁶Hãmri nhũm Tĩrtũm kapêr o mẽ wrỳk xwỳnhjê hõja omu nẽ nija mã àanhàhti jara gõ. Kot kagãmnuti pê ho htor nẽ ma nhỹri hpimxur xà wỳr htêm kaxyw. Nẽ kormã htor kaxyw nhũm kagãmnuti omu nẽ kot gô ho hanhir kaxyw hkôt hakwa rũm gô kapĩ nhũm hpikapĩr rax kumrêx. Te pyhti hprõt tỳx pyræk. Hãmri nhũm Tĩrtũm omu nẽ nija nê tanhmã pika hto nhũm kãm axkjê nhũm gô hprõt nẽ kamã pikapĩr pa. Jakamã nhũm mex pê àanhàhti jara ho to nẽ ma kapôt ã pimxur xà hwỳr ma tẽ. Nẽ kamã pa hã amgrà axkrunêpxi nẽ hkôt mytwrỳ kêp 6 nhũm prem hamãr mex rãhã ho pa.

¹⁷Hãmri nhũm kagãmnuti tee ri kãm hpĩr prãm kaprỳ nẽ gryk tỳx kumrêx. Hãmri nẽ ma ni hkwỳjê hwỳr mõ. Mẽ kot Tĩrtũm mẽ Jejus wa hkôt amnhĩ nhĩpêx o mẽ pa xwỳnhjê hwỳr tanhmã mẽ homnuj to kaxyw ma mẽ hwỳr mõ. Hãmri nẽ tanhmã kot mẽ ho kaxyw gô xujanãr mỳ ri nõ.

Apokarip 13

Satanasti nhõ kôwenatõ wa kot gô xujanãr rũm kator ã wa harênh

Sikũn Tesarõn 2.3-5

¹Tã pa axte mẽmoj pumu. Nhũm gô xujanãr rũm Satanasti nhõ kôwenatôjê hõja te mrymnuti pyrã nẽ àpir o mõ. Kagãmnuti pyrã nẽ hkrã kêp 7. Nẽ uràk nẽ hpàr kêp 10. Nẽ hpàr piitã kamã pahi hã mẽ ahkà. Nẽ ahkà piitã hã axtem tanhmã Tĩrtũm o kapẽr punuj to nẽ tanhmã haprỳ hto hã kagàja hikwỳ.

²Nẽ hkà te kêp ropkrorti kà pyràk. Nẽ hakwa te kot rêãwti jakwa pyràk. Nẽ ìhkra te kot pàati nhĩhkra pyràk. Jakamã na pre kagãmnuti nhỹ hã hihtỳx o kêp pahi hã pika nhõ xwỳnhjê ho amnhĩptàr o pa.

³Nẽ hkrã hõ te mẽ kot hayr o hpĩr nhũm ra akupỹm htĩr nẽ arĩ hayr xà wakre rã nyw pyràk. Jakamã nhũm pika kamã mẽ pa xwỳnhjaja amnhĩ jaêr pê omu nẽ kamã no pyma nẽ. Hãmri nẽ hkôt amnhĩ nhĩpêx o pa.

⁴Hãmri nẽ kagãmnuti kot tanhmã mrymnuti ho nhũm ÿ hã mẽ ho amnhĩptàr jakamã nhũm mẽ piitã hamẽ wa hã hpijaàm kaxyw wa kãm wa mex o wa mex ã wa harẽnh o pa. Nẽ mrymnuti hã axpẽn mã: —Hêxta waa nẽ. Mẽ pahtõ na mẽ pahte mrymnutita pyrã nẽ ã mẽ pahte amnhĩ nhĩpêx kot anhỹr? Mẽ pahtõ kot pu kutã xa nẽ paxihtỳx o hkurê kapa? Nà amrakati kumrêx. Anẽ.

⁵⁻⁶Hãmri nhũm Satanasti tanhmã mrymnuti ho nhũm kapẽr o ri mẽ hkôt pa nẽ mẽ ho amnhĩptàr o hã amgrà axkrunêpxi nẽ hkôt mytwrỳ kêp 6. No ãm axtem nẽ Tĩrtũm o kapẽr punuj o ri mẽ hkôt pa. Nẽ ri tanhmã haprỳ hto nẽ õ krĩa mex kêt ã harẽnh o ri mẽ hkôt pa.

⁷Hãmri nhũm Satanasti ra kot mẽ hkurê kaxàr kaxyw kãm anẽ nhũm axtem nẽ Tĩrtũm pê hkrajê kutã amnhĩ xãm nẽ mẽ hwỳr hprõt nẽ tanhmã hpijapu hto ho pa nẽ mẽ ho axtem nẽ mẽ ho krihkrit pa nẽ ahpỹnhã ri pika piitã hkôt mẽ uro hkwỳjê ho amnhĩptàr o pa. Nẽ ahpỹnhã mẽ kapẽr xwỳnh piitã mẽ ho amnhĩptà.

⁸Jakamã nhũm mẽ ohtô rax kumrêx nẽ mrymnuti hkôt amnhĩ nhĩpêx. Nẽ kutã hkõn krã ho rôrôk nẽ hkrĩ nẽ kãm mex o mex ã harẽ. No ãm mẽ piitã hkêt. Kot mẽ pahte amnhĩ tomnuj pãnhã amnhĩrer xwỳnh kôt ra mẽ kot amnhĩ xunhwỳr xwỳnhjaja tapxipixjaja na prem hkôt amnhĩ xunhwỳr kêt

ně. Amnepê mã kormã amrakati ri Tirtũm mẽ Jesus wa õ kagà kamã mẽ htĩr tũm nẽ mẽ pa mã xwỳnh nhĩxi xwỳnh pixjaja na prem mrymnuti pumu nẽ hkwyjê rom hprĩ hã kot amnhĩ nhĩpêx ã omunh kurê kumrêx nẽ hkôt amnhĩ nhĩpêx kêt nẽ.

⁹E ka mẽ atõ axumar kaxyw ajamak kre hã kot kaj ixujarênh piitã ama nẽ kãm ajamaxpêr tỳx rãhã ho apa.

¹⁰Jakamã kwa Tirtũm kôt ixkwỳjaja. Kwãr mẽ mãmrĩ mẽ apynê nẽ mẽ ajagjê. Nẽ kwãr mẽ mãmrĩ wapo ho mẽ ajayr o mẽ apa. Nom kêr ka mẽ umaj ixkaga hkêt nẽ. Ixkaga hkêt o ixkaga hkêt. Mẽ ãm ixkôt pix mã amnhĩ nhĩpêx o ri apa rãhã ty.

Pika rũm mrymnuti hõ kator ã harênh

Makre 13.22

¹¹Tã pa mrymnuti hõ pumu. Nom wanta pyrã nẽ gô xujanãr rũm kator kêt axtem pika rũm kato. Nẽ ôwêhti hkrare pyrã nẽ hpàr pijakrutre. Nẽ te ho kagãmnuti kapêr tỳx pyrã nẽ kapêr tỳx kumrêx o pa.

¹²Gô xujanãr rũm mrymnuti xàpir xwỳnhhta nhỹ hã pika nhõ xwỳnhjê mã kapêr tỳx nẽ mẽ kãm: —E pika piitã hkôt mẽ apa xwỳnhjaja mẽ inhma. Kêr ka mẽ kot hkrã hõ jayr o hpĩr nhũm akupỹm htĩr xwỳnhhta kôt pix mã amnhĩ nhĩpêx rãhã ho ri apa. Nẽ kãm mex o mex ã harênh rãhã nẽ. Anhỹr o mẽ kãm kapêr.

¹³Hãmri nẽ Satanasti nhỹ hã mẽ kãm aa mẽ kot mẽmoj pumunh kêt kwỳ ho anhỹr o pa. Jao kaxkwa rũm tanhmã mẽ kãm kuwy ho wrỳk to nhũm pikap rôrôk nhũm mẽ amnhĩ jaêr pê omu nẽ kamã no pyrna nẽ.

¹⁴ã ri mẽ noo mã mẽ kãm amnhĩ nhĩpêx anhỹr o ri mẽ hkôt pa. Gô xujanãr rũm mrymnutija noo mã ã hêx rom amnhĩ nhĩpêx anhỹr o mẽ no kupyra o pa nhũm mẽ omu nẽ hkôt amnhĩ nhĩpêx. Hãmri nhũm mẽ kãm mẽmoj tã karõ nẽ mẽ kãm: —E wam mrymnutita. Mẽ kot hkrã hõ jayr o hpĩr nhũm akupỹm htĩr xwỳnhhta kêr ka mẽ kãm hkarõ nhĩpêx nẽ ho mẽ anhõ sãnti. Kê mẽ piitã hwỳr mra nẽ kutã hkõn krã ho rôrôk nẽ hkrĩ nẽ amnhĩ to kuwy nẽ kãm mex o mex ã harê. Anhỹr o mẽ kãm hã karõ.

¹⁵Hāmri nhũm mẽ kuma nẽ mar xà hkôt hipêx nẽ ãm nhũm xa. Hāmri nhũm mrymnuti kot hitepta omu nẽ hwỳr tẽ nẽ tanhmã ho nhũm ra kapêr nẽ mẽ kãm: —E kêr ka mẽ kot inhmex ã ijarênh kêt xwỳnhjê pynê nẽ mẽ himex pa. Anẽ.

¹⁶Hāmri nhũm pika rũm mrymnuti kator xwỳnhhta haxwỳja mẽ kãm kapêr nẽ mẽ kãm: —E koja ixkwỳjaja inhỹ hã mẽ apiitã mẽ apê ixkwỳ hã mẽ akagà. Mẽ ate amnhĩ to rũnh xwỳnhjaja nẽ mẽ ate amnhĩ to hkryre xwỳnhjaja. Nẽ amarĩ mẽ kãm mẽ axàpênh xwỳnhjaja nẽ amnhĩ mã mẽ axàpênh xwỳnhjaja. Nẽ mẽ akàxpore rũnh xwỳnhjaja nẽ mẽ apê amrakati xwỳnhjaja. Kojã mẽ apiitã mẽ akagà hpa. Mẽ akwỳ nhõkrã kagà nẽ mẽ akwỳ xupôk rũm mẽ anhĩhkra katut kagà.

¹⁷—Gô xujanār rũm mrymnutita nhĩxi kot paj mẽ atã hipêx. Rỳ hixi hã nũm nhĩpêx. Hāmri ka mẽ axàpkur xà japrôr kaxyw nhỹhỹm mra nhũm mẽ atã hixita pumu nẽ rĩ kormã mẽ amã mẽmoj kwỳ ho wẽnê ka mẽ amnhĩm haprô nẽ ho axàpkur o ri apa. Nẽ mẽ ate mẽmoj to wẽnê xwỳnhjaja koja mẽ apê mẽmoj japrôr kaxyw mẽ awỳr mra ka mẽ tee ri nhỹhỹnh mẽ hã hixi japêr hāmri nẽ mẽ kãm mẽmoj to wẽnê hkêt nẽ. ãm nhỹhỹnh mẽ atã hixi hã kagàta pumunh pix kukwak ri kot kaj mẽ awjaprô rỳ mẽmoj to wẽnê. Anẽ.

¹⁸E kwa kêr ka mẽ ixte mẽmoj pumunh nẽ mẽ amã hã kagàta pumu nẽ ama nẽ kãm ajamaxpêr tỳx o apa. Mrymnutita nhĩxi na kêp nũm. Nũmja kêp 666. E kaj mẽ akrã hi mex xwỳnhjaja kot kaj mẽ aprĩ hã ja mar tỳx kurê kumrêx.

Apokarip 14

Tĩrtũm mex ã mẽ grer

Apokarip 7.1-8

¹Tã pa axte mẽmoj pumu. Nhũm mẽ pahte amnhĩ tomnuj pãnhã amnhĩrer xwỳnhja hixêt pê Siãwja nhĩmõk ã xa. Nẽ puhã mẽ ohtô rax kumrêx nẽ kuhê. Mẽ ohtô ho mẽ ohtô. Piitã kamã mẽ kêp 144.000. Nẽ piitã òkrã hã mẽ pahte amnhĩ tomnuj pãnhã amnhĩrer xwỳnh mẽ Hipêêxà wa hixi jaxwỳr pa mẽ omu.

²Nhũm mẽ kaxkwa kamã grer o kuhê. Mẽ grerja mex o mex. Te kot gô hprôt tỳx hkoko htỳx pyræk. Nẽ te na katõtök tỳx pyræk. Nẽ te wiorãw môr xwỳnhjaja kot hkakrênh mex pyræk pa mẽ mar o xa.

³Nẽ mẽ grer xwỳnhjaja. Jejus puhã mẽ ohtô rax kumrêx nẽ mẽ kuhê xwỳnhjaja na prem Tĩrtũm kot mẽ ho amnhĩptàr ã hkrĩ xàta kuri grer o kuhê. Nẽ mẽmoj tĩr pê kwat xwỳnhjê mẽ mẽ àptàr tũm pê 24jê kuri grer o kuhê. Mẽ grer nyw o gre. ãm mẽ tapxipixjaja mẽ kot mẽ grer nywja mar. Ra mẽ kêp Tĩrtũm kra hã mẽ kot mẽ ôkrã hã Tĩrtũm mẽ Kra Jejus wa hixi ã kagà nhũm Tĩrtũm kot ra mrymnuti mẽ hõta wa kêp mẽ utàr nẽ amnhĩ wỳr mẽ ho àpir xwỳnh na pre mẽ. ãm mẽ tapxipixjaja mẽ grer nywja ma nẽ wa kãm ho grer o kuhê.

⁴⁻⁵Na prem tãm amnhĩ nhĩpêx nẽ Tĩrtũm kôt amnhĩ nhĩpêx rãhã ho pa. Te mẽ kot amnhĩ prõ pix tãnopxar rãhã ho pata pyræk. Nẽ ri tanhmã hêx to rỳ tanhmã ri amnhĩ tomnuj to ho pa hkêt nẽ. ãm tãm ri amnhĩ nhĩpêx mex o pa. Mẽ kêp Tĩrtũm mẽ mẽ pahte amnhĩ tomnuj pãnhã amnhĩrer xwỳnh kwỳ jakamã na prem mẽ pahte amnhĩ tomnuj pãnhã amnhĩrer xwỳnhhta kôt pix mã amnhĩ nhĩpêx o pa. Jakamã na prem mrymnuti kutã rôrôk nẽ kãm mex o mex ã harênh kêt nẽ. Tã mẽ kumrêxjaja Tĩrtũm mẽ Kra wa kuri wa kãm grer o kuhê.

Tĩrtũm kapêr o wrỳk xwỳnh pijakrunêpxi jarênh

⁶Tã pa axte Tĩrtũm kapêr o wrỳk xwỳnhjê hõ pumu nhũm kỳx pê ri htor o pa. Ahpỹnhã ri pika piitã hkôt mẽ uro hkwyjê hkôt. Na ahpỹnhã ri mẽ kapêr xwỳnhjê piitã mẽ hkôt mẽ kãm Tĩrtũm kot tanhmã mẽ hipêx to hã harênh kaxyw. Ahpỹnhã mẽ kapêr xwỳnh piitã mẽ kãm harênh o pa. Nẽ htor o pa pê kỳx pê mẽ kãm kapêr nẽ mẽ kãm:

⁷“E na ra Tĩrtũm mẽ ate amnhĩ tomnuj mỳrapê tanhmã mẽ ato kaxyw. Jakamã kwa mẽ tokyx hã apijaàm kaxyw akõn krã ho arôrôk nẽ akrĩ nẽ kãm mex o mex ã harê. Kêp mẽmoj piitã ho kator xwỳnh na. Na pre kaxkwa ho kato nẽ pika ho kato nẽ gô xujanãr o kato nẽ hino ho kato nẽ mẽmoj piitã

ho kator pa. Jakamã kwa kêr ka mẽ tapxipix ã mãn apijaàm nẽ kãm mex o mex hã harẽnh rãhã ho apa.” Anhỹr o mẽ kãm kapẽr.

⁸Hãmri nhũm hõja wamta kôt tẽ nẽ uràk nẽ kỳx pẽ mẽ kãm kapẽr o: —Koja Tĩrtũm tokyx Papirõn grành pa. Na hte krĩ nhõ xwỳnhjaja amnhĩ tomnuj pix rãhã ho pa. Mẽ kot amnhĩ nhĩpêx te mẽ kot kagôxỳhti ho hkõm nẽ amnhĩ mẽ mẽ piitã mẽ kãm õr nẽ ho mẽ ho pipãnh pyràk. Na htem mënijê piitã ho amnhĩkati o pa. Nẽ amnhĩ kwỳjê pẽ mẽ hprõ ho amnhĩkati. Nẽ amnhĩ mẽ pika piitã hkôt mẽ pa xwỳnhjê mã anhỹr o pa. Mẽ kot mẽ uràk nẽ ã amnhĩ nhĩpêx anhỹr o pa kaxyw mẽ kãm anhỹr o pa. Ja mỳrapê na ra Tĩrtũm kot tanhmã mẽ ho kaxyw mẽ hã amnhĩ jarẽ. Anẽ.

⁹Tã nhũm wa hkôt hõja tẽ nẽ wa uràk nẽ kàx pẽ pika nhõ xwỳnhjê mã kapẽr nẽ mẽ kãm: —E mẽ ate mrymnuti kutã akõn krã ho arôrõk nẽ akrĩ nẽ kãm mex ã harẽnh xwỳnhjaja. Nẽ mẽ ate karõ nhĩpêx nẽ kutã akõn krã ho akrĩ nẽ kãm mex ã harẽnh xwỳnhjaja. Nẽ mẽ anhõkrã nẽ mẽ anhĩkra hã hixi hã kagà xwỳnhjaja.

¹⁰⁻¹¹—Tĩrtũm na tee ja hã mẽ apumu nẽ mẽ akamã gryk tỳx kumrẽx. Mẽ ate kapẽr kuhpa hã mrymnuti hkôt amnhĩ xunhwỳr jakamã nhũm mẽ akamã gryk tỳx o mẽ akamã gryk tỳx. Jakamã koja kuwy hpòk rãhã ho rãhã xwỳnhhta kamã mẽ arẽnh pa ka mẽ amnhĩ xà htỳx kamã ajamak rãhã apa ho apa. Koja kuwy hpòkja aa hapêx kêt nẽ kurũm kàx mã hkũm àpir o pa rãhã nẽ. Koja ã mẽ ate amnhĩ tomnuj o mẽ apa xwỳnhjê nhĩpêx anẽ ka mẽ kamã apa ho apa nẽ aa kurũm ajapôx kêt nẽ kamã amnhĩ xà htỳx kãm ajamak rãhã apa ho apa. Arĩgro hãn kamàt kãm arĩ ã amnhĩ nhĩpêx anhỹr rãhã apa ho apa. Mẽ ate gôj rũm mrymnuti mẽ hkarõ ho sãnti wa kutã akõn krã ho arôrõk nẽ akrĩ nẽ wa kãm wa mex ã wa harẽnhja mỳrapê kot kaj mẽ ã amnhĩ nhĩpêx anẽ. Kot mẽ pahte amnhĩ tomnuj pãnhã amnhĩrer xwỳnh mẽ Tĩrtũm kapẽr o mẽ wrỳk xwỳnhjê noo mã kot kaj mẽ ã amnhĩ nhĩpêx anhỹr o apa.

¹²Anhỹr o mẽ kãm kapẽr jakamã kwa kêr pu mẽ pahte Tĩrtũm kôt amnhĩ xunhwỳr xwỳnhjaja mẽ hkukamã mẽ harẽnhja ma nẽ Tĩrtũm kapẽr kôt pix mã amnhĩ nhĩpêx rãhã ho ri papa. Mẽ kot tanhmã hã mẽ pahto htã pu mẽ

hkaga hkêt nê amnhĩ kaxyw Jejus kôt pajamxpêr tỳx rãhã nê. Hãmri nê nhỹrmã mẽ kurom ma õ krĩ hwỳr api nê kamã pamex kumrêx nê papa ho papa.

Mẽ kêp Jejus kwỳ hã mẽ htyk xwỳnhjê jarênh

Wam Tesarôn 4.16

13Tã nhũm kaxkwa kamã mēhōja axte inhmã kapêr nê inhmã: E Juãw. Kêr ka ã akwỳjê mã mẽmoj tã kagà anê nê mẽ kãm hã kagà ho: “E mẽ ate Tĩrtũm kôt ri amnhĩ nhĩpêx xwỳnhjaja. Mẽ kot Tĩrtũm ã mẽ apar nhũm mẽ atyk tã koja amnhĩ tã mẽ ato mex rax kumrêx.” Anhỹr o mẽ kãm hã kagà. Anhỹr o inhmã kapêr. Hãmri nhũm Tĩrtũm Karōja kuma nê kãm: —Nà ãm hãmri na ka ã mẽ harênh anê. Ra Tĩrtũm kot amnhĩ tã mẽ omunh rãhã ho pa. Mẽ kot kôt pix mã amnhĩ nhĩpêx o pa pê mẽ kãm mẽ hkurê xwỳnhjê kutã amnhĩ to htỳx rãhã htykja nhũm Tĩrtũm kot amnhĩ tã mẽ omunh mex. Koja mẽ ho mex kumrêx. Mẽ kot Jejus ã mẽ hpar tã koja mẽ ho mex rax nê nhũm mẽ kuri mex rãhã nê pa ho pa nhũm mēhō axte tanhmã mẽ ho hkêt nê. Anê.

Tĩrtũm kot tanhmã mẽ kãm hkĩnh xwỳnhjê nhĩpêx to

14Tã pa axte mẽmoj pumu. Kaxkwa kamã kakrã jakajre pumu. Nê kamã mēhōj te panhĩ pyrã nê nhỹ. Nhũm ôr o pahi hã mẽ ahkà htu nê kuteere xwagixre py nê o nhỹ.

15Hãmri nhũm kaxkwa kamã Tĩrtũm kapêr o mẽ wrỳk xwỳnhjê hōja Tĩrtũm mã amnhĩ jarênh xà hã ixkre rũm kato nê kakrã jaka kamã ỳr xwỳnhta mã kapêr. Kàx pê kãm kapêr nê kãm: —E pika nhõ xwỳnhjaja te mẽ hpur kãm mẽmo hy ra hkamrêk nê hikênh mã mex pyræk. Jakamã anhõ kuteere ata py nê ma mẽ hkôt tanhmã ri mẽ ho ho ri mẽ hkôt apa. Te mẽ kot mẽmo hy nhĩkênh o ri pa pyræk o mẽ hipêx nê ma ho mẽ himex o ri apa. Anê.

16Hãmri nhũm kuma nê pika piitã mỳri õ kuteere ho apê nê te mẽmo hy jakàr pyræk o mẽ hipêx.

17Hãmri nhũm axte Tĩrtũm mã amnhĩ jarênh xà hã ixkre rũm kapêr o mẽ wrỳkjê hōja kato. ĩhkra kamã kuteere xwa gixre py nê o xa.

¹⁸Hāmri nhūm axte hōja ixkre rūm kê hkôt kato nē hkukamā kator xwỳnhta mā kapēr. Kàx pê kām kapēr nē kām: —E na ra Tĩrtũm tanhmā mẽ kot amnhĩ tomnuj to hā tanhmā mẽ hipêx to kaxyw. Te mẽ kêp mẽ hpur kām mẽmo xō pê uwa ra hkamrêk nē rênh mā tām pyræk. Jakamā ma pika hwỳr mẽ hwỳr wrỳ nē mẽ hkôt ri anhō kuteere ho mẽ himex o ri apa. Anē.

¹⁹Hāmri nhūm kuma nē ma pika hwỳr wrỳ nē mẽ hipêx o te mẽ kot uwa xō rênh nē prēs kām hkapĩr nē kagô janênh pyrà nē mẽ hkôt ri kuteere ho mẽ hpar o pa. Tĩrtũm ra mẽ kamā gryk tỳx o mẽ kamā gryk tỳx jakamā nhūm ã mẽ hkôt mẽ hipêx anhỹr o ri pa.

²⁰Jakamā nhūm mẽ hkamrô hpikapĩr rax kumrêx o uwa kagô jakre. Te ho pyhti hprôt o nōr pyræk. Jao upỳm o 2 met nē hkôt ho mēj met. Nom hprôt xà hkôt ry rax o ry rax. Ho 300 kirôm. Nhūm ã mẽ kamrô hprôt rax anē.

Apokarip 15

Tĩrtũm mex ã mẽ greer

¹Tā pa axte kaxkwa kamā mẽmoj pumu. Hāmri nē amnhĩ jaêr pê omu nē tee ri hkukamā ijamaxpēr. Aa mẽ pahte mẽmoj ã kot anhỹr pumunh kêt xwỳnh pa pre omu. Nhūm Tĩrtũm kapēr o mẽ wrỳk xwỳnh pê 7jaja ahpỹnhã pika hkôt mẽ kot amnhĩ tomnuj xwỳnhjê homnuj kaxyw akuprō nē kuhê. ãm jajê pixjaja koja Tĩrtũm nhỹ hā axte tanhmā mẽ homnuj to nē ho anhỹr pa hāmri nhūm ra ja hapêx o hapêx.

²Jakamā pa axte Tĩrtũm kapem gô rax pumu. Te kot kàx karỳr jaxênh mẽ kuwy hpôk o pihkàr pyræk xwỳnhja hprôt o nō. Nhūm Tĩrtũm kra hkwỳjaja gô mỳ ri ohtô rax kumrêx nē kuhê. Na pre ra mrymnutija tee ri amnhĩ kôt mẽ rênh mā nē tee ri mẽ hā amnhĩ nhĩxi hā kagà hprām kaprỳ nom nhūm mẽ hkaga nē Jejus kôt amnhĩ nhĩpêx rāhã ho pa. Nē mrymnuti karō ho sãnti mā mex ã harênh kêt rāhã ty nē kaxkwa hwỳr api. Jakamā nhūm Tĩrtũm amnhĩ tā mẽ omu nē mẽ kām wiorāwti hkwỳ gō nhūm mẽ piitā hamỳ nē gô rax mỳ ri ho kuhê.

³Hāmri nē Tīrtūm mā tanhmã amnhĩ to ho pa xwýnh pê Mojes mẽ mẽ pahte amnhĩ tomnuj pãnhã amnhĩrer xwýnhhta wa kot Tīrtūm mã greta nhũm mẽ Tīrtūm mã ho grer o kuhê nē grer o: E Pahi Maati Tīrtūm. Na pa mẽ ra inhmex pê awýr ixàpir pa. ãm hāmri na ka hte tanhmã amnhĩ nhĩpêx to ho ri apa. Aa tanhmã axêx to hkêt. Nē mẽ ixrom axihtýx o axihtýx. Nē mẽ ixrom axàhpumunh o axàhpumunh. Jakamã na ka hte mẽ inhmã aa mẽ ixte mẽmoj pumunh kêt kwý ho anhýr o apa. Pika piitã hkôt ahpýnhã mẽ ho amnhĩptàr xwýnhjê nhõ Pahi Maati na ka. Nē ate tãm amnhĩ nhĩpêx xwýnh na ka.

⁴Jakamã na htem piitã atã hpijaàm o pa. Nē amã mẽ kapêr xàptàr pix o amã kapêr. Nē amã amex o amex ã ajarênh rãhã nē. ãm hāmri mẽ ixrom kapxipix amex o amex. Jakamã koja ahpýnhã pika piitã hkôt akrajê piitã ate tãm amnhĩ nhĩpêx nē tãm mẽ piitã tanhmã mẽ harênh to hã ajarênh ma nē awýr mra nē akutã hkõn krã ho rôrôk nē hkrĩ nē amã amex o amex ã ajarê. Anē.

Mẽ homnu xà hã xijere jamýnh xwýnh jarênh

⁵Tã na pa axte mẽmoj pumu. Kaxkwa kamã Tīrtūm nhõrkwý hã hitom xà piitã amnhĩ kahê xà rē nē kuhê pa omu. Nē ixkre kamã õ hitom mex maati haxwýja amnhĩ kahê xà mẽ nē xa.

⁶Hāmri nhũm ixkreja rũm Tīrtūm kapêr o mẽ wrýk xwýnh pê 7jaja hapôj nē kuhê. Mẽ ê hakajre nē hirã htýx kumrêx. Nē mẽ hinô pre xàja ôr pix o. Nē piitã Tīrtūm mã tanhmã kot mẽ homnuj to xà hã xijere pê 7ta jamýnh kaxyw kuhê.

⁷Hāmri nhũm mẽmoj tĩr pê kwatjê ôja mẽ kãm xijere hkwy jamý nē mẽ hwýr o tẽ. Xijere kêp 7 nē piitã ôr o. Nhũm hamý nē Tīrtūm kapêr o mẽ wrýk xwýnhhtajê hwýr o tẽ nē ho mẽ hipêx nhũm mẽ ahpýnhã hamý. Xijere kamã Tīrtūm gryk xà jamý nē o kuhê.

⁸Pu nhũm Tīrtūm rũm kuwy hkũm hapôj. Tīrtūm mex nē hihtýx xwýnhhta rũm hapôx rax o ixkreta kunor pa nhũm mẽ tee ri hwýr gjêx prãm kaprý.

Apokarip 16

Xijere kamã mẽ homnu xà pê 7 jarênh

¹Tã pa arĩ mẽmoj pumu nhũm Tĩrtũm nhõrkwỹ kamã mẽhõja kapẽr o wrỳk xwỳnh pê 7jê mã kàx pê kapẽr nẽ mẽ kãm: —E na pa ra mẽ kot ixkapẽr kwỳm ri amnhĩ nhĩpêx xwỳnhjê pumu nhũm ixpê ja omnuj tỳx o ixpê omnuj tỳx. Jakamã e mẽ anhõ xijereta jamỳ nẽ ma pika hwỳr mẽ hwỳr wrỳ nẽ axpẽn pãnhã mẽ hã xijere kamã mẽ homnu xà kapĩ. E mẽ tokyx ma mẽ hwỳr wrỳ. Anẽ.

²Hãmri nhũm mẽ kuma nẽ axpẽn pãnhã mẽ hwỳr wrỳ. Nhũm wamta kumrẽx pika piitã hkõt mẽ homnu xàta kapĩ. Pu nhũm mẽ kot mrymnuti mẽ õ sãnti wa kãm mex ã harẽnh nẽ amnhĩ tã wa hixi jaxwỳr xwỳnh piitã hkànhy hpa nẽ à htỳx kumrẽx nẽ ri pa.

³Hãmri nhũm wamta kõt hõja õ xijere py nẽ gô xujanãr kãm hkapĩr pa nhũm gô te mẽ htykjê kamrô pyrà nẽ kamã mẽmo mry htyyxà rẽnh xwỳnh piitã pikaprãr pa.

⁴Tã ra xijere kapĩr xwỳnh o axkrut nẽ õ xijere kapĩ hãmri nhũm hkõt hõta õ xijere py nẽ hpãnhã gô hkryre piitã hkõt hkapĩr pa. Pyhti nẽ ri hino piitã hkõt hkapĩr pa nhũm piitã gô xujanãr pyrà nẽ mẽ hkamrô hã amnhĩ jahkre hpa.

⁵Hãmri nhũm axtem Tĩrtũm kapẽr o mẽ wrỳk xwỳnhjê hõ kot kãm gô piitã hamãr xwỳnhhta ja hã omu nẽ Tĩrtũm mã kãm: Pa amex rãhã apa ho apa xwỳnh. Nẽ arãhã apa ho apa xwỳnh. Nà ãm hãmri na ka ã mẽ kêp gõta nhĩpêx anẽ.

⁶Na prem mẽ kot akõt amnhĩ nhĩpêx xwỳnhjê mẽ mẽ kãm ri akapẽr jarẽnh xwỳnhjê hpar o pa nhũm mẽ hkamrô hpikapĩr rax nẽ. Tã ka ra mẽ hã mẽ kêp mẽ hkõm xà homnu hpa nhũm mẽ kêp mẽ hkamrô ã amnhĩ jahkre nhũm mẽ tee ri ho hkõm mã. Nà ãm hãmri na ka ã mẽ kêp gô nhĩpêx anẽ Tĩrtũm. Anẽ.

⁷Hãmri nhũm mẽ kot Tĩrtũm mã mẽmoj nhõr xà hã mēsti hpar pê hkrĩ xwỳnhjê hõja kuma nẽ kãm: Nà ãm hãmri na ã ajarẽnh anẽ Tĩrtũm. ãm hãmri na ka ã akrajê hã mẽ hipêx anẽ. Ra ate mẽ hã amnhĩ jarẽnh xà hkõt

na ka hte tanhmã mẽ hipêx to. Nà apê mẽ inhõ Tĩrtũm Maati na ka. Mẽ ixrom axihtỳx o axihtỳx nẽ axàhpumunh o axàhpumunh. Anẽ.

⁸Tã ra axkrunêpxi nẽ õ xijere kapĩ. Jakamã nhũm mẽ hpãnhã hõja õ xijere o tẽ nẽ myyti hã hkapĩr pa nhũm hkagro htỳx nẽ pika hkõt mẽ pa xwỳnhjê hkà ho hxêh o pa.

⁹Kagro htỳx o hkagro htỳx jakamã mẽ hkà ho hxêh nhũm mẽ kamã hkà kajê hpa. Hãmri nẽ tee ri amnhĩ pumu nẽ hamaxpêr o: —Nà Tĩrtũmtija na ã mẽ pahtomnuj tỳx anẽ. Anẽ. Hãmri nẽ kamã gryk tỳx nẽ haprỳ nẽ tanhmã ho kapêr punuj to ho pa. Nom mẽ kot amnhĩ tomnuj kaga nẽ kãm mex o mex ã harênh kêt nẽ arĩ tanhmã amnhĩ tomnuj to ho pa.

¹⁰Nhũm ra kêp kwat nẽ õ xijere kamã mẽmojja kapĩ. Jakamã nhũm ra hpãnhã hõja õ xijere o tẽ nẽ gôj rũm mrymnuti kot mẽ ho amnhĩptàr xà hã hkrĩ xà hã hkapĩr pa. Jakamã nhũm ra kot mẽ ho amnhĩptàr xà hã pikaja kamã kamàt kô htyk par kumrêx. Hãmri nhũm mrymnuti mẽ hkõt mẽ kot amnhĩ nhĩpêx xwỳnhjê hã kamàt kô hpa nhũm mẽ amnhĩ xà htỳx ã maj amnhĩ nham o axpên kamnhar tỳx kumrêx.

¹¹Nẽ ã Tĩrtũm kot mẽ hipêx anhỹr ã amnhĩ tã omu nẽ kamã gryk tỳx nẽ tanhmã ho kapêr punuj to ho pa. No ãm kot amnhĩ tomnuj xwỳnh ã amnhĩ pumunh nẽ kot amnhĩ tomnuj kaga hkêh nẽ.

¹²Nhũm prem ra kêp sĩk nẽ õ xijere kamã mẽmoj kapĩ. Jakamã nhũm hpãnhã hõja õ xijere kamã mẽmojta o tẽ nẽ pyhti pê Erax kamã hkapĩr pa nhũm gôja grà pa nẽ te kêp pry pyrà nẽ nõ. Jakamã nhũm myt japôx xà rũm mẽ ho amnhĩptàr xwỳnhjaja nẽ pôristijaja hãmri pijapu kaxyw Jerujarê hwỳr nojarêh nẽ hã hwỳr pa.

¹³Tã nhũm kagãmnuti mẽ ỹ hã mẽ kãm hêx o pa xwỳnh mẽ mrymnutita wa mẽ hakwa rũm mẽmoj te priti pyrà nẽ hapôx o pa. No ãm priti hkêh mẽ kêp Satanasti mã mẽ àpênh xwỳnh kwỳy.

¹⁴Jakamã na prem pika piitã hkõt mẽ kot aa mẽmoj pumunh kêt kwỳ ho anhỹr o hêx rom mẽ no kupyw o mẽ hkõt pa. Tã pika piitã hkõt mẽ ho

amnhĩptàr xwỳnhjê mẽ ho pikuprõnh kaxyw mẽ hapêr o pa. Mẽ kot Tĩrtũm xihtỳx o hihtỳx kurê kaxàr kaxyw mẽ pijapu xà hã arĩgro kukamã mẽ ho pikuprõnh o pa.

Jejus kot amnhĩ kwỳjê mã kapêr ã harênh

15Tã nhũm Jejus pika hkôt hkrajaja arĩ mẽ htĩr nê pa xwỳnhjê mã kapêr nê mẽ kãm: E mẽ inhma ixkwỳjaja. Akupỹm ixte mẽ awỳr ixwrỳk xà hã arĩgroja ã kot paj te mẽ àhkĩnh xwỳnh kot amnhĩ nhĩpêx pyrà nê mẽ ajaêr pê mẽ awỳr wrỳ. Jakamã kêr ka mẽ amnhĩ wỳr ijamãr rãhã ho apa. Kêr pa akupỹn wrỳ ka mẽ amnhĩ wỳr ixpumu nê akĩnh nê amnhĩ kamã amã ixpuma hkêt nê. Anê.

Mẽ kot axpên kurê kaxàr kaxyw mẽ pikuprõnh ã mẽ harênh

16Tã nhũm Satanasti hkwyjaja pika piitã hkôt mẽ ho amnhĩptàr xwỳnhjê ho pikuprõnh pa nê mẽ hkurê kaxàr kaxyw ma Ijaew kot kãm “Amaketõ” jarênhja wỳr mra.

17Hãmri nhũm Tĩrtũm kapêr o mẽ wrỳk xwỳnh pê 7 kot hitepta õ xijere py nê kax mã kamã mẽmoj kapĩr pa. Jakamã nhũm Tĩrtũm nhõrkwỹ kamã mẽ ho amnhĩptàr ã hkrĩ xà rũm Tĩrtũm kax pê kapêr o: —E hãmri. Na pa ra mẽ kot amnhĩ tomnuj mỳrapê tanhmã mẽ ho jatur xàm mẽnh kaxyw. Anê.

18Pu nhũm na hkatõtõk nê hkrakrak nê haxênh nhũm pika htertet tỳx nê. Aa mẽ kot pika htertet tỳx kot anhỹr ã omunh kêt kumrêx.

19Jakamã nhũm Papirõnja kajê axkrunêpxi. Papirõn nhõ xwỳnhjaja kot amnhĩ tomnuj tỳx o paja mỳrapê nhũm Tĩrtũm ã mẽ hipêx anê. Nê pika htertet o pika piitã hkôt krĩ grành pa.

20Nhũm gô hipòk piitã gôja hã axkamur nhũm hapêx pa. Nê kên prêk nê hkrã hixêt rôròk nê hpigrành pa. Pika htertet tỳx kumrêx jakamã ã mẽmoj amnhĩ nhĩpêx anê.

21Nê na mê pê jêr krã jakootija mẽ piitã mẽ hipy rôròk. No ãm hkrã hkryre hkêt hkrã rũnh kumrêx. ãm hpỹnh nê kamã kêp 40 kir nê mẽ hã rôròk nhũm

mě tee ri amnhĩ tã ã omu nẽ Tĩrtũm kamã gryk tỳx nẽ haprỳ nẽ ho kapěr punuj nẽ.

Apokarip 17

Tĩrtũm kra hkět xwỳnhjê jarēnh

¹Tã pa pre kê axte mẽmoj pumu. Nhũm kot xijere jamỳnh xwỳnhjê hõja ixwỳr tẽ nẽ inhmã: —E ma ixkõt tẽ nẽ mẽmoj pumu. Anẽ. Hãmri pa kuma nẽ ma hkõt tẽ nhũm inhmã: —Nà ahpỳnhã gô rax mỳri krĩ nhõ xwỳnhjaja te ho ni hkuprỳ gô mỳ ri ỳr nẽ kãm mẽmyjê piitã hkĩnh o ỳr xwỳnhhta pyræk. Na htem uræk nẽ Tĩrtũm kapěr kõt ri amnhĩ nhĩpêx kêt nẽ. ãm htỳx ri tanhmã amnhĩ tomnuj to ho pa. Jakamã koja Tĩrtũm tanhmã mẽ homnuj tỳx to nẽ mẽ ho hapêx.

²Krĩ piitã hkõt mẽ ho amnhĩptàr xwỳnhjaja na hte ma mẽ õ krĩ hwỳr mra nẽ te mẽ kot mẽ hkuprỳjê ho amnhĩkati pyræk o amnhĩ nhĩpêx. Nẽ te pipãnh nẽ htỳx ri amnhĩ nhĩpêx pyræk o amnhĩ nhĩpêx o pa. Nhũm krĩ nhõ xwỳnhjaja mẽ uræk nẽ amnhĩ krã hkõt pix mã tanhmã amnhĩ tomnuj to ho ri pa. E ma ixkõt tẽ nẽ ja hã mẽ omu. Anẽ.

³⁻⁴Hãmri nhũm Tĩrtũm Karõ tanhmã ixto nhũm kapěr o wrỳk xwỳnhja ma kapõt wỳr ixto mõ pa kapõt ã mrymnuti hkrã kệp 7 nẽ kamã hpàr kệp 10 xwỳnhhta pumu nhũm hkamrêeti nẽ xa. Nẽ ã piitã hã tanhmã Tĩrtũm o kapěr punuj to hã kagà. Nhũm katut ã mẽhõ ni kuprỳta nhỹ. Mẽ ho amnhĩptàr xwỳnh ã mẽ ê kakrã htyk nẽ hkamrêk o hkukàr jaxà nẽ hã nhỹ. Nẽ ôr o ôkrexê. Nẽ ôr o hinwỳyê nẽ ãhkra kamã kàx. ãm ôr pix o hikukrêx. Nẽ kẽn mex karỳr pix o amnhĩ jamrêx. Nẽ ôr o kopti hõ py nẽ hã nhỹ. Kopti kamã ni kuprỳ kot amnhĩ tomnuj xà. ãm kot mẽ kệp mẽ mjên o amnhĩkati ho pa xà pix nhũm kupy nẽ o nhỹ.

⁵Nẽ õkrã hã amnhĩ nhĩxi hã kagà kot: Inhĩxi pimxur pê PAPIRÕN RAXTI. Nẽ ixpê mẽ kệp mẽ mjênjê ho amnhĩkati ho mẽ pa xwỳnhjê nã na pa. Nẽ ixpê mẽ kot axpên prõ ho amnhĩkati o mẽ pa xwỳnhjê nã na pa. Nẽ ixpê mẽ kot Tĩrtũm nẽ mẽ kãm hêx o ri mẽ pa xwỳnhjê nã na pa. Nẽ ixpê mẽ kot Tĩrtũm

kapër kôt amnhĩ nhĩpêx o pa hkêt xwỳnhjê nã na pa. Anhỹr o òkrã hã amnhĩ nhĩxi hã kagà kot anhỹr.

⁶Nhũm axpã nẽ nhỹ pa omu. No ãm kagôxỳhti ho hpiãnh kêt. Mẽ kot Jejus kôt amnhĩ xunhwỳr nẽ ri mẽ kãm Jejus kệp mẽ ò pahihiti hã harênh xwỳnhjê kamnhwỳr o mẽ hpar nhũm mẽ hkamrô pikapĩr xwỳnhjê kamrô ho na pre axpã nẽ nhỹ. Pa ã kot amnhĩ nhĩpêx anhỹr ã omu nẽ tee ri ijamaxpër.

⁷Hãmri nhũm Tĩrtũm kapër o wryk xwỳnhja inhmã: —Kwa mon ka ri ja pumu nẽ tee ri ajamaxpër? E kot paj ixprĩ hã amã harẽ ka inhma. Niti mẽ hã ỹr xwỳnh pê mrymnutita. Krã pê 7 nẽ kamã hpàr pê 10 xwỳnhhta kot paj ixprĩ hã amã hamẽ wa harẽ ka wa harênh ma.

⁸—Nà mrymnutija na pre htĩr nẽ ri pa tã ty nẽ ahkre xupỳmti kamã hikwỹ. Nom koja akupỹm htĩr nẽ kurũm kato nhũm mẽ piitã omu nẽ ahpỹnhã tanhmã hamaxpër to. Amnepêm kormã amrakati ri Tĩrtũm kot ò kagà kamã mẽ htĩr tũm nẽ mẽ pa mã xwỳnhjê nhĩxi jaxwỳr xwỳnhjaja koja kator ã omu nẽ ãm omu nẽ tanhmã hamaxpër to hkêt nẽ. No mẽ kot Jejus kôt amnhĩ xunhwỳr kêt xwỳnhjaja koja mẽ amnhĩ jaêr pê akupỹm kator ã omu nẽ tee ri hkukamã hamaxpër. Hãmri nẽ axpẽn mã: “Kwa amnepêm htyk tã ra tanhmã amnhĩ to nẽ akupỹm htĩr nẽ api nẽ mỗ.” Anhỹr o axpẽn mã harẽ. Hãmri nhũm kato nẽ ma tẽ nhũm Tĩrtũm tã ho hapêx kumrêx nhũm hapêx o hapêx.

⁹—Kwa inhma nẽ jam ajamaxpër tỳx nẽ. Mrymnuti krã pê 7ta te kệp hixêt prêk pê 7 pyrã nẽ hã ỹr xwỳnh ni kuprỳta te hixêt prêk pê 7ta ã ỹr pyrãk.

¹⁰—Nẽ mrymnuti hkrã pê 7ja te kệp mẽ ho amnhĩptàr xwỳnh pê 7 pyrãk. Nhũm mẽ ho amnhĩptàr xwỳnhjaja te mẽ kệp 5 nẽ ra htyk pyrãk nhũm hkôt hõja arĩ mẽ ho amnhĩptàr o pa. No kot hitepta kormã. Nom koja mẽ ho amnhĩptàr ry hkêt nẽ.

¹¹—Mrymnuti htĩr nẽ pa htã htyk nẽ ra akupỹm htĩr nẽ àpir xwỳnhhta koja hkrã hitepta pãnhã mẽ ho amnhĩptàr o pa. Jakamã te mẽ ho amnhĩptàr xwỳnh pê 7jê hõ pyrãk. Koja hkrã pê 7ja mẽ ho amnhĩptà nẽ gaa nẽ htyk mẽ

nhũm hpãnhã mrymnutita hpãnhã mẽ ho amnhĩptà. Hãmri nhũm rĩ kormã Tĩrtũm tã mẽ ho hapêx par kumrêx.

12—Ně ate mrymnuti hkrã kamã pàr pê 10 pumunh xwỳnhhta te mẽ kêp mẽ ho amnhĩptàr xwỳnh pê 10 pyràk. No ãm jaja na kormã mẽ ho amnhĩptàr kêt nẽ. Kojã mẽ nhỹrmã anhĩpê mrymnuti nhỹ hã ahpỳnhã ri mẽ ho amnhĩptàr o pa nom mẽ ho amnhĩptàr japjê hkêk nẽ.

13Kojã mẽ tanhmã ja hã axpên mar to hãmri nẽ mrymnuti mã anẽ nhũm mẽ hpãnhã mẽ piitã mẽ ho amnhĩptà.

14—Ně mẽ ho amnhĩptàr xwỳnh pê 10jaja kojã mẽ pahte amnhĩ tomnuj pãnhã amnhĩrer xwỳnh kurê kaxàr kaxyw hwỳr mra nẽ kutã pijapu ho kuhê. No ãm tee ri kãm tanhmã ho hprãm hkaprỳ nhũm mẽ ho axtem nẽ amnhĩ tã mẽ himex pa. Hihtỳx o hihtỳx o kot mẽ ho hpimràatã mẽ hakrenh par. Nẽ kêp pika piitã hkôt mẽ ho amnhĩptàr xwỳnhjê nhõ Pahihti. Tãm na pre amnhĩ wỳr mẽ kot hkôt amnhĩ nhĩpêx o mẽ pa xwỳnhjê wỳ nhũm htem amnhĩ kaxyw hkôt hamaxpêr mex rãhã ho pa.

15—Ně krĩ pê Papirõn kapem gô xohtô mỳ ri ni kuprỳ hkrĩ xwỳnhhta. Gô xohtôja te kêp ahpỳnhã ri pika piitã hkôt mẽ uro hkwy pyràk. Nẽ te ahpỳnhã ri mẽ kapêr xwỳnh kwỳ pyràk.

16—Ně mrymnuti hpàr pê 10ta kêp mẽ ho amnhĩptàr xwỳnh pê 10 pyràk. Jakamã kojã mẽ kãm ni kuprỳta prãm nõkati nẽ kamã gryk tỳx kumrêx. Hãmri nẽ hwỳr mra nẽ kêp hikukrêx piitã utà nẽ kêp ê hkwrỳnh pa nhũm hkênh mex nẽ xa. Hãmri nhũm mẽ kupĩ nẽ ĩ hkrêr pa nẽ kuwy kamã hi rẽ nhũm kaxàr pa nẽ hapêx.

17—Na pre pahi pê 10jaja mrymnuti hkôt amnhĩ xunhwỳ nhũm Tĩrtũm ãm ja hã mẽ omu nẽ tanhmã nê mẽ kãm nẽ hkêk nẽ. Jakamã kojã mẽ ãm hkôt pix mã amnhĩ nhĩpêx o pa rãhã nhũm Tĩrtũm mẽ ho hapêx. Nẽ mẽ õ krĩ mẽ mẽ ho hpimràatã mẽ ho hapêx pa. Hãmri nẽ mẽ ho hapêx o mẽ ho hapêx.

18—Ně ate mẽhõ ni kuprỳ pumunh xwỳnhhta te kêp krĩ rax pê Papirõn nhõ xwỳnhjê pyràk. Nẽ mẽ ho amnhĩptàr xwỳnhja pika piitã hkôt mẽ ho

amnhĩptàr xwỳnhjê hkrãhtũm na. Anẽ. Ǻ Tĩrtũm kapẽr o mẽ wrỳk xwỳnhja inhmã mẽ harẽnh anẽ. Pa kuma nẽ ô ri mẽ amã hã kagà. Mẽ ate kamã harẽnh nẽ aprĩ hã mar tỳx kaxyw.

Apokarip 18

Tĩrtũm kot Papirõn grãnh par Ǻ harẽnh

¹Tã pa kê axte mẽmoj pumu. Nhũm axte Tĩrtũm kapẽr o mẽ wrỳk xwỳnhjê hõja kaxkwa rũm ahpar mã wrỳk o tẽ. Tĩrtũm nhỹ hã hihtỳx nẽ kamã hirã rax kumrẽx o pika piitã hkõt mẽ kãm hirã pa.

²Nẽ ahpar mã tẽn wrỳ nẽ kàx pẽ kapẽr o: E koja Papirõnja pigrãnh pa nẽ hpãnhã kệp Satanasti mã mẽ àpẽn h xwỳnhjê papxà nẽ kệp nhõnhti papxà. Hãmri nẽ aa kamã mẽmoj mex kêt kumrẽx.

³Krĩ nhõ xwỳnhjaja na htem Tĩrtũm kapẽr kõt amnhĩ nhĩpêx kêt nẽ amnhĩ krã hkõt kãm prãm xà hkõt pix mã tanhmã amnhĩ tomnuj to ho pa. Te mẽhõ pipãnh nẽ htỳx ri amnhĩ nhĩpêx o pa pyràk. Nhũm krĩ piitã hkõt mẽ ho amnhĩptàr xwỳnhjaja mẽ hwỳr mra nẽ mẽnijê ho amnhĩkati ho pa. Nẽ krĩ nhõ xwỳnhjaja mẽmoj pumu nẽ kãm hkĩnh nẽ haprôr kurê kumrẽx o pa nẽ aa ujaarôr o hapêx kêt nẽ. Jakamã na hte krĩ hkwy nhõ xwỳnhjaja mẽ hwỳr mẽmoj to pa nẽ xatã mẽ kãm ho wẽnê nẽ mẽ kukwak ri mẽ hikàxpore rũnh nẽ pa. Anhỹr o kapẽr.

⁴Hãmri nhũm Tĩrtũm Papirõn kamã hkrajê mã kapẽr nẽ mẽ kãm: E mẽ tokyx mẽ kot ri htỳx amnhĩ nhĩpêx xwỳnhjê nhõ krĩta rũm ajapôj ixkrajaja. Kot kaj mẽ anhỹr kêt nẽ ra mẽ hkõt amnhĩ nhĩpêx pa mẽ ato apimràatã mẽ ate amnhĩ tomnuj Ǻ mẽ atomnuj tỳx nẽ.

⁵Krĩ nhõ xwỳnhjaja na htem amnhĩ tomnuj rũnh o pa. Mẽ kot amnhĩ tomnuj xà te mẽ kot kẽn katutxô nhũm hprêk rax o kot kaxkwa kanhwỳr kaxyw pyràk. Na pa hte Ǻ mẽ kot amnhĩ nhĩpêx anhỹr Ǻ mẽ omunh rãhã ho ri ixpa. Jakamã kwa ixkrajaja mẽ tokyx mẽ kurũm ajapôj. Anhỹr o hkrajê mã kapẽr. Hãmri nẽ kapẽr o mẽ wrỳk xwỳnhjê mã kãm:

⁶E kwa mẽ ma mẽ hwỳr wrỳ nẽ tanhmã ixkrajê hã mẽ ho. No ãm kêr ka mẽ tanhmã mẽ ho htỳx o mẽ kot ra tanhmã ixpê ixkrajê nhĩpêx tota jakre. Kê mẽ tanhmã ixpê mẽ ho grire htã ka mẽ hã tanhmã mẽ ho htỳx kumrêx o mẽ kot mẽ hipêxta jakre.

⁷Krĩ nhõ xwỳnhjaja na prem mex nẽ pa. Nẽ mẽ hikukrêx rũnh nẽ hkĩnh nẽ pa. Nẽ tanhmã amnhĩ to jarkrar to ho ri pa nẽ amnhĩ jarênh o: "Ot pa mẽ te pahĩ ni kot amnhĩ nhĩpêxta pyrã nẽ ixkrĩ xà mex pix kãm ixkrĩ pyrãk. Nẽ te Tĩrtũm kot amnhĩ nhĩpêx pyrãk o na pa htem amnhĩ nhĩpêx o ri ixpa. Nẽ mẽ ixkĩnh nẽ mẽ inhmex rãhã ri ixpa. ã mẽ ixte amnhĩ nhĩpêx anhỹr xwỳnh na pa mẽ." Anhỹr ã amnhĩ to jarkrar o pa. Tã kêr ka mẽ tanhmã mẽ homnuj to kê mẽ mexta pãnhã omnuj tỳx nẽ pa. Nẽ kê mẽ hkaprĩ nẽ amnhĩ xà htỳx kãm hamak rãhã nẽ pa ho pa.

⁸E kê mẽ ã amnhĩ nhĩpêx anhỹr o pa. Jakamã koja mẽ arĩgro hpỹnh kãm mẽ hkwỳjaja hpikaprãr rũnh nẽ nhũm arĩ mẽ htĩr xwỳnhjaja omnuj nẽ pa. Nẽ tee ri amnhĩ pumu nẽ hkaprĩ xàj mỳr o pa. Nẽ amnhĩ xà htỳx kãm hamak o pa. Nẽ tee ri amnhĩ nhĩpêx o pa. Nẽ kãm prãm nẽ pa rãhã ty nhũm kuwy mẽ ho hkaxàr pa. Ixpê Pahĩ Maati Tĩrtũm kot paj ixihtỳx kãm ã mẽ hipêx anẽ. Anẽ.

⁹Hãmri nhũm krĩ piitã kurũm mẽ ho amnhĩptàr xwỳnhjaja. Mẽ kot mẽ hwỳr mrar nẽ mẽ hkuprỳjê ho amnhĩkati nẽ mẽ urãk nẽ mẽmoj pumunh nẽ haprôr rãhã ho pa xwỳnhjaja tee ri krĩ kaxàr nẽ kàx mã kuwy hkũm àpir o paja pumu nẽ hkaprĩ nẽ mỳr o kuhê.

¹⁰Nẽ Tĩrtũm kot mẽ ho hapêx par ã mẽ omu nẽ kãm ma htỳx kumrêx. Amỳm mẽ omunh o kuhê nẽ tee ri amnhĩ kukamã hamaxpêr nẽ htertet tỳx nẽ. Nẽ mỳr kãm kapêr o: Hêxta waa nẽ Papirõn nhõ xwỳnhjaja. Mẽ amex nẽ axihtỳx mex nẽ apa htã nhũm Tĩrtũm mẽ anhĩmex pa. Hêxta waa nẽ. Anẽ.

¹¹Nẽ mẽ hwỳr mrar nẽ mẽ kãm mẽmoj to wẽnê ho mẽ pa xwỳnhjaja haxwỳja krĩ pumu nẽ tee ri amnhĩ kukamã hamaxpêr nẽ hkaprĩ nẽ mỳr o kuhê. Nhỹri koja mẽ tokyx axte mẽmoj to wẽnê? Mẽ kêp mẽmoj japrôr rũnh xwỳnhjaja hkaxàr par kumrêx kênã.

¹²Na prem mẽmoj piitã ho pa nẽ mẽ kãm ho wẽnê. Mẽmoj mex piitã. ôr o mẽ hkukrêx nẽ prat o mẽ hkukrêx nẽ kẽn jaxênh ã kàxpore xohtôô. Nẽ kupêxê mex. Kakrã htyk nẽ hkamrêk nẽ hkroore nẽ hã hapjê. Nẽ mẽmo pĩ kuxware nẽ pĩ htỳx nẽ kẽn jakàr nẽ kàx o ri mẽmo nhĩpêxja nhũm prem mẽ kãm ho wẽnê ho pa.

¹³Nẽ mẽmo htwỳm nẽ mẽ hkuxwa xà. Nẽ mẽ ô ho ành xà nẽ mẽ ô kuxwa xà nẽ xwỳgrà nẽ harôj. Nẽ môx nẽ ôwêhti nẽ kawar nẽ kaxyw kawarti hkjênh xà hã karrotre. Nẽ nhỹhỹnh krĩ hõ kamã panhĩ hkwỳ pynê nẽ mẽ hwỳr mẽ o pa nẽ mẽ kãm mẽ ho wẽnê nhũm mẽ amarĩ mẽ hkôt ri àpênh rũnh o pa. Na prem ã mẽ kãm mẽmoj to wẽnê anhỹr o pa. Tã ra mẽ kot mẽ haprôr xwỳnh mẽ mẽ pimràatã hapêx pa.

¹⁴Jakamã nhũm mẽ tee ri mẽ hkukamã hamaxpêr nẽ te kot mẽ kãm kapêr pyrà nẽ mẽ kãm: Hêxta waa nẽ. Mẽ amã mẽmoj prãm nẽ amnhĩm haprôr xwỳnhhta na mẽ apê hapêx par kumrêx. Nẽ mẽ akàxpore rũnh nẽ mẽ akukrêx rũnhhta mẽ mẽ apimràatã ajapêx pa. Kot kaj mẽ axte tanhmã amnhĩ nhĩpêx to ho apa hkêt nẽ. Anẽ.

¹⁵Hãmri nẽ amỳm ri Tĩrtũm kot tanhmã mẽ hipêx to hã mẽ omu nẽ kãm ma xàj mur nẽ htertet o kuhê.

¹⁶Nẽ mỳr kãm kapêr o: Hêxta waa nẽ. Na pre htem ê mex pix jagjê nẽ ri hã mra. Kakrã htykre nẽ hkamrêkre. Nẽ mẽ hikukrêx mex o amnhĩ jamrêx nẽ ri hã mra. Nẽ ôr nẽ kẽn mex ã ohtô xwỳnh o amnhĩ jamrêx nẽ ri hã mra.

¹⁷Tã ra hapêx par kumrêx. Anẽ. Hãmri nhũm gô xujanãr kãm pàr nhõ dõn nẽ mẽ kot mẽ kãm pàr o ri mrrar xwỳnhjaja nẽ mẽ kot kamã tep pynênh xà ho tep pynênh o ri mẽ pa xwỳnhjaja nẽ pàr kãm amarĩ mẽ pa xwỳnhjaja hãmri mẽ hwỳr mra nẽ wamtajê pyrà nẽ tee ri amỳm ri mẽ ô krĩ pumu nẽ mỳr o kuhê.

¹⁸Nẽ kurũm kuwy hkũm xàpir o pa hã omu nẽ tee ri mẽ hkukamã hamaxpêr nẽ axpên mã: Hêxta waa nẽ. Krĩ mũj na pre mex o mex. Mex o krĩ piitã hakrenh par htã hapêx pa. Anẽ.

¹⁹Hāmri nē mur nē hkaprī xàj pika hkwỳ jamỳ nē ho amnhĩ kamĩ nē mỳr kām kapēr o: Hēxta waa nē. Krī mũj na pre rax o rax. Nhũm pre nhỹhỹnh pàr kām mẽmoj to wēnê ho pa xwỳnhjaja mẽ hwỳr mẽmoj to pa nē mẽ kām ho wēnê nē mẽ hkukwak ri hikàxpore rũnh nē ri pa. Tã hāmri mẽ hapêx pa. Anē.

²⁰Hāmri nhũm Tĩrtũmja krajê piitã mẽ kām kapēr nē mẽ kām: E ixpê Tĩrtũm na pa ã mẽ hipêx anē. Mẽ kot mẽ apê ixkrajaja tanhmã mẽ atomnuj to ho paja mỳrapê na pa mẽ atã ã mẽ hipêx anē. Jakamã e kaxkwa kamã mẽ apê ixri mẽ apa xwỳnhjaja. Nē mẽ ate inhỹ hã ri mẽ kām ixkapēr jarēnh o mẽ apa xwỳnhjaja. Nē Jesus nhỹ hã mẽ akapēr o ri mẽ apa xwỳnhjaja. Mẽ apiitã mẽ apê ixkra na ka mẽ. E mẽ amnhĩ tã ja pumu nē akĩnh nē axpēn mã apikunhar o akuhê. Pa na pa mẽ atã ã mẽ ho ijapêx anē. Anē.

²¹Tã nhũm kapēr o mẽ wrỳk xwỳnhjê hōja hihtỳx o kēn rax kumrēxja mỳ nē o tē nē gō xujanār kamã kām gêt nē kumē nhũm mrõ nē akunok. Hāmri nhũm kapēr o: E krĩta koja Tĩrtũm te ho ixte gōx kām kēn mẽnh nhũm mrõr nē hpikunor pyræk o hipêx nhũm hapêx par kumrēx.

²²⁻²⁴Na pre hte krĩja kamã mẽ kot ri mẽ kām mẽmoj to wēnê xwỳnhjaja amnhĩ to rũnh o krĩ piitã hkôt mẽ hakrenh pa. Nē krĩ nhõ xwỳnhjaja na prem pika piitã hkôt hêx rom tanhmã mẽ no kupyri to ho ri pa. Jakamã ra mẽmoj to wēnê xwỳnhjê pyrà nē mẽ hikukrêx rũnh gryk ã Tĩrtũm kaga. No ãm ja pix kêt. Tĩrtũm krajê mẽ Tĩrtũm nhỹ hã kapēr o mẽ pa xwỳnhjaja na prem mẽ himex rax nē. Hāmri nhũm krĩ piitã kamã mẽ pa xwỳnhjaja mẽ kot mẽ hipêx ã mẽ omu nē mẽ uræk nē ã mẽ hipêx anhỹr o pa. Tã Papirõn nhõ xwỳnhjaja kot mẽ hipêx anhỹrja mỳrapê koja Tĩrtũm mẽ himex par kumrēx. Jakamã koja mẽ axte hkĩnh nē hkĩnh xàj ri grer kêt nē. Nē axte hkĩnh nē grer kām hakwa kôr o ri pa kêt nē. Nē axte ri wiorãw kakrēnh hkêt nē. Nē axte ri amnhĩm kawà hyr o hkrĩ hkêt nē. Nē axte harôj kahuk o kuhê hkêt nē. Nē axte mẽ õrkwỹ kamã kanê hpòk kêt nē. Nē axte axpēn mã ri hkrajê rer o ri pa hkêt nē. Koja ã mẽmoj kot anhỹr piitã hapêx pa. Anē.

Apokarip 19

Mě kot Tirtům mex ã mě harěnh

¹Tã pa kê axte mẽmoj pumu. Ně kaxkwa kamã mẽ kapěr ma nhům mẽ ohtô rax kumrěx ně tanhmã axpěn mã kapěr to. Ně anhípê kàx pê kapěr tỳx ně kapěr o: E pu mẽ pahpiitã Tirtům mã mex o mex ã harě. Tapxipix na hihtỳx o hihtỳx. Ně tapxipix na àhpumunh o àhpumunh. Ně tapxipix na mex o mex. Tapxipix na mex o kot mẽmoj piitã hakrenh par. Ra kot mẽmoj punuj pê mẽ papytâr par jakamã kêp mẽ papytâr xwỳnh ã pixi mex na.

²Na hte amnhĩ jarěnh xà hkôt tanhmã mẽmoj to ho pa. Ně amnhĩ to hêx kêt nẽ. Tã ãm hãmri na ã Papirôn nhõ xwỳnhjê nhípêx anẽ. Na prem mẽ kãm Tirtům kapěr jarěnh o mẽ pa xwỳnhjê nhĩmex rax kumrěx. Ně krĩ piitã hkôt ri pa nẽ amnhĩ kôt mẽ kurě nhům mẽ kuma nẽ mẽ hkôt amnhĩ tomnuj o pa. Nhům Tirtům tee ri hã mẽ omu nẽ ã hkrajê hã mẽ hipêx kati anẽ. ãm hãmri na ã mẽ hipêx anẽ. Anhỹr o axpěn mã harě.

³Hãmri nẽ xatã axpěn mã: Nà ãm hãmri na ã mẽ panhõ Tirtůmja mẽ hipêx anẽ nhům mẽ kurům kuwy hkům kàx mã àpir o pa. Kojã krĩ nhõ xwỳnhjaja amnhĩ xà htỳx kamã hamak rãhã ho pa nẽ aa à htỳx hapêx kêt. E pu mẽ hã Tirtům mã mex o mex ã harě. Anẽ.

⁴Hãmri nhům mẽ àptâr tům pê 24 mẽ mẽmoj tĩr pê kwatjaja hãmri Tirtům kot mẽ ho amnhĩptâr ã hkrĩ xà maati kutã rôrôk nẽ kãm hipô hpa. Hãmri nẽ ã mẽ kapěr anhỹr xwỳnhjê mã kapěr nẽ kãm: Nà ãm hãmri na ka mẽ ã Tirtům mex ã harěnh anẽ. E pu mẽ pahpiitã kãm mex o mex ã harě. Anẽ.

⁵Hãmri nhům mẽhõja Tirtům krĩ xà maati kamã kapěr o: E mẽ axte Tirtům mã mex o mex ã harě. Mě ate Měpahpãm kôt amnhĩ nhípêx o mẽ apa xwỳnhjaja. Ně mẽ apê mẽ ho amnhĩptâr xwỳnhjaja nẽ amarĩ ri mẽ apa xwỳnhjaja nẽ mẽ apiitã mẽ ate Tirtům ã apijaàm o mẽ apa xwỳnhjaja kãm mex o mex ã harě. Anẽ.

Kot mẽ pahpãnhã amnhĩrer xwỳnh mẽ hkwỳjê jarěnh

⁶Tã pa tanhmã mẽ kapěr to hã mẽ kuma nhům mẽ kàx pê kapěr tỳx nẽ. Te mẽ ohtô rax kumrěx kapěr pyræk. Ně te gô koko htỳx rỳ na katõtôk tỳx pyræk. Hãmri nẽ mẽ kapěr o: E na ra Tirtům kêp mẽmoj piitã ho amnhĩptâr

xwỳnh. Nē kēp mē panhō Pahi Maati. Nē hihtỳx o hihtỳx nē àhpumunh o àhpumunh. E pu mē kām mex o mex ã mǎn harē.

7-8Nē hǎ pahkĩnh nē. Nē kām hihtỳx o hihtỳx ã harē. Te mē kot axpēn mǎ mē rer xwỳnh kot amnhĩ nhĩpêx pyrək. Jao mē pahte amnhĩ tomnuj pǎnhǎ amnhĩrer xwỳnhhta te kēp myja pyrək. Nē mē kot hkôt amnhĩ nhĩpêx xwỳnh piitǎ te mē kēp nija pyrək. Nē te mē kot axpēn mǎ wa rer nhũm wa kot axpēn kôt pa ho pa pyrək o koja mē amnhĩ nhĩpêx. Nē te mē kot mjēn mǎ xwỳnh mǎ ê mex jakare nhōr nhũm kot hagjēnh pyrək. Nē ê mexja te mē kot tǎm amnhĩ nhĩpêx xà pyrək. Anē.

9Hāmri nhũm Tĩrtũm kapēr o wrỳk xwỳnhja inhmǎ: —E Juǎw. Pa amǎ mēmoj jarē ka mar tỳx nē akwỳjê mǎ hǎ kagà. Tĩrtũm kapēr kwỳ kot paj amǎ harē. Kēp Tĩrtũm kapēr jakamǎ ãm hāmri na. Na hte mēmoj jarēnh o hêx kêt nē. E kapēr ã kagà ho: Na htem axpēn mǎ mē rer kaxyw nē amnhĩ wỳr hkwỳjê wỳ nhũm mē hwỳr mra nē wa hǎ hkĩnh nē apkur mex nē. Ja pyrà nē Tĩrtũm kot amnhĩ wỳr mē hwỳr xwỳnhjaja koja mē nhỹrmǎ mē pahte amnhĩ tomnuj pǎnhǎ amnhĩrer xwỳnhhta wỳr api nē ã amnhĩ nhĩpêx anē nē hkĩnh nē apkur mex nē. Hāmri nhũm Tĩrtũm mē ho mex rax kumrēx. Anē. —E kēr ka ã akwỳjê mǎ ja hǎ kagà anē Juǎw. Anē. Hāmri pa kuma nē kagà ja kamǎ mē amǎ hǎ kagà.

10Hāmri nē hǎ kagà hpa nē ra ixte kām mex o mex ã harēnh kaxyw kutǎ ixkôn krǎ ho tēm nē nhỹ nhũm tee ri amnhĩ tǎ ixpumu nē inhmǎ: —Kwa ã ri inhĩpêx anhỹr kêt nē. Apyrà nē ixte Jesus mǎ tanhmǎ amnhĩ nhĩpêx to xwỳnh kēnǎ. Jesusja apyrà nē kēp inhō pahihtĩ na. Jesus kapēr na prem hkukamǎ mē kot Tĩrtũm nhỹ hǎ kapēr o mē pa xwỳnhjaja hǎ kagà nē mē kām harēnh o pa. Jakamǎ kwa pu mē Tĩrtũm pix kutǎ mǎn pahkôn krǎ ho parôrôk nē pahkrĩ nē kām mex o mex ã harē. Anē.

Kawar jaka hǎ ỳr xwỳnh jarēnh

11-16Tǎ pa kê axte mēmoj pumu. Nhũm kaxkwa axkjê nhũm kamǎ kawar jakajre xa nhũm mēhōja hǎ nhỹ. Hixi na pre kēp “Aa kot Tĩrtũm kaga hkêt xwỳnh.” Anē nē hixi hō na pre kēp: “Tĩrtũm kôt pix mǎ amnhĩ nhĩpêx o pa

xwỳnh.” Anē. Ā hixi kot anhỹr jakamã na hte katàt kôt ahpỹnhã mẽ kot amnhĩ nhĩpêx ã mẽ omunh xà hkôt tanhmã mẽ harēnh to. Mẽ kot amnhĩ to mex ã mẽ omunh xà hkôt tanhmã mẽ hkwỳjê jarēnh to nẽ mẽ kot amnhĩ tomnuj ã mẽ omunh xà hkôt ahpỹnhã tanhmã hkwỳjê jarēnh to. Na pre mẽ kot tanhmã hkwỳjê nhĩpêx to ho pa xwỳnhjê kutã amnhĩ xunhwỳ nẽ mẽ hã tanhmã mẽ ho. Ā na pre kawar ã ỹr xwỳnhja amnhĩ nhĩpêx anhỹr o pa. Nẽ no te kot kuwy hpôk pyràk jakamã hprĩ hã mẽmoj piitã omu nhũm mẽmoj kêp hpimxur kêt nẽ. Nẽ kêp pahi hã mẽ ahkà ho ohtô nẽ kutu. Nẽ nhỹhỹnh ã hã hixi hõ hã kagà nom ãm tapxipix kot amnhĩ tã amnhĩ nhĩxija pumunh. Na pre ra amnhĩ kamrô ho ê xy hpa nẽ xa. Nẽ hixi hõ pê: TĪRTŪM KAPĒR O AMNHĪRĪT XWỲNH Nẽ ê ryti hã hixi hõ hã kagà. Nẽ ihkjê hã ãm tãm. Hã kagà jarēnh kot: Ixpê mẽ ho amnhĩptàr xwỳnh piitã mẽ õ Pahi Maati na pa. Nẽ hakwa rũm wapo xwa gixre pôm katon ajêt. Kot ho tanhmã mẽ kot TĪrtũm mẽ wa kutã amnhĩ xunhwỳr xwỳnhjê nhĩpêx to kaxyw. Jakamã ra mẽ piitã mẽ ho pikuprõnh pa nẽ mẽ hipêx o te mẽ kot prēs kãm uwa xô kagô janēnh pyràk nhũm mẽ hkamrô hpikapĩr rax kumrêx. TĪrtũm xihtỳx xwỳnh kot mẽ kamã gryk tỳx jakamã nhũm ã kãm mẽ hipêx anē. Mẽ kot amnhĩ tomnuj o paja mỳrapê. Nhũm õ pōristi piitã uràk nẽ kawar jakare hã hkrĩ nẽ hkôt ri pa. Mẽ ê jaka muxre jagjê nẽ hã ma hkôt ri pa.

17-18 Tã pa axte TĪrtũm kapēr o mẽ wrỳk xwỳnh õja pumu nhũm myyti kutã xa nẽ kàx pê nhônhti mã kapēr nẽ mẽ kãm: —E mẽ amnẽ mẽ ixwỳr wrỳ nẽ TĪrtũm ã akĩnh nẽ mẽ htyk nẽ mẽ hikwỹ xwỳnhjê hã atu nẽ aku. Mẽ ho amnhĩptàr xwỳnhjaja nẽ pōristijaja nẽ mẽ hkrãhtũm nẽ kawar nẽ kawar ã mẽ hkrĩ nẽ ri mrrar xwỳnhjaja nẽ mẽ kot amnhĩ to rũnh xwỳnhjaja nẽ mẽ kot amnhĩ to hkryre xwỳnhjaja. Nẽ mẽ kãm mẽ àpēnh xwỳnhjaja nẽ amnhĩ mã ri mẽ àpēnh xwỳnhjaja. Ām mẽ htyk nẽ mẽ hikwỹ xwỳnh mũj piitã mãmri mẽ hwỳr wrỳ nẽ mẽ hã atu nẽ mẽ aku. E mẽ tokyx nhônhti. Anē.

19 Tã nhũm mrymnuti nẽ krĩ piitã hkôt mẽ õ pahi nẽ mẽ õ pōristijaja piitã xypēn wỳr akuprõ. Wam kawar jakare hã ỹr nẽ htēm xwỳnh mẽ õ pōristijê hwỳr hprõt nẽ mẽ hkurê kaxàr kaxyw xypēn mar kaxyw akuprõ.

20-21Hāmri nē mẽ hwỳr mra nē mẽ hkurê kapa. No ãm tee ri amnhĩ nhĩpêx nē tee ri kãm tanhmã mẽ ho hprãm hkaprỳ nhũm wam kawar jakare hã ỹr nē htēm xwỳnhhta hakwa rũm wapo xwagixre kator o mẽ himex pa. Hāmri nhũm mẽ hkwỳjê pyràn htyk pa nē hikwỹ. Nhũm nhônhti mẽ omu nē mẽ hwỳr wrỳk o mra nē mẽ kuku hāmri nē kãm mẽ hkur kaga nē mẽ hkaga. No nhũm mrymnuti nē ỹ hã mẽ kãm hêx o pa xwỳnhhta wa nhũm mẽ axtem nē htĩr rãhã wa unê nē ma wa o tẽ nē ẽsôf o kuwy maati kamã wa kumẽ. Hāmri nhũm wa kamã htĩr tũm nē hxêt rãhã nē pa ho pa nē aa htyk kêt nē.

Apokarip 20

Mẽ kot Satanasti hpa hpre hã mẽ harẽnh

Wam Korĩt 15.20-28

1Tã pa kê axte mẽmoj pumu. Nhũm Tĩrtũm kapêr o mẽ wrỳk xwỳnhjê hõja kaxkwa rũm wrỳ nē ahkre xupỳmti hpro xà ho htỳx xà hã safja py nē kàx pytĩhti ho mẽ hpre xàja õ py.

2-3Hāmri nē kagãmnuti pê hêx xwỳnh maati Satanastija pynê. Amnepêm Atãw mẽ Ewa wa kãm hêx xwỳnhhta pynê nē kàx pytĩ o hpa hpre nē hte hpre hāmri nē ahkre xupỳmti nhĩtom xà mẽ nē kamã kumẽ. Hāmri nē akupỹm hpro xà ho hpro nē saf o hã ho htỳx. Kot pika piitã hkôt mẽ kãm hêx o pa pymaj ã hipêx anẽ. Koja tokyx kator kêt ry rax kumrêx. Koja kamã arĩ hkrĩ hã amgrà xohtô nē. Hã amgrà pê 1.000 nhũm rĩ kormã Tĩrtũm akupỹm kator nhũm kato nē ri pa. Nom pa hkrãnre.

4Tã pa mẽ htyk nē akupỹm mẽ htĩr xwỳnh kwỳjê pumu. Kormã mẽ htĩr ri na prem Tĩrtũm kapêr kôt pix mã amnhĩ nhĩpêx o pa. Nẽ Jejus kêp mẽ õ pahihtĩ hã harẽnh rãhã ho pa. Aa mẽ kot mrymnuti kutã hkõnkrã ho rôrôk nē kãm mex ã harẽnh kêt. Nhũm prem tee mẽ õkrã hã nē mẽ ãhkra katut ã mrymnuti nhĩxi nhĩpêx kaxyw nom nhũm prem hkaga kamã hihtỳx nhũm prem kãm mẽ hkurê xwỳnhjaja tee ri ja hã mẽ omu nē mẽ mut jakàr o mẽ kupa. Hāmri nhũm Tĩrtũm akupỹm mẽ ho mẽ htĩr nē mẽ kot mẽ ho amnhĩptàr ã hkrĩ xà kamã mẽ hkrĩ. Jejus nhĩhkô hã mẽ hkrĩ hã amgrà pê 1.000 kaxyw.

⁵Mě kumrêx na pre Tĩrtũm akupỹm mẽ ho mẽ htĩr nhũm mẽ hkwỳjaja mẽ hkĩnh ã arĩ ty nẽ hikwỹ hã amgrà pê 1.000 jakre nhũm rĩ kormã akupỹm mẽ ho mẽ htĩr.

⁶Wam akupỹm mẽ htĩr xwỳnhjaja kęp Tĩrtũm kra jakamã koja mẽ Tĩrtũm kra hkêt xwỳnhjê kurom hkĩnh nẽ pa ho pa. Nẽ mẽ kurom mẽ kot amnhĩ xà htỳx kamã hamak o pa htũm xà wỳr pa hkêt nẽ. Nẽ mẽ kurom Tĩrtũm mẽ Kra Jejus Kris wa kuri mex kumrêx nẽ wa kãm tanhmã ri amnhĩ nhĩpêx to ho pa. Nẽ Jejus nhĩhkô hã mẽ ho amnhĩptàr o pa hã amgrà pê 1.000.

Tĩrtũm kot kuwy hwỳr Satanasti mẽnh ã harênh

⁷Tã koja amgrà pê 1.000 hapêx nhũm rĩ kormã Tĩrtũm kapêr o wryk xwỳnhja akupỹm ahkre xupỹm wỳr tẽ nẽ Satanasti mã kahê xà mẽ nhũm kato.

⁸Hãmri nẽ kê axte pika piitã hkôt tanhmã mẽ kãm hêx to ho ri pa. Gorti nhõ xwỳnhjê mã nẽ Makok nhõ xwỳnhjê mã nẽ krĩ piitã hkôt Tĩrtũm nê tanhmã mẽ kãm hêx to ho mẽ hkôt pa. Hãmri nẽ mẽ kot Tĩrtũm krajê kutã amnhĩ xunhwỳr nẽ mẽ hkurê kaxàr kaxyw amnhĩ kwỳjê ho akuprõ nhũm mẽ ohtô rax kumrêx nẽ axpẽn wỳr akuprõ. Te pikahti grà xohtô pyràk.

⁹Hãmri nẽ ma Tĩrtũm krajê nhĩmex par kaxyw mẽ hwỳr mra nẽ mẽ õ krĩ mã hipòk pa nẽ kuhê. Mẽ õ krĩja Tĩrtũm mã mex tã nhũm mẽ kot kęp grành par kaxyw ma hwỳr mra. Hãmri nhũm kaxkwa rũm kuwy hpòkja mẽ haêr pê mẽ hã rôròk nẽ mẽ ho hxêt pa.

¹⁰No mẽ kãm hêx xwỳnh maati Satanastita nhũm Tĩrtũm kapêr o wryk xwỳnhja axte unê nẽ ma êsòf o kuwy maatita wỳr o tẽ nẽ kamã kumẽ. Ra mẽ kot kamã mrymnuti wa kot Tĩrtũm nê mẽ nokupyr o pa xwỳnh wa mẽnh tã wa hkôt Satanasti mã ho anẽ nẽ kamã kumẽ nhũm kamã pa ho pa. Koja mẽ aa kator kêt kumrêx. Nẽ arĩ kamã amnhĩ xà htỳx kamã hamak rãhã nẽ pa ho pa.

Tĩrtũm kot ahpỳnhã tanhmã mẽ piitã mẽ harênh to kaxyw

Matêwre 25.31-46; Juãw 5.25-29

¹¹Tã pa axte mẽmoj pumu nhũm kaxkwa mẽ pikaja wa ra hapêx pa. Pa Tĩrtũm kot tanhmã mẽ piitã mẽ harênh to hã hkrĩ xà raxja pumu. Nhũm hakajre nhũm Tĩrtũm kamã nhỹ.

¹²⁻¹³Hãmri nhũm ra mẽ htyk nẽ mẽ hikwỹ xwỳnh piitã akupỹm hapôx pa nẽ Tĩrtũm kot tanhmã mẽ harênh to hã hkrĩ xàta kutã hkrĩ pa. Mẽ piitãã. Mẽ kot amnhĩ to rũnh xwỳnhjaja nẽ mẽ kot amnhĩ to hkryre xwỳnhjaja nẽ mẽ ho amnhĩptàr xwỳnhjaja nẽ gô xujanãr kãm mẽ mrõr nẽ mẽ htyk xwỳnhjaja. Ra mẽ htyk nhũm mẽ kot mẽ hagjênh xwỳnhjaja piitã mẽ htykjê papxà rũm hapôx pa nẽ Tĩrtũm kutã ohtô ho ohtô nẽ hkrĩ. Hãmri nhũm Tĩrtũm õ kagà py nẽ kamã mẽ piitã mẽ hixi japêr. Kagà kamã ra mẽ hkukamã mẽ htĩr tũm nẽ mẽ pa ho mẽ pa mã xwỳnhjê nhĩxi japêr. Nẽ kagà hõ kamã mẽ htĩr ri tanhmã mẽ kot amnhĩ nhĩpêx to ho pa hã mẽ piitã mẽ hã kagàja. Nhũm kupy nẽ kamã tanhmã mẽ harênh to nẽ hkôt hprĩ hã mẽ piitã mẽ omunh pa nẽ rĩ kormã ahpỹnhã tanhmã mẽ harênh to.

¹⁴⁻¹⁵Hãmri nẽ mẽ htĩr tũm nẽ mẽ pa mã xwỳnhjê nhĩxi hã kagàja kamã tee ri mẽ hkwyjê nhĩxi japêr nhũm kamã amrakati. Jakamã nhũm mẽ ma kuwy maatita wỳr mẽ o mra nẽ kamã mẽ rênh pa. Te axte mẽ htyk nhũm mẽ kot kuwy kamã mẽ hagjênh pyræk nhũm mẽ kamã rôrôk nẽ tee ri amnhĩ xà htỳx kamã hamak rãhã nẽ pa ho pa nẽ aa kator kêt kumrêx.

Apokarip 21

Pika mẽ kaxkwa wa nyw jarênh

Sikũn Pêtre 3.8-13

¹Tã pa axte mẽmoj pumu. Nhũm Tĩrtũm ra pika mẽ kaxkwa nyw wa ho kato. Ra pika nẽ kaxkwa nẽ gô xujanãr tũmja hapêx pa nhũm kaxkwa mẽ pika nyw wa ho kato. Nom axte gô xujanãr o kator kêt nẽ.

²Hãmri nhũm Tĩrtũm nhõ krĩ mex pê Jerujarê nywja tanhmã amnhĩ to nẽ pika nyw wỳr wrỳk o mõi. Krĩja mex kumrêx. Mex o mex. Te mjên mã xwỳnh ê mex jaxàr nẽ amnhĩ to muxre nẽ mjên wỳr htêm pyrà nẽ pika nyw wỳr mex kumrêx nẽ wrỳk o mõi.

³Hāmri nhūm Tīrtūm kot mẽ ho amnhīptàr ã hkrī xà maati ja kamã mēhōja kapēr o: —Nà ãm hāmri. Na ra Tīrtūm hkrajê hkôt pa ho pa. Pika nyw kamã mẽ hkôt pa ho pa nhūm mẽ tã no ho omu nē hkôt pa ho pa rãhã nē. Nà ãm hāmri. Ja mex o mex.

⁴—Koja hkrajaja hkôt pa ho pa nē axte htyk kêt kumrêx. Nhūm Tīrtūm mẽ nê mẽ no kagô nhĩnhĩnh pa nhūm mẽ axte hkaprĩ nē mỳr kêt nē. Nē ri axte amnhĩ xà kamã hamak kêt nē. Nē axte ri tanhmã omnu hto hkêt nē. Ra mẽ hkaprĩ nē à nē mỳr o pata hapêx par kumrêx nhūm hpãnhã mẽmoj nyw pix. Anē.

⁵Hāmri nhūm Tīrtūm tãm tanhmã inhmã kapēr to. Krī xà maati kamã ỹr xwỳnhhta tãm inhmã kapēr o: —E na pa ra akupỹm mẽmoj piitã ho nyw pa. Jakamã e Juãw. ãm hāmri na pa ã amnhĩ kukamã amã mẽmoj jarēnh anē. Ixêx kêt. Jakamã kêr ka akwỳjê mã piitã hã kagà hpa. Kê mẽ kamã harē nē tokyx kuma nē hkôt hamaxpēr rãhã ho pa.

⁶—Ra ixte amnhĩ kukamã mẽmoj mã ijamaxpēr xwỳnhja na pa ra ho anhỹr pa. Ixpê mẽmoj piitã ho anhỹr o hkra xwỳnh nē mããnēn ixpê mẽmoj piitã ho ijaxpêx par xwỳnh. Nē ixrãhã ixpa xwỳnh. Amnepê mormã mẽmoj kator kêt ri na pa pre ixrãhã ixpa. Nē ot pa arĩ ixrãhã ixpa. Tã mẽ kãm kôr nē kãm gô hkwỳ ho hkôm hprãm xwỳnhjê pyrà nē mẽ kãm ixpix prãm xwỳnhjaja kot paj te mẽ kãm inhō hino rũm gô hkwỳ nhõr nhūm mẽ kot ho hkôm pyræk o mẽ hipêx. Hāmri nhūm mẽ htĩr tũm nē ixri pa ho pa nē axte htyk kêt nē. Kot paj ã mẽ hipêx mex anē.

⁷—Mẽ ate tanhmã amnhĩ tomnuj to nê amnhĩ to htỳx nē ixkôt pix mã amnhĩ nhĩpêx o mẽ apa rãhã mẽ atyk xwỳnhjaja kot paj ã mẽ anhĩpêx mex anē. Ka mẽ apê ixkra hã amex nē ixkôt ri apa rãhã ho apa. Pa ixpê mẽ anhō Tīrtūm ã tanhmã mẽ ato mex to rãhã ho ixpa.

⁸—No mẽ kot amnhĩ kaxyw ixkôt hamaxpēr kêt xwỳnhjaja. Nē mẽ kot amnhĩ tomnuj xwỳnhjaja nē mẽ kot ri mẽ hpar prãm xwỳnhjaja. Nē mẽ kot nhãm ri mēnijê ho amnhĩkati xwỳnhjaja. Nē wajagajaja. Nē mẽ kot amnhĩ to sãnti hwỳr o pa xwỳnhjaja. Nē ri mẽ hêx nhi xwỳnhjaja. ã mẽ kot amnhĩ nhĩpêx

anhÿr xwÿnh piitã koja mẽ apê ixkrajê hkĩnhã ma kuwy maati wÿr hapêx par kumrêx. Te axte mẽ htyk pyræk nom koja mẽ axte htyk kêt nê. Anê.

Jerujarê nyw jarênh

Sikũn Korĩt 6.16; Karatas 4.26; Eprêw 12.22-24

⁹Tã nhũm mẽ kot xijere pê 7 kamã Tĩrtũm gryk xà jamÿnh xwÿnhjê hõja hãmri ixwÿr tẽ nê inhmã: —E ma ixkõt tẽ nê mẽmoj pumu. Na ra krĩ nywja pika nyw wÿr wrÿk o mõi. Te mjên mã xwÿnh ê mex jaxàr nê amnhĩ to muxre nê mjên wÿr htêm pyrà nê mex kumrêx nê kaxkwa rũm pika nyw wÿr wrÿk o mõi. Nê kot ho mjên mã xwÿnhhta te mẽ pahte amnhĩ tomnuj pãnhã amnhĩrer xwÿnhhta pyræk. E tokyx tẽ nê omu. Anê.

¹⁰Hãmri nhũm Tĩrtũm Karõ tanhmã ixto pa ma kot inhmã kapêr xwÿnhhta kõt tẽ nhũm ma ixto mõi nê kên krã hprêeti hwÿr ixto api nê himõk ã ixãm. Pa Tĩrtũm nhõ krĩ mex pê Jerujarê nywja pumunh o xa. Nhũm mex o mex. ãm hãmri te mjên mã xwÿnh kot ê mex jaxàr nê amnhĩ to muxre nê mjên wÿr htêm pyrà nê ahpar mã wrÿk o mõi pa ixprĩ hã omu.

¹¹Na pre rax o rax nê mex o mex. Tĩrtũm kamã pa ho pa jakamã nhũm kamã hirã htÿx kumrêx. Te kên mex ã kàxpore xohtõ jaxênh mex tÿx pyræk.

¹²⁻¹³Nê krĩ puhã kahêja hprêk rax nê. Nê hwÿr mẽ gjêx xà kêp 12. Na pre myt japõx xà rũm axkrunêpxi. Nê myt gjêx xà rũm haxwÿja axkrunêpxi. Nê akutã kahpa hkõt haxwÿja axkrunêpxi. Nê ahpÿnhã hakwakre hã Tĩrtũm kapêr o wrÿk xwÿnhjaja hamãr o kuhê. Nê hakwa kre piitã hã Ijaew pê ahpÿnhã mẽ pikjêr kãm mẽ kêp 12jaja mẽ hixi hã kagà.

¹⁴Nê kahê xunhwÿr xà hkukamã kên pytyrja ahpÿnhã kêp 12. Kên pytyrta ã na mẽ kot Jesus nhÿ hã mẽ ahkre o mẽ pa xwÿnh maati pê 12jê nhĩxi hikwÿ.

¹⁵Tã nhũm kot ixto mõi nê inhmã mẽmoj jahkre xwÿnhhta ôr o mẽmo pĩ py nê kot ho krĩ ho mĩdi kaxyw xa. Nê ho kahê piitã ho mĩdi kaxyw. Nê mẽ gjêx xàja ho mĩdi kaxyw.

¹⁶⁻¹⁷Hãmri nê ho mĩdi hpa. Krĩja ry nê kahpa piitã axpên pyræk. Nê hprêk piitã mããnên axpên pyræk. Kamã mẽmoj piitã ahpÿnhã kêp 2.200 kirõm. No puhã kahêja hprêk o 64 met pix nê.

18Ně kahêja kën jaxênh pix o kot amnhĩ nhĩpêx jakamã mex o mex. Ně hkarỳr tỳx kumrêx. Ně kahê hkre kamã krĩ kamã ahpỳnhã ri ixkreja ôr pix o kot amnhĩ nhĩpêx. Ně piitã hkarỳr tỳx.

19-20Ně kahê xunhwỳr xà hkukamã kën pytyrta ahpỳnhã ri kën mex pix o kot amnhĩ nhĩpêx. Piitã mex kumrêx nẽ hkarỳrti. Wamta kawax pê grãgrãre. Ně hkôt ja kawax pê grãgrã kakrã htyk. Ně hkôt ja kakrã htyk. Ně hkôt hõja grãgrã karỳr. Ně hkôt ja hkamrêk pihkàrti. Ně hkôt ja grãgrã kakrã htyk. Ně hkôt ja hkamrêk tỳx kumrêx. Ně hkôt ja ràrààre. Ně hkôt ja grãgrã mẽ pihkàr. Ně hkôt ja ràràr mẽ pihkàr. Ně hkôt ja grãgrã karỳỹre. Ně hkôt ja kakrã htyk pihkàr. ã kën pytyr mex kot anhỳr.

21Ně mẽ gjêx xà hã hakwakre kahê xà pê 12ja mẽmo kën jakooti rũnh kumrêx pix o. Ně krĩ kahti hkôt pry nhĩkwỳ xwỳnhja ãm ôr pix o. Ně hkarỳỹre.

22Pa pre tee ri krĩ kamã Tĩrtũm mã amnhĩ jarênh xà hã ixkre japêr nhũm amrakati. Mo kaxyw koja mẽ axte ixkreja hwỳr mra? Ra Pahi Maati Tĩrtũm xihtỳx xwỳnh mẽ mẽ pahte amnhĩ tomnuj pãnhã amnhĩrer xwỳnhhta ra hkrajê kamã pa ho pa kênã kot kêt mẽ axte ri ixkreta o presija. Koja mẽ kãm wa mex ã wa kãm harênh prãm nẽ nhỹri tãm wa hwỳr mra nẽ ã wa kãm kapêr anẽ. Te mẽ pahte pahi hwỳr pamrar nẽ kãm pakapêrta pyrã nẽ wa hwỳr mra nẽ wa kãm kapêr.

23Ně koja krĩja kamã myyti nẽ mytwrỳre hkêt. Mo kaxyw kot kêt myyti nẽ mytwrỳreja arĩ ri hirã ho pa? Krĩ kamã Tĩrtũm pa ho pa jakamã kamã hirã mex kumrêx. Ně mẽ pahte amnhĩ tomnuj pãnhã amnhĩrer xwỳnhhta haxwỳja kamã pa ho pa. Te kêp kanê hpòk rax kumrêx pyrã nẽ hirã mex o pa. Kot hirã mex o kot myyti jakrenh. ã Tĩrtũm mẽ Kra wa krĩja kamã pa ho pa jakamã nhũm mẽ axte myyti ho presija hkêt nẽ.

24Koja krĩ nhõ xwỳnhjaja hirã mex pix kãm ri pa ho pa nẽ tãm ri amnhĩ nhĩpêx o ri pa. Tã koja mẽ ho amnhĩptàr xwỳnhjaja Tĩrtũm wỳr mra nẽ amnhĩ rom kãm mex o mex ã harẽ nẽ kãm: —Na pre mẽ ixkwỳjaja mẽ ixpê mẽ ho amnhĩptàr xwỳnh ã axpên mã mẽ inhmex nẽ mẽ ixàhpumunh ã ri

axpën mã mẽ ijarẽ. Nom mẽ ixrom amex o amex nẽ axàhpumunh o axàhpumunh. Jakamã ãm hãmri na htem amã amex o amex ã ajarẽ Tĩrtũm. Anẽ.

²⁵Nẽ krĩ hwỳr hakwakre koja amnhĩ kahê xà rěnh rãhã kuhê nẽ aa amnhĩ kahê hkêt nẽ. Jar mẽ panhõ pika kamã na hte kamàt kaxyw nhũm htem amnhĩ tã hakwakre kahê hpa. No mo kaxyw koja mẽ axte pika nywja kamã ã amnhĩ nhĩpêx anẽ? Koja kamàt kêt nẽ hirã rãhã ho rãhã jakamã nhũm mẽ amnhĩ tã kahê hkêt rãhã nẽ pa ho pa.

²⁶Nẽ koja mẽ piitã Tĩrtũm wỳr mra nẽ kãm mex o mex ã harẽ nẽ kãm: —Pa Tĩrtũm. Hêxta waa nẽ. Anhõ krĩa mex kumrẽx. Mex o mex. Nẽ mẽ ixrom amex o amex nẽ axihtỳx o axihtỳx. Nẽ mẽ ixrom axàhpumunh o axàhpumunh. ãm hãmri na ka ra mẽ ixpê akrajê kamã apa ho apa Tĩrtũm. Anẽ.

²⁷Nẽ koja mẽmoj punuj krĩa wỳr gjêx kêt kumrẽx. Mẽ hpijaàm kêt xwỳnhjaja nẽ ri mẽ hêx xwỳnhjaja hwỳr gjêx kêt nẽ. ãm mẽ pahte amnhĩ tomnuj pãnhã amnhĩrer xwỳnhhta nhõ kagà kamã Tĩrtũm ri mẽ htĩr tũm nẽ mẽ pa mã xwỳnhjê nhĩxi nhĩpêx xwỳnh pixjaja koja mẽ hwỳr agjê nẽ kamã pa ho pa.

Apokarip 22

¹⁻²Tã pa pre axte mẽmoj pumu. Nhũm Tĩrtũm kapër o wryk xwỳnhja axte inhmã mẽmoj jahkre. Nhũm Tĩrtũm mẽ kot mẽ pahpãnhã amnhĩrer xwỳnhja wa kot mẽ ho amnhĩptàr ã hkrĩ xà maati rũm pyhti hprõt. Krĩ kahti hkôt pry pohti nør xwỳnhhta kahti hkôt hprõt o nõ. Pyhti kamã gõja na htem ho ixkõ nẽ htĩr tũm nẽ pa ho pa. Gõ karỳyẽ. Nhũm mẽmo pĩ hpàr muxre xwỳnhja akutã hijê nẽ xa. Pĩ xõja na htem kuwô nẽ htĩr tũm nẽ pa ho pa. Na hte apkati mẽ ô rãhã nẽ kuhê. Nẽ axtem hõja mẽ piitã mẽ mex nẽ à hkêt kaxyw na hõja.

³Amnepêm na pre Tĩrtũm Atãw mã kapër nẽ kãm: —Ate amnhĩ tomnuj mỳrapê kot paj tanhmã pika homnu hto nhũm apê mex kêt nẽ. Ka kamã

apur nê kamã axapênh rûnh o apa rãhã nê rĩ kormã kamã axapkur o ri apa. Apê jamnuj tã kot kaj mẽ ã amnhĩ nhĩpêx anhỹr o apa rãhã ty. Anê. Tã ra Tĩrtũm nhõ krĩ nyw kamã mẽ omnuj xàja amrakati kumrêx. Nê Tĩrtũm mẽ kot mẽ pahpãnhã amnhĩrer xwỳnhhta wa õ krĩ kamã pa ho pa jakamã mẽ pahte kamã mẽ papa xwỳnhhaja kot puj mẽ wa kãm tanhmã amnhĩ nhĩpêx to ho ri papa.

⁴Kot puj mẽ tã pano ho Tĩrtũm pumunh o papa. Hãmri nhũm te mẽ pahpiitã mẽ panhõkrã hã amnhĩ nhĩxi nhĩpêx pyrãk o mẽ panhĩpêx.

⁵Nê kot puj mẽ Pahi Maati Tĩrtũm nhĩrã kamã ri papa nê axte myyti nhĩrã ho presija hkêt nê. Koja kamàt hapêx pa pu mẽ axte kanê ho presija hkêt nê. Nê Jejus nhĩhkô hã hirã kamã mẽmoj to amnhĩptàr rãhã ho papa.

Jejus tokyx akupỹn wrỳk ã harênh

Apokarip 1.1-3

⁶Tã nhũm Tĩrtũm kapêr o mẽ wrỳk xwỳnh kot ixto mõi xwỳnhhta axte inhmã kapêr nê inhmã: —E nà ãm hãmri na ixte amã mẽmoj piitã harênh xwỳnhhja. ãm hãmri na. Jakamã kwa kêr ka arĩ hã ano htỳx rãhã ho apa. Amnepêm Tĩrtũmja ỹ hã mẽ kapêr o pa xwỳnhjê mã tanhmã kapêr o amnhĩrĩt to. Kot tanhmã amnhĩ nhĩpêx to hkukamã mẽ kãm ho amnhĩrĩt nhũm prem kuma nê ô ri ma hkwỳjê mã harênh o ri mẽ hkôt pa. Tã ra mẽ hpãnhã pa mẽ awỳr inhmẽ. Mẽ ate Tĩrtũm mã tanhmã amnhĩ to ho apa xwỳnhjê mã ixte ja jarênh kaxyw Pahihti Tĩrtũmja mẽ awỳr inhmẽ pa wrỳ. Nà koja mẽmoj tokyx ã amnhĩ nhĩpêx anê.

⁷Na pre Jejus mẽ amã amnhĩ jarênh o: “Kot paj tokyx akupỹm mẽ awỳr wrỳ. Tã mẽ ate ijarênh ã kagà kamã harênh nê mar nê amnhĩ kaxyw hkôt ajamaxpêr nê hkôt amnhĩ nhĩpêx xwỳnhhaja kot kaj mẽ akĩnh nê ri apa.” Anhỹr o amnhĩ jarê. Anê.

⁸Nà ixpê Juãw na pa pre ã inhno ho mẽmoj pumunh anê. Hãmri nê omunh pa nê Tĩrtũm kapêr o wrỳk xwỳnh kot inhmã harênh xwỳnhhta kutã ixkõn krã ho ixtêm nê inhỹr kaxyw. Nom nhũm amnhĩ nê inhmã kapêr kãm hihtỳx nê inhmã:

⁹—Kwa nà ri ã inhîpêx anhÿr kêt nê. ãm Tirtûm pix kutã na pu htem ã amnhî nhîpêx anê. Apyrà nê ixpê Jejus kwÿ kênã. Na pa hte apyrà nê ÿ hã tanhmã amnhî nhîpêx to ho ixpa. Nê mẽ apyrà nê kapêr ã kagà hkôt pix mã amnhî nhîpêx. Na pu htem axpên kutã pahkôn krã ho parôrok kêt nê. ãm Tirtûm pix kutã na pu htem ã amnhî nhîpêx anê.

¹⁰—E ã ate mẽmoj pumunh nê mar anhÿr xwÿnhja koja tokyx ã amnhî nhîpêx anê. Jakamã kwa kêr ka akwÿjê pê ho apimxur kêt nê. Piitã hã kagà hpa kê mẽ kamã harê nê kuma nê mẽmoj kot ã amnhî nhîpêx anhÿr mã xwÿnhja piitã hkukamã harênh ma. Koja tokyx mẽmoj ã amnhî nhîpêx anê.

¹¹—Jakamã kwãr mẽ mãmri piitã tanhmã kãm amnhî nhîpêx to ho pa hprãm xà hkôt amnhî nhîpêx o pa. Kwãr mẽ mẽ kot amnhî tomnuj xwÿnhjaja ã amnhî anhîpêx anhÿr o pa. Nê kwãr mẽ kot tanhmã kapêr punuj to xwÿnhjaja mãmri ã amnhî nhîpêx anhÿr o pa. Nê kwãr mẽ kot tãm amnhî nhîpêx o ri mẽ pa xwÿnhjaja mãmri Tirtûm kôt pix mã ri tãm amnhî nhîpêx o pa. Anê. Nhũm pre ã kaxkwa hwÿr ixto àpir xwÿnhja inhmã kapêr anê.

¹²Hãmri nhũm hpãnhã Jejus tãm inhmã kapêr nê inhmã: —E kot paj tokyx akupÿm mẽ awÿr wrÿ. Nê akupÿm pøj hãmri nê mẽ kot amnhî tomnuj o mẽ pa xwÿnhjaja pa ja mÿrapê ma mẽ kot amnhî xà htÿx kamã hamak tũm xàta wÿr mẽ rênh pa. No mẽ kot ixkôt amnhî nhîpêx xwÿnhjaja kot paj akupÿn inhõ krÿ hwÿr amnhî kôt mẽ ho api.

¹³—Nê ixrãhãã xwÿnh na pa. Amnepê mã kormã mẽmoj kêt ri na pa pre ra ixrãhãã. Nê koja nhÿrmã mẽmoj piitã akupÿm hapêx pa arÿ ixrãhã nê ixpa ho ixpa.

¹⁴—Nê Tirtûm kot mẽ anê mẽ ate amnhî tomnuj kuhõnh par xwÿnhjaja kot kaj mẽ amex kumrêx nê apa ho apa. Nê akÿnh nê ajamakêtkati nê ri atÿx apa ho apa. Te ho mẽ kot amnhî xê kahõnh nê mex jagjênh nê ri hã pata pyræk. Koja Tirtûm mẽ amã anê ka mẽ ajamakêtkati nê õ krÿ hwÿr agjê nê kamã ri amex kumrêx nê ri apa ho apa. Nê kamã mẽmo pÿ xô mẽ kot kur nê htÿr tũm nê pa mã xwÿnhja wÿr mra nê amnhim ô rê nê hkur o ri apa. Ra

mě ate Jejus kôt amnhĩ xunhwỳr jakamã kot kaj mẽ axàmnhĩx hwỳr mra nẽ amnhĩm hkwỳr rẽ nẽ hkur o ri apa. Kot kaj mẽ ã amnhĩ nhĩpêx anẽ.

15—Nom mẽ kot amnhĩ tomnuj o mẽ pa xwỳnhjaja koja mẽ akĩnhã inhõ krĩ hwỳr gjêx kêt nẽ. Mẽ kot ri mẽ y ho mẽ pa xwỳnhjaja. Nẽ mẽ kot nhãm ri mênijê ho amnhĩkati ho mẽ pa xwỳnhjaja. Nẽ mẽ kot ri mẽ hpar o mẽ pa xwỳnhjaja. Nẽ mẽ kot ri sãnti nhĩpêx o te Tĩrtũm nhĩpêx pyræk o mẽ pa xwỳnhjaja. Nẽ mẽ kãm ri hêx prãm o ri mẽ pa xwỳnhjaja. Koja mẽ akĩnhã inhõ krĩ hwỳr pa hkêt nẽ.

16—E Juãw. Nà ixpê Jejus na pa awỳr ixkapêr o mẽ wrỳk xwỳnhhta mẽ. Kot ixkwỳjê kaxyw amã ixkapêr jarênh kaxyw. Ixpê Tawi pàr krax na pa. Te ixpê arĩgro hkôt kanhêti hpòk rax kot arĩgro ho mõi ã ho amnhĩrĩt xwỳnhhta pyræk. Anẽ. Nhũm pre ã Jejus inhmã kapêr anẽ.

17Tĩrtũm Karõ mẽ Jejus kwỳjaja na htem ã Jejus kot amnhĩ jarênh anhỳrja ma nẽ hkĩnh nẽ. Nẽ kãm kapêr o: —Hêxta waa nẽ. Kwa amnhĩm anojarêt nẽ tokyx akupỳn mẽ ixwỳr wrỳ Pahĩti. Pa mẽ tokyx ã amnhĩ nhĩpêx anhỳr o ri war akôt ixpa. Anẽ. Nẽ mẽ ate ja mar xwỳnhjaja kêt ka mẽ uræk nẽ ã kãm akapêr anẽ. Nẽ te mẽ amã kôr nẽ ri mẽ apa pyræk xwỳnhjaja kêt ka mẽ te Jejus wỳr amrar nẽ õ gô ho akõm pyrà nẽ hkôt amnhĩ xunhwỳ. Te Jejus amarĩ mẽ pamã õ gô nhõi pyræk o mẽ panhĩpêx pu mẽ hkôt amnhĩ xunhwỳ nẽ ra pahpê pahĩr tũm nẽ papa mã xwỳnh. Hãmri nẽ amnhĩ pãnhã tanhmã kãm amnhĩrer to hkêt nẽ.

Nhỹrmã mẽmoj nyw par ã harênh jatur xà

18E ixpê Juãw na pa Jejus nhỹ hã mẽ amã mẽmoj tanhmã kot amnhĩ nhĩpêx to hkukamã ã mẽ amã hã kagà anẽ. Tã kwa mẽ o kora. Kêt ka mẽ atõ amnhĩ krã hkôt ri ajamxpêr o te ho ja pyrà nẽ hijuk ri axte mẽmoj nhĩpêx kêt nẽ. ãm kwarĩ ho kwarĩ. Kot ka mẽ atõ anẽ nhũm Tĩrtũm ja hã apumu nẽ kagàja kamã tanhmã mẽ hipêx kati hto xàta o tanhmã anhĩpêx to ka arĩ amnhĩ pumu.

19Rỳ ka mẽ atõ kagà kamã harẽ nẽ ama nẽ tanhmã ajamxpêr to nẽ ajamxpêr o: —Nà ja kot anhỳr kêt. Na mẽ ãm harênh o hêx. Kot paj kuma

ně ãm kuma. Anhÿr o ajamaxpêr japêr. Hãmri nhũm Tĩrtũm amnhĩ tã ama
nẽ kagà mexta kamã kot tanhmã mẽ ho mex toja o ato mex kêt nẽ. Ka õ krĩ
hwÿr axàpir nẽ mẽmo pĩ xô mẽ kot hkur nẽ htĩr tũm nẽ pa kaxyw mã
xwÿnhta ka amnhĩm hõ hyr nẽ hkrêr kêt nẽ. Jakamã e kwa mẽ o kora. Kêr
ka mẽ kagàta kamã ã mẽmoj kot amnhĩ nhĩpêx anhÿr mã xwÿnhta jarênh
ma nẽ aprĩ hã piitã hkôt ajamaxpêr tÿx rãhã ho ri apa.

²⁰E Jejus kot inhmã mẽmoj kukamã tanhmã ujarênh to xwÿnhta na pre
inhmã amnhĩ jarênh o: “Kot paj tokyx akupÿn mẽ awÿr wrÿ.” Anẽ. ãm hãmri
na pre ã amnhĩ jarênh anẽ. Koja tokyx akupÿn mẽ pahwÿr wrÿ hãmri nhũm
mẽmoj piitã mex o mex. Jakamã kwa kêr ka amnhĩm anojarêr nẽ tokyx
akupÿn mẽ ixwÿr wrÿ Pahihti Jejus.

²¹Nẽ ixpyrà nẽ mẽ apê Tĩrtũm krajaja na pa hte mẽ ato Pahihti Jejus wÿr
rãhã ho ri ixpa nẽ kãm: —Kwa akwÿjê pumu nẽ mẽ kutã anojarêr rãhã ho
ri apa Pahihti. Anẽ. E mẽ ujarênhja na hapêx. Ixpê Juãw na pa Jejus kot
inhmã tanhmã ujarênh toja pa amnhĩ xô ri mẽ amã hã kagà hpa. E na hapêx.

Esclarecimento

Trata-se de iniciativa particular, com os seguintes objetivos: (i) colaborar para divulgação dos diversos textos bíblicos disponíveis, e, (ii) facilitar o acesso a esses textos, inclusive por meio de download.

Todo esforço em tornar a Palavra de Deus acessível a todos, em quaisquer localidades e falantes das mais diversas línguas, precisa ser um objetivo de todos os que são guiados pelo Espírito Santo. Ele inspirou o profeta Jeremias a dizer “não ensinará jamais cada um ao seu próximo, nem cada um ao seu irmão, dizendo: Conhece ao SENHOR, porque todos me conhecerão, desde o menor até ao maior deles, diz o SENHOR” (Jer. 31:34).

Jesus, também, falou assim: “e será pregado este evangelho do reino por todo o mundo, para testemunho a todas as nações” (Mat. 24:14).

Muitas organizações foram constituídas com o propósito de fazer a Bíblia disponível nas diversas línguas. Não é uma tarefa simples. Anos de trabalho, dedicação e entrega são necessários para esta tão extraordinária missão.

O texto deste trabalho está disponível na internet, em páginas eletrônicas de organizações que produzem ou divulgam bíblias, sem acréscimos de notas ou comentários. Assim, reconhecendo e respeitando os direitos que possuem sobre seus trabalhos, incumbe a todos os que amam a Palavra de Deus, o esforço em contribuir para amplificar sua divulgação.

Se possível, faça download do texto, para que sejamos, também, guardiões da Bíblia, e, com isso, preservando-a para as futuras gerações.

Divulga a Palavra de Deus, ela mostra o Caminho e permite a todos, que se conheça Sua vontade, em todos os lugares e épocas.

Marcel da Glória Pereira
2022, Vitória/ES - Brasil